





72





















Ultrajecti  
Apud Meinardum a Dreunen et Guilielmum a Walcheren bibliopolas.  
MDCLXXXV  
Cum Privilegio

*[Faint, illegible text, possibly bleed-through from the reverse side of the page]*



ISBRANDI DE DIEMERBROECK,

In Academia Ultrajectina Medici-  
næ & Anatomes Professoris

OPERA OMNIA,  
ANATOMICA  
ET  
MEDICA

*Partim jam antea excusa, sed Plurimis locis ab ipso auctore  
emendata, & aucta, partim nondum edita.*

Nunc simul Collecta, & diligenter recognita,

P E R

TIMANNUM de DIEMERBROECK, ISB. FIL.

Medicinæ Doctorem, & Reipublicæ Trajectinæ  
Poliatrum.

Q U O R U M

*Élenchum sequens Pagina indicabit.*



U L T R A J E C T I,

Apud MEINARDUM à DREUNEN, & GUILIELMUM à WALCHEREN,  
Bibliopolas. Anno cId Id c LXXXV.



**Hoc Libro Continentur.**

**ANATOMES CORPORIS HUMANI,**  
Libri decem.

**TRACTATUS DE PESTE,**  
Libri quatuor.

**TRACTATUS DE VARIOLIS & MORBILLIS.**

**OBSERVATIONES & CURATIONES MEDICÆ.**

**DISPUTATIONES PRACTICÆ,**

Ad Historias Ægrorum Propositæ de Morbis Capitis  
Thoracis, & infimi ventris.





*Cerne virum, Lector, Belgamque Machaona, per quem  
Secto pandit homo corpore, quid sit homo.  
Morborum en domitor, quem vivere Mors dolet una,  
Vitaque letatur se genuisse sibi.*

*L. vande Poll. S. P. D. et Professor.*

*Romijn de Hooghe designavit*

*Joannes Edeling sculpsit*



THE UNIVERSITY OF CHICAGO PRESS

185 EAST 5TH STREET, CHICAGO, ILL. 60601

TEL. (312) 837-3000

TELETYPE (312) 837-3000

CABLE: CHICAGO UNIV PRESS

POSTMASTER: Send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601

Subscription prices: \$12.00 per volume in advance, \$14.00 per volume in arrears.

Single issues: \$4.00 per issue in advance, \$5.00 per issue in arrears.

Second-class postage paid at Chicago, Ill., and at additional mailing offices.

Postmaster: Please send address changes to THE UNIVERSITY OF CHICAGO PRESS, 185 EAST 5TH STREET, CHICAGO, ILL. 60601



*Privilegium Illustrum & Præpotentium Hollandiæ Ordinum, ex fuetâ formulâ.*



E Staaten van Hollandt ende West-Vriesslandt, doen te weten: Alsoo ons vertoont is by *Timan de Diemerbroeck Medicina Doct̃or*, dat hy Suppliant met grooten Arbeydt ende Kosten by den anderen versaamelt, ende tegenwoordigh onder de Pers gebracht hadde, alle de Wercken van sijn overleden Vader, ofte seecker Boeck geintituleert, *Isbrandi de Diemerbroeck in Academia Ultrajectina Anatomies & Medicina Professoris, Opera Omnia Medica & Anatomica, per Timannum de Diemerbroeck, ejusdem Filium Medicina Doct̃orem & Reipublicæ Trajectinæ Poliatrum, in Folio*. Zijnde de voorschreven Wercken voorsien met verscheiden Plaatē; en alsoo den Suppliant beducht was, dat andere baatsoeckende Menschen, het voorschreven Werck aan den dagh gekomen zijnde, soudē naadrukken, en den Suppliant alsoo groote schaade toebrengen, soo was den Suppliant te raade geworden sich te keeren tot Ons, tot voorkomingh van de voorschreven geduchte schaade, ootmoedelijk versoekende, dat Wy hem Suppliant beliefdē te begunstigen met een Ootroy van vijftien jaaren, omme, gedurende den selven tijdt, het voorschreven Boeck, ofte Wercken, alleen te moogen doen Drucken, of te Verkoopen, binnen den voorschreven onsen Lande, met verbodt aan allen ende een ygelijken, het voorschreven Boeck, ofte Wercken, in de voorschreven onse Provincie in eeniger manieren, 't zy in 't geheel of ten deele, naar te Drucken, Uyt te geven, of te Verkoopen, ofte oock, elders naagedrukt zijnde, in den voorschreven onsen Lande te brengen, te verhandelen, of te verkoopen, &c: SOO IS'T, dat Wy, de saake en 't versoek voorschreven overgemerckt hebbende, ende genegen wesende ter Beede van den Suppliant, uyt Onse rechte wetenschap, souvereïne Macht ende Authoriteyt, den Suppliant geconsenteert, geaccordeert, ende ge-oetroyeert hebben, consenteeren, accordeeren, en oetroyeeren den selven mits desen, dat hy, gedurende den tijdt van vijftien eerst achter-een-volgende Jaaren, het voorschreven Boeck, geintituleert *Isbrandi de Diemerbroeck in Academia Ultrajectina Anatomies & Medicina Professoris, Opera Omnia Medica & Anatomica, per Timannum de Diemerbroeck ejusdem Filium Medicina Doct̃orem, & Reipublicæ Trajectinæ Poliatrum, in Folio*, binnen den voorschreven onsen Lande alleen sal mogen Drucken, doen Drucken, Uytgeven, ende Verkoopen. Verbiedende daarom allen ende een ygelijken het selve Boeck in 't geheel of ten deele naar te drukken, ofte elders naagedrukt zijnde, binnen den selven onsen Lande te brengen, uyt te geven, ofte te verkoopen, op verbeurte van alle de naagedrukte, ingebrachte, ofte verkochte Exemplaren, ende een boete van drie hondert guldens daar-en-boven te verbeuren, te appliceeren een derde part voor den Officier, die de Calange doen sal, een derde part voor de Armen der Plaatsē daar het Casus voorvallen sal, en het resteerende derde part voor den Suppliant: Alles in dien verstande, dat wy den Suppliant met desen onsen Ootroye alleen willende gratificeren, tot verhoedinge van sijne schaade, door het naadrukken van 't voorschreven Boeck, daar door in eenigen deele verstaan den inhonde van dien te autoriseeren ofte te advoueeren, ende veel min het selve onder onse Protectie ende Bescherming, eenigh meerder crediet, aensien, ofte reputatie te geven: nemaar den Suppliant in cas daar in yets onbehoorlijcks soude mogen influereen, alle het selve tot sijnen lasten sal gehouden wesen te verantwoorden, tot dien eynde wel expresselijk begeerende, dat by aldien hy desen Onsen Ootroye voor het selve Boeck sal willen stellen, daar van geene geabbrevieerde ofte gecontraheerde mentie sal mogen maken, nemaar gehouden sal wesen het selve Ootroy in 't geheel, en sonder eenige omiffie daar voor te Drucken ofte doen Drucken, ende dat hy gehouden sal zijn een Exemplaar van het voorz. Boeck, gebonden en wel geconditioneert, te brengen in de Bibliotheeck van Onse Universiteyt tot Leyden, ende daar van behoorlijk te doen blijcken, alles op poene van het Effect van dien te verliezen. Ende ten eynde den Suppliant desen onsen Consente ofte Ootroye moge genieten als naar behooren: Lasten wy allen ende een ygelijken die 't aangaan magh, dat hy den Suppliant van den Inhoude van desen, doen, laten, ende gedooogen, rustelĳck, vreedelĳck, en volkomentlĳck genieten en gebruycken, cesserende alle belet ende wederleggen ter contrarie. Gedaen in den Haage, onder Onsen Grooten Zeegele, hier aan doen hangen den 10<sup>den</sup> December, in 't Jaar onses Heeren en Zalighmakers, duysent ses hondert vier-en-tachtigh.

G A S P. F A G E L.

*Ter Ordonnantie van de Staaten*

SIMON VAN BEAUMONT.

*Facultatem hujus libri imprimendi videntique, juxta prædictum Privilegium, in Meinardum a Dreunen, & Guillielmum a Walcheren, Bibliopolas Ultrajectenses contulit*

TIMANNUS DE DIEMERBROECK. Med Doct̃.

*Privilegium Illustrum & Præpotentium Provinciae Trajectensis Ordinum.*



E Staaten van den Lande van Uytrecht, doen te weten, alsoo ons vertoont is by Meinardus van Dreunen, en Willem van Walcheren, Boeckverkoopers en Borgers tot Uytrecht, dat sy Supplianten met grooten Arbeyt en Kosten gedrukt hebben seker Boeck, geintituleert, *Isbrandi de Diemerbroeck in Academia Ultrajectina Medicinæ & Anatomies Professoris Opera Omnia, Medica & Anatomica in Folio*, per Timannum de Diemerbroeck, Isb. Filium Medicinæ Doct̃orem, & Reipublicæ Trajectinæ Poliatrum; ende dat sy Supplianten perijckel loopen dat andere baatsoeckige lieden, tot haerliedē groote schaade, het selve Werck soudē naadrukken, sy Supplianten derhalven versochten ootmoedelijk, dat Wy tot voorkominge van sulcks, haar beliefdē te begunstigen met een Ootroy voor vijftien naastvolgende jaaren, over 't voorsz. Boeck, met behoorlijke straffe tegen alle Contraventeurs. SOO IS'T, dat Wy, ter Beede van de Supplianten, genegen zijnde, uyt Onse rechte wetenschap, Souvereïne Macht, ende Authoriteyt, haar Supplianten geconsenteert, ende ge-oetroyeert hebben, consenteeren, ende oetroyeeren by desen, ten eynde dat sy den tijdt gedurende van vijftien naastvolgende Jaaren, het voorsz. Boeck binnen de Stadt, Steden, en Landen van Uytrecht, sullen mogen doen Drucken, Uytgeven, ende Verkoopen; verbieden alle ende een ygelijken, het voorsz. Boeck in gemelde Stadt, Steden, en de Landen van Uytrecht, in eeniger manieren naa te Drucken, Uyt te geven, of te Verkoopen; ofte oock elders naagedrukt, in desen onsen Lande, ende Provincie van Uytrecht te brengen, te verhandelen, of te verkoopen, op verbeurte van de naagedrukte, ingebrachte, verhandelde, ofte verkochte Exemplaren, ende een Boete van drie hondert Caroli guldens, te appliceeren een derde part van dien ten profijte van den Officier, die de Calange doen sal, ende een derde part voor den Armen der plaatsē daar de saake voorvallen sal, ende het resteerende derde part voor haar Supplianten voornoemt. Ende ten eynde sy Supplianten 't Effect, van dit Ons Consent, ofte Ootroy metter daat mogen genieten. Lasten ende Ordonneeren Wy allen ende eenen ygelijken, die dit aangaan ofte raaken magh, haar daar naar te reguleeren Gedaen tot Uytrecht onder Onsen Grooten Zeegele, 't welck Wy hebben onder aan doen hangen, Paraphire, ende Signature van onsen Secretaris, den 4<sup>den</sup> Martij sestiē hondert vier-en-tachtigh.

G A S P A R S C H A D E.

*Ter Ordonnantie van mijne voornoemde Heeren de Staaten*

J. VAN LUCHTENBURGH.

*V I R I S*

NOBILISSIMIS, AMPLISSIMIS,

*E T*

PRUDENTISSIMIS,

D. P A U L O V O E T  
à W I N S S E N, J. U. D.

Nuper ad Illustrissimos ac præpo-  
tentes D. D. Ordines Genera-  
les foederati Belgii Deputato.

D. G U I L I E L M O  
van W E E D E,

Reipublicæ Trajectinæ Consulibus,

*E T*

*Omnibus ejusdem inclytæ Urbis*

S E N A T O R I B U S,

ACADEMIÆ SERVATORIBUS.

TIMANNUS DE DIEMERBROECK,

*P. S.*

*Nobilissimi, & Amplissimi Domini*



Ecce nunc jam elapsum est, quod parens p. mem. H. brandus de Diemberbroeck, in Athenæo vestro medicinæ & Anatomies Professor vitam cum morte commutaverit, cumque paulo ante animus ei præfagiret mortem appropinquare, nec longe fatalem horam abesse, lucubrationum quoque suarum rationem habendam esse duxit, easque cum mihi in musæo suo ostendisset, consilium, quod in iis edendis, si vitam sibi Superi tam diu propagassent, fuisset secururus, indicavit: Prioris editionis marginibus adleverat multa, non pauca, ut dies diem docet, rescripserat & emendarat, plurima nova inventa & cogitata hic illic inseruerat: Sed cum vereretur ne tot accessiones aliquam postea parerent confusionem, qua via possent expediri omnia, & ex sententia ejus digeri, mihi præcipiebat: ita enim hominum fert ingenium, ut ea quæ vivi mente conceperunt & memoriæ prodere decreverunt, ea etiam post mortem tanquam per ea revicturi, & gloriam vel laudem inde consecuturi, consummari optent. Mortuo paucis post mensibus Charissimo patre, partium mearum esse putavi, editionem harum mihi creditarum lucubrationum (quæ testes esse possunt posteris ejus diligentiae in tantis, cum Academicarum rerum, tum medicinæ faciendæ, occupationibus) quam primum fieri posset procurare, & ut patris obsequeretur voluntati, cui quam diu in vivis fuit, in rebus difficilioris operæ & laboris semper meam probavi pietatem, & ne quis mihi vel negligentiae vel invidiae maculam inureret, quod Remp. literariam, ac imprimis medicorum & philosophorum filios, defraudarem opere tam diu exoptato, in quo omnia tunc temporis nova in re anatomica inventa, & omnium quotquot unquam de re Anatomica, & de Peste scripserunt auctorum sententiae & discrepantes opiniones in unum collectae ad rationis & veritatis trutinam Expenduntur, & ad praxim medicam accommodantur. Sed propter belli calamitatem, quod tunc musæ quasi filerent, typographis non erat animus opus tanti ponderis & impensæ suscipere. Cum propter hostilia arma undique viæ & navigationes erant impeditæ, & commercia cum exteris nationibus publice sublata: Sed cum jam Candidiores dies luceant, & pax aurea in Belgio refulserit:

## DEDICATIO

rit, vestraque prudentia, & clementissima omnium rerum moderatione etiam in hac Provincia Trajectina cives & incolæ fructus Pacis perceperint, fuerunt qui operibus Parentis publicandis animum applicuerint, quæ nunc demum post varias nec opinas interpositas moras lucem adspiciunt. Eætum hunc parentis optimi posthumum (Patres Patriæ) quibus potius quam vobis offerrem, quia in sinu vestro natus & enutritus vestram tutelam expetit. Vos patrem omni benevolentia genere complexi estis; ingratus essem nisi beneficia in eum collata, quorum seriem referrem, si vellem vos ea commemorando obtundere, grata mente recolerem: non dubito igitur (Patres Amplissimi) quin tam comiter & tam serena fronte excepturi sitis hæc parentis Posthuma scripta, quâ ipsum superstitem solebaris: & non ægre laturo ut sub vestris auspiciis in lucem prodeant longe luculentius, quæ antehac minus polita ab exteris & popularibus cupide fuerunt direpta, & non Genevæ modo bis, sed & Lugduni Galliarum typis fuerunt descripta paucos intra annos. Sic vestri non cives modo, sed & longe remoti populi, vobis acceptum referent, si quam ex his scriptis capient utilitatem, & dum pace uti & frui licet, etiam quæ faciunt ad sanitatem, tanquam corporis pacem, quo majus in hoc mundo nihil à Deo exorari potest, si quid ex hisce operibus colligent, vobis debebunt. Auctor, si quis manium sensus, tam gratam sibi memoriam superesse lætabitur; Filius vero, qui hæc vobis offert, pro tanta benignitate & benevolentia, defuncto parenti præstita, summum numen implorabit, ut vos diu bono publico incolumes servet, & ad patriæ nostræ gloriam tueatur.

*Nobiliss. & Ampliss.*

Dominat. V. V.

*Addictissimus & Devotissimus.*

TIMANNUS DE DIEMERBROECK.

Dabam Ultrajecti  
29. Decembris 1684.



# PRÆFATIO

## A D

# LECTOREM.



*Natome Corporis Humani primum in hoc opere locum obtinet, quia est tanquam oculus medicina, & vera ad methodum medendi introductio.*

*Prodromum hujus ante aliquot annos cum orbe communicavit parens, sed cum plurima ipsi postea occurrerent nova, tum sua tum aliorum celebriorum Anatomicorum inventa, experimentis & ratione suffulta, non potuit non in multis priora mutare decreta, qua tunc temporis, tanquam maxime veritati consentanea probaverat. Hac de causa in tantam molem crevit hoc opus, ut vere novum dici possit.*

*Vix ulla est pagina, in qua non aliquid additum, vel correctum sit, in primo praesertim libro de infimo ventre, ubi tota capita refinxit: quod etiam movit parentem, quamvis concatenatis laboribus occupatissimus esset, totam anatonien de novo conscribere, & propria manu exarare, in quatribus in locis tres figuras ex Aquapendente de Formato foetu, C. Bartholino, & de Graeff. desumptas, suis quasque locis inserendas annotaverat, His numerus tabularum adauctus est.*

*Post patris obitum alia, ante hac ignota, ab anatomicis prodita sunt, nulla enim ars vel scientia fertilior hac in re est, quam ars anatomica, propterea quod in ea plurimi inveniantur seduli natura indagatores, qui nullum non movent lapidem, totamque, ut ita dicam, aetatem consumunt, ut aliquid inveniant, aliquid in lucem prodant, quod haecenus latuit, virisque tot doctis & in re anatomica maxime versatis fuit ignoratum, qua isti operi adjungere, & patris scripta hanc ob causam immutare, propter varias rationes non consultum duxi, opportunius alio tempore, si Deus vitam mihi produxerit, illa prolaturus; & additurus tunc illas observationes, in hac editione, quia nimis intumescere hoc volumen typographis videbatur, omittas.*

*Tractatus de peste plurimis patris, & aliorum auctorum novis*

## P R Æ F A T I O

*vis ratiociniis, opinionibus & remediis, ad debellandum hunc crudelissimum hostem excogitatis & inventis, & plurimorum annorum praxi probatis, de novo est adornatus: Cui libellum de variolis & morbillis, antehac nunquam editum adjungi voluit, & maxime partim quia eodem ordine conscriptus est, partim etiam, quia multa cum peste habent communia, tam in causa, contagio, & symptomatibus, quam curatione.*

*Observationum centuriam hic liber continet unam, quamvis plures literis consignaverit, & annotaverit parens, sed propter rationes supra allatas in aliud tempus illarum editio est dilata: non inuidebo vero medicina studiosis illa, quæ conferunt non parum ad faciliorem agrotorum curationem, per convenientiam morbis tollendis remedia, usu longo probata, quemadmodum ex hisce paucis colligere licebit:*

*Habes & disputationes Academicas de morbis capitis & thoracis, olim publicatas, sed cum omnia jam essent distracta exemplaria, & à multis desiderabantur, de integro sunt in lucem revocata, & aucta tribus de ventris inferioris morbis, disputationibus. Vale Lector & Fruere.*



★ ★

*Illustribus*

*Illustribus ac Præpotentibus*  
P R O V I N C I Æ  
ULTRAJECTINÆ  
O R D I N I B U S,  
PATRIÆ PATRIBUS.

Nec Non,

*Nobilissimis & Amplissimis*  
R E I P U B L I C Æ  
ULTRAJECTINÆ  
C O N S U L I B U S,  
E T  
S E N A T O R I B U S,  
Academiae Curatoribus

ISBRANDUS DE DIEMERBROECK,

P. S.



Agnus & eloquentissimus libertatis Romanæ antistes Marcus Tullius Cicero, quondam bene dixit, eo omnis vitæ nostræ rationem dirigendam esse, ut præclaram nominis nostri famam, ex maximis in Rempublicam meritis collatis, posteris relinquamus. Nihil enim salutis Reipublicæ magis conveniens esse potest, quam laudanda illa æmulatio, qua certatim omnes, singuli scilicet in Provinciis ac muniis sibi concreditis, Reipublicæ prodesse, ejusque non incolumitatem solum fovere, verum etiam debiles ac vacillantes restaurare, sicque de Republica bene mereri nituntur. Hoc ipsum, Patres conscripti, ego penitus considerans, meas quoque partes esse putavi, in Provincia mihi demandata. scilicet Arte Medica & Anatomica, aliquid singulare moliri, quod ad nostratum splendorem, & incolarum Reipublicæ salutem plurimum conferre posset. Cum autem Medicam artem sine Anatomica vix solidis fundamentis inniti, & hanc sine illa inutilem esse, animadverterem, latum mihi campum apertum putavi, ad illius fulcra per hujus accuratiorem applicationem firmitus stabilienda. Artem enim Medicam, quatenus olim à solis empiricis excolebatur, longam esse, verè pronunciavit Hippocrates, propterea quod sine ullis rationibus, per periculosas & obscuras solorum experimentorum vias deducta, perpetuo titubaret, ac in mille offendicula, cum multorum exitio, identidem impingeret. Hac de causa divinus ille Senex & Medicinæ Sol, ut Cimærias istas tenebras discuteret, immensamque longitudinem contraheret, solidis rationum fundamentis artem subfulcire, & certis atque indubitatis regulis firmatam aphoristicè conscribere, eamque tali modo brevem reddere primus coepit. Cujus vestigiis postea insistentes, cum Græci, tum Arabes & Latini, cæterique quorumcunque locorum Medici posteris, certatim tantâ cum alacritate in exponenda

lienda nostra arte laborarunt, eamque tanto lumine illustrarunt, ut jam fere ad summum perfectionis culmen pervenisse putata fuerit. Verum hoc nostro oculatissimo seculo adhuc multi navi in ea observati sunt, & à perspicacioribus compertum est, illos imprimis ex eo enasci, quod dum medici in commodis morborum remediis conquirendis maxime occupati essent, ipsum morborum subjectum, scilicet corpus humanum vivens, non satis exactè, secundum omnes suas partes & actiones, perspicerent ac cognoscerent, sed ea in re crudioribus præcedentium inventis solummodo acquiescerent, eamque ob causam optima remedia sæpe male subjecto suo applicarent. Atque hinc multi illustres artis proceres dicti subjecti accuratiorem cognitionem per Anatomen diligentissime inquirere cæperunt, & super ea re a majoribus tradita, seu relicta monumenta, multis errorum maculis conspersa, & crassis obscuritatum nebulis non parum obfuscata, rursus excutere, corrigere, & novis inventis & observationibus undequaque augere, ac illustrare tentarunt: atque sic eorum indefesso labore, & singulari diligentia res jam co deducta est, ut per anatomen omnium totius corporis humani partium, singularumque usus & actionum perfecta cognitio pene tota comparata, & ex ea maximum medicinæ lumen accensum sit. Ad hos novos labores, & per Studium Anatomes, fundamentorum medicinæ haud exiguas reformationes, ante annos præter propter triginta sex, magnam facem in Anglia accendit Guilhelmus Harveus: cujus vestigiis mox institerunt Belgæ, & Dani, quos exinde insecuti sunt Galli, Itali, Sueci, alii-que varii, & tanto cum fervore hoc negotium ubique in Christianismo susceptum est, ut perpauci Medicorum & Anatomicorum ea in parte minimi haberi velle visi fuerint, sed eorum plurimi, in hanc quasi palestram vocati, pro laurea consequenda acerrime decertaverint. In hanc arenam Viri Magnates, cum etiam ego ante annos viginti duos (quo tempore in celeberrimum Athenæum Ultrajectinum, totam Medicinam, atque imprimis Practicam ejus partem, & simul Anatomen docturus, singulari vestra benevolentia introductus sum) descendissem, & in Anatomie multa quoque nova, aliis prætervisa, seu non reperta, invenissem, atque etiam observassem plurimos Anatomicos de partium multarum vero usu vel male vel nimis frigide scripsisse, haud inutile me facturum arbitratus sum, si totam corporis humani Anatomen, cum veterem tum novam concinno quodam ordine conjunctim conscriberem, atque ita editam publici juris facerem, sicque ex inclyta Ultrajectina Academia emitterem librum diu desideratum, & à plurimis expetiturum. Hunc autem Patres Conscripti, ad totius nostræ Provinciæ atque etiam ad florentissimæ hujus urbis clavum constituti, quorum auctoritate viget, & cura subsistit celeberrima Ultrajectina Academia, hunc vobis dedico & consecro, & submitte precor, ut non dedignemini hoc qualecunque munusculum benevolo animo suscipere ab eo, qui omni studio semper manere desiderat.

*Illustr. ac Præpot. Nobiliss. & Ampliss.*

Dominat. V. V.

Dabam Ultrajecti  
12. Februarii, 1672.

*Devotissimus & observantissimus*

ISBRANDUS de DIEMERBROECK.

## *Praefatio ad Lectorem.*



*Anatomicum studium his nostris temporibus admodum viget, plurimi- que in eo tam fervide laborant, ac si tota Anatome hac nostra etate ad summum perfectionis culmen deducenda sit. In quo studio cum etiam ego multis annis occupatus fuissim, & alios docendo multa ipsemet ad didicissim, novaque antehac incognita invenissim, decreveram meas observatio- nes peculiari libello conscribere, & sic publici juris facere, quemadmodum illud passim ab aliis factum fuisse videram. Sed dissuaserunt hoc varii mei amici, at- que me instigarunt ut potius totam corporis humani Anatomen conscriberem, in eamque (præter illa quæ à Galeno, Eustachio, Vesalio, aliisque artis hujus pro- ceribus olim scripta fuere) non solum mea, verum etiam aliorum quorumcunque hodierna nova inventa introducerem, ut sic unâ quasi tabulâ totius Anatomæ ve- tus novaque facies depingi atque exhiberi posset. Non displicuit quidem consilium, propterea quod hoc nemo ante me tentaverat, sed nonnihil me deterruerunt praxeos medicæ quotidiana impedimenta, laboriosi operis magnitudo, & imprimis illud, quod hoc nostro delicato seculo admodum difficile sit aliquid scribere, quod aliorum palato arridere, & à calumniatorum atque invidorum spiculis tutum esse possit. In- terim tamen his omnibus susque deque habitis negotium suscepi, idque tandem ad fi- nem perductum, nunc publici juris facio.*

*Pleraque omnia nova, quæ aut ipsemet invenire, aut ab aliis præstantissimis Anatomicis hætenus inventa fuisse percipere potui, in hanc scenam produxi: plu- rima alia adhuc in obscuro latentia, quo usque vita mihi supererit, è tenebris eruere conabor, & cum vita defecerit, inquirenda relinquam posteris. Nam quo usque ille Anatomen perficiendi fervor in Christianismo perdurabit, innumera alia postmodum in lucem proferentur, quorum ne umbra quidem hodie nota est, qualia post nos conscribenda relinquemus aliis, qui post nos, pro communi bono laborem istum suscipere non detrectabunt.*

*In hac mea Anatome adeo ambitiosus non sum, ut aliorum præclara dicta aut nova inventa mihi adscribere velim, sed cuique debitum suum honorem relinquere cupiens, nomina auctorum, ex quibus aliquid mutuatus sum, passim adscribo; nam cum Plinio, Benignum & plenum pudoris semper existimavi, fateri per quos profeceris, obnoxii verò animi & infelicitis ingenii esse, deprehendi in furto malle, quam mutuum reddere, cum præsertim fors fiat ex usura. Atque hinc passim suum cuique concedo. Non enim de numero eorum haberi volo, qui ut per librorum scriptionem aliquid nominis sibi faciant, multa ex aliis corradunt & exscribunt, eaque magno cum fastu tanquam sua edunt, auctorum ex quibus illa desumpserunt, nomina reticentes, cum sæpe tamen ipsimet mentem auctorum male perceperint, at- que hinc quæ tali modo scripserunt, neque ipsimet satis intelligant, neque aliis be- ne explicare possint.*

*Verum tamen in nominandis citatis auctoribus non utor multis adulationibus aut verborum lenociniis, sed vanis istis ac sæpe nauseabundis encomiis atque fucatis blandimentis abstineo, quibus hodie multorum libros sæpe commaculâri magis quam condecorari video, dum plerosque auctores, quos citant, appellant eminentissimos, nunquam satis laudandos, acutissimos, famigeratissimos, doctissimos, nobilissi- mos, laudatissimos, &c. eosque, imprimis autem illos qui adhuc vivi supersunt, nescio quibus non epithetis exornant (forte, vel ut eorum acerbis objectiones, quas aliquando secuturas metuunt, hac arte benigniter avertant, mitigent, & præ- veniant: vel quod ipsimet ambitiosi hujusmodi vanis laudationibus delectentur, simi- lesque ab aliis sibi etiam aliquando conferri desiderant & exoptent) ego omnes, quos cito, pro viris doctis habeo, nec de eorum eruditione dubitandum censeo, licet alii supra alios excellent. Ac proinde velim ut nemo ægrè ferat, quod nomini suo multa talia epitheta non adjecerim, quæ, propterea quod hodie quibuslibet indifferenter adscribuntur, multorum præ cæteris eminentium claritatem sæpe magis obscurare, quam illustrare videntur.*

*In*



*In hoc libro non sermonis ornatum, sed veritatem quæro, quæ phaleratis verborum fucis atque pigmentis non indiget. Ut autem illam melius eruam, variis locis aliorum opinionibus me oppono, sed amico animo: nonnullas earum refuto & rejicio, at sine malevolentia: meas opiniones hic illic introduco, sed absque ambitione: & quandoquidem de multarum partium vero usu multa apud alios desiderari multa quoque male scripta aut judicata fuisse, animadverti, variis locis ea de re paulo latius ago, sed absque aliorum vilipendio aut vituperio. Quippe hoc nulli viro docto unquam vitio vertendum censeo, quod quælibet aliorum scripta illi non placeant æque bene, sed multa corrigat & multis contradicat, si modo illud humaniter fiat, sine maledictis, ac sine calumniis: à quibus tamen hodie, proh dolor, non nulli superciliosi scriptores vix abstinere, qui ut suas sententias, easque non rard ex aliis descriptas ac mutuatas, & pro suis divenditas, melius defendant, malunt acerbis verbis & maledicis scriptis (quod viros doctos planè non decet) ad-versarios impetere, quam amicis rationibus cum iis concertare.*

*Hujus operis libro septimo, & passim alibi, in describendis venarum ductibus, novum atque inusitatum ordinem instituire, necesse mihi visum fuit: atque hinc, quemadmodum omnes alii Anatomici antehac venarum propagationes deduxerunt à vena cava, aliisque majoribus, ad totius corporis partes; ita ego è contra eas à partibus versus venas majores, & sic ad cavam prosequendas existimaui, ut tali modo sanguinis continuus progressus, secundum ordinem circulationis melius demonstrari posset.*

*Nullas tabulas huic operi adjicere decreveram, propterea quod artem delineandi ipsemet non calleam, & hic Ultrajecti inter multos eximios pictores vix ullos invenerim, qui subjecta anatomica à me præparata, iisque proposita, exacte & clare delineare poterant: multis adumbrationibus, quibus ex consuetudine in picturis suis utuntur, res demonstrandas ita obfuscabant, ut ego ipsemet eas ex eorum delineatione vix cognoscerem. Typographo tamen urgente ut aliquas paucas tabulas adjicerem, nonnullas rariores figuras, ab aliis Anatomicis optime delineatas, in paucas tabulas contraxi easque huic operi adjunxi, communiores vero passim ab aliis Anatomis scriptoribus editas, in eorumque libris satis inveniendas, omisi.*

*Hunc meum librum, cum sub prælo in volumen crassum excrescere animadverteterem, divisi in duos tomos, ut emptores cum in unum volumen; aut si forte illa crassities aliquibus displiceret, in duo volumina compingere possent. Numeros tamen paginarum non divisi, ut unus index utriusque tomi contenta melius & facilius indicaret. Hæc divisio facienda quidem fuisset post librum quartum, sed ut utriusque tomi æqualis fere magnitudo seu crassities foret, illam instituire coactus fui post finem libri secundi.*

*Denique illud obsecro, ut, quicumque hæc nostra leges, benevolum, ac non cognoscendi solum, verum etiam ignoscendi animum adferas, & si alicubi, per memoriae lapsum, quid desiderari videatur, illud benigne excuses: si verò hic illic aliquid palato tuo minus arridens occurrerit, hoc aut paulisper amice feras, usque dum prius illud bene masticaveris, & penitus attento animo perspexeris, aut clementer interpreteris seu explices, imò & emendes, si solida cum ratione id fieri posse & debere, tibi videatur. Vale.*

# S E R I E S C A P I T U M,

## Cujusque Libri A N A T O M E S. L I B E R P R I M U S

### *De infimo ventre.*

CAP.	Pag.	CAP.	Pag.
I.  Roemium.	1.	XIX. De glandulis Renali-	
II. De Anatome & corpore humano, hujusque divisione & partibus in genere.	2.	XX. De ureteribus.	103.
III. De infimo ventre in genere.	8.	XXI. De vesica urinaria.	104.
IV. De partibus continentibus communibus.	9.	XXII. De partibus virilibus seminis generationi inservientibus.	105.
V. De pinguedine, panniculo carnosso, & membrana muscutorum.	11.	XXIII. De Pene.	106.
VI. De partibus continentibus propriis.	15.	XXIV. De partibus muliebribus generationi inservientibus.	123.
VII. De partibus contentis.	18.	XXV. De Utero, ejusque motu.	128.
VIII. De ventriculo, fame, & chylo.	22.	XXVI. De Uteri partibus.	137.
IX. De intestinis.	35.	XXVII. De Constitutione partium genitalium in gravidis.	146.
X. De mesenterio.	39.	XXVIII. De Semine.	157.
XI. De Pancreate.	41.	XXIX. De Conceptione, & fetus formatione.	159.
XII. De vasis lacteis Mesentericis.	47.	XXX. De historia fetus in Utero contenti, ac primo de hepate Uterina, & acetabulis.	175.
XIII. De ductu Chylifero thoracico, & receptaculo chyli.	49.	XXXI. De historia fetus in Utero contenti, ac primo de hepate Uterina, & acetabulis.	199.
XIV. De vasis Lymphaticis, & Lympha.	58.	XXXII. De membranis fatum involventibus, & humoribus in iis contentis.	208.
XV. De Hepate.	65.	XXXIII. De Umbilico ejusque vasis, & de fetus nutritione.	216.
XVI. De vasis biliaris, & ipsa bile.	71.	XXXIV. Quibus partibus differat fetus in Utero ab homine adulto.	227.
XVII. De Liene.	79.	XXXV. De Situ fetus in Utero.	228.
XVIII. De officio Hepatis, & lienis: item de usu bilis, succi Pancreatici, & Lymphae.	88.	XXXV. De Partu.	229.
XVIII. De Sero & Renibus.	94.		

L I B E R

## LIBER SECUNDUS.

### De Thorace.

CAP.	Pag.	CAP.	Pag.
I. <b>D</b> E thorace in genere.	238.	IX. De partibus cordis.	277.
II. De mammis & La-		X. De Unione vasorum in corde	
III. De Diaphragmate.	239.	fetus.	282.
IV. De pleura mediastino, &	256.	XI. De cordis officio, seu actione.	283.
thymo.	259.	XII. De sanguine, spiritu vitali,	
V. De Pericardio & humore in		& nutritione.	287.
eo contento.	260.	XIII. De pulmone & respiratione.	305.
VI. De corde in genere.	261.	XIV. De Trachea, seu aspera arte-	
VII. De cordis motu.	267.	ria.	321.
VIII. De pulsu & sanguinis circu-		XV. De Larynge & voce.	321.
latione.	272.	XVI. De Oesophago.	326.
		XVII. De collo.	327.

## LIBER TERTIUS

### De Supremo Ventre, seu Capite.

CAP.	Pag.	CAP.	Pag.
I. <b>D</b> E Capite in genere	328.	XI. De spiritibus animalibus.	381.
II. De pilis eorumque genera-		XII. De Falce.	390.
III. De externis Capitis inte-		XIII. De Oculis in genere.	391.
gumentis.	337.	XIV. De partibus Oculos continentibus.	394.
IV. De internis Cerebri integumentis,		XV. De Lachrymis.	397.
nec non de falce & Sinibus	338.	XVI. De Oculorum vasis, & musculis.	403.
V. De Cerebro.	340.	XVII. De ipso oculi bulbo.	407.
VI. De Corpore Calloso, Septo Lucido,		XVIII. De auditus organis, & Audi-	
tribus ventriculis, plexu choroide, for-		tu.	411.
nice, natibus, testibus, & glandula		XIX. De olfactus organis, & ipso ol-	
pineali.	349.	factu.	419.
VII. De cerebello, quarto ventriculo,		XX. De Labiis, ore, & reliquis fa-	
& medulla oblongata.	354.	ciei partibus in genere.	424.
VIII. De processibus mamillaribus, glan-		XXI. De musculis buccarum, labiorum,	
dula pituitaria, infundibulo, rete mi-		& maxillæ inferioris.	425.
rabili, & nervis, intra cranium è me-		XXII. De gingivis, palato, Uvula, &	
dulla prodeuntibus.	359.	faucibus.	427.
IX. De ordine quo cerebri partes in præ-		XXIII. De osse hyoide.	428.
dicta sectione exhibentur, & de alio	374.	XXIV. De Lingua, ductibus salivali-	
secandi modo.	374.	bus, gustu, & sapore.	429.
X. De officio Cerebri.	375.		

## LIBER QUARTUS.

### De Artubus.

I. De manu.	442.	II. De Pede.	444.
-------------	------	--------------	------

## LIBER QUINTUS.

### De Musculis: Cum Appendice de Membranis & Febris.

I. <b>D</b> E Musculis in genere.	446.	IV. De Musculis brachii, seu humeri.	454.
II. De Musculis Capitis.	452.	V. De Musculis scapulae.	455.
III. De Musculis Colli.	453.	VI. De Musculis respirationi infer-	
		viem.	

CAP.	Pag.	CAP.	Pag.
vientibus.	456.	XII. De Musculis digitorum, & pollicis.	460.
VII. De Musculis dorsi, & lumborum.	458.	XIII. De Musculis femoris.	461.
VIII. De Musculis abdominis, & partium in infieriare ventre contentarum.	458.	XIV. De Musculis tibia.	463.
IX. De Musculis Cubiti.	459.	XV. De Musculis pedis, seu tarfi.	464.
X. De Musculis radii.	459.	XVI. De Musculis digitorum, & pollicis pedis.	465.
XI. De Musculis Carpi, & vola manus.	460.		

## Appendix de membranis & Fibris.

I. De Membranis.	466.	II. De Fibris.	467.
------------------	------	----------------	------

## LIBER SEXTUS.

### De Arteriis.

I. De Arteriis in genere.	469.	V. De Arteriis ex aorta trunco descendente, ante divisionem, prodeuntibus.	477.
II. De Arteria magna, seu aorta trunco	475.	VI. De Arteriis ex aorta descendente post divisionem intra peritoneum ortis.	480.
III. De ramis ex arteriis subclaviis prodeuntibus.	ibid.	VII. De arteriis cruralibus.	ibid.
IV. De Arteriis Carotidibus, earumque ramis.			

## LIBER SEPTIMUS.

### De venis.

I. De venis in genere.	482.	V. De axillaribus & Brachii venis.	492.
II. De vena porta, & venis ei unitis.	486.	VI. De vena cava parte infra diaphragma, & venis in eam se exonerantibus.	493.
III. De vena cava & venis ei supra diaphragma unitis.	490.	VII. De venis qua in Iliacas aperiuntur.	495.
IV. De subclaviis & Capitis venis.	491.	VIII. De Cruralibus, & pedis venis.	ibid.

## LIBER OCTAVUS.

I. De nervis in genere.	497.	V. De nervis ex medulla ossis sacri prodeuntibus.	
II. De nervis Cervicis.	510.	VI. De nervis brachii, & manus.	513.
III. De nervis thoracis, seu dorsi.	511.	VII. De nervis crurum, & pedum.	515.
IV. De nervis lumborum.	512.		

## LIBER NONUS.

### De Ossibus.

I. De ossibus in genere.	516.	XIII. De costis.	547.
II. De ossium conjunctione.	522.	XIV. De osse pectoris, sive sterno.	549.
III. De Cranio in genere	523.	XV. De claviculis, & scapulis.	550.
IV. De ossum cranii commissuris.	525.	XVI. De ossibus innominatis.	551.
V. De totius capitis ossibus in genere.	528.	XVII. De ossibus brachii, nempe humeri & cubiti.	553.
VI. De ossibus Cranii propriis in specie.	529.	XVIII. De ossibus infima manus.	555.
VII. De ossibus cranio & maxilla superiori communibus.	532.	XIX. De osse femoris, & cruris.	ibid.
VIII. De Maxilla superiore.	535.	XX. De pedis extremi ossibus.	557.
IX. De Maxilla inferiore.	536.	XXI. De ossibus sesamoideis, & omnium ossium numero.	558.
X. De Dentibus.	537.	XXII. De ossium vivorum, & mulierum differentia.	559.
XI. De spina, ejusque vertebrae in genere.	542.	XXIII. De ossium constitutione in infantibus.	560.
XII. De vertebrae in specie, & de osse sacro, & coccygis.	543.	XXIV. De unguibus.	561.

## LIBER DECIMUS.

### De Cartilaginibus, & Ligamentis

I. De cartilaginibus.	564.	IV. De Ligamentis totius trunci.	566.
II. De ligamentis in genere.	565.	V. De Ligamentis scapula, brachii, & manus.	567.
III. De Ligamentis Capitis, maxillarum, ossis Hyoidis, & Linguae.		VI. De Ligamentis Cruris, & pedis.	ibid.

## ANATOMES

# A N A T O M E S

## L I B E R I.

### D E

# INFIMO VENTRE.

---

### P R O O E M I U M.



Natomen scribere aggredior, incertus animi Medicorum ne illam an Philosophorum artem & exercitium appellem. Quippe illorum licet in gratiam olim instituta primò fuerit, tamen etiam ab his tantopere nunc obsidetur & occupatur, ut cuinam facultati plus debeat, cuinam magis annexa sit, vix judicari amplius possit, cum hoc nostro seculo, & hi, & illi, tanto cum fervore huic negotio incumbant, quasi ex una & sola Anatome tota utriusque facultatis salus eruenda sit, & ab hac, tanquam ab altero quodam Sole, utriusque lumen ita penitus dependeat, ut hujus unius artis cognitione destituti, omnino in tenebris ambulare, & fere nihil scire judicentur: cum alios quoque multos ab utraque ista facultate liberos, imò nec ullis certis humanioribus studiis ex professo addictos, tanta hodie noscendi corpus humanum cupido subeat, & incitet, ut plurimi certatim Anatomen ad majorem perfectionem deducere studeant: eorumque pauci existant, qui non solum in hac palæstra multis æquales fieri desiderant, sed plurimos quoque superare nitantur. Atque ita quæ olim in solius Medicinæ gratiam suscepta fuerat Anatome, nunc exercitium omnibus commune, & quasi splendens quidam oculus omnis cujuscunque solidæ eruditionis evasisse videtur. Ad cujus majorem perfectionem etiam nos talentum nostrum collaturi, ea duce, succincto quodam ordine omnia corporis humani palatia lustrabimus, postquam primò quid Anatome, & quodnam ac quale ejus subiectum sit, examinaverimus.

A

CA-





## CAPUT I.

De Anatome, & Corpore humano, hujusque divisione,  
& partibus in genere.Anatomes  
definitio.

Natome est ars quæ partium humani corporis artificiosam dissectionem docet, ut quæ in his sensu cognoscenda

sunt, verè pateant.

Subje-ctum

Primarium Anatomes subje-ctum est corpus humanum, partim quia perfectissimum; partim quia homini imprimis necessaria est cognitio sui, cujus magna pars in proprii corporis cognitione consistit. Adde, quod Anatomica exercitia maxime necessaria sunt Medicis, in eorumque gratiam imprimis instituuntur, quorum ad solius corporis humani morbos sanandos convertuntur studia, non verò ad brutorum viliorum medelam, utpote suis nobilissimis speculationibus indignam, atque hinc veterinariis aliisque plebeis committendam. Ita ut eorum etiam ratione corporis humani artificiosa sectio quorumcunque brutorum sectioni sit præterenda; cum Medici tali modo longe melius ad subje-cti artis suæ perfectam cognitionem pervenire possint, quam si brutorum corpora rimentur. Interim tamen quia corpora humana semper ad Anatomica exercitia commodè haberi nequeunt, eaque unquam viva Anatomico modo secare, neque fas, neque pietas permittunt, & nihilominus per multas sectiones ac inspectiones necesse est perfectissimam situm, nexus, formæ, usus, &c. partium cognitionem adipisci, solent defectu corporum humanorum, plurima bruta animalia, interdum viva, sed plerumque mortua, secari, imprimis illa quorum maxima in viscerum, plurimarumque partium situ, forma, & usu, est similitudo cum corpore humano, ut ex eorum cognitione humani corporis partes facilius percipi ac cognosci possint, cum in humano corpore postea semel atque iterum demonstrantur.

Corporis di-  
versitas con-  
sideratio.

Corpus humanum consideratur, vel generaliter, vel particulariter.

Generaliter, seu in toto consideratum, Generalis.  
maxima in eo observatur diversitas, cum in forma externa, tum in magnitudine & colore.

Forma externa qualis sit in noto mundo, Forma di-  
quilibet scit, & quotidie videt. At qui In- versitas.  
dias, cum orientales, tum occidentales inviserunt, aliasque exterarum & longinquas mundi partes peragrarunt, illi multas nobis incognitas & insolitas formas describunt. Nonnulli enim tradunt se invenisse homines sine capitibus, quorum oculi mammarum regionem occupabant: alii homines cum capitibus quadratis: alii homines plane hirsutos: alii homines feroces, quorum humeri supra caput extabant, quales in Guajana inveniri scribunt: alii homines caudatos: alii aliis formis efformatos.

Magnitudinis diversitas in eo sita est, quod Magnitudi-  
alii sunt aliis crassiores, alii tenuiores, alii nis diversi-  
breviores, alii longiores. Gallia superior tates.  
breviores tenuioresque edit homines, ac pauciores ibi proceri inveniuntur. Septentrionales regiones proceros validosque edunt: ad quos proximè accedunt Germani. Anglia & Belgium mediocres producant: inter Belgas tamen nonnulli admodum proceri inveniuntur, quamvis rariores. Ante  
decennium Ultrajecti vidimus juvenculam Homines  
septendecim annorum, tantæ longitudinis, valde pro-  
ut viri longi vix extremis digitis apicem ceri.  
capitis ejus contingere possent. Prope Schoonhoviam, in pago Leckerkerck, ante paucos annos vixit rusticus, piscator, vulgo magnus rusticus appellatus, homo fortissimus, sæpe nobis visus, cujus sub extensis brachiis quilibet ex ordinariis altissimus vir sine ullo impedimento vel attractu transibat. Anno 1665. in nundinis Ultrajectinis, mense Juli, vidimus virum validissimum, maximeque procerum, & satis ingeniosum (quod alioqui rarius est in talibus magnis corporibus) longitudinis circiter octo pedum cum dimidio, omnia membra bene proportionata habentem, & matrimonio junctum uxori parvæ staturæ, quam iter faciens absque incommodo in pera secum ferre potuisset: natus erat Schoonhoviz, parentibus ordinariæ magnitudinis. Eodem tempore etiam spectanda exhibebatur juvencula rustica

rustica octodecim annorum, quæ dicti viri longitudinem fere æquabat, totoque corpore bene formata, sed aliquanto obtusioris ingenii erat. Verum hæc nobis visa rariora insignis magnitudinis exempla (quibus similia alia quatuor describit Platerus, *Observat. lib. 3.*) fere nullius momenti sunt, collata cum aliis quæ à variis historicis describuntur. Corpus Orestis, quod oraculi jussu è terra effossum est, dicitur fuisse septem cubitorum: qui cubiti, teste Aulo Gellio, apud Romanos simul conficiebant pedes duodecim cum quadrante. Guilhelmus Schouten, in suo itineraio, refert se in portu Desire dicto, prope fretum Magellanicum, invenisse homines decem, & undecim cubitorum. Fazellus, *decad. 1. lib. 1. cap. 6.* meminit multorum cadaverum, diversis in locis repertorum, quorum alia erant longitudinis septendecim, alia octodecim, alia viginti, alia viginti duorum cubitorum, & singulorum singuli dentes molares unciam quinque pondus conficiebant. Plinius scribit, in Creta terræ motu montem fuisse ruptum, hacque occasione ibi inventum corpus quadraginta septem cubitorum, quod alii Orionis, alii Oetii fuisse existimaverunt. Sic etiam Camerarius varias hujusmodi gigantum historias recenset, *medit. histor. cent. 1. cap. 82.*

Homunciones.

E contrà verò interdum etiam homines admodum brevis staturæ inveniuntur, scilicet longitudinis trium quatuorve pedum, quales sunt illi homunciones, quos *Nanos* appellant, nostratibus *dwerger* dicti, cujusmodi tres quatuorve ante hac vidimus, quales etiam tres sibi visos describit Platerus, *observat. lib. 3. in principio.* Aristoteles, *lib. 8. histor. animal. cap. 12.* tanquam verissimum scribit, circa illa loca per quæ Nilus in Ægyptum fluit, Pigmæos habitare, eosque esse homunciones adeo breves ut ulnam unam non excedant. Hæc tamen gens ab hodiernis marinis nautis, totum mundum undequaque peragrantibus, hætenus inveniri non potuit (fortè quod navibus suis ad istius gentis regionem pervenire non potuerint) atque hinc de historiarum istius veritate multum dubitaretur, nisi Aristoteles, cui magna fides debetur, eam conscripisset. Hanc nihilominus fidem Spigelius Aristoteli denegat, & Pigmæorum historiam pro fabula habet, motus 1º. Auctoritate doctissimi Strabonis, *lib. 1. geograph. 2º.* Experientia Francisci Alvarez, Lusitani, qui ipsemet ea loca peragravit, circa quæ Aristoteles Pigmæos esse scribit, nempe per quæ Nilus in Ægyptum fluit, nullibi tamen tam parvam gentem à se conspectam aut inventam fuisse, sed ista loca à populo mediocris staturæ inhabitari tradidit.

Coloris diversitas.

Coloris diversitas magna est, pro regionum diversitate, nam in Europa & Chri-

stianismo albus, in Æthiopia & Brasilia niger, in variis Indiæ regionibus flavus, in nonnullis fere ruber, in aliis fuscus, in aliis subalbicans est.

Particulariter, seu secundum singulas partes consideratum corpus humanum, observanda exhibet concinnam singularum partium figuram, substantiam propriam, nexum maximè convenientem, structuram admirandam, actionem necessariam, ac denique singularum & omnium summam functionum usumque, & tamen omnino concordem, diversitatem.

Particularis consideratio corporis.

Est autem pars corporis quælibet corporea substantia toti in continuitate cohærens, propriaque circumscriptione gaudens, idque cum aliis complens, ad functionem vel usum comparata.

Partis definitio.

Hæc definitio perfectissima est.

Primo enim pars humani corporis debet esse substantia corporea, & quidem talis, quæ toti cohæret in continuitate (*continuum dicitur cujus minima particula sibi invicem cohærent in quiete*) non verò in contiguitate: nam corpora contigua necessario sunt diversa, & unum sine actione alterius, atque utroque integro manente, ab altero separari potest. Sicut enim vinum in vase contentum non potest dici pars vasis, nec vas pars vini, quia inter illa duo nulla est continuitas; ita quoque sanguis in arteria contentus, non potest dici pars arteriæ, aut corporis humani, cum nulla continuitate ei adhæreat.

Continuum quid sit.

Secundò, debet pars totum cum aliis complere, nam quæ ultra complementum sunt, non numerantur inter unius corporis partes, sed sunt corpora per se subsistentia, quæ sæpe toti junguntur & adhærent, ut à toto nutriantur. Ita foetus aut mola in utero, non sunt corporis muliebris partes, sed per se subsistunt, & tamen mediante placenta uterina cum vasis umbilicalibus, utero cohærent, ut ex eo nutrimentum suscipiant, interim mulier iis partu ejectis, tamen manet integra. Sic etiam sarcomata, aliaque similia, partibus humani corporis non accensentur, quia nec faciunt ad totius complementum nec ad debitas functiones & usus sunt comparata, sed toti adhærent ut à toto nutriantur.

Tertiò, debet pars ad functionem vel usum esse comparata.

Functio autem, seu actio est motus quidam effectivus ab organo factus, ob propriam ipsi aptitudinem.

Functio quid sit.

Hæc est, vel *privata*, qua partes sibi consulunt vel *publica*, qua toti animali. ex gr. Ventriculus sanguinem per arterias ad se impulsus, privata actione, seu coctione convertit in substantiam sibi similem, sicque nutritur: sed præterea aliam obit actionem,

A 2

qua

qua toti animaliconfultit, scilicet chylicationem.

Ufus quid.

Ufus est partis ad utendum aptitudo quædam, scilicet talis, quæ non solum modo in partis, unde dimanat, commodum cedit, sed etiam alterius cuiuspiam, aut totius utilitatem spectat. Distinguitur ab actione dupliciter. *Primo*, quod hæc duntaxat partibus operantibus, ille verò sæpe partibus nihil agentibus competat, talibus scilicet quibus aliquod commodum vel auxilium fertur parti agenti, ut melius agat. Sic cuticula nihil agit, sed usus ejus est cutis sensum attemperare, eamque cum vasorum extremitatibus contegere, & ab injuriis externis defendere: pinguedo nihil agit, sed partes fovet ac humectat, iisque faciliorem motum conciliat: capilli nihil agunt, sed usus eorum est caput contegere, exornare, & frigus externum arcere. *Secundo*, quod actio competat toti organo operanti, usus verò singulis organi partibus. ex. gr. Musculi actio est contrahere: usus verò membræ musculi est, fibras ejusdem continere, eumque ab aliis musculis distinguere; arteriæ autem sanguinem ei conferre, ut nervi spiritum animale; carnis fibras fulcire. Sæpe tamen ab Anatomicis usus & actio seu functio confunduntur ac promiscue usurpantur, & partis actio, quia ad quemcunque finem spectat, sæpe usus: atque etiam usus, quia actionem non excludit, actio dicitur. Ita tamen usus latius patet quam actio.

Totum constituentia.

Totum constituentia divisit Hippocrates in *continentia, contenta, & impetum facientia*, quæ tria Galenus, *Solida, Humores, & Spiritus* nominat. Qua divisione non constituuntur triplices corporis partes, sed tantum illa tria sine quibus homo vivere, & totus, id est, vivus consistere nequit. Sola enim continentia seu solida sunt veræ corporis partes. Illæ tamen partes nequeunt vivæ consistere, nisi continue nutrantur ab humoribus. Non quod humores etiam sint partes, sed proxima materia quæ per coctiones mutabitur in substantiam partium, in quam quo usque mutati non sunt, non possunt dici corporis partes, & jam mutati non possunt amplius dici humores: nam ex. gr. os non est sanguis, & sanguis non est os, licet hoc ex illo genitum sit. Idem intelligendum de spiritibus, qui ex subtilissima & calidissima sanguinis parte confecti, ad nutritionem corporis plurimum conferunt. Itaque licet homo sine his tribus vivus consistere nequeat, tamen non sequitur omnia illa tria necessariò esse partes humani corporis. Vitis constat ex partibus solidis ligneis & succo quo nutritur, quem tamen succum non esse partem vitis, ex eo liquet, quod ex vite intempestive resecta copiosus effluat, manente integritate vitis: unde vel cæcus videat illum non esse partem vitis, sed succum coctione

ulteriore in vitem mutandum. Sic etiam cum homini per hæmorrhoides, menses, aliamve quamcunque hæmorrhagiam sanguis effluit, aut cum urina exoneratur, vel sudor expellitur, vix quispiam mente sanus dixerit, tunc partes humani corporis evacuari, quamvis sine sanguine & sero homo vivus subsistere nequeat. Verum si particulæ pulmonis cum tussi rejiciantur, aut renum particulæ cum urina excernantur, ut in eorum exulceratione interdum contingit, tunc veras corporis partes separari certum est.

Præterea, partes corporis sunt illæ à quibus actiones immediate procedunt, atque ex non procedunt ab humoribus & spiritibus, sed à solidis. Humores enim & spiritus non movent cor, cerebrum, aliasque partes, sed illæ humores & spiritus generant & movent: quiescentibus enim corde, cerebro, aliisque visceribus, humores & spiritus nec amplius generantur, nec moventur (exemplum patet in gravi syncope) & quamvis plurimi sint in corpore calidissimi & ad motum aptissimi, sicut in iis qui causo moriuntur, simul ac tamen cor quiescit, nec ipsi per arterias venas, & nervos moventur, nec cor aliasque partes movere queunt: certo argumento illos pati, nullam verò actionem ab iis procedere. Quod autem humores & spiritus à corde moveantur, & in eo aliisque partibus generentur, in sequentibus latius explicabitur, *lib. 2. cap. 11. & lib. 3. cap. 10. 11.* aliisque diversis locis.

Actiones procedunt à solidis.

Jam verò etsi solida non possint agere sine humoribus & spiritibus, & ab iis (quantenus sua quantitate, suoque calore, frigore, aliave qualitate, hanc illamve mutationem & temperiem solidis inferunt) actiones eorum celeriores, tardiores, fortiores, debiliores, meliores, aut pejores fiant, hi tamen ea de causa non sunt dicendi partes corporis, cum actio quidem sine iis non peragatur, sed tamen ab iis non procedat, verum illi tantum partes disponant ad posse agere. Respiratio non potest fieri sine aëre, aër tamen non est pars corporis, neque actio respirandi ab eo procedit, sed à musculis thoracis eum impellentibus, quamvis interea aër ad motum musculorum cedendo, & intus forasque per asperam arteriam comeando, talem aptitudinem concedat ad respirandum, sine qua respiratio fieri non posset: licet etiam suo calore aut frigore respirationem celeriore, tardiore, longiore, aut rariorem efficere possit, pro ut secundum has mutationes calor partium augetur vel imminuitur, atque hinc citius aut tardius respirare cogat necessitas. Sic cor aliæque partes solidæ non moventur ab humoribus & spiritibus, sed agunt in humores & spiritus, eosque impellunt, attenuant, coquunt, usque dum tandem aptas eorum particulas in substantiam sibi similem convertant,

Solida non agunt sine humoribus.

An humores & spiritus sint partes corporis.

vertant, & sic sibi apponant, uniant, partesque corporis faciant, quod non erant antequam assimilatae apponerentur. Nam pars corporis non nutritur altera sui totius parte, os non nutritur carne, nec vena nervo, &c. neque quod nutrit partes potest ullo modo dici pars ipsa, nam alioqui nulla foret differentia inter ipsas partes & earum nutrimentum: quo tamen nutrimento nisi partes continue foventur, earumque consumptae particulae identidem restaurarentur, immineretur & brevi deficeret earum virtus ac substantia, ex eoque languore tandem periret earum actio.

Ita ut homo sanguine & spiritibus necessario quidem egeat ad vitam (hinc *Leviticus cap. 17. vers. 11.* dicit textus sacer: *Anima*, id est, vita, *carnis in sanguine ejus*) tanquam proximis partium sustentaculis, sine quibus neque partes corporis ejus agere, neque ipse vivere potest. Verum inde tamen non sequitur, sanguinem & spiritus etiam esse partes corporis: nam idem de aëre externo dici posset sine quo homo vivere nequit: aufer enim homini usum aëris externi, per laqueum, aquae submersionem, aliumve quemcunque modum, mox tollis vitam, non minus quam si ei sanguinem & spiritus sustuleris: nemo tamen mente sanus dixerit, aërem externum esse partem nostri corporis, cum certè, si illud, sine quo vita subsistere nequit, pars nominari deberet, etiam aër externus necessario pars nostri corporis dicendus foret, non minus quam sanguis & spiritus.

Præterea etiam considerandum, humores & spiritus, si vitia contraxerint, ab omnibus Medicis reponi inter morborum causas, non verò inter partes morbosas. Ad hæc, si partes essent, deberent esse similes, hætenus tamen nemo Anatomicorum, quod scio, illos similaribus annumeravit. Ex similaribus etiam componuntur pleraque organica, verum inter illas similes quæ organicas componunt, nemo unquam numeravit sanguinem & spiritus, tanquam partes similes: nam singula organa ex iis quæ propria & stabilia sunt, suam compositionem sortiri debent, non verò ex iis quæ fluxibilia & omnibus communia sunt, & quæ continuè consumuntur ac regnuntur.

Itaque humanum corpus potest quidem in suis partibus integrum existere sine sanguine, spiritu, & aëre, sed sine iis non potest agere & vivere. Sicut sine Anima rationali homo non potest dici vivus, perfectus, & totus homo: eam tamen partibus perituri corporis annumerandum non esse, quilibet novit, cum sit incorruptibilis, per se subsistens, & à reliquo corpore separabilis, cum à corruptibili corpore procedere non possit incorruptibilis, sed divinam ac celestem habeat originem, & divinitus cor-

ruptibili corpori infundatur, ut in eo agat quo usque corruptibilium instrumentorum integritas actiones fieri permittit. His adde, quod Anatomicus, dum humani corporis partes inquirat, illas consideret quæ tales, non verò quæ viventes, aut quæ animalis rationalis: neque vitæ & actionum causas, nulla continuitate corpori coherentes, pro partibus habeat, vel habere ullo modo possit.

Atque sic ex modò dictis abundè liquet, spiritus & sanguinem, aliosque humores, nec esse, nec verè dici posse partes nostri corporis. Verum his tamen omnibus nondum satisfactum videbitur eminentissimo viro J. C. Scaligero, qui, *lib. de subtil. exercit. 280. sect. 2.* unico argumento tanquam validissimo ariete, omnia nostræ opinionis fundamenta penitus convellere videtur. *Si spiritus (de sanguine & humoribus idem concludit) est anima*, inquit, *instrumentum, & anima est principium motus, & corpus est res mota, inter motam rem & moventem instrumentum interesse necesse est. Ergo si spiritus animati non sunt, & inter animans & animatum, informans & informatum, aliquid, quod neque informatum, neque animatum, erit. Sed movetur corpus quia animatum est. Non verò movetur ab externo, sed ab interno principio. Atque liquet spiritus ipsos quoque, & internos esse, & ipsis internum principium motionis. Quare sequetur, ut membri pars sint.* Verum hoc acutissimi Scaligeri argumentum etsi prima facie speciosum videatur, tamen penitus consideratum, sine nervis est, nec quidquam solidi contra nostram sententiam concludit. Nam spiritus non magis est instrumentum corpus movens, quam aër est instrumentum movens visum vel auditum. Sed quemadmodum aër, non instrumentum, sed medium est, sine quo objecta sensibilia illorum sensuum instrumenta movere nequeunt; ita etiam spiritus non sunt animæ instrumentum, sed duntaxat medium necessarium, per quod Anima agens corpus instrumentarium movet, & simul motionem illam in corpore isto factam percipit ac dijudicat. Atque sic non est absurdum (quale tamen id esse putat Scaliger) sed maxime necessarium, ut inter Animam animantem, & corpus instrumentarium animatum, intercedat aliquod inanimatum, quod neutrius pars sit, & quo mediante instrumentarii corporis animati actio per illam animam animantem peragi possit. *Atqui movetur*, inquit Scaliger, *corpus, quia animatum est, idque non ab externo, sed ab interno principio.* Concedimus totum, sed negamus illud internum principium esse spiritus, cum illud apertissime sit ipsa Anima, quæ operatur mediantibus spiritibus: ita ut hinc minimè probari possit, quod spiritus vivant, & sint pars corporis, sed duntaxat, quod sint medium per quod anima

Contra Scaligerum.

movet corpus. Quia autem hic difficilem objectionem eminus prævidebat Scaliger, scilicet, *quomodo spiritus possint esse alicujus partis corporea pars, cum fluxiles sint, nusquam in quiete fixi subsistant, & indifferenter per omnes corporis partes continuè moveantur*, ut hoc telum averteret, dicit, spiritus esse partem ejus partis corporis in qua sunt in præsentia; & cum ex ea effluerunt, tunc eos fieri partem alterius partis in quam influunt, & sic porro ulterius. Verum hæc rationum conclusio certè nimis frigida, tantoque viro indigna videtur, cum ex partis definitione notissimum sit, quod pars nostri corporis non sit substantia aliqua influens & transiens, sed talis quæ corpori in continuitate & quiete cohæret.

Partium divisio.

Dividuntur partes corporis dupliciter. 1. Ratione substantiæ. 2. Ratione functionum.

Ratione substantiæ dividuntur in similes & dissimiles.

Partes similes.

Partes similes sunt, quæ in partes sibi similes dividuntur, ita ut omnes earum particulae sint ejusdem naturæ & substantiæ. Sic quælibet pars ossis est os, fibræ fibra. Has Spigelius *conformes*, Græci *ὁμοιομετρῆς* appellant.

Numerantur autem communiter decem: Os cartilago, ligamentum, membrana, fibra, nervus, arteria, vena, caro, & cutis. His ab aliis adduntur, cuticula, tendo, & adeps: ab aliis, duo oculorum humores, vitreus & crystallinus: ab aliis, medulla cerebri & spinalis: ab aliis denique, pili & ungues.

Harum aliarum sunt simpliciter similes, ut os, cartilago, fibra, &c. in quibus non est oculis manifesta particularum differentia (dico, oculis manifesta, nam ratione minimorum diversorum elementorum, non oculis, sed mente contemplabilium, ex quibus componuntur, nulla etiam earum verè & absolute similis dici posset). Aliæ sunt ad sensum tantum similes, in quibus oculis manifesta particularum differentia observatur, ut vena, arteria, nervus. Vena enim constat ex tenuissimis fibris & membranis: arteria ex fibris & duplici differente tunica: nervus ex dura piaque matre, fibrillis, & medulla. Hæ tamen perfunctorio judicio etiam similes dicuntur, quia ubique eodem modo sunt compositæ, atque eatenus sibi similes, nec aliam substantiæ compositionem habent in capite, quam in pede, aliisve partibus.

De singulis similaribus partibus postmodum suis locis speciatim acturi sumus.

Omnes autem partes similes & solidæ in prima foetus formatione ex semine delineatæ sunt, cui deinde sanguis & succus lacteus in amnio conclusus accesserunt, delineatas partes nutriendas, mole augentes, & amplificantes.

Ante hac putatum fuit, in prima partium

formatione sanguinem maternum una cum semine concurrere, non solum ut materiale, verum etiam ut effectivum principium (quæ opinio postmodum à præstantissimis quibuscumque Philosophis merito explosa est) & alias partes plus seminis, alias plus sanguinis, alias cujusque æquales partes recepisse: atque hinc processit vetus illa divisio, quæ partes ratione hujus principii generationis, dicebantur, aliarum spermaticarum, quæ in sua formatione plus seminis, quam sanguinis accepisse credebantur, ut similes octo priores: aliarum sanguinearum, in quarum formatione sanguis prædominatus visus fuit, ut in carne: aliarum mediarum, quæ ex æqualibus sanguinis & seminis partibus formatæ putabantur, ut cutis. Verum hæc partium diversitas non processit à prima formatione, sed à nutritione, cujus ratione aliarum ad substantiæ suæ incrementum plus, aliarum minus sanguinis receperunt; item aliarum in mole plus & citius, aliarum minus & tardius adauctæ sunt.

Partes spermaticæ, sanguineæ, & mediae.

Quæ spermaticæ dicuntur, dissectæ non regenerantur, & ruptæ aut separatæ non uniuntur, nisi mediante corpore heterogenio: sic os abscissum non restituitur, sed fractum coalescit mediante callo. Sanguineæ regenerantur, quod in carne ablata vel vulnerata manifestum est. Quæ mediæ sunt medio modo se habent.

De spermaticis tamen ruptis aut fractis, an in quibuscumque corporibus mediante medio heterogenio uniantur, nonnulli dubitant, & putant in infantibus & pueris, quibus partes spermaticæ (atque ipsa etiam ossa) mollissimæ sunt, illas per medium homogenium coalescere posse. Verum, cum etiam in infantibus vulnera cutis semper cum aliqua cicatrice, & fracturæ ossium cum aliquo callo coalescant, vero simile est spermaticas partes in nulla ætate sine medio heterogenio coalescere, quamvis illud, ob insignem partium humiditatem, in primogenatis adeo conspicuum non sit, atque in adultis.

Partes dissimiles sunt, quæ in partes naturæ & substantiæ dissimiles dividuntur, non verò in similes. Sic manus non dividitur in plures manus, sed in ossa, carnem, nervos, arterias, &c.

Partes dissimiles.

Ratione functionum partes corporis dupliciter dividuntur. 1. In organicas, & non organicas. 2. In principes & ministras.

Partes organicae sunt, quæ actionibus peragendis sunt destinatae, eumque in finem certam, determinatam, ac sensibilem conformationem receperunt.

Partes organicae.

Ut autem ad destinata munia aptitudinem habeant, requiruntur in iis, *continuitas, situs, & numerus congruus, justa figura, & magnitudo.*

Hæc



Hæ non solum sunt dissimilares, ut olim putatum fuit, sed etiam similes. Nam, ex. gr. nervus, licet similis pars sit, attamen, quia ei commissum est munus deferendi ac distribuendi spiritus animales, non minus organica pars est, quam musculus, aut manus: idem quoque intelligendum est de osse, arteria, vena. Ita ut omnino frivola sit distinctio Caspari Bauhini, aliorumque quorundam, qui dum partes similes ab organicarum numero excludere nituntur, distinguunt inter instrumenta seu organa, & instrumentarias partes, cum tamen re vera inter hæc non major sit differentia, quam inter anum & mulierem vetulam.

Partes organica.

Non organicae partes sunt, quæ simpliciter usum habent, nullam vero actionem obeunt, ut cartilagine, pinguedo, pili.

Partes principes.

Principes partes sunt quæ nobilissimam & principem edunt actionem.

Ab his multarum aliarum partium actiones procedunt & promoventur. Numerantur autem tres: duæ scilicet, ratione individui, una ratione speciei. 1. Cor, fons caloris vivifici, & primum mobile nostri corporis, à quo actiones vitales, seu naturales procedunt. 2. Cerebrum, immediatum sensus motusque, & in homine etiam cogitationis organum, per quod omnes actiones animales perficiuntur. 3. Partes genitales, à quibus speciei conservatio dependet.

Partes ministræ.

Partes ministræ sunt omnes aliæ quæ principibus inserviunt, ut venter, hepar, lien, pulmo, renes, manus, &c.

Nobiles.

Hæ sunt vel necessariae ad vitam, Nobiles appellandæ, sine quibus homo non potest vivere, ut pulmo, venter, hepar, intestinum, aliæque similes. Vel non sunt necessariae ad vitam, sed tantum ad usum vel actionem aliquam, quæ vitam feliciorē facit, atque hinc Ignobiles dicendæ, quales sunt brachium, digitus, pes, manus, auris, nasus, dens, quibus carere possumus manente vita. His ignobilibus etiam adjungendæ sunt illæ, quibus est vile ministerium, & vix manifestum, ut pinguedo, capilli, ungues, aliæque similes.

Ignobiles.

Denique, ut omnium harum partium demonstratio commodius exhiberi, & ordine quodam describi queat, corpus humanum, Anatomicos hodiernos secuti, distinguemus in tres ventres & artus.

Ventres.

Ventres sunt insignes cavitates in quibus unum vel plura nobilia viscera recondita sunt.

Hoc loco vocabula *venter* & *cavitas*, non strictè sumenda sunt, pro ipsis solis cavitatibus, verum ne hujus primæ divisionis membra nimis multiplicentur, sub iis etiam laxè comprehendi volumus, tum partes continentis, quæ istas cavitates efformant; tum & ipsas in iis contentas partes, quinimo etiam collum, penem, testes viriles cum scroto, & si quæ sint aliæ ipsis annexæ partes, quæ artubus commode annumerari nequeunt. Postea in sequentibus, ubi de singulis ventribus speciatim acturi sumus, eas latius subdividemus, in partes continentis, contentas, & iis annexas.

Hi tres ventres sunt, *supremus*, *medius*, & *infimus*.

*Primus* & *supremus* venter est *Caput*, *Venter supremus*.

in quo cerebrum, oculi, aures, aliæque partes continentur. Hanc autem Principum facultatum arcem editissimo loco collocari necesse fuit, partim ut longius ab alimentorum officinis distans, per eorum nidores crassasque exhalationes non interturbarentur nobilissimæ animales functiones. Partim ad sensuum, visus, auditus, & odoratus commoditatem, quorum objecta loco editiore multo melius quam humili, in organa sensuum impingere, sicque percipi possunt.

*Secundus*, seu *medius* venter est *Thorax*, *Medius*, cordis, pulmonis, asperæ arteriæ, & oesophagi domicilium. Hunc medio circiter corporis loco constituit summus Conditor, ut quemadmodum Rex medio suo regno insistit, ita etiam nobilissimum & totius vitalitatis princeps viscus Cor, hoc medium microcosmici regni palatium inhabitaret, in eoque, tanquam in solio suo, sederet, atque hinc commodius vivifici nectaris & caloris rivulis, omnes totius parvi mundi regiones irrigaret.

*Tertius* venter est ille, qui communiter *Infimus* ac *Infimus* venter appellatur, & abdomine concluditur, hepatis, ventriculi, intestinorum, renum, uteri aliarumque multarum partium, alimentorum coctionibus, excrementorum secretionibus: & sobolis procreationi inservientium, sedes, in imum locum necessario releganda, ne hujus culinæ multiplices turbæ, ac foetidissimæ impuritates superiorum principum viscerum functionibus obessent.

Artus sunt membra ventribus ad- *Artus*, nata, & articulis distincta.

Hi melioris vitæ causa homini concessi, duplices existunt, *brachia* & *crura*.

*Brachia* in homine dividuntur in *humerum*, *cubitum*, & *manum*: *Crura* in *femur*, *tibiam*, & *pedem*.

Secundum dictam istam divisionem nos *Diviso opo- vis*, hanc Anatomem nostram distinguemus in decem libros: quorum prioribus quatuor explicamus

explicabitur historia eorum quæ speciatim in singulis ventribus & artibus sunt consideranda: posterioribus verò sex docebuntur ea quæ toti corpori sunt communia, scili-

cet, historiarum musculorum, membranarum, fibrarum, arteriarum, venarum, nervorum, ossium, cartilaginum, & ligamentorum.

## C A P U T II.

### De Infimo ventre, in genere.



Uia Infimus venter in se continet partes humiditas, putredini valde obnoxias, multarumque fœcum cloacam, hinc ab eo sectiones ac demonstrationes auspicari solent Anatomici, ut vim citæ putredinis declinent, eaque quam primum amoveant viscera, quæ sua corruptione totum cadaver citò inficere, atque sic commodam reliquarum partium demonstrationem impedire possent.

Nomina.

Hunc ventrem Aristoteles, 1. *Hist. anim.* 13. proprie vocat *γαστήρ*. Vulgares communiter Ventrem simpliciter appellant, abutentes vocabulo in pressiore significato: quod Celsus evitare volens, ad discrimen ventrium superiorum, hunc nominavit Imum ventrem.

Eius descriptio.

Est autem venter inferior totum id, quod superius cartilagine ensiformi ac diaphragmate, utrimque à latere costis inferioribus, posterius & inferius lumborum vertebra ossibus coxendicis, sacro, & pubis, circumscribitur.

Hypochondria.

Hujus anteriora infimis costarum cartilaginibus finitima, sub iisque comprehensa, veteribus Hypochondria, & Præcordia nominantur, suntque duo, hinc dextrum, inde sinistrum.

Epigastrium.

Quod in medio hypochondriorum ventriculo proximisque ipsi intestinis incumbit, clarioris doctrinæ gratia, cum Veslingio, Epigastrium nominamus (Riolanus, ex Rusto Epheso, Stomachalem regionem appellare mavult) quamvis antiquitus totum anterius abdomen Græcis *ἐπὶ γαστρί*, Arabibus *Myrach*, nominatum fuerit. In superiore parte illius epigastrii cavitas quædam occurrit, Græcis *σφαγή*, καὶ *καρδία*, & *σπλῆνις*, Latinis *Scrobiculus cordis* appellata.

Regio umbilicalis.

Media Regio umbilicalis est, infra & supra umbilicum tres digitos æquans, cujus portiones laterales Græcis *λαγύ-*

res, Latinis *Ilia*, eo quod ileum intestinum sub ipsis maxime lateat, nominantur.

Quod infra hanc pubisque spatium comprehenditur, *Hypogastrium*, Imus venter, & *Aqualiculus* nuncupatur: cujus partes laterales in flexura femoris ad pubem, *Inguina* dicuntur.

*Hypogastrium.*  
*Inguina.*

Pubes, Græcis *πύσιον*, est pars pubendis proximè imminens, quæ pilis tegitur in adultis. Huic à lateribus adstant *βυβόνες*, Latinis *Inguina* vocati.

*Pubes.*

*Bubones.*

Inferior pars, quæ inter principium penis & anum est, *Perinæum* appellatur.

*Perinæum.*

Posteriora abdominis superius *ἑσφύες*, lumbi, inferius nates complent, quas etiam *Clunes*, Græci *γλατῆς*, & *γλαῖνα*

*Lumbi.*  
*Nates.*

appellant. Fissura autem nates dirimens *Herophylo* *διχάλα* dicitur, in quam erumpit foramen intestini recti, quod vulgo *podicem*, & *anum*, à rugis quas habet anilibus, appellant.

*Anus.*

Constat hic venter ex partibus continentibus, seu exterioribus, & contentis, seu interioribus.

Continentes, quas *Abdomen*, quasi *circumventrem* proprie vocant, sunt vel communes, vel propriæ.

*Abdomen.*

Contentæ, vel ad nutritionem, vel ad excrementorum secretionem, vel ad generationem faciunt.

Physiognomi ex hujus ventris figura & magnitudine de hominis natura aliquid certi conjici posse asserunt. Sic Aristoteles, in *physiogn.* dicit *πατρὺν ventrem* inter primarias partes esse ex quibus sapientiæ decor in homine apparet. Apud alios, *venter depressus & cævus* denotat hominem invidum ac sordidum: *rotundus seu teres*, sobrium: *longus*, segnem & voracem: *prominens*, somniculosum, pigrum, & stupidum. *Umbilicus multum protuberans*, indicat magnam salacitatem.

*Physiognomonica signa.*

## CAPUT III.

## De Partibus continentibus communibus:

&amp; Primo,

## De Cuticula &amp; Cute.



Artes continentes communes dicuntur, quæ præter hunc ventrem, etiam totum reliquum corpus cingunt, pene, scroto, palpebris, paucisque aliis exceptis, quæ pinguedine carent.

Partes continentes.

Sunt autem hæ: Cuticula, Cutis, Pinguedo, panniculus carnosus, membrana muscutorum communis.

Cuticula.

Cuticula, Græcis *Ἰνδύγις* (quasi *res supra cutem posita*) dicta, est pellicula tenuis, densa, & insensilis, cuti instrata, eique firmiter adhærens, ut non nisi ignis vi excitatis vesiculis, ab ea separata demonstrari possit.

Duplicitas.

Aquapendens sub vesicatorio medicamento illam aliquando duplicem observavit, divisam in duas tenuissimas pelliculas, exteriorem paulo firmiorem, & interiorem longe tenuiorem, ac cuti tam pertinaciter ad hærentem, ut ne scalpello quidem detrahi posset: id autem factum putat, cum externis injuriis pateat, ut una pereunte, altera superstes maneat, & ad suos usus mediocriter sufficiat.

Ortus.

A subdita carnis madore, ambientis aëris siccitate densato, orta vulgò dicitur; sed malè cum principium feminale non minus habeat, quam cutis aliæque partes solidæ.

Usus.

Cutem, & ad illam porrecta vasorum oscula tegit, ejusdemque exquisitum sensum attemperat, & nimium madoris effluviū impedit.

An sit pars corporis.

Julius Casserius Placentinus, alique varii Anatomici, illam partibus humani corporis annumerandam non esse putant, his rationibus inducti.

I. Quia in prima partium formatione non fuit ex semine producta, sed postmodum ab excrementis tertiæ, ut ajunt, coctionis frigore condensatis & exsiccatis orta, instar crustulæ quæ pulti increfcit: hoc inde liquere tradunt, quia cum aufertur vel detritur, facile regeneratur, secus quam partibus spermaticis contingere solet.

II. Quia non sentit, & in morbis non absumitur, sicut aliæ partes.

III. Quia non vivit.

IV. Quia nullam obit actionem.

Verum hæ rationes sunt nullius momenti, & insignem contradictionem impli-

cant. Nam unanimi omnium Anatomicorum, etiam eorum qui hæc argumenta proponunt, consensu, cuticula partium continentium prima & extrema statuitur, qua in parte hætenus omnes graviter errassent, si non foret vera pars humani corporis. Sed videamus pondus rationum propositarum.

Ad primam dicimus, illius tenuissima stamina ex semine, una cum cute, in prima partium delineatione fuisse efformata. Hoc liquet in abortivis foetibus omnibus cute tectis, in quibus semper etiam cuticula invenitur: quæ non potuit fuisse generata à frigore externo, utpote quod in occluso utero nullum est; nec ab ambientis alicujus siccitate, quæ nulla foetum, lacteo succo satis humido innatantem, tontingit; ergo ab aliqua feminali portiuncula. Liquet illud in Æthiopum infantibus, tam maturo partu, quam abortu ejectis, qui ex utero nigredinem externam corporis secum adferunt, quæ nigredo solam cuticulam inficit, non verò cutem (hoc Riolanus, *Anthropogr. lib. 2. cap. 4.* notavit in sectione Æthiopis, cujus sola cuticula nigra, cutis verò nive candidior erat) igitur si illi istam nigredinem à prima formatione in utero habeant, ergo cuticula, cui soli ista nigredo ingenerata est, etiam in ipso formationis corporis exordio, una cum reliquis partibus, ex semine est delineata; non verò ab aliquibus excrementis, aut viscidis halitibus genita, cum talia in isto exordio adesse nequeant. Quod autem ablata aut detrita facile regeneretur, hoc commune habet cum dentibus, qui quotidie per masticationem deteruntur, & iterum excrefcunt, imò in permutatione (de hac vide *lib. 9. cap. 10.*) major eorum pars aufertur, & postmodum restituitur: item cum sanguineis quoque partibus, quæ tamen hac de causa à partium numero non excluduntur, quod ablata restituantur, cum ipsis sanguineum nutrimentum tam copiosum affunditur, ut facile talis redintegratio fieri possit. Sic etiam ad cuticulam, è finibus vasorum cutis, quos tegit & occludit, è sanguine halitus, roris instar, continue copiosi pro ejus nutrimento exhalant, depeditas ac detritas particulas facile restauraturi. Denique si, ut solent adjicere, generetur ut crustula pulti increfcens, hoc

B

satis

fatis probat illam esse veram corporis partem, ex eodem cum reliquis principio ortam: nam illa crustula in lacte non est lactis excrementum condensatum, ut nec aliud quid extra lac, sed est dentior ipsius lactis pars, ergo etiam lac.

Ad secundam dicimus, licet non sentiat, nec in morbis manifestè absumatur, tamen non minus partem corporis esse quam os, quod etiam neque sentit, neque absumi videtur.

Ad tertiam dicimus, falsum esse quod non vivat, nam increfcit cum reliquo corpore (hoc non faciunt partes non viventes & mortuæ) & nutritur succis alimentariis, sicut reliquæ partes, qui succi licet oculis manifestè conspici nequeant, nihil refert, quoniam illud ipsum etiam contingit in illis succis qui nutriunt multa ossa, periostea, dentes, multasque alias partes. Præterea etiam suos morbos patitur à pravis humoribus & sanguine procedentes, ut patet in lepra, exanthematibus, multisque maculis. In aliis quidem tenuior & mollior, in aliis crassior & durior est, sed talia non magis imminuunt vitam cuticulæ quam cutis, cui eadem illa etiam contingunt. Denique, quis quæso adeo mentis impos sit, qui credat, totum nostrum corpus vivens unde quaque contegi & circumduci à corpore mortuo, cum eoque nasci?

Ad quartam dicimus, licet non agat, tamen usum habere maxime necessarium, atque hinc non minus esse corporis partem, quam cartilaginem, pinguedinem, multasque membranas, carnes, aliasve partes, quæ usum quidem habent, non verò actionem.

Concludendum igitur, cuticulam esse veram corporis humani partem. 1. Quia cum aliis complet totum, nam homo sine cuticula non est totus & perfectus homo. 2. Quia corpori in continuitate adhæret. 3. Quia ad usum necessarium, ut ante dictum, comparata est.

*Cutis.* **Cutis**, δέσμα & δέρας, quasi δέσμα, *vinculum partes corporis colligans*, Græcis dicta, in brutis etiam *pellis & corium* appellata, velamentum est membranofum, crassum, ex semine ortum, corpori externo unde quaque inductum, ut qualitatatum tactibilibium excessus metiretur, & adversus fortuitorum incursum aliquam tutelam præberet.

*Substantia.* Propriam habet substantiam, mediamque naturam inter nervum, membranam, & carnem. Non est ex sanguis & tam acuti sensus ut nervus; non adeo tenuis ut membrana; non tam sanguine abundans ut caro: sed est quasi sanguine prædita membrana subnervæ ac sub carnosa: quæ ratione carnositatis majorem quam aliæ membranæ crassitiem, &

ratione nervositatis acutum sensum obtinet.

Substantiam planè carneam ei tribuere videtur Aristoteles, nam, *Problem. 29. sect. 10. ut & lib. 2. de gener. animal. cap. 6.* dicit cutem ex carne siccescente produci. Quo sensu etiam Columbus, *lib. de spirit. cap. 5. & 8.* dicit, cutem esse carnis exsiccationem. Cum quo consentire videntur Galenus, 3. *Method.* & Fernelius, *lib. 5. pathol. cap. 8.* dicentes, cutem esse subjectæ carnis portionem magis siccata. Verum cum maxima sit substantiæ cutis & subjectæ carnis differentia, illaque fere ubique, per intercedentem pinguedinem & panniculum carnosum, à carne separetur, satis liquet illam non esse siccata carnis portionem. Dico, fere, nam in fronte subjectis musculis adeo tenaciter adhæret, ut eorum motum omnino sequatur, & cum iis uniri videatur, etsi re vera sit pars per se subsistens, nec à carne musculorum orta, sed ei duntaxat firmiter annexa. Ac proinde concludendum, cutem ortum suum nulli alteri parti debere, sed eam in prima partium formatione non minus immediate è semine delineatam, & substantiam libi propriam adeptam fuisse, quam alias partes.

Lindanus hanc ejus substantiam geminam esse dicit, exteriorem nerveam, interiorem carneam: quippe cutem cortici mali aurantii assimilât, cujus exterior aurea pars tenuior, durior, densior, & porosior est; interior verò alba pars crassior, mollior, laxior, & fungosior: ita etiam cutem se habere putat. Hoc ipsum etiam voluit Massa, qui tamen in eo erravit, quod illam ex duabus pelliculis constari, easque acie novaculæ dividi posse, scripserit.

Ratione autem substantiæ differt cutis in *Differentia.* crassitie, tenuitate, raritate, mollitie, & duritie, pro varietate temperamentorum, ætatis, sexus, regionum, & partium.

Spigelius hic quæstionem proponit, scilicet, *an cutis sit tactus instrumentum.* Hoc videntur negare Aristoteles & Avicenna, sed affirmare Galenus cum suis asseclis. Ad dubii solutionem breviter dicendum. Membranam proprie esse instrumentum tactus, atque hinc cutem, quatenus membrana est, etiam sentire: sed quia illius particulis sentientibus etiam permiscetur aliæ crassiores non sentientes per se, hinc fieri quod ejus sensus sit aliquo modo temperatus, non obtusus, & non nimis acutus.

Temperamentum habet in primis qualitatibus temperatum, & sensum mediocrem. Cum enim tactui inserviat, ut externas injurias citius, & sine incommodo tutius persentiat, antequam internæ partes ab iis lædantur, medium inter tactibiles qualitates temperamentum habere debuit, cujus beneficio

*An sit tactus instrumentum.*

*Temperamentum.*

neficio omnia extrema exactissime perciperet. Et quia imprimis manibus constitutio tactibilibus qualitatibus explorari solet, hinc earum interna cutis maximè temperata est, & mediocris sensationis, modò per labores callo non sit obducta.

*Figura.*

Figuram planam obtinet; aliam autem peculiarem non habet, sed eam, qualiscunque fuerit, à subjectis partibus mutuatur, secundum quarum figurationem æqualis aut inæqualis, prominens & extuberans, vel contracta & depressa apparet.

*Lineamenta.*

In multis partibus varia lineamenta, ut & inscriptiones ac rugas, pro motuum varietate, varias habet, ex quarum in manu inspectione mira pollicentur chiromantici.

*Motus.*

Nusquam mobilis est per se, sed ubi movetur, ibi movetur vel à partibus quas investit, vel à musculis ei annexis, ut in fronte & occipite.

*Nutritio & vasa.*

Nutritur sanguine ei per innumeras arteriolas infuso. Venulas etiam habet innumeras, quarum multæ se manifeste exonerant in jugulares, axillares, epigastricas, lumbares, & saphænas: sed innumera etiam sanguinem suum invisibiliter per alias majores aliquas venas ad cor remittunt. Spiritus animales per nervos recipit, quorum ramuli exiles fibrillæque innumerae è subjectis partibus in eam terminantur, & acutum sensum ei conferunt.

*Foramina.*

Continua est, exceptis iis locis ubi perforatio necessaria fuit ad introitum & exitum necessariorum, ut ore, oculis, ano, utero, poris, &c.

*Pili.*

Multis in locis pilosa est, ut in capite, & adultioribus in pube, mento, labiis, sub axillis, præterea multis etiam, præcipue viris, in thorace, cubitis, femoribus, &

tibiis. In pilorum tamen copia, eorumque colore, longitudine, crassitie, & levitate, pro varia temperamentorum constitutione magna est diversitas.

Color cutis varius est, 1. *Pro diversitate colorum regionum*: hinc aliis fulvus, ut Scythiis: aliis flavus, ut Persiis, teste Hippocrate: aliis niger, ut Æthiopibus, Brasiliis, & Nigritis: aliis medius inter flavum & nigrum, ut multis Indis: aliis medius inter fulvum, rubrum, & nigrum, ut Mauritanis: aliis albus, ut Europeis & Asiis. 2. *Pro diversitate temperamentorum, & humorum in ea contentorum*: hinc pituitosis candidus, biliosis flavus, melancholicis fuscus, sanguineis floridus est. 3. *Pro diversitate corporum subjectorum*: ut si carni adhæreat, sicut in genis, magis rubet; si copiosa pinguedini, albicat; si parti arida & rugosa, fuscus color est; si venis magnis, livet. 4. *Pro diversitate Solis exurentis*: hinc illis quorum cutis continuè Soli exponitur, multo magis fuscus est, quam aliis qui in umbra vivunt.

Actioe an usus cuti adscribendus sit, *Ufus*, disputatur. Omnem actionem ei denegat Galenus, *lib. de caus. morb. cap. 6.* & usus potissimum gratia illam à Natura constructam esse dicit. Contrà, Julius Cæsserius Placentinus, *lib. de tact. org. sect. 2. cap. 1.* præter usum ei actionem aliquam publicam adscribit, quatenus tangendi munus peragat, & qualitates dignoscit atque dijudicat. Cum Galeno sentit Aristoteles: pro Julio Cæsserio stant multæ rationes, quas ille ipse longo sermone recenset & expendit, *lib. citat. à cap. 1. ad 9.* atque *ibidem* porro ulterius de organo tactus acutè differit, à *cap. 10. ad 19.*

## CAPUT IV.

## De Pinguedine, Panniculo carnosio, &amp; membrana musculorum.

*Pinguedo.*



Inguedo, Græcis *πικνυδα* dicta, est substantia unctuosa, ad tenuissimam membranam, panniculo carnosio incumbens, eique arctè copulatam, frigore condensata, ex sanguinis portione oleosa ac sulphurea producta: quæ cuti substrata, non minus penetrabiles frigidi noxas excludit, quam immodicam insiti caloris discussionem prohibet, & partes interiores humectat, iisque motum faciliorem præbet.

Cum dico, illam frigore condensari, tunc per *frigus* intelligo minorem calorem, non verò absolutum frigus, omni calore destitutum. Hanc rem latè explicat Andr.

Laurentius, *Anat. lib. 6. cap. 6.* ubi multis rationibus & similitudinibus clarissime demonstrat, quomodo minor calor concretionem efficere possit. Etiam admodum doctè omnes contrarietates super hac re ultro citroque adferri solitas expendit & decidit Vallesius, *Controvers. Med. & Philos. lib. 1. cap. 10.*

Materia igitur pinguedinis, ut modò dictum, est sanguis (hinc fit quod nulla exsanguia pinguedinem vel adipem habeant) isque non qualiscunque, sed optime coctus oleosus ac sulphureus, ex aërea maximeque laudabili alimenti parte coctione confectus. Hinc fit quod illis quibus sanguis non est oleosus (etsi copiosus) sed *servidus*,  
B 2



fervidus, biliosus, melancholicus, malè coctus, serofus, falsus, vel quacunque de causa acris (qualis est scorbuticis & hypochondriacis) non evadant pingues: propterea quod per vehementem & acrem fermentationem, ab acribus particulis inductam, oleosa sulphurea particula in sanguine, aut non satis copiosa generentur, aut genitæ consumantur, antequam è massa sanguinea separari, & membranis accrescere possint. Hinc etiam patet, quare infantes molliter quidem tumidiusculi, sed non pingues evadant, quia sanguis ipsis valde serofus est, & firmiores magisque oleosa ejus particula in alimentum & incrementum partium firmiter absumuntur: unde Aristoteles, lib. 3. *histor. anim. cap. 13.* bene scripsit, *quod omnia aetate provelta potius, quam novella, pinguescant; sed precipue cum jam sua longitudinis & latitudinis modum adeptæ, augeri in profundum incipiunt.*

causa efficiens.

Efficiens causa primaria est calor moderatus (non magnus, utpote qui nimis dissipat: non parvus, qui neque bene coquit, neque convenientes vapores resolvit) secundaria causa est vaporum à tali calore suscitatorum ad membranas frigidiores condensatio. Nec mirum videri debet, quod illa condensatio fiat, cum illi vapores impingunt in membranas non absolute frigidas (etsi respectu aliarum magis calidarum partium frigida dicantur) sed modicè calidas (ut etiam ante dictum) cum videamus plumbum liquatum, ubi ab igne remouetur, mox cogi, etsi in locum satis calidum; igne tamen paulo minus calidum, deponatur.

Illi autem oleosi sulphurei vapores non solum impingunt, nec semper condensantur ad membranarum superficiem, verum si satis porosa sint membranae, poris ipsarum sese undique insinuant, easque totas pervadunt, cum iis uniuntur, & earum pars fiunt, atque sic per tales universas membranas pinguedo dispergitur, quemadmodum id fit in illa membrana quæ cuti proximè subternitur. At si magis firmæ & densiores sint membranae, tunc ad earum superficiem duntaxat pinguedo vel adeps accrescit, ut interdum id fieri videmus in intestinis, corde, aliisque nonnullis partibus membrana firmiore donatis.

glandula adiposa, & ductus adiposus.

Doctissimus Malpighius, *exercit. de om. ping. & adip.* inquit quidnam illud sit, quo mediante oleosa & adiposa particula è sanguinea massa separantur, cum solus calor (qui quolibet quidem indifferenter vapores è sanguine suscitare, sed non speciatim oleosos à reliquis discernere potest) id efficere non posse videatur. Atque hinc iudicat secretionem istam fieri mediantibus quibusdam glandulis, isti muneri speciatim

dicatis, ab iisque oleosas particulas infundi in peculiare quosdam ductus, quos *adiposos* appellat (de his vide pauca *sequente cap. 6.*) & per hos membranis hic illic affundi: atque *ibidem* super hac sua nova speculatione multas probabiles rationes adducit. Verum hæc magni viri nova speculatio, non spernenda quidem, nec temere rejicienda est, sed cuilibet pensius examinanda venit, cum illam non parum dubiam reddant hæc sequentia. 1. Quod istæ glandulae nusquam visui offerantur, nec ullibi demonstrari possint. 2. Quod de ductibus adiposis, eorumque cavitate res non minus incerta sit. 3. Quod materia adiposa seu oleosa sit nonnihil viscida, atque hinc inepta quæ per glandulas invisibiles ex sanguine separari, ac per ductuum invisibilium imaginarias aliquas cavitates transire possit, cum vix tenuissimi animales spiritus (qui liquidi & minimè viscidi sunt) per invisibiles nervorum poros transire queant, sed à levissimo quocunque impedimento, ac precipue à paucillo viscido humoris, sistantur, ut liquet in paralyti. 4. Quod multis sudor subpinguis toto corpore erumpat, cum tamen fidem superet, totius corporis cuti passim ubique interius hujusmodi glandulas appositas esse.

Ex his jam dictis fati liquet quid de temperamento sentiendum sit, scilicet pinguedinem esse modicè calidam, licet frigore concrecat, & sanguine minus caleat. Quod ejus temperamentum patet, 1. Ex ejus materia, quæ est sanguis coctus & æreus, ac sulphureus. 2. Ex causa efficiente, quæ est calor. 3. Ex forma, quæ est oleositas. 4. Ex fine, qui est, coctionem partium juvare, & suo temperato calore externum frigus arcere. 5. Ex eo quod flammam facile concipiat. Galenus, lib. 4. *de usu part. cap. 9.* hac de re sic inquit: *Pinguedo quod calida res sit, cognoscitur ex sensu ipso, utentibus ea vice olei.* Illud ipsum maxime etiam hoc indicat, quod scilicet facile in flammam transmutetur, tanquam ad flammam proxime accedens, nihil enim frigidi prompte comburitur.

Temperamentum.

Piccolhominus pinguedinem membranae propriæ, densæ, sed tenuissimæ accrescere scripsit (hoc etiam nos paulo ante statimus) propterea quod in viventibus subtilioris sanguinis oleosi vapores per cæcis spiracula copiosi effluerent, nisi eos densa frigidaque aliqua membrana (hanc Malpighius *adiposam* vocat) retineret ac coqueret, seu coagularet. Verum Riolanus, *anthropogr.* putat ad illud negotium non esse peculiari membrana, cum illa condensatio satis fieri possit inter densitatem cæcis & membranae carnosæ (fortè sicut extrinsecus accrescit intestinis & renum membrana) quod eo probat, quia in obese corpori-

An peculiarem habeat membranam.

corporibus, præsertim in mulieribus, sæpe membrana carnosâ pinguedine multâ superne & inferne obducta est, eique media interjacet. Hoc ipsum alii etiam eo experimento probant, quod si pinguedo ad ignem fundatur seu liquetur, non supersit aliqua membrana ei propria, sed tantum membrana carnosâ. Atque hinc putat Riolanus, pinguedinem non esse describendam pro parte aliqua peculiari, cum videatur unicam partem constituere cum membrana carnosâ. Idem tamen Riolanus, in *enchiridio anat. lib. II. cap. 7.* rejecit hac suâ priore sententiâ, peculiarem membranam pinguedini adscribit. Hanc etiam nos (ut modò dictum) adesse putamus: quippe si pinguedo cuti substrata manibus discerpatur, ejus firmior cohesio per tenuem membranam facile innotescit: & licet membrana carnosâ nonnunquam etiam pinguedine obducatur (quemadmodum illud ipsum intestinis, aliisque variis membranosis partibus interdum contingit, hoc tamen non probat pinguedini isti, qui toti corpori sub cute circum tenditur, suam propriam non esse membranam.

Verum hic dicat quis, hæc membrana in prima fœtus formatione etiam cum aliis solidis partibus ex semine delineata fuisse debuisset: atqui neque in abortivis, neque in maturis fœtibus primo natis, ulla pinguedo sub cute deprehenditur, ergo talis membrana cui pinguedo dicitur accrescere, illic non adest. Respondeo: illam membranam ab ipso principio in omnibus fœtibus adesse, quamvis ob summam tenuitatem, & arctam cum carnosâ panniculo cohesionem, atque etiam pinguedinis in isto exordio ei nondum adhærentis defectum, non tam manifeste in conspectum incidat. Memini me aliquando in fœtu quodam majusculo ac carnosâ, in partu extincto, aliquid tenuissimæ pinguedinis, instar cujusdam spumæ, isti membranæ adhærentis, reperisse, & tanquam rarum quid, in isto exordio videri insolitum, præsentibus Medicinæ studiosis demonstrasse. Hac in parte nobiscum sentire videtur Petrus Laurenbergius, utpote qui, *Anat. lib. I. cap. 8.* demonstrat pinguedinem [dixerit potius, membranam cui postea pinguedo accrescet] in utero efformari, nec ullum visum fuisse editum fœtum cui defuerit pinguedo (id est, ejus membrana) corpus ambiens, & omentum.

Membrana  
adiposa.

Sicut pinguedo corpus ambiens propriæ membranæ accrescit, ita illud ipsum etiam contingit in aliarum partium pinguedine. Nam ubicunque observatur pinguedo, ut in musculorum interstitiis, corde, renibus, aliisque partibus, ibi inveniuntur multiplices tenues membranæ, sacculorum adinstar seu lobulorum excavatorum, extremitatibus

vasorum appensæ, quæ alteri substratæ cuidam crassiori membranæ, velut fundamento & basi, adhærent. In his adiposæ; seu oleosæ ac pingues ex sanguine secretæ materiæ globuli condensantur & colliguntur: atque sic ex pluribus sacculis adiposa materia repletis, sibi invicem appositis, insignes fiunt pinguedinis portiones. Malpighius per suâ microscopia observavit, dictos sacculos diversimode figurari, aliosque depressam, alios ovalem, alios aliam quamcunque habere figuram, & invicem connecti, partim per membranas ipsas ex quibus efformantur, partim per vasorum reticulum. Notandum autem, quod hujusmodi sacculi membranosi omnibus crassis membranis adnati non sint, atque hinc fiat quod omnibus membranis pinguedo non accrescat, sicut in pulmone, vesica, meningibus, hepate, liene, &c. notum est; utpote quorum investienti membranæ tales membranosi sacculi impositi seu adnati non sunt, atque hinc pinguedine destituuntur. De ossibus dubitari aliquo modo potest, an in iis sacculorum membranaceorum vicem subeant ipsæ eorum cavitates (in majoribus magnæ, in minoribus parvæ & spongiosæ) iis interius insculptæ; an verò in illis cavitatibus membranosi sacculi modò dicti contineantur, in quibus medulla pinguis colligitur: quod posterius eo nonnihil probabile videtur, quod medullosa pinguedo fibrillis & membranulis aliquo modo intertexta appareat.

Prædictam quæstionem, de pinguedinis membrana, alii ulterius extendunt, & non querunt, an pinguedo corpus ambiens, aut sola, aut cum membrana cui adhæret, partem corporis constituat, sed anne qualicunque modo inter partes corporis sit numeranda? Qui negativam sustinent, dicunt, 1. Quod non sit pars spermatica ex semine genita, quia in prima partium delineatione nusquam apparet. 2. Quod communi cum reliquis partibus vita non fruatur, quia insensibiliter, modò increfcit, modò absumitur. 3. Quod per inedias in aliarum partium nutrimentum convertatur, cum tamen una pars non possit nutrire aliam. 4. Quod nullam actionem obeat. 5. Quod non habeat propriam circumscriptionem. Verum quandoquidem affirmativa nobis potior, & verior videtur, respondeo Ad primum; partium spermaticarum prima solum minima delineamenta ex semine gigni, eaque in principio plerumque adeo tenuia esse ut oculis conspici nequeant, vel occulta lateant, sicut liquet in dentibus, aliisque variis partibus, quæ non nisi diu post apparent, ubi per oblata alimenta incrementum sumpserunt, & sic quoque se rem habere in pinguedine. Ad secundum, quod sicut muscoli per morbos insensibiliter decrescunt.

decreſcunt, atque inde tamen dici non poſſit, illos communi vita cum reliquis partibus non frui, ſic etiam per incrementum aut decrementum pinguedinis, non probari illam communi vita cum reliquis partibus non frui. Ad *tertium*; quod falſum ſit pinguedinem per inediaſ cedere in aliarum partium nutrimentum, in earumque ſubſtantiam mutari, & omnino certiffimum exiſtat, quod hæc per inediaſ, ſicut aliæ partes, imminuatur, deſtituta ſuo conveniente alimento. Ad *quartum*, quod Galenus, 6. de placit. cap. 8. pinguedini functionem adſcribat, per functionem intelligens uſum, ſicut etiam multis aliis locis actionem & uſum confundit, quamvis re vera differant, ut dictum cap. 1. Ad hæc, cuticulam, oſſa ſpongioſa narium, varias membranas, pilos, aliasque varias partes, etſi nullam actionem obeant, ſed uſum ſolummodo præſtent, e partium tamen numero non excludi, hæcque de cauſa etiam pinguedinem ex iſto numero excludi non poſſe. Ad *quintum*, quod propriam circumscriptionem habeat, licet non ad punctum contractam: eodem modo ſicut caro, quæ & ipſa exacte determinatam circumscriptionem non habet. Præterea ſciendum, quod figura non ſit de eſſentia partis.

Color.

Color pinguedinis in homine, nec non in brutis, pro ætatum ratione nonnihil aliud eſt. Nam in junioribus ſubſſavus, vel potius nonnihil ſubroſeus eſt color, in ſenioribus magis albicans, in decrepitis omnino albus: quamvis etiam in quacunque ætate hæc regulæ non ſint adeo perpetuæ, quin in iis nonnunquam exceptio, ſeu Naturæ luſus obſervetur. Laurembergius non male coloris diverſitatem in qualitates ſanguinis rejicit. Alii à cauſis externis illam deducere malunt. Sed hi cum Laurembergio convenient, ſi dicamus, à cauſis externis mutari qualitates ſanguinis, & ſic pro harum diverſitate mutari pinguedinis colores.

Pinguedo aliæ eſt interna, in partibus interioribus concreta: aliæ externa, cuti proxime ſubſtrata, de qua hoc loco primum ſermonem habemus. Hæc toti corpori circumfuſa eſt, exceptis labiis, auris parte ſuperiore, palpebris, ſcroto, & pene, quibus oneri fuiſſet.

Copia.

Differt tamen ejus copia variis modis, nam 1. *Ratione ætatis*, in flore ætate copioſior eſt, quam in pueritia aut ſenectute. 2. *Ratione ſexus*, foeminis copioſior eſt quam viris. 3. *Ratione temperamenti, regionis, & anni temporis*, longe parcius eſt calidis & ſiccis, quam ſubfrigidis & humidis. 4. *Ratione motus & quietis*, ſedentariis & otioſis in quiete viventibus longe copioſior eſt, quam iis qui multis gravibuſque exercitiis aut laboribus occupantur. 5. *Ra-*

*tione victus*, liberaliter & ſplendide epulantibus, atque alimentis euchymis & copioſis utentibus, longe copioſior eſt, quam parce viventibus. 6. *Ratione ipſarum partium*, copioſior eſt iis partibus quibus magno uſui eſſe debuit, ut abdomini, mammis, natibus: parcius iis quibus parvum uſum præſtare debuit, ut manibus & pedibus: nulla iis, quibus inutilis & oneroſa fuiſſet, ut in ſupra nominatis. 7. *Ratione valetudinis*, copioſior eſt in ſanis, quam in male valentibus & morboſis.

Interioribus partibus accreſcit adeps, *Adeps.* etiam ſevum, & Græcis *σάπ*, dictus, qui & ipſe eſt pinguedo, voce pinguedinis laxè ſumpta. Verum ſpecificè loquendo, differt à pinguedine, quod hæc mollior & humidior ſit, facile liqueſcat, & liquata tardius iterum concreſcat; cum adeps durior & ſiccior ſit, difficulter liqueſcat, & fuſus ſeu liquatus mox iterum concreſcat. Sciendum tamen, varios Medicos his vocibus promiſcue uti, & quamcunque oleoſam ſubſtantiam, cujuſcunque animalis, *πικρῶν, σάπ, pinguedinem, adipem, & ſevum*, indifferenter pro libitu appellare, quod etiam monuit Galenus, qui ipſemet hanc vocum proprietatem & diſtinctionem ſæpe neglexit: & lib. 11. ſimpl. cap. de ping. ſic inquit: *Si voles, oleoſam & pinguem in animalibus ſubſtantiam omnem Adipem appellato; ſed & pinguedinem appellare totum hoc genus licet.*

Panniculus carnoſus, etiam Membrana carnoſa, Membrana communis, & Muſculus, membraneus, Græcis *ψάλλω σαρκοῦς* dictus, membrana eſt valida, fibris carnoſis, præcipue circa frontem, collum, occiput, auriumque plagas, donata, & toti corpori ad tegumentum ac deſenſionem circumtenſa, ſenſuque exquiſito prædita, unde acerbis laceſſita vaporibus, corpus quadam concuſſione ac rigore convellit.

Panniculus carnoſus.

Situs eſt hic Panniculus in homine proximè ſub pinguedine, & extenſus etiam ad eas partes quæ pinguedine carent, quales ſunt palpebræ, labia, ſcroto, & penis. In plurimis brutis cuti ſubſternitur, cui firmiter adhæret, & pinguedinem ſibi ſubjectam habet. Hujus beneficio multa bruta cutem mobilem habent, & muſcas, aliaque infeſta iſto motu excutunt, ut videre eſt in equis, vaccis, cervis, & elephantibus.

Situs.

Dorſo firmiſſime adhæret, ibique craſſiſſima eſt, ac propterea inde ejus originem vulgò derivant.

Connexio.

In collo, fronte, & piloſa capitis parte, à ſubjectis muſculis vix ſeparari poteſt, & muſculo lato tam firmiter adneſcitur, ut eum conſtituere credatur.

Colore in fœtu non nihil rubet, in adultis *calor.* albicat,

albicat, qui tamen color ratione incumbens pinguedinis, vasorum, & fibrarum carnearum, aliquantum varius est, ut modò pallidior sit, modò medio modo se habeat.

Interius lento quodam humore, ad musculorum lævigationem & faciliorem motum, oblitus est.

*De usu ab  
funda opinio  
Zasii.*

N. Zas, in suo belgico libello de vore animalium, huic membranæ prorsus inauditum usum adscribit: quippe statuit illam serosos humores undequaque ad se attrahere, & esse commune promptuarium, ac veram sedem feri seu roris: quod serum hinc ad spermaticas omnes partes defluere, eorumque impuritates abluere tradit: ex hac quoque omnis sudoris scaturiginem exsilire, hancque cum aliis membranis in articulo- rum læsionibus sæpe incredibilem aquæ glærealis, vulgò *articularis* vocatæ, copiam profundere dicit, aliaque multa inania sibi somnia (secundum fundamenta institutionum illitterati sui præceptoris Ludovici de Bils) de hac membrana fingit, quæ aliis frivolo nisu persuadere studet: planè nescius huiusmodi nullam tractionis vim huic membranæ in esse, ut nec ullum locum aut receptaculum in quo feri seu roris manifestam aliquam quantitatem, multo minus ma-

gnam copiam, ad omnes spermaticas partes dimittere, & per sudores profundendam, coacervare possit, nec in satis densa tenuique membrana poros ad tantam copiam hospitandam sufficere, imò in dissectionibus corporum, tam vivorum, quam mortuorum, illam nunquam tumidam, seu ab huiusmodi seroso, aut alio quocunque roroso (ut ille eum appellat) humore, turgentem inveniri.

Membrana musculorum communis (alii propriam appellant) est tenuis membrana omnes & singulos musculos investiens, eosque à se invicem & vicinis partibus distinguens.

Riolanus, *animadv. in Bauhin*, reprehendit Bauhinum, quod hanc partem partibus continentibus communibus annumeret, & interim appelet membranam musculorum propriam. Verum in meliorem partem facile explicari potest mens Bauhini, si dicatur illum hanc membranam communibus integumentis continentibus annumerasse, quatenus propria quidem est solis musculis, sed tamen omnibus musculis communis, id est, talis quæ quidem solos, sed interim omnes communiter musculos ambit, tegit, & continet.

*Membrana  
musculo-  
rum.*

## CAPUT V.

## De Partibus continentibus propriis.

*ossa.*



Artes continententes huic infimo ventri propriæ, sunt ossa, musculi abdominis, & peritonæum.

Ossa sunt pauca, & vasta, scilicet lumborum vertebræ quinque, os sacrum, cum ei annexo osse coccygis, & os ilium, coxendis, ac pubis, de quibus latius agetur *lib. 9. cap. 12.*

*Musculi.*

Musculi abdominis decem (interdum octo, rarius novem) numerantur, membranæ propriis & fibrarum cursu vel situ manifeste distincti, utrimque æqualiter sibi invicem oppositi.

*Oblique descendentes.*

Primum par, quod externum, constituunt *Musculi oblique descendentes*, fibris obliquis descendentibus præditi.

Hi ab inferna parte sextæ, septimæ, octavæ, nonæ, decimæ, & undecimæ costæ, antequam illæ in cartilagine abeant, digicatum pinnis Serrati majoris implexi, ac processibus vertebrarum lumbalium transversis oriuntur, costæ ossis illi simul etiam adhærentes, latoque tendine in medio abdomine ad lineam albam definiunt: qui tendo proximè ascendenti tendini tam firmiter adhæret, ut cum eo quasi indivisus fiat, & citra dilacerationem ab eo

separari nequeat. Incipit autem membranosa ejus tendo ad *lineam albam*, quam Spigelius *lineam semilunarem* appellat. Hos tendines in viris (ut etiam fit in duobus subjectis paribus, ascendente & transverso) utrimque peritonæi processus ad testes excurrentes in mulieribus verò uteri ligamenta vermiformia, transeunt; eoque transitu nimis dilatato, aut rupto, si omentum vel intestina in inguen aut scrotum excidant, fit hernia.

Nervos, arterias, & venas ab intercostalium ramis parte superiore sortiuntur.

Est autem *Linea alba* (hanc etiam *Linea alba candidam* vocant Anatomici) pars candidans à mucronata cartilagine per medium abdominis & umbilicum ad os usque pubis excurrentes.

Tendineam habet firmitudinem, & conflatur ex concursu finium tendinum musculorum abdominis descenduntium, ascenduntium, transversorum, & pyramidalium.

Supra umbilicum latior, infra eum angustior est, atque in gravidis multoties sublivida apparet, quem colorem usque ad tertium à partu menssem conservare nonnunquam visa est.

Riolanus,

Riolanus, *animad. in Bauh.* sentire videtur, hanc esse peculiarem membranam, à cartilagine xyphoide per umbilicum ad ossium pubis commissuram excurrentem, & dictorum musculorum tendines excipientem. Idem, *animad. in Bartholin.* dicit, lineam candidam esse imaginariam; fortè quod præ senio cæcutiens illam amplius videre non potuerit.

*oblique  
ascendentes.*

*Secundum par* constituunt *Musculi oblique ascendentes*, fibris ascendentibus donati, & prioribus immediate substrati, quorum fibris descendentes suas ascendendo decussatim submittunt.

A transversis lumbalium vertebrarum (è quibus nervos recipiunt) processibus, & ossis Sacri spinis, membranosa, atque ab ossis illi externo margine carnosio principio oriuntur. Hinc carnosii ascendentes, superius octavæ, nonæ, decimæ, undecimæque costæ cartilaginibus junguntur, & lato nerveoque tendine, musculos rectos transcurrente, in lineam albam terminantur; ac ramulis arteriarum, ex arteria Muscula juxta lumbos enata, prodeuntibus, nutriuntur, venasque ad venam musculam projiciunt.

Vulgò tradunt Anatomici, hos musculos geminato tendine rectos musculo excipere, seu comprehendere, quod tamen non videtur verosimile, nam superiore quidem parte ascendentium tendines rectis incumbere, eorundemque tendinosis intersectionibus tam firmiter alligari deprehenduntur, ut ab illis difficulter integri separari possint: sed inferiore, seu interiore rectorum parte illi tendines demonstrari nequeunt, ac proinde à Vesalio & Riolo merito eluduntur & non agnoscuntur, atque Laurentius à Riolo jure reprehenditur, quod illos descripserit.

*Resti.* *Tertium par* exhibent *Musculi recti*, à recto fibrarum ductu denominati.

Hi validissimi sunt, & latitudine digitos transversos tres, quatuorve, crassitie minimum digitum æquant.

Ab utroque latere cartilaginis ensiformis, à sterno, & quatuor costarum cartilaginibus (quo loco nervos tres quatuorve ab intercostalibus accipiunt) carnosii oriuntur, sicque recta descendentes, ac prope umbilicum quasi uniti, & binis, ternis, interdum quaternis inscriptionibus, quibusdam transversis, quibusdam nonnihil obliquis, veluti in plures musculos dirempti, valido, crasso, tendinosoque fine desinunt in ossa pubis. Nonnulli Anatomici eorum principium ab ossibus pubis, finem in costarum cartilaginibus posuerunt. Alii illos ex pluribus musculis confari putarunt, eorumque principia partim in costarum cartilaginibus, partim in ossibus pubis, fines verò seu tendines ad eorum intersectiones statuerunt, &

singulas partes inter duas tendinosas inscriptiones contentas singulos musculos esse tradiderunt. Cui opinioni, non omnino absque, calculum suum concedit Spigelius, eo argumento præcipue inductus, quod non tantum in superioribus partibus recipiant nervos ab intercostalibus, verum etiam in inferioribus à primo lumborum pari. Nam perpetua regula est: Omnis musculus movetur versus suum principium. Ubi autem nervus inseritur, ibi (teste Galeno) est principium musculi (rationem vide infra, *lib. 5. cap. 1.* atqui hic varii nervi inseruntur in eorum partes, non modò superiores & inferiores, verum etiam illas quæ singulis intersectionibus interjiciuntur, igitur multa sunt horum musculorum principia, quæ cum non possint esse multa in uno musculo, necessario singuli recti musculi non constant ex uno, sed ex pluribus musculis. Præterea, si primariam eorum actionem spectemus, illa est, ventrem fortiter comprimere, ad fœcum fœtusque expulsionem: quæ compressio & expulsio non requirit, ut os sternum deorsum, vel ossa pubis sursum trahantur, sed ut illa ossa suis locis maneant, omnesque & singulæ horum musculorum partes simul intumescant, sicque superiores cujusque partes, alias sibi ad primas intersectiones proximas, sursum: inferiores alias sibi proximas, deorsum; mediæ intersectionibus interjectæ utrimque adstantes ad se trahant.

Quæ tractiones cum fiant à distinctis & diversis partibus ad partes diversas (quales tractiones in uno musculo fieri nequeunt) sequitur singulos rectos musculos constare, non ex uno, sed ex pluribus musculis.

Sicut arterias recipiunt insignes ab epigastricis ascendentibus & mammariis descendentibus, sic etiam venas majusculas ad venas epigastricas & mammarias emittunt.

*Vasa.*

Hæ arteriæ & venæ suis finibus in parte interiore, circa medium, per anastomoses coire vulgo dicuntur, ita ut epigastricarum fines aperiantur in fines mammariarum, atque hinc multi consensum uteri cum mammis deduxerunt. Verum ego has anastomoses semper defuisse comperi, neque hactenus mihi ullum contigit subjectum, in quo non fines hi ad pollicis, vel ad minimi digiti latitudinem à se invicem distarent, unde dicti consensus causam hinc nullo modo procedere posse, pro certissimo habeo. Sic etiam Vesalius, *in exam. obs. Fallopii*, scribit se observasse, nunquam illa vasa inter se uniri, ut communionem quandam inter ea intercedere dici posset. Bartholinus quoque, *in dubiis anat. de lact. thorac. cap. 1.* scribit se in juvenula sana, sexta post partum hebdomada occisa, has anastomoses quævisse, sed nullas invenisse, imò ramulos

*An hic de-  
tur anasto-  
mosis.*

ramulos ascendentes & descendentes transversum amplius digitum à se invicem fuisse remotos, Riolanus tamen dictas anastomoses acriter defendit, *Anthropog. lib. 2. cap. 8.* easque à se discipulis centum demonstratas fuisse scribit. Verum ego illius verbis tantam fidem non tribuo, quantam meis propriis oculis: potuit tunc temporis cæcutisse senex Riolanus, atque ita putasse se aliquid videre, quod tamen re vera non erat. De his anastomosis videantur nonnulla, *lib. 6. cap. 3. & lib. 7. cap. 7.*

*Pyramidales.*

*Quartum par*, rectis infimo loco incumbens, faciunt *Musculi pyramidales*, à pyramidalis figura denominati, ab usu vero *Succenturiati* dicti, quia Rectis subsidio venire creduntur in sua actione.

Oriuntur exigui & carnosi ab ossibus pubis ubi etiam nervos recipiunt. Ab hac latiore basi paulatim graciliores assurgunt, vixque quatuor digitorum transversorum latitudine fines rectorum conscendentes, sed longitudine nonnihil impares, sinistro brevior & angustior existente, tendinem suum acutum lineæ albae inferunt, eumque nonnunquam usque ad umbilicum gracili sine extendunt.

Vesalius, Andernacus, & Columbus, illos malè pro rectorum principio describunt, cum intercedens membrana, atque etiam separatio, quæ sine ulla læsione Rectorum facile peragitur, item fibrarum obliquitas à Rectis multum diversa, ac denique peculiaris insertio in lineam albam, diversos & distinctos musculos esse, satis ostendant.

*Ulio.*

Vesicam comprimendi, & urinæ excretionem promovendi actionem iis adscribunt Fallopius & Riolanus.

Nonnunquam tamen hi muscoli ambo defunt, interdum alteruter desideratur, isque frequentius sinister, quam dexter, tuncque eorum locum latior & carnosior rectorum finis supplet. Utrumque, scilicet eorum modò præsentiam, modò defectum, in publicis & privatis demonstrationibus multoties exhibuimus.

*Transversi.*

*Quintum par* constituunt *Musculi transversi*, qui peritonæo subiecto firmiter annexi, & fibris transversis præditi sunt.

A ligamento ex transversis lumbalium vertebrarum processibus enato, & osse ilio, cartilaginoseque sex inferiorum costarum confinio prodeunt, arteriisque, venis, ac nervis cum oblique ascendentibus donati, etiam lato tendine in lineam albam desinunt. His peritonæum tam arcte adhæret, ut sine laceratione ab iis separari nequeat.

*Ulio musculorum abdominis.*

Omnes jam enumeratos musculos ventrem inferiorem comprimere, sicque alimentorum per vasa & viscera impulsionem, ac redundantium, & fœtus quoque maturi expulsionem promovere, atque etiam tho-

raci in valida expiratione & expectoratione suppetias ferre, item contenta viscera coercere & ab injuriis externis defendere, ac calore suo fovere, communis fert opinio. Verum ego paulo specialius de eorum actione loquendum sentio. Nam si in genere omnes compressioni ventris inserviant, quinam erunt illi qui continentes hujus ventris partes elevant? alterna enim fit earum elevatio & depressio, estque utraque æque necessaria ad alimentorum & humorum per partes contentas propulsionem, quod miror neminem hactenus animadvertisse. Operationum igitur horum musculorum notabilis distinctio est instituenda. Prima duo obliqua paria abdomen elevant: cum enim principis suis seu carnosa parte intumescunt, tunc tendines cum linea alba extrorsum trahunt & elevant, eaque intumescencia ordinariè concurret cum intumescencia musculorum thoracis delatantium, atque hinc in inspiratione simul etiam elevatur abdomen, quod quilibet in se ipso experiri poterit: præterea etiam citra inspirationem elevatio illa fieri potest, cum spiritus animales speciatim copiosiores ad hos musculos obliquos determinantur, & paucissimi influunt in thoracis dilatatorios. Hanc operationem, inter alia, etiam docet obliquus eorum situs, qui ad expressionem minus commodus fuisset: item eorum ortus, & tendinum longitudo. Reliqua autem tria paria compressioni manifestissimè inserviunt: quippe recti cum pyramidalibus, quando intumescunt, non possunt non fortiter ventrem deprimere: transversi intumescunt, quia à lumbis oriuntur, non possunt non, lineam albam retrorsum trahendo, ventrem constringere.

Spigelius, *lib. 4. anat. cap. 10.* adhuc alium usum abdominis musculis adscribit, scilicet truncum corporis ad latera, circulariter & oblique movere, atque antrosum flectere, quorum munerum illud obliquis, hoc rectis adscribendum foret.

Præter dictos musculos etiam ventris inferioris musculis accenseri possent, in lumborum & ossis Sacri regione siti: verum quia illi primario aliarum partium actioni inserviunt, ordini musculorum hujus ventris annumerari non solent.

Intima continens abdominis pars est *Peritonæum*, Arabibus *Ziphach* dictum, <sup>um.</sup> quod omnibus hujus ventris visceribus ~~circumferitur~~, id est, *circumitenditur*, eaque non tantum continet & coercet, verum etiam communi tunica investit. Vesalius quidem & Bauhinus, ex sententia Galeni, *4. de usu part. 9.* illi ad fœcum exclusionem adscribunt etiam intestina comprimendi officium: verum cum actio seu expressio illa sit voluntaria, necessario fit à musculis, voluntarii motus instrumentis, à quibus

C



peritonæum compressum propellit, atque ita solummodo per accidens exprimit.

Est autem membrana tenuis ac mollis, fibris spermaticis intertexta, intrinsecus lævis, & veluti humore oblita, extrinsecus fibrosa & nonnihil aspera.

A prima & tertia lumborum vertebra improprie oriri traditur, quia eo loco crassities ejus major, & firmior connexio est. Dico, *improprie*, quia nulla pars spermatica ab altera oritur, sed omnes ex femine originem sumunt. Fallopius illud à mesenterii principio oriri existimat. Lindanus, ex mente Riolani; illius ortum deducit à membrana extrinsecus vasa & viscera ambiente. Verum cum hæc potius desumatur à peritonæo, totum inferiorem ventrem investiente, non potest hoc ab ea oriri.

Ubique duplex est, quod tamen maxime liquet parte posteriore, circa spinam, renes, & vesicam, quibus locis crassissima est, quamvis etiam parte anteriore ejus duplicaturam, divulsione membranae superioris ab inferiore, aliquoties publicè demonstraverim.

*Duplicitas.*

Jacobus Sylvius notat illud in viris superna, in mulieribus inferna ventris parte crassius & robustius esse. Hoc Bauhinus in illis, crapulae potissimum deditis, ratione ventriculi; in his verò ratione uteri & foetus in eo concipiendi; à Natura factum putat. Verum Spigelius illud in utrisque, nunquam superna, at semper inferna parte crassius esse asserit. Quod magno consilio à Natura factum putat, cum hac parte omnium maxime ruptioni oportunitas sit:

quippe sedentibus, stantibus, aut ambulantis, viscera ad imam partem devolvuntur, quorum pondus ut peritonæum innoxie sustinere posset, hanc ejus partem munire ac firmare debuit.

Nervos habet exiles à vertebra thoracica *vasa* & lumborum: arterias & venas à diaphragmaticis, mammariis, & epigastricis.

Perforatur ad transitum oesophagi, & vasorum sursum ac deorsum, & in foetu extrorsum comeantium, ut & ligamentorum uteri vermiformium. Præterea in viris exterior ejus membrana processus duos oblongos, tanquam canales laxiores, versus scrotum descendentes efformat, ad tunelam testium & vasorum spermaticorum descendantium ac recurrentium.

Hæc membrana quibusdam *vaginalis* appellatur, quia testes quasi in vagina comprehendit. In mulieribus verò, quibus testes foris penduli non sunt, in utroque latere circumtenditur fini ligamenti uteri rotundi, cum eoque extra abdomen procedens, supra ossa pubis usque ad clitoridem extenditur. Interior verò ejus membrana vasis spermaticis, aut dictis uteri ligamentis, transeuntibus, ac cum exteriori vaginali membrana extra abdominis cavitatem tendentibus, arctè cohæret & connascitur. Eâ autem isto loco dilatata aut rupta fit hernia, & intestinum vel omentum, in viris in scrotum, in mulieribus in inguina descendit. Quodsi talis peritonæi ruptio aut dilatatio contingat in umbilico, fit hernia umbilicalis.

## C A P U T VI.

### De Partibus contentis:

& Primum,

### De Omento.



Artes in abdomine contentæ, aliz publicas coctiones peragunt, aliz distributioni alimentorum & sanguinis inserviunt, aliz excrementa segregant, aliz generatione operam navant.

Publicas coctiones absolvunt ventriculas, intestina tenuia, pancreas, hepar, lien, iisque inserviens omentum.

Distributioni sanguinis & alimentorum inserviunt, arteria, vena, vasa lactea, & lymphatica.

Excrementa segregant, intestinum crassum, folliculus fellis, porus biliaris, renes, & vesica urinaria.

Ad generationem faciunt vasa spermatica, testes, parastata, prostata, vesiculae seminales, pudendum muliebre, uterus, cum sinu muliebri. Quamvis autem penis & testes in viris abdomine excludantur, tamen ab Anatomicis solent contentis partibus annumerari, quia vasa spermatica ab internis partibus versus testes exeunt, & rursus deferentia à testibus versus interiora progrediuntur, atque etiam semen in interioribus prostatibus & vesiculis seminalibus collectum, per penem emanat.

De his omnibus postmodum in sequentibus ordine agendum.

Aperto peritonæo mox sequuntur vasa umbilicalia, de quibus dicetur inferius, cap. 32.

His

## Omentum.

His remotis, statim sese offert **Omentum**, quasi *operimentum* dictum, eo quod tegat intestina. Hoc Græcis *ἠπικλον*, *ἠπικλον* τὸ *ἠπικλον*, *innatare*, quod intestinis quasi innatatet: atque etiam *πασγμων*, *καὶ σαγὴν*, *sagena*, Latinis **Rete**, & **Reticulum**, propter errabundum vasorum ductum, quod retis piscatorum formam aliquo modo exprimit; Arabibus *Zirbu* nominatur. Hoc omnia sanguinea donantur, sed alia pinguius, alia magis membraneum obtinent.

## Descriptio.

Est autem membrana tenuis & gemina, instar marsupii duplicata, à peritonæo ventriculorum & colon extrinsecus investiente orta, seu procedente. Riolanus ejus originem à mesenterio derivat: quæ sententia à priore non differt, cum mesenterium membranas suas etiam à peritonæo habeat, cujus quasi productio quædam est.

## Substantia &amp; connectio.

Constat igitur ex tenui membrana, multis striis, quasi tenuissimis filamentosis fibrillis, intertexta, anteriore parte ventriculi fundo & lienis, ac interdum etiam jecoris labo rotundo, posteriore verò parte intestino colo adnata, & sic instar sacci complicata: item ex vasis & cœnosa ac molli pinguedine, quæ vasis præcipue circumfusa est, & in obesis admodum copiosa existit.

## Vasa.

Venas habet copiosas, quas transmittit ad eas quæ à ventriculo & liene versus hepata excurrunt, & ad venam portæ procedunt: quibus arteriæ à ramo cœliaco ac mesenterico, paucique nervi à plexu intercostalium nervorum sexti paris interseruntur.

## Contextus.

Vasorum autem sanguiferorum propagines hic illic finibus sibi invicem anastomosi occurrunt, relictis intra se conspicuis areis, quæ & ipsæ minoribus etiam ramulis, lateraliter à propaginibus majusculis exsiliens, replentur, ex quorum crebra conjunctione conspicuum rete efformatur, cujus efformata intermedia spatia varias figuras miro artificio fabrefactas præ se ferunt. Horum minorum ramulorum multi etiam ad pinguedinem excurrunt, ejusque lobulos non tantum leviter exterius perreptant, sed etiam intimè penetrant, & pinguedinis globulis nectuntur: quandoque etiam tenui superextensa membranula absconduntur, sicque visum effugiunt. Qualis repariatur omenti constitutio in bove, ove, cervo, cane, aliisque nonnullis animalibus, accurate describit Malpigijs, *exercit. de oment. ping. & adipe*.

## Glandula.

Dictis vasis glandulas exiguas, satis conspicuas, nunc plures, nunc pauciores, interponi scribit Vesslingius. Verum Riolanus, *animad. in Vessling. & Barthol.* dicit se has glandulas nunquam observasse: sed præ senio videtur oblitus melioris senten-

tia, in *antropogr.* descriptæ, qua confitetur se eas paucas agnoscere. Et re vera paucæ tantum sunt, exque solummodo in inferiore & profunda portione, pyloro ac lienis subtensa. Sic etiam Whartonus, in *adenographia*, paucarum tantum meminit, nam *cap. 12.* scribit se perpetuo duas duntaxat glandulas in omento reperisse, scilicet unam majusculam, non procul ab ejus commissura cum pyloro, quam observavit vasa lactea pauca à ventriculi fundo [errat; non enim à fundo ventriculi ulla vasa lactea exeunt, sed quantum ego jam bis terve observare potui, videntur hæc vascula non esse lactea, ad glandulam venientia, sed potius lymphatica ex ipsa glandula prodeuntia] versus omenti longitudinem decurrentia excipere, indeque obliquo ductu versus dextram pancreatis extremitatem dimittere, quam ex parte videntur subire, ex parte etiam præterlabuntur, & ad commune chyli receptaculum tendunt, in quod se exonerant. Alteram paulo minorem, versus lienem sitam, quam duplicem, triplicemve, imò interdum multiplicem invenit. Si autem in statu morbofo forte plures glandulæ inveniantur, illas *adventitias* nominat, quia in sanis non reperiuntur.

Doctissimus Malpigijs, præter antedicta *Corpora adiposa*, etiam in omento notat tenuissima *Corpora adiposa*.

quædam corpuscula, instar tenuium filamentorum producta, inter vasa excurrentia, quæ appellat *Corpora adiposa*, eaque putat esse peculiaris quædam vascula cava, materiam adiposam ad pinguedinis generationem deferentia, etsi eorum ortum, propter summam exilitatem, observare non potuerit. Suspiciatur interea hanc materiam adiposam, mediantibus quibusdam invisibilibus glandulis adiposis, è sanguine secerni, atque sic vasculis his demandari, per eaque in membranas effundi, ut ibi in pinguedinem coaguletur. Nam sicut ad humorum acidorum, salforum, lympharum, amarorum, &c. è sanguine separationem peculiare glandulæ destinatae sunt (hoc in sequentibus patebit plenius, in historiis pancreatis, hepatis, lienis, &c.) ita etiam putat ad oleosarum & pinguium particularum è sanguine separationem necessario peculiare glandulas (quas *adiposas* vocat) destinatas esse debere, easque oleosas particulas jam separatas per peculiaris vascula adiposa deferendas esse, eodem modo sicut sanguis, spiritus animalis, chylus, lymphæ, bilis, &c. per peculiaris vasa feruntur. Et porro super hac re multas ingeniosas & probabiles conjecturas ibidem adfert. Verum quid me de his glandulis & vasculis adiposis omnino dubium reddat, scripsi *precedente cap. 4.* ubi harum glandularum etiam mentionem feci.


- Situs.** Omentum situm est supra intestina, quorum anfractibus & gyris se insinuat, ac magna portione lieni & ventriculo interjicitur.
- Magnitudo.** In multis infra umbilici regionem vix protenditur, in quibusdam ulterius dimissum, ad vesicam usque pertingit, & nonnunquam in obesis mulieribus os uteri (cujus fundo rarissime adnascitur) comprimendo, teste Hippocrate, sterilitatem inducit, atque in viris, si per ruptum peritonæum ad scrotum delabatur, herniam epiplocelem facit. Versus lienem magis convolutum reperiri solet, quam aliis locis. Interdum mulieribus post partum circa medium ventrem collectum remanens, gravium, sæpiusque recurrentium dolorum causa est.
- Pondus.** Plerumque vix semi libræ pondus in adultis excedit: interdum tamen in plures libras excrevisse visum est. Sic etiam per nonnullos morbos mirum in modum augeri

deprehenditur, refertque Whartonus, se in virgine caohectica vidisse omentum carnosum, seu potius, glandulosum, semi pollicis crassitie. Nonnunquam etiam in sanis obesis & ventricosis copiosa pinguedine suffunditur, magnumque pondus acquirit: sic Vesalius, *lib. 5. cap. 4.* vidit omentum, quod ad quatuor aut quinque libras adauctum, mole sua ventriculum deorsum detraxit, ac pondere suo tandem mortis occasio fuit.

Ventriculi & intestinorum calorem fovendo, coctiones feliciores efficit: rorum splenicum, aliaque vasa ad ventriculum, colon, & duodenum euntia, fulcit. Ad hæc, impuritatem & illuviem hepatis, sed præcipue lienis multoties in eo colligi, patet ex Hippocratis, *lib. 7. aphorif. 55.* item ex ejusdem *lib. 4. de morb. & lib. 1. de morb. mulier.* nec non ex observatione Riolani, Rosseti, aliorumque Medicorum.

## CAPUT VII.

## De Ventriculo, Fame, &amp; Chylo.

- Ventriculus.**  Blato omento mox adest Ventriculus, quasi *parvus ventris* dictus, Græcis *ἡ κοιλία*, aut *κοιλίη*, atque etiam *γαστήρ*, vocatus.
- Definitio.** Est pars infimi ventris organica, in epigastrio proxime sub diaphragmate sita, quæ alimentum assumptum, dentiumque molatione præparatum, ac per gulam dimissum, suscipit, & concoquit, ex eoque meliorem alimentariam partem dissolvit, ac in chylum, id est, succum albicantem, cremori similem, convertit.
- Membrana.** Constat triplici membrana: exteriore crassa & communi, à peritonæo: mediâ carnosa: interiore rugosa, quæ mucilaginosâ crustâ obducta est, ut à succorum acrium injuriis illæsa servetur.
- Fibræ.** In media intimaque tunica imprimis conspicua est fibrarum varietas, in orbem, obliquum, & rectum exporrectarum, ad visceris robur, facilemque retentionem & expulsionem.
- Interior tunica.** Interior rugosa tunica ori & œsophago communis esse vulgò traditur, cum tamen longe alterius sit naturæ & structuræ, ac ratione sua temperiei & conformationis, mirabilem fermentativam qualitatem, quæ œsophagi orisque tunica destituitur, in se contineat, atque hinc peculiarem fermentaceum humorem in se generet & recondat, quo bene se habente coctiones ventriculi felicius procedunt, à bilis verò aliorumve vitiosorum humorum affusione corrupto, male peraguntur. Melius igitur dicetur,

hanc tunicam cum œsophagi orisque tunica non esse communem, sed continuam. Quippe magna est differentia inter continuitatem, & communitatem: illa enim solius substantiæ inseparabilem adhæSIONem; hæc simul etiam qualitatum & muniORUM æqualitatem quandum designat: ex. gr. arteria magna est quidem continua cum corde, sed non communis, quia non habet tales qualitates aut actiones, quales habet cor.

Temperamentum ventriculi est modice calidum (minus tamen quam cordis, hepatis, aliarumque multarum partium) qui modicus calor à circumjacentium partium calore modicè augetur & fovetur, ut sic chylica coctio melius peragatur, quæ alioqui ab harum in calore aut frigore excessis magnopere læditur.

In homine ventriculus unicus est: rarissime autem contingit in eo duos ventriculos inveniri, ejusque rei tantum tres observationes legi, quarum unam, de bifido ventriculo reperto, citat ex Jасolino, Jo. Theod. Schenckius, in *anat.* Alterum citat idem ex observationibus Salmerhi. Tertiã scribit Riolanus, *anthropogr. lib. 2. cap. 20.* his verbis: *Duplicem ventriculum continuatum, sed ore angusto intercisum, semel vidi in homine, scilicet in muliere, anno 1624. publice dissecta. In hac ventriculus erat oblongus, in medio artus, amplitudine sua aequalis colo intestino: eoque dissecto, inveni angustiam illam pyloro similem, in aliam cavitatem amplam desinere, qua postea in orificium*

cium crassius terminabatur, quod verum erat pylorus, à quo ecphysis, primum intestinum, exordiebatur. Præter hæc tria exempla, de numero aucto in homine, non memini me ullibi quidquam legisse. Verum duo sunt ventriculi in ruminantibus, aliisque multis animalibus, quibus cibi duriores ac crudiores conficiendi erant, nec non in avibus, quarum pulli cibis è ventriculo ejectis erant nutriendi. Tunc autem primus *Ingluvies* Latinis dicitur, qui membranaceus & tenuior, alter multo crassior & carnosior existit: & in priore videtur materia alimentaria ad coctionem præparari, in posteriore perfecte coqui. In nonnullis animalibus tres inveniri dicuntur, & teste Riolo, quatuor reperiuntur in iis ruminantibus quæ alteram duntaxat maxillam dentatam habent.

**Figura.** Figuram oblongam obtinet, versus sinistram partem gibbosam, versus dextram tenuiorem.

**Situs.** Spinæ incumbit ad primam lumborum vertebra, & sinistra rotundior ac majore sui parte, hepatis cedens, versus sinistram latum propendit: dextra verò minore magis attenuatus, sinistroque hepatis lobo cooperatus, ac pancreate suffultus, jungitur intestino duodeno.

**Magnitudo.** Magnitudo variat pro varietate ætatis & magnitudinis corporis, cujus proportioni respondere debet, quamvis etiam hæc non sit perpetua regula: nam varios dissecui proceros homines quibus ventriculus erat parvus; varios quoque brevioris staturæ, magno ventriculo donatos. Gulosi, voraces, magnique biberones, magnos plerumque solent habere ventriculos. Qualis fuit ille quem Jo. Theod. Schenckius, *anat. lib. 1. sect. 2. cap. 14.* se in gulofo vidisse refert, qui continebat decem vini cantharos. Etiam magnus fuit ille, de quo Spigelius scribit, *anat. lib. 8. cap. 8.* quod quatuordecim libras liquoris caperet, isque inventus fuerit in viro magnum os habente: atque hinc judicat Bauhinus, *anat. lib. 1. cap. 46.* ex magnitudine oris judicari posse de magnitudine ventriculi, & magno ore præditos cum magnum habere, & voraces esse: quod ipsum etiam judicat Spigelius. Verum neque illa quoque regula caret exceptione. Memini enim Falcoburgium, celeberrimum quondam Anatomicum Leydensem, nobis in publico theatro profecuisse cadaver hominis proceri ac validi, qui in vita maximus fuerat potator ac strenuus helluo, comestor etiam haud exiguus, & semper optime sanus, usque dum tandem funesto fene vitæ finem imponeret invitatus: in quo vidimus ventriculam adeo parvam, ut vix ad dimidiam ordinarii virilis ventriculi magnitudinem accederet; sed tripla crassitie ordinarios aliorum ventriculos superabat.

Distinguitur in fundum, seu cavitatem *Fundus*, (hæc inferior & maxima ejus pars est, potissima sua amplitudine ad sinistram latum inclinans, in qua prima coctio peragitur) & duo orificia, sinistram ac dextram,

Sinistram, vulgo *Superius* dictum, proprio nomine *Stomachus* appellatur, & œsophago ac diaphragmati, circa undecimam thoracis vertebra, è regione cartilaginis ensiformis, continuum, alimenta deglutita admittit. Hæc alterum magnitudine, crassitie, & amplitudine superans, multis fibris orbicularibus, nonnihil carnosus (hæc firmiorem ejus contractionem perficiunt, & in vario corporis decubitu alimentorum ad os regurgitationem impediunt) & nervis à sexto pari pertextitur, in eoque cibi appetitus naturalis sedes esse, vulgo censetur: non quod in eo appetendi actus (qui in solo fit cerebro) peragatur, sed per intervalla in eo talis causa subsistat, cujus molestia in cerebro percepta talem appetendi actum suscitatur.

Alterum, vulgo inferius, proprie *Pylorus* seu *janitor* nominatur. Hoc altero angustius, ad sinistram partem, spinam versus nonnihil reflexum, ac fibris transversis, nec non circulo crassiore, musculi orbicularis forma, præditum (hoc mediante alimenta nonnihil detinet, ne nimis citò & cruda elabantur) ac intestino duodeno continuum existens, ingesta & concocta alimenta ad intestinum dimittit: quæ tamen alimenta declivi via ex eo non effluunt, cum æque elato loco atque stomachus subsistat, sed per ascensum expelluntur.

Ventriculus recipit nervos, arterias, & *Vasa* venas.

Nervos recipit à sexto pari: quippe *Nervi*, uterque paris vagi truncus infra ramos pneumonicos, juxta œsophagi latera descendens, scinditur in duos ramos, exteriorem, & interiorem. Horum externi mox simul coeunt, & in unum nervum coalescunt, qui ad ventriculum dimissus, stomachum interiorem, partemque ventriculi superiorem multis propaginibus perreptat. Interni etiam simul concurrentes unum nervum constituunt, qui juxta œsophagum & exteriorem stomachi partem descendens, ventriculi fundum circumdant, plurimasque fibras in illud mittit. Per hos nervos copiosi spiritus animales in ventriculum defluunt, acutum ei sensum conferentes, qui propter majorem nervulorum copiam stomacho insertam, superiore parte acutior est quam inferiore, cujus ratione fames illic imprimis oriri creditur. Per hos vagi paris nervos etiam ventriculi fibræ infunditur vis sese naturaliter contrahendi in quacunque contentorum excretionem;

per eosdem etiam magnus ventriculi consensus est cum cerebro.

*Arteria.* Arterias recipit à cœliaca, sanguinem alimentarium advehentes, quo nutritur.

*Vena.* Venarum exilium plurimas habet ramificationes, inter tunicas ejus latentes, quarum variae hic illic concurrentes ac coeuntes, tandem quatuor efformant venas insigniores, ad portam venam transmittendas: scilicet Gastricam (hæc reliquis major est) Gastroëpiploidem sinistram, dextramque, & Ramum pyloricum: item aliam venam insignem, Vas venosum breve appellatam (hæc modò uno, modò duobus, tribus, pluribusve ramis à ventriculo egreditur) ramo splenico inferendam. Per has sanguis à ventriculi nutritione residuus versus hepar defertur.

*Nihil defert à liene ad ventriculum.* Ante hæc Medici tradiderunt, à liene per vas venosum breve acidum quandam succum aut sanguinem ascendere in ventriculum, ad ejus nutritionem, & simul ad cibi appetentiam seu famem in ventriculo excitandam. Verum hujus doctrinæ falsitatem ostendit autopsia in sectionibus animalium vivorum, utpote in quibus manifestissime patet nihil à liene ad ventriculum, sed continue sanguinem à ventriculo ad ramum splenicum defluere. Quippe ligaturâ vasis venosi brevi injectâ, mox apparet intumescencia inter ventriculum & ligaturam, detumescencia verò inter ligaturam & ramum splenicum: quod certum indicium est, sanguinem ita fluere ut jam dictum, eumque vix unquam pervenire ad lienem (ingressus enim vasis venosi in ramum splenicum plerumque nonnihil distat à liene) neque ingredi lienem, sed in ramum splenicum effundi, per eumque recta ad portam deferri: plura hac de re videantur sequente cap. 16.

*Spacium triquetrum.* Hic obiter notandum, nonnullos etiam doctos viros admodum nugari in explicatione aphorismi Hippocratis 54. lib. 7. ubi inquit: *Quibus inter ventriculum & septum transversum pituita concluditur, & dolorem infert, ad alterutrum ventrem exitum non habens, &c.* His verbis inducti, scribunt inter ventriculi sinistram latem & diaphragma insignem formari cavitatem triquetram, circumseptam membranâ, tam à ventriculo, quam à diaphragmate & omento productis. Quod tamen à veritate longissime abest, quippe nullæ illic membranæ à dictis partibus emissæ concurrunt, nec ulla hujusmodi cavitatis illic efformatur: interdum omenti portio se insinuat inter diaphragma & posteriorem ventriculi partem, ita ut nonnunquam lienis tumorem mentiatur, atque hoc, procul dubio, est illud, quod dictæ opinionis patronos, in anatomicis non satis bene versatos, decipit.

Ventriculus etsi non sit pars princeps, sed ministra, est tamen pars maxime nobilis, cui in præparatione alimentorum primæ partes demandatæ sunt (hinc Quintus Serenus, Sammicus poëta illum appellavit Regem corporis:

*Qui stomachum Regem totius corporis esse  
Contendunt, vera niti ratione videntur.*

*Hujus enim validus firmat tenor omnia  
membra,*

*Et contra, ejusdem franguntur cuncta dolore.)*

Ac proinde ejus qualescunque graves morbi admodum periculosi habendi sunt, & vulnera ab Hippocrate, 6. aphor. 17. merito statuuntur lethalia, quia in hac parte membranosa ægerrimè sanantur, & si incidant circa stomachum, propter nervorum ibi insertorum copiam, convulsionibus & singultibus continuis ægros occidunt: si verò in partem inferiorem, ingesta alimenta mox per illa effluunt in abdominis cavitatem, illic alia viscera, sua corruptione ac putredine, etiam brevi corruptura. Verum etsi usus & ratio illud effatum Hippocratis confirmet, tamen hanc regulam interdum, quamvis rarò, exceptionem aliquam admisisse, & subinde vulnus aliquod ventriculi sanatum fuisse, observatum fuit. Cujus curationis historias sibi visas describunt, Fallopius, de cap. vuln. cap. 12. Cornax, in epist. Julius Alexandrinus, annot. ad lib. 6. cap. 4. therapeut. Gal. & ex aliis collegit Jo. Schenckius, observat. lib. 3. Qualem etiam ego vidi mense Decembri, anno 1641. in rustico juvene, qui in Batavia superiore cultro punctim vulneratus fuit in ventriculi sinistro latere, vulnere medio-criter lato, per quod toto octiduo cibos & potus effluxisse vidimus, imprimis si manu inferiorem ventriculi partem nonnihil premeret; qui effluxus exinde per septem dies substitit, ac post hos iterum rediit, at solummodo per triduum duravit, multoque pauciora effluerunt quam primis diebus. Postea jussus dextro lateri dies noctesque incumbere, nihil effluxit amplius, nulloque alio morbo superveniente, & chirurgo sua faciente, æger, præter meam omniumque expectationem, intra sex septemve septimanas prorsus sanatus est, neque postea quidquam mali ex vulnere relictæ, nec ventriculi aliquod incommodum sentit. Adhuc magis mirandi sunt illi casus, qui de duobus cultivoris scribuntur: quorum primum describunt Bernhardus Suevus, tract. de inspect. vulner. Crollius, in præfat. Basilic. Sennertus, præx. lib. 1. part. 1. sect. 1. cap. 15. alique plures, de rustico Bohemo, qui anno 1602. Pragæ cultrum longitudinis novem pollicum deglutiit, qui culter post septem hebdomadas à ventriculo excisus, & æger sanitati restitutus fuit.

Alterum

*Est pars nobilis.*

*Vulnera ventriculi lethalia.*

*Observatio rara.*

Alterum casum sibi vitam describunt duo Medici, Georgius Lothus, & Rotgerus Hempsing, peculiari Germanico tractatu, totam admirandæ rei historiam continente: de juvene xxii. annorum, qui Regio montii in Prussia, mense Majo, anno 1635. cultrum duas transversas palmas longitudine excedentem, manubrio deorsum descendente, casu deglutivit: qui culter circa sextam post deglutionem septimanam à chirurgo excisus, & æger unico mense persanatus fuit (utriusque Medici tractatum, ea de re scriptum, tunc temporis è Prussia mihi transmissum, adhuc in bibliotheca mea servo) Hic culter postea à Daniele Beckero, medico Dantiscano, D. Othoni Heurnio, tunc temporis in Academia Leydeni Medicinæ & Anatomies Professore, donatus, ibidem hodie inter innumera alia rara, in theatro anatomico adhuc asservatur.

Calculi in  
ventriculo.

Calculos in renibus & vesica nasci, frequentissimum atque notissimum est, eosque etiam in pulmonibus, hepate, aliisve variis partibus non nunquam repertos fuisse, ex Medicorum observationibus constat, sed illos in ventriculo gigni, fere inauditum: cujus tamen quatuor exempla profert Bauschius, *ephemerid. med. physic. tom. 2. observ. 181. Primum*, ex Jacobo Dobrenzki, qui refert, sceminam quandam, post diuturnos ventriculi dolores, vomitu eiecisse duos calculos, magnitudinis amygdalæ, & sic à doloribus istis penitus liberatam fuisse. *Secundum*, ex Laurentio Scholtzio, qui scribit, virum quendam similibus ventriculi doloribus diu excruciatum, evomuisse lapidem magnum, oblongum, & durissimum, atque sic à dolore liberatum fuisse. *Tertium*, ex eodem addit, de muliere, quæ quadraginta annis ventriculi dolore, tumore, nausea, & inappetentia laboraverat, in cujus ventriculo post mortem inventi fuerunt lapides tam copiosi, ut volam manus implerent, qui diu asservati, tandem friabiles evaserunt, & in sal luteum resoluti sunt. *Quartum* subjungit, de Comite Georgio ab Opperdorff, in cujus ventriculo etiam lapillos inventos fuisse, tradit.

Actio.

Actio ventriculi est chylicare, id est, ex alimentis peculiari coctione succum lacteum elicere, qui chylus dicitur.

Chylus.

Est autem chylus succus lacteus ptisanæ cremori similis, ex assumptis alimentis in ventriculo præparatus & excoctus.

Modus co-  
ctionis.

Coquuntur autem in ventriculo alimenta per modum fermentationis, sicque liquefcunt, & chylus ex iis educitur.

Fermentatio  
duplex.

Fermentatio autem duplex est. Una quæ misti particulæ sponte agitantur, incales-

cunt, ac rarefiunt, & per salini vinculi dissolutionem ita segregantur ut spirituosiores evadant, maximaque sui parte rursus firmiter misceantur, & licet spirituosiores, tamen mixtæ permaneant: sicut spirituosæ partes vini, per fermentationem suscitatae, eâ peractâ aqueis permixtæ manent. *Altera* (hæc non male effervescencia multis appellatur) qua particulæ salis acidæ magna parte cum aquea & tartarea aliqua materia effervescentes, per coagulationem concentrantur, adeoque ab aliis misti particulis separantur, ut cum iis non redeant ad exactam unionem, seu mitionem. Priore autem modo fit fermentatio in chylicatione: nos tamen in sequentibus, cum vehementiorem fermentationem designare volumus, effervescenciæ voce interdum utemur.

Digestio  
prima.

Fit hæc fermentatio, cum alimentorum ingestorum particulæ salinæ à ventriculi calore & acri admixto succo dissolvuntur, liquefcunt, & spirituosæ fiunt, sulphureasque particulas simul corrodunt & exagitant, atque sic è mixtionis stricto vinculo cum pugna quadam discedentes, per crassorem massam, una cum spirituosis sulphureis simul agitatis, subacescentes atque acriores expanduntur & vibrantur, ac propter denegatum exitum, mitionemque crassioris materiæ nondum exacte solutam, identidem reperiuntur, illam multiplici motu pervadunt, ejusque minimas particulas ab invicem diducunt, expandunt, & ad faciliorem sui segregationem, alteriusque pultaceæ, seu lacteæ suscipiendæ mitionis formam, disponunt. Quæ verò particulæ hac fermentatione non satis dissolvi, & ad lacteam formam deduci queunt, fœces sunt, quarum separatio à lacteo succo in intestinis peragitur, ut dicitur *sequente capite 17.*

Fermenta-  
tionis mo-  
dus.

Hæc fermentativa coctio (quæ sine vehementi motu sursum deorsumque, aut tumultuosa per ventriculi cavitatem agitatione, qualis in aqua ad ignem ebulliente contingit, peragitur) adeo valida est, ut per eam cibi, licet durissimi, qui super igne culinario vix totius diei coctione in lebetes emolliri queunt, paucis horis non tantum emolliantur, sed adeo dissolvantur ac liquefcunt, ut particulæ ab amica unionem disjectæ, atque ab invicem divulsæ, liquorique ventriculo inhzrenti vel infuso commixtæ, pultaceam consistentiam, cremori ptisanæ non multum ab similem, consequantur.

Fermenta-  
tionis vis.

Verum quod hac coctione alimenta in chylum potius, quam in bilem, sanguinem, aliumve humorem mutantur, illud à substantiæ ventriculi proprietate, seu specifico temperamento ac peculiari conformatione, & hinc genito specifico fermento ac

Causa chylifi-  
cationis.

ac



ac fermentationis modo, procedit, sicut ab alia proprietate in hepate & liene fermentum, in corde sanguis conficitur. Non autem fit hoc à solis particulis fermentaceis, quæ ingestis alimentis admiscuntur, ut neque à moderato calore, sicut nonnulli putarunt: quoniam illæ quidem faciunt ad alimentorum dissolutionem, hic verò ad coctionem seu dictam fermentationem promovendam, & latentem potentiam in actum producendam, sed quod ex illa dissolutione ac coctione chylus potius quam alius humor generetur, hoc dependet à proprietate substantiæ, cujus ratione calor aliter operatur in ventriculo, quam in corde, aliave quacunque parte, & in eo fermentum aliter disponit, quam in aliis partibus. Eodem modo sicut ignis culinaris aliter emollit carnem quæ in aqua ebullitur, aliter eam quæ in veru assatur, aliter eam quæ in oleo frigitur, aliter eam quæ in furno coquitur, aliter eam quæ in aceto vel muria præparatur, idque propter diversitatem substantiarum per quas & in quibus illa amollitio peragitur, cum tamen sit unus idemque calor. Sic etiam calor nostri corporis propter ventriculi & succorum in eo contentorum ac genitorum propriam dispositionem, in eo aliter emollit ac dissolvit alimenta, quam in aliis partibus, & in eo fermentum peculiari modo disponit, ita ut illud alimenta cruda ac primo ingesta aliter dissolvat & coquat, quam alia cocta & modò liquata alimenta in aliis partibus recoquuntur. Ita ut hujus proprietatis ratione non possit in ventriculo bene valente & agente alius succus confici, quam chylus albicans.

Paracelsus scribit Archæum cum suis mechanicis spiritibus chylicationem in ventriculo perficere: per *Archæum* autem intelligit calidum innatum. Hanc sententiam etiam sequi videtur Riolanus, in not. ad epist. *Walei*. Sed tamen aliquam proprietatem umbrosam admittit aliis verbis; nam inter alia dicit: *Causam refero ad varietatem calidi innati in modo substantia, id est, inquit, proprietatem calidi innati*. Non quod calidum innatum per se differat in substantia, sed cum non possit subsistere sine corpore seu substantia extra se, etiam pro hujus substantiæ diversitate in singulis partibus diversimode operetur.

Hinc jam liquet quam frivolum illud sit quod nonnulli dicunt, *Ventriculum non chylicare, sed esse tantum instrumentum seu receptaculum in quo fit chylicatio, non tamen chylum magis conficere, quam olla in qua carnes coquuntur, conficit jusculum*. Quis, quæso, adeo cæcus est, qui non videat, cum chylicatio ventriculo adscribitur, non intelligi nudas ventriculi membranas, sed ventriculum viventem ac sanum, id est,

spiritu ac calore proprio, ex suæque substantiæ proprietate proprio generato conveniente fermento instructum, quorum omnium olla culinaria nihil ex sese habet.

Color chyli lacteus seu sub albicans est; *color albus*. propter particulas sulphureas, una cum falsis dissolutas, & fermento acido ventriculi permixtas. Nam quilibet liquor sulphure & sale volatili, aut sale optime dissoluto imprægnatus, ilico lactescit, si humor aliquis acidus affundatur. Exemplo sunt præparationes lactis sulphuris, & extractorum vegetabilium resinarum; item spiritus cornu cervi, aut fuliginis, qui liquori acido, aut aquæ simplici confusus, ilico lactescit.

Plempius quidem & *Walæus* sentiunt, *An possit chylum non semper esse candidum, sed ex esse ruber*. rubris assumptis rubrum, ex viridibus viridem, &c. Verum hac in parte errant, nam si per se non esset semper candicans, non inveniretur semper albus in vasis lacteis mesentericis & thoracis (aliàs quidem magis, aliàs minus serofus & tenuis in chyli ductu thoracico reperitur, pro ut plus minusve succi lymphatici, qui copiosus in saccum chyloferum unde quaque influit, ei admiscetur, qui lymphidus succus absente chylo, etiam solus ductum istum continue & sensim permeat, sed tamen ipse chylus in iis lactiferis viis apparens, nunquam alterius, quam albi, coloris conspicitur) verum etiam ruber, viridis, alteriusve coloris in iis nonnunquam deprehenderetur, quod tamen à nemine hactenus visum fuit. Proinde licet color ejus albicans, ab aliis plurimis crassis alimentorum, quibus involvitur, particulis, rubro, viridi, aliove colore tinctis, in ventriculo & intestinis ita obfuscetur, ut visui non appareat, inde tamen non sequitur chylum per se non habere istum colorem album. Nam etsi in herbis viridibus candicans, seu potius pellucidus spirituosarum & aquosarum particularum color visui non appareat, inde tamen non sequitur spirituosam aquosamque earum partem habere talem viridem colorem, nam si per distillationem separatio fiat, mox pellucidus color apparebit. Ita etiam in chylo se res habet, nam separatus è crassiore quocunque colore tincta massa, & acidulo paucreatico fermento admixtus, nunquam alium quam albicantem colorem habet.

Verum quia chylicatio non procedit nisi alimenta sint ingesta, hæc autem ægrè ingeruntur sine fame, & quæ sine fame ingeruntur, etiam difficiliter coquuntur, haud abs re videtur, antequam chylicationis historiam ulterius ingrediamur, primo famis causam inquirere, ut sic paulatim facilius ad meliorem chylicationis cognitionem pervenire possimus.

Quid

*Fames quid.* Quid sit fames nemo non ab experientia aliquando noscere didicit, est scilicet appetitus cibi.

Sed quid appetitum istum inducat, ejusque causa sit, de eo magnum est dissidium inter Philosophos.

*An fiat à suctione.*

Antiquitus famem ab inanitarum partium tractione seu suctione fieri putarunt, easque nutrimento egentes ex venis, has ex hepate, hepar ex ventriculo sentiente facultate prædito fugere, eaque suctione molestiam illam, quam famem appellamus, induci tradiderunt. Quæ opinio hodie merito exploditur: partim quod secundum hanc plethorici nunquam forent famelici: partim quod non detur talis tractio, nec talis à partibus inanitis ab hepate per venas fieri possit, propter valvularum impedimenta.

*An ab acido succo lienis.*

Alii, cum acida famem excitare animadvertent, judicarunt eam induci ab acidis succis è liene per vas venosum breve ad ventriculum delatis. Hanc opinionem hodierna curiosior, Anatome omnino pessumdedit, demonstrans in vivis animalibus sanguinem per illud vas breve à ventriculo quidem versus lienem descendere, atque in ramum splenicum effundi, nihil verò ductu contrario à liene ad ventriculum ferri.

*An à succis arteriarum.*

Multi, cum Regio, statuunt, famem oriri ex morfu inaniti ventriculi, ab acerbis & calidis quibusdam succis, per arterias in ventriculum, seu ejus tunicas continue impulsis, qui post expulsionem chyli non invenientes quod corrodant, ventriculum pungunt, quo nervus sextæ conjugationis certo modo in eo motus, imaginationem cibi sumendi excitat, in morsus istius remedium. Verum hanc sententiam illud evincit, quod sanguis arteriosus, propter sulphurearum particularum prædominium, non sit ullo modo acer, sed omnino mollis, mitis, dulcis, ita ut neque in ventriculi, neque in aliarum partium, quantumvis acule sentientium (quales sunt tunica adnata in oculo, glans plenis, &c.) tunicis ullam corrosione, aut molestam punctiorem faciat, vel facere possit. Præterea hinc sequeretur, quo plus hujusmodi arteriosi sanguinis ad ventriculum inanitum pelleretur, eo majorem futuram famem; atqui contrarium liquet in febribus ardentibus. Adde, quod iis qui sani per biduum jejunarunt, amplius nulla fames sit, cum tamen ventriculus sit maximè inanitus, & sanguis per arterias continuè in tunicas ejus influat: si à dicta corrosione excitetur fames, quare in talibus non contingit illa famelica corrosio?

*Historia.*

Fuimus aliquando quadraginta peregrinantes, simul ex Gallia reduces, cumque in mari ventus planè deficeret, hinc præter

nostram spem & expectationem diutius nobis in itinere hærendum esset, omnibus eduliis, cum aqua dulci & quocunque potu penitus absumptis, tandem ad tertium usque diem nobis omnibus jejunandum erat, ita ut ne micam quidem panis, nec guttam potus haberemus: sed cum per sesqui diem, vel paulo ulterius jejunassemus, nemo nostrum famem perentiebatur amplius, ita ut tertius dies nobis non esset molestus, nisi sola corporis debilitatione, neque arteriosus sanguis in nostris inanitis ventriculis ullam corrosione famelicam excitavit. Atque ita antedictam sententiam, non ratio sola, sed ipsa quoque experientia omnino pessumdatur. Frustra igitur ex arteriis viam huic liquori arterioso fermentaceo ad ventriculum comminiscitur Ludovicus de la Forge, in annotat. ad Cartesii lib. de hom. ubi sic inquit: *Possit hic rogari, quare ille liquor [fermentaceus] per arterias potius ad stomachum seu ventriculum, quam ad alias partes feratur. Ad quod respondeo: arterias illum aequaliter ad omnes partes deferre, sed poros omnium membranarum non esse adeo convenientes ad transitum ei concedendum, atque sunt pori ventriculi.* Quod hoc fictum diverticulum sit nullius momenti, patet in membranis cerebri, aliisque multis, quarum pori sunt adeo convenientes, ut per eos sanguis multo copiosior feratur, quam ad ventriculum, & tamen ab eo nulla in iis corrosio aut vellicatio peragitur. Nonnulli, ut dictam corrosione melius defendant, dicunt, acriorem sanguinem ad ventriculum demandari, vel fluere, quam ad alias partes. Sed hoc cum nulla veritate cohæret: quoniam unus idemque qualitate sanguis æqualiter è corde propellitur ad omnes totius corporis partes, nec quidquam est quod acriores ab aliis mitioribus separet, & ad has potius, quam ad istas partes protrudat.

*Vera causa.*

Alii denique, quorum sententiæ subscribendum censemus, judicant famem fieri à particulis acerbis fermentaceis, genitis ex deglutito salivali succo, aliisque quibusdam subfalsis acidisve ingestis, ventriculi tunicis adhærentibus, ab eoque ad aliqualem aciditatem perductis; vel ab expulso chylo in eo residuis, interiori rugosæ membranæ (præcipue circa orificium superius) affixis, eique molestam vellicationem inferentibus, qua per nervos sextæ conjugationis cerebro communicatâ, excitatur imaginatio cibi sumendi, ad molestam corrosione demulcendam.

Acrimonia his fermentaceis particulis à ventriculo imprimitur, cum in succis qui interiori tunica adhærent, sulphureæ particulæ obtunduntur, & falsæ à ventriculi conveniente calore liquantur ad statum fusionis, sicque specifico modo acescunt.

D

Quo

Quo etiam plurimum facere potest saliva deglutita (hæc quippe fermentaceam qualitatem in sese habet, ut infra docemus, lib. 3. cap. 24.) ad ventriculum descendens; nec non succus pancreaticus subacidus, in duodenum intestinum infusus, si vel ipsemet aliqua sui parte versus ventriculum assurgat, vel acidus vapores aut halitus ex intestino ad eum transmittat.

*Objeſſio.*

Hic objicitur, si ea de causa fiat fames, ergo repleto ventriculo, cum jam coctio & fermentatio in cibis fit, maxima erit fames, quia in coctione illa multo plures excitantur particulae acidæ & fermentacæ, quæ ventriculum magis vellicabunt, quam pauciores illæ antedictæ. Negatur: plures quidem erunt particulae fermentandæ, & fermentatæ, id est, dissolutæ, sed non fermentacæ, id est, dissolventes. Exemplum habemus in pane fermentato, cujus tamen singulae partes non valent ad fermentandam aliam farinaceam massam, quia non amplius acidæ, sed, ut ex saporis dulcedine liquet, sulphureæ particulae in eo prædominantur: & quousque in dissolutis particulis prædominium sulphurearum persistit, eo usque non possunt fieri acidæ aut fermentacæ (sulphur enim dulce est.) Ut liquet in febribus, in quibus hanc ob causam acidæ copiosius exhibentur, ut sulphurea vis edomari, & sic fermentacea conveniens qualitas restitui possit. Nam cum sulphurearum dominium salutarum acidarum particularum vi superatur, tunc aciditas fermentacea introducit. Ac proinde repleto, & cibos coquente ventriculo, non sunt plures acidæ, acres, & corrodescentes particulae, & si quæ sunt, illæ ab admisto copioso liquore ita infringuntur, ut nullam molestam vellicationem ventriculo inferre possint, atque hinc etiam fames eo tempore major esse non potest, sed potius cessat. Verum ubi chylus, cum eoque dissolutæ sulphureæ salis permixtæ particulae ad intestina effluerunt, tunc quod residuum interiori tunica ventriculi adhæret, aut cum salivali succo istuc defertur, redundantia particularum sulphurearum magna ex parte liberatum, calore ventriculi acescit, & sic iterum vellicat, novamque famem inducit, quæ rursus cessat, ubi per ingestos cibos & potus illa aciditas fuerit attemperata, ejusque acrimonia mitigata ac retusa. Quod si verò hi fermentacei succi non tantum moderati ventriculo insint, verum etiam lienis, pancreatis, aliarumve partium vitio nimis acres & copiosissimi in corpore generentur, & à capite aut inferioribus quibuscunque partibus tanta copia ad ventriculum adfluant, ut ab ingestis cibis & potibus eorum acrimonia satis infringi & attemperari nequeat, tunc fit fames præternaturalis, quam **Caninam** vocamus,

*Fames canina.*

in qua ægri identidem cibos ingestos, una cum acerrimis succis, instar succi citri (ut ipsimet testantur) acidis evomunt, & præ vellicante acrimonia, ob magnam humoris tenacitatem in ventriculo remanente, mox iterum famelici sunt, & comedunt. Si verò fermentacæ particulae in sese sint valde viscidæ, aut crassiores & tardioris motus, tunc longiore tempore opus habent ad sui exaltationem, & famis excitationem: quod imprimis contingit, cum acidi spiritus in toto corpore, atque hinc etiam in saliva, & illo muco humore qui interiori tunica ventriculi adhæret, pauciores insunt. Interdum etiam contingit, famem subito prosternei vel imminui, cum amara bilis nimis copiosa in ventriculum ascendit (hoc frequenter contingit in hominibus biliosis, in ictero, in febribus variis, &c.) in eoque sui admixtione, tam fermentaceas alimentorum reliquas post expulsam chylum in ventriculo remanentes, quam eodem adfluentem salivam, corrumpit. Remotiores famem imminuentes causæ variæ sunt: ut excessus in somno & quiete, nimia curæ, alvi fluxus, &c. Magna quies & nimius somnus id faciunt, quatenus defectu sufficientis motus corporis, etiam humores non satis moventur, nec acidi à viscidis convenienter separantur, atque hinc in actum satis deduci nequeunt. In nimis curis fames non percipitur, propter aliò conversas cogitationes. In alvi fluxu fermenti vitiati certum indicium adest.

Hæc autem famem excitantes fermentacæ *Fermentum*, particulae, ut ex antedictis patet, acidæ vel subacidæ sunt, eademque existunt quæ coctionem ventriculi promovent, & ingesta alimenta fermentant ac dissolvunt. Hac de causa etiam fit, quod acidæ modicè sumpta famem excitent, & ventriculi coctionem meliorem faciant. Hujus rei experimentum (præter quotidianam experientiam quam in nobis ipsis percipimus) habemus in nostris nautis, qui longo itinere ad Indos navigant: cum enim diu crassis durisque cibis in navibus usi sunt, hincque debilem appetitum & coctiones omnino languidas habent, ac scorbuticam cachexiam contraxerunt, tandem quam primum ad insulas aut regiones appulerunt, in quibus ipsis limonum, aliorumque acidorum fructuum copia fit, mox ab aciditate istorum fructuum appetitus omnesque languentes coctiones in iis suscitantur, & sic ad pristinam sanitatem brevi redeunt. Hunc etiam in finem, ne scilicet præ nimis diuturno languore nautæ in longa ista via deficiant, solent multoties navium præfecti aliquot vasa succi citri in navi secum assumere, ut eum languentibus in itinere distribuunt, sicque eos reficiant.

Acidæ igitur sunt fermentacæ istæ particulae

ticulæ à quibus fames excitatur, quæ si in ventriculo defecerint, tunc fames languet, & chylicatio non perficitur, sed cibi crudi incoctique dejiciuntur, tales quales sunt assumpti: iis autem rursus in ventriculo genitis, coctiones redeunt, & appetitus restituitur. Unde Hippocrates, 6. aphorif. 1. dicit: *In longis levitatibus intestinorum si ructus acidus fiat, qui prius non erat, bonum est signum.*

An calor sit  
causa chyli-  
ficationis.

Quomodo autem fermentaceæ particulæ subacidam istam acrimoniam nanciscantur, paulo ante dictum, scilicet per convenientem calorem falsas particulas ad statum fusionis liquantem. Dico, *convenientem*, quoniam sicut ab admisto fermento panis in loco tepido bene, in frigido ægre, in clibano fervente nihil prorsus fermentatur: ita etiam aciditas hæc non nisi à moderato ventriculi calore excitatur, & postea in actum majorem suscitatur, à nimis parvo non producitur, à nimis magno discutitur, ipsique fermentum futuri liquores consumuntur. Hinc in pituitosis hominibus, intemperie ventriculi frigida præditis, fames languet, coctioque debilis est: in biliosis, calidave ventriculi intemperie donatis, tollitur. Atque hinc etiam non sequitur, Quo major est ventriculi calor, eo major erit fames, & fortior ac melior fiet coctio: contrarium enim liquet in causo & ventriculi inflammatione: & in leone, qui etsi inter animalia calidissimus esse censetur, nihilominus ferrum, aurum, æs, aliaque similia non concoquit, quæ tamen in ventriculo struthionis (multo minore calore, sed fermento tamen aciore, prædito) facile digeruntur: quemadmodum in aula Ducis Ferrariæ se struthionem, talia metalla deglutientem & concoquentem, vidisse, refert Langius, lib. 1. epist. 12.

Igitur non calor, sed fermentum (quod in aliis acius, in aliis mitius existit) est causa proxima famis & coctionis ventriculi: calor verò moderatus est causa materiam disponens, ut inde gignatur, idque fermentum exaltans, & in actum promovens.

Qualis sit  
calor chyli-  
ficans.

Cum autem hæc ventriculi potestas fermentum illud condendi, cum eoque chylicandi, non nisi per convenientem & moderatum calorem in actum promoveatur, dubitant nonnulli qualis, aut potius cujus sit ille calor actum hunc produciens, an membranarum ventriculi, an partium circumjacentium, an humoris cujusdam, an verò spirituum. Certè ipsius caloris in diversis subjectis nulla est diversitas per se (quod in ferro candente major, in stipulis accensis minor sit, hoc non arguit diversitatem ipsius caloris, sed quantitatis, procedentem à subjecti, cui inhaeret, diversitate) omnis enim calor à minimarum par-

ticularum & subtilis materiæ motu atque agitatione excitatur: at operationum diversitas procedit à diversitate ipsarum rerum in quas & per quas calor agit: nam idem calor ceram emollit, lutum indurat, carnem in veru aut furno assat, in lebetæ ebullit, in fimo equino putrefacit, in hypocausto ova fovet & excludit sine gallina. Ita etiam ad chylicationis actum producendum requiritur ut moderatus calor (qui non est nisi unus idemque) convenienter se habeat in ventriculo, id est, in ejus membranis, humoribus, & spiritibus, isque etiam debito modo foveatur à calore partium circumjacentium; ita enim convenienter se habens, non potest non ventriculus taliter instructus in aptam materiam chylicandam convenienter agere, ex eaque chylum dissolvere & educere.

Alimentorum autem ad chylicationem præparatio quodam ordine procedit. Cibis in ore masticatis ac comminutis admiscetur saliva, eos non solum emolliens, verum etiam fermentativa quadam qualitate perfundens. (de hac ejus qualitate videantur lib. 3. cap. 6. & 24.) etiam potus accedit, cerevisia, vinum, aliisque, qui & ipse plerumque acres particulas ac spiritus fermentaceos in se continet. Hos cibos arctè amplectitur, ac circum illos se constringit ventriculus ope fibrarum suarum, iisque etiam específicos succos fermentaceos, tum in interiore sua tunica genitos, tum eum saliva affusos, comiscet. Tum per calorem convenientem fit omnium mistura & eliquatio: quippe fermentaceæ particulæ in poros ciborum illabentes, eorum particulas pervadunt, agitant, & eliquant (ut paulo ante dictum) purioresque à crassis dissolvunt, illasque magis fluidas reddunt, ut aliam mitionis formam subire, & in lactei cremoris speciem inter se uniri queant: quo facto una cum crassiore, qua adhuc involvuntur, massa, constrictione ventriculi defluunt ad intestina, in iis per bilis (ut latius explicabitur cap. 16.) & succi pancreatici admitionem, alio fermentationis modo, ab admixta crassiore massa penitus separandæ, sicque ad vasa lactea pellendæ.

chylicati-  
onis mo-  
dus.

Certum tempus quo chylicatio absolvi-  
tur, designari nequit: quippe magna hic  
varietas observatur, procedens à varietate  
temperamenti ventriculi, ætatis, sexus,  
dispositionis partium circumstantium, &  
ipsorum alimentorum.

Tempus  
chylicati-  
onis.

Quod verò alii cibi citius, alii tardius  
digerantur, hoc imprimis procedit ab ipso-  
rum ciborum varietate, in substantia, du-  
ritie, soliditate, crassitie, tenuitate, calore,  
frigore, &c. Cujus ratione alii facilius &  
citius, alii difficiliter & tardius in ventri-  
culo dissolvuntur. Sed quod iidem cibi in

aliis

D 2

aliis citius, in aliis tardius concoquantur, item quod aliorum ventrili crudos pisces, carnes duras vix semicoctas, aut plane crudas; fructus immaturos, aliaque similia facillime; aliorum verò ventriculi tenella optimeque cocta alimenta difficulter ferant & digerant, hoc procedit à diversitate dispositionis ventriculi, fermenti, & magnitudinis caloris.

Concoctio  
potus.

Quod de cibis dico, idem etiam de potibus est intelligendum, utpote qui ob dictas diversitates, in aliis bene, in aliis male, in his citius, in illis tardius digeruntur, in nonnullis coctiones ventriculi meliores, in multis peiores faciunt. Ex gr. si vinum aliufve similis liquor, copiosus bibatur, ille vel propter acrium particularum copiam, tenuitatem, & spirituositatem, citius excoquitur & ad intestina defluit: vel propter nimiam quantitatem ventriculo gravis & molestus, crudior propellitur, cujus cruditatis indicia ex crudis ructibus, vomitu, rugitu in intestinis, & urinis crudis percipiuntur.

Hi aqua simplex bibatur, quæ acres particulas non continet, illa in calidiore ventriculo, vel in quo calidi acresque succi redundant, nimiam & nidorofam fermentationem bene temperare ac nonnihil inhibere; sed in frigidiore, aut frigidis succis repleto, coctionem impedire solet, quatenus frigida sua humiditate acres fermentaceas particulas, in ventriculo & assumptis cibis contentas, obtundit, id est, copiosa sua intercedente aquositate activorum principiorum minimas particulas nimis à se invicem dissociat & elongat, ita ut in se mutuo non satis agere queant, unde tunc minor motus, & ex hujus defectu majus frigus, oboritur, sicque fit quod fermentaceæ particulæ à calore ventriculi non satis attenuari, & ad justum effervescentiæ gradum attolli possint, atque hinc in fermentandas particulas non convenienter agere queant.

Pingua fa-  
men immi-  
nuunt.

Notandum etiam pingua copiosius assumpta famen imminuere, & chylicatricem coctionem difficilliolem reddere, eo quod fermentacearum particularum acrimoniam obtundant; vel potius quod assumptorum alimentorum plurimas particulas ita involvant, ut acres fermentaceæ in eas convenienter agere nequeant. Quæ pinguium vis patet quoque in rebus externis: quippe vasa argentea vel stannea pinguedine bene oblita, ab infuso acri aceto non corroduntur, licet acetum de acrimonia sua nihil remittat: aqua vitrioli, vel aqua fortis cuti pinguedine aliqua obductæ imposita eam non corrodit. Sic etiam acris fermentacea materia difficulter agit in alimenta insigni copia pinguedinis obducta, atque hinc solet copiosa pinguedo ingesta

citius nauseam movere, quam bene digeri. Plura de fermento videnda inferius, cap. 17. & lib. 2. cap. 12.

Ludovicus de Bils, anatomicus paradoxus, in canum sectionibus tempus chylicationis (referente N. Zas.) hoc modo observasse dicitur. Si canis solo lacte dulci cibatus fuerit, tunc post duas circiter horas chylicationem perfectam esse, demonstrari posse. Si isti lacti admixtus fuerit panis albus, tunc chylicationem absolvi tribus horis, vel paulo minore spatio. Si lac cum farina triticea in pulvem ex coctum, & sic à cane comestum fuerit, requiri ad minimum quatuor horas, antequam chylus in vasis lacteis demonstrari possit. Si verò canis solo pane filegineo fuerit cibatus, vix spatio sex horarum chylicationem perfici.

Observatio  
Bilsi.

Verum hæc Bilsi observationes admodum incertæ sunt, quia non omnium canum ventriculi eodem modo & æque bene dispositi sunt, nec cibos æquali tempore digerunt, atque hinc fiet, quæ digestio in unius ventriculo peracta comperietur unâ horâ, quod illa, licet sit ejusdem cibi, in altero forte vix tribus horis peracta deprehendi possit. Præterea, nisi hæc observationes commode explicentur, de omnimoda omnium simul ingestorum concoctione, prorsus repugnabunt rationi & experientiæ, quæ docebunt, neque in hominibus, neque in canibus omnia ingesta simul digeri, eorumque aptas particulas omnes simul in chylum converti, sed primò tenuiores, hinc crassiores, atque sic nullum certum chylicationis tempus definiri posse. Nam lac cum pane ingestum (de quo etiam loquitur) etsi forte tribus horis opus habeat, antequam omnes ejus aptæ particulæ in chylum mutatæ sint, tamen non requiruntur tres horæ antequam ex eo chylus prodeat, nam tenuiores lactis particulæ longe citius in chylum convertuntur, qui post unam, aut sesqui horam, imò nonnunquam citius in vasis lacteis conspicuus erit, interim pane & crassioribus lactis particulis usque ad tertiam horam in ventriculo subsistentibus. Qui igitur dicit, chylicationem istam non absolvi ante finem horæ tertię, ille errat, nam etiam prima hora ejus bona pars jam peracta & absoluta est.

Tempus chylicationis, & quæ incidere possunt impedimenta, admodum eleganter proponit Bernhardus Swalve, in querela & opprob. ventric. Ubi ventriculum sic loquentem introducit. *Ingesta omnia non obdurant equaliter laboribus meis, cedit unum altero citius. Lacticiniis vix horulam, non integras oleribus duas impendo. Ne id quidem temporis piscium mollietates sibi deposcit. Panificia compaciore quaternis vix horis in cremorem mihi cogibilia*

Impedimen-  
ta & tem-  
pus chyli-  
cationis.

cogibilia sunt : & quo quidque ex carnibus durius, eo protractius & spissius exigit officium meum : recusat ovilla, nec patitur bubula sex septemve horum suam frangi pertinaciam. Singulis tamen ne quidem ego spatium suum præfinire possim. Jam alacrior mihi acidus, jam firmior vita affluxus : jam substantia mea magis fortiter facit, etiam hac omnia viribus despoliantur suis enervanturque haud raro. Taceo jam enim quam plurimos casus, qui negotium inturbant, nunc hoc, nunc illud est, quibus languidus dego. Hac enim illa mea miseria, hinc mea lachryma, quod constare mihi ab externis incurstantibus nequeam, quod muneri meo infringendo tot ac tantis erroribus expositum sim. Tam fecunda mihi hac mala, ut semper in coquendo non obtineam finem debitum.

Ordo chyli-  
ficationis.

Certè admodum bene & succincte hæc à Swalve describuntur, quippe multa variaque alimenta uno pastu ingesta, non simul & æque citò lacteum succum ex se deponunt, sed pro majore vel minore ipsius ventriculi, vel succi acidi fermentantis robore aut debilitate, alimentorumque diversitate in substantia, quantitate, qualitate, duritie, tenacitate, raritate, soliditate, &c. spirituosiores & tenuiores particulae in aliis citius, in aliis tardius dissolvuntur, ac in chylum transeunt, & quæ priores excoctæ sunt, primæ per pylorum elabuntur, reliquis usque ad majorem dissolutionem in ventriculo diutius remanentibus. Hic processus ex refectione pastum sequente innotescit nam vires brevi reficiuntur, cum tamen cibi diu post adhuc in ventriculo subsistere percipiuntur : quæ prima refectio fit ab alimentorum particulis tenuioribus citius dissolutis ac coctis, & jam è ventriculo elapsis; quæ si usque ad duriorum perfectam coctionem in ventriculo subsistere debuissent, per nimiam illam moram nimis excoctæ, & sic corruptæ, vel saltem vitiatæ fuissent. Patet item hic processus in sectione canum, non diu post pastum occisorum : quippe in eorum intestinis & vasibus chyliiferis seu lacteis, chylus tenuior plerumque invenitur, quem satis copiosum spectantibus multoties demonstravimus vix hora una aut altera post pastum, imprimis si liquidiora alimenta data fuissent, cum interim maxima ciborum pars, nondum in chylum conversa, adhuc in ventriculo superesset.

Ordo ciborum.

Hinc jam liquet error multorum Medicorum, qui putarunt illa quæ primò assumuntur, primò etiam elabi è ventriculo, quæ ultimò, illa ultimò elabi, atque hinc satis anxie ordinem in cibis assumendis servandam scripserunt ; ut scilicet concoctu facillia primò, duriora ultimo loco assumantur, ne alioqui ex præpostero ordine cruditates generentur : quemadmodum illud inculcant, 3. de symptom. caus. cap. 1.

Fernelius, 5. pathol. cap. 3. Mercurialis, 3. prax. cap. 12. Sennertus, prax. lib. 3. part. 1. sect. 2. cap. 9. aliique multi. Certe in ventriculo omnia assumpta simul confunduntur, miscentur, & agitantur, idque per fermentationem, qua tenues ac spirituosæ particulae se expandunt, & à dissolutis crassioribus se expediunt, atque sic crassæ cum tenuibus simul agitatis, motu isto fit omnium mixtura, è qua tota quod satis excoctum est continuo per pylorum effluit, quod ulterius coquendum, in ventriculo diutius manet ac subsistit.

Hic jam tria problemata discutienda occurrunt. *Primum*, si fames fiat à particulis acidis fermentaceis, molestam vellicationem ventriculo inferentibus (ut supra dictum) quænam sit causa *Picæ*, seu depravatæ famis. *Secundum*, an in dyspepsia, aut qualicunque prava ventriculi coctione, bilis in ventriculo generari possit, qualis in *Cholera* morbo sursum deorsumque copiosa ejicitur. *Tertium*, an totus chylus jam coctus è ventriculo fluat in intestina.

Tria problema-  
mata.

Digestio  
prima.

Pica causa.

Quantum ad *primum*, depravatæ famis (quam *Picam*, & *Malaciam* appellant) causa hætenus à nemine satis bene descripta nobis videtur, cum interea affectus ipse admirabilis existat, utpote cujus tanta vis est, præcipue in virginibus & mulieribus (hæ quippe frequentius quam viri ea infestantur, quamvis etiam his nonnunquam oboriatur) ut modò farinam, modò cretam, modò fistulas tabacarias, modò terram, modò carbones, modò calcem, modò picem liquidam, modò carnes crudas, modò fructus edi insolitos, modò vivos pisces, modò hominis viventis aliquam carnosam partem, modò lapides (refert Sennertus, se novisse mulierem, quæ quotidie circiter duas libras lapidis molaris comedebat, sicque tractu temporis fere totum lapidem molarem voraverat) modò alias absurdas res, à natura hominis alienissimas, summo ac stupendo cum desiderio appetant, & magna copia comedant, quorum, præter exempla quotidiana indies occurrentia, etiam multa passim à Medicis descripta leguntur. Hujus tanti mali causa vulgo statuuntur esse depravati humores in ventriculo contenti, qui pro diversa singulorum natura, alii in eo excitant peculiarem famem ad hanc, alii ad illam peculiarem, sive bonam, sive absurdam rem, alii ad res pravas similes, alii ad dissimiles, quatenus scilicet pro vitiositatis diversitate, diversumode vellicant & movent fibrillas nervorum ventriculi, ex quarum speciali motu cerebro communicato, mox in cerebro talis fit motus, quo specialis appetitus excitatur ad hanc illamve rem. Franciscus de le Boë Sylvius, prax. lib. 1.



lib. 1. cap. 2. atque etiam in dictatis collegii privati, habiti anno 1660. hanc rem clarius explicaturus, dicit, malaciæ causam esse vitiosum ventriculi fermentum, corruptum scilicet, vel ab assumptis vitiosis alimentis, medicamentis, aut venenis; vel à morbis multifariis, præsertim fœmineis, totum sanguinem, hinc salivam, ac denique ventriculi fermentum inquinantibus, & pravam dispositionem illi conciliantibus. Verum si hæc speciosa ratio valeat, ex ea, quæso, deducatur etiam, quare talis appetitus determinatus ad res alienas, fiat quoque in iis, quibus nulli vitiosi humores in ventriculo subsistunt (quamvis pravos humores interdum adesse posse, negare nolim) sicut in praxi nonnunquam comperi id factum fuisse? quare in homine nihil vitii in fermento aut ventriculo habente, ex sola picturæ alicujus attenta inspectione, modò piscium, modò fructuum, aliarumve rerum, etiam absurdarum, fervidus appetitus nonnunquam excitatus fuerit? eodem modò sicut ex nudæ Veneris inspecta pictura Venereum desiderium excitatur? quænam, vel qualis possit esse alicujus humoris natura, vel qualitas admirabilis, quæ ita potest movere fibrillas nervorum & cerebri, ut ratione istius specialis motus, excitari queat appetitus ad lapidem molarem, fistulas tabacarias, carbones, aliasque res absurdissimas, quas neque ut molestæ vellicationis remedium, neque ut res necessarias appeti posse, quilibet satis videt. Hæc igitur aliam causam agnoscunt, & aliunde procedunt, scilicet ex solius imaginationis errore, hincque educto pravo judicio, ex mala cerebri dispositione, spirituumque pravo motu orto, non verò ex humorum in ventriculo subsistentium vitio. Pravi enim humores pro majore minoreve vellicationis intentione, possunt quidem in ventriculo famem abolere, imminuere, aut nimiam facere, sed non possunt illam dirigere ad peculiare aliquas res, easque sæpe absurdas, appetendum. Famem enim est naturalis quidam instinctus, quo natura simpliciter incitatur ad alimentorum assumptionem, in molestæ vellicationis remedium, sed non speciatim ad hæc, vel illa alimenta, vel ad has aut illas, & sæpe absurdas res. Quod autem homines sani famelici modò pisces, modò carnes, modò fructus, modò assata, modò elixa, &c. desiderant, hoc non procedit à peculiari aliqua vellicatione, aut naturali appetitu ventriculi, sed ab appetitu animali, quo judicant modò hos, modò illos cibos, modò dulces, modò falsos, modò acidos, gratiores, vel sanitati magis convenientes futuros, atque hinc etiam interdum majore cum appetitu desiderant vinum absinthite, haleces crudas, pluresque alias res per se

ingratas, quam alias longe gratiores & meliores. Cum autem electio, aut rejectio alicujus rei aut cibi dependeat à judicio, & judicium peragatur in cerebro, non verò in ventriculo, certè alicujus determinatæ rei appetitus causa non est quærenda in ventriculo, sed in cerebro, quod si male se habeat (læsum scilicet à pravis humoribus aut vaporibus, ex saburra aliqua circa uterum, lienem, pancreas, aliasve partes restagnante, sursum elatis, eique communicatis) facile contingunt absurdæ imaginationes, ex quibus depravatum sequitur judicium (res nota est in melancholicis; qui multoties circa unam solam rem, sæpe ab ipsis cogitatam, delirant, de reliquis satis bene judicantes) atque ita hujus vitio seu errore, res pravæ & absurdæ multoties tanquam saluberrimæ & optimæ, vel saltem ut gratissimæ, appetuntur, quales sunt creta, carbones, aliaque ante commemorata, de quibus pica laborantes antea sæpe cogitarunt. Quantum enim crebra alicujus rei intenta cogitatio talem depravatum appetitum accendat, & quantum in eo valeat, liquet in mulieribus gravidis, quæ multoties tam fervide appetentes sunt, ut si illis rebus, quas appetunt, potiri nequeant, sæpe earundem rerum notas foetibus suis imprimant, quæ impressio non potest dici procedere à ventriculi pravis aliquibus humoribus, sed à cerebro, quatenus crebra earum rerum cogitatio, cum judicio bonitatis, in eo peragitur, & per spiritus animales earum ideæ ex eo ad fœtum deferuntur, eique imprimuntur. Præterea ægri pica laborantes non appetunt semper unam eandemque rem, sed modò hanc, modò illam, pro ut modò de hac, modò de illa magis cogitarunt, quod profecto uni alicui pravo humori in ventriculo hærenti non potest imputari, quippe diversarum rerum appetitus à diversis humoribus procedere deberet. Ad hæc pica infestari solent ægri cum esuriunt, & tunc illico avidissimè eas res appetunt, de quibus antea sæpe cogitarunt, sive bonæ, sive absurdæ fuerint, easque non noxias aut pravæ, sed bonas & gratissimas futuras judicant: quorum tamen alienum appetitum multoties stratagemate quodam præveni, injungendo scilicet domesticis, ut coram talibus ægris nullam facerent mentionem istarum rerum, quas tam avidè desiderabant, earumque etiam picturas è domo amoverent, & interim tacite cibos bonos sæpius de die offerrent, sicque impedirent ne unquam multum esurirent: tali enim modo perfecti, quod medicamentis aut rationibus impetrare non potueram. Una hic superest *objeçtio*, scilicet, si ventriculi vitio non fieret pica, ægri ab alienis assumptis male valerent, neque talia in ventriculo digere-

*objeçtio.*

digerent, atqui è contra plurimi hac de causa nullum incommodum patiuntur, procul dubio quia in ventriculo sunt tales pravi succi, qui illas res absurdas dissolvere atque digerere possunt, quas proinde speciatim, in specialis yellicationis remedium, videtur postulasse ventriculus. Hujus objectionis efficacia facile divellitur, si consideretur non absolute verum esse, quod ægri nullum incommodum à rebus absurdis & alienis comestis percipiant, sed illud duntaxat in paucioribus, nec nisi prima, aut secunda, tertiave vice verum esse, postea verò illo inde satis graviter lædi, atque viscerum obstructions, hydropem, pso-ram, aliamve pravam cachexiam contrahere. Causa verò quod in principio à talibus rebus non manifeste lædantur, duplex est.

*Primo*, quod in ista avida comestione spiritus animales per nervos sexti paris valde copiosi ad ventriculum fluant (sicut in cogitatione de re Venerea copiosi feruntur ad partes genitales) accedente etiam sanguine arterioso copiosiore: quam efficaciter autem hi spiritus in nutritione operentur, latius explicabimus *lib. 3. cap. 11.* & quantum ad coctiones ventriculi faciant, si solito copiosiores influxerint, liquet in illis ventris mancipiis, qui dies noctesque in cute curanda occupati sunt, & de ventriculo infarciendo fere semper cogitant: hi enim, propter copiosos spiritus ad ventriculum determinatos, multo feliciores habent ventriculi coctiones, quam alii, qui continuis literarum studiis occupati, spiritus alio avocatos habent, hincque frequenter cruditatibus laborant, ac vix levissimos cibos bene digerunt.

*Secundo*, quod pica laborantes sint plerumque nonnihil melancholici, vel tales saltem quibus acres fermentacei succi solito copiosiores & aciores in liene, pancreate, & ventriculo generantur, unde etiam cum incipiunt esurire, acius esuriunt, & res quaslibet ingestas longe facilius digerunt, quam alii, imò quam illi ipsi aliis temporibus (sic mulierem gravidam novi, quæ cerasa matura avidissime desiderans, una vice quinque, sexve libras; aliam quæ triginta placentas; aliam quæ haleces salsatas crudas comedit, & bene digessit, cum alioqui aliis temporibus minime edaces essent, ac ne quartam, imò vix sextam earum rerum partem edere aut digerere potuissent) & hujus ratione fit quod tunc cibos copiosos, vel etiam res absurdas (triticum, crudos pisces, carbones, cretam, &c.) duræ digestionis allquot vicibus mediocriter bene digerant, vel saltem talia ipsis è ventriculo sine noxa effluant: verum si diutius in talium usu procedant, deficiente tandem acriorie illo succo, adeo affliguntur ventri-

culus & reliqua viscera, ut eorum coctiones planè interturbentur ac depraventur, & copiosi pravi succi, pessimam cacochymiam, variorum morborum causam generantes, suscitentur. Atque ex his omnibus manifeste liquere puto, picam, seu alienarum rerum appetitum non produci proxime à depravatis aliquibus humoribus, in ventriculo genitis, aut hærentibus, sed cerebri aliquo vitio, & hinc imaginationis errore.

*Secundi problematis* affirmativam Regius, alique varii Medici docent & inculcant, cum tamen longissime absit à verò. Nam in morbo statum possunt quidem in ventriculo humores variis modis corrumpi, multique pravi colligi, nunquam tamen bilis in eo generari; & quæ in cholera morbo sursum deorsumque copiosa erumpit, illa non est generata in ventriculo, sed in hepate, & collecta seu cæcervata in folliculo fellis, poro bilario, aliisque vicinis locis, è quibus tandem acriter fermentans & effervescens, cum insigni impetu erumpit in duodenum intestinum, ex eoque mox, partim sursum per ventriculum, partim deorsum per reliqua intestina proturbatur. Hoc ex eo satis liquet, quia cholera plerumque ex improvviso invadit, nullis præcedentibus ventriculi male affecti, aut bilis in eo generatæ, vel collectæ, signis: sæpe bene cœnantibus, nec ullum incommodum in appetitu aut coctione persentientibus, media nocte in somno, aliis de die repente oboritur, nullo præcedente sui prælagio; quod certe non posset non præcedere, si in ventriculo tam copiosa bilis, tanti mali causa, generaretur, vel generata aut collecta fuisset. Neque etiam ratio suadet credere, Naturam ad unum idemque officium (ut ad bilis generationem) peragendum varia ac diversa organa construxisse: utitur enim illa ad quemlibet finem obtinendum, unius generis medio, atque sic solus ventriculus chylicat, solum hepar bilificat, solum cor sanguificat, &c. Non valet hic effugium quod infertur: bilis in ventriculo genita non est bilis naturalis, sed præternaturalis. Respondeo: illam bilem quæ in cholera (quam bilem in ventriculo generari tradunt) & infantium multorum diarrhæis copiosa ejicitur, esse acrem, & plerumque æruginosam, seu viridem, eamque talem in apertis hujusmodi ægrorum cadaveribus semper admodum copiosam à me inventam fuisse in folliculo fellis & ductu cholodochi, paucissimam verò aut nullam in ventriculo: quod certum indicium est, eam effervescentem, ex folliculo erumpere in intestina & ventriculum, non verò in hoc generari. In infantibus tali diarrhæa biliosa viridi mortuis sæpe folliculum fellis viridissima bile repletum, ad ovi gallina-

*An etiam bilis in ventriculo generetur.*

gallinacei majusculi magnitudinem intumuisse deprehendi. Ita ut qua parte naturalem, in ea etiam præternaturalem bilem gigni certum sit, scilicet in hepate. At dicat aliquis, impossibile est tantam bilis viridis copiam tam subito in hepate generari, aut alicubi in eo recondi vel coacervari posse, quanta solet in cholera paucis horis sursum deorsumque excerni (interdum enim spatio viginti quatuor horarum multæ libræ exturbantur, iisque aliquot matulæ replentur) ac proinde necessario verum esse videtur, istam bilem in ventriculo tunc gigni. Respondeo: hæc bilis ad omnimodam folliculi fellis repletionem collecta, plerumque obscure viridis & maxime acris est, cumque hæc effervescens erumpit in intestina & ventriculum, tunc partes illas molestissime vellicat, & instar medicamenti fortiter purgantis, serosos aliosque varios humores undequaque ad intestina profluere facit, qui omnes à pauca bile viridi, intestinis & ventriculo infusa, viridi colore tinguntur, & sic virides exturbantur: quæ affluentium humorum copia cum nonnunquam admodum magna sit, ex isto viridi colore judicant imperitiores non nisi meram bilem tanta copia expelli, cum tamen sint alii humores bile tincti. Quod autem viridis illa bilis tantam tincturam sui admistione faciat, hoc scio ab experientia, nam cum illius ex folliculo educi semi cochleari integram libram aquæ, multis spectantibus, viridi colore tinxit.

An chyli  
pars feratur  
ad lienem.

*Tertii problematis* patroni affirmantes, cum quibus etiam consentit Regius, docent totum chylum è ventriculo non effluere ad intestina, sed aliquam ejus partem per vas venosum breve, aliasve vicinas venas gastricas, deferri ad lienem. Ad probationem adfertur gemina ratio. *Prima* est, quod foetus in utero primum untriatur succo, cui innatat, lacteo, per umbilicalem venam ei inhzrentem, & nondum ad placentam usque extensam, versus hepar & cor foetus delato: si hoc in foetu contingat, etiam mirum non esse, quod in homine nato pars chyli per venas gastricas transeat ad lienem. *Alterà ratio* est, quod ab assumptis alimentis tam cita sequatur refectio, ut talis, tamque cita fieri non posset, si toti chylo per omnia vasa lactea prius obambulandum foret, & non potius aliqua ejus pars brevior via ad lienem, indeque citius ad cor perveniret.

Verum respondeo ad *primam rationem*, foetum eo tempore non nutrir succo lacteo, sed residuo seminali liquore per juxta appositionem affuso, porosque subeunte (hoc latius docebitur *sequente cap. 29.*) & paulo post etiam per os admissio: venam quoque umbilicalem tandem placenta uterina irradicatam nihil lactei succi amplius recipere

vel deducere posse, atque hinc ab ea comparisonem cum venis gastricis malè institui. Præterea, etsi fortè eo tempore aliquid succi alimentarii per venam umbilicalem deferretur ad hepar foetus, dico, tamen inde non sequi, chylum in hominibus natis etiam transire è ventriculo per venas gastricas, aut ex intestinis per meseraicas; cum illa comparatio omnino claudicet, multæque partes in foetu usum quendam habeant, quem non habent in hominibus natis: exemplum præbent omnia vasa umbilicalia, foramen ovale in corde, conjunctio arteriæ pulmonaris cum aorta, &c. cum etiam quædam partes in foetu nondum habeant usum, quem adipiscuntur in natis, ut pulmo, hepar, lien, partes genitales, oculi, nasus, aures. Ex usu igitur alicujus partis in foetu, non potest noncludi alterius partis usus in homine nato, ut neque ex usu venæ umbilicalis, usus venarum gastricarum & meseraicarum.

Quantum ad *secundam rationem*, illa valde plausibilem probationem inferre videtur à cita refectioe, quæ ab assumptis cibis aut potibus sequitur, quæ fieri putatur, quia subtilior chyli pars brevior via è ventriculo ad lienem tendens, longe citius ad cor venit, idque reficit, quam si primò ad intestina, hinc per plurima vasa lactea ad venam subclaviam, & tandem per cavam ad cor veniret. Imò jam aliquoties audiui, ad majorem hujus probationem, à D. Regio citari ex Fernelio exemplum cujusdam ægræ, cui pylorus omnino obstructus erat, quæ quotidie edebat, sed comesta aliquamdiu post revomebat, sicque longo tempore vivebat, quod (ut dicit Regius) fieri non potuisset, nisi aliquid chyli è ventriculo per venas gastricas ad lienem delatum fuisset, eamque sic nutritivisset. Verum etsi hæc speciose proponantur, certissimum tamen est, nihil omnino chyli è ventriculo ad alias partes effluere, quam per pylorum, nihil etiam ex eo ad lienem pervenire. 1. Quia chylus nulla alia vasa ingreditur quam lactea, ut latius docebitur, *sequent. cap. 10. 11. & lib. 7. cap. 2.* 2. Quia ad ventriculum, aut à ventriculo nulla omnino lactea vasa feruntur (Deusingius, *instit. anat.* illa quidem contra omnem autopsiam ac rationem describere audeat, sed, ut credo, nullus Deusingianus demonstrare unquam audebit) & si chylus ex eo tenderet ad lienem, deberet per vas venosum breve, aliasve sanguiferas venas deferri, cum tamen illæ, neque chylum admittant, neque recipere possint, propter rationes de venis meseraicis allatas, *lib. 7. cap. 2.* 3. Quia chylus à crassiore massa non separatur, nec vasa lactea ingreditur, nisi prius bilis cum succo pancreatico ei admisceatur, eumque fermentatione quadam, seu effervescencia peculiari

peculiari à crassiore eum involvente materia separet, & simul attenuet (ut dicitur *cap. 17.*) hæc autem affunditur in intestinis, non in ventriculo: atque si forte ad ventriculum feratur, hoc præter motum Naturæ ordinarium est, tuncque chylicatio læditur & inturbatur. Quod autem chylus sine bilis admittance à crassiore massa non separetur, nec fermentatione adeo attenuetur, ut vasa lactea subire possit, liquet in illis ictericis quibus ab obstructione ductus cholidochi, vel ab alia quacunque de causa impedito bilis in intestinum duodenum influxu, affectio illa contingit, quippe illis ob denegatum bilis in intestina illapsum, rariores contingunt alvi dejectiones, & cum ægri tandem excernunt, tunc alba chylosa plurima, in intestinis collecta, quæ defectu bilis fermentari ac distribui non potuerunt, simul exonerant. Quantum ad subitam refectionem ab assumpto alimento, illa non fit per breviorē istam chyli viam à ventriculo ad lienem, indeque per hepar & venam cavam ad cor (quæ re vera brevior non est, quam cum fertur à ventriculo ad intestina, ex iisque per vasa lactea & subclaviā ad cor) sed quia tenuissimi vapores alimenti mox per ventriculi poros ad cor penetrant. (totum enim corpus, teste Hippocrate, *ἑνόςον* est) ac simul etiam nervos cordi & ventriculo à sexta conjugatione communes grato modo demulcent, ut ex eo patet, quia non tantum alimenta, sed etiam fragrantia odoramenta, imò & epithemata cordialia, in lypothymiam proclives vel prolapsos ilico reficiunt, cum tamen neque odores ad lienem, neque res odorem istum expirantes ad cor perveniant, sed soli spirituosissimi halitus per poros ad illud pertingant. Præterea mirum dictu, quam citò tenuissimæ alimentorum particulae, quæ non egent multa coctione, per vasa lactea ad subclaviā & cor perveniant. Canibus diuturniore fame inanitis alimenta liquida facilis digestionis dedi, in iisque post duos tresve horæ quadrantes occisis, brevi isto temporis spatio chylum aquosum in omnibus lacteis vasis copiosum, à ventriculo & intestinis delatum, inveni, quamvis cibi in ventriculo omnes adhuc contineri viderentur. Historia ex Fernelio citata, non satis bene videtur citari: Fernelius enim nusquam, quod scio de tali obstructione pylori quidquam scribit: habet quidem, *lib. 6. pathol. cap. 1.* historiam mulieris gravidæ, cui tuberculum durum enatum erat in stomacho, ita ut nulla alimenta ad ventriculum pervenire possent, sed mox attracto isto orificio remearent versus superiora, quæ bimestri spatio nihil cibi potiusve conatu vel maximo in ventriculum ingerere potuit. Sed quid hæc historia ad prædictæ opinionis probationem

facit? Docet alimenta in ventriculum pervenire non potuisse, ergo ex illis, neque chylum in eo confici, neque hunc ex eo ad lienem fluere potuisse. Melius citari & objici posset historia Philippi Salmuthi, *cent. 1. obs. 20.* de quodam qui continuis vomitibus affligebatur, & cibos assumptos, ob transitum à scyrroso pyloro, (ut post mortem compertum est) interclusum, statim rejicere cogebatur. Item similis historia à Benivenio annotata, *observat. 36.* ut & alia similis à Riverio tradita, *cent. 1. observ. 60.* aliaque à Jo. Theod. Schenckio scripta, *exerc. lib. 1. sect. 2. cap. 33.* Qualem sibi ipsi & aliis Medicis Delphensibus visam historiam, nobis mense Junio anni 1664. narravit Joannes vander Meer, Medicus delphensis, de muliere quadam quæ Delphis circiter per semi annum male habebat, & alimenta assumpta post aliquot horas, primo bene cocta, postea valde foetentia evomebat, cui alvi dejectiones paulatim magis magisque imminuebantur, ita ut primis septimanis bis terve, postea semel in septimana, tandem vix quatuor septimanarum spatio semel alvum dejiceret, & satis pauca excerneret, atque hinc vires paulatim magis magisque imminuebantur, totumque corpus ad extremam maciem deducebatur, usque dum tandem mors morbum finiret: in cujus aperto cadavere pylorus cartilagineus inventus est, adeoque angustus, ut solummodo majorem aciculam transmitteret. Verum cum ex illis historiis clarissimè pateat, pylorum non subito, nec diu totum obstructum, sed paulatim angustatum, sicque chyli transitum paulatim imminutum, hincque defectu sufficientis alimenti, vires paulatim dejectas, & corpus paulatim emaciatum fuisse, cum etiam ex raris alvi dejectionibus, & ex eo quod pylorus solummodo transitum aciculæ majoris permitteret, liqueat dictis ægris nunquam penitus occlusum fuisse pylorum, vel si tandem occlusus fuerit, eos cum tali omnimoda occlusionē non diu vixisse, sed citò mortuos fuisse; etiam ex iis minime probari potest, chylum à ventriculo ad lienem fluere posse: hoc enim si verum foret, & chylus per illam viam ad cor citius pervenire posset, vires ægri diu integræ persisterent, neque propter occlusum pylorum tam citò deficerent, mortique accessum & ingressum concederent.

Has difficultates considerans Bernhardus Swalve, *lib. de querel. & opprob. ventric. pag. 63. & 64.* non audet asserere subitam refectionem fieri à chylo ad cor veniente breviorē viā quam per intestina, sed scribit, dato casu necessitatis, oscula venarum gastricarum in ventriculi tunicis nonnihil dehiscere, iisque, non quidem chylum, utpote qui nimis crassus est, sed liquidiuscu-

*An chylus  
subeat ve-  
nas gastri-  
cas.*

E

lum

lum aliquem assumptum liquorem prompte instillari, cum sanguine ad cor refluyente protinus confundendum. Verum hac ratione videtur Swalve venis gastricis crudelem vim inferre, easque ad suam speculationem invitas flectere, imò etiam ex pacto, pro suo libitu eas nonnunquam referare velle, at tali scilicet conditione, ut non nisi tempore necessitatis dehiscant, & apertæ sanguinem suum non profundant in ventriculi cavitatem (quod alioqui facile contingere, & sic vomitus sanguinis fieri posset.) ut etiam ipsum chylum non assumant, sed liquidum duntaxat humorem è ventriculo absorbeant, & raptim ad cor deferant.

Ufus chyli.

Digestio  
secunda.

An aliqua  
partes chylo  
nutriantur.

Ufus chyli est, ut ex eo generetur sanguis. Verum anne aliquæ partes chylo proxime nutriantur, antequam in sanguinem mutatur, controversum est. De ventriculo id apertissime scribit Galenus, lib. 3. natural. facult. cap. 6. his verbis: Porro is finis est (scilicet coctionis ventriculi) ut ejus quod in qualitate conveniens consentiensque est, partem aliquam sibi capiat. Itaque quod in cibo optimum est, id halitus specie, at paulatim, sibi attrahit, atque in tunicis suis reponit, iisdemque adjungit. Ubi abunde saturatus est, quicquid reliqui nutrimenti est, veluti onerosum aliquid rejicit. Illud ipsum etiam asserit, ejusdem libri cap. 12. & 13. Hanc Galeni sententiam plurimis rationibus confirmat Vallesius, controvers. med. & philos. lib. 1. cap. 14. Quod ventriculus, inquit, chylo nutriatur, docet sua substantia modus, & insuper hæ rationes. Si ventriculus non nutriretur chylo, neque conficeret cibos. Quorsum enim chylum generat? num ut mittat ad jecur? jecoris igitur alendi cura est ventriculo, non igitur naturâ ducitur, sed intellectu: nam quæ naturâ operantur, aliorum nulla tanguntur cura. Præterea, aut ventriculus retinet chyli aliquid, & ad hepar reliquum mittit, aut nihil retinet. Si nihil retineret, statim esuriret: sed & si id quod retinet alimentum non esset, esuriret statim, solum siquidem alimentum videtur illum à fame vindicare posse. Non igitur solus sanguis membra nutrire aptus est. Cum Galeno etiam sentit Æmilius Parisanus, lib. 5. subtil. exercit. 3. cap. 2. ut & Henricus Regius, medic. lib. 1. cap. 4. nec ab eo alieni sunt Peramatus & Montaltus. Galeno contrarius est Aristoteles, qui, lib. 2. de part. animal. cap. 3. multis rationibus docet, sanguinem esse ultimum alimentum, eoque, & non chylo, partes omnes immediate nutriri. Plempius, lib. 2. fund. med. cap. 8. etsi ob debiles rationes utramque partem facile sustineri posse existimet, tamen cum Aristotele defendit, ventriculum & omnes partes corporis proxime nutriri sanguine, eamque sententiam multis rationibus suffulcit. Hoc ipsum etiam sentit Bernhardus Swalve, in

quærel. & approb. ventric. Nobis quoque maximè placet Aristotelis sententia, dicentis, Sanguinem esse ultimum alimentum. Sed interim hoc addi velim, chylum ventriculo & vasis lacteis necessariam quandam irrigationem conferre, sine qua subsistere in sanitate vix possunt, licet sanguine nutriantur. Eodem modo sicut multæ herbæ Solis ardori expositæ, quamvis satis nutrimenti è terra recipiant, tamen languescunt & concidunt, nisi aquâ irrigentur, quæ sua humectatione vigorem iis confert, quatenus à Solis fervore nimis siccitas & contractas particulas rursus laxat, sicque nutrimento liberiores ingressum concedit. Ita etiam tunica ventriculi & vasorum lacteorum, nisi à chylo humectarentur, nimis exarescerent, atque sic contractis substantiæ poris, minus commodè influentem sanguinem nutritium admitterent, eaque de causa debilitarentur, & tandem deficerent: quemadmodum hac de causa in longis inediis vasa lactea ita exarescunt, ut postea nunquam rursus aperiantur, hincque impedita postmodum chyli distributione, ægri atrophiam consumantur. Cum autem deficit illa humectans humiditas in ventriculo, tunc molesta tunicarum ejus contractio fit, & à fermentaceo succo iis inhzrente inducta vellicatio, famem parit, quam non sedat novus chylus nutritione, sed hoc faciunt alimenta humida assumpta, & ipse etiam ex his genitus chylus, humectatione, qua contractio tunicarum laxatur, & vellicantis succi acrimonia temperatur ac mitigatur. Sola humectatione id fieri, ex eo liquet, quod quælibet humectantia, cerevisia, aqua, præsana, aliaque similia liquida copiosius ingesta, per dictam humectationem famem citò imminuant & sedent pro tempore.

Verum quid dicetur de foetu in utero, cujus ventriculus solo lacteo amnii liquore nutriri videtur, cum nullus adhuc sanguis per vasa umbilicalia affluat? Respondeo: ille primo nutritur crassioribus à formatione corporis foetus residuis feminis particulis, partim in bulla pulsante primo in sanguinem mutatis, partim per juxta appositionem & aliqualem coctionem appositis, sed non chylo, aut lacteo amnii liquore: at consumptis feminis residuis particulis, tunc nutritur sanguine, ex lacteo amnii liquore confecto: quo tamen nutriri non posset, si destitueretur illa humectatione, qua à lacteo liquore perfunditur. Hac de re infra videndum, hujus lib. cap. 29.

Si dicat aliquis, concessio, ventriculum, quia arterias & venas manifestas habet, sanguine nutriri, tamen ipsa vasa lactea, eo nutriri non videntur, cum nullas arterias sanguinem adducentes recipiant. Resp. innumeræ in corpore nostro partes sunt, in quibus

quibus arteriæ visum subterfugiunt, etsi illas ingrediantur; & ad quas nullam viam, per quam sanguis adfertur, videre possumus, cum tamen non chylo, sed sanguine nutriantur: tales sunt, tunica cornea, ureteres, membrana tympani, varia ligamenta & ossa, multæ cartilagine, &c. quibus

etiam vasa lactea & lymphatica annumerari possunt: etsi enim sanguinis ad ea accessus nobis non pateat, inde tamen concludi nequit, eum non accedere, cum in multis aliis partibus similiter lateat accessus via, & tamen accessus ex nutritione constet.

## CAPUT VIII.

## De Intestinis.

**D**Extro ventriculi orificio, scilicet pyloro, continuantur Intestina, Græcis *έντερες*, & *έντερος* *έντα*, quod intra corpus locata sint, atque hinc Latinis etiam Interanea dicta.

*Intestina.*

Sunt autem corpora oblonga, membranacea, concava, teretia, varie circumgyrata, à ventriculo ad podicem usque extensa, ducendo chylo, fœcibusque continendis & transmittendis destinata.

*An chylum conficiant.*

Dico, chylo ducendo, &c. quaeritur an non etiam generando chylo sint destinata? Videtur ea mens fuisse Galeni, utpote qui, 4. de usu part. sic inquit: *Intestina licet coquendi chyli gratia non sint constructa, sed continendi & distribuendi tantum, attamen quia nunquam iners & otiosa est Natura, in ipso per intestina transitu, elaborationem perfectam consequitur chylus.* Galeni sententiam sequuntur Aretæus & Aëtius, atque inter recentiores Spigelius: eique adstipulari videtur constructionis ventriculi & intestinorum similitudo, in substantia, temperie, colore, & tunicarum contextu. His auctoritatibus omnino abreptus Plempius, lib. 2. fund. med. cap. 8. affirmativam quoque assumit, dicitque eandem coctionem quæ agitur in ventriculo, agi posse in intestinis (quod etiam inculcat Regius), atque hinc concludit, clysteres ex liquidis alimentis confectos, per anum injectos, posse nutrire, quatenus in crassis intestinis chylus ex iis conficitur, isque inde per lactea vasa rapitur, totique corpori communicatur. Negativa nobis potior videtur, quia cum in frigida humidaque ventriculi intemperie omnimoda cruditas est (ut in lienteria) assumpta alimenta non mutata, neque ullo modo cocta ab alvo defluunt, quæ tamen, si ulla chylicandi vis intestinis inesset, per tortuosos eorum gyros & meandros longo itinere decurrentia, aliquam saltem mutationem ad chylum nanciscerentur. Præterea bilis cum succo pancreatico continûe defluit in intestina, in iisque cocta alimenta fermentat quidem, sed illâ peculiari effervescentiâ, suæque amaritudine chylicam coctionem impedit magis, quam facit, ut

liquet cum in ventriculo copiosior hæret. *An clysteres nutriant.* Denique quis credat clysteres in crasso intestino stercoreibus admistos in chylum mutari, & sic nutrire posse? locus fœtidus ac fœculenta admista stercorea istam in chylum mutationem ibi fieri non posse, plus satis docent. Fortè eatenus vires nonnihil reficiunt, quatenus ex iis subtiliores & benigni aliqui halitus per poros aut vasa sursum ad superiora quædam viscera ascendant, eaque nonnihil reficiunt, eodem modo sicut etiam vini, panis calidi, mellis, aquæ vitæ, carnis assatæ odor naribus receptus, vires dejectas reficit, etsi in chylum non mutetur.

Longitudo intestinorum sexies, plus minus, superat vel æquat longitudinem hominis cujus sunt (alii, qui etiam ventriculum & œsophagum admetiuntur, septies, vel paulo minus, hominis longitudinem æquare tradunt: Hippocrates illa duodecim vel tredecim cubitorum; Vesalius quatuordecim ulnarum Italicarum cum dimidia, longitudinem habere scribit: nos communiter ulnarum nostratium quatuordecim, præter propter, sed anno 1668, mense Novembri semel in publico subiecto, longitudinem ulnarum sexdecim cum dimidia, invenimus) atque hinc, ut parvo spatio excipi possint, multis gyris & tortuosis circumvolutionibus in abdomine posita, ac mesenterio annexa sunt, quo medianæ alligantur dorso, & ab ossis illi cavitatibus sustententur.

Tanta longitudine & circumvolutione imprimis opus fuit, ut è ventriculo elapsa concocta alimenta, longiore in intestinis, morâ, flavæ bilis & succi pancreatici admistione commodius fermentarentur seu effervescerent, sicque subtiliores chylosæ partes è crassiore massa separata, in angusta vasorum lacteorum orificia, partim per peristalticum proprium intestinorum motum, partim, & quidem maxime, per musculorum abdominis cum respiratione motorum impulsionem, melius impellerentur: cumque in finem, quia separatio illa imprimis in tenuibus fieri debebat, Natura per multas spiras plurimosque anfractus

*Ratio longitudinis.*

E

ctus



ctus, tanquam remoras, tenuia contorsit, cum crassa solummodo per circularem & obliquum incessum arcuatim deduxerit. Præterea etiam valvulas conniventes iis concessit (de his statim dicetur) defluentium nimis rapidum transitum impediētes. Quippe si chylus per brevina intestina defluxisset, vasa lactea præterlapsus fuisset, antequam aut commode fermentari, aut ea subire potuisset, atque sic corpus debito ac sufficiente nutrimento fraudatum, hominem coëgisset ad sui sustentationem identidem comedere, & defectum illum continua ingestione compensare. Hujus rei exempla habent Cabrolus & Riolanus, hominum scilicet voracissimorum, in quibus post mortem unum, idque mirabiliter breve, ad instar Latinæ majusculæ literæ S. infortum, inventum fuit. His adde, quod per brevina intestina citius defluxissent excrementa, sicque hominem crebrius deijciendi servitio obligassent.

*Ambitus.*

Ambitum obtinent intestina rotundum, ad majorem capacitatem, & faciliorem transeuntium descensum.

*Substantia, & tunica.*

Substantiam habent membranofam, ut ventriculus, & triplicem tunicam: *exteriorem* communem pinguedine perfusam, à mesenterii membranis è peritonæo pronatis ortam: *mediam* carnosam, variis tenuibus fibris, præcipue transversis & rectis, per-textam: *intimam* nervosam, quæ in tenuibus rugosa est, ut chylum remoretur, & quasi carneâ quadam spongiosâ crustâ (hanc alii *peristoma*, alii *velamentum bombycinum*, alii *muscum villosum*, appellant) sed tenui, obducta (per hanc putat Fallopius chylum, velut per spongiam transmitti, antequam vasa lactea ingrediatur) atque, ut acrium humorum injurias avertat, etiam ad tutelam lentore quodam mucido, ab excrementis tertiæ concoctionis genito, lubrica; in crassis verò in cellulas expansa est. Riolanus, *lib. 2. anthropog. cap. 12.* sine fundamento scribit, carnosam tunicam, quæ in ventriculo media est, in intestinis esse intimam, & internam quidem crassam, sed tamen magis nervosam esse, nec multum differre ab interna ventriculi tunica.

*An habeant vim attracticem.*

Verum cum intestina omnis generis fibris donentur, quæritur an etiam vim attracticem habeant; qua chylum è ventriculo attrahant? Affirmativam, auctoritate Avicennæ & rationibus nonnullis inductis, multi defendunt: sed malè, cum nulla talis attractrix vis iis insit: quemadmodum id bene docet & probat Galenus, 4. & 5. *de usu part. & 3. de natural. facult.* Sic etiam de eorum vi retentrice similis quæstio movetur. Utramque quæstionem egregiè & latius expendit Andreas Laurentius, *lib. 6. anat. cap. 15. quæst. 10. & 11.*

*Nervi, & arteriæ.*

Nervos à sexto pari nanciscuntur: arte-

rias verò à mesenterica, tum superiore, tum inferiore, & nonnullas ab intestinali cœliacæ ramo.

Innumeræ exiles venularum radices inter *Vene.* tunicas eorum dispersæ, circa mesenterii annexionem hic illic concurrentes, multas efformant venas, à mesenterii, quod conscendunt, ingressu, *Meseraicas* nominatas, quæ in mesenterii supremitate, paulo ante ingressum in portæ venam, in duos ramos majores coeunt, sicque dextram sinistramque venam mesentericam constituunt.

His valis etiam interferuntur vasa lactea *Vasa lactea.* mesenterica, osculis suis versus interiora intestinorum hiantia, & chylum ex iis suscipientia, eumque ad magnum chyli receptaculum deferentia.

Temperamentum intestinorum vulgò *Temperamentum.* traditur esse frigidum & siccum, scilicet comparative loquendo, quatenus minus calida & humida sunt, quam multæ aliæ partes.

Usum intestinorum ex antedictis satis *Ufus.* patet hunc esse, ut non solum alimenta in ventriculo cocta recipiat, sed horum in illis separatio fiat, utilis ab inutili, & ex iis propulsio utilis in vasa lactea, inutilioris verò expulsio per podicem.

Hæc autem propulsio & expulsio imprimis peraguntur pressione muscutorum abdominis, quæ plurimum adjuvatur ab intestinorum exiguo proprio motu, procedente ex contractione fibrarum quas in propriis tunicis habent, qui admodum conspicuus est in felibus aut cuniculis vivis, dissectis. Hunc autem fibrarum motum aliquo modo ab obliquis, sed præcipue à transversis fibris peragi, ab iisque contenta à superioribus versus inferiora depelli, certum est. Verum si hic motus aliquando invertatur, quod rarò contingit, & fibræ sua contractione intestinorum contenta, ab inferioribus incipiendo, versus superiora moveant, tunc stercora è crassis intestinis sursum acta, in ventriculum ascendunt & evomuntur. Sic memini me Noviomagi tractasse *Observatio.* adolescentem ægrotantem, qui præter multa alia scæda, etiam suppositorium, quod ano immissum fuerat, integrum evomuit. Et hic Ultrajecti, anno 1658. mensè *1.* Aprili, graviter ægrotanti gravissimo putridissimoque Consuli Wede clysterem præscripseram, quem subitus injectum, intra semi horam sursum evomuit, ex quo perverso motu prognosticum mortis pronuntiavi, quæ post paucas horas subsequuta est. *2.*

Esti verò à pyloro usque ad podicem *Divisio.* tantum unum sit intestinum, tamen à substantiæ crassitie, nec non à magnitudine, figura, & officii varietate, illud ab Anatomicis distinguitur, in intestinum tenue seu gracile & crassum.

Tenue,

*Tenue.*

Tenue, à substantiæ tenuitate denominatum, umbilicalem regionem & hypogastrium occupat; hocque pro ratione figuræ, situs, longitudinis, & copię vasorum lacteorum, triplex à veteribus constituitur, *Duodenum, Jejunum, & Ileum.*

*Duodenum.*

Primum pyloro continuum, Galeno *ἐκφυσις*, id est, exortus, vel processus; antiquis verò Græcis & Herophylo *δωδεκαδάκτυλον*, atque hinc etiam communiter Latinis *Duodenum* nominatur, à duodecim digitorum transversorum mensura, quamvis illud vix quatuor digitorum mensuram habere, hodierni plerique Anatomici doceant. Verum si à pyloro usque ad inflexionem jejuni, quo loco transversim sub pancreate jacens sursum assurgit, mensuratio fiat, duodecim digitorum longitudo reperietur.

*Substantia.*

Hoc duodenum pyloro in dextro latere continuum, nec circumvolutionibus distortum, etsi reliquis intestinis angustius sit, crassiores tamen præ aliis tenuibus substantiam obtinet, & quatuor aut quinque digitorum transversorum latitudine à pyloro (rarissimè circa jejuni medium, quod tamen se vidisse refert Plempius) in ruga flexuræ ejus, ubi parva papilla prominet, modò uni ductui cholidochæ & Wirtzungiano communi, modò duobus diversis foraminibus, singulis ductibus propriis, perforatum est: quæ si duo sint, tunc superior ductum cholidochum, inferior Wirtzungianum transmittit: si verò ad ingressum unus sit (quod frequentissimum in homine, rarissimum in canibus) tunc stylus in illud versus superiora immisus bilarium, versus inferiora, pancreaticum ductum ingreditur. Hi tamen ductus non recta, sed obliqua via cavitatem ejus subeunt seu intrant.

Veslingius refert, & quotidianæ sectiones docent, hoc intestinum nonnunquam laxitate & amplitudine insigni præditum reperiri, atque tunc majori ventriculo quasi minorem adjunctum videri: quæ laxitas ipsi contingit à succis fermentaceis acrioribus & vitiosis in illud delabentibus, hincque validis inductis fermentaceis effervescentiis, à quibus non solummodo ipsum valde distenditur, verum etiam molesti rugitus, magni dolores, lincinationes, summæque anxietates in viventibus oriuntur.

*Situs.*

A pyloro, ut dictum, oritur, & mox ad posteriora sub ventriculo deorsum, versus dextrum renem reflexum, ac latiori pancreatis extremitati adhærens, vertebri lumborum & reni sinistro per ligamenta membranæ connectitur, ac deorsum excurrentes ad anfractuum principium sub colo definit.

Secundum, Græcis *νῆσιν* dictum, apud

Latinos *Jejuni* nomen obtinuit, quia *Jejunum.*

plerumque vacuum invenitur, tum propter vasorum lacteorum illud ingredientium maximam copiam, tum propter chyli à bile succoque pancreatico, per suos ductus proprios proxime influentibus, promptiorem effervescentiam, seu à fecibus separationem, & in vasa lactea ingressum.

Hoc longitudine duodecim vel tredecim *Situs & magnitudo.* palmos, latitudine digitorum circiter adæquans, multis gyris intortum, sub pancreate, prope spinam, in umbilicali regione, imprimis versus sinistram latem, situm est, initium habens à prima intestinorum circumvolutione, finem verò ubi vivere, & inane esse, definit.

Theodorus Kerckringius, *observat. 39. Valvula.* in hoc intestino notat valvulas aliquas, quas *conniventes* appellat, qui non claudunt ita intestinum, ut totam ejus cavitatem opeant, sed mediam circiter ejus cavitatem ita occludant, ut singulæ parte altera latiores, paulatim angustiores fiant, & rursus paulo inferius ab alia excipiantur, quæ latior ea parte qua præcedens erat angustior, talem intestino dant constitutionem, ut de super descendente delabi quidem possint, sed non præcipitari, unico quasi lapsu, ad inferiora. Idem Kerckringius similes etiam valvulas omnium primus (quæ primæ inventionis laus ipsi merito debetur, cum ante ipsum nemo, quod scio, istarum valvularum meminerit) observavit ac detexit in intestino colo, quas antehac in crasso intestino inflato, & ita exsiccato, nobis conspiciendas exhibuit, nam illæ tali modo optime & clarissimè demonstrari possunt.

Tertium à prædicto incipiens, *Ileum, Ileum.* Græcis *ἐλκόν*, *ἵππο* & *ἐλκίστη*, & *Volvulus* à circumvolutione ac gyrorum multitudine dicitur.

Hoc sub umbilico ad ilia & coxas utrimque situm, digiti transversæ latitudinem obtinet, ac longitudine reliqua duo multum superans, viginti unum aut duos circiter palmos adæquat. *Situs & magnitudo.*

Ejus principium est, ubi intestinum incipit esse angustius, & paulo rubicundius, finis ubi est valvula Bauhini, in principio coli.

Quod sequitur *Intestinum crassum* *Intestinum crassa.* nuncupatur, à majore carnositate & substantiæ crassitie, idque etiam in tres partes dividitur, scilicet in *Cæcum, Colon, & Rectum.*

Primum est illud quod Græcis *πυφλόν*, *Cæcum.* Latinis *Cæcum* appellatur, ita dictum, vel ab obscuro usu, vel quod altero fine pervium non sit, unde etiam *μονοκώλον* appellatur. Est autem appendicula parva, instar oblongi vermis, coli principio adhærens, longitudinis circiter quatuor digitorum

rum transverforum, exiguam cavitatem, in adultis plerumque vacuum, in fœtu excrementis repletam, habens. Spigelius aliquando lumbricum rotundum in eo invenit. In quadrupedibus plerumque excrementa aliqua continet.

*Connexio.* Non annectitur mesenterio, sed mediante peritonæo laxè jungitur reni dextro.

*Ufus.* Hujus usus hætenus incognitus fuit, quamvis alii hunc, alii alium usum per inanes potius conjecturas adscribere, quam hac in parte ignorantiam suam confiteri maluerint.

Veteribus nonnullis *Cacum* appellabatur, non antedicta appendicula, sed primus coli globus, ad ingressum tenuis intestini situs.

*Colon.* Secundum crassorum est *κώλον*, *Colon* *intestinum*, ita dictum tanquam *κρίλον*, *cavum*, quod inter intestina hoc maxime cavum sit: vel, ut aliis placet, à *κωλύω*, *tetardo*, quod in cellulis fœces remoretur. Hoc cæteris multo amplius & latius est, octo vel novem palmorum longitudinem habens.

*Situs.* Incipit circa os ilium dextrum, proximo ibidem reni se jungens, hinc sursum assurgit, & factò sub jecore flexu, transversim sub fundo ventriculi (cui mediante omento annectitur) pergit, & à sinistris lien renique sinistro tenuibus membranarum adhæret, atque circa os ilium sinistram, factò flexu, recti intestini principium orditur. Circa jecur verò à transsudante per folliculum felle bile, plerumque luteo colore tingitur, atque hinc excreticem ejus facultatem stimulari à nonnullis creditur.

Superiora ventris occupat, 1. Ut fœces paulatim in eo collectæ sua gravitate facilius deorsum volvantur & excernantur. 2. Ut coctionem ventriculi nonnihil fœcum calore adjuvet, quippe chymici nullam digestionem magis naturalem judicant, quam quæ fimi calore perficitur. 3. Ut fœcum gravitate medium mesenterium non comprimatur, sicque vasa lactea, lymphatica, & arteriæ venæque meseraicæ angustentur.

*Vinculum.* Vinculum habet proprium, digiti medii latitudine, secundum ejus longitudinem parte superiore, à cæco usque ad rectum intestinum, exporrectum, quo cellularum ordo continetur.

*Connexio.* Supernis & infernis partibus alligatur mediante peritonæo. Vesslingius ei duo ligamenta peculiariter suspensoria adscribit, quæ nusquam extant. Extremitas verò, quæ infra renem sinistram, usque ad recti principium extenditur, nulli parti alligatur, sed ab omni vinculo libera existit, eique copiosior pinguedo affunditur.

*Valvula Bauhini.* Ad ingressum tenuis intestini valvulam

obtinet orbicularem, sursum spectantem, fœcum regurgitantium, flatuumque obstaculum, quæ à primo ejus inventore hodie vulgo *Bauhini valvula* dicitur: quamvis alii ejus primam inventionem potius adscribant Varolio & Salomoni Alberto, eaque de re mordacem litem moveat Riolanus.

In hujus valvulæ descriptione non conveniunt Anatomici. 1. Nonnulli scribunt illam esse membranam ab uno latere intestino adhærentem, idque instar cortinæ claudentem. 2. Alii dicunt illam constare ex duabus membranarum sibi invicem oppositis, versus coli interiora spectantibus, quæ ad invicem concidentem intestinum tenue occludunt. 3. Alii judicant, illic nullam esse veram valvulam, sed circulum carnosum, intestino tenui, crassum ingredienti, circumjectum, idque instar musculi sphincteris contrahentem. 4. Nos antehac putavimus (ut in prodromo scripsimus) illam nihil aliud esse, quam membranam laxam circularem, & quasi propendiculam quandam intestini ilei colon ingredientis, quæ cum aliquid ex ileo ascendit in colon, cedit & aperitur; sed è colo si restagnantes fœces aut flatus ad ileum tendant, concidit ac complicatur, sicque viam obstruendo transitum versus intestina tenuia impedit: eodem modo sicut è navibus marinis tubuli longi ex corio laxo confecti à lateribus propendent, per quod aqua desuper in naves incidens, facile effluit, sed à fluctibus extrinsecus in tubulos impingens, quia hi mox plicantur, non ingreditur. Ut de ultima hac nostra opinione certiores essemus, placuit non ita dudum illam aliquo experimento clarius expiscari. E corpore itaque exemptum colon cum parte ilei ad utrumque finem funiculo colligavimus, & per immissum exilem tubulum fortiter inflavimus, flatumque per ligaturam intus detinuimus, sicque flatu distentum intestinum in aëre exsiccavimus usque ad duritiem: tunc in eo clarissime videre potuimus, non solum valvulas illas conniventes coli intestini à Kerckringio inventas (de quibus etiam paulo ante mentio facta est) sed notavimus quoque antedictam valvulam Bauhini esse membranam, ingressui intestini tenuis in colon transversim prætensam versus coli interiora nonnihil prominentem, & in medio ab uno ad alterum lato recto foramine, quasi cultello ei inciso, pertusam: atque sic observavimus, concidentibus utriusque istius aperturæ labiis, intestini ilei in colon ingressum his ita præmuniri, ut ex hoc nihil in illud regurgitare possit: & simul ex hac autopsia didicimus, ex antedictis quatuor opinionibus secundam esse maxime verosimilem; sed primam, tertiam, ut & quartam non.

stram, aberrare à vero: excepto quod tertia illud etiam vere & bene (nam ex autopsia patet) statuatur, carnosiore aliquem circumloquium ingressui ilei in colon esse circumjectum.

Ufus.

In hoc colo crassiora excrementa seu fœces coacervantur, & usque ad excretionis tempus continentur, cum turpe & molestum homini fuisset, si continuè defluxissent. Hunc in finem amplam capacitatem adeptum est, plurimasque cellulas, valvulasque conniventes, fœcum remoras, obtinuit. Quia verò totum fere abdomen circumdat, & modò ascendit, modò descendit, hinc deiciendæ fœces tardius defluant, & in alvi exoneratione non conferunt, sed duabus tribusve vicibus deturbantur.

Rectum.

Tertium & ultimum crassorum est Rectum intestinum, quod in coxarum antrum declive recto ductu descendens, in ano desinit. Hoc Græcis *ὀρθόσπονδον*, quod sine protuberantiis & spiris procedat, vocatur, atque etiam *ἀρχον*, dicitur, vel quia est intestinum *ἀρχή*, principium, vel *ἀρχον*, imperans, quod quasi imperio quodam nos cogit onera, quibus premitur, deponere.

Magnitudo.

Colo amplitudine & longitudine multum cedit, quippe unius & dimidii palmi longitudinem, ac circiter trium digitorum latitudinem habet: crassitie verò ac carnositate omnia intestina superat, extrinsecus pinguibus appendicibus donatum.

Connexio.

Ossibus Sacro & coccygis, mediante peritonæo, adhæret, atque in viris radici penis, in mulieribus utero, mediante musculosa substantia connectitur, unde harum partium magnus est consensus.

Finis ejus Anus, seu Podex dicitur, *Anus.* habetque tres musculos. Primus, *Sphincter* *Sphincter.* appellatus, & ossis Sacri partibus infimis annexus, anum in orbem amplectitur, ac constringit, ut fœces retineat. Huic nonnulli alterum ejusdem officii, sed tenuiorem, adjungunt, priori inseparabiliter junctum, & in podicis extremitate cuti veluti impactum: Verum hunc major Anatomicorum pars cum prædicto confundit, & ex his tantum unum conflare statuit. Reliqui duos *Levatores* nominantur, qui ab ossium coxendicis sacrique ligamenti orti (Riolanus ipsos mavult ab ipsis ossibus deducere, sed malè eos dividit in quatuor musculos, cum talis divisio sine dilaceratione fieri nequeat, ut etiam bene notat. Dominicus de Marchettis, *anat. cap. 3.*) descendunt distincti ad sphincterem, eique insertiones suas commiscunt, ut anum per excretionem depulsum, sursum retrahant. His musculis quacunque de causa relaxatis, fit ani procidentia, seu potius intestini prolapsus.

Ano autem suis radicibus implantantur *Vena hæ-* *morrhoida-* *les.* *Venæ hæ-* *morrhoidales* duplices: quarum internæ ut plurimum ad sinistram, rarius ad dextram mesentericam, interdum ad ramum splenicum ascendentes, in portæ venam sanguinem effundunt: externæ verò ramum hypogastricum ingrediuntur.

Venas comitantur arteriæ, partim à *Arteria:* ramo mesenterico inferiore, partim ab arteria hypogastrica procedentes.

His nervuli tres quatuorve se jungunt, *Nervi.* ab extremo spinalis medullæ derivati, acutum huic parti sensum inferentes, musculisque ad sui contractionem spiritus infundentes.

## CAPUT IX.

## De Mesenterio.



Mesenterium, Græcis *μεσέντερον*, à situ dicitur, quod sit pars *ἐν μέσῳ τῶν ἐντέρων*, in medio intestinum posita.

Situs & usus.

Est autem membranosa pars, in medio ventris inferioris sita, non solum vas ad intestina tuto deducendis, ab iisque abducendis dicata, verum ipsa etiam intestina fere omnia colligans, ne multiplices eorum gyri, cum valetudinis vitæque periculo, confundantur & intricentur.

Divisio.

Et si verò unum sit, tamen à nonnullis dividitur in *Mæsareum* seu *Mesenterium*, & *Mesocolon*, quatenus illi tenuia, huic crassa intestina adhærent.

Membrana.

Constat membrana duplici validaque,

peritonæo continua, pinguedine undique effarcta. Præter has, tertiam mediam, eique propriam, modò dictis paulo crassiorem, ipsaque vasa & glandulas in se suffulcientem, se invenisse ac demonstrasse, scribit Whartonus, *adenograph. cap. 7.*

A centro ad peripheriam habet fere spirithamæ magnitudinem. *Magnitudo, & figura.* Figura verò fere circularis est, cujus circumferentia in plicas innumeras contrahitur, ut intestinum longitudinem ac volumina coarctet, eorumque convenientem situm & ordinem contineat. In medio amplum est, in lateribus oblongum, præsertim in sinistro, ubi ad rectum intestinum descendit. Ejus verò crassities ingens est in obesis, aucta largiter pinguedinis mole, in aliis tenuior existit.

Exoritur

Ortus.

Exoritur circa supremam & tertiam lumborum vertebram, quibus nexu admodum firmo cohæret. Fallopius primam ejus originem putat procedere ex nerveo plexu ad exortum ejus sito, de quo dicitur *sequente cap. 18. & lib. 3. cap. 8.*

Glandulæ.

Glandulas habet plurimas exiguas & molles, membranis interjectas (harum numerus varius reperitur, non tantum in diversis animalium speciebus, sed in diversis quoque ejusdem speciei individuis: in homine tamen hoc observatum, cum pauciores sunt numero, tunc magnitudinem majorem compensare numeri defectum) in earumque medio unam magnam, quas omnes ad chyli attenuationem majoremque perfectionem plurimum conferre, manifestissime constat. Per illas quippe decurrunt vasa lactea innumera (quomodo eas transseant videndum *cap. 11.*) & chylum, ad majorem perfectionem glandulosi liquoris levi aliqua subacidula qualitate imbuedum, in eas effundunt, quæ vasa ex iis tandem in media magna glandula (hanc Fallopius & Asellius malè vocant *pancreas*, hodie multi *pancreas mesenterii*, ab altero tamen vero pancreate, sub ventriculo sito, longe diversum) pleraque concurrunt, indeque recto ac brevi ductu feruntur ad receptaculum chyli, in quod succum lacteum deponunt.

Glandularum usus.

Rem ita se habere, docent experientia & autopsia. Nam si hæ glandulæ aliqua de causa, vel obstruantur, vel liquor in iis genitus (de hoc vide quædam *precedente cap. & lib. 2. cap. 2.*) & lacteo succo necessariò admiscendus, nimis acidam acredinem, quacunque de causa, conquiverit, tunc chylus lacteus in iis subsistens coagulatur in casei formam, ab ejusque copioso influxu multum intumescunt, atque sic chylo subsequenti transitus omnino præcluditur, unde tales homines, quibus hoc contingit, cœliaco fluxu (propter impeditam chyli distributionem) & ventris dolore torquentur, atque ob denegatum alimentis transitum, atrophiam consumuntur, & paulatim usque ad mortem emaciantur. Hujus rei tria exempla ante hæc à me fuerunt demonstrata.

Observatio I.

*Primum* erat militis Scoti, qui in India occidentali, atque imprimis in longo maritimo itinere huc redux, diu pravis cibis usus fuerat, atque hinc tandem morbo languens, & cœliaco fluxu cum ventris torminibus, appetitu tamen ciborum mediocriter constante, laborans, anno 1657. mense Augusto, ad nosocomium nostrum delatus est: in quo cum per tres quatuorve menses commoratus fuisset, ac in cœliaco fluxu curando omnia frustra tentata essent, tandem totus emaciatus obiit. Cadavere in studiosorum Medicinæ gratiam aperto,

sele obtulit lien nimis magnus, durus, & ater; ut & pancreas nimis tumidum, durum, cinereique coloris: invenimus item mesenterii innumeras glandulas, (quæ in sanis propter parvitatem vix conspici possunt) mirum in modum turgidas & duriusculas esse, ita ut multæ quidem fabæ magnitudinem æquarent, sed plurimæ ad magnitudinem avellanæ, pauciores ad nucis moscatæ magnitudinem accederent. In iis autem dissectis nihil aliud, quam candida quædam crema, in caseosam substantiam indurata, repertum fuit.

2.

*Secundum* exemplum, erat puellæ pauperculæ undecim annorum, quæ postquam simili etiam alvi fluxu, cum rugitibus, ventris dolore, & extrema corporis emaciatione, obiisset, ex petitione parentum (qui ipsam fascino, aut Diabolicis artibus occisam esse, atque ex murmuribus & sibulis antea in ejus abdomine obauditis, serpentes, bufones, aliave similia fœda animalia in ventre ejus latere, sibi certò persuaserant) coram pluribus Medicinæ Doctoribus & studiosis, demortuæ cadaver aperui, mense Novembri, anno 1656. In hoc, ut in priore subjecto, innumeras mesenterii glandulas admodum tumidas & duriusculas invenimus, quarum multæ habebant avellanæ magnitudinem, aliquæ paulo majorem: color externus, aliis erat albicans, aliis variegatus, instar marmoris ex albo nigricantis. Intus autem tam in his, quam in illis omnibus continebatur chylus lacteus albissimus, in casei formam ac duritiem concretus. Lien & pancreas justam magnitudinem nonnihil excedebant.

3.

*Tertium* exemplum fuit nobilissimi pueli Dani, Nicolaus Retz nominati, ætatis septem octove annorum, qui magna atrophiam, cum ventris torminibus, multis mensibus confectus, tandem totus emaciatum vitam finivit mense Junio, anni 1662. Ego ab amicis, aliisque qui ejus curam gesserant, imploratus, ut in demortuo causam mortis, parentibus transcribendam, inquirerem, coram plurimis illie præsentibus cadaver aperui; in eoque hepar, lienem, cor, pulmones, renes, ventriculum, & intestina, bene constituta demonstravi, solo pancreate nonnihil tumido, & malè colorato existente, sed in mesenterio certa mortis causa à nobis inventa fuit: quippe innumeras mesenterii glandulæ mirum in modum intumuerant, cum singulari duritie, plurimæ ad avellanæ, aliæ ad paulo majorem, multæ ad fabæ magnitudinem: omnes candidi coloris erant, in iisque continebatur crema candida, ad casei siccoris duritiem concreta, quæ subsequenti chyli lactei transitum impediens, dictæ atrophiam, atque hinc mortis causa fuerat.

Ex quibus satis patet frequenter cœliacum

cum fluxum, & atrophiam ab harum glandularum obstructione produci. Ad hæc, non illum esse earum usum, quem ipsis Anatomici communiter adscribunt, scilicet fulcire venas & arterias per mesenterium delatas, sed in iis (ut in omnibus glandulis) gigni aliquid peculiaris subaciduli fermentacei liquoris, chylo lacteo admiscendi, & sic illas inservire vasis lacteis (non sanguiferis) atque hinc propter earum obstructionem, aliamve pravam constitutionem (qualis plerumque à vitioso fermento, quod chylo in intestino duodeno admiscetur, inducitur) sæpe magnam pravorum humorum colluviem, lentarum febrium, variorumque contumacium ac diuturnorum affectuum causam, inter mesenterii membranas coacervari.

Riolani de  
his glandu-  
lis opinio.

Aburdam opinionem de his glandulis concepit Riolanus, lib. 2. *anthropog. cap. 15.* quippe statuit earum ratione in mesenterio esse strumarum radicem ac fundamentum, nec ulla strumas unquam foras erumpere, nisi mesenterium strumosum fuerit: quod ipsum etiam sentire dicit Guidonem, & Julium Pollucem, cum quibus ille videtur maluisse errare, quam ex praxi medica addiscere, strumas nullam prorsus affinitatem habere cum glandulis mesenterii, solius chyli præparationi ulteriori dicatis: neque etiam strumas foras erumpentes ullo modo causam vel originem in mesenterio habere posse, imò quotidianum usum docere, pleororque strumosos reliquo corpore sanos existere, nec de ullo inferioris ventris incommodo conqueri, cum tamen morbi mesenterii magnas molestias inferre soleant:

ipsam quoque curationem contrarium docere, utpote quæ maximè topicis peragitur, quæ non prodesse, si fons mali in mesenterio lateret: denique in strumorum mortuorum dissectionibus id manifestum esse, utpote in quibus plerumque mesenterium satis sanum reperitur.

Nervos habet mesenterium ab interno-  
rum nervorum sexti paris plexu, & à nervis  
è lumbali medulla prodeuntibus, atque hinc  
in membranosa sui parte satis sentit, quam-  
vis in pingui & glandulosa obtusioris sensus  
sit, cujus ratione apostemata multoties in  
illa diu occulta latent, antequam ab ægro,  
vel Medico satis percipi possint.

Nervi.

Arterias recipit à ramo arteriæ magnæ  
mesenterico, dextro sinistroque, seu su-  
periore & inferiore.

Arteria.

Venas obtinet plurimas, inter membra-  
nas ejus decurrentes, *Meseraicas* dictas,  
quæ minimis radicibus ex intestinorum tu-  
nicis oriundæ, atque in mesenterio frequen-  
te concursu in se invicem hiantes, tandem  
in duas ramos majores, scilicet dextrum  
sinistrumque mesentericum, portæ venæ  
continuos, concurrunt. Hæ sanguinem  
per arterias ad mesenterium & intestina im-  
pulsam, jam à nutritione illarum partium  
residuum, in portæ venam infundunt, inde  
ad hepar deferendum. De portæ autem  
& venarum meseraicarum usu, plura legan-  
tur lib. 7. cap. 2.

Vena.

Præter arterias venasque mesentericas;  
etiam innumera vasa lactea, multaue lym-  
phatica per illud decurrunt, de quibus cap.  
11. & 13. acturi sumus.

Vasa lactea.

## CAPUT X.

## De Pancreate.



**P**ancreas, quasi totum car-  
nosum, quod & *παγκρεας*,  
Latinis Lactes, à suo candido  
lacteoque colore interno dici-  
tur.

Definitio.

Est corpus glandulosum, laxum, &  
informe, ad primas lumborum vertebrae,  
sub posteriore parte ventriculi ejusdemque  
fundo situm, membrana tenui à peritonæo  
investitum, ex eaque quasi suspensum.

Situs.

Figura.

Figuram obtinet oblongam & depres-  
sam.

Connexio.

Latiore sui parte hepatis confinia acce-  
dens, circa primam lumborum vertebrae,  
ut modò dictum, ventriculo substernitur,  
meatumque bilarium ac portæ truncum  
includens, duodeno intestino jungitur:  
hinc lienem versus extenditur, & sensim  
attenuatur, huic tamen non adnectitur.

Substantia.

Substantia ejus tota glandulosa est, con-

statque ex multis quasi nodulis seu globulis  
(hinc Franciscus de le Boë Sylvius dicit,  
pancreas esse glandulam conglomeratam,  
quasi ex multis minuscule glandulis, pro-  
pria membranula investitis, simul congestis,  
compositam) per intercedentia vasa, plu-  
rimasque fibrillas coherentibus, & com-  
muni membrana, à peritonæo desumpta,  
inclusis: qui noduli singuli quidem aliquam  
duritiem præ se ferunt, simul tamen sumpti,  
ob laxam connexionem, molliusculi viden-  
tur.

Color ei pallidus est, vix levissimam san-  
guinis tincturam referens, ita ut neque in  
substantia, neque in colore ullam carnosam  
partium similitudinem habeat, atque  
hinc mirum sit, quod à veteribus Anato-  
micis *παγκρεας*, id est, totum carnosum  
appellatum fuerit, cum potius *παγκρεας*,  
id est,

Color.

F

id est, *totum glandulosum* nominandum fuisse.

**Magnitudo.** Magnitudo in omnibus non est eadem: rarò trium vel quatuor, interdum sex, septem, octo, vel plurium digitorum transversorum longitudinem habet: latitudo maxima fere duos digitos cum semisse ad æquat, crassities circitur unum.

**Pondus.** Pondus varium est, pro ætatis & magnitudinis corporis varietate. Whartonus observavit illud in hominibus consistentis ætatis, ut plurimum uncias quatuor vel quinque ponderare. Regnerus de Graef in equis notavit undecim unciarum pondus. In hominibus tamen morboſis interdum magnitudinem ordinariâ longe majorem, & mirabilem sæpe corruptionem nanciscitur (exempla habent, Riolanus, *anthropogr. lib. 2. cap. 16.* Hildanus, *cent. 1. obs. 71.* R. de Graef, *lib. de succ. pancreat.* Horstius, Tulpius, Blasius, alique) imò etiam calculi in eo nonnunquam succrescunt, quales septem aut octo Parisiis in nobilis cujusdam cadavere inventos fuisse, scribit R. de Graef *lib. citat.* qui *ibidem* etiam ex Riolano subjungit exemplum totius pancreatis in duritiem cartilagineam indurati.

**Nervi.** Nervis exilibus donatur à sexto pari, imprimis à plexu superiore abdominis.

**Arteria.** Arterias recipit ab arteriæ coeliacæ ramo sinistro, dorso incumbenti, interdum ab arteria splenica.

**Vena.** Venas ad ramum splenicum, prope portam emittit: præterea truncum venæ, quam aliquatenus amplectitur, transmittit.

**Vasa lymphatica.** Vasculis lymphaticis etiam multis donatur.

**Ductus Wirtzungi.** In hujus partis medio, secundum ejus longitudinem, canalis singularis & mediocriter capax, excurrit, à primo ejus inventore, ductus Wirtzungi appellatus, tenui firmaque membrana constans.

Hic unicus per medium viscus excurrit, & brevia numerosaque exilia vascula, in ipsum patentia, unde quaque è viscere recipit, inter quæ unum præ cæteris majusculum est, quod parte sui inferiore, non longe ante ingressum in intestinum, admittit. Interdum duo ductus inveniuntur, sed non æqualis longitudinis, quorum unus loco solito, alter paulo inferiore subsistit, verum ad ingressum in intestinum plerumque simul junguntur, unumque orificium faciunt: interdum etiam alter, prope duodenum intestinum ductum cholidochum ingreditur, alter humiliore loco intestinum perforat. Fredericus Ruysch, *observat. anat. 12.* scribit, se duos ductus pancreaticos sæpius invenisse in cadaveribus humanis, quorum neutri aliqua cum ductu cholidochi erat communicatio: item se hunc ductum rarò simplicem in canibus compe-

riffe. Quippe in hoc ductu, pro diversitate animalium, imò nonnunquam in iisdem animalibus, varius est Naturæ lusus. Alia enim unum, quod frequentissimum est in hominibus; alia duos, alia tres ductus habent, qui interdum ante exitum è pancreate conjuncti, interdum separati intestinum adeunt. Horum insertio in nonnullis fit in ductum biliarium: in aliis partim in ductum biliarium, partim in intestinum, in paucissimis in ventriculum, hocque præcipue contingit in nonnullis piscibus.

Ductus Wirtzungi ductus, licet in hominibus facile reperiatur, tamen in canibus non tam facile invenitur, propterea quod eorum pancreas non sit contractum, ut in homine, sed tenue, & in longum extensum, ac sæpe quasi in aliquas partes disruptum. Si tamen ejus orificio, quo in intestinum duodenum aperitur, stylus inferatur, mox ductus invenitur.

Ducti canalis orificium hiati mediocriter amplo in duodenum intestinum, scilicet Canalis exitus. quatuor præter propter, interdum quinque aut sex digitorum transversorum latitudine à pyloro, in notabili ruga flexuræ duodeni (ubi exilis prominentia, seu papilla exitum ejus designans plerumque apparet) proxime ad pori bilarii egressum in homine (in canibus plerumque duobus circiter transversis digitis sub ductus bilarii exitu) non rarò etiam in ipsum ductum biliarium exituri-tem (hoc in ovibus quoque familiare) aperitur; eique nonnulli valvulam adstare scribunt, extrorsum spectantem, & cujuslibet rei ingressum ex intestino in canalem, præcludentem. Verum quia ductus à parte intestini sine obstaculo stylum facile admittit, & nobis ista valvula nunquam manifestè patuit, credimus obliquam in intestinum insertionem sufficere ad excludendum humores intestini, sicut id ipsum de ductu cholidochi dicitur *cap. 15.* Altera verò parte versus lienem extensus, sensim gracilescit & obliteratur, antequam ad extremum pancreatis perveniat, ita ut lienem non attingat, neque eum ingrediatur, quod tamen nonnulli aliis persuadere studuerunt.

Quomodo hunc ductum Wirtzungianum Idem ductus in volucribus. in volucribus invenerit Nicolaus Stenonis, eleganter describit, *lib. de musc. & gland. bus.* his verbis.

Ductui Wirtzungiano illustrando, inquit, servit in avibus facta observatio. In variis enim, quas reperire licuit, avium speciebus, geminum vidi ductum pancreaticum, ductu bilario itidem gemino (quorum alter à vesicula fellis hepatis non accumbente, ab hepate alter) occurrentem quorum quatuor vasorum insertio tribus variat modis. Vel enim in unum omnia confluunt ostium vel cum suo quilibet pancreatico bilario commune ostium subintrat, ita ut duobus



duobus tantum foraminibus pervium sit intestinum: vel suus cuilibet ductui concessus exitus id efficit, ut quatuor diversa in intestina pateant via. Nuper in Africana gallina vidi hepaticum ductum, ubi hepate exierat, simplicem, in progressu bifidum, duobus intestinum adire canaliculis, quod adeoque tribus bilem è vasculis recipiebat.

In hunc ductum Wirtzungianum ex omnibus nodulis, è quibus pancreas in homine construitur, exigui furculi, instar minorum rivulorum, excurrunt, humorem pancreaticum, in nodulis excoctum ac præparatum, in istum ductum effundentes, eo mediante in intestinum duodenum deferendum. In ipso tamen ductu nunquam succus pancreaticus invenitur, propterea quod declivi via celeriter effluat in duodenum intestinum, neque in ductu aliquamdiu subsistat: eodem modo sicut urina è renibus per ureteres defluens, propter rapidum transitum nunquam in his invenitur.

An ductus  
sit arteria.

Miror quod Lindanus, *med. physiol. cap. 16. artic. 16. vers. 244.* scribat, hunc ductum esse arteriam, sed incertum esse cujus sit propago, aortæ ne ipsius, an coeliacæ ante emissionem splenicam. Profectò nullam cum arteriis similitudinem habet, nec in substantia, nec in usu, neque uspiam cum arteriis continuatur; neque etiam pulsatur, sanguinemque continet, ut arteriæ, sed sine ullo pulsu vehit peculiarem quandam liquorem, neque se in venas, ut arteriæ, sed in intestini cavitatem exonerat. Præterea, hoc verum non est, quod Lindanus subjungit, scilicet, ab hoc ductu (quem ille arteriam nominat) plures furculos in illud viscus exporrigi, cum potius ex ipsius visceris nodulis varii furculi in ductum excurrant, ut modò dictum. Minus adhuc errarunt illi qui hunc ductum venam esse dixerunt, cum substantiæ structurâ & specie venam aliquo modo referat: quamvis tamen re vera etiam non sit vena, nec sanguinem ferat, sed aliud membranofum vas sit, peculiari succo vehendo dicatum.

Officium  
pancreaticis.

De officio hujus visceris (nemo, quæso, ægrè ferat, quod, ex singulari Philosophica licentia, hujusmodi nobile glandulosum corpus etiam *viscus* appellemus) ante hac graviter dubitatum fuit, dum illud multi solummodo vasorum divisiones fulcire, & instar pulvinaris ventriculo subterni: alii crudiores sanguinis portionem depascere: alii cordis sanguificationem adjuvare: alii melancholiam ex liene deducere, aut succum fermentaceum ventriculo subministrare, aut lienis laborantis vicem interdum subire: alii illud chylum recipere, eumque ad majorem perfectionem excoquere, & excrementa biliosa ex eo secer- nere, aliaque similia putarunt. Quas

omnes opiniones cum prorsus conjecturales, & omnino incertas esse, nec ullis solidis rationibus, aut certis experimentis fulciri animadverterem, in hujus hætenus fere neglectæ partis examen antehac diligentius incumbere cœpi: & post multa tentamina anatomica (quorum nonnulla bene, multa male successerunt, propterea quod in duodenum intestinum, superius inferiusque ligatum, & tunc secundum longitudinem diffissum, præter succum pancreaticum, plerumque copiosa bilis è ductu cholidocho influeret, succi pancreatici præsentiam & saporem obscurans) comperi, cum in vivorum, tum in recenter strangulorum brutorum sectionibus, è ductu pancreatico manifestum quendam liquorem sublympidum & quasi salivofum, nonnihil austerum ac leviter subacidum (præter experientiam illi omnem aciditatem denegat Needham) ac interdum quasi subsalsum quid admistum habentem (in canibus morbofis eundem etiam nonnunquam fœtentem, ac pravi saporis observavimus) effluere in duodenum intestinum, idque interdum spectabili non contemnendâ copîa: nulla verò chyliifera vasa in hoc viscus extensa, ut nec unquam chylum in eo reperiri. Unde judicavi, quamvis varii Anatomici chyliifera vasa versus hoc viscus excurrentia describerent, eaque in suis tabulis etiam delinearent; imò Jo. Theod. Schenckius, chyliifera vasa ex eo primam suam originem habere, ex eoque versus mesenterium propagari, judicaret; & Veslingius atque Baccius chylum ex eo sauciato largiter effluere dicerent; atque etiam Dominicus de Marchettis varios canales, tam versus hepar excurrentes, quam ab eo ad intestina delatos, se observasse putaret, tamen illos omnes ex aliqua præconcepta opinione deceptos fuisse, & neque chyliifera vasa eo excurrere, neque chylum in illud effundi, sed in eo peculiarem humorem, ex sanguinis arteriosi in illud delati serosa atque subsalsa parte, admistis paucis spiritibus animalibus, per minimos nervulos allatis, excoqui, eumque ad intestinum duodenum effluentem, & una cum affluente bile, alimentis in ventriculo coctis, ac per pylorum ad intestina jam elabentibus, mox admistum, in istis alimentis suscitare peculiarem effervescentiam, qua utiles chylosæ particule ab inutilibus separantur, attenuantur, & ad majorem fusionem deductæ (hanc ejus operationem ostendit diversitas substantiæ alimentorum in ventriculo coctorum, & adhuc contentorum, ab eorum quæ jam in intestina influxerunt: illa quippe viscida & crassiora sunt, coloresque assumptorum varios obtinent: hæc contrà sunt multò fluidiora, minus viscida, & magis albicantia) simul aptæ redduntur,

Digestio.

Usus succi  
pancreatici.

ut motu intestinorum peristaltico per anteriorem mucosam eorum tunicam in vasa lactea impelli queant, reliquiis crassioribus paulatim ad crassa intestina defluentibus, ut in iis asserventur usque ad excretionis tempus. Fit autem ista effervescencia propter bilis sal volatile oleumque sulphureum concurrens cum succi pancreatici aciditate, sicut in chymia ex talium concursu similes effervescencias fieri videmus.

His ita penitus consideratis, mihi certum feci pancreas non esse viscus adeo inutile aut parvi momenti, ut à multis describitur, & liquorem seu succum in eo excoctum non esse tam paucum, ut vix observari possit, neque etiam inutilem aut excrementitium esse, sicut multi hactenus putarunt, sed esse succum mediocris quantitatis, & ratione specificæ suæ subacidulæ qualitatis maxime necessarium, ad faciendum, una cum affluente eique admixta bile, alimentorum coctorum, è ventriculo jam elapsorum, novam in intestinis effervescenciam, per eamque utilium ab inutilibus separationem: atque hinc ex pancreate bene valente magnam sanitatis partem dependere, male autem valente plurimos morbos, hactenus solis lienis, hepatis, mesenterii, aliarumve partium vitiiis assignatos, non minus quam ab aliis istis dictis partibus procedere: & facile jam animadverti posse, ab ejus succo vitioso, scilicet aut nimis copioso, aut nimis acri affluente (præcipue si etiam bilis copiosior & acrior simul concurrat) nimiam & pravam fieri in intestinis effervescenciam, vomituum acidorum, rugituum, flatuum, tensionum, diarrhoeæ, dysenteriae, colicæ passionis (quæ tamen pleraque mala à vitiosa bile sola etiam induci posse certum est) aliorumque similium morborum causam: vel ab eodem nimis paucio, vel nimis miti & insulso affluente, valde exiguum fieri effervescenciam, obstructionum, atrophiarum, alvi durioris, &c. causam: vel interdum ab eo nimis falso vel acido, sursum versus ventriculum assurgente, famem caninam, nauseam, ructus acidos, &c. Versus intestina descendente, magna tormina, erosiones, alvi fluxus, &c. Versus caput verò, una cum sanguine, ascendente, epilepticas convulsiones, & quasi hystericas passiones (refert Highmorus, ex Auberto, quod in nobili femina epileptica, & quasi passione hysterica diu vexata, ac tandem mortua, repertum sit solum pancreas male affectum fuisse) ac melancholica deliramenta, &c. Versus stomachum, aut cor, palpitationes cordis & lipothymias (ita ex eodem Auberto scribit idem Highmorus, mercatorem Lugdunensem nihil dormire potuisse, sed cum dormiret in lipothymiam incidisse, tandemque sic mortuum fuisse, & in ejus cadavere, salvis cæteris partibus,

solum pancreas inventum fuisse abscessu putrefactum) pulsuumque summam inæqualitatem, & debilitatem, &c. excitari. Atque sic pro varia vitiositate hujus succi varios produci effectus; quales etiam in ægris hypochondriacis variè conspiciuntur, quorum magna pars vitiiis hujus succi merito adscribenda videtur. Quæ vitia ipsi maxime imprimuntur; aut per pravam dietam, multorumque falsorum, acidorum, fumo siccatorum, acrium, aliorumque similium usum: aut per pravas coctiones aliorum viscerum, præcipue lienis: quia scilicet his de causis, propter vitiosum sanguinis fermentum (de quo videndum *cap. 17.*) plurimæ sanguinis particule in corde minus spirituosæ redditæ, atque subacidæ vel subfalsæ, & ad coagulationem pronæ remanentes, sicque ad hoc viscus per arterias delatæ, in eo nec satis subigi, nec in fermentum alimentis coctis ad intestina jam elabentibus conveniens, mutari poterunt.

Biennio postquam hæc inquisiveram & scripseram, oblata mihi fuit disputatio doctissimi Regheri de Graef, quondam mei discipuli, habita in Academia Leydensi, sub præsidio clarissimi Professoris Fr. de le Boë Sylvii, de pancreate ejusque succo publice disputans, quæ prædictam meam opinionem multo magis confirmabat. Inter alia autem, post multos variosque frustraneos conatus, tandem invenit ingeniosum modum, quo in cane vivo hic succus colligi possit, quem postmodum nobis pluribusque aliis spectatoribus liberali demonstratione exhibuit, mense Martio anni 1665. Sumit canem jejunum, cui vinculis os obligatum, ne mordeat, & aspera arteria incisione cultelli referata est, ut respirare per illam aperturam possit. Hinc raptim aperto abdomine, mox cum sub pyloro, tum infra ductus pancreatici exitum, intestinum colligat, idque inter duas istas ligaturas parte sui externa à mesenterio libera dissecat & aperit, ac spongiâ pituitam, bilem, aliaque ibi reperta extergit: tunc ilico tenuem longiusculum calamum (seu pennam cujus plumata pars abscissa est) anatis sylvestris, cujus uno fini parvam lagenam vitream angustii orificii firmiter adaptavit, in ductum pancreaticum (qui fere duobus transversis digitis sub ductus bilarii exitu, occurrit in canibus) altera extremitate immittit, atque acu filum duplicatum ducente intestinum eundemque ductum calamo & lagenæ assuit, ut calamus cum lagena vitrea extra abdomen pendula, ab intestino & ductu recedere nequeat. Hòc facto, intestina foris pendula versus interiora reducit, & abdominis aperturam filo forti rursus confuit, atque sic canem, quo usque potest, scilicet ad horas octo vel decem, in vita servat.

*Modus colligendi succum pancreaticum.*

servat. Tali modo hujus lymphidi liquoris spatio septem aut octo horarum mediocrem quantitatem (scilicet interdum semi unciam, interdum drachmas sex, aut totam unciam) è ductu per calamus in appensam lagenam defluentis colligit, ejusque talem saporem esse, qualem cum in meis tentaminibus ante commemoratis compertus fueram, ipsimet, cum multis aliis, gustavimus, scilicet nonnihil austerum, aliquid subacidi subfalsive continentem. Totum apparatus D. de Graef citata disputatione latius describit, imò adjectis tabellis depingit: testaturque etiam se in quibusdam canibus (procul dubio aliquantum morbosus) istum succum admodum vitiosum invenisse, ut modò foetentem, modò valde nauseabundum, modò eximie austerum ac constringentem saporem exhiberet, ita ut illum gustantibus, interdum molestam suffocationem, interdum putidos ructus, & anhelitum foetentem, nauseamque tota die concitaret. Idem D. de Graef, libello Gallico quem anno 1666. eadem de re edidit, scribit se Andegavi in viro casu repentino extincto, & mox adhuc calente aperto, succum pancreaticum collegisse, ejusque tam amoenam aciditatem comperisse, ut similem in canibus nunquam gustasset; ibidemque etiam (& adhuc multo latius, lib. de succ. pancreat. edit. anno 1671. cap. 7. 8. 9. 11.) de qualitatibus hujus succi, & quomodo effervescentiam bili admixtus promoveat, chylumque albicare faciat; item qualia mala inducat, si vitiosus sit, latè disserit, quæ omnia hic referre nimis longum foret. Profectò admodum ingeniosum est hoc inventum, ejusque nomine magna laus diligenti doctoque inventori competit, qui hac sua industria magnam faciem ad meliorem causarum plurimorum morborum cognitionem accendit.

Sed interim notandum, quod sicut aliarum rerum novi inventores in eo plerumque peccare solent, quod foetus suos recens enixos, adhuc debiles & vix maturos, cæco amore tam perditè ament, ut nihil vitii in iis animadvertant, sed magno fastu usque ad fastidium eos supra alios adultiores & fortiter enutritos extollere nitantur: ita etiam Regnerum de Graef hac in parte nonnihil peccare, dum clarissimum Franciscum de le Boë Sylvium secutus (quem in omnibus etiam sequitur Bernhardus Swalve, lib. de pancreate) ab hac una inventa multorum morborum causa, fere omnium morborum causas & origines deducere nititur: quippe diarrhoeas, dysenterias, colicos dolores, epilepsias, syncopes, hystericas suffocationes, menstruum fluxus, febres, & nescio quos non alios, ab hac una sola causa produci existimat, haud aliter acsi nulli alii vitiosi humores, aliarum

partium vitiiis geniti, tales morbos unquam producerent; cum tamen ægrotorum mortuorum cadaverum sectio millies doceat, tales morbos sæpe, integro ac penitus illæso pancreate, aliarum partium vitio fuisse inductos. Multoties enim coram multis spectatoribus demonstravimus, integro pancreate, diarrhoeas, dysenterias, & colicas affectiones, vitio hepatis & bilis, ut & epilepsias vitio cerebri aut meningum, aut ab auris foetente ulcere fuisse inductas; febres quoque plurimas à vitiosis humoribus, per aliorum viscerum aut partium intemperiem, pravam coctionem, inflammationem, corruptionem, ulcerationem, &c. genitis, suscitatas, ut in pleuritide, peripneumonia, angina, phrenitide, &c. notissimum est: item hysterica gravissima & lethalia symptomata vitio testium præter naturam tumidorum, & virulentum, flavum, aut lividum succum, virulentos halitus versus superiores partes expirantem, continentium, fuisse excitata, eademque in multis viventibus sola vitiosi seminis excretionem fuisse sublata, nullis infanti pancreati remediis adhibitis. Anno 1667. 16. Novembris in nostro nosocomio publice secui cadaver juvenulæ 24 annorum, quæ per integrum triennium ibidem decubuerat, modò per multos menses gravissimis menstruum fluxibus, modò colicis torminibus, modò diarrhoeis, inappetentia, bradupepsia, tandem anasarcâ, eaque evictâ, sub finem vitæ longa tussi, cum aliquo purulento sputo detenta, in quo cadavere pancreas (in quo uno omnium dictorum malorum causam nos inventuros sibi certò persuaferant varii studiosi illic præsentis, qui antea Leydæ Sylvii institutionibus usi fuerant) optimè sanum & prorsus illæsum invenimus, hepate graviter affecto, non rubro, at sublivido colore tincto, & pulmone multis ulcusculis obsito. Hòc visò, multi Medicinæ studiosi ab opinione Sylvii & Regneri de Graef, omnes tales morbos à solo pancreatis vitio deducendum, recefferunt.

Novam, sed nullis fundamentis innitentem, opinionem de pancreatis usu concepit Whartonius, quippe putat in eo expurgari succos excrementitios nervorum, & imprimis plexus illius qui sub pancreate latet, quos ex substantiæ pancreatis suavi sapore judicat non esse amaros aut acres, sed dulces & insipidos. Alibi verò multis in locis, in sua adenographia, de aliis glandulis aliter loquitur, easque dicit succum alimentarium pro nervorum nutritione conficere. Verum quis credat in purissimis animalibus spiritibus crassa excrementa redundare, eaque per invisibiles nervorum poros undequaque ad solum pancreas defluere, ut in eo separentur ab animalibus spiritibus

Observatio.

Whartoni opinio.

spiritibus? quis non videat crassiores succos in glandulis confectos nervorum densam substantiam subire non posse, quin protinus obstructions & paralyfin faciant? Sed plura super his videantur, *lib. 8. cap. 1.*

Fernelii error.

Ex modo dictis etiam abunde patet quantum de usu pancreatis à verò aberraverit opinio Veterum multorumque neotericorum, atque inter hos etiam Fernelii, qui una cum cæteris docet, in pancreas, tanquam infimi ventris cloacam, superfluas & inutiles plurimas humiditates deponi, ex eoque in intestina defluere. Verum, cum hoc viscus pancreas densiore membrana, & singulæ ejus glandulæ tenui membranula obducantur, nec præter arteriolas & venulas, exilesque nervulos, alia vasa in illud ingrediantur, nulla patet via per quam aliarum partium superfluarum aut excrementosarum humiditates hoc pancreas ingredi possint: præcipue cum nulla ratio sit, quare ad hanc partem magis, quam ad renes, intestina, aliave evacuatoria depellerentur.

Verum quandoquidem ex præcedentibus satis liquet qualis constitutio, & quis usus sit pancreatis ac succi pancreatici, tandem colophonis loco hic duo subjungemus: 1. Quo modo specialis ille succus in pancreate generetur. 2. Qualem & quantam in intestinis effervescentiam suscitetur.

Generatio succi pancreatici.

Quantum ad *primum*, hodierni Philosophi docent, sanguinem in se continere omnis generis humores, acidos, amaros, salios, dulces, insipidos, crassos, tenues, &c. ex iisque singulas corporis partes speciatim tales admittere, quæ propter certam magnitudinis & figurarum dispositionem, maximam cum earum porulis analogiam habent; alias verò istam analogiam non habentes, excludere: sicque propter specificam istam pororum constitutionem, in hepate optime biliosos, in renibus serofos, in pancreate liquorem pancreaticum separari. Verum etsi concedendum sit, in singularum partium nutritione, propter certam & peculiarem pororum in singulis dispositionem, alias sanguinis particulas, his, alias illis melius & firmitus adhærere, in earumque substantiam mutari: tamen hoc locum non habet in generatione humorum, ex quibus tandem generale illud nutrimentum, sanguis, resultabit. Nam in sanguine continetur quidem materia è qua omnis generis humores efformari possunt, pro ut ille in his vel illis diversis visceribus & partibus diversis modis fermentatur, miscetur, & excoquitur (eodem modo sicut in terra continetur materia, è qua pro mixturæ & coctionis diversitate, mille herbarum, arborum, fruticum, aliarumque rerum genera profiliunt, imò & artificum manibus mille diversæ res efformantur, hic statuam, ille lateres, alius formis diversissima innu-

mera fictilia vasa ex ea effingit, etsi tales res ipsæ antea nunquam in terra fuerint, vel fuisse dici possint) tamen in sanguine verè non est succus aliquis pancreaticus, splenicus, biliosus, &c. (sicut in tritico aut pane re vera non est chylus, bilis, aut sanguis) sed ipse est materia heterogenia (videatur ejus generatio *sequente lib. 2. cap. 12.*) tales diversas continens particulas, quæ in destinatis visceribus peculiari modo mistæ & excoctæ, fiunt tales humores, dulces, amari, acidi, &c. non propter pororum aliquam analogiam, sed propter specificam partium coquentium naturam, id est, temperiem & conformationem. Ita sanguis, qui dulcis est, per splenicam arteriam influens in lienem, in eo magna suæ dulcedinis parte exiit, & consequitur qualitatem falso subacidam; non certè propter lienis poros, sed propter lienis naturalem subacidam temperiem, quam etiam sanguini, & quibuscumque in eum incidentibus humoribus imprimit. Vinum dulce in aceti vas infusum acefcit, non propter poros vasis aut vini ipsius cum aceti particulis analogiam habentes, aut quod aciditas in vino præextiterit, ejusque solæ acidæ particulæ aceto admixtæ fuerint, dulces verò non; sed quod acerba aceti in vase contenti aciditas dulces sulphureos vini spiritus ilico figere, & falsos acidosque supra eos exaltans, dulcedinem penitus extinguere potuerit. Sic etiam bilis in hepate gignitur, non quod illa antea verè præextiterit in sanguine, & propter poros hepatis cum particulis sanguinis biliosis analogiam habentes, ex eo duntaxat separata fuerit; sed quod dulcis sanguis copiosus è venis meseraicis, admistione succi splenici, per ramum splenicum ad portam affluentis, ita alteretur, ut in hepate novo modo, (à peculiari temperie ac conformatione, & fermento in eo confecto, procedente) excoctus seu fermentatus, multæ ejus particulæ fiant bilis, quod ante illam novam mitionem & coctionem non fuerant, qua de re vide *sequens cap. 15. de generat. bilis*. Eodem modo se res etiam habet in pancreate, in quo sanguinis, per tenellas arterias influentis, aliqua pars mutatur in succum pancreaticum (reliqua per venas ad suum principium Cor eunte) non propter pororum pancreatis cum illo succo analogiam, sed propter novam, quam sanguis in eo suscipit mutationem, à partis proprietate seu natura, novaque mitione & coctione ei illatam.

Quantum ad *secundum*, supra diximus *Effervescentia bilis cum succo pancreatico.* succum pancreaticum cum adfluente bile mixtum, novam in intestino duodeno effervescentiam facere: hoc autem in vivorum canum sectione manifestissime liquet, utpote in quibus in dicto intestino ordinariè spumofus effervescent humor invenitur, quem

quem à succi pancreatici aciditate, & bilis, sale volatili ac fixo abundantis, concursu excitari, illud unum ex chymia satis docet, quod spiritus acidi cum sale lixivo concurrentes semper effervescent, si modò nihil aliud admisceatur quod operationem illam impediatur. In bile autem, præter oleas sulphureas particulas, etiam salem lixivum contineri, ex eo innotescit, quod uterque arte chymica ex ea separari possit. Pancreatici verò succi modicam subausteram aciditatem docet gustus (ut supra dictum) atque etiam illud, quod in lac dulce injectus, illud protinus coagulari faciat, sicut acetum aliaque acida illud ipsum præstant. Ad ulteriorem denique probationem effervescentiæ illius quæ ex mixture bilis cum succo pancreatico exurgit, adjungemus bis repetitum experimentum D. Schuylii, quod tract. de veteri medicina, sic describit. Canis, inquit, vivi abdomine aperto, duodenum haud procul à pyloro ligamento constrinxit, vinculo quoque injecto paulo infra insertionem ductus pancreatici: canem deinde, consulto abdomine, sibi reliquimus. Tribus horis elapsis (canem, ut videbatur, adhuc vegeto, nam paucas duntaxat guttas sanguinis amiserat) aperto abdomine, invenimus spatium vinculo interceptum vehementer distentum, adeo ut illud digitorum compressioni omnino resisteret, atque rupturam minaretur, nec

minus distentam invenimus canis vesiculam felleam. Intensus etiam & veluti urens calor interseptum illud duodeni spatium occupabat, cui cum lanceolâ vulnusculum infligerem, cum humore quodam eo contento, flatu cum strepitu ac crepitu, atque vapores & exhalationes proruperunt, unde acris quidam factor nates omnium feriebat, quem, intestino magis aperto, continuis exceptum studiosorum nemo ferre poterat: manifesto argumento, non modo eo profluxisse tantam copiam bilis atque succi pancreatici, sed in iis fuisse effervescentiam excitatam, non mediocrem tantum aut blandam, qualis sanis contingit, sed vehementem: non enim intestini illa pars duntaxat plena erat, sed etiam vi quadam & orgasmo summè distenta: nec verosimile erat eam duodeni partem ita potuisse distendi, neque tanta vi dissipari humores, flatu, vapores, & exhalationes, nisi effervescentiâ sive agitatione particularum humorum horum contrariorum. Paucis interjectis diebus idem repetii experimentum, presentibus itidem multis studiosis: atque post duas, præterpropter, horas, portio illa intestini quoque turgerebat admodum, sed minus incalcescebat: aperta verò intumescere illa portione intestini quam antea ligaveram, cum sonitu prorupere spumantes bullæ, quibus intestini illud spatium fuerat distentum: ut ne ipsa quidem impudentia de hujus effervescentiâ veritate amplius dubitare posset.

## CAPUT XI.

## De vasis lacteis Mesentericis.



Vasa lactea albicantem chylum ex intestinis per mesenterium deferentia, nostro seculo primus detexit, & anno 1622. demonstravit Casparus Asellius, Anatomicus Ticinensis. Dico, nostro seculo, quia illorum quoque Hippocrates aliique, haud obscuram cognitionem habuerunt. Galenus etiam illa vidit & notavit, sed putavit esse arterias, atque ex hoc errore docuit, orificia arteriarum ad intestina pertingentium modicum quiddam alimenti assumere, ut liquet ex ejus, lib. 4. de offic. part. cap. 17. & lib. 3. de natural. facult. cap. 13. & lib. an. sang. in art. cont. cap. 5.

Nomen.

His Venarum lactearum nomen imposuit Asellius. Verum cum sanguinem non vehant, & substantia etiam multum differant à venis (nam sunt pellucida multoque tenuiora) nos ad meliorem distinctionem illa potius Vasa lactea appellabimus.

Descriptio.

Sunt autem vasa tenuia & pellucida, simplici tunicâ donata, per mesenterium dispersa, numero infinita, chylo vehendo dicata.

Exsurgunt ab intestinis (maxima eorum copia à jejunio aliisque tenuibus, inter quorum tunicas plurimis tenuissimis radicum finibus versus interiorem eorum capacitatem hiant, osculis sub spongioso quodam muco latentibus, in quem chylus pressione intestinorum imprimitur, ex eoque à vasculis hiantibus suscipitur) hinc obliquo ductu mesenterium conscendunt, in via sibi mutuo implexa, & variis modis confusa, atque inter & per multas glandulas, ad diremptus horum vasorum imprimis collocatas, versus magnam seu mediam mesenterii glandulam progrediuntur, quam plurima ingrediuntur, & multa per superficiem transgrediuntur, inde mox ad magnum chyli receptaculum, sub glandula illa latens, desitura. Nusquam verò hepar ingrediuntur, quamvis id nonnulli cum Walæo & Gassendo persuadere studeant: nec ulla etiam in venam portæ, cavam, aut mesentericam aperiuntur, etsi id Walæum secutus, doceat Lindanus, lib. 2. physiolog. cap. 5. nec uspiam continuantur cum venis mesentericis, tanquam earum propagines, quod

OTENS.

commen-

commentus est Deusingius : nunquam quoque ulla è ventriculo prodire visum est.

*Quomodo  
glandulas  
transcunt.*

Whartonus, in *adenograph.* observat, ea in ipso introitu in glandulas, vel paulo ante, denuo ramificari, id est, in plures minores ramulos dividi ac subdividi, sicque in ipsa glandularum substantia obliterari, ac postquam ita in earum meditullio evanuerunt, rursus ex ipso glandularum corpore nova eorundem filamenta epullulare, quæ coëuntia truncum ut antea constituunt, qui versus mesenterii principium delatus, in transitu alios ejusdem generis ramos obviam factos sibi associat, iisque augetur. Sic, procul dubio, etiam illa quæ magnam glandulam ingrediuntur, rursus ex eadem, tanquam novis radicibus epullant, & in chyli receptaculum decurrunt.

*Valvula.*

Multas obtinent valvulas, chyli ab intestinis introitum admittentes, regressum impediētes, quæ licet non facile ad visum demonstrari queant, propter summam earum tenuitatem (attamen Fredericus Ruysch, antehac Hagienſis, nunc Amsterodamensis Medicus, & professor eximius, eas demonstravit, ac publicis tabulis depinxit) ex eo nihilominus satis innotescunt, quod si vasa hæc lactea versus magnam glandulam premantur, mox inaniantur : si verò à glandula versus intestina pressio fiat, chylus sistatur, nec eo propelli possit. Atque hac de causa etiam fit, quod apertis vivis, aut post tres à pastu horas laqueo suffocatis canibus, aliisve animalibus, bene antea nutritis, hæc vascula lactea mox satis copiosa in mesenterio appareant : sed dum intestina ab Anatomico commoventur, & demonstrationis gratia huc illuc, una cum annexo mesenterio, rejiciuntur, quod, inquam, per eam commotionem succus lacteus ex iis propellatur & defluat ad chyli receptaculum, atque sic illa vascula in mesenterio quasi inter manus evanescant, ac visum subterfugiant, cum inanita, ob tenuitatem & pelluciditatem, ut modò dictum, amplius conspici nequeant.

*Uſus.*

Uſus horum vasorum lacteorum est, non sanguinem, sed chylum ab intestinis ad magnam mesenterii glandulam, atque inde ad chyli receptaculum devehere. Hoc docet contenti succi color albicans, qui in animali tribus quatuorve post pastum horis interempto, lactis cremori similis est, & finita chyli distributione disparet, neque unquam sanguis in ejus locum succedit : atque sic evacuato chylo, ipsa illa pellucida ac tenuissima vascula, defectu istius lactei coloris, fere omnino conspectum effugiunt, quæ causa fuit quod tot seculis ignota latuerint. Dico autem, fere, quoniam acutissime intuentibus sæpe fibrillarum specie

conspicua manent, quod Galenum aliosque nonnullos decepit, qui fibrillas has putarunt esse nervos aut arteriolas.

Per ea autem vascula chylum ex intestinis versus receptaculum ferri patet, si in animali vivo, bene pasto, post tres horas repente aperto, ligatura iis in medio injiciatur ; nam mox fit intumescencia inter ligaturam & intestinum, detumescencia verò ab altera parte : illud ipsum etiam innotescit ex situ valvularum, de quibus modò dictum.

*Probatio.*

Causa quod chylus lactea vasa ingrediat, per eaque promoveatur, est duplex : una debilior, scilicet undosa contractio quæ à fibris ipsorum intestinorum peragitur, quam facile conspicuam exhibent cuniculi & feles vivi dissecti. Altera fortior, priorem potenter adjuvans, est musculorum abdominis, una cum respiratione sursum deorsumque motorum impulsio, qua ex alimentis in ventriculo coctis, ac in intestino bilis & succi pancreatici admistione de novo fermentatis, partes chylosæ, quæ tenuiores magisque spirituosæ sunt, à crassiore ac crudiore admixta massa separata, in hiantia lacteorum vasculorum oscula ex intestinis impelluntur, & quasi imprimuntur : quæ tamen oscula, ob summam angustiam, alias partes crassiores non admittunt, atque hinc illæ à tenuibus chylosis secretæ, & ad crassa intestina propulsæ, ut inutilia excrementa per anum deturbantur.

*Causa impellens.*

Ex modò dictis patet hæc chyliſera vasa non continue chylum vehere (multoties enim inania reperiuntur) sed duntaxat per intervalla, tunc scilicet cum chylus in ventriculo conficitur, ex eoque ad intestina descendit.

Deusingius, lib. de motu chyli, existimat solam pulsionem hic non sufficere, quamvis illam omnino admittat, sed ei in subsidium adjungit suctionem seu tractionem, quam necessario etiam concurrere, his rationibus probare nititur. Si nulla attractio, inquit, concedenda, & omnis motus ad pulsionem referendus sit, qua ratione alimentum à matre in venas umbilicales fœtus ingredi, vel à quam causa eodem impelli credendum ? vel alimentaris in ovo materia quomodo ad cor pulli pertingit ? nisi tractione, ob rarefactionis motum & reciprocæ cordis distensionem ac contractionem. Verum hæ rationes non sunt tam validæ, ut dictam opinionem defendere ac stabilire queant. Ad utramque respondeo, nullum alimentum immediate à matre in venas umbilicales ingredi, sed tam sanguinem, quam succum lacteum, per matris pulsionem ab utero duntaxat impelli in placentam uterinam (ut latius docebitur hujus lib. cap. 30.) inde verò pulsione quæ è corde ipsius fœtus per arterias umbilicales fit versus dictam placentam, sanguinem maternum

*An chylus attrahatur.*

maternum in ea depositum; calore arteriosi istius sanguinis foetus attenuatum & coctum, propelli in venam umbilicalem, & simul etiam chylum in vasa chyli ad amnii capacitatem tendentia. Si hic quaerat quis, quomodo colliquamentum ingrediat foetum, antequam umbilicus ad justam magnitudinem excrevit, & talis motus cordis per ejus arterias fiat? Dico, istum ingressum fieri per illapsum; magna autem differentia est inter attractionem & illapsum. Attrahitur enim res dura, gravis, sicca, aliave, quae per se sequi non potest; & trahenti adhæret: illabitur res mollis & fluida, quae dato evacuato humiliore loco, nec se continere, nec per se in loco suo subsistere potest, sed non attracta sponte illabitur. Ut si, ex. gr. per molam aquariam

aqua molæ proxima sursum ejiciatur, alia subsequens aqua non potest dici quod trahatur à mola, quæ satis longe ab ea remota, nec ullo modo cum ea conjuncta est, sed se sustinere nequens ad declivem evacuatam locum sponte prolabitur. Ita etiam procedit illapsus colliquamenti in foetu: dum enim cor ex oblata materia sanguinem continue conficit, & à se dispellit, in evacuatos poros mox sponte illabuntur colliquamenti adjacentis particulæ, quæ evacuatam locum rursus supplent. Ita ut etiam in foetu nulla fiat alimenti attractio. Illud ipsum quoque dicendum de ovi pullo, in quem partim per illapsum, partim per cordis ipsius pulli pulsionem, materia alimentaris ingreditur.

## CAPUT XII.

## De Ductu chyliifero thoracico, &amp; Receptaculo chyli.

Descriptio.



**H**ic Ductus chyliiferus thoracicus est vas è lumborum regione, secundum spinæ dorsi longitudinem, usque ad venam subclaviam extensum, per quod chylus è lacteis mesentericis in hoc effusus, cum eoque lymphæ, ad subclaviam venam defertur. Quia autem chyli per eum transitus non est continuus (semper enim non adest chylus transmittendus) sed lymphæ est continuus, hinc nonnulli, haud præter rationem, putarunt hoc vas potius appellandum esse, Ductum lymphaticum magnum, quia simul ac chylus evanescit, à lymphæ adhuc repleti deprehenditur.

Ductus lymphaticus magnus.

Inventores.

Hujus prima inventio adscribitur Joanni Pecqueto Diepzo, & Jo. van Horne, Anatomico Leydeni celeberrimo, qui ambo, annis circiter 1650. & 1652. illum invenerunt, utroque alterius inventionis nescio, & nostro tempore demonstrarunt publice, ac conscriptis libellis exhibuerunt.

Verum etsi plurimum ipsis eo nomine debeamus, quod hujus cognitionem per integrum fere seculum altis tenebris, Anatomicorum negligentia aut inscitia sepultam, sua diligentia rursus, magno Medicinæ commodo, in lucem eruerint, & perfectiorem reddiderint, ac nullo duce invenerint, publiceque innotescere fecerint, tamen non est quod de ipsa prima inventionem sibi totam gloriam adscribant: nam centum fere ab hinc annis idem ductus in equorum sectione omnium primo observatus & notatus fuit à celeberrimo Anatomico Bartholomæo Eustachio, qui, *lib. de vena sine pari, antigrammate* 13. ita scribit. Itaque

in illis, inquit, animantibus (loquitur de equis) ab insigni trunco sinistro jugali, quæ posterior sedes radicis vena interna jugularis spectat (putat subclaviam, qua parte eam jugularis desuper ingreditur) magna quedam propago germinat, quæ præterquam quod in ejus origine ostiolum semicirculare habeat (valvulam clare designat) est etiam alba, & aquei humoris plena, nec longe ab ortu in duas partes scinditur, paulo post rursus coeunt in unam, quæ nullos ramos diffundens, juxta sinistram vertebrarum latus, penetratò septem transversò, deorsum ad medium usque lumborum fertur, quo loco latior effecta, magnamque arteriam complexa, obscurissimum finem, mihiq; adhuc non bene perceptum, obtinet. Ex his verbis patet hunc ductum ab Eustachio omnium primo fuisse inventum & observatum, sed ejus usum non satis cognitum: nam describit illius principium à subclavia, ubi finis est; & rursus finem in lumbis, ubi principium est. Ac proinde primam, sed rudiorum, detectionem debemus Eustachio; accuratam verò & perfectam cognitionem ac demonstrationem Jo. van Horne, & Jo. Pecqueto.

Licet autem à lumbis usque ad subclaviam unus continuus sit ductus, tamen quia in principio suo latam habet capacitatem, instar parvi sacculi, chylum ex lacteis mesentericis primo recipientem, optime distinguitur in Receptaculum chyli, & ipsum Ductum chyliiferum.

Receptaculum chyli est hujus ductus origo seu principium, ipso ductu multo capacius, estque quasi cellula quædam in lumbis sita, in quam chylus è lacteis mesentericis primo influit, qui in ea, tanquam in communi

Receptaculum chyli.



communi receptaculo colligitur, unde non male Pecquetus huic cellulæ nomen **Receptaculi chyli** primus imposuit; quam tamen Jo. van Horne **Saccum lacteum** appellare maluit. Hanc Bartholinus **Glandulam lacteam lumbalem** nominat; sed malè, cum nullam cum glandulis substantiæ similitudinem habeat. Gualterus Charleton eandem **Conceptaculi Pecquetiani** nomine, ab inventore, designat. Verum cum lympham, ex circumstantium partium glandulis affusam, non minus quam chylum recipiat (nam si in vivo animali chylum pollice expresseris, mox lymphâ repletur) non minus bene **Receptaculum lymphæ**, quam chyli, posset appellari, idque eo magis, quia chylus tantum per intervalla in illud delabitur, cum è contra lymphæ influxus continuus sit.

*Receptaculum lymphæ.*

*Situs.*

Hujus Receptaculi situs est sub cœliaca & emulgentibus, circa lumbares vertebrae, media fere regione inter musculos psoas, renes, & glandulas renales, quas, uti & renes, subinde vel immediato contactu (ita tamen ut cultello separari queant) vel mediantibus ramulis quibusdam attingit. Non exacte tamen in omnibus medium lumborum locum servat, sed in brutis plerumque versus sinistram latum inclinat, juxta cavam descendantem, prope renem sinistram, rarius ad dextrum deflectit, aut recta in medio lumbarium musculorum locum habet.

*Numerus.*

In brutis plerumque unicum est, una cavitate præditum: interdum tamen duplex, scilicet in utroque latere unum: interdum unum media intercedente membranula, quasi in duas cellulas distinctum, observavimus. Quinetiam tria aliquando inventa fuisse dicuntur, duo in uno, & unum in altero latere, qui tamen casus hæcenus se nobis non obtulit. In homine tria notavit Bartholinus; duo majora invicem superposita, sed mutuis ramulis lacteis conjuncta, inter cavam descendantem & aortam, in angulo quem emulgentes cum cava faciunt, sita: tertium superius diaphragmati vicinior, ejusque principio nerveo, sub appendice, immersum.

*Figura.*

Hujus receptaculi figura plerumque rotunda & compressa, multoties etiam ovalis est.

*Magnitudo.*

In magnitudine multum variat. Sæpe implet spatium inter lumbares musculos ad renes eorumque glandulas extensum, nonnunquam multo minus est: in brutis illud interdum majusculum, versus inferiora nonnihil protensum, videmus.

*Amplitudo.*

Interior cavitas, educto chylo, interdum fere duos digitorum anteriorum articulos, interdum duntaxat unum capit, nonnunquam vix apicem digiti admittit.

In hominibus cavitas minor est quam in brutis, sed ipsius vesiculæ substantia multo solidior, utpote quæ in brutis tenuis est, & valde mollis ac lævis, in hominibus verò crassior.

A superna receptaculi parte, statim sub diaphragmate, assurgit ramus latiusculus, **Ductus chyliiferus thoracicus**, seu **Lymphaticus magnus**, appellatus, tenui ac pellucida membranula, sicut receptaculum, constans, spinæ circiter mediæ, infra arteriam magnam, pleura contactus, incumbens, & versus dextrum arteriæ latus nonnihil reflexus, ubi inferiore sui parte, intestinis cum mesenterio & rescisso diaphragmate ad latus sinistram remotis, conspicuus magis est. Hinc sub arteria magna ulterius sursum procedens, circa quintam & sextam thoracis vertebrae, paulum extra magnam arteriam, versus sinistram latum deflectit, atque sic infra arterias venasque intercostales, sub pleura & glandula thymica, ad venam subclaviam sinistram ascendit, in quam inferiore parte seu latere aperitur, ea regione ubi superiore loco in eam ingreditur vena jugularis sinistra. Ad ingressum verò non amplo hiatus in illam patet, sed sex, septemve exiguis foraminulis aperitur, in interiore subclaviæ concavitate simul contactis una latiuscula valvula, ab humero cavam spectante, qua ingressus chyli & lymphæ è ductu chyliifero in subclaviam liber conceditur, sed ejusdem, atque etiam sanguinis è subclavia in ductum relapsus præcluditur.

*Ductus chyliiferus thoracicus.*

Interdum duo rami tumidiusculi ex receptaculo ascendunt, quos tamen in medio sub arteria magna unitos vidimus, ita ut superiore parte tantum unus foret ductus.

*Duo ductus.*

In humano corpore interdum, licet rarè, duo vel tria inveniuntur chyli receptacula, atque tunc ex singulis singuli exsurgunt ductus, qui in progressu uniti, tandem uno ductu ad subclaviam sinistram vadunt.

Insertio enim ordinaria fit in subclaviam sinistram, cum in hominibus, tum in brutis, rarissime in utramque subclaviam ejus insertionem observant Anatomici, atque inde judico illud vix in centesimo animali inveniri. Sic etiam Bartholinus refert se in sex hominum, multorumque brutorum sectionibus, chyliiferi ductus insertionem in subclaviam sinistram invenisse, & semel tantum in cane ejus in dextram quoque subclaviam ingressum. Pecquetus duos ramos sursum ascendentes, diversis ramulis parallelis in media via hic illic junctos, & ad tertiam thoracis vertebrae simul coeuntes, moxque rursus divisos observavit, quorum unus dextram, alter sinistram subclaviam ingrediebatur.

*Insertio.*

*Interiorius*

Valvula.

Interius obtinet hic ductus multas valvulas, chyli & lymphæ ascendentis regressum impediens, ex eo satis manifestas, quod in eo contentus chylus digito facile sursum adigi, sed deorsum impelli nullo modo possit, & quod ductu alicubi pertuso, lacteus quidem succus ab inferiore parte sursum tendens effluat, sed à superiore vultusculi parte intra valvulas subsistat, neque ad inflictum vulnus descendat. Præterea, quod per immisam tenuem fistulam flatus, aut per siphonem injectus liquor facile sursum ascendat, deorsum verò impelli nequeat.

Inveniendi  
modus.

Hujus chylieri thoracici ductus inventio non semper æque facilis est, quippe cum tunica ejus sit pellucida, & sub pleura lateat, non tam manifeste in conspectum venit si chylo vacuus fuerit, qualis esse solet multis horis post pastum, vel post inediam: optimè verò apparet, si chylo albicante turgat: ac proinde statim visui occurrit in canibus vivis, aut tertia quartave hora post luculentum pastum recenter strangulatis, atque tunc sæpe etiam ingressus lacteorum vasorum mesentericorum è magna mesenterii glandula in receptaculum chyli manifestè conspicitur. In duobus corporibus humanis recenter strangulatis, ante mortem bene pastis, se hunc ductum cum receptaculo satis bene invenisse, scribit Bartholinus. In iis qui ægrotantes à morbo extinguuntur, difficulter invenitur, quia chylo vacuus existit, quia ægroti vix edunt, imprimis cum mors præ foribus adstat, eorumque ventriculus ex assumptis alimentis vix ullum chylum conficit. Anno tamen 1654., in duobus morbi violentia extinctis illum inveni, & Medicinæ studiosis demonstravi. Primò mense Aprili, in cadavere mulieris longiusculo morbo emaciata, sed, dum viveret, siticulosa, in quo illum altero post mortem die, sero ac lymphâ turgidum reperi, & spectantibus præsentibus ostendi. Secundò, mense Majo, in muliere pleuritide sinistri lateris extincta, quæ præ fiti maktum biberat, atque hinc & receptaculum, & hunc ductum seroso humore turgidum habebat. In utroque autem subiecto ductus talem situm inveni, qualis in canibus reperiri solet, nec non insertionem ejus in subclaviam sinistram: in priore parvum, in posteriore amplius erat chyli receptaculum, utpote quod pollicis integrum articulum admittebat. Postmodum in pluribus humanis corporibus ductum investigavimus & demonstravimus, atque in receptaculo quidem aliquam diversitatem invenimus, ut modò unum foret, modò unum media membranula distinctum seu divisum, modò propter geminam protuberantiam duo diversa esse viderentur; & modò ex hoc unus, raro duo ductus exsurgerent,

postea in unum coeunt: sed ductus insertionem in subclaviam dextram hæcenus in homine non invenimus, at semper in sinistram.

Anne ductus chylierus etiam ad uterum & mammas ramos emittat, inquiremus in uteri & mammarum historia.

Hoc tempore, quo hæc scribimus, in lucem prodiit Belgicus libellus Ludovici de Bils, qui gloriatur se lactiferorum seu chylierorum vasorum multo ulteriorem propagationem invenisse: quippe scribit, & appositâ tabellâ delineat, ductum chylierum thoracicum ad divisionem venarum jugularium, contortum quendam circulum facere (hunc postmodum alii *labyrinthum*, alii *spiram* appellare maluerunt) ex eoque duos ramulos ad mammarum glandulas dimitti, duos item sursum ad colli glandulas projici. Hujus contorti circuli continuationem cum ductu chyliero thoracico aliquoties quæsi, nunquam tamen hunc ductum ulterius quam ad venam subclaviam deducere aut prosequi potui. Ex relatu tamen aliorum intelligens dictum circulum à Nicolao Stenonis aliisque diversis, sæpe quidem inveniri non potuisse, sed nonnunquam tamen inventum fuisse, sectiones in canibus aliter institui, scilicet à suprema gula usque ad os sternum, & post plures diligentes hujus circuli inquisitiones, illum manifestissimè interdum conspicuum inveni, imprimis si inflaretur, sic enim commodius spectatorum oculis objiciebatur: interdum verò nihil aliud inveni, quam varium concursum multorum vasculorum lymphaticorum, ex glandulis jugularibus, parotidibus, aliisque adjacentibus prodeuntium, & inde ad varias venas excurrentium, in iisque se exonerantium. Interea hoc etiam satis accurate observavi, hunc lymphaticorum vasculorum concursum non continuari cum ductu chyliero thoracico, neque ex illo chylum recipere, eumque ulterius ad circumjacentes glandulas deferre, ut male asserit Ludovicus de Bils: sed è contra illam lympham ex dictis glandulis deferri ad istum circulum lymphaticum, seu vasculorum varium concursum (dico, *varium*, quia in omnibus subjectis se eodem modo non habet) indeque per ramulos ulterius excurrentes evacuari & exonerari in varias venas: sicut axillares & inguinales glandulæ per vascula lymphatica suam lympham maxima ex parte deponunt in vasa lactea. Verum etsi nobis hic circulus interdum apparuerit, interdum non, videtur tamen ab aliis quibusdam nunquam inveniri potuisse: jam nuper enim in manus nostras incidit Jacobi Henrici Pauli, Professoris regii in Academia Hafnienfi, *Anatomia Bilsiana anatome*, qua doctissimus Vir dictum Bilsianum labyrinthum, ut meram fabulam,

Circulus  
Ludovici  
de Bils.

G 2

explodit,

explodit, propterea quod eum invenire minime potuerit, sed solum antedictum concursum aliquem lymphaticorum vasculorum reperit, ejus verba hæc sunt, dicto lib. cap. 6. Novus, inquit, ductus chyliiferus, quem D. Jo. van Horne inter primos divulgavit (intelligit ductum thoracicum) thoracem egressus, ultra jugulum non ascendit, & per se considerandus venit. Estque Bilsii receptaculum tortuosum, cum suis gyris, anfractibus, tubulis, ramis, surculis, nihil aliud, quam lymphaticorum jugularium ex superioribus glandulis ad axillares, & quidem utrimque, propagines, in quibus Natura, pro varietate subjectorum, eo modo ut in manuum pedumque venis, mirifice ludit, quæque & mihi diverso tempore aliter atque aliter se obtulere. Ut plurimum tamen hunc servarunt ordinem, ut ex glandula illa oblonga maxillari, qua parotidi conglobata & glandula thyroidea Whartoni, circa laryngis sedem, interjacet, solitarius canalis procedat, tribus vel quatuor interdum præditus ramulis, qui sæpe cum alio ramo, ex minori glandula, qua carotidi arteria & vena jugulari interna, sed non semper, adjacet, concurrunt. Is canalis deinde œsophagum, cui infertur, deferens, jugulari externa se associat, & sub illa incedens, modò transit, modò præterit duo alia lymphatica, qua ex glandulis cervicalibus in medio colli proficiscuntur, mutuo se amplectuntur, atque invicem stringunt, & multas ramificationes, minime verò, nisi mente fingatur, perfectum circulum efformant. Sit itaque hic samosus ille labyrinthus, & inextricabilis error. Omnes autem ista vasorum propagines, ubi surculum jugularis externa (cui quoque exigua subinde apponitur glandula) ad musculos mastoideos abeuntem, attigerunt, & superarunt, in communem præcipitantur alveum, ampulla similem, ventre amplo & quasi inflato, ut à Bilsio haud obscure receptaculum vocari meruerit. Ex hoc tandem gemina rursus appendices extenduntur, quarum una prope fistulam aspera arteria, quo in loco carotides à trunco assurgunt, venam axillarem: altera paulo distans, jugularem externam intrat. Quibus etiam aliud vas lymphaticum (quod hæcenus ex artubus derivarunt) ex glandulis subaxillaribus supervenit: ita ut plurimarum insertionum, scilicet inferius ductus thoracici (error: nam hic venam subclaviam non transcendit) à latere vasorum axillarium, ac desuper lymphaticorum jugularium, quin & ex thymo orientium, fiat concursus, nec raro ex uno in alterum transitus.

Hanc descriptionem idem auctor, novâ appositâ tabulâ, etiam clarissime delineat seu depingit, & cap. 7. administrationem, qua lymphatica jugularia inveniuntur, adscribit.

Verum etsi præfatus D. Pauli circulum Bilsii satis falsè irrideat, non videtur tamen

Bilsius sua sectione tot præsentis doctos viros eo cæcitatis aut dementiæ deducere potuisse, ut publico scripto testarentur, se talem circulum ab eo demonstratum vidisse, qui tamen re vera non adfuisset: adeone omnes cæcutiissent? Præterea etiam nos, cum pluribus aliis, istum circulum vidimus, etsi eum semper invenire non potuimus: atque hinc facile credendum, hic sæpe à Natura lusum fieri, ac in nonnullis canibus perfectum circulum reperiri, in aliis non nisi inordinatum vasorum lymphaticorum concursum circa jugulum inveniri. Pro conclusione interim hoc iterum assero, hunc circulum non esse productionem ductus chyliiferi thoracici (quod malè tradit, & sic delineat Lud. de Bils) eumque, ut modò dictum, nec ab eo chylum recipere, nec chylum vehere, sed esse alveum in quem lymphæ ex circumjacentibus glandulis aliis-que partibus delata, atque in vicinas venas, aliasve partes deferenda, colligitur.

An chylus & lymphæ sint unus idemque liquor, an vero distincti sint succi, videndum sequente cap. 13.

Ufus chyliiferi, seu lymphatici magni Ufus. thoracici ductus est, continuè lympham, & per intervalla etiam chylum, ad receptaculum ex lacteis mesentericis impulsam, in eoque lymphatici succi admixtione attenuatum, ad venam subclaviam devehere; ut illa sanguinem ad effervescentiam in corde faciendam præparet: hic sanguini venoso admixtus, cum eoque per cavam ad cor delatus, ab eo in sanguinem mutetur.

Chylum & lympham per hunc ductum chyli ascensum. sursum ascendere, præter situm valvularum, de quo modò dictum, etiam in vivorum animalium sectione ocularis inspectio docet, per ligaturam huic ductui injectam, mox enim fit ejus intumescencia inter ligaturam & receptaculum, detumescencia verò supra ligaturam. Quod ipsum experimentum etiam succedit in cane recentè strangulato, si post injectam ligaturam, intestina cum mesenterio manu leviter premantur, & sic ea pressione chylus è chyliiferis meseraicis propellatur ad receptaculum, ex eoque ad ductum thoracicum.

Chylum autem una cum lymphæ venam subclaviam ingredi, atque inde per cavam ad cor deferri, præterquam quod prius illud de foraminibus antè dictum, oculis conspicuum sit, ex eo etiam patet, quod lac paulo copiosius siphone in ductum chyliiferum injectum, mox in subclaviam, hinc in cavam & dextrum cordis ventriculum, una cum sanguine cavæ inhærente, deferatur, ac per vulnus isti ventriculo inflatum effluere conspiciatur.

Causa autem chylum cum lymphæ ex receptaculo in hunc ductum thoracicum, & sic ulterius in subclaviam propellens, eadem est,

est, quæ illum ex intestinis in lacteas mesentericas impellit (de qua capite precedente dictum) scilicet motus musculorum abdominis, una cum respiratione sursum deorsumque motorum, quo mollis ac clemens fit propulsio chyli per omnia vasa lactea, quæ impulsio ex eo manifeste conspicua fit, quod si in vivo animali, apertis ac dissectis abdominis musculis, eorumque motu sic omnino ablato, nos manu nostra ventris inferioris viscera clementer comprimamus, statim lacteum succum per omnia vasa lactea promoveri ac propelli manifeste videamus: & licet illa pressio non urgeat ductum thoracicum, tamen chylus è receptaculo in eum pressione ista impulsus, per eum propellitur sursum, sicut unda propellit undam.

An totus  
chylus as-  
cendat ad  
subclaviam.

Hic jam quæstio incidit, an per hunc ductum totus chylus ad subclaviam tendat? an non etiam magna ipsius pars venas meseraicas ingrediatur, & sic ad hepar ascendat? Nos totum ad subclaviam transire dicimus, eò excepto, qui in media via è ductu vel sacco chyliifero, cursu extraordinario interdum, sed rarissimè, fluit ad vesicam urinariam (de hoc vide sequens cap. 18.) vel in mulieribus gravidis ordinario cursu progreditur ad uterum (vide cap. 30.) & in lactantibus ad mammas (vide lib. 2. cap. 2.) Verum alteram opinionem docet Regius, qui sentit partem chyli è ventriculo per venas gastricas deferri ad lienem, partem etiam per meseraicas ad hepar, quorum illud à nobis refutatur precedente cap. 7. hoc verò lib. 7. cap. 2. Etiam Deusingius acriter defendit, totum chylum per ductum thoracicum ad subclaviam non deferri, hancque suam opinionem, exercit. de chylicat. & chyli motu, his argumentis confirmat.

I. Nulla, inquit, proportio Natura congrua existit, inter innumerabiles lacteas venas per mesenterium sparsas & thoracicos ductus (qui plerumque tantum unus est) chylum alterius ad venas axillares reventes.

II. Quomodo thoracicus ductus tantam chyli quantitatem, per tot vasa lactea ad chyli receptaculum advectam sine incommodo transmittet?

III. Tantilla exigua chyli portio, quanta per thoracicos ductus ad venas axillares & cavam deducitur, minime sufficit resarciendo continuo sanguinis, per universum corpus agitati & effervescentis, dispendio, ut nec continua omnium partium detritioni rescinda.

IV. Cum multum chyli generetur, & paucillum duntaxat per angustias thoracici ductus transire possit, ubinam remansurus est residuus chylus, qui inter utrumque pastum per exilem thoracicum ductum transire non potuit?

V. Illa maxima chyli pars, qua tempore imprægnationis & lactationis fertur ad uterum & mammas, quorsum fertur illa extra tempus

imprægnationis & lactationis, cum per ductus thoracicos eam transire non posse, verosimile sit?

VI. Si ductus thoracicus in vivo animali citissimè vinculo interceptiatur, motus lactei liquoris in mesenterio non inhiberi deprehenditur, cum tamen nihilominus vena lactea sensim evanescent.

Tandem subjicit experimentum Ludovici de Bils, quo id exacte per autopsiam probari putat.

Hæc sunt præcipua argumenta, quibus clarissimus vir opinionem suam fulcire nititur: jam examinandum quanti ponderis existant, & an tantum efficaciam, quantum promittitur contineant, ut videamus an acutissimo invento ipsa veritas suffragetur.

Respondeo ad primum & secundum, non minorem, imò multo majorem esse proportionem vasorum lacteorum mesentericorum cum uno vel duobus ductibus thoracicis, quam est tot innumerabilium venarum, à capite, trunco, pedibus, brachiis, aliisve quibusvis partibus delatarum, cum una vena cava, in quam omnes se exonerant: nam si tot venarum myriades spectentur, illæ omnes decuplo plus sanguinis in cavam exonerare videbuntur, quam vel cava capiat, vel commode à se dispellere possit. Quia tamen hoc sine ullo tumultu fieri videmus, quid mirabimur quod illud ipsum etiam convenienter fiat in vasis lacteis? Præterea sciendum, quod chyli processus non sit tam continuus, nam inter utrumque pastum sæpe longum tempus intercedit, quo nullus chylus generatur aut transluit (hoc per autopsiam patet in animalibus vivis longius à pastu occisis, in quibus hæc vasa chylo vacua reperiuntur) & qui homines nimis brevibus intervallis comedunt, vel nimis alimentis se infarciunt, atque hinc chylum nimis citò & nimis copiosum generant, ita ut tam rapidè per dictas vias transmeare nequeat, illi etiam malè se habeant, vel quod ingesta alimenta non satis digerant, vel quod chylus nimis copiosus non satis citò per vasa lactea permeare potens, in via per longiorem moram incrassescat, acefcat, coaguletur, aliove modo corrumpatur, sicque obstructions pariat, & subsequentem chylum transire prohibeat. Denique, si à simili liceat argumentari, videndum quantum feri per angustos ureteres brevi tempore transeat: si hoc sine ulla molestia in iis fiat, quare etiam per vasa lactea & canalem thoracicum tantundem transire non posset?

Ad tertium & quartum dico, non esse tantillam seu exiguam portionem chyli quæ per thoracicos ductus transit, sed copiosam, ut per autopsiam patet. Si canis vivus bene pastus quatuor aut quinque horis post pastum repente aperiatur, & vas

lacteum in medio thorace præscindatur, ac tunc manibus intestina cum mesenterio alternatim molliter modò comprimantur, modò laxentur (sicut in respiratione à musculis abdominis talis alternata pressio fieri solet in sanis & viventibus) tunc apparebit quam copiosus chylus per illud thoracicum vas transeat: brevi enim magna quantitas in thoracis capacitatem effluet, nec eò quidquam per alias vias affluere comperietur. Præterea, ex singulari observatione Walæi, in homine plethorico sano absumitur singulis diebus sanguinis, præter propter, libra una. An non totius diei spatio per lactea vascula transire posset una libra chyli, ad istius absumpti sanguinis restitutionem? spatio semi quadrantis horæ antedicto modo duas circiter uncias aliquando expressimus, quantum igitur transire poterit integra die? certò multo plus transiret quam absumptum est, si modò chylus in intestinis perpetim adestet, à quo copiosiore præsentē ac transeunte procedit corporis incrementum & generatur plethora. Huc accedat experimentum Loweri, citatum à Gualtero Needham, *lib. de format. fæt. cap. 1.* qui in vivo cane, perforato interdum in thorace dextro latere, receptaculum chyli prope diaphragma digito lacerabat: interdum sinistro thoracis latere aperto, ductum thoracicum infra subclavias disrumpebat, confutoque externo vulnere, canem in vita servabat, & bene saginabat: sed ut ut copiose cibatus, intra triduum inedia conficiebatur: apertoque cadavere, inveniebatur chylus totus expulsus in illud thoracis latere quo vulneratus fuerat; apertisque venis, sanguis crassior & sero destitutus, nec ulla chyli admistione refocillatus, conspiciebatur.

Ad Quintum dico, magnam chyli partem per thoracicos ductus ad subclaviam ferri solitam, tempore imprægnationis & lactationis ferri ad uterum & mammas, & quia defectu istius chyli aliorum delati, corpus mulieris non satis nutritur, hinc mulieres illas (si modò reliquo corpore bene sanæ sint) natura impellente, esse magis famelicas, ut edendo & bibendo suppleri possit ille defectus, & interim etiam satisfieri necessitati Naturæ, alimentum pro fœtu alibi requirentis. Quodsi verò ventriculi aliarumve partium vitio mulieres illæ non sint satis famelicæ, sed vel paucò, vel solito minore fruantur alimento, tunc illas, ob chylum ad fœtus nutritionem aliorum delatum, admodum debilitari, & penitus emaciari, ut quotidiana docet experientia.

Ad Sextum dico, quod intercepto ductu thoracico & moriente animali, videamus quidem lacteas mesentericas, partim à vicinis partibus incumbētibz pressas, partim in se concidentes, sensim evanescere, sed

non quia chylus venas meseraicas ingreditur, sed quia in saccum chyli ferum & ductum thoracicum infunditur, qui tunc chylo, præter solitum, valde turgent ac distenduntur: cumque in eos plus infundi nequit, tunc etiam circa magnam glandulam mesenterii in lacteis meseraicis subsistit, in iisque per integrum diem & diutius conspici potest, quæ non fierent si venas meseraicas ingrederetur.


Quantum ad experimentum Ludovici de Bils, quod multos doctos viros nimis imprudenter in alienam sententiam seduxit, quid de illo sentiendum sit, & super his plura alia, dicemus *lib. 7. cap. 2.*

Jo. Swammerdammius, in *Mirac. Naturæ*, pag. 29. se hepatis sanguificationis munus restitutum promittens, in ea est sententia, omnino totum chylum per venas meseraicas ad hepar tendere, & nihil aliud quam albicantem lympham esse, quidquid in lacteis videmus: idque eo probat, quod interdum in meseraicis, ut inquit, sanguinem velut striatum, & albis lineis permixtum, quandoque seu punctis notatum, imò nonnunquam in iis nil nisi purum chylum repperit: tandem hæc verba addit: *In vena porta sæpius chylum, etiam non ligata, vidimus, & ex eadem extraximus, & plurimas meseraicarum chylo repletas vidimus.* Si jam aliquis hæc omnia sibi sic persuaderi velit & permittat, per melicet, haud equidem invideo: ego tamen hac in parte Asellii, Pecqueti, Deusingii, Whartoni, aliorumque plurimorum, sed præcipue meis ipsius oculis (nisi illos, ut & reliquorum jam nominatorum, glaucomate obfuscatos, & suos solos acuto visu præditos, judicare velit Swammerdammius) multo plus confido, quam hujusmodi scriptis: talia demonstratione potius, quam sola scriptione persuadenda sunt artis Anatomicæ aliquo modo peritis, qui oculatas habent manus, & credunt quod vident. Verum quandoquidem Swammerdammius *ibidem* promittit se illud in suis *Anatomicis curiosis* (sic appellat suum secuturum librum) propediem in lucem prodituris, latius explicaturum, nos illam latiore curiosam explicationem, cum curiosa patientia expectabimus, interea mansuri in nostra antedicta opinione. Quare autem sanguis in venis meseraicis interdum pravi coloris existere possit, infra videndum, *lib. 7. cap. 2.* Verum ut Swammerdammius dictam suam opinionem magis corfirmet, adhuc aliud argumentum adjungit, ex eo desumptum, quod nemo hætenus demonstrare potuerit, chylum usque in lacteas primi generis ex intestinis deferri. Sed eodem argumento etiam ego docebo, chylum in venas meseraicas non ferri, quia hætenus nemo ejus ingressum ex intestinis in illas demonstrare potuit (scribit quidem Jo.

An totus chylus ascendat per venas meseraicas ad hepar.







van Horne, *epist. ad Rolsinc.* se id demonstratione exhibere posse, sed nunquam auditum est illud hoc præstitisse, aut ulli præsentī demonstrasse: nunc si etiam aliqui hodie sint, qui se hoc præstare posse gloriari velint, illi, quæso me spectatorem admittere dignentur, & tunc an istis dictis credendum sit iudicabo) hætenus etiam nemo ad oculum demonstrare potuit manifestum seminis transitum è testibus per vasa deferentia ad vesiculas seminarias: an hoc, quia in de mortuis cadaveribus ad visum demonstrari nequit, probat in vivis semen per illas vias non deferri? semen in parastatis & vesiculis seminariis conspicuum, sine ulla manifestiore demonstratione, sola ratione id docente, satis ostendit, illud è testibus & parastatis per dicta vasa ferri debere, cum in nullis aliis partibus extra testes semen conficiatur (ut infra docemus, cap. 22.) & plane nulli alii dentur meatus ad vesiculas seminarias. Sic etiam cum in ventriculo excoctus chylus nusquam alio fluat quam ad intestina, in iisque candido colore (hoc patet etiam ex albis chylois dejectionibus in coeliaco alvi fluxu) conspicuus existat, nec minus etiam candidus in vasis lacteis mesentericis, sacco chylifero, & ductu lacteo thoracico conspiciatur, imò per longiorem famem absente in intestinis chylo, in dictis lacteis vasis non reperiatur, nec ullibi in aliis vasis tam candidus liquor appareat, quis compos mentis, sola ratione dictante, dubitabit chylum ex intestinis vascula lactea mesenterica ingredi, ex iisque ad reliqua lactea ulterius promoveri, licet primus ingressus hætenus ad oculum demonstratus non fuerit? Cujus demonstra-

tionis defectus ex eo procedit, quod in visceribus aliisque partibus integris ac vivis fiat talis humorum spirituumque impulsio & promotio, qualem in demortuis & dilaceratis vel discissis ars in omnibus ad oculum perfectè demonstrare non potest. Interim quo modo chylus ex intestinis vascula lactea mesenterica subeat, *capite præcedente* à nobis descriptum est. Denique, quod Swammerdammius scribit, nil nisi albicantem lympham esse, quod per vasa lactea defertur, hoc iis, precor, persuadeat, qui differentiam chyli & lymphæ non novērunt, neque istos liquores seu succos à se invicem distinguere sciunt. Nos per dicta lactea vascula utrumque illum liquorem transire dicimus, ac demonstramus, & quare lacteus illic lymphatico liquore dilui debeat, docemus paulo ante hoc eodem capite, ut & sequente capite 17.

Præter modò dictum chyli transitum, quem per venas meseraicas ad portam fieri multi contendunt, etiam ad alias partes se chyli distributionem observasse, scribunt, Riolanus, lib. 2. *enchir. cap.* 18. Veslingius, *epist. ad Mauritium Hoffmannum*, Walæus, *epist. ad Bartholinum*, Maurocordatus, lib. de motu & usu pulm. cap. 13. referuntque se animadvertisse, vasa lactea etiam excurrere ad ipsum hepar, ad pancreas, ad truncum cavæ prope emulgentes, ad venam portæ & mesentericam, aliasque nonnullas. Sed omnes illi doctissimi Viri apertissimè decepti fuerunt per vasa lymphatica, quæ putaverunt esse vasa lactea, ut ex eorum textu, citatis locis legendo, ut & ex iis quæ sequente capite de lymphaticorum ortu & viis dicentur, manifeste liquet,

## T A B U L Æ I. E X P L I C A T I O.

Hæc tabula exhibet Sacci Chyliferi, ductus chyliferi Thoracici, & vasculorum lymphaticorum hepatis delineationes, à Primis eorum inventoribus depictas.

## FIGURA. I.

Omnia dicta vasa, pro ut occurrunt in cane.

- A. Ventriculus.
- B. Pylorus.
- CC. Intestinum duodenum.
- DDD. Jejunum.
- EEE. Ileum.
- F. Cecum.
- GG. Colon.
- H. Principium intestini recti.
- IIIII. Quinque loci hepatis.
- K. Vesicula fellea.
- LL. Renes.

- MM. Venæ emulgentes.
- NN. Vena cava.
- O. Vena porta.
- R. Vesica chyli.
- SS Mesenterium.
- TT. Pars mesenterii fracta, ut ligatura vasorum lymphaticorum hepatis commodè institui possit.
- aa. Pancreas glandulosum.
- bb. Pancreas carnosum duodeno annexum, & ventriculo substratum.
- cccc. Venæ lacteæ inter intestina & pancreas glandulosum.
- ddd. Venæ lacteæ pancreas glandulosum egredien-

egredientes.

aaeee. Vasorum lymphaticorum exitus ex hepate.

fff. Eorum ad glandulam m. & ab illa in chyli saccum seu vesicam progressus.

gg. Rami duo ductus cholidochi.

H. Hujus ductus in duodenum insertio.

iiiiii. Venæ meseraicæ.

m. Glandula sita sub porta, vasa lymphatica hepatis recipiens.

nn. Unus horum ductuum vesicam fellis perreptans.

oooo. Venæ portæ ramificatio & in hepar ingressus.

tt. Venæ vesiculæ fellis.

xxxx. Valvularum in hisce ductibus sedes.

#### FIGURA. II.

pppp. Earundem valvularum sedes.

#### FIGURA. III.

T. Bifurcatio ductus chyliiferi thoracici sub corde, sicut frequenter invenitur.

#### FIGURA. IV.

z. Ramificatio varia ductus chyliiferi rarior.

#### FIGURA. V.

x. Vena axillaris cum jugulari sinistra i.

n. Ductus chyliiferi triplex insertio, quæ rarior, frequentius enim simplex est.

#### FIGURA. VI.

AAA. Eadem insertio in capite humano.

BB. Vena axillaris integra.

C. Vena jugularis externâ.

d. Clavicula.

#### FIGURA. VII.

A. Cor ad latus remotum.

BB. Pulmones etiam reflexi.

CC. Vena cava.

D. Vena axillaris dextra.

E. Vena axillaris sinistra.

F. Pars ejusdem aperta, ut in conspectum veniat ductus chyliiferi insertio.

G. Sternum punctis solis delineatum.

H. Vena jugularis sinistra.

II. Arteria aorta.

KK. Saccus chyli.

L. Ramuli venæ cavæ hepatici.

aa. Venæ emulgentes.

bb. Venæ lumbares.

dd. Venæ crurales.

eeee. Vasa lymphatica sub intestino recto sursum ad saccum chyli tendentia.

ffffff. Glandulæ ad crurales venas sitæ, & quibus lymphatica ista oriuntur.

ggg. Dicta lymphatica è glandulis assurgentia.

hhh. Lymphatica inter abdominis musculos progredientia ad saccum chyli.

iiii. Venæ lacteæ inter pancreas glandulosum & saccum chyli repentes.

kkk. Pancreas glandulosum.

ll. Venæ lacteæ mesentericæ inter pancreas glandulosum & saccum chyli.

MM. Ductus chyliiferus thoracicus.

N. Ejus in venam axillarem insertio.

oo. Glandulæ sterni.

pp. Harum vas lymphaticum in chyli ductum thoracicum se exonerans.

Q. Ejusdem ramulus versus costas procedens.

RR. Glandulæ cordis.

S. Earundem vas lymphaticum, sub corde ductui chyliifero insertum.

#### FIGURA. VIII.

xx. OEsophagus.

β. Glandula ipsi annexa.

γγ. Vas lymphaticum ex ea ortum, & ductui chyliifero insertum.

δδ. Ductus chyliiferus.

#### FIGURA. IX.

Ductus chyliiferus in cane, pro ut à Pecquetto primo inventus, & delineatus est.

1. Ascendentis cavæ truncus.

2. Chyli receptaculum.

3. Renes.

44. Dissectum diaphragma.

55. Musculi lumbares ψα.

66. Ductuum chyliiferorum concursus varii.

#### FIGURA. X.

Idem ductus chyliiferus cum sacco Chyli è cane exemptus.

A. Truncus cavæ ascendentis, sursum in longum apertus.

BB. Venarum jugularium & axillarium concursus: ubi chyli scaturigines intra axillarem punctis designantur.

CC. Jugularium valvulæ deorsum spectantes.

DD. Lacteorum vasorum ad scaturigines distributio, pro ut à Pecquetto est delineata.

EEE. Diversi vasorum lacteorum concursus.

F. Ampulla, sive superior sacci chyliiferi pars, juxta illæsum diaphragma sinistrorsum in thorace conspicua.

G. Alveolus dextrorsum ad diaphragma apparens.

HH. Residua diaphragmatis portio.


I. Chyli receptaculum.

LLL. Lactæa meseraicæ saccum chyliiferum ingredientibus abscissæ.


MMM. Variæ ductus chyliiferi valvulæ.

ooo. No-





II



ooo. Notatæ, chyli ascendentis regressum impediētes.

## FIGURA. XI.

Ductus chyliiferus in homine, pro ut à Bartholino inventus delineatur.

- A. Saccus chyliiferus superior, rarus & insolitus.  
 bb. Duo sacci chyliiferi, vasis lacteis sibi invicem juncti, qui rari sunt, plerumque enim unus invenitur.  
 ccc. Rami lactei ex saccis ascendentes.  
 D. Solitarius ramus thoracicus.  
 E. Emulgens arteria dextra.  
 FF. Renes.  
 GG. Arteriæ magnæ truncus descendens

infra cor abscissus.

- H. Spina dorsi.  
 K. OEsophagus ad latus reflexus.  
 LL. Glandulæ thymi.  
 M. Ductus thoracicus ad subclaviam tendens.  
 N. Insertio ductus chyliiferi in subclaviam.  
 o. Valvula.  
 P. Axillaris venæ expansæ & per longum diffissæ interior facies.  
 R. Jugularis vena externa.  
 TTT. Costæ utriusque lateris.  
 V. Vesica in suo alveo.  
 xx. Diaphragma utrimque resectum.

## T A B U L Æ II. EXPLICATIO.

Hæc tabula exhibet lymphatica vasa in Collo sita, pro ut illa aliter à Ludovico de Bils, & aliter à Jacobo Henrico Pauli sunt in cane delineata.

## FIGURA. I.

Colli ductus lymphatici à Ludovico de Bils delineati, eique Roriferi ductus appellati.

- A. Ductus roriferus à cisterna sursum ascendens.  
 B. Divisio seu fissura istius ductus, circa 5. & 6. thoracis vertebam.  
 E. Receptaculum tortuosum quod ille ductus super surculis venæ jugularis conficit.  
 F. Gyri quos ille ductus circa receptaculum tortuosum exhibet.  
 3. Pars cavæ sub illo receptaculo.  
 4. Glandula thoracis.  
 G. Ramus ductus roriferi ad glandulas thoracis excurrrens.  
 H. Ramus qui subter istius ductus gyros in glandulas thoracicas coit.  
 I. Ramus ductus roriferi ad supremam colli glandulam ascendens.  
 K. Surculus rami I. sursum tendens.  
 L. Ejusdem ramus ad infimam colli glandulam ascendens.  
 M. Rami L. divisio.  
 5. Infima colli glandula.  
 N. OEsophagus.  
 O. Vena jugularis.  
 P. Surculus venæ jugularis.  
 R. Truncus arteriæ magnæ.  
 V. Intestina distorta.  
 X. Venæ roriferæ, nobis lacteæ vocatæ.  
 YYY. Glandula magna mesenterii, seu pan-

creas Asellii, cum glandulis ei adjacentibus.

- z. Tubuli ex glandulis mesentericis versus cisternam.  
 6. Intestinum duodenum abscissum.  
 7. Intestinum rectum abscissum.  
 9. Pars hepatis cava cum suis lobis.

## FIGURA. II.

Colli ductus lymphatici ab Jac. Henrico Pauli delineati.

- AA. Musculi sterno hyoidei extra sedem.  
 B. Cartilago scuti formis.  
 C. Asperæ arteriæ fistula.  
 DD. OEsophagus asperæ arteriæ succumbens.  
 EE. Musculi colli transversim incisi.  
 G. Vena cava ascendens.  
 HHH. Venæ axillares.  
 II. Jugulares externæ extra situm.  
 KK. Surculus jugularis externæ ad cervicem.  
 LL. Jugulares internæ.  
 m. Canalis lymphaticorum jugularium solitarius, à glandula oblonga veniens, & œsophago ex parte instratus, extra situm.  
 NNOO. Duo lymphatica ex glandulis cervicalibus prodeuntia.  
 P. Communis alveus ampullæ similis.  
 qq. Geminae appendices, una venam axillarem, altera jugularem intrans.  
 ff. Ductus thoracicus Pecqueti & Hornii ex sacco chyliifero ascendens.

H

TT. Costæ



TT. *Costæ superiores.*

VV. *Costæ inferiores.*

1. *Parotis conglobata inferior.*

2. *Glandula parva exterius supra fauces sita.*

3. *Glandula maxillaris rotunda.*

4. *Glandula maxillaris oblonga.*

5. *Glandula minor, quandoque deficiens.*

6. *Glandula carnea Thyroidea Warthoni.*

7. *Glandula cervicales racematim compactæ.*

8. *Glandula colli, nonnunquam jugulari externæ, sed rarius, appositæ.*

9. *Glandula sub axillaris.*

## C A P U T XIII.

### De Vasis lymphaticis, & Lympha.

Definitio.



Afa lymphatica sunt vascula tenuia & pellucida, lympham, seu liquorem quendam tenuem, pellucidum, ac lymphidum ad vasa chyliifera & venas deferentia.

Inventores.

Horum primi inventores fuerunt Thomas Bartholinus, & Olaus Rudbeck, quos inter magna & acerrima, de primæ inventionis gloria, lis est, cum singuli hunc honorem sibi debere putent. Hi duo annis 1650. & 1651. aliud quid in cadaveribus quærentes, casu in horum vasorum cognitionem inciderunt, fortasse neutro de alterius inventionem conscio, atque hinc utroque malè litigante de gloria sibi soli adscribenda, quæ bono jure utrique æqualis debetur. Glissonius tamen & Charletonus, scribunt hæc vasa ante Bartholini divulgatam inventionem Londini inventa & demonstrata fuisse à Jolivio Anglo. Sed Bartholinus, *in spicilegio*, bona fide asserit, se ante suam inventionem Jolivium natum nescivisse, cumque neque de nomine, neque de fama unquam novisse.

Nomina.

His vasculis Bartholinus Vasorum lymphaticorum, aquosorum, & Crystallinorum nomen imposuit, ipsumque liquorem in iis contentum, à claritate & crystallina pelluciditate, conveniente nomine Lympham appellavit. Olaus Rudbeck illa hepatis & glandularum ductus aquosos nominare maluit.

Substantia.

Contant ex pellucida ac tenuissima pellicula, è qua rupta si aqua illa lymphida effluat, penitus disparent, quia tunica eorum applicantur vasis & membranis subjectis, à quibus ob suam tenuitatem & pelluciditatem tunc discerni nequeunt.

Numerus.

Numerus eorum innumerabilis est, atque hinc certo determinari non potest.

Color.

Figura.

Colorem habent pellucidum ac crystallinum, figuram oblongam, fistulosam, & cavam, instar venarum, sed valde nodosam; amplitudinem exiguam.

Valvule.

Valvulas obtinent plurimas, lymphæ progressum ad vasa chyliifera multasque ve-

nas permittentes, regressum verò impediētes. Has semper pertinacissime negavit Ludovicus de Bils, usque dum illæ tandem Hagæ Comitum ipsi demonstratæ, delineatæ seu depictæ, atque etiam libello edito publici juris factæ fuerunt, à Frederico Ruysch, Med. Doct. & Anatomico eximio, qui illas geminatas invenit, Lunæ crescentis instar, vasorum lateribus affixas, & sibi mutuo oppositas, sed multo numerosiores & tenuiores quam in venis reperiuntur. Quæ valvulæ etiam sine vasculorum apertione satis animadverti possunt, cum lymphæ contenta digito promovetur ductu contrario, mox enim à valvulis istis ubique sistitur.

Ludovicus de Bils, qui hæc vasa antea *Error Bilsi* ductus toriferos appellaverat, & valvulis carere dixerat, videns se à Dr. Ruysch de valvulis evictum, mox effugium quoddam commentus est, idque ad honoris sui defensionem passim disseminavit, & parvo libello, Roterodami anno 1668. edito, publici juris fecit. Effugium hoc est: distinguit inter succum lymphaticum & rorem, atque illum per vasa lymphatica valvulis prædita confitetur deferri ad venas & lactea vascula, idque à se jam ante multos annos inventum tradit (quanta cum veritate hoc dicat, patet ex Bartholini responsione *de experimentis Bilsiensis*, ad Nicolaum Zac, anno 1661. edita, pag. 11.) hunc verò dicit per peculiare tubulos, ex minimis fibrillis contextos, nullis valvulis donatos, inter ipsas venarum, arteriarum, & vasorum lymphaticorum tunicas, instar moschi cujusdam, fitos, ab interioribus partibus versus exteriores jugi ac continuato cursu defluere. Egregium verò effugium, quo per imaginarios quosdam tubulos prædicti sui veritatem docere nititur. Dico, imaginarios, quia nemo non, quam minimum in Anatomicis exercitatus, facile percipit tales tubulos non dari in rerum natura, cum tam venarum quam arteriarum tunica adeo arcte sibi invicem cohæreant & adnatæ sint, ut vix ulla arte separabiles existant, nulla-que inter illas tubulorum, aliorumve meatus

tuum intercessio observari, aut Lynceis oculis videri, multo minus demonstrari possit: cum ob istam arctissimam cohaesionem multi oculatissimi Anatomici in dubium vocaverint, an venæ ex una simplici, an verò ex duabus tunicis constent. Quod ipsum de vasis lymphaticis dici potest, utpote quæ omnino ex una simplici tunica constare videntur.

*Si ins.*

Certus situs vasis lymphaticis assignari nequit, cum in diversis corporis partibus inveniuntur, ac in trunco multas venas, præcipue majores, comitentur, iisque per fibrillas adhærere videantur: multa quoque conspicua sint in medio, & innumera in inferiore ventre, quæ venas majores non comitantur: multa quoque inveniuntur brachiis ad latera venæ brachialis, ut & in cruribus, venis iliatis ac cruralibus adhærentia. Nonnulli scribunt illa etiam in musculis dari: verum etsi circa musculos illa viderim, nulla tamen in ipsis musculis hæcenus observare potui.

*Ortus.*

De eorum ortu ante hac magnum dubium fuit, sed hodiernorum Anatomicorum singulari industria illæ tenebræ jam maxima ex parte depulsæ sunt. Nicolaus Stenonis, professor accuratissimus, tantopere in horum ortu ubique inquirendo laboravit, ut tandem, *lib. de musc. & gland.* ex autopsia pro certissimo pronunciaverit, omnibus lymphaticis commercium esse cum glandulis, præcipue conglobatis, quæ cum in finem in medio aliqualem cavitatem obtinent, in qua illæ liquor ex glandulæ corpore colligitur, per lymphatica vascula ulterius profluxurus. Sic etiam Malpighius, *lib. de hepate*, scribit, omnia lymphatica, in quibuscunque partibus, ubique oriri ex glandulis conglobatis (quæ in corpore milienis locis inveniuntur) etiam ea, quæ ex hepate prodeunt: utpote quas glandulas se in cavo jecoris, & involucro, ubi vasa sanguinea & porus illud ingrediuntur, in vituli jecore sæpe conspicuas reperisse tradit. Sic etiam Fredericus Ruysch, *observat. anat.* 5. refert se harum quasi catenam in jecore humano, sub vesicula fellea invenisse, quæ nullo sanguine erant perlutæ, sed duræ.

*Ex hepate.*

Magnus horum vasculorum numerus hepar egreditur, idque visui manifestè patet, etsi nulla ligatura injiciatur, sed manifestius si ligatura fiat inter ventriculum & hepar, ea mesenterii parte, quæ hepar ventriculo ac intestinis connectit, qua ligatura simul vena portæ cum ductu bilario comprehendatur, mox enim (dummodo in animali vivo hoc tentetur) inter ligaturam & hepar fit horum vasculorum intumescencia, quæ multum increfcit, si hepar manu leviter prematur. Oriuntur autem præcipue ex cava hepatis parte, qua dictæ glandulæ

imprimis sitæ sunt, & eorum nonnulla vesiculam felleis transcendunt. Anne etiam, & quomodo per ipsam hepatis substantiam decurrant, illud nec visui patet, nec instrumentis, aliave arte hæcenus indagari potuit. Glissonius, *in anat. hepat.* retrorsum querendo, reperit illa portæ capsulam (quæ est membrana à peritonæo portam hepar ingredientem involvens) subire, in eaque abscondi, neque ulteriorem ingressum invenire potuit, atque hinc verosimile duxit, ea capsulæ, porique bilarii, in eadem conclusi, distributionem sequi, nec uspiam in hepatis substantiam emigrare. Nobis magis verosimile videtur, illa ex glandulis conglobatis, in cava hepatis parte sitis, prodeuntia, mox foras erumpere, atque propterea, neque capsulæ porique bilarii distributionem sequi, neque per hepatis substantiam multum dispergi posse.

Quomodo Pecquetus vasorum lymphaticorum ex hepate egressum observaverit, describit *lib. de lact. thorac. secunda editionis*. Ecce, *diffissa*, inquit, *viventis, qua infima est, canis alvo, meatus exquiro lymphaticos*. Hi *trunco vena porta, hederaceo more, suffulti, statim avidissimis accersitorum ad spectaculum amicorum oculis exhibent sese*. Ac tum encomiis æterna Doctoris Bartholini memoria decantatis, alios duodenum versus, versus mesenterii centrum alios, incilium instar, decurrentes, *multiplici stringo seorsim à porta ligamine*. A jecore omnes ad vinculum turgidi, aliorum flaccescentes, exactissimos obtutus effugiebant: *laxato demum vinculo, exundans è jecore lymphæ, per varios rursus adspectabiles latices, evidentissimis aquæ ductuum curriculis, in pancreas irrepere videbatur*. Optime hæc notat Pecquetus (etsi verum horum vasorum exortum, ex hepatis glandulis conglobatis tunc temporis nondum cognoverit) nam vascula lymphatica hepar egressa, per duplicaturam partis mesenterii hepar & intestina dorso connectentis, tam supra, quam infra venæ portæ & ductus cholidochi latera prorepunt maxima parte versus mesenterium, ac sub vena cava prope pancreas carnosum ventriculo & duodeno annexum, plurima glandulam quandam venæ portæ substratam, eique in multis corporibus adhærentem (quæ plerumque una est, interdum duæ vel tres sunt, rarò nulla) ramulis dispersis supragrediuntur, atque inde, una cum multis aliis istam glandulam prætervectis, in chyli receptaculum se insinuant.

Jam nuper accuratissimus professor Fredericus Ruysch etiam ex liene plurima lymphatica vascula, non tantum ex ipsius superficie, verum etiam ex interiore parte, arteriam splenicam nervosque concomitantia, prodire observavit, & singularem methodum, qua illa inveniri possint, describit,

H 2

*lib.*

*lib. de valv. lymph.* eaque notat in omnibus animalibus ejusdem generis non esse æque copiosa, & humanum lienem pauciora habere, quam vitulinum.

Ex pulmo-  
ne.

Idem Ruysch, *dicto lib.* scribit se etiam in pulmonibus vidisse vasa lymphatica. Eadem illa, referente Bartholino, se quoque observasse dicit, atque etiam delineavit seu depinxit Olaus Rudbeck.

Inferio in  
varias par-  
tes.

Præterea ab aliis quoque partibus, ex glandulis conglobatis hæc vascula exsurgunt, quibus glandulis specifica vis inest, subfalsas è sero separatas particulas eliquando levi aciditate donandi: nam acidiusculi quid lymphæ in se continet. Quæ ex glandulis colli profiliunt, se maxima ex parte exonerant in labyrinthum (de hoc *precedente capite* latius actum) seu lymphaticorum concursum inter venas jugulares situm. Quæ verò ex axillaribus glandulis procedunt, illa descendunt, & partim secundum cavæ longitudinem ad chyli saccum feruntur; partim in media via ductum chyli ferum thoracicum ingrediuntur, in quem etiam aperitur ramus ex oesophagi glandula procedens. Quæ ab inguinalibus & lumbis exeunt, sursum delata, ac chyli ferum receptaculi inferiorem partem subeuntia, in illud lympham suam exonerant, ad introitum valvulis munita, lactei succi ex receptaculo in ea delapsum impredientibus. Quod autem plurima lymphatica vascula se in chyli receptaculum exonerent, abunde liquet, si aperto vivo animali receptaculum pollice presseris, sicque à chylo inaniveris, mox enim ab influente lymphæ rursus repletur & intumescit.

Inferio in  
venas.

Verum non solum in vasa chyli ferum, sed etiam in multas venas aperiantur hæc vascula: & sic quoque Nicolaus Stenonis notavit, eas in jugularem aliasve venas hiare, ac lympham suam effundere: & Fredericus Ruysch scribit, sibi ex ligatura & valvularum structura constare, omnes lymphæ ductus qui in pulmonibus inveniuntur, lympham suam in venas subclavias, axillares, & jugulares deponere. Quorsum ferantur illa quæ ex artubus exsurgunt, nondum satis exploratum est. Nonnulli referunt se in artubus glandulas conglobatas sæpe vidisse, ex quibus, procul dubio, horum origo quoque deducitur: quantum ad horum insertionem, absque dubio se etiam in vasa chyli ferum variisque venas exonerant.

Error Bilsii.

Ludovicus de Bils, propter ignoratas vaforum lymphaticorum valvulas, in *epistolica dissertatione anno 1659 edita*, planè contrarium lymphæ motum, magno errore, à veritate remotissimo, describit, imò quoque lympham à chyloso succo nihil distinguere videtur. Cum Bilsio etiam errare, quam veriore sententiam sequi, malunt

An lymphæ  
sit idem suc-  
cus cum  
chylæ.

Bilsii admiratores: inter quos N. Zas, *belgico libello de rore animalium*, alique qui demonstrationes Bilsii viderunt, putant se observasse, lympham esse unum eundemque liquorem cum chyloso succo in vasis lacteis contento, eamque ex sacco aliisque chyli feris vasis deferri ad hepar, & glandulas inguinales, axillares, faucium, aliasque, & ex iis rursus ad partes spermaticas defluere, in earum humectationem & nutritionem, non verò à glandulis & hepate deferri ad chyli ferum vasa. Ad hæc, illam solummodo tenuiorem & pellucidam apparere, quia colatur per glandulas.

Verum prorsus contrarium docent *autopsia & ratio.*

**Autopsia:** quia præter me, etiam Bartholinus, Jo. van Horne, Pecquetus, Barbette, Nicolaus Stenonis, alique multi oculatissimi Viri, nunquam alium hujus liquoris cursum observare potuerunt, quam ex hepate, nec non ex glandulis axillaribus, lumbaribus, & inguinalibus (sic, procul dubio, se res etiam habebit in aliis remotioribus) versus multas venas, sed omnium maxime versus chyli receptaculum, alique chyli ferum vasa, ad quæ facile digito impelli, non verò ab iis versus glandulas aut hepar promoveri potest, idque propter valvularum obstacula. Imò si in viva sectione ligatura in vasis injiciatur (quod in canibus à me meisque discipulis sæpe tentatum) fit intumescencia inter glandulas & ligaturam (hoc ipsum in hepate quoque contingere jam ante dictum) detumescencia verò versus vasa chyli ferum. Hic nullius momenti est diverticulum quod adfert Regius, *lib. 4. physic. cap. 7. edit. anni 1661.* scilicet, injectâ ligaturâ hæc vascula lymphatica ultra ligaturam intumescere, quia propter ligaturam in ea non propellitur succus impelli solitus, atque hinc, dum concidunt, sua concidentia succum in iis contentum retrorsum versus ligaturam propellunt. Sed quare, quæso, cum non propellunt antrosum, cum ob dictam causam illud multo facilius fieri possit, quam retrorsum? & si retrorsum motus ille fieri debeat, quare eodem modo non fit in ligatis venis, ut & in vasis lacteis mesentericis ac thoracis? quare hæc vasa, denegatâ per ligaturam ulteriore succi contenti promotione, succum contentum sua concidentia retrorsum versus ligaturam etiam non propellunt, sed ultra ligaturam penitus inaniuntur? an his non idem jus, eademque potestas est, quæ vasis lymphaticis? quare etiam, nullâ injectâ ligaturâ, lymphæ à sacco chyli ferum versus hepar, ac glandulas inguinales & axillares digito impelli nequit, sed facile versus chyli ferum vasa propellitur? quare valvulæ magis obstant isti, quam huic promotioni lymphæ? Certè hæc omnia satis docent,

*Refutatio.*

docent, lympham non à sacco vasisque chy-  
liferis, sed ad ea propelli. In hepate, seu paulo  
infra hepar, hæc res per ligaturam paulo  
ante dictam adeo manifesta est, ut sit extra  
omnem hominis videntis contradictionem,  
cum tamen per hepar nullus chylus transco-  
letur, imò nullus eò perveniat, quidquid  
Regius, Ludovicus de Bils, aliique, cum  
antiquæ doctrinæ, tum erroneæ demonstra-  
tionis Bilfianæ strenui defensores in contra-  
rium afferant, ut infra latius probabitur,  
*lib. 7. cap. 2.* Si hoc in hepate sic contingit,  
quare illud ipsum in glandulis modò dictis,  
in quibus id etiam per ligaturam injectam  
conspicitur, mirum videbitur? quare glandu-  
læ axillares & inguinales è lacteo succo  
lympham conficiant, & non potius ex ipsis  
vasis sanguiferis eam elicient, eodem modo  
sicut in cerebri ventriculis videmus minimas  
glandulas plexui choroidi (ad quem nullus  
lacteus seu chylosus liquor penetrat) inhæ-  
rentes, serosum lymphaticumque liquorem  
ex vasis, quibus adhærent, elicere, & in  
ventriculorum cavitates deponere? Jam  
verò, si aliquando Ludovici de Bils aliquis  
sectator, aut admirator, hanc rem aliter  
nobis demonstrare velit aut possit, non  
erimus adeo pertinaces, ut oculis nostris  
illud videntibus fidem ullo modo denegare  
velimus, interim eo usque credituri, quod  
hactenus vidimus, & jam descripsimus.

Ratio etiam obstat prædictæ opinioni:  
quia lacteus chyli receptaculi succus non  
potest in ipso elapsu ex receptaculo versus  
glandulas, ex. gr. inguinales, statim mu-  
tari in hanc tenuem pellucidam lympham,  
totumque lacteum colorem in momento  
exuere. Fit hoc, inquiunt, quia colatur  
per glandulas media via interjectas. Verum,  
ubi est insertio vasorum lymphaticorum in-  
feriorum in chyli receptaculum, ibi nullæ  
sunt glandulæ: duæ quidem paulo inferius  
adstant, sed varia lymphatica vascula sic  
prætervehuntur, ut illas ne quidem attingant,  
ita ut lymphæ in illis contenta suam  
pellucidam tenuitatem à tali colatura non  
habeat. Alii, novitatis magis quam verita-  
tis studiosi, ut hanc novam sententiam  
aliquo fulcro suffulciant, cum Regio di-  
cunt, lacteum succum in receptaculum  
chyli cum impetu infusum, fieri spumofum  
& album, sed per moram cessante spumo-  
sitate aqueum fieri, & aqueo colore defluere  
ad glandulas: eodem modo sicut cerevisia  
subrubra, cum impetu in calicem infusa,  
albicantem spumam ad superficiem emittit,  
quæ per moram & quietem rursus in liquo-  
rem aqueum resolvitur. Quantum hæc si-  
militudo claudicat, undeque liquet.  
Certe in chyli motu non fit tantus impetus,  
ob quem chylosus succus fieri possit albicans  
& spumofus, nam ille naturalis motus le-  
niter & placide procedit, cujus nullus im-

petus vehementior ab homine unquam sen-  
tiri, imò ne quidem oculis videri potest in  
vivorum animalium sectionibus. Præterea si  
statim exuat albicantem colorem (quem illi  
*spumositatem* appellant) descendendo ex sacco  
chyliifero brevi via ad lumbos & glandulas  
inguinales, quare in quadruplo longiore  
ductu eum retinet, ascendendo ad venam  
subclaviam? unde habet illam albedinem in  
intestinalis & vasis lacteis mesentericis, an-  
tequam cum isto ficto impetu in saccum  
chyliiferum infunditur? quare in vasis lac-  
teis diu quietus subsistens, aut in cochleari  
collectus, per istam moram multis horis  
non mutat suum colorem, sed albedinem  
reservat?

Atque ita, five autopsiam, five ratio-  
nem consideremus, non videntur vasa lym-  
phatica aliunde oriri, quam ex glandulis  
conglobatis, & partibus à nobis jam pro-  
positis, ac simul manifeste patet, lym-  
pham esse liquorem à chylo longe diver-  
sum.

Post descriptionem horum ductuum seu *Qualis li-*  
vasculorum, etiam paucis inquirendum *quor sit*  
qualis liquor sit lymphæ in iis contenta. *lymphæ.*  
Admodum discrepantes sunt hac de re Do-  
ctorum virorum sententiæ, & quilibet  
suam, tanquam verissimam, vel saltem  
tanquam maxime probabilem proponit.

Bartholinus, *de vas. lymph. tract. cap. 6.* *An sit de-*  
scribit lympham esse aquam simplicem à *qua.*  
nutritione residuam, qualis est elementaris.  
Hanc Martinus Bocdanus (qui *apolog. 2.*  
*membr. 11. artic. 3.* cum eodem præceptore  
suo consentit) dicit in homine inter mem-  
branam adiposam & musculos esse diffusam,  
in reliquis verò animalibus sub corio deti-  
neri, & quia tota per cutem non exspirat,  
ad ejus evacuationem hæc vasa esse condita.  
Verum uterque nimis vilem hujus lymphæ  
ortum, substantiam, & usum describit,  
cum talis simplex aqua per solos poros à  
calore partium satis discuti posset, neque  
per tot vasa introrsum deferri necesse habe-  
ret. Si dicant, ad humectationem partium  
hoc requiri: certè illa sufficienter perficitur  
à potu & alimentorum assumptorum humi-  
ditate. Præterea simplex aqua non con-  
crescit in gelatinam, sicut hæc lymphæ in  
cochleari collecta concrefcere solet.

Glissonius, *in anat. hep.* putat lympham *An sit halt-*  
esse liquorem è sanguinis halitibus, roris *tus sangui-*  
instar, coactis, in hæc vasa impulsis, & *nis.*  
cum vehiculo alimenti per nervos allati re-  
fluentibus. Hanc opinionem evertit,  
1. Quod tales halitus facile in rorem, aut  
aquam, sed nunquam, sicut lymphæ, in  
gelatinam concrefcere possit. 2. Quod hy-  
pothesis illa, de nutritio succo per nervos  
delato, falsa, & à nobis, *hujus lib. cap. 16.*  
*& lib. 3. cap. 11. & lib. 8. cap. 1.* satis re-  
futata sit. 3. Quod sanguinis halitus abunde  
evacuen-

evacuentur, partim invisibiliter per poros, & visibiliter per sudores; partim per pulmonum expirationem, atque etiam condensati per urinas, alvi fæces, lachrymas, &c. ita ut hujus ratione nihil illos cogat hæc vasa ingredi.

*An vasa lymphatica sint venæ.*

A Glissonio non multum dissentire videtur Backius, qui istos sanguinis halitus è venis in hæc vasa deducere videtur, nam statuit vasa lymphatica esse venas, à venoso trunco exortas. Verum cum inter ea & venas magna sit substantiæ diversitas, talisque eorum exortus nusquam appareat, imò ne umbra quidem illius uspiam circa venosum truncum, id est, venam cavam exhiberi possit; cum nusquam etiam ab aliis venis exoriantur, sed ex glandulis conglobatis orta in eas nonnunquam inserantur, censendum est hæc opinionem à veritate aberrare.

*An sit spiritus animalis.*

Georgius Segerus, *differt. anat. artic. 2.* pronunciat lympham esse spiritus animales, vel ex iis constari, qui postquam per nervos in omnes partes sunt distributi, ibi partim consumuntur & dissipantur, partim verò in hanc aquam concresecunt. Cum Segero consentit Franciscus de le Boë Sylvius, *disput. med. 4. thes. 31.* & latius *disput. 8. thes. 40. 41.* Verum illud Segeri commentum magis ingeniosum, quam verum esse, ex eo liquet, quod spiritus animales sint adeo tenues halitus, ut similes non dentur in toto corpore (rapidissime enim penetrant angustissimos & invisibiles nervorum poros) unde verosimile est illos in partium, præcipue calidiorum, substantiam effusos, mox officio suo perfungi citissime, & reliqua parte, propter summam tenuitatem ac volatilitatem, à colore partium longe citius dissipari, quam ullos alios halitus, multoque minus in liquorem concresecere, quam alios halitus extravasatos (quam citò dissipentur liquet in illa lassitudine, quæ magna exercitia insequitur, & in subita musculorum contractorum laxatione) nisi forte id in frigidioribus aliquibus partibus, ut testibus, contingat, de quibus dicitur *cap. 28.* Præterea, si hi spiritus in partibus ad quas defluunt, cerebro calidioribus, concresecerent in hujusmodi liquorem, certe multo citius & facilius in eum concresecerent in ipso cerebro & spinali medulla, ob excellentius utriusque frigus, id est, ob calorem in iis multo minus, quam in aliis partibus, eminentem (quoslibet enim tenuissimos halitus & vapores in alembicum aliasve res frigidas impingentes, condensari in liquorem, quilibet novit, & in chymia quotidie patet) (atqui in iis nusquam condensati inveniuntur, neque etiam talis liquor per nervos penetrare posset: & si in iis non condensentur in liquorem, multo minus in partibus cerebro calidioribus id

fiet, utpote quarum calor tales tenuissimos halitus citissime dissipare valet. Denique copiosissima lymphæ profuit ex hepate ejusque glandulis, ad quod tamen adeo pauci & exiles nervuli perveniunt, ut nonnulli Anatomici de eorum ingressu dubitaverint. Etiam in cerebri ventriculis è plexu choroide per minimas glandulas ei interjectas, copiosa separatur lymphæ paulo spissior, inde per processus papillares effluxura, quem tamen plexum nulli nervi ingrediuntur. Ex quibus omnibus patet lympham ex spiritibus animalibus condensatis non confici.

Bernhardus Swalve, *lib. de pancreat. pag. 76.* putat lympham componi ex reliquis spirituum animalium volatilitate exutis, cum pauxillo acidi spiritus è glandulis adjecti, mixtis, & sic vasa lymphatica simul subeuntibus: *maxima*, inquit, *lymphæ pars agnoscit spiritum animale, minima acidum.* Verum hanc sententiam evincunt eadem modò dicta, ut & illud, quod lymphæ jugi motu per vascula cava & numerosa moveatur magnâ copiâ, cum tamen spirituum animalium tanta copia per invisibiles nervorum poros transire, & ad lymphæ confectionem deferri nequeat. Item, quod ex hepate lymphæ copiosa per plurima vascula erumpat, in quod tamen, ut ante etiam dictum, per paucissimos exiles nervos pauci duntaxat spiritus animales deferri possunt. Adde, quod acidus glandularum spiritus sit coagulatorius, atque hinc leptomeriæ lymphæ plurimum obfuisse. Præterea ipse Swalve, *eodem lib. pag. 88. & 89.* acerrimè defendit, nihil, ne quidem tenuissimi, liquoris per nervorum poros deferri, ergo etiam multo minus tanta spirituum copia è qua tam copiosæ lymphæ pars conficeretur.

*An componatur ex spiritibus animalibus & acidis.*

N. Zas, *lib. supra citat.* scribit lympham quam ille rorem appellat, esse succum alimentarium, quo nervi, membranæ, tendines, imò venarum & arteriarum tunicæ, omnesque partes spermaticæ nutriuntur, incresecunt, & amplificantur. Verum inter omnes antedictas opiniones nulla minorem verisimilitudinem habet, quam hæc; quam etiam penitus destruant illa quæ scribimus *lib. 2. cap. 12.* Ubi late probamus omnes partes sanguine nutriri, non aliis humoribus. Verum Ludovicus de Bils, ex quo Zassius sua fundamenta hausit, videns Zassium necessario deficere in defensione sui dicti, aliud diverticulum commentus est: quippe distinguit inter rorem & lympham; & illum dicit inservire usibus à Zassio relatis, hanc verò non: atque singulis diversos adscribit ductus, per quos fluunt ad partes, de quibus ductibus seu viis paulo ante dictum, ac diverticuli hujus vanitas satis demonstrata est.

*An lymphæ sit alimentaria.*

Quandoquidem igitur Viri doctissimi, & salutis

salutis reipublicæ Medicæ studiosissimi, veram hujus lymphæ genesin non percepisse, & usus necessitatem vix attigisse videntur, etiam ea de re meam sententiam subungere non detrectabo.

*Qualis sit liquor.*

Censeo autem quod lymphæ sit liquor fermentaceus, ex serosa sanguinis parte in glandulis conglobatis separatus, non tamen simplex, sed multo sale fuso ac volatili perfusus, & nonnullis paucis etiam sulphureis particulis imprægnatus, qui ob suam leptomeriam hæc vascula subit, per eaque defertur, partim ad vasa chyli, partim ad multas venas. Ad Illa, ut in iis chylum sui admittance tenuiorem & ad facilem in corde perficiendam dilatationem aptum faciat. Ad Has, ut sanguini venoso, jam minus tenui affusus, cum ad citam in corde dilatationem præparet. Utriusque enim ratione maxime necessaria est ejus admistio. Quippe chylus per se subdulcis ac subpinguis existit, quod in eo sulphurei succi nondum satis spirituosus prædominium indicat: atque hinc, cum ob particulas viscidas & spissas, solus ad cor veniens ineptus sit ad subitam dilatationem (sicut enim sulphur minerale, ob viscidas particulas, per se lente & gradatim, sed admixto sale petra, particulas illas incidente, raptim per admotum ignem accenditur: ita etiam sulphureæ particulæ chyli, si aliæ subsalsæ ac tenues iusta quantitate non admiscerentur, lentè, & non subito in corde dilatarentur ac spirituosæ fierent) necesse est ut ei in via admisceatur liquor hic tenuis, subsalsus, subacris, & fermentacea aliqua qualitate donatus, qui visciditatem ejus attenuet, eumque ad fermentationem præparet (qua in parte etiam aliquid confert succus pancreaticus, ei in intestino duodeno admixtus, qui quasi lymphæ quædam acrior & fortior, majoreque fermentacea vi prædita dici possit) ut cum eo ad cor delatus, mox dilatari, atque in spirituosum sanguinem mutari possit: eodem modo sicut in pulvere pyrio, sulphur minerale cum sale nitro & carbonibus mixtum, ab admoto igne ilico dilatatur. Sanguis autem venosus, cum in partium nutritione & longo itinere magna spirituum parte exutus sit, aliqua etiam lymphæ admittance opus habet ad faciliorem in corde dilatationem; sed quia multo tamen tenuior est chylus, pluribusque spiritibus adhuc perfusus, hinc minorem lymphæ copiam requirit, quæ causa est, quod pauciora vasa lymphatica in venas, plurima in vasa lactea inserantur, seu aperiantur.

*An sit, serum.*

Verum, cum hæc lymphæ ex serosa sanguinis parte separetur, quæritur an ipsa sit serum, an verò succus à sero diversus? Respondendum, illam non esse serum, sed peculiarem tenuem liquorem ex serosa sanguinis parte eductum. In hac enim serosa

parte continentur, præter aquosas, etiam copiosæ salsæ & aliquæ sulphureæ (illas indicat sapor salsus, qui in lachrymis, sudoribus, & urinis percipitur: has, quod antiquæ urinæ calefactæ à flamma admota flammam concipiant) atque in his utrisque rursus aliæ sunt particulæ viscidiores, crudiores, & magis fixæ, quales in urinis sæpissime conspiciuntur: aliæ tenuiores magisque spirituosæ, quæ ob summam leptomeriam, una cum tenuissima aquosa feri parte, cui inhærent, in glandulis conglobatis à crassioribus separatæ, facile subeunt angustissima vasorum lymphaticorum orificia, ex dictis glandulis prodeuntia (è quibus crudiores ac fixiores particulæ ob crassitiem excluduntur) per eaque ad chyli vasa, variasque venas feruntur, ut modò dictum.

Differentia inter lympham & serum ex eo innotescit, quod lymphæ in cochleari collecta, non tantum per admotum ignem tenuioribus particulis exhalantibus (sicut id fieri jubet Rolsincius) verum etiam sponte refrigerata, nec ulla per ignem exhalatione facta, concresecat in formam gelatinæ; cum serum neque per ignem, neque sine igne unquam ita coaguletur. Quippe lymphæ sal (quod acidiusculi quid in se habere videtur) in tenuissimis aquosis particulis ad magnam leptomeriam reductum, & sulphureis quibusdam particulis imprægnatum, quo usque in calore manet, admodum fluxile est, sed ubi à frigore condensatur, non figitur in crystallos duos ac salsos, sed una cum ei admixtis sulphureis, ob harum subpinguem visciditatem qua salsarum durities emollitur, faciscit in gelatinam, quæ ipsa quoque rursus calore ignis in tenuissimum liquorem resolvitur: cum è contra feri crudiores per frigus condensatæ particulæ calore ignis non resolvantur (hoc liquet in urina) nisi in cruda & tenacia filamenta, earumque multæ lapideam quoque ac tartaream formam retineant, neque unquam ad antedictam leptomeriam deveniant.

*Differentia inter lympham & serum.*

Ex quibus partibus lymphæ in glandulis secernenda, atque in vasa lymphatica deducenda, procedat, à multis dubitatum est. Glissonius è nervis, Bartholinus ex arteriis eam prodire existimat. *Primum* absurdum est, quia invisibiles nervorum pori talem visibilem, tamque copiosum liquorem, sine partium paralyti, & nervorum à continuo humido summa relaxatione, transmittere non possunt. *Posterius*, propter lymphæ copiam (quæ è nullis vasis copiosior secerni potest, quam ex arteriis) maxime verosimile videtur: cum omnes glandulæ recipiant aliquos arteriarum fines; atque sic ex illo arterioso sanguine in glandulas impulsio videtur, ob specificam harum structuram, lymphæ

*Ex quibus vasis secernatur lymphæ.*



lymphā separari, eodem fere modo sicut in renibus serum ē sanguine secernitur, & ex arteriolis plexus choroïdis serosus lymphidus liquor à glandulis interjectis ex eodem sanguine separatur, ac in ventriculorum cerebri cavitates deponitur, inde per processus papillares evacuandus. In hepate autem, quod paucas recipit arterias, & plurima lymphatica vasa emittit, lymphamque copiosam ex glandulis suis profundit, hæc lymphā ex tam paucis arteriis, exteriorē membranā imprimis perreptantibus, adeo largiter secerni ac profundi, sed ea potius ē sanguine per portæ venam (quæ hic quasi arteriæ munere fungitur) allato, à glandulis, cavæ ejus parti inhærentibus, secernitur.

*Causa impellens.*

Quidnam verò lympham ex hepatis, lienis, aliarumque partium glandulis conglobatis exprimat, eamque lymphatica vasa ingressam ulterius propellat, satis pater ex iis quæ de chyli propulsione dicta sunt cap. 11. & 12. causa enim impellens eadem est, scilicet motus ac pressio, partim inferioris ventris per abdominis musculos sursum deorsumque motos; partim thoracis in respiratione: quæ ex artubus progreditur, per motum musculorum istarum partium promovetur, eodem modo sicut videmus per motum maxillæ & linguæ etiam salivalem liquorem (qui & ipse fere lymphaticus est, sed paulo spissior) copiosum in os effluere, per quietem verò & in somno paucum vel nullum. Hac enim partium pressione, simul etiam in iis latentes glandulæ, ut & vasa lymphatica, cum à musculis, tum à depressis incumbētibz visceribus premuntur, ex iisque contentus liquor exprimitur & propellitur.

*Sine motu celer, an tardus.*

Charletonus, *æconom. animal.* scribit lymphæ motum per suos ductus esse admodum tardum: sed illud refutat & contrarium probat Bartholinus, in *spicilegio*. Ego existimo lympham modò citius, modò tardius moveri, pro majore minoreve motu ac pressione illarum partium in quibus subsistunt glandulæ conglobatæ & vasa lymphatica, sicut illud ipsum contingit in vasis salivalibus sublingualibus, quæ ex glandulis conglomeratis procedunt.

*Ascitis causa.*

Notandum de vasis lymphaticis in inferiore ventre latentibus, quod si aliqua de causa rumpantur (sunt enim valde tenellæ) tunc serosam lympham in abdominis capacitatem effundi, ab ejusque accumulatione tandem & sensim ascitem generari, quamvis etiam aliis de causis fieri possit.

*Observatio.*

Anno 1658. dissecuimus in nostro nosocomio juvenulam 24. annorum, quæ per sexdecim annos ascite, sensim ac lente crescente, detenta, indeque tandem mortua fuerat; in qua nullius visceris manifestam læsionem invenire potuimus: sola

aliqua vascula lymphatica disrumpita mali diuturni causa fuisse videbantur: crudeliter enim à parentibus in pueritia fuerat tractata, & duris ictibus pedum manuumque sæpissime excepta, à quibus, procul dubio, aliqua vasa lymphatica dudum disrumpita fuerant. Hanc suspicionem ipsi humores in abdomine collecti non parum confirmabant; nam in cadavere jam refrigerato aliquantum coagulati apparebant, sicut lymphā per frigus coagulari solet; etsi ad tantam gelatinæ consistentiam non pervenissent, quantam consequitur lymphā ex ipsis vasis lymphaticis in cochleari collecta. Vitam autem per tot annos produxerat misella, propter viscerum integritatem, atque etiam quia per juvenilem corporis calorem quotidie multum serosæ humiditatis, in abdominis cavitatem sensim influentis, fuit dissipatum.

Ruptis hisce vasis, interdum etiam contingit lymphaticum liquorem non effundi in abdominis cavitatem, sed inter vicinas membranas effluere, atque tunc inde vesiculæ producuntur, hydatides appellatæ, quibus hepar interdum intus, sed frequentius foris, nonnunquam etiam mesenterium, aliæque in abdomine partes scaterè deprehenduntur. Hujusmodi vesicas plurimas (alias ovi columbini, alias fere ovi gallinacei, multas minoris magnitudinis) in suspensi furis cava hepatis parte demonstravit, mense Februario anni 1647. Guilhelmus Stratenus, tunc temporis in nostra Academia Medicinæ & Anatomes Professor, postmodum Principis Auriaci Archiater. Nos in mesenterio easdem aliquoties Medicinæ studiosis in nosocomio exhibuimus: ibidemque etiam hepata extrinsecus vesiculis aqua lymphida repletis scatentia invenimus, è quarum numero variæ, dudum antea disrumpatæ, serosum liquorem in abdominis cavitatem distillaverant, sicque ascitem induxerant. Hinc postmodum conclusi, ascitem nunquam generari sine aliqua interiorum partium abdominis solutione continui, quacunque de causâ inducâ, & eorum sententiam rejiciendam censui, qui docent hunc affectum generari per vaporum, è vasis interiorum partium exhalantium, in abdomine condensationem in aquam, cum illa exhalatio in quibuscumque hominibus continue procedat, & interim ascites in paucissimis contingat. Volckerus Coiter, *observat. anat. chirurg. misc.* pag. 117. scribit se in phthifici & hydropici cadavere invenisse viscera inferioris ventris absumpta, & omni succo exhausta, nihilque aquæ in ventris capacitatem: at ubique mesenterio, peritonæo, intestinis, lienis, hepatis, omnibus denique visceribus vesiculas inæquali magnitudine adhærentes, easque omnes aqua lymphida plenas reperisse.

*Observatio.*

Similem



Similem casum etiam scribit Cordæus, *com. 5. ad Hipp. lib. de morb. mulier.*

Ruptionis autem horum vasorum variæ possunt esse causæ: sed, præter violentas extrinsecus incurrentes, maxime frequens causa est, vel erosio ab acribus humoribus, vel eorum obstructio aut compressio: & hanc ob causam sæpe contingit ascites magnis helluonibus ac potatoribus, quos crapula quotidiana infarcit, qui à crudita-

tibus hinc genitis, aut multos acres humores in corpore accumulans, aut viscerum debilitatem & obstructions incurrunt, unde vascula hæc, vel eroduntur, vel ita comprimuntur & angustantur, ut lymphaticum liquorem solito modo deferre & exonerare nequeant, qui proinde è ruptis vasculis effluens, aut vesiculas inter membranas facit; aut ruptis penitus membranis integumentibus, in abdominis cavitatem delabatur,

## CAPUT XIV.

## De Hepate.

**H**epar, ἥπαρ, seu Jecur, est eximium viscus in dextro hypochondrio sub diaphragmate situm, vastæ magnitudinis, in convexa seu gibba parte rotundum & læve, inferiore seu sima parte concavum, qua ventriculi dextro lateri incumbit.

*Lobi.*

In canibus, multisque aliis brutis dividitur in varios lobos, sed in homine continuum est, inferiore sima parte in lobulum extuberans. Rarò in tres lobos distinguitur, qualem casum sibi visum describit Jacobus Sylvius, *in isagoge.*

*Magnitudo.*

Magnitudo hepatis non eadem in omnibus animalibus, sed ad proportionem corporis homini, quam cæteris, amplior est moles, eaque naturalis & ordinaria tanta, ut tres quatuorve digitos infra costas nothas descendat, & ultra cartilaginem xyphoïdem nonnihil extendatur. Andreas Laurentius scribit, quod timidis, helluonibus, & abdomini natis majus hepar esse credatur: quam tamen regulam plurimis exceptionibus patere verosimile est. In præternaturali verò constitutione à magnitudine ordinaria, cum in excessu, tum in defectu, plurimum desciscit. Anno 1660. prosecui cadaver, in quo hepar tam enormiter vastæ magnitudinis erat, quæ omnibus spectatoribus admirationem movebat: quippe versus inferiora se usque ad inguen dextrum, & à sinistro latere usque ad lienem extendebat, atque ita maximam totius inferioris ventris partem occupabat: sed quamvis primo extrinseco conspectu & tactu boni coloris & integræ substantiæ esse videretur, in ejus tamen medio magnum occultum sinum invenimus, è quo, cum summo omnium stupore, puris albi bene cocti & non fœtentis undecim libras mercatorias extraximus. Alia monstrosa magna hepata describunt, Spigelius, *anat. lib. 8. cap. 12.* Riolanus, *anthrop. lib. 2. cap. 21.* Bartholinus, *obs. cent. 1. hist. 85.* aliique plures. In magnitudinis defectu rarius peccat hepar, quam in excessu, tamen

etiam hujus exemplum invenitur apud Riolanum, qui, *lib. ante citat.* scribit, Parisiis in quodam cadavere inventum fuisse hepar, quod renis magnitudinem non excedebat: atque *ibidem* etiam notat, ex Avicenna, hepatis parvitatem semper esse noxiam, non autem magnitudinem.

Quomodo ex digitorum magnitudine etiam de hepatis magnitudine judicari possit, infra videndum, *lib. 4. cap. 1.*

Substantiam habet mollem & rubicundam, instar sanguinis concreti, cujus tamen firmitas in hepate cocto apparet. In hac multæ latent glandulæ, ex quibus lymphatica vascula erumpunt, de quibus modò satis dictum *capite precedente.*

*Substantia.*

Malpigijs, qui microscopijs substantiam & interiora hepatis accuratissimè perspexit, *lib. de hep. cap. 2.* multa inaudita, & hæcenus penitus incognita in eo observavit. 1. Jecoris substantiam in homine ex lobulis contextam, hosque ex glandulosis acinis compositos esse, qui racemorum congeriem exhibent, & propria circumambiente membrana investuntur, ac continuatis per transversum membranosis nexibus firmantur, ita ut intermedia spatia & minimæ rimulæ inter lobulorum latera emergant. 2. Totam hepatis molem constare ex acinis glandulosis & diversis vasorum propaginibus, atque hinc, ut illa simul commune opus peragant, necesse esse ut inter vasa & istas glandulas commercium intercedat. 3. Vasorum portæ, cavæ, & pori bilarii ramulos per omnes, etiam minimos lobulos æquali numero decurrere, & venæ portæ propagines arteriarum vices gerere, tantamque esse portæ cum poro bilario societatem, ut amborum ramuli arcte eodem contineantur involucre. 4. Digitorum vasorum propagines per anastomoses non conjungi, sed glandulosos acinos, præcipuam hepatis substantiam constituentes, medium esse inter asportantia & adferentia vasa, ita ut his mediantibus adferentia liquorem suum transfundant in asportantia.

*Malpigijs observationes de substantia.*

I

Ex

Ex his observationibus tandem concludit, hepar esse glandulam conglomeratam, bilem secernentem, idque, *ibidem cap. 3.* variis rationibus confirmare nititur: & quia conglomeratis hoc solenne est, ut præter arterias, venas, & nervos, polleant proprio excretorio vase (ut patet in parotidibus, pancreate, aliisque) per suam substantiam disperso, & destinatum humorem eliciente ac deferente, dicit in hepate hoc vas esse porum bilarium cum vesicula fellea. Profecto hæ novæ clarissimi Malpighii observationes multas hepaticas tenebras discutunt, magnamque ad penitiorem hepatis cognitionem faciem accendunt. Nam etsi antehac dubitatum minime fuerit in hepate generari bilem, tamen quomodo illa ex sanguine separaretur, ignotum fuit, jam per has oculatissimi viri observationes manifestissime liquet hoc fieri per interjectas minimas glandulas, & glandulosos acinos.

An hepar  
sit viscus  
appellandum.

Verum etsi Malpighius, propter hæc nova aurea inventa hepar imposterum viscus appellare velle dedignari videatur, idque potius glandulam conglomeratam nominare velit, hanc tamen veniam seu licentiam nobis, quæso, concedat, ut illud nobis viscus etiamnum appellare liceat, ne per nimis repentinam nominis immutationem aliquam obscuritatem pariamus, præcipue apud eos quibus talis nova denominatio infueta & inaudita est, atque hinc talis novitas penitus odiosa esse solet. Vel si illam licentiam nobis denegare velit Malpighius, quod præter ejus humanitatem futurum arbitraret, tunc, ut speramus, haud ægre feret, quod illam, ex philosophica libertate, nobis ipsis assumamus, utpote qui haud raro alias quoque magnitudine & usu excellentes glandulas, qualis est pancreas, viscera appellare consuevimus.

Hepatis in-  
fortunium.

Sed interea dolendus est infortunati hepatis status, utpote quod olim princeps viscus appellatum, & à Galeno in summo sanguificationis throno depositum, in eoque jam multis seculis communi Medico consensu magnificè excultum, his nostris temporibus à folio isto depulsum atque dejectum, omnique principatu exutum & privatum, imò mortuum ac sepultum, ironicoque epitaphio à Bartholino inscriptum est, jam tandem, præter omnium expectationem, ut bombix in vilem papilionem, ita in servilem glandulam conglomeratam mutatum, misere resurgit ac reviviscit.

Color.

Color hepatis rubicundus oculis obvis, ratione suæ texturæ ei non est proprius, sed adscititius, à copioso sanguine per venam portæ ei largiter infuso, productus, ut ex sequente experimento Glissonii patebit. Proprius ejus color est pallidus, leviuscule flavescens, qualis se prodit in hepate cocto, qui tamen ipse à transeunte bile nonnihil

inductus videtur, atque hinc Malpighius ei album colorem adscribit.

Ratione copiosi sanguinis, quo perfunditur, temperamentum calidum & humidum adsciscit, suaque caliditate ventriculum fovet.

Temperamentum.

Membrana cingitur tenui, orta à peritonæo succingente diaphragma, & revoluta circum hepar.

Membrana involvens.

Suspensum tenetur & stricte connectitur, superius per totam suam peripheriam diaphragmati, ligamento lato, membranoso, ac valido, à peritonæo orto, quo mucronatæ cartilagini cohæret: malè Spigelius, *anat. lib. 8. cap. 12.* illud digiti intervallo à diaphragmate distare scribit. Hoc ligamentum non solum extimæ hepatis membranz affigitur, sed eam ipsam constituit, & ut tanti visceris pondus sine ruptionis periculo facilius sustineat, etiam versus interiora ejus descendit, & communi vaginæ seu involucro rami venæ portæ, qua vena umbilicalis ei continua est, adnectitur. Huic lato ligamento adhuc alterum adstat peculiare ligamentum teres ac validum, etiam à peritonæo ortum, quo hepar à sinistra & posteriore parte diaphragmati alligatur. Hoc tamen in hominibus non semel defuisse vidimus, in brutis autem plerumque non invenitur, unde nonnulli zootomici, qui cadavera humana rarius inspexerunt, ex illa brutorum sectione, putarunt illud in homine etiam frequentissime deesse. Inferius abdomini annectitur per ligamentum umbilicale, id est, per venam umbilicalem post nativitatem resiccata, & in ligamentum mutata, quo ingens viscus in suo loco detinetur, & impeditur ne cum diaphragmate altius ascendat.

Ligamenta.

Porro aliis quoque vicinis partibus adhæret, ut venæ cavæ, & portæ, omento, &c. quæ tamen connexiones illud suspensum non tenent.

His modò dictis ligamentis licet hepar in suo loco firmetur, non tamen adeo arctè ligatur, quia satis in respiratione sursum deorsumque, & in corporis commotione dextrorsum, sinistrorsum, aliisve pro necessitate modis, moveri possit.

Nervulos recipit exiles quatuor: duos à sexto pari, tertium à stomachico, & quartum à costali, quibus obtusus sensus ejus duntaxat tunicæ seu membranz investienti tribuitur, vix enim in ipsam substantiam ejus interiorē penetrare videntur. Galenus tamen, *4. de usu part. cap. 23. & 3. de loc. affect. cap. 3. & 4.* observavit duos notabiles nervos, portam comitantes, parenchyma ingredi. Majoribus & multis interioribus nervis non indiguit, utpote quod sentire vix debuit, & ipsummet fermentum conficiens, spirituum animalium fermentativa qualitate carere potuit.

Nervi.

Arteriolas

*Arteria.*

Arteriolas obtinet exiguas, à cœliaco ramo dextro, juxta portam ad illud venientes (Dominicus de Marchettis, *anat. cap. 4.* scribit se aliquando etiam vidisse, quod arteria mesenterica superior insignem ramum hepatis communicaret) secundum Veslingium paucas, secundum Walzium innumeras. Has Galenus docet maxime per cavam ejus partem disseminari. Rolincius scribit se easdem etiam copiosas in convexa parte observasse. Glissonius in excarnatione hepatis animadvertit nullos arteriolarum ramulos versus interiora hepatis exporrigi, sed omnes solummodo in membrana planè absumi. Ratio Glissonii sententiam omnino confirmat, nam hepatis substantia vix arteriis opus habere videtur, cum sanguis ei satis copiosus adfluat per venam portæ (quæ hîc arteriæ munere fungitur, quod etiam per microscopia notavit Malpighius, ut paulo ante dictum) qui ei, ob substantiæ suæ proprietatem, convenientior est ad nutritionem propriam, & fermenti biliosi confectionem, quam arteriosus. Nec etiam vena portæ cum suis furculis, ut nec cavæ radices indigent arteriis, cum proprio contento sanguine gaudeant & nutriantur, nec uspiam appareat ullos arteriarum ramulos quarumcunque venarum tunicis inferi ad earum nutritionem. Quia igitur pauciores hepatis partes sanguine arterioso nutriuntur, non male videtur Veslingius notasse, quod tantum paucæ arteriæ hepar ingrediantur. Hinc etiam bene scribit Lindanus, eas videri potius in membrana investiente subsistere, quam penetrare in hepatis substantiam.

*Vena.*

Venas habet duplices. Superiore parte Vena cava ei adnectitur, in quam plurimæ radices, per hepatis substantiam quaquaversum dispersæ, sanguinem suum exonerant. His radicibus inferiore parte occurrunt ramuli Venæ portæ (de umbilicali taceo, quia portæ propago est) qui similiter per totum parenchyma decurrunt.

*Vasa biliaria.*

His vasis adjungitur Porus biliaris, qui per hepar dispergitur innumeris radicibus, bilem ex sanguineo fermento separatam suscipientibus: quibus adhuc intermiscuntur aliæ tenuissimæ radices, post simul coeuntes, & uno tubo bilem ad vesiculam felleam deferentes.

*Vasa lymphatica.*

Præter dicta vasa, scribit Asellius, se lacteorum vasculorum ramulum etiam in hepate observasse. Sed, procul dubio, eum decepit vasorum lymphaticorum, tunc temporis penitus ignotorum, ex hepate egressus. Nulla enim lactea seu chylifera vasa ad hepar deferuntur, ut in brutorum, tam viventium, quam mortuorum, sectionibus millies demonstravimus; sed multa vasa lymphatica ab eo exeunt, succum lymphaticum ac pellucidum deferentia. Sic

etiam Gualterus Charleton, *lib. de æconom. animal.* scribit illud sibi à millenis experimentis indubitanter constare, ac proinde se absque ullo dubitationis scrupulo concludere, nullam omnino chyli portionem ad hepar deferri. Hic minime audiendi sunt Gassendus & Jacobus Backius, qui per ductum cholidochum chylum ad hepar deferri putant: valvulæ enim obstantes, ductusque angustissimus & obliquus in intestinum duodenum introitus, ut & biliosi ac pancreatici humoris contrarius versus intestinum motus, in vivis animalibus visu spectabilis, illos satis refutant. De vasis lymphaticis ex hepate prodeuntibus, plura videantur *proximè præcedentis capite.*

*Vasorum commissio.*

Vasa hepatis miro modo per ejus substantiam seu lobulos commiscuntur, ut clarissime patet si ejus caro auferatur, quod lente & prudenter faciendum, ne multum dilacerentur vasa: cujus excarnationis tres modos describit Glissonius, *anat. hep. cap. 21.* Antehac quidem ab Anatomicis traditum fuit, venæ cavæ radices maxime per superiorem, ramulos verò portæ venæ maxime per inferiorem hepatis partem decurrere. Verum Glissonii & Malpighii majore diligentia compertum est, utriusque dicti vasis, atque etiam vasorum felleorum ramulos per totum parenchyma æqualiter dispergi, inter se commisceri, & ad quamcunque partem pervenire: longè tamen minores esse ramulos vasorum felleorum, quam cavæ & portæ; quia per illos pauciores & tenuiores humores biliosi, per hos verò sanguinei plurimi aliquanto crassiores erant deferendi. Atque etiam fas erat vasa hæc per totum viscus dispergi, cum omnes ejus partes in unum munus conspirent. Cava tamen parte hepar durius est, tam propter majorum vasorum ingressum & egressum, quam propter glandulas conglobatas, illic imprimis sitas.

Quomodo autem omnes hi ramuli in jecore misceantur inter se (de lymphaticis nihil dico, quia illa non longius quam à glandulis conglobatis exeunt, neque ulterius reliquam totam hepatis substantiam percurrunt) ea de re magnus est Anatomicorum dissensus. Plurimi, Galenum secuti, scribunt portæ ramulos cum venæ cavæ radicibus per multas anastomoses jungi, ita ut modò coeant finibus suis, modò fines in latera aliorum ramulorum ingrediantur, & his etiam interjecta vascula biliaria per frequentes anastomoses connecti: hanc sententiam major Anatomicorum pars hæcenus secuta fuit. His rursus se opponunt Fallopius, Cortesius, Riolanus, alique varii, qui anastomoses illas prorsus in dubium vocant, easque, vel non, vel admodum obscuras dari tradunt. Bartholinus scribit, ex annotatione Harvei, venæ portæ

radices gibbam hepatis partem perreptantes, habere tunicas infinitis punctulis cribrosas, secus quam cavæ ramos, solummodo in propagines derivatos: utriusque autem valis divaricationes in visceris umbonem sine anastomosibus excurrere. Bauhinus monet, notandam esse insignem anastomosem, quæ canalem æmulatur, & est veluti communis ac continuus ductus ex ramulis portæ in radices cavæ stylum satis magnum admittens. In hunc canalem manifestum negant alii ullos venæ portæ ramulos aperiri, quia nunquam illic ulla apertio videri aut animadverti potuit. Glissonius, *anat. hep. cap. 33.* scribit hunc canalem esse productionem, seu continuationem venæ umbilicalis, per eumque in embryone sanguinem umbilicalem recta deferri ad cavam; illum verò in hominibus natis omnino occludi, ac una cum vena umbilicali ligamenti vicem subire, nec in eum ulla aliorum vasorum oscula aperiri.

Ita ut quomodo sanguis è portæ ramulis cavæ & felleorum vasculorum radices subeat, ex prædictis incertis, plurimumque discrepantibus opinionibus vix pateat.

*Transitus  
sanguinis è  
porta in ca-  
vam.*

In hac obscuritate magnum lumen adferunt, non solum Malpigijs per suas microscopio notatas observationes, paulo ante descriptas; verum etiam Glissonius, hepatis accuratissimus perscrutator, qui per frequentes hujus visceris excarnationes, scribit se experientiâ comperisse, ramos venæ portæ & cavæ sibi invicem quidem hic illic incumbere, & firmiter connasci, sed in se mutuo non aperiri, nec ullos ramulos in aliorum latera inferi, aut cum aliorum finibus coire, sed sanguineos humores solummodo per fines ramulorum portæ deponi in jecoris substantiam (hoc Malpigijs, ut supra dictum, observavit fieri mediantibus acinis glandulosis, ex quibus illa substantia maxime constat) & ex ea rursus subire hiantes venæ cavæ ac felleorum vasculorum fines, eosque fines omnes terminari in hepatis substantia, & tantundem sanguinis aut humoris per hiantes dictarum radicum fines absorberi, quantum per portæ ramulos in substantiam effunditur, positâ ubique debita justaque visceris proportionem. Certè hujus præclari viri experientiæ multum fidendum arbitror, nam liber ejus satis testatur, quod fuerit admodum diligens & laboriosus in hepatis mysteriis accurate perscrutandis, ac proinde lubet etiam hoc loco adscribere ejus experimentum, quo solide probat, in hepate nullas dari vasorum anastomoses: illud autem describit *anat. hep. cap. 33.* his verbis.

*Glissonii  
experimen-  
tum memo-  
rabile.*

Ad ulteriorem, inquit, sententia hujus confirmationem, experimentum adferam memorabile, quod non solum transitui huic sanguinis è porta in cavam, sed & alii plurimè

ad circuitiorem sanguinis spectantibus, præclaram faciem præferat. Facta nempe non ita pridem in theatro anatomico Londinensi privatâ cadaveris sectione, cui Collega solum aliquot intererant, visum est experiri quam facile aqua vi in portam intrusa hepar pertransitura esset. Vesicam itaque bubulam prægandem siphoni adaptatam (quo modo in enemate exhibendo apud nos fieri solet) aquâ calidâ, lactis pauxillo coloratâ, implevimus, fistulaque apicem porta juxta hepar inditum, filo constrinximus, ut scilicet, ne quid humoris relaberetur, prospiceremus. Quid? compressâ fortiter vesicâ, aqua ilico pertransiens, cavam ingreditur, indeque in dextrum cordis sinum delata, per venam arteriosam pulmones adit, iisdemque trajectis in sinistram ventriculū delabitur, hinc in aortam fertur, ac denique clara lactea hujus humoris vestigia in ipsis renibus deprehendimus. Relictâ autem historia parte illâ, qua ad rem præsentem nihil attinet, liquor hoc pacto in hepar transmissus, sanguinem paulatim, non solum è majoribus vasis, sed è capillaribus etiam ipsoque parenchymate abluebat. Visus enim est color sanguineus sensim evanescere, ablutoque mox omni sanguine, hepar ex albo fuscoque flavescebat. Idemque color, ut verosimillimum mihi videtur, nativo hepatis colori propinquior est, quam rubicundus ille, quem à pertranseunte sanguine mutabatur. Facto ad hunc modum hujus rei periculò, ipsum hepatis parenchyma alte incidimus, ut constaret numnam intima illius similiter permixta essent, sanguinemque omnem inde adeo ablutum reperimus, ut vix alio pacto id aque fieri potuisse videretur; quippe totum parenchyma colorem modo dictum planissimè ostendit. Jam verò si injectus liquor anastomoseon opera hepar penetrasset, qui factum ut omnis sanguis inde elueretur, & parenchyma ejus, dimotò sanguineo colore, novum ilico sua sponte indueret? Aqua certe colorem illi nullum indidit, quo ipsa caret; nec lac etiam clarum aut fuscum colorem, quem modò diximus, ei imperitiit, licet hic illius opera magis ad albedinem accedere potuerit. Verum ne quid ultra litis superesset, sæpe aqua sola hujus rei experimentum institui, apparuitque ex pallido fuscoque infuscatus color, & quoniam hic in omnibus parenchymatis partibus consimilis videbatur, indicium fecit, aquam singulas ipsius partes aqualiter perluisse: quod profecto fieri nullo modo potuisset, si pars ejus, factò per anastomoses transitu immediate in cavam perreptasset. Sanguinem autem naturaliter eodem cum aqua hac itinere deferri, nemini, opinor, erit dubium. Qua propter concludendum censeo, eundem, non quidem per fictas illas anastomoses elabi, sed ipsum hepatis parenchyma percurrere.

Hoc præclarum experimentum, præclaris Malpigijs observationibus conjunctum, hujus rei hæctenus obscuram cognitionem adeo

adeo illustrat, ut jam de modo transitus sanguinis è porta in cavam, & de naturali colore ipsius hepatis (quod etiam coctum ex pallido flavoque subfuscum colorem ostendit) nemini amplius dubium esse possit. Præterea ex eodem patet clarissimè, quomodo in aliis quoque partibus sanguinis circulatio non per solas arteriarum cum venis anastomoses, sed per substantiæ ipsarum partium poros fiat, qua de re latius agemus, lib. 2. cap. 8.

Sicut venæ portæ truncus hepar sima parte subiens, mille ramificationes in illud emittit, sic etiam mille radices venæ cavæ per intermedias illas ramificationes disperguntur, hæque paulatim versus supernam & interiorem hepatis partem concurrunt, & pauciores ac majores fiunt, donec tandem in unum truncum coeant, venæ cavæ continuum, qui (ex sententia Riolani) valvula, ingressum sanguinis è cava in hepar impediens, præmunitus est, de qua videndum lib. 7. cap. 10. Verum antequam in istum truncum concurrunt, majorum radicum concurrentium ramis (ex prima observatione Stephani & Conringii) interius circuli quidam membranosi, valvularum instar, apponuntur, modò crassiores, modò tenuissimi, quos Bartholinus invenit versus majorem truncum spectantes. Hi regressum sanguinis versus cavam progredientis impediunt. Quomodo sanguinis per hepar progressus in fortu procedat, videndum sequente cap. 32.

Actio hepatis.

De actione seu officio hepatis variæ sunt opiniones, quarum antiquissima ex Galeno, maximeque recepta, tradit in hepate hæmatosin perfici, & illud esse verum ac primum viscus sanguificans.

Verum hæc sententia, post cognitam sanguinis circulationem, omninino abolita est, compertumque sanguinem in solo corde confici: quod ipsemet quoque Hippocrates, lib. 4. de morb. clarissimis verbis significat, inquit, *Sanguinis fons est cor, bilis locus in jecore*. Præterea ratio isti opinioni obstat. Primo, quia nulla vasa lactea ad hepar perveniunt, atque hinc nihil chyli in sanguinem mutandi in illud deferretur: quod enim chylus per venas meseraicas non ascendat, aut transeat, infra docebitur, lib. 7. cap. 2. Secundo, quia in embryone cor & sanguis (patet in ovo gallinæ supposito) conspiciuntur antequam hepatis ulla rudimenta appareant, cum tamen hepar, si efficiens foret, necessario suum effectum, scilicet sanguinem, antecedere deberet, nam effectum non potest fieri ab eo quod posterius perficitur. Tertio, quia cum omnia viscera efformata, & in formationis principio vasa sanguine jam repleta sunt, tunc hepar adhuc albicat, & colore subflavescente suffunditur; quod indicium est,

illud sanguinem rubicundum non generare, cum ipsum necessario per se jam ab ortu tali rubicundo colore, ante omnes alias partes, à sanguine quem generaret ac contineret, coloratum esse deberet: atqui in principio habet colorem pallidum, postea nonnihil subflavescentem, quem etiam postmodum in sua substantia servat (hoc ante docuimus per experimentum Glissonii) licet ille à copiosi sanguinis affusione obfuscetur.

Bartholinus primitus putavit laudabilem chyli partem per lactea vascula delatam, ab hepate attrahi (Deusingius, acer defensor hujus opinionis, credit chylum per venas meseraicas ad hepar pervenire, tract. de sanguificat. imò etiam vasa quædam lactea à pancreate ad hepar pertingere, ejusque cava subire, institut. anat. quorum prius etiam sentit Reginus) atque ex eo chylo sanguinem crudiores in illo generari, postea in corde ulterius perficiendum. Sed hanc sententiam Bartholinus postea meritò rejecit, neque enim defendi ullo modo potest. 1. Quia nulla vasa lactea ad hepar perveniunt, ut dictum cap. 11. 2. Quia nullus chylus transit per venas meseraicas, ut latius docemus lib. 7. cap. 2. 3. Quia si cor ex sanguine crudiore in hepate confecto, non verò ex ipso chylo sanguinem conficeret, necessarium foret ut omnia lactea vasa etiam ad hepar decurrerent, eique chylum suum in crudiores sanguinem mutandum deferrent, nulla verò ad subclavas venas tenderent, & bona etiam chyli pars per venas meseraicas ad hepar ascenderet: atqui prioris contrarium docet autopsia, posterioris ratio, quæ videnda lib. 7. cap. 2.

An crudiores sanguinem conficiat.

Glissonius existimat hepatis parenchyma esse colum quoddam peculiare, per quod sanguis & humores percolantur, eamque alterationem quæ ipsis in hepate imprimatur, percolatione perfici. Verum talis simplex colatura potest quidem tenuia separare à crassis, sed interim nullam aliam mutationem effatu dignam inferre. Præterea, ubi fit colatura, ibi quæ tenuia sunt, transeunt, quæ crassa sunt in colo remanent: at per hepar totus sanguis non tantum transit, nec uspiam in eo crassum quid reservatur, sed etiam pars istius transeuntis rubicundi sanguinis suam naturam & dulcedinem exuens, mutatur in bilem amaram & flavam. Si fortè Glissonius dicat, istam bilem esse crassiorem, eamque proinde cum reliquo sanguine non transire, sed per bilarios ductus evacuari. Respondebo, bilem quidem in folliculo felleo sæpe, per moram & tenuissimarum particularum à calore dissipationem, crassitiem aliquam conquirere, sed illam, quo usque in hepate sanguini permista detinetur, esse ipso sanguine tenuiorem (id probabo per radices pori bilarii & vesti-

An sit coagulans.

& vesiculæ fellis, quæ multo minores, tenuiores, & angustiores sunt, quam radices venæ cavæ hepatis insertæ) nam si crassior foret, illam per vascula cæteris multo tenuiora non posse absorberi & evacuari, ac relinquere tenuiores à majoribus & latioribus cavæ radicibus assumendos. Præterea bilis per folliculi tunicas transsudat, & vicina viscera flavo colore tingit, cum tamen sanguis per nullas venarum tunicas, isto folliculo longè tenuiores & molliores, transfudet, procul dubio, propter majorem suam crassitiem.

*Vera aëlio.*

Verum igitur hepatis officium est, sanguinem sulphureo rore humectare, atque, una cum liene, illius & chyli fermentum conficere (qua de re videatur *sequens cap. 17.*) ac proinde omnibus hominibus, & fere omnibus brutis animalibus, cum terrestribus, tum aquatilibus, hepar datum est, quia sine illo fermento sanguis spirituosus fieri non potest.

*Hepar pars nobilis.*

Ex prædictis liquet hepar, quod olim inter principes partes fuit numeratum, cum Galenus ei sanguificandi munus imposuisset, jamque nostra ætate isto munere exutum, & ministris partibus adscriptum, tamen inter Nobiles, quarum usu carere non possumus, & quæ summum ministerium exequentur, primarium locum obtinere, ejusque morbos semper periculosos esse, ac totius corporis sanitati plurimum obesse; atque imprimis ejus vulnera ab Hippocrate, *lib. 1. de morb. & 2. prorrb. & 6. aphorif. 18.* item à Celso, *lib. 2. cap. 6.* inter maxime lethalia merito recenseri; propterea quod copiosa hæmorrhagia citius ægrum occidat, quam medicamentis in abdita parte sisti possit: & si forte sistatur, tamen ulcus post vulnus relictum tam rarè & difficulter sanetur, ut ex tribus millibus ea parte vulneratis vix unus aut alter evadat, & inter miracula fere habendi sint, qui ex iis servati fuerunt.

*Hepatis vulnera lethalia.*

*Hepatis vulnera sanata.*

Quales tamen quinque casus me legisse meminimus. *Primum* tradit Gemma, *lib. 1. cosmocrit. cap. 6.* de Hispano quodam ab insigni vulnere hepatis sanato. *Secundum*, sibi visum, refert Bertinus, *lib. 13. cap. 7.* de viro nobili, cui non tantum hepar vulneratum, verum etiam aliqua hepatis pars per vulnus extracta fuit, qui tamen, præter omnium expectationem sanatus est. *Tertium*, de ægro à se sanato, in quo vulnus ad profundam jecoris partem ferebatur, annotavit Cabrolus, *observat. 18.* *Quartum*, ex Rocho Tarraconensi, enarrat idem Cabrolus *eadem observat.* *Quintum*, scribit Hildanus, *cent. 2. obs. 34.* de Helvetio quodam, qui extracto hepatis vulnerati frusto, & symptomatibus sævissimis supervenientibus, tamen convaluit. Verum hæc sunt Naturæ miracula, qualia in curationibus interdum contingere, olim tra-

didit Averrhoës. Ego, cum in castris, tum alibi, varia vidi hepatis vulnera, sed cum iis meminem evasisse vidi.

Res alienæ rarius in hepate reperiuntur, *vermes & calculi, in hepate.* de vermibus tamen & calculis, aliquid ab observationum scriptoribus notatum animadverto. Quippe Hieronymus Montuus, *in parasceve morbor.* refert se vidisse hepar vermibus refertum; quales vermes hepatis etiam notarunt Wierus & Bauhinus. Vermem hirsutum in hepate canis vidit Borellus, *cent. 2. observ. 33.* Calculos autem in vesicula fellea nonnunquam inventos fuisse, multorum experientia constat; sed rarum est, eosdem in hepate gigni: cujus tamen exemplum, ex Jo. Georg. Greifelio, citat ephemeridum Med. Physic. Germanicarum scriptor, de Domina quadam, cui ad inferioris lobi hepatis partem adnata erat cystis, longitudinis palmi, in qua continebatur humor glutinosissimus, ex nigro resplendens, in ejusque medio lapis magnitudinis parvi ovi gallinacei, resplendens, acsi nitro plenus fuisset, sed insipidus ac nullius odoris, pendens unciam & grana octodecim. Idem ille scriptor aliud citat exemplum ex Jacobo de Nigroponte, de hepate insolitæ magnitudinis, circiter duodecim libras pendente, quod erat durum, flavum, & hinc inde calculis flavis respersum, in cujus folliculo fellis, præter multas arenulas flavas, etiam continebantur duo calculi rotundi, flavi, scabrosi, glandem sclopeti fere æquantes; præter quos adhuc alius minor calculus meatum hepaticum ad vesiculam felleam obsidebat. Verum etsi in humano hepate calculi rarè inveniuntur, tamen in boum & ovium morbosorum hepate illos aliquoties numerosos invenimus, alios rubros, alios subflavos, sed plures instar tartari vini albicantes.

Huic historiæ hepatis etiam merito subnectenda videtur rarissima quædam hepatis cum pulmone conjunctio, eorumque & vicinarum partium constitutio admiranda, quam nobis scripto communicavit D. Wassenæ, apud Ultrajectinos Medicus eximius, utpote sibi visam in filiolo D. Cornelii de Mirop, toparchæ in Wilgenlangenraeck: qui puellus in vita asthmaticus, & frequenti validaque tussi levissima de causa vexatus, tandem septimo ætatis anno, lenta febre extinctus fuit, ejusque cadaver 2. Februarii 1665. (præsentibus, D. de Goyer, & dicto D. Wassenæ, Medicinæ Doctoribus, cum duobus tribusve chirurgis, item tutoribus, pluribusque defuncti consanguineis) sectione apertum est, in quo hæc sequentia fuisse inventa, scripto nobis significavit.

*Rara hepatis conjunctio.*

Aperto, inquit, abdomine, ut & thorace, nullum inventum fuit diaphragma, quo thorax ab inferiore ventre discernitur, ut nec mediastinum

stinum in thorace: & unicus tantum repertus fuit pulmonum lobus, qui dextra parte cum hepate continuus, ei colore & substantia fere similis videbatur: nulla in isto lobo erat fungositas, & medium hepar transiens, sub cava ejus parte, velut appendix prominebat. E medio hepate meatus quidam, instar bronchiorum, derivabantur in ipsam arteriam asperam. Nulla circum costas manifesta apparuit pleura, nam hepar, & dextra hujus lobi pars tam arcte costis undique adharebant, ut non nisi scalpello à se invicem separari possent. Pericardium, in quo paucissimus liquor continebatur, involvebat solummodo dimidium cor, quod circa basin cum sinistra & superiore lobi pulmonis parte tam firmiter unitum erat cum spina dorsi, quam hepar & dextra lobi pulmonis pars cum costis. In convexa & inferiore hepatis parte, circa nonam costam, latebat ulcus, pure bene cocto repletum. Ventriculus, pro ratione corporis & ætatis, duplo majorem habebat magnitudinem.

Sic interdum mirabilia inveniuntur circa viscerum formationem, situm, & nexum.

Quemadmodum non minus rarum & *Aliud viderum.* monstrum est illud, quod ex suo aliorumque Medicorum ac chirurgorum testimonio, scribit Joannes Schenckius, *observat. lib. 3.* scilicet, anno 1564. in dissectione mortui corporis Matthiæ Ortellii, mercatoris Antverpiensis, ne vestigium quidem hepatis aut lienis fuisse inventum, sed omnium intestinorum substantiam carnosam extitisse, multoque solidiorem quam est musculorum caro, ut soliditate cordis carni fere responderet. Venam autem cavam ex ipsis intestinis originem suam sumpsisse, quam putat fuisse causam, quod æger in vita multoties inflammatione & abscessu intestinorum laborasset. Malpighius, *lib. de hepate*, haud inani conjecturâ, putat, in dicto Ortellio glandulosam hepatis substantiam, præter Naturæ ordinem, secundum longitudinem intestinorum fuisse extensam.

## CAPUT XV.

## De Vasis Bilariis, &amp; ipsa Bile.



D bilis evacuationem in dextra & cava hepatis parte duo meatus insculpti sunt, scilicet, Vesica biliaria, & Porus bilarius. Per hunc

bilis sœculentior & mitior in intestina profuit. In illam verò tenuior bilis confluit, quæ aliquamdiu ei inhærens, morâ illâ ex partis proprietate, magisque ex ei inhærente residuo liquore, acorem & magis fermentativam qualitatem acquirit.

Vesica autem biliaria, quæ etiam *Folliculus fellis*, & Græcis *κύστις χολή-δοχος*, appellatur, est vesica oblonga, pyriformis, subrotunda, concava, in sima hepatis parte sita.

Superiore mediaque parte connectitur sinui hepatis insculpto, reliqua verò parte extra hepatis corpus propendet, qua dextrum ventriculi latus & colon intestinum attingens, utrumque frequenter bile, per tunicas ejus transsudante, imbuat ac tingit.

Magnitudinem habet in aliis minorem; in aliis, præcipuè biliosis, majorem: ut plurimum verò longitudinem duorum digitorum transversorum, latitudinem digiti, vel pollicis.

Duplici donatur membrana. Una exteriore non fibrosa, à peritonæo orta, quæ partem extra hepar pendulam investit, & hepatis annectit, eademque est cum hepatis exteriore membrana. Alterâ interiore propriâ, crassiore, & mucò lubrico adversus

contenti humoris acrimoniam munita. Hanc omni fibrarum genere pertexam esse, & rectis bilem in se allicere, obliquis retinere, transversis eandem expellere, multi cum Laurentio tradunt. Hæ tamen fibræ aliis videntur imaginariæ, cum nullo modo demonstrari queant, atque hinc eas explodit Fallopius, & cum eo etiam Riolanus, *animadvers. in Laurent.* earumque à Laurentio descriptum usum refutat & rejicit Glissonius, *anat. hep. cap. 17.* Verum Laurentii causa satis defendi posse videtur, si dicamus, licet fibræ istæ manifestè demonstrari nequeant, tamen eas ratione satis percipi posse, cum hæc pars ad sui firmitudinem non minus egeat fibris, quam vena, arteria, vesica urinaria, aliæque plures, quæ cum distenduntur, per suas fibras se rursus contrahunt, sicque ad pristinum statum redeunt: qualis distentio à bilis redundantis copia, vel ab ejusdem inturgescencia seu effervescencia etiam fit in folliculo fellis, quam contractio per fibras, licet invisibiles & obscuras, necessario subsequi debet, non tantum ad bilis à folliculo expressionem (quam Glissonius quoque concedit) verum etiam ad reductionem folliculi in pristinum statum. Adde, quod ab Anatomicis etiam fibræ in venis admittantur, quas tamen nemo facile demonstrabit, quamvis ex varicibus constet, illas in iis adesse.

Vasa obtinet duplicia: alia quæ in ejus cavitate aperiuntur, de quibus mox dicitur: alia quæ per tunicas, seu membranas ejus



ejus decurrunt. Hæc autem quadruplicia habet. 1. Arteriolas maxime exiles, à dextro cœliacæ ramo superiore profectas. 2. Venas capillares multas, residuum à nutritione sanguinem referentes, ac tandem in duos exiles ramulos concurrentes, per eosque sanguinem istum in portæ venam effundentes. 3. Nervulum vix conspicuum, à sextæ conjugationis ramo hepatis tunicam perreptante, deductum. 4. Pauca vasa lymphatica ex hepate propagata, per exteriora ejus decurrentia. Arteriæ & nervus circa ejus cervicem ingrediuntur: venæ per eandem viam versus portam egrediuntur: lymphatica verò vascula in homine per eandem ingrediuntur, ac per fundum folliculi decurrentia, inferiore ejus parte cum reliquis ex hepate prodeuntibus lymphaticis conjunguntur: at in illis brutis, quibus ex hepate pendulus est folliculus, ad cervicem ingrediuntur, factoque per fundum circuitu, etiam per eandem regrediuntur versus alia lymphatica ex hepate exeuntia.

*Diviso.*

Dividitur hæc vesica in fundum & cervicem.

*Fundus.*

Fundus amplior est, rotundus, seu pyramiformis, & inferiore loco pendulus, colore bilis contentæ, modò flavo, modò æruginoso, modò nigricante, modò alio tinctus.

*Calculi.*

In hoc folliculi fundo interdum calculi inveniuntur, sed leves, qui aquæ injecti eidem innatant. Horum varios observavi colores, modò flavum, modò ex viridi nigricantem, modò variegatum instar marmoris. Hi illic gigni videntur ex bile fatua, id est, nullâ acrimoniâ prædita, quæ cum non effervescat, etiam è folliculo non erumpit, sed in eo ab hepatis calore paulatim in calculos induratur. Olim ictericam quandam, quæ aliquot annis ictero ex viridi nigro laboraverat, secui, in cujus folliculo calculum nigricantem, mediocriter magnum, inveni. Fernelius, *pathol. lib. 6. cap. 5.* scribit de sene quodam, cui tantus in folliculo calculus subsistebat, totamque ejus capacitatem adeo occupabat, ut cysti penitus carere putaretur. Innumera alia exempla calculorum in cysti repertorum, passim apud Medicos descripta inveniuntur.

*Observatio.*

*Cervix.*

Cervix folliculi strictior est, & superiora versus angustatur in tenuem meatum, qui in communem ductum, intestina petentem, desinit.

*An in ea sint valvule.*

In hac cervice, ex Andreæ Laurentii sententia, referunt Veslingius & Bartholinus, observandas esse valvulas, modò binas, modò ternas, bilis ad intestina fluentis regressum in folliculum impediennes. Verum ego has nunquam potui observare, sed egressum vesicæ arctissimum esse deprehendi, ejusque cervicem multis

rugis interceptam, ne nimis facilis & lubricus esset bilis descensus, sed ejusdem lenta fieret evacuatio. Sic etiam Riolanus & Glissonius, has valvulas invenire non potuerunt. Dicta autem cervicis angustia eum in finem concessa videtur, ut bilis suum folliculum ingressa, statim rursus non efflueret, sed in eo aliquantulum commoraretur, ad majorem acrimoniam & fermentativam qualitatem, ex loci natura seu proprietate, & admixtione residuæ acris bilis in vesicula adhuc subsistentis, acquirendam: qua ei impressa, atque hinc levi oborta in ipsa bile effervescencia, ut tunc dilatatis ac dehiscantibus ab ista distensione cervicis rugis, ejus aliqua pars, quæ per effervescenciam attenuata ac dilatata contineri commode nequit, ad intestina deturbetur. Hac de re plura videantur *cap. 17.*

Defertur autem bilis ad folliculum per multas exiles radices, in hepate inter cavæ *Via bilis ad folliculum.*

& portæ ramulos disseminatas (ut præcedente capite dictum) quæ simul in unum meatum concurrentes, per eum bilem in vesiculam effundunt. Hæ autem radices adeo exiguæ sunt, ut visum plerumque effugiant: solus truncus, in quem omnes concurrunt, invenitur, ejusque investigandi & inveniendi modum describit Glissonius, *anat. hep. cap. 13.* Hunc truncum sæpe manifestissimum cum aliquot radicibus, vidimus in hepate bubulo (in canibus, quorum hepar in varios lobos divisum est, duo, tresve trunci à nobis multoties reperti ac demonstrati sunt) stylum satis crassum admittentem, cui ad introitum in fellis vesiculam, modò parva, modò magna lataque valvula præfixa, bilis è vesicula regressum in hepar penitus impedit. Si roges, quomodo igitur in ictero regredia-tur? Dico, non regredi, sed tunc bilem in hepate genitam, defectu convenientis fermenti & fermentationis non separari è sanguine, ac neque ad vesiculam venire, sed sanguini admistam manere, cum eo-que ad cavam, cor, & totum corpus deferri.

Ufus folliculi fellis est, bilem colligere, *Ufus.* qua in hominibus sanis mediocriter repletus est, non tamen adeo infarctus, quin porro mensuram dimidii cochlearis capere posset: in morbo autem statu interdum bile admodum turgidus & infarctus est; interdum etiam, sed rarissimè, plane inanitus.

Alterum biliarium vas, quod **Porus biliaris** appellatur, est ductus; seu canalis oblongus, cervicæ vesicæ duplo latior, non procul à portæ vena ex hepate procedens, & bilem ab ipso hepate exceptam in communem ductum deferens, quæ non solum paulo sæculentior per latiore canalem delabitur, verum etiam mitior, cum non subsistat in via, nec longiore morâ, aut ab aliqua

*Porus biliaris.*

aliqua loci natura majorem acrimoniam acquirat, sicut altera in folliculo collecta.

*Valvula.*

Huic poro quidam geminas valvulas, bilis effluentis regressum in hepar impediētes, adscribunt; unam ad exitum ejus ex hepate, alteram ad ejus ingressum in ductum communem. Has valvulas alii adesse negant, quia ab Anatomicis inveniri nequeunt. Ratio tamen videtur persuadere, si non duas, saltem unam adesse debere, cum in trunco, bilem in vesiculam deponente, talis manifesta valvula adstet, bilis regressum impediens. Nos interea litem hanc paulisper suspendemus, usque dum certa autopsia & demonstratio hac de re judicium tulerit.

*An sit duæ  
biles.*

Hic jam quæri possit, an in hepate generentur duæ diversæ biles, quarum una acrior vesiculam felleam ingreditur, altera mitior per porum effluit? Dico, non, sed esse unam eandemque bilem, cujus tamen partes nonnihil fœculentiores facile per porum bilarium, ob latiore viam, defluunt, & propter fœculentiam minus acres sunt: tenuiores verò per angustissimas vesiculæ felleæ hepatis inspersas radices, in vesiculam deducuntur, ut in ea multo acriores fiant, & fermentaceam vim potentiorē acquirant, cum ex proprietate, seu specifica temperie loci, tum per admissionem acris biliosi succi in vesicula residui.

Quod bilis per porum decidua qualitatibus quibusdam differat ab illa quæ in vesicula detinetur, expertus est Malpighius, *lib. de liene, cap. 6.* comperitque illam pori altera esse magis dilutam, & minus amarā, nec ejusdem cum ea coloris, & igne exagitatam vehementissimum exhalare odorem, secus atque facit altera. Fortè quis rursus objiciet, multoties quoque crassam & tenacem bilem in folliculo reperiri, eamque fere inspidam & minimè acrem. Respondeo, illam crassitiem ei non inesse cum primo folliculum ingreditur (nam crassa & viscosa per angustissimos radicum ductus transire & ingredi non posset) sed cum folliculus obstructus est, vel alia quacunque de causa bilis diutius quam par est in eo detinetur, tunc ab hepatis calore dissipatis tenuioribus partibus, bilem præter naturam in eo fieri crassam & viscosam, imò nonnunquam in calculosam duritiem exsicari, quod plerumque propterea contingit, quia non satis valida fermentacea qualitas ei inest, quæ illam ad dilatationem seu effervescentiam, & sic ad tempestivam expulsionem, promovere potuit. Ita etiam dico, bilem in folliculo nunquam albicantem aut inspidam esse, nisi defectu subsalsi aut subacidi liquoris à liene venientis, ob cujus liquoris vitiositatem aut defectum hepar vitiosam bilem gignit, quod facile contingere potest in morbosa constitutione, in

qua etiam quilibet alii humores, in quacunque corporis parte, à naturali statu recedere possunt.

Recipit atque porus illam mitiorem bilem per innumeras radices quas hepatis inspersas habet, quæ passim ramulos venæ portæ, usque ad omnes hepatis partes (paucioribus exceptis, ad quas vesiculæ felleæ radices extenduntur) comitantur, imò cum iisdem unâ eademque tunica, ab hepatis ambiente membrana producta (eodem modo sicut arteria & vena spermatica) includuntur, eaque mediante adeo arte sibi invicem cohærent, ut ægerrimè sine dilaceratione à se mutuo separari possint, imò unicum vas esse primo intuitu videantur, cujus tamen duplicitas ex colorum varietate colligitur, si claræ luci objiciatur, quod fieri non potest nisi in hepate excarnato.

*Via bilis in  
porum.*

Franciscus de le Boë Sylvius, putat non esse ramulos venæ portæ quæ cum radicibus pori bilarii una communi tunica obducuntur, sed esse ramulos arteriæ hepaticæ, idque se à Jo. van Horne inventum ac demonstratum vidisse refert, *disput. med. 6. thes. 52.* Procul dubio in ista demonstratione fellei ramuli, quia propter contentum liquorem non sunt tam rubicundi quam venæ, à Jo. van Horne pro arteriis habitæ sunt. Sed quod addit Sylvius, arteriam hepaticam maxima sui parte intra communem vaginam deductam, in bilarii ductus hepatici ramulos inferi, hoc credam, cum videro: in communi vagina arctissimam ramulorum portæ & felleorum, nullius verò arteriæ, conjunctionem novi: atque hinc, illic arteriæ alicujus per anastomoses insertionem in vasa bilaria dari, hoc demonstratione meis oculis prius censo persuadendum, quam credendum.

Assumunt igitur pori radices bilem ex ipsa hepatis substantia, in quam plurimi venæ portæ, paucique arteriæ hepaticæ ramuli sanguinem suum deponunt, qui in ea statim alteratur, & sulphurearum subsalsarumque particularum mistione, novo modo excoquitur, & multis sui particulis amarescit ac bilescit: quæ biliosæ particulæ, mediantibus acinis glandulosis (ex quibus hepatis substantiam imprimis constare, comperit Malpighius, ut *cap. præcedente dictum*) à reliquis sanguineis, coctione ista minus alteratis, segregantur, & à radicibus pori ac folliculi bilarii absorbentur.

*Bilis assumitur ex  
hepatis substantia.*

Quemadmodum de arteriis modò dictum, ita multi inter extremitates ramulorum venæ portæ & radicum biliarium varias anastomoses effingunt, quas tamen nullas dari, præcedente capite docuimus; nec etiam adesse debere, experientia & rationibus clarissime evincit Glissonius, *anat. hep. cap. 32.* tota quippe sanguinis in bilem mutatio, & à venis in bilaria vasa

K

separatio

separatio ac transfusio, fit mediantibus acinis glandulosis.

*Ductus cholidochus.*

Bilis autem, tum ex ipso hepate per porum biliarium, tum è folliculo felleo defluens, concurret in unum ductum communem, vulgò **Ductum cholidochum** appellatum, qui est meatus seu canalis ex cervicibus pori bilarii & folliculi fellei coeuntibus, conflatus.

Hic plerumque solus, nonnunquam etiam ductum pancreaticum ad finem suum admittens (hoc frequentissimum est in homine, rarissimum in cane) circa duodeni intestini finem, vel jejuni principium, oblique inter utramque intestini tunicam, plerumque simplex, rarò circa finem geminus, digiti circiter transversa longitudine insertus, versus intestini cavitatem aperitur, bilemque, tam immediate ex ipso hepate, quam ex vesicula fellea, in intestina deponit. Alii, nec omnino præter rationem, malunt statuere, totum hunc ductum esse porum biliarium ab hepate in intestina extensum, cui à latere inferitur cervix vesicæ biliaris.

*Valvula.*

Vesalius & Sylvius membranulas laxas, instar valvulæ hujus ductus orificio præpositas esse tradunt, bilis ab intestinis regressum in hepar impediunt. Verum si accuratior inquisitio instituatur, nullæ hic valvulæ membranæ reperiuntur, sed interna intestini laxa membrana, à coctis alimentis transeuntibus depresso, viam ita occludit, ut nullus liquor ex intestinis ductum ingredi possit, quæ interim bile è ductu descendente & exituriente, mox aperitur, eique liberum exitum concedit.

Glissonius isti parti ductus, quæ intestinum oblique ingreditur & perforat, tribuit fibras annulares, quas putat instar sphincteris aperiri, cum bilis copiosior in eam impingit, sed eâ elapsâ, mox constringi, donec rursus plusculum novæ bilis collectum fuerit: atque has fibras dicit etiam impedire, ne quis humor ex intestinis ad hepar aut folliculum ascendat, Fortassis Glissonius carunculam istam, quæ ad ductus cholidochi in intestina exitum epullulat, pro exiguo quodam sphinctere habuit.

Quia autem ille obliquus in intestina transitus admodum angustus est, ductus verò latus, atque ille hinc vix decimam partem bilis, per pennæ circiter anserinæ latitudinis ductum adfluentis, transmittere posse videtur, putat Glissonius, prædictos cholidochos ductus, non tantum canalium officio fungi ad bilem devehendam, verum etiam receptaculorum seu folliculorum vices obire, ad illam aliquamdiu continendam & servandam. Verum in sectionibus cadaverum rarò bilis in illis ductibus servata

reperitur, atque hinc magis verosimile est, bilem ordinariè parva tantum quantitate ab hepate & folliculo descendere (pauca enim sufficit ad chyli fermentationem seu effervescentiam, una cum succo pancreatico, perficiendam) & ob illam paucitatem per obliqui transitus angustias facile in intestinum permeare posse: quo tamen transitu præter naturam obstructo, tunc in ductibus cholidochis bilem etiam, tanquam in folliculo aliquo, detineri: hoc tamen in statu naturali nunquam fieri, utpote in quo pauca bile, imprimis nonnihil acris, defluente, irritatio fit ad excretionem, & ipsorum ductuum distensio, & viarum laxatio.

Hic obiter notanda, felleorum vasorum rarissima quædam constitutio, quam mense Decembri 1668. vidimus, in profectione corporis mulieris, circiter 30. annorum, quæ hydropè non gravi, partim anasarca, partim ascite, longo tempore detenta, tandem obierat. In hoc subjecto repertum fuit hepar, non rubicundum, sed leviter flavescens; in reliquis visceribus vix aliqua flavedo observabilis erat: serosus humor nimia quantitate abdominis cavitatem replebat. Folliculus felleus omnino candidus intus forisque conspiciebatur, ut & ejus ductus versus ductum communem cholidochum excurrens, hicque tantam habebat amplitudinem, ut fere minimum digitum admitteret. In folliculo autem & ejus ductu nulla omnino bilis, sed candidus quidam succus, aliquantum viscidus, non magna copia continebatur. In communi tamen ductu cholidochæ (qui est porus biliaris usque ad intestina protensus) in intestinum duodenum exituriente, flava bilis modica quantitate continebatur, quam etiam in intestinum duodenum effluxisse, aperto intestino mox flavus color, intus repertus, indicavit. Hinc magnum argumentum desumere licet contra eos, qui statuunt ex hepate per porum biliarium nullam omnino bilem versus intestina defluere, sed partem bilis, ex folliculo defluentis, in duodenum intestinum eructari, partem per porum biliarium ascendere, & sic ingredi hepar: quod sic non fieri ex hac jam dicta observatione patet: cum enim nulla bilis contineretur in folliculo ejusque ductu, & interim bilis deferebatur ad intestinum duodenum, illa ex nulla alia parte, quam ex ipso hepate, per porum biliarium ductumque communem cholidochum (in quibus bilis quoque inventa fuit) eò deferri potuit.

Quæritur, an bilis continuo & æquali ductu ad intestina descendat? Hic distinguendum censeo, inter istam bilem quæ ex hepate per porum, & illam quæ è vesicula fellea defluit. Aliquam bilem pauca quantitate

*Rara constitutio.*

*Folliculus albus.*

*An bilis continue effluat.*

quantitate continuè ad intestina profluere, ac succo pancreatico, pauca etiam quantitate adfluente, mox admisceri, in vivorum animalium sectionibus docet autopsia: sed ego crediderim illam esse bilem mitiorem ex hepate per porum descendentem, non verò acriorem illam magisque fermentaceam quæ ex folliculo venit, utpote quæ ob cervicis folliculi angustiam (de qua ante dictum) non videtur è loco suo elabi, nisi cum effervescens folliculum ejusque cervicem distendit, sicque sibi viam parat: atque ita puto hanc non nisi per intervalla è folliculo effluere, idque imprimis cum à ventriculo cibus repleto folliculus, dextro ejus lateri accumbens, nonnihil premitur, & propter vicinam ventriculi coctionem ac fermentationem, bilis in eo simul etiam effervescit. Quippe illud acre biliosum fermentum non continuè, & non semper æque copiosum requiritur in intestinis, sed tunc maxime cum novus chylus à fœcibus separandus in ea delabitur, vel mox illapsurus est. Contra verò Glissonius, *anat. hep. cap. 20. propos. 11.* putat influxum bilis in intestina non fieri, sed coerceri, quamdiu ventriculus repletus est, aut chylus ex eo versus inferiora demigrat; sed, ex sententia Galeni & veterum, dicit illam aliquamdiu in vasis felleis subsistere, ac postea subito copiosam ex iis deturbari in intestina, atque in iis expurgandis munere clysteris fungi: quod ipsum etiam diu ante Glissonium sentiit & proposuit Spigelius, *lib. 8. anat. cap. 13.* Sed ex horum duorum opinione bilis in intestina profluere, cum ea minime opus est. Verum totus hic error inde processit, quod Galenus & ejus asside putaverint bilem esse merum excrementum, eamque solummodo fœcum excretionem promovere, nesciverint autem illam summe necessariam esse ad chyli fermentationem seu effervescentiam, de qua necessitate vide *sequens caput 17.*

*Ductus insolitus.*

Præter communem ductum jam commemoratum, anno 1655. mense Aprili, alium quendam insolitum ductum in theatro anatomico publice demonstravi, altero ordinario (qui tamen solito modo aderat) tenuiorem, & flavam bilem repletum, cui nulla cum poro bilario, aut jam dicto communi ductu communio erat, sed seorsim oriebatur paulo supra cervicem vesiculæ fellis, qua parte folliculus in cervicem incipit contrahi seu angustari, & seorsim quoque ferebatur ad intestinum duodenum, cui circa finem inferebatur circiter latitudine digiti ab insertione alterius ductus communis. Sequenti anno, in alio subjecto aliud quid rari vidimus, nempe præter ductum cholidochum ordinarium, adhuc alium insolitum ex medio fellis folliculo recta in coli intestini partem ei accumbentem, ex-

tensum. Sic etiam nonnunquam ductum aliquem ex vesicula in pylorum, interdum in ventriculi fundum produci observatum est. Sed hi sunt rarissimi Naturæ lusus.

Ex modò dictis jam satis liquet bilem in hepate confici, ex eoque per vasa bilaria effluere in intestina, nunc superest ut de ejus generatione & usu pauca subjiciamus.

Est autem bilis succus fermentaceus ex sanguine venoso & succo splenico specifica coctione in hepate præparatus. *Quid sit bilis.*

Generatur enim, tum ex sanguinis venosi particulis sulphureis seu suboleosis, tum ex subacidi liquoris ex liene venientis particulis subsalsis subacidisve, una cum illis per portam influentibus, in hepate simul specifico modo mistis, excoctis, ac præparatis. Nam sulphureus succus, etli per se subdulcis sit, diutius tamen cum subsalfo fermento excoctus, amarescit, & colorem mutat. Quod autem hæc sint materia è qua bilis constat, ostendit ars chymica, utpote qua parum quidem salis fixi & aquæ, sed multum salis volatilis & olei, è folliculi bile secundum naturam disposita educi potest. *Generatio bilis.*

Hæc bilis in hepate excocta, aliqua sui parte tenuissima sanguini immista manens, ad cavam fertur, in eaque sanguini ad eunti fermentativam qualitatem tribuit, qua aptus redditur ut in corde protinus dilatari queat. Reliqua verò parte maxime amara & magis fermentacea, partim per porum bilarium mitior effluit ad intestina; partim in folliculum fellis propulsa, à proprietate istius loci & succi ei inhaerentis, amarior & acrior fit, ac validiorem fermentativam qualitatem conquirat. *Motus bilis.*

Ex hoc bilis ignorato motu, à nonnullis præclaris Medicis, Galeno, Lud. Mercato, Helmontio, Krempfio, Hoffmanno, aliisque, dubitatum fuit, an non extra hepar & vasa fellea etiam in ventriculo, corde, capite, & renibus, aliquid bilis generetur, cum id doceri videatur ex bilioso vomitu in cholera morbo, ex flava spuma extracto sanguini interdum innatante, ex amaritudine fœdium in auribus contentarum, & ex bilioso urinarum colore. Sed error eorum ex eo processit, quod putaverint bilem esse merum excrementum, eamque totam per vasa fellea amandari ad intestina, per eaque evacuari: & nesciverint illam in cholera ex folliculo in intestina depulsam magna sui parte ascendere in ventriculum & sic evomi (hoc latius docuimus *præcedente cap. 7.*) item illius ex ipso hepate bonam partem pro fermento sanguini admistam, ad cor deferri, & cum sanguine per totum corpus circulari, atque hinc ejus colorem nonnunquam in sanguini innatante spuma, & urinis, saporem quoque & flavum

& flavum colorem in excrementis aurium apparere, licet in illis partibus excrementa ista fecermentibus genita non sit.

Loci proprietates.

Loci proprietates ad bilis generationem faciens, partim dependet ab ipsius folliculi interiore tunica, peculiari fermentacea qualitate perfusa ac donata: partim à bile in eo folliculo subsistente, quæ longiore mora illic fermentans atque effervescens, acrior & amarior fit, aliamque novam mitiorem bilem, ex hepate in folliculum influentem, similiter fermentat & acriorem reddit: atque sic continuatione quadam acrior bilis effervescens è folliculo effluit, & mitior in eum influens, in eoque subsistens acrior fit. Majorem tamen aut minorem acrimoniam bilis ibi acquirit, pro ut plures vel pauciores, iique acriores vel mitiores succisubacidi seu subsalsi, è liene ad hepar defluerint, in eoque cum sulphureo succo permisti, & magis minusve excocti fuerint. Si enim nimis paucus, aut minus acris succus è liene per ramum splenicum affundatur, fit bilis minus acris & minus valida ad fermentativam effervescentiam inducendam, quæ sæpe magnam visciditatem in hepatis vasis biliaris & folliculo acquirit (quia per debilem istam effervescentiam non satis attenuatur) & icteri multarumque obstructionum causa evadit. At si nimis acris liquor è liene adfluat, tunc bilis nimiam acrimoniam in vasis biliaris hepatis & folliculo acquirit, qua in fermentatione seu effervescencia nimis corrodendo & irritando, graves dolores, choleras, dysenterias, aliaque similia mala producit, imprimis si etiam succus pancreaticus acer in intestina influat.

Nova opinio.

Franciscus de le Boë Sylvius, considerans maximè exiles & plerumque invisibiles meatus, per quos bilis ex hepate ad folliculum fellis defertur, longe aliam de ejus generatione opinionem concepit, *disput. med. 6. thes. 36. & 37.* Suspiciatur enim bilem generari ex sanguinis, per arterias cysticas ad bilariam vesiculam delati, partibus ipsi maxime similibus, & per ejusdem tunicæ poros in cavitatem ipsam sensim penetrantibus, atque ibidem mox in eandem cum reliqua bile naturam abeuntibus: eodem modo sicut vinum canthari mensura in aceti dolium infusum, mox convertitur in acetum. Illud ipsum quoque sentit Regius, *philos. natur. lib. 4. cap. 12.* qui tamen etiam radices bilarias, ex sanguine venoso hepatis infuso bilem elicientes agnoscere videtur. Verum illud Sylvii commentum hæc sex destruunt. 1. Quod in folliculi cavitatem nulla unquam sanguinis infusi indicia appareant, imò ne minima quidem ab ullo Anatomico observata fuerint, cum tamen in quibuscunque partibus, in quibus ex sanguine alius succus, liquor,

aut spiritus est conficiendus, aliquæ notæ sanguinis manifeste appareant, ut liquet in cerebro & testibus. 2. Quod bilis etiam generetur in iis animalibus quæ dicuntur destitui folliculo felleo, ut in cervo, dama, camelo, in quibus illa in folliculo ex sanguine per arterias illabente generari non potest, sed in ipso hepate generata effluit per porum bilarium. 3. Quod in hepate interdum obstruantur illa vascula per quæ bilis ad porum & vesiculam fellis advehitur, atque tunc icterus fiat à bile copiosa per totum corpus diffusa, cum interim in poro & folliculo vacuo nihil bilis genitum fuisse liqueat, etsi arteriæ cysticæ satis multum sanguinis, more solito, ad vesiculam detulerint. 4. Quod in helluonibus & strenuis potatoribus ex hepatis intemperie calida procedens icterus, ab arterioso sanguine in bilem mutato gigni non possit, cum ille æqualiter antea atque tunc ad folliculum delatus fuerit, nec ulla ratio sit, quare copiosior tunc eò ferretur in bilem mutandus, quam aliis temporibus. 5. Quod hæc opinio præsupponere videatur, totam bilem in folliculo bilario gigni, cum tamen, ut ex præcedentibus patet, tota gignatur in hepate antequam ad folliculum perveniat, ut ex eo liquet quod plurimum bilis etiam per porum defluat ad intestinum, quæ folliculum non attingit, atque hinc ex sanguinis arteriosi particulis in folliculum delabentibus genita fuisse non potuit. 6. Quod etiam hoc statuere videatur, in sanguine præexistere veram bilem, ejusque particulas ab eo in folliculi arteriis separatas, in hujus cavitatem delabi, ibidemque summam bilis perfectionem adipisci: verum hujus statuti vanitatem jam supra latè demonstravimus, *cap. 10. artic. de generatione succi pancreatici.* His denique accedat historia paulo ante relata, de folliculo fellis albo, & liquore candido in eo contento, quæ satis efficaciter probat, bilem in folliculo ex sanguine arterioso non gigni.

Porrò, quæ Sylvius, in *additamento ad citatam disputationem*, pro sua opinione adfert, illa non videntur tanti ponderis esse, ut eam satis stabilire queant. Nam insertio arteriæ hepaticæ in pori ramos, illam non probat, quia illa ipsa insertio adhuc dubia est, non tam autopsiâ, quam opinione suffulta, ac proinde ad tempus inferenda ordini istorum dubiorum, quibus fides non adscribitur, nisi per ocularem inspectionem. Sic etiam ejus experimentum in cane factum, per immisum in arteriam hepaticam tubulum, & flatum in vesiculam felleam penetrantem, incertissimum est, id confitente ipso Sylvio, *thesi 54.* Præterea si flatus tam facili negotio propelleretur in vesiculæ cavitatem, etiam sanguis copiosus facile in eam depelleretur pulsione cordis

cordis & arteriarum cysticarum, quod tamen à nemine unquam observatum est.

*An bilis non generetur, sed separatur.*

Totam hanc bilis generationem negat Malpighius, qui, *lib. de hep. cap. 3.* putat bilem non gigni ex aliquo sanguine, aut per aliquam diversorum humorum mixturam & coctionem in hepate factam, sed duntaxat è sanguine separari mediantibus acinis glandulosis ipsius hepatis, eamque talem qualis est, præexistere in sanguine, atque hinc sola tantum separatione opus habere: quam separationem hoc modo perfici existimat. *Nec necessarium, inquit, est suctionis opus, ut bilis per porum ad intestina, vel vesiculam demandetur, nam valida & continuata glandulosis jecoris compressio, ex perenni respiratione, sanguinisque advenientis per arterias & porta ramos impulsus, bilis separationem in glandulosis acinis, ejusque propulsionem per pori ramos celebrant, sicuti in cæteris conglomeratis conglobatisque glandulis accidit, & parotidibus, & similibus.* Verum hac in parte doctissimus Vir longe à vero aberrat: nam sanguini ad hepar & vasa biliaria venienti inest quidem materia bilis futura, sed non ipsa bilis: eodem modo sicut alimentis inest quidem materia è qua per specifici fermenti admistionem & ventriculi specificam coctionem parabitur chylus, sed non inest ipse chylus: & chylo inest materia sanguinis, sed non ipse sanguis: & sicut hi humores, chylus & sanguis, per specificas fermentationes & coctiones conficiuntur in destinatis visceribus, ex rebus quæ antea non erant quod postea fiunt (eodem modo sicut in chymia, varia corpora mutantur in metalla, quæ antea non erant metalla, & ex rebus non coloratis simul mistis & effervescentibus suscitatur color novus, qui antea iis non inerat, sicut ex sale tartari albo & spiritu vini pellucido simul mistis suscitatur color rubicundus) ita etiam bilis flava & amara conficitur ex sanguine dulci & succo splenico subacido (quorum neutrum est flavum aut amarum, neutrum est bilis, neutrum in se continet bilem) simul in hepate mistis, & specifico modo fermentatis seu coctis, ejusque maxima pars (aliqua enim tenuissima sanguini admista manens ad cavam & cor deferretur) è reliquo sanguine, qui ineptus erat ut in bilem mutaretur, per acinos glandulosos separatur, & in radices vasorum biliariorum deducitur, sicque paulatim ad porum & vesiculam bilariam progreditur. Atque ita ex his certo concludi potest, in hepate non fieri simplicem aliquam bilis in sanguine præexistentis separationem, sed bilis non præexistentis novam generationem. Quantum ad argumenta illa quæ Malpighius adducit, de præexistentia urinæ in sanguine, aliaque, quæ hic referre nimis longum foret, illa tanti

momenti non sunt, ut istam bilis in sanguine præexistentiam & ex eodem simplicem separationem probare possint, cum non sit par ratio, in superflui feri præexistentis separationem, & necessariæ bilis non præexistentis generationem. Hac de re plura alia videantur *præcedente cap. 10. ante citato.*

Naturalis color bilis flavus est, sapor color, & amarum ac subacris, & substantia fluida. sapor.

Variis tamen de causis hæc tria in statu morbofo mutantur, pro ut scilicet sanguis bene vel male constitutus est, & succus splenicus ad hepar delatus magis minusve falsus, acidus, acris, vel austerus est: hinc enim variæ præternaturales bilis qualitates exsurgunt, & pro harum diversitate, febres, cholera, dysenteria, icteri, colici dolores, aliique varii morbi oriuntur, quos Regnerus de Graef, *lib. de succ. pancreat. Gallice edito*, à solius succi pancreatici vitiis oriri statuit; sed repugnante experientia, nam sectiones cadaverum, talibus morbis extinctorum, sæpe docuerunt, integro pancreate, causam morbi & mortis in hepate, folliculo fellis, aliisque vasis biliaris latuisse, quamvis interdum etiam vitio pancreatis eos morbos oriri posse, negare nolumus. Hinc etiam coloris bilis variæ fiunt mutationes, ut modò pallida, modò crocea, modò rubicunda, modò æruginosa, modò nigricans evadat. Regnerus tamen de Graef, succi splenici defluxum ad hepar non considerans, de his coloribus præternaturalibus longe aliam concepit opinionem: quippe, *lib. citat.* putat illam colorum varietatem bili conferri, non in folliculo aliisque biliaris vasis, sed in intestino duodeno, idque per admistionem succi pancreatici acidi & acris (hoc nonnunquam ita fieri posse negare nolumus, cum bilem per acidorum admistionem sciamus mutare colorem) haud aliter ac si in folliculo ipso nunquam alium quam naturalem flavum colorem obtineret. Verum in sectionibus cadaverum in nosocomio nostro mortuorum sæpe bilem viridissimam, æruginosam, & subnigricantem in ipso fellis folliculo, ante succi pancreatici admistionem, demonstravimus: imò in filiola Domini Vijch, alvi fluxu æruginoso mortua, & post mortem coram pluribus Medicis à me aperta, folliculum felleum circiter ad ovi gallinacei magnitudinem tumidum, & æruginosa bile infarctum invenimus: quod ipsum etiam in aliis quibusdam infantibus simili diarrhœa extinctis observavimus, ut & in aliquibus quibus cholera morbus vitæ finem imposuerat. Ita ut colorum bilis varietas non semper à succi pancreatici admistione in intestinis fiat, sed plerumque in folliculo & vasis biliaris conquiritur, modo à nobis ante præscripto.



Hac de re videantur quædam *precedente*  
*cap. 7.*

*Experimen*  
*ta de colore.*

Quod autem varii in corpore geniti humores bili admisti, pro qualitatibus diversitate, magnam coloris varietatem introducant, liquet ex his experimentis, quæ nuper sumptimus in bile bovis. Hæc mixta cum rebus acidis, ut oleo vitrioli, vel tartari, aut aceto, nonnihil effervescebat, moxque multum incrassescens, subviridem colorem acquirebat: sed in lagena cum istis acidis concussa & agitata, subalbicantem colorem recipiebat. Mixta verò cum aqua cinnamomi simplici, tenuior, magisque flava ac fluida fiebat: cum spiritu vini mixta, mox ab eo rursus separabatur, & inferius subsidebat. Aquæ simplici admista, pauxillum bilis multum aquæ croceo colore tingebat.

*An bilis*  
*per porum*  
*ascendat ad*  
*hepar.*

De motu bilis ante diximus, scilicet quod ex hepate aliqua sui parte cum sanguine ad venam cavam tendat, sed maxima parte ad vasa biliaria, sicque per porum & vesiculam felleam ad intestina, feratur. Hac de re alii longe aliter sentiunt. Vesalius (ex sententia Galeni, 4. de usu part. 4.) scribit, bilem ex poro trahi ad vesiculam, ex hac verò propelli ad intestina. Sed cadit hæc opinio, quia non demonstrat viam per quam bilis ex poro ad vesiculam perveniat; ad quam per vesiculæ ductum ascendere, per eundemque rursus è vesicula ad intestina descendere nequit, cum in nostri corporis partibus, neque detur tractio humorum (ut alibi latius docemus) neque naturalis situs & reditus per eandem viam. Fallopius, lib. 3. observ. cap. 7. putat hepatis bilem ex poro ad vesiculam non ascendere, nisi cum exitus meatus communis in intestina ob aliquam causam est præclusus, sed in hoc casu illud fieri. Verum huic sententiæ obstat cervicis vesicæ rugositas & summa angustia, bilis hac via ascendente ingressum penitus abarcens (de hac angustia supra dictum) adeo ut bilis ex ipsa vesicula in meatum communem pressione depulsa, nullo modo per dicti meatus contrariam pressionem in vesiculam repelli possit. Ab his multum dissentit Jacobus Backius, differt. de corde cap. 3. & 6. qui statuit bilem è cysti recta ferri ad ductum communem, sed huius finem, quo in intestina definit, ita esse comparatum, ut bili exitum non permittat, sed chylo è ventriculo descendenti facile cedat, adscensumque ei ad hepar permittat: imò & ipsi quoque ductui Wirtzungiano pancreatico per idem foramen tum chylum, tum præcipue bilis portionem, communicet. Verum Backii opinionem omnino pessundat & evincit autopsia, qua in vivorum animalium sectionibus ad oculum patet, tam bilem, quam succum pancreaticum, è suis locis erumpere in intestinum

duodenum, nihil verò chyli per illam viam ex intestinis contrario ductu ingredi posse, quod aliis locis latius docemus. Franciscus de le Boë Sylvius, adhuc alium bilis motum introducit, & statuit bilem in folliculo genitam, ad ductum cholidochum communem defluere, ex eoque partim in intestina deferri, partim per porum biliarium in hepar ascendere, & illic sanguini affundi, eumque tenuiorem efficere; nihil verò bilis ex hepate per porum defluere ad intestina: hoc, in additamento ad disput. med. 6. eo probat, quod per flatum immissum transitus pateat è poro in hepar. Egregia verò consequentia; similis atque hæc: per tubulum flatus in ureterem immisus transit in renem, & ulterius in venam emulgentem ac cavam, ergo serum urinosum è vesica fertur per ureterem ad renem. Certè valde alienum foret, si bilis in hepate genita, ex eoque in vesiculam modò deposita, regrederetur per porum in hepar. Huius opinionis falsitas ex plurimis antedictis manifestissime patet; imprimis ex rara illa constitutione vasorum felleorum, paulo ante hoc eodem capite descripta, ejusque efficacia penitus dissipatur per experimentum oculatissimi Malpighii, quod describit, lib. de hep. cap. 7. In se, inquit, paucorum mensium, ubi insigniter prominet bilis vesica, huius cystis collum filo innodavi, eamque vulnere medio exinanivi: mox ligatura extremum cholidochi, ubi in intestinum biat, coercui: deinde, superviente adhuc per insigne aliquod temporis spatium eodem animali, turgentem reperi interceptum biliarium porum, portionemque cholidochi vel communis ductus: & ut spem omnem à cystis opere in separanda bile eximerem, facto in ejus collo arcto vinculo, cystim ipsam recisam projecit: & tamen eandem subsequi in excavatis poris ab affluente bile turgentiam expertus sum, contentam insuper in huiusmodi turgentibus ductibus bilem digito sursum abigere tentavi, sed ilicò cum impetu ed rediit, unde, nisi summa vi, repulsa est. Paulo post addit: Certum est ex multis repetita observatione, ligata extremitate cystici meatus, ita ut ne minimum quidem substantia cystis ejusque colli maneat ultra ligaturam, sed solus ductus communis & biliaris porus recta excurrat via versus intestina; facta insuper ligaturâ prope jejunum, insignem bilis quantitatem recolligi, & evacuari medio inflato vulnere ultra ligaturam, qua pluries laxari potest, ut affatim repletus biliaris porus exinanitur. Huic experimento adjungi possunt tres quatuorve observationes Riolani, anthropogr. lib. 2. cap. 22. descriptæ, ex quibus luce clarius patet, nunquam bilem ex folliculo effluentem ascendere per porum biliarium ad hepar; sed nullam sæpe bilem ex folliculo descendere, atque interim copiosissimam



lissimam ex hepate per porum defluere ad intestina, in iisque, si pravis qualitatibus prædita sit, diarrhoeam, dysenteriam, choleram, gravia tormina, aliaque mala producere.

Usus bilis.

De usu bilis hætenus magnum fuit dubium, eaque de re maxime discordes sunt Doctorum sententiæ. Aristoteles illam tanquam merum & noxium excrementum à sanguine separari existimat, ejus opinionem multi sequuntur: atque hinc fortè est, quod Bauhinus, *anat. lib. 1. cap. 45.* dubitet an bilis in vesicula collectio ad vitam necessaria sit, cum veteres vitæ diuturnioris causam in vesiculæ fellis vacuitatem retulerint, argumento à cervis deducto, qui felle carent, & diu vivunt. Haly Abbas, & Avicenna tradunt illam hepar calefacere, corroborare, ejusque coctionem juvare. Zirbus illam hepar aliasque partes à putredine defendere scribit: quæ opinio licet irrideatur à Vesalio, non tamen displicet Riolo. Helmontius illam hepatis & to-

tius sanguinis balsamum esse dicit. Glissonius illam non tantum hepar à putredine præservare, verum etiam illius obstructions prævenire, & sanguinem depurare, ejusque coagulationem impedire tradit. Vesslingius illum chylum quoque à putredine tueri refert. Plurimi neoterici, ex Galeni sententia, illam solis fœcibus intestinorum excernendis destinant, quas ab ea fluxiles fieri, refert Bartholinus. Atque ita de nobilis hujus succi usu omnes dubitarunt, qui in nemine non invenitur, & sine quo vivere nemo diu potest, de quo scribit Fernelius, *lib. 6. pathol. cap. 5.* non paucos è vivis ereptos fuisse, in quibus non alia interitus causa comparuit, quam quod folliculus bile omnino exhaustus esset.

Manifestum igitur est, bilem longe nobiliorem usum habere, quam ei hætenus à Medicis & Philosophis adscriptus est. Hujus usus non est alius, quam ut inserviat fermentationi, qua de re latius agemus *cap. 17.*

## CAPUT XVI.

## De Liene.



**L**ien, sive Splen, σπλήν Græcis dictus, est pars organica, seu viscus in sinistro hypochondrio, sub diaphragmate, inter ventriculum & costas, situm.

Rarus fuit.

Rarissimum est, imò prodigiosum, testibus Aristotele & Plinio, lienem cum hepate locum permutare, ut hoc in sinistro, ille in dextro sit hypochondrio, quod tamen à Cornelio Gemma & Talentonio fuit observatum: cujus rarissimum casum describit Cattierus, *observat. 17. Petro Borello communicat*, atque etiam duas tresve historias refert Bartholinus, *observat. anat. rarar. cent. 2. histor.* Rarissimum etiam est lienem omnino deesse, quod tamen se in muliere quendam vidisse, refert Hollerius, *inter rar. num. 5.* & in Ortelio compertum fuisse, dictum *precedente cap. 14.* Andreas Laurentius quoque meminit cadaveris Lutetiae dissecti, sine liene inventi, in quo splenicus ramus in exiguum corpus glandulosum desinebat. Sic etiam Kerckringius, *in suis observat. anat.* scribit se in binis fœtibus Amstelodami dissectis, observasse, lienem plane defuisse. In multis brutis illum deesse testatur Aristoteles, *lib. 3. de part. anim. cap. 5.* Hepar, inquit, habent omnia sanguinea, lienem non habent omnia. Et ejusdem *lib. cap. 24.* dicit: Lienem duntaxat habent animalia perfectissima. Sic etiam Riolutus, *anthropogr. lib. 2. cap. 23.* ex mente

Defectus lienis.

Aristotelis ait: *Animalia quæ nullis aut exiguis pulmonibus prædita sunt, nullum aut exiguum lienem possident.* Entius, in *apolog.* scribit in plurimis avibus nullum lienem deprehendi.

In hominibus communiter unicus est, huncque numerum rarissime excedit. Cabrolus tamen, *observat. 15.* nec non Posthius, & Dominicus de Marchettis, duos invenerunt: Fallopius verò, in *observat.* tres lienes vidit. In canibus subinde duo, rarius tres inveniuntur, magnitudine inæquales, è quibus singulis vas in ramum splenicum extenditur. Hoc ipsum fortasse in aliis nonnullis animalibus etiam contingit: nam Aristoteles, *lib. 4. de gener. animal. cap. 4.* scribit, nonnullis brutis duplicem esse lienem, nonnulla etiam liene prorsus destitui.

Parte convexa diaphragmati non firmiter, sicut hepar, sed superficialiter, nec non reni sinistro connectitur per tenues membranaceas fibrillas à peritonæo enatas (mense Novembri, anni 1668. adeo firmam ejus connexionem cum diaphragmate, rene sinistro, & hepatis sinistro lobo eo usque extenso, invenimus, & publice demonstravimus, ut vix sine dilaceratione connexio dissolvi posset: sed hoc rarissime contingit) Sima verò seu depressa parte adhæret omento & vicinis partibus; sicque ligatus, in corpore bene habito ultra infimam costam non descendit: at relaxatis ligamen-

Numerus.

Connexio.

ligamentis humiliore loco sentitur, cum magno valetudinis incommodo: iisdem verò disruptis, nonnunquam in hypogastrium delabi visus est, quod Cabrolus in nobili viro contigisse notavit, cui lien per totam ventris cavitatem natabat: & à Riolo quoque visum fuit in muliere Parisiensi, in qua lien supra uterum subsederat, & Medicos per biennium molæ specie fefellerat, cum tandem fato defunctæ cadavere aperto, dicta tumoris & mortis causa inventa fuerit à liene delapso producta.

Magnitudo.

Lienes magni.

Magnitudo ejus in hominibus diversa est, pro corporum & constitutionum diversitate. Plerumque longitudinem habet fere sex digitorum transversorum, latitudinem trium, crassitiem pollicis. In morbois tamen corporibus interdum enormem acquirit magnitudinem, ita ut ejus protuberantia foris extra costas sentiri & videri possit. Qui humiditas regiones incolunt, & aquas paludosas bibunt, magnos lienes habere solent. Lindanus refert, Frisiorum vulgus, quod pro potu quotidiano utitur lacte ebutyrato acido, plerumque magnos habere lienes. Anno 1657. prosecui cadaver, in quo lienem quadratum ac durum, æquantem capitis humani magnitudinem, invenimus. Fernelius scribit, aliquando visum fuisse lienem, qui mole & magnitudine sua jecur superabat. Wepferus in cadavere nobilissimæ sceminæ lienem invenit, qui longitudine æquabat quinque palmas transversas, latitudine quatuor, crassitie unum cum dimidia, & erat ponderis librarum sex civilium, sicque superabat magnitudinem hepatis. Aërius, lib. 7. cap. 10. & 16. scribit hoc viscus in lienosis nonnunquam longitudine sua usque ad inguem pervenire, & latitudine jecur contingere. Hujusmodi magnos lienes se vidisse referunt, Vesalius, lib. 5. anat. cap. 9. & Marcellus Donatus, hist. med. mirab. lib. 6. cap. 3. Talem quoque annotavit Cabrolus, observat. 9. qui pendebat libras quinque. Multo tamen majores fuerunt illi lienes, de quibus scribit Columbus, anat. lib. 15. qui singuli excedebant viginti librarum pondus. Nec minor ille, de quo scribit Jo. Schenckius, observat. lib. 3. ex Georgio Gamero, qui pendebat libras viginti tres. Sed tanta tamque enormis magnitudo rara est. Interim quo viscus hoc præter naturam majus est, eo pejus degit homo, ejusque corpus magis extenuatur, quia ab eo non suppeditatur materia congrua ad fermentum conveniens in hepate conficiendum, quo destitutus sanguis, debito modo non attenuatur & perficitur, sed acris, acidus, crassus, aliove modo ad partium nutritionem inutilis relinquitur; atque hinc etiam Stomacacem, seu scorbutum enasci, primus tradidit Hippocrates, lib. 2. poret. his verbis: *Gingiva*

*vitiata & ora graveolentia his sunt, quibus splenes magni: quibus verò splenes magnos habentibus sanguis prorumpit, nec os olet, horum tibia prava ulcera habent, & cicatrices nigras.*

Spigelius observavit eos qui amplas habent venas, habere lienes majores, atque ideo macilentos facilius quam pingues, in tumidos lienes incidere.

Rarissime magnitudo lienis naturali minor est, cujus tamen nonnulla exempla me legisse memini. 1. Vidus Vidius junior, lib. 10. de curat. morb. cap. 10. in viri admodum cachectici cadavere, invenit lienem magnitudinis ovi columbini, fere ad lapidis duritiem compactum. 2. Salmuth. cent. 2. obs. 21. in scemina Lipsiensi parturiente extincta, optimæ alioqui sanitatis dum viveret, lienem adeo parvum invenit, ut vix pollicem majorem adæquaret. 3. Riolanus refert Thuani, historici, lienem vix unciam ponderasse. 4. Conringius scribit in Luxenburgia principe lienis duntaxat vestigium apparuisse.

Lienes parvi.

Figura ejus oblonga est, instar linguæ bovis (hinc viscus linguosum nonnullis dicitur, præcipue quia in bove, cane, multisque aliis brutis illam figuram non male representat) interiore facie aliquantum sinuosa, exteriore gibbosa. In homine tamen magna figuræ diversitas multoties reperitur, quippe in quibusdam triangularis, in aliis gibbosa, quadrata, rotunda, vel acuminata, in nonnullis in lobos distinctus invenitur. Summa & crassior ejus pars Hippocrati & Ruffo caput, tenuior verò cauda appellatur.

Figura.

Color in foetu rubeus, in adultis ex atro purpureus, in proventa ætate plumbeus, vel sublividus existit. Spigelius tamen in adultis nonnunquam vidit, & in theatro demonstravit, lienem rubedine jecori non cessasse: quod ipsum etiam observarunt Vesalius, Bauhinus, & Conringius. Causa autem varietatis coloris procedit à varietate victus, & mutatione temperamenti ac caloris, per hæc enim fit magna humorum totius corporis, atque hinc etiam eorum qui ad lienem feruntur, mutatio, & ex his coloris varietas.

Color.

Duplici circumdatur membrana: una exteriore à peritonæo: altera tenui propria, ab exteriore membrana vasorum lienem ingredientium pronata, & eleganti ac miræ fibrarum implicatione contexta. Hæc tunica seu membranae arterias, venas, & nervos habent ab iis quæ interiorem substantiam pervadunt.

Membranae.

Malpighius, lib. de liene cap. 1. interioris membranae miram duritiem (nobis tamen nondum visam) annotavit. *Membranam istam ossæ fieri, à pluribus, inquit, observatum, & Boschius ita induratum versus abdominis*

abdominis musculos vidit, ut scirrhum in ipsa subesse suspicaretur. Non raro, in ovibus præcipue, concretos calculos ex gypsea materia, vel melicerides, aliosque tumores observavi, ex varia sorte eructata ab extremitatibus vasorum concrecente materia. Sequenti capite, scribit, se ipsum semel in bove membranam illam cartilagineam vidisse, & illud ipsum etiam à Spigelio observatum fuisse.

Vasa lymphatica.

Inter utramque autem membranam excurrunt lymphatica vasa copiosa, instar retis cujusdam, multis valvulis donata, quæ, ex observatione Malpighii, liquorem subflavum aut subrufum (ex aliorum verò & mea, observatione lymphidum) continent, & conspicuis viis per omentum deductis, in receptaculum chyli eructant. Oriuntur autem ex multis minimis glandulis conglobatis, in liene subsistentibus.

Fibra.

Fibras obtinet innumeras, tenues, & validas, ex filamentis compositas, miro artificio sibi invicem intertextas, nulla cavitate donatas. Glissonius quidem cavitatem aliquam iis adscribit, sed eo errore seductus, quod putaverit illas in vehendo succo alimentario nervis auxilium ferre. Malpighius de earum cavitate totus dubitans, fatetur se eam percipere non potuisse, sed interim tamen sagacioribus & felicioribus ingeniis illam rem determinandam relinquere. Alii minus accurati inspectores, putarunt illas fibras esse contextum minimorum sanguiferorum vasculorum.

Vasa.

Præter supra dicta vasa lymphatica inter tunicas conspicua, recipit etiam alia vasa, scilicet arterias, venas, & nervos, per totum ejus corpus dispersa.

Arteria.

Arteriis irrigatur duabus (has Malpighius observavit in bove, & ove, unico, at in homine, cane, equo, aliisque multis, animalibus, tribus, quatuorve ramis parenchyma lienis subintrare) una ad elationem, altera ad dimissioem partem ingrediente. Hæ frequenter à cœliacæ sinistræ ramo, quem Arteriam splenicam appellant; interdum à ramo quodam ex ipso aortæ trunco exeunte, & flexuoso ductu secundum pancreatis latus ad lienem procedente, deducuntur, atque in mille ramulos fissæ per eum disseminantur. Per has arterias sanguis impellitur, cui si non detur satis liber transitus in venarum radices & ramum splenicum, atque hinc in liene nimis effervescat, pulsatio in liene non minus percipitur, quam in aliis arteriis, cujus stupendam historiam annotavit Tulpus, lib. 2. observat. 28. de pulsatione lienis quæ ad triginta pedes ab adstantibus audiebatur.

Vena.

Ramus splenicus.

Venam magnam ex summa parte emittit, quam Ramum Splenicum appellant, qui ramus numerosis plurimisque radicibus

parenchymati inhæret, ex quibus sensim coeuntibus, modò tres, modò plures majores rami efformantur, mox extra lienem in unum istum ramum splenicum concurrentes, qui transversim sub ventriculo per omenti superiora ad venam portæ excurrit, in eamque se exonerat.

Highmorus pauciores venas, easque non longe in viscus excurrentes, agnoscit, sed vascula copiosa sanguifera conspicua, dicit esse solos arteriarum surculos per totum viscus dispersos, putatque Anatomicos deceptos fuisse, & fibras pro venis habuisse. Verum hoc eximie magnitudinis viscus, ratione sui muneris, non potest non plurima habere utriusque generis sanguifera vascula, quæ licet vix perfecte distincta demonstrari queant, mente tamen satis percipi possunt, (ea Conringius, de sang. cap. 13. dicit in viscere colliquato bene conspici) nam si plurimæ sint arteriæ sanguinem in viscus infundentes, necessario etiam plurimæ debent adesse venæ eundem infusum sanguinem rursus assumentes, & in ramum splenicum deferentes, nam alioqui ibi fieret sanguinis restagnatio, hincque visceris tumor & inflammatio.

Valvula.

Idem Highmorus in dictis venis, mox ad exitum è liene, valvulas observavit, à liene foras spectantes, sicque positas, ut è ramo splenico nihil ad lienem, sed ex liene humores in ramum splenicum effluere possint. Hæ valvulæ etsi propter summam tenuitatem difficulter demonstrari queant, statim tamen percipiuntur, simul ac ramus splenicus inflatur, aut ei aqua siphone injicitur, obstant enim quo minus flatus vel aqua in lienem penetrare possint.

Anastomoses.

Bauhinus, Bartholinus, alique nonnulli, scribunt in interiore viscere ramulos arteriarum per anastomoses coire cum finibus venarum, atque ita sanguinem ab iis in has transfundi, sicque ad ramum splenicum defluere. Hoc tamen minus verosimile videtur, cum sanguis in tali per sola vasa transitu seu transfusione non possit consequi requisitam subacidam fermentativam qualitatem, atque hinc necesse sit, ut illa sanguinis transvasatio fiat per intercedens aliquod medium (sicut etiam in hepate contingit) de quo paulo inferius, actionem lienis explicaturi, loquemur. Interim tamen una insignis anastomosis notanda venit (rarò duæ sunt) qua truncus arteriæ, ante ingressum in lienem, coit cum ramo splenico: quæ eum in finem concessa videtur, partim ut sanguis arteriosus sui admistione humores è liene in ramum splenicum delatos fluxibiliores faceret, citiusque propelleret: partim ut redundans & superflua sanguinis copia, quæ propter viarum angustias fortè per lienem non satis citò transire

L

fire

sire potest, per hanc anastomosin defluat in ramum splenicum.

*Vas breve.*

Illum autem ramum splenicum non longè, aut potius mox ab ejus exitu, & sæpe in homine, eo ipso, quo è liene exit, loco (in brutis paulo longius) ingreditur **Vas venosum breve**, cujus radices ventriculo inhærentes, circa illius fundum concurrunt, rarius in unum, frequentius in duos pluresve ductus, atque sic modò unum, modò duo vel tria vasa brevia constituuntur, quæ omnia in ramum splenicum excurrunt. In canibus, aliisque variis brutis rarò unum frequenter plura vasa brevia in dictum ramum splenicum descendunt.

*Vene hæmorrhoidales internæ.*

Nonnunquam ab ani parte interiore vena quædam sursum ascendens, ramum splenicum inferiore parte ingreditur, in eumque sanguinem suum effundit. Hujus radices ano interiore inhærentes, ibi **Venæ hæmorrhoidales internæ** nominantur, quarum tamen caudex multo frequentius in venam mesentericam sinistram inferitur.

Hæc vasa, arteriæ scilicet & venæ, ante ingressum geminam habent tunicam, quarum exteriorem, cum ingrediuntur, exunt, & lieni proximè circumjiciunt, & sic ex illa conficitur propria lienis tunica.

*Nullus chylus venit ad lienem.*

Præter dicta vasa manifestos humores ferentia, nonnulli etiam lacteorum mentionem fecerunt. Sed omnino nulla vasa lactea ad lienem excurrere certissimum est, nam si chylus ad illum delatus fuisset, ille mox ab aciditate lienosi liquoris coagulationem incurrisset: atque hinc errant etiam illi, qui à vena portæ per ramum splenicum chyli partem ad lienem ascendere putant, sicut id olim à veteribus, atque etiam nuper ab Entio, *apolog. artic. 23.* statutum fuit; sed per illum ramum, tam sanguis à ventriculi nutritione residuus, quam illi qui peculiari modo in liene ex coctus est, celeriter deferretur ad venam portæ & hepar. Hoc in vivorum animalium sectionibus, injectâ huic ramo ligaturâ, clarissimè patet: mox enim fit intumescencia inter ligaturam & lienem, detumescencia verò versus portæ venam. Quæ ligatura si in canibus vivis injiciatur prope, ante vasis brevis in ramum splenicum ingressum, tunc fit intumescencia inter lienem & ligaturam, altera verò parte detumescencia; quod certum exhibet indicium, nullum etiam chylum tenuiorem (quod tamen inculcat Regius) per vas venosum breve, aliave vasa gastrica, ex ventriculo ad lienem deferri, ut ibi in fermentaceam materiam mutetur, sed per vas illud sanguinem venosum solum à ventriculo descendere, & per ramum splenicum recta ad portam profluere. Præterea, si

dicta ligatura ipsi vasi venoso brevi injiciatur, tunc adhuc aliud docemur, quippe statim fit intumescencia inter ligaturam, & ventriculum, sed versus ramum splenicum detumescencia, qua manifestum fit, sanguinem à ventriculi venis descendere, ut modò dictum, nullum verò succum melancholicum, aliumve acidum, per hanc viam ad ventriculum ascendere, in eumque ad famem excitandam eructari, sicut veteres id fieri tradiderunt. Denique si supra illam ligaturam vas breve, facta incisione, aperiatur, & effluens liquor cochleari excipiat, hunc purum venosum sanguinem esse, nec ei quidquam omnino chyli admisceri, eumque neque in substantia, neque in colore, quidquam ab alio venoso sanguine differre, quilibet oculis suis videre poterit, sive eum calentem, sive refrigeratum inspiciat. Quod penitus evertit eorum sententiam, qui chyli partem per has vias ad lienem deduci statuunt: quam sententiam supra latius refutavimus *cap. 7.*

Præter modò dicta vasa, lien etiam *Nervi.* recipit binos nervorum ramulos, à sexti paris ramo costali deductos, qui non exteriorem solum tunicam pervadunt, in eaque absumuntur, ut ante hac à multis putatum fuit, verum etiam introrsum pergentes (hic eos, quo lieni proprios sunt, tanto magis grandescere, idque similiter spatio aliquo, postquam lienem jam subiere, ipsis contingere, notat Glissonius) per visceris interiora multiplici ramificatione distribuuntur, qui ramuli sanguifera vascula comitantur, & integuntur communi cum iis involucri, efformato ex propria lienis investiente membrana, quæ in vasorum ingressu introrsum reflexa, ac in tubulum efformata, concomitatur, & quasi in fasciculum comprehendit dictorum vasorum ramificationes.

Glissonius, *anat. hep. cap. 45.* scribit, horum nervulorum fines cum fibris nervosis uniri, sicque ex his in eos infundi liquorem aliquem alimentarem (hunc dicit per lienis parenchyma effusum, primo à fibris istis elici) & illum ex his ad majores nervos deferri, sicque in nervorum plexum glandulis renalibus adstantem traduci, ut inde postmodum, data occasione, vel immediate per nervos sexti paris, vel mediantibus cerebro & medulla spinali, in omnes totius corporis nervos distribuatur, per eosque ad omnes corporis partes feratur. Verum doctissimus Vir hic totus aberrat à viâ. Nam, ut supra dictum, fibræ nullis cavitatibus donatæ sunt, & nervi quoque non habent sufficientes cavitates per quas ullus liquor in liene confectus transire possit, nec quisquam Anatomicorum adeo perspicax fuit, qui unquam in vervis ullum liquorem videre, vel ex illis dissectis unam aliquam

*An alimentarem liquorem deferant.*

aliquam minimam guttulam exprimere potuit. Præterea indubitatum, & ab omnibus Philosophis receptum atque sancitum est, per nervorum invisibiles poros è cerebro & medulla oblongata continue ad omnes partes propelli spiritus animales: an igitur per eosdem invisibiles poros, contrario ductu aut flumine, ex liene ad cerebrum vel ejus medullam ascendet liquor aliquis alimentarius visibilis, spiritibus multo crassior? an sic eodem tempore duo contrarii motus in angustissimis nervorum poris sine impedimento contingent, & succus alimentarius sursum, spiritus verò animalis deorsum feretur? an nervi succum alimentarem ex liene in se recipient, postea non in alias solummodo partes exspuendum, sed in ipsum quoque lienem remittendum? an aliàs minimus aliquis liquor in nervos incidens paralytin pariet, & hic è liene copiosus subintrans nihil incommodi producet? Absurdissima hæc sunt, ac proinde opinio illa omnibus fulcris destituta, necessario concidit: de qua nonnulla alia videantur *lib. 8. cap. 1.*

quare lien  
sit obtusi  
sensus.

Verum hîc fortassis aliquis scrupulum movebit, scilicet, quare lien tot nervorum ramulis donatus, non acuti, sed tantum obtusi sensus sit, cum tamen non solum nervi per se sint acutissimi sensus, sed etiam per spiritus animales omnibus membranosis partibus acutissimum sensum conferant? Fit hoc propterea, quod ab ipsa lienis substantia sub acida (qualis in cocto liene gustu percipitur) ac subaustera, & ab acido fermentaceo succo in eo genito, nervisque circumfuso, continuus stupor illis nervis inducatur: eodem modo sicut rebus acidis & austeris comestis seu masticatis stupor dentibus infertur, unde tunc multo minus, sed obscure tantum sentiunt.

Atque hæc de vasis dicta sufficiant, quorum statum quomodo inspectione accurata in liene bovis invenerit, describit Malpigijs, *lib. de liene, cap. 3.*

Substantia.

Post fibras & vasa, tandem ipsa visceris substantia inspicienda venit, quæ in sano liene duriuscula & firma est, ac quamlibet contrectationem sine læsione perpetitur; at in morbofo sæpe mollior evadit, & facile dissolvitur. Sic in scorbuticis & hypochondriacis, eum multoties adeo mollem post mortem inveni, ut ab imposito leviter digito totus facillime perforaretur, & ab aëre externo facile liquefceret, quamvis alioqui primo intuitu foris in magnitudine & colore nihil alieni præ se ferre videretur. Furem quendam scorbuticum suspendio strangulatum, mense Martio anni 1651. publice profecui, cui substantia lienis (non tamen præter modum magni, aut male colorati) valde mollis erat, & eo tempore, satis tunc frigido, intra bidui

Observatio.

spatium ab aëre externo sponte in spumosum liquorem obscure rubrum (instar fœcis vini rubri) dissolvebatur, adeoque liquecebat, ut præter multas fibrillas & tenuia vascula, fere nihil solidi intra membranam ejus contineri videretur. Ex quo liquet multorum error, qui in scorbutico, hypochondriaca affectione, febre quartana, aliisve à splene oriundis morbis, semper culpant hujus visceris obstructionem, duritiem, aut tumorem, cum tamen plerumque nullum hujusmodi ejus vitium (et si interdum etiam adesse possit) in his affectionibus conspiciatur, sed sola specifica dyscrasia, seu substantiæ peculiaris dispositio à naturali recedens (cujus ratione fermentaceam materiam nimis, acrem, crudam, acidam, debilem, aut fixam, aliove modo male dispositam conficit) dictorum affectionum causa sit. Non negamus tamen in statu præternaturali illum sæpe magnam & admirandam scyrrosam duritiem, instar ligni, foris perceptibilem, conquirere: imò Georgius Queccius, medicus Norimbergensis, & Jo. Theod. Schenckius, viderunt lienes media sui parte substantia cartilaginea incrustatas.

Hanc substantiam hepatis substantiæ similem esse, hocque viscus eodem cum illo munere fungi, atque illius ægrotantis officium ab hoc solo interdum peragi, multi prædicarunt. Verum utriusque partis dissimilitudo satis innotescit, cum ex colore, tum ex sapore. Color enim, qui in hepate crudo rubicundus & totus sanguineus est, ille in liene est lividus, seu plumbeus: qui in cocto seu elixato hepate nonnihil subflavus est, ille in elixato liene fœcis vini rubri similis est. Sapor hepatis cocti aliquantum ex amariusculo subdulcis est: sapor verò lienis cocti quid subacidi ac subausteri præ se fert.

An sit substantia hepatis similis.

Communiter traditur, substantiam lienis esse concretum quoddam corpus sanguineum, fulcimen præbens vasis per illum decurrentibus, quod levi attritione facile in fluorem dissolvitur. Verum hanc opinionem penitus destruit Malpigijs, qui hujus visceris mysteria microscopijs accuratissime perscrutatus, scribit, *lib. de liene cap. 4.* totum lienis corpus esse membranarum congeriem, in cellulas & concamerationes efformatam seu distinctam, ac non esse corpus tam densum, ut ante hac à plurimis descriptum est, sed rarum. Cognitionem istam singulari artificio consecutus est: lienem scilicet per arteriam & ramum splenicum ad magnam intumescentiam inflando, & sic inflatum exsiccando, ita enim dicit conspici posse, totam lienis molem ex membranis finibus seu cellulis, tanquam favis quibusdam, esse coagmentatam. Illarum autem cellularum ortum, variam-

An sit sanguinea.

que ac mirabilem figurationem, ibidem legendam, eleganter & lato sermone describit.

Idem Malpigijs in substantia lienis primus observavit multas glandulas notatu dignas, de quibus, citato lib. cap. 5. ita scribit. In splene, inquit, glandularum, vel majorum vesicularum sive sacculorum racemi copiosissimi observantur per totum lienem dispersi, qui uva botrum graphice amulantur. Minima hæc glandula figuram habent ovalem, & magnitudine parum distant à renum glandulis: colorem habent, ut perpetuo observavi, album, & licet lienis sanguinea vasa injecto atramento turgant, & circa ipsas ludant, hæc tamen eundem servant colorem. Earum substantia quasi membranæ videtur, sed mollis, facileque friabilis: ejus cavitas, ob exiguitatem, oculorum aciem effugit, conjecturâ autem attingitur, dum scissa in se ipsas concidere videntur. Numero copiosissima & fere innumera sunt, & in descriptis universi lienis cellulis, ubi vulgariter ejusdem parenchyma statuitur, mire locantur, pendentque à propaginibus capsula, sive à fibris ab ipsa ortis, & consequenter ab extremis arteriarum & nervorum finibus: quin & arteriarum fines, capreolorum instar, vel serpentis hedera, circa ipsas producuntur, quod in recenti adhuc liene, denigratis arteriis, observatur. Appenduntur ut plurimum racematim, cum septem vel octo singulis quique botrus conglobetur. Non aque facile sese produnt in quocunque animalium liene: imò sola lienis laceratione innotescunt in bove, ove, capra, &c. levi facta cultro abrasione, vel longâ communi aqua ablutione patent. In homine difficilius emergunt: si tamen ex morbo universum glandularum genus turgat, manifestiores redduntur, auctâ ipsarum magnitudine, ut in defuncta puella observavi, in qua lien globulis conspicuus, racematim dispersis, totus scatebat. Porro, de usu glandularum, & qualis humorum separatio in iis fiat, ea de re lato sermone describit suam opinionem, ibidem videndam.

Profectò multum debemus oculatissimo Malpigio, qui suis microscopiis maximas cognitionis lienis tenebras tam splendide discussit, ut usus ejus, antehac dubius, jam planè innotescat.

Rara in liene reperta.

In liene nonnunquam rara quædam observata fuerunt. Vesalius, lib. 19. de corp. fabric. cap. 9. scribit se in cujusdam liene, satis exiguo, sed impense duro, invenisse ad partem gibbam adipem adnatum, instar candidi durissimique lapidis concretum. Jo. Schenckius, observat. lib. 3. refert in cadavere Domini Spoletani repertum fuisse lienem plane exsuccum, & omni pulpa carentem, marsupii in modum inanem, & sinistris costis affixum. Turneiserus, in exam. urina, scribit se in nobilissima cujusdam mulieris liene invenisse lapidem,

magnitudinis castanæ, mollitiei alabastri, ponderis unciarum duarum & quinque drachmarum, quasi ex laminis instar putaminum ovorum simul involutis concretum. Sic etiam Fallopius, interdum calculos in liene gigni, notavit. Nos anno 1667. mense Januario, plurimis spectantibus, secumimus mulierem, cujus lien justæ quidem magnitudinis, & convenientis coloris ac durtiei reperiatur, sed parte anteriore, qua versus ventriculum spectabat, observavimus substantiam quandam albam, à reliqua visceris substantia longe differentem, duriusculam ac firmam, quæ digitorum frictione durior vix dissolvebatur, magnitudinis ovi anserini, & visceri non extrinsecus adnatam, neque ab eo extrorsum protuberantem, sed cum eo planè & bene continuam, ejusque pars existentem, etsi cum reliquis visceris particulis nullam omnino similitudinem haberet, neque etiam adeps aut glandula dici posset, utpote à quarum substantia longe differbat.

De temperie lienis nonnulli quærent, Temperamentum. fit ne pars calida, an frigida appellanda? Respondendum, debere frigidam appellari; non quod re vera frigida sit, verum quod minus calida sit corde, hepate, multisque aliis visceribus: ad hæc, quia sanguinem arteriosum calidum in eum influentem refrigerat, & subacidum facit, ejusque sulphureas calidas particulas figit & obtundit, omnique volatilitate exuit.

De actione seu officio lienis sunt variaz alio. multumque diversæ Doctorum sententiæ.

Nullam omnino actionem ei tribuunt Erasistratus, & Rufus Ephesius. Aristoteles, lib. 3. de part. animal. eum per accidens necessarium esse statuit, sicut alvi & vesicæ excrementa. Hippocrates, lib. de morb. & lib. de genitura, aliisque variis locis, lienem aquæ fontem vocat. Hinc fortè dicit Whartonus, adenograph. cap. 4. eum è sanguine liquorem aqueum prolicere, sed vix sciri posse in quem finem hunc liquorem eliciat, nisi in nervorum nutritionem (hanc sententiam paulo ante refutavimus) atque ibidem multa alia parvi momenti de usu lienis adscribit.

Multi, ex Galeni aliorumque antiquorum sententia, putarunt ejus actionem esse fœculentam seu melancholicam chyli partem separare, eamque per ramum splenicum attrahere, ac in se colligere (sicut vesicula fellea flavam bilem recipit) & aliquantulum excoquere, eamque deinde rursus, partim per vas venosum brevè in ventriculum, ad famem excitandam; partim per ramum splenicum ad intestina, & per venam hæmorrhoidalem ad podicem deponere. Quam opinionem multis, & fere iisdem rationibus, refutarunt Bauhinus, Riolaus, & Bartholinus, quibus tamen

An melancholicam & chylo separaret.



tamen omnibus argumentis ad ejus demolitionem opus non fuisset, cum hæc tria eam funditus evertant. 1. Quod in liene nulla sit ampla cavitas, qua tale excrementum recondi possit. 2. Quod nulla via sit, per quam illud rursus commode evacuari queat, cum per eundem ramum splenicum modò ingredi, modò egredi minimè debeat aut possit. 3. Quod in animali vivo, facta rami splenici, vasis venosi brevis, & venæ hæmorrhoidalis ligatura, plane contrarium demonstraret, ut supra docuimus, quæ sola demonstratio ad istius perversæ opinionis destructionem sufficit.

An sanguinem conficiat.

Vesalius, Platerus, Carolus Pifo, Bauhinus, Spigelius, Jessenus, alique multi, statuerunt lienem esse viscus sanguificans, non minus quam hepar, eumque, cum Aristotele, *hepar vicarium* appellarunt, quod hepate male affecto hoc viscus ejus sanguificandi munere fungi existimarent, eo imprimis argumento huc inducti, quod lien in foetu rubicundum colorem habeat, hepatis æqualem, & quod liene laborante sanguificatio lædatur. Istum autem sanguinem in liene confectum nutritioni viscerum in abdomine contentorum inservire putarunt, sicut hepatis sanguinem nutritioni reliquarum partium. Sanguinem hunc lienosum confici tradiderunt ex chylo aquoso fœculento, quem nonnulli per vasa lactea eo deferri, alii è ventriculo per vas venosum breve in eum defluere, alii per ramum splenicum ab eo attrahi existimaverunt. Verum hanc sententiam multa in præcedentibus modò dicta satis evertunt, cum sanguificatio neque ab hepate, neque à liene, sed à solo corde perficiatur: cum è liene nulla vasa exeant per quæ aliquis sanguis ad nutritionem partium in abdomine sitarum commode defluere posset: cum etiam non dentur viæ chylum ad lienem deferentes, utpote ad quem nulla vasa lactea excurrunt, nec per vas venosum breve (quod non in lienem, sed in ramum splenicum extra lienem inseritur) à ventriculo quidquam defertur: neque etiam per ramum splenicum ulla chyli attractio versus lienem fiat, ut antè probatum. Hanc accessus chyli difficultatem animadvertens Vesslingius, confugit ad poros ventriculi invisibiles, per quos aquosum chylum in lienem ferri tradit, sed nullis rationibus probat. Denique hanc sententiam penitus destruit circulatorius sanguinis motus, quo patet nullum sanguinem ad partes pro nutritione deferri ab hepate aut liene per venas, nec propter obstantes valvulas deferri ullo modo posse, sed totum è solo corde per arterias ad omnes partes propelli.

An cordi sanguinem præparet.

Æmilius Parisanus, *subtil. lib. 6. exercit. 2. cap. 3.* putat, ex sententia Ulmi, ex optima chyli parte lienem pro sinistro cordis

ventriculo sanguinem arteriosum præparare, eumque per arterias in aortam, ex hacque in sinistrum cordis ventriculum deferri. Quod commentum merito irridet & explodit Entius, *apolog. artic. 23.* Galenus, *de attrab. 7.* scribit quosdam Erisistrateos putasse omnem chylum ad lienem deferri, atque ab eo in sanguinem rudiorum efformari pro hepate. Verum utraque hæc sententia adeo absurda est, ut si viæ solummodo & sanguinis motus considerentur, nulla ulteriore refutatione indigeant.

Walæus cum animadvertisset per ramum splenicum non fieri ullum humorum motum ad lienem, nec ulla eo pervenire vasa lactea, bene conclusit, materiam quæ in liene coquitur, esse sanguinem arteriosum, per coeliacam ei infusum: sed in eo rursus erravit, quod judicaverit lienem solummodo acidam istius sanguinis partem ad se allicere, reliquam non, quasi lien judicio aliquo præditus, illâ magis delectaretur, quam altera dulci, eamque ab hac internoscere, imò & separare posset. Ad hæc, non consideravit in sanguine arterioso nullas esse actu acidas particulas, sed ex magis falsis ejus particulis in liene acidas particulas generari, quæ sanguini venoso affusæ, ei pro fermento sunt, cujus levissima aciditas cum sulphureis particulis in hepate specifico modo excocta, in fermentum biliosum evadit, quod per effervescentiam illam quæ in corde fit, rursus perit & evanescit.

An acidam sanguinis partem alliciat.

Glissonius, *anat. hep. cap. 45.* lienis primariam actionem esse scribit, conficere liquorem alimentarem ad nervorum nutritionem, quam opinionem paulo ante rejecimus, cum de nervis lienis ageremus.

An nervos nutriet.

Quantum ad Helmontii opinionem, qui animæ sensitivæ sedem in liene ponit, illa omni refutatione indigna est.

An sit animæ sensitivæ sedes.

Accuratissimus maximeque industrius Malpighius, de actione usuve lienis admodum dubius existens, ut minus in incerto fluctuaret, & præ cæteris aliquid certius constitueret, *lib. de liene, cap. 6.* ingeniosum experimentum tentare voluit, sperans se per illud aliquid luminis in hac obscuritate inventurum. In cane, inquit, adhuc tenello, excitato in sinistro hypochondrio vulnere, erumpentis lienis & appensi omenti sanguinea vasa ad lienis portæ filo innodata sunt: mox repositis in pristinum singulis, consuto peritoneo & musculis, & laxè etiam unita cute, brevi dierum spatio curatum est vulnus: paucas post hebdomadas ad pristina obeunda munia latibundus convaleuit, ita ut quo temporis spatio vixit, nullum læsæ sanitatis vitium observaretur. Voracior redditus, prævide cibum capiebat, ossa & cujuscunque naturæ alimenta vorabat. In ex cretis illasus natura statim servabatur. Illud unum animadverti, eum indeficienter, scilicet, plurimum, & frequen-

Malpighii experimentum.



frequenter mingere, quod licet familiare sit ceteris canibus, in hoc tamen excedere videbatur. Corporis habitus undequaque saluber & pinguis: in ceteris promptitudine & alacritate quadam consimilibus aquabatur. Hoc peculiare in externo corporis habitu deprehendebatur, tumor scilicet dextri hypochondrii, ita ut extrema costa pra ceteris protuberarent. Spe igitur concepta, canis iterum sectioni destinatur. In secto itaque abdomine lien, cujus vasa arcte erant ligata, gracillimus apparuit, ut cum omento complicatus, vix sui vestigium relinqueret, referebat enim exiguum folliculum membranis contextum: sanguinea vasa ad ventriculum, & per omentum copiose dispersa, integre florebant, & sanguine erant referta: ramus splenicus patens, & secundum naturam teges erat, circumaffusa ibi naturali pinguedine. Fecur, prout oculis permittitur, substantia, colore, & vasorum propaginibus optime se habebat; mole tantum excedere dixisses, cum sinistrum etiam hypochondrium ample occuparet. In reliquis, nec in thorace, nec in abdomine, & carnosio genere, quidquam mutilum repertum est: sanguis totus floridus & rubicundus, & ubique fluxilis. Hac sunt quae in cane reperta, ne minimum quidem lucis ad erudiendum lienis usum contulere. Mirum certe quod per ingeniosum illud experimentum nihil certi de lienis usu sciri aut edisci potuerit: hoc tamen eum in finem hic adscribere volui, ut tali modo etiam alios ad similia experimenta incitarem, & sic tandem verus lienis usus, non tantum rationibus doceri, verum etiam demonstrationibus exhiberi possit.

Vera lienis  
actio.

Ex praedictis igitur abunde liquet, quam variae & incertae de officio lienis fuerint plurimorum Doctorum sententiae, ita ut hactenus vix quispiam ejus veram actionem explicaverit: quae nulla alia est, quam materiam subacidam ex sanguine arterioso conficere, e qua cum sulphureis particulis in hepate rursus mixta & specifico modo excocta, sanguinis chylique fermentum biliosum conflat. Quomodo autem ille liquor acidus in eo generetur, non ita facile est explicare. Videtur illud negotium hoc modo procedere. In lienis substantia, quae Naturam subacida est (hoc in liene cocto gustu percipitur) multae continentur glandulae. Sanguis autem per arteriarum fines in minimas istas glandulas infunditur, eique per nervorum, in iisdem desinentium, fines spiritus animales, sed longe minore quantitate, affunduntur, qui sulphureum sanguinis spiritum compescentes, ei levem aliquam aciditatem inducunt; qua donatus, per pressionem circumstantium partium e dictis glandulis propellitur, & a venae splenicæ radicibus absorbetur, atque sic per ramum splenicum defluit ad portam & hepatis. Antequam tamen venarum radices

subeat, videtur in cellulis circumstantibus, quarum substantia acida est, nonnihil subsistere, ut per illam moram in iis aliquam majorem aciditatem conquirit: sicut vinum in vase acetoso subsistens, majorem acidam acrimoniam consequitur.

Hic jam dubium incidit, scilicet, an lien sit viscus magnopere necessarium ad vitam; item an ille possit e corpore humo eximi, seu excindi, & vulnus rursus sanari, sine vitae sanitatisque dispendio? Pro affirmativa parte sese offert auctoritas Plinii, qui, lib. 11. cap. 37. sic dicit. *Ægocephalo avi lienem non esse constat, neque iis qua carent sanguine. Peculiare cursum impedimentum aliquando in eo: quamobrem inuritur laborantibus, & per vulnus etiam exempto, vivere animalia tradunt.* Plinii sententiam practico exemplo probare videtur Trallianus, qui, lib. 8. narrat à se curatum militem, cui tota lienis regio barbaricis ferramentis candentibus ustulata erat. Etiam Bartholinus, cent. 4. anat. rar. histor. 51. Plinii auctoritatem confirmare nititur experientia Fierovanti, gloriantis se cuidam mulieri lienem excidisse, atque ita sanitati restituisse, de qua, propter testes, se dubitare non posse scribit; etsi nullos interea testes fide dignos producat vel citet. Hoc ipsum Fierovanti experimentum citat & admiratur Deusingius, tract. de sang. cap. 79. simulque ex Francisco Rousseto, adducit duorum minorum gentium & obscurorum chirurgorum testimonia, qui se lienes fauciatos & alteratos sectione extirpasse, ægroque feliciter sanasse dixerant: atque his testimonijs certam indubitatamque fidem adhibens, de liene concludit, *Hoc viscus non esse necessarium ad vitam, sed tantum ad felicioram vitam; non tam ad esse, inquit, quam ad bene esse: non ad nutritionem ac conservationem simpliciter, sed ad nutritionem meliorem, utpote ad sanguinis tenuioris, elaborationis, & magis spirituosæ generationem.* Ad hujus sententiae confirmationem etiam præclare facere videtur modò relatum illud experimentum Malpighii, ex ipso auctore exscriptum. Eidem quoque opinioni plurimum favere videtur, novus quidam modus, nuper in Anglia primo inventus, quo lienes e canibus excutantur, vita superstita manente: quemadmodum etiam nos, cum pluribus aliis, à Regnero de Graef sinistri lateris abdomine dissecto, & lienis vasis filo forti seu funiculo bene ligatis, integrum lienem e cane vivo exemptum seu resectum fuisse, & vulnere consolidato canem rursus convaluisse, vidimus, atque hanc ob causam istum canem *Exsplenium* nominavimus. Eo tempore nobis referebat idem accuratissimus prosector R. de Graef, se notasse, quod Angli scriberent, istos canes, quibus exemptus est lien, postmodum semper steriles

An lien  
possit ex-  
cindi, ma-  
nente vita.

steriles manere; atque hinc se istius rei experimentum facere voluisse in cane scæmella, quam, exsecto prius liene, & vulnere sanato, aluit: eam tandem lascivientem cum masculo coisse dicebat, atque ex eo concepisse, & duos catellos peperisse, sicque Anglorum, hac de re observationem refutasse. Hæc omnia docere videntur, hujus visceris non esse magnam necessitatem ad vitam, ut neque actionem tam nobilem quam ei hæctenus adscripta fuit. *Pro negativa parte* stant, non solum veteres, verum etiam Levinus Lemnius, Tobias Knoblochius, Jo. Lindanus, alique innumeri insigniores Medici neoterici, imò ex sex millibus vix unum invenias, qui antedictam opinionem non penitus rejiciat: de qua Cælius Aurelianus, *lib. 2. de morb. chron. cap. 4.* ita scribit: *Decidi, vel auferri lienem, voce quidem dictum, non officio completum accipimus.* Eandem etiam negativam suffulciunt ratio & experientia. *Ratio*: nam summus Protoplastes in nostro corpore nihil creavit frustra, sed omnia viscera, nullo excepto, omnesque partes formatæ & datæ sunt ad aliquem usum necessarium: quis jam mentis compos credat, tam eximium & magnum viscus, quale est lien, & quo omnia animalia sanguinea, paucis exceptis, donantur, frustra & sine aliqua ad vitam necessitate, hominibus & plerisque brutis datum esse? de cujus vero officio & usu, licet nos, in hisce Naturæ tenebris constituti, forte non satis perfecte judicemus, eaque de re acriter disputemus, tamen hoc non tollit ipsius visceris ad vitam necessitatem, utpote quam non solum ejus insignis ac præclara magnitudo, cumque aliis visceribus admirabilis connexio & societas, satis ostendunt, verum etiam ex ejus integritate procedens sanitas, ex ejusque prava constitutione innumeri geniti morbi, quotidie plus satis docent, & quasi digito demonstrant. *Experientia*: quia nunquam quod scio, ab aliquo Medico alicujus auctoritatis aut fidei, visum, auditum, scriptum, vel observatum est, alicui homini lienem fuisse exsectum, vita superstiti manente. Historia Tralliani nihil pro ea sententia probat; quia ille non dicit in suo ægro ipsum lienem fuisse exemptum, vel ustione absumptum, sed duntaxat exteriorē lienis regionem fuisse inustam: quemadmodum interdum in medendis nonnullis cerebri morbis ustiones in partibus externis fiunt, sed ipsum cerebrum tamen non inuritur. Quantum ad Fierovantum, ille fuit empiricus circumforaneus, nullius auctoritatis, & satis exiguæ fidei, qui credulis hominibus quidlibet persuadere studebat, ut apud vulgares magnus Medicus videretur potius, quam esset. De oblectis chirurgis ex Rousseto citatis, illud

ipsum sentiendum est: & nos quoque tales, aliasque mille similes fabellas à sciolis quibusdam gloriosis chirurgis nobis pluries narratas meminimus, quibus tamen nulla fides debebatur. Si res ita se haberet, certè non ab agyrtis & stolidis hujusmodi chirurgis istius testimonia hoc nostro ævo petere necesse foret: jam dudum enim ante multa secula extiterunt myriades clarissimorum Medicorum ac Philosophorum, quælibet Naturæ mysteria accuratissime perscrutantium, quorum, si non omnes, saltem aliqui hac de re aliquid vidissent, observassent, ac notassent. Sed jam tota rei certitudo confirmatur incertissimis obscurorum quorundam hominum testimoniis. Quibus, præter ante dictas, adhuc aliæ tam ponderosæ rationes obstant, ut dicta sententia nullo tali fulcro suffulciri amplius possit. Quippe præter nervos, magna vasa sanguifera hominis lienem ingrediuntur (duæ scilicet arteriæ splenicæ) & egrediuntur (variæ venæ in unum ramum splenicum concurrentes) quorum sola resectio sufficiens est, quæ hominem ilico ingenti hæmorrhagia occidat: verosimile enim non est, hæc vasa ullis injectis vinculis, aliisque astringentibus remediis ita constringi posse, ut hæmorrhagiam gravem non faciant: vel si forte vinculis ligentur (quod in hominis hac parte abdita commode fieri non posse, omnibus notum est, qui visceris situm, connexionem, & constitutionem probe noverunt) tunc tamen non diu post, vinculis putrefactis, gangrænam, aut lethalem hæmorrhagiam subsequi necesse erit. Præterea, ego ipsemet in castris non semel lienes gladiis aut hastis vulneratos, sed cum iis neminem, quantacunque in curando à me & chirurgis adhiberetur diligentia, servatum fuisse vidi. Si sola, & sæpe levia vulnera hujus visceris lethalia sint; imò si sola ejus intemperies, obstructio, aliisque morbus totum corpus graviter affligere, quinetiam occidere potest; quanto lethalior erit, quantoque magis corpus vitamque prosternet ejus totalis ablatio? Quantum ad canes quibus lienes excinduntur, illi non omnes vivi permanent, imò ex multis vix pauci in vita servantur, iique tunc reliquum vitæ tristes & ignavi protrahunt, neque diu vivunt: propterea, sine dubio, quod defectu convenientis materiæ à liene suppeditandæ, conveniens fermentum in hepate non præparetur, atque hinc sanguis crassior in corde generetur, spiritusque, cum vitales, tum animales, pauci & crassi è tali sanguine suscitentur. Præterea quod in cane tutius & commodius fieri potest, atque hinc facere licet, hoc in homine cum summo vitæ periculo tentare, nefas foret: nam quod cani alicui hac in parte non cedit ad mortem, hoc hominem certissime occide-

occideret: procul dubio, quod hoc viscus in homine magis necessariam actionem præstet, quam in cane, in quo forte pancreas, aliave pars, ejus vices melius supplere potest, quam in homine, utpote in quo tantum viscus, tot arteriis, venis, & nervis instructum, proprioque parenchymate donatum, frustra creatum esse, nemo sanæ mentis sibi facile persuaderi permittet.

Atque hinc jam etiam liquet, quidnam respondendum sit ad experimentum Malpighii, ante commemoratum, scilicet propterea forte, quod minor sit lienis usus, & non tam necessaria ejus actio in cane, quam

in homine, hinc nonnullos canes ejus usu carere posse (non tamen omnes, docente experientia, quod plurimi, quibus exsecti fuerunt lienes, brevi interierint, pauci verò evaserint) secus atque contingit in homine, in quo cum quælibet lienis prava constitutio totum microcosmicum regnum miris multisque modis conturbare possit, multo magis illud faceret ejusdem exemptio.

Ita ut concludendum sit, lienem in homine ad vitam maxime necessarium esse, nec salvo homine excindi posse. Plura de ejus actione & usu vide proxime sequente capite.

## C A P U T XVII.

### De officio Hepatis & Lienis.

I T E M,

### De usu Bilis, succi pancreatici, & Lymphæ.

Digressio.



E actione hepatis & lienis, atque de usu bilis, succi pancreatici, & lymphæ, quam discrepantes hæcenus fuerint plurimorum doctissimorum virorum sententiæ, præcedentibus capitibus satis demonstratum. Cum autem nemo tantorum viscerum dignitatem, & succorum necessitatem perceperit, aut saltem descripserit, tandem tempus erit, ut quæ tot seculis in obscuro latuerunt Sacra, in lucem proferantur, utpote ex quorum cognitione maximum toti Medicinæ lumen conferri, multorumque morborum obscuras & ignotas causas clarissime innotescere posse certum est.

Actiones trium viscerum.

Actiones hepatis, lienis & pancreatici conspirant in unum finem, & sanguinis atque chyli fermentum simul præparant, in cujus confectione horum trium officium necessario concurrere debet, cum unum sine altero negotium hoc absolvere nequeat.

Sicut farinæ triticeæ aquâ tepidâ subactæ fermentum admiscetur, ut per illud crassiores & terrestres frumenti particule dissolvantur, & spirituosæ particule in terrestri illa compage consopitæ atque occultæ latentes, attenuentur, ac suscitentur, sicque tota panis massa, attenuatis istis spiritibus jam perfusa, levior & concoctu faciliior evadat. Ita etiam chylo & sanguini venoso fermentum admisceri necesse est, quo spirituosæ in iis latentes particule attenuentur & suscitentur, sicque tota massa ad hæmatosin & nutritionem aptior fiat.

Fermentum panis.

Illud autem panis fermentum (ex cujus cognitione facilius ad fermenti sanguinis chylique notitiam pervenietur) commu-

niter conficitur ex farinæ aliqua quantitate, quæ subigitur cum aqua tepida, eique admiscetur aliquantillum salis & aceti, atque ita loco tepido servatur, donec spiritus falsi subacidive à calore nonnihil volatilisentur, & massæ farinaceæ particulas pervadant, easque dilatent ac separent, sicque totam massam subacidam & fermentantem efficiant. Tunc hujus fermenti acidi pauca frustula magnæ massæ farinaceæ tepidè subactæ immista, totam massam fermentare faciunt. Nam fermentaceæ illæ particule se per totam massam explicant, omnesque partæ farinaceæ partes incidunt, attenuant, spiritusque in iis latentes dissolvunt. Nostrates etiam florem (vulgus malè *facem* appellat) cerevisiæ fermentantis (qui valde acris & spirituosus est, magnamque fermentaceam vim redolet) farinaceæ massæ eundem in finem communiter admiscunt. Alii fortè alio utuntur fermento. Sed omne fermentum, qualecunque fuerit, constat ex rebus subsalsis subacidisve acribus & corrodentibus, moderato calore fufis seu liquatis, ac nonnihil volatilifatis: quæ si crassiores & densiores sint, cum lentius dissolvantur, earumque vis se tardius exerat, debent etiam longiore tempore farinaceæ massæ admixtæ esse, antequam illam fermentent, sicut in primo descripto fermento contingit, quod per multas horas, & sæpe per totam noctem admistum esse debet, ut operationem suam convenienter exerat. Si verò per quarumdam sulphurearum particularum admisionem, spirituosæ ac magis volatilifate sint, citò fermentant, ut videmus in flore cerevisiæ, qui unius horæ, aut sesqui horæ, aut breviori

viore spatio, illud opus absolvit. Quippe spirituosiores acres particulæ, cum in hoc à materia cui inhærent liberiores sint, atque hinc magis penetrantem vim habeant, citius operantur, & crassas farinæ particulas brevi dissolvunt, spiritusque latentes citius fuscitant, quod adhuc fortius peragunt, si pauxillum mellis (quod etiam acres particulas à sulphureis modò dissolutas, iisque involutas, in se continet) isti flori admisceatur. Sed horum nihil perficitur sine calore moderato, utpote quo falsæ particulæ ad modicam subacidiusculam qualitatem, & aliqualem volatilitatem deduci debent.

Eodem modò se res habet in chylo & sanguine venoso, qui si ante hæmatosin non attenuentur & præparentur per admistum fermentum conveniens, tunc in corde non satis spirituescunt, id est, spiritus in iis consopiti latentes non satis dissolvuntur è crassiore & serosa materia, sed consopiti manent, atque sic conficitur sanguis crassus & aquosus, ad corpus alendum, partesque corroborandas, parum utilis: unde tunc corpus fit languidum, & actiones naturales atque animales malè procedunt.

*Hepar conficit fermentum.*

Hoc autem chyli & sanguinis fermentum conficit hepar: cui tamen fermento hepatico speciatim pro chyli, è ventriculo primitus effluentis, præparatione, in intestino duodeno admiscetur succus pancreaticus, ut latius docuimus *precedente cap. 10.*

*Materia fermenti.*

Materia è qua hepar illud conficit, est sanguis venosus, è venis gastricis & meseraicis per portam in illud influens (videtur etiam pauxillum per arteriæ hepaticæ ramulos accedere) cui immiscetur succus acris, subsalsus, seu subacidus, in liene ex arterioso sanguine per arterias, & ex spiritibus animalibus per nervos influentibus (hos spiritus falsas sanguinis particulas à sulphureis magna parte separare, latius docebitur *lib. 3. cap. 11.*) confectus, qui per ramum splenicum in portam, sicque una cum dicto sanguine, cui admiscetur, in hepar deferitur. Atque mediante isto acri & corrodeute succo, per hepatis specificam vim seu coctionem, spirituosæ, cum sulphuræ, tum falsæ, in isto sanguine venoso latentes particulæ dissolvuntur, attenuantur, ac simul etiam nonnihil acres & fermentantes fiunt, earumque tenuissima quædam pars, instar aquæ lymphidissimæ ac tenuis, mediantibus glandulis conglobatis in cava hepatis parte præcipue sitis, à reliqua crassiore sanguinis massa secedens, per plurima lymphatica vascula ex hepate deferitur ad varias venas, sanguinem venosum versus cor tendentem præparatura: at maiore sui parte fertur ad vasa chylifera, ut in illis chylo influenti necessariam præparationem, ad fermentationem in corde futuram, inferat.

*Præparatio fermenti.*

In quem eundem finem etiam fermentacea quædam saliva ab ore, ut & subsalsa subacidave lymphæ, ex glandulis axillarum, inguinum, aliisque variis eodem deferuntur (ut dictum *cap. 13.*) & nonnihil succi pancreatici tenuioris ex intestinis una cum chylo, vasa chylifera subit.

Sicut autem in cerevisia fermentante plurimi spiritus jam fuscitati cerevisiæ toti jam permiscuntur, eamque spirituosam, fortem, & aptam faciunt, quæ ab assummentium ventriculis facillime attenuari, coqui, & digeri possit: sic etiam multi adhuc spiritus crassioribus magisque viscosis cerevisiæ particulis intricati inhærentes, cum iisdem ad superficiem ascendunt, & bullientes, seu potius fermentantes ac spumosa, cum strepitu è vase erumpunt: quæ spumosa materia saporem amariuscule nonnihil acrem, quasi levi aliquo dulci sapore permistum habet. Hanc nos **Cerevisiæ florem**, seu **bilem** nominamus, vulgares male *facem* appellant (à fœce enim quæ est residuum excrementum spiritibus privatum, longè differt) eamque colligunt, ut illam novæ cerevisiæ, aut farinacæ massæ fermentandæ rursus admisceant.

*Flos cerevisiæ.*

Ita quoque in hepate negotium procedit, & fermentacei spiritus acriores crassioribus ac viscidioribus sulphureis succis immisti (sulphur enim viscidum est) & validius ebullientes seu fermentantes, cum ob illam succorum, quibus inhærent, viscositatem glandulas conglobatas, ex iisque vasa lymphatica subire nequeant, & ob acrem ebullitionem à sanguine separentur ac recedant, segregantur cum succo cui inhærent, & amaritudinem induunt, ac bilis nomine designantur. Quæ bilis mediantibus acinis glandulosis, per porum bilarium & vesiculam fellis, paulatim ad intestina defluit, ut in iis una cum succo pancreatico permisceatur crassiori massæ, nempe alimentis in ventriculo coctis, & jam ad intestina defluentibus, ut illam quoque effervescente faciat, atque sic partes tenuiores, chylum constituentes, à crassioribus dissolvat ac separet, easque ita attenuet, ut in angusta vasorum lacteorum oscula impelli commode possint.

*Bilis generatio.*

Eum in finem delabitur hæc bilis per ductum cholidochum in intestinorum principium, scilicet duodenum, ibidemque statim miscetur cum succo pancreatico, per ductum Wirtzungianum ex pancreate (vide *antecedens cap. 10.*) eodem defluente, atque sic massæ alimentariæ in ventriculo coctæ, ex eoque jam elabenti, mox admiscetur, eamque effervescente facit. Et quia in primo introitu acrior est, atque integras vires obtinet, & propter succi pancreatici acidi admistionem mox ad ebullitionem parata existit, hinc in isto principio maxi-

*Quare jejuni-  
um si va-  
cuum.*

M

mam

mam facit effervescentiam, unde lacteus succus, massæ in ventriculo coctæ inhærens, maxima parte in intestino jejunio promptissime separatur, ac per innumera lactea vascula (quæ majore copia huic quam aliis intestinis irradiantur) citissime propellitur ad receptaculum chyli, hacque de causa intestinum illud plerumque vacuum & jejunum reperitur. In sequentibus autem intestinis, ob dissipatos in principio tenuissimos fermentaceos spiritus, paulatim tardior & minus efficax fit effervescentia, ac tardior chyli tenuioris è reliqua crassiore massa separatio, atque hinc illa etiam pauciora obtinuerunt vasa lactea. Denique residuum istius fermentacæ materiæ (cujus subtiliores partes & vires per longam effervescentiam in intestinis tenuibus factam, plurimum perierunt) in crassis intestinis alimentorum crassis fœcibus immixtum hærens, quia lente jam resolvitur, tardam quoque & rariorem, idque non nisi longiore mora, in iis fermentativam quandam effervescentiam facit, quæ fœculentam saburram emovendo, distendendo, & acriorem reddendo, intestinis molestiam infert, eaque sic ad excretionem irritat. Et quia tarde fit illa effervescentia, hinc etiam rarè fiunt istæ irritationes, ac fœcum dejectiones, ita ut homines sani communiter non nisi semel aut bis in die alvum deponant. Atque prout illud residuum fermentum majorem aut minorem acrimoniam obtinet, hinc in fœcibus citiorem aut tardior, nec non majorem aut minorem fermentativam effervescentiam facit, unde tunc crebriores vel rariores dejectiones succedunt.

*Bilis unde acrior.*

Ut autem in homine dicta bilis magis acris & fermentacea evadat, non protinus tota mitior ex hepate per porum bilarium rectâ profluit in intestina, sed bona ac tenuiore sui parte ex hepate per radices felleas defertur in folliculum felleum, in eoque aliquamdiu subsistit, ut ex istius loci proprietate, seu specifica temperie, per moram illam acres spiritus in ea magis suscitentur & exaltentur (sicut fermentum acidum panis per moram in loco tepido majorem acrimoniam acquirit) atque hinc in cysti nonnihil effervescens, ad intestina defluat, ut latius dictum cap. 15. quo loco etiam edoctum, quare minus, aut nimis acris evadat, qualesque morbos utriusque ratione producat.

*Fermentationis ultior progressus.*

Sanguinis autem venosi, è quo fermentum in hepate confectum est, superflua & maxima pars, quæ in bilis aut lymphæ naturam mutari non potuit, nec debuit, fermentacea fermenti confecti qualitate abunde perfusa in venam cavam profluit (quod fermentacea atque imprimis biliosa qualitate sanguis ex hepate in cavam profluens per-

fusus fit, liquet, si in recenter occiso animali mox hepar à cava abscindatur, & tunc ex eo effluens sanguis colligatur, eique spiritus nitri affundatur, statim enim æruginosus fit, quod in nullo alio sanguine contingit, & sic latens ei admixtum biliosum fermentum detegitur) cui desuper è venis subclaviis occurrit à lymphæ præparatus & attenuatus chylus, vel eo absente solus lymphæ liquor, subclaviarum sanguini permixtus, atque ita dextrum cordis ventriculum sensim ingrediuntur, in eoque ob præviam istam convenientem præparationem seu attenuationem, protinus in spirituosum halitum sanguineum dilatantur, sicut pulvis pyrius admoto igne protinus in flammam accenditur.

Ut autem spiritus ille sanguineus perfectior existat, & diutius in vigore permaneat, statim pulsu cordis è dextro ventriculo per pulmonarem arteriam in pulmonem propellitur, in eoque ab inspirati aeris frigore in liquorem rursus condensatur, & per venam pulmonarem defluit in ventriculum cordis sinistrum, in quo iterum (sicut spiritus vini secunda distillatione rectificatur) summamque spirituosæ sanguinis perfectionem adipiscitur, atque sic in aortam propellitur, ut ab ea per minores arterias omnibus totius corporis partibus communicetur, easque vivificet & nutriet. A qua nutritione qui tandem residuus est sanguis, maxima jam spirituum copia privatus, minores subit venas, ab iisque ad majores, & tandem ad cor iterum defertur, ut in eo de novo attenuetur & spirituosus evadat. Quia autem in isto circulo multæ sanguinis partes consumuntur in nutritione partium, quarum etiam substantia à calore continue consumitur ac dissipatur, hinc necesse est ut sanguini venoso ad cor redeunti identidem admisceatur novus chylus in sanguinem mutandus, qui consumpti locum suppleat: atque sic vita nostra consistit in tali continua nutritione, qua deficiente, mox imminuitur, & brevi deficit oleum lampadis nostræ vitæ, sicque extinguimur.

Quæritur jam, unde illæ acres, calidæ, & fermentantes particule in corpore nostro oriantur? Respondeo: ex sulphure & sale: prima emotio est à sulphure, sed primaria acrimonia ex sale, qui, præter sulphur, omnibus alimentis innatus est, nihil enim edimus quod in se naturaliter salem non contineat, quamvis alia plus, alia minus salis habeant. Sulphur dissolvit salem, eumque ad fusionem deducit: hic solutus, & attenuatus acrimonia sua omnes alimentorum particulas corrodit, pervadit, dissolvit, sique ad spirituum in iis latentium educationem disponit, quæ operatio est fermentatio, sine qua homo vivere non potest, & cum qua debili aut vitiata homo misere

*origo fermenti.*

misere vivit. Ut autem hæc fermentatio felicius procedat, nos Naturæ instinctu sali naturali, qui alimentis inest, adminiculum adjicimus, scilicet, salem marinum (multis in locis utuntur sale fossili) quem esculentis rebus etiam admiscemus, & quo cibi sunt durioris substantiæ, atque hinc ad sui digestionem majore fermentatione & efficaciore fermento opus habent, tanto majorem in iis falsedinem amamus, ut in carne bubula, porcina, &c. quia sal in talibus facilioris digestionis causa est (dummodo sulphurei spiritus, illum salem ad fusionem deducturi, in homine satis redundant, & satis efficaces sint, ut in juvenibus & biliosis) hujus rei exemplum manifestissimum habemus in halece, quæ salata & cruda comesta in ventriculo facile, at non salata & cocta valde difficulter digeritur. Ad hæc, ut latentes in isto crasso sale fermentacei spiritus citius suscitentur, & de potentia in actum exsurgant (quod alioqui in debilibus ventriculis, ob sulphurei spiritus primo moventis debilitatem, vel paucitatem, non satis convenienter fit) solemus in culina cibos coquere, ut firmiores & fixiores eorum partes melius dissolvantur, & sic ad fusionem & volatilitatem præparentur, ut facilius à ventriculo subigi possint. Denique in eundem finem etiam dictis durioribus cibis sæpe acria & spirituosiora, ac sulphurea quædam, pro condimentis, admiscere solemus, ut aromata, cæpas, anisum, raphanum rusticum, synapi &c. & non raro etiam vinum generosum, spiritum vini, aliaque similia superbibere. Nam sulphurei spiritus falsis permisti, crassas fixasque particulas potenter dissolvunt & pervadunt, atque ad statum fusionis, sicque ad fermentandi energiam exaltant. Quæ chylicans operatio plurimum adjuvatur, partim à saliva, quæ desuper ab ore fluit ad ventriculum, & fermentacea qualitate jam donata est (de hac vide lib. 3. cap. 24.) partim à fermento peculiari, quod ex chyli aliqua parte, post ejus coctionem, & maximæ partis ad intestina expulsionem, in ventriculo residua, & plicis porisque tunica interioris infixæ, in iisque acefcente, conficitur. Atque sic per primam illam fermentationem spirituosiores & utiles alimentorum partes à crassiore massa cremoris forma exeunt, & chyli nomen assument.

Ex hoc chylo, multis falsis sulphureisque particulis, ab alimentis desumptis, donato, per novam fermentaceam præparationem, à bile, succo pancreatico, & lymphæ inductam, conficitur in corde sanguis, qui & ipsas falsas chyli particulas, sed magis attenuatas, & sulphureis exactius permittas, in se continet.

Ex hujus sanguinis, ad lienem per arte-

riam splenicam, & ad pancreas, aliasque multas glandulas per peculiares arterias defluentis, particulis falsioribus, affluxu spirituum animalium nonnihil separatis, in liene & dictis partibus iterum conficitur fermenti materia pro sanguine venoso & chylo, majore sui parte ulterius ab hepate in perfectum fermentum excoquenda.

Atque ita ex alimentis interni fermenti prima origo est, quod deinde variis coctionibus magis magisque attenuatur, & in fermentum subtilius in corpore nostro mutatur.

Hepatis, autem, lienis, & pancreatis Probatio actionum hepatis & lienis. veram actionem esse fermentum dicto modo conficere, ex eo patet, quod ubi viscera hæc bene valent, suoque munere convenienter funguntur, totus etiam sanguis melior & spirituosior sit, atque hinc corpus vegetum & agile existat, omnesque naturales & animales actiones laudabiliter & bene procedant. At contra, ubi viscera hæc male se habent, innumeri morbi ex sanguine chyloque male fermentato exoriantur.

Succus acer, subsalsus, ac subacidus, Quomodo lien faciat succum acrum. ut antea etiam dictum, in liene conficitur ex sanguine arterioso, per magnam arteriam splenicam in hoc viscus copiose impulsus, qui à copiosa spirituum animalium per nervos affusione, atque etiam ab hujus visceris proprietate, seu proprio specifico temperamento, mox immutatur, in eoque qui prædominabatur spiritus sulphureus, obtunditur, figitur, ac suffocatur, & falsus acidusque in eo latens spiritus in actum producit, falsæque particula à sulphureis nonnihil separatæ prædominium capiunt: atque hinc fit quod sanguis fervidus ac subdulcis per arterias in lienem influat (de modo vide præcedens caput circa finem) sed protinus extincto sulphureo fervore cum dulcedine, subsalsus seu subacidus è liene per ramum splenicum delabatur ad hepar: unde lien coctus etiam subacidi quid sapit. Eodem modo hæc res procedit, sicut cum in vase acetario, seu in quo acetum servatur, acetum ex vino conficitur, quo modo caupona in Gallia perpetuum acetum domi suæ alunt. Quippe vas acetarium deponitur loco subtepido, plerumque in domus superiore tabulato, sub tecto radiis solaribus exposito: in hoc aliqua parte evacuatum vas vinum generosum & bonum (ex debili enim vino aut vappa non conficitur bonum acetum) subinde modica quantitate infunditur: quo facto, mox à falsis & acidis particulis in aceto prædominantibus, figitur & suffocatur vini sulphureus & dulcis spiritus, & quæ in eo latent falsæ acidæque particula ab aceti acri aciditate funduntur, modice liquefunt, attenuantur, & in actum producuntur, sicque vinum induit acorem, & fit



& fit acetum. Ita etiam sanguinis arteriosi sulphureus spiritus, partim à spiritibus animalibus per nervos adfluentibus, partim ab acidis & subsalsis succis in liene confectis ac contentis, figitur & suffocatur, atque prædominium suscipiunt quæ in eo sunt particulæ salæ acidæque, postea admittis denuo novis sulphureis, sanguini venoso in hærentibus, ab hepate in perfectum fermentum seu chylum mutandæ.

Quod autem hæc primaria fermenti ab hepate perficiendi materia in liene conficiatur, ab experientia aliquo modo demonstrari potest: quippe si lien, bovis, porci, alteriusve majusculi animalis in frustra conscissus, in aqua leviter tepida maceretur, & postea hujus aquæ pauxillum pastæ farinaceæ subactæ admisceatur, eam dilatat & fermentare facit, haud aliter ac si flos cerevisiæ, aut aliquod aliud panis fermentum admistum foret: quam operationem adhuc feliciter exequitur, si ei minimum quid aceti admistum fuerit.

Ortus mor-  
borum ex  
liene.

Jam verò, si hæc lienis actio non bene procedat, oriuntur morbi duplices: alii à subsalfo seu subacido succo nimis crasso & fixo; alii ab eodem nimis tenui & volatili. Nam quando subsalsi acidive succi in liene non satis attenuantur & liquantur, etiam pauci spiritus fermentantes ex iis exaltari possunt: quando nimis attenuantur, tunc supra modum acres, corroscentes, & copiosi spiritus ex iis educuntur, atque pro horum diversitate diversi morbi exsurgunt.

Si lien debilis sit, vel suo, vel alimentorum vitio, aliave quacunque de causa, tunc subacidus qui in eo excoquitur succus, non satis liquatur, attenuatur, aut volatilifatur, sed crassus & tartareus seu terreus manet, magnæque copia in lienis vesiculosa substantia & vicinis partibus, ob crudam viscositatem, cumulat, tumidumque & magnum lienem facit: quippe in eo latens spiritus non convenienter suscitatur, sed in angustiis in liene & circa lienem subinde aliquantulum effervescens, totum lienem ejusque confinia distendit, & mille flatus cum sibulo, rugitu, ac molesta tensione, hypochondriacis familiari, excitat. Quæ mala etiam plurimum augentur à prava dispositione pancreatis, ex sanguine vitiosis lienis succis inquinato, ac per arterias ei allato, contracta; cujus ratione succum suum etiam male coquit, nimiumque ex subsalfo acidum vel austerum relinquit, qui partim in ipso pancreate graves obstructions, officii visceris turbatores, gignit: partim in intestina defluens, in iis injustam effervescentiam facit, chyloque pravam subacidam qualitatem imprimit, ob quam ad coagulationem seu fixationem proclivis evadit, nec satis convenienter attenuatur. Unde tunc in abdomine ex chylo crassiore,

crudiore, & fixiore manente, atque ad ulteriorem fusionem minus præparato, plurimæ generantur obstructions in vasis lacteis quibuscunque; in mesenterio, & glandulis mesenterii, in iisque magna crudorum ac pravorum humorum saburra cumulat, à cujus copia & corruptione mille morbi succrescunt, qui vulgò melancholici appellantur, & à liene oriri traduntur, sed quomodo ab eo generentur, hæcenus non satis fuit explicatum. A sanguine autem, defectu efficacis & convenientis fermenti (quod ex lienis succo & sanguine venoso in hepate præparari, modò dictum) & spirituum non satis copiose genitorum, spisso nimis manente, totum corpus languidum ac torpidum redditur, multique morbi oboriuntur. Quippe crassus & non satis spirituosus existens, partesque salas, crudas, viscidasque admistas habens, in hepate aliisque variis abdominis visceribus, humores coagulando, obstructions & scyrrhos facile parit. In corde non satis dilatur, sed crassior in pulmonem impellitur, in eoque ab inspirato aëre adhuc magis incrassatus, ægre per angustissimos ejus meatus transit, hinc pulmonem infarciens, & bronchia compressione angustans, difficilem respirationem facit. In corde ipso, propter particularum inæqualitatem, multarumque difficilem dilatationem, producit pulsum inæqualem, ac nonnunquam intermittentem. In cerebro, propter crassitiem minimos ductus difficulter & inordinate transiens, facit susurros, & capitis gravitatem: cumque ipsius cerebri naturalem constitutionem lædat, & superflite aliquali acrimonia nonnihil vellicet, etiam læduntur actiones animales principes, imaginatio & judicium depravantur, memoria imminuitur, deliria, vigiliæ; aliaque similia incommoda succrescunt, & fit vera melancholia. Si verò crassius illud sal paulo magis exaltetur, & fusile, sed non satis spirituosum evadat, tunc sanguis subacidam & austeram diathesin acquirit, qualis est in scorbutis; atque tunc ab illius acredine vellicantur & lancinantur nervosæ partes, periorstea dolent, molliores partes eroduntur, sæpe etiam intestina graviter torquentur, & ulcera in cruribus oboriuntur curatu difficilia: ad hæc, ineptus fit sanguis ad nutritionem, atque inde totius corporis lenta atrophia procedit. Dictæ crudæ salæ particulæ in renibus frigidioribus coagulatae, & è sero separatae, in calculos concrescunt: in articulis verò separatae, & sentientibus partibus affixæ, easque corroscentes, faciunt acerbos dolores arthriticos, ac tandem majore copia cumulatae, nodosos tophos. Atque hæc & similia contingunt, si fermentaceus succus in liene nimis crudus & crassius conficiatur.

Si



Si verò idem ille succus nimis tenuis, spirituosus, & acer conficiatur (quod etiam fit vitio lienis, alimentorum, &c.) tunc alii morbi hinc procedunt. In sanguine magnum fervorem, cum aliqua acrimonia conjunctum, excitat, qui in cerebro, ob continuam irritationem, spirituum animalium celerem atque inordinatum motum, vigilias, delirium furiosum, & maniam facit. Articulis leviter coagulatus inhærens, arthritidem vagam generat: eoque acrispiritu seu halitu in una parte, ob suam tenuitatem, dissipato, facile rursus dolor in alia parte oboritur, cui alia quædam ejus particula forte adhærent.

Lien scyrrhosis, obstructus, aliove quocumque modo vitiat, prævum succum fermentaceum generando, mille quoque gravia mala inducit.

Hæc omnia, aliaque similia actionem lienis satis manifestam reddunt.

Ita etiam hepatis actio ex morbis ab eo procedentibus clarissime innotescit.

Si hepar frigidius quacunque de causa fuerit, & dictum lienis succum, per ramum splenicum allatum, commode digerere, ac cum admisto sanguine venoso, eique inhærente succo sulphureo, in conveniens fermentum convertere nequeat, tunc nusquam fit bona fermentatio. Chylus non satis coquitur, nec ad fermentationem in corde futuram satis bene præparatur: sanguis venosus manet crudus, serosus, neque in corde satis spirituosus evadit, sed attenuatur solummodo in aqueum vaporem, qui in vasis & mollibus partibus in liquorem aqueum facefcit, & sic totum corpus sero replens, Anasarcam parit; cui multa sitis adest, ob crudiores salsas particulas isti sero inhærentes, nec satis bene sanguini mistas, quæ una cum succis è salivalibus vasis defluentibus, ac tunc similiter subsalsis, ad fauces & œsophagum delatæ, sicca velli-catione continuam sitim faciunt.

Si verò hepar sit calidius, & hinc debile, tunc è sanguine sulphureos & oleaginosos spiritus exaltando, nimia copia eos suscitât, à quibus vis subacidi succi è liene venientis, multum obtunditur, atque prævum fermentum generatur, quod inflammationes, putredines, febres, aliosque calidos morbo, à nimia vitiosa fermentatione ortos, in corpore producit, nimiamque bilis copiam generat: quæ bilis, si ob pauci succi acidi admisionem, mitior sit, tunc icterum inducit: si verò acrior fuerit, à multo falso acidove & acrisplenetico succo cum ea excocto, tunc choleram, dyarrhœam biliosam, dysenteriam, aliosque similes morbos producit.

Hepar obstructum & scyrrhosis, cum fermenti boni generationem & distributionem convenientem non faciat, etiam plu-

rimiarum cruditarum, multorumque morborum à cruditatibus ortorum causa est.

Quæ nam sit fermentacea qualitas succi pancreatici, ac quales morbi à pancreate male habente inducantur, dictum cap. 10.

In foetu utero inhærente in principio tali fermento opus non est, quia nutritur seminis colliquamento, quod in se spiritum mediocriter fermentaceum continet, ac dein lacteo succo in amnio contento, paucioris fermenti indigo. Postea verò, cum aliquanto firmiore nutrimento, per venam umbilicalem allato, opus habet, & frui incipit, tunc sola placenta uterina subit vires lienis & hepatis, ac fermentum mitius, sætui in isto principio conveniens, conficit: interea temporis hepar & lien incrementum ad fixuros usus, scilicet, ad fermentum acrius postea conficiendum, cum natus infans solidioribus fruetur alimentis. Quod tamen officium illa viscera non statim post natum infantem, quasi per saltum, exequi incipiunt, sed etiam antea in utero paulatim ad ejus functionem accesserunt. Quo magis enim incrementum cordis calor, & sanguis spirituosior generatur, & quo magis perficitur & fortius evadit cerebrum, eo actiores spiritus in foetu generantur: atque ex his duobus, sanguine nempe & spiritu animali, indies validioribus concurrentibus in liene, qui paulatim ad majorem perfectionem, una cum hepate, deductus est, fermentaceæ materiæ præparatio etiam paulatim fieri incipit; & modum præparandi istam materiam dicta viscera jam paulo ante nativitatem sufficiente perfectione consecuta sunt, ut liquet ex bile, quæ in foetus modo nati folliculo felleo invenitur bene excocta.

Atque ita me verum, & ante hac non satis explicatum hepatis lienisque officium, ac simul etiam bilis, succi pancreatici & lymphæ usum, clarissime proposuisse arbitror. Plura alia ad plenior probationem adferri possent, verum hæc pauca intelligentibus dicta sufficient. Equus lector hæc jam poterit conferre cum aliorum Doctorum, qui ante nos de his scripserunt, opinionibus, & sic, quam longè plerique à scopo aberraverint, facile percipiet.

Ex modo dictis abunde jam patet, quam necessariam conspersionem habeant hepar & lien, & quales quantique morbi ex horum viscerum utroque vel alterutro male affecto exoriantur: quam parum verosimile etiam sit, lienem è corpore hominis eximi seu excindi posse, permanente vita & sanitate, de qua exemptione dictum præcedente capite circa finem. Liquet etiam quam male secunda publica coctio in hepate, liene, & pancreate fieri dicatur, cum illa necessario fieri debeat in corde. Nam fermentum modò dictum non genera-

M 3

tur

Morbi ex  
hepate o-  
rindi.

Anasarca  
causa.

Morbi à  
succo pan-  
creatico.

Fermentum  
in foetu.

Conclusio.

tur nisi ex sanguine; atqui sanguis debet primo confici in corde, antequam ad hepar, lienem, aut pancreas pervenire

possit. Secunda igitur publica coctio fit in corde, tertia in hepate, liene, & pancreate.

## CAPUT XVIII.

## De Sero, &amp; Renibus.



Ost hepatis & lienis explicatum officium, sequitur ut agamus de iis partibus quæ serum, quod necessario copiosum sanguini admiscetur, nimia copia redundans evacuant.

*Serum quid.*

Est autem Serum pars aquosa ciborum & potus cum alimentorum succis sulphureis ac falsis in ventriculo aliisque visceribus simul excocta, & sanguini copiose affusa, ut ei perfectam mixturam & necessariam tenuitatem ac fluxibilitatem conferat, qua mediante per angustissimas quasque vias permeare possit: ut ejusdem quoque impuritates ac crudiores falsas particulas abluat, sibi que admisceat, & una secum per salivam, sputa, sudores, atque urinas evacuet.

*An sit humor alimentarius.*

Hic rejicienda est Hieronymi Barbatii, aliorumque quorundam sententia, qui scribunt, multisque rationibus inculcare student, serum esse humorem non minus alimentarium quam est sanguis, idque nutrire spermaticas partes, sicut sanguis nutrit partes carnosas. Verum adeo debiles sunt eorum rationes, ut eas hic longo sermone refutare, non videatur operæ pretium. Quamvis enim sine sero nutrimentum partibus conferri nequeat, in eoque aliquæ particulæ falsæ sulphureæque, quales nutritioni inserviunt, contineantur, tamen inde concludi nequit, illud partes spermaticas nutrire, sicque sanguinem ab isto munere excludi. Qualem necessarium usum in nutritione præstet, latius docemus, lib. 2. cap. 12. in explicatione dubii de quatuor humoribus.

Hoc autem serum quia copiosum sanguini admisceri, ac quotidie gigni necesse est, & interim tamen substantiæ partium non apponitur, etiam necessaria fuere evacuatoria, per quæ redundans ejus copia sufficienter evacuari posset.

Illæ autem evacuatoria duplicia sunt, externa, & interna.

*Seri evacuatoria externa.*

Externa rursus duplicia sunt. Primo, illa, per quæ fit manifesta, non tamen perpetua evacuatio: hæc sunt, oculi, os, & nares. Ex oculis serosi humores lachrymarum forma elabuntur. Per os & nares magna serosorum & pituitosorum vaporum ac humorum expulsio fit, in excreatione, tussis, sputatione, salivatione, & grave-

dine, atque etiam in expiratione, hyberno tempore satis conspicua. Secundo, illa per quæ fit insensibilis evacuatio, scilicet pori cutis, per quos dies noctesque continua & insensibilis fit vaporosi seri exhalatio, quod ipsum sæpe etiam sensibilibus forma sudoris per eos effluit. Hæc autem serosi humoris per poros evacuatio omnes sensibiles quorumcunque excrementorum evacuationes copia longe superat. Ut, si homo una die assumpserit alimenta ad libras, ex. gr. duodecim, excernet per poros cutaneos & expirationem vaporosi excrementi libras, præter propter, novem, & forte vix duas per sensibiles evacuationes. Hoc ingenioso experimento scire docuit Sanctorius. Ille hominem juvenem matutino tempore, post depositas alvi urinæque sordes, in exactissima libra ponderat: ac præterea etiam omnia, quibus tota die usus est, alimenta seorsim ponderat. Deinde etiam sputorum, alvi-que & vesicæ excrementorum, quæ tota die excernit, in vase collectorum, pondus exacte inquit: eundemque hominem postmodum, eadem qua pridie, hora, jejunum ponderat: tuncque detracto excrementorum manifestè excretorum pondere, comperit excrementum per poros insensibiliter evacuatam, pondere multum superare omnia alia sensibilibus evacuata excrementa.

Interna seri evacuatoria, sunt **Renes** & **Vesica urinaria**, cum partibus inde dependentibus, de quibus nunc ordine dicendum.

*Seri evacuatoria interna.*

Verum antequam hanc telam aggrediamur, unus scrupulus tollendus est, scilicet (quia modo diximus, serum per exhalationes, vapores, sudores, & jam etiam dicturi sumus, per urinarias vias evacuari) an serum, sudor (sub quo exhalationes & vapores comprehendi debent) & urina, habeant eandem materiam, & in substantia conveniant. Illud maxima Medicorum pars unanimiter sentit. Ab aliis tamen omnibus dissentire videtur Ludovicus Mercatus, utpote qui, tom. 1. lib. 1. part. 3. class. 5. quest. 94. hos quatuor humores substantia distinctos esse putat. Breviter solvi potest hoc dubium, si dicamus, serum per se esse liquorem merè aquosum; urinam verò & sudores non esse liquores adeo simplices atque est serum proprie sumptum, sed

*An serum, sudor, & urina differant.*

sed falfuginofitate aliaqua donatos, ac cum falſis particulis excoctos, inter ſe, ratione ſubſtantiae, parum aut nihil differentes, quorum interim baſis ſeu maxima pars eſt ſerum, unde etiam ſeroſi humores ſunt, & non malè *ſerum* communiter appellantur, ſignificatione vocis latiſcule accepta, & denominatione à maiore ſubſtantiae parte deſumpta. Jam accedendum ad hiftoriam renum.

**Renes.** *Renes*, ῥῆν & ῥῆν, *fluere*, quod per eos urina, tanquam per rivulos, fluat: & ῥῆν, à ῥῆν, *mingere*, nominantur.

**Numerus.** Sunt autem duo (rariffimè plures vel pauciores adſunt, monſtroſum quippe haberi ſolet, ſi in uno latere unus, in altero nullus ren ſit, aut in utroque latere duo renes inveniantur, quod tamen nonnunquam contigiffe viſum eſt: Cabrolius, *obſervat.* 14. in duobus à ſe diſſectis cadaveribus, invenit unum renem vertebraſ lumborum incumbentem) poſt ventriculū & inteſtina, ſub hepate & liene, utrimque juxta ſpinam, ad muſculi pſoae caput ſiti, ea parte qua nervus muſculum ingreditur, atque hinc eò à renis calculo compreſſo, ſit femoris ſtupor. Riolanus tamen, *animadverſ. in Bartholin.* dicit iſtum ſtuporem fieri, quia dicta compreſſio ſit eo loco, ubi muſculoſa pſoae parti includuntur illi tres nervi, ex quibus conſtituitur inſignis ille nervus qui in crus, uſque ad pedem, exporrigitur: Verum cum crureus ille nervus non componatur ex tribus, ſed ex ſeptem nervis, ſcilicet lumborum quatuor inferioribus, & offis ſacri tribus ſuperioribus (ut infra videndum, *lib. 8. cap. 7.*) quorum nulli ſub capite pſoae latent, non video quomodo compreſſo pſoae capite crurei nervi, humiliore loco ſiti, compriſi, atque inde femoris ſtupor fieri poſſit.

**Situs.** Inter duas peritonaei membranas aortae & cavae lateribus accumbunt, dextro paululum humiliore ſede, quam ſiniſtro, locato: rariffimè æqualis ſitus eſt, aut dexter ſiniſtro elatior, in brutis tamen ſiniſter multoties humilior eſt.

**Magnitudo.** Magnitudo utriuſque rarè æqualis: ſiniſter plerumque dextro paulo major exiſtit. Longitudo, ut plurimum, eſt trium vertebrarum, interdum quatuor: latitudo trium digitorum tranſverſorum, craſſities pollicis. Interdum tota magnitudo minor, interdum major invenitur, qualem majorem in ſalacibus ſe obſervaffe putat Bartholinus: interdum tanta eſt magnitudo, ut proſus monſtroſa ſit, qualis fuit illa quam anno 1658. in cadavere cujuſdam hominis vidimus, cujuſ ſinguli renes dimidii capitis humani magnitudinem excedebant. Quippe Natura in magnitudine, numero, figura, &

vaſis, nonnunquam mirabiliter ludit; cujuſ rei varia & memorabilia exempla extant apud Euiſtachium, Ferneliū, Veſaliū, Carpum, Botallum, Bauhinum, & alios: verum tamen infrequens eſt hæc varietas, & ex ſexcentis vix in uno reperitur.

Figura phaſeolum, aut ſolium aſari expanſam aliquo modo referunt. **Figura.** Exterior ſunt gibboſi & recurvi, interior ad ingreſſum & egreſſum vaſorum nonnihil concavi. Superficies in homine adulto lævis & æqualis exiſtit, ſecus ac in bove, ove, multiſque brutis, in quibus inæqualis eſt, quaſi ex multis globulis carnoſis renes eſſent compoſiti: quam tamen externam faciem etiam in foetu humano exhibent, eamque poſt nativitatem ad triennium, & nonnunquam ad ſexennium permanere, teſtatur Riolanus. In adultis ſe bis duntaxat illam figuram vidiffe, refert Euiſtachius; eandemque ſe etiam bis terve in Patavino theatro publicè demonſtraſſe, ſcribit Dominicus de Marchettis, *anat. cap. 5.* Semel me iſtum caſum vidiffe memini, in viro icu gladii per medium abdomen ſupra utrumque renem perfoſſo, in cujuſ cadavere cum, ex petitione Magiſtratus, cauſam mortis & vulneris conſtitutionem inquirerem, caſu talem renum, quaſi ex globulis compoſitorum, figurationem reperi.

Membranis inveſtiuntur duabus, quarum exterior communis, à peritonæo procedens, **Adipoſa** nominatur, quia in obefis copioſo adipe circumfunditur: in hanc ingreditur arteria adipoſa, ab aorta; ex ea verò egreditur **Vena adipoſa**, quam ren dexter ad emulgentem, rarius ad cavæ trunccum, ſiniſter verò ad cavam emittit. Hæc membrana utrumque renem lumbis ac diaphragmati, dextrum etiam cæco inteſtino, & quandoque hepati; ſiniſtrum verò lieni & colo connectit. Interior propria membrana ab externa tunica vaſorum (quæ cum una duntaxat tunica renem ſubeunt) dilatata efformatur, eique nervuli exigui, à ſexti paris plexu & ramo ſtomachico, inferuntur, obtuſum reni ſenſum præbentes; qui tamen ulterius in ureteres extenſi, his acutiſſimum ſenſum conferunt, atque hinc cauſa ſunt, quod in nephriticis doloribus ventriculus in conſenſum protractus identidem vomituriat. Pauciſſimi verò iique tenuiſſimi ac vix conſpicui nervi ipſam renum ſubſtantiam ingrediuntur.

Habent ſinguli renes duo ampla vaſa ſanguifera, arteriam ſcilicet & venam emulgentem: quibus exilia quædam lymphatica interjici nonnullis putantur.

**Arteria emulgens**, ex aortæ deſcendentis trunco producta, ſimam renis partem

**Arteria: emulgens**

tem subit geminata prius, hinc diversis ramis per ejus substantiam dispergitur, in eaque in minimos atque invisibiles furculos evanescit. Per hanc sanguis copiosus (est enim arteria insignis amplitudinis) in renem deferitur, partim ut eum cum suis vasculis urinariis nutriet; partim ut in ejus glandulis (de quibus mox dicetur) bona pars feri ab eo separetur, eaque per fibrillas urinarias & carunculas papillares in pelvim deturbata, sanguis minus serosus fiat. Hanc arteriam semel in dextro rene infimæ renis parti insertam vidimus.

*Vena emulgens.*

**Vena emulgens** paulo amplior est arteriâ. Hæc innumeris radicibus, in hunc truncum concurrentibus, reni ejusdemque glandulis inhæret, ab eoque è cima parte exiens ad cavam procedit, in quam lato orificio aperitur, cui mox valvula insignis apponitur, ab inferiore parte sursum spectans, ita sita, ut sanguinis liberum in cavam transitum concedat, sed ejusdem influxum è cava in emulgentem impedit. Ex quo certum est, sanguinem per solam arteriam emulgentem in renem impelli, ejusque partem à renis nutritione residuam, in glandulis bona feri quantitate liberatam seu exutam, per venam emulgentem fluere ad cavam. Vix unquam observatum puto, ut ex uno rene duæ venæ emulgentes prodeant, quod tamen semel, mense Novembri, anno 1668., in humano cadavere à nobis visum & publicè demonstratum est: utraque ordinariam habebat amplitudinem, & una è media cima renis parte, more solito, altera verò ex infima ejusdem dextri renis parte prodibat, atque sesqui pollicis latitudine una infra aliam venæ cavæ inferebatur. Simile quid etiam notatum video à Saltzmanno, in *observat. anat.*

Harum autem emulgentium venarum sinistra in homine paulo altiore loco cavam ingreditur, & longior est dextrâ, ob altiore & remotiore sinistri renis à cava situm. In multis brutis dextra altior est. Interdum etiam dispar est earum numerus, & progressus inæqualis, ut latius dicetur *lib. 7. cap. 6.*

*Dispersio vasorum per renem.*

Utrorumque emulgentium vasorum dispersio ac disseminatio per renem exacte demonstrari nequit, propter summam ramulorum tenuitatem, & visus hebetudinem: interim diversi Anatomici hac de re varias speculationes, pro opinionum diversitate, conscripserunt. Inter alios, Rolfincius, statuit venarum emulgentium radices cum finibus arteriarum emulgentium per anastomoses multiformiter coire, idque à Bartholomæo Eustachio, *lib. de renib.* primo annotatum refert. Verum harum conjunctionum vanitatem jam nuper satis luculenter edocuit Malpigijs, qui per microscopia observavit, plurimos arteriola-

rum fines definere in exiles glandulas fibrillis seu vasculis urinariis adhærentes, sicque ex arteriolarum sanguine in his glandulis aliquam feri partem separari, atque ab urinariis vasculis ad pelvim ferri: reliquum verò istius sanguinis à venarum finibus absorberi, & sic ad venam emulgentem & cavam defluere.

In rene interiore continetur **Pelvis**, *Pelvis.* seu **Infundibulum**, quod nihil aliud est, quam sinus membraneus, factus ex uretere in cavo renis expanso ac dilatato, & apertis atque latis ramis (ut plurimum octo vel decem) instar fistularum, eò perveniente: quibus imponuntur **Carunculæ**, vulgo *Caruncula papillares.* **Papillares**, Rondeletio **Mammillares** dictæ (singulis scilicet una) instar glandularum minus coloratæ, sed duriores reliqua carne, magnitudinis pisi, superius latiusculæ, inferius convexæ, perforationes angustissimas habentes, quæ vix capillum admittunt. Malpigijs, *lib. de ren.* insuper observavit, à pelvis appendicibus in arcum productis, innumeras quoque membranofas fibras versus gibbum produci: atque pelvis etiam portiones aliquas, velut extenta vasa, concomitantes vascula sanguifera, versus peripheriam extendi.

Ipsa renum substantia, quatenus visui *Substantia renum.* occurrit, apparet quasi fibrosa, ex concursu ac commistione minimorum vasculorum, intercedente aliqua carnositate, variis exilibus alveolis donata, junctorum contexta, externo contactu duriuscula, sed interius tamen modicè spongiosa, coloris obscure rubicundi exterius, versus pelvim verò magis pallidi.

Hæc sunt illa quæ in renibus oculorum obtuitu communiter percipi possunt. Sed non ita dudum ope microscopii multo plura renum secreta primus detexit ante commemoratus Malpigijs, quæ à præcedentibus Anatomicis fuerunt ignorata: & quia omnes Anatomici hac in parte magno isti Viro multa debent, necessario etiam ab illo revelata mysteria hic adjungenda sunt, neque honori istius primi inventoris quidquam detrahendum.

Scribit, *lib. de renibus*, quod licet in *Malpigijs inventa.* hominibus adultis renum superficies communiter æqualis appareat, eam tamen in foetibus primo natis esse inæqualem (ut supra quoque dictum) & in adultis illam globulorum conjunctionem interius ex coloris diversitate adhuc apparere, qui in singulis globulis exterius & versus latera quibus conjunguntur, rubicundus, versus interiora magis pallidus est. Sicut autem in brutis globuli isti foris globosi, versus interiora verò in obtusam angustiam, quadrangulares, quinquangulares, vel sexangulares protensi conjunguntur: ita etiam in

in homine similem, sed firmiorem, globulorum conjunctionem ex coloris diversitate observari manifestè. Deinde addit: ablatâ membranâ in recenti & adhuc molli rene, rotunda quædam & brevissima corpora, adinstar exiguum vermium convoluta, exquisito microscopio detegi, parum dissimilia illis quæ in renem per medium dissectorum substantia reperiuntur: hancque vermicularium vasorum connexionem, extimam renem superficiem componentem, dicit eandem esse cum descendens vasus usque ad pelvim: eodemque etiam microscopio viros vasorum ramos, cum appensis globulis, sub extima superficie latitantes, & per renem superficiem versus pelvim propagatos, animadverti; ut & continuata quædam per totam extimam renem superficiem decurrentia tortuosa spatia & sinulos, injecto per vasa emulgentia atramento conspicuos: nec non canaliculos innumeros, qui carnis fibrosæ seu parenchymatosæ speciem aliquam oculis exhibent, sed revera sunt membranosi ac cavi, & sua aggerie primariam renem substantiam constituunt, suntque excretoria urinæ vascula. Præterea dicit, ablatâ renem membranâ, & in arteriam emulgentem factâ injectione spiritus vini nigro colore tincti, observari innumeras minimas glandulas, bifurcatis hinc inde arteriis appensas, atque ab ista injectione etiam nigro colore infectas; ut & plurimas alias inter vasculorum urinariorum fasciculos & enata interstitia, quæ glandulæ sanguineis vasis, atro colore turgidis, in speciosæ arboris formam productis, velut poma appenduntur. Ab his glandulis, in quas arteriarum fines desinunt, putat etiam orificia venarum oriri, eodemque nervos minimos produci, & excretoria quoque vascula ab uretere eò usque extendi, probabile esse, cum in glandulis hoc sit perpetuum, ut singuli acini seu globuli proprium ramum excretorium, præter arterias & venas, promant, sicut in hepate fieri dictum est. Illos autem canaliculos, seu urinarias illas fibrillas observavit in unamquamque papillarum in pelvi sitarum multas numero simul desinere, per easque urinam in pelvim exsudare, eamque per nullos pelvis porulos, ut antehac creditum, sed per hos solos canaliculos in papillas, ex hisque in pelvim descendere. Istas autem papillas (quarum alie rotundæ, alie oblongæ vel depressæ sunt) nihil aliud esse existimat, quam concursum multorum canaliculorum simul unitorum. Addit: se ex diligenti ac sæpe repetita sectione certo scire, in humano rene vascula urinæ, quæ fibras carneas solidas & compactas representant, & tamen cava sunt, desinere in dictas evidentes papillas, quæ in pelvim protuberantes hiant, & singulæ tot tubulos

seu vascula excipiunt, ut plerumque duodecimum numerum compleant; eademque vascula urinaria ad has papillas à circumferentia, tanquam ad centrum, produci.

Denique quæstionem subjungit Malpighius, scilicet, quomodo per angustissimas illas urinarias fibrillas & papillas arenulæ & calculi in pelvim descendere possint? Respondet, exiguas arenulas propterea transire posse, quia vascula illa membranosa & extensilia sunt. Ego potius dicendum arbitror, tartaream materiam sero transeunti inhaerentem interdum in pelvi coagulari seu concrefcere in arenulas aut lapillos, postquam ex dictis tenuissimis vasculis jam elapsa est, idque frequentissime contingere: interdum etiam in illis ipsis vasculis concrefcere, ex iisque disruptis in pelvim decidere: & si talis multa in istis vasculis coaguletur, in iisque subsistat, tunc arenosam ac calculosam evadere renem substantiam.

Certè clarissimus & oculatissimus Malpighius his suis per microscopia inventis magnam partem tenebrarum, quibus cognitio renem obscurata atque immerfa latebat, egregie dispulit: jam progrediamur ad ea quæ ulterius in renibus animadvertenda sunt.

Actio renem est, serosam redundantem humiditatem è sanguine separare & evacuare, quæ ipsis, ut ante dictum, cum sanguine advehitur per arterias emulgentes, è quo sanguine in transitu per renem glandulas, fibrillas urinarias & carunculas papillares, bona pars feri separatur ac in pelvim distillat, indeque per ureteres delabitur ad vesicam urinariam. Quod verò reliquum est sanguinis & feri ei permisti (torum enim serum è sanguine non separatur) illud per venas emulgentes dimittitur ad cavam.

Verum quomodo illa feri separatio fiat, Digressio difficillimum est explicare, quia primaria duo ex quibus explicatio petenda foret, penitus obscura sunt, scilicet specifica fermentatione, & peculiaris pororum in renibus dispositio.

Nam quod in renibus aut circa renes fiat specifica aliqua effervescencia, seu segregativa fermentatio (hanc olim coctionem appellabant) quæ feri pars, una cum ipsi admixtis impuritatibus, ex sanguine separatur, docent tres rationes. 1. Quod pleraque diuretica multo sale, talem fermentationem faciente, redundant, imò multa ex iis salia sint, ut sal fabarum, vitis, juniperi, prunellæ, &c. 2. Quod sudorifera (quibus serum etiam è sanguine separatur) efficacia fiant, si sal absinthii, cardui, artemisiæ, aliudve, vel talia quæ sale acido pollent, ut acetum, oleum vitrioli

Actio renem.

prima.

Seri separatio quomodo fiat.

vitrioli aut sulphuris, spiritus salis, aliaque similia addantur, quæ effervescentiam istam faciunt vel augent. 3. Quod in morbis frigidis, ex. gr. anasarca, ob debilem hepatis constitutionem, fermentum non satis validum & conveniens præparetur, atque hinc etiam serum crudum manens non sufficienter à sanguine separetur, nec satis attenuetur, unde urinæ tunc paucissimæ excernuntur, licet serum in toto corpore redundet, omnesque molliores partes œdematoso tumore distendat.

Sed quomodo per illam effervescentiam feri pars cum ipsi admixtis impuritatibus separetur, & qualem nanciscatur figurationem, ut sola per angustissimos ac porosos renum meatus, ante descriptos, delabi possit, ipso sanguine ab iis excluso, hoc qui explicabit verè laurea dignus erit.

An sint à  
glandulis.

Magnum privilegium hic sibi assument glandulæ renum, utpote quibus talem propriam serum è sanguine separandi potestatem inesse, hodie pauci dubitant. Sed cum præter serum, sæpe etiam pus, pituita limosa, aliique ipso sanguine multo crassiores humores, imò & arenulæ ac calculi cum urinæ excernantur, hinc an solis glandulis hæc feri secretio adscribi possit, à multis dubitatum fuit, qui proinde iis in subsidium adjunxerunt peculiarem seu specificam pororum in renibus dispositionem, non minus obscuram & ignotam quam dicta specifica fermentatio, & peculiaris fecernendi feri glandularum potestas. Nam quis, quæso, explicabit, quare serum cum suis contentis liquoribus, per antedictam specificam fermentationem à sanguine separatum, per renum & glandularum poros sine ullo sanguine ad vesicam defendat, cum interim purulenta materia è thorace delata, ac sanguini penitus admixta, ipso sanguine multo crassior, per eosdem poros sæpe sine ullo sanguine transiisse visa sit? Ita anno 1638. mercatorem Noviomagensen empyicum tractavi, qui tandem puris albi bene cocti, mediocriter crassi, duas matulas plenas è thorace per urinarias vias bidui spatium, cum aliquo in ureteribus dolore, excrevit, sine ullo sanguine, & sic feliciter ab empyemate liberatus fuit, cum antea pus (cujus fluctuatio ab illo ipso difficulter respirante, non modo sentiebatur, verum etiam per commotionem corporis antrorsum & retrorsum manifeste obaudiebatur) phthiseos, & vitæ periculum ipsi minaretur.

observa-  
tio. 1.

observ. 2.

observ. 3.

Tale quid etiam observavi anno 1639. in quodam Tielano, famulo Domini de Soulen, cui empyico etiam pus totum per urinarias vias fuit excretum, cum summo in lumbis & ureteribus dolore, à distensione, transitu crassi puris facta, inducto. Similem historiam à se in ægro quodam empyico visam, describit Andreas Lauren-

tius, *anat. lib. 9. quæst. 12.* in cujus cadavere invenit similem foetidam materiam copiosam in thoracis cavitate & sinistro cordis sinu, qualis cum urinæ reddita erat, quod certum indicium exhibebat, illam è thorace per cor ad renes venisse.

Hæc & similia considerantes alii, ac difficilem hujus rei explicationem animadvertentes, planè neglectis glandulis, totum hoc negotium fieri dixerunt, propter solam specialem pororum in renibus dispositionem, id est, aptitudinem & figurationem (hanc tamen describere nequeunt) cujus ratione pus crassum per illos dimitti, sanguis verò tenuior transire non potest. Cum in cribrum rusticum, inquirunt, injiciuntur paleæ tenues & pisa vel fabæ, tunc per ejus foramina crassæ fabæ vel pisa facile delabuntur, paleis tenuibus oblongis in cribro remanentibus. Verum etsi pororum aptitudo in rebus siccis talia præstare possit, tamen valde dubitandum an etiam in liquidis & omnino fluidis corporibus simul mixtis hoc contingere queat, præcipue ubi neutrum pinguedine alterum superat: scilicet, an pus quadruplo crassius sanguine, propter solam dictam pororum figurationem transire possit per tam angustos poros, qui sanguinem ei admixtum, multoque tenuiorem, non transmittunt, sed sistunt: an etiam sanguis (qui adeo tenuis & fluidus est, ut interdum per poros cutis transsudare visus sit) ad poros renum deveniens, non æque facile, imò longe facilius possit figurari ad formam pororum renum, quam pus, quod adeo crassum est, ut vix per ureteres transire queat, eosque distendendo multoties graviter excruciet. Atque ita ratio illa, de speciali pororum renum figuratione, vix sufficere videtur ad dictæ evacuationis explicationem, hic aliud quid latet, quod nemo hæcenus revelare potuit. Sed interim, licet hujus rei causa non manifeste pateat, tamen de ipsa re constat, nosque ipsimet pus è thorace ad renes & vesicam delatum, nullo sanguine comitante, magna copia excretum fuisse, vidimus, & illud ipsum alii quoque ante nos viderunt.

Verum ne in solis liquidis subsistamus, quid dicemus de rebus solidis, ac duris, an illæ etiam taliter figuratæ sunt, ut per poros renum dimitti possint, sanguine non concomitante? atqui varia extant exempla rerum durarum, sine sanguine, cum urinæ excretarum. Ita refert Langius, 2. *epist. 40.* virginem quandam quinquæ acus, quas ore tenebat, per repentinum risum, ex improvviso deglutitas, post triduum cum urina reddidisse. Acum capillarem, quatuor digitos transversos longam, in vesicam venisse, in eaque post mortem repertam fuisse, scribit Alexander Benedictus, *lib. 3. anat. cap. 9.* Parvum clavum ferreum, per

Solida res  
cum urina  
excreta.

per imprudentiam deglutitum, diu post cum evulso calculo è vesica extractum fuisse (calculus enim circum clavem undequaque accreverat, ejusque primum fundamentum fuerat clavus) refert Jo. Matthæus, Hællus, *hiflor. rarar. cas. 1.* Uxor mea aciculam mediocrem triduo ante deglutitam, cum urina reddidit 28. Augusti, anno 1665. nec quidquam mali ab ista acicula perfen- tiit, quo usque in corpore hæsit. Julius Alexandrinus, *annot. ad cap. 14. de substan. facul. natur.* frustula radicum apii pridie comestorum, nummuli quadrantis magni- tudine, cum urina excreta observavit. Ni- colaus Florentinus, *serm. 4. tract. 4. cap. 29.* refert quendam qui fungos non exacte ma- sticatos comederat, notabiles eorumdem particulas cum urina excrevisse. Plutar- chus, *lib. 8. sympof. problem. 9.* scribit hi- storiam viri, qui, post longam urinæ dif- ficultatem, culmum hordeaceum genicu- latum excrevit. Georgius Hieron. Vel- schius, *observat. 60.* refert quendam uva- rum acinos, frustula lactucæ, aliorumque ciborum cum urina excernere solitum fuisse: & alium cum aquas thermales biberet, in- tegras portiones feminum melonum, quæ mandere solebat, per urinam sæpius emi- sisse. Pigræus, *chirurg. lib. 10. cap. 2.* & Hildanus, *cent. 3. observ. 72.* referunt hi- storias aliquorum qui semina anisi, & grana alkekengi assumpta, eminxerunt. Hæc omnia angustissimos renum poros, quos sanguis permeare nequit, transire, hæte- nus à plerisque, & traditum, & creditum est. An hæc etiam illa pororum antedicta aptitudo & specialis figuratio sufficiet ac sa- tisfaciet? Vix credo. Nam tales res duras & majusculas, vasa lactea transeuntes, primo per venam cavam & dextrum cordis sinum, hinc per angustissimos ac tortuo- sissimos vix visibiles pulmonum meatus ad sinistrum sinum sine noxa & incommodo insensibiliter transire, indeque per aortam & arterias emulgentes ad renes demandari, ac per eorum fibrillas urinarias & papilla- rum poros ita transcolari posse, ut nullus sanguis comitetur, omnem fidem & ratio- nem superat, neque ulla experientia pro- bari potest, cum nullus Medicus vel Ana- tomicus unquam acus, semina, ramulos, aliasve similes res deglutitas in vena cava, cordis ventriculis, pulmonibus, aorta, aut renibus invenerit.

Hæc dum mecum pensius antehac rumi- narem, dum etiam perpenderem, quod illi qui aquas Spadanas, aliasve acidulas & diureticas, vel etiam vinum diureticum copiosius bibunt, intra semi horæ spatium sæpe tres, quatuor, pluresve feri libras emingant, sine ulla cordis alteratione, & vix verosimile videatur, quod tanta feri crudi & non colorati copia tam citò per

cor, pulmones, & renes sine incommodo transire possit; cœpi cogitare, necessariò, præter renes, debere etiam dari alias quas- dam vias, per quas copiosius serum, atque etiam res duriusculæ, modò commemoratæ, ad vesicam devenire possint. Vias has suspicatus sum esse quædam vasa lactea, quæ per occultos & hætenus incognitos meatus ad vesicam feruntur, & non quidem in omnibus, sed in paucis quibusdam homi- nibus versus vesicam adeo patula sunt, ut non tantum ipsum chylum lacteum & serum copiosum, sed res quoque solidas, duras, & oblongas transmittere possint. Suspi- cionem meam omnino confirmare videntur observationes Medicorum, qui interdum chylosam lacteam materiam cum urinis ex- cretam viderunt. Nicolaus Florentinus, *serm. 5. tract. 10. cap. 21.* refert, se novisse juvenem trigenarium, qui quotidie, præter urinam multam, sine ullo incommodo emingebat lactis quantitatem mediæ urinalis. Capellus medicus, teste Bauhino, vidit mulierem quæ dimidium cyathum lactis è vesica excrevit. Andreas Laurentius, *lib. 1. anat. quæst. 10.* nonnullas puerperas pluri- mam lactis copiam per uterum & vesicam excrevisse observavit. Ex quibus manifeste apparere videtur, lactea quædam vasa non solum ad uterum, verum etiam ad vesicam excurrere, in easque partes se exonerare posse, si nihil obstat, id est, si illa vascula non sint obstructa, compressa, aliove quo- cunque modo impedita, ut in plerisque hominibus esse videntur, quam ob causam tam rarò chylum lacteum ad vesicam de- fluere existimandum est. Cum autem hæc viæ breves & non adeo tortuosæ sint, ut multæ aliæ, facile contingere potest, ut per eas, præter chylum, interdum quoque res solidæ, ut semina, acus, furculi, &c. transeant. Præterea adhuc multo facilius magna pars crudi feri, à copioso potu cu- mulati, per has vias potest defluere, & per vesicam evacuari, cum per alia lactea vasa tanta feri quantitas non satis cito mo- veri, ac per cor circulari possit: atque hinc fit, quod talis urina sit plane aquei coloris, multum differens colore & consistentia ab illa urina quæ cum sanguine excocta fuit, qualis sæpe paulo post copiosi feri crudi ex- cretionem subsequitur bene colorata, ma- nifestumque indicium exhibet, quod per alias partes transierit, quam alterum cru- dum serum, scilicet per cor, pulmones, & renes, in iisque majorem coctionem adepta sit. Per easdem has vias etiam suspicatus sum plerumque deferri illos liquores assum- ptos, quorum color & odor in urina super- stes relinquitur, nam si per cor transirent, neutrum integrum servare possent. Actua- rius, *lib. 2. de jud. urin. cap. 20.* scribit historiam ægri, cui exhibuerat phar- macum

Vasa lactea  
ad vesicam  
& uterum.



nigrum, qui hinc paulo post urinam nigram sine incommodo minxit. Multoties obstetrices apud puerperas, ex odore, & sæpe etiam ex colore sordium quæ in puerperio effluunt, cognoscunt quidnam puerpera paulo ante comederit. Crocus in potu mulieri parturienti exhibitus, intra horæ quadrantem foetum croceo colore tingit, cum tamen isto brevi tempore crocus cor transire, ex eoque ad uterum demandari non possit, multo minus integrum colorem in tot partium transitu servare. Jo. Ferdinandus Hertodius (referente ephemeridum medicophysicarum Germanicarum scriptore) cani gravidæ, cui partus instabat, aliquot diebus alimenta croco condita exhibuit, in eaque aperta invenit colliquamentum intra membranas contentum, ipsosque foetus croceo colore tinctos, cum tamen chylus in vasis lacteis omnino albicans, nec isto colore ullo modo tinctus esset. Ego ipsemet non semel vidi eos qui pinguedinem renibus agnorum accrescentem comederant assutam, eandem fere totam brevi cum urina excrevisse. Oleum terebinthinæ exhibitum citissime urinam suo odore perfundit, atque etiam asparagi comesti, crudas, turbidas, suoque odore perfusas urinas tam citò promovent, ut si talium succi per cor aliaque viscera longum circuitum facerent, tam citò, tamque crudi, integro adhuc odore, ad vesicam pervenire non possent. Quæ omnia satis indicare videntur, quod vasa quædam lactea, occulta & ab aliis devia, ad uterum, & nonnulla etiam ad vesicam excurrant, per eaque nonnunquam huiusmodi liquores, & interdum etiam res aliquæ solidæ ad illas partes pervenire possint. Quæ vasa etsi hæcenus nec visui conspicua, nec ab ullo Anatomico demonstrata fuerint, tamen necessario adesse, modò dicta satis docent. Similia lactea vasa versus mammas protensa etiam in conspectum non veniunt, cum tamen illorum præsentiam satis ostendant furculi pridie comesti, per papillam excreti: jusculum croco coloratum assumptum, paulo post ejusdem coloris per papillas effluens (vide de his lib. 2. cap. 2.) aliaque similia. Si hæc vasa in mammis sint oculis invisibilia, quid mirum quod etiam illa quæ ad uterum & vesicam tendunt, hæcenus videri non potuerint? Interim ut hæc res aliquando manifestior fieri possit, rogatos velim omnes Anatomicos, ut postmodum in quærendis hisce viis & vasis nonnihil operæ ac diligentia, pro communi bono, impendere velint, ut sic, quod jam solis rationibus & conjecturis conficitur, etiam solidis demonstrationibus exhiberi possit.

Alii qui de lacteis ad vesicam tendentibus non cogitarunt, alias vias commentati sunt.

Bartholinus, lib. de lact. thorac. cap. 6. & 9. putat pus, aciculas, lacteum succum, atque in potatoribus & diabete laborantibus, potum copiosum vix quidquam mutatum, aliaque similia, à sacco chyliifero recta & brevi via deferri ad arterias emulgentes, sicque per renes ad vesicam. Verum has vias non confirmat autopsia, quia meatus illi à sacco chyliifero ad arterias emulgentes non inveniuntur, ut nec ulli rami ad pancreas & hepar delati, de quibus ibidem etiam loquitur: ut plures alios, ita etiam hunc doctissimum virum videntur decepsisse vascula lymphatica. Præterea concessio lactea vascula ad dictas partes pervenire, quomodo tunc per tortuosissimos atque angustissimos substantiæ renum porulos meatus transibunt acus, aciculæ, acus crinalis quatuor transversos digitos longa, aliaque similia, quæ ob singularem duritiem inflecti nequeunt, & ob longitudinem ac crassitiem permeare omnino non poterunt. Ita ut hoc clarissimi viri commentum solido fundamento destitutum concidat.

Clemens Niloe, libello belgico de ferment. & nutrit. cap. 9. hac de re agens, scribit, è vasis lacteis quædam ferri ad renes succenturiatos seu capsulas atrabilarias, ex iisque ferosos liquores defluere in externam renum tunicam, & inde ulterius per ureteres ad vesicam. Sed hic vacillat, imò deficit hypothesis, quæ primo demonstranda fuisset, scilicet, quod vasa lactea eo ferantur. Præterea ex illis capsulis atrabiliaris nulla datur via ad renes vel ureteres, sed illæ se exonerant in venam emulgentem aut cavam, atque sic nihil ex iis ad ureteres pervenire potest, ut ex Whartoni observatione docemus sequente capite.

Bernhardus Swalve, lib. de quærel. & opprob. ventric. pag. 65. manifestiores & breviores vias demonstraturus, scribit, aquas thermæ, acidulas, & quemvis copiosius ingestum potum, in ventriculo facile absorberi à venis gastricis, per talium occursum dehiscuntibus, atque ita citissime ad cor deferri. Verum hujus commenti vanitas undequaque patet. Nam acidularum, vini, alteriusve liquidi copiosior potus, si in ventriculo à venis gastricis assummeretur, deberet inde necessario deferri ad portam, hepar, venam cavam, cor, & pulmones, atque in tanto viæ, tantorumque viscerum transitu non posset non notabilem mutationem, & conspicuum aliquem colorem conquirere, cum tamen nullo colore tinctus citissime emingatur: non posset quoque colorem suum, à croco, rhabbaro, aliisve similibus ei impressum, reservare, cum eoque emingi, quod tamen fieri, modò probavimus. Præterea, ipso Swalve confitente, per illas vias nihil crassiusculi & chylosi (propter summam earum angustiam)

An à sacco chyliifero liquor ad renes feratur.

An à capsulis atrabiliaris.

An à venis gastricis.

angustiam) transire potest, cum tamen interdum pus, lac, acus, pharmacum nigrum, &c. citissime emingi, exemplis plurimis notum sit. Denique si tanta acidularum frigidarum quantitas, quanta brevi temporis spatio communiter sumitur, per dictas vias deduceretur, certè ab actuali isto frigore, hepatis, cordis, & pulmonis calor penitus extingueretur, totumque corpus marmore frigidius evaderet, sicque asthma, hydrops, aliaque similia mala protinus potatores istos invaderent, cum tamen usus doceat talia per acidulas sanari.

Itaque de breviori via ad vesicam maximæ dubiæ sunt Doctorum opiniones, inter quas tamen nostra supra dicta omnium maxime probabilis ac verosimilis manebit, quo usque alia probalior inventa fuerit.

Forestus, Duretus, atque post hos Beverovicus & Loselius, scribunt, uno rene obstructo, alterum etiam inutilem reddi, propriaque actione destitutum, urinæ fluxum intercipere, idque non semel à se quoque observatum scribit Riolanus, qui id fieri putat ob sympathiam quam inter se habent, officii societate, atque hinc uno laborante, mox etiam alterum, tanquam effectum, elanguere: quod ipsum quoque paucis verbis designat Veslingius. Verum hac in parte experientiam auctoritatibus & opinionibus quorumlibet gravissimorum virorum præferendam cenfeo, quæ nos multoties contrarium docuit, scilicet uno rene obstructo, aliove modo afflicto, alterum bene valere, per eumque urinam satis copiosam fluere posse, cujus rei plurima possem adducere exempla, quæ, brevitati studens, prætereo. Aliquoties quidem vidimus uno rene à calculo illabente obstructo, urinam in totum substituisse, verum id non propter aliquam sympathiam, sed quia infcio ægro alter ren (nam carent renes acuto sensu) diu antea obstructus fuerat & manserat, urinâ per oppositum satis effluente; quo opposito rene tandem etiam casu obstructo, mox urinæ transitus sufflaminatus est. Rem ita se habere docent cadaverum sectiones & inspectiones: multoties enim unum ureterem circa orificium penitus obstructum invenimus, quod ægri in vita planè nesciverant, nullumque incommodum inde perferant, urina satis effluente per alterum. Nunquam vero omnimodam urinæ suppressionem ratione renum factam vidimus, in qua post mortem utrumque renem obstructum non invenimus. Viro nobili Ultra-

*An inter  
renes sit  
consensus.*

*Digressio  
secunda.*

*Observatio.*

jectino, Domino Wede, nephriticis doloribus aliàs sæpius obnoxio, urina ex obstructione renum subito fuit suppressa, sine ullo dolore: statim apud Medicos dicti consensus suspicio incidit, quia unum duntaxat renem subito obstructum, atque hinc alterum per sympathiam mox etiam officio

suo privatum arbitrabantur. Omni remedium genere in cassum adhibito, quarta-decima morbi die vitam finivit. Aperto cadavere, in utroque rene calculus medioris magnitudinis, turbinatus seu pyriformis, in ureteris orificium delapsus, reperi- tus est, omnem urinæ transitum penitus intercludens. Quis, quæso, jam credat, in hujus ægri utroque rene hos calculos eodem tempore ad ureterum orificia delapsos esse, atque sic urinam subito suppressisse? Certe multo verosimilius est, diu antea unum renem ab uno calculo obstructum fuisse, nec multum incommodi ægro exhibuisse, urinâ per alterum renem satis effluente: postea verò etiam in alterius renis ureterem illabente calculo, mox urinam sufflaminatam substituisse. Saltem hoc patet, istam urinæ sufflaminationem non fuisse factam ab unius renis obstructione, & hinc alterius per sympathiam affectione. Notandum etiam in canum dissectionibus, frequenter in uno rene vermem longum, crassum, & rubicundum inveniri, qui sæpe totum renis parenchyma consumpsit, cum tamen alter ren in vita prorsus illæsus extiterit, nec ullam affectionem per sympathiam passus fuerit.

Verum et si hoc solum sit renum officium, serum è sanguine separare, nonnulli tamen eorum carnositatem & singularem magnitudinem penitus considerantes, illis etiam sanguinis præparandi, ulterius elaborandi, & excoquendi officium tribuunt: quam sententiam Deusingius, *tract. de sanguif. exercit. 87. & 92.* Beverovicum secutus, acriter defendit. Verum si per coctionem intelligat solam elaborationem, qua excrementum serosum à sanguine separatur, tunc tolerabilis erit ejus sententia: si verò talem, qua ipse sanguis in sese spirituosior & perfectior fit, tunc rejicienda erit, cum nulum viscus sanguinem ad majorem perfectionem perducatur, quam cor, à quo quanto longius recedit, tanto imperfectior evadit, nec ab ulla alia parte, ut neque à renibus, deperditæ perfectionis quidquam ei restitui potest, hacque de causa necesse habet per venas redire ad cor, ut ibi pristino vigori restituatur.

Præter dictum munus, alii, ex sententia Sennerti, adhuc aliam actionem renibus adscribunt, scilicet præparationem seminis, quam opinionem multis rationibus suffulciunt, quarum primariæ (omitto leviores) hæ sunt.

1. Quia renes peculiare parenchyma habent, ut reliqua viscera: cum autem singulis viscerum carnibus insit peculiaris coquendi vis, ea etiam renibus non est deneganda, quæ nulla alia esse potest, quam seminifica coctio, cum ad feri separationem sola colatura sufficiat, nec coctione opus sit.

N 3

2. Quia

*An renes  
sanguinem  
coquant.*

*An semen  
præparent.*

2. Quia arteriæ & venæ emulgentes nimis amplæ sunt, quam ut soli sero deferendo inserviant: magis verosimile videtur, magnam sanguinis partem à sero liberatam in iis coqui in seminalem succum, ulterius in testibus perficiendum.

3. Quia ex seminis suppressione, nimiaque retentione, sæpe renes male afficiuntur.

4. Quia in gonorrhœa juvant topica renum regioni applicata.

5. Quia calidior renum constitutio facit proclivitatem ad Venerem, libidinosa insomnia, ac pollutiones, & quo ea calidior, eo etiam semen acutius est.

*Refutatio.* At prorsus invalidæ & stramineæ sunt hæ rationes, ad quas ordine sic respondebo.

1. Renes quidem esse colatoria, in quibus è sanguine transeunte bona pars feri separatur, ac in pelvim decidens, effluit; verum hanc colaturam fieri non posse, nisi præcedat necessaria quædam specifica segregativa fermentatio, serum à sanguine separans (de hac paulo ante dictum) atque ita renes non separare simpliciter serum colando, sed illud fermentatione dicta separatim, solummodo tanquam per spongiam transmittere. Præterea, quia multum feri continuè separandum ac transmittendum erat, hinc etiam majusculis ac firmis colatoriis opus fuisse; nam si per parva colatoria tantum feri, per continuam fermentationem separati, trajiciendum fuisset, illa debuissent esse admodum laxa, atque sic facile una cum sero, fermentatione dicta separato, etiam sanguis tenuior per ea delapsus fuisset.

2. Multum sanguinis per amplas arterias emulgentes deferendum fuisse, ut ex eo mediocris tantum feri pars separaretur, toto enim sero sanguis privandus non erat, ut fluxilis manere posset. Per venas autem emulgentes nihil adfluere ad renes, idque patere ex circulatione sanguinis, atque etiam ex valvulis ad ingressum emulgentium venarum in cavam appositis. Denique non valere illam consequentiam: *Multum sanguinis adfluit ad renes, ergo ex ejus aliqua parte preparatur in renibus seminis materia.*

3. Illud non sequi, *A semine retento afficiuntur renes, ergo renes præparant & suppeditant seminis materiam.* Æque enim valet atque hoc: *A bile retenta atque effervescente fit dolor capitis, ergo caput conficit bilem.*

4. Sic etiam non sequi: *Renum regioni imposta topica prosunt in gonorrhœa, ergo renes suppeditant seminalem materiam.* Æque enim valet atque hoc: *Aqua frigida testibus admota sistit hæmorrhagiam navium, ergo testes consueverunt sanguinem ad naves deferendum.*

5. Calidam renum constitutionem esse signum libidinositatis, non verò causam. Quippe ordinarium hoc esse, ubi omnia vasa spermatica sunt calidiora, tunc etiam renes esse calidiores: non quod renes majorem calorem inferant semini, sed exspirationes è calido semine elevatæ calefaciant renes: atque sic etiam in brutis animalibus maturis & libidinosis, non castratis, saporem & odorem aliquem seminalem in renibus percipi.

Denique, addendum esse pro conclusione, nulla specifica vasa à renibus ad testes protendi, per quæ seminalis materia eo deferri posset. Arterias spermaticas ex trunco aortæ sanguinem ad testes ferre, ejusque superfluum per venas spermaticas refluere ad cavam (quarum valvulæ ita positæ sunt, ut per eas nihil ad testes delabi queat) atque ita hæc vasa isti muneri inservire non posse, alia autem nulla dari.

Ex omnibus antedictis liquet, renes esse partes excrementum serosum evacuantes, ad vitam maxime necessarias. Quæritur igitur an renum vulnera sint lethalia? Dicendum, esse lethalia, & ex centum in renibus vulneratis vix unum perfectam sanitatem recuperare: quæ quidem lethalitas non procedit à renum nobilitate aut præstantia, sed à symptomatum supervenientium syndrome, scilicet à magna hæmorrhagia, vasorum dissectione, urinæ obstructione, aut ejus continuo effluvio, ingenti dolore, inflammatione, abscessu, exulceratione ob acris feri transitum vix curabili, aliisque, quæ ægrorum vires usque ad mortem conterunt. Quippe licet renes non sint partes principes, sunt tamen tales quarum usu carere non possumus (tales etiam sunt intestina tenuia, ventriculus, aliæque, quarum vulnera lethalia censentur) quo usu sublato, vel graviter impedito, tollitur vita. Contigit quidem nonnullos in iis vulneratos aliquamdiu supervixisse, & rudioribus sanatos visos fuisse, sed tandem tamen superstites abscessus egros è medio sustulisse. Sic Fallopius, Cornelius Gemma, Dodonæus, Forestus, Valleriola, alique, referunt varia in renibus vulneratorum exempla, qui ad aliquot annos supervixerunt, sed tandem tamen ex istis vulneribus mortui sunt. Quod autem alii citius, alii tardius occumbant, fit pro ut illa vulnera magis vel minus profunda, & ingruentia symptomata majora vel minora fuerint. Quidquid sit, ego in tota mea quadraginta quinque annorum praxi neminem in renibus vulneratum perfectam sanitatem recuperasse vidi, etsi talia vulnera multa mihi curanda occurrerint, præcipue cum junior in castris praxin exercerem, atque hinc summam variorum chirurgorum vanita-

*An renum vulnera sint lethalia.*

vanitatem admirari soleo, qui se multoties renum vulnera perfectè sanasse, gloriari audent. Sed quid dicemus de calculorum ex renibus excisione? ad quam inclinat Avicenna, *canon. lib. 3. fen. 18. tract. 2. cap. 18.* de qua etiam scribit Paræus, *lib. de affection. Ubi intumuerit & extuberaverit* [renis calculus in lumbis] *sub hoc tempus juxta renem secato, extracto pure, arenam medicamentis urinam citantibus curato.* Dicendum ægros, quibus calculus ex rene exsecatur, omnes mori. Refertur quidem illam curationem

aliquando in Hispania feliciter, in quodam capite damnato, fuisse institutam & ægrum perfanatum esse: verum hoc (si modò verum sit, de quo magnopere dubitandum) inter miracula ponendum est.

Hic obiter notandum, sub ventriculo, *Plexus nervorum* inter duos renes plexum quendam nervorum collocari, formatum ex duplici costali & stomachico, à quo nervos mutuuntur fere omnes inferioris ventris partes, de quo plura dicentur *lib. 3. cap. 8.*

## CAPUT XIX.

## De Glandulis renalibus.

Nomina.



Landulæ renales, Julio Caserio Renes succenturiati, Whartono Glandulæ ad plexum nerveum, Bartholino Capsulæ atrabiliaræ appellantur.

Situs.

Sunt autem duo corpora glandulosa, quorum unum singulis renibus, qua cavam spectant, sub diaphragmate, superna parte adiposæ tunicæ incumbit, cui adeo firmiter adhæret, ut sæpe à negligentioribus præter videatur, & exemptis renibus, membranz diaphragmatis annexa relinquatur.

Sinistra diaphragmati, dextra cavæ vicinior est, illaque locum, quam dextra, paulo elatiorem occupat. Utraque verò in brutis animalibus plerumque renibus tam prope non incumbit, sed semi pollicis latitudine ab iis distat, pinguedine interjacente versus diaphragma nonnihil recedens.

Reperiuntur eo in loco, ubi nervorum plexus conspicitur, cui firmiter adnectuntur.

Numerus.

Numerum binarium rarissimè excedunt.

Substantia.

Substantiam possident renum substantiæ non multum ablimilem, sed laxiorem, coloris nunc rubicundi, nunc adipi similis.

Figura.

Figura renibus rarò similes sunt (semel atque iterum tamen figuram renum exacte retulisse vidi) frequenter instar pastæ depressæ, ex quadrato oblongæ, conspiciuntur: sæpe etiam triangularem, interdum ovalem, rarò rotundam figuram obtinent.

Magnitudo.

Magnitudinem in adultis habent renibus longe minorem, & circiter ad quantitatem nucis vomicæ extenduntur, dextraque solet magnitudine superare sinistram, rarius hæc illam. In fœtu & pueris, fere usque ad semestrem spatium, renes fere adæquant; sed postea secundum proportionem reliquarum partium non incrementum, & circa pu-

bertatem ab ulteriore incremento plane cessant, unde in adultis minores conspiciuntur; sed interim tamen in his non decrescunt, ut nonnulli tradiderunt, nam in phthisi & febre hectica laborantibus, ubi pleræque aliæ partes emaciantur & extabescunt, hæc fere sanæ & illæse remanent, ac solitam magnitudinem servant.

Tenui succinguntur tunica, qua exteriori renum membranz firmiter connectuntur. *Tunica.*

Manifestam sinuosam cavitatem habent, *Cavitas.* sed adeo exigua ut vix pisum admittat, atque hinc in fœtu melius, quam adultis, conspicua, quæ nigram fœculentamque materiam continet, cujus colore etiam parietes ejus interiores tinguntur.

Whartonus observat in hanc cavitatem *Foramina* plurima ex ipsa harum glandularum substantia prodeuntia foraminula hiantibus osculis terminari; ipsam verò cavitatem in venam proximam dehiscere, atque ibidem valvula muniri, venam versus apertâ, retrorsum clausâ. Hanc autem plerumque ex se emittunt ad emulgentem, interdum ad adiposam, aliquando furculum cavæ inferunt, amplo & lato orificio è sinu earum prodeuntem. *Foramina & vasa.*

Arteriam sæpe ex emulgentibus desumunt, interdum ex trunco aortæ unum vel plures ramulos.

Nervulos admittunt exiles, à sexti paris ramo stomachico, ad propriam renum tunicam decurrente.

Harum glandularum usus hætenus incognitus est. Nonnulli, cum Vesslingio, eas tractum serosæ humiditatis adjuvare, & bilem atram colligere existimarunt, quæ, coaguli instar, feri à sanguine separationem promoveat. Spigelius, *anat. lib. 8. cap. 15.* arbitratur illas factas esse ad implendum vacuum, quod inter renes & diaphragma interstat, & ad fulcimentum ventriculi eo loco, qui est supra venas & arterias emulgentes, *Usus.*

gentes. Alii eas divisionem retiformis plexus nervorum fulcire putarunt. Riolanus, *animadvers. in Bartholin.* judicat illas in hominibus natis nullum usum habere, sed earum usum solummodo in fœtu perquirendum esse, in quo existimat illas excipere succum quendam adipi renali generando dicatum, quia in corpore infantis non generatur adeps, nisi postquam editus est in lucem, & succus ille antea collectus in actum producit. Glissonius putat illas succum nervorum nutritioni inservientem à reliquo sanguine secernere, ut purus ad nervos feratur. Quæ tamen omnes opiniones sunt merè conjecturales, nec ullo solido fundamento innituntur. Whartonius arbitratur in has capsulas ex plexu nervorum, cui incumbunt, exonerari succum quendam nervoso quidem generi inutilem, sed qui tamen inde in venas defluens, utilitatem aliquam præstare potest. Verum hæc etiam conjectura incertissima, quippe per angustissimos solidioris substantiæ nervorum poros, vix credibile est hujusmodi, aut qualemcunque crassum fœculentum humorem

deferri posse. Alii tradunt in illis coagulum quoddam confici, quod inde ad renes defluens, in iis promptam feri à sanguine separationem facit: quæ certè opinio magnam verisimilitudinem haberet, si modò viæ ab his glandulis ad renes demonstrari possent. Sed quid si dicamus, nigrum illum succum in iis confici ex sanguine arterioso (sicut de liene diximus *cap. 16.*) & certam fermenti vim adipisci, sanguini venoso necessariam, eaque de causa illum ex iis, non ad alias partes, sed dicta qualitate donatum, per venas è capsulis prodeuntes profluere ad cavam? verum & hæc quoque conjectura est.

Ex illa autem usus obscuritate fieri arbitrator, quod hætenus nulla fere harum glandularum apud Medicos fuerit consideratio, cum tamen ex iis male habentibus varios morbos procedere credendum sit. Sperandum igitur Medicos practicos & Anatomicos has partes diligentius observaturos, & quales morbi ex iis oriantur, per multiplices cadaverum apertiones ac inspectiones indagaturos, ac annotaturos.

## CAPUT XX.

## De Ureteribus.

Definitio.



Reteres, quasi *urina ductores*, Græcis *ὑπερήτες*, ab *ὑπερ*, *mingere*, & *ῥέειν* φλεβίσι, *meatus urinarii*, dicti, sunt vasa oblonga & alba, vel canales teretes ex renibus egressi, serum in renibus transcolatum excipientes, & ad vesicam deferentes, una cum arenulis, bile, pure, aliisque succis sero permixtis.

Ortus.

Oriuntur è renum sinu interiore, cujus variæ fistulæ concurrentes, & tandem in unam coeuntes, ureterem efformant.

Numerus.

Unus communiter singulis renibus conceditur, rarò plures inveniuntur, quales tamen casus bis à me publice demonstrati sunt, qui tamen duo ureteres utrimque prope vesicam uniebantur, in eamque uno orificio ingrediebantur.

Substantia.

Crassa, duplicique, & alba membrana constare, vulgo ab Anatomicis traduntur, exteriore communi, & interiore propria. Sed melius unicam tantum propriam membranam agnoscit Riolanus, quippe nulla exterior communis membrana ei à peritonæo adjungitur: ureteres quidem sub peritonæo generaliter, una cum multis aliis partibus, continentur, sed ab ea speciatim non investiuntur, nec peculiarem tunicam ab eo assumunt, sicut ventriculus, vena cava, hepar, multaque alia viscera & vasa assumunt. Propria autem & unica, qua

constant, membrana, est valida, nervosa fibris nonnullis obliquis rectisque roborata & arteriis venisque exilibus à vicinis partibus, nec non nervis à sexto pari & medulla lumborum, exquisitum sensum tribuentibus donata: quos tamen nervulos iis denegat Riolanus, *animadvers. in Hoffman.* putatque ad dolorem excitandum sufficere, quod sint membranosi, cum ex distensione membranæ à calculo, aliave re acri, dolor satis magnus, ut putat, induci possit: qua in re errat, nam quod sine spiritibus per nervos influentibus hoc fieri nequeat, liquet in paralyti, in qua membranæ non sentiunt ob defectum spirituum animalium, nec ratione suæ structuræ ullum sensus indicium produnt.

Exigui sunt in homine, criciter palmum longi, & paleam lati: quamvis à calculis violenter magnoque cruciatu transeuntibus sæpe mirum in modum dilatentur, ita ut interdum tenuis intestini latitudinem habere visi sint.

A renibus supra musculos psoas, femur flexcentes, inter geminas peritonæi membranas, nonnihil versus inferiora reflexi, deorsum progrediuntur, & aliquo modo obliquo inter membranas vesicæ ductu, circa posteriora cervicis inseruntur, & cum interiore vesicæ substantia continuantur, quo loco nonnulli putant ipsos valvulis ad orificia

orificia sua muniri, urinæ è vesica regressum versus superiora impredientibus. Has tamen valvulas Andreas Laurentius, Riolanus, & Plempius, merito in dubium vocant, & solum obliquum ac tortuosum

ingressum in vesicam, urinæ regressum è vesica satis impedire posse tradunt, quorum sententiæ nostrum quoque calculum adjicimus.

Vide Tabulam III. & IV.

## CAPUT XXI.

## De Vesica urinaria.

Definitio.



Vesica urinaria, Græcis κύστις ὑροδόχος dicta, est membrana pars infimi ventris organica, quæ susceptum à renibus serum asservat, & tandem vel onere, vel acrimonia molestum excernit.

Situs.

Sita est in hypogastrio, inter geminas peritonæi tunicas, in cavitate quæ ab ossibus sacro, coxendicis, & pubis efformatur. In viris recto intestino incumbit, glandulisque prostaticis jungitur: in mulieribus uteri collo adhæret: in utrisque anterior ossibus pubis alligatur. Præterea connectitur etiam umbilico per urachum.

Membrana.

Triplici constat membrana, quarum externam in homine (non in brutis) adipe circumfusam tribuit peritonæum. Media crassior fibris carnis ad contractionem & urinæ excretionem donatur, atque hinc Aquæpendenti & Bartholino, *Musculus involvens*, Spigelio, *Detrusor urinæ* appellatur. Hæc si ab urinæ copia nimis distendatur, ischuriam, sive omnimodam urinæ suppressionem parit, quia nimis distentæ ejus fibræ adeo debilitantur, ut se rursus contrahere non possint; qualem ischuriam se ipsum passum fuisse scribit Forestus, lib. 25. observat. 14. Intima tenuior, sensuque vegetior lubrico quodam muco à contenti liquoris mordacitate vindicatur: hæc in calculosis rugosa invenitur.

Figura.

Figuram obtinet oblongam, globosam, & rotundam, seu pyriformem.

Magnitudo.

Magnitudo non in omnibus æqualis existit, sed in aliis major, in aliis minor, quam sæpe insignem peperit crebra & violenta ejus distensio ab urinæ nimis diuturna retentione.

Cavitas.

Cavitatem unicam habet, quam tamen in paucis membranâ seu septo medio in duas distinctam repertam fuisse, Medicorum observationibus constat.

Foramina.

Tribus foraminibus pervia est, quorum duo minora ante cervicem, ureterum ingressui patent: tertium majus in cervice urinam exeuntem transmittit.

Vasa.

Arterias ab hypogastricis recipit, cervicis latera ingredientibus, eique sanguinem pro nutritione deferentes; cujus residuam partem per exiguas venas in hypogastricam

venam effundit. Nervos admittit à sexto pari & medulla ossis sacri.

Dividitur in Fundum & Cervicem. Divisio.

Fundus superiorem latioreque vesicæ partem comprehendit à quo sursum ad umbilicum porrigitur urachus, qui una cum propinquis arteriis umbilicalibus validum in adultis ligamentum evadit, decubitus fundi in cervicem impediens: de uracho plura videantur cap. 32. Fundus.

Cervix, seu collum inferior & angustior pars est, quæ in viris longior & arctior, ad pudendi exortum defertur, & in urethram aperitur: in foeminis verò brevior & latior, uteri collo superius imminet, ac sub clitoride, statim supra vaginæ ostium, inter nymphas aperitur (plura de mulierum cervice vesicæ videantur cap. 26.) in utrisque autem carnosæ existit, fibris plurimis, maxime transversis & orbicularibus, intra rectas, totum vesicæ corpus ambientes, latentibus, contexta, quæ sphincterem musculum constituunt, vesicæ collum constringentem, ne urina præter voluntatem effluat, atque etiam prostaticis circumjectum, ut videndum sequente cap. 22. Nugæ sunt, quod nonnulli Anatomici, præter hunc, adhuc plures alios vesicæ musculos describant; ut sphincterem externum, detrusorem, &c. quæ nihil aliud sunt quam vesicæ membrana tota carnosæ. Cervix.

Huic cervici in viris versus urethram membranula instar valvulæ circumtenditur, quæ feminis versus urethram propulsi ad vesicam influxum, & urinæ è vesica defluentis in tubulos seminarios illapsum prohibet. Hæc demonstrari potest, si stylus intra vesicam introducatur versus urethram, in quam sine obstaculo facile ingreditur; non verò ductu contrario, utpote quo dilacerari solet. Effringitur ista membranula per catheteris in vesicam immisionem, & nonnunquam in gonorrhæa eroditur. Bartholinus refert ex observatione Riolani, hanc membranam in pueris usque ad vigesimum annum inveniri, postea verò non amplius. Quæ observatio, procul dubio, non erit perpetua regula: nam in praxi nos multoties senioribus hanc membranulam immis- Valvula.

sione catheteris cum dolore disruptimus. Forte Riolanus hoc in cadaverum sectionibus in Gallia observavit, quia juvenus Gallica admodum libidinosa mature Veneri

& turpiter scortationibus sine ullo pudore incumbit, atque hinc frequenter gonorrhœa laborat, in qua ab acris feminis transitu membrana hæc eroditur.

## CAPUT XXII.

Vide Tabulam III. & IV.

## De Partibus virilibus feminis generationi inservientibus.



Ost nutritionis organa, quibus in inferiore ventre nutrimenta ad perituri corporis sustentationem præparantur, ordo postulat ut accedamus ad descriptionem instrumentorum generationi inservientium, quibus humani generis perennitas, quam Natura individuis negavit, procreatione conservatur.

Pudenda.

Hæ partes **Pudenda** dicuntur, à pudore, utpote quarum ante peccatum hominis non pudebat, ut inquit Augustinus, *de civitate Dei lib. 4.* post peccatum verò turpis nuditas cum pudore animadversa est. Theophrastus Paracelsus scribit, homines ante peccatum his partibus caruisse, sed post commissum peccatum illas ipsis à summo Creatore adjectas fuisse, in perpetuam pudendi facti recordationem: & quia per Serpentis seductionem primi parentes in peccatum lapsi fuerant, hinc Adamo membrum genitale instar serpentis, Evæ verò instar antri serpentis (propterea quod illa blandientis serpentis illecebras prima receperat & admiserat) datum fuisse. An hinc igitur est quod Adamitarum serpens semper tanto cum fervore antrum Evæ subire atque ingredi gestiat; hocque etiam antrum tanto cum amore ac desiderio serpentem istum amittere & recipere expetat?

Genitalia.

Dicta autem *pudenda*, quæ communiter etiam **Genitalia** appellantur, cum in utroque sexu se eodem modo non habeant, de singulis necessario seorsim agendum erit, ac de hisce partibus virilibus primo dicturi, illas prosequemur eo ordine quo in iis semen generatur ac movetur, & tandem ex iis excernitur.

Virorum genitalia.

In viris genitalia sunt tales partes quæ ad sibi simile in foemina generandum sunt destinatae. Hæ partes commodè dividuntur in internas & externas; quarum illæ intra abdominis cavitatem delitescunt, hæ verò foris conspicuæ sunt. Omnes autem illæ, tam internæ, quam externæ generationi inservientes partes duplices sunt: *Aliæ* quæ semen conficiunt, de quibus hoc capite dicemus: *aliæ* quæ illud confectum ad uterum devehunt, de quibus sequente capite.

Vasa spermatica.

Inter eas quæ semen conficiunt, primo loco occurrunt **Vasa spermatica** (hæc etiam *preparantia* vulgo nominantur, quod

in iis sanguinem ad feminis generationem præparari olim creditum fuerit) duplicia, scilicet arteriæ duæ, totidemque venæ, quæ arteriis magis conspicuæ & majores sunt. Scribunt quidem nonnulli, se has illis majores vidisse, sed hoc si contingeret, foret omnino præter Naturæ ordinem, & sanguinis circulationi prorsus contrarium (per arterias enim latiores plus sanguinis adheretur, quam per venas minores & angustiores reduci posset) atque hinc verosimile est illud nunquam contigisse, sed Anatomicos id scribentes, per oculorum quandam caliginem fuisse delusos.

**Arteriæ spermaticæ** sanguinem ad feminis confectionem, testiumque nutritionem deferunt, earumque dextra paulo infra, sinistra vero juxta, vel aliquantillum supra emulgentem, nonnunquam utraque duorum transversorum digitorum intervallo sub emulgentibus, ex arteriæ magnæ trunco antica parte oritur. Dextra autem venæ cavæ truncum conscendens, oblique ad venam ejusdem lateris, sinistra verò recta ad sui lateris venam procedit. Alterutram tamen ex emulgente nonnunquam prodixisse, observavit Riolanus: & interdum, non duas, sed unam solam ex aortæ trunco emerxisse, duarumque officio satisfecisse, notatum est. Sic, referente Jo. Theod. Schenkio, Georgius Queccius, Medicus Noribergensis, in cadavere masculino inuenit arteriam hanc unicam, ex anteriore aortæ parte emanantem, quæ supra cruralium ramorum divaricationem in duos ramos diducta, ac utrimque postea venæ spermaticæ descendenti conjuncta erat. Et, referente Hoffmanno, Petrus Pavius anno 1598. in cadavere senis invenit arteriam spermaticam non nisi unam, è medio aortæ trunco prodeuntem, decuplo majorem quam in aliis hæ arteriæ reperiri solent, & in testes (procul dubio etiam antea bifurcatam) desinentem. Verum hi casus, de numero immutato, rarissimi sunt: quemadmodum etiam ille quem de numero aucto scribit Cornelius Gemma, *art. cyclog. lib. 2.* Sape, inquit, *videre datum est nobis tres quatuorve arterias feminales.* Loco *sape*, mallet scripsisset *aliquando*, nam numerus auctus adeo rarus est, ut ex sexcentis Anatomicis vix unus eum viderit:

com-



communiter enim duæ arteriæ spermaticæ, utrimque una, ex aortæ trunco prodeunt.

*An arteria possint deesse.*

Harum arteriarum nonnunquam unam in uno, & interdum utramque in utroque latere deesse, tradunt Bauhinus, Riolanus, & alii, hancque tunc sterilitatis causam esse scribunt. Quod tamen verum non esse convincit ratio, cum sanguis per nullas alias vias ad testes deferri possit, quam per has; venis ob valvularum impedimenta, nullum sanguinem ad testes dimittentibus. Atque hinc defectu materiæ non tantum semen non confici (quod illi sterilitatis causam esse dicunt) verum etiam ipsi testes nutriri non possent, sicque extabescentes deficerent & exsiccarentur, aut sphacelo correpti deciderent, cum tamen in illis corporibus, in quibus una, aut utraque arteria deesse dicebatur (sicut illud ipsum etiam olim nobis ab Otthono Heurnio & Falkoburgio, Anatomicis Leydensibus, non semel demonstratum & malè persuasum est) testes satis turgidi & succulenti reperti fuerint, semine quoque in vesiculis seminariis copioso satis conspicuo. Hic igitur vel dolus, vel error latet, qui ex eo procedere solet, quod propter harum arteriarum magnam tenuitatem, sæpe contingat, illas per imprudentiam, aut nimiam in præparando & secando festinationem, ab Anatomicis abscindi, atque hinc inveniri & demonstrari non posse, unde tunc sibi ipsis & præsentibus spectatoribus facile persuadent illas vitio naturæ deesse.

*Venæ spermaticæ.*

Venæ spermaticæ è testium nutritione & seminis confectione residuum sanguinem ad cavam referunt. Harum dextra è teste dextro ascendens truncum venæ cavæ anteriore sede, paulo supra emulgentis exortum (hanc Riolanus in emulgentem dextram quoque insertam, se multoties observasse scribit, quod tamen mihi nunquam videre contigit) sinistra verò emulgentem ejusdem lateris, rarissimè cavam ingreditur. In utramque autem intra abdomen varias tenellas ramificationes, ex omento & peritonæo prodeuntes, aperiri, observavit Regnerus de Graef; ut &, quod venæ non tam recto ductu procedant, quam arteriæ. Dominicus de Marchettis, *anat. cap. 6.* scribit se bis terve venam spermaticam, è teste in abdomen ascendentem, in medio itinere in tres ramos diffusam vidisse, qui singulatim truncum venæ cavæ ingrediebantur.

*Valvula.*

Ne autem sanguis per eas ascendens relabatur ad testes, valvulis semilunaribus multis, duplicata serie dispositis, & sursum spectantibus, sicque regressum sanguinis impredientibus, præditæ sunt. Ad introitum etiam utriusque in dictas magnas venas, parvum tuberculum conspicitur,

quod à valvula sanguine distenta, cavam versus spectante, excitari, haud inani conjecturâ, suspicatur Rolfincius, eamque valvulam delineatam exhibet Highmorus, in dextra unam, in sinistra geminam.

Ad singulos autem testes una arteria & una vena pertingit, hæcque duo vasa superius in suo principio circa renes, nonnihil à se invicem distant, sed in progressu mox simul junguntur, ac inter se aliquantum intorquentur, & tunicâ à peritonæo enatâ arcte connectuntur, ut vix arte separari queant. Jo. Saltzmannus, in *observat. anat.* tria describit subjecta humana, in quibus observavit, arteriam sinistram paulo sub emulgente ortam, se non statim venæ adjunxisse, sed prius sursum versus venam emulgentem ascendisse, eamque superasse, & circum eam circumflexam fuisse, atque inde mox cum vena spermatica conjunctam, deorsum more solito descendisse.

*De his vasis formis spermaticorum.*

Sic juncta supra ureteres deorsum feruntur ad inguina, ubi cum nervo gracili à sexti paris plexu in abdomine latente (interdum etiam unus à 20 aut 21 pari spinalis medullæ adjungitur) & cremastere musculo, perforant peritonæum (hujus tamen interior membrana ad hunc exitum lateribus valorum exactissimè connascitur, eaque disruptâ fit hernia, intestino, omento, aqua, aut flatu per rupturam in productionem peritonæi & scrotum illabente) ejusque processum (qui est exterioris membranæ peritonæi productio versus scrotum, vaginam efformans, in qua vasa spermatica cum teste continentur) ingrediuntur, in quo in plures divisa furculos, infinitis gyris & circumvolutionibus inter se implicatos, ad testes progrediuntur: quos ubi attingerunt, rursus separantur, & arteriæ flexuoso ductu per testis longitudinem, usque ad minorem epididymidis globum excurrunt, ibique primo in duos, hinc in plures ramulos diremptæ, partim versus oppositam testis extremitatem redeunt, partim intra testium substantiam evanescent. Venæ verò in minimas radices divisæ, arteriolarum ramulis interferuntur, & quasi reticulari quodam contextu sibi invicem, modò solo incubitu, modò anastomosibus junguntur: sed arteriolarum cum venulis nullas hic anastomoses observari, seu dari, liquet ex liquore arteriis injecto, qui nusquam venas subintrat. Neque etiam hæ anastomoses adesse debent: nam si sanguis ex arteriis per dictas anastomoses transire posset, ejus nihil, vel nimis parum ad testes perveniret, sed per latiores illas vias seu anastomoses longe citius & facilius, quam per ipsorum testium angustissimos atque invisibiles meatus, ad venam cavam transiret.

O 2

Andreas

*Error Anatomorum.*

Andreas Laurentius, Bauhinus, Vesslingius, multique alii Anatomici, in eo graviter errarunt, quod existimaverint arteriam venamque spermaticam finiri in parastatam, in eaque mutari in vas deferens, tanquam continuum sibi corpus: cum tamen accurate rem insipientibus clarissime pateat, illa vasa non ingredi parastatam, sed ipsum testem, ut ante dictum, & parastatam illic à teste separari posse, illis vasis illæsis manentibus, & ipsi testi adhærentibus. Sanguinem enim ipsos testes subire, ingenioso experimento dilucide ostendit Regnerus de Graef, lib. ante citat. *Opinio*, inquit, *quæ dicit sanguinem non subire testes, luce meridiana clarius sequente experimento convincitur. Immittatur tubulus in arteriam, & affixâ syringâ propellatur liquor colore aliquo tinctus versus testiculum, & videbis admodum belle arteriarum progressum, qui cum ad testium supremam, sive partem illam ubi primo intrat, pervenerit, primò se, intactis epididymidibus, in interiore testiculorum tunica diffundit, & versus ejus fundum excurrit, ubi dum reflectitur, in surculos pene infinitos luxuriat, qui modò dextrorsum, modò sinistrorsum, per testiculorum substantiam excurrunt.*

*Plexus pampiniformis.*

Constituunt autem hæc sic complicata & connexa vasa **Plexum** illum quem Anatomici **Pampiniformem**, à capreolorum vitium, aut **Varicosum**, à varicum venarum similitudine; atque etiam **Corpus pyramidale**, à pyramidis figura, appellant, quatenus principio angustiore incipiens, paulatim in descensu multiplicatur, donec latiore basi ad testem perveniat. Herophylus, teste Galeno, hunc plexum appellavit *Parastatam circoideam*, quod nomen illi etiam tribuit Riolanus. Alii illum nominant *Parastatam varicosam*, quod vasa hæc instar varicum sint contorta. Hoc tamen nomen Vesslingius male imponit posteriori parti epididymidis, cum in ea nulla vasa sanguifera tali modo contorta & complicata conspicua sint.

*Hernia varicosa.*

*Hernia carnis.*

In hoc plexu nonnunquam excitatur *hernia* illa quæ *varicosa* appellari solet, cum sanguis crassus & melancholicus in hos meandros incidit. Interdum etiam *hernia carnis* hic gignitur, cum à casu, ictu, dura equitatione, &c. hic plexus contunditur, atque ex ea contusione caro spongiosa succrescit, idque sæpe ad duorum triumve pugnorum magnitudinem, quod malum sine lateris affectu testis ablatione vix unquam perfectè sanatur.

Hanc tamen dictorum vasorum talem inter se complicationem, corpus pyramidale seu varicosum efformantem, in hominibus plane non reperiri, tradit Regnerus de Graef, lib. de part. genital. viror. sed arteriæ truncum, sine ulla reticulari diva-

ricatione, recta ad testem excurrere, & tribus quatuorve transversis digitis supra testiculos in duos ramulos dividi, eorumque unum sub epididymide abscondi, alterum ad testem procedere, ex autopsia sibi certo constare, hincque in corpore pyramidalitalem arteriolarum cum venulis reticularem contextum non adesse existimat; secus ac in multis brutis contingit, in quibus arteriam cum venæ trunco in varios cincinnos & capreolos contorqueri fatetur. Verum hernia carnis, quæ hac in parte enascitur, item contextus vasculorum sanguiferorum ibidem eodem modo in hominibus atque in multis brutis conspicuus, contrarium docere videntur: nisi forte dicere velit Regn. de Graef, quod etsi contextus iste in brutis ex arteriis venisque complicatis constet, eum tamen in hominibus ex solis ramulis venæ à teste redeuntis seu emergentis efformari, arteriâ solum rectâ cum transeunte: quod anne sic aliter in hominibus, quam in brutis, se habeat, dubitandum censeo, sed quia illud hæcenus tam exacte non observavimus, hoc dubium aliquamdiu sub iudice relinquemus, usque dum illud, data occasione, attentius à nobis perscrutatum fuerit.

Harum arteriarum inter se, atque etiam *Anastomoses nulla.* venarum cum arteriis anastomoses, hæcenus, tanquam indubitæ, à multis descriptæ fuerunt: sed idem Regn. de Graef, per alicujus liquoris in arteriam injectionem, variisque firmis rationibus, docet hic nullas tales anastomoses dari, vel dari debere, aut posse.

Ex modò dictis patet, quid hic arteriæ, *Vasorum officium.* quidque venæ præstent, quod scilicet illæ sanguinem adferant, hæc superfluum referant. Unde liquet vanam esse Galeni, Bauhini, Spigellii, aliorumque variorum opinionem, qui horum vasorum officium nimis longè extendunt, & nescio quam non sanguinis in his præparationem, imò & coloris ad albedinem immutationem describunt, cum è contrario nihil hujusmodi in iis contingat, & per autopsiam pateat, non minus rutilum sanguinem ex his, quam ex aliis vasis sanguiferis extrahi, nec quidquam albicantis humoris in iis contineri.

Hæc sibi mutuo sic connexa vasa, ut *Testes.* modò dictum, excurrunt ad **Testes**, seu **Testiculos**, qui sunt partes genitales extra abdominis cavitatem in scroto propendentes, semini conficiendo destinatæ.

Appellantur autem **Testes**, quia virilitatem testantur: atque hinc olim Romani, qui ad testimonia in iudicio non nisi viros admittebant, testibus privatos, tanquam non viros, repudiabant. Alii illos *Poma amaris, Coleos, Brachina mala*, aliisque nomini-

nomnibus nominantur. Græcis ὄρχις vocantur.

Numerus.

Numero duo sunt ( hinc Herophylo ἑδύμοι, gemelli, appellantur, quod sicut in uno utero, sic illi uno scroto concludantur ) partim ut seminis generatio felicius procederet : partim ut uno sublato, vel morbo aliove casu impedito, alter necessarium munus solus perficeret, & unus solus utriusque officio fungeretur.

Rarissime numerus minor aut major est : quippe raro contingit ut quisquam cum uno teste natus sit, cujus tamen casus exempla referunt Riolanus, *anthrop. lib. 11. cap. 31.* Petrus Borellius, *cent. 3. observ. 60.* & Regn. de Graef, *lib. de vitior. org. gener.* Item raro plures in uno inveniuntur, quamvis familiis quibusdam id familiare esse dicatur : quod de Coleonum illustri familia ( ex eo forte sic denominata ) nonnulli testantur : ita etiam refert Fernelius, *lib. 1. pathol. cap. 8.* se novisse tertium testiculum omnibus familiæ cujusdam superabundasse. Exempla variorum hac trinitate gaudentium describunt, Forestus, *lib. 27. observ. 15.* Scholiographus, *ad Hollerii lib. 1. cap. 26.* Borellus, loco ante citato, Regn. de Graef, loco citato, alique plures. Omnium maxime infrequens est, ut vir sine ullis testibus natus, tamen in coitu virilitatis actum præstare possit, cujus rei exemplum refert Cabrolus, *observ. anat. 1. de quo mox dicturi sumus, quest. 1.*

Sims.

Siti seu penduli sunt testes ad radicem penis, ibidemque in scroto reconditi. Raro & præter Naturam uterque intra abdominis cavitatem concluditur, cujus tamen exemplum vidit Regn. de Graef, loco citato, & ibid. aliud adjungit, visum Francisco de le Boe Sylvio. Alterutrum intus delituisse, observavit Riolanus, *anthropog. lib. 2. cap. 29.* in viro nobili, qui numerosam prolem è lectissima conjuge suscepit. Simile etiam mihi visum in viro forti, liberis plus satis ditato. Utrumque ad aliquod tempus, scilicet usque ad pubertatem, in inguine, aut abdominis cavo latuisse, postea verò in scrotum descendisse, exemplis probant, Paræus, Martinus Rulandus, & Bartholinus.

Figura & magnitudo.

Figura & magnitudine æmulantur ovum columbinum, & in quibusdam parvum ovum gallinaceum, utrimque nonnihil depressum. In his tamen varietas aliqua conspicitur, pro vicinorum vasorum majore aut minore inturgentia. Sinister communiter dextrum magnitudine nonnihil superat, & paulo longius propendit : rarius dexter sinistro major est. Nonnunquam in Veneris morbis insolitam magnitudinem, modo alteruter, modò uterque conquirat, quam sæpe postea, curato illo morbo, talem toto vitæ tempore, sine magno incommodo,

remanisse observavi ; sed hoc præternaturale est : ut & illud quod refert Lazarus Riverius, *observ. communic. 44.* de quodam cui testiculi superabant magnitudine testes equorum, ex quibus postea deciderunt frusta lapidea durissima : nec minus illud quod scribit Hildanus, *cent. 5. observ. 48.* de quodam hydropico, in quo testiculus dexter ad ovi anserini magnitudinem adactus, pilis (materiæ cuidam purulentæ, oleaginosa, & albæ commixtis) infarctus repertus est. De testibus capitis magnitudinem æquantibus, in homine admodum obeso & vasto, observationem habet Platerus, *observ. lib. 1.*

Substantia.

Substantiam obtinent peculiarem, qualis alia similis non datur in toto corpore, subalbam & mollem, ex innumeris minutissimis vasculorum seminiferorum funiculis, continuata serie junctis, conflata, in qua etsi nulla manifesta cavitas deprehendatur, dictos tamen funiculos cavos esse, semenque invisibiliter deferre, patet, si visibiles efficiantur. Modum autem quo oculis conspici redduntur, primus docuit Regnerus de Graef, *lib. supra citat.* quippe in cane aliove bruto animali vivo vas deferens firmiter ligat, atque ita testiculorum internos vasculorum funiculos, alioqui inconspicuos, mox seminali materia impleri ac distendi, sicque facile conspici, refert. Ita etiam in gliris majoris testiculis hæc vascula semine candida, per albugineam tunicam transparere scribit : additque, si detractâ albugineâ tunicâ iidem testiculi in aqua deponantur, parumque agitentur, quod dicta vascula sponte, sine instrumentorum ope, ita à se invicem secedant, ut tota testiculorum substantia non nisi ex vasculis composita esse videatur ; hocque à se Medicis & Chirurgis Delphensibus sæpe demonstratum refert. Illud ipsum jam nuper mihi quoque exhibuit in teste gliris, qui in tenuissima albicantia vascula ita erat dissolutus, ut totus ex iis constare videretur. Quamvis interea maxime verosimile sit, in vivo animali istis vasculis propriam aliquam tenellam, quasi medullarem, substantiam, cum minimis quibusdam glandulis, interjectam esse, quæ in vasculorum ablutione, dissolutione, ac præparatione ab iis separatur, sicque evanescit : nam credi vix potest testes ex solis vasculis, nulla alia substantia suffultis aut connexis, constare posse, cum in quibiscunque aliis visceribus, hepate, liene, renibus, cerebro, &c. vasa percurrentia peculiari viscerum substantia suffulciuntur ac connectentur, & humores in iis contenti per istis vasis circumjectæ substantiæ proprietatem, seu peculiarem temperiem & conformationem, magnam & specificam mutationem subeant : quod ipsum non minus in testibus, quam

aliis visceribus, contingere, verosimile est.

Dicta testium vascula seminifera, à se invicem dissoluta, in admirandam longitudinem extenduntur, eum in finem illic requisitam, ut materia seminalis diuturniore mora, & lentiore transitu melius elaborata, majorem perfectionem acquireret.

*Nobilitas.*

Errant qui scribunt testes esse glandulas, cum earum neque temperiem, neque conformationem, neque substantiam, neque usum habeant, sed nobiles sint partes, quatenus homini robur & vigorem affundunt: imò etiam principes dicendæ, quatenus ad procreationem & speciei conservationem faciunt.

*Vasa.*

Recipiunt, ut ante dictum, arteriolas à spermaticis, exiguasque venas ad cavam & enulgentem sinistram emittunt. Nervos, secundum vulgatam opinionem, obtinent exiles, à sexto pari vago, & à duodecimo thoracis pari derivatos. Nos mense Novembri 1668., & postea rursus Decembri 1670., cum in hos nervos diligentius inquireremus in cadaveribus humanis publicis, ad singulos testes unum duntaxat nervulum, paululum supra eum locum ubi vasa spermatica exitum ex abdomine minantur, sese cum vasis spermaticis conjungere, eorumque communem vaginam ingredi (quod etiam aliàs à nobis visum) & sic ad testem excurrere, observavimus, sed propter ejus parvitatem vix certo animadvertere potuimus, foretne sarculus sexti nervorum paris, an verò paris duodecimi thoracis (à nobis infra descripti, *lib. 8. cap. 3.*) vel, ut aliis non sine ratione placet, paris 20. aut 21. spinalis medullæ, quod postremum nobis maximè verosimile visum fuit. Atque ita, per autopsiam, videntur pauci tantum (forte unus solus) nervuli ad quemque testem excurrere. Verum è contra nuper scripsit Glissonius, *anat. hep. cap. 35.* se plurimos nervos in iis vidisse, materiam ad seminis generationem conferentes: qualem nervorum copiam nos hæcenus in iis videre non potuimus, sed tantum paucos, eosque vix ulterius quam ad albugineam tunicam deducere: in interiore enim testium substantia conspicui non sunt, tam propter summam eorum tenuitatem, quam propter colorem albicantem: etsi interea certissimum sit, illos sanguini per arterias affluentem spiritus animales affundere, ut latius docemus *sequeute cap. 28.*

*Vasorum distributione.*

Verum an etiam vasa sanguifera ipsam testium substantiam ingrediantur, an verò in albuginea tunica terminentur, apud nonnullos dubitatum est. Prius sentire videtur Hippocrates, *lib. de loc. in hom. & lib. de off. nat.* quibus locis scribit, venas quasdam in testes proficisci: ubi per *venas*, intelligit quælibet vasa sanguifera, id est, venas &

arterias, sicut id aliàs plurimis locis facere solet. Alii propter obscurissimum horum vasorum ingressum, illa vasa testium interiora non ingredi putarunt, cum per solam duntaxat albugineam tunicam eorum disseminationes conspiciantur, interius verò non reperiantur. Hæc tota dubitatio evanescet, si penitus inspiciamus testium usum & conformationem. Eorum usus, seu officium est, conficere semen, atque eum in finem componuntur ex propria aliqua substantia, & innumeris vasis seminiferis (ut antè dictum) in quibus semen conficitur: quia autem materia aliqua opus est, è qua semen conficiatur, hinc docet ratio, etiam necessario vascula sanguifera & nervulos dictis vasis seminiferis interferi, ut iis materiam in semen mutandam suggerant, & paulatim infundant: quo autem modo hoc facere videantur, statim dicetur. At enim, dicat aliquis, color rubicundus vasculorum sanguiferorum præsentiam arguit & prodit, at talis color in testium substantia vix unquam conspicitur, ergo nulla sanguifera vascula eam ingredi videntur. Respondeo, quod ejus rei causa sit summa arteriolarum, ab albicantibus seminiferis vasculis pressarum, tenuitas, ob quam etiam in mille aliis partibus arteriolæ & venulæ inconspicue sunt: præterea si in recenter evulso teste liquor aliquis rubicundus per syringam in arteriam spermaticam injiciatur, tunc plurima sanguifera vascula in medio teste nonnihil intumescunt, & sic conspicua fiunt. Denique addam, quid usu edoctus in homine observaverim, scilicet in sanorum & vegetorum virorum occisorum testibus difficissimis plerumque fere nulla sanguifera vascula in substantia interiore conspici posse, imò neque in testibus vivorum propter herniæ curationem excisis, vel saltem rarissime in talibus sanis minima quædam eorum vestigia apparere: sed in morbo emaciatis cadaveribus (qualia in nosocomio Medicinæ studiosis multoties profecamus) nonnunquam inveni multos leviter manifestos, sed tenuissimos, vasculorum sanguiferorum, interiora testium percurrentium, ramusculos, quod non modò sæpius privatim Medicinæ studiosis ostendimus, verum etiam mense Martio anni 1663. & mense Novembri anni 1668., in duobus cadaveribus humanis, longo morbo emaciatis & tandem extinctis, publicè in theatro nostro anatomico plurimis spectatoribus demonstravimus. Hujus rei causa talis esse videtur. Sicuti cerebro aliqua propria specifica vis inest, cujus ratione in ejus vasis, fibris, & poris ex sanguine conficiuntur spiritus animales: ita etiam testium substantiæ inest propria quædam seminifica vis, cujus ratione sanguis in eorum vasa seminifera delatus, mutatur in semen.

semen. Hæc vis quia fortis & vegeta est in sanis, hinc sanguinis per arteriolas ad interiora eorum delati subtiliores magisque falsæ particulae, una cum spiritibus animalibus per nervos accedentibus, in labyrinthea, mirabiliterque sibi invicem intertexta seminifera vascula, incidunt & ab iis exceptæ colorem rubrum exuunt (sicut chylus in corde colorem album) ac in semen album mutantur: paucillum verò residui sanguinis, quod in exilibus sanguiferis vasculis superest, à substantiæ testium & vasculorum seminiferorum albedine sic obfuscatur, ut conspectum effugiat. At in morboſis, in quibus sicut reliqua viscera, ita etiam testes debiles sunt, separatio particularum sanguinis confectioni feminis convenientium, non bene, nec satis citò peragitur, unde tunc sanguifera vascula magis tumida manent, & solito plus sanguinis continentia, facilius visui occurrunt. Præterea tunc etiam sanguinis male separatæ & nimis rubicundæ particulae in vasa seminifera effusa, malè & tardè in iis coquuntur, ac in semen mutantur, atque hinc quoque sanguineus ruber color in illis seminiferis vasculis aliquo modo hic illic transpatet. Eandem quoque ob causam, procul dubio, contingit, quod in nimio coitu utentibus, interdum loco feminis sanguis fuerit excretus (hujus rei varia extant apud Medicos exempla) testibus scilicet nimia Venere, nimiaque feminis profusione ita debilitatis, ut sanguinis in eos effluentis convenientes particulae tam citò non potuerint à reliquis separari, & in semen converti. Dicta autem seminifica vis procedit ab apta & conveniente ac propria testium conformatione & temperie, qua temperie per morbos nimiamve Venere immutatà ac læsà, labefactur etiam vis eorum seminifica: eodem modo sicut talem ob causam in cerebro etiam labefactur vis spiritifica.

Dubium.

Hic jam magnum dubium incidit, scilicet qua ratione sanguinis arteriosi (cui spiritus animales per nervulos accedentes adjunguntur) in testes effusi particulae falsiores, ad feminis generationem aptæ, & aquosæ seu albicantes, à rubris particulis separentur? Hæc res adeo dubia, obscura, & intricata est, ut ejus expeditioni hæcenus nemo manum admoveere ausus fuerit; vel qui aliquid dicere tentarunt, confugientes ad substantiæ & pororum proprietatem, fere nihil dixisse visi sunt: nam hac de re duntaxat per verosimilem conjecturam judicandum est, cum per autopsiam id clare doceri vel demonstrari non possit. Præcedente cap. 14. diximus, quomodo in hepate humorum secernendorum à reliquis sanguineis separatio fiat per minimos invisibiles glandulosos acinos, ante hac ignotos, sed nostro tempore Malpighii diligentia, ope

microscopii, detectos, quibus mediantibus illa separatio peragitur. Etiam cap. 18. similiter ostendimus, feri è sanguine separationem fieri per minimas, antehac ab Anatomicis prætervisas, glandulas. Et lib. 3. cap. 11. docemus sanguinem per cineream cerebri substantiam transeuntem, in isto transitu, ob substantiæ glandulosæ & pororum ejus proprietatem, exuere subtilissimas maximeque spirituosas falsuginosas particulas, easque à nervulorum primordiis assumi seu imbibi, ac in iis paulatim magis magisque attenuari, & ad spirituositatem exaltari, dum reliquæ rubicundæ magisque sulphureæ à minimis venulis absorbentur, & sic paulatim ad cor redeunt. Ita etiam in testibus hoc negotium procedere verosimile videtur. Aut enim minimæ, hæcenus ob exilitatem invisibiles, glandulæ, vel aliqui glandulosi acini vasculis testiculorum interjiciuntur, quibus mediantibus, talis conveniens separatio fit: aut vasculis testium (ex quibus testes maxime constant) circumfusa est medullaris albicans aliqua propria substantia, in quam arteriosus sanguis effusus, in transitu deponit subtilissimas falsuginosas particulas (ex quibus semen maxime constare, latius docemus sequente cap. 28.) feminis generationi aptas, à propriis testiculorum seminiferis vasculis absorbendas seu assumendas, magisque præparandas ac perficiendas, dum reliquæ minimarum venularum orificia subeuntes, ad venas præparantes seu spermaticas vulgò dictas, & sic ulterius ad cor redeunt. Utrum verò ex his duobus, an verò aliud quid statuendum sit, judicandum relinquemus iis, qui, vel acutiore visu, vel per microscopia hanc rem clarius detegere poterunt. Interim necessario illic aliquid adesse certum videtur, quo mediante antedicta separatio fit: nam alioqui si per solam transfusionem sanguis immediate ex arteriis in vascula seminaria deflueret, nulla ratio foret, quare totus in semen non converteretur, sed ejus aliqua pars per venulas reverteretur ad cor: ad hæc, quare ejus rubicundus color se semper in dictis vasculis non proderet.

Præter modo dicta vasa, accuratiore inspectione non ita dudum ab Anatomicis observata etiam sunt plurima vascula lymphatica, intra tunicas testium orta, multis anastomosibus inter se concurrentia, & una cum vasis deferentibus sursum in abdomen ascendentia, suamque lympham illic in chylifera vasa deponentia. Plurimis donata sunt valvulis sursum spectantibus, sicque lymphæ è testibus ascendentis relapsus ad testes impediens. Hæc vascula spectantium oculis facile occurrunt, si aliquanto supra testiculos vasa sanguifera ligentur, tuncque testes agitentur, mox enim inter illa observabuntur hæc lymphatica vascula intumes-

Vasa lymphatica.

intumescere, quemadmodum id in brutis vivis quocunque tempore, & in hominibus non diu mortuis, data occasione, experiri licet. Quia autem omnibus vasis lymphaticis commercium est cum glandulis, ex iisque eorum origo exsurgit, hinc per ea (quia ex testium interiore substantia emergunt) maxime confirmatur illud quod ante dixi de glandulis invisibilibus testium vasculis interjectis, & falsuginosam semini conficiendo aptam materiam è sanguine arterioso separantibus.

*Tunica albuginea.*

Testium substantiam proxime obvolvit propria, tenuis, dura, densa, & valida **tunica, Albuginea, & nervea** dicta, quæ interius nonnihil aspera, ei undique firmiter adhæret, eamque nonnihil mollem coercet, ne disrumpatur. Exteriore verò superficie lævis, & aqueo humore perfusa est; atque in extremitatibus magis, quam in medio, epididymides sibi arctius adnatas habet. Eâ tunicâ mediante vasa sanguifera, cum nervis, quæ illam undequaque pervadunt, ad testis interiora tutius perveniunt, ex iisque etiam lymphatica commodius emergunt.

*Tunica vaginalis.*

Huic, ad maiorem tutelam, alia tunica valida & tenuis, instar vaginæ, circumjicitur, atque hinc *ἐντοκοειδής, vaginalis*, appellatur, quam exterioris membranæ peritonæi procellus efformat. Riolanus scribit, hanc exterius adhuc alia tenui ac rubra membrana, à cremastere dilatato enata, obduci: verum, cum hæc nihil aliud sit quam ipse musculus cremaster dilatatus, pro peculiari membrana testem involvente non videtur describi debere.

*Musculi.*

Musculos testes obtinent duos, singuli unum *κρεμαστήρες, suspensorios*, dictos, qui simul à spina ossis pubis, vel, ut mavult Riolanus, ab extremitate carnea musculi oblique ascendenti, oriuntur, & tenues, intus læves, aqueoque humore obducti, foris vero asperi ac fibrosi, extrinsecus fibris suis carneis fere totum, præcipue parte posteriore, peritonæi processum ambiunt, sicque testes suspensos tenent, eosque in coitu sursum adducunt, ut dum vesiculæ seminariæ evacuantur, mox iterum, canalibus, feminalibus abbreviatis, ac testibus cum parastatis modicè compressis, citius & facilius aliud semen in vesiculas advehatur.

*Scrotum.*

Sic muniti & investiti testes extra abdomen propendent (rarissime in inguine subsistunt, aut intra abdomen delitescunt) in burfa seu sacco molli ac rugoso, **Scrotum, & Scortum** Latinis, at Græcis *ἰσχίον, & ἰσχίον*, Aristoteli *ἰσχία*, dicto, quod media linea, veluti futura, in dextram sinistramque partem distinctum, plurimisque vasis intertextum, ex cuticula & cute tenuiore ac molliore efformatur, eique interius adhæret alia tunica tenuis, ex pan-

niculo carnosio enata, *Ἀσπίς* appellata, quæ plurimis fibris membraneis vaginali connascitur. Scribit Regnerus de Graef, se virum quendam novisse, qui per hanc tunicam (à cute enim fieri non potuit) scrotum pro libitu attrahebat, in eodemque motum, à peristaltico intestinorum motu non absimilem, ex adstantium petitione, quocunque tempore excitabat. Sed quia voluntarii motus solummodo peraguntur à musculis, suspicor in illo viro isti tunicæ adnatos fuisse musculos cremasteres, qui, teste Bartholino, in nonnullis adeo robusti inventi sunt, ut pro arbitrio testes (& sic simul etiam scrotum, si iis adnatum fuerit) sursum deorsumque movere possent. Inter utramque autem scroti tunicam nulla pinguedo interjicitur, quia oneri & impedimento huic parti fuisset.

Ex scroto secundæ vel adversæ valetudinis aliqua signa desumi vulgò solent. *Signa valetudinis.*

Quippe, ut scrotum corrugatum & contractum prosperæ, sic relaxatum sinistræ valetudinis signum frequenter exhibet (modo ab externa aliqua causa, repentino aëris vel aquæ frigore, aut calore, &c. hoc non contigerit) ex quo signo etiam de infantium valetudine solent judicare nutrices, & mulierculæ.

Semen in testibus confectum in parastatas, inde per vasa deferentia versus vesiculas seminarias defluit. *Via seminis ad parastatas.*

Qua autem via è testibus in parastatas deveniat, non admodum manifeste patet: nam sicut vasorum sanguiferorum in testium substantiam obscurus est ingressus, ita etiam via per quam semen è testibus in parastatas influit, visu ægerrimè percipitur, atque hinc in ejus descriptione non bene convenit inter Anatomicos. Highmorus scribit se in medio teste invenisse corpus quoddam teres, album, & densum, vasi deferenti haud absimile, à testium fundo ad superiorem partem extensum, ac in tunicæ albugineæ interiorem partem fortiter implantatum, & tunicam perforans, ac in caput parastatæ sese inferens. Etiam mihi illud albicans corpus, diu antequam vidissem Highmori scripta, occurrit, in quod omnes testium fibræ tortuosæ concurrere videbantur, sed non ausus fui asserere illud esse ductum qui semen ad parastatam defert, saltem nullam in eo cavitatem percipere potui: illam quidem fortem implantationem, de qua loquitur Highmorus, in interiorem tunicæ albugineæ partem, satis vidi, sed tunicæ à corpore isto albicante perforationem non inveni: ac proinde illud potius alio usui destinatum esse putavi, scilicet, ut una cum aliis tortuosis fibris ei annexis, inserviret stabiliendis vasculis, tum iis quæ testem ingrediuntur, tum aliis quæ in eo continentur, indeque versus exteriora tellis ad epididy-



epididymida properant, ne omnia inter se confunderentur: eodem modo sicut in interiore pomo aurantio vel citrio, corpora quædam albicantia duriora observantur, quibus vascula succum deferentia, & vesiculæ semen continentes, fulciuntur ac stabiliantur. Spigelius aliud quid hac de re habet, quippe dicit inter testes & parastatas, parte superiore, ubi connectuntur, plurima tenuia vasa percurrere. Sic etiam Riolanus scribit, exiguum foramen inveniri, per quod seminalis humor testium substantiam ingreditur, aliosque tres furculos è teste in vas deferens excurrere. Videntur dicti viri, quasi per nebulam, aliquid vidisse, eique pro sua opinione tomentum aliquod adjecisse. Verum hæc omnia incerta tandem singulari sua diligentia plurimum illustravit & certiora fecit Regnerus de Graef, *lib. citat.* qui de exitu vasculorum seminiferorum, hæc observavit. *Eorum*, inquit, *finem, sive è testiculis egressum in multis animalibus clarè conspeximus, eumque longe alium invenimus quam Highmorus nobis depinxit: quia non uno crasso, sed in plurimis animalibus sex vel septem tenuissimis ductibus è testiculo prodeunt, qui singuli de latere in latus incurvati, majorem epididymidis globum constituunt, in eoque simul concurrentes, uno simplici ductu ad vesiculas seminarias excurrunt.* Addit, notandum tenuissimos istos ductus, dum per tunicam albugineam erumpunt, conspici vix posse, nisi semine turgeant.

Parastatae.

Fluit igitur semen è testibus in Parastatas, sic dictas, quasi *testibus adstantes*, & varicum in morem varie implicitas, Graecis *Ἐπιδιδυμίδες*, appellatas, quia testibus adhærent, iisque incumbunt.

Sunt autem Parastatae, sive Epididymidæ (nos, non obstante distinctione Riolani, per utrumque hoc nomen eandem particulam designamus) duo corpora albicantia, duriuscula, oblonga, quorum unum singulis testibus, tunica albuginea adhuc investitis, imponitur, communique vasis spermaticis tunica obvolvitur, & circa utriusque testis utrumque extremum albugineæ tunicae arctissime connectitur, in medio verò laxè ei cohæret, facileque sejungitur.

Principium.

Harum principium nonnihil tuberosum eo loco emergit, quo corpus varicosum ad testem accedit, cui tam arctè adjacet, ut multi Anatomici antehac putaverint, illud corpus, non testes, sed parastatas recta ingredi (qui error jam ante designatus est) & dubitaverint per quas vias sanguis ad testes perveniret. Est autem hoc principium duriusculum, nulla manifesta cavitate donatum, sed sex septemve radicibus è teste ortum.

In progressu parastatæ ad infimas testis partes descendentes, æqualis fere crassitie & figuræ sunt, atque gyrosis ac serpentinis progressibus seu flexuris, multis quasi plicis distinctis, implicantur, semenque album continent. Ab infima verò testis parte rursus tortuoso ac nonnihil tuberoso gyro sursum reflectuntur, postque reflexionem à testium firmiore nexu liberantur, eorumque tunica solummodo incumbunt, & in unum meatum, vasi deferenti continuum, exeunt: à quo vase non aliter differunt, quam quod hoc recto, illæ verò serpentino ductu incedant, & propter tenuitatem aliquanto molliores existant.

Substantia

Substantiam nervosam Vesalius, glandulosam verò Fallopius eis adscribit. Neutrum verum esse nuper docuit Regnerus de Graef, qui gyrosam ac implicitam cuiusque parastatæ corpus singulari dexteritate dissolvit, primo exteriorem, hinc secundam membranam prudenter resecando, atque sic corpus hoc in stupendam longitudinem extendit, quam in mediocri animali facile quinque ulnarum longitudinem excedere, & unum simplex, semen continens, vas esse, quod in suo situ per laterales contorsiones, ultro citroque sibi invicem impositas, coarctatur, satis apparere scribit. Præterea addit, quod ad testium supremiorem in suo principio adeo tenue sit, ut filo tenui comparari queat, sed sensim ita incrassescat, ut ad parvi funiculi crassitiem auctum, tandem vas semen deferens constituat: atque hinc etiam putat testes à parastatis vix aliter differre, quam quod illi ex variis minutissimis vasculis, hæc maxima sui parte ex uno tantum ductu, seu vase nonnihil crassiore constent: parastatas verò à vasis deferentibus eo duntaxat differre, quod hæc recto, illæ quasi serpentino ductu incedant, & propter majorem tenuitatem molliores existant. Quo experimento abunde liquet nihil glandulosi parastatis inesse, neque etiam nervosi quidquam, cum manifestam oculis acutioribus conspicuam cavitatem, semen continentem, obtineant, qualis in nervis non invenitur. Semen autem in testibus excoctum per antedictos serpentinis processus transire debuit, ut longiore mora & transitu tardiore melius in iis elaboraretur, sicque summam perfectionem acquireret.

Quantum ad officium harum partium, illud à Spigelio male describitur, utpote qui solis parastatis vim seminificam tribuit, ab eoque munere testes excludit, quos solummodo illius coctionis excrementa serosa colligere voluit, quia in testibus, non semen, sed serosus humor invenitur. Dominicus de Marchettis, quia nullum oculis manifestum foramen adesse videtur, per quod in testibus coactum semen rursus

P

OK



ex iis exonerari queat, hinc concludit testes duntaxat factos esse pro fovendis calore epididymidibus, ut in his sanguis facilius in semen convertatur. Verum ille non docet quare Natura solum pro excrementi separatione majorem, pro ipsa verò seminifica actione minorem partem constituerit: neque etiam ostendit per quas vias illa collecta excrementa rursus è testibus evacuentur. Hic autem non ostendit, quomodo testes, qui frigidiore sunt partes, calore possint fovere epididymidas. Sed videtur uterque in eundem cum multis aliis incidisse errorem, quod ambo putaverint arterias venasque spermaticas, non ipsos testes, at parastatas ingredi. Quæ vasa cum testes ipsos, ut ante dictum, & non parastatas, ingrediantur, abunde patet, in parastatis semen spirituosum in testibus confectum, atque ex his per vix visibilia minutissima vascula ascendens, ulterius præparari, easque longo ac labyrintheo itinere transeundo, majorem perfectionem adipisci, atque sic paulatim in vasa deferentia effundi.

Vasa deferentia.

Sunt autem **Vasa deferentia**, seu **Ejaculatoria** duo corpora candida, duriuscula, teretia, nervo majori aliquo modo similia, à parastatis usque ad vesiculas seminarias extensa, intus porosa, non manifesta conspicua cavitate donata. Hujus tamen cavitatis aliquam manifestiorem umbram nuper oculis exhibuit occulatissimus mysteriorum harum partium perscrutator Regnerus de Graef, lib. citat. ubi sic inquit: *Vas deferens manifesta cavitate donatum est, quæ ut melius conspiciatur, aperiendum hoc vas est sex vel septem digitis transversis supra testiculum, & immixtus flatus, vel liquor quidam coloratus beneficio syringæ versus testiculum propellendus est, & videbitis vas illud distendi, & colorem per mediam ejus cavitatem, primò recto ductu testiculum versus excurrere: & postea observabitis cavitatem in ipso vase de latere in latas revolvete, & tandem cum ipso vase sensim incurvari, ad eum fere modum quo serpentes atque anguillas ocyus repere cernimus: atque sic revolutionibus, non in orbem, sed ad latas factis, usque ad corpora testiculorum excurrere.* Sic igitur patet ejus cavitas versus testes: quomodo autem eadem versus vesiculas seminarias observari possit, illud describit aliquanto post. Hoc si elare, inquit, atque distinctè cognoscere cupiatis, immittatis solummodo tubulum in vas deferens, quod si vel flatu, vel liquore aliquo, beneficio syringæ, distendatur, observabitis citius vesiculas seminarias distendi, quam quidquam per foramen in urethram erumpere. Hinc patet lapsus eorum, qui dicunt vasa semen deferentia nullam omnino cum vesiculis seminariis communionem habere, & toto cælo ab iis differre, ac per duo peculiaria foramina sese exonerare intra urethram, distincta ab

iis per quæ materia seminalis ex vesiculis erumpit.

Johannes Swamerdammius, in *Natura mirac.* mihi pag. 10. hoc posterius experimentum Regneri de Graef, cum acerbitate reprehendit, & pro certo statuit, vesiculas seminarias nullam cum vasis deferentibus communicationem habere, nec quidquam liquoris ab iis recipere: utque hoc solidius probet, dicit à se domi suæ servari vesiculam seminalem, quæ tribus distinctis locis in vas deferens inseritur. Hanc probationem irridet Regn. de Graef, in *defens. part. genit.* & opponit, quod sibi reserret plus quam decem vesiculas seminales, in quibus demonstrare potest, vesiculas non in vasa deferentia, sed hæc in vesiculas terminari. Jo. van Horne, eadem Swamerdammii opinione ductus, scribit, per peculiaria foramina semen è vasis deferentibus, per alia verò è vesiculis in urethram eructari. Rursus hanc Hornii sententiam reprehendit Swamerdammius, dicitque illam solum veram esse in tauris, non verò in hominibus, cum in his vesiculæ in ipsa vasa deferentia tribus distinctis locis exitum fortiantur, sed aliam nullam cum iis communicationem habeant. Verum ego censeo, istum triplicem vesicularum exitum in vasa deferentia, à Swamerdammio iis assignatum, potius esse vasorum deferentium in vesiculas introitum, per quem semen ex iis in has influit: nam in sectione corporis humani videmus manifestissime, pressis digito vesiculis seminariis semen ex iis, non in vasa deferentia, per illas tres distinctas aperturas, sed ilico in urethram erumpere; quod certum indicium est, per istas tres aperturas semen in vesiculas effluere, non verò illâ viâ ex iis effluere. Denique post omnia illa dicta, concludit Swamerdammius, quadruplicem esse materiam è qua semen constituitur: unam ex testibus; secundam ex fine vasorum deferentium; tertiam ex vesiculis seminalibus; quartam ex prostaticis prodeuntem. Verum, cum entia non sunt multiplicanda sine necessitate, nescio quare tot diversæ materiæ unius seminis, & tot diversæ partes, illas singulas præparantes, constituendæ sint. Nemo, ut credo, inficias ibit, semen confici ex sanguine arterioso & spiritu animali (hoc paulo post latius docemus cap. 28.) & cum arteriæ spermaticæ cum exilibus nervis ferantur ad testes, neque earum progressus ad vasa deferentia, vesiculas, & prostaticas uspiam seorsim conspiciatur, magis verosimile est, unam esse seminalem materiam, sanguinem scilicet arteriosum, cum spiritu animali junctum, eamque in admirabili vasculorum ex quibus testes constant (ut ante docuimus) contextu mutari & excoqui in verum semen, quod ex iis per parastatas & vasa

& vasa deferentia defluens, in istis labyrinthis viis aliquid ad maiorem sui perfectionem consequitur (sicut spiritus vini, cum adeo tenuis ac subtilis in alembicum ascendit ut invisibilis existat, & coerceri nequeat, ex eo per serpentinum tubum æneum, aquæ frigidæ impositum descendens, tantam condensationis perfectionem consequitur, ut in suppositum receptaculum defluat, in eoque, aliisve vasis ad futuros usus commode servari possit) quod facit ut in vesiculis seminariis sine corruptela, usque ad necessariæ excretionis tempus servari queat. Atque hinc rationi magis verosimile videtur experimentum Regneri de Graef, quo communicatio vasorum deferentium cum vesiculis confirmatur, quam alterum Jo. Hornii & Swamerdammii, quo illud impugnatur. Atque sicut hi autopsiam testem producant, sic etiam ille: ubi verò autopsia dubia est, ibi ratio in subsidium vocanda, ab eaque de rei veritate iudicium petendum. Porro, sicut Natura in nostro corpore constituit unam partem (scilicet ventriculum) quæ chylum conficit, qui chylus per longas intestinorum ambages defluens, in iis maiorem puritatem, & à fœculenta materia separationem consequitur, quamvis ipsa intestina ad chyli ipsius confectionem nihil conferant: sic etiam semina habet in vasis spermaticis omnibus, quæ singula non faciunt peculiarem aliquam materiam ad seminis compositionem conferendam, sed soli testes primam in semen convertunt; in reliquis verò partibus & vasis illud in transitu maiorem aliquam perfectionem, & ad tutiorem conservationem, etiam peculiarem aliquam dispositionem nanciscitur. Denique, ut aliquis novus succus vel humor, chylus, sanguis, bilis, &c. conficiatur, id non fit per simplicem variarum materialium confusionem, sed per humorum in peculiari aliqua parte, seu viscere (corde, ventriculo, hepate, &c.) specificam fermentationem seu excoctionem, sine qua ex nullis humoribus novus succus vel humor alius gigni potest, quemadmodum id liquet, cum illa viscera per constitutionem aliquam morbosam adeo debilia evaserunt, ut debitam coctionem non peragant, tunc enim tales novos succos, aut humores gignere nequeunt. Jam verò si è quatuor istis materiis, è diversis partibus, ut putat Swamerdammius, in urethram simul concurrentibus nobilissimum semen (quod totius hominis compendium in se continet) constitueretur, tunc ex illis quatuor simpliciter mixtis & confusis, novus liquor seminalis conficeretur, sine ulla aliqua privata istarum quatuor sic confusarum materialium coctione, in aliqua destinata parte aut viscere instituta, quod omnino est præter Naturæ con-

suetudinem & rationem. Ultimò, dicat mihi, quæso, Swamerdammius, an illa materia, ipsi secunda dicta, à finibus vasorum deferentium exstillans, sit diversa & distincta ab illa prima, quæ è testibus profluit: & si sit alia seu distincta, ut ipse vult, unde tunc aliunde illa vasa deferentia suam materiam recipiant, quam è testibus eorumque parastatis, cum nulla alia vascula in eorum cavitates aperiantur. Sed nunc ad rem redeundum.

Vasorum deferentium unum è singulorum testium parastata exsurgit, ac per processum peritonæi, sursum prorepens, eadem via abdomen ingreditur, per quam vasa spermatica descendunt versus testem. Ubi jam ambo abdomen sunt ingressa, mox super ureteres deducuntur, & reflexa posteriorem vesicæ regionem petunt, ac supra intestinum rectum, juxta cervicem vesicæ, paulo antequam simul concurrunt, dilatantur & crassiora fiunt, ac circiter ad latera ipsius concursus vesiculis seminariis adherent, in easque aperiuntur & semen deponunt (has etiam constituere & efformare nonnullis videntur) indeque simul unita, singula ad sui lateris prostatam obliterantur.

**Vesiculæ seminariæ, seu seminales,** *Vesicula seminaria.* sunt quasi cellulae exiguae racematim dispositæ, semen (quod copiosum continent) à testibus per vasa deferentia influens, colligentes ac conservantes, usque dum illud, vel quantitate, vel qualitate molestum, vel etiam in coitu, à musculorum penis aliarumque vicinarum partium intumescencia (hîc notat Swamerdammius in talpis, vesiculas seminales, quas oppido magnas habent, suos peculiares musculos, quibus cinguntur, obtinere, quorum priores cum cremastere conveniunt: nos tamen in homine tales musculos nunquam observare potuimus) compressis vesiculis per eundem angustissimum introitum, per quem in vesiculas delapsus est, exprimatur, ac simul eadem compressione versus urethram propellatur, per duos angustissimos ductus medium prostaticarum transeuntes, sicque in eam deponatur, per duo exilia foramina, per quæ, compressis digito vesiculis, mox semen guttatim seu granulatim transire, in cadaveribus conspicitur, idque instar argenti vivi quod per corium transcolatur. Non est tamen quod alienum & insolitum quis putet, per eandem viam humorem aliquem in partem influere & effluere: nam in hoc casu duplex considerandus venit motus: unus ordinarius, à Natura sponte agente institutus, quo semen è vasis deferentibus fluit in dictas vesiculas: alter vi expressionis factus, quo compressæ vesiculæ semen per idem, quo incidit, foramen exprimitur versus urethram, in eamque eructatur, qui

motus violentus appellandus est, licet aut cum voluntate, aut à forti acrique irritatione præter voluntatem fiat.

Hiscæ vesiculis à quibusdam malè, non feminis colligendi duntaxat, verum etiam conficiendi officium adscribitur, cum earum substantiæ tenuitas isti muneri par esse non possit, & semen modò perfectissime coctum ac perfectum occurrat in parastatis & vasis deferentibus.

*Substantia.* Constant tenui membrana, arteriolis, venulis & nervulis donata, quibus etiam vascula lymphatica admisceri, nonnulli putant.

*Magnitudo.* Longitudine vix tres digitos transversos excedunt, latitudine & crassitie fere transversum digitum æquantes, sed in uno latere, quam in altero plerumque paulo majores.

*Situs.* Sitæ sunt utrimque ad vesicæ urinariæ & recti intestini ligamenta, ad latera, prope congressum vasorum deferentium, paulo ante eorum concursum, atque prostatis quam proxime adjacent.

*Numerus.* Geminæ sunt, interstitio quodam à se invicem divisæ, & singulæ per diversos ductus, & per peculiare foramen semen in urethram emittunt, ut semper generatio felicius procedat, & iis quæ in uno latere subsistunt, per lithotymiam, aliumve casum, læsis, aliæ alterius lateris adhuc integre, suo officio in generatione adhuc sufficienter fungantur: sicut etiam una aure, unove oculo læso, ab alterius lateris integro organo actio peragitur.

*Cavitas.* Cavitates habent, non unam, sed anfractuosa sunt, & quasi ex multis cellulis racematim dispositis, granorum mali punici cellulas exacte æmulantibus, concinnatæ atque implicatæ, ne in unico coitu totum semen effundant, sed propter anfractuosum transitum, bona pars retineatur, pluribus coïtibus infervitura.

*An adftet valvula.* Cæcis illis ductibus, per quos semen in urethram effluit, nonnulli Anatomici carunculam affingunt: Veslingius valvulam, continuum feminis effluvium impediens, adesse putat. Verum illa certè hic opus non est, cum sola fere invisibilium meatuum angustia sufficiat ad semen continendum: cum illud etiam effluere nequeat in sanis sine vesicularum compressione (sive semen copia, sive æstu, sive acrimoniâ, vicinas partes titillet ac irriter ad contractionem, & sic ad vesicularum compressionem) iisque compressis necessario effluere, nec ab ulla valvula impediri debeat. Melius observat Riolanus, in pueris usque ad vigesimum annum, modo gonorrhœa non laboraverint, adesse membranam instar valvulæ circumtensam, ita sitam, ut non effluxum feminis è vesiculis, sed ejusdem influxum in vesicam urinariam impediât. Sed mirum

certè quod Riolanus hanc valvulam seu membranam solis pueris concedat, & senioribus quasi deneget, cum illa quoque in senioribus adsit, modò in gonorrhœa ab acris feminis transitu non fuerit erosa: cum etiam per catheteris immisionem in senioribus disrumpatur cum dolore.

Hi obscuri ductus seu meatus à vesiculis ad urethram, si ab acrimonia feminis erodantur (qualis acrimonia ab impura Venere contrahitur) vel si debilitati ac dilatati per se ea parte nimis laxi evadant (hoc interdum observavimus contigisse senibus nimia Venere utentibus) tunc fit gonorrhœa: atque sic Vesalius & Spigelius illos post mortem in gonorrhœa laborantibus, multum dilatatos viderunt.

Galenus & Highmorus, volunt ex his vesiculis profundi humorem quandam oleaginosum, ad lubricandum & lævigandum urethræ meatum, ne ab urinæ vel feminis acrimonia lædatur. Verum ego, cum privatim, tum publicè, nihil aliud ex his vesiculis quam semen exprimere soleo, ac proinde prorsus indubitatum puto, in iis nihil aliud quam semen contineri, & lubricitatem urethræ, non ab aliquo oleaginoso humore è dictis vesiculis effluente, sed aliunde oriri, scilicet ex nutrimenti urethræ aliqua parte mucida, qua interior illa via oblinitur, sicut etiam lubricitas vesicæ urinariæ, intestinis, aliisque variis partibus hac de causa contingit.

Vesiculis urinariis proxime adstant Prostatae, quasi adstantes dictæ, quæ sunt corpora duo (sed ita juncta ut unum corpus constituere videantur, qua de causa pro uno corpore à nonnullis describuntur) glandulosa, duriuscula, albicantia, & spongiosa, antè & postè depressa, à lateribus rotunda, quæ membrana densa, fibrosa, & valida, à vasis deferentibus & inferiore vesicæ parte prognata, involvuntur, & vesicæ urinariæ ad radicem penis arcte junguntur.

Magnitudinem obtinent circiter nûcis juglandis, pro frequentiore tamen aut rariore Veneris usu & salacitate, modò paulo majorem, modò minorem. Paucis nervis, item venis arteriisque, in externa tunica præcipue conspicuis, donantur.

Hæ prostatae, licet primo intuitu vix humorem aliquem continere, & nullum fere commercium cum vasis deferentibus habere videantur, tamen in salacioribus statim post coitum extinctis seroso quodam mucido liquore turgidæ conspiciuntur, in earumque interiore parte multæ inveniuntur vesiculæ, lymphido isto mucido liquore repletæ, qui compressione in urethram, feminis viam, effluit.

Hunc autem mucidum liquorem per multos ductus in interno prostatarum corpore latentes,

Gonorrhœa causa.

Prostatae.

Magnitudo.

Liquor.

latentes, & tandem simul coeuntes, deferri, observavit Regnerus de Graef, lib. de viror. organ. genit. In interna, inquit, ejus cavitate plures ductus apparent, qui omnes, quotquot sunt, ad latera caruncula magna (hanc prope exitum in urethram se notasse prædixerat) sese in urethram exonerant: Horum orificia exiguis quibusdam carunculis obturantur, ne materia in corpore glanduloso confecta extra Veneris actum continè effluat, vel urina per illos ductus in corpus eorum instuat. Modum denique quo ductus hi conspici possint, adjungit. Ductus hos ulterius, inquit, examinare qui curiosi sunt, expresso prius liquore, quem naturaliter in se continent, tubulum minorem in illos imponant, & statu si distendantur, eleganter admodum ramificationes suas ostendent, ad quarum latera cavernula, magnitudinis seminis sinapi, distincta conspiciuntur, qua inflatis ductibus simul intumescunt, ita ut prima fronte totam hujus corporis substantiam spongiosam, & ex pluribus vesiculis rotundis, oblongis, & alia figura donatis constare, quis facile judicaret. Vasorum jam descriptorum in urethram terminantium, numerum quod attinet, in omnibus subjectis non eundem reperietis: non tamen meminimus nos in homine pauciores decem invenisse; in canibus, verò aliquando nonaginta, & plures numeravimus, per qua materia serosa ex glandoso hoc corpore, dum comprimeretur, copiose promanaret. Quod in hisce ductibus notatu dignum occurrit, est, quod in illis nulla sit communicatio, qua mediante ex uno in alterum ductum erumpit flatus, quia ita à se invicem distinguuntur, ut inflato uno ductu, tantum pars aliqua corporis glandosi distendatur, & inflato altero ductu, altera ejus pars intumescat, ita ut in tot classes distinguere possit corporis glandosi substantia, quot ductus in eo reperiuntur. Atque sic Regn. de Graef magnum prostatarum mysterium, hactenus incognitum, singulari sua industria egregiè patefecit.

Musculus.

Observat Riolanus, animadvers. in Laurent. vesicæ musculus sphincterem, orbicularem, carnosum, duos digitos latum, prostates obvolvere & circumdare, eumque isto loco à substantia vesicæ separatum esse, cum prostates habeat interjectas, atque sic ex iis, cum à sphinctere comprimuntur, seminalem liquorem exprimere, eodemque tempore ab eadem compressione vesicam occludi, ita ut una cum semine simul nequeat effluere urina. Verum cum semen non ex solis prostates, sed præcipue ex vesiculis seminariis in urethram proxime influat, debuisset potius dicere Riolanus, per istam sphincteris constrictionem prostates & vesiculas seminarias simul comprimi, atque ita ex illis seminalem liquorem, una cum semine in vesiculis collecto, eodem tempore ad urethram demandari. Linda-

nus, psycholog. lib. 5. artic. 11. hic effingit duos musculos, quorum anteriorem appellat sphincterem, alterum vero spleniatum seu fascialem, latitudinis duorum digitorum, collo vesicæ & accumbentibus ipsi glandulis prostates circumjectum. Ab his dicit dependere potestatem has partes aperiendi & claudendi. Verum quia Lindanus hos musculos secundum suam speculationem quidem descripsit, sed nunquam demonstravit, de iis dubitandum censemus usque dum aliquis eos demonstraverit.

Prostates in superiore media parte, instar infundibuli, nonnihil quasi excavatæ videntur, atque ibi admittunt vesicularum seminalium ductus per earum medium transeuntes, qui ad hunc ingressum attenuati, valde tenues feruntur ad urethram, in quam singuli admodum exili exitu aperiuntur.

Dicuntur prostates, quemadmodum etiam testes, habere sensum acutum, plurimumque facere ad voluptatem in coitu. Verum de harum, ut & de testium sensu, cum aliqua distinctione loquendum est, nam acutus sensus tantum inest exteriori harum partium membranæ involventi; ipsa verò substantia est nullius, vel obtusi sensus. Quamvis enim Glissonius & Whartonius prostates & testibus plurimos nervos adscribant, ego tamen non nisi paucissimos, maximeque exiles eò deferri, eosque per involventem tunicam potissimum disseminari, animadverto, quod etiam antè monui.

De officio prostatarum nonnihil dubitatur. Plurimis maxime verosimile videtur, quod semini in testibus confecto majorem aliquam perfectionem conferant, idque magis fecundum efficiant. Hæc tamen sententia aliis displicet, propter exiguum commercium quod dicunt esse inter vesiculas semen aservantes, & prostates. Hoc exiguum commercium probare nititur Regn. de Graef, lib. citat. Ablatâ, inquit, vesica [urinariâ] per medium, secundum ejus longitudinem, dissecetur corpus glandosum dictum (sic passim appellat prostates) & vasorum deferentium atque vesicularum ductus, usque ad eorum in urethram exitum prosequantur, separenturque à corpore glandoso, & immisso tubulo in vasa semen deferentia, si beneficio syringæ liquor aliquis in eorum cavitates propellatur, dictum factum cum ipsis deferentibus vesicula seminales intumescunt, liquore fortiter per foramen in urethram effluente, qua si circa exitum in urethram claudantur, nihil ex ductibus eo in loco ubi corpori glandoso annexi fuerant, erumpit, licet fortiter distendantur vasa seminaria, quod necessario contingeret, si cum corpore glandoso mutuum obtinerent commercium. Ex his tandem deducit Regnerus de Graef, neque semen in iis generari, neque seminale quid in iis contineri, sed putat illud contentum esse

P 3

peculia-

peculiarem quendam submucidum liquorem, qui pro feminis ex vesiculis erumpentis vehiculo infervit, quo semen involvendum judicat, ne evanescat antequam ad uterum perveniat. Verum cum in corporibus mortuis demonstrationes semper non exhibeant partes tali modo ut se habent in vivis, in iisque pori angustissimi que meatus sæpe adeo occlusi sint, ut nullum flatum transmittant, cum tamen in vivis permeabiles existant, dubito an dictum Gravii experimentum illa ex opinione ejus antedicta satis solide probare possint: nam etsi per illud prostaticarum internas cavernulas, in hisque contentum liquorem, & earum quoque vias evacuatorias, splendide explicet; tamen non docet qualis re vera sit ille liquor, & ex qua materia genitus, & quare non adeo exiguum, quale ille describit, sed potius tantum, tamque necessarium vesiculis seminariis cum prostaticis commercium sit, ut ductus illi per quos semen è vesiculis exprimitur, per medias prostaticas ad urethram excurrere, ac per eandem in hanc semen deponere debeant, eodem tempore quo liquor prostaticarum in eandem erumpit. Hic hæret nobis aqua, ac proinde cum prostatica nec frustra suo loco deposita sint, nec etiam frustra vesicularum excretorios ductus per mediam suam substantiam transmittat; cum vesicæ urinariæ aut excretioni urinæ nihil conferant; cum denique mucidum quendam proprium humorem contineant, eumque compressæ in urethram, simul cum vesicularum semine, deponant, etiam verosimile nobis videtur, magnum ipsis esse cum vesiculis seminariis commercium, atque vel semen per vasorum deferentium occultas productiones eo delatum in iis contineri, vel saltem ad majorem feminis perfectionem illas necessarium quid conferre, licet antedictum commercium oculis non admodum conspicuum existat. Semen in iis contineri liquet ex observatione Vesalii, in gonorrhœa laborante notata, *anat. lib. 5. cap. 13. In involuntario*, inquit, *feminis fluxu laborante, quem Patavii disse-*  
*cimus, corpus hoc glandosum, cum divideretur, non minus quam testes ipsos, semine op-*  
*pletum conspeximus: & si verum fatendum est,*


*inter dissecandum in nulla penitus corporis parte tanta feminis vis unquam, atque in hoc glandoso corpore invenitur, quantumvis id à testium substantia mollitie aqualitateque multum variet.* Si igitur semen in se contineant, certè non sunt habendæ pro partibus adeo vilibus, atque illas habere videtur Regn. de Graef: quod si dicat, illarum liquorem non esse verum semen, tamen necesse est ut fateatur semen absque illo non posse habere fecunditatis summam perfectionem: nam si absque illo liquore fecunditas feminis perfecta esse posset, prostaticæ omnibus maribus data non fuissent, sed tanquam inutiles aut superflue in multis defuissent.

Hic etiam prorsus rejicienda est opinio Whartoni, *lib. de gland. cap. 31.* & Antonii Everardi, *lib. de exort. animal.* qui ambo statuunt triplex diversum in diversis partibus confici semen: primum nobilissimum in testibus: secundum serosius in vesiculis seminariis: tertium crassius & viscidius in prostaticis: & hanc triplicem materiam necessario concurrere ad generationem, ut si una ex illis absit, imperfectum & minime fecundum semen generari possit. Verum illi hoc statuunt sine ullo fundamento, neque considerant illud ipsum in testibus confectum semen, in transitu per parastatas majorem perfectionem adipisci, atque sic per vasa deferentia aliqua sui parte per occultas istorum vasorum productiones seu extremitates deferri ad prostaticas, sed majore parte ad vesiculas seminarias demandari, in iisque usque ad excretionis tempus recondi, neque ullam aliam materiam in semen mutandam aliunde ad has partes deferre, aut in iis vel coqui, vel conservari, quam illud ipsum in testibus primo coctum & præparatum semen. Præterea si tanta est istius triplicitatis necessitas, quomodo semen generabitur in iis animalibus quæ naturaliter vesiculis seminariis destituuntur, quod de canibus notissimum est, ac de vulpibus & lupis vix dubitandum, quibus tamen animalibus fecundum semen generatur? Pluribus aliis validis argumentis hanc sententiam refutat Regn. de Graef, *lib. citat.*

*An detur triplex semen.*

TABU-







## T A B U L Æ III. EXPLICATIO.

Hæc Tabula ostendit vesicam urinariam, & testes humanos cum suis dependentiis, à Regnero de Graef accuratè delineatos.

## FIGURA I.

Vesica urinaria, cum partibus annexis.

- A. Vesicæ urinariæ pars cui urachus annexus fuit.
- B. Vesica urinaria anteriore parte aperta.
- CC. Ureteres.
- DD. Exitus ureterum in vesicam.
- E. Collum vesicæ.
- FF. Vasorum semen deferentium partes abscissæ.
- GG. Vasa ad vesiculas seminarias excurrentia.
- HH. Vesicæ seminariæ inflatæ.
- I. Caruncula duobus foraminibus præditæ, per quæ semen in urethram erumpit.
- KK. Corpus glandosum seu prostata anteriore parte divisa.
- LL. Oscula ductuum corporis glandosi ad latera caruncule hiantia, & nisi inflentur, punctis quibusdam solummodo conspicua.
- M. Rostrum carunculae.
- N. Urethra superiore parte aperta.

## FIGURA II.

Testiculus humanus cum suis involucris.

- A. Vasorum præparantium partes abscissæ.
- B. Tunica vaginalis omnia testiculi vasa continens.
- C. Musculi cremasteris principium.
- D. Ejusdem fibræ carneæ, tunica vaginali annexæ, ac per ejus longitudinem excurrentes.
- EE. Ejusdem fibræ carneæ in tunica vaginali obscuro sine terminantes.
- F. Tunica vaginalis testiculum continens.

## FIGURA III.

Testiculus cum annexis vasis involucris exutus.

- A. Vasa præparantia resecta.
- B. Vasa eadem per tenuissimas membranas sibi mutuo connexa.
- CC. Arteria semen præparans per ventrem testis delata.
- DD. Venarum semen præparantium per testis latera ramificationes.
- E. Tunica albuginea testis substantiam continens.
- F. Tunica vaginalis retracta.
- G. Globus epididymidis major.

H. Epididymis pars media.

I. Ejusdem globus minor.

K. Ejusdem finis, seu vasis semen deferentis principium.

L. Vas deferens abscissum.

## FIGURA IV.

Testiculus inversus.

- A. Arteria semen præparans.
- B. Ejusdem divisio in duos ramos.
- CC. Ramus major ad testem delatus.
- DD. Ramus minor ad epididymidem properans.
- E. Globus epididymidis major, testi adhærens.
- FF. Epididymis inversa, ut videatur quæ ratione arteria sub illa excurrat.
- G. Finis epididymidis.
- H. Vas semen deferens abscissum.

## FIGURA V.

- A. Principium epididymidis, quo loco vascula seminaria tunicam albugineam perforant.
- BBB. Globus epididymidis major sursum protractus, ut conspiciantur vasculorum ramificationes, & in testem ingressus.
- C. Vasa præparantia abscissa.
- D. Vasorum præparantium per tunicam albugineam divaricationes.
- E. Tunica albuginea.

## FIGURA VI.

- A. Corpus testiculi tunicâ albugineâ exutum.
- BB. Tunica albuginea inversa.
- CCC. Vasorum præparantium hanc tunicam perforantium portiones abscissæ.
- D. Tunica albuginea dorso testiculi, propter testis membranas ibi concurrentes, firmiter adhærens.

## FIGURA VII.

- A. Substantia testiculi à tunica albuginea liberata.
- BBB. Substantiæ solutiones, quibus patet illud non esse corpus glandulosum, ut prima fronte apparet, sed ex vasculis compositum.
- C. Tunica albuginea sursum protracta.

## FIGURA VIII.

- AAA. Vascula seminaria testiculorum inter membranas tenuissimas certo ordine collocata.

BB. Vascu-

BB. *Vascula seminaria per membranaceam substantiam testiculi dorso adherentem excurrentia.*

C. *Vasculorum seminariorum tunicam albugineam perforantium portiuncula abscissa.*

DDDD. *Tunica albuginea aperta & ad latera diducta.*

#### FIGURA IX.

A. *Testiculus transversim dississus.*

BBB. *Vasculorum seminariorum dispositiones.*

C. *Membranarum, vascula seminaria, ne confundantur, detinentium, concursus,*

*Due quaestiones.*

Hic jam duo inquirenda supersunt. Primum quænam sit vera actio testium. Alterum, quomodo crassum semen per invisibiles poros è testibus ad vesiculas seminarias & prostatas pervenire possit.

*Testium actio.*

Quantum ad prius, ex modo dictis sententia nostra satis patet, scilicet, testium officium esse, semen ex sanguine arterioso, concurrente spiritu animali, conficere.

Ab hac nostra sententia multi recedunt. Testes enim ad feminis generationem nihil aliud conferre, quam quod pondere suo vasa seminaria extendant, quo commodior fiat feminis ejaculatio, primus docuit Aristoteles, quem sequuntur, Fallopius, Cabrolus, Spigelius, Regius, alique varii, his rationibus præcipue inducti.

1. *Quod nunquam semen in iis invenitur.*

2. *Quod nullas cavitates aut ventriculos habeant, in quibus id colligi vel aservari possit.*

3. *Quod nulla manifesta vasa recipiant, per quæ seminalis materia influit aut effluit.*

4. *Quod pisces, serpentes, multaque alia animalia testibus destituta generent.*

5. *Quod nonnulla animalia testibus exsectis, postea adhuc generasse observatum sit: sicut Aristoteles, lib. 1. de ortu animal. cap. 7. refert taurum, post exsectos testes, vaccam implevisse.*

6. *Quod Cabrolus, observat. anat. 3. referat se Monspelii dissecuisse cadaver cujusdam viri qui virginem stupraverat, in quo tamen neque exterius, neque interius ullos testes, sed tantum vesiculas seminarias invenit.*

7. *Quod idem Cabrolus, citato loco, videt adolescentem intestatum, qui tamen uxorem duxit, & complures liberos genuit.*

Verum hæc omnia argumenta sequentibus rationibus facile convelluntur.

I. Etsi semen in iis ordinarie non conspiciatur, propter summam ejus tenuitatem,

*testiculi dorso firmiter annexus.*

#### FIGURA X.

Prostata, five Glandosum corpus.

AA. *Glandosum corpus anteriore parte divisum.*

B. *Urethra superiore parte aperta.*

C. *Ductus glandulosi corporis denudati.*

O. *Locus carunculae per quam semen in urethram erumpit.*

#### FIGURA XI.

Testiculus gliris in vasa dissolutus.

A. *Arteria spermatica in testem descendens.*

BB. *Totus testis singulari dexteritate in vasa dissolutus.*

& vasculorum quoque seminiferorum maximam tenuitatem, inde tamen concludi non potest, illud in iis non gigni: nam etiam spiritus animales non conspiciuntur in cerebro & nervis, propter eorum tenuitatem, inde tamen concludi nequit, eos in cerebro non gigni, aut per nervos non defluere. Quam spirituosum sit semen in testibus inde patet, quod ex iis per vasorum deferentium angustias invisibiliter transeat, & solummodo in vesiculis seminariis plane conspicuum evadat, in quibus crassiores ejus particulae, jam extra coquentium partium imperium depositæ, magis condensantur, ut subtilissimum germen melius involvant, ejusque dissipationem prohibeant. Interim, quod in testibus invisibile existens semen, arte tamen conspicuum seu visibile fieri possit, hoc nuper acuto experimento invenit, & docuit Regnerus de Graef, lib. ante citat. qui cani vivo vas semen deferens firmissime ligavit, ita ut nihil feminis è testibus effluere posset, materiâ tamen in semen mutandâ per vasa spermatica libere influente: in hoc cane, post coitum, testes & parastatas adeo semine turgidas invenit, ut in magnam molem distenderentur.

II. Licet ventriculos aut manifestas cavitates non habeant, id nihil in contrarium probat, cum etiam in hepate & liene non sint ventriculi, aut magnæ cavitates, & illa tamen viscera fermentum toti corpori necessarium conficiant.

III. Quamvis in ipsa substantia vasa non videantur habere in sanis, illa tamen ad eos pervenire, eosque pervadere, partim in morboris corporibus oculis conspici (ut ante docuimus & probavimus) partim rationibus satis probari potest. Nam nutriuntur, vivunt, & sentiunt, ergo recipiunt arterias & nervos: ab illa nutritione necessario sanguinis aliquid redundat, ad cavam remittendi, ergo cum illum non possint nisi per venas amandare, necessario venas de se emittunt. Jam verò, si hæc dicta vasa, quæ necessario insunt, in sanorum

rum interemptorum, vel vivorum hernio-  
forum testibus excisis conspicua non exi-  
stant, quid mirum quod etiam exilia semi-  
nifera albicantia vascula, seu minimi illi  
ductus, per quos semen ex se in parastatas,  
& ex his per vasa deferentia in vesiculas se-  
minarias dimittunt, invisibiles existant?  
quæ tamen nuper singulari dexteritate pri-  
mus detexit & conspicua fecit Regnerus de  
Graef. In cerebri substantia nulla vasa in-  
veniuntur, plurima tamen per illam decur-  
rere, & in illam aperiri ac sanguinem effun-  
dere, docent innumera sanguinea punctula,  
quæ ex dissecta substantia undique epullan-  
t. Etiam in nervis nulli meatus apparent,  
animales tamen spiritus per invisibiles co-  
rum poros perpetuo transfluere, indubita-  
tum est. Ita etiam subtilissimus arteriosus  
sanguis, per minimas arteriolas versus in-  
teriora testium penetrantes, & spiritus ani-  
males per nervos in testes possunt ingredi,  
atque ex iis confectum spirituosum semen  
per alios invisibiles ductus rursus egredi,  
sicque per vasa deferentia ad vesiculas semi-  
narias & prostatas deferri, licet ipsi meatus,  
propter tenuitatem, oculis conspicui non  
existant.

IV. Quamvis aliqua animalia testibus  
destituta generent, inde non sequitur, testes  
non conficere semen: quoniam illa animalia  
non testiculata habent aliquod aliud testibus  
analogon, in quo ipsis semen præparatur,  
idque secundum eorum naturam non minus  
bonum, quam aliis conficitur in testibus.  
Sic in piscibus masculis novimus illud cor-  
pus albicans, nostratibus *hompel* dictum,  
subire testium vices; & quod coeant, in  
fluvialibus manifeste videmus, idque in  
marinis etiam fieri certum est: ante multos  
annos balenam in littus nostrum ejectam,  
vidimus habuisse penem longitudinis sex  
septemve pedum, procul dubio, ipsi ad  
coitum a natura concessum. Hinc minime  
dubitandum pisces quoque minores genita-  
libus esse præditos, quæ licet nobis invisi-  
bilia existant (sicut etiam in ranis) tamen  
adesse coitus docet, iisque aliquod testibus  
analogon inesse, in quo semen conficitur,  
generatio ostendit. Quantum ad serpentes,  
quos Aristoteles testibus carere dicit, illud  
saltem in omnibus verum non esse, sciunt  
Medici & pharmacopolæ Veneti, qui, re-  
ferente Æmilio Parisano, per penem &  
testes distinguunt serpentes mares à foemel-  
lis: & si forte multi etiam sint, qui testibus  
carent, in iis, sicut in piscibus, procul  
dubio, reperietur illud testibus analogon,  
quod testium vices suppleat.

V. Quod animalia quædam exfectis te-  
stibus adhuc generasse dicantur, hoc (si  
modo verum sit) ex eo factum fuit, quod  
ante testium ablationem vesiculæ seminariæ  
semine repletæ fuerint, quod semen post-

modum, testibus jam privata, per coitum  
in uterum injecerunt, & sic generarunt  
per semen quod antea in testibus erat con-  
fectum. Talis autem generatio tantum  
semel fieri potest, evacuatis enim vesiculis  
nullum novum semen, propter testium &  
materiæ defectum, amplius restituitur. Hoc  
ultimum forte negabit Regius, qui *philos.*  
*natur. lib. 4. cap. 12.* putat illud semen so-  
lummodo gigni in prostatis & vesiculis se-  
minariis, non verò in testibus, atque hinc  
absentibus testibus, seminis generationem  
tamen in his partibus procedere. Verum  
ille Vir hoc sentit, repugnante omnium  
seculorum experientia, qua semper edo-  
ctum est, viros (sic etiam bruta animalia)  
exfectis testibus steriles, & ad generatio-  
nem prorsus inutiles fieri, nec unquam iis  
novum semen regenerari, quantumvis pro-  
stata & vesiculæ illæ remanserint. Ex-  
perientiam quoque confirmat ratio, nam  
ex qua materia conficerent semen, cum per  
testium resectionem necessario etiam, præ-  
ter nervos, resecentur vasa spermatica, san-  
guinem ad seminis generationem adferentia?  
cumque illa materia in semen convertenda  
per nullas alias partes, quam per illa vasa  
primò ad testes, hincque per vasa deferentia  
ad prostatas & vesiculas seminarias, perve-  
nire possit?

VI. Cabrolii prior historia nihil contra  
nostram opinionem probat, quia proponit  
casum, præternaturalem rarissimum: ne-  
que liquet ex historia an stuprator ille semen  
emiserit: præterea, si forte emiserit, pro-  
cul dubio, in isto homine fuit aliquod aliud  
testibus analogon, in quo semen confectum  
esse potuit, quod Cabrolius fortè non ob-  
servavit, quia ab eo aut non inventum, aut  
non cognitum fuit. Scribit Jo. Schenckius,  
*observat. lib. 3.* in Ortelio, mercatore Ant-  
verpiensi, post mortem non fuisse inven-  
tum ventriculum, sed ejus loco intestinum  
primum fuisse laxum, & valde carnosum,  
hocque vicem ventriculi supplevisse: an  
nunc ex raro isto casu quisquam bene con-  
cludet, ventriculum non chylicare, sed  
chylum confici in intestino duodeno vel  
jejuno? Sic etiam ex Cabrolii raro casu non  
sequitur, neque probatur, testes non con-  
ficere semen.

VII. Ex posteriore Cabrolii historia  
manifestum est, isti adolescenti intestato,  
vel saltem sic judicato, testes in abdomine  
delituisse, nec illum sine testibus generasse.  
Sic Bauhinus refert se adolescentem viginti  
annorum vidisse, cui nulli testes foris erant  
penduli, qui tamen salacissimus erat. Sic  
etiam ego ante multos annos in Batavia su-  
periore novi hominem, multa prole, ma-  
gis quam pecunia ditatum, cui nulli testes  
foris penduli aderant: alium præterea in  
territorio Vianensi cognosco, cui unus in  
inguine

inguine manifeste sentitur, alter nusquam; procul dubio quod in abdomine delitescat.

*Qua vi testes semen conficiant.*

Ratum igitur manet, semen in testibus confici. Jam si quis forte roget, qua vi, aut modo testes semen conficiant? Dicam, vim illam procedere ab eorum substantiæ proprietate, id est, propria temperie & conformatione admirabili, ex vasculorum concursu ac complicatione constructa: vim ipsam latius explicaturus, quando ille interrogator me primò docuerit, qua vi ventriculus ex assumptis alimentis non alium succum quam chylum, cor ex chylo sanguinem, cerebrum ex sanguine spiritus animales conficiat. Interim super hac re dabitur aliqua satisfactio, *sequente cap. 28.* quo tamen feminis historiam latius describimus, ut & de chylicatione, *precedente cap. 7. de hæmatosi, lib. 2. cap. 12. de pneumatosi, lib. 3. cap. 11.*

*An è dextro teste mares, è sinistro femelle generentur.*

Cum autem semen æque bonum in uno atque in altero teste generetur, nec ulla ratio sit, quare se aliter debeat habere in dextro, quam in sinistro teste, satis liquet, quantum errent illi, qui scribunt è dextri testis semine masculos, è sinistri verò fœmellas generari. Quam opinionem, præter varias rationes, brevitatis gratia prætereundas, experientia quotidiana convincit, varii enim alterutro teste privati utriusque sexus liberos genuerunt. Dominus Couper, equitum capitaneus notissimus, cum à violente cum equo lapsu herniosus factus fuisset, nec nisi uno teste ablato sanari potuisset, postea tamen non minus feliciter utriusque sexus proles ex sua uxore genuit, quam antea, & insigni liberorum numero familiam adauxit. Sic illud etiam contigit Bernhardo Z. Satrapæ Montfurtenfi, qui adolescens, ob herniam, uno teste castratus fuerat, atque exinde eo gloriari solebat, quod multo felicius uno, quam alii duobus testibus filios & filias procrearet, salacissimus enim erat, & magnum liberorum numerum ex quinque uxoribus, plurimisque meretricibus genuit.

*Transitus feminis è testibus ad vesiculas & prostatas.*

Jam verò, quantum ad alterum dubium, quod inquirendum dixeramus, scilicet, quomodo semen, quod non modo oculis

conspicuum, verum etiam crassioris substantiæ esse videtur, è testibus per invisibiles meatus ad vesiculas feminarias & prostatas pervenire possit, illud quamvis ex modò dictis de officio testium satis pateat, tamen paulo latius hic explicandum. Fit hoc in semine eodem modo ut in sanguine. In hoc enim aliæ partes sunt spirituosæ & valde tenues, aliæ crassiores & viscidiores, omnes tamen fluidæ, quæ simul mixtæ tantam habent leptomeriam, ut passim per invisibiles poros substantiæ partium transire queant; nam abrasâ leviter cuticulâ, mox sanguis per invisibiles cutis poros exit, atque sic etiam aliis plerarumque corporis partium poris se insinuat. Ita quoque in semine, crassiusculæ particulæ ab admistis spirituosis & tenuissimis, multum salis volatilis in se continentibus, atque etiam à peculiari effervescencia in testibus suscitata, adeo fluidæ sunt, ut angustissimos & invisibiles vasorum deferentium meatus facillime transeant, licet ipsa feminis tota substantia, cum foras excernitur, crassior esse videatur. Transit semen crassum & optime coctum, nobis videntibus, è vesiculis feminariis per exiles ac vix visibiles meatus in urethram, si vesiculæ digito premantur, eosque angustissimos ductus, instar argenti vivi quod per tenue corium transcolatur, penetrat, quare igitur non posset magis jam volatilifatum, ante factam condensationem quæ in vesiculis contingit, similiter transire per invisibiles meatus vasorum deferentium? In immoderato coïtu docet experientia nonnunquam loco feminis, sanguinem excerni (causam antè diximus, in historia testium) qui sanguis si per invisibiles dictorum vasorum meatus transeat, quidni etiam semen? Interim tamen inficias ire nolo, aliquibus de causis, ut ab impuro coïtu, semen in testibus posse corrumpi, adeoque coagulari seu incrassari, ut transire nequeat, & tunc testium tumores, aliaque incommoda inde oriri. Quomodo autem spirituosus aliquis humor, multum salis volatilis in se continens, per invisibiles poros facile transeat, latius docebitur *lib. 3. cap. 11.*

## CAPUT XXIII.

## DE PENE.

Vide Tabulam IV.

**S**emen in prædictis organis confectum, peculiari instrumento opus habuit, quo in uterum injiceretur, quem in finem Natura Penem formavit, qui hoc officio fungeretur.

**Penis.** Est autem Penis (qui etiam Priapus, Virga, Mentula, Veretrum, Coles, & Membrum virile, aut genitale, Græcis πάλος, clavus, & κούλος, caulis, ac πέος, penis, nominatur) pars organica ad seminis in uterum injectionem primariò, & secundariò ad urinæ excretionem comparata.

**Vires penis.** Hic est ille Priapus, hortorum naturalium præfectus

(Quem resupina colit mulier juvenisque puella) Incantator ille maximus, qui suo fascino foemineum sexum miris modis effascinare solet. Hæc est illa pars, quæ maturas virgines dementare, honestas sæpe foeminas abripere, tristes & melancholicas exhilarare, ac novo vigore perfundere valet: qui suo contactu frigidas mulieres calefacit, suo ingressu soporosas suscitatur, suo attritu torpidas alacres facit, atque ad summum voluptatis culmen evehit: imò quæ tenellas juvenculas dulci suo afflatu crassiores & ventricosas reddere, ac inscientes puellas sapientiores, atque etiam matres lactantes facere potest.

**An sit animal.** Propter hæc mirabilia, quæ præstare consuevit, Plato, in *Timeo*, censuit penem animal quoddam esse, propriumque habere motum, rationis imperio sæpissime rebellem, quoniam ei insita vis quæ generandi valde est appetens. Cum Platone consentit Aristoteles, lib. de animal. mot. cap. ult. qui etiam genitale membrum appellat animal. Verum cum vis illa appetens, non huic, sed cerebro insita sit, ex eoque in penem fundatur: cum etiam unum animal non possit esse alterius pars integrans: cum denique penis sit duntaxat pars animalis totum aliis complens, non potest certe animal, sed tantum animalis pars & instrumentum dici.

**Situs, Figura, Magnitudo.** Situm obtinet ad radicem ossis pubis. Figuram habet oblongam, & fere rotundam, superiore parte latiore: crassitiem verò & longitudinem ad Venerium actum convenientem, in aliis tamen majorem, in aliis minorem. Vulgo brevioris staturæ viri, nec non qui à Venere abstemii vivunt, item nasuti seu magno naso præditi (hinc ex nasi magnitudine de magnitudine penis, ut etiam ex oris magnitudine in mulieribus, de earum pudendi magnitudine judicari posse,

sibi persuadere solent, salaciores viri & mulieres, secundum hos versiculos.

*Ad formam naris noscetur mentula maris:*

*Ad formamque oris noscetur res muliebris.)*

Ut & stolidi, stupidi que, ac fatui, majore pene donati traduntur: quæ tamen regulæ non sunt perpetuæ, sed plurimis exceptionibus patent. Spigellius, anat. lib. I. cap. 10. ex penis magnitudine judicat de majore aut minore aptitudine ad Venerem. Major mentula, inquit, vulvam potius replet magnitudine, quam uterum fecundo semine. Est etiam ineptior ad Venerem, quam neque animose aggreditur, neque diu sustinet, victis pondere musculis qui rigidam hastam tenent. Parva, contra, & salacior, & fecundior est, quia titillando cervicem uteri, magis proleat foeminarum semen, & diutissime pugnam perfert. Alexander Petronius, lib. 2. de morb. Ital. cap. 17. ex magnitudine penis etiam de hominis ingenio conjecturam facit, & magnum penem dicit indicare ingenium durum ac stolidum, asinino simile.

Constat penis cuticula, cute, membrana *Substantia*. carnosa, & substantia propria: pinguedine verò caret, quia hæc pondere & nimia mole huic parti impedimento fuisset, & sensum obtundens, voluptatis magnam partem impedivisset. Propria autem substantia ei maxime conveniens, est, non ossea, ut in cane, vulpe, lupo; non etiam cartilaginea, neque carnea, sed talis quæ laxari, & ad seminis ejectionem extendi commode potest. Hanc constituunt partes quatuor, urethra, duo corpora nervosa, & glans.

**Urethra**, seu fistula urinaria, inferior *Urethra*. ejus pars est, quæ interius tenui ac sensili, exterius verò fungosa ac fibrosa membrana investitur, estque cervici vesicæ continua quidem, sed tamen non ejusdem cum illa substantiæ, nam nonnihil spongiosa & obscurioris coloris existit, potestque in penis tensione seu erectione turgescere ac distendi, & postea rursus flaccescere, qualia in cervice vesicæ urinariæ contingere nequeunt: ad hæc per coctionem quoque à vesica separatur, ejusque substantiæ diversitas tunc optime patet. Atque ex his jam liquet error Andreæ Laurentii, scribentis, urethram nihil aliud esse, quam vesicæ substantiam usque ad penis finem elongatam, vel vesicæ collum productius. Interea magnum ipsi commercium esse cum corporibus nervosis (etsi substantiâ ab illis differat) ex eo patet, quod una cum his infletur seu intumescat, & rursus detumescat.

Hæc toto ductu æqualem habet *Ampliudo* *tudinem*, *Q<sub>2</sub>*

tudinem, excepta parte anteriore, prope exitum, qua glans cum corporibus nervosis jungitur, utpote in qua superficiei habet cavernulam, in quam urina acris in calculo impingens, dum in ea circumagitur, dolorem excitat, magnumque calculi signum exhibet: in ea etiam nonnunquam acris liquor per gonorrhœam subsistens, exulcerationem admodum dolorosam facit.

Ufus.

Ufus ejus est, semen & urinam deducere, eumque in finem in illam aperiuntur multi exiles & pene invisibiles ductus à prostaticis, & duo angusti meatus à vesiculis seminariis semen transmittentes (de quibus utrisque *precedente capite* dictum) & vesicæ urinariæ cervix, in eaque invenitur illa valvula membranacea, de qua dictum *cap. 20.*

Corpora nervosa.

Urethræ superiore parte incumbunt duo Corpora nervosa, maximam penis partem constituentia. Exterius crassa sunt, instar arteriæ, nec non densa ac dura, intus verò rara seu spongiosa (hinc nonnunquam *Corpora spongiosa*, & *fungosa* appellantur) ex nigro subrubra seu subatra materia, velut nigricante sanguine opsecta.

Ortus.


Oriuntur utrimque ex inferioribus ossis coxendicis partibus, iisque validis ligamentis adhærent, & circa os pubis medium, cui alligantur ligamento nerveo subiecto, coeunt, interventu tamen septi membranei tenuissimi, pellucidi, ac fibrosi, à se invicem distinguuntur. Hoc septum quo magis ad glandem accedit, eo magis attenuatur, ita ut antequam ad penis medium pervenerit, ab urethra paulatim ascendat versus dorsum, atque inde ulterius procedens, sensim adeo attenuetur, ut prope glandem fere evanescat, & sic duo illa nervosa corpora ibi in unum coalescere videantur.

Substantia.

Horum internam spongiosam partem ex arteriis, venulis, & nervulis, inter se ad retis modum intertextis, conflata esse, & sanguinem spirituosum (qui per arterias è pudenda eò excurrentes influit) ibi collectum, cæstro Veneris incalescentem partes istas inflare & tendere, tradunt Bauhinus, Riolanus, & Veslingius. Retis nullam mentionem facit Fallopius, sed, *in observat.* scribit, geminos nervos insignes & manifestos, ac inter hos totidem arterias satis dilatatas usque ad glandem protendi: sic etiam geminas venas ad nervosa corpora excurrere, sed illas fere semper ad mediam bifurcationem coalescere in unam venam, quæ per medium dorsum penis inter arterias usque ad glandem procedit: hæcque vasa circiter à quarta lumborum vertebra, ab aorta, cava, & nervo maximo crura petente, oriri, ac circa osium pubis conjunctionem per penis bifurcatam

originem penetrantia, ad dorsum penis ferri. Satis exacta est hæc Fallopii vasorum descriptio, quorum minimi furculi versus internam spongiosam nervosorum corporum substantiam hiant, cumque è nervis & arteriis spiritus animales cum calido sanguine arterioso copiosiores in eam influunt, tunc penis incalescit & tenditur: ubi verò spiritus influere desinunt, tunc qui influxerat copiosior sanguis & spiritus à venularum ramulis absorbetur, sicque penis iterum flaccescit. Quod autem ab influxu sanguinis & spirituum penis tendatur, in recentibus cadaveribus facile demonstrari potest: quippe si aquam per syringam orificiis arteriarum impositam, in corpora nervosa seu spongiosa impellatur, mox penem adeo extendi videmus, atque in vivis ab influxu sanguinis & spirituum tendi solet. Verum ipsa tamen horum corporum interior substantia non est mera textura vasorum, sibi invicem retis in modum intertextorum, ut tradunt Bauhinus, Riolanus, & Veslingius, sed est substantia fibrosa, ex innumeris fibrillis hinc inde excurrentibus, ac circumdantem membranam à nimia dilatatione æqualiter detinentibus, atque iis intertexta vascula fulcientibus, constructa, hincque fungosa & cavernosa (sicut etiam est substantia pulmonis) cavernosis suis interstitiis sanguinem & spiritum, è vasis per illam substantiam oberantibus, suscipiens. Whartonus, *cap. 32.* scribit, corpora illa internè glandosam carnem habere, quæ quodammodo infarcit ejus capsulas, easque extra coitum, ut ait, à nimia concidentia & flacciditate tuetur. Sed illam carnem glandosam in capsulis illis non dari, per autopsiam demonstrat & evincit Regn. de Graef, *lib. citat.* idque per egregium experimentum ibidem latius descriptum.

Penis fini imponitur *βάλας*, sive Glans, seu *caput penis*, in quam prædicta *Glans.* duo corpora nervosa, cum urethra, terminantur. Hujus pars inferior, quæ tria illa corpora nonnihil ambitu excedit, *σφαγή, corona*, dicitur.

Formam seu figuram habet turbinatam: *Figura*  *color.* dum flaccida est, sublividum, dum tumida est, rubicundum.

Substantiam obtinet propriam, carnosam, mollem, spongiosam, exquisiti sensus, tenuissimaque membrana investitam, antè oblongo foramine perviam. Investiens autem membrana ab urethræ interna producitur, quæ per foramen exiens reflectitur, ac circum totam glandem expanditur, eique sensum acutissimum confert, quem eum in finem imprimis habere debuit, ut maxima in coitu voluptas excigaretur, hæc enim nisi adesset, vix ququam Venereos actus exerceret, sicque humanum

humanum genus brevi penitus interiret. Hac de re eleganter scribit Andreas Laurentius, *anat. lib. 7. cap. 1.* Hinc obscenarum, inquit, *partium titillatio, & sensus exquisitissimus.* Quis enim, per Deum immortalem, concubitum, rem adeo sœdam, sollicitaret? amplexaretur? et indulgeret? Quo vultu divinum illicet animal, plenum rationis & consilii, quod vocamus hominem, obscenas mulierum partes, tot sordibus inquinatas, & ea ratione in locum inum, velut sentinam corporis, relegatas, astrœtaret? Qua fœmina maris in amplexum rueret, cum & novimestris gestatio laboriosa sit, & fœtus exclusio diris cruciatibus molesta, saepeque exitiosa, & editi fœtus educatio plena sollicitudinis, nisi incredibili voluptatis æstro percita essent genitalia?

*Præputium.* Extrinsecus glans integitur **Præputio**, quod conflatur ex cuticula & cute, accedente interius pellicula nervosa & tenui, à panniculo carnosio.

*Frenum.* Hoc inferiore sui parte, infra foramen, **Freno**, seu **Frenulo** glandi alligatur.

Appellatur autem *Præputium*, quia præ pudendis existit. Hoc est illud præputium quod in circumcissione à Judæis & Mahometanis rescatur, unde à *putando*, aut *præputando* ei nomen impositum esse volunt: & quibus illud circumcissione ablatum est, illi, *apella* & *recutiti* dicuntur. Mirum est quod viri aliqui fide digni nobis retulerunt, se multiplici inspectione observasse, hanc partem in Judæorum & Turcarum pueris sextuplo majorem excrescere, quam in Christianorum filiis, imò in nonnullis monstruosam magnitudinem nancisci, & ad pollicis latitudinem, multoque amplius, ultra glandem prominere, scilicet ante ejus abscissionem. Hoc ipsum de Ægyptiorum Arabumque puerulis testatur Vellingius.

Hoc præputium in coitu à glande recedit, & infra coronam se recondit, ut sic aliquo modo æqualis fiat moles & crassities penis sine ulla asperitate. Revolutio tamen iterata præputii supra balanum in coitu magnam delectationem mulieribus excitare creditur, atque hinc (referente Riolo, ex Fragosi chirurgia Hispanica) Turcarum & Æthiopum fœminarum Christianorum fervorum consortium, tanquam delectabilius, magis expetunt, quam aliorum circumcisorum.

*Præputii nimia angustia.* Contingit nonnunquam hoc præputium in quibusdam adeo contractum & angustum esse, ut à glande recedere non possit, atque hinc talibus hominibus in tensione penis, ob glandem isto angusto quasi annulo nimis compressam, magni dolores excitantur, quales ægri mihi in praxi aliquoties occurrerunt, quos omnes uno remedio curavi, scilicet præputii in superiore parte diffissione seu incisione, forcice uno ictu facta; cujus incisionis labia postea facile sanantur,

sed glans præputio nunquam rursus tegitur, quod parum refert, cum varios noverim quibus à natura præputium adeo breve est, ut nunquam glandem tegat, qui tamen inde nullum incommodum patiebantur.

Penis vasa omnis generis recipit. *Vasa penis.* Arterias interiores duas insignes obtinet ab hypogastricis, per nervosa imprimis corpora dispersas, ad quorum coalitus initium ingrediuntur, & secundum longitudinem penis excurrunt, exilibus ramulis ad latera emissis: exteriores verò recipit à pudendis.

Venas interiores ad hypogastricas, exteriores ad pudendas emittit.

Nervos habet exteriores & interiores ab ossis sacri medulla, quorum duo mediocris magnitudinis, una cum arteriis & venis, parte inferiore per longitudinem penis excurrunt.

Musculis movetur quatuor. *Musculi.* Horum duo breviores & crassiores à tubere ischii principio nervoso prodeuntes, non procul ab exitu corporibus penis supertenduntur & affiguntur, ad virgæ erectionem. Reliqui duo longiores & graciliores, à recti intestini musculo sphinctere (Riolanus vult, à ligamento transverso utriusque coxendicis) orti, & subtus delati, ad latera urethræ circa medium inseruntur, seu annectuntur, quam ad promptiorem seminis & urinæ emissionem dilatant, & simul etiam vesiculas feminarias, in perinæo collocatas, comprimunt; & quia seminis urinæque guttulas propellunt, *Acceleratores* nominantur. Hunc dictum musculorum usum planè rejicit Regn. de Graef, *lib. de part. genit. viror.* iisque longe alium adscribit, scilicet, ut cum intumescunt, tunc corpora nervosa utrimque comprimant, sicque sanguinem per arterias influentem repente versus glandem propellant, eundemque per venas citò refluxurum, comprimendo venas, aliquamdiu illic sistant, sicque rigiditatem penis nonnihil conservent. Verum cum una tantum musculi actio sit, sese contrahendo partem cui annectitur attrahere, isque ad illam actionem primario conditus sit (ut latius infra docemus, *lib. 5. cap. 1.*) & quidquid ab illo extra istam suam actionem sit, illud tantum per accidens contingat, necessario, ut in omnibus, sic etiam in penis musculis, illa actio pro indubitata habenda, & dictos musculos penis erectionem, & urethræ dilatationem facere, pro certissimo statuendum est. Quod autem per accidens, dum intumescunt, corpora nervosa nonnihil comprimant, ut vult Regn. de Graef, hoc eorum unicam & primariam actionem non tollit, neque ex eo concludi potest, illos penem non erigere, sed duntaxat isti accidentario usui inservire.



*Penis tensio.*

Cum in libidine spiritus animales copiosi in hos musculos, & duo corpora nervosa in fluunt, tunc penis Venereo impetu percitus, valde tenditur, & rigidus evadit; Cujus tensionis modum & magnitudinem noverunt omnes, quorum nomina frigidis, & maleficiatis non sunt adscripta. Præter modum vehemens debuit fuisse tensio in isto Juvene viginti duorum annorum, quem se vidisse refert Jo. Theod. Schenckius in *exercit. anat.* qui stanneum cantharum cerevisiæ mensuras quinque continentem, citra molestiam, nec sine intuentium stupore ac risu, ultra horæ dimidium peni appensum circum ferebat.

*Officium.*

Officium penis ex prædictis & definitione satis patet.

*An fieri possit generatio sine penis immisione.*

Verum cum generatio, omnium Medicorum & Philosophorum consensu, sine pene peragi nequeat, quaritur an perfici possit sine penis intromissione in vaginam uterinam? Ratio dicit illud fieri non posse, cum sine intromissione penis semen viri in mulieris uterum ejaculari nequeat. Experientia tamen contrarium nonnunquam docuit, scilicet, quod nonnullæ mulieres conceperint sine penis immisione. Hujus rei quatuor historias, unam à se ipso, & tres ab aliis visas, describit Riolanus, *anthropogr. lib. 2. cap. 32.* Prima hæc est: Nuper, inquit, vidimus Parisiis mulierem, quæ ex laborioso & difficili partu laceratas habuerat partes genitales, cujus nympha & quatuor caruncula tam arte coaluerant, ut vix specilli cuspitem foramen admitteret, nihilominus concepisse. Intra pudendi labra effusum semen uterus, hujus pabuli avidissimus, attraxit, quemadmodum è profundis cuniculis cervus serpentes narium inspiratu allicit. Cum instaret partus, introducto speculo matricis, foramen dilatatum fuit in eam amplitudinem qua ad egressum fœtus necessaria erat, sicque fœtum perfectum emisit mulier incolumis & superstes.

*Secunda. Tertia.*

Secundam dicit visam fuisse Parisiis, anno 1609. Tertiam citat ex Clementina, 1. *quest. 15. de consang.* scilicet de quadam imprægnata, cujus virginitatis claustra omnia firma atque illæsa manserant. Quartam scribit ex *chirurgia Fabricii*, de fœmina quæ ex viri amplexu sine penis intromissione conceperat. Qualem historiam puellæ Romanæ, cui simile contigerat, refert Henricus à Monichem, apud Lyserum, *observat. 13.* Ego ipsemet memini me anno salutis 1637., cum Noviomagi poliater essem, vocatum fuisse ad mulierem quandam haud infimæ sortis, parturientem, prope portam gruis habitantem, de qua obstetrix referebat, quod valida transversa mem-

*Quarta.*

*Quinta.*

*Sexta.*

brana, in medio exili foramine perforata, ad ingressum vaginæ extensa esset, tantam firmitudinem habens, ut digitis ab ea dilacerari nequiret: hæc penitus impediēbat quo minus obstetrix digitum ullo modo immittere posset: & quia mariti penem adhuc multo minus recipere potuerat, mirabantur omnes quomodo illa imprægnari potuisset. Sed confitebatur maritus, se multoties tentasse, anne per illud obstaculum rigido suo ariete perrumpere posset, sed nunquam penetrare potuisse, aut interiora subiisse: interim tamen in ista lucta ipsi multoties semen effluxisse, & contra membranam istam ejaculatum fuisse. Hinc conjeci, illud semen per antedictum exiguum foramen, quod membranæ inerat, versus uterum ascendisse, sicque conceptionem factam fuisse. Consilium dedi de membrana ista rescindenda, sicque dilatanda, sed cum præ pudore chirurgum admittere nollet, ipsi inter gravissimos partus labores, ob exitum fœtus denegatum, miserè una cum fœtu moriendum fuit; propterea quod nullis rationibus aut verborum blandimentis ad illam operationem chirurgicam admittendam induci posset. Ex quibus omnibus exemplis liquet nonnunquam conceptum factum fuisse, sine penis immisione. Verum hi sunt rarissimi casus, quorum exempla nullam regulam constituunt, quippe rarissimæ de talibus obstaculis sponforum quæremonia audiantur.

Peni proxime adstantes partes variis nominibus designantur, ut supra, *hujus lib. cap. 2.* etiam dictum. Quæ superius ei incumbit Pubes appellatur: lateralibus Inguinum nomen conceditur. Pars à radice scroti usque ad podicem exporrecta, Perinæum dicitur, à περινεώ, circumfluo, quod illa pars plerumque sudore madeat, Latinis Interfemineum nominatur, quod inter femora situm obtineat. Omnes istæ partes, pubes, inguina, perinæum, una cum scroto, usque ad circuitum podicis, in ætate matura, & ad Venerem apta pilis luxuriant, quibus Natura pudendas partes aliquo modo velare voluit, cum naturalis verecundia id exigat. Illi autem pili, tum viris, tum fœminis, incipiunt erumpere circa annum decimum quartum, cum ratio firmior vitium à virtute discernit, quasi tegere volens natura eas partes, ob quas homines erubescere consueverunt. Notat Riolanus, *anthrop. lib. 5. cap. 32.* in mulieribus, quia carent perinæo, pilos raro circa podicem generari, nisi in vetulis.

*Partes peni adstantes.*

TABU-

11/11/11



## T A B U L Æ IV. EXPLICATIO.

Hæc Tabula exhibet membrum virile, cum vesiculis seminariis, aliisque ei annexis partibus, à Regnero de Graef exactè delineatum.

## FIGURA I.

Membrum virile à parte posteriore.

- A. Vesica urinaria.
- BB. Ureterum portiones.
- CC. Vasorum semen deferentium portiones.
- DD. Vasa deferentia instar capsularum dilatata.
- EE. Vasa ad vesiculas seminarias excurrentia.
- FFFF. Vesiculae seminae flatu distentæ.
- GG. Prostatarum facies posterior.
- H. Urethra.
- I. Concurfus vasorum deferentium cum vesiculis seminariis.
- K. Musculus urethram dilatans.
- L. Idem musculus ad latus diductus.
- M. Spongiosa penis pars urethræ subjacens.
- NN. Urethra.
- OO. Penis corpora nervosa.
- P. Glans.
- qq. Musculi penem extendentes.

## FIGURA II.

Partes genitales à parte anteriore.

- A. Vesica urinaria.
- B. Vesicæ collum.
- CC. Ureterum portiones.
- DD. Vasorum semen deferentium portiones.
- EE. Vasa ad vesiculas seminarias excurrentia.
- FF. Vesiculae seminae.
- GG. Prostata.
- H. Urethra spongiosæ suæ parti adjacens.
- II. Urethræ pars spongiosa.
- KK. Musculi penem erigentes.
- LL. Corporum nervosorum principia ab offibus pubis separata.
- MM. Penis cutis ad latera diducta.
- NN. Cutis duplicatura præputium constituens.
- OO. Cutis quæ retro glandem annexa fuit.
- P. Penis dorsum.
- Q. Glans penis.
- R. Meatus urinarius.
- SS. Nervi supra dorsum penis excurrentes.
- TT. Arteriæ supra dorsum penis delatæ.
- V. Corpora nervosa simul concurrentia.
- WW. Venæ duæ simul coeuntes, & uno insigni ramo per penis dorsum excurrentes.

- X. Vena aperta, ut valvula in illa conspiciantur.

## FIGURA III.

Membrum virile usque ad urethram divisum.

- AA. Glans penis, cum corporibus nervosis per medium divisa.
- BB. Corporis nervosi penis membranæ à se invicem diductæ.
- CC. Arteria per spongiosam corporis nervosi substantiam repens.
- DD. Spongiosa penis substantia.
- EE. Septum intermedium.
- FF. Fibrosæ septi intermedii propagines instar pectinis ascendentes.
- G. Urethra circa corpus glandulosum abscissa.
- H. Urethræ medium.
- I. Urethræ finis glandem perforans.
- KK. Urethræ substantia spongiosa.
- LL. Corporum nervosorum principia instar folliculorum dilatata.
- MM. Musculi penem erigentes.

## FIGURA IV.

Membrum virile ad latus apertum.

- AA. Glans nuda.
- B. Frenum.
- CC. Portiuncula cutis à qua reliqua pars, penem tegens, separata est.
- DD. Urethra corporibus nervosis subjacens.
- EE. Corporis nervosi penis membrana divisa.
- FF. Arteria per corporis nervosi substantiam spongiosam excurrentes.
- GG. Corporis nervosi substantia spongiosa.
- HH. Arteriarum abscissarum orificia.
- I. Urethra.
- K. Spongiosa urethræ substantia.
- LL. Septum intermedium corporum nervosorum.

## FIGURA V.

Membrum virile transversim divisum.

- AA. Spongiosa corporum nervosorum substantia.
- BB. Arteriæ duæ corpora nervosa perambulantes.
- C. Urethræ meatus urinarius.
- D. Urethræ substantia spongiosa.
- E. Septum

- E. *Septum intermedium.*  
 FF. *Membrana corporum nervosorum validissima.*  
 G. *Membrana tenuissima urethrae substantiam spongiosam continens.*  
 A. *Vena insignis per penis dorsum repens.*

## FIGURA VI.

Vasorum deferentium cum vesiculis seminariis communio, in corpore humano.

- AA. *Vasorum deferentium partes crassa substantia & exigua cavitate donata.*  
 BB. *Vasorum deferentium partes tenui substantia & magna cavitate donata.*  
 CC. *Vasorum deferentium extremitates, rursus coarctatae, & exiguo foramine in vesicularum seminariarum collum hiantes.*  
 DD. *Vesicularum seminariarum collum membrana quadam intermedia in duas partes divisum, ita ut unius lateris semen cum alterius lateris confundi non possit, ante-*

quam ad urethram pervenit.

- EE. *Vesiculae seminae flatu distenta.*  
 FF. *Vascula per illas decurrentia.*  
 GGG. *Membranae quibus vesiculae & vasa deferentia in suo situ detinentur.*  
 HH. *Vasa sanguifera ad latera vasorum deferentium excurrentia, eaque suis ramulis amplectentia.*  
 I. *Caruncula, per cujus poros semen in urethram erumpit.*  
 KK. *Ductus corporis glandosi in urethram ad latera carunculae hiantes.*  
 LL. *Corpus glandosum anteriore parte divisum.*  
 MM. *Urethra aperta.*

## FIGURA VII.

Eadem praecedentis figurae literae, sicut in illa externam, sic in hac internam vesicularum seminalium substantiam demonstrant.

## CAPUT XXIV.

*De Partibus muliebribus, seminis & ovorum generationi inservientibus.*



Præcedentibus duobus capitulis explicavimus partes genitales viriles, nunc ordo postulat ut accedamus ad genitalia muliebria, ad descriptionem scilicet illarum partium, quæ mille miseriis scæminas involvunt, mille modis viros enervant, quibus solis debiles ac imbelles mulieres de viris, etiam fortissimis, triumphum agunt. Quæ multos potentissimos Reges pessumdederunt, Imperatores Augustos perdiderunt, sapientes insipientes reddiderunt, eruditos scellerunt, prudentes seduxerunt, sanos in turpissimas morborum miseras præcipitarunt, divites opibus exuerunt, fortissimos heroës dejecerunt: quæ sanctissimum prophetam David abriperunt, sapientissimum regem Salomonem ad idololatriam impulerunt: quæ fortissimum Simpsona prostrarunt, validissimum Herculem ad colum adegerunt: quarum nomine vastata est urbs Sichem, Ileum eversum est, regna multa depopulata sunt. Ad descriptionem, inquam illarum partium, quæ solæ, quasi peculiaribus quibusdam incantamentis, plerorumque, etiam prudentissimorum, virorum mentes quasi ad dementiam adigere possunt, dum in muliere eas putant dulcissimas atque pulcherrimas esse partes, quibus foediores non dantur in toto illius corpore; partes scilicet

fordidas & morbosas, fœdo cruore ac tabo frequenter squallentes, urina quotidie conspurcatas ac perfusas, mephitim turpiter olentes, & tanquam conspici indignas, abstrusissimo ac contemptissimo totius corporis loco à Natura sepositas, ano & stercorebus proxime vicinas, omnis denique colluviei & fœditatis cloacam constituentes. Ad descriptionem illarum partium, dico, quæ licet quasi saburrhae totius corporis muliebris sordidissimum barathrum sint, in iis tamen superbissimum animal, cœlos brevi conscensurum, nempe hominem, concipi, delineari, efformari, & ad maturitatem deduci voluit altissimus Protoplastes, ut postmodum abjectissimi sui principii, ac primi sordidissimi fœdissimi-que domicilii memor, nimio fastu non turgeret, neque adversus Creatorem suum cristas erigeret, sed humilis ac dejectus summi Dei omnipotentiam admiraretur, ejusque divinam celsitudinem & majestatem cum debita veneratione adoraret, ab eoque aliud melius, beatum scilicet atque æternum Animæ suæ in cœlis domicilium supplex expeteret, & per immensam ejus clementiam impetraret.

Hæ autem partes muliebres generationi inservientes, duplices sunt: aliæ scilicet datæ ad seminis, seu ovorum confectionem & transitum: aliæ verò ad conceptionem.

Ovorum

Partes duplices.

*Vasa præparantia.*

Ovorum confectioni variæ partes inferiunt, inter quas primo occurrunt vasa præparantia duplicia, *Arteria* scilicet, & *Vena spermatica.*

*Arteria spermatica.*

*Arteriæ spermaticæ* duæ sunt, sub emulgente ex aorta prodeuntes, & sanguinem spirituosum ad testes, pro eorum nutritione & ovorum confectione deferentes. Harum sinistram in multis mulieribus (mihi in nullis) ex emulgente natam se vidiſſe, refert Riolanus; utriusque verò defectum se invenisse, scribit Bartholinus: verum quid hac de re sentiendum sit, supra dictum, cap. 22. Regnerus de Graef, lib. de mulier. organ. cap. 11. accurate notavit quomodo hæc arteriæ à suo principio ad testes descendant. *Differunt*, inquit, *arteria spermatica* [mulierum à virorum arteriis] quod qua in viris recto fere ductu ad testes properant, in mulieribus nunc per varios cincinnos, capreolos pampinosve vitium imitantes, contorqueantur: nunc rursus de latere in latus flexa, serpentino ductu ad testes appropereant, idque in uno quam in altero potentius, & rarissime eodem modo ac in viris constituta sint. Singulis his arteriis per latera uteri descendentes utrimque occurrit arteria hypogastrica, per eadem latera capreolato ac serpentino ductu ascendens, quam nonnulli cum spermatica per anastomosis coire crediderunt, sed ratione penitus repugnante, cum arteriarum sanguis pulsione cordis sursum & deorsum propulsus, non possit ex una arteria in aliam sursum ac deorsum impelli, sic enim aut (quod absurdum) darentur duo contrarii motus in iisdem arteriis; aut utriusque arteriæ sanguis in se mutuo impingeret, atque ulterius profluere non posset, sed necessario sisteretur.

*Vena spermatica.*

*Venæ spermaticæ* similiter duæ sunt, sanguinem à testium ovorumque nutritione residuum ad cavam referentes. Harum dextra à teste ad cavæ truncum infra emulgentem, sinistra verò ad ipsam emulgentem ascendit, in eamque aperitur, eodem modo ut in viris. Saltzmannus, in observat. anat. has ex utraque parte geminas in muliere quadam invenit. Sed hoc rarissimum est.

Utraque hæc vasa breviora sunt, quam in viris (quia mulieribus testes foris extra abdomen non propendent) & superius aliquantum sejuncta, sed in progressu versus inferiora simul juncta progrediuntur, & tunica à peritonæo enata simul arctè connectuntur. Peritonæo tamen non excidunt, at prope testes in duos ramos finduntur, quorum superior triplici radice testi implantatur, in ejusque ingressu (ex sententia Ruffi Ephesii, cui etiam subscribit Dominicus de Marchettis) corpus varicosum, sed obscurius constituit. Alter verò infra testes in tres furculos dirimitur; quorum

unus uteri fundum adit: alius tubam & ligamentum rotundum accedit: tertius uteri latera sub membrana communi perreptans, in ejus cervicem definit, in qua in minimos ramulos diremptus, cum valis hypogastricis sursum conversis retis in modum miscetur. Per hanc viam menstrua in gravidis nonnunquam fluunt, non verò ex interiore uteri cavitate: qui tamen sanguis illo tempore, non tam per vasa spermatica, quam per hypogastrica eò copiosior affluit.

Præter hæc sanguifera vascula exiles *Nervi*, quoque nervuli ad testes excurrunt, à sexto pari & lumbalibus.

Whartonus putat etiam vascula lymphatica inter reliqua vasa excurrere, quæ etiam observavit Regn. de Graef, ut statim dicetur.

*Vasa lymphatica.*

Vasis spermaticis inferius adhærent testes, quorum historiam antequam auspiciemur, pauca præfari necesse est: scilicet, quod his nostris temporibus, quibus per Anatomem multa abdita in corpore latentia in lucem producuntur, etiam variorum Anatomicorum singulari diligentia & perspicuitate, mulierum hæcenus penitus ignota ovaria & ova, simul in publicam scenam producta fuerint, & compertum sit earum testes esse vera ovaria, in iisque vera ova gigni ac contineri, ut in ovarii avium.

*Præfatio de testibus.*

Hæc nova inventio in principio facile benevolos ad se allexit novitatum amatores: aliis verò accuratiorem autopsiam cum ratione conjunctam desiderantibus, non tam facile persuaderi potuit. Postmodum verò, ubi super horum ovorum clariore demonstratione magis magisque laboratum est, res tandem eo devenit, ut de antedictis ovis hodie paucissimi versatiores Anatomici amplius dubitent.

Horum ovariorum & ovorum primam inventionem debemus Joanni van Horne, anatomico Leydenſi, qui hoc suum inventum publici juris fecit in epistola quadam ad Rolſincium scripta, & anno 1668. edita. Hoc antecessore excitati alii Anatomici, istam telam, quam Jo. van Horne, præmatura morte sublatus, ad perfectionem deducere nequivit, ulterius pertexere instituerunt, inter quos palmam facile meretur Regnerus de Graef, Medicus Delphenſis (nuper, pro dolor, cum totius rei Anatomicæ damno, in flore ætatis, è medio sublatus, ac fato ereptus) qui accuratissima sua inventa, cum elegantibus delineationum figuris, & simul suas speculationes super dicta ovorum historia, per typum divulgavit in principio anni 1672.: quem post aliquot menses inſecutus est Johannes Swamerdammius, Medicus Amſterodamenſis: qui tamen in suo libello, quem Miraculum Naturæ appellat, de prima delineationum

*Ovarii primi inventor.*

R

gloriola

gloriola cum Regnèro de Graef acerbissime contendit, idque tanto cum fervore, ut torum ovarium cum ovis, non melle, sed amara felle oblinire velle videatur: dolens forte quod sui libelli editionem alteri non satis tempestive præmittere potuerit. Verum hanc inanem magis & felleam, quam utilem, altercationem inter eos assopiendam relinquentes, ovariorum muliebrium, & ovorum historiam aggrediemur.

Testes.

Testes muliebres generando semini, minus perfecto quam est virile semen, dicatos esse, idque semen ex iis per tubas Fallopianas, aliasve quasdam vias ab aliis descriptas, partim in uterum, partim in vaginam uterinam infundi, præcedentibus seculis; usque ad nostra tempora, ab omnibus Medicis & Anatomicis pro certissimo scriptum & sancitum est, atque etiam antehac à me ipso pro indubitato habitum fuit, ut patet ex præcedente prima Anatomæ meæ editione: quam ob causam tunc temporis adversus novam ovariorum & ovorum inventionem, mihi eo usque inauditam & nunquam visam, aliquot argumenta intorxi. Sed postea totam rem diligentius examinans, aliorumque super ea in lucem editas observationes ad autopsiam conferens, manifeste comperidi dictam meam veterumque opinionem subsistere non posse, ac proinde in hac secunda meæ Anatomæ editione illam cantilenam necessario aliis musicis notis conscribendam, aliterque cantandam esse; non enim est ut aliquem pudeat, meliora edoctum, sententiam mutare, & ab antiquo communi errore discedere.

Numerus.

Hi autem testes muliebres bini sunt, molliores, flaccidiores, inæquales, & minores quam viris. Pro ætatis tamen ratione & Veneris usu, modò paulo majores & molliores, modò minores, duriores, & sicciore existunt.

Magnitudo.

Pondus.

Magnitudinem eorum, pro ætatis diversitate, ad pondus describit Regnerus de Graef, lib. de mul. organ. cap. 12. Quippe observavit eos in infantibus & recens natis ponderare à granis quinque ad semi scrupulum: in pubescentibus & ætatis flore constitutis, plerumque sesqui drachmam ponderare, atque sic dimidiam duntaxat virilis testis magnitudinem, præter propter, obtinere: in provectioribus minores & duriores fieri: in decrepitis verò adhuc scrupulum unum ponderare. Sed verosimile est hanc regulam tam exactam describi non posse, quin sæpe patiatur aliquam exceptionem, & sicut in viris, ita etiam in mulieribus, sæpe aliquam adesse magnitudinis varietatem. Nam in ætate florentibus, pro ut magis vel minus salaces & ad Venerem proclives in vita fuissent, magnitudinem (& per consequens etiam pondus) variasse, ex inspectione cadaverum certò novimus, neque

etiam in omnibus vetulis eos semper ejusdem parvitatis invenimus.

Siti sunt intra abdominis cavitatem, utrimque uteri lateribus, ad superiorem fundi partem, adstantes in vacuis (ab his tamen increscens fundus in gravidis paulatim sursum recedit) circiter duorum digitorum, aut unius cum dimidio, ab eo remoti, cui per lata membranosa ligamenta adnectuntur. Ab altera parte vasis spermaticis adhærentes, mediantibus membranis quibus illa vasa involvuntur, circum ossis illi regionem peritonæo firmiter adhærent, eandemque fere altitudinem cum uteri fundo servant in vacuis, at in gravidis, ut modò dictum, ab eo per incrementum ascendente, magis magisque removentur. Nullo autem cremastere musculo suspenduntur, quia cum foris penduli non essent, non indiguerunt istis musculis ad sui contractionem versus superiora, atque hinc solum à ligamenti latis firmantur ac continentur.

Connexio.

Figuram fere semiovalè, antica & postica parte latam ac depressam obtinent.

Figura.

Valida tunica, *duplex* nominata, integuntur, quam alii simplicem, iisque propriam; alii simplicem à peritonæo productam: alii denique duplicem esse statuunt, eamque ex una propria & altera communi à peritonæo producta, priori firmiter annexa, constare existimant. Hanc tamen ejus in duas membranas divisionem difficulter institui ac videri posse judicandum est.

Tunica.

Substantia plurimum differunt à testibus masculorum, cum hi ex seminariis vasculis, mira serie sibi invicem junctis ac intertextis (ut supra dictum cap. 22.) illi verò ex membranis, vasis, aliisque corporibus conformentur.

Substantia.

Hanc eorum substantiam, quia summâ diligentia inquisivit, invenit, & accuratissime descripsit Regnerus de Graef, lib. & cap. ante citat. tanti viri honori nihil detrachere volens, ipsius verba hac de re scripta hic subjungam. *Componitur, inquit, interna eorum substantia ex multâ præcipue membranâ ac fibrulis laxè sibi invicem unitis, in cujus intercapedine plurima reperiuntur corpora, quæ ipsi aut secundum, aut præter naturam insunt. Quæ semper secundum Naturam in membranosa testiculorum substantia jam descripta reperiuntur, sunt vesicula liquore plena, nervi, & præparantia vasa, quæ eodem fere modo ac in viris, ad testes excurrunt, & totam eorum substantiam perreptant, ac vesiculas subeunt, in quarum tunica rami quam plurimi, post copiosam divaricationem, evanescent, eodem modo ut in avium vitellis ovarii racemo adhuc annexis, contingere videmus.*

Vasa lymphatica, addit, in testibus reperta, an eorum substantiam subintrent, necdum tantum vidimus, ut illud (licet veritati consentaneum) asserere audeamus.

Quæ



Qua verò secundum naturam aliquando tantum in mulierum testibus inveniuntur, sunt globuli, qui glandularum conglomeratarum ad instar, ex multis particulis à centro ad peripheriam recto quasi ductu tendentibus, constantur, & propria membrana obvolvuntur. Hos globulos non omni tempore in foemellarum testibus existere dicimus, quia post coitum tantum in iis deteguntur, unus, aut plures, prout animal ex illo congressu unum aut plures foetus in lucem edet. Neque illi adhuc in omnibus, aut ejusdem generis animalibus semper eodem modo se habent: in vaccis enim flavum, in ovibus rubrum, in aliis cineritium colorem sortiuntur: praeterea aliquot post coitum diebus tenuiore substantia praditi sunt, & in sui medio lymphidum liquorem membrana inclusum continent, quo una cum membrana foras propulso, exigua solum in iis capacitas superest, quae sensim ita aboletur, ut postremis gestationis mensibus solida tantum substantia constare videantur: enixo jam foetu globuli isti rursus imminuuntur, ac tandem evanescent.

Qua verò praeter naturam in mulierum testibus quandoque observantur, sunt hydatides, lapilli, steatomata, aliaque similia.

Res praeternaturales in testibus.

Nonnunquam etiam alia praeternaturalia in morbofo statu in iis inveniuntur. Annis 1656. 1658. & 1663. tria secui cadavera muliebria, in quibus unus testis excedebat magnitudinem pilae palmariae, humoremque viscidum continebat, altero teste se bene habente. In variis aliis, quae in vita suffocationibus uterinis frequenter laboraverant, plerumque inveni aliquem quidem, sed tamen praedicto longe minorem magnitudinis excessum, in eorumque modo uno, modo utroque, liquorem quandam æruginosum vel croceum, aut flavescenscentem. Dominicus de Marchettis, *anat. cap. 7.* in foemina quadam vidit dextrum testem ad magnitudinem ovi gallinacei tumidum & serositate plenum: atque in altera testes cum ligamenti & tubis adeo implicatos, ut veluti sine distinctione una massa carnea esse videretur. Bauhinus, *lib. 1. anat. cap. 35.* scribit, interdum testes pugno majores repertos fuisse: ibidemque etiam meminit hydropis testium, in muliere tali hydrope extincta, è cujus dextri testis tumore novem feri libras extraxit, sinistro magnitudinem mali cydonii excedente, multisque magnis hydatidibus scatente. Ad hæc, alterius quoque historiam adducit, cujus testem dextrum, magnitudinem ovi anserini habentem, intus pilis oblongis albis, tunicae infixis, omnino refertum invenit, quibus mucosa quædam materia, instar sevi, circumjecta erat.

Antedictæ illæ vesiculæ, quæ secundum naturam in testibus reperiuntur, quarum hic meminit Regnerus de Graef, etiam diu ante fuerunt observatæ à Fallopio, in obser-

vat. & à Castro, *lib. 1. de nat. mulier. cap. 4.* sed illi tamen quales essent, & cui usui infervirent, ignorarunt.

Has postmodum Jo. van Horne, *epist. ad ova. Rolsinc.* Ova primus nominavit, idque convenientissimum nomen exinde sequentes Anatomici merito reservarunt, cum re vera sint ova, & in illis minoribus adhuc existentibus nil nisi tenuis quidam liquor contineatur, qui similis est albumini in avium ovis contento, & ovis illis coctis eodem modo concrefcit seu coagulatur, ut albumen in avium ovis, nec ab hoc albumine consistencia aut sapore quidquam differt: secus atque facit liquor in hydatidibus (quales hæc ova esse, quondam male putarunt, Vesalius, Fallopius, Riolanus, alii-que) contentus, qui neque coctione induratur, neque similitudinem saporis cum ovorum avium albumine habet.

Ova muliebria, aliorumque viviparorum *Ovorum membrana.* gemina membrana circumdantur, una crassiore, altera tenui: illa postmodum in conceptu chorion, hæc amnion constituit. In viviparis autem opus non fuit, ut exterior illa dura & crustosa evaderet, sicut in avibus: in his enim extra corpus fovenda, atque hinc per duriores illum corticem ab injuriis externis defendenda erant; sed hæc durities in illis intra corpus fovendis necessaria non fuit, utpote in quibus injuriæ externæ, per circumjectas alias calidas partes, uterum, abdomen, &c. satis abarcantur.

In omni autem animantium genere ova *Ova in omnibus animalibus.* inveniri, hodie certum ac sancitum habetur, quod sicut de avibus, plurimisque piscibus & insectis notissimum est, ita per innumeras sectiones & inspectiones variorum animalium, hodie de viviparis quoque indubitatum evasit. Quamvis pro animalium diversitate magnitudinis haud parva diversitas reperiatur; atque etiam, praeter majora ad maturitatem jam deducta, in multis adhuc multa minora, ulteriore incremento paulatim ad justam magnitudinem deventura, inveniuntur. Quamvis etiam numerus diversus sit, & in aliis unum, in aliis duo, tria, vel plura reperiuntur, prout scilicet animalia unum vel plures foetus editura sunt. In quibus verò animalibus materia ovorum foecundorum conceptui seu formationi inidonea est, illa, aut propter defectum ovorum, ut contingit in vetulis & mulis; aut propter ovorum pravam intemperiem vel conformationem, sterilia sunt.

Gignuntur hæc ova in testibus foemellarum vivipararum ex sanguine spirituosio per *Materia ex qua ova.* arterias præparantes, & spiritu animali per invisibiles nervulos ad testes affluente, atque in membranosa ac glandulosa eorum substantia materiam iis generandis idoneam

relinquente, dum reliqui residui humores per venulas & vascula lymphatica ad cor redeunt.

*Ovaria.*

Ex his omnibus bene concludunt hodierni Anatomici, duce Jo. van Horne, testes muliebres, potius earum ovaria, quam testes appellandos esse, idque imprimis propterea, quod neque in figura, neque in substantia & contentis, ullam similitudinem cum testibus virilibus habeant. Hinc, procul dubio, est, quod ut inutiles partes à multis habiti fuerint, quamvis eorum summa necessitas ex foemellarum castratione pateat, utpote quæ exsectis his partibus non minus steriles evadunt, quam mares exsectis testibus. Interim non est quod de nomine multum disputemus, an scilicet hæ partes in foemellis testes, an verò sint ovaria appellandæ, dummodo de re constet, nos utroque nomine indifferenter pro una eademque re utimur.

*De seminis via ad uterum variorum errores.*

Quomodo autem ova ex dicto ovario ad uterum perveniant, illud quia majoris obscuritatis, hinc etiam altioris indaginis res est. Per quas vias semen muliebre è testibus ad uterum perveniat, hoc, ante ovarum cognitionem, alii aliter descriperunt. Nonnulli, cum Galeno processus illos breves à testibus ad uteri fundum recta porrectos, putarunt esse vasa deferentia. Ex his ipsis processibus alii prope uterum peculiarem adhuc ramulum ad uteri cervicem derivari, sicque semen partim ad uteri fundum, partim ad principium cervicis deferri, & per superiorem viam in vacuis, per inferiorem verò in gravidis semen excerni tradiderunt. Riolanus ab extremitate inferna testiculi describit vasculum durum, candidum, & gracillimum, & adhuc aliud simile intra tubam uteri contentum, per quæ duo in uteri fundo simul juncta semen in uteri cavitatem effundi dicit: ex his denique adhuc gracillimum furculum ad cervicem quoque uteri deduci existimat. Sed quod priores manifestissime deceperit articularum præparantium divaricatio, Riolanum verò minimorum nervulorum illac excurrentium inspectio; & quod per priores vias nil nisi sanguis, per posteriores verò nihil semineum, sed solus invisibilis spiritus animalis transeat, hodierna accuratior Anatome passim ostendit.

Per uteri ligamenta rotunda, seu lumbricalia partem seminis in vacuis, totum verò semen in gravidis coeuntibus versus clitoridem & vaginam defluere, tradiderunt, Spigelius & Veslingius, in quorum opinionem etiam ego antehac totus descenderam, propterea quod in illis circa finem aliquando mucidi cujusdam liquoris, instar seminis, nonnihil videram (forte excrementum aliquod pituitosum, vel ex catarrho delapsa pituita fuit) sed postea ab

illa destiti, postquam observationibus aliorum admonitus, accuratior inspectione videram in illis nullam cavitatem inveniri, per quam semen transire posset.

Semen muliebre, non in cavitatem, sed in ipsius substantiæ uteri porositates injici, & virile semen, aut in uteri cavitatem non injici, aut in eam injectum, mox ut inutile, rursus foras effluere, nunquam mihi potuerunt persuadere inspectiones Harveii (hac de re postea latius agemus cap. 29.) nam tali modo semen muliebre, spermate virili foecundatum, ordine circulationis, facile per omnes corporis partes propelleretur, & sic in quibusvis calore conveniente maturari, & ad foetus formationem deduci posset.

His præmissis, jam manifestum evadit, ex antedictis opinionibus nullam verum semen, & ova muliebria, ovarumque deferentia vasa, satis bene describere, sed hanc rem longe aliter se habere: scilicet primò seminis virilis prolifici, in uterum injecti maxime spirituosam partem per tubas ab utero ad testes muliebres, & ova in iis contenta, defluere; eaque ova hoc semine foecundata è testibus excidere, & excipi ab extremitatibus earundum tubarum iis annexarum, & sic per has paulatim promoveri ad uterum.

Hæ tubæ à primo earum descriptore, *Tubæ Fallopiæ* appellatæ fuerunt, suntque vera vasa deferentia, in quibus se coram pluribus fide dignis spectatoribus, exquisitissimum semen reperisse ac demonstrasse, refert Fallopius, qui illas tubas, in observat. anat. hoc modo describit. *Meatus verò iste seminarius, inquit, gracilis & angustus admodum oritur, nervus ac candidus, à cornu ipsius uteri, cumque parum recesserit ab eo, latior sensim redditur, & capreoli modo crispas se, donec veniat prope finem: tunc dimissis capreolaribus rugis, atque valde latus redditus, finit in extremum quoddam, quod membranosum carneumque ob colorem rubrum videtur, extremumque lacerum valde & attritum est, veluti sunt pannorum attritorum fimbria: & foramen amplum habet, quod semper clausum jacet, concidentibus fimbriis illis extremis, quæ tamen si diligenter aperiantur ac dilatentur, tubæ cujusdam anea extremum orificium expriment.*

Hæ verò uteri *Tubæ*, ab incurva figura denominatæ, sunt duo corpora uteri lateribus adstantia, cava, ab uteri fundo utrimque protensa, è membranis duabus composita. *Tubæ quid sint.*

Harum interna communis est cum illa *Membrana*, quæ uterum interius investit, non tamen adeo lævis, idque magis circa earum extremitates, quam in media sui parte. Externa verò communis est cum externa uteri membra-

membrana, eaque lævis, ac prope uterum crassior existit, circa extremitates verò tenuior.

Figura.

Tubarum autem principia ab utero excurrentia paulatim magis dilatantur, notabilemque capacitatem adeptæ, sensim magis magisque incurvantur, & capreolari ductu contortæ procedunt, usque dum dimidiam circiter testium substantiam altera extremitate ambiant, circa testes primo valde dilatata, mox subito rursus coarctata, ultra coarctationem in multas fimbrias scissæ, quibus subinde hydatides & duros calculos adhærere, observavit Regn. de Graef. Quia autem post dictam dilatationem, repente coarctata, valde tenui ductu ad testes excurrunt, hinc in mulieribus primo aspectu à testibus nonnihil remotæ videntur, & solo tenuissimo quodam membranarum, alis vesperilionum similium, interventu testibus alligatæ: at in multis brutis plus minus testibus annexæ reperiuntur, imò etiam in multis testes ex dimidio amplectuntur. Atque ita tubæ à testibus, usque ad uterum, perviæ sunt secundum naturam, semel tantum eas præter naturam clausas invenit Regnerus de Graef.

Vasa.

Arteriis venisque spermaticis gaudent, nervis verò ab iisdem qui uteri fundum perreptant, donantur.

An habeant valvulas.

His tubis valvulas adscribit Whartonus, ita sitas ut nihil seminalis materiæ à testibus ad uterum profluere possit, idque se in sectione equæ observasse tradit. Alii valvulas contrario situ positas, & in utero contentorum in tubas ingressum impediendes describunt. Verum hic nullas valvulas adesse, præter inspectionem docet ratio, cum solo extremitatum coarctatio talis sit, ut hinc inde nullius rei transitum concedant, nisi in fervente libidine, à copioso arteriosi sanguinis & spirituum affluxu dilatentur, sicque spirituosam seminis masculini partem ab utero ad testes & ova penetrare, & rursus hæc ova à testibus ad uterum permeare permittant.

An cellulis sunt distinctæ.

Nonnulli in tubis varias cellulas, & diversa receptacula, à se invicem distincta, sibi imaginati sunt, atque hinc vesicularum seminariarum virorum usum iis adscripserunt: sed decepti sunt per inspectionem partium contortarum, & hinc inde dilatatarum, cum tamen in tubis inflatis, secundum longitudinem dissectis, unica duntaxat cavitas, nullis cellulis nullisque valvulis distincta, at hic illic nonnihil inæqualiter dilatata, conspiciatur.

Longitudo.

Capacitas & longitudo tubarum certo describi nequit, cum pro ætatis, Veneris usu, aliorumque multorum diversitate magna in his diversitas & mirus Naturæ lusus comperiatur.

Per tubas igitur spirituosa seminis virilis

in uterum injecti pars ad testes & ova in iis contenta, hæcque ova rursus à testibus ad uterum procedunt. Sed quo modo hæc à testibus per istas oviductus angustias ad uterum perveniant, hoc quamvis describere difficile videatur, per similitudines tamen commode explicari posse videtur.

Multi fructus horarii, cerasa, pruna, perfica, juglandes, &c. quorum semina (quæ sunt instar ovorum) ad tantam magnitudinem & aptitudinem deducta sunt ut fecundari possint, sponte dehiscunt, & sic ex iis semina ista, corticibus suis inclusa (qui cortices antea eorum substantiæ firmiter adhærebant, sed per maturitatem soluti ac liberi ab ea evaserunt) excidunt, sed quousque rorida terræ humiditate, & Solaris spirituosus caloris influxu (quæ duo ipsis sunt instar seminis maris) non irradian-  
Quomodo ova à testibus ad uterum perveniunt.  
 tur ac foventur, intra lapidosos suos calices, seu testas, occultata quiescunt: verum ubi fecundans ille terræ humiditatis, & Solaris, alteriusve caloris conveniens influxus per invisibiles calicum poros subintrans (sicut in oviparis masculini seminis spirituosam partem per invisibiles poros corticum ovorum subintrat) ea ad majorem fecunditatis maturitatem deduxit, mox sponte in suis juncturis emollescunt calices, sicque testæ, quamvis durissimæ, dehiscunt, & inclusa semina mollia, magisque succulenta evadunt, ac sese dilatantia testas egrediuntur, atque ita gemmam, primum efformandi delineamentum, projiciunt. Eodem modo etiam res procedit in fabis, pis, tritico, hordeo, feminibus melonum, cucumerum, aliorumque quorumcunque sola membranula (loco testæ) obvelatis. Ita quoque ova muliebria, omniumque viviparorum, atque etiam avium, in suo ovario (quod sunt testes in mulieribus) paulatim à nutrimento ipsis, per minimas arteriolas & invisibiles nervulos, allato, justam magnitudinem, talemque aptitudinem consequuntur, ut à spirituosa seminis masculini influentis parte fecundari possint: quam fecundationem si per coitum consecuta, & sic fecunditatis sigillo donata fuerint (in avibus etiam à masculo non fecundata frequenter elabuntur & deponuntur, ut liquet in gallinis gallo destitutis) mollescunt ac sese dilatant & laxant, quibus in ovario includuntur, capsulæ (instar pruni, pisi, alteriusve fructus semen germinaturum deposituri, capsulæ emollitæ sponte aperiuntur) atque sic, cum à capsulis ovarii, quibus conclusa latent, præ magnitudinis incremento & capsularum laxatione, amplius concludi seu contineri nequeant, sponte ex iis excidunt in oviductus seu tubas, quæ per augmentum caloris & spirituum, in Venereo congressu magna copia affluunt, ita laxantur, ut ovis  
 R 3 maturis

maturis facilem transitum ad uterum concedant, quæ per illas molli abdominis pressione, per inspirationem & expirationem facta, clementer promoventur usque in uterum (eodem modo sicut per eandem pressionem chylum per vasa lactea, & lympham per lymphatica promoveri, supra docuimus, *cap. 11. 12. 13.*) in quo ob orificii uteri coarctationem sistuntur ac detinentur, ut ab ejus miti calore humidoque conveniente foveantur, & sic vivificus in iis latens spiritus, cum semine masculino infusus, è compedibus suis extricetur, & de potentia in actum procedens, efformandi fœtus delineationem incipiat: de quo formationis processu plura & latius scribimus *sequentibus cap. 28. & 29.*

*Difficultas  
de mulie-  
rum ovis  
subventaneis.*

Hic jam singularis & gravis difficultas occurrit, scilicet, cum aves etiam sine masculi congressu ova sua matura (quæ subventanea appellantur, & infœcunda sunt) deponant, an non etiam maturæ virgines & mulieres, viris destitutæ ac sine coitu viventes, nonnunquam ova sua deponant, sive exonerent? Verosimile videtur hoc in frigidioribus, & ad Venerem non proclivibus vix contingere, cum in iis tantus calidi sanguinis & spirituum affluxus (qui alioqui per intentas Venereas cogitationes fortiter promoveri solet) ad partes genitales non fiat, ut ovarii capsulæ, & simul tubæ satis laxari possint ad ovorum exclusionem, seu propulsionem & transitum. Sed in fervidis illis ac prurientibus, ad Venerem maxime proclivibus, & Venereis cogitationibus continuè intentis, à copioso ad genitalia sanguinis spirituumque affluxu, ita nonnunquam laxari dictas partes, ut matura ova ex ovario sponte in tubas prolabantur, per easque ad uterum deferantur, sed in eo tamen non diu detineantur, propter uteri orificium apertum, utpote quod non exactè clauditur, nisi cum vel semen virile ad conceptionem comprehendit, vel fœtum continet. Quod autem antehac ista ova muliebria subventanea à nemine observata fuerint, hinc evenisse puto, quod mulieres ex utero elabentia non inspiciant, aut qualia sint cognoscant, nec à viris ea inspicere permittant, inter quæ si forte aliquod ovum adestet, ab ipsis minimè nosceretur: præterea illud propter tenellam, qua circumdatur, pelliculam, vel disruptum excideret, vel inter illa lintea, quibus uterinas sordes excipere solent, mox disrumperetur, & sic nullam ovi figuram visui offerret. Interim hæc speculatio sæpe mihi memoriam refricavit, quod ante multos annos fœmina quædam haud infimæ sortis, cujus filia viginti quatuor annorum, satis salax, etsi tamen honesta, vehementibus suffocationibus uterinis sæpe afficiebatur, mihi aliquoties narravit, scilicet, quod

meis filiæ præscriptis medicamentis nihil proficientibus, ipsam à præsentē malo & impendente mortis periculo multoties citò liberasset obstetrix, per immisionem digiti in uteri vaginam, & sic fricationem illic factam, qua mox è vulva viscidus aliquis liquor proliciebatur, cui sæpe clara aliqua bullula aderat, & sic à lypothymia ad se redibat ægra. Hoc ego tunc temporis, quod de ovis muliebribus, ne per somnium quidem, quisquam cogitaverat, flocci feci, sed postea mihi in mentem induxit, illam bullam, sine dubio, ovum subventaneum fuisse, qua de re nunc ovi conscius melius judicare possem, si talis bulla rursus conspicienda occurreret. Præterea maxime verosimile est talia subventanea ova etiam frequenter deponi ab illis mulieribus salacibus, quæ cum viro coeuntes, ob aliquam seminis ejus intemperiem, non concipiunt: nam quare illis per coitum ova minus ex ovario ad uterum deferrentur, quam aliis concipientibus? præcipue cum illæ ipsæ etiam ova ad fœcunditatem apta habeant, si modo fœcundo semine virili irrorentur; ut ex eo liquet, quod nonnullæ cum maritis coeuntes steriles existant, at cum aliis viris coeuntes fœcundæ sint, & concipiant.

Hanc de ovis subventaneis suspicionem adhuc magis confirmat historia mirabilis à Bartholino descripta *cent. 1. observat. 4.* de fœmina Norwegia, quæ post undecimum convenientem partum, tandem anno 1639. partu duodecimo, cum maximis doloribus enixa est duo ova, gallinarum ovis similia, nisi quod crusta non esset adeo candida. Quale ovum etiam in agro Vincentino, anno 1621., fœminam quandam, obortis doloribus parturienti consuetis, enixam fuisse, refert Jo. Rodius, *cent. 3. observ. 57.* Procul dubio, semen muliebre his ovis contentum, vel planè infœcundum fuit per se, vel, quod magis verosimile) ob insolitam exterioris membranæ crassitiem ac densitatem (ob quam in utero postmodum in firmam crustam obduruit) seminis virilis germen per nimis constrictos poros interiora istorum ovorum subire, sicque semini muliebri intus latenti admisceri, atque in eo ex sese aliquem embryonem formare non potuit, quam ob causam ista ova infœcunda remanserunt, instar ovorum subventaneorum avium sine masculis viventium. Tria autem in dictarum fœminarum ovis maxime mirabilia notanda veniunt. 1. Quod parva (ut semper solent) è tubis in uterum delapsa, illic tanto tempore subsisterint. 2. Quod in utero ad magnitudinem ovorum gallinæ excreverint. 3. Quod adeo obduruerit exterior membrana, ut in duram crustam evaserit, instar crustæ ovorum avium, quod certe plane inauditum est, nec

nec ab ullis aliis Medicis observatum fuisse, haecenus ullibi legimus.

*Causa laxationis tubarum.*

Verum, ante diximus, per spirituum animalium, & calidi sanguinis copiosorem influxum in coitu oviductus seu tubas ita laxari, ut per eas seminis masculini spirituosae pars facile ad ovaria & ova penetrare, atque etiam ipsa ova matura è testibus facile in eas prolabi, ab iisque excipi, & sic ad uterum promoveri possint. Hanc veram huius laxationis causam esse, nemini mirum videbitur, qui expertus fuerit quam stricta sint mulierum honestarum genitalia (de meretricibus loqui nolum, quibus multo nimioque Veneris usu, vel potius abusu, adeo attritæ & laxæ evaserunt partes genitales, ut amplius contrahi seu corrugari nequeant) si ille affluxus non contingat, cum scilicet absque ulla libidine coeunt, ita ut virilem penem cum aliqua molestia suscipiant: & rursus quam laxa sint, quamque facile, & quanta cum voluptate penem suscipiant, cum mulieres coeunt cum insigni libidine, in qua affluxus ille liberaliter contingit. Qui insuper consideraverit, quantum idem ille affluxus laxet uteri orificium & vaginam, cum magnus & maturus foetus, per angustas illas vias transiturus, sua calcitatione molestiam iis partibus infert. Dilatant quippe sese omnes illæ partes, priores ut ova matura, posteriores ut foetum maturum transmittant & excludant, idque non arte, aut cognitione aliqua præditæ, sed, ut modo dictum, laxatæ ac emollitæ à copiosiore affluxu sanguinis & spirituum animalium, tunc temporis per mentis determinationem, versus illas partes magis, quam aliis temporibus, affluentium: quo illapsu copioso rursus cessante, omnes illæ partes, tam enormiter laxatæ, intra paucos dies ad pristinam constitutionem & angustiam sponte redeunt.

*Fœtus in tubis concepti & formati.*

Ex prædictis igitur abunde liquet, ova è mulierum testibus seu ovaris per tubas ad uterum deferri. Hoc ipsum adhuc magis testatum faciunt observationes quorundam Medicorum fide dignorum, à quibus in cadaverum mulierum gravidarum sectionibus compertum est, ex istis ovibus, ob præternaturalem aliquam causam in tubis retentis, easque usque ad uterum non transeuntibus, foetus in ipsis tubis formatos, in iisque post mortem dissectis inventos fuisse (quæ historiarum, etsi nobis quondam mera anilia somnia esse visa fuerint, nunc tamen, per ovorum & tubarum meliorem cognitionem, eas veras esse credimus) quarum aliqua exempla ex Riolano, & Benedicto Vassalio, adducit Regn. de Graef, *lib. de mulier. organ. cap. 14.*

*Observatio Ruyschii.*

Præter illas observationes, totum hoc negotium per autopsiam clarissime innotuit, & 15 Aprilis, 1673. Amsterodami publice

in theatro demonstratum est ab oculatissimo Frederico Ruysch, Med. Doct. & Chirurgiæ atque Anatomies Professore celeberrimo, in muliere, quæ brevi postquam concepisset, repentino aliquo casu interierat: in qua quomodo has partes constitutas invenerit, postmodum, delineatam earum tabulam transmittens, per literas nobis communicavit, in quibus, inter alia, sic de iis scribit. *Non solum tuba dextri, verum etiam sinistri lateris, solito rubicundiores, crassiores, & magis distenta erant, usque ad omnium spectantium admirationem. Dextri lateris tuba versus ovarii aperturam intorta erat. Uterum, nulla præmissa præparatione, prosecutus, in præsentia spectatissima medentium corona. Hic observavimus uterum solito crassiorem, rubicundiorum, & fungosiorum, cavitatemque ejus liquore lymphido repletam, cui innatabat fœtus rudimentum, substantia mucilaginosa: quod rudimentum sequenti die ita resolutum est ab aëre, ut ejus ne vestigium quidem sit relictum. In illo fœtus rudimento nullam humani corporis figuram videre potui, quod necum testantur omnes spectatores, quorum curiosioribus, peracta demonstratione, loco solitario videndi copiam ex voto feci. Itaque an illud rudimentum embryo, an verò adhuc ovum fecundatum sit dicendum, anceps hæreo. Observatu quoque dignum est, ovarii fecundati cavitatem, aut aperturam, è qua ovum exciderat, haud solum fuisse coloris intense rubicundi, verum etiam spongiosam, sicut in utero, fœtu jam jam in lucem edito, semper videre est: adeo ut mihi videatur ovum in ovario fere soveri, quemadmodum fœtus in utero. Præterea, satè mirari non possum (quod in aliis subjectis gravidis semper reperio) cur amba vena spermatica, arteriarum respectu, adeo fuerint ampla. Si arteria venas capacitatem superarent, mirum non esset, multo enim alimento indiget fœtus; jam verò non capio; præsertim cum viderim sanguinem illum venosum, in illis venis contentum, non fuisse solito crassiorem: Clarissimi Viri sententiam super hac re, data occasione, libenter audirem. Uteri orificium interius non arctè clausum reperi, uti volunt auctores, sed plus solito hians, quemadmodum ex transmissa figura videre est, &c.*

Ex hac demonstratione clarissime videre liquet, non solum quomodo substantia ovarii, ovum deposituri, fungosa & patula evadat; verum etiam quomodo tubæ Fallopiæ, ovum ab ovario ad uterum deferrentes, eo tempore crassiores & patentiores fiant. Quare autem venæ spermaticæ per uterum decurrentes, amplitudine sua arterias multum superent, hoc miratur doctissimus Ruyschius, ejusque causam à nobis scire desiderat, quam in remisso responso ei transcripsimus, eandem scilicet quam damus sequente cap. 27. Porro, quod interius uteri

uteri orificium non arcte clausum, sed plus solito hians repererit, atque in tabula sic delineaverit, hoc est præter meam & aliorum Anatomicorum communem observationem: & fortè ea de causa contigit, quod propter repentinæ mortis insultum, orificium illud (hoc propter ovum brevi antea in uterum prolapsum, fortassis vix adhuc satis exacte occlusum fuerat) ob spirituum repentinam inordinatamque commotionem, mox relaxatum fuerit, sicque patens evaserit.

*Tria in ovo  
consideranda.*

In ovo muliebri (de brutorum ovis non dico, quia eadem fere res est) imprimis tria consideranda veniunt. 1. Pelliculæ ejus externæ, quæ post conceptionem chorion & amnium constituunt, de quibus agemus. *cap. 31.* 2. Humores seu liquores copiosi in istis pelliculis contenti, de quibus paulo ante aliquid diximus, & plura dicuntur *citato capite.* 3. Exigua crystallina bulla, in solo fœcundo ovo crym in utero concepto apparens, de qua dicitur. *cap. 29.*

*Unde voluptas in coitu.*

Post hanc ovorum historiam adhuc unum dubium restat, scilicet, si ova per tubas in uterum deferantur, & nihil aliud seminis ex testibus effluat, unde tunc procedat illa voluptas, quæ in coitu fœminis gravidis contingit, in quibus tamen eo tempore nulla ova de novo ad uterum feruntur, propter tubarum extremitates tunc exactissime clausas? item in quinquagenariis, quibus nulla amplius ova in ovaris succrescunt aut continentur? ut & in iis quibus uterus per morbum, scilicet uteri prolapsum, exsecutus est, atque hinc nulla ova eorum deferri possunt? Præterea, unde procedat illud semen, quod mulieribus in coitu cum summa voluptate in vaginam influit, & per pollutionem, in nocturnis de Venere insomniis interdum foras erumpit? Respondendum, in coitu magnam illam voluptatem, non tam oriri ab ovis ex ovario ad uterum transeuntibus, quam potius ex eruptione illius seminis (si semen appellandum sit) quod prodit ex glandulosa substantia cervicem vesicæ cingente (huic prostaticarum usum hodie nonnulli adscribunt) quam latius describemus *sequente cap. 26.* quod semen æque in gravidis, atque in maturis non gravidis, ut & in iis quibus uterus excisus est, nec non per Venerea insomnia potest summa cum voluptate erumpere in vaginam uterinam. Præterea sciendum, in coitu mulieribus non tantum à dicta feminali materia in vaginam erumpente, sed magnam quoque voluptatis partem procedere ex fricatione clitoridis, sicuti viris contingit ex frictione glandis penis.

*An mulieres castrari possint.*

Verum quia de testibus muliebribus jam satis dictum, inquirendum superest, an

sicuti viri castrantur, ita etiam mulieribus testes exsecari, eæque sic castrari possint? Respondeo, mulieres sine maximo vitæ periculo castrari non posse: nam utrimque ipsis ilia secanda forent, quod periculo non vacat, cum ex quolibet abdominis, & præcipue illi, vulnere in cavitatem abdominis penetrante, mox intestina foras prorumpant: quæ vulnera hic mediocrem magnitudinem habere deberent, ut digiti inferi, & intestina removeri, atque sic testes commode inveniri, & educi possent. Præterea exsectione testis etiam refecantur vasa spermatica, quorum hæmorrhagiam in interiore ventre sistere difficillimum foret, ut ex eo liquet, quod satis difficulter sistatur in viris, quorum tamen vasa in testis ablatione commode ligari, vel actuali cauterio, urgente necessitate, inuri possunt. Quamvis enim, teste Galeno, *lib. 1. de sem. cap. 18.* in Asia & Cappadocia suis testes abstrahantur, & illud ipsum etiam apud Germanos & Westphalos in usu esse soleat; quamvis etiam canes fœmellæ eodem modo nonnunquam castrantur, tamen id pari securitate in mulieribus tentari non potest, non enim tantis periculis homines exponendi sunt, quantis bruta animalia exponere licet; quorum multæ fœmellæ in ista castratione moriuntur; ac proinde miror, quod Felix Platerus, vir magni iudicii, *observat. lib. 1.* putat ad exemplum castrationis brutorum, etiam mulieres castrari posse, non considerans operationis difficultatem ac crudelitatem, mille periculis conjunctam, quæ à tanto actu, vel potius à tanto scelere aut facinore quoslibet homines, præcipue Christianos, abstinere & abhorreere jubent. Id tamen olim satis turpiter ac crudeliter in mulieribus tentatum fuisse, testantur historiarum monumenta. Creophagi (gens ita appellata) in Arabia, teste Alexandro ab Alexandro, non viris solum, verum etiam mulieribus testes excindebant, ad exemplum Ægyptiorum, qui mulieres eodem modo castrare solebant. Athenæus, *lib. 2. deipnosoph.* refert Xanthum memoriæ prædixisse, quod Adramytes, Lybiorum Rex, fœminas castraret, quibus eunuchorum loco utebatur. Hesichius & Suidas ejusdem sceleris etiam accusant Gygem.

Alterius castrationis meminit Wierus, cum scilicet mulieri uterus extrahitur & excinditur, eaque sic ad conceptionem inepta redditur, quod cuidam pecudum castratori feliciter successisse refert, qui filiam suam, adulterii suspectam, utero violenter extracto, more pecudum castravit, ut deinceps ad procreationem inepta foret. Verum ex hac castratione non multo minus periculi impendet, quam ex priore.

CAPUT



## CAPUT XXV.

## De Utero, ejusque motu.



Explicatis partibus inservientibus ovarum seu seminis mulieris confectioni & excretioni, jam ad illas deveniendum, in quibus conceptio peragitur, scilicet, ad uterum & ejus partes, quarum descriptionem hoc & sequente capite instituemus.

**Uterus.** Uterus, ab utris figura denominatus, qui etiam **Matrix**, & **Vulva** dicitur (Græci eum *μήτρα*, & *μήτρα*, atque etiam *μήτρα* appellant, unde procedit phrasia, *ἐν μήτρῃ ἔχειν*, in utero habere, id est, gravidam esse) organica pars est generationi inserviens, sita in medio hypogastrio (nonnunquam in gravidis, propter foetus pondus nonnihil versus dextrum sinistramve latus deflectit) inter vesicam & intestinum rectum, in robusta pelvi ex ossibus ilii, coxendis, pubis, & sacro formata; cujus pelvis in mulieribus major, quam in viris, amplitudo existit: & instante urgenteque partu, validis ligamentis circa os sacrum & pubis utcumque laxatis, ac retrocedente osse coccygis, ulterius laxari potest, ut ex angustis uterini carceris foetus eluctetur.

**Substantia.** Substantia ejus albicans, nervea, densa, & compacta in virginibus, at in gravidis nonnihil spongiosa & mollis existit.

**Membranae.** Membranas obtinet duas. Exteriorem duplicatam, validam, à peritonæo, lævem, aqueoque humore oblitam, qua mediante intestino recto, vesicæ, & vicinis laterilibus partibus adnectitur: interiorem propriam, fibrosam, magisque porosam, ab interna uteri substantia oriundam, eique firmissime annexam, in majore cavitate glabram, circa collum verò rugosam, multisque porulis perviam.

Inter has membranas carnosus & fibrosus contextus quidam reperitur, qui in mulieribus gravidis ab affluentium humorum nutritiorum ubertate admodum, una cum dictis membranis, increfcit, ita ut quo magis augetur & increfcit foetus, eo carnosior, fibrosior, & crassior evadat uterus, qui postremis gestationis mensibus pollicis, & nonnunquam circiter duorum digitorum crassitiem adæquat. Hæc crassities non est ex solis humoribus in porositates uteri se insinuantibus, ut multi existimant, sed est vera & satis densa caro, quæ postea, muscutorum adinstar, inservit ad foetus expulsionem: qualem carnosam uteri substantiam anno 1653. mense Novembri in theatro nostro anatomico publice demon-

stravi, in cadavere puerperæ; duodecim horis post partum mortuæ: & non ita dudum privatim in alia muliere in partu, una cum foetu, extincta. Hoc tamen carnosum incrementum post partum, humoribus & sanguine, maxima copia foras effluentibus, denuo emaciatur & exarescit, atque sic ad pristinam formam & magnitudinem uterus redit ac contrahitur.

Magnitudo uteri parva est, eaque pro ætatis mutatione & Veneris usu aliquantum diversa. In virginibus circiter duorum digitorum transversorum latitudinem, at vix trium longitudinem unquam habet: quæ magnitudo aliquantum extenditur in iis, quæ viro utuntur, & major etiam solet esse in fœcundis; quæ sæpius uterum gestarunt. In quantam magnitudinem increfcit in gravidis, cuilibet notum est.

Ejus magnitudinem, pro ætatem diversitate, per pondus distinguit Regnerus de Graef, *lib. de mulier. organ. cap. 8. In recens natis*, inquit, *notavimus uterum aliquando drachmam, aliquando drachmam unam & semis pependisse. In vetulis verò & virginibus jam pubescentibus, ejusdem magnitudinis est, & ut plurimum ab uncia una ad sesqui unciam ponderat. Denique in validioribus, & iis quæ sæpius pepererunt, aut frequenter Veneri indulgent, major evadit, rarius tamen duas uncias excedit.* Admodum monstrosus fuit morbosus ille uterus, cujus historiam idem Regn. de Graef, *ad finem ejusdem capituli*, annectit; qui totam abdominis cavitatem occupabat, & ad minimum quadraginta libras pendeat.

Figura pyrum, vel potius cucurbitulam chirurgorum representat, in virginibus ante & retro aliquantum depressam, in iis verò quæ pepererunt, magis rotundam.

Cavitatem obtinet exiguam, quæ in non gravidis, præcipue virginibus, vix fabam majusculam capit, & facta conceptione una cum foetu ac toto utero increfcit & dilatur. Hæc nullis cellulis, ut in plerisque brutis animantibus viviparis, distinguitur, sed sola futura, seu potius linea quadam per longitudinem exporrecta, & in interiore tantum parte carnosæ tunicæ designata, in dextram sinistramque partem dirimitur; qualis linea etiam in viri scroto extrinsecus conspicitur. Ita tamen cavitas illa se habet, ut non sit æqualis & omnino rotunda, sed versus dextrum sinistramque latus. Quasi in cornu extensa, versus osculum paulo longior existens, ita ut fere triangularis sit. Rarissimum est hanc cavitatem septo medio dividi,



dividi, cujus tamen divisionis duo exempla scribit Riolanus, *lib. 2. anthropog. cap. 31.* In hac cavitate plerumque subviscidus seu unctuosus quidam liquor subsistit in vacuis, secretum illud Naturæ scrinium ab ariditate defendens, & ad necessariam fœcunditatem paratum servans.

*Cornua.*

Quæ partes à fundi lateribus aliquantum protuberare videntur, **Cornua uteri** appellantur. Hæc tamen manifestiora sunt in brutis viviparis, in quibus uterus bipartitus in duo manifesta longaque cornua, intus cellulis distincta, dividitur. Rarissimum autem est in mulieribus talia cornua inveniri, qualia tamen in puella quadam invenit Sylvius, & cujus exemplum ex Bauhino annotavit Schenckius, *observat. lib. 4.* Riolanus, *animadvers. in Laurent.* non protuberantes uteri summitates, sed tubas mavult cornua appellare, qua in parte cum eo consentire videntur Jo. van Horne, & Swamerdammius. Verum quod de cornibus vulgo traditur, ego non de ipso utero, sed potius de interiore uteri cavitate intelligendum puto: nam uterus mulieris non cornutus, sed vere rotundus & non-nihil depressus est; verum ejus cavitas, ut modo dictum, dextrorsum ac sinistrorsum, quasi cornutum, extenditur, ut ex ejus sectione manifeste liquet.

*Connexio.*

Vicinis partibus alligatur collo & fundo. Collum, seu cervix, mediante peritonæo, antèrui vesicæ urinariæ & pubis ossibus, posterius intestino recto & ossi sacro connectitur, ac circa pudendum cum ano coalescit, à lateribus peritonæo laxè cohærens. Fundus sua substantia superius nulli parti annectitur, ut liberior ejus sit extensio. A lateribus verò duobus ligamentorum paribus suspensus tenetur. Horum *Primum*, quod superius, figurâ alas vespertilionum referens, est validum, latum, membranofum, laxum, molle, & fibris carneis intertextum (hinc unamquamque lateris partem singulos musculos esse putant Vesalius & Archangelus) à peritonæo illic duplicato proficiscitur, & tubis, testibus, fundique protuberantiis attensum, matricem ossibus illi alligat, eoque immodice laxato, vel externâ violentiâ disrupto, uterus in sinum descendit, & interdum foras prolabitur, si modò ipsa uteri substantia aliquibus de causis etiam laxa evaserit, quæ etsi in statu sanitatis densa & compacta sit, nonnunquam tamen in statu morbofo laxatur, ut scrotum virile.

*Uteri prolapsus.*

Soranus & Aretæus dicunt, non totum uterum, sed duntaxat ejus tunicam internam carnosam, cum primaria uteri substantia, ad inguina delabi, tunica exteriorè membranosa, quæ partibus vicinis firmiter alligatur, intus remanente. Sed quia hæc opinio mirabilem corporis uteri in duas

partes, exteriorem scilicet & interiorem, divisionem seu dilacerationem præsupponit, quæ omnino impossibilis est, pro certissimo statuendum, in prolapsu non posse solam interiorem carnosam uteri membranam descendere, sed necessario totum uteri corpus inversum prolabi.

Hanc uteri procidentiam, ab omnibus Medicis hætenus decantatam, nunc strenuè negat Theodorus Kerckringius, anatomicus insignis, & super ea re, *observat. anat. 20.* phalerato sarcasmo nimis falsè invehitur in Andream Laurentium, Veslingium, & Bartholinum, quasi illi inter alios hac de re admodum male judicassent, dicitque laxitatem quandam colli, quæ extra pudendum prominet, hæc ludibria facere. Verum respiscat, quæso, doctissimus Vir, & palinodiam canat, nam quia nunquam vidit uterum prolapsum, satis temere & nimis petulanter irridet alios istius rei oculos testes, ac præstantissimos Medicos, illo ipso, cum in praxi, tum in theoria longè versatiores & peritiores. Legat, si placet, apud Carpum, historiam mulieris cui uterus non tantum foras prolapsus, verum etiam exsectus est. Legat apud Paræum, *lib. 23. cap. 41.* exemplum uteri prolapsi, & ab ipso Paræo excissi, & post mulieris mortem in abdomine non inventi. Legat item Hildani, *cent. 4. observ. 60. 61. 62.* ubi à viro fide dignissimo, tria illius prolapsus exempla inveniet descripta. Legat Dominici de Marchettis, *anat. cap. 7.* ubi testatur se ter uterum prolapsum vidisse, reposuisse, & curasse. Legat plura similia exempla, apud Avenzoarem, *lib. 2. tract. 5. cap. 2.* Mattheum de Gradibus, *comm. ad lib. 6. Rasis*, Nicolaum Florentinum, *serm. 6. cap. 3.* Benivenium, *de abdit. cap. 11.* Christophorum à Vega, *comm. ad 8. aphor. 18. & lib. 3. cap. 10. art. medic.* Paulum Æginetam, Mercurialem, Bottonum, Licetum, Sennertum, aliosque. Quibus certe viris, multisque aliis, qui illud ipsum testati sunt, non fuerunt cucurbitina capita, nec oculi tanto glaucomate obfuscati, ut uterum prolapsum non cognoscerent. His denique addat meum testimonium, qui ante aliquot annos ipsemet vidi in concubina Satrapæ Leerdammensis uterum ad duorum digitorum transversorum latitudinem è sinu propendere, quem ego ipsemet (quia nullos chirurgos admittere volebat) manibus tractavi, & conveniente instrumento versus interiora in suum locum retrufi, & ægram porrò ita persanavi, ut postmodum illa pars nunquam amplius prociderit. Quæ antedicta testatiora fiunt per doctrinam magni Hippocratis, qui, *lib. 2. de morb. mulier.* aliisque variis locis apertissime docet, uterum nonnunquam foras prolabi, & simul istius prolapsus causas

*An uterus prolabi possit.*

causas ac curationem adjungit: cum quo etiam consentit Galenus. Experientiam hujus rei etiam confirmat ratio: nam si copiosus frigidorum humorum affluxus coxendicis articulum (qui alioqui valde firmus est) ita laxare possit, ut ossis femoris caput ex acetabulo suo excidat, quid mirum quod talium humorum affluxus etiam adeo possit laxare ipsum uterum ejusque ligamenta, ut uterus ab his sustineri nequeat, sed foras prolabatur? hinc videmus illud in locis humidis nonnunquam contingere, præcipue talibus mulieribus, quibus est frigidum humidumque temperamentum, & pituitosorum humorum redundantia, in quibus modò uterus in vulvæ orificium descendit, modò totus foras provolvitur. Quantum ad illud, quod dicit Kerckringius, non esse ipsum uterum, sed laxitatem quandam colli seu vaginæ, foris pendulam, quæ hæc ludibria facit: rogo mihi dicat, an utero in sua sede permanente, vagina tantopere deorsum versus extendi possit ut extra pudendum propendeat? & imposturum, quæso, iis in rebus, quas ipsemet nunquam vidit, oculatis testibus fidem adhibeat.

An uterus  
in prolapsu  
invertatur.

Hic jam quæritur, an uterus in isto prolapsu invertatur? Eum necessario inverti, & nullo alio modo foras exire posse, docet ratio. Hoc tamen Regnero de Graef prorsus impossibile videtur in virginibus, propter orificii uterini summam angustiam, sed possibile duntaxat in puerperis, cum secundina firmiter adhærens ab imperita obstetrice fortius attrahitur. Verum ego quoque prolapsu rarissime in virginibus contingere arbitror: sed tamen illum in aliis mulieribus, etiam extra puerperium, contingere, ego ipsemet aliquoties vidi, cujus rei aliqua exempla honestarum fœminarum, hodie adhuc viventium, adducere possem, nisi illarum reverentia & verecundia id prohiberet: unum illud de concubina Satrapæ Leerdammensis, ante relatum, hic jam sufficiet, in qua uterus omnino inversus foras propendebat.

Ligamenta  
lumbricalia.

Alterum ligamentorum par inferius, teres instar lumbricorum, subrubens, instar muscutorum (hinc illud cremaster musculo obvolvi, putat Riolanus, imò Vesalius illud uteri musculos appellat) à lateribus fundi utrimque prodit, sicque ad inguina descendit, per peritonæi productionem duplicatam (hac ruptâ aut dilatâ fit hernia inguinalis) tendinesque muscutorum obliquorum abdominis transiens, statim extra abdomen fibris carnis, ab osse ilio prodeuntibus, firmatur, & supra ossa pubis reflexum, clitoridem accedit, ibique terminatur. Tradunt tamen nonnulli Anatomici, reliquam hujus paris portionem ulterius in adiposam internam femoris membra-

nam expandi, cum eaque usque ad genu, vel, secundum nonnullos, usque ad pedem descendere, cujus consensu putat Riolanus mulieres primis ingravidationis mensibus de femorum interiorum doloribus conqueri. Sed decepit eos, quod non observaverint dictam membranam ad genu extensam non procedere à lumbricali ligamento, nec ullam cum eo communionem habere, sed illam manifeste ab ossium pubis ligamento cartilagineo oriri.

Hæc ligamenta uteri fundum partibus anterioribus & inferioribus laxè devinciunt. Bauhinus laxos in iis poros, & nonnunquam inferiore parte humorem aliquem mucidum animadvertens, judicavit illa duobus usibus inservire, scilicet, partim ligamentorum munere fungi; partim per suos poros genitalium partium superfluos humores excernere. Spigelius eundem mucidum humorem videns, judicavit illum esse semen, quod in mulieribus aliqua sui parte per hæc ligamenta (quæ putat esse vera vasa deferentia) deferretur ad vaginam uterinam & clitoridem. Post Spigelium ante hac, etiam me idem ille mucidus humor in eandem Spigelii opinionem deduxit, à qua postmodum destiti, ob rationes præcedente capite dictas. Veslingius putavit, præter semen, etiam quamcunque saburram circa uterum collectam per hæc ligamenta evacuari: quod tamen penitus impossibile, cum nullam sufficientem cavitatem habeant, per quam semen & talem saburram transmittere possent, quæ duo etiam nusquam in aliis quibuscunque viis misceri, & simul profluere verosimile est, cum semen sic necessario ab illa saburra contaminaretur & corrumpetur. Admodum male etiam scribit Andreas Laurentius, hæc rotunda ligamenta nonnunquam ita dilatari, ut bubonocelam pariant: cum tamen nusquam aperiri possint ad recipiendum intestinum vel omentum, nec ita dilatari ut illud admittere queant: sed generatur mulieribus bubonocèle, sicut viris, scilicet cum intestinum vel omentum prolabitur in dilatam vel ruptam productionem peritonæi, his ligamentis circumtextam, eaque extra abdomen usque ad inguina concomitantem & amplectentem, sicut in viris vasa spermatica in se includit.

Arterias & venas habet uterus plurimas, *Vasa.* longeque copiosiores & majores, magisque tortuosas quam vagina: illas tamen numerosiores, quam has, nam valde paucæ sunt venæ respectu arteriarum, eæque per exteriora uteri maximè dispersæ, unde Aristoteles, lib. 3. *hystor. anim. cap. 4.* dicit, *de majore vena nulla deducitur ad uteros, de aorta magna & frequentes.* His tamen verbis Philosophus non negat aliquas venas

per uteri superficiem excurrere, cum hoc quilibet oculus videat, sed vult illas venas, vel paucas, vel nullas subire intimam ejus substantiam, plurimas autem arterias hoc facere.

*Arteria.* Arteriae, quae superiorem ejus regionem perreptant, à vasis feminalibus, antequam constituunt præparantia, descendunt: quæ verò mediam & inferiorem, ut & cervicem perreptant, ab arteriæ magnæ cruralibus, & ab hypogastricis suppeditantur. Harum artieriarum tanta est conjunctio, ut difficulter, propter earum fines in ramos harum illarumque hiantes, à se invicem distingui queant; cum inflatis spermaticis aut hypogastricis, mox alterius lateris arteriæ ut plurimum simul, imò etiam eodem momento vaginæ arteriæ intumescant.

*Vena.* Venæ superiores ad cavam ascendunt, in eamque prope emulgentes se exonerant: inferiores verò ingrediuntur hypogastricas.

*Vasorum mistio.* Hæ arteriæ superiores cum venis inferioribus, & inferiores cum superioribus per varias anastomoses coire vulgo traduntur. Verum ego istas anastomoses hætenus animadvertere non potui, sed hoc solummodo notavi, venulas ex uteri substantia emergentes inter sese misceri, & in se mutuo aperiri, verum nullas cum arteriis per anastomoses conjungi, sicque etiam arterias hic illic anastomosibus inter se coire.

Subeunt enim arteriæ finibus seu ostiis suis uteri substantiam, in quam sanguinem effundunt, qui in ea quaquaversum distribuitur per anfractuosos canales & tubulos: hos nonnulli acetabula & cotyledones esse putarunt, quibus in conceptione hepar uterinum adhæret, in quod tunc temporis hiant, eique sanguinem pro nutritione foetus præparandum infundunt, atque ipsi etiam fungosæ uteri substantiæ, inter utramque membranam sitæ, sanguinem alimentarem copiosorem conferunt, à quo uterus eo tempore in majorem magnitudinem excrescit, atque sic dum crescit foetus, simul increfcit ejus domicilium uterus. Hunc in finem tunc temporis vasa admodum magna & turgida conspiciuntur (de horum vasorum enormi magnitudine, vide *cap. 27. circa finem*) à copia sanguinis quam tunc majorem continent, quam extra imprægnationem, cujus rei causa videatur loco jam citato. Extra imprægnationem verò qui singulis mensibus redundat sanguis, statis periodis, cum fermentatione seu effervescencia quadam, copiosus per arterias ad uterum propellitur, cumque in ejus substantia interiore admodum paucæ sint venæ, per quas tantæ copię circulatio commode fieri possit, & orificia modò dictorum tubulorum sint laxa & mollia, hinc fit quod redundans sanguis, qui ob copiam

fatis citò circulari nequit, per dehiscencia & aperta tubulorum orificia, nec non per fines vasorum in collo uteri desinentium, ut supervacuus, & naturæ sua copia molestus, foras effluat. In quibus verò dicti tubuli firmitus occlusi sunt (ut cum in gravidis angustantur ab adhærente placenta uterina, in quam non nisi minimis osculis hiant; aut cum post secundinam violenter cum hepate uterino avulsam obducuntur cicatrice; aut alia quacunque de causa obstruuntur) in illis menstrua solummodo profluunt per fines vasorum in uteri collo seu vagina desinentium, vel plane subsistunt, imprimis si etiam fermentifica illa qualitas ad tantam perfectionem nondum devenit, ut talem effervescencia in sanguine suscitare possit.

Verum quid sit, & quonam loco generetur illud uterinum fermentum, quod statim menstruis periodis istam sanguinis effervescencia inducit in mulieribus vacuis, at non, aut rarissime in gravidis, hætenus parum inquisitum est. Nos, licet propter rei obscuritatem hac in parte judicium nostrum adhuc pro tempore suspendamus, tamen quibuscumque considerandum relinquimus, an non fermentacea materia in liene, hepate, pancreate, glandulis, aliisque partibus genita, & cum sanguine per arterias ad uterum delata, atque ibi aliqua sui parte deposita & paulatim coacervata (semper enim in dissectis vacuarum uteris viscosum & mucosum quendam humorem invenimus) à specifica quadam uteri proprietate peculiarem quandam qualitatem nanciscatur (sicut eadem in ventriculo aliam quandam peculiarem qualitatem adipiscitur, qua chylus ex alimentis educitur) quæ (humore isto, cui ut subjecto inhæret, in sanis, à calore loci, mensis spatio ad illam volatilitatem perducto, ut sponte effervescat) talem specificam fermentationem introducere possit, qua totum mulieris corpus, imprimis autem partes utero circumstantes (in aliis magis, in aliis minus) conturbantur, & sanguis superfluous, aut effervescens, inturgencia sua vasorum orificia dilatans, foras proturbatur: eaque qualitate aut dicti humoris fermentacei volatilitate justa deficiente (ut fit in gravidis, in refrigeratis, in longo morbo detentis, &c. atque etiam in brutis) ista menstrua evacuatio non procedat.

Aristoteles illud uteri fermentum, indeque procedentem sanguinis effervescencia ignorans, scripsit, à Lunæ influxu & motu menstrua mulieribus moveri. Quæ tamen opinio nullis fundamentis innititur, imò rationem sibi planè contrariam habet; quia secundum illam sententiam omnibus mulieribus eodem tempore menstrua moverentur, eaque duntaxat profluerent certo illo tempore quæ Luna ad determinatum illud

*Fermentum uterinum.*

*Causa fluxionis menstrui.*

*Digressio prima.*

*An menstrua moveantur à Luna.*

illud cœli punctum mota talem specificam influxionem facit; cum tamen durante toto menstruo Lunæ decursu, nulla dies, imò etiam nulla hora sit, qua non hic illic in terrarum orbe, innumeris mulieribus menstrua fluant.

An à sanguine exsuperante.

Vana etiam est eorum opinio, qui à sanguine exsuperante, in uteri vasis collecto, menstrua moveri arbitrantur: quoniam vasa illa tantam sanguinis copiam, quanta singulis periodis excernitur, continere non possent: vel si eam paulatim colligerent, & sic per mensem asservarent, deberent valde tumida fieri, cum tamen per autopsiam pateat, quod in dissecis, & quidem plethoricis, eo tempore mortuis quo menstruæ evacuationis fluxus jam imminerebat, aut fieri incipiebat, nullus vasorum uteri solito major tumor conspiciatur: adde, quod etiam macilentis, & sæpe jejulantibus, quibus nulla est sanguinis redundantia, menstruorum fluxus procedat. Denique, quod continuata sanguinis circulatio, talem ejus stagnationem in uteri vasis non permittat, quæ si contingeret, sanguis illic citam putredinem incurreret, & mulierem, diu ante excretionis periodum, gravibus symptomatibus affligeret: cum è contra menstruus sanguis non sit putridus, & bonitate à reliquo sanguine non differat per se. Hoc confirmatur testimonio magni Hippocratis, qui de eo sic dicit: *Procedit autem sanguis velut à victima, & citò congelatur, si sana fuerit mulier.* Quod ipsum etiam asserit Aristoteles, his verbis: *Et qua menstrua vocantur erumpunt, quod sanguis quasi recens occisi animalis est.* Dico autem, per se, quia cum in nonnullis vitiosus, acris, foetidus, aliove modo corruptus excernitur, illud vitium ex se non habet, sed contrahit à vitiosa saburra in utero intemperato vel morbofo genita ac subsistente, aut tempore menstruæ effervescentiæ una cum sanguine ex aliis partibus ad hanc cloacam confluentem, sanguinemque transeuntem sui admixtione vitiantem. De hoc intelligendus est hippocrates, cum dicit: *Et rodit terram, velut acetum, & mordet ubicunque mulierem contigerit, & uteros exulcerat.* Certum igitur manet, per solam antedictam sanguinis in vasis uteri fermentantis effervescentiæ mulieribus menstrua moveri. Quæ effervescencia si interdum, non à solo fermento uterino antedicto, verum etiam ab aliis causis producat, tunc nonnunquam contingit menstrua extra ordinarium periodi tempus moveri, quemadmodum illud subinde accidit in variolis, febribus malignis, & ardentibus, &c.

Nervi.

Accedunt etiam ad uteri superiora nervi exiles, à sexti paris ramo interno: ad media verò & inferiora ramuli ex ossis sacri nervis prodeuntes.

Officium uteri est, semen virile recipere, & ova muliebria conservare ac fovere, usque dum foetus formetur, eumque postea maturum, & liberioris aeris indigum, in lucem extrudere. Præterea alteri etiam usui secundo destinatus est, scilicet purgationi corporis muliebris; plurimæ enim superfluitates per hanc partem evacuantur. Aretæus, lib. 2. de caus. morb. diutur. cap. 11. tribus verbis hæc duo munia simul comprehendit: *Uterus, inquit, muliebria est utilis ad purgationem atque fecundam.*

officium.

Uterus igitur est pars necessaria ad generationem, verum hinc tamen non concludendum, quod etiam penitus necessaria pars sit ad ipsius mulieris vitam, cum mulier etiam vivere possit utero destituta, ut in illis liquet, quibus uterus foras prolapsus, ab aëre & frigore externo non solum ulcerosus factus & corruptus, verum etiam excisus est, quæ tamen postea (succrescente aliqua cartilaginea substantiâ, abscissi uteri foramen intus consolidante) multis annis sanæ vixerunt, imò etiam cum suis maritis Venerem exercuerunt, idque æquali fere cum voluptate acsi uterum adhuc habuissent, cujus rei variæ historiæ describuntur à fide dignissimis Medicis, quorum varios, paulo ante, de uteri prolapsu agens, citavi.

An uterus sit necessarius ad vitam.

Digressio secunda.

Verum cum uterus sit pars ad generationem maxime necessaria, in qua conceptio fieri, & foetus delineari debet, quaeritur an ipsius specifica vi & facultate illa foetus formatio in eo peragatur? Respondendum, minimè, sed vim formatricem ipsi semini inesse, uterum verò non plus conferre ad generationem hominis, quam terra confert ad generationem plantarum, præbere scilicet ovis & semini locum securum, temperatum, & alimentum sufficiens.

An factum formet.

Verum etsi apud antiquos omnes, nullo, quod scio, excepto, certum indubitatumque habitum fuerit, soli utero demandatum esse concipiendi munus, neque foetus ullibi extra uterum concipi posse, tamen hoc seculo à præclaris viris compertum atque notatum est, (et si rarò id contingat) etiam in ipsis tubis uterinis foetus conceptum fuisse, ut supra retulimus, cap. 24. non longe à fine. Sed omnem fidem superat illa historia, à Philippo Salmuth, cent. 1. obs. 94. relata, de viro quodam qui coitum in uxoris sui ore instituerat, sicque semen suum in fauces ejus ejecerat, quæ inde foetus, ut dicit, conceperat in ventriculo, eumque postmodum digiti magnitudine ejecerat per os: quasi verò foetus ex solo semine virili, sine ovo muliebri, concipi posset, idque in ventriculo, fermentaceis succis & alimentis concoquendis identidem repleto: mirum certe quod Ph. Salmuth, vir doctus, huic fabulæ, ex anili colo depromptæ, tantam fidem adhibuerit,

An factus etiam formetur extra uterum.

Digressio tertia.

buerit, ut eam inter observationes suas annotare dignatus fuerit. Non multo majorem fidem etiam mereri videtur historia foetus Mussipontani, planè extra uterum in medio abdomine concepti & formati, ibique post mortem mulieris inventi, cujus historia à Laurentio Strausio edita est Dermstadii, anno 1662. cum adjunctis plurium clarissimorum Medicorum & Professorum super ea judiciis: nisi dicamus hanc historiam veram esse posse, quatenus forte ovum, seminis virilis irradiatione in ovario antea fecundatum, è testibus in tubas prolapsurum, casu ad tubarum fimbrias perveniens, in abdominis cavitatem prolapsum fuit, ante ingressum in tubam, atque calore & fotu istius loci foetus in eo efformatus sit: quod tamen vix verosimile videtur; atque hinc tales historiae, non omnino præter rationem, irridentur, & exploduntur à doctissimis viris, Guidone Patino, Bartholino, aliisque pluribus.

Uteri motus.

Digressio quarta.

De uteri motu præclara movetur controversia, scilicet, anne ascendat, aut per ventrem oberret, sicut in hysterica passione id facere dicitur.

Affirmativam partem defendunt, Aretæus, Fernelius, Laurentius, Spigelius, & præcipue Daniel Sennertus, qui, *prax. lib. 4. part. 1. sect. 2. cap. 15.* prædictorum Medicorum sententias, tanquam infallibilia oracula, citat & approbat, iisque magnum probationis ulterioris tomentum adjicit, & Galeni contrariam sententiam, tanquam à veritate maxime alienam, omnino rejicit, qui ejus textus *citato loco* legi potest. Rationes autem quæ dictos viros in hanc affirmantem sententiam impulerunt, imprimis duæ sunt;

I. Persuasiones muliercularum, quæ dicunt se uteri globum, magnitudinis ovi anserini, in hysterica passione, usque ad diaphragma ascendentem, non tantum intus percipere, sed foris etiam manibus sentire: imò nonnullæ ejus adscensum usque ad fauces asseverare audent. Fernelius, *lib. 6. pathol. cap. 16.* scribit, se ægrotantium mulierum, modò queremoniis, modò precibus adductum, hunc sæpe tactu deprehendisse, instar globuli cujusdam in ventriculum efferri, eumque graviter opprimere.

II. Odores, quod scilicet in hysterica præfocatione foetida naribus admota affectum imminuant aut tollant, suaveolentia verò eundem exacerbent, & sæpe inducant. Quorum prius hinc fieri tradunt, quod uterus, quasi ratione aliqua præditus, foetida fugiat, iisdemque naribus admotis, mox, quasi fugiens, descendat. Posterius verò, quod suaveolentibus oblectetur, atque hinc iis, si naribus admoveantur, statim obviam ascendat. Hanc opinionem illud adhuc

magis confirmare videtur, quod eadem suaveolentia pudendo interiori affricata, hanc affectionem cito imminuant, quia, ut dicunt, uterus versus suaveolentia, quibus oblectatur, tunc descendit.

Ex his concludunt, uterum spontaneo motu ascendere, & quaquaversum moveri posse, neque id mirum videri debere dicunt, cum ejus motus in gravidis sursum, & in uteri prolapsu deorsum, sit notissimus.

Hæ rationes apud multos tanti pretii & ponderis habitæ fuerunt, ut etiam præclaros viros in erroris labyrinthum deduxerint. Verum è contra, uterum sponte non ascendere, nec errabundo motu per ventrem inferiorem moveri, clarissimis rationibus demonstrari potest.

I. Illud impediunt ligamenta, non solum vermiformia, sed imprimis lateralialia vespertilionum similia, quæ adeo firma sunt, ut hujusmodi subitam extensionem nullo modo ferant. Adde, quod uterina quoque vagina vicinis partibus, vesicæ, intestino recto, pudendo, &c. firmiter adnectatur: quæ omnes partes in uteri adscensu versus superiora simul etiam, cum dolore & molestia, sursum attrahi deberent, de qua tamen dolorosa tractione nullæ unquam audiuntur hysterica passione laborantium queremoniæ.

II. Uterus adeo parvus est in vacuis (quippe ad summum non excedit ovi gallinæ parvi magnitudinem) ut se usque ad diaphragma extendere nequeat, licet vel violenta manuum vi eò protraheretur, vel in tenuissimam membranam per sumam extensionem attenuaretur.

III. In gravidis, etsi magnus sit, tamen nemo sanus dixerit, eum in hysterica præfocatione, una cum incluso foetu, usque ad diaphragma & fauces ascendere.

IV. In apertis cadaveribus earum quæ hysterica passione extinctæ fuerunt (dissecui, enim, experiundi gratia, varias) multoties vidi, uterum nec intumuisse, nec ullo modo è loco suo dimotum fuisse, quamvis in vita, atque etiam instante jam morte, de ejus adscensu versus diaphragma & fauces magnæ ac continuæ fuissent querelæ: imò in dicta affectione rarò vitium aliquod in utero, sed plerumque in alterutro vel utroque teste inveni.

Quantum ad reliquas istius opinionis rationes & probationes, illæ facile refelluntur.

Globus qui in ventre inferiore dicitur usque ad ventriculum, aut ulterius, ascendere, ille non est uterus, neque etiam (quod tamen putat Riolanus) sunt testes & tubæ uteri, à putrescente semine turgentes, & orgasmo atque impetu huc illuc violenter agitæ (hæ enim partes, neque tantam laxitatem, neque tantam magnitudinem habent,

Quid sit globus.

habent, ut supra umbilicum ascendere, & instar ovi gallinacei aut anserini illic sentiri possint) sed sunt intestina, quæ à maligno & acri vapore ex utero vel testibus elevato (sicut interdum in epilepsia acris malignus vapor è pollice pedis, aliave parte, usque ad caput ascendit, in eoque sua vellicatione inordinatam ac vehementem nervorum contractionem facit) feriuntur ac vellicantur: qua molestia menti in cerebro communicata, mox ad mali illius depulsionem, ejusque causæ exclusionem, è cerebro copiosi spiritus animales in eorum fibras transmittuntur, à quibus inde intumescuntibus contrahuntur intestina (quemadmodum etiam ab ejusdem vaporis ulterius ascendentis acrimonia vellicantur, & sic per copiosum spirituum influxum contrahuntur, diaphragma, muscoli faucium, aliæque partes, unde tunc illa præfocatio) tuncque si forte aliqui flatus sint in intestinis, ut plerumque sunt, contrahuntur circum illos flatus, eosque arcu cogendo & comprehendendo, globum istum effingunt. Etiam arcta ligatura quæ mulieribus in tali casu per latam fasciam, aut mappam longiorem, ventri transversim injicitur, eo nomine non prodest, quod globi istius (quem illi uterum esse arbitrantur) adscensum cohibeat, sed quia per illam maligni acris vaporis, ex utero vel testibus suscitati (suscitantur autem per aliquam humoris effervescentiam) copiosus ascensus versus superiora impeditur, qui vapor tunc infra illam ligaturam aliquamdiu detentus à circumstantium partium calore dissipatur.

An hysterica symptomata oriuntur à succo pancreatico.

Hic obiter notandum, quod Franciscus de le Boë Sylvius (quem sequitur etiam Regnerus de Graef) modò dictam hysterice præfocationis causam plane non agnoscit, sed longe aliam commentus sit, scilicet succi pancreatici peculiare vitium, & ab eo solo symptomata hysterica, modò dicta, suscitari doceat, sicque hac de re dogmata omnium antiquorum, & plerumque neotericorum, satis animose rejiciat, utrumque & partes spermaticas à talium symptomatum inductione penitus excuset. Verum etsi multoties symptomata quædam cum hysterice aliquibus symptomatibus quasi similitudinem aliquam habentia, vitio succi pancreatici nonnunquam induci possent, omnino negare nolim (quamvis attenta observatione satis ab his distinguantur) eaque ego ipsemet subinde in viris non minus, quam in foeminis amadverberim, tamen super hac re semper missellum pancreas accusare, nimis durum atque iniquum videtur, cum à me aliisque instituta cadaverum mulierum sectio, multoties docuerit, pancreas ab hysterice affectionibus prorsus insons extitisse, optimeque valuisse, atque interea in testibus,

modò valde tumidis (interdum alterutrum, rarius utrumque, ad semi ovi gallinacei magnitudinem intumuisse demonstravimus) modò male coloratis, virulentoque liquore repletis, tantorum symptomatum causam latuisse (videantur super hac re quædam præcedente cap. 24.) cum etiam in tali præfocatione uterina graviter laborantibus milles observatum sit, per seminis, sive coïtu, sive obstetricis digiti fricatione provocati excretionem, mox omnia symptomata cessasse, eorumque reditum per licitæ Veneris usum præventum fuisse, quæ tamen dulcia subitus adhibita remedia nullum quæcunque succi pancreatici vitium tam facile, citò, bene, & jucundè tollere possent. Verum hæc per parentes dicta sunt, nunc ad rem redeamus.

Ex odoribus etiam nihil pro dicta sententia de uteri motu concludi potest. Nam uterus non habet intellectum, ac proinde etiam nullam perceptionem, aut selectionem boni vel mali odoris: non habet etiam nasum, aut nullum aliud odoratorium instrumentum, atque hinc nullos odores percipit ut suaveolentes aut foetidos, neque eosdem amplectitur & amat, vel fugit & odit, neque persentit ullos odores ut odores, neque ab iis afficitur ut ab odoribus, sed ab eorum qualitate calida, attenuante, acri, discutiente, &c.

Quid faciant odores.

Quod autem foetida naribus admota affectionem hysterice imminuant, non fit quia uterus foetidorum occursum fugiens descendit, sed quia olfactu à foetidorum occursum malè affecto, cerebrum, ut illam molestiam excludat, se contrahit & coarctat, sicque non tantum pauciores spiritus ad fibras contractorias intestinorum, diaphragmatis, & musculorum faucium dimittit, verum etiam à testibus vel ab utero ascendentibus vaporibus ingressum in ejus arcem præcludit, & eos qui antea ingressi erant exprimit; quos etiam foetida per singularum suam discutiendi vim, ut in cerebro, ita quoque in faucibus, potenter discutiunt, sicque mulier non tantum fit compos mentis, sed quoque laxatis faucium musculis à præfocationis angustia liberatur.

Quare fatidica proferunt.

Suaveolentia verò naribus admota affectum augment, non quod uterus iis in occursum ascendat, sed quia, dum à mente per olfactum percipitur istorum fragrantia, ut mulier illa amœnitate diutius & melius fruatur, cerebrum se dilatat, atque ita non tantum copiosiores spiritus ad fibras modò dictas profluere, sicque earum contractionem augere permittit; verum etiam noxios vapores ab utero ascendentes, magna copia per dilatatos undique poros in sese admittit, unde tunc affectionis hysterice symptomata (præfocationis anxietas, delirium, sopor, nonnun-

Quare suaveolentia nocent.



nonnunquam etiam convulsiones epilepticae, aliaque) mox crescunt. Pudendo autem interiori affricata suaveolentia profunt, quia crassiores malignosque humores, circa uterum haerentes, attenuant, poros dilatant, & potenter discutiunt.

Longe alias hujus rei rationes adferunt Trincavellius, Eustachius Rudius, Hercules Saxonia, & Mercurialis, quas recenset, sed rejicit ac bene refutat Daniel Sennertus, *prax. lib. 4. part. 2. sect. 1. cap. 4.* qui ipse tamen ex hac difficultate se satis extricare nequiens, & videns uterum non posse odores percipere, nec ab iis affici ut ab odoribus, confugit ad occultam qualitatem uterum afficientem, sensibus nostris imperceptibilem, quam cum odoribus ita cohaerere putat, ut ab iis separari non possit. Verum hic opus non est, ad talem occultam aliquam qualitatem confugere, cum per manifestas qualitates & rationes haec tota res satis edoceri possit, ut ex modo dicta nostra explicatione liquet.

*Motus uteri  
in gravidis.*

Quod uterus in gravidis se quaquaversum extendat, aut in prolapsu foras excidat, etiam nihil pro spontaneo ejus motu probat. Quippe in gravidis uterus non simpliciter ascendit, sed versus superiora, & circum circa per omnes suas partes increfcit; nam una cum foetu increfcit ejus domicilium, & quo grandior fit foetus, eo major, crassior, & carnosior fit uterus, ita ut circa partum pollicis, & saepe circiter duorum digitorum crassitiem habeat; quae non inducitur à solo humorum & sanguinis in porositates uteri influxu, sed ex vero & firmo carneo incremento, ut etiam supra dictum. Magna autem differentia est, inter uteri incrementum, & ejus motum spontaneum: quia illud non fit nisi longiore tempore, hic in momento fieri, & rursus desinere deberet & posset: in illo uteri substantia augetur & incrassatur, in hoc deberet extendi & attenuari.

*Motus in  
prolapsu.*

In prolapsu etiam non est motus spontaneus nam laxatis ejus ligamentis, & substantia sua intemperie frigida humidaque affecta, gravitate sua deorsum delabitur, sicut omnia gravia, atque etiam membra paralytica, omni spontaneo motu jam destituta, deorsum delabuntur: eodem modo ut homo, qui ex alta turri decedit, se non movet sponte deorsum, sed ob suam gravitatem invitus movetur; verum si ille inferius esse volens, per gradus descenderet, tunc verè diceretur, quod se ipsum moveret. Ita etiam uterus se non movet deorsum, sed movetur à sua gravitate. Ex quibus omnibus satis liquet, uterum se nec sursum, nec deorsum movere, nec ullo errabundo motu per ventrem inferiorem divagari, sed interdum casu, praeflacciditate, ad latera, vel inferiora delabi.

Verum adversus hanc nostram conclusionem alia insurgit difficultas, scilicet, si uterus se non moveat sponte, qui fiat quod nonnunquam, mortua jam muliere, foetus in utero contentus adhuc foras excutatur? Sic, referente Bartholino, Sphinx Theologico Philosophica narrat, extinctae matris ab utero pusionem, emissio claro vagitu, salvum & incolumem egressum fuisse. Talem Scipionis & Manlii ortum describunt historici. Eberus quoque habet exemplum foetus mortua matre exclusi: quale etiam ex Wolfangi Silberi concionibus memorabilibus, refert Rolsincius: aliaque tria annotavit Philippus Salmuth, *cent. 2. observ. 36.* & simile quid Hassniae contigisse scribit Bartholinus, *hist. anat. rar. cent. 1. hist. 1. & cent. 2. hist. 99.* quale quid etiam Montfuri quondam mihi narratum memini. Similem quoque casum refert Harveus, *exercit. de partu.* Mulier, inquit, apud nos (compertum narro) sub vespertam mortua, in conclavi sola relicta est, mane autem sequenti inter femora ejus repertus est infans, qui proprio nisu exitum sibi procuraverat. Verum ad difficultatem dicendum, nonnunquam mortua & extincta matre foetum ad tempus aliquod in ejus utero supervivere posse (quales foetus non semel per abdominis incisionem vivos è mortuarum matrum ventre fuisse extractos, multis exemplis notissimum est) atque hinc si vivus & validus sit, & uteri orificium apertum, ut & genitalia à praecedentibus partus laboribus ac ferossae colluviei effluxu lubrica ac laxa fuerint, interdum fortassis fieri posse, ut foetus proprio impetu foras eluctetur, à nullo uteri jam mortui motu adjutus. Verum hoc valde rarò fit, sed frequenter contingit mulieres, post graves parturiendo exanthlotos labores, deficientibus viribus in gravem syncope incidere, ita ut mortuae esse putentur (quod etiam hysterica passione laborantibus saepe accidit, quae saepe hac de causa, nondum mortuae, terrae mandatae sunt, ut variorum Medicorum observationibus constat) imò nonnunquam pro mortuis sepultae fuerint, cum eas tamen postea ad se rediisse compertum sit. Memorandum hujus rei exemplum scribit Joannes Matthaeus, Marchionis Badensis Medicus, quæst. medicar. 4. Exemplum, inquit, commiseratione dignum accidit Madrici in Hispania, ubi nobilis matrona, ex familia Don. Francisci Lasso oriunda, postquam per triduum in agone decubisset, putantibus cognatis eam mortuam esse, deportata fuit ad locum subterraneum sepulturae destinatum. Post aliquot menses, ostio sepulchri, ad alterum in eodem sepeliendum, iterum recluso, repertum fuit cadaver eodem in loco adhuc repositum, sed in dextro brachio infantem mortuum tenens. Unde apparet dictam matronam, cum sepulta fuit, verè non


*Foetus mortua matre partu excussus.*



7-2-20

11

1. The first part of the paper is a general introduction to the subject of the study. It discusses the importance of the problem and the objectives of the research. The second part is a review of the literature on the subject. It discusses the work of other researchers and the results of their studies. The third part is a description of the methods used in the study. It discusses the experimental design, the data collection, and the analysis. The fourth part is a discussion of the results of the study. It discusses the findings and their implications. The fifth part is a conclusion. It summarizes the main points of the study and makes recommendations for further research.



non obiisse, sed infanticem infantem adhuc peperisse, & ulnis suis amplexam fuisse. In tali casu dico facile contingere posse, ut mulier, quæ pridie ex vivis excessisse putata fuit, postridie adhuc pariat (in extrema enim necessitate natura interdum mirabilia præstat) & una cum foetus expulsionem suam quoque animam exspiret: atque tunc peristum errorem putant adstantes, illam modò mortuam peperisse, quæ tamen cum pareret, mortua nondum erat. Ita ut hinc omnino doceri non possit uteri spontaneus,

aut proprius aliquis motus. Si jam quispian, his non contentus, pertinaciter sentire velit, uterum mortua muliere adhuc vivere, & sponte seu propria vi moveri, ille necessario, cum Platone, impinget in prædurum absurditatis scopulum, & concludet, uterum esse animal per se, communi vita cum reliquo mulieris corpore non conjunctum, sicque inde sequetur, unum animal componi ex duobus, vel unum esse alterius partem integrantem.

## T A B U L Æ V. E X P L I C A T I O.

Hæc Tabula uteri & pudendi muliebris, vicinarumque partium, cum in gravidis, tum in vacuis, constitutionem ostendit.

## F I G U R A I.

Uterus foetum fere bimestrem continens.

- A. Uterus.
- B. Vena inter eas quæ in superficie uteri existunt, maxima.
- CC. Testes penduli.
- DDDD. Uteri membrana, cui incumbunt vasorum propagines.
- E. Nympha.
- FF. Pili pudendi.
- GG. Cornua uteri, in cujus superficie apparent venulae, secundum delineationem Aquæpendentis. Hæc tamen à nobis pro veris cornibus non habentur.
- H. Meatus urinarius.
- II. Pudendum.
- KK. Ale.

## F I G U R A II.

Uteri introitus secundum longitudinem divisus.

- A. Uteri orificium.
- B. Collum uteri.
- C. Vesicæ orificium.
- D. Cervix, seu vagina divisa.

## F I G U R A III.

Substantia uteri gravidæ divisa, ut placenta appareat.

- AAAA. Quatuor uteri partes triangulæ extrorsum reflexæ.
- BBB. Placenta, forma tuberosa & inæquali.
- C. Membranosa placenta substantia quadam, cæteris membranis crassior, quæ utero annectitur, lacerata, ut chorion appareat.
- a. Chorion.
- D. Uteri collum divisum.

## F I G U R A IV.

Partes genitales foemineæ in vacuis.

- A. Glandula renalis dextra.
- B. Glandula sinistra.
- CC. Ren utriusque lateris.
- DD. Venæ emulgentes dextra.
- EE. Arteriæ emulgentes dextra.
- FF. Truncus venæ cavæ in duos ramos iliacos, dextrum & sinistrum, distractus.
- G. Vena emulgens sinistra.
- HH. Arteriæ emulgentes sinistra.
- II. Vena spermatica dextra.
- K. Arteria spermatica dextra.
- L. Arteria spermatica sinistra.
- M. Vena spermatica sinistra.
- NN. Arteriæ magnæ truncus, in ramum iliacum dextrum sinistrumque divisus.
- OO. Testes muliebres.
- PP. Ligamenti lati portio.
- QQQQ. Tubæ uteri in utroque latere.
- R. Uteri fundus.
- SS. Ligamenta uteri teretia inferius abscissa.
- T. Cervix uteri.
- V. In latere dextro vena hypogastrica.
- V. In latere sinistro arteria hypogastrica.
- X. In latere dextro arteria hypogastrica.
- X. In latere sinistro vena hypogastrica ad uterum diffusa.
- Y. Vagina uteri.
- Z. Vesica urinaria supra pudendum depressa.
- aa. Ureterum portio circa vesicam abscissa.
- bb. Ureterum portio circa renes abscissa.
- cc. Vasa semen præparantia, circa testes dilatata.
- cd. Ductus testium, seu vas deferens.

T

FIGU-

## FIGURA V.

- A. Testiculus dexter.  
 BB. Tuba dextra depressa.  
 C. Testiculus sinister.  
 DD. Tuba uteri sinistra.  
 E. Fundus uteri.  
 FF. Ligamenta uteri teretia.  
 G. Vesica urinaria vaginæ uteri inserta.  
 HH. Ureterum portiones.  
 II. Clitoridis duo crura musculoſa.  
 K. Clitoridis corpus ipsum.

## FIGURA VI.

- AA. Uteri fundus transversim dissectus.  
 BB. Cavitās fundi.  
 C. Cervix uteri.  
 D. Osclum in cervice uteri mulieris quæ  
 fœtum gestavit.  
 EE. Vaginæ uteri dissectæ rugosa facies.  
 FF. Ligamenta uteri teretia subtus abscissa.

## FIGURA VII.

Penis muliebris.

- A. Glans penis.  
 B. Præputium.  
 CC. Crura utraque.

- D. Rima non manifeste pervia.

## FIGURA VIII.

- AA. Penis transversim dissecti corpora duo  
 nervosa, seu spongiosa.  
 B. Glans penis.  
 C. Præputium.  
 DD. Duo ejus crura.

## FIGURA IX.

- A. Clitoridis caput sub cute prominens.  
 BB. Labia externa pudendi distracta.  
 CC. Ala seu nympha pariter deducta.  
 D. Caruncula meatui urinario (a.) circum-  
 posita.  
 EE. Productiones duæ carnosæ myrtiformes.  
 FF. Expansiones membranosæ rimam con-  
 tinentes.

## FIGURA X.

- A. Membrana transversim pudendo indu-  
 ctæ pro hymene habita.

## FIGURA XI.

Infantis puellæ pudendum representat,  
 in quo eadem partium significatio,  
 quæ figuræ IX.

## CAPUT XXVI.

## De Uteri partibus.

Vide Tabu-  
 lam V. &  
 VI.



*S*peciatim in utero consideranda sunt, fundus, cervix, vagina, & sinus pudoris.

Fundus.

Fundus est uteri pars suprema, proprie Matrix, vel Uterus nominata, extrinsecus lævis & æqualis, subpingui liquore obducta, nullis flexuosis cornuum prominentiis in mulieribus contorta vel separata, nec cellulis ita distincta, sicut in plerisque brutis viviparis reperitur. Durior & densior est in iis quæ gravidæ non sunt, magnitudinem habens ovi columbini, vel paulo majorem, quam tamen, ut præcedente cap. dictum, nonnihil immutant Veneris usus, conceptio, & ætas.

Cavitas.

Cavitatem obtinet unicam, non tamen exacte rotundam, sed utrimque nonnihil versus latera, quasi cornutum, protensam, in demortuis vix fabæ Turcicæ capacem, in libidinoso verò coitu, procul dubio, aliquanto laxiorem, rugis nonnihil asperam (ut semen melius retineat) & in non prægnantibus viscido quodam muco oblitam. Hæc mediâ lineâ, veluti futurâ, nonnihil prominulâ, in dextram sinistramque partem distinguitur, in quarum illa mares, hac fœmellas concipi, tradunt Hippocrates & Galenus. In istius cavitatis angustis vivificus seminis

virilis spiritus ovo muliebri infusus, ex sese mirabilem tot partium efformationem & constructionem peragit, sicque ex fordido atque exili hoc carcere, magnum animal, cœlos brevi conscensurum, erumpit.

Cervix uteri inferior (hanc multi *Cervix*. cum vagina male confundunt) & angustior uteri pars est, os seu orificium uteri internum continens. Quod Orificium oblongum & transversum est, instar foraminis glandis penis, in virginibus angustum & æquale, in iis verò quæ aliquoties pepere-  
*Orificium.*  
 runt, majus, & quasi duobus labiis subduriusculis, veluti carunculis nonnihil tumidis, præditum, quæ labia in virginibus vix, aut non inveniuntur. Post susceptum semen hoc orificium tam exacte clauditur, & lento, viscoso ac flavescente humore seu muco tam exacte obsignatur, ut, referente Galeno, ne specilli quidem aciem admittat, nec ante partum (nisi forte per libidinosum coitum admodum ferventem, ex quo nonnunquam superfœtatio contingit) referatur. Tempore verò partus stupendum in modum, ad fœtus exclusionem, instar rosæ sese explicantis, dilatatur, tuncque prædicta orificii labia (ut in puerperis mortuis observavi) sesqui digiti crassitiem adæquant, maxime

maxime laxa, lubrica, spongiosæque in modum rara ac fungosa sunt.

*An penis ad orificium uteri pertingat.*

Usque in hoc orificium rarissimè penis viri in congressu Venereo pertingit, quod tamen Riolanus, lib. 2. *anthropogr. cap. 34.* interdum evenire scribit. Fieri, inquit, potest, ut longior penis, dum orificium cervicis uteri apertum est fluentibus menstruis, in id osculum introductus & apprehensus, aliquantulum retineatur ac constringatur, ut in canibus simul junctis & coherentibus accidit; quod quibusdam evenisse certa fide mihi testatum. Sic cum olim Leydæ studiis incumberem, memini tunc sponsum quendam ibi fuisse, de quo dicebatur quod cum sponsa sua lasciviens, adeo ejus pudendo intrieatus remansisset, ut penem extrahere non posset: quem nexum advocatus Delmerhorstius, Medicus, affusione aquæ frigidæ protinus dissolverat.

Certè mirum est, quomodo hoc angustum uteri orificium adeo dilatari possit, ut glandem penis recipere queat, ac proinde illud nonnullis prorsus impossibile videtur, & quæ hac de re dicuntur, illa pro fabulis habent. Sed dicendum, in magna fervente libidine omnes illas obscenas partes admodum incallescere & laxari, ut patet in vagina uterina, quæ extra libidinem adeo stricta est, ut penem virilem cum molestia recipiat: cum verò in libidine per majorem affluxum sanguinis & spirituum, erigitur, incalescit, & intumescit, tunc adeo laxa & mollis evadit, ut facillime penem admittat. Non tam mirum igitur erit, si in nonnullis per summam libidinem adeo laxetur hoc uteri orificium ut penem admittat, præcipue si vagina brevior, & penis tam longus fuerit, ut illam Sybillinam rimam attingere & ingredi possit. Neque hoc magis mirandum, quam quod illud ipsum orificium tempore partus sponte adeo laxetur, ut magnus fœtus transire, vel chirurgi manus, cum parte brachii (cum scilicet fœtus arte, aut instrumentis extrahendus) facillimo negotio intromitti possit.

*Vagina.*

Fundo ejusdemque cervici, continuum est Collum uteri majus, quod aliis Ostium uteri, communiter Vagina dicitur, quia virilem penem instar vaginæ recipit: nonnullis, qui cervicem anteriorem cum hac parte malè confundunt, etiam Cervix appellatur.

Est autem canalis mollis & lusus, sese peni in coitu undequaque applicans, fibris carneis, secundum longitudinem excurrentibus, præditus, quibus aliis adjacentibus partibus agglutinatur, intus rugis orbicularibus (superiore parte pluribus quam inferiore, ut & versus pudendum pluribus, quam versus uterum) inæqualibus (ut major titillationis ab attritu voluptas oriatur) membranosa, ac quasi nervosa, sed non-

nihil spongiosa fungosaque substantiæ (hæc in libidine aliquantum inturgescit, ut penem strictius comprehendat) longitudinis digiti longioris, latitudinis circiter recti intestini: quæ tamen longitudo, latitudo, & laxitas, variant pro ratione ætatis, nec non pro ut fœmina magis vel minus libidine fervet, imò etiam pro naturarum diversitate; sicut crassities & longitudo penis in viris, ita etiam hæc latitudo & longitudo vaginæ variat in mulieribus. Atque hinc Spigelius, anat. lib. 8. cap. 22. sic dicit. Undique penem constringit [vagina] & secundum omnes ipsius dimensiones sese erigit, sicque [peni] brevi occurrit, longo cedit, crasso dilatatur, tenui constringitur. Natura enim ita omnibus penis differentiis consulit, ut non opus sit sollicitè vaginam cultello aquam quærere, sed ubique Opificii summi beneficio inveniatur.

Sic rugæ etiam in virginibus, nec non in mulieribus quæ rariore Venere utuntur, nec in eam tam fervide proclives sunt, ut & in iis quæ nunquam pepererunt, aut quæ diuturno mensium, vel albo muliebri fluxu non laborarunt, multo crebriores & densiores sunt, quam in iis quæ sæpius pepererunt, nec non in meretricibus frequenti coitu utentibus, utpote in quibus sensim fere obliterantur.

*Ruge.*

Hæc vagina in infantibus notabilem habet capacitatem, quamvis ejus orificium angustissimum sit: quod etiam in adultis, præcipue non vitiatis, singularem habet angustiam, quæ in primo coitu, cum hymenis ruptione, mediocriter dilatatur, sed tamen in mulieribus rariore Venere utentibus talis manet, ut virilis penis quasi per laxiusculum aliquem sphincterem musculum versus vaginam interiorem transeat.

*Amplitudo.*

Vasa habet omnis generis. Arterias ob-

*Vagina vasa.*

tinet duplices: alias ab hæmorrhoidalibus, partem ejus inferiorem perreptantes: alias ab hypogastricis, per ejus latera descendentes, indeque per totam vaginam dispersas, atque in superiore ejus parte uteri arteriis plerumque adjacentes. Venas varias ab inferiore sui parte ad hæmorrhoidales, reliquas verò, numero longe plures, undequaque substantiæ ejus immerfas, ad hypogastricas emittit, in quas sanguinem contentum deponunt, inde ulterius ad majora vasa, & tandem ad cor deferendum. Ex his sanguiferis vasis efformatur illud reticulum, à Regnero de Graef primò inventum, cujus statim mentio fiet.

Nervos recipit ab iis quæ ex osse sacro egrediuntur.

*Nervi.*

Regnerus de Graef scribit, se hic etiam observasse vascula lymphatica, quæ in ascensu externam uteri substantiam perreptando, sensim coeunt, & rivulorum adinstar augescunt, donec ad magnum chyli receptacu-

*Vasa lymphatica.*

ceptaculum pervenerint, atque in illud aperiantur.

Præter hæc vasa etiam in anticam vaginæ partem exeunt illi ductus substantiæ meatus urinarii inhærentes, de quibus paulo post, *hoc eodem capite*, in meatus illius descriptione dicitur.

Vesica cervicalis.

Ejus verò fini, scilicet ad primum ingressum sub nymphis, antica & superna parte incumbit vesicæ urinariæ cervix, sphinctere obvoluta, illic exitum habens: posticâ intestini recti musculo constrictorio valide connectitur.

Regnerus de Graef, *de mulier. organ. cap. 7.* bene observavit, sphincterem vesicæ lato fibrarum ductu, tres fere digitos æquante, vaginæ inferiorem partem amplecti, eum in finem, ut tempore coitus vaginam blande constingat circum penem; quam constrictionem plurimum juvari putat à duobus aliis corporibus, per accuratam investigationem primò ab eo inventis; de quibus ita scribit: *Constrictionem supra-memoratam mirum in modum opitulantur corpora illa, quæ remotis carnosus expansionibus à sphinctere ortis, in inferiore vagina parte utrimque prope pudendi labia conspiciuntur: ascendunt enim ab inferiore parte utrimque ad membranosam substantiam qua clitoris vicinis partibus adnectitur, in eaque terminantur ac evanescent: ita ut dextri & sinistri lateris corpora nullam inter se communionem habeant, ut videre est, si alterutrum flatu distendatur: nam inflato dextri lateris corpore, sinistrum non intumescit; nec è contra, inflato sinistro, dextrum intenditur, aut clitoris erigitur, quare nec illam cum corporibus istis communionem habere judicamus. Horum exterior substantia constat tenuissima membrana: interior verò, quæ plerumque, ut interna clitoridis substantia, ob coagulati sanguinis copiam nigricat, ex multis vasculis & fibrillis, sibi invicem unitis, contexta est, quam, cum retis complicati figuram quodammodo referat, Plexum reti-formem nominamus.*

Plexus reiformis.

Plexus ille, nostro iudicio, illic collocatus est, ut vagina orificium tanto melius coarctetur, & virile membrum accuratius amplectatur: nam illo copioso sanguine distentus, cum propter musculi sphincteris fibras carneas, illum comprimentes, extrorsum nequeat, necesse est ut introrsum cedat, & vagina orificium coarctet. Harum partium distensio ad oculum apparebit, si vasa sanguinea per clitoridis dorsum excurrentia parumper inflentur, quia cum plexu illo totum pudendum intumescit.

Quia autem hic vaginæ canalis angustior est in virginibus, ab ejus à pene extensione, & arteriolarum venarumque per eum decurrentium ruptione, in primo Venereo congressu dolorem excitari, & sanguinem veluti è mactata victima emanare, multi, cum Sorano, putant, quod tamen

alii hymenis rupturæ potius adscribunt.

Vaginæ usus est penem virilem recipere, *Vagina usus.* amplecti, & sese circum illum blande constingere. Hunc in finem à sanguinis & spirituum affluxu in libidine incalescit, & aliquantum inturgescit, sicque nonnihil quasi erigitur, & se dilatat, ut penem commodius admittere possit, cum extra libidinem, propter laxitatem & molliem concidat, atque sic aeris externi ingressum abarceat, imò ne aquam quidem, si forte in balneo fuerit mulier, versus uterum subire permittat: tempore verò fluxus menstrui, aut muliebris albi, ut & partus tempore, se ipsam non dilatat, sed ejus conniventia latera, fœtus humorumque pondere pressa, à se invicem recedere, sicque necessariis istis evacuandis viam concedere coguntur.

Quod autem vagina modo ante dicto in libidine dilatari debeat, & absque illa dilatatione penem virilem difficulter admittat, liquet ex iis mulieribus quibus violentus aut involuntarius coitus sine ulla libidine contingit, utpote quæ de magno dolore conqueruntur, propter vaginæ conniventia latera immissi penis vi à se invicem violenter divulsa. Sed illud ipsum adhuc magis innotescit, ex immenso dolore gravique incommodo quod ex coitu sine libidine nonnunquam juvenculas aliquas sponfas, Venerem nondum expertas, conquississe observatum est: cujus miserandam historiam refert Plazzonus: *Non ita pridem, inquit, contigit, ut juvenis quidam cum sponsa prima nocte congressurus, valida veretri intrusione, & violenta festinatione, non modo cervicem, sed & ipsum intestinum rectum, perirperit: cujus rei causam non aliam esse judico, quam quod vulva non assueta erigi, ad novum opus languida flaccesceret, nec peni irruenti directam viam præbere nosceret.* Sic etiam ego memini me antehac in Batavia superiore tenellam domicellam sponfam novisse, cui à violenta penis in primo coitu immissione, & hinc vaginæ nimis repentina dilatatione, tam enormis hæmorrhagia contigit, ut intra tres horas, una cum virginitate, etiam vitam amiserit. Similis dolendus casus ante aliquot annos etiam hic Ultrajecti contigit filiæ cujusdam civis, fabri lignarii, cui sponsæ à primo cum sponso congressu tanta oborta est hæmorrhagia, ut ante matutinum tempus animam exspiraverit.

Infra insertionem colli vesicæ in virginibus membrana tenuis & nervea, substantiæ colli continuata, ejusque parietibus orbiculatim adhærescens, fibris carnosus intertexta, & arteriolis venisque multis donata, atque ad menstruorum effluxum in medio perforata, ut in adultioribus minimi digiti apicem admitteret (hæc perforatio primis *Hymen.* tribus

tribus quatuorve à nativitate annis tam angusta est, ut vix minimo piso per eam transitus concedatur, sed exinde paulatim cum ætate dilatatur) transversim expanditur, quam **Hymenem** veteres (hinc *Deus Hymenaus* olim constitutus fuit, qui virginibus nubentibus præesse putabatur) alii **Claustum virginittis**, alii **Zonam castitatis** appellarunt, cujus integritas virginittis certum indicium semper habitum fuit, cum in primo coitu à membro viri necessario rumpatur, & sanguinem emittat, quem **Florem virginittis** vocant, de quo textus sacer mentionem facit, *Deuteronom. cap. 22*. Post ruptionem verò evanescit, nec unquam regeneratur.

*Flos virginittis.*

*Observatio.*

Hanc nonnunquam magno sanitatis dispendio, non antedicto modo perforatam & tenuem, sed crassiusculam, firmam, continuam, penitusque oclusam esse, interdum instar cribri foraminulentam, à Vesalio, Cabrollo, aliisque observatum fuit. Sic etiam nos, anno 1666., mense Martio secimus in publico theatro, juvenculam viginti trium annorum, in qua illam membranam omnino continuam, nec uspiam pertusam, adeoque firmam invenimus, ut cujuslibet fortissime arietantis viri impetum sine disruptione sustinere potuisset.

Cum tanta ejus est firmitas, tunc in maturis menstruorum aliorumque illà vià evacuandorum fluxus impeditus, tales virgines ad mortem deducit, nisi facta istius membranæ sectione à periculo liberentur, cujus curationis variæ historię descriptæ inveniuntur, apud Benivenium, *de abdit. morb. caus. cap. 28*. Aquapendentem, *chirug. part. 1. cap. 82*. Wierum, *de præstig. demon. lib. 2. cap. 38*. Hildanum, *cent. 3. observ. 60*. aliosque plures. Hic putarunt nonnulli, duram illam & imperforatam membranam aliam esse ab hymene diversam, præter Naturæ ordinem illic enatam; cum tamen re vera sit ipse hymen, præter naturam ad tantam soliditatem perductus, nec quisquam illic aliam hymenis membranam, ab hac duriore distinctam unquam inveniet.

*Origo nominis.*

Qui Hymenis nomenclaturam inquirunt, in eo fere consentiant, quod ὕμην & ὑμῆνις, *membrana*, deducatur, & sic appelletur per excellentiam, tanquam existens omnium membranarum præstantissima, maximeque notabilis. Verum Balthasar Lydius, Theologus Dordracenus, in *epistola quadam ad Beverovicium scripta*, ex Servianis scedis, aliam hujus vocis originem adfert: quippe scribit, Hymeneum olim adolescentem fuisse Atheniensem, adeo pulchrum, ut puella esse putaretur: illum raptas à piratis virgines Athenas reduxisse, ea conditione,

ut virgine nobili, quam antea perditè amaverat, & cujus nuptias desperaverat, quæque una cum cæteris abducta erat, potiretur: quo concessio, quia conjugium hoc felix erat, placuisse Atheniensibus, ut omnibus nuptiis Hymenæi nomen interesset: hinc putat ille dictam membranam, quæ in veris virginibus nubentibus semper adesse solet, vel saltem debet, denominatam fuisse.

Multi hanc membranam in dubium vocarunt, alii eam inveniri prorsus negarunt, & quæ de hymene traduntur, pro fabulis habuerunt. Alii cum Oribasio, Sorano, Fernelio, & Laurentio, putarunt virginittatem nihil aliud esse, vel designare, quam sinus muliebris angustiam rugosam, venulis conspersam, ex cujus in primo coitu dilatatione dolor exitatur, & ex venulis eodem impetu disruptis, sanguis profunditur. Verum Vesalius & Fallopius, peritissimi Anatomici, illam in omnibus virginibus invenerunt, ut & Columbus, Platerus, Piccolhominus, Joubertus, Spigelius, Wierus, Regn. de Graef, Swammerdamius, alique præclari viri, quibus oculatis testibus certè fides habenda est. Præter illos, etiam nos illam in virgine mortua viginti duorum annorum, Medicinæ studiosis in nosocomio demonstravimus, mense Decembri, 1671. quæ referebat membraneum annulum ad ingressum in vaginam uteri orbiculatim depositum, in medio pertusum foramine latitudinis apicis minimi digiti, non exacte rotundo, sed parte imprimis superiore nonnihil oblongo. Swammerdamius, in *Natur. mirac.* scribit, se talem hymenem à corpore virginis exemisse, qui proxime referebat planum illum & perforatum annulum, qui vitro in tubis opticis submittitur, & omnem ulteriorem tubi aperturam claudit, sicut etiam hæc membrana tubum vaginæ & collum externum uteri claudit.

*An detur hymen.*

Queritur jam, an illà membranà absente, bene, & semper secundum veritatem dici possit, quod talis juvencula, in qua hoc comperitur, necessario ab alio viro devirginata fuerit, cum eoque consueverit? Riolanus bene notat, hujus membranæ defectum non semper esse corruptæ virginittis, aut consuetudinis cum viro habitæ signum, quia illam in omnibus virginibus non adesse aut inveniri certum est. Nam interdum lascivæ puellæ membranam istam inopinanter effringunt, dum Veneris stimulis agitata, digito, aliove immisso instrumento, coitum imitantur. Præterea nonnullis adeo tenuis & mollis est, ut in primo coitu facile dehiscens, nec obstaculo aliquo sponsum offendant, nec etiam sanguinem profundat. Adde, quod etiam ab acrim humorum transitu corrodi,

*An absentia hymenis corruptam virginittatem indicet.*

T 3

vel



vel casu, ictu, aut in hysterica passione ab obstetricis immisso digito, disrumpi possit. Quod denique à menstruorum aliorumve humorum affluxu adeo laxari & emolliri queat, ut introeunti peni sine dolore ac molestia facilem ingressum concedat, & dilatetur citius quam dilaceretur (hujus rei duo præclara exempla scribit Pinæus, lib. 1. de notis virgin. cap. 6.) atque sic etiam non profundat in primo coitu illum sanguinem, quem florem virginittatis appellant. Ex quibus satis patet, non esse certam & perpetuam regulam, qua statuitur, *Quod sponsa in primo concubitu cum sponso, debeat aut sanguinem emittere, aut non fuisse virgo.* Quod etiam casus ille, de linteo cruentato, cujus mentionem facit textus sacer, Deuteronomii cap. 22. non sit absolute, sed hoc modo intelligendus: scilicet, si tale lintheum monstretur, tunc non esse ullo modo dubitandum de sponsæ castitate & virginittate, quia ut plurimum hoc demonstrari potest: verum si illud demonstrari nequiret, tunc pro certo tamen mox concludendum non esse, quod illa non fuerit virgo, sed, quod antequam de ejus virginittate judicium feratur, prius inquirendum sit, quare iste cruoris effluxus in primo concubitu non successerit, an illud imputandum sit consuetudini cum alio viro habitæ, an verò aliis causis naturalibus, modo à me relatis.

Verum antequam hinc desistam, adjicere lubet elegantissimum carmen, quod Catullus, de flore virginittatis (scilicet sanguine illo qui ordinarie virginibus, à membranæ hymenis ruptione, in primo coitu profunditur) scribit.

*Ut flos in septis secretis nascitur hortis,  
Ignotus pecori, nullo confusus aratro:  
Quem mulcent aura, firmat Sol, educat imber,  
Multi illum pueri, multa optavere puella.  
Idem cum tenui carptus defloruit ungue,  
Nulli illum pueri, nulla optavere puella.  
Sic virgo, dum intacta manet, tum chara  
suis: sed*

*Cum castum amisit, polluto corpore, florem  
Nec pueris jucunda manet, nec chara puellis.*

Caruncula  
myrtiformes.

Huic membranæ accumbunt quatuor Carunculæ, myrtiformes dictæ, quod myrthi baccas referant, ita sitæ ut quælibet unum angulum occupet, & per quadratum se respiciant, Una cæteris major & bifida, adit foramini meatus urinarii, quod redditâ urinâ claudit. Secunda, est posterior huic opposita; duæ reliquæ sunt collaterales.

Hæ carunculæ in aliis sunt breviores, in aliis longiores, crassiores, aut tenuiores. Parte exteriori membranulis quibusdam (has una cum carunculis *valvas* nominat Pinæus) relicto in medio foramine, coire traduntur, quorum cohætionem nonnulli pro hymene membrana habuerunt.

Comparatæ vulgo dicuntur ad voluptatem & titillationem, dum inflatæ & turgidæ penem constringunt.

Tali jam dicto modo solent hæ carunculæ passim ab Anatomicis describi, quasi in omnibus reperirentur, cum tamen in virginibus tantum unam solam, sed in devirginatis omnes quatuor inveniri certum sit. Præterea, secundum dictam descriptionem ex earum caruncularum cohæsione membranacea, præter hymenem adhuc alia secunda membrana virginittatis claustrum constituitur, quam ego non antea credam adesse, quam ubi quis illam mihi demonstraverit.

Riolanus, sui temporis accuratissimus Anatomicus, *anthropogr. lib. 2. cap. 34.* Haud inani conjecturâ, suspicatur tres minores carunculas (quartam, seu maximam, orificio vesicæ instar sphincteris appositam, semper inveniri tradit) non esse veras carunculas, sed esse tubercula ex disrupto hymene & corrugatione vaginæ pudendi conflata, atque refert se in puerperis septem aut plurium dierum, corrugationem illam, ad transitum foetus, omnino expansam invenisse, quæ tamen, si essent illic veræ carunculæ, in colli uteri distensione suam figuram & molem servarent, vel saltem earum aliquod vestigium remaneret, cum tamen ex iis nihil conspici possit, nisi cum pudendum rursus constringitur & coarctatur. Addit, quod tria illa corpuscula, si essent veræ carunculæ, magno impedimento forent parturientibus, quoniam asperitate & inæqualitate sua egredienti foetui, tanquam obices obstarent. Sententiæ suæ veritatem probat ab autopsia & experientia, scribitque se in dissectionibus virginum, ductis nymphis, invenisse membranam carnosam orbicularem, angusto foramine in medio pertusam, per quod pisum traduci posset, eaque membranâ laceratâ, se nullas alias vidisse carunculas, præter unam orificio vesicæ semper appositam (hanc suspicatur esse extremitatem sphincteris vesicæ) tres verò reliquas nusquam invenisse. Cum autem in aliis Venere utentibus illæ, rupto hymene oriri & emergere soleant, in virginibus verò non appareant, efficaci argumento concludit, illas tres minores carunculas nihil aliud esse, quam hujus disruptæ membranæ partes angulares, per corrugationem carnosæ vaginæ in cumulum actas. Atque sic præclarus Vir sua experientiâ egregie dissolvit dubia ista quæ hætenus inter Anatomicos de hymene & his carunculis fuerunt agitata.

Extrema uteri pars *αἰδοῖον γυναικῶν*, *Pudendum muliebre*, aliis *membrum genitale*, vulva (quasi *valva*, cum duobus valvulis & nymphis, quasi valvis occludatur) item *natura*, orificium exterius,

terius, & Cunnus, à κύν, concipere, dictum, in anteriore ossium pubis regione situm est.

**Magnitudo.** In virginibus multo minus ac densius est, quam in iis quæ pepererunt, atque in maturis superius & ad latera pilis investitur, ejusdem plerumque coloris cum capillis, sed magis crispis, quibus verecundam partem obtegi voluit Natura.

De pudendi magnitudine per signa quædam externa aliquid certi judicari posse, putat Spigelius, qui hac de re, lib. I. anat. cap. 10. ita scribit. *Pudendi muliebris proportionem plerumque ab ore licet desumere. Quibus enim os & oculi magni sunt, iis quoque amplum est pudendum; observatumque est à me multiplici experientia, omnibus crassis & pinguibus, mammaeque & ventrem amplum habentibus, amplas quoque esse vulvas. Contra quibus mamma depressa aut parva, os quoque parvum, mentumque acutum, & labia parva sunt, strictam esse & angustiore, vulvam.* Hoc ipsum etiam indicat posterior pars versiculi, suprâ, cap. 22. à nobis descripti.

**Labia.** In eo Labia duo externa occurrunt, quæ ad pubem crassiora & elatiora sunt, ibidemque coeuntia & magis protuberantia, constituunt **Monticulum Veneris**, utpote ad vestibulum ædis Veneris, situm, quem Veneri litaturi conscendunt. Versus posteriora verò sensim incurvantur, & magis attenuantur, ita ut prope perinæum in ligamentosam cutem desinant.

**Substantia.** Substantiam peculiarem carnosam, & quodammodo spongiosam obtinent, quæ in libidine inturgescit, & in partu admodum mollis ac tumida evadit. Bis mihi videre contigit in duorum civium uxoribus parientibus, post expulsum foetum, cum secundina sublequeretur, adeo laxata fuisse hæc labia, ut magna abrupta pars hepatis uterini se iis insinuaverit cumque obstetrix nesciret, quidnam insoliti illic sentiret, vocatus fuit Medicus cum chirurgo, qui labia dicto hepate infarcta, hincque præter modum tumida, & quasi frustum nigricantis carnis epullulans conspicientes, putarunt pudendū in partu dilaceratum, ac jam gangræna correptum esse: hinc extremum periculum adesse judicantes, etiam ad me concursum est: sed ego pudendum inspiciens, mox animadverti, illam nigricantem carnem esse partem abruptam hepatis uterini, quæ se labiis, introrsum dilatatis, insinuaverat, eaque forcipe exemptâ, mox utraque mulier, ab isto putato gangrænae periculo fuit liberata.

His labiis levem motum dilatationis & constrictionis adscribit Riolanus, eumque in mulieribus libidinosis, æstro Veneris agitatæ, a multis expertum fuisse tradit. Constrictionem autem fieri dicit à clitoridis musculo pudendi labiis subtenso; dilatio-

nem verò ab altero musculo, qui ligamento subjicitur. Lindanus mavult ambos hos musculos à sphinctere podicis per inguinâ protendi, eosque tenues & latos secundum totam labiorum faciem internam inferi, & cum mingendum est, labia diducere, eademque post mixtionem rursus constringere putat.

Labii adstant carnosæ mollesque duæ **Nymphae**, productiones, quas **Nymphas**, vel **Alas**, Græci πτερυγία appellant. Hæ ad ossium pubis commissuram (ubi angulo acuto junguntur, & productionem membranofam corrugatam, clitoridem instar præputii vestientem, constituunt) exordiantur, & circiter ad labiorum dimidiam partem descendunt, ubique fere sese tangentes, & inferiore sui parte obtuso angulo desinunt, cum figuræ fere sint triangularis, qua, ut & colore, referunt aliquo modo istam galli gallinacei cristam quam sub gutture habet.

**Substantia.** Substantiam obtinent rubicundam, partim carnosam, partim membranofam, mollem, fungosam tenui tunica investitam, in crassitie & magnitudine pro ætatis diversitate inæqualem: quippe communiter longitudinem internodii digiti habent, & tenues, nec multum latæ sunt in virginibus, usque ad vigesimum quintum annum; in adultioribus verò, præsertim iis quæ viro utuntur, vel pepererunt, crassiores & latiores evadunt, nunquam tamen ultra labiorum dimidiam partem descendunt. Hæ rarissime in nostris regionibus luxuriant, sed apud Ægyptios, referente Galeno, frequentissime in tantam longitudinem excrescunt, ut propter turpitudinem, & impedimentum quod adferunt, earum excisione opus sit.

Hæ nymphæ, una cum labiis, præter **Vasa** nervulos à sexto pari, vasa plurima insignia habent, per exteriorem interioremque substantiam dispersa. Arterias nempe recipiunt ab iliace interioris ramo *pudendo* dicto, copiosum sanguinem in libidine, qua inturgescunt, conferentes. Venas verò ad venam pudendam emittunt, in quam cessante libidine, sanguinem collectum rursus deponunt, quæ venæ quandoque in gravidis adeo tument, ut varices fere æmulentur.

**Usus.** Usus labiorum & nympharum est, ingressum pudendi simul occludere ac coarctare, atque uterum ab aeris externi injuriis defendere.

**Observatio.** De labiis & nymphis ante hac rarum casum Noviomagi observavi, anno 1640. Mulier quædam, nautæ uxor, una cum filia sua 24. annorum, ad me venit, & præ pudore lachrymis copiosis præmissis, conquesta est, istam suam filiam ad usum viri ineptam esse, rogavitque an illud incommodum tollere possem. Referebat filia suæ **puden-**

pudendum in principio post natiuitatem bene conformatum fuisse, verum ex quo nutritici demandata, & negligentius ab hac tractata esset, atque hinc per urinæ & stercoreis acrimoniis clunes ac pudendum, aliæque adstantes partes sæpius misere excoriata fuissent, tandem hac de causa pudendum coaluisse, relicto duntaxat paruo foramine, per quod urina & menses profluere poterant. Cum partem inspicerem, comperi labia, una cum nymphis tam exacte coaluisse, acsi illic antea nulla major apertio fuisset. Immisso per foramen stylo ferro, sentii illam consolidationem solummodo superficiei in cute esse, intus verò nihil præter naturam coaluisse. Vocato igitur chirurgo Henrico Chatborn, super immissum ferreum stylum incisionem ad iustam longitudinem fieri iussi, atque sic illa paucis diebus persanata fuit: ita ut post tres menses, desponsata viro, nullæ quæremoniæ de nimia angustia pudendi factæ fuerint; sed illud sequente anno foetum satis magnum eructare potuerit.

Rima.

Inter conniuentia labia apparet pudendi

**Rima:** diductis verò labiis & alis, apparet sectio profundior, quam recentiores

**Fossam**, nonnulli **Rimam nagnam**,

ad prioris modò dicti differentiam, appellat.

Hæc ab ossibus pubis deorsum versus

ad natium plicaturam & anum tendit, fere

transuersi pollicis latitudine ab eo distans

(hoc interstitium, quod communiter *inter-*

*faminium*, nonnullis *interforamineum* ap-

Observatio.

pellatur, nonnunquam mulieribus in ma-

gni foetus gravi partu dilacerari, & sic

rimam inferioremque vaginæ partem usque

in anum dehiscere, hocque malum in non-

nullis postea gravissime, in aliis nunquam

curari, aliquoties observavimus) & quo

magis retrorsum vergit, tanto magis in la-

tum & profundum augetur, & quasi val-

lem cavam, seu fossam cavam, naviculæ

figura (hinc *Fossa navicularis* vulgò dicitur)

efformat, atque in limbo orificii vaginæ

uterinæ terminatur. In fossæ medium in-

greditur orificium colli uterini, seu vagi-

næ, vel canalis penem recipientis: cui su-

periore parte adstat urinarius meatus, per

quem urina è vesica effluit. Dictum illud

colli uterini, seu vaginæ, orificium non-

nunquam à rhagadibus, vel à cicatrice per

exulcerationem inducta, in mulieribus adeo

angustatur, ut maritos amplius admittère

nequeant: interdum etiam in violento par-

tu valde dilaceratum penitus coalescit, mu-

lioremque prorsus imperforatam relinquit,

aut nonnunquam exiguo tantum foramine

pertusam. Præclara horum casuum exempla

scribit Bauhinus, *anat. lib. 1. cap. 39.* hu-

jus orificii occlusionem in virgine quadam,

& à chirurgo factam apertionem, notavit

Cabrolus, *observat. 23.*

Superius verò parte media inter alas pro-

minet particula, quæ Græcis κλειτορίς,

vulgò Clitoris appellatur, ἀπὸ τῆς κλει-

πείζειν, vel κλειοειδέειν, id est, lascivire,

& impudentius muliebria constrictare. Avicen-

næ Albathara, id est, virga; Albucasi

**Tentigo** dicitur: virgæ enim virili re-

spondet figura, situ, substantia, spirituum

repletionem & erectionem, ab eaque differt

sola magnitudine & longitudine.

Est autem corpus exiguum teres, con-

stans è duabus nervosis, intusque nigrican-

tibus, & spongiosis portionibus, utrim-

que ortis ab ossium ischy tubure, tanquam

è duobus cruribus, ad conjunctionem

ossum pubis concurrentibus. Illa autem

principia seu crura, appellat Riolanus, li-

gamenta candida.

Usque ad hæc crura finibus suis perve-

niunt ligamenta uteri rotunda, quæ ego

antehac, à Spigelio seductus, malè putavi

esse vasa semen deferentia.

Extremitas, seu glans clitoridis **Tentigo**

dicitur, substantiam habens uti glans penis

virilis, quam ex conjunctione alarum te-

nuissima quædam cutis, quasi præputium,

tegit. Hujus apici foramen oblongum, in-

star foraminis penis virilis, inest, sed non

pervium.

Obtinet clitoris, ut penis in viris, mus-

culos quatuor, eidem officio inservientes:

duos superiores rotundos, à coxendicis osse

exortos; & duos inferiores, latos ac carno-

fos, à sphinctere podicis prodeuntes, qui re-

tro pudendi labia perreptantes, clitoridi

adnectuntur. Hos putat Regn. de Graef,

non tam erectioni clitoridis, quam contra-

ctioni orificii vaginæ uterinæ inservire. Pi-

næus tantum tres musculos agnoscit

Arterias recipit ab arteriis pudendis, san-

ginem spirituosum magna copia in libidine

& coitu advehentes, quem postea venæ

pudendæ referunt ad venas majores. Præ-

ter has, Regn. de Graef observavit etiam

similia vasa ab hæmorrhoidalibus ad clitori-

dem pervenire. Hæc autem vasa commu-

nificantur clitoridi, ubi duo crura cœuntia

tertium ejus corpus constituunt, cujus sub-

stantiam exilibus tantum ramulis ingrediun-

tur, eamque, una cum per nervos affluen-

te spiritu animali, in libidine intumescere

faciunt. Notat idem Regn. de Graef, ve-

nas dextri & sinistri lateris, ut plurimum,

per anastomoses simul copulari, antequam

ad clitoridis latera descendunt, & ad ple-

xum retiformem aliasque pudendi partes ex-

currunt: in utriusque verò lateris arteriis

rarissime anastomoses observari.

Præter sanguifera vasa, etiam nervulum

(hunc mediocrem magnitudinem habere, &

per dorsum clitoridis omnesque pudendi

partes excurrere, observarunt hodierni

ocu-

clitoris.

Substantia.

Tentigo.

Musculi.

Arteria &amp; Venæ.

Nervi.

oculatiores Anatomici) habet à sexta conjugatione, qui exquisitissimum ei sensum, & in actu Venereo titillationem jucundissimam confert, unde in hac parte oblectationis mulierum præcipua sedes est, dum coitu utuntur: unde Bauhino Oestrum Veneris, Columbo & aliis Dulcedo amoris nominatur: Illa tamen voluptuosa titillatio maxime in ejus tentigine seu glande, perficitur.

Clitoris  
offens.

Rarissimum, imò vix ullibi unquam auditum est, quod, de clitoride notavit Bartholinus, *hystor. anat. cent. 3. hist. 59.* scilicet eum osseum factum fuisse in scorto quodam Veneto, quod propter duram hujus partis exstantiam, amasios in amplexu ita offendebat & lædebat, ut sæpius, inflammatione oborta, chirurgorum auxilium implorare cogerentur.

Exitus urina-  
rii meatus.

Paulo sub clitoride, supra vaginæ uterinæ ostium, inter nymphas, conspicuus fit exitus urinarii meatus, qui nonnihil prominens, superioremque carunculam (de hac ante dictum) constituens, est sphincteris vesicæ extremitas, quo sphinctere, post redditam urinam, vesicæ orificium rursus constringitur, & occluditur.

Vesica cer-  
vix.

Prostata  
muliebres.

Cervix vesicæ in mulieribus adultis fere duorum transversorum digitorum longitudinem obtinet, eamque sphincter musculus, fibris carneis donatus, ambit, totam ejus longitudinem cingens. Ipsa verò cervix intus constat tenui membrana, quam circumcingit substantia membranosa, & quasi glandulosa, albicans, transversè circiter digiti crassitiem habens, plurimisque porulis, maxime circa meatus urinarii exitum, donata, per quam ductus quidam majusculi excurrentes, prope meatus urinarii exitum, atque etiam in antica vaginæ uterinæ parte, terminantur. Per hos autem ductus putant nonnulli pituitosos illos vitiososque serosos humores, qui mulieribus sæpe diu profluunt, erumpere. Verum Regnerus de Graef, accuratissimus Anatomicus, haud inani conjectura, isti substantiæ crassiori urethræ circumjectæ prostatarum usum adscribens, existimat in ea seminalem quendam subviscidum succum, aliquali acrimonia & falsedine præditum gigni, qui mulieres salaces facit, ac per antedictos ductus & porulos erumpens, pudenda in coitu delectabiliter lubricat. Idem Regn. de Graef, qui in viris materiam illam viscidam in gonorrhœa effluentem rarius è testibus aut vesiculis seminariis, sed frequentissime ex prostaticis profundi judicat (ut infra dicetur cap. 28.) etiam putat similem mulieribus gonorrhœa laborantibus ex hisce partibus (quas earum *prostatas* nominat) solis eructari, idque, *lib. de organ. mul. cap. 9.* confirmat tali exemplo.

Gonorrhœam verò, inquit, ex glandoso corpore provenire, & per lacunas circum & in meatu urinario collectas erumpere, cadaveris cujusdam mulieris, hoc vitio infecta, dissectio palam fecit, nam utero ejusque vagina innoxia, corpus glandosum, sive *prostatas* solum male affectas offendimus.

Dictum autem orificium, seu cervix vesicæ, propter substantiæ mollietatem, facile dilatari potest, ita ut per eam vel sponte à copiosa urina calculi majusculi propellantur & excidant: vel iidem dilatatione instrumentis facta, absque ulla incisione è vesica educi commode possint, sicut illud aliquoties à lithotomis feliciter factum vidimus.

Magnitudo clitoridis communiter exigua est, atque sub nymphis in media pubis parte pinguiore, seu in rimæ majoris apice, fere latet in principio, deinde in adolescentibus leviter prominet, atque cum inturgescit libidinem stimulat. Magnitudo.

Riolanus bene notat, hanc partem in viventibus, cum omnia calore & spiritu turgent, manifestè cerni, præsertim in libidinosis, quæ Venerem voluptuose excuerunt: at in demortuis mulieribus vix emicare, propter molem exigua, quæ concidit dissipatis spiritibus. Hanc tamen in cadavere 24. annorum, ante aliquot annos in theatro publicè clarissime demonstravimus.

Contingit nonnunquam ut, præter communem Naturæ ordinem, hæc pars in majorem longitudinem, ad formam penis virilis excrescat (hinc forte *Penis*, & *Virga muliebris*, nominatur) ita ut hujusmodi mulieres parte illa abusus fuerint, cum aliis sui sexus coeuntes, atque hinc *Confricatrices*, antiquitus verò *Tribades* appellatæ sunt. Sic Platerus clitoridem in quadam muliere collum anserinum crassitie & longitudine æquasse vidit. Riolanus & Schenkii ejusdem longitudinem minimi digiti observarunt. Regnerus de Graef vidit infantem primo natum, cujus clitoris tantam cum membro virili similitudinem referebat, ut obstetrix aliæque præsentis mulieres illum masculinum esse judicaverint, & masculino nomine in baptismo insigniri jussissent. Plempius scribit de quadam Helena, quæ hac parte multas foeminas exercebat, & virgines vitiabat. Ego ante multos annos, in muliere quadam Monfurtensi, licitoris uxore, ejus longitudinem & crassitiem mediocris mentulæ virilis vidi, quod incrementum ei fieri contigerat, postquam ter quaterve peperisset. Confricatrices.

In hermaphroditis hæc ipsa pars est, quæ *Hermaphro-  
diti.* increfcens virgam virilem effingit, ut ex eo patet, quod in rima ejus glandis nulla manifestè conspicua perforatio observetur, quamvis testes ei foris à lateribus adstare videan-

videantur. Talem hermaphroditum memini me quondam in Gallia, prope Andegavum vidisse, ætatis 28. annorum, qui circum os, instar viri, totus barbatus erat, sed tamen muliebri vestitu utebatur, suaque genitalia pro vili prætio conspicienda exhibebat. Huic superiore pudendi parte clitoris excreverat ad medii digiti longitudinem, & mentulæ virilis crassitiem, cum glande, frenulo, & præputio, ut in viris esse solet, excepto quod fissura glandis non esset pervia: inferius meatus urinarius & vagina uteri adstant, ut in mulieribus: in singulis pudendi labiis unus testis continebatur. Similem hermaphroditum Anglum, ætatis 22. annorum, anno 1668., cum plurimis aliis spectatoribus vidimus hic Ultrajecti: de quo referebat ejus conductor, quod perfecta foemella natus esset, & inter quintum sextumque annum ei genitalia immutari cœpissent, atque decimo ætatis anno ei penis omnino conspicuus factus fuisset. Penem ejus protuberantem vidimus circiter ad semi digiti longitudinem, sed in rima glandis non perforatum (rima erat ejusdem figuræ ut in pene virili) forma peni virili non ab similem, cui nympharum coalitus præputium efformabat, quo glans ad dimidium tegebatur & detegebatur, ut in viris. Hunc penem per cogitationes libidinosas ad digiti longitudinem extendi, referebat ejus conductor. In singulis pudendi labiis, tanquam in singulis sacris seu scrotis, concludebatur unus testis. Paulo infra clitoridem meatus urinarius & uteri vagina (id est, utriusque introitus) consistebant. Narrabat etiam conductor, ei menstruas evacuationes singulis statis menstruis periodis fieri, ut aliis mulieribus, & in magna libidine semen etiam foras profluere, sed ipsum hermaphroditum nescire, an per penem, an verò per muliebria, seu vaginam uterinam efflueret. Mammæ non erant multum tumidæ: pectus & femora nonnihil hirsuta, virile quid designare videbantur, ut & vox gravis, atque etiam capilli in capite copiosissimi & crispi, nec non barbæ conspicua rudimenta circum os in labiis erumpentia. Vestitu muliebri tunc utebatur, quem tamen, propter barbæ incrementum, sequenti anno, cum me domi meæ rursus inviseret, eum rejecisse, & virilem vestitum assumpsisse vidi. Ex quibus omnibus fati patet, hujusmodi hermaphroditos non esse verè utriusque sexus participes, sed esse re vera foeminas, quibus genitalia sunt male conformata, scilicet testes extra abdomen in labia descendunt, & clitoris in nimiam longitudinem increvit.

Hic jam grave dubium occurrit, scilicet an confricatrices & hermaphroditi, cum aliis mulieribus coeuntes, etiam semen per

clitoralem penem emittant, & in uterum injiciant? Affirmativa mihi antehac adeo placuit, ut illam in prima Anatomes meæ editione, defenderim, cum illam ratione & experientiâ confirmari posse judicarem. *Ratione*: quia non magis mirum videri debere existimabam, semen per rimæ clitoridis invisibiles poros, tempore libidinis & coitus laxiores, posse transire, quam in viris potest transire à testibus ad vesiculas urinarias, per invisibiles poros vasorum deferentium. Adde, quod illæ confricatrices in isto coitu non minorem voluptatem perferant, quam viri in suo coitu per seminis emissionem. *Experientiâ*: quia ego ipsemet antehac mulierem quondam, haud infimæ sortis novi, quæ mihi conquesta est, se in prima juventute, libidinis stimulos sentientem, sæpissime clitoridem digito fricare, sicque semen sibi summa cum voluptate provocare solitam fuisse: sed progressu temporis hanc malam consuetudinem in morbum abiisse, ita ut tandem, si pudendum, sive à pulvinari cum sederet, sive à propria bracca cum ambularet, sive alio quocunque modo nonnihil fricaretur, mox ipsi invitæ semen efflueret, neque illud ad voluntatem retinere posset, atque hinc ad illud malum à me remedium petere cogeretur. Dicebat insuper, se certissime sentire, clitoridem sibi in libidinosis ac Veneris cogitationibus aliquantulum intumescere & prurire, & se certò putare semen digiti frictione provocatum ex illa particula (clitoridem designabat) exsilire. Huc etiam accedat insignis historia, quam Jacobus Duval, *tract. de hermaphrodit.* à cap. 62. ad 81. longo sermone, cum totius litis in curia actæ processu, exactissime describit: ubi inter alia refert, cap. 64. quod mulier quædam vidua, N. N. quæ ex marito defuncto duos filios susceperat, atque etiamnum in vivis habebat, & jam per ignorantiam politicorum cum hermaphroditico secundo nupta erat, confitebatur dictum hermaphroditum (quem illa virum esse putaverat) eam una nocte quater invisisse, & tam strenue & naturaliter eam exagitasse, ut olim cum defuncto suo marito nunquam melius majoreque cum voluptate coisset. Dictæ rationes & historiæ certissimè probare mihi quondam visæ sunt, quod confricatrices & hermaphroditi, cum aliis foeminis coeuntes, semen per clitoridem ejaculentur, sicut viri per penem. Verum quia hoc seculo Anatome indies magis magisque excolitur, atque in ea perficienda plurimi oculatissimi viri (inter quos ego lubens minimus haberi volo) graviter desudant, hinc factum, ut aliquoties reiteratâ atque accuratiore inquisitione à me factâ, compererim ligamenta uteri rotunda non esse vias per quas semen ad clitoridem deferri

Observatio.

An per clitoridem transeat semen.

deferri potest (quod antehac, cum Spigelio & Vesslingio, malè credideram) nec verè urethram, aut aliud quid simile, in clitoride adesse, nec etiam per ejus rimam ullum semen transire posse, atque hinc à priorè meà sententiā mihi necessàrio resiliendum esse, idque tanto magis, quia pro ejus defensione allatæ rationes & historiæ, tanti ponderis non sunt, ut eam satis defendere queant. Nam, quantum ad istam mulierem, quæ clitoridis frictione feminalem materiam prolaciebat, maximè verosimile est, viscidam illam materiam ex antedictis prostaticis erupisse in vaginam (sicut viris frictione penis semen foras erumpit) & per ejus ostium mox foras prodeuntem, etiam clitoridem humectasse, atque ex eo errore mulierem illam putasse, materiam ei ex clitoride prodire. Illud ipsum dicendum de confiatricibus alias mulieres exagitantibus: nec non de isto hermaphrodito à Duval relato, cujus uxor putavit quidem illum semen per clitoridem prolongatam in uterum ejaculari, sicut alii viri per penem id facere solent, verum ille error ex eo processit, quod dum ille pene suo clitorali ejus uteri vaginam fricaret, mulieri ex frictionis illius dulcedine viscosa illa materia è prostaticis ejus, magna cum voluptate eruperit in vaginam, qua voluptate abrepta ac decepta, putavit illam sibi fieri à femine ab hermaphrodito in uterum ejus ejaculato. His itaque omnibus pensatis consideratis, pro certissimo statuendum est, nihil seminis muliebris per clitoridem excerni.

*Digressio.*

Atque sic descripsimus omnes partes muliebres generationi inservientes: jam, colophonis loco, adhuc duo inquirenda videntur. *Primum*: an mulierum genitalia solo situ à virorum genitalibus differant. *Secundum*: an mulier in virum mutari possit.

*An genitalia mulierum & virorum solo situ differant.*

Quantum ad prius, illud indicare & docere videtur Galenus, *libris de usu part. & anatom. administ.* quem hac in parte sequuntur multi, cum Græci, tum Arabes, qui unanimi fere consensu mulierum genitalia non nisi solo situ à virorum genitalibus differre affirmant. Et quæ in mulieribus, ob frigidiorē intemperiem ac naturæ debilitatem intus delitescunt, in viris, ob eximium calorem & naturæ vim, foras fuisse propulsa. Quippe si uterus foras protruderetur, tunc inversus propenderet, ejusque externa, lævis, & æqualis pars fieret interna, & interna rugosa fieret externa, sicque scrotum efformaret, ac qui ei intra abdomen à lateribus accumbunt testes, in isto scroto interiore containerentur, quod scrotum exterius media linea foret distinctum, sicut uterus distinguitur interius, cui clitoris protrusa penem superius accumbentem adformaret. Aut si scrotum viri

versus interiora compelleretur, tunc interius intra abdomen uteri formam haberet, & qui in eo continebantur testes, tunc utrimque à lateribus ei accumberent, & penis retractus occultaretur, ut clitoris.

Verum etsi hoc admodum ingeniosum sit commentum, verisimilitudine aliqua exornatum, tamen certum est, utriusque sexus genitales partes, licet in nonnullis mutato situ convenire videantur, in multis nihilominus plurimum differre. Nam, 1. In foeminis arteriæ & venæ spermaticæ sunt multo breviores, & magis contortæ, quam in viris. 2. Desideratur in iis corpus varicosum seu pyramidale, ex arteriarum, venarumque, ante ingressum in testes, efformatum. 3. Item desiderantur parastatæ & vesiculæ seminariæ. 4. Prostatae iis longe aliter sunt efformatæ, quam viris. 5. In viris defunt tubæ, & longe alia sunt vasa deferentia, quam in mulieribus. 6. Testes inter se differunt magnitudine & figura, suntque in foeminis multo minores, humidiores, & flaccidiores, quam in viris. 7. Testium virorum substantia constat ex seminariis vasculis (admixtis paucioribus sanguiferis) sibi invicem intertextis, foeminarum verò ex membranis, vasis, calicibus, vesiculis, aliisque corporibus. 8. Clitoris longitudine & crassitie à pene virili multum differt, nec conspicuo ullo foramine perforatur ut penis. 9. In clitoride non adest urethra. 10. Scrotum ab uteri substantia longissime differt, utpote quæ in utero densa, compacta, & nervosa est, atque in imprægnatis ad duorum circiter digitorum crassitiem increfcit, in scroto autem mollis, & cutis rugosa est, nec unquam in crassitie quidquam increfcit. 11. In brutis, quorum uterus cornutus est, satis liquet ab eo inverso scrotum non posse efformari, licet eorum masculi scrotum habeant instar scroti virorum; in eorumque foemellis, nec clitoris, nec quidquam peni simile, hætenus fuit observatum: nec etiam versus interiora intruso scroto, penis clitoridis vicem & locum subire posset, cum in cane, vulpe, lupo, aliisque variis, penis intus offeus sit: atqui si verum foret genitalia in hominibus solo situ differre, videtur illud ipsum etiam fieri debere in brutis, quod tamen quilibet facile animadvertit, nec fieri, nec fieri posse. Ex quibus omnibus satis liquet, non solo situ, sed figura, numero, substantia, magnitudine, & usu, utriusque sexus genitales partes à se invicem differre.

Quantum ad posterius, scilicet, an mulieres in viros mutari possint, illud, tanquam certissimum, videtur persuadere experientia, & historiographorum auctoritate confirmari. Nam variz extant historiæ mulierum, postea in viros mutatarum.

*An mulier in virum mutari possit.*



Plinius, *lib. 7. cap. 4.* scribit, L. Licinio Crasso, & G. Cassio Longino, coſſ. Caſſini puerum factum fuiſſe ex virgine, juiſſuque aruſpicum deportatum in inſulam deſertam. Item refert Licinium Mutianum prodidiſſe, viſum à ſe Argis puellam, cui poſtquam nupſiſſet, mox barba & virilitas provenit, ita ut poſtea uxorem duxerit: ejuſdemque ſortis etiam Smyrnæ puerum à ſe viſum fuiſſe. Addit Plinius, ſe ipſum in Africa vididiſſe L. Coſſicium, civem Triſditanum, qui ſœmella, & jam ſponſa exiſtens, ipſo nuptiarum die in marem fuerat mutatus. Sic inter recentiores teſtatur Volateranus Cardinalis, ſub Alexandro VI. Pontifice Romano, ſe vididiſſe virginem, cui nuptiarum die mentula eruperat. Pontanus ſcribit, Cajetanam mulierculam, piſcatoris uxorem, per quatuordecim annos ſœminam, virum factam fuiſſe: idemque contigiſſe Emiliæ, conjugii Antonii Spenſæ, civis Ebulani, anno decimo poſtquam nupſerat. Similia exempla, etiam referunt Antimæologii auctor, Jacobus Duval, Merula, Marcellus Donatus, Amatus Luſitanus, aliique plures. Quæ omnia propoſitæ quæſtionis affirmativam partem abunde confirmare videntur.

Verum ſi rem penitus inſpiciamus, ſatis apparet omnes hiſtoricos, qui tales hiſtorias conſcripſerunt, rumore vulgi fuiſſe deceptos, propterea quod rem ipſam non ſatis prudenter ipſimet inquiſiverint, unde autem hic error proceſſerit, adſcribam.

I. Contigiſſe legimus, nonnullis masculis, ſed rariffime, ab ipſo ortu penem intus in abdomine delituiſſe (ſicut teſtes in inguinibus deliteſcere non ſemel ipſimet vidimus) atque hinc obſtetrices & mulierculas, ob penem tanquam in rima reconditum, judicaſſe infantem natum eſſe filiam, & pro filia baptiſari curaiſſe (hujusmodi errorem ex Pinæo refert Laurentius, *anat. lib. 7. quæſt. 8.*) cum tamen poſtmodum circa juventutem, occultus penis in libidine inturgeſcens, ex anguſto loco eruperit: tales autem viri non fuerunt primo ſœminæ, licet à ſciolis mulierculis, aliſque imperitis hominibus, tales fuiſſe judicati, & tandem prorumpentibus per libidinem genitalibus, ex ſœminis viri facti crediti fuerint. Atque tales fuerunt omnes illi caſus ex Plinio & Volaterano commemorati, in quibus nuptiarum tempore, propter ſummam libidinem, tumefactus deliteſcens penis erupit.

II. Nonnullis ſœminis, ut ſupra commemoratum, clitoris ad penis virilis magnitudinem poſtmodum, ætate jam adulta, excreſcit, ita ut ea parte Venerem cum aliis ſui ſexus exercere poſſint, & cum illud contingit, haud mirum eſt ſciolum vulgus (quod reliquas hujus caſus circumſtantias

non admodum curioſe inquiri, neque ſuperſtes pudendum muliebri conſiderat) hinc ſibi perſuadere, tales ſœminas in viros eſſe mutatas: atque tales videntur fuiſſe illi caſus ex Pontano antea relati.

III. Non ſemel contigit, præcipue inter magnates, matres, propter aliquod periculum, quod vel ab inimicis, vel ab hæredibus, filiis ſuis intendi metuebant, vel ſciebant, prudenti conſilio ſexum maſculinum celaiſſe, & illos ſœmellas eſſe ſimulaiſſe, ac muliebri veſtitu per totam adoleſcentiam induiſſe: tandem verò filios rejecto muliebri amictu, virilia veſtimenta aſſumpſiſſe, atque ſic à vulgaribus exclamatum fuiſſe, filias in filios eſſe mutatas. Ita tempore Ferdinandi primi, Neapolitano- rum regis, dicuntur Carola & Francisca, duæ filiæ Ludovici Guerna, quinto decimo ætatis anno ſexum mutaiſſe. Ego hic malim dicere, *veſtitum mutaiſſe*, nam, procul dubio, ut virilis ſexus celaretur, tam diu muliebri veſtitu fuerunt induti, quem quinto decimo anno rejicere debuerunt, tam propter vocem graviorem factam, quam propter barbæ exordium in facie apparere incipiens. Vult tamen Fulgoſus, *lib. 1. cap. 6.* iis eo tempore virilia membra erupiſſe: quod minus verofiſſime videtur, cum præter earum matrem nullus, tanquam oculatus teſtis, ea de re quidquam teſtatus ſit: & ſi fortè res ita verè ſe habuerit, procul dubio peracta fuit iſto modo, quem paulo ante, num. 1. deſcripſimus.

IV. Contingit interdum hermaphroditos naſci, & quia vulgo abominabile cenſetur, ſi quis utriuſque ſexus particeps eſſe dicatur, hinc ſolent matres, ab ipſis incunabulis vitium illud celare, & tales liberos in muliebri veſtitu educare: quibus ſi forte circa juventutem barba circum os excreſcat (hoc in duobus hermaphroditis ſupra deſcriptis à me viſum eſt) coguntur tunc veſtes etiam mutare, atque ſic ex ſœminis in viros mutari dicuntur.


V. Contingit interdum propter magnam temperamenti mutationem, mulieribus barbam circum os excreſcere, & vocem ingraveſcere, unde vulgus tunc facile dicit illas in viros mutatas eſſe. Sic Hippocrates, *lib. 6. epid.* ſcribit de duabus mulieribus, Phaëtula, Pythiæ uxore, & Lariffa, Gorrippi conjugæ, quod propter ſuppreſſos menſes, voce & barba tenus in viros degeneraſſent.

Ita ut certiffimum ſit, nullam ſœminam unquam ſexum mutaiſſe, aut mutare potuiſſe, ſed quæcunque hac de re ſcripſerunt hiſtorici, eſſe quidem non malevolas, ſed inſontes fallacias: nam illi ipſimet nimis creduli, rumore vulgi fuerunt decepti, atque ſic rei veritatem non ſatis accurate perſcrutantes, præter ſuam intentionem

lectori-







lectoribus falsa obtruserunt, quibus fama aliquam veritatis speciem adjecit.

Denique, colophonis loco hoc etiam addendum, quod si fœminæ aliquando in viros, ut fertur, mutatæ fuissent, procul dubio etiam nonnunquam viri mutati fuissent in fœminas: quod tamen prorsus inauditum (nugæ sunt quæ hac de re aliqui poetæ scripserunt) ratio est, quia men-

tula intus, quasi in foramine muliebrem rimam effingente, recondita, potest circa juventutem libidine inturgescens foras erumpere, & sic quæ mulier esse putata fuerat, quasi in virum mutari: sed foris propendens nulla unquam de causa potest introrsum retrocedere, & sic quasi muliebris rima effingi.

## T A B U L Æ VI. EXPLICATIO.

Hæc Tabula ostendit mulierum partes Genitales à Corpore exemptas, & in situ naturali collocatas, à Regn. de Graef accurate delineatas.

- |   |   |
|---|---|
| <p>AA. <i>Arteriæ magnæ truncus.</i><br/> BB. <i>Venæ cavæ truncus.</i><br/> C. <i>Vena emulgens, sive Renalis dextra.</i><br/> D. <i>Vena emulgens, sive Renalis sinistra.</i><br/> E. <i>Arteria emulgens sive Renalis dextra.</i><br/> F. <i>Arteria emulgens sive Renalis sinistra.</i><br/> GG. <i>Renes.</i><br/> HHH. <i>Uretheres abscissi.</i><br/> I. <i>Arteria spermatica dextra.</i><br/> K. <i>Arteria spermatica sinistra.</i><br/> L. <i>Vena spermatica dextra.</i><br/> M. <i>Vena spermatica sinistra.</i><br/> NN. <i>Arteriæ Iliacæ.</i><br/> OO. <i>Venæ Iliacæ.</i><br/> PP. <i>Rami arteriæ Iliacæ interni.</i><br/> QQ. <i>Rami arteriæ Iliacæ Externi.</i><br/> RR. <i>Rami venæ Iliacæ interni.</i><br/> SS. <i>Rami venæ Iliacæ externi.</i><br/> TT. <i>Arteriæ Hypogastricæ ad uterum &amp; Vaginam delatæ.</i><br/> VV. <i>Venæ Hypogastricæ dictas arterias comitantes.</i><br/> XX. <i>Arteriæ Hypogastricæ rami ad Vesicam urinariam tendentes.</i></p> | <p>YY. <i>Venæ Hypogastricæ rami ad Vesicam delati.</i><br/> ZZ. <i>Arteriarum umbilicalium portiones.</i><br/> a. <i>Uteri fundus communi tunica obvolutus.</i><br/> bb. <i>Ligamenta uteri rotunda, pro ut ejus fundo committuntur.</i><br/> cc. <i>Tubæ Fallopiæ in situ naturali.</i><br/> dd. <i>Tubarum Fimbriæ.</i><br/> ee. <i>Tubarum foramina.</i><br/> ff. <i>Testiculi in situ naturali.</i><br/> g. <i>Intestini recti portio.</i><br/> h. <i>Uteri cervix, communi tunica (ut vasa melius conspiciantur) denudata.</i><br/> i. <i>Vaginæ uteri pars anterior à vesica urinaria liberata.</i><br/> k. <i>Vesica urinaria contracta.</i><br/> ll. <i>Vasa sanguinea per vesicam excurrentia.</i><br/> mm. <i>Musculus Sphincter collum vesicæ constringens.</i><br/> n. <i>Clitoris.</i><br/> oo. <i>Nymphæ.</i><br/> p. <i>Meatus urinarius.</i><br/> qq. <i>Labia pudendi.</i><br/> r. <i>Vaginæ orificium.</i></p> |
|---|---|

## CAPUT XXVII.

## De Constitutione partium genitalium muliebrium in gravidis.



Uamvis partes muliebres generationi inservientes ita se habeant, ut modo à nobis descriptum, attamen hic necessario subjiciendum videtur, quomodo constitutæ sint in mulieribus gravidis, & qualis earum sit differentia inter imprægnatas & vacuas.

Uterus in  
vacuis.

Uterus in mulieribus vacuis magnitudi-

nem habet nucis juglandis, aut ovi columbini majusculi, substantiam verò carnosam, nerveam, solidam, duriusculam, cum cavitate interiore satis exigua; quam constitutionem etiam fere retinet in principio conceptionis, cum circum retentum semen constringitur.

Increcente foetu substantia illa paulatim <sup>In imprægnatis.</sup> mollis spongiosaque redditur, & sensim quanto

quanto magis increfcit foetus, tanto magis illa ampliatur, uterusque crassescit, ac simul carnosior & rotundior evadit, ficque una cum foetu increfcit ejus domicilium (ut supra dictum, *cap. 25.*) ita ut tandem circa elatiorem fundi partem, pollicis, imò sæpe duorum fere digitorum transversorum crassitiem acquirat.

*Mammarum tumor.*

Cum ultra dimidium ingravidationis devenit, mammae incipiunt intumescere, ex iisque pressione lac, primo aquosius, postea crassius, profluere. Eodem tempore papillarum areola amplificatur, & papillae antea contractae, tunc laxiores, magisque tumidae fiunt: labia quoque pudendi tumidiora evadunt.

*Orificii uteri occlusio.*

Orificium uteri interius à principio conceptionis coarctatur, & toto gestationis tempore exactè connivet, atque viscoso quodam muco occluditur, ita ut nihil ex utero effluere, nec quidquam extrinsecus in eum intromitti possit, nisi fortè cum in coitu admodum libidinoso dehiscens, & semen viri admittens, superfœtatio fit, quod rarissimè contingit. Idem illud orificium primis mensibus durum, postremis verò molle & pulposum existit.

*Situs intestinorum.*

Increfciente uteri magnitudine, gracilia intestina ad ejus latera secedunt. Si foetus versus dextrum latus magis inclinet, intestina propelluntur in sinistrum, & contra: atque hinc fit, quod mulieres nonnunquam putent se duos foetus gestare. Eo tempore etiam omentum sursum propellitur: de quo notat Riolanus, quod si ventriculum circumstet, mulieres toto ingravidationis tempore inappetentes esse.

*Testium situs.*

Testes, qui in vacuis rotundiores & laxiores sunt, ac superiori utero accumbunt, in gravidis, propter uteri incrementum videntur descendere, & primo mediis, postea inferis uteri lateribus accumbere. Præterea etiam post sextum ingravidationis mensem, contractiores, planiores, & nonnihil oblongi evadunt, ac venæ quoque spermaticæ arteriis multo majores reperiuntur.

*Cervicis status.*

Cervix sursum retracta, longior quidem, sed arctior est.

*Orificii laxatio.*

Duobus circiter ante partum mensibus, interius uteri orificium laxius & tumidius evadit, sensimque appetente partu dilatatur, ad modum rosæ se explicantis, quasi Natura viam exiturienti foetui præpararet, eo in opere haud parum adjuncta ab erupturientis foetus, tum pondere graviore, tum validiore agitatione.

*Mutatio labiorum & cervicis.*

Ultimo mense pudendi labia molliora & magis tumida evadunt, atque cervix seu vagina uteri, pondere & mole foetus pressa, ita abbreviatur, ut osculum uteri immisso digito facile attingi possit.

Ultimis duabus tribusve gestationis

septimanis supradictum uteri orificium humore quodam glutinoso ac viscoso irrigatur & imbuitur, ut eo laxior fieri, & sic facilius sine violentia dilatari ac dehiscere, tandemque foetui exeunti liberiores transitum concedere possit.

A testibus ad tubas, uteri fundum, & cervicem, vasa sunt solito majora & manifestiora. Notat etiam Cornelius Gemma, vasa ipsius uteri post multos partus distenta ac varicosa fieri. Nimis hyperbolicum esse videtur, quod scribit Bartholinus, vasa scilicet uteri tempore gestationis adeo turgere sanguine, idque præcipue circa partum, ut emulgentium amplitudinem, vel mediam inter arteriam magnam & venam cavam induant. Ego admodum magnam quidem, sed nunquam tantam magnitudinem reperi. Verum ille forte hoc scribit ex inspectione alicujus elephantis. Interim tamen illud ipsum confirmat Regnerus de Graef: *lib. de mulier. organ. cap. 8.* In gravidis, inquit, aliquando ea vasa in tantam latitudinem dilatata vidimus, ut facile digitum in earum capacitatem immitteremus, quæ cessante lochiorum fluxu, ita denuo contrahuntur & coarctantur, ut sedecim circiter dierum spatio, cum utero, pristinam fere figuram recuperent, nisi forsitan in iis quæ saepius uterum gestant, propter eorum extensionem magis contorta & flexuosa remaneant.

*Vasorum magnitudo.*

Causa autem ob quam vasa sanguinea in gravidis tantopere præter modum dilatantur, vulgo traditur esse necessitas copiosioris sanguinis, eò loci tunc ad nutritionem foetus requisiti. Verum cum propulsio sanguinis per arterias satis celeris fiat ad omnium partium nutritionem, idque sine vasorum extraordinaria aliqua dilatatione, eaque etiam sufficere possit ad nutritionem foetus in utero, longe alia istius rei causa esse videtur, scilicet, quod ab incremento substantiæ uteri, & ponderosa mole incrementis foetus, venæ uteri præter solitum compressæ, non tam liberam sanguinis circulationem, atque in vacuis, permittant, cumque per arterias multo plus influat, quam per compressas venas commode transire, & satis citò ad cor remitti possit, hinc fit quod sanguis, propter tardiores illam circulationem, qui interea per arterias æquali ductu impellitur, ibi majore copia detentus & accumulatus, paulatim vasa sanguifera venosa magis magisque distendat (sicut fit in varicibus) ita ut circa partum insolitam maximamque amplitudinem consequantur: quæ expulso tandem foetu, sicque dicta compressione cessante, & circulatione eo loci rursus libera factâ, intra paucos dies per ipsorum vasorum fibras iterum plane contrahitur, & sic vasa ad pristinum statum redeunt.

*Causa magnitudinis.*

Eodem

Uteri de-  
crementum.

Eodem modo etiam ipsa crassa uteri substantia non minus quam vasa, statim post partum, fluentibus lochiis, incipit rursus imminui, & quasi exarescere, sicque paucis diebus ad pristinam soliditatem & duri-

tiem redire, idque aliis sex septemve, aliis quatuordecim, aliis plurium dierum spatium.

Hæc omnia multarum gravidarum & puerperarum accurata inspectio docuit.

## CAPUT XXVIII.

## DE SEMINE.

Digressio.



Ost examen partium generationi inservientium, postulat ordo, ut ad historiam fœtus in utero contenti deveniamus.

Verum antequam hanc aggrediamur, pauca quædam de principiis fœtus præfabimur: Hoc scilicet capite acturi de semine humano (brevitatis gratia, ulterius ad quælibet alia semina non extendemus) sequente verò de Conceptione & fœtus formatione.

Nomina.

Semen verò, modò Sperma, modò Genitura, appellatur: & quamvis Aristoteles, lib. 1. de ort. animal. cap. 18. distinctionem aliquam statuere videatur inter genituram & sperma, quasi illa sit semen coëuntium, hoc non coëuntium, ut plantarum: & quamvis alii genituram solummodo accipiant pro eo semine, quod absolute fecundum appellari potest, alii pro eo quod constat ex virili & muliebri semine simul mixtis, sperma verò pro quocunque semine, attamen, quia ipse Philosophus passim alibi hæc nomina confundit, sicut illud ipsum quoque facit Galenus, cum multis aliis, nos quoque his nominibus pro una eademque re utemur.

Quia autem in generatione duo semina consideranda veniunt, unum masculinum, alterum foemininum, quorum neutrum seorsim quidquam producere potest, sed quæ simul debito modo juncta generationem perficiunt, utilissimum futurum arbitror (quamvis in prima Anatomies meæ editione de utroque simul in genere egerim) si prius de virili, & postea de muliebri semine seorsim sermonem instituam, & quid ex utriusque conjunctione procedat, concludam.

Definitio.

Est autem semen virile liquor spumofus, albus, & subviscidus, spiritu germinante imprægnatus, è sanguine arterioso, spirituque animali, in testibus aliisque spermaticis vasis elaboratus, ad similis animalis generationem.

Rejiciendam prorsus & omni refutatione indignam judicamus eorum sententiam, qui, duce Aristotele, docent semen esse excrementum tertiæ coctionis, cum potius nobilissima sit totius corporis substantia, &

quasi totius hominis compendium, aut saltem tale, quod totius hominis compendium in se continet.

In quibus partibus generetur supra satis explicatum cap. 22. & 24.

De materia è qua semen generatur, & partibus è quibus materia illa procedit, diversæ sunt Philosophorum opiniones.

Materia è  
qua.

Avicenna dicit semen procedere ex cerebro, corde, & hepate. Alii existimarunt illud à solidis partibus decidere in venas minores, ex iisque in majores ascendere, & nebulae sedimentique instar, reliquis humoribus innatare, tandemque testium vi attrahi. Quorum opinionum rationes, earundemque luculentæ refutationes, videantur apud Aristotelem, lib. 1. de gener. animal. cap. 8. 17. & 18. Fernelium, lib. 7. physiolog. cap. 2. Laurentium, lib. 8. anat. cap. 4. & Vallesium, lib. 2. controvers. cap. 8.

Antiquorum opinio-  
num  
1. & 2.

Antiquorum etiam multi tradiderunt semen confici ex succo quodam è cerebro & spinali medulla deciduo. Sic scribit Hippocrates, lib. de genitura, semen è cerebro in lumbos & spinæ medullam diffundi, ex hac in renes, indeque in testes defluere. Ita quoque scribit Plato, in Timæo, semen esse medullæ spinalis defluxum; & Alcmæon, illud esse cerebri portionem.

3.

Recentiores verò, qui nullas eximias vias è cerebro, aut spinali medulla ad testes inveniebant, dictam opinionem prorsus rejecerunt, & semen ex sanguine per vasa spermatica ad testes fluente, generari tradiderunt: quæ sententia, tanquam verissima & indubitata, jam multis seculis ab omnibus fere Philosophis recepta & edocta est.

Recentiorum opinio-  
num  
1.

Huic se nuper opposuerunt Glissonius, Whartonus, & Charletonus, Medici Angli, qui scribunt materiam feminis esse chylosum crudiorum quendam liquorem è mesenterio in cerebrum, indeque ad testes delatum per nervos, quos copiosos testibus & epididymis inferi tradunt: sed repugnante penitus experientia, cum pauciores duntaxat, eosque exiles & vix visibiles nervos eò pervenire, doceat autopsia, ut supra ostendimus, cap. 22.

2.

Aliam sententiam producit Clemens Niloë,

3.

Niloë, qui *libello Belgico de ferment. & nutrit. cap. 10. & 19.* scribit, semen generari ex liquore lymphatico. Verum cum lymphæ ex nullis aliis partibus ad testes progrediatur, sed ex ipsis testibus, dum semen conficitur, ex illa seminali materia separatur (ut demonstratum *precedente cap. 22.*) ac per vasa lymphatica, intus ex ipsis testibus orta, in abdomen ascendat ad vasa chyliifera, satis patet semen non confici ex lymphæ, sed ex seminis in testibus confectione resultare lympham; eodem modo sicut illam ex fermenti biliosi confectione resultare, docuimus supra, *cap. 13. & 14.* Præterea, si, quod non fit, lymphæ versus testes deferretur, in iisque materiæ in semen mutandæ admisceretur, tunc non haberet rationem talis materiæ seminificandæ, sed solummodo fermenti materiam præparantis ut commode semen fieri posset. Non videtur Niloë lymphæ motum è testibus sursum observasse, neque ejus usum satis novisse, à nobis supra descriptum, *cap. 13. & 17.*

4. A prædicta opinione non admodum longe recedit Hieronymus Barbatus, Patavinus, utpote qui, *lib. de sang. & sero*, scribit, semen non ex sanguine, aut ex sero generari: sed hanc suam opinionem multis quidem, sed adeo frigidis rationibus confirmat, ut refutationem non mereantur.

Vera seminis materia.

Verum nulla harum recentiorum, atque etiam antiquorum opinionum, rem acutè tetigisse videtur, sed qui prolificum liquorem pensius consideraverit, certissimum esse comperiet, ad seminis confectionem concurrere pro materia, partim sanguinem per arterias spermaticas affluentem, partim spiritum animale per nervos allatum.

Sanguis concurrens.

Sanguinem huc facere, & primariam seminis massam constituere, docent arteriæ spermaticæ insignes ad testes delatæ, quæ certe majores sunt, & plus sanguinis conferunt, quam qui soli nutritioni testium inserviat. Docent item venæ spermaticæ, sanguinem à nutritione testium, & seminis confectione residuum ad venam cavam referentes. Docet denique experientia, cum in nimia Venere, loco seminis, non raro sanguinem cum aliqua voluptate excretum fuisse, testetur Aristoteles, *lib. 1. de gener. animal. cap. 19.* idque etiam Medicorum observatione constat (exempla habent, Fernelius, *lib. 6. pathol. cap. 13.* Hollerius, *com. ad lib. 4. aphor. 78.* ejusdemque Scholiographus, *ad cap. 25. lib. 1. de morb. intern.* Philippus Salmuth, *cent. 1. obs. 81.* alique plures) propterea scilicet, quod sanguini per arterias copioso affluentem, nec sufficiens mora in testibus fuerit, nec satis copiosus ac validus spiritus animalis (qui specificæ fermentationis seminificæ causa, atque etiam materiæ pars est) ex nervis

affusus sit, ut tam brevi tempore in semen converti potuerit. Adde, quod in ipsis etiam testibus, aliisque vasis spermaticis, ab immoderato coitu & nimia dissipatione spirituum debilitatis, vis seminifica debilior, evaserit, quam ut allatum sanguinem, nervorum sufficiente spiritu destitutum, tam citò in semen convertere possit: quæ debilitas ex eo etiam patet, quod post nimium coitum semen aquosum & crudum aliquamdiu generetur. Hanc experientiam suffulcit ratio, quæ & ipsa docet, necessario sanguinem in semine, ut primariam & maximam materiæ partem concurrere, quia scilicet in corpore nostro omnia vivificantur per spiritum vitalem è corde effluentem, ac sanguini arterioso inhærentem (hoc inde liquet, quia cum aliqua de causa sanguis ille in partes influere nequit, quod illæ tunc brevi emoriantur) eoque deficiente nihil vivificari potest: atque hinc etiam necessario semini infundi debet spiritus ille vivificus, seu vivificationis energiam in se continens, in semine primario requisitam; qui spiritus cum non possit conferri sine subiecto cui inhæret, scilicet sanguine arterioso, sequitur hunc, extra omne dubium concurrere ad seminis materiam constituentem.

Spiritum verò animale per nervos allatum, & in testibus in tenuem liquorem condensatum, ac sanguini admixtum, etiam ad seminis materiam necessario concurrere, ex eo manifeste patet, quod cerebro magnus sit consensus cum testibus, & quod cerebrum, nervi, omnesque nervosæ partes ab immoderato coitu plurimum lædantur & debilitentur: quia scilicet cum excretionem multi seminis spirituum animalium magna pars consumitur, eorumque magna fit jactura, unde mox lassitudo & virium dejectio sequuntur, atque etiam aliqua tristitia oboritur (hinc est antiquum dictum, *Omne animal contristatur post coitum, præter gallum gallinaceum*) visus conturbatur, tremor membrorum accedit, quæ omnia indicant una cum semine copiosos evacuari spiritus animales; quod semen si è solo sanguine conficeretur, talia symptomata non subsequerentur post paucilli seminis evacuationem; quippe tota sanguinis libra detracta non infert tantam debilitatem, quantam una uncia seminis ejecta. Huc quoque accedat consideratio tabis dorsalis, quæ ab Hippocrate, *lib. 2. de morb.* describitur his verbis. *Dorsalis tabes*, inquit, *Tabes dorsalis. ex spinali medulla oritur, præcipue verò recentiores sponsores & libidinosos corripit. Quod si affectum percuncteris, asseret ager, sibi videri ex superioribus partibus, à capite, veluti formicas in spinam dimitti: cumque urinam & stercus reddit, semen genitale copiosum & liquidum ei prodit; neque generatio fit, etiam si cum*

Spiritus animalis concurrens.

cum uxore dormiat. Veneris ludibria patitur, cumque aliàs, tum præcipue cum per locum arduum iterfecerit, aut cucurrerit. Anhelosus & imbecillus evadit; caput gravatur, & aures sonant. Ex hoc morbo satis patet è cerebro & spinæ medulla spiritum quandam ad feminis confectionem per nervos adfluere: nam hinc est, quod post nimium coitum debilitato cerebro, fiat defluxus spiritus non satis cocti, sed crudi, è cerebro in spinalem medullam, indeque tunc fiat colliquatio; nervorumque flacciditas & laxitas: hinc Veneris ludibria & pollutiones, multique feminis profusio in somno; cum propter partes spermaticas à nimio coitu valde debilitatas, & minus retinentes; tum quod iste crudus & parum excoctus spiritus per nervos affluens, subsalsus & nimis acris sit (sicut in gravedine multoties pituita cruda in fauces defluens falsa & acris gustu percipitur) suæque acrimoniæ vellicando & titillando debilitata genitalia ad feminis profusionem irriter.

A sale primaria feminis moles.

Hic autem spiritus animalis è cerebro per nervos in testes profusus, in iisque in tenuem liquorem incrassatus, illic in contextu isto minimorum vasculorum, ex quibus primaria testium substantia constat (hoc supra docuimus cap. 22.) sanguini spirituoso permiscetur, eumque acrimoniâ suâ leviter fermentando, lymphaticumque liquorem (per vascula lymphatica, è substantia testium orta, sursum ad abdominis interiora deferendum) mediantibus exilibus, vix visibilibus glandulis, minimis vasculis testium interjectis ex eo separando, subsalsas ejus particulas specifico modo dissolvit, & à sulphurei liquoris nimia redundantia separat, cum quibus falsioribus particulis, paucisque sulphureis, in longo ac labyrintheo per minima vascula testium itinere, ipsorum testium specifica vi excoquitur in semen, quod ex parastatis per vasa deferentia profluit in vesiculas feminarias, in quibus in spumosum liquorem condensatur, & usque ad excretionis tempus servatur. Propterea autem, quod falsuginosus liquor in semine primarias partes teneat, ab eoque fecunditas & balsamica vis imprimis procedat, Veteres dixerunt, *Venerem ortam mari*, & libidinem appellarunt *salacitatem*.

Probatio.

Quod autem pro feminis materia falsiores sanguinis particulæ, quadam fermentatione seu effervescencia separatæ, necessario & maxima copia concurrant, eæque sulphureas in semine longe superent, varia docent.

1. Quod in corporibus obesis & pinguibus, in quibus pingues ac sulphurei humores prædominantur, parum feminis generetur, atque hinc iis exigua sit ad Venerem proclivitas.

2. Quod in siccioribus, in quibus falsi

humores prædominantur, multum feminis generetur, atque hinc tales ad Venerem sint fortiores.

3. Quod semen subacidum quandam odorem exspiret, qui necessario à sale fuso procedit.

4. Quod illud copia auctum, titillationem pruriginosam & irritationem ad Venerem excitet.

5. Quod plerarumque rerum fecunditas à sale fuso, ac per calorem dissoluto, procedat, atque hinc mirum videri non debeat, quod etiam feminis humani fecunditas ab eo magna ex parte dependeat. Prius illud ex variis patet. Cineres ignis culinarii, imprimis lignorum quercinorum, per prata dispersi, illa multo fertiliora efficiunt, quam si fimus bubulus inspergatur (hic citam quidem, sed admodum brevem fertilitatem confert) & diuturniorem fertilitatem inducunt, quia scilicet multo plus salis in se continent, qui à pluviis liquefactus, & Solis calore attenuatus, hujusmodi fertilitatem graminum & herbarum suscitatur. Stercore humano in latrinis collecto, vel etiam columbino, aut gallinaceo, si stercorentur agri, decuplo majorem fecunditatem iis præbent, quam si bubulo vel equino eadem, aut dupla triplave quantitate stercoreati fuerint, quia scilicet decuplo plus salis balsamici in se continent. Aqua pluvia multo sale volatili, calore Solis attenuato, & cum aquosis vaporibus è terra in sublime elato, imprægnata, herbas & plantas multo felicius crescere facit, quam si alia aqua adspargantur: hinc Aristoteles, lib. 8. *hystor. anim. cap. 19.* scribit, arundines quæ in lacubus & fossis crescunt, nihil ferme augeri, quando pluvix & imbres non decidunt. Sic pisces in piscinis etiam felicius degunt cum pluit. Ros quoque sale volatili & balsamico prægnans, in arboribus varia insectorum & vermium genera producit. In ipso etiam aceto Solaribus radiis exposito, & diutius asservato, sæpe vermiculi hac de causa generati conspiciuntur, ut experientia docet, eaque de re præclaram observationem annotavit Bartholinus, *hystor. anat. cent. 4. hist. 13.* qui illud quidem admiratur, sed causam ignorasse videtur. Fit autem, quia tota aceti aciditas à sale fuso, exactissime dissoluto (non satis exacta dissolutio facit muriam) præcedit, quod liquet ex spiritu salis acidissimo, & ex eo, quod sal commune aceto incoctum illud multo acidius faciat. Hujus salis fusi tenuissimæ particulæ, calore Solis attenuatæ ac volatilifatæ terrestriores aceti particulas peculiaribus motibus agitant, atque sic alias aliter atque aliter aliis jungendo, fecunditatem quandam pariunt, qua vermiculi producuntur, à radiis Solaribus vivificati.

X

Atque



Atque ita abunde probatum puto, maximam balsamicam vim salī inesse, hincque omnium rerum viventium fecunditatem imprimis à & ex sale produci: ita ut minime alienum videri debeat, quod necessario multo copiosiores salis particulæ ad seminis materiam concurrant, quam sulphureæ. Illas autem è sanguine copiosas separari dixi per quendam modum fermentationis, inductæ à spiritu animali ad testes affluente, qui & ipse ex salis acerbis particulis constat, ut latius docebitur *lib. 3. cap. 11.*

Jam verò si per nervos influens spiritus animalis satis copiosus & fortis ad testes deveniat, in iisque in liquorem spirituosum, una cum dicta spirituosa salsa sanguinis arteriosi parte, coeat & excoquatur, seu debito modo in longis labyrinthis viis præparetur ac immutetur, fit semen bene coctum, spirituosum, ac fecundum, quod in vesiculis seminariis crassescens, coloris albicantis in libidine projicitur. Quod si verò spiritus ille nimis paucus aut debilis ad testes confluat, tunc semen crudum, mucosum seu aquosum, & minus album generatur, sicut fit cum à nimio coitu, spiritibus valde dissipatis, partes spermaticæ debiles, frigidaque, & humida relinquuntur, qua intemperie tunc angusti nervulorum fines, in testes desinentes, flaccidi fiunt & concidunt, ita ut pauci spiritus animales ad testes penetrare queant, & qui transeunt à nimia frigidity ac humiditate testium fere suffocentur, atque hinc tunc in sanguine per arterias spermaticas affluente, non fit conveniens fermentatio & coctio, sed convertitur magna ejus pars in succum crudum, aquosum, ac subacrem, qui ad vesiculas feminarias delatus, in iisque collectus, facillime ex iis, imprimis per insomnia Venerea, in urethram erumpit. Eadem de causa tunc etiam in prostaticis, subviscida, quæ illic subsistere solet, seminalis materia, cruda & aquosa existit, imò nimia sua humiditate poros, in viris versus urethram, in mulieribus verò versus vaginam uterinam laxans, sæpe sine sensu, & præter voluntatem sponte foras effluit, hocque pacto gonorrhæam simplicem facit: cui tamen seminali materię si impura aliqua Venereæ malignitatis labes accesserit, eique corruptionem valde acrem intulerit, fit gonorrhœa virulenta, quam multoties erosio cum exulceratione subsequitur. Hujusmodi autem seminalis materię crudæ effluvium, seu gonorrhœam simplicem ægri sæpe longo tempore, & nonnunquam per annos patiuntur, cum virium haud magna dejectione (sic refert Bartholinus, *lib. 1. anat. cap. 23.* se quendam Patavii vidisse, qui ultra triginta annos eo fluxu laboraverat, cum nullo sanitatis detrimento item, *observ. cent. 2.*

Gonorrhœa  
causa.

*hist. 36.* alium se vidisse virum Bergomensem, cætera sanum, sed valde emaciatum, cui fluxus ille ad decem annos duraverat. Et ego etiam varios novi, quibus fluxus ille multis annis duravit, absque notabili valetudinis incommodo) propterea quod ille liquor spirituosus è nervis accedens, tali semini paucus admixtus sit, & ad ejusdem excretionem paucissimi vel nulli spiritus animales concurrant (sponte enim & insciis ægris effluit sine ullo conatu) qui alioqui in coitu libidinoso copiosi versus obscenas partes confluere, & cum virium jactura dissipari solent.

Si cuipiam mirum videatur, quomodo talis spirituosus animalis halitus per exiles ac difficulter conspicuos nervulos tanta copia profluere possit, ille consideret etiam arterias, cum ad testes perveniunt, fere invisibiles esse, eas tamen satis multum sanguinis conferre. Præterea sciat copiosos illos halitus non admodum copiosos eò deferri, propter summam nervulorum tenuitatem, sed illos solummodo sensim ad testes descendere, atque hinc post validum coitum, multamque seminis excretionem, rursus aliquo temporis intervallo opus esse antequam sufficiens copia eò deveniat, quæ novo semini generando satis esse possit.

At enim, dicat quis, minimi isti nervuli videntur solummodo terminari in tunica testibus proximè circumjecta, quæ hinc est acuti sensus, non autem in interiori testium substantiam pervenire, quæ hac de causa non sentit, ut ex variis ejus morbis patet, quod indicio est per istos nervulos non posse istos spiritus ad interiori substantiam defluere. Resp. sicut nulli nervuli, ita etiam in sanorum testibus plerumque nulla sanguifera vascula conspiciuntur, inde tamen non sequitur, talia interiori non adesse, nam quod adsint, & in quibus, & quando conspicua sint, dictum *præcedente cap. 22.* Sic procul dubio, etiam adsunt aliqui tenuissimi nervuli, etsi ob colorem album & summam tenuitatem minime sint conspicui, solumque obtusum & exiguum sensum in ipsa testium interiori substantia faciant, tum propter summam tenuitatem, atque hinc spirituum transeuntium paucitatem; tum propterea quod testium interior substantia non sit planè membranosa, (in membranis enim fit sensus acutus) & quod testes, sicut alia viscerum parenchymata, habeant substantiam propriam & peculiarem, imprimis ex vasis inter se complicatis constructam, qualis alia similis non datur in toto corpore, quæ ratione suæ temperiei & conformationis, est obtusi sensus, sicut substantia, cordis, pulmionis, hepatis, lienis, &c. quæ partes omnes, sicut etiam testes, sensum acutiorem solummodo obtinent in circumjecta tunica.

Verum

*Difficultas.*

Verum hic alia difficultas occurrit, quæ multo gravior videtur, scilicet, cum spiritus animales à mente quaquaversum, pro arbitrio, modò huc, modò illuc determinantur, quare nunquam copiosissimi determinantur & influant in testes, eosque intumescere faciant, præcipue in libidinosis & Veneris cogitationibus? Respondendum, illos spiritus non determinari inæqualiter ad quaslibet partes, sed primò ad illas quæ brevi aliqua tensione opus habent ut agant, vel melius agant, quales sunt oculi, cum accuratius aliquid videndum est; uterus, cum foetus expellendus est; & genitalia in libidine: deinde, & præcipue, ad illas partes quæ motui voluntario inserviunt, ut musculos. Verum illos ad partes solummodo sentientes continuato ductu semper æqualiter influere (quod interdum plures, interdum pauciores in eas influant, sicque modò acutiorem sensus tactum, modò obtusum sensum aut stuporem, inferant, illud non fit ex determinatione mentis, sed ob maiorem minoremve eorum copiam & viarum amplitudinem vel angustiam) ut & ad illas in quibus ad nutritionem vel fermentationem aliquid conferunt, utpote qui influxus nihil commune habet cum voluntate. Atque sic etiam spiritus animales ad testes non fluere motu aliquo determinativo, sed mere naturali.

*Due seminis partes.*

In semine autem tali modo ex dicta materia confecto, considerandæ veniunt duæ partes: aliæ subtiles maximeque spirituosæ, quæ paucissimæ, sed efficacissimæ sunt, hodieque *germinis* nomine designantur: aliæ crassiores, spumosæ, & aqueæ, quæ maximam seminis molem constituunt, & spirituosæ partibus alimentariæ sunt, easque involvunt.

Hæ autem spirituosæ & crassæ partes simul commistæ ac concretæ, seminis masculinam constituunt, principium duplex, scilicet efficiens & materiale in se continentem. Quod materiale duplex est, aliud è quo prima foetus stamina delineantur, quod est maxime spirituosæ seminis pars, principium efficiens seu formans in se habens: aliud proxime alimentarium, estque crassior seminis colliquata pars.

Si principium efficiens semini non insit, ut contingit in semine infœcundo, tunc, ex eo cum nihil efformari possit, effluit & corrumpitur. Si verò efficiens principium jam in actum erumpere paratum, materiali principio (quo proxime foveri & sustentari debet) destituatur, etiam nihil ex eo procedit, ut cum semen secunda tertiave post injectionem die, ob subitum terrorem, aliamve causam ex utero rursus effluit, tunc etiam ex germine nihil educitur.

Hæc autem duo principia simul unita

nihil agunt in se, sed otiantur, quo usque concretum est principium materiale crassius, hoc enim retinet spirituosum principium efficiens quasi irretitum & confopitum, idque ita coërcet, ut in actum erumpere non possit. Verum ubi conveniente loco (scilicet in utero bene disposito) ab externo conveniente, scilicet uteri, calore, materiale crassius dissolvitur ac colliquatur, tunc ejus insitus spiritus efficiens paulatim è compedibus istis eluctatur, excitatur, & liber fit, ejusque virtus prorumpit in actum, & per tubas uterinas ad ovaria procedens, quæ in iis jam parata ac matura sunt ova, fecundat, in iisque incipit agere, & in iis singulis ex se delineare & formare quod formandum est, dum interea crassiores seminis partes colliquantur, & aptæ fiunt, ut ova ex ovaris per tubas in uterum incidentia convenienter excipere & molliter fovere possint: nam si ova in uterum aridum inciderent, non magis ex iis quid produceretur, quam ex plantæ semine in terram aridam projecto: sicut enim ex hoc nihil epullulat, nisi injiciatur in terram tepida humiditate perfusam, ita etiam ex ovo nihil procedit, nisi incidat in uterum conveniente tepida humiditate irrigatum.

*Difficultas.*

Verum hæc res forte alicui ita se habere non videbitur, cum oviparorum ova non incident in uterum humidum, sed in nidum aridum, & tamen ex iis procedat pullus. Respondeo. Quantum ad aves, aliaque ovipara, in illis non est par ratio, nec in iis uteri alicujus humiditate, aut crassiore aliqua seminis masculini parte, sed solo calido fotu opus est: quia cum extra se pullos producere debuerint, provida Natura illis intra ovorum testas, hoc quod necessarium erat, & ab aliquo extrinseco conferri non poterat, copiosum scilicet conveniens humidum (hinc etiam ova eorum habent vitellum, ovis viviparorum denegatum) concessit, in quo spirituosæ seminis masculini pars commode ex se formare posset quod formandum est, & illud ipsum etiam eodem nutrire, usque ad parvi pulli maturitatem. In viviparis autem res ita se non habet, nec habere potuit: quia cum ipsis magni foetus essent edendi, non satis alimenti intra parva ova contineri potuit, quo foetus ad tantum magnitudinem deduceretur, ac enutiretur; atque hinc necessario extrinseca alimenta in ova influere, & ad foetum accedere, ac primo crassiores seminis virilis jam colliquatæ partes (quomodo hæc ovi membranas transcant, videndum *sequente capite*) recens formatum corpusculum molliter excipere, & per appositionem nutrire (de hac nutritione *sequens caput* latiore explicationem dabit) ac deinde alia quoque copiosiora alimenta à matre ad uterum, pro nutrimento

trimento magni foetus, deferri debuerunt.

De parte  
spirituosa.

Quia verò de materia feminis in præcedentibus generaliter satis dictum; nunc speciatim ejus pars spirituosa paulo accuratius explicanda superest.

Hippocratis  
opinio.

Hippocrates de spirituosa parte agens, variis locis scribit, semen ab omnibus partibus decidi, id est, in singulis partibus aliquid generari naturam partis referens, quod à singulis ad testes delatum, & crassiori materiæ immixtum, una cum crassiore ista materia semen constituit, omnium & singularum partium ideas in se continens.

Aristotelis  
opinio.

Aristoteles huic spirituosa parti adscribit naturam coelestem, stellarum naturæ similem: nam, 2. de gener. animal. cap. 3. sic loquitur: *Inest in semine omnium quod facit ut fecunda sint semina, videlicet quod Calor vocatur, idque non ignis, non talis facultas aliqua est, sed spiritus qui in semine spumosoque corpore continetur, & Natura (id est, Anima) qua in eo spiritu est, proportionem respondens elemento stellarum.*

Quid sit  
pars spiri-  
tuosa.

Ut autem hujus partis spirituosa feminis originem ac naturam penitus inquiramus, primò sciendum est, illam esse corpus subtilissimum ab alio corpore productum, aptitudinem habens (postquam aptam materiam, in qua subsistere potest, nactum est, & cum ea commodo loco depositum, omnibusque impedimentis liberatum est) adjuvantibus causis externis, producendi & ex se efformandi aliud corpus simile isti è quo ipsummet primam suam modificationem accepit.

Corpus esse.

Corpus esse liquet, quia corporalibus legibus subjecta est (ut putredini, corruptioni, mutationi, &c.) & à corpore producit, non verò ab Anima rationali, à qua si procederet, non corrumpere, nam illa incorruptibilis generaret sibi simile incorruptibile. Corrupti autem patet in feminis fecundi effusione ex quo non fit conceptus, nam tunc nihil ex eo generatur, sed perit ac corrumpitur, sicut alia corpora corruptibilia.

E corpore  
educti.

E corpore productam esse, ex eo innoscitur, quod generetur, & non creetur. Item quod producat ex ipsa feminis substantia, à calido & humido ambiente, mixti-que compagem laxante, soluta, nihilque aliud sit, quam ejusdem vapor seu halitus tenuissimus, maximeque fluidus & mobilis, à calore volatilifatus: qua de causa facile avolaret, nisi à crassiusculis feminis particulis, ad volatilitatem minus appropriatis, obvolutum detineretur, & ab utero propriisque membranis mox arctè concluderetur, atque ratione particularum falsarum, ex quibus magna sui parte constat, nonnihil

proclivis esset ad aliqualem fixationem, sicque à fuga prohiberetur.

Quod aptitudinem habeat ex conveniente materia, è qua constat ipsamet, & cui inhæret, adjuvantibus causis externis, producendi & formandi corpus simile ei è quo processit, docet experientia. Sed unde aptitudo illa procedat, non tam manifestum est.

Aptitudo.

Figuras formasque corporum oriri à varia constitutione, partim causæ formantis, partim materiæ, è qua componuntur, apud Philosophos in confesso est. In generatione igitur iusta debitaque materiæ constitutio ac dispositio requiritur, ut causa formans in eam agere, & ex ea aliquid formare seu generare possit. Istam autem requisitam specificam materiæ constitutionem habet & perficit dictus spiritus semini insitus, in se continens formam formantem, **Natura** appellatam, isque primum agens seu principium est formationis foetus, & simul prima proximaque partium delineandarum materia. Quippe singulis feminibus naturalibus efficiens quidam spiritus inditus est, qui ex tenuissimis maximeque volatilibus ipsius feminis particulis falsis sulphureisque, à calore simul peculiari modo excoctis, suscitatus seu ortus, & fixioribus feminis particulis implicitus, primaria formationis causa, & prima proximaque corporis formandi materia existit, cæterasque feminis particulas actuare, & motuum naturalium veluti choreas ducere debet (patet hoc in plantarum, omniumque brutorum semine) eoque coagulato, absente, extincto, vel suffocato, nulla generatio fieri potest. Si talis spiritus omnibus feminibus, ergo etiam humano semini inest.

Ille autem spiritus exigua sui particula *Idea spiri-* continet omnium & singularum partium *tas.* totius corporis ideas, quales partes rursus ex se efformare potest, cum ope caloris uterini à crassiore feminis massa nonnihil solutus ac liberatus, versus ovaria tendit, & ova ingreditur, in iisque per tubas ad uterum delatis, agitur, movetur, & in actum exsurgit: nam agitur agit, & agens non potest aliud agere, quam ex conveniente materia, è qua ipsemet constat, & cui inhæret, id est, ex se ipso formare tales partes qualium ideas in se continet, & simul paulatim reliquam ovi materiam aptam facere, quæ in earum augmentum cedens, earum quoque formam assumere possit. Hanc rem comparatione aliqua illustrabo. Sicut carbonem extinctum, stramina, cespites, ligna, aliaque similia, ignem & flammam non concipiunt, nisi aliqua subtilis materia, ignis formam habens, ea ingrediatur, & primam ignis ideam in iis suscitet; quæ deinde reliquam materiam aptam facit, ut similem ignis

ignis formam assumere possit. Ita etiam ex ovo non suscitatur animal simile, nisi aliquid ovum ingrediatur, ideam istius animalis gerens, quod ex sese primam animalis delineationem faciens, simul reliquam ovi materiam aptam reddit, quæ illius primo delineatum augere, & singularum ejus partium formam assumere potest. Illud autem est Spiritus ille ideigerus, femini masculino infusus, ex ejusque crassiore massa, uterini caloris beneficio, separatus, sicque ovo vel ovis infusus.

*Idea unde,  
& quales  
sint.*

Istas autem ideas recipit ab omnibus & singulis partibus (idea significat quidem imaginem visibilem, ab *idea*, *video*, sed apud Philosophos sæpe sumitur pro quacunque imagine, sive oculis visibili, sive mente perceptibili: & in semine nihil aliud sunt ideas, quam spiritus certo modo ab illis partibus, unde veniunt modificati, & quasi figurati) quippe sicut ab omnibus corporibus visibilibus radii infiniti subtilissimi exeunt, exprimentes figuram & colorem externum illorum corporum è quibus emanarunt, ita etiam è singulis minimis corporis particulis corpuscula quædam subtilissima, instar atomorum spirituosissimarum, exeuntia, dicto spiritui ab iis effluenti, immiscentur, qui inde talem corporis, è quo effluxit, & dicta minima effluentia corpuscula recepit, impressionem habet, ut in aptum subjectum, cui inhæret, incidens, ex se simile producere & formare valeat illi, à quo impressas notas accepit: nam corpuscula illa subtilissima è corpore aliquo, seu corporis parte effluentia, non possunt non ab eo modificationem aliquam nancisci, quales sunt in corporibus è quibus exeunt: sic etiam seminalis spiritus adipiscitur aliquam proprietatem istarum particularum corporis è quibus exivit, eamque non solius figuræ, sed totius naturæ.

Verum illæ singularum particularum proprietates non sunt in isto spiritu separatæ, sed in unamquamque ejus particulam coïncidunt, & in formatione se rursus explicant. Eodem modo sicut mille rerum visibilium radii coïncidunt in unum speculum, qui tamen ita se rursus explicant, ut oculus singularum rerum radios seorsim colligere, ex iisque figuras & colores singularum rerum distinguere possit. Atque hinc est quod unaquæque particula hujus spiritus virtutem habeat integrum animal efformandi, quæ tamen virtus potentior est, cum plures ejus particulæ in bulla (de qua *sequente capite* dicitur) colliguntur. Nam sicut pauci radii visibiles è re aliqua emanantes, ejus figuram & colorem satis quidem representant, sed illa tamen figura cum colore multo nitidior & accuratior exhibetur, si plures radii in eam depingendam

concurrant, ut fit in speculis concavis: ita etiam, licet singulæ hujus spiritus particulæ vim totum formandi habeant, fortior tamen fit formatio, si plures particulæ tali vi præditæ jungantur, & junctis viribus illud opus exequantur. Quodsi verò non in unius, sed in diversorum ovorum bullis particulæ hujus spiritus colligantur, tunc diversi generantur foetus: nam spiritus formator in singulis bullis sufficientem efficaciam habet formandi totum. Quod facile observatur in avibus: nam, ex. gr. semen galli gallinacei, quod gallinæ paucum, sed multo spiritu prægnans, infunditur, cum in ovarium incidit, per omnia illa ova, quæ jam ad maturitatem pervenerunt, dispergitur, & exiguis particulis in singulis ovis totius foecunditatis auctor est, atque calore externo agitur, in eo latens paucus spiritus fit efficiens pulli causa, simulque primæ delineationis materia.

Hic autem spiritus ex singulis particulis emanans sanguini immiscetur, & cum eo per totum corpus circulator, eique aptitudinem præbet omnes partes nutriendi. Nam si non haberet sanguis in se aliquid singulis partibus simile, non posset omnes partes nutrire, & singulis particulis aliquid simile apponere. Hujus sanguinis particulæ quæ in semen mutantur, etiam hunc spiritum ideigerum in se continent, qui proinde femini in testibus confecto copiosus involvitur, ejusque nobiliorem & primariam efficientem partem constituit, talem tamen quæ sine materiali crassiore subsistere, & integra servari non potest.

*Quomodo  
spiritus ille  
ad testes de-  
veniat.*

Hic jam gravis difficultas occurrit, scilicet quomodo ex semine etiam generentur illæ partes, quibus parentes diu ante generationem destituti fuerunt, cum tamen ab iis nulla idea, nec ulla formatrix vis, seu spiritus architectonicus emanare possit? Respondeo: fit hoc quia defectum illum supplet imaginatio parentum, qui cum quotidie videant alios infantes, pueros, & adultos, omnibus membris bene natos & formatos, sibi firmiter imaginantur, se tales etiam producturos, seu genituros, atque ita deficientium partium ideas dicto spiritui non minus imprimunt, eumque & totum semen non aliter modificant, quam si ex talibus partibus modificatio illa processisset, idque non tantum secundum figuram, verum etiam secundum totam naturam. Quantum enim hac in parte valeat fortis imaginatio, liquet in mulieribus gravidis, quæ per hanc solam mirabiles ideas effingentes, mirabiles sæpe rerum imaginatarum, non solum figuras, colores, & maculas (quæ frequenter hinc oriuntur) sed ipsas res secundum totam suam naturam foetibus interdum addiderunt. Sic nati fuerunt aliqui cornuti, quod mater à cornuto

*Difficultas.*

*Quare defi-  
cientes pa-  
rentum par-  
tes etiam  
generantur  
ex semine.*

nuto animali exterrita, illius cornu tam firmam ideam concepisset, & foetui impressisset, ut non macula, aut solus color, sed ipsum verum cornu in eo excreverit. Ego ipsemet, anno 1637. in Geldria cognovi mulierem 30. annorum, præter propter, quæ cercopithecum, seu simiam caudatam animi gratia alebat, & in deliciis habebat: cumque illa primo mense concepisset, hæc simia (cum qua frequenter colludebat) casu humero ejus infiliens, cauda sua faciem ejus obverberavit: hinc illa tantam concepit caudæ istius simiæ ideam, eamque continuis imaginationibus tam fortiter fovebat, ut tandem pepererit filium caudatum, habentem ad finem ossis coccygis caudam æqualis longitudinis & crassitiæ cum cauda simiæ, eamque etiam brevibus pilis ejusdem coloris investitam: quam caudam, cum ex petitione parentum, Medici, ob turpitudinem, rescidissent, gangræna partem invadens infantem extinxit. Experientia quoque docet, si mulier gravida, de alicujus hominis parte mutilata, à qua forte exterrita fuit, continuè & fortiter cogitet, illam foetum mutilum in lucem edere, licet ipsa & maritus ambo integri sint: & contra, si de foetu integro & sano continuè cogitet, eam foetum integrum parere, quamvis vel ipsa, vel forte maritus aliqua parte mutilatus sit. Ita quoque vir per fortem imaginationem potest partium deficientium ideas multo facilius spiritui seminali imprimere secundum totam naturam, quam mulier illas per suam imaginationem potest delere, immutare, vel depravare: & quia illud de muliere per experientiam certum est, hoc de viro adhuc multo certius habendum est. Nec de eo dubitandum, si parentes de partibus ipsis deficientibus continue multumque cogitent, nec per alias imaginationes istarum deficientium partium ideas spiritui seminali imprimant, eos tunc genituros foetus talibus partibus mutilatos. Hoc ex eo imprimis patet, quod si parentes nati fuerint aliqua parte mutilati, cum postea de partis istius integritate non facile aliquas ideas sibi imaginari possint, utpote quam nunquam integram in se cognoverunt, sæpe etiam foetus eadem parte mutilatos producant. At si diu post nativitatem aliqua parte mutilati fuerint, tunc istius partis, cujus integritatem & usum antea in se ipsis cognoverunt, ideam facile & fortiter imaginari, atque sic in semine ejusque spiritu illius defectum supplere possunt.

Quomodo  
imaginata  
idea impri-  
mantur se-  
mini.

Verum quomodo dictæ ideæ per imaginationem parentis semini, ejusque spiritui vivificanti imprimantur, non facile est explicare. Res ita procedere videtur. Imago rei sæpe & serio cogitata in cerebro exacte pingitur, & illa pictura ejusve modificatio spiritibus animalibus impressa, per eosque

etiam sanguini arterioso communicata, cum his, feminis materia futuris, deferitur ad testes, & in confectione seminis in eo supplet defectum istarum idearum, quæ à partibus, quibus parens destituitur, effluere non potuerunt, atque ita semen, cum suo spiritu vivificante, omnibus necessariis singularum totius corporis partium ideis instructum, aptitudinem nanciscitur ut ex eo omnes partes efformari possint, etiam illæ quibus parens destituitur. Hoc negotium in semine ita fieri, mirum videri non debet, cum etiam eodem fere modo foetui jam formato, per fortem matris imaginationem, variarum rerum idearum interdum imprimantur: quia scilicet cogitarum & imaginatarum rerum in cerebro exacte pictarum idearum spiritibus animalibus impressæ, per spirituum à mente factam determinationem una cum sanguine arterioso defluunt ad uterum, de quo, & de foetu in eo contento, mulier gravida frequenter cogitat; inde per venam umbilicalem ad ipsum foetum deferuntur (eodem modo sicut ideæ seu imagines rerum visibilium per longissima spatia, ope ætheris, intermedii, in oculi tunica pinguntur, & soni per ærem ad remota loca deferuntur) qui tenellus, ob summam corpusculi sui molliem, facile suscipit imaginem seu ideam per matris imaginationem sibi fortiter impressam (simili fere modo, sicut imago visa, vel cogitata, molli cerebro imprimatur, à memoria postmodum menti rursus offerenda) quæ admodum exigua est in principio, sed indies magis magisque increfcit cum foetu; sicut literæ vel picturæ corticibus fructus cucurbitæ, aut peponis, alteriusve, acui vel scalpello leviter insculptæ, paulatim increfcunt cum fructu.

Jo. Swammerdamius, in suo *Natura miraculo*, mihi pag. 21. proponens illud dubium, *Quare parentes aliquibus partibus mutilati, integros liberos generent?* quasi unica Herculeæ ratione totam illam obscuritatem elucidaturus, dicit, *Quia omnes partes ovo continentur.* Hæc si vera causa sit, ut ille vult, quare, quæso, ex illo ovo omnes partes continente, interdum etiam prodit foetus aliquibus partibus mutilatus, idque sæpe parentibus integris existentibus, & quidem talibus, qui antea alios foetus integros genuerunt, & postea rursus alios integros gignunt? quare in isto ovo primordium brachii, cruris, alteriusve partis, magis defuit, quam in aliis ejusdem mulieris ovis, cum antè, tum post in uterum delatis, ex quibus integri foetus geniti sunt? Si illa mulierum ova omnes foetus partes in se contineant, quare ille ipse, pag. 22. dicit, quod Levi diu ante nativitatem in lumbis parentum suorum fuerit? an ne vult etiam aliqua ova in lumbis viro-  
rum

Swammer-  
damii opi-  
nio.

rum gigni? metuendum certè ne illa tandem etiam è capite non minus, quam è lumbis virorum, & testibus mulierum educat.

*Quare puer non generet.* Unum adhuc dubium occurrit, scilicet, cum illæ spirituosæ irradiationes ex singulis corporis partibus, æque contingant, in corpore pueri, quam in adulti, quare generationis munus æque peragi non possit à puero, quam ab adulto, cum Spiritus formator in utroque æqualiter adsit. Resp. Fit hoc duabus de causis. 1. Quia Spiritus ille in puero nondum habet subiectum conveniens quod inhabitet: nam sanguis admodum oleosus existens, consumitur in nutrimentum & incrementum corporis, atque hinc in eo nihil redundat è quo semen iusto modo confici possit. 2. Quia in puero defunt requisita media ad opus illud perficiendum: nam præter materiæ nimiam oleositatem modò dictam, & ineptitudinem, etiam partes spermaticæ sunt nimis debiles ad semen conficiendum; in maribus penis habet nimiam brevitatem, & meatus nimis angusti sunt ad semen è testibus ad vesiculas feminarias, atque ex his in urethram deferendum: foemellis verò genitalia sunt nimis parva & constricta, ipseque uterus nimis angustus ad semen recipiendum.

*Unde forma externa similitudo.*

Ex hisce jam dictis aliam quæstionem forte quis educet, scilicet, cum dictæ spirituosæ irradiationes ideiferae solummodo in virili semine considerandæ sint (utpotè ex quo solo germen, suo Spiritu formante instructum, procedere, ex antedictis, & mox dicendis, patebit) qui fiat quod foetus similitudine figuræ seu formæ externæ non semper referat patrem, sed sæpe matris similitudinem existat? Hujus rei varias causas olim scripsit Hippocrates, *lib. de genit.* à diversa qualitate & quantitate seminum viri & mulieris simul mixtorum, desumptas: cujus sententiam multi sequuntur, sed non eodem modo explicant: inter quos etiam sunt, Capiavaccius, *de fact. format. cap. 8.* & Deusingius, *de gener. fact. part. 2. sect. 1.* quorum opiniones, quia nullis solidis fundamentis innituntur, brevitati studens, non expendam. Nostra sententia est, totum hoc negotium dependere à matris imaginatione. Quippe mulier gravida, cum vigilans vix unquam non imagnetur & cogitet hoc aut illud, & cogitationes suas ad foetum in utero contentum plerumque convertat, si philantiâ laborans, sui proprii corporis externam figurationem (præcipue faciei in speculo conspectæ) & formam super omnes alias admiretur, erit infans ei similis: si verò matris forma ei perplaceat, ejusque imaginem sæpe attenta mente concipiat, erit foetus patri similis. Hanc autem similitudinem à semine viri & mulieris qualitate, vel quantitate non procedere,

ex eo satis liquet, quod mulier prægnans etiam cujuscunque alterius hominis (qui nullam cum ea familiaritatem exercuit, nec quidquam seminis ad foetum formandum contulit) externam formam firma imaginatione concipiens, foetum ei similem producat, imò sæpe monstrosas formas videns, earum aliquas foetui multoties imprimat. Mirabiles enim sunt vires imaginationis, præcipue in mulieribus gravidis, de quibus viribus elegantem libellum scripsit Thomas Fienus.

Verum quæ hæcenus de semine dicta sunt, quia virili semini imprimis competunt, nunc etiam speciatim paucis agendum de semine muliebri, ejusdemque usu ac necessitate.

*De semine muliebri.*

Hic mox in vestibulo dubium occurrit, scilicet an mulieres semen habeant, nec ne?

*An mulieres semen habeant.*

Aristoteles, *lib. 1. de gener. animal. cap. 19. 20. & ult.* mulieres semine destitui, iisque menstrua loco seminis esse, dicit. Qui Philosophorum principem sequuntur, has addunt rationes. 1. Quia nulla patet via per quam illud è testibus ad uterum pervenire queat. 2. Quod muliebri semen nullum usum in generatione præstare possit, & multoties compertum sit foeminas concepisse nulla ex coitu percepta delectatione, ergo sine seminis emissionem. 3. Quod foemini eo tempore, quo iis semen generari dicitur, talia non contingant, qualia viris ea ætate accidunt, scilicet vox non ingravescat, nervi non roborentur, corpus non siccetur, animus fortior non evadat, &c. 4. Quod, teste Harveo, *de gener. animal. exercit. 55.* testiculi foemellarum in actu generationis, nec turgant, nec quidquam à solita constitutione, sive ante, sive post coitum, variant, nec ullo indicio utilitatem aliquam aut necessitatem, vel ad coitum, vel ad generationem adferant. 5. Quod per seminis muliebris in uterum injectionem in mulieribus gravidis, post coitum creber fieret abortus: illud enim semen, vel in utero corrumperetur, & sic incluso foetui varia mala, ac tandem mortem induceret: vel ex eo elaboretur, & sic aperto uteri orificio abortus sequeretur. Atque sic ex his tandem concludunt mulieres semen non habere, sed testes iis solummodo ad ornatum datos esse, sicut viris papillas.

Verum jam à longo tempore suspecta, imò à plerisque merito rejecta fuit illa sententia, cum mulieres semen habere ex eo satis constet, quod ipsis sint testes, & arteriæ venæque spermaticæ, ac vasa deferentia, tubæ scilicet, atque etiam prostata; quæ omnes partes cum frustra iis datur non sint, procul dubio, alicujus seminis generationi inserviunt. Ad hæc in ipse testibus



testibus conspicua sunt ova, liquorem pel-  
lucidum albumineum, seminis nomine haud  
indignum continentia, quæ ad maturitatem  
deducta, & seminis virilis irradiatione fœ-  
cundata, per vasa deferentia, scilicet tubas,  
deferuntur ad uterum. Denique etiam  
mulieres feminalem aliquam materiam è  
prostatibus (suprà, cap. 24. descriptis) in  
coitu magna cum voluptate excernunt, &  
post coitum eadem patiuntur symptomata,  
quæ viris quoque contingere solent, nempe  
tristitiam, lassitudinem, visus conturbationem,  
torporem, libidinis cessationem.  
Sicut *prima* ita etiam vacillat *secunda* Ari-  
stotelicorum ratio: nam semen mulieb-  
re ovis inclusum omnino necessarium esse ad  
generationem, ex eo patet, quod ex se-  
mine virili nihil generetur, nisi illius spiri-  
tuosa pars in ovi albumineum liquorem,  
tanquam in materiam solam isti usui conve-  
nientem, inciderit: quod mulieres quoque  
non concipiant, quibus nulla ova in ova-  
riis generantur; ut senioribus, aut saltem  
nulla fœcundata ex ovariis ad uterum defe-  
runtur; ut nec illæ quæ in coitu feminalem  
liquorem ex prostatibus cum oblectatione non  
emittunt (nulla certè fides iis habenda vi-  
detur, quæ se vi stupratas sine ulla oblecta-  
tione concepisse exclamant) quod deni-  
que inter bruta canes, sues, aliæque fœ-  
mellæ castratæ steriles evadant; utpote  
privata organis ova seminifera generanti-  
bus. His addendum, quod ipsa quoque  
Sacra scriptura, *Genes. cap. 3.* seminis mu-  
liebris mentionem faciat, tanquam rei ad  
generationem maxime necessariae. *Tertia*  
*ratio* Aristotelicorum nullius pretii est: nam  
quod circa tempus illud quo semen genera-  
tur, mulieribus vox non ingravescat, nervi  
non admodum roborentur, &c. hoc pro-  
pterea fit, quod totius corporis tempera-  
mentum ipsis multo frigidius & humidius  
sit, quam viris, qua de causa etiam earum  
ovis inclusum semen multo crudius & hu-  
midius est, quam virile semen, nec tam  
calidam acremque fermentaceam expira-  
tionem per totum corpus emittit, quam  
emittit semen virile. Non minus quoque  
inanis est *quarta ratio*, nam quod constitu-  
tio testium neque ante, neque post coitum  
alia seu varia inventa fuerit ab Harveo, inde  
factum, quod Harveus in animali ante coi-  
tum occiso non potuerit videre vel scire  
qualis constitutio varia in ipso coitu, vel  
statim post coitum futura esset, & in alio  
statim post coitum occiso non potuerit  
scire qualis constitutio in ipso coitu fuisset:  
nam si forte testes in ipso coitu turgidi fue-  
rint, per mortis terrorem & necem statim  
post coitum illatam definit & concidit par-  
tium genitalium inturgescencia, atque ilico  
redeunt ad pristinam flaccidam constitutio-  
nem, eodem modo sicut penis virilis,

quantumvis libidine rigidus, ab incasso  
mortis terrore ilico flaccescit. Præterea in  
coitu, aut à coitu nulla extrinsecus visui  
manifesta variatio contingit, neque in vi-  
rorum, neque in mulierum testibus (in  
viris solummodo sursum attrahuntur) quod  
tamen in testibus fœmineis in coitu aliqua  
grata alteratio contingat, dum in iis ab irra-  
diatione seminis masculini ova fœcundan-  
tur, hoc licet bruta animalia indicare ne-  
queant verbis, ex eorum tamen gesticu-  
latione illud satis significatur: & præterea  
rationales mulieres hoc ipsum verbis testan-  
tur, quod scilicet insigne oblectamentum  
in utero & omnibus adstantibus partibus  
(inter quas sunt testes uteri lateribus accum-  
bentes) persenserint, atque etiam gratam  
internam uteri contractionem circum se-  
men virile injectum, & in cavitatem ejus  
delapsum ovum, vel ova, perceiverint.  
*Quinta* denique ratio nihil probat, nam qui  
tempore imprægnationis ab ovis seminge-  
ris, per coitum in uterum injectis, fœtus  
læsiones & futuros abortus metuant, illi  
in eo errant, quod putent in imprægnatis  
coeuntibus adhuc aliqua ova seminifera de  
novo in uteri cavitatem decidere, nescien-  
tes vias illas, facta conceptione occlusas  
remanere usque ad partum; sicut etiam  
vasa menstruorum evacuationi dicata: &  
voluptatem illam quam tales percipiunt in  
coitu, non contingere ab aliquo ovo vel  
semine è testibus in uterum delabente, sed  
à materia illa seminali viscosa, quæ ex ea-  
rum prostatibus (cap. 24. descriptis) expri-  
mitur in vaginam uterinam.

Ex modo dictis jam satis notum est, tes-  
tes mulieribus non esse datos ad solum  
ornatum (ut sonat Aristotelicorum con-  
clusio) qui in parte abdita minimeque con-  
spicua nullus esse potest, sed ad summam  
necessitatem. Verum nunc breviter in-  
quirendum in quibus illa necessitas confi-  
stat.

Ut ex plantarum semine aliquid produ-  
catur, æque requiritur fertilitas terræ, atque  
fœcunditas seminis. Hujus fœcunditas  
consistit in germine spirituofo; illius ferti-  
litas in conveniente calore & humiditate,  
salsis sulphureisque particulis debito modo  
perfusa atque imprægnata. Nisi hæc duo  
concurrant, nihil ex semine plantæ gigni-  
tur. Nam si, ex Gr. optimum triticum  
conjiciatur in cumulum salis, ferri, plumbi,  
vel arenæ aridæ, nihil inde excrevit, licet  
per se fœcundum sit, quia non incidit in  
materiam convenientem, in qua germen  
ejus dissolvi, & in actum promoveri possit:  
similiter si injiciatur in terram cui nimium  
salis inest, vel calx, ærugo, aliave similis  
materia, corrodente & valde acri qualitate  
prædita admiscetur, tunc semen una cum  
suo germine corrumpitur & extinguatur,  
nec

*Causa neces-  
saria ferti-  
litas semi-  
nis mulie-  
bris.*



nec quidquam ex eo producit: at si injiciatur in terram pinguem & stercoreatam, mox accedente calore, tenuiores terrei humidi particulae subeunt minimos seminis tritici poros, ejusque substantiae immiscentur, quae inde intumescit, & sic germen ejus solvitur ac prorumpit in actum, & quod inde formatur, mox ab eodem humido, una cum crassioribus seminis particulis colloquato ac misto, nutritur, augetur, & crescit, postea projectis radicibus majus & solidius nutrimentum ex ipsa terra sumpturum.

Ita se quoque res habet in generatione hominis. Uterus ager seu terra est; semen virile foecundum primo excipiens: sed nisi ille ager conveniente rorida humiditate perfusus, susceptum virile semen amplectatur & dissolvat, ejusque subtiliores germinosas partes per tubas ad ova, in testibus seu ovariiis contenta, emittat, atque ova tali modo foecundata ad uterum redeant, vel procedant, ut per ejus calorem foventem, germen iis jam infusum exurgat; & in actum promoveatur; nihil enim ex virili semine solo, licet per se foecundissimo, generatur. Illud autem ovorum muliebri albumineum semen simile est pingui humido terrae; imò est ipsum prae paratum humidum, quod spirituosam seminis virilis partem convenienter excipiens, ejusque porulos subiens, illam dissolvere, atque sic germen in eo latens expedire, & in actum suscitare potest. Quod in actum procedens mox ex sese exili compendio format totum quod formandum est (scilicet prima minima totius foetus delineamenta) idque conveniente isto albumineo humido, cui innatat, in principio per irrorationem & appositionem (de qua dicitur *sequente capite*) nutrit, alit, & incremento auget, usque dum ad tantam firmitudinem deductum sit, ejusque viscera adeo valida evaserunt, ut sibi ipsi postmodum ad uterum delata, ac per os & umbilicum infusa alimenta, conficere ac prae parare possit. Hinc jam facile innotescit, quare ex omni coitu cum muliere vacua non fiat conceptio: quia scilicet si mulier propter ovariorum aliquam intemperiem, vel pravam conformationem, aut propter altiore aetatem, aliamve causam, ovis destituuntur, vel albuminea in ovis latens materia sit male temperata (nimis acris, fervida; frigida, &c.) vel quacunque prava qualitate praedita, atque sic ad germinosi seminis virilis dissolutionem inepta; tunc nulla conceptio fieri potest, quia virilis seminis spirituosum germen, ob dictas causas suffocatur & corrumpitur. Verum haec tamen non est sola impedita conceptionis causa, nam frequenter etiam contingit ova mulierum ad justam maturitatem nondum pervenisse, aut propter viarum aliquod

impedimentum, germen ad ovarium, & ova ad uterum pervenire non posse, vel ipsum semen virile per se invalidum ac germine destitutum esse, aut ejus germen proliferum, antequam ad ova perveniat, in utero corrumpi & suffocari, ob ipsius uteri malam temperiem, aut prava humores in eo subsistentes, atque tunc talibus de causis etiam nulla conceptio fieri potest.

Quidquid sit, ex antedictis abunde liquet verus manifestus, maximeque necessarius usus seminis muliebris, utpote sine quo generatio hominis non magis procedere potest, quam plantarum generatio sine foecundo humido terrae.

Hic jam gravis quaestio incidit: scilicet, si tanta sit seminis muliebris necessitas, ratione materiae dissolventis, foventis, & nutrientis, an non illud etiam in formando ipso foetu aliquam efficientis seu formantis rationem habeat?

*An semen muliebri sit causa formationis.*

Haecenus fuit communis fere opinio, illud efficientis seu formantis, & materiae nutrientis rationem simul habere; ac semini virili admisceri, ex iisque seminibus commistis unam massam fieri, & ex ea in utero simul fermentata educi spirituosum germen, per quod, & è quo membra foetus delineantur ac efformantur quam sententiam admodum speciose proponit & defendit Sennertus, *instit. med. lib. 1. cap. 10.* cujus etiam strenuum patronum se praebet Ludovicus Mercatus, *tom. 1. lib. 1. part. 4. artic. 3. quest. 97.* qui hoc uno Herculeo argumento (quae minoris momenti sunt praetereo) se totum dubium penitus sublaturum, & formantem vim seminis muliebris probaturum existimat: *Omne quod assimilatur, inquit, passum cum victoria, necessario agit: sed filius aliquando assimilatur matri, ergo mater in generatione filii agit.* Verum licet totum hoc argumentum concedatur, inde tamen non sequitur semen muliebri in generatione praestare vim agentem formationem foetus; nam multum certe differunt, *Mater agit, & semen matris agit.* Nam mater agit in virile & suum semen, dum utrumque in utero calefacit, amplectitur, & fovet, sicque illius germen de potentia in actum suscitatur, hoc verò ad materiam nutritiam aptum facit: verum nec illa, nec semen ejus ad partium formationem quidquam tribuit, nisi media, per quae latens in semine virili potentia in actum promoveatur. Si autem semen muliebri etiam ageret in delineando & formando foetu, tunc in se deberet habere principium activum formationis partium, quod ex eo solo per uterini caloris foveam de potentia educi posset in actum, atque non habet, nec ex eo unquam educitur, ut à nobis ante probatum, & in ovis subventaneis manifestum est. Similitudo filii ad matrem nihil

Y

probat,

*Quare ex omni coitu non fiat conceptio.*

probat, utpote cujus causa ex feminis aliquo actu non educitur, sed plerumque aliunde foetui, dum formatur, imò sæpe etiam ei jam plane formato, omnibusque partibus donato, & quidem aliquot interdum post formationem septimanis aut mensibus, imprimitur. Quippe varias fortes matris imaginationes, hincque procedentes spirituum insolitas motiones ac determinationes, foetum jam formatum adhuc mirabiliter immutare, eique, tanquam molli ceræ, hanc illamve formam seu figuram imprime-re posse, docent innumera exempla mulierum gravidarum, quæ à terribili aliqua re exterritæ, aut picturas vel imagines cum oblectatione vel abominatione multoties cum attenta cogitatione adspicientes, vel cerasa, aliosve fructus fortiter desiderantes, mirabiles rerum notas foetibus impresserunt, idque sæpe non longe ante partum, quam tamen activam virtutem, nec à semine muliebri procedere, nec ullo modo ei adscribi posse, nemo non facile videt, cum illa actio post foetum jam diu formatum peragatur, ejusque etiam alia manifesta causa sit, & dari possit.

Præter dictum Mercati argumentum, adhuc tria alia, satis gravia, objiciuntur ab aliis. 1. *Quod ex equa & asino gignatur mulus.* 2. *Quod ex viro & bestia, non homo, sed monstrum irrationale gignatur.* 3. *Quod mulier alba ex viro Æthiope multoties concipiat & producat infantem album.* Quæ non videntur posse fieri nisi à formante vi feminis foeminini, quatenus illa cum masculini feminis formante vi concurrat.

Antequam has difficultates dissolvam, considerandum censeo, semen masculinum non procedere in actum, neque ex eo produci aliquod simile ei à quo processit, nisi illi admisceatur conveniens fermentum & alimentum, quod si in utroque, vel alterutro defectus, seu error, aut vitium fuerit, tunc vel nihil, vel aliquid vitiosi ex eo produci, quod tamen Natura perficit quo usque potest. Eodem modo sicut videmus inter plantas, semen tritici vel hordei in terram incultam & aridam injectum degenerare in lolium, aliasve inutiles herbas, fere nullam cum prioribus similitudinem habentes, scilicet propter defectum convenientis fermenti & alimenti. Hòc præmissis, nunc ad objecta accedo, & respondeo *ad primum*, quod illud non probet foemineum semen concurrere cum masculino ut causam formationis coëfficientem: sed in dicto casu, ex masculino semine activum germen, nec debito modo produci, nec convenienter procedere in actum, propter impedimenta quæ occurrunt; scilicet quod à semine equæ semen asini, nec in ovo satis convenienter pro natura istius animalis dis-

solvatur & in actum provocetur, nec ei satis conveniens alimentum in prima facta formatione suppeditetur: hinc Natura operatrix, quæ nunquam otiosa est, cum non possit ex istius asinini feminis germine, quod ovum subintravit, formare asinum perfectum, gignit animal quod proxime accedit ad naturam asini, scilicet mulum, qui ratione feminis asinini formantis, natura est asinus; at ratione alimenti seu primi nutrimenti ab equa copiose suppeditati, & ab equæ natura participantis, corporis molem asinina majorem, & equæ aliquo modo similem acquirit. *Ad secundum* dico, semini virili eundem modò dictum errorem contingere in utero & ovis brutæ foemellæ, atque hinc Naturam loco humani foetus, ex eo generare monstrum irrationale: eodem modo sicut etiam in ovis & uteris ipsarum mulierum, interdum ob similem defectum convenientis fermenti (nempe feminis muliebris) aut illius, vel primi alimenti aliquod vitium, loco hominis, ex semine virili foecundo generantur modò molæ, modò animalia bruta, instar ranarum, semicanum, glirium, lacertarum, aliave similia monstra, quorum varia exempla inveniuntur apud Medicos observationum scriptores, atque etiam apud nonnullos historicos. Quæ monstra interim non generantur à semine foeminino, tanquam vim aliquam formantem in se continente, sed vitio feminis foeminini producuntur, quatenus illud male dispositum, impedimentum confert, cujus ergo virilis feminis formandi efficientia ita turbatur & impeditur, ut bene agere non possit. *Ad tertium* dico, quod mulier alba, non propter feminis sui aliquam formandi vim, sed propter fortē de foetu albo imaginationem, possit ex Æthiope producere foetum album: imò quod propter eandem imaginationem mulier nigra ex Æthiope nigro possit foetum album generare, & in lucem edere, cujus utriusque rei extant exempla. Certè imaginatio in mulieribus concipientibus & gravidis mirabilia præstat, non tantum circa formationem foetus, verum etiam circa eum jam formatum, ut paulo ante docuimus, quorum tamen nullum activitati feminis foeminini adscribi potest. Fuerunt nonnulli qui putarunt in equa modò dicta, aliisque brutis animalibus, imaginationem (quam in brutis omnino agnoscit & admittit Aristoteles, lib. 3. de Anima, com. 157.) etiam fortiter operari circa formationem foetus. Illud rursus alii strenuè negant, & quia bruta animalia ratione destituuntur, hinc etiam nullam imaginationem iis adscribunt, sed si quid alieni in utero genitum sit, id à vi formatrice feminis foeminini procedere arbitrantur. His respondendum, etsi bruta dicantur ratione, intellectu, & memoria

memoria destitui, illa tamen habere aliquid istis analogum (de hoc plura vide *sequente lib. 2. cap. 2. circa finem*) ut ex eorum actionibus manifestissime liquet (bos agnoscit præsepe domini sui: apis, cum mella colligit, inter centum similia alvearea suum cognoscit & ingreditur: canis heri sui mandata intelligit & exequitur, &c.) & quod tale imaginationi quaecumque analogum etiam in brutis concipientibus & gravidis aliquid circa foetum efficere possit, docuerunt oves patriarchæ Jacob, *Genes. cap. 30*. Hujus rei notabile exemplum ego ipsemet, cum pluribus aliis, vidi. Anno 1626. forte Montfurtum advenerat camelus dromas, vulgo dromidarius appellatus, quem suus herus pretio videndum exhibebat, animal erat valde magnum, quod inter alia latas fissas, & rotundas ungulas pedum habebat, & genua admodum crassa ac tumida, ad magni capitis humani magnitudinem: huic dromidario casu ex improvviso obviam fiebat equa, quam caballus triduo aut quadriduo ante iniverat, quæ à subitaneo occurso hujus animalis adeo exterrita fuit, ut repente retrorsum resiliens, insidentem rusticum à se excuteret in terram: tandem completo ingravidationis tempore, peperit illa equa pullum, cujus totum dextrum anterius crus omnino simile erat cruri dromidarii, cum ungula valde lata, rotunda, ac fissâ, & genu tam crasso quam dromidarii genu, qui pullus postea excrevit in equum validum, quem multis annis vidimus aratra & currus cum aliis equis trahentem. Certe nemo mente sanus facile dixerit hunc formationis errorem factum fuisse ab efficiente aliqua vi formatrice seminis equæ, sed potius ab isto jam dicto imaginationis analogo.

Observatio.

Contraria sententia.

Thomas Consentinus, *progymnasmate* 5. hac de re longe aliam concepit opinionem, quippe scribit solo foemineo semini inesse, tum primam materiam è qua, tum causam efficientem per quam formatio foetus fit: virile verò semen neque materiam formandi conceptus esse, neque ipsum formatorem in se continere, sed nihil ad generationem conferre, præterquam substantiam quandam insensibilem, quæ materiam à foemina collatam duntaxat subigit ac movet. Cum Thoma Consentino consentit Deusingius, *lib. de genesi microcosmi*, ubi apertissime etiam docet, foetum formari ex solo semine foeminino, idque non tantum esse materiam ex qua delineatur, sed eidem quoque potentia inesse Animam vegetativam, foetus formatricem; verum illam ex eo non posse extricari, & in actum produci, nisi virile semen accedat, tanquam quoddam fermentum substantiam ejus dissolvens, sicque latentem animam extricans, & ad formandi actum promovens. Verum hæc nova opi-

nio longe recedit à vero, dum imperfectiori semini muliebri (de quo non pauci dubitarunt, an verè & bene semen appellari possit) totam formationis vim & primam formandi materiam adscribit. Nam semen arboris, tritici, fabæ, aut pisi, quod est instar seminis virilis, injectum in suam vulvam, scilicet terram, terræ semen seu succum, accedente calore non dissolvit, ex eoque sibi simile producit, sed ab eo dissolvitur, & sic spirituosâ ejus parte compedibus soluta, atque in actum prodeunte, ex sese prima delineamenta formandi efformat, eaque formata primò colliquatis sui ipsius crassioribus particulis (quæ foeminei seminis vicem gerere videntur) hinc succo terræ conveniente nutrit & auget. Res patet in piso, faba, aliisque similibus, quæ in solo aëre humido ac tepido deposita, non fermentant aërem humidum, ut ex eo aliquid generetur, sed dissolvuntur ab aëre, sicque spirituosâ parte compedibus soluta, & in actum prodeunte, in se, & ex sese formant formandum, gemmamque primam projiciunt. Sic etiam se res habet in semine masculino, cum bestiarum, tum hominum, quod in vulvam projectum, & germinosa sui parte ova ingressum, non inducit in iis semini muliebri aliquam aptitudinem ex se aliquid formandi, sed à foeminino ovis contento semine solutum ejus germen, formandi vim continens, colligitur in exigua bulla, in qua compedibus jam expeditum, ex sese efformat quod formandum est, semenque muliebri ovo inclusum, quod primo fermentacei succi vicem gessit, mox deinde pro formati primo alimento inservit. Porro, quod *citato loco* dicit Deusingius, de semine galli in gallinæ ovarium injecto, illud nihil contra nostram sententiam facit: quippe paucissima seminis galli quantitas sufficiens est, è qua primum pulli delineamentum formetur: nam si foetus humanus primo delineatus formicæ magnitudinem habet, ut *sequente capite* docebitur, quam exilis & quanto minor in principio erit foetus gallinaceus, & quantilla seminis portio ad ejus primam delineationem requiretur? Sed verum non est quod addit Deusingius, gallum uno coitu totum ovarium foecundare, omniaque in eo contenta ova, etiam minima, vix pisi magnitudinem habentia, hinc foecunda evadere, licet gallus non amplius ineat gallinam; nam semen galli non ingreditur nec foecundat alia ova, quam illa quæ jam ad justam maturitatem pervenerunt; reliqua parva & immatura non magis foecundantur à semine galli, quam puella quinque sexve annorum foecundari posset à semine viri: imò cruda illa & immatura ova adhuc inepta sunt admittere aut recipere semen galli, atque hinc quotidiano fere coitu opus est, ut sic quæ

quotidie matura evaserunt ova semine galli perfundantur ac fecundentur. Atque hinc fit, quod illæ gallinæ quæ gallo rarius utuntur (est observatio ipsi vulgo nota) multa ova subventanea seu infœcunda pariant, è quibus per incubationem gallinæ pullus non procedit, quia scilicet de semine galli nihil receperunt: atque hinc etiam illi qui ova gallinæ supponere, ex iisque numerosos pullos habere desiderant, talium gallinarum ova quæerunt, quæ generosi galli quotidiana consuetudine utuntur. Hæc eadem consideratio etiam extendi potest ad ova muliebria, quæ quo usque cruda & immatura sunt, seminis virilis germen non admittunt, eaque præcipua causa est, quod multæ juvenulæ, præcipue frigidiores & minus salaces, sæpe primis multis post nuptias mensibus non concipiant, quia cruda adhuc & immatura sunt earum ova, atque hinc inepta quæ seminis virilis germinosam partem admittere, vel ab ea fecundari possunt, quæ fecundatio postea facile succedit, cum illa ova ad justam maturitatem pervenerunt.

Jo. Swammerdamius, in *Natura mirac. mibi* pag. 24. etiam videtur, tum materiam, tum foetum formantem spiritum semini muliebri adscribere, nam de ovis muliebribus agens, ita loquitur: *Fecundatio vero vel conceptio nihil aliud esse videtur, quam perfectioris motus communicatio, ita ut ovum, quod in ovario & nutriebatur & vivebat, post conceptionem* [id est, postquam ex ovario in uterum expulsum, ab eoque comprehensum est] *ovario relicto, perfectiore modo, atque ita nutriatur & vivat, ut jam ipsum se curare & sustentare posse putandum sit.* Pagina autem 22. dicit: *Omnes animalis partes ovo insunt.* Atque ita etiam Consentini & Deusingii sententiam assumens, semen virile nihil ad fecunditatem facere, imò neque materiam è qua delineatio prima facienda, neque spiritum formantem ei inesse statuit. Verum si alias validiores rationes non adferat, quam hanc, *putandum est*, certe nimis debilis erit illa confirmatio ad stabilimen suæ sententiæ, quæ meam de semine virili doctrinam, ante propositam, prima facie omnino destruere velle videbatur: quam incertus etiam & dubius de propria opinione sit, ostendit pag. 25. ubi sic dicit: *Fecundatio forte non nisi ratiocinando, & difficulter admodum per experimenta demonstrari potest.*

*Semen muliebri an sit materia necessaria ad generationem.*

Hæc & similia pensius considerata fecere, quod antedicta, de formatrice vi seminis muliebris, opinio multis præclaris viris displicuerit, qui proinde judicarunt, semen muliebri in generatione concurrere ut materiam necessariam quidem ad seminis virilis germinosam partem excipiendum, fovendum, expediendum, & in actum pro-

movendum, ipsumque primo delineatum embryonem nutriendum, sed nullam ad prima delineamenta effingenda materiam conferre, nullam quoque in foetu formando efficientis rationem habere. Quod posterius olim etiam docuit Aristoteles, lib. 2. de gener. animal. cap. 4. & post illum inter neotericos acriter defendit Cæsar Cremoninus, lib. de sem. nec non J. C. Scaliger, subtil. exercit. 268. his verbis: *Sicut forma non potest esse nisi una unius rei, ita principium continens ipsam formam, non potest esse nisi unum: unum igitur semen [virile] forma enim cum sit simplex & indivisibilis, ex duobus componi non potest, ac componeretur, si è mare prodiret & femina.* Plura ibidem subjungit argumenta, citato loco videnda, quibus non tantum foemineo semini omnem efficientiam in formando denegat, sed ipsum illud semen planè non agnoscere, nec etiam ullum ministrale officium ei concedere velle videtur. Rationes Scaligeri sunt admodum ponderosæ, ita ut in eo me facile consentientem habeat, quod forma & actus formationis tantum ab uno semine, scilicet virili, profluere possit, atque hinc muliebri semen ad foetus formationem nullum effectum formans conferat. Sed non possum cum Scaligero muliebri semen abdicare, & tanquam rem nullius usus æstimare: illud enim in generatione maxime necessarium esse, modò docui & probavi: & cum necessarium sit, atque formandi potentiam non habeat, non potest esse necessarium, nisi ratione talis materiæ sine qua virilis femininis potentia non potest suscitari & exurgere in actum. Efficientis autem seu formantis nullam rationem habere ex eo innotescit, quod mulier absque maris congressu ex se ipsa non concipiat, licet verosimile sit illam in nocturnis pollutionibus (quæ per insomnia Venerea mulieribus æque contingunt atque viris) præter feminalem materiam è prostaticis in vaginam erumpentem, subinde etiam ova per tubas excutere, & in uterum deponere: quæ tamen, si ejus ovis inclusum semen contineret duo principia generationis, agens & patiens, cum in se & locum, & tempus atque alimentum conveniens habeat, non posset non ex sese concipere. Præterea sic à Natura comparatum est, ut tantum unicum sit agens quod effectum naturalem producit, teste Aristotele, lib. 8. physic. 82. atqui si mulieris semen etiam efficientis seu formantis rationem haberet, jam duo forent principia agentia, nempe semen viri, & semen mulieris, quod repugnat instituto Naturæ. Ad hæc, si uterque sexus vim præstat activam, mas aut idem producet quod foemina, aut diversum. Si idem, tunc alterutrum superabundat: si diversum, tunc semper generabuntur gemelli, aut herma-

hermaphroditi, atqui illud rarò, hoc rarissime contingit. Denique, sententia nostra per naturalem instinctum vulgo ab omnibus confirmatur, nam liberi non denominantur à matre, sed communiter à patre, tanquam ab eo qui efficiens principium ad eorum conformationem contulit.

Ex jam dictis igitur liquet semen muliebri in se non continere vim formatricem fœtus, in hocque formando nullam efficientiam habere, imò nec primam materiam ad prima formandi fœtus delineamenta conferre; sed illud tamen necessarium esse ut materiam virilis seminis germen mollior excipientem, dissolventem, ac foverentem, spiritumque formantem germini virili inhærentem solummodo ab impedimentis liberantem, & ad agendum, omniaque prima corporis stamina ex se ipso, suave substantia, formandum disponentem, ac delineatum embryonem nutrientem.

Hippocratis opinio.

Huic nostræ sententiæ non videtur favere Hippocratis, qui, lib. 1. de genitura, ita scribit: *In viro, tum muliebri, tum masculinum semen inest, eodemque modo in muliere se habet. Masculinum verò semen robustius est: generationem autem à robustiore fieri necesse est.* Quibus verbis videtur Hippocrates indicare, semen muliebri etiam efficientis seu formantis rationem habere, non minus quam virile. Respondeo: in generatione robur seminum consistere, partim in causa efficiente ac formante, partim in materiali ad formandum præparante: & utramque causam seorsim sumptam, posse appellari robustam aut debilem; vel, ut Hippocratis dicendi formula utar, virilem, aut muliebrem. Cum causa formationis efficiens, quæ in semine virili hæret, valida, vel, ut Hippocrates dicit, virilis est, & causa materialis fovens, proximeque primo nutriens, quæ muliebri semen est, etiam robusta, id est secundum Hippocratem, virilis existit, tunc ex illis simul junctis fit mas. Si verò alterutra causa debilis sit, altera fortiori existente, tunc ab ea quæ prævalet fit mas, vel foemina. Atque hinc patet ex dictis Hippocratis verbis non solide concludi posse, illum muliebri semini vim efficientem ac formantem tribuisse, sed illud robur, de quo loquitur, etiam in materiali præparante causa non minus, quam in efficiente posuisse, & per robur in virili semine intellexisse, vim formationis efficientem validam ac robustam: in muliebri verò materiæ præparantis ac nutrientis optimam temperiem, & aptitudinem ad efficiens, in virili semine latens principium è suis compedibus potenter dissolvendum.

Veslingii opinio.

Veslingius de semine muliebri longè aliam concepit opinionem, quippe dupli-

cem in eo agnoscit substantiam: unam corpulentam, quæ ad ipsam fœtus constitutionem seu formationem requiritur: alteram aquosiorē, quæ partes uteri laxat, fœtumque reficit ac conservat, quam etiam concepto jam fœtu continuè in uterum profluere scribit, his verbis: *Ad fundum uteri à testibus quæ pertingit spermatici humidi portio, concepto jam fœtu longè nobiliorem usum præstat: huic enim copiosius affuso rude embryi corpusculum per initia conformationis innatat; adeoque non solum prohibet, ne quid uteri calor intensior immitium resolvat, sed fœtum etiam ipsum in valida materni corporis concussione mollior sustentat, adeoque umbilicalia vasa, per id tempus capilli tenuitatem aquantia, à ruptura periculo tuetur.* Veslingius in semine muliebri bene quidem consideravit duplices partes, sed in eo, secundum antiquam opinionem, maxime deceptus fuit, quod viri & mulieris semen in utero simul commisceri, sicque ex iis mixtis primam fœtus formationem fieri putaverit (hæc erroris nebula hodie per ovorum cognitionem dissipata est) quod etiam crediderit, succum lacteum, qui in gravidis, ad fœtus nutritionem, in uterum profluit, esse aquosiorē seminis muliebris partem, de quo succo videndum sequens cap. 31.

Hodie, ex Harvei opinione, multi docent semen muliebri, facta conceptione, una cum semine virili, rursus effluere ab utero, utpote ad conceptum prorsus inutile. Verum etsi istius opinionis vanitas ex antedictis satis pateat, tamen illam proximo capite latius examinabimus.

Harvei opinio.

Post seminis, cum virilis, tum muliebris explicationem, adhuc duo de semine in genere inquirenda supersunt. Primum, quæ ætate semen generetur. Alterum, quare eunuchi & castrata animalia pinguiora ac languidiora evadant.

Quantum ad prius; semen non generatur nisi cum corporis habitus jam sicciior & robustior evasit, cumque ad summum fere incrementi corporis perventum est. Atque hinc, quia inter decimum quartum & vigesimum annum hoc robur hæcque firmitas corpori maxime accedit, eo tempore semen generari incipit, tantoque majorem perfectionem indies nanciscitur, quanto corpus validius evadit, & minore incremento opus habet. Quod autem in juniore ætate & pueritia semen non generetur, vulgò imputari solet incremento corporis, in quod superflua sanguinis pars, semen futura, absumitur. Verum hæc est ratio longe petita, & solummodo signum causæ ob quam semen non generatur. Primò igitur videndum quare in juniore illa ætate incrementum corporis magis procedat, ejusque moles tantopere augeatur, ut sic

Quæ ætate generetur semen.

ex hac cognitione possumus pervenire ad alterum, scilicet, quare semen in illa ætate non generetur.

*Quomodo  
fit incre-  
mentum  
corporis.*

Incrementum corporis fit, quia omnes partes admodum humido, sulphureo, & oleaginoso succo abundant, atque hinc valde flexiles & extensiles sunt, qua de causa spiritus animales in illas influentes, sanguinem pro nutrimento per arterias infusum non acriter fermentare, atque hinc neque falsarum particularum à sulphureis sufficientem separationem facere queunt: idque partim quia obtunditur eorum vis à copiosa humiditate & sulphurearum particularum oleositate: partim quia ipsum cerebrum adhuc nimis humidum existens, eo tempore non generat spiritus adeo acres, qui effervescentiam acrem facere queunt, quales tamen postea satis generantur, cum omnia sicciora evaserunt. Hæc de causa etiam partes spermaticæ, in quibus præcipuum seminificandi robur consistere debet, tunc non admodum siccantur, sed propter copiosas humidiores & oleosiores nutrimenti particulas continue iis adjectas, extenduntur & excrescunt secundum longitudinem & crassitiem, idque tanto citius, quanto humidius & oleosius nutrimentum iis accedit, ut fit in infantia & pueritia: at robur iis magis augetur & firmitas, quando magis siccantur & minus increfcunt: loquor autem de modica & conveniente siccitate, non verò de totali ariditate. Quod magis siccantur, fit, quia nimia oleaginosa humiditas paulatim ab increfcente calore absumitur, atque sic nimia humiditas & flacciditas partium spermaticarum imminuitur, fiuntque robustiores, quia plus falsarum particularum è sanguine separatarum nutrimento earum admiscetur, iisque firmitus adunitur seu assimilatur.

*Quare pueris non generetur semen.*

Hæc eadem causa quæ partium incrementum promovet ac fovet, illa impedit quo minus semen in pueris generetur. Hinc enim fit quod sanguis humidior & oleosior, & ipsi quoque spiritus animales pauciores & minus acres, ad testes fluant, ita ut hac de causa eorum incrementum solummodo fieri, nullum verò semen inde gigni possit. Sed postea per incrementum caloris absumpto nonnihil superfluo isto oleoso humido, tunc cerebrum siccius gignit spiritus animales acriores, qui sanguini arterioso ad testes delato per nervulos affusi, falsiores particulas, ad feminis generationem aptiores, ex eo melius separant, cum quibus in tenuem liquorem condensati ac commisti, propria testium vi (à peculiari specifica eorum temperie ac conformatione procedente) coquuntur in semen, quod eo perfectius evadit, quo minus in eo prædominatur copiosa illa humiditas, quæ in perfecto non nisi moderata esse debet.

Atque ex his jam quoque liquet, quare in senectute semen, aut paucum & aquosum, aut nullum in testibus conficiatur (excipiendi sunt illi fortiores, quibus viridis est senectus, quorum nonnulli octuagesimo & nonagesimo anno liberos genuerunt, sicut illud de proprio suo parente narrat Platerus) quia scilicet propter debilem calorem, in ea ætate rursus prædominatur toto corpore nimia humiditas, quamvis non tam oleaginosa ut in pueritia, sed cruda, & magis aquosa, unde tunc cerebrum fit humidius, & pauciores ac minus acres spiritus generat (hinc quoque actiones animales principes, motusque corporis, tardiores ac debiliores fiunt) sanguis fit frigidior & humidior: ad hæc ipsæ partes semen coquentes fiunt flaccidiores & nimis humidæ, ita ut tam ratione materiæ ineptæ, quam propriæ debilitatis, semen conficere nequeant.

*Quare senibus non generetur semen.*

Quantum ad posterius, scilicet quare eunuchi & castrata animalia pinguiora, languidiora, & minus animosa evadant, illius rei ratio est, quia per testium excisionem eximia temperamenti corporis mutatio inducitur, propterea quod tunc desinat virosa illa seminalis inspiratio (hæc in brutorum masculorum carnibus ex singulari quadam graveolentia & peculiari sapore innotescit) qua omnes partes corporis virilis perfundi, sanguis aliique humores calidiores, spiritusque acriores & vegetiores fieri solent. Insignis illa temperamenti mutatio, præter alia varia signa, in eunuchis ex eo patet, quod pili ante castrationem nati iis non decidant, & nondum in barba aliisque partibus nati, nunquam nascantur, secus ac aliis non castratis evenire solet. Eadem se manifestissime prodit in cervis ad masculam maturitatem deductis: his quippe in capite magna enata cornua singulis annis decidere, & tunc alia nova rursus succrescere solent: verum si delapsis seu depositis cornibus mox castrantur, tunc nova cornua nunquam rursus succrescere, sed corpora pinguiora evadere dicuntur. Hæc autem temperamenti mutatio, à defectu virosæ seminalis inspirationis per totum corpus inducta, versus frigus tendit, unde fit quod sanguis oleosior, minusque fervidus, & spiritus animales minus acres ac vegeti generentur, minusque dissipantur, & quæ sanguinis pars in semen spiritusque seminales absumi debebat, in corpore tota remaneat, ac vasa repleat, omnibusque partibus pro uberiore nutrimento adjiciatur, quæ ab illa maiore copia & oleositate magis humectantur & pinguescunt. Quippe spirituum animalium fermentans vis in tanta sanguinei succi minus fervidi quantitate multo obtusior seu remissior existens, sulphureas & oleaginosas sanguinis particu-

*Quare idcirco animalia sunt pinguiora.*



particulas à falsis minus separat, quæ hac de causa majore copia iis admixtæ manentes, & partibus nutriendis simul appositæ, eas magis humectant, & pinguiore ac obesiores sed languidas minusque robustas, efficiunt: quippe intercessione illa impeditur quo minus particulæ sanguinis sicciore & magis falsæ spermaticis partibus firmiter uniantur; à quibus alioqui harum robor maxime procedit. Hic denique addendum, quod in castratis ab ista nimia sanguinis oleosi redundantia ipsum cerebrum etiam nimis humectetur, eaque de causa spiritus minus acres, subtiles, ac vividos, hincque ad fermentationem & animales actiones minus aptos, generet: unde eunuchi sunt torpidioris ingenii, minus animosi, languidi, effœminati, & tardiores ad quælibet mentis corporisque actiones.

Quare obesi  
minus va-  
leant ad Ve-  
nerem.

Ex eadem illa oleaginosarum particularum, acrimoniam spirituum animalium infringentium, in sanguine redundantia fit, quod iis, qui naturâ suâ pingues & obesi existunt, minus seminis, idque tardius generetur, iique hinc ad Venerem minus valeant, & ea citissime delassentur: cum

è contrà robustis macilentioribus major sit ad Venerem proclivitas, & faciliior ac longior ejus tolerantia; quia scilicet his plus seminis, & citius generatur, quam illis; propterea quod spiritus animales accriores & copiosiores habeant, eorumque fermentans vis à nimia copia oleosæ humiditatis non obtundatur. At enim, dicat aliquis, quare pueri non fiunt obesi, in quibus est eadem ratio? Quia nimia quantitate redundans humidus roridusque sanguis ipsis absumitur in augmentum & incrementum corporis.

Ex modò dictis jam quoque patet, quare in plethora corpus lassum, pigrum, ac debile evadat, simulque actiones animales cum principes, tum aliæ, torpescant, homines soporosi fiant, &c. quia scilicet propter oleosarum particularum nimiam in sanguine redundantiam, pauciores & minus acres atque agiles generantur spiritus animales.

Quare plethorici sunt languidi.

Quænam autem sit illa spirituum animalium fermentans vis, de qua hic aliquoties mentio facta est, videndum lib. 3. cap. 11.

## CAPUT XXIX.

Digestio.

## De Conceptione, &amp; Fætus formatione.

Conceptio.



Um semen fœcundum utriusque sexus ab utero bene disposito comprehensum est, in eoque inclusum detinetur, conceptio facta dicitur.

Quo loco  
fit.

Hæc autem conceptio fit in ipsius uteri cavitate, non verò in aliquibus membranarum interiorum poris: quia neque seminis injecti quantitas poris contineri potest: neque germen ex crassiore seminis massa separatim poris includitur (hoc paulo inferius patet ex observationibus de bulla annotatis) sed per tubas ad ovarium defertur, eoque fœcundata ova (hæc semen muliebre continent) per eandem viam ad uterum deveniunt; in ejusque cavitate comprehenduntur & foventur. Qui, Harveo duce, tradunt semen in uterum injectum paulo post rursus foras effluere, solo germine intus remanente; illi docent conceptionem, non tam in uteri cavitate, quam in membranarum internarum poris fieri, quod etiam inculcat Regius, *philos. natur. lib. 4. cap. 14.* sed quantum à vero aberrant, ex sequentibus patebit.

Necesse est autem ut semine jam concepto & comprehenso mox uteri orificium claudatur, & clausum maneat (saltem primis mensibus) ut spiritus ille, in quo seminis fœcunditas consistat, non evanescat,

antequam per tubas ad ovaria delabatur, qui ostio non clauso facillime dissiparetur; ut etiam ova dicto spiritu jam fœcundata, sicque ex ovariiis ad uterum delata, foras non elaberentur, aut ab ingrediente aëre non corrumperebantur. Hanc orificii occlusionem dicit Galenus, & nos quoque vidimus (ut cap. 25. & 26. dictum) adeo arctam & exactam fieri, ut ne specilli quidem apicem admittat.

Loquor autem de semine utriusque sexus neque eò animi impotentia devenire volo, ut cum Aristotele, nec non Harveo (*de gener. anim. exercit. 33.*) de semine muliebri dubitare, ac sine eo conceptum fieri posse, credere velim; cum præcedente capite ejus necessitatem satis, probaverim, & quamvis non sit causa efficiens formationis fœtus, est tamen talis causa materialis, quæ in ipsis ovibus cum virilis seminis germine necessario debet concurrere, ad hujus dissolutionem & expeditionem; eamque, unâ cum aquosioribus colliquatis ejusdem seminis virilis partibus constituere materiam; qua tenuissima maximeque tenella & exilia è germine seminis virilis jam efformata membrorum embryi stamina primum foveri, & incrementum ac alimentum desumere, atque ipsæ quoque membranae, chorion & amnios, efformari debent; eodem modo sicut

Semen a-  
trisque  
sexus con-  
currit.



ficut in ovo gallinæ corticem, cum interiore tenella membrana, ex semine gallinæ genitum videmus ante coitum cum gallo, ut liquet in ovis subventaneis. Qui tamen durus cortex cum dicta tenella membrana in gallinarum, aliarumque avium ovis, post deposita ova non augentur aut incrementum amplius, quia justam capacitatem & magnitudinem adepti sunt antequam deponerentur, utpote extra corpus avium effovenda, secus atque in homine aliisque viviparis, in quibus cum incremento fœtus hæ membranæ necessario incrementum debuerunt, atque hinc quia ad illud quotidianum in utero incrementum semen muliebne solum non est sufficiens, ei in subsidium veniunt, primò seminis virilis aquosiores in utero subsistentes partes, deinde etiam sanguis per vascula sanguifera, alique humores per alias vias ab utero eò delati.

*Sanguis  
menstruus  
non concurr-  
rit.*

Hic rejiciendam censemus eorum opinionem, qui, ex sententia Aristotelis, putant etiam sanguinem menstruum una cum semine concurrere ad primam partium formationem: nam omnes partes ex solo semine, & quidem à & ex subtilissima, maximeque spirituosâ ejus parte delineantur, nec menstruus, aliisque qualiscunque sanguis quidquam aliud confert quam nutrimentum, à quo sumitur partium incrementum, ut mox latius docebimus.

*Seminis  
comprehen-  
so.*

Facta conceptione non tantum clauditur uteri orificium, sed totus uterus se circum semen contrahit, ut illud undique melius comprehendat, seu amplectetur. Sic refert Galenus, *lib. 2. de sem. cap. 2.* mulieres ipsi sæpius dixisse, se post conceptum semen quandam in vulva motionem sentire, quæ quasi convellat, & paulatim illam in se contrahat.

*Seminis col-  
liquatio.*

Semen ab utero comprehensum rorido uteri calore fovetur, alteratur, & colliquatur, sicque ejus particulis crassioribus & magis fixis à firmiore cohæsiōe seu nexu dissolutis, particulæ spirituosæ maximeque mobiles, quæ in istis crassioribus veluti sopitæ & incarceratæ latuerant, ab iis liberatæ mox per tubas uterinas ad ovaria tendunt, ut in iis ova, quæ ad sufficientem maturitatem pervenerunt, ingrediantur (per membranularum enim ea cingentium poros facile transeunt, ut notum est in avium ovis) & illa fecundent, in quibus in exili bulla concurrunt, & instar tenuissimi pel- lucidi, ac crystallini liquoris, in ovo ad uterum delato apparent.

*In bulla fit  
formatio.*

In hac sola bulla totius fœtus formatio perficitur. In ea enim tenui & spirituosâ seminis parte Vis architectonica latet, quæ per uterini caloris fœtum, cum suo subjecto cui inhæret, scilicet tenuissimo ac spirituosio illo seminis liquore, à massa crassiore liberata, mox prorumpit in actum; nam libera

esse non potest, quin agat, & liberari nequit nisi à causa externa, nimirum uteri calore, tota seminis virilis massa coitu ejecta in cavitate uteri dissolvatur ac colliquetur, sicque ex ea separata spirituosâ seu germi- nosa pars per tubas ad ovaria, in iisque contenta natura ova, deferatur, & ovis jam inclusa rursus cum iis ad uterum redeat. Ut enim se ipsum nihil producere potest, sic nequit ulla forma se ipsam ex materia educere. In actum autem prorumpens ex suo tenui subjecto fœtus totius delineationem auspicatur ac brevi perficit. Nam ilico tenuissimæ particulæ bullæ inter se leniter agitantur & moventur, variisque modis ac figuris hic illic coagulantur, & per eas innumeræ viæ excavantur, sicque omnes corporis partes efformantur: quia spirituosâ illa bullæ materia, à crassiore massa separata, continet in se omnium partium ideas, hincque aptitudinem habet ad singularum partium formas recipiendum, & figuras in se efformandum, ut *precedente capite* latius dictum. Quia autem spirituosâ illius partes in bulla conclusæ paucissima quantitas est, ejusque adhuc minima solummodo & maxime subtilis pars delineationi fœtus impenditur, propterea fœtus in isto principio vix formicæ magnitudinem habet.

Hinc jam patet, quia liquor in ista bulla contentus subtilissima ipsius seminis virilis pars est, omnium partium prima delineamenta ex ipso semine, id est, ex tenuissima ac subtilissima illius parte constari, ac deinde in principio à crassioribus seminis, cum viri, tum mulieris, particulis colliquatis ac fufis, postea verò succo lacteo aquoso, & sanguine per umbilicum adfluente, augeri ac magis incorporari.

Ex modò dictis jam satis manifestum est quantum à veritate aberraverit Aristoteles, dum statuit omnes partes, non ex semine, sed ex sanguine formari: imò dum semini masculino, neque formationis, neque materiæ, ullam partem tribuit, sed illud solummodo dicat sanguinem menstruum movendo, ex eo generare formam & partes; ut liquet ex ejus verbis, *lib. 1. de gener. anim. cap. 22.* Semen, inquit, nulla pars factus est: sicut nec à fabro quidquam secedit ad lignorum materiam, neque ulla pars artis fabrilis in eo, quod efficitur, est, sed forma & species ab illo per motum in materia existit. In quem errorem etiam prolapsus est Harveus, *lib. de gener. animal. exercit. 17.* quo loco persuadere & probare nititur, sanguinem existere ante omnia alia viscera, atque hinc prima omnium partium stamina delineari ex sanguine: quod ipsum adhuc magis confirmat *exercit. 56.* Videtur, inquit, paradoxum, sanguinem fieri & moveri, spirituque vitali imbui, antequam ulla organa sangui-

*Delineatio  
fit ex solo  
semine.*

*Non ex san-  
guine.*

*sanguifica, vel motiva extiterint.* Sic etiam exercit. 16. dicit, sanguinem primum existere, pulsationem verò non nisi post accedere. Verum respondemus Harveo, licet corculum, quod sanguificat, in principio nostris oculis videri, & ab aliis partibus clarè distingui nequeat (partes enim omnes ex pellucido spirituosissimo seminali liquore in bulla concluso delineatæ, etiam in principio fere pellucidæ existunt, atque hinc, cum propter colorem, tum propter summam exilitatem, visu distinguibiles non sunt) illud tamen necessario cum cæteris ex semine esse delineatum ante sanguinem, & formatum statim pulsare, quamvis exiguis ejus pulsus à nobis in isto principio animadverti nequeat. Nam ejus præsentiam, & ante sanguinem existentiam effectus manifestissime docet. Cum enim nullus sanguis ante delineationem in bulla contineatur, nec in eam aliunde influere possit, ergo ille qui in ipso delineationis principio, cum prima aliqua exilia stamina videri incipiunt, in bulla observatur, necessario in ea genitus fuisse debet, atque si nulla alia pars sanguinem gignat quam cor, nec ullus sanguis sponte ac per se gigni possit, necessarid, cum in bulla & colliquamento aliquæ sanguinis notæ apparere incipiunt, quæ ob colorem rubicundum facile visui occurrunt, causam efficientem istius sanguinis, scilicet cor, præexistere statuendum est, quamvis nostris oculis nondum perfecte videri, aut pro eo quod est cognosci queat, propter exilitatem & pelluciditatem. Ita etiam, si sanguis per vascula promoveatur, cum id fieri non possit sine pulsu cordis, certissimum est cor pulsare, quamvis adhuc nullus ejus pulsus oculis manifestè videri possit. Nam quod corculum, ejusque exilis pulsus in ipso principio à nobis non videatur, hoc non fit quia non sunt, sed quia nostri oculi tam exilia videre & percipere nequeunt. Præterea in ovo gallinæ supposito res manifesta est, quippe colliquamentum cum bulla, quod prima inspectione se prodit, ante sanguinem est, cumque illud in sua bulla amplectatur spiritum formatricem pulli, neque uspiam sanguis ad interiora ovi ingredi aut penetrare possit, indicium est membra pulli delineati ex illius colliquamenti bulla delineari, non verò ex sanguine. Sic etiam planta non generatur ex viridi succo, quo postea nutritur, sed ex spirituosissimo germine in semine latente: ubi verò jam genita est planta, tunc operationem suam instituit in præparando succo, quem pro nutrimento suo conficit. His adde, quod ovi gallinæ inspectione constet, punctum saliens & sanguinem simul videri: unde liquet, sanguinem non dari; nisi prius extet organum sanguinem conficiens, scilicet cor, quod

tamen si totius corporis delineamenta ex sanguine generarentur, etiam cum cæteris post sanguinem genitum fuisse debuisset, quod tamen falsum esse docet autopsia, & docent modò dictæ rationes. Igitur ex solo semine, & non ex sanguine, primæ embryi stamina delineantur, neque spiritus architectonicus ex sanguine, sed ex germine seminis prorumpit in actum; & delineato sanguifico viscere corde, mox illud gignit sanguinem, & simul eum movet. Deusingius, *de sanguificat. exercit.* 19. 20. 21. de hac re differens, efficaciter sic loquitur: *Quisnam dux, vel quanam intelligentia sanguinem dirigit per conceptus materiam vagabundam & errantem? quæ intelligentia assistens (cum primo destituatur intellectu) sedes ipsi formandorum viscerum designabit? ubi formandum cor, ubi collocandi renes, vel cerebrum, vel lien? ne forte cerebrum in abdomine, & intestina in cranio suam sedem consequantur. Quanam intelligentia à sede cordis, ante cordis radimentum constitutum, quo propellatur ipsum abducat? aut vagum ex variis sedibus formandarum partium, ad unum punctum, ubi cor constituendum sit adducat? quanam causa aget ipsum in circuitum porro, nisi pulsante cordis vesicula propellatur? quanam providentia vagantem prius sine conceptaculis, sic coërcebit, ut post, conditis canalibus in hos dirigatur?*

Huic, fœtus in bulla jam delineati minimo corpuseulo, in principio suo, non quodlibet, sed appropriatum aliquod formamentum & nutrimentum conveniebat, quo absque viscerum (horum quippe tunc invisibilia solummodo extant rudimenta, nec iis conspicua aliqua coquendi vis adhuc inest, nam prius augmento seu incremento aliquo opus habent, antequam agere possint) notabili coctione nutriri, augeri, & incrementum posset. Illud verò non sanguis, non ehylus esse poterat, utpote quæ majore coctione & præparatione egent antequam nutrire queant, sed eum in finem providus Creator ovo muliebri inclusit semen muliebri (instar albuminis cujusdam) utpote quod est humor mitissimus, ad primum innatantis embryi fœtum & irrorativam nutritionem aptissimus, proximè accedens ad naturam tenellarum jam delineatarum partium; nec multiplici coctione opus habens, sed unica tantum levi præparatione, scilicet ut per clementem calorem loci seu uteri, nonnihil attenuetur & colliquetur. Sic etiam Galenus, *lib. 14. de usu part. cap. 11.* scribit, embryonem primo nutriri semine fœminino, tanquam eo quod naturæ ejus magis familiare sit, quam sanguis; cum omne quod nutritur à similibus augeri facilius possit. Sicut etiam videmus avium pullos in ovis primo nutriri interiore albumine, quod est semen avium.

Primum fœtus nutrimentum.

Z

Verum

Verum quia in parvo ovo, quod mulieres ex ovario per tubas ad uterum dimittunt, non multum muliebris seminis contineri potest, hinc ei ad uterum delato etiam adjungitur aquosius jam colliquatum & attenuatum seminis virilis residuum, post ex eo separatum & ad ovaria depulsum germen, in utero subsistens; quod ovum in uterum decidens molliter excipit & amplectitur, ac poros pellicularum ejus transiens, sicque interiora subiens, & albumines muliebris succo sese admiscens, colliquamentum (quod copiosum intra chorion & amnion continetur, ut liquet ex abortibus paulo post descriptis, nec a solo foemineo semine tam copiosum esse potest) cui embryo innascitur, quantitate multum adauget, simulque pelliculas ovi valide distendit & amplificat, ut sic embryo sit amplior sedes, atque etiam plus nutrimenti, proxime ad maturam principiorum ejus accedentis suppetat. At etiam liquor ille feminilis, qui mulieribus in coitu ex suis proflatis, (cap. 26. precedente descriptis) erumpit, residuo seminis virilis in uteri cavitatem admisceatur, & una cum eo in foetus nutrimentum cedat, an verò peracto coitu statim foras effluat, haecenus incertus dubito. Præterea germen ovo jam ante infusum & inclusum, longe fortius & melius procedit in actum, cum crassior colliquata seminis virilis pars per tunicas ejus interiora subierit, sui que admistione albumineum foemineum sensen convenienter dissolverit, ut sic aptius sit quod germen spiritum citius ad actum suscitare possit. Eodem modo hæc res etiam procedit in plantis, quorum seminibus inclusam atque irretitum germen non procedit in actum, nisi prius per cortices imbibuerint succum terræ, qui interiorem substantiam, seminis muliebris vicem tenentem, dissolverit, atque sic germen expederit, & in actum promoverit. Atque sic primum embryonis fomentum & nutrimentum fere simile est isti substantiæ, e qua formatum est, aut saltem ex simili formatum. Hoc ipsum quoque animadvertit Aristoteles, lib. 2. de gener. anim. cap. 4. ubi inquit: *Eadem est materia e qua augetur animal & ex qua constituitur.* Nam quidquid in principio delineatis partibus, dum augentur, superadditur & apponitur, fere similis debet esse substantiæ cum illa ex qua constant, adeoque ex eodem genere materia constare. Hac in parte etiam consentientem habemus Harveum, de gener. animal. exercit. 44.

Quomodo  
seminis vi-  
rilis resi-  
duum inter  
bullam.

Non est autem quod cupiam mirum videatur, per poros pellicularum ovi muliebris (quæ pelliculæ in isto principio admodum tenellæ, molles & porosæ existunt, sed postea chorion & amnion constituentes, adeo firmæ evadunt, ut amplius nullum

humorem per poros elabi. Annot. illud seminis virilis jam colliquatum & attenuatum residuum versus ovi interiora penetrare, & ingredi posse; nam æque facile hoc fit, in ovo muliebri, quam in seminibus plantarum, quæ per corticum suorum (etiam durissimorum, ut avellana, amygdala, persici, juglandis, &c.) poros humidum terræ facile imbibunt, a quo tunc cortex multum distenditur, & semina intumescunt, eoque imbibito terræ humido quæ internis crassioribus seminis particulis colligatis mixto, mox primo delineata, quam projiciunt, gemma nutritur, quæ deinde per incrementum eo usque deducta, ut majore nutrimento opus habeat, etiam radices, tanquam umbilicos, projiciunt, ut per eas plus firmioris nutrimenti ex ipsa terra haurire possit. Sic etiam fit in embryone humano; qui primo nutritur, tum semine muliebri, tum huic admixto semini virilis residuo colliquato: sed deinde, his fere absumptis, paulatim incipit umbilicus excrescere, ut per eum tanquam per radicem, alio copiosiore & firmiore nutrimento nutriatur, de qua nutritione videndum sequens caput. 31.

Hæc jam dicta materia dupliciter nutritur. *Primo*, per juxta appositionem, quatenus tenellæ delineatæ partes eâ undique irrorantur, & sic augentur. *Secundo*, per alimentorum in propriis visceribus coctionum assimilationem. Quippe embryonis recens delineatæ viscera in principio nullas coctiones peragere, nec alimenta præparare aut conficere possunt (hoc considerans Alcmæon, apud Plutarchum, scribit in utero contentum foetum toto corpore per halitum nutriri) atque hinc sola seminali ante præparatâ materiâ per appositionem nutritio tunc perficienda est. At paulo post ex eadem illa materiâ cor sanguinea conficit, pro intrinseco partium uberius nutrimento, atque tunc ad nutritionem per juxta appositionem accedit alia per ipsius susceptionem.

Utramque hæc foetus in suo principio nutritionem etiam agnovit Harveus, exercit. 9. Quippe in omni, inquit, nutritione accretione aequaliter necessaria est partium juxtapositio, & applicatio alimenti concoctionis distributio, neque hæc minus, quam illa, vera nutritio censenda est; siquidem noni alimentum accessu, appositione, agglutinatione, & transformatione contingit. Nec minus sæpe ciceret vel sub attractione tenuioris suæ terræ humore, quem veluti spongia imbibunt, verè nutriti dicuntur, quam si eandem per venarum osacula admitterent, & ab eisdem corticibus suis eorum plantisque absorbent, ex aqua rari alimentum ac per radices falerent.

Tandem verò seminali isto liquore absumpto, & visceribus jam incremento nonnihil

Duplex nu-  
tritionis  
modus.

Nutritio per  
sanguinem.

nonnihil adauctis ac corroboratis, & succo lacteo intra amnion jam largiter affluente, paulatim definit nutritio per iuxta appositionem, & permanet sola nutritio per intus susceptionem, id est, per sanguinem: quia lacteus ille liquor non est tam analogus partibus foetus, quam prior seminalis, atque hinc etiam majore coctione, & in sanguinem mutatione opus habet, antequam nutrire possit. Quæ coctio, seu sanguificatio ut feliciter ac convenienter in foetu procedat, necessario etiam per venam umbilicalem sanguis in placenta uterina præparatus, ac fermentacea qualitate donatus, ad foetum deferri debuit, qua de re latius agetur cap. 31.

Sanguis  
quomodo  
nutritur.

Sanguis autem in corde genitus, totique corpori communicatus, concrescit super exilia partium stamina, primum cordis (nam hunc sibi non minus, quam aliis partibus conficit) hinc jecoris, pulmonis, renum, ventriculi, musculorum, &c. variz enim sunt in sanguine particulæ crassiores, tenuiores, salzæ, sulphureæ, mixtæ, &c. (de his vide lib. 2. cap. 12.) ex quibus aliæ his, aliæ illis partibus magis adhærent & convenientes sunt, iisque uniuntur, prout aliæ harum, aliæ illarum naturæ magis propriæ & analogæ sunt, pro cuius naturæ diversitate in singulis diversas mutationes subeunt, antequam prorsus assimilari queant. Quo autem sanguis magis accrescit primis istis delineatis filamentis, eo magis increfcunt parenchymata viscerum, & reliquæ etiam partes, ac paulatim magis magisque perficiuntur & roborantur, aliæ tamen citius aliis, idque pro majore vel minore usus necessitate: unde fit ut cor omnium primo manifeste agat, sanguificet, & pulset, quia illius perfectio & actio omnium primo & maxime necessaria erat; cerebrum verò adhuc appareat instar aquæ spissioris nonnihil turbidæ, cum jam aliæ partes increverunt; & quamvis postmodum etiam necessarium quid conferat ad nutritionem (ut latius explicabitur lib. 3. cap. 11.) tamen in isto principio, cum omnia tenuia delineamenta ortui suo proxima levem aliquam fermentaceam qualitatem in se contineant, nec fortem requirant, aut ferre possent, ejus subsidio nondum opus est. Præter cerebrum etiam multæ aliæ partes non bene apparent, nec visui clarè occurrunt, nisi aliquamdiu post formationis principium, imò nonnullæ non nisi aliquamdiu post nativitatem, ut dentes, quamvis omnes simul delineatæ sint ab initio. Nam sicut Natura partibus jam delineatis, per illas mox agit pro necessitate usus, sic etiam organa per incrementum non perficit, nisi prout eorum perfectionem postulat necessitas usus. Et sicut ex actione possumus colligere partes jam formatas esse,

licet oculis nondum queant conspici (ita sanguineis lineolis in ovo apparentibus, constat cor jam esse formatum, etsi aut non, aut vix appareat) ita etiam colligere possumus, eas partes ad usum maxime necessarias esse, quæ primæ absolvuntur, inter quas omnium prima est cor.

Ex modo dictis itaque satis patet, quomodo embryo ex germine in bulla contento, non autem è sanguine generetur, & quomodo postmodum nutriatur; primò scilicet semine foeminino & colliquato residuo seminis masculini, postea semineo isto nutrimento & sanguine, ac denique solo sanguine.

Hæc nostra sententia contraria est eorum opinioni, qui tradunt hominem ex solo germine, id est, spirituofo & efficaci illa seminis parte, produci & efformari, reliquam verò seminis massam prorsus inutilem esse, atque hinc facta conceptione foras effluere. Ex germine quidem solo, ovo muliebri infuso, & in bulla collecto, prima totius corporis delineamenta seu stamina efformari certum est, sed interim omnino falsum est, post separatum germen & conceptionem factam, vel ante hanc, reliquam seminis molem, ut inutilem foras effluere. Quippe repugnat ratio, repugnant auctoritates præstantissimorum Medicorum, repugnat denique experientia.

An semen  
post conceptionem  
rursus effluat.

I. Ratio: quia ubi semen ab utero conceptum est, adeo arctè occluditur uteri orificium, ut ex eo nihil omnino effluere possit.

II. Auctoritates: nam Hippocrates, lib. de genitura, conceptis verbis dicit: *Post coitum autem si quidem mulier minimè conceptura est, semen ab utrisque emissum foras profluet. Quodsi conceptura sit, semen minimè foras profluit.* Eo namque excepto uterus clauditur, ejus nimirum osculo ob humiditatem contracto, simulque miscetur, tum quod à viro, tum quod à muliere procedit. Si mulier aliquando partum experta fuerit, & animadvertit quando genitura non exciderit, sed intus remanserit, scit qua die conceperit. Idem Hippocrates, lib. de natura pueri, sic inquit: *Si genitura ab utroque parente in mulieris utero permanserit, primum quidem cum mulier minime quiescat, simul permiscetur, condensatur, & calore incrassescit.* Galenus, de usu part. lib. 14. cap. 11. dicit, *Semen in matrice manet, cum mulier conceptura est.* Idem, lib. 1. de sem. cap. 2. ita scribit: *Integros libros omnium, qui hac de re scripserunt, Medicorum perlegi, quos inveni hoc idem etiam affirmare, hoc est, si conceptura est mulier, opus esse genituram viri intus remanere.* Ita quoque Macrobius, lib. 1. som. Scip. cap. 6. scribit: *Semen quod post jactum sui intra septem horas non fuerit in emissionem elapsum,*

*elapsum, hâsſe in vitam pronunciatuſ.* Hoc ipſum plerique antiqui, cum Græci, tum Arabes, multiplici obſervatione edocti, paſſim inculcant. Inter recentiores illud ipſum etiam aſſerunt, Ferneliuſ, *lib. 6. patholog. cap. 17.* Ludovicuſ Mercatuſ, *lib. 3. de morb. mulier. cap. 6.* Sennertuſ, *lib. 4. med. pract. part. 2. ſect. 5. cap. 1.* aliique plures.

**III. Experientia:** nam Galenuſ, *lib. 1. de ſem. cap. 2.* ſcribit, ſibi non tantum multoties ab iſtiuſ rei peritiſ (loquitur de Zootomiciſ) relatam eſſe equaſ, caneaſ, aſinaſ, vaccaſ, capraſ, & ovaſ, cum concipiunt, utero ſuo ſemen manifeſte continere: verum ſe ipſum quoque illiuſ rei multoties experimentum feciſſe, & ſemper comperiſſe in omnibuſ animalibuſ, quæ poſt coitum ſemen retinuerant, & hinc imprægnata habebantur, facta diſſectione, ſemen in utero inventum fuiſſe. Si hoc in brutiſ contingere ipſemet Galenuſ (cui terte magna fideſ debetur) viderit, quid ni etiam in muliere ſic contingat? Verum hoc in ipſiſ eodem modo contingere, ſatiſ docet uſuſ: quippe muliereſ ex eo ſciunt ſe certo gravidâſ eſſe, ſi obſervaverint poſt coitum nihil ſeminiſ ex genitalibuſ effluxiſſe, eaque ſicca manſiſſe. Rogentur quotquot gravidæ fuerunt, illud certiſſimuſ indicium conceptioniſ & imprægnationiſ unanimiter teſtabuntur, ex eoque ſigno ſemper ſcire poſſent, quo certo tempore concepſſent, niſi ſæpe ſtatim poſt nocturnum coitum in ſomnum delaberentur, vel poſt diurnum aliis curiſ & occupationibuſ intentæ, iſtiuſ rei nullam rationem haberent, atque tunc, ſemen ne effluerit, an non, ignorarent: hoc autem ubi ab ipſiſ animadverſum non eſt, ſolent certum principiuſ imprægnationiſ ignorare, ſuamque computationem à primo defectu menſtruorum incipere, ſicque haud rarò in tali computatione graviter falluntur, ut latius docebitur *cap. 35.*

*Harveii opi-  
nio, ſemen  
rurſuſ ef-  
fluere.*

Verum neque prædicta ratio, neque auctoritateſ clariffimorum virorum & Medicinæ patrum, neque teſtimonia ipſarum fœminarum tantum valere potuerunt, quin tamen Harveuſ, iſi omnibuſ non obſtanti- buſ, audacter negare auſuſ fuerit, ſemen ad partium formationem & incrementum quidquam conferre, atque hinc dixerit, illud, vel uterum non ingredi, vel ingreſ- ſum rurſuſ foras effluere, conceptu ni- hilominuſ permanente; in quem errorem etiam Regiuſ, pluſimoſque alioſ Philoſo- phoſ protraxit. Rationeſ quibuſ in hanc opinionem deducitur, deſumit ab autopſia, quod damaſ, cervaſ, aliaque multa bruta (legatur ejuſ *lib. de gener. vivipar.*) poſt coitum diſſecuerit, nec unquam aliquod ſemen in uteriſ reperiit, cum tamen, ut credit, varia ex iſiſ imprægnata fuiſſe debue-

rint: & exercit. 67. hæc de re ſic loquitur: In canibuſ, cuniculiſ, aliſque pluſibuſ ani- malibuſ, expertuſ ſum, nihil proruſ in utero poſt coitum per aliquot dierum ſpatia reperi- ri, adeo ut exploratum habeam, in vivipariſ quo- que (quod de ovipariſ conſtat) nec ex ſpermate mariſ & fœmina in coitu projecto, nec ex ambo- buſ ſimul miſtiuſ (ut Medici volunt) oriri factum: neque ex ſanguine menſtruo, tanquam mate- ria, ut Ariſtoteleſ cenſuit, neque proſinuſ à coitu conceptuſ aliquid conſtitui, ac proinde haud verum, in coitu proliſco materiam ali- quam in utero paratam aſeſſe, quam maſculi ſeminiſ virtut coaguli inſtar coquat, coagulet, & efformet, nihil enim omnino per dieſ com- pluſculoſ ineſſe cernitur. Similiter exercit. 17. inquit: In uteri cavitatē nec ſperma mariſ, nec aliud quidquam, ad conceptum ſpectanſ, invenire potui. Mareaſ tamen interea quotidie coitum celebrabant, egoque fœmellaſ quam- pluſimaſ diſſecabam, eſtque hoc ipſum mihi multorum annorum experientia compertum. Cum autem periculo ſapiuſ factuſ, nihil aliud in- tra uteri cavitatem occurreret, capi primuſ dubitare, num mariſ ſemen ullo pacto (injectione ſcilicet aut attractione) conceptioniſ locum poſſet ingredi: tandemque iterata ſapiuſ in- ſpectio ſententiam hanc mihi ratam feciſ, nihil proruſ ſeminiſ in ea loca perſtingere. Atque ex hiſ tandem concludit, ſemen virile, neque formationiſ actorem in ſe continere, neque formandi materiam fieri, imò neque uterum ingredi, neque ab eo detineri: utque conceptioniſ principiuſ & ſubje- ctum deſcribat, confugit tandem ad quali- tatem ſine materia, ſpeciem ſine ſubjecto, & uteri inanem conceptum ſine cerebro. Nam, *lib. de concept.* ſic inquit: Quoniam nihil ſenſibile poſt coitum in utero reperi- tur, & tamen neceſſe eſt, ut aliquid adſit quod facun- dam reddat, atque illud corporeum eſſe nequeat, ſuper eſt ut ad merum conceptum, ſpecierumque ſine materia conceptionem confugiamuſ, ut idem ſcilicet hic contingat, quod in cerebro fieri nemo dubitat. Et paulo poſt: Quemad- modum noſ à conceptione forma ſeu idea in ce-rebro ſimilem ei in operibuſ noſtriſ efficiuſ: ita pariter idea aut ſpecies genitoruſ in utero exiſtens, formatriciſ facultatiſ ope ſimilem factum generat, dum ſpeciem ſcilicet, quam habet immortalem, operi ſua imponit. Atque ita ſtatuit conceptionem in utero fieri ex receptione ſpecierum ſine materia, ipſum- que uterum, dum ſecunduſ ideam e ſe conceptam impellit formatricem facultatem, eſſe principalem formationiſ cauſam, facultatem verò formatricem eſſe illiuſ in- ſtrumentum (hac in parte merito & bene refutatur à Deuſingio, in *geneſ. microſc.*) cum tamen in & ex ipſo ſeminiſ germine tota formatio in ovo peragatur, uteruſque nihil aliud quam convenientem locum & foruſ ſemini ſuppeditet.

Deuſin-

Deuslingii  
opinio.

Deuslingius, etsi citato loco contradicat Harveo, tamen dubius factus fuisse videtur, nam Caribdin evitare volens, incidit in Scyllam, & rem quidem paulo aliter proponit quam Harveus, sed nihil solidius confirmat. Quippe scribit, genituram maris, genitalibus foeminae injectam, quasi per contagium, immutare temperiem, cum accidentalem, tum substantialem totius corporis & uteri, talemque corpori & uteri conferre dispositionem, qua deducitur ad maturitatis apicem, & imprægnatur, ut fructus à calore æstivo solent: ita ut licet postmodum, vel genituræ maris crassamentum penitus effluerit post coitum, vel ipsa quoque spirituosæ portio in totum evanuerit, à dicta tamen temperie talem impressionem habeat spirituosæ substantia corporis muliebris, qualem per naturam suam spirituosæ seminis virilis portio movebat. His autem dictis non videtur doctissimus Vir in conceptione quidquam aliud adscribere semini virili, quam quod dispositionem mulieris & uteri contagio quodam immutet, eique & formandi, & materiam suppeditandi aptitudinem conferat, ipsum verò virile semen, post coitum, ut inutile, rursus effluat & dissipetur. Quasi verò, illa dispositionis mutatio, & ad maturitatem præparatio, in coitu tam citò & quasi per saltum, à sola seminis virilis injectione fieri debeat, & foemina non diu antè paulatim ex sese, per proprii caloris & sanguinis spirituumque incrementum, matura viro, & ad ovorum generationem atque conceptionem apta evaderet, & conceptio plerumque non fieret brevi post coitum tempore, sed duntaxat præcedente magno apparatu, ac corporis totius muliebris longa immutatione, per frequentem seminis virilis injectionem inducta. Male etiam applicatur, quod semen virile maturet mulierem, sicut calor æstivus fructum: quoniam mulier non ab hoc semine, sed à suo ipsius interno calore maturatur, & sic talem fructum (suum ipsius scilicet semen ovo inelufum), producit, qui ad germinis è semine virili separati & ovo infusi, forum ac fermentationem seu fuscitationem, & ab impedimentis liberationem, membranarumque foetui circumjectarum generationem, atque ad primum formati foetus nutrimentum est optime conveniens.

Atque ita Harvei inspectiones circa brutorum conceptiones habitæ, non solummodo illum, verum etiam Deuslingium, Regium, plurimosque alios doctissimos Philosophos nimis citò abriperunt, antequam rem ipsam attentè satis examinassent. Ego profiteor me unum ex iis esse, qui Harvei experimenta, summamque in Zootomia industriam admiror, eique maximam fidem habeo, atque hinc etiam credo illum

in plurimis brutis post coitum dissectis nullum semen in utero invenisse: sed hinc tamen non sequitur, quod ille nititur inde deducere, scilicet semen in coitu non ingredi uterum, aut statim post coitum ab utero rursus effluere, & tamen conceptum fieri, atque hinc semine ad conceptum opus non esse. Quippe inspectiones illæ Harvei nondum certo docent, semen in utero non retineri factò vel fiente conceptu: nam licet ille in prædictorum brutorum uteris à se visis semen non invenerit, illud tamen nihil certi concludit, nec probat illa bruta fuisse imprægnata, aut à præcedentibus coitibus necessario conceptum in iis futurum, si modò vita iis fuisset diuturnior concessa. Certè multa sunt quæ ejus rationes, ab his experimentis desumptas, convellunt.

1. Potuisset in brutis ab eo dissectis statim post coitum semen injectum vel sponte rursus effluxisse ab utero (sicut in mulieribus non concepturis contingit) vel excussum, & sic conceptum nullum factum fuisse. Nam ille ipsemet scribit cervas & damas per integrum mensem quotidie coire, igitur ab iis multoties fit irritus coitus, post quem semen rursus ab utero effluit: ab uno enim coitu, fortè ultimo, in illis animalibus conceptionem fieri, verò simile est, præcipue in illis, quæ unum tantum foetum concipiunt, quia statim post conceptionem marem amplius non admittunt. Si jam Harveus suis dissectionibus casu inciderit in illas cervas aut damas (quod inter plurimas facile contingere potuit), quæ aut ad ultimum conceptivum (ut ita nominem) coitum nondum pervenerant, aut saltem non conceperant, non est mirum quod nihil seminis in uteris invenerit, utpote quod statim post coitum rursus fuit excussum. Sic memini me ante decennium, præsentibus pluribus aliis, equam lascivientem vidisse, quæ statim post caballi congressum, nobis videntibus, semen rursus excutiebat: sed caballo per tres quatuorve dies eam ineunte, observavimus eam ultimo coitu semen non excussisse, atque ex eo tempore concepit, nec caballum amplius admittere voluit. Si illius equæ prima vel secunda die fuisset apertus uterus (nam plerumque primo aut secundo coitu putantur equæ concepisse) etiam nihil seminis in eo inventum fuisset: at si post ultimum coitum, ex quo conceperat, apertio facta fuisset, procul omni dubio semen in utero repertum esset. Atque sic etiam Harveo contigisset, si in cervas, quæ conceperant, incidisset. Nam etsi ex tanta cervarum grege variaz fortassis concepissent, inde tamen non sequitur illum imprægnatas dissecuisse: multæ enim aderant quæ non conceperant, in quas æque facile incidere potuit, quam

Examen ex-  
perimento-  
rum Harvei.



in imprægnatas, cum nullo externo indicio à se invicem dignosci queant in principio.

II. Dum ista animalia per venationem, vel aliam quamcunque capturam delassantur, exterrentur, & tandem occiduntur, mirum non erit, ubi forte primo biduo vel triduo conceperunt, si per magnam illam spirituum conturbationem ipsis ante capturam, vel dum capiuntur, aperto uteri osculo semen vix colliquatum effluxerit, atque sic nihil in utero inventum fuerit: ex magno enim terrore sæpe mulieribus quoque semen conceptum, imò & nonnunquam modò jam formatum fœtum, citissime ab utero excuti, quotidianus docet usus.

III. Si canibus, cuniculis, aliisque similibus animalibus, dum occiduntur, ab incusso mortis metu præ anxietate stercus & urina effluat, imò nonnullis quæ non occiduntur, solius penæ metu id contingat, ut fieri videmus, quis mirabitur, si istorum brutorum fœmellis, paucis post coitum diebus vel horis, etiam semen ab utero conceptum effluat, dum occiduntur, atque ita post mortem nihil seminis in utero invenitur.

IV. Semen in utero conclusum, ut ex eo aliquid generetur, magnam in utero subit mutationem (Aristoteles illud aquescente scribit) nec eam omnino retinet substantiæ formam quam habebat cum primo injiceretur (sicut illud etiam aëri expositum citò mutatur) atque hinc fortassis ab Harveo pro semine cognitum non fuit, vel jam colliquatum, atque etiam paucitatis ratione, ab eo inveniri non potuit.

Ex his omnibus satis patet, experimenta Harvei talia omnino probare non posse, qualia ipse ex iis deducere nititur: ac proinde non est ut sibi quisquam facile persuaderi patiatur, semen inutile & ad conceptum necessarium non esse, sed illud vel ante, vel post factam conceptionem rursus ab utero profluere. Ego hac in parte majorem fidem habendam censeo Galeno, fide dignissimo, qui, ut ante dictum, per propria & aliorum experimenta, non minus quam Harveus per sua, edoctus, rem aliter se habere comperit. Ad hæc, rationalibus quoque mulieribus fidem minimè denegandam puto, quæ quomodo se hæc res habeat, & quod in concipientibus semen ab utero rursus non effluat, verbis nobis indicare possunt, cum muta & irrationalia bruta nihil hac de re significare queant. Denique non nimis hac in parte fidendum existimo aliqujus speculationibus ex sola brutorum inspectione desumptis, sæpe enim parum certi conferunt, quia non rarò magis ad speculantis aliquam opinionem ante conceptam, quam ad veritatem diriguntur & explicantur.

Præterea ipse Harveus scribit, circa diem decimum octavum Novembris, vel ad summum vigesimum, se conspexisse in cornu uteri damarum, interdum dextro, interdum sinistro, nonnunquam in utroque, materiam colliquatam transparentem, crystallinam, propria ac peculiari tunica contentam, in ejusque medio fibras sanguineas & punctum saliens. Hæc autem materia cum cœlitus eò non depluerit, quid, quæso, aliud fuisse potuit, quam ipsum fœmellæ semen ovo, una cum puncto saliente, inclusum, & seminis masculi colliquati mole adactum, amnio chorioque circumdatum? Quod autem talem materiam in multis aliis non invenerit, inde, procul dubio, factum, quod rarissime inciderit in talia animalia quæ conceperant, sed plurima ipsi oblata fuerint, quæ quidem coierant, sed semen non retinuerant, atque hinc minimè conceperant.

Ratum igitur manet, semen post conceptionem nec ab utero rursus effluere, nec (quod vult Aristoteles, lib. 2. de gener. cap. 3.) in spiritum resolvi ac dissipari, aliove quocunque modo evanescere, sed intus in utero retineri, eoque, ut & fœminino ovo incluso, jam formatum fœtum primò foveri & nutrir, ut ante dictum.

Interim tamen nemo, velim, existimet, me absurda proponere, dum fœtum ex semine delineari seu formari, & in principio etiam semine nutriri dico, atque ita unum idemque semen duobus diversis usibus inservire scribo. Quippe in semine, ut præcedente capite docui, sunt duæ diversæ partes, aliæ spirituosæ, ex quibus delineatur & formatur fœtus: aliæ crassiores & minus spirituosæ, quibus, una cum semine fœminino fovetur & nutritur fœtus, id est, ex quibus desumitur proxima materia ad partium jam formarum primum nutrimentum, incrementum & majorem perfectionem necessaria: neque fœtus ex his formari, neque illis nutriri posset. Ita ut, ex una eademque re non fiat formatio & nutritio, sed ex diversis unius rei, nempe seminis, partibus. Idem fit in semine humano & viviparorum omnium, quod in plantæ semine, in quo Theophrastus, lib. 1. de caus. plantar. cap. 19. duas partes agnoscit, unam spirituosam, à qua vis procreatrix dependet: alteram crassiorem, & spirituosæ partis alimentariam, cujus ratione plantarum semen etiam epullulat, & folia aliqua projicit, licet terræ impositum non sit, quia in se continet alimentum primo requisitum.

Verum nunc tandem ad bullam redeundum, à qua sermonem nostrum deduxerat embryonis prima nutritio.

*Fœtus ex semine formatur, eodemque nutritur.*

In



In bulla fit  
fetus for-  
matio.

Formationis  
tempus.

In hac bulla ex liquore crystallino in ea contento (non verò ex tota seminis massa) & peculiari invisibili pellicula circumdato primam & totam fetus formationem fieri notavit Hippocrates, lib. de natur. pueri, in genitura sex dierum, in qua scribit se vidisse internam pelliculam (id est, bullam) cuius interior liquor pellucebat, & super medio tenuis quid eminebat, quod umbilicum esse putabat.

Quantum ad tempus formationis, id eo notum differtur Doctores. Hippocrates, lib. de carnib. docet genituram in utero receptam septimo die haberi, quæcunque haberi docet, & si abortus hoc tempore ejectus in aqua deponatur, ac diligenter inspicatur, in eo utriusque partium rudimenta manifeste animadverti & videri. Alii non infra septem dies, sed longiore tempore hanc partium formationem fieri scribunt. Straton peripateticus, & Diocles Caristius, referente Macrobio, comment. in form. Stipion. dicebant quinta hebdomada, id est, trigesimo quinto die, humanam figuram fingi quidem magnitudinis apis, ita tamen ut in illa brevitate membra omnia, & designata totius corporis lineamenta confisterent. Aristoteles verò, tradit, lib. 7. hist. animal. post partum fetus, quadragesimo die veluti in membrana consistere, quod supra, fetus ipsum apparere magnitudine formæ majusculæ, & membra ejus jam differere, & cetera omnia, tum genitura consistere. Alii, tamen Aristotelis locus sicile cum Hippocrate conciliabitur, nam illud computationem facis à tempore quo semen in utero injectum est, usque ad hanc & manifeste visibilem fetus formationem, quod tempus dicitur in toto esse quadraginta dierum. Hippocrates verò incipit computare ab eo tempore quo fetus jam in membris formati incipit, & scilicet postquam semen primo in utero colligatum, & germen ex eo separatum, ab eo ad rostrum portus delapsum, in eoque in bulla collectum (quæ primis aliquot diebus peraguntur) tandem incipit disponi ad partium delineationem. Præterea Aristoteles describit fetus omniumque membrorum perfectam ac visibilem. Hippocrates verò videtur ad vim visibilem formationem, ad illam autem pluribus ab hanc verò paucioribus diebus opus est. Fernellum, cum Aristotele consentiens, scribit se quadragesimo die fetus perfectum vidisse, sed non addit, cujus fuerit magnitudinis. Alii recentiores dicunt se observasse, illud eo tempore minimi digiti magnitudinem & longitudinem, sub finem vero tertii mensis palmarem, & circa quintam pedalem longitudinem habere, quod tamen minime verificabile videtur, cum meis oculis contrarium viderim, ut ex sequentibus abor-

tivorum fetusum historiis liquet. Sed, procul dubio, illi recentiores eo decepti fuerunt, quod exactum principium conceptionis ignoraverint.

Harveus scribit se in conceptu muliebri, ovo gallinæ æquali, invenisse fetusum longitudinis sabæ majusculæ, cum capite prægrandi, quod cerebellum, tanquam crista, supereminebat: cerebrum autem lacti coagulato erat simile: cranii vicem membrana gerebat coriacea: rostrum apparuit caninum, & nasus non conspiciebatur.

Ante aliquot annos mihi oblata fuit occasio videndi abortum paucarum septimanarum, ab uxore Domini B. excussum, in quo hæc deprehendi. Magnitudo totius abortus, una cum membranis, erat circiter ovi gallinæ. Chorion laxum, rugosum, & extrinsecus nonnihil asperum, ac villosum erat, multis venulis tenuissimis conspersum, quæ omnes concurrebant ad ejus summitatem, cui quædam parva carnea, oblonga, informis, & sanguinolenta massa adhærebat, & qua dictæ venæ oriri ac derivari videbantur. Præterea idem chorion facillimo negotio separabatur ab amnio, idque per levem contactum, excepta ea parte cui caruncula antedicta inhærebat, eo enim loco firmiter coherere videbantur ambæ membranæ, quæ tamen toto reliquo ductu sibi invicem tantum simpliciter erant impositæ, sine ullo nexu. Inter chorium & amnion nihil liquoris interjacebat, nec ulla interjacens membrana conspicua illic reperiebatur, sed inter amnion colliquamentum quoddam aquosum, nonnihil viscidum, copiosum continebatur, cujus medio innazabat exilis embryo, unde quaque liber, & nusquam amnio cohærens. Hujus truncus corporis vix æquabat magnitudinem dimidiæ partis pisi minoris, aut ciceris, per medium dissicili, cujus summitati ex tenuissimo collo, crassiusculi filii crassitiem habente, infistebat caput, pro trunci ratione valde magnum, quod circiter quartam partem totius trunci æquabat, in eoque oculi nigricantes erant manifestissime conspici, nasus non protuberabat, sed ejus loco linea quædam albicans apparebat: auricularum nihil videbatur, nec oris forma aut apertio conspicua erat, solummodo parva quædam transversa lineola illic visui occurrebat. Cranii loco tenuis membrana cingebat cerebrum, quod instar paucilli albuminis ovi offerebatur. Truncus non apparebat distinctus in duos ventres, sed totus quasi ex uno ventre consistere videbatur, in ejusque interiore parte exilia quædam viscera, tenuissimâ pellucidâ membrana contexta, visui offerebantur, sed adeo confusi, ut distingui ac internosci manifeste non possent. Paulo infra trunci medium

Fetus abortivi historia  
Prima.

Secunda.

medium exilis quidam albicans ramulus foras exsurgebat (umbilicus erat) sed adeo brevis, ut longitudine sua vix dimidium latitudinis straminis tenuioris æquaret. Præterea superius exilia quædam brachiorum, & inferius crurum rudimenta albicantia obscure apparebant, in quibus manuum pedumque digiti per folas exiles lineolas albicantes distincti conspiciebantur. Putabat hæc mulier abortiens, hunc fuisse foetum octo aut novem septimanarum.

*Tertia.*

Post duos ab hoc viso abortu annos abortiit nobilissima Domina D. Magnitudo totius abortus erat instar minoris ovi gallinæ. Extrinsecus membranis fortiter adhærebat particula carnea, è qua vasa chorii derivabantur, qualem in præcedente abortu etiam observavi, sed hæc paulo major erat, fere dimidium partem parvæ nucis moscatæ adæquans. Aperto chorio nihil liquoris effluxit, nihil enim inter duas membranas continebatur, nec etiam alantois inter eas conspici poterat: interim tamen chorium amnio non adhærebat, sed ei solummodo impositum erat, ab eoque levi contactu facile separabatur, excepto eo loco ubi antedicta caruncula ei extrinsecus insisteret, ibi enim amnios chorio connectebatur. Intra amnion colliquamentum mediocriter copiosum repertum fuit, in cujus medio exilem inveni embryonem, cum capite ratione totius magno, quippe totum reliquum corpusculum vix videbatur triplo vel quadruplo majus capite, quod habebat magnitudinem parvi pisi, ac tenuissimo collo, instar fili triplicati crasso, insisteret trunco: in hujus posteriore parte cerebellum, tanquam candida crista, protuberabat, totumque caput pelliculâ firmâ circumdabatur, sub qua reconditum erat cerebrum molle, instar albuminis ovi. Anterior oculi nigricantes erant manifestè conspicui, auriculæ non apparebant. Nasi & oris locum linea alba designabat. Reliquum corpus rudi modo in truncum & exiles artus delineatum reperiabatur, sed longe mollius erat, quam in præcedente abortu, scilicet instar crassioris ac firmioris cujusdam mucis, ita ut vix aliquem contactum sine læsione ferret. Fortè hæc summa mollities ab aliqua corruptione, & quod embryo aliquamdiu mortuus fuerat, processit, nam Domina illa per tres quatuorve septimanas ante abortum male valuerat, nesciens tamen se esse gravidam.

*Quarta.*

Anno 1663, mense Decembri, eadem Domina rursus abortiit, postquam vix ad finem sextæ septimanæ grvida fuisset. Magnitudo abortus erat instar parvi ovi gallinæ. Particula carnea membranis extrinsecus adhærens multo major erat, quam in præcedentibus abortibus, fere ad dimidium chorii se extendens. Intra membra-

branas colliquamentum continebatur mediocriter copiosum, ut in præcedentibus. Colliquamento innatabat exilis embryo, magnitudinis magnæ formicæ, in quo caput manifestè distinctum exiguo trunco insidens apparebat, cum duobus minimis nigricantibus punctulis, oculis designantibus. Truncus nonnihil incurvus conspicebatur, instar parvæ carinæ, in eoque aliqua viscera apparere videbantur, sed adeo confusa, ut distingui non possent: nulli artus visibiles erant. Præter hunc exilem embryonem, eidem colliquamento adhuc innatabat bulla crystallina (qualem in præcedentibus abortibus una cum embryo non inveni) magnitudinis parvæ avellanæ, coloris maxime pellucidi, in qua nulla delineamenta embryonis animadvertere potui: ex hac fortassis foemella (quæ dicitur tardius perfici quam masculus) postmodum delineata fuisset, sicque gemelli in lucem prodissent.

Si embryo octava vel nona septimana dimidii pisi aut ciceris, & die quadragesimo (secundum Aristotelem, atque etiam secundum historiam quartam modò descriptam) formicæ majusculæ magnitudinem non superet, omnino inanes habendæ erunt eorum demonstrationes, qui minimos aliquos abortus exsiccatos conspiciendos exhibentes, suis spectatoribus persuadere student, hunc esse sex aut octo dierum, illum sesqui hebdomadæ, aut duarum septimanarum conceptum, &c. cum tamen multo majores sint quam illi mihi visi, & jam descripti, atque omnino verosimile existat, ante quadragesimum diem vix quidquam formati embryonis oculis videri posse. Præterea ex parvitate primo formati embryonis satis liquet, totam seminis, tum maris, tum foeminæ molem in tantilli corpusculi formationem non absumi, cum ex una minima ejus guttula tale corpusculum, instar formicæ, efformari posset. Reliqua igitur moles, quæ ex utero non effluit, & in partium formationem non absimitur, easdem formatas mox fovet & nutrit, iisque incrementum confert, ut ante dictum. Quia autem illud seminis residuum citò absimitur, hinc ei quamprimum succedit copiosus lacteus succus, qui intra amnion non diu à principio (scilicet ubi vasa umbilicalia ad justam magnitudinem excreverunt) satis copiosus influere incipit, cui tunc foetus innatat, sicut antea seminali liquori, de quo lacteo succo vide cap. 31.

Ex modò dictis historiis etiam manifestum est, foetum non ex tota seminis massa, sed tantum ex tenuissima spirituosâ & valde exigua ejus parte, quæ instar pellucidissimi crystalli primò in exigua bulla colligitur, ut supra dictum, formari.

De

De hac bulla, ante foetus formationem, quid alii observaverint, & quid ego viderim, nunc subiungendum.

De bulla  
observatione  
prima.

Riolanus, *animadvert.* in *Laurent. tit. de formato fœtu*, hanc de crystallina bulla observationem scribit. Nuper, inquit, ab obstetrice mihi oblata fuit genitura unius mensis, ovo gallinula similis, suis membranis obvoluta: quarum exterior tota erat tomentosa, ac veluti fibrosa, principium ac fundamentum placenta. Hac dississa membrana, intus conspicua erant tres ampullae, invicem contiguae, instar racemuli uva. Vesiculis istis aqua pellucida continebatur, & in una ampulla media cernere erat corpusculum quoddam instar formicae, & tenuissimum filamentum ab eo productum. Corpusculum istud fœtum referebat informem & indiscretum, quantum oculis miraculum illud avidissime spectantibus deprehendere licuit. Filamentum verò rubicundum denotabat umbilicum. Hæc historia noticiam de bulla haud parum illustrat: sed unum in ea percipio errorem, ex opinione præconcepta (qua olim putatum fuit embryonem mox per umbilicum nutrir) ut puto, ortum. Nam existimo Riolanum admodum cæcutiisse circa filamentum illud, quod dicit fuisse umbilicum: nam, ut ex præcedente secunda nostra historia liquet, si in embryone isto à me viso (qui jam è bulla eruperat) & attentissimis, oculis (quibus multo magis, quam aliorum dictis confido) diligentissime considerato, ac perfectius jam formato, umbilicus vix dum ad dimidii tenuioris straminis latitudinem protuberabat, nec ullum filamentum ulterius projiciebat, quanto minus ab hoc rudi indiscretoque, jam vix auspicato fœtu, filamentum umbilicale longius protensum fuisse potuit. Præterea in principio citius tardiusve augentur partes pro majore minoreve usus necessitate: & quia in ipso principio adhuc nulla umbilici necessitas est, cum fœtus tunc umbilicali sanguine nondum indigeat, hinc etiam fit, quod ab initio in nullam conspicuam longitudinem projiciatur, sed postea sensim è fœtu excrescat, & versus placentam extendatur, ut infra dicetur, *cap. 32.*

Secunda.

Idem Riolanus similem observationem ex Carpi commentariis in Mundinum, *ibidem* adscribit, in quo Carpus notavit tres bullulas, se mutuo tangentes. Sic etiam Platerus, *quest. med. quest. 1.* scribit se in abortu magnitudinis avellanæ, intra tenuem amnion tres bullulas invenisse, & putat has esse trium principalium viscerum, cordis, cerebri, & hepatis, rudimenta. Ego tam parvum abortum, magnitudinis avellanæ, nunquam vidi, nec quemquam alium, præter Platerum, vidisse legi. Præterea opinionem Plateri minime veram esse, docent historiæ modò ex Hippocrate, Ari-

stotele, & Riolano allatæ, è quibus patet fœtum in una tantum bulla totum delineari, formari, & inveniri: in reliquis duabus reperit Riolanus aquam pellucidam. Carpus credit, quod in istis aqua pellucida repletis, etiam fœtus formati & generati fuissent, si diutius in utero substitissent, sed fœmineos, qui paulo tardius formantur: hoc secundum experimenta Hippocratis & Aristotelis aliquo modo verosimile videtur. Saltem illud verissimum est; in & ex unius bullæ pellucida liquore totum fœtum delineari & efformari: ac proinde mihi facile persuadeo, rarissime tres bullas, quales viderunt antedicti Viri, sed plerumque tantum unam in conceptu adesse, nisi cum forte gemelli aut trimelli concipiendi sunt, quibus etiam quarta bulla accedere debet, in mulieribus multiparis, quales sunt Scotæ, quæ frequentissime quadrimellos pariunt.

Hujus opinionis majorem fidem mihi *Tertia.* facit abortus trium quatuorve septimanarum, qui mihi circa hoc tempus, quo hæc scribo ac diligentius inquiri, oblatus est à notissima obstetrice Rachele; in quo non tres, sed tantum unam bullam inveni; magnitudinis avellanæ, tenuissimâ araneâ membranulâ circumcinctam. Hæc inter copiosum quoddam colliquamentum seminale, aquosum, & nonnihil spissum ac subviscidum, duabus membranis, chorio & amnio circumdatum, latebat, eique innatabat, tota libera, nec amnio uspiam annexa. Istis autem externis membranis una exigua parte foris adhærebat parva quædam massa carnosâ, mollis, informis, & sanguinolenta, magnitudinis circiter duodecimæ partis abortus, quæ exteriore sui parte aliquantum læsa, & quasi ab utero abrupta videbatur. In bulla continebatur aqua pellucida, clarissima instar crystalli; in qua nec sanguinem, nec quid aliud, quam paucas exiles vix conspicuas lineolas albicantes, ipsâ aquâ paulo spissiores (procul dubio, prima quædam fœtus delineamenta) animadvertere potui. Fœmina quæ hunc conceptum abortiit, nesciverat se concepisse, sed ingenti subitaneo quodam terrore percussa, talia ab utero ejecit, sine dolore, & sine magno conamine.

Circa idem tempus alium conceptum *Quarta.* valde juveniculum, ab uxore concionatoris N. excussum, vidi, in quo similiter unam tantum bullam splendidissimam ac crystallinam, magnitudinis circiter avellanæ, inveni: in qua omnino nullæ sanguineæ, albicantes, alteriusve coloris lineæ apparebant. Hujus exteriori membranæ colliquamento circumjectæ, etiam, ut in priore, firmiter adhærebat particula carnea, mollis, & sanguinolenta, exteriore sui parte læsa, & quasi ab utero abrupta. Ab hac maxime tenella quædam sanguifera vascula

A a

exire,

exire, & per chorion copiosa excurrere, manifestissime observavi. In amnio autem interiore, præter colliquamentum semineum aquosum, cui bulla innatabat, nihil sanguinei, nec in ipsa ejus substantia ulla vascula observare potui. Hæ duæ membranæ facillimo negotio à se mutuo separabantur, nec quidquam liquoris inter eas continebatur.

Magnitudo horum duorum abortuum, præcedentis scilicet & hujus, erat circiter ovi gallinæ, in eorumque membranis plus colliquamenti continebatur, quam dimidius cortex ovi gallinæ caperet, quod cum totum una cum bulla, à virili semine esse non potuerit, etiam muliebre semen ei admistum fuisse, licet bulla ex solo virili pullulaverit (hoc capite præcedente latius edoctum) minimè dubitandum est.

His duobus experimentis edoctus, facile (ut etiam ante dixi) crediderim, ut plurimum unam solam bullam in conceptu adesse, rarissime verò plures, idque non nisi cum plures foetus simul efformandi sunt. Verum etsi ego hæcenus plures non viderim, tamen experientiæ Riolani, Carpi, & Plateri contradicere, aut de ejus veritate dubitare nolo, fortassis aliquando etiam mihi plures videndi occasio occurreret, sicut me bullam, una cum delineato (procul dubio, in alia bulla, quæ jam evanuerat) foetu vidisse, dixi paulo ante, historia quarta.

Quo ordine  
formantur  
partes.

In hac foetus formatione quærunt curiosiores, quænam corporis partes primò, quænam secundo, tertio, & postremo formentur. Aristoteles, lib. de juvenute, cap. 3. scribit cor animantium sanguine præditorum primum gigni, idque se observasse in ovis, post tres dies totidemque noctes gallinæ suppositis, asserit, lib. 6. de histor. animal. Cum Aristotele sentit Entius, qui, apolog. digress. 4. existimat cor primum formari, & formationis reliquarum partium esse causam efficientem: Semen, inquit, in coitu in uterum à mare projectum, in conceptu cor tantum constituit: nulla enim animalis pars, præter cor solum, à semine constat. Et artic. 188. dicit, cor non tantum formato foetu, sed statim ab initio moveri, ipsiusque formationis esse causam, non materialem, sed efficientem. Cum Entio consentire videtur Regius, lib. 4. philos. natur. cap. 14. Alii putant primò hepar, alii cerebrum, alii tria illa dicta viscera simul generari, postea verò intestina, lienem, pulmones, &c. hæcque est Galeni sententia (quam multi sequuntur) lib. 14. de usu part. Qui humor, inquit, internam uteri superficiem oblinis, in membranam convertitur, qua spiritus formator undique occlusus, motus suos naturales exprimit, tria puncta procreans, partes principes referentia,

qua caloris impetu inflata & distenta, suos ventres efformant, cor thoracem, cerebrum caput, secur ventrem. Postea reliqua partes figurantur & conformantur, tumque sensim affluit tenuis sanguis ad earum incrementum. Quid de tribus illis punctis seu bullulis sentiendum sit, dictum paulo antè, observ. 2. de bulla. Alii, cum Bauhino, putant primum gigni vasa umbilicalia, tanquam, ratione nutritionis, maximè & omnium primò necessaria. Alii ossa, tanquam basin & necessarium fundamentum corporis, primo formari statuunt. Atque sic alii aliter de re obscura judicant. Sed quis, quæso, operanti Naturæ interfuit, ut hæc omnia tam exacte scire possit? Si embryo die quadragésimo tantum formicæ magnitudinem habeat, ut ante dictum, quam exiguam habebit die trigesimo, quo tamen omnium partium perfecta, procul dubio, erunt delineamenta, licet visum nostrum subterfugiant? quis in minimo isto corpusculo videbit, aut judicabit, quid primo, quid secundo, vel postremo formatum sit? Hæc sunt mysteria quæ nos ignorare voluit altissimus Conditor, in quorum inquisitionem si ulterius descendamus, reprehendet nos Galenus, lib. 15. de usu part. cap. 1. sic dicens: Quo pacto hæc fiant, si scrutaberis, convinceris te non intelligere, neque tuam imbecillitatem, neque opificis tui potentiam.

Interea tamen, si de re obscura aliquid saltem per conjecturam dicere licet, ego existimo omnes solidas partes simul delineari & efformari, quia à se mutuo non dependent, & sunt omnes immediata Naturæ opera. Adhæc una non potest esse aut agere sine alia, corpus non potest esse sine fundamento solidiore, postea osseum futuro: cor non potest agere sine venis & arteriis, nec cerebrum sine nervis, nec ventriculus sine intestinis, &c. Nulla enim ratio est quare una pars formaretur ante aliam. In dicta bulla continetur materia apta ad omnium generationem, quæ ulteriore præparatione non indiget. Spiritus architectonicus ex illa materia æqualiter eodem tempore potest delineare & efformare omnes partes. Et quare, quæso, cor, ut vult Entius, citius formaret, quam alias partes? an ut materiam præpararet è qua alias generari possent? jam ante fuit illa præparata. Certe dici nequit cor generare & formare alias partes, cum solummodo materiam præparet ad omnium nutritionem & incrementum, à qua, non earum generatio, sed generatarum major perfectio ad privata munia procedit. Si enim cor in principio alias partes generaret, quare post nativitatem, cum jam robustius sit, & validius operatur, novas non produceret? Quod post nativitatem omnibus partibus nutrimenta præparet, apud omnes in confesso.

fesso est, quare illud ipsum etiam non faceret in principio? an illi alia actio hoc, quam illo tempore assignabitur? At dicas, cor primum evadit conspicuum, reliqua viscera, omnesque aliae partes serius, ergo primum formatur. Quis, quaeso, in embryone formicâ in principio minore, hæc omnia oculorum acie percipiat, & perfectè videat, quænam partes una cum corculo pulsante, jam formatæ sint? qui defectus licet sit in acumine nostri visus, ratio tamen satis docet, omnes partes simul delineari, cum tanta, tamque necessaria sit omnium harmonia, ut non nisi simul consistere & agere queant. Verosimile quidem videtur formatrices spiritus in bulla contentos, & jam omnium partium formationem incipientes, fortius opus suum moliri, partesque omnes modò delineatas citius perficere & roborare, postquam calore cordis, per peculiarem ebullitionem seu fermentationem excitato, adjuti, à colliquamento crassiore magis liberantur: verumtamen eos etiam ante illud subsidium singularum & omnium partium formationem incepisse, certum est: quarum licet illæ primum appareant, in quarum formatione plures spiritus fuerunt occupati, & quarum major usus necessitas fuit, hoc tamen non excludit aliarum etiam delineationem, quas nostri visus acies non percipit.

Hic, si quis objiciat, spermaticas partes forte simul delineari posse, sed sanguineas necessario post produci, respondebo, cum de partium formatione loquimur, tunc agimus de primis omnium partium delineationis, seu staminibus, eaque omnia dicimus ex solo semine efformari, quibus postea sanguineum nutrimentum affunditur, à quo majorem molem & magnitudinem acquirunt: sed interim nulla in corpore est sanguinea pars, quæ non staminibus spermaticis sit affusa, atque hinc nulla potest verè dici primitus ex sanguine generari, seu formari, & sine spermatico fundamento subsistere. Hæc olim etiam fuit mens Hippocratis, qui lib. de diata, sic inquit: *Discernuntur & augentur, omnia membra simul, non alterum altero prius, nec posterius; quæ tamen naturâ sunt majora, minoribus priora conspiciuntur, licet non prius genita sint.* Idem, lib. de loc. in hom. hoc modo scribit: *Nullum, mea quidem opinione, corporis est principium, sed omnes partes ex æquo, & principium, & finis esse videntur: descripto namque circulo principium non invenitur.*

Quænam partes visui primæ pateant, & quibus gradibus formationis ordo, quantum oculis occurrit procedat, valde eleganter describit Harveus, tract. de generat. animal. quem lector consulere potest: hac de re videndus etiam Antonii Everardi libellus de ortu animalium.

Verum cum formatæ partes mox allatum

commodum alimentum sibi associent & assimilent, atque sic ea nutritione incrementant: cum cor quoque ab ipso minimo suo punctulo seu principio actionem suam naturalem, scilicet sanguificationem, mox auspicetur; quærunt aliqui curiosiores, an etiam cerebrum (quod in fœtu admodum molle est) animales spiritus conficiat, per eosque actiones animales peragat? Respondendum: quod sicut multarum partium actiones in principio otiantur, ut pulmonis, oculorum, aurium, dentium, testium, &c. utpote quarum in isto principio nulla est requisita necessitas: quod ita etiam quarundam, ut cerebri, hepatis, lienis, &c. actiones magis necessariae ab ipso quidem principio incipiant, verum id adeo debiliter, propter organorum infirmitudinem, ut visui minime pateant, sed quod paulatim, quò magis ad perfectionem deveniunt instrumenta, tanto perfectiores, magisque perceptibiles fiant: Atque hinc verosimile sit, quod cerebrum quoque ab ipso principio spiritus animales conficere incipiat, sed admodum paucos & debiles, quia eorum in principio minor est necessitas: sed quod cerebrum paulatim firmitus evadit, & spirituum major necessitas requiritur, eo plures & validiores spiritus gignat; ut liquet circa dimidium ingravidationis, cum fœtus moveri incipit, qui motus absque spiritibus illis paulo copiosioribus peragi nequit. Atque ab eo tempore paulatim ita corroboratur cerebrum, ut tandem gignat spiritus copiosiores & fortiores, ad actiones quoque animales principes peragendas aptos: quæ tamen principes actiones otiantur in fœtu utero incluso, cum in eo nulla imaginationis, nulla cogitationis, aut memoriæ sit occasio, aut necessitas: sed nato fœtu, seu infante, paulatim cum cerebri incrementante firmitudine, spiritus validiores gignuntur, & actiones animales firmiores evadunt. Itaque puelli, ut corpore, sic actionibus animalibus debiles nascuntur, quia facultates animæ non ante suo officio bene funguntur, quam instrumenta perfecta fuerint. Solæ ministræ facultates, sentiens & movens, à dimidio ingravidationis manifeste agere incipiunt; nam ab eo tempore motus fœtus à matre percipitur, isque fœtus etiam doloribus matris compatiatur, ut ex ejus agitatione percipitur, quod probat Cardanus per aquam frigidam ventri mulieris infusam, hinc enim ipsum fœtum in utero agitari scribit, & sic vitam fœtus in ingravidatis explorat.

Tandem adhuc unum, de quo controversitur inter Philosophos, adjiciam, scilicet an fœtus in utero vigilet & dormiat. Avicenna istas fœtus functiones in utero non agnoscit. Iterum mulieres gravidæ referunt, se manifestè percipere fœtus

An in embryone actiones animales peragantur.

An fœtus in utero vigilet & dormiat.

Digressio prima.

A a 2

vigilant.

vigilantis motum, & dormientis quietem. Sed dicendum, quod somnus sit sensuum quies, ad spirituum animalium per vigilias dissipatorum refectionem & restorationem, concessa, à pororum & viarum cerebri aliqua concidentia seu angustatione producta: & è contra, quod vigilia sit pororum cerebri conveniens apertio, & per eos spirituum animalium ad actiones peragendas sufficiens in organa sensuum influxus. Atqui horum neutrum in foetu utero inclusum adest. *Primo* enim, spiritus non sunt dissipati, sed pauci debilesque confecti, ac proinde quæ in foetu est quies, non potest dici somnus, quia non fit à somni causis (spirituum scilicet dissipatione, & pororum cerebri concidentia seu angustatione) nec etiam habet finem somni, scilicet spirituum dissipatorum refectionem. *Secundo*, non potest dici, quod foetus motus fiat propter vigiliam, quia veras vigiliæ causas non habet, scilicet justam pororum cerebri apertionem, & ad actiones sensuum peragendas sufficientem spirituum in organa sensoria influxum. Prius enim non potest adesse, propter summam cerebri molliem & humiditatem: neque etiam posterius, propter spirituum nondum genitam sufficientem copiam. Præterea motus & sensus foetus non præsupponit necessariam vigiliam, quia etiam homines adulti, somno oppressi, multoties corpus jactant ac movent, imò nonnunquam incedunt & loquuntur (ut notum est in somnambulibus) & compuncti sentiunt, membraque læsa contrahunt, & tamen non vigilant. Concludendum igitur, quod foetus in utero, neque dormire, neque vigilare, bene dici possit, sed duntaxat, modò quiescere, modò moveri.

*Digressio  
altera.*

*Quenam sit  
virtus ar-  
chitectoni-  
ca.*

Hic fortè colophonis loco aliquis rogabit, qualifnam sit illa Vis seu Virtus architectonica in germine latens, de qua hoc, & præcedente capite aliquoties mentio facta est, quæ partium formationem instituit & facit? Præcedente capite de spiritu vivifico germi in sito (quatenus scilicet ille subjectum est primi formantis) latius quidem egimus: verum quia spiritus aliquis per se & propriis viribus generationem moliri non posse videtur, nisi in se habeat aliquod principium effectivum, cujus ratione & vi effectum istum molitur, hinc quidnam illud sit quod spiritui vim istam activam, seu corporis animati formatricem præstet, & omni perfectionis genere materiam instruat, ordinem, figuras, magnitudinem, numeros, situm, & alia quæ in corporibus animatorum conspiciuntur, conferat: illud est quod hæcenus ignoratum fuit, & omnium Philosophorum animos suspensos tenuit: quorum plurimi magnum operatorem & ejus opus tacitè admirari quam explicare, atque hinc cum Lactantio, *lib. de opif. Dei, cap. 19.*

dicere maluerunt, *hominem, præter materiam nascendi (nempe semen) nihil conferre, sed cetera Dei esse omnia, scilicet conceptus ipsos, & corporis formationem, & inspirationem animæ, & partium incolumitatem.* Quo sensu etiam dicit Harveus, *exercit. 50. Rem recte pieque reputaverit, qui rerum omnium generationes ab eodem illo atero atque omnipotente Numine deduxerit, à cujus nutu rerum ipsarum universitas dependet.* Alii verò, qui Naturæ limites, neque tam facile transillendos, neque in generationis principis inquirendis ilico ad totius universitatis conditorem ac gubernatorem Deum concurrendum, sed ex ipsis rebus primum efficiens & formans, à Deo cum rebus conditum, illique inditum, investigandum arbitrantur, arrogantiorè spiritu Philosophicis rationibus explicationem clariorem, (ut putant) tentare ausi sunt, sed discordantibus opinionibus, nam in varias multumque diversas sententias abierunt. Quippe virtutem illam, seu vim architectonicam Galenus modò *Naturam*, modò *Nativum calorem*, modò *insitum temperamentum*, modò *Spiritum*, vocat, quem, *lib. de trem. & rigor.* dicit esse *substantiam per se mobilem, semperque mobilem.* Aristoteles, *lib. 2. de gener. animal. cap. 3.* distinguens inter calidum seu spiritum seminis, & Naturam, dicit, *Virtutem architectonicam esse, Naturam quæ in Spiritu seminis est: ergo aliquid distinctum ab ipso spiritu, quod Spiritui ut subjecto inhæret, & in Spiritum, ut in materiam, agit.* Hanc Naturam in seminis spiritu etiam agnovit Hippocrates, quippe, *lib. de alim.* dicit, *illam eruditam esse, licet recte facere non didicerit: non quod rationalis sit, sed quia (ut explicat Galenus) ex se ipsa sine institutione agit omnia quæ agi necesse est.* Hinc illam definit Deusingius, *lib. de gener. fact.* quod sit *substantia quadam immaterialis, è materia emergens, à summo Deo sic ad materiam determinata, ut sine ea nec esse, nec subsistere, nec operari queat.* Eandem virtutem architectonicam alii, cum Avicenna, *Intelligentiam*: alii, cum Averrhoë & Scoto, *vim cælestem*, seu *divinam virtutem* nominant. Jacobus Schegkiius, *lib. 1. de plast. sem. fac.* illam appellat *λόγος ποιητικός*, seu *πλαστικός*, dicitque se *ἡ λόγος* vocabulo *intelligere formam substantialem, quæ nullo sensu, sed duntaxat mente & ratione percipitur*: atque ita dum videtur aliquid dicere, nihil dicit. Platonici dicunt illam esse *Animam generalem per totum mundum diffusam*, quæ pro materialium & seminum diversitate, diversas facit generationes, ut ex semine plantæ plantam, hominis hominem, equi equum, piscis piscem, &c. Plotinus tamen, magnus Platonicius, *lib. enead. 3.* hanc virtutem architectonicam distinguit à Platonica anima mundi, tanquam

*Variorum  
opinionum.*



quam productum ab eo à quo producitur, illam enim appellat Naturam ab anima mundi profluentem, quam dicit esse actum illius essentialem, & vitam ab ea dependentem. Themistius, *com. de anima*, & 12. *metaphysic.* dicit, virtutem formatricem esse Animam in semine potentia animato inclusam. Deusingius, *lib. de ortu anima*, illam in semine appellat Naturam, id est, ut ipsemet explicat, Animam potentia in semine subsistentem, ac principium & causa motus per se existentem: sed in corpore jam formato illam nominat, Animam actu existentem: atque sic sine necessitate unam eandemque rem quasi in duas distinguit, eique duo distincta nomina imponit, pro ut quiescit vel agit, & pro subjecti formandi vel formati diversitate (haud aliter ac si quis distinguens inter pictorem otiose dormientem, & vigilem pingentem, diceret illum esse Naturam in ejus spiritu latentem, quatenus è somno expeditus pingere posset: hunc verò esse pictorem, quatenus jam actu pingit: quasi verò pictor quiescens non esset æquè pictor atque agens) cum tamen, ut ex effectis patet, unum idemque sit, quod primò ex semine corpus formare potest, & quod format, atque sic postea continuatione quadam formati forma manet. Hanc suam sententiam hausisse videtur Deusingius ex Platoniorum institutis, qui distinguunt inter Animam, & esse animam, hoc est, inter Animam substantiam, quæ sub appellatione Natura semini inesse dicitur; & Animam quæ jam actu agit, & formati corporis forma existit. Fernellius, *lib. 4. physiol. cap. 2.* vim plasticam appellat quidem Spiritum, sed non intelligit talem communem spiritum, qualem Medici per viscerum coctiones seu præparaciones ex humoribus suscitari tradunt, sed alium quendam longe majoris præstantiæ; nam, ut dicit, Est hic spiritus corpus athereum (id est, magis divinum quam vulgò dicti spiritus) caloris facultatūque sedes & vinculum, primumque obeunda functionis instrumentum. Et, *lib. 1. de abdit. cap. 10.* putat illum esse quidpiam quòd à cælo influit: nam inquit: Cælum nullo semine multos profert, tum animantes, tum stirpes, at semen nihil quidpiam sine cælo generat. Semen gignendis rebus materiam concinne duntaxat & convenienter apparatus & instruit: cælum in apparatus speciem summamque perfectionem immittit, vitamque suscitatur in omnibus. Et postea addit: Animantium, stirpium, lapidum, & metallorum omnium, quacūque & fuerunt, & esse possunt, formas una cæli forma potestate comprehendit, & innumerabilibus illa quasi gravida formis, omnia fundit & gignit ex sese. Alii putant virtutem plasticam esse vim quandam ab anima matris in semen effluentem. Alii illam appellant Animam vegetativam, atque

Fernellii  
opinio.

inter hanc & Naturam (de qua ante dictum) nihil distinguunt, sed dicunt semen fecundum necessario esse animatum. Hanc feminis Animam acriter defendunt, J. C. Scaliger, *subtil. exercit. cap. 5. usque ad 11.* & Ludovicus Mercatus, *tom. 1. lib. 1. quest. 98.* Quorum vestigiis insistens Sennertus, *Sennerti institut. med. lib. 1. cap. 10.* sic inquit: *li opinio.* omnes mihi errare videntur, qui animam, quæ formationis causa est, in semine adesse negant. Etenim cum vim formatricem in semine esse concedatur, Animam etiam in ea esse concedendum est. Nam cum potentia non sint separabiles ab Anima cujus sunt potentia, impossibile est potentiam aliquam alicui propriam esse in subjecto, in quo non est forma à qua fluit potentia. Et cum ex operationibus ad latentis essentia notitiam perveniamus, quid causa est, cur semini animam non tribuamus, quæ suis in eo operationibus satis se prodit? Sunt autem illa dua; seminis ac conceptus vivificatio, & partium omnium, quæ ad vitæ actiones edendas necessaria sunt, efformatio. Quodvis enim semen, quod in plantis manifestum est, vegetante anima conservatur, & aliquamdiu prolificum permanet: & quam diu integrum & incorruptum est, in loco idoneo, & presente alimento, ut vivens operatur, & exercet suas operationes in eam, quæ præsto est, materiam, non secus ac ipsum vivens integrum in omnibus partibus: quod non solum in animalibus in actione, & partium nonnullarum regeneratione, sed præcipue in plantis videre est. Nam eadem operationes in semine & planta omnibus numeris integra conspiciuntur, & propterea idem in utroque movens indicant. Eadem enim est omnino operatio, quæ anima in semine latens ex attracta materia corpus plantæ fabricat, & cum eadem postea singulis annis amissa folia & flores instaurat, novos surculos, ramos, & radices protrudit: & propterea ejusdem omnino facultatis, ejusdemque anima indicium est. Neque hoc solum in plantis; sed & in animantium perfectiorum seminibus idem fieri concedendum est. Nam si non fit ex sanguine caro, nisi caro ipsa animata sanguinem in carnem mutet, multo minus fiet ex semine animal, si semen animæ careat. Et paulo post addit: Nam animantium corpus cum sit præstantius & perfectius, sequitur, non animatum non esse principalem animati corporis causam, sed animatum ab animato, ut principali causa, produci. Profectò admodum ponderosæ sunt hæc Sennerti rationes pro animæ vegetativæ præsentia: quam etiam efficaciter defendit Deusingius, *de gener. fact. in utero, part. 2. sect. 1.*

Verum, quia hic forte dubium incidere posset, scilicet, unde semen illam animam habeat, aliquid ad majorem dictæ opinionis dilucidationem & confirmationem adjicere lubet. Sciendum omnes & singulas corporis animati viventis partes istius animæ partici-

Semen unde  
animam ha-  
beat.



participes esse, & per eam vivere, atque hinc quod ex singulis partibus ad perfectionem feminis conficiendam deceditur, etiam de ista anima participare, eamque feminis massæ immiscere: & quia ex omnibus & singulis partibus aliquid spirituosissimi (atomorum adinstar) ad feminis confectiōnem & perfectionem tribuitur, hinc fieri quod in femine totius animati corporis compendium, simili anima instructum, contineatur: eamque animam, femine loco conveniente deposito, per calorem, cum ea, cui ipsamet inhæret feminis materia (scilicet maxime spirituosâ parte à singulis & omnibus partibus decisa) à crassioribus feminis partibus expediri, atque in actum suscitari, & sic ex ea materia per omnia simile efformare ei à quo cum subtili illa feminis parte decisa est; si modò ob aliquod caloris, aut materiæ circumstantis vitium vel corruptionem in sua operatione non impediatur, & ipsamet extingatur. At obijciat quis, formas animatorum esse indivisibiles, atque hinc à singulis partibus non posse separari partes aliquas animæ, easque in femine cœcutes integram animam constituere. Respondeo: quod formæ animatorum per se non sint quantæ & divisibiles, sed tamen quantæ dicantur, & dividantur ad divisionem materiæ, si modo materia talis sit, in qua anima commode delitescere, & ex qua ad suum opus rursum per calorem nativum in conveniente gradu constitutum, suscitari possit. Hæc res ad oculus patet in salice, quippe ejus aliquo ramo ab arbore avulso, dividitur anima ad divisionem materiæ, & sicut in ipsa arbore, ita etiam manet in ramo, ut ex ejus operatione patet; quia ramo isto terræ humidæ implantato, mox in eo præsens anima agit, & folia ac radices & ramos producit, atque ipsa arbor mater non minus per easdem tales operationes animæ præsentiam; etiam in se ostendit. Sic quoque in animantibus, spirituosum illud quod ex singulis viventibus partibus ad semen deferendum deceditur, de eadem partium, ex quibus deceditur, anima participat, quia conveniens domicilium animæ præbere potest (in quibus tale conveniens domicilium præstari nequit, etiam anima vivens deficit) & sic semini immixtum, facit (si modò bene constituta sit feminis substantia) ut semen potentia fiat animatum, quæ anima in eo potentia latens, postea, femine conveniente loco deposito, à calore compedibus crassioris substantiæ, cui involuta est, expedita, in actum suscitatur, & agens, mox ex subjecto cui inhæret, format partes similes iis, ex quibus dicta decisio facta est, quia ejusdem speciei est cum anima è qua deceditur.

Cum igitur dicitur ab Aristotele, aliis-

que Philosophis, quod anima duntaxat potentia lateat in femine, hoc non est intelligendum quatenus ipsa animæ essentia in femine non adsit, sed quatenus impedita à reliqua feminis materia crassiore, non potest agere (atque hinc semen non potest dici animal) è quâ femine conveniente loco deposito, per calorem, materiam illam dissolventem, extricatur, & extricata mox agit, atque ex suo spirituosâ è partibus animalis deciso subjecto, cui inhæret, delineat & format quod formandum est, idque per proxime adjacens nutrimentum incremento adauget. Nam cum semen ex efficientium numero sit, & omne agens operetur, non quatenus potentia, sed quatenus actu tale est, animam actu in femine adesse, negandum non est, licet propter impedimenta, ejus actio nondum pateat.

Verum hinc quæri posset, an illa anima foetum formans insit soli semini virili, an verò etiam foemineo? Dico, soli virili inesse: quia si pars animæ à viro, pars à muliere procederet, tunc fieret anima res composita, cum tamen simplex sit: vel si tota à mare, & tota à foemina deduceretur, tunc duo forent formationis principia, quorum unum redundaret: nam necesse non foret, ut agens principium maris conjungeretur cum agente principio foeminae, quia hæc efficiens principium in se habens, cum etiam locum commodum (uterum) item conveniens alimentum, aliaque requisita, in se habeat, non egeret altero maris efficiente principio, sed in sese posset concipere, & ex suo animato semine foetum efformare sine congressu maris, & in oviparis etiam ex ovis subventaneis pullus produci posset sine accessu masculi; quod utrumque tamen est penitus inauditum. Plura super his videantur *capite precedente*, quo latius hanc rem expendimus.

Æmilius Parisanus, licet hoc mysterium non exacte cognoverit, tamen, quasi per umbram, aliquid animadvertisse videtur: atque hinc duplex semen (melius dixisset, *duplices feminis partes*) constituit: unum in genitalibus partibus genitum, quod, *lib. 1. exercit. 12.* negat esse animatum: alterum non genitum in partibus genitalibus, sed à toto decisum, quod, *lib. 1. exercit. 1.* dicit esse animatum.

Alii, qui speciatim in homine non admittunt vel agnoscunt ullam animam, quam Rationalem, dicunt illam solam ex conveniente oblata seminali materia omnium partium delineamenta perficere, & habitaculi sui architectam esse: hancque suam sententiam plurimis rationibus acerrimè defendunt, & sic tacitè animam rationalem extruere esse, ac per generationem, non minus quam ipsum corpus, propagari, docere nituntur: qua de re lectu dignus est

*Parisi  
opinio.*

*An sit Ani-  
ma rationa-  
lis.*

est Sennerti *acutissimus tractatus de generatione viventium*, quem inter sua hypomnemata physica conscripsit.

Hos rursus magno fervore plurimi Philosophi, & omnes Theologi impugnant (horum tamen aliqui præter rationalem, etiam vegetativam animam in homine admittunt, aliqui hanc planè non agnoscunt) & animam rationalem, non per traducem propagari, sed creari & infundi statuunt: quibus etiam nos ea in parte calculum nostrum lubentes concedimus; quia scilicet ea non est talis, ut ex sua substantia quidquam producere possit, non est sibi conscia formationis corporis, aut ullarum actionum naturalium, non est divisibilis in partes, nec corruptibilis ut reliquum corpus, sed immutabilis, & à reliquo corpore separabilis: quia etiam non est creata sicut animalium corpora, quæ ex terra & aqua produci iussa sunt, secundum speciem suam, qua singulorum anima vegetans includitur (*Genes. 1. vers. 20. 21. 24.*) sed post totum hominis corpus ex terra vivens formatum, dicitur à Deo in faciem ejus inspiratum spiraculum vitæ, eumque factum esse in animam viventem (*Genes. 2. vers. 7.*) unde clarissime patet rationalem hominis à Deo inspiratam animam non esse formatam ex terra, aqua, aliave corruptibili materia, sicut corruptibile ejus corpus, quod modò ex luto, ante animæ istius inflationem seu infusionem, omnino formatum erat; sed eam ex Dei immediata operatione, post formatum corpus, processisse incorruptibilem & simplicem (id est, non habentem ullas partes per quarum à se mutuo separationem in plura resolvi & mori possit, sicut ea de causa corpus, cum sua vegetante anima, perit) & collapsò per mortem hospitio suo temporali, per se absque isto hospitio persistere potentem: cujus ratione etiam homo non dicitur solum vivere naturaliter, sicut alia animalia, verum etiam dicitur vivere ad imaginem Dei, qualis vita reliquis animalibus non adscribitur: nihil autem mortale immortalis Dei imago esse potest.

Non esse Animam rationalem.

Verum hi posteriores etsi de Animæ rationalis creatione & infusione satis bene differere videantur, tamen si Animam vegetantem etiam in homine non admittant, omnino aberrant à scopo, nec primum efficiens principium, quod semini inest, explicant, de cujus explicatione, non verò de Animæ Rationalis ortu, hic quæstio nostra agitur. Illis igitur, qui animam vegetantem non admittunt in homine, duo valida infero argumenta, quorum *Primum* hoc est. Anima rationalis cum per generationem non propagetur, sed creetur, necessario infunditur, idque vel in corpus mortuum, vel in vivum. Non in mor-

Primum argumentum in contrarium.

tuum, nam illa anima non potest inhabitare corpus mortuum, nec illud vivificare, nam ejus vita diversa est à vita corporis; hæc enim perit cum corpore, illa non, sed moriente corpore ex eo emigrat, vitamque suam perennat. Ergo in vivum: quid igitur vitam in corpore suscitavit ante Animæ rationalis infusionem? Dicitur fortè, eodem tempore quo partes delineandæ sunt, infunditur Anima rationalis, eaque ipsis vitam introducit, & vita est. Respondeo: quod non cum delineandæ, sed cum penitus delineatæ & formatæ sunt omnes corporis partes Anima rationalis infundatur, testem esse Sacram scripturam, *Genes. cap. 2. vers. 7.* ubi patet Deum primo formasse de limo terræ hominem (nota *hominem*, ergo creaturam viventem, seu Anima vegetante præditam, nam limus terræ, quo usque non vivebat, non poterat appellari homo) & tunc inspirasse spiraculum vitæ, eumque factum esse in Animam viventem: id est, tunc ei inspiratam esse animam perpetuo viventem & immortalem. Ergo, uti tunc, ita etiam postmodum Anima rationalis, non corpus humanum format & vivificat, sed infunditur in corpus modò formatum & vivens. Dico, *vivens*, nam quod corpus format, hoc ipsum necessario illud vivificat, & ipsummet vivit: à re enim mortua non potest tam mirabilis corporis structura formari, ut nec à solo calore, utpote qui duntaxat substantiam seminis attenuare & colliquare, sicque formatricem spiritum, in ea quasi sopitum ac irretitum latentem, è compedibus istis expedire, suscitare, & ad formandi actum promovere, per se autem partes corporis tam concinno ordine, & conveniente figura minime formare, potest. Igitur, non Anima rationalis, sed hic spiritus vivificus (cui inest illud quod Galenus *Naturam* appellat, nos verò *Animam vegetativam* nominamus) ex ipso semine, in quo extitit potentiâ, suscitatus, est ille qui ex seipso & subjecto cui inhæret, & ex quo prodiit, scilicet semine, corpus ejusque partes convenientes efformat & vivificat: cui dein formato ac viventi immortalis Anima rationalis infunditur, eique unitur, animæ corporeæ motus exinde determinatura, & temperatura, quo usque lapsu temporis corpore ad domicilium suum inepto reddito, illa ex eo emigrat, non causam mortis ipsa præbens, sed ob mortem corporis, à quacunque intemperie aut prava conformatione inductam, ex hospitio suo simul quasi depulsa: atque sic vitam corpoream, quam suo accessu non contulit, etiam suo recessu non aufert. Hoc ipsum ex eo quoque liquet, quod illa immortalis non possit vitam mortalem, qua ipsamet destituitur, conferre corpori ab ipsa separabili & corruptibili. Nam quidquid vita-

Tempus in-  
fusionis A-  
nimæ ratio-  
na. is.

lem formam corpori confert; illud vitam & formam sibi similem confert, ut liquet in omnibus brutis & plantis: ergo si etiam Anima rationalis formam corpori tribueret, illam immortalem, sibi similem, tribuere deberet, qualis corpori non inest. Præterea durum est credere, cum partes primo delineari incipiunt, isti principio mox, tanquam primum actorem, adesse Animam rationalem: adhuc acerbius, credere, cum primo delineatus embryo magnitudinis formicæ majusculæ, aut dimidii pisi (quales nobis visos supra descripsimus) per abortum ejicitur, tunc ab isto vix cognoscibili corpusculo, exire, & vel servari, ac æternis gaudiis demandari, vel una cum eo perire Animam rationalem. Certè nostrum non est judicare vellè de rebus cœlestibus, quæ superant humanum captum; ut & de tempore infusionis Animæ rationalis: etsi hæc de re aliquid verosimile definire videantur illi, qui secundum veritatem bene statuentes, Animam rationalem à Deo *αὐτὸς* creari, ex sententia D. Augustini dicunt, *Animam creando infundi, & creari infundendo*: id est, non in cœlo prius conditam inde in corpus formatum immitti, sed eam tunc creari, cum simul formato corpori sociatur, ac conjungi corpori eo ipso momento quo creatur. Verum anne illa creatio, & simul associatio, fiat in ipso formationis corporis initio, an verò primo, secundo, tertio, quarto, aliove à principio formationis mense; & quo tempore corpus aptum sit illam Animam recipere (*oportet*, inquit Galenus, *idoneum esse corpus, quod Animam est recepturum, & si sui temperamenti*, addo, & suæ conformationis, *magnam mutationem subeat, ex eo statim Animam migrare*) hoc nostrum non est accurate inquirere, utpote quibus tanta non est ingenii perspicacitas, ut illud aptitudinis tempus ad punctum exacte cognoscere possimus, quod summus Deus, Animæ istius creator, novit solus: (hinc bene dicit Th. Willis, *de anim. brutor. physiol. cap. 7. quam primum omnia in fœtus humani formatione, ad ejus receptionem rite disposita sunt, eam à Deo immediate creari ac infundi*) tantummodo de ortu perituræ vitæ in corpore humano, quod in hac miseriarum valle istius Animæ rationalis domicilium pro tempore existit, naturalibus rationibus inquirere, Philosophorum est, quam vitam nos, bona cum ratione, dicimus longe diversam esse à vita Animæ rationalis, nec ab ea oriri posse.

Secundum  
argumen-  
tum in con-  
trarium.

Secundum argumentum quod infero, hoc est. Anima rationalis infunditur, aut in semen, aut in formatum fœtum. Prius verum non est, nam alioqui cum quaque effusione seminis fœcundi, ex quo non fit conceptus, periret Anima. Atque sic graviter peccarent omnes Theologi & Po-

litici, ac non possent non publici animæcidii rei haberi, quando viris juvenibus matrimonium inire permittunt cum mulieribus quinquagenariis, sexagenariis, aut magis grandævis, licet ex fœcundo illorum semine in tales anus effuso, nihil productum, sed illud suffocatum ac corruptum iri præsciant. Quod si forte dicatur, virile semen non esse fœcundum, nisi cum muliebri semine miscetur: respondebo, vim efficientem totam esse in semine virili, (ut *hæc & præcedente capite* satis probavi) & muliebri tantum materiale proximumque alimentale principium esse. Si igitur vis illa efficiens fœtumque primò formans, foret ipsa Anima rationalis, deberet illa tota esse in semine virili, atque hinc in prædicto casu non possent Theologi & Politici immunes haberi ab animæcidio, à quo tamen illos quilibet facile excusat, etiam illi qui Animam per generationem propagari contendunt. Si *Posterius* verum est, jam dicant adversarii, quænam fuerit in semine prima causa movens vel efficiens, quæ semen movere & vivificare, ex eoque fœtum efformare auspicata est ante Animæ rationalis infusionem. Illud necessario debuit fuisse aliud quid quam Anima rationalis: ergo anima vegetativa. Atqui Philosophi docent, in unoquoque composito vivente tantum posse unam esse Animam, & illam in homine sub se complecti vegetativam; hancque posteriorem solummodo esse accidens, substantiæque modificationem, scilicet calorem innatum, & talem cordis, cerebri, aliorumque viscerum, ut & spirituum dispositionem, quæ ad agendum apta sit: ergo in homine non posse esse duas distinctas animas, unam vegetativam, alteram rationalem. Verum, quamvis Aristoteles olim, *lib. 2. de anima*, multique Philosophi, illud hodie doceant, inde tamen non sequitur rem ita se habere, homines sunt, errare possunt: rationes modò præmissæ rem aliter se habere demonstrant, & abunde docent, vitam corporis perennem futuram, si Anima rationalis illud sua inhabitatione vivificaret: nam quare illud minus præstaret in fine, quam in principio, cum in facultatibus suis non imminuatur? & si materiam in principio disponit ad vitam, quare illud ipsum non pergeret facere sine fine? Præterea cum in brutis admittatur Anima vegetativa, unica formationis corporis organici & vivificationis magistra, quare talis etiam non admittitur in corpore hominis, quod non minus corruptibile existit quam corpus bruti? Huc accedit, quod etiam ex operationum seu actionum diversitate duarum diversarum animarum præsentia in homine animadvertatur. Nam *Caro concupiscit adversus Spiritum, & Spiritus adversus carnem*. Hoc intestinum bellum quilibet in se experitur.

ritur. Anima enim corporea corpori inhærens, hominem ad voluptates sensuales totum inclinat & deducit: sed Rationalis anima, quæ altioris originis est, per divinam gratiam, ipsum noxiis voluptatibus abstinere, iisque resistere suadet, & ad pietatem invitat, ejusque cogitationes à terrenis perituris ad cœlestia & altiora nunquam peritura evehit seu extollit. Hoc intestinum bellum in se ipsa etiam sentit: Medæa, apud Ovidium, atque hinc dicit,

— Video meliora, proboque,  
Deteriora sequor.

Denique, Anima corporea, etsi non modò res simplices apprehendat, sed & plures simul componens, aliquas conclusiones suo modo faciat, sicut id manifeste patet ex actionibus canis, simiæ, elephantis, vulpis, &c. tamen ejus actiones Animæ rationalis actionibus longe inferiores sunt: hæc quippe non tantum ideas ab illius corporeæ phantasiâ conceptas intuetur, aut simul dijudicat utrum veræ an falsæ, bonæ an malæ, ordinatæ an inordinatæ sint; & ipsum Animæ corporeæ, per varia phantasmata instabiliter divagantis, impetum sæpe cohibet, atque eam ab his illisve conceptibus avocans, ad alios dirigit, ac pro suo arbitrio intra certos limites coercet, ne à recto proposito nimis divertat vel aberret, sicque illius actus moderatur ac regit.

Ad hujus obscuritatis majorem sublationem in sequentibus aliquanto major claritas elucescet.

Solutio.

Verum hujus dubitationis totam nebulam penitus discutit summus iudex Sacra Scriptura, utpote quæ Animam vegetativam æque in hominibus, atque in brutis existere significat. De brutis res manifesta est, Genes. cap. 1. vers. 21. & 24. *Producat terra animam viventem in genere suo, jumenta, & reptilia, & bestias terra in genere suo.* Similia sequuntur, ejusdem cap. vers. 30. & cap. 9. vers. 10. 12. 15. 16. & Levitici cap. 24. vers. 18. & Job. cap. 12. vers. 10. quibus omnibus locis loquitur textus sacer, de Anima vivente è terra, seu corporea materia producta, ac corpori viventi juncta, ergo corruptibili, & cum solutione misti rursus peritura. Hujusmodi quoque animam in hominibus non modò agnoscit, sed manifestè illam ab immortali Anima rationali distinguit, & illam simpliciter appellat *Animam viventem*, hanc verò *Spiritum à Deo datum*. Prius patet variis S. Scripturæ locis: Genes. cap. 2. vers. 7. Exodi, cap. 21. vers. 23. Levitici, cap. 24. vers. 18. Deuteronomi, cap. 19. vers. 21. lib. 1. Regum, cap. 19. vers. 4. ubi Elias petivit mortem animæ suæ: & Evangel. Joannis, cap. 10. vers. 11. dicitur, *Pastor bonus animam suam dat pro ovibus suis*: quod certe intelligi non potest

de immortali Anima rationali, quæ non moritur, sed de illa anima, quæ ut in brutis, sic etiam in hominibus vitam constituit, & in principio corpus organicum formavit, atque ipsamet corporea ex materia corporea esteducta seu suscitata, ac cum corpore quod formavit rursus perit, & qua pereunte, etiam Animæ rationali divinitus infusæ mox demigrandum est, utpote cujus in humano corpore habitaculum non diutius durat quam corporis vita. Hanc autem immortalem Animam rationalem Sacer textus, ad differentiam alterius jam dictæ Animæ viventis, seu vegetantis, quæ corruptibilis est cum materia è qua processit, plerumque appellat *Spiritum*, ut modò dictum, & interdum quoque simpliciter *Animam*. Sic David, Psal. 15. vers. 10. dicit, *Quoniam non derelinques Animam meam in inferno*. Et, Psal. 30. vers. 10. *In manus tuas commendo Spiritum meum*. Ita etiam inquit Ecclesiastes, cap. 14. vers. 7. *Ut Spiritus redeat ad Deum, qui dedit illum*. Item Stephanus, Act. 7. vers. 60. *Domine Jesu suscipe Spiritum meum*. Et Matthæi cap. 27. vers. 50. *Jesus clamans voce magna emisit Spiritum*: quod ipsum etiam scribit Joannis cap. 19. vers. 30. Quæ posteriora omnia non possunt intelligi, nisi de immortali Anima rationali.

Verum, quia ex modo dictis patet, in homine esse duas animas, unam vegetativam, alteram rationalem, quid jam respondebitur ad eorum objectionem, qui dicunt, propterea duas animas in homine esse non posse, quia plures formæ eandem materiam simul actuare nequeunt? Dicendum, unam tantum esse animam quæ immediate materiam actuat, & compositum specificat, scilicet vegetativam: sed Rationalem, quæ altioris profapiæ est, mediante illa formante seu actuante Vegetativa, corpus inhabitare, non verò illud primitus formare; atque sic non esse duas, sed tantum unam formam quæ materiam actuat: hoc ex eo manifeste liquet, quia pereunte corpore formato, simul cum eo perit & corrumpitur forma formans, sed cum eo non perit nec corrumpitur Anima rationalis. Hæc igitur non est, nec fuit forma formans, sed est aliud quid in modò formatum corpus infusum, ac per se subsistens, quod mediante forma formante corpori humano inest, atque deficiente illa forma formante ex eo protinus emigrat, ac sine corporis associatione integra per se subsistit.

Verum hic jam alia quæstio suboritur, scilicet si vegetativa anima concedenda sit, quæ vitam indifferenter plantis & animalibus confert, videri adhuc aliam tertiam statuendam esse peculiarem Animam sentientem, quæ in brutis & homine sentit, atque operationes à vegetantis operatione

*Anima sensitiva qualis sit.*

Bb

diversas

diversas facit. Respondendum, Vegetantem esse illam ipsam quæ etiam sentit in iis creaturis, quibus ad sentiendum concessa sunt media necessaria, nec non apta organa, ut cerebrum, spiritus, oculi, aures, &c. in aliis verò quæ istis mediis & organis destituuntur (ut in plantis) non sentire, sed duntaxat vegetare.

Concedendum igitur secundum Sacram Scripturam, ut & secundum rationes antelatas, dari in homine Animam vitalem, seu vegetantem mortalem, distinctam à rationali Anima immortalis, & illam in fœtus formatione choreas ducere, imò totam formationem perficere, atque illam ipsam esse illud, quod multi Virtutem architectonicam, alii Vim plasticam appellant. Videantur super his plura alia sequente lib. 2. cap. 2. circa finem.

Atque sic jam plus satis me demonstrasse puto, quod Virtus architectonica sit ipsa Anima vegetativa, & quod hæc una cum Rationali anima in homine vivente commode subsistere queat. Hinc nunc ea de re nulla ulteriora verba facienda videri possent, sed quia portus nostri limites modò inopinanter paulo longius egressi sumus, placet, antequam domum revertamur, vela non-nihil expandere, & hunc oceanum adhuc paulo altius ingredi, ut sic aliis turbulentum hoc æquor navigantibus, in eoque inter rupes & vada oberrantibus, tutiorem viam aliquo modo demonstrare possim.

Anima vegetativa  
sedes.

In Animæ vegetativæ historia, primum quod occurrit dubium hoc est, nempe, quænam ei sedes in corpore hominis aliorumque perfectiorum animalium assignanda sit, utpote de qua non omnino convenit inter Philosophos.

Est tota in  
toto, &  
tota in par-  
tibus.

Illam omnibus corporis viventis partibus inesse, vix quisquam negare audebit, cum hoc liqueat ex actionibus quas in omnibus & singulis partibus agit. Peripatetici illam omnibus partibus æqualiter inesse statuentes, dicunt, *Eam esse totam in toto, & totam in qualibet parte.* Id est, unam eandemque numero animam vegetativam toti corpori coextensam, totum vivificare: sed quia est divisibilis cum materia cui inest, hinc quæ singulis à toto avulsis partibus inest, non constituere partem Animæ totum vivificantis, sed etiam constituere in illa avulsa parte totam Animam, quæ vel cum avulsa parte defectu nutrimenti moritur, ut cum aliqua pars animalis abscinditur; quippe tunc tota illa anima quæ partem illam vivificabat defectu nutrimenti deficit & evanescit: vel dato conveniente nutrimento in avulsa parte operatur, & vivificationis actum peragit. Liqueat hoc in multis plantis: ex. gr. falicis rami avulsi, & alibi rursus terræ implantati, æque bene

crescunt atque arbor à qua avulsi sunt, ergo singuli habent totam animam, & eorum quoque mater habet & retinet totam animam, & sic cum hæc, tum illi, omnes æque bene crescunt, idque non per animæ aliquam partem (hæc enim non posset vivere) sed per totam animam, ut liquet ex actione, nam in singulis vivificatio & nutritio peragitur, quæ non ab animæ parte, sed à tota anima perfici possunt. Atque sic commode explicari potest antedictum Peripateticorum statutum, quod tamen hæcenus à multis Philosophis, ut falsum & impossibile, atque ab omni ratione alienum, nimis præcipitanter fuit rejectum.

Inter illos qui præfatum Peripateticorum dogma non bene perceperunt, videtur etiam esse doctissimus Th. Willis, utpote qui, *lib. de anima brutor. physiol. cap. 4.* concedit quidem Animam vegetativam esse corpoream, & per totum corpus organicum vivens extensam, sed illam putat aliis partibus magis, aliis minus inesse. *Anima corporea*, inquit, *brutis perfectioribus & homini communis, sicut toti corpori organico coextenditur, & singula, tum partes ejus, tum humores vivificat, actuat, & irradiat, ita in duobus illorum eminentius subsistere, atque sedes velut imperiales habere videtur. Sunt autem immediata hac anima subiecta, Liquor vitalis, sive sanguis in corde, arteriis, & venis perpetuo gyro circulator; & Liquor animalis, sive succus nervus, intra cerebrum & appendices ejus blande scaturiens. Utrasque has provincias Anima sua presentia incolit, ornatque, sed cum tota utrisque simul adesse nequit, quasi divisa, per partes suas, ambas eas actuat. Cum enim illa sit cujusdam ignea natura, una pars ejus, intra sanguinem gliscens, quasi flamma accensa est; ac altera per liquorem animale diffusa, videtur esse lumen, aut radii lucis, à flamma ista emanantes. Paulo post addit. Sunt igitur Anima corporea, secundum binas principes ejus in corpore organico functiones, scilicet vitalem, & animale, dua distincta partes, nempe flammea & lucida. Ex illo Willisii textu liquet, quod clarissimus vir novam, sed rationi minus congruam, opinionem de anima conceperit. Nam primo, statuit Animam, præter corporis partes, etiam vivificare ejus humores & spiritus, quod longissime à vero recedit. ut liquet ex eo quod infra, *lib. 2. cap. 12.* scribimus, ubi clare docemus, quod humores & spiritus non vivant, atqui viverent, si ab anima vivificarentur. Secundo, cum vita, non nutrimenti fluidis transeuntibus, nec toti in continuitate junctis, sed solis duntaxat veris corporis partibus adscribi possit, videtur Willis tanquam indubitatum, tacitè præsupponere, sanguinem & spiritus animales esse veras corporis animati partes, æque atque partes solidas*

An aliis  
partibus  
magis, aliis  
minus in se.

solidas toti in continuitate adhærentes, quod minime verum esse, supra latius docuimus, *hujus lib. cap. 1. Tertio*, statuit, sanguinem & liquorem animale esse immediata animæ subjecta, cujus tamen contrarium ex eo innotescit, quod immediatum animæ subjectum sint ipsæ partes corporis, quibus nec sanguinem, nec spiritus, aut ullos alios humores annumerari posse, *locus citatis* abunde docuimus. *Quarto*, præter rationem duas animæ partes constituit, unam igneam seu flammeam, alteram lucidam, iisque singulis diversas sedes adscribit, illi sanguinem, huic liquorem animale: nam sic, quæ antehac nullipes fuit Anima, hoc nostro seculo bipes evadet, unoque pede sanguinem, altero liquorem animale perambulabit. Verum, ne fortassis per infortunium uno crure fracto Anima collaberetur, providus Willisius tandem ei adhuc tertium crus in subsidium adjungit. *Attamen præter bina hæc membra*, inquit, *corpori individuo accommodata, altera quadam portio ejus, ab utrisque illis delibata, & velut in totius Anima epitomen redacta, propter speciei conservationem, seponitur. Hæc flamma vitalis in sanguine gliscentis, velut in quovis, maxima ex parte lucida est, & spiritibus animalibus constat; qui scilicet in manipulum quendam collecti, atque humorem appropriatum, sc. genitalem, nacti, intra corpora spermatica reconduntur.* Atque sic Anima, olim ambulare & stare nescia, nunc tribus cruribus instructa & suffulta firmius subsistet; verum sic tripes non sine lapsus periculo clauda procedet; ac propterea si jam aliquis adhuc quartum aliquod crus ei adaptare commode posset, tunc non modo firmiter staret, verum etiam in suis actionibus æqualiter, sine ulla claudicatione, instar fortis equi, quadrupes procederet. *Ast*, seposito joco, ex prædictis liquet quod magnis summæque eruditionis vir Thomas Willis Peripareticorum dogma non satis bene perceperit, atque hinc Animam, quo usque in toto subsistit, indivisam, pro suo arbitratu in varias partes misere dissiderit ac diviserit, cum tamen in omnibus partibus eadem, ejusdemque naturæ, existat. Si hic quispiam fortassis objicere velit, semen etiam esse potentia animatum, atque hinc manifestum esse, quod, præter corporis partes, ejus quoque humores vivere & animati esse possint, cum tamen illud antea à nobis strenue negatum sit. Respondeo, semen neque esse humorem aliquem nutritium (quales sunt sanguis & liquor animalis) neque amplius esse partem corporis individui, Joannis aut Petri, à quo decisum est, sed esse specificum succum, in se totius hominis compendium, omniumque partium ideas continentem, atque hinc animam in eo, tan-

quam in omnibus totius corporis partibus, latere posse, usque dum tandem in loco conveniente per calorem ab impedimentis suis liberata, præsentiam suam per suas actiones vivificas demonstret: quales actiones vivificæ è nullis humoribus nutritiis, aut à nutritione redundantibus, unquam procedunt, aut procedere possunt.

Verum cum hodie nostri Philosophici *Quid sit Anima vegetativa.* seculi acutissima philosophica ingenia nihil non inquirant, nec unquam quiescant, antequam in qualibet obscurissima re aliquid invenerint, quo ipsam rei veritatem contineri, se cum sibi, tum aliis persuadere posse existimant; velim ut jam explicent nobis, quid sit illa Anima vegetans, quæ in formatione fœtus primum effectivum principium, seu protoplastes est: nam alioqui si in solo nomine acquiescendum est, æque probabiliter statui potest, principium efficiens esse chimæram, quam Animam vegetativam. Si forte quispiam dixerit, cum Aristotele, *1. de part. animal. cap. 1. Quod Anima sit principium motus.* Aut, *lib. 2. de anima, cap. 1. Quod anima sit actus primus corporis naturalis potentia vitam habentis.* Aut cum Fernelio, *Animam esse organici corporis perfectionem, & quidquid illi corpori vitam conferet, actionesque vitales inducet, id animam esse.* Aut cum Sennerto, *illam esse actum & formam substantialem, per quam corpus animatum tale est.* Aut cum non nullis hodiernis Philosophis, *illam esse primam fermentationis & formationis materiam, ipsamque vitam nihil aliud esse, quam fermentationem.* Ille nihil dicit, hæc enim mera verba, & meræ chimære sunt: quippe talibus verbis non explicatur ipsa Animæ essentia, neque etiam quid sit illud motus principium, seu actus ille primus, innotescit, ut neque quid sit illa perfectio, aut forma substantialis, vel prima fermentationis materia. In solo homine Animam rationalem, ejusque divinitatem & immortalitatem, ex revelatione, ex fide, & ex admirandis ac divinis operibus cognoscimus; sed non illam formam substantialem, seu illum actum primum, aut primam fermentationis materiam, per quam omnia animata primitus vitam nascisci, & exinde vivere dicuntur, nec quidnam ille actus primus, aut hæc forma, vel materia sit, quisquam explicat, sed in solo Animæ vegetantis nomine omnes acquiescunt.

Hanc ego Animam paulo ante, atque *Spiritus viscus.* etiam *lib. 2. cap. 2.* appello Spiritum vivificum è materia corporca eductum, aliorum spirituum è materia eductorum conditionem longe superantem. Verum etsi hæc mea sententia ipsam Animæ substantiam, aut potius subjectum cui inhæret, satis designet, multis tamen non omnino satisfaciet (sicut etiam vix mihi ipsi satisfacit) qui



ulteriore naturæ hujus Spiritus explicationem desiderabunt, quam certe melius est animo contemplari, quam verbis exprimere. Nam quomodo, aut qua scientia instructus, formandi corporis partes tam rite, tamque concinno ordine, & figura conveniente, formet ac jungat, novit ille Unus, qui in principio omnia creavit primus & solus. Quid illum suscitet, & ab impedimentis quibus obvolvitur expediat, sicque in actum deducat, jam satis explicatum est, quod sit calor in semen conveniente loco & tempore agens, quippe sine tali calore, neque è materia crassiore dissolvi ac suscitari, neque agere potest. Verum hac de re latius dictum capite præcedente.

Regii opinio.

Hujus Gordii nodi solutionem se tandem multo aliter & clarius invenisse putat Regius, qui se hoc obscurum, ut multa alia Naturæ mysteria, manifestis rationibus explicaturum promittit. Ille, *philos. natur. lib. 4. cap. 14.* scribit formationem fœtus perfici calore, cum uteri, tum seminum, quo horum particulæ in utero agitantur, hæc verò agitata ob suas figuras & magnitudines quas in meatibus seminariis, certo modo temperatis ac figuratis, sunt adeptæ, necessariò in utero in perfectum animalis, generandi germen, succo alimentario instructum, & membranulis vestitum, semina stirpium aliquo modo referens, abeunt. Tandem subjungit quod hæc explicatio formationis fœtus adeo manifesta sit, ut jam nulla amplius necessitas cogat, ullam Animæ, alteriusve facultatis ideam, phantasiæ, vel archeum, formationis auctorem, in utero, vel semine effingere. Verum clarissimus Vir, qui prima fronte Apollinis aliquod oraculum promittere videtur, his verbis obscurum per obscurius vult explicare, atque summâ philautiæ turgidus, tantopere ipsi placet hoc suum inventum, ut neminem hæcenus acutius quid excogitasse, vel postmodum excogitaturum esse putet, cum tamen meras duntaxat vanitates redolet. Nam quod alii appellant Animam seminis, Animam vegetativam, Vim plasticam, Virtutem architectonicam, &c. hoc ille appellat Certas figuras & magnitudines particularum seminis, multo magis ignotas, & minus comprehensibiles, quam Anima vegetativa, aut vis plastica: & licet fortè ex ejus subnexa mechanica explicatione aliarum rerum non viventium artificiosam formationem taliter qualiter concipi posse, quispiam existimet, tamen ex ea non patet, quomodo partes corporis nostri viventis ex figurarum & magnitudinis particularum seminis diversitate generentur, quidnam procuret ut cor efformetur in medio thorace, non in abdomine aut capite, in eoque speciatim constituentur

undecim valvulæ, non plures, non pauciores, quare non duo corda in uno fœtu formentur, quare & quomodo partes ab ipso formationis initio vitam habeant, quidve illam, quidve motum & actiones introducat, &c. qui hæc aliaque innumera vult referre ad particularum seminis figuras & magnitudines, deberet istas primo explicare, & quales essent, ac quomodo commiscerentur, docere: qui hoc non facit, ille figuras istas proponit tanquam meras chimæras imaginarias, & non tollit obscuritatem, sed majoribus tenebris eandem involvit, dumque aliquid novi & melius dicere velle videtur, nihil dicit, sed aliò duntaxat novo, at obscuriore, termino rem obscuram magis implicat.

Jam nuper longe aliter hujus Animæ substantiam & naturam proposuit Thomas Willis, *lib. de anima brutor. physiolog. cap. 2.* qui postquam primo statuit animam brutorum (quam vegetativam appellamus) esse corpoream, & toti corpori coextensam, ac cum materia cui inhæret divisibilem, tandem concludit, Animam in sanguine aut liquore vitali (quàm male tale subjectum animæ adscribat, paulo ante dictum.) latentem, esse aut ignem, aut flammam quandam. *Quod verò bruti animam, inquit, non modò corpoream & extensam, sed naturæ cujusdam igneæ, ejusque actum, sive substantiam, aut flammam, aut balium flammæ proximum & affinem esse statuerim, præter auctorum, tum veterum, tum recentiorum testimonia amplissima, insuper rationes & argumenta fere apodictica, me induxerunt.* [ hæc dicit se alibi scripsisse ] *Quod aliorum vero suffragia attinet, ne unius Gassendi, qui hanc hypothesin tuetur, vestigiis insistere videar, hic plerosque antiquiores, tum Medicos, tum Philosophos citare possum. Nam, ut Democritum, Epicurum, Lucretium, eorumque spectatores præteream, Hippocrates, Plato, Pythagoras, Aristoteles, Galenus, cum multis aliis, ut ut circa alia discrepantes, in hanc sententiam, scilicet Animam aut ignem, aut quoddam ei analogon esse, junctis quasi manibus ierunt: quibus item è modernis, Fernellius, Heurnius, Cartesius, Hogelandus, alique se adjunxerunt: & nuperrime Honoratus Faber, bruti animam corpoream, ejusque substantiam ipsummet ignem esse, verbis expressis tradidit.*

Willisii opinio.

Verum, dum clarissimus Thomas Willis, cum omnibus illis acutissimis maximisque nominis Philosophis & Medicis, Animam ignem esse statuit, nominat quidem corpus maximæ activitatis, sed tale quod omnia in quibus & in quæ agit, consumit ac corrumpit, cum è contrario Anima sui præsentia, corpora in quibus est & agit, non corrumpat, sed in integritate conservet, atque ad munia sua suscitet, & à corruptione

Refutatio.



corruptione tam diu defendat, donec illa quibus inhæret corpora, ob aliam qualem-cunque causam, una cum ipsa anima, corumpantur. Præterea ex omnibus prænomminatis maximis viris nemo unquam docere potuit, quid ignem istum (quem illi animam esse dicunt) in generatione animalis cogat vel doceat, omnes & singulas partes tam concinno & admirabili ordine offormare & jungere, in iisque singulis tam diversas & destinatas operationes operari, in ventriculo chylum, in corde sanguinem, in cerebro spiritus conficere, in oculo visum, in aure auditum, in lingua gustum, &c. facere: quare non maxima sua activitate, rapidissimoque motu illa organa formari impediatur, aut formata mox destruat potius, quam formet, & diversas operationes ex singulis educat.

Willisii definitio animæ.

Porro, præfatus Th. Willis, dictæ Animæ essentiam adhuc clarius explicaturus, paulo post eam definit, quod sit atomorum subtilium & valde mobilium agglomeratarum congeries. Ut autem sciri possit cujus naturæ atque originis sint illæ atomi, cap. 4. sic inquit. In mechanicis ignis, aer & lux sunt præcipua elementa quibus humana industria, ad opera maxime stupenda, & non minus necessaria, uti solet, &c. Pariter opinari licet, summum artificem, sc. Creatorem optimum, ab initio ex eorundem particulis, utpote maxime activis, etiam subtilissimas & maxime activas viventium animas conflasse: quibus insuper majorem & quasi supernaturalem virtutem & efficaciam ex concinna organorum, supra machinam cujusvis artificum & technas exquisitissime elaboratorum, structura indidit. Verum concessio ex talibus principiis substantiam organi, cui anima proxime infidet, esse conflaram (quod tamen ex sola conjectura propositum, sed minime certum aut probatum est) & sic animæ organum esse bene compositum, quid hoc facit ad illam rem quam hic inquirimus? Animæ vera existentia non consistit in organi sui (quod quasi proximum ejus domicilium est) sed in propria sua substantia, atque innotescit ex ejus actu seu operatione: sicut visus, non consistit in oculo ex bona substantia bene conformato, sed in actu videndi, seu radiorum visibilium perceptione, quem actum visionis Anima per organum visionis bene conformatum perficit. Jam verò, quid, quæso, illud est, quod illam atomorum congeriem, animæ substantiam constituentem, fecit vivere, & sua præsentia alias quoque partes formare, vivificare, atque ad tam multas diversas, mirabiles, & distinctas operationes excitare? Cum dicitur, quod Anima sit congeries subtilissimarum atomorum, vel etiam ignis, tunc solum per impropriam locutionem designatur continens pro contento,

subtilissimum scilicet aliquod subjectum cui Anima proxime inhæret. Nam quod proprie sit aliquid aliud quam ignis, patet ex actionum contrarietate: nam ignis corrumpit, Anima conservat; ignis destruit corpora formata, Anima non formata format & producit; ignis nihil percipit, Anima mediantibus organis sensoriis sentit (videt, audit, gustat, &c.) & percipit. Atque hinc etiam ipse doctissimus Willis, utcunque strenuus opinionis suæ defensor, tandem tamen Animam à suo corporeo subjecto distinguere cogitur: Enimvero, inquit, quam primum materies quæpiam versus animationem disponitur, ex creationis lege, simul Anima, qua rei forma est, & corpus, quod materies dicitur, sub certa specie, juxta modulum, sive characterem iis impressum, formari incipiunt. Igitur forma, id est, Anima, est quid diversum à materia illa quæ est proximum Animæ subjectum habitaculum. Sic etiam sequente cap. 5. de principiis Animæ sic loquitur Willis: Quod ad prima initia, sive originem Anima corporea spectat, hac corpore organico (quod ipsa velut cochlea testam suam, efformat, sibi que adaptat) aliquantulum prior [igitur ab hoc diversum quid] proindeque nobilior existit: quippe spirituum animalium, sive atomorum subtilium congeries quadam, sive Animula nondum accensa in humore seminali reconditur, qua focum idoneam nata, & demum à parentis, vel gestantis, vel incubantis anima, velut flamma de flamma, accensa, ante jacta corporis fundamenta, aut prima stamina, micare, & se paululum explicare incipit. Hac conceptus telam exorditur, & materiam appositam agitat. Jam velim ut Th. Willis nobis explicet, quid sit illa Animula (de qua hic loquitur) nondum accensa. Nam spirituum animalium, vel quarumcunque atomorum congeries, non potest aliud esse, quam illius proximum subjectum, seu proxima materia cui inhæret: tale enim subjectum (quod in generatione non potest, non scit, non didicit, tam concinno ordine omnes partes delineare, formare, componere, augere) non vivit, nisi accedat vel insit aliquod vivens, quod illam congeriem vivificet. Quod quale sit ignoratur, idque tantum ex dictis illis effectis cognoscitur. Hinc etiam ipsemet Willis, citato cap. 2. dicit: Anima sensibus nostris percipi nequit, at solummodo ab effectis & operationibus suis dignoscitur. Ex his ejus verbis liquet, quod quidquid antea de igne, aut spirituum animalium, & atomorum congerie dixit Willis, sint tantum meræ & incertissimæ conjecturæ, quæ non ipsam animam, sed duntaxat, aut ejus proximum subjectum cui inhæret; aut, per similitudinem corporum tenuissimorum velocissimæ activitatis, actionum ejus modum aliquatenus designant.

Bb 3

Nam

Nam statuere quod Anima sit atomorum subtilissimorum congeries, vel ignis, æque valet ac si quis statueret, visum esse ignem, propterea quod mediante subtilissimo maximeque mobili æthere, seu igne, ejus actio peragatur, nec sine eo peragi possit; cum tamen non illud medium, cui ut subiecto radii visibiles impressi sunt, cum eoque ad oculos deferuntur, sed istorum radiorum perceptio visum constituat. Sicut igitur illud percipiens est quid aliud & diversum ab æthere, quo mediante radii visibiles ad organa visoria deferuntur; sic etiam Anima est quid aliud & diversum ab igne, aliave quacunque atomorum congerie, qua mediante in corpore subsistit & operatur.

Ex his igitur liquet, quam alienum & absurdum sit illud quod Th. Willis citato cap. 2. in sequentibus addit. *Anima, inquit, corporea existentia omnino ab actu, seu vita ejus dependet.* Malè scribit, *dependet*, cum scribere debuisset, *innotescit*. Nam ex actu isto seu vita solummodo innotescit quod talis Anima præsens adsit & agat, ac corpus cui inest vivificet: sed interim manifestissime & necessario differunt, seu diversum quid sunt, actus ille, & actum faciens. Ex. gr. cum ego aliquid scribo, ex ista scriptione quidem innotescit, manum scribentem istum actum facere; sed interim manus scribens est aliquid diversum ab illo actu, scilicet scriptione, & ab illo actu omnino non dependet, sed per illum actum duntaxat ejus jam agentis præsentia innotescit. Hinc male etiam in sequentibus addit Willisius: *Quapropter hujus essentia omnino à vita, tanquam à materia cujusdam subtilis incendio, incipit.* Dico illum male hoc statuere, quia Anima non incipit à vita, sed illa ipsamet vita est, quæ tamen in semine quasi incarcerata latet, quo usque una cum proximo suo spirituofo, cui inhæret, subiecto, à crassioribus feminis particulis obvoluta manet, à quibus loco conveniente per calorem liberata & expedita, mox incipit agere, & munere suo fungi, atque corpus cui inest vivificare, formare, nutrire, augere, & sic per istas actiones innotescit, quod talis vita, seu Anima vivificans corpori insit.

*Anima affectum.*

De affectibus seu passionibus hujus Animæ adhuc multa scribenda forent, quæ tamen hic studio præterimus, ne nimis longum fiat nostrum extra metam diverticulum. Interim cupidis lectoribus commendamus, ut de his legant illa quæ præclarus vir Thomas Willis, in doctissimo suo tractatu de Anima brutorum, proponit, *physiolog. à cap. 8. ad 16.* ubi de illis passionibus tam eleganter & splendide scribit, ut non tantum ingenii sui magnum acumen ostendat, verum etiam omnibus aliis, qui de his aliquid scribere ausi sunt, palmam præripiat.

Antequam tamen ab hoc colo discedamus, placet, coronidis loco, hoc unum filum adhuc ex eo educere, scilicet, Cum Anima vegetativa sit corporea an illa etiam nutriatur per ista alimenta quæ ad corporis cui inest sustentationem adferuntur. Hippocratis antiquum effatum est, quod Anima semper, usque ad mortem, nascitur. Hinc nonnulli concluderunt, Animam, ut alias corporis partes, consumi, & per oblata alimenta, una cum illis partibus quibus inest, identidem renovari, & sic nutrir. Verum cum natura substantiæ istius Animæ nobis sit ignota, & interim ratio notissimè doceat, illam necessario alicui proximo subiecto (scilicet alicui subtilissimo qualicunque Spiritui) inesse & inhærere, eoque mediante corpus vivificare, nobis videtur illud Hippocratis effatum potius intelligendum esse de illo proximo Animæ subiecto, sine quo illam subsistere non posse notissimum est, quam de ipsa Anima, de cujus substantia quid & qualis sit, & an nutritione indigeat, adhuc incerti sumus. Cum flamma lampadis fovetur & continuatur, tunc illi non adjicitur alia similis flamma eam nutrens, sed adjicitur aliquid quod ejus subiectum cui inhæret, scilicet oleum, nutrit & continuat, quo subiecto tandem deficiente, deficit flamma; quæ tamen à suo subiecto distinctum quid est, nam oleum non est ignis aut flamma, & flamma non est oleum; sed illa est igniculus in oleo latens, qui per aliam flammam accensus paulatim ex eo procedit, ac sine eo non subsistit, atque hinc non lampadis flammam alia simili flamma, sed ejus subiectum, scilicet oleum, nutrire necesse est, ut illa continuetur. Sic quoque non ipsam Animam, sed proximum ejus subiectum nutrir, sicque per illius nutritionem hanc continuari, dicendum nobis videtur. Attamen Thomam Willis contrarium sentire, liquet ex his ejus verbis: *Pro ut succi nutritii, inquit, in visceribus elaborati, crassiores particula molis corporea jacturas, ita subtiliores Anima hujus dispendia resarciunt.* Atque sic ille putat, non proximum duntaxat subiectum, sed ipsam quoque animam actu nutrir. Sed adiaphorum hoc est, de quo quilibet sentire potest quod lubet.

*An Anima nutriatur.*

Interim tamen, dum acriter disputatur de Animæ origine, sede, subiecto, essentia, substantia, totaque ejus historia, hætenus nullius ingenii acumine indagari, aut clare explicari potuit, quidnam re vera sit illa *Vita* seu *Anima*, de qua tot sermones habentur, & quæ in generatione animalium choreas ducit, totumque formandum format.

Hic igitur omnibus hæret aqua: hic cernimus quantum ignoremus: hic conspicimus quam frustraneum sæpe laborem impen-

impendamus in inquirendis ac discutiendis iis arcanis quæ nos ignorare voluit altissimus Protoplastes: hic animadvertimus inanem multorum arrogantiam, qui in talibus Naturæ secretis enodandis magnum scientiæ atque eruditionis specimen ingenti ac fastoso apparatu ostendere nituntur, cum interea nil nisi inania verba proferant. Omnino certe nos decet in huiusmodi mysteriis tacite acquiescere, eaque æquo animo nescire velle, & summi Numinis omnipotentiam admirari potius, quam inquirere

& examinare, & memores esse horum versiculorum Lucretii.

*Multa sacro tegit involucre Natura: neque ullis*

*Fas est scire quidem mortalibus omnia: multa*

*Admirare modo, nec non venerare: neque illa Inquires qua sunt arcanis proxima: namque In manibus qua sunt, vix nos ea scire putandum est.*

*Usque adeo procul à nobis præsentia veti.*

## CAPUT XXX.

## De Historia fœtus in utero contenti: ac primo de hepate uterino, &amp; acetabulis.

Vide Tab.  
VII.



Ost historiam seminis & conceptionis, ac formationis fœtus, nunc pergendum ad ipsius fœtus jam formati, & in utero contenti historiam.

Hepar uterinum.

Aperto mulieris gravidæ utero, mox occurrit carnea illa substantia, quam Fallopius, à placentæ aliqua figura, seu similitudine, Placentam uterinam, alii ab usus & coloris ac substantiæ aliqua similitudine, Hepar uterinum appellant.

Definitio.

Hoc hepar est viscus suo modo carnosum, molle, ex innumeris fibris, minimisque vasculis, & intermedio sanguine (in demortuis concreto) conflatum, quo mediante fœtus utero, ejusque imprimis fundo, adhæret.

Origo.

In principio semen virile utero injectum (si conceptio futura sit) à toto uteri ambitu undequaque comprehenditur, eique contiguum reperitur. Tum per caloris uterini fœtum colliquatur, sicque ex eo germinosa spiritusosa pars separata mox per tubas uterinas versus ovaria secedit, illic ovum matrum (vel ova, si plura matura fuerint) fœcunditatis sigillo donatura. Isti ovo in ovario (teste puta) ex fœminino semine modo circumdatæ sunt duæ pelliculæ, una crassior & firmior, altera tenuior & debilior (hæ postea chorium & amnion constituunt) sicut in avibus exterior durus cortex, & interior tenuis pellicula, in ovo ex semine avis fœmellæ nascitur. Harum membrarum exteriori mox à principio lanuginosa quædam hepatis uterini delineamenta, ex eodem semine fœminino efformata, adnasci conspiciuntur, quibus in eo ipso principio accedit carnosæ rubicundæ & mollis quædam substantia (hæc in abortibus præcedente oapite descriptis notata est) quæ ex ipsa uteri

substantia eo loco videtur oriri, per quem ovum ex tuba in uterum delabitur, qua mediante mox utero adhæret, & vasis aliquibus sanguiferis ab utero donatur, eaque chorio communicat, utpote quæ vasa mox ante ullam fœtus formationem in chorio conspiciuntur (ut dictum præcedente capite) nec aliunde eò devenire vel deduci possunt. Hæc primò lanuginosa hepatis uterini principia, seu delineamenta tenuia, per sanguinis istius affusionem paulatim increscunt in hoc viscus, cujus substantia tertio mense finito, notabiliter conspicua evadit. In interiore autem membrana includitur totum feminis colliquamentum, una cum bulla crySTALLINA, in qua ex germine ei infuso fœtus formatur, qui formatus isti colliquamento, totus liber ac nusquam membranis adhærens, innatât, eoque solo aliquamdiu nutritur. Postea verò, cum increscens embryo jam uberiore incipit egere alimento, vasorum umbilicalium extremitates paulatim magis excresecunt, & versus hoc hepar extenduntur (quod eo tempore etiam incipit manifestius conspicuum fieri) ut ex eo, sicut plantæ radicibus suis è terra solent, succum alimentarium firmiorem hauriant, & ad fœtum deferant. Quo autem modo vasa illa membranas transeant, sicque ad hoc hepar deveniant, videndum cap. 32.

Harveus in ejecto conceptu, ovi gallinæ magnitudinem habente, similiter observavit in chorii externa ac superiore parte quasi muscum tenuem, seu lanuginem quandam, accrescentis placentæ rudimenta exhibentem: in ejusdem verò parte interna plurimas vasorum umbilicalium propagines, nusquam verò chorium utero adhærens. Verum quod illi chorium nusquam utero adhærere visum fuerit, propterea forte contigit, vel quod materia ad placentæ incrementum

mentum ex utero affundenda, nondum satis copiosa accesserit: vel quod carnosâ particula (quam in abortibus capite præcedente descriptis, chorio extrinsecus adhærere vidimus) in excussione illius conceptus, non ab utero, sed à chorio fuerit abrupta, atque ita chorium sine illa prodiens, Harveo nusquam utero adhæsisse visum fuerit. At vasorum illarum propagines, quas Harveus pro umbilicalibus productionibus habuit, non videntur fuisse vasorum umbilicalium ramuli, cum umbilicus eo tempore ad istam longitudinem nondum excrevisse, & eo usque pertingere potuerit: sed fuerunt potius vascula ex antedicta carnosâ substantia, chorio superius adhærente (videantur præcedentis capitis abortus) producta, quibus se postmodum intermiscere solent vasa umbilicalia.

An sit sanguis coagulatus.

Ex modò dictis igitur satis innotescit, hepatis uterini principium non gigni ex impuriore sanguinis materni menstrui parte ab utero affluente, puriore ad fœtum per venam umbilicalem transeunte (ut multi ante hac malè tradiderunt) cum illius prima stamina ex fœminino semine, non minus quam chorium & amnios, sint delineata, seu conflata, quibus postmodum, non ex impuriore, sed ex bono affuso sanguine, incrementum accedit: atque hinc graviter errasse eos, qui iudicarunt illud non esse aliquod viscus, sed esse tantum congeriem sanguinis menstrui extra vasa collecti & coagulati, atque isto loco ad fœtus nutritionem servati, cum tamen & principii, & fibrosæ substantiæ, atque usus ratione, illud non minus liqueat esse viscus, quam alterum hepar in hypochondrio dextro situm. Præterea opinionis istius patroni non considerant, sanguinem extra vasa, in utero, aliave parte calida & humida, novem mensibus integrum, ac sine putredine & corruptela consistere non posse, usumque quotidianum satis docere, quam gravia mala sanguis, etsi bonus, illic extra vasa hærens inducat, si tantum paucis mensibus ibi sistatur.

Hieronymus Fabricius ab Aquapendente illud hepar nominat **Carneam substantiam**, & **Molem carneam**, non quod simpliciter caro sit, sed viscus peculiarem ac propriam fibrosam contexturam & carnem sibi convenientem habens, cujus prima stamina, ut modò dictum, ex semine fœminino sunt delineata, & postea peculiaris carnosâ substantia paulatim affusa ex sanguine vitali, qui primò è matre per vasa uterina copiosior eò confluit, & postea etiam è corde fœtus per arterias umbilicales eò impellitur. Ex corde enim fœtus, cum vasa umbilicalia jam ad hepar uterinum pervenerunt, spirituosum quoddam nectar, aut spiritus quidam vitalis, una

cum sanguine arterioso, effluit, qui sicut omnes fœtus partes, ita etiam membranas ejus, & adjuvante, maximamque materiæ partem suppediante materno spirituofo sanguine, hoc quoque hepar uterinum auget, nutrit, vivificat, & ad agendas actiones excitat.

Hoc hepar in unius fœtus conceptu semper unicum existit, sed in gemellorum conceptione, modò ambo fœtus unum commune, utriusque umbilicum excipiens; modò singuli diversum & peculiare hepar uterinum habent. Whartonus tamen putat singulos gemellos semper habere propriam placentam, sed quæ sibi mutuo adeo contiguæ sunt, ut una esse videatur. Verum Whartoni sententiam per vocem *semper* expressam, non generaliter veram esse, docet experientia, utpote qua constat, nonnunquam contrarium contigisse. Atque hinc pro certissimo concludendum, in gemellorum conceptione, modò unum hepar uterinum, modò duo dari: sed quam ob causam, & in quibus casibus unum, vel duo dentur, hoc altis tenebris immersum, hætenus omnibus ignotum remansit, cujus nos tamen præclaram explicationem daturi sumus *proximo sequente capite*, eo loco, ubi *de statu membranarum in gemellis* agimus.

Substantiam habet sibi propriam, mollem, laxam, fragilem, & raram, multis intercedentibus fulcis inæqualem, atque hic illic quasi leviter divisam, sed interim totam fibrosam, ex innumerabilibus filamentis ac fibrillis, infinitisque vasculorum ramulis contextam, & quasi ex affuso concreto sanguine turgidam, jecoris parenchymati laxiori non multum absimilem, licet minus firmam, sed quæ levi attritione laceratur ac dissolvitur. Qualem ejus substantiam, cum aliàs, tum mense Decembri, anni 1665. multis medicinæ Doctoribus & studiosis demonstravimus in cadavere mulieris sexto mense gravidæ: atque etiam novissimè in duarum mulierum viventium (quibus parere non potentibus à nobis fœtus extracti fuerunt) placentis, post extractum fœtum integris ab utero separatis, & una cum membranis eductis.

Colorem obtinet rubicundum, sed obscuriusculum, non omnino instar coloris lienis, at paulo rubicundiorem, rarò pallidiusculum.

Totius placentæ seu hepatis uterini figura plerumque circularis est (interdum etiam oblonga, aut quadrangularis, rarius triangularis) at circumferentia inæqualis. Magnitudo autem & crassities varia, pro corporis fœtusque conditione, & gestationis tempore. Quippe in abortibus triginta aut quadraginta dierum, circum umbilici radices, vix tunc eò extensas, ægre apparet, sed

Numerus.

Substantia.

Color.

Figura & magnitudo.

sed exinde sanguine spirituofo copioſiore affluente, indies accreſcit & amplificatur, ita ut tandem, cum ad ſummam perfectionem devenit, latitudinem circiter pedis habeat, vel talem quæ in circuitu pollice & indice extenſo comprehendi poteſt; craſſitiam verò duorum, rarò trium digitorum tranſverſorum in medio, ſed in extremitatibus minorem. Nicolaus Hobokenus, placentarum accuratus perſcrutator, ſcribit ſe nunquam majorem quam pollicis, aut parum ultra eum, craſſitiam illius inveniffe. Notandum tamen, in latitudine & craſſitie aliquem Naturæ luſum obſervari, & utramque in omnibus ſecundinis æqualem non exiſtere, ſed modò majorem, modò minorem reperiri.

*Superficies.*

Cava parte, qua foetus reſpicit, ſuperficiem habet æqualem & concavam, inſtar ſcutellæ: at gibba ſui parte plurimis tuberibus inæqualis eſt, quibus utero interior, nulla alia intercedente ſubſtantia, præcipue fungoſis ejus partibus, tempore imprægnationis hic illic leviter protuberantibus, adhæret, eique reſeratis & apertis poris accumbit: atque etiam uterus tunc fungoſior, apertis ſuis poris & arteriolarum extremitatibus, illi placentæ immediate jungitur, ſine ullis tamen venarum arteriarumve hujus illiuſve mutuis inoſculationibus, ſeu anastoſibus (de quibus varii Anatomici multa præter veritatem, ſola conjectura ducti, ſcripſerunt) ſicque ſanguinem & lacteum ſuccum alimentarem (de quo paulo poſt) in hanc tranſfundit, qui poſt partum, avulſa & ſeparatâ jam placenta uterinâ, per multos dies ex iſdem aperturis adhuc deſluit.

*Umbilici ingreſſus.*

In medio, vel circa medium, interdum etiam nonnihil verſus unum alterumve latuſ (in eo enim ludit Natura) illi adnectitur inteſtinulum umbilicale, cum ſuis incluſis vaſis, quibus mediantibus neceſſaria communio intercedit inter placenta & foetus, de qua latius agemus cap. 32.

*Vaſa.*

Innumeris radicibus ei inferuntur vena & arteriæ duæ umbilicales (harum tamen ramificationes communiter copioſiores, & magis intortæ ac nodoſæ, ſed minores & rubicundiores, illius verò pauciores quidem, ſed multo majores ſeu craſſiores, & minus intortæ, ac obſcurioris coloris exiſtunt) quæ in ejus ſubſtantia plexu miro radicibus inter ſe miſcentur, & nonnullis anastoſibus coïre creduntur: major tamen radicum pars anastoſibus non jungitur (an ullibi talis conjunctio vaſorum in placenta fiat, ego meritò dubitandum cenſeo) ſed arteriæ ſanguinem à corde foetus delatum in ipſum placenta parenchyma effundunt, quem una cum bona parte ſanguinis, per uteri vaſcula affluentis, ab hepate uterino alteratum, & levi aliqua fer-

mentacea qualitate donatum, venæ hiantes radices aſſumunt, & ad foetus defe-runt.

Harum arteriolarum & venarum minimos ramulos, (ut jam dictum) non modò inter ſe, verum etiam cum vaſorum uteri extremitatibus per anastoſes jungi ſeu coïre, & hinc poſt partum, per eorum abruptionem ex decedente hepate uterino, magnam hæmorrhagiam fieri, ante hac, ex Galeni ſententia, communiter traditum fuit. Verum nos in brutis obſervamus, ex chorii placentulis vaſcula quædam nutrimentum elicientia in poros caruncularum ab utero protuberantium manifeſtè exporrigi, nullas verò ab utero ejuſve protuberantibus tuberibus deſcendere in placentalas chorii, nec inter harum uterique vaſa ullas anastoſes dari: quod ipſum, ſicut in brutis, ita in humano conceptu ſe eodem modo habere, & nulla ſanguifera vaſa ex utero in placenta excurrere, multo minus cum umbilicalibus per anastoſes coïre, verofiſimile eſt: cum ſanguis ſolummodo ex uterinarum arteriolarum finibus, tempore imprægnationis leviter hiantibus, roris in modum in placenta ſenſim deſcendat, in eaque ad foetus nutritionem præparetur, ut mox docebitur.

Videtur tamen Whartonus ſtatuerè, quod etiam ex ipſo utero, non minus quam ex foetus umbilico, ſanguifera vaſcula in placenta protendantur, ſed illa tamen cum his non miſceri. Nam dicit placenta in duas medietates, ab invicem facile ſeparabiles, diſterminari: quarum medietatum altera manifeſtè ad partes uteri, altera ad partes embryonis ſpectat. Atque vaſa uterina omnia, ad placenta diſtributa, in illa medietate, quæ uterum ſpectat, terminari, in eaque in capillamenta penitus abſumi, neque omnino in alteram medietatem tranſire. Et ſimiliter vaſa umbilicalia, quæ ad medietatem placenta chorio affixam progrediuntur, omnia in eadem medietate in capillamenta exhauriri, neque tranſire in oppoſitam medietatem utero contiguam. Verum clariffimus Vir hic mirabilem, & nunquam inveniendam aut demonſtrabilem placenta diſiſionem præſupponit, ex eaque male concludit, hinc inde accurrentia vaſcula ad ſolam duntaxat medietatem pervenire, in eaque terminari, cum tamen nulla omnino ſanguifera vaſa ex utero ad placenta deſcendant, & certiffimum ſit, vaſa umbilicalia eam totam perreptare: quæ autem in ipſo conceptus principio è caruncula chorio impoſita derivantur vaſcula, illa per totum chorium (etiam ante formatum foetus) diſtribuuntur, & cum placenta vix ullam communicationem, aut ſaltem valde exiguam, habere videntur: de quibus etiam magnopere dubitandum, anne

*An hic den-tur anasto-moſes inter vaſa uteri & placen-tæ.*

*Whartoni opinio.*

Cc

Cx

ex aliqua continuatione vasculorum uteri procedant. Magnum in hac obscuritate lumen conferunt accuratissimæ inspectiones placentæ clarissimi viri Nicolai Hobokeni, qui nullas unquam vasculorum sanguiferorum productiones ab utero in placentam observare potuit, cum tamen, supra omnes alios, quælibet placentæ totiusque secundinæ mysteria, summo cum labore & studio, inquisiverit, & patefecerit, atque etiam publico libro, *de secundina humana, nec non vitulina*, conscripto, elegantissimisque figuris, propria manu delineatis, exornato, omnium oculis & judiciis exposuerit.

An adsint  
vasa lym-  
phatica.

Idem Whartonus putat in hepate uterino seu placenta, venis & arteriis intermisceri vasa lymphatica, eaque simul cum iis foetus umbilicum ingredi: sed addit; per illa lacteum succum, ab utero versus placentam effusum, ad foetum deduci. Sed ante probatum nulla qualiacunque conspicua vasa ab utero ad foetum extendi: & si forte Whartonus albicantia aliqua vascula à placenta per umbilicale intestinulum ad foetum deduci viderit, verosimile est eum deceptum fuisse, & vasa lactea pro lymphaticis habuisse, cum figura & tenuitate vix differant: nisi dicamus, lymphatica vascula, non solum & semper lympham, sed variis in locis, oblato chylo, sæpe etiam chylum vehere (hoc in magno thoracico vase, quod *Ductum chyli ferum thoracicum* appellant, notissimum est) & sic illud ipsum quoque in placenta contingere posse. Interim Hobokenus, in his experimentis accuratissimus, nunquam ulla lymphatica vascula in hepate uterino invenire potuit; nec illa etiam mihi unquam occurrerunt, licet ea aliquoties cum attentione investigaverim.

An in placenta adsint  
nervi.

Nonnulli tradiderunt prædictis vasis minimos quoque nervulos interferi, per eosque succum aliquem nutritium pro foetu deferri. Sed illi velim mihi dicant, unde nervi illi deriventur, an à matre, an verò à foetu. Prius fieri non posse liquet ex præcedentibus, cum nulla vasa ex utero in placentam extendantur. Posterius etiam minime verum esse, ex eo patet, quod è mollißima cerebri foetus aut medullæ substantia nervos eo usque extendi posse, eosque ex ipsius foetus corpore per totius umbilici longitudinem ad placentam excurrere, omnem rationem & fidem superet. Adde, quod etiam in partu per nervorum istorum abruptionem foetui maximum periculum induceretur. Denique, quod nulli succi nutritii per nervos vehantur, vel vehi possint, illud luculenter doceamus, *lib. 8. cap. 1.*

In præcedentibus diximus uteri vasa & poros versus placentam leviter hiare, in eamque succos suos roris in modum depo-

nere. Hoc multi strenuè negant in homine, & interim concedunt uteri vascula in brutorum carunculas uterinas (de quibus paulo post dicemus) aperiri, in earumque exiles cavernulas succum alimentarium effundere, atque illum ex iis per ramulos vasorum umbilicalium, cotyledonibus chory adherentes, absumi, seu absorberi, ex iisque cotyledonibus ad foetum deferri, sicut id autopsia clarissimè docet. Verum longo sermone horum opinionem refutare, non videtur operæ pretium, cum autopsiæ, & sibi ipsis manifestè contradicant, eo quod placentis seu cotyledonibus brutorum alimentarium succum ab utero, seu ejus protuberantibus carunculis concedant, & illum tamen in mulierum placentis negent, cum nihilominus ejusdem partis in utrisque idem sit usus, eademque necessitas, & alimentarium succum non minus in mulierum quam brutorum placentis seu cotyledonibus inesse, pateat ex iis quæ paulo inferius dicentur.

Locus quo placenta utero adheret, certus assignari nequit, interdum enim in dextra, interdum in sinistra, interdum in anteriore, interdum in posteriore uteri fundi parte, ei jungitur & firmiter adheret; ac qua parte interius chorio adnectitur, eâ vasorum umbilicalium ingressum admittit. Postquam autem incrementum incipit, primis mensibus pertinaciter ei coheret, ut fructus immaturus arbori: exinde verò, quo major evaserit foetus, & maturior ac partui vicinior fuerit, eo facilius ab utero recedit, tandemque, seu fructus maturus, post expulsum foetum ab utero delabitur.

Adhæsi-  
onis  
locus.

Adhærere autem utero per *Acetabula*, magno veterum assensu traditur, de quibus tamen acetabulis haud parva lis est.

Acetabula.

Nonnulli putant illa esse vasorum uteri protuberantias, hæmorrhoidibus seu verrucis similes, quibus embryo nutritur. Sed horum opinionem irridet Erotianus, in suo *onomastico*.

Opinio.

Alii, cum Diocle, dicunt esse processus quosdam mamillares, ex uteri corpore in ejus cavitatem tempore imprægnationis, ad foetus nutritionem, protuberantes: quam sententiam explodit Soranus Ephesius.

2.

Alii, cum Praxagora, ex mente, ut putant, Hippocratis & Galeni, dicunt, acetabula esse ora vasorum sanguine tumentium, per internam uteri tunicam sparßorum: & sic etiam Jo. van Horne, in *microscop.* scribit esse tubulos arteriosos majores, in cavitatem uteri hiantes: quam opinionem Spigelius diu antè proposuerat, sed Nicolaus Massa rejecerat.

3.

Olim glandulosas carnes, folia cotyledonis herbæ referentes, inter chorium uterumque locatas, & vasorum orificiis adnatas esse,

4.



esse, easque pro cotyledonibus habendas tradebant.

5. Riolanus scribit placentam per innumeras fibrillas ligamentales parietibus uteri adhærere, iisque fibrillis cotyledonum nomen adscribit: &, *animadvers. in Laurent.* dicit, præter has, nullas alias apparentes cotyledones in mulieribus dari.

6. Fallopius, Arantius, multique alii oculatissimi Anatomici, acetabula seu cotyledones in utero humano inveniri negant, cum quibus etiam consentit Harveus, qui cotyledones in brutis describit, sed eosdem negat extare in mulieribus, in iisque nihil simile reperiri tradit. Contra vero Sylvius, *in depuls. calum. Vesalii*, cotyledones in muliere dari pertinaciter defendit, asseritque in parturiente, aut recens enixa eas aperte spectari. Cum eo consentiunt Carolus Gemma & Laurentius. At Galenus, *lib. de dissect. vulva*, & *lib. de sem.* cotyledones in mulieribus dari quidem asserit, sed illud non nisi aliorum Anatomicorum auctoritate confirmat: dicitque esse vasorum uteri apertiones, vel potius vasorum uteri & foetus coalitum per anastomosin: quam sententiam paulo ante refutavimus.

In tanta clarissimorum virorum dissensione quamvis difficile sit aliquid certi asserere, tamen veritas inquirenda est, cum in mulieribus cotyledones dari, minime dubitandum videatur, propterea quod Hippocrates (qui, teste Macrobio, tam fallere, quam falli inscius erat) 5. *aphorif.* 45. procul dubio, nec frustra, nec male, earum mentionem faciat. Ut autem ad huius rei veritatem perveniri possit, primò quid re vera sint cotyledones, seu acetabula, inquirendum erit; deinde an etiam reperiantur in muliere gravida.

Nominum derivatio.

Nominantur Græcis *κοτυλεδόνες* partes aliquæ in utero imprægnatæ apparentes, idque à duplici similitudine. Primò, à similitudine quam habent cum herba cotyledone, quam Latini *Umbilicum Veneris* appellant, cujus folia sunt crassiuscula, lævia, succi plena, rotunda, in circuitu aliquantum inæqualia, & in medio nonnihil cava. Secundo, à similitudine cavitatis ossis coxendicis, quæ *κοτύλη* dicitur, & caput ossis femoris amplectitur, seu continet: atque ab hac similitudine Latinis etiam appellantur *Acceptabula*, propterea quod in sinu suo partem aliquam accipiant; at frequentius *Acetabula*, quia similes sunt vasculis, seu parvis scutellis, in quibus acetum aliudve acidum jusculum ad intinctus in mensa apponi solet.

Quid sint cotyledones.

Ex hac nominum derivatione manifeste patet, Hippocratem aliosque veteres, per cotyledones non intellexisse aliquas vasorum protuberantias, aliasve carneas, vel mamillares uteri prominentias, ant liga-

mentales fibrillas, sed res aliquas cavitate præditas, aut ipsas earum cavitates, atque hinc graviter errasse omnes, qui tales protuberantias pro cotyledonibus habuerunt.

Jam quæritur, in quibus animalibus inveniantur? Dico, æque in mulieribus, atque in brutis viviparis reperiri (quamvis prius à nonnullis præstantissimis Anatomicis negetur) sed forma seu figura differre.

In quibus animalibus inveniantur.

Quippe in mulieribus, si rem cum attentione consideremus, non multæ, sed unica tantum (interdum in gemellis duæ) est cotyledon, scilicet tota placenta uterina, quæ versus uterum convexa, versus chorion verò concava, tota lævis, crassiuscula, succi plena, rotunda, & in ambitu inæqualis, exactissime refert folium bulbiferæ cotyledonis herbæ, vel etiam figuram parvæ scutellæ, in qua acetum aliudve acré condimentum ad intinctus in mensa apponitur. De hac mulieris cotyledone loquitur Hippocrates, *sect. 5. aphorif.* 45. *Qua mediocriter corpulenta elidunt fetus bimestres aut trimestres, sine occasione manifesta, in cotyledones mucoris sunt plena, nec præ pondere factum continere possunt, sed abrumpuntur.* Nam si pituitosi & mucosi humores copiosi decumbant ad placentam, illa ad gibbam sui partem, qua uteri interiori spongiositati adhæret, emollita & flaccida facta, necessario dissolvitur, una cum foetu, qui ea mediante utero adhæret. Loquitur autem Hippocrates de cotyledonibus in plurali numero, non quod velit unam mulierem, quæ unum foetum concepit, plures habere cotyledones seu placentas, sed quia sermonem instituit de pluribus mulieribus, quæ licet singulæ unam, simul tamen plures habent cotyledones. Hæc si pensius considerassent multi insignes Anatomici, atque novissime inter eos etiam oculatissimus Harveus, cotyledones in mulieribus tam imprudenter non negassent, neque Hippocraticam auctoritatem ea in parte tam facile rejecissent. Secundum primam igitur, jam dictam similitudinem cotyledones reperiuntur in mulieribus.

Cotyledones in mulieribus.

At secundum posteriorem similitudinem, illæ inveniuntur in plerisque brutis viviparis, in quibus plures nonnihil crassæ, subduræ, spongiosæ, ac prominentes carunculae, imprægnationis tempore ab utero versus internam capacitatem prognatæ, eique firmiter adhærentes, & ad modum favi, multis parvis, at satis manifestis, foraminulis, succum aliquem alimentarium continentibus, excavatæ conspiciuntur, ut in ovibus, vaccis, aliisque multis videre est. Et nonnulli has uteri carunculas, alii minima ista modò dicta foraminula, pro veris cotyledonibus habuerunt, cum tamen neque illæ, neque hæc, ullam cum cavitatis ossis coxendicis

Cotyledones in brutis.



coxendicis similitudinem habeant. Verum istæ uteri singulæ carunculæ, ab alia tenui, molli, subrubicunda caruncula chorio adhærente, & innumeris minimis vasculorum umbilicalium extremitatibus, exigua spongiosa foraminula protuberantium caruncularum uteri ingredientibus, donata, & versus uteri carunculam cava, circumdantur: quæ tenues carunculæ cavæ chorio adhærentes, & uterj crassas protuberantes carunculas amplexantes, sunt veræ cotyledones, & cavitatem habent instar cavitatis ossis coxendicis: & sicut hæc caput ossis femoris, ita illæ eodem modo protuberantes carunculas uteri comprehendunt: atque hinc etiam appellantur **Loculamenta**, id est, distincta loca, quibus singulis una uteri caruncula excipitur. Hæ autem chorij carunculæ in istus brutis, quibus insunt, placentæ vicem supplent, & ab uteri carunculis susceptos succos excipiunt, eosque per umbilicalia vascula versus foetum dimittunt. Quippe singulæ umbilicalium vasculorum iis inhærentes tenues extremitates, inferuntur singulis foraminulis caruncularum uteri, succo quodam alimentario mucaginoso repletis (ut favus melle repletur) quo multa bruta in utero nutrirî videntur: quæ vascula cum ex foraminulis caruncularum uteri extrahuntur, dictus mucosus succus radicibus eorum adhærere conspicitur, & instar filamentorum albicantium ex foraminibus protrahitur. Verosimile tamen est illum succum in mortuis animalibus frigore condensatum tantopere incrassari (sicut etiam succus lymphaticus in gelatinam frigore condensatur) sed in viventibus & calentibus non esse tam crassum & viscidum, at tenuem & fluidum, ut per angustissima vascula facilius in amnii capacitatem delabi, & ad foetum pervenire possit. Notandum autem, illas chorij carunculas in principio gestationis ab uteri carunculis difficulter separari: sed grandefcente embryone, quasi maturas, sensim dissolvi, ac tandem sponte decidere, ac in partu una cum foetu expelli, tunque etiam ab utero protuberantes carunculas paulatim rursus decrefcere & contrahi.

Ufus placenta.

Ufus hepatis uterini in muliere est, partim vasa lactea umbilicalia, lacteum aquosum succum è poris seu minimis uteri foraminulis elicientia, fulcire: partim sanguinem, cum ex matre per arterias uterinas, tum ex foetu per umbilicales affluentem, peculiari modo coquere ac præparare, ut nutritioni foetus melius inservire possit. Hoc ipsum etiam judicavit Harveus, dum inquit: *Placenta similiter succum alibilem à matre proveniente nutriendo foetui porro concoquit.* Verum qualem in conceptu humano mutationem aut præparationem sanguis in dicto hepate subeat, illud hæcenus non

fatis clare innotuit, nec à quopiam conscriptum est. Nobis omnino probabile videtur, hepar uterinum crassiores falsasque sanguinis particulas dissolvere, easque sulphureis permiscere, & cum iis excoquere, atque ita necessarium sanguineum fermentum pro sanguine foetus conficere (utpote sine quo sanguis in ejus corde non bene dilatari posset) & solum eo munere fungi, quo in homine nato simul funguntur jecur & lien. Nam sicut in homine nato per arteriam splenicam sanguis arteriosus in lienem impellitur, in eoque specifico modo excoctus, per ramum splenicum & portæ venam ad hepar dimittitur, ut una cum sanguine venoso è venis meseraicis veniente misceatur, & ibi rursus novo modo coquatur, ac fermentacei liquoris perfectionem nanciscatur, eaque adeptâ mox sanguinem venosum undequaque affluentem, ut & chylum per venam subclaviam illabentem, in vena cava sui admistione fermentacea qualitate perfundit, ita ut ad cor veniens protinus dilatari, & in sanguinem spirituosum converti possit. Sic etiam in foetu sanguis ex arteriis iliacis per umbilicales arterias propellitur in placentam, ut in ea una cum sanguine ab utero affluente misceatur, coquatur, & levem aliquam fermentaceam vim acquirat: atque sic per venam umbilicalem defertur ad hepar foetus (in eo tamen vix notabilem mutationem primis mensibus subit, ut docebitur cap. 32.) ac per illud in venam cavam defluens, illie admiscetur sanguini & chylo (genito ex amnii liquore per os foetus assumpto) desuper è vena cava affluenti, sicque tota illa mixtura, jam levi fermentacea qualitate perfusa ac præparata, gradatim ad cor transit, in eoque dilatatur & spirituosâ fit. Verosimile itaque est, sicut in foetu pulmo quiescit, ita etiam hepar & lienem eo officio nondum fungi, quo in homine nato funguntur; quod manifestum evadit, 1. Ex hepatis mole, pro corpore foetus nimis magna. 2. Ex colore lienis nimis splendido, ac plane rubicundo, qui alioqui in natis, cum munere suo fungitur, lividus existit.

Illa itaque viscera cum in foetu, propter tenellam debilemque constitutionem, sulphureas & falsas tartareasve sanguinis particulas nondum satis dissolvere, & ad fermentaceam qualitatem præparare possint, provida Natura in eorum duorum locum pro tempore substituit unum hepar uterinum, quod vices utriusque subit, ab eo tempore quo sanguis è foetu per arterias umbilicales incipit influere in hepar uterinum, usque ad partum. Nam sicut in foetu sanguis debuit esse minus acris, isque proinde non in utroque, sed tantum in uno cordis ventriculo excoqui (hoc docebitur lib. 2. cap.

cap. 10.) sic etiam ei admiscendus fermentaceus liquor debuit minus acris esse, isque proinde non in jecore & liene, ut in homine nato, sed in sola placenta uterina excoqui ac præparari, ut sic mitior foetus ingrederetur.

Quare placenta utero adhaereat.

Placenta autem quadruplici de causa utero affixa hæret: 1. Ut ea mediante foetus in utero firmiter contineretur, nec facile excideret. 2. Ut aquosus lacteus succus ab utero matris descendens, per propria lactea vascula umbilicalia placentam transeuntia, commode deferretur in umbilicale intestinum, ab eoque in amnii capacitatem. 3. Ut ipsamet placenta non nutriretur solo sanguine foetus, per umbilicales arterias affluente, qui in principio paucissimus est, verum etiam, & quidem præcipue, materno, atque hinc citius increfceret, & ad muneris sui functionem apta redderetur, cum in sanguine tartarearum salutarumve particularum aliqua dissolutio, per levem quandam fermentaceum liquorem, necessaria sit ab initio, ad partium solidarum incrementum citius promovendum, de quo vide, lib. 2. cap. 12. 4. Ut etiam sanguinis materni, è vasculis uteri ad placentam adfluentis, major copia contribueretur, isque copiosior sanguis cum paucio sanguine arterioso, ex iliis foetus per arterias umbilicales eò veniente, in placenta misceretur, ibique excoctus miti fermentacea qualitate donaretur, ut sic in cor decedens, protinus dilatari, ac in sanguinem spirituosum mutari possit. Sicut enim in homine nato, ut bona sanguinis confectio fiat, uni parti chyli, per ductum chyli ferum thoracicum adfluentis, viginti pluresque sanguinis venosi partes in vena cava admiscuntur, antequam simul ad cor veniant: ita etiam in foetu fieri debuit: qui proinde cum tantum sanguinis de se ipso non habeat, qui cum chylo conveniente portione misceatur, necessario ad illius defectus supplementum, potiri debuit sanguinis materni portione ad placentam delata, quæ una cum arterioso ipsius foetus sanguine, ab iliis eò confluyente, convenienter præparata, foetui continuè per venam umbilicalem communicatur.

Obiectio.

Fortè hic aliquis objiciet, sanguis ille ab utero fluet, vel in vasa umbilicalia, vel in hepatis uterini substantiam. Prius verum non esse ex eo patet, quod nulla sit vasorum uteri & umbilicalium communio per anastomoses. Si posterius fieret, tunc sanguis extravasatus corrumpere, hincque inflammationes, apostemata, aliaque mala generarentur: ergo, &c. Concesso priore, respondeo ad posterius, quod aliorum viscerum (in quorum numero etiam placenta habenda est) & partium multarum coctiones satis doceant, illud minimè verum esse: nam chylus in mammarum glandulas effu-

sus, in iis non corrumpitur, sed excoquitur in lac: sanguis venosus in jecoris substantiam effusus, sine ulla corruptione fermentaceam qualitatem induit, sicque deferretur ad venam cavam: item in renes effusus sanguis, feri bona parte exutus, absque corruptione ad cavam progreditur: sic etiam qui in placentam uterinam influit, in ea non corrumpitur, sed peculiari modo coquitur (ut ante dictum) & necessariam aliquam mutationem subit, qua adeptâ, ingreditur radices venæ umbilicalis.

Extra dubium igitur est, sanguinem ab utero fluere in hepar uterinum; idque docet hæmorrhagia quæ in puerperio ex vasorum uteri, avulsione hepatis uterini, apertis extremitatibus illis quæ antea in illud hiebant, per multos dies contingit.

Verum, præter sanguinem, etiam aquosus, subviscidus, lacteus quidam liquor ab utero profluit ad amnii capacitatem, qui nonnunquam in partu, & statim post partum copiosus effluere conspicitur. Sic refert Andreas Laurentius, anat. lib. 1. quest. 10. se vidisse puerperas quæ plurimam lactis copiam per uterum excreverunt. Refert quoque ex Bauhino, Schenckius, quod Capellus medicus, viderit mulierem, quæ dimidium cyathum lactis ab utero & vesica exoneravit. Atque hinc concludit Deusingius, lacteum succum ab utero in hepar uterinum (id est, in vasa lactea umbilicalia hepar illud transeuntia) profluere: quæ opinio etiam eo stabilitur, quod sæpe in puerperis circa finem fluxus, lochia albescant, & quasi sublaeteum colorem acquirant, qui mammarum suctione citò desinit. Sed an lacteus ille liquor ab utero profluat in ipsam placentæ substantiam, de eo nonnulli dubitant. Alii verò contrarium docere judicant, partim parenchymatis placentæ colorem rubicundum ac sanguineum, partim quod nunquam in tota placenta lacteum illum humorem, aut quid simile, ab ullis Anatomicis inventum fuisse legatur. In hac obscuritate aliquod lumen confert accuratior brutorum sectio, qua invenitur in eorum carunculis uterinis humorem aliquem albicantem & mucaginosum sibi sistere, in quem vasorum lacteorum umbilicalium, chorii placentalis inhærentium, radices inferuntur, eumque assumunt, & ad foetum deferunt. Sic etiam verosimile videtur, in muliere ad uterum per peculiarissima quædam vascula lactea similem liquorem lacteum profluere in proprias aliquas carunculas, ipsius uteri interioris porosæ substantiæ insculptas (nam sicut in brutis tubera quædam spongiosa ab utero excrescunt, succum illum excipientia, sic in mulieris utero etiam spongiosas aliquas cavernulas in eundem usum adesse, maximè verosimile est, quamvis non conspicue protuberent,

Locus succi lactei.

ut in brutis) iisque inferi placentam transeuntia vasa lactea umbilicalia, liquorem illum assummentia, & ad amnion deferentia. Nam si in brutorum carunculis uterinis sublaeteus liquor inveniatur (qui in demortuis animalibus à frigore crassus ac viscosus, atque hinc satis conspicuus evadit) procul dubio etiam in mulieris uteri porosa substantia aliquæ erunt uteri cavernulæ in quibus speciatim sublaeteus ille succus, ab utero profluens, excipitur & colligitur: & sicut ab uteri venis arteriisque versus placentam hiantibus sanguis effunditur in sanguineas hepatis uterini partes, ab iisque per venam umbilicalem adjecur foetus devehitur; ita etiam ab uteri cellulis lactiferis lacteum succum in vasa lactea umbilicalia deferri verosimile est. Quod autem hæ uterinæ lactei succi cavernulæ hætenus à nemine fuerint observatæ ac demonstratæ, hoc non probat eas ibi non esse, nam etiam ipsa vasa lymphatica & lactea mesenterica ac thoracica multis seculis incognita latuerunt, cum tamen eo tempore non minus extiterint, quam hoc. Sic etiamnum hodie urachi productio extra umbilicum, & vasa lactea versus mammas decurrentia non sunt conspicua, cum tamen certum sit per illam effluere foetus urinam in alantoidem, inter chorium & amnion sitam (de hac vide *sequens caput* 31.) per hanc verò lacteum chylum deferri ad mammas. Præterea, Anatomicis rara datur occasio in muliere prægnante uteri substantiam seu constitutionem, & placentam uterinam integram perscrutandi; eaque oblatâ forte hætenus de inquirendis his uterinis cellulis lacteis nemo cogitavit: atque etiam vasculorum lacteorum per placentam transitus, ob substantiæ mollitiem ilico distractâ placenta, propter effluentem cruorem, conspici nequivit. Adde, quod forte in mulieribus aliquamdiu mortuis non potuerint istæ uteri cellulæ lacteæ, & placentæ vascula lactifera commode inveniri, utpote quæ potius in repentino fato recenter extinctis quærendæ ac inveniendæ forent. Concludendum igitur, sicut in brutis lacteus maternus succus colligitur in cavernulis caruncularum uteri, ita etiam in mulieribus istum succum à certis quibusdam uteri cavernulis, interiori substantiæ (imprægnationis tempore certis locis porosæ) insculptis, excipi, quamvis non ita protuberent, oculisque manifestæ sint, ut in brutis. Si enim illæ uteri cellulæ lacteæ non adessent, cui usui inservirent vasa lactea, cum materna, usque ad uterum extensa; tum foetus umbilicalia? quæ tamen utraque dari & adesse, minime dubitandum censeo. Quippe uterina dari lactea vascula ab oculatioribus Anatomicis non ita pridem inventum est, ut latius patebit ex iis quæ hac de re dicentur *sequente*

*capite*. Sic etiam umbilicalia dari lactifera vasa, inde liquet, quod in intestinulo succus lacteus contineatur, ex eo ad amnii capacitatem defluens, quem cum per vasa sanguifera eo non deferri color albicans satis indicet, necessum est illum eo pervenire per vasa lactea à foetus umbilico versus uterum extensa. Quia autem hic succus tantam albedinem non habet, quantam habet lac mammarum, sed colorem magis aqueum, hinc Whartonius eum maluit appellare *gelatinam*, neque id male, quia nonnihil viscidus ac subclarus est, & refrigeratus concrescit instar gelatinæ, idque non tantum in amnio, verum etiam in intestinulo, quia in utroque invenitur.

Verum his jam dictis, & sequente capite dicendis obstabit Gualterus Needham, qui unice persuadere studet, hunc lacteum seu chylosum succum, non per vasa aliqua lactea, sed per arterias cum sanguine versus uterum deferri, atque ibi rursus purum è sanguine separatum, deponi in amnii capacitatem. Quasi verò arteriis aliquis intellectus, aut provida separatrix facultas insit, cujus ductu & instinctu noverunt istum succum lacteum, à corde una cum sanguine in ipsas impulsam, postea ingravidationis, & non alio tempore, purum ac integrum, nullo sanguine contaminatum, recta ad uterum (fortè etiam ad mammas) & non alio deferre, eumque ibi tanta cum prudentia è sanguine secernere, & ex arteriarum finibus versus amnii cavitatem eliminare, ut hic solus spissior crassiorque succus è finibus istis effluat, sanguis verò arteriosus, qui multo tenuior & magis fluxilis est, ex singulari quadam gratia, in suis vasis detineatur. O stupendum Naturæ miraculum! Atqui, dicet quis, in hepate bilis, in renibus serum, pus, tartarum; in alvi fluxibus spontaneis, aut arte factis, vitiosi humores è sanguine separantur, & foras eliminantur, quid mirum igitur, quod illud ipsum chylo contingat circa uterum? Respondedo, quod dictorum humorum à sanguine separationes in hepate, renibus, aliisve partibus, fiant vi viscerum eum in finem conditorum, quorum talis est propria totius substantiæ ac pororum constitutio, hincque resultans peculiaris fermentificatio, ut ea bene se habentia necessario istas separationes facere, & aliter agere nequeant: eodem modo sicut in duodeno intestino vi hepatis & pancreatis genitus peculiaris fermentaceus succus chylum albicantem à massa alimentaria in ventriculo cocta separat. Verum si chylus ex sanguine arterioso prope uterum separandus foret, illud fieri deberet sine ope alicujus visceris, aut sine peculiari aliquo succo fermentaceo, genito in aliquo viscere speciatim in hunc finem condito, nam tale viscus illic nusquam reperitur.

Adde,



TABULA.VII.

FIG.I.




FIG.IV.




FIG.II.




FIG.V.




FIG.III.





FIG.VII.





FIG.VI.



Adde, quod etiam talis qualiscunque separatio non posset efficere ut succus ille lacteus determinaretur ad certas tantum partes, scilicet uterum & mammæ, idque duntaxat certis temporibus, nempe in gravidationis & lactationis, non verò aliis: quippe unum & solum cor est propulsor generalis sanguinis arteriosi, isque continuus, qui sine ulla distinctione partium aut temporum, continuato ductu sanguinem cum ei immistis humoribus, quaquaversum ad omnes partes propellit, non alium ad has, quam ad illas,

sed qualitate eundem ad omnes. Denique & hoc considerandum, quod illi dicti chyloli seu lactei humores, ante illam è sanguine separationem, re vera, seu actu in arterioso sanguine extitisse, eique immisti fuisse debuerint, cum è contrario nullus unquam verus chylus, vel actu, vel potentia, contineatur in sanguine qui cor transit, in eoque dilatatus, & sic in arterias propulsus est, ut latius docemus lib. 2. cap. 12.

## T A B U L A VII. EXPLICATIO.

Hæc Tabula Secundinas cum vasis umbilicalibus, in foetu humano, differentesque ab adulto partes à Casp. Bauhino, Bartholino, & H. Fabr. ab Aquap. accurate delineatas demonstrat.

## FIGURA I.

- AAAA. Caro placente, aut Hepar uterinum.  
BB. Membrana Amnios.  
C. Vasa umbilicalia.  
D. Vena umbilicalis, & arterie duæ umbilicales.

## FIGURA II.

- AAA. Amnios membrana.  
B. Vena umbilicalis & arterie duæ umbilicales.  
CC. Membrana Chorion.  
DD. Venarum & arteriarum rami per chorion sparsi.  
E. Vasorum umbilici conjunctio, quatenus sua tunica intestinulum aliquod referente, obvolvuntur.

## FIGURA III.

Fœtus dissecti skeleton in plurimis ab adulto differens, ut ex textu liquet.

## FIGURA IV.

- Vasorum umbilicalium à placenta ad jecur infantis longitudinem, & ab umbilico umbilicalis venæ in jecur progressum, insuper iccur fœtus & vesiculam fellis exhibet.  
A. Placenta Chorion obducta.  
BBBB. Vasa umbilicalia.  
CC. Jecur in fœtis.  
DD. Duo rami majores venæ umbilicalis sese in minores fundentes.  
EE. Rami arteriarum umbilicalium.

- G. Vena Cava truncus, sursum ad gibbam jecoris adscendens.  
H. Vena Portæ.  
I. Vena umbilicalis in portam, & cavam pertusa.  
K. Vesicula fellis.  
LLL. Vasa chorii, nempe arteriarum & venarum umbilicalium rami per Chorion sparsi.

## FIGURA V.

- AAA. Exterius fœtus involucrem in utero, quod Chorion vocant.  
BBB. Caro exteriori involucre adnata, seu uteri placenta, vel hepar uterinum.  
CCC. Vasa distributa.

## FIGURA VI.

- AAAA. Uteri fundum in quatuor partes dissectum.  
B. Cervicis uteri pars.  
CC. Vena & arteria cervicem uteri amplexantes.  
D. Placenta uterina.  
EE. Exterius fœtus involucrem.

## FIGURA VII.

- AA. Renes succenturiati.  
BB. Renes veri variis glandulis adhuc distincti, sculptoris errore in situ male expressi.  
C. Arteria magna, ex qua rami ad capsulas & renes.  
D. Vena cava ex qua emulgentes, & capsularum venula.

CAPUT

## CAPUT XXXI.

De Membranis foetum involventibus, & humoribus  
in iis contentis.

Ost hepar uterinum proximè sequuntur duæ membranæ totum foetum involventes, & quasi ovo includentes, *χόριον* & *ἀμνιον*, quæ quia simul junctæ, una cum placenta, post editum infantem, utero excluduntur, Latinis **Secundæ**, & **Secundinæ**, Græcis *ὑνάρις*, & *ὑδῆρις*, tanquam res secundo loco prodeuntes, appellantur.

Secundina.

Chorium.

**Chorium** est membrana exterior totum foetum circumdans; eaque crassa, plurimis fibrillis, quasi filamentis, intertexta, interius lævis, exterius nonnihil inæqualis seu aspera, hic illic pinguedinis alicujus particeps, & qua parte uteri fundo, mediante placenta, adhæret, plurimis vasis, à prima caruncula *cap. 29.* descripta, item ab hepate uterino & umbilicalibus prædita: quorum illa ante formatum foetum copiosa in chorio conspiciuntur, ut liquet in abortibus *citato capite* descriptis: hæc verò postquam umbilicus è foetu ad justam longitudinem excrevit, eam ingrediuntur, & prioribus intermifcentur, sicque hac membranâ, tanquam stragulo firmata, progrediuntur ad hepar uterinum chorio annexum.

Membrana urinaria.

Nicolaus Hobokenus, præter chorium, describit adhuc aliam tenuem membranam, pellucidam, nullis visibilibus vasorum ramulis donatam, amnio valde similem, chorio adhærentem, ab eoque unguibus, absque cultelli ulla ope, facile separabilem, verum circa placenta tamen chorio adhærentis regionem firmiter annexam. Hanc tertiam chorio & amnio interjectam membranam primus invenit Needham, eamque convenienter appellavit, **Membranam urinariam**, quia hanc loco brutorum alantoidis esse, ac inter eam & chorium urinam foetus colligi, & usque ad partum servari, bona cum ratione statuit. Atque sic per hanc inventionem clarissimi Needham, ejusdemque per Hobokeni secundinarum inspectiones confirmationem, splendidissime tolluntur omnia illa dubia, quæ de mulierum alantoides, ac de loco quo foetus urina colligitur, & usque ad partum servatur (de quo paulo post aliquanto latius acturi sumus) hætenus Anatomicorum animos suspensos tenuerunt. Ego ipsemet, Needhamo duce, illam quæsi, & inveni, sicque etiam nebulas istas de alantoides mulierum (quæ etiam me antehac obfuscave-

rant) ex animo meo excussi. Hanc membranam cum etiam alii vidissent, putarunt esse internam chorii partem, atque hinc chorium ex gemina membrana constare dixerunt, quorum sententiæ multi Anatomici hætenus calculum adjecerunt.

**Amnios** est membrana interior, foetum proximè involvens & molliter excipiens (hinc etiam *Amiculum* & *Indusium* nominatur) atque chorio blanditer accumbens, non tamen, nisi una superiore exigua parte (ad carunculam, *cap. 29.* descriptam) ei annexa.

Amnios.

Hæc admodum tenuis & simplex est (duplex tamen censetur Aquapendenti, qui forte in membranam urinariam modò dictam incidens, putavit eam esse partem amnii) mollis, lævis, & pellucida, laxo intervallo à foetu distans, tenuissimis vix visibilibus vasis, à prænominata caruncula & umbilicalibus, donata. Hæc vasa, propter summam tenuitatem, rarè ac vix oculis conspiciuntur, atque propterea Hobokenus aliique nonnulli, eam vasis sanguineis prorsus carere judicarunt; sed malè, & contrapugnante ratione, cum vita, nutritio, & incrementum, illam vasis non omnino destitui doceant, cum etiam in oculi tunica aranea & vitrea nulla sint conspicua vascula, & tamen illæ non minus sanguine nutrantur, quam aliæ partes, eaque vascula satis conspicua sint in vitreo humori circumjecta tunica retina. Needham scribit hæc tenuissima amnii vascula manifeste videri in recenter expulso & adhuc calente amnio, sed in refrigerato evanescere. Whartonius insuper lymphatica vascula amnio tribuit, quæ tamen cum omni tempore visum penitus effugiant, neque in eo usum aliquem præstare posse videantur, an adsint merito dubitandum censeo.

Interdum in partu contingit abruptam hujus amnii partem foetus capiti adhærere, huncque cum ea, tanquam galea indutum, nasci, unde tales foetus *galeati* dicuntur. Ex hac galea solent obstetrices, felicia & infausta infanti nato, pro coloris diversitate, augurari, eamque diligenter asservare, tanquam prædam ipsis debitam, ut sit nugis & figmentis suis nati infantis parentes exterrere, & auro melius emungere, eamque galeam magno pretio ipsis vendere possint; anili multiloquio iis persuadentes, nisi infans galeam istam pulverisatam comederit, vel eandem toto vitæ tempore in pyxide secum

Gal. 4.

secum



secum portaverit, illum infelicem, vel etiam epilepticum futurum; & manes, lemures, ac spiritus infernales, aliaque dira spectra continuè visurum: si verò illam comederit, vel secum portaverit, tunc eum felicem futurum; & nescio quas non alias frivolas nugas credulis hominibus obtrudentes.

Membranarum status in gemellis.

Notandum autem, cum mulier gemellos concepit, illos plerumque uno chorio obvolvi, sed singulos distinctum amnion habere, & in singulis amniis distinctum humorem sublaeteum contineri: quemadmodum in castaneis & amygdalis frequenter fieri solet, in quibus licet duo nuclei uni cortici includantur, habent tamen singuli propriam tenuem tunicam, qua à se invicem separantur. Quodsi verò ab ictu, casu, contusione, aliave causa gemellorum amnia disrumpantur, vel ab ipso forte principio non satis bene distincta fuissent, tunc foetus, quibus partibus se mutuo contingunt, simul coalescunt, & sic monstrum gignitur. Multoties tamen etiam contingit, ut singuli foetus distinctis choriis includantur.

Causa hujus utriusque casus antehac omnino ignorata fuit, sed ex quo historia ovariorum & ovorum muliebrum cognita est, explicatu facilis evasit. Quippe sicut in gallinarum ovis sæpe videmus duos vitellos, cum suis distinctis albuminibus, tenuissima membrana separatis, uni duro cortici includi, atque ex talibus à gallo foecundatis ovis gallinae suppositis, raro duos distinctos & bene formatos, sed frequenter unum monstrosum pullum gigni & excludi, quatuor alas & pedes, ac duo capita habentem; propterea quod ruptis distinguendis membranis, duo pulli sibi invicem connati, atque ita penitus adnati sint, ut evaserint quasi in unum monstrosum. Ita etiam in mulierum ovis contingere potest, ut duo cortici uni duriori, chorium constituenti, simul includantur: atque tunc, si amnion membranae satis firmæ sint, gemelli à se mutuo separati manent, & umbilici ex singulis prodeuntes, simul in unam chorio adhærentem placentam inseruntur (singuli diversas & distinctas placentas habere non possunt, quia uni chorio tantum una potest adnasci placenta) & tandem ad maturitatem deducti, singulatim in partu prodeunt, & post ultimum expulsus subsequitur una secundina, quæ ambos in utero detinuit. At verò si amnion membranae valde debiles extiterint, & ruptæ fuerint, tunc sibi invicem immediate accumbentes gemelli, propter summam corporum mollietatem, connascuntur, atque sic juncti in partu quasi monstrosi, expelluntur. Verum si contigerit duo distincta matura ova, germine virili foecundata, ex mulieris ovariiis per tubas Fallopianas in uterum devoluta

esse, tunc singuli foetus distinctis membranis, scilicet choriis & amniis, includuntur, & singuli etiam necessario, pro suo cuiusque recipiendo umbilico, distinctam, proprio chorio adnatam, placentam habent (sicut in brutis plures foetus concipientibus, singuli embryones habent distinctam & peculiarem placentulam) atque singulatim in partu prodeunt, propriis secundinis singulos subsequenter (imò nonnunquam unum, die uno aut duobus post alterum expulsus vidimus) nisi fortè placentæ firmiter utero adhæserint, iisque tandem simul solutis, ambæ secundinae, post ambos ejectos foetus, simul subsequantur. Ut in gemellis, ita se res etiam habet in trimellis & quadrimellis, qui partus hic rari, at in Scotia frequentes sunt. Ex modò dictis jam etiam patet solutio dubii, quod de numero placentarum moveri solet in gemellis (de hoc dictum *præcedente capite*) & satis clarè innotescit, quando una, & quando necessario duæ vel plures sint placentæ: una scilicet cum gemelli uno chorio comprehenduntur; duæ verò cum singuli propriis choriis continentur: quæ duæ tamen multoties tam prope sibi invicem accumbunt, ut rudi intuitu una esse videatur. Nam singulorum gemellorum umbilicalia vasa, proprium chorium & amnion transeuntia, mox inferi debent placentæ in exteriori asperitate istius chorii enatæ, ut ea mediante utero adhæreat embryo; non verò inferi placentæ alterius foetus chorio adnatæ, utpote quam illa vasa immediatè non ingrediuntur, neque versus illam tendunt.

Hæ duæ membranæ, chorium & amnios, *origo harum membranarum.* vulgo creduntur esse productiones membranarum abdominis foetus. Quippe vasa umbilicalia ex abdomine foetus prodeuntia, duabus membranis seu involucris, intestinum constituentibus, includuntur: quarum interior, quæ tenuior, à peritonæo; exterior verò, quæ crassior, à membrana carnosâ produci putatur. His membranis ad finem umbilici dilatatis, & circum foetum expansis, ex interiore amnios, ex altera exteriori chorium efformari dicitur: hæcque est sententia Harvei, *lib. de generat. anim. exercit. 52. ad finem.* Illud ipsum etiam innuere videtur Hippocrates, *lib. de genitura*, dum inquit: *Ex umbilico protenso sunt membrana.* Qui ipse etiam vidit in genitura psaltriæ, membranam ab umbilico productam, quæ genituram continebat. Si fortè quis objiciat, has membranas generari priusquam partes foetus sunt delineatæ: Respondetur, primæ delineationis stamina, licet nobis ad oculum non appareant, tamen illic existere. Nam in ovo gallinae videmus punctulum rubicundum saliens (hoc creditur esse cor) quod non potest pulsare, nisi per venas aliquid recipiat,

D d

&amp; per

& per arterias expellat: attamen neque hæ, neque illæ conspicuæ sunt, quas nihilominus adesse ratio docet. Sic etiam in foetu humano, etsi prima delineamenta omnia conspici nequeant, tamen adsunt, & ex his produci potest umbilicus, cum membranis foetum involventibus. Si quis dixerit, in ovo gallinæ adsunt membranæ antequam umbilicus delineatus est, imò antequam illud ovum gallinæ supponitur. Respondetur, in ovo ante partium delineationem omnia necessaria adesse debuisse, cum in earum delineatione talia à matre tribui nequeant, qualia in viviparis paulatim unà cum delineatione conceduntur: nam hæc ad sui incrementum plus insuper alimenti ab utero matris accipiunt, à quo etiam hæ membranæ ex foeminino semine delineatæ incrementum capiunt.

Hæc Harveyi sententia etiam quondam mihi placuit. Verum ex quo vidi in abortibus *cap. 29.* descriptis, membranas istas jam factas & formatas, imò magnas & validas esse, ante inceptam foetus formationem, dum germen in crystallina bulla colligitur, nullis uspiam filamentis è bulla protensis: atque etiam in embryonis jam formati principio umbilici rudimentum vix conspicuum ex ventre pauxillum duntaxat expullulare, nec ulterius ulla minima vasculorum delineamenta ab eo per colliquamentum protensa versus membranas conspici, sed embryonem totum liberum, nec ulli parti alligatum colliquamento innatare, & utramque membranam satis firmam jam factam, ac toti colliquamento circumjectam, & vasis conspicuis donatam esse, ab illa opinione, non absque ratione, mihi recedendum fuit, cum ex aliquo invisibili filamento (de quo Harveyus loquitur) quod ne per somnium quidem aliquis ex bulla primo collecta sibi effingat, tam conspicuas, magnas, & validas membranas gigni posse, omnino impossibile sit.

Vetus etiam opinio.

Ab isto igitur principio dictæ membranæ non oriuntur, sed in ipsis mulierum ovariiis ex semine foeminino generantur, & ovis circumducuntur, ut supra, *cap. 24.* latius docuimus. Quibus ovis postea in uterum depositis, intumescunt exteriores eorum membranæ, & chorium crassius evadit (sicut corium aquæ impositum) multumque dilatatæ constituunt has duas membranas, chorium scilicet, & amnion. Et sicut ovi exterior cortex in gallina, aliave ave, antequam foras erumpat, pediculo seu ramulo quodam adhæret ovario; ita etiam in muliere hæ membranæ, mediante caruncula quadam chorio adhærent, non quidem ovario, sed ipsi utero (fortè ea parte qua ovum è tuba in uterum descendit) mox à principio (hoc liquet in abortibus *cap. 29.* descriptis) adhærent, totumque colliqua-

mentum, cum bulla crystallina in eo collecta, complectuntur, ut sic intra earum parietes, per clementem uterini caloris forum, architectonicus spiritus in bulla ista latens expediatur, & de potentia in actum suscitetur. Quantum ad exilia tenuissima sanguifera vascula, quæ ab ipso principio per chorium dispersa conspiciuntur, ut in citatis abortibus ea notavimus, illa observavi non produci à foetu tunc nondum formato, aut à crystallina bulla, tunc nullo adhuc sanguine sanguineisve vasculis prædita, sed ex illa particula carnea fungosa & plane rubicunda, quæ superiore parte chorio adhærebat, & extrinsecus læsa, ac quasi ab utero abrupta videbatur (ita ut ea mediante chorium utero adhærisse certum esset) quæ illa vascula ab uteri vasis per continuationem recipere, sicque ad chorium dimittere visa fuit.

Præter modò dictas membranas, in brutis viviparis invenitur tertia membrana saciformis, eaque tenuissima, & nullis visibilibus vasis donata. Hæc Galeno & priscis Medicis *ἀλαντοιδής*, appellatur, ab *ἀλός*, farciminis genere, quod figura cuidam intestino similis videatur, ex quo farcimina fieri consueverunt: nam ex Suida, *ἀλός* pro *ἐντέρω*, intestino, sumitur: hinc Latinis *Membrana farciminalis*, & quibusdam, *intestinalis*, dicitur: quamvis figuram farciminis aut intestini tam exacte in omnibus non habeat, sed in multis latam fasciam referat.

Est autem membrana tenuissima, lævis *quid sit.* cava, mollis, & tamen densa, nullis oculo conspicuis vasculis donata, nequaquam totum foetum obvolvens, ab uno ad alterum uteri cornu usque ad extremum protensa, partibus extremis uteri cornua subeuntibus gracilescens, donec in mucronem desinat.

Angusto principio, ubi urachus ei continuus in cavitatem ejus hiat, *Ortus.* assurgens, mox dilatatur.

Sita est inter chorium & amnion, à quibus *Situs.* facili negotio separari potest.

Ufus ejus est, urinam foetus per urachum *Ufus.* è vesica influentem colligere, & usque ad partus tempus servare: hinc Needham, ab hoc usu, illam in animalibus placentiferis appellat *Membranam urinariam*.

Amplitudo & figura pro diversitate animalium diversa est: in nonnullis enim intestini formam & latitudinem, in aliis latam fasciam refert, multoque amplior est, ut in vacca, & adhuc magis in equa, in qua ubique chorio subnectitur, & totum fere foetum cum amnio complectitur. Qualem autem figuram & magnitudinem habeat in suis, cuniculis, canibus, aliisque nonnullis animalibus, accurate ex autopsia describit Gualterus Needham, *lib. de format. fat.* *Magnitudo & figura.*

fæt: ejusdemque etiam totam historiam, & in brutis inveniendi modum, *ibidem* adjungit.

*An alantoidis  
detur in mu-  
liere.*

Verum cum in omnium animalium viviparorum fœtibus utero inhærentibus urina redundet, eaque è vesica excerni, & alitubi usque ad partum recondi debeat, quaeritur an hæc membrana alantoides in omnibus, ac præcipue an etiam in mulieribus adsit? Aquapendens dicit, homines, canes, feles, & id genus alia utrimque dentata animalia, hac destitui, iisque urinam fœtus in nullo peculiare vase colligi, sed ex uracho inter chorium & amnion effluere, atque ibi usque ad partum detineri. At hodierni oculatiores Anatomici illam nunc in multis talibus brutis invenerunt, in quibus antea fuit denegata. Verum inter hos tamen de mulieribus maximum adhuc dubium reliquum mansit. Harveus, qui illam in brutis prætervidit, eandem in mulieribus quoque existere negat. Contra verò Highmorus illam non tantum concedit in brutis, verum etiam in mulieribus eandem admittit, eundemque in his usum ei adscribit, quem in brutis habere vulgò traditur, scilicet urinam fœtus per urachum excipiendi, & ad partum usque retinendi: eamque, ex mente Vesalii, dicit facile inveniri, si in gravida muliere sectio incipiatur à placenta, alioqui propter summam tenuitatem abrumpi. Verum hic bene notat Needham, *citato lib. cap. 7.* Vesalium eo Tempore, quo id scribebat, nullam mulierem gravidam secasse (ut eo loco ipsemet fatetur) atque hinc ex canino fœtu de homine iudicium fecisse, & fœtum humanum secundinis catuli indutum depinxisse: postea verò, ubi mulierem secaverat, opinionem mutasse, & tantum duas membranas in muliere numerasse, scilicet amnion & alantoidem: chorium verò non peculiaris membrana, sed totius conceptus nomine habuisse. Quidquid sit, an alantoides etiam in mulieribus inveniatur, an verò alia quædam pars in iis adsit quæ urinam fœtus colligit, hæcenus gravissime dubitatum fuit apud Anatomicos. In hac magna obscuritate magnum lumen contulit oculatissimus Needham, qui, *lib. & cap. citat.* describit, non quidem farciminales aliquem, qualis est alantoides in multis brutis, sed longe alium saccum, quo urina fœtus verè colligitur, & usque ad partum continetur. *Secundina*, inquit, *cum ab obstetrice recepta fuerint, ad situm naturalem, quantum fieri potest, reducuntur. Tunc prehensio funiculo, eundem ad amnion usque proseguere. Hac funiculo, paulo infra placentam, affigitur, cætera libera pendet. Admodum recentem si obtinueris, invenies ipsius venulas; aliter, effuso sanguine & refrigeratâ membranâ evanescent. Hac circa funiculum relictâ, ad proximam membranam perge: quam si vel*

externe circa placentam vulneraveris, vel ad extremas fimbrias digitis laceraveris, videbis in duas facile dividi; quarum exterior porosa est, & spongiosa, venulisque scatet: interior lubrica admodum est, summeque pellucida, venis arteriisque vacua. Illam ego pro chorio habeo, hanc pro tunica urinaria: prioris duplicatura dici non potest, ob dissimilitudinem substantiæ, sed sive locum ipsius, sive figuram aut substantiam spectemus, prorsus eadem est cum membrana urinaria placentiferorum, & equi. Forma verò minime alantoidis est, neque membrana illius figura in homine datur. Ex quibus verbis liquet, talem in mulieribus non dari alantoidem, qualis datur in brutis: sed insuper etiam patet, quod Needham interiorem tenuem membranam, chorio proxime accumbentem, bene & verè statuerit esse urinariam, mulieribus loco alantoidis concessam, ac inter eam & chorium urinam per urachum è vesica fœtus defluere, atque ad partum usque servari. Hoc Gualteri Needham inventum in plurimis secundinis quoque reperit, confirmavit, & descripsit (ut etiam supra monitum, in *historia chorii*) Nicolaus Hobokenus; *lib. de secund. human.*

Intra amnion, præter embryonem, copiosus quidam liquor continetur sublaeteus, lacti valde aquoso similis, nonnihil mucosus seu oleosus, quem Harveus *colliquamentum* appellat, cui fœtus innatat, & qui illi jam nato adhæret toto corpore, atque ab obstetrice aquâ tepidâ, vel vino & butyro abstergetur.

*Liquor intra amnion.*

Verum ego hic necessario distinguendum arbitror, inter istum liquorem cui primo delineatus embryo innatat, & illum cui postmodum innatat. Nam primus ille est residuum feminale virilis ac fœminini seminis, (ut capitibus præcedentibus dictum) & verè ac bene colliquamentum appellatur. Posterior verò, qui absumpto fere priore, & umbilico jam ad hepar uterinum deducto, per vasa lactea umbilicalia adfluit, est succus merè lacteus, sed aquosus, colliquamenti nomine minime nominandus.

*Sordes fœtini adhærentes.*

Hic obiter notandus error Fabricii, aliorumque quorundam, qui putarunt suboleosam istam immunditiem corpori fœtus jam expulsi adhærentem, esse excrementum tertiæ coctionis, in toto habitu factæ. Nec non error Jo. Claudii de la Courvee, qui, *lib. de nutrit. fæt.* scribit illam nihil aliud esse, quam excrementum à cerebro per os & nares delapsum. Verum sola ignorantia naturæ & usus sublaetei liquoris in amnio contenti, hos errores produxit, de quo usu jam dicturi sumus.

De amnii liquore sunt duæ diversæ Medicorum opiniones, quarum una putat illum esse urinam, altera sudorem fœtus. Verum neutra rem acu tetigit.

*Amnii liquor qualis sit.*

D d 2

Urinam

An sit urina.

Urinam non esse ex eo apparet, quod hic liquor copiosus reperiatur foetu jam recens formato, cum tam pusillus embryo urinam nondum excernat: imò quod in amnio reperiatur modò ante formatum foetum, cum tamen ex bulla crySTALLINA nihil urinæ emanare possit. Adde, quod color subalbicans & substantiæ unctuositas nullam urinæ similitudinem exhibeant.

An sit sudor.

Sudorem non esse inde liquet, quod ante formatum & perfectum foetum, vel etiam à principio formati foetus, tam unctuosus, crassus, & copiosus sudor ab exili embryone emanare nequeat, qui sua quantitate corpusculum embryonis decuplo & amplius superet.

An sit excrementum.

Præterea, si liquor hic foret excrementum, sive urina, sive sudor, sive aliud quodcunque, quo magis increveret foetus eo magis augetur. Contrarium tamen docet ocularis inspectio: nam in ovibus manifestissime cum incremento foetus paulatim ita imminuitur, ut paulo ante partum vix quidquam ejus supersit, qui tamen copiosus adfuit in principio. Denique, sudor & urina sunt excrementa acrimonia habentia, quibus si tenellus, ac tenuissima & mollissima cute præditus embryo septem aut novem mensibus innataret, certe ab acrimonia illa magnam injuriam pateretur; quemadmodum infantium jam natorum cutem (quæ multo durior & firmiter est cute foetus utero inclusi) ab urinæ acrimonia brevi tempore multum lædi atque erodi videmus, si linteis urina madidis paulo diutius involuti maneant.

An sit fuligo.

Riolanus, *anthropog. lib. 6. cap. 7.* hunc liquorem etiam pro sudore foetus agnoscit: sed *cap. 8.* dicit eum esse fuliginem sanguinis arteriosi è corde expulsum, sicque tandem in aquam illam conversum, qua foetus circumfusus est. Hoc si verum foret, deberet ille liquor in principio, cum adhuc vel nullus (ut in bulla ante foetus formationem) vel paucissimus est sanguis, etiam nullus aut paucissimus esse, atque incremente foetu magis magisque augeri; cum è contra in principio sit copiosus, & exinde paulatim imminuatur; quam paucus in ovibus circa partum inveniatur, modò dictum.

Est humor alimentarius.

Non est igitur hic amnio contentus liquor excrementum aliquod, sed est humor alimentarius, & materia nutrens, è qua in principio omnium & singularum embryonis partium nutrimentum desumitur, atque hinc earum incrementum succedit. Quippe proximum est alimentum quo foetus primo nutritur: in eo enim natare deprehenditur, antequam hepar uterinum manifeste apparet, è quo tandem incremente vasa umbilicalia sanguifera manifeste sanguinem eliciunt, quo solo si foetus nu-

triretur, in principio aliquamdiu careret omni alimento, neque ad primum partium incrementum alimentaris aliqua materia suppeditaretur. Hinc autem esse nutritium humorem, foetui per os assumendum, ex eo liquet, quod colore, sapore, & consistentia parum, aut fere nihil differat ab eo liquore qui in foetus ventriculo reperi-

tur. In prima foetus formatione hic liquor nihil aliud est quam semen foemininum (instar albuminis) ovo inclusum, cum residuo seminis virilis colliquato mixtum. Postea verò, ubi umbilicalia vasa ad justam longitudinem excreverunt, & hepar uterinum ingressa sunt, tunc est succus sublaeteus, ex uteri lactiferis cavernulis (de quibus dictum *præcedente capite*) per vasa lactea umbilicalia eo delatus, cujus subalbus color, sapor subdulcis, & substantiæ similitudo, parum differunt à chyloso liquore, lymphæ nonnihil diluto, qui in ductu chyliifero thoracico, ejusdemque sacco seu receptaculo invenitur: unde omnino verosimile est, eum esse puriorem chylum, à lymphæ admixtione nonnihil aquosum, è matre ad amnii capacitatem delatum, per vias *capite præcedente* commemoratas, & jam rursus commemorandas: imò eum esse grati saporis, instar lactis aquosi; quod non tantum ex gustus nostri judicio, verum eo etiam probat Harveus, quod omnia fere bruta animalia vivipara eum statim à partu absorbeant & devorent, jamque natos foetus lambendo abstergant, cum tamen foetus excrementa ne attingant quidem.

Whartonius scribit illum esse liquorem è nervis intra amnion effusum, forte quod colore albo deceptus, putaverit vasa lactea esse nervos.

Needham putat illum esse lacteum liquorem per arterias eo delatum, nervoso liquore nonnihil dilutum, cujus opinionis hypothesin refutamus *lib. 2. cap. 12.* Etiam Nicolaus Hobokenus statuit hunc liquorem per arterias deferri, sed nonnihil alio modo: nam etsi alibi passim, *toto libro de secundina humana*, scribat se nulla sanguifera vascula in amnio observare potuisse, tamen *lib. de secund. vitul.* scribit arterias amnii tunicam sufficienter occupare, iisque eo loco magnum commercium esse cum plurimis minimis glandulis, non solum funiculi exteriora, sed & amnii interiora magno numero obsidentibus, quatenus istarum glandularum intercessione, arteriosus eo allatus sanguis ita afficitur & apparatur, ut dictus liquor ex eo versus amnii cavitatem amandetur. Sed non addit, qualem affectionem ibi subeat, nec ullo modo probat illud commercium, quod ex conjectura præsupponit. Præterea, in multis partibus, per intercessionem glandularum, ex arterioso sanguine

Qualis sit liquor.

An ex nervis procedat.

An per arterias eo feratur.

guine separatur lymphæ, ut & in hepate bilis, in liene succus splenicus, &c. sed nunquam auditum est aliquem succum lacteum, qui isti sanguini non inest (hoc latius docemus supra, cap. 30. & infra, lib. 2. cap. 12.) ex eo separari, aut ipsum sanguinem arteriosum in lacteum succum mutari posse, ut liquet ex iis quæ hac de re scribimus lib. 2. cap. 2.

*Difficultas  
de vasculis  
lacteis uterini  
& umbilicali-  
bus.*

Una hic occurrit difficultas, scilicet quod lactea vascula, cum à matre ad uterum, tum à foetu ad uterum tendentia, nusquam visui occurrant. Verum hac de re nemo mirabitur, qui viderit quam facile vasa quælibet chylifera, imò ipse etiam ductus chyliferus thoracicus, qui majusculus est, vacua delitescant, & quantopere etiam vasa lymphatica inanita dispareant, ita ut nec videri, nec inveniri amplius possint: qui etiam animadverterit quam invisibiles sint illi ductus per quos interdum in ascite serofus abdominis humor, & in fluore muliebri albo vitiosorum humorum ingens saburra, ab hepate, mesenterio, aliisque abdominis visceribus, per uterum evacuat. Sic etiam hi lactei ductus uterini & umbilicales, procul dubio, admodum exiles, & in mulieribus mortuis inaniti sunt, atque hinc tantopere hæcenus delituerunt, ut oculos Anatomicorum subterfugerint: quorum tamen non ita pridem indicia aliqua observata fuisse videntur, quæ nonnulli, de lacteis non cogitantes, vasa lymphatica, alii nervulos esse putarunt. Charletonus, *æconom. animal.* refert, Jo. van Horne, celebrem Anatomicum Leydensensem, in epistola quadam ad Thomam Bartholinum missa, scripsisse, quod observaverit duos lacteos ramos versus divaricationem magnæ arteriæ descendentes, prope crurales, usque ad uteri sedem extensos. Hac de re etiam in cuniculis aliquid notavit Antonius Everardi, lib. de ortu animal. quippe scribit se in cuniculo gravido observasse ductus aliquos chyliferos, ex trunco descendente oriundos, una cum vasis spermaticis excurrere ad partes propagationi inservientes. Clariorem horum vasculorum autopsiam describit Deusingius, de hum. corp. fabric. part. 7. cap. 3. Ad uterum quoque vasa lactea, inquit, pertingere, alimentarium succum pro foetu advenientia, cum alibi solidissimis argumentis ostendimus; tum autopsia innumerabiles ramulos lacteos per ligamenta uteri lata, ad ipsa cornua totumque uteri corpus decurrentia, in catella foetu observavimus. Quin & cum vasis umbilicalibus lacteum ramulum ingredi per umbilicum catellorum in utero contentorum, notavimus anno 1655, spectantibus id clarissimis D. D. Eissonio, Widmaro, Andrea, aliisque. Sicut in brutis, ita etiam in mulieribus se hanc rem habere, minime dubitandum est. Hos autem lacteos ad uterum ductus etfi

nos hæcenus non viderimus, sufficit tamen ad veritatis demonstrationem, illos ab aliis oculationibus Anatomicis fuisse inventos: atque etiam quod certissimis argumentis doceri possit, illos, etsi rarò conspicuos, necessario adesse; ut ex his tribus imprimis liquet: 1. Quod liquorum sacci ductusque chyliferi thoracici, & amnii, magna sit similitudo in colore, sapore, & substantia. 2. Quod nonnunquam in puerperis chylosus & lacteus quidam liquor ab utero copiosus profluat, ut observatum ac visum fuit ab Andrea Laurentio, lib. 2. anat. quest. 10. Zacuto Lusitano, lib. 2. prax. admir. observ. 143. aliisque, ut dictum præcedente capite. 3. Quod assumpta liquida colorata citissime ad uterum perveniant, nec per alia, quam occulta & à cæteris devia, lactea vasa tam citò eo penetrare possint. Ita scribit Jo. Heurnius, lib. 2. method. ad prax. cap. 15. croco cum jusculo dato, puerperam edidisse foetum croceo colore infectum. Etiam Henricus ab Heers, observat. spad. 14. refert mulierem quandam assumpto croco intra horæ semiquadrantem enixam esse foetum croceo colore tinctum. Certe hic color tam citò ad uterum & foetum pervenire non posset, nisi una cum chylo per vasa quædam lactea, à cæteris devia, eò deferretur: si enim crocus in corde prius excoqui, ac tunc cum sanguine eo ferri deberet, colorem suum perderet: vel concesso, eum adhuc retineri, tamen aliquot horarum spatium opus haberet, antequam ad uterum perveniret. Hac de re nonnulla alia videantur præcedente cap. 18. ubi per egregium experimentum, ab Herdotio in cane gravida tentatum, hic devius lactei succi ad uterum transitus clarissime patet; ibidemque etiam aliis observationibus illustratur.

Hic notandus venit error Courveï, qui scribit à principio humorem copiosum contineri seu colligi inter chorium & amnion, atque eum per amnii tunicam seu membranam transudantem & filtratum, ad interioram amnii capacitatem penetrare, huncque internum ab altero non differre quam tenuitate, per istam filtrationem inducta. Cum tamen qui extra amnion reperitur humor, non simpliciter in chorio, sed inter chorium & membranam urinariam, supra descriptam, contineatur ac concludatur; isque etiam in principio nullus illic filtrandus adfit (videantur super hac re abortus cap. 29. descripti) cum tamen ab ipso principio humor in amnio quantitate mediocri redundet: cumque is interior etiam non tenuior, sed multo crassior ac viscosior sit altero inter chorium & urinariam membranam postmodum succrescente. Præterea, hujus amnii lacteus liquor coctione acquirit gelatinæ consistentiam; alter verò extra amnion

*Error Courveï.*

fitus nulla coctione incrassescit. Prius constat experimento Rolfincii, *lib. 6. dissert. anat. cap. 32.* sic descripto: *Humores, inquit, quibus fœtus innatat, leni calore coctus, absumptis tenuioribus atomis, in fundo reliquum quod erat, glutini instar erat viscidum. Sapore humores ut subdulci linguam perfundunt, ita & hoc gluten gratum gustui, nec lixiviosum aut salsum occurrit.* Non solum autem coctione incrassescit & glutinosam viscositatem acquirit, verum etiam modicam crassitiem & viscositatem à solo frigore consequitur, quo vidi hunc succum in intestinulo umbilicali perfectam gelatinæ, & in amnio fere albuminis ovi consistentiam conquirere.

Via lactei  
succ.

Verum etsi hunc lacteum succum per vasa quædam lactea à matre ad uterum, ab eoque per placentæ lactea vascula intra amnii capacitatem ferri, minime dubitandum videatur, tamen ex qua parte matris, & unde procedant hæc lactea vasa versus uterum, à nemine hætenus, quod scio, vere compertum est. Nonnulli, ut paulo ante dictum, ex ductu chyliifero thoracico, alii ex sacco chyliifero, alii ex pancreate illa eò protendi, per conjecturas satis incertas arbitrantur. Si horum facilis & clara posset exhiberi demonstratio, sublatum foret omne dubium. Hanc obscuritatis nebulam satis animosè discutere nititur Entius, *apolog. digress. 5.* quo loco scribit, à nullis internis lacteis vasis hunc amnii liquorem derivari, sed illum à mammis mulierum ad uterum profluere, fœtumque non minus in utero, quam extra uterum lacte matris nutriri: atque hac de causa putat in brutis animantibus mammas utero vicinas adstare, ut scilicet ab iis lac facilius ad uterum fluere. De via non est admodum sollicitus, nam scribit lac à mammis descendere per venas mammarias, ex iisque in epigastricas, anastomosi illis junctas, transfundi, ac per has ad uterum profluere. Ut autem circulationi non videatur omnino contrariari, dicit, *feri non incommode posse, ut per aliquas venas contrarius usitata circulationis fluxus instituat, si novum trahens accesserit.* Hoc novum trahens paulo ante dixerat esse cor fœtus. Denique addit, hac de causa lac in mammis tam diu ante partum generari, scilicet cum fœtus in utero moveri incipit: quod si lac ad fœtum non deflueret, necessario magnum incommodum mulieri pareret, & in mammis trimestri aut quadrimestri spatio detentum corrumperetur. Ultimo subjungit auctoritatem Hippocratis, qui *5. aphorif. 37.* dicit: *Si mulieri uterum gerenti mamma repente gracilescant, abortit.* Quia, inquit Entius, cum lac deficit in mammis, nihil alimenti fœtui in utero hærenti à mammis suppeditari potest, qui tunc hac de causa moritur & per abortum ejicitur.

An lac à  
mammis ad  
uterum  
fluat.

Verum etsi hæc nonnihil speciose ab Entio proponantur, multa tamen sunt, quæ doctissimi Viri sententiam penitus evertunt.

I. Quod lacteus ille liquor intra amnion diu copiosus redundet, antequam quidquam lactis in mammis gignatur, aut contineatur.

II. Quod impossibile sit per easdem venas mammarias & epigastricas sanguinem sursum, & lacteum succum eodem tempore deorsum ferri.

III. Quod inter venas mammarias & epigastricas nullæ dentur tales anastomoses, quales ille præsupponit, ut supra latius dictum, *cap. 5.*

IV. Quod lacteus mammarum liquor, per illas vias sanguiferas transiens, sanguinis admistione colorem album exueret, seu perderet, atque sic non albicans, sed rubicundus in amnio reperiretur, quod non fit.

V. Quod pusilli fœtus debile cor lacteum succum à mammis maternis attrahere minime possit: quod insuper tam longinqua tractio in corpore humano nulla fiat, imò etiam de propinqua satis magnum dubium sit.

VI. Quod lac à dimidio ingravidationis usque ad partum non subsistat & permaneat in mammis, sed venas mammarias ingressum, identidem una cum earum sanguine, per illas venas, ordine circulationis, deferatur ad venam cavam, sicut chylus per subclaviam eodem pervenit (hac de re plura dicuntur *lib. 2. cap. 2.*) atque hinc in mammis non corrumpatur, aut incommodum aliquod mulieri pariat.

VII. Quod Hippocrates, *citato aphorismo*, istam mammarum gracilescantiam non statuat esse causam, sed signum abortus. Hæc enim indicat, in muliere, vel deficere chylum, vel illum totum ad ejus cor ferri, nihil verò ad uterum vel mammas fluere. Hinc concludit Hippocrates. Si antea copiosus ad mammas fluere solitus chylus (loquitur de mammis post medium ingravidationis lacte jam tumidis) subito deficiat, ut ex gracilescantia mammarum patet; multo magis deficiet ille qui ad uterum parcius, pro tenelli fœtus nutritione, per multo angustiora vascula fluit, atque sic necessario tenellus fœtus, defectu alimenti, citò morietur, & abortu ejicitur.

Ex quibus omnibus satis liquet, undecunque lacteus liquor ad uterum venit, illum saltem non venire à mammis, & magis verosimilem esse eorum opinionem, qui illum à chyli sacco, ductu thoracico, aliisve internis chyliiferis vasis promanare putant, licet hætenus satis obscura fuerit viarum demonstratio.

Veslin.



Veslingii  
opinio de  
usu huius  
succ.

Veslingius nutritionem fœtus per os non animadvertens aut nesciens, huic amnii lacteo liquori adscribit usum valde exigui momenti: quippe dicit illum solummodo tenella innatantis sibi embryi vasa in valido genetricis motu tueri, ac propinquo jam partu, ruptis uteri membranarum, proluvie maternos locos emollire & laxare, ad faciliorem fœtus exitum: præterea putat illum esse aquosioris seminis muliebris partem ut ex eo latius retulimus *precedente cap. 28.*

Humor inter  
chorion  
& membra-  
nam urinaria-  
m.

Amnios, membrana urinaria, & chorion, unâ parvâ particulâ, scilicet ad carunculam in abortibus *cap. 29.* descriptam, sibi invicem arctè cohærent (quo loco vasa umbilicalia versus hepar uterinum transmittunt) at reliquo spatio sibi invicem in principio conceptus duntaxat incumbunt laxo modo, cumque tandem vasa umbilicalia membranas istas transierunt, tunc paulatim ab urinæ fœtus per urachum influxu incipit à chorio paulatim recedere membrana urinaria (quæ ad hoc usque tempus chorii pars seu interior pellicula visa fuerat) inter eamque & chorion serofus urinaceus humor indies, cum incremento fœtus, magis magisque augeri & coacervari, ita ut tandem circa partum valde copiosus illic reperitur.

Riolani o-  
pinio.

Hunc urinaceum liquorem adesse negat Riolanus, dicitque extra amnion nullum humorem inveniri. Sic videtur eundem quoque nunquam cum attentione vidisse Veslingius, nam dicit, inter membranas fœtus nullum humorem colligi posse, ob arctam earum connexionem. Verum earum non arctam connexionem, sed laxam duntaxat conjunctionem seu impositionem esse, docet autopsia. Totus hic error ex eo processisse videtur, quod urinaceam membranam, humorem urinaceum continentem, inter chorion & amnion latere, ac paulatim ab urinæ fœtus influxu à chorio recedere, & extendi, ignoratum fuerit: unde multis dubium incidit, an eo loci aliquis humor contineri posset: quæ dubitationis nebula per nuperam, à Needham primo detectam urinariam membranam, nunc dissipata est.

Dictum urinaceum, inter chorion & urinaceam membranam contentum, humorem, in brutis (in quibus in alantoide colligitur) manifeste ab amnii liquore separatum, multoties conspeximus, ejusdemque separationis in canibus facilis est demonstratio: quippe si catellum membranarum adhuc involutum capite apprehendas, atque sic adversa luce inspicias, clarissime videbis hos humores, mediantibus alantoidis & amnii membranarum, à se invicem separatos esse (quo experimento etiam utitur Aquapendens, *part. 1. de formato fœtu, cap. 8.*)

& serofum ac turbulentum alantoïdi includi, sicque inter chorion & amnion subsistere: alterum verò sublaeteum intra amnion contineri. Tunc si chorion cum alantoïde aperueris, mox exterior ille urinaceus effluit, alter verò sublaeteus in amnio remanet. Atque sic etiam in humano conceptu serofum urinaceum humorem inter chorion & urinaceam membranam (quæ est loco alantoidis brutorum) colligi ac detineri, alterum verò sublaeteum intra amnion concludi certissimum est: idque nuper clarissime demonstravimus in muliere quadam fere ad extremum gravida, quam, catarrho suffocativo repente interemptam, secuiamus, & aqueum urinaceum humorem inter chorion & tenuissimam urinaceam membranam (quam tunc temporis alantoïdem esse putavimus) inclusum, valde copiosum; alterum verò sublaeteum, intra amnion subsistentem, multo paucioris invenimus. Hoc primum fuit subiectum in quo me aliquam alantoidis umbram videre putabam, sed postea, per præeuntem demonstrationem oculatissimi Needham, observavi in mulieribus alantoidem brutorum alantoidi similem, non dari, sed ejus munere perfungi membranam urinaceam modo dictam.

Qualis autem sit serofus ille humor inter chorion & urinaceam membranam contentus, usque ad nostra tempora maxime dubitarunt, cum Medici, tum Anatomici, hæcque hæsitatio ante hac duas diversas sententias peperit. *Secundum primam*, plurimi existimarunt, illum non esse aliquod excrementum, sed humorem benignum, instar lactis ebutyrati, minus nutrientem quam alter in amnio contentus, ejusque puriorem partem ad fœtus nutritionem inservire, & ad eum deferri per fibrillas vasorum umbilicalium, ex Harvei observatione, eo usque extensorum: reliquam verò inutiliorem partem in tutelam fœtus usque ad partum reservari, ut mollitie sua fœtum ab injuriis externis defendat, & in partu obscenas partes humectet ac lubricas faciat. *Secundum alteram verè sententiam*, putarunt alii hunc humorem esse urinam fœtus, per urachum paulatim in chorion & urinaceam membranam effusam ac collectam, ibi ad partum usque asservandam, ut tunc humiditate sua locos muliebres humectare, emollire, atque lubricos facere, & ad faciliorem fœtus exitum præparare possit.

Qualis sit  
serofus hu-  
mor.

Horum posteriorum sententiæ calculum nostrum meritò adjicimus: quia omnino necesse est, ut formatis omnibus fœtus partibus renes officio suo fungantur, & copiosum redundans serum è sanguine separent: nam fœtus nutrimenta, sanguis scilicet & lacteus succus, sunt valde serosa, ut sic magis liquida & fluida existentia, facilius

Est urina  
fœtus.

ad



ad foetum penetrare, & à novellis visceribus melius digeri possint. Illud autem nimis redundans serum ab utili succo separari necesse fuit, ut tali modò partium incrementum melius procederet, quod alioqui totum serosum fuisset, & foetum anasarca distentum reddidisset. Separant autem illud serosum excrementum renes, ex quibus per ureteres ad vesicam delabitur; in qua in foetibus quinque aut sextimestribus (in quibus jam omnia clarius ad oculum patent) copiosa satis reperitur. Et vesica autem per ejus orificium non effluit, quia eo tempore nimis adhuc constrictus & angustus sphincter urinam non transmittit: quod ita voluit summus Protoplastes, ne urina è genitalibus effluens immisceretur succo lacteo quo foetus nutritur per os, eumque conspurcasset, corrumpere, & ad alendum inutilem redderet. Alius igitur exitus ei fuit concessus per urachum, è fundo vesicæ umbilicum versus exsurgentem, qui licet in hominibus natis ad ligamenti formam consolidetur, sicut vena umbilicalis ex hepate foetus emergens, tamen in foetu utero incluso semper pervius, ac usque ad umbilicum satis conspicuus est (videatur hac de re *sequens caput*) & urinam è vesica inter chorium & urinaceam membranam defert & effundit, ibi usque ad partus tempus servandam.

*Error Deu-  
singii.*

Qui hac in parte nobiscum non sentiunt, solent dicere, hunc serosum humorem copiosum inter membranas inveniri in ipso foetus jam formati exordio: imò Deusingius, *part. 3. genef. microsc. sect. 1.* scribit ex sententia Harvei, illum tunc quantitate forte centies æquare alterum humorem in amnio contentum (sic satis ostendit, se chimæras volantes describere, huncque humorem in foetus exordio nunquam vidisse) atque hinc pro urina haberi non posse, sed necessario esse humorem ad foetus nutritionem & securitatem maxime requisitum, etsi minus probum quam alter in amnio

contentus. Verum hæc sunt tantum mera figmenta, experientiæ prorsus contraria. Nam in exordio formati foetus hic humor plane nullus (hoc liquet in abortibus *cap. 29. descriptis*) circa quartum verò mensem admodum paucus invenitur, atque exinde, quo magis foetus ejusque renes increscunt, & hi officio suo funguntur, eo magis augetur. In eo autem liquet istorum error quod dum magno fervore sententiam suam defendere conantur, non distinguant inter hunc serosum humorem amnio exclusum, & sublaeteum succum intra amnion hospitantem, ac intercedente urinaria membrana, atque ipsius amnii tunica, à seroso humore separatum. Præterea non animadvertunt, lacteum succum esse illum qui à foetus principio copiosior adest, & odorem ac saporem non ingratum habet, atque in multis brutis ita plerumque absumitur, ut circa partum paucus supersit: cum è contra alter serosus in principio inter membranas nullus (ut modò dictum) & aliquamdiu post primò paucus reperiatur, atque exinde sensim in magnam quantitatem accrescat; nullo etiam sublaeteo colore præditus sit, sed colorem, saporem, & odorem magis magisque, usque ad finem gestationis, acquirat, & tandem in partu admodum copiosus, ac sæpe male olens, effluat: cui si foetus in utero immediate innatasset, tenellum corpusculum ab ejus acrimonia extrinsecus haud parvam injuriam passum fuisset, nec minorem intrinsecus, quippe per os in ventriculum continuè deglutitus embryonem graviter affligeret.

Hujus rei minus attenta speculatio etiam *Riolani error.* decepit Riolanum, qui, *lib. de fat. hum. cap. 1.* non observavit duos diversæ naturæ & plane distinctos intra membranas contineri humores, sed illos simul pro uno humore habuit, quem intra amnion subsistere existimavit, qui ejus error ex antedictis abunde liquet.

## C A P U T XXXII.

### *De Umbilico, ejusque vasis, & foetus nutritione.*



Pertis membranæ foetum involventibus, in conspectum prodit Umbilicus, ab *umbone* nominatus, quod sit in medio ventris, vel inferioris ventris centrum (nonnulli, cum Galeno, male illum totius corporis centrum esse tradiderunt, quod tamen in ossium pubis symphyssi melius constituit Vesalius) Græcis *ὀμφαλός*, & Aristoteli etiam *ἐξά γαστρός*, *radix ventri*, dictus.

Est autem umbilicus, ductus membranofus, tortuosus, & inæqualis, à medietate abdominis foetus versus hepar uterinum assurgens, conspicua longitudine præditus, & in foetu jam maturo spithamarum trium, vel ulnæ Hollandicæ quartas partes duas cum dimidia, aut tres, rarius sesqui ulnæ mensuram, digiti verò crassitiem plerumque, nonnullis tamen minorem, adæquans. Quæ longitudo & laxitas imprimis necessaria fuit, ut foetus jam in utero robustior factus,

*Umbilicus.*

factus, umbilicum calcitracione & circumvolutione sua non disrumperet, atque in partu sine ejus disruptione commodius exiret, & remantes secundinæ, propter ejus adhæSIONem, facilius educerentur.

Situs.

Reflectitur plerumque supra pectus, & sinistrorsum ab occipite ad frontem producit, atque hinc ad uterinum hepar procedens, & per contenta vasa membranasque conjungitur. Interdum dextrorsum ad cervicem progreditur, hinc collum ambit, & sic ad placentam descendit. Nonnunquam supra pectus versus posteriora & dorsum reflecti, nec ad collum pervenire animadverti: mirabiliter enim in ejus situ ludit Natura. Imò jam nuper supra pectus & caput, atque inde circum sinistram pedem revolutum reperi. Rarum est, quod in propriæ uxoris difficili partu observavit Schenckius, scilicet umbilicum duabus tribulve circumvolutionibus collum foetus amblisse: adhuc rarius, quod Hobokenus, *lib. de secund. hum. cap. 2. artic. 1.* notat de foetu, cui umbilicus quater collo circumvolutus, atque caput placentæ proximum erat, qui foetus disruptis membranis, simul cum tota secundina in lucem prodiit.

Constat autem umbilicus vasis, & vasa continente tubulo, *Intestinulum* vocato.

Vasa.

Vasa umbilicalia, quæ è foetu progrediuntur, vulgò numerantur quatuor, Vena una, Arteriæ duæ, & Urachus. Verum his necessario addenda sunt vasa lactea, per quæ lacteum liquorem ab uteri cavernulis in amnii capacitatem deferri, dictum *cap. 30.*

Vena umbilicalis.

Vena arteriis amplior, oritur ex hepate foetus, è cujus fissura ad fundamentum venæ portæ (cujus est propago) egreditur, atque inde umbilicum transiens per intestinulum excurrit ad placentam, cui infinitis radicibus implantatur. Harveus, *lib. de gener. animal. exercit. 68.* primam ejus originem deducit à corde, sed minus bene, cum ad cor non perveniat, nisi mediante vena cava: atque sic ejus origo potius deducenda foret à cava, & cavæ à corde.

Ufus.

Per hanc sanguinem è placenta adfluentem in jecur foetus effundi, in eoque ad summam sanguinis perfectionem ulterius exequi, hætenus vulgata fuit opinio. Contra verò Harveus, *exercit. de motu cord. & sang. cap. 19.* scribit in embryone nullum pene usum esse jecoris, ac proinde hanc venam integram per jecur recta transire ad cavam, sicque sanguinem umbilicalem nullam quoque in jecore mutationem subire, sed recta per illud in cavam, ex eaque ad cor profluere, in eo in sanguinem spirituosum dilatandum. Aliud è contra scribit Riolanus, scilicet venam umbilicalem in hepate esse bifidam, & æque communicare portæ, ac cavæ, idque se multiplex ex-

perientia didicisse. Hoc ipsum se etiam aliquando vidisse, scribit Dominicus de Marchettis, *anat. cap. 8.* idemque in vituli recter in lucem editi hepate se invenisse ac demonstrasse refert Fredericus Ruysch, *observat. anat. 7.* Atque sic illi partem aliquam, forte dimidiam sanguinis umbilicalis in foetus hepar; alteram vero partem in cavam effundi putant. Magnam fidem hac in parte habendam esse Harveo prima fronte aliquantum suadere videtur ratio, quippe fermentum quod in hominibus natis, ob duriora alimenta dissolvenda, acrius esse debet, iis conficitur in hepate & liene; sed in foetu, in quo illud, ob molliora nutrimenta multo mitius esse debuit, illud conficitur in placenta uterina (hoc latius supra docuimus, *cap. 30.*) ita ut jecoris & lienis nullus, aut admodum exiguus usus sit in foetu, ut nec pulmonis, eaque viscera præcipue in futuros usus increfcant & servantur, atque hinc etiam verosimile esse videatur, sanguinem sine notabili aliqua mutatione recta per hepar transire ad cavam, ex eaque ad cor. Hanc rem adhuc magis confirmare videtur Glissonius, qui describit in hepate canalem quendam venosum, qui stylum mediocre facile admittit, in recens natis & embryis apertum, in adultis verò semper occlusum, qui recta ad cavam tendit, eumque in finem datus est, ut sanguinis per venam umbilicalem adfluentis gurgitem in cavam deducat: hunc autem canalem dicit ante natum hepar existere. Quod ultimum non potest esse verum, cum omnes partes spermaticæ, quarum una exprimariis est hepar, simul delineentur, & hoc hepar inter alia viscera, post cor, primo conspiciatur, diu ante venam umbilicalem, & brevi in notabilem facileque conspicuam magnitudinem increfcant. Verum etfratredictæ rationes valde plausibiles esse videantur pro Harvei & Glissonii sententia, tamen Riolanum & Ruyschium veriora sentire, facile ex mea ipsius observatione probare potero. Ut enim hanc rem certius scirem, aliquando libuit in foetu maturo, in partu mortuo, super hac re aliquod experimentum instituere. Abdomine cum thorace aperto, per fistulam venæ umbilicali immisam inflavi, & observavi, me ilico cor quidem & pulmonem inflasse, sed ita ut hepar istius status etiam aliquid reciperet; procul dubio, per lateralem ramulum à Riolano & Ruyschio notatum, ac hepatis seu venæ portæ insertum: qui licet primis mensibus adeo exilis sit, ut vix visui pateat, postea tamen verosimile est, una cum aliis partibus etiam hoc vasculum increfcere, & plus sanguinis hepatis conferre ad citius ejus incrementum, ita ut paulatim melius disponi possit ad futurum munus, quod aliquamdiu ante partum in utero jam auspicatur,

E e

ut

ut liquet ex bile, quæ non solum in modò nati jam maturi, sed etiam in abortivi sextimestris aut septimestris folliculo fellis invenitur, & in recens natis jam excrementis alvinis admixta reperitur: non enim hepar post nativitatem statim, quasi per saltum, ad suum fermentationis biliosi munus accedit, sed etiam in ipso utero paulatim eo deducitur.

Va. vula.

Vena umbilicalis igitur sanguinem in placenta præparatum deducit ad fœtum, cujus regressus in placentam impeditur per plurimas valvulas versus fœtum spectantes, & relabentis sanguinis impetum sustinentes. Hæ tamen valvulæ, propter summam tenuitatem, difficillime demonstrari possunt, sed eas adesse inde merito suspicari licet, quia sanguis à fœtu versus placentam digitis promoveri nequit, cum facile promoveatur versus fœtum. Nicolaus Hobokenus, *lib. ante citat.* scribit, se in umbilicali vena nullas genuinas valvulas invenire potuisse, sed in ea varias sinuosas inæqualitates observasse, & prope placentam vidisse carunculam, seu potius membranosam discretoriam plicam parvam, juxta venæ longitudinem ac profunditatem ita sitam, ut ramificationem venosam terminaret, & instar valvulæ se habere videretur; hanc autem appellat *Valvula anastom.*

Error Cour-  
vei.

Hic obiter notandus est error Jo. Claudii de la Courvee, qui putavit per venam umbilicalem nihil ex placenta uterina deferri ad fœtum, sed contrà è fœtu sanguinem ad placentam defluere, idque propter hanc rationem, quia hæc vena è fœtu primo excrescit, & progreditur ad placentam, ergo debet, inquit, sanguis in originem ejus primo defluere, & sic deferri versus suum finem placentæ insertum. Verum Courvei errorem luculenter demonstrant, non modò valvulæ antedictæ, sed ipsa quoque experientia per injectam ligaturam facta, de qua paulo post dicitur. Præterea ejus ratio ab ortu seu principio venæ umbilicalis petita, nullius est momenti, nam productionis principium non arguit usus principium, sed aptitudinem ad qualemcunque futurum usum. Sic vena cava, secundum Harveum, à corde producit, propterea tamen sanguis à corde non defluit in cavam, sed è cava in cor. Ita etiam plantarum radices à plantis in terram projiciuntur; sed per eas tamen alimentum è terra in plantas defertur, non verò è plantis in terram.

Vena umbi-  
lialis in  
brutis.

Vena umbilicalis non videtur se in omnibus brutis eodem modo habere ut in homine: nam Fabricius notat in cane & felle, præter hanc modò dictam, adhuc duas alias venas umbilicales ad mesentericas venas abire, in easque aperiri, unam juxta ven-

triculum, alteram prope crassa intestina. Hichmorus verò scribit, se in vaccis venam umbilicalem semper geminam invenisse. Fortassis etiam in aliis brutis aliqua erit differentia, quam cuilibet inquirendam relinquimus.

**Arteriæ umbilicales** duæ ex arteriæ *Arteria* magnæ ramis iliacis internis, ad ipsum *umbilicales.* principium divaricationis, ortum ducunt, à quibus sursum ad vesicæ latera porrectæ, & venam comitem nactæ, intestinulum umbilicale ingrediuntur, idque multo laxiore, & magis, quam vena, flexuoso ductu, transeunt, atque sic tria hæc vasa, modò ordinate, instar funiculi, quasi leviter contorta, modò sibi invicem solummodo, instar trianguli, opposita, per gelatinam lacteam in intestinulo contentam, transeunt ad hepar uterinum, cui innumeris radicibus implantantur, in eoque admirabilem texturam & retiformem plexum efformant, quam conspiciens Bartholinus, scribit illa vasa in placenta mirabili anastomosi inter se coire, quod tamen verosimile non est, nec quisquam demonstrabit. Carpus & Fabricius nullam anastomosis mentionem faciunt, sed notant solummodo, circiter spithamæ à fœtu distantia, horum trium vasorum magis confusam texturam, & asperiores contorsiones. Ego aliquoties in umbilici examine accuratius incurrens, inveni & demonstravi, modò levem aliquam, modò nullam contorsionem, sed hæc vasa quasi in triangulo posita, & æquali fere interstitio à se invicem disjuncta, recta per intestinuli gelatinam transire, ut modò dictum.

Harveus, *de gener. animal. exercit. 52.* scribit, has arterias in embryone primis mensibus vix reperiri, venam autem umbilicalem diu ante has conspicuam esse, atque hinc credit has arterias serius, & aliquamdiu post venam formari. Verum magis verosimile est illa tria vasa simul formari & crescere, cum placentæ uterinæ parenchyma sine his arteriis satis vivificari & in actum promoveri nequeat, ac venæ umbilicalis etiam nullus usus esse possit, nisi per arterias sanguis vitalis primo ad placentam deferatur. Quod autem serius conspicuæ evadant, hoc fit, quia sunt multo minores & tenuiores, quæ de causa etiam passim in aliis plerisque partibus arteriæ parvæ non sunt tam conspicuæ quam venæ. Dictarum autem arteriarum amplitudinem ubique non æqualem, sed prope intestinulo nodulos angustiores esse, & sic quasi in se etiam nodulos efformare, observavit Nicolaus Hobokenus, *lib. ante citat.*

Per has arterias confertur sanguis spiritalis & vitalis, non à matre ad fœtum (ut *Arteriarum* ex Galeni sententia, multi ante hæc tradiderunt) sed è contrario à fœtu, cordis *usus,* pulsione,

pulfione, impellitur ad hepar uterinum, ut in eo sanguinem ab uterinis vasculis adfluentem, specifico modo ulterius colliquet, fundat, & cum illo coquatur, ut sic foetus materia apta ad nutritionem præparetur, quæ per venam umbilicalem ad viscera foetus delata, in ejus corde convenienter dilatari, & novam sanguinis perfectionem induere possit.

*Sanguinis  
motus per  
umbilicum.*

Hunc sanguinis motum clarissime docet autopsia: quippe si vivi foetus (quod in bestiis experiri licet) umbilicus in medio ligetur, apertò intestinulò, mox arteriæ inter foetum & ligaturam intumescere, sed ultra ligaturam concidere, omnique motu destitui, conspiciuntur; cum è contra vena intumescat inter ligaturam & placentam, at versus foetum detumescat. Quod certo significat arteriosum sanguinem impelli à foetu ad placentam, venosum verò à placentam ad foetum. Vel illud ipsum alio modo licet experiri sine ligatura, si scilicet sanguinem per venam à placentam versus foetum digitis impellas, sic enim facile procedit; at contraria via propelli nequit, propter obstantes valvulas: per arterias verò sanguis ad foetum ægerrime impellitur, cum ad placentam facile & sponte defluat.

*Nulla hic  
anastomo-  
sis.*

De anastomosis arteriarum cum arteriis, & venarum cum arteriis, varii multa scribunt, sed repugnante autopsia, cum in placenta nusquam tales anastomoses observari possint: quod ipsum etiam satis accurate notavit Nicolaus Hobokenus, *lib. ante citat.* qui per injectum liquorem istius rei cognitionem perfecte inquisivit.

*Nulla unio  
vasorum  
umbilici  
cum utero.*

Jam quid de venarum & arteriarum umbilicalium unione cum utero sentiendum sit, breviter inquirendum. Galenus, *lib. 2. dissect. uteri*, & Aristoteles, *lib. 7. histor. animal. cap. 8.* docent oscula vasorum umbilicalium uniri cum finibus, seu osculis vasorum uteri; ita ut venæ umbilicalis radices à venis uteri sanguinem, arteriæ ab arteriis spiritum hauriant: cui sententiæ Aquapendens, Sennertus, multique alii clarissimi viri calculum adjecerunt. Alii rursus, quibus non est nisi oculata fides, hanc vasorum unionem prorsus negant, quibus nos suffragium nostrum concedimus. Nam varia sunt quæ nullas vasorum umbilicalium & uteri anastomoses seu uniones dari demonstrant.

I. Quod talis vasorum unio foetum tam firmiter utero alligaret, ut in partu minime dissolvi posset: vel si per parturientis impetuolos labores seu conatus, violenter avelleretur, tot tamque perniciose vulnera ex singulorum unitorum vasorum disrptione excitarentur, quæ sanguinis immensa profusione necessario puerperam citissime extingueret.

II. Quod sanguis per hiantia uteri vascula in placentam paulatim descendat, ad foetus nutrimentum & incrementum in eo præparandus, ut dictum *cap. 30.* Sed nullus Anatomicus hæcenus ullas vasorum uteri ultiores productiones versus aut in placentam, nullasque illorum uniones cum placenta aut umbilici vasis animadvertere potuerit, ita ut si quid hac de re nonnulli tradiderint, illud ex mera tantum conjectura scripserint.

III. Quod posita tali vasorum uteri & umbilicalium unione seu continuitate, nullus omnino placenta uterinæ possit esse usus: sanguine enim per continuitatem illam transfluente, nihil ejus in ipsam placenta substantiam pervenire, aut in ea elaborari poterit.

IV. Quod venæ umbilicales ad uterum usque non progrediantur, sed per hepar uterinum solummodo radices spargant, ex eoque, non autem ex utero, sanguinem alimentarium foetui deferendum immediate assumant, sicut plantæ per radices alimentarem succum è terra hauriunt.

V. Quod arteriæ nihil ab utero ejusve arteriis hauriant, sed vitalem sanguinem è foetu ad placentam deferant, in eaque suis ramulis penitus absumentur.

VI. Quod in pulsu arteriarum umbilicalium rythmus à matris pulsu omnino diversus sit.

VII. Quod nonnunquam contigerit, mortua matre foetum adhuc aliquamdiu vivum in utero superfuisse (hoc docuerunt variorum vivorum foetuum post aliquot horas ex emortuæ matris utero exsectorum exempla) quod minimè fieri posset, si foetus sanguinem vitalem per arterias matris reciperet, quippe deficiente matris pulsu, foetui simul etiam, vel citius, vel saltem eodem tempore moriendum foret.

Ex his jam patet error Vesalii & Columbi, qui, Galenum secuti, putarunt umbilicalia vasa, non tantum cum vasis uterinis conjungi, verum etiam per continuationem ab iis oriri, atque ab utero ad foetum protendi. Quem errorem, præter modò dicta, facile demonstrat illud, quod in abortivo embryone, à nobis viso, & inter alios *cap. 29.* descripto, umbilici exordium non ab utero, sed à foetu oriebatur: quod etiam in volucrum pullis umbilicalium vasorum exortus manifeste ab ipso pullo incipiat, eaque in minimas propagines dirempta à pullo ad vitellum extendantur. Eodem modo sicut in vegetabilibus, radices non è terra in plantas, sed è plantis in terram altericem porriguntur, quod adhuc multo clarius liquet in bulbis, qui extra terram suspensi, radices ex se ipsis emittunt.

Ex prædicta sententia processit alia absurda opinio, qua edoctum, venas & arterias

*Vasa umbi-  
licalia non  
oriuntur ab  
uterinis.*

*An formen-  
tut ante cor.*

rias umbilicales generari ac formari ante cor & reliqua viscera (hoc variis rationibus inculcare studet Bauhinus, *anat. lib. 1. cap. 11.*) quasi viscera non possent formari sine sanguine ab utero delato: cum tamen apud acutiores Philosophos meritò indubitatum sit, illa ex feminis germine formari, & post eorum jam peractam formationem, dictorum vasorum (quorum minima stamina cum aliis solidis partibus in foetu antea modo erant delineata) nutrimentum ad ulteriorem extensionem ab iis visceribus procedere, atque hinc illa tunc primo in maiorem longitudinem excrecere, & usque ad placentam protendi.

Quomodo  
hæc vasa  
transciant  
membranas.

Sed hic forte quæret aliquis, quomodo illa vasa, cum à ventre foetus ad eam longitudinem excreverunt ut membranas contingant, per amnion & chorium ad hepar uterinum penetrare possint? Respondeo: fit hoc eodem modo, sicut radices herbarum, fruticum, & arborum penetrant in duram terram, imò sæpe crassos asseres, muros, & lapides, quos aqua penetrare nequit, ingrediuntur. Ita enim vasorum umbilicalium primi acuti tenuissimique fines se membranarum poris sensim infinuunt (est enim istorum pororum apta ad eorum ingressum figuratio) eosque transeunt, per quos tamen humores intra membranas contenti effluere non possunt: postea verò cum illa vasa poris inhaerentia in longitudinem magis increscunt, etiam sensim magis magisque, pro eorum incremento, dilatantur dicti pori, quibus vasa jam indissolubiler unita & innata sunt.

Radices  
dorsales.

Riolanus commemorat, ex Avicenna & Varolio, ante venæ & arteriarum umbilicalium generationem, duo capillaria vasa, quæ ille *Radices dorsales fetus* appellat, à singulis scilicet uteri cornibus unum, in summam & posteriorem seminis coagulati partem inferi, per eaque sanguinem ad partium formationem necessarium suppeditari, interea dum vasa umbilicalia firmanantur; postea verò, jactis partium fundamentis, obliterari. Verum hæc tantum mera figmenta esse, ex eo liquet, quod foetus non generetur aut formetur ex semine coagulato, sed ex colliquato, & quidem ex subtilissima ejus parte, scilicet germine. Præterea inutiles forent hæc radices dorsales, cum partes ex solo feminis virilis germine delineari debuerint, non concurrente ullo sanguine (ut dictum *cap. 28. & 29.*) quod clarissimè patet in ovo, in quo etsi nullus sanguis contineatur, nec aliunde suppeditari possit, partes tamen efformantur, quæ formatæ ex obvia alimentali materia sanguinem gignunt, quo omnes delineatæ partes nutriuntur, increscunt, & perficiuntur.

Vasa lactea.

Post vasa sanguifera etiam de lacteis umbilicalibus, nunc dicendum foret nisi latius

de his actum esset *cap. 30. circa finem.* Hæc tamen adjicio, vel hic repeto, quod Gualterus Needham, *de format. fet. cap. 3.* hic nulla vasa lactea agnoscere videatur, nam aliam huic sublaeteo liquori viam assignat: quippe scribit eum in matris ventriculo coctum admisceri sanguini (hoc latius inculcare nititur *eodem lib. cap. 1.*) cum eoque per vasa sanguifera circulari, & sic deferri ad uterum, ibique sanguini foetus admisceri, & tunc eam materni sanguinis partem, quæ ulteriore coctione aut fermentatione non eget, in sanguinem foetus converti, reliquum verò nutritium lacteum succum, majoris coctionis indigum, ex eo separari, ac in amnion recondi, tanquam futuræ nutritionis materiam, per os ad foetus ventriculum deferendam, in eoque digerendam. Hanc opinionem citato *cap. 30.* latius refutavimus.

Quartum umbilicale vas manifeste conspicuum est *Urachus*, seu *Vas urinarium*, estque corpusculum tenue, membranofum, teres, exili meatu pervium, à fundo vesicæ ad umbilicum, medio inter venam & arterias loco, assurgens.

Hic in plerisque brutis animalibus majoribus manifeste pervius, & observante Hobokeno, nullis valvulis donatus, usque ad membranam urinariam, supra descriptam (in minoribus tamen brutis transitus ejus vix deprehenditur) deferretur, inter quam & chorium urina foetus per eum effunditur, illic usque ad partum reservanda. Hieronymus Fabricius, *de format. fet. part. 1. cap. 10.* scribit, hoc vas in plerisque brutis animalibus, ubi è vesica pullulat, unicum esse meatum, seu canalem, sed ubi extra abdomen longius versus alantoidem progreditur, tunc in multas findi fibras exiles, quæ in causa sunt quod urina in intestinulum quidem influat, sed in urachum non facile refundatur, etiamsi dedita opera ipsam remittere coneris. Sic etiam notat Needham, *de format. fet. cap. 3.* quod in brutorum majorum vesica similis inveniatur liquor, qualis continetur in alantoides, & si fistula vesicæ adaptetur, quod flatus in alantoidem transmittatur.

In homine autem usque ad umbilicum duntaxat urachi protensio animadvertitur, extra quem nullus ulterior ejus progressus ab ullo Anatomico hæcenus demonstrari potuit, atque hinc à plerisque conclusum est, urachum solummodo usque ad umbilicum extendi, & inservire pro ligamento fundi vesicæ, neque eum pervium esse. Hoc apertissimis verbis indicat Arantius, *lib. de human. fet. cap. 11. Mea sententia*, inquit, *illud quod in humana vesica canali vel urachi quandam effigiem præ se ferre videtur, nihil aliud est, quam vesicae ligamentum, quod sua basi latiusculum existens, sensim, subula*

subula in modum, attenuatur; adeo ut cum ad umbilicum pervenerit, evanescat, & in nihilum abeat, nulla interim cavitate pradi-  
tum, sed ejus tantum (ut reor) usus gratia datum, ut vesicam peritoneo colliget, eamque sustineat, ne, cum urinâ distenta fuerit, ejus cervicem subjectasque partes comprimat. Sic etiam Paræus, se nulla arte urachi apertio-  
nem in homine invenire potuisse scribit. Imò Needham refert se in funiculo humano nullum urachi vestigium deprehendere po-  
tuisse, multo minus ejus cavitatem aliquam reperire. Verum ratio docet hunc liga-  
menti usum esse minus necessarium, cum vesica pubis regioni satis firmiter adhæreat & adnectatur, nec ullo alio ligamento magnopere indigeat, ac proinde hanc par-  
tem alii usui nobiliori destinatum esse, quam Avicenna & Fabricius ab Aquapendente melius perceperunt: qui tradunt urachum non terminari in umbilicum, sed hunc  
transire & egredi, atque una cum vena & arteriis umbilicalibus ulterius progredi, sci-  
licet usque ad membranas fœtum involven-  
tes, atque illam in brutis hiare in alantoi-  
dem (per consequens in homine inter cho-  
rium & membranam urinariam) & urinam è vesica fœtus deferre.

Quod autem extra abdomen conspicuus non sit, causa est, vel quod fortassis nemo ulteriorem ejus investigationem satis dili-  
genter investigaverit: vel quod propter summam substantiæ suæ tenuitatem & pel-  
luciditatem visibilis non sit, cujus ratione etiam vasa chyliifera, & lymphatica, cum inanita sunt, vix uspiam conspici queunt, atque hinc tot seculis à peritissimis quibuslibet  
Anatomicis prætervisa fuerunt, cum tamen repleta hodie satis inveniantur. Ad-  
de, quod in corporibus humanis mortuis tam tenue vasculum, per quod solummodo transit serosus humor, qui in eo non subsi-  
stet, facile concidat, & sic propter pellu-  
ciditatem à vicinis partibus visu discerni nequeat: & in vivis, in quibus id forte repletum appareret, ejus investigationem prohibeat pietas.

observatio.

Jam nuper abortivi fœtus, circiter septem mensium, & adhuc ulterius, umbilicum cum accuratius examinarem, animadverti venam & duas arterias umbilicales, inter se non contortas, sed in intestinulo conti-  
neri copiosam quandam crassamque albi-  
cantem gelatinam (procul dubio, per lactea vascula umbilicalia, placentam transeuntia, ex uteri cavernulis lacteis (de quibus cap. 30. dictum) eo delatam, modice concretam, & dicta vasa quasi in triangulo posita, recta per illam transire, & à gelatina ista quasi fulciri. Nulla alia conspicua vasa in inte-  
stinulo inveni: sed cum funiculum trans-  
versum conscinderem, observavi in istius trianguli medio punctulum seu guttulam

serosi liquoris epullulare, & funiculô à fœtu extrorsum versus paulo durius pressô, feri sex septemve guttulas subsequi. Has ex uracho, invisibiliter albicantem gelati-  
nam una cum aliis vasis transeunte, epul-  
lulasse mihi persuasi.

Urinam è fœtu per urachum fluere, do-  
cent exempla variorum adultorum, quibus denegato urinæ per ordinarium meatum transitu, illa per reseratum umbilicum fuit evacuata, cujus rei præclaræ historiæ repe-  
riuntur apud, Fernelium, lib. 6. parhol. cap. 13. Laurentium, lib. 8. anat. quæst. 17. Cabrolium, observat. 20. Hildanum, cent. 1. observ. 47. & cent. 2. observ. 48. Highmo-  
rum, lib. 1. part. 4. cap. 7. multosque alios. Si hoc in adultis contingat, in quibus jam in ligamentum resiccatus est urachus, quan-  
to magis certum est illud in fœtu continge-  
re, in quo vas hoc magis apertum, nec ullo modo resiccatum est. Præterea in em-  
bryone, mense quinto, sexto, septimo, &c. cum per abortum ejicitur, vesica semper turgens, & urinâ prorsus repleta invenitur, è qua certe si totis sequentibus mensibus urina non evacuetur per urachum, vesica brevi disrumpetur; quotidie enim ali-  
quantum feri à sanguine in renibus secerni-  
tur, & ad vesicam demandatur, & quo magis increfcit fœtus, eo plus feri secerni necesse est.

Urina fluit  
per ura-  
chum

Qui prædicta hæc non satis pense confi-  
derarunt, subscripserunt antiquæ opinioni, eamque diversis rationibus defendere annixi sunt. Inter cæteros est Bartholinus, qui, hist. anat. rar. scribit se in dissectione juven-  
culi cujusdam fœtus urachum pervium non invenisse, nec stylum immittere potuisse, atque hac autopsia satis probatum putat, urachum non esse pervium. Verum qui ejus angustiam in homine bene observavit, non mirabitur, quod in tam angustum vas stylus communis immitti non potuerit, id-  
que eo magis, cum ejus exitus è vesica ad-  
modum tortuoso ductu inter membranas transeat; & si tenuiorem vel acutiorem stylum aliqua vi intrudere quis velit, nec ille recta transibit, sed per tenuissimi vas-  
culi latera facile erumpet. Præter Bartho-  
linum, etiam Harveus, exercit. de uteri membran. scribit se urachum nunquam per-  
foratum, aut urinam in se continentem in-  
venisse. Sic etiam Antonius Everardi, lib. de ort. animal. refert, se neque in fœtibus humanis, neque in cuniculis, canibus, aut leporibus, urachum perforatum, sed semper solidum ac impervium, vicemque ligamenti suspensorii sustinentem, reperisse. Horum dictis confidens Regius, medic. lib. 1. cap. 11. etiam credit urachum non esse pervium. Verum præcedentia horum quoque senten-  
tiam satis convellunt, erroremque demon-  
strant.

Alia opinio.



*Courvei o-  
pinio.*

Jo. Claudius de la Courvée, animadvertens necessario feri partem è sanguine, qui in embryone conficitur, separari debere, eamque per genitalia non effluere in succum lacteum amnio contentum, quo foetus nutritur, & cum cæteris credens urachum non esse pervium, hanc rem aliter explicat, *part. 1. de nutrit. fæt. in utero, cap. 7.* & probare nititur embryonem toto tempore, quo inclusus in utero detinetur, nihil urinæ è vesica exonerare, sed solam vesicam omnem urinam colligere, & usque ad partum continere posse. Verum quantopere erraverit Courveus, hoc unum satis docet, quod in fætibus quarto vel quinto mense per abortum ejectis, vesica jam sero turgida & omnino repleta semper invenitur; quæ si his primis mensibus tota repleta sit, in quibus propter viscera admodum exilia & debilia minus sanguinis conficitur, atque hinc minus feri separatur, ubi manebit serum quod ultimis mensibus, jam robustioribus existentibus visceribus, multo maiore copia separatur? an illud in vesicam primis mensibus repletam infarciatur? certe vesica necessario disrumpetur, antequam ad sextum mensem foetus perveniat. Præterea foetus in lucem editus creberrime mingit, quod indicium est, serum copiosum continue ad vesicam defluere, atque hinc illud quoque necessario, dum utero inhærebat, è vesica evacuatum fuisse per urachum, propter genitalium viam tunc nondum apertam. Hoc ipsum etiam satis indicat copiosa serosa colluviæ effusio partum antecedens, quæ nihil aliud est, quam hæc urina inter chorium & membranam urinaceam collecta, quæ his membranis calcitracione foetus disruptis, foras effluit.

*Maurocor-  
dati opinio.*

Alexander Maurocordatus, *lib. de motu & usu pulm. cap. 11.* longe aliam viam proponit, ad feri, quod necessario in foetu copiosum redundat, evacuationem: quippe scribit illud non per urachum (quem falso nomine hætenus ita appellatum fuisse tradit) sed per continuationem vasorum umbilicalium & uteri, in prægnantis venas transmitti, ut per loca congrua excernatur. Verum, hoc commentum innititur falsæ hypothefi, scilicet continuationi venarum arteriarumque umbilicalium & uteri, quam paulo ante refutavimus. Præterea si, ut etiam præsupponit, nullus sit urachi usus, per quas, quæso, vias urina (qua foetus vesica communiter repleta reperitur) è vesica foetus ad venas prægnantis perveniet? an ex vesica revertetur per ureteres ad renes, indeque per venas emulgentes ad cavam & hepar redibit, ut sic per umbilicalem venam contrario flumine regurgitet ad matrem?

*Intestin-  
lum.*

Ad vasorum umbilicalium securitatem, iis circumjicitur involucrum, quod Intesti-

nulum, aliis **Funiculus**, appellatur (multoties etiam per *Funiculum* tota umbilici productio cum suis vasis intelligitur) estque pars membranosa, teres, cava, mediocriter crassa, duplici tunica constans (harum interior à peritonæo, exterior à panniculo carnosio producta vulgo putatur) vasa umbilicalia simul comprehendens atque investiens (à sanguine his vasis contento foris variæ in eo maculæ conspicuæ fiunt, à vena latiores & obscuriores, ab arteriis verò rubræ, vel ex rubro livefcentes (cum quibus funis in modum contorquetur: hæc tamen contorsio in aliis major, in aliis minor existit; interdum etiam solum intestinum contortum vidimus, vasis per ejus cavitate contentam gelatinam recta ascendentibus, ut ante dictum, & in brutis frequenter conspicuum est.

In hujus cavitate humor quidam subalbicans per aliqua lactea vascula ex uteri cavernulis assumptus, & in hanc cavitatem inter vasa umbilicalia effusus, iisque circumfusus invenitur, ex ea ulterius in amnion paulatim descensurus. Hic post expulsum foetum in intestinulo ab aeris frigore in gelatinæ fere consistentiam coagulari solet.

Nervis paucissimis frui creditur, sicut chorium & amnios, quia sensu non indigebat.

Variis in locis nodos aliquot, quasi vesiculas albicante succo plenas, obtinet, quos Riolanus putat à portione carnosæ involucri, ibi crassiore, ad fortiorem colligationem vasorum umbilicalium genitos, eaque arte à Natura cautum fuisse, ne sanguis affatim & cum impetu ad foetum proflueret, & sic tenellum corpusculum obrueret. Sed melius observavit Whartonus, illos nodos esse papillulas, per quas succus lacteus in funiculi capacitatem effluens, distillat in amnii cavitatem, ut latius dictum *cap. 30. circa finem.* Alii, at sine fundamento, nodulos istos excitari putant ab arteriarum umbilicalium contorsione. Alii illos aneurismata esse judicaverunt, sed repugnante penitus ratione, cum aneurismata per violentiam quandam inducantur, hi verò nodi sponte gignantur: cum etiam in illa parte vix tanta vis arteriis inferri possit, qua in aneurismata (harum generationem vide *lib. 6. cap. 1.*) dilatari queant. Præterea, cum aneurismata sint morbi pravæ conformationis, hinc in funiculo omnium foetuum non adessent, cum tamen illi noduli in omnibus (modò plures, modò pauciores) inveniuntur, atque tumores præternaturales non existant, neque adeo laxi sint atque aneurismata. Adde, quod etiam horum in modum non evanescant seu concidant effuso sanguine, nec etiam, ut illa, interdum majores, interdum minores, sed semper



semper æqualis magnitudinis appareant; & conspicuis maculis à funiculi membrana facile distinguantur; cum è contra aneurismata vix ulla coloris varietate à reliqua cute discerni queant. Nicolaus Hobokenus, *lib. ante citat.* hos nodos non in solo involucro seu intestinulo, sed etiam in vasis eo conclusis observandos putat: atque hinc statuit tres nodorum species, alios funis, alios venæ umbilicalis, alios ipsarum arteriarum. Funis nodos dicit esse membranz ipsius protuberantias, à venæ arteriarumque contorsionibus factas. Arteriarum esse rotundos & orbiculares: venæ verò duntaxat laterales. Atque ita vasculorum sanguiferorum amplitudinis inæqualitates, etiam appellat nodos. Verum communiter, cum de funiculi nodis sermo est, intelligatur solummodo illi qui in intestinulo foris conspiciuntur, mox visui occurrunt.

Anguria.

Ex horum nodorum copia superstitiosa obstetrices de futuræ sobolis numero divinare solent, & si paucissimi nodi adsint, sterilitatem in posterum futuram pronunciant: ex eorumdem quoque ab invicem distantia, de puerperiorum intervallo, & ex varietate colorum de sexus discrimine, multa que etiam de infantis felicitate aut infortunio, anisiter hariolantur. Quod non tantum hodiernis obstetricibus familiare est, sed olim etiam à Medicis scitatum fuisse videtur, nam, referente Riolo, harum ex umbilico prædictionum etiam meminerunt Eucharius, Rodion, & Avicenna.

Umbilici sectio.

Umbilicus nato infante prope abdomen filo vel lino forti ligatur, & duobus tribusve à ligatura digitis transversis rescinditur, sicque relinquitur, donec quod extra ligaturam est, exsiccatum vel corruptum sponte decidat, & exitus ex abdomine valida cute inducta solidetur. Exinde prædicta vasa umbilicalia intra abdomen infantis degenerant in ligamenta, eas partes ex quibus procedunt, ambilico alligantia.

Verum ad dietam umbilici sectionem monet Aristoteles prudentiam aliquam requiri, quæ in eo consistit, ut iusta longitudo relinquatur. Nam umbilicus nimis protracto, & sic exacte prope cutem ligato, ac resecto, multi sibi persuadent, infanti masculo, postea incrementibus partibus, penem brevem remansurum, nec ad justam longitudinem perventurum; scemellæ verò postmodum pariendi conatus non bene successuros. At nimis longa umbilici parte foris relicta, in eam facile postmodum illapsurum esse intestinum vel omentum, atque sic herniam umbilicalem futuram. Huius posterioris veritas nobis constat ab experientia, de priore adhuc incerti sumus.

Cum usus umbilici sit sanguinem arteriosum per arterias è foetu ad hepar uterinum, & eundem cum materno sanguine, eodem confluentem, præparatum, rursus per venam ad foetum deferre, hinc pro certissimo quondam constitutum, & à Medicis ac Philosophis sancitum fuit, foetum in utero non nutriri ullo alio alimento, quam sanguine per umbilicum allato: quæ opinio etiam Hippocratis auctoritate confirmari visa est, utpote qui illud ipsum sentire videtur *lib. de alimento*, ut & *de octimestri partu*. Alii rursus hanc antiquam opinionem prorsus rejiciunt, & docent, foetum in utero non ali per umbilicum, sed per os, suamque sententiam auctoritate Hippocratis etiam præmuniunt, qui, *lib. de princip. & lib. de nat. puer.* clarissime scribit, foetum in utero per os nutriri. Atque hi existimant, hepar uterinum solummodo sanguinem istum, qui per arterias umbilicales ex ipso foetu eo impellitur, specifico modo præparare, & sic per venam ad foetum remittere, nihil verò sanguinis ab utero ad venam umbilicalem venire.

Verum ut de hac ultro citroque agitata questione altercationis terra non diu reciperetur, has duas opiniones simul coniungendas iudico, & dicendum, quod foetus partim per os & appositionem, partim per umbilicum nutriatur, sicut id breviter supra propositum est *cap. 29.*

Foetus nutritur per os &amp; umbilicum.

In principio, ante perfectam vasorum umbilicalium & hepatis uterini formationem, partes delineatz accrescunt & augentur, primo per appositionem, ex materia seminali residua, jam in colliquamentum dissoluta, cui pusillus embryo innatat (nam hæc materia jam ad nutritionem parata est, nec multa ulteriore coctione opus habet, sed per se est maxime affinis tenellis jam primo delineatis partibus) eodem modo sicut planta, cum ex semine germinare incipiunt, primum nutrimentum & incrementum ex residua feminis parte desumunt, ut liquet in bulbis in aëre suspensis, qui folia sursum, & radices deorsum propiciunt, cum tamen nullum aliud nutrimentum advehatur, quam quod in se ipsis habent: idem in fabis & pisce extra terram in humido aëre germinantibus fieri conspicitur. Sic primo nutritur foetus per colliquamenti seminalis appositionem solam, & deinde partim per appositionem; partim etiam per colliquamenti aliquam partem ore assumptam, & prius in & à corde in sanguinem mutatam.

Nutritio per appositionem.

Postea verò, corroboratis nonnihil visceribus, & colliquamento seminali maxima ex parte consumpto, atque hepate uterino jam ad maiorem perfectionem deducto, umbilico cum suis vasis usque ad illud extenso, hincque succo lacteo jam largiter

Nutritio per os &amp; umbilicum.

largiter in amnion affluente, foetus per os & umbilicum nutritur.

Hi tres modi nutritionis foetus firmis rationibus probantur.

Probatio  
nutritionis  
per apposi-  
tionem.

Nutritio per appositionem, quæ omnium prima est, liquet ex cito partium incremento, cum tamen viscera adhuc adeo tennella & debilia sint, ut tantum sanguinis ad tam citum incrementum conferre ac suppeditare nequeant.

Probatio  
nutritionis  
per os.

Nutritio per os sextupliciter patet.

I. Quod foetus ventriculus nunquam vacuus, sed lacteo subalbicante liquore stipatus (experiri licet in brutis) invenitur, similisque succus etiam in ipsius ore contineatur. Sic illud ipsum etiam in avis pullo contingit, dum in ovo hæret, utpote in cujus ore, ingluvie, & ventriculo materia instar lactis coagulatiprehenditur, scilicet ex albumine ore assumpto.

II. Quod in intestinis fœces (has *meconium* appellant Philosophi) contineantur, quas natus infans ex ano excernit. Procul dubio illæ ex alimento quodam per os assumpto residuæ sunt, cum ex solo sanguine tales fœces in intestinis redundare nequeant, quod tamen nonnulli præter rationem docuerunt, quos refutat Riolanus, *de fœt. hum. cap. 7.*

III. Quod ventriculus statim post partum functionem coctionis aggredi non posset, si illi nullatenus in utero fuisset assuetus.

IV. Quod sine gravissimo incommodo foetus tam subitam mutationem subire non potuisset, ut in utero tot mensibus solo sanguine umbilicali nutritus, postea in lucem editus, mox, & quasi per saltum, lacte nutritur per os assumpto, & in ventriculum dimisso.

V. Quod infans natus statim mammas sugere noverit, quod non sciret nisi antea in utero etiam aliquid per os, vel sugendo, vel mandendo assumpsisset.

VI. Quod non pauci recens nati alimentum lacteum evomant, antequam mammas suxerunt, aut quidquam extra uterum ore assumpserunt: atqui illud in eorum ventriculis esse non posset, nisi in utero per os hausissent. Hujus rei manifestum exemplum vidimus in filia mea Joanna, natu minima, quæ circiter post unam à nativitate horam, lac copiosum & album evomuit, illud admirantibus omnibus foeminis præsentibus, propterea quod infans mammas nondum suxisset, nec quidquam ei per os exhibitum fuisset.

Harveus, *de gener. anim. exercit. 57.* hanc nutritionem etiam probat valido argumento à suctione desumpto. *Fœtus*, inquit, *quam primum natus in lucem editur; imò vero priusquam natus est, sugit, tanquam id in utero pridem egisset: quippe experti sumus eum*

*in partu barentem, antequam ejulare aus respirare possit, digitum ori admoitum apprehendere & sugere.*

Confirmatur etiam hæc nutritio auctoritate Hippocratis, qui *lib. de carnib.* eam fieri docet, argumentis à stercore, quod primo nati dejiciunt, & mammaram prima suctione desumptis.

Si quis roget quali alimento per os nutriatur, ea de re ante satis dictum, scilicet primò feminali colliquato liquore, postea succo lacteo in amnii cavitate contento, de cujus in amnion influxu, actum *cap. 30. circa finem.* Hunc lacteum succum in foetus ventriculo invenit Harveus, *de gener. anim. exercit. 69.* De hoc observationem quoque suam scribit Olaus Rudbeck: *Dissectu*, inquit, *omnibus catti fœtibus, in ore, œsophago, & ventriculo, conspexi mucilaginem & visciditatem, illi qui intra corpus & amnion erat, persimilem.*

Hic autem succus paulatim ab infante per os assumitur & deglutitur, non verò in eum propellitur; nam hoc pacto tanta copia in eum influeret, ut brevi totus distenderetur, & se malè haberet. Non est autem quod quis, cum Hennigio Arniseo, *disput. de gener. hom.* metuat foetum à copioso, cui innatat, liquore suffocatum iri posse, si os aperiret, quoniam cum in utero non respiraret, etiam nihil intra pulmones adducit, & si respiraret (quod non facit) etiam ipsò ore clauso manente non minus suffocaretur, quam eo aperto.

Hic quæstionem movet Nicolaus Hobokenus, scilicet, an dicendum sit, quod foetus illud primum nutrimentum assumat sugendo, an verò solum deglutiendo, sine præmissa aut juncta suctione. Verum hoc dubium tanti non est, ut operosam solutionem requirat; nam quando aliquod liquidum deglutiendum ore assumitur, illud communi loquendi modo dicitur sugendo, vel sorbendo sumi, cum tamen multoties neutro modo fiat, sed illud in os duntaxat infundatur, & sic deglutiatur: atque sic etiam alimentarium liquorem in utero sponte in os foetus illabi seu influere, minime dubitandum est: interea tamen etiam verosimile existit, quod appropinquante partu id fiat quasi sorbillando, & sic deglutiendo, atque hinc foetus isti sorbillationi jam assuetus, simul ac natus est, sorbillare studentem, mox suctionem facile addiscere. Quod ipsum quoque sentit Harveus, *de gener. animal. exercit. 57.* *Si embryo*, inquit, *in humore dicto natans, os suum aperit, necesse profecto est, aquam fauces ingredi: & si alios musculos movet (hoc ex ejus motu in utero notum est, qui foris manibus sentiri potest) quidni credemus eundem pariter & faucium organum usum, liquorem illum absorbere? Ut autem hunc absorptionis modum seu*

Quæstio.

seu actum melius describat, & quod non contingat liquorem versus interiora oris adducendo seu attrahendo, sicut nos sorbere solemus, subjungit etiam modum quo primo natus infans suctionem auspicatur. *Neque enim, inquit, infans [jam natus] papillam labiis comprimens sugit, ut nos absorbendo, sed quasi deglutire vellet, totam in sauces usque attrahit, linguaque & palati auxilio, tanquam manducando, lac emulget.* Nam dum quasi manducare nititur, talem instituit suctionem, quali usus fuit in utero. De tali suctione etiam intelligendus est Hippocrates, lib. de carn. sect. 8. scribens, foetum in utero sugere.

Riolanus, de fœt. hum. cap. 7. satis imprudenter negat, subalbicantem liquorem in ventriculo foetus contentum esse succum chylosum, sed dicit esse excrementum tertiae coctionis ventriculi, aut pituitam e cerebro delapsam; quorum tamen neutrum bene dici potest; atque hinc illum bene refutat J. Claudius de la Courvee, part. 2. de nutrit. fœt. cap. 12. his verbis. *Si tertio mense, ut ipse notavit, jam illud excrementum, qualecunque sit, generetur in quadam copia, in qua quantitate generabitur in sexto, septimo, & nono mense? & tandem quantum erit proventus hujusce excrementi? sed quantum si mucosus ille humor ventriculo contentus omnium ventrium excrementum sit, ut voluit Fabricius? tantum quidem ut neque ventriculus pueri, neque intestina hunc essent continendo.*

Nutritionem foetus per sanguinem umbilicalem hæc tria imprimis docent.

I. Insertiones vasorum umbilicalium in placentam utero annexam, in quam ex uteri corpore sanguis maternus per aperta vasorum oscula confluit, in eoque præparatur, ac deinde per venam ad foetum deferitur.

II. Sanguinis per venam umbilicalem ad foetum ascendentis magna copia, quæ in vivo animali, injecta umbilico ligaturâ, & inter ligaturam ac placentam venâ læsâ, seu pertusâ mox conspicitur, cum tamen solummodo paucillum per arterias umbilicales tenuissimas à foetu versus placentam propellatur: quippe quadruplo plus è placenta per venam educitur, quam per arterias umbilicales advehitur.

III. Necessitas: foetus enim crescens multo eget alimento, ejus autem tenella ac debilia viscera duntaxat pauca concoquere & præparare possunt, hinc aliquo alimento puriore, & jam ante concocto opus habet, quo prompte nutriri, ejusque admistione etiam alimentum per os haustum in sanguinem mutari possit. Præterea in embryone nonnihil adultiore, non oportebat chylum per os sumptum, solum ad cor venire, sed sanguini venoso permistum, sicut in homi-

nibus natis ad venas subclavias fertur, in iisque & cava sanguini venoso, ac fermentacea qualitate imbuto, permiscetur, atque sic ad cor venit, ut latius dictum cap. 17.

Hanc nutritionem tali modo procedere liquet in ovi gallinæ pullo, cujus os albumini inhæret, umbilicus verò (seu ejus vascula) maxime ingreditur vitellum, qui est loco materni sanguinis in hepate uterino præparati. Quo autem magis increfcit pullos, eo magis primo minuitur albumen interius, seminis foemini vicem verè gerens, quod pullus ore seu rostro ei inhærente paulatim absumit. Eo autem magna ex parte absumpto, etiam consumitur albumen exterius (duplex albumen esse, in ovis ad duritiem coctis apparet) lactei liquoris vicem gerens, & tunc simul manifeste minuitur vitellus, utpote in quem vasa umbilicalia inferuntur, quorum vena est portæ ramus. Quæ certum indicium exhibent, pullum in principio tenellum, ac paucioris alimenti indigum, solo albumine interiore, primò per appositionem, deinde per os nutriri: postea verò, ubi copiosiore eget alimento, tunc etiam nutriri albumine exteriori per os, & simul vitelli succo per umbilicum. Talis quoque nutritionis processus fit in foetu humano, qui ante hepatis uterini & vasorum umbilicalium sufficientem perfectionem, & dum maxime tenellæ adhuc sunt partes, nutritur colliquamento seminali à partium delineatione residuo: postea verò majore & copiosiore alimento egens, hepate uterino jam crescente, & vasis umbilicalibus perfectis, ac lacteis usque in intestinulum & amnion productis, nutritur lacteo liquore per os, & sanguine per umbilicum, atque ita tunc duplici fruatur alimento, ex quibus mistis in corde perfectus sanguis conficitur. In principio enim embryonem satis nutrit seminale colliquamentum, utpote ipsi maxime analogon, & origini ejus proximum, ac jam omnino præparatum, nec multæ coctionis indigum: postea verò cum absumpto colliquamento, foetus lacteo succo nutriendus venit, qui ei minus analogus est, atque hinc coctione aliqua in ventriculo & corde opus habet, tunc necessario isti succo in corpore foetus admisceri debet aliquis firmior nutritivus succus, quadam fermentacea qualitate donatus, qui cum ab ipsius foetus jecore nimis debili concedi non possit, necessario per umbilicum hauriendus fuit ex hepate uterino, ut latius dictum cap. 29. & 30. Eodem modo procedit hæc nutritio ut in plantis: nam ex. gr. salicis ramus in stagnum projectus, primò sola viscida aqua nutritur, & interea, præter folia, radices paulatim ex sese projicit ad aliquam longitudinem, ut tandem terram attingant, eique se infundunt,

Ff

nuent,

Probatio  
nutritionis  
per umbili-  
cum.

nuent, & ex ea tunc alimentarium succum firmiorem assumant, qui salicem largiter excrecere facit. Ita quoque embryo primo nutritur (ut modo dictum) aliquamdiu colliquamento feminali, & serosiore lacteo sueco per os assumpto, atque interea paulatim ab umbilico ejus excrecunt seu projiciuntur radices vasorum umbilicalium (horum primordia cum cæteris partibus solidis in prima formatione fuerunt delineata) usque dum tandem ad placentam (quæ eodem tempore simul increvit) tanquam in terram, se extendant, ex eaque succum alimentarium firmiorem, in ea præparatum, desumant, ac foetui deferant, ad majus & citius ejus incrementum.

Hæc modò dicta jam silentium injungent Riolano, *lib. de fæt. hum. cap. 7.* concludenti, foetum per solum umbilicum nutriri. *Sed cum fætus*, inquit, *aquis undequaque circumfundatur, si ore alimentum sumat, fieri non potest quin simul cum alimento urinam suam resorbeat: propterea observarunt recentiores fœtui quadrimestri nondum ora natesque patere. Non aliam igitur in fœtu alimenti viam agnoscimus, præter umbilicalem venam, qua sanguinem ad hepar deducit.* Verum Riolanus, una cum veteribus, in eo deceptus fuit, quod non observaverit differentiam substantiæ & loci, inter succum lacteum amnio inclusum, & urinam extra amnion, inter membranam urinariam & chorium, contentam, qua de re dictum *cap. 31.* Quod etiam sine ulteriore inquisitione, ut verissimam susceperit propositionem falsam, & ex opinione vel relatu aliorum solummodo conscriptam, quæ præter veritatem traditum fuit, in foetu quadrimestri os esse clausum.

Prædicta etiam satis convincunt Jo. Claudium de la Courvee, qui, *tract. de nutrit. fæt. in utero*, multis rationibus persuadere nititur, foetum sanguine umbilicali nullo modo nutriri, sed solo amnii liquore ali; cujus inanem in hac probatione laborem, quilibet ex dicti tractatus lectione facile percipiet.

Verum antequam ab umbilici historia discedamus, unicum adhuc, quod praxin medicam concernit, inquirendum superest, scilicet, cum hydropici ascitici, ex Hippocratis aliorumque veterum institutione, & experientia assensu, per paracentesin (si modo tempestive instituat) sæpe feliciter curentur, eaque institui soleat paulo infra umbilicum, nonnihil ad latus dextrum vel sinistrum: quaeritur, an non illa sectio tutius fieri possit in ipso umbilico, ut sic intus conclusum serum effluere queat? Andreas Laurentius, *anat. lib. 6. cap. 9. quest. 9.* cum quo planè consentit Bauhinus, *anat. lib. 1. cap. 11.* affirmativam tanto cum fervore defendit, ut istam umbilici sectio-

nem, sine ulla exceptione, alteri longe præferendam judicet, sicque serum inclusum optime & tuto per vasa umbilicalia evacuari posse scribat. Hanc suam opinionem confirmat quatuor historiis agrorum asciticorum, quorum tres sponte rupto umbilico, quartus eodem arte secto vel aperto, perfecte sanati fuerunt. Subjungit deinde non solum sectionis modum, verum etiam diversas rationes, quibus id maxime persuaderi putat; quarum primaria hæc est. *Quo natura vergit, eo ducere oportet; at sæpe per umbilicum eam evacuationem sponte molitur, ergo, &c.* Verum Laurentius in eo errat, quod de hac umbilici sectione tam generaliter loquatur, ac si in omni ascite conveniret. Quippe dicendum quidem quo Natura vergit (si modo vergat per vias lege Naturæ convenientes,) sed cum in ascite Natura rarius vergat ad umbilicum, isque in eo affectu paucioribus tantum intumescat (male, & contra omnem experientiam, id fere in omnibus contingere, scribit Laurentius) hinc etiam non generaliter in omnibus, sed tantum in paucioribus illa sectio convenire poterit. Nam in aliis, in quibus umbilicus sponte non intumuit, ista sectio non modo inutilis, verum etiam damnosa foret, cum periculosum sit solidatum umbilicum secare, versus quem Natura istorum serosorum humorum evacuationem non molitur, indeque gravissimæ convulsiones expectandæ sint, atque etiam gangræna metuenda, præcipue in corpore cacochymo & ascitico. Præterea si sponte, seu vi Naturæ antea non intumuerit umbilicus, etiam postea arte apertus nihil feri è ventris cavitate profundet, quia Natura eò non vergit, ergo tunc talis sectio inutiliter & male, ac cum periculo instituitur. Denique admodum male judicat Laurentius, quod illud serum è tumido umbilico sectione aperto effluens, è vasis umbilicalibus effluat, cum illud longissimè à vero absit. Quippe serum in abdominis cavitate contentum non potest per ulla vias vesicam urinariam ingredi, & sic per eam & urachum ad umbilicum ascendere (longe facilius enim ex ea per vesicæ orificium efflueret) non etiam potest cor ingredi, ex eoque per arterias iliacas & umbilicales eo propelli: non ipsum quoque hepar subire, ex eoque per venam umbilicalem (non obstantibus copiosis ejus valvulis, omnis liquoris ascensum ex hepate versus umbilicum impredientibus) eò deduci: non denique vasa lactea umbilicalia, post nativitatem brevi penitus resiccata, intrare. Ergo per nulla vasa umbilicalia evacuatio illa fieri potest, sed ex ipsa abdominis cavitate, è qua in nonnullis asciticis serum magna copia collectum, pressione musculorum abdominis, nonnunquam se insinuat in umbilicum,

*Digr:ffio  
secunda de  
paracentesi  
in ascite.*

eum, dissolvens eandem viam per quam vasa umbilicalia eò transeunt, unde tunc laxata in umbilico cute, fit tumor aquosus, quo apertò, interius latens aquosum serum effluit, id tamen non sine periculo ægri, cum, teste Hippocrate, talis subita evacuatio sit admodum periculosa, eaque in hoc casu à Medico difficillime fisti possit. Vinculum quidem umbilico circumjicere, & fistulam argenteam ei jam inciso immittere jubet Laurentius, eoque pacto feri rapidum effluxum impediri, idque ad libitum Medici conveniente quantitate emitti posse, existimat. Verum hoc consilium sapit ma-

gis imperitam theoriam, quàm exercitatum praxin ratione suffultam, cum non solum ratio, verum etiam experientia, satis doceat, quàm difficile sit, umbilicum, effluente sero mox concidentem, ligatura constringere, atque etiam fistulam argenteam ei immittere, in eoque detinere: nam si hoc fiat fasciâ lumbis circumjectâ, illa magis anget ægrum: si autem fiat vinculo fistulæ circumjecto (quam vix illic ligari posse modo dixi) tunc illa pars vinculo comprehensa citò morietur, & sic resolvetur vinculum.

## CAPUT XXXIII.

*Quibus partibus differat fœtus in utero, ab homine adulto.*

**P**ost totam fœtus historiam, tandem subjiciendum quibus partibus fœtus in utero differat ab homine adulto. Hæc autem diversitas consistit in diversitate magnitudinis, figuræ, situs, numeri, usus, coloris, cavitatis, duritiei, motus, excrementorum, & roboris partium.

Est autem illa diversitas conspicua, vel in toto corpore, vel in singulis ventribus, vel in artubus.

*Diversitas in toto.*

In toto corpore considerabilis est,

1. Omnium partium magnitudo exigua.
2. Color totius rubicundus.
3. Ossium mollietates, quorum multa cartilaginea & flexibilia adhuc sunt, idque tanto magis, quanto fœtus à maturitate longius abest.

*Diversitas in capite.*

In capite varia occurrit diversitas.

1. Caput ad proportionem reliqui corporis grandius est, & faciei figura inconcinnior.
2. Cranii ossa molliora sunt, & vertex non osse tegitur, sed membrana inducitur.
3. Os frontis divisum est, ut & maxillæ inferioris: os verò cuneiforme quadripartitum.
4. Os occipitis in tria, quatuor, vel quinque ossa distinctum.
5. Cerebrum mollius & fluidius, nervorumque magna mollietates existit.
6. Officulorum auditus mira durities & magnitudo.
7. Dentes intra alveolos delitescunt.

*Diversitas in thorace.*

In thorace non minor quoque diversitas animadvertitur.

1. Mammæ tumentes sunt, ex iisque in recens natis, tam maribus, quam fœmellis, lac serosum, modò sponte, modò levi

pressione exit: nullæ tamen glandulæ satis conspicuæ occurrunt, at papillæ vestigium apparet.

2. Vertebrae spinosæ processibus destitutæ, atque ex tribus distinctis officulis constructæ sunt, quorum mutuus concursus foramen efformat, descendenti spinali medullæ pervium.

3. Cor magnitudine conspectius, auriculisque amplioribus donatum.

4. Duæ adfunt majorum vasorum uniones, in adultis non conspicuæ: scilicet, foramen ovale, quo transitus patet è cavâ in venam pulmonarem, à parte hujus venæ valvula munitum: & canalis ex arteria pulmonari in arteriam aortam protensus, de quibus vide lib. 2. cap. 10.

5. Thymus vasis adnatus, eximia magnitudine, & quasi triplici glandula eminet.

6. Pulmones rubicundi, densi, & sanguinei sunt, atque etiam solito graviores, ita ut aquæ injecti non natent, sed subdant.

In ventre inferiore diversitas in his consistit.

*Diversitas in ventre inferiore.*

1. Vasa umbilicalia abdomen egrediuntur.

2. Ventriculus contractior, sed non vacuus, at lacteo liquore stipatus est.

3. Omentum vix conspicuum aranearum telis simile conspicitur.

4. Intestina septies corpusculi longitudinem æquant, vel superant.

5. In tenuibus intestinis excrementa pituitosa & flava, in crassis verò duriuscula & subnigra, interdum subviridia continentur: cœcum solito amplius est, & sæpe fœcibus refertum.

6. Jecoris insignis moles non solum dextrum hypochondrium replet, sed usque

in sinistrum latus se extendit, & totam superiorem ventriculi partem contegit: quænam differentia sit in vasis, videndum præcedente capite.

7. Lien exiguus est.
8. Folliculus fellis flava viridive bile turgēt.
9. Pancreas insigni magnitudine & candore conspicuum se exhibet.
10. Renes mole vastiores, & quasi ex plurimarum glandularum collectione compositi apparent.
11. Renes succenturiati magnitudine

admodum insignes, renibus non accumbunt, ut in adultis, sed incumbunt, eorumque partem superiorem lato veluti sinu complectuntur.

12. Uretères patuli sunt, & vesica urinæ copia distenta.

13. In scemellis uterū est depressus, tubæ longiores, & testes amplitudine conspicui.

In artubus consistit diversitas,

1. In ossium ténertudine & mollietate.
2. Quod ossicula carpi & metapedii cartilaginea, nec firmiter iuncta reperiuntur.

*Diversitas in artubus.*

## C A P U T XXXIV.

### De situ fœtus in utero.

Vide Tab. viij.

**D**Um fœtum maturum è mortua matre extraho, non possum non mirari, quomodo tantum corpus in tam angusto ergastulo contineri, & se movere potuerit, quod semel inde eductum, nulla arte iisdem angustis rursus intrudi, concludi, aut comprehendere potest. Videndum igitur quo situ in utero depositus contineatur.

Situs in omnibus fœtibus se eodem modo non habet, sed multoties ejus diversitas reperitur, partim ab ipso fœtu, partim à diversitate temporis gestationis & propinquitate partus procedens.

*Situs ordinarius aliquos mensum.*

Caput elatiore uteri parte continetur, brachiis ac tibiis contractis: genua cubitis proxima: manus in nonnullis ad genua, in aliis ad pectus positæ, aliis complicatæ sunt, in his enim aliqua diversitas reperitur. Pedes introrsum sunt reflexi, ita ut plerumque plantis, rarius calcaneis clunes attingant, quo fit ut recens nati tibiae introrsum flexas, pedesque ad interiora incurvatos habeant, quod vitium apta deligatione seu fasciatione, propter partium mollietatem, à mulieribus postea facile corrigitur. Interdum etiam fœtus ad latera procumbit, & quasi transversum situm sibi assumit, quod ab ipsa muliere manu ventri imposita, ut & ex protuberantia laterali ac pondere percipitur.

*Inversio fœtus.*

Sæpe una, duabus, aut tribus septimanis ante partum sese omnino invertit fœtus, & capite deorsum devolvitur (quod etiam ob-

servavit Aristoteles) multoque magis versus inferiora procumbit, atque ita se ad exitum præparat: quæ provolutio brevi quidem tempore peragitur, sed non sine aliqua mulieris molestia, quæ illam mutationem pro certissimo brevi futuri partus signo habere solet.

Circa partum fœtus variis modis situm *Mutatio situm* mutat, dum calcitrando, & sese hac illac *mut.* movendo, exitum quærit. Hinc factum puto quod varii præstantes Anatomici, qui forte in mulieribus hujusmodi tempore extinctis, tales fœtus inspexerunt, non conveniant in descriptione situs fœtus in utero, dum alii brachia, alii crura, aliasve partes hoc illove loco aliter atque aliter inventas describunt.

Fernelius diversum matrum & scemellarum situm esse tradit, & mares dicit faciem suam versus abdomen seu anteriora, dorso vero versus dorsum matris; scemellas autem situ contrario collocatas esse: atque hinc sceminarum cadavera in aquis prona, masculorum supina fluitare seu natare. Quam opinionem Riolanus, ut inanem, non omnino sine ratione irridet.

*Fernelii opinio.*

Carolus Stephanus, refert gemellos *Gemellorum situm.* contrarium situm obtinere, unum scilicet anticam, alterum posticam partem respicere. Verum hæc regula prorsus incerta est, ut ex eo liquet, quod interdum nati fuerint gemelli abdomine, thorace, aut frontibus connati, quod contingere non posset, si semper dorsibus sibi mutuo accumberent.

TABU-





TABULA.VIII.

FIG.I.




FIG.II.




FIG.III.



## T A B U L Æ VIII. EXPLICATIO.

Hæc Tabula exhibet Situm foetus in Utero, ab H. Fabric. ab Aquapend. & G. Bartholino delineatum.

## FIGURA I.

Situm foetus sudori innatantis & placentam cum chorio ei annexo ostendit.

- A. Placenta cui chorion annexa.
- B. Vasa umbilicalia.
- C. Sudor cui innatat foetus.
- DDDD. Quatuor uteri partes.
- E. Collum uteri.
- F. Vagina aperta.
- G. Trunci insigniores vasorum chorii.

## FIGURA II.

Demonstrat situm foetus in utero, qui in aliis tamen variat.

- A. Caput prorum ut nasus inter genua recondatur.
- BB. Nates quibus calcanea applicantur.
- CC. Brachia.
- D. Funis per collum ductus & supra frontem reflexus continuatusque cum placenta.

## FIGURA III.

Situm foetus jam ex utero conantem egredi, monstrat.

- A. Caput infantis.
- B. Pudendum.
- CCCC. Partes abdominis superiores cultello ablatae.

## CAPUT XXXV.

Digressio.

## D E P A R T U.

Quandiu  
foetus in u-  
tero maneat.

**F**OETUS in utero conceptus & formatus, obscurum illud domicilium inhabitat quo usque ad maturitatem pervenerit, id est, quo usque tantas vires acquisiverit, ut e latibulo isto excussus, aeris vim, alimentorumque mutationem ferre possit. Quo autem temporis intervallo maturitatem illam consequatur, & quando partu in lucem edi debeat, disputatur inter doctos. Brutis animalibus certum quidem pariendi tempus à Natura præscriptum esse, quilibet novit, sed sola lis est de homine.

Hippocrates & Aristoteles nullum certum nascendi tempus homini adscribere videntur, nam à mense septimo usque ad undecimum, scribunt legitimum partum fieri posse: cum iisque hac in parte consentit maxima Medicorum cohors. Frequentissime tamen foetus humanus in utero detinetur per integros novem menses, antequam ad justam maturitatem perveniat; quæ tamen nonnunquam etiam septem mensibus absolvitur: atque illis temporibus partus salubres fieri solent. Qui ante septimum mensem excutuntur, immaturi sunt, & rarissime in vita servari queunt, propterea quod vim aeris & mutationem alimentorum ferre non possint. Unde Aristoteles, lib. 7. histor. animal. cap. 4. inquit: *Formæ qui maturius quam septimo mense prodit, nullo pacto vitalis est.* Verum quia hæc Aristotelis regula nonnunquam exceptionem passa fuit,

pro nullo pacto, scribendum censeo rarissime. Nonnullos enim ante septimum mensem natos remansisse superstites, docent Medicorum historiae. Avicenna, lib. 9. de nat. animal. cap. ult. refert se vidisse sexto mense natum, qui bene vixit. Cardanus scribit, filiam Petri Sorani, sexto mense natam adolevisse. Adrianus Spigelius, epist. de incerta temp. part. scribit, se in Zeelandia virum tabellarium novisse, qui urbis Mediburgensis testimonio publico, Magistratus auctoritate conscripto, docebat, se sexti mensis initio editum, & corpore adeo exiguum ac tenellum, viribusque tam debilem fuisse, ut linteis excipi, ac fasciis ligari non posset, sed gossypio excipiendus ac involvendus esset, ut à frigore defenderetur. Nos quoque novimus filiam sextimestrem, cujus caput, cum nasceretur, magnum pomum æquabat, totumque corpus adeo pusillum erat, ut vix contrectari posset à nutrice, nec fasciis, aliisque confectis seu usitatis involucris involvi, quæ postea tamen adolevit, & justam magnitudinem consecuta est, atque etiamnum hodie, quo hæc scribo, corpore & mente sana vivit, annum ætatis circiter decimum octavum agens.

Montanus scribit, se pincernam Henrici Galliarum regis, novisse, qui etsi quinto mense natus fuisset, tamen ad floridam ætatem pervenit. Franciscus Vallesius refert, suo tempore quinquimestrem puellam ætatis duodecimum annum ingressam fuisse.

Ff 3

Sic

Sic etiam Ferdinandus Mena duorum quinto mense natorum mentionem facit: sed hic, procul dubio, intelligendus est finis quinti mensis. Atque ita hæc omnia ex auctoribus fide dignis allata, eorumque testimoniis confirmata, satis docent, interdum foetum, ante perfectam maturitatem expulsum, arte & diligente cura enutrir, sicque in vita servari posse. Verum hæc sunt de raro contingentibus, ex quibus nulla regula concludi potest: admirandum enim est, quod foetus adeo immaturus, pusillus, tenellus ac debilis, superstes manere & adolescere possit.

Octimestres  
nati.

Hippocrates, *lib. de carnib.* etiam octavo mense natis vitam denegat, fortassis quod illud in Græcia plerumque sic evenire observaverit. Cujus rationem putat esse Regius, *medic. lib. 1. cap. 11.* quod cum partus sit quasi critica quædam evacuatio, ille non tuto & salutariter fieri possit nisi mense critico, qualis est septimus: & si illa partus crisis octavo mense contingat, tunc necesse esse, ut valida præternaturalis causa intervenerit, quæ foetum adeo graviter affecerit, ut in vita permanere nequeat. Verum si hic soli menses critici, septimus, decimusquartus, &c. tanquam salutare sint statuendi & observandi, quid dicemus de partu nonimestri, qui non est criticus, & tamen est frequentissimus maximeque salutaris? quid item de decimestri? certè corporis foetus non sit ulla effervescencia, ut sit humorum, qui per effervescenciam statis temporibus ebullientes moventur (ut patet in febribus) & critice erumpunt: ac proinde, cum nulla effervescencia fiat in foetus solidis partibus, etiam non hic, ut in morbis acutis, criticarum evacuationum tempus bonum vel malum observandum, hincque octavo mense natis vita magis deneganda est, quam septimo natis, cum apud nostrates quotidiana experientia doceat, octavo mense natos non minus vivos permanere, quam septimo mense natos, neque ulla sufficiens ratio huic experientie contraria esse possit. Nam si septimo mense nati sint, vel possint esse maturi, quare non octavo nati? & quare hi non æque bene ferent aëris vim alimentorumque mutationem, quam illi? imò quare non melius, cum sint adultiores? frustra huc adducunt nonnulli magnos foetus labores, quibus septimo mense sese exagitat plus, quam aliis temporibus, adeoque delassatur ac debilitatur, ut octavi mensis expulsionem ferre nequeat: quippe hæc somnia sunt, quæ refelluntur ab ipsis mulieribus, passim testantibus se istum supraordinarium motum non magis septimo, quam sexto aut octavo mense percipere. Frustra confugiunt alii ad dierum, horarum, & minutarum numeros, atque foetus exitum certis numeris

alligant, cum incertissimi partus dies numeros istos quotidie illudant. Frustra denique hanc rem explicare nituntur Astrologi per duos atque iniquos Saturni adpectus, haud secus ac si Saturni imperium perpetuum esset, vel saltem nulli octimestres partus fierent, nisi eo regnante, cum tamen sub aliorum benignorum Planetarum dominio tales partus etiam frequenter contingant, qui tunc horum clementia ac benignitate à Saturni injuriis immunes habendi videntur. Præterea quam ignotæ & conjecturales sint astrorum vires, ex incertissimis maximeque contrariis ac fallacibus Astrologorum scriptis & judiciis ubique patet, & quam parum valeant vel efficiant, docet usus: ita ut an quidquam in hæc inferiora agant, à multis haud immerito dubitatum sit: qua de re aliàs pluribus egimus in *tractatus nostri de Peste, lib. 1. cap. 8. in annotat.* Atque hinc quamvis multi in explicatione mentis Hippocratis, *de octavo mense natis, ab eo non vitales pronunciatu*, admodum laboraverint, ejusque effatum multis commentis & veritatis speciminibus exornare ac fulcire studuerint, illa tamen omnia extra Græciam evertit, non solum hodierna frequens observatio, verum etiam auctoritas & experientia, tam antiquorum, quam neotericorum. Nam Galenus, *com. in 6. epid. text. 2.* eos multum errare inquit, qui mensem octavum pro legitimo & naturali pariendi tempore non agnoscunt. Sic etiam Aristoteles, *lib. 7. histor. animal. cap. 4.* octavo mense natos in Ægypto vivere & adolescere scribit: addit tamen, quo Hippocratis verba in meliorem partem explicantur: *Sed locu Græcia multi intereunt, nec nisi perpauci servantur. Unde fit, ut si quis ibi servetur, non octavo mense natus existimetur, sed mulierem sui computi initium latuisse.* Plinius, *lib. 7. cap. 5.* scribit, in Ægypto & Italia octavo mense editos, contra antiquorum opinionem, esse vitales: & Vastiliam octavo mense feliciter enixam fuisse Cæsoniam, postea Caii Principis uxorem. Inter neotericos Bonaventura, tres octavo mense natos incolumes vidit. Sic etiam referunt doctissimum Vincentium Pinellum, una cum sorore gemella, ut & Cardinalem Sfondratum, amboque ejus filios, octimestres primam lucem vidisse. Cardanus, *lib. 1. tract. 3. contradict. 8. & com. ad Hipp. de septimestri partu*, quinque adfert exempla magnatum octavo mense natorum, qui supervixere, scribitque in Ægypto generaliter octavo mense natos vivere. Si tot magnatibus hoc acciderit, facile conicere licet quam multis plebeis, inter quos partus tempus minus accurate observatur, illud ipsum contigerit, & hodie etiam contingat. Riolanus, *cap. 11. ad Fernellii lib. de hom. procreat.* refert, in

Naxo

Naxo insula partum octavo mense felicissime procedere : & Avicennam scribere, quod ille partus in Hispania quoque satis felix sit. In nostro quoque Belgio octimestrem partum satis feliciter succedere, & vitalem esse, modo dictum, idque adeo notum est, ut de eo minimè dubitandum sit. Sic etiam in Gallia, Anglia, Scotia, & septentrionalibus regionibus, rem eodem modo se habere, ex eo satis manifestum esse videtur, quod de nullo talis partus incommodo unquam ex iis locis quidquam auditum sit.

*Causa diversitatis temporum partus.*

Quod autem alii septimo, alii octavo, alii nono mense, in lucem erumpant, id adscribendum diversitati regionum, tempestatum, diætæ, animi passionum, ac temperamenti mulieris, seminis, & uteri, quorum ratione calor in fœtu, modò citius, modò tardius increfcit, atque hinc aliàs citiore, aliàs tardiore ventilatione opus habet.

*Zachia opinio.*

Paulus Zachias, lib. 1. *quest. med. legal. quest. 1.* videtur Hippocratem & Aristotelem erroris incusare, quod tot incertos menses salubris partus terminos constituent; putatque, imò multis rationibus probare nititur, etiam homini, sicut bruis animalibus, omnino certum pariendi tempus à Natura præscriptum esse, scilicet finem noni, seu principium decimi mensis, & omnes partus, qui vel supra, vel infra illum terminum contingunt, esse partus præternaturales, vi causæ alicujus morbificæ suscitatos, atque hinc fœtus talibus temporibus natos, esse debiles, vel morbosos. Verum si res ita se haberet in iis qui infra nonimestrem terminum nascuntur, tunc certè à causa illa morbifica qualicunque, vel ante, vel post partum, male afficeretur mater aut fœtus, cum tamen in partu septimestri, qui satis frequens est, rarissimè talis mala affectio conspiciatur, & mater æque bene se habeat, & fœtus æque bene vivus permaneat, ac si ad finem noni mensis esset expulsus, nec magis morbosus & invalidus sit, quam solent esse alii fœtus nono mense prodeuntes, utpote qui & ipsi non raro debiles & tenelli existunt, nec à morbofo statu magis immunes comperiuntur, quam septimo mense nati. Quantum ad illos quos dicit supra illum terminum nasci, certe bono jure hætenus à multis dubitatum fuit, an hoc unquam verè contingat, & mulier longe post istum terminum pariat. Interim tamen, stante ista dubitatione, apud multos, tanquam firmissima regula, verosimilibus quibusdam rationibus investita, magnorumque virorum auctoritatibus confirmata, adhuc hodie statuitur, nonnullos fœtus undecimo, duodecimo, decimotertio, vel decimoquarto mense nasci posse, & legitime natos fuisse,

*Partus septimi.*

idque propter imbecillitatem fœtus, vel matris, uteri frigiditatem, alimenti paucitatem, aliamve similem ob causam, ob quam statutum à Natura partus terminum differri vel extendi posse, multi clarissimi Philosophi sibi ipsis & aliis persuaserunt. Hippocrates, lib. de octimestri partu, undecimestres nasci conceptis verbis testatur. Aristoteles, loco supra citato, etiam admittit mensem undecimum, sed non ultiores: Qui diuturniores, inquit, quam undecimo mense nasci videntur, latere putantur; id est, ut ante dixerat, eorum matres conceptionis initium latet. Petrus Aponensis, aliàs Conciliator dictus, referente Cardano, refert se ipsum undecimo mense natum fuisse: quasi verò ille ipse tunc matris computationem & suæ conceptionis initium, exactè in utero matris cognovisset. Homerus *Odysf. A.* meminit duodecimi mensis. Plinius, lib. 7. cap. 5. fœminam quandam mense decimotertio peperisse refert. Avicenna, lib. de anim. & lib. 3. sen. 21. scribit etiam mense decimoquarto fœtum partu editum fuisse. Ejusdem rei exemplum invenitur apud Alexandrum Benedictum, lib. 25. de curand. morb. cap. 23. Sileo hic fœtus viginti tribus mensibus, imò etiam toto biennio, triennio, vel quadriennio gestatos, quorum ex variis auctoribus historias (proh dolor, nimis vanas & mendaces) adducit Jo. Schenckius, *observat. lib. 4.*

Verum inania sunt hæc omnia, nullis firmis rationibus innitentia, nullis veris experimentis probata, sed ex solis dicacularum muliercularum verbis descripta, quibus nonnulli nimis creduli docti viri aliquod tomentum adjecerunt, ut sic quibusdam rationum verosimilium fulcris hanc rem fulcirent. Nam sicut certissimum duco, ad paucos dies ultra nonimestrem terminum aliquibus de causis partum differri posse, ita prorsus incredibile existimo, illud ad unum, multo minus ad plures menses, posse fieri; cum in quacunque mulieris constitutione incrementum caloris (de quo paulo post dicetur) spatio novem mensium in fœtu tantum fiat, ut ventilatione per respirationem opus habeat, eamque ob causam illi necessario ex uteri angustis demigrandum sit. Atque ita manifeste patet, ex falso muliercularum relatu, nimis citam conclusionem instituisse istius opinionis gravissimos defensores. Nam re ipsa penitus considerata, hic latet anguis in herba, scilicet, aut nequitia in muliere, aut simplex error in computatione. Nequitia: si mulier liberis carens, mortuo marito, ut ejus hæreditate & bonis frui possit, cum alio viro consuecat, ab eoque gravida fiat, & sic undecimo, duodecimo, decimotertio, vel decimoquarto mense post obitum mariti, natum

*Solutio dubii.*

natum infantem defuncto marito adhuc adscribat; quæ nequitia tam frequens est, ut ubique terrarum per omnes curias judiciales peritrepit: & hæc causa est, quod fere in solis hujusmodi viduis tales ferotini partus contingant, rarissimè verò in iis mulieribus, quarum mariti cum iis vivunt & concumbunt. Simplex error etiam in computatione latere potest, quia mulieres ut plurimum, ingravidationis initium computant à prima menstruorum suppressione: atqui fieri potest ut menstrua propter aliam aliquam causam duobus vel tribus mensibus ante conceptionem fuerint suppressa; tunc si mulier à primo suppressionis tempore computationem suæ imprægnationis incipiat, necessario errabit, & sic per insontem errorem, putabitur infans nasci undecimo, vel duodecimo mense, qui tamen nascitur more solito ad finem noni mensis. Aristoteles, loco ante citato, eundem errorem existimat per uteri inflationem contingere posse. *Latet mulieres, inquit, conceptus initium, si, cum ante inflatus fuerit uterus, ut sæpe contingit, post coierint, atque conceperint, hoc enim principium esse sui conceptus existimant, quod simile indicium attulit.*

*Partus sextimestris.*

Eundem ob errorem in computationis principio commissum, nonnunquam infantes etiam quinto vel sexto mense nasci putantur, qui tamen nono procedunt in lucem: propterea scilicet, quod nonnullis mulieribus, primis duobus tribusve imprægnationis mensibus menstrua statis periodis adhuc fluant, postea verò subsistant, à quo suppressionis tempore si tunc computationis initium faciant, graviter errabunt, & tertium quartumve imprægnationis mensem pro primo vel principio habebunt, atque sic infans facile putabitur sexto mense nasci, qui tamen nascitur nono, qui error innotescit manifeste ex ipsius foetus justa magnitudine, & virium robore.

*Quæ contingant circa partum.*

Instante partu foetus sese convolvit, caputque declinans pudendo offert, reliquum corpus in sublime distendens: quæ tamen inversio, ut modò dictum, nonnunquam una aut altera ante partum septimana peragitur. Tunc etiam orificium uteri, instar rosæ maturæ, incipit dehiscere & se dilatare, atque exituro foetui viam parare. Præterea infans vehementius calcitrando, & sese hac illac movendo, membranas, quibus involvitur, dirumpit, æque ita humores iis conclusi foras effluunt, qui partes obscenas laxant, viasque lubricas faciunt, sicque transituro foetui facilem exitum procurant. Rarissimè contingit ut foetus cum ambientibus membranis integris atque illæsis excludatur, quod tamen semel à me visum fuit in foetu debili.

*Causa expulsiōis foetus.*

Ista calcitratione molestia infertur utero, qua in cerebro menti communicata, mox

per nervos copiosi spiritus animales demandantur ac emittuntur ad fibras uteri constriCTORIAS & musculos abdominis, quibus simul contractis, fit valida foetus expulsio.

Foetus autem capite primo prodit, si *Partus naturalis.* secundum naturam prodeat, ut inquit Hippocrates, *lib. de nat. puer. & lib. de octimest. part.*

Quocunque alio modo se ad exitum offert, ille partus non naturalis dicitur, *Non naturalis.* & tanto periculosior est, quanto pejore figura foetus se offert. Nam si unum crus vel brachium offert, non procedit partus, nisi eo membro versus interiora retruso, & foetu inverso. Si duo crura simul offerantur, partus procedere potest, sed cum molestia. Si clunes offerantur, sæpe non procedit partus: interdum duplicatus & valde difficulter prodit foetus, cum periculo. Si latera, vel venter offerantur, impossibilis est partus.

Quomodo maturus & magnus foetus per *Transitus per pelvim.* ossum pelvis angustias, musculis aliisque partibus infarctas, transire possit, miratur Galenus, explicare non audet. Fit illud, quia ossa pubis, sacrum, & coxendicis, laxatis cartilaginibus, à se mutuo nonnihil recedunt, ut latius infra à nobis describitur, *lib. 9. cap. 16.*

Quidquid sit, in partu quocunque tempore fiat, Natura foetum ex utero per *Insolite partus via.* vaginam uterinam foras expellit, vel saltem expellere nititur, eaque sola naturalis via est excussioni foetus dicata. Dico, *vel expellere nititur*, quia interdum contingit, illo transitu quacunque de causa impedito, foetum sponte Naturæ expelli non posse, sed arte chirurgica debere extrahi, idque, aut per illam jam dictam viam, ope manus, live obstetricis, live chirurgi, vel etiam adhibitis uncis (quam operationem nos ipsimet in multis mulieribus felicissime tentavimus) aut per viam alienam, scilicet per sectionem in abdomine & utero factam, quæ vulgo *Partus casarius* appellatur, de qua chirurgia egregium tractatum conscripsit Franciscus Rouffetus. Rarissime autem visum est ipsam Naturam sua sponte per vias alienas foetus exclusionem moliri: cujus tamen casus memorandam historiam describit Bartholinus, *lib. de insolit. part. viis*, de muliere, quæ primo ex umbilico tumido ac dissecto, deinde ex apostemate infra umbilicum aperto, ac deinde ex ulcere in ilio sinistro oborto, plurima foetus humani officula, non simul & semel, sed (quod admirationem magis augeat) diversis vicibus, imò & diversis multumque inter se distantibus annis, excrevit, eaque tam multa, ut pro gemellorum ossibus sufficere potuerint. Cui historia *ibidem* longam splendidamque explicationem subjungit: ac præterea ex aliis variis Medicis scriptoribus, multa alia adducit

adducit exempla foetuum putridorum, ex umbilico, hypochondriis, iliis apertis, ano, aliisque insolitis viis exclusorum, quorum omnium historias hic recensere, quia nimis longum foret, eas scire cupientes ad dictum Bartholini librum dimittimus. Interim admiranda & stupenda sunt hæc Naturæ opera, cum in tali casu foetus necessario per ruptum, ulceratum, aut quocunque modo laceratum uterum primo in abdominis capacitatem delabi; vel forte in tuba conceptus (de quo conceptu supra dictum cap. 24. non longe à fine) ex ea, propter membranæ tubæ tenuitatem, disrupta, eodem devolvi debuerit, antequam sua putredine ac corruptione istas exulcerationes in abdominis partibus inducere potuerit: sed quia variae tales mulieres pristinae sanitati restitutæ sunt, illud omnium maxime mirandum, quod interna illa uteri vel tubarum ulcera aut vulnera sponte sanata fuerint, atque etiam quod foetus dicto loco putrescens, intestina, vesicam, mesenterium, aliaque abdominis viscera non plane corrupuerit, sicque misellis illis foeminis mortem citius, quam partum adeo insolitum induxerit.

Post cognitionem temporis partus, atque etiam viæ per quam foetus naturaliter exit, & insolitarum viarum per quas rarius & præter naturam, vel arte totus eximitur, vel sponte Naturæ putridus expellitur, redeundum ad causas partus, inter quas, modo dixi, in partu naturali primam esse foetus vehementiorem commotionem ac calcitrationem. Verum hic jam illud necessarium inquirendum videtur, quidnam scilicet foetum ad istam calcitrationem impellat.

*Causa calcitrationis futus.* Illud tribus causis vulgo adscribi solet, scilicet angustia loci, corruptioni alimenti, & ejusdem defectui: quarum nulla tamen hujus motus, & per consequens, partus causa esse potest.

*Non loci angustia.* Loci angustia nihil huc facit, multæ enim sunt mulieres, quæ cum magnos antea pepererint foetus, postea parvum, & deinde rursus magnum pariunt: isti autem parvo ad ulterius incrementum & diuturniorem in utero stationem sufficiens debuisset fuisse illa loci capacitas, in qua antea magnus foetus hospitaverat, & postea iterum alius magnus contineri potuit. Ad hæc, secundum foetus incrementum increfcit ejus domicilium uterus (ut dictum cap. 29.) quod si aliqua de causa forte non fiat, tunc diu ante maturitatem moritur, & non partu naturali, sed intempestivo, id est, abortu ejicitur.

*Non alimenti corruptio.* Ab alimenti corruptione nihil probari potest, cum nulla ejus sit corruptio, & æque bonum suppedietur in fine, quam in principio ingravidationis. Si quis dicat, foetus urinam alimento admisceri, illum

remitemus ad *precedentia capita* 30. 31. 32. in quibus satis docui, urinam cum alimentario liquore non misceri, sed inter chorium & membranam urinariam, cap. 31. descriptam, separatam servari. Præterea foetus à corrupto alimento non fieret alacrior ad calcitrandum, sed languidior & debilior, atque sic minus calcitraret, imò potius deficeret. Sunt qui hic insuper, cum Regio, addunt, alimentum ob depravationem foetui ingratum fieri, qui tale ingratum alimentum respuens, vehementer calcitrat & exitum quærit. Verum hic nullam alimenti depravationem fieri, jam demonstratum. Præterea hæc sententia præsupponit acutum foetus judicium, quo de alimenti bonitate vel pravitate, gratitudine aut ingratitude dijudicare potest; quale judicium an tenello foetui insit, cuilibet judicandum relinquo: video foetus primo natos vinum hispanicum, lac, oleum amygdalarum dulcium, syrupum aliquem, paxillum cerevisiæ, pulverem lapidis bezoartici (nonnullæ enim mulieres hoc promore habent, ut infanti nato aliquid per os statim exhibeant, quo morbos aliquos præveniri posse arbitrantur) aliasve res indifferenter sine ullo judicio, aut ulla electione, sumere, nec unam magis respuere quam alteram: ita ut in utero de alimenti gratitudine aut ingratitude etiam parum judicare posse videatur.

Alimenti defectus, vel ejusdem paucitas causa majoris calcitrationis esse nequit, utpote cujus ratione potius languor & immobilitas foetus induceretur: nam deficiente victu languent omnia corpora viventia, minusque & debilius moventur, ac tandem deficiunt & moriuntur: longe abest ut hanc ob causam alacrius moverentur. Præterea videmus multos infantes primo in lucem editos, satis fortes & validos esse, & tamen primis duobus tribusve diebus nullo, aut interdum paucissimo uti alimento, cujus si in utero defectum habuissent, non fortes, sed languidi & debiles forent, & jam nati conveniens oblatum alimentum avide assumerent. Adde, quod in iis mulieribus gravidis, quibus ob paupertatem aliamve causam cibi deficiunt, foetus non modò non calcitret, sed ita langueat ut ejus motus in utero prorsus sentiri nequeat: oblatis verò copiosioribus alimentis, foetus iterum reficiatur, & alacriter in utero moveatur. Quod certum indicium est, majorem foetus motum fieri à sufficiente alimentorum copia, non verò ab ejusdem defectu, utpote qui languorem potius induceret, & partum non promoveret, sed retardaret ac impediret.

Claudius de la Courvee, cum his de causis partum minimè procedere animadvertet, aliam commentus est, scilicet excrementorum

G g

mentorum

*Non alimenti defectus.*

*An excrementorum copia.*

mentorū nimiam in foetu redundantiam, quam tandem adeo magnam fieri dicit, ut foetus se deplendi, & ea excernendi necessitate pressus, tantopere calcitret, donec foras expellatur. Verum hoc Courvei commentum convellunt ratio & experientia. Illa, quæ docet nihil ob stare quo minus foetus in utero excrementa sua exoneret: urinam enim inter chorium & membranam urinariam deponi, satis demonstratum est cap. 31. Fœces autem alvi paucissimas redundare posse, ex eo patet, quod foetus paucos, vel nullo solido alimento in utero fruatur. Hæc, quæ docet foetum jam natum nonnunquam tota prima die non mingere, & sæpe tridui spatio nihil meconii, nullasve alvi fœces exonerare, quod tamen statim in lucem editus facere deberet, si vera foret Courvei opinio.

Vera causa  
majoris calci-  
trationis  
& partus.

Igitur longe alia debet esse causa majoris calcitrationis foetus, & hinc subsequens partus, eaque est refrigerii, seu respirandi necessitas. In principio exiguus est embryonis calor, qui instar exiguae favillæ primo emicare incipit, & non refrigerio, sed augmento opus habet. Hôc paulatim crescente, etiam foetus actiones & motus crescunt. Tandem verò calor ille adeo augetur, ut ventilatione & refrigerio indigeat: quo denegato, incipit foetus à nimio calore paulatim magis magisque angī, & propter molestam anxietatem sese tandem acriter movere ac calcitrare, sicque forti isto motu uterinos humores ad validam effervescentiam, irritatione molestam, incitare, ac sibi exitum & liberiores aërem querere. Illud autem caloris incrementum æque contingit in parvo foetu, qui satis diu in utero hæsit, quam in magno, atque hinc cujuslibet maturi foetus, sive magni, sive parvi eadem est causa majoris calcitrationis & partus.

Similitudo.

Eodem modo hæc res se habet, ac si hyberno frigidissimo tempore homo aliquis admodum refrigeratus, & præ frigore totus rigidus, ac sui prorsus impos, in angusto cubiculo undequaque occluso captivus deponeretur, in eoque cubiculo ignis luculentus esset extructus. Primò calor istius loci exilem residuum calorem corporis captivi suscitaret & augeret. Hinc captivus paulatim ad se rediret, & sui compos fieret, isque calor eum egregie reficeret & oblectaret, atque à frigore rigida & immobilia membra paulatim agilia & mobilia faceret, eumque tandem hilarem ad ambulandum & edendum exciteret. Sed postea calore corporis ultra debitam mediocritatem paulatim crescente, licet optima & satis copiosa alimenta ad refectionem ipsi adessent, tamen inciperet angī, & præ anxietate nimioque calore sudare. Denique, crescente, præ calore; magis anxietate,

se acriter quaquaversum moveret, ac cum violentia januam effringere, & sibi exitum parare niteretur, ut sic liberiores aëre, ac necessario refrigerio potiri posset.

Sic etiam in foetu refrigerii & respirationis necessitas, unica & vera majoris calcitrationis (qua membranae disrumpuntur, & uterus ad expulsionem irritatur) ac prima partus causa est. Cum enim cordis calor paulatim adeo increvit, ut tandem fervidiorem sanguinem, bis jam dilatandum (scilicet in utroque ventriculo semel) generet, illum per respirationem in pulmone refrigerari necesse est: quæ respiratio si nimis diu denegetur, suffocatur infans, sicut id multoties contingit, cum in difficili partu diutius hæret, antequam expelli possit. Quod autem respirandi necessitas foetum ad calcitrationem impulerit, ex eo patet, quod simul ac natus liberiores aëre fruitur, mox respiret, & sæpe ejulet, ad quam respirationem non impellitur ab aëre circumstante, sed à refrigerii necessitate, præter quam nihil aliud est, aut etiam excogitari potest, quod illum respirare cogit.

Harveus, lib. de partu, hanc refrigerii necessitatem non putat esse causam calcitrationis & partus, utque hoc probet, duas quæstiones (quibus contrarium doceri putat) viris doctis solvendas proponit. Prima hæc est: *Quomodo, inquit, embryo post septimum mensem in utero matris perseveret? cum tamen eo tempore exclusus statim respiret, imò verò sine respiratione ne horulam quidem superesse possit: in utero autem manens ultra nonum mensem, absque respirationis adminiculo vivus & sanus degat?* Ad hujus solutionem dico illud ipsum quod ante monui, scilicet, pro diversitate temperamenti mulieris, feminis, uteri, & victus, calorem (cujus extremus incrementi in utero terminus est finis noni mensis) in aliis foetibus citius, in aliis tardius crescere, qui si septimo mense ad tantam magnitudinem ascenderit, ut refrigeratio per respirationem necessaria sit, tunc foetus calcitrando se expedit, ac foras erumpit, & talis foetus usque ad octavum vel nonum mensem vivus & sanus in utero superesse nequit (etsi Harveus hoc fieri posse putet) qui enim usque ad nonum mensem in utero permanet, illius calor mense septimo vel octavo eo usque nondum increvit, ut refrigeratione indigeat. Altera Harveii quæstio hæc est. *Qui sit, inquit, ut foetus in lucem editus, ac membranis integris opertus, & etiamnum in aqua sua manens, per aliquot horas citra suffocationis periculum superstes sit, idem tamen secundis exutus, si semel aërem intra pulmones attraxerit, postea, ne momentum quidem temporis absque eo durare possit, sed confestim moriatur?* Ad hanc bimestrem quæstionem respondeo: priorem partem forte de foetu immaturo, per abortum ejecto,

Harveii opi-  
nio, & duæ  
quæstiones.



ejecto, veram esse posse, propter exiguum ejus calorem, nullius refrigerii indigum: sed de foetu maturo, justo tempore edito, minime veram esse, utpote in quo jam tantus est calor, qui necessariò respiratione refrigerandus est, ac proinde talis foetus membranis inclusus, non potest vivus superesse ad aliquot horas (quod præter veritatem supponit Harveus) sed ne quidem ad semi horam, imò vix ad horæ quadrantem, & minus. Hoc ab experientia novērunt nostri rustici, scilicet, si pullus equinus aut vaccinus ex utero ejectus, non per integram horam, aut semi horam, sed duntaxat paucillum, aut per horæ semi-quadrantem, & minus, membranis suis inclusus maneat, illum suffocari, atque hinc, ut tale damnum effugiant, solent etiam curam habere, ut aliquis parienti equæ aut vaccæ adsit, qui ejecto foetu mox membranas dirumpat, quas alioqui, nemine præsentē, nonnunquam ipsa mater ore dilacerat (quod in plerisque aliis brutis viviparis matres ordinariè statim faciunt) ut sic foetum suum expediat, hoc si non fecerit, suffocatur. Præterea concessio, quod jam negatum, scilicet foetum per horam, aut semi horam intra oclusas istas membranas vivere posse, hoc tamen nostram sententiam non evertit, nam aer externus ilico refrigerat aërem in membranis conclusam, quo ita refrigerato foetus levi respiratione fortassis aliquantisper uti posset: non tamen diu, quia per expirationem emissus ē pulmone calidus aer cum vaporoso halitu, brevi totam membranarum capacitatem replet, atque ita foetum, frigidioris aeris indigum, suffocari necesse foret. Ad posteriorem quæstionis Harveii partem dico, quod, quousque nullus aer in pulmonem admissus fuit, foetus adhuc aliquamdiu sine respiratione vivere possit, quia in densum pulmonem paucissimus sanguis ē dextro cordis ventriculo impelli potest, atque hinc dilatatus in dextro ventriculo sanguis, non defertur in sinistrum, sed per canalem quo arteria pulmonaris in foetum jungitur sortæ (de quo vide lib. 2. cap. 10.) infunditur sortam, in quam adhuc aliquamdiu & minus calidus ac spirituosus jacti existens, profluere potest sine refrigeratione, quia in illa de novo non dilatatur. Sed cum semel per aeris inspirationem substantia pulmonis dilatatur seu explicatur, ejusque vena aëre replentur, tunc solutis & subactis vasculorum compressionibus, copiosus sanguis spirituosus ē dextro cordis ventriculo in aperta omnia pulmonis vascula libere impellitur, qui nisi statim per frigidum aeris inspirationem nihil condensaretur, non posset ad sinistrum ventriculum deferri, in eoque rursus dilatari, sed totum pulmonem infunderet & hujus rei causas

vide lib. 2. cap. 13.) sicque animal suffocaretur: atque hæc causa est, quod foetus, cum semel respiravit, postea vix tantillum sine respiratione vivere possit. Ac proinde explodendum certe illud, quod ex Jo. Paterfonio Hayn, citat ephemeridum Medico physicarum Germanicarum scriptor Bauschius, ipsi ab Hungarico quodam pastore Gerges his verbis scriptum. *In Hungaria, inquit, femina partui vicina, anno 1669. incepit parere fatum, ut jam extra uterum totum exereret caput: sed foetus ejulatu bis terve edito, in uterum fuit abreptus, per duas septimanas ibi adhuc hæsit, & dein legitimo partu fuit exclusus.* Hanc historiolum à veritate prorsus alienam esse, vel cæcus videat: nam cum foetus suum caput extra uterum exeruit, si non statim, vel proprio uterique nisu, vel manu obstetricis, reliquo corpore foras procedat aut extrahatur, mox circum ejus collum adeo constringitur pudendi seu vaginæ orificium, ut citissime extingatur: ob summam verò capacitatis uteri angustiam, nunquam versus interiora regredi possit, idque imprimis edito prius bis terve ejulatu; hoc credat Judæus apella, & simul etiam credant, quo usque volent, pastor Gerges & Paterfonius Hayn, qui ambo sibi talem nugacem fabellam à dicibus quibusdam mulierculis persuaderi permiserunt, atque eandem quoque, tanquam verissimam, describere ausi sunt.

Denique, hic fortassis adversus antedictam nostram sententiam aliquis objiciet, non esse verosimile quod respirationis necessitas foetum impellat ad majorem calcitrationem, cum foetus in utero, pro magnitudine sui caloris, satis respiret. Vellin-  
*Objectio.*  
gius enim, motus auctoritate Hippocratis, lib. de princip. & lib. de nat. pueri, scribit, foetus in utero conclusi pulmones blanda dilatatione aliquid aeris haurire, ejusque rei indicium præbere illius vagitum in utero sæpius auditum. Hujus vagitus exempla & historias describunt, Albertus Magnus, lib. 10. de animal. Libavius, lib. de vagitu uterino. Solinus, cap. 3. Camerarius, memorab. med. cent. 11. 16. & 17. Sennertus, lib. 4. prax. part. 2. sect. 6. cap. 8. Bartholinus, histor. anat. rar. cent. 1. hist. 1. Deusingius, part. 3. genes. microcos. sect. 1. Putat etiam doctissimus Velthufius, tract. de generat. cap. 11. in isto casu aërem ad loca, in quibus infans degit, penetrare, eumque per inspirationem ab infante attrahi. Imò Robertus Boyleus, in experim. physie. mathem. exercit. 41. sibi notissimo exemplo eandem vagitum confirmare videtur. Novi, inquit, quandam Dominam, ea cum paucis hinc annis gravida esset, apud me conquesti fuerant ejus amici, illam infantuli sui vagitu plurimum multoties perterresactam fuisse.  
*Vagitus in utero.*

G g 2

Verum

## Refutatio.

Verum errarunt omnes, quotquot de infantis respiratione & vagitu in utero scripserunt. *Primo* enim, historiae hac de re notatae pleraeque descriptae sunt ex relatu mulierularum aliorumque quorundam imperitorum hominum, qui aut sibi ipsis forte nugae quasdam imaginantur; aut saepe etiam studio hujusmodi aliquas fallacias aliis persuadent: idque eum in finem, ut *vel* commiseratione quadam commoveant divites (ut plurimum hi vagitus facti notantur in mulieribus pauperculis & misellis, divitum subsidio egentibus) ad lautas eleemosinas conferendas: *vel* ex iis aliquid mali ominis hariolebant, sicque fictis suis vaticiniis nomen sibi concilient apud populum. Vix autem virum aliquem fide dignum & doctum hujusmodi vagitum bona cum attentione audivisse legimus. *Secundo*, certum est, neque respirationem, neque vagitum in utero fieri posse sine aëre illic praesente: sed per quas quæso vias aër eo penetrabit? Os enim uteri, testimonio Hippocratis & Galeni, in praegnantibus tam arctè clauditur, ut ne quidem specilli aciem, nec ullius aëris, aut aquae (in balneo) introitum admittat: quod licet nonnulli in dubium vocent, & solummodo de levi aliqua conniventia explicent, tamen à nobis verissime visum est anno 1649. quo ex petitione Senatorum judicialis curiae provinciae Ultrajectinae, in pago Wouwenberch, praesentibus Marefcalco Vermeerten, Praetore, & compluribus chirurgis, aliisque variis spectantibus, aperuimus, inspeximus, & examinavimus ancillae veneno interemptae cadaver, in quo, praeter alia, invenimus uterum à longitudinis manus foetu tumidum, ejusque osculum non modo arctissime contractum, sed glutinoso ac tenaci humore pituitoso tantopere obseratum, ut nusquam tenuis stylus immitti posset, nisi majore quadam vi per gluten illud adigeretur. Illud ipsum etiam vidimus, & Medicinae studiosis demonstravimus in alia muliere circa septimum mensem gravida, repentino fato extincta, mense Decembri, 1665. Ad hæc, praeter istam osculi uteri obserationem, etiam foetus suis membranis tam exacte inclusus est, ut neque liquor intus contentus exstillare, neque externus aër introrsum penetrare possit. Hanc difficultatem videns Gualterus Needham, *de format. fæt. cap. 3.* postquam vagitus uterini, in illustri foeminae utero, ut ipsi narratum erat, auditi historiam recensuit, scribit aërem quidem extrinsecus ad foetum accedere non posse, sed per humorum intus delitescensium fermentationem illic produci, sicut flatus in ventriculo, intestinis, aliisque partibus generantur. Verum hac positione nonnihil concessa, quomodo, quæso, foetus vagitum factururus (qui sine

## Observatio.

aëre fieri nequit) istum, vel quemcunque alium aërem ore hauriet, cum innatet amnii lacteo liquori, eoque os continuè oppletum habeat? si inspiraret, suffocaretur, quippe dictus liquor ori inhærens, necessario, una cum isto aëre per asperam arteriam in pulmonem delaberetur, ejusque bronchia statim repletur. Certè mirum est, quod non animadverterint viri docti, qui de vagitu uterino scripserunt, sonum istum in ventre mulieris gravidæ obauditum, quem forte adstantes pro vagitu foetus habuerunt, excitari à flatibus per intestina, mole foetus compressa & coarctata, rugientibus; sicut mirabilis interdum sibulus à ventis, fenestrarum angusta foraminula cum impetu transeuntibus, obauditur; qualem me, cum pluribus aliis adstantibus, aliquando audivisse memini, qui exactissime referebat alta suspiria & gemitum hominis valde mœsti, aut in periculo & summa anxietate constituti, ita ut omnes mecum adstantes exterrerentur, & putarent manes aut dæmones aliquos nobis adesse, qui gemitus istos, infortunii alicujus praenuncios, illic facerent; cum tamen post semi horæ investigationem tandem à me inventum fuerit, tortuosum quoddam exiguum foramen, per quod ventus transiens, gemibundum & plorabundum istum sonitum efformabat, eoque foramine obstrueto, mox cessabat. Atque sic etiam mirum videri non debet, si flatus per compressorum intestinorum angustias transeunt, interdum edant sonum instar vagitus infantis: qualem saepe instar perfectissimi rugitus ranarum, aut sibuli serpentum, hac de causa in ventre inferiore obaudiri, nemo non novit. Optimè igitur, & verè docet Aristoteles, *lib. 7. histor. anim. cap. 10.* foetum non vagire antequam utero egrediatur.


Hic nonnullis fortassis grave dubium adhuc incidet, nimirum, si propter respirandi necessitatem foetus fortius calcitrando partum promoveat, & sic naturam ad excussionem irretet; quidnam in causa sit; I. Quod interdum foetus admodum debilis, vix calcitrare potens, & nullius respirationis indigus, mense quinto, sexto (horum exempla ante dedimus, & quotidie obvia sunt) aut septimo (quo licet multi maturi, satisque fortes & vitales, ac respiratione egentes nascantur, non raro tamen contingit, ut etiam aliqui immaturi, valde debiles, & aëris alimentorumque mutationem ferre impotentes, in lucem prodeant) ex utero proturbetur. II. Quod foetus in utero extinctus seu mortuus, atque hinc nulla respiratione egens, partu ejiciatur: cum tamen in hoc utroque casu nulla respirationis necessitas ad magnam calcitrationem, sicque uterum ad expulsionem irritare possit. Respondeo ad *primum*: nonnunquam

*Causa abortus, & partus mortui fœtus.*

nunquam foetus in utero sanum quidem esse posse, pro ratione temporis quo ibi formatus subsistit, quamvis adhuc immaturum, id est, adeo debilem, ut aëris alimentorumque mutationes ferre nequeat; atque talem foetum interdum abortu ejici, sed non propter respirationis necessitatem, aut calcitrationem majorem (quæ foetus maturi, & partus legitimi causa sunt) at longe alia de causa, scilicet, quia propter copiosam pituitæ affluxum (secundum Hippocratis 5. aphorif. 45.) aut ob magnam corporis mulieris agitationem, vel concussionem, vel propter rapidam, inordinatam, validamque spirituum & humorum commotionem (ut in ira, & magno terrore) vel ob aliquem morbum, placenta ab utero dissolvitur; vel foetus extinguitur, qui tunc pondere fit utero gravis & molestus, eumque ad expulsionem irritat, utque illa molestia dispellatur, mox copiosi spiritus è

cerebro ad uteri fibras constrictorias & abdominis musculos defluunt, qui & illas, & hos contrahendo seu constringendo, foetum expellunt. Ad secundum dico, extincto seu mortuo foetu, communiter pro aliquo tempore cessare parturientis labores, quia cessat calcitratio & motus ipsius foetus; eosque labores rursus non irritari, nisi vel ab exhibitis medicamentis validâ humoribus uterinis inductâ fermentatione, acriter emoveantur: vel ex putrescente foetu, aut placenta dissoluta, aut retentis lochiis geniti acres humores per se acriter effervescent, vel foetus mortui pondus & corruptela utero singularem molestiam exhibeant, eumque sic, mediante spirituum animalium copiosiore influxu, ad expulsorios partus labores & fortem excussionem rursus incitent.

De partu qui contingit post mortem puerperarum, in puerperio extinctarum, supra latius dictum cap. 25. ad finem.



## ANATOMES

## LIBER II.

## DE

## Medio ventre, seu Thorace.

## CAPUT I.

## De Thorace, in genere.



Ost descriptionem infimi ventris, culinæ totius corporis, in qua alimentorum primæ fiunt coctiones, sordiumque inutilium separationes, nunc perveniendum ad medium ventrem, seu ad penetralia & solium Regii visceris, cui excocta & emundata alimenta, tanquam delitiosa cupedia, offeruntur, ut ex illis basilico suo afflatu nectar toti Reipublicæ microcosmicæ salutare conficiat, idque per arteriolarum rivulos omnibus partibus distribuatur.

*Thorax.*

Medius autem venter vulgò **Thorax**, *ἡ στήθος*, *salio*, quia cor saliens continet, dicitur, estque illa cavitas quæ superius claviculis, inferius diaphragmate, utrimque costis, parte antica Sterno, postica dorsi ossibus circumscribitur: cujus anteriora Sternum & Pectus, posteriora Dorsum appellantur.

*Constructio.*

Constructio ejus partim ossea est, partim carnea. Ex parte ossea esse debuit, ut expansus maneret thorax, ne per molliem carnosarum partium concidentia fieret; sicque nobilissimum viscus cor, cum pulmone, comprimeretur, & in motu suo impediretur. Ex parte carnea esse debuit, ut commode moveri posset in respiratione, qua cor omnino carere nequit. Utque expansio illa servaretur, & simul motus convenienter perageretur, non ex uno, sed ex pluribus ossibus componi, eaque ad faciliorem motum cartilaginibus coarticulari, & non tantum singulis muscoli interjici, sed omnibus etiam multi superfsteri debuerunt.

*Figura.*

Figura thoracis fere rotunda, antrosum & retrorsum, nonnihil depressa, atque in longitudinem convenientem extensa est.

*Amplitudo.*

Amplitudo aliis major, aliis minor est, atque mulieribus, & præcipue virginibus, multo minor solet esse quam viris, propterea quod hi calidiore corde & sanguine præ-

diti, atque etiam gravioribus laboribus occupati, majore egeant respiratione, pulmonumque dilatatione, ut sanguis fervidus è dextro cordis ventriculo in pulmones impulsus, citius in iis refrigeretur. Angustia autem thoracis semper suspecta est: quia cum in angusta cavitate pulmones, dum respiratio fit, non satis libere moveantur, identidem fortius impingunt in circumstantes costas, atque hinc, quia per se sunt partes valde molles, ex longo isto in costas impulsu, paulatim flaccescunt, ac debiles evadunt, eorumque valis ista collisione ruptis, contingit hæmoptysis, & à sanguine in spongiosis eorum cavernulis restagnante ac corrupto gignitur ulcus, cujus mox individuus comes succedit tabes, cum febre lenta. Hanc ob causam imprimis curagenda est in infantibus, ne iis thorax fasciis nimis arcte constringatur, sicque costarum incrementum, & dilatationis thoracis augmentum impediatur, ob quem errorem nimia angustia thoracis ab ipsis incunabulis non paucis generatur. Contingit interdum in junioribus, ut ipsa Natura fortior angustam capacitatem thoracis sponte dilatet, & costas aliquas flectendo, atque è loco naturali dimovendo, gibbum protrudat, sicque pulmonum motum & respirationem liberiores faciat. Verum ut hæc deformitas declinari possit, solent artifices aliqui istos gibbos commodis instrumentis paulatim comprimere, atque ita deprimere ut evanescant, & non appareant amplius; quæ curatio hic apud nos familiaris est. Sed tunc multoties observavi, quod tali modo curati gibbosi, ob reductam nimiam thoracis angustiam, evaserint asthmatici, & brevi post hæmoptoici, sicque tandem in phthisin incurabilem inciderint & perierint. Quam ob rem gibbosis plerumque consilium damus, de non curando gibbo, utpote cum quo vivere præstat, quam eo ablato vel curato mori.

*Angustia suspecta.*

*Observatio.*

Constat hic medius venter ex partibus continentibus & contentis.

Conti-

Partes continentes.

Continentes sunt vel communes, vel propriæ. De communibus supra dictum, lib. 1. cap. 3. & 4.

Continentes propriæ, sunt muscoli thoracis, descripti lib. 5. cap. 3. 4. 5. 6. 7. Ossa varia, Sternum, dorsales vertebrae, costæ, scapulæ, claviculæ, quæ omnia describuntur, lib. 9. cap. 11. ad 16. marmæ, diaphragma, pleura, mediastinum.

Contentæ sunt, Cor, cum suo pericardio, pulmo, cum tracheæ portione, œsophagi major pars, portio truncorum arteriæ aortæ & venæ cavæ, thymus, multaque minora vasa.

Porro collum, quia huic ventri, tanquam ejus appendix, insistit, partibus hujus ventris etiam annumerari solet.

## CAPUT II.

## De Mammis, &amp; Lacte.



**M**ammæ duæ, tam viris, quam mulieribus, pectori medio, utrimque una, supra musculum pectoralem humerum adducentem, insternuntur, idque tegunt, ac corporis venustatem perficiunt.

Nomen.

Has Græci uno generali nomine *μῆστας*, foeminarum verò speciali nomine *μαστὲς* vocant: Latinis etiam **Mammillæ**, & **Ubera** appellantur: quamvis nonnulli velint *Mammæ* mulieribus, *Mammillas* viris, *Ubera* brutis propria esse.

Magnitudo.

Magnitudo in viris exigua, in mulieribus excellentior est, propter necessarium lactationis usum. In his tamen magnitudinis quoque diversitas conspicitur: quippe ante mensium eruptionem, & in vetulis, parum aut nihil protuberant: intermedia verò ætate aliis magis, aliis minus tumentes sunt, pro ut mulieres sunt, vel gravidæ, vel non gravidæ, item vel non lactantes, vel lactantes, his enim tumentioribus opus est, quam illis.

In variis Indiæ locis, ut in regno Senegæ, insula Arnabonis, aliisque, tantæ magnitudinis mammæ in mulieribus inveniri traduntur, ut ad imum usque ventrem protendantur, & elevatae in terga reflecti queant. Hic Ultrajecti antehac nutricem vidimus, cujus tanta erat mammarum magnitudo, ut eas ipsamet exfugeret, & si infans ejus humeris incubisset, ei papillam commodè offerre potuisset. Admodum monstruosa fuit illa mammarum magnitudo, de qua Bartholinus, *hist. anat. cent. 3. hist. 46.* scribit: *Mulier, inquit, Helsingorensis primaria, tam amplas & ponderosas non ita pridem mammæ circumtulit, ut ad genua propenderent: onerosam molem sedendo genibus suffulciebat.*

Magnitudinis consideratio.

Mammarum autem magnitudo imprimis consideranda venit Medico, cum de eligenda nutrice judicium faciendum est. Hac de causa Moschio, antiquus Medicus, scribit, mediocres mammæ semper in bona nutrice

eligendas esse, cum grandes lac copiosum non generent, & parvæ frigiditatem denotent. Verum etsi frequenter, res ita se habere possit, non esse tamen perpetuam regulam, docet experientia. Quippe multas novimus exiguis mammis præditas mulieres, quibus singulis imprægnationis temporibus mammæ mediocriter intumescunt, & post puerperium toto lactationis tempore lac copiosum profundunt, atque rursus ablactato infante, ad priorem parvitatem redeunt. Alias quoque vidimus non paucas magnis multumque tumentibus mammis donatas, quibus lac admodum copiosum generabatur: imò communis est vulgi opinio, magnas mammæ esse lactis feraciores, quam parvas seu tenues. Hoc in vaccarum uberibus se ab experientia novisse putant rustici, qui propterea vaccam lactantem empturi, multo majus pretium impendunt pro tali quæ magnum uber habet, quam pro alia quæ habet parvum aut mediocre.

Efformatæ sunt binæ, patim ut idonei alimenti proventus geminæ soboli sufficeret, partim ut unâ morbo aliove casu impeditâ, nutritionis functionem altera sufficienter perageret.

In medio pectore (non in abdomine, ut brutis) collocatæ sunt, ad lactationis commoditatem, ut inter ulnas genetricis detento infantulo magis obviæ forent. Alias hujus rei ineptas rationes (referente Buxtorfio, *Syn. Jud. cap. 3.*) commenti sunt Rabbini; quippe Rabbi Abba mammis superiorem pectoris regionem concessam esse tradit, ut puer cordatus & prudens evadat, & intellectum è matris corde sugat. R. Jehuda id factum scribit, ne puer matris aut nutricis pudenda videre cogeretur. R. Mathana verò ne in loco sordido sugeret.

Figura hæmispherica est, & substantia mollis maximeque albicans in foeminis (Riolanus notat, quod illa in puerperis & lactantibus sit rubicunda sub axillis, quod nos tamen hætenus observare non potuimus) in vaccis autem aliisque brutis, minus albicans, & quasi leviter nonnihil flavescens.

Compo-

*Glandula.* Componuntur ex multis glandulosis corporibus, magnitudine diversis, variis tubulis & ductibus inter se coeuntibus, multaque affusa pinguedine junctis & compactis, quæ simul membrana carnosæ succinguntur, & subjectis musculis adnectuntur. Riolanus & Whartonus, contra autopsiam, hanc glandularum multitudinem negant, & totam mammam ex uno solo glanduloso corpore, in nullos distinctos globos diviso, constare tradunt; & interim concedunt, in mammis male habentibus globulos distinctos percipi posse: qui certe non perciperentur in ægris, nisi etiam in sanis mammis, minus tumidis, adessent.

*Glandula magna.* Glandularum una magna in medio sita est, quam reliquæ minores circumstant: etiam vasorum lacteorum plexus infiniti glandulis interjiciuntur, quibus mediantibus non solum lacteus succus ad omnes deferretur, verum etiam minores suum lac in magnam glandulam effundunt. Præterea in ipsis glandulis pori sunt amplii & copiosi, in quibus, tanquam in cellulis, lac usque ad suctionis tempus asservatur, nisi fortè ob nimiam copiam aut tenuitatem ex iis sponte citius effluat.

*Papilla.* Magnæ glandulæ superstat **Papilla**, quæ corpusculum est teres ac fungosum, tenui cute investitum, multisque foraminulis pervium.

In hanc glandularum lactei ductus terminantur, per ejusque foraminula lac, tanquam per tubulum, in os infantis, suctione, vel pressione infunditur.

Est exquisiti sensus, atque in ea ex levi grata contrectatione voluptas, ex dura verò dolor percipitur. Præterea ex contactu & suctione flaccescere erigique potest, instar glandis penis.

Colorem habet in virginibus rubrum, in lactantibus lividiorem, in effœtis subnigricantem.

Magnitudinem obtinet variam; in nonnullis fructum mori, in plurimis fructum rubi æquantem, in aliis minorem, lactationis tempore magis prominulam, quam extra lactationem.

*Arcola.* Circulus ei circumjectus **Arcola** nuncupatur, quæ in virginibus pallida, in prægnantibus & lactantibus fusca, in vetulis nigra conspicitur.

*Mammæ vas.* Mammæ quintuplicia habent vasa.

1. **Nervos** ab intercostalibus superioribus, qui ad papillam copiosiores delati, acutiorum ei sensum tribuunt. 2. **Arterias** ad nutritionem: interiores ab arteriæ magnæ ramo subclavio: exteriores ab axillari. 3. **Venas**, ad sanguinis à nutritione residui reductionem, longe majores & plures quam sunt arteriæ: easque geminas, è mammarum interioribus & exterioribus

excurrentes ad subclaviam & axillarem venæ cavæ ramum, in eumque se exonerantes. Per has in nutricibus interdum nimia lactea materia à mammis deferretur ad subclavias, eodem modo sicut chylus per ductum chyloferum thoracicum, ac propterea imprimis hæ venæ tam numerosæ & magnæ sunt, quia scilicet non solum à nutritione residuum sanguinem, verum etiam in lactantibus partem redundantis lactei liquoris ad subclavias deferre debuerunt: qui etiam liquor in ablactatione infantis residuus, in mammis non corrumpitur, sed per has venas eodem deferretur. 4. **Vasa lactea.** 5. **Lymphæ ductus.**

Arteriarum & venarum interiorum à subclaviis descendantium (quæ **Mammariæ** dicuntur) utrimque una versus inferiora sub musculis rectis abdominis prorepat: quibus ab infimo ventre obviam veniunt totidem arteriæ & venæ ab epigastricis, quæ cum prioribus sub medio dictorum musculorum per anastomosis coire dicuntur, per easque maximam consensum uterum cum mammis fieri, & sanguinem ab utero versus mammas pro lactis materia deferri, antehac creditum fuit. Verum horum vasorum concursus merè fictitius est, illum enim nec ipsimet unquam invenimus, nec alii nobis demonstrare potuerunt: interdum quidem fines eorum propius ad se invicem accedunt, sed nunquam uniuntur. Præterea circulationis sanguinis cognitio dictam opinionem jam dudum refutavit. Hac de re vide etiam supra, lib. I. cap. 5. & infra, lib. 6. cap. 3.

Lymphatica vascula in mammis adesse, *Lymphatica vascula.* non est quod quis dubitet, sed anne tam numerosa illic sint, atque illa se observasse putat Whartonus, de eo aliquantum dubitari posset. Verosimile est, quia lactea sæpe liquorem lacteum valde aquosum continent, illum hinc deceptum etiam multa lactea vascula pro lymphaticis habuisse, atque sic horum copiosiorum numerum descripsisse. Aquoso autem lacteo succo replentur illa lactifera vascula, cum mulier lactans in ediam passa, multum aquosi potus aut alimenti assumpsit, atque tunc etiam lac, quod è mammis ejus exprimitur, vel exsugitur, valde aquosum est.

Vasa lactea, ab arteriis & venis diversissima, glandulis mammarum plurima interjecta cernuntur, ab inferiore parte toto ambitu enata, ac in mammarum centro coeuntia, quorum tamen communio & continuïtas, cum ductibus chyloferis intra corporis truncum latentibus, hæcenus Anatomicorum diligente inquisitione manifesta fieri non potuit: quoniam in cadaveribus, licet recenter strangulatis, hi aditus, seu communionis exiles ductus delitef-

delitescunt, haud secus ac feminis viæ è testibus in parastatas, atque è vesiculis seminariis in urethram, alique similes meatus, per quos Natura frequentes humorum metastases in viventibus moliri videmus. Dubitandum tamen non est, illos in interioribus partibus, (Castellus putat à ventriculo, Deusingius à pancreate, ego à ductu chyliifero thoracico.) per membranas & musculos non minus ad mammas transire, quam arterias & venas. Conspicui tamen non sunt, sed delitescunt, quia chylosus succus in iis non subsistit, nec magis detinetur, quam urina in ureteribus, sed compressione musculorum respiratoriorum & partium per quas transeunt, citissime propellitur, per easque transit: eodem modo sicut lactea mesenterii vascula, chylo in receptaculum effuso, citissime evanescunt, neque rursus conspiciuntur, antequam chylo iterum turgeant, qui cum etiam non diu in iis commoretur, tantum brevem eorum conspectum permittit. Neque mirum videri debet, hos minimos lacteos ductus, versus mammos extensos, visum effugere, cum ipse ductus chyliiferus thoracicus, satis magnus secundum spinæ longitudinem excurrens, è tot seculorum curiosissimis ac perspicacissimis Anatomicis, nec videri, nec inveniri potuerit, quem tandem nostro tempore casus magis, quam ars aut diligentia patefecit, qui casus etiam vasa lymphatica, antehac à præstantissimis quibusvis Anatomicis prætervisa, detexit. Fortè aliquando similis casus eodem modo hos chyliiferos mammarum ductus offeret: quos interea tamen adesse, licet oculis non pateant, ratio & usus, seu effectus, satis docent, eosque sub venularum nomine describit Hippocrates, cum, *lib. de nat. puer.* dicit, *in mulieribus à partu mammarum venulas ampliores factas, pinguedinem* [id est, pinguem chylum] *à ventre trahere, è qua lactis generatio emergit.* Quorum etiam non dubitandam præsentiam, etsi non omnium, tamen quorundam oculatissimorum Anatomicorum autopsia confirmavit. Antonius Everardi, *tract. de ortu animal.* in cuniculo lactante manifestam vasorum lacteorum deductionem ad mammas observavit. *Horum,* inquit, *ductuum nonnulli ex trunco descendente oriundi, excurrentes super musculos abdominis, subter pinguedinem, glandulosa mammarum substantia materiam lactis suggeriebant, qui tubulos postmodum manifestos satù constituebant, ex quibus lac in communem canalem deducitur, perque papillam exhauritur.* Ita etiam Pecquetus, *diff. de lact. thor. exper. 4.* Monspelii, anno 1654. coram experientissimo Riverio, invenit ac demonstravit in catella lactante, prope tertiam costam superiorem, lacteum canalem ad mammas pertingentem, è quo satis magna

lactis copia efferebatur: quod experimentum sæpius iteravit in catellis lactantibus, pari semper lactis uberrimi ex rupto vasculo effusione, quoties juxta primas costas thoracis ab exterioribus partibus sectionem inciperet. Ex bifurcationibus hunc ramulum procedere antea animadverterat, qui non subclavio canali inferebatur, sed quasi furtim versus axillam, inter thoracis musculos, divertebat. Non minorem quoque Jo. Theodorus Schenckius, referente Bartholino, in cane lactante dissecta, surculum lacteum pleno cursu extra abdomen ad ubera tendentem, conspexit, qui compressus succum suum in papillam eructabat, largèque exstillabat. Ludovicus de Bils, in *belgica apologia contra Jo. van Horne*, depingit quidem vascula quædam à circulo lymphatico in collo sito, versus mammarum glandulas descendentia, quæ lactea esse putat, sed erravit, non distinguens inter vasa lymphatica & lactea, ut latius dictum *lib. 1. cap. 12.* Ita ut, præter rationem, etiam dictorum virorum autopsia nos securos faciat de vasorum lacteorum ad mammas productione.

Sicut Antonius Everardi in cuniculis invenit tubulos ex descendente trunco protensos ad mammas, quæ istis animalibus inferiore loco sitæ sunt, ita videntur in muliere potius ex ascendente thoracico trunco nonnulli ramuli ad mammas, in pectore sitas, protendi. Hoc liquet in Secretarii *Observatio.* nostri uxore, puerpera quatuor aut quinque septimanarum, quæ casu, dum animum huic speculationi attentius applico, in praxi nostra occurrens, conquerebatur se admodum parum lactis in mammis habere, & si infans fortius sugeret, se dolorem valde molestum à mammis ad dorsum, circa regionem inter scapulas mediam, sed paulo humiliorem, extensum sentire, & ejus quoque aliquem leviusculum sensum usque ad lumbos percipere: infante verò non surgente, nihil tale sentire. Procul dubio hic fuere aliqua impedimenta, quorum ratione vasa lactea ad mammas non habuere liberum transitum, atque hinc facta suctione in superiore eorum parte, & chylo è ductu thoracico non satis copioso subsequente, à suctione ista aliquis dolor excitatus fuit à mammis usque ad ductum lacteum thoracicum: ut ex eo imprimis liquet, quod quantumvis sese per suctionem infantis postea excrucietur illa mulier, tamen non nisi pauxillam quantitatem lactis in mammis colligi sentiret, atque hinc infantem alteri nutrici demandare cogeretur. Illud ipsum etiam animadverti in uxore collegæ mei Pauli Voet, Professoris Juris, quæ mense Septembri 1664. puerpera, conquerebatur se mammarum suctionem ægerrime ferre, utpote à qua ipsi dolor molestus excitabatur,

Hh

tur,



tur, usque ad dorsum inter scapulas, indeque ad lumbos se extendens. Similia alia exempla postmodum adhuc varia observavi. Quæ omnia ductuam lacteorum mammariorum derivationem à ductu lacteo thoracico procedere, verosimile faciunt.

*An chylus per arterias feratur ad mammas.*

Ex modò dictis jam satis liquet quam longe à verò absint illi, qui statuunt, non per vasa lactea, sed per ipsas arterias chylum una cum sanguine ad mammas deferri, ex iisque è sanguine rursus separari, ac in lac mutari. Quemadmodum Thomas Consentinus (cui quo consentit Gualterus Needham) *progymnasm.* 6. scribit, lac secerni è sanguine per arterias thoracicas mammariasque delato, idque probare nititur: 1. Per multiplices arteriarum ramificationes, quæ in mammarum glandulis observantur. 2. Per anastomoses vasorum epigastricorum, cum vasis mammariis. 3. Per singularem magnitudinem arteriarum mammariarum, in lactantibus conspicuam. Verum hæc argumenta tam nervosa non sunt, ut tanti ponderis novum figmentum sustinere, atque à lapsu præservare possint. Quippe multo copiosiores arteriarum ramificationes in cerebro, ejusve membranis, pulmone, aliisque plurimis partibus conspicuæ, nullum unquam lacteæ aut chylosæ materiæ in sanguine arterioso contentæ, ex eoque rursus uspiam separandæ, indicium, quod scio, præbuerunt: sic etiam anastomoses vasorum epigastricorum cum mammariis, nihil hac de re docent, cum eas inveniri à multis quidem traditum, sed à nullis demonstratum sit, ut paulo ante diximus. Quantum ad magnitudinem arteriarum in lactantium mammis conspicuam, illa non fit propter lacteæ materiæ, ut ille existimat, copiam, sed propterea quod glandulæ lacte tumentes nonnihil comprimant arteriarum fines, ita ut sanguis in eas influens non tam libere & citò, ut extra lactationem solet, ex iis effluere ac circulari possit, unde tunc paulo majore copia in iis detentus, eas plus solito tumidiusculas apparere facit. Sed miror quod Consentinus etiam nullam mentionem faciat venarum, quæ in lactantibus longe copiosiores & majores conspiciuntur quam arteriæ, cujus rei causam & rationem paulo ante docuimus. Plura quidem minoris momenti argumenta citato loco adducuntur à Consentino, sed quia illa in sequentibus hic illic à nobis refutantur, nunc plura verba de iis facere, necesse non videtur. Atque ita penitus concidit dicta nova sententia, insistens falso ac planè stramineo fundamento, quo statuitur, præter sanguinem, etiam chylum, actum talem, per arterias & venas ferri ac circulari, posteaque rursus ex eo separari. Cujus fundamenti primaria fulcra penitus destruimus, hujus lib. cap. 12.

Officium mammarum primum est, lac conficere: secundarium verò pectus contegere, ab eoque frigus externum arcere, & in mulieribus etiam ad venustatem facere.

*Officium.*

Est autem Lac succus albus & dulcis, ad infantis nutritionem in mammis præparatus.

*Digressio prima.*

De materia è qua gignitur lac, maximus est doctorum virorum dissensus. Cum enim per arterias sanguis spirituosus, ac per vasa chylosa chylus ad mammas feratur, & præterea plurimæ in iis venæ conspiciantur, dubium incidit, an ex sanguine arterioso, vel an ex venoso, an ex menstruo, vel alimentari optimo, aut minus bono, vel an ex chylo lac generetur.

*Lac quid sit.*

*Materia lactis.*

Aristoteles, lib. 7. *histor. anim. cap. 11.* & lib. 4. *de gener. anim. cap. 8.* nec non Galenus, lib. 4. *de usu part. cap. 8.* & lib. *de venasect. advers. Erasistr. cap. 5.* aliisque variis locis, docent materiam lactis esse sanguinem menstruis temporibus excerni solitum. Quam opinionem videntur hausisse ex male percepto Hippocratis *aphorismo 39. sect. 5.* ubi inquit divinus senex: *Si mulier, qua neque gravida est, neque peperit, lac habet, ei menstrua defecerunt.* Hos sequuntur fere omnes, cum veteres, tum recentiores Medici ac Philosophi, his præcipue argumentis inducti.

*An generetur ex sanguine menstruo.*

1. Quod sufflaminatis menstruis lac generetur, non tantum in gravidis & puerperis, sed nonnunquam etiam in virginibus, qualium lactantium virginum exempla describunt, Vega, Gorrhœus, Schenckius, alique.

2. Quod lactantibus menses subsistant, vel si illi largiter fluant, tunc lac plurimum imminuatur, aut prorsus deficiat.

3. Quod quibus per ætatem deficiunt menstrua, iis lac in mammis non gignatur.

Verum hæc sententia, quantumvis præstantissimorum virorum, atque etiam veterum auctoritatibus munita, clarissimis rationibus evinci breviter poterit: ex ea enim sequuntur hæc quinque absurda.

I. Cum lac generatur, necessario subsistere menstrua: At contra millies vidimus matres & nutrices, quibus menstrua statis periodicis, & satis copiosa profluebant, lactis tamen copiam, vel plane non, vel vix quidquam imminutâ, quod nobiscum testabuntur quilibet in praxi exercitati Medici. Quod autem in lactantibus frequenter etiam subsistant menstrua, hoc non fit quia lac ex iis generatur, sed quia magna chyli copia ad mammas quotidie confluit, & parcius ad cor lactantis pervenit, unde sanguis ad corporis quidem nutritionem necessarius, sed nulla ejus redundancia, singulis mensibus evacuanda, generatur.

II. Tunc

II. Tunc maxime redundare lac, cum sanguinis menstrui subsistentis maxima est copia, minime cum exigua est copia. Atqui primis gestationis mensibus, cum sanguis ille in mulieribus maxime redundat, & ab embryone minime absumitur, tunc nihil lactis generatur: ultimis vero mensibus, cum grandior foetus superfluum sanguinem maxime consumit, ejusque minimum redundat, tunc lac in mammis succrescit. Præterea, in puerperis, dum lochia copiosa fluunt, lac copiosum in mammis generatur, eoque crescente, lochia tamen non illico subsistunt.

III. Tantum lactis generari, quantum dicti sanguinis redundat. Verum nemo non facillime animadvertit, quam inæqualis sit illa proportio paucissimi sanguinis, qui singulis mensibus redundat, & copiosissimi lactis quod quotidie à muliere redditur. Ad hæc, quid dicemus de ovibus, vaccis, capris, aliisque similibus brutis, quibus nulla unquam fluunt menstrua; & tamen lac copiosum quotidie profundunt.

IV. Lac solummodo generari in mulieribus maturis, quibus ex sanguinis redundantia menses fluunt, vel fluere possunt. Sed obstant infantes recens nati, non foemellæ modò, sed & masculi, è quorum mammis lac per aliquot dies, imò interdum septimanas effluere, aut levi pressione exprimi, multoties vidimus: idque ipsum etiam observavit Cardanus, de subtil. lib. 12. & à Joachimo Camerario visum refert Schenckius, observat. lib. 2. & quilibet in recenter natis, qui animadvertere velit, videre poterit. Obstant etiam vetulæ sicciores, quibus propter ætatem menstrua naturaliter deficiunt, quas, licet rarò, nonnunquam tamen lac copiosum habuisse, præter Aristotelem, lib. 3. histor. anim. cap. 20. etiam observationum medicarum scriptores testantur: exempla habent, Bodinus, Henricus ab Heers, alique.

V. Lac nunquam generari in maribus, quia ipsis nullus menstruus sanguis redundat. Atqui contrarium testantur; Aristoteles, lib. 1. hist. anim. cap. 12. & lib. 3. cap. 20. & Avicenna, lib. 3. can. sen. 12. tract. 1. cap. 3. qui ambo docent etiam mares interdum lac copiosum profundere. Qui novum orbem lustrarunt, referunt se illic regiones quasdam invenisse, in quibus viri penè omnes maximam lactis copiam in mammis habebant, eoquæ etiam infantes nutriebant. Horum testimonia experimentorum exemplis confirmant, Vesalius, lib. 5. de corp. hum. fabric. cap. 18. Eugu-  
bius, lib. de lacte. Alexander Benedictus, lib. 3. anat. cap. 4. Bartholinus, cent. 1. observ. 27. Santorellus, Cardanus, Gemma, Donatus, & plures alii. Hic non valet illa distinctio, quam adferunt Bauhinus,

lib. 2. anat. cap. 3. Spigelius, anat. lib. 9. cap. 2. & Ludovicus Mercatus, tom. 1. lib. 1. quest. 124. dicentes, istud lac viro-  
rum non esse verum lac, sed succum lacti similem, atque hinc à verò lacte distinguendum. Nam verosimile non est tot oculos testes & prudentissimos viros, quibus non fuerunt cucurbitina capita, in eo ita potuisse decipi, ut hoc non animadvertissent. Præterea generatur etiam in mammis, & à lacte muliebri plane nihil differt, in colore, odore, sapore, & substantia, eoque infantes æque bene nutriti fuerunt, quam muliebri, ut testantur historiae.

Alii ut has omnes prædictas difficultates effugerent, statuerunt, non quidem necessario ex sanguine menstruo, sed tamen ex sanguinis alimentarii qualibet redundantia lac in mammis generari. Verum hi dum Caribdim evitant incidunt in Scyllam, nam variae rationes hanc opinionem penitus evertunt.

I. Impossibile est mulierem lactantem posse vivere cum tanta sanguinis jactura. Si homini alicui per paucos dies continuos sanguinis una libra, vel semi libra detrahatur, idque sine summa corporis emaciatione, virium prostratione, & tandem vitæ jactura fieri nequeat: aut si menstruorum excretio modum excedens summam debilitatem inferat; an verosimile erit mulierem aliquot lactis ex sanguine generati libras (nam sæpe lac iis abundat, & gemellos lactant) quotidie per multos menses, vel integros annos, sine ulla emaciatione, aut virium vel sanitatis jactura depromere posse? Si dicas, nonnunquam illas adeo debilitari, ut cogantur infantes ab lactare: Respondebo, illud non fieri propter copiam sanguinis in lac mutati, sed propterea quod chylus nimis copiosus ad mammas feratur, in iisque in lac mutetur, ejusque paucior pars ad cor feratur, & in sanguinem transeat, cujus defectum necessario subsequitur totius corporis emaciatio cum debilitate.

II. Si semen (quod è sanguine gignitur, ut latius docuimus lib. 1. cap. 28.) modica quantitate excretum, corpus universum debilitet, an non multo magis lac, quotidie magna quantitate emulctum, vires debilitabit? atqui hoc non fit.

III. Si post quamcumque magnam & sæpe iteratam sanguinis evacuationem, succedant, virium lapsus, cachexia, hydrops, alique morbi frigidi, an lactantes mulieres, quibus talis quotidiana lactis evacuatio sæpe per integros annos fit, ab iis erunt immunes, & (quod ipsis fere ordinarium est) meliorem corporis habitum induent?

IV. Si omnis subita mutatio sit periculosa, quare, quæso, mulieres, cum infantes ab lactant, subito tunc deficiente copiosa lactis, & per consequens etiam sanguinis

An generatur ex sanguine alimentario.

sanguinis evacuatione, non protinus incidunt in perniciosam plethoram? quod tamen non fit. Dices fortè, quod nonnullæ tunc minus edant. Respondeo, illas tamen non esse inappetentes, imò plerasque æque bene & multum edere post ablactationem, quam antea. Si dixeris, sanguinem istum superfluum, periodicè evacuari per menstrua: non valebit illa ratio, quippe nimis minutilla & rara, imò nullius fere momenti erit illa evacuatio, respectu tantæ copię sanguinis in lac mutati, quæ antea quotidie profusa fuit.

V. Si sanguis majore copia per arterias in partes influens (nam omnis influxus fit per arterias, & refluxus per venas) partefque distendens, pulsationes in iis validiores & majores faciat, quare illud ipsum non contingit in mammis lactiferis tumentibus? in quibus tamen nulla major pulsatio percipitur.

VI. Si sanguis ad mammas copiosus affluens, in iis extravasaretur, & moras traheret ad formam lactis induendum, non in lac, sed in pus mutaretur, & abscessum pareret, sicut id in mammarum abscessibus contingere solet.

VII. Legibus Naturæ non datur reditio seu regressus à privatione ad habitum. An ab hac regula solus chylus excipietur, & albedinem, aliasque suas qualitates, exceptâ solâ fluiditate, exuet, ut sic in sanguinem transeat, postea sanguinis qualitates iterum deponitur, & antiquas, seu priores chyli qualitates iterum suscepturus? an sanguis ad solidarum partium nutrimentum jam excoctus, meliorem exuet conditionem, & denuo in alimentum lacteum mutabitur, postea à foetu in sanguinem rursus excoquendum? Natura nihil frustra instituit, nec in operationibus suis progreditur & regreditur per eandem semitam, nec etiam coctionis aut maturationis motus unquam retrogreditur versus cruditatem, sed ulterius semper progreditur ad majorem perfectionem: atque hinc etiam Natura ex chylo non facit sanguinem chylo meliorem, ut hic postea mutetur in lac, quod sanguine crudius ac deterius, & necessario in sanguinem rursus mutandum est. An fructus maturus potest de novo revirescere, ut postea iterum maturecat? Sic etiam sanguis ex chylo confectus non potest retrogredi in lacteum chylum, in sanguinem denuo excoquendum. Dicit fortè Plato, Naturam hic fucum facere, quo à cruore vescendo hominem abalienaret, alioqui lac à sanguine non differre nisi colore. Sed quid opus fuit isto fucum in infantibus recens natis, qui, dum sugunt, colorem lactis non vident, & si viderent, non cognoscerent? quare idem ille fucus fit in leonibus, lupis, tigris, leopardis, &c. quibus crudelitas

naturalis est, atque hinc talis fucus minimè necessarius existit? Neque est quod hic quispiam objiciat, dum semen generatur, sanguinem eodem modo transire in substantiam iterum mutandam: nam tunc certè non mutatur in chylosam aliamve se deteriore ac crudiore substantiam, rursus ad formam sanguinis reducendam, sed in longe meliorem, è qua scilicet non aliquæ partes nutriuntur, sed solidæ foetus partes omnes primitus generabuntur & formabuntur.

VIII. Cum alimenta assumpta non nisi multis horis in sanguinem mutari possint, qui fit, ut post cibum & potum assumptum, nutrices statim, vel brevi post perferant copiosum liquorem ad mammas confluere, antequam ex assumptis sanguis generari potuerit? Quænam etiam ratio est, quod lac facultatem & qualitatem (nam datis nutriti purgantibus, citius purgatur infans quam nutrix) ac odorem ingestorum citissime contrahat, & sensibilibus retineat, cum talia in sanguine, aut sanguine nutritis partibus percipi nequeant? nisi forte longo usu ac tempore, multotiesque iterata similis rei ingestione, coctione, & præparatione talis aliqua mutatio seu qualitas paulatim sanguini, solidisque partibus eo nutritis, sit impressa, ut contingit in pulchra illa puella venenis nutrita, quæ Alexandro Magno oblata fuit, cujus totum corpus longo venenorum esu & usu adeo venenatum evaserat, ut quemlibet cum ea concumbentem inficere & occidere potuisset. Quod autem lac qualitates ingestorum brevissimo temporis spatio recipiat, optime probat Gualterus Charleton, *lib. de æconom. animal.* his verbis, *Pra cateris, inquit, omnibus maximi ad lactearum viarum demonstrationem momenti est ejusmodi experimentum. Nutrici propinetur lac croci tinctura leviter imbutum, & intra semi hora spatium (paulo plus minusve) lac à mamma refundet, odorem, saporem, imò & colorem quoque croceum planè referens.* Idem refert observationem ex Prospero Marino, de muliere Romana, cujus è papilla chirurgi manu extractus fuit cichorei surculus, quem pridie comederat: sicque probat, non tantum chylum, sed etiam res crassiores nonnunquam una cum chylo ad mammas transire posse. Ita etiam Aristoteles, *lib. 7. histor. anim. cap. 11.* pilos ingestos interdum ad mammas & papillas pervenire: cujus exemplum se in muliere vidisse, refert Alfaravius, *tract. 14. pract. cap. 1.*

IX. Si mulier inedia vel sitim patiatur, non generabitur in mammis lac, quamvis ei sanguis non desit in vasis: quod licet Bartholinus ex Hogelandii observatione neget, tamen verissimum esse, indies meis oculis video. Et si tali tempore infans

mammas

mammas fugat, non lac (quia nullus in vasis lacteis est chylus) sed ex arteriolarum & venularum finibus, suctione ista plus solito referatis, sanguinem exsuget, usque dum mulier rursus comederit vel biberit, & chylus in ventriculo generatus fuerit, quippe tunc rursus lac succrescit in mammis. Istius rei manifestissimum exemplum præbuit uxor D. N. viri hic notissimi, quæ anno 1650. infantem lactabat, cumque mense Septembri, ob mariti gravem & periculosissimum morbum, admodum contristaretur, ita ut per tres quatuorve dies vix aliquid effatu dignum comedere posset, non tantum lac in mammis non habuit, sed ad fortiores infantis suctionem purus sanguis secutus & e mammis extractus est: postea verò, decrecente mariti morbo, tristitiæque nonnihil imminutâ, cum cibos euchymos & liquidos rursus ingereret, atque hinc chylus copiosior in ventriculo generaretur, mox lac copiosum in mammis rursus habuit: certo indicio, lac illud non e sanguine fuisse generatum, e quo sanguine alioqui etiam antea, absente chylo, gigni potuisset, qui tamen tunc temporis syncerus ac rubicundus, & non in lac mutatus, exsuctus est.

His argumentis fortasse obstare videbitur, quod vacca primis à partu diebus lac sanguinolentum emittat, quo indicari videtur, lac e sanguine generari. Sed respondeo, cum in principio post partum lactei mammarum pori nondum ita dilatati sunt, ut chylus satis copiosus per eos ad ubera confluere possit, tunc emulgendo aperiuntur mammarum venulæ, ex iisque paucus sanguis effluens lacti permiscetur, qui lac subrubro colore tingit: postea verò poris lacteis satis apertis & dilatatis, ac chylo liberè ad ubera affluente, dictis venis nulla amplius vis infertur suctione, tuncque desinit illa sanguinis admistio, & lac abunde generatur, ac solum & syncerum emulgetur.

*Quare venæ in mammis tumescant.* Una adhuc superesse videtur difficultas, scilicet, si lac non generetur e sanguine, quare in lactantibus animalibus arteriæ, & imprimis venæ, in mammis multo ampliores & tumidiore sint, quam in non lactantibus? Respondeo, quod quare arteriæ intumescant, jam paulo ante à nobis satis explicatum sit, in quaestione, *An chylus per arterias deferatur ad mammas*: & quare venæ numerosiores & magis tumidæ sint, etiam supra explicatum sit, *eo loco, quo vasa mammarum enumerantur*.

*An generetur ex sanguine crudo.* Conringius, *exercit. physiol. de lacte*, ut huiusmodi scopulos sine naufragio melius præteriret, statuit lac gigni ex sanguine imperfectiore & crudiore, qui nondum ad perfectam rubedinem sit excoctus, nec admodum spirituosus, aut multum per cor

circulatus, cujus evacuatione vires non admodum concidunt, & qui ob serositatem facile ad mammas delabatur, atque à potu prompte augetur. Verum huic opinioni obstant quinque difficultates.

I. Quod chylus, simulac in corde dilatatur, statim perfectam rubedinem nanciscatur, ita ut sanguis ex eo genitus, in isto principio minus quidem spirituosus, sed non minus rubicundus dici possit, quam alius qui sæpe per cor circulatus est, ut latius infra docemus, *hujus lib. cap. 12*.

II. Quod crudior pars sanguinis, ob majorem crassitiem, non possit tam celeri motu per vasa deferri, & à sanguine magis elaborato separari, ac ad solas mammas defluere, cum sese seorsim movendi, & à reliqua massa separandi vim non habeat.

III. Quod suctione facilius spirituosæ ac tenuiores partes sequerentur, quam crudæ & crassiores, atque hinc oborirentur celerrimæ virium exsolutiones.

IV. Quod in nutricibus quæ euchymo victu utuntur, lac non sit admodum serosum, sed pingue & crassius, cum tamen alioqui, ratione cruditatis, semper serosum esse deberet.

V. Quod corpus nostrum non bene nutriatur seroso crudoque sanguine, ut in pituitosa cachexia & anasarca liquet, sed alimento pingui ac bene cocto, quale lac esse ex eo patet, quod infantes, quousque lactantur & lacticiis utuntur, melius nutriantur, & plus citiusque increcant, quam post ablactationem: quod etiam lac adultos optime nutriet, in quibus alioqui serosa & cruda alimenta, vel cachexiam inferunt, vel per urinas & sudores maxima ex parte evacuantur, nec multum roboris corpori tribuunt.

Hæc omnia satis docent, sanguinem quemcunque, sive menstruum, sive alimentarium, sive crudior, non esse proximam materiam e qua lac generatur. Rejicienda igitur tandem tot seculis tradita, scripta, & inculcata doctrina, atque alia lactis materia quaerenda est.

Hanc ut melius inveniant & describant Whartonius & Charletonus, dividunt lac in duas partes, unam chylosam, alteram spermaticam, hancque multo minorem esse tradunt alterâ. Illam dicunt per arterias thoracis ad mammas transmitti; hanc per nervos eò deferri. Verum hic dupliciter errant: primo quod non considerent nullum chylum, aut chylosum humorem in arteriis contineri, quia cum chylus cor transit, ilico deponit suam formam, & induit formam sanguinis, neque unquam ad chyli formam redit, ut latius probamus *hujus lib. cap. 12*. Secundo, quod putent per invisibiles nervorum poros humores alimentarios visibiles & crassiusculos trans-

*An lac oriatur ex succo arterioso & nervoso.*

fire : quam opinionem latius refutamus ,  
lib. 1. cap. 16. & lib. 8. cap. 1.

An ex sero  
generetur.

Hieronymus Barbatius, Patavinus, lib. de sang. & sero, longe aliam lactis materiam describit, quippe multis rationibus nititur inculcare, lac plane non ex sanguine, ut neque ex chylo, sed solummodo ex sero generari, utpote quo etiam omnes spermaticas partes nutriri, credit, quia, ut dicit, serum sanguini innatans calore ignis concrefcit in gelatinam, ex quo liquet, illud non modo in lac mutari, sed etiam partibus nutriendis agglutinari. Verum, doctissimus Vir hoc ultimum, quod tanquam firmum opinionis suæ fundamentum ponit, experienciâ penitus repugnante scribit. Nam serum illud quod refrigerato sanguini è vena extracto innatat, calore Solis vel ignis ad siccitatem quidem exhalabit, sed nunquam gelatinæ formam acquireret, nisi vitiosum sit. Succus lymphaticus, quem ille putat nihil differre à sero, in gelatinam condensatur, sed quantum ille differat à sero, latius docuimus lib. 1. cap. 13. Denique, etsi lac non conficiatur sine sero, tamen serum esse duntaxat menstruum seu Mercurium, in quo lacteæ particulæ simul miscentur in fusione, & non esse primariam materiam è qua lac generatur, ex ipsa lactis substantia, ut & ex butyro ac caseo, quæ ex eo confici possunt, & à sero longissime differunt, tam manifeste oculis patet, ut ea de re nemo mente sanus dubitare possit.

An ex adipe  
generetur.

Malpigijs, lib. de ping. & adip. scribit, dubitari posse, an non lac in mammis fiat ex adipe 1. Quia circa mammarum glandulas multam pinguedinem in nutricibus seu lactantibus colligit Natura, quod ad solam pulchritudinem facere non videtur. 2. Quia in lacte genito multum butyri continetur, ex eoque extrahi seu separari potest. Verum hanc opinionem penitus evertit sola copia lactis, quæ ex animalibus lactantibus quotidie exsugitur, vel emulgetur, ut liquet in mulieribus, sed præcipue in vaccis, ovibus, suibus, &c. hæc enim copia seu quantitas tanta est, ut si tota mammarum pinguedo una die in lac resolveretur, non posset tanta, imò ne dimidia quidem lactis quantitas ex ea generari, multo minus mamma in integro statu permanere. Et si ex mammarum pingui adipe lac gigneretur in lactantibus, quare illud ipsum etiam non contingeret in virginibus, aliisque non lactantibus, quibus sæpe mamma non minus pingues & tumidæ sunt quam lactantibus? Quod lac in se contineat butyrum, hoc non probat mammarum pinguedinem esse materiam è qua gignitur, quoniam etiam chylus continet butyrum, & sanguis ipse oleosas partes sibi admixtas habet (hoc videndum sequente cap. 12.) cum tamen neque illud à pinguedine aliqua ventriculi,

neque hæ ab adipe cordis gignantur, aut procedant.

Martianus, Entius, Giffartus, & Deusingius, multo melius tradunt, lac ex chylo generari: quorum sententiæ nostrum quoque calculum libenter adjicimus, statui-musque lac, tam in viris & infantibus, quam in mulieribus, ex chylo confici.

Chylus est  
lactis materia.

Hujus rei veritatem, præter rationes in præcedentibus allatas, imprimis confirmat substantiæ chyli lactisque exacta consideratio: si enim albicans chyli succus penitus inspiciatur, quantillum à lacte differt? Inter lac aquosum & chylum exigua, vel fere nulla erit differentia in colore, sapore, & substantiâ: sola chyli serositate in mammarum glandulis nonnihil separatâ atque imminutâ, optimum habebitur lac, idque eo pinguius & crassius, quo serositas illa parcius chylo adfuerit, vel in mammarum glandulis magis sequestrata, aut dissipata fuerit. Si verò illa chyli serositas non satis separetur (quod fit propter glandularum mammariarum debilitatem, nimiamque flacciditatem) tunc syncerus chylosus liquor tenuis & albicans, nec quidquam fere à chylo in ductu chylofero thoracico contento differens, è mammis exstillat, ut contingere videmus in infantibus primo natis, tam masculis, quam foemellis, in quibus ob pororum & ductuum chyloferorum laxitatem, chylus ad mammas libere confluit, & quia tenellæ flaccidæque mammarum glandulæ ad ulteriorem præparationem istius chyli non satis validæ sunt, hinc chylus eò perveniens, ob serosam tenuitatem, & pororum papillæ laxitatem, vel sponte, vel levi pressione facile effluit.

Verum quare, & quo modo chylosus succus in his glandulis in lac transeat, seu mutetur, hæcenus à nemine, quod scio, inquisitum fuit. Ratio hæc est. Omnes totius corporis glandulæ isti officio destinatae sunt, ut ex sanguine tenuem aliquem liquorem lymphaticum (in ore salivofum, in hepate subbiliosum, in liene lixiviosum, in aliis partibus alium) eliciant, & illum levissima quadam subacidula qualitate perfundant, eaque donatum sanguini, chylo, aliisque humoribus affundant, ut eos leviusculâ quadam effervescentiâ ab aliis inutilibus humoribus aliquantulum separent, atque nonnihil incrassent seu coagulent, sicque impediunt ne subtilissimi sulphurei spiritus evanescant (ita videmus ad chylum in ventriculo coctum in intestino duodeno hunc in finem mox affluere succum pancreaticum, ac passim aliis plerisque lacteis vasculis lympham per vascula lymphatica infundi) & simul efficiant ut dulces sulphurei lactei spiritus in subpingui leviter condensato liquore paulo magis inspissati & coacti, adhuc dulciores & candidiores evadant.

Quo modo  
chylus in  
lac mutetur.

Eadem

Eâdem de causa etiam succus lacteus (cui in itinere per vasa lactea interiora hic illic aliquid lymphatici liquoris modò affusum est) in glandulis mammarum magis perficiendus venit, ut in iis dulces ejus sulphurei spiritus, per admistionem pauci subacidiusculi (dico *subacidiusculi*, nam acidior nimiam coagulationem faceret) paulo magis inraffentur, seu figantur, sicque magis uniti, pinguiorres, candidiores, & ad infantis nutritionem aptiores fiant. Rem ita se habere ex eo patet, quod cum ille glandularum mammarum liquor, lacteo succo iis infuso admiscendus, aliqua de causa vitiosus, vel nimis acidus evasit, tunc etiam lac in mammis corrumpatur, vel acefcat (testantur hoc ex pravo sapore mulieres illæ suctrices, quæ interdum loco infantis mammas exsugunt) imò & coaguletur in caseosam duritiem, mammaeque sæpe inflammari & exulcerari faciat. Nonnulla alia super his videantur, *precedente lib. 1. cap. 7.* ubi de colore chyli agimus.

*Quare lac in hæmorrhagiis imminuitur.* Hic fortè quis rogabit, si hæc vera sint, & lac non è sanguine, sed ex chylo generetur, quare igitur in magno sanguinis profusio lac imminuitur, vel deficit? Respondeo, ea de causa non semper deficere lac, si mulier bene comedat: & cum deficit, hoc fieri, quia Natura majori necessitati intenta, ad virium totius corporis restaurationem, totum chylum, vel maximam ejus partem, ad cor propellit, eumque in sanguinem convertit, & ejus vel parum, vel nihil ad mammas transmittit. Adde, quod deficiente sanguine, deficiat etiam satis copiosus influxus spirituum animalium in mammas, quorum beneficio, ut mox docebimus, mammae alioqui laxantur, & sic viæ chyliferæ in iis patulæ servantur, quibus ob defectum horum spirituum concidentibus, vel à partium adstantium gravitate ac densitate compressis, denegatur chylo in mammas transitus, atque hinc tunc deficit lac.

*Quare lactantibus menstrua subsistant.* Huic nostræ sententiæ nihil obstat antecitatus Hippocratis *aphorismus 39. sect. 5.* Si mulier, quæ neque gravida est, neque peperit, lac habet, ei menstrua defecerunt. Non enim propterea lac habet, quod superfluitas illa sanguinis menstrui suppressi ad mammas confluat, atque ibi in lac mutetur; sed quia sanguine sufficienter repletis vasibus, & accedente libidinosa cogitatione, aut salaci mammarum contrectatione, pars chyli, quæ ob repletionem, ad sanguinis generationem necessaria non est, per dictas vias confluit ad mammas, in iisque in lac mutatur: atque sic plenitudo illa sanguinis, quæ mulieri superflua futura, & per menstruam evacuationem deponenda fuisset, à Natura eo prævenitur, quod notabilem chyli partem ad mammas deponat, ibique in

lac mutet, antequam sanguis fiat: quali modo illud in nutricibus frequenter fit, utpote quibus ob eandem plerumque causam menses non fluunt, & interim nimia sanguinis redundantia non onerantur. Si autem in muliere ab Hippocrate commemorata, lac illud generaretur ex sanguine menstruo restagnante, ergo quibus menstrua obstruuntur vel sistuntur, iis plerumque, vel semper lac esset in mammis, cum illud rarissime contingat, idque non nisi in salacibus & prurientibus, quæ multa frictione, & libidinosa ac Venerea cogitatione, atque hinc procedente spirituum animalium motu, mammas laxant, & ductuum chyliferorum poros aperiunt, sicque liberum chylo ad mammas accessum parant. Quemadmodum etiam per salacem frictionem & suctionem chylus ad virorum quorundam (de quibus saltém nulla sanguinis menstrui redundantis suspicio esse potest) mammas deferri, in iisque in lac mutari potest, quallium lactantium virorum varia extant apud Medicos exempla, quorum nonnulla collegit Bartholinus, *lib. 2. anat. reformat. cap. 1.*

Eodem modo etiam explicanda est historia mulieris cujusdam Rufi, apud Mesuem, quæ sanguinem spuebat, postquam lac delituit in mammis ejus, qui sanguis restrictus est lacte provocato. Hinc scilicet, quod chylus primo ad mammas fluere solitus, ad cor fluxerit, atque sic in hoc nimis copiosus sanguis generatus fuerit, qui ob nimiam plenitudinem è capitis vel pulmonum vasibus erupit, atque sic per sputa rejectus fuit: postea verò chyli magna parte rursus ad mammas defluente, sicque lacte redeunte, minus sanguinis in corde genitum sit, unde tunc cessante ulteriore repletionem, etiam sanguinis exspuitio cessavit.

His denique objici posse videtur exemplum vaccarum, quæ cum post hybernum foeni usum tandem gramina & herbas comedunt, tunc tamen lac earum non nisi post duas tresve septimanas immutatur & pinguius fit, aliumque subrubicundum butyro colorem, gratumque saporem confert, quod prima vel secunda die fieri deberet, si antedicta propositio vera foret, cum chylus à principio mutetur. Respondeo, primum illud minime verum esse, nam non post tres septimanas, verum etiam prima, secunda, tertia, &c. die lactis mutatio fit, eaque in butyro inde facto quarta die gustu & visu manifeste percipitur, quamvis non omnino perfecte conspicua sit in principio, propter præcedentem chylum nondum planè absumptum, sed posteriori adhuc ex parte admistum. Ad hæc, ipsa quoque mammarum substantia nondum est disposita ad tam citam mutationem lactis inferendam; cum ea dispositio dependeat à sanguine sub-

stantiam



stantiam illam nutriente, hinc sicut illa nutritio, ita ab ea procedens dispositionis magna immutatio, paulatim magis magisque, sed non una aut altera die peragi potest.

*An spiritus  
animales  
sint lactis  
materia.*

Hanc nostram, de chylosa lactis materia, ex parte solummodo probare videtur Whar-tonus, nam ei adjungit aliam materiam, de qua hactenus nemo alius mentionem fecit: quippe statuit lac generari, partim ex chylo, partim ex succo quodam ex nervis effluente, qui isti chylo admiscetur. Verum cum in nervis tanta non sit cavitas, per quam talis manifestus, crassior, subpinguis, & albitans succus transire possit, sed tantum invisibiles sint porositates (hæ à crassioris succi illaplus mox obstruerentur, & sic fieret paralytis) per quas copiosus succus lactificandus ad mammas lactantium sufficienter defluere nequit, satis liquet è nervis nullum liquorem ad lactis generationem concurrere. Quod ipsum ex eo etiam patet, quia ex copioso istius animalis liquoris per nervos ad mammas confluxu, magna in lactantibus fieret spirituum animalium dissipatio & jactura, viriumque summa dejectio, quæ tamen non contingit, imò contra multæ mulieres alacriores sunt, & melius valent cum lactant, quam extra lactationem.

*Nobilis  
questio.*

*Quidnam  
chylum ad  
mammas  
impellat.*

His ita positis, subjicienda tandem restat nobilis quæstio, quæ plurimos doctos viros ita deterruit, ut eam silentio præterire, atque tacite intactam relinquere, quam agitare maluerint: aliis verò admodum vacillantes solutiones extorsit. Scilicet, *Quidnam chylum per chyloferos ductus ad cor fluere solitum* (ante hac dicebant) *quidnam sanguinem per venas ad cor fluere solitum* impellat vel deducat ad mammas, ut ex eo lac generetur.

Deusingius, tract. de lacte, putat sanguinem menstruum singulari quadam qualitate ab utero contracta, totique massæ sanguineæ communicata, omnia in corpore rarefacere, & quasi fermentare, ac simul etiam dispositionem generando lacti aptam efficere. Hanc infantibus communicari tradit à blando uteri fovente calore. In viris autem & virginibus illam induci scribit per frequentem mammarum contrectationem & suctionem, eo modo ut in capellis, quibus dum ubera manibus comploduntur, lac sequitur. Verum hæ satis plausibiles excogitatæ rationes undequaque impingunt in scopulos ante à me propositos, in iisque tantum patiuntur naufragium, ut nullæ ex iis servari possint. Quemadmodum etiam illud longe à verò abest, quod addit Deusingius, scilicet in gravidis, compressione ventriculi & pancreatis, à foetu crescente facta, chylum versus mammas propelli: namquare, quæso, in aliis extra abdomen tumoribus, & cum foetus mortuus in utero

hæret, illud ipsum non contingit, ubi eadem compressio est? Dicit forte, ab iis non inferri mammas requisitam dispositionem lactificam: sed talis responsio est merum duntaxat diverticulum nullius momenti: nam si cum tali dispositione concurrere debeat antedicta ventriculi compressio, ergo post partum deficiente illa à foetu facienda compressione, nihil chyli perveniet ad mammas, sicque in his nihil lactis generabitur, multoque minus in virginibus & viris lactantibus, in quibus talis à foetu facta compressio nunquam adfuit. Verum cum hæc omni experientiæ contraria sint, sine ulteriore refutatione per se cadunt.

Alii ad Naturæ providentiam, aliasque invalidas rationes decurrunt. Atque sic mysterium illud hactenus omnino obscurum relictum est.

In eo autem bene perscrutando, primo considerandum est, præter chylum & aptam mammarum conformationem, etiam ad lactis generationem requiri liberum chyli ad mammas transitum, quem in infantibus modo natis, ob partium mollietatem & mammarum laxas porositates, facile mente concipimus. Verum quidnam in adultis transitum illum, qui multis annis occlusus fuit, rursus aperiat, qui hoc invenerit, ille hunc Gordium nodum solvet. Centum viris, virginibus, aut mulieribus non lactantibus sugantur & contrectentur mammarum, quo usque placet, inde tamen non omnibus, sed forte vel nulli, vel tantum uni aut alteri lac ad mammas veniet. Sed quare non omnibus? quia, dices, reliquorum, vel reliquarum mammarum non sunt satis porosæ & laxæ. Verum hanc responsionem postea refellunt & evincunt eadem illæ mulieres gravidæ factæ, in quibus tunc sufficientem mammarum laxitatem adesse satis deprehenditur.

Igitur alia istius rei causa quærenda est, cuius neminem hactenus mentionem fecisse animadverti. Illa autem est fortis imaginatio, seu intenta & crebra de lacte, mammas, earumque suctione cogitatio, quæ mirabilia in corporibus nostris operatur: non quidem simpliciter per se, sed mediante potentia appetitiva, seu mediantibus animi passionibus, quæ spirituum & humorum varios motus inducunt. Sic imaginatio & cogitatio magni periculi facit hominem contremiscere, cadere, refrigerari, in syncopem incidere, imò nonnunquam capillorum summam canitiem brevi tempore inducit: rei lætæ imaginatio facit corporis calorem & animositatem: cogitatio de repudenda, vel ejusdem rei occursum, inducit faciei ruborem; ut de re terribili cogitatio pallorem; de re tristi frigus. Venerea cogitatio corpus calore perfundit, stricte muliebria genitalia laxat, virilia flaccida tendit,

*Vera causa  
chylum ad  
mammas  
impellens.*



tendit, & vias seminarias, alioqui invisibiles sæpe ita aperit, ut semen pollutione sponte effluat. Hæc eadem intenta imaginatio, & de lactatione infantis desideriosa cogitatio, causa est quod viæ chyliferæ versus mammas laxentur & aperiantur, imprimis si fortem illam cogitationem foveant & magis incitent causæ aliquæ externæ eodem facientes, ut mammarum lasciva contrectatio, foetus in utero commotio, papillæ suctio, &c. nam pro vario spirituum animalium influxu, partes modò constringuntur modò laxantur, ut cuilibet notissimum est: & pro varia illa constrictione vel laxatione, sanguis aliique impulsus humores, modò magis, modò minus in partes influunt; & modò calorem, mollitiem, rubedinem; modò constrictionem, frigus, & pallorem generant. Inter hos impulsos humores etiam est chylus, qui à musculis abdominis per quælibet lactifera vascula (ut dictum lib. 1. cap. 11. & 12.) atque sic etiam per illa quæ ad mammas tendunt, continuè propellitur (sicut unda propellit undam) modo spirituum animalium specialis influxus, partes illas, per quas ista vasa feruntur, laxaverit, omnique sublata constrictione dicta vasa permeabilia fecerit.

Hanc veram hujus rei causam esse, clarissime liquet in isto viro, cujus meminit Santorellus, qui mortua uxore, cum paupertatis ergo nutricem infanti suo conducere non posset, ut vagienti aliquo modo satisfaceret, eundem mammis suis sæpius apposuit (procul dubio, cum ingenti desiderio illi aliquid lactis conferendi) atque sic tandem per intentam & continuam illam cogitationem, & sæpe iteratam papillarum suctionem, viæ chyliferæ fuerunt laxatæ, & mammarum lac satis copiosum pro nutritione infantis dederunt. Illud ipsum etiam liquet Vianæ (quæ est oppidum nobis propinquum) ubi ante annos triginta, præter propter, in diversorio ante portam sito, cui caput porcinum pro insigni est, mulier caupona, non diu post obitum mariti, peperit, atque brevi post puerperium extincta est, superstitem relinquens infantem suum sanum; cumque illi res angustissima domi superesset, ejus mater, nominata Joanna Vuyltuyt, etsi & ipsa egenâ præ paupertate nutricem conducere non posset, tamen infantis filiæ suæ miserta, eundem enutriendum suscepit, ætatis suæ anno sexagesimo sexto: cum autem eum vagientem summa cum commiseratione, mammis suis aliquoties apposuisse, eique papillam sugendam obtulisset, per fortem illam imaginationem, & desideriosam de nutriendo infante cogitationem, mammarum lac dare cœperunt, idque paucis diebus tantâ copiâ, quæ nutriendo infanti abunde sufficeret, ita ut vix aliis alimentis indigeret: atque sic cum

omnium admiratione, infans lacte hujus vetulæ (cujus mammarum à plurimis annis omnino exaruerant & conciderant; jamque rursus, tanquam juvenulæ; de novo intumuerant) optime nutritus fuit: cujus rei memoria hodie apud multos dicti oppidi cives superest. Talia exempla, de vetulis ob similem occasionem lactantes factis, plura refert Bodinus, *theat. Natur. lib. 3. p. 429.* Causæ antedictæ veritatem etiam non semel confirmarunt lascivæ & prurientes nonnullæ virgines, quæ libidinis cogitationibus totæ intentæ, atque hinc mammas suas sæpe contrectantes, ac cum titillo pruritu fricantes, interdum, virginitate illæsa, lactifera evaserunt, quales indubitata pudicitia lactiferas virgines mihi bis videre contigit: qualem sibi etiam visam, describit Bartholinus, *cent. 1. observ. 37.* & plura hujusmodi virginum lactantium exempla, ex Schenckio, Vega, Castro, Castello; aliisque, collegit Bauschius, *ephemerid. medic. phys. tom. 2. observ. 135.* Tales lascivas de mammis propriis cogitationes ac contrectationes etiam in viris nonnullis contingere, eosque sic lactantes evadere posse, nemo non facile crediderit. In mulieribus gravidis cogitationem de nutriendo infante indies magis magisque excitat commotio foetus in utero, atque hinc cum sese sensibiliter movet foetus, tunc lac incipit apparere in mammis.

Addam denique manifestissimum exemplum domesticum mihi visum. Charissima mea uxor, mense Martio 1656., in puerperio lactis habuit, more ipsi consueto, sufficientem copiam: sed cum infans invalidus totis sex septemve septimanis, præ summa debilitate, sugere non posset, & brevi moriturus putaretur, atque illa hinc omnem lactandi spem abjiceret, resiccata sunt ei mammarum: cumque postea rursus convalesceret infans, & jam sugere posset, atque uxor mea omnem lactandi spem jam diu abjecisset, nihilque in mammis haberet, nutrici necessario demandandus fuit: ab hac autem cum minus bene tractaretur, uxor mea, infantis miserta, circa finem noni à partu Mensis, scilicet Decembris, illum ad se reportari jussit: & interea dum alia quæritur nutrix, eum vagientem millies cum lachrymis amplectebatur, & mammam lacte plenam ei dari posse, cum summo materno desiderio, exoptabat. Inventâ tandem eadem die aliâ nutrice, ei infans demandatus fuit. Sed eâdem vespere comperit mea uxor, ex forti illa imaginatione & cogitatione mammas suas (quas tamen neque fricaverat, neque infans eo tempore suxerat) ultra octo jam menses omnino resiccatas, optime intumuisse, & lac bonum ac satis copiosum profundere, ita ut si nutrix non fuisset conductâ, illa ipsamet infantem

Observatio.

infantem sufficienter lactare potuisset. Quo exemplo clarissime docemur, solam imaginationem & fortem cogitationem esse primam causam, quæ alias movendo, chylum ad mammas defluere facit.

*Obiectio.*

Hic forte quis objiciet, si hoc verum, ergo etiam illis ætate florentibus mulieribus, quibus post partum non generatur lac, per talem de infantis lactatione cogitationem lac generari posset, quod tamen non fit, quantumvis infantem lactare desiderent. Respondeo; non omnem cogitationem adeo intentam & fortem esse, ut animi affectus valide commoveat, sine quorum valida commotione spiritus animales non admodum impetuose moventur: atque hinc cogitationes de lactando infante, licet sæpe mulieri occurrant, si tamen non fiant cum magna fortique ac continua intentione, spiritus animales non tam copiosos determinari versus mammas, ut vasorum lacteorum eo tendentium impedimenta laxare ac dissolvere queant. Præterea sciendum, multa incidere posse, quæ chyli ad mammas transitum, licet præsentem fortissima de lactando infante cogitatione ac summo desiderio, impediunt: qualia sunt, ipsius chyli paucitas, mammarum densitas, glandularum à viscidis humoribus obstructio, vel earundem ab exulceratione, casu, ictu, aliave læsione, cicatrices, vasorum lacteorum ad mammas tendentium nativa angustia, vel defectus, vel à vicinis partibus compressio, &c. atque tunc imaginationis & cogitationis effectus per instrumentorum ineptitudinem prohiberi, ut succedere nequeant.

*Quare lac die quarto puerperii succrescat.*

Ex his nunc etiam patet, quare plerisque puerperis tertio, quarto, vel quinto post partum die lac copiosius in mammis succrescat. Quia scilicet primis duobus tribusve diebus à partu delassatæ, ut plurimum nullis fere negotiis animum fortiter intendunt, & propter aliqualem inappetentiam, minus comedunt, minusque chyli generant: sequentibus verò diebus, cum plus comedunt, & infans magis vagire incipit, tunc etiam de eo nutriendo continuè cogitant, eique vagienti satisfacere desiderant, atque ex hoc affectu, per determinatum spirituum animalium influxum laxatis viis, qui antea ad uterum deferebatur chylosus succus, tunc convertitur ad mammas.

Colophonis loco, adhuc unum quæsitum dignum adjiciam, scilicet, quare in ablactatione infantis chylosus ille liquor ad mammas amplius non feratur, sed mammae exsiccentur? Fit hoc quia mulier tunc omnem lactandi cogitationem & imaginationem deponit, quod quo citius facit, eo citius & melius exsiccentur mammae, quia tunc deficit ille copiosior spirituum animalium ad mammas influxus, quo mammarum

glandulæ & chyliфера eo tendentia vascula antea dilatabantur, atque hinc tunc concidunt & contrahuntur glandulæ, & simul etiam dicta vascula chyliфера & lactea comprimuntur à circumstantium partium decubitu, ita ut per ea nihil amplius ad mammas ferri possit (quod ipsum etiam faciunt topica astringentia & refrigerantia, quæ simili ratione lac exsiccant) tuncque chyli pars eò ferri consueta in gravidis ad uterum, in non gravidis verò ad cor fertur, ut ab eo in sanguinem mutetur, quo quia corpus tam copioso non eget, hinc mulieres tunc sunt minus famelicæ & sitientes, quam erant antea cum lactarent, atque sic iis minus chyli generatur, & qui interea superfluis ac nimius generatur sanguis, in gravidis confertur ad foetum, in non gravidis rursus singulis mensibus per uterum evacuat.

Sed roget quis, ubi manet lac illud quod in principio ablactationis bona copia in mammis residuum est, & non exsugitur? quare in iis non coagulatur & corrumpitur, sicque inflammationem & abscessus facit? Respondeo: fertur paulatim per venas mammarias (quæ hunc in finem decuplo plures & majores sunt, quam arteriæ) ad venam cavam & sic ad cor, eodem modo sicut chylus è ductu chyliifero thoracico in venam subclaviam effusus, una cum sanguine venoso ad cor defluit. An autem per has mammarias venas non ordinariè in lactantibus, præcipue in quibus copiosum lac redundat, aliquid istius lactei succi etiam ad cor feratur, considerandum propono, cum notabilis earum quantitas in numero & magnitudine, arteriarumque paucitas ac parvitas illud omnino persuadere videantur.

Adversus hanc nostram sententiam unum singulare ac notabile dubium, idque satis magnum, insurgit, quod solvendum superest, scilicet, quare in vaccis, equis, ovibus, capris, aliisque plurimis brutis animalibus, chylosus lacteus succus tam copiosus & tam diu ad mammas confluat, cum tamen iis, utpote Anima rationali destitutis, cogitatio, intellectus, imaginatio, voluntas, memoria, & iudicium, nullo modo adscribantur? Hodierni Philosophi, qui fundamenta Cartesii sequuntur, nullas hujusmodi nobiles actiones in brutis agnoscunt, & si aliquas iis similes peragere videantur, illas minime ad principum actionum ordinem referri posse aut debere censent, quia ab Anima rationali non perficiuntur, sed eas solummodo procedere putant & docent, à certo quodam spirituum motu ab objectis inducto, atque à proprietate dispositionis partium fluente. Et sic tradunt in brutis per objecta mox spirituum & reliquarum partium certas dispositiones induci, ex iisque certos quosdam motus

*Quare mamma in ablactatione exsiccentur.*

*Quid in brutis chylum ad mammas pellat.*

resultare, quorum ratione modò harum, modò illarum partium pori, per maiorem minoremve, citiorem aut tardiozem, fortiozem aut leniorem spirituum animalium influxum, aperiuntur, vel clauduntur. In hoc jam à nobis proposito casu sic dicerent: scilicet, ex. gr. in vacca, à magna foetus commotione in utero, vel à molestia tempore partus excitata, aperiuntur pori circa & versus ubera, sicque per influxum spirituum animalium viæ antea occlusæ dilatantur, ita ut lacteus vel chylosus succus per propria vasa liberius eo confluere queat: quæ lactearum viarum laxitas etiam diu post partum permanet, propter continuatam versus ubera pororum solito maiorem apertionem, spirituumque animalium copiosiorum influxionem, ratione motus titillantis circa ubera, à contrectatione sugentis pulli, aut mulgentis manus inductam, permanentem.

*Digressio  
altera.*

Verum cum objectum non possit per se aliquem sensitivum motum inducere, nisi prius cognoscatur ut bonum vel malum (sine cognitione enim & perceptione sumptum, dici nequit, eo mediante ullum motum fieri: quod satis liquet in hominibus catalepsi laborantibus, in quorum organa sensibilia ac motoria bene formata, sanguineque, calore, & spiritibus satis instructa, etsi objecta incidant, nullum tamen motum inducunt, quia non percipiuntur, atque hinc etiam nullæ novæ fiunt spirituum ad varias partes determinationes, nullæque motus immutationes, ut satis innotuit iis qui morbi huius naturam penitus & perfectè noverunt) & illa cognitio ac perceptio præsupponat necessariò aliquod cognoscens, ab objecto cognoscendo longe diversum: cumque præterea proprietas dispositionis partium, necessariò quoque aliquod peculiare disponens, quod istam propriam dispositionem inducit, & pro re nata immutat; atque ipse etiam motus spirituum necessariò aliquod primum movens, objectumque percipiens ac cognoscens, præsupponat, (nihil enim se ipsum sine causa cognoscit, disponit, ac movet) satis patet, illam explicationem, nec sufficere, nec satisfacere: imprimis si insuper consideretur, pleraque bruta animalia dolores, odores, & sapores percipere & distinguere, res gratas appetere, ingratas ut tales percipere, cognoscere, & fugere, amicos ab inimicis internoscere, &c. quæ certe non sunt operationes dispositionis partium ab objectis motorum, sed alicujus rei objecta percipientis, & sic partes ad tales actiones peragendas disponentis. Sicut enim in homine cerebrum bene conformatum ac temperatum, spiritibusque animalibus bene perfusum, non est causa primaria functionum principum, sed Anima rationalis, quæ cerebro cum spiritibus

utitur tanquam instrumento, idque ita disponit, ut modò hi, modò alii pori magis minusve aperiuntur vel claudantur, spiritusque modò per hos, modò per illos copiosiores vel pauciores, & quidem hoc illo certo modo determinantur, atque hinc modò hæ, modò illæ, & sæpe plures functiones principes (aliarum actionum animalium principia) simul operentur. Vel sicut in templis organum musicum, fistulis, follibus, & vento seu flatu sufficienter instructum, non potest ratione ullius objecti, aut suæ propriæ dispositionis, ullas cantilenas musicas canere, nisi magister musicus accedat, qui claves & manubria dirigendo, flatum modò in has, modò in illas fistulas determinet, sicque gratissimum concentum ex iis educat. Ita etiam in brutis, præter objecta & cerebri aliarumve partium propriam dispositionem, necessariò debet aliquid aliud insuper adesse, quod objecta percipit, & ex illis partibus tam præclaras operationes educit. (Frustra hic infertur, quod simplices affectus naturales, ut fames & sitis, delectatio & tristitia, in brutis non egeant alio perceptore, quam ipso instinctu naturali: de quo multa, sed parum ad huius obscuritatis dilucidationem facientia, scribit Thomas Willis, *lib. de anima brutorum, physiol. cap. 6.* Quasi verò ille naturalis instinctus non æque in brutis opus habeat perceptore, atque in homine; qui homo cum nunquam sit famelicus, nisi quando molestiam illam ventriculi vellicationem perlenit ac percipit, an quis putabit bruta fieri famelica sine istius vellicationis perceptione? si verò famem sentiant ab instinctu, sine aliquo alio perceptore, explicetur, quæso, quidnam sit ille instinctus percipiens sine perceptore, & quomodo istam perceptionem operetur.) Hoc autem cum non sit Anima rationalis, qua bruta destituuntur, quæritur, quid sit? Nos illud impræsentiarum appellabimus **Anima rationalis analogon** (non enim bruta animalia plane moventur, actionesque suas peragunt sicut automata, quamvis plurimi hodierni Philosophi illud unicè inculcare nitantur, idque se abunde probare putent, Henricus Regius, *lib. 4. philos. natur. cap. 17.* & Florentius Schuyl *in præfat. ad lib. des Cartes de homine*: quippe automata non sentiunt dolores, non audiunt, non vident, non occurrunt vocanti, non fugiunt verberantem, &c. quæ omnes operationes in brutis observantur) quod in brutis vel aliqualem intellectum, memoriam, cognitionem, cum obscuro aliquo iudicio suo modo, vel simile quid manifestissime operatur. Nam teste Jesaia propheta, *cap. 1. vers. 3.* *Cognovit bos possessorem suum, & asinus præsepe domini sui:* & Jeremia, *cap. 8. vers. 7.* *Milvus in celo cognovit*

*Anima rationalis analogon.*

cognovit tempus suum: turtur & hirundo, & ciconia custodierunt tempus adventus sui. Sic etiam canis herum & domesticos ab aliis distinguit, ejusque amicis occurrit, inimicos adoritur & adlatrat, fortes & minantes fugit, mandata heri suo modo intelligit & exequitur; dormiens somniat, & per somnium latrat. Idem in venatione aliquo modo ratiocinari videtur (est argumentum Chrysippi, à Sexto Empirico, lib. 1. *Pyrrh. hypoth. cap. 14.* descriptum) nam ad trivium veniens, cum duas vias odoratu indagavit per quas fera non transit, tertiam, ne indagans quidem, magno cum impetu ingreditur, quasi sic ratiocinaretur: Aut hac, aut istac, aut illac transit fera; sed neque hac, neque istac, ergo illac. Sic etiam de cane singularis sui amici notabile quid scribit Rorarius, lib. 1. *de ration. brutor.* quod contigit in aula Cardinalis Alexandri, qui ejus amicus cum cane suo solus ad venationem prodierat, cumque in sylva solitaria magno fervore cervum prosequeretur, casu infelix in profundam foveam inciderat, è qua nunquam evasisset, nisi canis solus domum reversus, in aula mœsto ululatu cuncta replevisset, repetensque cursus atque recursum, familiaribus quasi innuisset ut eum sequerentur: quod tandem animadvertens Cardinalis, & intelligens dominum canis non rediisse domum, injunxit ut canem sequerentur, à quo recta in solitudinem ad foveam deducti, dominum canis invenerunt & extraxerunt, (quis canem docuit, dominum suum paulisper deferere, humanum subsidium quærere, domum reverti, ejulatu tristitiam suam testari, domesticos incitare ut secum irent, euntes ad foveam deducere, in eaque dominum suum monstrare? an solum aliquod objectum? ô admiranda scilicet objecti vis, quæ etiam bestias sic ratiocinari docet!) Equæ inimicum lupum cognoscit, pullumque suum ab eo acriter defendit. Aquilæ cum cervis dimicaturæ (teste Rorario) prius crebra volutatione copiosum pulverem inter plumas colligunt, inde supervolantes cornibus insident, concussisque alis collectum pulverem in cervorum oculos offundunt, ut cæcutientes è rupe præcipitentur. Immanis panthera (referente eodem) cujus catuli in profundam foveam deciderant, cum illos, nisi humana manu, recuperari non posse animadverteret, quasi aliqua ratione ducta, trivium occupavit, alicujus hominis adventum expectans: tandem ex improvviso cuidam iter agenti adsuit, blandiensque, levi unguium injectu non reluctantem duxit ad foveam, è qua cum catulos exemisset viator, crudelis, sed grata, fera, ob præstitum beneficium viatorem per mediam solitudinem securum reduxit ad suam viam, & illæsum dimisit. Vastissimus maximeque

terrificus leo (apud Aulum Gellium, lib. 9. cap. 14.) post interlapsum aliquod tempus cognovit Androclum servum, qui ipsi quondam aculeum è pede extraxerat, & vulnus sanaverat, eumque non dilaniavit, sed omni gestu gratitudinem & amicitiam ei præstitit, cum eoque familiariter vixit, & per urbem deambulavit, ac isti servo, quondam suo medico, ita obtemperavit, ut nomen offenderit. Columba ex Hollandia trans mare in Angliam deportata, atque ibi aliquamdiu captivæ servata, tandem è captivitate dimissa, intra biduum ad pristinum columbarium redire noverunt, quod expertus est dominus Abeels, mercator nobis notissimus. Ciconia, propter nidum suum ab alia ciconia occupatum, crudeliter in bellum, hostem impugnat, vulnerat, vel occidit, ejusque pullos & ova è nido ejicit: eadem novit ex aeris constitutione, quando sibi ad alias longinquas (hominibus hactenus ignotas) regiones, & quo itinere demigrandum, & quando huc redeundum sit. Simia & cercopithecus singularem suam astutiam plurimis actionibus produnt. Elephas multa mirabilia, quasi aliqua rationalitate præditus, facit ac præstat (hoc stupendis historiis confirmant, Plutarchus, Ælianus, Plinius, Lipsius, Acoſta, Garcias ab Horto, Jac. Bontius, alique fide digni scriptores) & sic quoque multa alia bruta animalia. Taceo hic formicarum ingenium & solertiam admirandam: taceo singulare artificium quo aviculæ nidos construere, araneæ telas texere, apes favos conficere, ac mella colligere sciunt, aliaque innumera necessario hic prætereunda. Quæ omnia profectò sine aliquali intellectu, cognitione, memoria, & judicio, aut saltem aliquo iis analogo, peragi nequeunt: quamvis non æquali perfectione peragantur in omnibus brutis, nam pro ut analogica illa ratio, secundum majorem minoremve organorum aptitudinem, in aliis excellentior atque vegetior, in aliis magis torpida est, ita etiam alia bruta ab aliis ingenii acumine, intellectu, memoria, docilitate, ac stupiditate differunt. Hinc etiam ipsa Sapientia, scilicet Servator noster Jesus Christus, manifestissime brutis aliqualem cognitionem, seu intellectum, ingenii acumen, aliis majus, aliis minus adscribit, dum, *evang. Matthæi cap. 10. vers. 16.* sic dicit: *Estote prudentes sicut serpentes, & simplices sicut columba.* Quomodo, quæso, prudentia, animique simplicitas iis inesse poterunt sine aliquali intellectu? quamvis hæ operationes in brutis multo imperfectiores & tardiores fiant, quam in hominibus: in quibus illæ etiam satis imperfectæ sunt per se (hoc liquet in iis hominibus qui in ipsa infantia, aut per matrum immisericordiam, aut propter hostium persecu-

persecutionem, aliumve casum in sylvis depositi, à brutis nonnullis animalibus illic nutriti sunt, atque inter illas feras adoleverunt, diuque vixerunt, qui postea casu à venatoribus capti, proflus ferale ingenium, & mores ab omni rationalitate penitus alienos induisse, atque sic non nisi corporis figura à brutis ac sylvestribus feris distingui posse visi sunt: exempla inveniuntur, apud Plinium, *lib. 7. cap. 2.* Simonem Goulartium, *histor. memorabil. tom. 1. & 2.* Drefferum, *lib. de antiq. & nova disciplina.* Ph. Camerarium, *medit. histor. cap. 79.* & Jacobum Cats, in *matrefamilias*, pluresque alios) sed conveniente educatione, cultura, & exercitatione ad summum perfectionis culmen deducuntur: qualis perfectionis tantum levis aliqua umbra, eaque satis obscura, & longissimis parasangis à rationali perfectione distans, in brutis manifestissime apparet, quæ tamen & ipsa necessario aliquam causam habere debet. Hic non est admittenda quorundam Philosophorum distorta explicatio, qua dum Sacram scripturam ad suam opinionem flectere nituntur, dicunt eam ante citatis locis loqui idiotissimos secundum apparentiam, non quod bruta aliqualem intellectum habeant, sed quasi habere videantur. Certè qui tali modo dictos textus explicant, videntur non longe abesse ab atheismo (eodem enim jure poterunt dicere, biblia sacra non esse autentica, sed talia quasi videri, non esse aliquem Deum omnium creatorem, sed talem quasi videri esse) & Sacram paginam falsi insimulare, quasi à Prophetis, & ipso Christo aliquid dictum esset ab omni veritate alienum, & sic aliqualis intellectus ac cognitio brutis falso ab iis adscripta fuisset: cum tamen nemini noti hominum, cui vel unum granum intellectus humani superest, ille aliqualis brutorum intellectus quotidie conspicuus fiat per eorum actiones, quarum modo aliqua pauca dedimus exempla, & mille alia similia indies obvia sunt: cum etiam ex rationibus ante positis manifestissime pateat, ab objectis nullum motum in brutis suscitari posse, nisi percipiantur ut bona, vel mala, & si taliter percipiantur, necessario iis debere inesse aliquod **Percipiens & Cognoscens**, ab objecto percipiendo diversum. Ex qua tamen positione non sequitur (quod inferunt adversarii) si brutis insit aliqualis intellectus & cognitio, ergo etiam habent Animam, eamque non minus immortalem quam est anima hominis. Quod enim aliquam animam sentientem ac percipientem habeant, omnino concedendum (de hac vide quædam præcedente *lib. 1. cap. 28.* ut & *cap. 29. ad finem*) existimo, sed plane negandum quod immortalis esse possit, æque atque anima hominis: nam maxima istarum animarum

differentia, & origo longe diversa (de quibus statim dicetur, & citato *cap. 29. lib. 1.* latius dictum est) omnino contrarium ostendunt. Docentibus itaque Sacram scripturâ, rationibus, & quotidianâ experientiâ, aliquod Animæ rationalis analogon, sed mortale, brutis concedendum est. Quod vel ex eo uno satis notum evadit, quod interdum bruta etiam delirent (hoc patet in simiis ebriis, item in canibus aliisve brutis hydrophobiâ seu rabie laborantibus) cum tamen delirium non incidat nisi in animalia quæ bene valentia sapiunt: nam potentia & impotentia naturalis ad idem subjectum referenda sunt. Hic magni faciendum non est, quod à nonnullis infertur, scilicet, cum homo delirat, non insanit secundum Animam rationalem, sed duntaxat secundum sensus internos, quos cum brutis communes habet, qui bene vel male operantur, pro ut organa sunt bene vel male disposita: atque sic etiam bruta secundum hos sensus delirant, non verò secundum aliquam animam. Hæc objectio non destruit in brutis existentiam alicujus mortalis animæ, menti immortalis aliquo modo analogæ, ejusque quasi aliqua umbra: sed probat potius in homine, præter Animam rationalem incorruptibilem, adhuc adesse aliam quandam animam corruptibilem, cum brutis communem, sensuum internorum operationes (quibus ut moderator & rector præest Anima rationalis) perficientem, *Vegetativam ac Sentientem* appellatam, quam in homine necessario adesse, etiam nos satis probavimus, *lib. 1. cap. 29. circa finem.*

Doctissimus Willis, in suo *lib. de anima* willisi opinio. admodum laborat in explicando & inveniando illo *Percipiente*, & postquam, *cap. 6.* largiter explicuit, quomodo ex spirituum cursu, recurso, motu, percussione, &c. objectorum imagines in cerebro formentur & pingantur, tandem totus dubius, sic inquit: *Adbuc tamen inquiritur cujusmodi ea potentia fuerit, quæ tales imagines illic delineatas specularatur & agnoscit, nec non juxta impressiones ibidem susceptas, appetitus, aliarumque facultatum actus respectivos elicit.* Ut autem ex hoc dubio se expediat, dicit: 1. Quod aliqua notitia brutis sit ingenita, & à summo Creatore infusa, atque ipsis illorum principis, seu naturis, à prima formatione impressa, propter usus quosdam vitæ prorogandæ necessarios, quæ vulgo *Naturalis instinctus* appellari solet. 2. Quod iis etiam sit alia quædam acquisita notitia, quæ nempe sensibilibus incurso, imitatione, experientia, institutione humana, aliisque modis paulatim edificatur, & in aliis ad majorem, in aliis ad minorem perfectionis gradum evehitur. In sequentibus de utraque hac notitia late differit, sicque se dubium hoc

plus satis extricasse putat, cum interea minusquam explicet, aut explicare possit, quid, seu quale ens, vel qualis res sit ille *instinctus naturalis*, & à quo procedat illa *notitia acquisita*, quæ non potest non procedere ab aliquo *nasciente*, quod *nascens* quale sit, si una cum *instinctu naturali* explicasset, tota obscuritatis nebula fuisset discussa: sed jam in solis nominibus acquiescens, lectores suos æque dubios & incertos relinquit, atque erant antea.

Antedicta omnia cum optime perspexisset Galenus, scribit, *exhort. ad art. lib. stud.* bruta non esse prorsus rationis affectuum capacis expertia. Et, *lib. de art. med. cap. 12.* brutis aliqualem rationem, aliis parciorem, aliis liberaliorem, tribuendam putat. Qua in parte Galenus consentit cum Aristotele, qui, *lib. de hist. anim. cap. 3.* sic inquit: *In homine est ars, sapientia, prudentia, sic in nonnullis brutis est quadam hujusmodi altera natura: & paulo ante dixerat de brutis: Inest eis urbanitas, feritas, clementia, acerbitas, fortitudo, ignavia, metus, fiducia, ira, malitia, atque etiam prudentia imago.* Sic etiam (referente Bodino, *theatr. nat. lib. 4.*) summa eruditione præstantes Philosophi, Chrysippus, Porphyrius, Dion, Solinus, Plutarchus, alique, rationem aliquam belluis, à Natura tributam, prope infinitis argumentis confirmarunt. In quorum sententiam descendit quoque magnus Hugo Grotius, *lib. 1. de veritat. relig. Christ. paragrapho 7.* ubi sic loquitur. *Quin & bestiarum nonnulla actus exercent ita ordinatos atque directos, ut omnino eos appareat à ratione aliqua proficisci, quod in formicis & apibus maxime apparet; sed & in aliis plurimis, quæ ante omne experimentum, aut nocitura fugiunt, aut profutura quarunt.* Hanc brutorum aliqualem rationem Aristoteles, *1. Ethic. cap. ult.* appellat Rationem per participationem, seu Intellectum patientem.

Sententiam hanc modò dictam non convellit alius Sacræ paginæ textus, quo dicitur: *Nolite similes esse equis & bobus, qui intellectum non habent.* Nam ibi per *intellectum*, intelligitur intellectus acutus & rationalis. Sic etiam nos dicimus de hominibus stupidis, stultis, & fatuis, quod intellectum non habeant, quia eum non habent satis acutum, cum tamen suo modo objecta cognoscant & distinguant, ut ex actionibus eorum patet. Præterea, cum & homines, & bruta cognoscant, ut ex antecedentibus liquet, illi perfectè, hæc minus perfectè, necessario distinguendum est inter intellectum rationalem, qui est solius hominis; & brutalem, qui solus est brutorum, alteroque longe interior & imperfectior est, neque ad rationalitatis perfectionem unquam deduci potest. Super

his adhuc pauca, quæ obijci possent, videantur *lib. 8. cap. 1.*

Sed quidnam in brutis sit illud *Animæ rationalis analogon*, cuius etiam nonnulli pauci alii ante nos meminerunt, nemo haecenus satis explicare potuit. Julius Cæserius Placentinus, in *prologom. de organ. sens.* sufficientem explicationem se invenisse putat: quippe dicit, illud Analogon esse Sensum communem dictum, qui medius est inter omnes sensus externos, eorumque multiplicatam in unum colligit. Verum hoc acuto diverticulo non explicatur, quid sit ille sensus communis, aut quidnam illud sit quod in sensorio communi objectorum perceptionem, distinctionem, & aliqualem cognitionem facit, quod hic imprimis inquiritur. Alii putant illud esse nihil per se subsistens, sed esse tantum accidens & substantiæ modificationem, scilicet cerebri & spirituum talem à calore inductam dispositionem, quæ facit bestias vivere, & suo modo sentire. Verum tali modo proponuntur tantum media quibus sentiendi actus peragitur, calor scilicet & aptitudo instrumentorum, sed non docetur quidnam illud sit quod per talia media in brutis suo modo sentit. Cum homo, ex. gr. videt, ille eget calore (oculus enim congelatus non videt) & dispositione, cum cerebri, tum oculi conveniente: sed tamen aliud quid est, quod illum per ista media facit res visibiles sentire, seu percipere, scilicet *Animæ*: cum autem bruta etiam res visibiles, audibiles, tactibiles, &c. sentiant ac percipiant (hoc ex eorum actionibus undequaque liquet) necessario in iis quoque, præter calorem & organa convenientia, debet constitui aliquod percipiens, seu *Animæ analogon*, quo sentiendi actus peraguntur, de quo Analogo quæstio nostra agit. Quidquid sit, licet illud *Analogon* sit explicatu difficillimum, manifestissime tamen apparet, in brutis singulare aliquid esse, quod à summo Deo in principio cum toto mundo creatum, & materiæ mundi infusum atque immixtum est, atque hinc in brutis è materia quidem rursus educitur, & in actum manifestum procedit, sed interim excellentissimum materiæ productum est, ordinariam seu communem materiæ mixtæ conditionem superans, quod nobiliores istas actiones in brutis tam præclare operatur, ut sæpe in aliquibus mentis actiones nonnihil æmulari videantur: & hoc est illud ipsum quod nos per antedictum *Analogon* intelligendum putamus, quod melius admirari, quam explicare possumus.

Attamen hoc productum seu Analogon nemo sanus bene appellaverit Animam rationalem incorruptibilem, cum illud è corporea corruptibili materia processerit, atque

*Quid sit Anima variis analogon.*

*An analogon sit idem quod Anima rationalis.*



atque etiam per generationem propagetur, & non tantum operationes edat imperfectas, verum etiam corruptibile sit, & cum corpore pereat: Anima verò rationalis è materia corporis non processerit, sed seorsim à Deo creata, ac infusa sit (in eo consentit ipse gentilis Philosophorum princeps, 2. de gener. animal. cap. 3. Restat, inquit, ut Mens sola extrinsecus accedat; eaque sola divina sit, nihil enim cum ejus actione communicat actio corporalis.) perfectissimaque edat operationes, & incorruptibilis, immortalis, ac à corpore separabilis existat; suasque actiones non tantum multo longius producat, quam illud corruptibile Analogon suas, verum etiam in infinitum extendat. Nam speculatur non solum substantias rerum, sed res quoque substantiis suis exutas; scientiam suscipit; invisibilem Deum intuetur; beatorum sedes attingit; angelorum naturam & officia cum admiratione perspicit; se ipsam contemplatur, & qualis ipsa sit cum corpore juncta, qualis à corpore abstracta, novit: diu præterita, tanquam præsentia, inspicit; futura, eaque etiam quæ nunquam futura sunt, possibilia, & impossibilia examinat; innumerabilia & infinita comprehendere nititur, &c. qualia nulla peraguntur à dicto Analogo, utpote quod corporeum nil nisi corpora, & quæ corpus spectant, rudi modo contemplatur. Admodum eleganter quoque hac de re scribit Thomas Willis, lib. de anima brutorum, physiol. cap. 7. Quippe postquam primo dixit, Animæ corporeæ facultatem cognoscentem, esse phantasiam sive imaginationem, eamque solum res corporeas sub imagine apparente, & non semper sub vera, apprehendere; tandem hæc subjungit: At verò intellectus, inquit, imaginationi præsidens, species omnes in ipsa depositas intuetur, illarum obliquitates, aut hypocrises discernit & corrigit, phantasmata ibidem protracta sublimat, atque materiâ devestiens, è singularibus universalis effingit: porro ex iis noëmata quadam alia sublimiora, potentia corporea haud quaquam competentia, efformat: ita naturam cujusvis, tum substantiæ, tum accidentis, ab individuo abstractam, scilicet humanitatem, rationalitatem, corporeitatem, spiritualitatem, albedinem, fortitudinem, temperantiam, & similia speculatur: porro altius evecta, Deum, angelos, seipsum, infinitum, æternitatem, pluresque alias notiones, à sensu ac imaginatione longissime remotas contemplatur. Cumque adeo intellectus noster, conceptibus hujusmodi metaphysicis, aut res materiâ penitus exuit, aut ultra omnem speciem sensibilem se provehens, prorsus immateriales speculatur, hoc certe immaterialem immortalemque Anima rationalis substantiam, sive naturam arguit. Quippe si hæc indolis corporea fuisset, cum corporeum nil incorporeum sensu concipere

possit, nihil tale uspiam in mundo subesse suspicaretur.

Est igitur prædictum Analogon excellentior quidam spiritus Natura instructus, è corporea materia eductus; aliorum spirituum è materia eductorum conditionem longe superans, quem elementi Astrorum naturam habere, olim dixit Aristoteles: quippe, loco citato, scribit, in quocunque semine spiritum quendam contineri corpore nobiliorem, qui natura & proportionem respondet elemento stellarum: ab hoc etiam alibi docet, primam fœtus formationem peragi (ut quoque supra diximus, lib. 1. cap. 29.) & postea in brutis dictas operationes procedere. Hic est ille Spiritus vivificus, cujus naturam hæcenus nemo perfecte describere potuit; qui per calorem materiam dissolventem è materia eductus & solutus, in materiam rursus agit, eamque variis modis ita disponit, ut præter multas alias, etiam dictæ nobiliores actiones in brutis perficiantur. Illam autem partium dispositionem, quæ effectum est hujus Spiritus, seu potius Naturæ in Spiritu latentis, & medium per quod operatur, hodierni Philosophi, præter rationem, constituerunt esse efficientem dictarum operationum causam, & sic brutorum fabricam automatam fabricæ malè assimilarunt; non considerantes in automatibus rotarum aliarumque partium appropriatam dispositionem, non ex ipso automate, vel ex æris, ignis, alteriusve materiæ coctione, aut flatu, motu, vel venti influxu, sed ab artificis alicujus manu processisse, qui per istam dispositionem operatur in automate quam destinavit operationem; & sic non dispositionem partium, sed qui partes disponit, illum esse auctorem operationum, qui etiam dispositionis partium minima immutatione totam automatis operationem sistere, vel aliter dirigere potest pro libitu, quod tamen nunquam sponte facere poterit ipsum automa per suarum partium appropriatam dispositionem. Ex. gr. horologii rotæ aliæque partes sunt dispositæ ad horas demonstrandas, sed nihil tamen demonstrabit, nisi aliquis artifex accedat, qui pondera statotempore eleve; qui ipse, pro ut pondera, pro arbitrio, graviora vel leviora appende-rit, ita machinam citius vel tardius procedere faciet. Sic etiam in brutis animalibus, etsi partes sint proportionatæ & bene dispositæ ad actiones peragendas, nisi tamen aliquid adsit quod illas ad destinatas actiones aliter atque aliter immutet ac incitet, nihil agent. Ita ut neque ab innata partium dispositione, neque ab objectis, actio seu operatio procedat, sed ab eo quod objecta percipit ac cognoscit, & dispositas partes ad agendum diversimode incitat, quod ipsum etiam antea partes disposuit, earumque



que dispositionem, ut modò tali, modò alio modo agant, subito immutat. Hujus rei segnior consideratio in causa fuit, quod multi non intellexerint, in brutis partium proprietatem etiam opus habuisse aliquo artifice nobiliore, dispositionis istam proprietatem tribuente, & pro re nata immutante, eumque, ut istius dispositionis, ita quoque antedictarum nobilium operationum causam & auctorem esse.

Ab his autem operationibus in brutis spirituum animalium copiosior versus ubera influxus (eodem modo, sicut illud in homine fieri, supra dictum est) atque hinc diuturna lactis generatio procedit.

Obiectio refutata.

Verum (antequam manum de tabula) ex ante dictis jam clarissime patet, quam male argumententur illi, qui brutis omnem qualemcunque cognitionem & intellectum denegare volentes, sic inquirunt, (quemadmodum illud in nupera quadam publica disputatione audivimus & legimus) 1. *Bruta*, 2. *cum eis assignanda non sit substantia cogitans, destituuntur omnibus sensibus*: 3. *nam nullus sensus est sine conscientia*: 4. *nulla conscientia sine re cogitante*: 5. *nulla res cogitans sine rationalitate*: 6. *nulla rationalitas sine immortalitate*. Primum enim adeo veritati repugnat, ut vel à puero, vel ab imperitissimo quocunque rustico reprehendi possit: nam totus cæcus, surdus, omnisque cognitionis expers sit oportet, qui negare audebit, & non manifestissime percipiet, pleraque bruta animalia pollere visu, auditu, gustu, odoratu & tactu; qui clarissime non animadvertet istorum sensuum organa ipsis haud frustra à summo Creatore concessa esse: item, ea pollere aliquali

cognitione, qua res ingratas & inimicas fugiunt, gratas verò & amicas prosequuntur, hasque ab illis distinguunt. *Secundi* falsitas liquet ex antedictis, cum tales sensuum actiones sine aliqua substantia cogitante ab iis peragi non possint, quamvis illa substantia non sit immortalis & omnino perfecta, sicut in homine, sed ejus duntaxat analogon aliquod mortale & imperfectum appellari possit. *Tertium* omnino verum est, cum nullus sensus peragi possit sine conscientia: ut & *quartum*, cum nulla sit conscientia sine re cogitante: sed interim distinguendum est inter rem cogitantem imperfectam ac mortalem, è materia productam, cum eaque pereuntem; & rem cogitantem immortalem, perfectissime rationalem, divinitus creatam atque infusam, à materia separabilem, & post illam in integritate persistentem; cujus prior illa mortalis non est nisi analogon quoddam, seu umbra tenuissima, hujus immortalis levem aliquam similitudinem de longe referens. Atque sic ex his omnibus patet, *quintum* plane falsum esse, cum aliqua res cogitans possit esse sine perfecta rationalitate, licet (ut dicit *sextum*) nulla perfecta rationalitas possit esse sine immortalitate.

Atque hæc tandem de his dicta sufficiant. In historiarum lactificationis examine, propter rei obscuritatem, paulo prolixior esse debui. Nunc adhuc subjungenda foret ipsius lactis ulterior anatome, quatenus ex diversis constat partibus, caseosa, butyracea, & serosa: verum ne nimis longe extra metam divagari velle videar, hic potius subsistam.

### C A P U T III.

#### D E D I A P H R A G M A T E.

Vide Tabulam IX.



Ost historiam mammarum extrinsecus thoraci insidentium, pergimus ad interiores hujus medii ventris continentes partes, inter quas primo considerandum venit sepimentum illud notabile, quod *Diaphragma*, *Σπὴν τὸ Διαφραγμα*, *distinguere*, Latinis *Septum transversum* dicitur quia transversum corporis nostri truncum in duos ventres distinguit seu dirimit. Aristoteles communiter *Διαφραγμα*, *succinatum*, & interdum *Σελιασμα*, & *Σπασμα*, Macrobius verò *disseptum* vocat. Hippocrati multisque veteribus *φελω*, & *φελές*, id est, *mens* appellatur, quod eo affecto per consensum mens & sensus conturbentur, atque in ejus inflammatione paraphrenitis contingat.

Nomina.

Est autem musculus respirationi, cum aliis costarum musculari, inserviens, figura propemodum circulari, & situ à reliquis musculis multum diversus, magnitudine respondens amplitudini transversæ imi thoracis.

Est musculus.

Substantia præditum est carnosum, in medio, ad majus robur, membranosa ac nervosa, ad quam medietatem fibræ carnosæ à thoracis peripheria, tanquam ad centrum, excurrunt: cui centro inflata vulnera lethalia censentur, quod inde pereat respiratio, & graves sequantur convulsiones. Sed in carnosum parte inflata vulnera non esse lethalia, dicit Galenus, idque exemplis confirmant Hollerius, *com. ad lib. 6. aphorif. 18.* Jacotius, *com. ad lib. 1. aphor. 15. & sect. 3. conc. Hipp. & Alexander*

Substantia.

Benedi-

Benedictus ; idemque etiam nos in praxi vidimus.

*Membrana.*

Membrana vestitur duplici : quarum superior pleuræ ex pansio est , cui mediastinum & pericardium ( nonnunquam etiam , sed rarius , pulmonum lobi per nerveas fibrillas ) firmiter cohærent. Inferior peritonæo accepta fertur.

*Situs & connexio.*

Extremis undique costis , sterni parti inferiori , ac mucronatæ cartilagini annexum , thoraci circumtenditur , & circa vertebrae lumborum in duas protenditur carnosas primò , deinde tendinosas portiones , dictis vertebrae valide annexas , usque ad os sacrum descendentes , per quas descendit arteria magna , cum nervis sexti paris costis attentis , & vena azygos ascendit. Ab his portionibus originem ejus multi , cum Galeno , describunt : alii verò à cartilagine ensiformi : alii , cum Fallopio & Laurentio , à costarum extremis : alii , cum Vesalio & Sylvio , à medio membranoso centro , quod nervi ingrediuntur , principium ejus deducunt. Quæ postrema opinio multis displicet , quibus illa membranosa pars potius omnium in circuitu adstantium fibrarum quasi unus generalis tendo esse videtur : sed insertio nervorum in nervosam partem docet contrarium , utpote qui semper inferuntur in caput musculi : cujus rationem vide *lib. 5. cap. 1.*

*Foramina.*

Pervium est circa medium , dextrorsum pro venæ cavæ , sinistrorsum pro gulæ & nervorum stomachicorum transitu. Quantum ad Arteriam aortam , illa non perforat diaphragma , sed vertebrae incumbens , quasi semicirculo quodam ab eo comprehenditur.

*Vasa.*

Arterias duas **Phrenicas** dictas , à conjuncto sibi arteriæ magnæ trunco consequitur. Venas similiter duas , **Phrenicas** dictas , residuum à nutritione sanguinem referentes , cavæ trunco inserit. Nervos recipit insignes , per totam ejus substantiam dispersos , è plexu nervorum cervicis & paris secundi vertebralis ramis in homine ( in brutis majoribus è quarti & quinti vertebralis paris ramis ) ut & è nervis brachialibus per mediastinum descendentibus , consensus diaphragmatis cum capite , & propter commissionem cum nervulis maxillarum labiorumque musculos petentibus , etiam *risus Sardonii* præcipuos auctores. His ab inferiore parte nervuli accedunt à costali & stomachico illic transeunte. Omnes hi nervi prope ejus mediam membranaceam partem inferuntur , quæ hic non cauda , sed caput hujus musculi est , utpote versus quam circumferentia cum annexis costis attrahitur.

*Movet.*

In inspiratione explanatur , & ex curva seu convexa laxitate ad planitiem accedit , non tamen tenditur : at in expiratione

primo quasi cum impetu tenditur , sed mox rursus laxatur , atque tensione ista costas attrahendo , expirationem cum aliquo impetu exorditur & facit ( quippe negotium hoc procedit eodem fere modo ut in reti illo jactitio , nostratibus *werpnet* appellato , quod ad piscium capturam projicitur expansum in aquam , sed cum ex aqua rursus extrahitur , tunc per interiores funiculos ambitus ejus contrahitur : sic etiam in inspiratione explanatum diaphragma , in expiratione per suas fibras contrahit suum ambitum cum annexis ei costis , & sic redit ad laxam curvitatem ) quibus costis ilico subsequentibus , mox desinit hujus tensio , & fit laxatio : eodem modo sicuti cum campanæ pendulæ longis funibus trahendo moventur ; quippe primo impetu funis tenditur , sed quia ad istum impetum ilico sequitur mota campana , hinc statim laxatur funis , usque dum campana ab altero ad prius latus revoluta , illius attractor rursus simili impetu funem tendens , eandem retrahat. Non autem necesse est ut diaphragmatis tensio tam diu persistat , quam diu durat exspiratio , nam costæ uno validiore impetu attractæ , mox sine ulteriore tanto impetu facile subsequuntur ( sicut de campana dictum ) & leniore contractione musculorum intercostalium , adjuvantibus simul etiam Sacrolumbis & Triangularibus , ad se invicem propius adducuntur. Sic quilibet in se ipso experiri potest , primam expirationis partem cum aliquo impetu fieri , reliquam lenius sine impetu subsequi : quod in altis suspiriis & majoribus respirationibus optime animadvertitur. Ex quibus liquet , diaphragma esse primum musculum qui expirationem facit.

Omnino contrarium usum ei assignat Joannes Swamerdammius , *tract. de respir. sect. 1. cap. 2. item sect. 2. cap. 1. & 2.* dico *contrarium* , imò & impossibilem : scribit enim diaphragma se extendendo thoracem dilatare , & inspirationem procurare ( hoc ipsum inculcat quoque Fr. de le Boë Sylvius , in *praxeos med. lib. 1. cap. 22. & 23. de respiratione laesa , & de singultu* : idemque sentit Joannes de Bruyn , in Academia nostra Philosophiæ Professor doctissimus : & longo quoque sermone docere nititur Johannes Mayow , Anglus , *tract. de respir.* ) cum tamen musculorum quorumcunque , atque hinc etiam diaphragmatis , tantum una sit actio , scilicet se contrahere ( hoc latius infra docemus , *lib. 5. cap. 1.* ) partemque ei alligatam versus suum caput adducere , atque hinc etiam impossibile sit , inter omnes musculos solum diaphragma extendendo ( nam extensione id fieri deberet ) & se ipsum , & simul alligatas costas dilatare posse , idque etiam ( ut ibidem addit ) absque aliorum musculorum inspirationi infer-

K k

infer-

intervientium, interventu, quippe inauditum, & musculosarum fibrarum naturæ penitus contrarium est, extendendo agere. Si jam forte præfatus Vir dicere velit, illam thoracis dilatationem contractione diaphragmatis fieri, tunc adeo rationi, imò & experientiæ contradicit, ut à nemine amplius excusari possit. Nam cum diaphragma necessario costas versus suum caput adducat, ejusque caput sit media membranosa pars (hoc ex insertione nervorum patet) idque medio superiore & longe altiore loco situm sit, quam costæ ei inferius annexæ, necessario, dum sese contrahit, costas inferiores introrsum versus suum caput adducit (sicut contingit in reti illo jactitio, de quo modo dictum) sicque thoracis capacitatem angustat, non vero dilatat. Præterea & illud error est, quod, *ibid.* putet diaphragma in inspiratione viscera abdominis deorsum propellere, cum tamen ea in inspiratione sursum moveri, quilibet in se ipso experiri, atque in sectionibus vivorum animalium oculis videri possit; & ipsa quoque ratio doceat in inspiratione curvitatē ejus ad planitiem deduci, quia ejus latera, una cum annexis costis, extrorsum & sursum moventur, atque hinc etiam tunc necessario extrorsum & sursum ascendere abdominis musculos, & viscera diaphragmati annexa. Præterea ipse Swamerdammius, *eodem cap. 2. sect. 1. artic. 5.* scribit in expiratione abdomen introrsum & deorsum cogi, igitur necessario in inspiratione, quæ contrarius est motus, sursum attollitur. Addit denique, *artic. 7.* in expiratione diaphragma sursum ascendere, cum tamen tunc in medio, qua parte mediastino, quod ossi sterni & dorsi vertebri annexum est, adhæret, neque sursum, neque deorsum moveatur, sed in circuitu undequaque deorsum descendat, & ad pristinam fornicis cavam curvitatē redeat.

Postmodum idem Swamerdammius, in *sua natura miraculo, mihi pag. 26.* postquam ubique Regnerum de Graef (cum quo de prima inventionē multarum rerum circa uterum ejusque vasa, admodum litigat) acerbissimè & præter decorum nimis petulantè exagitavit, nescio quo iracundiæ, invidiæ, aliove maligno spiritu ductus, ut etiam mihi, litis eorum inscio, per transennam à latere alapam impingat, in istam suam uteri historiam vel scenam, etiam me, quasi postliminio, introducit, quatenus hoc meæ Anatomes loco adversus ejus libellum de respiratione (non demandatâ prius, aut impetratâ ab ipso aliquâ veniâ) aliquid scripsi quod ei non arridet, & ejus aliquem corrigendum errorem notavi: quæ in me invectiva (in qua magnam laureolam sibi quærere velle videtur) isti historię uteri,

quam ibi ex professo describit, eodem modo convenit, ut historia belli Trojani conveniret euangelio Lucæ. Satis falsè me reprehendit, quod hic scribam, illum *citato lib. de respir.* statuere thoracis dilatationem, quæ inspirando fit, peragi à diaphragmate se extendente, cum tamen se contrarium scripsisse dicat. Ejus verba hæc sunt: *Reperiemus in aëre inspiratione diaphragma è fornicato planum fieri, atque sic recedens ab otiosa sua curvitate, thoracem se contrahendo, etiam absque aliorum musculorum inspirationi dicatorum interventu, solum per se ampliare.* Jam ego omnium doctorum virorum sententiam peto, ut libere pronuncient, quidnam ex his ejus verbis aliter judicare vel intelligere possint, quam quod diaphragma solum, absque aliorum musculorum subsidio, thoracem dilatat. Sed malè dicit, diaphragma id facere contrahendo, cum tamen in contractionē nulla pars amplior & planior, sed durior, compressior, ac brevior fiat: hoc, sicut in omnibus musculis, ita etiam in diaphragmate verum esse debet, quod si, dum planum fit, thoracem ampliet & dilatat, ut ille facere dicit, ergo non contrahendo, sed sese extendendo id facere deberet, nam in inspiratione ejus circumferentia, cum ei annexis costis, versus ejus caput (quod superiore & medio loco, in cartilaginis scutiformis regione, situm est) non adducitur, sed longius ab eo abducitur, igitur, extensione id fieri deberet, & non contractione. Si verò dictis verbis significare velit, thoracem, sine diaphragmatis aliorumque musculorum interventu, se ipsum sponte dilatare, tunc necessario præsupponit, hunc inspirationis voluntarium motum peragi sine musculis, quod est absurdissimum, cum omnis, in quibuscunque partibus, voluntarius motus peragatur à musculis. Hæc cum vera sint, quare igitur in sua uteri historia, tam longe extra metam exsiliens, adeo impotenter in me invehitur, ac si turpem aliquam injuriam ei studio fecissem? Non satis considerasse videtur, quod scriptoribus objectiones expectandæ, sed nunquam ægrè ferendæ, & opposcentes eo nomine odio habendi non sint, sed rationibus potius refellendi.

Riolanus, *lib. 3. anthropogr. cap. 4.* disputat, si ne diaphragmatis motus naturalis, an verò animalis, & concludere videtur, ejus motum esse naturalem, quia non dependet à nostro arbitrio, & sequitur respirationis conditionem. Verum hæc ejus sententia veritati & experientiæ repugnat: nam quod respiratio sit motus merè animalis, clarissime docebimus *sequente cap. 13.* Cumque illa peragatur à musculis thoracis, quorum pars magna est diaphragma, necessario etiam diaphragmatis motus est animalis. Frustra etiam distinguit Riolanus, inter

*Situs ejus  
motus natu-  
ralis, an  
animalis.*

inter ejus motum liberum, cum ex se ipso movetur; & violentum, cum sequitur motum aliorum musculorum, nam utriusque ratione non definit esse motus animalis; utpote qui motus non consistit in solo agere, verum in agere posse: ac proinde cum diaphragma, aliisque qualiscunque musculus, ad tempus ab actione desistit, & tantisper

aliorum musculorum motum sequitur, statim negandum non est ejus motum esse animale, nam potest se quocunque tempore ad arbitrium movere: & quod à motu suo quiescat, aliorumque musculorum motum sequatur, hoc etiam ex arbitrio procedit, quia etiam potest hoc non facere.

## CAPUT IV.

## De Pleura, Mediastino, &amp; Thymo.

Pleura.



Leura est membrana valida, dura, & alba, costis eorumque musculis subtensa, thoracis interiora omnia cingens.

Nomina.

Lindanus, *physiolog. lib. i. cap. 6. artic. 9.* admodum anxie inquit in originem nominis, & putat male appellari Pleuram, cum Græcis ἡ πλὴν, *costam*, non verò hanc membranam significet: atque hinc mavult eam, cum Aretæo & Ruffo, appellare *Membranam succingentem*. Certè frivolum est, tanto cum scrupulo inquirere in originem nominis, cum de re satis constet, & omnibus Medicis per membranam pleuram intellexerint. Sed tales critici videntur malle ossa corrodere, quam nucleos gustare, & de nomine litigare, quam rem ipsam inquirere.

Duplicitas.

Ubique duplex esse censetur, quæ duplicatura circa dorsales vertebrae, & in mediastino melius conspicua esse videtur. Riolanus tamen, *animadvers. in Laurent. & Bauhin.* hanc duplicaturam prorsus negat, cum quo etiam alii nonnulli sentiunt, quia extra mediastinum non facilis est ejus demonstratio.

Interius, quæ pulmonem respicit, lævis existit: parte autem exteriori magis aspera, musculis mesopleuræ, costis, sterno, & vertebrae dorsæ firmiter cohaeret: ossibus tamen non immediate, sed intercedente pericardio, quo hæc proxime investitur.

Fibrilla.

Intrinsècus, modò in uno, modò in utroque latere, interdum nerveas fibrillas ex se emittit, quarum interventu multoties pulmo, idque etiam in sanis, pleuræ annexitur sine ullo respirationis incommodo, ut latius docebimus *sequente cap. 13.*

Foramina.

Superius & inferius variis foraminibus pervium est, ad arteriæ magnæ, venæ cavæ, oesophagi, multorumque vasorum transitum.

Vasa.

Arterias, venas, & nervos, ab intercostalibus sortitur.

Orins.

A spinæ ossibus oriri traditur, à quibus utrimque per latera ad sternum ascendit,

sub quo utriusque lateris membrana simul jungitur, thoracis capacitatem ac pulmones in duas partes dispescens, & sepimentum in medio thorace constituens, quod **Mediastinum** appellatur. Illa autem conjunctio membranarum utriusque lateris maxime conspicua evadit cum os sternum ab ea divellitur.

Mediastinum.

Inter has membranas à claviculis usque ad pericardium, nonnulli cavitatem quandam inveniri, in eaque non raro collectos pravos humores, varios occultos morbos inducere tradiderunt, eo decepti, quod cavitatem illam, quam avulsione sterni manibus suis efformant, ibi antea naturaliter extitisse putent: quam tamen ibi non existere, patet, si à parte posteriore, solutis costis, sectio incipiatur, tunc enim duplicata pleura, sine ulla intermedia cavitatem, adnecti deprehenditur.

Cavitas.

Recipit mediastinum arterias à mammariis internis, venas autem ad mammarias & venam sine pari emittit, quæ ablato sterni conspiciuntur. Præterea *Venam mediastinam* dictam (quæ modò una & amplior, modò gemina & tenuior est) venæ cavæ ramo subclavio inserit. Nervos habet à sexto pari, ejusque ramo recurrente.

Vasa.

Ejus usus est, cor suspensum tenere, & ab injuriis defendere: nec non thoracem & pulmonem in duas partes dividere, ut una læsa, possit tamen altera respirationis munus peragere: item diaphragma sursum continere, ne ex eo suspensa viscera, hepar & ventriculus, illud suo pondere nimis deorsum revellant.

Usus.

Huic mediastino circa jugulum, in summa thoracis parte, ad divisiones arteriarum & venarum subclaviarum adnascitur **Thymus**, qui est corpus glandulosum, molle, spongiosum, & subalbum, in foeminis humidisque corporibus majus, quam in viris & siccis.

Thymus.

Hæc pars in infantibus modò natis triplici glandula distinguitur, & cum pancreate aliquam substantiæ affinitatem obtinere videtur: in adultis, exsiccatâ humiditate,

K k 2

multo

multo tenuior est. Whartonus, *adenograph. cap. 16.* vidit in humano sex mensium abortivo fœtu, thymum inferiore parte adnatum pericardio, atque inde bifurcatum sub clavicula extra thoracem tracheæ latera conscendentem. Sic etiam in vitulis inferiore parte pericardio adhæret, hinc in majorem molem excrescit, & divisus thoracem superius egreditur, ac tracheæ latera utrimque conscendens, ad glandulas maxillares, imò nonnunquam usque ad parotides excurrit: estque in his animalibus magnum, **Lactes** appellatum, esui expetitur obsonium.

Lactes.

Vasa.

Arteriolas & venulas à jugularibus adeo exiguas habet, ut in dissectione visum effugiant.

Succus.

Whartonus thymo etiam tribuit nervos à sexto pari & plexu subclavio, quos putat liquorem suum nutritium, nonnulla impuritate, aut acrimonia nimia inquinatum, in hanc glandulam exspuere, & depuratum resumere. Verum hæc sententia prorsus aliena est. Nam vasa lactea (quæ in his glandulis vix unquam commodius inveniuntur, quam inspectione vituli modò nati, aut lacte nutriti, eodem modo sicut illa quæ mammarum lactantium glandulis interjiciuntur) nervos esse putat Whartonus, eaque pro nervis describit. Ad hæc, non observat qualis succus in thymo modo nati fœtus contineatur, scilicet chylosus

seu lacteus, qualem in eo reperit Harveus, *exercit. anat. ad Riolan. mihi pag. 19.* qualem ex eodem copiose effluentem vidit Deussingius, *de lacte, cap. 3.* qualem etiam quilibet in vitulis junioribus, hora una atque altera post lac copiosius datum occisis, inveniet. Qui succus non per nervos, sed per vasa lactea eo confluit, in parte hac magis perficiendus, & sic per subclavias venas ad cavam & cor transmittendus. Hic autem succus quia in adultis, propter viarum lactearum eò tendentium exsiccationem vel angustiam, aut valde parvâ, aut nullâ quantitate in thymum confluit, hinc in iis pars illa valde imminuitur & contrahitur, eodem modo ut fit in mulierum mammis cum illæ exsiccantur.

Nulli igitur manifesti nervi in thymum feruntur, utpote quæ huic parti insensili, nec ullius sensus indigentis, non magno usui fuissent: forte ad privatam in sui ipsius nutritione effervescentiam aliquam perficiendam, invisibiles aliquos nervorum ramulos admittit.

Lymphæ ductus per hanc partem decurrunt, & in venam subclaviam se exonerantes, frequenter se vidisse, refert Whartonus: neque illi sine ratione eò transeunt, cum in præparatione lacteæ materiæ, ad fermentaceam effervescentiam in corde faciendam, ista lymphæ opus sit, ut latius docuimus *lib. 1. cap. 13. & 17.*

Lymphæ  
ca vasa.

## CAPUT V.

## De Pericardio, &amp; humore in eo contenta.

Pericardium.



**Pericardium** (quasi cordi circumjectum, quod Hippocrates *περιεὶον*, *vaginam*, alii *cordis capsulam* vocant) est involucrum membranofum,

cor undique cingens, quo intra sedem continetur, & ab externis injuriis tutelam qualemcunque consequitur.

Contiguum quidem est cordi, sed tantum ab eo distans, quantum agitationis pulsusque commoditas exigit.

Ortus.

Oritur ad cordis basin ex communibus à pleura desumptis tunicis exterioribus vasa cordis cingentibus, quæ cor ingressura, illam ad pericardii efformationem deponunt.

Membrana

Riolanus duplicem ei membranam adscribit, earumque anteriorem vult esse sobolem mediastini, posteriorem verò produci à tunica vasorum cordis. Sed illam duplicatam demonstrare nimis difficile foret. Præterea tunica exterior vasorum cordis desumpta est à pleura, quemadmodum etiam mediastini membrana: atqui absur-

dum foret ex una pleura duas tunicas concurrere ad pericardii efformationem, unam à tunica vasorum, alteram à mediastino, & interim mediastinum manere peculiarem membranam pericardio extrinsecus circumjectam. Idem Riolanus sibi inconstans, *animadvers. in Laurent.* scribit, satius esse dicere, pericardium oriri à pleura, in cujus duplicatura continetur: & *animadvers. in Baubin.* bene probat, non duplicatam, sed tantum unam simplicem esse pericardii tunicam; fortè immemor eorum quæ de ejus duplicata scripserat *anthropograph. lib. 3. cap. 7.*

Exterius mediastino plurimis fibrillis adhæret, eique circa basin cordis conjunctum continuumve cernitur, ubi arteriis venisque majoribus transitum concedit. Inferiore parte adhæret centro diaphragmatis.

Communicatio.

Ad nutritionem arterias adeo exiles obtinet, ut vix conspici queant. Venulas ad phrenicas & axillares emittit. Nervos minimos recipit à recurrente sinistro, & sexto pari versus cor transeunte.

Vasa.

Liquor

Liquor pericardii.

Liquorem in se continet ferofum, in naturaliter constitutis corporibus rubicundum, è vaporibus ex corde protrufis, ac in pericardio nonnihil condensatis, genitum, quantitate unius aut alterius cochlearis. Hæc est vera ejus generatio, neque audiendi sunt, qui illum ex potu, faliva, adipe cordis, aliisve caufis produci arbitrantur. Nicolaus Stenonis fufpicatur illum ex lymphaticis quibusdam vafculis in pericardium deponi.

Ufus.

Hic liquor extrinsecus cor humectans & lubricum faciens, illius motum reddit faciliorem, nimiamque ficcitatem prohibet: ejus verò diuturnior defectus ficcitatem & tabem non femel induxit. Deficit autem cum per pericardii vulnus, exulcerationem, aliamve continui solutionem, cordis ille fudor in eo condensatus effluit, nec in eo detinetur. Observatum tamen à practicis, eum per vulnus pericardii elapsum, postea occluso vulnere fuisse regeneratum, & ægros fanitati reftitutos, cujus rei hiftorias & exempla defcribunt, Galenus, Cardanus, Benivenius, Petrus Salius, & alii.

Invenitur hic liquor æque in viventibus, atque in mortuis, ut ex viventium brutorum anatomica diffecione patet, qua omnino convincitur Matthæus Curtius, qui, *comment. ad anat. Mundini*, illum in vivis animalibus dari negat.

Qualis fit in morbofis.

In morbofis corporibus hujus colorem magis aqueum, interdum urinæ, interdum aquæ turbulentæ omnino fimilem, copiam quoque multo majorem, sæpe invenimus. Nam in nosocomio nostro multa occurrerunt fubjecta, in quibus istius liquoris femi libra à me reperta, & Medicinæ ftudiofis demonstrata fuit. Anno 1651. in cadavere Angli cujusdam, pravis alimentis diu nutriti, atque hinc in cachexiam pituitofam delapfi, & fic tandem mortui, istius liquoris turbulenti, aquei coloris, ad minimum duas libras, in diftento plurimumque laxato pericardio contentas, fpectatoribus oftendimus, quorum

variū tunc cafum iftum, ut valde rarum, annotarunt.

Hunc liquorem femper comperi pauciorum, magisque rubicundum effe, in hominibus calidi temperamenti, in quibus vapores è corde exhalantes funt tenues, paucique in pericardio condensantur, & qui condensantur, ii à valido cordis calore citius attenuantur, ac per pericardii poros citius exhalant. Contra verò eundem copiofiorum, magisque aquofum ac palentem femper observavi in naturis frigidioribus, in quibus à pravo victu, morbosa constitutione, aliisve caufis, calor debilis evaferat, unde craffiores è cordis fubstantia propulfi vapores, in pericardio majore copia condensati ac collecti, & defectu fufficientis caloris minus diffipati fuerant. Hinc etiam fcribit Vesalius, eum in mulieribus copiofiorum effe, quam in viris; eundemque Riolanus in senibus uberiores observavit, quam in juvenibus.

Quantitatis varia caufa.

Præterea notavimus majorem copiam istius liquoris non facere palpitationem cordis, quod tamen, ex Galeni fententia, communiter tradunt Medici. Nam in omnibus iis, in quibus post mortem in pericardio humoris istius aquei majorem copiam reperi, antea dum morbofi viverent, nullam omnino cordis palpitationem (ne quidem in ifto Anglo ante citato) fed contra pulfum languidum ac rariorem inveniri. Neque etiam à copia istius liquoris tanta fit pericardii anguftia (etfi id vulgò prædicetur) ut cor fe in eo libere movere nequeat, atque hinc palpitet; fed contra, femper animadvertimus, pericardium hinc adeo latum laxumque reddi, ut cor in eo multo facilius moveri poffit, quam in paucio liquore. Ita ut hujus liquoris copia palpitationem minime faciat, eaque potius excitetur à quovis liquore, etfi paucio, dummodo præter ordinem plurimum & raptim dilatari, vel acrimonia, putredine, aliave vellicante qualitate cor infestare, idque ad tam molefti hostis depulfionem incitare poffit.

A copia non fit palpitatione hordis.

## CAPUT VI.

## DE CORDE, IN GERE.

Vide Tabulam IX.

Denominatio.



Or à eutrendo nomen defumpfiſſe videtur, unde etiam Belgis *Hart*, vel *Hert* (quod alioqui *cervum* fignificat) appellatur, quia ficnt illa beſtia præ cæteris animalibus, ita cor præ cæteris corporis partibus, curſu & motu valet. Quod tamen Belgicum nomen etiam derivari poſſe videtur ab *Harden*, quod dura-

tionem, aut ab *Hard*, quod duritiem fignificat, vel quia ejus motus durat per totum vitæ tempus, vel quia ſubſtantia duritie mufculos aliaque parenchymata ſuperat. Riolanus nomen deducit à Græco *κῆρ*, contracto ex *κῆαρ*, quod à *κῆω*, *uro*, derivatur, quia ex eo ignis noſtri corporis procedit: atque fic etiam Belgis *Hert*, ab *heert*, quod focum fignificat, derivari poſſet.

K k 3

posset. Menetius à *καρδία*, *vibro, concutio*, derivat. Chysippus deducit *καρδία*, seu *καρδίον*, à *robore*, vel à *καρπία*, *robustum imperium habeo*, quoniam validissimas actiones edit, & quali imperium in reliquis totius corporis partes habet.

*Viscus princeps.*

Est autem viscus omnium princeps, Sol microcosmi, actionum vitæ principium, calidi spiritusque vitalis scaturigo, & primum mobile nostri corporis: quo vigente, naturales omnes corporis functiones vigent, languente languent, deficiente, penitus abolentur. Quippe in hoc continetur totus fomes & focus caloris naturalis, ut ex eo patet, quod omnes corporis partes frigore rigeant, ad quas sanguis è corde propulsus pervenire nequit; quodque is sanguis frigidior est, qui diutius ab hoc fonte & foco absuit: quod denique caloris dispendium in nulla alia, quam in hac corporis parte reparari possit. Quæ omnia sensus testatiora facit, quippe digito in cor animalis vivi dissecti immisso, tam eximius in eo calor sentitur, qualis similis in nulla alia parte reperiri potest.

*Caloris focus.*

Hic calor licet ab ipso generationis principio excellens ei sit insitus & infixus, certum tamen est illum ab humoribus in ventriculos ejus infusus, in iisque fermentantibus, sustentari & plurimum augeri, ac per istam continuam humorum illabentium fermentationem seu effervescentiam eum continuari. Calx viva per admistam aquam exardescit à fermentatione seu effervescencia, quid mirum igitur si cordis calor etiam ab influentium humorum fermentatione identidem accendatur, & pro majore, vel minore ista fermentacea effervescencia (quæ à materiæ fermentandæ aptitudine, magna ex parte dependet) etiam modò major, modò minor existat? quippe calidi insiti spiritus cordis mox in illapsam materiam agunt, eamque cum calore fermentant atque effervesce faciant, & sic identidem renovant calorem, qui alioqui paulatim imminueretur, usque dum tandem deficeret.

*Situs.*

In medio thoracis situm est, pericardio & mediastino circumdatum, mucrone ad sinistram nonnihil, propter diaphragma, reflexum, eoque nullis vicinis partibus alligatum, sed ex solis vasibus ad basin ingredientibus & egredientibus, quibus unitur, suspensum. Ejus tamen pulsatio magis sentitur in sinistro latere, infra papillam, quia sinister ventriculus versus anteriora thoracis eminet cum aorta, quæ simul feriunt latus sinistrum. Dexter verò ventriculus profundius versus dextrum latus situs est, atque hinc ejus pulsatio in dextro latere foris minus sentitur. Rarissimum est, cor istum situm mutare, & dextrum ventricu-

lum in sinistro, sinistrum verò in dextro latere subsistere, in hocque pulsare: Riolanus tamen, *animadvers. in Bauhin.* scribit se id vidisse in viro quadragenario, & in Regina, Ludovici XIII. matre.

Substantiam habet firmam, crassam, densam, in dextro latere tenuiorem & molliorem, in sinistro crassiorē & densiorem, in mucrone spissiorē ac duriorē: ad finem tamen mucronis, ubi sinister ventriculus desinit, tenuem, utpote ex interioris, & exterioris membranæ concursu maxime constantem.

*Substantia.*

Hanc substantiam triplici fibrarum genere intertextam esse, docuit Galenus, quem plerique Anatomici sequuntur. Verum si cordis fibræ diligenter considerentur, & paulatim divellantur (hoc in corde cocto non minus quam in recente fieri poterit) nullæ transversæ fibræ inveniuntur (has tamen Vesalius, beneficio sectionis, inveniri posse, male tradit) sed videntur omnes cochleato ductu, id est, circa medium nonnihil incurvo, circumduci, omnes tamen ad mucronem non pervenire, sed extremitatibus suis sursum reflecti: nam quæ à ventriculorum orificiis primæ descendunt, breviores sunt, iisque mox incumbunt aliæ paulo longiores, ad conum tamen non pervenientes; his aliæ adhuc longiores; ita ut tandem ultimæ longissimæ ad conum pertingant, cæteræque breviores sub se positas, sibi que connexas, contineant. Et quia breviores sub longioribus contentæ cumulum altiorē faciunt, fit quod superior mediaque cordis pars tumidiuscula sit, cum longiores, ad quarum extremitates non pertingunt breviores, in conum angustiorē definant. Notante tamen Nicolao Stenonis, *lib. de muscul. & gland.* hic fibrarum ductus magis videbitur observari in sinistro, quam in dextri ventriculi regione: observavit eum in dextro ventriculo interius à septo descendentes fibras oblique posteriora versus per exteriorē superficiem ascendere, sicque fundum dextri versus basin tantillum elevare, atque hinc in contractione cor in dextro latere, non modò brevius, sed etiam aliquanto rotundius & crassius evadere, & propter hanc parietum dextri sinistri que lateris majorem brevitatem ac crassitiem, necessario ventriculorum cavitates tunc fieri angustiores.

Propter has fibræ & pulsationis motum, statuit Hippocrates cor esse musculum, quod hætenus strenue negatum est per omnes Medicorum scholas, & passim edoctum, illud esse primum viscus totius corporis.

*An cor sit musculus.*

1. Quia in eo nobilissimus generatur humor cum suo spiritu, sanguis scilicet vitalis spirituosus, cum in nullo alio peculi-



peculiaris aliquis humor aut spiritus generetur.

2. Quia substantiæ duritiæ omnium musculorum substantiam longe superat.

3. Quia fibræ canosæ non faciunt musculum, nam alioqui ventriculus & vesica urinaria, propter fibras carnosas (quibus ille se fortiter contrahit in vomitu & singultu, hæc in urinæ expulsiōe) facile inciderent in numerum musculorum, è quo tamen concordibus suffragiis hæcenus excluduntur.

4. Quia cor habet ventriculos & valvulas, quales in nullo totius corporis musculo inveniuntur.

5. Quia muscoli sunt motus voluntarii instrumenta, quæ pro arbitrio, & non perpetuò, sed per intervalla moventur, & à longo & vehementi motu delassantur, sicque à motu desistere coguntur; cum è contrà cor, non animali, sed naturali & perpetuo motu sine delassatione moveatur, qui ad arbitrium ne minimum quidem mutari, augeri, imminui, aut listi potest, sed à principio usque ad finem vitæ perdurat.

Verum etsi hæc valida sint argumenta, tamen, iis non obstantibus, pergit Nicolaus Stenonis, *lib. ante citat.* pronunciare, cor nihil aliud esse quam musculum, scilicet, quia habet omnia quæ musculis concessa sunt (puta, caput, ventrem, tendines, fibras, nervos, sanguifera vasa, & membranas) nec aliquid quod musculo denegatum est, in corde invenitur (hoc fere ita sonat, acsi dicerem, Vesica urinaria habet omnia quæ ventriculo concessa sunt, nempe externam membranam communem, mediam carnosam, internam rugosam, nervos, arterias, & venas, formamque globosam & cavam, ergo vesica est ventriculus, eodemque munere fungitur) atque hinc à sanguificandâ, spiritusque naturales generandi officio penitus excusat, omnibusque hæcenus ei adscripsis & concessis privilegiis exutum, inter serviles musculos reponit, fortè ejus epitaphium quoque brevi conscripturus, eodem cum applausu, quo Bartholinus hepatis epitaphium exhibuit. (videantur super his alia quædam *lib. 5. cap. 1.*) O infelicia horum viscerum tempora! quæ antea in puppi sedebant, & microcosmici regni clavum tenebant, ea nunc vix digna judicantur, quibus sentinæ corporis exhauriendæ munus committatur. Si Anatomicorum examina sic ulterius procedant, metuendum certè ne etiam cerebrum, aliæque variæ partes, quam primum de gradu deturbentur, suisque dignitatibus, prærogativis, & muniis priventur. Nam si illa officia, quæ hæcenus à visceribus peragi dicta sunt, non amplius toti viscerum partiumve substantiæ & naturæ,

sed solis eorum cavitatibus (quæ olim conditæ erant, ut in nonnullis partibus coquendos humores exciperent, in aliis coctos continerent, in aliis excrementa colligerent) secundum Nicolai Stenonis opinionem, adscribenda sint, certè tempus erit, ut cerebrum, testes, lien, ventriculus, aliæque variæ similes partes, quam citissime fuga sibi consulant, antequam judicium tam rigidum incurrant, iisque vivis etiam exequiæ fiant, nenix canantur, & epitaphia scribantur.

Figuram cor obtinet pyramidalem inversam, seu potius turbinatam: cujus ratione dividitur in basin, seu partem latiorē, quæ superior est; & apicem vel conum, seu partem strictiorem, quæ inferius in mucronem acuminatur.

Magnitudo variat pro ætate & temperamento, quæ tamen in homine, quo ad proportionem corporis, major est quam in aliis animalibus. Ordinaria longitudo in adultis est fere sex digitorum transversorum, latitudo quatuor. Observatum quoque est, illud in hominibus calidioribus & audacibus minus ac densius, in frigidioribus verò & timidis majus ac mollius esse. Sic etiam aliis pavidis & ignavis animalibus, ratione proportionis corporis prægrande; audacibus verò pusillum aut mediocre esse solet. Bauschius tamen, *ephemerid. med. physic. tom. 2. obser. 6.* aliquot habet exempla leonum dissectorum, quibus corda, pro ratione corporis istorum animalium, multo majora erant, quam ulli alteri animali. Interdum, sed valde rarò, admirandus cordis excessus in magnitudine observatus fuit. Sic admodum monstruosum fuit cor illius viri, quem se Patavii secuisse, scribit Dominicus de Marchettis, *anatom. cap. 10.* quod tam vastæ erat magnitudinis, ut pulmonibus exilibus existentibus, totam fere thoracis capacitatem occuparet, ac diaphragma deprimeret, ejusque pericardium pleuræ à lateribus alligaretur, & ventriculi tam lati essent, ut in singulis alterius viri naturale cor subsistere potuisset. Non minus monstruosum fuit etiam illud cor, de quo scribit Kerckringius, *observat. 16.* quod è foemina quadragenaria exsectum, pendebat uncias viginti duas, cujus sola auricula dextra æquabat cor hominis ordinarium: arteria pulmonaria & vena cava excedentem magnitudinem habebant. Plura alia insolitæ magnitudinis cordis exempla, sibi visa, describit Bartholinus, *observat. cent. 1. bist. 32. 45. 50. & 24.*

Tunica propria tenui, sed valida, densa, & vix separabili, extrinsecus investitur, ad visceris firmitudinem, quam communem habet, cum magnarum arteriarum tunica tenui propria exteriore: sicut etiam tenuis pellicula ventriculos interius investiens, continua

continua & communis est cum tenuissima illa pellicula quæ, tanquam levis cuticula, arterias majores interius investit: atque hinc verosimile est, arterias has tunicas mutuari à corde, sicut nervi duas tunicas mutantur à cerebri meningibus.

*Adeps.*

Huic tunicæ exteriori ad humectationem adeps durior circa basin accrescit, quem Riolanus in mulieribus invenit copiosiores & magis flavum, quam in viris. Hic nonnunquam tanta copia in brutis cor obvolviffe deprehensus est, ut olim, testantibus historiographis, non semel haruspibus imposuerit, qui viso tanto adipe, victimis cor deesse putarunt. Sic etiam scribit Spigelius, *anat. lib. 9. cap. 6.* se Patavii in struthiocamelo publice dissecto, cor tanta adipis quantitate oblitum invenisse, ut facile multis præsentibus fidem facere potuisset, cor huic avi defuisse.

*Pili.*

Rarissimum est, cor hirsutum reperiri, quod tamen à nonnullis observatum. Tale in Hermogene rhetore visum fuisse, refert Cælius Rhodiginus. Sic etiam scribit Plutarchus, cor hirsutum fuisse repertum in Leodina, ut & in Lyfandro Lacedemonio. Idem in Aristomene Messino compertum fuisse, refert Valerius Maximus. Inter recentiores cor hirsutum se vidisse referunt, Benivenius, Amatus Lusitanus, & Antonius Muretus.

*Vasa.*

Per exteriora parenchymatis sparguntur *Vasa coronaria* dicta, quia coronæ instar basin cordis cingunt, suntque arteriæ & venæ.

*Arteria coronaria.*

*Arteriæ coronariæ* duæ sunt, ab aortæ principio, antequam pericardium egreditur, eò dimissæ, quas in exortu valvula, sanguinis regressum impediens, donatas esse, nonnulli arbitrantur. Hæ cor ambiunt, multosque ramulos à basi ad cornu exporrigunt, quorum plures amplioresque in sinistro latere conspiciuntur. Usus earum est sanguinem spirituosum, mox è ventriculo sinistro egredientem, ad parenchymatis nutritionem advehere. Harveyus, *lib. de motu cordis*, putat cor per eas, una cum sanguine caliditatem & vitam accipere. Quam opinionem irridet Riolanus, qui absurdum esse dicit, cor accipere vitam & caliditatem ab isto sanguine, cum ipsum sit focus caloris & vitæ, è quo ipsius sanguinis calor resultat [potuisset addere, cum ipsum sanguinem conficiat, & esse faciat, cumque vivat & moveatur antequam ullus sanguis existit] atque hinc concludit, per has coronarias extimas partes cordis duntaxat nutriri, & adipem conservari.

*Vena coronaria.*

Venæ coronariæ item duæ sunt: (rarò una tantum) quæ, sicut arteriæ, cor in orbem amplectuntur, & venæ cavæ inferuntur, ac sanguinem à nutritione residuum, è multis minoribus ramulis, à cono

ad basin ascendentibus, susceptum in cavam effundunt. His, magno errore, valvulam adscribunt Bauhinus & Spigelius, quæ putant sanguinis influxum ex coronaria in cavam impediri; cum tamen ille influxus necessario liber esse debeat, & si quæ valvula illic existat, illa tali modo sita esse debeat, ut influxum sanguinis è cava in coronariam prohibeat, quemadmodum in eum finem magna valvula apposita est venis emulgentibus, jugularibus, aliisque variis quæ in cavam aperiuntur.

Præter vasa coronaria, scribit Galenus, *Nervi.*

*lib. 16. de usu part. cap. 3.* cor etiam recipere exiles & invisibiles nervulos à sexta conjugatione: Riolanus dicit, à plexu nervorum stomachicorum ad basin cordis versus spinam existente. Horum nervorum cordis etiam meminerunt, Piccolhominus, Jacobus Sylvius, Bauhinus, Bartholinus, & alii. Eos autem difficulter inveniri, & intra ipsam cordis substantiam conspici non posse, docet sectionis usus. Sic etiam Fallopius, *in observat.* se per ipsam cordis substantiam eos prosequi non potuisse, scribit. *Sub basi cordis*, inquit, *ubi vena arterialis incipit ad sinistrum latus flecti, atque ubi adest meatus ille insignis arterialis in embryone, qui conjungit venam dictam cum aorta, est plexus quidam, aut complicatio nervea, robusta ac solida, à qua abundans copia nervosa materia totam cordis basin amplexatur, perque ipsam plures propagines parvorum nervorum inde deductæ disperguntur, ac per totam ipsam substantiam (hoc addit per conjecturam) decurrunt, quamvis illas minutim prosequi nequeam.* Sic etiam Galenus, *lib. 6. de usu part. cap. 18.* insertionem nervorum in substantiam exacte prosequi non potuit: *Solum*, inquit, *ipsius integumentum pericardium, tenuium nervorum videtur recipere propagines, à quibus divisæ sensibiles alia, ac conspicua in cor ipsum etiam inferi, in majoribus saltem animalibus, cernuntur: quo tamen in ipsam dividantur modo, id sensu amplius dignosci perspicue non potest.*

Hi nervi, propter summam tenuitatem, ita visum fere subterfugunt, ut à multis, atque etiam olim à me ipso, valde dubitatum fuerit, an aliqui nervuli cor ingrederentur. Tandem tamen majore cum attentione & diligentia eos quærens, plurimos admodum exiles nervulos, instar tenuium filorum, à plexu in cordis basin & ventriculorum orificia extensos, eodem modo ut de his testatur Fallopius, inveni, quos in ipsam cordis substantiam prosequi, difficillimum reperi, in ipsa enim basi & tunica exteriore disseminati, mox evanescere, & duntaxat duo majusculi parenchymatis substantiam aliquo modo leviter subire videbantur: unde verosimile duxi, si forte aliqui ramuli ulterius excurrant, illos solummodo

lummodo instar tenuissimorum & invisibilium filamentorum, in substantiam produci, eique obtusum sensum conferre. Fallopius, citato loco, magnum quidem & acutissimum sensum cordi adscribit, sed repugnante experientia: nam obtusus ejus sensus abunde innotescit in quocunque pulsu valido, qui in & à corde non sentitur: nec non in ægro illo Fernellii, lib. 5. pathol. cap. 12. qui sensum contabuit, in cujus corde post mortem tria ulcera non parum cava & sordida, multo ante tempore contracta, invenit: hæc certe acutum dolorem in parte adeo sensibili induxisse debuissent, cum tamen Fernellius nullam doloris mentionem faciat (ut nec Dominicus de Marchettis in simili ægro, ad finem hujus capitis descripto) procul dubio, quod æger de eo nunquam conquestus fuerit. Idem etiam liquet in historia vulnerati in corde, à nobis visi, ad finem hujus capitis adjecta, qui etiam de nullo cordis dolore conquestus est. Hic fortè quis objiciet, quod palpitacionis magna molestia satis persentiat. Respondeo, illam non sentiri in ipso corde, sed in pericardio, mediastino, diaphragmatis mediotullio, aliisque proximè circumstantibus partibus, quibus acute sentientibus à valida ista cordis vibratione in eas impingente, dolorosa molestia infertur. Verum, quid censendum cum pravi vapores ab utero aliisve partibus ad cor delati, illud malè affligunt, an non illam afflictionem inde procedere credendum est, quod acute sentiat, atque hinc molestam vellicationem ab iis illatam, ilico percipiat? Respondeo: si acrem vellicationem acute sentiret, doleret, atqui inde non dolet, ergo. Proinde dico, etli obtusum seu obscurum aliquem sensum cordi, præcipue in exteriori ejus tunica & circa ventriculorum orificia concedamus, tamen credendum non esse, mutationes & afflictiones ejus qualescunque, imprimis majores, eatenus solummodo fieri, quod cor nonnihil seu obscurè sentiat, sed potius aliis tribus de causis. I. Quia ab istis pravis vaporibus vel humoribus sanguis in corde dilatandus incrassatur, coagulatur, aliove modo corrumpitur, ut à corde dilatari debito ac solito modo non possit, unde tunc ejus major, minor, inordinatus, vel qualiscunque pravius motus procedit. II. Quia spiritus cordi insitus, primaria motus causa, ab iis nimis coagulatur, refrigeratur, aut dissipatur. III. Quia aliæ acutè sentientes partes à dictis pravis vaporibus graviter & male affectæ, admodum agitantur, contrahuntur, laxantur; atque hinc sanguinem ex sese insolito modo versus cor propellunt, unde tunc ilico etiam sanguis alio quodam modo in corde attenuatur, hincque mutato quoque pulsu non convenienter ad cerebrum emittitur, atque

sic spiritus animales, & inordinate generantur, & in nervos inordinate influunt.

Cartesius animadvertens nullos insignes, aut dilucide manifestos nervos in ipsam cordis substantiam extendi, illud audacter asserere noluit, sed interim ut passiones animi melius explicare posset, cum Fallopio, bene statuit, aliquot nervulos pervenire usque ad orificia ventriculorum cordis: nam, part. 1. tract. de pass. anim. cap. 15. dicit præcipue observandos esse parvos quosdam nervos cordis basi insertos, qui inserviunt explicandis & contrahendis orificiis cavitatum ejus: similiter etiam artic. 33. & 36. eorundem nervulorum mentionem facit: & super hoc fundamento doctissimum suum tractatum de Animi passionibus, ingeniosissimè extruxit.

Hi igitur Spiritus animales, ut modò dictum, aliquem obtusum sensum cordi conferunt. Acute enim sentire non debuit, ne ex jugi motu, & quorumcunque acrium humorum transitu ac fermentatione molestiam perciperet. Præterea partibus omnino perfectis, etiam ad cordis nutritionem conferunt aliquam fermentativam vim (de hac dicitur lib. 3. cap. 11.) qua in principio opus non fuit (cerebrum enim molle eos tunc nondum conficit) quia acriores germinis particulæ in cordis formatione collectæ, in sese satis acrem fermentantem vim, pro materiæ in qua operantur teneritudine, continent: sed postea cum in majore cordis incremento materia paulo firmiore opus sit, necessario etiam aliquo adminiculo spirituum paulo magis fermentantium opus fuit. Denique hi spiritus orificia cordis, seu ventriculorum ejus, pro diverso influxu, modò magis, modò minus laxant vel contrahunt, atque ita in passionibus animi, modò sanguini liberior, modò difficilior in cor ingressus, & è corde egressus conceditur; atque hinc tunc pulsum mutationes procedunt; hinc in terrore cordis palpitaciones, in mœrore angustaciones cum pulsu parvo; in gaudio calor gratus circa cor, cum pulsu alacri & valido percipiuntur.

An etiam hi spiritus animales sint causa continui motus & pulsus cordis, inquiremus sequente capite.

Cor, ut ante dictum, princeps & regium viscus est (habeat illud Nicolaus Stenonis, cum suis, pro servili mæsculo, quo usque volet) è quo vitalis liquor, cum perenni calore, vitæ hujus sustentaculo, quaqua-  
versum ad totum corpus continuè diffunditur, quo reliquæ omnes partes pauxillum destitutæ, concidunt & moriuntur. Ea-  
propter graviore ejus morbos maximè periculosa, & imprimis vulnera omnino lethalia esse, pronunciavit Hippocrates, cum quibus licet nonnulli per exiguum  
L I tempus

Cartesii opinio.

Usus spirituum animalium in corde.

cordis divinitas.

Vulnera cordis lethalia.

tempus vixerint, nunquam tamen sanari potuerunt; imò plerique eo ipso fere momento, quo vulnus in ventriculos penetrat, tanquam fulmine icti, concidunt, quod meis oculis bis terve factum vidi, ita ut mirarer, quomodo tam subito posset homo omni sensu, motu, & vita privari. Ratio tamen manifesta est: quia sanguis qui ex corde in arteriam magnam, per eamque ad omnes partes, atque etiam ad cerebrum propelli debet, per vulnus expellitur in thoracis cavitatem: nullo autem sanguine ad cerebrum propulso, etiam ilico nulli spiritus animales in cerebro moventur (motus enim cerebri, & hinc spirituum animalium, totus dependet à cordis motu sanguinem impellente, ut docebimus lib. 3. cap. 5.) nec per nervos ad partes propelluntur: hinc ilico deficiunt facultates principes, & sensus; omnisque motus omnium musculorum, etiam respiratoriorum, statim definit, sicque homo repente moritur. Si tamen vulnus admodum exile in ventriculos penetret, tunc interdum, etsi rarò, contingit hominem tam subito non corruisse, sed per paucas horas adhuc vixisse. Ita vidit Paræus virum in corde vulneratum per ducentos passus cucurrisse. Schenckius, *observat. lib. 2.* meminit studiosi, qui vulnus punctum per utrumque ventriculum recepit, & tamen plateæ longæ spatium cursu confecit, ac mente sanus fere per horam vixit. Sennertus, Jonstonus, Mullerus, Heers, & Tulpus, varia referunt exempla eorum qui cum vulneribus cordis per aliquot horas, imò per diem unum aut alterum vixerunt. Fernelius, lib. 5. *pathol. cap. 12.* dicit: *Vulnera cordi inflicta, quæ non alte in ventriculos penetrant, non protinus interimunt. In quodam, qui sensum contabescens & liquefcens, de medio tandem sublatus est, tria ulcera in corde reperi, non parum cava & sordida, multo antè jam tempore contracta.* Etiam simile quid de cordis ulcere refert Dominicus de Marchettis, *observat. medic. chirurg. 47.* de viro quodam qui paulatim longi temporis tractu omnino emaciatus, tandem obiit: in cujus dissectione invenit magnum ulcus, quod non solum cordis capsulam, verum etiam substantiæ cordis magnam partem exederat, usque dum tandem penetrasset in sinistri ventriculi cavitatem, ægrumque sic occidisset. Adhuc magis mirum est, quod magnum cordis vulnus sanari possit: quale exemplum in sectione corporis humani, in theatro anatomico, vidit Cabrolus, *observat. 26.* nam dicit se in furis suspensi corde invenisse cicatricem ex vulnere relictam, duos latos digitos longam, crassitie testonem (hic est nummus Gallicus) æquantem. Verum etsi hæc rara sint, tamen non memini me unquam legisse exemplum vulne-

rati cordis adeo rarum atque ego meis oculis vidi, cujus proinde tota historia, tanquam inaudita & rarissima, hic describenda videtur.

Anno 1660., 5. Aprilis, una cum nonnullis aliis Medicis & chirurgis Culenburi vocatus fui, ut, ex petitione Magistratus istius oppidi, inviserem cadaver Georgii Jacobi Weyman, juvenis viginti duorum annorum, dum viveret robusti, gladio vulnerati & mortui, atque una cum aliis judicarem, vulnusne, an alius casus mortis causa fuisset. Cadaveris visitatio, sectio, & apertio à me peracta fuit presentibus D. D. Gesont, satrapa totius istius Ducatus, Prætor, Scabinis, & Secretario Culenburiensibus: item D. D. Antonio Pelt, medico Ultrajectino, N. van Beeck, medico Culenburiensi, Bonaventura à Dortmont, medico Vianensi, Cornelio à Vianen, chirurgo Ultrajectino, cum tribus quatuorve chirurgis Culenburiensibus, & nonnullis civibus. Primo intelleximus ex relatu Satrapæ, Prætoris, & Scabinorum, hunc juvenem post inflictum vulnus, quinquaginta aut sexaginta passus processisse, tuncque concidisse, & syncope correptum ab aliis domum delatum fuisse, eumque tunc paulo post ad se rediisse. Medici & chirurgi, illuc præsentibus, qui illum tractaverant, dicebant, prima & secunda die vix aliquam effatu dignam sanguinis quantitatē è vulnere angusto (tenui enim gladio inflictum erat) effluxisse, sed postea vulnere aliquantillum dilatato, tantam profluxisse copiam, ut singulis religationibus coacti fuissent, obstructo vulnere, hæmorrhagiam cohibere: addebant, ægrum semper mente sanum, nec de interno aliquo dolore unquam conquestum fuisse, & corpus suum satis commovisse, ac dum religaretur, se ipsum in latus sponte contorfisse, & liberaliter tussisse ad sanguinis è vulnere effluxum commodius promovendum; quotidie etiam aliquid edisse & bibisse, usque dum tandem deficientibus viribus moreretur, postquam ab inflicto vulnere vixisset dies novem, & horas octo. His præauditis, ad cadaveris visitationem accessi, omnibusque demonstravi, vulnus inflictum fuisse inter quintam & sextam costam dextri lateris, latitudine circiter pollicis antequam costæ in cartilagineas abeunt. Sublato osse sterni, inveni thoracis cavitatem in latere vulnerato, usque ad mediastinum, sanguine omnino repletam, eoque inde spongiis evacuatò, vidi ictum gladii, illæso pulmone, transversim sub sterni transiisse per mediastinum & pericardium, ac recta penetrasse in superiorem partem dextri ventriculi cordis, supra seu potius inter valvulas tricuspidales, prope ingressum venæ cavæ, nec ulterius processisse: pericar-

*observatio  
rara.*

pericardium sanguine coagulato prorsus repletum ac distentum erat. Mirum certe omnibus videbitur, quomodo hic homo cum tali vulnere tot diebus & horis vivus superesse potuerit: rationem tamen fuisse puto, quod vulnus admodum angustum fuerit, & superiore loco inter valvulas inflictum, ita ut in constrictione cordis totus, qui in dextrum ventriculum è cava profluxerat, sanguis, propter valvularum tri-

cuspidum impedimenta, per vulnus expelli non potuerit, sed maxima ejus pars per arteriam pulmonarem, quæ vulnere multò latior erat, in pulmonem fuerit propulsa, atque inde porrò ad sinistrum ventriculum & arteriam aortam, ita ut non nisi pauxillum singulis pulsibus è vulnere in pericardium & thoracis cavitatem expelli potuerit, unde etiam vires, tardius collapsæ sunt.

## CAPUT VII.

## DE CORDIS MOTU.

**D**iximus præcedente capite, Cor esse primum & perpetuum mobile nostri corporis, à quo omnis naturalis motus totius corporis procedit, & perpetuo durat, quo usque motus cordis perdurat. Verum quam ob causam perpetuo moveatur, non ita perspicuum est: unde fit ut hac de re alii aliter sentiant.

*Prima sententia* est eorum, qui docent cor moveri à spiritibus animalibus, per nervos, modò in externas, modò in internas fibras influentibus, earumque sic alternatam, modò contractionem, modò laxationem facientibus.

*Secunda* est eorum, qui illud moveri putant à sanguinis in ventriculis cordis dilatatione.

*Tertia*, eorum, qui existimant illud moveri, partim à dilatatione sanguinis, partim ab influxu spirituum animalium.

*Quarta*, eorum, qui à subtili seu ætherea materia illud moveri dicunt.

*Quinta*, eorum qui illud à spiritu quodam sanguinis moveri tradunt.

*Sexta*, quæ refert cor à pulmonis respiratione moveri.

Has sex sententias breviter examinabimus, ut videamus an ex aliqua earum veritas elici possit.

Quantum ad primam, illa pro defensione sua tres admodum speciosas rationes profert.

1. Quod in corpore nostro omnes manifesti validique motus fiant ab influxu spirituum animalium, ac proinde etiam necesse sit cordis motum ab eodem influxu procedere.

2. Quod cordis basi non frustra multi nervuli inserti sint, sed cum potius in finem, ut spiritus animales ad motum ejus perficiendum deferrent.

3. Quod in animi pathematibus manifestum sit, pro majore minoreve istorum spirituum influxu, cor magis minusve moveri.

Verum etsi hæc plausibiliter, cum aliqua verisimilitudinis specie proponantur, tamen sententiam hanc à veritatis scopo aberrare varia docent.

1. Quod motus illi qui ab influxu spirituum animalium procedunt, sint arbitrarii, præcipue in musculis, qualem illi dicunt esse cor, cordis verò motus non sit arbitrius, cum ad arbitrium nostrum nec peragatur, nec peragi aut immutari possit.

2. Quod cor in ovo gallinæ, aliove conceptu pulset, antequam cerebrum perfectum est, & spiritus animales generat, aut ulla animalis facultas ad movendi sentiendique actus producit.

3. Quod nervi cordis sint adeo exiles & tenues, ut spirituum animalium copiam, ad motum istum perennem perficiendum, sufficientem conferre nequeant. Singulis partibus motorii dati sunt nervi pro motus magnitudine & diuturnitate convenienter magni. Oculus, qui tota die videt & movetur, nocte verò quiescit, præter magnum nervum visorium, etiam habet motorium insigniter magnum. Sic muscoli crurum & brachiorum, prout magnos vel parvos faciunt motus, etiam majores aut minores nervos adepti sunt: quod ipsum in aliis quibusvis partibus contingit. Cum igitur omnes aliæ motorie partes, quæ longè diutius quiescunt quam moventur, magnis & conspicuis egeant nervis, an solum cor, quod sine quiete, jugi motu dies noctesque pet totum vitæ tempus movetur, atque hinc longè copiosioribus spiritibus continuè opus habere deberet, quam ulla alia pars quæ movetur, an illud, inquam, solum per maximè exiles & fere invisibiles nervulos, ad motum istum perennem perficiendum sufficientem spirituum copiam recipere poterit? Præterea, incertum adhuc est, an minimi isti nervuli, quorum productiones ad cordis basin, pericardium, ventriculorum orificia, & externam tunicam aliquo modo deferri conspiciuntur, longius in ipsam parenchymatis substantiam ingrediantur: multi quidem satis audacter hoc asserunt, sed nemo demonstrat. Ea de re scrupulosi dubitant Galenus & Cartesius: quos etiam insequitur Thomas Willis,

L 1 2

eximius

An cor moveatur à spiritibus animalibus.

eximius cerebri & nervorum percrutator, cujus diligentiae ea in parte multum debemus, qui hoc tam animosè non audet asserere, sed, *anat. cereb. cap. 24.* dicit: *Observare est, quod plures nervorum propagines ac fibrae in cordis auriculas & vasa appensa, quam in illius substantiam distribuuntur.* Nos dicimus paucissimos nervos ipsam cordis substantiam ingredi, eosque adeo tenellos & paucos (vix enim visu percipiuntur) ut sufficientes spiritus animales, ad cordis perennem motum perficiendum, suppeditare aut deferre nequeant, sed duntaxat aliquos paucos conferre possint, qui ferant aliquam opem ad cordis nutritionem perficiendam, de quo eorum munere vide *lib. 3. cap. 11.*

4. Quod ad motum efficiendum multis opus sit spiritibus animalibus, ad sentiendum vero pauci sufficiant: atque hinc omnes partes ad sentiendum aptae, quae multos recipiunt spiritus ad motum perficiendum, simul etiam acutissime sentiant; quae vero paucos recipiunt spiritus, illae planè non moveantur, sed obtuse tantum sentiant, ut patet in paralyti minoris gradus. Quod tamen cor membranas quidem habeat ad sentiendum aptas, puta investientem tunnicam exteriorem & interiorem, valvulas tricuspidales & mitrales, propriaeque fibras, sed interim tamen obtusissime sentiat (patet ex iis quae praecedente capite diximus) atque inde manifestum fiat, illud paucissimos duntaxat recipere spiritus animales: quos si adeo copiosos reciperet, ut perennem ejus motum perficere possent, illi, extra omne dubium etiam sensum acutissimum in eo facere deberent.

5. Quod corda variorum animalium, ut ranarum, serpentum, anguillarum, &c. à pectore evulsa diu adhuc pulsant, cum tamen abscissis omnibus quibus adherent partibus, atque etiam vicinis quibuscumque nervis, omnino nullus in illa spirituum animalium influxus fieri possit. Quod etiam cum cani vivo circa jugulum, cute per longum disscissa (experimentum est à Thoma Willis aliquoties tentatum) uterque par vagi (per quod spiritus versus cor fluere debent, truncus arripiatur, & fortiter ligetur, vel abscindatur, animal quidem obmutescat & torpescat, verum cordis tamen motus seu pulsus ea de causa non deficiat, sed tam diu vita superstes maneat, donec tandem praeter longa inedia (omnem enim cibum respuit, propterea quod nulli spiritus animales, famis sensum inducentes, ad ventriculum perveniant) sensim attritis viribus enecetur.

6. Quod cor formetur & perficiatur ante spirituum animalium officinam cerebri, & conspiciatur, pulset, ac moveatur, antequam ulla minima cerebri rudi-

menta uspiam appareant, ut liquet in ovo gallinae supposito, aliove recenti conceptu. Si dicas, in ovo tamen seu bulla cerebri delineamenta & rudimenta adesse, licet manifeste non appareant, sed invisibilia existant: Respondebo, illa ad tantam perfectionem nondum pervenisse ut operari possint; cum interea cor operetur & moveatur antequam ullum subsidium ab illis cerebri rudimentis habere possit.

7. Quod spiritus animales generentur ex sanguine arterioso, quem nulla alia pars generat quam cor. Cum illi igitur non possint generari nisi ab hac materia, eaque ad cerebrum pervenire nequeat nisi impulsionem cordis, in quo haec generatur, necessario sequitur, cor per se moveri, antequam ulli ullibi existant spiritus animales, & motu suo materiam generandis istis spiritibus idoneam, scilicet sanguinem arteriosum, ad cerebrum primò impellere. Obijcietur forte, in principio cor moveri à spiritibus animalibus qui parentum semini immixti fuerunt, & tunc etiamnum inhaerent. Extremum certe refugium, & frivolum diverticulum! Animalis spiritus concurret quidem ad seminis confectionem, sed exuit istam suam naturam, & cum sanguine vitali mixtus, fermentatus, & coctus, in unam alterius naturae massam cum eo coit, sicque simul seminis naturam induunt, in quo neque animalis spiritus, neque sanguis arteriosus amplius est, sed illud semen est novum corpus, ex utrisque mixtis & per coctionem immutatis genitum, quod neque specialiter animale, neque sanguineum spiritum in se continet; sed ex utriusque mixtura & coctione resultantem novum spiritum potentia vitalem, qui si aliquando in utero suscitetur, ac de potentia in actum procedat, mox vivet, & instrumenta formabit sanguinem spirituosum & animales spiritus productura. In semine igitur nulli amplius sunt spiritus animales, qui primum cordis motum in principio efficere possunt. Nam sicut nemo sanus dixerit, in ossere vera esse sanguinem, licet sanguis, tanquam necessaria materia, ad ejus confectionem, nutritionem, & augmentum concurreret; sic etiam de semine nemo bene dixerit, in eo esse spiritum animale & sanguinem, licet uterque ad illius compositionem concurreret. Quemadmodum enim in ossis generatione sanguis cum spiritu animali concurrens, omnino deposita sua sanguinea naturâ fit os, nec amplius manet sanguis, ut nec dictus spiritus manet spiritus, quod antea erat: sic etiam in seminis confectione spiritus animalis & sanguis non manent quod antea erant, atque hanc etiam dici nequit, in semine ullos animales spiritus superesse, qui primum cordis motum aspicari possint.

8. Quod



8. Quod spirituum animalium motus non à cerebro, sed totus à corde procedat, hocque corde quiescente, mox omnis animalis motus cesset. Liquet id in vulneribus ventriculos cordis penetrantibus: quippe sanguine non impulsio in arteriam magnam & carotides, sed per vulnus ventriculorum effluente, mox eodem ipso momento cerebrum quiescit, & spiritus animales non expelluntur per nervos ad partes moventes, nec moventur etiam in cerebro, atque hinc homo ita vulneratus ilico, tanquam fulmine ictus, concidit, omnibus facultatibus principibus, omnique sensu & motu privatus. Idem etiam liquet in syncope, & multoties quoque in suffocatione uterina cor affligente, aliisque similibus affectibus, in quibus sæpe noxii vapores vel humores non ulterius quam ad cor pervenerunt, nondum verò ad cerebrum, & sic cor pulsare desinit, cerebro illaeso manente, quod tamen desinente pulsu cordis, ilico etiam desinit moveri, nec de novo rursus moveri incipit, nisi prius cor pulset. Omnium autem manifestissime res patet in vulneribus capitis cum aliqua cranii & substantiæ cerebri ablatione, qualia in castris multoties vidimus: quippe si æger syncope deficiat, ilico cerebri motum deficere, oculis videmus: si cor rursus incipiat pulsare (quod in carpo ægri ex pulsu percipitur) non ante, sed paulo post aliquot pulsus paulatim rursus incipit moveri cerebrum, & post cerebrum sensim etiam moventur alia membra.

Hæc omnia certa indicia sunt, cor non moveri à spiritibus animalibus à cerebro in illud propulsis, sed cerebrum, eoque mediante spiritus animales, moveri à sanguine versus superiora propulsis. Interim tamen inficias ire nolo, ob nervulos vix visibiles versus basin cordis descendentes, orificia ejus nonnihil, modò magis, modò minus, laxari vel constringi, ut sit in animi pathematibus, atque hinc sanguinem in ventriculis, modò difficilius, modò facilius recipi, vel expelli, pro diversa scilicet spirituum animalium ad illa orificia determinatione, sed inde tamen ipse cordis motus perennis seu continuus non procedit, licet ei hac de causa nonnunquam aliqua impedimenta, ad motum suum liberè & æqualiter peragendum, injiciantur, sicut in respiratorio motu thoracis nonnunquam impedimenta injiciuntur à musculis laryngis, ope spirituum animalium, per nervos influentium, plus satis constrictis, quamvis musculi illi respirationem non faciunt.

Atque his omnibus primæ opinionis errores satis manifestos factos arbitror.

Nunc accedendum ad examen secundæ opinionis; quæ sentit, cor moveri à sanguine in ventriculis ejus dilatatione. Sanguis enim in ventriculos ejus incidens, mox

admodum dilatatur, & latera ventriculorum ultra æquilibrium distendit, quæ dilatato isto sanguine mox per magnas arterias utrique ventriculo adstantes erumpente, ilico ultra æquilibrium rursus contrahuntur, novoque sanguine in ventriculos illapso, iterum, ut antè, distenduntur: atque sic ordine quodam à sola ista sanguinis dilatatione & eruptione motus cordis perpetuari creditur. Eodem modo sicut in virgula salicis, alteriusve arboris, contingit: hanc enim si ultra æquilibrium ad unum latus detrahas, & sic dimittas, mox sese ultra æquilibrium spontè flectet ad oppositum latus, & sic aliquoties ultro citroque movebitur sponte. Certè admodum speciosum est hoc commentum, quod tamen facili negotio refelli poterit. Nam si à sanguinis dilatatione in ventriculis, procedat cordis motus & pulsus, ergo deficiente sanguinis illapso cor non movebitur (nihil enim in eo tunc dilatabitur) at contra, variorum animalium corda è corpore exempta, omnibusque circumstantibus vasis & sanguine plane privata, adhuc aliquamdiu moventur, cum tamen nullus sanguis in iis contineatur, aut dilatetur: imò anguillarum, lacertorum, aliorumque quorundam cordibus in frustra dissectis, singulæ particulæ adhuc aliquamdiu moventur: refert etiam Deusingius, de motu cord. sect. 2. se in cane vivo mucronem cordis abscidisse, in eoque resecto se aliquamdiu validas contractiones vidisse: quæ omnino fieri non possent, si præfata opinio vera foret. Charletonus, æconom. anim. exercit. 6. ut hujusmodi scopulos tutius præternavigaret, maluit duas causas conjungere, & dicere, cor ab illapso sanguinis dilatatione per accidens distendi, sed à suis fibris proprio motu moveri ac contrahi. Verum cor anguillæ in frustra dissectum docet contrarium, cum in illud nullus sanguis dilatandus illabatur, & fibræ conscissæ sint, permanente tamen alternata contractione & laxatione.

Alii, ut in antedictos scopulos, cum in prima, tum in secunda opinione obvios, non impingerent, præcedentes duas sententias conjunxerunt, ex iisque unam confecerunt (hanc proponit Franciscus de le Boë Sylvius, in Leydeni Athenæo Professor celeberrimus, disput. medic. 3. thesi, 15. & 16.) statuuntque sanguinem in ventriculos cordis illabentem, ab ipsi innato igne accendi & rarefieri, suæque expansione majoris loci indigum, cordis parietes expandere: tuncque cordis parenchyma expansione ista molestatum, spiritus animales in sui auxilium vocare, eosque copia conveniente accedentes, contrahere musculos parenchyma cordis constituentes, sicque ventriculos coarctando, sanguinem contentum in arterias propellere: atque hinc

L 1 3

dilatatio-

An moveatur, partim à dilatatione sanguinis, partim à spiritibus animalibus.

An moveatur à sanguinis dilatatione.



dilatationem cordis, à sanguine rarefcente factam, esse naturalem: sed contractionem per musculos absolutam, & voluntati quodammodo parentem, esse animalem. Certè tam plausibiliter hæc sententia proponitur, ut primo adspectu nihil dubii superesse videatur: sed re ipsa penitus inspectâ, clarissimè patet posteriorem partem cum priore non bene cohærere. Præsupponit enim totum cordis parenchyma constructui ex musculis; quod si verum est, ergo totum cor est motus voluntarii instrumentum, cujus motus ad arbitrium augeri, imminui, sisti, vel aliter atque aliter immutari potest. Sed quis, quæso, cordis motum unquam ad arbitrium dirigere, imò vel minimum, pro voluntate, immutare potuit? Præterea muscoli ad frequentem motum perficiendum egent nervis majusculis, & copioso spirituum animalium influxu; at in cor per nervos fere invisibiles, non possunt nisi paucissimi influere spiritus, ad continuum motum, tota vita durantem, minimè sufficientes: & unde, quæso, illi spiritus procedent & influent in punctum saliens seu pulsans, quod primum moveri in bulla ovi conspicitur, cum neque cerebri, neque nervorum delineatio uspiam animadvertantur? Hæc, & plura alia similia, ex duarum præcedentium sententiarum refutatione colligenda, etiam hanc opinionem pessumdant.

*An moveatur ab æthereâ materia.* Hujusmodi gravibus difficultatibus exterriti alii, maluerunt, ut eas declinarent, rem explicare per materiam subtilem seu ætheream, quæ continuè agitur & movetur, atque etiam alia corpora, in quæ impingit, diversimode movet, pro ut per horum aut illorum poros hoc illo modo facilius vel difficilius penetrat. Hæc, inquit, in fibras cordis dilatatorias impingens, earumque poros, propter peculiarem eorum situm & figuram, commode transire nequens, in iis nonnihil sistitur, easque replens tendit: hinc ex iis elapsa, & in constrictorias impingens, prioribus jam laxatis, eas replet & tendit: & sic ordine quodam, modò has, modò illas, repleti & tendi docent. Verum illa causa videtur nimis longe petita; nam qui hic vult confugere ad generalem aliquam causam motus omnium rerum, ille nihil specifici de motu unius rei, nec etiam de cordis motu concludit: cum tamen in cordis motu non generalem (hanc Deum esse, etiam dici posset) sed specialem & proximam aliquam causam inquirere fas sit. Præterea, nulla ratio dari potest, quare subtilis illa materia eodem tempore non impingat simul in utrasque fibras, dilatatorias scilicet & constrictorias, sed ordine quodam (quasi intelligentiâ quadam peculiari prædita) ab his in illas alternatim procedat: nec etiam quare in

animali recenter strangulato, in quo cor aliæque partes adhuc satis calent, æthereâ illa materia fibras cordis eodem modo amplius non moveat. Si forte dicatur, id fieri, quia tunc nullus sanguis in cor illabitur dilatandus; dicam ego, cor non moveri ab illa dilatatione sanguinis, ut jam ante probavi: & si illa sit motus causa, ergo non æthereâ materia; si verò sit adjumentum, sine quo non fit motus, ubinam, quæso, est illud adjumentum in corde anguillæ recenter evulso, & in frustra confisso, cujus singulæ particulæ pulsan, licet nullus sanguis dilatandus iis insit?

Quinta sententia à prioribus longe differt, hæc quippe docet, cor non movere sanguinem, nec ipsummet moveri ab animali spiritu, aut subtili materia fibras ejus distendente, sed motum ejus procedere à spiritu quodam vivifico, qui ipsi sanguini inest, eumque in se generat. Hujus commentum refutatio videatur *sequente cap. 11.*

Rejctis his quinque sententiis, sextam, penitus novam & hæcenus inauditam, proponit Alexander Maurocordatus, *lib. de motu & usu pulm. cap. 14.* ubi magno molimine inculcare & persuadere nititur, cor moveri à pulmone respirante, & simul etiam pulmonem à corde, hæcque partes sibi mutuas operas navare. Verum hæc opinio à nobis refutatur *sequente cap. 13.* Cui refutationi hæc pauca censeo hic addenda. 1. Quodsi à pulmone respirante procedat cordis motus, unde tunc ille suscitetur in foetu, qui utero includitur, cujus pulmones otiantur, & non respirant; imò qui primo punctulo saliente seu pulsante in ovo oculis conspicuo apparente, nusquam inveniuntur? 2. Unde ille procedat in piscibus, aliisque animalibus quæ pulmone destituuntur, & unum duntaxat cordis ventriculum habent? 3. Unde ille producat in corde anguillæ, quod rescissis omnibus circumstantibus partibus, è corpore extractum aliquamdiu pulsat? Is tremulus, dicit Maurocordatus, motus est. Negatur, quia rythmum systoles & diastoles aliquamdiu servat, usque dum mors propius imminet, tunc enim tremulus evadit.

Inter has itaque sex sententias nulla est quæ veram motus cordis causam eruit. Certè mirandum non est, humani ingenii aciem in tantæ rei caligine hallucinari, neque etiam cuiquam vitio vertendum, quod hac in parte ad ipsum veritatis culmen pervenire non potuerit, sed laudanda quorumlibet doctorum virorum studia, qui certatim in obscura re aliquod qualecunque lumen conferre nituntur: quem in finem etiam meam sententiam hic lubens subiiciam, quæ tamen nec ipsa, procul dubio, arridebit omnibus, sed rem penitus inspicientibus non displicebit multis.

*Inter*

*An moveatur à sanguinis spiritu.*

*An moveatur à pulmone.*

Inter præfatas sex sententias secunda omnium proxime ad veritatem accedit, sed paulo latius & aliter explicanda est. Docet enim cor moveri à sanguinis in ventriculos illapsi repentina dilatatione. Verum hic duo desiderantur. *Primò*, enim non docet, quid sanguinem dilatet. *Secundo*, non satis explicat quomodo moveatur cor sanguine non illabente in ventriculos. Hæc duo igitur penitus sunt inquirenda, ut ipsa veritas melius erui possit.

Vera causa  
motus cor-  
dis.

In prima conceptione spirituosum germen, quod semini inest, colligitur & concluditur in exigua bulla (ut latius dictum lib. 1. cap. 29.) in qua fit omnium partium delineatio per spiritum vivificum germi inisum, qui dat omnibus partibus materiam, formam, & esse quod sunt, iisque omnibus & singulis formatis inhæret, & pro earum diversitate diversimode in eis operatur. Hujus subtilissima & acerrima pars cordi insita inhæret, quæ singulari sua acrimonia maximam fermentandi aut effervescenti vim habet, quæ humores in cor illapsi ilico dilatantur (si modò ad dilatationem apti fuerint) haud aliter ac pulvis pyrius ab admoto igne ilico dilatatur & incenditur. Et sicut pulvis pyrius in se actum calorem non habet, sed accensus urentem fervorem concipit: ita etiam sanguis in corde à spiritu isto dilatatus mox excandescit. Propter quem calorem Cartesius, *part. 1. de passion. anim. cap. 8.* appellat hunc spiritum, *calorem continuam cordibus, quam diu vivimus, inhærentem, qui speciat est ignis, quem sanguis venarum nutrit, & est principium corporale omnium motuum nostrorum membrorum.* Quippe hic spiritus continua sua agitatione & dilatatione perennem caloris focum suscitatur. Cum autem propter istam continuam agitationem multum dissipetur, etiam continua refectione opus habet, quæ dissipatae particulae continuè restaurentur. Hæc refectione ipsi suppeditatur ex sanguinis in corde attenuati subtilissimis particulis, poros cordis subeuntibus, atque etiam per arterias coronales continuè ei infusus. Qui sanguis si bonus & laudabilis sit, tunc spiritus hic recte reficitur, & cor validum est; sin contra, diætæ aut viscerum aliorum vitio pravus sit, tunc spiritus hic male reficitur, & cor debile evadit.

Hic autem spiritus toti substantiæ cordis insitus sanguinem, & quoscunque aptos humores, in corde ilico dilatatur. Quæ ejus actio modò celerior, modò tardior, modò vehementior, modò debilior sit, prout materia dilatanda à fermentaceis ei admixtis particulis, ad dilatationem magis vel minus apta est, & ipse spiritus à majore minoreve calore magis minusve suscitatur in actum: hæc enim duo omnium mutationum pulsuum causa sunt. Sic in febribus, ubi major

est calor, & materia dilatanda tenuior ac volatilior, ibi pulsus sunt crebri & celeres; & si materia illa, ut in febribus putridis fieri assolet, multas habeat particulas inæquales, alias magis, alias minus facile dilatabiles, tunc fit pulsus inæqualis: si sanguis sit frigidior & crassior, fit pulsus tardus & rarus, &c. Calor igitur est qui in humido spiritum suscitatur. Patet hoc in corde anguillæ, quod è corpore evulsum aliquamdiu pulsatur; ubi verò refrigeratur, mox imminuitur, & tandem desinit ejus pulsus; tunc si recenti sanguine, vel aqua tepida inspersa nonnihil calefiat, statim rursus pulsare incipit.

Dictus spiritus per calorem suscitatus mox fermentatur & dilatat humores, idque dupliciter. *Primò* illos qui copiosi per venam cavam & pulmonarem decidunt in cordis ventriculos, à quorum fermentatione, dilatatione, minimarumque particularum inter se rapida agitatione, magnus calor in corde accenditur. Hic calor mox acuit eundem spiritum interiori ac densiori substantiæ cordis ejusque fibris inhærentem, qui inde incitatus, mox subtilem sanguinem, interiori substantiæ ac fibris pro nutrimento infusum, nonnihil dilatatur, atque hinc tunc ilico undequaque contrahuntur cordis fibræ, & sic fit sanguinis in ventriculorum cavitate dilatati expulso. Illabente rursus novo sanguine in ventriculos, fit ejusdem dilatatio cum acri calore, & per illam simul ventriculorum distensio, quam, propter accensum calorem, ilico subsequitur dilatatio in substantiæ poros circa fibras, & sic iterum fit totius cordis & ventriculorum contractio: hæcque ordine quodam ita procedunt quo usque vita durat. Hic autem motus vehementior evadit, quia fibræ ultra æquilibrium dilatatae, statim cum sanguis in ventriculis dilatatus per late patentibus arterias facillime erumpit, etiam ab interni sanguinis dilatatione facile ultra æquilibrium rursus contrahuntur, ita ut illa distensio & contractio hac illac ultra æquilibrium pulsus majores quidem faciat, sed tamen prima motus causa non sint, utpote quæ nulla alia est, quam alternata sanguinis modò in ventriculis, modò in substantia cordis dilatatio.

Hinc jam patet, quare in anguillarum, aliorumve vivaciorum animalium cordibus è corpore evulsis aliqua pulsatio adhuc aliquamdiu persistat, licet nihil sanguinis è magnis vasis in ventriculos tunc effundatur: quia scilicet dictus spiritus illorum cordibus insitus, à parvo superstite calore facile suscitatur in actum (hoc ut in aliis animalibus fiat, majore calore in corde accenso opus est) & agit in sanguinem ipsi substantiæ inhærentem, eumque nonnihil dilatando, fibras contrahit: deinde materiâ illâ dilatata nonnihil discussâ, eadem rursus laxantur;

Quare cor  
anguillæ è  
corpore e-  
vulsum pul-  
set.

laxantur; quod non tantum in cordibus integris, sed etiam in nonnullorum cordibus in frustra dissectis apparet in singulis particulis, utpote in quibus singulis talis dilatatio circa fibras dissectas contingit. Sed quia in tali casu nihil novi sanguinis in ventriculis dilatatur, atque hinc etiam novus

calor non suscitatur, neque etiam fibrarum ultra æquilibrium distensio accedit, hinc in illis cordibus evulsis aut dissectis motus est exiguus, & cito deficit.

Hanc veram motus cordis causam esse, mihi persuasum habeo, usque dum alius quis aliam magis verosimilem ostenderit.

## C A P U T VIII.

### De Pulsu, & Sanguinis circulatione.

Digressio.



Motus cordis (cujus causam nunc satis exposuimus) Græcis *κρῆσις*, Latinis Pulsus appellatur, quo cor alternatim intumescit & subsidit.

Perficitur autem diastole & systole, seu dilatatione & contractione, inter quos motus parva aliqua quies intercedit.

Dilatatio.

In dilatatione parietes ventriculorum, postquam fibrarum contractione dilatatum sanguinem expulerunt in arterias, mox per rarefactionem sanguinis de novo illapsi, à septo medio depelluntur, sicque redeunt ad intumescentiam.

Contractio.

In contractione putant Bauhinus & Harveus cor in longum extendi, mucrone à basi recedente, & sic lateribus ventriculorum in medium septum impulsis, sanguinem expelli: quam opinionem etiam amplecti videtur Entius, in *apolog.* Sed contrarium docet vivorum animalium sectio, utpote in qua manifestissime apparet, cor in contractione undequaque simul contrahi, id est, distenta ventriculorum latera versus septum medium impelli, & simul conum versus basin ascendere, sicque cor, jam à dilatato sanguine tumidum, rotundius ac durius fieri, atque illà totius contractione sanguinem è ventriculis expelli. Quod, præter experientiam, etiam ratio sic fieri docet, cum à sanguinis interioribus substantiæ poris contenti dilatatione omnes cordis fibræ eodem tempore undequaque simul contrahantur, ut circa finem præcedentis capitis latius docuimus.

Quando cavitates sint latiores.

Hic dubium incidit, an cavitates ventriculorum latiores seu ampliores sint, cum cor in rotundiorum figuram contrahitur, an verò cum extenditur in longitudinem. Harveus putat cavitates latiores fieri, cum cor extenditur in longum, angustiores verò cum cor contrahitur seu abbreviatur, quod his tribus rationibus probare nititur. 1. Quia in abbreviatione cor fit durius. 2. Quia in animalibus parum sanguinis habentibus, eo tempore etiam fit albidius, seu minus rubrum, quam in ejus elongatione. 3. Quia si in momento contractionis incisio fiat usque in ventriculi cavitatem,

mox sanguis erumpit per vulnusculum, secus atque contingit in ejus elongatione. Potuisset Harveus simul adjunxisse hoc experimentum, scilicet, si in cane vivo cordis acumen præcindatur, & per aperturam digitus immittatur in cavitatem alterutrius ventriculi, manifestè percipietur digitum premi cum cor abbreviatur, eamque pressionem cessare cum elongatur. Cartesius, lib. de format. fust. omnino contrarium sentiens, docet cor in contractione, seu abbreviatione, durius quidem, sed tamen interius latius fieri, propter contentum, jamque repente dilatatum sanguinem, & manifestè oculis conspici, illud tempore abbreviationis non imminui in magnitudine, aut potius aliquantulum augeri: hancque eandem ob causam eo temporis puncto illud durius, atque etiam in animalibus parum sanguinis habentibus minus rubrum fieri, scilicet propterea, quod ab ista dilatatione fibræ cordis tendantur, & tensione ista sanguinem in poris cordis contentum eo temporis puncto bona parte exprimant, & novum in poros non intromittant, qui relaxatis fibris ilico in cordis poros rursus influit, idque rubicundius facit. Rem confirmat experimento, dicitque, si juvenis cuniculi acumen cordis præcindatur, tunc oculis conspici, cavitates fieri latiores eo momento quo cor contrahitur ac durius fit, sanguinemque expellit: quin etiam cum tandem expulso fere omni corporis sanguine, nil nisi exiguas guttulas propellit, cavitates tamen tempore expulsionis retinere istam dilatationis latitudinem: addit denique, hoc in canibus, aliisque fortibus animalibus, minus apparere visui, propterea quod fibræ cordis in iis sint validiores, magnamque partem cavitatum occupent. Verum quamvis hæ Cartesii rationes sint admodum firmæ, puto tamen nonnihil distinguendum esse in tempore, id est, in principio & fine contractionis, seu abbreviationis, & eo puncto quo primum incipit contractio, cavitates esse latiores seu ampliores, propter dilatatum sanguinem in iis contentum: sed mox cum sanguis ex iis erumpit in magna vasa, illas istius temporis puncti

puncti spatio fieri angustiores, fibris undequaque versus interiora ultra æquilibrium contractis, seu concidentibus: idque diligente inspectione vivi cordis observari posse existimo.

*Motus vi-*  
*siosi.*

Præter pulsum, meminit Bartholinus adhuc duorum aliorum motuum cordis, videlicet Undationis, & Tremuli motus. Verum, cum hi nihil aliud sint quam species quædam morborum seu vitiosi pulsus, frustra tanquam novi motus describuntur.

*Ufus pul-*  
*sus.*

Ufus pulsus est, sanguinem in corde dilatatum per arterias ad omnes corporis partes propellere, ut eo omnes nutriantur, & singulæ aliquam ejus partem propria facultate coquant, immutent, atque in substantiam sibi similem convertant, eamque apponant, residuum verò per venas ad cor remittant, ut in eo iterum dilatetur, spirituefcant, novumque vigorem resumant.

*Sanguinis*  
*circulatio.*

Cum autem continua pulsus reciprocatione sanguinis assidua fiat à corde expulsio; necessum est ut cor è cava assiduo hauriat, quod explendis denuo ventriculis sufficere queat. Verum quandoquidem cava nunquam exhauritur, & præterea etiam arteriæ, in quas continua expulsio fit, præter modum non intumescunt, necessario sequitur motum hunc circulariter procedere, & sanguinem ex corde continuè propelli in arterias, ex his verò in venas & partes nutriendas, inde à venis minoribus redire ad cavam, & sic tandem ad cor. Cujus circulationis primam inventionem debemus industriæ Guilhelmi Harvei.

Hanc circulationem imprimis confirmant tres efficacissimæ rationes.

*Probatio à*  
*sanguinis*  
*copia.*

I. *Sanguinis è corde in arterias propulsi copia*, quæ tanta est, ut ejus ne centesima quidem pars ab assumptis alimentis subministrari possit, cum illa propulsio æque procedat in homine qui per biduum triduumve jejunavit, atque in alio qui bene pastus est: ac proinde nisi sanguis ex arteriis per venas rediret ad cor, brevi in corde deficeret materia propellenda: præterea disrumperentur etiam omnes arteriæ brevissimo tempore, & partes, in quas sanguis influit, mirum in modum intumescerent. Quippe cor hominis sani, florentis ætatis, una hora ter mille, vel paulo plures pulsus facit: Cardanus 4000, Bartholinus 4400, Rolincius in se ipso numeravit 4420. Si singulis pulsibus in aortam propelleretur sanguinis duntaxat scrupulus unus (minimum pondus nomino, nam drachmas duas, imò plus expelli, in vivorum canum sectionibus docet autopsia) facta computatione comperietur, quod unâ horâ per cor transirent sanguinis libræ mercatoriz octo vel novem, ergo spatio quatuor horarum triginta vel quadraginta (pro majore vel minore pulsu numero) libræ: atqui vero-

simile est vix tantum sanguinis in toto hominis corpore contineri. Præterea si in venæsectione homini in brachio facta, quantitatem sanguinis citissimè profluentis consideremus, ac simul perpendamus quantum interim per myriades aliarum venarum, quibus à nulla ligatura progressus & circulatio impeditur, eodem tempore circumferatur, quod universum cor transeat, facile animadvertemus, in homine singulis pulsibus non paucas guttulas, non scrupulum, non unam vel duas drachmas, sed multo plus, forte semî unciam, vel plus, è corde in arteriam magnam expelli: quod ipsum melius adhuc apparet in arteriotomia, in qua si quod ex parva arteriola secta singulis pulsibus expellitur notemus, & quantum per omnes alias iisdem pulsibus propellatur computemus, valde magnam copiam per cor transire observabimus, cum certum sit, tantum singulis pulsibus è sinistro cordis ventriculo in unam arteriam aortam propelli, quantum ex singulis & omnibus arteriis ab aorta derivatis expelleretur, si apertæ essent. Cum autem à tanta copia, neque arteriæ præter modum distendantur, neque partes ullæ intumescant, neque etiam cava aliæque venæ inaniantur, certum est sanguinem in & per arterias impulsam, per venas refluere ad cor.

II. *Situs valvularum in venis*, qui in omnibus talis est, ut sanguis per eas libere profluere possit ad cavam, nihil verò à cava ad minores venas: imò si fistula cavam infles, nihil illius flatus minores venas ingreditur: si contrà minores venas infles, mox flatus progreditur ad majores, & sic ad cavam.

*Probatio à*  
*situ valvularum.*

III. *Ligatura in venæsectione*, hæc quippe, in brachio & crure injicitur supra locum secandum, atque inde subtus intumescit vena, quia sanguis per arterias versus externas partes impulsus, per venas redit, & sursum ascendit, cumque ad ligaturam pervenit, sistitur, unde tunc vena intumescit infra ligaturam, & sanguis ulterius ascendere nequens, cogitur per inflictum vulnusculum effluere: solutâ ligaturâ iterum desinit illa effluxio, quia tunc sanguis per tubulum suum satis patulum facilius potest ascendere, quam per angustum vulnusculum egredi. Ad hæc, si ligatura illa tam stricta injiciatur, ut sanguis per ipsas arterias versus inferiora permeare nequeat (quæ alioqui profundius sitæ à mediocri ligatura non facile occluduntur) tunc etiam nihil effluit, quia sanguis per arterias non impellitur versus inferiora, atque hinc etiam per venas versus superiora ascendere nequit: rursus verò solutâ nonnihil illa arctâ ligaturâ, & arteriæ pulsu liberius penetrante, mox iterum ex incisa vena effluit sanguis. Præterea etiam quælibet venarum

*Probatio à*  
*ligatura in*  
*venæsectione.*

M m

& arte-

& arteriarum in vivis animalibus ligatura vel compressio, ostendit sanguinem per arterias propelli à corde, per venas verò profluere ad cor: nam supra ligaturam, scilicet versus cor, intumescunt ligatæ arteriæ, ob denegatum sanguini transitum: detumescunt autem venæ, ob liberum sanguinis ad cor effluxum: contrarium contingit infra ligaturam.

Hæ rationes solæ satis efficaces sunt ad dictæ circulationis probationem; præter quas multæ aliæ sunt apparentes & probabiles, quas hic, brevitati studens, prætereo, de quibus consuli possunt, Harveus, Riolanus, Coringius, Entius, Highmorus, Deusingius, alique, qui ex professione integros tractatus de sanguinis circulatione ediderunt.

*Modus circulationis.* Unum adjiciam, de modo circulationis, in quo forte ab aliis nonnihil dissentio.

Dux de circulationis modo sunt sententiæ, quarum una est Riolani, quam pauciores sequuntur: altera communis, quam maxima Philosophorum pars amplectitur.

*Riolani modus.* Riolanus, *lib. de circulat. sang. cap. 16. & 17.* scribit sanguinem per vasa tantum majora circulari; illum verò qui ad propagines minores est effusus, non amplius recurrere ad canales majores, sed absumi in nutritionem partium: præterea sanguinem primæ regionis etiam non circulari, sed similiter ad partium in ea latentium nutritionem absumi. Hæc opinio hodie à quibuscumque viris doctis meritò rejicitur, cum nullam possit dare rationem, quare sanguis per minimas arterias majore copia impulsus, quam pro partium nutritione opus est, non æque necessario circuletur per minimas venas, quam si per magnas arterias esset impulsus: nec etiam quare sanguis per celiacas & mesentericas arterias magnâ copiâ ad ventriculum & intestina impulsus, per earumdem partium venas non circularetur. Cum denique in utroque casu experientiam ipsam contradicentem habeat: quippe si in extremitate manus vel pedis minima arteriola fuerit incisa, plus sanguinis unâ horâ effluit, quam integra die in totius manus vel pedis nutritionem absumi posset: & in vivorum brutorum sectionibus per autopsiam liquet, injectâ vasis mesentericis ligaturâ, sanguinem per arterias propelli ad intestina, & satis copiosum etiam per venas refluere ad portam.

*Communis modus.* Altera communior sententia statuit circulationem sanguinis fieri per anastomoses arteriarum & venarum, quibus oscula arteriarum cum venarum osculis uniuntur, & in se mutuo patent: ita ut ubicunque sunt tales anastomoses, ibi fiat circulatio. Ego inde concludo, quod ubi illæ ana-

stomoses non sunt, ibi circulatio non fit.

Hanc sententiam defendere admodum difficile foret: quippe anastomoses illæ in majoribus vasis paucæ sunt, & licet forte in minimorum vasculorum exilibus finibus copiosiores esse possint (quod nihilominus per autopsiam ubique non patet) tamen propter summam talium viarum angustiam paucissimum sanguinis per eas transire, imò ne sexta quidem vel decima pars, quæ per arterias propellitur, venas subire posset. Præterea, quomodo, quæso, à sanguine per illas anastomoses transeunte nutriendur partes, quibus in transitu nihil conceditur, vel tribuitur? Dices fortè, illis per exhalationem tantum tribui, quantum opus est. At hinc sequitur, cum tenue serum sit maxime aptum ad talem exhalationem (nam per sudores & insensibilem transpirationem continue illud è corpore exhalare novimus) partes omnes nutriri sero, & non ipso sanguine, quia sanguis paulo crassior per vasorum poros facile exhalare nequit: atqui hoc absurdum est; quia serum duntaxat pro vehiculo sanguini adjicitur, non autem pro partium nutrimento, idque sanguinem per fines arteriarum vehit in poros substantiæ partium, indeque tunc partim insensibiliter exhalat, partim cum residuo sanguine redit in venas. Denique posito, circulationem solummodo fieri per dictas anastomoses, quomodo tunc in anasarca (in qua serum non solis vasis concluditur, sed partium substantiæ necessariò inhæret, totam enim copiam in solis vasis cumulari, nemo sanus dixerit) circulatio illa procedet è partium substantia in venas? an serum illud, quod in isto morbo crudius & crassius est, per exhalationem ex arteriis egressum, rursus per inhalationem ingreditur in venas, ut sic per cor circuletur, & inde ad vias urinarias defluat, per easque expellatur, sicut morbum hunc per urinæ copiosum fluxum nonnunquam solvi, praxi & Medicorum observationes docent? quomodo etiam magni partium molles tumores sæpe brevi tempore subsidunt, sine ulla manifesta evacuatione, si humores extra vasa in ipsa partium substantia contenti, non redeant in venas? & quomodo eas, cum arteriis ad fines suos unitas, ingredi poterunt? Atque hæc satis superque communis sententiæ errorem demonstrant.

Ex prædictis bene perpensis verus circulationis modus statim innotescit, patetque sanguinem non tantum circulari per dictas anastomoses, verum etiam per ipsam partium substantiam. Impellitur enim per arterias copiosus sanguis, cujus bona quantitas per minimarum arteriolarum fines effluit in poros substantiæ partium, ejusque ad

*Verus modus circulationis.*

ad nutritionem tantum apponitur cuique parti, quantum vel necesse, vel apponi & assimilari aptum est: reliquum verò ulterius procedit, & hiantia minimarum venarum partibus inhærentium oscula subit, atque sic ulterius progreditur ad majores venas. (sanguinem in partium poros influere, per eosque in venas redire, liquet ex iis quæ diximus de hepate *lib. 1. cap. 14.* & de cerebro, *lib. 3. cap. 5. & 11.* & ex quacunque levissima cutis læsione, è qua vasis illæsis ubique mox sanguis exit) Verum quia minimæ arteriolæ in partium substantia apertæ desinentes, angustissimæ sunt; hinc quidem multo plus sanguinis transmittunt, quam ad nutritionem opus est, sed interim non minor sanguinis quantitas superest, quæ per eas in poros substantiæ infundi nequit: hæc ut in arteriis non restagnaret & corrumpere, aut partibus molesta esset, concessit summus Protoplastes antedictas anastomoses, ut illa redundantia per eas transiret in venas: qualem insignem anastomosis notavimus ad ingressum lienis, *lib. 1. cap. 16.* item duas alias *hujus lib. cap. 10.* in foetu existentes, unum scilicet in ejus corde, per foramen ovale, alteram in arteria pulmonari, qua parte cum aorta conjungitur. Præter quas magnas, etiam verosimile est plurimas parvas & minimas anastomoses dari. Hæc nostra sententia etiam consentientem habet Harveum, *lib. de motu cordis cap. 14.* Plempium, *lib. 2. fund. medic. cap. 7.* Pecquetum, *lib. de circul. sang. cap. 5.* & Charletonum, *æconom. animal. exercit. 6.* quorum duo posteriores, non omnino præter rationem, putant longe majorem sanguinis partem per ipsam substantiam partium, quam per anastomoses redire ad venas. Cum his quoque sentit Nicolaus Hobokenus, *lib. de secundin. hum. Anastomosis*, inquit, *rejiciens, dico sufficere, si arteria ita partibus vivificandis conjungantur & inserantur, ut alitè earundem substantiam penetrarent, in minorum capillamentorum propaginem variè divertentem, desinentes: & si venarum pari modo in partium illarum substantiam insertarum, consortio continuè & aptè fruantur.*

Non est quod à sanguine extra arterias in substantiam partium effuso, metuantur tumores, inflammationes, putredines, apostemata, &c. nam propter arteriolarum in substantia desinentium angustiam, non plus influit, quam per poros commode transire, & à venarum osculis rursus imbibi potest. Atqui, dicat aliquis, in valida corporis exercitatione & calefactione sanguis multo validius & majore copia impellitur, quam aliis temporibus, ergo tunc saltem nimia copia influet in partium substantiam, & dicta mala producet. Respondeo, tunc sanguinem, ratione majoris caloris, esse

tenuiorem, & poros quoque latiores, ac orificia venularum magis patentia, ita ut facilius transire possit. Verum si pori, vel à contusione, vel à subita refrigeratione, aliave quacunque de causa angustiores evaderent, aut sanguis in partibus crassior fieret, quam ut venularum angusta orificia subire posset, tunc brevi tempore nimia ejus copia (nam influxus per arterias continuè procedit) in partim substantia cumlaretur, atque dicta mala statim generarentur. Hæc enim est vera & frequentissima pleuritidis, peripneumoniarum, anginae, phlegmones, omniumque inflammationum cum rubore & tumore, causa. Quam causam non perceperunt illi, qui per solas vasorum anastomoses circulationem fieri arbitrantur: docent enim ob denegatum commodum sanguinis transitum, vasa quidem ad summum repleti, hincque partes à repletis vasis in tumorem distendi (quasi vero vasa ita distendi queant, ut inducere possint pollicis, aut duorum triumve digitorum altitudinis tumores, quales sæpe conspiciuntur) sed quia in repleta vasa plus sanguinis impelli nequit, hinc sanguinem in iis coacervatum novo arteriosi sanguinis affluxu destitui, sicque refrigerari, non verò inflammari (quemadmodum id inculcat Regius, *lib. 2. institut. med. cap. 11.*) Verum non considerant sanguinem totum per vasorum anastomoses non transire, sed majorem ejus quantitatem in poros substantiæ partium impelli; è quibus si non satis citò redundans quantitas in venas profluat, ob causas supra dictas, tunc necessario fieri partium tumorem; & quia singulæ singulis pulsibus adfluentes sanguinis arteriosi guttulæ habent & conferunt suum calorem, hinc à sanguinis in parte nimio augmento incrementum tumorem, & simul fieri nimium augmentum caloris, & ab hoc intenso calore fieri sanguinis cumlati effervescentiam, partisque inflammationem cum tumore. Inficias tamen non eundem illam effervescentiam interdum etiam posse fieri à paucis, sed acris, & ad effervescentiam prono sanguine in aliquam partem effuso, tuncque fieri inflammationem sine tumore, ut in erysipellate.

Ad majus lumen hanc rem similitudine quadam illustrabo. Si spongia magna tenui corio laxè investita, & inferiore loco tribus quatuorve parvis tubulis coriaceis donata sit, in eamque superiore parte per exiguum corio incisum foramen, siphone aqua fortiter impellatur, illa per poros spongiæ commode distribuetur, in qua spongia tantum aquæ remanebit, quantum ad ejus humectationem sufficiet, reliquum verò poros ejus transiens, tandem per tubulos coriaceos inferiores sponte effluet, sed non cum tanto impulsivo motu, quanto cum superiore

*Causa inflammationum.*

*Similitudo.*



riore parte per siphonem est immissa. Dico, *per poros*, quia non est necesse ut à siphone usque ad inferiores tubulos alii mediū tubuli aquam injectam ulterius delaturi intercedant, & cum inferioribus uniantur, ut sic aquam istam transmittant, quippe soli spongiæ pori sufficientem transitum præbent. Verum si illi pori angustentur, vel tubuli inferiores aliqua de causa constrictiores fiant, ut aqua (quam suppono æqualiter impelli) æque bene & citò transire non possit, tunc spongia plus recipiens quam transmittere potest, intumescit, & hinc laxum, quo investitur, corium evadit tensum, durum, ac tumidum. Idem etiam fiet, si isto siphone in spongiam impellatur viscidus aliquis liquor, qui poros & transitus ejus infarciat, tunc enim plus recipiendo quam commode dimittere potest, spongia necessario in tumorem assurgit. Hanc similitudinem si quis corpori humano applicare voluerit, in eo sanguinis circulationem simili modo per poros substantiæ partium fieri animadvertet, & causas plurimorum tumorum hinc facile percipiet. Videatur super hac re nobile experimentum Glissonii, *precedente lib. 1. cap. 14.* à nobis descriptum, quo ille probat sanguinem per ipsam hepatis substantiam transire: quod ipsum eodem modo dici potest de aliarum partium substantia.

*Circulationis usus & necessitas.*

Hujus circulationis sanguinis (intelligo sanguinem cum aliis quibuscvis ei admistis humoribus) ut ex modò dictis clarissime patet, multiplex & summa est necessitas atque utilitas.

I. Per eam quælibet sanguinis particulæ paulatim & ordine quodam aptæ fiunt ad nutritionem: nam cum in corde non fiat longa coctio, sed tantum celeris quædam dilatatio, propterea chylus primo transitu per cor non acquirit summam sanguinis perfectionem, sed pluribus transitibus, modò hæ, modò illæ particulæ, subtiliores, & corpori alendo magis aptæ evadunt.

II. Cum sanguis in partes propulsus, quo longius à caloris sui foco recedit, eo magis refrigeretur, & ad alendum minus aptus evadat, omnino necessarius est ejus reditus ad caloris fontem cor, ut in eo de novo incalescat & attenuetur, sicque novam perfectionem induat, qui reditus per hanc circulationem procuratur.

III. Sine hac circulatione, neque sanguis ad partes alendas propelli, neque à nutritione residuus, una cum chylo, ad cor referri posset.

IV. Hujus beneficio medicamentorum assumptorum & applicatorum vires per totum corpus, aut magnam ejus partem feruntur.

V. Per hanc sanguis in continuo motu

permanet, atque sic à congelatione & putredine præservatur.

VI. Per hujus cognitionem causa multorum morborum clarissime innotescunt, de quibus antehac aut nihil, aut obscure scriptum, & graviter inter Medicos altercatum ac dubitatum fuit.

VII. Per eandem quoque Medici certas plurimorum morborum curationes instituire noverunt, de quibus alioqui magna ex parte per incertas conjecturas judicare consueverunt.

Non est necesse, ut hic speciatim refutem Primerosii, Parisani, aliorumque multorum inania argumenta, quibus hanc circulationem acriter impugnare, & superiorum seculorum tenebras studiosissime defendere nituntur: præcedentia modò dicta illorum caninos dentes satis retundunt, atque hinc, brevitati studens, inutile illud negotium præteribo, & lectores, qui hæc latius scire cupient, dimittam ad Entium, Highmorum, aliosque varios, qui ex professo objecta argumenta proponunt, eademque solide refutant.

Verum hic duo supersunt dubia: 1. An chylus per totum corpus circuletur, sicut sanguis? 2. An etiam serum tali modo circuletur? Respondeo: de chylo dicendum, quod quousque est extra cordis imperium, & venas non est ingressus, illum cordis pulsu non propelli, atque hinc non circulari. Sic chylus in vasis lacteis mesentericis & thoracis contentus, per musculorum aliarumque partium pressionem urgetur, sed cordis pulsu ulterius non promovetur, quo usque venas non intraverit. Ita quoque chylus è vasis lacteis in mammas decidens, ulterius non circuletur, sed lactis formæ è papillis exsugitur, emulgetur, vel sponte effluit: si tamen aliqua ejus pars illic venas mammarias subintret, (quod nonnunquam in lactantibus mulieribus copioso lacte donatis, & præcipue in ablactantibus fieri, docuimus *precedente cap. 2.*) illa formam chyli vel lactis adhuc retinens, una cum sanguine venoso ad cor deferretur, (tali modo sicut chylus è ductu chylofero thoracico in venam subclaviam effusus eodem venit) in quo dilatatus, mox chyli lactisve formam deponit, & sanguinis formam induit, primo quidem crudioris, id est, minus spirituosæ, sed postea pluribus per cor circuitibus magis magisque perficiendi: atque sic non circuletur per totum corpus in forma chyli. (utpote quam in corde modo exiit vel amittit) sed in forma sanguinis, omnino nullam cum chylo similitudinem habentis: unde fit quod in nullis arteriis chylus invenitur, aut esse possit. Sic etiam non circuletur chylus in mulieribus gravidis versus uteri placentam & amnion defluens: ut nec ille qui in nonnullis non gravidis (at sæpe vitiosus, in-

*An chylus & serum circulentur.*

tempe-



temperatus, vel aliis pravis humoribus admistus) ad uterum similiter fluens, circa uterum corrumpitur ac putrescit, & foras effluit, cum majore vel minore foetore, prout ejus corruptio ibi major, vel minor facta est: hanc quippe frequentissimam fluoris uterini causam esse, verosimile est. Ita quoque qui ad vesicam urinariam interdum fluit chylus (hoc nonnunquam fieri, supra docuimus, lib. 1. cap. 18.) omnino circulari nequit. Atque his omnibus bene perpensis, una conclusione dicendum, quod chylus per totum corpus non circuletur, sed quod venas subiens, usque ad cor duntaxat chyli formam retineat, eamque in eo prima dilatactione ilico deponat & amittat. Plura hac de re videantur sequente cap. 12. De

Sero dicendum, quod non circuletur nisi cum vasa sanguifera ingressum est. Nulli enim humores pulsu cordis propelluntur & circulantur, nisi cum imperii cordis limites ingressi, in iisque permanentes, cordis motui subjiciuntur: sed quousque alium quemcunque motorem (ut peristalticam contractionem ventriculi, intestinorum, aliarumque partium, pressionem musculorum abdominis, &c.) agnoscunt, non circulantur: ut serum, cum limites imperii cordis egressum in ureteres, & vesicam delapsus est: & lymphæ pituitosa cum è sanguine plexus choroidei separata, in cerebri ventriculis deposita est, non circulat amplius, etsi antea sanguini admista, circulata fuerint.

## CAPUT. IX.

Vide Tabulam IX.

## DE PARTIBUS CORDIS.



OST descriptionem eorum quæ de corde ejusque motu necessario præfanda erant, nunc ad singulas cordis partes deveniendum.

Partes cordis.

Speciatim in corde considerandæ sunt hæc partes. Auriculæ duæ: ventriculi duo, cum septo medio eos distinguente: undecim valvulæ: & vasa magna quatuor: quorum duo ventriculo dextro, scilicet vena cava, & arteria pulmonaria: alia duo sinistro ventriculo adhærent, nempe vena pulmonaria, & arteria aorta.

Jam quo ordine in hac sanguificationis officina vivifici nectaris confectio procedat, videndum; ac proinde singulas partes eo ordine proponemus, quo in hoc munere exequendo Natura iis utitur.

Auriculæ.

Auriculæ sunt veluti cordis appendices, in utroque latere ad basin cordis, circa ventriculos, ante officia vasorum materiam, ventriculis invehentium sitæ, & à qualicumque figuræ similitudine, quam cum auribus habent, Auriculæ cordis nominantur.

Numerus.

Duæ sunt, quarum dextra, quæ major & laxior, venæ cavæ: sinistra, quæ minor, crassior, & firmior, venæ pulmonariæ appositæ est.

Utraque in embryone singularem, ac imprimis spectabilem magnitudinem habet.

Substantia.

Substantiam obtinent peculiarem nervosam, ad robur & firmitudinem; interim quodammodo tenuem ac mollem, ad facilitatem dilatationem & contractionem.

Superficies.

Exterius rugosa apparet eorum superficies, quæ tamen in repletis & extensis æqualis est.

Utraque concava, fibrisque nervosis ac firmis, quasi columnis, interius instructa est, inter quas foveæ profundiusculæ conspiciuntur, in dextra pauciores, in sinistra plures.

Cavitas.

In foetu & infantibus primo natis colorem habent rubicundum, in adultis obscuriorem quam cor, qui tamen in dilatatione, ob admissum sanguinem rubicundior, in contractione, ob eundem expulsum, pallidior cernitur.

Color.

Dilatantur & contrahuntur ut ventriculi cordis, sed diverso tempore; nam semper diastole ventriculorum, concurret cum systole auricularum, & vice versa, ut ex vivorum anatome liquet: quæ etiam docet, illas deficientem jam cordis motu, adhuc paulisper palpitare, & quasi ultimo mori. Hinc judicavit Harvey, & cum illo Entius, illas etiam primo vivere, eamque vesiculam pulsantem, quæ omnium primo apparet in ovo gallinæ supposito, esse auriculam, & non ipsum cor. Contra quam opinionem insurgit Deusingius, lib. de mot. cord. sect. 2. Cujus opinionis errorem ipse numerus demonstrare videtur, duæ enim sunt cordis auriculæ, & in ovo tantum una vesicula saliens apparet, quam longe verosimilius est constituere cor, quod tantum unicum est, quam auriculæ, quæ duæ sunt.

Motus.

Harum usus est sanguinem è vasis invehentibus primo recipere, leviter fermentare & præparare, sicque præparatum in ventriculos dimittere. Walæus putat esse mensuras sanguinis è vasis invehentibus ad ventriculos delati: quam opinionem etiam probat Riolanus. At Sennertus, in physicis, putat illas speciatim ærem ad spirituum confectio-

Usus.

confectionem attrahere : sed quantum aberrat à vero , supra docuimus , *lib. 1. cap. 35.* & infra docemus , *sequente cap. 13.*

Ventriculi.

Cor habet duas cavitates, Latinis Sinus, & Ventriculos, Hippocrati *πυλῆς*, *ventres*, Galeno *κελιάς*, Julio Polluci *κελύπες* appellatas, dextram & sinistram, distinctas *Septo medio* carnosum, crasso, ac denso, quod dextra parte gibbosum, sinistra concavum, utraque columnis seu lacertulis (hos nonnulli musculos esse, ac fibrillas ex iis prodeuntes, & in valvulas, cum tricuspides, tum mitrales, extensas, istorum musculorum tendines esse, & ad valvularum cordis contractionem facere, arbitrantur) & cavernulis quam plurimis miro ac eleganti artificio elaboratum, nusquam tamen pervium, cernitur. Unde patet error Antiquorum, qui per ejus poros latiores sanguinem è dextro in sinistrum ventriculum transmeare scripserunt; ut & ingeniosa fallacia quorundam neotericorum, qui, ut antiquorum sententiam re quasi demonstrant ac probent, stylis fortius immixtis septum perforantes, se manifestos in eo poros ac transitus invenire, imperitiis persuadent, quo fucum etiam olim præceptores meos, Otthonem Heurnium, & Falckoburgium, anatomicos Leydenenses, in publico theatro nonnunquam usos fuisse vidimus. Certè si tales in eo essent pori, sollicita Natura in foetibus frustra condidisset foramen ovale in cordis basi, & vas illud medium quod arteriam pulmonarem conjungit cum aorta (de quibus *sequente capite* dicetur) quippe non opus fuisset his viis, si sanguis per septi poros è dextro in sinistrum ventriculum comeare potuisset. Ac proinde antiquam illam sententiam merito impugnat Realdus Columbus, *proprio de corde tractatu*, & vere docet, sanguinem è dextro ventriculo per arteriam pulmonarem impelli in pulmonem, atque ex eo per venam pulmonarem descendere in ventriculum sinistrum. Idemque, *anat. lib. 15.* scribit, se septum illud, quo ventriculi distinguuntur, in nonnullis cartilagineum invenisse, certò indicio, per illud non potuisse sanguinem ab uno in alterum ventriculum permeare. Taceat igitur Riolanus, qui, *anthropogr. lib. 3. cap. 12.* transitum sanguinis è dextro ventriculo per septum in ventriculum sinistrum tam acriter defendit, ut quoque figmenta pro fundamentis supponat, & septum non tantum versus mucronem conspicuè pervium esse, verum etiam quædam foraminula ei inesse tradat, eaque quidem invisibilia in corde mortuo, sed in corde elixato satis patentia. Fortassis Riolanus dormiens hæc foraminula per somnium vidit, quandoquidem ab aliis Anatomicis vigilantibus, neque in crudo, neque in cocto corde, inveniri

queunt. Scribit quidem Dominicus de Marchettis, *anat. cap. 10.* se semel tantum in septi superiore parte duo foramina invenisse, quæ valvulas in sinistro ventriculo obtinebant; sed, procul dubio, deceptus fuit per unum magnum foramen ovale, quod in recens natis semper adest, & postea omnino occluditur, idque ob insignem latitudinem pro duobus conspexit, de quo foramine agemus *sequente capite*.

In ventriculis interdum varia præter naturam generantur, sanitatis haud parva impedimenta, quæ tamen in ægrotantibus à Medico vix sciri aut cognosci queunt. Frustula adiposa, ac quasi carunculas molles & albicantes, magnitudinis circiter semi ovi, interdum etiam majoris, non semel in iis invenimus, & spectantibus demonstravimus, scilicet in morbo sublati cadaveribus. Inter alia, mense Octobri, anni 1663. secumimus & demonstravimus cadaver juvenculæ circiter viginti trium annorum, quæ vivens diu conquesta fuerat de summa cordis anxietate & palpitatione, ac lypothymias sæpe passa, sicque tandem vitam finiverat: in quo cadavere etiam tale frustum adiposum, dextrum ventriculum fere replens, & aliud parvum in sinistro ventriculo invenimus, atque diligentiore examine instituto, animadvertimus, illud non fuisse corpus aliquod ex sanguinis coagulatione genitum, sed re vera corpus adiposum ac firmum, quod digitorum frictione non dissolvebatur: hocque mortis causam fuisse judicavimus, nullam enim aliam in toto corpore invenire potuimus, nec illa vivens de ullo alio malo, quam de prædicta maxima corporis anxietate, & palpitationibus ac lypothymias sæpe recurrentibus, conquesta fuerat: quam ob causam imperiti domestici illam sæpe levi epilepsia sine convulsionibus, vel hysterica passione laborare judicaverant. Mense Decembri, 1668. in alia juvencula ejusdem ætatis, simile adiposum corpus satis firmum, magnitudinis dimidii ovi gallinacei, in dextro ventriculo invenimus. Talia frustra se etiam frequenter reperisse, scribunt Bauhinus & Riolanus. Refert quoque Henricus Smetius, *miscell. med. lib. 10.* duas historias frusti albicantis, in ventriculis cordis reperti, longitudinis medii digiti, crassitie pollicis, medullam cruris bubuli referentis, & appendicibus aliquot præditi. Polypum pituitosum in sinistro ventriculo à se inventum scribit Tulpus, *observat. lib. 1. cap. 27.* Vesalius scribit se in sinistro cordis sinu glandosæ seu nigricantis carnis libras propemodum duas reperisse (videtur esse error typographicus, & scribi debere, uncias duas) homine ante mortem habitu utcunque melancholico existente, admodum vigili, & pulsu miris inæqualitatibus prædito. Benivenius frustum

*Aliena in ventriculis genita.*

carnis

carnis instar mespili, & in alio callum obduratum, magnitudinis nucis, observavit. Nicolaus Massa saniosum apostema, cum totius auriculæ sinistræ exulceratione: Matthias Cornax putredinosam exulcerationem, cum multa sanie: Salius, Horstius, & Marcus Antonius Severinus, vermes in ventriculis invenerunt. Hollerius (referente Laurentio) in *coac. Hipp. & in praxios scholiis*, cap. de ardore urina, duos calculos, cum multis abscessibus: & Wiërus quoque, lib. 4. de præfig. cap. 16. calculos in corde observavit. Nos mense Novembri anni 1668. in theatro publico profecimus cadaver viri triginta quinque sexve annorum, qui in vita diu multis anxietatibus atque longo asthma detentus, & sic tandem in nosocomio nostro extinctus fuerat. In hujus dextro cordis ventriculo invenimus corpus quoddam insolitum, album & firmum, ac verè nerveum, quod nulla digitorum frictione frangebatur, longitudinis parvæ spithamæ, crassitiei fere minime digiti, membrana peculiari obvolutum, inter quam & ipsum corpus duo vasa sanguine turgida ab uno ejus latere à summo ad imum deferrebantur. Una majore & crassiore sui parte, eaque solida, & nulla cavitare donata, ipsi ventriculo inhærebat: alterâ verò auriculæ dextræ cavitatem transiens, venam cavam ad trium fere digitorum latitudinem ingrediebatur, eratque hæc pars cava, intus donata multis cellulis anfractuosis, sicut interior auriculæ cavitas. In sinistro ventriculo aliud simile corpus nerveum invenimus, sed paulo longius, ab uno latere etiam vasis sanguineis, sub membrana involvente latentibus donatum, dimidia solida & crassiore sui parte ventriculo inhærens: altera parte bifurcatum, ac quasi in duo crura di-remptum, atque in his cruribus etiam cavum, & intus anfractuosis cellulis exsculptum; quorum crurum unum extendebatur in venam pulmonarem (quam alii Arteriam venosam appellant) ad duorum triumve digitorum latitudinem: alterum in arteriam aortam. (Similes fere, sed minores, polypus in dextro sinistroque ventriculo invenimus, & publice demonstravimus, mense Febuario, anni 1670.) Hæc corpora liberum sanguinis transitum per cor & pulmones impediverant, atque inde pulmones etiam valde turgidi erant (hinc à compressione bronchiorum processerat asthma) ex iisque incisus tenuis quidam spumofus liquor emanabat: etiam in iis venulæ, quæ in sanis vix conspicuæ sunt, variis in locis sanguine turgidæ, intumuerant ad crassitiem pennæ alaudæ. Similem fere, sed majorem polypum in corde repertum, describit Bartholinus, *hist. anat. cent. 3. hist. 17.*

De horum polyporum generatione præ-

clarum & lectu dignum libellum conscripsit Malpighius, qui super hac re legi potest.

Ventriculis cordis cohærent quatuor *vasa*, magna vasa, scilicet vena cava, arteria pulmonaria, vena pulmonaria, & arteria aorta.

Dexter ventriculus tenuior, amplior, *Ventriculus dexter.* major, & non exacte rotundus, sed fere semicircularis est, neque ad mucronis finem pertingit. In eo sanguis venosus, una cum admisto chylo è subclavia in cavam delato, admissus per auriculam (in qua primo præparatur, cum chylo exactius miscetur, ac modice dilatatur) mox attenuatur & spirituosus redditur, sicque in verum spirituosum sanguinem convertitur.

Hunc sanguinem venosum cum, vel sine *Vena cava.* chylo, (semper enim chylus non adest) recipit è **Vena cava**, quæ maximum est totius corporis vas membranofum, tunica simplici ac molli constans, & in progressu, tutelæ gratia, partium proximarum involucris indutum. In hoc vas, sicut omnia flumina in mare aquam, ita omnes corporis venæ sanguinem effundunt, cordi referendum, in eoque de novo coquendum ac dilatandum.

Hæc vena vasto & patente orificio inferitur seu jungitur ventriculo cordis dextro, cum eoque tam exacte unitur, ut ab eo integra separari nequeat.

Huic orificio circulus membraneus ad- *Valvula tricuspidet.* nascitur, qui statim finditur in tres valvas membranofas, introsum spectantes, vulgo **Tricuspidet**, Græcis *τρίσπιδες*, appellatas, idque à forma triangulari, ut nonnulli putant, quamvis hujusmodi formam seu figuram minime obtineant, neque in tres cuspidet extendantur: atque hinc fortè nomen illud iis potius impositum videtur, quia singulæ utrimque tres fibras, seu tria quatuorve parva ligacula habent, quibus septi cordis carneis columnulis alligantur. Hæ valvulæ in ventriculi dilatatione patentes, sanguinem è cava admittunt: in contractione verò occlusæ ac concidentet, regressum sanguinis è ventriculo in cavam, eodemque momento etiam illapsum novi sanguinis è cava in ventriculum prohibent.

Qui sanguis tunc è dextro ventriculo *Arteria pulmonaris.* propellitur in pulmonem, per **Arteriam pulmonarem**, quæ est alterum magnum vas ei parte superiore annexum, quod *Venam arteriosam* majores nostri male appellant, cum nullam venæ similitudinem habeat, ut patet: 1. Ex ejus substantia, scilicet duplici, crassâ, firmaque tunica: & quod ab arteriæ aortæ substantia non differat. 2. Ex usu, quia sanguinem spirituosum ac fervidum deferre debuit. 3. Ex motu,

motu, quia pulsum edit sicut reliquæ arteriæ, ut vivorum animalium sectiones docent.

*Valvula  
sigmoidea.*

Hujus orificio adstant valvulæ tres membranosæ, foras spectantes, **Sigmoïdes**, seu **Sigmoïdeæ** appellatæ à figura antiquæ Græcæ literæ sigma, quæ olim instar Latinorum C. scribebatur. Hæ impediunt, ne sanguis ad pulmonem impulsus, in pulmonum depressione cordisque dilatatione, rursus in eundem ventriculum delabatur.

Per hoc igitur vas in dextram sinistramque pulmonis partem (in quas magnis geminatisque plurimisque divisis ramis insertum est) sanguis è dextro cordis ventriculo largiter effunditur, cujus quidem minimum quid pulmonis nutritioni impenditur, sed maxima pars in ramulos venæ pulmonariæ, cum ramulis arteriæ per anastomoses junctos, ac per utrumque pulmonis lobum, instar tenuissimi retis, una cum arteriæ ramulis dispersos, impulsæ, ad auriculam & ventriculum cordis sinistrum, per venæ pulmonariæ truncum defertur.

*Ventriculus  
sinister.*

Cordis autem Sinister ventriculus dextro angustior est, sed multo carnosior, crassior, durior, & longior existit, subrotundam habens cavitatem, usque ad mucronem pertingentem. In hoc sanguis pulmonum inspiratione refrigeratus, iterum fermentatur, dilatatur, effervesceat, ac spirituosus redditur, summamque perfectionem adipiscitur.

*Vena pulmonaris.*

Hunc autem sanguinem ulterius perficiendum recipit (ut jam dictum) per **Venam pulmonarem**, quæ vas est amplum ex pulmone descendens, ventriculi parti superiori insertum, eique continuum, quod antiquitus *Arteria venosa* nominatum fuit, sed male, cum non arteria, sed vena sit, ut liquet, 1. Ex ejus simplici molli-que tunica, aliis venis simili. 2. Ex usu, cum non spirituosum ac fervidum, sed æris frigidi inspiratu refrigeratum ac temperatum sanguinem subministret. 3. Ex eo quod non pulset sicut reliquæ arteriæ.

*Valvula  
mitrales.*

Hujus orificio valvulæ duæ membranosæ apponuntur, **Mitrales** dictæ, quia simul junctæ mitram episcopalem aliquo modo referre videntur. Hæ magnitudine & forma à valvulis tricuspidibus parum, aut nihil fere differunt, & versus interiora ventriculi spectant, sanguinis refluxum seu adscen-

sum ex isto ventriculo in pulmonem impedi-  
dentes. Eum in finem ad majus robur, plurimis carneis explanationibus ac filamentis longioribus adnectuntur binis aut ternis crassiusculis & carnosior lacertulis seu columnulis, ex septi inferiore parte sursum assurgentibus, quas musculos, & ista filamenta tendines esse nonnulli arbitrantur.

Sanguis in hoc ventriculo perfectus expellitur in ei insertam & continuam **Arteriam aortam**, seu **magnam**, omnium arteriarum, exceptâ pulmonariâ & tracheâ, radicem, substantia solidiore ac duriore, & geminâ tunicâ, internâ densiore, externâ tenui, præditam, vicinarumque partium tenui membrana, roboris ac tutelæ gratia, investitam.

*Arteria  
aorta.*


Ad hujus exortum valvulæ tres, extrorsum protensæ conspiciuntur, Antiquis **Semilunares**, à semi Lunæ forma dictæ, sigmoïdeis omnino similes. Hæ sanguinis ex aorta regurgitantis impetum sustinent.


*Valvula se-  
milunares.*

In nonnullis brutis, maximeque frequenter in cervis, ex hujus aortæ orificio indurato officulum generatur valvulas sustinens. Galenus variis locis mentionem facit hujus ossis; & Plempius scribit se ex boum cordibus tale os aliquoties exemisse, atque interdum unum, interdum duo reperiri, nec non quandoque etiam rudimentum tertii: verum ille putat non esse partem arteriæ ossificatam, sed peculiare os, quia in ipsa carnea substantia cordis observatur. Nicolaus Stenonis scribit se illud non in grandioribus modo animalibus, sed etiam sæpissimè in ovibus sibi visum, putatque nihil aliud esse quam tendineæ orificii partem in ossæam duritiem degenerantem. Hoc os in hominibus rarissimum est. Bartholinus tamen, *histor. anat. rar. cent. 1. hist. 50.* illud reperit in corde cujusdam phthisici: & *cent. 2. hist. 45.* illud in Urbani octavi, pontificis Romani, corde inventum fuisse asserit. Sic etiam Riolanus illud in præsidis cujusdam, nec non Reginz matris corde repertum fuisse tradit. Idem præterea, *animadvers. in Bauhin.* satis animosè scribit, id in senibus non tantum frequenter occurrere, sed à se ipso plus quam trigies observatum fuisse: forte quod Riolanus in senum dissectionibus magis fuerit occupatus quam alii Anatomici, quibus juniorum dissectiones frequentius occurrunt.

*Oscordis.*

TABU-





## T A B U L Æ IX. EXPLICATIO.

Hæc Tabula cor cum suis vasis in situ, ejusdemque Ventriculos & valvulas: item pulmones in situ, & asperam arteriam ac diaphragma exhibet.

## FIGURA I.

- A. Pericardium cor adhuc involvens.
- BB. Pulmones cor in situ naturali complexi.
- C. Vena cava supra cor ascendens.
- D. Venæ azygos principium.
- E. Vena subclavia dextra.
- F. Vena jugularis dextra.
- G. Vena jugularis sinistra.
- H. Vena subclavia sinistra.
- II. Arteria carotis dextra & sinistra.
- KK. Arteria subclavia dextra & sinistra.
- LL. Nervi sexti paris ad pulmones descendentes.
- M. Arteriæ magnæ descendentes principium.

## FIGURA II.

- A. Pericardium à corde detractum.
- B. Cor venis & arteriis coronariis respersum.
- C. Truncus arteriæ magnæ à corde emergens.
- D. Portio ejus descendens sursum conversa.
- EE. Vena arteriosa sinistrorsum ad pulmonem distributa.
- F. Canalis inter venam arteriosam & arteriam magnam, in solo fœtu recens edito conspicuus, in adultis exarefactus.
- G. Venæ arteriosæ ramus dexter.
- HH. Arteriæ venosæ ramus dexter & sinister.
- I. Auricula cordis.
- KK. Pulmones cordi adstantes.
- L. Tunica pulmonum propria separata.

## FIGURA III.

Cor infantis integrum.

- A. Membrana cordis propria separata.
- B. Parenchyma cordis nudum.
- CC. Auricula cordis dextra & sinistra.
- D. Arteria magna à corde prominens.
- E. Venæ cavæ portio extra cor prostrans.

## FIGURA IV.

- A. Cordis transversim incisi pars.
- B. Ventriculus sinister.
- CC. Ventriculus dexter.
- DD. Septum cordis.

## FIGURA V.

Cordis interiora.

- A. Orificium venæ coronariæ.

- B. Anastomosis inter venam cavam & arteriam venosam, in solo fœtu recens edito conspicua, in adultis consolidata.
- CCC. Valvule tricuspidales.
- DDD. Ventriculus cordis dexter apertus.
- aa. Meatus in septum desinentes.

## FIGURA VI.

- A. Vena arteriosa in dextro ventriculo dissecta.
- BBB. Valvule similunares, seu sigmoideæ, in orificio istius venæ.
- CCC. Dexter cordis ventriculus apertus.

## FIGURA VII.

- A. Arteria venosa dissecta.
- B. Anastomosis inter arteriam venosam & venam cavam vestigium, utpote quæ in solo fœtu adest.
- bb. Meatus intra membranas in septum desinentes.
- CC. Valvule duæ mitrales in sinistro ventriculo ad ingressum venæ arteriosæ sitæ.
- DD. Ventriculus cordis sinister apertus.

## FIGURA VIII.

- A. Arteria magna dissecta juxta cor.
- BBB. Ejusdem valvule semilunares.
- CC. Sinister cordis ventriculus.
- D. Pars sinistri ventriculi reflexa.

## FIGURA IX.

- AB. Nervus sexti paris dexter sinisterque, ad pulmones.
- C. Ramus inter utrumque nervum medius.
- D. Ejusdem propago ad pericardium.
- EE. Arteriæ asperæ rami duo majores, posterius membranosi.
- FF. Pulmonum pars postica.
- G. Membrana propria pulmonum separata.
- HH. Pericardii portio relicta.
- I. Cor in suo situ, cum vasis coronariis.

## FIGURA X.

- AAA. Sterni, & connexarum cartilaginum interior superficies.
- BB. Venæ & arteriæ mammariæ sub sterno descendentes.
- C. Glandulosum corpus thymus dictum.
- DDDD. Mediastini divulsi latera.
- EE. Cavitas per avulsionem sterni inter mediastini membranas enata.
- F. Protuberantia mediastini, ubi cor situm est.

Nn

GG. Pul-



GG. Pulmones.

HH. Diaphragma.

I. Cartilago ensiformis.

## FIGURA XI.

Diaphragma.

AB. Nervus diaphragmatis dexter sinisterque.

C. Membrana ejusdem superior separata.

D. Substantia ejusdem carnosae, nuda.

E. Foramen pro gula descendente.

F. Foramen pro vena cava.

GGG. Pars membranosa, sive centrum diaphragmatis.

HHH. Ejusdem appendices, inter quas ar-

teria magna descendit.

## FIGURA XII.

Corpus glandulosum ad laryngem situm.

AAA. Glandula laryngi connata.

B. Venae jugularis portio, cujus duo rami per dictas glandulas progrediuntur.

## FIGURA XIII.

Aspera arteria è pulmone exempta.

A. Aspera arteria sub larynge abscissa.

B. Ramus ejus dexter, bifariam primo, bina pluries in multa bronchia divisus.

C. Ramus sinister, similiter divisus.

dddd. Extrema ramorum in membranosos canaliculos desinentia.

## CAPUT X.

## De Unione vasorum in corde foetus.

Vide Fig.  
gur. VII.  
TAB. IX.

Quomodo sanguis per cor ejusque vasa moveatur in hominibus natis, jam dictum satis. Verum quia in foetu, dum in utero commoratur, vasa paulo

aliter sunt disposita, nunc quomodo sanguificationis negotium in eo procedat, explicandum.

Motus sanguinis in foetu.

In foetu sanguis è dextro cordis ventriculo per pulmonem, ut in homine nato, non transit ad sinistram, neque etiam coquitur, fermentatur, & dilatatur in utroque ventriculo, sed tantum in uno: nam qui in dextro coquitur & dilatatur, inde non progreditur ad sinistram, ut in eo rursus dilatetur: & qui in sinistro dilatatur, ille antea in dextro dilatatus non fuit.

Duplex unio vasorum.

Hunc in finem duplices sunt in foetu vasorum cordis uniones, per quas ille sanguinis transitus fit, quæ in adultis prorsus obliterantur.

Foramen ovale.

Prima fit in corde per anastomosin, estque foramen amplum & patens, ovalis figuræ, hincque Foramen ovale appellatum, sub dextra auricula, prope coronariam, antequam cava se planè in dextrum ventriculum aperiatur, situm, quo fit unio Venæ cavæ & Venæ pulmonariæ.

Valvula.

Huic foramini à parte venæ pulmonariæ prætenditur valvula membranacea tenuis, sed firma ac dura, foramine major, sanguinis in sinistram ventriculum è cava illapsi, refluxum impediens.

Altera unio.

Altera unio fit duobus circiter digitis transversis à basi extra cor, per canalem oblongum, quo arteria pulmonaria jungitur cum arteria magna. Qui canalis arteriæ substantiam, crassitiem, & amplam cavitatem habet, atque obliquo nonnihil ductu

transversim ab arteria pulmonaria in arteriam magnam ascendit, & sanguinem è dextro cordis ventriculo in pulmonariam expulsum, in aortam transfundit, ita ut in sinistram ventriculum non illabatur.

Quia autem foetus calor est tanquam novus ignis, qui ab exigua favilla primum incipit succendi, & sic paulatim majora incrementa sumit; hinc fit quod sanguis ejus, dum in utero hæret, ad tantum caloris gradum nondum pervenerit, ut refrigeratione, & duplici cordis coctione opus habeat: nondum enim eget acrimoniâ illâ, quæ postea ad firmiorem corporis nutritionem requiritur. Hac etiam de causa foetus in utero non respirat (hoc latius docuimus lib. I. cap. 35.) ejusque pulmones pro tempore otiantur, & sine usu, ac densiores manent, ob quam densitatem sanguini in dextro ventriculo cordis excocto, indeque in arteriam pulmonarem impulsio, liber transitus per pulmonem non conceditur: cui ut tamen pateret via & progressus, summus Creator dictum canalem condidit, ut per eum sanguis ille ex arteria pulmonaria in aortam propelleretur, interim pulmone tantum concessio, quantum ad ejus nutritionem sufficit.

Ne autem sinister cordis ventriculus, in quo sanguis subtilior ac spirituosior conficitur, defectu materiæ otiosus maneret, foramen ovale ad ingressum venæ cavæ positum est, ut sanguis è cava decidens, partim in cordis ventriculum dextrum, partim per dictum foramen in venam pulmonariam, & sic in sinistram ventriculum prolaberetur.

Atque ita sanguis in corde foetus tantum simpliciter & semel coquitur, seu dilatatur in

Ufus sinistri ventriculi.

in alterutro ventriculorum, & qui in dextro ventriculo coctus ac dilatus est, in arteria magna miscetur cum eo qui dilatus est in sinistro.

*Foramen ovale in natis aboletur.*

Hoc foramen ovale, quod in foetu amplum est, cum in hominibus natis usum non habeat, intra paucas hebdomadas ita coalescit & aboletur, ut nullum ejus vestigium uspiam appareat. Quippe rarissimum est, si in adultis pervium invenitur, quemadmodum se illud semel atque iterum invenisse scribunt, Pinæus, Riolanus, Marchettus, & Bartholinus: id tamen vix in uno ex decem millibus reperietur: communiter tam solide occlusum est, ut quis juraret ibi nunquam foramen fuisse: quippe valvula antedicta brevi post nativitatem adeo occluditur & consolidatur, ut ibi nullus transitus amplius pateat, etsi in multis adultis eadem jam firmata valvula adhuc translucens, à reliqua substantia septi distincta, appareat.

Absurdissimum igitur est, & ab omni veritate alienum, quod scribit Riolanus, *animadvers. in Bauhin.* anastomosin per hoc foramen sæpissime, imò fere semper adpertam manere: certè magnus ille Vir hic nimis impotenter in Bauhinum, contrarium bono jure sentientem, invehitur, ita ut ipsi experientia & autopsia audacter contradicere audeat: at quo non magna ingenia interdum abripit invida æmulatio & Zelotypia!

Sic etiam dictus canalis, licet magnam *Canalis ex- tabescentia.* amplitudinem & insignem crassamque substantiam, instar aortæ, obtineat, paulatim tamen post nativitatem ita exsiccatur & contabescit, ut in adultis nullæ ejus inveniantur reliquæ.

Antedictæ vasorum uniones, defectu foetus humani, satis commode inveniri ac demonstrari possunt in vitulis & agnis recens natis.

## CAPUT XI.

## De Cordis officio, seu actione.



Ost descriptionem totius historiarum cordis, tandem etiam de ejus actione seu officio dicendum est, qua de re non est eadem omnium sententia.

*Antiquorum sententia de Anima sede in corde.*

Plato, Galenus, varique Stoici, cor animæ irascibilis sedem esse docuerunt. Chrysippus verò, Possidonius, multique Aristotelici, non tantum irascibilis, verum etiam concupiscibilis sedem in eo constituerunt. Ab horum sententia non admodum alienus est Hippocrates, utpote qui, *lib. 1.º de diet. text. 12.* dicit, Animam versari in calidissimo ac validissimo igne: quem, *lib. de princip. text. 7.* in corde reponit. Quintetiam, *lib. de corde, text. 8.* aperte scribit, mentem hominis cordi insitam esse. Hoc ipsum quoque, teste Plutarcho, sentiit Diogenes, nec non Zeno, referente Laërtio: cui sententiæ olim etiam subscripsisse Apollodorum, scribit Tertullianus; eamque inter recentiores quoque probare videtur Gassendus. Ad hujus sententiæ confirmationem non parum quoque conferunt Sacrae literæ: in iis enim legimus: *Deum esse scrutatorem & inspectorem cordis: de corde exire cogitationes malas: Corde credi ad justitiam: Studium contentionum, notitiam temporum, judicium, sapientiam, stultitiam, consilium, poenitentiam, &c. à corde procedere.* Unde Propheta David, *Psal. 119.* sic orat: *Fec me prudentem, & tenebo legem tuam, & observabo eam toto corde. Inclina cor meum ad testificationes tuas, &c.* Etiam

*Proverb. 6. vers. 17.* Odit Jehova cor quod fabricatur cogitationes iniquas.

His accedunt variæ rationes. 1. Quod cor primo vivat ac moveatur, & ultimo moriatur, eoque vulnerato mox tota fabrica concidat. 2. Quod medio ac dignissimo totius corporis loco situm sit. 3. Quod hoc solum viscus sanguinem ac spiritum vitalem conficiat, omnesque corporis partes nutriet & vivificet: in quo sanguine Animam esse, liquet ex *Levit. cap. 7. vers. 11.* ubi Sacer textus inquit: *Anima carnis in sanguine est.* 4. Quod corde male affecto, mox totum corpus compatiatur, illud tamen corruptis alijs partibus, cum illis non necessario moriatur. 5. Quod cerebrum, cui Animæ sedem plurimi adscribunt, dependeat à corde, ut ex arteriarum carotidum ligatura patet, non cor à cerebro; & ipse quoque cerebri motus à corde procedat. 6. Quod cerebri pars corrumpi & auferri possit, manente vita & Anima (apud Schenckium, *observat. lib. 1.* variorum hujus rei extant exempla & testimonia) non verò cordis, utpote cujus læsiones lethales existunt. 7. Quod licet perceptio, cogitatio, imaginatio, memoria, aliæque actiones principes in cerebro peragantur, inde tamen non sequatur Animæ sedem esse in eo instrumento per quod actiones illas peragit. Artifex per horologium, quod confecit, toti civitati horas quidem demonstrat, & campanæ pulsatione indicat, quod sine isto instrumento facere non posset, sed hinc tamen non sequitur illum ipsum esse

in horologio, in eoque sedem fixam habere, sufficit si horologio conferat requisita ad talem actionem necessaria, licet ipse alibi sedem habeat. Sic etiam Anima operatur quidem in cerebro, tanquam instrumento, cum tamen in corde sedem habere possit. Hinc Piccolhominus, *cap. 5. physic. cap. 18.* acutè dicit, mentem seu Animam duplici ratione nobis connecti: *Primo*, per naturam, atque eatenus cor esse absolutè ejus sedem. *Secundo*, per operationem, quatenus per spiritus è corde propulsos facultates immittit instrumentis, ex quorum tunc operatione facultatum Animæ præsentia animadvertitur, licet ipsa Anima alibi sedem habere possit. Eodem fere modo Avicenna, *fen. 1. 1. doct. 5. cap. 1.* vult Animam cum suis facultatibus in corde, ut prima radice, insidere, cæterum in aliis membris lucere: hoc est, cor principium esse facultatum animalium, sed cerebro uti tanquam instrumento ad sentiendum: ita ut animalis facultas sit radicaliter [sic loquitur] in corde, at manifestative in cerebro.

Atque his, aliisque similibus auctoritatibus & rationibus solent nonnulli, cordis officium descripturi, dictam sententiam defendere, quam tamen Cartesius, *part. 1. de pass. anim. artic. 33.* validissimè impugnât.

Verum omnes longissime à scopo aberrare nobis videntur, qui cordis actionem describere volentes, mox de Animæ rationalis sede altercationem suscipiunt, eamque tanto cum fervore agitant, acsi in isto cardine tota quæstio, cum patriæ salute, versaretur. Certe nemo dubitat Animam rationalem esse & operari in homine, eamque esse incorruptibilem, de potentia materiæ corporeæ non eductam, sed spiritualem & incorpoream particulam divinæ auræ: verum nemo non etiam videt, quam difficile sit rei incorporeæ (disputent de corpore ejus nasutiores quo usque volent) à corpore separabili, in corpore, à quo non processit, & in quo semper detineri nequit, certam peculiarem sedem designare. Ac proinde hic de Animæ rationalis sede cum verbosis disputatoribus ferram reciprocare, non tantum inutile foret, verum etiam à scopo nos abduceret, decrevimus enim, non Animæ immortalis sedem, sed cordis mortalis actionem inquirere.

*Cordis actio.* Hæc autem cordis actio est primaria in toto corpore, scilicet sanguinem conficere, eumque pulsatione per arterias ad omnes partes propellere, ut eo omnes nutriantur.

Illud sanguificationis munus antiquissimi Philosophi, qui ante Galenum vixerunt, semper cordi adscripserunt. Ita Hippocrates, *lib. de morb.* dicit, sanguinis fontem cor esse. Plato, in *Timæo*, asserit cor esse

fontem sanguinis impetu quodam manantis. Aristoteles, *lib. 3. histor. anim. cap. 2.* & *lib. 2. de part. animal. cap. 1.* & *lib. 3. de part. animal. cap. 3.* statuit cor venarum principium esse, & vim procreandi sanguinem primam habere. Post hos verò accessit Galenus, novæ opinionis introductor, qui cor à sanguificationis officio excusavit, idque modo hepati, modò venarum substantiæ, modò utrisque adscripsit, ut liquet ex *lib. 4. de usu part. cap. 12.* & *17. ejusdemque lib. 1. cap. 16.* item, *lib. 6. de placit. Hipp. & Plat. cap. 4.* & *6.* aliisque multis locis. Galenum magno applausu imitantur, Vesalius, Jacobus de Partibus, Columbus, Piccolhominus, Carpus, Bauhinus, Joubertus, aliique innumeri, imprimis illi qui simpliciter antecedentium gregem sequuntur, euntes, non quo eundum est, sed quo à Galenicis itur, & qui hac in parte Galeni auctoritatem admirari, quam veritatem ulterius inquirere malunt. Verum hoc nostro seculo antiqua veritas, crassis nebulis diu obvoluta, rursus è tenebris in lucem erupit. Ex quo enim circulationis sanguinis cognitio totam Medicinam illustravit, verissime compertum est, sanguificationis officium soli cordi competere, & in eo solo hoc generale nutrimentum confici, quo omnes totius corporis partes nutriendæ sunt, atque hinc ei pulsus etiam perpetuum concessum esse, ut hoc nutrimentum continuè ex se dispelleret, & omnibus partibus communicaret.

Hoc cordis sanguificandi officium hodie præstantissimi plerique Philosophi concedunt, paucique supersunt, qui Galenicam sententiam de hepate ulterius defendunt. Nuper tamen promisit Swamerdammius, se hepar pristinæ dignitati restitutum, & sanguificandi munus ei redditurum, quo applausu, & quibus fundamentis innixus, hoc facturum sit, cum desiderio expectamus.

Verum ab utraque, tam antiqua de corde, quam Galenica de hepate, opinione, desciscit Glissonius, *anat. hep. cap. 35.* qui videns semine concepto, & à calore uteri alterato, consopitum vitalem spiritum de potentia suscitari in actum, eumque spiritum tunc vitalem succum, cui inhæret, quaquaversum movere, nec non sibi per feminalem materiam canales & vias facere: præterea quoque sanguinea rudimenta apparere, antequam cor, hepar, aliaque viscera manifeste conspici vel animadverti possint: ex omnibus illis concludit sanguinem non generari & moveri à corde, sed cor sanguinemque generari à spiritu seu succo vivifico qui ipsi sanguini inest. Addit axioma: *Quia, inquit, idem qua idem, semper operatur idem.* Atque hinc concludit, *Qua causa in primo conceptu primum fabricavit*

*Glissonii  
nova opinio.*

*fabravit sanguinem, illa, vel saltem ei aequi-  
pollens etiam postmodum sanguificationis fons  
existimari debet. Hanc suam sententiam  
multis speciosis rationibus confirmat, quas,  
brevitati studens, prætereo; atque ita putat  
se nunc receptam de sanguificatione cordis  
opinionem, penitus destruxisse.*

*Responsio.*

Verum respondemus doctissimo Glissonio, Spiritum vivificum esse primum movens in semine, eumque, dum de potentia in actum exsurgere, & semen vivificare incipit, suo motu succum vitalem, cui ut subjecto inhæret, ita disponere, ut ejus nonnullæ particulæ fiant cor, aliæ hepar, aliæ vasa, membranæ, &c. atque ita per istum motum sibi ipsi fabricare habitaculum, cujus singulæ partes, pro varia minimorum principiorum dispositione, singulas diversasque operationes edunt, quibus omnibus præest ille spiritus, tanquam præses generalis: quippe omnes partes simul vivificando, singulas ad suum destinatum opus excitat: non quod Spiritus illud cujusque peculiare opus faciat, sed quam in prima formatione partibus singulis dedit aptitudinem illud faciendi, eam aptitudinem sua præsentia in illis conservet, sine qua nullas operationes edere possent. Igitur Spiritus vivificus, secundum citatum axioma, semper unum idemque agit in toto corpore, scilicet, vivificat: sed materiam vivificandam proxime non producit, sine qua tamen subsistere nequit, cum subjecti ejus, id est, succi vitalis consumptio assiduam restaurationem requirat. Igitur singulæ partes vivificatæ eam materiam paulatim generant, per multas diversasque, ad hoc negotium necessarias, coctiones, aliasque præparatorias operationes, quas Spiritus vivificus sine illis partibus perficere non posset: quippe non posset chylicare sine ventriculo, sanguificare sine corde, &c. Atque hinc, licet Spiritus ille sit generalis totius corporis vita, sine qua nihil fieri potest, & quæ in genere omnibus ac singulis partibus speciatim operantibus inesse præsupponitur, tamen quia peculiare istas operationes seu actiones sine dictis partibus facere non potest, dici omnino nequit, illum peculiare istas operationes absolute facere: sed melius, & quidem necessario, dicendum, illas procedere à natura singularum partium viventium. Atque sic ventriculus, ratione suæ propriæ naturæ, proximè & solus chylicat, cor proximè & solum sanguificat: nec ulla alia pars est in toto corpore, quæ illa munia obire potest, quia nulla alia habet illam naturæ proprietatem. Falsum igitur est, quod dicit Glissonius, scilicet, non cor, sed hunc Spiritum vivificum (quem in sanguine existere, pro certissimo præsupponit) in ipso sanguine generare alium novum sanguinem, & motus

sanguinis auctorem esse, *Primum* falsum esse, ex eo liquet, quod si sanguis generetur ex spiritu in sanguine existente, ergo sanguine male habente labefactabitur, & non procedet sanguificatio: contrarium tamen apparet in scorbuticis, multisque cachecticis, in quibus sanguificatio nihilominus procedit, imò vitia sanguinis beneficio cordis paulatim emendantur, quæ alioqui propter ipsius sanguinis pravitatem nunquam emendari possent. Sed vice versa, si cor qualicumque morbo affligatur, mox sanguificatio labefactatur, & ipse sanguis depravatur. *Posterius* falsum esse, patet ex vivorum animalium sectionibus. Nam si arteriæ aortæ principium prope cor filo constringatur, illico desinit omnis motus sanguinis in arteriis, qui tamen aliquamdiu adhuc perseverare deberet, si in se contineret talem spiritum sui motorem, & motum suum aliunde non haberet: at rescisso filo, statim per pulsus cordis redit sanguinis motus. Idem etiam manifestum est in timidis illis, qui dum ipsis vena brachii à chirurgo secatur, mox ab inflicto vulnuscule in lypothymiam incidunt, iisque cor vix pulsare sentitur, atque sic etiam statim per vasa, aut non, aut valde parum, movetur sanguis, nec per inflictum vulnusculum effluit, (quod tamen fieri deberet, si per inhærentem sibi motorem spiritum moveretur) sed ægro ad se redeunte, & corde iterum fortiter pulsante, mox sanguis rursus movetur, & per vulnusculum bene effluit.

Ex quibus liquet, sanguinem non generari & moveri à Spiritu vivifico qui ipsi sanguini inest, sed à corde: Spiritum autem vivificum omnibus corporis partibus inhærentem, partes duntaxat vivificare, & illas singulas vivificatas, pro quarumlibet dispositionum diversitate, speciatim & diversis modis in materiam vivificandam agere.

Præterea illud attentius inquirendum censeo, an etiam Spiritus aliquis vivificus (ut à Glissonio præsupponitur) insit sanguini. Scio quidem in corde generari *Spiritum vitalem* vulgò appellatum, id est, aptum qui vivificetur, & calore suo sanguificationem promoveat, eumque sanguini immisceri, nec aliud quam ejusdem subtilissimam partem esse: sed tamen non crediderim *Spiritum vivificum*, id est, jam actu viventem, & simul vivificantem, seu vitam facientem, sanguini immisceri, cum ille spiritus sit altioris ordinis, & solummodo germini seminis, ut & humido primigenio ipsarum partium corporis necessario inhærere, & ab influente calido *Spiritu vitali* dicto, in actum promoveri debeat: cum ipsemet quoque sanguis nondum sit pars corporis (ut latius probatum *lib. 1. cap. 1.*) nec etiam sit vivificatus, sed vivificandus, ubi partibus erit assimilatus.

Nn 3

Denique

*An Spiritus  
vivificus  
insit sanguini.*

Similitudo.

Denique rem similitudine, supra descripta, illustrabo. Artifex qui horologium confecit, ille non movet rotas, nec indicat horas, sed horologium hoc facit, quod tamen rotas movere, & horas indicare non posset, nisi artifex illam machinam construxisset, eique talem aptitudinem dedisset, & illam quoque postmodum in ea conservaret. Sic etiam Spiritus vivificus (qui qualis sit, videndum *præcedente cap. 2. circa finem*) etsi in prima partium delineatione construxerit, ex. gr. cor, eique aptitudinem sanguificandi dederit, quam suâ præsentia etiam postmodum in eo conservat, tamen non illum, sed cor sanguificare dicendum est.

Quantum ad sanguinis rudimenta, quæ Glissonius dicit primo conceptionis tempore observari, antequam cor appareat: Dico, illa rudimenta etiam à corde produci: hæc enim in ovo non conspiciuntur, nisi cum moveri incipit punctum, seu bulla saliens, quæ primum cordis exordium est: & quamvis tota structura cordis vivi non pateat oculis, tamen illud revera illic esse, & ista sanguinis rudimenta generare, effectus docet. Miror certè, quod Harveus, qui etiam sanguinem ante alia factum tradit, hoc non animadvertit, cum tamen ipsemet, *lib. de gener. animal. exercit. 52.* hoc modo scribat: *Eodem tempore* (scilicet, quo sanguis in ovo cerni incipit) *receptacula ejus, vena scilicet & vesicula pulsans, manifeste apparent.* Unde clare liquet, sanguinem non conspici, nisi simul cum cordis exordio, quod quam primum incipit agere, conficit sanguinem, hæc enim ejus destinata actio est, quam aut agere, aut otiosi debet, quo otio durante, ne gutta quidem sanguinis generabitur. Atque sic eadem causa agens (nempe cor) quæ primum fabricavit sanguinem, etiam postea sanguinem continue generat, & ex hoc solo fonte sanguinis scaturigo semper prorumpit.

Porro, ne in prædictæ opinionis (quam varios nimis præcipitanter sequi & probare video) destructione quidquam desiderari videatur, adhuc alia tria Glissonii argumenta, quæ Herculeæ esse putat, prætermittis multis levioribus, examinanda censeo.

Primum hoc est: Cor, inquit, *vitalet omnem calorem atque activitatem à sanguine vitali, in ventriculo ejus contento, inque substantiam ejus per arterias coronales distributo, generatur, absque quo calore & vitalitate si foret, omnino langueret, & torpida pars esset.* Hinc concludit cor moveri, nutriri, & vivere per sanguinem, non verò illud movere & generare, idque docet exemplo cordis ex animali vivo evulsi, in cujus adhuc pulsantis ventriculos si liquor aliquis infundatur, non mutatur in sanguinem. Egregia verò com-

paratio operationis cordis in animali sano contenti, cum operatione ejus quod ex animali evulsum & omnino languidum est: nec non liquoris alicujus crudi in exemptum semimortuum cor infusi, cum chylo, præmissis variis specificis coctionibus ad faciliorem sanguificationem præparato, ac in cor sanum naturaliter pulsans illabente. Verum si cor calorem & activitatem sceneretur à sanguine, quæ nam erit causa, quod corde à maligno vapore, aliave causa male affecto, atque hinc parum aut nihil pulsante, mox omnes sanguineæ partes refrigerentur, cum tamen satis multum boni sanguinis sit in vasis (hoc per venam sectam liquet) qui & eas calefacere, & in ipsum cor influere possit? Videmus tamen hujusmodi subitam refrigerationem contingere in febrium intermittentium paroxysmis incipientibus, in terrore, in syncope, &c. Certe nemo non animadvertet illud fieri, quia sanguis suum calorem & motum à corde recipit, & quam primum illud amplius non movetur, tunc reliquarum partium sanguinem etiam calore & motu destitui, atque hinc refrigerari. Præterea, cor non simpliciter languet propter deficientem influxum sanguinis in ventriculos, quatenus hinc non suppeditantur ei calor & spiritus vitales, sed quatenus ipsi tunc deficit materia conveniens, è qua spiritus vitales generare, & tum sibi, tum toti corpori necessarium nutrimentum conficere possit.

*Secundum* ejus validissimum argumentum à colore desumitur: nam dicit chylum non posse rubicundum colorem à corde nasci, sicque ab eo in sanguinem mutari, quia ipse sanguis multo rubicundior est corde, seu cordis substantiâ, ac proinde cor sanguini non esse satis affimile, ut eo officio defungi possit, cum quamlibet partem sanguificationi idoneam oporteat sanguini omnifariam similem esse: & tandem addit: *Quomodo enim quidquam ultra activitatis sue sphaeram operetur, & alteri communicet quo ipsummet destituitur? Quoniam igitur cor, hepatis, & vena, ipso sanguine pallidiora conspiciuntur, quomodo huic colorem propria vividiorum, magisque saturum conferant? Videtur profectò Glissonius hic sui omnino oblitus, juxta dictum, Quandoque bonus dormitat Homerus.* Nam paulo ante dixerat, à calore & motu sæpe calores ex albo pallidove ad rubicundiorum speciem exurgere, idque per coctiones fructuum, carnum, aliaque mille experimenta palam esse: jam verò colorem rubicundum non à motu & specifico calore, sed à simili colore vult deducere. Quam male hæc cohæreant undequaque patet. Fructus, carnes, aliaque in clibano assata rubicundum colorem acquirunt: succus radicis consolidæ majoris in fumo equino per multos dies digestus, induit omnino rubicundum

eundem sanguineum colorem, cum tamen, neque clibanus, neque fimus equinus colore rubicundo prædita sint. Ventriculus sua specifica coctione candidissimum chylo colorem tribuit, qualem tamen ipsemet non habet. Bilis in suo folliculo sæpe æruginosum seu viridem colorem nimia coctione & mora acquirit, & naturaliter flavum habet colorem, cum tamen neque hepar, neque folliculus felleus, viridem aut flavum colorem habeant. E cerebro multoties humores falsi & acres, ac interdum subvirides distillant, cum tamen ipsum album sit, omnisque viriditatis, fædeditis, & acrimoniæ expers. In virulenta gonorrhœa non raro semen flavescens & subviride profuit, cum tamen partes spermaticæ talis coloris expertes sint. Certe toto cœlo à scopo aberrant, qui vim calori ac specificæ coctioni & mixturæ, à partis proprietate procedenti, tribuendam, ad colorem revocant, qui color non procedit à similitudine partis agentis, in qua coquitur, sed à calore in parte illa specifico modo agente, secundum specificam istius partis constitutionem, seu temperiem & conformationem: atque hinc etiam est, quod ventriculi calor ex assumptis alimentis chylum album eliciat ac conficiat, & cordis calor chylum in sanguinem rubicundum commutet. Denique si rubicundus color chylo duntaxat conferatur à sanguine rubicundo, quid, quæso, primum sanguinem in prima conceptione ab albicante semine rubicundum efficit?

*Tertium* argumentum suppeditant ei coctiones: nam dicit, corpora naturalia id, quantum in se est, adniti, ut corpora alia intra sphæram activitatis suæ posita sibi ipsis assimilent, atque hinc etiam cor, si sanguinis faciendi officio se accingeret, chylum ad substantiæ suæ similitudinem necessario deducturum, ibidemque substiturum, nec ad formam sanguinis inducendam unquam

processurum. Sed quare Glissonius illud ipsum etiam non dicit de ventriculo & hepate? quare illa viscera non mutant alimenta in substantiam sibi similem, & ibi subsistunt? quid illa magis quam alias partes impellit, alimenta mutare in substantiam à se dissimilem, scilicet in albissimum chylum, & in flavam viridemve bilem? quod si verò illis in commune totius bonum hoc facere licitum sit, quare generatio dissimilis substantiæ in totius utilitatem cordi denegabitur? Verum non satis distinguit doctissimus Glissonius inter coctiones publicas & privatas, & non satis animadvertit, quod in publicis præparetur materia pro totius nutritione; in privatis verò istius communis materiæ præparatæ immutatio fiat in substantiam singulis partibus similem: atque hinc necesse esse, ut illa viscera, quæ publicis coctionibus inserviunt, materiam nutritiam pro toto præparandam, non faciant sibi similem (tunc enim aliis, atque omnibus partibus non convenisset) sed talem, è qua omnes & singulæ partes aliquid sibi conveniens assumere & assimilare possint: atque sic illa ipsa etiam viscera nutrimento illo communi (scilicet sanguine spirituofo) quod pro toto corpore præpararunt, privata coctione nutriuntur, ex eoque convenientes sibi particulas assimilant, ibique in privata illa coctione subsistunt, dum interea in publica coctione ulterius progrediuntur.

Atque his prædicta nova opinio satis refutata videtur, cuius se acrem defensorum etiam exhibuit Gualterus Charleton, *lib. de œconom. anim. exercit. 4.* Verum cum iisdem utatur Glissonii argumentis & verbis, non est quod ipsius refutationi speciatim incumbam: quamvis *exercit. 6.* solam sanguinis quantitatem motus auctorem constituat, sicque à Glissonio nonnihil descisere videatur.

## CAPUT XII.

## De Sanguine, Spiritu vitali, &amp; Nutritione.

Digressio.



Ræcedente capite dictum, cordis actionem esse, sanguinem conficere, hac occasione etiam brevem sanguinis historiam subijciemus.

Nomina.

Sanguis Græcis *αἷμα*, Gallis *du Sang*, Italis *Sangue*, Hispanis *Sangre*, Germanis *Blut*, Anglis *Blood*, Belgis *Bloet* dicitur, & quod imprimis mirandum, in omnibus ac singulis istis linguis nullum datur sanguinis synonymum, quo absolute succus ille significatur. Latinis quidem in usu etiam est vox *Cruor*, sed ille non absolute sangui-

nem, sed duntaxat sanguinem ex vulneribus, aut ulceribus effluentem, item corruptum, aut post mortem in vasis superstitem, denotat. Sic etiam *αἷμα* Græcis, & *grumum* Latinis, solummodo dicitur sanguis concretus.

Est autem Sanguis succus rubicundus, ex chylo, ad totius corporis nutritionem, in corde confectus. Definitio.

Ejus massa seu substantia conflata est ex *Substantia*, duobus diversis succis, mediante sero per coctiones

coctiones viscerum in ipso sero ita unitis, ut in unam istam massam sanguineam simul coeant.

Succi.

Horum succorum unus est sulphureus (Malpigijs, *lib. de ping. & adip.* de sulphure non cogitans, eundem succum ubique appellat pinguedinem) alter falsus (succos appello, quatenus sulphur & sal in fusione concurrunt ad sanguinis massam) ille nonnihil subpinguis, oleosus, ac subviscidus; hic ab omni pinguedine prorsus alienus. Ac proinde in dissolutione sine jactura & tumultu bene misceri atque uniri non possunt (pingue enim cum falso aquoso non bene miscetur) nisi intercedat Mercurius aliquis, utriusque naturæ adeo familiaris, ut cum eo, & in eo uterque exacte misceri queat. Ille Mercurius est serum, utpote in quo amborum dictorum succorum aquosiores particulæ per coctiones solutæ & mistæ sunt: atque hinc illud constat, non ex sola aquosa alimentorum parte, verum etiam ex particulis aliquibus sulphureis & falsis, in eo coctione fuis & liquatis (hæ cognoscuntur ex sudoris & urinæ sapore subfalso: illæ ex utriusque odore: præterea hæ ex sale, quod arte chymica ex urina separatur; illæ ex eo, quod antiquæ urinæ ad ignem calefactæ, exhalans vapor ab admota flamma etiam flammam concipiat) atque hinc mediæ cujusdam naturæ particeps est, ita ut in eo sulphureorum ac falsorum succorum conveniens mistura, & quasi unitio fieri possit. Ac proinde requiritur etiam ut illud serum conveniente quantitate, & bene coctum reliquis succis admisceatur: nam si nimis paucum sit, vel deficiat, tunc activa principia, nempe falsus sulphureusque succus, nimis arctè coeunt, nimiumque se exagitant atque impugnant, & sese mutuo cum pugna atterunt, atque absumunt, vel corrumpunt; unde corpus, vel alimento fraudatum emarcescit, vel eodem corrupto, morbosum fit, & sic emoritur. Si verò Serum nimis aquosum & valde crudum redundet, tunc eadem activa principia nimis à se invicem elongantur & dissociantur, eorumque combinatio nimis laxa efficitur, ut se mutuo non satis implicent & agitent, atque hinc sanguis nimis humidus, & corruptioni obnoxius, totumque corpus tali sanguine nutritum debile evadit.

Quod autem sanguis ex his principiis constet, facile doceri potest. Nam sulphur ei inesse, satis notum faciunt alimenta multa oleosa, dulcia, pingua, & sulphurea, quibus utimur, ex quibus non potest non sulphureum quid per coctiones viscerum educi (hoc liquet ex butyro, quod ex chylo & lacte separari potest) & sanguini immisceri: præterea etiam illud, quod ex sanguine plurimas corporis partes pingues

ac sulphureas generari videamus, quæ molitiem, oleositatem, ac teneritudinem suam habent à sulphure. Salem inesse similiter patet ex alimentis falsis quibus vescimur, ex sale qui arte chymica ex sanguine educi potest, & ex sale qui urinæ inhæret, atque cum superfluo sero è sanguine separatus est. Sæpius præsentia oculis satis conspicua est. Sunt qui his principiis etiam terram adnumerant; verum cum illa nihil aliud sit, quam falsis crassi maximeque crudi ac ægre dissolubilis residuum, hæc pro peculiari principio habenda non videtur, utpote quæ per longum fortemque calorem coctione adhuc liquari & dissolvi potest, instar alterius crudi tartarei falsi: sicut id manifestum fit in lateribus è terra confectis, & in furno coctis: qui enim lateres igni proxime adjacent, ab ignis diuturnioris vehementia funduntur & liquantur, instar vitri crassi.

In hac sulphurei falsique succi in sero mistura majorem quidem citioremque activitatem confert succus sulphureus, sed primariam molem constituit succus falsus, utpote qui fixioris naturæ existens, sulphurei ei immisti & implicati facilem resolutionem impedit, sicque massæ sanguineæ dissolutionem retardat, & putredini, corruptioni, & inflammationi plurimum resistit, & quia proclivis est ad fixationem, hinc causa est quod sanguis partium substantiæ infusus, bona sui parte in ea coaguletur, eidemque adhæreat & assimiletur.

Hic, per parenthesis, notabile dubium *Dubium.* considerandum occurrit, scilicet, cum pingues seu oleosæ & sulphureæ partes in sanguine sint aliis calidiores, atque hinc falsas ad majorem activitatem promovere posse videantur, qui fiat quod in obesibus & pinguibus hominibus, in quibus sulphureæ oleosæ majore copia redundant, minor sit totius corporis agilitas, & spirituum animalium activitas, sed illi valde somnolenti & pigri existant, atque caro, apoplexia, asthmate, aliisque similibus affectibus, magis quam macilentiores afficiantur? Fit hoc, quia in talibus oleosæ sulphureæ sanguinis particulæ supra falsas nimis abundant, hæque sua pingui oleositate nimis involvunt & obtundunt, ita ut debito modo effervescente, attenuari, & spirituosæ fieri nequeant, atque hinc etiam minus convenientes evadant, ex quibus spiritus animales (qui agilitatis & activitatis totius corporis primaria causa sunt) satis commode & copiose generari possint, quorum sufficiente copiâ & generatione deficiente, actiones animales torpescunt, & soporosi affectus obrepunt. Adde, quod ipsarum sulphurearum particularum calor stupeat, & non multum excandescat, nisi adjumento acrium falsarum particularum effervescencia in sanguine contingat, & sic per minimarum particula-  
rum

*Quare obesibus  
sunt minus  
agiles.*



rum inter se majorem ac rapidiorem motum calor major suscitetur. Si verò pingues sulphureæ particulæ tantopere supra falsas emineant, ut has implicant, obvolvunt, & obtundant, tunc hæ intricatæ ad istum fermentaceum actum exsurgere nequeunt. Hic fortè quis objiciet, quod in febricitantibus calor sulphureus prædominetur ac choreas ducat, & in his tamen animales actiones non semper torpescant. Fit hoc, quia in illis particulæ sanguinis sulphureæ & oleosæ non superant, nec copia & oleositate obtundunt falsas, sed harum acrimoniam in majorem actum calore & motu producentes, effervescentiam nimis validam, aut vitiosam ac febrilem inducunt. Videantur super his alia quædam *lib. I. cap. 28. circa finem, & lib. 3. cap. 11.*

*Spiritus gemini.*

Verum nunc ad rem redeundum. Ex massa sanguinea per convenientes fermentationes viscerumque coctiones, gemini suscitantur Spiritus, scilicet sulphurei & falsi, illi subdulces, hi acres, ambo subtiles ac tenuissimi, & simul confusi, illi tamen magis volatiles, quam hi: quales sulphurei etiam in oleis ex vegetabilibus chymice extractis animadvertuntur, & falsi arte chymica etiam ex salibus & rebus falsis educuntur. Quod autem sulphurei tenuiores magisque volatiles sint, liquet in vegetabilium distillatione, nam primi & facile separantur, ac per alembicum adscendunt, nisi falsis admodum implexi, aut propter nimiam oleositatem ab his minus attenuati sint: falsi verò difficulter & ultimi adscendunt, quorum acrimoniam à sulphureorum dulcedine gustus distinguit ac dijudicat.

Dicæi autem spiritus massæ sanguineæ, è qua per fermentationes suscitati sunt, immiscentur (sunt enim subtilissimæ ejusdem particulæ) & cum ea ad cor identidem delati, in eoque multoties simul attenuati ac dilatati, tam exactè uniuntur, ut prorsus in unum spiritum, quem *vitalem* appellamus, coëant.

*Spiritus vitalis.*

Est autem Spiritus vitalis subtilissima & efficacissima sanguinis pars, ex ejus sulphureis falsisque particulis, cordis fermentatione dilatatis, & simul unitis, conflata.

Dico esse subtilissimam atque etiam efficacissimam sanguinis partem, id est, talem quæ suscitata est ex ejus sulphureis falsisque particulis: nequaquam enim quælibet substantia tenuis & vaporosa, ut illa quæ ex serosa sanguinis parte suscitata est, spiritus appellari debet (etsi multoties adeo tenuis sit, ut obtutum oculorum non minus effugiat, quam ipse efficax spiritus) quia non est pars sanguinis efficax, sed talis quæ copiosa sui admistione spirituum efficaciam infringit, eorumque agilitati oblectatur.

Cum sanguis in cor illabatur, statim totius liquoris compages solvitur, & spirituosæ particulæ, soluto mistionis vinculo, simul exactissimè uniuntur; sicque unitæ à cæteris exsilire, & se quaquaversum expandere nituntur, verum à vasis intus coercitæ, reliquo liquori implicantur, atque ita cum turgescentia in apertos arteriarum ductus seu tubos erumpunt, per quos una cum sanguine calorisque effluviis in totum corpus effunduntur.

Hujusmodi Spiritum à sanguine diversum sanguini inesse, nonnulli, cum Argeniterio, acriter negant: alii verò non minore cum fervore eundem defendunt. Sed horum lis facile componi posse videtur, si dicamus, illum esse subtilissimam sanguinis partem, è crassiore materia liberatam, & ad summam tenuitatem exaltatam, toti quidem immistam (quippe ab ejus admistione perfectio sanguinis procedit ac dependet, qui sine hoc spiritu est tantum crudus & inutilis cruor) sed ab eo tamen separabilem. Eodem modo sicut in vino, spiritus constituit perfectionem vini, ejusque subtilissima pars est, & quo is melior, eo vinum melius est: hic tamen arte chymica separabilis est à vino; sed tunc reliqua vini substantia manet crudus, aquosus, & inutilis liquor. Antedicta igitur quæstio hoc modo decidi potest. Si intelligamus sanguinem bonum & perfectum, tunc bene dicitur, Spiritum vitalem sanguini inesse, ab eoque diversum non esse, nam est subtilissima ejus pars, ex eo ipso suscitata, quæ suâ præsentia perfectionem ejus constituit. Si verò cruorem, sive sanguinem simpliciter intelligamus, qualis etiam in mortuis invenitur, qui perfectus non est, propterea quod nullus spiritus in eo volatilifatus superfit vel existat, tunc Spiritus à sanguine diversus dici potest, utpote qui, vel ex illo sanguine dissipatus est, manente sanguine; vel in eo nondum genitus seu suscitatus est, existente tamen sanguine: qui præterea, si in sanguine adesset, in eo quasi choreas duceret, & crassiores sanguinis particulas inter se agitare. Cum autem, teste Aristotele, nihil à se ipso moveatur & agitur, etiam bene dici potest, quod reliquæ crassiores sanguinis particulæ à se ipsis non moveantur, sed ab alio (motus enim causa cum mobili nequaquam confundi, aut eadem statui debet) scilicet ab hoc spiritu, qui tamen nihil aliud est, quam ipsius massæ sanguineæ ad spirituositatem exaltata pars.

Hic fortasse aliquis objiciet: si ille Spiritus alias sanguinis particulas inter se agit, ergo sanguis in se habet motus sui causam, & non movetur à corde. Respondeo: duplicem esse motum sanguinis: unum circulatorium, qui extra omne dubium à

00

corde

*An Spiritus sit à sanguine diversus.*

corde procedit, quo bona parte spiritus per arterias ad omnes corporis partes propellitur. Alterum fermentaceum, qui ab hoc Spiritu fit, quo minimæ ejus particulæ inter se agitantur, dum ille Spiritus instar fermenti eas pervadit, & à se invicem diducit: qualis fermentaceus vehemens motus in febrium crisis, & menstruum emotione observatur. Verum hic motus etiam à corde procedit, quatenus illud hunc Spiritum, sanguinem dilatando, continue gignit, à sanguini immiscet, suoque motu in actum suscitatur, ita ut deficiente cordis motu, etiam hic ilico deficiat.

Calor sanguinis.

Hic Spiritus vitalis, dum ob summam volatilitatem semper avolare nititur, cæteras crassiores, quibus obvolvitur seu implicatur & à fuga detinetur, sanguinis particulas continue agitatur, varioque modo per eas vibratur, & propter denegatum exitum identidem repercutitur, sicque illas à se invicem diducit, subigit, subtiliat, & in fermentativo quodam motu continuo detinet, à quo motu, subtilisque materiæ agitatione, procedit calor, qui in mediocri agitatione mediocris, in parva parvus, in magna magnus existit: atque hinc fit quod sanguis, pro agitationis illius varietate, quæ variis de causis contingere & mutari potest, modò magis, modò minus caleat.

Isto autem motu per Spiritum excitato, sanguis non solum in calore & integritate, id est, exactæ mixtionis vinculo (si modo in mediocritate consistat ejus compositio) conservatur, verum etiam fluidus, tenuis, & ad nutritionem aptus redditur, qui alioqui eo motu & spiritu destitutus crassescit, coagulatur, corrumpitur, & inutilis evadit. Præterea idem Spiritus motu seu agitatione illa tantam leptomeriam sanguini confert, ut una cum ipso angustissimas quasque vias permeare, & ad quasque partes deferri queat, quas omnes hic Spiritus ad actiones & destinata munia suscitatur, singulisque convenientes sanguinis particulas assimilandas apponit, in earundem augmentum & supplementum, seu restaurationem ejus quod à calore dissipatum est. Atque sic idem Spiritus, qui continua sua agitatione, atque hinc procedente calore, continue depopulatur & dissipat fluidiores partium particulas, easdem etiam per sanguinem continue restaurat, & sæpe auget.

Sanguinis temperatura.

Sanguis verò, ut & ex eo suscitatus Spiritus vitalis, illi immixtus, si ex duobus istis principiis, nempe sulphureo & salso in fero mixtis, viribus convenienter coeuntibus confletur, tunc optimus, & bene secundum naturam temperatus est. At si hujus aut illius principii vires nimis excedant, tunc frigidior, vel calidior evadit, eaque temperatura magis excellit, prout alterutrum vires fortiores concurrunt. Dico

autem, *frigidior*, non quod frigida qualitas à sale, vel spiritu salino, tanquam è proprio subjecto procedat, sed quod eo prædominante sulphureus spiritus magis obtundatur & figatur, atque hinc minor fiat minimarum particularum inter se agitatio, unde tunc à minore isto motu etiam calor actualis minor suscitatur. Adde, quod eo etiam nomine sal ejusve spiritus frigidior dicatur, quia in ignem injectus solummodo crepat, non vero accenditur aut flammam concipit, sicut sulphur aut sulphureus spiritus.

E sanguine autem ex dictis principiis composito, modò plures, modò pauciores spiritus suscitantur. Nam si sanguis cum chylo in corde rarefaciendus in aliis visceribus fit bene coctus, & ad fermentationem præparatus, & ut ita dicam, ad justam maturitatem evehctus, tunc fit illius debita in corde effervescencia seu dilatio, qua conveniens spirituum quantitas, cum moderato calore, suscitatur. Si verò, quacunque de causa, minus præparatus & crudior sit, tunc in corde minus & difficilior effervescit ac dilatatur, paucioresque spiritus ex eo exsurgunt, atque hinc frigida corporis intemperies procedit. Si autem nimis fuerit excoctus, & particulæ, vel salæ, vel sulphuræ, vel ambæ nimis sint attenuatæ, tum in corde nimium dilatatur, nimiumque acres & fervidi spiritus generantur, hincque procedunt, calida corporis intemperies, humorum putredines, inflammationes, febres, imprimis si sulphurei spiritus supra salinos prævaleant.

Spirituum quantitas & qualitas varia.

Hic obiter notandum, errare eos qui principiis essentiam sanguinis in mixtione constituentibus, præter sale & sulphur, etiam annumerant spiritum, eumque necessario cum sale & sulphure in fero concurrere ac misceri tradunt: cum tamen hic spiritus, de quo loquuntur, non sit peculiare quid ad sanguinis confectionem concurrens, sed sit solummodo tenuissimus maximeque spirituosus halitus ex ipso sale & sulphure vi caloris eductus: quemadmodum ex omnibus rebus viventibus calore naturali, & ex mortuis per chymiam calore artificiali spiritus educitur. Quælibet enim corpora (ut & sanguis) etsi ex sale & sulphure, ut è suis principiis, mediante Mercurio unitis, orta sint, tamen quia sal & sulphur non sunt corpora omnino simplicia & æqualia, sed è particulis inæqualibus conflata; hinc etiam corpora ex iis composita necessario constant ex variis & inæqualibus particulis, aliis tenuioribus, aliis crassioribus, aliis magis, aliis minus fixis, aliis ad fusionem & attenuationem aptioribus, aliis ineptioribus. Calor autem in corpora ex his composita agens, tenuiores minusque fixas particulas facilius & primo liquat,

Error de spiritibus.

liquat, attenuat, ac spirituosas facit, easque à crassioribus nonnihil liberat, & per crassiores agit ac movet, atque tunc sic attenuatæ spirituosæ particulæ *Spiritus* appellantur, quia summa tenuitate ac mobilitate præditi sunt: non quod sint diversum quid à sale & sulphure, ad misti compositionem concurrans, sed duntaxat tenuius quid ex eodem misto vi caloris fufum, attenuatum, & eductum, quod per absentiam caloris rursus condensatur, & cum reliquis crassioribus, ad fusionem nondum perductis, particulis, unitur in quiete ut antè.

Error de ære.

Non minus errant illi, qui aërem copiosum sanguini admisceri, ad ejusque perfectionem necessario requiri arbitrantur. Hunc autem quatuor modis ei admisceri tradunt. 1. Cum cibus in ore masticatis admixtus deglutitur, iisque cibus & alimentis in ventriculo per coctionem ita unitur, ut tandem sinum cordis subiens, sanguini incorporetur. 2. Cum per cutis poros sanguinis massam subiatrat. 3. Cum per inspirationem non parum sanguini, ad sinistram cordis sinum per pulmonem properanti, admisceatur. 4. Cum per eandem inspirationem etiam ad cerebri vasa & ventriculos aër feratur. Verum si aër sanguinis perfectionem, ut ajunt, compleret, ergo ei semper necessario immisceri deberet, utpote sine quo bonus & perfectus sanguis gigni non posset: atqui in fœtu, utero & membranis suis incluso, nullus aër adest, qui cum alimentis deglutiri, aut per poros ingredi, aut per respirationem ad cor vel cerebrum pervenire potest, & tamen in eo non minus bonus & perfectus gignitur sanguis (hoc liquet ex ejus incremento & motu) quam in iis qui nati aërem quocunque modo hauriunt vel recipiunt. Quod autem fœtus non respiret, nec ullum aërem intromittat, satis supra probatum est, *lib. 1. cap. 35.* quod etiam in respiratione aër sanguini non admisceatur, late docemus *proximo sequente capite 13.* quo etiam plura alia de hac quæstione videri possunt.

Origo principiorum sanguinis.

Hic fortè quæret aliquis, ex quibus rebus illa jam dicta sanguinis principia educantur? Dico, ex alimentis (in embryone primum formato colliquamentum seminale alimenti vicem supplet, & alimentum est, ut dictum *lib. 1. cap. 29.*) quæ omnia sulphur & salem in se continent (utrumque arte chymica ex iis separari potest) & ex iis specifico modo mistis ac coctis constant: alia tamen plus hujus, alia plus illius habent: estque in aliis hoc vel illud magis spirituosum, in aliis crassius: atque hinc qualitatum exsurgunt diversitates, & causa procedit, quod alia alimenta magis convenient hominibus calidioribus, alia frigidioribus.

Ut autem principia ista ex alimentis

educantur, & sanguis ex iis conficiatur, debent alimenta variis modis præparari, ut prima eorum mistura penitus dissolvatur, in iisque latentes particulæ sulphureæ ac salæ ad fusionem & majorem tenuitatem exaltentur, ita ut à priore unione liberatæ, rursus novo modo misceri queant. Hunc in finem, præterquam quod arte culinaria fiat eorum magna dissolutio, etiam in corpus admissa, primò quæ dura sunt dentibus comminuuntur in ore, ac salivæ admistione præparata versus ventriculum dimittuntur: secundo, in ventriculo specifico modo fermentantur ac dissolvuntur ulterius: tertio, ex ista dissoluta coctaque massa in intestinis alia singulari effervescencia separantur utiles chylusæ & magis dissolutæ particulæ à reliquis crassioribus, æque in vasis lacteis multisque mesenterii glandulis, atque etiam admistione succi lymphatici, adhuc magis dissolvuntur & attenuantur: hæ denique sanguini venoso admistæ, & ad cor delatæ, in eo dilatantur, sicque cum reliquo sanguine uniuntur, & perfectus sanguis fiunt. Cum prima tamen vice in corde dilatantur, non fit ex iis mox sanguis spirituosus, sed spissior & crudior, qui reliquo sanguini sæpius per cor circulato, & jam valde spirituosus reddito admiscetur, & paulatim etiam per multas circulationes, & à corde factas attenuationes, multo spirituosior evadit.

Interim certum manet, quod chylus cor transiens, in eoque dilatatus, ilico chyli formam deponat, atque aliam, scilicet sanguinis, formam eo ipso momento suscipiat.

Chylus transiens cor non manet chylus.

Verum hic jam incidit gravis difficultas, videlicet an totus chylus in transitu per cor totam chyli formam ita deponat, sicque totus sanguinis formam ita recipiat, ut nulla ejus pars chylus maneat. Hoc dubium in scenam produxit Gualterus Needham, qui, *lib. de format. sat. cap. 1.* dicit, chylum in corde dilatatum notabili aliqua sui parte manere actu chylum, eumque sanguini admistum per totum corpus cum sanguine circulari, & in variis partibus (præcipue in amnio & mammis, de quibus supra suis locis dictum) iterum è sanguine separari ad usus privatos.

An totus chylus in transitu per cor mutetur in sanguinem.

Hanc suam sententiam eo confirmat, *Probatio.* quod non rarò (ut dicit *cap. 6.*) crudus & indigestus chylus è brachii venis sectis, à chirurgis fuerit extractus. Eandem opinionem adhuc magis confirmare videntur aliorum quoque Medicorum observationes, quarum varias ex aliis excerptas, collegit ephemeridum Germanicarum scriptor Bauschius, *tom. 1. observat. 27. & 132.* 1. Puellæ synocha febre laborantis, cujus sanguis in tribus venæ sectionibus semper lacteus apparuit. 2. Egri qui ex omnibus

O o 2

venis

venis secari solitis sanguinem album emisit. 3. Cuidam virgini, dicit, ob menstrua suppressa, postquam hora septima jentaculum sumpsisset, hora undecima venam in pede sectam fuisse, & effluxisse sanguinem plane album, qui ad ignem calefactus indurrescebat instar albuminis ovi diu cocti. 4. Pharmacopolæ Cambrisenſis ægrotantis, cujus è vena secta effluens sanguis erat ruber, sed in vase fiebat albus. 5. Cujusdam scabiosi, & 6. Mulieris lactantis febre maligna laborantis; item 7. Puerperæ febricitantis; & 8. Alterius similis puerperæ; & 9. Puellæ menstruorum suppressione laborantis; quibus omnibus è sectis venis, una cum sanguine, albus liquor profluxit. Hujusmodi duas quoque historias sanguinis albicantis à se visi, refert Regnerus de Graef, *lib. de viror. organ. genit. mihi pag. 84.*

Refutatio.

Verum etsi talis longa observationum series Needhami sententiam penitus confirmare videatur, quia tamen illa exempla à scopo aberrant, eandem suffulcire nequeunt. Nam omnes illi casus agunt de corporibus morboſis, in quibus albicans materia una cum sanguine educta fuit: de qua etiam materia (referente eodem Bauschio) satis acriter inter ægrorum istorum Medicos disputatum fuit, anne esset appellanda pituita, an chylus, an verò lac, aut pus, eaque de re diversæ multumque incertæ inter eos fuerint conjecturæ: cum ex quotidiana praxi notissimum sit, in variis morbis sanguinem, ob peculiare aliquod vitium, ipsi per viscerum male valentium pravas coctiones impressum, sæpe magna sui parte subalbo, subflavo, aliove pravo colore tinctum è sectis venis educi. Præterea, si semper aliquid chyli admisceretur sanguini, cum eoque circularetur, ergo etiam nonnunquam in hominibus bene sanis (quales frequenter etiam sunt mulieres gravidæ & lactantes, in quibus chylum una cum admixto sanguine circulari, ab hujus opinionis patronis pro certissimo præsupponitur) è venis secari solitis, cum sanguine effluere visus fuisset: atqui illud à nemine unquam visum fuit. Ego in mea praxi innumeris, non viris modo, verum etiam mulieribus gravidis & lactantibus, cætera sanis, venam secari jussi, sed nunquam minimam qualemcunque chyli guttulam in detracto sanguine observare potui; nec etiam alii illustriores practici, cum quibus super ea re locutus fui, illud unquam viderunt; & nemo certè aliquod exemplum hominis recte sani producet, è cujus secta vena chylus una cum sanguine effluerit, ex eoque separatus fuerit, an quis putabit nobis, aliisque senioribus practicis, hac in re oculos magis cætuſiſſe, quam hodiernis novitiis hujus commentis inventoribus? Fortassis hic ali-

quis objiciet, ipsam rationem docere, & experientiam confirmare, quod in mulieribus gravidis & lactantibus, bene sanis, chylus è sanguine separetur, & his in mammis, illis in amnion effundatur (sic Laurentius scribit se in puerperis, & lactantibus sæpe vidisse lactis copiam per vesicam & uterum excretam; quale quid à se quoque observatum refert Bauhinus) qui è nullis aliis quam sanguiferis vasis, versus illas partes delatis, eo defluere posse videtur. Respondeo: chylum ad amnion & mammam delatum, ut & per uterum ac vesicam effluentem, nunquam fuisse vasis sanguiferis infusum, aut sanguini admixtum, atque hinc neque per ea delatum, neque ex hoc separatum fuisse posse, sed per longe alias abditas vias ad illas partes defluere, de quibus viis, quia supra latius actum, videantur, *lib. 1. cap. 18. & 31. & hujus lib. cap. 2.* Præter hæc omnia, etiam ratio antedictæ opinioni penitus repugnat. Nam cum per viscerum coctiones (quæ fermentatione quadam singulis visceribus peculiari peraguntur) alimenta, & humores alimentarii prioribus suis formis exuantur, aliamque novam formam suscipiant, non potest non illud ipsum etiam contingere chylo in corde excocto. Ex. gr. pomum comestum, in ventriculo coctum, penitus sua forma privatur, & fit chylus, qui amplius non est pomum, & cujus nullæ particulæ ad pomi formam reduci ullo modo possunt: ita etiam chylus in corde dilatatus, non potest non, per repentinam illam validamque ac peculiarem effervescentiam, ilico totam chyli formam exuere, & sanguinis formam suscipere: qui licet in principio crudior sit quam reliquus sanguis sæpe circulatus ac in corde dilatatus, est tamen sanguis, in quo ne minima quidem chyli forma superest. Atqui cruditas illa, dicit quis, præsupponit aliquas chyli particulas non esse omnino in sanguinem mutatas, sed chyli formam adhuc retinere, sicque sanguini admisceri. Negatur, nam crudus sanguis non dicitur, in quo omnes chyli particulæ non sunt sanguificatæ, sed qui ad justam spirituositatem & maturitatem non est deductus, atque hinc qui ex chylo in corde dilatato primitus conficitur, etsi sit crudior, non tamen chylosa, sed pituitosa sanguinis pars appellatur, in qua quidem chyli nullæ particulæ supersunt, sed iusta tamen spirituositas adhuc aliquo modo desideratur. Eodem modo sicuti semen, quod ex sanguine conficitur, in semibus dicitur esse crudum & infœcundum, non quod in eo aliqua sanguinis particulæ in semen nondum mutatæ supersint, quæ formam sanguinis non exuerunt; sed quod semen illud, ob partium spermaticarum debilitatem, ad justam spirituositatem & maturitatem non sit deductum:

nemo

nemo enim, quantumvis perspicax, ulla sanguinis particulas in crudo semine observabit, seu percipiet, multo minus ex eo separabit. Sic etiam pomum immaturum dicitur crudum, non quod terræ aut arboræ aliquæ particulæ (ex quibus confectum est, & excrevit) in eo conspicuæ, aut ex eo aliquo modo separabiles sint, sed quod spiritus in eo latens ad tantam tenuitatem & maturitatem non sit perductus, ut sese exerere possit, quæ maturitas ipsi per Solis calorem, hincque ulteriorem factam coctionem, postea sensim accedit.

Verum enimvero, cum serum, bilis, & nonnunquam aliqui corrupti in vasis de-  
 tenti humores, una cum iis admisto sanguine cor transeunt, sæpe formam suam retineant, & maneant quod antea erant, quare illud ipsum etiam chylo contingere non posset? Quia chylus est succus alimentarius, naturæ gratus ac conveniens, præviis coctionibus & lymphatici fermentacei succi admitione tali modo, atque in eum finem præparatus & aptus redditus, ut in corde confestim dilatari (sicut pulvis pyrius in igne confestim dilatatur, atque ita formam suam exiit) & sanguis (bonus aut malus, prout cor, & ipse chylus bene vel male se habent) fieri possit & debeat, nec in corde dilatatus ullo modo formam chyli retinere queat. Secus autem contingit in fero, hile, aliisque corruptis humoribus sanguini admistis, qui neque conveniente modo, neque eum in finem præparati, sed inepti sunt ut sanguis fiant, licet sanguini in corde dilatando admisceantur, cum eo-  
 que cor transeant, atque hinc manent quod antea erant: sicut gleba terræ oleo imprægnata, & sic in ignem injecta, formam terræ retinet, quia ejus substantia est inepta ut per ignem formam suam facile privetur; etiam interea oleum, quo imprægnata est, ab igne dilatatum & accensum, formam olei ita perdat, ut ejus ne punctum quidem supersit, nec ad illam reduci unquam possit.

Quæritur igitur, si non semper & multum, an non interdum aliquantum meri chyli sanguini admisceatur? Hoc de arterioso sanguine penitus negamus, de venoso non semper; quia venæ cavæ interdum inest lacteus & chylosus succus, cum è lacteis thoracicis in venas subclavas infusus, tum in mulieribus lactantibus per venas mammarias (hæc de re supra videndum, cap. 2.) ad cavam ipsam delatus, talis tamen qui cor nondum transiit. Nam quod chylus cum sanguine in corde dilatatus, & in arterias propulsus, chyli formam retinere, & ex sanguine rursus separari possit, hoc credat Judæus appella, & ego etiam credam cum videro. Fortè per alicujus rei admitionem sanguinis color ex rubro mutabitur in album

(sicut oleum vitrioli & aqua fortis panni rubri colorem in album mutant) sed tunc illud quod album in sanguine apparet, non est chylus, sed potius sanguis corruptus appellandum: qualis etiam est ille qui interdum in certa corporis cacochymia, ut & in nonnullis morbis malignis, magna sui parte tali colore tinctus conspicitur: quemadmodum ea de re historiam ex alio describit Bauschius, *ephemerid. Germ. med. physic. tom. 2. observ. 210.* de Canonico febris maligna correpto, cujus ter detractus sanguis, omni rubedine erat privatus, substantiam habens saniosam, instar albuminis ovi, Addam notabile exemplum mihi visum. Anno 1635. æstivo tempore, Noviomagi (ubi tunc temporis praxin exercebam) grassata fuit febris petechialis valde maligna, quæ plurimos è medio sustulit. Hac infectis si primo biduo vena secaretur, sanguis bonus & laudabilis effluebat: quibus verò post sextum aut septimum diem secabatur, iis maxima sui parte albicans conspiciebatur, cum tamen, propter summam inappetentiam, tot intermediis diebus nihil fere edissent, & parum bibissent, nam febris hæc malignitate & summa anxietate magis, quam ardore & siti ægros cruciabat. Sic etiam in multis aliis ægris, quibus ob longam inediam nihil chyli in ventriculo gigni, sed ob morbosam corporis constitutionem sanguis facile corrumpi potuit; imò & in sanitate vacillante præditis, in quibus ob pravas coctiones vitiosi humores, sanguinem corrumpentes, paulatim in corpore succrescunt, albam crustam sanguini refrigerato innatantem vidimus, sed à chylo longè diversam, qui tamen color doctissimum Needham, multosque alios, in novo hoc mustaceo laureolam quærentes, chyli specie decepit. Verum quod præfatus Needham, ad opinionis suæ confirmationem, ultimo adjungit, scilicet arte chylum è sanguine separari, ac sic demonstrari posse, idque per inspersionem alicujus pulveris, hoc valde suspectum videtur, cum illud experimentum scribat ex longe petito relatu alterius cujusdam hominis ignoti, fortè idiotæ, quem ipsemet non vidit, sed à quo (ut dicit) Shneiderus se id non vidisse, sed audivisse scribit. Verum ego, qui hujusmodi historiis me non facile seduci peior, aliud dico, quod ipsemet præstabo, scilicet me affusione alicujus liquoris rubrum sanguinis colorem protinus in album seu lacteum mutaturum: sed inde tamen non sequitur, me tali modo chylum è sanguine secernere (utpote quem ei non inesse antea probavi) sed potius me sanguinis bonam mixturam corrumpere. Talia experimenta (proh dolor, audita duntaxat, & nunquam ab ipsismet visa, tantopere seduxerunt Gualterum Needham, aliosque suos

O o 3

afleclas,

An interdum aliquid chyli sanguini admisceatur.

afleclas, ut quasi magnum quid molituri, ex iis male intellectis, nec altiore indagine inquisitis, mox nova Medicinæ fundamenta & dogmata introducere conati fuerint, eaque nonnulli maledictis & conviciis potius, quam solidis rationibus defendere voluerint, antequam ipsimet rem intellexerint. Plura alia super his videantur *lib. 1. cap. 30. & 31.* Sed his omissis, jam ad rem redeundum.

Unde color  
ruber.

Ex illa coctione & dilatatione quæ in corde fit, rubicundus color sanguini imprimitur, quem non tribuit aut confert ipsum cor (ut multi putant) ratione rubedinis propriæ suæ substantiæ, sed casu excitat illa coctio quæ in corde fit (hoc latius dictum *precedente capite, circa finem*) utpote qua falsæ subacidæque particulæ cum sulphureis specifico modo exactius mistæ, mox talem colorem ex se producunt. Nam ex falsarum particularum, præcipuè acidarum, cum sulphureis exacta permistione rubrum colorem fieri, in chymia notissimum est, ut ex salis nitri (quod multas sulphureas particulas in se continet) distillatione patet: sic olei vitrioli tantillum liquoribus aut conservis ex pallido rubescentibus (si modo iis aliquid sulphurei insit) affusum, intensissimè rubrum colorem excitat. Hæc autem falsæ sulphureæque particulæ cum ipso chylo advehuntur, in quo tamen rubicundum colorem non faciunt, quia tunc falsæ vix ullum aciditatis gradum nactæ videntur, atque hinc cum sulphureis non satis attenuatæ & permistæ sunt, sed adhuc ambæ subcrudæ, viscidioribus particulis nimis obvolutæ, latent, è quibus expediuntur, & spirituescunt singulari cordis calore ac fermentatione seu dilatatione, atque sic exacte simul in spirituositate permistæ, & viribus circiter æquales concurrentes, talem rubicundum colorem producunt. Notum est in chymia, spiritus sulphureos minores, falsos non nisi magno calore suscitari posse: sic etiam in viscerum coctionibus res procedit. Coctione ventriculi, ut & fermentatione à succo bilioso ac pancreatico inducta, sulphureæ particulæ ex alimentis mediocriter dissolvuntur, eæque falsis, quæ tam leni calore ad perfectam dissolutionem perveniri nequeunt, involvuntur, sicque impeditur, ne sulphureæ, propter majorem volatilitatem, nimis citò dissipentur: falsæ verò his obvolutæ, & sulphurearum admistione paulatim magis resolutæ, subacidæque factæ, tandem cordis intenso fermentaceo calore attenuatæ ac dilatæ, prorumpunt spirituosæ, tuncque sulphureis, quas involvunt, & cum quibus dilatantur, exactè permistæ, rubescunt. Si verò cor morbo aliquo maligno afflictum, non habeat tantam fermentativam vim, ut falsas particulas cum sulphureis satis attenuare, dilatare, &

unire queat, tunc sanguis etiam non omnino rubicundus generatur, sed ei copiosi pallescentes humores admisti reperiuntur, ut in quibusdam malignis febribus, facta venæsectione, multoties videre contingit, qui tamen non sunt chylus, sed corrupti humores.

Hic itaque verus modus est quo conficitur sanguis, omnium partium nutritioni inserviens, & in se continens materiam omnium & singularum nutritioni aptam, ex qua singulis apponitur quod earum nutritioni conveniens existit; scilicet aliis particulæ magis coctæ & subtiliores; aliis minus coctæ & crassiores; aliis particulæ ex sulphureis & falsis æqualiter mistæ, ut fit in partibus carnosis: aliis particulæ magis oleosæ & sulphureæ, ut fit in pinguibus & adiposis: aliis particulæ magis falsæ ac tartareæ, ut fit in nervosis & ossibus: aliis denique hoc, aliis illo modo dispositæ particulæ agglutinantur, uniuntur, & assimilantur.

Quomodo  
partes nu-  
triantur  
sanguine.

Hæc autem appositio maxime procedit à figurarum diversitate, quam tum singulæ sanguinis particulæ, tum pori singularum partium obtinent. Hinc enim fit, ut sanguine in partes impulso, aliæ ejus particulæ harum, aliæ illarum poris melius inhæreant, in iisque inter se variis modis complicantur ac figurentur, & sic cum partium substantia immediate uniantur, in earumque naturam convertantur, & quæ ob peculiarem figurationem his aut illis adhærere ineptæ sunt, ulterius ad alias propellantur; usque dum tandem residua & omnibus inepta pars per venas remittatur ad cor, in eo de novo excoquenda, & nova aptitudine donanda. Vulgò quidem docetur, singulas partes ex sanguine attrahere particulas sibi maxime similes, easque sibi unire. Sed in corpore nostro nulla talis attractio datur, neque partes ulla cognitione præditæ sunt, ut sanguinis particulas sibi similes à dissimilibus distinguere, & sic illas magis quam has attrahere noscant vel possint. Verum sanguis talis qualis est ad omnes partes æqualiter propellitur, sed diversitas figurarum, cum in singulis sanguinis particulis, tum in singularum partium poris, causa est, quod aliæ magis his, aliæ magis illis adhæreant & agglutinentur, atque in his aliisve alio modo figantur & uniantur, à qua diversitate etiam diversitas substantiarum in singulis procedit, ut aliæ duriore, aliæ molliore, aliæ firmiore, aliæ debiliore existant.

Figurarum  
diversitas.

Hæc autem ex sanguine nutritio fit dupliciter.

Duplex ex  
sanguine  
nutritio.

1. Immediate, cum sanguinis particulæ immediate, nec prævia alia notabili aut magna commutatione apponuntur, ut in partibus carnosis & pinguibus fieri videtur.

2. Mediate,



2. Mediâte, cum præcedente alia notabili coctione & immutatione appositio contingit, ut fit in ossibus, ad quorum nutritionem, præter falsas tartareas sanguinis particulas, etiam concurrat medulla, prius ex sanguine confecta: item in nervis, qui non solum nutriuntur sanguine, ipsorum exteriori tunica per invisibiles arteriolas (ex continuatione earum quæ utramque cerebri & spinalis medullæ membranam pervadunt) communicato, verum etiam particulis sanguineis falsioribus, primo cerebri coctione præparatis, qua de re vide *lib. 8. cap. 1.*

Nutritionis  
gradus.

In hac autem ex sanguine nutritione tres gradus observandi sunt. I. Cum corpus ita nutritur, ut simul per nutritionem illam accrescat. II. Cum nutritur & manet in statu. III. Cum nutritur & decrescit.

Quatuor ad  
nutritionem  
necessaria.

Ut horum graduum diversitas, seu potius diversitatis causa innotescat, considerandum, quatuor esse necessaria ad nutritionem perficiendam: nempe succum alimentarium, ejusdemque succi appositionem, deinde agglutinationem, ac denique assimilationem.

Succus alimentarius est sanguis, qui per minimas quasque arteriolas pulsu cordis impellitur ad partes nutriendas, & in earum poros protruditur, sicque partium substantia eum quasi imbibit. Et quia in illis poris semper humoris aliquid versus assimilationem tendentis superest, hinc fit ut in iis noviter advenientis sanguinis convenientes particule, humori isto magis affines & associabiles, cum illo præcedente, seu antea inhzrente humore misceantur (reliquis minus affinis particulis per circulationem ulterius procedentibus) & per convenientem calorem ac proprium singularum partium temperamentum excoquantur, & substantiæ partium sensim agglutinentur, nec non magis magisque assimilentur, perque spiritum vitalem cum sanguine arterioso continuè in partes influentem ita præparentur ac disponantur, ut vitalitatem induant, sicque veræ partium particule fiant, communi cum reliquis vita & anima donatæ.

Incrementum.

Si jam, dum fit illa nutritio, partium minimæ particule, ratione temperamenti humidioris & caloris mitioris, molliter sibi invicem cohzreant (sicut in infantibus & pueris) tunc illæ in prima illa appositione, seu permissione, ab humoris alimentarii cordis impulsione influentis copia, facile nonnihil à se invicem recedunt, plusque nutritii humoris admittunt, quam ad sui nutritionem opus habent, à cuius agglutinati & assimilati copia, fit sensim partium incrementum, quippe plus apponitur & assimilatur, quam dissipatur. Si verò per majorem calorem minimæ partium particule magis exsiccata, duræ, & firmæ eva-

Status.

serint (sicut in virili ætate) tunc ab impulsu alimentario succo à se invicem amplius non recedunt, & qui in poros satis copiosos impellitur succus, à majore & fervidiore calore tam validè discutitur, ut non plus apponi & assimilari possit, quam dissipatur, atque ita fit status seu consistentia, in qua partium substantia nullum quantitatis excessum aut recessum patitur. Si denique non solummodo partium minimæ particule ab antecedente magno calore inaruerint, porique angustiores facti sint, ita ut minus alimentarii succi admittere possint; sed insuper ipse etiam alimentarius succus, propter calorem lapsu temporis & ætatis imminutum, hincque pejorem procedentem viscerum coctionem, deterior, ipsiusque substantiæ partium minus affinis & associabilis evaserit, (sicut in senectute) tunc partes decrescunt & imminuuntur: quippe ineptitudo pororum in partibus, nec non ipsius nutritii succi, & caloris coquentis, atque etiam dicti succi paucitas, faciunt ut minus apponatur quam dissipatur. Hoc autem decrementum imprimis & manifestius observatur in partibus mollioribus, quarum minimæ particule sunt humidiores & facile dissipabiles, quales sunt caro, pinguedo, &c. Minus verò observabile est in ossibus, aliisque partibus durioribus, quarum minimæ particule sunt magis fixæ, atque hinc minus dissipabiles.

Decrementum.

Hic, per parenthesin, inferenda videtur quæstio, ab aliquibus proposita, scilicet an senum jam decrecentium corpora etiam breviora fiant, quam ante fuerunt? Id multi affirmant, & autoplasmam judicem constituunt. Spigelius verò, *anat. lib. 1. cap. 7.* id absolute negat: *Breviores, inquit, fieri pernego, graciliores fieri, lubens largior.* Addit rationes: *Ossa enim, inquit, secundum quæ longitududo corporis exporrigitur, cum partes sint dura ac solida, nec ætatis diuturnitate, nec morbi ullius sævitia unquam imminuuntur. At caro, ut ab aliis pluribus causis, sic ab ætate facile depascitur consumiturque. Quodsi breviores esse videantur seipsis juvenibus, seniores facti, ideo accidere credendum est, quod articuli omnes, tum à musculi à caloris inopia tensi, tum à ligamenti siccatis & occallescentibus incurvantur.* Verum etsi Spigelius speciosas rationes pro sua sententia negativa adferat, tamen affirmativa nobis plausibilior videtur, cum decrepiti senes, non solum ratione curvaturæ articulorum & corporis breviores appareant, sed necessario etiam aliquanto, licet non multo, breviores facti sint, idque imprimis propter cartilagineas spinæ vertebris & crurum, aliarumque partium articulationibus interjectas, quæ cum in juvenibus sint molliores & tumidiusculæ, atque hinc ossa paulo remotius à se invicem sejungant, corpus necessa-

An sentiant breviores.



rio aliquantum elongant: in senibus verò cum illæ paulatim magis magisque exsiccentur & tenuiores fiant, corpus hac de causa brevius fieri omnino necesse est. Adde, quod etiam ligamenta exsiccata articulorum ossa propius ad se invicem contrahant. Hæc res manifeste patet in illis senibus, qui fortiores sunt, & non curvati (etsi enim plerique, non tamen omnes senes incurvantur) sed erecti incedunt: quippe si applicentur ad mensuram qua se ipsos in juventa mensurati sunt, inveniuntur, alii latitudine pollicis, alii sesqui pollicis, nonnulli duorum pollicum, breviores evasisse, quam fuerant in juventute; quæ res ab experientia nobis constat.

*Duo dubia.* Ex iis quæ de sanguinis confectione & principiis modo diximus, duo hæcenus obscura dubia omnino manifesta fiunt. *Primum*, quid sint quatuor sanguinis humores, pituita, sanguis purus, bilis, & melancholia. *Alterum*, quomodo temperamenta in corporibus fiant.

*De quatuor sanguinis humoribus.* Quantum ad *primum*, de quatuor humoribus, ex quibus sanguis constare traditur, Medici de his passim multa loquuntur, sed quales, aut qui sint, vix quisquam explicat.

*Pituita.* Pituita est sanguinis illa pars, quæ ex chylo recenter confecta (sive plus, sive minus sulphuris aut salis in se contineat, eodem redit) nec multoties circulata, & in corde dilatata, sed crudior ac minus spirituosâ est.

*Sanguis purus.* Sanguis purissimus est illa pars massæ sanguineæ, quæ pluries circulata, & in corde dilatata, ad mediocrem spirituositatem pervenit.

*Bilis.* Bilis est illa pars, quæ per frequentiores circulationes ac dilatationes ad maiorem tenuitatem exaltata est, maximeque spirituosâ ac fervida evasit.

*Melancholia.* Melancholia est illa pars, è qua per plurimas circulationes, & in corde factas attenuationes, spirituosâ particulæ magna ex parte eductæ & dissipatæ sunt, atque hinc frigidior, crassior, & magis terrestris remansit.

(Hic per parenthesin notandum, per pituitam, bilem, & Melancholiam, non intelligi humores fermentaceos, quales in ventriculo, hepate, & liene conficiuntur, quasi sanguinis massa ex iis mixtis constaret, sed hæc nomina tantum comparative applicari massæ sanguineæ, quatenus ejus partes aliæ minus, aliæ magis, aliæ nimium excoctæ sunt.)

*Quatuor humores sunt semper in sanguine.* Quia autem propter humorum spirituumque continuam consumptionem, restauratio deperditorum per assumpta alimenta identidem est faciendâ, hinc necessario quatuor isti humores semper in sanguine existunt, isque ex iis constat. Ex

alimentis enim coctis ac sufficienter præparatis, & primo in corde dilatatis, supeditatur identidem succus pituitosus (sic crudior sanguinis pars vulgò appellatur) qui paulatim pluribus circulationibus ac in corde reiteratis dilatationibus, transit in sanguinem purum, maximeque temperatum. Hic ulterius supra justam caloris temperiem procedens, transit in sanguinem biliosum: hic verò, amissis ac dissipatis particulis subtilioribus, in melancholicum abit. Atque sic quatuor illi succi (qui omnes ex sulphureis & salis particulis constant, nec à se mutuo differunt, nisi majore & minore coctione ac spirituositate) simul misti, & sic quadam perpetuatione qualitatum excessus inter sese infringentes, constituunt, quousque vita durat, totam sanguinis massam, mediante sero coherentem, seu unitam & fluidam: quod tamen serum, ejusque imprimis aquosior pars, nutriendis partibus non assimilatur, sed sanguinis particulas nutriendas ad partes nutriendas devehit, ab iisque jam appositis & assimilatis per calorem discutitur seu dispellitur & evacuatur. Eodem modo hæc res procedit, sicut in metallorum deauratione: nam aurum purum in tenuissimas lamellas (folia vocant) redactum, Mercurio seu argento vivo admiscetur, ut eo mediante vasis deaurandis apponi & firmiter adhærere possit, quod sine Mercurio impetrari nequit: postea verò, facta illa affictione, & forti appositione, admoto igne Mercurius ille seu argentum vivum resolvitur & discutitur, sicque abigitur, nec ejus quidquam in vase remanet, atque tunc eo discusso aurum vasi firmissime affixum, & vas plane deauratum conspicitur; atque sic aurum, quod solum per se vasi affigi, seu firmiter apponi & uniri non potuisset, mediante Mercurio isto affigitur & adhæret, & ipse Mercurius, ut postmodum inutilis, separatur calore ignis. Talis etiam in corporibus vivis Mercurius, sanguinem ad partes deferens, iisque apponens, est serum.

Quantum ad *alterum dubium de temperamentis*, de eo quoque multa dicuntur, sed pauca bene explicantur. *Quomodo fiant temperamenta.*

Fiunt autem temperamenta nostrorum corporum ex varia quatuor modò dictorum succorum mistione & redundantia.

Si chylus ex alimentis humidis & frigidis, quibus parum subtilis spiritus inest, sit confectus, vel etiam crudior è ventriculo dimissus, aut defectu convenientis fermenti non satis dissolutus, tunc ex eo generatur succus sanguineus pituitosus, qui licet sæpius circuletur & in corde dilatetur, à corde tamen ad sufficientem tenuitatem ac spirituositatem exaltari nequit, atque hinc (si modò ex dictis erroribus talis chylus diu multusque

multusque generetur) ejus copia succrescit, & contra fit inopia reliquorum succorum, scilicet sanguinis puri, succi biliosi, & melancholici, utpote qui ex isto principio commodè & satis copiosè generari non possunt. Et quia tunc corpus totum tali sanguine, in quo crudior pituitosus succus præ reliquis prævalet, nutritur, hinc partes constitutionem humidiorum ac frigidiorum consequuntur, fitque totius corporis temperamentum pituitosum.

*Sanguinem.*

Si verò chylus sit bene coctus, temperatus, & ex alimentis temperatis confectus, vel viscerum bona coctione temperatus factus, tunc fit ex eo succi puri sanguinei redundantia, hincque temperamentum totius sanguineum.

*Biliosum.*

At si fuerit confectus ex alimentis valde calidis & acerbis, vel ob viscerum intensiorem calorem acriter fermentatis, tunc paucis circulationibus transit in succum calidum & valde spirituosum, à cujus in sanguine prædominio fit temperamentum biliosum.

*Melancholicum.*

Si denique confectus sit ex alimentis crassis, terrestribus, multoque sale crudo ac fixo redundantibus, iisque non satis bene coctis ac dissolutis, tunc per circulationes, factasque in corde dilatationes, pauci spiritus ex eo educuntur, manetque succus crassus, & parum spirituosus, ex cujus redundantia procedit temperamentum quod vulgò melancholicum nominatur.

Porrò, magnus excessus cujuslibet temperamenti intemperies appellatur, generatque morbos consimiles, frigidos, calidos, &c.

Jam si quis forte ipsorum proximorum principiorum sanguinis, nempe sulphuris, salis, & mercurii, latiore explicationem desideret, & qualibus minimis particulis, ac quomodo inter se cohererentibus, consent, scire velit, ille chymicos consulat, qui hac de re integros libros conscripserunt. Imprimis autem super his lectu dignus est Daniel Sennertus, in doctissimo tractatu, *de consensu chymic. cum Galen. cap. 11.*

*An sanguis & spiritus vivans.*

Post descriptionem principiorum ac confectionis sanguinis & spirituum vitalium, antequam de usu loquamur, pauca præfari lubet de eorum vitalitate, utpote de qua disputant Philosophi, dissentiunt Medici, dum alii vitam iis tribuunt, alii denegant, & utriusque sententiæ probatio plausibilibus rationibus confirmatur. Illi pro vitalitatis defensione dicunt. 1. Sanguinem & spiritus pro animi motuum & imaginationis diversitate se diversimode movere, non minus quam reliquæ vivæ corporis partes, in terrore versus cor, in pudore versus genas, in libidine versus genitalia, &c. 2. Teste Sacra scriptura, animam carnis, id est, vegetativam in sanguine

subsistere. 3. Semen potentiâ animatum & vivens ex sanguine & Spiritibus confici.

4. Illos, teste Hippocrate, nutrir: quæ omnia contingere non possent, si non viverent. Hi tamen qui vitam iis denegant, veriore sententiam amplecti nobis videntur, ac proinde pro hujus partis defensione, dictas rationes hoc modo refellimus, respondentes ad *Primam*, quod sanguis & spiritus in sese non habeant principium sui motus, tanquam ab anima ipsis inductum, sed quod eorum motus ipsis inducatur vi partium solidarum ab anima motarum & viventium, ut cordis, cerebri, &c. quarum vi etiam, idque sæpe pro animi motuum diversitate, promovetur motus chyli, bilis, imò nonnunquam & stercorum, aliorumque variorum humorum, quos tamen propterea vivere nemo sanus dixerit. Ad *secundam*, carnis animam dici adesse in sanguine, quatenus caro animata eget sanguine (imò & aëre) tanquam proximo sustentaculo sine quo vita ejus subsistere nequit, qua de re latiore explicationem dedimus *lib. 1. cap. 1.* Ad *tertiam*: quod semen potentiâ animatum ac vivens ex sanguine & spiritibus non gignatur, quia sanguis spirituosus, ex quo conficitur, est vivus, sed quia per novam specificam missionem, materiæque sanguineæ dispositionem, vi convenientis caloris & specificæ proprietatis partium seminificantium inductam, nova, & quidem potentiâ vitalis, forma introducit, quæ materiæ non vitali antea non inerat: quemadmodum illud ipsum in aliis quoque rebus fieri videmus: ex cadavere enim mortuo, ex lignis corruptis, ex caseo, ex aqua pluvia, aut paludosa, quin etiam ex aceto Soli diu exposito, aliisque rebus non viventibus, producantur vermes viventes, cum tamen nulla vita istis rebus, siue isti materiæ ex quâ, antea infuerit. Ad *quartam*: quod Hippocrates sanguini & spiritibus nutritionem proprie dictam non adscribat, sed per eorum nutritionem intelligat duntaxat continuam eorum ex chylo generationem seu confectionem: eodem modo sicut nos lampadis flammam oleo nutriri dicimus (etsi nulla res mortua nutritionis capax sit) quia oleum est proxima materia qua flamma illa fovetur. His denique adjungo, quod in animali vita non possit esse nisi in partibus corporis, è quarum numero sanguinem & spiritus apertissime excludi, satis late demonstravimus *lib. 1. cap. 1.* Atqui, forte quis dicet, semen quoque non est pars corporis, & tamen potentia vivit, ergo, quidni etiam sanguis? Respondeo: etsi semen non sit pars corporis, ex. gr. Petri præsentis, à quo decisum est, & in cujus fortassis partibus spermaticis adhuc continetur, est tamen pars corporis animalis futuri viventis,

P p

imò

imò talis materia, quæ animalis formandi omnium partium ideas in se continet, ut latius docuimus lib. I. cap. 28. Sanguis autem neque viventis Petri, neque futuri animalis pars dici potest, sed duntaxat humor vel succus partes proxime nutriens, earumque substantiæ per novam coctionem agglutinandus, assimilandus, & sic cum ea tunc simul vivificandus.

*Sanguinis  
usus.*

Ex supradictis abunde patet, usum sanguinis esse, ut omnes partes nutriat, id est, non tantum materiam singulis assimilandam præbeat, verum etiam spiritum vitalem calidum advehat, qui omnium & singulorum actiones coctionesque suscitet ac promoveat, & sic aptam assimilandam nutritiam materiam assimilari, ac in deperditæ & à calore dissipatæ locum substitui faciat.

*Quis san-  
guis nutriat.*

Verum cum sanguis tum per arterias, tum per venas feratur, quæritur, nutrianturne partes sanguine arterioso, an venoso? Antiquitus creditum fuit partes venoso sanguine nutriri, quia in hepate sanguis confici, ex eoque per venas ad partes ferri putabatur: quem errorem ex quo detexit cognitio circulationis sanguinis, & animadversum est sanguinem in solo corde confici, ex eoque per arterias ad partes impelli, per venas verò à partibus avehi, clarissime innotuit, corpus humanum præcipue nutriri sanguine arterioso. Dico, præcipue, quia etsi negari non possit, dum sanguis per venas redit ad cor, illius aliquantulum per vasculorum seu tunicarum poros transudans, hic illic variis partibus affigi, easque nutrire, ipsasque venarum tunicas eo, quem vehunt, sanguine nutriri, & hepar quoque maximam sui nutrimenti partem à sanguine venoso habere, ut ex summa arteriarum paucitate, & venarum illud perreptantium multitudine patet: tamen aliis quibuscunque locis, ubi arteriæ comitantur venas, manifestum est, partes imprimis nutriri sanguine arterioso, utpote magis spirituosus & coctus, majoreque cum impetu per arteriolarum fines in partium poros impulsus.

*Charletoni  
opinio con-  
traria.*

Huic antiquissimæ, & in Medicis scholis receptissimæ sententiæ, de partium nutritione per sanguinem, se nuper magno cum fervore opposuit Gualterus Charleton, æconom. animal. exercit. 5. eamque multis validissimis, ut putat, argumentis destruere, atque sanguinis ineptitudinem ad nutritionem docere nititur. Quæ nova opinio quandoquidem varios, etiam doctos, viros, à veritate jam seduxisse videtur; necessario hic paulo accuratius perpendenda est.

*Argumenta  
Charletoni.*

Primaria summa argumentorum Charletoni hæc est.

I. Sanguis constat ex quatuor succis, qui ulteriore coctione tandem omnes degenerant in

melancholiam, quo impuro succo partes omnes nutriri nequeunt, & eo tamen omnes nutriri deberent, si sanguine nutrentur.

II. Ad multas partes sanguis non pervenit, ut ad cerebrum, ossa, nervos, ligamenta, &c.

III. Macilenti, quibus plurimum est sanguinis, plus comedunt, & minus nutriuntur, quam obesi, quibus tamen paucior est sanguis, venarum angustia major, & paucior victus.

IV. Qui fame aut phibisi moriuntur, iis post mortem plurimus sanguis in venis superest, qui nutritioni ulterius inservire, sicque mortem avertere aut differre potuisset.

V. Sanguis in omnibus partibus servat suam rubedinem, nec quoque in albicantibus eam deponit, ergo eas non nutrit.

VI. Hippocrates, lib. 5. epidem. text. 6. virum contubescitum, qui alimentis non reficiebatur, multiplici venesectione curavit.

VII. Sanguis per arterias ad partes deferatur, in iis copioso sero diluitur, & multo minus pinguis atque unctuosus est quam in venis, per quas a partibus aufertur.

VIII. Sanguis maximam cum multis partibus habet dissimilitudinem, ut cum cerebro, ossibus, membranis, &c.

IX. Modus nutritionis est alimenti à cruditate seu fixationis statu ad statum fusionis seu dispersionis processus, quo spiritus ejus antea fixi exaltantur ad ulteriorem activitatis gradum: qui spiritus cum sanguini inhæreant, & helluonis instar, alibilem partium substantiam exhauriant, dissolvant, ac dissipent, eum ineptum reddunt ad partium nutritionem, utpote quibus solidandis nutrimentum magis fixum convenit.

X. Sanguis ipse nutritur chylo, ergo non potest alias partes nutrire: neque propterea etiam, quia in eo continetur calor, qui partium substantiam deprædatur.

XI. Singula partes nutriri debent succo quodam consimilis natura cum illo è quo primo sunt conformata: atqui ille non est sanguis, sed seminis colliquamentum, ac proinde non potest earum augmentum & nutrimentum à sanguine procedere.

His ita positis, tandem constituit Charletonus similitudinem inter flammam lampadis & illam fermentationem quæ in corde fit, ac pro conclusione dicit, usum sanguinis esse, ut biolychnii pabulum sit, spirituumque perpetim generandorum proxima materies.

Jam videamus quanti ponderis sint hæc argumenta.

Ad primum dico, Charletonum graviter errare, dum præsupponit partes omnes impura melancholia nutriri debere, si sanguine nutrantur. Ex antedictis liquet, pro diversitate naturæ partium etiam diversa debere esse nutrimenta, aliasque debere nutriri crudiore, alias temperato, alias calidiore, alias frigidiore & crassiore sanguinis

*Refutatio.*

guinis parte, easque omnes partes semper esse in sanguine, & si harum aut illarum nimius sit excessus, tunc fieri atrophiam, vel cachexiam. Præterea, eum non considerare, partem sanguinis melancholicam appellatam non esse succum impurum, sed duntaxat spissiore, & quæ dissipata spirituosiore parte, non facile rursus ad spirituositatem ulterius exaltatur, ob viscerum coquentium & fermenta præparantium debilitatem: quæ viscera si convenientibus remediis integritati restituantur, tunc eum ad justam spirituositatem reduci solere, eoque modo affectionem hypochondriacam, scorbutum, aliosque morbos melancholicos curari, scilicet remediis viscera corroborantibus, ac humorum fixitatem solventibus, eosque ad spirituositatem exaltantibus. Denique, illum non animadvertere, varias esse partes, quæ ad sui nutritionem huiusmodi spissiore sanguinis partem requirunt.

Ad *secundum* dico, nullas esse partes ad quas sanguis non pervenit. In media cerebri substantia innumera punctula sanguinea epullulantia conspiciuntur. Nervi recipiunt sanguinem, qui per continuationem vasorum cerebri membranas perreptantium ad eos fluit, ut docebitur *lib. 3. cap. 8.* Per ossa transeunt arteriæ & venæ usque ad anteriorem fungosam substantiam & ad medullam, eorumque periosteæ extrinsecus undequaque alluit sanguis, ut latius probatur *lib. 9. cap. 1.* & sic de cæteris.

Ad *tertium* dico, macilentis, licet sanguine copioso redundant, molem tamen corporis minus incrementum, propter magnum acremque sanguinis fervorem. Magnus enim calor, quidquid assimilatur, citissime dissipat; contra quam fit in obesitate, quibus minor est calor & acrimonia in sanguine, atque hinc iis ex pauciore sanguine plus apponitur quam dissipatur.

Ad *quartum* dico, per inediam homines duplici modo extingui posse. *Primo*, cum corpus caco-chymum est, & muli quidem, sed pravi sanguinis copia in vasis redundat: in talibus enim necesse est per convenientia alimenta novos & bonos succos identidem cordi suppeditari, ut refocillari continuè possit, quod si per inediam non fiat, tunc sanguine ferventiore, acriore, aliove quocunque modo corruptiore evadente, cor à pravis humoribus obrui & mori, etsi multum sanguinis in vasis supersit: hacque etiam de causa, scilicet ob pravam sanguinis qualitatem, qua ad cordis refocillationem & partium nutritionem ineptus fit, phthisici moriuntur, etsi adhuc aliqua sanguinis copia supersit: non enim ad vitam sustentandam sola quantitas, sed etiam bona qualitas sanguinis requiritur. *Secundo*, cum in bene, aut male constitutis corporibus

sanguis per longam inediam absumitur: quamvis enim in iis qui inedia moriuntur, aliquis sanguis in vasis supersit, apparet tamen illum nimis paucum esse, quam ut omnium partium nutritioni sufficienter inservire possit, atque hinc debilitatis omnibus partibus & visceribus, homo extinguitur. Quod autem in tali casu valde paucus sanguis supersit, illud anno 1656. mense Novembri, in theatro anatomico publice à nobis observatum & demonstratum est, in viro, qui ob cordolium aliquod vitæ pertæsus, se ipsum fame & siti extinxerat: quippe corpore alioqui sanus existens, aliquot septimanis nihil omnino edere, ac ne guttam quidem bibere voluerat. In hoc subjecto nullæ venæ meseraicæ, intercostales, aliæque minores conspici poterant, propterea quod inanitas essent, atque ex ipsa vena cava vix trium cochlearium sanguinis mensura effluxit, & arteria magna omnino vacua inventa fuit. Similiter anno 1660. mense etiam Novembri, hominem quendam, ob summam & diuturnam inappetentiam longâ, inediâ emaciatum, & tandem mortuum, in eodem theatro nostro publice prosecuimus, in eoque venas & arterias mirabiliter inanitas invenimus, ita ut ex vena cava vix duo cochlearea sanguinis effluerent, ex arteria aorta nihil. Quæ certè quantitas nimis pauca est, quam ut totum corpus ea nutriri possit.

observatio.

Ad *quintum* dico, falsum esse, sanguinem in nutritione partium albicantium non deponere suam rubedinem, contrarium enim liquere in cerebro, quod sanguine per poros ejus transeunte nutriri, docent innumera punctula sanguinea in discissa substantia passim ubique conspicua, & tamen albicat. Ad hæc, dico colorem rubicundum specifica cordis coctione in sanguine circulante facile perpetuari, propterea quod particulæ sulphuræ cum falsis exacte concurrant, & cum spirituositate mixtæ uniantur: sed in sanguine partibus jam ad nutritionem inhærente, illum colorem alia specifica partium albicantium coctione rursus æque facile immutari ac perire, cum sulphuræ particulæ magna sui parte rursus à falsis separantur, aliove modo miscentur. Denique subjungo, in sanguine, præter rubicundas, etiam multas albas, aliasque variorum colorum particulas recondi, quas intensa rubedo ita obvelat, ut non nisi in particularum sanguinis separatione animadverti possint: eodem modo sicut in vino rubro latet spiritus lympidissimus, & aquosa pars pellucida, quorum tamen lympidus color in vino non conspicitur, sed per distillationem mox apparet.

Ad *sextum* dico, nonnullis hominibus esse sanguinem nimis falsum, acrem, spissum, vel corruptum, qui proinde alimentis

non reficiuntur, nisi natura prius, aliquā notabili istius sanguinis copiā detractā, levetur, ut sic novos alimentorum succos melius digerere, ac in sanguinem puriorem convertere, eoque melius & debito modo corpus nutrire possit: atque talem, procul dubio, fuisse illum virum ab Hippocrate per venæsectiones curatum.

Ad *septimum* dico, ad partium quarumcunque nutritionem non requiri semper & necessario unctuositatem sanguinis, sed talem aptitudinem quæ omnibus & singulis partibus conveniat, quæ aptitudo in sola unctuositate non consistit, ut ex ante dictis patet.

Ad *octavum* dico, sanguinem in toto consideratum videri quidem multis corporis partibus dissimilem, sed in particulis suis consideratum, habere in se quod singulis partibus simile existit (hoc exprædictis etiam liquet, cum nullæ partes sint, quæ non sint constructæ ex sale & sulphure, secundum singularum naturam diversimodè, mediante Mercurio, mistis, quæ ipsa etiam sunt sanguinis principia. Præterea similitudinem non esse æstimandam ex colore, qui qualibet nova coctione facile mutari potest, sed ex particulis, cum partium, tum sanguinis substantiam constituentibus.

Ad *nonum* dico, Charletonum confundere nutritionem cum sanguificatione, & quæ ille hic dicit de nutritione, illa pertinere ad sanguificationem, inter quæ magna est differentia. Nam alimentum non exaltatur, ad maiorem spirituositatem, ut ita fiat nutritio sed ut fiat bonus sanguis: qui postea rursus subit aliam mutationem, ut per eum fiat nutritio, quæ nutritio non consistit in ulteriore spirituum exaltatione, sed potius in nova quadam fixatione. Præterea & hoc addo, Spiritus vitales non, tanquam helluones, consumere partium solidarum substantiam, sed eam conservare in integritate, neque etiam reddere sanguinem ineptum ad nutritionem, sed aptum, eosque partibus cum sanguine infusos, illas ad munia suscitare, atque ad nutrimenti allati assimilationem quali impellere seu cogere, quæ assimilatio alioqui sine his spiritibus fieri non posset. Quomodo autem nutrimentum spirituosum rursus figatur, infra videndum, *lib. 3. cap. 11.*

Ad *decimum* dico, egregiam verò esse consequentiam: *Sanguis nutritur chylo, ergo non potest alias partes nutrire.* Nam retrocedendo similiter sequeretur: *Triticum nutritur succo terra, ergo comestum non potest nutrire chylum.* Sic etiam de calore dico: *Vinum, triticum, aliaque multa alimenta, in se continent spiritum calidum, ergo non possunt mutari in chylum & sanguinem: quare? quia spiritus calidus solet partes fluidas depræ-*

*dari.* Quam sunt hæc inania! Propter sanguinis spirituosum calorem, sine quo sanguis prorsus inutilis est ad nutritionem, dicitur illum non posse nutrire partes: an igitur corpus aliquod frigidum, aut humor omnis caloris expers erit alimentum, & valebit ad nutritionem?

Ad *undecimum* dico, Charletonum hic sui penitus oblitum esse: nam antea ex Harvei *exercit. 18. de gener. animal.* statuerat sanguinem dari antequam quidquam reliqui corporis existat, & ex ipso materiam ex qua corporatur fœtus, & nutrimentum procedere. Si hæc ejus positio vera est, ut eam esse vult, quid difficultatis jam superest, quod partes ex sanguine constructæ eodem etiam nutrantur? Præterea, si seminis colliquamentum, ut Charletonus ex Harvei sententia statuit, partibus nutriendis simile sit, & rursus illud, ex ejusdem Harvei observatione, simile sit sanguini, etiam sanguis similis erit partibus nutriendis. Nos tamen, qui partes ex sanguine primitus non construi censemus, ad propositionem hoc modo respondemus: scilicet, partes primitus conformatas esse ex spirituofo bullæ liquore (vide *lib. 1. cap. 29.*) & nutritas colliquamento seminis: hujus autem seminis totam substantiam ex sanguine arterioso, per arterias spermaticas ad testes fluente (accedentibus etiam spiritibus animalibus, per nervulos eodem dimissis) desumptam esse (ut dictum *lib. 1. cap. 28.*) ergo in sanguine esse totam materiam seminis, bullæ, & colliquamenti, eamque in singulis partibus speciatim excoctam, non minus acquirere aptitudinem eas singulas speciatim nutriendi, quam in testibus generatim excocta seu præparata acquirit aptitudinem eas omnes generaliter primo constituendi, & sic concludendum esse, omnes partes primam conformationem seu consistentiam, & subsequentem augmentationem ac nutritionem habere à succo omnino consimili, qui ante illam præparatur in testibus, ante hanc vero in singulis partibus: atque ita verum esse antiquum axiomā: *Isdem nutrimur, ex quibus constamus:* ut & illud Aristotelis effatum: *Eadem materia est ex qua augetur animal, & ex qua construitur primum.*

Denique ad *conclusionem* dico, admodum male institui comparisonem, inter fermentationem quæ in corde fit, & flammam lampadis: qualis comparatio facile toleratur, in poetis & oratoribus, qui solummodo verborum ornatum seu elegantiam quærunt, sed non in Philosophis Naturæ scrinia perscrutantibus. Flamma enim non solum dissipat subjectum cui inhæret, verum etiam corrumpit, ejusdemque totam misturam dissolvit, ac inutilem reddit: contra verò fermentatio cordis non corrumpit

rumpit sanguinem, neque misturam ejus dissolvit in interitum, sed mediante totius massæ dilatatione, eandem exactiorem & firmiorem reddit, sicque sanguinem ad majorem perfectionem deducit, in eoque spiritus generat, qui tenues, calidi & puri massam sanguinis pervadentes, illum in dicta perfectione conservant, ac una cum sanguine, suo subjecto, cujus pars sunt, partibus corporis infusi eximio suo calore omnium innatum calidum torpescens suscitant in actum. Verum quidem est, quod illi spiritus, propter summam suam tenuitatem & mobilitatem, continuè copiosissimè exhalent, atque etiam corporis multas fluidas particulas suo calore dissolvendo, dissipari faciant; sed hoc non fit ob eorum aliquam corruptionem, sed propter summam tenuitatem. Dabo similitudinem. Vinum cum distillatur, spiritus vini ab eo exurgens, non corrumpitur ab ignis calore distillationem promovente, sed ad majorem tenuitatem & perfectionem exaltatur, manentque in eo sulphureæ falsæque particulae in arcta mixture: cujus tenuitatis ergo etiam plurimum exhalat, & dissipatur in auras. At contrarium fit in lampadis oleo, quod per flammam attenuatur quidem, verum non ad majorem perfectionem, sed ad omnimodam corruptionem: quippe oleum non fit melius aut spirituosius, at tota ejus mistura seu compositio dissolvitur, & neque manet amplius oleum, neque fit spiritus olei: sicut etiam lignum quod comburitur, non manet amplius lignum, sed solutâ misturâ, redigitur in vaporem & cineres. Quodsi verò spiritus vini etiam conciperet flammam, tunc similiter non fieret perfectior, sed penitus corrumpetur. Atque ita se res habet in nostro corpore sicut in distillatione, non verò sicut in flammâ, ac proinde comparatio fermentationis cum flamma, plane absurda est. Fateor quidem sanguinem esse materiam & subjectum spirituum animalium, sed inde nego deduci, quod propterea non possit nutrire omnes totius corporis partes: verum inde potius deducendum arbitror, quod necessario nutriat partes, cum in se contineat & materiam nutrientem, & spiritum vitalem istam nutritionem promoventem, sine quo nulla nutritio perfici potest.

Atque sic tandem omnino concidit, hæc nova opinio, admodum animosè ab auctore suo proposita, & à multis fati temerè recepta.

N. Zas, Belgico libello de rore animalium conscripto, solum liquorem lymphaticum (quem per suum rorem intelligere videtur, quamvis Ludovicus de Bils inter rorem & lympham distinguat) omnes spermaticas partes nutrire arbitratur: quod ipsum etiam sentit ac scribit Clemens Niloë, Belgico

libello de nutrit. & ferment. cap. 9. qui posterior eodem loco etiam sanguinem ad partes nutriendas prorsus ineptum esse dicit, scilicet, 1. Quia est substantiæ nimis terrestris. 2. Quia neque sanguis, neque chylus ex quo ille generatur, in distillatione ad ignem facta sursum impelluntur aut transcendunt per alembicum in vas recipiens, utpote in quod solummodo aqueus quidam liquor delabitur; ergo non est sanguis satis subtilis ut ad omnes partes pervenire, easque nutrire possit. 3. Quia similis spiritus qualis è sanguine per chymiam educitur, etiam educitur ex lymphâ, quæ ex circulo lymphatico, juxta venas jugulares posito, colligitur. 4. Quia multæ sunt partes, ad quas non perveniunt arteriæ & venæ sanguinem deferentes. Hæc opinio Clementis Niloë in eo distat à Glissonii & Charletoni sententia, quod hi putent nutritionem fieri per succum quendam è nervis effluentem, ille verò per succum lymphaticum, quorum prius refutamus lib. 8. cap. 1. posterius rejecimus lib. 1. cap. 13. ibidemque alium hujus succi usum demonstravimus. Verum argumenta à Clemente Niloë allata, quibus ineptitudinem sanguinis ad nutritionem probare nititur, sunt exigui momenti, Primum vacillat, quia ante docuimus, quod sanguis componatur partim ex crassioribus & serosis, partim ex spirituosius particulis, & tam illis, quam his opus esse ad nutritionem, nec has sine illis persistere, aut quidquam efficere posse. Secundum nihil probat, quia non valet consequentia, quod sanguis non nutriat, quia in distillatione solæ spirituosæ & serosæ ejus partes per alembicum transcendunt, terrestres verò non: nam inde è contrario patet, quod ea de causa melius nutriat: si enim secundum omnes suas particulas esset volatilis & spirituosus, tunc nimis dissiparetur, nec partibus apponeretur ad nutritionem; ipsæ enim spirituosæ particulae citissimè diffunderent, nisi à crassioribus involverentur: imò sine particulis crassiusculis non possent nutriendis partibus agglutinari & uniri. Tertium prorsus invalidum est: prius enim solidè probandum cenſeo, quam adeo percipitanter scribendum, omnino similem spiritum è sanguine & lymphâ educi, quippe dissimilitudo manifesta observabitur in acrimonia. Deinde, posito talem ex utroque educi, ego tamen hoc, ut certissimum contrapono, ex una libra sanguinis decuplo plus spiritus educi posse, quam ex duabus libris lymphæ, faciat D. Niloë experimentum, & colligat duas libras lymphæ, tunc, procul dubio, rem sic inveniet. Denique non est mirum, quod sanguinis spiritus aliquam similitudinem habere videatur cum spiritu lymphæ, cum ipsa lymphâ sanguini continue affundatur, ejusque

pars fiat, ab eoque rursus gignatur, & ab eo in hepate, glandulis, aliisque partibus separetur, ut in iis novam fermentaceam vim acquirat, cum eaque in venas redeat, sicque sanguinem ad dilatationem ac perfectionem, in corde conquirendam, præparet, & ipsius rursus pars fiat. An hinc jam bene concludi potest, solam lympham præparantem, non vero sanguinem præparantem, nutrire? Præterea etiam ex urina spiritus subtilis & acer educitur, imò sæpe subtilior, aut saltem acrior quam ex sanguine, an ex eo bene concluditur, non sanguinem, sed urinam, seu serum sanguinis nutrire partes, utpote quod non minus quam ipse sanguis, & cum sanguine ad omnes partes pervenit & penetrat? *Quartum* autoplæ repugnat, cum nulla pars sit, ad quam sanguis non perveniat, ut ante dictum & edoctum, in refutatione opinionis Charletoni, ad argumentum secundum.

Atque sic tandem etiam evanescit hæc secunda opinio, ex fundamentis & institutionibus Ludovici de Bils deprompta, & è contra in integrum restituitur hoc antiquissimum ac verissimum Aristotelis effatum, nempe, *Sanguis est ultimum alimentum*. Cui sententiæ sicut antehac, ita etiam nunc tota Medicorum schola merito suffragatur.

Quantum ad illud, quod Charletonus, Glissonium secutus, persuadere studet, nutrimentum humorem per solos nervos partibus conferri, illud commentum omnino infra refutamus, lib. 8. cap. 1.

Malpighii  
observata  
in sanguine  
refrigerato.

Ex modo dictis, satis longo sermone relatis, abunde patent sanguinis in homine vivo contenti genesis, natura, & usus, jam subjungenda videntur singularia quædam observata oculatissimi Malpighii, quæ in sanguine per venæ sectionem è corpore hominis extracto, & in aëre refrigerato notavit, ex quibus etiam ad penitiorum constitutionis sanguinis cognitionem non parum luminis accedit. Hæc observata describit peculiari libello de Polypo cordis, mihi pag. 6. Si pulchrum, inquit, exoptas spectaculum, microscopio hunc [refrigeratum] perlustra sanguinem, contexturam namque fibrosam, & quasi nerveis fibris compaginatam rete videbis, in cuius exiguis excitatis spatiis & sinibus, velut cellulis, rubicundus stagnat ichor, qui qua deterfus, subalbidam reticularem hanc implicationem relinquit, qua nudis oculis membrana mucosa speciem exhibet. Hanc verò reticularem sanguinis portionem, cum innatante crusta, eandem sortiri materiam, quin & naturam, probabiliter tibi indicabit diligens sanguinea crusta exploratio; etenim si concretus sanguis, cui copiosè crusta alba & densa innatat, qua tamen concrescibili sero non surgat, quasi pellea, mollis, & complicabilis

fit, per longum scindatur, & per iteratas vices abluatur, in superiore ejus parte subalbis pelliculis contextam crustam, meatibus & fere vesiculis perviam, observabis, qua diaphano & minus gravi succo replentur, & si ulterius hujus substantia prosequaris productionem, mox ubi concreta sanguinis moles rubescere incipit, in fibrillas divisam & lancinatam deorsum elongari reperies, & harum elegantis implicatione meatulos & sinus excitari iterum observabis, qui coërcitis rubris atomis turgent & inficiuntur, & in quibusdam etiam grandioribus spatiis subflavum serum coërcetur, vel cum rubro confunditur ichore: quare sensus ipse nobis indicare videtur, sanguineum hunc album & reticularem plexum toti concreti cruoris corpus firmare, & potiore ipsum donare corporatura, eamque discriminis radicem, qua tantopere diversarum rerum imaginibus nos ludit, dependere à contento in minimis sinibus diverso inficiente ichore: in superiore namque superficie, ubi approximatis intimeque unitis albis illis sanguineis staminibus, media vix intercepta spatia excitata extrema crusta color subalbida maximeque compacta consurgit tunica, ubi autem laxatis sensim porulis levioris sero subflavi portionem, vel quid simile, admittit, laxior, facileque solutioni cedens, subsequitur structura: tandem ampliores redditæ meatus, dum rubra substantia turgent, ilico crusta illa larva oblitteratur, subsequente fibrosi sanguinis elongata deorsum implicatione; qua cum circa fundum vi superioris molis compressas rubras illas atomos continet, novum substantia modum & colorem exhibet, nam flacciditas ex lancinatis fibrarum ultimis productionibus subsequitur, & color ater, addensatis contentis particulis, excitatur, qua melancholia specie plures decipiunt, cum tamen mutato situ veluti purpura reddantur. Ex quo unum hoc monendum duxi, in crusta interstitiis, quin & in toto fibrosi sanguinis ambitu, interdum in quibusdam agilitudinibus, concrescibile serum ibidem detentum inspissari, hincque cinereum & pallidum emergere colorem, eamque mucositatem, & substantia modum, qualem in concreto sero, & ovi albumine observamus. Non raro elongatas quasdam appendices per totum sanguinem promi observamus, quibus hinc inde minores stria reticulariter productæ appenduntur, quas interdum absque microscopio licet intueri. Dilutus autem hujusmodi sanguis multis aqua aspersibus, excusso semiconcreto sero, conspiciuntur rete illud efformante, canaliculos, fibrosa albaque sanguinis portione excavatos, exhibet, quod in minimis superius expositis fibrosis implicationibus non accidit, etiamsi longo tempore abluantur, cum novi plexus, majorque perpetuo subsequatur albedo.

Ex dicta accuratissima Malpighii observatione jam clarissime innotescit quid per diversas diversorum viscerum coctiones ex

fale,



fale, sulphure, & sero, ad sanguinis generationem (ut supra dictum) simul concurrentibus generetur, & qualia diversa corpuscula ex iis formentur, ex quibus bene genitis, mixtis, ac unitis, sanguis bonus constituitur; male verò genitis & mixtis, aut putredinosa aliave vitiosa fermentatione depravatis, vitiosus sanguis efficitur.

*Sanguinis  
differentia.*

Atque sic totam sanguinis historiam nos absolvisse videri possemus, nisi adhuc aliquæ ejus differentiarum considerandarum superessent, quas hic tandem coronidis loco, subjungemus. Petuntur autem illarum differentiarum à variis.

1. *Ratione quantitatis*, sanguis est vel multus & copiosus, vel paucus: eaque differentia consideratur non modo inter diversa animalium genera, quatenus alia plus, alia minus sanguinis habent: sed etiam inter ipsos homines, quatenus in iis sanguinis quantitas differt, pro diversitate ætatis, sexus, temperamenti, victus, anni temporis, &c.

2. *Ratione qualitatis*, sanguis est bonus, vel malus, calidior, frigidior, humidior, aut siccior, eaque differentia etiam magna

ex parte consideratur secundum diversitates modò dictas.

3. *Ratione consistentia*, sanguis est vel crassus, vel tenuis, item concretus, vel fluidus & non concrefcens. Spigelius notat, eos quibus dura & densa est cutis, habere sanguinem crassiores, qui facile concrefcit; è contra verò rara ac molli cute donatis sanguinem non tam facile concrefcere. Verum experientia docet, sanguinis bonam malamve, & citam tardamve concretionem, totam dependere ac procedere à diversitate qualitaturn sanguinis: atque sic eum modice crassum esse & bene concrefcere in sanis, cum è contra in multis ægrotis, ut hydropicis, scorbuticis, hypochondriacis, aliisque, aquosus sit, & non, aut vix concrefcant.

4. *Ratione coloris*, sanguis est rubicundus & bene coloratus, aut pallidus, flavus, nigricans, aliove pravo colore infectus.

5. *Ratione humorum admistorum*, sanguis est biliosus, pituitosus, melancholicus, aut ferofus.

6. *Ratione vasorum continentium*, sanguis est, aut arteriosus, aut venosus.

## CAPUT XIII.

## De Pulmone, &amp; Respiratione.

Vide Tab.  
IX. & X.

*Definitio.*



**P**ulmo (Græcis πνεύμων, à πνέω spiro, dictus) est medii ventris viscus respirationi inferviens, ad sanguinis è dextro cordis ventriculo propulsi refrigerationem, vaporumque multorum expulsiorem, conditum.

*Magnitudo.*

Magnitudinem habet insignem, ita ut inspiratu aeris diductus, maximam cavitatis thoracis partem repleat.

*Substantia.*

Substantiam carnosam hepatis aut licni non multum ab similem, ei antehac male adscriperunt varii Anatomici. Verum Marcellus Malpighius, accuratissimus pulmonis perscrutator, singulari sua diligentia comperit ejus substantiam longe aliam esse, & in duabus epistolis ad Alphonsum Borellum scriptis (quas ulterius expandit & splendide dilucidat Bartholinus, lib. de pulmone.) experientia autoptica & rationibus clarissimè ostendit, pulmonem constare parenchymate molli spongioso, raro, ac vesiculoso, ex levissimis tenuissimisque membranulis, cum interiore tracheæ tunica continuis, contexto, quarum membranulæ extensæ ac sinuatæ, infinitas minimas vesiculas orbiculares & sinuosas, totius parenchymatis substantiam constituentes, efformant, ita fitas ut à trachea mox ex una in alteram patens sit aditus, & tandem omnes

terminentur ad membranam continentem, seu involvientem. Hæ in pulmone bubulo, vel ovillo, ex animali recenter evulso, & vel inciso, vel lumini obverso, perspicillis seu microscopiis conspicuæ evadunt, & aëre turgidæ observantur, præcipue circa extimam superficiem, quamvis etiam circa interiora, inflato pulmone, satis pateant, & in secta qualibet parte mox è levi extensa membrana efformatæ, ac nerveo quodam tenuissimo reticulo colligatæ conspiciantur. Quomodo se habeant cavitates harum vesicularum, describit Malpighius his verbis. *Post lobulos occurrunt observanda interstitia, non undequaque nuda cavitates, & intercepta inania spatia, plures enim habent extensas membranas, modò sibi parallelas, modò angulares, quæ non tantum ab externa superficie lobulorum lateraliter positorum, verum & ab interna lobulorum substantia propagantur. Inter hasce membranas excurrunt plurima vasa minima à lobulis egressa, quæ in eosdem oppositos ingrediuntur. Hisce membranis recipitur & ejicitur aër, veluti in amplioribus sinibus, qui mutuam habent communionem, ut aër ex una in alium comprimi possit, ita ut interstitia sint eadem membranacea vesicula pulmonum, diaphana tamen & tenuissima.*

Sunt igitur omnes vesiculæ continuæ cum interiore tracheæ & bronchiorum tunica,

pars fiat, ab eoque rursus gignatur, & ab eo in hepate, glandulis, aliisque partibus separetur, ut in iis novam fermentaceam vim acquirat, cum eaque in venas redeat, sicque sanguinem ad dilatationem ac perfectionem, in corde conquirendam, præparet, & ipsius rursus pars fiat. An hinc jam bene concludi potest, solam lympham præparantem, non vero sanguinem præparantem, nutriti? Præterea etiam ex urina spiritus subtilis & acer educitur, imò sæpe subtilior, aut saltem acrior quam ex sanguine, an ex eo bene concluditur, non sanguinem, sed urinam, seu serum sanguinis nutrire partes, utpote quod non minus quam ipse sanguis, & cum sanguine ad omnes partes pervenit & penetrat? Quartum autopsiæ repugnat, cum nulla pars sit, ad quam sanguis non perveniat, ut ante dictum & edoctum, in refutatione opinionis Charletoni, ad argumentum secundum.

Atque sic tandem etiam evanescit hæc secunda opinio, ex fundamentis & institutionibus Ludovici de Bils deprompta, & è contra in integrum restituitur hoc antiquissimum ac verissimum Aristotelis effatum, nempe, **Sanguis est ultimum alimentum.** Cui sententiæ sicut antehac, ita etiam nunc tota Medicorum schola merito suffragatur.

Quantum ad illud, quod Charletonus, Glissonium secutus, persuadere studet, nutritium humorem per solos nervos partibus conferri, illud commentum omnino infra refutamus, lib. 8. cap. 1.

Malpighii  
observata  
in sanguine  
refrigerato.

Ex modo dictis, satis longo sermone relatis, abunde patent sanguinis in homine vivo contenti genesis, natura, & usus, jam subjungenda videntur singularia quædam observata oculatissimi Malpighii, quæ in sanguine per venæ sectionem è corpore hominis extracto, & in aëre refrigerato notavit, ex quibus etiam ad penitiorum constitutionis sanguinis cognitionem non parum luminis accedit. Hæc observata describit peculiari libello de Polypo cordis, mihi pag. 6. Si pulchrum, inquit, exoptas spectaculum, microscopio hunc [refrigeratum] perlustra sanguinem, contexturam namque fibrosam, & quasi nerveis fibris compaginatam rete videbis, in cuius exiguis excitatis spatiis & sinibus, velut cellulis, rubicundus stagnat ichor, qui qua deterfus, subalbidam reticularem hanc implicationem relinquit, qua nudis oculis membrana mucosa speciem exhibet. Hanc verò reticularem sanguinis portionem, cum innatante crusta, eandem sortiri materiam, quin & naturam, probabiliter tibi indicabit diligens sanguinea crusta exploratio; etenim si concretus sanguis, cui copiosè crusta alba & densa innatat, qua tamen concretescibili sero non turgeat, quasi pellea, mollis, & complicabilis

fit, per longum scindatur, & per iteratas vices abluatur, in superiore ejus parte subalbis pelliculis contextam crustam, meatibus & fere vesiculis perviam, observabis, qua diaphano & minus gravi succo replentur, & si ulterius hujus substantia prosequaris productionem, mox ubi concreta sanguinis moles rubescere incipit, in fibrulas divisam & lancinatam deorsum elongari reperies, & harum elegantem implicationem meatulos & sinus excitari iterum observabis, qui coercitis rubris atomis turgent & insciantur, & in quibusdam etiam grandioribus spatiis subflavum serum coercetur, vel cum rubro confunditur ichore: quare sensus ipse nobis indicare videtur, sanguineum hunc album & reticularem plexum toti concreti cruoris corpus firmare, & potius ipsum donare corporatura, eamque discriminis radicem, qua tantopere diversarum rerum imaginibus nos ludis, dependere à contento in minimis sinibus diverso insciente ichore: in superiore namque superficie, ubi approximatis intimeque unitis albis illis sanguineis staminibus, media vix intercepta spatia excitata extrema crusta color subalbida maximeque compacta confurgit tunica, ubi autem laxatis sensim porulis levioris seri subflavi portionem, vel quid simile, admittit, laxior, facileque solutioni cedens, subsequitur structura: tandem ampliores redditus meatus, dum rubra substantia turgent, ilico crusta illa larva obliteratur, subsequente fibrosi sanguinis elongata deorsum implicatione; qua cum circa fundum vi superioris molis compressas rubras illas atomos continet, novum substantia modum & colorem exhibet, nam flacciditas ex lancinatis fibrarum ultimis productionibus subsequitur, & color ater, addensatis contentis particulis, excitatur, qua melancholia specie plures decipiunt, cum tamen mutato situ veluti purpura reddantur. Ex quo unum hoc monendum duxi, in crusta interstitiis, quin & in toto fibrosi sanguinis ambitu, interdum in quibusdam aggritudinibus, concretescibile serum ibidem detentum inspissari, hincque cinereum & pallidum emergere colorem, eamque mucositatem, & substantia modum, qualem in concreto sero, & ovi albumine observamus. Non raro elongatas quasdam appendices per totum sanguinem promi observamus, quibus hinc inde minores stria reticulariter producta appenduntur, quas interdum absque microscopio licet intueri. Dilutus autem hujusmodi sanguis multis aqua asperfusionibus, excusso semiconcreto sero, conspicuum rete illud efformante, canaliculos, fibrosa albaque sanguinis portione excavatos, exhibet, quod in minimis superius expositis fibrosis implicationibus non accidit, etiam si longo tempore abluantur, cum novi plexus, majorque perpetuo subsequatur albedo.

Ex dicta accuratissima Malpighii observatione jam clarissime innotescit quid per diversas diversorum viscerum coctiones ex sale,

fale, sulphure, & sero, ad sanguinis generationem (ut supra dictum) simul concurrentibus generetur, & qualia diversa corpuscula ex iis formentur, ex quibus bene genitis, mixtis, ac unitis, sanguis bonus constituitur; male verò genitis & mixtis, aut putredinosa aliave vitiosa fermentatione depravatis, vitiosus sanguis efficitur.

*Sanguinis  
differentia.*

Atque sic totam sanguinis historiam nos absolvisse videri possemus, nisi adhuc aliquæ ejus differentiæ considerandæ superessent, quas hic tandem coronidis loco, subjungemus. Petuntur autem illæ differentiæ à variis.

1. *Ratione quantitatis*, sanguis est vel multus & copiosus, vel paucus: eaque differentia consideratur non modo inter diversa animalium genera, quatenus alia plus, alia minus sanguinis habent: sed etiam inter ipsos homines, quatenus in iis sanguinis quantitas differt, pro diversitate ætatis, sexus, temperamenti, victus, anni temporis, &c.

2. *Ratione qualitatis*, sanguis est bonus, vel malus, calidior, frigidior, humidior, aut siccior, eaque differentia etiam magna

ex parte consideratur secundum diversitates modò dictas.

3. *Ratione consistentia*, sanguis est vel crassus, vel tenuis, item concretus, vel fluidus & non concrecens. Spigelius notat, eos quibus dura & densa est cutis, habere sanguinem crassiores, qui facile concreciscit; è contra verò rara ac molli cute donatis sanguinem non tam facile concreciscere. Verum experientia docet, sanguinis bonam malamve, & citam tardamve concrectionem, totam dependere ac procedere à diversitate qualitatum sanguinis: atque sic eum modice crassum esse & bene concreciscere in sanis, cum è contra in multis ægrotis, ut hydropicis, scorbuticis, hypochondriacis, aliisque, aquosus sit, & non, aut vix concreciscat.

4. *Ratione coloris*, sanguis est rubicundus & bene coloratus, aut pallidus, flavus, nigricans, aliove pravo colore infectus.

5. *Ratione humorum admistorum*, sanguis est biliosus, pituitosus, melancholicus, aut serofus.

6. *Ratione vasorum continentium*, sanguis est, aut arteriosus, aut venosus.

## CAPUT XIII.

## De Pulmone, &amp; Respiratione.

Vide Tab.  
IX. & X.

*Definitio.*

**P**ulmo (Græcis πνεύμων, à πνέω spiro, dictus) est mediis ventris viscus respirationi inferviens, ad sanguinis è dextro cordis ventriculo propulsi refrigerationem, vaporumque multorum expulsionem, conditum.

*Magnitudo.*

Magnitudinem habet insignem, ita ut inspiratu aeris diductus, maximam cavitatis thoracis partem repleat.

*Substantia.*

Substantiam carnosam hepatis aut licni non multum ab similem, ei antehac male adscriperunt varii Anatomici. Verum Marcellus Malpigijs, accuratissimus pulmonis percrutator, singulari sua diligentia comperit ejus substantiam longe aliam esse, & in duabus epistolis ad Alphonsum Borellum scriptis (quas ulterius expandit & splendide dilucidat Bartholinus, lib. de pulmon.) experientia autoptica & rationibus clarissime ostendit, pulmonem constare parenchymate molli spongioso, raro, ac vesiculoso, ex levissimis tenuissimisque membranulis, cum interiore tracheæ tunica continuis, contexto, quæ membranulæ extensæ ac sinuatæ, infinitas minimas vesiculas orbiculares & sinuosas, totius parenchymatis substantiam constituentes, efformant, ita sitas ut à trachea mox ex una in alteram patens sit aditus, & tandem omnes

terminentur ad membranam continentem, seu involvientem. Hæc in pulmone bubulo, vel ovillo, ex animali recenter evulso, & vel inciso, vel lumini obverso, perspicillis seu microscopiis conspicuæ evadunt, & aëre turgidæ observantur, præcipue circa extimam superficiem, quamvis etiam circa interiora, inflato pulmone, satis pateant, & in secta qualibet parte mox è levi extensa membrana efformatæ, ac nerveo quodam tenuissimo reticulo colligatæ conspiciantur. Quomodo se habeant cavitates harum vesicularum, describit Malpigijs his verbis. *Post lobulos occurrunt observanda interstitia, non undequaque nuda cavitates, & intercepta inania spatia, plures enim habent extensas membranas, modò sibi parallelas, modò angulares, quæ non tantum ab externa superficie lobulorum lateraliter positorum, verum & ab interna lobulorum substantia propagantur. Inter hæc membranas excurrunt plurima vasa minima à lobulis egressa, quæ in eosdem oppositos ingrediuntur. Hisce membranulis recipitur & ejicitur aër, veluti in amplioribus sinibus, qui mutuam habent communionem, ut aër ex una in alium comprimi possit, ita ut interstitia sint eadem membranacea vesicula pulmonum, diaphana tamen & tenuissima.*

Sunt igitur omnes vesiculæ continuæ cum interiore tracheæ & bronchiorum tunica,

tunica, atque hinc ex aspera arteria in bronchia, & ex his in vesiculas patens via est, aërem ultro citroque comeantem transmittens. Sed anne vesiculæ ita sint dispositæ, ut ab una parte aër ingrediatur, ab altera egrediatur, vel an per easdem vias ultro citroque commeët, vel anne etiam aliquæ sint quæ aërem aliquamdiu contineant & reservent (sicut in ranis aërem in pulmone servari posse videmus) exacte discerni nequit: saltem quod totus inspiratus aër non ilico exspiretur, sed in vesiculis & anfractibus (qui nunquam vacui inveniuntur) plurimum adhuc remaneat, docent pulmones canum vivorum apertorum, in quibus post expirationem adhuc plurimum aëris superest: item mortuorum pulmones, in quibus semper plurimum aëris continetur, qui manuum pressione exprimi potest. Atque hinc Hippocrates, *lib. 3. de morb.* pulmonem appellat sedem seu habitaculum aëris: & Galenus, *lib. 1. de caus. respir.* ventriculum in quo aër habitat.

Hic aër in pulmone retentus ei confert mollitiem & levitatem summam maximeque necessariam, ne minima sanguifera vascula pondere premerentur, sed semper permeabilia manerent, in iisque sanguis (qui in dextro cordis ventriculo in subtilem halitum attenuatus, propter summam levitatem ad sinistrum ventriculum è pulmone ita descendere non potest) tanquam per mediam aëris regionem transiens, condensaretur, sicque per venam pulmonarem ad sinistrum cordis ventriculum promptius deflueret.

*Aliena in pulmone reperta.*

Præter autopsiam, pulmonis substantiam totam vesiculosam esse, docet etiam ratio: nam multoties sputa rotunda, crassa, & foetida, vomica, folliculi, vermes (sicut ante aliquot annos vermem vivum, magnitudine & forma bombycem majusculum referentem, sed subrubrum, cum valida tussi, à muliere quadam excussum vidimus) calculi, aliæque res præter naturam in pulmonibus gignuntur, ut observationum scriptores exemplis testantur (de his varia exempla collegit Bauschius, *ephemerid. Germanic. med. physic. tom. 2. observ.* 181.) & nos quoque multoties in praxi videmus, tum rejectas cum tussi, tum post mortem in pulmone repertas: quæ certe non in vasis sanguiferis, nec etiam in bronchiis (suffocationem enim, asthma violentum, perpetuamque tussim induxissent) sed necessario in hisce vesiculis gigni, ac longo tempore contineri debuerunt, & potuerunt.

*Observatio.*

Anno 1649. in nostro nosocomio profecui famulum lapicidæ, asthma mortuum, in cujus pulmone magnam pulveris lapidum copiam, inspiratione cum aëre attractam, atque vesiculas fere omnes in-

farcientem, inveni, ita ut in dissectione pulmonis (qui admodum durus erat) cultro meo quasi per acervum arenæ, aut per corpus aliquod arenosum scinderem, quo pulvere repletæ vesiculæ aërem inspiratum admittere seu recipere non potuerant, atque sic misellus æger asthma extinctus fuerat. Sequenti anno adhuc duo similes casus lapicidarum simili modo interemptorum, eodem in nosocomio à nobis secti & demonstrati sunt. Tunc temporis retulit nobis horum famulorum magister lapicida, quod, dum lapides inciduntur, tam subtilis pulvis ex iis affurgat in aërem, qui poros vesicæ bubulæ inflatæ & siccæ in officina sua suspensæ, penetrare possit, ita ut circa finem anni ad minimum hujus pulveris manipulus unus in interiore capacitate vesicæ inveniretur, atque illum esse pulverem, qui tam multos lapicidas, qui sibi ab isto pulvere non satis prudenter cavent, præmatura morte interimit. Si talis tamque copiosus lapidum pulvis in pulmonis vesiculas inspiratione penetret, minime dubitandum est aërem in inspiratione illas omnes permeare. Vidimus etiam alium longo asthma extinctum, qui plumas illas, quibus lecti & pulvinaria infarciuntur, expurgare, seu à detritis sordibus emundare solebat, cui pulmonis vesiculæ à tenui plumarum pulvere penitus erant infarctæ.

Dicta vesiculosa substantia extrinsecus investitur membrana tenui ac porosa, quam à pleura derivatam plerique Medici & Anatomici tradunt: at ego ab externâ tunicâ vasorum parenchyma ingredientium illam derivari, & hinc obscurissimi sensus esse, existimo. Porositas ejus facile apparet, si folle pulmo fortiter inflatur, sic enim usque adeo dilatantur sæpe pori, ut oculis manifeste conspici evadant, quamvis inflatus aër per eos non exeat, ut ex eo liquet, quod pulmo aëre inflato distentus, injectâ superius ad asperam arteriam conveniente ligaturâ, illum usque ad sui exsiccationem retineat. Hinc judicare licet peculiarem esse horum pororum constitutionem, scilicet talem, ut ex interiore parenchymate nihil foras transire permittant, sed quæ in capacitate thoracis extrinsecus pulmone accumbunt, potius versus interiora ejus subire posse videantur, si modo non sint nimis crassa. Verum etsi hæc distentio inflatione facta sit violenta, neque talem in viventibus contingere verosimile sit, tamen per eam manifeste ostenditur & conspicua fit dictæ tunice porositas, quæ in aliis major, in aliis minor est, & ex illa diversitate fit, quod non in omnibus empyicis, sed duntaxat in paucioribus pus è thoracis cavitate pulmonem subeat, & per sputa vel urinas evacuetur, procul dubio propterea, quod in multis pro crassitie puris pori non sint satis lati.

*Membrana investiens.*

lati. Memini me Noviomagi sex septemve empyicis, ad puris evacuationem, thoracem inter costas sectione aperuisse, ac denique evacuato pure, nonnullis eorum, ad pulmonis absterfionem, injectiones abstergentes amaras in thoracis cavitatem infundisse, quarum non tantum amarum saporem ore perceperunt (quod etiam à Fernelio, Paræo, Lommio, & aliis observatum) verum bonam quoque partem per sputa rejecerunt: quod certum indicium erat, in illis ægris poros tunicæ pulmonis adeo angustos fuisse, ut nullum pus crassius, sed duntaxat tenuiores liquores admittere potuerint.

Hos poros considerans Riolanus, *lib. 3. anthropogr. cap. 11.* ut convenientius explicaret modum, quo pus è cavitare thoracis per sputa evacuat, dicit inter media cartilaginum spatia aërem libere se insinuare in thoracis capacitatem, & per eadem regredi fuligines ac purulenta contenta (hanc sententiam Helmontius pluribus rationibus defendit, quem refutat Bartholinus, *lib. de pulmon. sect. 4.*) cum tamen nullus aër per poros membranæ investientis in thoracis cavitatem exeat. Nam etsi per experientiam liqueat, multoties pus & injectos liquores per poros à pulmone absorberi: eadem tamen experientia etiam docet, aërem inspiratum per illos poros non egredi in thoracis cavitatem. Sæpe enim folle inflavimus pulmones ex animali recenter occiso evulsos: sed totius quidem parenchymatis vesiculas ab inflatione admodum distendi, nihil verò aëris per poros exire, aut admodum candellæ flammam commovere posse, observavimus: at si tunica incisione aliqua læderetur, mox dictam flammam agitari animadvertimus. Quod indicium est illos poros ita esse sitos, & quasi valvulis munitos, ut forinsecus quidem aliquos liquores intromittant, intrinsecum verò aërem foras non emittant.

Color.

Color pulmonis in sanis est cinereus aut variegatus. At in corporibus morbofis, præcipue eorum qui in vita multo foedo tabaco fumifuctione usi fuerant, multoties subnigricantem colorem reperi, & in publicis privatisque profectionibus demonstravi: imò in quodam tabaci & spiritus vini mancipio, asthmate longo tandem extincto, totum pulmonem non tantum subnigrum, verum etiam ad mediocre duritiem exsiccatum inveni, exiguis hic illic intercurrentibus ulcusculis, pure non fluido, sed crasso & sicciore repletis. In alio autem magno tabacario, publice profecto, illum ejusdem nigri coloris, & totum ulcerosum, sed non exsiccatum reperi.

Color in fœtu.

Scribunt plerique Anatomici, pulmonem in fœtu esse coloris rubicundi, & substantiæ densioris, ita ut aquæ injectus ad

fundum subsidat, secus quam in adultis, in quibus est omnino spongiosus, & coloris, ut modò dictum, cinerei aut variegati, leviter albicantis: quod adeo perpetuum videtur Johanni Swamerdammio, ut, *tract. de respir. sect. 2. cap. 1. artic. 2.* referat, se in apertione thoracis fœtus semper (procul dubio paucos secuit humanos fœtus) pulmones plane contractos, sanguineoque colore præditos, & absque ullo intus aëre invenisse. Hoc ipsum etiam asserit Harveus, sed illud absolute negat Charletonus, in *æconomia*, qui se multoties expertum fuisse scribit, nullam coloris differentiam inveniri in pulmone fœtus & hominis nati. Verum utrumque error est, qui facile tolli potest, si distinguantur tempora fœtus. Nam autopsia edoctus notavi & observavi, usque ad quintum mensem cum dimidio, præter propter, pulmonem rubicundum & mediocriter densum esse: sed postea eum paulatim molliorem, rariorem, & coloris magis subpallidi, ac variegati, seu cinerei fieri, talemque in dissecis fœtibus inveniri. Anno 1665. mense Decembri, coram compluribus Medicinæ Doctoribus & studiosis, secui cadaver mulieris septimo mense gravidæ, in ejusque fœtu, utero incluso, pulmonem minus quidem turgidum (quia nondum respiraverat) quam in hominibus natis, sed mollitie ac colore à natorum pulmone parum differentem inveni & demonstravi. Rursus mense Novembri 1666. in fœtu maturo, paulo ante partum in utero extincto, colorem quidem aliquanto magis rubicundum quam in adultis, sed tamen nonnihil variegatum seu cinereum reperi, talemque substantiæ molliem ac spongiositatem, ut aquæ injectus pulmo minime subsideret, sed nataret. Verum cum illa pulmonis levitas & spongiositas, qua subsidencia ejus in aqua impeditur, & color nonnihil mutatur, oriatur ab aëre in vesiculosa substantia contento (sic vivorum pulmonum inspectio docet, eos in inspiratione pallidiores apparere, quæritur, quomodo, & unde ille aër pulmonem sic ingressus, in fœtu nondum respirante? Aër ille paulatim genitus est in ipso pulmone, è subtilissimis vaporibus ex humida sua substantia & sanguine per calorem suscitatis, & aëream tenuitatem adeptis: quo modo etiam aër ille gignitur qui abdominis cavitatem occupat, ut & ille qui in fœtus nondum nati intestinis invenitur. Sed hic tamen paucillus pulmonis aër, qui neque satis copiosus, neque crassus atque frigidus satis est, ut sanguinem è dextro cordis ventriculo in pulmonem impulsus sufficienter refrigerare ac condensare queat, non potest inservire respirationis usui; sed duntaxat pulmonis densitatem sensim imminuendo & tollendo, eum ad respirationem adeo aptum facit,

Qq

facit, ut infans natus statim respirare possit, quod alioqui, quasi per saltum, non fieret, nisi organum respiratorium tali modo sensim ad hoc munus aptum redditum esset.

*Diviso.*

Dividitur pulmo in partem dextram & sinistram, beneficio intercedentis mediastini, quas singulas multi pro singulis pulmonibus habent & describunt, atque hinc illi non de uno pulmone, sed de pulmonibus in plurali numero loquuntur. Alii singulas partes malunt appellare magnos pulmonis lobos. Sed non opus est ut solliciti simus de singulari aut plurali numero seu nomine, dummodo de re constet.

Harum partium quælibet rursus in lobum superiorem, qui brevior, & inferiorem, qui major, raro in tres lobos dispescitur: in canibus tamen, præcipue venaticis, multi sunt lobi.

Singulæ partes figuram obtinent ungulæ bovis; extrinsecus, qua costas spectant, gibbam, interius verò, qua cor molli amplexu comprehendunt, cavam.

*Diviso in lobulos.*

Præter dictam pulmonis divisionem, Malpigijs accurata inspectione invenit adhuc aliam, scilicet totum pulmonem ex multis lobulis sibi invicem junctis constare. Ipsius viri verba, ex ejus epistola prima ad Borellium, adscribi merentur. *Mirabilior, inquit, & altior observavi divisionem: pulmonum enim moles lobulis infinitis, propria membranâ circumseptis, communibus vasis donatis, propaginibus aspera arteria adnatis, conflatur. Attingi autem possunt lobuli, si semi inflatus pulmo Solis radiis vel luminis obijciatur, interstitia enim quadam quasi diaphana emergunt, quæ si levi incisione persequaris, lobulos utrimque aspera arteria & vasis adherentes, sejunctos reddes, & propria involutos membrana, inspirato aëre per tracheam, experieris: illa & diligenti sectione sejungi potest, & luci opposita splendet. Clarius tamen hos tibi continget videre, facta levi pulmonum elixatione, & elaborata interstitiorum sectione.*

*Connexio.*

Suspensus tenetur pulmo ex aspera arteria, se in mediam ejus substantiam insinuantem, atque illa mediante, collo cohæret. Fallopius scribit illum in solo homine naturaliter claviculis ac summis costis adnecti. Sed Riolanus illum à costis & claviculis prorsus sejunctum multoties observavit, idque etiam à nobis non semel animadvertum est.

*observatio.*

A pleura verò plerumque liber reperitur. Dico, *plerumque*, quia multoties etiam illi, nunc toto ambitu, nunc aliqua parte, fibrosis nexibus alligatur, atque in profectionibus invenio, fere tertiæ hominum parti hanc connexionem contingere: nam valde multa cadavera occurrunt, in quibus pulmo per innumeras fibrillas pleuræ firmiter alligatur,

imò multa in quibus ipsa exterior pulmonis membrana pleuræ maxima sui parte adhæret immediate. In nosocomio nostro, atque etiam in theatro anatomico, varia demonstravimus cadavera, in quibus pulmo tam firmiter toto fere ambitu pleuræ adhærebat, ut sine magna vi & dilaceratione avelli non posset, qui tamen homines in vita de nullo respirationis incommodo conquesti fuerant. Unde liquet minime verum esse, quod Massa, Riolanus, Bartholinus, Lindanus, aliique nonnulli scribunt, hæc de causa dyspnœam diuturnam & incurabilem fieri. Anno 1660. mense Novembri, publicè *Observatio.* prosecui cadaver capitanei furum, suspensi, qui in vita optime sanus, sine ulla respirandi difficultate vixerat, in quo pulmo in utroque latere undequaque, non solum pleuræ, sed etiam toti diaphragmati & mediastino tam firmiter annexus erat, ut non sine magna dilaceratione avelli posset. Verum etsi hujusmodi pulmonis connexio multis hominibus post nativitatem contingat (cum ea quempiam nasci, à nemine, quod scio, compertum est) & sine læsione sanitatis persistat, in brutis tamen, præcipue majoribus, ut equis, bobus, ovibus, capris, &c. viscus hoc à pleura liber esse solet, eique vix unquam, nisi præcedente pleuritide, peripneumonia, aliove simili, cum exulceratione, morbo, adnascitur, ac proinde in quocunque mactato animali talis connexio reperitur, illud de morbo suspectum esse solet.

In praxi hoc notatu dignum observavi, *Observatio. nes variae.* scilicet illos, quibus ex aliquibus signis judicabam pulmonem pleuræ adhærere, facilius & frequentius in pleuritidem incidere, quam alios, eaque durante si suppuratio accederet, etiam pus sanguinolentum ex latere affecto facilius & citius exspuere: in aliis verò quibus pulmo à pleura liber est, pleuritidem minus frequenter contingere, eamque, si ad suppurationem deveniat, rarissime solvi per puris exspuitionem, sed plerumque mutari in empyema. Ratio hæc est, quod in priore casu pus ex pleuræ apostemate possit immediate defluere in ipsam pulmonis substantiam ei annexam, atque una cum pleura, fortè ob viciniam & immediatam connexionem, nonnihil quoque inflammata, & sic exspui: in posteriore verò non possit non defluere in thoracis cavitatem, è qua non facile datur introitus in pulmonis poros.

Præterea & hoc notavi, minime veram esse Plateri, Zecchii, aliorumque doctrinam, pertinaciter defendentium, in pleuritide, quæ frequens est morbus, vel nunquam, vel rarissime pleuram, sed semper inflammari exteriorem pulmonis membranam, in eaque, propter exquisitum sensum (hunc male, & præter omnem experientiam

tiam ei tribuunt, ut alibi dictum) tam crudeles dolores excitari: in peripneumonia verò inflammari interiorē pulmonis substantiam, quæ obtusissimi sensus est, atque hinc tantum obtusos in ea fieri dolores. Quippe ex multi juga cadaverum pleuritide extinctorum sectione, rem aliter se habere invenimus, & Medicinæ studiosis non semel demonstravimus. Scilicet compertissimus in omnibus pleuriticis inflammari pleuram, eamque solam, si pulmo liber esset ab ejus connexu: sed si ille pleuræ adnecteretur firmius, tunc una cum pleura etiam pulmonis adhærentem partem inflammari.

3. Anno 1656. mense Decembri, in nosocomio nostro, multis præsentibus spectatoribus, prosecui cadaver mulieris pleuritide interemptæ, quæ primis quatuordecim diebus acutissime affecta fuerat: postea verò, inflammatione ad suppurationem deveniente, morbus per aliquot dies mitior visus, sed tandem tamen morte finitus est. Invenimus pulmonem à pleura omnino liberum, & in dextro latere totam pleuram ab axillis usque ad diaphragma inflammata: abscessum verò disruptum fuisse ad quintam & sextam costam, quæ duæ costæ duorum digitorum latitudine per ruptionem abscessus omnino erant à pleura denudatæ, & pus in thoracis capacitatem mediocri quantitate effluxerat. Pulmo autem prorsus nulla inflammatione, aliave prava affectione læsus inveniebatur.

4. Planè similem casum etiam demonstravi anno 1657. in viro pleuritico extincto (famulus erat Domini de Mijnen) qui media ætate in fœno colligendo occupatus, & valde sudans, cerevisiam frigidam largo hauustu biberat, sicque ilico pleuritidem, & intra paucos dies mortem contraxerat: in quo etiam pulmo à pleurâ plane liber, eique nusquam ad costas annexus, & tota dextri lateris pleura inflammata reperiebatur, pulmone prorsus illæso.

5. Ex his liquet, minime verum esse, quod cum publice, tum privatim docet, atque etiam, *lib. 2. institut. cap. 11.* scribit Regius, scilicet in omni pleuritide adesse etiam exterioris partis pulmonis inflammationem, idque omnium pleuriticorum extinctorum corporum sectiones docere, in quibus semper pulmones affecti inveniuntur, pleurâ sæpe integrâ existente. Sed credo hunc bonum Virum (qui aliorum doctorum virorum dicta & scripta sibi facile assumit & adscribit, ac tanquam sua libris suis passim inserit) ex præconcepta, vel ab aliis audita (ipse enim exercitatus & bonus, neque practicus, neque anatomicus unquam fuit) opinione hæc docere & scribere; nam, ut certissimum duco, cum pleuriticorum sectiones nunquam fecisse, ita etiam maxime

verosimile existimo, illum easdem ab aliis institutas, vel nunquam, vel rarissime vidisse. Nam autopsia omnino contrarium docet, ut ex multa pleuriticorum extinctorum sectione anatomica, (ad morborum enim eorumque causarum cognitionem melius inculcandam, exercitia anatomica, cum publice, & in nosocomio, tum alibi privatim, pro iis qui privatis meis institutionibus interfunt, in quocunque morbo extinctis cadaveribus, celebrare soleo) abunde liquet, & à me sæpius demonstratum est. Nunquam enim pleuritidem illæsa pleurâ factam invenimus: sed in quibus pulmo pleuræ affixus adhærebat, in iis pulmonem, qua parte pleuræ adnectebatur, simul etiam affectum vidimus; in aliis verò quibus pulmo à pleura liber erat, eum nihil affectum fuisse: hacque in parte oculis nostris, & eorum qui demonstrationibus nostris multoties interfuerunt, magis confidimus quam dictis aliorum, qui forte nihil tale viderunt, & interim adeo perfrictæ frontis sunt, ut de hac experientia multum dicere & scribere audeant. Si Platerus (cui fides debetur) se tale quid aliquando observasse scribat, nihil miror, fortassis ille (quod etiam aliis contingere potest) inter plurimos variis morbis interemptos, tamen paucos pleuritide extinctos secuit, & fortè paucis illis quos secuit, etiam pulmo pleuræ affixus fuit, quemadmodum ex sectionibus comperio, illud in tertia vel quarta hominum parte sic inveniri: sed alios, quibus pulmo à pleura liber erat, secuisse non videtur; quales tamen nos non semel spectandos exhibuimus, cum gravi pleuræ, nulla verò pulmonis inflammatione, aliave mala affectione.

Præterea acutus pleuriticus dolor in pulmonis membrana investiente, ab aliqua ejus inflammatione, excitari nequit, cum experientia passim doceat illam esse obtusissimi sensus. Habuimus bis tervè cadavera, quæ peripneumoniâ fuerant extincta, in quibus unius lateris totus pulmonis lobus, una cum exteriori membrana, inflammatus reperiebatur, & interim isti, dum viverent, ægri de nullo acuto, sed de gravativo duntaxat, dolore conquesti fuerant; qui tamen acutus necessario adfuisse debuisset, si modò verum foret, quod, *loco citato*, scribit Regius, scilicet ab inflammatione membranæ pulmonem investientis acutissimum dolorem excitari.

Denique, vulnera pulmonem transeuntia, qualia in castris & extra castra, plurima vidimus, etsi membrana sit perfossa, sunt tamen sine eximio pulmonis dolore, & quicunque in iis adest dolor, illum duntaxat in pleura & musculis perferunt ægri. Sic etiam ulcera ab erodentibus humoribus pulmone inducunt, sine dolore existunt,



licet externa tunica etiam erodatur; quod publice in theatro anatomico ostendimus, annis 1660., & 1663. in duobus corporibus adeo ulcerosi erant pulmones, ut vix dimidium visceris superesset, qui tamen homines, quam diu in nosocomio nostro decubuerant, de nullo insigni pulmonis dolore conquesti fuerant. Illud ipsum quoque in plurimis aliis in nosocomio à nobis demonstratum, & in phthisicis quotidie conspicuum est, in quibus non solum interiorem substantiam, sed frequenter etiam exteriorem pulmonis membranam sine eximio dolore erodi & exulcerari, per autopsiam & experientiam novimus.

8. Subjungam adhuc unum notabile exemplum. Anno 1660. à Senatoribus curiæ provincialis Ultrajectinæ, una cum D. Cornelio de Goyer, medico, & duobus chirurgis missus sum ad pagum Maerssen dictum, ut ibi in cadavere cujusdam rustici examinarem & inquirerem mortis causam. Hic rusticus viginti duobus ante obitum mensibus, ab alio quodam vulneratus fuerat ictu cultri in sinistro thoracis latere, inter quintam & sextam costam, quod vulnus ego, qui ab ipso principio ad ejus curationem aliquoties advocatus fueram, dixeram usque in pulmonem processisse, quod cum nec æger, nec qui illum tractabant chirurgi crederent, mea consilia deseruerunt. Æger de nullo interiore dolore conquerebatur. Quæ è vulnere copiosa effluebat sanguinolenta ac purulenta materia admodum foetebat. Post sesqui ab inflicto vulnere mensem, æger solita munia rursus obibat, foras ad vicinos aliosque remotiores pagos excurrerebat, imò etiam consuetas commestiones ac quotidianas potationes ad sesqui annum strenue exercebat, vulnere interea semper aperto manente, foetidamque colluviem putredinosam satis copiosam eructante. Duobus tribusve ante mortem mensibus incipiebat parvâ febriculâ corripì, & toto corpore valde emaciari, sicque tandem phthisicus moriebatur. Aperto thorace, invenimus vulnerati lateris totum pulmonis lobum suppuratione adeo consumptum, ut ne minima quidem ejus particula in illo latere superesset, imò fere dixisses nunquam in eo latere quidquam pulmonis fuisse: atque hinc magnopere admirati sumus omnes, quomodo ille homo tanto tempore, & tam fortis, in vita superesse potuisset. Interea, durante toto morbi decursu, æger plane de nullo pulmonis dolore conquestus fuerat, qui tamen, cum ab inflicto vulnere, tum à subsequente inflammatione & exulceratione, necessario diu & magnus adfuisse debuisset, si membrana pulmonem investiens foret acutissimi sensus, ut eam esse scribit & docet Regius.

Vasa tria ampla pulmoni inferuntur. *Vasa.*

Primum, omniumque maximum vas, aëri vaporibusque crassis vehendis dicatum, est **Trachea**, seu **Aspera arteria**, multis productionibus, **Bronchia** appellatis, prædita, de qua dicetur *sequente capite*.

Secundum & tertium sunt duo ampla vasa sanguifera, scilicet **Arteria & Vena pulmonaris**, quæ in minimos ac penè invisibiles, nec nisi per microscopium exacte conspicuos ramulos fissa, ac inter se mista, per totam vesiculosam substantiam, instar artificiosissimi retis, decurrunt, mutuis anastomosibus innumeris inter se hiantia. Venulas in casu morbofo interdum valde conspicuas evadere, patet ex nostra observatione, *precedente cap. 9. in historia polyporum cordis*, descripta.

Per arteriæ ramulos sanguis spirituosus atque in halitum dilatatus, è dextro cordis ventriculo in pulmonem impulsus, & in iis per inspiratum aërem frigidum nonnihil condensatus, transit in venæ ramulos, sicque in sinistrum ventriculum destillat, nec in naturali statu quidquam sanguinis (præter paucissimum quid, quo nutriuntur) videtur influere in bronchia aut vesiculas, quod illas cruentet: sed si ab acris humoris erosionem, valida tussi, aliave violenta causa, istorum vasorum apertio alicubi contingat, tunc sanguis ex iis in vesiculas, ex his in bronchia profluens, sputo ejicitur, & hæmoptysin parit. Interim in isto sanguinis per hæc vasa transitu, serosi vapores, qui una cum sanguine in dextro cordis ventriculo in tenuem halitum sunt attenuati, per tenues vasculorum tunicas copiosi exhalant, & in vesiculis aëri frigido inspirato admisti, ab eoque nonnihil condensati, cum eodem per expirationem in bronchia, atque ita porro foras expelluntur, & tali modo sanguis magna serosorum vaporum parte liberatur, quorum notabilis quantitas imprimis conspicua fit hybernis, frigidisque temporibus, cum per expirationem ab ore emissi vaporosi halitus, ab externo frigore ilico, quasi in nebulam condensati, occurrunt visui, & proximas quasque res, in quas impingunt, humectant.

Verum etsi hæc ita se habeant, dubium tamen incidit, an omnis sanguis per dictorum vasorum anastomoses transeat; an non etiam multi istorum vasculorum sanguiferorum fines definant in ipsam pulmonis substantiam, in eamque arteriolæ sanguinem effundant, venulæ verò ex eâ rursus exorbeant; sicuti sanguinis circulationem in plerisque aliis partibus fieri diximus, *precedente cap. 8. atque etiam in hepate & liene peragi docuimus lib. 1. cap. 14. & 16.* Rem ita se habere, videntur docere rationes *citatis*

*Vasa.*

*Aspera arteria.*

*Arteria & Vena pulmonaris.*

*An sanguis solum transeat per anastomoses.*

autopsia, qua ipsum parenchyma fere penitus exsangue apparet, nec unquam quidquam cruoris effatu dignum in ejus substantia reperitur (et si horæ spatio octo, novem, vel plures libras sanguinis transmittat, ut citato cap. 8. latius probatum) secus atque contingit in hepate, musculis, aliisve partibus multum sanguinis transmittentibus, in quibus sanguis copiosus extra vasa reperitur. Præterea, si iste sanguis extra vasa in pulmonis vesiculofam substantiam effunderetur, partim vesiculas aëri recipiendo destinatas repletet; easque sic ad respirationem ineptas redderet; partim hæmoptyses frequentissimas pareret, quæ tamen valde raræ sunt, & manifestissime contingunt, cum ruptis aut erosis vasis sanguis in vesiculofam substantiam & bronchia profunditur, nec unquam sine hujusmodi vasorum apertione evenire visæ sunt.

Objeſſio.

Fortè aliquibus mirum videbitur, quod parenchymatis substantiam exsanguem esse, hoc est, sanguinem notabili quantitate in ea non conspici, dicam, cum tamen sanguine, sicut aliæ partes, nutriatur: cum etiam Hippocrates, sect. 5. aphorif. 13. scribat, *Qui spumantem sanguinem extussunt, is ex pulmone educitur*: cum denique in suffocatis sæpe multum sanguinis in pulmone reperiatur. Respondeo ad primum, nutriti pulmonem sanguine sicut arteriæ, venæ, & nervi, quæ vasa ex transeunte sanguine & spiritu assumunt quod sibi conveniens est nutrimentum (quomodo illud in eorum tunicis detineatur, videndum præcedente cap. 12.) atque etiam per invisibiles vias & arteriolas tantum recipiunt, quantum ipsis necessarium est, sicut hoc de nervis docebitur lib. 8. cap. 1. Ad hæc, pulmonem etiam, & quidem præcipue, nutriri eo sanguine, qui per Arteriam bronchiale (de qua statim dicemus) advehitur. Præterea distinguendum esse inter sanguinem paucissimum, quo nutritio pulmonis perficitur; & copiosissimum, qui toti corpori inservit: Illum per invisibiles vias ad vesiculofam substantiam posse infundi, & vix uspiam conspici: Hunc verò, propter singularem copiam, non nisi per manifestum aliquem conspectum transire, atque Anatomicos, cum de transitu sanguinis per pulmonem loquuntur, de hoc, non verò de illo intelligendos esse. Ad secundum regeo, Hippocratem, citato aphorismo, loqui de toto pulmone in genere, quatenus ex propria substantia, vasis, & membranis constituitur, non verò speciatim de solius parenchymatis propria substantia: atque sic cum dicit, sanguinem è pulmone educi, illum intelligere, istum sanguinem non ex propria substantia, sed ex erosis vel ruptis aliquibus vasis sanguiferis, per substantiam

decurentibus, erumpere. Ad tertium dico, qui in suffocatorum pulmonibus reperitur sanguis, cum non ex ipsa propria substantia, sed è vasis, propter impeditum circularem transitum, ruptis effluxisse in vesiculas.

Fredericus Ruysch, Anatomicus Amstædodamensis, lib. de vasc. lymph. describit adhumaliam peculiarem arteriam, ab omnibus Anatomicis hæctenus prætervisam, singulari sua industria inventam, quam Arteriam bronchiale appellat, quæ præcipue sanguinem ad pulmonis, aut asperæ arteriæ, seu bronchiorum nutritionem conferre videtur: & quia hujus arteriæ primæ inventionis gloria ipsi merito debetur, haud alienum videtur ipsa illius verba adscribere. Hanc, inquit, arteriam Bronchiale appellare visum fuit, supra bronchia enim serpens, ea concomitatur ad finem usque. Ortum sumit ab arteria magna descendente postica parte, digiti latitudine, plus minus, supra supremas arteriolarum intercostalium, ex aorta descendente exortarum: aliquando etiam duorum digitorum latitudine supra arteriæ modò dictas: nonnunquam etiam infra eas, originem habere comperio: placet enim Natura aliquando varietate frui: Nunc unica exsurgit, nunc gemina, ita ut sæpius, arteriâ magnâ è cadavere exemptâ, intercostalibus & bronchialibus abscissis, trunculi bronchialium remanentes; exortum intercostalium mentiantur. Hinc pulmones oblique subit, bronchiaque sub arteria venosa ad extremum usque comitatur, donec capillaris facta, visus aciem effugiat. In pulmonibus humanis observavi, hanc arteriam sæpius anticam bronchiorum perrepere partem, quod in brutorum pulmonibus rarò vidi.

Arteria bronchialis.

Præter ampla sanguifera vasa modò dicta, etiam, referente Bartholino, minima quædam lymphatica, per pulmonis superficiem proserpenti, se observasse dicit & depingit acutissimus professor Olaus Rudbeck, tab. 1. fig. 1. edit. Heidelberg. Eadem se etiam vidisse, & quod lympham suam in venas subclavias, axillares, & jugulares effundant, observasse scribit Fredericus Ruysch, lib. antè citat.

Vasa lymphatica.

Nervuli admodum exiles à sexto pari ad pulmonem progrediuntur, quos plerique per solam membranam externam dispergi; Riolanus verò (lib. 3. anthropogr. cap. 1.) etiam versus interiora tendere, & Bartholinus (lib. de pulmon. sect. 2.) fere semper à postica parte bronchia comitari observavit, præter ramulum qui antica parte membranam externam perreptat. Thomas Willis, anat. cerebr. cap. 23. dicit nervulos istos etiam una cum vasis sanguiferis per totum pulmonem distribui, & cum bronchiorum ductus, tum arterias & venas assequi, propaginibus quaquaversum emissis. Verum ego mihi minimè persuaderi patior, tantam esse nervulorum per pulmonem dissemina-

Nervi.

torum topiam, cum ratio potius doceat, eorum magnam esse paucitatem & parvitatem, utpote quarum ratione, ob spirituum animalium influentium paucitatem, obscurissimi sensus est hoc viscus, ut patet in ejus vulneribus, ulceribus, & peripneumonia, quibus multo plus molestiæ & periculi, quam doloris adest. Riolanus quidem & Reginus exquisitissimum sensum exteriori tunicae tribuunt, tanquam à pleura, exquisito sensu prædita, derivatæ, sed re-

pugnantibus experientia & ratione, ut paulo ante à nobis probatum est latius. Ex illa quippe notum est, quod per inflammationem & vulnera vix ullus notabilis dolor in ea sentiatur. Hæc docet, quod non à pleura, sed ab externa tunica vasorum viscus ingredientium derivetur, quæ est obtusi sensus, ut etiam supra dictum.

Officium pulmonis est, inservire respirationi.

### T A B U L Æ X. E X P L I C A T I O.

Hæc Tabula arteriam bronchiale à Frederico Ruysch inventam, & pulmonis substantiam exhibet, pro ut illa à Malpigio fuit observata.

#### F I G U R A I.

Arteriæ bronchialis ramificatio.

- A. *Aspera arteria vituli à postica parte, abscissa larynge.*
- B. *Ramus dexter.*
- C. *Ramus sinister.*
- D. *Arteria bronchialis, cujus ramuli bronchia ad finem usque concomitantur.*
- E. *Arteriæ descendentes pars postica, è qua intercostales procedunt.*
- F. *Summus ramus, in solis vaccis & vitulis inveniendus.*

#### F I G U R A II.

Hæc & sequentibus substantia pulmonis exhibetur.

*Frustulum extimum pulmonis exsiccati, continens delineatum rete.*

#### F I G U R A III.

*Internæ vesiculæ & sinus adumbrati, cum appensa particula interstitii in parte superiore. Ceterum exortus & integra propagatio icone oculis subjici non potuit.*

#### F I G U R A IV.

*Lobulorum varia adaptatio supra tracheam & pulmonaria vasa, qui etiam à naturali situ distracti exhibentur.*

**Digressio.** Post descriptionem pulmonis, nunc superest ut hac occasione etiam officii ejus, scilicet respirationis, historiam paulo latius explicemus, & quæ circa eam incidunt dubia tollamus.

**Respiratio quid sit.** Est autem respiratio alterna thoracis dilatatio & contractio, qua aer externus frigidus modò in pulmonem impellitur, modò cum vaporibus & fuliginibus ex eodem ejicitur, ut aeris frigidi receptione, ejusdem-

#### F I G U R A V.

Ranarum pulmones cum appensa trachea ostendit.

- A. *Larynx, quæ semicartilaginea est.*
- B. *Rimula, quæ exactissime clauditur, ad animalis arbitrium, & clausa aëre turgentes servat pulmones.*
- C. *Cordis situs.*
- D. *Pars exterioris pulmonis.*
- E. *Cellularum propagatum rete.*
- F. *Arteriæ pulmonariæ propagatio.*
- G. *Pars concava pulmonis per medium scissi.*
- H. *Venæ pulmonariæ parietum apices excurrentis propagatio.*







#### F I G U R A VI.

Exhibet cellulam simplicissimam absque intermediis parietibus, auctam in magnitudine.

- A. *Cellula area interior.*
- B. *Parietes divulsi & inclinati.*
- C. *Arteriæ pulmonariæ truncus cum appensis ramis, quasi reticulato opere desinentibus.*
- D. *Venæ pulmonariæ truncus parietum fastigia pererrans suis decurrentibus ramis.*
- E. *Vas in fundo & angulis parietum commune lateralibus, & continuatis retis ramificationibus.*

que una cum serosis, ex sanguine spirituoso in pulmonem impulsio, per tenuissimas vasculorum sanguiferorum tunicas exhalantibus, & in vesicularum anfractibus collectis vaporibus, expulsione, sanguis è dextro cordis ventriculo fervidus, spirituosus, ac in tenuissimum halitum dilatatus prodians, in pulmone refrigeretur & nonnihil condensetur, ex eoque multi vapores serosi secernantur, ut sic inde ad sinistram cordis ventricu-

Figura I Tabula X





ventriculum melior & prompte descendere ( fere tantâ quantitate ad hunc pervenire debet, quanta è dextro ventriculo exivit: dico, fere, propter serofos vapores qui è sanguine secernuntur, & cum expiratione foras pelluntur ) & in eo de novo dilatari & spirituescere, majoremque perfectionem nancisci queat.

Fini.

Nam quoniam sanguis è dextro cordis ventriculo in pulmonem erumpens, propter dilatationem in tenuem halitum extensus, & valde levis est, ac vigecuplo majorem locum requirit quam sanguis condensatus, qualem locum sinister ventriculus ipsi minime suppeditare potest; hinc necesse est, istum halitum per inspiratum aërem frigidum rursus in sanguinis crassitiem condensari, & sic graviores fieri; partim ut ratione majoris gravitatis facile ad sinistram ventriculum descendere seu defluere; partim ut ita compactior factus, ab illo ventriculo commodè comprehendi, sicque in eo de novo dilatari possit. Quemadmodum enim in chymicis vasis distillatoris in tenuem vaporem redactus liquor, nec tali exiguo spatio seu vase contineri potest, quali continebatur ante attenuationem; nec etiam colligi, & ad majorem spiritus perfectionem rursus distillari potest, nisi prius ille vapor in frigidum alembicum impingens, redeat ac condensetur in liquorem, per rostrum alembici defluentem, ab eo in alio vase colligendum, & postea de novo distillandum. Ita etiam sanguis in dextro cordis ventriculo omnino rarefactus ac spirituosus redditus, necessario per inspirationis refrigerium in vasis pulmonis nonnihil rursus condensari debuit, ut sic gravior factus, minoremque locum occupans, ad sinistram ventriculum defluere, in eoque iterum dilatari, & majorem spirituositatem adipisci, ac fervidum cordis calorem novo fomite nutrire possit. Præter modò dictam refrigerationem, adhuc illud commodi præstat inspiratus aër frigidus, quod etiam sanguinem in pulmonem impulsus, & dicta refrigeratione ad defluxionem paratus, ac jam exiturientem, per totius visceris distensionem, hincque vasculorum magnam compressionem, è minimis arteriis pulmonaribus in venulas exprimat, ex hisque citissime per magnam venam pulmonarem in sinistram cordis ventriculum propellat; ita ut hac imprimis de causa admodum parum sanguinis in pulmone subsistat, ac post mortem in eo inveniatur.

Quidam perimat suffocatos.

Hinc jam manifestum fit, quidnam perimat illos qui suffocantur: præterquam enim quod serofi (alii dicunt fuliginosi) vapores defectu respirationis, non dissipantur, etiam spirituosus & fervidus in pulmonem impulsus sanguis non refrigeratur, nec condensatur, unde tunc pulmo

spiritu vaporoso copiosissimo nimium repletur ac distenditur, ita ut è dextro cordis ventriculo in eum nihil amplius propelli possit ( sicut in vesicam aëre distentam ac repletam plus aëris impelli nequit ) & simul etiam ob summam levitatem, nihil, aut valde parum ad sinistram ventriculum deferri seu descendere queat, unde etiam ille novo fomite seu pabulo destituitur, nec quidquam habet quod refundat in arteriam aortam, atque sic sistitur sanguinis circulatio, & cor duplici de causa citissime deficit: ejusque sanguine non propulso aut veniente ad cerebrum, etiam mox deficit cerebrum, nec sese amplius movet, nec ullos spiritus animales generat, aut ad partes impellit, hinc omnium etiam partium sensus & motus definit. Præterea ex his quoque liquet quare in æstuario nimis calido, aut in aëre nimis fervente, animi deliquium patiamur; quia scilicet aër nimis calidus inspiratus non potest halituosum sanguinem, defectu frigoris, satis condensare, unde tunc pulmo ab eo sanguine repletur, & sinistro ventriculo parum aut nihil condensati sanguinis de novo dilatandi suppeditatur.

Causa deliquii animi in æstuario.

Hanc veram necessitatis respirationis causam esse, ex eo patet, quod animalia uno tantum cordis sinu prædita, pulmones non habeant: quod etiam in foetu utero incluso nulla fiat respiratio ( hoc supra probavimus lib. 1. cap. 35. ) quia scilicet sanguis è dextro cordis ventriculo non movetur per pulmonem ad ventriculum sinistram ( quomodo moveatur ante videndum, hujus lib. cap. 10. ) atque hinc in media via non eget aliqua condensatione, aut pressione per inspirationem facta, sed pulmo ei solummodo increfcit ad futuros usus. Quod denique respirationem crebrius repetere cogimur, cum sanguis à febribus, exercitiis, aliisve causis, magis incalescit, aut cum aër calidior inspiratur, ut scilicet per respirationem sæpe reiteratam, citior & convenientior possit fieri sanguinis refrigeratio ac condensatio.

Probatio necessitatis respirandi.

Dicta autem refrigeratio non fit in pulmone propterea quod aër inspiratus admisceatur sanguini fervido è corde in pulmonem impulsus ( ut opinantur Entius, in apolog. Deusingius, de sanguific. hodieque multi alii præclari Philosophi sedulo inculcare nituntur ) sed quod aër frigidus bronchia & vesiculosam pulmonis substantiam subiens, totum pulmonem, & simul etiam sanguinem in ejus vasis sanguiferis contentum refrigeret. Eodem modo sicut vinum lagenis vitreis, aliisve vasis contentum deponitur in aqua frigida, aut nive, & sic refrigeratur sine ulla aquæ aut nivis admistione.

Quomodo sanguis refrigeretur.

An aër admisceatur sanguini.

Putant quidem nonnulli, si non multum, saltem aliquantulum inspirati aëris sanguini admisceri

admisceri (hanc opinionem etiam defendit Malachias Truſton, *libello de reſpirat.*) cum eoque ad cor deferri, ut ejus admittione ſanguis ſpirituosior & liquidior fieri poſſit; idque his rationibus probant. 1. Quod in cordis ventriculis, præter ſanguinem etiam aliquantillum aëris inveniatur. 2. Quod tempore peſtilenti malignus aër inſpiratus cor inficiat. 3. Quod in lypothymiam prolapſi vel prolapſuri mox reſciantur ſi acetum, aqua roſacea aut cinnamomi, vel aromata aliqua odorifera ac fragrantia naribus admovcantur; propterea, inquiunt, quia eorum fragrantia una cum inſpirato aëre pulmonem ſubintrans, mox cum aëre ſanguini admiscetur, cum eoque ſtatim ad ſiniſtrum cordis ventriculum progreditur. Verum hoc commentum non videtur eſſe magni ponderis: nam ſi verum foret, ergo ſemper aër deberet in pulmone ſanguini admisceri, nec ſine ejus admittione bonus ſanguis generari: at in foetu nihil aëris admisceri poteſt, cum in utero non reſpiret (hoc latius à nobis probatum *precedente lib. 1. cap. 35.*) & tamen in eo non minus bonus ac ſpirituosus ſanguis conficitur, quam in homine nato & reſpirante. Sic etiam in piſcibus ſub aqua, & in avium pullis ovo adhuc incluſis, bonus ſanguis generatur ſine ulla aëris admittione. Reſpondeo igitur ad *primum*, quod qui in ventriculis cordis continetur aër, eò per nullam inſpirationem deductus dici poſſit, propterea quod æque adſit in dextro, quam in ſiniſtro ejus ventriculo, cum tamen ad dextrum nullus cum aëre ſanguis è pulmone deſcendere queat, propter valvularum ſemilunarium obſtacula: ad hæc; etiam in abdominis cavitate talis aër reperiatur, qui & ipſe eò inſpiratione deductus minime dici poteſt (quomodo illic gignatur paulo ante dictum) præterea etiam in foetus utero incluſi, & non reſpirantis abdomine ac ventriculis cordis ſimilis aër invenitur. Ad *ſecundum & tertium* dico, quod inſpiratus malignus aër propterea non inficiat cor, quia ſanguini admiscetur, ſed quia pulmone, per quem tranſit ſanguis malignam qualitatem imprimat, quæ inde mox ſanguini in vaſis contento, & ſic cordi communicatur. Ita quoque aceti & aromatum fragrantia non reſcit vires, quia aër ea imprægnatus ſanguini admiscetur, ſed quia per inſpiratum aërem fragrans illa qualitas pulmone imprimatur, & ab eo mox ſanguini tranſeunti, eoque mediante cordi communicatur. Sicut enim aër calidus calidam, frigidus frigidam, ita etiam putridus aut venenatus putridam aut venenatam, benignus & fragrans benignam ac fragrantem qualitatem pulmone, & ſanguini in eo contento conferre poteſt. Nam ut aliqua qualitas alteri corpori communicetur, non neceſſario ipſum prius

corpus è quo qualitas illa dimanat, tale quale eſt admiscetur alteri corpori cui qualitas communicatur. Ut ferrum ignitum calefaciat, non eſt neceſſe ut ipſum ferrum ingrediatur corpus calefaciendum: ſufficit quod minimæ ejus fervidæ particulæ ſua vehementi agitatione corporis calefaciendi vicini minimas particulas ſimiliter etiam vehemente agitent, ſicque vehementi iſto motu calorem introducant. Ut fruſtum vitri antimonii in vino depoſitum iſti vino vomitivam qualitatem imprimat, non eſt neceſſe ut ipſum vitrum antimonii vino immiſceatur, & cum eo corpus humanum ſubeat (eodem enim exactiſſimo pondere, ſine ulla ſubſtantiæ perditione, ruruſ è vino eximitur) ſufficit ſi ſua qualitate vini ſubſtantiæ tali modo diſpoſuerit, ſeu talem ei qualitatem impreſſerit, ut vomitivum evaſerit. Cum triticum in mola conteritur, non eſt neceſſe ut ipſe ventus rotas & lapides molares ingrediatur, ſufficit ejus impetus in externas molæ alas factus, eaſque movens, hæ enim ſuo motu axin, axis rotas, rotæ lapides molares ilico movebunt, eſi nullus ventus qualitatem motivam inducens, molam ingrediatur, aut tritico vel farinæ admiſceatur. Denique, ſi aër inſpiratus ſanguini admisceretur, ergo in recenti pulmone cum folle per aſperam arteriam inſtatus, per venam pulmonarem verſus ventriculum cordis ſiniſtrum erumperet, quod tamen in nullis tentaminibus animadvertere potuimus. Præterea, ſi aër vaſa ſanguifera ingrederetur, non tantum illa vaſa, verum etiam ipſæ partes, quæ ſanguine nutriuntur, admodum intumeſcerent ab aëre, & flatuoſis tumoribus continuè infeſtarentur. Videantur ſuper his alia quædam *precedente cap. 12.* Plures ſuper hac re probationes optime deſcribit Gualterus Needham, *de format. ſæt. cap. 6.*

Dictum refrigeratorium pulmonis ſeu *Charleſtoni error.* reſpirationis uſum plane rejicit Charleſtonius, *æconom. anim. exercit. 8.* eumque tribus quatuorve argumentis impugnatur, ſed adeo frigidis, ut reſutationem non mereantur: & tandem concludit, Aërem inſpirari ad majorem ſanguinis ſubtiliſationem, ſpirituumque vitalium igneſcentiam: quod ipſum etiam docet Williſius, *lib. de affect. hyſteric. contra Highmor. mihi pag. 9.* Verum quia hæc ſententia principiis Philoſophiæ repugnat, non eget multa reſponſione. Quippe ex Philoſophia notiſſimum eſt, frigus condenſare, calorem verò attenuare. Prius adeo verum, & in iſtrumento *thermometra* dicto, oculis tam conſpicuum eſt, ut nihil contradici poſſit: atque hinc ab inſpirato ſaltem frigido aëre non poteſt in pulmone major fieri ſanguinis ſubtiliſatio, ſed, extra omne dubium, condenſatio. Si jam prædicti doctiſſimi Viri ſtatuerent



velint, per calidi aëris inspirationem majorem fieri sanguinis subtilisationem; hoc iis facile concedemus, sed dicemus, illam mox nimiam, & minime salutarem; at brevi lethalem futuram, atque illum non esse respirationis finem; ut sanguis per eam magis subtilisetur, sed ut subtilisatus è dextro cordis ventriculo ad pulmonem impulsus in eo condensetur. Quodsi jam illi tamen contrarium pertinaciter sustinere velint, tunc necessario in præduram absurditatis scopulum impingent: hinc enim sequetur, quod quanto calidior erit aër inspiratus, tanto citiorem & faciliorem futuram sanguinis subtilisationem, cordisque refectionem, & hominem in calido aëre degentem pauciore opus habiturum respiratione: ac per consequens etiam in syncope, in qua præsentis spirituum refectione opus est, ut & in febribus ardentibus, in quibus spiritus admodum consumuntur, ægros, ad citiorem spirituum restaurationem ac cordis refectionem, deponendos esse in cubiculis calidioribus, & fervidis Solaribus radiis perlustratis, ne forte in frigidiore cubiculo, à frigidi aëris inspiratione, sanguis nimis lente subtilisetur, sicque cor & spiritus nimis tarde reficiantur. Sed quam contraria hæc sint rationi & experientiae, etiam illi facile percipiunt, qui praxin medicam solummodo eminens salutarunt. Hæc omnia penitus considerans Gualterus Needham, *de format. fet. cap. 6.* meritò pulmonibus omnem facultatem accendendi, aut subtilisandi sanguinem adimit, suamque sententiam efficacibus argumentis probat.

Alexander Maurocordatus, Constanti-nopolitanus, *lib. de motu & usu pulm. cap. 1.* hoc pulmonis refrigerandi munus etiam acriter impugnat variis argumentis, quorum primaria, (leviora prætermitto) hæc sunt. 1. Cum aër frigidus inspiratus non intret vascula sanguifera pulmonis, sed iis tantum in viscere circumfundatur, necessario in istis vasculis non imminuet, sed per antiperistalsin nimis augebit sanguinis calorem. 2. Cum in fœtu, loco calido concluso, major sit calor, nulla tamen urget respirationis necessitas, sed pulmo in eo otatur. 3. Morituri aërem frigidiorem exhalant. Respondeo ad *primum*; frigus moderatum istam antiperistalsin non parere (hoc cuilibet hyberno tempore notum est, quo satis refrigeramur, sed ab ambiente frigore non incalescimus) verum illam tantum in vehementi & subita refrigeratione contingere: atqui per inspirationem tam vehemens frigus in thorace, parte calida, gigni non posse. Ad *secundum*: in fœtu calorem ad tantum incrementum nondum pervenisse ut inspirationis refrigerio indigeat, quod latius docemus *lib. 1. cap. 35.* Ad *tertium*: aërem in morituris exspiratum,

tam calidum non sentiri, quàm qui à sanis exspiratur, quia ob cordis debilitatem sanguis multo minus fervidus impellitur in pulmonem, hocque viscus minus calefacit, unde tunc inspiratus aër in eo minus calefit, sed ad sensum adstantium sanorum, qui bene calidi sunt, frigidus exspirari videtur, cum tamen aliqualem calorem in pulmone adeptus sit, etsi minorem quam est calor cutis eum persentientium. Si verò putet Maurocordatus, illum ab iis frigidiorem exspirari, quam est inspiratus, hoc nos negamus, nec ille ulla experientia aut ratione hoc probabit.

Idem Auctor, post rejectum refrigerandi pulmonis munus, *cap. 2.* concludit; pulmonis usum esse, ut sanguinem circumducatur, & sit quasi torcular circulando sanguini dicatum. Hoc si verum foret, tunc in fœtu angustis uteri incluso, & non respirante, item in piscibus & animalibus pulmone destitutis, non fieret sanguinis circulatio: quia in his illud torcular non adest, in illo otatur, ut latius docemus *lib. 1. cap. 35.* Hanc opinionem etiam egregio experimento refutat Joh. Majov, *tract. de respir. mibi pag. 21.* apud ipsum auctorem videndo.

Malpighius, *epist. 1. ad Borell.* non ad refrigerationem, sed ad Sanguineæ molis miscelam, pulmonem fabricatum esse scribit, ut in eo quælibet minimæ sanguinis particulæ, albæ, rubræ, fixæ, liquidæ, chylosæ, sanguineæ, lymphaticæ, &c. in unam massam sanguineam exactissime misceantur, quam mixturam non nisi rudem in dextro cordis ventriculo, sed exactissimam in vasculis pulmonis fieri posse arbitratur (simile quid etiam sentire videtur Fr. de le Boë Sylvius, *prax. med. lib. 1. cap. 19.*) multaque ad sententiæ suæ probationem ibidem adfert; quæ tamen adeo efficacia non sunt, ut suam satis probare, antiquam verò convellere possint. Quippe mistura sanguinis exactissima fit per fermentationem, qua omnes particulæ in spiritum, seu tenuem halitum dilatantur; atqui illa peragitur in corde, non verò in pulmone, in quo fermentatio inhibetur, & dilatata sanguinis massa incrassatur. Præterea, si è dextro cordis ventriculo expulsi sanguis exactam misturam in pulmone hancisci debeat, ubinam ille qui è sinistro ventriculo in aortam propellitur, atque etiam ille qui in piscibus, vel qui in fœtu utero incluso pulmonem non ingreditur, exactam suam misturam consequetur?

Malachias Thruston, *lib. de respir. ali-* quid novi in hanc scenam producere volens: à sanguificationis officio cor excusat, idque munus pulmoni injungit, quia eo male affecto, ut in tabe, omnes partes pravo sanguine nutritæ, labascunt & extenuantur.

R r

Quali

Maurocor-  
datus nova  
opinio.

An pulmò  
sanguinem  
circumdū-  
cat.

Malpighii  
opinio.

Thrustoni  
opinio.

Quasi verò illud ipsum non contingat, cum hepar, lien, ventriculus, renes, mesenterium, aliaque similia viscera, quæ sanguinem non conficere notissimum est, ulcere, intemperie magna, aliave prava affectione tenentur. Postea addit: chylum cum sanguine tantum rudi modo in corde, sed accurate misceri in pulmone, in eoque effervescente, subtilisari, fluiditatem suam consequi, & in verum sanguinem mutari. Verum hæc rationi prorsus repugnant. An enim inspiratus aer frigidus (qui in rebus extraneis fermentationem & effervescentiam impedit & coercet, ut notum est cenopolis, cerevisiariis, pistoribus, aliisque similibus mechanicis) in pulmone sanguinis effervescentiam & subtilitatem pariet, cum semper frigiditas alibi effervescentiam compescat, & sanguinem incrasset, ut in curationibus morborum calidorum docet quotidiana experientia? & unde, quæso, foetus, qui in utero non respirat, illam sanguinis sui effervescentiam & subtilitatem nanciscetur, cum in eo pulmones otientur? Denique duo magna, ut putat, argumenta producit, unum à *phlebotomia*, alterum à *suspiriis* desumptum. Per *phlebotomiam* liberali manu celebratam, inquit, apoplectici, anhelosi, & qui pene suffocati sunt, magnum levamen sentiunt, quia per eam sanguis versus pulmonem properans, aut in illo jam congestus, aliorum ducitur, adeoque pulmones ab onere isto paulatim liberantur. Verum hoc argumentum doctissimo Viro totum concedendum censeo, sed non video quomodo hoc ejus opinionem probet, aut sanguinem in pulmone suam perfectionem consequi doceat. In dictis affectibus sanguis detrahitur liberaliter, ut cor debilitetur, idque debilitatum minus sanguinis ex se propellat ad alias partes, & sic ille qui pulmoni aut cerebro infarctus hæret, minimasque vias obstruit, ab insequente pauciore per pulsionem debiliorem cordis minus pressus, commodius effluere, atque ita suffocans infarctus tolli possit. Nam ex. gr. si in aliquo conclavi multi homines simul congregati, per ostium simul è conclavi excurrere vellent, illi statim in ipso ostio infarcirentur, & quo magis urgerent posteriores, eo minus exire possent anteriores: sed impetu pressiois posteriorum sublato, anteriores, cæterique omnes commode exire possent. Sic etiam se res habet in apoplexia, asthma, aliisque similibus affectibus: in his enim, quo cor robustius est, & plus sanguinis à se propellit, eo firmitus infarcta loca, cerebrum, pulmo, &c. constipantur & obstruuntur: at quo magis per sanguinis mediocrem detractionem debilitatur cor, idque hinc minore cum impetu, & minus sanguinis ad partes infarctas propellit, eo facilius

Quare phlebotomia  
conducat in  
apoplexia,  
asthma,  
&c.

ille qui partibus jam infarctus hæret, ab ipsarum partium calore resolutus, dissolvitur ac profluit ulterius, sicque cum levamine etiam solvitur obstructio. Sed hoc omne nihil probat pro sententia Thrustonii: ut neque alterum ejus *argumentum à suspiriis* desumptum: illa enim non fiunt, ut ille putat, propter majorem chyli in pulmone effervescentiam, sed propter minorem & rariorem respirationem (hanc quippe cogitabundi & tristes satis frequentem ducere negligunt vel obliviscuntur) atque hinc non sufficientem sanguinis è dextro cordis ventriculo in pulmonem impulsu refrigerationem, cujus ratione halituosus & dilatatus nimis manens, sicque ad sinistrum ventriculum lentius defluens, ac pulmonem distentum tenens, ægros angit, qui proinde coguntur subinde per alta suspiria, multi aeris frigidi introductione, halituosum istum sanguinem condensare, ut sic per venam pulmonarem ad sinistrum cordis ventriculum è pulmone citius defluere, imò etiam propter totius pulmonis à copioso aëre inspirato majorem distensionem vasa ejus prementem, citius propelli possit. His ultimo loco addendum (quod etiam *precedente cap. 12. ut & lib. 1. cap. 30.* latius docemus) chylum in corde accensum seu dilatatum mox chyli formam exuere, & sanguinem fieri, atque nihil chyli pulmonem ingredi, ut in eo fermentetur, sed in pulmonem ingredi sanguinem halituosum, ex chylo in dextro ventriculo cordis dilatato confectum, atque in eo per aeris inspirati frigus nonnihil condensandum, & ex halitu in liquorem cogendum. His iisdem rationibus etiam facile dilui possunt varia alia argumenta, quæ Thrustonus, *ibidem*, ab exercitiis, asthma, machina Boyliana, aliisque rebus desumpta, ad opinionis suæ confirmationem adducit.

Ratum igitur manet, respirationem non fieri ad sanguinis in pulmone confectionem, rarefactionem, mitionem, aut circumductionem, sed ad ejusdem refrigerationem, eamque (teste Aristotele, *lib. de respir.*) non esse necessariam ut motum, sed ut refrigerium: hoc ex eo patet, quod si requisita in pulmone refrigeratio fieri possit per aliquod refrigerans, seu frigus aliunde ad pulmonem accedens, frustra sit, imò ad tempus desinat respiratio, ut patet ex variis exemplis, mox in subnexa quaestione, *An homo vivere possit sine respiratione*, referendis.

Secundarius usus pulmonis est, ut in expiratione spiritum ad edendam vocem, & tussim suppeditet.

Pulmonis autem motus dilatationis ac constrictionis, qui in respiratione contingit, non est activus, sed passivus (hinc nullam actionem ei assignavit Galenus, *lib. 7. meth.*)

Conclusio.

Secundarius  
usus.

Motus est  
passivus.

*meth. cap. 13.*) quia viscus hoc proprio motu respiratorio per se non movetur, sed sequitur motum thoracis, quod imprimis liquet cum pulmo utrimque (ut ante dictum) tenaciter pleuræ adnascitur; in talibus enim hominibus à connexionem illa impediretur in isto suo motu, cum tamen respiratio in iis satis feliciter procedat, propterea quod dilateretur & constringatur ad ductum thoracis.

*Sententia contraria.*

Aliter hac de re sentiunt, Platerus, *quæst. physiol. postum. 29.* & Riolanus, *anthrop. lib. 3. cap. 11.* qui pulmonem in moderata respiratione, proprio motu, ab innata vi procedente, moveri tradunt, absque ullo manifesto motu thoracis: imò in apoplecticis, in quibus omnium musculorum motus aboletur, eum non tantum per se moveri, verum etiam motu suo ipsum thoracem impellere; & in canibus, aliisve vivis animalibus, si thorax totus repente aperitur, ita ut muscoli ad pulmonis motum nihil conferre possint, pulmonem tamen sursum deorsumque moveri satis violenter. Idem quoque sentit olim Averrhoës, qui ad majorem confirmationem tale argumentum subjicit. *Si respiratio, quæ perpetua est, sequeretur motum thoracis, ergo in corpore nostro foret motus violentus perpetuus: atqui absurdum posterius, ergo & prius.* Sennertus etiam, in *physic.* ejusdem est sententiæ: *Propria vi, inquit, moventur pulmones, & simul pulmo & thorax moventur, quia in unum finem conspirant. Vi nimirum insita pulmo dilatatur: ut verò id commodius fieri posset, & locum in quo dilateretur inveniat; cum pulmo movetur, facultas animalis simul movet thoracem. Neque distenditur pulmo quia impletur, ut vesica quæ inflatur solet, cum aliunde aer non infletur in pulmonem, sed repletur quia dilatatur, ad modum folliis.*

*Refutatio.*

Ad has difficultates respondeo, priora duo falsa esse, cum nemo quiescentibus omnino thoracis & abdominis musculis, respirare possit, nec ulla hominis talis dispositio inveniri queat, in qua thorace immoto manente moveatur pulmo, ad cujus probationem cujuslibet in se ipso experientiam cito. Cum etiam in apoplecticis motus musculorum thoracis, non sit abolitus, sed imminutus, eoque tandem in totum deficiente, etiam omnino deficiat respiratio (sicut semper pereunte motu thoracis perit respiratorius motus pulmonis) & moriatur æger. Cum præterea qui in canibus vivis aperto thorace conspicitur pulmonis motus, non sit motus respiratorius, cum expansione pulmonis contingens, sed motus quidam accidentarius, à diaphragmate (quod in vivente animali adhuc movetur) excitatus, utpote quod annexum mediastinum, ipsique adhærentem pulmonem, sursum deorsumque secum trahit, sed absque ulla pa-

renchymatis dilatatione, sine qua tamen non potest fieri respiratio, nec aer admitti. Ad Averrhoës argumentum dico; quod quidquid alterius partis motum sequitur, non necessario sequatur per violentiam, alioqui etiam arteriarum, cerebri, aliosque similes perpetuos motus naturales, dicendos esse motus violentos perpetuos, quia perpetuo procedunt, & sequuntur motum cordis. Præterea violentum non esse motum qui bene, & consueto Naturæ ordine procedit, licet alterius partis motum sequatur, sed illum potius qui præter naturam & male fit, ut in convulsione contingit. Denique addo pro conclusione, non solum pulmonis cum pleura firmam connexionem, antè commemoratam, sed ipsam quoque experientiam docere pulmonem proprio motu respiratorio non moveri: nam utrimque perfosso vel aperto vivi animalis thorace, pulmonis respiratorius motus dilatationis ac constrictionis ilico desinit, aëri tunc per latum vulnus libero ingressu in thoracis cavitatem concessa, ita ut in dilatatione thoracis aer non necessario ingrediat per asperam arteriam in pulmonem, eumque distendat ad replendum thoracis cavitatem: quæ motus cessatio non fieret, si pulmo per se moveretur; nulla enim ratio est, quare minus per se dilaretur aperto thorace, quam eo clauso. Quod ipsum etiam satis refellit opinionem Sennerti, putantis pulmonem, instar folliis, repleri quia dilatatur: nam ex dicta thoracis apertione omnino liquet illum sponte non dilatari, sed duntaxat dilatari, cum per dilatationem thoracis aer ad fugam vacui cogitur asperam arteriam ingredi, sicque pulmonem replere ac dilatare.

Ab hac Averrhoës, ut & nostra sententia dissentit Aristoteles, qui, *lib. 3. de part. animal. cap. 6. & lib. de respir. cap. ult. aliisque locis*, docet pulmonem moveri à corde: eaque in parte cum eo consentit Hoffmannus, *comm. in Gal. de usu part. lib. 6. cap. 10.* Hoc alii rursus pertinaciter negant, alii de respiratorio motu male interpretantur. Utrique error est, qui hinc nascitur, quod non fiat distinctio inter motum naturalem, quem cor pulmoni infert; & motum respiratorium, qui à corde non procedit. Nam cor aliquem parvum motum pulmoni inferre certissimum est: quippe cum è dextro cordis ventriculo sanguis dilatatus in eum per amplam arteriam pulmonarem impellitur, necessariò, ipsa ratione demonstrante, aliquantulum movetur & intumescit pulmo, sicut eandem ob causam arteriæ moveri & intumescere solent, etsi hic parvus motus à magno respiratorio motu ita obfuscetur, ut in vivo pulmone vix oculari inspectione manifeste percipi possit: atque de hoc motu intelligendus est Aristoteles;

R r 2

sed

*An pulmo à corde moveatur.*

sed ille tamen non est motus respiratorius, de quo communiter loquuntur Anatomici, cum de motu pulmonis agunt, qui re vera, nec à corde, nec ab ipso pulmone procedit, sed accidentarius est, & thoracis motum sequitur, ut ex antedictis abunde patet. Præterea, si motus respiratorius procederet à corde, deberent pulsus cordis & respiratio exacte convenire in ritmo, & ad singulas pulsationes cordis pulmo æqualiter intumesceret (sicut in arteriis) hincque thorax dilataretur, & subsidente corde, etiam pulmo subsideret. Ad hæc, inæqualitas respirationis esset indicium pulsus inæqualis: at contrarium docet usus, longe enim rariores sunt respirationes quam pulsus cordis. Denique potest respiratio tardior & celerior, major & minor fieri, pro arbitrio respirantis, cum tamen pulsus cordis non possit pro libitu immutari.

Hæc omnia etiam penitus refutant Maurocordatum, qui, *lib. ante citat. cap. 6. & 14.* pulmonis totum motum cordi penitus adscribens, dicit, cum cor latera contrahens systolem facit, tunc diaphragma erigi, & tracheæ annulos contrahi, sicque pulmonem expirare: cum verò cor diastolem facit, tunc diaphragma descendens detrahere pulmonem, ejusque annulo dilatare, & sic eum inspirare. Hanc suam sententiam *ibidem* variis argumentis confirmare nititur: quæ tamen omnia funditus evertunt, *non modo* antedictæ nostræ rationes; ut & illud quod in pulsu intermittente (qui multis hypochondriaca affectione laborantibus familiaris est) mox ad motus cordis intermittentiam non sistatur respiratio, quæ tamen subsistente motore, & ipsa subsistere deberet: *verum* imprimis pensior consideratio eorum hominum quibus pulmo toto ductu pleuræ utrimque firmiter annexus hæret (horum exempla paulo ante dedimus) utpote in quibus hoc viscus cum trachea ad cordis systolem & diastolem tali modo sursum deorsumque moveri minime potest, sed ad latera solummodo dilatari, ac dilatationem thoracis à musculis factam sequi. Quod porro idem, *cap. 7.* hinc concludit, per respirationem, metu vacui, sanguinem è vena cava trahi in dextrum ventriculum, ex eoque in arteriam pulmonarem, &c. illa non merentur refutationem, cum nulla talis attractio in corpore nostro detur, sed omnes humores per impulsione moveantur.

*Respirationis modus.*

Pendet igitur respirationis motus, nec ab ipso pulmone, nec à corde, sed à musculis thoracis, qui cum thoracem dilatant, mox per asperam arteriam ingreditur aer in pulmonem, eumque dilatat: cum autem thoracem contrahunt, illum per eandem viam, una cum serosis vaporibus, expellunt. Aeris verò ingressum, sive propter frigiditatem vacui, cum nonnullis; sive propter

aëris externi à dilatato thorace pressionem, & sic in pulmonem per asperam arteriam impulsione, cum aliis fieri dicamus, eodem redit, cum utrumque verum sit, quæ de re tamen nonnulli vitiligatores acerrime, sed valde inutiliter, digladiantur.

De isto respirationis motu inter Philosophos agitur quæstio, scilicet, qualis sit actio. *Qualis sit actio.* quippe alii naturalem, alii animalem, alii mixtam ex naturali & animali, esse tradunt; suasque opiniones singuli plurimis rationibus confirmant, quas omnes hic referre nimis longum foret.

Ex modo dictis satis liquet respirationem esse actionem merè animalem, quia peragitur motui animali inservientibus instrumentis, scilicet musculis, & pro arbitrio nostro, accelerari, tardari, intendi, & remitti potest, ut videmus in cantoribus, tubicinibus, aliisque, & quilibet in se ipso experitur: imò itiam ad mortem usque cohiberi potest, in hominibus cordatis, qui mori non timent: cujus exemplum habet Galenus, *lib. de mot. muscul. cap. 6.* de servo Barbaro, qui respiratione cohibita sibi mortem conscivit. Alia duo exempla refert Valerius Maximus, *hist. lib. 9.* primum Comæ, alterum Licinii Maceris, qui compresso spiritu se ipsos in conspectu omnium extinxerunt. *Est actio animalis.*

Si hic forte quis objiciat, voluntariam actionem nobis conscis fieri, & non posse perpetuam esse: omnemque motum animalem diuturnum inducere delassationem, qualem tamen non facit respiratio, quæ perpetuo dies noctesque procedit, etiam nobis dormientibus & minime conscis. Respondebo, illas esse, & verè dici actiones animales ac voluntarias, quæ ad voluntatem nostram fiunt, vel fieri possunt: ac proinde, licet respiratio nobis dormientibus & minime conscis procedat, illam nihilominus esse actionem animalem, cum nobis vigilantibus ac conscis ad arbitrium nostrum dirigi possit. Qui in somno ambulant & loquuntur, etiam hoc se facere nesciant, tamen actiones illæ, ambulatio & locutio, non minus sunt animales, quam si vigilantes & conscii hoc facerent: quippe actionum animalitas non consistit in sole agere, verum etiam in posse conscientia ad voluntatem agere. Sciendum itaque (quod Galenus quoque docet, *lib. 2. de mot. muscul. cap. 6.*) actiones animales alias ab instinctu fieri, & esse liberas; alias affectibus animi inservire: *illas* perpetuo, & absque impedimento procedere, etiam nobis minime cogitantibus, sed à nobis tamen cogitantibus aliter atque aliter dirigi posse, qualis actio est respiratio: *has* verò non perpetuo fieri, ut pugnare, currere, saltare, scribere, &c. In *illis* ex consuetudine satis copiosum & continuum fieri spirituum anima-

animalium in musculos influxum, atque hac de causa non sequi ullam defatigationem, quavis sint diuturnæ: in his duntaxat a determinatione in cerebro facta, spiritus modò hoc, modò illo tempore, modò majore, modò minore copia influere, atque ex illa mutatione & insuetudine sequi lassitudinem. Super his etiam infra quædam videantur, lib. 5. cap. 1. in principio.

Verum quandoquidem jam de pulmonis officio, & respirationis summa necessitate satis dictum, adhuc unum dubium discutiendum superest, scilicet, **An homo natus etiam sine ulla respiratione aliquamdiu vivere possit.** Galenus, 6. de loc. affect. cap. 5. scribit: *Respirantem non vivere, & viventem non respirare, impossibile est.* Item, 5. de loc. affect. cap. 1. dicit: *Sublata respiratione tollitur vita.* Galeni sententiam confirmant rationes antea de necessitate respirationis allatæ, quinimo experientia quoque illam confirmare videtur, cum indies videamus homines respiratione privatos ilico mori. Verum eadem ipsa experientia nonnunquam contrarium quoque docuit, cum variis exemplis demonstrari possit, nonnullos homines notabili temporis spatio sine ulla respiratione vivos superfuisse: ad cujus probationem aliquot talium historias hic subjungeré necesse videtur.

**I.** In India dicuntur urinatores illi, qui margaritas & coralla in fundo profundissimorum fluminum quærunt, plerumque per femi horam, vel diutius, sub aqua commorari posse sine ulla respiratione.

**II.** Ante aliquot annos splendidissima quædam navis pro Galliæ Rege, prope Amsterodamum exstructa, per infortunium in mari submersa est, prope Tessaliæ insulam: in qua cum legatus Regis cistulam aureis nummis repletam deposuisset, certo pretio conduxit nautam urinatorem, qui sub aquis navem submersam (cujus locus satis notus erat) ingrederetur, & tentaret cistulæ (indicans illi quo loco eam deposuisset) extractionem. Hic urinator ad dimidiam horam sub aquis remansit, posteaque sospes emerit, dicens se cistulam quidem invenisse, sed eam extrahere non potuisse.

**III.** Similia tria notabilia exempla ego ipsemet Noviomagi vidi, cum ibi praxin, ut poliat, exercebam. Anno 1636. in pago Bemmell dicto, rusticus, quidam, famulus Domini Bronekhorst, peste, ut putabatur, extinctus, usque ad tertium diem pro mortuo jacuit, sine ulla respiratione, aliisve ullis vitæ indicii: tandem verò ad sepulchrum efferendus, in cista ferali ad se rediit, & multis post annis vixit,

pluriesque se nobis & aliis admirantibus conspiciendum exhibuit: quem mirabilem casum latius descripsimus, in tractatu nostro de peste, lib. 4. histor. 85.

**IV.** Anno 1638. mulier quædam ad superiorem partem urbis Noviomagi cecidit in flumen, pavibus totum exercitum nostrum continentibus tunc temporis omnino contactum, ac rapiditate fluminis mox sub naves abrepta, totam classem sub aquis transiit, & post horæ quadrantem, cum illam jam mortuam esse nemo dubitaret, ad inferiorem classis partem sospes emerit, & à nautis ibi præsentibus servata fuit.

**V.** Anno 1642. mense Junio, uxor Alberti Noot, civis Noviomagensis, cum in pago Bemmell margini putei cujusdam profundi insideret, casu retrorsum cecidit in puteum, capite in fundum demerso, solisque pedibus extra aquam exstantibus: cum autem defectu virorum & commodorum instrumentorum, ei nullum auxilium protinus ferri posset, ultra semi horam in tali statu sub aqua remansit: deinde è puteo extracta, & pro mortua lecto imposita fuit: sed postquam per duas horas ita jacuisset, sine ullis respirationis aut vitæ signis, rursus paulatim ad se redire cœpit, ac postridie domum veniens se meæ curæ commisit, ac remediis quibusdam adhibitis, integræ sanitati restituta est.

Verum ne mea sola testimonia hic valere videantur, adhuc tria alia singularis momenti exempla proferam ex aliis.

**VI.** Primum est historia ex Platero, observat. medic. lib. 1. descripta, de muliere quæ ob enecatam infantem suum, condemnata fuit, ut manibus pedibusque vincitis in Rhenum projecta, aquis submergeretur: cum autem per quartam horæ partem sub aqua jacuisset, ita ut nusquam videri amplius posset, per funem, qui antè injectionem pedibus ejus alligatus fuerat, extracta, paulatim rursus respiravit & ad se rediit, atque in totum sana facta, viro postea nupsit, & liberos procreavit. Idem Platerus, eadem observatione, adhuc alias duas, fere similes, historias subjungit.

**VII.** Secundum, est historia quæ (referente Joanne Matthæo, in quest. medic.) Coloniz Agrippinæ, in vestibulo templi Apostolorum, tabellæ inscripta legitur, traditque sceleratos quosdam homines defunctam & sepultam non infamæ sortis mulierem media nocte (ut aureis annulis & armillis; quibuscum sepulta erat) illam spoliarent) effodisse, tumque manus illi injicerent, foeminam ad se rediisse, & quasi revixisse: hinc deterritos sepulchri violatores, mox aufugisse: foeminam verò apprehensâ lucernâ à nebulonibus relictâ, ædes suas repetiisse (similes historias etiam

R r 3

describit

describit Philippus Salmuth, *cent. 2. observ. 86. & 87. & 95.*) Hæc, procul dubio, verè mortua non fuit, sed absque respiratione jacens, pro mortua fuit se-  
pulta.

VIII. Tertium notabile & miserandum exemplum, de alia muliere pro mortua sepulta, & postmodum reviviscente annotarunt, Diomedes Cornarius, *lib. histor. admirand.* & Jo. Matthæus Hæssus, *in suis quest. medic.* quod supra à nobis citatum, & latius exscriptum est, *lib. 1. ad finem cap. 25.* quo loco integræ historia inveniri poterit.

Plura hujusmodi exempla reperiuntur apud Lycosthenem, *lib. de prodig. & ostent.* Levinum Lemnium, *lib. 2. de occult. rer. mirac. cap. 3.* Georgium Pictorinum, *sermon. convival. lib. 1. cap. 10.* Hildanum, *cent. 2. observ. 95. & 96.* Jo. Jacobum Crafftium, *epist. ad Hildan.* aliosque plures, ut Paræum, Forestum, &c.

Ratio ante-  
dictorum.

Hæc certe omnia satis superque docent, hominem interdum aliquamdiu sine respiratione vivere posse. Verum nunc hujus rei ratio inquirenda restat. Galenus, tum alibi passim, tum imprimis *lib. de util. respir. cap. 3. & 4.* variis firmisque rationibus & argumentis; ab experientia & communi sensu desumptis, docet cordis calorem esse causam necessitatis respirationis. Quousque enim per suum calorem cor sanguinem attenuat, & dilatatum è dextro ventriculo in pulmonem impellit, necessario requiritur refrigerium per respirationem allatum, ut calidus attenuatus in pulmonem impulsus sanguis rursus condensari, sicque è pulmone in sinistrum ventriculum delabi possit; quo refrigerio denegato, mox halituoso sanguine replentur pulmonis vascula, & seroso vapore vesiculosa substantia; nec quidquam ad sinistrum cordis sinum descendit, sicque citissime suffocatur homo. Ex hoc fundamento jam sequitur alterum, scilicet, quotiescunque cor nimis refrigeratum est, vel calor & motus ejus à morbi-  
ficis causis ita oppressus est, ut nullam sanguinis illapsi effervescentiam seu dilatationem faciat, tunc etiam nullam refrigerationem necessariam esse (sublatâ enim causâ necessitatis, tollitur necessitas) atque isto tempore hominem sine respiratione aliquamdiu vivere posse. In omnibus autem præfatis historiis & casibus, atque etiam ab aqua frigida sola (ut in margaritarum piscatoribus) totum corpus ipsique simul pul-

mones, adeo refrigerati sunt, ut illa refrigeratio aliquamdiu sanguinem è corde in pulmonem (sed minus calidum, & pauciorè quantitate, ob totius frigus) impulsu fatis refrigerare ac condensare potuerit. Vel à maximo terrore & frigore simul, cor una cum toto corpore, adeo refrigeratum & contractum est, ut fere desierit pulsare, atque ita mox syncope accesserit, qualem quid contigisse videtur istis mulieribus, quarum casus describuntur historia quarta, quinta, & sexta. Vel à vitiosis malignisque vaporibus aut humoribus calor ejus adeo oppressus est, ut etiam plane deficiat sanguinem dilatare, ac pulsatione propellere. Deficiente autem propulsione sanguinis in pulmonem, non est necessaria respiratio, eaque homo tunc aliquamdiu carere, & tamen vivere potest, si modo ille status non nimis diu duret, scilicet, donec ipsum calidum innatum penitus extinguatur. Sed tunc vivit homo immobilis, sui que impos (ut videre est in tertia, septima, & octava historia) sicut hyberno tempore vivunt muscæ, ranæ, lacertæ, aliæque plura animalcula, quæ, veluti mortua, sine ulla respiratione latitant, eo quod calor cordis oppressus, & veluti extinctus sit, neque ullo refrigerio indigeat. His ita se habentibus, quid jam dicendum erit ad verba Galeni, in exordio hujus questionis citata, quibus docet impossibile esse viventem non respirare? Galenus ipsemet hanc difficultatem prævidens, ut ex ea se expediat, *citato loco*, confugit ad transpirationem, quæ fit per universi corporis poros, eamque ponit tanquam speciem minimam respirationis, seu potius ejus vicariam, quam in dictis, aliisque similibus casibus ad vitam sustentandam sufficere posse existimat. Verum hoc diverticulum, quo se etiam hodierni Galenici defendunt, non sufficit probationem. Nam cum tor & humores non moventur, tunc totum corpus ilico refrigeratur, & neque halitus calidus expellitur, neque aer frigidus usque ad cor intromittitur. Itaque dicendum potius, sententiam Galeni priorem veram esse de communi modo vivendi, non verò de talibus raris casibus modò propositis, utpote in quibus res aliter contingere potest.

De musculis actionem respirationis facientibus, vide *hujus lib. cap. 3. & lib. 5. cap. 6.*

## CAPUT XIV.

## De Trachea, seu Aspera arteria.

Vid. Tab.  
XI.

Trachea, seu Aspera arteria, aliis Fistula, vel Canna pulmonis dicta, est canalis, qui à faucibus ad pulmonem descendit, eumque plurimis ramis ingreditur, per quem inspiratus aer hauritur, & exspiratus idem cum serosis vaporibus ac fuliginibus redditur, ad sanguinis vitalis refrigerationem ac ventilationem, & sonorum vocisque productionem.

Situs.

Sita est in anteriore colli parte, œsophago incumbens, sicque ab ore ad pulmonem descendens.

Diviso.

Ad quartam thoracis vertebra dividitur in duos ramos, quorum singuli pulmonis lobum sui lateris ingrediuntur. Illi iterum in duos alios subdividuntur, & hi rursus in alios, donec tandem in parvos ramos, inter arteriæ & venæ pulmonaris radices dispersos, ac cum vesiculis pulmonis continuos, in easque patentes, desinant. Appellatur hi rami, quousque majusculi sunt, Bronchia.

Bronchia.

Magnitudo.

Magnitudo varia est, pro ætatis, sexus, & temperamenti diversitate.

Substantia.

Componitur ex substantia antierius cartilaginea, ut non concideret, sed ad spiritus aerisque liberam reciprocationem perpetuo aperta fervaretur: posterius membranosa, ne œsophagi dilatatio corporis durioris incubitu impediretur.

Annulli.

Cartilaginosa portio non continua, sed ex plurimis veluti annulis compacta est, quorum superiores majores sunt. Hi autem annuli æqualiter à se invicem distant, & posterius, qua parte gulæ incumbunt, inferiore circumferentiæ parte destituuntur, membranosa substantia defectum supplente: reliqui pulmonis parenchyma, subintrantes, integri manent, nec amplius semilunares sunt, sicut in superiore parte, sed

variis figuris constructi, rotundi, quadrati, aut triangulares; & quo longius parenchyma ingrediuntur, eo magis membranosi, minusque duri, arteriis similes, & vesiculis pulmonis continui fiunt. Omnes autem dicti annuli majusculi per carnosa ligamenta sibi invicem exacte connectuntur, minimi per solas membranas cohererent.

Aspera hæc arteria duplici membrana obducitur. Unâ externâ, quæ tenuis est, à pleura productâ, & cartilagineum ligamentis firmiter devincta. Alterâ internâ, quæ crassior & densior, palatoque continua est, sensu exquisito, ad molestorum perceptionem, prædita. Hæc oblitur pingui & mucoso humore, ad prohibendam exsiccationem, utque lenior evadat sonus: quo humore à catarrhis acerbis abrafo, aut alia quacunque de causa inæquali reddito, vox raucescit: à nimio autem calore, ut in febribus, exsiccato, clangosa editur.

Arterias duplices habet; alias à carotidibus: alias ab arteria bronchiali, præcedente capite descripta, quæ omnes ejus ramificationes comitantur. Venas ad jugulares externas emittit. Nervulos habet à recurrentibus sexti paris, maxime per internam membranam dispersos, cui acutissimum sensum tribuunt; quem non considerans Lindanus, nervos ei denegat, physiolog. mihi pag. 257.

Dividitur trachea in bronchum & laryngem.

Bronchus est pars inferior & longior, multiplicibus ramis in utramque pulmonis regionem diducta, ut modò dictum.

Larynx est pars ejus superior, de qua proximo capite agendum.

## CAPUT XV.

## DE LARYNGE, ET VOCE.



Larynx arteriæ caput, seu initium ori continuum, Larynx (à λάρυγξ, diducto gutture vociferor) appellatur, qui vocis organum est, ad eamque formandam & exprimendam, è cartilaginibus & musculis diversis constructur.

Figuram habet fere circularem, antica parte extuberantem, postica nonnihil depressam, ut gulæ in deglutitione cedat.

Arterias recipit a carotidibus, sanguinem advehentes, eumque à nutritione residuum per exiles venas remittit ad jugulares externas. Spiritus animales conferunt nervi recurrentes sexti paris.

Magnitudo



*Magnitudo.* Magnitudo ejus pro ætate, sexu, & temperamento varia est, atque hinc etiam vocis magna est diversitas, quæ in junioribus & siccioribus, ob laryngis angustiam, est acuta; in adultioribus, ob amplitudinem, gravis evadit: quo etiam faciunt, laryngis longitudo, aut brevitæ; item aeris expulsio fortis, vel debilis, ejusdemque copia, vel inopia, quorum ratione, magna aut parva, gravis vel acuta vox fit.

*Substantia.* Præter membranas præcedente capite commemoratas, componitur larynx ex quinque cartilaginibus, & tredecim musculis.

*Cartilagineæ.* Cartilagine ossibus annumerare mavult Columbus, *lib. 1. anat. cap. 13.* quia illas magis ad ossæam, quam ad cartilagineam naturam accedere, & sæpe in senibus ossescere, imò etiam medullosa aliqua substantia, instar ossium, præditas esse tradit. Verum hanc medullosam substantiam demonstrare difficile foret. Præterea, quamvis nonnunquam in senioribus ossescat (cujus rei præclara exempla describunt, Cardanus, *lib. 2. tract. 2. contradict. 7.* nec non *lib. 14. de rer. varietat.* & Coiter, *lib. observat. anatom.* tamen propterea semper ossibus non sunt annumerandæ: possunt enim primo diu esse cartilagineæ, & illæ postea ossa fieri (quod tamen rarius contingit) sicut interdum costarum, & spinæ vertebris intercedentes cartilagineæ omnino ossæ fieri animadvertimus, quas tamen ante istam ossificationem nemo vere dixisset esse ossa.

*Cartilago scutiformis.* Cartilaginum primum *ὑποειδής*, vel **Scutiformis**, à scuti figura nominatur, quia fere quadrata est, instar antiquorum clypei, aut potius instar anterioris, aut pectoralis partis ferrei thoracis militaris, intus cava, foris gibbosa & prominens, quæ gibbositas quia antèius magis conspicua est in viris, quam in mulieribus, hinc in iis appellatur, **Pomum Adami**, quia vulgo persuasum, in Adami faucibus pomi fatalis partem ex pœna divina remansisse, atque inde cartilagineam hanc distentam protuberasse, eandemque protuberationem hæreditate quadam ad posteros translatam fuisse. Quia autem in medio linea quadam distinguitur, hinc nonnulli eam duplicem descripserunt, cum tamen nunquam duplex inveniatur: & si forte quispiam aliquando tale quid viderit, illud non pro ordinario, sed pro rarissimo casu habendum sit.

In angulis suis processus habet, superius duos longiores, quibus ossis hyoidis inferioribus lateribus ligamenti ope jungitur: inferius duos breviores, quibus inferiori cartilagini adhæret.

Fallopium, *tom. 1. observat. anat. tract. 2.*

scribit se hanc cartilagineam thyroïdem, ut & sequentem cricoidem, in valde senibus ossæas reperisse, neque solum in decrepitis, sed etiam in primo senio constitutis. Addit præterea, se notasse, quod thyroïdes, cum ossæa fit, primum obdurefcere incipiat in partibus lateralibus, ut linea media prominens, velut cartilagineus angulus relinquatur à summo ad imum, qui tandem ipse quoque fit ossæus.

Secunda *περιειδής*, seu **Annularis**, *Annularis*, dicitur, quia rotunda est instar annuli, & totum laryngem ambit.

Tertia & quarta (quæ ob investientem *Guttalis* membranam unica, sed eâ ablata aliquo modo gemina apparere videtur, præcipue anteriore parte, quamvis id neget Riolanus) *δρυταινοειδής*, seu **Guttalis**, appellatur, quia processus sibi mutuo juncti formam gutturi, id est, ollularum partis qua aquam effundimus, referunt.

Fallopium, *citato loco*, scribit se guttalem nunquam ossæam invenisse, quod tamen sibi visum refert Riolanus, *lib. 4. anthropog. cap. 1.*

Quinta, Græcis *ἐπιγλωττις*, & *ἑπιγλωττις*, Latinis eodem servato nomine **Epiglottis**, dicta, ad radicem linguæ sita; est glottidis seu rimulæ operimentum quo tegitur, ne inter deglutendum cibus potusve in asperam arteriam delabatur, quamvis non tam exquisita sit commissio, quin humidum aliquod blande secundum parietes trachæ se insinuare possit.

Hæc cartilaginibus reliquis mollior existit, figura hederæ folium, vel linguam referens, unde **Lingula** nonnullis appellatur.

Nicolaus Stenonis, *observat. de gland. oculor.* in epiglottidis vituli superiore parte notat carnem quandam ex globis glandulosis compositam, à qua per ipsam cartilagineam, usque ad inferiorem partem, dicitur meatus reperiri conspicuos.

Hæ laryngis cartilagineæ, ad motum *Musculi* vocisque modulationem, tredecim donantur musculis, quibus rima, vel dilatatur, vel constringitur.

Horum quatuor sunt communes, & novem proprii, quibus *Nervi vocales* dicti, à sexti paris ramis recurrentibus, inferuntur.

Communes sunt, qui in laryngem implantantur, ab eo tamen non oriuntur. Proprii in larynge, & oriuntur, & finiuntur. Illi numerantur quatuor, hi novem.

Communium par primum, quod inferius, *COMMUNES*, **Sterno thyroïdes** dictum, à superiore atque interna sterni parte ortum, inferne ad latera cartilaginis scutiformis inferitur, & dum scutiformem detrahit, rimam coarctat.

Alterum

Hyothyroi-  
des.

Alterum par, quod superius, **Hyothyroides** appellatum, ab inferiore sede ossis hyoidis ortum, in basin scutiformis inseritur, eamque attollendo, rimam dilatat. Riolanus tamen putat hoc par nulli cartilagini speciatim addictum esse, sed totum laryngem attollere.

Proprii.

Propriorum musculorum par primum, quod exiguum, ex opinione Vesslingii, pluriumque Anatomicorum, originem ducit ab annulari cartilagine, & in scutiformis latera definit, atque hinc **Cricothyroides anticum** nominatur, & cartilaginem nonnihil oblique deorsum movere putatur. Contra verò Bartholinus, ab insertione nervorum, judicat illud antierius ab infima scutiformis parte oriri, & in annularem definire, eamque ad scutiformem leviter (quia illa fere immobilis est) trahere, ut jungantur, & junctæ servantur, ac proinde hoc par melius appellari posse **Thyro-cricoides**. Hanc Bartholini opinionem Riolanus, pro suo more, mordaciter irridet, in *animadvers. ad Barthol.* utpote qui non facile patitur quempiam à se dissentire, aut quippiam invenire, vel in Anatomicis rebus scire, quod ille non viderit & sciverit prior.

Cricoart-  
noides pos-  
terior.

Secundum par carnosio principio posterius procedit ab annulari, & in guttalis, seu artænoidis partem inferiorem nervoso sine inseritur, ac cartilaginum duarum artænoidum diductione, laryngem aperit. Anatomicis communiter **Cricoartænoides posticum**, Casserio **Par cucullare** appellatur.

Cricoart-  
noides late-  
rales.

Tertium par, **Cricoartænoides laterale** dictum, superius ab annulari lateribus ortum, guttalis lateribus ad articulum inseritur, cartilaginum obliqua diductione laryngem aperiens.

Thyroart-  
noides.

Quartum par intrinsecum & latum, **Thyroartænoides** nuncupatum, antierius & interius à scutiformi prodit (aut, secundum Riolanum suspitionem, ex cricoide) & definit in latera guttalis seu artænoidis, quam constringens, laryngem recto ductu claudit.

Nonus mus-  
culus.

Nonus musculus (aliis quintum par, **Arytænoides** dictum) oritur à postica guttalis linea, & fibris transversis delatus, in ejusdem latera inseritur, & arytænoidem cartilaginem constringens, laryngem claudit.

Epiglottidis  
musculi.

Epiglottis in homine nullis donatur musculis conspicuis (tamen Jo. van Horne, in *microscopio*, scribit, quod diligentia Anatomicorum duos exiles musculos suspensorios invenerit) nec motu arbitrario moveri, sed assumptorum pondere & linguæ retrorsum tractione duntaxat deprimi

videtur. In brutis verò majoribus, quæ ruminant, & fere perpetuè ciborum ingestioni inhiant, ac epiglottidem prægrandem habent, musculis donatur manifestis: quorum alii ab hyoide oriuntur, & basi epiglottidis inserti, eam attollunt: alii inter epiglottidis tunicam & cartilaginem siti, eam detrahunt, sicque laryngem claudunt.

Larynx ex dictis partibus conformatus, *Glandulæ.* ut in vocis modulatione officio suo commode fungatur, continua indiget humectatione & lævigatione, in quem finem ei variaz adstant glandulæ. Harum conspectiores sunt duæ majusculæ, ad altiore laryngis sedem, vel linguæ radicem, à lateribus uvulæ seu gargareonis sitæ, utrimque una, *ἀμυγδαλῆς*, & *παρατομή* Græcis:

**Tonfillæ** Latinis, vulgò **Amygdalæ** *Tonfillæ.* dictæ (licet nullam cum amygdalis similitudinem habeant) communi oris tunica vestitæ, & arteriis venisque exilibus à carotidibus & jugularibus donatæ. Hæ laxæ & spongiosæ sunt, ac sinus habent varios: unum amplum & ovalem in os apertum (hic in bobus digiti minoris apicem facile admittit) pluresque parvos, quibus humiditatem salivalem cerebri suscipiunt (nonnulli putant in iis salivam confici ex humoribus è cerebro delapsis: Jo. van Horne, in *microscopio*, earum usum adhuc incognitum esse existimat) eaque laryngem, fauces, linguam, & œsophagum continue humectant ac lubricant. De saliva & valis salivalibus vide *lib. 3. cap. 24.*

Fallopianus bene notat, interdum magni sinus interioris aperturam ulcusculum æmulari, & nonnunquam pro tali ab imperitis chirurgis tractari, nempe quoties ejus osculum ab humorum copioso in glandulam decubitu, nimium dehiscit. *Observatio.* Quantum autem interdum dehiscat, vidi in rustica quadam Breuckelenfi, quæ anno 1659. mense Aprili, famelica comederat pruna damascena cocta, & propter in edendo festinationem, nescio quo casu, lapillus unius pruni majusculi ingressus est aperturam dicti magni sinus, unde glandula mox intumuit, adeoque pressione sua cibi potusque viam præclusit, ut sequentibus quatuor diebus ægra, nec cibi, nec potus quidquam deglutire potuerit, atque hinc meum consilium tunc implorare coacta fuerit. Depressâ linguâ glandulam admodum tumidam in dextro latere, sed minime inflammatam, ejusque antedictam aperturam præter solum valde dehiscens contempsi, sed prunum lapillum non vidi. Mox pauxillum decocti hordei cum syrupo dealthea mistum, mulieri sorbendum dedi, & foris pollicem meum regioni glandulæ istius tumidæ imposui, eamque fortiter pressi, & jussi ut tunc mulier magno impetu contentum ore

S f

liquorem

liquorem deglutire niteretur. Prima vice reliliit liquor per nares: sed secunda vice, ob compressionem quæ foris per meum pollicem, & intus per retractam versus posteriora linguam, fiebat, lapillus è glandula exiliit in os, ægraque ilico rursus cibos potusque deglutire potuit. Eadem isti mulieri anno 1664. mense Majo rursus pruni lapillus, in eandem glandulam delapsus, deglutionem impedivit, ut ante, à quo iterum eodem modo liberata fuit. Similis fere casus anno 1661. mense Decembri à me visus fuit in cive quodam Ultrajectino, cui frustulum crustæ duræ casei in antedicti sinus aperturam illapsus fuit, totamque deglutionem protinus impedivit, verum hujus curatio non tam prompte successit, ut prioris, sed aliquot dierum molestiam nobis exhibuit, atque incurvo rostrato forcipe, eum in finem fabricato, illud casei frustulum fuit extrahendum.

Whartoni  
error.

Whartonus, præter omnem rationem, putat has glandulas, quæ vix notabili sensu tactus præditæ sunt, esse verum & primum gustus organum: præterea existimat materiam pituitosam è cerebro ad has glandulas defluere per nervos quasi verò crassa & viscida materia per angustissimos & invisibiles nervorum poros tam copiosa defluere possit. Verum hæc non egent refutatione, quam tamen supra latius damus lib. 1. cap. 16. & infra lib. 8. cap. 1.

Infra dictas tonsillas adhuc duæ aliæ glandulæ inferiori laryngis regioni adstant, utrimque una, ad latera primorum aliquot annulorum asperæ arteriæ. Hæ quia pluribus arteriis & venulis donantur, habent substantiam magis sanguineam & solidiorem quam aliæ glandulæ, atque inter secundum cultello magis resistunt. De usu harum dubitatur: nonnulli illas conditas putant, ut viscosa ac pingui humiditate laryngem extrinsecus irrigent, ejusque cartilagine ad motum aptiores faciant. Verum cum hic usus parum re-

quiri, & larynx extrinsecus tali irrigatione non indigere videatur, potius animadvertendum censeo, an non aliqua vasa salivalia ab iis exeant.

Dictis glandulis adstant *Parotides*, & *Parotides*. *Glandulæ jugulares*, nec non *maxillares*, sub lingua sitæ, de quibus omnibus vide lib. 3. cap. 24.

Atque sic jam descripsimus organa quibus efformatur vox.

Est autem vox sonus articulatus *vox*. hominis, à glottide, ex percussione respirati aëris, productus, ad animi conceptus explicandos.

Finem hunc respiciens Scaliger, *subtil. Digressio*. exercit. 256. non ineptè ex Aristotele dicit: *Rationem esse manum intellectus, rationis orationem, orationis manum. Manus enim jussa facit, jussa obediunt rationi, ratio vis intellectus est.* Item ex Cicerone: *Naturam tribus præfidiis hominem armasse: ingenio, ad inventionem necessariorum: sermone, ad auxilium: manibus ad perfectionem omnium eorum, quæ vel ingenio excogitasset, vel sermone ab aliis didicisset.* Per vocem enim & sermonem ab aliis petimus illa quæ nobis defunt, & discimus quæ nescimus; ad hæc, quæ fieri volumus, jubemus, quæ communicare volumus indicamus.

Non quivis igitur sonus, ut tussis, screatus, &c. vox est, sed ille tantum qui fit in glottide, & à mente per musculos laryngis dirigitur. Hinc etiam bruta plurima, quamvis habeant vocis organa, ut laryngem suis musculis instructum, pulmonem, &c. tamen articulatam vocem non edunt, quia aer expiratione propulsus, ab anima rationali, qua carent, per dicta organa non artificiose dirigitur, seu articulatur, atque hinc solummodo boatum, hinnitum, latratum, aliunde inarticulatum sonum, Naturæ solius instinctu edunt. Arte tamen pſtaci, picæ, corvi, aliæque nonnullæ aves articulas quasdam voces effingere, loqui, & canere docentur.

## T A B U L Æ XI. EXPLICATIO.

Hæc Tabula exhibet Laryngem cum suis musculis, item Asperam arteriam, oesophagum, nervos recurrentes, & superiorem gulæ partem, cum suis musculis.

### FIGURA I.

Laryngis facies anterior.


- A. Os hyoides membranulis quibusdam tectum.
- B. Inferius ossis hyoidis latus.
- D. Latus superius.
- F. Secundum par musculorum laryngis com-

munium.

- G. Primum par musculorum communium quod male circa exortum adeo angustum est delineatum.
- N. Primum par musculorum laryngis propriorum.
- g. Cartilaginis scutiformis pars.

FIGU-





## FIGURA II.

Laryngis facies posterior.

- L. Epiglottis.  
 H. Cartilago guttalis.  
 V. Nonus laryngis musculus.  
 P. Secundum par propriorum laryngis musculorum.  
 K. Cartilago annularis posteriore facie.

## FIGURA III.

Laryngis facies lateralis posterior.

- V. Nonus laryngis musculus.  
 P. Secundum par musculorum laryngis.  
 R. Tertium par propriorum musculorum laryngis.  
 a. Quarti paris propriorum musculorum laryngis musculus dexter.  
 b. Ejusdem superior pars musculi sinistri.  
 h. Cartilago scutiformis posteriore facie.  
 i. Cartilago annularis anteriore facie.  
 k. Eadem posteriore facie.  
 l. Cartilago guttalis.

## FIGURA IV.

- A. Epiglottidis facies interna.  
 aa. Cartilaginum arytenoidum prominentia.  
 BB. Musculi arytenoides undique soluti.  
 CC. Musculi crycoartenoidei postici.  
 D. Cartilaginis annularis pars latior.  
 EE. Aspera arteriae posterior membranosa pars.

## FIGURA V.

- A. Epiglottidis laryngi conjunctae facies externa.  
 BB. Musculi thyroartenoidei.  
 CC. Musculi crycoartenoidei laterales.  
 D. Cartilago crycoidei.  
 EE. Aspera arteriae pars anterior.

## FIGURA VI.

Laryngis facies lateralis.

- A. Os hyoidis membranulis quibusdam adhuc tectum.  
 B. Inferius ossis hyoidis latus.  
 C. Superior processus cartilaginis scutiformis.  
 F. Secundum par communium laryngis musculorum.  
 G. Primum par musculorum communium.  
 H. Gula.  
 I. Musculus deglutitorius, aliis tertium par.  
 K. Locus musculorum epiglottidis in brutis

ruminantibus, quibus homo destituitur.

- l. Cartilago guttalis.  
 g. Cartilaginis scutiformis pars anterior.  
 M. Glandulae laryngis radici ad asperae arteriae latera annexae.

## FIGURA VII.

- A. Os hyoidis membranulis quibusdam adhuc tectum.  
 B. Inferius ejusdem latus.  
 C. Cartilaginis scutiformis superior pars.  
 D. Superius ossis hyoidis latus.  
 K. Locus musculorum epiglottidis in brutis.  
 L. Epiglottis.  
 h. Cartilaginis scutiformis pars anterior.  
 l. Epiglottis.  
 M. Glandulae laryngis radici appositae.  
 H. Gula.

## FIGURA VIII.

Aspera arteria &amp; oesophagus cum nervis recurrentibus, à parte posteriore.

- AA. Musculus oesophagum constringens.  
 BBB. Oesophagus.  
 CCC. Aspera arteria gulae substrata.  
 D. Membranosa ejusdem pars.  
 EEEE. Nervi sextae conjugationis.  
 FF. Nervi linguae posterius inserti.  
 GG. Nervus recurrens dexter ad arteriam humeralem revolutus.  
 HH. Nervus recurrens sinister circum arteriae magnae truncum descendente revolutus.  
 II. Nervus ad ventriculi sinistrum orificium ac diaphragma tendens.  
 KK. Nervus ad diaphragma descendens.  
 LL. Arteriae jugulares, utrimque una.  
 M. Arteria humeralis sinistra.  
 N. Arteria humeralis dextra.  
 O. Arteria magna.  
 PP. Arteriarum pulmonariarum caudices.

## FIGURA IX.

Superior gulae pars, una cum ejus musculis.

- AA. Musculi cephalopharyngei.  
 BB. Musculi sphæropharyngei.  
 CC. Musculi stylopharyngei.  
 DD. Sphincter gulae distractus.  
 E. Gulae interna facies.  
 F. Gulae pars descendens.

## CAPUT XVI.

## DE OESOPHAGO.

Vide Tabulam XI.



**O**esophagus, Græcis *οισοφάγος*, & *οισμαχος* Latinis Gula, Arabibus *Meri* dictus, est canalis rotundus, seu fistula per quam alimenta ab ore ad ventriculum descendunt.

**Situs.** A faucibus initium sumens, sub trachea, primum recta descendit, hinc ad quintam thoracis vertebra nonnihil dextrorsum, ad nonam verò vertebra rursus laevorsum deflectit, tandemque ad undecimam vertebra diaphragma transiens, superiori orificio ventriculi continuus adnascitur, eumque suspensum tenet.

**Connexio.** Faucibus & laryngi cohaeret per oris tunicam, ipsi & ventriculo continuam: trachea verò & vertebis, aliisque vicinis partibus jungitur per membranas ex dorsi ligamenti ortas.

**Vasa.** Arterias recipit à carotidibus & aortae trunco descendente, sæpe etiam ab intercostalibus, & ab arteria bronchiali, à Frederico Ruysch inventa. Venas paucas interdum ad venam sine pari, interdum ad jugulares emittit. Nervulos habet à paris sexti ramis.

**Substantia.** Substantiam carnosam & membranofam obtinet, ut commode extendi & concidere possit, estque ex tribus tunicis conflata. Harum prima exterior, & cum ventriculo communis esse dicitur: manifesta tamen interest differentia, cum hæc oesophagi oriatur à pleura, altera ventriculi à peritoneo. Secunda, quæ media, eique propria, est valde crassa, mollis, & carnosæ, instar musculi perforati, rotundis transversisque fibris, sibi invicem ex opposito oblique occurrentibus, & decussatim interfecantibus, atque impositis, pertexta. Tertia interna, atque etiam propria, membranæ os faucesque succingenti continua, tenuis, dura, & nervosa est: hanc alii rectis longisque, alii transversis & circularibus fibris donatam esse tradunt: verum hæc adeo exiles & tenellæ sunt, ut de iis haud facile sit judicare.

**Glandulae.** Ad oesophagi humectationem variae glandulae ipsi adstant. Superius scilicet ad linguæ laryngisque latera duæ tonsillæ humorem ad leniendam interiorem cavitatem suppeditantes, de quibus capite præcedente dictum. Exterius eum humectare traduntur inferiores glandulae duæ, in postica oesophagi parte, juxta quintam thoracis vertebra sitæ (eo scilicet loco ubi oesophagus aortae trunco cedens, ad dextram

nonnihil deflectit) ac multoties inter oesophagum & vertebra tantopere occultata, ut non nisi diligentiore investigatione repellantur; quæ habent magnitudinem phaeoli minoris, & figuram renis aliquo modo æmulantur; ac convexa parte oesophago adhærent, cava extrorsum spectant, ita ut in sua sede renis per medium divisi figuram referre videantur. Interdum tamen contingit illas minores esse, & binarium numerum excedere, atque tunc plerumque variis figuris donantur, suntque numero tres, quatuor, vel quinque: atque habent etiam sua vasa, scilicet arteriolas à vicinis arteriis, minimasque venulas, quas ad proximas venas emittunt, item vasa lymphatica, lympham in ductum chyloferum thoracicum deferentia. Whartonus nervos quoque insignes à sexta conjugatione, ut & à duodecimo vertebra pari eas recipere tradit. Verum, cum neque manifeste sentiant, neque moveantur, merito dubitandum censo, an tam insignibus & conspicuis nervis donentur; an non potius nullos, vel saltem minimos tantum, vixque visibiles nervulos recipiant: forte Whartonum deceperunt vasa lymphatica ex iis exeuntia, eaque pro nervis adspexit.

Nonnulli has glandulas non tantum exterius oesophagum irrigare, verum etiam eundem, ad faciliorem deglutitionem, interius humectare credunt. Verum, cum neque extrinseca ista irrigatio necessaria sit, neque à glandulis ullus transitus versus interiorem oesophagi cavitatem protendatur, satis patet illum non esse earum usum: sed illas potius lymphaticum liquorem colligere, vel ex vicinis partibus exsorbere, eumque per lymphaticos ductus chylo affundere, ut dictum lib. I. cap. 12.

Hæ glandulae nonnunquam ab humorum *Musculi.* affluxu ita intumescunt, ut nimium comprimant & angustent oesophagum, sicque potui & cibo, omnique alimento transitum præcludant, hominemque fame & siti ene-cent, quales tres quatuorve casus in praxi nostra occurrentes, vidimus.

Movetur oesophagus tribus musculorum paribus, & sphinctere proprio.

Primum par, quod **Cephalopharinx** nominatur, à capitis cervicisque confinio dimissum, amplo fibrarum plexu in tunicam oesophagi expanditur, eumque sursum elevando, fauces in deglutitione constringit.

Secundum par, **Sphœnopharinx**



gæum dictum, à sinu alæ internæ ossis cuneiformis procedens, lateribus œsophagi & palati oblique implantatur, easque partes ad recipienda alimenta dilatat. Huic nonnulli adhuc aliud par adjungunt, ab eodem principio ortum, in lateralem ac posteriorem faucium & œsophagi partem insertum, quam deorsum trahendo, faucium gulæque cavitatem dilatare tradunt.

Tertiam par, Stylopharyngeum appellatum, ab acuto styloformi processu oritur, teretique corpore descendens, in gulæ latera exporrigitur, eamque cum priore pari dilatat.

Sphincter gulæ, qui etiam Oesophagus musculus nominatur, ab utraque scutiformis cartilagine natus, sphincte-

ris instar œsophagum ambit, eumque constringendo, cibos deorsum propellit.

Usus œsophagi est, ore assumpta deglutire, & deorsum ad ventriculum dimittere: quæ actio peragitur œsophagi fibris, & præcipue dictis musculis. Galenus hanc naturalibus actionibus annumerat. Verum cum deglutitio ex arbitrio pendeat (deglutimus enim quando volumus & lubet) & peragatur motu voluntario interservientibus instrumentis, nempe musculis, meritò animalibus actionibus annumeranda videtur: & quatenus interserviat usui, aut actioni naturali, scilicet nutritioni, tamen non minus est animalis actio, quam respiratio, quæ etiam nutritioni famulatur, & tamen est animalis.

œsophagi  
usus.

## CAPUT XVII.

## DE COLLO.



Edii ventris summitati appendix altior insitit Collum, à colendo, ut volunt, quia exornari solet, nominatum.

Quæ tamen denominatio nobis minime placet, cum collum fuerit longe ante usum & notitiam monilium, aliorumque ornamentorum, ac proinde nobis melius deduci videtur à colle, quod instar collis ab humeris exsurgat.

Hoc collum nos, cum plurimis Anatomicis, thoracis partibus annumeramus, tam propter vertebrarum cum reliquis spinæ vertebrae similitudinem, quam propter communem cum iis usum, quatenus medullæ cerebri communem transitum cum reliquis præbet. Spigelius tamen putat illud ad caput referri debere.

Huic parti caput, tanquam colli eminentiori, impositum est, ut ex eo, tanquam è specula, res appetendas & fugiendas quaquaversum prospiceret, & facili modo circum circa moveretur. Hac parte destituuntur illa animalia, quæ caput immoto trunco non movent.

Cervix.

Posterior ejus pars, etsi una cum anteriore Colli nomine designetur, speciatim tamen Cervix dicitur.

Constat collum ex communibus corporis integumentis, lib. I. cap. 3. & 4. enumeratis: item ex arteriis, venis, nervis, nec non ex septem vertebrae, & octo mus-

culis, de quibus infra suis locis acturi sumus, in historiis musculorum, vasorum, & ossium.

Posterior colli pars descendens, proprie ἀνχλω, Aristoteli ἐπ' ὤμων, quod supra humeros sita sit, dicitur. Huic substant humeri, Græcis ὠμοὶ dicti, partes illæ ad latera colli positæ, quæ initium præbent toti manui, & constituuntur ab eminentia quam caput brachii efficit, dum lato scapulæ ossi jungitur. Huic contraria pars cava, sub brachii articulo sita, Græcis μαχαλὴ, & μαχαλὶς, Latinis verò axilla, & per syncopen ala dicitur.

Epomis.

Humeri.

Axilla.

Hippocrates, 6. epid. sect. 1. & alibi, ex colli crassitie aut tenuitate, judicat de hominis viribus, & tenue collum debiles, crassum verò validas vires significare docet. Neque id male, cum quales sunt colli vertebrae, tales quoque sint vertebrae thoracis, lumborum, & ossis sacri, imò etiam talia sint reliqua omnia ossa, nec non cæteræ partes magnitudini ossium respondentes, ut musculi, arteriæ, venæ, nervi, ligamenta, &c. Si igitur collum sit tenue & debile, omnes reliquæ totius corporis partes, ei respondentes, necessario etiam proportionaliter tales erunt. Si verò crassum & validum fuerit, etiam proportionaliter fortes, magnæ, & robustæ erunt reliquæ corporis partes. Nisi aliqua colli monstrositas fortassis exceptionem det in regula.

Judicium de  
viribus cor-  
poris.

## ANATOMES

## LIBER III.

## DE

## Supremo ventre, seu Capite.

## CAPUT I.

## DE CAPITIS, IN GENERE.



Actenus duas regiones, infimam & mediam, peragravimus, nunc ordo postulat ut supremam quoque perlustremus, & regiam Palladis arcem ingrediamur, hancque eminentissimam aulam, suo instructam satellitio, describamus, in qua hospitatur nobilissimum viscus, cui corporis universi animale ministerium subjecit altissimus Conditor.

Hæc autem suprema regio, seu tertius & supremus hic venter est **Caput**, quo nobiliorum Animæ functionum primarium organum continetur.

Denominatio.

Denominatur autem à *capiendo*: vel quod nobilissimum viscus Cerebrum capiat: vel quod sensus actionesque animales ab eo initium capiant. Græcis appellatur κεφαλή, quasi dicas κεφαλή, aut κεφάλι, quod *putamen* vel *testam* significat, fortè propterea quod cranium instar testæ, nobilissimo visceri circumjiciatur, atque hinc etiam Gallis *la teste* dicitur.

Sims.

Situm est superiore & eminentiore corporis parte, quod Platonici ideo factum putant, quia necesse fuit, & decuit, intellectum, tanquam facultatum omnium Reginam, in sublime attolli. Galenici verò id factum existimant, ut inde, tanquam è specula, res quælibet appetendæ aut fugiendæ, visu, odoratu, audituque melius perciperentur.

Figura, & Magnitudo.

Sphæricam habet figuram, à lateribus nonnihil depressam, & in homine præ cæteris animalibus magnitudinem insignem: utque in eo nobilissimum viscus cerebrum tutius consisteret, præter alia integumenta, undeque ossea galea circumdatum est, quæ totius capitis figuram sustinet ac conservat: de qua videatur *lib. 9. cap. 3.*

Figuræ autem & magnitudinis convenientem proportionem per quatuor lineas explorat Spigelius, *anat. lib. 1. cap. 8. Ut*

*partes, inquit, capitis inter se consentiant, quatuor æquales lineas requirit. Prima est, quam faciei lineam vocabimus, & ab imo mento ad supremam frontem pertingit. Altera est, quam occipitis dicemus, & à vertice usque ad colli primam vertebram ducitur. Tertia est frontis. ab uno temporum ad alterum excurrentis. Quarta denique ab una aure (quo loco processus sunt, mamillares) ad syncipitis elatiorem partem perducta. Hæ quatuor lineæ si æquales invicem sint, caput proportionatum vocetur; sin ad inæqualitatem quandam declinaverint, tantum à justa & naturali constitutione abesse, quantum ad hanc accesserint propius, dicantur. Si enim ex his lineis ea quæ faciei est, longior fuerit, caput longum dicitur; si brevior, brevius. Si frontis lineæ longior cæteris, caput latum erit: si occipiti, caput acuminatum. Si omnes æquales, rotundum & naturale: si omnes inæquales erunt, aut quadam, aut plures, oriatur illa capitis forma, quam φoξὸν vocant Hippocrates & Galenus.*

Dividitur caput in partem capillatam, & non capillatam, seu glabram: illa **calva**, hæc **facies** dicitur. Divisio.

Calva in **synciput**, **occiput**, & **tempora**. Facies verò in **frontem**, eique subjectas partes, **nasum**, **genas**, &c. faciei nomine speciatim insigniri solitas, distinguitur.

A nasi summitate usque ad capillos **Frontis regio** se extendit: hinc **Synciput** ad futuram coronalem progreditur: inter quam & lambdoidalem futuram **Bregma** seu **Vertex** comprehenditur: cui laterales partes **Tempora**, ossibus temporum inter aures & oculos circumscripta, adstant: posterior pars à futuræ lambdoidalis principio, usque ad primam cervicis vertebram, **Occiput** nominatur. Ossium verò capitis latior divisio videnda inferius, *lib. 9. cap. 5. ad 10.*

CAPUT

## CAPUT II.

## De Pilis, eorumque generatione.

**S**ecundum communem ordinem, capitis partem capillatam primo diligenter perscrutabimur, plurimaque in eo latentia in lucem proferemus.

In hac aliæ sunt partes externæ, nobilissimo visceri ad ornamentum & tutelam circumjectæ: aliæ sunt internæ.

Definitio.

Inter externas omnium primi occurrunt Pili, qui sunt corpora tenuia, longa, frigida, sicca, & flexibilia, è cute epullulantia. Dico, è cute, quia rarissime ex aliis partibus erumpere visi sunt. Sic quod è corde aliquando produsse observatum sit, diximus lib. 2. cap. 6. Ante multos annos vidimus in uxore Hermanni van Leuwen, civis Ultrajectini, è foedo plurimumque foetente cruris ulcere tam enormem pilorum copiam excrevisse, ut in curatione magnum nobis impedimentum exhibuerint, & identidem nos coegerint cauteriis potentialibus fungosam putidamque interioris ulceris carnem, pilorum adeo feracem, erodere.

Denominatio.

Denominati videntur Pili, à πῖλον, qua voce, cum Græcis, tum Latinis, significatur quidquid teres & oblongum est. Alii nomen illud deducunt à πῖλον, (eliso T.) quod est *pluma*, quia ut plumæ avibus, ita pili sunt hominibus. Alii alias nominis derivationes adferunt, sed nimis longe petitas.

Illud autem pilorum nomen generale est, atque competit omnibus totius corporis pilis, quacunque parte erumpentibus. Verum in capite, præter generale, etiam speciale nomen obtinuerunt, & Latinis Capilli, quasi capitis pili; Græcis κῆρυξ, à κείρω, incido, dicuntur; eosque veteres τεῖχος ἐν τῇ κεφαλῇ, pilos in capite nominarunt. Etiam in utroque sexu Crines appellantur: ac speciatim in viris ὄβερα, Casaries, à frequente casione; in foeminis verò κόμη, à κομίζω, curō, Latinis Coma, à curiosiore cultura appellantur.

Horum capillorum Natura foecundam segetem, cum in capite superiore; tum etiam speciatim in viris circum os ejusque confinia, produxit, ut isto tegumento nimia frigoris violentia, nimisque radiorum Solarium fervor, à nobili viscere melius averteretur: Præterea, ut divinum animal, præ cæteris, ornamento hoc decorum fulgeret, nam

*Turpe pecus mutilum, turpis sine gramine campus,*

Et sine fronde frutex, & sine crine caput.

Hic jam aliquis quærat, si pili etiam ornamentum causa in capite dati sint, quare illud ornamentum viris in barba magis excrecat, quam foeminis? Fit hoc, quia summus Protoplastes, sicut inter sexuum genitalia instrumenta, ita quoque inter eorum ornamenta, distinguere voluit, eumque in finem viris barbam circum os pro ornamento virili concessit, quæ mulieribus turpis & indecora fuisset: ut sic primo intuitu, absque inspectione partium genitalium (quæ sine pudore conspici nequeunt, atque hinc *Pudenda* appellantur) ex solis externis ornamentis sexus distinctio cognosci posset. Atque hinc etiam pueri, quia ad virilitatis perfectionem nondum pervenerunt, barba destituuntur, eaque ipsis tunc succrescit, cum ad virilem actum, scilicet generationem, apti fiunt. Alia naturalis ratio hac de re dari non potest, cum in utroque sexu partes circum os æqualiter sint formatæ, & in iis tamen distinctio illa fiat per dictum ornamentum, idque eo tempore, quo illa distinctione maxime opus esse incipit, nempe pubertatis & adolescentiæ tempore, quo propter facultatem procreatricem exorientem, pueri à puellis, externo aliquo visui obvio signo, distingui & internosci debuerunt.

Quare mulier non sit barbata.

Erumpunt pili ex cutis poris, non quibuscunque, sed iis solummodo qui certam convenientem aptitudinem ad istam eruptionem habent: quæ aptitudo cum in poros volæ manus, & plantæ pedis, atque etiam in cicatricibus desit, hinc iis in locis nulli pili excreverunt.

Eruptionis locus.

Radicibus seu bulbulis cuti inhærent, & quia in capillata capitis parte maxime copiosi & prolixi educendi erant, hinc cutis ibidem multo crassior est, quam in aliis corporis partibus, è quibus pauciores & tenelli enascuntur.

Irradiatio.

Dividuntur pili in congenitos, & post-gemitos. Illi sunt cum quibus nascimur, quales sunt pili capitis, palpebrarum, & superciliarum. Hi sunt, qui post natiuitatem certo quodam tempore nonnullis in locis efflorescunt, quales sunt pili faciei, pubis, pectoris, axillarum, nasi, aurium, podicis, tibiæ, alique qui aliis corporis partibus erumpunt.

Divisio.

Sunt autem corpora heterogenia (et si primo conspectu homogenia esse videantur) ut ex eo patet, quia vivunt & nutriuntur: vita enim non subsistit in ullo corpore

Sunt corpora heterogenia.

corpore homogenio ac simplici; & alimenti coctio, preparatio, utilis ab inutili secretio, ac denique appositio & assimilatio, peraguntur necessario à minimarum particularum diversitate. Atque hinc, licet Aquapendens, aliique varii, illas partes similes esse dicant, tamen illud duntaxat grosso modo intelligendum est, non quod re vera homogeniæ & similes sint, sed ad conspectum tales esse videantur, ut supra latius docuimus, *lib. I. cap. I.*

*Forma.*

Forma pilorum duplex est, alia essentialis, alia accidentalis. Essentialis est illa, quæ dat pilis suum esse & vivere, scilicet eorum anima: & quia hæc forma nobis ignota, ejusque præsentia tantum sola mente perceptibilis est, nec verbis commode exprimi potest, nos cum Medicis (qui pro forma partium accipiunt earum temperiem, à qua omnis actio procedit) dicemus, formam essentialem esse eorum temperiem frigidam & siccam. Accidentalibus pilorum forma est eorum qualiscunque figura, oblonga, incurvata, recta, crispa, rotunda, quadrata, &c. Nam licet pili primo aspectu solidi & exacte teretes esse videantur, tamen penitiori inspectione etiam alia in iis observantur. Spigelius dicit illos esse quadratos, & Riolanus illos esse cavos: nos dicimus pilos porosos existere, alioque esse quadratos, alios triangulares, alios rotundos. Omnes enim hæc figuræ manifestè apparent, si pili in exiguas portiunculas secti microscopio inspiciantur. Pori autem maxime secundum longitudinem eorum extenduntur, ut in porcorum setis optime apparet.

*Causa efficiens.*

Efficiens pilorum causa est eadem quæ aliorum corporum generationem perficit, scilicet conveniens calor in aptam materiam agens, eamque ad animationem pilis propriam disponens, & licet in corporibus mortuis, in quibus pili aliquamdiu succrescunt, nullus calor superesse videatur, tantus & talis tamen superest, qui pilorum generationem promovere potest, utpote ad quod opus eximius seu excellens calor non requiritur. Hic calor ex apta materia format, animat, & protrudit pilos, qui protrusi ab ambiente frigore magis exsiccantur, & duriores fiunt. Atque hinc etiam pili congeniti, quia diu humido loco substiterunt, in primo natis valde molles & humidi sunt, sed nato homine, mox ab aëre sicciores evadunt.

*Primus ortus.*

De primo ortu pilorum est aliqua dissensio inter Philosophos, dum alii illos in prima partium delineatione, una cum cæteris, ex semine, alii illos non ex semine primitus formari existimant. Priores ad sententiæ suæ probationem varias adferunt rationes, & de pilis congenitis, quod illi ex feminis portione terrea delineati sint, nullum du-

bium esse posse judicant, cum materia pilorum sit femini maxime analoga, atque hinc nati pili substantiam, imò & plerumque etiam formam & colorem pilorum alterutrius parentis referant; cum quoque in hominibus femine abundantibus pili maxime luxurient, cum è contra per multam Venerem, & feminis copiosam excretionem, vel defectum (ut in senio) excident. De postgenitis dicunt, quod illi ab eadem feminali materia in partibus pilandis hærente, at nondum in actum suscitata, sed postea, suo tempore per calorem turgescunt, gignantur & erumpant: eodem modo sicut dentes, qui aliquamdiu post nativitatem, ex conveniente in maxillis latente feminali materia, gignantur & erumpunt. *Posteriores* longe melius sentiunt, pilos in prima formatione, una cum reliquis partibus ex femine non delineari, sed postmodum, ubi corporis partes modò delineatæ, & incremento nonnihil adauctæ sunt, in earum quibusdam, ad hanc rem aptioribus & fecundioribus, ex allato nutrimento succrescere peculiarem illam materiam generandis pilis aptam, ex eaque tandem per calorem agitata, efformari ac suscitari pilos, peculiari à cæteris partibus anima & vita donatos, quia non cum cæteris ex eodem femine, sed seorsim ex alia materia postmodum genita suscitati ac vitalitate donati sunt. Quod autem vivant per animam vegetantem peculiarem, cum reliquis corporis partibus animatis nihil communionis habentem, ex eo constat, quod non tantum vivente, verum etiam mortuo homine adhuc vivant, nutriantur & increcant (istius rei notabile exemplum vide *ad finem hujus capituli.*) eodem modo quo polypodium, muscus, dulcamara, aliæve plantæ in antiquis arboribus crescunt, & ante, & post arborum mortem, quia singulæ habent animam propriam, distinctam à forma seu anima arboris ex qua, & in qua crescunt.

Pilorum magna est diversitas, quæ licet in omnibus corporis pilis, tamen in capillis est omnium maxime observabilis. Nam differunt:

1. *Copia:* hinc alii rari & pauci, alii admodum copiosi sunt ab ipso ortu, vel post ortum valde copiosi evadunt, idque propter convenientis materiæ, è qua generantur, copiam vel paucitatem. Quibus postmodum calvitium contingit, illud ipsis non à sola paucitate, verum etiam à materiæ pravitare (ut in leprosis) vel ineptitudine, aut pororum è quibus prodeunt, oclusionem fieri solet. Admiranda fuit illa capillorum copia in Absalone, filio Regis David, de qua scribit textus sacer, 2. *Regum, cap. I4. vers. 26. Quando tundeat capillum (semel autem in anno tundeatur, quia gravabat eum casaries)*

*casaries*) ponderabat capillos capiti sui ducentis siclis, pondere publico. Siclus autem apud Hebræos pendebat unciam unam.

2. *Craſſitie*: hinc aliis tenues, aliis craſſiores ſunt, propter pororum per quos tranſeunt, ſeu viarum diverſam latitudinem; & materiæ redundantiam; vel inopiam.

3. *Longitudine*: hinc aliis breviores, aliis longiores ſunt, & in genere mulieribus multo longiores quam viris, propter materiæ redundantiam, & pororum aptitudinem: nam ſi pori nimis laxi ſint, excidunt antequam ad inſignem longitudinem perveniant: ſi verò ſint anguſtiores; tunc radices iis firmius inhærent, & accedente materiæ copia longius excrescunt.

4. *Externa qualitate*: hinc alii molliores, alii durioreſ, alii criſpi, vel læves, ſicci, vel humidi. Quæ omnia procedunt, partim à diverſitate materiæ, è qua generantur, in ſiccitate & humiditate: partim à pororum, è quibus erumpunt, varia diſpoſitione in rectitudine, tortuoſitate, aliave: unde etiam fit, quod alii glomerati ſine ordine erumpunt, ut in capite, pube, barba, &c. alii ordine quodam ſeriatim ſint diſpoſiti, ut in palpebris.

5. *Colore*: hinc aliis ruſſi, aliis nigri, aliis albicantes, cani, vel medii coloris ſunt.

*cauſa colorum.*

Procedit autem coloris illa diverſitas à diverſitate humorum qui admisceantur iſti ſucco quo pili nutriuntur, cui ſi admixta ſit pituita, pili erunt albicantes, atque hinc videmus pituitoſos, qui ab ortu ſunt frigidioris temperamenti, habere capillos albos: ſi fuligines nimio calore, nimiaque coctione quaſi exuſtæ admisceantur, erunt nigri, hinc calidiores, quibus coctiones bene procedunt, indeque huiusmodi fuligines copioſiores generantur, nigros habent capillos: ſi flava bilis admisceatur, erunt ruſſi, quales ſolent eſſe bilioſi. Si uno cutis loco pituita, altero dictæ fuligines, vel bilis, redundant, erunt pili diverſi coloris, uno loco albi, altero nigri, vel flavi. Atque tales colores ab iſtis humoribus cuti impactis, tunc etiam multoties in ipſa cute (quod in brutis frequens eſt) conſpiciuntur: unde Ariſtoteles, *lib. de color. & alibi*, dictos humores cuti impactos, eique colorem conferentes, non conſiderans, ſcripſit, *Cutem conferre ad colorandos pilos, eoſque cuti concolores fieri*. Sic nonnullos una capitis parte canos, altera nigros capillos habere, & in canibus atque equis variegatis, huiusmodi diverſos colores ſimul in cute & pilis videmus, eo quod iis cutis ab ortu talibus diverſis coloribus prædita fuerit; qui colores conſtantes manent, quo uſque tales humores cuti impacti perſiſtunt: quibus ſi forte poſtea alii humores admisceantur, tunc immutatur color: ſic equis variegatis, ut

& canibus, verſus ſenectutem, à pituitæ incremento, ejuſque copioſiore admittance, pili albescunt, & quæ maculæ antea nigrae erant, canescunt.

Hinc ſimul etiam patet quare Ægyptiis, Arabibus, Indis, Hiſpanis, & Italis, pro maxima parte, nigri ſint capilli, quia nempe calidas inhabitant regiones, & vino forti, alioque victu calido utuntur, à quo calore quaſi exuſtæ fuligines copioſiores generantur, quæ ſucco pilorum alimentario admixtæ, ei talem colorem imprimunt, qui per eum confertur capillis. Contra, Hollandis, Anglis, Scotis, Danis, aliisque Septentrionalibus gentibus ſubalbicantes ſunt capilli, quia frigidiores inhabitant regiones, hincque multum pituitæ in iis generatur, quæ ſucco pilorum alimentario albicantem colorem confert: atque inde eſt quod inter illos pauciores ſint qui verè ſeu exactè nigros capillos habent, at plurimi quibus uſque ad mediam virilem ætatem color eſt medius inter album & nigrum. Adde, quod hac de cauſa in hiſ nationibus etiam plurimi citius canescant, cum è contra in calidioribus regionibus canities longe tardior accedat.

Hanc eſſe veram cauſam varietatis & mutationis coloris pilorum; ex eo liquet, quod capilli non ſemper retineant eundem illum colorem quem ab ortu habuerunt, ſed prout hominis temperamentum mutatur, & alii atque alii humores in corpore generantur ac cumulantur, hinc etiam mutantur pilorum colores. Sic refert Marcellus Donatus, *hiſtor. med. mirab. lib. 1. cap. 1.* hiſtoriam patritii N. qui inclinante ætate, cum jam totus canus evaliſſet, poſtmodum plurima bile ſanguini permiſtâ in corpore redundante, non ſolum ejus cutem auriginolum colorem contraxiſſe, ſed etiam omnes canos pilos canitiem perdidiffe, & luteo colore, ad viridem inclinante, tinctos fuiſſe.

Hoc tamen ex jam dictis concludi nolim, pilos ex huiusmodi humoribus, pituitoſis, ſanguineis, bilioſis, vel ex fuliginibus generari, vel iis, tanquam conveniente alimento, nutriri: nam generantur & alimentum ſumunt ex ſpecifico quodam ſucco vel humore; peculiari modo præparato, quem ex parte, cui inhærent, deſumunt (hæc ſuccum illum præparat ex ſanguine, aliove quocunque humore ad eam veniente) ſed hoc volo, pro ut ſuccus ille nutritivus huius illiuſve humoris admittance tingitur, hinc talem colorem pilis imprimi. Sic à bile admixta in bilioſis ſiunt ruſſi: à pituita albicantes: cute à vitioſis humoribus infecta, colorem acquirunt humoris eam inficientis. Hinc eſt quod Hippocrates, *lib. de nat. pueri*, ſtatutum reliquerit, quod qualemcunque humiditatem caro attraxerit,

Tt

sive

sive albam, sive ruffam, sive nigram, tali colore etiam pili tingantur. Cum quo consentit Trallianus, *lib. 1. cap. 1.* Hoc sensu scribit Alexander Aphrodiseus, *problem. 3.* pilos aliquando propemodum aureolos fieri, cum vitellina bilis pituitæ admiscetur, id est, cum illi duo humores simul admiscuntur succo pilorum alimentario. Sic ætate ad senectutem vergente, pili indies magis magisque cani & albicantes fiunt, non ob defectum materiæ alimentariæ, (hanc non deficere, testatur, quod multis sepius pili sint satis copiosi & firmi, qui in capite solito modo excreverunt, ut in juventute) sed quia ratione frigidioris ætatis pituita copiosior in corpore generatur, & isti succo, quo pili nutriuntur, admiscetur, eumque album facit.

Quare capilli primi canescant.

Ex his jam manifeste patet, quare pili in capite citius canescant, quam in pube, axillis, cruribus, &c. quia scilicet in nulla corporis parte tantum pituitæ cumulat, quam in capite, quæ cuti ejus infusa; non potest non in frigidior senili ætate pilorum materiæ alimentariæ multo arctius inhærere, quam in juventute, in qua ob majorem calorem crudior humor minus coquitur, & magis dissipatur: ab hac autem pituita arctius admixta color albus primò isti materiæ, hinc pilis infertur. In aliis verò partibus, pube, axillis, pectore, &c. quæ calidiores sunt, pituita serius cumulat, atque hinc pili in iis serius canescunt.

Signa temperiei corporis.

Medici, Galenum secuti, ex colore pilorum, etiam temperiei, tam ipsius cutis, quam corporis totius, signa desumunt. Ita color albus pituitosam, rufus biliosam, mixtus mediam temperiem indicat. Imò nonnunquam morbi quoque occulti, & animi mores ex pilorum constitutione innotescent. Sic afflictio & sanatio lepræ, quæ describitur in veteri testamento, potissimum ex colore pilorum dignoscebatur. Pili longi, lenes, & recti, animum mitem ac benignum: crispì verò animum inconstantem, iracundum, in rebus agendis promptum & alacrem: molles pusillanimitatem: duri verò, præcipue ad nigredinem vergentes, animi & corporis firmitudinem indicant:

— Dura per brachia setæ

Promittunt atrocem animum.

Post hæc omnia, ne in descriptione historiarum pilorum quippiam desideretur, etiam inquirendum qualis sit materia è qua pili generantur, & qua nutriuntur, cum illos in formationis principio, una cum cæteris partibus, ex semine non delineari supra docuerimus. Illa materia est succus quidam crassus, terrestris, viscidus, ex sanguine, aliove quocunque humore genitus, ac specifico modo præparatus. Materiæ crassities seu terrestritas patet ex pilorum du-

ritie, visciditas ex firmitudine & flexibilitate.

Ex hac materia, sive ex hoc succo, in partibus ad pilorum generationem & implantationem aptis, à calore agitato, generantur, animantur, & protruduntur pili eodemque postmodum nutriuntur: hic quippe succus per eorum radices è corpore elicitur, & per poros usque ad extremitates defertur (eodem modo sicut à plantæ radicibus alimentum ex terra assumitur & toti plantæ, usque ad extremum communicatur) sicque eos nutrit, & in substantiam eorum transit, haud absimili modo, atque in plantis nutritio peragi ac procedere solet.

Hunc succum dico gigni, seu coqui, & præparari in quibusvis partibus è quibus pili erumpunt, idque tali tempore quo partes illæ ad hujusmodi materiæ præparationem aptæ evaserunt; quam aptitudinem cum aliæ partes pilandæ citius, aliæ serius consequantur, hinc fit quod pili in aliis maturius, ut in capite, palpebris & superciliis; in aliis tardius erumpant, ut in barba, pube, axillis, pectore, &c.

Riolanus hac de re aliter sentit, & hunc succum in ipsis partibus pilandis non gigni seu præparari judicat, sed, *anthropog. lib. 6. cap. 52.* ex Hippocratis *lib. de gland.* docere & probare nititur, pilorum materiam à solis glandulis suppeditari. Præter cutis, inquit, aptitudinem, requiritur substantia glandulosa, qua & cutem humectet, & materiam pilis generandis ac nutriendis suppeditet. Quare ubi canosa partes sunt, & humectæ, ibi etiam glandula, cujus signum est, quod ubi est glandula, ibi etiam pili. Pili ex glandulis oportunitatem habentes, nascuntur & auferunt, colligentes id quod in extremitates redundat & effervescent. Ubi autem corpus siccum est, neque glandula, neque pilus inest. Glandula porro sunt ab utraque aurium parte, juxta jugulares colli venas, & pili etiam ibidem. Item sub alis utrimque, & glandula, & pili sunt. Inguina & pubes, similiter ut alæ, & glandulae, & pilos habent. Majus autem est cerebrum quam alia glandula, & capilli etiam majores quam alii pili. Verum quamvis hæc à Riolo fatis speciose, quasi ex Hippocratis sententia, proponantur, tamen nullo solido fundamento innituntur. A contrario enim si argumentemur, sequetur, Ubi non est glandula, ibi non generantur pili, quod falsum esse multa docent: nam tibiæ, cuti nullæ manifestæ glandulae substernuntur, in quibus tamen pili abunde excreverunt in plerisque viris: præterea viris in mento & labiis luxuriant, in quibus etiam vix ullæ glandulae alicujus momenti inveniuntur (frustra Riolo dictam materiam à glandulis nimis longe remotis, parotidibus scilicet sub auribus, aliisque quibusdam sub lingua sitis, ad mentum & labia deducere,

Generatio-  
nis modus.

An materia  
pilorum à  
glandulis  
suppeditetur.

Materia è  
qua.

deducere, imò vi potius detorquere velle videtur) quinetiam pilos in corde nonnunquam succrevisse visum est (hujus rei aliquot exempla ex aliis supra citavimus, *lib. 2. cap. 6.*) in quo nullas glandulas quis demonstrabit: atque in cadaveribus quoque exsiccatis pilos excrevisse compertum est (exemplum videatur ad finem hujus capituli) in quibus saltem exarefactæ glandulæ nihil ad pilorum materiam suppeditare possunt. Præterea si glandulæ illam coenofam pilorum materiam suppeditant, & ista Riolani regula, *Ubi est glandula, ibi etiam pili*, vera sit, quare mulieribus ubique iisdem partibus pili non excrevunt, in quibus excrevunt viris, cum tamen illis non pauciores sint glandulæ, quam his? quare illis in mento & labiis barba non æque erumpit, atque his? quare ipsis pectus hirsutum non evadit, ut viris, cum tamen in eo valde magnas mammarum glandulas obtineant, atque hinc in earum pectore pili magis luxuriare deberent? Denique, sub finem Riolanus admodum male cerebrum glandulis annumerat, nam illud glandulam non esse docebimus *sequente cap. 5.*

An materia pilorum sit excrementum.

A nostra ante proposita, atque etiam à Riolani doctrina, omnino Galenus, cum eoque plurimi Medici & Philosophi dissentiunt, qui putant, & docent, materiam, ex qua generantur & excrevunt pili, non esse peculiarem aliquem succum eum in finem in partibus pilandis specifico modo præparatum, aut à glandulis (ut vult Riolanus) suppeditatum, sed esse excrementum tertiæ coctionis, humidum, fuliginosum, crassum, & terrestre, ex adipe cuti subtrato, vel ex mucoso ac viscoso humore, qui cuti subjacet, eique adhæret, excitatum, quod radicibus pilorum continuè appositum, & præcedentes particulas paulatim ulterius extrudit, sicque eos in longum excrevtere facit. Ex qua sua opinione tandem hæc concludunt, *Primo*, nullam nutritiam materiam per ipsos pilos usque ad eorum fines permeare, sed eorum incrementum solummodo fieri per dictam appositionem quæ ad radices fit, atque hinc esse quod secundum omnes dimensiones non excrevunt. *Secundo*, pilos non esse partibus corporis annumerandos: partim, quia non nutriuntur succis alimentariis, sicut reliquæ partes, sed ab excrementitiis fuliginibus exsurgunt: partim, quia non habent vitam & animam cum reliquis partibus communem: atque hinc pilis resectis vel evulsis, homo nulla corporis parte privatus censetur: & homine mortuo animaque privato, vivunt tamen, aut saltem aliquamdiu adhuc crescunt pili.

Objectiones. Huic sententiæ multa validissima argumenta ab aliis obijciuntur.

1. Si ex tali excremento fuliginoso ge-

nerarentur pili, tunc in corporibus euchymis, in quibus minimum hujusmodi excrementorum redundat, pili paucissimi generarentur, in cacochymicis plurimi; cum tamen experientia doceat, illos in euchymis optimè excrevtere, in cacochymis verò non modo non bene crescere, sed etiam excidere, atque sic alopeciam fieri, qui affectus curatur per purgationes cacochymiam tollentes, & per bonam diætam, quæ purum sanguinem suppeditat, fuliginosa verò excrementa consumit, & generari prohibet.

2. Pilos etiam tali excremento non nutrir, seu per ejus appositionem augeri, ex eo liquet, quod resecti, sicque in suis finibus obtusi facti, obtusi manerent, cum tamen è contra in fine primo excrevunt & acuti fiunt.

3. Idem etiam ex eo manifestum est, quod evulsis capillis, sæpe radicibus eorum sanguis adhærere conspiciatur, ex quo in ipsa cute excocto, ac specifico modo in partibus pilosis præparato, conficitur succus ille qui pilos proxime nutrit, & paulatim per ipsas pilorum cavitates aut porositates usque ad eorum fines pro nutrimento progreditur. Illud ipsum adhuc clarius innotescit in Plica Polonica, morbo sic dicto, in qua ex præcis pilis sanguis effluere dicitur; procul dubio crudior, qui necdum in cute in talem succum mutatus fuit. De pilorum autem cavitatibus modo dictis, nulum dubium esse potest, nam quod illæ interius secundum longitudinem eorum excurrant vel extendantur, manifeste advertitur, si in minutas particulas confissi, microscopio inspiciantur: sic in Alcis vivæ pilis cavitates sine microscopio facile videri, tradunt Gesnerus, & alii. Præterea, pili nutriuntur eodem modo quo avium pennæ seu plumæ, sunt enim ejusdem propemodum naturæ: at pennæ peculiarem quandam alimentarium succum in sese continent ac conficiunt, in cavitate quadam usque ad fines earum extensa (hic succus ex sanguine ipsis confici videtur, cum singulæ arteriolam usque in earum cavitatem extensam obtineant) igitur quid ni etiam simile quid habeant pili? scilicet peculiarem succum alimentarium, & cavitatem per quam succus ille usque ad eorum fines defertur, sive succus ille ex sanguine, sive ex aliis humoribus gignatur.

4. Si pili per morbum albescerent, secundum Aristotelem, postea redeant ad naturalem colorem, certum est illos non per appositionem propelli, sed vere per totam substantiam nutriri. Ut etiam ex eo patet, quod in canitie pili incipiant albescere ad finem, aut saltem æqualiter secundum totam longitudinem; cum alioqui, si per appositionem antedictam res procederet,



deret, illa albedo à radice incipere deberet, & nigredo quæ antea pilis inerat, deberet permanere, eique paulatim alia nova albicans pars apponi. Nec minus ex eo liquet, quod nonnulli una nocte cani facti sint, nempe humoribus nutritiis per totam pilorum longitudinem subito mutatis.

5. Quod pili dicantur non excrefcere secundum omnes dimensiones, illud minime verum est: nam etsi in longitudinem maxime excrefcant, tamen etiam in latitudine aliquod incrementum animadvertitur; sæpe enim videmus pilos tenuissimos & molles, postea fieri crassiores & duriores, præcipue in barba: sic etiam in virginibus puellis, capilli sæpe in pueritia sunt tenuissimi, postea tamen, licet in iis nunquam refecentur, ad justam crassitiem & longitudinem perveniunt, quos crassitie limites haud excedunt, non magis quam dentes, ossa, nervi, venæ, aliæque partes, quæ justam magnitudinem adeptæ, subsistunt, nec ulterius increfcunt; quippe certus magnitudinis terminus, & certa figura singulis partibus à summo Creatore præscripta sunt, unde etiam fit, quod pili secundum latitudinem tantum non increfcant, quantum secundum longitudinem.

6. Si pili nutrentur fuliginoso excremento tertiæ coctionis, excrefcerent in immensam longitudinem, quin etiam continue & toto vitæ tempore augerentur, quia talis excrementi continuus est proventus, hinc etiam continuè radicibus appositum pilos ulterius protruderet. At è contrario, videmus pilos, cum ad certam aliquam longitudinem pervenerunt, ulterius non increfcere, ut liquet in fœminis, quibus illi in capite nunquam refecantur: ut etiam liquet in pilis crurum, pubis, pectoris, aliarumque partium.

Hæc argumenta multorum mentibus illam infixerunt opinionem, pilos verè esse partes corporis, & communi vita ac nutrimento cum reliquis partibus frui.

*Solutio.*

Si utriusque opinionis rationes bene ponderentur ac perpendantur, priorem pro maiore parte rejiciendam esse comperiemus. Sed interea in posteriore, quæ verior est, adhuc aliqua etiam desiderantur. Nam, *primò*, bene docet pilos non protrudi per solam alicujus materiæ appositionem ad eorum radices factam, sed illos secundum totam substantiam nutriri: verum non explicat, quomodo per talem nutritionem possit subita fieri canities. *Secundo*, non satis ostendit, an pili sint partes corporis appellandi: neque solvit hunc nodum, quomodo pars aliqua corporis mortuo homine adhuc vivat & crescat. Hæc duo igitur paulo clarius explicanda supersunt.

*Subita canities.*

Quantum ad prius, nonnunquam homines ex ingenti terrore, vel mortis metu,

una nocte aut die canos evasisse, certissimum est; idque ego ipsemet in capitaneo quodam ab hostibus capto, & postridianum suspendium metuente, factum fuisse vidi. Hujus rei plures & variæ historiæ ex Suetonio, Nicolao Florentino, Crantzio, Petro Messia, Scaligero, Adriano Funio, aliisque collectæ, inveniuntur apud Marcellum Donatum, *histor. med. mirab. lib. 1. cap. 1.* & Schenckium, *lib. 1. observat. 1.*

Hujus tam repentinæ mutationis causam, *Ejus causa.* nonnulli statuerunt esse subitam siccitatem, alii subitam putredinem humoris pilos alentis. Sed horum neutrum verum esse potest, cum neutrum tam subito fieri queat. Ego potius id hoc modo fieri arbitror. In magno metu & terrore mente percepto, cor per accidens admodum angitur, atque hinc parum & valde debiliter pulsat, ut nonnulli hac de causa in syncopem incidant: per debilem autem pulsum paucus sanguis ad partes externas impellitur, hinc illæ mox frigent & rigent: deficiente in cute sanguine, mox etiam in succo pilos nutriente mutari potest color, qui ipsi antea ab humoribus sanguini admistis inferebatur: tunc si pituitosi albicantes humores forte antea in cute hæserint, illi mox prædominio sui coloris inficient succum pilos nutriente, qui cum continue pilos usque ad finem pervadat & nutriet, poterit eorum color hinc brevi spatio immutari, & canus seu albicans fieri; quippe substantia eorum est quasi diaphana, omnes colores facile suscipiens, qui ipsi cum alimento conferuntur. Si verò pituita tunc in cutē capitis non hæreat, sed alius humor fuliginosus, nigricans, aliove colore tinctus ibi firmitus impactus sit, tunc terrorem & metum licet maximum, non subsequitur subita canities, & quia frequentius fuliginosi, biliosi, aliive humores cuti impacti hærent, hinc fit quod tam pauci ob ingentem terrorem & metum cani fiant. Verum enimvero dicat aliquis, si hac de causa contingat illa subita canities, ergo postea, cessante terrore & metu, & aliis humoribus ad capitis cutem rursus libere affluentibus, iterum evanescet illa canities, & pili colorem pristinum recuperabunt. Conceditur, si modo tam copiosi affluere possint, ut suo colore prædominium coloris albicantis pituitæ evincere queant: sed plerumque propter sanguinis in terrore affluentis summam paucitatem, ita contrahuntur & à pituita opplentur ac infarciuntur pori cutis, ut affluens postea copiosior sanguis, aliufve fuliginosus, nigricans, vel biliosus flavus humor, vix unquam tanta copia eos subire possit, ut colore suo prædominantis & infixæ pituitæ colorem evincere queat, atque hinc fit quod tam pauci, sive ex terrore metuve ingenti, sive sponte, absque tali

tali occasione cani facti, postea colorem pilorum albicantem rursus immutent. Si tamen aliqui sint, quibus alii humores affluentes albicantis pituitæ colorem evincunt (quod rarò contingit) in illis etiam mutatur pilorum canus color. Hoc vidi in capitaneo ante citato, cui in carcere una nocte capilli omnes ex nigris albissimi evaserant, sed postea paulatim canities illa aliquo modo recessit, ita ut biennio post, fere omnes capilli rursus nigricarent: dico, *fere*, quia nunquam in totum canitiem illam ita superavit, quin quarta circiter pars pilorum cana remanserit. Idem etiam liquet in patritio N. quem ex Marcello Donato ante citavimus, qui fuit canus totus, sed cum postea biliosus evasisset, pili ejus, evanescente canitie, subvirides ac flavi evasere. Illud ipsum etiam hic illic in paucis aliis observatum fuit, quod propter novam aliorum humorum redundantiam canities multum imminuta, & interdum fere ablata visa est.

An pili sint  
partes corporis.

Quantum ad posterius, scilicet an pili sint appellandi partes corporis, ea de re longa sermonis reciprocatione opus non est: diverso enim respectu, modò partes dici, modò non dici posse videntur, secundum diversas nempe partis definitiones. Si enim hanc ponamus definitionem: *Pars corporis est qualibet substantia corporea, illud cum aliis complens atque integrum faciens.* Tunc pili erunt partes corporis dicendi, nam re vera cum aliis partibus complent humanum corpus, haud secus atque folia arborem, plumæ avem: sicut enim arbor sine foliis, & avis sine plumis, ita etiam homo sine pilis vix omnibus numeris completus dici potest, quamvis sine iis vivere possit. Si verò partem hoc modo aliter definiamus: *Pars est corpus toti coherens, communique vita conjunctum, ad illius functionem usumve comparatum.* Tunc pili vix possunt nominari partes corporis, nam etsi vivant, non vivunt tamen communem vitam cum reliquis partibus animatis, sed vitam peculiarem vegetabilem: haud secus atque moschus, vel herba aliqua, ut polypodium, in arbore crescens (quamvis ad complementum arboris non faciat, sicut pili ad complementum hominis) separatam & diversam ab arbore vitam vivit, licet ex arbore viva nutrimentum suum desumat: vitæ diversitas ex eo patet, quia mortuâ arbore adhuc vivit & crescit, quo usque vel ex arbore, vel aliunde conveniens nutrimentum habere potest. Sic etiam pili, quo usque è corpore, vel vivo, vel mortuo, conveniens nutrimentum ipsis confertur, suam vitam peculiarem vivunt, & ad justam magnitudinem increscunt: quam vitam reliquis partibus non esse communem, docet illud, quod mors pilis non est com-

munis cum reliquis partibus, nam ablata animâ moriuntur omnes partes eadem anima animatæ, sed non pili, utpote quos per peculiarem seu propriam, qua donati sunt, animam, diu post hominum mortem vixisse & increvisse, multoties observatum est. Unde liquet illos non esse communi cum cæteris partibus anima animatos, neque talem vitam vivere, qualem vivunt reliquæ partes.

Quod autem pili sanguine nutriantur in vivis hominibus, hoc non probat illos esse partes communi vita conjunctas: nam non nutriuntur proxime & immediate isto sanguine, sed peculiari succo, qui in vivis ex sanguine quidem conficitur, sed tamen etiam ex aliis humoribus confici potest, ut manifestum fuit in illa muliere antè citata, cui ex foetido cruris ulcere copiosissimi pili enati fuerunt; ut etiam manifestum est in corporibus mortuis (non tamen quibuscumque, sed illis solummodo, quæ sine humida putredine paulatim exsiccantur, sicut fit cum cadavera, antequam incipiunt putrescere, siccissimo loco, à calore externo remoto, sepeliuntur, cujus notabile exemplum mox subjungemus: vel cum exemptis intraneis, ad diuturniorem conservationem. Aromatibus & balsamis à pollinctoribus condiuntur) in quibus longo post mortem corporis tempore, cum nullus sanguis amplius superesset, capillos in notabilem longitudinem excrevisse, variis Medicorum & historicorum testimoniis constat. Quod certum indicium est, illum succum eos nutrientem tunc non ex sanguine, sed ex alio quodam humido in cadavere residuo generari, quod quia in cadaveribus paucum est, hinc etiam capilli in iis tam citò non increscunt, quam in vivis. Præterea, sicut foetus, qui per umbilicum, mediante placenta, utero materno adhæret, & sanguine umbilicali nutritur, propterea non est pars matris, sed potius corpus per se animatum, in matre genitum, quod in utero fruitur sanguine materno ut nutrimento, atque etiam succo lacteo (hæc latius supra docuimus, lib. I. cap. 29. 30. 31. 32.) sed postea extra uterum sine illo sanguine & succo lacteo, aliis alimentis non minus bene nutritur, & vivet, quam illis primis in utero ei collatis: eo autem partu excusso, manet tamen mater integra, nec ulla parte ad totius complementum faciente privata dici potest. Sic etiam de pilis sentiendum est.

Ita ut illa quæstio; *An pili sint partes corporis, nec ne*, de qua nonnulli tam acriter contendunt, sit tantum quæstio de definitione partis.

Verum, quandoquidem de pilis in corporibus mortuis excrecentibus modò aliquoties mentio facta, & in quibus cada-

*Pili in defunctis excrecentes.*

veribus illud contingat à me in præcedentibus dictum est, nunc hac de re adhuc pauca addenda videntur. Aristoteles, *lib. 2. de generat. animal. cap. 4.* docet pilos defunctis excrefcere, sed novos non nasci. Sic etiam Plotinus, *lib. 2. de dubiis animæ imaginat. cap. 19.* dicit, defunctis pilos & ungues augeri. Illud ipsum, ex Aristotelis sententia, tradunt plures alii Philosophi, quamvis de hujus excrefcentiæ pilorum causis inter eos magnus sit dissensus, imò eorum varii, obscuritatem rei animadvertentes, maluerint de re ipsa dubitare, & contra Aristotelem, istam pilorum in defunctis excrefcentiam negare, quam in ejusdem causas inquirere. Verum hanc alterationem, omniumque opinionum discussionem & examen hic agitare nimis longum foret. Nostra sententia patet ex antedictis; & rei ipsius veritatem confirmant observationes & testimonia plurium Medicorum, qui illam excrefcentiam pilorum in defunctis, sibi aliisque visam, hic illic diligenter annotarunt. Inter hos etiam est (ut reliquos præteream) Ambrosius Paræus, qui, *ad finem lib. de renunciat. & embammat.* scribit, se domi suæ servare furis suspensi cadaver, à se balsamis aliisque rebus, ad diutinam conservationem, conditum, atque sic optime siccatum, & absque ulla putredine ultra viginti quinque annos servatum, cujus capillos & ungues crebrius à se resectos, animadvertit mox rursus increfcere, & ad priorem longitudinem redire. Verum hic opus non est ut isto Gallico Paræi, fide dignissimi, testimonio hanc rem confirmem, cum autopsia domestica ejusdem veritatem nos edocuerit: subjungemus itaque notabile exemplum nobis ipsis visum. Anno 1636. peste Noviomagi (in qua urbe tunc temporis poliatæ, praxin exercebam) crudeliter grassante, cum illa etiam domesticos Domini Jordaens, Senatoris urbis, invasisset, & unum ex liberis è medio sustulisset, atque illi tantum unum in templo sepeliendis suis defunctis sepulchrum superesset (alia duo, quæ habebat, consanguineorum defunctis modò repleta erant) mihi dixit in eo ante septuaginta sex aut octo annos ultimo sepultum fuisse unum ex majoribus suis (si bene meminî, attavum) ut à suo patre ipsi sæpe relatum fuerat; & quia illud sepulchrum, jam pro defuncti sui sepultura, necessario aperiendum erat, me rogavit ut apertioni adesse vellem, & videre anne cadaver illud exsiccatum foret, quemadmodum in illo templo (quod in monte arenoso altiore situm est) alia sæpe cadavera exsiccata inventa fuisse dicebantur. Curiositate ductus, lubens adfui: rejecta terra sepulchrum superius replente, cistam feralem sine commotione è sepulchro extrahi cura-

Observatio  
Paræi.

Observatio  
notabilis.

vi, quam facili negotio aperuimus, in eoque cadaver, quasi adhuc integrum invenimus, solæ genæ in facie nonnihil collapsæ erant, reliqua membra in naturali situ jacere videbantur: capilli ultra humeros prolongati excreverant, ex pallido subruffi coloris: barba lata fere usque ad umbilicum prolongata erat, ejusdemque coloris cum capillis: cum tamen ex ejus effigie, quam D. Jordaens pictam domi suæ habebat, videremus, quod in vita curtos seu brevissimos capillos talis coloris, & barbam quadratam quidem, secundum istius temporis morem, sed brevem habuisset.

In hoc eodem cadavere adhuc aliud quid maxime mirandum, atque hinc minime prætereundum, notavi, scilicet, quod postquam exteriora illa satis perspexissem, cum tandem cadaver manu mea invertere vellem, illud ilico totum, exceptis ossibus, resolveretur in tenuem pulverem; & quod præterea, exemptis ossibus (quæ in fundo sepulchri rursus in humari curavimus) totus ille totius corporis pulvis adeo paucus esset, ut uno compresso manipulo facile comprehendi posset, imò integrum manipulum vix conficeret.

Tandem, coronidis loco, adhuc unum subjiciemus, scilicet, An capillorum copia aliquid conferat ad corporis fortitudinem & vires? Affirmativæ defensor videtur esse Levinus Lemnius, *de occult. natur. mirac. lib. 3.* quippe suadet sanis ne barbam & capillos usque ad vivam cutem sibi deradi pantantur: *Quia, inquit, depopulatur nimis ejus rei usus vires, atque homines effeminatos mollesque reddit, quinetiam spiritus & calorem nativum resolvit atque extenuat, maximamque audacia & confidentia partem in adeundis periculis cordi detrahit.* Lemnio favet historia Simpsonis in Sacra scriptura, qui virtutem illam, & insignem qua pollebat, virium corporis fortitudinem, abralis capillis amisit, ac deinde capillitio recrescente recuperavit. E contra verò legimus veteres Romanos suis athletis (qui in promovenda corporis firmitudine & exercitia studium omne ponebant) capillos usque ad cutem rescuisse, ut fortiores & viriliores evaderent. Quidquid sit, ego capillorum copiam parum ad robur & vires, sed frequenter multum ad sanitatem conferre arbitror, quatenus iis contactum caput à multis injuriis externis defenditur. Capite autem, cum cerebro, bene sano existente, spiritus animales copiosi generantur, hincque totum nervosum genus fortius, & ipsi etiam muscoli, à copioso spirituum animalium influxu, validiores fiunt, atque ex illa consequentia, capillorum copia in multis ad majus virium robur multum præstat. Sed illa tamen regula universalis & perpetua esse non potest, quoniam multi etiam inveniun-

Alia obser-  
vatio.

An capillo-  
rum copia  
conferat ad  
vires corpo-  
ris.

inveniuntur, quibus copia capillorum exspirandas exhalationes inhibet, sicque cerebrum per accidens debilitat: hac autem Palladis arce vaporum nebulis obfucata, pauciores generantur spiritus animales, quorum paucitate nervoli generis & musculorum vires imminuuntur, imò & catarrhi, aliique ex his orti morbi succrescunt. Hac de causa, ad visum acuendum, capitis tonsuram commendant Rases & Avicenna, ac in diuturnione pituitæ defluxu, caput tonderi jubet Celsus, lib. 2. eademque de causa etiam Aristotelem tonso vertice usum fuisse, refert Laertius, ut valetudini suæ consulere: & sic quoque tradit Galeus, lib. 6.

epidem. sui temporis Medicos, sanitatis conservandæ gratia, ad cutem usque detonsos fuisse. Præterea mulieres propter copiosum capillitium nunquam judicantur esse fortes. Pro conclusione igitur dicendum capillorum copiam per accidens aliis robur, aliis morbos conferre, pro diversâ hominum constitutione. Communiter tamen judicantur illi fortes & validi, qui pectore & reliquo corpore sunt multum hirsuti & pilosi; non quod pili illam fortitudinem suâ copiâ conferant, sed quod signum sint, cor & reliqua viscera esse valida, à quorum integritate necessario totius corporis robur procedit.

## CAPUT III.

## De Externis capitis integumentis.

Cuis.



Ilos sequuntur reliqua externa capitis integumenta, inter quæ primo sese offert *Cuticula*, hinc *Cuis*, quæ in parte capillata insignem habet crassitiem, ut externarum injuriarum vim facilius eludat, eique pili firmitus ac profundius inhaereant.

Pinguedo.

Cuti subternitur *Pinguedo* paucissima, ne vaporum transpirationem densior infarctus impediret. Riolanus hic nullam pinguedinem agnoscit.

Panniculus carnosus.

Pinguedinem sequitur *Panniculus carnosus*, hunc muscoli varii, aliis locis explicandi.

Pericranium.

His subjicitur *Pericranium*, quod est membrana tenuis, mollis, densa, firma, & sensu exquisito prædita, propter nervos ad occiput per eam & tempora dispersos. Hoc totum cranium cingit, & suturis servatis firmiter jungitur, nervosis fibris per ossium commissuras ad duram usque meningem demissis, cum eaque unitis, unde magnus utrisque membranæ consensus oritur, & pericranium à meninge oriri vulgò creditur: à qua tamen opinione, non omnino sine ratione, dissentiunt Spigelius & Highmorus, qui hunc ortum negant, & solummodo utriusque connexionem per nerveas fibrillas agnoscunt. Lindanus, *physiol. cap. 8. artic. 5.* videtur pericranii ortum deducere velle à tendinibus musculorum frontis, temporum, & occipitis, circum cranium expansis: quod minus verosimile videtur, cum pericranium supra musculos temporales eorumque tendines extendatur, atque ab his illæsis detrahi possit. Fallopius, in *observat.* dicit pericranium esse duplex, & aliquot capitis locis in duas partes, etsi difficulter, separari posse, quarum altera cuti adhæret, altera

ossi connascitur. Hanc duplicitatem non agnoscit Vellingius, & nos quoque hæcenus animadvertere non potuimus.

Superius, antè, & posterius cranium proxime (intercedente tamen periosteo) circumdat: verum ad latera descendens, ab eodem recedit, & musculos temporales supergreditur, eosque, ad majorem custodiam, intra se comprehendit, non quidem usque ad eorum insertionem, sed usque ad ossa jugalia, hisque locis crassior & durior est. Præterea etiam ad nasum excurrit, & oculorum orbitas investit, ipsisque oculis tunicam conjunctivam, pro ligamento, circumjicit.

Periosteum.

Pericranio subternitur *Periosteum*, quod est membrana tenuissima & nervosa, acuti sensus, cujus beneficio cranium sentit, sicut etiam alia ossa, exceptis dentibus, qui partim à periosteo radices investiente, partim ab interiore nervulo sensum habent.

Hoc, sicuti cranium firmiter connectitur, ita etiam pericranio tam exacte jungitur, ut simul unam membranam constituere videantur, quod decepit Fallopius, qui unam esse putavit, hincque scripsit, idem in capite esse pericranium, quod in aliis partibus periosteum; immemor scilicet, quod periostea nusquam musculos supergrediantur, sicut pericranium transcendit musculos temporales. Verum artificiosa separatio diversas membranas esse docet.

Ad has exteriores membranas sanguis vitalis defertur per ramum externum arteriarum carotidum, & à nutritione residuus per venas exiles remittitur ad jugulares externas. Sunt qui credunt has arterias, per cranii foraminula transeuntes, penetrare & aperiri in sinum magnum duræ meningis; quod tamen non videtur verosimile, cum ad diploem solummodo tendant, in eaque absuman-

absumentur, sanguinem ad medullas substantiæ confectionem eò deferentes, nusquam verò ossa rursus egrediantur.

offa.

Periosteum immediatè adhæret capitis ossibus, quæ sunt, vel cranii, vel maxillarum.

Cranii ossa sunt, frontis, syncipitis, occipitis, sphœnoides, & temporum.

Maxillarum multa sunt ossa, quorum varia peculiaribus nominibus sunt insignita. De his omnibus, tum cranii, tum maxillarum ossibus, vide lib. 9. cap. 3. ad 10.

## C A P U T IV.

### De Internis cerebri integumentis: nec non de Falce, & Sinibus.



Blato cranio in conspectum veniunt partes interiores, inter quas primo occurrunt duæ membranæ acuti sensus, Græcis Meninges, Arabibus Matres appellatæ, quas sollicita Natura ad nobilissimi visceris meliorem conservationem cerebro proxime circumjecit.

Dura meninx.

Harum exterior, quæ cerebrum immediate non ambiens, à substantiæ crassitie ac duritie, Galeno *σκληρὴ*, sive *παχύεια*, Crassa, vel Dura meninx, Hippocrati *παχυπύην*, aliis, Dura Mater appellatur, sensuque exquisito prædita est.

Hanc geminam existeret, cum Fallopio & Bauhino, varii Anatomici tradunt: quæ duplicatura, quia difficulter demonstratur, rejicitur à Riolo.

Condita est, non solum ad cerebri, medullæ, & nervorum tutelam, verum etiam ut cerebrum in duas partes, nec non à cerebello distingueret.

Laxo ambitu cerebrum amplectitur, tantum ab eo distans, quantum motus commoditas exigit. Simul etiam totum interius cranium laxiore copula investit, ita ut ab eo plerisque in locis facile dimoveri queat, sicut perforato per terebram cranio, id levi depressione fieri solet. Basi tamen arctissime jungitur, ut facile ab ea divelli nequeat, & futuris firmiter adnectitur per fibras, atque circiter semi digiti latitudine à lateribus futuræ sagittalis, nec non multoties etiam prope ejusdem concursum cum coronali, mediantibus minimis vasculis, quæ versus diploidem emittit, duobus, tribus, quatuorve locis nonnihil adhæret, quibus locis, cum cranium avellitur, punctula sanguinea è vasculis illis disruptis epullulant. Semel calvariæ undique adnatam vidit Varolius, quod rarissimum est: quales tamen duos casus sibi visos notat Hildanus, cent. 1. observ. 7.

Foramina.

Foraminibus multis, ad vasorum transitum, pervia est, uno præterea magno ad medullæ descensum, & altero versus glandulam pituitariam: qua verò parte ossi cri-

briformi cohæret, instar cribri perforatur, seu potius per ossis foraminula tenellos tubulos ad nares emittit, in vitulino capite manifeste conspicuos.

Exterius asperior & durior, cranium ejusque sinus ac cavitates succingit, & fibrillis plurimis per suturas serratas transmissis, eidem, ut modò dictum adhæret, ex quibus fibrillis foris circum cranium expansis pericranium efformari, multis persuasum est. Interius lævis & lubrica est, humore aqueo perfusa. Tenui meningi multis locis cohæret mediantibus vasis.

Arterias ab arteriæ carotidis ampliore ramo productas, per foramina ossis cuneiformis & frontis transeuntes, recipit, quæ quibusdam locis, præcipue in verticis regione, ex hac membrana exsistentes, tenui meningi surculos tribuunt, quibus mediantibus hæ membranæ sibi mutuo cohærent. Venas autem copiosas ad sinus & internæ venæ jugularis ramum emittit.

Duplicatur in capitis vertice, ubi versus interiora descendens, cerebrum dividit in dextram sinistramque partem. Hæc superior duplicata pars, quia versus posteriora latior est, & versus anteriora arctatur, sicque falcis messoriæ figuram alioquo modo referre videtur, Falx appellatur.

Fertur autem Falx parte anteriore ad summam nares, & septo osseo processus papillares distinguente, id est, cristæ galli, connascitur. Parte verò posteriore & latiore in occipite divaricata, in dextrum sinistramque latus descendit, & cerebellum à cerebro distinguit, quo loco in canibus os prominet, cerebrum subfulciens, ne cerebellum ab eo comprimatur.

Riolanus, *animadv. in Bauhin.* in falce nullam meningis duplicaturam agnoscit, nec etiam in sepimento quod est inter cerebrum & cerebellum, quam tamen sinus in illa duplicatura efformati satis probant.

In dicta duplicatura quatuor Sinus efformantur, tres majores, unus parvus: quorum majorum interiores cavitates non æquali amplitudine procedunt, sed propter multiplicia vasa undique in illos hiantia, aliquan-

aliquantum inæquales, quibusdam locis nonnihil latiores, aliis paulo arctiores sunt.

Horum sinuum primus, elatior, & longissimus (in hunc interdum venam, & jam nuper arteriam, ad duorum triumve digitorum transversorum latitudinem, excurre obfervavi) secundum superiorem falcis partem, à summis naribus per capitis longitudinem versus posteriora progreditur, ubi dirimitur in duos sinus laterales, ad basin occipitis, juxta lambdoidis latera descendentes, qui cum jugularis venæ ramo interno continuantur. Ad dictam divisionem quartus brevis sinus versus interiora progreditur ad glandulam pinealem, per quem è tertio ventriculo vena plexui choroidi interjecta, eique continua, sanguinem exonerat, per laterales sinus ad venas jugulares deferendum.

*Torcular  
Herophili.*

Ubi horum sinuum concursus est, ibi **Torcular Herophili** vulgò constituitur.

Verum sicut hi sinus plerumque æqualiter concurrunt, ita nonnunquam etiam, licet rarius, inæqualis eorum concursus reperitur, ita ut lateralium inferiorum unus paulo altiore, alter paulo humiliore loco in tertium rectum ingrediatur.

Præter dictos sinus à Sylvio, aliisque nonnullis Anatomicis, interdum adhuc tres alii sinus, non tamen in omnibus subjectis, inventi & observati sunt. Horum unus (quem etiam nos semel atque iterum publicè demonstravimus) per infimam falcis partem defertur, estque valde angustus, ac in quartum antedictum desinit & aperitur. Reliqui duo laterales minores & breviores, utrimque unus, in dura membrana cerebri à cerebello distinguente, transverso circiter pollice à majoribus distant, in quos tandem desinunt, interdum ad torcular Herophilianum cum reliquis excurrunt.

Riolanus, *animadvers. in Bartholin.* hos sinus minores irridet, fortè quia illos nunquam vidit; vel quia, pro suo more, ægrefert quod illos primus non invenerit, hincque eorum inventoribus istam primæ inventionis honorem detrahare nititur.

*Ufus  
f.*

In hos sinus, præter carotidis posterioris propaginem, terminantur arteriolæ plurimæ per meninges decurrentes, quarum innumera exilia oscula in supremo magno sinu undequaque manifeste conspicua sunt: quod abunde refellit Fallopius, qui, *in observat.* scribit, nullam arteriam ad hos sinus pervenire. Præterea in eosdem aperiuntur multæ meningum venæ, sanguinem in eos effundentes; quod certo experimento docuerunt Thomas Willis & Wepferus. Quippe liquorem nigrum arteriæ carotidis caudici cum per syringam injecissent, obfervarunt istum atrum liquorem per innu-

meras arteriosas & venosas propagines transire, usque dum tandem in sinus, ex iisque in venas jugulares conflueret.

Bauhinus & Vellingius scribunt etiam tubulos aliquos sinuum in meningum & cerebri substantiam, inter venas & arterias, excurre. Walæus, *epist. 1. de motu sang.* videns quorundam vasculorum latiora oscula in sinus aperiiri, & fines arteriolarum tam latos esse vix posse, existimat hos tubulos per anastomosis coire cum arteriolarum, per meninges & cerebrum disperfarum, extremitatibus, sicque ab iis à nutritione illarum partium residuum sanguinem suscipere, ac in sinus deponere; quas anastomoses enormiter crassis delineamentis depingit Flighmorus, *anat. lib. 3. tab. 18.* Verum non animadvertit Walæus, quod oscula arteriolarum in sinus hiantia, non sint lata, sed admodum exilia; & illa quæ latioribus osculis in eos aperiuntur vasa, esse venas, quæ magnæ & copiosæ per meninges decurrentes, in hos sinus se exonerant. Ita ut necesse non sit hic ullos tubulos à sinibus productos effingere, cum autopsia satis doceat, ipsas arterias & venas, nullis mediantibus tubulis, extremitatibus suis ad sinus pervenire, in eosque aperiiri.

*An sint  
etiam tubuli  
sinuum.*

In hos igitur sinus sanguis à nutritione meningum & cerebri residuus per venas, & qui nimia quantitate in illas partes influxurus fuisset, per arterias exoneratur, eodemque etiam sanguis in plexu choroide redundans confluit, per venam quæ medio plexui in tertio ventriculo supra glandulam pinealem, modò recta, modo bifurcata interjicitur (hanc Galenus appellat Venam à nulla alia vena ortam) ac per quartum sinum in superiorem magnum sinum ascendit, ab eoque mox in duos laterales sinus, versus maltoides apophyses, seu occipitis basin, in venæ jugularis ramos internos, iis immediate unitos & continuos, inde ad cor reverteretur. Ab eo autem sanguine per arteriolarum orificia in sinus impulso fit, quod ablato vivi animalis cranio (hoc in nuper nati vituli aut porcelli capite facillime effici potest) manifesta pulsatio in superiore magno sinu animadvertatur. Quia verò sinus illi lati sunt, hinc sanguis in eos infusus, & per arteriolarum pulsationes propulsus, mox ad inferiora defluit, quæ causa est, quod superior maximus sinus, cum duobus lateralibus, plerumque vacuus, sine ullo sanguine, nonnunquam pauxillum sanguinis continens, rarò totus sanguine repletus, inveniatur, quod tamen in strangulatis semel atque iterum vidimus. Ex his jam patet quam longe à veritate aberret P. Laurenbergius, qui existimat in sinibus generari spiritus animales; ut & A. Kyperrus, qui scribit in iis sanguinem ventilari ac refrigerari, ad meliores cerebri usus, &

V

commo-

commodiorem dictorum spirituum generationem.

*Tenuis meninx.*

Altera interior membrana, exquisito sensu prælita, plurimisque arteriis & venulis donata, λεπὴ μὲνιγξ, **Tenuis Meninx**, & **Pia mater** appellatur, quia admodum subtilis & tenuis est, & instar bonæ ac piæ matris, immediate ac molliter cerebrum ejusque partes amplectitur, & ne diffuant, impedit, simulque gyros ejusdem & anfractus profundius involvit, ac summitates eorum colligat, sicque totam exteriorem cerebri superficiem quasi planam reddit: qua connexionione superiore soluta, gyrorum anfractus, quia hac meninge sunt investiti, facile separari & explicari possunt. Ab hac tenui meninge procedit etiam tenuissima membranula ventriculos cerebri interiores investiens.

*Plexus vasorum.*

Hæc meninx intexitur mirabilibus & copiosis minimorum vasculorum plexibus seu reticulis, ad intima glandularum corticis penetrantibus, oriundis à carotidibus cervicalibusque arteriis & venis jugularibus,

passim mutuis inosculationibus (de quibus dicitur *sequente capite*) ultro citroque junctis, ut ad magni visceris, cerebri, nutritionem, spirituumque animalium confectionem, per innumerabilem horum vasculorum copiam sanguis satis copiosus undequaque affundatur. His vasculorum plexibus plurimas exiles glandulas interjectas se observasse, scribit Thomas Willis, quas facile percipi dicit in cerebro humidior, aut hydropico, etsi in aliis fere visum effugiant. Verum istæ glandulæ hic à Willisio notatæ, procul dubio fuerunt aliquæ glandulæ ipsius corticis cerebri, quæ seroso liquore turgidæ, & extrorsum versus assurgentes, ipsi visæ fuerunt peculiare glandulæ dictis plexibus interjectæ, de quibus glandulis vide *sequente cap. 5.*

Cerebri autem medulla, usque ad finem spinæ extensa, omnesque nervi ex ea prodeuntes, geminam tunicam ab his meningibus assumunt, qua muniti ad destinatas partes excurrunt.

## C A P U T V.

### D E C E R E B R O.

*Cerebrum.*



Motis involucris ad **Cerebrum** devenitur, quod Græcis ἐγκέφαλον dicitur, estque organum sentiendi generale, cujus ministerio sensuum internorum externorumque, tum voluntarii motus functiones, Anima princeps corporis ac gubernatrix exequitur. In hoc enim partium sentientium sensationes percipit ac dijudicat, ex eoque, tanquam ex scaturigine, radios benignitatis suæ, nempe Spiritus animales in cerebro genitos, per nervorum ductus seu rivulos, omnibus sentientibus corporis partibus communicat, & per eos actiones animales edendi facultatem ipsis tribuit.

*An cerebrum sit viscus, an vero glandula.*

Hic in vestibulo dubium movent nonnulli, an cerebrum etiam viscus appellandum, & viscerum ordini annumerandum sit? Hippocrates, *lib. de gland.* videtur illud glandulis annumerasse, nam dicit, *Μαζμν ἐστὶν cerebrum quam reliqua glandula*: quasi significare vellet, cerebrum esse maximam glandulam, eo quod, sicut glandulæ, sit album, molle, humidum, & quasi subpingue. Whartonus, *in adenogr.* dicit arduum esse, illius rationem aliquam communem cum reliquis visceribus constituere, atque hinc illud è viscerum numero excludit. Cum Whartono consentire videtur Malpighius, *lib. de cerebri cortice*. Alii, cum Platone, illud inter medullas reposuere,

propter friabilitatem, mollitiem, & ossium circumductionem; etsi ab ossium medulla toto cælo differat, neque ignem, ut illa, concipiat. Verum longissime à veritate aberrant omnes, qui illud glandulis, aut medullæ annumerant, cum substantiæ & structuræ diversitas satis ostendant, illud neque cum illis, neque cum hac quidquam similitudinis habere. At enim, dicat quis, totus cortex (ut statim latius dicetur) est quasi mera congeries minimarum glandularum? Certè hoc non probat cerebrum esse glandulam, nam quod pars aliqua plurimas glandulas habeat, exque etiam ad necessarium complementum partis faciant, ex eo concludi non potest nec debet, partem esse glandulam, nam alioqui hepar, lien, renes, quia suæ substantiæ plurimas intertextas habent (ut dictum *lib. I. cap. 14. 16. 18.*) etiam glandulæ dici, & è viscerum numero excludi deberent; nasus item, lingua, palpebræ, propter glandulas ipsis concessas, imò & ipsum quoque palatum glandula nominandum foret: quales novitates si aliquis, tanquam magnum eruditionis specimen, hodie introducere velit, per me licet, dummodo mihi non denegetur licentia manendi in antiquis terminis, quam etiam supra in simili occasione petii, *lib. I. cap. 14.* Præterea, cerebri ipsius dignitas, & operationum principum, quas edit, nobilitas, clarè docent, illud verissime viscus esse,



esse, non minus quam cor, hepar, &c. & suas proprias, easque principes, actiones obire, ac nobilissimos totius corporis spiritus, nempe animales, conficere, atque hinc etiam illud summo jure viscus nominari à Galeno, *lib. de decret. Hipp. & Plat.* nec non ab Aristotele, *lib. 3. de part. animal. cap. 7.*

*Formatio.*

Delineatum & formatum est cerebrum ex feminis germine, eodem tempore cum reliquis corporis partibus: atque hinc rejicienda videntur figmenta quædam, quæ, ex sententia Cartesii, super hac re sibi imaginatus est Ludovicus de la Forge, *comm. in Cartesii lib. de hom.* scilicet, cerebrum formatum esse è particulis crassioribus per arteriarum poros transeuntibus, atque hinc propter pororum angustiam in tenuia filamenta se extendentibus, sicque cerebri substantiam quasi ex fibris compositam efficien- tibus, & propter impetum spirituum è glandula pineali & vicinis arteriis erumpentium, intus variis cavitatibus seu ventriculis per accidens excavantibus. Certe hujus splendori commentum debilitas undequaque patet. Cerebrum enim non est delineatum ex particulis feminis crassioribus aut durioribus (potius dicendum foret, ex tenuioribus & mollioribus, nam in principio caput apparet instar bullæ, aqua turbida, instar albuminis ovi, repletæ) per arteriarum poros transeuntibus; nam præterquam quod semen per arterias non fluat, etiam in prima formatione nullæ arteriæ extant ante cerebrum, sed omnes partes ex feminis germine simul delineantur & formantur (sunt enim immediata Naturæ opera, ut supra latius docuimus, *lib. 1. cap. 29.*) neque una post aliam, aut ab alia. Nec etiam ejus ventriculi ab aliquo spirituum impetu è glandula pineali aut arteriis erumpentium excavati esse potuerunt, cum in delineationis principio nullus tantus impetus adsit: neque etiam impetus ille fieri possit per instrumentum (nempe cerebrum) nondum perfecte formatum (tale illud in principio esse, præsupponit ipse L. de la Forge) quod tamen è contrario, ante illum aut ullum impetum modò perfecte formatum fuisse, docet ipsa glandula pinealis, per quam impetum istum fieri dicit Lud. de la Forge; nam cum illa non possit habere alium locum quam in tertio seu medio ventriculo, ergo necessario ille locus non ab ista re locata, aut post rem locatam, sed potius aut simul cum re locata, aut ante eam genitus fuisse debuit.

*Nominis divisio.*

Cerebrum modò stricta significatione sumitur pro ea majore parte, quæ proprie Cerebrum appellatur, & à cerebello ac medulla distinguitur: modò lata, pro toto viscere, pro ut ex cerebro, cerebello, & medulla constar.

Humani cerebri magnitudo, pro ratione totius corporis, insignior est quam aliorum animalium, utpote quod cerebri elephantis quantitatem, & circiter duplo pondere bovis cerebrum superat; quippe pendet libras quatuor aut quinque. Lindanus passerum cerebrum, ad corporis proportionem, humano majus esse existimat.

*Magnitudo.*

Fernelius, Vesslingius, Riolanus, Bartholinus, Lindanus, & Highmorus, præeunte Fallopio, docent ad Lunaris luminis dispendia vel incrementa, cerebri quantitatem augeri vel imminui. Verum nulla certe actionum animalium mutatio hujusmodi mutationem nobilissimi organi unquam ostendit. Præterea, nullâ etiam experientiâ talis opinio stabiliri potest: quia unius ejusdemque animalis cerebrum duobus diversis Lunæ temporibus inspicere ac ponderari nequit: & quæ in diversis subjectis fiunt diversis Lunæ temporibus cerebriorum demonstrationes aut inspectiones, nihil certi ea de re indicare possunt, cum quantitas cerebri in similibus animalibus, licet sint ejusdem speciei & magnitudinis, non necessario semper æqualis sit, eo quod cranii capacitas in aliis paulo major, in aliis paulo minor esse possit: atque hinc si diversitas quædam in cerebri quantitate appareat, illa non tam sectionis temporibus diversis, ad Lunæ mutationem institutis, quam naturalis conformationis diversitati, quæ à Luna minime dependet, adscribenda est. Anno 1661. mensibus Aprili & Majo, una cum chirurgis tractavi Egidium Spruyt, nautam Ultrajectinum, in dextro bregmatis ossis lapidis ictu graviter vulneratum, cum cranii fractura & depressione: abstulimus ossa confracta ad latitudinem daleri imperialis majoris: postmodum dura mater, contusione valde læsa, eadem magnitudine sponte separata & exempta fuit, tenui meninge illæsa manente. Cerebrum eo loco depressum remansit ad latitudinem minimi digiti, & totis duobus mensibus per quamcunque Lunæ mutationem, ne minimum quidem cerebri incrementum vel decrementum animadvertere potuimus, quantumcunque curiose hanc rem observavimus: remansit continuè illa depressa cerebri pars in eodem statu, ac ne quidem ad pili crassitiem per novilunium aut plenilunium cerebri quantitas adaucta fuit, nec in quadraturis quidquam imminuta: sed postea carne ex tenui meninge (quod alias nunquam à nobis visum, lectum, vel auditum fuit) largiter, præter omnem expectationem, succrescente, vicesque duræ meningis obeunte, & se cum carne ex diploide orta conjungente, desperatus æger, qui jam cum Charonte de naulo pacisci credebatur, sanatus fuit.

*An Luna quid faciat ad cerebri quantitatem.*

*Observatio.*

Pro æque incerto etiam habendum quod scribit Horstius, in epistolis, scilicet, se

*An Veneris usus imminuat cerebrum.*

vidisse cerebri substantiam à nimio Veneris usu imminutam. Quomodo, quæso ille potuit scire, an corpus istius hominis, de quo loquitur, ante plus cerebri habuerit? an illud antea viderat & ponderaverat? Nimia Venus cerebrum quidem debilitat, sed an illud imminuat certo dici non potest.

*An viri plus cerebri habeant quam mulieres.*

Frivolum etiam est, quod nonnulli, duce Aristotele, tradunt, viri cerebrum mulieris cerebri quantitatem excedere. Nam pro certo credendum, hac in parte nullam observari posse differentiam notabilem & certam. Nam sicut pro majore vel minore cranii capacitate, alii viri plus, alii minus cerebri habent, ita etiam se res habet in mulieribus. Si jam aliquis majus viri caput velit comparare cum minore capite mulieris, non erit mirum si plus cerebri inveniat in virili, quam in muliebri capite: sed inverfo casu, plus cerebri invenietur in muliebri, quam in virili capite. Magnitudinis verò & capacitatis cranii æqualitatem ad amussim in utroque sexu invenire, ut tunc de cerebri quantitate exacte judicari possit, impossibile est.

*Figura.*

Figura cerebri subrotunda est, versus frontem tuberosa, superficies externa anfractuosa, gyris & meandris, instar intestinorum, convoluta, qui anfractus tenui meninge investiti, plurimisque capillaribus arteriarum carotidum & venularum, ramulis donati, alte descendunt, & nonnulli profunditatem corporis callosi circiter æquant: superius verò ab eadem meninge simul colligantur. In cuniculis aliisque minoribus quadrupedibus, cerebri superficies non tam anfractuosa, sed magis plana existit, atque gyri vix aliquantillum descendunt. In ple-risque autem volucris externa cerebri facies fere omnino æqualis apparet, nullis anfractibus sinuosa.

*Substantia.*

Cerebrum substantiam habet peculiarem, albam, humidam, mollem, instar pinguium liquecentem potius, quam diffluentem, etsi verè pinguis non sit.

*Color & molities.*

Color & molities substantiæ per totum viscus æqualis non est, parte enim exteriori, quo usque anfractus inter gyros descendunt, molities major, & color magis cinereus conspicitur, reliqua verò interiore parte omnino candida, atque etiam solidior est substantia.

*Fibra, seu stria.*

Cartesius, *lib. de hom.* multis probabilibus conjecturis inculcat hanc substantiam necessario totam esse fibrosam, ex millenis filamentis compositam, quæ filamenta Willisius canaliculos, aut strias appellat. Quod Cartesius mentis oculis perspexit, hoc Malpigijs, *epist. ad Fracassat.* autopsia demonstravit: quippe scribit se in cerebro bovis, aliorumque pecudum, tum crudo, tum elixato, sæpius microscopio observasse, quod tota alba cerebri portio evidenter di-

visa sit in fibrulas depresso rotundas, hasque in piscium cerebris adeo manifeste conspici, ut si adverso lumine observentur, eburneum pectinem, vel organum ecclesiæ mulicum representent. Has fibrulas extremis capitibus dicit immergi in corticem (id est, exteriorem cineream cerebri partem) quasi ex illo materiam alimentariam desumpturas, in quem corticem copiosissima vasa sanguinea ramificantur. Addit denique: *Ab arteriis sanguineum succum, vel quid simile, delatum, hac corticis carne, veluti filtro, separari, simulque in implantatas fibras, veluti in radices, propagari, non est absolum rationi*, (hoc nititur confirmare sequenti experimento) *cum interrupto*, inquit, *natura ordine, ex morbosa aliqua constitutione, aberrantem copiosam feri hujus collectionem, in ventriculis, cerebri substantia, & sub ipsis meningibus sæpe observemus*. Ut hoc probet, adducit ibidem varias historias ægrorum, quibus talis feri copia in capite fuit collecta. Fracassatus, *in respons.* scribit se hæc eadem observasse in cerebro canis, & simul inveniendi modum adjungit: dicitque cerebrum & medullam esse veluti filis, mutuo & omnifariam nexis, grandem spongiam: præterea judicat, cum Malpigio, albicantem medullarem substantiam aliquid mutuari ex dicto cortice, utpote in quem ejus fibrulæ medullares inseruntur, vel terminantur, atque hinc ex eo aliquid assumere videntur. Verosimile est in ejus glandulosa substantia sanguinis (qui per innumera circumfusa vascula illi undequaque infunditur) tenuissimas falsas particulas à reliquis separari, & sic præparari (de hac separatione plura videantur *sequente cap. II.*) ut à fibrulis, tanquam invisibilibus tubulis, assumi, in iisque in spiritus animales converti possint. Fracassatus istas particulas tenues, quas ego falsas nomino, appellat *Serum concrecibile, & succum nerveum*, quem in cortice separari, & sic in fibrulas infundi, ait.

Piccolhomini substantiam illam cineritiam exteriorem appellat cerebrum, interiorem verò albicantem vocat medullam, sicque totum cerebrum distinguit in corticem & medullam: quod ipsum etiam facere videntur Bauhinus & Bartholinus.

Cineritia illa substantia, seu cortex, non solum extrinsecus cerebro circumducitur, in ejusque gyros & meandros se dimittit, verum etiam in interiore albicante substantia quibusdam in locis conspicitur, & spinalem quoque medullam nonnihil amplexatur, ejusque interiora (ex observatione Malpigi) aliquo modo ingreditur.

Verum etsi ex his modò dictis magnum lumen ad secretorum cerebri penitorem cognitionem elucescat, tamen adhuc unum singulare hic desideratur, scilicet, quo modo  
*Modus quo spirituum animalium materia à sanguine separetur.*

è sanguine fiat separatio falsæ spirituosæ materiæ in spiritus animales mutandæ. Supra, lib. I. cap. 14. diximus in hepate biliosas particulas è sanguine separari mediantibus acinis glandulosis: & sic etiam in liene subacidas, ac in renibus serosas particulas, mediantibus peculiaribus minimis glandulis, separari, dictum cap. 16. & 18. ejusdem libri. Hoc peculiarium minimarum glandularum (quæ hætenus latuerunt, & omnium Anatomicorum oculos subterfugerunt) officium hic etiam dictam separationem perficit. Harum autem glandularum primam inventionem debemus perspicacissimo Malpigio, qui singulari sua diligentia cerebri mysteria adhuc ulterius perscrutatus est: scribitque se per microscopia comperrisse, totum cinericeum corticem esse minimarum glandularum, figuram ovalem habentium, congeriem, eumque ex ea congerie efformari. Dictas autem glandulas dicit tortuose locatas, exteriores cerebri gyros componere, & in earum exteriorem portionem ingredi sanguifera vascula tenuem meningem perreptantia: ex interiore verò portione depromi fibram albam velut proprium vas, & sic singulis fibris appendi seu imponi exilem glandulam, ita ut ubicunque transversim secantur gyri, determinata & firma semper glandularum congeries medullæ affundatur: aque ita observavit ex multiplicium fibrularum connexu & fasciculo albam medullarem cerebri substantiam emergere. Addit; Fracassatum judicare, glandulosum corticem oriri ex sero concretescibili; medullarem verò fibrosam albicantem cerebri substantiam oriri ex deciduis purioribus salibus. Denique modum has corticis glandulas inveniendi subiungit. Dicit eas difficulter in crudo, licet magni animalis, cerebro deprehendi, quia pia mater avulsione lacerantur, & intercedentia enata spatia, ob molliem, non ita facile distinguuntur; facilius autem in cocto cerebro apparere; quia ipsarum substantia, dum coctione crassescit, patentiora reddit intermedia spatia, quæ meningis piæ detractione evidentiora fiunt (si præsertim adhuc calentes explorentur) & affuso atramento, ac leviter gossypio rursus deterfo, facile in conspectum veniunt; tunc enim intercepta spatia ita denigrantur, ut circumpositas glandulas facilius exhibeant. Eodem modo illas in piscium, & pennatorum cerebro facile deprehendi dicit. Profectò magnas gratias debemus oculatissimo Malpigio, quod ope microscopiorum hæc tanta cerebri mysteria, per multos labores multaque tentamina, primus patefecerit, eaque tam splendide in lucem produxerit, ut jam discussis crassissimis obscuritatum nebulis, de cerebri constitutione, officio, & actionis modo certius judicari possit.

Ex hac nova Malpighii observatione jam manifestè patet magnus error Piccolhomini, qui medullam à dicto cortice, in recenti cadavere, lineis quibusdam manifeste distinguere, atque etiam exacte separari posse, tradidit: quod post ipsum quoque dixit Bauhinus, ex eoque exscripsit Bartholinus: cum tamen nulla linea inter cerebri albam medullam & corticem intercedat, eæque partes minime disjunctæ sint, sed medullares fibræ glandulas corticis ingrediantur, & hæ illis annectentur, ita ut nullo artificio sine læsione à se invicem separari possint.

An cortex sit separabilis à medulla.

Cerebri substantia, quia ex pluribus salis fusi, paucisque sulphureis particulis est compacta, cæteris visceribus comparata, humidior, minusque calida est, unde frigidum humidumque statuitur ejus temperamentum, quamvis calorem minorem quidem, sed manifestum tamen obtineat, quippe arterioso sanguine intus & undequaque perfusa, non potest non inde caloris alicujus particeps esse.

Temperamentum.

Sanguinem, ad nutritionem & spirituum animalium confectionem, recipit per arterias à carotidibus & cervicalibus deductas; quarum hæ in minimos ramusculos directæ, maximè in cerebelli, illæ in cerebri substantiam supra infraque copiosum sanguinem infundunt: qui non solum per dictos invisibiles ramusculos, verum etiam roris in modum per poros ejus transit, cujus guttulæ innumeræ & punctula rubicunda in substantiæ dissectione passim è vasculis & poris ejus epullulare conspiciuntur. De his arteriis notat Franciscus de le Boë Sylvius, disput. med. 4. thes. 14. & 15. quod dum crassam meningem penetrant, alteram tunicam deponant, & tales maxima sui parte cum tenui meninge per cerebri anfractus omnes distribuuntur, paucissimis venis comitatæ. Thomas Willis insuper tortuosum earum ingressum diligentissime persecutus, scribit, quod utrimque canalem proprium, ossi cuneiformi insculptum, subituræ, in majus muninem, tunicam adscititiam assumant, quam osseo canali elapsæ, & jam intra cranium subsistentes, rursus deponunt: tuncque juxta Sellæ Turcicæ latera, tortuoso ac reflexo ductu, prorepant, donec ad caput Sellæ Turcicæ perveniant: ubi rursus ambitu quodam incurvatæ ac intortæ, recta ascendunt, & duram matrem perforantes, versus cerebrum efferuntur, ante ejus ingressum emissis plurimis, sibi miro artificio intricatis, ramulis, rete mirabile in quadrupedibus plerisque efformantibus, ad impetuosum sanguinis influxum per illa mille diverticula infringendum & mitigandum, qui cum in homine, caput erectum gestante, tam impetuosus fieri non possit, hinc etiam in

Arteria.

homine exiguum duntaxat rete mirabile conspicuum esse.

*An arteria  
cerebri sub  
stantiam in-  
grediamur.*

Per has arterias sanguinem ad cerebrum deferri, extra dubium est, sed de modo non convenit inter Anatomicos. Alii enim putant ipsas arteriolas cerebri substantiam ingredi: alii illas substantiam non subire, sed in ejus poros solummodo sanguinem effundere existimant. *Prioris* sententia sunt Fallopius, Bauhinus, Spigelius, Highmorus, alique varii, atque inter eos novissime Thomas Willis, & Jacobus Wepferus: eamque probare nituntur, partim ex punctulis sanguineis, quæ ex dissecta cerebri substantia epullulant: partim ex arteriæ carotidis per immisum tubulum inflatione, qua sanguis introrsum propulsus, innumerabilibus punctis cruentis dissectam substantiam inficit; aut ex atramenti in carotidem injectione, qua mox innumera nigricantia punctula in ipsa cerebri substantia epullulare, expertus est Thomas Willis. *Posterioris* opinionis patroni, sanguinem in solos cerebri substantiæ poros effundi, motuque cerebri sic per eam totam propelli, eo probant, quod nullæ unquam arteriæ in cerebri substantia oculis videri potuerint: præterea, quod in ea, propter mollietatem partis, arteriæ plerumque compressæ & occlusæ fuissent: quod ipsum etiam asserit Aristoteles, qui, *lib. 3. histor. animal. cap. 3. & 16. ut & lib. 7. cap. 4.* scribit, cerebri substantiam nec venam, nec ullum sanguiferum vas intra se continere, imò nequiquam adeo firmam esse, ut per illam arteriæ venæque, sicut in reliquis corporis partibus, digeri possint. Verum hujus dissidii compositio facile invenietur, si istæ duæ opiniones jungantur, & statuatur, sanguinem partim una cum arteriolis cerebrum ingredi: partim in poros effusum per cerebri substantiam propelli, eodem modo sicut per venas sanguinem in hepate promoveri, docuimus supra, *lib. 1. cap. 14.* & in sanguinis circulatione per partium substantiam transire diximus *lib. 2. cap. 8.* Nam si arteriolarum cerebri substantiam non permearent, sanguis in eam satis largiter effundi non posset: & si poros quoque substantiæ non permearet sanguis, sed singula innumerabilia sanguinea punctula, quæ in substantiæ dissectione conspicienda occurrunt, ex præciso vasculo effluerent, certe myriades vasculorum in illa substantia continerentur, imò tota ex hujusmodi vasculis tenuissimis contexta seu coagmentata videretur, quod tamen minus verosimile est.

*Vena.*

Sanguinis per dictas arterias in cerebrum infusi, in eoque excocti residuum in meningum venas & sinus deponitur, ad jugularium venarum ramos internos, indeque ad cor deferendum.

*Vasorum a-  
nastomoses.*

De his sanguiferis, cum arteriosis, tum

venosis, vasis, observavit Thomas Willis, quod dum sursum ad cerebrum ascendunt, circa crassam tenuemque meningem, plurimum & varie inter se inosculentur, non modo arteriæ cum venis, verum etiam arteriæ cum arteriis, scilicet unius lateris carotides cum oppositi lateris carotidibus: præterea vertebrales utriusque lateris inter sese, atque etiam cum posterioribus carotidum ramis: & carotidum mutuas inosculaciones maxime fieri circa calvariæ basin, sub dura meninge & intra eandem. In horum inosculacionum notitiam per tale experimentum se incidisse scribit, *anat. cerebr. cap. 7.* *Liquorem*, inquit, *atramento tinctum quoties in carotidem alterutram injeci, statim rami utriusque lateris, imò & arteriarum vertebrarum præcipua propagines, eadem tincturâ inficiebantur. Quinimo si talis injectio per unicum aditum aliquoties reiteretur, vasa quælibet cerebri ac cerebelli angulum & recessum perreptantia, eodem colore imbuentur. Etiam quibus rete mirabile adest, tinctura injecta ex uno latere, vasorum plexus retiformes in utroque pervadet. Hinc plane constat, quod inter vasa totum ἐννίσφαλον irrigantia, communicatio habetur.* Tandem addit; quod his vasorum inosculatorum reticulis plurimæ exiles glandulæ interjiciantur, facile perceptibiles in cerebro humido & hydropico, etsi in aliis vix conspici queant.

Bauhinus, Vellingius, alique nonnulli, tradunt, etiam tubulos multos sinuum duræ meningis in cerebri substantiam definere, & aliis sanguiferis vasis intermisceri. Quod tamen rationi & experientiæ repugnat, cum sanguis è sinibus ad substantiam cerebri non feratur, sed autopsia doceat, illum per plurimos arteriarum venarumque fines è cerebri substantia & membranis effundi in sinus, ut præcedente capite dictum.

Nervos cerebrum in propria substantia *Nervi.* nullos possidet, cum enim sentiendi organum generale sit, de omnibus sensibus & motibus animalibus judicans, debuit sensus & animalis motus expers esse: nam uno sensu motuve præditum, de aliis non bene judicasset, quia singuli sensus ab uno tantum objecto moventur, ut visus ab objecto visibili, tactus à tactibili, &c. Si igitur cerebrum uno aliquo sensu motuve præditum fuisset, anima per illud organum de quolibet sensu & motu non potuisset justum judicium ferre: ac propterea sensus & animalis motus expers conditum, nec in substantia sua ullis nervis donatum est; quamvis duntaxat minimas, & non nisi microscopio vix perceptibiles fibrillas (de quibus ante dictum) quæ nervorum sunt origines, contineat, ex iisque coagmentatis efformetur, & è medulla sua oblongata omnibus nervis exortum præbeat. Hinc etiam Galenus,

Galenus, 1. de sympt. caus. cap. 1. bene statuit, quod cerebrum, non ut sentiat, sed ut sentiendi vim præstet, factum sit: eademque de causa illud 3. de caus. symp. organum non sentiens appellavit.

Diviso.

Dividitur cerebrum proprie sumptum in dextram sinistramque regionem, intercedente duræ meningis falcata duplicatura, quæ tamen divisio se ulterius non extendit quam ad corpus callosum. At sumptum pro eo toto viscere quod cranio includitur, dividitur in cerebrum & cerebellum, quatenus intercessione duræ meningis pro maiore parte à se invicem separantur.

Motus.

Cerebrum moveri extra dubium ponendum est, cum autopsia illud doceat, & ex vivorum inspectione adeo notum existat, ut negari minimè possit. Verum de isto motu gravis inter Anatomicos agitur questio, scilicet anne proprio (non animali, sed naturali) motu per se moveatur, an verò moveatur ab alio. Prius statuunt, Laurentius, anat. lib. 10. quest. 9. Piccolhomini, in anat. & Bauhinus, anat. lib. 3. cap. 15. idque varis speciosis rationibus confirmare nituntur. Posterius, & quidem verius, sentiunt, Vesalius, Fallopius, aliique, quibus etiam nostrum calculum adijimus. Nam per se immobile est cerebrum, at per accidens continue movetur ab alio, nempe corde, idque non animali, sed naturali systoles & diastoles motu, sequiturque exactissime motum arteriarum: quippe arterioso fervidoque sanguine è corde per arterias in substantiam ejus impulso, mox dilatatur, eodemque sanguine in eadem substantia statim refrigerato, mox concidit. Hic motus per autopsiam patet, & à me, cum antehac in castris & prope castra praxin exercerem, non semel observatus fuit in capitis vulneribus, in quibus cerebri substantia, per ossium & meningum ablationem casim factam, conspicua evaserat: nam prout in carpo pulsus parvus aut magnus, rarus aut celer sentiebatur, ad eandem normam etiam cerebrum moveri conspiciabatur, ejusque motus, deficiente per syncope in carpo pulsu, eodem tempore omnino deficiebat, simulque omnium partium animalis motus cessabat; agro verò ad se redeunte, una cum pulsu cordis & arteriarum redibat motus cerebri, isque cordis motui omnino correspondebat. Quod certissimum indicium est, cerebrum non moveri per se, sed per accidens à corde moveri, ejusque spiritus animales in medullam & nervos influere per solam cordis impulsionem: ad hæc; cor non moveri à spiritibus animalibus è cerebro in ipsum influentibus, cum motus cerebri tunc necessario illum influxum præcedere & facere deberet: atqui si cordis motus illum cerebri præcedat, tunc fieri non posse ut à Spiritibus

animalibus, post primum cordis motum influentibus prior seu primus cordis motus producat: videantur hac de re alia quædam lib. 2. cap. 7. Denique cerebrum per se omnino mobile esse non posse, ipsam rationem docere, cum ad dilatationis & constrictionis motum perficiendum requirantur, aut muscoli, aut saltem fibræ adeo fortes quæ se contrahere possint, quibus utrisque caret. Atque sic undequaque patet, illud non per se, aut proprio motu, sed per accidens moveri à corde.

Sed quæritur an ille cerebri motus cum cordis motu coincidat, id est, an ambo eodem tempore & instanti æquali modo moveantur. Columbus sentit, quod motus cerebri cum cordis motu exacte coincidat, & utraque pars simul intumescat, ac simul concidat: hoc si Columbus dixisset de motu cerebri & arteriarum, tunc vera dixisset, sed de cordis motu verum esse non potest. Nam cum cor contrahitur & concidit, tunc arteriæ per sanguinem imperuose in eas impulsæ, intumescunt, simulque cum iis intumescantibus dilatatur cerebrum, ergo una cum arteriis dilatatur eo momento quo cor concidit, & rursus eo concidit, quo cor dilatatur. Atque hinc Riolanus, anthropog. lib. 7. cap. 1. melius & verè judicat, motum cerebri contrarium esse cordis motui, cumque per systolem cerebrum comprimitur, tunc per diastolem cor attollit & contra.

Ex his jam manifestum est, quantum An cerebrum proprio motu moveatur. erraverit doctissimus Fernelius, qui, 6. patholog. cap. 8. ex sententia Galeni, dicit: Cerebri corpus jugi constantique agitatione, cordis more, ex se, & sua sponte movetur. Hoc ipsum etiam sentiunt, Vesalius, Fallopius, Bauhinus, Riolanus, Mercatus, Sennertus, & Plempius. Verum Andreas Laurentius, lib. 10. anat. cap. 9. & quest. 9. hujus sententiæ dimidiam partem sustinere videtur, nam dicit cerebrum moveri, partim motu naturali proprio, partim alieno, scilicet arteriarum. Highmorus cerebro omnem motum denegat, tam accidentalem, quam proprium, & illum qui ablato cranio sentitur ac conspicitur, scribit esse motum membranarum ex accidenti contingentem propter arterias iis insertas: idque eo argumento imprimis probat, quod spinalis medulla sit immobilis, nec ullo modo pulset. Verum credo Highmorum esse insignem Medicum theoreticum, & physicum præclarum (utrumque doctissima ejus scripta satis testantur) sed interim tamen non tam pertinaciter opinioni suæ fidentem, quin si aliquando (ut ego aliquoties feci, & Plempius, lib. 2. fund. med. cap. 6. atque etiam Hildanus, cent. 1. observat. 13. se etiam fecisse referunt.) vulnera cerebri cum partis substantiæ ipsius ablatione viderit, & tunc nudæ

nudæ substantiæ cerebri motum observaverit, facile in meam sententiam discessurus sit. Immobilitas medullæ prolongatæ nihil probat: quippe cerebrum pullare seu moveri potest, & spiritus ex eo in medullam propelli, licet non manifeste moveatur medulla; forte licet unda propellit undam, ita spiritus per eam propelluntur in nervos; quemadmodum simile etiam contingere videmus in venis per quas sanguis sine earum pulsu moveatur & transit, cum tamen per arteriarum pulsationem in eas influat, & pulsatione arteriarum desinente, ilico moveri desinat, quod in venæsectione brachii multoties observatur, cum nimis arcta injecta ligatura arterias omnino constringit, aut æger in syncopen incidit; quippe mox cessante arteriarum brachii pulsu, nihil sanguinis per vulnusculum venæ inflatum effluit; rursus verò solutâ ligaturâ, vel ægro ad se redeunte, arteriisque sic iterum pulsantibus, sanguis rursus effluit. Sic etiam Spiritus è cerebro per medullam sine medullâ manifestò motu moveri possunt. Præterea, quis scit an non medulla moveatur eodem modo ut cerebrum? Ut hoc certo sciri posset, primo cranium in vivo animali aperiendum, & ablatâ durâ meningē cerebrum denudandum foret; deinde etiam convenientibus instrumentis vertebræ forent aperiendæ, & medulla prolongata denudanda, ut sic per utriusque, scilicet cerebri & medullæ, inspectionem judicari posset, non modo an medulla moveatur, verum etiam an eodem modo & tempore moveatur cum cerebro: sed dum apparatus ille fieret, animal moriretur antequam apertio facta esset, atque sic per mortui inspectionem nihil certi sciri posset. Interim Plempius probabili conjecturâ putat medullam etiam moveri, quia est veluti apophysis cerebri, quæ propterea cum cerebro moveri debere videtur, ut spiritus animales per dilatationem admissos, rursus per constrictionem seu concidentiam in nervos exprimere possit.

*Necessitas  
motus.*

*Quale sit or-  
ganum.*

*Facultatum  
sedes.*

Dictus cerebri motus, quamvis accidentalitatis sit, maxime tamen necessarius est, ut scilicet, dum dilatatur ex arteriis recipiat sanguinem arteriosum, & dum concidit, spiritus animales ex eo sanguine confectos versus nervos, residuumque sanguinem ad duræ meningis sinus & venas propellat, quorum neutrum sine isto motu peragi posset.

Cerebrum autem, ut ante dictum, est organum in quo, & per quod facultates animales, ministerio spirituum animalium in eo genitorum, peraguntur: de quorum spirituum generatione pluribus agetur, cap. 10. & 11.

Verum cum Facultates animales sint sentientes, appetentes, & moventes, dubium incidit in quam cerebri parte singulæ ha-

bitent? Fernelius, *lib. 3. pathol. cap. 18.* sentientem facultatem dicit in cerebri meningibus residere, quia illæ sentiunt, non verò moventur: moventem facultatem in medulla cerebri sedem habere, quia hæc movetur, sensu autem caret. Hanc opinionem refutat Plempius, *lib. 2. fund. medic. cap. 4.* & bene docet, in ipsa cerebri substantia utramque facultatem herere & generari, indeque reliquis partibus communicari.

Rursus, de principibus facultatibus, imaginatione, ratiocinatione, & memoria controversum est, fiantne in tota cerebri substantia, an omnes in una ejus parte, an verò singulæ distinctæ in distinctis cerebri locis. Aëtius, *serm. 2. tetrab. 2. cap. 2.* atque etiam Arabum sectatores, illas sedibus distinctas esse docent, & phantasie anteriorem, ratiocinationi mediam, memoriæ posteriorem cerebri partem adscribunt, his inducti rationibus. 1. Quia sæpe contingit, ut læsâ unâ facultate altera salva maneat. 2. Quia læsa anticâ capitis parte, læditur phantasia; mediâ, læditur ratiocinatio; posticâ male affectâ læditur memoria. Alii rursus has actiones in toto cerebro exerceri, & tantum efficiendi ratione differre, cerebrumque variis modis circa eas occupari statuunt. Quorum sententiam, ut probabiliorem, firmis rationibus stabiliant, Daniel Sennertus, *lib. 1. institut. major. cap. 15.* & Plempius, *loco ante citato*, qui ambo dictis capitibus quæstionem hanc latius examinant, eaque de re legi poterunt, nimis enim longum foret illa omnia hic inquirere. Ludovicus Mercatus, *tom. 1. lib. 1. quæst. 126.* videtur ambas dictas opiniones aliquo modo velle conjungere, dum sic inquit: *Licet in universo cerebro insint omnes facultates, tenendum tamen est, in hac magis quam in illa cavitate aliam aliâ magis vigere & operari, prout spiritus in hac cavitate tenuiores sunt, perfectiores, & magis elaborati, ac temperatura huic ministerio proprior, quam illi.*

Verum illas omnes dictas opiniones admodum dubias constituit experientia, ita ut nihil fere certi possit decerni, tam de loco in quo facultates illæ peraguntur, quam de modo quo peraguntur. Multa enim extant exempla, à Nicolao Massa, Carpo, Fallopio, Vega, Francisco Arceo, Augenio, Andrea à Cruce, Petro de Marchettis, aliisque præstantissimis practicis notata, ægrorum quibus è magnis vulneribus capitis notabiles cerebri portiones prodire & rescissæ sunt, integris manentibus modò dictis principibus functionibus, quod tamen fieri non posse videtur, si illæ actiones peragantur in toto cerebro, aut aliqua ejus parte, cum organo operante graviter læso, ejusque aliqua parte ablatâ, non possint non nobilissi-



nobilissimæ illæ actiones graviter lædi. Paulo inferius, scilicet *hujus lib. cap. 10.* adscribo historiam raram, cujusdam juvenis, cui magnum apostema obortum fuerat in cerebro, usque in ventriculos superiores penetrans, qui tamen mente sanus vixit ad septem hebdomadas. Aliud notabile exemplum nobis hic Ultrajecti occurrit mense Januario anni 1670. in ancilla D. Henrici van Solingen, Med. Doct. & hujus urbis poliatri, cui 5. Januarii per infortunium gravis lapis (ponderis 30. librarum, præter propter) è domus summitate decedit in superiorem dextram capitis partem, cum magna ossium bregmatis & frontis, circa futuram coronalem diffractione ac depressione, cerebrique læsione, quod cerebrum, biduo post quatuordecim fractorum ossium exemptionem, meningibus adhuc intactum, sursum è lato vulnere epullulare incepit, idque paulatim tanta altitudine, ut primo columbini, postea gallinacei, denique anserini ovi magnitudine extra cranium extaret, eaque protuberante parte magno cum fœtore sponte separata, rursus de novo alia similis epullulavit, & sic diversis vicibus aliquæ putridæ partes sponte deciderunt, ita ut durante curatione, substantiæ cerebri putridi quantitas ad pugni magnitudinem separata fuerit: ægra tamen in illo statu vixit usque ad trigésimum sextum diem, scilicet ad decimum mensis Februarii, quo mortua est: eoque toto tempore in vita ipsi mens constitit, actionesque animales principes bene peragebantur; etsi durante curatione sinistri totius lateris (in quod lapis non deciderat) continua paralyti ab ipso principio detineretur, & bis terve convulsionibus ac singultu corriperebatur. Post mortem, ablato cranio, in dextra cerebri parte magna cavitas inventa fuit (propter substantiæ cerebri magnam partem putredine separatam, ac per vulnus expulsum) sese cum putredine extendens per ejusdem lateris ventriculum superiorem, simulque à latere ventriculum tertium seu medium transiens usque ad os sphænoideum. Curationi, præter me & H. van Solingen, etiam interfuerunt, Henricus Gesselius, Lambertus Velthuisius, Petrus Wassenæer, & Adrianus Gentnam, Medicinæ Doctores & practici: item Everhardus à Sypesteyn, Cornelius à Pyllsweert, alique duo tresve chirurgi. Hic memorandus casus satis docet, quam dubia sint illa omnia quæ de principum facultatum animalium sedibus, aut distinctis, aut toti cerebro æqualiter adscriptis, vulgò traduntur: cum in hac ægra vita mentisque illæ actiones usque ad trigésimum sextum diem persisterint, hæque neque magna cerebri putredo, neque substantiæ ejusdem ad pugni magnitudinem ablatio, impediuerit.

Verum hæc quæ de læsione cerebri modò dicta sunt, nimis parva videbuntur, si conferantur cum eo quod de omnimodo cerebri defectu commemorat Theodorus Kerckringius; *observat. anatom.* 46. quippe scribit se accepisse puerum quinque mensium cum dimidio, hydrocephalo mortuum, atque in ejus dissecto cranio (cujus futuræ admodum hiabant) nihil cerebri, sed ejus loco aquam mucosam reperisse, cujus simile dicit à nemine Anatomicorum hæcenus observatum fuisse. Verum licet ille se primum istius rei observatorem esse putet, tamen multis ante illum annis simile quid etiam scripsit Zacutus Lusitanus, *prax. admir. lib. 1. observat.* 5. de puero curato à magno vulnere capitis, cum alicujus partis cerebri perditione, & triennio post hydrocephalo correpto, ac mortuo: in cujus aperto capite, loco cerebri, inventa fuit aqua lympidissima, boni odoris, quæ gustata videbatur insipida. Simile quid etiam scribit Samuel Costerus, *epist. ad Nicolaum Fontanum, consult. & respons. pag.* 13. de puero sine cerebro nato, cujus loco aqua lympidissima reperta fuit, quem puerum se etiam, 26. Decembris, anni 1629. vidisse testantur Fontanus & Carpus. Ubinam in istis pueris confecti fuerunt Spiritus animales? ubinam constitere facultatum principum, & sensorii communis sedes? Respondendum, has observationes manifestum continere errorem, insontem quidem, sed per negligentiorum Kerckringii, Zacuti, Costeri, aliorumque inspectionem introductum. Nam *Primo*, potuit cerebrum non quidem penitus defuisse, ut illi putaverunt, sed per redundans serum adeo fuisse emollitum, ut mucus esse visum fuerit, atque hinc etiam paucos spiritus animales generatos, & principum facultatum actiones vix debiliter peractas, propter organi ineptitudinem (sicut embryoni contingit, in cujus principio etiam mucosum est cerebrum, instar albuminis ovi, sed tamen non deest) sicque pueros tandem mortuos fuisse. *Secundo*, potuerunt etiam Kerckringius, Zacutus, & Costerus, propter nimis festinatam inspectionem, non satis accurate observasse, an non aliquid solidioris cerebri superfuerit, quo antedictæ actiones peragi potuerint. Vesalius, *anat. lib. 1. cap. 5.* in hydrocephali cujusdam cerebri ventriculis novem feri libras invenit, qua quantitate cerebrum superiore parte fere ad membranæ crassitiam, propter extensionem, tenue evaserat: sed interim cerebellum, & universa cerebri basis, nec non nervorum productiones, secundum naturam se habebant. Sic etiam, præter omni dubio, in dictis Kerckringii, & cæterorum hydrocephalicis cerebrum superius fuit admodum extensum, tenue, & molle, atque hinc illi basin & cerebellum

*Cerebri totalis defectus.*

X x

non



non inspiciendo, nimis præcipitanter judicarunt illud omnino defuisse. Præterea, quod ad opinionis suæ confirmationem citato loco subjungit Kerckringius, ex relatu imperitissimi, atque vix fide digni cujusdam lanionis, de ovibus fatuis omnino sine cerebro repertis, mera fabula est, cui Kerckringius fidem adhibere non debuisset: quoniam nullum animal è viviparis natum sine cerebro vivere potest, & quo magis in eo ab ipso formationis principio perficiuntur cor & cerebrum, eo citius & magis increscunt omnes corporis partes, simulque omnes actiones, cum naturales, tum animales. Atque ita hæ Kerckringii, Zacuti, & Costeri observationes plane non ostendunt, functiones animales sine cerebro peragi, aut hominem sine cerebro vivere posse, quamvis ipsimet per errorem seducti, hoc aliis inculcare studeant. Sed interim hic permanentes hærent crassæ istæ nebulæ de functionum animalium sedibus, & actionum modis, quas tenebras qui dispellere poterit, magnus erit Apollo.

Rara cerebri constitutio.

Dictas illas tenebras adhuc densiores efficit rara quædam constitutio in cerebro bovis observata, cujus admirandam historiam, ex Jacobo de Nigroponte exscribit Bauschius, *ephemerid. med. phys. Getman. tom. 1. observ. 130*. Scribit monachos S. Benedicti, Patavii bovem faginare voluisse, sed cum non pinguefceret, licet escas avidè comederet, eum occidisse, causam istius macilentia inquisituri; eamque anatomen, plurimis spectantibus, peractam fuisse à Sebastiano Scarabeccio, professore Patavino. Ubi, inquit, *ventum est ad cerebrum, illud totum instar saxi repertum est. Obstupescitibus, omnibus putarunt primo vi ingentis frigoris congelatum esse, unde posito capite in catinum, ad ignem, aquâ superfusâ, sat longo tempore coxerunt, at finitâ cocturâ, ut prius, cerebrum durissimum reppererunt, nec extra cranium ullatenus extrahere potuerunt*. Post hanc historiam tandem addit duo dubia. *Hinc jam 1. nascitur, inquit, dubium inperceptibile, si cerebrum animalium functionum, motus & sensus est principium, & hoc petrefactum supponitur, quomodo tamen influere potuerit facultas ad bovi motum, sensum, & inde appetitum ad vorandum impertiendum. 2. Quare appetitu præditus bos, non tamen pinguior evaserit?* Non minus admirandum fuit cerebrum in alio bove Suecico visum, à Bartholino descriptum, *histor. anat. cent. 6. hist. 91*. quod totum in lapidem, multis foraminulis porosum, erat conversum: & etiamnum hodie asservatur in prædio Comitum Oxensternii, ubi bos ille occisus est. Profectò, tales observationes pensius consideratæ, nos jubent judicium, de functio-

num animalium sedibus & agendi modis, adhuc aliquantulum ad dubitationis clavum suspendere, usque dum alia certiora quædam inventa hanc lucem clariorem effecerint.

Cerebrum esse viscus nobilissimum, quod cum corde totius corporis principatum obtinet, docent ejus actiones: solum enim & unicum organum est, à & in quo spiritus animales conficiuntur, sine quibus præterquam quod vita subsistere nequeat, etiam nullæ qualescunque animales actiones peraguntur, quæ & ipsæ ex hac sede scaturiunt. Unde patet læsiones ejus admodum periculosas existere, & Hippocratem vulnera in ventriculos penetrantia merito lethalia pronunciasse, imò quælibet ejus vulnera, etiam minora, pro summe periculosis & lethali-bus habenda esse. Quamvis enim in curatione vulnere cerebri interdum monstra (ut loquitur Averrhoes) contigerint, & nonnulli vitæ discrimen feliciter evaserint, quibus meningum & substantiæ cerebri aliqua notabilis portio ablata fuerat (quod ego ipsemet aliquoties vidi, atque etiam Schenckius plurimorum testimoniis, imò & Hildanus *cent. 1. observ. 13*. ac Petrus de Marchettis, *observat. medic. chirurg.* singuli quatuor historiis talium ægrorum à se feliciter curatorum: nec non Alexander Benedictus, *lib. 4. anat. cap. 24*. Valleriola, *lib. 4. observ. 9. & 10*. Zacutus Lusitanus, *prax. admir. lib. 1. observ. 9*. alique plures rarissimis à se observatis historiis, confirmant) tamen maxima pars à levi meningum cerebri vulnere solet mori, & rarissime contingit, ut aliquis sic vulneratus evadat.

Nobilitas cerebri.

Hic obiter notandum illud quod scribit Plinius, *lib. 10. histor. natur. cap. 66*. scilicet, ex cerebro humano putrescente gigni angues. Hujus rei exemplum habet Plutarchus, in *vita Cleominis*, quem scribit à Ptolomeo in crucem actum fuisse, ejusque caput paucis post diebus ingentem draconem complicasse, quem Doctores è medulla cerebri putrescente ac contabescente natum fuisse tradebant, atque sic rem plurimis admirandam & stupendam explicabant. Ita quoque refert Rolfincius, ex theologo Gerardo, historiam nobilis cujusdam à Schleiniz, cujus sepultum cadaver, exacto post mortem mense, è sepulchro effossum fuit, in eoque duo magni serpentes ex putridis oculorum angulis prorumpentes, inventi fuere. Videtur certè Natura per hanc è cadavere humano serpentis generationem, quasi digito auctorem nostrarum calamitatum, citæque nostræ corruptionis, demonstrare velle.

Angues ex cerebro.

De officio seu actione cerebri vide *cap. 10*.

CAPUT

## CAPUT VI.

De Corpore calloso, Septo lucido, tribus Ventriculis,  
Plexu choroide, Fornice, Natibus, Testibus,  
& Glandula pineali.

N demonstratione partium cerebri, alii à superiore, alii ab inferiore parte incipiunt, illi antiquam, hi novam sectionis methodum sequentes. Nos autem primo secundum antiquam, maximeque familiarem methodum, & postea etiam breviter secundum novam, totum hoc negotium exhibebimus.

Corpus callosum.

Cerebro superna parte, qua intercedente falce dividitur, hinc inde aliquantum diducto, inferius infra divisionem conspicuum fit **Corpus callosum**, aliàs **psaloides** dictum: quod Anatomi communitè tradunt esse cerebri portionem reliquâ substantiâ duriorem, cum tamen mollitie & albedine reliquis interiores cerebri partes adæquare videatur. Non est autem peculiare aliquod corpus cerebro adjectum, sed nihil aliud quam utriusque lateris cerebri connexio, seu unio, vel potius substantiæ continuatio. In hoc corpore secundum longitudinem dissecto, plurimas strias obliquas se observasse dicit, & depingit, ac describit Thomas Willis, in *anat. cereb.* Has strias, seu fibras, ope microscopii etiam observavit Malpighius, *epist. ad Fracassat.* easque in piscium cerebro ita evidentes esse scribit, ut si adverso lumine spectentur, eburneum pectinem representent, & vascula sanguinea inter eas decurrentia conspiciantur.

Septum lucidum.

Inferior pars corporis callosi **Septum**, seu **Speculum lucidum** & **Fornicem** constituit, eique à lateribus duo ventriculi superiores adjacent.

Superius duæ notabiles venæ corpori calloso incumbunt, ab utroque latere una, quæ in sinum quartum aperiuntur. In has plurimorum vasculorum tenuis meningis sanguis deponitur, per eas in dictum sinum exonerandus.

Hiatus septi lucidi.

Franciscus de le Boë Sylvius, *disput. med. 4. thes. 13.* novum quendam hiatus in septo à se observatum describit. **Corpus callosum**, inquit, ubi in **septum lucidum** incipit attenuari, hiatus habere ipsum etiam septum, quamvis tenuissimum, in partes duas nonnquam diremptum, cum admiratione ante annum casu observavimus, & spectatoribus nostris jam demonstravimus aliquoties.

Ventriculi.

Varie in cerebro notandæ veniunt cellulæ in se mutuo coeuntes. Quamvis enim

in nobilissimo hoc viscere contentæ cavitates sint continuæ, attamen quia primo intuitu quasi separatæ videntur, earumque continuas per angustiores ductus, seu transitus fit, hinc Anatomi eas in quatuor Ventriculos, aut Sinus, Galeno *ῥαλῆς* dictos, diviserunt, quorum tres in cerebro siti sunt, de quibus hoc capite agemus; quartus cerebello & medullæ oblongatæ communis est, de quo sequente capite. Omnes autem tenuissima membranula interius investuntur, cui obscurum aliquem sensum, non sine ratione, tribuit Erasius, *part. 4. disp. contr. Paracels.*

Cerebro usque ad corpus callosum ablato, mox in conspectum veniunt duo **Ventriculi superiores**, vulgò **Anteriores**, aliis **Laterales**, dicti quorum unus dexter, alter sinister.

Ventriculi duo superiores.

Lunæ falcatæ faciem aliquo modo referunt, & circa medium, ubi fere concurrunt, interstitio ab ipsa cerebri substantia candidissimo (hoc ex observatione Malpighii, fibris rectis, per longum ab anterioribus ad posteriora extensis, donatur) admoto lumine transparente, atque hinc **Septum lucidum**, nonnullis **Speculum** appellatur, à se invicem distinguuntur.

Sunt hi ventriculi forma usuque pares, cæteris longe ampliores & longiores, tenuissimâ membranâ undique obducti, qua reliquorum duorum interiora etiam investuntur, ut supra dictum.

Parte superiore à latiusculo obtusoque principio versus tertium ventriculum nonnihil arctantur, & utrimque satis lato ductu (qui in cerebro vituli pennam anserinam admittit, in homine multo angustior est) descendunt in processus papillares, qua via pituitam in iis collectam per os ethmoidæ in nares & palatum exonerant. Has vias licet recentiores plerique Anatomi non observaverint, eorumque nonnulli primam illarum inventionem sibi arrogaverint, tamen eas satis longo sermone describit Galenus, *lib. 8. de usu part. cap. 6.*

Parte postica rotundius explicati, falcisque in modum incurvati, deorsum ad cerebri basin feruntur, ac prope nervorum opticorum exortum desinunt; quo loco eos singulos ingreditur ramus arteriæ carotidis, plexum choroideum in iis efformans.

Ductus ad nares.

Inferiore & posteriore horum ventriculorum

Fornix.

lorum parte, ubi in priora reflectantur, in cerebri medio, corpori calloso subiectus, & utrisque cerebri partibus communis conspicitur **Fornix**, foris gibbosus & convexus, intus verò cavus, quem constituit substantia cerebri medullaris candidissima, fibris versus latera inclinatis donata, membranâ tenuissimâ obducta. Appellatur etiam **Testudo**, hoc nomen sortita, quod testudinis, seu fornicis instar in ædificiis, molem incumbens cerebri sustinere videatur: qua de re plura dicentur *cap. 8. in historia nervorum optico- rum.*

A posterioribus verò cruribus, usque ad anteri- us, medio toto spatio, cerebro non adnectitur, sed liber est. Posteri- ora crura Hippocrates appellat *Pedes hippocampi*. Riolanus, duce Arantio, putat hæc esse propa- gines nervorum optico- rum sursum revo- lutas, ex iisque Spiritus opticos, tanquam ex scaturigine, depromi: hinc illas versus anteriora coire, ad unitatem specierum visibilium intra cerebrum faciendam.

Plexus cho- roides.

In his duobus ventriculis superioribus obvi- us est Plexus choroides, qui est elegans & mirabilis quidam, è subtilissima mem- branula à pia matre producta, plurimis- que minutis glandulis, & vasculorum varie complicatis ramulis, contextus: qui ra- muli ab arteriæ carotidis furculis (quibus alii etiam arteriæ cervicalis ramulos admisce- ri putant) suppeditantur. His arterioli- bus terve vidimus unam venulam manifestis- simam, secundum totam plexus longitudi- nem, admisceri (quæ alioqui rarè manifeste conspicua offertur, quamvis semper adesse verosimile sit) suumque sanguinem in tertio ventriculo infundere venæ illic medio plexui semper interjectæ, ac se in sinum quartum exonerantis, sicque cum ea continuam esse. Bauhinus, cum multis aliis, præter ratio- nem & autopsiam, furculos etiam quarti sinus intermisceri tradit. Riolanus, *anim- advers. in Bauhin.* hunc plexum ex solis venis, sine ullis arteriis, conflatum esse scri- bit; sicut è contrario, rete mirabile ex solis arteriis constare putat: cum tamen & ille, & hoc, maxima ex parte ex arteriis constuantur, venasque paucissimas ha- beant, adeo ut eam ob causam nonnulli de venarum admistione omnino dubitave- rint.

Ortus &amp; progressus.

Oritur hic plexus ex infima posteriore horum ventriculorum parte, quam utrim- que ingreditur ramus arteriæ carotidis, qui postquam rete mirabile (de quo dicitur *cap. 8.*) ad glandulam pituitariam constituit, tenui membrana involutus, sursum in hos ventriculos ascendit, ubi in ramulos innu- meros divisus, hunc plexum per dictos ventriculos expansum efformat. Qui cum ad anteriores ventriculorum tuberositates pervenit, utrimque circa fornicis anterioris

crus, in ventriculum tertium, subtus la- tentem, tranfit, cujus ventriculi lateribus undequaque, & ipsius quoque fornicis sub- stantiæ isti ventriculo incumbentis, per exiles ramulos annectitur, quos ramulos in medullas cerebri substantiam emittit. Horum ramulorum annexio & ingressus statim conspicitur, cum fornix leniter ele- vatur ac sursum reflectitur, sicque tertius ventriculus detegitur.

Per hunc plexum sanguis arteriosus ad spirituum animalium confectionem defertur (non tamen per hunc solum, sed longe major pars per infinita vascula corticis, ut dictum *præcedente capite*) è quo per glan- dulas admodum exiles, & sæpe vix conspi- cuas (semel mense Novembri anni 1666. in cadavere humano inveni, & publice de- monstravi, in utroque ventriculo superiore, huic medio plexui, præter ordinarias minu- tissimas glandulas, inhaerentem unam glan- dulam valde conspicuam, magnitudinis pisi majoris, sed molliusculam: sic quoque jam nuper in alio humano cadavere has glandulas majusculas & valde copiosas, aquoso quodam liquore turgidas, secundum totam plexus longitudinem, demonstravi) arterioli- bus plexus interjectas, serosior pars, ad spirituum animalium confectionem inu- tilis, separatur, emulgetur, atque in ven- triculis colligitur, non ut prorsus inutile excrementum, sicut hætenus plurimi ju- dicarunt, sed ut necessarius humor, ibidem in necessarium quendam liquorem præpa- randus: cujus triplex est usus.

I. Ut frigiditate sua temperet & nonni- hil infringat fervorem sanguinis plexum transeuntis (nam plexus ei innatat) eumque sic ad spirituum animalium confectionem præparet.

II. Ut ad tonsillarum orisque glandulas defluens, laryngem & œsophagum conti- nue humectet.

III. Ut in ore (in quo una cum liquore per salivales ductus affluente, salivam con- stituit) & ventriculo cibis masticatis ad- misceatur, eorumque coctionem peculiari fermentatione adjuvet: eodem modo sicut lymphæ ex hepate & glandulis per vasa lym- phatica ad ductus chylicos affluens, chy- lum, cui admiscetur, specifico modo præparat, ut sic ad cor veniens, facile in eo dilatari, ac in sanguinem converti queat.

Cum verò ob cerebri refrigerationem, aliamve debilitatem, ille liquor non satis bene præparatur, tunc crudior & viscosior evadens, majore copia in ventriculis colli- gitur, ex iisque non solum ad dictas partes fluit copiosior, sed multoties ejus major pars, ob nimiam crassitiem & tenacitatem, per ordinarios angustos ductus ad fauces defluere nequens, magna copia per alios ductus

ductus ad nares & palatum descendit, indeque ut superfluum crudum excrementum, quod mucum vulgò appellant, evacuetur.

Hunc esse verum dicti pituitosi liquoris usum, varia docent.

I. Quod in magno æstu, capite multum calefacto & sicciore existente, atque hinc liquore isto multum dissipato, ac paucio ad os & tonsillas delabente, magna fiat oris & faucium exsiccatio, cum siti, sicut illud ipsum eadem de causa fit in febribus, aliisque calidioribus morbis.

II. Quod in appetentia grati alicujus conspectu cibi, una cum salivali humore per vasa salivalia affluente, etiam dictus liquor non minus è cerebro per laxatas vias ad os & linguam defluat, quam spiritus animales ad partes movendas copiosi à mente determinari ac mitti solent.

III. Quod in calidioribus & sicciore temperamento præditis, in quibus parcior est serosa ac pituitosa sanguinis pars, & dictus liquor paucior in cerebri ventriculis colligitur, ac melius excoquitur, ejusque tenuior pars multum dissipatur, nulla, vel admodum pauca excrementa è naribus & palato evacuentur, & saliva quoque oris paucior, ac sitis major fit.

IV. Quod in naturis humidioribus hujus liquoris magna copia in ventriculis cerebri colligatur, atque hinc salivæ copia major in faucium orisque glandulas ac ductus salivales, & sæpe crudior ad os & ventriculum defluat, imò nonnunquam tanta copia, ut una nocte & die interdum pelvis aliquot ea repleantur, si nempe frigida & humida cerebri intemperies illum magna quantitate depluat: quin etiam sæpe ad ventriculum copiosior descendens, illum suâ copiâ, frigiditate, & humiditate ita laxat ac debilitat, fermentaceasque reliquias ei inhærentes adeo infringit, ut appetitus inde pereat, & coctio lædatur.

V. Quod deficiente saliva deglutitio difficilis fiat, & ventriculi coctio non bene peragatur, ut liquet in multis febricitantibus.

Postquam hic serosus liquor è plexu sanguine arterioso separatus, & arteriosi istius sanguinis sufficiens copia ad spirituum animalium confectionem in cerebrum & medullam transmissa est, qui in plexu superest residuus sanguis ad venam (interdum simplicem, frequenter geminam) in tertio ventriculo plexui medio, supra glandulam pinealem, interjectam profluit, per eamque ad magnum sinum falcis deferretur, ut dictum cap. 4. Hanc venam Galenus à nulla alia propagari tradit, propterea quod ejus nulla unio vel conjunctio cum alia vena animadvertatur. Bauhinus verò putat illam esse productionem seu ramum magni sinus;

quem errorem satis convellunt ea quæ de illo sinu diximus citato cap. 4.

Ex his modò dictis obiter notandus venit error Rolfincii, qui, lib. 6. dissert. anatom. cap. 56, 57, 58. longo sermone novum catarrhorum fontem, à nemine antea descriptum, quaerens, omniumque aliorum de causis catarrhi opiniones satis temere rejiciens, concludit, arterias carotides catarrhorum fontem suppeditare. Has quippe dicit pituitosos humores partim deponere in rete mirabili; ex eoque illa excrementa ulterius ascendere in plexum choroïdem & ventriculos cerebri, inde ad glandulam pituitariam defluere, in eaque sensim assumi: partim eosdem pituitosos humores per internæ propaginis ramum anteriorem expuere in spongiosas narium, palati, faucium, & oris partes omnes, glandulasque vicinas, eosque inde, ut prorsus inutiles expurgari: vel si peccent in quantitate, qualitate, excernendi modo, tempore, aut loco, tunc inde catarrhos generari. Non videtur doctissimus Vir considerasse, quam facile pituitosi humores angustias tenuissimi retis & plexus obstruant, & quam graves inde morbi oriantur, apoplexia, carus, lethargus, cataphora, &c. quibus homines frequentissime obnoxii forent, si illa propositio vera esset. Non animadvertit etiam arterias sanguinem æqualiter ad omnes corporis partes, sine ullo selectu, devehere, nec speciatim ejus partes biliosas ad hepar, melancholicas ad lienem, pituitosas ad caput deferre, in eaque viscera deponere (quod ita fieri dicit) cum arteriis nullum insit selectionis judicium, nulla separandi potestas, nec etiam dicta viscera speciali attractionis vi illud facere queant, sed unius ejusdemque sanguinis varia mutatio, & minimarum particularum separatio fiat, pro diversitate glandularum, conformationis, & naturæ partium in quas influit. Ille citatis locis multa ad opinionis suæ probationem adfert, sed ea experientiae ac rationi tam contraria, ut refutatione non indigeant.

Porro, retrorsum inverso fornice, conspicuus evadit **Ventriculus tertius**, seu **medius**, qui est concursus duorum superiorum, seu anteriorum, in centro quasi medullæ cerebri efformatus. In eo varia considerata occurrunt.

I. Duo meatus: quorum primus eminente processu (hunc Vellingius *Vulvam* appellat) deorsum fertur ad infundibulum & glandulam pituitariam, per quem pituitosa cerebri excrementa evacuari, vulgò traduntur, sed malè, ut docebimus cap. 8. Alter, qui **Anus** dicitur, seu *foramen ani*, transit ad ventriculum quartum, & nihil aliud est, quam foramen ex conjunctione

X x 3

Rolfincii error de causa catarrhi.

Ventriculus tertius.

Processus superflui sanguinis à plexu.

feu contactu monticulorum striatorum, & duorum natium ac testium conflatum. Hunc canalem, tenuissima membranula investitum, Sylvius *Alveum* vocat.

II. Duo insignes monticuli oblongi, sursum prominentes, substantiam habentes quasi ex plurimis fibris feu striis compositam, unde eos *Corpora striata* nonnulli appellant. Hi anteriorem supremam medullæ oblongatæ partem constituunt (quod à multis non observatur, qui illos non medullæ, sed cerebri partes esse arbitrantur) cum cerebro & medulla conjunctam, sed peculiaris substantiæ, & quasi desuper medullæ impositam, cum ea tamen unitam ac continuam, candidissima quidem membrana investitam, sed intus fibrosam, minus candidam, & magis porosam quam reliqua medulla. Hæc autem pars soli Visui (in quo divini quid elucet) speciatim inservire videtur, ex eaque egrediuntur nervi optici (hoc cap. 8. latius docebitur) unde Galenus dictos monticulos appellat *Thalamos nervorum opticorum* (ubi nonnulli minus bene per *Thalamos* putant debere intelligi duo posteriora crura fornicis) & Riolanus, *animadv. in Bauhin.* reprehendit Bauhinum, quod scilicet omnes nervos intra cranium scribat oriri à spinali medulla, cum tamen nervi optici revoluti sint circum suos thalamos. Quibus verbis satis indicat, hos monticulos habere substantiam à reliqua medulla quasi nonnihil diversam, eosque solis oculis inservire. Sed interim malè reprehendit Bauhinum, quod dixerit omnes nervos ex medulla oriri, nam etiam opticorum thalami, ut ante dictum, sunt pars suprema medullæ, atque hinc etiam nervi optici ex medulla progrediuntur, quod tamen Riolanus non videtur percepisse.

III. Protuberantiæ quatuor: quarum superiores feu anteriores & majores, à qualicunque similitudine, *Nates* dicuntur, inter quas & protuberantias striatas conspicua est rima, Columbo *Vulva* appellata, continens foramen ani. Inferiores & minores, *Testes* nominantur, suntque quasi duæ epiphyses, seu prominentiæ depressæ, natibus subtus firmiter adnatæ & continuæ. Illa tamen natium testiumque magnitudinis diversitas magis locum habet in brutis, quam in homine, utpote in quo quatuor illæ protuberantiæ haud rarò fere æquales sunt.

*Principia medullæ oblongatæ.*

Sunt autem hæc quatuor protuberantiæ, una cum protuberantiis striatis desuper iis impositis, principia medullæ oblongatæ, inferius cerebro continuata, superius verò & à lateribus tenuissimâ membranâ à pia matre obducta; substantiam habentia quasi ex innumeris tenuissimis fibrillis compactam, qualis per microscopium conspicitur.

De protuberantiis striatis hoc notandum, quod licet candidissima membrana obvelentur, intus nihilominus substantiam habeant peculiarem, striatam, fibrosam, quasi ex longis filamentis compactam (hæc striæ seu fibrillæ, ex quibus etiam cerebri & reliqua medullæ substantia composita est, hic longè conspectiores sunt, quam alibi) minus albicantem quam reliqua medulla, ut sic quasi constituere videantur peculiarem aliquam partem, medullæ oblongatæ principio superiore parte veluti impositam & unitam, ac cum cerebri medulla etiam continuatam. Usus autem harum duarum protuberantiarum est uni nobilissimo sensui inservire, scilicet visui, quia speciatim soli nervi visorii, nec ulli alii, ex iis progrediuntur: qua de re plura videantur cap. 8.

IV. Glandula inter testes & anum, ad foramen ani, quod versus quartum ventriculum ducit, apposita, quæ Græcis *σπένδαρον*, à coni figura, Latinis *Glandula pinealis* dicitur, quod pini turbinatum fructum similitudine quadam representet: aliis etiam *Penis cerebri* vocatur.

*Glandula pinealis.*

Hæc in hominibus exigua est, in ovibus autem & vitulis multo major existit.

Constat substantia duriuscula, quæ tamen citò flaccescit, & in cadaveribus humanis nonnihil inveteratis colliquata vix apparet. Membrana tenui & subluetei seu cinerei coloris obvolvitur.

Oblonga est, mucrone suo sursum, seu potius antrorsum spectans, basi verò substantiæ cerebri incumbens.

Superius plexu choroide, & vena per medium plexum illic decurrente, contegitur, quibus ita connectitur, ut in homine cum iis facile avellatur, quia cerebri substantiæ tam parum adhæret, ut Bauhinus ei omnino non cohærere scribat, cum tamen illam nonnihil cum cerebro uniri, paulo manifestius in brutis appareat.

Sylvius ei etiam nerveos quosdam funiculos tribuit. Whartonius dicit in eam ingredi duos nervos, utrumque unum, ab ipso exortu spinalis medullæ oriundos, sed exiles. Verum horum nervulorum demonstratio difficilis foret, nec quisquam eo loco facile ullos nervos dignoscat: hoc tamen attentiore inspectione observavi, plexum choroidem in tertio ventriculo undequaque plurimos minimarum arteriolarum ramulos, tanquam exiles albicantes fibrillas, emittere in incumbentes fornicis, & natium testiumque, atque etiam in protuberantiarum striatarum, & glandulæ pinealis substantiam, sicque plexum dictis partibus per hos fibrillosos ramulos undique adhærere, per eosque sanguinem arteriosum in eo præparatum, ac sero pituitoso aliqua parte exutum, in dictam substantiam effundere: quos ramulos minus diligenter consideratos

vero-

verosimile est Sylvium & Whartonum de-  
cepisse, atque hinc pro nervis ab iis habitos  
fuisse, quia nonnihil albicant, sicut etiam  
aliarum partium minimæ arteriolæ: nec  
sanguis in iis conspicitur, quia solum tenuis-  
sima maximeque halituoza sanguinis pars  
per eas raptim transit, nec in iis diu subsistit,  
crassioribus particulis per venam plexui in-  
terjectam defluentibus.

*Arena &  
calculi in  
ea inventi.*

In hac glandula, scribit Sylvius, se  
diversis vicibus arenulas, & semel exiguum  
subrotundum calculum, pisi quartam par-  
tem æquantem, invenisse: qualem etiam  
calculum, plus quam dimidium glandulæ  
occupantem, se, adstantibus studiosis, in  
ea reperisse, eundemque celeberrimo Ana-  
tomico Jo. van Horne, in admirandorum  
thesauro suo conservandum, tradidisse,  
scribit Florentius Schuyt, in *præfat. ad lib.  
Cartesii de homine*. Regnerus de Graef, de  
calculis in ea glandula à se repertis, ita scri-  
bit. *In omnibus corporis glandulis calculos  
generari credimus, præsertim tamen in glan-  
dula pineali, quia in illa plus quam vigesies, in  
hominibus lento morbo, vel violenta morte ex-  
stinctis, calculos observavimus; quod tamen  
longe frequentius in Gallia, quam in nostra  
Batavia, occurrit.* Hujusmodi calculi certè  
iis muniis plurimum obessent, quæ hodie  
glandulæ pineali à multis recentioribus Phi-  
losophis adscribuntur, cum tamen ab istor-  
um calculorum inventoribus nusquam ob-  
servatum legam, illis hominibus, in quo-  
rum cadaveribus tales calculi in hac glandu-  
la reperti sunt, in vita quidquam incom-  
modi circa animales actiones contigisse.

*Ufus cona-  
rii.*

De usu hujus glandulæ varix sunt opi-  
niones. Nonnulli putant, illam firmandi  
plexus choroidis munere fungi. Alii, cum  
Galeno, valvulæ ani foramen occludentis  
usum ei adscribunt. Alii ipsam Animam  
ejus angustias, tanquam capsulæ, includunt  
(forte ne per totius microcosmi infinita di-  
verticula nimis errabunda divagetur, &  
aliquando hic illic sui obliviscatur, atque  
sic tempore necessitatis interdum domi non  
inveniatur) hancque putant in ea, tanquam  
in centro cerebri, positam, ideas à quinque  
sensuum sensoriis profectas, colligere, ap-  
prehendere, & discernere, atque ab hoc  
loco etiam spiritus animales, per hos illos  
certos nervos, ad determinatas partes emit-  
tere: quam prostram opinionem hodie  
multi acriter popugnant, alii rursus fortiter  
impugnant. Cartesius, *de pass. anim. part. 1.  
artic. 31. 32. 35.* concedit quidem Animam  
esse junctam toti corpori, sed dicit illam  
specialius, & magis immediate in hac glan-  
dula exercere suas functiones, quam in  
cæteris ullis partibus. Reginus, *medic. lib. 1.  
cap. 12.* illam dicit esse Sensorium commu-  
ne, in eaque sola, non verò in ulla alia  
corporis parte Animam existere. Sic etiam

Ludovicus de la Forge, *comm. in Cartesii  
lib. de hom.* illam esse præcipuam Animæ  
sedem, & verum organum imaginationis  
ac sensus communis, neque isti officio  
quidquam obesse, quod nonnunquam cal-  
culi in ea generentur, aut totum ejus corpus  
calculus fiat, si modo pori sint sufficienter  
magni ad transitum spirituum: imò addit;  
licet ipsa glandula penitus abesset, & so-  
lummodo ejus locus illic superesset, in  
quem se exonerare possent arteriolæ plexus  
choroidis (sicut id fortassis contingere putat  
in prima cerebri formatione, & in illis ca-  
pitibus, in quibus loco hujus glandulæ ali-  
quantum aquæ inventum fuisse dicitur)  
tamen illum solum locum non esse non con-  
venientem sedem Animæ, imaginationis,  
& sensus communis. Certe eodem jure  
similiter, si velit, dicere poterit Ludovicus  
de la Forge, corde penitus absente, si  
duntaxat ejus locus supersit, in quem magna  
vasa se exonerare possint, illum non minus  
futurum convenientem omnium actionum  
vitalium fontem, quam si ipsum cor adesset:  
id est, absente organo agente, aut sine quo  
non potest fieri actio, ipsum organi locum,  
quia spiritus & sanguinem satis transmittit,  
nec quidquam continet quod eorum transi-  
tum impediatur, sufficientem futurum ad or-  
gani actiones perficiendas. Verum ego  
ingenuè fateor, quod hujusmodi subtilita-  
tes, ipsa subtilitate subtiliores, longe su-  
perent meum captum. (Videantur super  
his quædam *præcedente cap. 5. circa finem*)  
Franciscus de le Boë Sylvius, *disput. med. 4.  
thes. 35.* suspicatur in ea humorem aliquem  
elaborari, sed qualem, & in quem usum,  
se valde dubitare. Whartonus denique  
valde inanem de ejus usu opinionem conce-  
pit, putatque illam solummodo excre-  
mentitias quasdam humiditates è principii  
spinalis medullæ cruribus superioribus eli-  
cere. Atque sic de usu hujus glandulæ ad-  
huc sub judice lis est. Ego cuilibet suam  
opinionem reliquens, sentio ejus usum esse  
satis ignotum & obscurum, neque de eo  
quidquam, nisi per meram conjecturam,  
incertissimis rationibus suffultam, statui  
posse arbitror, ac proinde ingeniosas quo-  
rumlibet super hac re speculationes puto  
quidem laudandas, sed non tamen ut Sa-  
crum evangelium, aut fidei articulos ne-  
cessario approbandas.

V. Plexus choroides, qui è superiori-  
bus ventriculis in hunc medium descendens,  
per eum multo latius & crassiore contextu,  
quam in prioribus, expanditur, atque in  
medio venam, modò unam rectam, modò  
geminam, interjectam habet, usque ad  
falcis sinum magnum excurrentem, in  
quam plexus arteriolæ residuum sanguinem  
exonerant, ad sinum deferendum, ut  
paulo ante dictum. Hic autem plexus, ut  
modò

modò relatum, in fornicem, protuberantias striatas, testes, & nates, plurimos minimos ramulos, tanquam fibrillas, emittit, per quos iis undequaque adnectitur: totam quoque glandulam pinealem adeo contegit & obvolvit, ut ea, nisi rupto & amoto plexu, conspici nequeat.

Malpigijs, *epist. ad Fracassat.* cum Moëbio, sentit, ventriculos nullius usus gratia, sed per accidens à Natura fuisse efformatos (quomodo autem formati putentur, supra ex Lud. de la Forge retulimus, *cap. 5. in*

*principio*) sed quantum hæc sententia à vero aberret, ex præcedentibus satis liquet. Usus enim trium ventriculorum cerebri maxime necessarius, est, plexui choroidi laxum & amplum transitum præbere, eumque à compressione defendere: ad hæc serosus ac pituitosus humores, cum è cerebri substantia interiore, tum imprimis è plexu vâculis per exiles glandulas separatos, excipere ac colligere. An in iis generentur Spiritus animales, videndum *cap. 10.*

## CAPUT VII.

## De Cerebello, quarto Ventriculo, &amp; Medulla oblongata.

Cerebellum.



N posteriore & inferiore calvarii parte, scilicet intra ossis occipitis amplos sinus, reconditum est **Cerebellum**,

Græcis *παρεγκεφαλῆς*, & *ἐγκεφάλιον* appellatum, secundam cerebri partem constituens, quasi parvum & privatum cerebrum dictum, quia multo minus est cerebro, & utraque meninge intectum ab eo sejungitur, ac utrimque medullæ oblongatæ exiguo spatio unitur, cum eaque continuatur. Media verò infima sede spinali medullæ committitur parte posteriore, tenuis meningis interventu: & ne quartus ventriculus illic dehiscat, tenui meninge ad nates usque expansa obvolvitur.

Figura.

Formam habet latiusculam, aliquantum depressam, duabus partibus lateralibus globi latioris imaginem utrimque exprimentem.

Magnitudo.

Magnitudinem in homine multo majorem obtinet quam in brutis.

Substantia.

Substantia non multum differt à cerebri substantia, excepto quod minus mollis, sed paulo firmior esse videatur. In innumeras lamellas, frondes ramosque arborum amœno spectaculo referentes, tenuique meninge, plurimis arterialium cervicalium capillaribus ramulis pertexta, investita, altissimè discriminatur, quarum interna mediaque pars candidissimi, externa verò ambiens obscurioris coloris est. Per dictas arteriolas sanguis ei copiosus affunditur, cujus à nutritione residua pars in laterales sinus fluit.

Processus vermiformes.

Duos obtinet **Processus, vermiformes** dictos, qui ex multis particulis transversis, & quasi contortis, tenui membrana copulatis, constant, instar vermium qui in ligno carioso reperiuntur. Horum anterior in quartum ventriculum prominens, natibus testibusve adjacet: posterior verò

non ita prominet, sed mucrone in cerebelli substantiam absimitur. Nonnulli putant hos processus in cerebelli elevatione & compressione modò distendi & elongari, modò contrahi.

Circa posticam trunci medullæ oblongatæ partem **Pons Varolii** conspicitur, *Pons Varolii. lili.* qui constat ex binis utrimque, interdum ternis gibbosis processibus, ex eodem cerebello ad quarti ventriculi circumferentiam protuberantibus, quorum qui ad vermiformem siti, majores sunt, reliqui minores.

Cerebellum nullas habet cavitates, sed in medio sinum latum, non autem profundum, obtinet, quem **Cisternam** aliqui *Cisterna.* nominarunt: hic quarti ventriculi elationem partem constituit.

Quia cerebelli substantia, aut vix, aut plane non differt à substantia cerebri, & eodem modo membranis ac cortice investitur, atque etiam gyros & meandros profundos habet, tenui meninge usque ad intimas profunditates obductos, & arteriolarum venularumque plexibus reticulatis circum circa, non minus quam cerebrum, donatur, hinc vulgò ejus & cerebri officium unum idemque statuitur.

Thomas Willis, *anat. cereb. cap. 15.* *Opinio virilium de officio.* cum hoc officium cerebello adscriptum nihil certi continere, sed tantum conjecturale esse animadverteret, aliam quandam, eamque, ut existimat, veram ac genuinam ejus actionem commentus est. Cerebellum (quod putat esse peculiare viscus) dicit esse peculiarium quorundam spirituum animalium, in quædam opera designatorum, peculiarem scaturiginem, & penum ab ipso cerebro distinctum. Cerebri officium esse tradit, spiritus animales suppeditare, quibus imaginatio, memoria, discursus, aliique superiores functionis animalis actus peragun-



peraguntur; item quibus motus quicunque voluntarii obeuntur. Cerebelli verò officium ipsi videtur esse, spiritus animales seorsim, à Spiritibus in cerebro genitis diversos, procreare, & peculiaribus quibusdam nervis suppeditare, quibus actiones involuntariæ (cujusmodi sunt, cordis pulsatio, respiratio *et c.*, alimenti coctio, chyli protrusio, aliæque multæ) quæ nobis insciis & invitis constanti ritu fiunt, peraguntur. Hoc novum commentum ibidem multis rationibus confirmare nititur, quæ tamen attentius examinatæ, tam validæ non sunt, ut dictam sententiam satis stabilire queant, sicut quilibet ex lectione citari loci percipere poterit. Interim, licet verba ejus de officio cerebelli meram duntaxat conjecturam contineant, tamen summo pere laudandam censeo doctissimi Viri diligentiam, qui rem obscuram novo ingenioso commento illustrare, aliisque ad ultiores speculationes viam patefacere voluit. Illud ejus commentum etiam valde extollit & admiratur Fracassatus, *respons. ad Malpig.* eoque putat problemata motuum naturalium, qui scilicet inconsulto fiunt cerebro, optime solvi, multa que ignorata, quorum causas & rationes una sibi partium natura & proprietas vindicabat, recludi posse: si modò vera & indubitata foret hypothesis, quæ de spirituum cerebri ac cerebelli diversitate, eorumque diverso in diversos nervos influxu, præsupponitur: hanc enim planè incertam esse eo probat, quod in volucris & aliis nonnullis animalibus cerebellum non adsit, quibus tamen motus cordis, respiratio, chyli protrusio, &c. æque procedunt, atque iis quæ cerebello donantur. Addit denique; quod si peculiares spiritus involuntariis motibus inservientes in cerebello gignerentur, illos ex eo devenire non posse in nervos sexti paris, è medulla elongata, longè infra cerebellum, oriundos, qui tamen plurimis thoracis & abdominis partibus spiritus animales ad dictos motus perficiendos conferunt, sed devium futurum ad istos nervos comeatum. Adjungere potuisset: hoc concessò, quod per nervos sexti paris fluant spiritus cerebelli, motibus involuntariis inservientes, quomodo tunc per eosdem etiam fluere possint spiritus cerebri voluntariis motibus inservientes, quales motus in ossis hyoidis, laryngis, faucium, & aliis variis musculis peraguntur ope spirituum per hos nervos influentium.

An sit memoria sedes.

Arabes, propter paulo majorem cerebelli duritiem & siccitatem, in eo memoriæ sedem collocarunt, atque hinc fieri tradiderunt, quod postica capitis parte læsa, etiam memoria lædatur. His favere videtur Benivenii *observatio* 89. qua refert historiam furis, qui sæpe deprehensus & castigatus,

anteactorem nunquam meminerat: in quo fure, post mortem, invenit posteriorem capitis partem adeo brevem, ut vix tantillam cerebri (intelligit cerebellum) portiunculam contineret. Sed quid hac de re dicendum, & an hæc Arabum opinio vera sit, judicari poterit ex iis, quæ de principum facultatum sedibus dicta sunt *precedente cap. 5.*

Quantum ad Cerebelli partes, Andreas Laurentius & Riolanus, anteriorem processum, instar valvulæ, putant referare & claudere aditum quarti ventriculi. Verum, cum per se, sicut cerebrum, proprii motus expers sit, vix eo munere fungi posse videtur. Pons Varolii extremos cerebelli circulos constringere, nobilemque ventriculum, aggeris instar, tueri creditur.

Cerebellò ab inferiore parte elevato, in *Ventriculus quartus.* conspectum venit posterior, seu quartus ventriculus, reliquis minor: qui ex truncis spinalis medullæ è cerebello & cerebri tertio ventriculo descendit, & antequam toti uniuntur aliquantum ab invicem distantibus, efformatur: quippe elatior & minor ejus pars à cerebelli sinu, membrana tenui obducto, conficitur: inferior verò & potior pars medullæ oblongatæ quasi insculpta videtur, cavitatem habens fere ad figuram calami scriptorii, qua parte ad scribendum adaptatus est efformatam, unde etiam *Calamus scriptorius olim nominatus fuit.* *Calamus scriptorius.*

Arantius huic ventriculo Cisternæ nomen imposuit. Herophilus illum *Principalissimum*, alii *Nobilem ventriculum* *Nomina.* appellarunt, in eoque spiritus animales, in superioribus ventriculis præparatos, summam perfectionem adipisci, atque inde per poros in medullam & nervos influere tradiderunt. Verum cum illi spiritus in superioribus ventriculis nec conficiantur, nec contineantur, ut abundè docuimus *sequente cap. 10.* satis liquet huic quarto ventriculo non magis convenire functionem spiritus animales generandi, ac perficiendi, quam tribus superioribus: imprimis quia neque materia è qua illi spiritus generari, neque spiritus in aliis ventriculis confecti, atque hic ulterius perficiendi, huic quarto ventriculo suppeditari possunt.

Medulla oblongata, quæ extra cranium delapsa, ad differentiam medullæ *Medulla oblongata.* ossium propriè sic appellatæ, Spinalis medulla dicitur, est pars cerebri & cerebelli durior, compacta & alba, partim intra cranium, longitudine scilicet quatuor digitorum transversorum, consistens: partim extra illud in ossium spinalis fistula, usque ad ossis sacri finem, extensa.

Y y

Etli

Differentia  
inter hanc  
& ossium  
medullam.

Et si improprie Medulla, ab aliquali similitudine, dicatur, tamen à proprie dicta ossium medulla in multis differt. 1. *Substantia*, cum illa non sit adeo humida & pinguis atque hæc, quæ adipi similis & fluxilis est, atque igne liquatur & accenditur, instar olei concreti, illa verò è contrà igne nec fundatur, nec flammam concipiat. 2. *Colore*, cum illa sit magis alba quam hæc. 3. *Involucris*, cum illa obtineat duas membranas, & circumjecta ossa, hæc verò nullis membranis obvoluta, in solis ossium cavitatibus & porositatibus contineatur. 4. *Uso*, cum illa non nutriet ossa, ut hæc, sed nervos, spirituum ductus, ad partes exporrigat, quales hæc nullos de se promit. Atque hinc, ad differentiam illa *εγκέφαλος, spinalis*; ab aliis *σπονδυλίου, dorsalis*; ab aliis *σπονδυλίου, dorsalis*; ab aliis *σπονδυλίου, dorsalis*, dicitur, cum per cervicem, dorsum, lumbosque descendat, & totam spinam impleat. His pensius consideratis, etiam magnus Hippocrates, lib. de carnib. tex. 5. spinalem medullam ab ossali omnino distinguit. *Medulla*, inquit, *quæ vocatur dorsalis, descendit à cerebro. Non habet autem in se vel pinguis, vel glutinosi multum, ut nec cerebrum; ideoque nec proprie ei nomen medulla convenit. Non enim perinde, ac alia medulla, continetur ossibus: sola quippe meninges habet, alia non habet.* Hippocratis vestigiis insistens Galenus, etiam dicit, spinalem medullam non recte appellari medullam.

Motus.

Movetur eodem motu, quo cerebrum, scilicet motu non proprio, sed ab arteriis inducto, qui quidem æqualiter cum motu cerebri procedit, sed minor est, propter majorem hujus partis firmitudinem, & minorem mollitiem ac humiditatem. De hoc motu supra etiam dictum cap. 5.

Substantia.

Substantia ejus fibrosa est (quod ope microscopii conspiciatur) quali ex innumeris tenuissimis longis filamentis compacta, & superius mollior, ubi vero thoracis medium perrepsit, sensim magis subduriuscula evadit. Verum an fibrosa illa corpuscula, cum cerebri, tum medullæ, cava sint, sicque per suas cavitates, vel spiritum, vel humorem aliquem transmittant, hoc seculo inter Philosophos anxie inquiritur, sed propter visus debilitatem, & demonstrationis difficultatem, ea de re nil nisi per conjecturas concluditur.

Vasa.

In dissecta substantia innumera sanguinea punctula passim apparent, eodem modo sicut in dissecto cerebro; vascula tamen sanguifera per ipsam substantiam transeuntia adeo tenella sunt, ut oculis conspici nequeant.

Ortus horum vasculorum, propter summam tenuitatem, satis obscurus est. Hoc tamen oculatiore seculo ab Anatomicis acutioribus observatum, eo circiter loco ubi

truncus aortæ in subclavias dispescitur, arteriam vertebralem per foramina transversis vertebrarum cervicalium processibus insculpta sursum emitti, ab eaque duos ramulos ad spinalem medullam procedere; atque inde, deorsum versus, inter singula vertebrarum internodia, ab aortæ trunco descendente, qua parte spinæ incumbit, immediate duas arterias (utrimque scilicet unam) ad dictam medullam excurrere: quæ utriusque lateris arteriæ simul concurrentes, & inter se commixtæ, mirum reticularem contextum in meningibus efficiunt; easque, instar annulorum catenæ, se mutuo excipere, ac ductu flexuoso continere, sicque anteriori & posteriori medullæ parti prospicere, imò etiam ex iis capillares quosdam ramulos versus interiora medullæ dimitti videri, tradit Thomas Willis: quod ultimum ex punctulis sanguineis, in difficilissima substantia conspiciis, omnino manifestum est. Ex harum arteriolarum utriusque lateris supra mediam medullæ fissuram, seu divisuram, concursu vel conjunctione, arteria conspectior efformatur, secundum medullæ longitudinem decurrens: item aliæ duæ (utrimque una) similiter communes, sed minores, ejusdem latera perreptant.

Venæ sanguinem à nutritione residuum è medulla spinali ejusque involucris versus cor reportantes, à minimis, vixque visibilibus principiis ortæ, paulatim concurrunt, plexumque arterioso plexui similem, eique permixtum, efformant. Ex hoc plexu ulterius delatus sanguis sensim influit in duas venas majusculas (has *sinus minores* appellat Willis) quarum utrimque una, intra spinæ cavitatem, usque in os sacrum protenditur. Ex his infunditur ille sanguis in venam majorem (hanc *sinum magnum* nominat Willis) per totum spinæ tractum, supra divisuram medullæ, excurrentem, & utriusque venæ lateralis sanguinem, tanquam in communi alveo, recipientem (eodem modo sicut in capite sinus major duræ meningis supra divisuram cerebri excurrit, ac circumstantium vasculorum sanguinem suscipit, venis jugularibus tradendum) & per lateralia vertebrarum foramina ad venas proximas (nempe supra cor ad venam azygon & venas vertebrales per collum ascendentes: infra verò illud, ad alias in lumbis & ossis sacri regione sitas) ex hisque ad cavam deferentem.

Ex hac medulla omnes totius corporis nervi originem sumunt, neque ulli aliunde, ex cerebro, cerebello, aliave quacunque parte procedunt.

Non est autem medulla pars à cerebro separata, sed ejusdem ac cerebelli productio, è quibus, tanquam caudex, quatuor radicibus educitur: antè nempè, seu superius,

Medulla or-  
tus.

superius, duabus tertii ventriculi protuberantiis, hodie corpora striata, olim thalami nervorum opticorum appellatis, quibus maxime cerebro cohæret: Posterius verò, seu inferius, natibus ac testibus, quibus cerebello magis cohæret.

Sicut ego hanc medullam cerebri productionem esse dico, ita aliis nominibus eam designarunt alii. Ruffus, lib. 2. dicit illam non esse peculiare aliquod corpus, sed stitiam cerebri. Theophilus, lib. 4. de struct. hom. cap. 56. eam cerebrum elongatum esse tradit: quod ipsum etiam asserit Petrus Borrellus, cent. 1. obs. 8. Alii eam cerebri apophysin, alii processum appellarunt; propterea quod à cerebro, tanquam à trunco crasso, protendatur, cum eoque fibras continuas obtineat.

Contrarium tamen olim sentisse videtur Praxagoras & Philotinus, qui (referente Lindano, *physiolog. cap. 9. artic. 1.*) statuerunt hanc medullam non esse productionem cerebri, sed cerebrum nihil aliud esse quam redundantiam quandam & germinationem dorsalis medullæ. Horum vestigiis insistent Bartholinus, lib. 3. anat. cap. 4. similiter statuit, medullam non ex cerebro protendi, sed cerebrum potius ex hac medulla, tanquam è radice, assurgere ac quasi epullulare, idque apophysin seu processum quendam esse huius medullæ oblongatæ: argumento desumpto à quibusdam piscibus, quorum medullæ caput & cauda sunt insignis magnitudinis, cerebrum verò exiguum. Bartholini sententiæ subscribit Malpighius, *epist. ad Fracass.* eamque latius extendens, scribit, à spinalis medullæ trunco intra calvariam contento, veluti ab insigni fibrarum collectione, egressum habere omnes fibras per cerebrum & cerebellum dispersas: simili fere modo quo in brassicâ capitata fibræ caudicis erumpentes disperguntur per folia, quæ flexuose circumducta, caput efformant, intus cavitæ quadam, quasi ventriculo, per accidens donatum: atque hinc etiam cerebri ventriculis, tanquam per accidens excavatis, nullum usum adscribit. Sed an eadem numero fibræ, quæ in cerebro radicanter, in spinalem medullam protrahantur, & ibi intimè unitæ solidiorem truncum efficiant; an verò medulla sit tantum partialis cerebri propago, inquit idem Malpighius: & tandem scribit, se ex quorundam piscium anatome edoctum, probabile existimare, easdem numero esse spinalis medullæ, cerebri, & cerebelli protractas fibras, atque hinc sibi consonum videri, cerebrum esse appendicem spinalis medullæ; vel saltem nervorum truncum spina contentum, radices tortuose per cerebrum & cerebellum ductas, in affuso cortice cinereo propagare, ramos autem sub forma nervorum, à dorso

& capite emanantes, in universum corpus promere. Illud ipsum quoque sentit Fracassatus, in *respons. ad Malpig.* & eo probat, quod carina primò formati pulli, fere adhuc exigua galba involuti, si acicula tangatur, ilico contrahatur, quamvis tunc solum cerebri sedem lymphæ, nondum in cerebrum fixata, obtineat; atque sic inde deducit, cerebrum & cerebellum esse spinalis medullæ appendices. Verum qui bene perpenderit ea quæ supra, lib. 1. cap. 29. diximus, facile animadvertet, nec cerebrum medullæ, nec medullam cerebro suam originem debere, cum in prima formatione omnes partes simul delineentur, atque sint immediata Naturæ opera, quæ ita à se mutuo dependent, ut una sine altera, nec agere, nec vivere possit. Si quis fibras ex medulla elongata in cerebrum manifeste ascendere dicat, ego, eodem jure & privilegio, dicam illas è cerebro in medullam descendere, neque obstare, quod cerebrum in principio nondum satis concretum appareat, quoniam tunc etiam medulla nondum satis concreta est, sed instar mollis mucii apparet. Præterea sensus perceptio fit in cerebro, tanquam omnium nervosarum fibrillarum principio, non in medulla (nam non propter læsam medullam, sed læso atque impedito cerebro non fit perceptio, ut patet in apoplexia, catalepsi, &c.) neque contrarium docet modò allata carinæ contractio: quippe si in pullo primò formato carina ex contactu aciculæ contrahatur, certum indicium est, etiam tunc cerebrum, omnis sensationis principium, absque quo nulla sensatio fieri potest, non minus formatum esse quam carinæ medullam, etsi eo tempore feri turbidi, vel albuminis ovi substantiam habere videatur.

Medulla figuram habet variam, eamque in omnibus animalibus non plane eandem: in hominibus tamen oblonga, & fere rotunda est. Vesalius (cum quo consentiunt Laurentius, Piccolhominus, & Spigelius) quidem refert, illam in suo principio crassiorē & ampliorem esse, versus finem verò tenuiorem fieri, idemque in apposita tabula sic depingit: verum illud bene & merito reprehendit Fallopius, in *observat.* & optime notat, circa inferiores vertebrae cervicis ac primam thoracis, unde magni nervi ad brachia excurrunt, ut & in lumbis, unde magni nervi ad crura prodeunt, eam pleniorē & crassiorē reperiri, quam aliis locis superioribus, intermediis, aut inferioribus: reliquis verò partibus ubique fere æquè crassam esse, excepto fine in osse sacro latente.

A septima thoracis vertebra usque ad inferiora, in multos quasi funiculos, nervorum productiones, distrahitur, in recentis cadaveris medulla, aquæ frigidæ immersa,

immerfa, in eaque agitata, ita conspicuos, ut circa finem illa copia funiculorum tenuium figuram caudæ equinæ aliquo modo representare videatur: quod Riolanus (qui totam medullæ constitutionem fibrosam esse nescivit) eum in finem à summo Deo factum putat, ne spinalis medulla mollis & succulenta, qualis in cervice & dorso spectatur, lumborum continuo motu contunderetur & effringeretur.

Dictam medullæ circa finem in tenuissimos funiculos divulsionem, in dubium vocat doctissimus Nicolaus Tulpus, in *observat.* Prope os factum, inquit, *quævisimus quidem curiose, sed non invenimus pilosa ista filamenta, qua depingit Andreas Laurentius, scriptor aliqui minime infidus. Occurrere quidem nobis nervi illic magis quam alibi dissoluti, sed interim compacti, & tam presse uniti, ut ab aqua tepida (licet aliquamdiu in ea detinerentur) nequaquam ita diffunderet conglomerata illorum compages, ut id asserit auctor. Nisi forte intellexerit per filamenta sua teretes illos nervos in quos dispescitur evidenter extrema spinalis hujus medulla pars.* Huic dubitationi opponenda est autopsia, qua manifeste patet, inferiorem medullæ partem, præcipue eam quæ in lumbis & osse sacro continetur, in aqua agitatam & concussam in plurima filamenta dissolvi. Quod autem Tulpus illam divulsionem non viderit seu observaverit, inde, procul dubio evenit, quod ille medullam in aqua quidem aliquamdiu (ut dicit) detinuerit, sed in ea non satis agitaverit & concussit.

*Divisura.*

Medulla intra cranium, ut modò dictum, sinum habet instar calami scriptorii ad scribendum adaptati, partem inferiorem ventriculi quarti constituentem, quo usque ad mediam fere crassitiem manifeste dividitur in dextram sinistramque partem (hinc modò dextri, modò sinistri lateris paralyxis) eodem modo sicut cerebrum superiore parte dividitur. Hæc tamen divisio extra cranium in spinæ cavitate oculis manifeste conspicua non est, propter exteriorem tunicam, seu duram meningem, ei in orbem circumjectam, ob quam tota medulla externo intuitu rotunda & simplex, sine ulla divisione, usque ad finem ossis sacri apparet, quamvis incisâ vel ablatâ exteriore illâ tunica, talis divisio, per intercedentem tenuem meningem efformata, re vera adit, & artificiosa

sectione demonstrari possit. Præter talem sectionem, etiam per inflationem divisura illa inveniri potest, atque sic acuto hoc experimento Bartholinus eam detexit, qui cum maximâ diligentiam nullum cavitatis indicium percipere potuisset, tandem *immissâ*, inquit, *in sinum supra divisuram fistulâ, facillime spiritum ad extrema perducebam, totumque medulla corpus, qua divisura pergebat, visum est elevari.* Hæc autem divisura non ulterius quam circiter usque ad medietatem substantiæ ejus descendit. Alia autem manifesta cavitas in medulla nusquam invenitur.

Membranis, ut ante relatum, obducitur *Involucra.* duabus, sicut cerebrum, quarum prima, immediate eam cingens, à pia matre est, quæ innumeris minimis arteriolis, medullæ substantiam intransibit, resperfa, eam sanguine vitali perfundit & nutrit, cujus sanguinis residuam partem innumeræ venulæ, arteriolis intermixtæ, absorbent, & ad principium suum, cor, deferunt. Altera membrana, priori ubique per fibrillas coherens, à crassa est meninge. Gerardus Blasius, *anat. medul. spinal.* inter has duas tunicas notat tertiam, etiam vasculis sanguiferis donatam, quam propter insignem subtilitatem appellat *Arachnoideam*, eamque tenui meningi adhærere, ab eaque flatu stylove facile separari posse, scribit. His tunicis circumjicitur nervosa & fortis tunica à valido ligamento, anteriores vertebrarum partes colligante, orta, quæ medullam in spinæ flexione & extensione illasam conservat. Huic humor crassus & viscosus, ad humectationem & lavigationem, circumfusus est, ut facilius flectatur, & ne exsiccata in motu doleat: quali humore etiam omnes articuli ad faciliorem motum donantur. Lindanus & Blasius hanc membranam medullæ spinalis continentibus partibus malè annumerari putant, cum potius ligandis interius vertebris, quam medullæ investiendæ inserviat: quod ipsum etiam asserit Galenus, *lib. 13. de usu part. cap. 9.*

Præter modò dicta integumenta spinalis medulla etiam ossea theca, ad majorem tutelam, concluditur, superiorem partem calvariæ tectam habens. De hac theca vide *lib. 9. cap. 11. & 12.*

De nervis ex hac medulla prodeuntibus dicemus *lib. 8. cap. 2. ad 7.*

## CAPUT VIII.

## De Processibus mammillaribus, Glandula pituitaria, Infundibulo, Rete mirabili, &amp; nervis intra cranium è medulla prodeuntibus.

Vide Tabulam XII. &amp; XIII.

**D**emonstrationis serie huc usque perducta, cerebrum à parte anteriore elevandum est, ut quæ inferius latent partes commodè exhiberi queant.

Processus papillares.

Inter partes autem sub cerebri mole latentes primæ antèrius occurrunt Processus papillares, seu Mammillares, sic nominati à figura, quam in extremitate globosam, instar papillæ, habent.

Hi antiquis, ob substantiæ molliem, & quia crassam meningem ac calvariae cavitatem non excedunt, ac productiones instar aliorum nervorum non habent, nervis merito annumerati non fuerunt, atque hinc male etiam à plerisque Anatomicis recentioribus nervorum numero hætenus adjecti, & è medulla prolongata prodire dicti sunt, cum autopsia illud plane falsum arguat.

Mammæ.

Sunt autem numero duo, albi, molles, oblongi, ad finem bulbosi, intus cavi, in hominibus tenuiores & minores, in vitulis, ovibus, aliisque brutis majores.

Oris.

Ex cerebri medulla globosa & ventriculis anterioribus propagati (Thomas Willis male scribit illos oriri è cruribus medullæ oblongatæ) ac tenui meninge investiti, inter cerebrum, os sphænoideis, & os frontis feruntur ad ossis cribri formis sinus, crassa meninge succinctos, quibus insinuantur, eos intercedente, & à se mutuo distinguente osseo processu, quem *Cristam galli* vocant.

Tubuli.

Crassa meninx istos ossis cribriformis, sinus investiens, eo loco instar cribri, multis foraminulis non tantum perforata est, verum etiam multis exilibus tubulis, per cribrosi ossis foramina protensis, aperitur in fungosas narium carnes, ossibus spongiosis in hærentes, per eosque tubulos pituitam è cerebri ventriculis transmittit ac deducit in dictas carnes & narium ossa spongiosa, superiore parte iis in hærentia, ac dicta fungosa carne oppleta. Hæc causa est, quod è cerebro quidem aliquid in nares defluere, nihil verò è naribus sursum remeare possit ad cerebrum, quia cum aliquid sursum ascendit, illud sistitur, partim à pororum fungosæ carnis contrario situ; partim à tubulorum tenuium circa extremitates complicatione.

Hi tubuli in capite bubulo & vitulino facile inveniuntur, si summarum narium ossa

ita tollantur, ut tota eorum cavitas pateat, tunc enim tubuli isti satis manifesti per foraminula ossis ethmoidei penduli, ac in spongiosas narium carnes protensi conspiciuntur.

Per horum processuum quemlibet transit ductus è superioribus ventriculis, secundum eorum longitudinem, usque ad os ethmoideum excurrans (hunc clarissime & longo sermone describit Galenus, lib. 8. de usu part. cap. 6. 7.) in vitulino seu bubulo & ovillo cerebro tantam habet amplitudinem, ut calamum scriptorium anserinum facile admittat: verum in homine mortuo admodum angustus est, ita ut solummodo stylum ferreum communem ac tenuiorem recipiat (procul dubio in vivis aliquanto latior est) atque hinc non nisi in recentibus cadaveribus conspici possit, in quibus illum sæpius in nosocomio nostro Medicinæ studiosis demonstravimus. Si verò cadavera per paucos dies servata fuerint, ita flaccescit horum processuum substantia, ut dictus ille ductus in iis inveniri nequeat. Atque hanc causam esse arbitror, quod à recentioribus plerisque Anatomicis hi ductus prætervisi, & minime observati fuerint. Inter hos primus est Vesalius, qui, lib. 7. de hum. corp. fabric. cap. 11. nullam pituitam per hos processus defluere, in iisque nullum interius meatum esse, nec ob tenuitatem esse posse, tradit. Hujus collapsæ anatomes Restauratoris auctoritatem plurimi neoterici sequuntur, atque inter cæteros etiam Riolanus, qui judicat non esse verosimile pituitosam illuviem per processus mammillares & ossium cribriformium foramina stillare, quia inquinaret, ut ait, aërem purissimum qui illic requiritur. Iisdem quoque vestigiis insistit Rolfincius, qui, lib. 4. dissert. anat. cap. 27. scribit se nullam cavitatem in his processibus invenire potuisse: fortè quod illam semper in cadaveribus humanis inveteratis, nunquam in recentioribus, aut vitulorum oviumque capitibus quæriverit. Sed audiamus de his Fallopium, in observat. ubi sic inquit: *In homine horum ductuum cognitio satis difficilis est, quia nimis tennes & parvi sunt, &c.* Postea addit: *at in brutis, ut in bobus, capris, ovibus, ac similibus aliis, haud difficile est videre oculis apertis, quod processus isti ab extremis ventriculis anterioribus oriuntur, atque foramen manifestum è ventriculo*

Ductus pituita.

quoque in quemque processum perrigit. Isti meatus habent ab hoc foramine usque ad colatorium os, qui meatus, pro ratione processus, magnus aut parvus est: nam in bovino processu magnus, in humano vero angustissimus est, atque ita angustus, ut nisi in recentissimo atque integerrimo cerebro tractetur, nunquam patere possit. Quod fortasse in causa fuit, quod reliquis Anatomis horum processuum historia minime cognita fuerit.

Hæc interior processuum cavitas omnino candida est, ac succingitur tenuissima pellicula, communi ac continua cum ea quæ superiores ventriculos interius investit. Rarissime autem vacua, plerumque lymphido pituitoso mucosove succo repleta invenitur.

*Ufus horum processuum.* Conradi Sneideri, *lib. de off. cribriform.* aliorumque Anatomicorum communis fere doctrina est, processus papillares esse veros nervos odoratorios. At Galenus, *citato loco*, iis duplicem usum adscribit, scilicet, ut partim olfactui inserviant: partim sint evacuatoria, per quæ, tanquam per tubulos, pituitosa excrementa è ventriculis cerebri expurgentur. Priore in parte cum eo consentiunt, Avicenna, Halii, Piccolhominus, Fuchsius, Bauhinus, Spigelius, Casserius, pluresque alii, qui omnes statuunt hos processus esse primarium odoratus organum: sed de evacuatorio munere paucissimi mentionem faciunt, quod tamen primarium & unicum est eorum officium.

*Non sunt nervi odoratorii.* Quod nervi odoratorii non sint, varia docent. 1. Nullam similitudinem habent cum nervis. 2. Amplam habent cavitatem, qualis in nullis nervis invenitur. 3. Ex medulla oblongata, omnium nervorum principio, non oriuntur. 4. E crassa meningis & cranio non elabuntur, nec ullos funiculos nerveos in narium membranas (in quibus olfactus fit, ut gustus in linguæ membranis) emittunt, sed tantum pituitam per ossis ethmoidis foraminula ad narium ossa spongiosa deponunt. Præterea nervosum organum excrementis scatens ad hunc usum ineptum esset, sicut in omnibus aliis nervis etiam contingit, quorum usus à pituitæ affluentis humectatione & obstructione impeditur: in his autem ductibus humores pituitosi fere semper, modò majore, modò minore copia, inveniuntur, idque etiam in canibus, acutissimo odoratu præditis, in quibus tamen olfactum hinc non impediri, docet experientia. Neque etiam in homine ob hanc pituitam modicam quantitate illic hærentem imminuitur olfactus: verum si tanta ejus copia in interiore fungosa narium substantia colligatur, ut eam instar spongiæ intumescere faciat, hincque narium membranae, cum nervis iis insertis, comprimantur, ac libera in-

spiratio per nares (sine qua non fit ullius odoris perceptio; ut postea latius docebitur) impediatur, tunc odoratus imminuitur & impeditur, quemadmodum id in gravedine fieri notum est.

Liquet igitur hos processus non esse nervos odoratorios (eos describemus paulo post, *hoc eodem capite, & cap. 16.*) sed tantum ductus per quos pituitosa excrementa è cerebri ventriculis anterioribus defluunt, quæ ad eorum extremitates per crassæ meningis & ossium cribriformium ac spongiosorum porositates elabuntur ad nares & palatum: quæ porositates adeo exiguæ sunt, ut pituita illa rarius sponte effluat, idque non nisi cum admodum tenuis est, sed plerumque duntaxat cerebri pressione exprimatur: illud autem factum, ne aer frigidus inspiratus ingrederetur cerebri cavitates, sicque nobilissimum viscus nimis refrigeraret: quem in finem etiam rubicundæ spongiosæ carnes, fungosa ossa in narium supremirate opplentes, ita sunt constitutæ, ut excrementis pituitosis exitum quidem concedant, sed aëri ingredienti seu ascendenti nullum ingressum ad os cribriforme permittant: quippe in inspiratione propter molliem, concidunt & occluduntur, atque hinc etiam vapor odorifero nullam viam ad processus papillares concedunt, sed eundem penitus excludunt & abarcent. Ex his jam liquet quantum aberret Rolfincius, qui, *lib. 2. differt. anat. cap. 20.*, scribit aërem inspiratum, partim per processus papillares ingredi ventriculos cerebri, partim per latera tenuem membranam ambire: quorum tamen neutrum fieri potest, cum spongiosæ narium carnes omnem aëris ad processus papillares accessum & introitum impedian.

Humores itaque pituitosi in cerebri ventriculis collecti per hos processus evacuantur, quos ubi transierunt, mox bona sui parte descendunt ad fauces earumque glandulas, ut os, fauces, laryngem, & oesophagum humectent, ac salivam copiosam suppeditent, quæ cibis masticatis ad faciliorem coctionem (ut dictum *cap. 6.*) & transitum in deglutitione necessario admiscetur. Quod verò horum pituitosorum humorum reliquum maximeque superfluum est, defluit versus nares & palatum, partim ut etiam oris fauciumque interiora humectet, & fermentacea aliqua vi masticata alimenta perfundat; partim ut ejus magna pars foras evacuetur. Hi, capite aliqua de causa nimis refrigerato, multo crudiores & copiosiores colliguntur, propterea quod vapores ex inferioribus eò ascendentes, defectu sufficientis caloris, non dissipentur, nec satis coquantur, sed condensati in hujusmodi pituitosum mucum transeant, qui cum ob viscositatem & nimiam copiam per ossium cribriform-

Gravedinis  
causa.

cribriformium angustias & spongiosas superiorum narium interiorum porositates, satis citò & commode evacuari nequeant, fit in his viis infarctus seu obstructio, **Gravedo** appellata, quam errhina, istorum humorum incisione & attenuatione, imminuunt, ac sternutatoria evacuant, cum scilicet cerebri membranæ, horum acrimonia vellitatis narium interiorum membranis, etiam per consensum irritatæ, se valide contrahunt, sicque cerebrum comprimendo pituitam in venticulis contentam vi quadam per impeditos meatus exprimunt.

Nervi intra  
cranium.

Post hos processus statim ad nervos devenitur qui, ut ante dictum, omnes è medulla oblongata prodeunt, alii dum cranio adhuc inclusa est, alii dum cranio excidit.

Septem pa-  
ria.

Priorum primariorum, ex sententia Galeni, vulgò septem numerantur paria, seu conjugationes: quem numerum recentiores, alii in octo, alii in novem, decem, vel plura paria redigunt, cum non solum majores & primarios, ut Galenus, sed etiam minimos quosque nervulos, quos Galenus pro majorum filamentis habuit, alii plures, alii pauciores, hisce paribus annumerent.

Septem illæ conjugationes his versiculis comprehendi solent.

*Optica prima, oculos movet altera,  
tertia gustat,*

*Quartaque, quinta audit, vaga  
sexta est, septima lingue.*

Quia autem hæc paria è medulla oblongata, antequam cranio excidit, prodeuntia, post cerebri demonstrationem exhiberi solent, nos, secundum ordinem consuetum, illud ipsum quoque hoc capite faciemus, reliquos nervos è medulla in spinæ vertebra contenta prodeuntes, descripturi lib. 8.

Primum  
par, opti-  
cum.

Amotis processibus papillaribus, mox in conspectum venit primum nervorum **Par, opticum** appellatum, spiritus animales, visivam seu videndi facultatem oculis conferentes, devehens, radiosque rerum visibilibus ad sensorium commune referens; quod inter reliqua paria maximum est, sed mollius, ac cæteris porosius.

Ejus oris.

Hoc par posterius è medullæ oblongatæ principio, qua parte fornicis duo crura exporriguntur, oriri vulgò traditur. Verum si productio ejus diligentius inquiratur, incipiendo ab ipsis oculis, patebit par illud exordium sumere à protuberantiis striatis in tertio ventriculo sitis: nam ab oculis progreditur ad mutuam conjunctionem, hinc rursus separatim recto ductu ad protuberantias striatas fertur, imò lateribus earum utrimque adnascitur, & deposita ad latus

internum, versus earum substantiam, exteriore involvente tunicâ (quæ illic tota circum illas protuberantias expanditur) cum illis immediatè unitur, eorumque substantiæ ita immiscetur, ut fibras suas cum earum fibris continuas habere, ratio aliquo modo suadere videatur. Atque ita secundum exteriorem earum partem ad foramen ani procedit, quo loco amborum nervorum opti-  
corum exterior facies, in medio istarum protuberantiarum, concurrit, & sursum reflectitur (infra hunc concursum adstat foramen ani) sicque conjunctim ascendunt usque ad protuberantiarum dictarum summitatem; quo loco sursum ac retrorsum videntur reflecti & expandi, sicque fornecem efformare: quod etiam notavit Riolanus, etsi totum hunc decursum non descripserit.

Nervi optici in media via, supra sellam *Opticorum  
conjunctionem* offis sphenoidis conjunguntur: quam conjunctionem Bauhinus, Lud. Mercatus, Sennertus, aliique multi, putant fieri, non per simplicem contactum, sed totalem substantiæ confusionem, ut facilis spirituum ab uno in alterum oculum sit transitus, non tantum ad visum augendum in sanis, sed etiam in monoculis, in quibus unus oculus videndi acie duos æquare debuit: quam sententiam multis & plausibilibus rationibus defendit Jo. Baptista Porta, lib. 6. de rarefact. cap. 1. Alii putant hos nervos non confundi, sed se mutuo crucialiter duntaxat interfecare, ita ut dexter progrediatur ad oculum sinistram, sinister ad dextrum: quam sententiam nulla demonstratio confirmat. Riolanus, animadv. in Bauhin. docet hos nervos tantum conjungi per simplicem contactum, mediante vinculo quodam aut canaliculo interjecto, ad formam literæ H. Ego potius sine ullo intejecto vinculo hos nervos ad concursum suis membranarum firmiter sibi mutuo connasce judico; idque non tantum videtur doceri per autopsiam, sed etiam confirmari variis Anatomicorum observationibus. Nam Vesalius, Aquapendens, & Valverda, scribunt, se aliquando hos nervos ductu toto divisos observasse, atque inde concludunt, semper duos esse nervos, sed communiter ad concursum membranarum unitos. Memorabilem quoque historiam super hac re ex Cæsalpino transcribit Lindanus, cap. 16. physiolog. artic. 17. nota 298. his auctoris verbis. *Repertus est aliquando in anatome alter ex nervis visivis attenuatus, alter plenus: visus autem erat imbecillis in oculo ad quem nervus extenuatus ferebatur, habuit enim vulnus in capite circa eandem partem: nervus autem extenuatus non ad oppositam partem procedebat, sed ad eandem flectebatur. Visum hoc est Pisis, anno 1590. unde omnes spectatores argumentum id certum existimaverunt, nervos*



*nervos visorios nequaquam se interfecare, sed cōre, & regredi ad eandem partem.* Vesalius etiam meminit mulieris suspensæ, cui dexter oculus à juventute emarcuerat, in qua dexter nervus toto ductu tenuior, durior, & rubicundior sinistro, inventus fuit. Tales observationes penitus deltruunt opiniones de interfectione & substantiæ confusione.

Postquam hi nervi à conjunctione rursus separantur, mox utrimque per foramen ossis cuneiformis, unus ad dextrum, alter ad sinistrum oculum excurrit, ejusque fere centrum in homine, at in brutis lateralem magis partem ingreditur.

Hoc par intra calviam sola tenui meninge obducitur: sed calviam exiens, ab ossium, quæ transit, foraminibus, usque ad oculos, crassiā quoque meningem assumit, à quibus meningibus & media medullosa substantia, circum oculi bulbum simul ordine expansis, tres oculi tunicae efformantur, ut cap. 16. dicitur latius.

Opticorum  
cavitas.

Galenus, ex sententia Herophili, lib. 8. de usu part. cap. 6. & lib. 16. cap. 3. & de dissect. nervor. cap. 2. & de placit. cap. 7. scribit nervos opticos esse cavos, ac foramen manifestum habere, cujus inveniendi modum describit Plempius, lib. 1. ophthalm. cap. 19. Verum ingenue fateor, me hanc cavitatem hætenus non vidisse, licet eā servatâ methodo quam Plempius describit eam quælibet, sicut eam quoque invenire & animadvertere non potuerunt, Jacobus Carpus, Vesalius, Fallopius, Columbus, Valverda, Aquapendens, alii-que præstantissimi Anatomici. Quippe satis densa videtur eorum substantia, quæ, sicut alii nervi, ex plurimis filamentis, beneficio membranæ sibi mutuo connatis conflatur (hoc ipsum de iis etiam bene notavit Coiter) in eo tamen ab aliis nervis differens, quod in medio sit nonnihil porosa, & in istis poris aliquantillum medullosæ substantiæ continere videatur, nam in cadavere recenti & succi pleno, si transversim dissectus nervus opticus digitis comprimatur, pauxillum conspiciui succi manifestè exprimitur. Ita ut sibi quispiam difficulter unam aliquam conspicuam cavitatem, de qua Galenus scribit, imaginari possit. Plura hac de re videantur lib. 8. cap. 1.

Filamentorum  
ductus,  
seu substantia.

Rolfincius, lib. 4. dissert. anat. cap. 32. de filamentorum istorum ductu aliquid novi proponit: quippe scribit filamenta in aliis nervis recto ductu secundum nervorum longitudinem excurrere, in opticis verò tortuose sibi mutuo implicari. Addit; se cum admiratione apud Eustachium, lib. de examin. off. legisse, & ita se rem habere in optico comperisse, scilicet eum complicatum esse veluti tenuissimum matronarum linteum, in rugas innumeras æquales pari serie distri-

butas, & tunica eas ambiente coactum, qua incisâ evolvi, & in amplam membranam totum explicari posse. Simile quid in Xiphia pisce vidit & descripsit Malpighius, epist. ad Fracass. sed addit, se in bovis, capræ, suis, &c. optico leviter elixato, ut microscopio distinctius percipi posset, istas complicationes non invenisse, sed quasi acervum virgularum, quæ compressæ rotundo ore eructabant mollem cerebri substantiam, quæ propriâ membranâ, à pia matre communicatâ, investitæ, sanguinea quædam vascula secum ferebant, atque ex his, si in recens mactato animali opticus comprimatur, sanguinis guttæ ab interstitiis horum corporum manifestè erumpunt. Hoc ipsum in ovium & vitulorum opticis etiam multoties à me observatum: sed medullaris substantia, quæ ex compresso nervo optico exprimitur, paucissima vixque visibilis est; & vascula sanguinea, quæ inter fibrosa filamenta deferuntur, manifeste per tunicam retinam dispersa conspiciuntur. Dicta autem filamenta sibi invicem, veluti in fasciculum, connectuntur, per duram tenuemque meningem, totum nervum obvolvunt. Fracassatus, respons. ad Malpig. dicta opticorum filamenta, quæ fibras nominat, putat per continuationem, tanquam à radicibus, oriri à fibrulis substantiæ cerebri, & hoc uno tantum dissimiles videri, quod rerum exordia à minimis, ac proinde infirmis, petantur. Hoc ille haud inani conjecturâ sic putat, propter fibrillarum tamen substantiæ cerebri summam tenuitatem, & visus nostri debilitatem, conspici nequit, quamvis ratio illud dictare videatur. Quantum ad istas filamentorum implicationes, de quibus Rolfincius scribit in genere, sine animalium ulla distinctione, quasi illæ in omnibus animalibus adessent, illas in omnibus observari negandum censeo, cum præter me, etiam multi alii, in homine, bobus, & ovibus, illas non invenerint, ac semper optici, sicut alii nervi, in dictis animalibus ex rectis filamentis componantur: si fortè in aliquibus piscibus res aliter se habeat, hoc fieri potest, eaque res per Malpighii diligentem dexteritatem jam extra dubium posita est, verum ex eo tamen generalis regula constitui nequit.

Sublato hoc pari, in conspectum venit *Glandula pituitaria* (hanc Galenus, *Glandula pituitaria*, 9. de usu part. cap. 3. ἀδλω, id est, glandulam, simpliciter nominat) ab ejus usu sic nominata, quod humores pituitosos in tertio seu medio ventriculo collectos excipere, eosque ad fauces & palatum per propinqua foramina dimittere; seu, ut melius se sentire putant hodierni Medici Anatomici, per vasa venosa, aut forte lymphatica, non ad fauces & palatum, sed in alias venas infundere, ac sanguini venoso admiscere, dicatur,

dicatur, eodem modo sicut in aliis plerisque glandulis contingit, quarum collecti humores per vascula pecularia, lymphatica, salivalia, aliave, absorbentur, abducuntur, & massæ sanguineæ reaffunduntur. Atque sic glandula hæc pituitaria nominata est ab hoc ei adscripto usu, qui an verus ejus usus sit, paulo post inquiremus.

*Vasa.*

Exiles arterias mutuatur à carotidibus, venulasque ad jugulares emittit. Arterio-  
larum insertio ex eo patet, quod aqua atramento scriptorio tincta per syringam carotidi injecta, mox exterior glandulæ pars, plurimis minimis vasculis donata, colore nigro inficiatur. Et quia per arteriolas continue influens liquor in glandula totus, nec subsistere, nec consumi potest, hinc superflua ejus pars per alias vias rursus evacuat, & (ut hodie putatur) per exiles venulas defluit ad jugulares. Præter hæc sanguifera vascula, Whartonius huic glandulæ etiam tribuit nervos à plexu retiformi, quorum tamen vix ullus usus in ea esse posse videtur.

*Situs.*

Sita est sub meningibus, in offis sphæ-  
noidis cavitate, quæ vulgò *Sella equina* vocatur, cujus figuram etiam quodammodo exprimit, est enim depressa, supernè non-nihil concava, infernè globosa, & penè quadrata.

*Substantia.*

Substantia ejus durior & compactior est quam aliarum glandularum, eaque proximè obducitur tenuissima membranula ab infundibulo procedente, circum eam expansa, quam integrit duræ meningis portio, qua hæc glandula arctè cavitati Sellæ adnectitur, non in homine tantum, verum etiam in porcis, vitulis, & ovibus: quæ tamen connexio in aliis quibusdam animalibus non est æque firma; nam in felibus, cuniculis, & canibus adeo debilis seu laxa est, ut amotione infundibuli sæpe mox una divellatur.

Compages substantiæ in homine & vitulo unica & individua esse videtur, at in fele & cane illam ex duabus distinctis & facile separabilibus glandulis componi manifestissime patet.

*Magnitudo.*

Hac glandula non soli homines, sed omnia perfecta animalia donantur: ad corporis tamen, cui inest, magnitudinem, varia est proportio quantitatis: quippe majora animalia hanc partem sæpe non tam magnam habent, quam minora: & in quibus major est, in iis plures arteriarum carotidum rami eam subeunt, amplumque est rete mirabile, ut in bobus & ovibus: in quibus minor, in iis pauciores arteriæ ad eam accedunt, & illud rete tenue atque angustum est, ut in hominibus & equis, atque hinc verosimile videtur, vel ob majorem arterio-  
larum copiam, vel ob usum majorem necessitatem, illam in nonnullis

animalibus esse majorem, & contrarias ob causas in aliis esse minorem.

In hanc glandulam definit **Choana**, *Infundibulum.* seu **Infundibulum**, à figura ita dictum: nam est cavitas orbicularis, amplo principio (hoc nonnulli *Pelym* appellant) à medio tertii ventriculi foramine incipiens, & in canalem longum atque angustum, glandulæ pituitariæ insertum, desinens.

Efformatur ex pia matre, ubi cerebri basin succingit, estque coloris obscurioris, & contenta pituita repletum inveniri solet, quam ad glandulam transmittere putatur.

Glandulæ pituitariæ à lateribus sellæ *Rete mirabile.* equinæ circumponitur **Rete mirabile**, quod aliis **Plexus retiformis**, ab artificiosa & mirabili retiformi figura, nominatur.

Conflatur præcipue ex arteriis carotidibus, per colli latera ad caput ascendentibus, ac per cranii hiatus, juxta nervos opticos cranium intrantibus, quibus inferiore parte pauci ramuli à cervicalibus admiscuntur: nam ambæ carotides ad cerebri basin, circa sellam sphænoidis, coeunt, ramulisque mirabiliter inter se commistæ (de hac commistione vide præcedente cap. 5.) una cum paucis cervicalium ramis hunc plexum efformant.

Huic plexui, putat Walæus, etiam venarum jugularium ramulos intermisceri, sanguinem superfluum referentes; quod tamen negat Rolsincius, qui illum ex solis arteriis conflare existimat. Pro Walæi opinione stat ratio: pro Rolsincii autopsia, cum vix ullæ notabiles venulæ arteriis interjectæ conspici queant, eæque adeo paucæ sint (si modò aliquæ sint) ut cum arteriis minime comparari possint.

Hic plexus in vitulis, multisque aliis brutis satis manifestus est, in iisque exhibet quasi contextum multorum retium invicem cumulatorum, ita tamen continua serie conjunctorum, ut separari nequeant. In homine verò exilis & obscurior est, ita ut sæpe deesse videatur, quæ causa fuit, quod Vesalius, Fuchsius, Valverda, Carpus, Ingrassias, & nuper etiam Wepferus, illum in homine non reperiri censuerint. Varolius tamen, Picolhominus, Nicolaus Massa, Sylvius, Riolanus, aliique illum plexum re vera in homine dari, eumque investigandi modum, tradunt. Ego in nosocomio, atque etiam in theatro nostro, illum in recentibus cadaveribus humanis, sanguine plenis, non longo morbo extenuatis, multoties, sed admodum tenuem, multoque minus conspicuum quam in ove aut vitulo, demonstravi, cujus tamen in emaciatis aut antiquis cadaveribus vix quidquam videri aut inveniri posse, usu didici.

zz

Usus

Ufus Retis.

Ufus hujus retis est, impetuosum influxum sanguinis ad cerebrum in illis diverticulis infringere ac mitigare: qui influxus cum impetuosior sit in illis brutis quæ prona spectant, quam in homine erecto capite prædico, hinc in illis hoc rete majus est, quam in homine.

Ab hoc reti ulterius ascendentes arteriæ carotidis rami, ventriculos superiores ab infima postica parte subeunt, in iisque plexum choroidem efformant, de quo dictum cap. 6.

Glandule  
pituitariæ  
verus usus.

Denique à reti mirabili nunc redeundum ad glandulam pituitariam, quæ propter hoc rete condita videtur, de cujus ulu communem opinionem antea proposuimus, sed anne illa vera sit, nunc breviter inquirendum. Unico argumento, tanquam valido ariete, tota illa sententia penitus convellitur; scilicet, si pituitam è tertio cerebri ventriculo per infundibulum continue excipiat, necessario illam rursus per alias vias debet exonerare, & ad alias partes dimittere: atqui nullæ dantur aliæ viæ per quas, nec aliæ partes ad quas illa excretio seu evacuatio fieri possit, ergo, &c. Major extra dubium vera est. Minor probatur, quia sella equina duro crassoque osse constat, nec uspiam perforata seu pervia est, ut latius infra probamus, lib. 9. cap. 7. Ipsa quoque glandula meninge dura exacte contegitur, & sellæ firmiter alligatur, quæ meninx nusquam aperta est, quam eo duntaxat loco ubi infundibulum ad glandulam accedit, ita ut à lateribus pituitosum serum ex ea effluere minime possit; & si efflueret, quorsum, quæso, tenderet? nulla enim pars in propinquo est, ad quam tuto, id est, sine maximo partis incommodo descendere posset. Si dicas, per osicæ sellæ aut duræ meningis invisibiles poros illam pituitam evacuari posse, hoc æque est, ac si dicerem, per minimum acus foramen transire posse camelum: nam si de tenuissimis spiritibus nobis sermo esset, aliquid hac in parte conneri posset, sed hujusmodi visibilem & crassiusculum liquorem per invisibiles poros transire, superat fidem. Præterea, concesso, illum transire per tales poros, quorsum fluat? nullæ inveniuntur partes à quibus excipitur. Quantum ad venas, aut vasa lymphatica pituitosum illud serum (secundum hodiernam opinionem) absorbentia, & in majores venas effundentia, illa sunt mera imaginaria vasa, nec quispiam adeo oculatus invenietur Anatomicus, qui unum aliquod tale abducens vas demonstrare poterit. Ergo jam tandem omnino concidit antiquissima illa, & tot seculis ab omnibus male ac receptissima probata sententia. Nunc igitur alius & verior hujus glandulæ usus inquirendus atque inveniendus est. Qui non est, pituitam è medio cerebri

ventriculo excipere, sed potius ex arteriolis retis mirabilis serosæ pituitæ partem separare, & per ei desuper impositum infundibulum, ad medium ventriculum transmittere, ut inde ad anteriores seu superiores ventriculos ascendens, per processus papillares effluat ad nares & palatum. Notum est, plexum choroidem plurimas minimas glandulas arteriolarum divaricationibus interjectas habere, quas serosam pituitam ex vasculorum illorum sanguine elicere, ac in ventriculorum cavitates deponere, in confesso est. Rete mirabile, quod longe pluribus arteriolis constat, quam plexus choroides, nullas hujusmodi glandulas, serum elicientes, interjectas obtinet (quorsum enim serosa pituita ex iis effluxisset?) & quia tamen sanguis arteriosus ad spirituum animalium confectionem in eo quoque præparandus, atque serosæ pituitæ aliqua parte liberandus erat, summus Protoplastes, loco plurium minimarum glandularum, unam ipsi glandulam majusculam concessit, in medio ejus, scilicet in ossis sellæ equinæ cavitate, positam, tali nempe loco è quo separatus liquor commode deponi potest in cerebri ventriculos, atque sic per communes vias, processus papillares, excerni. Quod arteriolæ glandulam ingrediantur, in eam aliquid deposituræ, vel in illam hient, liquet ex antedicto experimento, de aquæ atramento tinctæ in carotidem injectione. Neque est quod quis putet nimis gravem fore humoris è glandula ascensum ad medium ventriculum supra glandulam positum: nam cerebrum alternata sua dilatatione & concidentia quoscunque intra cranium contentos humores per vias singulis destinatas, & inter alios etiam serosam pituitam, ex dicta glandula in choanam influentem, sensim & clementer promovet sursum, atque hinc fit quod choana inferius à glandula continue tantum recipiens, quantum superius in ventriculum deponit, nunquam vacua, sed pituitoso sero repleta semper inveniatur. Hunc esse verum hujus glandulæ usum, ex eo etiam innotescit, quod pro majore vel minore hujus usus necessitate, illa major vel minor existat: major scilicet in iis animalibus quibus magnum est rete mirabile, plurimæque arteriolæ ad eam perveniunt, ut in vitulo: minor verò in iis, quibus parvum est illud rete, ac pauciores arteriolæ glandulam circumdant & ingrediuntur, quæ minorem feri pituitosi copiam suppeditant.

Post horum demonstrationem mox conspicuum fit secundum nervorum par, quod proxime sub primo pari subsistit, sed multo minus & durius est. Secundum  
par oculos  
mouens.

Hoc prope primum ad intimam partem medullæ oblongatæ ortum, principio suo unitur (hinc nonnulli putant fieri, quod uno

uno oculo moto, etiam moveatur alter) moxque se junctum utrumque per foramen secundum ossis sphœnoïdis ad oculos fertur, & palpebræ superioris oculique musculis ramulos tribuit. Præterea hujus paris aliquot tenues fibras, visorium par comitantes, in membranas oculi exteriores disseminari, notat Fallopius, *in observat.*

*Tertium  
par olfacto-  
rium.*

Tertium par præcedenti proximum, ex latere initii medullæ oblongatæ, exiguo principio seu nervulo oritur (hic nonnullis radix secundi paris esse malè censetur, cum tamen nullam, neque in exortu, neque in progressu, cum eo communionem aut conjunctionem habeat) & deinde sub basi cerebri recta antrorsum fertur, ac solum utrumque perforat crassam meningem, & tunc secundo pari attentum, cum eoque per commune foramen exiens, oculi orbitam subit, ubi in quatuor ramulos dispescitur. Horum *primus* per oculi adipem fertur, ejusque musculum quintum seu trochlearem, nec non frontis cutem, & palpebram superiorem adit. *Secundus* per foramen proprium in maxillæ osse exsculptum, progreditur ad labrum, ejusque musculos, & nonnullos nasi musculos. *Tertius*, partim per maxillæ superioris foramen sub oculi orbita situm: partim per ossis cuneiformis foramina transiens, per tunicas narium cavitates investientes, & per carnem papillosam (de qua vide *sequens cap. 9.*) dispergitur, sensum olfactus iis conferens, & ramulum porrigit musculo nasi alam contrahenti. *Quartus* musculi temporalis parti internæ inferitur. Hinc fit quod ab odore ingrato frons, oculi, & nasus exterior per consensum contrahantur. Nullus autem hujus paris ramus pervenit ad linguam, ejusve tunicas, ita ut mirum sit, quod Antiqui Medici, eorumque hæcenus posteri, hoc par gustui infervire crediderint, cum gustatorium non sit, nec esse possit, sed verè olfactorium existat, utpote quod non linguæ, sed narium tunicas ingreditur: quod ipsum etiam significare voluit Galenus, *lib. 6. de usu part. cap. 16.* cum quo consentit Vesalius, qui scribit, ab antedicto hujus paris tertio ramulo internam narium tunicam efformari. Antiquos igitur versiculos ante descriptos, quibus tertio pari gustatorium munus adscribitur, sic reformandos censeo.

*Optica prima: oculos movet altera: tertia odorat:*

*Quarta est quæ gustat: quinta audit: sed vaga sexta:*

*Septima laxatas linguæ moderatur habenas.*

Veslingius huic tertio pari addit nervulum, qui à basi cerebri, juxta prominentias, *Testes* appellatas, ortus, orbitamque oculi ingressus, ad trochlearem ejus muscu-

lum fertur. Sed hic videtur potius esse tertii paris ramus primus, modò descriptus.

Sequitur quartum par, *Gustatorium*, *Quartum par, gustatorium.* quod Bartholino quintum est, & Galeno tertiæ conjugationis crassior radix male censetur.

Hoc, cum præcedente, ex medullæ oblongatæ lateribus, sed paulo antè, ortum, primo exilem propaginem ad aurium cavitatem emittit, quæ oblique tympanum ingreditur. Deinde utrumque per ossis cuneiformis foramen tertium descendit, & postquam musculis temporum, faciei, buccarum, cuti faciei, maxillæ superioris dentibus (qui hujus beneficio sentiunt) palato, & gingivis, ramos largitum est, fertur ad foramen maxillæ inferioris internum, dentiumque inferiorum radicibus furculos præbet, atque ex ejusdem maxillæ externo foramine, inferius sito, denuo egressum, in labium inferius ejusque cutem spargitur. Qui superest hujus partis ramus insignis, transiens per musculos in ore latentes, in latera linguæ propagatur, per ejusque tunicam dispergitur, gustus sensum ei conferens.

Isti quarto pari adstant duo paria gracilia & dura (hæc, ob tenuitatem, è vulgata *Alia duo paria tenuia.* numeratione excluduntur) quorum prius, quod alii quartæ conjugationis graciliorem radicem esse putant, originem, habet priori pari proximam, & cum eo per commune foramen exiens, non tamen unitum, fertur in palatum, & ad gustum quoque facit. Posterius oritur paulo ante quintum par (hinc quinti paris propaginem esse, multi putant) ex medietate medullæ oblongatæ, & tertium par conscendens, per foramen commune cum secundo tertioque pari egreditur, & totum fere in musculum oculum abducentem absimitur.

Post hæc sequitur quintum par, quod *Quintum par auditorium.* est *αὐδιστήν*, seu Auditorium.

Hoc ex partibus medullæ lateralibus, quibus pontes cerebelli opponuntur, proxime ad latera priorum, paulo inferius, oritur. Utrumque ad os petrosum veniens in duos ramos dividitur; quorum major & mollior ossis petrosi canalem proprium, seu foramen primum ossis temporum ingreditur, ac auditus organo prospicit. Minor, qui durior, deorsum fertur, & per foramen Antiquis *caecum* appellatum, extra cranium inter processum mammiformem & appendicem styloideum delapsus, musculo temporali, nec non maxillæ laryngisque musculis, ac faucibus (hinc ex aurium purgatione fit per consensum tussicula sicca) imò etiam externæ auris cuti ramulos largitur. Rolfincius tamen refert se dispensationem illam in laryngem non perpetuam & ordinariam invenisse, neque Vesalius eam admittere

velle videtur. Riolanus, *anthropogr. lib. 4. cap. 2.* notat, quod idem ille nervus extra cranium delapsus, non solum prædictis musculis prospiciat, verum etiam in narces & buccas aliquos furculos transmittat, atque hinc majore sui parte ad radices dentium, laryngem, & linguam deferatur. Addit tandem: Hinc surdis istis vox rauca & raucidula redditur, & magnas hæmorrhagias sistit arcta & vehemens aurium occlusio (apud Galenum, lib. 3. κατὰ τὴν ὥσιν) hinc à sono aspero citra contactum dentes offenduntur, & naturâ surdi sunt muti, & surdi anhelosi: qui durius aures scalpunt, tussunt, & peripneumoniacis aures madent, parotides illis supervenientes, fausta: hæc omnia contingunt propter nervorum quinta conjugationis istis partibus communicationem.

Hæc nostra modò proposita brevis quinti paris descriptio in demonstrationibus facile obvia est. Sed qui exquisitiorem illius historiam, posterioreque per auditus organa distributionem tradere nituntur, illi in omnibus inter se non conveniunt, neque etiam in sectionibus nervorum dispersiones semper & omnibus eodem modo occurrunt, Naturâ multoties in his, ut & in multis aliis, ludente.

Eustachius hac de re ita scribit. *Quintum nervorum cerebri jugum, ex duobus nervis, ut alii arbitrantur, minime constat, sed duas utrimque propages inæquales habet: quarum major secundum longitudinem, instar semicirculi, eleganter excavatur, minoremque, quod alios fugit, amice suscipit & amplectitur, eoque modo amba simul junctæ oblique in anteriorem & posteriorem partem, usque ad extremum sinus, in osse petra simili earum gratia exsculpti, procedunt, ubi minor propago à majore recedens, parvum foramen sibi paratum invenit & ingreditur, miroque admodum flexuoso incessu extra calvariam elabatur. Major propago videtur in tres portiones, parum ab invicem distantes, terminari: ex quibus præcipua exiguo foramine, in cochleatum os pervio, obducitur, sed num instar operculi ei tantum incumbat, an verò altè penetret, & in spiras ejus ossis convolvatur, propter difficultatem administrationis (quam quis qui negotium manibus contrectat, facile experitur) certo explorare adhuc non potui.*

Fallopianus eandem rem paulo aliter proponit. *Quintum par, inquit, auditui inservit, ex duobus nervis conflatum: altero, quo nullus nervus mollior est exceptis visoribus, ad auditum destinato: altero, qui quinto etiam pari assignatur, quia nascitur ab eodem penitus loco cum molliore dicto, & cum eodem ad os petrosum venit; sed re vera distinctus est nervus, & durior priore, atque æque durus ut reliqui nervi qui cætera paria efformant, neque ulla ratione videtur pars mollis dicti. His præmissis, seposito duro nervo, quid*

de molli dicat, adjungam. *Altera, inquit, quinti paris portio, quæ mollis est, & nervus auditorius à me vocatur, una cum dura ad extremum antri illius perveniens, quibusdam angustissimis foraminibus mediis in cavitates distribuitur geminas, atque illas quodammodo sublinat, quarum una labyrinthus, altera cochlea, vel cochlearis à me vocata est, neque ulterius procedit, ullumve nervum à se dimittit ad exteriora. Coiter scribit se multoties rem ita invenisse, ut à Fallopio describitur.*

Vesalius à Fallopio nonnihil dissentit, & in exam. observat. ei sic respondet. *Ego discrimen illud quod abs te in molli & duro in quinti paris exortu (quod alias veluti duobus fit funiculis) & in ipsius ad situm proprium foramen adfertur, non memini me observasse. Mihi namque nulla vicinior via occurrit, quæ anterior quinti paris nervi portio (quæ veluti gracilior est funiculus) in bobus & ovibus, & manifestius adhuc in porcis quidem, ad inferiorem petrosæ partis superficiem, in homine autem ad initium antri, quod fodinarum camera comparo, deferri & distribui queat, modò antrorsum in petrosæ parte exsculptorum debeat haberi ratio, illaque citra causam & seriem non temere fuerit perforanda. Et quamquam duram quinti paris tui portionem ita describis, ac si auditus organo nullum usum conferret, animadvertendum tamen est, quod oblongo illi nerveo corpori in bove adnascitur, & in homine per foramen camerato antro peculiare propaginem exhibet. Corpus hoc proprio sinu in interiore petrosæ partis superficie contineri, jam sæpius dixi: illisque oblongis corporibus conferri potest, quæ in nervorum complexibus Olivaria appellantur. Ut enim corpora illa, nervea simul & glandulosa substantia efformata, nervis adnascuntur, aut potius nervorum incrementum constituunt; ita quoque hic in auditus organo tale olivare corpus in proprio sinu reponitur, quod quinti paris applantationem admittens, aut ab illa constitutum, humiliore sua sede nervos à se diffundit, qui ossiculorum auditus organi nexibus, crassarum & manifestarum fibrarum ritu, partim exporriguntur, partim illic ad coalitum, cum non spernenda tertii paris cerebri portione, procedunt, quæ vasa auditus organum ingrediuntur. Posteaquam igitur Natura eleganti compendio his sedibus anteriorem quinti paris portionem distribuit, & reliquam quinti portionem (quæ veluti crassior est funis) quodammodo ante osseam tenuitatem subsistit & dilatari voluit, quæ inter cuniculorum cameralis antri præcipuam intersectionem, & foraminis quintum par admittentis basin observatur: ipsa, inquam, Natura nerveam portionem in illam intersectionem demandat, quæ proprio foramine, licet arcto, in cuniculos illos fertur, & fibrosis distributionibus per antra in petrosæ ossis parte hic conspicua, dispensantur. Estque hæc distributio bobus & ovibus*

ovibus pariter, ac homini communis, etiam in hoc, quam in illis, sit manifestior, uti & cameralis antri seriem aut imaginem in homine ampliore, patentioreque, quam in illis, esse expendimus. Imò cum foramen quintum nervorum par admittens observo, & in anteriore huius sede meatum auspicari intueor, qui sub aure tandem extra calvariam finitur, non possum satis colligere, qui, dum quintum par in mollem & durum nervum partiris, & cum durum graciliorem ac situ posteriorem statuis, ipsum nuper dictum meatum ingredi cupias, citra nescio cujus decussationis, alteriusve rationis explicationem, qua durioris tui nervi supra & infra molliorem, ductum situmve argueret. Mihi enim anterior quinti paris nervi portio, non verò posterior, meatum illum subire cernitur, qui sub aure versus posteriora cessat in foramen cecum.

Admodum exactam quinti nervorum paris distributionem hic describit Vesalius, quam tamen adeo exactam in cadavere demonstrare difficillimum est, imprimis iis qui festinantiores in sectione procedunt: ac proinde illud opus solis oculatissimis, dexterimis, & patientissimis Anatomicis committendum.

Sextum par vagum.

Sextum par, quod in medio infimoque ventre pluribus partibus prospicit, atque hinc **Par vagum** appellatur, paulo infra quintum exoritur, membranis fortibus, propter ductum longiorem, obductum, vicinisque partibus connexum.

In exortu ex pluribus nervulis seu fibris componitur, quæ fibræ statim ita uniuntur, eademque membranâ obducuntur, ut unum nervum constituent, seu constituere videantur.

Nervulus vagi peculiaris.

Inter hos nervulos in unione ista collectos, in utroque vago unus adest, qui non ex medulla intra cranium hærente, sed ex cervicali medulla oritur, juxta sextam aut septimam cervicis vertebra (huius primam inventionem debemus Thomæ Willis) è quo loco secundum latera medullæ (cui in via nusquam inseritur, sed per tenuissimas fibrillas extrinsecus duntaxat leviter adnectitur) sursum versus caput ascendit, ac mole augetur, hinc ad cranii interiora delatus, paris vagi fibris adiungitur, (cum quibus quasi in unum truncum coalescere & inoculari videtur) cum iisque per idem foramen egreditur. Ab egressu autem statim à trunco vagi iterum separatus, extrorsum reflectitur, & postquam nonnullis musculis cervicis & humeri ramulos quosdam impertiit, ad scapularem musculum descendit, in eoque fere totus absorbetur, spiritus animales ei infundens ad motum brachiorum in hominibus, crurum anteriorum in quadrupedibus, alarum in volucribus, & pinnarum in piscibus (in his enim brutis eadem quoque nervi dicti

productiones notavit Thomas Willis) perficiendum. Atque hinc quia validis muscutorum brachii motibus inservire debebat, etiam non debuit à medulla intra cranium, sed ab ea quæ extra cranium est, oriri.

Hoc autem par vagum ex dictis pluribus nervulis concurrentibus constitutum, è cranio egreditur per foramen tertium ossi temporum cum occipite commune (per quod etiam transit ramus major venæ jugularis internæ) & non procul ab egressu ad musculos cervicis & cucullarem ramulos emittit. Hinc ulterius procedens musculis hyoideis, faucium, & linguæ propagines tribuit. Hinc mox in homine nervi intercostalis (hactenus hic fuit descriptus pro interiore ramo paris vagi) ramum (in quadrupedibus totum truncum) sibi socium assumit, aliumque insignem ramum emittit ad laryngem, qui excurrit ad gulam, exteriores laryngis musculos, & cartilagineam scutiformem subiens, etiam ad recurrentis nervi apicem procedit, eique unitur. Ad hunc autem locum ubi intercostalis ei iungitur, & alter ab eo versus laryngem emittitur, caudex vagi in tumorem oblongum nonnihil extollitur, & plexum nerveum ganglioformem constituit, quem Fallopius *Corpus olivare* appellat: qualis plexus etiam in vicino intercostali reperitur, ex ejus concursu cum ramo nervi paris intra cranium ultimi constructus. Inveniuntur autem hi ambo plexus, cum utrimque inter cervicis musculos deteguntur arteriæ carotides, tunc enim earum ductum sequendo, circa maxillæ inferioris insertionem statim conspiciuntur. Præter dictum plexum, adhuc alium plexum minorem observavit Thomas Willis, paululum ab illo situm, qui efformatus est è furculo antedicti plexus circum arteriam pneumonicam circumvoluto, ac cum ramo descendente è dextri paris vagi trunco, simul & cum alio nervo posticæ cordis regioni destinato, ex hocque plexu nervulos in dextrum cordis anterioris latus mitti notavit.

Plexus cervicalis.

Postquam hos plexus efformavit, truncus paris vagi inter carotidem & jugularem ad tracheæ latus descendens, supra jugulum utrimque dividitur in ramum anteriorem, & posteriorem.

Nervi recurrentes.

Exterior uterque, statim à divisione, prospicit musculis è sterni & clavicula ortis, atque tunc ab eo egrediuntur **Nervi vocales** dicti, quia vocis instrumentum perficiunt, unoque præfecto semimutum, utroque planè mutum redditur animal: quod Galenus, *lib. de pracog. ad Posthum. cap. 6.* scribit se coram omnibus Philosophis & Medicis Romæ in hædis & porcis demonstrasse. Idem vocales, etiam **Nervi recurrentes**, *reversivi*, & *recursi*, Græ-



cis *παλινδρομῶντες*, appellantur, eo quod primo descendant, deinde sursum tendant, dexter circum arteriam dextram subclaviam, sinistraliter circum truncum magnæ arteriæ ad descensum se incurvant, circumvolutus, ut sic recurrant ad musculos laryngis, quorum capita deorsum spectantia ingrediuntur numerosis ramis.

Quare nervi  
laryngis  
non descen-  
dant.

Quare autem nervi desuper aut è collo in musculos laryngis non fuerint immissi, sed ab inferiore parte sursum recurrere debuerint, Galenus, *lib. 6. de usu part. cap. 14. & 15. item lib. 16. cap. 4.* longo sermone inquit, sed nodum vix dissolvit. Vera autem ratio hæc est; quod muscoli laryngis faciant vocem, & modulentur aërem è pulmone exeuntem, igitur debuerunt suis capitibus necessario inferiora, & caudis superiora spectare. Nam ut modulatio aëris è pulmone exeuntis fiat, debent laryngis supremitates desuper versus inferiora nonnihil contrahi, ut pro arbitrio exeunti aëri aliquo modo obfistere, penitus tamen occludi non possint. Cum autem omnes muscoli trahant partes caudis suis adhærentes versus sua principia seu capita, debuerunt capita musculorum laryngis infimum locum obtinere: cumque illis nervi essent inferendi, necessario debuerunt illi ab infernis partibus ad hæc capita sursum ascendere (quare nervi musculorum capitibus, & non caudis inferantur, infra videndum, *lib. 5. cap. 1.*) At si capita horum musculorum superius fuissent locata, iisque nervi desuper immissi, tunc facile ex horum musculorum aliqua contractione, accedente adjumento expirationis, omnimoda laryngis oclusio, & sic hominis suffocatio contigisset. Jam si quis forte roget, quare nervi musculorum laryngis à sexta conjugatione potius recurrant, quam à proximis medullæ spinæ nervis deducantur? Illi respondet Galenus, *lib. 9. de usu part. cap. 11.* artus, aliasque partes quæ fortius moverendæ erant, durioribus eguisse nervis, quales è spinæ medulla prodeunt: aliis verò, quæ minus fortiter & violenter moventur, molliores fuisse convenientiores, quales sunt illi qui è medulla intra cranium latente progrediuntur, inter quos sextum par unum est, cujus recurrentes rami laryngis musculos, leviter duntaxat movendos, accedunt.

Plexus nervorum  
thoracicus.

Recurrentibus constitutis, mox hoc par sub jugulo descendit, atque ad basin cordis (eo loco ubi vena arterialis incipit ad sinistram latus flecti) versus spinam plexum quendam nervorum, quem nonnulli appellant *Plexum cardiacum*, constituit, è quo pleuræ, tunica pulmonis, pericardio, cordi, œsophago, aliisque variis in thorace partibus, ramuli tribuuntur.

Hunc plexum Fallopius, *in observat.*

accurate describens, sic inquit: *Nervus iste plexus originem ducit à quinque nervorum propaginibus, quæ quævis aliquando quatuor tantum sunt, quinque tamen ut plurimum reperiuntur. Harum prima illa est, quam dixi oriri à ramo sexti paris sinistro, parum infra exortum recurrentis nervi, atque inde delatam & reflexam ad venam arterialem sinistram, in dictum plexum nerveum ascendere. Secunda verò & tertia propago in eodem latere sinistro, oritur à plexu illo, quem ego in cervice plexum sexti paris ad corpus olivare situm, appellavi. Ab hoc plexu in sinistro latere gemini oriuntur nervuli (aliquando etiam unus tantum est) qui descendentes ad cordis basin, per eundem plexum distribuuntur. Quarta etiam propago, & ipsa sinistra, ea est, quæ ab aliis proponitur à recurrente ejus lateris nervo exorta. Hac simul cum tertia & secunda descendens, in dictum plexum disseminatur. Quinta verò propago, quæ ultima, in dextro latere sita est, geminum habens principium. Nam à plexu sexti paris dextro, qui recta tendit ad cor: similiter quoque à nervo ejusdem sexti paris, qui recurrentem dextrum facit, statim cum thoracis cavitationem ingressus est, alius nervus non admodum parvus emanat, qui cum priore dicto jungitur, unicumque satis crassum nervum facit. Hic quintus à me vocatus duplici ex principio manans, sub arteria quæ jugulum sinistram petit latitans, venit ad eandem complicationem, ac in ipsa simul cum aliis quatuor confunditur, unicumque fit principium solidum ac nerveum, à quo postea veluti rivuli non pauci ad cor feruntur.*

Cordis nervi.

Hujus plexus etiam meminit Thomas Willis, *in anat. cereb.* sed illum non tanquam ab exteriori paris vagi ramo (quem intercostalem appellat, & pari vago suam originem non debere scribit) & aliis concurrentibus nervis efformatum describit.

A plexu sextum hoc par ulterius procedens & septum transiens, ventriculi orificium ingreditur & amplectitur, in eoque *Stomachicum* dextrum sinistramque constituit, ac simul ad janitorem & inferiorem ventriculi partem furculos projicit (ut latius supra dictum, *lib. 1. cap. 7.*) atque etiam ad cava jecoris tenellum ramum emittit.

Nervi ventriculi & hepatis.

Ramus interior utriusque lateris hæcenus pro vagi ramo fuit descriptus, sed nuper diligentiore inquisitione putat Thomas Willis se observasse, illum quidem per ultro citroque emissos furculos communicare cum pari vago, sed tamen aliunde primum ortum habere, & plane distingui à pari vago: oriri scilicet putat à duobus tribusve ramis nervorum quinti & sexti paris (secundum ejus computationem, nam secundum antiquam computationem, illi iidem nervi forent rami tertii & quarti paris) qui à nervis istis versus oculos & faciem reflexi, in unum



unum caudicem evadunt, quem ille *nervum intercostalem* appellat, & è cranio per proprium foramen egredi, ejusque solummodo ramum cum paris vagi trunco sub eadem vagina conjungi, non verò uniri, sed toto tractu distinctum manere, ac dissectâ membranaceâ vaginâ, facile ab ea separari scribit.

Hic nervus intercostalis per proprium foramen cranio egressus, mox concurrens cum ramo nervi paris intra cranium ultimi, *vertebralis* quibusdam appellati, efformat *Plexum ganglioformem*, prope paris vagi similem plexum, paulo ante descriptum. Hinc juxta vertebrae descendens alium plexum longe majorem constituit, in quem nervus amplius à vicino pari vertebrali inferitur. Ab hoc plexu plures nervi, qui præcordia respiciunt, distribuuntur, quos una cum plexu Thomas Willis primus invenit, & *anat. cereb. cap. 25.* hoc modo descripsit: *Hinc duo, inquit, vel tres surculi in diaphragmatis nervum, surculus unus in nervum recurrentem, mittuntur: præterea fibra & propagines numerosa, & in recurrentem nervum, & versus tracheam feruntur, quæ ipsius & œsophagi tunicis, atque vasibus sanguiferis inferuntur. Porro ramus in paris vagi truncum, & bini notabiles nervi in plexum cardiacum descendunt. Deinde paulo inferius nervus alter solitarius è trunco intercostali præcedens, etiam plexui cardiaco inferitur. Qui nervi insignes à nervo intercostali utrimque dimissi, quatenus cum aliis, ab utroque pari vagi trunco derivatis, una cœunt, ipsum plexum cardiacum efficiunt. Attamen hi rami cardiaci à nervo intercostali, sicut & plexus cervicalis, à quo procedunt, homini peculiæres sunt; in brutis animalibus omnino desiderantur. Ex his posterioribus verbis liquet, Thomam Willis plexum cardiacum paulo quidem aliter describere, quam Fallopium, sed differentiam maxime consistere in nominum nervorum diversitate.*

Truncus intercostalis à plexu cervicali (de quo ante dictum) arteriam cervicalem, sicque in thoracem descendens, tres quatuorve ramos à nervis vertebralibus proximè superioribus admittit, cum iisque alium insignem plexum (hunc Willis *Intercostalem & Thoracicum* appellat) constituit in homine, nam in brutis hic plexus paulo aliter se habet.

Porro truncus intercostalis per thoracis cavitatem descendens, secundum inferiorem cavamque singularum costarum partem ramulum de se extendit. Deinde ad os uf-

que sacrum tres rami separati descendunt, qui & ipsi cum aliis nervis hic illic rursus uniti, & ab iis denuo soluti, varios alios plexus mesentericos efficiunt, quos Th. Willis septenario numero comprehendit. Verum ne horum singulorum nimis specifica descriptio confusionem pariat, nos solummodo trium modo dictorum ramorum progressum prosequemur. Horum *primus* ad omentum, ventriculi fundum, hepatis lienisque tunicam (scilicet dexter ad hepar & folliculum fellis, sinister ad lienem) ipsamque lienis substantiam & intestinum colon fertur, unde post diuturnam colicam raucedo oriri creditur. *Secundus* ad renem tendit, qui in nephritico dolore ventriculum consensu exagitans, vomitus causa existit. *Tertius & maximus* ad mesenterium, intestina, vesicam, & uterum progreditur.

Quare autem interiora viscera à sexto pari, & non à vertebrarum medulla nervos recipiant, ejus rei causam, ex sententia Galeni, non male explicat Bauhinus, scilicet, quod cum motum voluntarium non habeant, nervis durioribus è spinali medulla prodeuntibus non eguerint, sed ne sensus & leviusculi alicujus motus expertes forent [addo, & ne spiritibus animalibus ad nutritionem necessariis destituerentur] solis mollioribus opus habuerint, quales è medulla oblongata, dum adhuc in cranio est, progrediuntur, ut etiam ante dictum.

Septimum par, *Linguam movens*, cæteris multo durius, in postremo occipitio è medulla oblongata, jam jam in spinam illapsura, variis principiis mox unitis oritur, & per obliquum ac proprium foramen in occipitio exsculptum, cranium egreditur, & statim tutelæ gratia, cum sexto pari fortibus membranæ jungitur, non verò commiscetur. Deinde rursus se junctum, magna sui patte ad linguam abit, cujus musculis omnibus surculos ad motum impertit. Minore verò portione progreditur ad hyoidis & laryngis musculos, eosque qui ab appendice styloide oriuntur.

Nonnulli dictorum nervorum intra cranium è medulla prodeuntium, substantiam ac compositionem ab aliis nervis longe diversam esse putarunt, cum tamen autopsia doceat, illos eodem modo, ut alii nervi, conflatos esse ex plurimis filamentis, membranæ firmissimæ amplexu junctis, & quasi in unum concretis, nec quidquam ab aliis nervis differre, quam quod sint molliores.

*Nervi lienis.*

*Nervi renis.*

*Mesenterii nervi.*

*Quare viscera nervos habeant à sexto pari.*

*Septimum par lingua motorium.*

*An hi nervi differant substantia ab aliis nervis.*

*Plexus cardiacus.*

*Plexus intercostalis.*


*Plexus mesenterici.*

TABU.

## T A B U L Æ XII. EXPLICATIO.

Hæc tabula, à Willisio delineata, exhibet nervorum paris quinti & sexti (secundum ejus numerationem) origines, ab iisque nervi intercostalis radices profectas: porro ejusdem nervi intercostalis & paris vagi, atque nervi è spina ad par vagum accessorii, origines & ramificationes, usque ad ventriculi regionem perductas. Insuper nervorum paris septimi, noni, decimi, atque nervi diaphragmatis principia & distributiones representat: in eaque etiam toto tractu è regione nervorum vertebraliū, eorumque cum prioribus communicationes, describuntur: prout scilicet in homine reperiuntur. Notandum autem, Willisium in descriptione hujus tabulæ non sequi antiquam (quam nos in nostra nervorum descriptione servamus) sed novam suam numeri nervorum computationem: atque hinc quod nos in textu tertium hoc ille quintum; quod nos quintum, hoc ille septimum; quod nos sextum, hoc ille octavum; par &c. nominat.

- A A A. Nervus quinti paris, cum duobus ejus ramis A A. quorum superior recta antrorsum tendens, in musculos oculi & faciei, in nasum, palatum & totius oris partem superiorem propagines distribuit: insuper binos surculos aa. qui nervi intercostalis duæ radices sunt: alter quinti paris ramus inferior, deorsum vergens, in maxillam inferiorem, ejusque partes omnes dispergitur.
- aa. Duæ propagines à superiore quinti paris ramo dimissæ: qui cum surculo altero b. nervo sexu paris reflexo coeunt, nervi intercostalis truncum D. constituunt.
- B. Nervus sexti paris, recta antrorsum in oculi musculos tendens: è cujus trunco surculus b. qui tertia nervi intercostalis radix est, reflectitur.
- bb. Tertia nervi intercostalis radix.
- C. Nervus auditorii, sive paris septimi, origo, cum duplici ejus processu, scilicet molli & duro.
- c. Ramus ejus mollior, qui totus in partem auris internam distribuitur, scilicet in musculum mallei elevatorem, & cochleam.
- c. Ramus ejus durior: qui integer extracranium emergens, & propagim E. octavi paris inosculatus, cum ea nervum singularem constituit, qui statim dividitur in plures surculos: horum.
1. In musculos linguae & ossis hyoidis absumitur.
  2. Rursus in plures propagines; quorum superior.
  3. In musculos faciei & oris.
  4. In musculos palpebrarum & frontis.
  5. In musculos auris.
- D. Nervus intercostalis truncus, è tribus prædictis radicibus constans, in plexum ganglioformem transiturus: qui plexus nervi intercostalis, extra cranium producti, supremus nodus esse videtur.
- E. Nervus paris vagi, sive octavi origo, multis fibris constans, quibus nervus è spina oriundus accedit, cumque iisdem inosculatus una cranium transit; quo trajecto, denuo abscedit, & communicatione cum vicinis quibusdam nervis habitâ, in musculos scapulae ac dorsi impenditur.
- e. Surculus octavi paris ramo auditorio occurrens.
- fff. Aliæ propagines paris vagi in musculos cervicis.
- G. Ejusdem paris ramus principalis, in plexum ganglioformen proprium demersus.
- H. Plexus ganglioformis superior paris vagi addo, qui surculum K. è plexu altero nervi intercostalis vicino, admittit.
- hh. Ramus è plexu prædicto paris vagi in musculos laryngis, cujus surculus insignis cartilagine scutiformem subiens, nervo recurrenti occurrit, eidemque unitur.
- i. Surculus è plexu cervicali nervi intercostalis in truncum paris vagi immissus.
- KK. Plexus inferior paris vagi, è quo plures nervi ad cor, & appendicem ejus procedunt.
- l. Surculus insignis ad plexum cardiacum dimissus.
- m. Fibræ nervosæ in pericardium & vasa cordi appensa distributæ.
- n. Nervus recurrens sinister: qui aortæ trunco descendente circumligato, sursum versus cartilagine scutiformem reflexus, in ascensu





ascensu multas propagines xxxx asperæ arteriæ impertit : ac denique surculo h. è plexu ganglioformi demisso occurrit. Hic recurrens à reflexionis modo propagines quasdam versus cor dimittit.

L. Nervus recurrens in latere dextro, qui multo superius reflexus, arteriam axillarem circumligat.

o. Ramus insignis à trunco paris vagi in latere sinistro versus cor dimissus, cujus statim bifidi surculus unus venæ pneumonica truncum circumligat : alter posticam cordis regionem attingens, in plures propagines, quæ superficiem ejus obducunt, dispescitur : huic ramus cardiacus, ab alterius trunco emissus, occurrit.

p. Rami prædicti surculus venam pneumonicam circumambiens.

q. Ejusdem ramus alter, multas propagines cordi impartiens, quæ propagines superficiem ejus posteriorem obducunt.

rrrr. Propagines exiles à trunco paris vagi emissæ, quæ longo tractu œsophago inferuntur : extra proprium situm reflexæ.

ssss. Surculi plures resecti, quorum ramificationes in pulmonum substantiam distributæ, vasa sanguifera variegata stringunt & circumligant.

TTT. Truncus paris vagi dividitur in duos ramos, scilicet anteriorem & posteriorem, quorum utrique versus pares ramos alterius lateris inclinati, iisdem uniuntur, & post communicationem mutuam duos ramos stomachicos, scilicet anteriorem & posteriorem constituunt.

VV. Rami interni, qui uniti in X. rami stomachici inferioris principium constituunt.

WW. Rami externi, qui ramum stomachicum anteriorem efficiunt.

X. Ramorum internorum coalitio.

F. Origo paris noni, cum multis fibris, à quibus unitis truncus constans versus linguam fertur : in progressu tamen duos surculos dimittens.

oo. Surculus primus deorsum tendens, & ramo paris decimi unitus, musculo sternothyroides impenditur.

pp. Surculus secundus, in musculos ossis hyoidis.

99. Hujus nervi truncus in linguæ corpus transiens.

G. Plexus ganglioformis nervi intercostalis superior, qui hujus nervi cranioegressi

supremus nodus est.

a. Surculus è plexu hoc in plexum vicinum paris vagi emissus.

bb. Duo processus nervosi, per quos hic plexus cum nervo paris decimi communicat.

γ. Surculus in sphincterem gulæ dimissus.

L. Plexus medius, sive cervicalis, qui homini proprius, juxta mediam cervicem in trunco nervi intercostalis consistit.

d. Ramus insignis è secundo pari vertebrali in hunc plexum, quo hic cum nervo diaphragmatis, in prima radice sua communicat.

ee. Duo rami ab eodem plexu in truncum nervi diaphragmatis.

55. Plures fibræ nervosæ à plexu cervicali in nervum recurrentem.

θ. Surculus ab eodem in truncum paris vagi.

x. Surculus alter insignis in nervum recurrentem.

xx. Duo rami insignes versus cor dimissi, quos ramus alter λ. paulo inferius oriundus, assequitur : hi deorsum delati, inter aortam & arteriam pneumonicam, paribus ramis alterius lateris occurrentes, plexum cardiacum Δ. constituunt, è quo nervi præcipui qui cordi impenduntur procedunt.

λ. Ramus paulo inferius à trunco intercostali profectus, qui cum prioribus plexui cardiaco destinatur.

Δ. Plexus iste prædictus cardiacus.

μ. Ansula ab eodem profecta, quæ arteriam pneumonicam circumligat.

ν. Ansula inferior venam pneumonicam stringens.

z. Nervus intercostalis in cavitatem thoracis demersus, ubi arteriam axillarem stringit.

ζζζ. Quatuor nervi vertebrales in plexum thoracicum dimissi, quorum superior arteriam vertebralem stringit.

ooo. Tres rami insignes à cardiaco plexu dimissi, qui anteriorem cordis regionem obducunt, sicut nervi P. q. è trunco paris vagi profecti, ramificationes parti ejus posticæ impertiunt.

τ. Arteria vertebralis à nervo vertebrali circumligata.

sss. Propagines nervæ anteriorem cordis regionem obducentes.

TTT. Propagines & fibræ nervæ in posticam ejus partem distributæ.

Aaa


o. Plexus

9. Plexus inferior, proprie intercostalis, sive thoracicus dictus, cui, præter nervum intercostalem quatuor vertebrales inseruntur, horum supremus in descensu arteriam vertebralem circumligat.
- I. Nervus intercostalis per thoracis cavitatem juxta costarum radices descendens, ubi in toto progressu à singulis vertebriis mediis ramum admittit.
- H. Nervus paris decimi, multis fibris in origine constans, inter primam & secundam vertebralem emergit, ubi statim duos processus nervosos b b. in plexum superiorem nervi intercostalis emittit.
- x. Ramus ejus, qui furculo noni paris unitus in musculum sternothyroidem, asperæ arteriæ immediate incumbentem, impenditur.
20. Surculus reflexus in musculos cervicis posteriores.
21. Surculus in nervum spinalem patheticum.
- x. Propagines ab ejusdem nervi ramo præcipuo in musculum sternothyroideum.
- I. Nervi vertebralis primi origo, quæ in hoc, pariterque in cunctis aliis vertebralibus, multis fibris constat, quarum manipulus unus à medulla spinalis margine inferiore, ac alter à superiore prodiens, obviam facti, in eundem truncum coalescunt, qui statim in nervos multifariam distributos dirimitur.
6. Surculus ab hoc nervo in ramum decimi paris.
6. Surculus alius in spinalem patheticum.
- c. Ramus insignis sursum in musculos cervicis & aurium emissus.
- T. Surculus à nervo incurvato, in musculos cervicis anteriores.
7. Nervus ab hoc pari in nervum primum brachialem, è quo nervus diaphragmatis radicem supremam habet.
- M. Origo nervi secundi vertebralis, è quo ramus supremus brachialis procedit, & in quo diaphragmatis nervus primo radicitur. Hic nervus brachialis in quadrupedibus juxta quartam & quintam vertebralem oritur, proindeque diaphragmatis radix inferius consistit.
- V. Ramus iste vertebralis brachio destinatus.
- Y. Diaphragmatis nervus, cujus radici furculus d. è plexu cervicali accedit, & paulo inferius ab eodem plexu duo alii rami e. in truncum ejus protenduntur. Hæc communicatio homini propria est.
- φ. Diaphragmatis radix altera, è nervo secundo & tertio brachiali.
- x. Diaphragmatis nervi truncus inferior, extra locum remotus, qui in proprio situ thoracis cavitatem sine ulla communicatione trajiciens, recta ad diaphragma pergit, ubi in tres furculos expansus, musculosæ ejus parti inseritur.
- ψψψ. Ceteri nervi brachiales.
- ωωω. Nervorum brachialium origines.
22. Nervi spinalis ad par vagum accessorii origo ultima, cum cuspide acuta incipiens.
23. Ejusdem nervi truncus incipiens, qui in toto ascensu per latus medullæ spinalis incedens, nervorum vertebralium origines medias pertransit, & à caudice medullæ fibras accipit.
24. Ejusdem nervi truncus descendens, qui pari vago abscedens, extrorsum reflectitur, & post communicationes cum nervis noni & decimiparis habitas, totus in musculos scapulæ impenditur.
25. Ejusdem nervi processus inferior.

## T A B U L Æ XIII. EXPLICATIO.

Exhibet hæc Tabula paris vagi & intercostalis ramificationes inferiores, ventriculo scilicet, & totius abdominis visceribus distributas; item nervorum vertebralium, qui priorum è regione consistunt, & cum aliquibus eorum inosculantur, origines.

- A. Ramus stomachicus inferior, qui ex ramis paris vagi utriusque lateris internis simul unitis conflatur, & ventriculi fundum obducens, propagines in toto tractu quaquaversum dispergit.
- BB. Ramus stomachicus superior, qui ex ramis paris vagi utriusque lateris externis simul unitis constat, & ventriculi summitatem perreptat.
- C. Ramorum exteriorum coalitio.
- D. Plexus nervæus è fibris utriusque nervi stomachici, juxta orificium simul unitis, & velut







& velut in reticulum contextis.

a a. Extremitates utriusque nervi stomachici, quæ illic nervis hepaticis occurrunt, cumque iis communicant.

E E. Nervus intercostalis in utroque latere juxta costarum radices descendens, ac in toto descensu à singulis nervis vertebralibus ramum accipiens.

F. Ramus è nervo intercostali lateris sinistri prodiens, & versus plexus mesentericos dimissus.

G. Idem nervus mesentericus bifidus, ramum majorem in plexum, qui & stomachicus, & lienaris est; ac minorem in plexum renalem emittit.

H. Par ramus mesentericus, è dextrilateris nervo intercostali prodiens, & versus plexus mesentericos inclinatus.

3. Hujus nervi, pariter bifidi, ramus major in plexum hepaticum, & minor in plexum renalem.

h. Plexus mesentericus sinistri lateris primus, qui & stomachicus, & lienaris est: è quo plures nervorum fasciculi, sive conjugationes numerosæ, multifariam emittuntur.

5. Plexus mesentericus renalis sinistri lateris, in quem, præter surculum mesentericum, ββ. duo alii nervi, è nervo intercostali immediate inferuntur.

γγγ. E plexu hoc prope capsulam bilariam sito, plures nervi & fibræ in renem mittuntur.

δδ. Nervi & fibræ quibus hic plexus cum plexu mesenterii maxime communicat.

ζ. Nervorum fasciculus primus, è priore plexu h. in lienem tendens, quem affecutus, exinde fibras quasdam in ventriculi fundum reflectit.

α. Nervorum conjugatio secunda, è prædicto plexu in ventriculi fundum, cujus fibræ cum surculis nervi stomachici inferioris communicant.

θ. Nervorum conjugatio tertia, inter hunc plexum & vicinum hepaticum.

ι. Quarta nervorum conjugatio, inter hunc & plexum mesenterii maximum.

6. Plexus mesentericus renalis, in quem (similiter ac in pari ejus) præter ramum mesentericum.

KK. Duo nervi è nervo intercostali producuntur.

λ. Nervi & fibræ inter hunc plexum & maximum mesenterii.

μ. Ramus insignis inter hunc plexum & vicinum hepaticum.

ν. Insignis nervorum & fibrarum cohors à plexu hoc in renem, qui vasa emulgentia scandunt, & varie circumligant.

77. Plexus mesentericus superior dextri lateris, qui & hepaticus.

οο. Magna nervorum conjugatio ex hoc plexu in hepar & cystim felleam: è qua plures item surculi in pylorum & pancreas distribuuntur. Hujus nervi & fibræ in ascensu versus hepar arteriam hepaticam velut reticulo obducunt, & truncum ejus fere abscondunt. Horum surculi cum nervorum stomachicorum apicibus αα. conveniunt.

π. Surculi circa pylorum distributi.

ρρ. Alii surculi in pancreas dispersi.

cc. Nervi inter hunc plexum & mesenterii maximum protensi. Hic plexus cum renali vicino per μ. & cum stomachico per θ. communicat.

Ο. Plexus mesentericus maximus, è quo ingens nervorum fasciculus \*\*... sub magna mesenterii glandula oriundus, exinde quaquaversum in plurimas propagines & ramos disspescitur, inque omnia intestina ( præter rectum ) distribuitur. Nervi & fibræ quaquaversum protensæ, arteriis & venis toto ambitu innituntur, easque varie stringunt & circumligant.

ΤΤ. Propagines nervosæ ab hoc plexu in testes fæmineos, sive glandulas uterinas, quæ ramis nervorum vertebralium paris vigesimi & vigesimi primi in easdem partes emissis occurrunt, cumque iis inosculantur.

νν. Rami vertebrales in testes fæmineos.

8. Plexus mesenterii infimus, longe infra priores situs, & pro origine sua tres utrimque nervos, ab intercostalibus inferius oriundos, habens.

ΦΦΦ. Tres nervi utrinque à nervo intercostali in plexum mesenterii infimum dimissi.

xx. Nervus ab isto plexu directe in maximum mesenterii plexum protensus, qui in transitu surculos aliquos ab intercostali nervo utrinque accipit, sc. 4. 4. 5. 5. 5. & ipse surculos duos in testes fæmineos mittit.

ψψ. Duo nervi è nervo prædicto in testes fæmineos.

9. Plexus alter exiguum paulo supra hunc infimum consistens.

Aaa 2

u. Pro-

- u. Processus nervosus à plexu prædicto infimo in vicinum perexiguum protensus.
- a. E plexu minimo 9. nervus insignis in plexum mesenterii maximum elatus, qui in toto ascensu intestinum rectum & coli partem subtendit, iisque propagines crebras inserit.
- b. Ramus alter ab eodem plexu deorsum missus, qui ejusdem intestini recti partem inferiorem subtendit, eique propagines crebras impertit.
- c.c. Duo nervi e plexu mesenterii infimo 8. deorsum missi, qui circa imam ventris cavitatem in pelvim dimissi, binos ibidem plexus, k.k. scilicet unum in alterutro latere situm, subeunt.
- K K. Plexus gemini intra pelvim siti, quorum nervi excretionibus singulis, sc. urinae, stercoris, & seminis, ibidem factis, prospiciunt. Sic nervos d. d. versus plexum mesentericum infimum emittunt.
- d.d. Nervus à prædicto plexu utrimque juxta latus intestini recti ascendens, ei propagines inserit, quibus geminis nervus alter b. e. plexu minimo descendens occurrit.
- e.e. Duo nervi ab eodem plexu in uterum.
- f. Nervus ab eodem plexu in vesicam.
- g. Nervus in glandulas prostatas.
- h. Nervus e radice vigesimi octavi paris vertebralis in musculus ani.
- i. Par vigesimum nonum vertebrale, à quo.
- k. Nervus in sphincterem, & reliquos musculos ani.
- ll. Nervus insignis utrimque ab isto pari in penem.
- m. Ramus alter brevior in musculos penis.
- L L. Nervus intercostalis infra renes.
- m. Nervulus à ramo vertebrali in testis virilis musculus cremasterem.
- n. Par vertebrale 21. cujus origo pone renes sita delitescit. Ab hoc nervo plures utrimque propagines in testes foemineos mittuntur, qui surculis aliis mesentericis eidem parti distributis occurrunt.
- o. Nervus e pari vertebrali 22. è quo etiam surculi quidam in testes foemineos.
- pppp. Nervi in crus destinati, quorum qui superius oriuntur, in descensu ramos à nervis inferius oriundis, suscipiunt.
- q. Nervi intercostales juxta principium ossis sacri ad se mutuo inclinati, per processum transversum r. communicantes.
- rr. Processus alter transversus, intra ossis sacri curvaturam, duos intercostales nervos connectens.
- s. Uterque nervus intercostalis in fibras minutas definit, quæ fibræ in ipsum sphincterem ani distribuuntur.
- t. Nervus e pari 24. vertebrali, qui in glandulas inguinales defertur.
- v v v. Propagines e nervo intercostali utrimque in ureteris corpus dimissæ.
- X. Nervus qui ad testem & musculus cremasterem destinatur, ubi abdomine egreditur, abscissus.

## CAPUT IX.

De Ordine quo cerebri partes in prædicta sectione exhibentur, & de alio sectionis modo.



Secundum jam dictum secandi modum primo demonstrantur crassa tenuisque meninx, cum quatuor duræ meningis sinibus, cerebri divisio, eique interposita falx, cum sepimento ei continuo, quod cerebellum à cerebro distinguit: item corpus callosum ei substratum. Hinc ablatis superioribus cerebri partibus, ventriculi duo superiores, septum lucidum, plexus choroides, ductus pituitæ ad nares, & fornix. Deinde ventriculus tertius, in eoque plexus choroides, foramen medium ad infundibulum, monticuli striati, cum foramine ani ad quartum ventriculum tendente, vena plexui interjecta, per sinum quartum in magnum sinum

se exonerans: item glandula pinealis, nates, & testes. Postea cerebellum cum suis membranis & processibus, eoque elevato, ventriculus quartus, & medulla oblongata. Ultimo, cerebro ab anteriore parte elevato, processus mammillaris, rete mirabile, glandula pituitaria, infundibulum, cum nervorum paribus intra cranium e medulla oblongata prodeuntibus.

Si aliter hæc quispiam demonstrare velit, illud optime fiet hoc modo. Primò superiorius meninges, cerebri divisio, falx cum sinibus, & corpus callosum, exhibeantur. Hinc cerebro anteriore parte elevato, processus mammillares, nervi optici, & oculorum motorii, ac rete mirabile, & glandula

Alius sectionis modus.

dula pituitaria, ostendenda erunt. Deinceps cerebro à latere elevato, reliqua nervorum paria demonstranda sunt: sicque eadem opera cerebrum cum cerebello & medulla oblongata, & cranio eximendum & invertendum est. Tunc ab inferiore parte reliqua demonstratio absolvenda venit. Ac primò elevatâ medullâ oblongatâ, quartus ventriculus, hinc cerebellum cum suis processibus exhibendum. Postea rete mirabile, cum infundibulo: factaque ad infundibulum sectione, tertius seu medius ventriculus ostendendus: in quo rimanda sunt monticuli striati, nates, testes, glandula pinealis, foramen ani, & arteriolarum plexus. Hinc ad duos anteriores seu superiores ventriculos procedendum, in quibus plexus cho-

roidis perscrutandus, una cum septo lucido, & ductibus pituitam ad processus papillares vehentibus.

Notandum tamen, hunc sectionis modum longe facilius succedere in ovillo, aut vitulino, quam in humano cerebro, utpote in quo, ob nimiam molem non tam commode institui potest: nisi enim admodum recens sit, omnia mox concidunt ob flacciditatem, ita ut fere nihil convenienter demonstrari queat.

Alium secandi cerebrum, sed nimis operosum, modum Constantini Varolii, describit Bauhinus, *lib. 3. theat. anat. cap. 28.* Et medium quendam modum Francisci Sylvii, describit Bartholinus, *lib. 3. anat. reform. cap. 6.* qui modi citatis locis legi poterunt.

## CAPUT X.

## DE OFFICIO CEREBRI.

Digressio.



Ost demonstrationem cerebri, omniumque ejus partium, tandem de officio, actione, & usu tanti visceris pauca dicenda supersunt.

A cerebri integritate actionum animalium integritatem procedere in confesso est, si modo in corpore illa organa, per quæ actiones peragendæ sunt, bene fuerint constituta; quibus tamen optime dispositis, nulla animalis actio feliciter procedit, cerebro se male habente.

Quia autem actiones animales in homine, non à solo cerebro, verum etiam ab Anima rationali perficiuntur, vel perfici possunt, hinc multis persuasum est, necessario isti parti adscribendam esse sedem hujus Animæ, e qua actiones animales procedunt, scilicet cerebro, secundum Arabes & Moschionem toto; secundum alios ejus alicui parti. Sic Herophilus eam circa basin immorari scribit: Xenophon in vertice capitis: Erasistratus in membranis. A quibus opinionibus differunt multi hodierni Philosophi, qui ei pro sede assignant minimam cerebri particulam, in tertio seu medio ventriculo sitam, nempe glandulam pinealem, in qua Animam residere, & sensum communem peragi, multis verosimilibus rationibus ac conjecturis probare nituntur. Hæc ultima sententia aliis admodum displicet, ac præcipue multis Theologis duræ nimis videtur, qui non capiunt, nec sibi persuaderi perpetiuntur, Animæ incorporatæ, corpori divinitus infusæ, & totius corporis actiones animales regenti, tam exiguum & angustum domicilium in toto adscribi debere, & tamen omnia, etiam ea quæ in extremis partibus sunt, minimo

momenti spatio, seu eo ipso quo fiunt puncto, percipere posse: ad hæc non credunt istam Animæ rationalis sedem in homine tam exiguum, in brutis verò, quæ illa Anima destituuntur, triplo majorem esse debere. Præterea nesciunt, quare cordi non æque adscribenda sit Animæ sedes, quam cerebro, cum omnis spirituum animalium, & ipsius quoque cerebri motus, à corde procedat, eoque non pulsante, mox omnes animales actiones concidant, ut liquet in syncope, & vulneribus ventriculorum cordis. Hæc de re nostra ætate ultro citroque acriter, tanquam pro salute patriæ dissertatum est, atque etiamnum dissertatur, gravissimæque literariæ lites indies oboriuntur, acerbæ quidem, sed admodum frivola & inanes, quibus (proh dolor) juniorum animi magis turbantur, quam docentur. Verum nos, seposita hac inutili vitilitigatione, ipsam sensibiliorem cerebri actionem inquirendam censemus.

Aristoteles, *lib. 2. de part. animal. cap. 7.* *Cerebri officium.* docet cerebri munus esse, ut calorem cordis temperet. Quam sententiam, etsi plurimi rejiciant, Spigelius tamen in meliorem partem explicare nititur. Galenus cerebro spiritus animales generandi ac conficiendi officium adscribit. Cui doctrinæ plerique hodierni Philosophi merito calculum adjiciunt. Nam hoc certissimum est, animales actiones proxime non peragi à cerebro ipso, sed à spiritibus animalibus in cerebro confectis, per quos Anima in bene dispositis organis actiones suas exequitur, atque ita cerebrum est instrumentum quod spiritus illos generat.

Hos spiritus Zabarella, Argenterius, Helmontius, Deusingius, alique nonnulli, *An spiritus animales à vitalibus tam differant.*

tam Medici, quam Philosophi, cum spiritibus vitalibus confundunt, & ab iis non specie, sed tantum aliqua modificatione, seu accidentibus quibusdam differre statuunt: atque sic etiam Spigelius, *lib. 10. de corp. fabric. cap. 8.* dicit: *Non, quod quibusdam visum est, secundum substantiam quadam hic vitalium spirituum sit mutatio, quæ totam horum naturam evertat, sed temperamenti solius alteratio quadam perficitur.* Spigelium sequitur Entius, in *apolog. digress. 4.* qui suam opinionem his tribus argumentis præmunuit.

I. Fœtus, inquit, in utero sentit ac movetur citra omnem spiritum animale, quia nullus nervus maternus ad fœtum decurrit.

II. Spiritus subtilissimus in cerebro frigidus, & mucosa colluvie referto, perfici nequit, frigus enim spiritus sopit, eorumque actionem impedit.

III. Nervi ipsi vitam & calorem ab arteriis sortiuntur, quæ per illos conspicue disseminantur.

His argumentis alii adhuc unum addunt, scilicet quod quilibet tenuissimi spiritus non descendant versus inferiora, sed semper sursum tendant & exhalent; atque hinc etiam si darentur animales spiritus adeo subtiles, illos nunquam descensuros in nervos, sed semper per poros sursum evoluturos.

Verum etsi hæc nonnihil speciosa eminus videantur, dictam tamen sententiam neque probant, neque confirmant.

Ad *Primum* respondeo, fœtum in utero nec moveri motu animali, nec sentire, nisi cum cerebri nervorumque prima delineamenta, seu stamina ad tantam molem, firmitudinem, & perfectionem pervenerunt & increverunt, ut cerebrum spiritus animales satis copiosos generare, iique per nervos ad sentientes moventesque partes deferri commode possint: & quia ad illam perfectionem consequendam aliquot mensibus opus est, hinc fœtus se non movet, nisi circa dimidium ingravidationis, id est, circa mensem quartum cum dimidio: qui enim ante illud tempus gignuntur spiritus, sunt nimis pauci & imbecilles, & ipsæ etiam corporis reliquæ partes ad sensum motumque adhuc ineptæ. Neque motus fœtus procedere & peragi debuit per spiritus & nervos maternos ad se decurrentes, quorum nulli fœtum ingrediuntur, sed à spiritibus & nervis in se ipso genitis.

Ad *Secundum* dico: in spirituum animalium confectionem non requiri insignem magnitudinem, sed potius mediocritatem caloris, qualis in cerebro sufficiens est, etsi multo minor existat quam in aliis partibus. Atque tali minore calore, quem vulgò frigus appellant, opus erat ad compescen-

dum sanguinis arteriosi fervorem, & ad nonnihil condensandum ejus volatiles sulphureas particulas, ut sic Spiritus animalis è falsis particulis purior secederet, neque ulteriore viscosorum halituum copia obstitus, in nervos deflueret. Præterea sciendum, quamvis cerebrum aliis partibus frigidius dicatur, illud tamen non esse absolute frigidum, sed habere temperiem minus calidam quam multæ aliæ partes, talemque propriam conformationem quæ ad spirituum confectionem est maxime idonea, de qua videndum *sequens caput.* Denique naturalis subfrigida cerebri temperies non confopit spiritus, nec eos ad actiones in partibus peragendas ineptos reddit: sed ejus præternaturalis frigida intemperies sanguinem caloremque naturalem pororum nimia constrictione excludens, facit ut defectu convenientis materiæ pauci spiritus in eo generentur, iique jam generati per constrictos poros & nervos ægerime & pauci ad nervos defluant, unde tunc paulatim actiones deficiunt, non quod spiritus, ut vulgò dicitur, confopiantur, sed quod nimis pauci generentur & influant: spiritus enim nullum soporem perpetiuntur, sopor enim nihil aliud est, quam actionum in organis sensorii quies, ob spirituum animalium paucitatem vel defectum inducta.

Ad *Tertium* rehero: quamvis cerebrum & nervi arterioso sanguine nutrantur, inde tamen non sequi spiritus animales in cerebro genitos non esse quid diversum à sanguine & spiritibus vitalibus in corde genitis, ac per arterias pro nutrimento partium delatis. Eodem modo sonat hæc ratio, ac si quis dicat: Ventriculus nutritur sanguine arterioso ex chylo genito, ergo chylus in eo excoctus non est diversus à sanguine. Vel, cor mutat chylum in sanguinem, ergo sanguis in eo genitus non est diversus à chylo. Vel, panis mutatur in chylum, & hic in sanguinem, ergo panis non est diversus à chylo & sanguine. Pauca alia videantur super his *sequente capite, in principio.*

Ad *ultimum* dico: quod animales spiritus facillime exhalarent è cerebro & medulla, nisi illic continerentur in sua officina subfrigida, quæ eorum subitam exhalationem impedit (sic etiam quilibet spiritus chymici in vasis frigidis optime coërentur, & ab exhalatione prohibentur) & influerent in nervos, firma substantia præditos. Quod etiam in nervos non descenderent, nisi per alternatam cerebri dilatationem & concidentiam è cerebro & medulla expressi in eos propellerentur, posterioribus anteriores urgentibus, sicut unda propellit undam (sic etiam in templi organo musico, videmus levissimum aërem, qui nunquam sponte deorsum versus cum impetu ingrederetur in fistulas, folium dilatatorum concidentia ac

pressionem

pressionem in eas facile impelli) ut ex eo liquet, quod cessante cerebri motu, per syncopen, cranii depressionem, &c. nulli amplius influant in nervos, sed omnes partes immobiles concidant. Super eadem re etiam lectu dignus est Daniel Sennertus, lib. 1. institut. cap. 6. & prax. lib. 1. part. 2. cap. 33. quest. 2. quibus locis antedictam opinionem luculenter refutat, plurimisque aliis efficacibus argumentis perfundat.

Hac igitur opinione penitus rejecta, cum majore & sagacior Philosopherum parte, pro certo & indubitato habendum est, dari spiritus animales, è vitalibus quidem genitos, sed actu ab iis plurimum differentes, sicut panis multum differt à chylis, chylus à sanguine, & sanguis à substantia partium. Quippe sicut chylus in cor veniens primam exuit constitutionem, & omnino aliam induit, quæ nullam cum priore similitudinem habet, sicque in sanguinem mutatur: ita etiam subtilissima sanguinis vitalis pars in cerebro prorsus aliam & novam speciem, viresque alias & novas assumit. Hic si quis dicere velit, eosdem spiritus etiam antea fuisse in sanguine, quatenus è sanguine postea educuntur, nec illos ex eo educi posse, nisi antea in eo fuerint (quod enim non inest, non potest educi) cum eo non litigabo, si modo materiam horum spirituum in eo fuisse intelligat: nam tales spiritus animales, quales in cerebro conficiuntur, actu in sanguine non continentur, sed materia è qua conficiendi sunt, in eo continentur. Eodem modo sicut in cibis & alimentis non continetur sanguis spirituosus, sed materia è qua per viscerum coctiones talis generabitur: aut sicut in terra non continetur herba aut arbor, sed materia è qua per Solis calorem herba vel arbor suscitabitur: aut sicut in luto non continetur amphora, sed materia è qua amphora conficietur, quæ tam diversa est ab amphora, ut vel à puero stultus æstimaretur, qui diceret lutum est amphora, vel in luto continetur amphora, vel amphora est lutum, cum neutrum alteri actu insit.

Cerebri a-  
lio.

Cerebri autem hanc propriam esse actionem, ut spiritus animales gignat; eosque spiritus ex hac officina, in qua generantur, per nervos in partes profluere, atque etiam ab Anima quaquaversum cum determinatione quadam copiosiores emitti posse, tanquam administratos & portatores virium quas à se diffundit, hodie unanimis est Medicorum & Philosophorum sententia. Sed in quam cerebri parte spiritus illi gignantur, admodum controversum; & quidnam ipsi sint, fere penitus ignotum est: ac proinde de utroque paulo latius differendum: de priore, scilicet, hoc capite: de posteriore sequente capite.

Petrus Laurenbergius spiritus animales in sinibus falcis generari existimavit: à cuius sententia non admodum alienus est Daniel Sennertus, lib. 1. institut. cap. 7. Verum hæc opinio ab ignorato usu sinuum processit, ac proinde eam satis refellunt illæ quæ antea cap. 4. de sinibus diximus.

An spiritus  
generentur  
in sinibus  
falcis.

Andreas Laurentius, Riolanus, Lud. Mercatus, alique multi, quibus etiam calculum suum adjicit Regius, putant hos spiritus in cavitatibus ventriculorum generari, ex calidissimo arterioso sanguine è plexu choroide exhalante (cui nonnulli etiam aërem ex inspiratione admisceri arbitrantur (eosque deinde ex his ventriculis per poros invisibiles impelli in nervos, & sic per eos ad partes reliquas profluere. Quidam, ex sententia Arabum, eos non in omnibus ventriculis, sed tantum in quarto generari ajunt, quem ea de causa principissimum appellant. Utramque sententiam etiam docuit Galenus, lib. 7. de usu part. cap. 8. ut &, lib. 3. de loc. affect. cap. 7. nec non, 7. decret. Hipp. & Platon. cap. 3. Verum hanc de ventriculorum cavitate opinionem evincunt ratio & experientia. Nam si spiritus vitales è plexu choroide exhalant in cavitates ventriculorum, ut illic in animales mutantur; quomodo, quæso, ex istis vitalibus jam geniti animales spiritus è ventriculis ingredientur in nervos, quorum nulla cum ventriculis continuitas est? (nulli enim nervi è ventriculis exeunt) an qui vitales è plexu exhalant, jam animales facti rursus in nervos longius à ventriculis distantes inhalabunt? an etiam Anima spiritus extra imperii sui limites, scilicet in ventriculis, genitos ac contentos huc illuc, pro arbitrio, determinare poterit? Præterea, si ipse quoque locus consideretur, ille plane ineptus comperietur, in quo spiritus animales gigni possint. Quippe in ventriculis pituitosa colliguntur excrementa, quæ ordinarie in iis, modò majore, modò minore copia, æque in sanis, atque in ægrotis, inveniuntur. Deberent igitur hi tenuissimi purissimique spiritus extra vasa in horum ventriculorum cavitatibus, inter impura & frigida cerebri excrementa generari, atque inde (non obstante eorum à frigidis excrementis incrassatione) per poros angustissimos ac penitus invisibiles, potius in nervos satis longe à ventriculis diffitos, quam per latos & apertos processuum papillarium ossisque cribriformis ductus, una cum excrementis crassioribus effluere: quod maxime absurdum esse cuilibet facile patet. Præterea, in hydrocephalo, in quo nonnunquam magna feri copia in ventriculis colligitur (Vesalius scribit se aliquando multas libras in iis invenisse: & simile quid sibi quoque visum refert Plempius: atque etiam Tulpus, lib. 1. observ. med. cap. 24. quin-

An in ven-  
triculis.

que libras feri in iis reperit, mente usque ad extremum sana existente: nos quoque annis 1651. 1654. & 1670. ter spectanda exhibuimus humana cadavera, in quorum ventriculis plus quam semi libra serosi ac pituitosi liquoris continebatur) & in apostemate cerebri, in quo purulenta materia in hos ventriculos effunditur (talem casum in theatro nostro anatomico publice demonstravi mense Martio, anni 1653. in homine cui plus quam semi libra crassi, foedi, ac subviridis puris in ventriculis distentis continebatur, à magno partis superioris cerebri abscessu, usque in ventriculos superiores penetrante, in illos effusi, qui tamen æger, quod maxime mirandum, toto, eoque satis longo, scilicet septem hebdomadarum, afflictionis suæ tempore, sanæ mentis extiterat, motuque etiam non privatus fuerat usque ad mortem) in talibus, dico, casibus, nec hi spiritus generari, nec animales actiones procedere possent, quorum tamen contrarium docet experientia, ut ex modo dictis exemplis liquet. Ad hæc, si non per modo nominata pituitæ evacuatoria, saltem per ventriculorum vulnera illi spiritus mox effluerent, omnique animali actione homo per eorum defectum ilico privaretur. Galenus tamen, lib. 8. de usu part. cap. 10. refert historiam adolescentis, qui Smyrnæ in Jonia vulnus accepit in alterum superiorum ventriculorum, & tamen superstes remansit. Ego ipsemet hic Ultrajecti, anno 1648. iussu Magistratus, una cum urbis Prætoris & Scabinis, aliisque Medicis ac chirurgis, invisi cadaver juvenis nobilis Transilulani, juris studiosi, cui capitis vulnus mortem intulerat: in quo compertum est, aperto prius cranio, gladium ingressum fuisse orbitam unius oculi, in angulo nempe majore seu interiore (ipso oculo tamen illaeso) & per superiorem dextrum ventriculum penetrasse, ac superius versus lambdoidalis suturæ acumen in cranium intrinsecus impigisse, idque fere perforasse. Hic tamen juvenis nullis actionibus animalibus privatus fuit (quod certum indicium erat spiritus è ventriculo per latum vulnus non effluxisse) sed mente sanus, bene videns, audiens, gustans, omnesque partes bene movens, & deambulans, ac cum sodalibus convenienter & bono cum judicio quacunque de re differens, vixit per decem dies, atque tunc, superveniente febre vehementiore, bidui spatio extinctus est. Sic etiam Lindanus, cap. 8. physiolog. artic. 21. meminit cujusdam ægri vulnerati, cui chirurgus quatuordecim continuis ante obitum diebus specillum usque in cerebri ventriculum (ad quem vulnus pervenerat) sine sensu immisit: illum tamen dicit quotidie per urbem deambulasse, excepto ultimo quatrinduo, quo

extinctus est. In his casibus certe spiritus subtilissimi, aut sponte effluxissent, aut alternata cerebri dilatatione & subsidencia, è ventriculis per vulnus expulsi fuissent, sicque hominem actionibus animalibus subito privatum è vita sustulissent, si nempe locus generationis eorum in ventriculis fuisset. Atque ex his omnibus dictæ opinionis straminea fulcra satis innotescunt: quam opinionem aliis rationibus etiam luculenter refutat Wepferus, lib. de apoplexia, mihi pag. 127. ad 156.

A prædicta sententia parum abest Cartesius, qui quidem non docet hos spiritus generari in ventriculis, sed, lib. 1. de hom. circa finem, dicit eos per arteriolarum plexus choroidis angustias è sanguine arterioso separari in glandula pineali, atque ex ea infundi in ventriculos, nec alio modo differre à spiritibus vitalibus, quam quod sint tenuissimæ partes ab iis separatæ, & alio duntaxat nomine donatæ. Verum acutissimus Philosophus his verbis priori adhuc alium adjungit. Nam horum spirituum separationem in glandula pineali fieri, nullam habet verisimilitudinem, cum propter glandulæ parvitatem, tum propter immensam spirituum animalium copiam, qualis per tam exiguam particulam tam velociter transcolari minime potest. Ad hæc, etiam ea propter, quod hac glandulâ impedita & compressa, vel obstructa, tamen hos spiritus satis copiosos generari compertum sit: ut patuit in iis antedictis hominibus quibus pus & serum valde copiosum in ventriculis collectum, non potuit non glandulam hanc comprimere, & in tali officio (si modo tale haberet) impeditam reddere; quod tamen factum non est: ut patuit etiam in iis quibus arenulæ & calculi, plus quam dimidiam glandulam occupantes (exempla videantur præcedente cap. 6.) in ea generantur. Quantum ad sequens, quod dicit Cartesius, hos spiritus colligi in ventriculis, illud modò refutatum est: ut & alterum, scilicet illos non nisi sola separatione differre à spiritibus vitalibus: qua de re etiam plura videnda sequente cap. 11.

Multi alii sentiunt spiritus animales in plexu choroide elaborari ac confici, sanguinemque vitalem in transitu per plexum à cerebri proprietate mutari in hos spiritus: quam sententiam hodie varii, ut veriore, amplectuntur, eademque etiam mihi quondam placuit, sed jam bono jure displicet: quia repensius considerata, tres efficacissimæ rationes illam prorsus evertunt. I. Quod sanguis in isto plexu contentus, sit omnino rubicundus, nec ullam mutationem in eo suscipere conspiciatur, nec uspiam, quacunque plexus parte inspicias, alium colorem, quam rubicundum & sanguineum habeat, cum tamen spiritus animales pellucidi,

An generentur in glandula pineali.

An in plexu choroide generentur.



lucidi, & ob summam tenuitatem invisibiles existant. II. Quod plexus nusquam sit continuus cum ullis nervis, atque hinc etiam nulli spiritus ex eo in nervos transfundi possint. III. Quod sanguis è plexu, partim per innumeros exiles ramulos influat in medullarem cerebri substantiam (ut dictum cap. 5.) partim ordine circulationis fluat ad venam medio plexui, supra glandulam pinealem, interjectam (de hac vena dictum cap. 4. & 6.) per eamque ad sinum quartum feratur, inde ad sinus inferiores duræ meningis seu falcis, ex iisque ad venas jugulares: per quas vias etiam spiritus animales, si ulli in plexu conficerentur, ob summam tenuitatem effluerent cum sanguine, nec ulli ad nervos, extra plexum positos, eique minime continuos, pervenirent.

An generentur in arteriis exerioribus.

Franciscus de le Boë Sylvius, *disput. 4. thes. 28.* suspicatur illos confici in arteriis secundum cerebri & cerebelli superficiem excurrentibus (quas in istum publicum, non verò in privatum usum ita superficietenus distribui putat) atque ex iis in cerebri cerebellique corticem, hinc in mediam substantiam albicantem penetrare, & in hoc transitu liberari parte sua aquea, penitissime ipsi adhærente. Verum hanc opinionem hæc tria subvertunt. I. Quod in arteriis capitis non alius contineatur humor, quam in aliis arteriis, scilicet sanguis, eaque arteriæ sint duntaxat partes ministræ sanguinem deferentes, non verò illum in spiritus animales mutantes, aut alium qualemcunque humorem aut spiritum ex eo conficientes. II. Quod non spiritus animales, sed ipsum sanguinem arteriosum, cum per cerebri corticem cinereum, tum per substantiam albicantem, ex arteriis propelli, doceant innumera punctula sanguinea, quæ in substantia dissecta undequaque visui occurrunt, qualia hic conspici non possent, si ille sanguis in dictis arteriis modò mutatus esset in spiritus animales invisibiles. III. Quod singulæ notabiles humorum mutationes peculiare aliquod viscus eos immutans requirant: ut patet in ventriculo, alimenta in chylum; in corde, chylum in sanguinem; in hepate, sanguinem in fermentum biliosum (& sic in multis aliis) mutante, atque hinc etiam pro verissimo haberi debeat, spirituum animalium ex sanguine confectionem non posse fieri in arteriis, solummodo materiam è qua generandi sunt advehentibus, sed necessario eam peragi in ipso nobilissimo viscere cerebro, ac ne quidem in arteriis cerebrum & cerebellum ambientibus, sed in ipsa ejus substantia: de qua eorum generatione plura videantur *sequente capite.*

An elaborantur in cerebri substantia.

Sic etiam Galenus, *lib. 8. de usu part. cap. 13.* cum eoque Bauhinus, Sennertus,

Hoffmannus, Æmilius Parisanus, & Plempius, illos in ipsa cerebri substantia confici ac elaborari existimant, quorum sententiam nos quoque amplectendam censemus, utpote cujus veritas ex eo patet, quod sanguis arteriosus undequaque multo majore copia ad cerebri substantiam impellatur, quam ad ejus nutritionem opus est. Extrinsecus enim milleni arteriolarum ramuli, partim in cinereum corticem cerebro extrinsecus circumductum, sanguinem copiosum deponunt, in cujus glandulis (de quibus supra dictum, cap. 5.) ad spirituum generationem aptæ particulæ à reliquis ineptis separantur, & ab extremitatibus fibrillarum cerebri, in corticem extensis, assumuntur & absorbentur: partim ipsam cerebri substantiam subeunt. Præterea intrinsecus etiam in tertio ventriculo infinitos exiles furculos è plexu choroide in medullarem albam substantiam inferi, eique adnecti & inhærere, facile patebit illis qui istum ventriculum prudenter detexerint, & fornicem lente elevaverint, tunc enim videbunt innumeros plexus choroidis ramulos fornicis, monticulorum striatorum, testium, natiumque substantiæ adhærere (sine horum disruptione fornix inverti, & tertius ventriculus detegi non potest) eamque ingredi, & in ejusdem poros tenuiorem sanguinem jam per plexus glandulas viscosioris feri magna parte liberatum, effundere, qui in dissectione substantiæ, cum ex vasculis invisibilibus, tum ex poris passim epululare conspicitur. Præterea, spiritus animales ea in parte generari necesse est, è qua commodè in nervos defluere ac propelli queunt: talis autem pars est cerebri & medullæ substantia, utpote quæ fibrosa tota, ac cum nervis continuata, continuatas cum iisdem habet fibras porosas, in quas per cerebri subsiditiam, quæ dilatationem sequitur, spiritus illi commodè propelli possunt. Denique, Anima utitur ministerio horum spirituum, igitur debent generari & contineri in tali parte in qua habitat Anima: atqui illa non habitat in vacuis cavitatibus seu ventriculis, inter medias sordes excrementitias, sed in partibus solidis viventibus: ergo, sicut in aliarum partium, ita etiam in cerebri substantia habitat, è qua actionum animalium principia instituit per spiritus animales, quos ex ea quaquaversum pro arbitrio per nervos dimittit.

Huic sententiæ duæ graves difficultates obfistere videntur. I. Quod apoplexia, alique graves sopores fiant, secundum præstantissimorum Medicorum judicium, à denegato influxu spirituum animalium è ventriculis cerebri in medullam, propter principii medullæ, vel à repentino pituitæ illapsu obstructionem, vel ejusdem aliqua de causa compressionem: qualis obstructio

Due objectiones.

Bbb

aut

aut compressio apoplexiæ vel soporis causa non foret, si spiritus non in ventriculis, aut plexu choroide, sed in ipsa cerebri substantia generarentur. II. Quod determinatio spirituum à mente secundum voluntatem instituta, non fiat in ipsa cerebri substantia, sed in sensorio communi, quod in tertio ventriculo situm est. Docet hoc catalepsis, in qua spiritus quidem copiosi in nervos influunt, sed de novo non determinantur, propter sensorium commune impeditum.

*Solutiones.*

Verum etsi hæc prima facie sententiam nostram nonnihil obfuscare videantur, tamen ponderis non sunt, ut eam convellere queant.

*Causa motus cerebri.*

*Prima difficultas* facile amovetur, si causa motus cerebri penitus consideretur. Antea, cap. 5. late docuimus, cerebrum moveri à perpetuo & primo mobili nostri corporis, scilicet corde, hocque sanguinem spirituosum in ejus substantiam per arterias impellendo, totum cerebrum dilatare, idque, cessante isto impulsu, mox iterum concidere, & sic in se contentos spiritus ulterius ad nervos comprimendo propellere. Si jam aliqua de causa, ut obstructione, compressione, &c. angustentur arteriæ per quas sanguis in cerebrum propellitur & fluit, sicque liber sanguinis per arterias impulsus accessus ad cerebrum imminuatur aut præcludatur, tunc parum materiæ ad spirituum generationem suppeditatur, atque etiam cerebri motus admodum exiguus fit, & hinc non solum paucorum spirituum generatio, sed eorundem etiam debilis seu exigua in nervos propulsio. Cum autem pauci spiritus, sique debiliter impulsus non sufficiant ad perficiendas actiones organorum sensoriorum, quorum etiam actiones per continuum & sufficientem spirituum motum peraguntur, in eorumque quiete deficiunt, necessario sequitur altus sopor, seu animalium actionum quies: qui sopor, pro dictarum arteriarum majore minoreve angustia, gravior aut levior existit. Si verò istæ arteriæ, per quas sanguis versus cerebri interiora fluit, nempe retis mirabilis & plexus choroide, imò & ipsæ arteriæ carotides, à crassioris pituitæ in cerebro collectæ repentino versus illas decubitu, vel à cranii cerebrique depreffione ab ictu aut casu, repente ac valide comprimantur & occludantur, mox impeditur motus sanguinis versus cerebrum, hinc simul etiam spirituum animalium generatio, eorumque motus ac propulsio in & per nervos (hoc de colli carotidibus insigni historia mulieris suspensæ, jam mortuæ putatæ, & tamen postea ad se redeuntis, probat Wepferus, lib. de apoplex.) & sic fit apoplexia: quam Medici hæcenus male statuerunt & judicant fieri à principii nervorum obstructione,

vel angustatione, cum totum hoc negotium à solis arteriis obstructis vel compressis procedat. Quod ipsum etiam clarissimè docet Hippocrates, lib. 2. de morb. ut & 4. acut. quibus locis apoplexiæ causam esse scribit, sanguinis stationem, præcipue in arteriis colli (id est, carotidibus, aliisque inde derivatis, quales sunt illæ quæ rete mirabile & plexum choroïdem constituunt) utpote qua spirituum motus & actio tollitur, quo motu impedito, dicit necessario corpus quiescere. Audiamus hac de re acutissimum Fernelium, qui, lib. 2. de abdit. cap. 15. hanc rem experimentis & rationibus eleganter confirmat: Cum aliquando vidissem, inquit, virum viribus integrum, sinistri oculi ictu vehementiore repente attonitum corruisse, moxque sensu & motu privari, cum spiritu difficili ac stertore, & cum aliis fortis apoplexiæ indicia, eumque nec vena sectione, nec alia ratione servari, quin duodecim horis interiret, mortis causam investigatione dignam judicavi. Dissciso apertoque capite, neque ossis, neque meningum, neque substantiæ cerebri quidquam confractum divulgumve, sed duntaxat interiores oculi venas contusionis vi ruptas animadvertimus, è quibus sanguis cochlearium duorum mensura in cerebri basin procubuerat, qui concretus arterias eas obstringebat, quæ retiformem contextum efficiunt, & quæ illinc in cerebri ventriculos propagata, choroïdem alterum constituunt. Cerebri autem ventriculi prorsus illasi inanesque cernebantur. Hinc edoctus, alterum, qui citra causam externam extinctus est, disseccare visum fuit: in quo humor crassus & viscosus similiter ad contextum retiformem inventus est, cerebri ventriculis, nec oppletis, nec obstructis. Hinc ego ratiocinatus consentaneum putavi, in arteriis, vel obstructis, vel compressis, apoplexiam gigni, quod tum cerebrum nihil spiritus è corde per subjectas arterias recipiat, sitque necesse illius motum sensumque perire. Quidam, hac opinor animadvertens, recte dixit, fieri apoplexiam interceptis viis quæ sunt cerebro cordique communes. Sic etiam, si omnium apoplecticorum (horum varias historias ex præclaris Medicis collegit Schenckius, observat. lib. 1. text. de apoplexia, & varias etiam annotavit Wepferus, lib. de apoplex.) morbi causa diligentius inquiratur, non à principii nervorum in tertio seu medio ventriculo, sed à sola arteriarum ad cerebrum tendentium compressione, vel obstructione totum malum procedere comperietur; etiam tunc, cum à colluvie serosa, in ipsa cerebri substantia, vel inter meninges collecta, sit apoplexia: quam ex ea interdum productam fuisse, ab experientia per sectiones se comperisse scribit Wepferus: qui tamen malè putat, hoc fieri ob ingressum spirituum animalium præclusum, cum ab arteriarum occlusionem manifeste fiat: nam si in hydrocephalo aut cerebri

cerebri abscessu, à copioso fero vel pure in ventriculis collecto, nervorum orificia non occludantur, multo minus id fiet à collectione aliqua serosa longe minore. Quod illud etiam non fiat à pituita ventriculos subito replente, ut antiqui statuerunt, docet autopsia per sectiones apoplecticorum, utpote in quorum ventriculis nunquam tanta pituitæ copia invenitur: docet etiam illud, quod sine ulla cerebri multo minus ventriculorum, læsione, à sola arteriolarum reticuli mirabilis compressione apoplexiam fieri, pateat per experientiam, ut liquet ex antedictis Fernellii historiis, ut ex illa Wepferi, de muliere suspensa, ad se redeunte. Hac in parte nobiscum sentit Martianus, qui, *comm. in Hippoc. de morb. lib. 4.* sic inquit: *Apoplexia tres invenio in Hippocrati doctrina differentias: quarum etsi diversæ sint causæ antecedentes, in essentia tamen conveniunt omnes, quæ in sanguinis statione consistit, unde spirituum motus & actio omni tollitur: nam, ut ipso inferius ait, dum sanguis non movetur, fieri non potest ut non etiam corpus quiescat. &c.* Cum igitur sanguis motu privatur, spirituum non modo intercipitur motus, qui fit per sanguinem, sed simul & semel animalis spiritus generatio, quæ fit in cerebro, vitatur, ac interruptitur ex materia defectu, venis seu arteriis interceptis. Notum est enim animales spiritus ex vitalibus generari. Quantum ad illam apoplexiæ causam, quam proponunt Malpighius & Fracassatus, cum hunc affectum etiam fieri dicunt ab impedita transcolatione seri concrecibilis in cortice cerebri (cujus mentionem fecimus *cap. 5.*) illa si commode explicetur, conveniet cum priore modo dicta: nam si serum concrecibile, (ut illi dicunt) id est, si subsalsæ sanguinis particulæ in cortice cerebri (crasii depreffione, pituitæ infarctu, aliave de causa, impedito) sistantur, & transcolatione non separentur, tunc sistitur quoque spirituum vitalium seu sanguinis arteriosi ingressus in cerebrum, atque hinc ilico

etiam (defectu materiæ è qua generandi sunt spiritus, & causæ qua geniti sunt propellendi) deficit generatio, & simul etiam promotio seu propulsio spirituum animalium in nervos, & sic inducitur apoplexia, aliisque gravis sopor, licet via istorum spirituum ex ipso cerebro in nervos adhuc libera esse possit. Atque sic ex his patet, causas apoplexiæ & soporum, nostram sententiam, de loco generationis spirituum animalium, non evertere.

Quantum ad *secundam difficultatem*, illa etiam nihil contra nostram sententiam infert effatu dignum: nam magna differentia est inter spirituum generationem, de qua hic agimus; & eorum determinationem: ut & inter locum in quo fit illa generatio, & locum in quo, aut è quo fit determinatio. Quod mens è sensorio communi spiritus substantiæ cerebri inhærentes determinet ad has illasve partes, hoc non impedit quominus illi spiritus in substantia cerebri generentur, atque inde per imperium mentis ad has illasve partes determinentur: hoc etiam non necessarium facit, ut spiritus gignantur in isto loco è quo mens illos pro imperio determinat. Rex imperans è solio subditos ad hæc illave munia, vel loca determinat, sed hinc non sequitur illos serviles subditos in solio vel palatio Regis esse genitos vel contentos, quippe imperii ejus irradiatio se etiam extendit ad longe diffitos.

Qui jam convenienter explicabit modum, quo spirituum determinatio ab Anima seu mente peragitur, ille magnam facem ad majora mysteria detegenda accendet. Interea hæc secunda difficultas seu objectio nihil adversus nostram sententiam facit: atque hinc, tanquam omnium maxime verosimile, statuimus, spiritus animales generari in ipsa cerebri substantia.

Quomodo autem istorum spirituum elaboratio ac confectio in cerebro peragatur, explicabitur *sequente capite*.

## CAPUT XI.

## DE SPIRITIBUS ANIMALIBUS.

Digressio.



Ræcedente capite dictum, cerebri officium seu actionem esse, generare Spiritus animales, ac demonstratum illos elaborari in ejus substantia: jam quales, & quid sint illi nobilissimi Spiritus, ac quomodo generentur; ulterius inquirendum superest.

Notandum tamen, cum hic, ut & *lib. 2. cap. 12.* de Spiritibus loquimur, nos non agere de incorporeis quibusdam

spiritibus; aut de generali Spiritu totius mundi, per quem omnia vivere statuerunt Platonici, sed de subtilissimo quodam halitu, qui ex sulphure & sale per viscerum coctiones educitur, & pro materiæ è qua educitur diversitate, diversoque educendi modo, diversus est, diversasque qualitates obtinet.

Sunt autem Spiritus animales *Spiritus definitio.* halitus invisibiles, tenuissimi ac volatiles, potissimum ex falsis sanguinis

Bbb 2

par-

particulis, paucissimisque sulphureis, maxime volatilibus in cerebro confecti, partim naturalibus, partim animalibus actionibus inservientes.

Rejiciendam & refutatione indignam censemus opinionem eorum qui negant re vera dari ullos spiritus animales specie à vitalibus diversos (quod etiam monitum præcedente capite, non longe à principio) ut Hoffmannus, *comm. in Gal. de usu part.* Deusingius, *lib. de spirit.* alique varii acriter defendere conantur: cum hi ex falsis multisque sulphureis spiritibus in corde simul dilatatis & exactissime mistis componantur; illi verò ex paucissimis sulphureis & plurimis falsis præcipue constent; atque non solius substantiæ, & compositionis, verum etiam usus ratione à prioribus multum differant, atque in peculiari quoque viscere, cerebro, toto genere à corde differente, elaborentur: cum ab illis denique procedant actiones animales à naturalibus multum diversæ, ut phantasia, imaginatio, ratiocinatio, iudicium, memoria, tactus, visus, musculorum motus, &c. ab eorumque vitio etiam peculiare morbi & affectus excitentur, ut liquet in vertigine, apoplexia, incubo, mania, convulsione, phrenitide, aliisque ab eorum pravo motu, nimioque influxu, vel defectu orti, quorum similes à vitalium spirituum vitiis immediate procedere non possunt. Totam hanc rem clarissime explicat Galenus, *lib. de placit. Hipp. & Plat. cap. 6. ut & lib. 7. cap. 3. de usu part.*

Glissonii opinio de materia.

De materia è qua generantur hi Spiritus, jam nuper aliquid novi introducere annexi sunt Glissonus & Charletonus, qui ambo contendunt illos generari ex aliqua chyli portione, quæ à nervis absorbetur, è qua partim hi spiritus animales educuntur, partim succus aliquis sanguine crudior generatur, qui per nervos ad omnium partium spermaticarum nutritionem defluit. Verum hanc absurdissimam opinionem supra refutamus, *lib. 1. cap. 16. & infra, lib. 8. cap. 1.* eamque lato sermone destruit Deusingius, *lib. de nutritii succi novo comment.*

Antiquissima & verissima sententia est, illos generari ex sanguine arterioso, sed quo modo ex eo generentur, hætenus vix bene & certò descriptum est.

Cartesii opinio.

Cartesius, cum quo plurimi hodie consentiunt, *de passion. anim. part. 1. cap. 10.* hac de re ita scribit. *Considerandum est, inquit, vividiores & subtiliores omnes partes sanguinis, quas calor in corde rarefecit, ingredi indefinenter & maximâ copiâ cavitates cerebri. Ideo autem eò potius comeant, quam alio, quod omnis sanguis qui è corde egreditur per magnam arteriam, dirigat suum cursum*

*rectâ lineâ in illum locum: & cum non possit totus ingredi, quia via valde angusta sunt, partes ejus magis agitata & subtiliores transcunt sola, dum reliqua se diffundunt per omnes corporis partes. Hæ autem partes sanguinis subtilissima componunt Spiritus animales, nec eum in finem ulla alia egent mutatione in cerebro, nisi quod ibi separentur ab aliis partibus sanguinis minus subtilibus. Nam quos hic nomen Spiritus, nil nisi corpora sunt, & aliam nullam proprietatem habent, nisi quod sint corpora tenuissima, & que moventur celerrime.* Ex his verbis patet Cartesium non longe abuisse ab eorum opinione, qui putant Spiritus animales specie non differre à vitalibus, quam opinionem refutavimus capite præcedente. Hoc ipsum apertissime etiam significare voluit *lib. 2. de hom. artic. 10.* ubi sic inquit. *Illa sanguinis portio quæ ad cerebrum usque assurgit, non tantum nutritioni & conservationi substantiæ cerebri opitulatur, sed imprimis quoque subtilem auram, vel potius flammam admodum agilem puramque, quam Spiritus animales vocamus, ibidem generat. &c.* Paulo post addit. *Atque ita [subtiliores sanguinis arteriosi particulæ] sine ulla præparatione aut mutatione, quam qua separata sunt à crassioribus, & etiamnum agitantur vehementi illa celeritate, quam cordis fervor illis impressit, amittunt formam sanguinis, & spirituum animalium nomine veniunt.* Præterea statuit mirabilem quandam separationem tenuiorum sanguinis partium à crassioribus, cum tamen arteriosus sanguis æqualiter, totus talis qualis est, sursum deorsumque per omnes arterias propellatur, nec ulla ratio sit, quare subtiliores ejus partes speciatim sursum ad caput, crassiores verò ad reliquas corporis partes profluerent. Quantum ad viarum angustiam, illa hoc minime probat: nam arteriæ carotides & cervicales sunt satis latæ & amplæ, ut crassior sanguis una cum spirituoso mistus, per eas non minus, quam per alias arterias, profluere possit. Neque rectitudo viæ ad talem particularum tenuissimarum à crassioribus separationem quidquam facit: quippe cum impetu è corde propulsus sanguis, æqualiter, sine ulla particularum separatione, qua datâ portâ ruit. Non enim ejus spiritus paulatim separentur, sicut in chymica distillatione vini, alteriusve liquoris spiritus aliquos in se continentis, vi ignis gradatim dissoluti spiritus sensim, sine alio impetuoso impulsore, recta via sursum tendunt, ac per angustas quasque rectas (si tales dentur) vias evolant, aqueis crassioribus per laterales vias defluentibus; sed hic raptissime fit totius massæ dissolutæ sanguineæ propulsio in arteriam magnam, ejusque quascunque latas, angustas, rectas, incurvatas, superiores & inferiores productiones, eaque tam subita, ut illo minimo tempo-

temporis puncto, quo cor illam pulsionem facit, tam repentina-separatio tenuioris à crassiore, nec fieri, nec ratione doceri, nec imaginatione concipi possit. Si sanguis in cordis ventriculis à solo calore attenuatus & vaporosus redditus, sponte, sine aliqua impulsione, sursum in arterias ascenderet, tunc fortassis, propter lentum progressum, tale quid fieri nobis imaginari possemus; sed jam, cum cor subita contractione quidquid ventriculis inest, rapidissime, quasi oculi nictu, cum forti impetu expellat, talis separatio omnino fieri nequit. Si quis in tubum versus latera incurvatum, & superiore parte tribus quatuorve parvis foraminibus pertusum, cum syringa vinum rubrum servectum impetuose impellat, illud æqualiter, tale quale est, per quælibet superiora, lateralia, recta, curva, angusta, lataque foramina, profluet, nec ullam tenuiorum partium à crassioribus separationem (multo minus illarum per superiora recta foramina specialem sine crassioribus transitum) puncti temporis brevitatem, & impetus magnitudo permittent. Eodem modo se res habet in sanguine à corde propulso. Præterea sanguinis sursum per angustas rectasque vias ad caput ascendens, & deorsum per incurvatas latasque vias deorsum descendens ne minimam quidem differentiam in tenuitate & crassitie ullius Lyncei oculi unquam observare potuerunt: qui enim animal ex carotide extrahitur, ne punctum quidem differre cernitur ab eo qui ex aorta descendente, aut ex iliaca, per inflictum vulnusculum educitur: ut neque reduxi residuus sanguis, qui per venas jugulares descendit, quidquam differt ab eo qui per venam basilicam brachii, aut iliacas crurum ascendit (nisi forte per morbosam aliquam partem transierit) sed omnino æqualis est: cujus tamen aliqua differentia animadvertetur, si dicta Cartesii doctrina vera foret. Denique, dicit acutissimus Philosophus, subtiliores sanguinis partes hos spiritus componentes, non egere alia mutatione, quam separatione partium tenuissimarum à minus tenuibus, sed interim non explicat: 1. Quales sint illæ partes subtilissimæ, ex quibus hi spiritus conficiuntur. 2. Quomodo cerebrum earum separationem à reliquis partibus sanguinis faciat. 3. Quare, & quomodo moveantur.

De primo dixi in definitione, scilicet, non quælibet subtilissimas sanguinis partes, sed præcipue falsas volatiles ad confectionem horum spirituum convenire, quod, ut earum particularum separationem ac motum, jam latius docebimus.

Materia igitur è qua generantur hi spiritus, est sanguis arteriosus (hunc supra, lib. 2. cap. 12. diximus constare ex succo falso, sulphureo, & sero) ejusque non

æqualiter omnes particulæ, sed imprimis falsæ, quæ peculiari glandularum corticis cerebri qualitate à sulphureis magna ex parte dissolvuntur & separantur, suæque serositate exutæ, fiunt tenuissimæ ac omnino volatiles, ita ut per tenuissimas cerebri medullosi fibrulas, & invisibiles nervorum poros facillime permeare queant.

Vesalius, Laurentius, Columbus, Sennertus, Plempius, Fracassatus, aliique multi cum his, arbitrantur, præter sanguinem, etiam necessario aërem, ut materiam è qua, ad horum spirituum generationem concurrere, ejusque in inspiratione aliquantulum per cribrosa ossis ethmoidis spiracula in cerebri ventriculos penetrare. Quæ olim quoque fuit sententia Erasistrati, ut & Galeni, lib. de util. respir. cap. 5. ut & lib. 12. de med. ration. cap. 5. Verum illud à veritate prorsus alienum esse, docent, partim ea quæ de situ ossium spongiosorum & carnis fungosæ nares superiores infarcentis, latius dicta sunt *precedente cap. 8.* partim ea quæ de loco generationis spirituum animalium dicta sunt *precedente cap. 10.* ubi in priore edoctum, aërem inspiratum non posse penetrare in ventriculos cerebri: in posteriore, spiritus animales in illis ventriculis non generari. Præterea, spiritus animales semper generantur ex eadem & simili materia, cui si aër inspiratus necessaria pars foret, nunquam possent generari sine aëre inspirato. At contra, generantur etiam in iis, quibus, vel in gravidine à copiosa pituita, vel alia quacunque de causa nares ita obstruuntur, ut in respiratione nullus aër per eas transire queat. Generantur etiam in fœtu, dum utero & membranis suis inclusus latet (hoc ex motu ejus manifestum est, qui sine his spiritibus non peragitur) cum ille tamen non respiret, nec ullum aërem recipere possit, ut supra demonstratum, lib. 1. cap. 29. Generantur quoque in piscibus, qui licet aërem non inspirent, hos spiritus tamen satis copiosos habent, ut liquet ex eorum visu, tactu, & agili motu. Generantur denique in pullo avis, dum ovo inclusus detinetur, nec aërem recipere potest. Ex quibus omnibus facile concluditur, aërem inspiratum non concurrere ad constituendam materiam è qua hi spiritus conficiuntur.

Sanguis autem è corde per arterias carotides & cervicales copiosus impellitur, non in solas capitis membranas, sed in ipsam quoque cerebri, cerebelli, & medullæ substantiam (ut supra latius demonstratum, cap. 6. & 10.) atque in isto, primo per corticem, hinc per medullofam substantiam transitu, quæ in eo sunt subtiliores falsæ particulæ, à sulphureis seu oleosis ac serosis maxima ex parte separantur (hanc separationem

An aer concurret ad materiam.

Separatio spirituosæ falsæ partis.

Materia è qua.

tionem alii coctionem, alii immutationem appellant) quarum rursus densiores particulae nutritioni ipsius visceris inserviunt, quae verò tenuiores sunt, illae adhuc magis volatilisantur, & à sulphureis maxima ex parte liberatae, mutantur in spiritum subtilissimum, Animalem vocatum, qui è cerebri cerebellique fibris in nervos, per eosque ad reliquas corporis partes defluit.

*Salsa partis  
separatio à  
sulphureis.*

Quo autem modo, aut qua vi illa falsarum particularum separatio à sulphureis serosisque, earumque attenuatio ac volatilisatio fiat, non facile explicari potest, idque proprietati ipsius substantiae cerebri & glandularum corticis tribuendum videtur, utpote quae substantia praecipue ex simili quadam salina materia conformata est (sic etiam Fracassatus, *respon. ad Malpig. mibi pag. 206.* scribit corticem cerebri magis falsum & molliorem esse medulla, quia ille ex sale magis fuso constat, hæc verò medulla ex sale per corticem defœcatione minusque seroso reddito, atque hinc firmitus concreto, idque à se multoties expertum dicit, & *pag. 208.* aliquam experimentalem observationem probabilem addit) cui aliquae paucæ oleosae particulae admixtae quasi subpinguem ejusdem constitutionem conferunt: atque hinc ratione istius similis materiae, cum alia simili subsalsa materia affinitatem habet, eamque, dimissa reliqua sulphurea ac serosa, facile imbibit, & in fibrulis suis ad majorem perfectionem immutat.

Hæc autem separatio primo contingit in cortice, utpote in cujus innumerabiles exiles glandulas, per infinita sanguifera vascula, sanguis copiosus infunditur (ut dictum *precedente cap. 5.*) è quo in istis glandulis fit lequestratio salioris spirituosissimae partis, eaque in cerebri fibrulas, inferiore parte singulis glandulis insertas, influit, & sic in cerebri substantia medullari, ex istis fibrulis composita, ad ulteriorem perfectionem deducitur, residua sanguinis portione per venulas ad cor redeunte. Nam sicut omnium glandularum officium est humorem aliquem è sanguine separare, ita etiam in his corticis glandulis illud ipsum contingit: & sicut in pancreate separatur humor subacidus, in hepate (mediantibus suis glandulis & acinis glandulosis) biliosus, in tonsillis & faucibus salivofus, in renibus serofus, in multarum aliarum partium glandulis lymphaticus, vel alius qualiscunque, pro varia constitutione glandularum & ipsarum partium: ita quoque in corticis cerebri glandulis, singulari sibi propria constitutione praeditis, separatur è sanguine peculiaris, spirituosissimus, atque invisibilis liquor subsalsus, qui in medullaris cerebri fibrulis magis spirituescens, ab eo quod Animæ imperio in plurimis actionibus obsequatur, *Spiritus animalis* nomen sibi adscivit.

Quod autem in liquoris alicujus separatione particularum affinitas (de qua modo *Particula-  
rum affini-  
tas.* mentio facta) plurimum conferat, liquet ex eo, quod in aliarum quarumcunque partium nutritione res eodem modo procedat (hac de re vide *lib. 2. cap. 12.*) ut scilicet quae particulae sanguinis magis affines sunt partibus, illae iis adhæreant, in earumque substantiam assimilentur, reliquae verò ab iis separentur, & ulterius propellantur. Ita in aliis quoque rebus videmus ea facilius misceri quae aliquam habent affinitatem. Si oleum & aqua simul misceantur, eique misturæ particula oblonga panni lanei, aqua madefacti, uno fine immittatur, altero fine foris extra ollam pendulo, tota ollae aqua per panni longitudinem exstillabit, sed oleum in olla remanebit. Hanc affinitatem hodierna nova Philosophia non incommode explicat per minimarum particularum & pororum convenientiam. Ut si, ex. gr. minimae particulae recipiendae sint rotundae, & pori recipientes etiam rotundi, tunc illae ab his, propter affinitatem illam, facile recipiuntur; ut etiam si pori & particulae sint triangulares, aliove, sed simili modo, convenientes: verum si pori forent rotundi, particulae verò recipiendae triangulares, aut quadrangulares, tunc difficilis foret harum ab illis receptio, nec ulla esset affinitas. Ita quoque in cerebro se res habet: quae enim salsa aut subsalsa sunt sanguinis particulae, propter substantiae affinitatem & pororum convenientiam à corticis glandulis facile assumuntur, in iisque quasi fermentaceo aliquo motu à reliquis separantur, atque separatae mox à medullois substantiae fibrulis (ex quibus hæc maxime conflata est) facile imbibuntur, & magis subtilisantur, sulphureae verò non facile: ac proinde sulphurearum particularum non nisi paucissimum ac tenuissimum quid, minimum oleositatis habens, spiritibus animalibus admiscetur, reliquum verò, una cum serosis particulis, *partim* in excrementum abit, quod tum in ventriculorum cavitatibus, una cum aliis colligitur; tum per poros vaporosum dissipatur: *partim* una cum residuo sanguine ad exteriora cerebri propulsum, ibidem absorbetur ab orificiis minimarum venularum, atque ita ulterius circulator. Sed notandum tamen in isto transitu non omnes falsas particulas in corticis glandulis separari, & à cerebro imbibiri (nam sic fieret compositionis sanguinis dissolutio) sed tantum magis fluxiles & volatiles; reliquas verò crassiores sanguini immistas remanere, cum eoque circulari. Eodem modo sicut in renibus totum serum è massa sanguinis non separatur, sed duntaxat quod tenuius, & glandularum renalium poris magis affine est, reliquum massae admixtum



mistum manet, cum eaque ad cavam fertur.

*Spirituosa  
parvis sepa-  
ratio à cras-  
sa.*

Ex jam dictis scimus quomodo salsa sanguinis particulae in cerebro separentur à sulphureis & serosis: sed quia illarum solummodo subtilissimae maximeque volatiles ad spirituum animalium generationem conveniunt, reliquis crassioribus partim cerebri nutritioni inservientibus, partim in excrementum abeuntibus, videndum nunc quomodo particularum spirituosarum ac volatilium fiat separatio à crassioribus. Haec res eodem modo procedit, sicut in distillatione vini contingit, cum orificium alembici magna spongia exacte obturatur. Chymici enim ut ex vino distillando spiritus potentiores, seu à phlegmate magis depuratos, eliciant ac separent, spongiam alembico addunt: ita enim per implicitas spongiae vias soli spiritus rotantur ac torquentur, impura verò pauloque crassiora eas transire nequeunt, & sic quae non defaecata & valde aquosa insunt separentur ac deponuntur, ipsique spiritus subtilissimi exeunt, & per alembici rostrum decidunt in subiectum receptaculum. Ita etiam in cortice cerebri separatae salsae sanguinis volatiles particulae, mox à minimis fibrulis (è quibus medullarem substantiam constitui, supra dictum, cap. 5.) quae obscurissimis angustis cavitatibus (fortè etiam tortuosis & spiralibus) praeditae sunt, assumuntur; per quas intricatas vias, dum spiritus illi rotantur ac torquentur, quae iis minus defaecata & crassiuscula adhuc insunt, magis magisque deponunt, sicque fere in corpoream tenuitatem exaltantur, & in medullam oblongatam, tanquam in proximum alembici rostrum, ex eaque in nervos, tanquam minora rostra è maximo derivata, defluunt; dum interim crassiores sanguinis particulae salinae minus volatiles nutritioni ipsius visceris inserviunt; reliquae verò adhuc magis fixae, in sanguineae massae mistura remanentes, per poros latiores in sanguifera vascula refluunt, & circulationi remanantur. Haec autem spirituum è cerebri medullaeque poros fibrulis ad nervos, & sanguinis ad venas propulsio, urgetur ab una eademque causa, scilicet à cerebri alternata post dilatationem concidentia, qua, tanquam compressione quadam, qui in cerebro sunt spiritus & humores ad effluxum promoventur, ut latius dictum *precedente cap. 5.*

Atque ita per cerebri corticem & medullarem substantiam fecernitur salsum à sulphureo & seroso, purum ab impuro, subtile à crasso, idque subtile per propriam modò explicatam dictae substantiae vim, à sale volatili, quo abunde perfusa est, procedentem, ad summam volatilitatem exaltatur: atque hinc etiam è cerebri & medullae

substantia ac fibrulis effluens, non debuit contineri vasis laxis & fistulae in modum excavatis (ex his enim facile avolasset) sed talibus firmis ac solidioribus receptaculis seu canalibus, in quibus solummodo minimi & invisibiles essent pori (tales canales sunt nervi) utpote per quos ob summam suam volatilitatem ac tenuitatem satis libere permeare ac defluere potest.

Notandum tamen, quamvis Spiritus animales hoc modo ex dicta materia conficiantur, illos nihilominus ad aequalem volatilitatis gradum in omnibus hominibus non exaltari: nam in aliis sunt tenuiores & magis agiles, in aliis crassiores & tardioris motus (vulgò dicunt, puriores vel impuriores) quia scilicet salsae sanguinis particulae, è quibus generantur, in aliis sunt magis, in aliis minus volatiles; & ipsum etiam cerebrum in aliis copiosius, in aliis paucius spiritu volatili est impraegnatum; atque in aliis calidius existens, spiritus magis volatilifit; in aliis frigidius, illos magis figit & incrassat. Propterea melancholicis, iisque qui crassis, duris, falsis, & crudis cibis continue utuntur, & hinc coctiones peiores habent, crassiores & minus spirituosos generantur humores, ac inter alios falsi minus volatilifantur, unde tunc spiritus animales ipsis crassiores & minus agiles sunt, ut apparet in rusticis, pauperibus, & iis qui frigidas ac polares regiones inhabitant, talique victu, defectu tenuioris, utuntur: hi enim ad quaelibet actiones animales tardiores & segnes sunt, & ingenium stupidum habent: cum è contra, qui in calidioribus vivunt regionibus, omniumque salubrium rerum abundantia gaudent, nec duris multumque salitis, aut antiquis, vel muria aut fumo servatis cibis delectantur, sed tenuioribus ac salubrioribus utuntur, atque hinc coctiones meliores, & humores spiritusque magis tenaces ac volatiles habent, maxime agiles sint corpore & ingenio. Aristoteles quidem dicit, melancholicos esse ingeniosos, sed hoc non est intelligendum de iis qui omnino sunt melancholici, & una cum sanguine etiam spiritus crassiores habent; verum de iis qui ad melancholiam inclinant, atque hinc spiritus, neque admodum tenues & volatiles (tales enim nimis mobiles atque inconstantes sunt) neque crassos (tales torpidi sunt) sed medio modo temperatos habent: atque hinc tales homines, neque nimis parum, neque nimis multum de rebus agendis solliciti & cogitabundi sunt, sed omnia cum accurata attentione, prudenter perpendunt ac dijudicant.

Fortè cuiuspiam mirum videbitur, quod particulae salsae tam subtiles ac spirituosae fieri possint, ut per invisibiles nervorum poros libere permeare seu transire queant.

Sed

*Spiritus  
diversitas  
in tenuitate  
& crassitie.*

*Transitus  
per poros  
nervorum.*



Sed mirari desinet, si in chymia observaverit summam tenuitatem ac subtilitatem salis volatilis: si etiam animadverterit quomodo spiritus salis per invisibiles vasorum fictilium seu ollularum poros citissime transeat: imò si duntaxat consideraverit, quomodo ipsum sal culinarium seu marinum fustum, sine admittance humidi vel aquæ in muriam dissolutum, per crassos vasorum ligneorum asseres penetret, & per vasa fictilia lapidea, intus forisque vitreâ crustâ obducta, transiudet, ut liquet in vasis istis in quibus bubulæ muriâ condiuntur, aut haleces aliive pisces asservandi saliantur. Si sal fixum simpliciter fustum seu liquefactum per poros vasorum transeat, quanto facilius per nervorum poros salis volatilifati subtilissimus spiritus penetrabit?

*Quare hi spiritus non vellicent sua acrimonia.*

Verum hic aliud fortassis objicietur, scilicet quod salsa & acida sint acria ac corrodentia, atque hinc si spiritus animales essent ex salis sanguinis particulis geniti, atque hinc alicujus salfuginis participes, acrimonia sua corroderent quascunque partes, sicque dolores, multaque incommoda inducerent. Respondeo: quod Spiritus animales levissimam aliquam acrimoniam habeant, hoc certum est; sed non tantam tamen quæ sensibilem molestiam inducere potest: quia excellens acrimonia quæ sali fixo, propter acres pungentes particulas conjunctas, inest, illa in volatili ac vaporoso spiritu omnino mitis existit, quia minimæ particulæ acres dissolutæ à se invicem remotiores sunt, earumque vis ab intercedente aëre, aliove halituoso vapore, infringitur. Ex. gr. si quis ingrediatur cellam, in qua vasa spiritu vini repleta servantur, & aërem subtilissimo exhalante spiritu perfusum inspiratione attrahat, vel etiam si spiritus vini ad ignem calefacti halitum seu spirituosum vaporem naribus adducat, ille, quamvis subtilissimus & acerrimus spiritum è vasis in aërem effusum hauriat, tamen ex eo nihil molestiæ persentiet, neque tantam percipiet acrimoniam, quantam perciperet si ipsum spiritum in liquorem fixum naribus hauriret. Sic etiam in magnis salinis nostratibus, in quibus sal marinum magna quantitate excoquitur ac depuratur, vapores exhalantes volatili sale imprægnati, si naribus vel ore hauriantur, nullus, aut vix minimus aliquis subfalsus & acris sapor in iis percipitur, cum tamen ipsum sal fixum acerrimum sit. Fit hoc, quia vires, quæ in corpore fixo ac denso conjunctæ, & hinc valde efficaces sunt, in dissoluto ac vaporoso se junguntur, hincque minus fortes apparent. Atque hæc etiam causa est, quod Spiritus animales non corrodant, quia in subtilissimum halitum dissoluti, non habent tantam acrimoniam conjunctam quæ ulli parti molesta esse possit. Huc accedit,

quod tenuissimum aliquem serosum vaporem, una cum tantillo sulphurei spiritus, pro vehiculo adjunctum habeant, qui acrimoniam haud parum infringit ac temperat: præterea, quod ipsæ etiam partes per quas transeunt, & in quas influunt, participes sint alicujus alterius humiditatis, acrimoniam hanc plurimum quoque infringentis.

Ex his jam dictis abunde liquet, spirituum animalium generationem non esse animale, sed mere naturalem, eosque non solis qualitatibus, seu quibusdam accidentibus, sed toto genere differre à spiritibus vitalibus. In his enim longe prævalet sulphureus succus falso admixtus: in illis autem paucissimus adest sulphureus succus, aliisque inflammabilis liquor. Hi educuntur ex chylo & sanguine venoso, illi præcipue ex sola salsa sanguinis arteriosi parte. Hi conficiuntur in ventriculis cordis, illi in ipsa cerebri substantia. Hi fluunt visibiles per amplas arterias & venas, illi invisibiles per nervorum invisibiles poros. In hos nullum est Animæ imperium, in illos est.

*Differentia inter animales & vitales spiritus.*

Plurimum igitur inter se differunt spiritus animales & vitales. Sed jam quæritur, an etiam ipsi animales inter se differant, substantia, generationis modo ac loco, & usu? an scilicet alii ex sanguine, alii ex lymphâ, aliave materia fiant? item an alii generentur in anterioribus, alii in medio, alii in postremo ventriculo? vel (ut nuper docuit Willis) an alii in cerebri, alii in cerebelli substantia conficiantur? denique an alii peculiare à cæteris diversi sint qui visum, alii qui auditum, alii qui tactum, alii qui motum arbitrarium, alii qui motum spontaneum, &c. efficiunt? Respondendum Spiritus animales non gigni ex diversa materia, nec in diversis partibus (cerebrum enim & cerebellum pro una parte habemus) neque inter se esse diversos, sed omnes ejusdem naturæ, compositionis, & conditionis: operationum verò diversitatem oriri à diversitate naturæ & constitutionis partium in quas influunt: ut qui fluunt in partes ad tactum adaptatas, quales sunt membrana & cutis, illi tactum: qui in oculum, illi visum, qui in aurem, illi auditum: qui in fibras, musculos, aliasve partes ad motum comparatas, illi motum, &c. operantur, licet iidem, minimeque diversi sint: pro ut scilicet unumquodque instrumentum ad hanc illamve propriam actionem est adaptatum. Eodem modo sicut Solis radii, qui licet semper sint iidem, & ab uno Sole procedant, neque aliud lumen, aliasve vires ad has, aliud ad alias res deferant, tamen diversissimos edunt effectus, scilicet pro constitutionum rerum in quas influunt diversitate: hic enim hor-

deum,

deum, illic arbores, alibi lapides, modo vermes aut pisces, modo insecta, aliasve res generant: his vitam extinguunt, illic introducunt; hic emolliunt, illic indurant, &c. Videanter super his alia quædam inferius, *lib. 8. cap. 1.*

*Spiritus  
motus.*

Quo modo & medio spiritus animales per nervos propellantur, videndum *precedente cap. 5.*

*Ufus horum  
spirituum  
duplex.*

His Spiritibus animalibus nullus alius usus hæcenus adscriptus fuit, quam quod inserviant actionibus animalibus, scilicet, principibus facultatibus, sensibus, & motibus animalibus: quem eorum usum omnibus notissimum, neque ego, neque alius quispiam negare volet vel audebit. Verum præter hunc adhuc alius naturalis usus iis assignandus videtur, scilicet, quod etiam partium, imprimis spermaticarum, nutritioni maximam opem præstent. Hoc ex eo imprimis liquet, quia sicut sanguis continuè è corde per arterias, ita etiam hi spiritus animales è cerebro per nervos continue profluunt ad partes (minimè audiendi sunt, qui non ipsos spiritus, sed solam irradiationem aliquam per nervos deferri tradunt, quorum sententiam bene refutat Plempius, *lib. 2. fund. med. sect. 4. cap. 1.*) idque naturaliter, sine ulla mentis voluntate aut determinatione, etiam tunc cum mens nullos determinat, ut in somno & morbis soporiferis.

Quamvis autem præter hunc motum naturalem perpetuo procedentem, adhuc alio motu determinativo, sed non continuo, à mente seu Anima procedente, subinde moveantur, vel moveri possint, attamen illud nihil detrahit motui naturali continuo, quo minus, hi spiritus per hunc actioni nutritionis inserviant, sicut per illum actionibus animalibus. Sanguis enim in corporis quiete per arterias statò continuo motu ad partium nutritionem è corde propellitur; an ille, cum per majora exercitia, aut quancunque corporis magnam excalescentiam, decuplo citius & rapidius propellitur ac movetur, ea de causa non erit amplius nutrimentum partibus idoneum? Certe nemo fanus dixerit, istum secundum rapidum motum exuere sanguinem sua nutritiva qualitate. Atque sic etiam rapidior Spirituum animalium determinativus motus, priorem continuum subinde immutans, illis qualitatem ad nutritionis subsidium necessariam non eripit.

*Objeçtio.*

Verum enimvero, dicat aliquis, quomodo poterit nutritionis opus in partibus æqualiter procedere, cum modò pauciores, modò plures spiritus animales in has illasve partes influant (sicut per determinationis varietatem contingit) videntur enim illæ in quas pauciores, minus; aliæ, in quas plures influunt, magis nutriri debere?

Respondeo: idem in his Spiritibus fit, quod in sanguine, qui licet rapidius & copiosior, in corporis exercitiis vel motibus gravioribus, aliisve majoribus excalescentiis, per partes propellatur, propterea tamen non multo magis eas nutrit, quam si ordinario continuo motu propelleretur: quia rapidus ejus motus fit à magno calore: à motu & calore fit sanguis magis tenuis ac subtilis, partiumque pori magis laxi, ita ut sanguis partibus minus adhærere possit, sed ejus magna pars dissipetur. Sic etiam hi spiritus, cum copiosiores ad has illasve partes frequenter determinantur, majorem quidem iis firmitudinem (ut mox docebitur, *probatione 1. 2. 3.*) sed non multo majus augmentum conferunt, quia illorum plurimum, ob tenuitatem, dissipatur (hinc lassitudo & debilitas subsequuntur) & quod nutritioni non inservit, nec dissipatur, illud extra nervorum fines in partium substantiam, more solito, effusum, & nonnihil incrassatum, venarum extremitates una cum residuo sanguine subit, cum eoque miscetur & circulatur, atque ad cor deferretur: quam circulationem etiam notant Rolincius, *lib. 4. dissert. anat. cap. 12.* & Deusingius, *in disquisit. anat. Sylv. 18. 76.*

Jam inquirendum, quid hi Spiritus in nutritione præstent, vel conferant. Dictum *lib. 2. cap. 12.* sanguinem ex sulphureo, falso, & seroso succo constare, eumque ad nutritionem partium quaquaversum impelli. Sunt igitur in illius massa duplices partes nutritioni inservientes, sulphureæ & falsæ: tertia Mercurius est, ad nutritionem quidem fere inutilis per se, sed tamen summopere necessarius ad priorum conjunctionem, misturam, & vehiculum.

Ex duabus istis prioribus, aliæ carnosarum & pinguium, aliæ spermaticarum (sic vulgò appellatarum) partium nutritioni magis inserviunt. Priores, nempe carnosas & pingues, maximè nutriunt sulphureæ sanguinis particulæ, quæ ipsis oleosam molliem & dulcedinem aliquam tribuunt: quibus tamen falsarum particularum nonnihil admiscetur, ad majorem firmitudinem: cum autem in istis partibus sulphureæ plurimum supra falsas prædominantur, tunc pinguiore & molliore, cum verò minus, tunc carnosiores & firmiores evadunt. Posteriores, nempe spermaticas dictas, magis nutriunt falsiores sanguinis particulæ, quæ ipsis majorem firmitudinem & soliditatem ac duritiem conferunt, & paucas sulphureas particulas admittas habent, pro quarum tamen majore vel minore copia & dissolutione, aliæ partes molliore, ut membranæ, venæ, arteriæ, &c. aliæ duriores evadunt, ut ossa & cartilagine.

*Solutio.*

*Quid hi spiritus efficiant in nutritione.*

Ccc

Ut

*Processus  
nutritionis.*

Ut autem nutritio hæc convenienter procedat, necessario requiritur aliqualis falsarum particularum à sulphureis segregatio, ut sic illæ melius spermaticis, hæc carnosis & pinguibus adhærere, iisque assimilari possint. Hanc segregationem facit Spiritus animalis, qui suo influxu, quasi levi quadam effervescencia ac simul coagulatione falsas particulas peculiari affinitate nonnihil coagulando, à sulphureis separat, ut spermaticis partibus adponi, cum iisque, mediante calore ac pauculo sulphureo halitu, in eandem substantiam assimilari possint: & prout spermaticæ partes sunt magis vel minus siccæ aut humidæ, & plus minusve sulphurearum particularum iis admiscetur, etiam falsiores illæ sanguinis particulæ in iis magis vel minus figuntur & indurescunt. Sic omnino siccæ & duræ fiunt in ossibus, molliores manent in membranis, fibris, &c. His falsioribus particulis modice separatis, ex reliqua magis sulphurea sanguinis massa, quod aptum est, cedit in nutrimentum partium carnosarum & pinguium. Ita ut Spiritus animales (præterquam quod ipsi etiam aliquantum nutrire multis putentur) vicem gerant subacidi coaguli, quod ex sale & falsis rebus educitur.

*Spiritus  
animalis est  
coagulum.*

Tale enim acidum coagulum falsarum & sulphurearum particularum separationem facere, clarissime patet in chymia. Nam si spiritum vini (in quo decuplo plus sulphurearum, quam falsarum particularum contineri, patet ex flamma cum accenditur, quamvis etiam multarum falsarum præsentia ex ejus acrimonia satis appareat) miscueris cum tartari spiritu vel aqua (malè *oleum* vulgè appellatur) quæ ex falsis tartareis particulis tenuissime dissolutis & liquatis constat, exacta fit eorum mistio: huic mixturæ si pauxillum spiritus salis acidi vel vitrioli affundas, mox fit effervescencia, qua falsæ particulæ à sulphureis & aqueis separabuntur, ac coagulatae figentur, & ad fundum præcipitabuntur.

Sic etiam admistione Spirituum animalium, qui mitem subacidulam qualitatem habent, falsæ sanguinis ad partes influentis particulæ mediocri quantitate clementer à reliquis separantur, atque una cum ipso spiritu nonnihil figuntur seu coagulantur, sicque partibus spermaticis agglutinantur, accrescunt, & planè assimilantur: quæ verò minus falsæ & magis sulphuræ sunt, adhærent partibus carnosis & pinguibus, cum iisque uniuntur. Quæ verò particulæ spiritibus magna parte sunt privatae, & ad nutritionem minus convenientes, una cum reliquo sanguine per venas refluent ad cavam, ut novo fermentaceo humore, ab hepate & liene prodeunte, imprægnentur, sicque in corde, vel cum novo admisto chylo, vel solæ sine chylo, de novo spirituescant.

Verum enimvero, si talis particularum falsarum & sulphurearum separatio à spiritibus animalibus, per nervos influentibus, in partibus fieri debeat, ut nutritio peragatur, quæritur quomodo hoc negotium procedat in iis partibus in quas nulli nervi inseruntur, ut in ossibus, aliisque similibus? item in iis quæ paucissimos recipiunt nervos, & tamen ratione magnitudinis & actionis, multo egent nutrimento? Respondeo, nullas esse partes ad quas nervi non pertingunt, sed ad alias plures & majores, ad alias pauciores & minores pervenire, prout aliæ pluribus, aliæ paucioribus spiritibus animalibus ad sensuum ac motuum munia, & nutritionem egent, & in aliis major, in aliis minor falsarum particularum à sulphureis separatio fieri debet. Ossa, quia per falsas tartareasque sanguinis particulas maxime nutriuntur, multis egent spiritibus animalibus, fortem separationem falsarum particularum à sulphureis procurantibus, atque hinc omnia periosteo sunt investita, in quod è nervis spiritus hi copiosi influunt, ex eoque in eorum poros penetrant, prædictum munus efficaciter in iis peragentes: & licet nulli manifesti nervi ossa ingredi videantur, in nonnulla tamen ingredi docent dentes: fortè multa alia etiam ingrediuntur tam exiles ut visui non appareant: & in quæ nulli ingrediuntur, in iis periosteum, spiritus è nervis recipiens, nervorum munere fungitur: quæ autem neque nervum, neque periosteum habent, illa ab ipso principio justam habent magnitudinem, cum singulari duritie conjunctam, & postea neque deteruntur, neque incrementum amplius, ut ossicula aurium, incus, malleus, stapes. Cor, quod carnosum, quia neque tam copioso sale nutriendum, neque voluntario motu movendum erat, & quia aciores spiritus in se ipso conficit ac continet, paucissimis indiget spiritibus animalibus, atque hinc maxime tenellos obtinet nervulorum ramulos. Hepar & pulmo, quia fermentaceos acresque succos aliunde satis copiosos recipiunt, hic è corde, illud è liene, maxime exiles recipere nervulos, per membranam investientem imprimis dispersos, ac vix parenchyma subeuntes. Lien verò copiosiores recipit nervos & animales spiritus, quia fermenti materiam ex sanguine arterioso conficiens, in eo acidæ falsæ sanguinis particulæ fortius à sulphureis erant separandæ. Et sic quoque se res habet in alijs partibus: inter quas firmiores semper plures, molliores verò pauciores spiritus animales recipiunt, & quibus inter molliores plures solito spiritus affunduntur, illæ fiunt aliis mollioribus firmiores, ut de musculis statim dicetur.

Hujusmodi autem qualitatem ad partium nutritionem promovendam maxime necessariam

sariam spiritibus animalibus inesse, varia docent.

Probatio 1.

I. Quod partes illæ quæ motu animali voluntario magis & crebrius exercentur, & in quas ad motum istum faciendum necessario spiritus copiosi frequentius influunt, quam in alias quæ minus exercentur; quod illæ, inquam, ob falsarum particularum sanguinis meliorem à sulphureis separationem ac coagulationem, nutrimento solidiore nutrantur, atque hinc multo firmiores & robustiores evadant, quam aliæ quæ minus moventur, & in quas proinde spiritus illi tam copiosi non determinantur, sed tantum ordinario modo influunt. Liqueet hoc in plurimis hominibus, quibus dextrum brachium cum manu multo validius & robustius est, quam sinistrum, propterea quod ex consuetudine illud decuplo plus moveant & exercent, cum eoque pleraque opera faciant, unde multo plures spiritus animales ad illud determinantur, quam ad alterum, in quod propterea ob spiritum istum pauciores sanguini affusum, minor fit falsarum particularum à sulphureis separatio & fixatio, atque hinc etiam minus firma nutritio, quamvis interdum major videatur moles seu crassities; sed quod apponitur, cum ob minorem istam coagulationem effervescentiam à sulphureis minus sit liberatum, est molle, flaccidum, & subpingue, partique minorem firmitudinem tribuit.

II. Quod iis qui multum & frequenter ambulant, crura ob dictam causam multo firmiora & validiora evadant, quam aliis, qui otio dediti raro ambulant, & tamen crura sæpe multo pinguiora, carnosiora, molliora, & crassiora habent: imò quod illi ambules crura longe fortiora habent, quam alias corporis sui partes, quas minus exercent, atque hinc ad ambulationem & cursum, non verò ad alios labores valeant.

III. Quod ob eandem causam mulieres, aliæ otiosæ, satis pingues & molles, sed debiles existant, quia scilicet ordinarius naturalis duntaxat fit spirituum animalium in partes influxus, atque hinc sulphureæ sanguinis particulæ copiosissimæ falsis admixtæ, ab iisque minus separatæ, una cum falsis apponuntur, sicque fit nutritio minus firma.

IV. Quod paralyticis, quibus paucissimi vel nulli spiritus ad membra resoluta influunt, primo partes resolutæ per aliquod tempus flaccidæ sint, & quasi tumore œdematoso nonnihil turgidæ, tandem verò emaciantur & contabescant, licet per arterias satis multum sanguinis ad eos propellatur.

V. Quod qui immoderata Venere utuntur, contabescant, scilicet propter magnam

spirituum animalium consumptionem ac dissipationem, cujus ratione cum pauciores ad nutriendas partes profluant, non satis bene procedit nutritio, atque inde totius corporis macies sequitur.

VI. Quod in cerebri intemperie & variis morbis atrophiam sequatur, aut propter horum spirituum absorptionem, aut quod pauci generentur, aut quod depraventur. Sic Malpighius, *epist. ad Fracass.* scribit, quod vulnere cerebri tentatos, marasmo tandem interiisse, frequenter observaverit.

VII. Quod talis atrophiam vitio cerebri & spirituum inducta, sæpe curata fuerit remediis soli capiti adhibitis, quibus restituta spirituum animalium integritate, ipsa nutritio fuit redintegrata.

VIII. Quod præciso aliquo nervo, pars illa, ad quam nervus ille defertur, emaciatur (si modo plures alios nervos non recipiat) propter defectum spirituum animalium. Hujus rei elegantem historiam, ex *scholiis in Synefium*, refert Riolanus, *anthropogr. lib. 5. cap. 49.* Vidit, inquit, Nicephorus Gregoras aliquando puerum quendam, cui cum sagitta nervum cervicis percussisset, contigit ut inde pes alter torpore corripere, & permaneret in reliquum tempus insanabilis morbus; & cum pes alter atatis progressu cresceret, hic alter verò in ea tenuitate & brevitate, qua tunc fuerat, subsisteret, suspensus est inutilis & otiosus, tanquam pondus inane. Itaque dubitatione afficiebat eos, qui causas & rationes non intelligebant, quo pacto manus, cum propior esset, sine ullo sensu doloris permansit, pes autem procul distans, condoluit. Verum, propter istius seculi majorem Anatomies obscuritatem, videtur illa causa à præsentibus Medicis non fuisse percepta, quæ, procul dubio, hæc fuit: quod illa sagitta non percussit nervum in cervice è medulla jam separatum, & per lateralia fistulæ spinosæ foramina modo elapsum (per cervicis enim vertebra nullus elapsus nervus ad crus & pedem descendit) sed intra fistulam spinosam penetrans, in ipsa medulla dissecuerit illa nervosa filamenta (tota enim medulla quasi ex fasciculo filamentorum nervosorum compacta est, ut *præcedente cap. 5.* docuimus) quæ ad lumbos & os sacrum, indeque ad pedem descendunt, eaque de causa deficiente influxu spirituum animalium in pedem, pes exaruit, & ad ulteriorem magnitudinem non increvit.

Ita, ut, quocunque modo rem consideremus, & sive ad rationis, sive ad experientiae lydium lapidem exploremus, undequaque appareat, spiritus animales ad nutritionis munus necessario concurrere. Præterea eos etiam in liene materiam fermenti, ad sanguinis chylique præparationem

convenientis, ex arterioso sanguine separare, diximus *lib. I. cap. 16.*

Hæc eminus aliquo modo etiam subollescisse videntur Glissonius & Whartonus, eorumque vestigiis insistent Lambertus Velthulius, in *perdocto suo tractatu de generatione*. In eo tamen decepti fuerunt, quod, præter spiritus animales, etiam alium quendam liquorem nutritium per nervos defluere putaverint, qui per se spermaticas partes nutriet: vel fortè, quod crediderint, illos spiritus esse talem liquorem. Hallucinatio ipsis processit ex albumineo illo succo, qui, cum nervi læduntur, sæpe in articulis, aut circa eos, colligitur (vulgò *Aquam glarealem*, vel *articularem*, nostrates *Het leemeter*, appellant) qui tamen non est humor ex nervis læsis exstillans (quippe talis mucosus succus per invisibiles eorum poros transire non posset) sed est humor circa articulos, ad eorum humectationem & lubricitatem, subsistere solitus, qui à spirituum animalium, è læsis nervis effluentium, nimis copiosa admittance incrassescit & coagulatur, idque multoties fere ad albuminis ovi consistentiam: atque ab hac spirituum perditione fit in tali parte debilitas & atrophia.

Placuit hisce anatomicis exercitiis hanc meam paradoxam sententiam paucis verbis (plura commentabuntur alii, quibus plus otii superest) inferere, quia ex hoc fundamento multarum aliarum partium usus & natura explicanda erat.

Jam adhuc duo enucleanda restant. *Primum*, an spiritus animales sint proximum Animæ instrumentum: qua de re accurate agit Plempius, *lib. 2. fund. med. sect. 4. cap. 1. Alterum*: quomodo isti spiritus in cerebro geniti, & ad partium nutritionem perficiendam continuo ac naturali motu per nervos defluentes, etiam à mente alio motu determinativo moveantur, & modò pauciores, modò copiosiores, ad varias partes emittantur. Verum hæc quia imprimis ad Animæ actiones pertinent, huic nostro libro, quem non de Anima, sed de solo corpore humano conscribimus, minus bene convenire videntur: ac proinde hujus explicationis cupidos cenfeo transmittendos ad illos Philosophos, qui ex professo de Anima ejusque actionibus integros libros ediderunt: quos tamen sano cum judicio legendos existimo, cum eorum non pauci multa & admirabilia sibi ea in parte somnia finxerint.

## CAPUT XII.

## DE FACIE.



Vultus.

Facies.

Ræcedentibus capitibus quæ in capillata parte capitis rimanda occurrunt, perscrutavimus: nunc ad glabram accedendum, quæ Vultus dicitur, à voluntatis judicio, quod pro voluntatis varietate mutetur, aut voluntatem detegat: etiam Facies (Græcis *ὤψων*) nominatur, quod homines à brutis differre faciat, in iisque cœlestem spiritum contineri indicet.

Nam si faciei structuram, ejusque singularem pulchritudinem ac splendorem pensius consideremus, non poterimus non ex ea mirabile quid & divini perspicere: unde merito Aristoteles, *problem. 36.* dicit, totum hominem in facie, velut in compendiosa tabella, comprehendi.

Et si enim in singulis humani corporis partibus maximi Opificis sapientia plus satis elucescat, unius tamen faciei, tum pulchritudo, tum admirabilis cum animo consensus, reliquarum omnium partium elegantiam ac dignitatem quasi in compendium trahere, ac simul etiam omnium reliquarum affectiones, tanquam in speculo, exhibere videtur. Ex ea enim non tantum sanitatis, morborum, & imminens mortis

signa, verum etiam ipsius indolis, morum, & animi affectuum clarissima indicia elucunt. Nam ut in genis pudor & terror, sic in oculis ira, gaudium, tristitia, odium, & imprimis amor, se produnt: ex fronte gravitas & humilitas; ex superciliis superbia; ex mento majestas; ex naso sagacitas vel stupiditas; ex motu faciei sapientia vel stultitia, honestas vel nequitia, urbanitas vel incivilitas, reverentia vel despectus, benevolentia aut malevolentia; ex colore, totius corporis temperamenta dilucide innotescunt. Præterea in facie genus, sexus, vita, & ætas dignoscuntur, eaque homines à se invicem distinguuntur. Est igitur illa animi certissima imago, & dilucidum eorum quæ in abscondito latent speculum, in quo externi internique sensus se produnt, omnesque internarum facultatum motus ac perturbationes conspiciuntur.

Constat autem facies ex partibus continentibus, & contentis. Faciei partes.

Continentes sunt vel communes, vel propriæ.

Communes (de quibus supra latius actum, *lib. I. cap. 3. & 4.*) sunt, *Cuticula*; *Cutis*, quæ hic valde tenuis est; *Pinguedo*, quæ nulla in palpebris & naso, ac valde pauca in

in labiis & regione buccarum reperitur, ubi musculis adeo est intertexta, ut à subjectis partibus non possit avelli: *Panniculus carnosus*, qui infra oculos adeo tenuis est, ut Riolanus illum eo loco prorsus deesse putaverit; in fronte verò multo carnosior, adeoque cuti adnexus est, ut ægerrime ab ea separari queat, eoque loco, propter musculos frontales ei implicitos, rubet.

Propriæ partes sunt, musculi, ossa, cartilagine, aliæque suis locis describendæ.

Contentæ partes sunt oculi, aures, os, nasus, multæque aliæ, sequentibus capitibus explicandæ.

Dividitur facies in partem superiorem & inferiorem.

Superior, à capillis usque ad supercilia, **Frons** dicitur, hæcque pars in corpore integro ad faciem refertur, cum tamen in sceletio ad cranium pertineat.

Inferior, à superciliis usque ad extremum mentum extensa, oculis, naso, genis, aliisque partibus postea speciatim describendis, donatur, & viris circum oris delubrum barbæ exornatur.

**Frons.**

**Frons** autem à ferendo dicitur, quod animi indicia, gravitatis, tristitiæ, hilaritatis, morositatis, &c. præ se ferat. Græci *μετωπον* vocant, quasi dicas, *μετὰ τοῖς ὤψεσιν*, partem post oculos sitam.

**Musculi frontis.**

Hujus cutis mobilis est, propterea quod duobus musculis latis donetur (hos Riolanus nominat, *membranam carnosam musculosam*.) utrimque uno, è calvaria, prope futuram coronalem, oriundis, eique firmiter connatis, qui ad latera musculis temporalibus adnectuntur, & superius quidem in medio nonnihil distinguuntur, sed inferius ita coeunt, ut unus musculus esse videatur.

Terminantur autem ad supercilia (Bartholinus scribit, se in nasuto quodam eorum appendicem usque ad nasi cartilagine extensam observasse) quæ attollunt, unaque firmiter annexam sibi cutem in plicas rugasque contrahunt.

**Hariolatio.**

Istas rugas Physiognomi observant, & ex iis naturæ fortunæque hominis signa desumunt, ac de contingentibus ei futuris

mirabilia sæpe hariolantur: utque prædictionum suarum certitudinem credulis melius persuadeant, rugas distinguunt in longas seu rectas, & transversas: atque illas rursus septem constituunt, singulis Planetis dicatas: quas omnes in omnibus non apparere, sed quasdam in multis deesse fatentur: illas tamen ut plurimum conspicuas esse referunt, quæ Mercurio, Veneri, & Jovi dicatæ sunt, imprimis si supercilium attollatur, quod altius cogitantibus evenire solet; vel frontis cutis, ut in irascentibus, contrahatur, sicque rectarum & transversarum corrugatio simul fiat. Verum quam inanes & incertæ sint hujusmodi prædictiones, præter quotidianam experientiam, docent illa quæ de Planetarum viribus late scripsimus, in tractatu nostro de Peste, lib. 1. cap. 8. problem. 2.

Nervulos habent dicti frontales musculi à tertii paris ramulo, è foramine orbitæ oculi prodeunte. Arteriolis donantur à carotidibus externis: venulas ad jugulares emittunt.

Fibras obtinent rectas, atque hinc cutem recta sursum trahunt, non verò transversas vel obliquas, quod tamen contra autopsiam & rationem statuunt Columbus & Aquapendens.

Hic obiter extra faciem quoque notandum, quod hujusmodi duo musculi admodum tenues, (hinc multoties visui non manifeste occurrentes, deesse putantur) rarò insignes, in occipitio reperiantur, qui breves, tenues & lati, ab illa transversa occipitis linea, in quam desinunt musculi caput moventes, oriuntur, fibrisque rectis sursum ascendentibus donati, in tendinem latum finiuntur, & aurium musculos à latere tangunt. His, qui musculos illos obtinent insigniores, cutis capitis versus posteriora etiam trahitur, quod de se ipso testatur Johannes Schenckius, *observat. med. lib. 1.* & de pedagogo suo Columbus, *lib. 5. de musc. cap. 3.*

**Musculi occipitis.**

Sub fronte quatuor sensuum, visus, auditus, odoratus, & gustus, domicilia seu organa continentur: quintus verò sensus, nempe tactus, in facie privatum domicilium non habet, sed per totum corpus dispersus est.

## C A P U T XIII.

### DE OCULIS, IN GENERALE.



**O**culi ob *occludendo*, vel *occultando* dicti, Græcis *ὀφθαλμοί*, quasi *ὀπὲς θάλαμος*, *visus cubicula*, & *ὀμματα*, *ὡς τὸ ὀμᾶν*, à *videndo*, nomina-

ti, sunt visus organa, ex pluribus similaribus partibus videndi gratia efformata.

Hi, instar siderum & luminarium nostri corporis, eminentiore corporis parte à summo Creatore depositi sunt, ut tanquam

**Situs.**

speculatores fortuitorum occursum, & quæ fugienda, quæ prosequenda sunt, ex editiore loco melius prospiciant, atque per rerum visibilium admirandam constructionem, elegantiam, & varietatem, Dei invisibilis omnipotentiam indicent. Sunt enim lucernæ nostri corporis, quæ, instar Solis, homini lumen conferunt. Sicut enim Sol splendens macrocosmum illuminat, contactus verò latens in causa est quod tristes tenebræ offundantur: ita etiam oculi valentes & aperti microcosmum illustrent, eique mirabilia Dei opera patefaciunt: excæcati verò eundem tenebris involvunt, hominemque miserrimum, tanquam in obscurissimo carcere, perpetuo vivere cogunt, quippe iis fenestris orbatus, simul omni lumine & primaria maximeque voluptate privatur.

Oculorum autem mirabilis constructio atque fabrica si penitus consideretur, certe immensa summi Dei sapientia meminem non in admirationem & stuporem abripiet, utpote qui in his organis condendis tanto excellentius artificium exertuit, quanto visus reliquos sensus exteriores nobilitate, præstantia, ac dignitate antecellit.

Numerus.

Sunt oculi numero duo, partim ad majorem visus perfectionem, partim ut uno læso, alter in communis ac necessarii muneris subsidium veniret. In homine inter se exiguo intervallo disjuncti sunt, in multis verò brutis majore.

Figura.

Si ipsum globum spectes, figuram rotundam seu sphaericam obtinent, ut tam ad motum aptiores, quam ad radiorum visibilium receptionem commodiores essent. At si oculus cum suis musculis, posteriore parte appositis, consideres, tunc figuram bulbi tulipæ, nonnihil oblongam, habent.

Color.

Color in homine nonnihil variat, estque in aliis cæsius, in aliis subflavus, in aliis niger, quæ varietas circum pupillam in iride maxime conspicua est, atque ab uveæ colore procedit. In Syriarum regione, referentibus historicis, incolæ nigros, in Tartaria autem virides habent oculos. In brutis ejusdem speciei tanta varietas non reperitur. Causas horum colorum late describunt, Aristoteles, lib. 5. de gener. animal. cap. 1. Simon Portius, lib. de color. oculor. & Montaltus, in optica physica. qui hac de re legi possunt.

Magnitudo.

Magnitudo homini mediocris est, non omnibus quidem exacte æqualis, sed talis tamen quæ recipiendis visibilium radiis sufficit. Interim exigua illa magnitudinis diversitas ad majorem minoremque visus firmitudinem haud parum confert: quippe majores & prominentes oculi multo hebetiore visu præditi sunt, quam minores & in profundo reconditi, cujus rei causa videnda apud opticos scriptores.

Maximus & admirandus est oculorum inter se consensus, propter nervos opticos in medullæ summitate sibi in medio connatos: nec non propter motorios è communi principio simul oriundos (de his supra dictum cap. 8.) atque hinc uno, præcipue à causis internis, male affecto, mox condolet languetque alter, & ab unius noxa alter vix immunis servari potest.

Consensus.

Lucem aliquam congenitam in se habent, eamque mediocrem in homine, qui diurnis actionibus imprimis occupatur: majorem verò in iis animantibus quæ nocturnis venationibus victum quærunt, ut gliribus, bubonibus, felibus, &c. quorum clare fulgentes oculi circumfusas tenebras evincunt. Refert, ex propria autopsia, Laurentius Bauschius, ephemer. med. phys. Germ. tom. 2, obs. 6. quod leonum oculi sint clari & lucentes post mortem, ita ut per foramen uveæ videri possit fundus choroidis, quasi auratus.

Lux oculorum.

Quia verò ad oculos maximus fit spirituum animalium affluxus, hinc secundæ adversæque valetudinis signa manifestissime proferunt. In homine sano conveniens horum spirituum affluxus, eos plenos, splendidos, & alacres facit: at in male affecto, seu ægrotante, paucior eorundem copia eos reddit collapsos, mæstos, turbidos, & obscuros, donec inter extremos naturæ collabentis conatus, vacillante fractoque visu, virium vitæque casum prænuncient.

Oculi valetudinis indices.

Hos spiritus pravis qualitatibus imbutos, ex oculis exeuntes specula inficere, & contagio ophthalmiam aliis etiam inferre, antehac Aristoteles, Galenus, Alexander, & ex recentioribus multi clarissimi Viri male opinati sunt. Quippe spiritus animales in cerebro geniti sunt omnes æque boni, & si illi qui ad oculos fluunt pravis qualitatibus forent imbuti, tunc etiam illi qui ad alias partes fluunt, ejusdem prævæ qualitatis participes essent, & plures partes malè afficerent, earumque actiones læderent (nulla enim ratio est quare peiores fluerent ad oculos, & meliores ad alias partes) & tamen è contra plerisque ophthalmicis nullæ aliæ partes, præter oculos, male afficiuntur. Præterea, tanta spirituum extra oculos ad distans emissio, salvis manentibus oculis, fieri nequit, ut è longinquo speculum, vel longius distantes alterius oculos inficere possint. Ac proinde speculi infectionem (quæ nunquam ad longam distantiam, sed in propinquo tantum fit) non ab inquinatis spiritibus ex oculis, sed à pravis vaporibus ex ore prodeuntibus, aut alia aliqua causa externa, induci, pro indubitato habendum est. Sic etiam lippitudo, sive ad brevem, sive ad longam distantiam, ad speculum lippientis illata, non lippientis spirituum in-

An oculi morbo sit contagiosus.

Lippitudo non est contagiosa.



inquinatorum ab oculis emissioni, sed potius alterius hominis spirituum conturbationi, ab horribilis & abominandæ lippitudinis aspectu inductæ, tribuenda est, utpote qua spiritus non tantum inordinatè moventur, verum etiam poris per insolitum spirituum influxum plus solito dilatatis, sanguis & humores ad eas partes de quibus fit intenta cogitatio, scilicet oculos, copia majore abripiuntur. Eodem modo, sicuti quando aliquis cum abominatione & aversione alterum vomentem videns, simul etiam ad vomitum incitatur: vel epilepticum gravi convulsione exagitatum cum horrore & terrore adspiciens, simul etiam in epilepsiam incidit (cujus rei varia extant apud Medicos exempla) quorum neutrum contagio adscribi potest, sed inordinato spirituum motui, quo simul etiam pravi humores ad partem cogitatam moventur, in iis, quibus tales humores antea fuerunt in corpore collecti & parati: quo modo etiam lacteum succum ad mulierum, imò nonnunquam etiam ad virorum, mammas, copiosum deferri, supra dictum, *lib. 2. cap. 2.* Quo loco hanc rem latius explicuimus. Hæc autem horribilis cum abominatione impressio, cum in omnibus non sit æque magna, nec omnes æque conturbet, cum etiam non semper incidat in tales in quibus pravi & acres humores sunt coacervati, hinc fit quod quorundam, & sæpe quidem longius distitorum, oculi a lippientis aspectu lædantur, aliorum magis propinquorum oculis illæsis manentibus: quod etiam ab alterius vomentis aspectu alii vomant, alii non.

*Miasmata  
non exeunt  
ab oculis.*

Nonnulli has de spiritibus difficultates animadvertentes, & tamen contagium in lippitudine pertinaciter defendere volentes, aliud effugium quærunt, idque contagium non tam in spiritibus, quam in tenuissimis exhalationibus, seu contagiosis miasmatis ab oculis lippientis exeuntibus consistere tradunt: eodem modi sicuti pestis per contagiosa miasmata propagatur: atque ita propter magnum hujusmodi contagium, epidemias ophthalmias subinde visas fuisse; & à nonnullis quoque, quibus ista miasmata valde maligna ab oculis exibant, specula inspectione solâ penitus contaminata & corrupta fuisse, referunt: hocque posterius probant historiâ C. Hoffmanni, qui, *exercit. juvenil. pag. 112.* scribit se vidisse virginem floridissimam, quæ menstruorum tempore speculum, quod inspiciebat, adeo infecit, ut retrorsum plumbum abscederet, & speculum inutile fieret. Verum hi non considerant, quod ex oculo, parte frigidior, quæ præter conjunctivam, etiam contexta est tunica scleroticâ crassâ, valde durâ ac densâ, non nisi paucissimæ exhalationes fieri possint, quæ nequidem ad tres, multo minus ad

viginti passus (qua distantia lippitudinem ab aspectu lippientis contrahi, multoties visum est) circum circa protendi queunt. Nam si tantus, quamvis tenuissimorum, halituum egressus ex oculis continuè fieret (in sanis enim non minus quam ægris id fieri deberet) certe non possent non paucarum horarum spatio toti exsiccare, nec quod à minimis & invisibilibus arteriis suppeditatur humidum, foret sufficiens ad tantam inanitionem supplendum. Præterea, si aliquis scdâ ophthalmiâ detentus, ex improviso ingrediatur magnum aliquod atrium, & mox alius illum eminus adspiciat, hincque idem malum statim contrahat (quemadmodum id interdum factum fuisse novimus) an illud erit à contagio? deberet igitur talis æger ante suum adventum illud contagium præmittere; nam alioqui verosimile non est, illud ab ejus oculis momenti spatio per totum atrium protendi posse. Varii ophthalmias ab aspectu lippientium contraxerunt, qui ipsos in patulo aëre, & quidem averso vento, eoque satis forti, pauxillum adspexerunt, cum tamen contra venti impetum tale tenuissimum contagium deferri posse, nemo facile credet. In peste verò res longe aliter se habet, nam in ea fiunt copiosissimæ contagiosæ exhalationes, ex totius corporis partibus humidis, calidis, & raris, seu valde porosis, quin & ex ipsis in corpore contentis quibusvis copiosis inquinatis humoribus, è quibus, tum multi humidi, tum magni caloris ratione, copiosissimas exhalationes suscitari, atque etiam propter illam copiam, & magni caloris fortiter impellentis vim, longè ad magnam distantiam deferri posse, nemo non facile percipiet. Quantum ad epidemias ophthalmias, illæ communiter, grassatæ sunt propter communem causam in victu vel aëre hærentem, non verò propter ullum ab oculis exiens contagium: & si forte eo tempore ad aspectu lippientium, hic affectus à nonnullis fuerit contractus, illud non adscribendum contagio, sed isti conturbationi, de qua modò dictum. Sic etiam specula à paucissimis miasmatis ab oculis prodeuntibus unquam infecta & corrupta fuisse; credat Judæus apella, non ego: neque etiam hoc probat historia ex C. Hoffmanno citata; nam omnem fidem superat, quod illud prædurum ac politum speculum (quod, sicut alia vitra, oleum vitrioli, aquam fortem; aliasve res acerrimas sine ulla læsione sustinisset) à paucissimis ac minimis exhalationibus, ex oculis istius virginis prodeuntibus; infectum ac corruptum fuerit, imò quod illæ exhalationes ipsius vitri poros ita penetraverint, ut inde plumbum ab altero latere affixum adhærens recesserit, cum tamen vitra nullos tenuissimos aut acerrimos spiritus per suos

poros

poros transmittant : fortè illud speculum extrinsecus à copiosis viscosis tetrisque vaporibus, ex virginis ore & reliquo corpore exhalantibus, nonnihil contaminatum fuit, quæ tamen labes linteo facile abstergeri potuisset, nec ea de causa speculum corruptum fuisset, aut plumbum retrorsum à vitro recessisset : sed magis verosimile est, quod Hoffmannus nimis credulus, dicacitate illarum muliercularum, quæ ipsi hoc dixerunt, & speculum illud fortè monstrarunt, fuerit deceptus, & illa speculi corruptio aliam potius causam habuerit, scilicet parietem calceum humidum, ex quo speculum antea diu suspensum fuisse potuit, aliamve similem, cujus ratione isto tempore, quo illa virgo casu speculo usa fuit, forte fortuna retrorsum plumbum separatum, hincque speculum quasi maculis conspersum repertum sit, quemadmodum illud tali modo frequenter contingere solet.

Colophonis loco adhuc unum adjicio : si contagium aliquod ab oculis lippientium exeat, illud in tenebris non minus efficax erit, quam in lumine (sicut pestis, luis Venereæ, & scabiei contagia diu noctuque sunt æque efficacia) attamen si quis inscius decumbat aut dormiat cum ophthalmico, aut tota nocte in tenebris cum eo converseatur, nihil mali ejus oculi inde contrahent : at si in lumine cum cum aversione adspiciat, cum eoque tantillum converseatur, mox lippiens fiet : quod certum indicium est, illud non procedere ab ullo contagio, sed à dicta conturbatione.

*Observatio.* Studiosus quidam Germanus, anno 1653. ganeum quoddam circa noctem ingressus, ac meretricem petens, à lenone in tenebris sine candela ad pulcherrimam quandam, ut ipsi persuadebatur, mulierem, sed quæ

cognosci nolebat, propterea quod alterius viri uxor esset, deductus fuit, cum qua tota nocte, & exinde pluribus noctibus concubuit, atque postea apud alios suos sodales de pulchritudine hujus amasæ non parum gloriatus fuit. Isti sodales cum quadam nocte rescivissent, illum idem ganeum rursus intrasse, multi numero media nocte eodem venerunt, & invito lenone, accensis candelis, sodalem suum, cum pulcherrima ista amasæ, quæsiyerunt, atque in cubiculum ejus irruperunt : hic, simul ac sodales in cubiculum cum lumine intrantes conspiceret, mox è lecto exsiliit, & vestes induit : paulo post etiam meretrix è lecto ad lumen protracta fuit, eamque turpi ac fœda lippitudine detentam omnes viderunt, hincque sodalem suum, qui de ignotæ hujus amasæ (quam ad lumen nunquam antea viderat) pulchritudine sæpe locutus fuerat, plenis cachinnis irriserunt. Ille, qui hoc in ea vitium antea ignoraverat, cum admotâ candelâ meretricem accuratius adspiceret, abominabili quadam aversione percitus ac conturbatus, mox gravi ophthalmia correptus fuit, à qua ipsum vix mensis spatio liberare potui. Satis autem liquet, juvenem illum per solam conturbationem, non verò per contagium, lippitudinem illam contraxisse, utpote quod contagium alioqui ante multas noctes ipsi in isto concubitu communicatum fuisset.

In oculis considerandæ veniunt duplices *Oculorum duplices partes.* partes : aliæ illos continentes : aliæ illos constituentes.

Continentes partes variæ sunt : orbitæ oculorum, palpebræ cum ciliis & superciliis, carunculæ in angulis, & glandulæ.

Constituentes partes sunt, adeps, vasa, muscoli, tunica, & humores.

## C A P U T XIV.

Vide Tabulam XIV.

### De Partibus oculos continentibus.

*Orbita.*



Nter oculorum Domicilia, iis ad tutelam & commoditatem concessa, primo considerandæ veniunt duæ magnæ cavitates, quas **Orbitas** vulgò nominant, utrimque ad nasi latera, sub fronte, ossibus cranii insculptæ, quibus oculos contineri voluit Altissimus Conditor, ut in his offeis sedibus ab externis injuriis tutiores consisterent. Ipsa autem ossa oculis, vel impendentia, vel subjecta, Græcis *ὀφθαλμια, καὶ υποφθαλμια*, quasi dicas *subocularia*, vocantur.

*Figura & amplitudo.*

Figura orbitalum rotunda ac nonnihil oblonga est : amplitudo verò mediocris, ut oculi in iis, cum suis glandulis, pingue-

dine, & musculis, commode contineri, ac libere moveri possint.

Investiuntur interior pericranio (hoc, contra autopsiam, iis denegat Riolanus, *animadvert. in Bartholin.*) cui adeps musculorumque principia firmiter adnascuntur.

In singulis tria sunt foramina : duo posteriora, eaque maxima, & unum laterale minus. Posteriorum interior rotundum nervo optico transitum præbet. Exterior verò ei à latere adstans, est fissura oblonga, per quam nervus motorius, cum arteriis & venis, ad oculum progreditur. Laterale foramen, quod minus, in angulo interno situm est. Hoc sub osse cribriformi ad nasi interiora

*Foramina.*

interiora pertunditur, atque inde lachrymas transmittit, unde vulgò **Foramen lachrymale** appellatur. De hoc foramine notat Spigelius, quod in foeminis, iisque qui faciles sunt ad lachrymas, majus sit quam in maribus, & iis qui rarius ac difficulter ad lachrymas moventur.

*Caruncula glandulosa.* Ut autem lachrymæ per hæc foramina lachrymalia continue non effluerent, summus Opifex utrique carunculam glandulosam & mollem imposuit, exiguis vasculis sanguineis & nervulis pene invisibilibus donatam; duobus insuper vasculis lympham evehentibus (hæc in bove conspectiora sunt, in homine visum effugiunt) ab interiore glandosæ carnis parte exeuntibus, & humorem ad oculi continuam humectationem sensim effluentibus, præditam. Hæc glandosa caro lachrymale foramen tegit (hinc nonnullis appellatur **Caruncula lachrymalis**) sicque liquoris interni continuum effluvium prohibet, quousque ob nimiam ejus copiam nonnihil retrocedere, & sic isti liquori, id est, lachrymis, transitum præbere cogatur. Hac carunculâ ab aëre frigido nimis contractâ, aut ab acri humore erosâ, vel exulceratâ, dictum foramen non satis exacte occluditur, sicque lachrymarum eruptio non impeditur, unde tunc involuntarius & continuus fit earum profluxus.

*Signum luis Venereæ.* Tandem inter oculi bulbum palpebris tectum & superciliarum infernam, ac genarum supernam regionem, duæ cavitates semilunares considerandæ veniunt, quarum superior Græcis *κρίλον*, Latinis *Oculi cavum*; inferior verò *σπινδρίλον*, *subcavum*, dicitur. Hæc utraque cavitas in vigiliis & ophthalmiis, sed frequentius in cachexia pituitosa & hydrope, intumescere solet, lividumque colorem contrahere. Hunc colorem, si pallidus, & cum insigni splendore fuerit, certissimum morbi Gallici signum esse, asserit Spigelius.

*Palpebra.* His orbitis seu robustis specubus contenti oculi, majoris tutelæ gratia **Palpebris**, tanquam velaminibus, conteguntur, quibus pulveres molestique fumi atque vapores ab iis excluduntur, nimiumque lumen, & aëris injuriæ avertuntur, & ad majorem claritatem, cornea humectatur, abstergetur, ac depuratur.

Palpebræ autem denominationem habere videntur à *palpando*, quod dum videmus frequenter palpitent, & sursum deorsumque moveantur. Græcis *βλέψω* vocantur, *ὅσα πὲρ βλέπειν*, à *videndo*: vel quia sunt *βλέπων* & *φάσμα*, *visu tunica*, seu *opercula*. Nonnullis *ὀμματαίφοντα*, *oculi folia*, dicuntur.

*Carum membrana.* Constant exterius cute tenella, cui nulla substernitur pinguedo: interius pericranio

tenuissimo ac læuissimo, ad faciliorem motum, succinguntur. Has partes media intercedit membrana carnosæ, quæ hic valde tenuis est.

Arteriarum minimos ramulos à carotidibus recipiunt, minimasque venulas ad jugulares emittunt: nervulis verò à secundo pari donantur.

Sunt autem singulis oculis numero duæ. *Vasa.* Una inferior & minor, *κρίλον καὶ ἀνάκριλον* Polluci vocata, cujus in homine minor est motus: hæc in avibus superiore major existit, atque in plerisque sola fere moveri videtur. Altera superior, Græcis *κρίλις* dicta, motu celerissimo prædita, ipsi concessio à duobus musculis. *Musculi.* Quorum primus, qui rectus, in superiore orbitæ regione situs, intra oculi thalamum, supra juxtaque elevatorem oculi, circa nervi optici foramen, tenui cartilagineoque principio exortus, lato ac subtili tendine in palpebræ marginem expanditur, eamque attollendo, oculum aperit. Alter, orbicularis dictus, inter membranam carnosam & eam quæ à pericranio educitur, situs est. Hic à plerisque Anatomicis pro uno musculo, oculum orbicularim ambiente (unde ei nomen impositum) describitur, qui circiter digitum latus, oritur in angulo majore, ad nasi radicem, & hinc sub inferiore palpebra procedit, ac per canthum exteriorem orbicularibus fibris recurrit, & supra palpebram superiorem ad eundem canthi interioris locum redit, ibique definit, ac palpebras contrahendo claudit. Verum Spigelius & Riolanus melius tradunt, hunc orbicularem non unum, sed geminum esse musculum, quoniam in valde musculosis communiter duo tenues musculi semicirculares observantur: quorum superior & major, in superiore palpebra situs, & acuto principio ex interiore oculi angulo, & supercilii parte naso proxima exortus, sicque versus externum angulum transversim delatus, in eumque insertus, occupat totum illud spatium, quod interjacet inter supercilium & extremum cartilaginis è quo pili erumpunt. Inferior verò & minor, à nasi latere principio acuto enatus, ac per inferiorem palpebram transversim delatus, atque ad externum angulum nonnihil sursum conscendens, in palpebram superiorem lato fine inseritur. Atque ita hi singuli musculi suam insertionem & distincta principia habent, tametsi fibræ eorum circulares se invicem contingant, adeoque sibi mutuo cohæreant, ut rudiore intuitu earum exacta quædam continuatio esse, sicque hi duo unum musculum constituere videantur, quamvis duos esse, non solum per accuratam separationem & demonstrationem, verum ex eo quoque pateat, quod singuli distinctos nervos à distinctis locis, accipiant; superior scilicet nervulum ab eo motorio

Ddd

motorio qui per foramen supernæ orbitæ erumpit: inferior verò nervulum ab illo, qui per foramen infernæ orbitæ partis producit: & illud ipsum ex eo etiam liqueat, quod Medici observaverint in faciei spasmocynico, sæpe inferiorem palpebram immobilem, ac veluti convulsam & deorsum detractam subsistere, dum interea superior naturaliter movetur: quod fieri non posset, si utraque ab uno musculo moveretur.

Musculus  
ciliaris.

His dictis musculis addunt nonnulli musculum ciliarem exilem, qui cilia palpebrarum cingens, ad earum exquisitam commissionem, concurrat: hunc tamen musculum nemo facile demonstrabit, atque hinc nonnulli merito dubitant, an talis musculus ibi extet.

Qualis sit  
motus.

De motu palpebrarum dissensus aliquis est inter Aristotelem & Galenum, dum ille motum ejus naturalem, hic voluntarium esse dicit. Ille simpliciter erravit, propter ignoratos earum musculos: hic musculos cognoscens, merito voluntarium motum iis adscribit, cujus organa sunt muscoli. Julius Casserius, de ocul. fabric. sect. 3. cap. 19. considerans tenuissimos esse palpebrarum musculos, eosque, etsi maxime tenellos, à continuo tamen motu non delassari, palpebrarum quidem motum voluntarium esse concedit, sed tamen à communi voluntario motu nonnihil diversum: quasi putet, eas ex parte etiam motu naturali moveri, aut earum motum esse mixtum ex naturali & animali: verum si pensius considerasset levitatem ponderis palpebrarum, istos tenues musculos ad motum voluntarium in iis perficiendum sufficientes esse, satis intellexisset.

Indicationes  
ex palpe-  
bris.

Julius Casserius, sect. 1. de organ. visus, cap. 18. ex palpebris has indicationes desumit: scilicet dicit, eos qui palpebram superiorem elatam habent, esse superbos ac feroces: qui verò eandem depressam habent, dimidium fere oculum claudentem, ita ut aliquo modo terram adspicere videantur, illos esse humiles & mites. Ex palpebris verò in somno male commissis, pessimum prognosticum desumit Hippocrates, lib. 1. prognost. cap. 2. Considera, inquit, & qua in oculis subapparent per somnos. Si enim ex albo quid apparuerit, palpebris non commissis (si id non ex alvi profluvio, aut medicamenti potione fuerit, aut agrotus ita dormire consueverit) malum signum, & valde lethale.

Canthi.

Palpebræ apertæ duos angulos efformant, quos communiter Canthos, Græci τῶν ὀφθαλμῶν κανθὸς, nominant.

Externus.

Horum externus minor est, eique intra oculi orbitam glandula adjacet insignis, quam innominatam vocant, quæ in superiore istius anguli regione sita est, crassior supe-

rius, tenuis inferius, quasi in lobulos quosdam eleganter divisa, & inter istos lobulos vascula lymphatica tenuissima emittens, quæ inde intra palpebrarum interiorem tunicam pergentia, exiguis eandem foraminibus, brevi à ciliis distantia, pertundunt. Hæc vascula primus detexit oculatissimus Nicolaus Stenonis, in capite ovillo & vitulino (in humano oculo rem eodem modo se habere verosimile est, licet in eo propter parvitatem visus acies hæc omnia tam exacte discernere nequeat) observat. de gland. oculor. quo loco etiam modum inveniendi adscribit: In conspectum, inquit, facile protrahuntur prædictorum fluminum ostia, modo universam in exteriori angulo palpebram tantillum extenderis: mox enim ad medii pollicis ab exteriori limbo recessum, in ipso angulo tria, infra quatuor, supra sex, interdum & septem patebunt: per qua immissa sine sectione seta, facile in ipsam quoque glandulam transitus offendit. Hæc superior mihi annus vasa detexit, cum eruti ex orbita ovilli oculi palpebram, exterioribus tunicis nudatam, candela lumini exponerem, an pellucida esset exploraturus: mox enim splendentes lymphæ rivuli suo se indicio prodiderunt.

Internus canthus major est (hic Græcis peculiari propriaque voce ἰγκανθὸς appellatur, & Hesychio πηγή, fons, dicitur, quod inde lachrymæ, quasi ex fonte, scaturire videantur) in quo caruncula glandulosa antedicta (quæ vera glandula, aliis paulo densior, esse videtur) foramini lachrymali incumbit. De hac ante diximus, quod cum ab acrium humorum affluxu, vel ab acri pure, eroditur, tunc fiat involuntarius lachrymarum profluvius. Sic generatur affectus ille quem Medici Fistulam lachrymalem, Græci αἰγύλατον vocant.

Canthus in-  
ternus.

In oculo bubulo, præter istam carunculam particula quædam callosa & duriuscula, versus oculum planè lævis, exteriori parte aliquantulum aspera, in interno angulo reperitur, membranæ, qua nictant, motum faciliorem præbens.

Usus utriusque glandulæ est, serosum lymphaticum humorem, ex sanguine arterioso separatum, per tenuissimos lymphaticos tubulos, oculis affundere, ad continuam eorum humectationem, cornæ tunicæ absterisionem, & palpebrarum motum faciliorem.

Usus glandularum.

Extremis palpebrarum cartilagineis parvæ molliusculæ inducuntur, quas πτερύγες Græci, Cilia Latini vocant, ad palpebrarum stabilem expansionem, exactamque commissionem. Harum superior multo latior est inferiore.

Cilia.

In hisce limbis cartilagineis, circa majorem angulum, obvia sunt in utroque oculo duo exilia foramina, Puncta lachrymalia nuncupata, immixtam setam intra palpebra-

Puncta la-  
chrymalia.

palpebrarum membranas admittentia, quæ in bobus aliisque magnis animalibus magis, quam in homine, sunt conspicua. Hæc prope foramen lachrymale in unum ductum cœunt, qui versus anteriora excurrunt, circa narium extremitatem manifesto foramine aperitur, per quod tenuis ille liquor, qui nonnullis hominibus insciis, frigido præcipue tempore, e naribus extillat, deferri videtur. Per puncta autem lachrymalia nonnunquam paucillum lymphatici liquoris, e glandulis expressi, insciis & invitis, quali lachrymarum specie, sine ullo animi motu effluit, unde nomina ipsis imposita videntur, quamvis illi non sint veri lachrymarum fontes, ut docebimus sequente capite.

Pili cilio-  
rum.

Palpebrarum extremis, seu tarsis simplicibus ac uno ordine inserti sunt pili recti, nonnihil sursum reflexi, βλεφαρίδες Hippocrati dicti (hos Casserius, alique nonnulli specificè cilia vocant) qui ad definitam longitudinem excreverunt, quam ex Naturæ lege non excedunt. Semper autem nigri sunt, nec cum reliquis corporis pilis canescunt: ad hæc nunquam (notante Galeno, lib. 11. de usu part.) defluunt, nisi in magnis partis affectibus, ut in elephantiasis, & lue Venerea: Aristoteles tamen, problem. 19. sect. 4. hos etiam in salacibus & Venereis hominibus defluere scripsit: quod ipsum repetit, 3. histor. anim. cap. 11.

His volitantia per aërem corpuscula ab oculis arcentur, & visus, inductis leviter tenebris, perfectior redditur: iis autem quacunque de causa sublatis, remotiora exacte non internoscuntur; versus interiora

verò converfis, gravis molestia oculis, cum visus incommodo, infertur.

In bobus, præter palpebras, alia adhuc membrana sub palpebris adest, qua homines & pleraque bruta carent, peculiarem motum voluntarium agnoscens. Duplici enim chorda ad oppositum angulum ducitur, altera superius, altera inferius latente, quæ à musculo quodam oritur in exteriore angulo collocato, qui musculus à Fallopio pro parte illius, qui totum oculum ad exteriora trahit, recensetur. Hujus membranae beneficio boves nictitant, & oculum claudere possunt palpebra aperta manente, quando metuunt ne quid in oculum incidat.

Majoris adhuc tutelæ gratia, superius ad oculorum frontisque confinia, Supercilia constituta sunt, crassiore cute, instar arcus, prominula, pilisque pressulis, versus exteriora decumbentibus, hirsuta; sudores, pulveres, & alia quæ à capite defluunt, excipientia; ne in oculos delabantur.

Hæc supercilia, ὀφρύες Græcis dicta; Rufus appellat hirsutas frontis extremitates: eorumque pars nasum respiciens ὀφύων κεφαλή, superciliorum caput: tempora verò respiciens ὀφύων ἄρα, superciliorum cauda vulgo nominatur. Medium interstitium inter utrumque supercilium, Græcis μεσσοφρύον, Latinis verò, quia glabrum, seu pilis expers est, glabella dicitur, quamvis nonnunquam hirsutum quoque inveniat, superciliis ad extremitatem nasi simul cœuntibus: quod Aristoteles, lib. 1. hist. anim. cap. 9. scribit esse signum hominis στυφνός, austeri & aterbi, & tunc eidem talis homo στυφνός vocatur.

## CAPUT XV.

## DE LACHRYMIS.

Digressio.



Quandoquidem præcedente capite mentio facta est viarum per quas lachrymæ defluunt, ipsæ verò lachrymæ, cum autentico suo fonte, hæcenus à Philosophis admodum obscurè sunt descriptæ, haud inutile me facturum arbitror, si, levi digressionem extra metam facta, hisce exercitiis anatomicis exactiorem earum historiam inferuero, ut unde illæ guttæ serosæ ex oculis decidunt, & quid sint, clarè intescere possit.

De lachrymarum origine, causis, & materia, variæ sunt opiniones.

Sententia  
1.

Empedocles, teste Galeno, credidit lachrymas fieri ex attenuato & eliquato sanguine. Verum cum multi homines citissime, imo varii ad lubitum lachrymari pos-

sint, non est verosimile sanguinem tam cito colliquefcere posse.

Jo. Bapt. Scottias, de nat. & increm. Nili, lib. 2. cap. 11. vult lachrymas gigni in oculi angulo, ab animali spiritu, qui sensu rei tristici compressus, liquatur, & in aquam destillat. Idem etiam sentire videtur Jacobus Tappius, utpote qui scribit, sicut urina & sudor sunt excrementa venosi & arteriosi sanguinis; ita lachrymas esse excrementum sanguinis nervosi, id est, spirituum animalium. Verum cum per angustissimos nervorum poros soli tantum invisibiles animales spiritus; nulli verò visibiles serosi humores transire possint; cum lachrymæ quoque in magno gaudio & risu nonnunquam profluant, sine ullius rei tristici sensu: cum denique ingens lachrymarum

D d d 1

rum copia, qualis in magna tristitia interdum brevi tempore effluit, totum hominem protinus prosterneret, si tam enormis spirituum animalium copia in earum confectione consumeretur; satis liquet illam opinionem, nec subsistere, nec defendi posse, sed à veritate alienissimam esse.

3. Georgius Nyssenius, *lib. de hom. opific. cap. 12.* & Moletius, *lib. de struct. hom.* putarunt lachrymas generari ex multis vaporibus, per viscerum aliquam conturbationem ad caput delatis, ibique, ob cerebrum frigidius, in aquam densatis, quæ mox, ut inutile excrementum, foras expellitur. Ab horum opinione non longe distare videtur Coringius, *lib. de ferment.* Verum cum multis, re tristi visa, illico lachrymæ profluant copiosæ, nulla præcedente viscerum conturbatione; imò cum ab aëris frigidi sola obverberatione, ut in iis qui equis velociter currentibus insident; vel à repentino Solis adpectu, lachrymæ sine mentis viscerumve conturbatione fundantur: cum nonnulli ad voluntatem lachryment: cum vapores tam citò ad caput ascendere, in eoque tam repente & copiosi condensari nequeant: cum occupato & conturbato in magna tristitia corde, una cum cerebro aliisque visceribus, sæpe nullæ fluant lachrymæ: cum in risu & gaudio æque atque in tristitia, illachrymatio fieri possit, vapores tamen in his contrariis animi affectibus æquali modo, quantitate, & velocia ad caput ferri nequeant, satis patet hanc non esse veram lachrymarum originem.

4. Aristoteles, *in problem.* scribit, lachrymas esse sudorem, seu vaporem quendam. Qualis autem sit sudor, & in qua parte genitus, hoc latius explicat Cartesius, *part. 2. de pass. anim. artic. 128.* his verbis. *Ut verò bene intelligatur, inquit, earum origo, observandum est; quod etsi continuo multi vapores prodeant ex omnibus corporis nostri partibus, nulla tamen sit ex qua plures egrediuntur, quam ex oculis, propter magnitudinem nervorum opticorum, & multitudinem parvarum arteriarum, per quas eo veniunt.* Verum hæc paulo attentius sunt examinanda.

Cartesius dicit nullam esse partem ex qua plures egrediuntur vapores, quam ex oculis. An igitur ex parvis illis partibus, quas, præter alias membranas, investit & circumdat tunica sclerotica dura & crassa, adeoque firma, densa, ac parum porosa, ut sui similem non habeat in toto corpore; an ex illis, inquam, poterunt egredi plures vapores, quam ex ulla alia parte, inter quas mille sunt decuplo calidiores, humidiores, & porosiores? An propter magnitudinem nervorum opticorum tot vapores in oculum confluent, & interim visus non obscurabitur, spirituumque animalium ingressus

non impediatur? Per eorum interiores majores porositates quicquid influet, deponetur in bulbi cavitatem anteriorem inter humores, atque hinc certe non possent non intumescere oculorum bulbi, visusque plurimum lædi. Quantum ad multitudinem arteriolarum, illa non major animadvertitur in oculis, quam in multis aliis partibus: arteriolæ enim paucae ad oculos decurrunt, eæque adeo tenues, ut pleræque visum subterfugiant, atque hinc ex illis fere invisibilibus vasculis tantum serosi humoris effundi nequit, quo interdum per lachrymas unius horæ spatio integra mappa madefieri possit. Si quis roget, quare ille vapor non continuè & semper procedat, ac lachrymas generet? Respondet Cartesius, *sequente artic. 122. vapores corporis solummodo mutari & condensari in aquam, cum aut minus solita agitantur, etsi non sint copiosi; aut cum multo copiosiores sunt, modo insuper non magis agitentur.* Jam mihi dicat clarissimus Vir, an in eodem homine, cui primo præ tristitia, & paulo post præ lætitia lachrymæ profluunt, sit minor vaporum motus, an verò major copia. Si dicat, in tristitia eorum fieri minorem motum, ego dicam in gaudio non esse majorem copiam, quia hi affectus brevissimo intervallo tunc contingunt in eodem homine, cum tamen in lætitia tunc à majore copia fieri deberet, nam à majore motu, qui in gaudio contingit, id fieri non posse, ipsemet docet. Si contra in tristitia dicat esse minorem eorum copiam, ego dicam in lætitia esse majorem motum, qui (secundum Cartesii verba) lachrymas profundi impedit; & interim tamen vaporum non esse majorem copiam, utpote quæ in eodem homine tam subito augeri nequit. Et tamen idem ille homo, tempore non multum distante, in hoc utroque contrario animi affectu lachrymas profundit, ergo non ab illis causis modo relatis. Has difficultates eminens prospiciens Cartesius, maluit *sequent. artic. 130. & 131.* etiam alias hujus rei causas adjungere. Porro, inquit, *non nisi duas causas observare possum, quæ faciant ut vapores, qui ex oculis prodeunt, mutantur in lachrymas. Prima est, cum figura pororum, per quos transeunt, immutatur, ex quocunque accidente, &c. Altera est tristitia, quam sequitur amor, & lætitia, &c.* An igitur eadem erit pororum figura in contrariis istis affectibus, tristitia, amore, lætitia? addo, in risu, veloci equitatione, pulvere aliave re in oculos incidente? item in infantibus, adultis, & senibus? An verò mavult Cartesius distinguere inter causas proximas, ut alia sit certa figura pororum, alia sit tristitia, alia sit amor, &c.? Hæc profectò nimium sibi invicem repugnant, nam tali modo una lachrymarum causa proxima dividitur in varias, easque sibi invicem contra-

contrarias. Qui hæc penitus considerabit, facile animadvertet clarissimum acutissimumque Cartesium in descriptione historiarum lachrymarum, una cum aliis, admodum hæsitasse, & longe à scopo aberrasse: quod tamen primario nostri seculi Philosopho non est vitio vertendum, cum nemo adeo perspicax esse possit, qui non aliqua in re hallucinetur.

5. A prædicta sententia multum dissentiunt Aquapendens & Julius Casserius Placentinus, qui tradunt lachrymas esse tenue excrementum ipsorum oculorum, ex coctionis propriæ reliquiis genitum, in pinguedine & glandulis collectum. Cum his consentit Septalius, 1. *comm. ad sect. 3. problem. Arist. 24.* scribens, lachrymas esse serosum humorem assidue in oculis generatum, & in quatuor eorum glandulis collectum. Verum nec oculi tantum excrementi deponunt, aut serosi humoris generant; nec tanta ejus copia in exiguis glandulis, vix octo vel decem guttas capientibus, & in pauca pinguedine (hæc, ratione suæ oleositatis, nihil feri imbibit, vel capit) colligi potest, quæ sæpe parvo temporis spatio integras mappas lachrymatione madefacere possit: nec talis copiarum collectio sine visibili & magno tumore, visusque summo incommodo, in glandulis & pinguedine fieri posset; cum tamen ante lachrymarum profusionem nulla glandularum aut pinguedinis intumescencia percipiatur. Præterea nulla ratio est, quare illud excrementum in dolore & repentina tristitia tam subito generaretur, aut tanta copia colligeretur, ac per lachrymas erumperet.

6. Fuere nonnulli, qui existimaverunt lachrymas esse portionem potulenti humoris, in cerebro & venis oculorum, ac præsertim venis angulorum cujusque oculi, contentam, quæ per istarum venarum, aut compressionem, aut dilatationem, gaudio multo, vel mœrore factam, foras erumpit. Verum repugnant dictarum venularum, visum fere effugientium angustia & paucitas, ipsiusque humoris lachrymalis ingens copia, quæ nec in tenuissimis vasculis tanta colligi, ex iisque tam largiter subito profluere; nec aliunde tam citò ad ea transmitti, per eaque transire posset. Adde, quod oculorum venulæ superfluos sanguineos humores extremitatibus suis assumant, & ad jugulares deferant, nullos verò ex sese effundant: quod etiam nulla via sit per quam potulenta materia ad oculos pervenire possit.

7. A præcedentibus non multum distant illi qui existimant lachrymas nihil aliud esse quam serum quod è sanguine ad caput delato separatur, cum à certo spirituum motu pori ita disponuntur, ut illud effluere queat. Sed illi neque pororum istam dispositionem, neque certum illum spirituum motum ex-

plicant: quæ duo cum admodum diversa & multifaria sint, nec eodem modo se habere possint in constrictione & dilatatione, in tristitia & gaudio, in quibus tamen contrariis casibus lachrymæ profluere debent ab una eademque causa proxima, non verò à diversis & contrariis, nihil superest quod istam opinionem defendere possit.

8. Hodie multi lachrymarum proventum solis vasis lymphaticis ad oculos delatis adscribunt. Sed neque istum modum lachrymationis, neque illa ipsa vasa quisquam, quod scio, hæcenus demonstravit, præter Nicolaum Stenonis, adenographum accuratissimum; qui jam nuper dictam sententiam latius explicaturus, *lib. observat. de gland. oculor.* non male statuit, lachrymas esse serosum liquorem, è sanguine arterioso maxime separatum; sed de modo & loco separationis habet peculiarem sententiam, à nemine ante illum propositam. Quippe putat sanguinem per arterias ferri in glandulas oculorum, ejusque superfluitatem à venis absorberi. Venas verò, si aliqua de causa constringantur, officio isto non sufficienter fungi, tuncque propter magis diuturnam sanguinis copiosioris moram in glandulis, serum copiosius ex eo separari, & specie lachrymarum per vascula lymphatica è glandulis prodeuntia (horum etiam præclaram demonstrationem adscribit) effluere. Constringi autem existimat venas ab intumescencia glandularum, inducta per copiosorem influxum spirituum animalium, quos per exiles nervulos glandulis insertos, pro mentis arbitrio, modo plures, modò pauciores, ut in dolore, ira, gaudio, tristitia, &c. in glandulas influere, easque diversimode movere, & magis minuscule angustare, tradit. Ad hanc causam quoque refert lachrymas involuntarias, ut & eas quæ à fumis acrisque halitibus, aut in valido corporis motu erumpunt; suamque opinionem plurimum probari credit, per lachrymas sanguineas, quæ nonnunquam observatæ dicuntur. Certè hæc nova sententia admodum speciose proponitur, sed interim lachrymarum fontem non satis detegit. Si enim magnam copiam lachrymarum citissime profluentium comparemus cum minimis sanguiferis istarum glandularum vasculis, mox in ipso vestibulo concidet illa sententia: quam paucæ enim & quantillæ sunt illæ arteriolæ quæ ad glandulas oculorum feruntur? pleræque invisibiles existunt. Proinde, licet tempore tristitiæ omnes istarum glandularum venæ, sanguinem relaturæ, penitus essent obstructæ, & omnes earum arteriolæ per continui solutionem apertæ, ex hisque non modo serosa sanguinis pars, verum etiam totus quantus est qui per eas vehitur sanguis efflueret, ne integra quidem hora centesimam partem



tantæ copię liquoris profundere possent, quanta sæpe unius semiquadrantis horæ spatio in magna tristitia per lachrymas effunditur. Si reponatur: tempore tristitiæ sanguinem copiosorem ad oculos ferri, & dictas glandulas etiam magis intumescere ac premi, venasque angustari: illius contrarium docebit ratio. Nam in tristitia cordis artierumque pulsus est parvus & contractus, exterioresque partes frigesunt, quia cor multo minus sanguinis à se propellit in arterias quascunque, ergo etiam in arterias capitis: neque ulla ratio est quare in tristitia copiosior & serosior ad oculorum glandulas ferretur, quam ad alias partes. Ad hæc, glandularum istarum arteriolæ sunt nimis paucæ & angustæ, quam ut tanta sanguinis aut feri copia tam brevi tempore per eas transire posset (ut modo dictum) quanta sæpe per lachrymas citissime profunditur. Denique, nihil est quod in tristitia glandulas istas magis intumescere aut premi faciat, quam aliis temporibus. Nam quantum ad spiritus animales, quos N. Stenonis dicit, pro mentis imperio, modo pauciores, modo copiosiores, in tristitia, dolore, ira, gaudio, &c. influere, glandulasque diversimode movere: illos quidem concedimus per minimos, paucos, & plerumque invisibiles nervulos in illas pauca quantitate influere, ut subsalsum lymphaticum liquorem ex sanguine arterioso modice separent (super hac re videndum *precedens cap. 11.*) eumque ad oculorum necessariam humectationem ac lævigationem per vascula præcedente capite descripta, effundant: sed non tanta copia (nervi enim isti sunt nimis pauci & exiles) ut glandulas moveant, & citissime intumescere faciant, aut comprimant, sicque copiosissimas lachrymas exprimant: per influxum enim istorum spirituum vix ullæ aliæ partes ad mentis arbitrium moventur quam muscoli, & quæ moventur à musculis. Accedit: quod in tristitia spiritus animales solito pauciores ad quascunque partes influant, unde artus sæpe tremunt, & oculorum visus obscuratur: nam corde se contrahente, ac debiliter pulsante (ut fit in tristitia) parum sanguinis ad eorum generationem versus cerebrum propellitur, & simul ipse cerebri motus hinc debilitatus, pauciores spiritus animales ad partes expellit. Denique, posito, verum esse quod præclarus Vir statuit, tamen eo non stabilitur, sed evertitur ejus sententia. Nam inde sequitur, quo copiosiores in istas glandulas influunt spiritus animales, eo majorem futuram earum intumescentiam, venarumque compressionem & angustationem, atque hinc copiosorem lachrymarum profusionem: at in gaudio dicti spiritus copiosissimi influunt in partes, & tamen in eo rarius profluunt lachrymæ,

eæque, si prorumpant, erunt perpaucae; contra, in tristitia multo pauciores influunt spiritus, unde minor deberet fieri intumescencia ac pressio, & tamen lachrymæ fluunt copiosissimæ. Ultimo: si objiciatur, salivalem liquorem satis copiosum ex arteriis per glandulas separari posse (hoc etiam nos docemus *sequente cap. 24.*) ergo etiam lachrymalem. Respondeo; parotides fauciumque glandulas esse insigniter magnas, & valde copiosas, multisque arteriis, insignioribus præditas, ac proinde per eas facile talem copiosam separationem fieri posse (quod enim non possunt singula, multa juvant) qualis per exiles & paucissimas oculorum glandulas, paucis & fere invisibilibus arteriis præditas, fieri nequit. Qui igitur hæc pensius considerabit, facile animadvertet, Nicolai Stenonis opinionem non continere veram lachrymarum causam, nec ab ea etiam deduci posse lachrymas involuntarias, aut eas quæ à veloci cursu, fumo, pulvere, &c. excitantur, ut nec sanguineas, quæ potius ab erosione arteriolarum aut venularum procedunt, & ratione angustię vasculorum, non nisi perpaucae esse possunt.

Atque ita circum hujus lymphæ fontem multi clarissimi viri oberrant, eumque detegere volentes, multas chartas conjecturis repleverunt. Jam nobis quoque periculum faciendum, an in hac obscura re aliquid luminis conferre possimus.

Hoc tamen antequam auspicemur, distinguendum censemus inter humorem lachrymalem, & istum lymphaticum humorem qui è glandulis ad oculorum humectationem ac lævigationem continue per tenuissima lymphatica vascula effunditur. Differunt enim: 1. Quod hic lymphidus, multoque tenuior sit altero. 2. Quod hic è lymphaticis glandularum vasculis, ille ex cerebri ventriculis profluat. 3. Quod hic minus acris sit, neque tantam salsedinem obtineat, quantam lachrymis inesse gustu & erosione percipitur. 4. Quod paucus sit, nec oculos nimia copia offendant, sicut lachrymæ, quæ sæpe enormi copia profluunt, magnum incommodum oculis adferunt. 5. Quod hic non erodat quidquam, sed gratus sit oculis, cum contra lachrymæ multoties genas erodant, & sæpe ipsas quoque glandulosas carunculas lachrymales, in angulis sitas, plane absumant, quibus cum suis vasculis omnino absumptis, lachrymarum effluxus desineret, vel sisteretur, si vera foret antedicta Stenonis sententia; cum è contra tunc involuntarius, multoque copiosior sit, neque inhiberi possit.

Præmissa hac distinctione, nunc ad lachrymarum historiam accedimus, incipiendo ab earum definitione.

Lachry-

*Distinctio  
inter la-  
chrymas &  
lympham.*

Lachrymæ sunt pituitosi humoris, in cerebro collecti, tenuiores ac serosiores particulæ, ex oculorum antris effluentes.

Causæ serosas istas particulas per lachrymalia foramina expellentes, sunt quinque.

1. Pituitosorum serosorum humorum in cerebro collectorum copia.

2. Eorundem subita colliquatio, aut valida agitatio.

3. Cerebri & membranarum ejus contractio.

4. Foraminis lachrymalis à caruncula glandulosa non satis exacta contactio.

5. Ossium spongiosorum in naribus obstructio.

Harum causarum plerumque duæ tresve concurrunt, ut in sequentibus patebit, singulatim igitur explicandum, quomodo in diversis casibus lachrymæ profluant.

*Lachryma  
in tristitia.*

In tristitia membranz cerebri, una cum ipso cerebro contrahuntur, atque hinc serosi sanguinis arteriosi humores (qui ab humido viscosoque viscere aliquam viscositatem nanciscuntur) ex glandulis corticis, atque ipsa cerebri substantia (copiosus enim sanguis arteriosus in ejus vascula & poros influit, ut dictum *cap. 5.*) & glandula pituitaria, atque exiguis glandulis plexui choroidi interjectis, in ventriculos copiosi exprimuntur, atque ex his simul etiam per processus papillares & ossium cribriformium angustias, in narium interiorum fungosas partes copiosi illabuntur: qui cum illas, ob copiam & visciditatem, non satis citò permeare queant, tenuiores & serosiores particulæ per angusta lateralia lachrymalia foramina erumpunt in oculorum angulos majores, totosque oculos proluentes, ac foras effluentes, lachrymas constituunt. Crassiores verò & viscidiores particulæ, obstructionem in fungosis narium superiorum ossibus facientes, paulatim, tum per nares, tum per paulatim, evacuantur; & quo magis sic imminuitur illa narium obstructio, eo magis minuitur lachrymarum proventus: eâ enim sublata, tenuiores ac serosiores humores recta descendunt ad palatum & nares, neque necesse est ut tunc, propter impeditam viam, per lachrymalia foramina exprimantur, sicque tunc definit lachrymarum effluxus, usque dum ob novam humoris descendentis copiam, nova ibi generetur obstructio.

*In gravedine,  
& ster-  
matione.*

Ob eandem illam obstructionem sæpius quoque in gravedine lachrymæ profluunt, atque etiam nonnunquam in majore stermatione.

*In risu.*

Quæ in magno risu fit illachrymatio, eandem rationem habet, nam ab illa alternata muscutorum capitis, & simul etiam

cerebri membranarumque ejus contractione, copiosi exprimuntur è cerebro & glandulis antedictis in ventriculos, atque ex his in processus papillares, serosi prædicti humores, qui ad nares & palatum defluunt (hinc fortiter ridentes spumofum mucum è naribus & ore excutiant, eoque in fauces & asperam arteriam delabente, non rarò simul tussiant) & crassioribus particulis in narium fungositate obstructionem, seu transitus angustiam faciunt; unde tunc particulæ tenuiores ac serosiores, ob impeditum liberum descensum, per lachrymalia foramina expressi & erumpentes, ex oculis defluunt, idque eo facilius, quo foramina illa ab impositis glandulosis carunculis minus exacte occluduntur: iis quippe satis firmiter occlusis (ut fit in plurimis quibus carunculæ istæ validæ, nec ullo modo contractæ sunt) nullæ lachrymæ profluunt. Atque hinc fit, quod pro firmiore, vel laxiore illorum foraminum occlusionem, & majore minoreve pituitosi humoris in cerebro redundantis copia, alii ridentes lachrymas profundant, alii non. Et quia illa, quæ in risu contingit concussio, seu alternata contractio, non diu durat, hinc in risu lachrymæ non admodum copiosæ exprimuntur.

Eadem causa est, quod juvenes & viri animosi, quibus non facile, nec multum, ob aliquam tristitiam animus conturbatur, ac cerebrum contrahitur, & glandulosa caruncula utrique foramini lachrymali imposita major & fortior est, non facile lachryment. Contra verò senes, infantes, & pueri, facile lachryment: quia in illis glandulosa caruncula siccior, inæqualior, & magis contracta; in his verò mollior & minus firma, foramen lachrymale tam debiliter occludit, ut à minimo interni serosi humoris impulsu loco cedat, sicque isti lachrymali humori mox exitum præbeat. Cui causæ & altera plurimum adjuvans adjungitur, quod & hi, & illi admodum faciles sint ad tristitiam, ex tædio, amore, vel ira obortam, cujus ratione etiam cerebrum cum suis membranis se contrahendo, pituitosos ac serosos humores (qui in utraque illa ætate copiosi in capite redundant) facile exprimit, & per ossa cribriformia expellit. Cartesius, *de pass. anim. artic. 133*, aliam, sed minus veram, hujus rei causam profert, quippe totum hoc negotium videtur copiam sanguinis adscribere, à quo plurimi vapores ad oculos feruntur. Verum hanc opinionem paulo ante, tam in tertia, quam in septima de lachrymis sententia, satis refutavimus.

*Quare viri  
animosi non  
facile, ac  
senes & in-  
fantes facil-  
lime la-  
chryment.*

Quod nonnulli mox illachryment cum vehementius moventur, vel equis insident velociter currentibus, fit tribus de causis.

*A vehe-  
menti motu.*

1. Quia à valido motu glandulosæ carunculæ

culæ loco motæ, foramina lachrymalia non satis exactè occlusa servant: in talibus enim qui à motu facile illachrymant, carunculæ non sunt fortes & plenæ, sicut in aliis, atque hinc facile loco moventur. 2. Quia istæ carunculæ ab aëris frigidi veloci appulsu, seu molesta obverberatione, contrahuntur. 3. Quia pituitosi humores per validam agitationem facilius è capite defluunt, & plus solito per cribriformes angustias descendunt. Sic illud ipsum quoque contingit, cum à solo aëris frigore majore, imprimis repentino, contractis seu constrictis utriusque canthi glandulosis carunculis, foramina lachrymalia minus bene occluduntur, atque hinc lachrymis transitum concedunt.

*A capis,  
synapi, &  
errhinis.*

Cæpe, synapi, nec non errhina, sternutatoria, aliaque similia, lachrymas provocant, quatenus ab eorum attenuante ac incidente acrimonia, partim humores in capite attenuantur, & magis fluxiles fiunt; partim ob tædiosam molestiam ac vellicationem, ab acrimonia eorum oculis nari- busque illatam, cerebrum cum suis membranis se contrahit, sicque humores pituitosos intus contentos exprimit & expellit, qui eo facilius per foramina lachrymalia elabuntur, quia adnata oculi tunica & glandulosa caruncula foraminibus impositæ, ab eadem acrimonia vellicatæ, etiam contrahuntur, sicque humoribus descendenti- bus liber exitus conceditur.

*Ab oculi  
dolore.*

Quæ dolorem oculis inferunt, ut pulvis, festuca, fumus acris, &c. lachrymas movent, quia à dolorosa molestia ac vellicatione inducta conjunctivæ tunica maxime sensibili, contrahitur in utroque oculo, & imprimis in eo qui maxime affligitur, ei adjacens glandulosa caruncula lachrymalis, sicque foramen detegitur: contrahitur item cum suis membranis cerebrum, ob tristem istam sensationem, eaque contractione serofos ac pituitosos humores, in se suisque ventriculis contentos, exprimens, illos per processus papillares propellit versus os cribriforme & nares, quorum tunc crassiores particulae per nares, tenuiores magisque fluidæ per foramina lachrymalia effluunt.

*Unde la-  
chrymarum  
magna co-  
pia.*

Quod autem in tristitia copiosissima lachrymæ, idque nonnunquam per aliquot dies profundantur, hac de causa contingit, scilicet, quod cerebrum præ tristitia contractum refrigeretur (constrictio enim copiosum sanguinis arteriosi accessum præcludit) & concoctionem debito modo non peragat, unde ex sanguine (qui tunc, propter minimarum viarum angustias, valde serofus eò ascendit, ut fluidior existens melius transire queat) ad nutritionem ejus allato serofi humores in glanduloso hoc viscere copiosi separantur, multique crudi simul gignuntur, qui per prædictam con-

tractionem continue exprimuntur, & è ventriculis versus nares propelluntur. Animo autem de re tristi minus cogitante, atque hinc cessante illa contractione, mox desinit ista expressio & lachrymarum effluxio: at eadem intenta tristi cogitatione redeunte, mox etiam ab expressione redeunt lachrymæ. Quia autem magnum & humidum viscus copioso humidoque eget nutrimento, hinc etiam multa humidaque excrementa diu in eo generari posse certum est, quorum sæpe uberrimus proventus diu durat, ut clare patet in gravedine & catar- rhis: atque etiam manifestissime à nobis demonstratum est anno 1663. mense No- vembri, in muliere quadam à nobis pro- secta, quæ diu tristi vixerat, atque de capitis gravitate millies conquesta, & ad fletum ac copiosas lachrymas promptissima fuerat: hujus totum cerebrum adeo humi- dum invenimus, ut serum subviscidum ex ejus substantiâ manu nostra detentâ, tan- quam ex spongia aquæ imbuta, copiosum extillaret, eodemque etiam ventriculi me- diocriter repleti essent. Præterea huc ac- cedit, quod vapores à partibus corporis inferioribus copiosi ad caput delati (instar alembici enim caput corpori impositum, plurimos inferiorum partium vapores reci- pit) atque inde per poros foras discuti so- liti, propter dictam cerebri & membrana- rum ejus refrigerationem ac contractionem angustatis poris, discuti nequeant, sed incrassati, una cum aliis humoribus versus nares exprimantur, unde tunc etiam la- chrymarum copia plurimum augetur.

*Observando.*

Propter eandem cerebri malam coctio- nem fit quod lachrymæ multoties salæ & acres existant, ac genas erodant, sicut eadem de causa multoties catarri acres & falsi fiunt, qui acrimonia sua dentes ero- dunt, & fauces aliasve partes exulcerant; quia scilicet ob cruditatem salæ particulae fixiores remanserunt, nec satis dissolutæ, nec reliquis serofis particulis exactè permi- stæ sunt.

*Unde la-  
chrymarum  
salsedo.*

His ita se habentibus, jam adhuc qua- tuor dubia solvenda supersunt.

I. Unde fiat quod tristes ex fletu magnum solatium ac levamen percipiant, & qui se præ animi dolore fere præfocatos sentiunt, ac caput grave habent, illi lachrymis lar- giter effusis plurimum levantur? Causa est, quod interdum in magna tristitia cerebrum undequaque ita constringatur, ut simul meatus evacuatorii angustentur, & neque serofi pituitosique humores ex eo uspiam commode effluere, neque arteriosus san- guis commode in illud influere possit; unde tunc pauciores in eo generantur, ex eoque pauciores effluunt spiritus animales ad alias partes; ob quorum paucitatem, & simul excrementorum in cerebro detentionem,

*Quare tri-  
stes ex fletu  
levantur.*

talibus

talibus tristibus varia contingunt incommoda, caput gravatur, ratiocinatio & iudicium nonnihil torpescunt, tremunt pleræque partes, visus sæpe obscuratur, respiratio difficilis evadit, cum altis suspiriis, difficilior fit deglutitio, cordis orificia constringuntur (hujus causa supra videnda, lib. 2. cap. 7.) ita ut neque recipere, neque expellere sanguinem commode possit; hinc magna oboritur anxietas; quæ una cum aliis præfatis incommotis rursus imminuitur, magnoque levamine tristes afficiuntur, cum laxatis viis evacuatoriis, serosi pituitosique humores è cerebro largiter per oculos lachrymarum specie, & simul per nares ac palatum, seu os evacuantur, sicque liberior sanguinis arteriosi ad cerebrum accessus, & spirituum animalium uberior generatio, ac copiosior ad partes influxio conceditur.

Quare in magna tristitia lachrymæ non fluant.

II. Quare multoties contingat, ut homo in admodum magna & repentina tristitia plorare non possit, sed modo dictam potius anxietatem seu angustiam, cum capitis gravitate persentiat: ubi verò animum nonnihil collegit, tunc lachrymas satis liberaliter cum levamine profundat? Sic referunt historici, Psammenitum ad amici mortem plorasse, & caput ferisse, liberos verò ad supplicium duci, tacitum sine lachrymis spectasse. Hinc antiquum dictum: Curæ lenes loquuntur & illachrymant, ingentes stupent. Hujus rei causa est maxima illa cerebri constrictio modo dicta: quippe in præmagna consternatione homo quasi attonitus fit, & cerebrum quasi obstupescens undequaque fortius constringitur, unde humores coacti densatique in eo sistuntur. Hæc autem magna constrictio, cum æger animum recolligit, tristitiamque paulo mitius ferre incipit, statim multum imminuitur, atque hinc per evacuatorias vias, antea nimis angustatas, & tunc iterum laxatas, serosi pituitosique humores liberaliter ac cum levamine è cerebro expelluntur, lachrymæque copiosissimæ profluunt. Ex eo quoque patet, quare vinò hujusmodi valde tristibus datò, quæ antea subsistebant lachrymæ, brevi largiter

fluant: quia scilicet vinum reficit cor & cerebrum, ac animositatem facit, mœroremque lenit, & tristitiam mitigat, unde tunc simul præmagna illa cerebri constrictio nonnihil imminuitur, viæque evacuatoriæ rursus laxantur.

III. Cur plorantes acutam, ridentes verò gravem vocem edant? Hanc quaestionem etiam proponit Aristoteles, sect. 11. probl. 13. Causa est, quod plorantibus & tristibus vocalia instrumenta coarctentur & tensiora reddantur: videntibus verò laxentur ac dilatentur. Per angusta autem instrumenta impulsus aer multo acutiorem sonum producit, quam per ampla, ut liquet in angustis & amplis fistulis musicis. Angustantur autem vocalia instrumenta præ frigiditate: quia in magno mœrore cordis orificia contrahuntur, hincque parum sanguinis & caloris ex eo ad partes propellitur, unde totum corpus inhorrescit & frigidius fit.

Cur plorantium vox sit acuta.

IV. Quare solus homo inter animalia maxime lachrymas profundat? Quia solus ratione præditus luctum, tristitiam, dolorem, &c. cum magna animi attentione percipit, hincque cerebri modo dictas constrictiones, humorumque expressiones solus maxime patitur. Quantum ad crocodylos, cervos, & si quæ sint alia animalia bruta, quæ lachrymas profundere dicuntur, illorum lachrymæ paucissimæ sunt, & imprimis effluere videntur, partim ob serosi humoris in capite redundantis copiam: partim ob foraminis lachrymalis detectionem, propter carunculæ canthi majoris constrictionem, ab aere frigido, aliave quacunque de causa inductam: propter quas duas causas etiam in ipso homine interdum lachrymæ profluunt, sine ullo animi motu aut organi vitio.

Quare solus homo lachrymas.

Quantum ad finem lachrymarum, illum communiter statuunt hunc esse, ut sint affectionum animi indices, & per eas cerebrum à superfluis humiditatibus exonere-  
tur.

Lachrymarum finis.

Atque sic putamus nos veram lachrymarum genesin descripsisse, non ratione sola, verum experientia quoque confirmatam, quam quilibet in se ipso experiri potest.

## CAPUT XVI.

## De Oculorum vasis &amp; musculis.

Vide Tabulam XIV.



Culi visionis organa triplicibus partibus instructa sunt: quarum aliarum ad nutritionem, ut arteriarum & venarum: aliarum ad motum efficiendum, vel facilitandum, ut musculi, adeps, glandulæ, &

vasa lymphatica: alia ad ipsum visum faciunt, ut nervi optici, tunicæ, & humores.

Arteriarum sanguinem vitalem ad nutritionem oculorum, musculorum, glandularum, & adipis, deferentes, partim sunt  
Ecc  
externæ,

Arteria.

externæ, à carotidis ramo externo; partim internæ, ab interno ejusdem ramo plexum retiformem constituyente, procedentes.

*Vena.* Similiter etiam venæ externæ, in oculi albo spectabiles, ad jugularis externum; ut internæ nervum opticum comitantes, ad ejusdem ramum internum emittuntur.

De glandulis & vasis lymphaticis supra dictum, cap. 14.

*Musculi.* Moventur oculi humani quaquaversum beneficio sex musculorum, intra orbitæ cavitatem oculis circumstantium. Horum quatuor majores recti, motum rectum, sursum, deorsum, & ad latera: duo multo minores obliqui, motum obliquum perficiunt: quibus omnibus adeps copiosus, tum ad facilitandum motum; tum ad oculi humectationem, calefactionem, & lævigationem interponitur.

*Ortus.* Oriuntur omnes principio acuto è profunda orbitæ parte, juxta foramen per quod nervus opticus orbitam ingreditur, cujus membranæ adnascuntur, & desinunt in tendinem tenuissimum, corneæ adhærentem, in qua omnes tendines in circuitu simul juncti, tunicam quandam tendineam constituunt, vulgò **Innominatam** dictam, quæ latioris circuli instar oculo adnectitur, sed totum non ambit.

*Musculus superbus.* Rectorum primus, superior, & crassior, oculum attollit, quod quia superbis hominibus frequens est, hinc **Superbi** nomine indigitatur.

*Humilis.* Secundus, qui minor, priori oppositus, ab inferiore seu humiliore, qua locatus est, sede, **Humilis** appellatur, oculumque deprimit.

*Bibitorius.* Tertius in angulo interno subsistens, oculum introrsum versus nasum adducit, quod quia bibentibus, dum proculum inspicunt, familiare est, hinc **Bibitorius** dicitur.

*Indignabundus.* Quartus oculum versus exteriora ad parvum angulum movens, **Indignabundus** nuncupatur, quod indignantium lateralem aspectum exprimat.

*Obliquorum minor.* Obliquorum prior, qui gracilis, teres, brevis, inferiore loco situs, & in extrema inferioris orbitæ parte, scilicet ad juncturam primi maxillæ ossis cum quarto, exortus, versus externum palpebræ angulum oblique sursum ascendit, ibique oculum transversim amplexatus, brevi tendine versus superiora occurrit tendini alterius obliqui, oculumque deorsum movendo, versus externum angulum convertit & abducit.

*Trochlearis.* Alter obliquorum, qui tenuior, longior, situque superior, è communi principio cum tertio rectorum ortus, ad internum oculi angulum recta fertur, ubi corpore tenui trochleam transiens cartilagineam (hinc

**Trochleæ, & Trochlearis** musculus dicitur) obliquo flexu per oculi superiora progreditur, & juxta finem tendinis obliqui inferioris musculi terminatur, ceculumque versus angulum internum circumaggit.

Est autem **Trochlea** cartilago perforata, ad os maxillæ superioris, juxta internum oculi angulum propendens, cujus primam inventionem Spigelius Fallopio, Riolanus Rondeletio adscribit.

Hi duo musculi obliqui, ob petulantium oculorum amasiam spectantium occultas illecebras, **Amatorii**, à motu verò quem peragunt, **Circumactores** nominantur.


In brutis, quæ prona cibum capiunt, præter dictos sex musculos, septimus adest, qui nonnunquam in duos, rarissimè in tres musculos findi videtur. Hic brevis & carnosus nervum opticum ambit, ac posteriori corneæ parti inferitur, oculumque in prono ad terram adpectu sustinet, & longius propendentem retrahit.

Musculis vis motoria infunditur per ramulos secundi nervorum paris, qui rectis præcipue musculis inferuntur. Obliquus enim internus ramulum à quinto pari: externus verò ramulum recipit ab exili pari quod quinto proxime anteponitur, ut supra dictum, cap. 8.

Hic quæstio incidit; cum singuli oculi distinctos & proprios habeant musculos, quare diversis motibus non moveantur, sed simul eodem motu semper ferantur? Aristoteles, in *problem.* causam refert in coitum nervorum opticorum; idemque sentire videntur Galenus & Avicenna. Verum cum nervi optici sint solummodo visorii, nihil verò ad motum faciant, nec musculos ingrediantur, hujus rei causa esse non possunt. Eorum quoque conjunctionem nihil huc facere, ex eo liquet, quod (ut supra, cap. 5. dictum) Anatomicis jam comperitum sit, illam conjunctionem in variis hominibus deesse, quibus tamen viventibus utriusque oculi motus non minus quam in aliis hominibus, ita semper æqualis fuerat, ut utriusque visus simul ad unum punctum ferretur. Andreas Laurentius dicit, talem æqualem motum fieri ad sensus perfectionem: verum ille sic quidem hujus motus finem proponit, sed causam non explicat. Alii dicunt, motum æqualem fieri, quia nervi oculorum motorii in principio seu ortu suo uniuntur. Verum ex illa conjunctione liquet quidem spiritus æqualiter ad utriusque oculi musculos fluere posse, sed non patet, quare spiritus speciatim copiosiores influant in hos, aut illos oculorum musculos, & non in utriusque oculi eodem, internos, externos, &c. Nam si,

ex. gr.

1





ex. gr. quis velit aliquid videre versus latus dextrum, mox spiritus determinatur in dextri oculi muscolum externum, & sinistri internum, atque sic per duos diversos musculos utriusque oculi visio convertitur ad unum punctum. Si verò unio principii nervorum secundi paris huc aliquid faceret, deberent ratione istius unionis spiritus eodem tempore in eisdem utriusque oculi musculos, externos, internos, &c. & sic eodem tempore singuli oculi isto motu ad diversas partes & res prospicerent, non verò ad easdem.

Vera igitur causa procedit à mente: quippe cum mens intendit rem aliquam videre, non convertendus est unus oculus ad illam, alius ad aliam rem, nam ita fieret radiorum & perceptionis in sensu communi confusio; sed uterque oculus ad eandem rem necessa-

rio convertendus est: atque hinc spiritus semper determinatur ad illos musculos qui utrumque oculum eo flectere possunt, non vero ad tales qui singulos oculos in diversum trahere valent. Quia mens (hujus munere in brutis fungitur mentis quodcunque analogon, de quo dictum lib. 2. ad finem cap. 2.) semper intendit unam rem seorsum videre; & quamvis sæpe plures videre intendat, ut tamen singulas melius percipiat, ordine quodam hoc facit, & unam post aliam videt, quod citissime fieri potest, si res adeo sint propinquæ & magnæ, ut citò percipi queant: at si forte rem aliquam longe remotam, aut valde parvam, non sat citò & accuratè percipiat, ei diutius ambos oculos intendit, ut sic radiis copiosioribus in oculos influentibus, melius ab ipsa percipiat.

## T A B U L Æ XIV. EXPLICATIO.

Hæc Tabula demonstrat oculorum fabricam & partes.

## FIGURA I.

Partes Oculi exteriores.

- AAAA. Cutis revoluta.
- BB. Orbicularis palpebræ musculus major.
- C. Ejusdem tendo, in oculi cantho majore.
- DD. Minores palpebrarum muscoli.
- EE. Palpebrarum cilia.
- F. Supercilium oculi dextri.
- G.H. Palpebra superior & inferior.
- I. Angulus seu canthus major.
- K. Angulus minor.
- L. Conjunctiva tunica.
- M. Tunica cornea.

## FIGURA II.

Oculi musculi & nervi.

- AAAA. Cranium resectum.
- BB. Cerebri dissecti portio.
- CC. Cerebellum.
- D. Nervorum optitorum coitus.
- EE. Eorundem progressus ad singulos oculos.
- GG. Primus oculi musculus, Attollens dictus.
- H. Sinistri oculi secundus musculus, depri-mens.
- II. Recti interni, seu Adducentes, in utro-que oculo.
- KK. Recti externi seu Abducentes in utro-que oculo.
- L. Sinistri oculi musculus quintus, seu obli-quis externus.
- MM. Sextus musculus seu obliquus inter-nus, cujus tendo per trochleam N. transit.

O. Dextri oculi nervus opticus.

P. Cornea tunica, in cujus medio est pupilla.

## FIGURA III.

- AA. Cranium resectum.
- BB. Cerebellum.
- CCCC. Dura mater.
- D. Cerebri secti portio.
- EE. Opticorum scaturigo.
- F. Eorundem concursus.
- GG. Eorundem separatio.
- H. Ortus musculorum universalis.
- II. Palpebræ musculus in suo situ.
- K. Musculus rectus oculum extrorsum du-cens.
- L. Musculus rectus sursum movens oculum.
- M. Tertius rectus musculus deorsum mo-vens.
- N. Ultimus rectus, ad interiora trahens.
- OO. Rami nervi motorii musculis inserti.
- PP. Globosum ipsius oculi corpus sub palpebræ musculo prominens.
- Q. Palpebra superior cum suis ciliis.
- R. Os abruptum.
- S. Oculi sinistri corpus.
- T. Palpebræ superioris musculus extra situm revolutus.

## FIGURA IV.

Supercilium & palpebræ.

- AA. Supercilium pilosum.
- BB. Pinguedo palpebræ.
- CCCC. Interna palpebrarum superficies.
- DDD.

Ecc 2

- DDD. Palpebrarum cartilago.  
E. Cilium superius.  
F. Cilium inferius.

## FIGURA V.

- AA. Palpebræ superioris musculus in suo situ.  
BB. Cartilago palpebræ.  
C. Palpebræ abscissæ vestigium.  
D. Cilium palpebræ superioris.

## FIGURA VI.

- AA. Palpebræ superioris musculus.  
BB. Ejusdem palpebræ cartilago.  
C. Cilia seu pili.

## FIGURA VII.

- A. Nervus opticus.  
B. Nervus motorius.  
C. Omnium musculorum exortus.  
D. Trochlearis musculus.  
E. Trochlea.  
F. Chorda musculi trochlearis.  
G. Musculus rectus internus.  
H. Musculus rectus externus.  
II. Musculus palpebræ superioris.  
KK. Palpebrarum abscissarum reliquiæ.  
L. Cilia.

## FIGURA VIII.

- AAA. Cartilago palpebrarum exempta.  
B. Cilium superioris palpebræ.  
C. Cilium palpebræ inferioris.

## FIGURA IX.

- A. Cornea tunica, cum pupilla transparente.  
B. Musculus rectus attollens.  
C. Rectus inferior, deprimens.  
D. Rectus internus, adducens.  
E. Rectus externus, abducens.  
F. Obliquus internus, seu trochlearis.  
G. Obliquus externus, seu inferior.

## FIGURA X.

Musculi oculi ovis.

- A. Nervus opticus.  
B. Musculus septimus multis brutis proprius, oculum circumdans.  
CCCC. Musculi recti.  
D. Musculus trochlearis.  
E. Musculus obliquus inferior.

## FIGURA XI.

- A. Nervus opticus.

- B. Musculorum principium.  
C. Musculus rectus lateralis.  
D. Musculus rectus superior.  
E. Musculus rectus lateralis alter.  
FF. Oculi adeps, musculos nervumque opticum abscondens.  
G. Palpebræ superioris abscissæ cutis pars.  
HH. Sclerotica oculi tunica.  
I. Cornea tunica.  
K. Pupilla oculi.  
L. Palpebræ inferioris cilium.  
MM. Palpebra inferior.

## FIGURA XII.

Tunica adnata separata & extra situm posita, venulis arteriisque plurimis donata.

## FIGURA XIII.

Tunicam crystallinam ostendit.

## FIGURA XIV.

Humor crystallinus, ejusque figura.

## FIGURA XV.

Aqueus humor.

## FIGURA XVI.

Humor vitreus, in medio crystallinum excipiens.

## FIGURA XVII.

- A. Nervus opticus.  
BB. Choroides tunica, à sclerotica denudata.  
CCCC. Venæ per scleroticam dispersæ.  
DD. Sclerotica inversa.  
E. Ruptura scleroticæ.

## FIGURA XVIII.

- A. Nervus opticus.  
BB. Dura mater, opticum ambiens.  
CC. Sclerotica aperta, per cujus fissuram uvea D. videtur.

## FIGURA XIX.

- A. Nervus opticus.  
BB. Uvea revoluta, & à retina ex parte separata.  
C. Retinæ ab uvea separatæ pars.

## FIGURA XX.

- A. Retina tunica plane denudata.  
B. Conjunctiva tunica, seu album oculi.  
C. Cornea.  
D. Pupilla.

## CAPUT XVII.

## DE IPSO OCULI BULBO.



Ulbis oculi construitur ex membranâ & humoribus.

Membranæ sunt, vel communes, vel propriæ.

Communes duæ sunt, ad-

nata & innominata.

Prima ossi proxima, **Adnata alba**, Græcis *Ἀντεφύνη* dicta, quod aliis oculorum membranâ foris adhæreat; Hippocrati & Galeno **Album oculi** appellata, est tenuissima pericranii supra scleroticam, usque ad circulum iridis; expansio, oculum orbitæ & interioribus ossibus conjungens, unde etiam **conjunctiva** dicitur. Exquisitissimi sensus est, arterioli venulique multis conspersa. Per has arteriolas cum sanguinis fervidioris major sit affluxus, quam per venulas refluxus, tunc ophthalmia generatur; cujus hæc membrana sedes est.

Altera, quæ **Innominata** Columbo dicitur, nihil aliud est, quam tendinum musculorum ad corneam concurrentium, subtilis quædam expansio, usque ad circumferentiam iridis producta, cui instar annuli latiusculi circumjicitur & adhæret: ob hanc adnatæ tunicæ albedo multo lucidior apparet. Bauhinus, Riolanus, & Casserius, hanc inter tunicas numerandam non censent, sed cum musculis potius, ex quorum tendinibus conflatur, demonstrandam. Galenus tamen inter oculi tunicas illius mentionem facit, *lib. 10. de usu part. cap. 2. & 8.* sed nullum nomen ei imponit, atque hinc fortè à Columbo **Innominata** nomen primo recepit.

Præter has duas communes, in bove insuper alia membrana omnium extima adest, non firmiter oculo adnata, sed motu & musculo prædita, qua boves pro libitu oculos claudunt, & nictitant, palpebris apertis manentibus: de hac supra plura diximus, *cap. 14.*

Propriæ membranæ seu tunicæ tres sunt, quarum prima & extima à dura matre, circum oculi bulbum expansa, oriri dicitur (hoc tamen non credit Fallopius, qui putat eam substantiæ crassitiæ & figuræ nimum à dura matre differre) & **Sclerotica**, à duritie, appellatur. Hæc totum oculum involvit, estque crassa, dura, densa, æqualis, posterius opaca, antèr insar pellucidi cornu transparens, pellucida, & polita, unde ea parte **Corneæ** tunicæ nomen obtinuit; quod nomen tamen, ob singularem instar cornu crassitiem ac duri-

tiem, non rarè etiam toti scleroticæ tribuitur. Et si crassa & dura sit, tamen simplex esse communiter censetur. Bauhinus nihilominus, *anat. lib. 3. cap. 38.* eam ex pluribus corticibus, seu quatuor laminis componi tradit, atque hinc dicit, quod Avicenna eam quoque quadruplicem constituerit. Sed verosimile est, illam quadruplicitatem, per imaginationem ex membranæ firmitudine ac duritie conceptam; citius & facilius verbis dici, quam facto & demonstratione exhiberi posse.

Secunda & media tunica, quæ præcedente multo tenuior est; à tenui meninge orta, & exilibus vasculis conspersa, quia oculi humores, sicut chorium foetum, amplectitur, *χοροειδής*, **Choroides** nominatur, at anteriore parte, qua crassior & duplicata, atque ad radiorum transmissionem in medio perforata est, **Rhagoides**, seu **Uvea**, ab uveæ colore, dicitur, quod tamen nomen sæpe etiam toti tunicæ adscribitur.

Hæc interius variis coloribus donatur, in homine tamen obscurior esse solet: in bo- bus verò, aliisque animantibus quæ noctu vident, splendide viridis, vel fulva, aut flava reperitur. Hinc suspicatur Aquapendens, illa tantum animalia noctu videre, quibus interior uveæ color fulgidus est, & si talis etiam homini contingeret, illum quoque noctu visurum; quod Cæsari Tiberio naturale fuisse, refert Suetonius.

Exterius verò qua corneam attingit, atra quasi fuligine perfunditur, quæ tangentium digitos nigro colore inficit, seu tingit, & si abluatur, fere tota aufertur. Hoc nigro colore, ad visus perfectionem maxime necessario, in ipsa prima partium delineatione imbuitur, atque hinc in rudi adhuc embryone, per tenuissima palpebrarum velamenta & ipsam quoque scleroticam tunicam, se manifestat. In isto nigricante hujus tunicæ colore sistuntur rerum visibilibus radii & species seu imagines (sicut in speculo, quod eum in finem retrorsum plumbo obductum est) ut non ulterius transeant, sed percussi, mediante retina tunica, sensorio communi melius offerantur, & menti represententur.

Portio illius per corneam transparentis, colorum trahit varietatem, atque hinc à cœlestis iridis similitudine, **Iris** appellatur: *Iris.* est tamen in aliis magis nigra, in aliis magis cerulea, in aliis magis cæcia, in aliis magis fulva: quos colores iridi tribuit Aristoteles,

E e e 3

1. histor.

Membrane  
communes.

Tunica ad-  
nata.

Ophthalmia  
causa.

Innominata.

Bovæ mem-  
brana pro-  
pria.

Membrane  
propria.

Sclerotica.

Cornea.

Uvea, seu  
choroides.

Ejus colo-  
res.

Iris.

1. *hiflor. animal.* 10. Hi autem colores non solum considerandi in singulis individuís, verum etiam in integris nationibus. Quippe niger fere color est Æthiopibus & Synensibus, viridis Tartaris, cæsius Belgis aliisque Septentrionalibus populis, fulvus Italis, vicinisque gentibus.

Hujus portionis circumferentia duræ tunice firmiter adnectitur. Riolanus scribit eam cuspidē scalpelli orbiculatim separari posse, & in oculo bovis ebullito vel excocto, istam uveæ coronam prorsus separatam inveniri: atque hinc putat illam esse membranam ab uvea distinctam, fibras peculiare & motum quoque proprium in pupillæ dilatatione & contractione habentem. Verum hodie tamen dicta portio pro continua parte ipsius uveæ ab Anatomicis passim habetur.

*Pupilla.*

Est autem uvea in media anteriore parte fenestrata seu perforata, in hominibus foramine rotundo, in multis brutis oblongo seu ovali, quod Latini **Pupillam**, Græci *κόρη* nominant, Russi *глыла*, & Hippocrates etiam *ὄψιν* vocat, per quam rerum visibilium radii à crystallino humore, isti foramini incumbente, excepti, oculum ingrediuntur.

Hoc foramen modò dilatatur, modò constringitur, prout spiritus animales majore vel minore copia in oculum influunt. Magnopere hic errant Aquapendens & Sennertus, qui putant hanc majorem minoremve dilatationem proxime fieri à vehementiore aut debiliore lumine. Certe lumen per se nihil introducit in oculum ad ejus expansionem vel contractionem, sed facit & causa est, quod plures vel pauciores spiritus in oculum influant, atque sic horum influxu pupilla modò major, modo minor fiat, secundum quam diversitatem etiam rectius deteriusve cernimus: quippe modica contractio acutiorem, magna dilatatio hebetiorem visum facit; quod in illa spiritus magis collecti sint, & radii visibiles melius colligantur in punctum; in hac verò minus.

*Ligamentum ciliare.*

Ex circumferentia uveæ, parte interiore qua crystallino humori accumbit, oritur **Ligamentum ciliare** dictum, quod constat ex tenuibus filamentis seu fibrillis, tanquam lineolis atris (quæ palpebrarum pilis sunt similes) ex hac circumferentia versus prominentem crystallinum humorem excurrentibus, eumque cingentibus & uveæ connectentibus. Hujus ligamenti ope foraminis uveæ contractionem & dilatationem sæpe etiam ad hominis arbitrium peragi, tum crystallini ipsius, pro varia visus necessitate, lenem versus anteriora posterioraque motum fieri, admodum probabiliter statuunt Vesslingius & Cartesius. Hanc tamen contractionem & dilatationem alii

adscribendam putant tenuissimis fibrillis seu filamentis per tunicam retinam dispersis, utpote in quas, pro diversis objectorum qualitatibus, spiritus animales modò copiosiores, modò pauciores influere, hincque pupillam modò magis, modò minus dilatari, tradunt.

Tertia membrana seu tunica, quia æmulatur reticulum illud expansum quod è fune pendulum eminus ad piscium capturam aquis injicitur, nostratibus *Werpnet* dictum, hinc **Retina**, & **Retiformis tunica**, Græcis verò *ἀμφιβληστροειδής*, ab amplectendo, appellari solet. Ejus substantia mollis est atque mucosa (hinc, ex sententia Galeni, bene putant Riolanus & Bauhinus, illam membranæ nomen non mereri) in qua, tum filamenta quædam tenuissima, tum vascula maxime tenella, è plexu choroide & rete mirabili derivata, sanguinem ad ejus nutritionem deferentia, manifeste conspiciuntur: quæ tamen non videtur observasse Platerus, nec vidisse Riolanus, *animadvers. in Bauhin.*

Hanc Retinam appellatam tunicam communiter tradunt esse interioris medullaris substantiæ nervi optici, seu cerebri, circum humorem vitreum, usque ad ligamentum ciliare, expansionem. Verum, cum hujus tunicæ substantia vix aliquam medullaris cerebri substantiæ similitudinem habeat; cum vascula sanguifera manifeste visu conspicua, qualia in cerebri substantia non reperiuntur, recipiat, non videtur medullaris cerebri substantiæ expansio esse, sed potius peculiaris quædam esse substantia primariam organi visus partem constituens, in qua radiorum visibilium colores pinguntur, indeque Menti, mediante nervo optico & spiritibus, communicantur, sicque percipiuntur: qualem aliam peculiarem substantiam sub narium & linguæ membrana reperi, & primariam organorum odoratus ac gustus partem constituere, observavimus, & descripsimus *sequentibus cap. 19. & 24.*

Præter has tres tunicas proprias toti oculo necessarias, duæ insuper aliæ speciatim crystallinum vitreumque humorem investiant, de quibus nunc dicendum.

Humores oculorum tres sunt, consistentia varii, aqueus, vitreus, & crystallinus, à se invicem distincti, pellucidi omnes, colorisque expertes; partim ut radii visibiles in iis non sistantur: partim ut visibilium coloratorum radii, nullo oculi colore alterati, aut immutati, ad retinam transire, indeque sensorio communi, tales quales sunt, offerri possint. Quippe cum per oculum in cerebro judicium de coloribus fieri debuerit, necessario etiam debuerunt ejus partes, coloratorum radios excipientes & transmittentes, omnis coloris expertes esse.

*Oculorum humores.*

**Aqueus**

Humor aqueus.

Aqueus humor, Græcis ὕδαρτος dictus, tenuis, pellucidus, omnis coloris expers, mediocriter copiosus, & fluidus, antèrius spatium inter corneam & crystallini sedem alluit, nullaque tunica propria comprehenditur, sed inter corneam uveamque tunicam ante pupillam concluditur. Nonnullis hic humor perperam ὠκεϊδης, *albugineus*, vel *albumineus* appellatur, cum nullam cum albumine ovi similitudinem habeat, neque ullam ei similem crassitiem aut visciditatem obtineat, sed tenuissimus maximeque fluidus existat.

Hic locus.

Hic dubium incidit, an solummodo anteriorem oculi partem occupet, & humori crystallino tantum obijciatur; an verò etiam vitreo humori circumfusus sit. Riolanus putat illum non solum antèrius contineri, verum etiam circum circa vitreo humori circumfundi, quia corneâ & uveâ tunica posteriore parte apertis (ut in apparatu ad oculi demonstrationem fieri solet) aqueus aliquis humor per aperturam effluit. Plempius, *lib. 1. ophthalmograph. cap. 16.* hac in parte reprehendit Riolanum, & dicit se experientia contrarium invenisse, atque posteriorem ocularis bulbi partem acicula perforasse, nihilque humoris erupisse: hinc concludit, humorem quem ex postica parte erupisse vidit Riolanus, fuisse vitreum humorem, ob incisam vitream tunicam exstillantem. Plempio responderi potest, illam experientiam parum facere ad sententiæ suæ probationem, cum certum sit, extractâ acu vel aciculâ, mox exiguum corneæ inflictum foraminulum confugendo occludi, ut aqua effluere non possit: sicut id fieri videmus in illa chirurgia, qua suffusiones & cataractæ acu tolluntur: in illo enim actu acus producitur ante humorem crystallinum, & medium aqueum humorem permeat, attamen cum extrahitur acus, aqua ex vulnuscule exili non exstillat, ob suctionem seu occlusionem modo dictam. Verum horum magnorum virorum lis atque dissensus, facile dirimi ac componi, & ipsa veritas clarius patere potest, si hæc res paulo penitus perspiciatur: nam accurate intuenti manifeste apparebit, diversum esse aqueum humorem circa pupillam contentum, ab eo qui è postica oculi parte effluit; & illud non modo tenuissimum esse, verum ante pupillam solummodo detineri, ac concludi, neque ulterius versus oculi posteriora profundius: hunc verò posteriorem subviscidum, & altero spissiore, nihilque aliud esse quam aquosum quendam liquorem, ex humore vitreo, læsâ propriâ tunica vitreâ, æris allapsu & spirituum defectu colliquescente resolutum ac separatum: quod satis manifeste liquet, si vitreus humor manu in aëre tantisper suspensus detineatur, mox enim

talis subviscidus liquor lentis guttis ex eo exstillat.

Quæritur à nonnullis, an hic humor partibus corporis sit annumerandus? Illud *An sit pars corporis.* apertissime faciunt Laurentius & Mercatus, iique qui etiam sanguinem partibus corporis annumerant. His se aperto Marte opponunt Julius Cæsserius Placentinus, *de organ. visus sect. 1. cap. 36.* & Plempius, *in ophthalmograph.* idque non sine ratione, cum enim proprio termino non circumscribatur, nec corpori in continuitate uniatur, & in vulneribus oculorum totus deperditus restituitur, partibus animatis minime accensendus videtur. Quod autem deperditus restituitur, patet ex Galeno, qui, *lib. 1. de symptom. caus. cap. 2.* refert exemplum pueri, qui stylo in pupillæ loco ita fuit compunctus, ut universus aqueus humor efflueret, qui tamen puer aliquamdiu post, collecto & regenerato humore aquoso, visum recuperavit: qualia duo exempla etiam scribit Hildanus, *cent. 1. observ. 26.*

Hanc difficultatem animadvertentes alii, *An sit excrementum.* maluerunt, cum Avicenna, statuere, illum esse excrementum humoris crystallini, atque hac de causa fieri, quod evacuatus & deperditus regeneretur. Verum hos evincit, quod qualiacunque corporis excrementa quotidie succrescant, atque hinc necessario viis opus habeant, per quas rursus evacuentur, cum tamen ad hujus humoris evacuationem nullæ viæ adsint. Si igitur humor hic evacuatus brevissimo spatio regeneretur (ajunt enim in pullo, per punctiorem oculi emissum, quindecim dierum spatio restitui) debent etiam manifesti transitus dari, per quos continue rursus evacuetur ejus redundantia; sed illos in cornea nemo unquam invenit, nec inveniet si nulli sint, ergo humor hic continuo incremento oculum in immensum distendet (nulla enim ratio est, quare crystallinus & vitreus non semper æqualiter hoc excrementum deponerent) vel saltem in senibus, ob multorum annorum collectionem, admodum copiosus; in infantibus verò paucissimus invenietur; utriusque tamen contrarium docet experientia. Dicendum igitur, hunc humorem non esse partem corporis, non etiam excrementum, sed liquorem quendam ad instrumenti visus perfectionem, non minus quam sanguis ad nutritionem, necessarium, ex lymphatissimis sanguinis particulis genitum: & sicut sanguis non est pars corporis (hoc latius probatum *lib. 1. cap. 1.*) non etiam excrementum, sed humor ad nutritionem, vitæque sustentationem necessarius; ita etiam aqueus oculi humor, nec pars corporis animata, nec excrementum est, sed liquor ad visus sustentationem, & forte etiam ad crystallini vitreique nutritionem, necessarius.

Hujus

Ufus aquei.

Hujus usus est, reliquos duos densiores humores, cum uvea retinaque tunica humectare ac lavigare, & forte etiam nutrire: ad hæc, corneam, ne rugosa, atque inde opaca fiat, distendere, luminis nimium splendorem infringere, & radios visibiles dilatare. Si verò à puritate sua recedat, & crassior evadat, tunc visus hebetatur. Si particulæ aliquæ crassiusculæ in eo natent, tunc culices, muscæ, paleæ, araneorum telæ, aliaque similia ante oculos oberrare, aut volitare videntur. Si illæ particulæ crassiores concurrant, & ita cohæreant ut inde pellicula generetur, ante pupillæ foramen subsistens, tunc visus aboletur, propterea quod radiorum visibilium ingressus in crystallinum abarceatur: idque incipiens vitium Græcis *ὑπόχυμα*, Latinis **Suffusio** dicitur, consummatum verò **Cataracta** nominatur.

Suffusio.

Humor vitreus.

Vitreus humor, Græcis *υαλοειδής*, vitro fuso similis, aqueo multo minus fluidus, ac crystallino multo mollior existens, & circiter triplo aqueum, quadruplo vel quintuplo crystallinum quantitate superans, totam posteriorem oculi capacitatem occupat.

Parte posteriore, qua retinam contingit, rotundus est, anteriore utcunque planus, in medio nonnihil excavatus, qua cavitate crystallinum excipit. Tenuissima pellucida tunica, *Vitrea* dicta, investitur, qua à reliquis duobus humoribus separatur.

Tunica vitrea.

Ufus.

Ufus ejus est, rerum visibilium radios à crystallino acceptos dilatare, sicque dilatatos retinæ offerre. Alii, qui in nervo optico visionem fieri existimant, illius usum esse statuunt, ut in eo radii, cum per crystallinum transierunt, refracti, in unum punctum coeant, ut imago visui representetur.

Humor crystallinus.

**Crystallinus humor**, Græcis *κρυσταλλοειδής*, à clarissima pelluciditate, instar crystalli maxime splendente, nominatus, atque etiam **Glacialis** dictus, eo quod purioris concretionis glaciale gemmam æmuletur, reliquis duobus humoribus solidior ac splendidior, è purissima maximeque pellucida seminis parte genitus est.

Anterius occupat foramen uveæ, posterius autem sinu vitreo humori insculpto excipitur, eique arcte cohæret. Parte antica depressiorem, postica rotundiorem globositatem habet, quamvis pro variis oculi affectibus hæc figura subinde nonnihil immutari videatur.

Tunica aranea.

Hunc tenuissima maximeque pellucida propria **Tunica**, **crystalloidea** dicta, quæ etiam à subtilissimo contextu **Aranea**, Græcis *ἀραχνοειδής*, appellatur, quod nomen tamen non placet Riolo, cui plurima displicent quæ sua non sunt. Hac

tunica ab aliis humoribus distinguitur, eique in vitrei humoris sinu vitrea quidem arcte cohæret, sed tamen diversa est. Riolanus hanc tunicam prorsus non agnoscit, ne quidem in anteriore parte, utpote quam solummodo perpolitam esse putat, ob crystallini crassitiem. Verum hanc opinionem evincit autopsia, quippe tunicam illam, etsi tenuissimam, nonnihil detrahi posse, eaque læsâ ipsam exteriorem humoris partem tantillum epullulare, quilibet videre poterit. Sic etiam Julius Casserius, *de org. vis. sect. 1. cap. 36. quinimo ego hanc*, inquit, *ab ipso crystallino separatam etiam oculis conspiciendam exhibui.*

Rerum visibilium radii, in aqueo humore dilatati, hoc crystallino primò excipiuntur, hincque per vitreum ad retinam tunicam transeunt, indeque sensorio communi offeruntur. Ratione igitur primæ collectionis seu receptionis crystallinus humor primarium est visus instrumentum: at ratione perceptionis retina tunica, utpote qua mediante radii accepti sensorio communi offeruntur, in quo percipiuntur. Interea tamen adeo arcta & necessaria est omnium oculi partium conjunctio, ut una sine aliis agere non possit, & cujusslibet, quamvis vilissimæ, ut humoris aquei, vitium, mox primariam totius organi actionem lædat.

De crystallino & vitreo humore dubium incidit, an partibus corporis sint annumerandi? De crystallino dicendum, illum revera esse partem corporis, quia propriâ araneâ tunicâ integitur, videndi actionem cum aliis partibus perficit, vivit, nutritur, in utero generatur, propriam habet circumscriptionem, est corpus toti cohærens, idque cum aliis complens, communi vita conjunctum, ad illius functionem & usum comparatum: atque si ejus substantia penitus consideretur, non est verè humor, quamvis ita vulgo appelletur, sed est corpus satis firmum ac solidum; quod in piscibus excoctum, in fibrillas distrahitur, imò multo firmitus est quam pinguedo, cerebrum, medulla, &c. Hinc etiam Galenus, *1. method. cap. 6. & 1. de sympt. caus.* illum merito partibus corporis annumerat, & quidem similaribus, quia in similes sibi partes dividitur; atque etiam organicis, quia actioni visus peragendæ est destinatus, eumque in finem (sicut omnes aliæ organicæ partes) certam, determinatam, ac sensibilem conformationem habet.

Eadem de Vitreo humore incidens quaestio, iisdem rationibus solvenda: & quamvis nonnulli crystallinum hoc vitreo humore ali seu nutriri tradant, tamen illud improprie sic dicitur (forte quia, ut alii putant, ei alimentum suum præparat (cum non magis nutriat crystallinum, quam cor nutrit brachium: cum etiam ad crystallini

Ufus crystallini.

An sint partes corporis.

nutritio-

nutritionem tam magna nitidaque parte necessario opus non sit, & ille non minus sanguine nutriri possit, quam nervi, medullæ, cerebrum, aliæque albicantes partes.

An humores isti sentiant.

Aliam de his humoribus quæstionem in scenam primus produxit Julius Casserius Placentinus, *de org. vis. sect. 1. cap. 36.* scilicet, an tactu sentiant? Ille hunc tactus sensum acutissimum ipsis tribuit. Ego illorum membranarum talem concedo, sed ipsi humorum substantiæ nullum tactum adscribo, cum sola membrana sit organum tactus. Eodem modo sicut dentes & ossa, quorum etsi propria substantia sensu tactus omnino destituatur, sentiunt tamen eorum periosteæ, atque hinc sentire vulgò dicuntur.

Oculo ex his omnibus partibus constructo vim visivam conferunt spiritus animales, qui in eum influunt copiosi per nervum opticum, de quo supra dictum, *cap. 8.* Spiritus autem modò majore, modò minore copia influunt, atque hinc oculi modò magis, modò minus turgent, modò acutius, modò minus acute vident. Sic turgent juvenibus, plethoricis, iratis, ebriis: minus turgent senibus, multa Venere utentibus, tristicis, inedia confectis: etiam virginibus turgidiores esse dicuntur, quam vitatis. Quamvis autem oculi modica à

spiritibus turgescencia visum acutiorem faciat, tamen non sequitur, in omni inturgescencia fieri visum acutum, quia contrarium liquet in ebriis, in quibus visus non est acutus, ob turbulentum & inordinatum spirituum influxum.

Actio oculorum, omnibus nota & manifesta, est visio. *Actio oculorum.*

Hæc autem Visio est sensus, quo ex vario radiorum visibilium, in humore crystallino ac vitreo collectorum, ac in tunicam retinam impingentium, motu, colores cum lumine, situ, distantia, magnitudine, figura, & numero, percipiuntur. *Definitio visus.*

De visionis autem modo, medio, objecto, multisque aliis huc pertinentibus, consulendi sunt illi Philosophi, qui totam visus historiam ex professo describunt: hæc enim, ne in nimis prolixum volumen excrescat noster liber, necessario hic præmittenda sunt, cum breviter describi satis accurate nequeant, sed per se integrum tractatum requirant, qualem inter alios admodum insignem conscripsit Cartesius, *lib. dioptr. ut & lib. de hom. artic. 18. 19. 20.* quam eandem rem etiam fuse pertractant Julius Casserius Placentinus, *de org. visus, sect. 2.* & Plempius, *in ophthalmographia.*

## CAPUT XVIII.

## De Auditus organis, &amp; Auditu.



Uemadmodum oculi mirabilium summi Numinis operum, nec non appetendarum fugiendarumque rerum speculatores, in summa corporis parte sunt collocati, sic ad sapientiæ disciplinarumque cultum, à lateribus iis adstant Auditus organa, Latinis Aures, generali nomine (quo improprie tota auditoria instrumenta designantur) ab hauriendis vocibus, Græcis verò ὤτις, & ὠτίς, dicta, imminentis boni malique, quod ob tenebras, vel interjecta crassiora corpora, miniamve distantiam, conspici nequit, prænuncia: sublimi loco deposita, ut aëris commoti gyros in sublimi diffusos, facilius percipiant.

Auditus organa.

Numerus.

Duo creavit Altissimus Conditor, ut uno forte præpedito, alterum officio isto ad necessitatem fungeretur: utque à dextra sinistraque corporis parte soni audiendi melius perciperentur, utrimque temporum regioni unum apposuit. Cujus alia pars est externa, oculis conspicua: alia interna & abdita, intra petrosi ossis cavernas recondita.

Externa pars, instar vanni expansa, quæ non est primum, sed adjuvans auditus organum, sonos prima colligens & excipiens, proprie Græcis ὠτίς, Latinis Auris, vocatur: ejusque superior pars Ala, vel pinna (Græci πτερυγία vocant) inferior vero mollisque lobus Infima auricula, & lobi nomen antiquitus recepit. Spigelius tamen totam auris externæ faciem Auricula nomine designat. *Auris externa.*

Magnitudo auris homini satis exigua, figuraque semicircularis & concinna, variis protuberantiis & cavitatibus elaborata, in quibus exceptus cum aëre sonus, non statim prolabitur aut diffuit, sed nonnihil sistitur; & simul infringitur, ut deinde rectius & minus impetuosè in cavernas auris internas succedat; unde illi, quibus hæc pars infelici vulnere est ablata, multo minus audiunt, vocesque magis confusè, instar sonitus aquæ fluentis, cum murmure quodam percipiunt. Hinc etiam surdastri, ut com moti aëris sonum copiosorem excipiant, sicque melius audiant, manum eam auribus admoveere solent, *Magnitudo & figura.*

Fff

Protube-



*Helix.* Protuberantiarum exterior, ambitum  
constituens, à tortuositate ἑλῆξ, **Helix**,  
*Anthelix.* & altera ei opposita ἀνθελῆξ, **Anthelix**,  
quæ vero tempora spectat, quia nonnullis  
*Tragus.* instar barbæ hirci pilosa est, **Tragus**, vel  
*Antitragus.* hircus: eique opposita, cui infima auri-  
cula appendet, **Antitragus** appellatur,  
quæ & ipsa in quibusdam pilosa est.

Cavatum interior, quæ ipsius meatus  
auditorii est vestibulum, ob flavas in ea  
*Alveareum.* collectas sordes, nonnullis **Alveareum**,  
*Concha.* Græcis κοφελή: exterior verò, quæ major,  
à tortuositate **Concha**, κόγχη, dicitur:  
tertia verò, quæ inter helicem & antheli-  
cem comprehenditur, hætenus nullo pec-  
uliari nomine donata est.

*Indicatio-  
nes.* A figura & magnitudine auris externæ  
Antiquos varias indicationes desumpisse  
legimus. Aures mediocris magnitudinis &  
arrectas optimorum notam esse, tradunt  
Aristoteles & Galenus. Quadrangulares  
& semicirculares aures mediocris magnitu-  
dinis, hominem virilem, bonum, & egre-  
giis sensibus præditum indicare, scribunt  
Polemon, Loxus, Adamantius, & Al-  
bertus. Magnas aures magnam stoliditatem,  
imprudentiam, & garrulitatem, at bonam  
memoriam significare, referunt iidem: eas-  
que longam vitam præfugire, ex Aristotele  
tradunt Rases & Plinius. Valde parvas  
aures hominem stolidum, malorum morum,  
latronem, & libidinosum indicare, ajunt  
Aristoteles Galenus, & Polemon. Au-  
res parvas & protensas, sicut in canibus,  
ut & breves ac compressas, stoliditatem  
& stultitiam arguere, testes sunt Polemon,  
Adamantius, & ex Loxo Albertus. Longas  
& angustas aures hominem invidum & pra-  
vum demonstrare, referunt Polemon, Al-  
bertus, & Conciliator. Nimis rotundas  
& non exsculptas aures, hominem indoci-  
lem: contrà verò exsculptas docilem præ-  
figurare, dicunt Polemon, Adamantius,  
& Albertus. Quando lobus auris inferior  
cum mandibulæ carne jungitur ac cohæret,  
illud hominem stultum ac vanum significa-  
re, testatur Avicenna.

*Partes au-  
ræ.* Constat auris variis partibus, quarum  
aliæ communes, aliæ propriæ.

Communes sunt, cuticula, cutis te-  
nuissima, eique substrata membrana ner-  
vea, & in inferiore lobo pauca pinguedo.

Propriæ sunt, cartilago, musculus,  
vasa.

*Cartilago.* Cartilago, superiorem amplioremque  
auris partem constituens, ut aurem expan-  
sam patulamque sustinens, ossi petroso ad-  
hæret per ligamentum validum à pericranio  
natum.

Hæc in hominibus fere immobilis existit,  
paucique inveniuntur qui aures pro libitu  
movere possunt (horum tamen rarissima

quædam exempla ex aliis collegit Schenck-  
kius, lib. 1. observat. tit. de auribus) qui  
motus peragitur beneficio quatuor muscu-  
lorum (sex se invenisse refert Julius Casse-  
rius, sicut. 1. de organ. audit. cap. 4.) qui  
admodum tenelli, & vix conspicui huic  
cartilagini adjacent, quos Galenus, ob  
eorum singularem tenuitatem, perigra-  
phos, seu lineamenta musculorum ap-  
pellat.

Eorum *primus*, auri & utrique labro com-  
munis, auremque deorsum ad latus trahens, *Musculi.*  
ejus radici sub lobo implantatur, estque  
pars tenuis musculi quadrati, genas cutem-  
que faciei moventis.

*Secundus*, musculo temporali incumbens,  
auremque sursum & antrosum movens,  
juxta principium musculi frontis descendit,  
& paulatim angustior factus, supremæ  
auris parti inferitur.

*Tertius*, aurem versus posteriora nonni-  
hil attollens, supra mammillarem procef-  
sum ab occipite angusto principio oritur, ac  
dein latior factus, nunc duobus, nunc  
tribus tendinibus radicem cartilaginis poste-  
rius ingreditur.

*Quartus*, communem cum præcedente  
usum habens, latoque ortu à processu mam-  
millari prodens, in tendinem abit, cujus  
nonnulli tres insertiones in radicem cartila-  
ginis describunt.

In bobus autem, equis, aliisque variis  
brutis, musculi hi magni, & sæpe plures  
sunt, unde ista animalia aures validè move-  
re, & muscas, aliaque molesta ab iis ex-  
cutere queunt.

Vasa triplicia auri implantantur.

1. Arteriolæ à carotidibus in illam pro-  
cedunt, quarum major quædam antitragum *Vasa.*  
& anthelicem perreptans, superioremque  
maxillam conscendens, singulis dentibus  
sanguinem vitalem suppeditat, cum quo  
sæpe acres humores eodem defluentes,  
acerrimæ odontalgicæ causa sunt, quam  
artificiose cauterio actuali in anthelice dif-  
fecta hac propagine, multoties mirabiliter  
sedatam fuisse vidimus: quod ipsum etiam  
bene notatur à Bauhino: & refert Riola-  
nus, se Parisiis virum vidisse, qui per illam  
curationem magnum quæstum faciebat;  
qualem etiam nos antehac in Geldria novi-  
mus.

2. Venulæ minimæ ex aure ad jugulares  
excurrunt.

3. Nervuli duo, à secundo medullæ  
cervicis pari, latera posterioremque auris  
regionem perreptant, quibus adjungitur  
furculus à quinti paris duriore portione, per  
cæcum foramen procedens.

Exterius auribus adstant variæ glandulæ *Glandula  
parotides.* crassæ & insignes, **Parotides** nominatæ,  
non tantum pone aures, verum etiam sub  
auribus, & ad utrumque latus. Inter has  
duræ

dux insignis magnitudinis, sibi invicem prope accumbentes, quarum minorem & anteriorem *conglobatam*; majorem verò, quasi ex pluribus glandulosis fragmentis compositam, Sylvius & Nicolaus Stenonis *conglomeratam* vocant: utramque ex capite vitulino clare depingit Nic. Stenonis. Hæ glandulæ vasa ascendunt fulciunt: & quia etiam serolos humores ex sanguine arterioso separatos suscipiunt, ac per quædam lymphatica & salivalia vasa dimittunt (hac de re vide *sequens cap. 24.*) multamque pituitosam saburram interdum coacervant, hinc cerebri emunctoria vulgò appellantur. Præter has, toto spatio infra maxillam inferiorem multæ aliæ sunt glandulæ, in quibus scrophulæ similesque affectus generantur, quæ tamen parotidum nomine non designantur, sed à Whartono *jugulares* appellantur. Harum magnus est numerus, sed magnitudo exigua: neque in solo collo earum situs est, sed à processu styloformi, secundum inferiorem maxillæ sedem, juxta latera thyroidearum (de quibus dictum *lib. 2. cap. 15.*) inter spinam & vasa thoracica descendunt in thoracem, atque eo usque imprimis conspicuæ sunt in primo natis infantibus, vix in adultis. De his accurate differit Steno, *in suis observat. anatom.*

Organum  
auditorium  
interius.

Organi auditorii interior pars ossis temporum processu (de quo infra vide *lib. 9. cap. 6.*) continetur, partim ad majorem tutelam, ut ob loci duritiem à fortuitorum impetu minus læderetur: partim ad meliorem soni conservationem, cui hic locus, ob siccitatem & duritiem, erat aptissimus.

In hac interiore parte varia consideranda veniunt, scilicet cavitates quam plurimæ, quarum quatuor peculiaribus nominibus sunt insignitæ, **Meatus auditorius, Tympanum, Labyrinthus, & Cochlea**: item membrana tympani, duo muscoli, quatuor ossicula, aer congenitus, & vasa.

Hujus autem structura facilius & distinctius demonstratur in infantibus & pueris junioribus, quam in adultis. Quippe evulsâ prius epiphyssi ossæ interna ossis petrosi (quæ in juveniculis facile separatur) mox in conspectum veniunt, musculus internus cum exili glandula ei annexa, ossicula tria, filum tympano attensum: sed cavitates, nempe cochlea, labyrinthus, & concha, non perfecte conspiciuntur, quia labyrinthus in recens natis eo modo nondum est excavatus, ut in adultis.

Auditorium  
meatus.

Auditorius meatus vocatur antrum illud, quod ab auris extremæ concha incipiens, versus interiora tendit, tenuique cute ac pericranio ad oras usque tympani vestitur.

Tortuoso ductu sursum nonnihil ascen-

dit, partim ne forinsecus quidpiam in aërem confertim illabatur, & illapsa ac intus collecta facile declivi tramite deorsum ferantur: partim ut aëris commoti vehementior impulsio nonnihil infringatur, sicque mitius tympanum feriat.

In hoc meatu humores quidam flavi, biliosi, amari, crassi, ac viscosi, colliguntur, à mollioris ceræ similitudine, Antiquis **Cerumina**, Græcis *κνέληδα*, dicti, à quorum etiam melleo colore, ipse meatus **Alveare**, Græcis *κνέλη*, nominatur.

*Cerumen.*

*Alveare.*

Intrinsecus, ad finem meatus auditorii, membrana quædam nervosa, orbicularis, ac pellucida, situ ex obliquo in primum despicens, deprehenditur, instar velamenti auris interni, quæ, propter nervulos quos suscipit, & qui sub ea progrediuntur, exquisitissime sentit, estque subtilis & siccissima, ut melius personet, sed interim subdensa, ac satis firma, ut ab aëris confertim irruentis injuriis non facile lædatur.

Hanc membranam Hippocrates, **Meatus auditorii pelliculam**, Aristoteles **Meningem**, Galenus **Operimentum**, Barbari **Myringam**; at melius Neoterici, ratione subjectæ cavitatis, **Membranam tympani** appellant.

*Membrana tympani.*

A pericranio illam oriri putat Julius Cæsius: alii piæ, alii duræ matri, alii ramulo nerveo quintæ conjugationis expanso, originem ejus adscribunt. Bauhinus putat illam habere substantiam propriam, ab aliis membranis diversam, atque hinc à nulla alia oriri, sed ex semine in prima conformatione partium generari: vel si ab alia procedere dicendum sit, eam tunc necessario debere à periosteo deduci, utpote cui arctè cohærere in capite infantis conspiciatur. Sic etiam Vesslingio periostei quædam expansio videtur, qui eandem subinde duplicem inveniri, & frequenter crustula ab excrementis condensatis obduci tradit.

*Orinis.*

Subjectæ cavitatis orbitæ, seu ossæ annuli sulco firmiter inhæret, quamvis superiore meatus auditorii regione nonnihil laxior sit connexio, unde in medio nonnihil incurvatur, ut sonus in aliquali ista concavitate melius & perfectius excipiatur.

*Connexio.*

Ut autem clarius resonet, ejus dorso chorda non aliter intensa est, quam nervus militari tympano. Illam Anatomici transversim ei annexam esse, communiter tradunt: sed Julius Cæsius bene observavit, illam neque ipsi annexam, neque per diametrum ei toti, sed vix quidem tertiæ ejus parti esse subtenfam.

*Chorda.*

De hujus chordæ naturâ disputant Anatomici. Bauhinus putat eam esse, vel nervum, vel ligamentum, vel quid ex utroque mixtum. Eustachius dicit esse nervulum ab

*Ejus substantia.*

Fff 2

alterutro

alterutro quarti paris ramulo. Vesalius statuit esse nervosum corpus. Cum Bauhino sentit Volcherus Coiter: cum Vesalio sentiunt Fallopius & Casserius, à quibus non videtur differre Rolincius.

*Musculi.*

Duobus exilibus muscélis donatur, ad motum ossiculorum; vel, ut mavult Riolanus, ad flexum & reflexum ipsius membranæ tympani definiendum, comparatis, qui motus manifestè percipitur, cum aures arriguntur ad aliquid accuratius audiendum.

Horum unus externus, è superiore atque interiore sinu meatus auditorii latiore principio exortus, sensumque contractior factus, ac subtilissimo tendine membranæ tympani contiguus, ad malleolum usque fertur, membranam cum malleolo sursum extrorsumque nonnihil extendens. Hujus inveniendi modum describit Eustachius his verbis. *Incides os petrosum eo loco, quo linea minimè altè penetrante insculptum est, & versus tenuiorem ossis temporum sedem in anteriorem partem magis eminet, aperiasque ejus squamam. Hoc cum effeceris, statim musculus se conspicuum exhibebit: qui etiamsi omnium minimus sit, constructione nulli cedit. Oritur à substantia ligamenti simili, qua parte os cuneiforme cum osse temporum committitur. Inde carneus evadens, redditur sensim ad medium usque aliquanto latior; deinde verò angustior redditus, tendinem gracillimum producit, qui in majorem apophysin mallei, è regione minoris apophysin ejusdem, inseritur.*

Alter musculus est internus, in osse petroso situs, & circa conjunctionem lapidei processus cum osse cuneiformi, exortus, nonnunquam simplici, sed plerumque duplici tendine ad malleolum progreditur, & uno ejus processui elatiori, altero ejus cervici inseritur seu affigitur, mallei caput oblique antrorsum trahens, & ad interiora ab incude deducens.

Hi duo musculi membranam cum ossiculis sursum deorsumve tunc imprimis movent, cum ex industria partes illas ad acute audiendum excitare volumus.

*Ufus membranæ.*

Hæc membrana à rebus sonoris commota movet aërem intus conclusum, qui internum auditus medium est, sine cujus motu nulla fit auditio. Quodsi verò membrana ab ortu, vel à morbo crassior evaserit, aut excrementorum mucore obducta sit, ut moveri commodè nequeat, gravem auditum; at si disrupta, vel ab ortu immobilis fuerit, incurabilem surditatem infert.

*Tympanum.*

Ablatâ prædictâ membranâ, patescit ampla illa cavitas, quam Recentiores **Tympanum** appellant, cujus interior superficies multis colliculis sinibusque inæqualis est.

*Quatuor ossicula.*

In eo mox consideranda offeruntur quatuor exigua, dura, & densa ossicula,

**Malleus, Incus, Stapes, & Os orbiculare, seu squamosum.** Quæ licet membranæ seu periosteis destituta sint, tamen circa extremitates, quibus committuntur, ad nexus firmitudinem, obvinciuntur ligamento exili, procedente ab eo ligamento quod membranæ tympani, sicut nervus tympano bellico, prætenditur, atque hinc **Chordæ**, vel **Fili** nomen acquisivit, de quo paulo ante dictum.

Hæc ossicula veteribus fuerunt incognita, *Eorum inventores.* eorumque duo priora primus invenit Jacobus Carpus; tertium Ingrassias, Eustachius, & Columbus: quartum Franciscus Sylvius.

Deiis illud notatu dignum ab Anatomicis observatum, quod in qualibet ætate nihil omnino discrepent in situ & magnitudine, ac nihilo in recens natis, quam in adultis, sint minora. Auditus tamen in pueris paulo obtusior est, propter reliquarum organi partium nimiam humiditatem: fortè etiam hinc, quod licet dicta ossicula justam magnitudinem habeant, sint tamen in infantibus minus solida & duras, sed interius nonnihil fungosa & medullosa, ut ea tunc esse testantur Columbus & Casserius.

Primum ossiculum, quod à formæ *Malleus.* qualicumque rudimento, vel potius ab usu, **Malleum** nuncupant, capitulo rotundo incudis cavitati laxiore ligamento inarticulatur, hincque in cervicem attenuatur. Ulterius verò procedens, instar caudæ reflexæ, firmiter ultra medium membranæ tympani adhæret, ac circa medium processibus duobus donatur: uno brevi, cui musculi interni tendo adnectitur; altero longiore, sed magis tenui, qui tympani orbitæ incumbit, & tendini musculi auris externi alligatur.

Secundum ossiculum **Incudis** nomine, *Incus.* ab usu, insignitum, & dentem molarem duabus radicibus præditum aliquo modo referens, malleolo subjacet, ejusque caput superiore parte leni sinu excipit: inferiore verò duos habet processus: unum brevem, tympani specui posteriori innitentem: alterum longiorem, per ligamentum laxiusculum, sed firmum, stapedis capitulo devinctum.

Tertium ossiculum **Stapes**, à figuræ *Stapes.* stapedis equestris similitudine, dictum, cochleæ insistit, & fenestræ ovali figuræ ambitusque similitudine respondet, cui per ambitum undique lento laxoque vinculo alligatur, ut impelli quidem intra sinum queat, attolli verò & educi citra vim non possit. Superiore parte instar arcus convexum est, cujus crura duo minutissima, nonnihil sinuata, basi transversæ inseruntur. Vertici verò, seu summitati verticis insistit capitulum minutum, planum, & rotundum

dum, quo incudis apophysi (ut ante dictum) ligamento laxiusculo adnectitur.

*Os orbicula-  
re.*

Quartum ossiculum perexiguum & rotundum est, atque hinc **Os orbiculare** nominatur. Hoc stapedi, qua incudi committitur, per tenue ligamentum ad latus adnectitur. Lindanus illud appellat *cochlear*, eique tres processus adscribit.

*Meatus &  
tympani ad  
fauces.*

Inferius, anteriora versus, è tympano ad palatum meatus patet rotundus, qui inter duos faucium musculos delatus, partim in palati tunicam crassam, prope radicem uvulæ, ubi os palati superioris definit, inseritur: partim in naris sui lateris cavitatem amplo & cartilaginoso fine, mucosâ narium tunicâ (vel, ut putat Riolanus, membranâ ligamentali tonsillas includente) tanquam janitore, obducto, ingreditur. Per hunc humiditates præter naturam in tympano collectæ (testatur Aquapendens, se multoties, præsertim in pueris, internam cavitationem muco, & quidem multo, referam invenisse) ad palatum effluunt, & sonus in ore excitatus nonnihil aurem subit: quam ob causam hebetioris auditus homines ore aperto & respiratione cohibita melius audiunt.

Huic meatui interius pelliculam seu valvulam, versus palatum & nares prospicientem, & ascensum vaporum è palato & naribus ad aurium anfractus impediens, adponi, putant Fallopius & Laurentius, quam rursus Riolanus negat reperiri. Verum hæc forte propter nimiam parvitatem ac tenuitatem, à Fallopio & Laurentio melius ratione, quam à Riolo oculis videri potuit. Nam ratio docet, necessario aliquod impedimentum in isto ductu ascendentibus vaporibus objici, ut auditus organum ab iis non obfussetur: sed anne illud valvula sit, asserere non ausim: videtur mucosa narium interiorque mollis palati tunica, extremitatibus hujus ductus laxè apposita, isti muneri abunde satisfacere posse: quippe humoribus ex aure defluentibus facilem exitum, sed è faucibus aut naribus ascendentibus nullum introitum concedit, quia concidit, & plicatur in rugas.

*Observatio.*

Si in hac tympani cavitate humores excrementitii crudiores, obstructo ab eorum tenacitate dicto canali, subsistant, & nimia quantitate colligantur, ut in gravedine nonnunquam contingit, tunc læditur auditus, & à magna membranæ tympani tensione acer sæpe dolor inducitur, qui forti per nares aëris attractione & screatu sæpe multum lenitur, dum scilicet per violentiam illam canalis versus nares & palatum nonnihil aperitur, & humores intus latentes, quasi suctione quadam eo protrahuntur. Interdum etiam per topicorum discutientium applicationem, aut per solum ad-

jacentium partium calorem proprium humores isti attenuantur, & in vapores ac flatus rediguntur (hinc sæpe aurium tinnitus & susurrus) sicque magis fluxiles fiunt, ita ut per dictum canalem rursus facile effluere queant. Si verò nimis diu ibidem substiterint, nonnunquam rupta interiore tunica, meatus auditorius interius investiente, foras erumpunt, cum magno ægri levamine, & multis diebus per dictam rupturam insigni quantitate effluunt, usque dum interea canalis ab obstruentibus humoribus liberetur, quo facto, ad illam viam redeunt. In aurium autem morbis hic canalis medico bene notandus est, quippe per illum crassi humores masticatorii feliciter eliciuntur, & nonnunquam sternutatorii excutuntur, quod, præter rationem, ipsa quoque probat experientia.

In medio cavitationis tympani duo foramina *Foramina.* reperiuntur, quorum majus & altius, circiter in media concameratione constitutum, & stapedis basi clausum, ab ovali figura, **Fenestra**, vel **Fenestella ovalis** *Fenestella ovalis.* nominatur, & parte posteriore in labyrinthum se aperit insigni amplitudine. Alterum, quod minus, humiliter & rotundum, **Fenestra rotunda** dicitur. Hoc semper *Fenestra rotunda.* apertum manet, nec ab ullo corpore operitur, & in duos canales, squama ossa divisos, scinditur, quorum unus cum fenestella ovali cochleam petit, alter labyrinthum.

Est autem **Labyrinthus** cavitas tympano longe minor, quam ob semicirculos osseos excavatos, tenui membranula succinctos, per circuitus in eandem cavitationem redeunt, **Labyrinthum** primus appellavit Fallopius: at Platerus **Fodinam** nominat. In hanc cavitationem ovalis fenestella patescit: præter quam adhuc aliis quinque foraminibus pervia est: quorum unum in cochleæ latioris gyri finem sese aperit: per reliqua, quæ adeo exilia sunt ut vix capillum admittant, nervi acustici tenuissimæ fibrillæ ad membranulam internam succingentem procedunt.

**Cochlea**, à cochleæ in spiras contortæ *Cochlea.* similitudine nominata, labyrintho minor, sed insignis tamen cavitas est, gyris duobus, interdum tribus vel quatuor, cochleæ in modum, circumflexa, tenuissimæque membranæ succincta, in quam, ut in priore, per tria quatuorve minima foraminula tenuissimæ nervi quinti paris fibrillæ ingrediuntur.

Hæc cavitas Fallopio *caca* dicitur, quod nullum habeat exitum. Casserius tamen scribit, ex eo ductum produci in meatus nervi auditorii; quem etiam deprehenderunt Riolanus & Rolfincius, quorum hic dubitat, an non per eum ad aurem

Fff 3 defluat

defluat biliosum cerebri excrementum.

Has cryptas, labyrinthum & cochleam, scribit Riolanus, nulla prorsus membranula, ne quidem periosteo, investiri, sed in iis os nudum esse, ut melius resonet. Verum cum nuda ossa nullam resonantiam sentire possint, necessario requiritur membranula ex nervi expansione nata, quæ eam involvit, & per quam fit æris moti sensus. Quam membranulam etiam notavit Fallopius, *in observat.* esse tenuissimam & mollissimam: *An sit nervus expansus, an aliud quid*, inquit, *non refert, sed verosimile est, à nervorum propaginibus hanc membranulam ortum ducere.*

Præterea scribit idem Riolanus, *in enchiridio*, has cavitates in infantibus primo natis esse admodum angustas, nec labyrinthum, veluti in adultis, inspicere posse. Contra verò Veslingius, *anat. cap. 8.* scribit tympanum, labyrinthum, & cochleam, in primo natis infantibus, non magnitudine minus quam figuræ summetria, perfectioni suæ proxima esse, ut auditus perfectionem homo citius consequeretur, omni disciplinarum genere excolendus. In contrarietate ista dicendum, quod hac in parte cum Riolo sentiendum sit: nam licet tria ossicula, incus, malleus, & stapes, ab ipsa nativitate justam habeant magnitudinem, tamen labyrinthus in infantibus eo modo nondum est excavatus ut in adultis, sed ejus cavitas admodum exigua conspicitur.

*Aër insitus.* In his abstrusis cavitatibus aër continetur purus ac subtilis, quem multi statim ab ipso ortu inditum, & ex semine genitum putarunt, eumque propterea **Aërem insitum, congenitum, ac implantatum** vocarunt. Verum cum partium spermaticarum difficilis sit regeneratio, hic autem aër calore circumstantium partium continuè dissipetur, hincque continua regeneratione opus habeat: cum etiam hic aër nullâ continuitate cum ullis solidis partibus cohæreat, sicut spermaticæ partes omnes inter se cohærent, dici non potest eum, aut tanquam spermaticam aliquam partem isto loco detineri, aut è semine genitum, & ab ortu implantatum

esse. Hinc nonnulli statuendum existimant, illum non differre ab aëre externo, nisi quod multo purior & tenuior sit. An non posset commode dici, hunc aërem esse spiritum animale, per nervum in dictas cavitates effusum? quippe aëreus, purus, & subtilis est, sicut ille spiritus: utriusque eadem conservationis & refectionis est ratio: uterque perpetuo successive dissipatur & generatur: deficiente spiritu mox perit auditus, fortè quod etiam in aurium cavitatibus mox deficiat hic aër, qui internum est auditus medium, sine quo nihil audiri potest. Nonnulli tamen hunc aërem, quem implantatum vocant, & in prima delineatione etiam ex semine cum cæteris partibus genitum esse volunt, non auditus medium, at primum instrumentum esse statuunt. Sed hoc longissime abest à veritate: quia primum instrumentum necessario debet esse pars corporis vivens, cum omnes actiones opera corporum viventium perficiantur; atque hinc, quia hic aër non vivit, & corporis partibus annumerari nequit, utpote cum quibus nulla continuitate, cohæret, etiam non potest primum auditus instrumentum, sed ejus duntaxat medium dici, sicut aër externus dicitur esse medium visus, & quemadmodum sine hoc non potest peragi visio, ita sine altero perfici nequit auditio.

Ad nutritionem distribuuntur per internum auditus organum arteriæ venulæque plurimæ, ab internis anterioribusque ramis arteriæ carotidis & venæ jugularis profectæ, quæ dictarum cavitatum loca abdita variis propaginibus perreptant.

Ad sensum verò nervi inferuntur. *Mollior nervi quinti paris portio* (ut dictum *cap. 8.*) in meatum ossis petrosi posteriorem delata, ad cochleam & labyrinthi circulos progreditur, utrobique audiendi munus perficiens. Præterea accedit ramus à quarta nervorum conjugatione productus, is in tympanum protenditur, eique sensum, & musculus ejus movendi facultatem tribuit. Plura de nervis videantur *citato cap. 8.*

## T A B U L Æ X V. E X P L I C A T I O.

Hæc Tabula auris, præcipuè interioris, partes ostendit.

### F I G U R A I.

Auris externa integra, cum musculis & sinibus.


- A A. *Auricula helix.*
- B B. *Anthelix.*
- C. *Tragus, sive hircus.*
- D. *Antitragus.*

- E. *Lobus auris externa.*
- F F. *Concha auris externa.*
- G G. *Cavitas inter helices innominata.*
- H. *Musculus auriculam recta sursum movens.*
- I I. *Musculus triceps, eandem sursum trahens.*



FIGU-




III




II




VI




V




IV




X




IX




VIII




VII




XIII




XII




XI



XV



XIV



XVI





## FIGURA II.

- A A. Cutis cum membrana deorsum sursumque protracta.  
 B B. Cartilago auriculam constituens.  
 C. Foramen ad meatum auditorium pervium.  
 D. Portio ligamenti externæ auris.  
 E. Lobi auriculæ pars.

## FIGURA III.

Auris internæ pars anterior.

- A. Pars ossis temporum, os petrosum continens.  
 B. Meatus auditorius.  
 C. Limen meatus auditorii, sive alveare.  
 D. Processus mammiformis.  
 E. Processus styloformis abruptus.

## FIGURA IV.

- A A. Vestigium meatus auditorii.  
 B B. Membrana tympani.  
 C. Mallei pediculus per membranam transparens.  
 D. Processus mammiformis.  
 E. Processus styloformis.

## FIGURA V.

Musculi auris internæ.

- A. Musculus membranam cum malleolo extrorsum movens.  
 B. Membrana tympani.  
 C C. Musculus malleolum cum membrana introrsum movens.  
 E. Caput malleoli.

## FIGURA VI.

- A. Meatus auditorii pars.  
 B. C. Tympani cavitas, in qua.  
 B. Foramen ovale, quod stapede remoto conspicuum.  
 C. Foramen rotundum designat.

## FIGURA VII.

Os petrosum, cum ossiculis tympani in situ.

- A. Malleolus.  
 B. Ossiculum Incus dictum.  
 C. Stapedis pars superior conspicua.  
 D D. Cochleæ flexus nativa magnitudine detecti.

## FIGURA VIII.

Ossicula quatuor extra situm.

- A. Malleolus, cum duobus processibus.  
 B. Incus malleo applicatus.  
 C. Stapes.  
 D. Os orbiculare, ligamento stapedis annexum.

## FIGURA IX.

Ossis temporum facies inferior.

- A A. Pennæ anserinæ extremum in meatum

auditorium transmissæ per meatum qui ad palatum fertur.

- B B. Meatum eundem proxime ostendit, ex parte diffractum.

## FIGURA X.

- A A. Cochleæ cavitas, cujus portio latior excurrit ad labyrinthum.  
 B B. Cavitas labyrinthi, in qua foramen ovale, propter os à latere dissectum transparet. Quatuor foramina alia in circulos se aperientia, nigro colore inumbrata sunt. Quintum in extremo cochleæ gyro latiore effractum est.

## FIGURA XI.

- A A. Principium meatus, seu foramen primum ossis temporum, in quod nervus auditorius admittitur.  
 B B. Processus petrosus ossis temporum, in quo demonstratæ cavitates continentur.

## FIGURA XII.

- A. B. C. D. Finis meatus in quem nervus auditorius progreditur, limâ ablato osse, detectus.  
 B. Sinus in quo portio nervi auditorii mollior ad cochleæ centrum recumbit.  
 C. Apophysis inter utramque nervi portionem, pontis instar, prominula.  
 D. Sinus alter, ex quo per foramen cæcum portio nervi auditorii durior oblique descendit.  
 E E. Vestigia duo circulorum in labyrinthum tendentia.

## FIGURA XIII.

Portio ossis temporum, in qua scalpris dissipato tympano, &amp; meatu nervum auditorium suscipiente, apparet sub.

- A A. Portio nervi auditorii mollior.  
 B B B. Portio nervi auditorii durior, oblique sub tympano descendens, circa exitum crassior.  
 C C. Nervulus à quarto pari. descendenti duriori portioni nervi auditorii sese jungens.

## FIGURA XIV.

- A A. Concha.  
 B. Tympanum.  
 C. Malleolus.  
 D. Incus.

## FIGURA XV.

- E. Stapes.  
 F. Os orbiculare, ligamento stapedis annexum.  
 G. Foramen ovale.

## FIGURA XVI.

- H. Malleolus.  
 I. Incus.  
 K. Stapes.  
 L. Os orbiculare.

Ufus

*Ufus.* Usus omnium harum partium est, auditum perficere.

*Auditus definitio.* Auditus autem est sensus, quo ex aëris circumstantis vario tremulo motu, tympanum auris pulsante, simulque internum aërem cum nervi auditorii fibrillis, movente, sensorio communi communicato, percipitur sonus.

*An auditus sit actio.* An auditus sit actio, an verò passio, apud nonnullos disputatur. Major pars censet esse passionem: quibus se opponens Julius Casserius, *de org. audit. sec. 2. cap. 1.* dicit esse actionem. Verum cum ad auditum perficiendum necessario duo concurrant, scilicet, objecti receptio, & recepti perceptio ac dijudicatio: nos auditum, pro diverso hujus illiusve respectu, & actionem, & passionem dici posse existimamus. Nam receptio objectorum audibilium est vera passio: eorum verò perceptio ac dijudicatio est vera actio, eaque animalis.

*Sonus.* Objectum auditus est **Sonus**, qui nihil aliud est, quam qualitas orta ex aëre vel aqua, vehementi ac subita concussione percussis & fractis, nervumque auditorium, mediante aëre insito, moventibus.

*Generatio soni.* Ad generationem soni duo sunt necessaria, unum Medium, & aliud quod medium vehementer agitat. Medium debet esse fluidum, scilicet aër, vel aqua (nam pisces etiam audiunt) quoniam corpus solidum non potest esse medium auditus. Illud medium vehementer agitans, duplex est, nempe, vel corpus solidum, vel fluidum. **Solidum**; cum duo corpora solida (valde porosa, ut lanæ, spongiæ, aliaque similia, in concussione aërem non frangunt, sed in se excipiunt) vehementer percutiendo, aërem vel aquam cogunt, citò condensant, & rapide impellunt, ac frangunt. Dico, *vehementer & citò*, quia quæ sensim & leniter conjunguntur, aërem vel aquam adeo non frangunt, ut inde sonus fieri possit. **Fluidum**: cum ipsamet fluida, rapidissimo motu agitata, in sese fortiter condensata impingunt, & franguntur, sicque partim soni efficientis, partim medii rationem habent: qualis sonorus motus aëris fit in sibulo, tonitru, & bombardarum explosionibus: aquæ verò, in pluviis densissimis, in fluminibus ex alto delabentibus. Debet autem hic fluidorum motus esse rapidus, quoniam lenis medium tantopere non percutit, & frangit, ut sonum facere queat.

*Differentiæ soni.* Sonus varias habet differentias, quarum hæ sunt præcipuæ. Acutus, obtusus: rectus, reflexus, ut echo: naturalis, violentus: à rebus solidis, aut à fluidis: item ab animatis, aut ab inanimatis excitatus. Notandum autem, quod maxima sit dissimili-

tudo inter objectum auditus, nempe sonum, & reliquorum sensuum objecta: quandoquidem hæc actu, & ante, & in, & post sensationem sensibilibus inhærent: sonus verò neque ante, neque post, neque in ipsa sui perceptione actu & subjective existit.

Soni diversitatem & magnitudinem distinguunt quatuor ossicula tympano adstantia: prout enim ab externi aëris sonori (undarum instar, in quas lapillis incidit) fluctuantis impulsu majore vel minore; leni, vel aspero, &c. tympani membrana impellitur, aut incutitur in malleum, malleus in incudem, incus in stapedem, ita etiam aëris intus conclusi, facta per stapedem & os orbiculare majore minoreve fenestellæ ovalis apertione, liberior vel angustior in labyrinthum & cochleam datur transmissio, in quibus tortuosis & inæqualibus anfractibus diversimoda modulatione infringitur, sicque soni species gignitur, eaque pro externi impellentis diversitate, modò acutior, modò plenior, modò asperior, modò lenior, modò major, modò minor: cujus speciei idea per nervum acusticum, ruptas istas expansione sui investientem, deferretur ad sensorium commune, & sic menti representatur.

Verum etsi in labyrintho & cochlea commotus insitus aër infringatur, tamen de fine istius infractionis non eadem est Philosophorum sententia. Multi, cum Volchero, existimant, finalem causam esse, ut sonus per angusta transiens, tanto acutior & exquisitior fieret, eodem modo sicut in fistulis musicis sonus tanto acutior fit, quanto ex sunt angustiores & longiores: & quia canaliculi isti, propter ossis petrosi brevitatem, in longum protendi nequiverunt, hinc compensatam esse longitudinem gyroso anfractu & circumvolutione. Verum his regerendum, in dictis fistulis sonum fieri acutiorem, si ille primo in iis producat, sed omnino languidiorem & obscuriorem fieri, si eum forinsecus accipiant per aliud instrumentum, in quo primum excitatus est: sicut clarissime patet in Echo, cujus reverberatus sonus longe distat à sono primitus excitato, coque longe inferior & obscurior est. Arque ita etiam sonus qui in cavitate tympani primo acutus excitatur, necessario in dictis duabus cryptis imminuitur. Unde Julius Casserius de fine hujus infractionis longe melius sentit, *lib. de org. audit. sec. 3. cap. 7.* ubi sic inquit. *Aspera, foraminulenta, atque spongiosa existit concha (intelligit cavitatem tympani) ut si quando vehementior sonus in illam ingrederetur, qui ladere auditum posset, beneficio cavernularum, quibus plena est atque exasperata, vis ejus paululum retunderetur. Retusio autem hac, fractioque, certo termino ac meta debebat*

*Distinctio sonorum.*

*Infractionis finis.*

bebat esse definita, ne sonus aut nimiam, aut omnino obscuratus atque extinctus, auditionem debilem, ac depravatam, aut nullam pareret. Sed cum meta hac soni duplicationem ac Echo non effugeret, dua reliqua organi auditus cavitates, labyrinthus & cochlea, constructa sunt, ut cum sonus per harum circulationes atque gyros perfertur, sensim quiescat ac com-

moriatur. In situs igitur aer ab externo impellente in tympani concha commotus, eum in finem in dictis specubus, labyrintho & cochlea, necessario infringitur, partim ut ex diversimoda illa infractione species soni melius gignatur; partim ut sensim quiescat sine repercussione.

## CAPUT XIX.

## De Olfactus organo, &amp; ipso Olfactu.



Lfactus organum nasus est; qui in eminentiore corporis parte locum habere debuit, ut ascendentibus invisibiles halitus ac vapores melius susciperet, & eorum qualitates per nervos odoratorios, tunicae interiori insertos, ad sensorium commune deferret, mentique judicandos exhiberet, atque sic homo res appetendas vel fugiendas, quae in visum non incurrunt, nec auditu percipiuntur, cognosceret.

Nomina.

Nasum Græci *ῥίνα*, *ῥίνα* τὸ ῥέειν, *fluere*, & *μύκτις*, à *mucō*, cerebri excremento, quod per ipsum defluit, appellant. Ejus superior ossea pars immobilis, inferior cartilaginea mobilis existit. Media acuminata pars *ῥάχς*, *spina*, ac *dorsum*, dicitur: summitas verò *ῥῆμας*, *colatorium*, quia ibi mucus per ossa cribriformia colatur; ima extremitas *Globulus* & *Orbiculus* nominatur: laterales infimae partes *Ala*, & *Pinna*; duo magna foramina inferiora *ῥύνα* Aristoteli, *ῥῆμας* Dioscoridi, Latinis *Nares* vocantur: sepimentum medium foramina distinguens, Latinis *Columna*, Græcis *ἄμφω* dicitur.

Nasus.

Est autem Nasus faciei pars protuberans, olfactui inserviens, & in respiratione aëri transitum præbens, nec non cerebri excrementa, per ossa cribriformia transfluentia, dimittens.

Figura &amp; magnitudo.

Figura & magnitudo nota sunt, in quibus tamen aliqua incidit diversitas, ratione crassitiei, tenuitatis, longitudinis, æqualitatis, &c. Quo autem concinnior est in figura, magnitudine, & colore, eo plus confert ad faciei pulchritudinem ac venustatem, quapropter vulgo appellatur *Sol faciei*, quod sicuti Sol suo lumine singularem macrocosmo splendorem ac pulchritudinem confert, ita nasus pulchritudine sua microcosmum quasi illustrare videatur.

Indicia ex naso.

Ex magnitudine nasi nonnulli etiam de ingenii & penis magnitudine conjecturam fieri posse arbitrantur, & magno naso præditos aliquantum stupido ingenio, sed magno pene donatos; sed parvo naso præditos acutioris ingenii, sed morosiores, & parvo

pene donatos; mediocri decentis magnitudinis naso præditos, diligentes & dociles, atque animi moribus modestos, & pene mediocri præditos esse tradunt. Sed usus quotidianus docet has regulas admodum incertas esse, plurimasque pati exceptiones.

Constat autem nasus cuticula, cute, cartilaginibus, musculis, membranis, & vasis.

Cutis multo tenuior & durior est reliqua *cutis*. faciei cute, eique nulla pinguedo substernitur, atque hinc tam firmiter cartilagini & musculis adhæret, ut integra & illacerata separari vix possit. Sub septo tamen medio (quæ pars sub globulo ad labium extensa solet *columna* appellari) multo crassior & fungosior reperitur, atque interius pilis investitur, qui vibrisci dicuntur, & impediunt quo minus in inspiratione culices, paleæ, aliaque similia, versus interiora facile atrahantur. Hinc illa cutis introrsum reflexa degenerat in membranam nasi interiora investientem, cui in superiore nasi parte, aliquam duræ meningis, per os ethmoideum transeuntis, portionem admisceri, cum Julio Casserio, multi sentiunt, atque hinc fieri, quod illa investiens membrana in suppremitate longè exquisitioris sensus sit, quam subtus in primo nasi introitu.

Superiorem & immobilem nasi partem *ossa*. expansam sustinent ossa, eaque vel propria, duo scilicet externa lateralia, & unum internum medium, quod nasum in duas partes divincit: vel communia, de quibus omnibus vide *lib. 9. cap. 7. & 8.*

In his superioribus ossibus narium cavernis *ossa fungo-* utrimque alia adhuc ossea quædam substantia *sa.* spongiosa & fungosa observatur, ex ossis cribriformis inferiore parte pendula, & nasi parietibus adhærens, septo tamen non annexa, interius spongiosis subrubris carni- *Polypi cau-* bus oppleta, ex quibus oblæsis, tuncque *sa.* nimium incrementibus, generatur polypus.

Hæ spongiosæ substantiæ eum in finem *usus sub-* supremam cavitatem occupant, ut aërem *stantia* frigidum inspiratum sistant & alterent, ejus- *spongiosa.* que adscensum ad ossa cribriformia impediant, ut latius dictum *precedente cap. 8.* Ad

G g

hæc

hæc, ut descendens muci continuum subitumque defluxum aliquo modo retardent, utpote qui molestiam & foeditatem homini intulisset. Denique, ut voci etiam nonnihil inserviant, nam quibus exulceratione hæc ossa spongiosa exciderunt, vel quibus eadem nimis tumida, aut polypo-prolongata sunt, illis vox clangosa & vitiosa redditur; quia aer sonorus e faucibus prodiens, & aliqua parte per narium foramina ascendens, vel impingit in ossium exulcerationum inæqualitates, vel in eorundem nimias protuberantias, atque sic mutato aeris excutis motu, mutatur & vitiatur vox.

*Concidens  
naſi.*

In lue Venerea sæpe à malignis & acerbis humoribus illic hærentibus, solent hæ spongiosæ partes erodi, ac cum mucro cruento foedoque emungi, atque hinc malignitas illa se facillime in tenella proxima, medium & lateralia ossa extendit, quæ similiter erosa per particulas excutuntur, sicque naſus concidit, & interdum, erosione proserpente, totus absumitur, faciesque quam maxime deturpatur.

*Cartilagineſ.*

Inferiorem mobilem & exoscam naſi partem perficiunt quinque cartilagines: quarum duæ superiores, & naſi ossibus inferiore parte, quæ latiora & aspera sunt, adhærent, indeque invicem connexæ, ad naſi apicem vergunt, & quo longius feruntur, eo molliores fiunt, atque in naſi extremo veluti in cartilagineum ligamentum degenerant. Tertia inter illas media, septum est cartilagineum, quod ex osseo septo propendit, & prædictis duabus cartilaginibus, anteriore parte, regione interna, secundum longitudinem adnascitur. Quarta & quinta sunt inferiores duæ cartilagines laterales, duabus cartilaginibus superioribus, mediante membranoso ligamento, connexæ: quarum utrimque una naſi infimæ parti adhæret; & quia alarum modo naribus adstant, ac voluntario motu sursum, deorsum, introrsum, & extrorsum moventur, antiquis Anatomicis *Narium pinnae*, & *alæ*, Græcis *Πτερυγæ*, nominatæ sunt.

*Pinnae  
narium.*

*Musculi.*

Motus autem earum perficitur beneficio octo musculorum, quorum cuique alæ quatuor inferuntur.

*Primus*, a summitate naſi, juxta foramen lachrymale, initio acuto & carnoso ortus, ad latera ejus forma triangulari, vel Græcæ literæ Δ, descendens, in alam subjectam expanditur, eamque sursum attollendo, ducit.

*Secundus*, à propinquo maxillæ superioris osse delatus, partim in alam naſi exterius, partim in labii subjecti elatiorem sedem progreditur, adeoque partem utramque sursum movet.

*Tertius*, qui exilis est, circa pinnae radicem exortus, ac transversum supra alam de-

latus, angulo alæ inferitur, eamque dilatat, ut bene judicat Vellingius, alii tamen constringere tradunt,

*Quartus*, priori magnitudine similis, eique oppositus, sub tunica narium parte interiore latet. Hic ab ossis naſi extremitate ortus, in alam expanditur, eamque constringit. Est autem hic præ cæteris maxime exilis, atque vix, nisi in naſutis, invenitur, utpote in quibus omnes dicti musculi crassiores sunt, & manifestius conspiciuntur.

Præter hos musculos, scribit Bartholinus, se aliquando invenisse musculum carnosum tenuem, recta à frontali musculo basi latiore protensum, moxque angustiore circa cartilaginem naſi desinentem.

Intrinsècus, septi antedicti beneficio, distinguitur naſus in duo foramina vel sinus, quos *Nares* vocant, quia per eos odor & spiritus innare non desinit.

*Nares*

Horum quodlibet circa naſi medium in duas partes dividitur, quarum una sursum ad os spongiosum ascendit: altera supra palatum ad fauces descendit, per quam errhina in nares attracta in fauces & os delabuntur, ac potus aliquando per nares effluit, excrementa etiam mucosa cerebri, per ossa spongiosa descendunt, fortiore aeris per nares attractione seu inspiratione, ad palatum deducuntur, & sreatu exspuuntur, vel deglutita ad ventriculum descendunt.

Narium interior amplitudo investitur tenui membrana, quæ a crassa meninge, per foramina ossium cribriformium; vel, ut mavult Riolanus, per foraminula palati, erumpente oriri, & tunica, palati, linguæ, laryngis, & œsophagi communis esse, vulgo traditur. De hac membrana etiam paulo ante dictum: quid verò de ejus communione, cum tunicis linguæ, laryngis, &c. sentiendum sit, docemus *sequente cap. 24.* aliisque locis.

*Interior  
narium in-  
nica.*

Hæc membrana, qua parte ossibus cribriformibus adhæret, exilibus foraminulis seu propendulis tubulis pertusa est, ad excrementorum cerebri transitum.

Sub illa membrana latet caro quædam tenuis, mollis, ac papilloſa, quasi ex multis papillulis coagmentata, quæ in hominibus valde difficulter, in vitulis aut bobus paulo facilius invenitur, quamvis non sine molestia. Hujus papillulæ parte anteriore minores, versus posteriora verò majores protuberant, & à paucis Anatomicis sunt observatæ, à nonnullis pro exilibus glandulis habitæ: de harum usu mox dicetur.

*Caro papilloſa.*

Naſo ad nutritionem tribuuntur arteriæ à carotidibus, ab eoque venæ ad jugulares externas emittuntur.

*Vasa jan-  
guifera.*

Nicolaus Stenonis, *observat. de gland. o-* *Lymphati-*  
*culor.* præter hæc sanguifera vasa, in ovibus & canibus non raro observavit in utraque nare

*ca.*

nare vas lymphaticum longius (inveniendi modum etiam adscribit) e glandulis sub narium tunica, supra molarium regionem, sitis, exurgens plurimis radicibus, mox in unum ductum coeuntibus, qui deorsum versus progreditur ad extrema fere narium, & in sinum intra cartilaginofam alarum protuberantiam conspicuum, se exonerat. Putat idem, per foramen quod ex anterioribus naribus per palatum in os perforatur (de hoc dicemus *lib. 9. cap. 8.*) pituitosos humores e naribus in os profluere: quod tamen mihi non admodum verosimile videtur.

*Nervi.*

Ad sensum musculorumque motum, nervus utrimque unus à tertio pari, per foramen commune, ad majorem oculi angulum (ut dictum *precedente cap. 8.* in tunicam nasi internam, & ei substratam carnem papillofam, abit, in quam spiritus animales, ad olfactus sensum perficiendum, effundit, atque inde ulterius ad ejusdem musculos progreditur.

*Digressio.*

Quandoquidem autem de olfactus organo jam satis dictum, haud alienum videtur, de illo ipso sensu pauca subjungere.

*Olfactus definitio.*

Olfactus est sensus, quo res odoriferæ in nares delatæ, per specifi- cum motum organi odoratorii, percipiuntur.

Ut hujus sensus mysteria bene explicentur, tria consideranda veniunt, objectum, ipsum organum, & sensationis modus.

*Odor.*

Objectum olfactus est Odor, qui est halitus quidam spirituosus ex re odorifera in nares exhalans, organumque odoratorium hoc illo certo modo movens.

*An odores sint substantia.*

Sennertus, *instit. med. major. lib. 1. cap. 12.* multis verbis inculcare nititur, odores non esse substantias, nec etiam reales qualitates, sed tantum earum species, eaque de re prolixè agit. Verum paucis respondemus Sennerto, nullas qualitates, nullasque species posse subsistere sine aliquo corpore, atque hinc nullas posse dari, imò nec imaginatione concipi species odorabiles nulli substantiæ corporeæ impressas. Hoc in visu notissimum est, utpote in quo species visibiles sunt certæ aëris modificationes à rebus visibilibus in eo pictæ, eique impressæ, quæ sine aëre nullæ sunt, nam species sine substantia non subsistunt, & nullæ sunt. Sic etiam in odoribus, qualitates odorabiles necessario inhærent aliquibus substantiis, & quia sine his esse & subsistere nequeunt, hinc odores bene dicuntur, quod sint substantiæ qualitatibus odorabilibus donatæ. Istæ autem qualitates à substantiis abstractæ in rerum natura dari nequeunt.

*Odoris causa efficiens.*

Philosophi communiter odorem in sicco supra humidum prædominante constituunt. Sciendum tamen eum absque humido esse non posse, imò ex humido per calorem at-

tenuato & elevato generari. Dico, *per calorem*, quia calor est causa efficiens, quæ in subjectum, odorem potentia continens, agit, in coque halitus odoriferos excitando, odores de potentia in actum suscitatur. Atque hinc corpora odorifera redolent cum calent, at cum frigent, odorem non emittunt, nam odor actu non est nisi emittatur: sed per frigus claudens & stringens attenuari & emitti non potest, per calorem verò potest: hinc est, quod odorata, cum calent magis redoleant, minus verò cum frigent.

Hic fortè objicietur, quod odor sit aliquid per se subsistens, ergo humidum & calorem non esse ejus causas? Respondeo, odorem esse accidens in subjecto subsistens, in eoque latens, nec ex eo exire potens, nisi in & cum aliqua subjecti sui parte eum comitante (siquidem, secundum Philosophos, *Accidentium esse consistit in subjecto inesse*) nam extra subjectum est halitus humidus, qui suscitari nequit sine calore: atque hinc, & humidum, & calor necessario concurrunt, illud ut subjectum sine quo esse & perferri; hic ut causa agens, sine qua in actum suscitari nequit. Atqui, hic dicat quis, secundum hanc sententiam, odor per se nihil erit, & sic odoris nulla erit cognitio, cum non entis nulla possit esse scientia? Concedimus, quod odor seorsim & separatim consideratus nihil sit, neque sub sensum cadat, sed quod in & cum halitu consideratus, sensum moveat, & sub scientiam cadat: quatenus accidens per subjectum & subjectum per accidens mutuo quodam ordine, cognoscibile fit. Fortè rursus hic quisquam opponet, si odor actu duntaxat in halitibus existat, quomodo pisces in aquis odorem percipiant, ubi halitus non inveniuntur, cum tamen illos in aquis odores percipere, ex eorum natatione aliisque actionibus liqueat? Respondendum: 1. Merito dubitari debere, an pisces percipiant odores, & an ad res odoriferas accedant, vel ab iis fugiant, ratione percepti odoris grati vel ingrati, & non potius ratione gratitudinis vel ingratitude sapore, visu, aut tactu perceptæ, ex aliis qualitatibus e rebus odoriferis in aquam diffusis. 2. Seposito dubio & concessio illos odores percipere, minime dubitari debere, quin & in ipsa etiam aqua, per subtilem ætheream materiam, aquam quocunque modo permeantem, & motu suo aliqualem calorem ei inducentem, halitus aliqui suscitentur, in quibus odoriferæ qualitates (si quæ fortassis aquæ potentiâ in sint) de potentia in actum produci, & sic a piscibus percipi (si modo odores ut odores percipiant) possunt.

Odorum variaz sunt species & differentiæ, nam alii sunt acres, alii dulces, alii acidi, alii austeri, alii suaveolentes alii fetentes, alii grati & jucundi, alii ingrati & fastidiosi, &c. multique odores saporum differentiis applican-

*Odorum differentia.*

applicantur. Præterea, odores alii sunt simplices & naturales, qui per naturam corporibus in sunt: alii sunt compositi & artificiales, quales pigmentarii ex variorum aromatum permistione ad luxum & delicias conficiunt: alii denique sunt præternaturales, quales ex corruptione & putredine oriuntur.

*Organum odoratus.*

Organum odoratus est nasus. Verum cum ille ex multis variisque partibus construatur, quæ omnes simul isti officio præesse non possunt, diu multumque inter Doctores dubitatum est, in qua nasi parte odoratus perficiatur.

In vasis sanguiferis aut Lymphaticis, ossibus aut cartilaginibus illum non fieri, apud omnes in confesso est.

*An odoratus fiat per certos nervos.*

Fuere nonnulli qui per peculiare & alterius naturæ nervos naso insertos, & específicos etiam spiritus animales per istos nervos influentes, odoratum fieri crediderunt. Sed non observarunt quod omnes totius corporis nervi in compositione seu constructione vix aliter differant, quam quod alii sint majores, alii minores, alii longiores, alii breviores, alii crassiores, alii tenuiores, alii molliores, alii duriores: quod tamen, qualescunque fuerint, omnes uni eidemque muneri inserviant, scilicet viæ sint per quas spiritus animales deducuntur. Præterea etiam non considerarunt, quod illi spiritus, per quoscunque nervos delati, nullo modo sint diversi, nec alterius constitutionis qui per hos, quam qui per alios nervos ad has aut illas partes influunt, sed ejusdem sint substantiæ & naturæ, per quoscunque nervos, & in quascunque partes defluerint. Denique, non animadvertunt, quod diversitas operationum, quæ eorum ministerio perficiuntur, non procedat ab eorum, aut nervorum eos vehentium diversitate, sed à diversitate constitutionis partium in quas influunt: sic in oculo visum, in musculo motum, in cute sensum tactus faciunt. Igitur ut in naribus odoratum faciunt, debent naribus necessario etiam specificæ aliquæ partes inesse, in quibus, mediantibus illis spiritibus, non simpliciter tactus, sed odorum, ut odorum, suaveolentium, foetidorum, rosaceorum, camphoraceorum, &c. perceptio, & distinctio fit.

*An per processus papillares.*

Apud Galenum olim, & exinde apud plerosque Anatomicos & Philosophos fancitum est, processus papillares esse veros nervos odoratorios, & proxima olfactus organa. Verum istam opinionem merito rejecimus & refutavimus præcedente cap. 8. ubi docuimus, eos neque esse nervos, neque organa odoratus, sed ductus evacuandis excrementis dicatos. Eandem opinionem etiam destruit Vallesius, lib. 2. controvers. cap. 26. Verum Conradus Sneiderus, lib. de off. cribr. form. & odorat. organ. nec non Rolfin-

cus, lib. 4. dissert. anat. cap. 27. videntes vix fieri posse, ut in processibus papillaribus odoratus fiat, iis in subsidium adjungunt nervos à tertio pari ad nares derivatos. Verum ex antedictis patet, odoratum non fieri in peculiaribus aliquibus nervis, sed in specificis quibusdam partibus, in quas nervi suos spiritus infundunt: quæ partes certè non possunt esse processus papillares, cum illi neque spiritus vehant, neque in sese illos nervos recipiant, vel admittant, ut dictum cap. 8.

*An sint membrana.*

Plurimi alii judicaverunt odoratum fieri in membrana nares interiores investiente, eamque, præ aliis membranis, specificam aliquam constitutionem adeptam esse, cujus ratione odores distinguit. Verum, cum membranae sint organa tactus, non verò odoratus (qui sensus à tactu longe differt) & tactus quidem faciat ad perfectionem organi odoratus, quod tactu privatum etiam non odoraret, sicut oculus tactu privatus non videret: cumque aliud sit sentire & distinguere odorem rosæ, castorei, moschi, camphoræ, ruthæ. &c. aliud verò sentire asperum, dolorosum, durum, frigidum, calidum, &c. sicut in oculo aliud est videre colores, aliud sentire asperitates & dolores, satis patet, membranam, quæ est organum tactus non esse adæquatum organum odoratus. Nam organum tactus, quæ tale, non distinguit odores & colores: sicut etiam organum odoratus aut visus, quæ tale, non judicat de asperitate, dolore, frigore, &c. Hic non magni faciendum est quorundam effugium, scilicet, quod membrana quæ nares investit sit alterius naturæ ac temperiei, quam aliæ membranae: nam si hoc verum esset (quod primo probandum foret) tunc eatenus acutiore vel obtusiore tactu prædicta esse posset, sed tamen non distingueret, aut dijudicaret odores. Denique, si illa membrana odoraret, & sicut communiter traditur, communis ejusdemque substantiæ esset, cum membrana oris, palati, linguæ, &c. quare etiam in illis partibus non haberet illum odorandi usum, quem in naribus ei ascribunt. Julius Caserius de nas. fabric. sect. 3. cap. 6. antedictam specificam membranae nares investientis constitutionem sic describit: Internam, inquit, narium superficiem membrana quadam a dura matre exorta, à reliquarum membrandarum natura ac temperie multum distans, ambit. Sed ille tamen non judicat propter specificam istam constitutionem in ea olfactum fieri, sed in ea de primis qualitatibus, calore, frigore, &c. antequam ad cerebrum perveniant, acutius judicari. Nam, eodem lib. sect. 2. cap. 17. dicit, olfactum fieri in processibus mammillaribus, quam errorem jam ante etiam demonstravimus. Atque sic his arietibus conquassata conruit sententia de membranis jam relata.

Plures

Verum odoratus organum.

Plures de verò odoratus organo sententias hæcenus non audivimus, cumque ex modò relatis nulla rem acu tetigerit, tandem etiam nostra est adjicienda. Nos igitur in naso verum & proximum odoratus organum esse censemus, tenuem istam carnem papillofam, sub interiore narium tunica sitam (de hac paulo ante dictum) quæ non habet aliam sibi similem in toto corpore, cujus papillulas nervorum odoratoriorum fines ingrediuntur: eodem modo sicut gustus proximum organum sunt papillulæ sub extrema linguæ membrana sitæ, de quibus dicetur *sequente cap. 24.* & visus proximum organum est tunica retina. Non quod velim in hisce organis singulorum objecta percipi, sed singulis organis illatam à suis propriis objectis motionem, seu alterationem, mediantibus nervis & spiritibus in cerebro percipi, & à mente judicari.

Olfactus medium.

Medium olfactus constituit Aristoteles (*lib. 2. de anima, & 4. histor. anim. cap. 8. aliisque locis*) esse aërem & aquam. Hac in parte plerique Philosophi cum Aristotele consentiunt. Ab eo tamen dissentit Julius Casserius Placentinus, *lib. de fabric. nasi, sect. 2. cap. 13.* quo loco docere nititur, aquam non posse esse medium olfactus, & pro hac sua sententia varias adducit rationes, citato loco videndas. Verum si pisces odorari certum & verum sit, sicut illud tanquam verissimum statuitur ab Aristotele, extra omne dubium cadit Casserii sententia: si vero hoc in dubium vocari possit, etiam dubitari aliquo modo potest, an aqua sit olfactus medium. Etsi enim odoriferæ qualitates etiam per aquam diffundi, sicque aqua odorifera fieri possit, tamen illius odor non percipitur nisi mediante aëre, quatenus illius aquæ halitus in aërem sublatis, hoc aëre mediante organum odoratorium ferunt ac movent, sicque percipiuntur: nam si ipsa aqua odorata in nares attraheretur, non intercedente aëre, tunc ejus odor non perciperetur. Unde liquet in animalibus respirantibus medium olfactus esse aërem, & sine illo medio nullum odorem percipi posse. Anne in piscibus simile medium sit aqua, sicque ea mediante odores à piscibus quoque percipiantur, ut &, an animalia aërem non respirantia olfactu donata sint, Aristoteli probandum relinquimus.

Olfactus autem, seu odorum perceptio & dijudicatio hoc modo peragitur.

Modus olfaciendi.

Aër (in piscibus aqua, si modo odoratu præditi sint) odoribus, seu spirituosæ exhalatione rerum odorabilium alteratus seu imprægnatus, à naso, velut camino quodam, excipitur, sed olfactu non percipitur, nisi per inspirationem versus interiora ducatur: nam sine inspiratione per nares vix ullus odor percipitur, quamvis etiam ipsæ res odoratæ naribus propius admoveantur,

quod quilibet in se ipso experiri poterit. Isto igitur inspirationis motu opus est, utpote per quem, partim interioris membranæ narium pori aperiuntur: partim exhalationes & vapores odoriferi, pro illius motus majore minoreve impetu, melius per istos poros transeunt, aliquanto fortius in exiles papillosas dictæ papillosæ carnis protuberantias impingunt, easque specifico aliquo modo alterant; ex qua alterationis diversitate, per fibrillas nervorum tertii paris iis insertas, sensorio communi, & sic menti communicata, species odoris efformatur & à mente percipitur. Atque hinc, quo fortior sit inspiratio, eo melior sit odorum perceptio: unde illi, qui rosæ, alteriusve rei gratum odorem melius volunt percipere, ejusque amœnitatem frui, fortius inspirant: & qui fœtorem aliquem volunt fugere, minus inspirant: qui verò naribus à pituitæ defluxu (ut in gravedine) aliave causa obturatis, per eas inspirare nequeunt, illi etiam nullos odores percipiunt. Julius Casserius, *lib. 3. de organ. sens. sect. 2. cap. 2.* multis rationibus docere nititur, ad olfactum non concurrere respirationem ut medium necessarium, sed etiam sine ulla respiratione odores percipi posse. Verum quia ipsam experientiam sibi manifestissime contrariam habet, non est quod illum ulterius refutemus: idque eo magis, quia solum experimentum Lowerianum (à Gualtero Needham, *lib. de format. sat. cap. 6.* citatum) istam sententiam adeo pessumdat, ut ejus resurrectionis nulla spes supersit. Ille enim cani asperam arteriam in jugulo præscindens, eam extrorsum vertit, ita ut vulnere sanato, non amplius per os aut nares, sed per illam gutturis aperturam duntaxat respirare queat: huic non vox solum, sed & olfactus ita penitus perit, ut ne teterimis quidem odoribus excitari possit.

Hinc jam liquet, nulla animalia olfactu prædita esse, quæ non respirant (sive respirent aërem, ut terrestria, sive aquam, ut pisces) quamvis Bauhinus, *lib. 3. theat. anatom. cap. 66.* contrariæ sit opinionis, & putet etiam ea animalia, quæ non respirant, olfacere, quia scilicet vehementes odores, ut sulphuris, bituminis, &c. fugiunt, ab iisque corrumpuntur. Verum non consideravit Bauhinus, quod multa minuta animalia respirent, quæ nos tamen nescimus respirare, quia eorum respiratio, nobis non patet, nec oculis nostris videri potest, & talia forte odores quosdam fugiunt, quia ingratitudinem & offensionem eorum olfactu percipiunt; vel alios quosdam odores appetunt & prosequuntur, sicut ad putrescentia cadavera muscas, scarabeos, formicas, culices, aliaque similia minuta animalcula (quorum respiratio à nobis videri nequit) odore ducta, mox undequaque

Olfactus est in solis respirantibus.




de longe accedere videmus. Præterea nec illud animadvertit, quod illa animalcula quæ non respirant, simul etiam destituantur organis, non solum respiratoriis, verum etiam olfactoriis, sine quibus odores non percipiuntur; & quod talia non fugiant odorifera propter odorem, utpote quem non percipiunt, sed propter acrem, aliamve insensam qualitatem, quam sulphur accensum, multaque alia fortia odorifera circum

circa de se diffundunt, quæ corpora talium animalculorum erodit, aliave molestia excruciat, sicque corrumpit.

Quare autem alius odor gratus & suavis, <sup>quare odor</sup> alius ingratus & teter homini videatur, & <sup>gratus vel</sup> quare ab eo qui uni gratus est, alter abhorreat, illius diversitatis eadem ratio est quæ in gustu contingit, ac proinde super hac re videantur illa quæ scribimus *sequente cap. 24. ad finem capituli.*

## CAPUT XX.

## De Labiis, Ore, &amp; reliquis faciei partibus in genere.

**Genæ.**  Aciei partes sub oculis inter nasum, aures, & mentum expansæ, Antiquis Genæ, *γενæ* τὸ γένος, dictæ sunt, quia in iis pili gignuntur.

Hæ genæ dividuntur in partem superiorem & inferiorem.

**Malum.** Superior sub oculis inter nasum & aures leviter prominens ac rubens, Hippocrati *κυκλὸς προσώπου*, faciei circulus; & *μύλον*, *malum*, live *potum faciei* appellatur, ab aliquali similitudine cum malis, quo ad formam & colorem. Hæc Plinio pudoris sedes censetur, quod ea pars in pudore protinus rubescat.

**Bucca.** Inferior laxiorque pars, quæ à retento spiritu inflari potest, Bucca nominatur. In hac parte nonnullis ridentibus rima, seu ruga, in quibusdam scrobiculus seu fovea comparet, quam Martialis *gelasium*, id est, *risionem* appellat, deducta voce à *γέλασμα*, *rissio*. Cavitas labro superiori sub septo nasi impressa, *φίλτρον* dicitur. Istius verò utrimque à cavitate proflans pars *μύσας*, hincque barba ei innata Gallis *moustache* appellatur.

**Labia.** Margines autem oris dicuntur Labra, five Labia. Nonnulli quidem Grammatici labra à labiis distinguunt, quod labra sint modica, labia verò immodica, & plus quam justo crassa: verum hæc distinctio apud Anatomicos non habet locum, utpotè qui his vocibus indifferenter utuntur pro iisdem partibus quomodocumque constitutis.

**Prolabia.** Sunt autem labia duo, quorum mediâ rimâ os concluditur. Horum partes extremæ prominentes *προχέλαια*, Prolabia; & quæ in commissura rubent *προσώμια* dicuntur. Quæ verò pars sub inferiore labro in acutum protenditur, Græcis *ῥήγιον*, Latinis Mentum, & carnosâ sub mento aliquantum prominens, Buccula veteribus appellatur. Dicitur autem Mentum ab eminendo, quia eminet à gula, & est fa-

ciem pars infima, in orbicularem acutiem desinens. Circa hoc primum erumpentes pili, *χνῶς*, lanugo; adulti *παρρη*, καὶ *πρώγων* barba, dicuntur. Pili verò à lateribus, sub temporibus & genis prodeuntes, *ἰσλα* vocantur, quod instar vermis Juli appellati se involvant, & primam lanuginem constituent.

Constant autem labia carne molli ac fungosa, cui cutis cum musculis exacte miscetur, ita ut cutis musculosa, vel musculus cutaneus esse videatur. Hæc autem caro foris illa cute, intrinsecus membrana ori, œsophago & ventriculo continua integritur.

Nervorum propagines exquisitum sensum labiis conferunt: arteriæ verò à propinquis locis inter cutem & carnosam membranam dispersæ, sanguinem nutritium tribuunt, cui debetur purpureus ille labiorum color ac splendor, pulchritudinis & sanitatis nota. Arteriis immiscentur venulæ, superfluum sanguinem ad venas proximas deferentes.

Data sunt homini labia, tam ad edendi *Usus*, bibendique commoditatem, quam ad vocis aliquam formationem, salivæ retentionem, oris occlusionem, & ab externis injuriis defensionem, nec non ad ornatum, cujus etiam nomine in viris barba donantur. Quia autem ad dictos usus voluntario motu opus habuere, hinc varii ipsis concessi sunt musculi, *sequente capite* describendi.

Os, Græcis *στόμα*, modò dicitur rima os, illa quæ inter labia constituitur, modò tota cavitas ad fauces usque conspicua; quo sensu etiam Aristoteles, *lib. I. hist. animat.* breviter dicit, *Quod intra maxillas & labra continetur, os est.*

Altiori loco, in media scilicet faciei parte sub naso, locatum est, ut assumpta non solo gustu, sed etiam odore quodammodo cognoscerentur, & declivia facilius ad ventriculum descenderent.

Hujus partes aliæ ipsum os constituunt, aliæ in ejus cavitate continentur.

Os

Os ipsum partim constat ex partibus ossibus, ut maxilla superiore & inferiore, cum infixis dentibus, de quibus infra videndum, lib. 9. cap. 8. 9. 10. Partim ex carnosus, ut labiis, musculisque labiorum, buccarum, & maxillæ inferioris.

Tota interna oris capacitas succingitur tunica: quæ in capacitate intra dentes crassior, ac in palato rugosa: extra dentes verò in gingivis & labiis tenuior existit, estque (ut etiam ante dictum) tunicæ gulæ ac ventriculi continua, unde vulgò communis esse dicitur, cum tamen in lingua & palato con-

stitutionem peculiarem habeat, ab aliis tunicis diversam.

Uusus *primarius* est, ut in eo alimenta, *Uusus oris* tanquam in infundibulo recepta, ita masti-centur & præparentur, ut per œsophagum commode ad ventriculum descendere, in eo-que facilius digeri possint. *Secundarius* usus est, ut in respiratione aëri ad pulmonem comeanti transitum, & excrementis pulmonum, capitis, ac ventriculi, per screatum, exspuitionem, & vomitionem, exitum præbeat: denique ut ad vocis tonum aliquid faciat.

## CAPUT XXI.

## De Musculis Buccarum, Labiorum, &amp; maxilla inferioris.



Musculi buccarum & labiorum, aut sunt utrisque partibus communes, aut labiis proprii.

Musculi communes.

Communes quatuor sunt, utrimque duo.

Quadratus.

Primus sub colli cute latens, à figura *Quadratus* appellatur, estque tenuis & membranofus, cuti valide adhærens, ac proinde eum à cute non distinxerunt veteres. Sic etiam Veslingius illum nominat Membranam pinguedini subditam, & hic aliquo carnosarum fibrarum contextu præditam.

Oritur lato principio circa clavículas, scapulas, & posteriorem colli partem, ac fibris obliquis implantatur mento, labiis, & radici nasi, quas partes oblique deorsum trahit: & quia cum mento plurimum cohæret, idcirco oris apertioni auxilium ferre videtur. Nonnunquam etiam ad radicem auris progreditur, & quibus talis contingit insertio, illi hujus musculi beneficio aures movere possunt.

Varios nervorum furculos recipit à nervis cervicis. Hoc musculo convulso & tenso, fit spasmus cynicus, quem tamen Riolanus potius buccinatoris convulsioni adscribendum putat.

Illius fibræ chirurgis exacte noscendas esse, bene monet Bauhinus, propter incisiones quæ aliquando fieri debent: nonnulli enim harum ductum ignorantes, easque ampliore transversa sectione dividentes, buccas in alterutram partem avulsas effecerunt.

Buccinator.

Secundus musculus qui buccam constituit, hincque *Buccinator* dicitur, prædicto quadrato subjacet, & totam buccarum sedem amplectitur. Hic rotundus est, instar circuli, & à maxillæ superioris longitudine fere tota exortus, in inferioris maxillæ longitudinem ad gingivarum radicem inferi-

tur: vel, si mavis, à summis unius maxillæ gingivis, in alterius summas gingivas, circuli instar, terminatur. Tenuis etiam & membranaceus est, variis fibris intertextus, tunicæ oris interna investientis adeo arcte connatus, ut integer ab ea avelli nequeat.

Hujus musculi usus est, non tantum buccas cum labiis movere, verum easdem etiam constringere, & cibos ab ore in buccas prolapsos identidem rursus ad dentes propellere, ut accurata eorum fiat contractio, nec non inflationem, vocisque aliquem tonum facere, quatenus scilicet è pulmone in os influentem aërem constrictione sua, per labia plus minusve aperta, fortius aut mitius expellunt. Quorum omnium motuum varietas, versus inferiora, superiora, exteriora, & interiora, procedit à multiplici fibrarum, quibus intertextitur, varietate.

In musculi hujus centro robustum quoddam vinculum inveniri, tradit Placentinus, quod exterius enatum, & os gingivæ perreptans, in musculum quendam parvum ac gracilem, buccæ directe oppositum, terminatur: hoc tamen vinculum non agnoscit Riolanus.

Propriorum musculorum, solis labiis *Musculi labiis proprii.* inservientium, sunt quinque paria, & unus musculus orbicularis.

*Primum par* à maxilla superiore, ubi genarum cavitatem efficit, principio lato & carnosus enatum, variisque fibris præditum, oblique deorsum in priora fertur, & in labii superioris latus utrimque inseritur, idque sursum & extrorsum movet.

*Secundum par* à cavitate malis subjecta carnosus, sed gracili ac tenui principio ortum, multaque pinguedine obvolutum, in frenum, ubi labia conveniunt, implantatur, motumque prioris adjuvat.

*Tertium*

*Tertium par*, Riolano **Zygomaticum** appellatum, carnosum & teres, extrinsecus à processu jugali ortum, & oblique per genas descendens, in labii utriusque confinio terminatur, quod ad latera sursum versus abducit.

*Quartum par* à maxillæ inferioris humiliore parte, ad menti latera, carneo latoque principio exortum, in labii inferioris medium inferitur, idque deorsum extrorsumque movet.

*Quintum par* à maxillæ inferioris lateribus humiliore loco exortum carneo latoque principio, nonnunquam ad medium mentum protenso, sursum progreditur, sensimque angustatum, oblique in labium inferius prope finem inferitur, idque oblique deorsum extrorsumque trahit.

*Musculus orbicularis, & constrictor* dictus, qui utrique labio communis, est ille qui labiorum propriam figuram, mollemque substantiam constituit, & labium utrumque in oris circuitu efformat, totumque os instar sphincteris ambiens, & labia ad se mutuo adducens, fibris orbicularibus constringit, & cuti rubicundæ firmiter adhæret.

Omnes autem labiorum muscoli eorundem cuti, fibris decussatim se intercussantibus miscentur, unde admodum diversi labiorum motus procedunt.

Maxilla inferioris musculi.

Musculi maxillæ inferioris (superior enim immobilis est) validissimum in ciborum contritione motum perficientes, **Masticatorii, molares, & Manforii** nominantur, eorumque quinque numerantur paria.

Par temporale.

*Primum par*, validissimum maximumque **Crotaphytes**, seu **Temporale** dictum, circa syncipitis & temporum os carnosum principio exortum, pericranio integitur. Hujus fibræ quo magis à medio recedunt, eo magis oblique versus tendinem suum feruntur, atque hinc quo magis descendit, eo arctius crassiusque fit, ac tandem brevi quidem, sed robusto tendine inferioris maxillæ acutum processum amplectitur, eumque una cum maxilla potenter sursum attollit.

Nervos utrimque tres recipit, unum à tertio, alterum à quarto, tertium à quinto pari: quorum ratione contuso aut vulnerato hoc musculo, magnum periculum convulsionis & mortis impendet, præcipue si circa

humiliorem nervosamque partem læsio contingat.

*Secundum par* **Digastricum, Gra-phoides, & Biventre** appellatum, quia in medio extenuatum duos quasi ventres habet, prope mammiformem processum oritur, atque circa medium, ubi ad maxillæ inferioris flexionem curvatur, in corpus tendinosum angustatur, hinc rursus carnosum factum, interius parti anteriori mediæque menti adnectitur, & maxillam deorsum trahendo, os aperit, cujus maxillæ nimius descensus ab annexo ligamento impeditur. Ad dictam actionem melius perficiendam, cum hoc pari, officii similitudine, concurrat par quadratum, ante descriptum.

*Tertium par* laterale, **Masseterium, & Manforium primum** dictum, partim carnosum, partim nervosum principio, à maxilla superiore & osse jugali procedens, maxillæ inferiori latè valideque connectitur, eamque, ob fibrarum diversitatem, antrorsum, retrorsum, & in latera movet, ac quasi circumagit.

*Quartum par*, **Manforium alterum, Pterygoïdes, & Alare internum** nuncupatum, quod crassum & breve est, ab ossis sphænoïdis processibus aliformibus internis nervosum producit, & carneum, amplum, ac crassius redditum, lato robustoque tendine in partem inferiorem ac posteriorem interni lateris maxillæ inferioris deferitur, quam sursum trahendo actionem temporalis adjuvat: præterea maxillam extrorsum converfam retrorsum agit.

*Quintum par*, **Pterygoïdes, sive Alare externum** dictum, & in ossium temporum cavitate humiliore situm, ab osse sphænoïde & processu alari externo, gemino principio, partim nervoso, partim carnosum, prodit, & aliquo ductu in maxillæ inferioris cervicem, ac illius capitis internam sedem inferitur, atque maxillam antrorsum movet & abducit.

Præter modo dictos, etiam ad maxillæ inferioris musculos commodissime refertur par musculorum quadratorum, maxillam deorsum trahens, quod supra, inter musculos buccis & labiis communes, descripsimus.

## CAPUT XXII.

## De Gingivis, Palato, Uvula, &amp; Faucibus.

Gingiva.



Artes in oris cavitate contentæ, variæ sunt, inter quas primo occurrunt **Gingivæ** duæ, quas constituit caro duriuscula & immobilis, dentes instar valli cingens, eosque in suis alveolis stabiliens. Hinc gingiva Græcis *ἔλον* dicitur, ab *ἐλέω*, *involvere*, *coarctare*, seu *concludere*, quia est involucrium dentes concludens: & hinc etiam *ἐπυλὶς* Medicis vocatur tumor in gingiva natus.

Palatum.

Palatum, quod dentibus quasi vallatum sit, (Græcis *ὤπερῶα*, & *ἔρανός*, vel *ἔρα-νισμός*), quasi *caelum oris*, dictum) superior est oris pars, instar fornix leviter concava (hinc *oris testudo* nonnullis dicitur) in osse sphœnoide formata, à faucibus ad dentes usque extensa.

Constat ex ossibus (de his vide *lib. 9. cap. 8.*) carne peculiari & glandosa, seu ex conglomeratis exilibus glandulis constructa, & tunica crassa, multis minimis foraminulis, salivalem aliquem liquorem è palati glandulosa substantia transmittentibus, donata, quibusdam locis rugosa, cum tunica reliquas oris partes investiente continua, unde etiam vulgò gulæ ventriculoque communis dicitur, quamvis constitutionem peculiarem habeat ab aliis tunicis diversam, cujus ratione gustum una cum lingua perficit, eumque in finem nervis à quarto pari donatur. De hac tunica videatur *sequens cap. 24.*

Ufus palati est, partim gustum cum lingua perficere: partim vocem infringere, & perfectiorem reddere: atque hinc illi quibus hæc pars infelici ulcere exesa est, gustum habent imperfectiorem, & raucam ac ingrati vocem edunt.

Uvula.

**Uvula**, aliis **Uva**, **Gurgulio**, **Columna**, **Columella**, & **Gargareon** (Græcis *γάργαραν*) dicta, est caruncula rubicunda, fungosa, longiuscula, superius aliquantum lata, inferius obtuse acuta, à palati medio, juxta narium meatus in os, instar uvæ propendens. Hanc Bauhinus, alique nonnulli Anatomici, putant nihil aliud esse, quam oris interiora investientem membranam reduplicatam.

Mollissima laxaque pellicula, à palato dimissa, investitur, & à pituitosis defluxionibus facile intumescit ac prolongatur, qui affectus **Casus uvulæ** appellatur.

Huic Riolanus & Vellingius muscutorum duo paria, externum & internum, ad suspensionem levemque motum ad-

scribunt. Horum tamen opinionem solummodo conjecturalem esse, docet autopsia, cum tales musculos ea in parte demonstrare difficillimum foret; cum etiam uvula iis non indigeat ad suspensionem, ut neque ad motum voluntarium, qui nullus in ea parte animadvertitur.

Præterea Riolanus, Aretæum secutus, uvulæ duo ligamenta lata, alis vespertilionum expansis similia, *galsamach* Arabibus dicta, tribuit. Verum & hæc, non minus quam dicti muscoli, conjectura potius, quam demonstratione probantur: nisi quis forte posteriorem membranosam palati partem, ex qua uvula propendet, pro ligamenti habere velit.

Ufus uvulæ varius est.

Ejus usus.

1. Aëris frigidioris inspirati impetum nonnihil frangere, ne in pulmones subito irruat, eosque lædat.

2. Impedire ne humores per palati superiora descendentes, recta in laryngem copiosi incidant, sed deglutitione retrorsum actâ uvulâ, una cum ea versus œsophagum deflectantur, in eumque decendant.

3. Impedire ne potus ex ore in nares regurgitet.

4. Ad vocis tonum aliquid conferre (hoc Fallopius, alique nonnulli, præter rationem, negant) licet enim vocis modulatio fiat in larynge, tamen latior vel angustior exitus istius jam modulatae vocis ad ipsum vocis tonum plurimum confert: quod ex eo liquet, si quispiam specillis naribus impositis & compressis canat; longe enim alia erit illa vox, quam si naribus non compressis canat. Sic etiam ablata uvulâ vox ingravescit & vitatur, ut patet in iis quibus uvula exulcerata decidit: atque hinc illam ad vocis tonum conferre certum est.

5. Fallopius putat primarium ejus usum esse, ut lymphidissimum aliquem liquorem instillando, epiglottidem & laryngem humectet.

**Fauces** improprie de toto oris hiato *Fauces*.

dicuntur; proprie verò designant posterius & inferius spatium, ubi linguæ & asperæ arteriæ extrema, nariumque foramina per palati posteriora descendentia, concurrunt, quod ore aperto & linguâ depressâ conspicitur, ac Græcis *φάρυγξ*, Galeno etiam *ἰσμός*, & Hippocrati *ἰσμιον*, per metaphoram, ab angustia, dicitur: quia isthmus proprie terræ angustum tractum inter duo maria significat; & sic in faucibus uvula,

H h h

tandem

tanquam terræ tractus, in medio faucium hiato propendet, quam tamen uvulam non appellant isthmum, sed ipsum hiatum faucium in quo uvula dependet, cum tamen ad ipsam uvulam nomen illud pertinere deberet.

Nicolaus Stenonis, *observat. de gland. oculor.* in capite vitulino, sub tunica fau-

cium, observavit carnem quandam ex glandis glandosis compositam, vasculis lymphaticis donatam.

Faucium usus est, illa quæ ore assumuntur, transmittere & deglutire, quæ actio perficitur tribus musculorum paribus pharyngi cum œsophago communibus, *lib. 2. cap. 16.* in œsophagi historia descriptis.

## CAPUT XXIII.

## DE OSSE HYOIDE.



Os hyoidis.

Ntequam linguæ historiam aggrediamur, nonnulla de osse hyoide præfanda sunt, utpote quod ad firmiorem linguæ structuram, motumque faci-

lem, fulcimenti gratia substernitur.

Constat autem Os hyoidis ex variis ossibus, quæ quia simul juncta Græcorum literam  $\gamma$  vel  $\Delta$ , quo ad formam, aliquo modo referunt, hinc etiam Os Ypsiloides, & lambdoides nominatur, quamvis melius  $\gamma$ . referat quam  $\Delta$ . cum non acuto, sed obtuso ac subrotundo semicirculo circumducatur.

Ex tribus potissimum ossibus constituitur (rarius ex quinque, septem, novem, vel undecim) quorum medium reliqua superans magnitudine, amplum, latum, foris gibbosum, & intus nonnihil excavatum est: huic reliqua duo, cornuum instar, committuntur. Si autem supra ternarium numerum plura ossicula adsint, illa cartilaginea existunt.

Riolanus, *anthrop. lib. 5. cap. 1.* de osse hyoide hæc notat: Ceterum os hyoides, inquit, in mulieribus gracilius & tenuius apparet, paucioribusque constat ossiculis, quorum vicem supplent suspensoria ligamenta productoria. Deinde notabis, cavitatem hyoidis solam epiglottidem excipi; linguam superno lateri basis inniti.

Junguntur his ossiculis quatuor exiguae cartilagines, quæ & ipsæ nonnunquam ossæ evadunt. Harum duæ ad medii ossis basin subsistunt, forma & magnitudine granum tritici æmulantes. Duæ aliæ juxta ossa lateralia, seu cornua, sedem habent, eaque nerveo ligamento styliformi appendici connectuntur. Atque ita os hyoidis à lateribus adhæret isti appendici, antèrè cartilagini scutiformi laryngis, & imprimis linguæ, atque epiglottidem sinu suo excipit.

Cum movetur lingua, tunc etiam movetur hoc os, idque beneficio octo musculorum, quos cum lingua communes habet. Horum

*Primum par*, Sternothyoides appellatum, deorsum & retrorsum movet, oriturque lato ac carnosio principio à superna interiore ossis sterni sede, & antèrè in basin hyoidis desinit.

*Secundum par*, quod longum Coracohyoides antiquitus dictum, à latere superiore scapulæ, prope coracoïdem processum exoritur, medioque corpore instar tendinis extenuatum, sub capitis musculo septimo oblique desertur ad ossis hyoidis latera, eaque oblique deorsum trahit.

*Tertium par* gracile ac teres, sub mento situm, à styliformis processu extremo (unde Styloceratoides dicitur) tereti ventre procedit, & hyoidis cornibus implantatum, oblique sursum movet.

*Quartum par*, Geniohyoides appellatum, recta sursum, & nonnihil antèrè trahens, à menti interna & humiliore sede amplo carneoque principio ortum, ad mediam ossis hyoidis sedem extenditur.

His paribus adhuc duo alia adjungit Fallopius, in *observat.* scilicet

*Quintum*, quod rectis fibris à medio internoque mento exortum, in os hyoides inferitur. Hoc par multi cum præcedente quarto confundunt, & pro eodem habent: alii linguæ musculis annumerant, sicut etiam nos *sequente capite* facimus.

*Sextum*, quod dicit constitui geminas carnes, musculorum effigiem gerentes, quæ ab eodem mento ortæ, aliqua ex parte commistæ apparent cum prima movente linguam: verum ulterius ad inferiora procedentes, inferuntur in latera ossis hyoidis, idque os ad mentum trahunt.

## CAPUT XXIV.

De Lingua, Ductibus salivalibus, Saliva, Gustu,  
& Sapore.Vide Tabu-  
lam XVI.

**L**ingua, à *lingendo* Latinis, vel, ut nonnullis placet, à *ligando* (quod liget cibos, vel etiam articulatos sonos in verba liget) dicta, Græcis γλῶσσα, & γλῶττα, appellata, est pars organica, gustus & sermonis instrumentum, cibi potusque deglutiendi adminiculum, in ore sub palato situm.

Figura.

Oblonga est, lata, magnitudinis mediocris ori respondentis, & circa radicem insigni crassitie prædita, ad extremitatem verò tenuior.

Substantia.

Peculiarem obtinet substantiam, carnosam & mollem, gemina membrana contextam: una exteriore, crassa; altera interiore, tenuiore.

Membrana  
exterior.

Exterior superiori planitie linguae imposita, valde porosa, & in hominibus mediocriter lævis, in plerisque verò brutis, præcipue quadrupedibus, aspera, ac in superficie lineola per mediam longitudinem excurrente, quasi in duas partes distincta est.

Hæc membrana vulgò ex crassa meninge producta censetur, & ori, palato, œsophago, ac laryngi communis esse traditur. Verum cum illa totam linguam undequaque non investiat, sed per ejus planitiem duntaxat, usque ad radicem & fauces extendatur, neque ad inferiori linguæ partem, ut neque ad œsophagum perveniat, sed ejus interiori tunica solummodo uniatur; illique etiam in lingua & palato aliam alterius naturæ substantiam crassiorem esse, satis liqueat, nullam ei cum œsophagi & laryngis membranarum communionem esse, clare patet. Quamvis enim in homine illam crassitiem & asperitatem non habeat, quæ in multis brutis conspicitur, tamen crassior est, multumque differt ab eâ, quæ laryngem & œsophagum interius investit. Quæ differentia etiam innotescit, cum in aphthis, in febribus ardentibus, magnaque siti nimis exsiccatur & exarescit, ac postea de novo humectata, triplo crassior separatur & decidit, quam sunt œsophagi & laryngis membranæ. Præterea, sicut oculi, auris, & narium tunica ab aliis membranarum, imò & à se invicem multum differunt, etsi à meningibus procedere credantur, ita etiam hæc linguæ tunica, una cum lingua & papillis nerveis, organo gustus servitium aliquod præstitura, debuit necessario peculiarem aliquam constitutionem præ aliis mem-

branarum habere, cujus ratione specificum aliquod servitium gustui conferre posset. Neque est quod specificum hic requisitum officium aliquibus specificis nervis ei inferatis, aut specificis spiritibus acceptum feramus, quoniam ea de causa nihil specifici in partibus fieri, supra docuimus, cap. 19.

Hæc membrana, ut ante dictum, valde porosa est, & talis esse debuit, ut res gustandas (quas ipsamet, ob sensum obtusorem ei concessum, ne ab objectis acerbis gustabilibus & tactilibus facile læderetur, non satis acute percipit) ei impositas, & linguæ motu super ea agitas, mox per dictos poros aliqua sui parte dimitteret ad papillas nerveas ei suppositas.

Eadem illa membrana in bobus, ovibus, aliisque similibus brutis (in quibus multo crassior est quam in homine) superiore regione aspera est, ex eaque plurima corpuscula acuminata, nonnihil cartilaginosa, inæquali longitudine prædita, serie quadam disposita, modice incurvata, ac versus radicem protensa, tenui tunica, desumpta à membranâ, è qua procedunt, investita (an intus cava sint, hæcenus comperire non potuimus) erumpunt, quæ istam asperitatem inducunt: quæ tamen corpuscula in eminentiore linguæ parte versus radicem, pauciora ac longe minora, & in multis quoque nulla conspiciuntur. Talia tantæ magnitudinis corpuscula in humana lingua non adsunt, atque hinc fit quod ejus non sit magna asperitas. Anno tamen 1660. in prosecutione cujusdam, qui in vita furum capitaneus fuerat, illam asperitatem valde spectabilem reperi, atque in theatro anatomico publice demonstravi: erat quippe superior linguæ regio minimis aculeatis corpusculis, quasi aspera quadam lanugine, obrita. Quod autem in plurimis brutis hæc cartilaginea corpuscula longiora & multo majora sint, quam in homine, & quod acuminibus suis versus fauces spectent, eum in finem factum videtur, ut alimenta, quæ prona à terra assumunt, in ore melius retinerent, nec ea facile ex ore elaberentur: qualis longitudo in homine necessaria non fuit, utpote qui pronus sua alimenta non assumit, & in os immissa ex eo non facile elabi possunt, propterea quod erectus ea sine molestia intra os continere queat, atque hinc ei corpuscula hæc exilia, & levis linguæ asperitas ad alimentorum retentionem sufficiens fuit.

Corpusculo-  
rum cartila-  
ginosorum  
usus secun-  
darius.

H h h 2

Verum

Ufus pri-  
marius.

Verum istorum cartilaginorum corpusculorum jam dictus usus videtur tantum esse secundarius, utpote in quem solum tanto tot corpusculorum apparatu opus non fuisse videtur: sed quisnam sit primarius eorum usus, de eo haecenus inter Doctores valde dubitatum fuit: cum enim fistulosa & pervia non sint, in iisque nulla minima cavitas microscopio detegatur, salivam, aliumve quemcunque humorem in os aut exteriora linguae (quod nonnulli sentierunt) profundere nequeunt. Acutissimus Malpigijs credit hisce corporibus, mediante linguae impulsu, compressionem quandam fieri in palatinis glandulis à Stenone observatis, atque sic ex iis exprimi salivam & mucum, pro linguae totiusque oris humectatione: & hinc naturam in brutis, quae duris crudisque cibis vescuntur, non solum palati involucrium crassius, sed etiam haec linguae insistentia cartilaginosa corpora duriora & altiora, seu longiora dedisse, ut sic continuo superiora scalpendo, fortiter humidum exprimerent: eademque in hominibus, aliisque animalibus, quibus laxior & mollior contigit palati structura, papillarum adinstar, flaccida & flexibilia fecisse, utpote in quibus ille muci proventus levi vellicatione & compressione satis facile provocari poterat. Præterea etiam merito dubitandum existimat, an non horum corporum radices glutinosae substantiae, sub crasso involucrio sitae, foraminibus mox describendis implantatae, dum lateraliter illic subsistentes papillulas urgent, compressionem, & sapidi corporis intus pulsionem faciant, ita ut major contingat vellicatio & motio.

Substantia  
glutinosa.

Sub dicta crassa membrana mox sese offert glutinosa quaedam substantia, instar crassioris retis, per superiorem præcipue linguae partem extensa, conspicuis foraminibus (quae singulis cartilaginosis cornibus, exteriori jam dictae membranae insistentibus, correspondent) prædita, inter quae etiam innumeri exigui diversae figurae meatus, versus exteriora hiantes, microscopio deteguntur. Eiusdem glutinosae substantiae etiam in palato & buccis aliqua vestigia apparere, notavit Malpigijs. Fuere qui arbitrati sunt in hac glutinosâ substantiâ gustus sensationem fieri, sicut visus in retinâ tunicâ: alii, qui in illâ salivofum quendam liquorem colligi, ac per crassi involucri poros in linguam, ad ejus humectationem, cructari existimarunt. Ego puto illam facere ad sapidas humiditates excipiendas, & nonnihil continendas, ut illae sic papillulis paulo firmitus adhæreant, easque asperitatibus suis commodius alterent, ut ita melius percipiantur.

Corpus pa-  
pillare.

Post dictam glutinosam substantiam, proximè sub linguae involucrio latentem,

occurrit corpus quoddam, quod *crustam carneam* appellavit Laurentius Bellinus, lib. de gust. org. cap. 12. sed nullo peculiari nomine donavit, propterea quod nec membranae, nec muscoli, nec nervi, nec glandulae, ullam similitudinem in colore, structura, vel substantia habere videatur. Hoc corpus, quatenus in lingua bubula conspicitur, admodum accuratè describit Malpigijs, lib. de lingua. Hac [glutinosa jam dicta substantia] examinata, inquit, in conspectum sese offert nervosum & papillare corpus subflavum & subalbum, per totam præcipue superioris areae portionem, membrana instar excurrent, considerabilis etiam altitudinis. Hoc interiore superficie, qua nectitur subjectis lingua carnibus, laevè & aequale videtur, præter quasdam connexiones seu propagines nerveas inter carneas lingua fibras disseminatas, quibus nectitur, vel, si mavis, adnascitur: exteriore verò parte inaequale est, papillas enim nerveas insignes, miro ordine dispositas, promit: haec in bove, caprâ, ovis, & ipso etiam homine, configuratione & magnitudine sunt in triplici discrimine: observantur enim aliqua grandiores, quae ad latera præcipue apicis linguae situantur inter infra exarandas: in area etiam superioris linguae quadrato ordine disponuntur; circa mediam regionem, ubi albescit lingua, rara observantur; in basi autem lateribus aliqua, & insigniores. Haec substantia & figura videntur emulari cornua emissilia & conductilia quae in limacibus conspiciuntur; altiore enim pollent pedunculo, qui superatâ mucosâ substantiâ, in rotundum desinit capitulum, quod in concava quadam attenuata exterioris membrana cavitate locatur. Exordium habent à nervoso & papillari corpore, continuas enim, eadem accidentia, & substantia modus in utrisque consimilis observatur: hoc autem peculiare obtinent, quod in basi propaginem nerveam habeant, cui appenduntur, vel potius adnascuntur. Succedunt alterius ordinis papilla copiosiores exaratae: quot enim cornua exterius linguam tegunt, tot etiam hujus generis nervea papilla intus reperiuntur: haec exorta à communi papillari corpore, in mediocrem altitudinem elevantur, & ab extremo capite nerveas propagines ulterius emittunt, quae subintrant in exaratos sinus, & cornuum radicibus occurrunt: circa has innumera fere conspiciuntur papilla, idem exordium sortita, & ad eandem altitudinem elevata, graciliores tamen, quae coniformem referentes, proprios sinus in jam exarata mucosa substantia excitatos subintrantes, tandem desinunt versus extimam membranam. Circa basin linguae in cornuum situ papilla nervea enarrata foras eminentes mutant figuram, & obtusiores, mox subrotunda & depressiores fiunt, & harum insigniores non valde absmiles sunt, in quae ad radices dentium in buccis observantur. Sciendum tamen, idem papillare corpus



corpus, & utrumque subextensum involucrum, licet valde gracile, in palato & buccis etiam reperiri, hac tamen conditione, ut his in locis papilla grandiores foras erumpant, conicam figuram referentes; prope quas observantur excretoria vasa in subjectis glandulis implantata, & inter hac perpaucula minimaque nervosa papilla disseminantur. Hæc Malpigijs: qui tandem concludens, scribit ortum hujus papillofi corporis valde incertum esse, & Columbum quidem ejus principium à dura meninge calvariam elapsa, una cum cæteris oris interioris membranis, deducere; verum se existimare, illud potius oriri à nervis propaginibus in membranam dilatatis, sicut in aliis organis sensorii illud ipsum contingit.

Fibra.

Linguae, præcipue humanæ, substantia fibris tenuibus prædita est, atque propter illam tenuitatem, putarunt ante hac nonnulli rudiores Anatomici, linguam fibris prorsus carere. In bovis, & ovium, aliorumque multorum brutorum majorum linguæ, hæc fibræ satis conspicuæ existunt: quas ipsas etiam in lingua humana, tam eruda, quam cocta, vidimus. Versus linguæ radicem his fibris nonnihil pinguedinis interferitur, iisque etiam in basis lateribus exiles glandulas, milii instar, interjici, observavit Malpigijs.

Tam vario & obscuro modo hæc fibræ sibi invicem intermiscuntur, ut earum in situ ordinem explicare admodum difficile sit: Riolanus, *animadvers. in Bartholin.* has maxime diversas, sibi invicem contrarias, & diversimode intertextas esse, observans, desperat de earum explicatione; *Hac tamen corpora*, inquit, [duo scilicet linguam constituentia] *obliquas, transversas, rectasque fibras simul adepta mihi videntur, quæ invicem adeo coeunt, commiscunturque, ut in his fibrarum aliquod genus assequi, prope modum sit impossibile.* Quod Riolanus assequi non potuit, hoc se assecutum putat oculatissimus Nicolaus Stenonis, qui, *lib. de musc. & gland.* harum fibrarum ordinem & ductus sic describit: *Ab apice ad ipsam usque basin distincte omnes fibrarum series licet demonstrare attendenti.* Exteriores, superiorique superficiem proxima fibra rectum, secundum linguæ longitudinem, servant ductum: reliquarum, totum medium corpus occupantium, duo tantum sunt genera: unam quod à superiore lingua plano descendit, alterum quod à medio versus latera in homine recedit. In certis hac duo genera series disposita sunt, se alternatim excipientes, quarum singula vix nisi unam in crassitie continent fibræ, ita ut stratum supra stratum hic non inepte applicarent chymici. Ipsum superius lingua planum, unicam anteriorem inter & carnes, carniuntendines servat clausas. Hæc N. Stenonis. Ego, ut verum fatear, in harum fibrarum eno-

datione aliquoties satis diligenter occupatus fui, sed propter diuturnioris laboris impatientiam, illud quod desiderabam obtinere non potui; adeo enim inter se intricatas inveni has fibras, ut vel ego eas ad lubitum explicare non potuerim, vel illæ se explicari à me noluerint: plurima suspicari solummodo, nihil certi decernere licuit, atque hinc omnem spem istius telæ detexendæ abjiciens, gratulabor imposterum Nicolao Stenonis, & aliis, si hac in re aliquid præclarioris præstiterint, vel posthac præstare possint.

Quia autem linguæ corpus ex innumeris Lingua mō- fibris, modo relatis, contextitur, & insuper varios musculos obtinet, dubium incidit, quo motu lingua moveatur, an à propriis fibris, an verò à musculis, vel ab utrisque. Ultima sententia plerisque Anatomicis placere videtur. Julius Casserius Placentinus, *lib. de organ. gust. cap. 5.* linguam non quidem musculum, sed partem musculosam appellat: *Fieri non potest*, inquit, *quin lingua proprio motu, & quidem voluntario, prædita sit, tot enim modis movetur, ac in tot partes agitur, ut à musculis omnem ejus motum absolvi, asserere ridiculum foret.* Neque tamen propterea eum musculum vocavero, sed musculosam, utpote qua aliquid de natura musculorum participat, & inter musculosam ac glandulosam carnem media existit. Laurentius Bellinus, *lib. de gust. organ. cap. 13.* præter fibras, etiam admirabilem motus varietatem & rapiditatem considerans, dicit illam esse musculorum invicem coeuntium contextum. Riolanus, secundum Averrhois opinionem, præter motum à musculis factum, adhuc alium proprium motum linguæ adscribit, & reprehendit Andreæ Laurentium, quod hunc non animadverterit: quippe linguam in celeri & continuata locutione suapte natura moveri, ejusque extremitatem admodum mobilem in omnes motus differentias non à musculis agitari, sed musculos duntaxat validiores motus facere, planum esse putat. Spigellius, *lib. 4. anat. cap. 6.* copiosissimas linguæ fibras animadvertens, absolute pronunciat eam esse musculum. Verum istorum clarissimorum virorum nemo satis bene observasse videtur, tot diversas, sibi invicem mutuo diversimode impositas, ductibusque contrariis intertextas fibras musculorum actioni (quæ est attractio) inservire non posse, cum unius fibræ tractio ab alterius operatione impediatur, nec in tanta oppositionum & impositionum contrarietate ulla sit quæ musculi officium linguæ præstare possit. Cum insuper solæ fibræ non doceant partem aliquam esse musculum, aut debere appellari musculosam, propterea quod ventriculus, intestina, vesica urinaria, & fellea, aliæque plures partes, habeant omnis generis

H h h 3

generis fibras satis conspicuas & copiosas, & tamen musculorum ordini accenseri non possint, nec debeant. Rapiditas & varietas motus non docent linguam esse muscolum, sed potius eam à musculis rapide moveri, quod ex eo patet, quia motus ille est plane voluntarius, & ad hominis arbitrium fit, qualis motus à solis musculis peragitur, in parte quæ ipsa musculus non est. Et quis, quæso, mentis bene compos, sibi persuaderi sinet, ullum motum arbitrarium, qui ad voluntatem fit, vel fieri potest, sine musculis peragi? Movemus linguæ etiam extremitatem ad nostrum arbitrium, sed hoc per musculos, utpote quorum tendines suas fibrillas tenuiores eo usque emittunt. Celeritas motus pro adversariorum sententiâ nihil probat, quia illam non minorem facere possumus digitis, quam linguâ, quos tamen à musculis moveri, nemo diffitebitur. Denique duo validissima argumenta totam musculositatem linguæ penitus convellunt. I. Nullus musculus propter se ipsum est conditus, sed propter partem aliam per se ad arbitrium immobilem, ut eam scilicet moveat: atqui lingua, si musculus foret, propter se ipsam condita esse deberet, cum nulli corpori inferatur ut illud moveat. II. Nullus musculus alteri musculo inferitur, ut eum moveat; at linguæ alii muscoli inferuntur, qui eam movent, ergo ipsa non potest esse musculus.

Non est  
glandula.

Arantius, nescio quo spiritu ductus, voluit probare linguam esse glandulam: sed illud tentat rationibus adeo frigidis & jejunis, ut earum refutationi immorari minime necessarium videatur. Attamen ab illius sententia non omnino alienus videtur Riolanus, lib. 4. *anthropogr.* cap. 8. illam desumens ex Galeno, qui, lib. de *cibus boni & mali succi*, cap. 4. dicit, linguæ naturam esse glandulosam, & ad glandulæ temperiem accedere. Verum, cum linguæ substantia, figura, temperies, usus, &c. nihil simile habeat cum glandulis, necessario hæc sententia rejicienda est.

Connexio  
sua.

Lingua posterius ossi hyoïdi, laryngi, faucibus, tonsillis, & summitati œsophagi committitur, superiori parte libera, & à connexione immunis existens: inferiore superficie musculos sibi annexos habet, quibus mediantibus inferiori maxillæ utrimque alligatur: & ne plus justo in omnem regionem moveretur, summus Creator membranoso validoque ligamento prospexit, quo subjectis partibus jungitur. Hujus ligamenti extremitas mediocri laxitate donata, **Frenulum** dicitur, cujus nimia brevis liberum & convenientem linguæ motum, haud rarò, præcipue in infantibus, cohibuit, sicque loquelam & lactis suctionem impedivit: qua de causa Medici illius sectionem in prima ætate fre-

Frenulum.

quenter instituere coguntur. Cujus sectio licet facilis sit, tamen (ut bene monet Bauhinus, nec non Riolanus) in eâ observandum, ne per imprudentiam vicini linguæque substrati nervi incidantur, ex quorum læsione repentina linguæ convulsio supervenire solet. De fine hujus ligamenti hæc habet Riolanus, loco ante citato. *Summopere considerandum*, inquit, *lingua tantum atque pudendis frenulum indidisse Naturam, quoniam in his potissimum organis voluit homines esse modestos.*

Arterias duas majusculas recipit à carotidibus, & binas venas ad jugularium externarum rorum interiorum emittit, **Raninas** vulgò dictas, sub lingua insigniter conspicuas, quo loco in faucium affectibus nonnunquam secari solent.

Vasa sangui  
fera.

Vena Rani-  
na.

Nervorum duo admittit paria. Horum tenuius, quod à quarto pari procedit, per ipsam linguæ substantiam defertur, & extremitatibus suis se insinuat nerveis papillis (aliquos etiam ramulos membranis concedens) spiritus ad gustus sensum perficiendum infundens. Alterum verò crassius, à septimo pari exiens, illius musculos subit, quibus per spiritus animales movendi facultatem tribuit.

Nervi.

Notandum autem, præterquam quod lingua in dextram sinistramque partem, intercedente linea, ut ante dictum, dividatur, etiam horum vasorum nullum à dextra ad sinistram linguæ partem, neque à sinistra ad dextram ferri: unde Galenus hoc instrumentum duplex esse pronunciavit, eodem modo sicut visus, auditus, & olfactus organa gemina sunt. Hæc linguæ duplicitas (rarius triplicitas) maxime conspicua est in serpentibus, viperis, lacertis, vitulis marinis, aliisque similibus, utpote quibus lingua in duas tresve partes fissa est, unde hæc animalia bilingua aut trilingua dicuntur.

Nota.

Posteriori linguæ parti insistit cartilago **Epiglottis**, quæ & **Lingula** dicitur, de qua ante actum, lib. 2. cap. 15.

Apparent ad radicem linguæ duæ glandulæ, **Tonsillæ** appellatæ, de quibus modo citatum cap. 15. videatur. Item caro, plurimis glandulis & pinguedine constans, sub lingua & mento, inter hyoïdis & linguæ musculos sita: qualis glandosa caro etiam utrimque ad latera totam buccarum regionem occupat. Quæ glandulæ & glandosæ carnes salivofum liquorem, ad linguæ & oris humectationem, colligunt, & eructant in oris capacitatem, tum per minima lymphatica seu salivalia vascula, tum per exilia crassioris membranæ oris foramina, præcipue cum os & lingua moventur, quod quilibet in se ipso experiri potest. Ac proinde, quando alimenta in ore masticantur,

Tonsillæ  
glandosæ  
carnes.

partim

partim sponte, partim per masticata alimen-  
ex hisce glandulis expressus liquor multo  
copiosior in os confluit tum alimentis ad  
fermentaceam præparationem adniscetur,  
tum deglutitionem faciliorem efficiat. In  
quiete verò, cum os non movetur, qui-  
escit, ut notum est in dormientibus, qui-  
bus ob hujus liquoris defectum os & fauces  
exsiccantur, si aperto ore dormiant.

Musculi.

Movetur lingua in quamcumque regio-  
nem, idque beneficio, partim illorum  
musculorum, quos cum ossi hyoide com-  
munes habet, *præcedente capite* descripto-  
rum: partim singularibus ac propriis quin-  
que musculorum paribus. Horum

Styloglossi.

*Primum par*, Styloglossum veteribus  
appellatum, à styloformi appendice, an-  
gusto tendinosoque principio natum, cir-  
ca medium in utrumque linguæ latus in-  
feritur, eamque attollit & introrsum ducit.  
Circa radicem verò linguæ fibras suas cum  
fibris musculorum deorsum linguam mo-  
ventium ita permiscet ac confundit, ut il-  
lud par cum his quodammodo uniri dixeris.  
Hoc par in homine gracile, at in bove ge-  
minum, carnosum, & crassum est.

Basioglossi.

*Secundum par*, Basioglossum & Yp-  
siloglossum dictum, à basi ossis hyoi-  
dis prodiens, in medio linguæ finitur, eam-  
que recta intro trahendo deprimit.

Genioglossi.

*Tertium par*, quod Genioglossum  
nominant, ad menti medium interna sede  
oritur, mediæque linguæ inferius inferitur,  
quam exierit. Hoc, ut etiam præcedens  
par, hic illic inscriptiones habet, ac si plu-  
res essent musculi. Veslingius hoc par hyoi-  
deis musculis annumerat, ejusque ossis basi  
illud infigi dicit.

Ceratoglos-  
si.

*Quartum par*, à cornibus ossis hyoidis  
prognatum, atque hinc Ceratoglos-  
sum vocatum, lateribus linguæ (ubi fi-  
bras suas cum fibris primi paris permiscet,  
ut ante dictum) inferitur, eamque, si  
ambo simul agant, recta deorsum versus  
interiora movet: si verò alteruter tantum  
agat, in latus movet dextrum vel fini-  
strum.

Myloglossi.

*Quintum par*, Myloglossum dictum,  
oritur à lateribus maxillæ inferioris ad radi-  
ces posteriorum dentium molarium, & sub  
lingua in ligamentum linguæ inferitur, eam-  
que deorsum trahit.

Glandula.

Remotis musculis, præter duas glandu-  
las oblongas ac rotundas œsophagi princi-  
pio adjacentes, aliæ plurimæ glandulæ car-  
nosæ, & quasi ex pluribus glandulis con-  
glomeratæ, vasis lymphaticis, arteriolis,  
venulisque, & nervorum fibrillis præditæ,  
sub lingua, circa ejus frenum, sitæ sunt,  
continuum madorem, per minima lym-  
phatica vascula, linguæ conferentes.

Ductus sa-  
livares  
sublingua-  
les.

Præterea ex utroque latere ex magna &

insigni glandula (quæ substantia thymum  
vitulinum, vel humanum pancreas æmula-  
tur) supra tendinem medium inter diga-  
strici seu biventris musculi carnes sita, du-  
ctus quidam procedit, cui, ab usu,  
**Ductus salivaris, vel salivaris** nomen  
impositum est.

Hujus cognitio, etsi Antiquos non la-  
tuerit, tamen multis seculis, tanquam  
altissimis tenebris obruta jacuit, & tandem  
casu, absque ullo duce, à Glissonio &  
Whartono ante aliquot annos rursus eruta,  
& in lucem producta, atque hinc ab ho-  
diernis Anatomicis prima ejusdem inventio  
ipsis adscripta est.

Quod autem Antiquis hi ductus noti fue-  
rint, liquet ex Avicenna, qui, *lib. 3. can. sen. 6. cap. 1.* eos sic describit: *Sub lingua sunt duo orificia, quæ ambo ingreditur stylus, & sunt fontes saliva, quæ ad carnem perveniunt glandosam quæ est in radice ejus, & nominantur generativa saliva: & isti duo fontes nominantur duo effusoria saliva, conservantque rorem linguæ.* Id ipsum etiam patet ex Galeno, qui, *lib. 11. de usu part. cap. 10.* his verbis eorum mentionem facit. *Quoniam exsiccata lingua ad motus tardior efficitur, hinc ei Natura mirifice providit, ne ipsa tali affectu facile prahenderetur: nam in larynge glandulas carnosas, spongia similes, unam utrimque apposuit, quod ipsum in lingua etiam fecit: ab iisque [scilicet, glandulis laryngi appositis] meatus per obliquas atque inferiores partes, humorem pituitosum in ipsas [scilicet, linguæ suppositas] eruant, linguam ipsam, atque inferiora lateraque, & omnia quæ in oris sunt circuitu, humectantes.* Sic etiam Haly, *3. theor. cap. 16.* eosdem satis perspicue designat. Super hac re plura etiam habet Carpus, in *Mundin. pag. 401.*

Hi ambo ductus, ut formam, ita sub-  
stantiam habent venis non multum absimi-  
lem, sed paulo magis pellucidam, & ca-  
vitatem non magnam, quæ in homine &  
vitulo stylum mediocrem aliquo modo ad-  
mittit, sed in canibus exigua est: in non-  
nullis tamen paulo amplior, in nonnullis  
angustior.

Utrunque unus oritur ex dicta glandula, *Situs, & oris.*  
multis parvulis principiis simul in unum  
ductum concurrentibus. A glandula obli-  
que sursum ascendens, ad mediam circiter  
maxillam fertur, inter duas exiles glandulas  
ibi sitas: quas ubi transiit, recta progredi-  
tur juxta nervum septimi paris, quem tan-  
dem transiit, atque sic paulum versus ante-  
riora, digiti circiter transversa à dentibus  
distantia, juxta linguæ frenulum termina-  
tur, & aperitur in peculiarem glandulam  
(hanc **Raninam**, aut **Hypoglottidem**  
appellare liceret) tenui ac porosa membrana  
investitam, quæ sita est sub lingua, utrim-  
que

Substantia  
& magni-  
tudo.

que ad frenuli latera una, prope venas raninas, inter carnem quæ linguam vicinis partibus connectit, & glandulas basi linguæ substratas: suntque hæ duæ glandulæ quasi duæ exiguæ spongiæ molles, salivarem liquorem è ductibus primæ imbibentes, seu excipientes. In brutis autem, propter maxillam longiorem, necessario horum ductuum major est longitudo.

*Ranula  
causa.*

Si in homine contingat poros membranæ sublingualis casu aliquo constringi & nimium arctari, vel ipsum liquorem salivalem sub illa membrana nimis condensari, ita ut per istos poros transire, & in os effluere nequeat, tunc sub lingua ex multæ salivæ collectione generatur tumor mollis, quem Medici *Batrachum*, seu *Ranulam* vocant, qui suo incremento sæpe magnum linguæ, in loquela & deglutitione, impedimentum exhibet, sed membranæ sublingualis incisione facile curatur.

*Ductus Stenonii.*

Præter dictos salivales ductus, adhuc alii duo, utrimque unus. anno 1661. mense Januario, à D. Jo. van Horne, in publico Leydenfi theatro Anatomico demonstrati fuerunt, quos ille tunc appellavit **Ductus Stenonios**, à Nicolao Stenonis, Dano, qui illi primus eos ostenderat, in eorumque cognitionem casu inciderat, dum Amsterodami aliquamdiu antè, cum hospite & præceptore suo Gerardo Blasio, Medicinæ professore, caput ovillum diligentius perlustraret. Hinc postmodum inter Blasium & Nicolaum Stenonis lites obortæ sunt, & primæ inventionis gloriolam editis libellis singuli sibi vindicarunt. Quidsi, ut illæ lites inter hos amicos dirimantur, utrumque in ista inventionem parem constituamus? vel dicamus, Blasium in ovillo, alterum in humano capite illos primo invenisse?

*Ortus.*

Originem utrimque habent è maxima glandula ad radicem auris ejusdem lateris sita, quam Nicolaus Stenonis *parotidem conglomeratam* nominat, è qua dissecta multi ramuli undequaque prodeuntes, & in hos ductus excurrentes, conspiciuntur.

*Progressus.*

Extra maxillam transversim decurrunt ad centrum musculi buccinatoris, atque sic finiuntur in oris cavum, modò paulo remotius, modò paulo propius accedentes ad utriusque labii confinium. Eosdem nos quoque postmodum invenimus, & in vitulo satis conspicuos, ac orificio latiusculo se ad confinia labiorum in os exonerantes multoties demonstravimus, eosdemque etiam in homine exhibuimus.

In his ductibus observat Nicolaus Stenonis, præter propriam tunicam, varios nerveos funiculos, medium ductum amplexantes.

*Observatio medica.*

Interdum contingit, his vasibus salivalibus circa buccam læsis, lymphaticum salivalem liquorum è vulnere admodum copiosum,

sensim, & diu exstillare, eamque solutionem, propter continuum istius liquoris transitum, difficulter solidari. Sic Nobilis quidam Noviomagensis ictu poculi vitrei in media mala seu bucca læsus fuit, vulnus quidem à Chirurgo fere consolidatum est, sed in medio per exiguum foramen longo tempore aquosus ac lymphidus quidam liquor sensim exstillavit (hic è dicto læso ductu salivali, tunc temporis adhuc ignoto, profluebat) qui non obstante summa chirurgi diligentia, fere per biennium foraminis consolidationem impedit, quod meo consilio tandem, liquore isto per cauterii actualis impositionem cohibito, perfanatum est. Similem fere casum etiam Aquapendens à se observatum describit: & nos quoque adhuc alium similem ante aliquot annos vidimus in quodam caupone Ultrajectino.

Illam modò descripta salivalia vasa conspectiora sunt, sed præter hæc adhuc plura alia minima in ore existunt, præcipue in palato & buccis (de his ante dictum) quæ hætenus pleraque invisibilia latent, verum salivæ ex iis partibus transitus docet, per talia aliqua vascula, aut per poros membranæ investientis illam salivam ex multis exilibus glandulis, intra membranam sitis, exstillare: per quorum pororum constrictionem interdum à salivali liquore, intra membranam detento, interius in buccis & palato tumores indolentes oboriuntur, qui multoties brevi tempore, vel insensibiliter, vel cum multa sputatione solvuntur, vel chirurgi instrumento aperiendi veniunt.

*Alia salivalia vasa.*

Des Cartes non videtur hæc salivalia vasa cognovisse, ac proinde originem salivæ aliunde, scilicet è ventriculo, deducit, & lib. de hom. artic. 8. tradit, quasdam sanguinis arteriosi particulas incidere in stomachum & intestina, quæ ibi aquæ fortis officio funguntur in juvanda coctione ciborum: ab his, quia valde calidæ sunt, dicit vapores facile per œsophagum in os ascendere, atque istic salivam componere. Verum cum salivæ succus manifestissime è capite & glandulis procedat; & cum in magna corporis excalefactione sanguis calidus multo copiosior ad stomachum & intestina veniat, atque interim tamen os exsicceatur, nec copiosiore saliva humectetur, cum potius eo tempore, propter majorem calidi sanguinis copiam, plures vapores per œsophagum in os ascendere, in eoque copiosiore salivam componere deberent: cum etiam quicquid è ventriculo ascendit facile nauseam aut vomitum pariat, quod in salivæ affluxu ordinario non contingit: cum denique in pituitosis & frigidis hominibus, ut senibus, in quibus sanguis arteriosus frigidior & paucior (utrumque docet eorum pulsus parvus, rarus, & languidus) ad

*Cartesi opinio de salivæ.*

omnes

omnes partes, atque hinc etiam ad stomachum delabatur, è quo pauciores vapores è stomacho per oesophagum ad os ascendere possunt, saliva non sit pauca, sed copiosissima, certe hæc omnia satis demonstrant, quod illud Cartesii, de ortu salivæ, commentum, non sit bene inventum.

Verus salivæ ortus.

Ratum igitur manet, salivarem liquorem per oesophagum non ascendere, sed per antedicta vasa salivalia in os profundi. Verum cum istorum vasorum liquor admodum copiosus in os deferatur, quæritur è quibus vasis liquor ille secernatur, & ad dictas parotidum fauciumque glandulas deportetur, ex iis per vasa salivalia in os effundendus? Ex nervis illum effluere statuit Whartonus. Sed cum hi non habeant sufficientem cavitatem, per quam talis, tamque copiosus liquor transire possit; cum etiam minimus visibilis liquor in poros eorum incidens paralyin inducat, hæc opinio minime vera esse poterit, ut infra latius docebitur, lib. 8. cap. 1. Nonnulli ex vasis chyliferis illum deducere velle videntur. Verum quia chylifera vascula eo usque non excurrunt, & quia chylus, si eò deferretur, ad maiorem perfectionem excoqui (sicut fit in glandulis mesenterii, ut supra dictum, lib. 1. cap. 9.) non verò in alium minus alimentarem, & magis fermentaceum humorem, ibi immutari deberet; etiam hæc opinio caret fundamento, ut patet ex iis quæ dicta sunt lib. 1. cap. 12. & 13. Deulingius illum è vasis lymphaticis in glandulas, & ex his in os effundi putat. Quæ opinio, etsi aliquam verisimilitudinem habere videatur, pro certo tamen sciendum, vasa lymphatica, lympham in glandulas non infundere, sed in his confectam elicere & assumere, ad alias partes deferendam: præterea etiam minime dubitandum, salivam & lympham, etsi crassitie substantiæ nonnihil differant, habere tamen eandem originem, nec unam ab altera, sed utramque ab alio humore oriri, scilicet à sanguine: cumque à sanguine venoso id fieri nequeat, utpote qui à glandulis, aliisque partibus, abducitur; superest ut ex sanguine arterioso liquor ille secernatur: quippe arteriæ, ut omnibus partibus, sic etiam glandulis, nutritium sanguinem infundunt, cujus serosior & subsalsa salivalis pars, nutriendis glandulis apta, admistione spirituum animalium (hac de re vide præcedens cap. 11.) per exiles nervulos influentium, à reliquis particulis separatur, atque à dictis glandulis imbibitur, in iisque specifico modo nonnihil excoquitur, ac paulo ulterius præparatur, & quod ab earum nutritione redundat, illud levi acidiuscula qualitate (quam in glandulis consequitur) donatum, per vasa salivalia effluit in os. Videntur etiam, ut in aliis arteriarum di-

varicationibus appositis, sic quoque in his dictis glandulis, arteriæ versus glandulas minimis quibusdam poris hiare, per eosque huiusmodi serosum liquorem in glandulas deponere. Hanc opinionem etiam confirmant magnæ salivationes, five spontaneæ, five arte provocatæ, in quibus tam enormis salivæ copia excernitur, qualis nec à nervis, nec ab aliis vasis, quam arteriis, suppeditari potest.

Ex prædictis jam patet via per quas saliva in os influit, patet etiam quomodo separetur ex sanguine arterioso, jam videndum qualis liquor sit saliva.

Est autem salivæ liquor leviter fermentaceus, serosus, & lymphidus, ex sanguine arterioso in parotidibus, & variis faucium orisque glandulis ac carnibus glandulosis separatus, & per vasa salivalia, aliosque salivales transitus, in os effusus.

De salivæ qualitatibus parum ab aliis scriptum invenimus, quæ nihilominus, si attentius examinentur, satis ostendunt, illam non esse corpus simplex, sed compositum ac lubricum, aqua minus fluidum, sed paulo spissius & viscidus: spumositatem ex se non habet, sed illam, si adsit, conquirat à motu aëris & linguæ. Saporem & odorem in sanis nullum habet per se, quem in ægris ab humoris ipsius dyscrasia, aliorumque pravorum humorum admistione, & nonnunquam etiam ab assumptorum sapido liquore acquirit.

Difficile foret singularem ejus compositionem exacte describere, quæ tamen admirabilis existit. Omnibus enim alimentis facillime admiscetur, siccis, humidis, oleosis, aquosis, falsis, sulphureis, &c. nullum enim ingeritur cui non associetur: imò extra corpus nostrum etiam cum argento vivo misceri, eique associari potest; cum alioqui alii simpliciores heterogenii humores, aqua, spiritus, oleum, sal, alique simul misti à se mutuo recedant, cum quibus tamen omnibus saliva unitur: quæ insuper sua mediatione, omnia illa, non modo miscere, sed inter se unire valet. Ita ut videatur esse Mercurius quidam humoralis, seu menstruum internum universale, quo quælibet ore assumpta mox junguntur, cum eoque ad ventriculum descendunt, ut in eo omnium exactior dissolutio promoveatur. Ex quibus omnibus judicat Franciscus de le Boë Sylvius, illam in se continere multum aquæ, parum spiritus volatilis, & minimum salis lixiviosi, cum olei spiritusque acidi tantillo, inter se commistis ac temperatis.

Quantum ad ejus usum, ille multiplex & valde notabilis est.

I. Cibis in ore masticatis admista, facili-

111

lem

Digestio.

Salivæ definitio.

Qualitates salivæ.

Compositio ejus mirabilis.

Uusus salivæ.

lem deglutionem sua lubricitate efficit, quæ absque illa ægrè & difficulter procedit, ut liquet in febricitantibus, aliisque saliva destitutis.

II. Ex cibis siccioribus saporiferam qualitatem, id est, sal lapidum, elicit, qui alioqui sine humido educi nequit.

III. Sitim humectando extinguit, unde fit quod sputatores parum sitiant.

IV. Oris interiora, fauces, loquelæ organa, & œsophagum lubricat.

V. In ventriculo alimentorum assumptorum fermentationem promovet, imò primum eorum fermentum est, omnia ad fermentationem illam perficiendam in se continens, scilicet aliqualem levissimam aciditatem, cum spiritu volatili in aqua copiosa temperatam. Quæ fermentans ejus vis ex eo patet, quodsi frustum panis albi masticatum, multaue saliva humectatum, pastæ farinacæ cum aqua tepida subactæ admisceatur, eam fermentare faciat. De fermento alia plura videantur supra, lib. I. cap. 17.

*Differentia  
inter spu-  
tum & sali-  
vam.*

Verum hic notanda est aliqua differentia inter sputum & salivam. Per sputum intelligunt Medici tenacem humorem in ore cum molestia redundantem, qualis vel ex catarrhi defluxu in eo colligi, vel ex salivæ aliqua corruptione generari, vel cum tussi ex pulmone rejici solet. Per salivam verò intelligunt liquorem naturalem, in bene fanis non superfluum, nec excernendum, ad oris humectationem & alimentorum commistionem, eorumque ad coctiones præparationem ac fermentationem necessarium. Distinctio etiam aliqua constituenda videtur inter salivam & mucum istum qui è cerebro per os cribriforme delabatur, & partim per nares evacuatur, partim per palati posteriora ad fauces descendit: non

quod hi humores ratione originis multum differant (illa enim separatur in variis faucium orisque glandulis, ante descriptis; hic verò separatur in glandulis plexui choroïdi interjectis, & in glandula pituitaria, atque etiam in ipso cerebro, quod Hippocrates maximam glandulam appellat, ex ejusque ventriculis per processus papillares quoque defluit ad nares, palatum, fauces, & os) sed quod mucus, ratione longioris moræ in via, sæpe alienam qualitatem adeptus sit, antequam ad os perveniat, atque hinc crassior, tenacior, subflavus, aliove modo male coloratus, ac pravi saporis evaserit; quas tamen alienas qualitates cum non habet, tunc à salivali humore non admodum differt, & fauces, œsophagum, vicinasque partes humectat ac lubricas facit, atque in ventriculo assumptis alimentis admixtus, eundem cum saliva usum præstat, ac fermentationem promovet. Hic liquor, homine sano existente, in cerebri ventriculis satis fluidus & tenuis existit, non tantum instar salivæ oris, sed fere instar lymphæ aliis lymphaticis vasculis contentæ, & propter hanc tenuitatem per minima ossis cribrosi foraminula facile in spongiosa narium ossa, elabitur, in quibus per diuturniorem moram, ab aëris frigidi inspirati & expirati transitu, crassitiem, colorem, aliasque alienas qualitates sæpe adipiscitur: quemadmodum etiam lympham ex vasis lymphaticis prope hepar, aliisve, in cochleari collectam, ab aëre frigido in gelatinam concrevisse, & modò subflavum, modò alium colorem acquisivisse, non semel observavimus. Ita ut dicti duo liquores à lymphæ, aut non, aut parum differant, & mucus ille ac saliva non male appellari possent lymphæ ad os delata.

## T A B U L Æ X V I. E X P L I C A T I O.

Hæc Tabula ostendit ductus salivares, atque etiam oculorum lymphaticos in capite vitulino, prout accurate delineati sunt à N. Stenonis & Warthono.

### F I G U R A I.

- aaaa. Parotis conglomerata.
- bb. Parotis conglobata.
- c. Vas Lymphaticum ex conglobata deorsum tendens.
- dddd. Radices ductus salivaris exterioris.
- eee. Truncus ductus salivaris.
- fff. Venæ jugularis rami exteriores.
- ggg. Nervi qui ut intra glandulam & caput, sic & extra illum locum, ut in h. sibi innectuntur.

### II. Nervi funiculi ductum salivarem comitantes.


### F I G U R A II.

- aa. Ostia vasorum à glandula buccarum inferiore prodeuntium, quorum nonnullis seta immitti potest.
- b. Apertio ductus salivaris exterioris in papillarum summa & postrema occurrens. Reliqua puncta innuunt cetera foramina, per quæ compressione viscidus humor exit.

FIGU-







## FIGURA III.

- aa. Glandula sublingualis.  
 bb. Vasa ejus.  
 cc. Vasorum excretoriorum oscula.  
 d. Sinus ad latus linguae observatus.

## FIGURA IV.

- A. Foramina palati per quae Lentus humor exprimitur.  
 bb. Tonsillae.

## FIGURA V.

Vasculum unum ex illis, quae, ex glandula buccarum parte inferiore prodeunt.

## FIGURA VI.

- A. Glandulae maxillaris pars posterior.  
 aa. Radices posteriores ductus salivaris.  
 C. Truncus posterior ductus ejusdem, tendinem musculi biventris conscendens.  
 DD. Reditus ejusdem & unio cum ductu anteriore.  
 E. Truncus communis ductus salivaris.  
 F. G. Musculus biventer.  
 H. Progressus dicti trunci versus dentes anteriores maxillae inferioris.  
 I. Apertio ductus sub lingua.  
 K. Glandula rotunda maxillari assidens.

## FIGURA VII.

- A. Posterior glandulae maxillaris pars.  
 BB. Anterior ejusdem pars, cum radicibus anterioribus ductus salivaris.  
 C. Truncus posterior ejusdem ductus, tendinem musculi biventris conscendens.  
 D. Reditus ejusdem & unio cum ductu anteriore.  
 EE. Truncus communis ductus salivaris.  
 F. G. Musculus biventer.  
 H. Progressus trunci versus dentes anteriores maxillae inferioris.  
 I. Ductus salivaris sub lingua apertus.  
 K. Glandula rotunda maxillari assidens.

**Digressio.** Post totius linguae, omniumque partium ejus descriptionem, videndum quodnam sit ejus officium.

**Actio linguae.** Primaria linguae actio est gustare, eumque in finem imprimis condita videtur: secundaria loquelae & deglutitioni inservire.

**Gustus definitio.** Gustus autem est sensus, quo ab organo gustatorio corporum saporiferorum qualitates saporosae, motu linguae & vicinarum partium, in humido percipiuntur.

**Distinctio inter gustum & tactum.** Hunc gustus sensum multi, Platonem secuti, cum tactu confundunt, ejusque speciem quandam esse statuunt. Sed male: quamvis enim tactus ad perfectionem or-

- L. Series asperitatum sub linguae latere.  
 M. Lingua extra sedem propulsa.

## FIGURA VIII.

Glandulae conglobatae.

- a. Parotis conglobata.  
 b. Conglobata maxillari inferiori apposita.  
 c. Conglobata alia supra fauces sita.  
 d. Glandula communis.  
 e. Lymphaticum vas ad jugularis axillarique confinium tendens.  
 fff. Lymphatica tria à tribus glandulis, a. b. c. in glandulam communem d. delata.

## FIGURA IX.

Oculus vituli sinister.

- A. Glandula oculi superior innominata.  
 b. Angulus oculi major.  
 c. Angulus oculi minor.  
 ddd. Lobi in quos anterior glandulae limbus est divisus, per quorum interstitia lymphatica eee. exeunt.

## FIGURA X.

- A. Interior palpebrae superficies.  
 bbb. Glandula innominata, quae una cum vasculis ccc. per tenuem palpebrae tunicam transparet.  
 dd. Oscula vasorum lachrymalium.

## FIGURA XI.

- A. Glandula lachrymalis in interiore angulo sita.  
 B. Cartilago ex ipsa glandula prodiens.  
 bbb. Limbus cartilagineus.  
 cc. Membrana.  
 dd. Ostia duo, ad utrumvis cartilaginis latus unum.

## FIGURA XII.

- aa. Punctorum lachrymalium ad extremas nares continuatio.  
 bb. Vas excretorium naribus proprium.

gani gustatorii faciat, tamen gustus & tactus differunt organo & objecto. Organum enim tactus est membrana, gustus vero sunt papillulae nervae ex secunda tenui linguae membrana (ut ante dictum) epululantes, quales similes non inveniuntur in toto corpore. Objectum tactus sunt qualitates tactiles qualescunque, durae, molles, frigidae, calidae, &c. gustus vero sapores. Utriusque distinctio etiam inde patet, quod salvo tactu gustus potest aboleri; ut patet in multis aëgris, qui gustandos sapores non percipiunt, nec gustant, sed tanquam lignum insipidum eos linguam ferire tradunt, cum interim punctiorem, frigus, ultiorem, aliasque similes tactiles molestias in lingua satis percipiant,

Concludendum igitur, gustum esse quid peculiare distinctum à tactu, qui licet sine organo tactu prædito peragi nequeat, est tamen aliquid specifici, quod præter & supra tactum in solo organo gustatorio (scilicet in antedictis papillis nerveis) nec in ulla alia parte tactu prædita percipitur. Eodem modo sicut visus peragitur quidem ab oculo sensu tactus prædito (nam tactus, sicut ad perfectionem omnium organorum sensoriorum, ita etiam facit ad perfectionem organi visorii: eodem modo sicut artificis manus facit ad perfectionem horologii quod conficit, quod sine ejus manu tactu prædita perfectum fieri, & esse, atque operari nequit, cum tamen longe alia sit operatio, ejusdemque alius finis, ac modus, in horologio, quam in manu, neque inter istas manifestissime distinctas operationes ulla similitudo constitui queat) etsi visio plane distincta sit à tactu, nullaque actionum similitudo inter istos sensus existat.

*Gustus nullum est medium.*

Ex modo dictis jam etiam innotescit, quod gustus (eodem modo ut tactus) nullum detur medium, cum gustatio peragatur, quando corpora gustabilia immediate tangunt organum gustatorium, & in illud impingunt.

*Organum gustus.*

Præditarum gustus organum est lingua, seu aliquæ partes linguæ. Verum cum illa ex variis partibus componatur, carne, membranis, nervis, vasis sanguiferis, glandulis, & papillis nerveis, quæritur, quænam illarum sint istæ, in quibus gustus perficitur? Hac de re variæ sunt opiniones.

*An gustus fiat in lingua carne.*

Aristotelici (quos sequuntur Bauhinus, Vellingius, Bartholinus, Deusingius, & alii) statuunt gustum fieri in linguæ carne parte, quam eum in finem valde spongiosam & porosam esse tradunt: partim ut in illos poros facile ingrederentur sapidæ humiditates: partim ut in iis etiam specifici quidam liquor hospicaret, ad gustus perfectionem necessarius: eodem modo sicut in aure, ad auditum perficiendum, non minus requiritur aer in interioribus cavitatibus inclusus, quam aer externus commotus tympanum pulsans. Verum cum qualescunque carnosæ partes in toto corpore, tactu duntaxat sentiant (quatenus membranis sunt investitæ aut per textæ) & distinguant objecta tactibilia, quatenus sunt mollia, aspera, aculeata, dolorosa, &c. gustabilia verò objecta, acida, salsa, amara, dulcia, &c. nusquam distinguant, imò ut talia non percipiant, an sola lingua carnis suis particulis, quibus fortè tactibilia objecta, mediantibus membranis & nervis, percipit, insuper etiam judicabit de gustabilibus, & saporibus distinguet? quare, quæso, illud privilegium huic soli datum, aliis verò carnis partibus denegatum est, cum tamen

omnes eodem modo sint conformatæ? At dices, lingua magis spongiosa est, quam sunt muscoli, cor, renes, aliæque carnosæ partes, hinc sapidos humores intra suos poros facile admittit, quos reliquæ carnosæ partes, ob majorem densitatem, excludunt. Quasi verò linguæ caro sit magis spongiosa: Examinetur quocunque modo, & inspiciatur acuto oculo, ac conferatur cum musculorum carne (hæc quippe cæteris laxior est) certe non major, sed minor spongiositas in illa reperietur, quam in hac musculo. Præterea in poris nullus fit sensus, sed in ipsa substantia partium carnearum sentientium: hinc cum sudor salus, aut amarus (ut in ictero) partium carnearum poros transit, earumque substantiam magis minusve vellicat, illum in sua substantia tactu quidem sentiunt, ut mollem, acrem, aut dolorosum, sed non ut salum, vel amarum. Quare igitur corpus sapidum, quod carnosæ parti admoveretur, in lingua aliam quam in musculosis aliisque carnis partibus sensationem exhibebit? Renes & pulmones etiam sunt laxi & spongiosi, ergone etiam ob illam constitutionem gustabunt?

Sunt qui, cum Laurentio, in linguæ membranis gustum fieri arbitrantur. Sed neque hi scopum tangunt, quia linguæ membranæ (sicut omnes membranæ) tactu quidem sentiunt an quid durum, vel molle, calidum, vel frigidum, asperum, aut læve, &c. sit, sed non magis distinguunt sapores, quam membranæ oculi, auris, intestinorum, aliæque aliarum partium. Eadem etiam ratio est nervorum, utpote qui in quacunque corporis parte tactu quidem sentiunt, sed non gustant. Non valet hic effugium, quod à nonnullis adfertur, scilicet, quod linguæ nervi & membranæ aliam dispositionem habeant (forte crassior, vel tenuior, siccior & durior, vel humidior & mollior) quam aliarum partium nervi & membranæ: non valet, inquam, quia illa alia qualiscunque dispositio nihil aliud producet, quam acutior, vel obtusior sensum tactus, sed nunquam gustum, aut ullam saporisognitionem.

Quantum ad sanguifera vasa, in illis gustationis sensum non fieri, est extra omne dubium.

Jam quid de glandulis dicatur videndum. Whartonius in tonsillarum glandulis: alii in omnibus aliis in ore sitis, ac linguæ appositis aut circumpositis glandulis, gustum fieri putant. Verum cum gustus acutissime perficiatur in apice linguæ, à tonsillis aliisque glandulis remotiore, & cum ille longe obtusior sit ad radicem linguæ, cui tonsillæ aliæque plurimæ glandulæ adstant: cum etiam gustus sit peculiaris acuta sensatio acutum

*An fiat in membranis, aut nervis.*

*An fiat in glandulis.*

acutum sensorium specificum requirens, & glandulæ sint valde obtusi sensus, nec quidquam contineant quo gustus perfici possit, imò nec ulla unquam observata sit, quæ sapores distinguit, certe non video quomodo hæc sententia defendi possit.

*Fit gustus in papillis n. r. vis.*

Denique considerandæ veniunt papillulæ nerveæ ex intima tenui membrana emergentes, ac sese insinuant in poros seu exiles scrobiculos exteriori crassæ membranæ ab interiore parte insculptæ. In his papillulis (quibus plurimi nervorum furculi, ex linguæ substantia exsurgentes, inferuntur, ac tenuissima porosa pellicula insternitur) peculiari quadam substantia præditis, adjumento dictæ porosæ pelliculæ, seu mucosæ crustæ carneæ iis instar retis circumfusæ (de qua non longè à principio hujus capitis dictum) gustum perfici, pro indubitato statuendum existimo. *Partim*, quia in qua linguæ parte harum papillularum copia major est, ut in apice, planitie, & versus latera, in ea etiam citior, acutior, & exactior gustus fit: in qua verò ejus parte illarum minor est copia, in ea sapores tardius obscuriusque percipiuntur: in qua denique parte nullæ sunt tales papillulæ, ut subtus inter apicem & frenulum, in ea nulli sapores, sentiuntur, sed tangibilia solummodo objecta dijudicantur. *Partim*, quia etiam in illis palati partibus, in quibus similes papillulæ sub tunica crassa latent, sapores gustu percipiuntur. Quæ omnia certiora sunt per experientiam. Quippe si salis aut aloes paucillum modò huic, modò alteri linguæ parti imposueris, mox percipies una parte citiorem & acutiorem, altera tardiorē & obtusiorē, tertia nullam saporis perceptionem fieri, prout scilicet dictæ papillulæ in una parte copiosiores, in altera pauciores, in tertia nullæ adsunt. Præterea si ipsam papillularum istarum substantiam singularem pensius consideremus, in ea aliquid specifici observabimus, quod melius admirari, quam explicare possumus.

*Modus perceptionis saporis.*

Modus autem quo per hæc papillulas nerveas saporum perceptio ac distinctio fit, non minus explicatu difficilis est, quam modus quo visio vel auditio fit per destinata sua organa. In genere dicendum, prout papillulæ ab his illisve diversis saporiferis objectis aliter atque aliter afficiuntur, ex illa diversitate menti oblata, aliam atque aliam saporis speciem efformari seu dijudicari.

Sed quæritur, quare unus idemque sapor, ex gr. amarus, vel dulcis, semper eodem modo se offerat? Fit hoc, quia sapidus sal particulis suis eodem modo, eademque figuratione constitutis, impingit in porulos & fibrillulas harum papillularum, quæ affectio, mediantibus nervis,

mox menti representatur: quo usque autem salis particulæ eandem commensurationem ad papillularum porulos habent, eundem saporem representant. At si per sulphurei, alteriusve humoris admistionem mutata sit particularum salis constitutio (ita ut quæ antea rigidæ, duræ, & aculeatæ fuerant, postea flexiles & molles, vel rotundæ evaserint) tunc fit etiam alia papillularum & nervorum affectio, hincque mutatio saporis, & ejusdem alia in gustu perceptio.

Papillulis autem sapida corpora imprimis impingit agitatio & motus linguæ (sine hoc admodum debilis & obrusa fit gustatio) quo motu in papillulas impulsæ, eas specifico quodam modo alterant, & cuspidibus suis tenuibusque asperitatibus exactissimam iis imprimunt saporis speciem, mediantibus nervis menti mox offerendam: quæ species interdum aliquamdiu iis inhæret, cum scilicet dicta corpora vehementius in papillulas sunt impulsæ, nec, propter inæqualem particularum salis cum figuratione pororum commensurationem, facile ex iis extricari, ac per salivam reduci possunt.

Atque hæc de gustu ejusque organis, *Saporis Historia.* dicta sufficiant, qui gustus cum sit sensus saporis dijudicans, jam inquirendum superest, quid sit sapor, & in quo consistat, cum de his acerrimæ disputationes inter Philosophos moveantur.

Aristoteles, magno veterum assensu, *De sapore variae opinionones.* dicit saporem nihil aliud esse, quam qualitatem quandam in determinatis compositis, ex elementorum mistione resultantem. Sed quidnam sit illa qualitas sapida, hoc est quod omnes suspensos tenet. Idem Aristoteles, alibi, putat illam esse quid ex aqua & terra, ignis calore concurrente, mistis resultans, & licet aqua per se insipida sit, omnis tamen saporis capacem esse, atque hinc prout ignis diversimode in illam & terram agit, ex ea actionis diversitate, in aqua saporum diversitatem excitari. Verum cum ignis aquæ nihil inferat quam calorem, attenuationem, & discussionem, terræ autem solam exsiccationem & duriem, certe hæc opinio omnibus fulcris destituta, sponte concidit. Galenus, *lib. de ocul.* super hac re nihil quoque certi determinat, dum dicit, saporem esse aquam alicui corpori siccato, operante calore, permistam. Eodem fere sensu dicit etiam Alstedius, Saporem esse humidi aquei cum sicco terreo contemperationem. Alii hæc omnia incertissima esse, neque sibi hoc modo satisfieri videntes, aliquid clarius molituri, dixerunt, Sapidam qualitatem esse certam minimarum particularum figuram, magnitudinem, & motum. Sed cum non explicent in quibus rebus illa figura, magnitudo & motus considerari debeant, & quomodo ex iis sapor procedat

procedat, negotium æque obscurum relinquunt.

Quandoquidem igitur prædictæ opinion-  
nes saporis historiam non satis dilucidè ex-  
plicant, etiam nostram hac de re senten-  
tiam libere adjiciemus.

*Quid sit  
sapor.*

Dicimus igitur, quod saporosa qualitas  
non sit quid specificum ex rebus aliquibus  
promanans, verum quod sit determinata,  
seu specifica quædam passio, à rerum qua-  
rundam asperitatibus, organis gustatoris  
impressa; cujus passionis perceptio & diju-  
dicatio est ipse gustus.

*Unde aspe-  
ritates.*

Dictas autem asperitates, earumque di-  
versitates existimamus inveniendas esse ex  
ipsis rerum principiis, sale, sulphure, &  
Mercurio, de quibus vide *precedentis*  
*lib. 2. cap. 12.*

*Asperitates  
sapidæ.*

Asperitates saporem efficientes in sale  
consistunt, qui prout variis modis cum sul-  
phure & Mercurio miscetur, excoquitur,  
atque unitur, hinc majores vel minores,  
magisque aculeatas, rigidas, duras, pun-  
gentes, vel molles, flexiles, retusas, &  
læves asperitates habet (ex chymia notissi-  
mum est, sulphur prout majore, vel mi-  
nore copia & calore, hoc illo modo cum  
sale miscetur, eique unitur, innumeras  
particularum salis immutationes, diversas-  
configurationes, acies, superficies, &  
angulos facere, hincque saporum & opera-  
tionum salium diversitatem procedere,  
quatenus alius sal amaram, alius dulcem,  
alius acidam saporis speciem producit, &  
alius erodit ac pungit, alius lenit, alius  
ebullitionem, alius congelationem facit)  
ex quarum diversitate multijuga saporum  
diversitas gignitur, prout illa linguæ passio,  
quæ à salis quocumque modo figurati aspe-  
ritate excitatur, est vel jucunda, vel in-  
jucunda, aut hoc illo modo suavis, vel  
insuavis. Hoc ipsum etiam sentiens Fracas-  
tatus, exercit. de ling. sic dicit. *Conclu-  
damus, sapores debere suas efficientias figuris,  
quæ non nisi in principio corporeo sumuntur,  
quod præcipue in mixtis est sal ipse, qui à chy-  
micis corpus vocatur, & ex observatis figuris  
in salibus hoc colligamus, sal esse [saporis]  
principium, ut ita loquar, figurativum.*

*Differentia  
saporum.*

Has saporum differentias ex variis ato-  
morum salinarum figurationibus etiam de-  
monstrare, & distinctas proponere cona-  
tur Gassendus, qui proinde hac de re ita  
scribit. *Quo fit, inquit, ut is rem non in-  
congruè definiat, qui statuet rotundas esse,  
congruæque mole atomos, quæ dulcem faciunt  
saporem: magna figura, quæ acerbum: mul-  
tångula, minimeque orbicularia, quæ aspe-  
rum: acuta, conica, incurva, non tenuia,  
non rotunda, quæ acutum: orbiculata tenuia,  
angulata, incurva, quæ acrem: angulata,  
distorta, crurumque aequalium, quæ sal-  
sum: rotunda, lævia, distorta, parva,*

*quæ amarum: tenuia, rotunda, parva,  
quæ pinguem.*

Quod autem sapor ex solo sale procedat, *Sapor ex  
in chymia patet. Si enim, ex. gr. carduus sale.*

benedictus, qui amarus est, in cineres  
comburatur, ex iisque sal extrahatur, tunc  
illi cineres erunt prorsus omni sapore desti-  
tuti: at si iis restituatur suum sal, restitui-  
tur sapor, sed non necessario idem prior ille  
amarus, quem carduus habuit ante combu-  
stionem, quia per ignem sulphureæ ad-  
mixtæ particulæ sunt consumptæ, & hinc  
asperitates salis immutatæ.

Verum hic aliquis dicat, si sapor excite-  
tur à sale, unde excitatur alicujus rei insa-  
piditas seu insipientia, quæ etiam à gustus  
organis percipitur? Respondeo: rei insi-  
pientiam non esse quid positivum, quod  
gustum movet, sed nihil aliud esse quam  
salis, & hinc saporis privationem, eam-  
que vulgò dici, gustu percipi, eodem  
modo sicut dicitur audiri silentium, cum  
nullus aer commotus in auris tympanum  
impingit; aut videri tenebras, cum nulla  
lux perstringit oculos.

Ipse autem ex sale procedens sapor papil-  
lulis nerveis communicatur mediante humi-  
do, quæcunque enim sicca sunt, nisi suas  
sapidas salsasve asperitates in humido aliquo  
deponant, nullum exserunt saporem. Hu-  
midum autem illud, vel sunt ipsa corpora  
saporifera, vinum, mel, herbarum fru-  
ctuumque succi, &c. vel est aqua, ptisa-  
na, jusculum, saliva, aliisque liquor, in  
quo res siccae contritæ, dissolutæ, coctæ,  
vel maceratæ, salem suum sapidum dissol-  
vunt & deponunt, qui tum mediante isto  
humido linguæ papillulis imprimi, & sic  
gustui percipi potest, cum alioqui in sicco  
non esset perceptibilis.

Res saporifera cum ori imponuntur, in  
eoque super lingua agitantur, tunc earum  
salsæ sapidæve asperitates humido impressæ,  
per linguæ poros impingunt in papillulas  
nerveas, easque pro diversitate configura-  
tionis particularum salinarum aliter atque  
aliter specifico modo alterant, & sic species  
saporis gignitur, cujus idea per fibrillas  
nervorum quarti paris, linguæ insertas,  
ad sensorium commune delata, menti re-  
presentatur. Si enim salis particulæ sint  
longæ, duræ, ac pungentes, vel scinden-  
tes, talesque incidant in linguæ poros ro-  
tundos, tunc hos, propter disparitatem  
configurationis pororum & salis, ægre in-  
gredientes, molestiam pungentem faciunt,  
ut in rebus acidis, amaris, & acerbis con-  
tingit. Si verò particulæ salis sint molles,  
flexiles, aut rotundæ, tunc linguæ & pa-  
pillularum poros facile ac leniter, cum de-  
lectatione aliqua ingrediuntur, linguam-  
que demulcendo, gratum dulcemque sapo-  
rem faciunt, ut contingit in sacharo, melle,  
aliisque

*Gustus fit in  
humido.*

*Modus quo  
species sa-  
porum  
efformatur.*

aliisque similibus. Hæc ipsa etiam aliis quibilibet saporibus applicare cuilibet facile erit. Eodem fere sensu Lucretius, *lib. 2.* dicit, dulcium corpuscula esse lævia & rotunda, amarorum verò & acidorum magis aculeata, hamata, & inter se connexa.

*Agitatio  
quid faciat.*

Agitatione autem seu motu in ore opus est, ut sapor melius percipiatur, eoque in liquidis minore, in siccis verò majore & longiore. Nam in liquidis sapidus sal, quia modo dissolutus est, mox per membranz linguam contegentis poros impingit in papillulas nerveas, easque citissime alterat. In siccis verò falsæ istæ particulæ densiori substantiæ inhærentes, per longiorem agitationem dissolvendæ, ac salivæ imprimendæ sunt, ut percipi queant. Ad hæc, per agitationem illam pori membranz linguæ & papillarum magis aperiuntur ac dilatantur, sicque dictæ falsæ particulæ, liquori jam inhærentes, quasi aliqua vi iis imprimuntur. Nam sine agitatione in siccioribus vix, imò & in liquidis fit obtusior saporis perceptio. Si enim linguæ imponatur sal, saccharum, aut aloë, & lingua omnino quieta atque immota teneatur, non nisi obtusus; simul ac verò lingua commovetur, ilico acutus seu perfectus sapor percipitur, ejusque à configurationis salis diversitate procedens species, à mente dijudicatur.

*Pororum  
diversitas  
mutat sapo-  
res,*


Verumtamen non semper à solius salis diversa configuratione saporum diversæ species gignuntur, cum interdum etiam ipsius

organi diversa constitutio hac in re plurimum faciat, nam ejus pori in omnibus hominibus non sunt eodem modo configurati & qui in plurimis sunt rotundi, in aliquibus paucis forte erunt oblongi, vel quadrangulares, qui lenes rotundas salis particulas difficulter ac cum molestia aliqua, longas verò vel aculeatas sine molestia admittent: atque hinc fit quod dulcia non omnibus grata & dulcia esse videantur, neque amara omnibus æque amara & tædiosa sint.

*Imaginatio  
mutat sapo-  
res.*

Verum etsi hæc ita se habeant, sciendum tamen ad saporis gratitudinem seu amœnitatem, & ingratitude seu abominationem, plurimum quoque facere imaginationem, hincque conceptum judicium: quatenus alii sibi majorem amœnitatem imaginantur, & judicant percipi ex sapore aliquo leniter organa gustatoria demulcente, alii ex tali qui acriter organa ferit. Sic videmus multos vinum absinthite, acetum, hancem falsatam, aliaque amara & acria cum voluptate assumere, licet ipsis molestiam aliquam in organis gustatoriis faciant, à dulcibus verò, organa leniter demulcentibus, abhorrere, non quod saporibus tales quales sunt, dulces, amaros, &c. non percipiant, sed quod ex præconcepta imaginatione magis ipsos delectet mediocris illa molestia ab acribus inducta, quam dulcium amœnitas.

De loquela & voce, cui lingua etiam ministerium haud vulgare præstat, videntur *lib. 2. cap. 15.*



ANA-

# ANATOMES

## LIBER IV.

### DE

# ARTUBUS.

## CAPUT I.

### DE MANU.



**Artus**, (Græcis *κῶλα*) sunt membra ventribus adnata, & articulis distincta.

Sunt autem duces, nempe superiores, qui communi vocabulo

**Manus**, Græcis *χῆρις*; & inferiores, qui **Pedes**, Græcis *πόδες*, appellantur.

Inter hos artus proportio quædam conveniens in hominibus bene constructis requiritur: scilicet ut tanta fere sit longitudo ab osse pubis usque ad calcanei extremum, quanta est ab ala ad medii digiti extremum apicem. Dico autem, *fere*, quia crura plerumque longitudine paulum superat brachia. At quanta est longitudo crurum, tanta solet esse trunci, metiendo ab ossibus pubis usque ad supremum frontem. Quo magis ab hac mensura deficit proportio, eo vitiosior est. Hic notat Spigelius, multiplices experientia à se observatum, eos qui longos habent pedes; ut plurimum alvo esse fluentiore, ac proinde talibus validiora purgantia nunquam exhibenda.

**Manus** ad apprehensionem homini datæ sunt, ut nudum & inerme animal, ratione duce, his instrumentis non unum armorum, vestium, & habitaculorum genus, sed mille sibi pararet, sicque bruta omnia, quantumvis ferocia, & quocunque modo armata ac vestita, viribus, regumentorum commoditate, atque in utrisque polydedala varietate, & elegantia longè superaret. Præterea ut divinum animal his instrumentis divinas leges, historias, magnæ summi Dei miracula, & Naturæ mirabilia, suasque proprias contemplationes, conscriberet, aras erigeret, cœli terrarumque contenta depingeret, artium delineationes faceret, aliaque divinitatis suæ monumenta exhiberet. Quæ omnia ut melius perageret, duæ ipsi manus concessæ sunt, ut una alteri adjumento esset,

& una languente, altera utriusque vicem suppleret.

Est autem manus pars organica, a summo humero usque ad extremos digitos extensa. *Definitio manus.*

Dividitur in **Brachium**, & **Manum** extremam.

**Brachium**, Græcis *βραχίονα*, Aristoteli *βραχίων*, dictum, rursus dividitur in **Brachium** strictè sumptum, & **Cubitus**. Illud à summo humero ad cubiti flexuram: hic ab eadem illa flexura ad carpum usque procedit. *Brachium.*

Cavitas sub humeri articulo **Axilla**, vulgò **Ala** vocatur, fortè quia in ea pili, quasi pennæ nascuntur: hi pili interjecti impediunt, ne ex assidua brachiorum agitatione cutis hujus loci atteratur. *Axilla.*

In hac cavitate, sub panniculo tres latent glandulæ considerabiles, vasorum divaricationi appositæ, quæ conjunctæ unam constituere videntur. Hæ Antiquis Medicis putatæ sunt esse emunctoria cordis: quis earum usus sit supra videndum, lib. I. cap. 17. *Glandulæ axillares.*

**Cubitus**, aliis **Ulna**, Tullio *La-* **Cubitus**, certus, Græcis *πίχη* dicitur.

Extrema manus, (*ἄκροχῆρ*) expansa, **Manus**.

simpliciter **Manus**, contracta & clausa

**Pugnus**: digitorumque internæ partis articulationes **Internodia**: clausorum verò, præcipue mediæ eminenter articulorum potuberantiæ, **Condyl**i nominari solent. Græci adhuc specialius singulas digitorum articulationes propriis nominibus designant: quippe *κόνδυλος* ipsis vocatur medius nodus digitorum in pugnum contractorum: *προκόνδυλος*, ille qui ungui est vicinior: *μεθакόνδυλος* verò, qui metacarpio vicinior est. Latini hujusmodi peculiaribus nominibus destituuntur.

Dividitur autem manus in **carpum**, **metacarpium**, & **digitos**.

**Carpus**

*Artuum  
proportio.*

*Observatio.*

*Manus.*



Carpus.

**Carpus**, Græcis *καρπός*, & *καρπός*, Latinus *Brachiale*, Barbaris *Rasseta*, aliis *Roseta*, dictus, & cubito proxime annexus, octo constat ossibus, duplici ordine dispositis, quæ propriis carent nominibus.

Metacarpium.

**Metacarpium**, Græcis *μετακαρπών*, Latinis *Post brachiale* dictum, componitur ex quatuor ossibus stricta articulatione connexis.

Vola.  
Palma.

Hujus interna pars, manus cavitatem effingens, Hippocrati *θέραι*, Latinis **Vola manus**, Cornelio Celso **Palma**: externa verò Græcis *πρόθερα*, hodiernis **Dorsum manus** nominatur.

In vola multæ observantur particulæ imprimis monticuli, *θέραι* proprie dicti, & lineæ.

Monticuli.

Monticuli sunt prominentiores & carnosiores internæ manus partes.

Initium manus aliquantum extuberans *Radix manus* appellatur. Monticulus pollicis substratus, *Mons Martis*: qui indici adhaeret, *Mons Jovis*: qui medio digito, *Mons Saturni*: qui annulari, *Mons Solis*: qui minimo, *Veneris Mons* dicitur. Spatium verò quod inter pollicem indicemque intercedit, *Mercurio*; hypothenar verò *Luna* dicatus *mons* est.

Lineæ.

Lineæ in vola manus multæ variæque, neque in omnibus hominibus eadem, aut similes sunt. Ex his Cheiromantici, ridiculâ & inani conjecturâ ducti, valde multa præfagia pollicentur, ex iisque se vitæ longitudinem ac brevitem, matrimonia, liberorum futurorum numerum, infortunium, felicitates, indolem, eventus denique omnes, bonos & malos, præfagire posse, magna dicacitate, nullis rationibus suffulta, contendunt, sicque multos credulos decipiunt & auro emungunt.

Imprimis autem quatuordecim ab iis notantur lineæ, ex quarum variis concursibus, intersectionibus, curvitate, rectitudine, &c. Præfagia, seu prædictiones suas efformant. Inter eas autem tres sunt quas præcipue considerant. Prima pollicis ambitum circumscribens, *Linea vîa*, & *Linea temporalis* nuncupatur. Secunda transversim per mediam volam delata, ad Lunæ montem extensa, *Jecoraria*, & *naturalis* nomine insignitur. Tertia, ab hypothenare incipiens, & ad indicis articulum delata, *Mensalis*, *Thorialis*, & *Veneris linea* appellatur.

Digiti.

**Digiti**, Græcis *δάκτυλοι* dicti, in qualibet manu quinque sunt, longitudine & crassitie differentes.

Primus qui crassus, quia robore cæteris omnibus æquipollet, **Pollex** nominatur. Secundus, abusu, **Index**, & **Demonstrator** dicitur, quod in rebus demon-

strandis & indicandis uti soleamus. Tertius, qui medius & longissimus, solet **Impudicus**, **Famosus**, & **Obscoenus** appellari, quia eo extenso homines deridentur & infamia notantur. Quartus **Annularis**, & **Medicus** nominari consuevit, quia olim iis qui ad Medicinæ doctoratum admittebantur, hic digitus annulo aureo exornari solebat, quem honorem Index jam dudum ei præripuit. Quintus à parvitate **Minimi**, ab usu, **Auricularis** nomen obtinuit, quia aurium sordes eo expurgantur.

Singuli autem digiti tribus donantur ossibus, per gynglymum articulatis, quibus adstant sesamina.

ossa.

De digitorum longitudine aliquid notabile scribunt Rases & Avicenna: quippe Rases, 17. continent. ubi loquitur de jecore, & Avicenna, 14. 3. tract. 1. cap. 3. & 30. nec non 2. 1. doct. 3. cap. 1. dicunt, brevitem digitorum indicare parvitem jecoris, & consequenter ab eorum longitudine indicari ejus magnitudinem. An hæc indicatio vera & certa sit compertum non habeo, idque à nullo alio Medico vel Anatomico hæcenus observatum, aut saltem in scriptis notatum scio. Quidquid sit, Avernhoes, 4. collect. cap. de signis jecoris, eam rejicit, ut maximè incertam.

Digitorum verò extremitatibus exterius impositi sunt **Ungues**, *ὄνυχες* Græcis dicti, quorum pars posterior albicans *Radix unguium*, & *Lunula candicans*; maculæ albæ *Mendacia*; loca abscondita sub unguibus *Crupta* vocantur.

Ungues.

Duri sunt ungues, ut mollissimas, acutissimoque sensu præditas digitorum extremitates, tueantur, & scalpenti munere melius fungantur: substantiam tamen aliquantum flexilem sortiti sunt, ut non facile frangantur, sed nonnihil flecti queant. Figuram habent aliquo modo convexam.

Pellucidi sunt, unde pro subjectæ carnis, eique influentis sanguinis ratione, livent, rubent, pallefcunt, flavescent, &c. ex quibus coloribus Medici bonæ malæve valetudinis signa desumere solent.

Cutis extrinsecus iis circumnascitur, musculorumque tendines subternuntur, unde ob exquisitum loci sensum, acutissimus ex læsione dolor sub unguibus excitatur. Plura de unguibus infra videantur, lib. 9. cap. 24.

Componitur autem totum brachium cum manu, ex communibus tegumentis, membranis, ossibus, ligamentis, musculis, arteriis, venis, & nervis.

Communia integumenta sunt, cuticula, cutis, pinguedo, &c. de quibus supra dictum, lib. 1. cap. 3. & 4.

K k k

Membra-

Membranæ sunt perioſtea, membranæ muſculorum, tendines, &c.

Oſſa ſunt multa & varia, per ligamenta connexa, de quibus vide *lib. 9. cap. 17. 18. 21.*

Arteriæ ab axillari prodeunt, quarum ramificationes deſcribuntur *lib. 6. cap. 3.*

Venæ plurimæ in manu & brachio continentur (harum hiſtoria videatur *lib. 7. cap. 5.*) quæ tamen omnes ad venam axillarem concurrunt, in eamque ſanguinem ſuum exonerant. Harum imprimis tres ad flexuram cubiti peculiaribus nominibus notantur, **Cephalica, Baſilica, & Mediana**, quæ in ſanguinis detractiõibus frequentiffime ſecari ſolent. Præterea in extremâ

manu exteriore parte adhuc una inter annularem mediumque digitum privato nomine **Salvatella** nominatur, cujus ſectionem nonnulli in affectibus melancholicis, & febribus quartanis admodum extollunt, imprimis ſi in ſiniſtra manu adminiſtretur: ſed hæc opinio, nullis rationum fulcris innititur, & ex ſola duntaxat quorundam vana opinione proceſſit, qui, circulationis ſanguinis neſcii, olim ſibi imaginati ſunt, per hanc venam ſpecialius, quam per ullas alias venas, ſanguinem melancholicum e liene educi poſſe.

Nervorum ſex paria brachium ingrediuntur, quorum productiones exhibentur, *lib. 8. cap. 3.*

## CAPUT II.

## DE PEDIBUS.



Icut ad apprehenſionem duas manus, ita ad ſtationem & ambulationem duos homini pedes conceſſit ſummus Conditor, qui ad maiorem commoditatem & ingreſſus firmitudinem longi latique, ac ſubtus in medio aliquantum cavi, variisq; articulis diſtincti ſunt.

**Pes.** Pes autem, Græcis πῆξ, aliis **Crus** appellatur eſtque pars organica ab iſchii ſeu coxendicis articulo ad extremos uſque pedis digitos extenſa.

Dividitur in **Femur, Tibiam, & parvum pedem.**

**Femur.** Femur (quod à *ferendo* dictum putatur, eo quod hominem maxime ferat) Græcis μηρός, Celſo *Coxa* dictum, à coxendicis articulo ad primam inferiorem articulationem procedit, quæ anteriore parte **Genu**, poſteriore **Poples** appellatur.

**Iſchion.** Pars femoris interna πνεγμαῖον, vulgò *femen*: at protuberantia exterior circa articulum ſuperiorem ισχίον, *coxendix*: ſpatium ad nates inter duo femora, πλάγας, & πείλαιον, *perinaum*, vocatur.

**Perinaum.** In huius ſummitate ad flexuram **Inguen** eſt, in quo latet famoſa illa glandula, ex octo minoribus glandulis compoſita, quæ olim hepatis emunctorium eſſe dicebatur, de cujus uſu actum *lib. 1. cap. 17.*

**Tibia.** Tibia, Græcis πνήμη dicta, ſumpto à genu initio, ad calcem uſque fertur, cujus anterior & durior pars ſpecificè **Tibia**, Ariſtotelei verò ἀντηνήμιον; poſterior carnoſa **Sura**, Græcis γαστρονήμιον, interior αἰσθητήμιον nominatur. Duæ verò

inferiores laterales prominentiæ **Malleoli** *Malleoli.* (hos Ariſtoteles σφυγῆ, alii σφυγία vocant) vulgò **Tali**, hic internus, ille externus, dicuntur.

De Malleolis tradunt Phyſiognomi, eos quibus malleoli multum extant, eſſe homines invidios: quibus verò ſubſident ac depreſſi ſunt, eos ſegnes & pigros eſſe, atque hoc veriſſimum ac infallibile ſignum eſſe produnt. Sed credendum tamen exiſtimo huiusmodi indicationes, quantumvis pro infallibilibus traditæ, multis patere exceptionibus.

**Pes** autem, Græcis πῆξ, quem ad totius diſtinctionem, **Parvum**, vel **Extremum pedem**, nominant, eſt baſis cui totum corpus inſiſtit: dividiturque in *Pes extre-*  
*mus.* **pedium, metapedium, & digitos.**

**Pedium.** **Pedium**, (cujus pars poſterior **Calx**, & **Calcaneum** dicitur) conſtat ſeptem, *Calx.* **Metapedium** quinque oſſibus: digiti ſinguli tribus (quibus adſtant ſeſamina) *Metape-*  
*dium.* excepto pollice, qui duobus tantum oſſibus conſtat.

Superior pedis pars Ruſſo πῖθ, Latinis **Dorſum pedis**: inferior verò καίλον & ποδός, **concavum pedis** vocatur: & quibus hæc inferior pars non cava, ſed ita plana eſt, ut ſolum toto veſtigio attingat, illi dicuntur **Planci**, eoſque dicit Ariſtoteles eſſe verſutos ac fraudulentos.

**Ungues.** Mollibus autem digitorum extremitatibus, ad tutelam (ſicut in manu) impoſiti ſunt **Ungues** ὄνυχες Græcis dicti, ejuſdem ſubſtantiæ & naturæ cum iis qui in manibus ſunt, de his infra latius agimus, *lib. 9. cap. 24.*

Totum crus componitur ex partibus continentibus.

continentibus communibus, membranis, ossibus, ligamentis, musculis, arteriis, venis, & nervis.

De partibus continentibus communibus dictum, *lib. 1. cap. 3. & 4.*

Membranæ sunt periosteæ, membranæ musculorum, eorumque tendines, &c. aliis locis describendæ.

Ossa multa variaque sunt; per ligamenta sibi invicem connexa, quorum historia infra videnda, *lib. 9. cap. 19. 20.*

Musculi alii femur, alii tibiam, alii pedem, alii digitos flectunt, extendunt, adducunt, abducunt, & circumagunt, de quibus dicendum *sequente lib. 5. cap. 13. 14. 15. 16.*

Arteriæ ab arteria crurali procedunt, va-

riisque ramificationibus per omnes cruris partes disseminantur, ut videndum *lib. 9. cap. 7.*

Venæ similiter plurimæ numerosa radicum serie per omnes cruris partes disperguntur, & descendantium arteriarum ductum in ascensu suo pleræque sequuntur, ut latius demonstrabitur *lib. 7. cap. 8.*

Nervi quatuor insignes, tactus motusque facultatem inferentes, per totum pedem distribuuntur: quorum tres ex tribus infernis paribus lumborum procedunt: quartus verò crassissimus & validissimus, ex quatuor supernis ossis sacri paribus coeuntibus originem sumit. De his latius *lib. 8. cap. 7.*



A N A T O M E S  
L I B E R V.  
D E  
M U S C U L I S:  
C U M A P P E N D I C E  
D E  
M E M B R A N I S E T F I B R I S,  
C A P U T I.  
D E M U S C U L I S, I N G E N E R E.



**M**Usculus, Græcis *μῦς* nominatur; sive ab officio, scilicet *ἀντὶ τῆς μύων*, id est, *contrahere*: sive ab aliqua formæ similitudine, quod nonnulli muscoli murem excoriatum aliquo modo referre videantur; quatenus nimirum, sicuti mures, capite & cauda graciles, medio verò corpore tumidi sunt. Latinis **Lacertus**, à lacerti qualicumque similitudine, dicitur: quamvis certa figura musculis, ob eorum varietatem, attribui nequeat.

*Definitio.* Est autem Musculus pars organica, voluntarii motus instrumentum.

*Compositio.* Componitur musculus ex partibus dissimilariis, ut fibris, carne, venis, nervis, tendine, membrana integente, & in obesis aliqua pinguedine ad humectationem.

Per arterias sanguis vitalis ad nutritionem advehitur, ejusque residua pars per venas redit ad suum fontem. Per nervos influunt spiritus animales, sensus motusque facultatem conferentes, & in actu quoque nutritionis suo munere (de quo dictum *lib. 3. cap. 11.*) fungentes. Fibris carnosa substantia ad robur & molem circumfunditur: suntque hæ fibræ plerumque rectæ; nonnunquam aliquantum incurvatae ad tendinem procedentes, ut in temporum musculis; interdum orbiculares, ut in sphincteribus: rarò autem unus musculus duplices fibras obinet. Membrana circumjicitur, partim ad firmitudinem & integumentum;

partim ut musculi à se invicem distinguantur, & à vicinis partibus separati maneant. Hæc fibras concludit, iisque in circuitu adhæret. Putant Bauhinus, Rolfincius, & Nicolaus Stenonis, illam quoque productiones & nexus ad internam musculi substantiam intromittere, quibus fibræ connectuntur.

Andreas Laurentius, *anat. lib. 5. cap. 2.* malè statuit, musculorum carni (quam ad robur & molem fibris interjectam esse, modò dixi) insitam esse vim agendi: cum tamen illam totam vim à fibris & tendinosis filamentis procedere certissimum sit, idque abunde doceant febre hectica & tabe consumpta corpora, in quibus motus persistit, etsi carnosæ partes sint consumptæ. *Laurentii error.*

Musculi duplices sunt. *Alii* qui nullas partes attrahunt, quales sunt musculi orbiculares ut ani & vesicæ sphincteres, qui orbiculariter & æqualiter in sese contrahuntur, & instar annuli, sibi ubique similes, nec ullo manifesto principio, medio, aut fine distincti sunt: quibus etiam accensendæ videntur membranæ musculosæ, quæ solam cutem sursum deorsumque movent, quales sunt musculi frontis & occipitis, in quibus etiam nulla manifesta distinctio observabilis est. *Alii* qui ossa, aliasve partes validius movent: atque tales musculi manifeste dividi possunt in principium, medium, & finem; vel, ut alii loquuntur, in caput, ventrem, & caudam. *Musculi duplices.*

Principium, seu caput, ea musculi pars est versus quam fit motus. Perpetua enim regula est: **Omnis musculus movetur versus** *Principium.*

versus suum principium. Illud caput interdum carnosum, sæpe membranosum est, in aliis longius, in aliis brevius, modò crassius, modò tenuius.

*Nervi inferio.*

Omnis musculus habet nervum (plerumque unum, interdum plures, ut diaphragma, quod duos insignes; & musculus temporalis, qui tres nervos recipit) vel in caput, vel circa medium ejus insertum. Unde Galeus indubitata constituit regulam: **Ubi nervus inferitur, ibi est caput musculi.** Quam tamen regulam Bartholinus, Walæum secutus, sine ratione improbare & rejicere videtur, dicens, interdum etiam ad finem musculi nervum inferi, neque ullam necessitatem esse, quare in caput magis, quam in caudam inferatur; & quod in caput inferatur, illud per accidens fieri, quatenus scilicet nervi, dum descendunt, facilius in musculorum capita, quæ altiore loco sita sunt, quam in caudas, humiliore loco positas, inferuntur. Verum hujus opinionis primum fulcrum evertit experientia, qua liquet, nusquam nervum in caudam inferi: vel si forte eam ingredi putetur, illud tamen re vera ita non esse, sed errore ipsius Anatomici ita videri, qui caput musculi putat esse caudam. Sic hæcenus media membranosa diaphragmatis pars, cui nervi inferuntur, pro tendine seu cauda istius musculi habitata fuit, cum tamen re vera sit illius principium, ut supra latius explicatum est, *lib. 2. cap. 3.* Secundum argumentum ratio evincit, quæ docet, necessario nervum debere ingredi istam musculi partem, à qua ab influxu spirituum debet incipere ejus intumescencia; cum autem illa incipere debeat ab ea parte versus quam debet fieri motus, necessario inferi debet capiti: à fine enim seu cauda musculi si inciperet intumescencia, tunc principium traheretur versus caudam. Tertium fulcrum etiam destruit experientia, seu autopsia, in nervis recurrentibus, qui licet sursum tendant, tamen capitibus musculorum laryngis implantantur, utpote quæ deorsum spectant.

*Medium.*

Medium, seu venter musculi, est crassior & carnosior ejus pars, estque plerumque continuum, nonnunquam, sed rarius, tendinosi intersectionibus distinctum, ut in rectis abdominis musculis, & digastricis inferiorem maxillam aperientibus, aliisque paucis. De quibus tamen intersectionibus nonnulli hoc sentiunt, scilicet, ad singulas alium incipere musculum, & intersectos hujusmodi musculos non esse unum, sed plures musculos simul conjunctos, ad majorem usus commoditatem, ut supra dictum, *lib. 1. cap. 5.*

*Finis.*

Finis, seu cauda, est ea musculi pars, quæ parti movende adnectitur. Hæc

Græcis *ὁ τένων* ὁ τὸ τῆς Τένειν, Latinis proprio nomine **Tendo**, quod tendatur; nonnullis etiam **Chorda** appellatur. Quod tendinis nomen interdum à nonnullis etiam transfertur ad membranosa quorundam musculorum principia, nec non ad tendinosas musculi medii distinctiones, quales sunt in musculis rectis abdominis.

*Tendo.*

**Est autem tendo pars musculi continua, per totam musculi longitudinem dispersa.** *Definitio.*

Multi antehac putarunt, tendinem esse illam duntaxat musculi extremitatem quæ alteri parti adnectitur, cum tamen re verâ ejus filamenta per totam musculi longitudinem extendantur: atque hinc Lindanus dicit, musculum nihil aliud esse, quam tendinem carne vestitum: & *physiolog. pag. 747. artic. 6.* sic inquit: *falluntur, qui tendinem demum inchoare putant ultra carnem, non existimantes docere experientiam, extendi illum per totam musculi longitudinem, & esse in principio & medio etiam.* Illam ipsam fibrarum per totum musculum extensionem confirmat Riolanus, *anthrop. lib. 4. cap. 2.* *Tendonis*, inquit, *continuitas à capite per totum musculum, usque ad finem, in cruribus pennatorum manifeste patet, & quod mirum est, subinde cartilagineus deprehenditur: quinetiam dissectione accurata licebit observare fibrarum continuitatem à capite musculi usque in finem, in crudo, & in cocto musculo.*

Quæritur an omnes musculi tendines habeant? Bauhinus, *anat. lib. 1. cap. 7.* dicit, tendinem non ad motum simpliciter, sed ad validiores motus edendos, & graviora membra movenda, & ad robur, ne musculi disrumpantur, comparatum esse, atque idcirco non omnes musculos in tendines desinere. Verum hæc Bauhini sententia tantum vera est in iis musculis in quibus tendo extra carnem protenditur, sed non generaliter in omnibus. Nam qui alias partes non movent, sed in se ipsos contrahuntur, ut sphincteres ani & vesicæ, illi non desinunt in tendines extra carnem protensos, sed tendinosa filamenta fibris suis interjectata obtinent; quod ipsum etiam contingit in frontis, occipitis, variisque faciei musculis, cuti firmiter adnatis. Sed qui musculi alias partes movent, illi tendines extra suam carnem in illas extendunt, ad parvos motus tenues & obscuriores, ad magnos verò motus validos ac crassiores. Concludendum igitur contra Bauhinum omnes musculos habere tendines, sed alios habere illos validos, vel saltem conspicuos, & extra carnem suam protensos; alios verò tenellos ac non conspicuos, vel sub carne

*An omnes musculi tendinem habeant.*

K k k 3

cornu

eorum latentes, vel fibris eorum interjectos.

Hic tendo, pro partium valido vel parvo motu, variat in magnitudine & forma, atque modo teres, modò latus, modò longus, modò brevis, modò tener, modò validus est: ac interdum uno, interdum pluribus finibus parti movendæ agglutinatur.

*Sit ne pars  
similaris.*

Casparus Bauhinus statuit, ex sententia Aquæpendentis, tendinem esse corpus omnino simile, à principio ad finem musculi continuum, simplex, sui generis, ex semine, ut reliquæ partes spermaticæ, productum. Cujus opinionem hodie multi sequuntur, qui tendinem partium similarium numero etiam adjiciunt. Vesalius verò, Andreas Laurentius, Jacobus Sylvius, & alii cum Galeno, putant tendinem esse corpus dissimile, conflatum ex concursu fibrarum, ligamentorum, & nervorum tenuissimorum, paulatim in unum corpus simul coalescentium. Volunt enim nervum, ubi musculus jam ingressus est, in multos minimos ramusculos seu exiles fibrillas dividi, iisque obviam ire ligamentum eodem modo fissum, atque ramusculos istos, intermixtis fibris, ultro citroque eire & misceri, sicque mistos, & ad finem musculi unitos, tendinem constituere, ejusque majorem quidem molis partem à ligamento, minorem verò à nervo fibrisque procedere; & quia necesse erat inter istos ramulos spatia quædam inania esse Naturam illa carne replevisse, quæ dictis fibrosis ramulis subsidio esset in contractione & laxatione (hinc esse, quod musculi carnosius validius trahant, quam tenues & emaciati) eosque etiam ab injuriis externis defenderet. Hanc posteriorem opinionem rejicit, sed non satis solidè refutat Bartholinus, dum simpliciter Aquæpendentis & Riolani observationes in contrarium adducit, qui nunquam potuerunt productionem nervi per medium musculus usque in tendinem invenire. Verum, etsi neque ab illis, neque à nobis illud hætenus inveniri potuerit, inde tamen non sequitur illud non esse: nam ductus chyloferus thoracicus, vasa lymphatica, aliaque multa, tot seculis latuerunt, inde tamen, quod ab oculatissimis Anatomicis prætervisa sunt, concludi nequit, illa antea non extitisse. Sic etiam ex prædicta autoritate non satis solide concluditur, nervos non produci usque in tendines, nam acutus tendinis sensus nervi præsentiam in eo abunde testatur, licet oculis videri nequeat: & cum tendo merus nervus non sit, fibras & membranam cum ligamento ei intermisceri, vero simile fit.

Quilibet igitur hac de re sentire potest quod lubet, utraque enim opinio probabilibus rationibus innititur: quamvis poste-

rior, per acutum sensum, longe prævalere videatur, cum nulla pars sentiat quæ non recipit nervum spiritus animales deferentem.

Verum enim vero, ex his forte aliquis bene concludet, tendinem esse maxime necessariam musculi partem, eumque per totum musculus extendi, sed ad ejus finem maxime conspicuum esse: cum tamen obstare videantur musculi non nulli, in quorum cauda nullus tendo conspicuus est. Respondet: licet multorum tendines multa carne obducantur, atque hinc ipsa tendinosa substantia minus conspicua sit, inde tamen non sequi, illam in talibus musculis non adesse: in obesis sæpe mesenterium tanta pinguedine obductum est, ut nulla vasa in eo conspici queant, quorum tamen præsentiam propter pinguedinem illam excludi, nemo sanus dixerit. Ita se etiam res habet in quorundam carnis musculorum tendinibus.

Musculi multis modis variant.

1. Ratione substantiæ: quod alii sint carnosius, alii membranosi, alii seminervi.
2. Ratione quantitatis: quod sint crassi, tenues, longi, breves, lati, rotundi.
3. Ratione figuræ: quod figuram habeant teretem, planam, deltoidem, cucullarem, &c.
4. Ratione situs: quod sint interni, obliqui, recti, orbiculares & transversii: item capitis, trunci, vel artuum.
5. Ratione ortus: quod alii ab ossibus, alii à cartilaginibus, aut tendinibus nasci dicantur.
6. Ratione implantationis: quod alii uno, alii gemino, vel triplici tendine in hanc illamve partem implantentur.
7. Ratione coloris: quod sint rubentes, candicantes, aut lividi.
8. Ratione coalescentiæ: quod alii cum hac, illave parte, alii cum uno aut pluribus aliis musculis coalescant.
9. Ratione usus: quod alii sint flectentes, alii extendentes, adducentes, vel abducetes, levatores, depressores, vel rotatores.

Usus musculorum, ut dictum in definitione, est, motui voluntario inservire, qui his solis instrumentis peragitur, nulla enim pars eo motu movetur, quæ aut non est musculus, aut non movetur à musculo. Qui motus dicitur animalis, aut voluntarius, quia ad animalis voluntatem peragitur, vel peragi potest.

Hic à Francisco Piccolhomino, lib. 2. *Sit ne musculi actio voluntaria, an spontanea.* præleſ. cap. 7. Plempio, lib. 2. fund. med. cap. 6. aliisque nonnullis quæstio movetur, scilicet, an ille motus qui à musculis peragitur, voluntarius sit dicendus, cum in brutis æque peragatur, atque in homine; quibus tamen brutis, utpote anima rationali

*Usus.*

nadi destitutis, dicunt non esse voluntatem: ac proinde putant eum potius appellandum esse motum spontaneum. Sed possent his alia validiora adjici argumenta, & dici, voluntarium non esse, quia ille motus à foetu in utero peragitur sine conscientia & voluntate, ut & cum utero ejectus mox fugit, & si neque mammam, neque lac noverit: etiam in dormientibus respiratorii musculi pectus movent citra conscientiam, ergo citra voluntatem. Respondeo ad primum: in brutis etiam re vera aliqualem voluntatem esse, ab animæ rationalis qualicumque analogo (de hoc videantur illa quæ latè supra diximus, lib. 2. cap. 2. circa finem) & ab appetitu naturali procedentem, ac proinde hunc motum in iis non minus voluntarium appellandum esse, quam in homine. Ad secundum de foetu, & ad tertium, de respiratione dormientium, dico, motum animale seu voluntarium non necessario semper à voluntate dirigi, seu peragi, verum sufficere, si in homine sano, cogitante & vigilante, ad voluntatem peragi possit. Præterea, voluntas est duplex: una ab electione, qualis est in homine vigilante & cogitante: altera ab instinctu, qualis est in dormientibus, & foetibus utero inclusis, vel recens natis, atque etiam in brutis. *Erudita* (inquit Hippocrates) *Natura, & non edocta, qua expediunt facit*, Galenus, lib. 2. de motu muscul. cap. 6. super hac re scribit, quod eorum quæ motu voluntario fiunt, alia quidem libera sint, alia affectibus corporis inserviant: & lib. 1. de usu part. cap. 3. quod omne animal suæ ipsius animæ facultates, & in quos usus polleant, nullo doctore persentiat. Ita musculi (inquit alibi) conveniente structura præditi, virtute quadam ingenita, etiam citra cognitionem, suum opus peragunt, quod tamen cum cognitione ad voluntatem peragere possunt. Igitur concludendum est, musculorum motum bene dici voluntarium, seu animale; minime verò spontaneum appellandum esse, cum spontaneus motus, qualis est cordis, verè naturalis sit, neque ex animalis arbitrio ullo modo pendeat, aut ad voluntatem ejus dirigi, vel aliter atque aliter immutari possit.

*Axioma.*

Cum igitur musculi motus sit actio animalis, & ipse musculus sit motus voluntarii instrumentum, certissima semper regula est: *Ubi cumque est musculus, ibi in parte sana potest fieri actio, seu motus animalis ad arbitrium, & quacunque pars ad arbitrium moveri nequit (dummodo sana sit) illa neque est musculus, neque movetur à musculo, quamvis forte ejus fabrica aliquam videatur habere musculi similitudinem*. Hinc etiam cor non est musculus, nec movetur à musculis, ut supra à nobis demonstratum, lib. 2. cap. 7. Verum e contra Nicolaus

Stenonis, lib. de musc. & gland. adversus hanc nostram regulam, dicit, varios dari laryngis, linguæ, & dorsi musculos, qui nunquam ad animi arbitrium moventur. Sed hoc asserit præter veritatem, nemo enim unquam probabit, eorum ullum esse qui ad arbitrium moveri non possit. Præterea, ad majorem sententiæ suæ confirmationem, ipsum nobilissimum Princeps viscus Cor, omnibus antiquis dignitatibus ac prærogativis miserabiliter exuens, in servilium musculorum familiam etiam reponit, idque nisi musculus esse, tali argumento probare nititur. *Quacunque pars, inquit, nec An. cor sit musculo necessariam ullam desiderat partem, nec aliam musculo denegatam possidet, & fabricam simul musculo convenientem obtinet, non poterit non musculi nomen mereri, licet voluntatis imperio subjecta non sit: At qui cor, &c.* Profecto videtur oculatissimus Vir hic limites anatomes aut non nihil transilire, aut eosdem nimis longe extendere velle, dum neglecto notissimo visceris usu, in solam ejus fabricam tantopere oculos defigit, ut nobilissimas actiones prætervidens, illud repente à principatus gradu ad incitas, ad servilitatis barathrum dejicere conetur. Si enim à simili argumentari liceat, ego sic dicam. Quacunque pars neque ventriculo necessariam ullam partem desiderat, neque aliam ventriculo denegatam possidet, & fabricam simul ventriculo convenientem obtinet, illa non poterit non ventriculi nomen mereri, licet alimenta non concoquat: atqui hæc omnia requisita inveniuntur in vesica urinaria (scilicet, figura globosa & cava, arteriæ, venæ, nervi, item una membrana communis à peritonæo, media propria carnosior, plurimisque fibris intertexta, & interior rugosa) ergo vesica urinaria non potest non ventriculi nomen mereri. Quam valida & certa sint talia argumenta, cuilibet judicandum relinquo. Præterea in suo argumento inter alia dicit N. Stenonis, *nec aliam musculo denegatam possidet*: jam, quæso, quis non videat, quasnam partes possideat cor, musculo denegatas, duas scilicet aurículas, duos capaces ventriculos, & undecim magnas valvulas: ullusne datur in toto corpore musculus, cui hæc, vel aliqua similia concessa sunt? igitur possidet cor varia, & quidem singulariter notabilia, musculo denegata, atque hinc etiam fabricam musculo nec similem, nec convenientem obtinet. Denique, si actio cordis consideretur, ex ea sola liquebit, cor non esse musculus: quippe cor solum sanguificat, nec ullus datur musculus (imo nec ulla alia pars) in toto corpore, quæ isti nobilissimo muneri inservit, aut inservire, sanguinemque, vel sanguinis aliquam umbram, generare possit. Si doctissimus



simus N. Stenonis forte non curet istam principem cordis actionem, eaque prætervisâ, solummodo ejus in pulsu per fibras factam contractionem considerare, ex eaque adhuc pertinaciter concludere velit, illud nihilominus esse muscolum, licet motu voluntario non moveatur; tunc eadem opera si ei placuerit, in musculorum familiam introducere poterit ventriculum, qui & ipse à re vellicante (sicut cor ab acribus fermentaceis succis vellicatum, sese identidem contrahit, ad molestæ rei expulsionem) irritatus, fibrarum ope contrahitur, & ad vomitum, vel singultum incitatur, ad rei molestæ expulsionem: item, folliculum fellis, qui in cholera ab effervescente bile irritatus, illud ipsum facit: nec non uterum, ad foetus expulsionem sese per suas fibras contrahentem: denique etiam intestina, vesicam urinariam, aliasque varias similes partes, quas à rebus molestis vellitas, se per fibras suas contrahere notissimum est. Si omnes tales partes ea de causa musculi appellandi forent, certè numerus musculorum plurimum increaseret, & brevi etiam membranæ cerebri, quæ in sternutatione valide contrahunt, musculorum ordini accenserentur. Sed quam hæc sint absurda, quilibet facile videt. Atque sic ex his omnibus satis patet certitudo nostræ definitionis, scilicet, *quod solus musculus sit motus voluntarii instrumentum*: ut & alterum quod ex eo deducitur: nempe, *quod pars, quæ non movetur motu voluntario, non sit musculus, nec moveatur à musculo*.

Musculi  
actio est  
attrahere.

Actio autem musculi una tantum est, scilicet, attrahere: quæ actio peragitur, dum à spiritibus animalibus per nervos copiose in muscolum determinatis, atque in fibras influentibus, musculus intumescens secundum longitudinem contrahitur: sic enim tendo versus caput adducitur: quæ determinatio & spirituum copiosa influxio quo usque perdurat, eo usque contractus manet musculus.

Dum hæc actio à musculo peragitur, tunc oppositus musculus (si oppositum habeat) relaxatur, quia spiritus in eum antea determinati, tunc determinantur & influunt in alium, atque sic ille: necessario flaccescit, ejusque intumescencia & contractio mox desinit, quia determinationis spirituum animalium mutatio in minimo momento fieri potest, quamvis quo modo id fiat, vix doceri possit, cum actiones animales satis pateant, sed earum modus obscurus sit, quem non nisi incertis conjecturis assequi possumus.

Relaxatio  
non est  
actio.

Hæc tamen musculi relaxatio non est ejus actio, sed desistentia ab actione; ac proinde multi errant, qui hanc alteram ejus actionem esse tradunt: quod etiam asserere videtur Galenus, lib. 1. de motu

musc. cap. 8. qui tamen; *sequente cap. 9.* dicit, contractionem corpori musculi magis propriam esse, quam relaxationem seu extensionem. Atque sic videtur aliquo modo distinguere velle inter illa duo, & laxationem non tanquam ipsissimam actionem, sed tanquam actionem aliquam secundariam statuere. Verum si rem ipsam penitus inspiciamus, hæc re vera non est actio, neque talis appellari ullo modo potest, sive primariam, sive secundariam appellare velis: simpliciter posset dici, esse motum per accidens.

Quæritur, an in motu illo quem Tonicum nominant, aliqua sit musculorum actio, cum undequaque simul contractis musculis, partes movendæ nusquam flexuntur, sed in quiete detinentur, nec ipsi etiam musculi moveri videntur? Respondendo, magnam eo in casu fieri actionem, nam musculi undequaque pari contentione agunt, atque hinc quæ partis aliqujus putatur esse immobilitas, illa infertur à musculis oppositis eodem tempore simul agentibus, & partem movendam undequaque simul trahentibus.

Motus Tonicus.

Riolanus, lib. 5. *anthrop. cap. 3.* videtur distinctionem aliquam instituere velle inter contractionem & tensionem, hancque appellat, contracti conservationem. Verum, cum illa tensio nihil aliud sit, quam contractionis perpetuatio, certe nulla distinctione à contractione separari poterit, cum contractio, sive brevi, sive longiore tempore permanens, re neutequam distet. At, dicit Riolanus, tensio tamen differt à contractione: nam multa tenduntur, quæ non contrahuntur: ut, virile membrum tenditur à distensiva facultate, sed tunc non contrahitur, sicut musculus: vermes quidem contrahuntur, sed non tenduntur: musculi verò tenduntur, inquit, & contrahuntur. Sed Riolanus hic extra oleas divagatur, quoniam hic non de aliarum rerum, sed de musculorum duntaxat contractione & tensione agitur: quamvis enim aliæ quoque partes, ventriculus, intestina, &c. aliæ animalcula, ut vermes, contrahantur, vel tendantur, hoc nihil ad musculos, qui ordinario motu voluntario contrahuntur & laxantur, ac præternaturali de causa ab illo motu impediuntur, atque sic multoties tenduntur, cum ad voluntatem laxandi essent, ut in convulsione, vel rursus laxantur, cum (ut in paralyti) contrahendi essent.

Non differunt contractio & tensio.

Actio musculi perficitur per ejus fibras, tendines, & nervos. Per fibras fit contractio, qua tendo, cum ei alligata parte, adducitur. Per nervos influunt spiritus animales, sensum, intumescencia, & contractionem facientes, ut etiam ante dictum. Si unum ex his tribus deficiat, vel impeditum

Actio fit per fibras.

impeditum sit, non potest fieri hæc actio. Si enim nervus sit obstructus, vel præcisus, tunc non influunt spiritus animales, atque hinc non fit musculi intumescencia & contractio. Si fibræ sint transversim præcisæ, earum contractio fit versus duas diversas partes, sursum & deorsum, sicque pars movenda non adducitur. Si tendo desit, licet musculus intumescat, quia tamen parti movendæ non alligatur, eam non attrahit. Quantum ad carnem fibris affusam, illa proprie ad motum istum non facit, sed fibris robur addit, easque calore suo fovet agilesque facit, & mole sua firmat, atque adversus frigoris æstusque injurias tuctur, ad contractionis verò motum inepta est, quia ob mollietatem & laxitatem, nec se ipsam contrahere, nec alias partes attollere potest. Hoc cum non satis perspexissent, Vesalius, Laurentius, & Erasmus, magno errore statuerunt, hanc affusam carnem esse præcipuum motionis instrumentum: quod verum non esse, liquet in multis hominibus macilentis, quorum musculi sæpe multo fortiores sunt in trahendo, quam aliorum magis carnosorum. Si quis dicat, musculos suræ & brachiorum, propter majorem carnositatem, fortius trahere aliis minus carnosis: Respondebo, id non fieri propter copiosiores carnem, sed propter copiosiores & validiores fibras, quibus illi præ cæteris præditi sunt.

Operationis  
diversitas.

Dicta musculorum actio, pro partium quibus adnectuntur diversitate, varias operationes multosque diversos effectus producit. In thorace dilatat & constringit: in œsophago deglutitionem facit: in cubito flectit & extendit: in larynge vocem modulatur, &c. pro ut scilicet modò hi, modò illi musculi agunt.

Spiritus  
determina-  
tio.

Quomodo autem spiritus animales actionem musculorum producentes, modò in hos, modò in illos musculos, ex mentis arbitrio, copiosiores influant & determinentur, res est obscuritatis plena, de eaque inter Philosophos magna controversia est. Nonnulli per imaginarias quasdam valvulas, quas nervis adscribunt, illud negotium explicare nituntur: sed quantum valeant horum rationes & commenta, infra videndum, lib. 8. cap. 1. Alii, cum per tales nervorum valvulas nec sibi, nec aliis satisfacerent, commenti sunt duplices tubulos, ab uno musculo in alium ita positos, ut in musculi contractione orificium unius, valvula peculiari munitum, aperiat, & per illam viam spiritus ex laxando musculo mox in contrahendum influant, & eodem momento alterius valvula claudatur, ut rursus effluere non possint, sed necessario musculus distendant, quo usque mutato rursus partium situ, illa valvula iterum aperiat, priore tunc clausa, & sic spiri-

tibus ad alium contrahendum musculus liber transitus concedatur. Verum, hoc ingeniosum quidem, sed nullius pretii est commentum. *Primo*, quia musculi qui partem in oppositum movent, plerumque nimis longe a prioribus diffiti sunt, ita ut tubuli isti valde longi esse deberent, sicut in iis musculis qui corpus antrorsum & retrorsum movent. *Secundo*, hi tubuli, si non ubique, saltem alicubi essent visibiles, & ab aliquo Anatomico inventi, cum plurimi exiles nervuli, per quos spiritus fluunt, visibiles existant. *Tertio*, in vulneribus sæpe musculi à se mutuo separantur, & tamen facta ista separatione, motus eorum quaquaversum æque bene procedit, atque antea: quod fieri non posset, si talis intermedii tubuli illic dissecti, & cicatrice obducti adessent: hi enim propter parvitatem (eos enim invisibiles esse statuunt) non possent non per cicatricem omnino occludi. *Quarto*, situs partium mutatus non potest facere apertionem vel occlusionem valvularum: nam præsupponitur, situm partium mutari prout spiritus in hunc vel illum musculus influunt: igitur si prius illud verum foret, tunc causatum præcederet causam, & influxio spirituum fieret antequam existeret ejus causa.

A prædicta opinione de tubulis, non multum distare videtur Cartesius, qui, de *pass. anim. part. 1. artic. 11.* ita scribit: *Parvi hiatus sunt in unoquoque horum musculorum, per quos isti spiritus fluere possunt ex uno in alium, & qui sic dispositi sunt, ut cum spiritus qui veniunt ex cerebro versus unum ex illis, habent paulo majorem vim illis qui versus alterum eunt, aperiant omnia orificia per quæ spiritus alterius musculi possunt in hunc transire, & simul claudunt omnia illa per quæ spiritus hujus possunt transire in alium: qua ratione omnes spiritus antea contenti in his duobus musculis, confluant celerrime in unum eorum, & sic instant & contrahunt eum, dum alter, extenditur & remittitur.* Hoc commentum tum etiam valde speciosum apparet, sed perexiguam habet verisimilitudinem, eodemque modo hi hiatus refutantur, ut antedicti tubuli. Præterea, cum corpus modò antrorsum, modò retrorsum celerrime flectitur, quis mente sanus sibi ulla ratione imaginari poterit tales hiatus ab anterioribus musculis ad posteriores extensos? an illi hiatus, atque etiam spiritus, recta transibunt per omnes alias partes in medio interjectas? Hic respondet Ludovicus de la Forge, *comm. in Cartesii lib. de hom.* illos spiritus non transire per omnes alias in medio interjectas partes, sed è tendine unius musculi per occultos poros & ductus invisibiles (hos etiam per medias ossium extremitates, quibus tendines adnectuntur invisibiliter transire putat) facile transire posse

Cartesii  
opinio.

in alterius tendinem, indeque ulterius in ventrem alterius musculi, quia licet sæpe musculi à se mutuo longius remoti videantur, tendines tamen sibi invicem propinqui adstant. Verum hoc speciosum doctissimi viri commentum docet spiritus è tendine musculi agentis per istos fictos ductus rap- tim influere in tendinem & ventrem ejus qui mox acturus est: sed quid si oppositus musculus acturus non sit, sed oriaturus, quare tunc desinente actione musculi agen- tis, non fluunt illi spiritus in oppositum quiescentem, cum viæ pateant, & quie- scens eos recipere capax sit? si impossibile sit (ut dicit Lud. de la Forge) eos tam citò per musculi poros dissipari, aut in venas vel arterias redire, ubi nam tunc manent, cum ex agente musculo ab actione subito desistente, non ingrediuntur in ullum alium, aliis omnibus in quiete manentibus? aut cum in alium acturum omnino ingredi non possunt, propter distantiae longitudi- nem, ut cum post motionem pedis vel cru- ris mox movetur caput, vel manus, qua- rum partium musculi & tendines tam longe à se invicem distant, ut plane nulla suspicio esse possit, spiritus tam subitò ex illis in hos migrare posse? quid impedit eorum ingressum in proxime adstantes musculos, vel tendines? Hoc faciunt valvulae, dicit. Lud. de la Forge, ductibus appositae. Sed quare illae non satis aperiuntur, cum impe- tus spirituum in musculum agentem, ejus- que tendinem, sit satis magnus, qui val- vulas ductuum, versus alium oppositum tendentium, satis fortiter apperire, & sic ex illo in hunc sibi liberum transitum facere, huncque etiam invitum ad actionem incita- re deberent? Ad hæc, omnes valvulae hu- morum & spirituum influxum versus unum terminum permittunt, refluxum semper impediunt, nec unquam ultro citroque aperiuntur & clauduntur (tunc enim nul- lius usus aut valoris essent) qui sit jam ut

illae valvulae, qui spiritus è musculo, ex gr. dextro agente transfluere permittunt in sinistrum mox acturum, iisdem spiritibus etiam transitum concedant è sinistro agente (cum prior agit) ad dextrum mox actu- rum, eosque non sistant? Præterea, si per tendinem ingrediantur illi spiritus in musculum qui acturus est, ergo musculi cauda citius intumescet, quam caput, & sic non cauda (cum annexa sibi parte) ver- sus caput, sed caput versus caudam trahe- tur, ut paulo ante docuimus in principio hujus capituli. Et si musculi acturi non sat citò possint intumescere à spiritibus per nervos influentibus, nisi simul accedant spiritus ex vicinis musculis ab actione desi- stentibus, nec etiam ab actione desistentes sat citò detumescere, nisi contentos spiri- tus in vicinos musculos deponant, quid dicetur de musculis sphincteris, qui non habent oppositos musculos, è quibus spiri- tus recipiant, aut in quos illos deponant, & tamen citissime agere & non agere, in- tumescere & detumescere possunt? De- nique, quasi rationalis aliqua cognitio spiritibus influentibus adscribitur, cujus ergo, quasi ratione aliqua præditi, sciunt modò aperire, modò claudere has illasve, vel easdem valvulas, seu orificia ductuum, prout ipsis vel transeundum, vel non tran- seundum est. Certè illi qui tali modò mus- culorum motum per hujusmodi suos concep- tus explicant, sunt Philosophi qui malunt Naturam flectere & torquere ad suos con- ceptus quam suos conceptus dirigere ad le- ges Naturæ, aut confiteri suam in hujus- modi obscurissimis rebus ignorantiam.

Atque ita hæcenus modus, quo deter- minati spiritus moventur versus musculos, non nisi per incertas quasdam, & à veritate alienas, conjecturas conscriptus est: qui tandem verum modum invenerit, nobis magnus erit Apollo. Super hac re plura alia videantur infra, lib. 8. cap. I.

## C A P U T I I.

### De Musculis Capitis.



Musculi humanum corpus ejus- que partes moventes, sunt aut capitis, aut colli, aut trunci, aut artuum.

Musculi capitis, alii mo- vent totum caput, alii solum partes aliquas in capite contentas.

Totum caput movetur, vel *secundario*, quatenus motum cervicis, à musculis cer- vicis factum, sequitur. Vel *primario*, quatenus à propriis musculis supra primam vertebrae, cui immediate insistit, antror-

sum, retrorsum, & ad latera flectitur; nec non supra processum dentiformem se- cundae vertebrae, velut ad axin, circum- ducitur.

Primarius hic motus peragitur novem musculorum paribus.

Primum par, *Splenium* appellatum, oblongum, crassum, carnosum, utrim- que vertebrae instratum est. Oritur ner- voso principio, partim à spinis quinque vertebrae superiorum thoracis; partim à quinque spinis inferioribus vertebrae colli,

*Musculi  
splenii.*

colli, atque sursum ascendens lato carneo-que sine in occiput implantatur, & caput recta ad posteriora trahit: vel si alteruter tantum agat, caput retrorsum in latus ducit.

*complexi.*

Secundum par, **Complexum** dicitur, quia musculus quilibet quasi ex tribus musculis constare videtur, principia enim varia, partesque multas tendinosas & carnosas obtinet. Oritur hoc par ad septimam cervicis, & primam, secundam, tertiam, quartam, ac quintam thoracis vertebra, & occipiti tenacissime affigitur, modò simplici, modò triplici tendine, unde Galenus hos musculos triplices esse dicit, quos tamen simplices esse id docet, quod nusquam ulla membranæ separatio adfit, sed soli suæ membranæ includantur: hoc enim non fieret, si in plures musculos dividerentur; nam tunc quilibet propriam haberet membranam, qua mediante ab altero separari posset.

*Parvi, & crassi.*

Tertium par, **Parvum, & Crassum** nominatum, sub secundo pari situm, oritur principio nervoso à processibus transversis sex priorum vertebrarum cervicis (rarius etiam à quinque superiorum vertebrarum thoracis) carnosumque redditum, oblique sursum introrsum porrigitur, & fine nervoso in processus mamillaris radicem posteriorem inferitur, ac caput retrorsum leviter ducit: alterutro tantum agente, retrorsum ad latera vergit. Riolanus putat hoc par nihil aliud esse, quam productionem musculi spinati, ad caput usque pertingentis juxta processum mamillarem.

*Recti majores.*

Quartum par, **Rectum Majus**, est parvum, carnosum, & gracile, oriturque ab apice spinæ secundæ vertebrae cervicis, atque in medium occipitium definit, & tertii paris motum adjuvat.

*Recti minores.*

Quintum par, **Rectum minus** dictum, sub priore latet, eique substantiâ, formâ, ductuque simile est. Oritur à primæ vertebrae postica parte, & in medium occiput definit, motumque tertii & præcedentis juvat.

*Obliqui superiores.*

Sextum par, **Obliquum superius**, sub rectis situm est, iisque substantia & for-

ma respondens, parvum existit, atque à primæ vertebrae colli processu oritur, definitque in occiput, juxta latus externum rectorum. Bauhinus illud in occipite oriri, & in apices processuum lateralium primæ vertebrae colli finiri tradit. Hoc agente recta leviter abnuimus: alterutro agente, caput retrorsum in unum latus inclinamus.

Septimum par, **Obliquum inferius**, *obliqui oblongum, carneum, & teres, à spina inferioris.* secundæ vertebrae cervicis ortum, processui transverso primæ vertebrae implantatur, eamque cum adnexo capite, ad latera circumagat.

Octavum par, **Mastoides**, parte *Mastoides* colli anteriore situm, validum, longum, & teres est, idque nonnulli, propter duo principia, duplex esse statuunt. Oritur nervosum latumque à sterni & claviculae summa parte, ac fine carnosum in mamillarem processum & occipitis partem posteriorem inferitur. Hoc par caput antrorsum in pronum flectit: & alterutro agente, ad latus obliquat.

Nonum par, à fallopio inventum, quod *Recti interni.* **Rectum internum** appellari posset, sub œsophago in anteriore parte colli situm, primo cervicis pari adjacet. Oritur principio nervoso à ligamentis omnium fere vertebrarum cervicis, & fine carnosum in capitis basim, inter utrumque processum, quo cum prima vertebra articulatur, inferitur, & caput ad anteriora, dum annuimus, flectit.

Musculi qui partes in capite contentas movent multi varique sunt, nimirum frontis duo: palpebrarum quatuor: oculorum duodecim: aurium octo: membranarum tympani quatuor: nasi octo: buccarum & labiorum quindecim: maxillæ inferioris decem: linguæ decem: ossis hyoïdis octo: quorum omnium formam, ortum, insertionem, situm, & usum, descripsimus supra, lib. 3. in dictarum partium historiis.

*Partes in capite moventes.*

Sunt igitur musculi capitis in universum nonaginta novem.

## CAPUT III.

## DE MUSCULIS COLLI.



Musculi qui primario collum, secundario verò caput movent, utrimque quatuor sunt, quorum ope collum versus anteriora, latera, & posteriora movetur.

I. **Duo Longi**, qui sub œsophago *Musculi longi.* latitant. Hi à quinta & sexta thoracis vertebra carnosum oriuntur, & sursum ascendentes, tendine acuto in primæ vertebrae cervicis processum extuberantem simul implantantur: rarius occipiti prope magnum

eius foramen adnectuntur. Horum beneficio collum, una cum capite, recta versus anteriora flectitur: uno autem solo agente, versus latus.

*Scaleni.*

**I I. Duo Scaleni**, (hos nonnulli thoracis musculis annumerant) qui latera magis occupant, & carnosio principio a prima colla prodeuntes, in omnes transversos processus vertebrarum colli, primâ & secundâ nonnunquam exceptâ, interne inferuntur, & præcedentium motum adjuvant. Habent hi musculi foramen peculiare, per quod arteriæ ad brachium descendentes, & venæ ab eodem ascendentes transeunt.

*Transversales.*

**III. Duo Transversales**, in dorso siti. Hi ex radicibus processuum sex vertebrarum superiorum thoracis orti, sensimque carnosiores redditi, omnibus processibus transversis vertebrarum cervicis externâ

sede adnectuntur & cervicem in posteriora, vel uno solo agente, oblique retrorsum flectunt. Inter hos nervi medullæ spinalis, è vertebris colli exeuntes, feruntur.

**IV. Duo Spinati**, qui longi & amplii totam cervicem inter spinas occupant. Oriuntur a septem thoracis, & quinque vertebrarum colli spinis, sibi invicem accumbentes, & solis spinis distincti, ac in spinæ secundæ vertebræ cervicis totam inferiorem sedem implantantur, atque una cum transversalibus cervicem ad posteriora, vel oblique flectunt.

*Spinati.*

His octo cervicis musculis, si annumerentur musculi laryngis tredecim, & œsophagi septem (descripti, *lib. 2. cap. 15. & 16.*) item ossis hyoidis octo, & linguæ decem (descripti *lib. 3. cap. 23. & 24.*) qui omnes in collo siti sunt, numerabuntur in collo musculi quadraginta sex.

*Numerus musculorum colli.*

## C A P U T IV.

### De Musculis Brachii, seu Humeri.



Superior brachii pars a summo humero ad cubitum pertingens, quam Humerum vocant, variis motibus movetur, imprimis quinque, antrosum, retrorsum, sursum, deorsum, & in gyrum: qui motus perficiuntur novem musculis.

*Musculus pectoralis.*

**Primus**, a situ, **Pectoralis** dicitur, qui pectori carnosus incumbens, a media clavicula totoque osse sterni, nec non sextæ, septimæ, & octavæ costæ cartilaginibus (tanquam ex pluribus musculis compositus) membranaceo principio exoritur, & circa finem coarctatus, brevi valido tendine humeri ossi, paulo infra ipsius caput, implantatur, & brachium antrosum pectori adducit, idque vel recta, vel nonnihil sursum, aut deorsum versus, prout modò omnes, modò mediæ vel superiores, aut inferiores fibræ, contrahuntur. Hic manifeste in duos dividi potest, sed non in tres, quatuorve, ut censuit Bauhinus.

*Deltoides.*

**Secundus** a figura triangulari Græcæ literæ  $\Delta$  **Deltoides**, & **Triangularis humeralis** nominatur. Lato nerveoque initio procedit ex claviculæ media parte, summo humero, totaque scapulæ spina, & valido, extrinsecus carnosio, intrinsecus nervoso, tendine ad ossis humeri medium extenditur, brachiumque sursum attollit, modò recta, modò nonnihil antrosum, vel retrorsum, pro diversa anteriorum, posteriorum, mediarum, vel omnium fi-

brarum contractione. In hujus media parte imperitiores chirurgi fonticulos faciunt; sed male, quia contractio musculo simul contrahitur foramen fonticuli, sicque pium aliufve immixtus globulus, vi & cum dolore identidem expellitur, seu exprimitur, & fit præter voluntatem cita fonticuli consolidatio: qui error facile evitatur, si fonticulus excitetur inter hunc & bicipitem musculum, ad quatuor aut quinque digitorum latitudinem infra humeri articulum, quo loco dum brachium inflectitur, hoc duorum musculorum interstitium mox percipitur.

*Locus fonticuli.*

**Tertius**, ab usu, **Aniscliptor**, quia brachium retro deorsum trahit; a magnitudine verò **Latissimus** appellatur, quia totum fere dorsum cum suo compari tegit. Oritur membranoso latissimoque principio ab apicibus vertebrarum spinæ, inter os sacrum & sextam thoracis vertebram sitarum, nec non a superiore ipsi ossis parte: hinc scapulæ basim (a qua nonnunquam fibras carnosas plurimas recipit) carnosus accedit, & tandem brevi, sed valido latoque tendine, inter pectoralem & rotundum inferitur, & brachium retro deorsum trahit, modo magis ad superiora, modo magis ad inferiora, prout vel hæ, vel illæ fibræ, quas propter amplum principium valde diversas obtinet, contrahuntur.

*Aniscliptor.*

**Quartus**, **Rotundus major** dictus, qui carnosus parte posteriore sub axilla locum habet, & carneo principio a tota scapulæ inferiore costa pronascitur, ac brevi lato

*Rotundus major.*

lato validoque tendine in brachii os, paulo infra cervicem, definit, brachiumque retro deorsum trahit.

*Rotundus minor.*

*Quintus*, à situ, *Transversalis* musculus brevior, à forma verò, *Rotundus minor* nuncupatur. Hic ab infimo scapulæ angulo exsiliens, in brachii cervicem producit, & motum quarti musculi adjuvat, cujus illum portionem esse nonnulli existimant.

*Infra spinatus.*

*Sextus*, *Supra scapularis inferior*, aliis *Infra spinatus* appellatur, quia totam anteriorem scapulæ partem, quæ sub spina est, tegit. Hic à scapulæ basi infra spinam exortus, lato brevique tendine humeri ligamento articulum continente, velut in semicirculum, inseritur, & brachium ad exteriora circumaggit.

*Supra spinatus.*

*Septimus*, *Super scapularis superior*, aliis *Supra spinatus* dicitur. E scapulæ basi enatus, totam cavitatem inter spinam & costam scapulæ superiorem implet, latoque ac valido tendine articulum superante, oblique cervici inseritur, & brachium cum priore circumducit. Alii

tamen putant, illum cum deltoide brachium sursum movere.

*Octavus*, *Subscapularis*, seu *Immersus* nominatus, est valde carnosus, atque inter scapulam & costas subsistens, occupat partem scapulæ internam, inseriturque tendine lato interne in humeri ligamentum secundum, & brachium introrsum circumaggit.

*Subscapularis.*

Horum trium musculorum (sexti, septimi, & octavi) circumagentium tendines articuli ligamentum totum, quasi in orbem, complectuntur. Sed interim notandum hanc circumactionem à reliquis humeri musculis successive agentibus plurimum adjuvari.

*Nonus*, *Perforatus*, *Coracoidæus*, & *Coracobrachixus*; dictus, brevi nervosoque principio à scapulæ processu coracoidæ incipiens, robusto tendine ad medium fere brachium antrosum versus pectus adducit. Hujus venter perforatus est, & transitum præbet nervis qui ad cubiti musculos distribuuntur. Riolanus putat hunc musculum esse portionem bicipitis, seu primi musculi cubiti.

*Perforatus.*

## CAPUT V.

## DE MUSCULIS SCAPULÆ.

**S**capula (quæ cum ossæ humeri per arthrodiam, intervenitu ligamenti crassissimi, & magni nervi articulatur) præterquam quod ab antedictis humeri musculis per accidens movetur, etiam peculiares quatuor habet motus, qui beneficio quatuor musculorum perficiuntur: qui sunt hi.

*Serratus minor.*

I. *Serratus minor*, qui musculo pectorali substratus, a costis superioribus quatuor, primâ exceptâ, quasi digitatim exoritur, & scapulæ ad processum coracoidem inseritur, eamque antrosum ad thoracem adducit.

*Trapezius.*

II. *Trapezius*, aliis *Cucullaris*, quia cum suo pari dorsum tegens, cucullam monachi aliquo modo refert. Principium sumit ab occipite, & apice quinque spinarum colli, octoque vel novem superiorum thoracis: inde versus scapulam angustatus procedens, in ejusdem spinam totam, summum humerum, & claviculæ

latiorem partem implantatur, atque scapulam, propter varium exortum variasque fibras, diversimode movet, sursum, deorsum, recte, oblique, prout modò hæ, modò illæ fibræ contrahuntur.

III. *Rhomboides*, qui tenuis, latus, & quadrangularis, sub cute latens, carnosus emergit à spinis trium vertebrarum inferiorum colli, & trium superiorum thoracis, atque in externam basim scapulæ inseritur, eamque nonnihil sursum ad posteriora trahit, & dorso applicat.

*Rhomboides.*

IV. *Levator*, qui à transversis processibus, secundæ, tertiæ, & quartæ vertebræ colli, diversis principiis, circa medium coeuntibus, prodiens, lato carneoque tendine scapulæ angulo elatiori & inferiori infigitur, eamque sursum versus anteriora trahit, & cum humero attollit.

*Levator.*

His scapulæ musculis nonnulli Serratum majorem & Deltoidem massæ adjiciunt, cum ille proprie sit thoracis, hic verò humeri musculus.

## CAPUT VI.

## De Musculis respirationi inservientibus.



Um rare factus in dextro cordis ventriculo sanguis necessario refrigerandus & condensandus sit, antequam ad sinistrum perveniat, ut dictum lib. 2. cap. 13. respiratione imprimis opus est, qua thoracis alterna dilatatione & contractione, aer modò frigidus in pulmonem recipitur, modò ex eodem cum vaporibus expellitur, ejusque tanta est necessitas, ut vita sine hac in homine nato diu persistere nequeat, sed calore protinus suffocato extinguatur.

Hic autem respirationis motus, cum non sit actio naturalis, sed animalis, ut antecitato loco satis probatum est, peragi debuit instrumentis animali motui inservientibus, nempe musculis, quibus licet pulmo destituatur, tamen ut motus ille continue procederet, summus Creator quinquaginta septem musculos, respirationi inservientes, thoraci adjecit, qui illum continua alteratione dilatarent & constringerent, sicque per accidens etiam eodem modo pulmonem moverent.

Horum musculorum latissimus & maximus, qui interius thoracem ab inferiore ventre separat, **Diaphragma** appellatur, cujus historia antè descripta est, lib. 2. cap. 3.

Reliqui vel costis intertexuntur, vel iisdem imponuntur.

Interco-  
stales.

Qui costis intertexuntur, **Interco-  
stales** dicti, sunt quadraginta quatuor, utrimque viginti duo, scilicet undecim externi, & totidem interni, omnes breves & carnei, fibris obliquis ab una costa ad aliam proximam oblique delatis, & instar literæ X se mutuo interfecantibus, præditi. Quorum illi a superiorum costarum inferioribus partibus oriuntur, & oblique versus posteriora descendentes, inseruntur in inferiorum partes superiores: hi autem contrario ductu feruntur. Illi ad cartilagine desinunt: hi & costarum, & cartilagineum spatia replent.

Costarum  
levatores.

Hic bene notat Nicolaus Stenonis, lib. de musc. & gland. aliquos, præter interco-  
stales, dari musculos, qui vulgò interco-  
stalibus annumerantur, cum tamen sint musculi ab iis diversi; scilicet illos qui à transversis vertebrarum processibus in costarum inferiorum superius latus desinentes, **Costarum levatores** suo jure videntur salutandi. Atque etiam monet, nec illam quoque exteriorum intercostalium negli-

gendam partem, quæ superioris costæ osseam extremitatem cum inferioris cartilagine connectit.

Interco-  
stales habent arterias ab utraque arteria intercostali. Venas ad azygon & intercostalem superiorem emittunt. Nervos recipiunt à sexto pari, quibus junguntur illi qui è dorsi medulla procedunt.

De actione intercostalium nonnihil discrepant Anatomici.

Eorum  
actio.

Johannes Mayow, Anglus, his musculis adscribit munus costas in inspiratione dilatandi, seu à se invicem dimovendi: additque etiam, diaphragma thoracem dilatere. Verum prius illud prorsus impossibile est, cum musculorum actio sit, sese contrahendo partes alligatas ad se invicem adducere, atque hinc etiam interco-  
stales non possint non iis alligatas costas adducere, sicque thoracem angustare. Posterius de diaphragmate, supra satis à nobis refutatum est, lib. 2. cap. 3. Alii nonnulli putant internos thoracem dilatere, externos contrahere, alii contrarium statuunt: utrumque evincit ratio ante dicta. Alii existimant illos in inspiratione nihil agere, in expiratione verò costas simul contrahere, & diaphragmatis motum adjuvare: quorum sententiæ nostrum quoque calculum adjicimus, quoniam non possunt esse diversæ eorum actiones, sed simul in unum finem conspirant, & costas ad se mutuo adducendo, thoracem constringunt.

Propter horum musculorum parvitatem ac tenuitatem, putavit fallopius illos non esse musculos, sed tantum carnosæ costarum ligamenta. Cujus tamem opinionem hoc satis evertit, quod costæ talibus ligamentis, fibris decussatim se mutuo interfecantibus, non indiguissent, quales in his musculis cernuntur: quod etiam obscurus & parvus costarum motus iis musculorum naturam non deneget, utpote qui etiam in larynge, aure, tympano, aliisve varis partibus admodum obscurus est, & tamen à musculis peragitur.

Musculi respiratorii qui costis insternuntur, utrimque sex numerantur.

I. **Subclavius**, sub clavicula situs, à clavicula interna prope acromium carnosus exoritur, & obliquis fere transversis fibris antrosum delatus, in primam costam prope sternum implantatur, eamque sursum & extrorsum trahendo, thoracem dilatat.

Subclavius.

II. **Serratus major**, in thoracis latere positus, & singulari latitudine ac carnositate insignis, ab interna scapulæ basi ad

Serratus  
major.

sex



sex septemve costas pertingit (secundum Riolanum, origo ejus à costis duabus supernis usque ad claviculam) & quinque inæqualibus extremitatibus in costas quinque veras, spuriasque duas vel tres, antequam in cartilagine desinant, implantatur, quas attollit. Contrarium tamen ortum & usum, aliamque insertionem ei male adscribunt Spigelius & Veslingius. Dicti musculi motus juvatur ab obliquo abdominis descendente musculo, & hujus rursus ab illo: atque hinc unius inæqualibus extremitatibus alterius extremitates digitatim interponuntur, sicque serratam compagem simul efformant, quemadmodum & Serratus posticus inferior.

*Serratus posticus superior.*

III. Serratus posticus superior, qui parvus in dorso sub Rhomboide, inter utramque scapulam, & supra musculorum capitis par primum situs est, oriturque membranofus à spinis trium inferiorum vertebrarum colli & primæ thoracis, ac costarum trium quatuorve superiorum intervallis inferitur, easque sursum attollendo thoracem dilatat.

*Serratus posticus inferior.*

IV. Serratus posticus inferior, latus & membranofus in dorso fere medio, sub latissimo seu Anisclptore humeri musculo tertio situs. Procedit à spinis trium vertebrarum inferiorum dorso, & primæ lumborum; desinitque in tribus quatuorve infernis costis nothis, quas extrorsum trahendo, inferiorem thoracis partem dilatat.

*Sacrolumbus.*

V. Sacrolumbus, præcedenti substratus, qui ex ilii ossis margine, sacri posterioriore sede, & spinolis apophysibus lumborum ortus, carnea portione usque ad costas ascendit, quibus omnibus & singulis inferiore parte implantatur, atque trium circiter digitorum spatio à spinis, scilicet loco ubi costæ incurvari incipiunt, tendinem affigit. Circa hunc tendinem nonnihil erratum videtur ab Anatomicis. Nonnulli enim, cum Laurentio, putarunt hunc musculum emittere geminum tendinem; unum sursum ad costarum partem inferiorem; alterum deorsum, ad eandem partem superiorem, atque sic mediantibus his diversis tendinibus (qui circa costas manifeste conspiciuntur) costas in inspiratione sursum attolli, in expiratione deorsum trahi. Verum cum tales contrarias actiones ab uno eodemque musculo peragi non posse ratio clarissime doceat, suspicatus sum, descendentes tendines ab alio peculiari musculo debere procedere, atque hinc diligenter inquirendo, tandem percepi eos procedere à musculo quodam, qui Sacrolumbo substratus, eique adeo con-

nexus est, ut vix perfecte ab eo separari queat. Hunc animadverti originem suam debere, 3. 4. 5. 6. 7. vertebræ colli (ea de causa illum appellabo *Cervicalem descendentem*) ex iisque carnosum exoriri, ac tendines deorsum versus in partem superiorem omnium costarum emitte- re, è directo Sacrolumbi tendinibus oppositos, atque sic horum duorum musculorum tendines se mutuo decussatim interfecare, & non simul, sed alternatim operari. Quippe cervicalis descendens tendines in inspiratione costas sursum ducunt; ut in mediis spatiis a se invicem removeri ac dilatari queant: Sacrolumbi verò tendines in expiratione costas deorsum trahunt, ut ad se admoveri ac contrahi possint. Quantum ad progressum & insertionem tendinum ipsius Sacrolumbi, ea de re elegantem suam observationem scribit Nicolaus Stenonis, *lib. de musc. & gland.* Non ab inferiore, inquit, costa in proxime superiorem ilico feruntur fibrae, sed quadam tres, alia plures intermedias transcendunt. Nec quas una emittit fibra uni tantum inseruntur, sed quadam tribus, alia quinque, nonnulla septem costis prospiciunt. Pari quoque ratione quilibet conspicuus tendo non ea, quam una subministrat, contentus carne, quibusdam in locis à quinque costis emissas colligit fibras. Nec confusa hac adeo, quin in subjecto media magnitudinis separari ac demonstrari possint facile. tum à tendine retrorsum descendendo sectione recta, ut multiplices conspiciantur ventres: tum sectione laterali seu transversa à spatio inter costas intercepto sursum pergendo, ut tendinum unius ventris videatur numerus: quandoquidem quilibet integer venter pluribus tendinibus largiatur suam singulis partem, ut integer quilibet tendo pluribus è ventribus suam à singulis partem accipiat.

*Cervicalis descendens.*

*Triangularis.*

VI. Triangularis, sic vulgò dictus, & si verum triangulum non efformet. Parvus & subtilis a media sterni linea procedens, utrimque quatuor exiles projectiones emittit ad osseas extremitates (quibus junguntur cartilaginibus) 3. 4. 5. & 6. costæ veræ, quas adducendo, thoracem constringunt, nec non anteriorem ejus partem deprimunt.

His sex musculis (quibus nos unum, scilicet cervicalem descendentem, adjecimus) a fallopio tres alii, in cervice positi, annumerantur, quos tamen vesalius melius censet esse partes musculorum cervicem & dorsum occupantium.

Dicti musculi respiratorii in sua actione secundario juvantur a musculis abdominis, scapularum, & brachiorum.

## CAPUT VII.

## De Musculis Dorsi, &amp; Lumborum.



Ropter varias dorsi, & imprimis lumborum motus, antrorsum, retrorsum, & ad latera, singulis vertebrae tendines musculorum implantati sunt, ac si plurimi illic essent musculi, quos tamen nonnulli Anatomici ad unum magnum musculum referunt, a quo omnes istos tendines produci tradunt: quæ opinio inde orta videtur, quod musculi dorsi & lumborum multis in locis sibi invicem firmiter adhæreant, & ægre a se mutuo separentur. Verum attenta & curiosior sectio quatuor musculorum paria in dorso & lumbis exhibet, quorum ministerio istarum partium validi motus perficiuntur, imprimis circa ultimam thoracis & primam lumborum vertebra, utpote quæ duæ multo laxiore articulatione sibi mutuo cohærent, quam reliquæ.

Quadrati.

*Primum par*, constituunt duo musculi triangulares, qui cum simul juncti quadraturam aliquo modo exprimant, *Par quadratum* vulgò dicuntur. Hi lati & crassi ab ossis ilii cavitate postica superiore, ossisque sacri parte laterali, internè profluunt, & in transversas vertebrarum lumbalium apophyses, usque ad ultimam costam carnosam inferuntur, atque lumborum vertebrae antrorsum, vel alterutro agente, oblique antrorsum ad latera flexunt.

Longissimi.

*Secundum & primum par*, constituunt Musculi longissimi, qui ab extremo ossis sacri & ilii, secundum longitudinem spinæ, usque ad processus mammillares prope ossa temporum extenduntur, & sin-

gulis vertebrarum lumbalium ac dorsi processibus tendines largiuntur (hinc nonnulli hoc par diviserunt in tot paria quot sunt vertebrae, sed melius Galenus hoc pro uno pari, omnibus vertebrae tendines tribuente, describit) ac cum Sacrolumbo & Semispinato usque ad infimam dorsi vertebra fere confunduntur, versus superiora ab eo separati: atque hinc multi istos tres, quia difficulter separari queunt, pro uno habent musculo.

*Tertium par*, constituunt Sacri, qui ab osse sacro posterius acuto carneoque principio oriuntur, & in duodecimæ vertebrae thoracis spinam, ac plerumque in lumbalium quoque vertebrarum spinas oblique processus variis tendinibus finiuntur, priorumque actionem adjuvant.

Sacri.

*Quartum par*, constituunt Semispinati, qui nervoso principio à spinis omnibus ossis sacri & lumborum enati, in apophyses lumborum inferioresque thoracis transversas defluunt, & thoracem erigunt.

Semispinati.

Omnibus his musculis simul agentibus spina extenditur, erecta sustinetur, vel inflectitur: illis verò qui in alterutro sunt latere solis agentibus, ad latera contorquetur.

Flectionem autem lumborum totiusque spinæ versus anteriora, magnopere juvant musculi abdominis, præcipue recti, dum enim contrahuntur, & abdomen ac thoracem deprimunt, spinam simul incurvant, quod manifeste percipiet, qui supinus jacent sine manuum adminiculo corpus vult erigere.

## CAPUT VIII.

## De Musculis Abdominis, &amp; partium in inferiore ventre contentarum.

Musculi abdominis.



Abdomen ad alimentorum propulsionem, & violentam foetumque expulsionem, decem musculis donatum est: duobus oblique descendentibus, totidemque oblique ascendentibus: duobus rectis, cum totidem pyramidalibus, iis inferiore parte adhærentibus, & duobus transversis. Quorum omnium historia supra descripta est, lib. I. cap. 5.

Ani.

Anus tres habet musculos, unum Sphin-

cterem, & duos Levatores, lib. I. cap. 8. descriptos.

Vesica uno musculo Sphinctere clauditur, ut dictum lib. I. cap. 21.

Vesica.

Testes virorum duo musculi, Cremasteres dicti, suspensos tenent, videndi lib. I. cap. 22.

Testium.

Penis quatuor musculos obtinet, lib. I. cap. 23. descriptos.

Penis.

Clitoris in foeminis etiam quatuor musculis donatur, ut dictum lib. I. cap. 25.

Clitoridis.

CAPUT

## CAPUT IX.

## DE MUSCULIS CUBITI.



Ubitus duobus constat ossibus, quæ prout variis articulationibus connectuntur, ita motus habent nonnihil diversos. Flexionem & extensionem dirigit os cubiti: pronam verò & supinam manum facit radius: hincque ad proprios motus singula proprios diversosque habent musculos.

connectuntur. Hic cum priore cubitum arctissime flectit.

**Longus** valido latoque, sed gemine, principio, emergit: uno sublimiore, ab omoplate costâ inferna: altero humiliore: quibus junctis, sub capite ossis humeri, in olicrano sive cubiti summo exterius terminatur.

**Brevis**, à cervice postica brachii ortus, in illam olicrani partem, cui innititur, cum præcedente definit. Hic una cum longo unicum robustum ac nerveum tendinem efficit, quo brachium extenditur.

His quatuor musculis duo sequentes ab Anatomicis posterioribus adhuc additi sunt, iisque numerus musculorum cubiti adauctus est.

**I. Brachiaëus externus**, Riolo ita vocatus, qui est moles carnea, quæ cum Longo & Brevis confunditur, eidemque parti inferitur.

**II. Aconæus**; qui corpore exiguus (hic aliis est pars musculi quarti seu Brevis) ab inferiore humeri parte posterius enascitur, cubitique duobus ossibus intermedius, in latus ulnæ nonnihil oblique descendit. Hi duo (si modò pro peculiaribus musculis habendi sint) extensionem Longi & Brevis adjuvare debebunt.

Musculi  
cubiti.

Biceps.

Brachiaëus.

Os cubiti quatuor movetur musculis, nempe duobus flexoribus, in interna, seu anteriore brachii parte sitis: & duobus extensoribus, externam, seu posteriorem brachii partem occupantibus. Illi sunt Biceps & Brachiaëus: hi longus & Brevis.

**Biceps** gemino validoque oritur principio, altero exteriore nerveo, à superiore supercilio acetabulis ipsius scapulæ: altero partim nerveo, partim carneo, à scapulæ coracoide apophysi exorto: quibus principiis deinde unitis, corpore suo brachii internam sedem occupat, & crasso tendine in caput, seu prominentiam anteriorem inferitur, articuli ligamento nonnihil alligatus.

**Brachiaëus** prædicto substernitur, eoque brevior & totus carnosus est. A media parte ossis brachii procedens, definit inter radium & cubitum, qua parte simul

## CAPUT X.

## DE MUSCULIS RADII.



Adium quatuor movent muscoli, quorum duo interiores radium introrsum movent, **Pronatores** dicti: duo exteriores eundem extrorsum convertunt, **Supinatores** appellati.

cubito connectit, progreditur, radiique internæ parti committitur.

**Prior Supinatorum**, qui longior, ab extremo humeri tuberculo exortus, ad radii apicem inferiorem descendit.

**Alter**, qui brevior ac tenuis, è brachii externa apophysi emergens, prope radii medium terminatur.

Notandum; quamvis post cubiti musculos radii musculi ordine descriptionis sequantur, in demonstrationibus tamen post cubiti musculos, primo exhibendos esse musculos digitorum, pollicis, & carpi, postea musculos radii, utpote qui dictis illis remotis commodius offeruntur.

Rotundus.

Quadratus.

**Primus Pronatorum**, qui superior, à forma **Rotundus**, seu **Teres** nominatur. Hic ab interiore parte tuberculi humeri productus, tendine membranoso ad radii fere medium decurrit.

**Secundus**, qui inferior, **Quadratus** dictus, ab interno ulnæ latere transversim extensus, supra ligamentum quod radium

M m m

CAPUT

## CAPUT XI.

## De Musculis Carpi, &amp; Volæ manus.

Musculus  
palmaris.

Arpus extenditur, flectitur, & lateraliter movetur beneficio quatuor musculorum: ex quibus duo sunt interni, totidemque externi.

Ante hos tamen primo loco demonstrandus occurrit **Musculus palmaris**, qui omnibus fere musculis manus interioris subternitur. Originem sumit ab interno humeri tuberculo, carnosus in principio existens, mox in gracilem tendinem attenuatur, qui ligamentum annulare carpi supergressus, dilatatur in nervosam membranam, per volam manus, usque ad digitorum confinia, expansam, cuti adeo tenaciter affixam, ut difficillime ab ea separari queat. Hic cutem corrugando apprehensionis firmitatem præstat, volamque eximio sensu donat.

Paluari adjacet caro quædam in principio manus internæ, parte inferiore montis Lunæ, ad carpi ossiculum octavum, quæ bifida, nonnunquam trifida, duorum vel trium musculorum quasi effigiem extrinsecus refert, atque in mediam internamque volam defertur musculo paluari subtenfa & implicata. Hæc eminentiam carneam articuli digito subiectam ad Tenar adducens, manum cavam reddit, & scyphum diogenianum efformat.

Cubitus  
internus.

Musculorum carpi internorum primus,

**Cubitæ interni** nomine insignitus, oritur à brachii interna apophysi, & cubito attensus, crasso tendine carpi quinto ossi implantatur.

Secundus, **Radixus internus** dictus, ab eodem loco eductus, per radium exporrigitur, & in os metacarpi indicem sustinens desinit. Hi duo manum contrahunt.

Externorum verò carpi musculorum prior, **Radixus externus**, sive **Bicornis** dictus, lato geminoque principio à brachii acumine osseo, ejusdemque condylo externo procedens, radio carnosus innititur, & duplici tendine in os metacarpi primum & secundum inseritur. Hic propter geminam insertionem, geminumque principium, à nonnullis geminus describitur.

Alter, **Cubitæus externus** nuncupatus, ab externa apophysi brachii ortus, ac per cubitum delatus, in os quartum metacarpi, minimo digito subiectum, unico tendine insignitur. Hi duo manum extendunt.

Si horum quatuor musculorum tantum unus, aut duo unius lateris agant, tunc manus lateraliter movetur, idque aut fursum, aut deorsum, aut in medio, prout vel solus externus, vel internus, vel ambo simul agunt.

## CAPUT XII.

## De Musculis digitorum, &amp; Pollicis



Flexor.

Flectunt Sublimis, Profundus, & Lumbricalis.

Sublimis.

**Sublimis**, qui & **Perforatus** dicitur, ab interno ossis humeri tuberculo exoritur, & circa carpum in quatuor tendines dirimitur, prope finem veluti rimâ (quam sequentis musculi tendo transit) fissos, qui in secundum digitorum internodium inferuntur.

Profundus.

**Profundus**, qui & **Perforans** vocatur, à partibus superioribus cubiti & radii paulo infra articulum emergit, quadripartitus robustis tendinibus rimas prioris

transiens, tertio digitorum ossi implantatur.

Ut autem per hos musculos recta fieret digitorum inflectio, & tendines contracti non exurgerent, cutemque attollerent, parte manus interna, secundum totam eorum longitudinem, canali ex duris membranis confecto, interius pingui ac oleoso humore inuncto, includuntur, in quo liberum cursum habent.

**Lumbricales** appellati, tenues à muscoli Profundi tendinibus orti, in primum internodium tereti tendine, cum Interosseorum tendinibus confuso, desinunt: interdum ulterius cum interosseis mixti, secundum digitorum latera usque ad tertium internodium excurrunt, & digitos lateraliter flectunt.

Digitos

**Extensores.** Digitos extendunt musculi duplices, alii communes, alii proprii.

**Communes.** Communes, qui quatuor digitis inferiunt, bini sunt, ab extremo humeri tuberculo prognati, qui in progressu simul junguntur (hinc eos pro uno musculo describunt. Jac. Sylvius & Riolanus, eique *Magni tensoris* nomen imponunt). & tendinibus unitis, secundo tertioque digitorum ossi firmiter adnectuntur.

**Proprii.** Proprii, qui unum solummodo digitum extendunt, duo sunt.

**Indicis tensor.** Primus **Extensor indicis proprius**, quem præter communem obtinet, Riolo- & Veslingio *Indicator* appellatus, à media & extrema cubiti regione ortus, bifido tendine in secundam articulationem inferitur, quorum tendinum alter cum tendine extensoris communis coalescit.

**Minimi digiti tensor.** Alter **Minimi digiti extensor proprius**, qui à radii superna parte ortus, & cubito radioque interjectus, externe in auricularem digitum duplici tendine implanta- tur, quorum unus cum tendine communis extensoris miscetur.

**Interossei.** Dignati ad latera, vel versus pollicem adducuntur, vel ab eo abducuntur beneficio octo **Musculorum interosseorum**: quorum quatuor interni intervallum ossium metacarpi obtinent: quatuor externi in palma manus collocati, prioribus desuper incumbunt. Oriuntur à supernis ossium metacarpi partibus juxta carpum: deinde modò soli, modò cum lumbricalibus coeunt, lateraliter tria digitorum ossa tendinibus perreptant, usque ad radicem unguium, ubi antrorsum & superne tendines coeunt terminantur. Ab his medius & annularis digitus duos tendines recipiunt, index & auricularis unum. Galenus, *lib. 1. de usu part. cap. 18.* putat ab his musculis etiam postrema digitorum ossa extendi.

Præter Lumbricales antedictos, sunt lateraliter moventes musculi proprii duo.

**Indicis adductor.**

Primus **Adductor indicis proprius**

(hic à nonnullis cum extensore indicis proprio confunditur) qui ab interno pollicis internodio primo exsurgens, in ossa indicis desinit, & indicem versus pollicem adducit.

Alter, **Abductor minimi digiti proprius** (hunc in duos secari posse putat Riolanus) qui in vola à carpi osse tertio & quarto secundi ordinis emergens, in articulum primum auricularis digiti exterius ad latus inferitur, eumque à reliquis digitis abducit.

**Pollex**, qui robore quatuor digitis æquipollet, extenditur beneficio duorum musculorum longorum, qui ab exteriori cubiti latere oriuntur: quorum unus ad tertium usque internodium pertingit. Alter carpum prætervectus, in primum & secundum pollicis articulum duplici tendine extrinsecus inferitur.

Flectitur autem à duobus musculis. Uno valido, qui à superiore radii parte ejectus, ad primum & secundum pollicis internodium excurrit. Altero minore, qui ab osse carpi procedens, alteri subjicitur, & in medium pollicem extenditur, Riolanus hunc posteriorem non agnoscit pro flexore, putatque musculos à carpi aut metacarpi ossibus ortos esse adductores, vel abductores.

Adducitur versus alios digitos à tribus musculis (hos Riolanus describit pro uno musculo, qui ratione trifidæ originis in partes secatur) ex tribus ossibus infernis metacarpi prodeuntibus, & in pollicis secundum os insertis.

Abducitur versus exteriora à duobus musculis. Horum prior à parte interiore ossis carpi pollicem sustentis ejectus, in secundum internodium pollicis membranoso tendine inferitur. Alter spatium quod inter pollicem & indicem est occupans, à posteriore sede ossis metacarpi indici subjecti exoritur, & in pollicis internodium toti externo lateri carnosus inferitur, ac tendinem membranofum secundo transmittit.

## CAPUT XIII.

## DE MUSCULIS FEMORIS.



Um pedis officium sit deambulare & stare, idque consistat in firmatione & motu (dum enim unus pes in terram deponitur, ac stat & firmatur, alter verò circumfertur, aut promovetur, ambulatio fit) ad utrumque peragendum variis musculis opus fuit,

quorum alii movent femur, alii tibiam, alii ipsum pedem, cum suis digitis.

Femur extenditur, flectitur, adducitur, abducitur, & circumagitur.

Flectunt femur tres musculi.

I. **Lumbaris**, sive *ψαῖς*, qui fere teretes, crassius, ac lividus in abdominis capitate situs est. Oritur carnosio principio,

M 2

circa

**Femoris moventes.**

**Flexores.**

**ψαῖς.**

circa duas inferiores thoracis & tres superiores lumborum vertebrae, & per ossis ilii anteriorem faciem descendens, tereti validoque tendine in rotulam femoris minorem elatiore parte antèrius inseritur, ac femur valide sursum trahit. Quia autem huic musculo insigni nervo prædito, renes incumbunt eo loco ubi nervus eos ingreditur, hinc fit ut calculo in rene existente, ab illius compressione stupor in ejusdem lateris femore perferatur.

Huic musculo nonnunquam supertenditur alter exiguus musculus, **Parvus psoas**, vel **Parvus lumbalis** Bauhino dictus, qui in exortu suo minimi digiti longitudine carnosus, gracilis, ac plano tendine supra psoam delatus, cum psoa & iliaco finitur, illumque arcte amplectitur, ac in sede sua firmiter continet. Hunc in mulieribus non inveniri refert Riolanus. Scribit Bartholinus, se anno 1651. hujus loco alium psoam paulo majorem vidisse, latitudinis trium digitorum transversorum, qui exterius ad latera magis vergens, magno lumbali ex parte subjacebat, & posterius inferebatur carnosus in superiorem ossis ilii marginem, ubi iliaci interni est exortus.

*Iliacus internus.*

**II. Iliacus internus**, qui tenui carnosoque principio in ossis ilii interna cavitate ortus, tendine suo cum lumbali jungitur, & inter magnum ac parvum trochantera antèrsum desinit.

*Pectineus.*

**III. Pectineus**, qui lividus est, Hic à parte superiore ossis pubis ad commissuram, juxta ejus cartilaginem, carnosus & latus proficiens, brevi latoque tendine femoris lateri interno implantatur, & ad posteriora usque progreditur, quo femur valide sursum & introrsum flectitur, sicque femur unum alteri imponitur; ac propterea à Bartholino non male ad musculos adducentes refertur.

*Extensor.*

Extendunt femur musculi tres, **Glutæi** dicti, qui nates constituunt, & etiam inserviunt ad regrediendum.

*Glutæus major.*

**I. Glutæus major**, à coccyge, spina ossis sacri, & ilii ossis costa, carnosus admodum enatus, quatuor digitis infra magnum trochanterem valido tendine desinit.

*Glutæus medius.*

**II. Glutæus medius**, tam in situ, quam in magnitudine, qui primo magna ex parte subternitur. Hic à costa & dorso ossis ilii regione anteriore carnosus exiens, totamque fere ossis ilii regionem occupans, lato validoque tendine in trochanteris majoris anteriorem & elatiorem partem implantatur, eam undique cingens.

*Glutæus minor.*

**III. Glutæus minor**, qui totus sub secundo latet. Hic ab ossis ilii dorso,

ejusque sede posteriore ac inferiore carnosus procedit, & lato robustoque tendine trochanteris majoris parti interiori & apici inseritur.

Adducit femur introrsum **Triceps** *Adducens Triceps.* musculus, qui à quadruplici principio, secundum fallopium, Bauhinum, & Riolanum, rectius **Quadriceps** appellari meretur; estque omnium totius corporis musculorum crassissimus, cujus singulæ partes, ut ortu & insertione, sic fibræ, & aliquantum etiam usu variant: qua de causa Bartholinus illum in tres musculos divisum describit, sed melius in quatuor divisum proposuisset.

Prima ejus pars oritur principio nervoso ab ossis pubis linea superiore, & in femoris lineam asperam inseritur.

Secunda procedit ab ima ossis pubis commissura, & desinit in femoris lineam asperam parte superiore.

Tertia à tota coxendicis inferna parte emergit, & in femoris posticam lineam asperam, sub rotatore minore implantatur.

Quarta pars à coxendicis apice ejecta, tereti tendine, qui cum tenui tendine portionis primæ partis jungitur, in femoris tuberculum internum & inferius finitur.

Riolanus scribit primam partem inferi in medium femur, secundam infra cervicem, tertiam robustissimo tendine ad extremum usque femur produci.

Qui tricipitis! tria tantum principia describunt, illi loco quarti principii adjiciunt peculiarem musculum, quem Riolanus **Pectineum**, Veslingius **Lividum** appellat, qui tamen re vera est quarta musculi tricipitis pars.

Abducunt femur ad latus externum musculi quatuor exigui, **Quadrigemi** dicti, quia fere sibi invicem similes sunt, & parte postica supra femoris articulationem alternatim collocati. *Abductores. Quadrigemi.*

Primus & superior quadrigeminus, qui à forma **Pyriformis**, à situ **Iliacus externus** nominatur, ab imo osse sacro procedit. Secundus à tubere ossis ischii. Tertius huic contiguus ab eodem loco.

Quartus qui **Quadratus** dicitur, cæteris latior & carnosior, & duorum digitorum latitudine à tertio distans, exoritur ab interna parte tuberis ischii, & in partem externam magni trochanteris desinit. *Quadratus.*

Oblique femur rotant duo musculi, **Obturatores** appellati, qui foramen inter os pubis & ischium patens occupant, ac regressum etiam adjuvant: unus internus, alter externus. *Rotatores. Obturatores.*

Internus, qui validior, interna dicti foraminis circumferentia carnosus & latus procedens

procedens, & transversim supra coxendicem extrorsum delatus, trifido tendine, marsupium tutelæ gratia transeunte, magni trochanteris cavitatem ingreditur, & rotationem externam facit.

Externus, qui pectineo subjacet, à dicti foraminis circumferentia externa carnosus incipiens, & per cervicem femoris, veluti per cochleam, revolutus, in magni trochanteris cavitatem amplo validoque

tendine sub quadrigemino implantatur, & internam rotationem dirigit.

Notandum: licet femoris muscoli ordine descriptionis inter crurum musculos primum teneant locum, illos tamen in dissectione non satis commode, sed molestius demonstrari, si non prius removeantur musculi tibiæ, qui proinde in demonstrationibus, facilioris comoditatis gratia, primum exhiberi potuerunt.

## CAPUT XIV.

## DE MUSCULIS TIBIÆ.



Tibia tripliciter movetur, nempe flectitur, extenditur, & obliquatur.

Flectunt tibiam musculi quinque.

Flexores.

Longissimus.

I. Longissimus, qui & Fascialis dicitur, antè statim sub cute occurrens, ab interiore ossis ilii tubere oritur nerveo carnosoque principio, & gracilis per interiora femoris, instar fasciæ, aliis musculis decussatim instratus, fertur, ac juxta genu in tendinem definit, qui in anteriorem partem ossis tibiæ, ad lineam acutam, sub genu inseritur: atque hinc non sine ratione scribit Riolanus, hunc non flectere tibiam, sed potius extendere, & introrsum ducere.

Gracilis.

II. Gracilis, longissimo introrsum accumbens, ad commissuram ossis pubis nerveo amploque principio enascitur, & per femoris interiora excurrans, tereti tendine in partem tibiæ internam implantatur.

Seminervosus.

III. Seminervosus, à tubere ischii nervoso gracilique principio ejectus, per femoris posteriora & interiora oblique descendit, & tereti tendine in tibiæ posteriorem & internam partem definit, ejusque tendo usque ad tibiæ medium excurrit.

Seminembraneus.

IV. Seminembraneus, qui ab eodem cum præcedente loco egressus, tendine paulo latiore ad tibiam posticam protenditur.

Biceps.

V. Biceps, ex eodem ischii tubere ortus, per externam femoris partem deferitur, ac circa medium femur carneam molem, tanquam novum musculum, assumit (hinc nonnulli: ejus secundum caput è medio femore prodire scribunt) sed, notante Bauhino, illud quidem in homine, sed non in simia: sicque deorsum descendens, insigni tendine inferius in ossis fibulæ processum implantatur. Hic musculus interdum duplici exortu & fine distinctus

observatus fuit, atque hinc Vesalio duplex est.

Extendunt tibiam musculi quinque, *Extensores.* vel sex.

I. Membranofus, à superna spina ossis ilii acutus carnosusque prodicens, exteriore parte, juxta femoris processum majorem, abit in membranam longissimam & latissimam, quæ instar transversi cujusdam ligamenti (hinc nonnullis *Fascia lata* dicitur) fere omnes femoris & tibiæ musculos circumdat, ac in sede sua continet, ad extremum usque femoris excurrans. Miscetur autem circa insertionem cum tendinibus musculorum sequentium, & in tibiæ ac fibulæ partem anteriorem, versus externum latus, implantatur, tibiamque recta extendit, atque etiam, ut quibusdam placet, nonnihil extrorsum abducit.

Membranofus.

II. Longus (hic Riolo *Sutorius*, Veslingio *Fascialis* dicitur) ab ossis ilii appendice anteriore ortus, & per interiora femoris obliquo ductu decurrens, sub genu ad tibiam interius descendit, eamque extendendo adducit, & futorum more alteri imponit.

Longus.

III. Rectus, ab inferna spina ossis ilii enatus, canoso teretique ventre recta secundum longitudinem femoris decurrit, ac forti teretique tendine patellam includens, sub ea in tibiam definit.

Rectus.

IV. Vastus internus, à cervice & rotatore femoris minore ortus, tibiæ internè, paulo infra patellam inseritur.

Vastus internus.

V. Vastus externus, à rotatore femoris minore exterius principium sumens, amplo tendine in tibiam externe, paulo infra patellam definit.

Vastus externus.

His quinque musculis extensoribus, nonnulli subjiciunt sextum musculum, femori adhærentem, *Cruentum* appellatum: cujus principium constituunt inter duos femoris rotatores, finem verò cum vastis musculis eundem.

Cruentus.

M m m 3

Horum



Horum extensorum quatuor posteriores circa genu simul uniti, unicum communem latum validumque tendinem efformant, quo patellam involvunt, & femoris tibiaeque ossa, instar ligamenti, valide colligant.

*Popliteus.*

Oblique tibiā adducit **Popliteus**

(hunc flectentibus annumerat Riolanus, latitans in cavo poplitis, ab inferno & exteriore femoris tuberculo exortus, & oblique per appendicis tibiae superioris posteriorem ac internam partem delatus, illic quadratus inseritur.) Hunc se aliquando geminum invenisse refert Riolanus.

## CAPUT XV.

### De Musculis Pedis, sive Tarsi.



Es flectitur, extenditur, & ad latera movetur.

Flectunt pedem versus superiora duo musculi antici.

*Tibialis anticus.*

**I. Tibialis anticus**, à superiore tibiae fibulaeque appendice pronatus, toti tibiae ad latus externum adhæret: hinc sub ligamento pedis annulari excurrens, in tarsi os pollicis subjectum interius definit. Nonnunquam sub ligamento pedis in duos tendines scinditur, quorum unus in os primum innominatum, alter in metatarsi os pollicis præpositum, inseritur. Obtenet hic musculus, qua parte sub tarso reflectitur, cartilaginem & ossiculum sesamoidæum.

*Peroneus anticus.*

**II. Peroneus anticus**, qui toto progressu præcedentis musculi externo lateri committitur, & in externo tibiae latere reponitur. Hic extrinsecus à fibulae parte superiore carneus nervosusque incipiens, & tendine validissimo, sæpe bifido, fissuram malleoli externi transiens, infigitur in os metatarsi, quod minimum digitum sustinet: cum bifidus est, tunc altera & major ejus pars sub planta oblique intedens, inseritur in os pedis è regione pollicis. Cum autem tendo bifidus est, tunc etiam principium seu caput solet esse geminum, scilicet unum à fibulae superiore parte seu epiphyssi (de quo jam dictum) alterum è peronis medio ortum: atque hinc factum, quod nonnulli Anatomici, ratione hujus duplicis principii & finis, hunc musculum pro duobus musculis descripserint.

*Extensores.*

Extendunt pedem musculi tres, **Gastrocnemius**, **Soleus**, & **Plantaris**: quorum duo priores crassitie & mole sua constituunt *sura* ventrem.

*Gastrocnemius.*

**Gastrocnemius** duobus principiis (quibus officula sesamina apposita observavit Vesalius) ab interno externoque femoris interioris capite sub poplite oritur, atque ob geminum istud principium à multis pro duobus musculis describitur. Hinc in ventrem tumidum excrecens, inferiore parte

valido tendine, una cum Solei tendine juncto, calci implantatur.

**Soleus**, à figura piscis denominatus, est musculus latus & crassus, qui à tibiae & fibulae postica ac superiore commissura enatus, paulo supra calcem cum gastrocnemii tendine unitus, in ossis calcis partem posteriorem definit.

*Soleus.*

**Plantaris** inter præcedentes in poplite latet, & ab externo femoris inferioris capite exili carnosoque corpore procedit, moxque sub genu in tendinem longissimum & gracilem definit, qui cum gastrocnemii & solei tendinibus arctissime junctus, calci infigitur, atque ad mediam usque plantam se extendit.

*Plantaris.*

Hi tres musculi circa finem commiscuntur, unumque validissimum tendinem, calci posteriore parte implantatum, efformant, qui propter singulare, robur, **Chordæ magnæ** nomen obtinuit, cuius vulnera valde periculosa esse, ex iisque febres singultuosas & convulsivas oriri, censuit Hippocrates. Hunc tendinem Veslingius (Galenus, lib. 3. usu part. cap. 11. secutus) non tantum calcaneo inseri, verum etiam usque ad digitorum confinia exporrigi putat. Ante insertionem tamen, propter ossis calcis prominentiam, à tibia nonnihil abscedit, & interstitium illud efformat, per quod Achilles Hectori funem trajecisse fertur, cum illum devinctum & currui alligatum circum Trojæ incenia circumduceret.

*Chordæ magna.*

Introrsum movet pedem **Musculus Tibialis posticus** qui inter tibiā fibulamque exortus, & toti tibiae affixus, in os tarsi, quod cubiformi commissum est, inferius excurrit. Aliquando geminos tendines producit, quorum unus ossi naviculari, alter primo ossi innominato implantatur.

*Tibialis posticus.*

Extrorsum pedem abducit **Peroneus posticus**, qui à superna & postica perone, seu fibulae parte productus, & per malleoli externi fissuram cum Peroneo antico

*Peroneus posticus.*

antico

antico delatus, duro teretique tendine, ab antici tendine separato, versus inferiora pedis reflectitur circa ossis cubiformis regionem, ac infra pedium delatus, inseritur in radicem ossis cuneiformis majoris, quod pollicis præponitur. Riolanus hunc posticum peronæum flexoribus annumerat,

fortè quia dum abducit, simul etiam flectit pedem.

Nonnunquam, sed rarius, alius **Ter-** *Peronæus*  
**tius Peronæus** reperitur, admodum tenellus, qui una cum postico per inferiora pedis excurrit, atque insertionem & usu ab eo non differt, quamvis sit viribus impar.

## CAPUT XVI.

## De Musculis Digitorum, &amp; Pollicis pedis.



Igitur pedis varios habent musculos, qui illos extendunt, flectunt, & obliquant.

Extendunt quatuor digitos duo musculi **Tensores** dicti.

*Longus tensor.*

I. **Longus tensor**, sub tibiæ antico reconditus, oritur ab antica & interna tibia, qua parte fibulæ sub genu connectitur. Hinc secundum longitudinem fibulæ recta descendit, & in tendines quatuor separatus, ligamentum annulare transit, atque in quatuor digitorum tres articulationes parte superna inseritur.

*Brevis tensor.*

II. **Brevis tensor**, ab astragali vicina parte superiore projectus, & longo substratus, in omnes primi internodii articulos suis tendinibus definit, qui tendines supra metatarsum longi tendines decussatim interfecant.

Flectunt quatuor digitos sex musculi **flexores**.

*Longus flexor.*

I. **Longus flexor**, seu **Perforans**, & **Sublimis**, qui una cum sequente **Brevi**, sub musculis suram constituentibus posteriore sede occultatur. Hic à superna tibiæ parte posterius originem sumit, & circa malleolum internum tibiæ calcisque ligamentum subiens, in planta pedis finditur in quatuor tendines, qui per foramina brevis flexoris transeunt, in quatuor digitorum tertium articulum inferuntur.

*Brevis flexor.*

II. **Brevis flexor**, qui etiam **Perforatus**, & **Profundus** appellatur, inferius & interius à calce prodit, dimissisque tendinibus quatuor, circa finem ad tendinum præcedentis musculi transitum rimâ divisus, in secundum digitorum internodium excurrit.

*Lumbricales.*

III. IV. V. VI. Musculi **Lumbricales** quatuor, qui à flexoris longi ac brevis tendinibus, vel potius à ligamento eos tendines obvolvante, producti, & carne quadam à calcaneo exsurgente adaucti, primo quatuor digitorum internodio singulis tendinibus infiguntur.

Bartholinus scribit se alium peculiarem

minimi digiti flexorem observasse, à tibiæ capite exortum, duobusque tendinibus circa digiti insertionem divisum.

Oblique digitos movent Musculi **In-** *Interossei.*  
**terossei** decem, sub ossibus metatarsi, atque inter illa locati, & à massa carnea exorti: quorum externi ad primum digitorum internodium desinunt: interni usque ad secundum internodium excurrunt. Agentibus externis digiti abducuntur, internis adducuntur, simul agentibus extenduntur.

Digitus minimus peculiarem abductorem habet, à calcaneo productum, & quinto metatarsi offi extrinsecus subiectum, qui primi internodii externo lateri inseritur.

*Minimi digiti abductor.*

Pollex singulares obtinet musculos.

*Pollicis flexor.*

I. **Flexor**, adjacens longo digitorum tensori, qui posterius à superiore fibulæ parte carnosus exoritur, viamque perforantis musculi secutus, robusto tendine tertio pollicis offi (secundum Riolanum primo) connectitur. Nonnunquam sub planta pedis in duos tendines dividitur, quorum unum pollicis, alterum secundo digito tribuit, atque tunc longus digitorum flexor tantum tres tendines ad digitos emittit.

II. **Extensor**, ab externo tibiæ latere, ubi fibula recedit, ac pedis superiora perreptans, toti pollicis parte superiore implantatur. Interdum geminum tendinem emittit: unum ad ultimum digiti magni articulum: alterum in os metatarsi, pollicis substratum.

*Extensor.*

III. **Abductor**, ab interna parte calcis ortus, & pedis lateri interno secundum longitudinem attensus, in pollicis os primum extrinsecus defigitur.

*Abductor.*

IV. **Abductor major**, à ligamento ossis metatarsi quod minimo & proximo digito subiectum est, emergens, & oblique super alia ossa procedens, interna parte in primum pollicis articulum brevi robustoque tendine definit.

*Abductor major.*

V. **Abductor minor**, (Casserio **Transversalis**) à minimi digiti ligamento

*Abductor minor.*

mento, quod primum internodium vincit, prodiens, transversim carnosus defertur, atque ad primum pollicis os brevi latoque tendine interius excurrit. Huic nonnulli alium usum adscribunt, & colligandis primis digitorum ossibus appositum esse putant. Riolanus pulvilli solummodo vicem obtinere, ne tendines terræ & ossium duritie pressi læderentur. Julius Casserius, qui primus musculi inventor esse dicitur, aliud

officium ipsi assignat, scilicet ut pollicem ad parvum digitum adducens, cavum efficiat pedem, sicque in locis saxosis & inæqualibus, facta quasi apprehensione quadam, firmiorem faciat ingressum.

In planta pedis, quæ **Vestigium** *Vestigium.* appellatur, observanda est carnea massa, quæ instar pulvinaris, musculorum tendinibus substernitur. Hanc nonnulli cum musculo transversali confundunt.

## A P P E N D I X.

### De Membranis & Fibris.

*Quandoquidem muscoli, præter arterias, venas, & nervos (de quibus sequentibus libris agetur) etiam componuntur ex membranis & fibris, quarum generalis historia nusquam in hoc nostro tractatu anatomico descripta est, baud incommode futurum arbitror, si huic libro de Musculis, annectatur brevis APPENDIX DE MEMBRANARUM ET FIBRARUM HISTORIA IN GENERE (in specie enim passim suis locis describuntur) peculiarem enim hac de re librum instituere, non videtur operæ pretium.*

### C A P U T I.

### D E M E M B R A N I S.

Definitio.



Membrana est pars similis alba, lata, plana, densa, & extensibilis, ex seminis portione lenta viscidaque genita, partes subjectas ac contentas custodiens, continens, colligans, corroborans, & determinans.

Nomina.

Hæc veteribus *μῆνις*, *μῆνις*, & *χιτὼν* appellabatur, eaque vocabula ipsis unum idemque significabant. Postea hæc generalia nomina evaserunt particularia, & singula certis quibusdam membranis sunt attributa. Quippe *μῆνις* nunc specificè significat illam membranam quæ in collo uteri subsistit, & vulgo Claustum virginitatis nominatur. *μῆνις* dicitur utraque membrana cerebrum proxime involvens. *χιτὼν*, seu *tunica*, de vasorum (ut arteriarum, venarum, ureterum, &c.) membranarum dicitur. Hodie autem membrana generalis vox est, per quam tamen plerumque designari solet talis membrana quæ partem corpulentam ambit, ut pleura, peritonæum, pericardium periosteum, membrana musculorum, &c.

Ortus.

Certus membranarum ortus describi vix potest, cum sint partes per se subsistentes, ex semine delineatæ, & ubique in corpore

conspiciuntur, quarum nec superiores ab inferioribus, nec inferiores a mediis aut superioribus oriri videntur. Multi eorum qui certam originem iis adscribere tentarunt, probabiliter tradiderunt, eas a meningibus deduci. Lindanus, *physiolog. cap. 6.* scribit, substantiam cordis investiri membranâ tenuissimam ac densissimam, quam a fibrarum cordis extremitatibus dilatatis nasci existimat, atque hinc scribit, cogitandum esse an non ab hac cordis membrana reliquæ omnes propagatione quadam oriantur. At, quia harum opinionum neutra solidis fundamentis innititur, sed merè conjecturalis, imò vix vero similis est, dicendum potius, membranas esse partes spermaticas, cum aliis spermaticis in prima embrii delineatione ex semine formati, ac proinde illas nullum aliud ortus sui principium agnoscere, quam semen.

Nutriuntur membranæ, ut reliquæ partes, sanguine arterioso, per arterias in substantiam illarum influente, in eaque per spirituum animalium admisionem fermentato: cujus residuum ad nutritionem ineptum aut superfluum, per venarum tubulos refertur ad venam cavam.

*Nutritum.*

Sunt autem membranæ tactus organa *officium.* omnes

omnes enim partes sentientes, imò & ipsi quoque nervi, solummodo per membranas sentiunt; quibus quæ destituuntur partes, sensu carent, ut ossa, cartilagine, viscerum multorum parenchymata, in quibus sensus non ulterius se extendit, quam ad ambientem membranam.

Sentiendi facultas ipsis infertur à spiritibus animalibus per nervos continue influentibus, quorum influxu desinente definit etiam sensus, ut in apoplexia, paralyfi, & syncope contingit. In quas autem membranas pauci spiritus influunt, illæ obtusum sensum obtinent, atque hinc non sentire multoties putantur: sic enim arteria & vena sensu destitui dicuntur, quia obscure duntaxat sentiunt.

*Differentia.*

Differentiæ membranarum multiplices sunt. *Ratione substantia*, aliæ sunt tenues aliæ crassæ: item aliæ legitimæ, ut pleura, periossteum: aliæ illegitimæ, & potius corpora membranosa appellandæ, ut ligamenta membranæ, tendines, ventriculus, intestina, vesica urinaria & biliaria, &c. *Ratione figura*, aliæ sunt latæ, aliæ longæ, aliæ triangulares, &c. *Ratione situs*, aliæ sunt internæ, aliæ externæ.

*Numerus.*

Numerus membranarum est penè infinitus, primariæ tamen maximeque considerabiles sunt hæ sequentes.

In foetu, Chorion, Amnios, Membrana urinaria, & in brutis Alantois.

In toto humano corpore, Cuticula, Cutis, Panniculus carnosus, Membranæ musculorum, Periosteum, & membranæ vasorum.

In capite, exterius Pericranium; interius utraque Meninx, quæ etiam è cranio in spinalem cavitatem descendit, spinalem medullam obvolvens, & secundum nervorum longitudinem producit.

In oculo tunica septem: Innominata, Conjunctiva, Cornea, Uvea, Retina, Aranea, & Vitrea.

In aure Membrana tympani.

In ore, Tunica linguæ & palati propria, ut & ea quæ ori & faucibus, cum œsophago & ventriculo communis esse dicitur.

In thorace, Pleura, Mediastinum, Pericardium, Tunica pulmones & cor investiens, valvulæ cordis,

In imò ventre, Peritonæum, Epiploon, Mesenterium, & membranæ quibus singula viscera investuntur, ut & illæ ex quibus intestina, vesica, aliæque partes componuntur.

De quibus omnibus primariis membranis alibi suis locis supra mentio specialis facta est.

Præter has, infinitus est tenuium membranarum, quæ nomine carent, numerus.

## CAPUT II.

## DE FIBRIS.

*Definitio.*



*Fibra*, nonnullis Villi, Gracis *ives dicta*, sunt partes similes alba, solida, oblonga, exilium filamentorum, aut staminum instar, ad quarundam partium motum, quarundam custodiam destinata.

*Ortus.*

Sunt partes non ab aliis oriundæ, sed per se existentes ad complementum earum partium in quibus requiruntur: ac proinde errant, qui illas è cerebro, aut spinali medulla deduci putant; ut & illi qui eas tradunt esse nervorum productiones, cum impossibile sit nervos in tot filamenta expandi posse: ex gr. in musculum aliquem majusculum inferitur exiguus nervus, qui fortè constabit ex viginti fibrosis filamentis, & in musculo reperientur fibrosa filamenta centum, multo majora & validiora quam illa quæ sunt in nervo. Sic cor totum fibrosum est, cum tamen nervos obtineat paucissimos & tenuissimos. Communi-

cant quidem fibræ cum nervis, quatenus spiritus animales ab his recipiunt, tamen non magis sunt eorum productiones, quam venæ sunt productiones articularum, à quibus sanguinem recipiunt. Sunt igitur partes per se existentes, in communem usum aliis adjunctæ & unitæ.

Actio earum est, ut in sese contrahantur. Riolanus illis potius usum tribuendum censet, quam actionem.

Omnes muscoli per fibras moventur, hisque dissectis perit eorum motus. Cordis fibrarum mirabilis contextus facit, ut continuum motum perferre possit. Ventriculus, intestina, uterus, vesica, similesque partes etiam fibris donantur, ut in retentione & expulsionem validiores sint. Omnes denique partes quæ officialem actionem edunt fibras habent: interim fibras aut fibrillas cerebri, pulmonis, hepatis, & lienis nonnulli in dubium vocant, fallopius planè non agnoscit; sed illæ tamen cerebri

N n n

hodie

*Alia.*

hodie extra dubium evaserunt. Adhæc arteriæ & venæ fibris non carent; quamvis de venarum fibris, quia valde obscuræ sunt, Vesalius & Fallopius non parum dubitent, quas tamen Fernellius, Brissottus, Fuchsius, alique magni viri merito admittunt, & ad robur ac conservationem venæ inservire tradunt, earumque rectitudinem in venæsectione observandam esse docent. Has ipsa quoque experientia satis probat in varicibus, cum disruptis orbicularibus & obliquis fibris, venarum tunica mirum in modum distenditur, nec unquam rursus contrahi, aut ad pristinum statum reduci potest.

*Differentia.*

Triplex vulgò differentia ex situ constituitur. Aliæ dicuntur rectæ, quæ secundum longitudinem extenduntur: aliæ transversæ, quæ rectas intersecant: aliæ obliquæ, quæ utrasque intersecant. Sed his tribus differentiis necessario etiam adjiciendæ sunt

fibræ orbiculares, quales sunt in sphinctere musculo, nisi quis illas forte transversis annumerare velit. Rectæ dicuntur vulgò attrahere, obliquæ retinere, transversæ expellere: quas tres distinctas actiones non sine ratione irridet Fallopius, *in observat.* & omnes fibras expellere docet, nullas verò ratione sui attrahere aut retinere.

Habent autem partes quæ unam actionem obeunt, fibras simplices, ut plurimi musculi, quorum actio simplex est, scilicet contractio. Quæ verò plures actiones obeunt, variis fibris donantur, ut intestina, quæ retinent & expellunt, atque hinc transversas & obliquas habent fibras, quibus rectæ ad robur accedunt. Membranae verò, quæ undequaque ad actiones aptæ & paratæ esse debuerunt, habent fibras ita permixtas, ut totum earum corpus ex fibris conjunctis constare & contextum esse videatur.



ANA-

# ANATOMES

## LIBER VI.

### DE

# ARTERIIS.

## CAPUT I.

## DE ARTERIIS IN GENERE.



**A**rteria Græcis ἀρτηρία dicitur, ὅτι ἀρτίζω, quia continuo motu attollitur, & deprimitur, seu subsidet: vel ὅτι ἀέρος ἵκεται, quod aerem sive spiritum conservet.

Tria autem in humano corpore vasa Arteriarum nomine insigniri solent.

I. Aspera, seu Trachea arteria, de qua in historia pulmonis dictum lib. 2. cap. 16.

II. Arteria pulmonaris, ab aliis malè vena arteriosa appellata, de qua etiam actum eodem lib. 2. cap. 9.

III. Arteria Magna, sive Aorta, cum suis propaginibus, de qua hoc libro dicendum.

Definitio.

Est autem hac Magna arteria pars organica similis, oblonga, rotunda, cava, sanguini spirituofo vehendo dicata.

Organica dicitur, quia ad actionem seu usum, scilicet ad sanguinem vehendum, est comparata.

Similaris dicitur, non stricto, sed perfunctorio judicio: licet enim ex fibris & membranis coagmentata censeatur, quia tamen ubique eodem modo coagmentata est, nec arteria in manu substantiâ differt ab arteria in pede, aut alia quacunque parte, hinc similaribus partibus annumerari consuevit, sicut etiam vena & nervus.

Ufus.

Sanguini spirituofo vehendo dicata dicitur, quia ille primarius ejus usus est. Non quod arteriosus sanguis totus sit spirituosus, sed major ejus pars talis sit, à qua parte potiore fit denominatio. Nam sciendum illius alias partes esse magis, alias minus spirituosas: quippe chylus cum cavæ sanguini permixtus, prima vice cor ingreditur, tantam subtilitatem, attenuationem, & spirituositatem in eo statim non nanciscitur, quantam jam adeptæ sunt aliæ sanguinis particule chylo admixtæ, quæ per circula-

tionem jam sæpius per cor transierunt, in eoque multoties dilatatae sunt. Nam sicut in distillatione vini, quo sæpius distillatur, eo subtilior, purior, & efficacior spiritus ab eo elicitur: sic etiam sanguis, quo sæpius in corde dilatatur, eo spirituosiores particulae è crassiore massa melius dissolvuntur, magisque attenuantur: quæ verò minus attenuatae ac spirituosæ, atque hinc ad nutritionem minus convenientes sunt particulae, illæ per venas ad cor redeunt, ut in eo rursus dilatatae majorem spirituositatem nanciscantur.

Mirandum certè, quod doctissimus Entius, in apolog. dicat, sanguinem arteriosum esse deteriolem venoso, cum tamen ille multum, hic parum spirituosus sit. At, inquit, multo tenuior, & serosior est, quam venosus. Quid hoc? certe multo spirituosior est, atque hinc procedit illa tenuitas, quæ serosa esse videtur, etsi talis non sit. Spiritus vini etiam multo tenuior & fluidior est ipso vino, an propterea est serosior & deterior? Sed, dicit, sanguis arteriosus plurimum sui olei in lampade vitæ, id est, corde, amisit. Negatur: non valet comparatio flammæ lampadis ignitæ, cum spiritificatione cordis, ut supra latius docuimus, lib. 2. cap. 13. circa finem.

Præter sanguinem, arteriarum nonnumquam per accidens etiam vehunt humores pravos & corruptos sanguini admixtos, ut liquet in quacunque cachexia, hydrope, ictero, &c. quales etiam in febribus aliisque variis morbis sæpe critice ex iis evacuantur. Horum tamen in definitione non fit mentio, quia ille non est destinatus earum usus.

Præter dictum usum nonnulli etiam alios usus arteriis adscribunt. Andreas Laurentius, Æmilijus Parisanus, Bartholinus, alique varii, putant arterias etiam per suos fines & invisibiles poros in cute desinentes aerem attrahere ad sanguinis refrigerium &

N n n 2

ventila-

An arteriosus sit deterior venoso.

An aerem attrahant.

Sanguis arteriosus qualis sit,

ventilationem. Verum, si hæc opinio vera foret, tunc necessario motus duò contrarii in iisdem arteriis eodem tempore fierent, nempe sanguinis versus exteriora propulli, & aeris versus interiora intrantis, quales contrarii motus in his iisdem vasis omnino fieri nequeunt, utpote per quæ continua duntaxat sit sanguinis propulsio, nulla verò per eorum fines aeris admissio. Præterea, cum spiritum vitalem, seu cordis calorem per arterias ad omnes corporis partes deferri necesse sit, ut per eum omnes vigeant, vegetentur, & floreat, quare per aeris frigidi accessum calor ille, tantopere ad vitam necessarius ilico in arteriis refrigerabitur & retundetur, præcipue in frigidis & pituitosis hominibus, in quibus calor iste fere sponte extinguitur?

An fuligines dissipant.

Rolfincius existimat arterias etiam inservire fuliginum dissipationi. Hoc tamen minus verum esse docet crassior earum substantia, per quam spirituosus & serosus liquoris nihil, aut saltem valde parum exhalare potest, multo minus quod crassum & terrecum est, quales sunt fuligines; præcipue cum sanguis in iis longas moras non trahat, sed continuo propellatur. Dicendum igitur, fuligines, una cum serosis vaporibus, è sanguine separari, dissipari, & exhalare, cum extra arterias in partium substantiam sanguis est effusus, per quarum latiores poros plurimæ fuligines cum halituosis vaporibus, aut insensibiliter, aut cum sudoribus continuè transire & evacuari solent.

Magis absurdæ, & omnino rejiciendæ sunt eorum sententiæ, qui statuunt sanguinem per certas quasdam arterias ex hepate ad dextrum, & per alias quasdam ex liene ad sinistrum cordis ventriculum deferri: ut & eorum qui illas solos spiritus vitales, & nullum fere sanguinem alimentarium vehere existimant.

An lympham vehant.

Bartholinus, *defens. vasor. lymph. cap. 6.* putat etiam lympham per arterias deferri: cujus opinioni quoque subscribit Rolfincius, *lib. 6. dissert. anat. cap. 14.* Hoc tamen minime verum esse, liquet ex iis quæ supra diximus *lib. 1. cap. 13. & 17.* Nam lymphæ chylo & sanguini venoso admixta, ubi cum tota massa in corde dilatatur, non manet amplius lymphæ. In media autem via vasa lymphatica nusquam in arterias aperiuntur, ut liquorum suum in eas effundant: neque etiam sanguis arteriosus, jam satis spirituosus existens, isto fermentaceo liquore indiget, quo tamen sanguis venosus, spirituum magna quantitate exutus, ad novam in corde effervescentiam, una cum chylo præparandus fuit.

Arteria magna, è qua reliquæ propagines minores procedunt, originem ducit è sinistro cordis ventriculo, tanquam ex principio locali, non verò tanquam ex ma-

teriali, seu generationis principio, cum verè statuæ Hippocrates, nullam partem ex alia oriri, ut supra latius dictum, *lib. 1. cap. 29.*

Substantia arteriarum est membranosa, ut facile dilatari & constringi possit. Constant autem duplici propria tunica; externâ, & internâ: quæ ambæ ne à continua, præcipue majore, pulsatione dolerent, sensum obscurissimum obtinuerunt, atque hinc sensu præsertim destituti vulgo dicuntur.

Substantia  
& tunica.

Externa tunica tenuis & mollis est, eaque multis rectis, paucis obliquis fibris donata creditur. Hæc ab exteriori cordis tunica derivari videtur, cum eaque continua est.

Tunica  
prima.

Interna durior, multoque crassior existit, qua crassitie & duritie indiguit, ut spirituosum ac vaporosum sanguinem absque magna dissipatione tutius veheret. Illa autem durities & crassities maxime conspicua est in arteriis majoribus prope cor, quæ fervidum sanguinem è corde elabentem primæ suscipiunt; qui quo magis in via de fervore & subtilitate sua remittit, eo magis imminuitur hujus tunicæ crassities & densitas, ita ut circa arteriarum fines ea omnino mollis & tenuis existat, nec multum à venarum substantia differre videatur, ac solo fere albicante colore exiles arteriæ à venis distinguantur.

Secunda.

Hanc tunicam multas fibras transversas, paucas obliquas obtinere, vulgò statuunt. Sed Rolfincius, *lib. 6. dissert. anat. cap. 4.* nullas proprias arteriarum fibras agnoscit. At contrarium patet in arteriis magnis coctis, utpote in quibus fibræ manifestissime conspiciuntur: præterea ratio docet, quod arteriæ, nisi à transversis fibris firmarentur, per magnas pulsationes nimium dilatarentur, & dilatatæ manerent, utpote destitutæ fibris à quibus rursus contrahi possent. Hæc enim causa est aneurismatis, quod tunicâ hac cum suis fibris ruptâ, sanguis in primam seu extimam mollem tunicam illabatur, quæ ob mollietatem mox extenditur, sicque ibi tumor generatur.

Fibra.

Dicta interior tunica, ex observatione Galeni, tenuissimâ pelliculâ, quasi cuticulâ, latis araneorum telis persimili, interiori parte obducitur, quæ pro tertia tunica propria haberi potest. Riolanus, *animadvers. in Bauhin.* scribit, se hanc nunquam potuisse videre. Verum & si ille eam fortè non animadverterit, tamen accurate prospicientibus conspicua est in arteriis majoribus (hinc omnino vero simile est, illam etiam existere in minoribus) & continua apparet cum tunica ventriculos cordis interiores investiente: atque hinc manifestum videtur, arterias hanc intimam pelliculam, sicut etiam extimam tunicam, mutuari à corde, quemadmodum nervi

Tunica  
tertia.

720

3



nervi duas tunicas mutuatur à cerebro.

*Quarta.* Præter dictas tunicas proprias, arteriam aortam cum suis propaginibus majoribus in trunco corporis latentibus, ad majus firmamentum, externa quædam tunica impropria, seu communis ambit, in thorace à pleura, in imò ventre à peritonæo desumpta, qua mediante sentit acutius, & vicinis partibus alligatur, quam tunicam exiit cum viscerum parenchymata ingreditur. Sic etiam in aliis partibus arteriæ, quæ musculos non ingrediuntur, à vicinis plerumque membranis externam sibi tunicam assumunt. Valida enim debuit esse arteriarum substantia, ne impetu & impulsione spirituosus sanguinis arteriæ effrangerentur, sed validissimas quasque pulsationes sine incommodo sustinere possent.

*Aneurismatis generatio.* Verum quia hic modò à nobis facta est mentio aneurismatis (id est, tumoris illius præternaturalis, qui in arteriis contingit) de eo etiam obiter paucis agendum. Fit, ut ante dictum, aneurisma, quando secunda durior arteriæ tunica, cum suis fibris quacunque de causa rumpitur, & sanguis pulsione in externam mollem tunicam impingens, eam magis magisque dilatat, in eaque, quasi in sacco, coacervatus, tumorem producit, in quo manifesta, imò sæpe admodum molesta pulsatio, systoleque ac diastoles reciprocatio, sentitur: qui tumor si disrumpatur, vel ab imprudente chirurgus aperiatur, æger per immensam hæmorrhagiam, quæ cohiberi nequit, citissime perit. Contra hanc nostram & præstantissimorum plerorumque practicum opinionem atque experientiam sese acriter opponit Regius, qui cum publicè, tum privatim docet, aneurisma fieri, cum sanguis extra ruptam aut vulneratam arteriam effluit inter musculos, aliasve partes; huncque sanguinem ex viscidioribus sui particulis sibi ipsi pelliculam generare & circumjicere, ut ea contineatur & concludatur, tradit. In hanc opinionem deductus est à Jacobo de Back, medico Roterodamensi, qui ipsi narravit casum viri in brachio vulnerati, cum læsione arteriæ: in hoc aperto & valde tumente brachio, dixerat se sanguinem arteriosum inter musculos copiosum & pellicula conclusum invenisse. Ab hac unice narratione Regius, tanquam singulare quid præstiturus, mox artis fundamentum instituit, ac sibi hinc casum practicum effinxit, eumque, tanquam in suo aliquo ægro sibi visum, suæ praxeos Medicæ lib. 4. medic. II. inseruit: & exinde magna cum arrogantia de cathedra publice, & in collegiis privatim, effutivit ac proclamavit, semper aneurisma tali modo generari (scilicet effusione sanguinis plane extra arteriam) idque quotidianam

experientiam (qualem credo nec illum, nec alium quemquam hac de re unquam vidisse) docere, & nugari, imò etiam delirare eos dicit, qui putant, aneurisma fieri, à fibrarum arteriæ & ipsius mediæ tunicæ læsione, atque exterioris extensione. Sed parum considerat clarissimus Vir, admodum turpe, maximeque indecorum esse viro docto, sententiam suam calumniis potius, quam rationibus stabilire atque defendere, ejusque adversarios probrosis dictis libentius proscindere, quam melioribus argumentis refutare. Præterea non animadvertit, quod sanguis in aneurismate contentus, non corrumpatur, nec unquam ex eo apostema fiat, cum alioqui sanguis copiosus extra vasa inter partes effusus semper corrumpatur, ac inflammationes & abscessus generet, secundum Hippocratis sect. 6. aphorif. 20. Item quod sanguis extravasatus non possit sibi membranas circumjectas generare, sed quam primum putrescat. Denique quod in tali tumore ab extravasato sanguine producto nulla insignis pulsatio persentiat (forte ad locum læsæ arteriæ proximum levis aliqua percipi videbitur) qualis in aneurismate continue procedit. Scribit quidem Regius, *medicatione ante citata (hanc ex casu à Backio ipsi narrato, ut isto quasi exemplo sententiam suam confirmaret, omnino effinxit, sed historiam acti malè proposuit)* in isto vulnere sui ægri ad cicatricem penè deducto, circa locum affectum apparuisse tumorem valde pulsanter, & quotidie magis magisque incrementem: sed hoc tamen de Backii ægro (quem ille tanquam suum vult describere) minime verum est. Quippe neque vulnus ante meum adventum ad cicatricem penè deductum est (quippe recenter ante octo decemve horas inflictum erat) neque pulsatio in brachio ab extravasato inter musculos effuso sanguine valde tumido percepta fuit. Nam ego ipsemet casu tunc temporis Roterodami sublitens, ad illum ægrum à Backio ipsi narratum (qui circumforaneus erat medicaster, ab affine suo ictu cultri in brachio vulneratus) primus vocatus fui, cumque læsam arteriam profundo loco sitam, imò & majusculam esse, totumque brachium ab infuso inter musculos extravasato sanguine admodum intumescere, nec sanguinis ex arteria effluxum ullo modo à chirurgis sisti posse, atque hinc ægrum brevi moriturum animadverterem, nisi cito remedio occurreretur, consilium dedi [de brachio ad locum vulneratum abscindendo seu extirpando, ut eò factò læsa arteria oculis videri, & una cum aliis rescissis vasis, vel ligatura, vel cauteriis actualibus constringi, sicque æger, & si cum perditione unius membri, in vita servari posset. Sed, ne mea solius

Observatio.

auctoritate, ad durum hoc remedium deveniretur, atque hinc forte malum aliquod nomen mihi inureretur (vulgares enim valde faciles sunt ad calumnias Medicis injiciendas; eorumque optima consilia sæpe turpiter culpanda) alterius quoque Medici consilium prius audiendum censi. Tunc mox secundus fuit advocatus senior medicus Jacobus de Back, qui consilium meum quidem approbavit, sed suavitatem, antequam ad extirpationem istam deveniretur, prius aliud experiri, scilicet brachium superius fortissime ligare, sicque tali ligatura simul omnia vasa fortiter constringere, atque tunc raptim dissicis aut separatis musculis, læsam arteriam quærere, & inventam filo cerato ligare. Mox dictum factum, nam periculum erat in mora, Incisione facta, sanguis valde copiosus, qui inter musculos ex arteria læsa deciderat, mox effluxit: sed nulla ibi pellicula sanguinem continens seu in se concludens observata, nec de tali pellicula observanda ab adstantium ullo cogitatum fuit, imò nec sanguis tam diu inter musculos subsisterat, ut talis circum eum pellicula generari potuisset (si modo unquam sic generari queat) nam secundo die ab inflicto vulnere hæc encheiresis peracta est. Sic inventa feliciter & citissime ligata læsa arteria, moxque rursus soluta brachio superiori injecta ligatura, aliisque topicis convenientibus adhibitis, noster æger, præter omnium expectationem servatus, & brachium bene perfanatum est. Interim ex ipso casu vel cæcus videat, istam sanguinis inter musculos effusionem non fuisse aneurisma, & si Backius hoc ita male putaverit, & de circumjecta pellicula magnum sibi somnium finxerit. Certe mirandum, quod Regius tam facile sibi aliquid persuaderi sinat in re quam ipsemet nunquam vidit aut novit (nam ex hac sua sententia satis ostendit se nunquam verum aneurisma vidisse, aut novisse) & ex eo, tanquam Regia quadam auctoritate, mox novum inauditum, & tam firmum doctrinæ Medicæ fundamentum constituat, ut alios contrariam, seu aliam opinionem bono jure sustinentes, nugari, imò delirare existimet & dicat, cum potius delirii suspicionem ægre effugere possint tales arrogantes φιλῶνται, qui sua solum inventa & excogitata tanto cum stupore admirantur, ut aliena quælibet, & si suis multo meliora, & veriora cum vilipendio quodam despiciant atque rejiciant, & ex aliorum falso relatu (vide simile lib. 1. cap. 22.) mox novam regulam medicam constituere, quam veriora sentientibus assentiri malint.

An substantia sit nervea, vel cartilaginea.

Verum post examen tunicarum & fibrarum, nunc ad arteriarum substantiam redeundum, de qua curiosiores nonnulli quærunt, magisne illa accedat ad naturam ner-

veam, an verò ad cartilagineam? Aristoteles, lib. 3. *histor. animal. cap. 5.* aortam dicit esse nerveam, eique etiam multis aliis locis νεῦρωδης φλέψ, *vena nervosa*, vocatur. Alii arterias ad cartilagineam naturam magis accedere statuunt, ob majorum arteriarum calorem & duritiem: cujus opinionis videtur fuisse Galenus, 5. *method. med. cap. 7.* Fallopius verò, lib. de *part. simil. cap. 5.* illas mediam naturam inter cartilagineam & nervum obtinere existimat, sed cartilagineam prædominari, atque hinc majores arterias prope cor nonnunquam cartilagineas & osseas, in magnis senioribus animalibus, quin & in ipso quoque homine, fieri, observatum fuisse. Hujus rei exempla describunt, Cornelius Gemma, Solenander, Riolanus, Harveus, & alii. Verum prædictas tres opiniones convellit ratio. Quod enim arteriarum substantia non sit nervea, docet obtusissimus sensus, cum tamen omnes nervosæ partes acute sentiant. Quod cartilaginea non sit, docent fibræ, quibus destituuntur cartilagineæ & cartilagineæ partes. Quod mediam naturam non obtineat, ex antedictis patet, cum neutrius naturæ particeps sit. Dicendum igitur, substantiam arteriarum esse membraneam, propriam, & sui generis, qualis alia in corpore non invenitur.

Nutriuntur arteriæ sanguine spirituoso per eas transeunte, in quo quia multæ sunt particule salæ, volatiles, ac dissolutæ, quarum bona pars tunicis earum accrescit, hinc substantia earum firmior & densior est.

Nutritio.

Magnitudinis arteriarum magna est diversitas. Aortæ insignis est magnitudo & crassities: ejus tamen a corde sursum ascendens pars minor est, altera deorsum descendens major, ob partium inferiorum nutriendarum majorem magnitudinem seu molem, & numerum. Reliquæ verò arteriæ magnitudine variant, pro usus necessitate, scilicet prout longius vel brevius excurrere, & plus minusve sanguinis ad plures vel pauciores ex ipsis derivatas arterias pro partium nutritione deferre debent: & quo longius a corde recedunt, eo angustiores sunt, & tenuiorem ac molliorem substantiam habent, quia sanguis a corde remotior de spirituositate sua multum amittit, atque hinc salæ ejus particule minus copiosæ tunicis earum accrescunt; nec etiam in remotioribus tanta horum vasorum firmitudine opus est, quanta requiritur in iis quæ cordi viciniore sunt, quia minus spirituosus sanguis mollioribus vasis facile contineri potest.

Magnitudo.

Numerum arteriarum nonnulli tradunt pauciores esse quam venarum, quod tamen certo dijudicari nequit, cum parvæ arteriolæ

Numerus.

arteriolæ venis longe albicantiores & pellucidiores existant, atque hinc visum facile subterfugiant. Alii potius æqualem cum venis numerum, alii majorem esse existimant, quod major sit sanguinis quantitas quæ per arterias ad omnium partium nutritionem impellitur, quam per venas refertur, cum ejus bona pars in nutritione consumatur, & non minor per poros dissipetur, antequam ad venas deveniat. Hic fortè quis dicat, si hoc verum est, qui fit quod in venis multo plus sanguinis contineatur quam in arteriis, & illarum major à sanguine intumescencia conspiciatur? Fit hoc propterea, quod multo celerior & rapidior fiat motus sanguinis per arterias, quam per venas: unius enim momenti spatio plus transit per arterias, quas decem momenti per venas, propter longe majorem impetum à corde sanguini intra arterias impressum, qui in venis admodum debilis & remissus est, atque hinc plus sanguinis in his colligitur, quam in illis.

Situs.

Reconduntur arteriæ plurimis in locis sub venis, partim ut tutiore loco subsistant: partim ut sanguinem in venis subsistentem sua vicina pulsatione aliquantum promoveant. Interdum tamen à venis etiam recedunt, rarius eas transcendunt, sicut illud fit in ventre inferiore circa os sacrum, ubi arteria magna venam cavam superat.

Differentia.

Differentiæ arteriarum ex prædictis facile dijudicantur. Nam *Ratione magnitudinis*, aliæ sunt maximæ, ut aorta & pulmonaria: aliæ mediocres, ut arteriæ carotides, emulgentes, & iliacæ: aliæ minores, ut illæ quæ per artus & caput repunt: aliæ minimæ, ut capillares per habitum corporis viscerumque substantiam dispersæ. *Ratione progressus*, aliæ sunt rectæ, aliæ tortuosæ, & capreolares. *Ratione situs*, aliæ sunt arteriæ thoracis, aliæ capitis, aliæ inferioris ventris, aliæ artuum: item aliæ superficiales, aliæ profundæ. *Ratione connexionis*, aliæ venis, aliæ nervis, membranis, aliisque partibus connectuntur.

Progressus.

Excurret autem arteriæ ad omnes corporis partes, nulla enim est cui sanguis arteriosus ad nutritionem non advehitur. Contrarium tamen sentire videntur Entius, in *apolog.* & Glissonius, *anat. hep. cap. 45.* qui statuunt, non omnes corporis partes sanguine nutriri. Verum hæc difficultas facile dissolvitur hac distinctione: si scilicet dicamus, alias partes sanguine nutriri immediate, ut caro musculorum, parenchymata cordis, hepatis, renum, &c. alias verò mediatè, cum nempe ex sanguine prius conficitur alius quidam succus, quo partes aliquæ nutriuntur. Quemadmodum, ut nervi nutriantur, non tantum sanguis arteriosus requiritur (hic tunicis eorum exterioribus per invisibiles arteriolas

ex continuatione earum quæ meninges perreptant, affunditur) verum etiam necesse est, ut bona ejus pars in animales spiritus prius convertatur, qui & ipsi magnam nutrimenti eorum partem constituunt, ut infra docebitur, *lib. 8. cap. 1.* Ut ossa nutriantur, arteriæ ad eorum interiora producuntur, atque in internas eorum cavitates & fungosas porositates sanguinem effundunt, ibi in medullam convertendum, qua, ut & salsis tartareisque sanguinis particulis, ossa nutriuntur, ut infra latius videri poterit, *lib. 9. cap. 1.* Sicut omnes aliæ partes, ita etiam ipsæ arteriæ nutriuntur sanguine per cavitates earum transeunte, nec minus venæ: illæ scilicet particulis sanguinis subsalsis & magis fixationi propinquis, quæ faciunt ut densior & nonnihil fixior sit earum substantia: hæ particulis nonnihil sulphureis & magis humidis, unde humidior flaccidiorque evadit harum substantia. Modum hujus nutritionis describit Fernelius, *lib. 6. physiolog. cap. 5.* *Non dissimili*, inquit, *ratione nutriuntur vena & arteria, quæ quamquam proximum in se sanguinem continent, quo aluntur, hunc tamen non possunt levi momento in se convertere; sed quæ portio tunicis proxime adhsit, primum commutata albescit, tanquam ros, in angusta foramina) id est poros) vena aut arteria rapitur, quibus penitus apposta, crassiorque facta, adnectitur, tandemque assimilatur.*

Pulsus.

Sanguis autem per arterias partibus advehitur mediante pulsu cordis, quo singulis ictibus, cum se contrahit, sanguinem in arterias impellens, arterias eodem tempore dilatari & pulsare facit: sicut enim cor pulsat cum contrahitur & sanguinem expellit, ita è contrario arteriæ pulsan, cum sanguinem recipiunt, ab eoque implentur & dilatantur.

Quod autem arteriæ omnes, usque ad extremas corporis partes, simul eodem tempore pulsent, quo cor contrahitur & pulsat, illius rei causam multi cum Praxagora & Galeno statuerunt esse propriam & innatam pulsficam facultatem, qua sponte omnes eodem tempore distenduntur & pulsan, quo cor contrahitur. Imò Platerus, *quæst. physiolog. 2.* illam pulsficam facultatem adhuc magis confirmare volens, scribit arterias ante cor formari & pulsare: *Arteria*, inquit, *formantur, pulsan, spiritumque deducunt, priusquam cor vel ullum motum persensierit.* Hanc opinionem falsam esse, ex duobus patet. *Primo*, quod ad omnes mutationes pulsus cordis ilico pulsus arteriarum mutetur, isque debilis, validus, celer, tardus, interruptus, &c. Mox sentiatur, sicut cordis pulsus, quod tam subito non contingeret, si arteriæ haberent propriam pulsficam facultatem. *Secundo*, quod

An arteriis  
insit vis  
pulsifica.

quod si in vivis animalibus ligetur arteria, mox ipso momento ultra ligaturam deficiat ejus motus, qui tamen, si ipsi innata esset movendi facultas, saltem pauxillum post injectam ligaturam perduraret. Hic si forte quis dicat, illud fieri non posse, quia per istam ligaturam, compressa arteriae tunica, irradiatio cordis, motivam arteriae facultatem in actum suscitatura, non potest ultra ligaturam penetrare vel procedere; tunc rem aliter explicabo, & utar certissimo experimento Plempii, quod describit, *fund. med. lib. 2. sect. 4. cap. 1. & 7.* scilicet in vivo animali arteriam aortam, aliamve majusculam, digitis versus cor comprimam, & infra compressionem incisione aperiam, atque per aperturam molle gossypium aut spongiam intrudam, ad levem arteriae obstructionem, ita tamen ut tunica ejus non distendantur nec comprimantur: hoc factò, digitos supra incisionem comprimentes amovebo, atque tunc apparebit, arteriam infra gossypium seu oppletionem omnino non moveri, licet tunica ejus non sint compressa aut ligata. Quantum ad opinionem Plateri ante relatam, illa longis parafangis à via aberrat, ut latius patet ex iis quae de prima partium formatione supra diximus, *lib. 1. cap. 29.*

causa pulsus arteriarum.

Causa igitur pulsationis arteriarum est sola repletio, & sanguinis in eas è corde impulsio. Hoc tamen nonnullis impossibile videtur (hinc Walæus, Bartholinus, alique, facultatem pulsificam arteriis propriam necessario adjungendam censent) quia sanguis successive implet arterias, moveturque ejus pars post partem, & sic existimant hac de causa unam arteriam pulsaturam post aliam, non autem simul omnes eodem tempore pulsaturas. Verum illi non considerant, sanguinem arteriosum esse rarefactum, calidum, tenuem, atque hinc facile mobilem, eumque è corde impelli in arterias simili sanguine ante repletas, unde cum pauxillum quid è corde in arteriam magnam propellitur, mox ab illo pauxillo etiam necessario totum, quod omnibus arteriis inest, simul propelli, sicque omnes arterias eodem tempore simul distendi necesse esse. Si in orbe stanneo mensali, vel scutella deponatur circulus globulorum contiguorum, & unus eorum manu promoveatur seu impellatur, ille proximum, alter tertium, & sic deinceps omnes eodem momento promoventur & impelluntur, quoniam primo promoti non datur novus locus nisi secundus loco cedat, hoc cedente suo loco, necessario omnes loco cedunt & promoventur propter contiguitatem. Ita se quoque res habet in arteriis, in quibus una parte sanguinis mota, moventur omnes. Successive quidem cor illas replet & pulsare faceret, si fo-

rent vacuæ, sed hoc facere nequit in repletis. Has rationes confirmat experientia, qua docemur, simul ac cor definit sanguinem in arteriam magnam propellere, mox definere omnium arteriarum pulsus. Sic vidi quondam Noviomagi virum cum alio viro pugnantem, cui, me adstante medius thorax ab adversario suo perfossus fuit gladio, ictu sinistrum cordis ventriculum (quod postea in aperto cadavere vidimus) penetrante: ille eo ipso momento quo vulnus accepit, quasi fulmine ictus, concidit, moxque extinctus est: cum autem concideret, statim accessi, & ejus pulsus in carpo ac temporibus exploravi & quæsi, sed nusquam arteriarum ullam pulsationem, percipere potui, propterea scilicet, quod sanguis per vulnus cordis in thoracis cavitatem effluens, non impelleretur in arteriam magnam, sicque mox sanguis omnium arteriarum immobilis substitit, nec ulla arteria pulsavit. Omnino similem casum antea etiam Leydæ videram; aliumque similem hic Utrajecti ante paucos annos nobis videre contigit. In iis qui repente syncope moriuntur, mox arteriarum pulsus deficit, cum cor moveri definit, vel debilis sentitur, si cor debiliter moveatur. Præterea, apud omnes medicos communibus suffragiis sancitum est, pulsus arteriarum esse certissimum indicem constitutionis cordis: atqui si arteriæ haberent propriam innatam pulsificam facultatem, tunc pulsus foret index constitutionis arteriarum, & non cordis, atque sic ab Hippocrate, usque ad nostra tempora, hac in parte magnopere decepti fuissent & errassent omnes Medici, quod tamen minus verum esse docet quotidiana experientia. Ex quibus omnibus satis patet arterias nullam propriam pulsificam facultatem habere, sed earum motum solummodo procedere à motu cordis: qui motus in depressione arteriarum adjuvatur quidem nonnihil ab earum fibris transversis, sed hæ tamen fibræ per se omnino non moventur, nisi prius distentio fiat à sanguine è corde impulsio, hæ enim duntaxat arterias ultra quietis modum distentas in priorem statum contrahunt, in quo quiescunt usque dum iterum distendantur.

observatio.

Quæritur, an corde pulsante, mox etiam omnes arteriæ pulsant usque ad extremos fines? Respondeo, si pulsus cordis majusculi sint, tunc hoc sensibilibiter fieri: at si parvi & languidi sint, tunc sensibilem motum in earum finibus non percipi. Hinc, non sine ratione, ita scribit Harveus. *Impulsus cordis ad divisiones singulas arteria quasi partibus imminuitur, adeo ut ad ultimas divisiones arteria planè capillares facta, venis non solum constitutione & tunicis, sed & quiete similes fiant, dum sensibilem pulsus.*

An corde pulsante omnes arteria pulsant.

ant

aut nullum, aut non semper edant, nisi cum cor vehementius pulsât, & arteriola nimium dilatata est. Hæc causa est quod in apicibus digitorum quandoque sentiamus pulsum, quandoque non; quod etiam Harveus pue-

ros febricitare noverit, si pulsus in apicibus digitorum sensibilibet perciperetur.

De motu arteriarum lectu digna est Epistola Cartesii, ad medicum Lovaniensem scripta, quæ est tom. 1. Epist. 78.

## CAPUT XI.

## De Arteria magna, seu Aortæ trunco.



**Arteria Magna, seu Aorta** (Græcis μεγάλη, maxima, & non nunquam simpliciter μεγάλη, magna, aliis παχία, crassa, & αίστη, dicta) est qua

omnes totius corporis Arteriæ, exceptâ asperâ & pulmonariâ, procedunt, reliquas omnes Arterias substantiæ crassitiæ & ductus amplitudine plurimum superat. Huic tamen in substantia & amplitudine non multum absimilis est magna Arteria pulmonaria, à dextro cordis ventriculo in pulmonem extensa, quam vulgò venam Arteriosam malè appellant.

**Substantia.** Talem autem firmam substantiam Aorta habere debuit, ne fervidus ac spirituosus sanguis, ex ipso caloris foco in eum proximè impulsus, dissiparetur. Amplitudine verò opus habuit, ut sufficientem sanguinis quantitatem omnibus aliis Arteriis, ab ea procedentibus, distribuendam contineret.

**Ortus.** Patente orificio cordis sinistro ventriculo continua adhæret, mox in ipso exordio tribus donata valvulis sigmoideis, à corde versus exteriora prominentibus, &

sanguinis ex Arteria in ventriculum cordis regressum impediens.

Ante egressum verò e pericardio de se *Arteria coronalis.* emittit Arteriam coronariam, modò simplicem, modò geminam, cordis basin instar coronæ ambientem, indeque per ejus longitudinem ramos spargentem, venis coronariis comitatos, cum quibus illos per anastomosin conjungi, a nonnullis statuitur, quod tamen demonstrare difficillimum foret.

Hujus Coronariæ orificio valvula adstat, ita comparata, ut sanguis facile ex Arteria magna in Coronariam influere, non verò ex hac refluere possit.

Hæc tenui stylo à parte cordis versus Arteriam magnam immisso obstat, eique transitum præcludit: à parte verò Arteriæ magnæ immixtus stylus facile in Coronariam ingreditur: atque sic valvulæ hujus præsentia animadvertitur, quæ alioqui adeo exilis est, ut oculis vix appareat.

Cum Aorta è pericardio elapsa est, *Truncus.* truncum constituit, cujus minor pars sursum ascendit, major versus inferiora delabitur.

## CAPUT III.

## De ramis ex Arteriis Subclaviis prodeuntibus.



Arteriæ Aortæ minor pars ascendens, inter membranas intersepientes venæ cavæ substructa, asperæ Arteriæ incumbit.

**Subclavia.** E corde emergens mox dirimitur in duos Ramos Subclavios, dextrum altiore & ampliorem, qui eo loco prodit quo Aorta in carotides scinditur: sinistram humiliores & angustiores, qui enascitur ubi Aorta deorsum retorquetur, & obliquiore, quam alter, ductu ad brachium fertur.

Ab utraque hac subclavia varii rami progrediuntur, alii antequam Thoracis cavitatem excidit, alii postquam Thoracem egressa est.

**Intercostalis superior.** Dum in Thorace latet utraque subcla-

via, ab inferiore parte emittit **Intercostalem superiorem**, quæ utrimque costarum radicibus attensa, tribus quatuorve interstitiis costarum superiorum (inferiores intercostales ex Aortæ trunco descendente prodeunt) sui lateris singulos ramulos communicat, à quibus surculi impertiuntur musculis vicinis & medullæ dorsali. Interdum tamen hæ intercostales ab Arteriis cervicalibus, illuc per vertebrarum foramina emigrantibus, deducuntur.

A superiore verò utriusque subclaviæ parte prodeunt hæ tres Arteriæ.

**I. Mammaria**, quæ per musculos *Mammaria.* cartilaginum verarum costarum interstitia occupantes, descendit versus mammas, & ad cartilaginis mucronatæ latus egressa, sub musculis rectis abdominis in plures surculos

O o o

culos dividitur, quos plurimi Anatomici ante hac scripserunt suis finibus per Anastomosim cōire cum extremitatibus ramorum Arteriæ epigastricæ sursum ascendentis. Verum illam conjunctionem ego nunquam potui observare, eandemque minime fieri docet ratio, cum Arteriosus sanguis in arteria redundans in aliam arteriam fini ejus annexam transfundi nullo modo possit: nam per utramque arteriam sanguis à corde propellitur ad finem, igitur à neutrius arteriæ fine potest aliquid recipi & versus cor deferri. Atque hinc, si aliqua sub dictis musculis Anastomosis statuenda foret, deberent arteriæ Mammariæ cōire cum venis epigastricis, & arteriæ epigastricæ cum venis mammariis; quam tamen conjunctionem etiam nunquam reperire potui, quamvis varii illam, tanquam prorsus indubitam, describant. Hac de re vide supra, lib. I. cap. 5.

*Cervicalis.*

**II. Cervicalis**, quæ vertebris musculisque cervicis surculos tribuens, ad septimam cervicis vertebra per foramina transversis Apophysibus insculpta transit, ac crassam meningem quæ medullam spinalem investit, in latere perforans, & medullæ propagines tribuens, per magnum occipitis foramen calvariæ cavitatem ingreditur, moxque sub medulla cum oppositi lateris ramo juncta, in innumeros minimos ramulos scinditur, qui tum cervicalis oppositi lateris ramulis concurrentes, mixti, & plurimis in locis ultro citroque inosculati, mirabiles reticulorum plexus in tenui meninge circum cerebellum (cujus, ut & partis posticæ medullæ oblongatæ irrigationi potissimum inservit) efformant, qui ramuli, partim invisibiles cerebelli substantiam pervadunt; partim versus interiora ejus hiantes, subtilissimum sanguinem in cerebelli poros copiosum effundunt, cujus punctula ex dissecta substantia epullulare conspiciuntur. Præterea ex utraque cervicali versus fellam equinam parvi ramuli excurrunt, qui cum copiosissimis ramulis carotidum, inferiore retis mirabilis parte, commiscentur, atque sic ad complementum retis aliquid conferre videntur, quamvis maxima ejus pars à carotidibus perficiatur.

*Muscula.*

**III. Muscula**: quæ cervici incumbentibus, & nonnunquam etiam brachii musculis ramulos impertit.

Cum Thoracem egressa est subclavia, &

mutato nomine **Axillaris** appellatur (quia *Axillaris.* ad alam seu axillam vergit) antequam ad brachium delabatur, emittit parte superiore **Humerariam**, ad musculos humerum *Humeraria.* & scapulæ gibbum integentes.)

Inferiore verò parte tres arterias proiicit.

**I. Thoracicam superiorem**, quæ plurimis ramulis ad musculos pectori in *Thoracis superior.* stratos excurrit.

**II. Thoracicam inferiorem**, quæ *Inferior.* deorsum per thoracis latus, & imprimis per musculum latissimum fertur.

**III. Scapularem**, quæ musculos *Scapularis.* scapulæ cavitatem occupantes ingreditur.

His ramis emissis, reliquum arteriæ axillaris postquam glandulis sub alis sitis exiguos ramulos communicavit, ad brachium abit (hinc nonnullis *Arteria brachialis* appellatur) per cujus partem internam cum vena basilica (nulla enim est, arteria cephalica) inter musculos descendens, surculos utrimque graciles in musculos humeri sedem internam amplexantes distribuit. Mox cum venæ basilicæ ramo profundo extrinsecus emergens, cubiti exteriora percurrit, ramulosque articulo & vicinis partibus largitur. Sub flexura verò cubiti introrsum versus ad musculos digitorum flexores descendens, in duos ramos insignes dividitur, quorum superior secundum radium delatus, carpum adit, quo loco *Arteria brachii & manus.* pulsus explorant Medici, hic quæ deinde sub ligamento annulari procedens, hos surculos emittit.

**I. Inter os pollicis & metacarpii** ad manus externæ musculos: præter hanc manus externa nullas alias habet arterias manifestas.

**II. Geminum**, ad pollicis interiora.

**III. Etiam geminum**, ad indicis internam sedem.

**IV. Unum** ad medium digitum.

Inferior verò ramus secundum ulnam carpum accedit, ab eoque procedunt hi ramuli.

**I. Ad musculos juxta minimum digitum** positos.

**II. Ad medium digitum.**

**III. Geminus**, ad medicum.

**IV. Etiam geminus**, ad minimum digitum.

## CAPUT IV.

## De Arteriis Carotidibus, earumque ramis.

Carotides.



Missis Subclaviis, mox ex arteria aorta ascendente exsiliunt Arteriæ carotides: quarum sinistra ex superiore ipsius trunco exsurgit: dextra

verò, licet ab ipso trunco oriri à multis dicatur, tamen à principio Subclaviæ dextræ, claviculam jam superantis, verè procedit.

Hæ duæ carotides juxta elatiorem sterni partem, thymo circa exordium suffultæ, sursum tendunt, atque externo internoque ramo ad caput assurgunt. Postquam enim laryngi, linguæ, Hyoidis musculis, vicinisque glandulis ramos tribuerunt, utrimque secundum asperæ arteriæ latus, cum venâ jugulari interna ad fauces ascendunt, ibique dirimuntur in ramum anteriorem & posteriorem.

Carotidis ramus externus.

Exterior, qui gracilior est, partim multiplici fruticatione per faciem & buccarum musculos dispergitur, atque etiam frontem & pericranium irrigat: partim ad aures prorepens, emittit hos ramos.

I. Ramum anteriorem versus tempora, qui eo loco pulsans sentitur, ac non nunquam in vehementibus & antiquis capitis doloribus à Medicis secatur.

II. Ramum ad auris posticum locum.

III. Ramum ad maxillam inferiorem, cujus propagines inferuntur labro inferiori, quæ etiam os maxillæ inferioris subintrantes, ad singulorum dentium radices furculo decurrunt. Ab hoc ramo etiam minimi furculi, per exilia foraminula externam cranii tabulam penetrant, & diploidem ingrediuntur, cui sanguinem adferunt ad succi medullaris confectionem.

Ramus interior.

Interior ramus, qui major est, fertur primo ad fauces, ubi laryngi, paristhmis, & linguæ furculos largitur, ramosque emittit ad glandulas post aures, & spongiosas palati nasique partes. Deinde maxillam superiorem ingreditur, cujus singulis dentibus ramulum suppeditat, per quem acres humores defluentes interdum aserrimam odontalgiam excitant. Reliqua verò parte calvariam conscendens, circa ejus basim in duos ramos, magnitudine inæquales, dividitur.

Horum unus, qui minor & posterior, ubi musculus cervicis interioribus furculum largitus est, aliumque per foramen superioris vertebrae in duram meningem, spinæ medullam investientem, emisit, ulterius ascendens, per foramen nervo vago exsculptum, cranium ingreditur, & duram meningem perreptat, ac circa crassæ meningis sinum, in quem tenuissimis ramulis hic illic aperiri videtur, finis ejus evanescit.

Alter verò, qui major, & trunco fere æqualis est, versus superiora tendens, per canalem osseum in cuneiformi osse, juxta anteriorem latus meatus auditorii, exsculptum, tortuoso ductu fertur ad sellam equinam: ad cujus basim, postquam utrumque in crassæ meningis latus ramum emisit, in plurimas minutas propagines se expandit, quæ implicatæ cum furculis arteriæ cervicalis, efformant Rete mirabile, in vitulis, bobus, & ovibus satis conspicuum, sed in homine obscurius, nisi fortè in recenti cadavere sectio fiat, in quo illud mediocriter apparet: de hoc vide lib. 3. cap. 8.

Rete mirabile.

Verumtamen dictus ramus in istas propagines non absimitur, sed duram meningem perforans, duobus insignibus ramis tenuem meningem ingreditur, qui infinitis propaginibus cum cervicalis ramulis medullæ attensis miscentur, atque etiam extra calvariae pomeria spinalem medullam comitantur usque ad lumbos. Hoc facto, mox ramum quendam minorem, per cuneiformis ossis foramen secundum, cum nervo optico extra calvariam ad oculum mittit. Item alium ramum majorem sursum, per foramen lacerum, choanæ propinquum, exporrigit, qui ad latus glandulæ pituitariæ in duas propagines finditur: quarum interior, cum oppositi lateris arteria interiore unita, ac in minimas arteriolas scissa, ad initium nervorum opticorum per tenuem membranam disseminatur, ac partim innumeris invisibilibus ramis cerebri molem pervadit: partim per hiantia orificia sanguinem spirituosum in substantiæ cerebri poros effundit. Altera verò exterior, reflexa, ac tenui membrana involuta, suisque ramulis cum arteriis a cervicali ad eam sedem delatis, unita, partim per tenuem meningem disseminatur; partim sursum ascendit in ventriculos cerebri anteriores, in quibus Plexum choroidem constituit, de quo dictum lib. 3. cap. 6.

Plexus choroides.

Ab eodem majore carotidis ramo adhuc alia arteria procedit, quæ ubi per temporis foramen secundum calvariam subiit, mox in duas propagines dispescitur. Hæ



rum exterior per cuneiformis ossis foramen octavum in majorem cavitatem excurrit, ramulum unum naso extremo offerens.

Altera verò interior, quæ primo bipartitur, gracilem ramum crassæ meningi tribuit.

## CAPUT V.

## De Arteriis ex Aorta trunco descendente, ante divisionem prodeuntibus.



Runci arteriæ aortæ pars deorsum descendens, quæ superiore major est, œsophago adhæret. Hinc nonnulli, conjecturâ haud planè inani, fieri putant, quod homo validiore exercitio, aut solis æstu plus solito excalesfactus, ab uno majusculo potus frigidi haustu mox insignem refrigerationem sentiat, refrigerato scilicet œsophago, eoque mediante, simul sanguine in contiguæ arteriæ magnæ trunco hærente: item quod in tali casu à largiore frigida potu nonnulli in lypothymiam incidant, quia scilicet sanguis, in vicina arteria magna, à frigida potu per œsophagum transeunte, subito refrigeratur, & non nihil incrassatur, sicque motus ejus turbatur.

Interco-  
stales inferio-  
res,

Hæc trunci pars descendens, antequam diaphragma transsit, de se emittit **Interco-stales inferiores** (superiores oriuntur à subclaviis, ut ante dictum, cap. 3. quæ à posteriore ipsius sede utrimque ad octo vel novem (interdum enim in numero aliqua varietas reperitur) inferiorum costarum intervalla, usque ad cartilagineas, vel paulo ulterius, mittuntur, atque etiam dorso thoracis musculis, nec non dorsali medullæ, per foramina nervis exsculpta, furculos communicant.

Phrenica.

Præterea, circa diaphragma à trunco prodit **Phrenica**, hinc dextra, illinc sinistra, quæ ad diaphragma, mediastinum, & nonnunquam etiam ad pericardium defertur.

Reliquum trunci Aortæ diaphragma penetrans, per corporis inferiora quaquaversum ramos spargit: alios antequam in Arterias iliacas dispescitur: alios postquam in eas divisa est.

Qui ante divisionem ab ea progrediuntur, alii ramos Venæ portæ, alii ramos Venæ cavæ comitantur.

Qui rami venæ portæ propagines comitantur, duo sunt, **Coeliaca** & **Mesenterica**.

Coeliaca.

**Arteria Coeliaca**, quæ nonnullis etiam **Stomachica** dicitur, ex anteriore corpore aortæ prodit ad primam lumborum vertebra, & sub hepatis cavo descendens,

supra venæ portæ truncum dividitur in duos ramos, qui sub posteriore sede ventriculi adhærent pancreati.

Horum dexter gracilior elatiore parte producit **Gastricam dextram**, quæ pylorum accedit, atque hinc **Pylorica** Spiegelio appellatur. Præterea **Cysticas gemellas**, exiguas; per fellis vesicam plurimis ramis dispersas. Humiliore verò parte ab eo procedunt.

Gastrica  
dextra.

Cystica ge-  
mella.

**I. Epiplois dextra**, ad inferioris omenti dextram sedem, ipsique annexum colon.

Epiplois  
dextra.

**II. Intestinalis**, ad duodenum, & jejuni initium.

Intestinalis.

**III. Gastroëpiplois dextra**, ad ventriculi fundum & medium.

Gastroëpi-  
plois dex-  
tra.

**IV. Hepaticæ dextra** exigua, de quibus aliqua lis est. Nam ex sententia Galeni, 4. de usu part. cap. 13. Hepatis parenchyma ingressæ, maxima ex parte in cavam ejus partem se conferunt. At Rolfincius, anat. lib. 6. cap. 25. & 42. Scribit se in convexa parte easdem etiam multas ac copiosas observasse. Contra verò Glissonius, anat. Hep. cap. 29. animadvertit, has arteriolas non ingredi parenchyma hepatis, at solummodo se insinuare in capsulam communem, cum eaque dividi in capillaria vasa, plurimosque furculos vesicæ fellæ porisque bilariis communicare: Hac de re vide supra, lib. 1. cap. 14.

Hepaticæ.

Reliqua hujus dextri rami portio mesenterium plurimis propaginibus ingreditur, idque irrigat.

Sinister verò celiacæ ramus, qui **Splenicus** dicitur (interdum tamen contingit arteriam splenicam ab ipso aortæ trunco, & non à celiaca, oriri) & dextro amplior, ac nonnihil varicosus est, flexuoso ductu supra pancreas ad lienem progreditur, & parte superiore emittit **Gastricam majorem**, quæ postquam surculum tribuit elatiori & mediæ ventriculi sedi, duas propagines peculiaribus nominibus insignitas ad ventriculum proiicit.

Splenicæ.

Gastrica  
major.

**I. Coronariam stomachicam**, quæ orificium ventriculi superius coronæ instar cingit,

Coronaria  
stomachica.

cingit, & corpori ipsius ventriculi varios ramulos tribuit.

*Gastrica  
sinistra.*

**II. Gastricam sinistram**, quæ dextrorsum in ventriculi superiora, & ad pylorum transfertur.

Præter has, à ramo splenico, sed parte inferiore, procedunt,

*Epiplois postica.*

**I. Epiplois postica**, ad omentum inferius, ipsique annexum colom,

*Epiplois sinistra.*

**II. Epiplois sinistra**, ad inferius & sinistrum omenti latus.

*Vas breve arteriosum.*

*Gastroëpiplois sinistra.*

Reliquum rami splenici lienem accedens, ejus parenchyma ingreditur; postquam scilicet paulo ante ingressum superiore parte emisit **Vas breve arteriosum**, ad fundi ventriculi sinistram latus, & **Gastroëpiploidem sinistram**, quæ superiore omento suffulta, sinistram fundi ventriculi sedem perreptat, anteriori & posteriori ejus parti, nec non omento ramulos tribuens. Lienem ingressus hic ramus, plurimis divaricationibus per substantiam ejus distribuitur, ut supra videndum, *lib. 1. cap. 15.*

*Arteria mesenterica.*

**Arteria mesenterica**, quæ etiam venæ portæ radices comitatur, ex anteriore trunci parte, modò simplex, modò statim ab egressu in duos ramos divisa, procedit. Horum superior, infra cæliacam enata, per universam mesenterii partem superiorem (in qua meseraicas constituit) nec non in jejunum, ileum & coli partem, ad renem dextrum protenditur.

*Hæmorrhoidales internæ.*

Inferior verò infra spermaticas, juxta os sacrum, enata, humiliorem mesenterii regionem ingreditur, plurimisque ramis in sinistram coli partem & intestinum rectum distribuitur, ac denique ad podicem descendens, constituit **Arterias hæmorrhoidales internas.**

Per dictos ramos à mesenterica prodeuntes sanguis arteriosus ad nutritionem intestinorum & ipsius mesenterii defertur: nec audiendi sunt illi, qui Galeni auctoritate (*lib. an in arteriis sit sanguis*) suffulti, existimant arterias mesentericas etiam chyli tenuiorem partem exsugere; nam cor per arterias sanguinem continuè à se ad partes propellit, nihil verò per easdem à partibus recipit, nec duo isti contrarii motus, expulsionis & attractionis, eodem tem-

pore in arteriis fieri possunt. Totus hic error ex eo processit, quod Galenus vasa lactea non cognoverit, & ex albo colore judicaverit eas esse arterias.

Rami è trunco arteriæ aortæ ante divisionem prodeuntes, qui venæ cavæ propaggines sequuntur, varii sunt.

**I. Arteria emulgens**, utrimque una, *Emulgens.* (rarò plures inveniuntur) ad singulos renes: quæ circa primæ & secundæ lumborum vertebræ conjunctionem è trunco prodit, dextro paulo humiliore, sinistro elatiore sede, & in duos, tres, quatuorve ramos fissa, sui lateris renem ingreditur. Hujus extremitates cum venæ emulgentis extremitatibus per anastomoses intra renis substantiam multiformiter cõire, scribit Rolsincius, quod nullo modo probabile est (hoc liquet ex iis quæ de renum constitutione supra diximus, *lib. 2. cap. 18.*) ac proinde opinioni ejus subscribam, quando aliquis conjunctiones istas mihi demonstraverit, vel ego ipsemet eas invenerim.

**II. Spermatica** utraque contiguè *Spermaticæ.* principiis prodiens (rarissime dextra ab emulgente, interdum sinistra in fœminis ab emulgente pronasci visa fuit) quarum dextra venæ cavæ truncum supergreditur. Hæ singulæ cum vena sui lateris statim ab exortu, vix duorum digitorum intervallo ab emulgentibus, conjunctæ, in viris per peritonæi processum ad testes descendunt; in mulieribus verò, cum testibus propinquæ fiunt, in tres ramulos dirimuntur, quorum primus inseritur testibus: secundus uteri fundum multis ramulis ingreditur: tertius in uteri tubam & ligamentum distribuitur.

**III. Lumbares**, quæ non tantum *Lumbares.* per vicinos lumborum musculos & peritonæum distribuuntur, verum etiam parte posteriore, qua arteriæ magnæ truncus vertebris incumbit, per foramina vertebrarum lumborum ad spinalem medullam feruntur, quas nonnulli putant inde secundum medullæ latus, una cum adjunctis venis, ad cerebrum ascendere.

**IV. Muscula superior**, utrimque *Muscula superior.* una, quæ ad abdominis latera, ejusque musculos excutrit.

## CAPUT VI.

## De arteriis ex Aorta trunco descendente post divisionem intra peritoneum ortis.



Rteriz aortæ truncus descendens, ubi ad regionem quintæ lumborum vertebræ pervenit, venam cavam conscendit, atque in duos ramos,

Iliaca.  
Sacra.

Iliacos dictos dispescitur. Ad ipsam verò divisionem prodit Arteria sacra, quæ exiguis furculis ossis sacri foramina subiens, in ejus medullam aperitur.

Quilibet verò ramus non procul à bifurcatione rursus dividitur in ramum interio-rem & exteriorem.

A ramo isto iliaco interiore, qui minor est, procedunt tres propagines.

Muscula inferior.

I. Muscula inferior, ad musculos gluteos, nates constituentes, nec non ad musculi iliaci & psoæ extremitatem progreditur. Circa hujus exortum nonnunquam ex alterutro trunco ramus excurrit ad partes cutaneas pubis, ilii, & abdominis.

Hypogastrica.

II. Hypogastrica, quæ ampla est, & ad humiliorem ossis sacri sedem in vesicam ejusque cervicem, & musculos pubis os tegentes, procedit, atque nonnullis radicibus ad podicem usque excurrit, ubi

Hæmorrhoidales externæ.

Hæmorrhoidales externas constituit. In viris etiam per penis duo corpora cava ad glandem deferuntur. In fœminis verò in uteri fundum ejusque cervicem numerosa sobole distribuitur.

Umbilicalis.

III. Arteria umbilicalis, quæ juxta vesicæ latera ascendens, ac duplicaturæ peritonæi inserta, ad umbilicum procedit, quem in fœtu utero in hærente egreditur, & ad placentam uterinam excurrit, ut su-

pra dictum, lib. 1. cap. 32. In homine autem nato, cum abscisso umbilico sanguinis deferendi munus amplius non præstet, solidior & durior evadit, atque in ligamentum vesicæ latera nonnihil sustinens faciescit, & instar chordæ ab utraque arteria iliaca ad umbilicum usque protenditur.

Reliquum rami interioris, assumpta propagine rami exterioris, dispergitur in musculos foramen ossis pubis occupantes, & vicinos.

Ab exteriore verò iliaco ramo, qui major est, duæ propagines exeunt.

I. Epigastrica, quæ sursum extra peritoneum reflexa, rectum abdominis musculum interiore parte conscendit, cui circa umbilici regionem occurrit Mammaria descendens, quæ cum hujus extremitatibus per anastomosim cõire vulgò traditur, quod tamen minime verum esse, diximus præcedente cap. 3. ut & lib. 1. cap. 5.

Epigastrica.

II. Pudenda, quæ utrimque notabilem arteriam in penis nervosa seu fungosa corpora, & in fœminis in clitoridem, emittit. Hinc introrsum, secundum pubis ossis commissuram, ad pudenda & inguina, eorumque glandulas fertur, ac in partium istarum, & penis cutem absumitur.

Pudenda.

His ramis emissis, egrediuntur iliacæ peritonæum, & ad crura devolvuntur, tuncque mutato nomine Crurales appellantur.

## CAPUT VII.

## De Arteriis Cruralibus.

Cruralis.



Arteria cruralis, quæ vena crurali minor est, versus inferiora cruris descendens, alios ramos supra, alios infra poplitem emittit.

Supra poplitem ab ea progrediuntur hi tres rami.

Muscula cruralis exterior.

I. Muscula cruralis exterior, à trunci cruralis exteriore parte. Hæc musculos femoris anteriores ingreditur.

Interior.

II. Muscula cruralis interior, ex

trunci parte interioro. Hæc per femoris musculos interiores distribuitur.

III. Poplitea, quæ deorsum descendens per musculos femoris posteriores excurrit usque ad poplitem, unde ei nomen impositum.

Poplitea.

Infra poplitem ab ea procedit Suralis, quæ paulo sub poplite latitans, utrimque propaginem profundam emittit ad articulum genu & musculos suram constituentes. Hinc versus tibiam descendens, dividitur

Suralis.

*Tibiae.*

dividitur in arterias **Tibias** appellationes.

**I. Tibia exterior**, quæ secundum fibulam descendens, in musculos tibiae absumitur.

**II. Tibia posterior elatior**, quæ usque ad commissionem tendinum musculorum suræ progreditur.

**III. Tibia posterior humilior**, quæ per ligamentum membraneum fibulae musculos tibiae jungens, transit, ac per pedis superiora & musculos abducentes digitos distribuitur.

*Arteria pedis.*

Reliquum caudicis cruralis per tibiae posteriora, inter secundum & tertium digitorum pedis musculum, recta descendit, atque inter calcem & malleolum ad pedis humiliora progreditur, circa malleolum à latere, ad pollicis musculum pedisque superiora ramulum emittens. Quod superest, inter tendines musculorum digi-

torum pedis, in duos ramulos dispescitur. Horum interior pollicis duos, indicis duos, & medio digito unum furculum tribuit. Exterior verò minimo duos, medio duos, & unum furculum medio digito largitur.

Notandum; in historia arteriarum à nobis aliisque Anatomicis tantum illas describi arterias, quæ manifestius conspici & inveniri possunt: minimas verò earum ramificationes, non satis manifeste conspicuas, vel visum subterfugientes, describi non posse, licet eas partibus inesse nutritio satis doceat. Ex gr. cutis nutritur sanguine arterioso, quem profundit, vix ullæ tamen conspicuæ arteriæ in ea demonstrari possunt, quamvis ex nutritione, & sanguinis profusione, eas subesse satis pateat. Quod ipsum in plerisque aliis partibus ita se habere certum est.



A N A-

# A N A T O M E S

## L I B E R VII.

### D E

# V E N I S.

### C A P U T I.

### DE VENIS, IN GENERE.



Ena Græcis φλέψ dicitur, ἀπὸ τῆς φλέβειν, abundare, plenum esse, quod in ea sanguis copiosus redundet.

Venarum appellationem Veteres etiam arteriis tribuerunt, ut liquet ex Hippocrate, Aristotele, Galeno, Celso, aliisque. Hodie illam varii etiam adscripserunt vas-  
 is lacteis & lymphaticis, quas venas lacteas & lymphaticas nominarunt, sed minus proprie, cum hæc vasa per omnes corporis partes non ferantur, sicut venæ, & præterea usu ac substantia à venis multum differant. Nos verò hoc libro solummodo venarum proprie dictarum seu sanguiferarum historiam conscribemus.

Definitio.

*Est autem vena pars organica similis, membranosa, oblonga, teres, cava, sanguinem minus spirituosum continens, & ad cor deferens.*

Organica dicitur, quatenus ad actionem seu usum, scilicet ad sanguinem deferendum est comparata.

Similaris dicitur perfunctorio judicio, ut præcedente libro etiam de arteria dictum est.

Forma exprimitur vocibus, *oblonga, teres, & cava*, quippe canalem, seu fistulam æmulatur.

Usum indicant ultima verba, *Sanguinem minus spirituosum continens, & ad cor deferens*. Quia scilicet sanguis primarius est humor qui per eas devehitur, alii humores sanguini admisti pauciores sunt.

Dico, *minus spirituosum*, ad differentiam sanguinis arteriosi, qui multo spirituosior est, & non nisi magna parte spirituositatis deposita ad venas pervenit.

Dico, *continens*: non quod in solis venis talis sanguis contineatur, nam in multarum partium substantia etiam satis invenitur; sed quod illius maxima copia in his

vasis concludatur, & quantum fieri potest, à corruptione conservetur, qualis copia si alicubi extra vasa containeretur, citissime corrumpetur & putresceret.

Dico, *ad cor deferens*; quia hunc primum ejus usum esse, patet ex iis quæ de sanguinis circulatione docuimus lib. 2. cap. 8. Defertur autem sanguis per venas sine pulsatione, & defluit solummodo ac propellitur sicut unda propellit undam.

Antiqui adhuc duos alios usus venis adscribebant.

I. *Sanguinem distribuere*: nam putabant sanguinem è cava in minores venas, & sic ulterius ad omnes partes defluere: quam opinionem jam dudum pessumdedit cognitio circulationis sanguinis.

II. *Sanguinem excoquere & elaborare*: quam earum actionem Galenus passim inculcat: nam lib. 1. de usu part. cap. 16. dicit, sanguinis generandi, & in omnes partes ferendi gratia venas conditas esse. Et lib. 4. de usu part. cap. 17. Hanc facultatem ipsis tributam ait, ne dum per eas fertur sanguis, tempus ipsi alimento frustra pereat. Et lib. de morb. differ. cap. 7. illud ipsum innuere volens, dicit, sæpe venarum affectus obstare, quo minus sanguis utilis gignatur. Inter neotericos cum Galeno consentit Adrianus Spigelius, qui, Anat. lib. 8. cap. 12. sic inquit: *Vena sunt quæ sanguinem coquant, & in se vim ac facultatem sanguificandi insitam habent*. Et paulo post addit: *Si ergo concludimus, cerebrum rationis esse domicilium, quod eo laeso & laborante mentem nostram minus valere sentimus; recte profecto & venas sanguinis officinam vocabimus, quod iis affectis prævum ac deteriore sanguinem generari videamus*. Galenum etiam sequuntur, Vesalius, Joubertus, Laurentius, & Schenckius, alii-  
 que varii cum his. Verum hæc actio non venis, sed soli cordi competit, utpote quod solum & unum est viscus sanguificans,  
 à quo

a quo quanto longius recessit sanguis, tanto imperfectior evadit, nec usquam in venis ad meliorem statum reducitur seu elaboratur, sed eam ob causam necesse est ut per venas ad cor redeat, in eo de novo excoquendus ac perficiendus. Hoc etiam satis consideravit Highmorus, qui proinde, *lib. 1. anat. cap. 1.* prædictam opinionem splendide refutavit. Vide super his, *præcedentis lib. 2. cap. 11. & 12.*

Substantia.

Substantiam habet vena membranosa, mediocriter mollem, quo facilius distendi & concidere possit.

Tunica.

Unica constat tunica propria, molli, obtusissimi sensus, unde vulgò dicitur nihil sentire. Hæc triplici fibrarum genere intertexta creditur. Sed de his fibris aliqua dissensio est inter Anatomicos. Illas magnopere in dubium vocant, Fallopius,

Fibra.

*in observat.* & Vesalius, *in exam. observ. Fall.* quia eas nunquam, quantacunque adhibita diligentia, invenire potuerunt. Easdem etiam strenue negat Scaliger, *comm. in lib. Hipp. de insomniis.* Contra verò Brissotus, *lib. de venasect.* in pleurit. & Fernellius, *lib. 2. method. med. cap. 5.* fibras omnino in venis admittunt, nam in missione sanguinis fibræ venarum spectandas esse monent: cum quibus consentiunt, Fuchsius, *com. in lib. Gal. de venasect.* & Thadæus Dunius, *lib. de miss. sang.* Ut super hac dissensione iudicium nostrum feramus, dicendum putamus, quod licet venarum fibras nullus Anatomicus manifeste demonstrare queat, quilibet tamen eas facile sibi imaginari poterit, qui earum necessitatem & usum penitus consideraverit, & animadverterit, per has solas fibras necessario venas in debito statu contineri, & sanguinis copia nimium distentas ad naturalem statum earum contractione reduci. Hoc manifestissime patet in varicibus, cum disruptis transversis & obliquis fibris, venarum tunica admodum laxatur, nec unquam rursus ad naturalem statum contrahi potest. Non videtur illud considerasse Lindanus, qui *physiolog. cap. 16. artic. 19.* admodum spiratur, quod Medici admittant in venis tantam fibrarum multitudinem, cum solæ rectæ, ut inquit, sint necessariae. Verum ego multo magis miror, quod Lindanus ex solis varicibus non animadverterit, ad vasculi robur & conservationem multo magis necessarias esse fibras transversas, quam rectas: ac proinde, si rectæ sint admittendæ, multo certius admitti debere & posse transversas & obliquas. Spigelius & Plempius scribunt, has fibras etiam demonstrari posse, si majorum animalium insignes venarum trunci elixentur. Deusingius putat venas ratione harum fibrarum sanguinem attrahendo allicere, & ad cor deferre, dicitque

etiam meseraicas chylum attrahere. Verum hæc sunt meræ imaginationes, experientiæ & rationi contrariæ, omnique refutatione indignæ, quippe nullam huiusmodi tractionem in venis, aliisve vasis dari, alibi à nobis satis demonstratum.

Venæ tunicam obtusissimum vel nullum sensum habere, constat ex ejus sectione, in qua tamen si forte dolor aliquis per sentiatur, ille non tam fit in ipsa vena, quam in cute, aliisve partibus vicinis sensibilibus, quibus vena inhæret.

Riolanus, *animadvers. in Bauhin.* ubique ansam querens exagrandi Bauhinum, reprehendit illum, quod dixerit, venas non sentire: obijcit, ex Plutarcho, quod Marius in sui varicis sectione admodum doluerit, & in hæmorrhoidibus tumentibus acris dolor sentiatur. Sed quis, quæso, hic tam cæcus sit, qui non videat dolorem istum in utroque illo casu excitatum fuisse in cute & circumjacentibus membranis, non verò in ipsa vena? Nos etiam varices excindi curavimus, de acris dolore conquerebantur ægri quo usque vena ab incumbentibus membranis denudabatur, sed cum illa jam denudata abscinderetur, hoc, aut non, aut vix sentiebant. Ita ut hac in re meis oculis majorem fidem debeam, quam persuasioni Rioli.

Præter dictam tunicam propriam, vena sæpe alteram impropriad & communem à vicinis partibus mutuatur, in thorace à pleura, in abdomine à peritonæo, in aliis partibus à quibuslibet membranis proximis, ut eâ tunicâ mediante in longiore via partibus vicinis connexa tutius deducatur. Hanc tamen tunicam exuit, cum viscerum parenchymata, & musculorum aliarumve partium substantiam ingreditur.

Tunica impropria.

Nutritur vena isto sanguine qui per eam transit, cui quia pauciores spiritus falsi admiscuntur, hinc humidior duntaxat succo nutrita, molliorem substantiam habet. Modus nutritionis, prout ille à Fernelio describitur, videndus *præcedente lib. 6. cap. 1.*

Nutritum.

Hic dubium occurrit, cum venæ sanguinem per arterias propulsum recipiant, & ad fontem, scilicet cor, referant, quare etiam venæ non pulsant? Respondeo: motus pulsationis in arteriis usque ad extremos quidem earum fines continuatur, sed ob frequentes illarum divaricationes ejus impetus paulatim magis magisque imminuitur, & tandem circa earum fines admodum parvus exiit, imò deficit, ita ut ea de causa in venis nulla pulsatio fieri possit. Præterea, sanguis cum levissimo impetu è minimis arteriolarum finibus elapsus, atque angustissima venarum orificia subiens, mox ab illis angustis profuit in vias seu venas latiores; atque hinc in iis ulterius nullus violentus seu valde impetuosus & pulsans motus fieri

quare venæ non pulsant.

P p p

tus fieri

tus fieri potest. Eodem modo sicut aqua, si per angustum foramen aut canalem siphone, vel propria gravitate pressa impellatur versus latum canalem, cum impetu quidem impulsâ profilit per illam angustiam, sed ab altero latere per latum canalem sine tanto impulsivo impetu simpliciter profluit, unda impellente undam. Videatur super hac re comparatio lib. 2. cap. 8. à nobis proposita.

Valvula.

Venarum interius multis valvulis donantur membranosis ac tenuibus, sed tamen densis, quæ modò simplices sunt, instar unguis aut semilunulæ: modò duplices, seu duæ sibi invicem oppositæ, quales in nonnullis vasis majoribus inveniuntur: interdum etiam triplices, triangulariter sibi invicem oppositæ, inveniri dicuntur. Hæ omnes ita sitæ sunt, ut per eas sanguini versus cor liber affluxus pateat, refluxus autem à corde impediatur. Atque hinc venarum capitis valvulæ deorsum, sed inferiorum partium valvulæ sursum spectant.

Numerus valvularum infinitus est, neque omnes demonstrari aut inveniri ab Anatomicis possunt. Fuerunt tamen aliqui, qui majusculas & magis conspicuas magno labore quæsierunt, easque in toto corpore centum & octo notarunt. Sed quid hoc? in minoribus venis adhuc myriades valvularum existunt, quas invenire & demonstrare & si impossibile sit, tamen earum præsentia ex eo patet, quod per exiles illas valvulas sanguis ita sustineatur, ut digito repelli nequeat versus partes ex quibus in istas venulas influxit.

Magnitudo.

Venarum magnitudo admodum diversa est. In genere, partes molles, calidiores, & quæ magis moventur, majores habent venas, quia ab illis multum sanguinis erat referendum: quæ verò duræ ac frigidiores sunt, minusque moventur, minores venas obtinent, ob rationem contrariam. Maxima omnium, ab insigni cavitata, **Vena cava** appellatur, qui est quasi sanguinis maximus fluvius, in quem omnes minores venæ, tanquam rivuli, sanguinem exonerant, quæ prout singulæ plus minusve sanguinis eò deferunt, hinc pro istius usus necessitate, aliæ majores, aliæ minores existunt: quarum majores & insignes Hippocrati *κόλαι*, & *αἰμόρροοι*, *venæ*, & *sanguisina* appellantur, quod multum sanguinis contineant, eumque ruptæ aut sectæ copiosum profundant: minores verò seu parvæ *τρίχομοι*, *capillares*, dicuntur.

Venæ paucæ incomitatæ procedunt, plurimæ arteriam sociam obtinent, eique rarius substernuntur, frequenter adjacent, sed multo frequentius incumbunt, forte ut arteria loco tutiore subsisteret. Multæ suis extremitatibus cum arteriarum finibus per-

anastomosis cœeunt: plurimarum verò capillares fines in partium substantia evanescent.

Venarum differentia variæ sunt. 1. *Ratione substantia*, aliæ crassiores, aliæ tenuiores tunicam obtinent. 2. *Ratione magnitudinis*, venæ sunt vel magnæ, vel mediæ; vel parvæ, vel capillares. 3. *Ratione figura*, aliæ sunt rectæ, aliæ curvæ & tortuosæ. 4. *Ratione situs*, aliæ sunt capitis, aliæ thoracis, abdominis, vel artuum. 5. *Ratione connexionis*, aliæ carni, aliæ arteriæ, nervo, ossi, aliisve partibus adnectuntur. His differentiis nonnulli adhuc alias quasdam adjungunt, ab usu petitas, quatenus aliæ sanguinem purum, aliæ chylosum, aliæ impurum & excrementitium vehunt. Verum cum unus duntaxat sit venarum usus, nempe sanguinem qualemcunque, bonum, malum, purum, aut impurum, à partium nutritione residuum versus cor revehere, isque usus omnibus æqualis & communis sit, nullæ hinc earum differentia ab usu desumi bono jure possunt.

Differentia.

Numerum venarum alii arteriis superiores, alii æqualem statuunt, & neque his, neque illis, probabiles rationes deesse videntur. Verum tamen exacta hujus rei determinatio nimis difficilis est, cum omnes minimas venarum & arteriarum productiones ne Lynceis quidem oculis quisquam videre aut invenire possit. Si solum caudices spectemus, tunc venarum numerum cum arteriis æqualem statuemus. Nam sicut arteriæ tres sunt, **Aspera**, **Pulmonaris**, & **Aorta**: sic etiam venæ tres sunt, **Vena Portæ**, **Cava**, & **Pulmonaria**: quibus si adiacere velimus venam umbilicalem, tunc etiam Arteriæ umbilicales addendæ erunt numero arteriarum: Verum, sicut hæ sunt productiones arteriarum iliacarum, sic illa est venæ portæ productio.

Numerus.

Venam è semine principium materiale habere, nemo dubitat. Sed anne primam originemumat ab hepate, per venam cavam & portæ, an verò à corde procedat, acriter apud varios, cum veteres, tum neotericos, disputatur. Plerique tamen eas ab hepate oriri censuerunt: atque hinc Spigelius, lib. 8. anat. cap. 12. sic inquit: *Vena ita ipsius parenchymati permixta sunt, ut vix quisquam Anatomicorum hætenus fuerit, quin sibi persuaserit, eas ideo ab hepate enasci.* Verum hac de re litis ferram diu reciprocare, omniumque rationes ultro citroque examinare, non videtur operæ pretium, cum omnes hujusmodi disputatores à scopo aberrare videantur. Nam pars aliqua ab alia oriri dicitur tripliciter, scilicet, ratione aut *generationis*, aut *radicationis*, aut *distributionis*: atqui nullius ratione potest dici quod vena oriatur ab alia parte. Nam

Origine.

ratione



*ratione generationis*, cum in principio cor, jecur, venæ, aliæque solidæ partes omnes ex semine simul delineentur & formentur, una ante aliam, nec una ab alia. Non etiam *ratione radicationis*, cum vena nullas habeat veras radices, succum alimentarium ex rebus à corpore humano alienis ad nutritionem partium advehentes (sicut illa actio procedit in herbis & arboribus, quæ per radices ex terra sua alimenta assumunt) & illi ejus fines qui ab aliqua similitudine radices vulgò appellantur, non sunt veræ radices, sed tantum principia per quæ sanguis à nutritione partium residuus, & per longum circuitum magna spirituositatis parte exutus, sicque ad nutritionem inutilior factus, reducit ad suum fontem cor, ut in eo denuo excoctus, pristinam integritatem recuperet. Nec denique *ratione distributionis*, cum per venam ejusque productiones sanguis non distribuatur aliis partibus (ut olim malè putatum fuit) sed ab omnibus aliis partibus assumptus ad unum cor feratur. Ex quibus satis patet, quod vena à nulla alia parte oriatur. Nam ab hepate non magis oritur, quam rivulus aquam ad flumen ducens oritur a flumine. A corde non magis oritur quam tubus plumbeus aquam pluviam à tecto domus recipiens, oritur à tecto ei continuo, aut à cisterna in quam aquam istam defert. Ex continuitate cum hepate aut corde nihil certi concluditur, cum eadem illa continuitas sit in prædicto rivulo & tubo, quorum tamen neque ille à flumine, neque hic à tecto aut cisterna oritur. Fortè melius quis originem deducet à partium substantia, utpote ex qua per minimas radices assurgit, & tandem in caudicem, scilicet venam cavam, excrefcit, sicut arbor: atque etiam sanguinem ex ipsis partibus, arteriisque in iis contentis, assumit, & ad caudicem vehit; sicut arbor sua radice succum è terra assumit, & ad caudicem defert. Verum ex antedictis patet, quod neque hujus originis deductio valeat, & objectionibus carere possit, nec ulla valere queat: quia venæ sunt partes per se subsistentes, simul cum aliis spermaticis è semine delineatæ, quæ non magis originem quærunt ab aliis partibus, quam cor, hepar, cerebrum, &c. quarum origo à nullis aliis peti potest. Atque hinc bene dicit Hippocrates, *lib. de offib. vena*, inquit, *per corpus diffusa* (intelligit simul etiam arterias) *spiritum, & fluxum, & motum exhibent, ab una multa ge-*

*minantes, atque hac una unde oriatur, ubi desinat, non scio; circulo enim facto principium non invenitur.* Frivolum igitur est, de re inutili multas, ut multi fecerunt, commaculare chartas, plurimisque corrahis argumentis & rationibus hanc illamve sententiam, nullis fundamentis innitentem amplecti & defendere velle, Quibus vero argumentis Aristoteles a corde, & Galenus ab hepate, originem venæ probare nitantur, longo sermone describit, eorumque rationes examinat Spigelius, *lib. 5. anat. cap. 3.*

Interea tamen, sicut rivuli aquam è fontibus & montibus primi excipientes & ad flumen deferentes, non oriuntur à fluminis alveo, sed sunt principia quæ aquam prima recipiunt, & ex quibus concurrentibus tandem flumen ipsis continuum conflatur: ita etiam minimæ venæ dici non possunt oriri à magnis, aut à visceribus his annexis, sed esse principia sanguinem primo haurientia, & ad majores venas, visceraque his continua, deferentia: secus quam contingit in arteriis & nervis, in quibus à primariis visceribus ad majora vasa, atque ex his ad minora fit sanguinis spirituumque progressus. Ac proinde, sicut horum descriptio necessario à majoribus vasis & visceribus primariis, corde scilicet & cerebro, tanquam principiis, ad minores & minimos finales ramulos est deducenda: sic etiam in venis ab earum principiis, minimis scilicet capillaribus venulis (has non ratione generationis, cum majores primæ sint genitæ, sed ratione officii, principia & primas origines appello) descriptionem incipiendam esse censeo, quin à id maxime necessarium duco, ut quomodo, unde, & quo sanguis secundo flumine per eas feratur, melius doceri, & facilius addisci possit. Hac de causa nos, contra hætenus vulgatam methodum, historiam venarum à minimis radicibus (has Glissonius mavult appellare *Scaturigines*) & principiis deducemus paulatim ad caudicem, scilicet venam cavam; non verò progrediemur a cava ad radices, ut hætenus ab omnibus Anatomicis, nullo, quod scio, excepto, factum fuit.

Quia autem de vena umbilicali satis suprà dictum, *lib. 1. cap. 32.* & de vena pulmonaria, *lib. 2. cap. 9. & 13.* hoc libro describenda solummodo erit historia venarum, tum portæ & cavæ, tum omnium minorum in hos alveos se exonerantium.

## CAPUT II.

## De vena Porta, &amp; venis ei unitis.

Vena Porta.



Ortus.

Avam hepatis partem inter duas eminentias, *πύλας* id est, portas Hippocrati nominatas, ingreditur vena portæ, trunco lato, sed brevi, sub intestino duodeno sito.

De ortu seu principio hujus venæ aliquod dubium occurrit, dum alii ab hepate, alii à mesenterio ejus principium derivant. Verum hujus dubii facilis est solutio, si dicamus ejus ortum (modò ortus dici debeat) esse in intestinis & mesenterio, quia ab illis partibus per suas radices recipit à nutritione residuum sanguinem, eumque in suum caudicem effusum, per suas ramificationes, in hepatis substantiam expansas, hepati defert, ut in eo bona sui parte in fermentum biliosum convertatur, quemadmodum supra latius hac de re dictum est lib. I. cap. 14. Ne autem sanguis per eam versus hepar delatur relabatur unde venit, hinc cum in radicibus, cum in ramulis, multas valvulas obtinet (nullas tamen in caudice) sanguinis relabentis impetum sustinentes.

In hanc venam portæ plurimæ minores venæ sanguinem, tanquam in alveum, exonerant, inde ad hepar, cui numerosa ramificatione inseritur, deferendum. Quomodo autem ramuli isti cum venæ cavæ & pori bilarii radicibus in hepate misceantur, dictum loco modo citato.

Ingrediuntur autem portæ venam hæ sequentes

Vena umbilicalis.

I. Vena umbilicalis, ab umbilico vel placenta uterina procedens.

Suspensoria.

II. Vena suspensoria, à Fallopio & Eustachio observata, quæ a septo ad eam descendit.

Cystica gemellæ.

III. Cysticæ gemellæ, quæ sunt duæ exiles venulæ a vesica biliaria ad portæ sinistram partem excurrentes.

Gastrica dextra.

IV. Gastrica dextra, quæ ex posteriore ventriculi parte & pyloro prodiens, à dextris truncum portæ, humiliore quam cysticæ loco ingreditur.

Ramus splenicus.

V. Ramus, seu ductus splenicus, qui magnus, & omenti membrana ac glandoso corpore suffultus, à splene transversim ad venam portæ fertur, in ejusque truncum elatiore ac sinistra parte aperitur.

Mesenterica.

VI. Vena mesenterica, quæ priore amplior est, & è mesenterio ad portæ humiliorem dextramque partem procedit.

Verum quia mediantibus duabus hisce venis majoribus, nempe Splenicâ & me-

sentericâ, multarum partium inferiore ventre sitarum sanguis ad portam deferitur, videndum est quænam minores venæ, & unde, ad has majores deveniant.

In ductum splenicum variæ venæ terminantur. Aliæ in gremium ejus principium, inferius & superius, ubi scilicet primo è liene egreditur. Aliæ postquam illa principia coaluerunt in unum ductum.

Vena ad ramum splenicum delata.

In principium ejus inferius aperiuntur hæ.

I. Innumeræ minimæ venulæ per liem dispersæ, & tandem in unum caudicem concurrentes, qui ramo splenico continuus est, eique nomen imponit.

Vene splenicæ.

II. Epiplois sinistra, quæ ab interiore omenti membrana uno atque altero furculo eò prorepat. Hanc tamen non semper inveniri, bene monent Vesalius & Bauhinus.

Epiplois sinistra.

III. Gastroëpiplois sinistra, quæ satis insignis à fundi ventriculi parte sinistra exsiliens, una cum ramulis ab omenti membrana superiore ascendentibus, eodem progreditur.

Gastroëpiplois sinistra.

In superius verò ductus splenici principium descendunt à ventriculo, modò duo, modò tres rami breves, modò plures, frequenter unus, quem Vas venosum breve vocant, quod sæpe calami scriptorii amplitudinem habet.

Vas venosum breve.

Postquam hæc duo principia simul cõe-runt, ductus splenici truncus efficitur, in quem parte superiore descendunt,

I. Gastrica minor, è ventriculi posteriore gibbosa parte.

Gastrica minor.

II. Gastrica major: in hanc è majore parte totius ventriculi, atque ipsius etiam orificii superiore (in quo Coronaria stomachica constituitur) ac nonnunquam inferiore, plurimi rami concurrunt.

Major.

Parte verò inferiore eam ingrediuntur, ab omenti membrana inferiore, eique annexo loco, Epiplois dextra, quæ gracilior, & Epiplois postica, quæ major: nec non ex pancreate Vena pancreæ, inter utramque epiploidem delata.

Epiplois dextra, &amp; postica. Vena pancreæ.

Venam mesentericam, quæ ductum splenicum magnitudine superat, plurimæ minores venæ ingrediuntur, eæque vel in gremium ejus principium, scilicet mesentericam dextram aut sinistram, vel in ejus truncum.

Vene ad mesentericam.

In

*Vena meseraica.*

In Mesentericam dextram, quæ duplex, concurrunt innumera Venæ meseraicæ dictæ, à jeuno, ileo, cæco, & coli intestini parte dextra, inter duas mesenterii membranas ascendentes, plurimis interjectis glandulis, vasa lactea excipientibus, hic illic suffultæ, quas tamen non ingrediuntur. Hæ primo in quatuordecim plerumque ramos cœuntes, tandem in dictam mesentericam terminantur.

*Hæmorrhoidalis interna.*

In Mesentericam sinistram etiam plurimæ venæ meseraicæ desinunt, è sinistra & media mesenterii parte ascendentes: inter quas primaria & insignior est **Hæmorrhoidalis interna**, (externa enim per venam Hypogastricam ad cavam progreditur) quæ principio suo anum tenuibus radicibus orbiculatim amplectitur, hincque sub recto intestino ascendens, a toto colo furculos recipit, usque dum una cum reliquis dictam mesentericam ingrediatur. Hæc tamen in nonnullis corporibus recta ad ramum splenicum excurrere, in eumque aperiri deprehenditur.

In truncum autem mesentericæ, quem dextra & sinistra cœuntes constituunt, ingrediuntur duæ venæ.

*Epiplois dextra altera.*

**I. Epiplois dextra altera**, à ventriculi fundo & omenti membrana superiore oriunda: quæ tamen interdum, sed rarius, sinistram mesentericam post divisionem ingreditur. Hæc in canibus, modò ad intestinalem procedit, modò desideratur, atque tunc sinistra utriusque loco est.

*Intestinalis.*

**II. Intestinalis**, è duodeni medio & jejuni principio, nec non è superiore omento & pancreate prodiens.

*Ufus venæ portæ.]*

Venæ portæ varius usus ante hac à Medicis & Anatomicis assignatus fuit. Per illam enim & venas meseraicas sanguinem pro nutritione intestinorum aliarumque in abdomine contentarum partium defluere, & simul etiam chylum per easdem vias sursum ad hepar ascendere; ejus præterea chyli crassioris fœculentam partem per ductum splenicum ad lienem ferri (ut reliqua purior pars magis nitida hepar ingredi possit) ab eoque excoqui in succum quandam acidum, postea pro famis stimulo per vas venosum breve ad ventriculum deferendum, antiquitus docuerunt, & unanimiter crediderunt. Verum illius doctrinæ errorem nostro seculo, quo sanguinis circufusio singulari Harvei industria innotuit, accuratioribus Anatomicis, jam toties demonstrarunt, ut vix credibile sit quempiam in sectionibus Anatomicis nonnihil versatum, ei diutius inhærere velle, aut posse. Quippe in vivi animalis sectione, per ligaturam vasi venoso brevi injectam, mox ex intumescencia quæ inter ventriculum & ligaturam fit, & detumescencia ab altera parte,

liquet sanguinem à ventriculo profluere ad ductum splenicum, nihil verò à liene aut ductu splenico ad ventriculum. Et similiter ligato ductu splenico, ex intumescencia quæ fit inter ligaturam & splenem, ac detumescencia quæ fit versus venam portæ, satis manifestum est, sanguinem deferri à liene ad portæ truncum, non verò chylum à portæ vena ad lienem.

Quantum ad meseraicas, quod per eas chylus sursum, & sanguis deorsum moveatur, illud omnem fidem superat, & rationi prorsus repugnat: talem enim duorum diversorum humorum motum contrarium in iisdem angustissimis vasis eodem tempore fieri nullo modo posse, vel cæcus videat. Neque hic valet comparatio à nonnullis præclaris Anatomicis adducta (*Sirafura ferri cum paleis in eodem tubo misceantur, & tubi uno fini admoveatur magnes, ille ferrum: altero fini succinum, illud paleas ad se trahet*) quoniam hic non est par ratio, nam duo talia sicca corpora non miscentur & cœunt, sicut duo liquida: neque etiam illis venis meseraicis ad sunt vel adstant duo diversi magnetes, quales illi sibi imaginantur, quorum unus chylum sursum, alter sanguinem deorsum trahit, sed in toto humano corpore fit tantum una simplex sanguinis propulsio à corde.

Alii, re pensius considerata, antiquam sententiam nonnihil immutarunt, & sanguinem ac chylum diversis temporibus has venas permeare tradiderunt; ita ut modò sanguis ab hepate ad intestinorum nutritionem defluat, modò chylus ad hepar ascendat. Verum quia hæc opinio conscientiam quandam, seu pactum aliquod inter sanguinem & chylum concludit ac præsupponit, ut veniente chylo mox sanguis retrocedat, vel se in hepate sistat; aut ut chyli adventum prænosens, ad intestina eo tempore fluere definat, certe indigna videtur omni refutatione.

Alii voluerunt solum chylum per has venas ad hepar ascendere, sed illas propriam facultatem habere, chylum rubro colore tingendi. Verum neque hæc opinio subsistere potest, cum nullis venis humores ullos tingendi facultas insit: cum etiam sanguini à nutritione intestinorum residuo nullus reditus ad cor supersit, si venæ meseraicæ soli chylo deferendo destinatæ sint.

Plempius has difficultates percipiens, rem aliter explicat, & dicit sanguinem arteriosum à nutritione intestinorum residuum per venas meseraicas refluere ad portam, eique chylum ex intestinis adjungi, vel permisceri. Sed velim nobis demonstret Plempius vias per quas chylus venas illas ingreditur: illæ enim, ut chylum recipiant, necessario debent alicubi in intestinis aperiri; at qua-

*Secunda opinio.*

*Tertia opinio.*

*Quarta opinio.*

re, dum aperiuntur, sanguis, qui tenuior & spirituosior est chylo, per istas aperturas non effluit potius in intestina? quare crassior lacteus chylus ingreditur potius illas aperturas & venas, quam sanguis tenuior egreditur? sanguini tam æquale jus erit per aperta venarum oscula effluendi, quam chylo influendi. Si jam Plempius in illis venis aliquam suctionem vel tractionem statuere velit, illam omnino rejiciendam censemus, utpote quæ nulla datur in nostro corpore, in quo sanguis & chylus moventur per solam impulsionem, ut latius supra probavimus, *lib. 1. cap. 12. & lib. 2. cap. 8.* Si fortè confugere vellet ad pororum seu osculorum vasorum diversitatem, & specificam constitutionem; dicam, per quoscunque poros crassior chylus potest influere, per eisdem tenuior sanguis facilius potest effluere. Præterea, nemo unquam chyli quidquam, imò ne minimam quidem chyli similitudinem, in venis meseraicis observare aut videre potuit, sed chylus albicans semper invenitur in vasis lacteis, aliisque chyloferis, cum in finem, ut chylum veherent, à summo Architecto speciatim conditis.

Quinta opi-  
nio.

His ultimis meis dictis fortè ob stare videbitur Ludovicus de Bils, qui cum Plempio sentiens, & præterea valvulas finibus venarum meseraicarum affingens, sanguinis exitum sustinentes, chylum verò intro admittentes, in epistola quadam Belgica (nam Latinus non est) ad D. Jordaen medicum tunc temporis Dordracenum, 15. May, anno 1658. scripta, tali experimento probare nititur chylum venas meseraicas ingredi, per easque ad hepar deferri. Cani vivo dissecat abdomen: eo facto, arterias & venas meseraicas à se invicem separat, & omnibus arteriis ligaturas injicit, ita ut nullum sanguinem in venas amplius transfundere possint; tunc abdomen rursus confuit, & sic canem per quatuor aut quinque horas in vita conservat, ope alicujus liquoris in os infusi, usque dum cibi ante hanc sectionem dati in chylum sint mutati. Tunc denique rursus aperto abdomine, vasa interiora quærit, & arterias omnino vacuas, sed venas turbulento quodam liquore, coloris obscure cinerei, repletas invenit.

Hoc experimentum omnes Bilsianistæ, tanquam miraculosum, admirantur, idque tanti faciunt, ut obstupescant, si quispiam aliquid contradicere audeat, imò turpissimis acerrimisque contumeliis ac convitiis, viris doctis indignissimis, quoscunque contradictores proscindant: Quantum ad me, ego mordaces eorum contumelias flocci faciens, probationem inde sumptam prorsus invalidam existimo. Nam si rem penitus inspiciamus, comperiemus sanguinis in venis meseraicis contenti, neque colorem, neque

consistentiam, neque quantitatem, unquam docere posse chylum per illas vias transire. Nam sanguis in venis meseraicis contentus, ratione partis per quam decurrit, per se non nihil fœculentior & magis turbidus esse potest, quam sanguis aliarum partium venis contentus, isque in proposito experimento fortè in venis meseraicis pravum aliquem colorem & pejorem consistentiam (si modò in isto cane similiter malè dispositus non fuerit in toto corpore, sicut in nonnullis hominibus scorbuticis, aliave cachexia laborantibus, tam pravum etiam è brachii venis interdum extrahi videmus) nancisci potuit, quia ob injectas ligaturas continuo sanguinis arteriosi affluxu non fuerat refocillatus: sed hinc tamen propterea non sequitur illam decolorationem & fœculentiam procedere ab admixto chylo. Quod autem venosus sanguis eodem tempore in hominis ejusdem aliis partibus melior & magis floridus, in aliis, fœculentior, pejor, & magis decolor inveniat, clarissime docet & probat fernelius, *lib. 4. pathol. cap. 6.* cujus doctrinam evidenter confirmat experientia, nam præterquam quod sæpe ex eadem brachii incisa vena effluens prior sanguis longe fœculentior magisque decolor sit quam postremus; etiam frequenter usu venit, ut ex brachio floridus & bonus, contra è pede fœculentus, lividus, aliove pravo colore tinctus extrahatur, cum tamen nemo mente sanus facile dixerit ullum chylum ad pedem pervenire, cujus admistione sanguinis color & consistentia magis in pede mutantur, quam in aliarum partium venis. Fit autem hoc ob pravam constitutionem, aut specificam temperiem ipsius pedis. Hic etiam ratione specificæ temperiei ipsius mesenterii, potest sanguis per eum transiens forte in isto transitu aliquanto fœculentior & decolorior fieri (sicut aqua per fœculentum canalem fluens aliquam fœculentiam & pravi coloris tincturam contrahit) quam ille qui per partes carnosas, bene temperatas, minusque fœculentas transit: sed manifestum satis est, illi hoc non contingere à chyli admistione, sed à propria istarum partium substantia & fœculentia: quæ fœculentia, & aliqualis, si fortè adsit, decoloratio rursus evanescit, cum hepatis vi excoctus fermentaceam qualitatem acquirit, & à corde rursus dilatatur. Atque hæc causa esse potest, quod in vena portæ & meseraicis ramis, nonnunquam crassior vel impurior sanguis reperiatur, quam in cava, aliisque venis. Dico, *nonnunquam*, quia plerumque non differt quidquam ab aliarum partium, aliorumve sanguiferorum vasorum sanguine. Nos enim non semel in brutis sanguinem è meseraicis collegimus,

mus, etiam eo tempore quo omnes lactei ductus à chylo succo turgabant, eumque cum aliarum venarum sanguine contulimus, sed nullum manifestum discrimen in colore, substantia, aut coagulatione animadvertere potuimus. Illud ipsum etiam observavit oculatissimus Nicolaus Stenonis, qui in *respons. ad vindicias hep. red.* ita scribit. *feci, inquit, experimentum in amicorum praesentia, observavi praescriptam à Bilso methodum, ligavi arterias, detinui in vivis canem, primum per tres, alterum per quatuor, horas, qui vel integrum diem ita vixisset, consutum dein ventrem iterum dissolvi: seorsim eductum ex porta, & aorta sanguinem aeri exposui (unumquemque peculiaribus vasculis contentum) sed aque cito concredebant, splendebant aque, atque nigricabant.* Frivolum itaque omnino est, quod Clemens Nilœ, Medicus Daventriensis, in suo Belgico libello de fermentatione, cap. 6. dicit, sanguinem sub porta ex meseraicarum aliqua vena eductum alter coagulari, quam aliarum venarum sanguinem, imò in vitream duritiem concrelescere: quasi vero.

Porro, quod Lud. de Bils scribit, se in ultimo tentamine venas meseraicas repletas invenisse, nihil miror: quid enim sanguinem ex iis ulterius propulisset, cum arteriae meseraicae omnes essent ligatae? In venae sectione brachii, si ligatura nimis stricta injiciatur, quae arterias comprimendo occludat, tunc etiam ex vulnuscule venae inflicta, nullum sanguinem effluere, sed cum in venis subsistere, quotidiana docet experientia: quippe desinente impulsione per arterias, etiam desinit sanguis profluere per venas.

Ut autem Lud. de Bils, cum suis, melius persuadeat, chyli maximam partem ingredi venas meseraicas, dicit, has circa intestina superare sua amplitudine ac capacitatem lacteas, faciliusque chylum admittere. Quod tamen praeter autopsiam asserit, cum accurate utraque vasa inspicientibus, clarissime conspicuum fiat vasorum lacteorum non minorem esse amplitudinem ad insertionem in intestina, quam meseraicarum: illaque chylo turgida prope intestina non minus manifeste conspici, quam haec sanguine repleta: quamvis exhaustis & inanitis lacteis (lacteus enim succus non semper praesto est, sicut sanguis) meseraicae venae melius appareant, propter rubicundum & facile transparentem contentum sanguinem. Ita ut nos amplitudinis aequalitatem esse putemus in extremitatibus vasorum lacteorum & venarum meseraicarum, neque ex maiore harum quam illarum amplitudine ullo solido fundamento probari posse, chylum magis haec, quam

illa vascula subingredi. Imò Jacobus Henricus Pauli, Professor Hassniensis, in *anatomie anatomia Bilsi cap. 4. & in respons. ad epist. Wepseri*, scribit se observasse, ad insertionem in intestina maiorem esse amplitudinem vasorum lacteorum, quam venarum meseraicarum; & vasa lactea recta transire intestinorum tunicas, ac versus interiora eorum hiare, imò compressa chylum effundere: meseraicas vero compressas non effundere sanguinem, nisi abrasa interiore intestini tunica. Verum & si haec maxime verosimilia sint, tamen nonnullorum tanta fuit curiositas, ut his non satis contenti, hoc sequens experimentum commenti sint, quo omne, quod hac de re superesse posset, dubium penitus sustulerunt. Sumunt intestinum jejunum cum parte illi, & mesenterii ei annexi, recentem ex animali evulsum, idque utraque extremitate fortiter ligant, postquam ante ligaturae occlusionem, liquorem atramento tinctum infuderint; & tunc a liquore illo tumidum, intestinum clementer comprimunt, sicque comperti sunt, nihil istius nigri liquoris venas meseraicas subire, sed multum vascula lactea ingredi. Plura alia, quae probant chylum non ingredi venas meseraicas, sed per sola lactea vasa transire, videantur supra, lib. I. cap. 11. & 12.

Haec omnia jam commemorata praedictas opiniones satis convellunt. Jam denique verus Venae portae usus inquirendus est: qui triplex est.

I. In foetu utero concluso sanguinem, vel (ut alii volunt) succum alimentarium sanguineum e placenta uterina per venam umbilicalem recipere, & hepatis aut venae cavae tradere.

II. Sanguinem qui per arterias ad intestina aliaque varia abdominis viscera impellitur, à nutritione residuum, & per meseraicas aliasque minores venas eo delatum, ad hepar & venam cavam vehere.

III. Sanguinem arteriosum in liene specifico modo excoctum, & subacidula fermentacea qualitate donatum, eodem deferre.

Utu igitur non differt Vena portae à Vena cava, aliisque cavae productionibus: omnes enim totius corporis venae sanguinem ad cor reducant, quem arteriae à corde abduxerunt: ac proinde etiam non differunt venae substantia, sicut id visu satis conspicuum est: ita ut omnino frivola censenda sit, illa tanta substantiae differentia, qualis à Bauhino, aliisque nonnullis traditur: sola tunicae crassitie nonnihil à cava differre, eamque paulo tenuiorem (addit Spigelius, etiam colorem magis fuscum, & minus candidum, maioremque molliem) obtinere videtur.

Vena portae  
verus usus.

## CAPUT III.

## De Vena.cava, &amp; venis ei supra diaphragma unitis.



Ena cava, ab insigni cavitare denominata, & Græcis à singulari magnitudine  $\phi\lambda\epsilon\psi\mu\epsilon\gamma\alpha\lambda\eta$ , vena magna, & nonnunquam  $\mu\epsilon\gamma\acute{\iota}\sigma\tau\eta$ , maxima, appellata, omnium totius corporis venarum amplissima est, & quasi fluvius, seu alveus, in quem omnes corporis sanguiferæ venæ, exceptâ pulmonariâ, tanquam rivuli, sanguinem exonerant.

Situs.

Sita est secundum spinæ dorsii longitudinem, ab osse sacro usque ad jugulum, sicque per medium & infimum ventrem recto ductu fertur, atque in illo cordi, in hoc hepati immediatè connectitur.

Hanc venam plurimæ venæ ingrediuntur, aliæ supra, aliæ infra diaphragma.

Phrenica.

Supra diaphragma ei uniuntur hæ.

**I. Phrenica, seu Diaphragmatica,** utrimque una, cujus radices diaphragmati, pericardio, & mediastino inhærent. Huic in introitu in cavam nonnulli valvulam adstare tradunt, sanguinis è cava relapsum impediens, quales valvulas plerisque venis in cavam hiantibus præponi verosimile est.

Pneumonica.

**II. Pneumonica,** quæ ex pulmone prodiens, non procul à phrenica, in truncum aperitur. Hæc, ob tenuitatem, non facile invenitur, sed tamen observata & descripta fuit à Sammichelio, Novocomensi anatomico, quem citant Aquapendens, Costæus, & Mongius.

Coronaria cordis.

**III. Coronaria cordis,** interdum gemina, in quam multæ minores venæ à mucrone ad basin cordis ascendentes, eamque coronæ instar cingentes, concurrunt. Ad hujus in cavam ingressum valvulam, instar dimidiatæ Lunulæ, primus observavit Bartholomeus Eustachius. Hanc Bauhinus clarius explicare volens, dicit ita sitam esse ut sanguinis fluxum à corde ad cavam impediat: quæ in parte totus errat, nam etsi hæc valvula inventu & demonstratu difficilis sit, necessario tamen ita sita esse debet, ut impediat influxum sanguinis è cava in coronariam, non verò contra, sicut voluit Bauhinus.

Azygos.

**IV. Vena sine pari, seu  $\alpha\zeta\upsilon\gamma\omicron\varsigma$ ,** quæ ita nominatur quod in homine una tantum sit, nec in opposito latere conjugem habeat. Fallopius tamen & Bauhinus, aliquando in homine observarunt alteram similem venam ei oppositam, in sinistram subclaviæ ramura, & nonnunquam in ip-

sam cavam à sinistris insertam, circa regionem tertiæ thoracis vertebræ, quæ  $\alpha\zeta\upsilon\gamma\omicron\varsigma$  munere fungebatur, & ab intercostalibus aliquot spatiis sanguinem recipiebat, ac deinde circa sextam septimamve thoracis vertebram cum  $\alpha\zeta\upsilon\gamma\omicron\varsigma$  radicibus uniebatur. Hoc tamen in homine rarò contingit, sed Bauhinus dicit familiare esse in capris, suibus, multisque ruminantibus, utpote in quibus vena hæc plerumque gemina est, una dextri, altera sinistri lateris. Riolanus, *animadvers. in Bauhin.* hanc secundam venam irridet, & si forte reperitur, id præter naturam esse dicit: sed ita omnia præter naturam forent, quæ vel rarò inveniuntur, vel Riolanus non vidit.

In homine vena  $\alpha\zeta\upsilon\gamma\omicron\varsigma$  cavam ingreditur circa quartam & quintam thoracis vertebram, paulum supra cor, posteriore dextraque parte: at in ovibus multisque aliis brutis eam sæpe à sinistris subit.

Sanguinem recipit à venis intercostalibus decem inferiorum costarum (rarissimè etiam superiorum) intervalla occupantibus; interdum quoque à mediastino, vertebris, œsophago, musculis intercostalibus & abdominis, aliisque nonnullis partibus, è quibus ramuli ad eam ascendunt. Sæpe etiam ramus ab emulgente sinistra (licet Riolanus, *animadvers. in Laurent.* id, contra experientiam, neget) & nonnunquam alter ramus à cavæ tronco supra emulgentem dextram, rarò ex emulgente, sursum ascendens, & diaphragma transiens, supra spinam unitur cum radicibus venæ  $\alpha\zeta\upsilon\gamma\omicron\varsigma$ , atque tunc non tantum per caudicem  $\alpha\zeta\upsilon\gamma\omicron\varsigma$ , verum etiam per has vias sanguis ex intercostalibus spatiis, vicinisque partibus ad cavam defluit. Mediante autem hac viarum communione, pus in empyicis è thoracis capacitate per urinarios ductus interdum, & quidem facile expurgari, tanquam certissimum statuit Aquapendens (cujus hac de re opinionem multi præclari Medici probant) non considerans illam evacuationem per has vias nullo modo procedere posse. *Primo*, quia dictæ venæ in thorace membrana pleura obductæ, pus illud nullo modo recipere possunt. *Secundo*, quia ut illud reciperent, necessario deberent aperiri: per apertas autem facile quidem sanguis fluidus in thoracis cavitatem efflueret, sed difficulter pus crassum influeret in harum venarum angustias. *Tertio*, quia obstant valvulæ, impediens cujusvis liquoris è thorace versus renes

An pus è thorace per has vias fluat ad renes?

renes effluxum. Nam in radice venæ azygos multoties tres valvulæ inveniuntur, una ad introitum in cavam, duæ in medio caudice, quibus sanguinis influxus è cava in azygon impeditur, egressus verò ex azygo in cavam liber conceditur. Bauhinus scribit se has valvulas nec in hominibus, nec in brutis, unquam observasse. Riolanus è contra asserit se illas in omnibus cadaveribus demonstrasse. Sed uterque nimis absolute seu generaliter loqui videtur, nam ego multoties, cum publice, tum privatim, has valvulas diligenter quæsi, tam in hominibus, quam in brutis, sed comperi illas in multis adesse omnes, in nonnullis unam tantum ad cavæ ingressum adstare, in quibusdam nullas inveniri, atque hinc

perpetuam regulam de iis statui non posse.

V. *Intercostalis superior*, utrimque una, quæ tamen sæpe ramum subclavium, juxta jugularium venarum initia, ingreditur: nonnunquam dextra cavæ trunco, sinistra subclavio ramo inferitur: sed utrobique valvula, relapsum sanguinis impediens, ad ingressum præmunitur. Hujus radices ex tribus quatuorve superiorum costarum intervallis exsurgunt, & non raro cum mammariis radicibus, per cartilagineas repentibus, miscentur. Contingit interdum ex omnibus costarum spatiis venas ad azygon ferri, atque tunc hæc intercostalis superior deest.

VI. Subclaviæ duæ, de quibus dicitur *subclaviæ*: sequente capite.

## CAPUT IV.

## De Subclaviis, &amp; Capitis venis.



Enæ Subclaviæ duæ, dextra & sinistra, trunci cavæ supermatem ingrediuntur, & quo usque intra thoracem subsistunt Subclaviæ; thoracis verò cavitatem egressæ, Axillares nominantur.

Ad has subclavias sanguinem deferunt multæ minores venæ, quarum aliæ in eas aperiuntur parte inferiore, aliæ parte superiore.

Parte inferiore utramque subclaviam ingrediuntur venæ quinque.

*Intercostalis superior.*

I. *Intercostalis superior*, à trium costarum superiorum intervallis exsurgens. Hæc tamen, ut præcedente capite dictum, sæpe etiam cavæ truncum ingreditur.

*Mammaria.*

II. *Mammaria*, quæ tamen non semper subclaviæ, sed quandoque cavæ trunco inferitur. Hujus radices sunt internæ, & externæ. Internæ à cartilagineis costarum extremitatibus, earumque intercostalibus spatiis, nec non à mammarum glandulis emergunt. Externæ à rectis abdominis musculis (sub quibus cum epigastricæ radicibus per anastomosim cõire, ante hac ab Anatomicis male traditum est) mammarum glandulis, cute, & pectori insertis musculis, assurgunt.

*Mediastina.*

III. *Mediastina*, quæ à mediastino, pericardio (in quo capsularem cordis constituit) & glandula thymo (in qua thymica dicitur) sanguinem defert: Hæc tamen non semper subclaviam, sed nonnunquam cavæ truncum ingreditur.

*Cervicalis.*

IV. *Cervicalis*, quæ partim tenellis radicibus, lateralia vertebrarum foramina transeuntibus, medullæ cervicis, vel

potius ei circumjectis membranis; partim musculis proxime vertebis incumbentibus, inhæret.

V. *Muscula inferior*, quæ ex musculis pectoris superioribus, & colli inferioribus procedit. Hæc aliquando in jugularem externam aperitur.

*Muscula inferior.*

Parte superiore Subclavias ingrediuntur venæ tres.

I. *Muscula superior*, è cute, musculisque cervicis originem ducens.

*Muscula superior.*

II. & III. *Jugularis externa & interna*, quorum introitum modò una tenuis valvula occludit, modò binæ adstant, desuper in subclaviam spectantes, & sanguinis è subclavia adscensum ad superiora impediens. Riolanus tamen, *animadvertens*, in Bartholin. externam valvula carere refert, & valvulæ in interna se primum inventorem gloriatur. Verum nulla ratio est quare externa magis careret valvula, quam interna, cum sanguinis è subclavia refluxus non minus in illam, quam in hanc impediri debuerit.

*Jugulares.*

Hæ jugulares in colli lateribus sitæ, & partibus vicinis adnexæ sunt. Descendunt autem à capite, in easque totius capitis sanguis à nutritione residuus, per plurimas minores venas & duræ meningis sinus, delabitur: variæ enim venæ in utramque jugularem aperiuntur, multis valvulis, sanguinis descendens recursus impediens; hic illic donatæ.

Jugularis externa duas admittit venas, quarum exterior radicibus suis inhæret cutaneis partibus capitis, faciei, verticis, temporum, occipitis, buccarum, narium, vicinisque musculis, & maxillarum ossibus:



Vena frontis.

Vena puppis.

Ranaria.

imò ab ipsis meningibus per futuras tenues fibrillas recipit. In hanc se quoque exonerat **Vena frontis** in fronte sita, & genita ex concursu venarum utriusque lateris: nec non **Vena puppis**, in occipite sita: quarum illius in anterioris, hujus verò in posterioris capitis affectibus, sectionem nonnulli extollunt. Interioris verò radices implantantur partim ori, scilicet musculis faucium, laryngis, hyoidis, palato, & linguæ, sub qua Ranarias, seu Hypoglotides, in faucium inflammatione secari solitas, constituunt. Partim interiori membranae nasi. Aliquæ etiam exiles venulae

à falce, per ossis temporum foramen, hoc procedunt.

Jugularis interna utrimque per foramina cranii duas recipit venas: quarum prior, quæ major, sinus crassæ meningis, lambdoidali futuræ substrati, productio, & cum hac vena continuatio est, quæ per foramen ossis occipitis, sexto nervorum pari extulptum, transit, radicem è medulla spinæ ascendente admittens. Altera, quæ minor, partim è crassa meninge prodians, transit per foramina secundo, tertio, & quarto nervorum pari concessa: partim ab auditus organo procedit, per ossis temporum foramen quintum.

## CAPUT V.

## De Axillaribus, &amp; brachii venis.



Um venis subclaviis continuæ eademque sunt **Venæ Axillares**, quippe à loci tantum seu situs diversitate nominum mutatio procedit: nam una eademque vena, qua parte sub claviculis consistit *Subclavia*; qua verò parte à claviculis ad axillas extenditur, *Axillaris* dicitur. Quænam venæ ad partem anteriorem, seu subclaviam, à lateribus accedant, modò dictum: quænam autem ad axillarem excurrant, nunc inquirendum.

Ad venam axillarem utriusque lateris, qua parte thoracem jam jam egreditur, accedunt duæ minores venæ, **Scapularis interna, & externa**, quarum illa è musculis scapulæ cavitatem occupantibus, hæc è scapulas tegentibus musculis procedit.

At paulo ulterius, ad ipsum principium axillaris, duæ venæ majores cum ea continuantur, quæ totius brachii venosum sanguinem in axillarem effundunt, quarum superior *Cephalica*, inferior *Basilica* nominatur.

Cephalica.

**Vena Cephalica** (quæ & *Humeralia*, & *Cubiti exterior* appellatur) nomen ex eo adepta videtur, quod olim Medici, in rebus anatomicis minus versati, eam recto ductu à capite ad brachium descendere, sanguinemque ex eo huc deferre, existimaverint, atque hinc in capitis affectibus illam potius quam ullam aliam brachii venam secandam esse putaverint (qui antiquus error etiam hodie quorundam imperitorum animos obsedit) cum tamen è contrario hæc vena ex brachio ascendat ad axillarem, nec à capite quidquam recipiat, nec ad illud quidquam deferat, sed duntaxat sanguinem ab inferiore manu as-

cendentem per axillarem in venam cavam effundat.

Hæc autem cephalica superiore loco axillarem ingreditur (rarò ad jugularem externam ramulo excurrit) scilicet in corpore humano, nam in multis quadrupedibus jugulari externæ insinuat.

Recipit sanguinem è manu & vicinis brachii partibus, quibus radices ejus implantatæ sunt. Ab externa quippe manus sede (postquam inter annularem & minimum digitum **Salvatella**, sive **Sucle Ararum** constituta est) plurimi rami affurgunt, circa cubitum in hanc cephalicam concurrentes, quæ à cubito superficietenus inter membranam carnosam & musculorum tunicam ad humerum ascendit, in via undique tenues venulas à brachii ac humeri musculis recipiens, & unam atque alteram paulo majorem à brachii musculo deltoide.

Salvatella.

**Vena Basilica**, quæ inferior & interior axillarem subit, cephalicam magnitudine superat, & in dextro brachio *Hepatica*, in sinistro *Lienaris* vulgò appellatur, quod olim rudiores Medici illam in hepatis, hanc in lienis affectibus (tanquam ex illis visceribus oriundam) secandam judicaverint.

Basilica.

Sanguinem recipit basilica à partibus inferioribus & adjacentibus. Ex singulis digitis duo, ex cute verò manus, tam exterius, quam interius, plurimi rami succrescunt, qui primo in quatuor, & hi rursus circa cubiti articulum in duas venas cœunt, quarum una profunda in alto latitat, altera subcutanea est. Hæ à flexura cubiti ambæ sursum ascendunt: profunda secundum os radii & cubiti; altera secundum exteriora: utraque autem à partibus adjacentibus

tibus, tam exterioribus, quam interioribus, varios ramulos admittit. Ubi vero ad humerum pervenerunt, simul cōeunt in unam venam, in quam, præter humeri & thoracis cutaneas, se insinuant duæ venæ.

Thoracica  
superior.

I. Thoracica superior, quæ ex cute, musculi pectoralis interna parte, & manu emergit.

Inferior.

II. Thoracica inferior, musculo latissimo & toto thoracis lateri radicibus inherens, quam varii tradunt cum osculis trium quatuorve radicum intercostalium venæ azygos cōire.

Mediana.

A basilica & cephalica conflatur alia tertia vena, qua à medio brachii situ, vel potius quod inter dictas venas media sit, Medianam vocant, alii etiam Venam communem nominant: quia ex cephalica & basilica paulo infra flexuram, vel in flexura cubiti, mediante brevi hac vena concurrentibus, constructur. Hæc gemina est, una exterior, sub cute conspicua; altera profunda, quarum utraque plurimis radicibus

manui & digitis, nec non musculis membrisque manus & cubiti implantatur.

Ip manu autem omnium radicum minimarumque venarum divaricationes exactissime describere difficillimum foret, etsi nonnulli, sed frustraneo conatu, hanc rem perfectissime absolvere tentaverint. Tam confusa enim est venarum manum & cubiti implicantium divisio, & tam frequens conjunctio, atque intermixtio, ut læpenumero an venæ ab hac, an vero ab illa radice procedant, distingui vix possit. Ad hæc, tam varia etiam est earum distributio, ut inter viginti humana corpora vix duo invenias, in quibus venæ illæ æquali modo in ramos dirimuntur; imò in eodem homine multoties alia dextræ, alia sinistræ distributio est. Itaque huiusmodi dubias, varias, & incertas venarum manus inquisitiones iis relinquemus, quibus ad res parvi momenti investigandas satis otii & patientiæ superest. Quod de manu dico, illud ipsum etiam de pede intelligi volo, utpote in quo non minor varietas occurrit.

## CAPUT VI.

### De Vena cava parte infra diaphragma, & venis in eam se exonerantibus.

**S**icut omnes partes supra diaphragma sitæ sanguinem à nutritione reliquum per minores venas ad magnum alveum, scilicet Venam cavam, transmittunt, ita etiam faciunt partes omnes diaphragmate inferiores: ab his enim variae multæque venæ ad illam accedunt.

Vena hepatis.

I. Per latum orificium, quo hepatis cohaeret, innumerae venulae ex hepate in cavam se exonerant: quibus maximam cum ramis venæ portæ communionem esse, vulgo traditur, qua de re latius actum lib. 3. cap. 14. Riolanus meminit valvulae, quæ intra truncum cavæ hepatis adstat, ita posita, ut sanguis ex hepate in cavam, non verò ex cava in hepar fluere possit: hanc à Carolo Stephano & Sylvio inventam fuisse, & in bobus certo inveniri tradit, sed an in homine reperiatur, nescit.

Adiposa.

II. Adiposa, sinistra & dextra. Sinistra ex membrana renis exteriori, ejusque adipe, & glandula ei imposita, nec non ex diaphragmate (in quo cum diaphragmaticis misceri dicitur) radicitus procedens, trunci cavæ sinistro lateri, paulo infra emulgentem, inseritur. Dextra ex iisdem partibus egressa, raro immediate truncum cavæ, sed plerumque elatiorem

mediamque ductus emulgentis partem accedit. Raro autem utraque emulgentem, & multo rarius cavam ingreditur.

Emulgentis.

III. Emulgens, satis ampla, sed brevis, eaque dextra & sinistra. Hæ singulae sui lateris reni capillaribus radicibus inherant, quæ tandem circa renis mediam & concavam partem concurrentes, ex illo erumpunt, modo uno, modo duobus tribusve, raro quatuor vel quinque ramis, paulo post exitum in unum ductum latum & brevem concurrentibus, qui nonnihil oblique descendens, in cavæ truncum lato orificio aperitur, sinister paulo altiore loco quam dexter. Orificio autem emulgentis in cavam hianti adstat valvula insignis, ab inferiore orificii parte sursum spectans, & illud contegens, sicque liberum sanguinis è rene in cavam influxum concedens, ejusdemque per cavam versus cor ascendentis illapsus in emulgentem impediens.

Interdum Natura in emulgentium numero ludit, & licet plerumque a singulis renibus una, nonnunquam tamen, sed rarius, duæ, modo singulae seorsum, modo in media via simul in unam concurrentes, ad cavam procedunt: interdum ab uno rene una, ab altero duæ emergunt.

Qq q 2

Non-

Nonnunquam ad emulgentem ramus ex thorace deorsum descendit, qui in hoc cum radicibus venæ azygos misceri, & hic illic, coïre creditur. Interdum etiam à lumbis & medulla spinali ramus in emulgentem delabitur. Haud rarò à glandula succenturiata ramulus eò protenditur. Sæpe etiam ramuli quidam à vicinis partibus in eam aperiuntur & hiant. Quippe natura in his sæpe varia est.

*Spermatica.*

**IV. Spermatica**, seu **Seminalis** utrimque una, dextra nempe & sinistra. Riolanus scribit, se nonnunquam in Libidinosis ob adulterium strangulatis geminas, præcipue in dextro latere, invenisse; sed nulla certè ratio est; quod propterea potuerint fuisse magis libidinosi; ac proinde illius inventionis fides, & assertionis probatio, penes ipsum esto Riolanum.

Dextra in ipsius trunci eminentiorem sedem, infra ejusdem lateris emulgentem, ingreditur, rarò emulgentem accedit; quod tamen à Galeno & Vesalio semel atque iterum observatum fuit. Ad ingressum in cavam crassiusculo prominet tuberculo, quod à valvula sanguine ascendente distenta, cavam versus spectante, excitari, haud sine ratione, putat Riolanus. Hæc valvula, propter parvitatem & summam tenuitatem ægerime demonstrari posset, eam tamen adesse ratio magnopere suadere videtur, cum necessariò ibi aliquod obstaculum requiratur, delapsum sanguinis è cava in spermaticam impediens: & sic etiam omnino vero simile est eundem in finem omnibus venis, (exceptis iliaceis & subclaviis, quarum valvulæ remotiores sunt) in cavam hiantibus, mox ad ingressum valvulam aliquam adstare.

Sinistra mediam fere emulgentem sinistram parte inferiore subit, valvulâ ad orificium præmunitâ. Ab hac nonnunquam alius ramus ad truncum cavæ emittitur.

Verum Natura in venis spermaticis sæpe ludit, & circa earum finem varia est; utpote qui finis nonnunquam utrimque ca-

vam; interdum utrimque emulgentem; subinde dexter emulgentem, & sinister cavam; rarius bifido sine utrimque cavam & emulgentem accedit.

Oriuntur hæ venæ viris extrâ abdomen ex ipsis testibus & corpore varicoso, è quibus sanguinem à nutritione istarum partium & seminis generatione residuum ad communem alveum, venam cavam, versus superiora referunt. In mulieribus vero intra abdomen, partim ab uteri fundo & vicinis membranis, innumeris capillaribus radicibus excunt; partim è testibus assurgunt: præterea adhuc tres quatuorve radices à spinali medulla huc extendi, à nonnullis observatum.

**V. Lumbares**, duæ, tres, vel quatuor, quæ posteriore sede vertebrae spectante truncum cavæ subeunt, ita ut non nisi elevatâ cavâ ingressus earum conspici queat. Procedunt è musculis lumbaribus, & spinali medulla inter quatuor lumborum vertebrae per foramina nervis utrimque exsculpta: & eminus recipiunt utrimque unum ramulum medullæ involucris irradiatum, & secundum ejusdem longitudinem per istas meninges eam investientes descendentes: hanc in suo exordio cum radicis jugularis ascendentes principio, ei proxime vicino, per anastomosis conjungi, putat Riolanus, qui tamen congressus mihi non videtur verosimilis.

**VI. Iliacæ** duæ, venæ amplæ, quæ circa quintam lumborum vertebrae & ossis sacri principium trunci cavæ finem subeunt, ita ut cava, his, tanquam duobus cruribus insistere videatur. Paulo supra ingressum in inferiorem ventrem, antequam cum cava uniuntur, lata valvula sursum spectante præmuniuntur, quæ ascendentes sanguinem transmittit, sed descendentes remoratur: Hæ iliacæ omnium inferiorum partium sanguinem, è minoribus subjectis venis ad eas delatum, cavæ infundunt: de quibus venis sequente capite dicendum.

C A-

## CAPUT VII.

## De venis qua in Iliacas aperiuntur.

Muscula superior.



D utramque Iliacam, eo ipso circiter loco quo cavam accedit, pervenit Muscula superior, quæ à peritonæo musculisque, tam lumborum, quam abdominis progreditur. Præterea huc etiam pervenit Sacra, modò simplex modò gemina, quæ è medulla in osse Sacro contenta, vel potius è membranis eam investientibus, per ejusdem ossis foramina huc excurrit.

Sacra.

Iliaca inferior.

Paulo verò inferius iliacam inferiore sede ingreditur vena mediocriter ampla, sed brevis, quæ ab Anatomicis Iliacæ inferioris nomine designari solet. Hanc solum modo duæ minores venæ subeunt.

Muscula media.

I. Exteriore sede Muscula media, quæ suis radicibus inhæret musculis exteriori femoris coxæ sedem occupantibus, nec non natium cuti, partibusque vicinis.

Hypogastrica.

II. Interiori sede Hypogastrica, quæ prior major est, & nonnunquam gemina, ad quam pleræque Hypogastrici venæ feruntur: quippe in eam excurrunt.

I. In viris, à pene & vesica varii ramuli.

II. In mulieribus, rami à vesica, sed plures ab uteri fundo, ejusdemque collo.

Hæmorrhoidales externæ.

III. Hæmorrhoidales externæ,

ab intestino recto, seu ano.

I V. Ramus à partibus foramini ossis pubis inhærentibus, qui decimum femoris musculum & peritonæum perforans; huc pervenit.

Ubi iliacam inferiorem istum ramum admittit; paulum inferiore loco desuper recipit Epigastricam (hæc rarò cruralem ingreditur) radicibus suis utero, cuti inguinum, & musculis epigastrici, præcipue rectis, inhærens. Hujus radicibus sub rectis abdominis musculis, circa umbilicum prope adjacent duæ radices Mammariæ, inde ad mammas ascendentes, quæ tamen per anastomosin cum epigastricis non junguntur. quamvis illud à Fallopio, Laurentio, Sylvio, Bauhino, aliisque Anatomicis scribatur. Hac de re vide, lib. 1. cap. 5. & lib. 6. cap. 3.

Epigastrica.

Paulum infra peritonæum in iliacam aperiuntur duæ venæ.

I. Pudenda, quæ interna, sede, antequam ramus iliacus peritonæum subit, intrat, & in viris è scroto penisque cute, in foeminis verò è sinu muliebri, & pudendi labiis, nymphis, vicinisque partibus affurgit.

Pudenda.

II. Muscula inferior, quæ radicibus suis cuti, & musculis coxendicem occupantibus, vicinisque musculis inhæret.

Muscula inferior.

## CAPUT VIII.

## De Cruralibus, &amp; pedis venis.



Vena cruralis in utroque crure continua eademque est cum Iliacæ, ac pro loci duntaxat seu situs diversitate nomen mutat, quippe ab infimo crure, seu pede assurgens, usque ad inguen Cruralis nomen obtinet: ubi verò in inguine peritonæum subire minatur Iliacæ dicitur, cum tamen sit una eademque continua vena.

Hæc cruralis est magna vena, in eamque totius cruris minores venæ, tanquam rivuli, sanguinem à nutritione residuum exonerant, ad cavam deferendum. In femoris autem plicatura, quo loco nervis & arteriis comitata transit, frequentibus adpositis glandulis fulcitur.

Recipit cruralis, præter multas exiles à vicinis & inferioribus partibus venas insigniores sex. 1. Saphænam. 2. Ischiam mi-

norem. 3. Musculam. 4. Popliteam. 4. Suralem. 6. Ischiam majorem.

Saphæna, seu Malleoli vena, est longissima & insignis, arteria conjuge carens, Infimis radicibus pedi pedisque digitis inhæret, quarum nonnullæ cõeunt in pollice superiore Cephalicam vulgò dictam; hæcque ulterius procedens, & cum aliis in malleolo interno rursus concurrens, Saphænam dictam constituit, in uteri affectibus secari solitam. Quæ hinc inter cutem & panniculum carnosum per cruris interiora ascendens, in media via varias admittit venulas in tibia, femore, & genu, quarum radices cuti, musculis, aliisque vicinis partibus inhærent, atque sic tandem prope inguina cruralem ingreditur.

Saphæna.

Ischias minor, è coxendicis parte anteriore, ejusque loci musculis procedens,

Ischias minor.

9993

exteriore

exteriore sede cruralem, ex opposito sapha-  
nae, accedit.

*Muscula.* Muscula, gemina, exterior, quæ  
minor, à tibiā extendentibus musculis  
secundo & quarto, ac cute emergit. In-  
terior, quæ major & profundior, à genu  
& femoris musculis fere omnibus, impri-  
mis autem à quinto, & tibiā extendenti-  
bus tertio procedit. Hæ duæ à directo sibi  
invicem oppositæ, cruralem intra inguina  
ingrediuntur.

*Poplitea.* Poplitea, calci, & nonnunquam  
malleolo externo radicibus inhaeret. Inde  
sursum conscendens, à suræ cute muscu-  
lisque transversos & obliquos ramos admit-  
tit: atque sic medium poplitæ perambu-  
lans, in duos ramos dividitur, qui paulo  
supra poplitem non longe à se invicem sepa-  
rati, interdum cruralem ambæ subeunt,  
interdum unus cruralem, alter saphanam  
ingreditur. Hujus venæ sectio veteribus  
familiaris fuisse videtur, eamque in renis  
dolore commendat Hippocrates, 6. epidem.  
sect. 1. aph. 5.

*Suralis.* Suralis magna vena est, quæ circa ti-  
biæ flexum & paulo supra, crurali conti-  
nua jungitur. Conflatur autem ex duobus  
ramis circa poplitæ regionem concurrenti-  
bus: quorum exterior à digitis & summi-  
tate pedis. (in qua cum poplitæ radicibus

concurrens constituit varium illum vena-  
rum plexum sub cute conspicuum) malleo-  
lo externo & musculis inter fibulam latenti-  
bus: inferior verò à pollice, calce, & ti-  
biæ externa sede, musculisque suram con-  
stituentibus enascitur.

Ischias major, ad cruralem in *Ischias ma-*  
latentem, paulo infra furalis ingressum, ac-  
cedit. Hæc à pedum musculosa substantia  
& digitis exoritur, sicque ascendens mal-  
leolus exteriorē perreptas (quo loco in  
ischiatricis affectibus secari solet), ac in ulte-  
riore itinere varios ramos à tibiā anteriorē,  
suræ musculis, vicinisque partibus reci-  
pit, usque dum tandem ad cruralem dege-  
niat, in eamque aperiatur.

Notandum, maximam esse venarum pe-  
dis varietatem, neque illas in omnibus sub-  
jectis, imò vix in ejusdem corporis utro-  
que pede, se eodem modo habere, ac pro-  
inde earum exquisitam descriptionem vix  
dari posse: sicut illud ipsum etiam præce-  
dente cap. 5. monui de venis manus. Præ-  
terea, in descriptione venarum totius cor-  
poris, tantum exhiberi illas quæ manife-  
stè conspicuæ sunt, minimas verò rami-  
ficationes minus conspicuas, & capillares  
radices vix visibiles, exacte inveniri & de-  
scribi non posse.



A N A

# A N A T O M E S

## L I B E R VIII.

### D E

# N E R V I S.

### C A P U T I.

## DE NERVIS, IN GENERE.



**N**ervus Græcis νεῦρον appellatur, ἀπὸ τῆς νεῦω, *flecto*, atque etiam τένειν, ἀπὸ τῆς τένειν, *tendere*, quod nervi musculis infundant vim partes flectendi, tendendi, & extendendi.

Nonnulli, duce Galeno, 6. *method. cap. 4.* ut & 15. *de usu part. cap. 1.* tres nervorum species constituunt, ligamentosam, tendinosam, & nervosam. Verum illarum sola ultima verus nervus est, è cerebri medulla procedens: priores verò duæ potius corpora nervosa, à similitudine duritiei & siccitatis, appellanda sunt, quia neque ex medulla prodeunt, neque corpora similia sunt, sed ex membranis & nervis, concurrentibus arteriis & venulis, composita. Nos autem hoc libro de veris nervis ex medulla prodeuntibus acturi sumus.

*Definitio.* Est autem nervus pars organica, similis, alba, longa, & teres, spiritui animali vehendo dicata.

Organica pars dicitur, quia organum est spiritus animales vehens, eumque in finem certam ac determinatam conformationem obtinet.

Similis dicitur perfunctorio iudicio, sicut de arteria illud ipsum monui *lib. 6. cap. 1.*

*Substantia.* Substantiam obtinet albam, densam, ex multis filamentis tenuibus, sibi invicem per membranulas connatis, constantem, nulla conspicua cavitate, sed poris subtilissimis, ad spirituum animalium transitum præditam, quos inesse, per eosque spiritus istos diffundi, abundè tum vulnera, tum obstructions quibus affliguntur, arguunt.

*An nervi sint cavi.* Adversus illud quod dico, nervos nulla manifesta cavitate donatos esse, ab alijs

opponitur auctoritas Galeni, qui, *lib. 8. de usu part. cap. 6.* & *lib. de nervor. dissect. cap. 2.* scribit nervos opticos esse cavi: & *lib. 1. de sympt. caus. cap. 2.* dicit, *Impeditur animalis facultatis influxus, cum nervus meatu præditus, est vel obstructus, vel compressus.* Ex his Galeni verbis Bauhinus, Gemma, Riolanus, Spigelius, Marchettus, aliique varii, concludunt ac persuadere student, nervos esse cavi; imò nonnulli asserere audent, se manifestam cavitatem in nervis maioribus, ut in opticis, & in trunco nervi prope coxas, invenisse, ac demonstrasse: utque ea in opticis manifeste appareat, ex Galeno & Plempio, aliquot conditiones proponunt. 1. Ut sectio fiat in animali magno recenter mortuo. 2. Ut fiat clara luce, & cultro acutissimo, ne inter secandum nervus comprimatur, vel extendatur. 3. Ut ultra cõitionem dividatur. His conditionibus servatis, scribit etiam Bartholinus, *anat. lib. 3. cap. 1.* se in opticis cavitatem vidisse ac publice demonstrasse; quod etiam ego dicam, & credam, cum videro, non ante. Quippe in opticis nullâ diligentia, etiam observatis dictis conditionibus, hætenus manifestam cavitatem invenire potui: eorum media substantia etsi magis porosa sit quam in aliis nervis, nusquam tamen manifestè cava conspicitur: quod ipsum etiam asserunt, Vesalius, Fallopius, Eustachius, Cõiter, Aquapendens, & Columbus. Sic etiam nos in aliis nervis, nulla arte, nullis accuratissimis microscopiis, unquam cavitates aliquas percipere potuimus, atque hinc credimus illos, qui in aliis quibuscunque nervis cavitates inesse contendunt, eo deceptos fuisse, quod dum nervorum filamenta à se mutuo dirimunt, in spatiis intermediis quasi cavitates quasdam effingant; vel efficiant, quæ tamen nervis integris non insunt: ac proinde Bartholinus, etsi in *anat. optico-*  
rum

rum cavitatem admittat, tamen *in spe. elegio cap. 3.* istorum opinionem splendide refutat. (Quantum ad processus papillares in cerebro, quos multi prodiderunt esse nervos odoratorios, illi quidem sensibilem cavitatem habent, sed quod non sint nervi, satis docuimus *lib. 3. cap. 8.* sicut etiam veri nervi non sunt fungosa corpora penis, quæ à nonnullis nervi penis appellantur, & quæ indigitare voluerunt Riolanus pater, & Severinus, *in Zootome*, cum ille dicit penis virilis, hic veretri bovini nervos esse cavos.) Si ipsam rationem consulamus, certe manifesta & conspicua cavitas nervis assignari non potest: nam invisibiles quidem spiritus per filamentorum poros (de his supra videndum, *lib. 3. cap. 5. 7. 8.*) invisibiles devehunt, sed nullum conspicuum liquorem, majoris cavitatis aut latioris viæ indigum, transmittunt; utpote qualis liquor nunquam ex vivorum nervis vulneratis, aut mortuorum dissectis nervis effluere, ab ullo oculatissimo Anatomico observatus fuit. Ad hæc, cum ipsa spinalis medulla, è qua nervi oriuntur, nullam habeat manifestam cavitatem, quanto minus eam habebunt ex ea prodeuntes sicci durique nervi, ex solis fibrillis compacti. Quod autem medulla prolongata manifeste cava non sit, ad institutum Bartholini, *in spe. elegio cap. 3.* per immissam tenuem fistulam aliquoties experti sumus quippe nullum flatum maximo spiritu immittere potuimus, qui tamen fistulâ in divisuram ejus immissâ, facile usque ad divisuræ finem progrediebatur. Huic nostræ sententiæ quamvis Galeni antedicta verba mox prima facie obstare videantur, minime tamen contraria sunt: ille enim citatis locis non loquitur de sensibili aliqua cavitate, qua nervos manifeste cavos esse voluit, sed de insensibili, id est, de eorum poris, quorum ratione nervis aliqualem cavitatem insensibilem adscripsit, mente potius quam visu perceptibilem. De qua insensibili cavitate etiam bene sic loquitur Nellianus Glancanus, *curf. med. tom. 5. lib. 3. cap. 9.* *Licet sensibiliter, inquit, nervi perforati non appareant, capaces tamen spiritus animalis delatores æstimantur: quoniam spiritus hic tenuissimus est, nervique medulla (qua nervum vere constituit) spongiosa est, facileque tenui spiritui permeabilis.* Quare autem nervi manifestam amplamque cavitatem habere non debuerint, dictum *lib. 3. cap. 11.*

Substantia  
triplex.

Nervorum autem substantia triplex censetur. Prima est interior medullaris, à cerebri medulla procedens. Secunda cum tertia est duplex membrana substantiam interiorem involvens: quarum una tenuior & interior piæ, altera crassior & exterior, duræ meningis productio est. Verum hæc triplex substantia licet fortè in nervis opticis

aliquo modo conspicua esse possit, in aliis tamen ratione potius quam sensu distinguitur, nam illam per anatonem demonstrare difficillimum foret, cum nervi omnes in longa duntaxat filamenta distrahantur, nec ulla medullaris substantia in iis conspici possit, unde nonnulli hanc nervis inesse omnino negant. Atque hinc etiam est quod nervi, qui ex solis filamentis componi videntur, partibus similaribus adnumerentur, non quod simpliciter tales sint, sed esse videantur, & ubique, in pede, manu, aliisque partibus, eodem modo compositi & sibi similes existant.

Quomodo nervi nutrantur, difficile est judicare. Vesslingius ipsis venas & arterias, nutrimentum vitalemque calorem subministrantes, adscribit: quorum vasorum ratione, dicit Hoffmannus, *in institut.* eos esse cavos. Lindanus, *in med. physiol.* venarum non meminit, sed dicit, omnes nervos, non solum cavos esse, sed intra cavitatem suam recipere arteriolam plus quam capillarem. Etiam Nicolaus Stenonis, *in observat. anat. de gland.* putat se inter funiculos nervorum tertii & quinti paris sanguifera vascula observasse. Nos in solis nervis opticis interdum notavimus levissima quædam indicia unius alteriusve sanguiferi vasculi transcuntis, & in retinam tunicam sese expandentis, ad humorum oculi & tunicarum nutritionem: in aliis verò nervis illud hæcenus nobis videre non contigit. Unde dictorum virorum opinionem, quæ se ad omnes nervos extendit: non satis solido fundamento inniti puto. 1. Quia per autopsiam illud in omnibus nervis non constat, nec perspicacissimorum Anatomicorum unquam, ne dicam in minoribus, sed ne quidem in maximis (exceptis opticis, ullas arteriolas per interiora decurrentes observare potuerunt: & quas Nicolaus Stenonis se inter funiculos vidisse exstimat, ego in tunica involvente (si modò videri possint) inveniri crediderim. 2. Quia pororum seu cavitatum angustia non tantum magna, verum etiam planè invisibilis existit, ita ut nullum capillum visibilem, multo minus arteriolam plus quam capillarem admittere possit. 3. Quia arteriolarum interiorum pulsatio spiritibus animalibus impedimento fuisset, & in valida cordis pulsatione ab inturgescencia arteriolæ angustato nervi ductu, spiritus animales minus bene transire potuissent. 4. Quia nervo qualicunque modo dissecto, ne minima quidem sanguinis guttula, ex interiore aliqua arteriola effluens, unquam observata fuit.

Glissonius scribit nervos, deferendo spiritus animales, non solum sensui & motui inservire, sed præterea fluidum quodque

Nervorum  
nutritio.

An humo-  
rem nutri-  
tium ve-  
hant.



Glissonii  
opinio.

que humorem nutritiam, ad sui aliarumque partium, quas ingrediuntur, nutritionem vehere (hanc sententiam multis, sed enervibus argumentis persuadere studet, in *appendici anat. hep. cap. 45.*) eosque hunc humorem non recipere ex musculis, ossibus, corde, pulmone, renibus, sed ex liene, ventriculo, & intestinis, atque ex parte etiam mediatè ex cerebro. Verum hanc opinionem facillime etiam invertit antedicta pororum in nervis angustia; utpote quæ tanta est, ut nullus visibilis humor eos permeare possit, & si forte humor aliquis, licet tenuis sit, in eos illabatur, statim fit obstructio & paralisis: id ipsum etiam ex eo patet, quod ex læsis nervis nullus succus exprimitur: item quod nervus in corpore vivente ligatus aliquo vinculo, nulla in parte intumescat, vel detumescat, nec unquam circa aut ultra ligaturam quispiam minimum quid tumoris observaverit. Huc accedat experimentum oculatissimi Regneri de Graef, quod describit *cap. 2. lib. de succo pancreat. pag. 32. edit. 1671.* quo manifestissime patet omnino nullum liquorem per nervos deferri. Hac de re, inquit, ut certiores evaderemus, aliquando in cane vivo nervum illum notabilem ad crura posteriora tendentem denudavimus, eumque per medium transversim dissidimus, & à vasis lymphaticis liberatum, in phialam (quali ad succum pancreaticum colligendum uti solemus) immisimus; cujus collum superius eum in sinem ita erat coarctatum, ut nervi dissecti crassitie ejus orificium blande clauderetur, quo minus spiritus, vel quidquid subtilius per nervos transiret, in auras evanesceret. Phialam hanc cum nervo ita in ejus cavitate propendente, cuti affiximus, sperantes fore, ut si quid liquidi nervos transiret, id ea ratione colligeremus: sed frustra: nam quatuor aut quinque horarum spatio ne minimam quidem gattam collegimus, neque etiam animales spiritus lateribus vitri per condensationem adherere notavimus. Præterea, illud quod ultimo loco proponit Glissonius, ab omni veritate remotissimum est, quippe si succus, vel liquor aliquis à nervis susciperetur, ille in eorum capita seu principia necessario influere deberet, atqui nullorum nervorum principia ad ventriculum, intestina, & lienem perveniunt, sed à medulla cerebri prolongata procedunt omnia, nullo excepto. Igitur si qui humores è ventriculo, liene, aut intestinis per nervos fluerent, illi deberent, non in caudas, sed in eorum capita seu principia infundi: at per quas, quæso vias eo pervenirent? an chylus, vel qualiscunque in ventriculo confectus succus, præteribit cor, & sic ad cerebrum ascendet, eoque & medulla mediante in nervos fluet? an verò potius ille nutritius humor ingreditur per fines nervorum ventriculo. in-

testinis, & lieni inhærentium, atque sic contrario contra spiritus animales defluentes flumine, primo ascendet ad medullam, ut inde illabatur in principia nervorum, & sic deinde eò regrediatur unde venit? nugæ. Super hac re legantur quædam à nobis descripta *precedente lib. 3. cap. 11.* & ulterior refutatio videatur *lib. 1. cap. 16.* item apud deusingium, *lib. de novo nutritii succi commento*, & Bartholinum, in *specilegio*, *cap. 3.*

Whartonius & Charletonus eundem nutritium humorem etiam admittunt, sed putant eum præparari ac confici in glandulis, passim hic illic in toto corpore sitis, easque speciatim huic officio dicatas esse, plurimis locis docent. Verum cum in illis glandulis crassiores & visibiles succi præparentur, ut patet in glandulis menterii, parotidibus, &c. qui succi nullo modo invisibiles nervorum poros penetrare, imò nec eos subire seu ingredi possunt, sine inductione obstructionis: cum etiam succus ille contrario flumine contra spiritus animales fluere deberet: cum denique variaz glandulæ sint ad quas aut nulli, aut solum tenuissimi invisibiles nervi perveniunt, certe hoc non esse glandularum officium, nec ab illis ullum nervorum nutritium humorem educi, satis manifestum est.

Malpighius, *lib. de cerebri cortice, cap. 3.* etiam sentit per nervorum fibras notabilem aliquem succum deferri, sed illum derivari dicit ex glanduloso cortice cerebri: hanc ob causam nerveas fibras etiam vasis annumerat. Inter vasorum, inquit, genus reponendas esse hujusmodi nerveas fibras, vulgatum illud indicare videtur: his scilicet sectis, copiosum quendam succum, ovi albumen referentem, igneque concrevisibilem emanare, ut in secto brachii nervo observavi. Verum hanc Malpighii opinionem etiam satis evincit modò dicta pororum summa in nervis angustia; atque illud etiam, quod singulæ eorum fibrulæ tantam cavitatem non habeant ut ullum tenuem succum transmittere possint, multo minus crassiusculum instar albuminis ovi, atque hinc doctissimus vir per illum succum à se in brachii læsione visum, manifeste deceptus fuit: qualis autem sit ille succus, supra à nobis descriptum *lib. 3. cap. 11. circa finem capitis.*

Atque sic opiniones illæ, de nervorum nutritio succo, plane concidunt,

Re autem pensius considerata, clarissime liquet, nullum nutritium, aliumve manifestum humorem, sed solos invisibiles spiritus animales per nervos ad partes deferri, maximeque verosimile est, nervos aliquo modo nutriri sanguine arterioso, sed omnium maxime spiritibus animalibus. Nam etsi nulla sanguifera vasa per sui interiora, ut modò dictum, admittant, tamen

R r r

sicut

Whartonii  
opinio.

Malpighii  
opinio.

Nutritium  
nervorum.

sicut in capite dura tenuisque meninx sanguine arterioso magna ex parte nutriuntur, ut liquet ex arteriolarum eas perreptantium copia: sic etiam exteriores nervorum tunicas, à meningibus derivatas, per invisibiles arteriolas, continuatione quadam è meningibus eo deductas, nonnihil sanguinis pro nutritione recipere, & ejusdem quoque sanguinis interiori substantiæ nonnihil per exhalationem communicare, certum est. Sed interim indubitatum haberi debet, easdem has tunicas, sed omnium maxime interiores fibras, imprimis nutriri spiritibus animalibus eas transeuntibus (de his, quomodo, & ex qua materia generentur, & quid in nutritione faciant, supra videndum, *lib. 3. cap. 11.*) quorum aliqua particula fixiores, eorum substantiæ accrescentes, iis in nutrimentum cedunt. Et quare, quæso, nervi non gaudent tali prærogativa, quali gaudent arteriæ & venæ? nam hæ ambæ nutriuntur eo sanguine quem vehunt; arteriæ quidem illius particulis paulo magis salis & fixis, unde siccior & densior est earum substantia; venæ autem particulis humidioribus & minus salis, unde harum substantia est humidior & magis flaccida. Sic etiam alienum non erit, nervos maxime nutriri spiritibus animalibus eos transeuntibus, eosque hinc tam acuti sensus esse, suamque singularem duritiem & siccitatem inde habere, quod illi spiritus animales quibus nutriuntur, sint instar salis volatilis subtilissimi & sicci, seu instar subtilissimæ & siccioris cujusdam exhalationis. Interim tamen, præter dictos spiritus, etiam paucissimum quid sanguinis arteriosi ad exteriorum præcipue tunicarum nutritionem concurrere, ejusque subtilissimum quid per exhalationem interioribus fibris communicari, ex eo satis patet, quod nervi obstructi, licet priventur sensu & flaccidi evadant, ob denegatum spirituum animalium ingressum, attamen non priventur vita, nec omnimodò nutrimenti defectu exarescant; nam sæpe post aliquot annos, soluta obstructione, rursus moventur & pristinae sanitati restituuntur paralytica membra. Vidi ante hæc & diu novi mulierem per triginta annos in uno latere adeo misere paralyticam, ut neque brachii, neque cruris sinistri ullum articulum loco movere posset, totiusque lateris sensus stupidissimus esset, cui tandem per maximum horrendumque nocturnum ventislatum cum fulmine & tonitru, quo illa mundum periturum putabat, immenso terrore percussæ, materia obstructuens à nervis subito expulsa, & sic ipsa à paralyti liberata fuit & mansit, ac postmodum cum omnium stupore foras prodit, & exinde pedibus manibusque non minus quam sanissimus quisque valuit. Hoc certe fieri non potuisset, si nervi tanto tem-

pore sine nutrimento fuissent, nam tot annorum spatio penitus exaruiscent: ut sine ullo nutrimento tam diu fuissent, si solis spiritibus animalibus nutriri debuissent, utpote qui durante illa obstructione eos ingredi non potuerant. (Aliam similem historiam refert Valleriola *lib. 2. observat. 4.* scilicet civis Arelatensis, qui multis annis paralyticus fuerat, & tandem per ingentem terrorem ex incendio domus suæ conceptum, subito fuit à morbo liberatus, eique sensus & motus in paralyticis partibus restitutus.) Arteriola tamen per quas sanguis ad nervos fluit, cum per eorum interiora percurrere nequeant, ut ante probatum, cum etiam in media via nusquam eos ingrediantur, aut hic illic à latere inserantur, videntur solummodo ab iis quæ meninges cerebri perreptant, invisibiliter deduci.

Magnitudo nervorum varia est, pro usus varietate ac necessitudine, organorumque ad quæ excurrunt, & actionum diversitate ac magnitudine. Magnitudo.

Ortus seu principium nervorum duplex Ortus. est: aliud *γενέσις*, generationis, aliud *διανομήσις*, dispensationis. Prioris ratione oriuntur ex semine, sicut omnes aliæ partes solidæ. Posterioris verò ex cerebro, seu ejus appendice medulla. Quippe, rejecta opinione Aristotelis, Petri Aponensis, Andreæ Cæsalpini, aliorumque (quorum nonnulli scribunt, nervos oriri à corde, alii partim à cerebro, partim à corde) dicimus omnes nervos oriri è medulla cerebri oblongata, tam intra cranium, quam in spinæ cavitate contenta (de hac medulla supra dictum, *lib. 3. cap. 7.*) quod ipsum, autopsi à edocti, merito sentiunt, Varolius, Piccolhominus, Bauhinus, aliique plerique clarissimi Anatomici.

Ex illa autem medulla egrediuntur per Exiens è medulla. foramina cranii & vertebrarum, sed non omnes eodem modo. Quidam enim transeunt per foramina maxime vicina isti medullæ loco è quo oriuntur: alii per foramina proxime vicinis foraminibus subiecta: alii duo, alii tria, alii plura foramina præterlabuntur, antequam egrediantur: quippe, quo magis medulla versus inferiora tendit, eo nervi ex illa prodeuntes ante exitum plura foramina prætercunt.

Nervi alii molliores, alii duriores sunt; Molliores & durities. pro diversitate usus, situs, & longitudinis, nec non partium quas ingrediuntur: quippe molliores propinquiorebus & humidioribus; duriores verò longinquiorebus & siccioribus inseruntur. Galenus scribit, iis partibus quæ solummodo sentiunt, molliores; quæ verò simul sentiunt & moventur, duriores tribui nervos.

Usus nervorum est, spiritus animales ad Usus. partes deferre, ut per eorum influxum ordinarium

dinarium nutritio procedat ; & per influ-  
xum determinativum partes sensui ac motui  
animali destinatae acutius sentiant , & me-  
lius moveantur : qua de re supra latius egi-  
mus , *lib. 3. cap. 11.* Hunc in finem par-  
tibus sentientibus & moventibus miro arti-  
ficio inferuntur ac connectuntur : & qui  
musculos moturi sunt , in eorum capita ,  
aut paulo sub capite , vel saltem non ultra  
medium eos ingrediuntur : quemadmodum  
illud bene notatum est à Galeno , *lib. 7. de  
usu part. cap. 14.* hujus insertionis causam  
seu rationem supra dedimus , *lib. 5. cap. 1.*

*An sine sen-  
sus & mo-  
tus instru-  
menta.*

Interim nonnulli ex prædicta considera-  
tione male concluderunt , nervos esse sensus  
motusque instrumenta , cum sint potius can-  
nales per quos spiritus animales ad sensus  
motusque voluntarii instrumenta deferun-  
tur. Sensus instrumenta sunt membranæ,  
quæ quo plures recipiunt nervos , & per  
consequens plures spiritus animales , eo ac-  
utius sentiunt ; quo pauciores & minores ,  
eo obtusius : non enim soli nervi , sed spi-  
ritus per nervos delati dant membranæ suum  
sentire , ut patet in paralyfi , in qua licet  
nervi adsint , propter spirituum tamen de-  
fectum abest sensus : his autem membranæ  
quia nervi etiam præditi sunt , non est mi-  
rum quod ipsimet etiam acutissime sentiant ,  
præcipue cum in se copiosissimos contineant  
spiritus animales , quibus mediantibus sen-  
sus fieri debet , & quibus destitutæ , mem-  
branæ , & ipsi quoque nervi , non sen-  
tiunt. Motus voluntarii instrumenta sunt  
musculi , quos nervi non movent se ipsos  
contrahendo , ut ex Galeni sententia , *comm.  
ad 6. aphorif. 39.* multi ante hac tradiderunt ,  
sed tantum copiosos animales spiritus , mo-  
tum facientes , iis infundendo : atque sic  
nervi quidem ad motum musculorum , una  
cum his , simul flectuntur , vel extendun-  
tur , sed sua contractione aut extensione  
non movent musculos , quod necessario fa-  
cere deberent , si essent motus instrumen-  
ta.

*An nervi  
sensorii &  
motorii sint  
diversi.*

Fernelius , Mercurialis , Laurentius , al-  
liique nonnulli magni Medici , cum in pa-  
ralysi observarent , modò sensum obtu-  
pescere & motum aboleri , modò utrum-  
que perire , constituerunt differentiam inter  
nervos motorios & sensorios , eosque pu-  
tarunt esse singulos distinctos nervos , &  
pro ut vel hi , vel illi , vel utrique obstru-  
untur , hinc dictam paralyfis diversitatem  
fieri. Sed hac in re omnino errarunt , si-  
cut enim spirituum animalium , ita etiam  
nervorum nulla est diversitas , sed opera-  
tionum diversitas à partium quas ingrediun-  
tur diversitate procedit. Sic oculis vim vi-  
dendi , auribus audiendi , naribus odoran-  
di , membranæ sentiendi , fibræ contra-  
hendi , musculus movendi , per spiritus in-  
fundunt : quinimo unus idemque nervus

diversis partibus insertus , uni solum sensum ,  
alteri sensum & motum confert. Sic per  
nervum sextæ conjugationis pleura , media-  
stinum , ventriculus , multæque aliæ par-  
tes sentiunt : per eundem musculus cervicis ,  
hyoidis , laryngis , aliique , sentiunt & mo-  
ventur. Verum Thomas Willis , cum  
animadverteret , ventriculum , intestina ,  
multasque alias partes , habere motum  
quendam spontaneum , qui ex arbitrio non  
procedit , putavit duplices esse nervos , &  
duplices spiritus animales : alios qui motui  
spontaneo , per spiritus in cerebello geni-  
tos ; alios qui motui voluntario , per spi-  
ritus in cerebro confectos , inserviant. Hic  
idem illud respondendum , quod modo di-  
ctum , scilicet motus diversitatem non pro-  
cedere à diversitate nervorum aut spirituum ,  
sed potius à diversitate partium in quas ner-  
vi spiritus deferunt : ut si eos deferant in  
partes motui voluntario inservientes , scili-  
cet musculos , tunc perficere motum vo-  
luntarium ; si in alias , quæ musculi non  
sunt , & tamen fibras mobiles obtinent ,  
tunc motum spontaneum inducere , qui ad  
arbitrium dirigi nequit.

Illud autem super hac re notandum est , *Non perit  
sensus ma-  
nente motu.*  
nullum musculum moveri qui simul etiam  
non sentiat , & in musculis posse perire  
motum manente sensu , sed non contra ; *Digressio  
prima.*  
cum pauci spiritus sufficiant ad sensum ta-  
ctus , ad motum verò multis opus sit , qui-  
bus non satis copiose influentibus , perit  
motus manente sensu , sed hoc tamen ( ob  
spirituum paucitatem ) obtusius , nec tam  
acuto ut ante. Falsum autem est , quod  
hactenus nimis præcipitanter statuerunt  
præstantissimi quilibet Medici , perire non-  
nunquam in eodem toto membro sensum  
manente motu : nam in praxi non semel ob-  
servavimus , interdum quidem perire , aut  
obtusissimum fieri , sensum in cute , ita ut  
ei etiam pruna ardens sine dolore admoveri  
posset ; sed interim in talibus ægris acu per-  
forata cute sensum satis acutum & acrem  
perceptum fuisse in substratis musculis se  
moventibus , qui certè non debuissent sen-  
tire , si vera foret dicta hypothesis. Frivo-  
lum etiam est exemplum , quod aliquoties  
à Regio , & quidem ex solo aliorum relatu ,  
in contrarium objectum fuisse audivimus ,  
de juvene quodam cui in manu omnino pe-  
rierat sensus , manente motu : in eo enim  
perforationes per cutem usque in musculos  
factas fuisse , ut ille factas dicit , credat Ju-  
dæus apella ; hoc ipse sibi persuadeat , &  
aliis in praxi non minus rudibus quam ip-  
semet est : ego oculis meis majorem fidem  
habeo quam aliorum imperitorum relatio-  
ni , atque hinc , cum illud in isto juvene ,  
vel alio , videro , tunc credam , non an-  
tea , eo usque mansurus in priore mea sen-  
tentia , quam veram esse , non ex relatu

R r r 2

aliorum

aliorum imperitorum habeo, sed oculis meis vidi, neque enim adeo credulus sum, ut stolidorum & anicularum fabulosis narratiunculis tam facile fidem habeam, neque tam præceps in iudicio, ut ex eorum dictis mox regulam in Medicina instituere velim.

Verum Medici ante hac non videntur observasse, illam sensus stupiditatem haud esse in musculis, sed in sola cute (forte etiam in panniculo carnosio) ob cujus tamen vitium putarunt interiores membri partes etiam sensu privari. Ita ut totus ille error ex eo processerit, quod deficiente sensu in cute (hoc fieri potest ob intensum frigus vel ob vitiosos humores cutis poros ita infarcientes, obturantes, aut contrahentes, ut spiritus animales eos libere permeare nequeant; ut in scorbuto, similibusve affectibus nonnunquam contigisse visum est) speculatio Medicorum non fuerit usque ad musculos motum facientes conversa, quos si diligentius inspexissent, satis percepissent in illis manentem motum nunquam perire sensum.

Observationes.

Illustrabo hanc rem paucis observationibus. Ante aliquot annos mulier quædam consilii causa ad me venit: membra omnia satis movebat: tota cutis ipsi rigida erat, instar membranæ tympani bellici tensæ, atque etiam subfrigida, ea tamen nihil contactu sentiebat, ita ut si aciculis pungeretur, aut ignis ei admoveretur, nihil mali aut doloris inde perciperet: verum si acicula vel acus adigeretur profundius, usque ad aliquem musculum subjectum (hoc in ea studio diversis in locis tentavimus) tunc ilico internum musculi dolorem sentiebat. Simile etiam vidi in quodam nauta, qui totus scorbuticus ex India orientali advenerat, cui membra satis movebantur, sed tanta erat cutis insensibilitas, ut ab impostitis candentibus prunis illa corrugaretur, sine ulla tristis sensatione. seu doloris perceptione: at si profundius, usque ad musculos, acu pungeretur, tunc ilico dolorem in iis satis magnum percipiebat. Sic etiam tractavi quendam mercatorem tabaci, cui motu integro cutis obriguerat, adeoque obstupuerat, ut compunctiones externas non sentiret, sed compunctus usque in musculos, acute sentiebat. Elephantia laborantibus cutis stupida & obtusi sensus est, verum si muscoli pungantur, dolent. Ita ut si quotquot occurrent insensibilitatis manente motu exempla diligentius expendantur, semper observabitur in ipsismet moventibus partibus, scilicet musculis, non perire sensum, nisi simul eodem tempore, imo etiam citius & magis, pereat motus: & si forte manente motu sensus perire videatur, illum tunc non perire in musculis moventibus, sed in aliis partibus membro instratis

vel circumjectis, præcipue in cute, cujus insensibilitas statim & maxime obvia esse potest. Rogatos autem velim omnes Medicos practicos, ut postmodum oblata occasione, diligentem hujus rei rationem habere velint, ut per plurium observationes veritas nostræ sententiæ confirmari, & altera antiquior à veritate aliena, omnium animis jam dudum firmiter impressa, penitus eradicari queat.

Qui hodiernam novam, & in plurimis insigniter illustratam Philosophiam toti sequuntur, antedicto errori haud parvam faciem, per imprudentiam accenderunt: quia nimis creduli, Medicorum, de perduto sensu manente motu scribentium, testimonium non de externarum partium, sed de totius membri insensibilitate intelligentes, neque hanc rem ad Lydium experientiæ lapidem ulterius probantes, istius rei (quæ neque esse, neque fieri potest) causas inquirere tentarunt, & docuerunt, sensum conferri partibus per nervorum fibrillas, motum verò à spiritibus animalibus, qui per eorum tubulos copiosi in musculos influunt (super his videatur des Cartes, de passion. anim. part. 1. artic. 12.) & fibrillas eorum posse impediri, illas liberæque manente via spirituum, sicque tunc perire sensum, manente tamen motu, propter spiritus per interiorum cavitatem libere in musculos influentes, è contrario, interiorum cavitatem obstrui posse, fibris integris & liberis manentibus, tuncque perire motum ob denegatum spirituum transitum ad musculos, manente interea sensu. Verum nervos sentire ratione fibrarum & tunicarum à meningibus prodeuntium, hoc certum est; sed quod per suas fibrillas sensum tribuant omnibus partibus sentientibus, falsum est. Non enim dictæ fibrillæ, sed spiritus animales per tubulos seu porositates nervorum influentes, fibris & membranis, ac membranosis partibus omnibus (in his enim solis fit sensus) facultatem sentiendi conferunt, sine quorum influxu etiam ipsæ nervorum fibrillæ non sentiunt, ut patet in paralyti. Atque hinc liquet, quam absurdum sit dicere, *Obstructa interiore cavitatem seu porositate, & sic spirituum transitu impedito, perit motus, sed manet sensus*: cum tamen ipse sensus ab isto influxu debeat procedere, & sine eo mox pereat. At enim dicat quis, licet interior nervi cavitatem seu porositas obstructa sit, per ipsam tamen fibrillarum substantiam ad huc satis multos spiritus transire ad sensum faciendum. Hoc merum diverticulum est. Nam eodem modo dici posset, arteriâ intus obstructa, & sanguinis transitu impedito, per ejus substantiam adhuc satis multum vivifici caloris & spiritus transire, ad partium naturalem calorem servandum, cum tamen conservatio

Error Philosophorum.

conservatio caloris à debito influxu sanguinis procedat, eoque deficiente mox evanescat (hoc patet in syncope, utpote in qua ex hoc defectu extrema ilico frigent) etiam in propria arteriæ substantia, quæ & ipsa à transeunte substantia calefit & nutritur. Præterea, quomodo interior cavitas nervi aut arteriæ obstrui poterit sine compressione fibrillarum & substantiæ ipsius vasis? nam materia obstruens si cavitatem interiorē exacte claudat, ita ut ne subtilissimus quidem & invisibilis spiritus transire queat, necessario arctius comprimit vasis substantiam & fibrillas, utpote sine qua compressione exacta occlusio fieri nequit, substantiā verò cum fibrillis compressā, pori in ea & fibrillis angustantur vel occluduntur: & quomodo, quæso; illis occlusis vel obstructis, spiritus per illas fibrillas aut substantiam adhuc permeabunt? Denique cum in musculorum motu eorum fibræ & membranæ necessario spiritibus animalibus copiosius perfundantur (sine his enim non potest fieri motus) fibræ autem & membranæ per hos spiritus acute sentiant, quomodo possibile est, ut concessis copiosis spiritibus ad motum, fibræ & membranæ, iisdem spiritibus necessario eodem tempore perfusæ priventur sensu, qui à longe paucioribus spiritibus perfici potest, quam motus? an non positis mediis necessariis ad sensum, ponitur sensus? at hoc axioma rejicere videntur illi qui sensum in musculo aboleri dicunt, cum interim concedant, quod satis multi spiritus influant ad motum perficiendum: Ultimò, etiam iis probanda foret illa nervorum interior cavitas, quæ tanquam certa & indubitata ab illis præsupponitur, cum tamen, ut ante dictum, nulla unquam demonstratione exhiberi, imò ne microscopiis quidem hætenus ab aliquo videri potuerit.

*Digressio  
secunda, de  
sensu perceptione.*

Hanc quæstionem mox excipit alia gravior, de qua altercationis ferram acerrime reciprocant nobiliores Philosophi, scilicet de sensu perceptione. Multi per spiritus animales in nervorum tubulis ac medullofa substantia contentos: alii per nervorum fibrillas, sensationem menti in cerebro communicari tradunt, & neque his, neque illis probabilia argumenta defunt.

*An fiat per  
spiritus.*

Prior opinio multis displicet, & minus verosimilis videtur, quia spiritus animales continua impulsione ex cerebro per nervos propelluntur, non verò è nervis ad illud ascendunt vel redeunt, atque hinc admodum grave videtur, impressas spiritibus imagines seu ideas, è membris remotioribus, ut pedibus, adverso & renitente spirituum flumine, ilico minimi temporis puncti spatio ad cerebrum deferri, illicque menti offerri posse. Gassendus tamen, dictæ opinionis strenuus defensor, hanc diffi-

cultatem videns, lib. 6. *sua philosophia*, ut illam amoveat, singularem quendam modum describit, quo hunc spirituum recursum ad cerebrum fieri arbitratur: postquam enim præsupposuit, omnes sensus contactu quodam intercedente actiones elicere, tandem sic dicit. *Quia nervus nervulusve non potest contingi quin aliquatenus prematur, neque potest ullatenus premi quin ob distensionem spiritus contentus urgeatur, neque spiritus illic sic urgeri, quin pellat: seu potius repellat vicinum instantem, ac pari ratione advenientem ex cerebro, neque iste porro repelli, quin totâ serie ob repletionem continuitatemque repulsâ, spiritus existens ad originem nervi nervulive in cerebrum quasi resiliat, ideo facultatem sentiendi, residentem in cerebro, certum est hoc quasi resultu moveri, factumque attractum percipere, apprehendere, seu cognoscere, ac sentire.* Et paulo inferius addit: *Quippe non aliquid mitti, sed remitti potius repellive videtur, spiritus nempe nervis contentus, neque apparet quidpiam aliud in cerebrum pertingere posse.* Verum acutissimus Gassendus non exacte his verbis tangit punctum rei: nam secundum hunc modum, pressio nervulo spiritus in eum influens, pressione illa prohibito ulteriore transitu, posset quidem flecti, seu sufflaminari, sed nullo modo sursum versus cerebrum repelli, aut ullus motus ideigerus ab eo usque ad cerebrum reduci, quia obstat continua pressio, seu impellens motus ipsius cerebri, quo spiritus tam fortiter urgentur versus nervos eorumque fines, ut nullus motus contrarius eos ad cerebrum repellere queat, idque eo minus, quia etsi detur causa sistens, tamen nulla datur alia causa repellens. Quippe in nervo hoc negotium procedit ut in arteria: hac enim alicubi compressâ, sanguis quidem ob pressuram sistitur ac transitu prohibetur, sed non resilit seu refluit ad cor, quia cordis pulsio tam fortiter sanguinem à se propellit, ut propter aliquam extrinsecam pressuram, illum per arterias ad cor redire posse, nemo mente sanus sibi imaginari queat: Et cum cerebrum non minus spiritus à se in nervos propellat, quam cor à se sanguinem in arterias: cumque minimus contactus in remotissima quacunque parte, (ut ex. gr. pede, vel pedis digito) factus, eo ipso momenti puncto, quo ille fit, in cerebro percipitur; & cum neque tam rapidissimus aliquis spirituum motus à pede usque ad cerebrum (etsi secundo flumine eo procederent, quod non faciunt) puncti temporis spatio fieri, aut cogitatione comprehendi possit: neque etiam ratione repletionis aut continuitatis (ut vult Gassendus) spiritibus ob nervi pressuram ulteriore transitu prohibitis, illi qui ad originem nervi existunt, in cerebrum resiliere queant, propter modo dictam spirituum

R r r 3

pro-

propulsionem, quo cerebrum suo motu spiritus continue urget versus nervos, nec ullos resilire permittit: cum denique per istam spirituum stationem seu sufflaminationem ab antedicta pressura factam, à parte contacta etiam nulla contactus idea (aspera, mollis, pungens, mulcens, urens, & c.) ad cerebrum deferri, in eoque menti representari possit (propterea, quod à parte contacta, in qua nervus nervulusve attactu pressus est, neque spiritus, neque aliud quid ideigerum ad cerebrum perveniat, sed simpliciter spirituum transitus ad posteriores partes, per illam pressuram induci possit) cum inquam hæc omnia ita se habeant, manifestum est, hoc ingeniosissimum Gassendi commentum dictam opinionem, nec probare, nec ullo modo confirmare posse.

*Am fiat per  
fibrillas  
nervorum.*

Posterior opinio, licet etiam illam plausibilem prærogativam habeat, quod necessario in fibrillis, nervi corpus constituentibus, fiat sensatio, tamen hoc explicatu difficile continet, quomodo uno minimo temporis puncto per solidam fibrillarum nervorumque substantiam istius sensationis specifica imago à crure ad cerebrum perveniat, in eoque à mente percipiatur. Scio quidem hoc explicari per similitudinem chordarum in instrumentis musicis, quæ si liberæ ac satis tensæ sint, & inferiore loco moveantur seu pulsantur, mox tremunt etiam superiore, usque ad summum. Verum claudicat illa similitudo, quia in vivis corporibus non est tanta nervorum tensio, neque rectitudo situs, quanta est in chordis musicis, sed magna in situ laxitas ac tortuositas, cumque vicinis partibus undequaque connexio multiplex, ita ut talis continuatus tremor in nervorum fibrillis non possit excitari, qualis fit in tensis musicis chordis; quæ & ipsæ laxatæ, aut in medio detentæ, non tremunt usque ad summum, licet alicubi contrectentur durius. Et hoc est quod etiam bene notavit Gassendus, *libro antecitato*: *Possent quidem profecto dici, inquit non tam contentum spiritum, quam continentem tunicam nervi, ob sui usque ad cerebrum continuationem distensionemque; eo affectionem producere. Verumtamen, quia non sunt nervi secundum longitudinem directeque tensi, eo modo quo fides in lyra, ut in uno extremo attracti pulsive, motum in alio simul exprimant, sed & oblique divertuntur, & remissione tensionis sunt, quam ut præstare id posse videantur.* Hæc Gassendi verba multis contrariis argumentis acriter impugnat Ludovicus de la Forge, *comm. in Cartesii lib. de hom.* sed talibus, quibus quidem evincit, sensus perceptionem non fieri per spiritus à parte contacta usque in cerebrum fluentes, sed non satis solide probat istam perceptionem fieri à motu per nervorum fibrillas cerebro com-

municato. Tota vis rationum ejus, fundata est super influxu spirituum animalium in nervorum fibrillas, quo influxu has continue tensas remanere scribit: sed illa exigua sensio non est sufficiens, ut ob eam minimus aliquis nervulus è cerebro ductu maxime tortuoso ad pedem usque productus milleque intermediis partibus in via annexus, in pede leviter contactus, mox motum suum usque ad cerebrum extendat, imò illius contactus ideam, eo ipso momenti puncto quo contingitur, cerebro communicare possit, nullo intercedente, perceptibili tempore, cum tamen satis longum iter à pede usque ad cerebrum, si non magnum, saltem aliquod exiguum temporis interstitium necessario requirat, non minus quam aer, qui per mallei ictum, aut bombardæ explosionem commotus, notabili temporis interstitio opus habet, antequam ejus motus ad aurem eminus audientis se extendat. Si tale temporis interstitium intercedat in motu aeris, corporis levissimi maximeque fluidi, quanto majus requiretur in nervi corpore solido, intricata via & ductibus tortuosis procedente? & tamen nullum intercedit, nam eo ipso fere indivisibili temporis puncto, quo tangitur digitus pedis, istius contactus idea percipitur in cerebro, ita ut contactus & perceptio contactus plane simul & eodem tempore fieri videantur (sicut cum ex improvviso speculum oculis obiicitur, tunc simul eodem temporis puncto idea faciei in speculo pingitur, ex eo repercutitur, & ab oculis conspicitur) quæ omnino simul fieri non possent, si fibrillarum motus se à pede usque ad cerebrum extendere, atque sic ideæ contactus perceptio in cerebro fieri deberet. Si quis obiiciat, hoc fieri propter nervi continuitatem: Respondebo, continuitatem hoc præstare posse in rebus duris, tensis, ac rigidis, sed non in mollibus & flaccidis: ut si, ex. gr. lignum viginti pedes longum uno fine auri admoveatur, altero leviter percutiatur, tunc in aure illa percussio ilico audita percipitur. Verum si alicujus animalis intestinum mundatum, & spiritu seu flatu satis distentum, uno fine percutias, ille motus non procedet ultra palmæ aut spithamæ longitudinem, multo minus pertinget usque ad alterum finem auri admotum, imò ne minimum quidem auditu percipietur. Sic etiam in nervo excitatus circa pedem motus, propter nervi mollietatem, tortuosum & incurvum situm, ac cum innumeris partibus in via connexionem, statim emoritur seu definit, nec ratione fibrarum puncti temporis spatio ad cerebrum deferri potest. Præterea, nervus componitur ex in numeris fibrillis, tam firmiter coherentibus, ut non nisi vi quadam à se mutuo divelli queant: si jam una aliqua nervi



nervi fibrilla in pede moveatur, quomodo poterit istius solius motus ad cerebrum ascendere, reliquis ei firmiter connexis, in quiete manentibus? Si dicas, illâ motâ simul etiam reliquas, & sic totum nervum moveri: tunc in cerebro incerta fiet perceptio, neque mens diiudicare poterit, an primus motus excitatus fuerit in digito, an in infimo, an in supremo pedis, cum unus idemque nervus ad tam diversas partes sæpe varias fibras emittat. Hic non sufficit dicere, *Res ita se habet, & qui aliter sentiunt, illi sunt cervicofi, ac perricaciam pro scuto habent*: sicut hodie nonnulli superciliose Philosophi, quasi cum singulari quadam Regia auctoritate, dicunt, quibus tanta est philautia, ut singula sua commenta putent esse oracula ex Apollinis tripode deprompta, eaque pro legibus cuilibet præscribere velint, nec quidquam contradici patiantur, haud aliter ac si ipsis Regium imperium in aliorum etiam opiniones demandatum esset: sed potius clarioribus rationibus, sine præiudicio, res dilucidanda, & amicè docenda est.

Cartesii  
opinio.

Hujus dubii, de perceptione, etiam meminit. Cartesius, *lib. de hom. artic. 13*, quo loco illud clarius explicaturus, sic dicit: *Præterea ut percipiamus, quomodo ab externis objectis, sensuum organa afficientibus, incitetur (machina corporis) omniaque sua membra mille modis moveat, cogitandum, exigua filamenta) qua modo dixi ex intimis ipsius cerebri penetralibus provenire, atque componere illorum nervorum medullam) omnibus illius partibus inesse, qua cujuslibet sensus organo inserviunt: atque hæc quidem filamenta ab horum sensuum objectis facillime moveri posse. Cum verò paululum moventur, ipsa è vestigio trahere cerebri partes, ex quibus originem sortiuntur, eademque opera recludere meatus quorundam pororum, in anteriore cerebri superficie existentium. Vnde spiritus animales statim cursum suum exorfi, atque per eosdem in nervos & musculos delati, excitant motus iis omnino similes, quibus nos quoque, sensibus nostris eodem modo affectis, concitamus.*

Excellentissimus nostri seculi Philosophus videtur duas ante relatas opiniones conjungere voluisse, ut sic ex ista conjunctione sensuum perceptionem educeret. Nam per fibrillas putat objecti ideam ad cerebrum deferri, & tunc in cerebro, reclusis quibusdam poris, spiritus animales per earundem fibrillarum porositates ilico in nervos & musculos influere, sicque talem concitare motum, quo perceptio perficitur. Utinam per ingeniosissimum hoc commentum jam etiam explicari & doceri posset, quomodo in uno minimo momenti puncto à remo-

tissimis partibus, ex. gr. pedum digitis, ille fibrillarum motus ad cerebrum deferri, & simul eo ipso puncto spirituum influxus à cerebro ad pedes deferri possit; sicut minima digiti pedis punctio, eo ipso quo pungitur momento, in cerebro sentitur. Obstant omnes illæ rationes quas adversus duas priores sententias attuli. Videtur eminentissimus vir tantopere respexisse ad instrumenta mechanica, ut humani corporis organa eodem modo moveri & operari crediderit: quod facile percipitur ex illa similitudine, quam in sequentibus addit: *Si funis, inquit, extremitatem trahas, campana, cui altera ejus extremitas cohaeret, eodem momento sonat*. Verum in homine non est par ratio: in hoc enim est Anima rationalis (in brutis Animæ analogon) & vita: Anima autem percipit, partesque etiam sine objecto externo movet; secus ac campana, quæ animâ & vitâ destituitur, nec nisi ab externo aliquo movente moveri potest; atque hinc longe aliis opus habet organis, quam corpus aliquod vivens. Ex. gr. funis non movet campanam, nisi sit tensus, & à motore aliquo trahatur: talis autem neque motor, neque tensio in nervis eorumque fibrillis, unquam adest, multoque minus in mollissima & medullosa nervorum substantia existere potest. Cum aliquis duplici vel triplici curvatura incurvatus in lecto dormiturus decumbit, in illo neque rectitudo, neque ulla tensio, sed multis in locis compressio est nervorum, & tamen minimam digito pedis inflictam puncturam, vel admotam ignis favillam ilico per sentit: anne tunc per incurvati corporis tortuositates mollissima medullaris nervi fibrilla, eo ipso minimo momento, quo punctura infligitur, usque ad intima cerebri movebitur? an aderit hic aliqua fibrillarum & nervorum tensio? an non pressura aliqua hic illic motum istum intercipient, vel impedit? Non, dicit *ibid.* des Cartes, quia iisdem tubulis inclusa sunt hæc filamenta, per quos spiritus animales in musculos deducuntur, qui tubulos illos paululum semper inflantes, hoc agunt, ne filamenta ibidem nimis comprimantur. Acutum certè, sed merè imaginarium diverticulum: quasi vero cum nervi in curvatura corporis hic illic premuntur, ficti illi tubuli aperti & distenti maneat, ut à dictis filamentis compressionem arceant. Porro, ex hac sententia Cartesii, & similitudine funis campanæ sequitur, quo magis tensi sunt nervi, eo facilius & citius illa filamenta moveri usque ad intima cerebri. Contra verò, citati *lib. cap. 14.* dicit, filamenta quæ gustus organis inserviunt, facilius moveri aliis, quæ tactui in genere opitulantur, quia dissolutiora sunt. An igitur chorda laxior & dissoluta melius, citius,



tius, & facilius movebitur, quam alia magis tensa? olim sic se res habere non solebat, sed fortè hoc corrupto seculo, dum tempora mutantur & nos mutamur in illis, per hodiernum mundi senium aliarum rerum naturalium status immutatur. Verum & hoc ultimò rogandum, an illa tenuissima, mollis, & invisibilis fibrilla mota, etiam facultatem aliquam habere possit, recludendi in cerebro aliquos poros ad spirituum influxum? Hæc mentis actio est, non verò nervi, aut alicujus fibrillæ: nam mens etiam sine objecto externo facere potest, ut pori modò horum, modò illorum nervorum aperiantur, vel claudantur, & spiritus ad has illasve partes copiosiores vel pauciores determinentur: loco mentis illud in brutis peragit mentis analogon, de quo supra latius egimus, *lib. 2. cap. 2.* Quantum ad me, & si sensationem per fibrillarum nervosarum tractionem, tremulumve motum, planè fieri non posse existimem, tamen per eorum fibrillas cum spiritibus eam fieri arbitror: sed quomodo? certè meæ super hac re speculationes mihi ipsi etiamnum vix omnino satisfaciunt, ac proinde tutius fore existimo, hic pro tempore eas reticere, hæcque me impræsentiarum nescire malle, quam nimis adhuc incultis speculationibus explicare: difficillimum quippe judico, ut de multis aliis, ita etiam de hac animali operatione sensitiva exactum judicium ferre. Videantur super his quædam præcedente *lib. 3. cap. 5.*

Digressio  
seria.

Determina-  
tio spiri-  
tuum per  
nervos.

Non minus explicatu difficile videtur, quomodo per nervos spirituum motus determinativus procedat. iique modo in hos, modò in illos musculos repentè momenti spatio tam copiosi fluant, aut fluere desinant: Hæcque res, propter summam obscuritatem, à Veteribus fere intacta relicta est. Nunc verò, hoc nostro Philosophico seculo, quo quælibet obscura eruuntur, etiam hoc dubium in scenam productum est, idque per valvas quasdam explicare nonnulli tentarunt: inter quorum antesignanos Regius, ut Gordium hunc nodum dissolvat, acuto commento docet, in nervis multas dari valvas (has etsi nunquam sibi aut aliis visas, pro sua tamen imaginatione dipingit, *philosophia natural. lib. 4. cap. 16.*) pro quarum apertione, vel occlusionem, spiritus animales modò ad has, modò ad illas partes majore copia per mentis determinationem fluere, aut refluere, statuit. Verum (cum nihil temere credere nervus sit sapientiæ) hujusmodi valvas in nervis dari, nemo mihi persuadebit, nec ab ullo unquam Anatomico demonstrari, aut saltem aliquam earum umbram exhiberi potuisse, audiui, ne quidem in maximis nervis. Præterea etiam ratio huic opinioni minime favet.

*Primo:* si mediantibus istis valvulis determinativus spirituum influxus peragetur, deberet anima, dum determinationes illas peragit, solummodo occupata esse esse in occlusionem & apertione istarum valvularum, non verò in emissionem spirituum (hi enim è cerebro per cordis & cerebri impulsione continue & sponte influunt) eodem modo sicut organista, qui prout in suo organo musico aperit clauditve has illasve valvas ita spiritum seu statum è folle continue influentem, pro sua determinatione, modo has, modò illas fistulas ingredi facit: & sicut organista ante se habet singularum valvularum claves (ut vulgò vocantur) usque ad singulas valvas extensas, quas prout digitis suis deprimat, vel non deprimat, sic valvas fistularum aperit, vel claudit: ita etiam deberent in cerebro, è quo operationes Animæ procedunt, singula filamenta ad singulas nervorum valvas extendi, quibus ad mentis arbitrium ilico possent occludi, vel aperiri. Cum autem unus sæpe nervus ramos suos ad multos musculos emittat, sicut recurrens nervus ad diaphragma, & singulos laryngis, multosque hyoidis, cervicis, aliarumque partium musculos, deberent necessario singulis ramis addare valvulam, & ab his singulis peculiaribus filamenta usque ad cerebrum protendi, atque sic per unum sæpe nervum, qui ad varias partes excurrit, etsi satis tenuem, qualis est vagus sextæ conjugationis, centum, ducenta, vel plura, pro numero valvularum, ascenderent; qualia valvularum filamenta non dari, nemo non facile concipere potest.

*Secundo:* sicut per prædictas valvas occlusas vel apertas, motus partium celer, tardus, major, aut minor effici, vel planè intermitti dicitur, propter spiritus majore minoreve copia transmissos: sic etiam propter eandem causam ex determinatione mentis sensus tactus in partibus sentientibus major, minor, acutior, vel stupidior, pro arbitrio, fieret, imò interdum intermitteret, quod tamen nunquam fieri cuilibet notum est. Aliquis potest quidem pro arbitrio manum movere, vel non movere, sed nunquam ex suo arbitrio poterit efficere, ut cutis manus modò magis, modò minus, modò plane non sentiat, quod tamen facere posset, si dictæ valvulæ in nervis darentur, & ad mentis arbitrium moverentur.

*Tertio:* Fottasse quis dicet, has valvas non moveri sicuti valvulæ organi musici in templo per filamenta seu claves moventur, sed eas aperiri & claudi per influxum spirituum animalium. Hoc minime verum esse, facile potest doceri: nam spiritus animales è cerebro & medulla in nervos

vas

vos influentes & impulsos, semper recta progredi, nunquam verò regredi, satis patet ex continua cerebri pulsione (alternatim enim dilatatur & subsidit, ex arteriis recipit; & per nervos expellit) & nullius rei repulsione. In progressu autem semper iis patet transitus per valvulas, ita, ut dicitur, positas, ut sine impedimento transire possint. Jam quid, quæso, est quod illas in varia spirituum determinatione, modò minimo temporis punctulo occludat, modò rursus aperiat? Influens spiritus id facere non potest, quia ille influendo valvulas solummodo aperit: refluens verò spiritus non datur, quia nihil est quod spiritum influentem repellat, nec etiam anima id facere potest, nam qui effluxit è cerebro in nervos, ille jam est extra vim & imperium determinantis, suæque officia à mente ipsi demandata exequitur suo profluxu, quo in partes, ad quas determinatur, copiosior influit, nihil verò in momenti puncto eum à parte revocare potest ad arbitrium quippe in corpore nostro sanguinem & spiritus per impulsionem semper promoveri, non verò per easdem vias repelli, certum est.

*Quarto*: valvulæ dantur, & possunt tantum existere in vasis manifestam cavitatem habentibus, ut lacteis, lymphaticis, & venis, utpote in quibus solis ipsis spatium conceditur aut patet, in quo consistere & expandi queunt: atque in nervis nulla est manifesta cavitas, sed toti quanti sunt in fibras & longa filamenta distrahuntur: imò in vulnerato & non penitus abscisso nervo, illa filamenta quæ difficilia erant, in curatione ad latitudinis manus longitudinem, magno cum ægri dolore, à reliquis non difficilis paulatim sponte separata vidimus, & ipsimet extraximus, reliqua circiter dimidia nervi parte integra manente (visum hoc nobis in Domino de Bregarde, ut & in vicecapitano Domini de Somerdijk legionis equitum præfecti, qui ambo in brachio erant vulnerati) & peracta sanatione, muniis suis, ut antea, fungente: neque in talibus raris casibus ulla à nobis cavitas in nervis observari potuit: & si in iis valvulæ aliquæ extitissent, illæ necessario per dimidii corporis nervi secundum longitudinem ablationem, dilaceratæ fuissent, neque nervus postea suo officio fungi potuisset, quod tamen fecit. Præterea, si quis valvulas quærat in magno aliquo nervo, sive crudo sive cocto, ille longa duntaxat filamenta, nullam verò cavitatem, & multo minus valvulas; aut umbram aliquam valvularum, quacunque arte inquisiverit, in eoinveniet.

Cartesius, *lib. de homine* (quem librum magna ex parte super hoc valvularum fundamento extruxit) alique ejus affectæ, præ-

dictos scopulos animadvertentes, & tamen spirituum animalium determinativum motum per has valvulas explicare volentes, de iis tam generaliter non loquuntur, sed rem paulo aliter proponunt: quippe docent, non quidem ubique in nervis valvulas existere, sed illas duntaxat iis in locis, quibus nervi in ramos divisi diversos musculos ingrediuntur: & sic tradunt, uno musculo à spiritibus majore impetu è cerebro in eum irrumpentibus, dilatato, ac secundum latitudinem intumescente, hincque secundum longitudinem contracto, mox in altero, per compressionem ab illo dilatato factam, spiritus repellit sursum, & impelli in illam valvulam ad nervi bifurcationem positam, cumque eam transire non possint, statim influere in alterum bifurcationis ramum, ad alium musculum vicinum vel oppositum contrahendum, ejusque intumescentiam augendum. Verum hanc doctrinam illud facile evertit, quod non frequenter, sed rarissime, ejusdem nervi bifurcationes, seu ramificationes in musculos sibi invicem oppositos aut vicinos, membraque contrariis motibus moventes, inserantur, ita ut talis spirituum regressus ad valvulam bifurcationi appositam omnino statui non possit, cum multoties non adit talis bifurcatio, sed singuli sæpe musculi diversos recipiant nervos. Sicut, ex. gr. musculi recti abdominis corpus antrosum flectentes, musculi dorso ac lumborum, corpus retrorsum flectentes, singuli propriis ac diversis donantur nervis. Cum jam corpore retrorsum inflexo, ilicò sit reflexio antrosum, an quis bene dicet, eo ipso momenti puncto, quo spiritus celerrime, tempore minimi nictus oculi, copiosiores influunt in musculos rectos abdominis, illam horum musculorum intumescentiam mox ita premere musculos dorso, ut spiritus ex iis mox influant in hos? sed per quas, quæso, vias? nervi sunt diversi, iique, ut & ipsi musculi, longe à se invicem distiti: nulla certè pressura musculorum laxandorum, nullæ valvulæ hic in subsidium vocari possunt. Idem illud adhuc manifestius patebit in motu pedum & manuum: nam si post motionem pedum moveantur statim manus, an tunc per intumescentiam musculorum manuum ita comprimuntur musculi pedum, ut spiritus ilico ex his in illos demigrare cogantur? & quid si toto reliquo corpore quiescente, soli pedes & manus simul moveantur, ex quibus aliis musculis tunc per compressionem, ab horum intumescencia factam, spiritus in hos deturbandi exprimentur? in hoc saltem casu, neque musculorum oppositio aut vicinia, neque nervorum bifurcationes aut valvulæ, quidquam facere poterunt. Ad hæc, præsupponit illa sententia unius musculi dilatationem, atque

Sff

atque

An valvula adferat  
nervorum  
bifurcationem.

atque hinc contractionem, antequam alter laxandus premitur, nam dicit, per unius contractionem & dilatationem alterum premi: quod si verum est, non erit necesse ut spiritus ex uno musculo moveantur & pellantur in alium, ad alterius contractionem faciendam vel adjuvandam, quia intumescencia & contractio præsupponitur jam fieri antequam alius premitur, igitur fit illa sine ope spirituum ex alio musculo influentium, imò illa dilatio & contractio ponitur causa pressionis: causa autem cum debeat præcedere causatum, deberet primaria pressio præcedere contractionem, quod cum hic non fieri dicatur, clarissime patet contractionem & intumescenciam illam non fieri à spiritibus ex alio musculo in oppositum aut vicinum influentibus, sed duntaxat à spiritibus aliunde, scilicet è cerebro per alios nervos influentibus: nam primo debet unus musculus distendi, antequam alter premi possit, & si sufficienter distendatur à spiritibus è cerebro influentibus, quid opus erit spiritibus ex aliis musculis petitis vel expressis? Hic fortasse rogabit quis, si spiritus tali modo per nervos ex uno musculo non resiliant in alium, qui fiet, quod dum unus contrahitur, alter tam celeriter eo ipso temporis puncto laxetur, & quorsum spiritus, qui illi inerant, tam citò diffuant? Respondeo, musculos per continuum & solito copiosorem spirituum influxum intumescenciam suam nancisci & servare: sed spirituum determinatione copiosa repente aliorum facta illos mox laxari, spiritusque in iis contentos mox per poros diffuere (hinc per gravia exercitia fit spirituum magna dissipatio, & lassitudo) nam illi spiritus, qui adeo tenues sunt, ut per angustissimos nervorum poros rapidissime transire ac moveri queant, longe facilius momenti spatio transeunt ac dissipantur per poros musculorum multo laxiores. Sed faciamus aliquam similitudinem. Si quis saccum habeat coriaceum, ex cuius inferiore parte varii oblongi tenues tubuli, ex molli flaccido corio confecti, multisque minimis foraminulis hic illic pertusi, producantur, eumque saccum, alligato folle, fortiter inflet, tunc omnes illi tubuli ilico intumescunt, tumidique manebunt, quousque ventus continuus in eos inflatur: interea si quis alicujus tubuli exordium circa saccum digitis constringat, ille tubulus statim latus concidet; non quod ventus, qui huic in est, retrorsum fluat ad alium tubulum jam intumescencem, sed quia non succedente amplius continuo vento, eoque qui inerat per minima foraminula, quibus pertusus est, celerrime elabente, laxi parietes se distentos sustinere nequeant, atque hinc ilico concidant. Ita etiam se res habet in musculis: illi enim in-

tumescunt quo usque copiosus influxus spirituum perpetuat, sed eo desinente ilico laxantur, spiritusque in iis contenti mox diffuunt per poros. Neque ulla ratio est quare tam tenues celerrimeque mobiles halitus contrario potius flumine è musculi fibris in eosdem nervos, per quos descenderunt, rursus ascenderent, atque in valvulam alicubi impingentes, in alium musculum influerent, quam per musculi poros multo laxiores effluerent.

Verum hic una difficultas objicitur, scilicet, si valvulae non dentur, quarum ratione spiritus animales ab uno in alium, vel ab his in illos musculos moveantur, qui fiat, quod, cessante determinatione è cerebro facta, tamen variae partes adhuc per suos musculos moveantur & sentire videantur? quidnam spiritus ab his in illos tunc propellat, in iisque motum & aliqualem molestiam illat? perceptionem per paucillum temporis adhuc continuet? quidnam illos circa musculos detineat, si non sint valvularum impedimenta? ex. gr. cum serpenti aut anguillae caput abscinditur, aut dimidium corpus rescatur, pars à capite resecta aliquamdiu adhuc movetur: sic etiam cum anseri, Gallinae, aut columbae caput detrahitur, moventur adhuc aliquamdiu alae & pedes: idemque contingit in ranis quibus caput abscissum est, quarum musculi, si statim post capitis abscissionem pungantur, sese adhuc contrahunt, et si nullus amplius spirituum animalium profluxus è cerebro jam ablato in musculos fieri possit: quod certè aliter contingere non posse videtur quam per valvulas, eo modo ut à Cartesio proponitur. Respondeo: Spiritus animales semper continuato ductu (modò majore, modò minore copia, pro varia determinatione mentis in homine, & mentis analogi in brutis) è cerebro in spinalem medullam, & ex hac per nervos profluunt ulterius ad partes, non verò per eandem viam, per quam semel transierunt, unquam regrediuntur, ut modò dictum: in dictis autem serpentibus, avibus, & ranis spiritus animales valde copiosi infarcti & collecti sunt in spinali medulla & funiculis istis ex quibus illa constat, qui ab impetu ipsis è cerebro antea impresso seu dato, fluunt adhuc aliquamdiu in partes & musculos nondum perfecte mortuos, sed propter spiritus vitales & animales, qui in eos è corde & spinali medulla etiamnum nonnihil influunt, adhuc aliquantulum viventes, imò & punctiōem ipsis illatam hac de causa obscuro modo adhuc nonnihil sentientes (sicut in catalepticis, in quibus externorum sensuum objecta externa in cerebro non percipiuntur, & partes tamen compunctae se adhuc contrahunt) cum caput jam ablatum est (eodem modo sicut in

*Difficultas.*

in

in fluxu maris, aqua in flumen ascendens adhuc aliquamdiu, à primo impetu mota, in superiore parte fluminis ascendit, cum jam sæpe ante horam unam in inferiore parte fluminis versus primum suum motorem, scilicet mare, reflucere cœperit) sed quia impetus ille non diu durat (ob cerebrum enim ablatum non continuatur) sed paulatim imminuitur, hinc etiam paulatim definit spirituum influxus & illarum partium motus, omnisque obscura, quæ adesse visa fuit, sensatio. Neque hic opus est effingere aliquas in nervis valvulas, refluentes spiritus sistentes, cum ille motus & obscura rei molestæ sensatio, fiat à spiritibus è medulla spinali adhuc in musculos influentibus, non verò ab iis qui antea in eos influxerant, & post ablatum caput regrediuntur atque abeunt ad alios: quidnam enim eos puncti temporis spatio ex his musculis in alios impelleret? non aliqua anima in cerebro suas operationes exercens, utpote cujus actiones in cerebro cessant ablato capite, atque tunc nullius doloris alteriusve rei amplius fit in cerebro perfectæ perceptio, licet aliqua valde obscura adhuc fieri videatur in nonnullis musculis & membranis (in capite enim omnem perfectam perceptionem fieri, patet in apoplecticis & catalepticis, qui momenti spatio ea privantur, propter affectum cerebrum) cujus perfectæ perceptionis ratione ulla certa spirituum determinatio ad hos illosve musculos fieri posset. Si dicatur, illam determinationem ante abscissum caput in hos illosve musculos factam fuisse, hoc tamen non probat illum motum, post abscissum caput contingentem, fieri à spiritibus in valvulas nervorum impingentibus, & ex his illisve musculis ultro citroque minimi momenti spatio comeantibus: nam quidnam eos ex his in illos identidem impelleret? abscisso capite nulla fit nova determinatio: pressura unius musculi per alterius intumescens statui non potest, ut ante probatum: quidnam enim hunc musculum intumescere faceret, ut alter ab eo premeretur? non spiritus ex hoc in priorem refluens, quia nihil est quod hunc reflucere cogit ad alterum, & nulla amplius fit nova determinatio ad musculum flaccidum, ita ut ille, nec per novam determinationem, nec per ullam pressionem istos spiritus ex altero in se compellere possit. In cuniculis & felibus strangulatis statim post mortem aperto infimo ventre, adhuc conspicitur egregius quidam vermiculans motus in fibris intestinorum aliquamdiu perdurans, qui certè nullis valvulis adscribi, nulli pressionis ab intumescens aliquo musculo factæ imputari potest, sed fit solummodo à spiritibus ante mortem è cerebro versus spinalem medullam fortiter motis, eumque motus impetum post mortem ad-

huc nonnihil servantibus (sicut de maris in flumen influxu modò diximus) & sic in illas intestinorum fibras adhuc aliquamdiu inordinatè influentibus. Non est autem quod tale quid in solis brutis contingere putemus, sed etiam in hominibus fieri posse: quippe cum juvenis Leydæ studiis incumbere, vidimus ibi virum homicidam, procerum & fortem, qui à iudicibus mortè condemnatus, & publice decollatus fuit; sed capite amputato ac de trunco decidente, mox erectus surrexit, & in pedes nonnihil substitit: quod certe factum non fuit ob aliquas nervorum valvulas, sed, procul dubio, quia vir ille, extremum gladii ictum expectans, cogitaverat statim assurgere, & sic spiritus animales jam erant determinati ad musculos crura extendentes, qui illo impetu moti, dum ictus gladii ejus cervicem præscindit, illum statim post ictum elevarunt, & aliquantisper erectum sustinuerunt; licet caput modò resectum esset.

Ita ut ex his omnibus concludendum sit, valvulas nervorum esse merè imaginarias, & fortè commodioris doctrinæ potius, quam veritatis gratia excogitatas, quamvis nulla commodior doctrina, quam quæ ab ipsa veritate desumitur, inveniri aut quæri possit, vel debeat.

Quomodo igitur repentinus ille motus, seu velocissima illa determinatio spirituum tam promptè modò per hunc nervum ad unum, modò per istum nervum ad alium musculum, peragatur; & quid modò hunc nervum magis laxet, modò illum magis constringat, Veteres, tanquam rem speculationibus suis altiore, meritò præterierunt, quam etiam nos puto melius ignorare velle, quam explicare posse.

Nervorum differentiarum variae sunt. 1. *Ratione substantiae & qualitatis*, alii sunt crassiores, alii tenuiores: item, alii molliores, ut illi qui ex medulla intra cranium exeunt, & illi etiam qui brevi via ad partes sentientes, aut levi tantum motu movendas excurrunt: alii verò duriores, ut illi qui per longiora spatia, & ad partes fortius movendas feruntur, atque è medulla extra cranium elapsa egrediuntur. 2. *Ratione quantitatis*, alii sunt magni, alii parvi, alii longi, alii breves. 3. *Ratione ortus*, alii ex medulla intra cranium adhuc subsistente, alii ex eadem cranium jam egressa procedunt. 4. *Ratione pororum*, alii magis porosi sunt, ut optici; alii minus, ut reliqui nervi minores.

Numerantur autem nervorum paria, seu conjugationes triginta novem, cum uno nervo impari. Scilicet novem paria è medulla cerebri intra cranium orta: triginta extra illud è medulla spinali per foramina vertebrarum prodeuntia: nempe, cervicis paria octo, thoracis duodecim, lumborum quina-

quinque, ossis sacri quinque. Huic numero adiciendus est nervus sine pari, exiens è fine spinalis medullæ, quem tamen Ferlius, *lib. 1. physiol. cap. 1.* inter vincula potius numerandum censet. Differt autem hic numerus ab eorum computatione, qui intra cranium duntaxat septem nervorum paria, secundum Galenum, constituunt, cum potius sint novem (describuntur *precedente lib. 3. cap. 8.*) & sic triginta septem

paria, cum uno impari, numerant.

Quantum ad nervorum divaricationes, ut & ramiolos, eorum numerus est innumerus, neque tanta Anatomicorum sagacitas inquam fuit vel erit, ut illos omnes describere possint: majores verò & primarii, qui maxime notabiles sunt, & visui occurrunt, sequentibus capitibus à nobis, quam fieri poterit exactissimè, proponuntur.

## C A P U T II.

### DE NERVIS CERVICIS.



E nervis è medulla cerebri oblongata intra cranium prodeuntibus, satis superque dictum *precedente lib. 3. cap. 8.*

E spinæ autem medulla (de qua latius actum *lib. 3. cap. 7.*) plurimi nervi egrediuntur, quorum Anatomici pro ratione foraminum vertebrarum, tot numerant conjugationes, quot sunt foramina è quibus exeunt.

Nervorum tunica.

Nervi autem ex medulla spinali prodeuntes, ex pluribus filamentis constant, quæ à tenui meninge simul comprehensa unum nervum efficiunt, qui quo crassior, eo in plura filamenta diffinditur, quod dissicillâ membranâ apparet. Ne autem fibræ seu filamenta illa in primo exitu à se invicem divellerentur, primò tenui meningi dura mater circumjicitur, ac deinde ipsis per vertebrarum foramina egressuris substantia quædam carnosior, instar ligamenti, superadditur, qua firmiter connectuntur. Post egressum verò facile rursus separantur. Quomodo per spinæ foramina egrediantur, dictum *precedente capite.*

Ex medulla verò in spinam prolapsa (ubi *Spinalis*, & Galeno, *dorsalis medulla* appellari solet) exeuntes nervi, pro ordine quo e medulla descendunt, faciliore doctrinæ gratia, dividuntur in nervos cervicis, dorsi seu thoracis, lumborum, & ossis sacri.

Nervi cervicis.

Ex medulla cervicis vertebrae transeunte procedunt paria octo, aliis septem, qui infimum par nervis thoracis annumerant.

1. 2.

Primum & secundum par, ab anteriore medullæ parte enatum, non à latere, sed ne ob peculiarem articulationem primæ & secundæ vertebræ laderentur: gemino principio oriuntur, & sic prodeunt parte anteriore & posteriore: illud scilicet inter occiput & primam vertebra: hoc inter primam & secundam vertebra: ad latera dentis. Illius autem *primi paris principium prius* in musculos collo insidentes, &

œsophago substratos, cervicis nempe flexores, distribuitur. At *principium ejus posterius* (quod una cum priore per foramen occipitis ossi & primæ vertebræ commune excidit) gemino furculo procedit: quorum gracilior in rectos minores, & superiores obliquos capitis extensores musculos distribuitur: alter vero principio musculi scapulam attollentis inseritur. Verum *Secundi paris principium prius ac gracilius*, ad latus processus dentiformis exiens, in musculos colli (quemadmodum & primi paris ramus prior) distribuitur, ac totum fere in faciei cutem absumitur. *Posterius verò principium*, per latera posterioris secundæ vertebræ processus erumpens, mox in duos ramos inæquales finditur. Horum *crassior*, versus posteriora tendens, seque cum tertii nervorum paris furculo tertio jungens, musculos cervicis posteriores omnes perreptat, ac denique auribus ex parte communicatus. summum verticem conscendit, atque in capitis cutem absumitur. *Alter verò tenuior*, in rectos majores & obliquos inferioris capitis extendentes musculos distribuitur.

3.

Tertium par, utrimque ex laterali foramine, quod inter secundam & tertiam vertebra: excavatum est, profiliens, statim ab egressu in duos ramos scinditur. Horum *Anterior* rursus in quatuor propagines subdividitur: quarum *prima* ad primum cervicem flexentium musculum, longum dictum, excurrit: *secunda* descendens, cum furculo quarti paris unita, definit in musculos œsophago substratos: *tertia* ascendens, & cum secundi paris crassiore ramo concurrens, in capitis posterioris cutaneas partes absumitur: quarta, emissis ramis ad musculos cervicem extendentes, in transversis processibus ad cervicis finem subsistentibus, ut & in scapulæ elevatorum, ad initium cervicis situm, tandem in quadratum buccas detrahentem exhauritur. *Posterior* hujus paris *ramus* musculorum

culorum secundo thoracem extendentium pari implantatur.

4. **Quartum par**, inter tertiam quartamque vertebram exiens, mox in duos ramos inæquales diducitur. Horum *anterior & major* rursus in tres furculos tripartitur: quorum *primus* cum alio tertii ramo junctus, primum & longum musculorum par, cervicem flectentium, ingreditur: *alter* ad transversalem musculum, cervicem extendentem, & primum scapulæ, cucullarem dictum, fertur: *tertius*, cæteris gracilior, cum quinti sextique parvis furculo junctus, juxtaque mediastinum & pericardium descendens, una cum istis furculis nervum diaphragmaticum constituit. *Posterior & minor*, retrorsum versus spinam procedens, istius loci musculis varios ramos largitur, atque inde inter quadratum, buccas detrahentem, fertur.

5. **Quintum par**, inter quartam & quintam vertebram exiliens, in duos quoque ramos dirimitur, anteriorem scilicet, & posteriorem. *Anterior* quatuor furculos emittit: quorum *primus* ad cervicis flexores fertur. Secundus cum quarti & sexti parvis propaginibus (quandoque septimi, cum nempe quarti ramus deest) juxta latus œsophagi secundum anteriora vertebrarum descendens, diaphragmatis medio inferitur, in eoque nervum phrenicum constituit. *Tertius* ad deltoideum, seu attollentem humeri musculum, per sedem humeri superiorem & externam, progreditur, atque inde ramulos ad cucullarem & levatorem scapulæ musculum emittit. *Quartus* ad scapulæ cervicem accedens, in duos ramos bipartitur: quorum *unus* in deltoideum, qua parte à clavicula recedit, fertur; *alter*, qui paulo crassior, versus spinam torquetur, & eodem modo ac posterior quarti parvis ramus, distribuitur.

6. **Sextum par**, sub quinta vertebra elapsum, in duos etiam ramos divisum, *Anteriore & majore*, ubi furculum ad nervum Phrenicum (de quo modo dictum) constituturum, quem cum quarti quintique parvis ramulo junctum, efficit, propagavit,

ulterius procedens, cum duobus sequentibus, septimo scilicet colli & primo thoracis pari unitur; rursusque ab illis recedit, & iterum cum iis unitus, retiformem illum plexum efformat a quo nervi prodeunt qui ad brachium feruntur. *Posteriore* verò *minore* fertur ad musculos posticos caput & cervicem extendentes.

7. **Septimum par**, per commune foramen sextæ septimæque vertebræ exit. Hujus *Anterior majorque ramus* cum sexto colli (de quo modò dictum) & primo thoracis (qui nobis est octavus cervicis) statim ab egressu suo jungitur, & ad brachium maxima parte cum cæteris fertur. *Posterior* verò & *minor ramus* ad musculos cervici incumbentes, & quadratum, buccas detrahentem, abit.

8. **Octavum par** (hoc aliis est primum thoracis) inter ultimam cervicis & primam thoracis vertebram egressum, mox etiam in duos ramos finditur. *Anteriore majore* cervicis septimo & thoracis primo nervo unitur, sicque totus in brachia postmodum dispergitur, excepta unica propagine, quæ ad principium ejus enata, dictis conjungitur, & in priora, juxta primæ thoracis costæ longitudinem, ad sternum deducitur, furculum etiam subclaviæ musculo tribuens: deinde sursum reflexus, in musculos à sterne summo ortos, absumitur, scilicet in mastoideum, sterno hyoideum, & hyoideum, in quos tamen nonnunquam aliqui etiam rami à sexta cerebri conjugatione & tertia thoracis transmittuntur. Ab eodem tamen ramo, jam in brachium abituro; alia soboles à posteriore parte procedit, quæ musculum scapulæ cavitatem occupantem, ingreditur. *Posteriore minore* sub musculis, qui vertebris adnati sunt, latitat: hinc ramificationes aliquot emittit in secundum cervicis flexorem musculum, nec non in eos qui caput & cervicem extendunt; at circa septimæ vertebræ spinam descendens, in partem inferiorem musculi scapulæ primi, nempe cucullaris, ut & tertii, nempe rhomboidis, & ferratum posticum superiorem, furculos emittit.

## CAPUT III.

## De nervis Thoracis, seu dorso.



Medulla dorsali oriuntur nervorum paria duodecim, qui nervi omnes, mox post egressum, in duos ramos dirimuntur, quorum major semper retrorsum, minor ad posteriora reflectitur.

1. **Primum par**, inter primam & secundam thoracis vertebram exiliens, mox in duos ramos scinditur. Horum *Anterior & major*, quinto, sexto, septimo, & octavo cervicis pari jungitur, cum iisque reticularem contextum efformat, ex quo postea omnes nervi ad brachium descensuri, oriuntur,

oriuntur. Hic quoque secundum primæ costæ ductum usque ad os sternum ramum dimittit, qui primum intercostalem nervum constituit, & furculos in thoraci incumbentes musculos distribuit. *Posterior & minor ramus* eodem modo disseminatur ut cervicis octavi paris ramus posterior.

2. ad 11.

**Decem sequentia paria** similiter ab egressu in ramum anteriorem majorem, & posteriorem minorem dirimuntur. Horum *anteriores rami* totidem ramis, à nervi sexti paris ramo interiore sub pleura descendentes, comitati, intercostales nervos constituunt, qui, una cum arteriis venisque intercostalibus, secundum costæ longitudinem versus anteriora, per sinum qui ab inferiore & interna costarum sede insculptus est, feruntur. At qui ad veras costas pertinent, ad sternum usque progrediuntur: qui verò ad spurias, in abdominis anteriora supra peritonæum feruntur. Ab his multi ramuli ad varios musculos excurrunt: ut ad intercostales externos & internos, duos ferratos anticos, latissimum, qui humerum abducit, & pectoralem, qui humerum adducit: nec non ad primum par musculorum abdominis, totamque thoracis cutem, & ad mammæ papillas, quibus acutissimum sensum impertiunt. *Postiores verò rami* inter musculos vertebrae adnatos versus spinam properant, iisque, ut & ab apicibus spinarum vertebrae ortis musculis (quales sunt, trangularis seu splenius dictus,

rhomboides, cucullaris, latissimus seu aniscliptor, & serratus posticus) nec non cuti dorfi, ramulos concedunt. Observavit Galenus, nervos, qui ex costarum notarum vertebrae erumpunt, iis qui ex superioribus costis exsiliunt majores, & semper circa mediam costam bipartitos esse, unaque parte foras educi, alterâ interiorem costam perreptare. Nos verò observamus illam divisionem non circa mediam costam fieri, sed statim simul ac è vertebrae foraminibus elapsi sunt.

**Duodecimum par** (hoc alijs est lumborum primum) inter ultimam thoracis & primam lumborum vertebrae erumpit, ac protinus in duos ramos dividitur, quorum *Anterior*, qui major est, in carneas appendices diaphragmatis, musculos abdominis oblique descendentes. & primum flectentium musculum *ψῶας* inseritur (ex hujus compressione à calculo in rene commorante fit stupor femoris ejusdem lateris) Ab hoc ramo etiam principium ducit furculus ille qui cum arteria præparante ad testem exporrigitur, de quo supra dictum, lib. 1. cap. 22. quem à primo lumborum pari procedere tradunt Vesalius, Laurentius, & Platerus, utpote quibus primum illud par est nostrum duodecimum thoracis. *Posterior* ingreditur musculos lumborum vertebrae à posteriore parte incumbentes, longissimum scilicet, & sacrolumbum, ac latissimum humeri abductorem.

12.

## CAPUT IV.

## DE NERVIS LUMBORUM.



X medulla spinali lumborum vertebrae contenta procedunt nervorum paria quinque (aliis quatuor, qui par infimum, quod per foramen infimæ lumbi vertebrae & ossi sacro commune prodit, non lumborum, sed ossis sacri nervis annumerant) qui dorsilibus majores sunt, & singuli in duos ramos dirimuntur: quorum *Antiores* ad musculos abdominis: *Postiores* ad musculos vertebrae spinis ossibusque innominatis incumbentes feruntur, simul ramulos aliquot cuti lumbos investienti tribuunt. Antiores autem aliquo spatio inter se juncti, plexum istum simul constituunt e quo nervi ad crura dimittendi procedunt.

1.

**Par primum**, inter primam & secundam lumborum vertebrae, sub musculo *ψῶας*, egreditur, & *Antiore propagine* ad musculum femur flectentium secundum, & primum ti-

biam flectentium fascialem, nec non cutim femoris digeritur. *Postiore* verò abdomen egressum, tribus femur extendentium sive glutæis, & tibiae extensori membranofo prospicit.

**Secundum par**, inter secundam & tertiam vertebrae, sub primo femur flectentium musculo, procedit. Hujus *Anterior ramus* prope ossa ileum transiens, duas propagines emittit, unam ad genui ejusque cutem: alteram longiorem, quæ venam saphænam comitatur. *Posterior* verò reflectitur, & musculos lumbis instratos ingreditur.

2.

**Tertium par**, quod lumbalium nervorum maximum est, sub dicto musculo femur flectente, tum pubis ossi, delatum, venam & arteriam cruralem comitatur. Columbus scribit ab eo propaginem ad inguen, scrotum, & penis cutem extendi:

3.

quam



quam tamen Bauhinus notavit ab ossis sacri medulla eo mitti.

4.

**Quartum par** inter quartam & quintam vertebram emergit, ejusque *Anterior ramus* per foramen, quod est inter os coxendicis, pubis, & ileum, transit, & propagines duobus femur circumagentibus, obturatoribus dictis: item alias femur flectentium secundo & tertio: nec non alias penis musculi distribuit: ab hoc etiam putant nonnulli ad collum uteri & vesicæ ramulos dimitti. *Posterior* in musculos & cutem vertebris instratam abit.

**Quintum par** (hoc aliis est ossis sacri primum) inter ultimam lumborum vertebram & ossis sacri partem supremam exiliens, similiter ac reliqua, in duos ramos dividitur: quorum *Anterior* nervis ad cruribus majore parte admiscetur, & furculum juxta ossis ileum internam regionem, ad musculos abdominis, & secundum femur flectentium mittit. *Posterior* in musculos ab ileum osse pronatos, maximeque in femur extendentium, sive glutæum magnum, tum cutim natium disseminatur.

## CAPUT V.

## De nervis ex medulla ossis sacri prodeuntibus.



Medulla ossis sacri cavitate contenta procedunt nervorum paria quinque, qui nervi antequam ex hujus ossis foraminibus egrediuntur, singuli dividuntur in ramum anteriorem seu interiorem, & posteriorem seu exteriorem, qui antrorsum & retrorsum per foramen transversum elabuntur.

*Anteriores* tres superiores ad crura abeunt: duo inferiores ad musculos vesicæ & ani: item ad perinæum & pudenda externa, atque in viris ad penem & scrotum, in feminis ad uteri cervicem.

*Posteriores* distribuuntur musculis posteriore sedem ossis ileum & sacri occupantibus, quales sunt primus & tertius thoracem extendentium, sive dorsi longissimus & sacrolumbus: flexor lumborum, sacer dictus; latissimus humerum abducens, tres glutæi dicti, qui nates constituunt.

*Finis vero medulla spinalis*, in coccygis os penetrans, unam propaginem emittit, ideo **Sine pari** nominatam, quæ primo in duos, hinc in plures furculos dividitur, ad nates, anum, & quosdam femoris musculos excurrentes. Fernellius hunc nervum **sine pari** vinculis annumerat.

## CAPUT VI.

## De nervis brachii, &amp; manus.



Ost nervos per viscera & musculos trium ventrium dispersos, superest ut de artuum nervis agamus, brachiorum scilicet & crurum.

E spinali medulla, per communia vertebrarum foramina, in quodque brachium feruntur nervi quinque, nempe ex pari quinto, sexto, septimo, & octavo cervicis, ac primo thoracis. Hi autem nervi statim ab exitu inter se anterioribus majoribusque ramis uniuntur, qui mox à se iterum separantur, rursusque juncti adhuc semel separantur, sicque retiformem quandam plexum efformant, qui sub clavicula, ad arteriæ venæque axillaris egressum, prodit: à quo plexu denuo expediti, ad brachium sui lateris descendunt, ita tamen ut propter dictam iteratam implicationem & extricationem, incertus sit verus singulorum exortus, isque ab Anatomicis vix ali-

ter quam per verosimilem aliquam conjecturam describi possit.

**Primus nervus** ex quinto pari gemino ramo producit, quorum *unus* ad secundum humeri musculum deltoideum, & ipsi instratam cutem: *alter* versus scapulæ cervicem fertur, atque ibi in duos rursus finditur, quorum *prior* deltoidei, circa exortum à clavicula, inseritur: *Posterior* quartum par musculorum ossis hyoidis, coracohyoideum, ingreditur, inde super scapulari superiori, & deltoidei, quo loco scapulæ spina oritur, ramulum largitur. Hic per humeri elatiorem partem, at reliqui nervi per alam ad brachium feruntur, ibidemque in plures ramos dirimuntur.

**Secundus**, crassior, per anteriorem mediamque brachii partem sub musculo bicipite delatus, ejusdemque duobus capitibus, nec non capiti longioris radium pronato-

Plexus retiformis.

1.

2.

natoris ramulos tribuens, infra cubiti flexuram in duos ramos dividitur; quorum *externus gracilior*, cum venæ cephalicæ ramo per cubiti sedem externam aliquo usque delatus, pollicis internodium primum & secundum ingreditur. *Internus major*, sub vena mediana in duos ramos subdividitur: quorum *exterior* oblique sub cute procedens, relictâ venâ versus radium procedit, usque ad carpum: *interior* verò basilicæ ramo interiori attensus, & obliquo ductu incedens, circa cubitum in duos præcipuos ramos scinditur, quorum *unus* per radii, *alter* per cubiti regionem ad carpum abit, hocque superato, in manus internæ cutem absumitur.

3. **Tertius**, antequam brachium attingit, ramulum inter musculus humerum abducentem & deltoideum projicit: hinc ad brachium, sub musculo bicipite, procedens, surculum in caput secundi cubitum flectentis emittit. Hinc descendens, una cum secundi nervi ramo, in cubiti flexura internum ossis humeri tuberculum accedit anteriore sede. Hoc ubi superavit, varios surculos projicit, qui ramulis à quinto nervo, per ejusdem tuberculi posticam regionem delatis, juncti, in musculos internam cubiti sedem occupantes, & ab interno humeri tuberculo enatos, distribuuntur, scilicet in duos digitorum quatuor extrema internodia flectentes, & unam qui pollicis articulum tertium curvat. Inde aliam propaginem ejicit, quæ inter dictos musculos per radium versus carpum descendit, & sub transverso ligamento transiens, tenues aliquos surculos dimittit in abductorem pollicis musculus, & duos primum ejusdem articulum flectentes. Postea, ubi ad volam manus pervenit, in tres ramos dirimitur: quorum *primus* surculos duos pollicis: *secundus* duos indici: *tertius* unum medio digito circa internum latus tribuit.

4. **Quartus**, crassitie reliquos circiter triplo superans, per brachium, inter musculos in profundis latitans, una cum arteria axillari venaque basilica, defertur. Brachium autem ingressus, mox plures exiguos surculos in capita musculorum cubitum extendentium, & cutem brachii sedem internam investientem, sursum deorsumque projicit. Hinc per sinum, posterius ossis humeri tuberculo insculptum, versus

posteriora procedens, ibi in cutem brachii abit, indeque ad carpum usque descendit. Juxta cubiti autem articulum in duos ramos dividitur, qui inter musculos ad carpum descendunt. Horum *externus*, secundum radii longitudinem productus, & ad carpum ab exteriori parte ligamentum transversum transiens, ibi in duos ramos subdividitur, quorum unus, duplici surculo in externam pollicis sedem; alter, partim in indicem partim in medium digitum inseritur. *Internus* verò, secundum cubiti longitudinem porrectus, plures ramificationes emittit: 1. In musculus primum extensorem digitorum. 2. In extendentium digitos secundum. 3. In extendentium carpum interiorem. Hinc in progressu tribus musculorum principiis, à cubiti osse originem ducentibus, propagines largitur. Reliquum quod superest in carpum definit & absumitur.

**Quintus**, ab inferiore parte antedicti plexus retiformis procedens, quartoque junctus, per brachii internam sedem, inter musculos cubitum flectentes & extendentes, descendit, & integer usque ad internum humeri tuberculum progreditur, atque ibi, una cum tertio nervo, propagines emittit in musculos ab illo tuberculo enatos, & internam cubiti sedem occupantes. Surculum quoque ulterius inter musculos secundum & tertium digitorum internodia flectentes, projicit ad volam manus; ubi tres ramos educit: quorum *primus* bipartitus, minimi digiti interiorem partem ingreditur: *secundus*, etiam bipartitus, in annularem: *tertius* ad interni lateris medii digiti externam sedem progreditur. Porro, idem hic quintus nervus, ab externo latere, juxta medium longitudinis radii, alium surculum projicit, qui in tres ramos divisus, externam partem medii, annularis, & minimi digiti ingreditur.

**Sextus**, (qui, præter quinque prænomatos ordinarios, interdum adjungitur) ab infima plexus retiformis parte emergens, per interiorem humeri ac cubiti sedem descendit, surculis multis in itinere ad vicinam cutem dispersis. Cum internum ossis humeri tuberculum attingit, in multas propagines dirimitur, quæ basilicæ venæ ramis comitatæ, ad carpum venientes sub cute evanescent.

C A-

## CAPUT VII.

## De nervis crurum, &amp; pedum.



Nervorum ad crura descendentium sunt quatuor paria; eaque oriuntur ex septem paribus à spinali medulla descendentibus, scilicet à lumborum quatuor paribus inferioribus, & ossis sacri tribus superioribus, qui omnes in exortu commixti, retiformem plexum efformant, è quo in utroque latere dicti quatuor nervi exeunt, crassitie & ductu differentes. Eorum enim *primus & tertius*, cum non ultra femur excurrant, breviores & tenuiores sunt: *secundus* longior & crassior est, per medium femur, usque ad tibiam extensus: *quartus*, priores crassitie & longitudine multum superans, per femur & tibiam usque ad digitorum apices defertur. Horum autem tres priores sunt antichi, quartus posticus.

Plexus retiformis.

1.

*Primus* ex elatiore plexu retiformis parte, qua *secundus* lumborum nervus cum *tertio* cōit, exoritur, ingrediturque duos femur extendentium musculos, ejusdemque cutem, ramulos etiam concedens primo musculo tibiam flectentium, ut & secundo ac *tertio* eandem extendentium: atque supra articulum genu terminatur.

2.

*Secundus*, ex eodem fonte, proxime sub primo, exsiliens, cum arteria & vena crurali per inguina ad femur abit, ejusque musculos interiores & anteriores, atque etiam tibiæ octavum ingreditur, vicinis membranis & cuti etiam ramulos tribuens, unumque insignem furculum versus pedem dimittens. Laurentius, Spigelius, alique male statuunt hunc saphænæ conjungi, eaque de causa hujus venæ sectionem esse nonnihil periculosam, cum tamen illa sola progrediatur, & nervo comite careat.

3.

*Tertius*, ex plexu mox sub secundo

natus, ac super secundum femur flectentium musculum delatus, foramen ossis pubis transit, ac quinto, nono, & decimo femoris musculo, peni ejusque musculis erigentibus, & cuti femoris interioris furculos porrigit: reliqua parte in alto permanet, notabilem propaginem in secundum & tertium tibiam flectentium dimittens.

*Quartus* (hunc Bartholinus aliquando duplicem in exortu & progressu notavit) omnium totius corporis nervorum crassissimus, siccissimus, & validissimus, ex infimo lumborum & ossis sacri tribus superioribus paribus conflatus, postquam femori & nati cuti prospexit, furculos emittit ad aliquot fessores, tibiæ, & pedis musculos. Hinc trunco ulterius descendens, ad flexum genu in poplite dividitur in ramum exteriorem & interiorem. Horum *exterior*, qui gracilior, ad poplitem, pedis exteriora, musculos perinæos, & malleolum externum producit, in via multos furculos cuti tribuens. *Interior*, qui major, secundum tibiam ad musculos pedis & digitorum, pollicem, plantam, & suræ cutem fertur, & in utrumque inferius digitorum latus sobolem dispescit. Quo circa omnes nervi infra genu ad tibiam & pedem delati, ab hoc quarto crurali procedunt, excepto illo ramo qui à secundo pari juxta malleolum descendit.

Notandum nos hoc libro nullos cutaneos nervos speciatim descripsisse, cum ad cutem solummodo deferantur ramuli exiles à nervis vicinis educti, quorum hic illic, ubi eorum productio nonnihil conspicua est, mentionem fecimus, sed exactam omnium cutaneorum descriptionem dare, impossibile arbitramur, atque hinc etiam nulli Anatomici hæcenus illam provinciam suscipere ausi fuerunt.

4. !

T t t

A N A-

# A N A T O M E S

## L I B E R I X.

### D E

# O S S I B U S.

### C A P U T I.

### D E O S S I B U S I N G E N E R E.

Quare osteo-  
logia ul-  
mo loco de-  
scribenda.



**A**B ossium historia multi Anatomici, Galenum secuti, descriptionem Anatomes exordiantur, propterea quod ossa sint stabilimentum totius corporis, sine quo reliquæ partes subsistere non possunt. Nam Natura, inquit Galenus, *lib. an omnes partes simul fiant*, artifices navem condituras æmulatur, carinæ loco ponens spinæ vertebrae, quibus tum costas, brachiaque & crura, velut asseres, transtra, & reliqua ligna adaptat. Atque sic Galenus osteologiam reliquarum partium historiis præmittendam esse, duplici ratione confirmat, præsupponens nempe ossa ante alias partes formari, eaque necessarium stabilimentum conferre, sine quo reliquæ partes subsistere nequeunt, atque hinc ab iis, tanquam primo genitis, & primo necessariis Anatomes descriptionem necessario auspicandam esse. Verum & si hæ rationes aliquo modo plausibiles esse videantur, nobis tamen ille ordo prorsus displicet, ob varias magis prægnantes rationes. I. Quia ossa non formantur aut delineantur ante alias partes, sed eodem tempore simul cum aliis partibus, ut latius docuimus *lib. 1. cap. 29.* II. Quia longe tardius perficiuntur quam aliæ partes, ut docebimus *hujus lib. cap. 23.* III. Quia necessaria basis ad stabilimentum in principio non sunt ossa, sed postea basis evadunt cum duritiem convenientem adeptæ fuerint, quam non consequuntur in principio (quo talis eorum firmitudo non requiritur, imò noxia foret) sed aliquot post conceptionem & totius formationem mensibus, imò etiam multa ad eam non perveniunt nisi post nativitatem.

IV. Quia ossa demonstrari nequeunt nisi omnes aliæ iis annexæ partes primo removeantur, eaque sic denudentur, & ultima in conspectum producantur. V. Quia omnes molliores partes putredini sunt maxime obnoxie, secus quam ossa, atque hinc in demonstrationibus necessario primæ exhibendæ, ut subjecti cadaveris cita putredo, quantum fieri potest, declinetur: ac per consequens ad perfectiorem melioremque institutionem, eodem ordine Anatomes descriptio ab iis primo incipienda, & necessario ad ossa ultimo perveniendum videtur. Hunc itaque ordinem nos secuti, præmissis aliarum partium historiis, tandem penultimo libro de ossibus agimus: ultimò verò subjungemus cartilaginee & ligamenta, quibus ossa inter se coherant.

Verum hic in ipso limine fortè dicent nonnulli alii minus accurati mysteriorum medicorum speculatores, osteognosin, ut Medicis nimis vilem & prorsus inutilem, sic chirurgis solis maxime necessariam esse (horum quippe circa ossium cariem, luxationes, fracturas, aliaque vitia, versantur manuales operationes) eamque proinde his solis demandandam & commendandam. Verum quantopere hæc opinio à rationis tramite aberrat: unde quaque patet. Cum enim Medicus totius & universæ Medicinæ cognitionem habere debeat, ejusque Medicinæ duæ sint partes, Cognitio & Curatio; hæc curatio peragatur tribus remediorum instrumentis, Diætâ, Chirurgiâ, & Pharmaciâ, quis non percipiat, Medicum non solum subjecti sui, in quo operatur, scilicet totius corporis humani, ejusque sanitatis & morborum; verum etiam remediorum, debere perfectam habere cognitionem, & per consequens etiam Chirurgiæ, quæ inter alias certè nobiles, & facile antiquissima Medicinæ curatoriarum pars est: & quam-

An osteo-  
gnosis sit  
utilis Medi-  
co.

vis

vis Medicus, altioribus speculationibus & studiis nimis occupatus, chirurgicas operationes fortassis ipsemet administrare nolit, tamen cognitio illi maxime necessaria est; partim ut tempore necessitatis & aliorum chirurgorum defectu, ille ipsemet manum feliciter operi admoveere possit: partim ut quocunque tempore operationes chirurgorum (quorum maxima pars in arte sua summam imperitiam ostendit) jussu ac institutione sua convenienter dirigere queat. Atque cum ad illius Chirurgiæ perfectam scientiam comparandam plurimum faciat exacta ossium cognitio, quis dubitabit Medico etiam osteognosin maxime necessariam esse? Hanc ipsemet quoque Medicorum maximus & pater, Hippocrates, in epistolis, filio suo Tessalo commendans, asserit, ad multiplicem ossium affectionem, & articulorum luxationum repositionem, & perforationem, & compositionem, & ultionem, atque reliquam curationem, majore & feliciore industria usurum illum, qui noverit qualis sit locus, & quale sit os quod luxatum fuerit. Hinc etiam Galenus, comment. in lib. 3. de artic. sic præcipit. Nemo, inquit, accedat ad lectionem librorum Hippocratis de Fracturis & Luxationibus, nisi prius in sceletis, qualia sint ossa singula, inspexerit.

Nominis  
origo.

Ossa, Græcis ὅσθα appellantur, ab ὅσθον, sto, quod tota corporis fabrica mediantibus ossibus stet. Vel, ut eleganter Hippocrates, lib. de oss. nat. quia ὅσθον ὁσθον, ὅσθον ὅσθον, ὅσθον ὅσθον: toti corpori stabilitatem, & rectitudinem & formam exhibent.

Definitio.

Sunt autem ossa partes similes durissima siccissima, sensu destituta, ceteris omnibus partibus frigidiores, ad stabilitatem totius corporis condita.

Dicuntur similes, non quod re vera & absolutè tales sint, (nulla enim verè similis pars in corpore vivente dari potest, sed omnes ex plurimis elementis, seu principiis diversis componuntur, ut etiam dictum lib. 1. cap. 1.) sed ad sensum tales appareant, neque in alias facile dividi possint. Spigelius, ut hanc rem clarius explicet distinguit inter simile, & simile. Simile profecto à simili plurimum, inquit, differt, tantum puta, quantum denominativum quodcunque à re unde denominationem hausit. Sic differt angulus ab angulati, annulus ab annulari.

Generatio.

Generantur ossa in utero ex seminis parte crassiore ac tartarea, seu terrea, & nutriuntur tartareis sanguinis particulis, ac medullosa pinguedine irrigantur.

Medulla.

Illa autem medullosa pinguedo, medulla appellata, non uniusmodi est in omnibus ossibus: quippe in grandiorum ossium magnis cavitatibus valde unctiosa & pinguis

existit, coloremque subrubicundum obtinet: in minoribus minorum ossium cavitatibus magis candida est: in ossibus verò spongiosis succus medullaris minus crassus & pinguis continetur. Generatur autem medulla ex sanguine, versus interiora ossium propulso, per illas arteriolas, de quibus statim dicitur. Duo in eo notanda veniunt: 1. Quod plane non sentiat, etsi id olim putaverit Paræus, 2. Quod in cavitatibus ossium nullâ membranâ succingatur: quo signo, hanc medullam à spinali distinguat Hippocrates, lib. de princip. Spinalis, inquit, medulla alteri medulla non est similis, quæ in aliis ossibus est, hæc enim sola membranas habet, quas alia medulla non habet.

Hæc medulla ossibus maxime necessaria fuit, quippe tartareæ particulæ, cum fixationi proximæ sint, in glaciale duritiem citissime concreverent, sicque ossa maxime fragilia fierent, & ad justam magnitudinem non pervenirent, nisi illa medullosa pinguedo tota ossa pervadens, tartarearum particularum summam duritiem nonnihil impediret & emolliret, atque sic efficeret, ut in totius corporis incremento minimæ istæ tartareæ particulæ à se invicem recedere, novæque intermisceri, sicque ossa incrementum possent. Quod incrementum tandem desinit, cum à totius corporis incrementum calore ita exsiccantur istæ particulæ, ut à medullosa pinguedine (quæ & ipsa incrementum ætate ac calore crassior minusque humida evadit) amplius emolli, & à se invicem deduci nequeant. Unde fit, quod quo magis incrementum corporis calor, eo minus incrementum corpus in longitudinem, quia scilicet ossa, quæ sunt bases & fulcra corporis, magis magisque siccantur & indurantur, atque etiam medulla crassior & minus humida evadit. Hæc de causâ etiam contingit, quod infantes brevi tempore multum; pueri minus, adolescentibus adhuc minus & tardius, viri & senes nihil amplius secundum longitudinem incrementum: quod etiam in senibus, ob partem medullæ, ejusque minus humidæ ac oleosæ, generationem, atque hinc maximam ossium siccitatem & duritiem, valde fragilia evadant ossa, ita ut facile dissoliantur ac frangantur, & fractu tardius coalescant, ob calli tardioris generationem.

Tartareæ autem istæ particulæ ex sanguine arterioso, per admistionem spirituum animalium (quos ad periosteum copiosos affluere, testatur periosteorum acutus sensus) separantur, ut supra latius dictum, lib. 3. cap. 11.) & medullosa pinguedine irrigatæ ossibus apponuntur.

Sanguis autem ad periosteum & interiora affluit per arterias, ejusque inutilior residua

T t t 2

pars

pars per venas rursus effluit. Hunc in finem hæc vasa non solum plurimis extremitatibus circa periosteum desinunt, verum etiam ipsa ossa penetrant, in eorumque interiores cavitates quoque sanguinem effundunt, in medullam, succumque ossium nutritioni idoneum, mutandum: & licet ingressus eorum in omnibus visui non pateat, manifestus tamen est in ossibus maioribus, ut humeri & femoris, quæ conspicuas habent cavitates ad medullam usque pervias, arteriis & venis transitum præbentes. Præterea introitus eorum in ossa etiam liquet ex sanguineo succo qui in diploide, seu media fungosa cranii tabula, nec non in costarum infantium multorumque aliorum ossium interiore fungosa substantia reperitur, qui per nullos alios ductus, quam per arterias, eò pervenire potest. Huc accedat Spigellii observatio, qui Patavii in ossis tibiæ magna carie, substantiam ossis ab arteriola pertusam vidit, cui spectaculo se adfuisse refert Plempius. Huic observationi adjungatur etiam nostra. Mense Septembri, anni 1663. una cum chirurgo Isaaco Hofkens, tractavi adolescentem, cui tibiæ os, anteriore parte circa medium, ubi durissimum solet esse, carie admodum erosum erat: ablata tota incumbente carne, cum periosteum, vidimus in cavitate interiore, quæ usque ad medullam perveniebat, arteriolam satis fortiter pulsantem, cum tamen eo durissimo ossis loco nemo unquam arteriam invenire, imò ne quidem per somnium sibi imaginari posset: neque erat arteriola illa carni injecta continua, nam ablata carne, pulsus in interiore cariosa ossis cavitate persistebat per multos dies. Credendum tamen censeo, hujusmodi arterias in ipsa dura ossis parte rarissime conspici in adultis, fortè quod ab incrementis ossis duritie, paulatim magis magisque pressæ, tandem penitus evanescant (an in infantibus visui pateant, à nemine, quod scio, hæcenus inquisitum, aut animadvertum est) in quibus tamen paulo majores adhuc insunt, eos homines occasione aliqujus cacochymiae corporis, facile incurere ossis cariem, ab acri corruptoque sanguine ei per has arterias infuso: quæ & ipsæ per affusionem boni sanguinis, cum ossa fracta sunt, materiam ad calli generationem suppeditant. Interim patet quam male dixerit Platerus, arterias nusquam in ossa ingredi: & quam bene è contrà Galenus, *comm. ad lib. 1. de humor. & 6. de usupart. cap. ult. item 8. de placit.* unicuique ossi sanguiferum vas tribuat, majus, vel minus: secundum ossis proportionem; quod tamen fatetur adeo exile & tenue esse, ut vix in magnis animalibus appareat.

Quod autem ab incrementis calore ossa indurescant, ut extendi ulterius nequeant,

liquet in iis hominibus qui nascuntur & educantur in calidis regionibus, victuque calido & sicco utuntur: nam propter calorem externum majorem & internum citius in iis incrementem, promiscue sunt brevioris staturæ, sicciores, & macilentiores, humidò nempe corporis citius exsiccato & imminuto: exemplo sunt Galliæ superioris incolæ, qui promiscue sunt corpore tenues, & aliis statura minores, sed propter spirituum subtilitatem, animo & ingenio verè magni: inter illos tamen si fortassis aliqui proceri fuerint, qui humidioris temperamento præditi, & victu humidioris usi sunt, illud communem regulam non evertit. Contrà verò, qui frigidiores humidæque inhabitant regiones, & humido, pingui, multoque cibo ac potu utuntur, illi in magnam proceritatem excrescunt, idque propter tardius caloris siccitatisque incrementum: exemplo sunt Dani, Norwegi, Moscovitæ, aliæque Septentrionales nationes. Incrementum autem corporis à caloris & siccitatis citiore incremento impediri, etiam noverunt nostræ Dominæ nobiles, quæ delectationis gratia catellos minutos alere gaudent, quos ut parvos habeant, solent iis junioribus, quam citissime fieri potest, lac aliæque humida alimenta subtrahere, iisque subinde cum cochleari aliquantum vini, vel spiritus vini per os infundere, sicque efficiunt ut in istis catellis calor citius increseat, & sanguis alimentarius siccior acriorque fiat, hincque siccatis ocyus ossibus, catelli in majorem magnitudinem non excrescant.

Efficiens ossium causa est spiritus vivificus semini insitus (Galenus facultatem *ἐννομιαν*, id est, *ossificam* vocat) crassiores & magis tartareas seminis partes ita disponens, ut inde ossa fiant. Hi igitur Spiritus forma ossium essentialis dici posse videntur, quam aliqui Medici statuunt esse temperiem eorum frigidam & siccam, Aristoteles verò animam. Rolsincius tamen considerans os in corpore mortuo, absente jam spiritu vivifico, æque manere os, atque in corpore vivo, existimat veram ossium formam nobis esse ignotam, non minus quam formam lapidis. Sed quid si dicamus, Spiritum illum vivificum esse formam ossium viventium; at mortuorum ossium formam esse temperiem eorum frigidam & siccam, cum propria conformatione? accidentalis verò ossium forma est, quælibet eorum figura, rotunda, plana, recta, curvata, acuta, obtusa, & c. quam singula ossa sibi pro usuum diversitate propriam adeptæ sunt, sicut eandem quoque ob causam in magnitudine, crassitie, firmitudine, asperitate, & levitate, multum differunt.

Quantum ad tempus generationis ossium, Tempus generatur Aquapendens, *lib. de ovo & pullo, generationis.* ossa

Observatio.

Observatio.

causa efficiens.

ossa inter alias partes prima generari, eo argumento (quo simili etiam Galenum uti, in principio hujus capituli dictum) ductus, quod ædificium exstrui non possit, nisi prius positis solidis fundamentis, quibus reliqua structura innitatur. Harveus verò, accuratiore autopsia edoctus, melius statuit, ossa non citius generari quam alias partes, quarum etiam multæ postmodum naturam ossium induunt, quam in principio non habebant, ut liquet in bregmate infantium, & dentibus. Et quamvis primum corporis rudimentum instar recurvæ carinæ cernatur, tamen mollis, mucosa, & glutinosa est substantia, nulloque modo ad ossis naturam, constitutionem, & officium accedit, quam constitutionem non nisi paulatim, & aliquamdiu post, consequitur.

Finis & usus.

Finis ossium, justam duritiem jam habentium, non est aliqua actio, sed usus, nullum enim os actionem exercet. Estque ille finis, vel communis, vel particularis. Communis est, ut sint omnibus partibus fundamenta ad stabilitatem, sicut dictum in definitione. Particularis usus varius est: scilicet partes principes multaque viscera ab injuriis externis defendere; quibusdam tutum transitum præbere, sicut fit in spina; aliis articulorum laxitatem constringere, ut contingit in patella genu, & c. de quibus aliisque particularibus usibus dicetur suis locis.

Differentia.

Differentiæ ossium, secundum Galenum, tres sunt. *Prima* desumitur à magnitudine, quatenus alia sunt parva, alia magna. *Secunda* à cavitatibus, quatenus alia sunt cava, alia solida. *Tertia* à contento, quatenus alia medullam continent, alia non. Plures quidem differentias commentum sunt alii, quatenus alia sunt recta, alia incurvata, alia rotunda, alia plana, alia mollia; alia dura, & c. quas hic præteribimus, quia de iis in singulorum ossium historiis dicendum erit.

Substantia.

Substantia ossium est albicans & dura (in aliis ossibus, ut & in aliis ætatibus magis, in aliis minus) non prorsus arida in vivis, sed pingui ac viscoso quodam madore perfusa, qui quo copiosior in ossibus redundat, eo tenaciora sunt, minusque franguntur, & fracta citius mediante callo coalescunt; contrarium verò evenit si minus redundet.

Callus.

Dico, coalitum fieri mediante callo, quia ossa ablata nunquam regenerantur, & fracta non coalescunt nisi mediante callo, ut testatur Hippocrates, 6. aphoris. 19. *Perfectum os aut cartilago, aut nervus, aut genæ tenuis particula, aut præputium, neque augeatur, neque coalescit*, id est, non coalescit sine medio Heterogenio. Callus tamen, quo mediante fracta ossa coalescunt, pau-

latim adeo induratur & ossescit, ac si verum os foret. Hoc non videtur observasse Lindanus, atque hinc, *physiolog. cap. 16. artic. 21.* scribit in pueris quævis ossa absque callo conferruminari: additque exemplum, quo se id probare putat: *Memoria dignum est, inquit, quod meus pater vidit Enchusa, Puero sexenni comminutum est os femoris: fragmentis arte & natura sequestratis, medio ossis spatium erat quatuor pollicum. Id visum est ex reliquis partibus ossis sensim adauctis, & tandem cœsuntibus, ita impleri, ut dicere non liceret, ubi absuisset os, aut quod incommodum haberet ex fractura.* Ego simile etiam

observat.

contigisse memini in adulto: quippe anno 1635. Noviomagi molitor quidam è mola sua decedens, tibiam cum fibula in medio confregit, tanta cum violentia, ut superior pars carnem perforans, in ipsam duram terram vi adigeretur, atque non solum carne, verum etiam periosteo privaretur: nos, cum tribus chirurgis, advocati, inferioris cruris fracti partem cum pede abscindendam censuimus, utpote de cuius restitutione nulla spes superesse nobis videbatur. Verum ex illis chirurgis unus senex, in arte sua experientissimus, prius aliud tentare suavit, scilicet, ut istam ossis partem, quæ periosteo circiter ad duorum digitorum latitudinem denudata erat, amputaremus: nobis cæterisque chirurgis consentientibus, dictum factum, & secunda religatione os illud subtili serra amputatum fuit: tunc dictus ille chirurgus crus ad pristinam longitudinem rursus extendit, & sic in lignea theca æqualiter deposuit, vulnus quotidie sine cruris commotione inspiciens & emundans: atque sic ex utroque ossis fine paulatim, præter expectationem, succrescens callus tandem cœbat, ac sensim in ossiam duritiem firmabatur, ita ut per sanato vulnere crus pristinam longitudinem retineret, & ossis partem ablatam esse in ingressu & ambulatione, animadverti vix posset (hæc curatio propterea feliciter successit, quod nulla magna arteria aut vena disrumpita esset, & qui ex parvis ruptis profuebat sanguis, prima religatione facile sisteretur) Sed hoc factum non fuit sine callo, & sic, procul dubio, illud ipsum etiam contigit in illo puero Lindani. Ita ut omnino certum maneat, ossa fracta non coalescere nisi mediante callo. Sed quid dicendum de ossibus bregmatis, occipitis, in-nominatis, aliisque, quæ sine ullo medio heterogenio in infantibus coalescunt & solidantur? dicendum, in recens natis multa ossa non habere firmam ac debitam suam duritiem, sed esse adhuc mollia & flexibilia, instar membranarum, quæ proinde putantur non esse ossa, cum tamen re vera sint, ut apparet cum duritiem suam adeptæ sunt: & talia sunt ossa bregmatis in infantibus,



tibus, nec non occipitis, & innominata, quorum molliores intercedentes partes, quibus duriores in plura ossa distingui videntur, etiam sunt ossa, sed talia in quibus iusta durities adhuc desideratur, qua postea accedente, reliquis ossibus prorsus similia evadunt.

*Cavitates.*

Multa ossa, ut femoris, humeri, tibiae, &c. interius insignem habent cavitatem, medullae copiosae domicilium. Alia verò, ut cranii, costarum, &c. parvas & obscuras tantum cavernulas, cruento ac medulloso succo, ad eorum nutritionem necessario, repletas, obtinent. Hae cavitates aut cavernulae si adeo sint exiles, ut aut vix aut plane non possint videri, tunc ossa dicuntur esse solida, qualia sunt ossa nasi, ossicula carpi, pedii, &c. quae tamen etiam aliquibus minimis porositatibus, etsi non manifeste conspicuis, procul dubio, donantur.

Exterius in ossium superficie considerandae veniunt cavitates & prominentiae, ad articulationum, nec non insertionis tendinum musculorum, ligamentorum, &c. commoditatem factae.

Cavitas, si profunda est, & alterius ossis caput recipit, ut in osse ischio, κοτύλη: si verò superficialis est, ut in genu, γλύνη, & Sinus appellatur. In summitate sinuum qui labiorum instar occurrunt processus, maximeque conspicui sunt in profundis, Graecis ἴνυες, ὀφρύες, καὶ χεῖλη, Latinis labra, & supercilia nominantur.

*Prominentia,*

Prominentia vel est rotunda, ut in capite ossis femoris: vel longa, ut in osse styloide: vel cava, ut in osse scapulae. Rotunda caput, idque si humile & depressum fuerint, etiam condylus dicitur.

Est autem prominentia duplex, ἀπόφυσις, & ἐπίφυσις.

*Apophysis.*

Ἀπόφυσις Latinis Processus appellatur, estque pars ossis continua, ultra planam superficiem manifeste protuberans, ad commodiorem insertionem musculorum, tendinum, aliarumque partium, quales processus multi sunt in vertebrae dorsi, nec non in maxilla inferiore, & scapula.

Alia autem apophysis brevis est, ut in ossibus digitorum: alia longa, eaque vel acuminata, quae κόρυς, &, κορόνη nominatur; vel simpliciter longa, quae pro ratione figurae diversis nominibus insignitur, diciturque styloides, coracoides, odontoides, &c.

*Epiphysis.*

Ἐπίφυσις, seu appendix, est os ossi instar additamenti adnatum, per simplicem & immediatam contiguitatem, idque exilium capitulorum sinuumque nonnihil mutuo ingressu, instar gynglimi, licet sine motu.

Substantia ἐπίφυσις in infantibus primogenatis cartilaginosa & rara est, in adultis ve-

ro induratur in os rarum ac spongiosum, adeoque progressu temporis cum osse unitur, quasi apophysis foret; & unum atque continuum os esset, ita ut inde separari rursus nequeat, nisi forte in aetate juniore per longam coctionem aut macerationem inde secedat. Nulla autem sui parte mollior & infirmior est, quam circa ipsum connexum, ibi enim pumicis in modum spongiosa, multisque cavernulis praedita est: nullam tamen notabilem cavitatem, medullam continentem, habet, sed duntaxat succum quendam medullarem, ad sui nutritionem, in porositis suis cavernulis continet. Ipso autem osse latior existit, ut basis columnae, hacque de causa articulationem firmiorem efficit.

Ossa sensu tactus omnino carent, nec interius ullis conspicuis nervis donantur (exceptis dentibus molaribus, ut videndum sequente cap. 10.) sed extrinsecus investuntur tenui & acuti sensus membranula, scilicet periosteo, quod quia immediate ossibus adhæret, & male affectum dolet, hinc tristis illa sensatio improprie ossibus adscribitur, eaque dolere dicuntur: quo modo etiam Hippocrates, lib. de fractur. & 2. de morb. item Galenus, 4. de placit. Hipp. & Plat. aliisque variis locis: & Aretaeus, lib. 2. de sign. & caus. diuturn. morb. de ossium dolore loquuntur, non quod ipsa ossa, sed ipsis proxime circumjecta periostea, vicinasque membranas sentire putaverint. Destituuntur tamen periosteis dentes, qua parte extra alveolos prostant; item ossicula sesamoides, quatuor aurium ossicula, & fines ossium articulos constituentium, ne ex motu & collisione nimium dolerent.

*An ossa sentiant.*

Rarissimum quid refert Nicolaus Massa, scilicet, se vidisse crus ulcerosum, cum detectione ossis, in quo osse, quod periosteo exutum erat, sensus erat adeo dolorosus, ut sine incommodo tangi non posset, imò se perforasse os, & intus quoque fuisse sensum dolorosum, idque scribit se dicere voluisse, ut viderent Anatomici num aliqua seminatio nervorum penetret ad ossa. Ex hac observatione nonnulli concludunt, ossa, si non omnia, saltem quaedam sentire. Sed dicendum, illam corruptionem ossis à periosteo denudati, se procul dubio latius extendisse ad illas ossis partes quae periosteo adhuc tectae erant, atque hinc commotione ossis denudati, in proxime vicinis periosteo adhuc tectis ejusdem ossis partibus dolorem fuisse excitatum, quales dolores in mea praxi multoties observavi, qui quidem à motu particularum non sentientium excitabantur, sed re vera fiebant in proximis sentientibus particulis.

*Observatio.*

Adversus hanc nostram, plurimorumque Philosophorum sententiam, nonnulli val-

*Objectione.*

lidissi-

lidissimum arietem, ab Avenzoare fabricatum, intorquent, qui Arabs sic argumentatur: *Ossa habent animam rationalem & nutriuntur, ergo sentiunt: nam, ex Aristotele. 2. de anima. in rationali inest sensitivum & vegetativum, ut in pentagono trigonum & tetragonum: ergo, aut dua erunt anima in ossibus, aut ipsa sentire necesse est. Præterea, nisi sensu tactus prædita essent ossa, major pars animantis a plantis non differret. Denique si vitalis facultas per eorum substantiam sine adminiculo arteriarum potest influere, ergo multo facilius animalis, qua vitali tenuior, & magis spiritalis est, sine adminiculo nervorum potest influere.* Hæc argumenta nonnullos eo deduxerunt, ut obtusum sensum ossibus denegare ausi non fuerint. Verum si attentius examinentur, erunt nullius pretii. Primum enim argumentum vacillat: *Ubi est anima rationalis & nutritio, ibi est sensus.* Consequentia non sequitur, nam in caroticis, catalepticis, & apoplecticis, est anima rationalis, & fit nutritio, in iis tamen non est sensus.

Præterea tale absurdum hinc procedit, *Ubi non est anima rationalis, ibi non est sensus.* Contrarium tamen patet in brutis, quæ satis acute sentiunt, etsi anima rationali destituantur: imò in spongia dum crescit, quæ duriorum contactum sentire, atque hinc se contrahere dicitur; cuius tamen aliam rationem dant Philosophi. Ad hæc, Anima rationalis diversimode operatur, pro diversitate instrumentorum quibus median- tibus operatur, sic in oculis visum, in membranis tactum, in musculis motum, in ossibus firmitudinem operatur, ac proinde extra Animæ istius promerita non sunt pro- scribendæ omnes partes sensu tactus carentes, alioqui variorum viscerum parenchy- mata, pinguedo, adeps, aliæque similes partes etiam in exilium forent ejiciendæ. Homo quidem sensu differt à plantis, quatenus dolorem & voluptatem sentit, verum hinc non sequitur omnes ejus partes necessario sentire: sufficit si homo sentiat, id est, tales aliquas partes habeat quibus sentire possit, quales plantæ nullas habent. Nam homo etiam visu differt à plantis, an propterea omnes ejus partes debent videre? sufficit quod aliquas partes isti muneri convenientes habeat, scilicet oculos, qui isto officio funguntur. Denique certissima rerum magistra Expe- rientia clarissime docet, ossa planè non sentire: nos multoties illa perforavimus terebra, etiam scalpris & lima abrasimus, ac candentibus ferreis instrumentis inussimus, idque semper (si modo periosteum non læderetur) sine dolore & sensu: imò si nonnunquam ægris oculi obvolverentur, ut chirurgicam operationem non viderent, sæpe nesciebant, factano, an faciendæ esset

operatio, præcipue si ustio fieret. Sic etiam Scaliger, *subtil. exercit. 191.* scribit, se sibi ipsi ossa ex hiantibus vulneribus sine ullo dolore abripuisse: cui certe magno viro fides habenda est, cum in se ipso illud experimentum fecerit.

Numerus ossium non est idem in omni- bus ætatibus ( loquor de iis quæ justam habent duriciem) nam in infantibus & pueris plura sunt, quæ paulatim incremente ætate coalescunt, & in pauciora abeunt, ut ossa sterni in unum vel tria; pubis, ilii, & coxendicis, in unum: &c. Nec idem semper est numerus in eadem ætate, nam interdum utrimque costa una superest, vel deest: interdum colli aut dorso vertebræ, ut & cranii ossa, in unum os coalescunt: interdum vertebris lumborum una adjecta reperitur, sicut id patet in sceleto quodam quod ab Antonio Pelt, Medico practico Ultrajectino, ante hac, dum viveret, as- servabatur, in quo erant sex lumborum vertebræ, eæque omnes ordinariæ magnitudinis, nec ulla thoracis aut colli verte- bra desiderabatur. Denique variant etiam ipsi Anatomi in ossium computatione faci- enda, dum alii ossa cum epiphysibus, alii epiphyses seorsim numerant, alii se- samoida addunt, alii omittunt. Quis au- tem primariorum ossium in adultis sit nu- merus, videndum ad finem sequentis capituli 21.

Post hanc generalem ossium descriptio- nem, etiam proponendæ sunt ipsæ ossium qualitates. Hæ autem consistunt in tri- bus, scilicet in substantia, in iis quæ sub- stantiæ succedunt, ac denique in iis quæ accidunt. Substantiam complet proprium eorum temperamentum ( ut ante quoque dictum) utpote quod ossibus dat suum esse quod sunt. Substantiam sequuntur duri- ties & color. Quæ accidunt, sunt mag- nitude, numerus, figura, situs, & con- nexio. Ex his bene perpendis qualitatibus præcedit judicium de ossium constitutione, quæ Medico practico summopere conside- randa venit, scilicet, an ossa integra & bene, an verò læsa & male constituta sint in viventibus. De sceleto non loquemur, utpote cujus ossa cocta, periosteis, medul- lis, & cartilaginibus exuta, exsiccata, sicque multum de naturali statu remota sunt, sed de ossium viventium constitu- tione. Ossa in viventibus naturaliter sese habentia, debent esse dura, periosteo in- vestita, subcandida (id est, taliter albi- cantia, ut mediocri seu levi aliquo rubore perfusa sint) non plane sicca, sed nonni- hil unctiosa, in extremis cartilagine in- crustata, & humore unctioso delibuta; item substantiam habere æqualem ac conti- nuam, & figuram convenientem. Quæ- cunque autem ossa ab hac regula desciscunt, morbosa

Numerus.

Ossium qua-  
litates &  
constitutio.

morbosa censenda sunt; ut mollia, perios-  
teo, vel etiam ad fines cartilagine privata,  
aspera, inæqualia, cariosa, nimis solida,

arida, candida, rubra, nigricantia, vel ma-  
le figurata.

## C A P U T II.

## De ossium conjunctione.

Symphysis.



Ossa inter se junguntur, vel ad  
quietem, vel ad motum.

Conjunctio ad quietem  
σύνφωσις, seu Coalitus appel-  
latur: estque ossium firma na-  
turalis connexio absque motu, cum duo  
ossa inter se ita uniuntur, ut unum os esse  
videantur.

Symphysis autem duplex est, vera, & non  
vera.

Vera est, cum ossa indurescunt & cōeunt  
nullo interveniente manifesto medio hete-  
rogenio: sic mentum, seu maxilla inferior  
ex duobus ossibus sine manifesto medio he-  
terogenio est unita.

Non vera est, cum ossa uniuntur per ma-  
nifestum medium heterogenium: fitque  
tripliciter.

Synchondrosis.

I. Per συνένωσιν, cum ossa junguntur  
per medium quod videtur esse nervosum  
vel membranofum sicut in infantibus ossa  
calvariae, innominata, & corpora verte-  
brarum, sibi invicem cohærent. Dico,  
videtur esse, quia medium illud re vera ner-  
vosum aut membranofum non est, sed est  
verè osseum, tale tamen quod perfectam  
duritiem nondum est adeptum (ut etiam  
dictum capite præcedente) qualia sunt plu-  
rima foetus in utero contenti ossa, usque  
ad quartum à prima formatione mensem.

Synchondrosis.

II. Per συνχόνδρωσιν, intercedente sci-  
licet medio cartilagineo, sicut uniuntur in-  
ter se ossa pubis, & os sacrum cum ossibus  
coxendicis.

Sysarcosis.

III. Per συσάρκωσιν, cum fit conjun-  
ctio mediante carne, qualis est dentium  
cum maxilla mediantibus gingivis.

Spigelius rejicit συνένωσιν, quia nullum  
os alteri per nervum proprie dictum jun-  
gitur (hoc etiam nos ante monuimus) ejus-  
que loco tres alias hujus coalitus species  
substituit, scilicet συνδέσμωνσιν, cum me-  
diante ligamento ossa junguntur; συντένωσιν,  
cum conjunctio fit mediante tendine: &  
συνέμεινσιν, cum illa fit mediante mem-  
brana.

Quare autem alia ossa sine medio hetero-  
genio, alia per medium heterogenium  
cōeant, illius rei Galenus, lib. de ossibus,  
hanc adfert causam. Mollia, inquit, & spon-  
giosa ossa facile coalescunt, & ita connascun-  
tur ut unum evadant: at quæ dura sunt,

& solida ac densa, quo coeant medio aliquo  
indigent. Quæ enim multum a se invicem di-  
stant, ut durum & molle, ea uniri, nisi per  
medium, non possunt. Molle quidem cum  
molli facile coalescit: at durum cum duro coire,  
nisi quid interveniat quod utrumque colliget,  
non potest.

Ad motum junguntur ossa καὶ ἄρθρον, Articulatio.  
id est, per Articulationem, quæ compositio  
in contiguitate consistit, & connexio ma-  
xima ex parte fit per ligamenta: estque vel  
ad motum magnum & valde conspicuum,  
vel ad motum parvum.

Ad motum magnum junguntur ossa  
per διαρθρώσιν, id est, per articulationem la-  
xam, & evidentem motum habentem.  
Hæc autem triplex est, ἐναρθρώσις, ἀρθρώδια,  
& γγγλυμός.

Ἐναρθρώσις est, cum magnum ossis ca-  
put ex longa cervice protuberans, in pro-  
fundam cavitatem seu κοτύλην ingreditur, ut  
fit in articulatione ossis femoris cum ischio.

Ἀρθρώδια est, cum caput minusculum,  
à cervice non magna protuberans, in ca-  
vitatem superficialiam inferitur: qualis est  
articulatio ossis humeri cum scapula.

Γγγλυμός est, cum unum os sua protu-  
berantia una, vel duabus, alterius ossis ca-  
vitatem ingreditur, simulque obtinet cavi-  
tatem, in qua alterius ossis protuberantiam  
recipit, ut fit in osse cubiti & humeri.

Fit autem γγγλυμός tripliciter.

I. Cum os ab unico osse excipitur, &  
excipit alterum, ut in exemplo jam di-  
cto.

II. Cum unum os excipit, & excipi-  
tur ab alio quod non excipit, ut fit in ver-  
tebris.

III. Cum articulatio fit in modum rotæ  
ad axin, qualis est vertebræ primæ cervicis  
articulatio cum secunda.

Ad motum parvum & destinatum, vel  
ad quietem junguntur ossa per συναρθρώσιν, Synarthrosis.  
quæ articulatio vel exiguum, vel obscu-  
rum, vel nullum, nisi urgente necessitate,  
motum habet.

Quæ ossium conjunctio parvum motum  
habet, est triplex.

Ἐναρθρώσις in συναρθρώσει, sicut inter os  
calcis & astragalum.

II. Ἀρθρώδια in συναρθρώσει, ut inter os  
suboides

cuboides & os calcis ; item inter os carpi  
& metacarpii.

III. Ρήγγυμος ἢ συνάρθρωσις, ut inter os calcis & tali.

*Zurückgekehrt ad quietem per se, non movetur, nisi cum magna necessitas incidit, quæ partes motui arbitrario non subjectas movet sine earum diffractione : estque triplex.*

I. Ραφῇ *futura*, cum ossa sibi invicem

inæqualiter junguntur, quasi essent confu-  
ta, ut in superiore capite : de hac viden-  
dum *sequens cap. 4.*

II. *Agguria*, quæ est ossum compositio per simplicem lineam, rectam, obliquam, vel circularem, ut in maxillæ superioris & nasi ossibus.

III. Γυμφωσις, id est, *conclavatio*, *Comphosē*, cum oīnstar clavi infigitur, ut dentes maxillæ.

### C A P U T . . . I I I .

*DE CRANIO IN GENERALE.*

**Skeletons.**



**C**ompages omnium humani corporis ossium invicem coherentium *σκέλετος*, *ἀπὸ τῶ σκέλλειν*, *arescere*, appellatur, eo quod in aridis & siccatis ossibus illa conjunctio arte fiat,

Instituitur autem illa conjunctio, in offi-  
bus aut adultorum, aut infantum. Nos  
de scelecto adultorum primo acturi sumus:  
postea de infantum scelecto dicturi *cap. 23.*

Hic sceletus dividitur in caput, truncum, & artus; hi verò in manus & pedes.

Caput est totum illud quod collo imponitur, idque dividitur in cranium, & faciem.

**Crucians.**

**C**ranium est globosa & rotunda, interiorius concava ossæ capitis pars, cerebrum continens, ita appellata, quod veluti *caput*, seu *galea* cerebro ad munimen circumdetur. Aliis **Calva**, & **Calvaria** dicitur. Barbaris etiam à duritie & rotunditate *Testa*, atque hinc Gallis *la teste* nominatur.

**Facies.**

**Facies** appellatur illa capitis pars, quæ inter frontem, aures, & mentum extenditur.

**Figura cra-  
nii.**

Ut autem in cranio magni nobilissimique visceris cerebri domicilium capacius esset, injuriisque externis melius resisteret, figuram rotundam ei concessit summus Creator, non quidem exacte sphaericam, sed nonnihil oblongam, scilicet antérieur & posterius aliquantum protuberantem, à lateribus depressam. Quæcunque verò figura ab hac desciscit vitiosa est, & quæ magis, eo vitiosior. Ut si anterior posteriove, vel utraque projectura tota, aut dimidiata desit, vel exacte rotunda acuminatave figura fuerit, vel longitudo utrimque ad latera promineat (cum hac figura homo vivere vix poterit, quia cerebri constructio nimis pervertitur) vel hac illave parte eminentia aut depressio aliqua præter consuetudinem adsit. Vitiosa autem figura Galeno  $\Phi\epsilon\zeta\Theta$

dicitur, quæ vocula quamvis proprie capiti  
superne acuminato competat, tamen à Ga-  
leno pro quavis vitiosa figura generaliter fu-  
mitur.

Hujusmodi autem vitiosa figuræ, quamvis in prima partium confirmatione in utero multoties formentur, sæpe tamen contingunt, cum in difficili partu, ob viæ seu transitus angustiam, molliusculum, & superiore parte nondum duro offe solidatum infantis caput durius comprimitur, unde non rarò protuberantiam aut depressionem aliquam fieri observavi: omnium tamen frequentissime acuminata; seu ovalis, & in acutum superius exporrecta figura hinc procedit, quam Hippocrates, *lib. de aeris, aquæ & loc.* tradit nonnullis gentibus familiarem & in honore esse, eamque in principio apud illas multoties factam fuisse ab obstetricibus, fascia caput tenellum in acutum comprimentibus: postea verò, converso in naturam artificio, à parentibus liberos cum acuminatis capitibus natos fuisse. Sic etiam quadrata capitis figura, quæ apud Christianos insolens & inaudita est, videtur arte induci posse; nam refert Cardanus, *lib. 8. de rer. varietate, cap. 43.* apud Indos occidentales, in provincia Portus veteris, inveniri homines quibus caput quadratum est, quæ figura primum arte fuit inducta; quippe obstetrices aut parentes infantibus primo natis caput inter tabellas colligarunt, atque sic iis figuram istam conciliarunt: postea verò arte in naturam transeunte, omnes liberi quadratis capitibus nati sunt.

Quia autem communiter ex figura capit-  
tis indicia & judicia quædam desumi solent, Judicia ex  
capitis figu-  
ra.  
etiam illa, ex Riolano, *comm. in lib. Gale-  
ni de offi.* hic subjungenda videntur. Cum  
autem Medici, inquit, ex figura depravata  
capitis, maxima morum & sanitatis argumen-  
ta sumant, quamam inter eas sit laudabilis &  
vitiosa, ex Galeno, *lib. 6. epidem. declarabo.*  
Exigua capita semper prava sunt : magna ve-  
rò, licet rarè, nonnunquam bona judicantur,

nam ob facultatis formatricis robur, quam ex materia, unde creata sunt, ubertate: quali capite Pericles Atheniensis, vir prudentissimus, fuisse traditur. Nec enim grandius caput vituperandum, si naturalem figuram retineat, & cervicem validam, atque oculos acutum cernentes habeat. Sed acuta capita vitiosa sunt, cum scilicet anterior vel posterior projectura deficiat, aut quam deceat longior est. Improbatur caput acutum ex imminuta projectura, non autem illud quod eam adauctam habet. Imprimis considerabis decoram incrementi formam, quia deformia incrementa prava sunt. Deinde notabis quantum posterior projectura anteriorem superet: melior enim est postica, quam antica, ibi namque nobilissimus cerebri sinus, & spinalis medulla principium continentur. Postea cervicem inspicias, imbecilla ne sit, an robusta. Nam si projectura, neque indecora fuerit, neque ultra modum grandis, validumque eam colum sustineat, huiusmodi capitis acumen probabis, atque istos homines aliorum membrorum, sed precipue ossium, viribus pollere comperies. Verum, ut animadvertit Hippocrates, cephalalgia sunt obnoxii, auribus sordidis, palato concamerato, maxillis distractis, nec inter se ad amussim compositis.

Ancranium  
figuretur  
à cerebro.

Verum, antequam ulterius progrediamur, hic solvendum occurrit aliquod dubium, quod à nonnullis movetur, scilicet an cranium figuram det cerebro, an verò cerebrum cranio? Hippocrates, lib. de oss. natur. dicit ossa corpori figuram exhibere: & Galenus, lib. I. anatom. administ. scribit, naturam ad ossis imitationem cetera omnia in animante effingere. Addunt alii, quod domicilium prius formetur & figuretur suo inhabitatore: quod item ossa, veluti bases & fundamenta, necessario ante alias partes formari debeant: quod denique melius figuretur mollior à duro, quam durum à molli. Hæ rationes tantum valuerunt apud clarissimum Arnoldum Senguerdium, ante hac, dum viveret, Philosophiæ professorem apud Amsterodamenses, ut huic sententiæ subscripserit, osteologia sua cap. 4. E contra verò Galenus variis locis (ut, lib. de usu part. & comm. in sect. 3. lib. 6. epidem. & lib. de format. set. & c.) clarissime docet, cerebrum cranio figuram dare, non cranium cerebro. Quæ sententia nobis potior videtur, firmisque rationibus defendi potest. 1. Quia non propter cranium constructum est cerebrum, sed propter cerebrum debuit effingi cranium. 2. Quia domicilium non semper extruitur ante inhabitaturo, qui illud ad suam commoditatem struit: & sic quoque cor ante suum domicilium, thoracem, formari, oculis conspicuum est in puncto saliente quod in ovibulla observatur, cum gallina ei per paucos dies insedit. 3. Quia cranium in embryo-

ne fere tam molle est ac ipsum cerebrum, totum enim membraneum est, ita ut illud ad figuram cerebri facile & naturaliter figuretur (sicut membranæ etiam alibi figuras ubique assumunt à partibus contentis) nec opus sit ut durum figuretur à molli, quia cum figuratur tunc durum non est, sed postquam figuratum est, paulatim induratur. 4. Quia sulci, qui plurimi cranio interiori insculpti, seu potius impressi sunt, & venas duræ meningis eminentiores, aliasque cerebri protuberantias suscipiunt, satis ostendunt illos non sponte in cranio indurato fuisse exsculptos, sed fœtu in utero adhuc hærente, à cerebri & venarum protuberantiis, in mollem ac membraneam cranii substantiam impingentibus, cranio fuisse impressas.

Substantia cranii in embryone tota est membranacea, & in nuper natis ossa quidem maxima ex parte, sed tamen mollior existit, instar ossis mollioris, ac compressioni cedit, imprimis superiore capitis parte circa suturarum sedem, ubi eo tempore justam ossiam duritiem vix habet, maximeque tenue est, ut cerebri copiosa humiditas, quæ in infantibus redundat, commodius exhalare possit. Postea verò ad maiorem cerebri securitatem ac tutelam, paulatim magis induratur, instar aliorum ossium, crassaque fit, sed rarior, & in medio spongiosa manet, ad faciliorem vaporum transitum.

Crassities variat pro ætatis diversitate, imò neque semper & ubique eadem est in eadem ætate, nam regionum quoque diversitas hac in parte multum facere videtur. Sic refert Herodotus, Persarum crania valde tenuia & fragilia esse, ita ut facile perforentur; Egyptiorum verò admodum crassa & firma esse, ita ut vix ictu lapidis gravioris confringantur. Ad hæc, in delicatis, ut plurimum, minor crassities ac durities reperitur, quam in rusticis aliisque durioribus hominibus; cuius rei causam putat esse Carpus, comment. 32. in Mundinum, quod delicati caput semper bene tegant, ab eoque æstum & omne frigus arceant, rustici autem, nautæ, aliique similes per æstus & frigora intensissima nudo capite incedant, quo æstu, & imprimis frigore, ossa indurantur & crassiora fiunt: atque hinc monet idem Carpus, puerorum capita non esse multum tegenda, cum per nuditatem potius corroborentur, & externis injuriis ferendis aptiora evadant.

Constat autem cranium duabus tabulis seu laminis, externâ, & internâ, tenuioribus in fœmineo sexu quam in virili: quarum illa crassior & æqualior, hæc verò durior (hinc propter singularem duritiem & fragilitatem *Tabula vitrea* appellatur) multis sulcis exarata, ut locum concedat vasis duram

Tabula.

ram

ram meningem perreptantibus, à qua meningem nonnulla insignia vasa juxta aures inter geminas cranii laminas se insinuant, medullarium interjectum irrigantia. Eum autem in finem ex duplici tabula constructum est cranium, ne in capitis percussionebus ictus totum cranium facile penetraret, atque hinc fit quod interdum una tabula findatur, illa sola manente altera.

Diploe

Inter has tabulas media latet substantia quædam spongiosa & cavernosa, medullarem subcrentum succum ad cranii nutritionem continens; qui conficitur ex sanguine influente per minimas arteriolas exilia foraminula tabularum (hæ, una cum venulis egredientibus, multæ conspiciuntur in cranii juniorum; at in seniorum plerumque, ob substantiam cranii magis siccam, & solidam, delitescunt) transeuntes, atque hic est ille sanguis, qui, dum cranium trepano perforatur, ubi ad diploidem perventum est, rubicundus nonnihil effluit. De hoc sanguine aliquid scitu dignum notavit Riolanus, lib. 5. anthropog. cap. 50. Medicis practicis observandum: Ex istis, inquit, *carunculis* (id est, spongiosis cavernulis inter utramque tabulam subsistentibus) *vehementiore ictu collisis, sanguis expressus & putrescens os corrumpit, foris osse integro apparente, sed & exsudans sanies ab interiore tabula cerebrum ipsum corrumpit ac putrefacit. Quod si in razione cranii sanguinem stillare videris, ne putes ideo fracturam penetrare secundam tabulam, quoniam ex dicto medullio sanguis ille profluit.*

Medullium hoc spongiosum duplici tabulato cranii interjectum Hippocrati & Anatomicis διπλὸν vocatur, quamvis Galenus, lib. 6. method. med. externam internamque tabulam simul sumptam διπλὸν appellare maluerit.

Hoc medullium alibi majus, alibi minus cernitur, nonnullis in locis vix animadvertitur, ubi ambæ tabulæ simul cõire, & cranium simplex ac pellucidum consti-

tuere videntur. Refert Bartholinus, se cranium secuisse in quo hæc media spongiosa substantia omnino deerat, totumque cranium ex una tabula constare videbatur; forte quod ob senium exsiccatis & contractis ossibus, non manifeste apparuerit; vel quod à Bartholino cranium ea tantum parte casu dissectum fuerit, qua ambæ tabulæ cõierant, alia fungosa parte intacta relicta: rarissime enim totum cranium in parvas particulas secant, vel diffingunt Anatomici.

Hippocrates, lib. de vulner. cap. caruncularum aliquarum mentionem faciens, mediam istam spongiosam cranii substantiam intelligit. (hanc etiam Riolanus ante citato loco significare voluit) quod non percipiens Fallopius, comm. ad dictum locum, alias peculiare carunculas in spongiosa illa substantia quærit: sed male, nam Hippocrates eo loco per *carunculas*, nihil aliud quam illam spongiosam substantiam vult significare: nam in ipsa illa substantia nullæ aliæ carunculæ subsistunt. Sed interim contingit nonnunquam in capitis vulneribus & gravibus contusionibus fungosam hypofarcosin ex illo medullio succrescere, ac foras protuberare; quæ tamen in ejus spongiositate antea non magis substitit, quam ante herniam sarcocalem caro substitit in corpore pyramidalis prope testem.

In spongioso hoc medullio nonnunquam, præcipue in lue Venerea infectis, vitiosus quidam humor colligitur, qui tractu temporis virulentus & acrior factus, tabulas ipsas, & frequentius exteriorem, ob minorem duritiem, exedit, ac in periosteo & pericranio diros cruciatus excitat: nonnunquam etiam interiorem una cum exteriore, ab eo erosam, sicque totum cranium perforatum fuisse vidimus; quod ipsum se quoque observasse referunt. Julius Palmarius, Jo. Riolanus, & Antonius Benivenius.

## CAPUT IV.

## De ossium cranii commissuris.



Ntequam ad ossium capitis historiam accedamus, primò quali modo illa sibi invicem cohæreant & jungantur, paucis præfabimur.

Variis commissuris cranii ossa sibi invicem cohærent, quas omnes nonnulli uno nomine *Suturas* nominant: alii verò melius & magis proprie illas distinguunt in *futuras* & *harmonias*.

*Sutura* autem dicta quasi *consutura*,

Græcis *εμφυ*, Arabibus *Odorem* nominata est quædam ossium compositio consutis rebus similis, ossa distinguens & conjungens, quæ in superiore capitis parte, refert compagem duarum ferrarum se mutuo ultro citroque denticulatim ingredientium.

Sunt autem in cranio multæ futuræ, numero sitque in viro & muliere paræs, secus quam censuit Aristoteles. Sine futuris raro cranium invenitur. Verosimile tamen est in junioribus, nunquam sine futuris dari,

V v v 2

nam

Sutura.

nam tale cranium, præterquam quod injuriis externis minus resisteret, & ex graviori ictu facile diffiliret, etiam in reliquo corporis incremento vix secundum cerebri incrementis augmentum & magnitudinem satis commode distenderetur & cresceret. Crania sine futuris sibi quidem visa referunt, philosophorum princeps Aristoteles, lib. 1. de histor. animal. cap. 7. & lib. 3. cap. 7. atque inter neotericos Vesalius, Fallopius, Cöiter, Jo. à Cruce, Alexander Benedictus, aliique plures: quale etiam, teste Bartholino, Helmstadii, atque in Francorum monasterio Heidelbergensi monstratur: verum illa, procul dubio, non fuerunt juniorum crania, sed senum, in quibus præficcitate ita coaluerunt futuræ, ut amplius non appareant; qualia duo crania etiam a me servantur, & alibi multoties visa sunt. Atque sic quoque intelligendum est illud quod Herodotus, Aratus, & Arrianus de Æthiopum & Maurorum capitibus scribunt, illa nullis futuris prædita esse, non quod futuras in prima ætate non habeant, sed quod ipsis ab æris magno fervore, & altioris ætatis siccitate ossa ita indurescant, & futuræ tantopere coalescant, ut in adultis & senioribus omnino non appareant.

*Sutura duplices.*

Sunt autem futuræ duplices: aliz cranio propriæ, ejusque ossa superiora connectentes: aliz cranio cum maxilla superiore communes.

Propriæ futuræ aliz veræ, aliz mendosæ seu nothæ dicuntur.

*Veræ.*

Veræ sunt, cum in modum serræ ossa denticulatim se mutuo ingrediuntur, atque hinc Serratæ appellantur. Hæ urgente necessitate à se invicem recedere, & humoribus ac vaporibus intus latentibus ampliorum locum & viam seu exitum præbere, possunt, ut in iis hydrocephalicis fieri solet quibus serosi humores nimia redundantia intra cranium colligitur, cujus ad mirandum exemplum scribit Vesalius, lib. 1. de humani corp. Fabric. cap. 5. Quomodo hæ futuræ se habeant in infante, infra videndum, cap. 23.

*Mendosæ.*

Mendosæ futuræ sunt, cum ossa sibi invicem umbricatim, seu squamarum modo incumbunt, unde etiam Squamosæ appellantur. Hæ potius commissuræ quædam sunt, ad harmoniam magis quam ad futuram referendæ, vel saltem inter utramque mediæ, atque hinc non male futuræ harmoniales appellari possent.

Suturæ veræ sunt tres.

*Coronalis.*

Prima, quæ anterior, est Coronalis, Arabibus *Arcualis*, & *Puppis*, Græcis *σφαλαια* dicta, quod circumferentialis ejus sit figura, caput anterius instar coronæ cingens, vel quod isti capitis parti coronæ imponi soleant. Hæc ab uno tempore ad alterum, circuli instar, per transversum supra fron-

tem excurrit, & frontis os cum syncipitis ossibus jungit.

Secunda, quæ posterior, huic opposita, in occipite est, & à forma literæ Λ nominatur *Λαμβδοειδής*, *Lambdoidalis*, & à nonnullis à figura literæ *υ* inversæ *υψιλοειδής*, aliis *Prota futura* appellatur. Hæc à basi occipitis, circa processum mammillarium radices exurgens, & ad utramque aurem oblique ascendens, ad sagittalem cono finitur, atque os occipitis à temporum & syncipitis ossibus distinguit, eademque conjungit.

Verum in osse occipitis, præcipue in prima ætate, rarissime in adultis, lusus quidam Naturæ cernitur: tunc enim illud, præcipue iis quibus calvaria postica parte amplissima est, quasi ex pluribus ossibus, nec tamen eodem modo in quibusvis capitibus, compositum, & multiformibus futuris divisum videtur: quippe modò transversâ futurâ separatur, modò duplici circumscribitur, ac si minor quidam triangulus majori includeretur; modò etiam triplici circumducitur, majore triangulo duos minores continente; hæcque inclusa ossa ab Anatomicis *Triangularia*, & *Triquetra* appellantur. Præter quæ nonnunquam, sed rarius, etiam alia quædam officula triquetra, oblonga, ovalia, ibidem inveniuntur, tam in dextro, quam in sinistro ossis latere, ut plurimum duo, tria, vel quatuor, suis futuris circumscripta, ab Olao Worm primò notata, & in concava cranii parte magis conspicua quam in convexa, quorum maximum non excedit magnitudine unguem pollicis. Verum etsi hæc multiformis divisio tali modo se offerat visui, est tamen, etiam in junioribus, totum os occipitis unum os continuum, sed tale, cujus partes aliz osseam duritiem modò adeptæ sunt, aliz nondum, quam ubi hæ postea etiam nactæ sunt, tunc à reliquis ossis particulis non differunt, ut dictum præcedente cap. 1.

Tertia, quæ media, *Sagittalis* dicitur, quod instar sagittæ ab apice Lambdoidalis recta per longitudinem summi capitis ad coronalis medium feratur in adultis. Hæ bregmatis ossa distinguit & jungit, atque in infantibus primo biennio vel triennio, imò in pueris nonnullis, usque ad octavum vel decimum annum, rarius in adultis, mediam coronalem transiens usque ad nasi summum excurrit, os frontis in duo ossa dividens, quæ frontis sutura plerumque in adultis ita coalescit per veram symphysim, ut ejus vestigia omnino aboleantur: rara enim sunt adultorum capita in quibus hæc sutura frontalis invenitur: à me tamen quinquagenarii cujusdam cranium servatur, in quo futura illa prorsus integra est, sagittali inter ossa bregmatis, ut & lambdoidali fere abolitis, ac vix conspicuis. Galenus, lib. 17. de usu

art.



part. cap. 9. nec non Vesalius, & Sylvius, in comment. ad Gal. lib. de offibus, observant futuram sagittalem etiam interdum in infantibus per medium occipitis os, usque ad spinalis medullæ initium pertingere: quod tamen Fallopius apertissime negat unquam fieri.

Suturamendosa.

Suturæ mendosæ duæ sunt.

Squamoidæ.

Prima à processus mammillaris radice sursum circulari ductu delata, os temporale in utroque capitis latere circumscribit, & deorsum ad auris basim progreditur, syncipitis, occipitis, & sphænoïdis ossa cum temporibus squamosa impositione (hinc Sutura squamoidæ appellatur) jungens: quæ laxa conjunctio huic parti commodissima fuit, propter ossis temporalis aliquem motum, quem una cum suo musculo in masticatione peraget.

Secunda, ad latera, à summitate squamosæ conjunctionis oblique versus oculi orbitam deorsum fertur ad principium suturæ primæ communis, atque hoc os superius cum syncipitis offibus, inferius cum frontis offe jungit.

Quatuor commissuræ.

Præter has suturas adhuc quatuor sunt commissuræ, cranio propriæ, ad harmoniam referendæ, quamvis Bauhinus illas suturis annumeret.

Prima ab extremitate suturæ lambdoidalis ad radicem ossium petrosorum oblique ad basim capitis versus interiora procedit, & est quasi lambdoidis suturæ additamentum.

Secunda est linea in media basi, quæ utrimque brevi ductu fertur usque ad rimam communem sphænoïdi cum temporum offe.

Tertia in anterioris calvariæ sede interius conspicua, ad ossis sphænoïdis angulos inferiores & posteriorem orbitarum oculorum partem, transversa ducitur.

Quarta foris sub narium offibus fungolis obliquo ductu ad ossis sphænoïdis foramen procedit.

Præter dictas suturas nonnulli, quibus multiloquia & longiores ambages placent, adhuc plures alias describunt, quarum tamen variz non sunt, nisi dictarum suturarum partes ulterius extensæ, variz item non nisi harmoniæ.

Commissuræ communes.

Commissuræ cranio & maxillæ communes, quinque numerantur, quæ cum quasi mediz sint inter futuram & harmoniam, Suturæ harmoniales appellandæ sunt.

Prima in orbitæ oculi sede dextra, à fine suturæ quintæ extrorsum procedit, & veram futuram æmulatur, estque frontis ossi & maxillæ superioris ossi primò communis.

Secunda in oculi sede laterali & inferna apparet.

Tertia ab interna & laterali oculi sede

oblique ad nasi summum extrorsum ascendit.

Quarta per ossis jugalis medium oblique procedit; idque temporali ossi jungit, & veram futuram æmulatur.

Quinta inferius in narium amplitudine ex posterioribus antrorsum tendit.

Has suturas Riolanus, comm. ad lib. Gal. de offib. cap. 10. paulo aliter describit, eorumque numero adhuc quinque alias adjicit, citato loco videndas, quas nos tantum aliarum appendices seu ultiores productiones esse putamus, atque hinc, ut confusio nem, evitemus, illas prætermittimus.

Usus suturarum est, partim ut vaporibus exeuntibus faciliorem transitum præbent: partim etiam ut fissuræ, quæ in cranio contingunt, se non extendant ulterius quam per unum os, & in proxima futura sistantur. Adde, quod per has fibrillæ à dura meninge transeant, pericranio connexæ (ab his per cranii exteriora expansis, pericranium generari, non pauci existimant) ex quibus dura meninx una cum cerebro suspensa tenetur, ne valido saltu aliove motu loco moveatur, sicque ventriculi cerebri concidant. Atque hinc bene scribit Hippocrates, illos sanioris capitis esse, qui plurimas suturas habent: & contra, si sine suturis sint capita, pejus valere, nam in his multi, & sæpe vitiosi vapores detinentur, cephalalgia, epilepsia, aliorumque gravium morborum causæ: præterea ab externo incidente ictu vel casu facile rumpuntur, longasque fissuras contrahunt.

Verum quandoquidem hic mentio fit fissuræ cranii, quam dicimus non extendi ulterius quam per unum os, & sisti ad futuram proximam, obiter etiam inquirendum, quomodo interdum fieri possit, à pluribus decantata illa contrafissura, qua cranium dicitur findi in parte opposita illi in qua ictus fit. Hanc Hippocrates creditur describere, lib. de vulner. his verbis: Os sub vulnere frangitur alia capitis parte quam qua ulcus est, & os nudatum est. Hic locus Hippocratis contrafissuræ certitudinem plurimorum animis firmissime impressit, in eamque sententiam etiam Galenum, Avicennam, Cornelium Celsum, Soranum, Jo. Andr. à Cruce, Nicolaum florentinum, Jo. de Vigò, aliosque præclaros Medicos abripuit: quam Fontanus quoque, anot. in cap. 1. epit. Vesalii, confirmare nititur exemplo pueri, qui è muro quindecim pedes alto deciderat, in quo fractura cum multis fissuris, mox deprehensa fuit circa musculum temporalem, sed post mortem secto cranio, adhuc duæ aliæ contrafracturæ in latere opposito repertæ sunt. Has contrafracturas strenue negat Gabriel Fallopius, de capit. vulner. cap. 13. & rem probat, non tantum Galeni, Pauli, aliorumque auctoritatibus,

Usus suturarum.

An fieri possit contrafissura.

Digressio.

verum etiam propriâ experientiâ, scribit-  
que se centies & pluries capite percussos  
vidisse, nunquam tamen contrafracturas in-  
venire potuisse. Experientiâ Fallopii etiam  
nostram adjungimus, qui in castris non  
centies, sed ducenties, & pluries hujusmo-  
di capite graviter percussos milites, præci-  
pue equites, tractavimus, nunquam tamen  
ullam contrafracturam observare potuimus:  
interdum quidem fissuras in utroque latere  
invenimus, sed in iis solummodo quibus  
caput utrumque percussum fuerat. Et sic,  
procul dubio, etiam contigit in puero illo  
Nicolai Fontani, in quo licet manifesta ex  
casu læsio, cum fissura, mox deprehensa  
sit in uno latere, ignoratum tamen fuit, an  
non etiam puer in oppositum latus percussus

fuisset, vel lapis aliquis gravior ex muro,  
fortè ruinoso, post illum descendens in illud  
latus decidisset, quod maxime verosimile  
est. Ita ut nos, rationibus & experientia no-  
stra freti, calculum nostrum iis adiiciamus,  
qui contrafracturas fieri negant, cum nullas  
sufficientes rationes videamus quibus illas  
fieri posse verosimile sit. Quantum ad citata  
Hippocratis verba, ille non loquitur ibi de  
contrafractura, sed docet interdum pus sub  
cranio alia parte colligi, quam qua os fra-  
ctum est, idque etiam nos aliquoties vidi-  
mus, sed hoc nihil probat pro contrafractura,  
nec eam fieri posse docet:

Quid sit harmonia, dictum *precedente*  
*capite 2.*

## CAPUT V.

*De totius capitis ossibus in genere.*

Capitis ossa alia sunt cranii, alia  
maxillarum.

Cranium.

Cranium instar galeæ cere-  
bro ad tutelam circumjectum,  
non ex uno osse constare de-  
buit, ne à casu, ictu, vel alicujus rei du-  
rioris irruentis impetu penitus funderetur aut  
diffiliret, sicque nobilissimi visceris con-  
tenti actiones impedirentur. Eum in finem  
summus Protoplastes illud ex pluribus ossi-  
bus construxit, ut ictu in unum os inciden-  
te, fissura se non extenderet nisi usque ad  
futuram qua ossi proximo jungitur, ut  
dictum capite præcedente.

Sunt autem cranii ossa, vel propria, vel  
communia.

Ossa pro-  
pria.

Propria alia sunt continentia, alia con-  
tenta.

Continentia, quæ cranii exteriorem scu-  
tellam seu galeam constituunt, sunt sex, vel  
septem. 1. Os frontis, quod in recens na-  
tis, & sæpe etiam in adolescentibus, rarè  
in adultis, in duo divisum est. 2. Duo ossa  
sincipitis. 3. Unum os occipitis. 4. Duo  
ossa temporum.

Contenta, sunt octo ossicula, in uno-  
quoque osse petroso quatuor, latentia, &  
auditus inservientia, scilicet, incus, mal-  
leus stapes & os orbiculare. His annumerat  
Bauhinus duo ossa labyrinthi, & duo inno-  
minata.

Communia.

Communia verò cranio cum maxilla su-  
periore duo sunt ossa, nempe os cuneiforme,  
& cribrosum, cum appendice spon-  
giosa.

Atque sic cranii ossa modò plura, modò  
pauciora numerantur, pro ætatis, futura-  
rum, & computationis diversitate.

Maxillarum ossa maximam partem faciei  
constituunt, eaque sunt vel superioris, vel  
inferioris maxillæ. Maxillarum  
ossa.

Superioris maxillæ ossa numerantur quin-  
que: inferioris duo in puerulis, quæ post-  
modum coalescunt, & in adultis unum os  
fiunt. His maxillis insistant dentes viginti  
vel triginta.

In dictis autem capitis ossibus variaz oc-  
cultæ cavitates existunt (de his postmodum  
suis locis hic illic specialius agemus) de qua-  
rum usu haud parvum dubium est inter Ana-  
tomicos. Harum descriptionem quia con-  
junctim proponit Riolanus, lib. 5. anthro-  
pog. cap. 50. ejus verba & textum hic infe-  
remus. In capite, inquit, multa sunt cavi-  
tates insignes, quæ Sinus ab Anatomicis vo-  
cantur. Illas perquirere, ut cognoscas, an sint  
inanes & vacua, membrana tenui velata, &  
quam inter se communionem habeant. Sunt au-  
tem sinus utrimque quatuor. Maxillaris, qui  
intra maxillas superiores delitescit. Frontalis,  
juxta supercilia in fronte collocatus. Sphanoi-  
deus sub sella sphenoidii latet. Mastoideus in-  
tra mastoideum continetur. Omnes sunt vacui,  
membrana tenui obducti: solus Mastoideus ca-  
vus quidem est, & inanis, sine ulla membra-  
na, sed in septem, aut octo, vel novem cel-  
lulas, instar alvearis apum, distinguitur.  
Ingressus sinus maxillaris intra cavitatem na-  
rium, à latere ossis spongiosi apparet. Introitus  
frontalis sinus in summis & intimis naribus de-  
prehenditur. Ingressus sinus Sphenoidi intra  
nares profunde occurrit, detractis ossibus spon-  
giosis. Ingressus sinus Maxillaris evidens est sine  
ossium incisione. Ingressus sinus frontalis con-  
spicitur, osse frontali supra supercilia descisso.  
Ingressus sphenoidi sinus evulsâ sellâ, seu ta-  
bu- aciliati

bulâ interiore sphæroidis ademptâ innotescit. Ingressus sinus mastoidei in latere sinistro concha continetur, propè mastoideam apophysin, nec apparet nisi rupto & lacerato conchæ fornice, sive poro auditorio divulso.

Foramina.

Præter istos sinus, in calvariæ ossibus considerata quoque veniunt varia foramina, atque etiam nonnullæ fossæ: de quibus idem Riolanus, in *isagog. de ossibus*, cap. 7. hoc modo scribit. foramina, inquit, sunt interna, & externa. Interna sapius viginti quinque, interdum viginti septem namerantur, utrimque duodecim vel tredecim, & unum sine pari, quod spinali medulla egressum præbet. Primum est Ethmoideum; secundum, Sphænoideum: tertium, Opticum: quartum, Scissura orbitaria: quintum, Temporale, pro nervo tertiæ conjugationis in temporalem musculum abeunte: sextum, Gustativum: septimum, Gustativum secundum: octavum, Iugulare: nonum, Caroticum: decimum, Auditorium: undecimum, Iugulare: duodecimum, motivum linguae, seu linguosum: decimum tertium Cervicale ultimum impar, sive Occipitale. Externa sunt utrimque decem Sylvio: undecimum addo, nempe, externum auris foramen. Præterea ad radicem sty-

loidis, in extremitate apophyseos auricularis parte externa foramen adest, intus bipartitum, & tenuissima squama divisum, quod vestibulum ipsum intuentibus apparet. Externorum foraminum primum est, Superciliare: secundum, lachrymale: tertium, Orbitarium externum: quartum, Orbitarium ethmoideum: quintum, supra palatum: sextum, in extremo palati: septimum, scissura sub zygomate: octavum & nonum, supra pterygoides apophyses intrabiatum: decimum, Mastoideus: undecimum, Auditorium foramen externum.

Fossæ,

Fossæ sunt interna & externa. Interna sex notantur in basi interioris calvaria: frontales duæ: temporales duæ: occipitales duæ. Externa sunt septem utrimque, quibus octavam fossam addo, nempe narium cavitatem. Prima est, orbitaria, sive ocularis: secunda, nasalis: tertia, zygomatica: quarta, supra palatum: quinta, infra palatum: sexta, pterygoidea: septima, articulatoria maxilla inferior: octava, est in foramine sexta conjugationis.

Hæc Riolanus, jam in sequentibus patebit, an & in quibus hæc Riolani cavitatum, foraminum, & sinuum descriptiones differant à nostris.

## CAPUT VI.

## De ossibus cranii propriis in specie.

**D**E singulis capitis ossibus speciatim acturi, initium faciemus à cranii ossibus, quæ varia sunt scilicet, ossa frontis, syncipitis, occipitis, & temporum.

Os frontis.

**Os frontis**, aliis **Os puppis** dictum, eximiam habet magnitudinem, estque in infantibus superiore parte molle ac geminum, utpote futura sagittali ad nasi summitatem excurrente divisum, qua in adultis coalescente & abolita, fit unum, idque tam exacte, quasi nunquam fuisset divisum: rarè in senioribus futura divisum reperitur.

Sedem capitis anteriorem occupat, estque figuræ semicircularis, superius futura coronaria, inferius verò, & interius post oculi orbitas, transversa commissura circumscriptum.

Cellula ossis frontis.

In superciliorum regione ad nasi summitatem, inter utramque tabulam, cellula seu fovea gemina, ossis squamulis distincta, tenuissimæque membranæ succincta, & modo vacua, modò humore quodam mucoso repleta, donatur, quæ tamen in infantibus, iisque qui depressam sinamque faciem, vel frontem divisam obtinent, vix conspicua existit. Hæc non magna est in

homine, sed in bobus, ovibus, equis, aliisque similibus animalibus insignem & oblongam habet cavitatem, in qua nonnunquam ferventissimo æstatis tempore vermes generari tradunt, à quibus animalia ista vertiginosa, & interdum furibunda evadere, atque hinc periti veterinarii, ad istius mali sanationem, caput circa hunc locum aperire, & sic vermes eximere, dicuntur.

Tabula exterior, foveam hanc effingens, orbitæ oculi superiorem partem planam efformat: interior vero utrimque supra oculos extuberantiam gibbosam, multis prominentiis, instar colliculorum, inæqualem, tanquam fornicem, constituit.

Fovea hæc foraminulis, in nasi amplitudinem desinentibus, donatur, quibus additur unum foramen exile, supra ossis sphæroidis septum intra calvariam desinens, quod tamen plerumque non pervium invenitur, forte quia in adultis ut plurimum consolidatur. Riolanus, *animadvers. in Bauhin.* putat hoc solummodo inservire adhæioni sinus longitudinalis duræ meningis.

De usu hujus cellulæ sunt varix opiniones. Nonnulli ad aeris præparationem pro spiri-

Usus cellulae,

spirituum animalium generatione : alii ad aeris odoriferi diuturniorem conservationem : alii ad excrementi pituitosi collectionem : alii ad vocem sonoram reddendam, eo loco à Natura positam esse credunt. Hæc tamen omnes opiniones sunt tantum meræ conjecturæ, nullo solido fundamento innitentes. Nam aer externus ad spirituum animalium materiam complendam per hanc viam omnino concurrere nequit : nec odoriferi aeris conservatione hoc loco opus est ; & excrementis pituitosis colligendis ventriculi cerebri dicati sunt, eaque paucissima, imò plerumque nulla hoc loco reperiuntur, non tantum in hominibus, quibus hæc cellula parva & arcta est, verum etiam in vitulis, bobus, ovibus, aliisque similibus humidis animalibus, quibus illa satis ampla & magna est ; etiam sonus vocis ab hac fovea nullam perfectionem recipit, utpote quæ à larynge & libero narium transitu procedit, quod in quadrupedibus liquet, quæ nulla, aut minima voce utuntur, cum tamen hanc cavitatem maximam habeant. Ita ut de usu hujus foveæ aut cavitatis adhuc omnino dubitandum sit, cui tamen frustra magnitudo tam insignis, præcipue in brutis, concessa non est.

*Processus.*

Hujus ossis frontis exigui sunt processus, ad oculorum angulos utrimque prominuli, orbitæ superiorem partem constituentes.

*Fossa.*

Intrinfecus ei quoque fossa non admodum profunda sursum versus per medium insculpta est, locum sinui magno duræ meningis concedens.

*Foramina.*

Obtinet quoque foramina, modò unum oblongum, vel rotundum, modò bina (horum locum interdum fossula supplet) ad medium cujusque supercilii sita, & in oculi orbitam desinentia, per quæ ramus nervi tertie conjugationis ex oculi sede ad palpebrarum & frontis musculos ac cutem ascendit. His accedit tertium foramen, supra cristatum os situm, & in foveam ante commemoratam desinens, quod sæpe non perforatum inveniri antè dixi.

*Ossa syncipitis.*

Ossa Syncipitis, seu Verticis, vel Bregmatis duo sunt, superiore capitis sede locata, & per veram futuram sibi invicem, ut & frontis atque occipitis ossibus, conjuncta, temporalibus verò per mendosam futuram coherentia.

*Figura.*

Figuram convexam & semicircularem simul juncta constituunt.

*Substantia.*

Substantiam duram quidem in adultis, sed cæteris tamen ossibus rariorem ac tenuiorem, obtinent, idque ad vaporum faciliorem transitum ; quorum etiam ratione in infantibus, qui multa humiditate semper abundant, membranosa ac mollia sunt, & postmodum paulatim indurantur, scilicet plerumque circa loquelæ exordium. Rarissime autem contingit ut in adultis mollities

illa permaneat, quod tamen in nobili quadam domina quadragenaria me vidisse meminisse ; & Bauhinus, lib. 3. theatr. anat. cap. 6. scribit illud ipsum contigisse in prima sua uxore : sic etiam Lindanus vidit horum ossium tantam mollitiem & laxitatem in femina triginta annorum, ut ei capite dolente, vel parturienti, coronalis futura ad pollicis latitudinem, dehisceret, conspicuuntur motu cerebri. Unde liquet, non esse perpetuo verum, quod nonnulli tanquam certum tradunt, scilicet hunc membranosum hiatus semper solidari cum incipiunt pueri articulas voces proferre.

Nos, ut ex antedictis patet, membranosum hoc integumentum ossis nondum indurati naturam habere, ac paulatim in osseam duritiem exsiccare ac solidari, existimamus. Sunt tamen alii, qui putant illud esse membranam, & ipsa syncipitis ac frontis ossa sub illa membrana è marginibus suis paulatim excrecere, usque dum tandem coeant, eumque hiatus opplent.

Hujus hiatus geminus est usus. I. Ut *Ufus huius.* crassi viscosique vapores, qui in humidissimo infantis cerebro plurimi redundant, per hunc minus densum locum commodius exhalare, & dissipari possint. II. Ut in partu hæc superiora ossa compressione nonnihil coeuntia, capiti infantis faciliorem transitum per ossium hypogastrii angustias efficerent.

Hæc syncipitis ossa, licet communiter duo sint, sæpe tamen in senibus, consolidata futura, unum fiunt, & omnino coalescunt.

Exterius lævia, interius inæqualia sunt ; *Salci.* eaque interiore parte varios insculptos habent sulcos, longos & tortuosos, duræ meningis venas excipientes : item ad latera futuræ sagittalis duas, interdum tres, quatuorve foveas obtinent, quasi apice digiti impressas, multisque exilibus foraminulis ad diploidem penetrantibus, donatas, quibus foveis dura mater firmiter adhæret, ita ut hoc loco, propter firmum connexum, sæpe in avulsione cranii, præcipue brutorum, dilaceretur. Per dicta exilia foraminula arteriolæ ex dura matre in diploidem ingrediuntur, & venulæ ex diploide ad meningem exeunt, quæ vascula in avulsione cranii disrupta, copiosas sanguinis guttulas iis locis in meningis supremis conspicendas exhibent. Præterea etiam aliis in locis hic illic varia, sed rariora, foraminula, ad minimorum vasculorum transitum, in his ossibus reperiuntur.

Os occipitis, aliis Basilare, Proxæ, *os occipitis.* & Pyxidis os dictum, posteriorem & inferiorem capitis partem constituit.

Hoc unicum est in adultis, rarissime in plura quasi ossa divisum : at in pueris plerumque in tria vel quatuor, aut secundum quosdam

quosdam, in quinque, sex, septemve ossa distinctum videtur: sed Fallopius, in *observat.* non plura quam quatuor unquam observavit: cum quo consentit Eissonius, *lib. de ossib. infant.* De his ossiculis videantur ea quæ de lambdoidali futura dicta sunt *præcedente cap. 4.*

*Figura.*

Figuram exhibet triangularem, intus cavam, foris convexam.

*Substantia.*

Substantiam nactum est duram, crassam, atque densam, cæteris cranii ossibus fortior, ut injuriis externis in posticam capitis partem, ubi prævideri nequeunt, irruentibus, melius resisteret. Non tamen ubique eandem seu æqualem crassitiem habet, sed aliis partibus tenuior, aliis crassior est.

*Sinus.*

Connequitur ossibus syncipitis & temporum, nec non ossi cuneiformi.

Sinus in eo novem conspiciuntur, quos Riolanus fossas appellare mavult. Exterius duo inferiore parte ad latera magni foraminis exsculpti. Interius septem, quorum duo infimi & maximi protuberantias cerebelli excipiunt: quibus adstant alii duo, utrimque unus, qui ex ossibus temporum oblique ascendunt, & transversim per occipitii ossa procedunt, in ejusque medio concurrunt, & duos duræ meningis sinus laterales excipiunt. Ex his tertius rectus ascendit ad ossa bregmatis, ejusdem meningis superiorem magnumque sinum admittens. Hujus recti lateribus utrimque majusculus adstat sinus, cerebri geminam protuberantiam posticam excipiens.

*Processus.*

Processus duo majusculi ad magni foraminis medullæ latus, oris interiora spectantes, adstant: quibus duo minores & plani, paulo retrorsum versus, junguntur, qui omnes lubrica cartilagine tecti à sinibus primæ vertebræ excipiuntur, & articulationi capitis inserviunt. His interius duæ aliæ eminentiæ opponuntur, ita ut eodem loco os intrinsecus & extrinsecus protuberet. Ad dendus etiam quintus, isque maximus processus, magnum huic ossi inferiore parte, qua tenuius est, robur conferens, qui interius à magno foramine recta ascendens, cerebelli protuberantias distinguit. Huic in canibus superiore parte incumbit processus transversus, cerebrum a cerebello dividens.

*Foramina.*

Foramina habet quinque. Unum inferius maximum, per quod medulla oblongata è cranio in vertebrarum cavitatem illabitur. Cui mox ad latera adstant duo foramina, ad septimi nervorum paris, & arteriæ venæque transitum. Ab horum latere utrimque sub osse petroso, inter occipitis capitulum & appendicem styloidem, magnum oblongum foramen, cum osse temporum commune, conspicitur, sexto nervorum pari, ut & arteriæ carotidis ve-

næque jugularis ramo, transitum concedens. Præter hoc interdum, sed rarius, in externa sede capituli hujus ossis utrimque adhuc unum foramen proprium, sed non amplum, inveniri, & arteriam venamque transmittere, notant nonnulli Anatomici.

Ossa temporum laterales capitis regionem occupant, utrimque unum, quorum exterior superiorque pars *Ossa tempora- rum.* **Os squamosum**, & **Squamiforme**, propter squamæ explanatam tenuitatem: inferior verò & interior, auditus organum continens, ob inæqualitatem & singularem durtiem, *Os petro- surr.* **Os petrosum**, & **lapidosum** appellatur, qualem durtiem habere debuit, ut sono percutiendo foret aptius.

Singula hæc temporum ossa in adultis continua ex uno osse constant: at in infantibus squamosa pars à petrosa dividitur; imò etiam in pueris, usque ad septimum annum meatus auditorii anterior circulus intercedente cartilagine ab eo dirimitur, cujus divisionis vestigia etiamnum in adultis ad principium istius meatus aliquo modo supersunt, ut mox sub finem hujus capitis dicetur.

Figuram superius semicircularem & æqualem, inferius verò & interius asperam, multisque protuberantiis, instar rupium prominentibus, inæqualem: item substantiam à lateribus tenuiorem, inferius verò & interius multo crassiorem obtinet. *Figura.*

Sinus in hoc osse duo considerandi. Exterior major, cartilagine obductus, inter meatus auditorium & ossis jugalis processum, qui caput longius maxillæ inferioris recipit. Interior minor, ossi occipitis communis, ad dictum processum posteriore loco situs. *Sinus.*

His sinibus appendix adstat oblonga, acuta, gracilis, à styli figura *Os styloides,* **Os styloides** appellata, quæ in infantibus cartilaginea, in adultis ossea conspicitur. Hæc in coctione cadaverum facile diffingitur & amittitur.

Item observandi duo alii processus externi, & unus internus, quorum.

*Primus* obtusus, crassius, & brevis est, intus nonnihil concavus, à papillæ uberis vaccini aliqua similitudine, *Processus mammillaris.* **Processus mammillaris** appellatus, quem in pueris nondum adesse, sed postmodum exoriri, scribunt Fallopius & Bauhinus.

*Secundus* ab auris meatu antrorsum fertur, & per suturam oblongam jungitur cum osse maxillæ superioris, atque sic ex duabus apophysibus (una ossis temporalis, altera ossis maxillæ minorem oculi angulum constituentis) concurrentibus, ac simul junctis construitur **Os zygomaticum**, seu *Os jugale.* **Jugale**, Græcis *σζυγῶδες* dictum, quod figura jugum capitibus boum alligatum quodam-

X x x

dammodo refert, & instar pontis ab oculo usque ad aurem se extendit, atque durissimum & solidum est, secus ac censuit Columbus, qui illud cavum esse voluit. Utrisque radicibus crassis prodiens in medio gracilescit. Constructum autem est ad tutelam & securitatem muscoli temporalis, & exortus muscoli masseteris: atque eum etiam in finem ut tendo crataphytæ muscoli aggere lapidoso muniretur, & os malorum protuberans, tanquam a repagulo quodam fulciretur.

*Foramina ossis petrosi.*  
*Tertius* internus ad basim internam calvariae in longum protuberans, a singulari duritie & inaequalitate (ut modò dictum) petrosus appellatur (Riolanus scribit hunc in puerulis esse epiphysim distinctam & separatam, quæ cultri cuspidem facile aufertur) qui principio latiore à temporum osse procedens, sensim in acutum desinit, exterius nonnihil asper, interius omnino lævis, sed tamen multis tuberculis inaequalis, propter sinus in eo efformandos. Hic intra calvariam duo foramina habet, per quorum anterius & minus arteriola, per alterum verò majus & posteriora respiciens, nervus auditorius ad interiores sinus & cryptas ingreditur: qui mox ab ingressu in duos ramos divisus, per duo interiora diversa foramina in superiorem inferioremque sinum, labyrinthum scilicet & cochleam, abit. Extra calvariam tria habet foramina. *Primum* est meatus auditorius, qui lato orificio in eum

patet, & à parte posteriore oblique antrorsum sursumque delatus, sensim angustatur, ut aeris percussus, ampliore ductu ingredientis; in angustia illa fiat collectio, sicque perfectior auditus. Præterea, ut in illa obliqua tortuositate ejus impetus nonnihil infringatur, & tympani membranam mitius feriat. Hujus autem meatus orificium seu circulus in infantibus recens natis omnino cartilagineus est, sed post nativitatem paulatim ossescit, & post septem octove menses mediante cartilagine adhuc à reliquo osse distinguitur, ac coctione separatur, postea verò tantopere exsiccatur, & per symphysim tam exacte cum reliquo osse cōit, ut amplius separari nequeat, etsi primæ separationis vestigium in plerisque adultorum craniis residuum maneat. Huic dicto meatui juxta meatum primum ossis sphæroidis adstat foramen *secundum*, angustum, breve, & obliquum per quod ex interioribus cavitatibus vena ad jugulares excurrit. *Tertium* vero foramen inter processum mamillarem & appendicem styloidem situm est, & desinit in meatum qui ab aure ad os fertur.

In hoc processu, seu osse petroso auditus organum comprehenditur, in eoque latent tres cavitates, Tympanum, Labyrinthus, & Cochlea: nec non quatuor officula, Incus, Malleus, Stapes, & os Orbitale, de quibus omnibus supra latius dictum, lib. 3. cap. 18.

## C A P U T V I I.

### De ossibus Cranio & Maxilla superiori communibus.



Recedente capite quinto dictum, duo esse ossa cranio cum maxilla superiore communia, scilicet Os cuneiforme, & Os cribrosum.

*Os cuneiforme.*

*Os cuneiforme*, Græcis σφenoειδές dicitur, non tam quod forma cuneum æmuletur, quam quod instar cunei reliquis ossibus sit interpositum. Quia autem variam obtinet figuram, hinc etiam πλῆμορφον, *multiforme*, & quia basin cranii constituit, *Os basilare* nominatur.

In infantibus constat ex pluribus ossibus mediante cartilagine unitis, eaque vulgò quatuor numerantur: quorum primum dicitur vix digiti latitudine ab occipitis coronis recedere: secundum sellam equinam & processus nervis visoribus destinatos comprehendere: tertium & quartum esse processus alatos & planos. Contra, Riolanus scribit, cuneiforme os in paulo adultioribus,

usque ad duodecimum annum, ex gemino tantum osse constare. Verum hic binarius, & ille quaternarius numerus nobis omnino displicet, isque ad ternarium reducendus videtur: quippe si os cuneiforme in infantibus accuratius inspicatur, illud ex tribus duntaxat ossibus constare comperietur: uno scilicet medio maximo, quod basin constituit, sellamque equinam efformat, atque antrorsum versus latera duas quasi alas expandit; & duobus minoribus, alas vespertilionum constituentibus. Progressu ætatis omnia illa ossa conjunguntur, & in unum os coalescunt, mediis mollioribus, quibus à se mutuo dividi videbantur, partibus ad firmam osseam duritiem, reliquis æqualem, jam perductis. His ossibus nonnulli addunt *Os vomer* dictum, tanquam ossis sphæroidis partem, quia inferius ei affixum adhæret; quod tamen displicet Fallopio & Riolo, qui illud

os tan-

os tanquam distinctum & separatum describunt.

**Situs.** Situm est in media capitis basi, eique ossa cranii propria, nec non maxillæ superioris ossa undequaque circumstant, ac per suturas mendosas & harmonias illi junguntur, quæ in ætate provectiore sæpe obliterantur.

**Substantia.** Substantiam in medio crassam, in lateralibus verò expansionibus tenuiorem, duram, & squamosam obtinet, quæ in pueris usque ad duodecimum annum solida esse videtur, at in adultis constat ex duabus tabulis & media cavitate spongiosa inter illas hærente, quæ maxime apparet sub sella.

**Processus.** Processibus variis donatum est, externis & internis.

Externi quatuor sunt, quorum duo anteriorius conspicui, juxta septum osseum narium & palati, qua parte cum maxilla superiore cohæret, à figuræ aliqua similitudine, *πνευμοειδεις*, aliformes, nonnullis *Alæ vespertilionum* nominantur. Duo autem posterius occurrentes geminis apicibus versus styloidem protenduntur.

Interni etiam quatuor sunt, sibi invicem oppositi & *κλινοειδεις* inde vocati, quod quatuor lecticæ aut mensæ pedes aliquo modo expriment. Horum duo anteriores & majores à latiore basi paulatim in acumen attenuantur. Duo autem posteriores in aliquibus non extuberant, sed parietem referunt, ac pro uno habentur: plerumque tamen in latum exprorecti, in duos apices acuminantur, in medio nonnihil sinuatos. Atque hi quatuor processus, una cum spatio quod eos intercedit, à sellæ equinæ Turcicæ aliquali similitudine, *Sella equina*, *Sella sphænoideis*, *Sella Turcica*, & uno nomine *Ephippium* appellatur.

**Sella equina.**

**An sella sit perforata**

De hac Sella notandum, quod Galenus, *lib. 9. de usu part. cap. 3.* scripserit, os sphænoideis cribrosum, multisque foraminibus pertusum esse, ad pituitæ in glandula collectæ transitum. Hanc sententiam quoque Jac. Sylvius, *depuls. calum. secund.* Riolanus, *lib. 5. anthropog. cap. 50.* Julius Casserius, *de nasi fabric. sect. 3. cap. 15.* Hoffmannus, *in institut.* & Francisc. de le Bœ Sylvius, *disput. 4. thes. 33.* amplectuntur: imò Franciscus Puteus scribit, se foramina ista in anatome Versellii habitasse: etiam refert Andreas Laurentius, se illa in quibusdam craniis resiccatis invenisse; in plerisque tamen deficere, nec in recente cadavere unquam inveniri, quia viscidæ pituitæ infarctui opplentur. Atque sic multi alii quoque clarissimi viri Galenum ducem hac in parte sequuntur; sed errante duce, simul omnes seducuntur.

Quippe Galenus cum statuisset cerebri pituitam è ventriculis influere in glandulam pituitariam sellæ impositam, per eamque evacuari, & interea tamen nullas vias videret per quas pituita ex illa glandula rursus effluere posset ad nasum & palatum, sibi imaginatus est, sellam necessario foraminibus pertusam esse debere: atque hanc speculationem, quam Galenus solummodo ut verosimilem proponit, reliqui ut verissimam susceperunt & approbarunt: sed, quod facere non debuissent, ut præceptoris sui sententiam melius defenderent, scripserunt se illa foramina vidisse: atque sic mendacio Galenum defendere annexi sunt, quod ipse Galenus vivus ab iis non petiisset. Quippe cavitas ossis sellæ continua squama dura ac densa, & nusquam ullis foraminibus pervia obducitur, atque ne Lynceis quidem oculis quispiam illic foraminula ulla videbit. Quod ipsum etiam satis accurate observavit Vesalius, *lib. 7. de corp. fabric. cap. 11.* cum quo consentiunt, Fallopius, Columbus, Valverda, & Bauhinus. Per quas autem vias pituitosus liquor è glandula pituitaria evacuetur, videndum supra, *lib. 3. cap. 8.*

Sinus plures huic ossi sunt insculpti. Exterius in utroque processu aliformi unus oblongus & profundus, pterygoidi musculo interno sedem præbens. Interius unus in ephippii medio, præ cæteris insignis, & fere quadratus, glandulam pituitariam suscipiens. Cui anteriore & superiore parte alius transversus & oblongus incumbit, nervorum opticorum conjunctioni sedem præbens: à lateribus verò unus utrimque minus profundus adstat.

**Sinus.**

Præterea à sellæ equinæ lateribus etiam considerandæ veniunt duæ hujus ossis expansiones, intus inæqualiter concavæ, variisque prominentiis donatæ, exterius verò convexæ, in primò natis spongiosæ, in adultis duræ & squamosæ.

Foramina in utroque ossis sphænoideis latere numerantur septem: quorum

**Foramina.**

*Primum*, quod rotundum, juxta ephippii processus anteriores nervo optico transitum præbet ad oculum.

*Secundum*, quod oblongum & amplum, priori subjicitur, & transmittit nervorum par secundum ad oculi musculos, ac tertii paris ramum ad frontem, genas, & nares, nec non amplum arteriæ carotidis & venæ temporalis ramum. Hactenus tradiderunt Ingrassias, alique varii Anatomici per hoc secundum, ut & per tertium ac quartum foramen pituitosam materiam è glandula pituitaria ad narium amplitudinem effluere, atque etiam inter oculorum musculos effundi, ibidemque ab iis lachrymas generari. Verum hæc opinio à veritate prorsus aliena est, quia glandula pituitaria in ephippio arctissime inclusa est duræ meningi, quæ

X x x 2

eo loco



eo loco nusquam pertusa observatur, ita ut pituita per eam commodè transire nequeat: & quia ipsum quoque ephippium interius squamosa lamina nusquam pervia obductum est: adde; quod humor pituitosus inter musculos oculorum effusus, eos & ipsum oculum non parum offenderet: denique quod non inde, sed aliunde profluat lachrymarum materia, ut supra dictum, & latius demonstratum, *lib. 3. cap. 15.* quod etiam aliæ dentur manifestissimæ viæ per quas pituita è glandula pituitaria & cerebri ventriculis evacuatur, de quibus dictum *lib. 3. cap. 6. & 8.*

*Tertium*, quod parvum & rotundum, secundo subjicitur, & ramum tertii, nec non quinti nervorum paris ad temporalem musculum & pterygoides, item ad internam narium membranam, ac supernos anteriores dentes deducit.

Foramen  
lacerum.

*Quartum*, Foramen lacerum dictum, quod amplum, longum, & inæquale, instar fossæ, in orbitæ oculi latere externo situm, & sphœnoidi cum ossè maxillæ commune est, ac quarti nervorum, ut & præcedentis tertii paris ramum ad temporalem musculum & palatum emittit.

*Quintum*, quod oblongum, sed processui posteriori ephippii obvium, insignem arteriæ catotidis ramum intromittit. Vesalius etiam venæ jugularis ramum emittere putat.

*Sextum*, quod ovale, præcedenti ad latus adstet, & quarto nervorum pari exitum concedit.

*Septimum*, præcedenti proximum, exiguum & rotundum, è dura meninge venæ jugularis radicem emittit.

Os cribrosum.

*Oscibrosus*, seu *Cribiformis*, seu *Ethmoides*, Græcis ἠθμοῖς, ἠθμοειδές, in media frontis basi, inter utriusque oculi convexam partem situm, narium summis incumbit, & ossi frontis, maxillæ superioris secundo, & sphœnoidi levibus harmoniis jungitur, quas altior ætas frequenter abolere solet.

Hoc os multis exilibus foraminibus pertusum est instar cribri (hinc ei nomen impositum) paucis rectis, plurimis tortuosis & obliquis, inter quæ majora sunt illa quæ cristæ galli proxime adstant.

Integitur dura meninge, quæ hac parte valde porosa & minimis foraminulis pervia esse vulgò traditur, quod tamen à vero nonnihil recedit: nam illa meninx per ista exilia foramina multos parvulos tubulos emittit versus ossa spongiosa, narium supremitates opplentia, per quos pituita è cerebri ventriculis descendens effluere, nihil verò è naribus sursum meare potest: de his vide supra, *lib. 3. cap. 8.*

Hujus medio oblongus, triangularis, & in apicem acutum desinens insistit processus, qui à cristæ gallinacæ aliquali similitudine, **Crista galli**, Fernelio *Verruca pradura*, Sneidero *Septum ossis spongiosi*, appellatur (in brutis figuram paulo aliam habet, sed tamen non eandem in omnibus) hocque os cribrosum, instar septi, in duas partes dirimit (hinc est quod nonnulli Anatomici os cribrosum pro gemino, & hanc cristam galli pro tertio ossè describant) ac cerebri processus mammillares distinguit. Hæc crista galli superiore loco protuberantiam habet inæqualem, cum sinuosa quadam asperitate, cui falcis sinus superior valide adnascitur. In infantibus primò natis hæc crista nondum reperitur.

Crista galli.

Cristæ galli ab inferiore parte alius processus opponitur, tenuis & durus, nares superiore parte distinguens, unde **Vomer**, & **Narium diaphragma**, seu **interstitium**, nominatur.

Diaphragma narium.

Narium cavitati superiori inhaerent **Ossa spongiosa**, pumici similia, innumeris labyrinthicos cavernulis ac tortuosis foraminulis donata, carne admodum fungosa opplenta. De his loquitur Hippocrates, *lib. de loc. in hom.* In naribus, inquit, foramen non est, sed aliquid fungosum ut spongia. Hæc tamen ossa ipse Hippocrates, ut & Galenus, multique Anatomici, sæpius etiam confundunt cum ossibus cribriformibus, atque cum ossa nominant, sæpe intelligunt cribrosa, & interdum etiam contra. Nos tamen existimamus singula esse distincta ossa, quorum spongiosa ex cribriformibus quidem pendula sunt, & ossium nasi parietibus adhærent, sed tamen ab utrisque diversa existunt.

Ossa spongiosa.

Galenus, *lib. 8. de usu part. cap. 6.* ut & *lib. 9. cap. 3.* (cum quo consentiunt plerique Anatomici) horum cribriformium & spongiosorum ossium usum esse scribit, partim ut pituitosa excrementa è cerebro per ea evacuentur: partim ut per eadem quoque vapores olfaciendi intro ad processus papillares ferantur: & præterea etiam aeris frigidi, nec non cujuslibet maligni odoris nimis repentinus in cerebrum impetus aliquantum tardetur, in eaque mora aer nonnihil tepescat, & odor alteretur ac benignior reddatur. Verum illam sententiam à veritate aberrare, ex eo liquet, quod spongiosa carnes ita positæ sint, ut per eas nihil à naribus ad tubulos, à dura meninge per foramina ossis cribrosi pendulos, multo minus ad ipsum cerebrum penetrare possit, sed duntaxat excrementa pituitosa libere ad nares effluere queant, ut supra latius dictum, *lib. 3. cap. 8. & 19.*

Ufus.

C A-

## C A P U T VIII.

## DE MAXILLA SUPERIORE.

Maxilla  
superior.

Axillæ duæ sunt, faciei maximam partem constituentes superior, & inferior.

Superior inferiores & laterales orbitæ oculorum partes, nec non nares, malas, palatum, & dentium superiorum ordinem comprehendit.

Hæc in homine brevior & semicircularis est, ad venustatem; in brutis verò longa: præterea homini immobilis est, quod tamen plerisque aliis quoque animalibus commune, exceptis psittaco, phœnicoptero, & crocodilo (forte etiam nonnullis aliis nobis ignotis) quibus mobilis existit.

Substantia.

Substantiam habet foris quidem solidam, sed intus cavernosam, imprimis versus dentes, quo loco in pueris medullosus succus ad maxillæ incrementum continetur, eo autem in adultis absumpto, cavernosum os remanet, idque ad vocis resonitum nonnulli factum putant, quod tamen minus verosimile est. Hanc cavernositatem accuratius perscrutatus est Highmorus, *lib. 3. anat. part. 2. cap. 1.* & utrimque sub oculi sede inferiore, ubi os ad oculi tutelam quodammodo protuberat, antrum ad latera inferiora nasi situm invenit, insigniter cavum, sphaericum, & nonnihil oblongum, osse attenuato, seu tenuiore ossea squama tectum, in cuius basi protuberantiæ quædam eminent, quibus radicum dentium apices tenuiores includuntur. Hoc antrum frequentius vacuum, aliquando muco repletum inveniri tradit, quem per cavitatem quandam ab ossis frontis cavernulis & osse ethmoide destillare existimat.

Caverna.

Vasa.

Sanguinem ad nutritionem recipit per ramulos arteriarum soporalium, & a nutritione residuum per exiguas venulas ad jugularem externam remittit.

Ossa.

Componitur ex ossibus duodecim, quorum in utroque latere sex numerantur, quæ omnia harmoniis potius quam futuris junguntur.

Os jugale.

*Primum*, forma quasi triangulare, situm est ad angulum oculi externum. Hoc apophysi sua cum anteriore ossis temporum processu per futuram obliquam junctum, efformat *Os jugale*, Græcis ζυγωμα, & ζυγώδες dictum quod exterius gibbum, interius verò cavum, instar arcus musculum temporalem amplectitur.

*Secundum*, quod exiguum, tenue, pellucidum, & fragile, oculi canthum inter-

num constituit, in coque ad nares pervium est, *Foramen lachrymale* appellatum, *Foramen lachrymale*, per quod serofus humor è ventriculis cerebri distillans, lachrymas in oculis efficit (de his videndum *lib. 3. cap. 14.*) ne autem illæ ad oculos continue profluerent, caruncula huic foramini imposita est, quæ seri ordinarii effluxum prohibet, at copiose affluenti cedit, eique exitum guttatim per oculorum canthos lachrymarum specie præbet. Interdum prope tenellum hoc os, circa summitatem nasi & oculi canthum majorem abscessus fiunt, quos *διγλωπας* Græci vocant, qui si negligentius tractentur, facile ipsum os erodunt ac penetrant, sicque *fistulam lachrymalem* efficiunt. *Fistula lachrymalis.*

*Tertium*, tenue & pellucidum, intra, orbitæ oculi internum latus reliquis duobus interpositum, ac interius narium fungosis ossibus continuum est.

*Quartum*, os maximum est, quod genarum & palati potissimam partem constituit, dentiumque superiorum ordinem cavernis suis recipit. Foramen conspicuum obtinet, sub oculi orbita situm, tertii nervorum paris ramum ad faciem producens: item aliud ad dentium incisoriorum partem posteriorem, mox medio osseo septo in duo foramina sursum versus divisum: quorum ad singulas nares unum tendit, quod arteriolam ex palato ad narium amplitudinem transmittit, ex eaque venulam eodem remittit. Sunt qui putant per hanc viam pituitosos quoque humores per nares descendentes in os profluere, quod tamen non videtur verosimile. Ad hæc, sub oculi orbita, ad nasi inferius latus, fovea insigniter cava ei insculpta est, quæ tamen in pueris non manifeste invenitur, sed incrementum ætate paulatim excavatur.

*Quintum*, quod durum, tenue parvum, oblongum, & fere quadrangulare, cum suo pari eminentiorem ossium nasi partem constituit.

*Sextum*, quod latum & tenue, cum suo pari palatum efformat.

His adhuc unum addunt Fallopius, Columbus & Laurentius, inter palatum intimum & os sphaenoides interjectum, nariumque imam partem, septi instar, separans, atque hinc *Vomer* dictum. *Vomer.* Cui Vesalius adijcienda putat ossa spongiosa in interno nasi posita, capite præcedente descripta.

X x x 3

C A-

## CAPUT IX.

## De Maxilla inferiore.



**A**xilla inferior in homine (sic etiam in aliis animalibus, excepto crocodilo & paucis avibus) mobilis est. Hæc in pueris usque ad septimum, ex sententia Laurentii & Bartholini; at secundum Riolanum, *com. in Gal. de off. cap. 12.* usque ad primum, vel saltem non ultra secundum annum, ex duobus ossibus constat, in mento per *συνχόνδρουν* junctis, quæ postmodum vigente ætate, in unum os crassum, durum, atque validum coalescunt.

Hanc coalescentiam interdum rursus dissolvi scripsit Galenus, *com. ad lib. Hipp. de artic. part. 34. sect. 2.* idque etiam à chirurgis Gallis observatum fuisse, refert Riolanus, *com. in lib. Gal. de off. cap. 12.* nempe maxillam saxo illisam sæpius ea parte discissam fuisse, qua ossa sibi invicem cohærebant, Verum etsi talis observatio illius rei fidem aliquam facere videatur, tamen è contrario multoties observatum est, dictam coalescentiam in adultis firmiorem esse reliquo osse maxillæ, atque hinc maxillam facilius à lateribus diffingi, quam in illa coalescentia, quemadmodum id in praxi bis terve nobis videre contigit.

Henricus Eissönus, *tract. de off. infant. cap. 3.* notat se aliquando utrimque adhuc aliam divisuram in infantibus invenisse, in medio fere cujusque lateris loco, qua parte os crassius sortitur protuberantiam, & jam in latiore nititur assurgere planitiem.

Brevior est hæc maxilla in homine, & fere semicircularis, antèrèus lata & crassa, posterius diducta, formam Græcæ literæ *υ*, vel ut mavult Platerus, furcam, aliquo modo exprimens, idque ad majorem venustatem. In aliis verò animalibus manuum opera destitutis, & alimenta ore ab humo capientibus, longa est, brevior tamen in simia, quæ manibus quodammodo utitur.

Utrunque ad finem duos attollit processus, nonnullis cornua dictos. Horum anterior, tenuis, & latus, desinit in mucronem *ρομφήν* appellatum, eique tendo musculi temporalis valide adnectitur, unde luxatio hujus maxillæ periculosa censetur. Posterior obtusus, cervice, & simul oblongo capitulo, *condylo* nuncupato, ac cartilagine ad faciliorem motum obducto,

præditus, quo sinui ossis petrosi, cartilagine similiter lævigato, inarticulatur, eique per ligamentum membraneum commune firmiter adhæret.

Interius cavitatem habet, medullosum succum ad nutritionem ossis continentem, quæ in quadrupedibus, maxime versus posteriora, sed in homine imprimis anteriore parte, versus menti regionem, & latera maxillæ exsculpta est.

Foraminibus quatuor donatur, quorum utrimque unum internum, ad dictorum processuum initia situm, quartæ conjugationis nervum, dentibus distribuendum, una cum arteriola intromittit, & venulam emittit. Sic etiam duo reliqua externa, quæ minora & rotunda, ad latera menti utrimque exsculpta sunt, prædicti nervuli ramulos rursus extrorsum, ad inferius labium, ejusque musculos & cutem emittunt.

Antèrèus, interiore & media menti sede, ad firmiorem musculorum insertionem, tuberculo inæquali exasperatur.

Sinus superficialis, tam externos, quam internos, circa processuum exordia, ad musculorum insertionem obtinet.

Cavernulis etiam seu alveolis, ad dentium insertionem, excavatur, quorum non est certus numerus, quippe in aliis plures, in aliis pauciores sunt, pro ratione diversitatis radicum & numeri dentium: præterquam enim quod dentium numerus in omnibus æqualis non sit, etiam eorum radices modò pauciores, modò plures, modò triplices, modò quadruplices sunt, quarum quælibet peculiari alveolo infixæ est.

Alveoli autem isti Græcis *σώματα*: intervalla verò quæ dentes à se invicem discernunt, *αίμα*: margines maxillarum, quibus alveoli seriatim continentur, *ψάρυα* dicuntur. Iidem alveoli Latinis etiam *presepia*, *locelli*, *fossula*, & *mortariola* nominantur.

Dicti alveoli interdum pereunt, interdum renascuntur: nam evulso dente, si alius succedat in ejus locum, alveolus ita constringitur & coalescit, ut ejus vestigium omnino pereat, tantamque duritiem acquirit, ut dentis munere fungatur. Contra verò nonnunquam circa annum quinquagesimum vel sexagesimum, erumpentibus genuinis seu sapientiæ dentibus, alveoli novi formantur; imò in pueris, ubi dens excidit, & ipsi novus subrogatur, sæpe con-

Divisura.

Cavitas.

Foramina.

Sinus.

Alveoli.

Nomina.

Figura.

Processus.

contingit, ut ab alveolo priore oblitterato, sibi novum excavet.

Infra maxillam inferiorem, sub lingua,

situm est os hyoides, de quo supra actum, lib. 3. cap. 23.

## CAPUT X.

## De dentibus.

Definitio.

**D**entes, quasi edentes, Græcis ὀδόντες, dicti, ossa sunt minuta, dura candida, maxillarum alveolis per γόμφωσιν inarticulata, cibis confringendis primario dicata, & secundo pronuntiationi vocabulorum aliquo modo inservientia.

An sint ossa.

Dico esse ossa: sed ante hac acriter disputatum fuit, dentesne offibus forent annumerandi, aut non: ac super ea controversia plurimæ rationes ultro citroque allatæ sunt, quas omnes collegit Riolanus, *com. in lib. Gal. de offib. cap. 11.* quæ isto loco videri possunt. Ipse autem Riolanus affirmativam partem bono jure defendit 1. Quia in prima partium formatione, una cum aliis offibus, ex semine delineati sunt. 2. Quia nutriuntur sanguine, ut reliqua ossa. 3. Quia dura sunt ut alia ossa. 4. Quia non sentiunt in sua substantia, sed tantum in radicum periosteis & nervulis ad illos pervenientibus, eodem modo sicut illud etiam contingit in aliis offibus.

Substantia.

Quia autem non semper molles, verum etiam res duræ comminuendæ erant, substantiam inter reliqua ossa dentes nati sunt durissimam: & qua parte ex alveolis extant, læves & nudi, nulloque periosteo obvoluti; qua verò in alveolis latent, asperi & pellicula tenui, acutique sensus investiti sunt, intus cavitatem habentes, manifestam in molaribus confractis, at in caninis & incisoriis invisibilem, qua per exilia radicum foraminula, præter arteriolam à carotidibus (ut ante dictum, lib. 6. cap. 4.) & venulam exilem à jugularibus, etiam nervulum à quarti paris ramo admittunt, per tenuissimam membranulam, quæ dictam cavitatem investit, expansum, cujus, ut & periostei radices investientis ratione, dentes acutissime sentiunt, quamvis sola eorum ossea substantia, membranula interiore & nervulo privata, omnino insensilis sit, quod patet, quia dum secantur, aut limantur, non sentiunt. Atque ita facile componi potest illud Medicorum dissidium de sensu dentium, quem alii dentibus inesse, alii non inesse volunt, si dicamus; dentem ipso toto isto instrumento, ex osse, nervulo, & membranula constante, sumptum, sentire: at pro

sola offium substantia sumptum, non sentire.

Hæc autem tria vasa, scilicet arteria, vena, & nervus, primo unita, & quasi in funiculum una membranula cinctum, composita, ingrediuntur internum maxillæ, & in peculiari canali, à medullæ cavernis diverso, sub dentibus decurrunt, & tenues furculos ad radices dentium mittunt, qui tamen quomodo dentes ingrediantur, fate-mur, cum Fallopio, nos in homine visu non assequi, quippe exilia radicum foraminula, etsi in prima pueritia nonnihil conspicua esse, & ad mucosam radicem substantiam penetrare videantur, tamen in crescente ætate adeo angusta evadunt, ut visum penitus subterfugiant. Ratio tamen abunde docet, vias aliquas dari per quas illa vasa dentium interiora subeunt: quippe continua nutritio arteriarum & venarum ingressum ostendit; ut & illud, quod cavitatem molarium interior, ac præcipue prima mucosa substantia, sanguine nonnihil adsparsa conspiciatur, & sæpius evulso dente magna hæmorrhagia fiat. Nervulum autem ingredi docet sensus acutus, nam dente molari erosione perforato (quod frequenter fit ab acribus catarrhis) si acicula vel acus usque ad membranulum, quæ interiorem cavitatem investit, per foramen im-mittatur, valde acutus & dolorosus sensus percipitur, qui sine nervo spiritibusque per eum allatis, illic esse non potest. Præterea, licet horum vasculorum in dentem ingressus in homine demonstrari commode non possit, tamen experientia hoc negotium clarius reddit in brutis majoribus. Nam si bovis inferior maxilla interiore latere aperiat, mox cavitatem medullam continens & tria vascula (arteria, vena, nervus) membranulo peculiari obvoluta in suo peculiari canali occurrunt. Disscissâ verò membranulâ, nervus ex pluribus quasi funiculis conflatus videtur, inter quos arteriæ venæque propagines feruntur. Membranulâ verò sublevatâ, fibræ nonnullæ, telis aranearum similes, ab ea ad dentium radices protendi conspiciuntur; & si molaris vel incisoriis sensim è proprio alveolo extrahatur, fibras istas gracillimas dentis radici adhærere, & è maxillæ cavitatem extendi, observatu facile

cile est. Illud tamen mirum occurrit, quod incisorii & canini dentes, qui minores, & una tantum radice infixi sunt, surculos magnos & conspicuos, via patente ad insertionem accedentes, obtineant; molares verò, qui majores, & tribus quatuorve radicibus præditi sunt, surculos illos capillorum modo tenues, & itinere obscurissimo incedentes, habeant. Hanc rem in homine se eodem modo habere dubitari minime potest, licet visus acumine vasculorum ingressus percipi nequeat.

*Ortus.*

Dentium principia in utero cum reliquis partibus generata, intra maxillas & gingivas latent, intra quarum claustra paulatim magis magisque perficiuntur, in iisque primo observantur, folliculus, pars ossea, & pars mucosa.

*Folliculus.*

Folliculus albus, non exacte membranofus, sed nonnihil mucosus, & quo dens junior, eo mucosior, totum quidem dentem obvelat, sicut cortex seminis plantæ medullam, sed denti nusquam inseparabiliter coalescit. Hic paulatim extremis partibus sursum deorsumque perforatur, atque tunc ipse dens ex eo quasi propullulat, cujus in isto principio duæ substantiæ observantur, una ossea, altera mucosa.

*Ossea pars.*

Ossea pars est dentis basis, quæ paulatim in firmam candidamque substantiam induratur, & extra gingivas protruditur. Hujus principia intra gingivas in nuper natis magis conspicua sunt in incisoriis, minus in caninis, sed in molaribus non nisi diu post apparere incipiunt. Hanc basin esse epiphyisin, crediderunt Sylvius, Vesalius, & Columbus; quod tamen bono jure negant, Eustachius, Fallopius, & Riolanus.

*Mucosa pars.*

Mucosa verò pars est dentis radix, quæ maxillis infigitur, constatque squama seu pellicula tenui minus candida, quæ continet mucum istum pellucidum, duriusculum, coloris ex rubro albens, in quo vasorum minima rudimenta permixta conspiciuntur: qui mucus squama seu pellicula ista circumseptus, usque ad secundum ætatis annum, plus minus, invenitur, adeoque mollis est, ut fortius digitis compressa dentis radix sanguinem exsudet, fere tali modo sicut gallinarum & columbarum pennæ, quarum superior pars dura & quasi solida, inferior verò cava & mucosa est, sanguinemque exsudet vehementius compressa. Progressu temporis mucus hic primo in circumferentia magis magisque induratur & ossescit, hinc paulatim etiam in medio induratur, ita tamen ut in medio ipsius crassitie ad radicem cavitas quædam remaneat, in molaribus satis conspicua, in reliquis non, quæ interius vix usque ad partem dentis extra gingivam eminentem protenditur, & tenuissima, acutique sensus mem-

branula, quam vel nervulus ingreditur, vel ipsius nervuli expansio constituit, succingitur. Sic autem mucosus illo paulatim indurato, radix ulterius increscit, ac folliculum perforat, ipsique maxillæ infigitur. Tunc folliculus, amisso priore usu, alium assumit, & fit dentis vinculum, eò enim jam firmiore reddito, dens ipsis alveolis & gingivis, velut glutino quodam adhærescit.

Hoc modo perficiuntur dentes sub gingivis latentes, e quibus non nisi aliquot post nativitatem mensibus erumpunt, plerumque septem aut octo mensibus, quod tempus dentitionis appellatur. Primò erumpunt incisores superiores, hinc inferiores, propter eorum majorem necessitatem: postea canini (non raro tamen ante caninos duo molares prodeunt) ultimo molares, idque summo cum dolore, propterea quod gingivarum carnem perforant, quæ simillior, faciliorem; si durior, molestiorem iis transitum concedit, unde tunc pueris febres, convulsiones, & alvi profluvia contingunt, maxime cum erumpunt canini, ut testatur Hippocrates, 3. aphorif. 25. Quare autem primo incisorii, postea verò molares orientur, illius hanc rationem adfert Aristoteles, lib. de gener. animal. cap. 8. *Oriuntur, inquit, prius incisorii, quam lati, quod officium eorum prius est, secatur enim prius quam molitur quod comeditur: sunt autem hi molendi officio delegati, illi vero secandi. Tum etiam quod res minor, etsi simul inchoatur, tamen celerius solet perfici quam major, minores autem priores quam maxillares sunt.*

*Tempus eruptionis.*

Postquam viginti dentes, scilicet sursum deorsumque decem, eruperunt, tunc reliqui sequentes molares tardius procedunt, idque sæpe non ante quintum, sextum, aut septimum annum, ad quod usque tempus veluti tenuia puncta intra maxillas delitescent: quod ea de causa fieri verosimile est, quia maxillæ nondum pervenerunt ad sufficientem magnitudinem, unde spatium brevius seu angustius est, quam ut possit viginti octo, aut triginta duos dentes comprehendere: atque hinc non erumpunt illi dentes, nisi cum amplificatæ fuerint maxillæ, ad quod 4. 5. 6. aut 7. annorum spatium requiritur.

Circa septimum & octavum annum permutatio dentium fieri solet, quippe decidunt priores, in eorumque locum alii succrescunt. Non semper tamen omnes dentes decidunt & permutantur, sed ut plurimum incisores, canini, & ex molaribus illi qui proxime singulis caninis adstant, rarius secundi. Neque etiam in quibuscumque horum omnium permutatio fit, multis enim pauciores duntaxat decidunt. Sic observavi, quibusdam solos incisores decidi-

*permutatio.*

cidisse, nullos alios: quibusdam solummodo duos vel tres ex incisoribus permutatos fuisse, reliquis permanentibus: ita ut hac in parte res semper eodem modo non procedat.

Hæc autem permutatio communiter semel tantum fieri solet, annis modò dictis, aliis autem temporibus, aut pluries illam fieri, rarissimum est. Ita semel in quadragenario vidi dentem molarem, canino proxime adstantem, fuisse permutatum: & in tribus quatuorve pueris incisoriorum aliquos bis decidisse, ac renovatos fuisse observavi. Hac de re rarissimos casus videtur observasse Eustachius, *lib. de dentib. cap. 29.* adjiciam ipsius verba; *Illud consideratione, inquit, dignum videtur, quibusdam non septimo, sed decimotertio & decimoquarto anno consuetos renovari dentes cecidisse, atque iterum natos fuisse. Alios statuto definitoque annorum numero, nimirum semel post septimum, iterum post decimum quartum annum, eosdem dentes bis amisisse, & totidem denuo novos recepisse. Neque illud prætereundum est, nonnullis vigesimum ætatis annum ægentibus genuinum erutum eodem anno renatum fuisse: multisque demum juvenibus bene temperatis ac fortibus molarem unum extratum iterum creari.*

quæstio de  
permuta-  
tione.

Super hac permutatione inter viros doctos quæstio satis contentiosa agitur. An scilicet primi dentes fuerint veri dentes, & qui elapsis primis postea erumpunt, sintne plane novi dentes, an verò novi rami ex eadem radice succrescentes? Absurdum videtur, statuere novam aliquarum partium generationem post nativitatem fieri, cum in prima formatione omnes partes sua perfecta delineamenta, suæque principia adeptæ sint, & quibus postea ad justam magnitudinem paulatim succrescunt. Hoc cum multi observassent, ut in hunc scopulum non impingerent, dixerunt, primos dentes non fuisse veras corporis partes, sed tantum varias quasdam particulas è superflua materia generatas, & dentium munere fungentes, quo usque ipsi dentes perfecte prodirent. Alii, cum hanc sententiam vacillare, & priores dentes è numero partium corporis justo titulo excludi non posse viderent, maluerunt dicere, priores & posteriores dentes simul in utero generari, sed priores citius absolvi, atque hinc septimo mense prodire; posteriores verò tardius perfici, atque hinc septimo anno erumpere, tuncque priores ex alveolis suis protrudere: idque per anatomen liquere tradunt, qua visui patet, illos qui decidunt, tenui quodam interstitio separari ab iis qui septimo anno erumpunt, neque esse inter illos communionem.

Permutatio-  
nis proces-  
sus.

Verum neutra opinio rem acu tetigit, nam si negotium hoc permutationis den-

tium accuratè perspiciamus, liquebit non opus esse ambagibus ad evitandum hunc illumve scopulum, in quem impingere nulla necessitas cogit. Primi enim dentes circa septimum annum primò quidem vacillant, & postea decidunt, sed animadvertendum illos non radicitus elabi, at superiorem duntaxat partem radici insistentem decidere: nam quotidiana experientia docet, si primi dentes radicitus evellantur, vel per infortunium ita excutiantur, ut radicis nulla particula superstes maneat, nunquam, vel rarissimè novos in eorum locum succrescere, sed tunc plerumque alios proxime adstantes fieri latiores, sicque vacuum locum nonnihil replere: & si forte radicitus evulso dente alius in locum succedat, tunc radicem non fuisse penitus extractam, sed infimam ejus particulam diffractam intus in alveolo remansisse, è qua postea novus dens rursus epullulavit. Hæc res, quam longo usu & diligente inquisitione ita se habere observavi, est consideratu dignissima, & studiose semper cavendum, ne in priorum vacillantium dentium detractione (quæ vulgò digitis, vel filo alligato fieri solet) radix simul evellatur aut extrudatur, utpote qua penitus evulsa, spes nulla novi dentis emerfuri superest, qui alioqui manente radice postea facile succrescit. Hoc ipsum etiam observavit Columbus, *lib. 1. cap. 8.* ac proinde bene monet, ne, cum pueris dentes ictu vel casu aliquo effringuntur, quæ reliqua portio est effringatur, sed accuratissime radicem ipsam servandam esse, in ea enim, veluti in semine quodam, ipsius dentis regenerandi spem residere, eaque radicitus evulsa, dentes non amplius, vel rarissime, renasci. Rolfincius, *lib. 2. exerc. anat. cap. 28.* Columbum hac in parte reprehendit, & dentem non ex radice epullulare, sed totum radicitus primo septennio excidere, ac totum novum in ejus locum succrescere tradit. Verum, cum Rolfincius experientiæ & autopsiæ manifestissime contradicat, non opus est ut rationibus refutetur.

In cervo cicuri observavimus, singulis annis aut sesqui annis ex radice cornuum substantiam quandam molliusculam & mucosam sub basi cornuum, instar pilæ palmaris, assurgere, cui tunc cornua vacillantia insistebant, & quantum illo tempore ex animantis furore animadvertebatur, dolor hinc vel molestus pruritus ei excitabatur; usque dum tandem cervus cornua in arborem vel parietem impingens, ea detruderet ac deponeret, tuncque ex eadem illa radice nova cornua paulatim succrescebant. Sic etiam se res habet in dentibus, in quibus hujusmodi mollior ac mucosa substantia, non singulis annis aut sesqui annis, ut in cornubus cervorum, sed tantum semel,

Y y

idque

idque circa annum septimum (quamvis etiam in senectute, etsi rarius, hac de causa dentes nonnunquam decidisse, & de novo rursus succrevisse, observatum sit) è radice sub imposita dentis basi assurgit, eamque vacillantem & cum dolore mobilem efficit, ita ut plerumque aut digitis, aut ciborum masticatione deturbetur (rarò enim sponte decedit) & nisi tempestive detrahatur, postea rursus exsiccata & indurata molli istâ substantiâ, iterum firmatur, eique ex eadem radice, per prædictam mucosam partem, adhuc unus dens à latere adjungitur vel enascitur, qui tamen non est totus novus dens, sed novus surculus ex prioris radice quoque prosiliens. Ita ut mirum non sit, dentem priorem aliquo interstitio separari à surculo posteriore, quia non habet cum eo aliam communionem, quam per unam radicem utrique communem, sicut diversi arboris surculi ex una radice succrescentes, in quibus sicut singuli surculi non sunt novæ & diversæ arbores de novo generatæ, sed unius arboris diversi surculi: ita etiam dentis surculi non sunt novi & diversi dentes, sed diversi surculi unius dentis. Hæc res non exacte considerata deceptit Eustachium & Riolanum, qui cum per Anatomicen observassent, posterioris surculi principium sub priore epullulans, scribunt se vidisse novos dentes sub primis latuisse. Quod autem posterior surculus priorem expellat, sit propter angustiam alveoli, qui vix duos surculos simul capit, quos tamen nonnunquam etiam admittit, tuncque priori posterior surculus in suo exordio adjungitur: verum quia ille posterior tunc irregulariter extra dentium ordinem solet excrescere, & ori aliquam formæ turpitudinem inferre, hinc plerumque prior surculus, cum vacillat, detrahitur, vel eximitur, ut posterior recta intra ordinis limites excrescere possit.

Ex his itaque liquet totus permutationis processus, simulque patet, quantum priores duæ opiniones à verò aberraverint, dum hæc non satis considerantes, ambages commentæ sunt, ut novæ generationis scopulum evitarent.

Dentes in  
senibus re-  
nati. —

Eodem modo dicendum est, rarissime quidem, sed tamen nonnunquam contingisse, ut etiam in senibus jam edentulis ex residuis radicibus novi dentes epullularent. Cujus rei exemplum habet Joubertus, *apolog. paradox. 7. dec. 2.* de anu nobili & prorsus edentula, cui septuagesimo ætatis anno plurimi dentes renati sunt, sed exigui & imbecilles, ut in prima ætate. Talem historiam etiam refert Sennertus, ex literis Georgii Tithscardi, medicinæ Doctoris, scilicet Richenbachii in Silesia vixisse honestam matronam, fere septuagenariam, cui dentes viginti antea amissi re-

pullularunt, atrocibus cum doloribus & symptomatibus, qualia dentientibus pueris accidere solent. Hoc tempore vivit hic Ultrajecti anus quædam pauperula, octogenaria, nomine Elisabetha Grenii, cui dentes omnes ante multos annos fuerunt elapsi, & jam ante biennium anteriores quatuor dentes incisorii sunt regeniti. Mihi ipsi ætatis anno 56. caninus dens, & multos ante annos elapsus, renatus fuit, & firmus exinde substitit, sed brevior remansit. Similia exempla referunt etiam Plinius, *lib. 11. cap. 17.* Nævifanus, *in Sylva Nupt. lib. 5.* & Alexander Benedictus, *lib. de curand. morb. cap. 1.*

Vcrum in hujusmodi senibus notandum, licet dentium basis extra gingivas prostrans ipsis erosa fuerit, & decident, radices tamen integras & illasas remansisse, ex iisque postea novas bases excrevisse. Quia autem rarissime contingit, ubi bases eroduntur, radices integras manere, cum erosio & caries illa se plerumque etiam ad radices extendat, easque enecet & corrumpat, & rarò corrupta illa pars ab inferiore superstitie sana sponte separetur, sicque ei occasio de novo excrescendi detur, hinc in senibus quoque nova illa dentium repullulatio insolens & rarissima est, quam tamen nonnunquam factam fuisse, docent modò dicta exempla. Sed nemo, velim, sibi persuadeat, dentibus una cum tota radice funditus elapsis vel evulsis, unquam plane novos dentes in eorum loco de novo succedere aut regenerari posse: multoties hoc observavi in pueris, scilicet anteriores dentes ictu vel casu violenter cum tota radice exturbatos, nunquam alios succedaneos habuisse.

Quo modo  
dentes nas-  
cantur in  
senibus.

Circa vigesimum primum, aut sextum, vel trigessimæ ætatis annum, paucioribus in senectute, adhuc duo postremi molares dentes maximis cum doloribus erumpunt, quorum materia in maxillæ alveolis tam diu imperfecta delituit, antequam dentalis substantiæ perfectionem nancisci, & sic in dentem excrescere, atque erumpere potuerit. Hos appellant communiter, **Dentes genuinos, Intellectus, & Sapientiæ**, quia erumpunt eo tempore quo homo jam sapit.

Dentes ge-  
nuini. aut  
sapientiæ.

Præter aliorum ossium naturam hoc habent dentes, quod non ad definitum tempus, sed fere toto vitæ tempore augeantur (hinc merito dicendum, illos esse ossa sui generis) & quantum quotidie per masticationem, ciborumque comminutionem ab iis deteritur, tantum rursus increseat. Quod incrementum imprimis liquet, si dens, evulso opposito dente in quem solet impingere, non deteratur, tunc enim in tantam sæpe longitudinem increfcit, ut oppositum foramen fere repleat: sic etiam apparet hoc in

Incrementum  
con-  
tinuum.



incrementum, si forte dens transversim versus anteriora, vel posteriora ex alveolo erumpens, ordinem dentium excedat: nam hoc si versus anteriora contingat, tunc in ipsam labii carnem paulatim se insinuat, eamque magno incommodo perforat: si verò versus posteriora seu introrsum versus hoc fiat, tunc ab eo linguæ motus oblæditur; sic ante hac in praxi, sed diversis temporibus, mihi occurrerunt duæ ingenuæ Domicellæ, quibus singulis unus acutus dens ex radice intima incisorii dentis superioris proruperat, atque in tantam longitudinem excreverat, ut linguam perforaret, cum maximo dolore, & loquelæ impedimento, ob quam causam utrumque evelli curavi. Sic etiam Plinius, Eustachius, & Alexander Benedictus, cum scribunt se vidisse dentes in palato enatos, intelligendi sunt de dentibus qui tali modo ex radice alicujus incisorii superioris per palati membranam prorumpentes versus oris interiora excreverunt.

Verum hujus tamen jam dicti incrementi sunt certi limites, ultra quos dentes non protenduntur: fiunt quidem interdum extra ordinem longiores, sed nihilominus ad certum terminum (aliocui monstrosam longitudinem sæpe nanciscerentur) sicut pili ciliorum & superciliorum, qui abscissi recrescunt, & in nonnullis luxuriant, ubi tamen ad statutum longitudinis terminum pervenerunt, subsistunt, neque ulterius extenduntur.

Dentes uno ordine in maxillis depositi sunt. Rarissimum est, quod de Laodice, regis Mithridatis filia, & de Trimarcho, Nicolis filio, testatur Plinius, scilicet dentes iis duplici ordine constituisse. Adhuc multo rarius triplex ordo invenitur, quod tamen in Hercule observatum fuisse, narrat Rhodiginus; & in proprio filio suo Phœbo notavit Columbus. In tygri & elephante triplex ordo communis est. Sic etiam Manticora bellua, & Moraxus piscis, triplici dentium ordine armantur. In homine contingit quidem interdum hic illic dentem unum aut alterum, præcipue ex anterioribus, duplici ordine consistere, sed hoc commune non est, & fit dumtaxat cum dentes permutantur, novusque furculus ex eadem radice succrescit, qui, dente priore non decidente vel detracto, interdum recta sursum excrevens priori foris accumbit, seu adstat.

Magnitudo.

Magnitudo dentium mediocris, aliis tamen paulo latiores, aliis strictiores, aliis longiores, aliis breviores sunt.

Numerus.

Numerus in omnibus non est idem: plerumque quindecim aut sexdecim in singulis maxillis reperiuntur: nonnulli tamen pauciores habent, paucissimi plures: & qui pauciores habent, iis dentes frequenter pau-

lo latiores sunt. Majorem numerum minori præferunt Hippocrates, Aristoteles, & Galenus, eumque longævitatē præsagire arbitrantur; fortè quod materiæ primæ copiam, & formatricis facultatis robur significet: vel quod multis dentibus melior fiat masticatio, sicque ciborum ad coctiones felicior præparatio. Rarissimum est, quod de Pyrrho, Epirotarum rege, testatur Plutarchus, in *Pyrrho*; & de filio Prusæ, regis Bithynorum, refert Plinius; & de Eryptolemo, Cypriorum rege; Eriphæo Cyreneo, pœta Pherecrate, ac Sicionio, scribunt alii, scilicet, iis pro dentibus unum continuum os fuisse, lineis solummodo distinctum: qualem continuum dentem se in Barbaro quodam vidisse, refert Bartholinus, *cent. 1. Histor. 35.* qualem etiam in virgine quadam vidit Melanthon, in aula Principis Ernesti, Luncburgensis.

Differunt dentes, tum figura, tum officio.

Alii sunt acuti, lati, & incidentes, hincque **Incisorii**, Græcis *πριῆς*, & *πριμῆς*, à *πρίνω*, *incido*, appellati, origine primi, anteriore oris parte siti, & unica simplici radice, in apicem desinente, præditi. Hi numerantur sursum deorsumque quatuor, interdum tamen tres, rarissime duo, cum scilicet valde lati sunt, ita ut simul totum inter caninos spatium repleant.

Incisorii.

Alii sunt acuti & fortissimi, sed altis radicibus infixi, Latinis **Canini**, Aristoteli & Galeno. *κυνόδοντες*, dicti, in quaque maxilla duo, incisorii utrimque à lateribus proxime adstantes, qui quod priores incidere non potuerunt confringunt. Hos vulgus *oculares dentes* nominat, eorumque extractionem periculosam censet, quia nonnulli sibi persuadent earum radices usque ad oculos pertingere; cum tamen superiores suis radicibus vix alarum nasi oram inferiorem transcendant, & inferiores deorsum ab oculis longe recedant. Alii tamen, cum Laurentio & Riolo, credunt nervi oculos moventis portiunculam in hos dentes ferri, quod etiam minime verum est. Riolanus & Spigelius notant, incisoriorum & caninorum dentium radices sæpe reperiri curvas, iisque quibus hoc accidit, raro dentes illos evelli sine portione alveoli.

Canini.

Alii sunt obtusi & magni, Græcis *μύλαι*, *Molares*.

*μύλῃται*, & *μύλοι*, Latinis **Molares**, ac **Molitores** appellati, quia cibos instar lapidum molarium conterunt: Germanis, *buccarum dentes* vocantur. Horum numerus in omnibus non idem. Communiter in utraque maxilla decem, utrimque scilicet quinque, reperiuntur, quibus si sapientiæ dentes forte accesserint, augetur

nume-

Y y 2

numerus. Duo priores, caninis proxime adstantes, cæteris minores sunt, & tuberculis duobus prominuli: tres verò posteriores, majores, quatuor eminentiis inæquales redduntur, & superiore parte lati, ac fere quadrati existunt. Radicibus innituntur binis, ternis, vel quaternis, nam in his lusus aliquis Naturæ conspicitur: qui duo caninis proxime adstant, plerumque binis, posteriores ternis vel quaternis, in maxilla tamen superiore pluribus, quam in inferiore, donati sunt.

Ufus.

De usu dentium ante dictum, illos primario cibis comminuendis dicatos esse, secundario autem vocis formationi nonnihil inservire, quod munus ab anterioribus dentibus maxime perficitur, ut ex eo patet, quod qui illis destituuntur perperam loquantur, & literas aliquas, ut C. D. L. T. X. Z. malè pronuncient. Hinc bene ait Plinius, lib. 7. cap. 16. *Vocis sermonisque regimen primores dentes tement, concentu quodam excipientes ictum lingua, seriemque structura atque magnitudinem, mutilantes, mollientes que, aut hebetantes verba: & cum*

*defluxere, explanationem omnem adimentes.* Galenus, lib. 16. de usu part. cap. 2. præter hos usus, adhuc alium tertium usum dentibus adscribit, scilicet ut una cum lingua, non aliter quam reliquæ oris particulæ, sapores percipiant & distinguant. Verum ipsa ossea dentium substantia sola prorsus insensilis est, ut etiam ante dictum, sed mediante periosteo & membranula interioriorem cavitationem investiente, nec non nervulo ingrediente, satis sentit: sed anne sapores diiudicet, ut multi, cum Galeno, crediderunt, magnopere dubitandum censeo: quippe magna differentia est, inter sentire sensu tactus, & sentire sensu gustus, ut latius explicatum lib. 3. cap. 24. atque sic nobis videntur dentes percipere calorem, frigus, austeritatem, aliasve similes tactiles qualitates, sed nullos sapores distinguere.

Atque sic primam sceleti partem, scilicet caput absolvimus, nunc ad truncum seu secundam partem progressuri, & deinde ad artus.

## C A P U T XI.

### De Spina, ejusque vertebra, in genere.



IN secunda sceleti parte, scilicet trunco, considerata veniunt, vertebræ spinæ, ossa sacrum & coccygis, costæ, stenum, claviculæ, scapulæ, & ossa innominata.

Spina.

Hujus trunci posterior compages (de qua hoc & sequente capite primò agemus) instar columnæ molem corporis sustentans, atque à capite usque ad os coccygis sese extendens, componitur ex vertebra seu spondilis, & osse sacro ac coccygis, sibi invicem impositis, & per ligamenta firmiter cohærentibus, eaque vulgo Spina appellatur, quia posteriore parte spinis prominentibus donata est. Græci Sacram fistulam vocarunt, quia excavata est instar fistulæ, & principem partem continet ac tuetur. Iisdem etiam frequenter *caix* nominatur, à verbo *caia*, frango, quia videtur ossea esse columna in multas partes diffracta.

Non debuit autem hoc corporis fulcrum ex uno osse, sed ex pluribus constare, ut corpus quaquaversum commode inflecteretur. Nonnunquam tamen in senibus contingit, exsiccata cartilaginum humiditate, & intermediis ligamentis induratis, plures vertebra in unum os coalescere: cujus rei præclarum exemplum antehac ha-

bui domi meæ, in sceleto cuiusdam gibbosi, in quo septem vertebræ omnino coaluerant: qualem coalitum etiam Pavius, alique Anatomici notarunt.

Constant singulæ vertebræ in adultis ex uno osse, earumque substantia interna crassior ac fungosior, & qua parte articulantur, ad faciliorem motum, cartilagine investita est: in processibus substantiam duriorum & solidiorem obtinent.

In pueris verò constant singulæ ex pluribus ossiculis; quod ipsum, in observatis, satis accurate notavit Fallopius: In his, inquit, vertebra unum observo, ipsas ex tribus partibus ossis, dum oritur puer, & quasi per integrum annum, constare: quatum una est corpus ipsum, gemina reliqua illæ sunt, quæ foraminis medulla latera efformant. Ha corporis lateribus, dextro & sinistro, & inter se ubi spina est, cartilagine ligantur, quæ postea ossea facta juncturas delet. Hoc in omnibus verum est, exceptâ secundâ, quæ ex quatuor partibus constat, corpore videlicet, & duabus posterioribus quæ latera constituunt, & quarto dente, qui quamvis processus vocetur ab omnibus Anatomicis, est tamen re vera appendix nuclearis figura, quæ postea ita ligatur, conversis omnibus cartilaginibus in os, ut pars vertebra; & processus potius, quam appendix, esse videatur. Præ-

ter

ter secundam, etiam prima vertebra excipienda est, utpote quæ non ex tribus, sed ex duobus ossibus lateralibus, in quibus insculpti sunt sinus caput sustinentes, componitur; quæ cartilagine antrorsum circum secundæ vertebræ dentem, & posterius ab uno ad alterum os extensa, colligantur quippe prima vertebra in foetu mox nato destituitur medio crasso osseo corpore, reliquis vertebrae concessa, ejusque loco dictam habet cartilagine, quæ postea incremente ætate ossescit. Sciendum tamen, illam substantiam, quæ singulas vertebrae in diversa officula dividit, potius videri, quam esse veram cartilagine, & esse quoque osseam partem, sed talem, quæ ossis duritiem nondum est adeptæ, quod etiam de aliis ossibus monitum *precedentibus cap. 1. & 4.*

Figura.

Foramina

Figuram obtinent vertebrae superius & inferius planam, interius convexam, posterius multis processibus inæqualem.

In medio excavantur magno foramine, ad tutum spinalis medullæ descensum comparato. Ad hujus latera utrimque duo sinus adstant, quorum superiores minores, inferiores majores sunt, qui inter duas vertebrae sibi invicem impositas concurrentes, utrimque foramina illa efformant, per quæ nervi à medulla progrediuntur, quæ tantam habent latitudinem, quantam cujusque nervi transeuntis crassities requirit. Ad horum foraminum efformationem in collo, utraque vertebra æqualiter confert: in dorso autem, & maxime in lumbis, tota fere foramina in vertebra superiore, seu alteri imposita, hoc est, in inferiore cujusque vertebræ parte, sunt exculpta. Præterea etiam alia innumera foraminula minimas arteriolas, nutrimentum sanguinem deferentes, ad interioris ossis substantiam deducunt, passim in iis conspiciuntur.

Processus.

Septem processus habent. Duos superiores ascendentes, totidemque inferiores descendentes, duos transversos (hi in cer-

vice à lateribus perforati sunt) & unum posticum, qui omnium maximus est, & quem omnes vertebrae habent, excepta solâ supremâ, cui caput insidet.

In foetu primum nato processus ascendentes & descendentes osseam duritiem nondum sunt adepti, sed exigui, molles, & quali omnino cartilaginei videntur: transversus verò & posticus, spinæ dicti, eo tempore prorsus desiderantur, hincque tunc inter singulas duas vertebrae divisio, seu scissura quædam apparet, cartilagine vertebrae conglutinante repleta.

Connectio.

Connectuntur inter se vertebrae posterius per gynglimum, antè per harmoniam, ac denique extrinsecus per duram membranam intrinsecus verò per ligamentum membranosum durum ac validum, à summa cervicis vertebra ad sacrum os productum, quod multi à cartilaginibus vertebrarum oriri credunt. Præterea intercedente cartilagine inter se conglutinantur.

Ex his vertebrae constructa spina figuram habet convenientem partibus internis & earum functionibus, ac proinde rectitudinem obtinet quæ nunc retrorsum, nunc introrsum nonnihil inclinatur. A prima cervicis vertebra usque ad septimam antrorsum inclinatur, ut oesophagum & asperam arteriam commodius suffulciat. A prima dorsi usque ad duodecimam vertebram extrorsum protuberat, ut cordis & pulmonis domicilium amplius ac capacius fiat. Lumbi introrsum curvantur, ut aortæ & cavæ descendentes truncum melius suffulciant. Os sacrum cum rectitudine extrorsum protuberat, ut hypogastrii amplior sit capacitas, distensionis vesicæ, & imprimis uteri, maxime necessaria. Hanc spinæ figuram eleganter expressit Hippocrates, *lib. de artic. & lib. de ossium nat.*

Figura spinæ.

## CAPUT XII.

## De Vertebrae in specie, &amp; de osse Sacro ac coccygis.



Vertebrae, ὀστέων ἐν τῇ σπονδυλῷ dictæ, à vertendo nominatae sunt, ob continuum motum quo in quacunq; corporis flexione moventur.

Numerus.

Numerantur autem spinæ totius verte-

bræ viginti quatuor: scilicet colli septem, dorsi duodecim, lumborum quinque, quibus fundamenti instar subiicitur os sacrum, cum suo appendice osse coccygis.

Colli septem vertebrae inter se, & à cæteris spinæ vertebrae differunt, earumque pro-

Colli vertebrae.

Y y 3

processus transversales perforati sunt, ut arteriis & venis cervicalibus tutum transitum præbeant: atque in extremis sinuati sunt, ad mollis nervi exitum. Spinae verò posteriores bifidae existunt, ad musculorum & ligamentorum firmiorem connexionem.

Substantiam duriores tenuiores & minus porosam obtinent quam reliquæ spinæ vertebrae, atque interiore parte etiam minus gibbosæ sunt, molemque reliquis minorem habent. Duæ superiores capiti per valida ligamenta cohærent.

*Atlas.*

*Prima Atlas* nominatur, cui caput tanquam parvus mundus imponitur, & firmiter adnectitur. Tenuior cæterisque densior est, & spina posteriore caret, ejusque loco tuberosa quædam semicircularis inæqualitas conspicitur. Duas habet apophyses sursum ascendentes, duas item laterales, nonnihil descendentes & perforatos. Anterior protuberantiam valde solidam & duram exhibet, à cujus lateribus superiores duæ, totidemque inferiores eminentiæ obliquæ prominent (quomodo se habeat in infante primum nato, dictum præcedente capite) Interior ad anticam magni foraminis partem sinu semicirculari excavatur, cartilagine obducto, quo sequentis vertebrae dentem excipit.

*Dentata.*

*Secunda ἰσσοφύς*, à *vertendo* dicta, emittit sursum è sui medio processum durum ac rotundum, dentis instar oblongum, circum quem caput cum prima vertebra rotatur. Vnde Hippocrati tota vertebra *Dens*, aliis *Vertebra dentata*, nobis etiam *Axis* vocatur. Hic dentalis processus singulari ligamento comprehenditur, & occipitio connectitur.

Notandum, hunc dentem in infante primum nato non esse firmiter unitum, sed videri quasi separatum à reliquo osse, eique impositum; cum eo tamen postmodum ita uniri ac si nunquam ab eo solutus fuisset, sicque in adultis processum potius quam appendicem referre.

A dentis utroque latere parva & lævis planities est, sub qua apophysis lateralis perforata subsistit.

Antica parte apophysis una latior descendens, ab inferioris vertebrae cavitate excipitur. A latere posteriore utrimque apophysis descendit, quam tertia vertebra recipit.

Spina ejus posterior descendens bifida existit.

*Tertia* olim ἄξων Græcis appellata est, quod tamen nomen huic male impositum est, utpote secundæ vertebrae proprie conveniens, cujus dens axis usum & formam verè refert.

Hæc utrimque à lateribus retrorsum si-

nuosam apophysim sursum emittit, qua descendente secundæ vertebrae apophysim excipit: sub hac alia descendit, cui antrorsum versus perforata adstat, eique adhuc alia parva sursum ascendens adest, se insinuans cavitati secundæ vertebrae.

Inferius sinum habet, quo sequentem vertebrae admittit; Spina bifida in duas extremitates dividitur.

*Quarta* similis est tertiæ, sed peculiari nomine caret, ut & sequentes.

*Quinta* non multum differt à duabus prioribus.

*Sexta*, mole paulo major, etiam non multum differt à prioribus, excepto quod duas apophyses superiores habeat magis ascendentes, & spinam majorem.

*Septima*, omnium maxima, eique spina longior & crassior, sed non divisa, at capitulo rotundo obtusa est. Hujus apophyses laterales carent eminentia introrsum extensa, qua quarta, quinta, & sexta donantur.

Præter has septem, refert Spigelius, interdum etsi rarò, octavam dari, idque in iis qui longo sunt collo, quibus tunc una vertebra deest in thorace, qui hanc ob causam tunc brevior existit.

Dorsi vertebrae duodecim numerantur (rarò una superest, vel deest) magnitudine & crassitie cervicis vertebrae superantes, minus tamen solidæ, & pro vasculorum transitu multis foraminibus perforatæ. Inter se similes sunt, & apophysibus solidis ac continuis donatæ.

*Dorsivertebra.*

Harum corpora orbicularia sunt, anterior & posterior leviter excavata, superius verò inferiusque plana superficie donata, exceptâ primâ, cujus elatior sedes nonnihil inæqualis est. Verum etsi planæ sint, circa ambitum tamen omnes leviter extuberant, ut ligamenta illic firmiter vinciantur, ne vertebrae extra suam sedem prompte elabantur.

*Figura.*

Magnitudo earum fere æqualis est in novem superioribus, at sensim decrescit in tribus inferioribus. Sic etiam spinæ in novem superioribus magnæ sunt, in superiore parte acutæ, infra latiusculæ, superioresque supra inferiores obliquæ descendunt. In tribus autem inferioribus spinæ fere rectæ & extrorsum feruntur, & sunt obtusiores, infima verò spina ad finem levi superficiario sulco sinuata est.

*Magnitudo.*

Hæ dorsi vertebrae nullis peculiaribus nominibus hodie discernuntur, quamvis veneranda Antiquitas illas certis nominibus olim distinxerit. Quippe prima, quæ eminentior, λοφία, quod λόφος, seu *crista galli* similis sit. Secunda *μασχαλίζης*, *axillaris*: octo sequentes *πλευράται*, *costales*: undecima *ἀγρεπής*, non ob rectam spinam, ut putat Laurentius, sed quia in spinæ motu stabi-

*Nomina.*

stabilis manet, supernis & infernis vertebrae ab ea recedentibus in flexione, ad eamque accedentibus in erectione spinæ: duodecima *ἡ δώδεκῃς, præcingens*, veteribus dicebatur.

Distinguuntur à vertebrae cervicis, quod dorsaliū spinæ fere omnes crassæ, longæ, solidæ, ac simplices, neque ad finem divisæ sint, ut pleræque cervicis vertebrae: & quod illæ ab utroque latere sinum habeant, cui inarticulatur caput costæ, quo sinu destituuntur vertebrae cervicis; quæ è contra, ut ante dictum, processus transversales perforatos habent, secus quam vertebrae dorsi. Dictis sinibus etiam destituuntur vertebrae lumborum. Præter illos in vertebrae dorsi adhuc duo alii adsunt sinus processibus transversis insculpti, non profundi, sed superficialii, firmandis costarum articulationibus dicati, qui tamen in undecima & duodecima vix conspicui sunt.

Processus.

Donantur dorsales vertebrae, sicut etiam aliæ cervicis modò dictæ, septem processibus: quatuor obliquis, duobus lateralibus seu transversis, & uno acuto, qui spina dicitur. Obliquorum duo sunt ascendentes, totidemque descendentes. Illi se insinuant in processus descendentes vertebrae superiorum: hi non multum protuberant, & excipiuntur à capitulis processuum ascendentium vertebrae inferiorum. Transversi autem processus trium inferiorum vertebrae, decimæ, undecimæ, & duodecimæ, sensim minores evadunt, suntque undecimæ & duodecimæ processus nonnihil bifidi.

Scribit Riolanus, *isagog. de ossib.* undecimam & duodecimam vertebrae à reliquarum articulatione differre, & per arthrodiam primis vertebrae connecti, cum reliquæ per gynglimum articulentur: qua in re præclarus Vir manifeste errat, cum hæ non minus quam reliquæ per gynglimum conjungantur, etsi harum articulatio laxior sit quam reliquarum, propterea quod spinæ motus in flexura, extensione, & obli- quatione, eo imprimis loco peragi debuerit.

Lumborum vertebrae.

Notandi in his dorsi vertebrae sinus cartilagine investiti, quibus cæteræ destituuntur: duo in processibus transversis, quibus tamen carent undecima & duodecima: & duo in ipso corpore, pro costarum processibus recipiendis.

Lumborum vertebrae sunt quinque, raro plures vel pauciores. Fallopius, *de oss. cap. 20.* scribit se multoties observasse, quod pro varietate numeri vertebrae dorsi, etiam variet numerus vertebrae lumborum: ut si undecim sunt vertebrae dorsi, tum vertebrae lumborum sex inveniri: si illæ tredecim sint, tunc has tantum quatuor:

si illæ duodecim, quod ordinarium, tunc has quinque reperiri. Hoc tamen perpetuum non esse, liquet in sceletto, quod hic Ultrajecti à Medico D. Pelt servatur, in quo sunt duodecim dorsi, & sex lumborum vertebrae insignis magnitudinis.

Hæ vertebrae singulari crassitie & magnitudine reliquas omnes superant, multisque exiguis foraminulis, ad arteriolarum venarumque ingressum & exitum, donantur, atque intercedente glutinosa cartilagine, simul inter se, & cum ultima thoracis vertebra ac osse sacro articulantur, ita tamen ut harum quam thoracis, laxior sit conjunctio, quo facilius corpus inflecti possit. Processus posteriores habent breviores & minus acutos, sed latiores & crassiores quam thoracis vertebrae, ac sursum nonnihil ascendentes: laterales verò processus longiores. Interim differunt aliquantum in articulatione à vertebrae thoracis, scilicet, quod hæ processibus ascendentibus recta sursum ferantur in sinus vertebrae superiorum: illæ verò processibus inferioribus à latere inarticulentur inferioris sequentis vertebrae processibus. Duodecima autem thoracis vertebra superioribus processibus articulat, ut aliæ thoracis vertebrae, sed inferioribus ut vertebrae lumborum.

Varii Hebræi scriptores, inter ultimam os Lus: lumborum vertebrae & os sacrum, effinxerunt os quoddam, cui nomen Lus imposuerunt, de quo mirabilia scribunt, multaque nugantur, quorum summam collegit Casparus Bauhinus, *lib. 1. theatr. anat. cap. 48.* cujus verba hic adscribere lubet, ut unicuique pateat, quam turpiter Rabbini suis figmentis ac mendaciis imperitos & credulos decipiunt. Hebraeorum, inquit, scriptores tradunt in humano corpore post decimam octavam vertebrae os quoddam esse, quod neque aqua, neque igne, neque alio elemento corrumpi, nec ulla vi externa frangi aut conterri possit: quod os deus in extremo judicio rore celesti rigabit, & tunc reliqua membra ipsi rursus aggregabuntur, & in corpus coalescent, quod spiritus Dei afflatus, vivum resurget. Os hoc vocant Lus, non Luz, quod situm dicunt in spina dorsi, post decimam octavam vertebrae ad os femoris. Hujus fabula pater est Rabbi Vschaja, qui anno Christo 210. vixit, circa quod tempus conscripsit librum, qui Bereschit rabba, id est, glossa magna in pentateuchum vocatur. Hoc os inquiunt non comburi, neque corrumpi in perpetuum, quod radix hujus ossis sit ex substantia celesti, sed humectari rore, quo deus suscitaturus est mortuos, tanquam fermento quod est in massa farinacea. Volunt etiam hoc os cæteris diutius remanere, propterea quod non recipit gustum alimentorum hominis, sicut reliqua ossa, & propterea durabilius esse reliquis, & esse fundamentum cor-

po-

poris, quod ex eo extructum est. Apud eosdem legitur, Adrianum Casarem interrogasse Rabbi Jeshuam: filium Chaninæ, unde deus hominem in futuro seculo erecturus sit: respondisse, ex osse Lus, spinæ dorsi. Tunc Adrianus, unde id sciret, & quomodo probaret? tunc Jeshuam os illud in conspectum adferri curasse, quod aqua impositum non fuit emollitum, igni non fuit adustum, mola non fuit attritum, incudi & percussum malleo, rupta fuit incus, os autem nullum defectum sensit. Munsterus dicit, Rabbinos in collo hoc os esse dixisse. At Vesalius ossiculum hoc ab Arabibus Albadaran vocari, & ciceris imagini respondere scribit, & dubitat num sit ossiculum interius duorum sesamoideorum, qua ad primum pollicis pedis articulum spectantur, quod insigniter durum est. Verum Hieronymus Magius refert Thalmudistas, aliosque Hebræos commentos esse, hoc os juxta calvaria basin, sive in ipsa basi, aut nucha consistere: aliis primam esse è duodecim vertebra, à qua thorax initium habeat, qua, cum caput collumque inclinamus, maxime emineat & extuberet. Sed qua ille Adriano Imperatori respondit, vera esse nemo persuadebit. Nam etsi ossa, Platone teste, maxime diuturna sint, nihilominus ea lapidibus & malleis in pulverem comminui, & flammis in cinerem verti, quotidie videmus. Sic solent circumcisi Patres, quando rei difficilius veram rationem explicare nequeunt, ad fabulas confugere, quas suis pro sacra fidei articulis obtrudunt, ne aliquid ignorasse videantur. Hæc Bauhinus, qui dicto loco citat Rabbiorum libros & capita, quibus has fictitias nugas conscribunt: quorum sententiæ calculum etiam adjicere videtur Agrippa, de philos. occult. cap. 20

Os sacrum.

Os sacrum, crassitie & robore spectatissimum, sub vertebra consistit immobile, atque, basis instar, vertebrarum impositam struem sustentat.

Interius læve & concavum, exterius convexum & asperum est, figuramque trianguli constituit. A lateribus utrimque superiore parte planitiem asperam & inæqualem habet, qua ossibus iliis, intercedente cartilagine, firmiter cohæret.

Ex quinque, sexve ossibus, vertebrarum æmulis, construitur, quæ è latiore principio in angustum paulatim contrahuntur, & quamvis in infantibus ac puerulis facile separantur, provectiore tamen ætate in unum os coalescunt. Fallopius, in observat notat, in puerulis nuper natis etiam speciatim hujus ossis partes, ex quibus construitur, constare ex tribus particulis, sicut reliquæ vertebra (de his vertebrarum particulis dictum præcedente capite) quæ ita postea uniuntur, ut nulla amplius divisio appareat.

Foraminibus pertusum est, non latera-

libus, ut vertebra; sed transversis, ad exitum nervorum antrosum & retrorsum, utrimque ad internodia, seu conjunctiones partium, ex quibus hoc os construitur, sitis, quæ introsum versus multo sunt ampliora & majora, quam extrorsum.

Processus habet exiguos, & spinas fere sursum spectantes, ita ut infima vix emineat.

Os coccygis à figura rostri cuculi nominatum, ex tribus quatuorve ossiculis, à latiore basi deorsum in acumen sensim desinentibus, construitur, & antrosum, ad sessionis commoditatem, incurvatur.

Os coccygis.

Fallopius, in observat notat, hoc ex tribus ossibus constare, cum os sacrum componitur ex sex ossibus: at cum sacrum ex quinque construitur, tunc coccygis ex quatuor constare.

In pueris totum quasi cartilagineum est, eamque naturam fere usque ad septimum annum servat: postea incipit in spongiosam osseam naturam solidari, & ex tribus quatuorve particulis unum os fieri.

Hoc os coccygis sacro ossi instar appendicis adhæret, eique mediante glutinosa cartilagine, nexu admodum laxo conjungitur, ut in mulieribus parturientibus, & in crassiorum ac durarum sæcum excretionem, retrorsum cedere, atque à quolibet violento occurso minus lædi queat. Putant Spiegelius & Riolanus, si nexus ille nimis mollis & laxus fuerit, ea de causa in pueris prolapsus podicis fieri; cujus tamen alia manifestior & frequentior causa dari potest.

Vsus ejus est, sustinere rectum intestinum, ac in mulieribus etiam vaginam uteri, intestino isti annexam & incumbentem.

Mucroni ejus cartilago pendula adnascitur.

Hoc coccygis os, si extrorsum incurvatum in longitudinem excrecat, fit cauda, qualem anno 1638. in infante recens nato ad semi ulnæ longitudinem vidimus, omnino similem caudæ cercopitheci, seu simiæ caudatæ, à qua bestia mater secundo tertiove ingravidationis mense, ut ipsamet nobis narravit, exterrita fuerat, tamque firmam caudæ istius bestię ideam animo suo imprefferat, quam toto ingravidationis tempore ita à se excutere non potuerat, quin per memoriam identidem ipse rursus occurreret. Cum talibus villosis caudis homines in quibusdam Indiæ locis communiter nasci, testis est Plinius, lib. 7. natural. hist. cap. 2. Etiam Paulus Venetus, lib. 3. itinerar. cap. 18. scribit, in regno Lambri homines sylvestres in sylvis inveniri, qui caudas habent ut canes, longitudinis unius palmi. Horum testimonia plurimum confirmat Harveus,

Cauda.

veus,

veus, de gener. animal. exercit. 4. hac historia. Chirurgus quidam vir probus, mihi-  
bique familiaris, ex India orientali redux.  
bona fide mihi narravit, in insula Bornea locis  
à mari remotioribus & montosis, nasci hodie  
genus quoddam hominum caudatum (uti olim

alibi accidisse apud Pausaniam legimus) è qui-  
bus agrè captam virginem) sunt enim sylvicola  
ipse vidit, cum cauda carnosâ, crassâ, spi-  
thama longitudine, inter clunes reflexa, qua  
anum & pudenda operiebat. Vsq̃ue adeo vela-  
ri ea loca voluit Natura.

## CAPUT XIII.

## DE COSTIS.



Ost descriptionem spinæ, to-  
tius columnæ, nunc pergen-  
dum ad illa ossa, quæ spinæ  
sursum deorsumque junguntur  
& adnectuntur.

Superiore parte ei adhærent costæ, os  
sternum, claviculæ, & scapulæ: inferiore  
verò ossa innominata.

Costæ.

Costæ, thoracem ob vallantes, Græ-  
cis πλευραι dicuntur.

Numerus.

Hæ numerantur utrimque duodecim, ra-  
rissime plures, vel pauciores inveniuntur.  
Galenus, lib. 8. administ. anat. cap. 1.  
tradit rarissime decimam tertiam costam vi-  
deri, & adhuc rarius tantum undecim re-  
periri, idque tam insolens esse, ut inter  
mille vix unum cum tali costarum numero  
invenias. Semel duntaxat undecim obser-  
vavit Columbus. Nos etiam semel, scilicet  
anno 1642. in milite quodam Gallo,  
gladio occiso, utrimque undecim inveni-  
mus. Riolanus, cap. 19. com. in Gal. de  
oss. scribit se in nonnullis sceletis undecim  
in utroque latere, in aliis tredecim utrim-  
que monstrasse. Bartholinus, cent. 3. ob-  
servat. 1. in uno duntaxat latere undecim,  
in altero duodecim invenit. Tredecim in  
utroque latere bis observavit Fallopius, bis  
item Piccolhominus, semel Bauhinus, &  
semel Fredericus Ruysch. Ego sceletum  
mihi reservo, in quo duodecima costa utri-  
usque lateris fere desideratur: dico, fere,  
nam admodum tenuis est, & vix sesqui pol-  
licis transversæ longitudinem habet.

Hic certè ridendi videntur nonnulli ab-  
ditarum rerum nimis nasuti scrutatores, qui  
numerum costarum primi parentis Adami,  
& quot costas ante, quot post creatam  
Evam, ex costa ejus formatam, habuerit,  
magna curiositate inquirunt, multisque  
verbis ea de re differunt, haud aliter ac si  
illud quoque ad anatomicam scientiam per-  
tineret, vel scitu necessarium foret. Tali-  
bus tamen curiosis satisfaciât Plempius, lib.  
2. fund. med. cap. 3. quo loco scribit, mu-  
lierem non fuisse creatam ex sola Adami  
costa, sed ex costa carne investita: adductâ  
quippe foeminâ, Genes. cap. 2. dixit Adam:

Hoc nunc est os ex ossibus meis, & caro de car-  
ne mea. quod ultimum non addidisset, si  
ex nuda costa, & non potius ex costa car-  
ne investita Eva fuisset formata. Et ibi-  
dem refert textus sacer, quod Deus costæ  
locum in Adamo repleverit carne, id est,  
carne adnata novæ costæ.

Substantia.

Ad robustiorem firmitudinem sunt costæ  
maxima sui parte, qua per dorsum & la-  
tera feruntur, ossæ, sed intus fungosæ, at-  
que hinc diffractæ per callum facilius con-  
solidantur quam alia ossa. Anteriore verò  
minimaque parte, qua versus sternum pro-  
grediuntur, cartilaginossæ existunt, ad fa-  
ciliorem pectoris motum. Hæ anteriores  
productiones cartilagineæ nonnunquam in  
mulieribus duriores fiunt, & quasi osses-  
cunt, forte ad mammarum incumbentium  
molem melius sustinendum, nam in viris  
hoc omnino insolens est.

In infantibus primò natis extremitates seu  
capitula, quibus cum vertebra articulan-  
tur, cartilaginea sunt, sed brevi solidi-  
tatem ac firmitudinem ossæ accipi-  
unt.

Curvantur instar arcus, ut thoraci  
conveniens sit capacitas: quæ tamen cur-  
vatura major est in supernis, quam in infer-  
nis costis. Figura.]

Externa superficie nonnihil inæquales  
sunt, præcipue circa vertebra, ubi liga-  
menta annectuntur: interna verò, qua  
membranæ pleuræ adhærent, magis læ-  
vigatæ.

In longitudine & latitudine varietas est,  
nam superiores & inferiores sunt breviores,  
mediæ verò longiores & latiores, exceptâ  
primâ, quæ omnium latissima est. Ad hæc,  
in uno ejusdem ætatis homine multo latiores  
cernuntur, quam in alio, licet corporis pro-  
ceritate uterque æqualis sit: imò duo habeo  
sceleta, unum hominis, dum viveret, val-  
de proceri, quod angustas seu strictas &  
mediocriter tenues costas habet: alterum  
hominis brevioris staturæ, quod latas,  
crassas, & valde firmas habet co-  
stas.

Magnitudo.

In exortu omnes angustiores ac subro-  
tundæ

Z z z

tundæ



tundæ sunt, & quo magis ad pectus accedunt, eo sunt latiores. Superiore parte crassiores sunt quam inferiore, sed inferiore planiores.

In ima interiore parte sinu nonnihil excavantur, quo nervum, arteriam, & venam intercostalem suscipiunt.

Señio in  
empyematt.

Observatio  
practica.

Hic sinus in empyicorum sectione considerabilis existit, nam unice cavendum ne dicta vasa intercostalia lædantur. Hoc Bartholinus scribit evitari posse, si sectio (quæ inter quintam & sextam, vel inter sextam & septimam costam, numerando à suprema, institui solet) fiat à summo ad imum: sic etiam olim nos docebat Otto Heurnius, Medicinæ Professor Leydensis, qui ad istam sectionem requirebat cultellum ab uno latere acutum & scindentem, ab altero obtusum, eumque ita immitti volebat, ut obtusa pars respiceret inferiorem superioris costæ partem, id est, prædictum sinum, inferior verò acuta deorsum adigeretur ad summitatem costæ inferioris. Verum usus & experientia docent, totam istam doctrinam redolere solam imaginativam theoriam, non verò exercitatum praxim: nam in homine vivo costæ à se invicem tantum non distant, ut cultellus transversus ab infima parte superioris ad summitatem inferioris costæ immitti commode possit. Ac proinde, ut in talibus ægris (qui cum in castris, tum hic & alibi sæpius in praxi mihi curandi occurrerunt) dicta vasorum læsio evitetur, soleo jubere ut Chirurgus sectionem faciat in parte superiore costæ sextæ vel septimæ, secundum ejus longitudinem, non ascendendo ad costam ei desuper proximam. Dicunt nonnulli hoc modo fibras musculorum intercostalium transversim discindi: quasi verò illæ manerent illæ & non discinderentur in priore sectione. Fibre istorum musculorum sunt omnes oblique & interiores decussatim acumbunt exterioribus, ita ut quocunque modo sectio instituatur, fibrarum illarum læsio evitari minime possit: quæ etiam non est magnopere metuenda, cum in hoc casu vulnus non magnum infligatur, & usus doceat, illud postea facili negotio rursus consolidari, ut in hac chirurgia, quam tali modo feliciter multoties administravimus, sæpius experti sumus.

Articulatio,

Articulantur costæ à tergo vertebra,

intercedente aliqua cartilagine, iisque firmis ligamentis revinciuntur. Anterior verò cartilaginosa productiones emittunt, quarum aliæ ad os sternum perveniunt, aliæ non.

Priores dicuntur **Costæ veræ**, quarum cartilagineæ productiones immediatè sterno adnectuntur, suntque septem superiores, quarum duæ primæ *ἀντιστοφαί*, *retorta*, duæ sequentes *σβεσται*, *solida*, tres inferiores *σπυγίνδες*, *pectorales*, antiquis appellatæ fuerunt.

Posteriores & inferiores nominantur **Costæ spuria**, seu **nothæ**, quarum quatuor priores suis cartilaginibus sursum reflexis, & sibi mutuo coherentibus, agglutinantur inferiori cartilagini septimæ verarum costarum: ultima verò, quæ minima, interdum diaphragmati: nonnunquam abdominis musculo recto connascitur, in qua connexionione aliquando penultimam sibi sociam assumit.

Usus costarum est.

I. Distentum servare thoracem & supremam infimi ventris partem: ne in illo nobilissimum viscus cor, una cum pulmone; in hoc jecur, cum liene & ventriculo; ab incumbantium partium pondere nimis prematur.

II. Easdem, aliasque ibi contentas partes ab injuriis externis defendere.

III. Respiratorios musculos sustinere, eorumque motibus inservire, quam ob causam thorax ex uno osse constare non debuit, utpote quod immobile fuisset, & sic respiratio commode procedere non potuisset: atque hinc est quod costæ rarissime sibi invicem connascantur. Nicolaus Fontanus tamen tres unitas & inseparabiles vidit. Rarissimum est, quod Pausanias, in *Atticis*, refert de Protophane Magnesio, in cujus cadavere inventum est, quod costas veras omnes connexas habuerit. Fuit hic Protophanes olim famosus luctator, ut in Olympia victor sit renuntiatus: quia autem in lucta respiratio magna multaque requiritur, quæ ob illarum costarum firmam connexionem, seu coalitum; commode procedere non potuisset, verosimile est, ipsi costas istas connatas & continuas factas fuisse in senectute, cum jam dudum à lucta destitisset, sicut multoties aliquæ vertebræ dorsii, cranii ossa, aliaque circa senectutem continua fiunt.

CA-

## CAPUT XIV.

## De osse Pectoris, siue Sterno.



**S** pectoris ( hoc Græcis *στερνον* ; Latinis *Sternum* appellatur, quia in medio costarum sternitur, vel pectori insternitur ) anteriori thoracis parti, instar propugnaculi seu munimenti præponitur, eique verarum costarum productiones cartilagineæ adnectuntur.

*Substantia.* Substantiam fungosam, & minus quam reliqua ossa albicantem obtinet, quæ in infantibus fere tota cartilaginea apparet, excepta interdum superiore parte paulo magis ossea, fortassis quia articulatio claviculæ illic firmanda erat.

*Partes.* In modò natis ex septem aut octo ossibus cartilagine conjunctis compactum esse liquet, quorum infimo ensiformis cartilago, reliquis singula verarum costarum paria connascuntur. Hæc autem, exactis octo vel decem annis, per synchondrosin in pauciora ossa coalescunt, ita ut in adultis solummodo tria, rarius quatuor lineis transversis distincta, reperiantur, quæ & ipsa multoties ingravescente ætate unum os fiunt. Riolanus vidit Romæ, in puella septem annorum, illud ex undecim ossibus constitisse: cui os sternum in sex ossa divisum erat, sed eorum postrema seu inferiora quinque ab imo ad summum per ossis longitudinem singula in duo ossa secta conspiciebantur. Hanc sectionem in ossibus mediis, scilicet exceptis summo & infimo, frequenter inveniri, etiam asserunt, Eustachius, Bauhinus, & Bartholinus.

Supremum os amplitudine & crassitie præcæteris excellens, capuli gladii nodum exprimit, & superiore mediaque parte foveâ lunata excavatur, furcula, & jugulum appellata: cui ad latus utrimque alius parvus sinus adstat, clavicularum capitibus excipiendis, & mediante cartilagine adnectendis, dicatus. Interiore etiam parte sinus aliquis reperitur, tracheæ descendenti transitum concedens liberiolem.

Secundum, seu medium os, intercedente cartilagine primo annexum, angustius, sed longissimum est, atque in utroque latere quinque sexve sinus habet, imparibus intervallis distantes, quibus costarum cartilagine excipiuntur.

*Cartilago mucronata.* Tertium os, infimum & minimum, desinit in cartilagine, quæ à forma mucronis gladii, **Cartilago mucronata**,

Græcis *ἐνσφονδης*, *Ensiformis*, vulgò *Scutiformis* appellatur.

Hæc cartilago oblonga & triangularis, transversum pollicem longitudine æquat, atque rarissime duplex, communiter simplex reperitur: nonnunquam ad transeuntium vasorum commoditatem bifida ( hinc *furcella* nomen assumpsit ) nonnunquam rotunda existit, tuncque perforata arteriæ venæque liberum transitum præbet. Quodsi verò & bifurcatio, & foramen deficiant, tunc os sternum in medio perforatum est, quod potissimum in mulieribus observari, scribit Riolanus, *animadvert. in Laurent.* qui in quadam muliere illud foramen interna sterni parte adco latum invenit, ut minimum digitum exciperet: sed illius mulieris thorax utrimque tredecim costis obvalabatur. Sic etiam Sylvius & Eustachius notarunt, sternum quandoque circa medium lato foramine, vasis transmittendis destinato, pervium esse. Hujus foraminis primam inventionem sibi adscribit Nicolaus Massa.

Frequenter hæc cartilago extrorsum, nonnunquam introrsum recurvatur, non sine multiplici ventriculi vicinarumque partium damno, unde singultus, atrophia, alique graves affectus oriuntur. In senibus interdum ossescit, quod deprehendit Pavius in quodam qui gravi asthma diu laboraverat. Rarissimum est, quod notat Vesslingius, hanc cartilagine in quodam longitudine digiti usque ad umbilicum extensam, & omnino rigidam fuisse, non sine magno incommodo in corporis flexione, ventriculi coctione, & chyli distributione.

Folius notat duos exiles musculos à latere positos, hanc cartilagine sursum seu extrorsum & introrsum moventes: hos ego tamen hæcenus animadvertere non potui.

Exterius in regione hujus cartilaginis cavitas quædam conspicitur, quam Græci *καρδίας*, Latini **Scrobiculum** vel **Foveam cordis** vulgò appellant, quia cor pericardio inclusum, & diaphragmatis nervo centro connexum, ei interius cono suo proxime adstat.

Riolanus in mulieribus mammosis & obesis nonnunquam comperit, à mole mammarum os sternum acuminatum, sicque pectus angustum evasisse, & hinc talibus continuam dyspnœam natam fuisse.

*Scrobiculum cordis.*

## CAPUT XV.

## De Claviculis, &amp; Scapulis.



Claviculae & scapulae nonnulli Anatomici ad humerum & manum referunt, quia brachium cum iis articulatur, ad eamque articulationem imprimis conditae videntur, cum thoraci vix ullum notabilem usum praestent: alii tamen ratione situs, illas melius annumerant ossibus thoracis; quos etiam nos sequemur.

**Claviculae.** Claviculae, sic dictae, quod instar clavis scapulam cum sterno claudant ac firmant, Graecis *κλειδες*, quod thoracem claudant; Celso Iugula, à jungendo, vel potius à jugi boum aliquali similitudine; aliis *ligula*, appellantur.

**Numerus.** Sunt autem duo ossa, quorum utrumque unum transversim pectori superiori imminet, inter humeri articulum & ossis sterni summam.

**Substantia.** Substantiam obtinent crassam & fungosam, quae facile externorum violento incursum frangitur, sed propter laxitatem facile rursus coalescit per callum. Haec aequae ossae est in infantibus atque in adultis.

**Figura.** Figuram aliquantum flexuosam habet, oblongam, literam Italicam S. aliquo modo referentem, viris tamen, ob brachii validiorem motum, magis intortam, quam mulieribus.

**Connexio.** Extremorum uno, eoque rotundo, adhærent summam ossis sterni, altero planiore cum scapulae processu connectuntur, ubi acromion sive humeri summum producunt.

**Acromion.** Vtraque autem extremitas cartilagine obducta est, eaque unctuosam cartilagine intercedente (hinc aliquantum mobilis existens, brachii & scapulae motibus facile obsequitur) per valida ligamenta nexu laxiore articulantur per *διαρθρώσειν*.

Singulae autem tuberculum, & duos sinus superficiales habent, subclavio musculo & parti pectoralis musculi originem praebentes: atque utrumque juxta extrema exasperantur, ut inde prodeuntia ligamenta firmitus iis adhæreant. Cartilago mobilis, *κωτιλέϊς*, *clausura* dicta, ibi conspicua iis non adnascitur, sed ligamenti articulum amplexantibus detinetur, ut scapulae brachiique motibus cedat facilius.

**Ufus.** Videntur claviculae factae ad quoslibet brachii motus firmiores facilioresque reddendos, atque hinc pleraque bruta iis distituuntur. Attamen reperiuntur in iis, quae an-

terioribus pedibus, tanquam manibus, aliquid apprehendunt, ut in simia, scjuro, & echino.

**Scapula**, Graecis *ὀμοπλάτη*, & Barbaris *Spatula* dicta, utrumque una costis dorsalibus, instar scuti, incumbit, estque os latum ac tenue, & quodammodo triangulare, intus nonnihil concavum, exterius gibbum, non tam ad thoracis posterioris tutelam, quam ad humeri tutam cum clavicula articulationem, & musculorum implantationem comparatum.

Sita est inter primam & quintam thoracis vertebam, raro ad sextam pertingens.

Hujus pars secundum dorsi longitudinem exporrecta, *Basis* appellatur, cujus duae sunt extremitates, *Anguli* dicti, una superior, altera inferior. Basis latera *Costae* nominantur, quarum superior est brevior & tenuior, inferior vero longior & crassior. Tota scapulae latitudo *Mensa* dicitur, cujus externa pars gibba est, internam concava, ut musculus immersum excipiat.

Processus seu eminentias habet scapula tres.

**Prima** per medium ejus corpus extensa, ac summum humerum contingens, ob spinam aliqualem speciem, *Scapulae spina*, & *crista*, ejusque extremitas claviculae connexa *ἀκρωμίων*, seu *humeri mucro*, ab Anatomicis hodiernis passim appellatur. Dico, *hodiernis*, quia olim in acromii descriptione nonnihil dissentisse videntur Veteres. Nam Rufus Ephesius dicit, acromium esse ipsam juguli & scapulae ossis copulam. Eudemus vero dicit, illud esse officulum perexiguum, quod in pueris est totum cartilaginofum, & licet haec cartilago successu temporis in os degeneret, tamen usque ad annum decimum octavum contra morem ceterorum ossium, multum istius substantiae cartilaginofae retinet, & nonnunquam cum scapulae spina tam leviter connascitur, ut media aetate facili occasione separari queat; ut sibi ipsi contigisse refert Galenus, *lib. 1. de artic.* & in alio à se visum fuisse, dicit *comm. ad part. 1. sect. 1. de officina*. Ipsemet quoque Hippocrates hujus officuli mentionem facit, ejusque luxationem notavit *lib. 1. de artic.* quo loco addit, in acromio diversam esse hominis naturam à ceteris animantibus.

Ex dictae spinæ utraque parte fossula expor-

porrigitur, *interscapulium* Rioloano dicta, una superior, altera inferior.

*Processus  
coracoides.*

*Secunda*, humilior, minor, & acuta, corvino rostro non absimilis, hincque *καρπυοειδής*, aliis à forma *στυμοειδής*, & *αγκυροειδής* nominata, humeri os in sua sede continet, & prohibet ne illud versus anteriora elabatur: cum enim manus actiones versus anteriora fiant, facile eo luxaretur humerus, nisi a coracoide retineretur, quæ tantam securitatem huic articulo confert, ut hinc rara fiat humeri in anteriorem partem luxatio, quam semel observavit Hippocrates, & quater à se Romæ visam fuisse refert Galenus, *comm. ad partic. 4. lib. de artic.* atque etiam ante aliquot annos à me semel visa, & restituta est in sene, Domino Teckmanno, concionatore eximio, qui ex gravi casu illam dislocationem contraxerat.

*Tertia*, brevissima, *ἀνχὴν*, *cervix*, dicta, intra suum sinum cartilagine munita, & circum circa limbo crasso cartilagineo labra cingente ampliata, humeri ossis caput recondit. Hæc in infantibus primo natis constat obtusior, & brevior, ac cartilagineo osse, quod cum ætatis augmento longius increfcit.

Accedunt his additamenta propria, tum ligamenta singularia quinque, quibus scapula claviculæ & humeri ossi jungitur.

Pro majore vel minore scapularum magnitudine, solent etiam humeri esse latiores vel strictiores. Viri autem qui latis humeris sunt præditi, creduntur foetus gignere majores, strictis præditi minores: cujus tamen opinionis maximam incertitudinem quotidiana experientia docet: interim ea de re etiam aliquid scripsit Petrus forestus, *lib. 28. observat. 70.* Hoc, inquit, *notatu dignum, à mulieribus longo usu observatum, quod viri qui humeros latos habent, plerumque magnos foetus generent: hinc Iodoca Tēilingia, socrus mea, qua viginti proles ex marito suscepit, filias suas collocare volebat viris humeros latos habentibus.*

Riolanus refert Gallicis puellis plerumque dextram omoplatam altius sitam esse sinistra, ejulque rei rationem dare, dicit esse difficile. In nostris Belgii regionibus hoc observo, quod qui in pueritia & adolescentia dextro brachio in validioribus exercitiis aut operationibus frequenter usi fuerunt, iiscapula dextra magis extrinsecus à costis distet, quam sinistra.

## CAPUT XVI.

## De offibus innominatis.



Columnæ corporis humani, seu spinæ, inferiore parte, adherent *Ossa anonyma*, seu innominata duo, quorum utrumque unum ossis sacri lateribus, intercedente cartilagine, per ligamentum validissimum connectitur. *Innominata* autem dicuntur, quod iis totis nominem non sit impositum cum tamen singulis eorum partibus nomina indita sint.

*Constructio.*

Construuntur autem singula ex tribus offibus, Ilio, Coxendicis, & Pubis, per cartilagineas arctissime junctis, quæ in infantia cultro tenuioris dorsi separari possunt, earumque divisionum limites usque ad septimum annum manifeste conspicui manent; postea verò exsiccatis cartilaginibus in unum os validum coalescunt, quod utrumque cum osse sacro junctum pelvim constituit, seu cavitatem illam qua uterus, vesica, & intestinorum pars continetur; ac foetus in utero sustinetur.

*Os ilium.*

*Os ilium*, cui ab ileo intestino; ei proximo, nomen impositum, superior & latissima ossis innominati pars est. Insignem habet amplitudinem nonnihil concavam, costæ nomine designatam. Circumferen-

tiam obtinet semicircularem & inæqualem; cujus extrema antèrius posteriùsque *Spina*, *Supercilia*, & *Labra* nonnullis appellantur: totius verò ossis exterior pars *Dorsum* nuncupatur. Hoc os, præter intercedentem cartilagineam, per ligamentum commune membraneum validissimum cum osse sacro committitur.

*Os coxendicis*, vel *Ischium*, est inferior & exterior ossis innominati pars, eaque crassa & firma. In hoc ampla & profunda; ac lævissima cartilagine investita cavitas reperitur, *Acetabulum*, & *Pyxis* dicta, intra quam globosum femoris caput reconditur, è qua si excidat, luxatio fit: quam evitare Natura volens gemino vinculo, ab osse sacro enato, ossa hæc firmiter conjunxit. Hujus cavitatis processus cartilagineus, acetabulum amplificans, *Supercilium* nuncupatur, quod posteriore parte majus est quam anteriore, ut femur nobis sedentibus in acutum angulum commodius flectatur: deficit autem qua parte sinus ossa pubis respicit, ob vas sanguiferum illac transiens, quod nutrimentum articulo confert. In cavitate autem interiore notandus venit sinus nonnihil

*Os coxendicis.*

hil asper & inæqualis, cui tenaciter inhæret ligamentum illud quod femoris caput interiori acetabulo firmiter colligat. Item notandæ duæ prominentiæ, una interna, à qua initium sumit secundus tibiæ extendentium, sive Rectus musculus: altera externa, quæ acuta est, in quam inseritur ligamentum quod à quinto ossis sacri processu exoritur.

Os pubis.

Os pubis, vel pectinis est anterior & tenuior ossis innominati pars, quod, ad majorem levitatem, amplo foramine, inter sinum coxendicis & sui ipsius anteriora sito, pervium est, ac mediante cartilagine cum suo pari firmiter connectitur, & superius ad vasorum cruralium descensum sinu excavatur. Hoc foramen sedem præbet duobus femoris musculis, extrinsecus scilicet externo, intrinsecus interno obturatori, sive secundo & tertio circumagentibus musculis, qui à se invicem ligamento forti, quod foramen subtendit, discriminantur. Prædictam autem ossium pubis inter se connexionem per ligamentum membranæ firmari, scribit Vellingius, negat Riolanus.

In his autem inferioribus ossibus notanda est differentia inter hæc ossa in viris, & in mulieribus: quæ in his consistit.

I. Os sacrum in mulieribus multo magis extrorsum excavatur, quo foetui in partu transeunti locus amplior concedatur: quam ob causam etiam os coccygis laxiore nexu ei cohæret, quam in viris.

II. Ossa ilium multo ampliora & excavata sunt, eorumque spina magis in latera educitur in mulieribus, quam in viris.

III. Ossium coxendicum & pubis partes inferiores in mulieribus extrorsum magis producantur, & pelvim latiore faciunt.

IV. Cartilago qua ossa pubis connectuntur, ut melius distendi possit, in feminis duplo crassior & laxior est, quam in viris, præcipue si aliquoties pepererint: ad hæc, linea, qua ossa pubis conjunguntur, in foeminis brevior est, quam in viris.

Due questiones.

Hic jam gemina incidit questio. *Prima*, an ossa pubis moveantur. *Secunda*, quomodo possibile sit, ut maturus & magnus foetus per pelvis angustias, musculis aliisque partibus undequaque obsitas & infarctas, in partu transire possit.

An ossa pubis moveantur.

Prioris questionis affirmativam defendunt Spigelius, Io. Cajus, & Riolanus, qui ope musculorum rectorum abdominis hæc ossa sursum ac deorsum moveri asserunt, idque in congressu Venereo & saltatione manifestum esse tradunt. Verum non ferenda videtur eorum sententia, nisi mitius explicetur. Quippe dicendum moveri hæc ossa, aut per se, ratione & ope

musculorum ipsius infertorum, aut per accidens, quatenus vicinarum partium motum nonnihil sequantur. Prius omnino falsum est: nam hæc ossa invicem per symphylin juncta sunt immobilia, exbrepro solo partus tempore, quo humectatis & laxatis nonnihil cartilaginibus, aliquantum mobilia evadunt, & à se invicem paucillum recedunt. Posterius verum est, nam ad motum cruris, dorsi, & lumborum, hæc cum toto osse innominato aliquantillum moveri certum est, sed non tamen singula separatim.

Ad secundam questionem dico, si parvus fuerit foetus, eum per dictas angustias sine magna molestia transire posse, docente id experientia quotidiana; nam partus tempore ab humorum copioso affluxu adeo laxæ, molles, & læves fiunt partes genitales, ut obstetricis vel chirurgi totam manum facile admittant. Verum si magnus fuerit foetus, & partes per se, seu à natura mulieri sint angustiores, tunc gravem & laboriosum fieri partum, atque pubis ossa, laxatis ligamentis & cartilaginibus, aliquantum dehiscere; imò cartilaginofam quoque connexionem ossis sacri cum illi ossibus adeo laxari, ut manifeste à se mutuo recedant. Hanc dehiscentiam istorum ossium primi inter veteres notarunt, Hippocrates, lib. de nat. pueri: Avicenna, lib. 3. sen. 12. tract. 1. cap. 2. & Aëtius, tetrab. 4. sem. 4. cap. 22. eandemque inter neotericos acriter defendit Severinus Pinæus, operis physiol. lib. 2. cap. 5. 6. 7. Præter Pinæum, varii clarissimi Medici recentiores sunt ejusdem sententiæ. Alexander Benedictus, anat. lib. 5. cap. 3. scribit, quod cum foetus amplior est, sponte hient, & ad facturam consentiant pecten & os sacrum: item quod illa ossa post partum paulatim in naturam suam redeant, & altero ex iis, vel pluribus renitentibus partus difficiles fiant, etsi cætera tuto respondeant. Fernelius lib. 6. pathol. cap. 17. inter causas difficilis partus recenset ossium pubis firmiorem compactionem. Gorrhaeus, com. in lib. Hipp. de nat. pueri, dicit mulieribus in partu coxas diduci, atque hinc ipsis lumbos coxasque dolere. Sed notandum, quod, licet illa ossa diducantur & hient, non tamen exarticulentur, hoc enim si fieret, nunquam ad pristinum statum redirent. Verum hæc, cum ab antiquis, tum à recentioribus Medicis confirmatam sententiam nihilominus magno studio refellere nituntur, Columbus, Volcherus, Rodericus à Castro, Fuchsius, Carolus Stephanus, Cordæus, omniumque maxime Andreas Laurentius, lib. 8. anat. quest. 33. Sed hos omnes evincit certissima rerum magistra Experientia (hac docente, omnes qualescunque contrariæ rationes concidunt) qua non semel illud fieri

Quomodo  
foetus tran-  
seat per  
pelvim.

fieri compertum, ac clarissime demonstratum est. Paræus, *lib. de generat. cap. 13.* scribit se olim fuisse in illa opinione, ossa ilium & pubis in partu non posse divelli; sed tandem tamen contrarium ipsi apparuisse, in sectione cujusdam mulieris, decimo quarto die post partum suspensæ, cujus ossa ilium ab osse sacro distracta erant, & ossa pubis à se invicem distabant latitudine dimidii digiti. Sic duas hac de re præclaras observationes describit Casparus Bauhinus *lib. 1. theatr. anat. cap. 49.* Riolanus refert, se plus quam trigesies in mulieribus mox à partu, vel paulo ante enixum extinctis, cartilaginem quæ ossa pubis colligat, minimi digiti latitudine diductam vidisse, ita ut hiulca pubis ossa apparent, si digito intus attrectarentur: imò dicit, illud ipsum etiam ante dissectionem innotuisse, & uno crure sublato, ossa pubis mobilia deprehensa, unumque alteri supereminere observatum fuisse. Harveus, *de generat. animal. exercit. 57.* inquit: *Experientia edoctus assero, ossa pubis sæpe ab invicem in partu laxari, emolito eorum cartilaginosa connexu, totamque hypogastrii regionem ad miraculum usque ampliari.* Addit causam: *Non quidem, inquit, ab aquosa substantia profusione, sed sua sponte, ut fructus maturi excludendis suis seminibus solent dehiscere.* Spigelius, *lib. 2. de corp. hum. fabric. cap. 24.* scribit, se in publicis foeminarum ex difficili partu mortuarum sectionibus, conjunctionis ossium pubis, ut & illi ac sacri dehiscenciam spectatoribus multoties conspiciendam exhibuisse. Nos quoque, anno 1654. mense Martio, puerperam sequenti post partum die mortuam in publico theatro secuimus, in qua

pubis ossa à se invicem adeo divulsa erant, ut minimus digitus facile interponi posset. Hæc ossium divulsio causa est, quod puerperæ, quibus gravis & laboriosus fuit partus, & foetus magnus, frequenter de doloribus circa os sacrum & pubem conquerantur: quod etiam foemina quæ sæpius pepererunt, dictas cartilagines habeant crassiores: item quod virgines seniores, quibus hæ cartilagines magis resiccatae sunt, viro locatae, & ingravidatae, difficilius pariant: quod denique, cum reliquæ corporis cartilagines ætatis progressu siccescant, & in multis partibus ossæ fiant, hæ tamen in mulieribus nunquam siccentur, ac nunquam ossæ evadant. Riolanus, *animadvert. in Vesling.* scribit istam diductionem ossium illi, sacri, & pubis, non tantum in difficili, verum etiam in omni, etsi facillimo, partu fieri. Qua de re magnopere dubitandum censeo: quippe non semel vidi mulieres parvos, & tamen maturos, foetus facillimo negotio, ac sine dolore effatu digno, citissimo peperisse, idque vel in lecto jacentes, vel in sedili communi sedentes, & sine obstetrice, quod eam vocandi tempus non daretur, in quibus dictorum ossium nulla divulsio facta fuisse animadverti poterat, ut pote per quam à vicinarum membranarum distensione, non potuissent non magni dolores induci. Ad hæc, verosimile est, non nisi per violentam & validam à magni foetus transeuntis pressionem, hæc ossa à se invicem diduci possent; nam cartilaginosa illa connexio nimis firma est, quam ut in facili partu à parvo foetu tam facili negotio distendi queat.

## CAPUT XVII.

## De ossibus Brachii, nempe Humeri &amp; Cubiti.



Os humeri.

Sæpe manus vel sunt humeri, vel cubiti, vel extremæ manus.

Humeri os unum est, magnum, validum, teres, & inæquale, parte postica versus cubitum nonnihil depressum & planum.

Superius obtinet caput magnum & globosum cartilagine munitum, quo cum scapula articulatur, per illam diarthrosis speciem, quam arthrodiam vocamus: quia autem cavitas ad caput commode excipiendum proportionata non est (hoc factum à Natura, ut facilius & liberius foret articuli motus, hinc labra ejus cartilagine coronante augentur.

Paulo inferius circum caput varia mani-

ifesta foraminula adsunt, per quæ vasa sanguifera introrsum penetrant ad medullæ nutritionem. Riolanus scribit, omnibus communiter in humeri osse, circa mediam & interiorem partem, adhuc aliud apertissimum foramen esse, ossis substantiam penetrans, ad vasorum transitum. Verum ego in meis sceletis hoc foramen non invenio; atque hinc credo illud non in omnibus, sed tantum in paucioribus adesse.

Dictum ossis humeri caput in recens natis est epiphysis, seu appendix, quæ postmodum in adultis fit pars ossis, ejusque apophysis seu processus.

Hoc humeri os connectitur scapulæ, interventu ligamenti crassi & nervei, quod totam articulationem amplexatur. Præter hoc,

Connexio superior.

hoc, etiam tres muscoli, Supraspinatus, Infra spinatus & Subscapularis, suis tendinibus latis ipsam quoque articulationem circumdant, & sub deltoidē latum ac insigne ligamentum subsistit, quod ab acromio usque ad deltoidem protenditur, ut brachium superne cohibeat, ne in partem superiorem luxetur.

Capiti ossis humeri posteriore parte adstant duæ prominentiæ asperæ & inæquales, quibus ligamenta valida adnectuntur. Item duo sinus, unus internus orbiculatus, ad capitis latus, ligamenti origo: alter externus oblongus dictas prominentias distinguens, principii musculi bicipitis sedes.

*Articulatio inferior.*

Inferius articulatur cum cubito per gynglymum, quæ articulatio quia cum duobus ossibus, ulna & radio, fieri debuit, hinc in extremitate, quæ cartilagine obducitur, tres processus obtinuit, superiorem mediocrem, medium minimum, & infimum majorem, inter quos duo sinus sunt, ita ut simul formam trochleæ, vel rotulæ ad quam funes volvuntur, effingant, & circum hanc extremitatem cubiti ossa volvantur.

Ad latus inferius dicti majoris processus alius magnus processus adstat, intercedente sinu ab illo distinctus, qui in viventibus externo contactu facile deprehenditur, è quo musculi educuntur.

Post dictam trochleatam extremitatem, sede posteriore una ampla & profunda, anteriore verò duæ minores cavitates reperiuntur, in quas cubiti ossa, dum antrosum & retrorsum moventur, impingunt ac sistuntur.

Foramina parva habet circa capita, imprimis circa superius, & unum manifestum in medio, ad vasorum transitum pro ossis nutritione.

*Cubitus.*

Cubitus è duobus componitur ossibus, sibi mutuo accumbentibus, ita ut extremitates jungantur, media verò à se invicem secedant, quamvis membranoso ligamento copulata sint. Quod à summo Creatore ita factum videtur, partim ut hoc membrum levius, & ad motum expeditius foret: partim ut multiplices manus musculi tutiore loco consisterent.

*Ulna.*

Horum ossium primum, quod inferius & longius, *Ulna* vocatur, fortè quod ulnæ mensura olim istam longitudinem habuerit, Græcis *πῦξ*, antiquis *Cubitus*, & *Os cubiti*, Barbaris *facile majus*, dicitur.

Superiore parte amplius crassiusque est, ac versus manum sensim velut in aciem attenuatur, eique ad finem tuberculum rotundum adnatum est, processu minore nonnihil acuto, qui Styloides vocatur, donatur, quo per ligamenta carpi ossiculis, interveniente cartilagine, connectitur per arthrodiam. Superne verò humeri ossi articulatur per gynglymum, cumque in finem processus obtinet duos: quorum anterior, qui minor, ossis humeri sinum interiorem subit: posterior, qui major, longior, & obtusior, ossis humeri cavitatem posteriorem ingreditur, in eaque sistitur, ita ut brachium non ultra rectitudinem extendi, seu retrorsum moveri possit. Hunc Hippocrates *ἀγκύνα* Galenus *ἀλέκτρον*, Latini *Gibberum* appellant. Uterque hic processus in primo natis cartilagineus est, anterior tamen cito ossescit, posterior vix septimo anno; His accedunt duo sinus cartilagine obducti, quorum qui externus, seu lateralis & minor est, caput radii excipit: alter, qui posticus & amplior, instar semi circuli ad humeri rotam circumvolvitur.

Alterum cubiti os *Radius*, & *Focile minus*, Græcis *κερῖς* dicitur. Hujus superior extremitas minor existit, rotundoque capite prædita, à latere ab ulna excipitur. In summitate verò sinum rotundum, cartilagine incrustatum, obtinet, quo, humeri caput admittit, cum eoque per diarthrosim articulatur. Inferior verò extremitas, quæ crassior, à latere ulnam parvo sinu, cartilagine munito, recipit, & inferius gemino sinu, similiter cartilagine obducto, carpi duo prima & suprema ossicula admittit.

Singula hæc ossa in peculiarem usum condita videntur: *Cubitus* enim, median-  
*Ulna.* tibis musculis, flexionis & extensionis munus obit; & flexionis quidem in acutum angulum, at extensionis ad rectam tantum lineam, quam non excedit. Radius verò manus potissimum gratia factus est, quam pronam supinamque reddit.

Connectuntur hæc ossa inter se arciculo  
*Connexio.* differente: quippe cubitus, superiore parte, qua latior est, excipit radium: at radius inferiore parte, qua latior est, excipit cubitum: & sic invicem colligantur ligamento longo, quod internos musculos ab externis separat, & à duabus lineis acutis, quæ se mutuo respiciunt, exoritur, cum altera in externo cubiti latere sit, altera in radii interna parte.

CA-



## CAPUT XVIII.

## De ossibus Infima manus.



Anus extrema, Græcis ἀνέροχον dicta, est totum illud quod à cubito radioque dependet, & distinguitur in tres partes, καρπὸν, μετακαρπὸν, & δακτύλιν.

Carpus.

Carpus, superior manus pars, octo constat ossiculis, magnitudine figuraque nonnihil discrepantibus, duplici ordine dispositis, quæ in primo natis osseam duritiem nondum habentes, videntur esse cartilagineæ; postea verò indurantur in ossa nonnihil spongiosa, ligamento, tum membraneo, tum cartilagineo validissimo simul firmiter compacta: tum alio communi, ossibus his deligandis, simulque tendinibus musculorum ad digitos porrigendis & conservandis destinato, investita.

Articulatio.

Horum tria superiora cubito radioque committuntur per arthrodiam, quartum extra ordinem tertio extrinsecus insitit: reliqua quatuor inferius locata totidem metacarpii ossibus per synarthrosin junguntur.

Duas habent superficies, lubrica cartilagine obductas. Vnam anteriorem gibbam, qua recipiuntur à viciniorum ossium cavitatibus: alteram posteriorem sinuatam, qua viciniorum ossium protuberantias recipiunt.

Notandum, quandoque juxta connexum ossis carpi octavi cum metacarpii osse parvum digitum sustinente, inveniri parvum ossiculum, quod sedem illic vacuum opplet: hoc Vesalius ossium sesamidum ordini annumerare videtur.

Metacarpium quatuor constat ossibus longis, gracilibus, intus cavis seu fistulosis, medulla repletis, intermedia regione sejunctis, ut musculis interosseis tutior sedes foret.

Metacarpium.

Horum primum indici annexum, longissimum & crassissimum est, cætera verò sensim tenuia & breviora evadunt.

Appendices habent superiores latiusculas quarum sinus carpi ossicula recipiunt: inferiores quibus digitorum sinus insistant.

Digitorum phalanx, adnumerato pollice, quindecim absolvitur ossibus; quippe singulos tria perficiunt, magnitudine diversa, quorum primum amplius secundo, secundum tertio, quod tertium ungue integitur.

Digit.

Foris gibba, intus plana, & aliquantum excavata sunt, ad commodiorem solidorum comprehensionem.

Processus obtinent superius & inferius.

Superiores rotundi sunt, & in singulis supremis seu primis quatuor ossibus unum sinum rotundum habent, metacarpii os recipientem: in reliquis verò quasi geminum sinum, parvâ eminentiâ distinctum, obtinent.

Inferiores verò processus quasi gemino capite sinu distincto, protuberant, quo geminum sinum impositi ossis subeunt, excepto tertio seu extremo osse, quod à nullo alio excipitur, sed ungue munitur. Hi autem omnes sinus & processus ad faciliorem motum, cartilagine obducuntur.

## CAPUT XIX.

## De Osse femoris, &amp; Cruris.



Edis tres sunt partes, femur, tibia, & extremus pes.

Femur.

Femur, à ferendo (Græcis φέρω) dictum, quia totum corpus fert, unico constat osse robusto, magnitudine & longitudine cæteris omnibus corporis ossibus excellentiore, antè rotundo & aliquantum gibbo, postè nonnihil depresso ac sinuoso, asperâque lineâ, oblique versus genu descendente, insignito.

Alia autem considerata veniunt in ejus parte superiore, alia in inferiore.

Superius processum crassum, versus coxendicis os prominentem, eique epiphysin rotundam & amplam impositam habet, sicque globosum femoris caput, valida cervice subnixum, constituit, quod cartilagine obductum in coxendicis acetabulum reconditur, in eoque duobus validis ligamentis detinetur: uno lato, crasso, & membranoso, quod totum articulum circum-

Caput femoris.

A a a

cum-

cumdat: altero tereti, quod ab ipsa cavitate acetabuli productum, in femoris susceptum caput inferitur, idque acetabulo firmissime connectit, atque sic articulatio hæc per enarthrosin perficitur.

*Observatio.* De hac epiphyli seu capite aliquid observatu dignum annotavit Rolfincius, *lib. 2. exercit anat. cap. 49.* scilicet, illud caput valde laxa conjunctione ossi femoris adhærere, ita ut coctione in aqua cito emolliatur, & facile manibus ab osse dirimatur, præcipue in animalibus junioribus; atque hinc fieri ut in infantibus & pueris junioribus nonnunquam facile ab osse femoris recedat & divellatur, idque sæpe parva de causa, ut à levi casu, vel cum nutrices nimis mature pedibus insistere & inniti jubent infantes, atque tunc illud communiter haberi pro luxatione, ex eoque diagnoseos errore felicem curationem impediri. Hic Rolfincii locus mihi in memoriam reduxit, quod huiusmodi recessum hujus epiphysis ante hac in ægro uno aut altero viderim, qui à chirurgis & aliis præsentibus Medicis (& quidem senioribus, atque in praxi exercitatissimis) pro luxatione habebatur, licet caput ossis femoris extra acetabulum nusquam elapsum sentiri posset: interim tamen os femoris versus posteriora reflectebatur, ejusque superior pars sine capite nonnihil sursum versus ascendere sentiebatur, sicque crus illud brevius evadebat altero. Atque tunc temporis, etsi de modo luxationis dubitarem omnes, nemo tamen nostrum de hujus epiphysis recessu ab osse cogitavit, quem tamen in istis ægris factum fuisse, jam satis percipio.

Infra cervicem, ubi os latius fieri incipit, duo processus educuntur, suis epiphysibus donati, quæ in pueritia manifeste conspicuæ sunt, at incremente ætate omnino ossescunt, & femori inseparabiliter uniuntur, ut nulla substantiæ diversitas unquam fuisse videatur. Horum processuum unus superior & major, sursum versus exteriora vergit: alter inferior & longe minor, obtusi tuberculi figuram habens, retrorsum versus interiora spectat, eumque putat Riolanus, *animadvers. in Laurent.* esse potius apophysin, non verò epiphysin: ille trochanter, seu rotator major, hic trochanter seu rotator minor appellatur. Huic minori plerumque versus exteriora adhuc aliud parvum tuberculum paulo humiliore sede adstat. Hi processus variis validis musculis insertionem & ortum præbent.

Inferius, ubi femoris os cum suo appendice sensim crassescit, duo capita ampla efformat, quorum externum crassius est interno. His cartilagine obductis, subjectas tibiæ geminas cavitates, similiter cartilagine munitas, ingreditur. Inter illa capita cavitatem anteriorem parvam, posterius mag-

nam habet, per quam insignia vasa, cum quarto paris vasti nervo, ad crura deferuntur. Inter has cavitates tibiæ protuberantia suscipitur, sicque articulatio ista per gynglymum absolvitur, dum etiam duo tibiæ capita hæc suscipiunt.

Præterea adhuc duo alii exigui sinus ad utriusque capitis latus conspiciuntur, quibus variorum musculorum tendines inferuntur.

Posterius in poplite duo ossa sesamoidea inferioribus femoris appendicibus apponuntur, quæ musculorum duorum priorum pedem moventium capitibus innascuntur, cum alioqui reliqua sesamina musculorum tendinibus inhæreant. *Sesamina poplitis.*

Quia autem articulatio genu non admodum firma fuisset, sed in cruris motu, & ab externorum impetu ossa facile è sua sede excidissent, hinc providus Creator isti articulo antea imposuit os rotundum & latum, instar umbonis circularis, quod Græci *μούλην*, Latini *Molam*, & *Patellam*, alii *Rotulam* vocant, substantiam in pueris cartilagineam obtinens, quæ incremente ætate fit plane ossea, & ad faciliorem motum interius cartilagine obducitur. Hoc os inhæret tendinibus musculorum, nexu laxiore, quippe non stricte vinciri, sed aliquantum mobile esse debuit, ut facilem luxationem averteret, & interim motui musculorum haud officeret. *Patella.*

Necessitatem officii hujus ossis notavit Galenus, in quodam juvene palæstrita, cui luctanti cum patella luxata fuisset, & ad femur ascendisset, illi periculosa evasit curvatio in genu, ut & ambulatio in locis declivibus, quæ sine scipione permeare non poterat. Illud ipsum vitium etiam ego in praxi aliquoties observavi in iis, quibus per aliquam violentiam patella sursum erat depulsa, quod scilicet difficilem ingressum haberent, atque imprimis per loca declivia deambulare non possent. Vidi etiam alios, quibus à magno aliquo impetu patella in duas partes diffracta esset, cum maximo incessus incommodo, quorum tamen aliqui, postmodum fractis partibus per callum rursus cõeuntibus & satis firmiter junctis, integro gressui restituti sunt. *Paræus, lib. 4. cap. 22.* refert se neminem unquam vidisse non claudicantem, cui illud os fractum fuerat. Ante aliquot annos vidi nobilem Germanum, cui ictu globi bombardæ patella tota erat ablata, unde omni incessu fuit privatus; quem tamen in hac nostra urbe Ultrajecto, aliquis artifex, instrumento quodam ferreo genui adaptato, & femoris os in conjunctione cum tibia colligante, aliquo modo restituit, ita tamen ut instrumento isto indutus & armatus mediocriter bene incederet, sed cõ depositò, pedem ad

ad incessum promovere non poterat, ac ne quidem momenti spatio ei insistere.

Crus.

Femori subiicitur **Crus** (hoc nomine à multis universus pes designatur) à genu ad talum se extendens.

Hoc è duobus ossibus componitur, crassitie & magnitudine plurimum differentibus, sursum deorsumque coherentibus, intermedia autem regione, ob pedis musculos, sejunctis, valido tamen intercedente ligamento connexis.

Tibia.

Horum primum Græcis *κνήμη*, Latinis **Tibia**, vulgò **Focile majus** appellatum, est amplum atque validum os, aliquo modo triangulare, anterius secundum longitudinem acumine anguli sui anterioris spinam acutam effingens, qua parte etiam carne destituitur, ac periosteo, membrana carnosa, vix visibili aliqua pinguedine, & cute integitur; hæc que causa est, quod tibiæ interioris contusiones sæpe in curatione longas molestias pariant, quia in iis à violento duræ rei incurfu facile panniculus carnosus & periosteum, illic nulla carne aut alicujus momenti pinguedine intacta, gravem læsionem incurrunt.

Ad utrumque finem appendicem crassam & considerabilem obtinet.

*Superior* amplitudine insignis, posterior veluti duobus capitibus diducta est, atque in summitate duobus oblongis sinibus, lubrica cartilagine munitis, excavata, femoris inferiora capita suscipit. Dictis autem sinibus limbus cartilagineus crassus, mobilis, & ferme circularis, ad articulationis firmitatem circumiicitur.

Inter hos sinus colliculus, veluti sepimentum, exurgit, qui à femoris ossis ca-

vitae excipitur, è cujus colliculi aspera & sinuosa summitate ligamentum validum prodit, quod femoris sinui infigitur, & inter alia ligamenta omnium maxime articulum firmat.

*Inferior* verò appendix minor est altera, processu notabili ad internum pedis latus protuberans, qui nulla carne tegitur, & **Malleolus internus** vocatur.

Hæc sinibus duobus prædita est. Vno laterali & minore, cui fibula accumbit: altero inferiore, multo majore, levi protuberantia quasi in duos sinus distincto, & cartilagine obducto, quo talus subjectus suscipitur, qui intrinsecus tibiæ sua cavitate recipit; atque sic per gynglimum articulatione hæc perficitur.

Alterum cruris os *περόνη*, & **Fibula**, *Fibula*. Barbaris **Focile minus**, nuncupatur, estque tibiæ extrinsecus attensum, ei longitudine non cedens, sed multo tenuius ac debilius, secundum longitudinem variis sinibus, ad musculorum insertionem, exculptum, atque lineis acutis prominentibus asperum.

Capita duo habet, unum supra, alterum infra, quibus appendix coalescit, eaque in processum acutum & nonnihil asperum definunt.

Capite superiore usque ad genu non assurgit, sed infra tibiæ appendicem subsistit, eamque levi sinu excipit.

Inferius verò fibula sinu tibiæ excipitur, & tuberosum caput cum processu usque ad latus tali dimittit, foris conspicuum, ubi **Malleolus externus** nominatur, estque interno humilior.

## CAPUT XX.

## De Pedis extremi ossibus.



Ossium pedis extremi tres sunt classes, Tarsi seu pedii, Metatarsi seu metapedii, & digitorum.

Tarsus.

Tarsus septem constituitur ossibus, magnitudine & figura plurimum discrepantibus.

Talus.

Primum **Astragalus**, seu **Talus**, Græcis *ἀστράγαλος*, & *ἀστράγαλος*, appellatur, quod capite nonnihil convexo tibiæ sinum inferiorem ingreditur, à cujus malleolum internum constituyente processu interius, sicuti à fibula exterius comprehenditur, & sex constat lateribus.

Prominentiam anterius amittit, qua offi calcis committitur.

Ad hæc, cavitatem in medio inferiore sinu majusculam obtinet, cui similis calcanei cavitas è regione opponitur: his tanquam in cellulis, unctuosa mucago, ad ligamentorum & cartilaginum humectationem, servatur.

Secundum os est **Calx**, seu **Calcaneus**, Græcis *πέγνα* dictum, os tarsi maximum, oblongum versus posteriora protensum, ut homo firmitus talo insisteret, nec facile retrorsum concideret.

Posteriori parti validissima chorda, ex trium pedem extendentium musculorum tendinibus conflata, adnectitur.

A a a 2

Su-

Superius amplo, sed depresso capite ingreditur sinum tali, & paulo antè talis eminentiam suo sinu excipit: prominentia verò exteriore cum osse cubiformi jungitur.

Ab interno latere sinu lato excavatur, per quem tendines & majora vasa ad pedis inferiora tuto descendant. Ab externo latere tuberculis hinc inde inæquale est, ad ligamentorum & tendinum firmiorem connectionem.

*Os Naviculare.*

Tertium est **Os naviculare**, quod etiam **Cymbiforme**, Græcis *σταφοειδές*, à cymbæ, vel scaphæ forma, propter recurvum ductum, nominatur. Hac posterius amplo sinu talum excipit, antè depresso capite trium minorum ossium tarfi sinus subit, tenui cartilagine inter has conjunctiones intercedente.

*Os cuboides.*

Quartum est **Os cuboides**, à forma sic appellatum: item **Os tessera**, & Arabibus **Os grandinosum**, Græcis verò *πλύμορφον*, dictum. Hoc cæteris sequentibus seu lateralibus majus, calci præponitur, eique superficie inæquali jungitur: altero latere committitur cuneiformi ossi tertio: versus digitos verò ossi quarto & quinto metatarsi insistit.

*Ossa cuneiformia.*

Reliqua tria ab Antiquis non fuerunt peculiaribus nominibus insignita. Fallopius, Galenum secutus, illa **Sphœnoidea**, **Calcœidea**, & **Cuneiformia** appellanda censuit, quia instar cunei à latiore basi sensim attenuata, reliquis interponuntur. Horum primum majus tertio, medium verò minimum est.

Non rarò ad externum latus articulationis ossis cubiformis cum metapedii osse quinto, minimum digitum sustinente, ossiculum parvum ad insertionem tendinis mu-

sculi pedis octavi reperitur: ut & nonnunquam ossea particula in senibus, cubiformi ossi paulo antè appositâ, ejusque cavitatem replens, & tendini musculi pedis septimi inhærens. Quæ duo, cum adsunt, ad firmiter pedis stabilimentum facere videntur. Hæc à Bauhino ossibus sesamoidæis annumerantur.

Omnia hæc tarfi ossa in primo natis cartilaginea potius, quam ossea dicenda videntur; p̄gressu autem temporis in solidiorem abeunt substantiam, pumici similem, & cavernulis plenam, eamque alii aliis citius duriorem assumunt, & validis ligamentis sibi invicem vicinisque ossibus connectuntur, ac cartilagine ad conjunctiones præmuniuntur.

**Metatarsum** (quem Græci *πῑδιον*, *Metatarsus*, Celsus **Plantam**, alii **Pecten** appellant) quinque perficiunt ossa valida & fistulosa, longitudine & crassitie discrepantia, in medio à se invicem sejuncta, ut musculis interosseis locum præbeant.

Sursum deorsumque capitibus protuberant: quorum illa, quæ crassiora & pedio proxima, suis sinibus quatuor inferiora ossa tarfi recipiunt: hæc verò rotundis protuberantiis donata, à digitorum sinibus excipiuntur.

**Digitorum**, pedis ossa numerantur quatuordecim, è quibus duo pollicis ossa *Digitorum ossa.* magnitudine præ cæteris excellunt. Cæteri digiti singuli tribus constant ossibus, quorum forma & nexus convenit cum ossibus manus, sed magnitudo minor est.

Omnia hæc ossa metatarsi & digitorum, ad faciliorem motum, circa extremitates, ubi articulantur, cartilagine obducuntur.

## C A P U T XXI.

### De ossibus Sesamoideis, & omnium ossium numero.



**Q**ssa **Sesamoidea**, à feminis sesami aliqua similitudine nomen desumpserunt, suntque minima quædam officula rotunda, & nonnihil depresso, intus fungosa.

*Situs.*

Tendinibus musculorum digitos, cum manus tum pedes moventium, ad articulos inhærent, cum iisque in cadaverum coctione, & ossium purgatione seu denudatione plerumque amittuntur, nisi prudenti investigatione conserventur.

In prima ætate cartilaginea sunt, postea

increpcentibus annis ossescunt, & levi cartilagine obducta, ossis alterius sedem lubricam contingunt.

Magnitudinem variam habent, pro ossium quibus adhærent diversitate. In manibus majora sunt quam in pedibus, excepto pollice pedis, cui ad caput metapedii ossis apponitur maximum, quod tendini musculi pollicis os primum flectentis subiicitur, & aliud multo minus sibi adjunctum habet. Hoc verò maximum, quod internum, pisi majoris decorticati dimidiam partem forma & magnitudine refert, appellaturque Arabibus

bus Albadaram: de illo nonnulli Hebræi Iudei eadem illa fabulantur, quæ de ossibus commemoravimus *precedente cap. 12.*

*Numerus.*

Numerus horum ossium non semper idem reperitur: plerumque in singulis manibus & pedibus duodecim inveniuntur, interdum pauciora, interdum plura. Non tamen verosimile est eundem numerum in omnibus non adesse, sed potius credendum, propter parvitatem tam exilia ossicula omnia in quibusvis subjectis inveniri non posse.

*Sesamoidea poplitis.*

His etiam addenda sesamoidea in poplite latentia, de quibus hoc peculiare notandum, quod non musculorum tendinibus, ut reliqua sesamina, sed duorum priorum musculorum pedem moventium capitibus innascantur, ut etiam dictum *cap. 19.*

Casparus Bauhinus sesamoideis etiam annumerat ossiculum ad articulationem ossis carpi octavi cum metacarpi ossi minimum digitum sustinente situm: item ossicula duo quæ nonnunquam in senibus cubiformi ossi apposita reperiuntur, de quibus ante, *cap. 18. & 20.* dictum.

*Ossium omnium numerus.*

Post omnium ossium in adultis descriptionem, forte aliqui curiosiores in eorum numerum inquirent, quem exacte determinari non posse, diximus *precedente cap. 1.* idque ob varias, rationes eo loco videntas. Interim tamen ut aliis hac in parte aliquo modo satisfieri possit, de numero hæc pauca dicemus: scilicet, quod computatione facta secundum illam ossium constitu-

tionem quæ in adultis communiter, seu ut plurimum invenitur, comperturi sumus omnia ossa simul sumpta numerari ducenta & quinquaginta sex.

Nam cranii ossa sunt septem: cribrosa duo: nasi tria: aurium octo: maxillæ superioris undecim, inferioris verò unum: dentes triginta duo: totius spinæ, à capite usque ad finem coccygis, viginti octo: costæ viginti quatuor: sterni tria: claviculæ duæ: omoplatae duæ: ossa hyoidis tria: innominata duo: humeri & cubiti sex: manuum quinquaginta quatuor: femoris & cruris octo: ossicula in utroque poplite quatuor: ossa pedum quinquaginta duo: sesamoidea magna in utroque pollice quatuor.

His si numerus certus (qui alioqui incertus esse solet) ossium sesamoideorum minorum, nempe viginti quatuor in manibus, totidemque in pedibus accedat; atque etiam parvum ossiculum utriusque manus, quod sæpe ad connexionem ossis carpi cum metacarpio; ut & simile parvulum in utroque pede, quod ad externum latus ossis cubiformis invenitur; nec non duo ossa spongiosa narium, adiciantur, comperietur numerus omnium ossium 310. Iam prætereo illas ossium in plura ossa divisiones, quæ in adultis raræ sunt; ut ossis frontis in duo, occipitis in tria quatuorve: sterni in quinque vel sex: & si quæ sint aliæ similes.

## CAPUT XXII.

## De ossium virorum &amp; mulierum differentia.



Sæ utriusque sexus in plurimis conveniunt, in paucioribus differunt.

*Differentia generalis.*

Generaliter mulierum ossa ut plurimum sunt minora ossibus virorum, tam in pondere & crassitie, quam in longitudine, latitudine, soliditate & duritie.

*In capite.*

In capite futura sagittalis mulieribus usque ad summas nares frequentius extenditur quam viris.

Larinx illis etiam minor est, & thyroides cartilago minus protuberat.

*In thorace.*

Thorax mulieribus anteriore parte nonnihil depressus, nec elatus sicut viris, quo sic mammis commodior sedes sit.

In mammosis etiam mulieribus thorax sæpe angustior, & fere acuminatus est, propter molem & pondus mammarum.

Costæ mulieribus sunt minus latæ, minusque duræ & fortes, quam viris.

Claviculæ iisdem minus incurvatae apparent, ad colli & pectoris venustatem.

Sternum etiam parte inferiore latius est, quam viris, ejusque infernum os nonnihil fissum, cum cartilagine xyphoide ei appensa foramen amplum efformat, ad egressum venæ mammariae internæ.

Os sacrum in mulieribus magis ad ext<sup>ra</sup> In inferiorem terna curvatum & brevius, sed latius est, *ventre.* quam viris.

Coccyx mobilior est, nexuque laxiore adstrictus, atque retrorsum magis incurvatus.

Ossa ilium, ut plurimum, sunt ampliora, & extrinsecus magis excavata, ut iis uterus foetu gravidus commodius

Aaaa 3

innita-

innitatur. Ab hac amplitudine fit, quod plerisque mulieribus etiam snates sint ampliores.

Vtrumque foramen ovale in ossibus pubis angustius est, & hinc portio ossis pubis juxta symphylin latior.

Ossis pubis spina juxta symphylin cum altero congenere, in muliere productius est, & extrorsum vergit.

Ischii infernæ partes, sive tuberositates longiore intervallo distant.

Ossium pubis commissura in mulieribus cartilagine triplo crassiore & molliore op-  
pleta est, quam in viris: atque etiam brevior linea perficitur, ut instante partu

emollitâ & laxatâ cartilagine intermediâ, ossa pubis facilius dehiscant. Sic etiam crassior cartilago illis utrimque intercedit inter os sacrum & ossa ilium.

In artubus consimilis est ossium utriusque sexus structura.

Notandum tamen, istas differentias non semper, & in omnibus reperiri, sed ut plurimum, & in plerisque: interdum enim contingere potest, ut vir effoeminatus & tenellus, vel male formatus, multa ossa foeminarum ossibus similia habeat; & mulier virago & fortis in paucissimis à virorum ossibus differat: hæc tamen quia rarius contingunt, communem regulam non evertunt.

## C A P U T XXIII.

### De Ossium constitutione in infantibus.



Descriptioni omnium ossium in adultis, tandem subjungenda est specialis descriptio constitutionis ossium in infantibus (de hac etsi hic illic suis locis aliquid in præcedentibus dictum sit, nunc tamen de ea paulo latius & conjunctim agendum) ut ex illa cognitione quantum ab adultorum ossibus differant, perfectius sciri possit.

Constitutio  
ossium ca-  
pitis.

In infantibus omnia cranii ossa sunt valde tenuia & mollia, ita ut levi pressione facile flectantur, nec duæ tabulæ, cum media diploë, in iis observari possunt, nisi anno elapso.

Serratæ suturæ in iis non conspiciuntur, sed apparent instar laxarum harmoniarum.

In vertice, ad concursum suturæ sagittalis & coronalis, hiatus est, qui ossium loco membrana crassa & densa occluditur, postea in osseam duritiem exsiccanda: hac parte cerebri pulsatio visu & tactu percipitur. De hoc hiatu supra dictum, cap. 6.

Ossa frontis cæteris crassiora, & duo sunt, nulla sinuosa cavitate donata.

Occipitis os est tenuissimum, contra quam in adultis, & in plures partes dirimi potest, atque hinc ex pluribus quasi ossibus componitur, de quibus dictum cap. 4. & 6.

In osse temporali squamosam & petrosam partem discriminat linearis harmonia, ultra foramen auris inter mastoideam apophylin exarata.

Meatus auditorius est cartilagineus usque ad sextum mensem, postea ossescit, sed ejus tamen anterior circulus usque ad septimum annum à reliquo osse dividi potest (ut dictum cap. 6.) in basi autem hiulcum, &

veluti fenestratum usque ad tertium annum, & ulterius, invenitur.

Auris cavitates sunt admodum angustæ, & labyrinthi admirabilis structura vix apparet.

Interior tympani circulus, cui membrana affigitur, etiam à reliquo osse divisibilis est.

Tria ossicula, incus, malleus, & stapes, æque magna sunt, atque in adultis,

Os sphœnoides in tria quatuorve ossa manifeste distinguitur, de quibus vide cap. 7.

Os ethmoides est admodum tenellum, & fere cartilagineum, in eoque vix ulla pertusa foraminula conspiciuntur.

Os crista galli dictum, in infantibus nondum est conspicuum.

Septum narium superius mollius est, & longe post reliquas partes induratur, osseamque duritiem acquirit.

Sutura quædam per orbitam oculi decurrit, in eaque fere ad tertium usque annum spectabilis persistit.

In principio palati transversa linea cernitur, quæ ab uno canino dente ad alterum protenditur, & quatuor incisores comprehendit.

Nulli dentes in ore apparent: quomodo autem, & quibus temporibus erumpant, dictum cap. 10.

Inferior maxilla duobus constat ossibus, in mento per harmoniam junctis.

Ossa hyoidea sunt cartilaginosa.

Vertebræ spinæ omnes, exceptâ primâ & secundâ colli, ex tribus partibus constant, ut dictum cap. 11. earundemque processus transversi, una cum postico vel acuto, cartilaginei sunt, adeoque parvi ut fere de-

Trunci.

desiderari videantur : ascendentes verò & descendentes exigui etiam & cartilaginei, sed paulo magis conspicui sunt.

Os sacrum ex quinque construitur ossibus, ut dictum cap. 12. eaque singula in tres partes sunt divisibilia, sicut omnes spinæ vertebræ. Hæc quinque ossa cartilagine interjecta ab invicem secernuntur: postica spinosa acuties est tota cartilaginosa.

Costæ ad vertebrarum articulationes sunt cartilaginosa, & citò indurantur.

Os sternum, exceptâ supremâ particulâ, totum cartilagosum & continuum ac indivisum apparet, & primo ossescunt ejus partes superiores, hinc paulatim reliquæ, & tunc ex octo ossibus constat (ut dictum cap. 14.) quæ brevi ad septenarium numerum rediguntur, duobus ultimis in unum os coalescentibus: postea sunt pauciora, ut sex tantum appareant, usque ad septimum annum: ultra quam ætatem paulatim ita coalescunt, ut adultis tantum tria quatuorve solummodo permaneant.

In omoplate epiphyses & apophyses sunt cartilaginosa: cervix quoque cum cartilagine glenoide est ejusdem naturæ. Coracoides eminentia est epiphysis. Acromium primo est epiphysis multa cartilagine incrustata, quæ post tres quatuorve annos degenerat in apophysin.

*Brachiorum  
& ma-  
manu.*

Humeri appendices superiores & inferiores cartilaginosa sunt, & postea ossescunt.

Olecranon seu cubiti pars superior epiphysis est, quæ post annum induratur, & ossi unitur.

Carpi ossa ex cartilagine indivisa constare

videntur: hinc primo spongiosa facta à se mutuo distinguuntur, & exinde paulatim magis indurantur ac firmiora evadunt.

Extremities ossium metacarpi & digitorum sunt cartilaginosa, & intra annum ossescunt.

Singula ossa innominata, usque ad septimum annum, ex tribus ossibus construuntur, ut dictum cap. 16. *crurum & pedum.*

Patella ossis coxendicis cartilaginea est, talisque pluribus mensibus permanet, postea in os durum firmatur.

Processus ossis femoris superiores & inferiores aliquamdiu cartilaginosa manent.

Patella genu etiam diu cartilaginosa existit.

Tibiæ & fibulæ appendices superiores & inferiores cartilaginosa sunt, atque etiam postea, cum jam indurantur, separari possunt usque ad decimum annum.

Tarsi ossa in pede ad plures menses cartilaginosa manent, excepto calcis osse, quod intus osseum, foris cartilagosum est.

Sesamoidea manent cartilaginosa usque ad ætatem consistentem.

Ex his omnibus jam dictis patet, ossa infantium etiam numero plurimum differre ab adultorum ossibus.

Verum hæc imprimis intelligenda sunt de ossibus infantium primo natorum. At quomodo se habeant ossa in foetu utero inhaerente, eorumque generationem, & quid cuique officulo singulis mensibus accedat, quidve decedat, & in eo per varia immutetur tempora, accurate describit, & adjectis tabellis clarissime oculis subiicit Theodorus Kerckringius, lib. de osteogenia fatuum.

## CAPUT XXIV.

## DE UNGUIBUS.



Uamvis unguis non sint ossa, tamen propter notabilem duritiem, atque hinc aliqualem cum ossibus mollioribus, vel potius cartilaginibus durioribus, aut cornibus similitudinem, horum historiam ossium descriptioni subjun-  
gemus.

*Definitio.*

Sunt autem Ungues corneæ partes extremis digitis manuum & pedum impositæ.

*Nomina.*

Græcis appellantur ονυχες, à νύσσω, pango, fodio. Eorum radix εχθονυχία summa verò pars alba seu lunula candicans,

ἀνατολή pellicula radici adnata, αἰγερμοὶν nominatur.

Julius Pollux, lib. 2. unguium particulas sic explicat, *Partes*, inquit, quæ sunt sub ungue, dicuntur κρόκη: superiores verò αἰγερμοί: quæ utrimque sunt, παρυονυχία: quæ post hæc sunt, γωνία: albedo autem illa juxta unguium radices, ἀνατολή: quæ in unguibus apparent νεφέλια: termini qui intra digitos sunt, Rimæ & Vertices, Græcis εἰγες, & κερυφαί, dicuntur.

Substantiam nullo sensu præditam & mediocriter duram obtinent, mediamque inter ossa



ossa & cartilaginee; unde etiam flexiles existunt.

**Color.** Colorem habent pellucidum, qui pro subjectæ carnis ratione, modò rubicundus, modò pallidus, vel lividus, alteriusve coloris apparet. Ex eo colore Hippocrates, alique Medici nonnunquam morborum & sanitatis indicia desumunt.

**Connexio.** Carni subjectæ firmiter connascuntur, ac circa radicem ligamento colligantur, ut firmitus ad hæreant, eosque cutis in circuitu complectitur, eodem fere modo quo gingivæ dentes comprehendunt.

Singulorum digitorum extremitati superiori, tum in manu, tum in pede, unus imponitur, ad tutelam partium maxime sensibilibus sub iis latentium: quippe nervuli & tendines usque ad extremitates has deferuntur, & sub unguibus dilatantur, iisque locis acutissimum sensum conferunt, unde homo ad quemlibet externorum solidorum & acrium contactum miserrime doluisset, nisi impositi ungues huiusmodi sensum dolorosum impedivissent, qui primarius eorum usus esse videtur; quamvis secundario etiam inserviant ad scalpendum, aliasque similes operationes peragendum.

**Usus.** Illos ex tertiæ coctionis excrementis crassioribus & viscosis pronasce, ac per appositionem solummodo incrementum, hincque in longum, non verò in latum ac profundum augeri, & partibus etiam corporis annumerandos non esse, vulgò tradunt: atque huic sententiæ Galenus quoque favere videtur; utpote, qui, *lib. 2. anat. administ. cap. ult.* dicit in ungues vasa non dispensari, eo quod pilorum modo à radice exeuntes, augeantur. Contra verò idem Galenus, *citato loco*, sibi ipsi contrarius, arteriam, venam, & nervum in unguum radicem porrigi, per eaque vasa illos, aliarum partium instar, vitam & nutrimentum assumere testatur: quod si verum sit, etiam partibus corporis annumerandi videntur, quia communi cum reliquis vita & alimento fruuntur. Huc accedit, quod in multis affectibus etiam mutationem subeant, sicut alia partes: nam in syncope & febrium quartanarum principio pallescunt, in plethora rubescunt, in cacoehymia pravos sæpe colores habent. Verum ut dubium hoc breviter solvatur, tria sunt consideranda. **Primo**, maculas in ungue enatas nunquam deleri, donec tandem cum ea parte unguis cui inhaerent, extra carnem perveniant, & sic una cum parte unguis abscindantur.

**Secundo**, videri quidem in variis corporis affectibus unguum colorem, idque multoties subito, mutari, sed illam non esse veram mutationem coloris in eorum substantia sed duntaxat coloris subjacentium humorum transparentiam, quia ungues per se sunt diaphani seu pellucidi, atque hinc

quolibet subjacentis sanguinis, aliorumve humorum colores per eos transparent. Et quia in syncope & febrium quartanarum principio, ob cordis debilitatem sanguis paucissimus ad iis subjectam carnem propellitur, hinc propter illius defectum tunc pallent: & quia copiosus sanguis eo propellitur in plethora, hinc tunc rubent: & quia male coloratus est in cacoehymia, hinc mali colores per ungues transparent, qui tamen eorum substantiam non magis inficiunt, eique inhaerent, quam colores per vitrum transparentes inficiunt vitrum, aut ejus substantiæ inhaerent.

**Tertio**, ungues post hominis mortem adhuc vivere & incrementum (hoc testatur Aristoteles, *lib. 3. histor. animal. cap. 11.*) cujus rei exemplum manifestum scribit Paræus, *tract. de renuunciat. ad finem*, idemque tot alia docuerunt experimenta & observationes, ut ea de re minime dubitandum sit.

His tribus pensius consideratis, satis liquet,

I. Illos non vivere vitam cum animantis ejusdem corporis partibus communem, sed peculiarem vitam vegetabilem

II. Illos non nutriri solo sanguine, sicut reliquæ partes animatæ, sed etiam aliis alimentis, qualia in corpore mortuo adhuc supersunt, post sanguinem diu consumptum & putrefactum; ac proinde non esse verosimile ulla arterias aut venas eorum substantiam ingredi, licet forte ad radices usque decurrant, in partes subjectas distribuendæ.

III. Illos non crescere secundum totam substantiam, sed duntaxat per appositionem scilicet appositæ radici partibus quæ anteriores sensim propellunt.

Hinc denique concludendum, illo partes corporis appellandos esse, quatenus faciunt ad complementum totius (homo enim sine unguibus non est omnino completus, seu perfectus) non verò quatenus communi vita cum cæteris partibus fruuntur, nam privatam vitam vivunt, post omnium aliarum partium mortem sæpe diu adhuc perdurantem seu supersistentem. Super hac re videantur plura, quæ de pilis supra diximus, *lib. 3. cap. 2.*

Sed quia modò diximus ungues incrementum per appositionem, quæritur, an illud incrementum fiat secundum trinam dimensionem, in longum, latum & profundum: Hoc Spigelius negat: Bauhinus verò, in longum potius, quam in latum & profundum, illos incrementum sentire: cum quo consentit Hoffmannus. Sed Lindanius, *physiolog. cap. 16. artic. 6. num. 51.* eorum incrementum secundum omnes tres dimensiones admittit, utque hoc probet, addit rarum exemplum. *Hujus testimonium*, inquit, *dedit Enchusana mulieris duoxéga, seu*

Conclusio.

Modus incrementi.

seu fœditas & negligentia sui inaudita. Ei in pedibus ungues in tantum excreverant, ut ambulare tandem non posset. Medicus vocatus ferrare jubet. Segmina meus pater, p. m. abstulit secum, & ea seruo etiamnum. Segmentum pollicis duos pollices longum, crassitudine digiti est, circa radices solidum, inde de multis laminis, velut totidem unguibus, compaginatum. Segmentum digiti medii aequè longum ac prius, sed minus crassum, insigniter tamen. Nullum pollice brevius: etiam minimi crassius est crassissimo pollicis ungue ordinatio. Quod in latum increvit, introrsum

cernitur aduncum. Haud abfimilem historiam scribit quoque Platerus, *observat. lib. 3.* de puella cui ungues in digitis manuum transversè digiti crassitiem habebant, & valde protuberabant, ita ut verius ungulas, quam humanos ungues referrent. Sic ego etiam novi virum, cui secundi pedis dextri digiti unguis ad crassitiem digiti increverat, circa radicem solidus, versus partem verò anteriorem quasi ex multis laminis, velut totidem unguibus, compaginatus, magno ingressus impedimento, quod tamen vitium reliquis unguibus non inerat.



Bbbb

ANÀ-

## ANATOMES

## LIBER X.

## DE

## Cartilaginibus &amp; Ligamentis.

## CAPUT I.

## DE CARTILAGINIBUS.



Definitio.

Ost historiam ossium, sequitur ut ultimo agamus de cartilaginibus & ligamentis. De illis, quia ad ossium naturam proxime accedunt, imò in nonnullis partibus ossium vicem gerunt, sæpe ossescunt. De his, quia multæ partes, atque inter alias omnium maxime ossa, sibi invicem per ligamenta cohærere debuerunt.

Substantia.

*Est autem cartilago pars similis frigida, modice sicca, & sensus expers, generata è seminis parte glutinosa & terrea, ad stabilimentum multarum partium molliorum, & ad eludendos durarum rerum foris incidentium impetus, comparata.*

Hunc in finem substantiam obtinet lævem, politam, & flexilem, ligamento durior, osse molliorem; quæ ubi terreæ particulæ superant glutinosas, majorem duritiem acquirit, & facile ossescit, ut in osse sterni, spina dorsi, aliisque, in quibus sæpe cartilagine tandem ossa fiunt. Vbi glutinosæ terreas superant, nunquam ossescit, ut in articulis brachiorum, femoris &c. Vbi verò particulæ medio modo se habent, si aliqua insignis exsiccatio per ætatem, vel victum accedat, interdum præter communem ordinem ossea fit, ut in cartilagine scutiformi, & asperæ arteriæ; quod ultimum furis Mediolanensis exemplo docet Cardanus, qui fur de patibulo suspensus, hac de causa non fuit suffocatus, quod ei aspera arteria ossea evaserat.

Differentia.

Cartilagine non habent notabiles cavitates sicut ossa, neque medulla nutriuntur, sed eorum substantiam molliorem, porosque latiores alimentum facile penetrat.

Differunt inter se magnitudine, figur, situ, connexu, usu, & substantiæ duritie: præterea eo quod aliæ ossium capita incrustent & lubricent; aliæ ipsas partes constituent, ut in aure, & naso: aliæ præstruantur præcipuis quibusdam partibus, ut in cartilaginibus costarum & ossis sterni.

Vsus cartilaginum ex postremis definitionis verbis patet, isque varius & singularis est.

I. Partibus, quæ articulantur, motus reddunt faciles, quippe in vivis copioso lubrico humore turgent.

II. Varia ossa conjungunt per *συνχόνους*.

III. Solidorum impetum elidunt.

IV. Partes varias ab injuriis externis defendunt, ut liquet in cartilaginibus costarum sterno annexis.

V. Varias partes prominentes vel cavas efficiunt, ut aures, nasum, tracheam.

VI. Articulorum majorum cavitates amplificant.

His addi posset peculiaris usus epiglottidis, operculi vicem obeuntis: & cartilaginum palpebrarum, instar fulcri palpebras sustentantium.

Omnia ossa quæ articulantur, in articulis cartilagine obducuntur, eamque magis lubricam obtinent illa quæ magnos agilesque motus obeunt; at quæ exiguos, viscosiorem.

De cartilaginibus laryngis, epiglottidis, asperæ arteriæ, palpebrarum, aurium, nasi, sterni, aliisque variis, dictum suis locis, ita ut earum historiam hic repetere non sit necesse.

CA:

## CAPUT II.

## De Ligamentis in genere.



**L**igamentum, Græcis σύνδεσμος, vinculum, appellatur: Hippocrati & Aristoteli nonnunquam, à figuræ & coloris aliqua similitudine, νεύρον, nervus, dicitur.

**Definitio.** Est autem pars similis frigida, sicca, & firma, laxa tamen & flexilis, variis partibus colligandis dicata.

**Substantia.** E seminis parte lenta ac tenaci conditum censetur, hincque solidam & albam substantiam adeptum est, mediam inter membranam & cartilaginem: duriores membrana, ne facile rumpatur; molliorem cartilagine, ut musculorum motibus melius obsequatur: & prout ad hujus vel illius naturam propius accedit, hinc dicitur, aut ligamentum cartilagineum, ob majorem duritiem, sicut illud quod ex ossis femoris capite procedit in coxendicis acetabulum: aut ligamentum membraneum, ob molliem quale est illud quod humeri articulum amplectitur. Præter has tamen differentias à substantia desumptas, multo plures sumuntur ab ortu, insertione, robore, figura, & duritie.

Sensu carent illa quæ ossa colligant, ne in partium motibus dolores molestos, hincque miseram hominis vitam efficerent. Nonnulla tamen eorum à periosteis oriri, atque hinc aliquo modo membranosa esse, & nonnihil sentire quibusdam putantur: sentiunt etiam alia quædam ligamenta membranosa, à periosteis non orta, qualia sunt illa quæ hepar, uterum, vesicam, &c. vicinis partibus annectunt.

**Nutritum.** Nutritur ligamentum, non medulla, ut Columbus aliique nonnulli putarunt, sed sanguine, qui per capillares arteriolas, visum subterfugientes, affunditur.

**Figura.** Figuram obtinet latiore, angustiore, teretem, planam, brevior, aut longior, pro partium colligandarum diversitate,

situ exteriori vel interiori, & majore usus commoditate.

Oritur ab osse, cartilagine, aut membrana, iisdemque etiam inseritur. **Oritur.**

Connectunt autem ligamenta partes duplici modo. Vel ut moveri commode possint, & in motu non excidant suo loco. Vel ut solummodo partes contineantur suo loco, sine magno motu. **Usus.**

Prior connexio omnibus articulis communis est, pro quorum majore vel minore motu, aliis tenuiora & laxiora, aliis crassiora & validiora ligamenta circumjecta sunt, eaque totum articulum amplectuntur, si nihil impediat (sic in genu, ob patellam, totus articulus non ingitur) & adnascuntur, vel ipsis ossibus articulum constituentibus, vel cavitarum superciliis, capitumque circumferentiis, vel cartilagini articulum intercedenti. Si plures articuli conveniant, tunc extrinsecus pluribus simul obducuntur.

Præter hæc quæ totos articulos amplectuntur, etiam partibus nonnullis quæ nexum validiorem requirunt, peculiaris ligamenta contigerunt, crassa, tenuia, teretia, vel lata: quorum alia oblique vel transversim ab uno osse ad aliud procedunt; alia verò articulos intercedunt, ut inter vertebrae, & inter ossis femoris acetabuli coxæ interstitium, hæcque ligamenta cartilaginea dicuntur.

Posterior connexio, qua partes solummodo sede sua continentur, sine insigni motu, conspicua est in ligamentis hepatis, vesicæ, uteri, &c. item in ligamentis annularibus, quæ tendines musculorum manuum & pedum orbiculatim ambiunt: in iis etiam quæ radium cubito, & fibulam tibiæ connectunt, aliisque similibus.

## CAPUT III.

## De ligamentis capitis, maxillarum, ossis hyoidis, &amp; linguae.



**C**aput primæ vertebræ insistentis, cum super ea & secundæ vertebra moveatur, arctissimis vinculis fortiter iis colligari debuit: idcirco quatuor valida ligamenta has partes connectunt Horum.

**Ligamenta capitis.** Primum, quod maximum & latum, totum articulum externum in orbem amplectitur, & ad internam quoque vertebræ partem seu portionem membranosa dimittit. Hoc capiti primam vertebram in occipitio necit, à cujus basi oritur, utque firmitus adhæreat, ea parte occipitium exasperatur, & in pueris multifidum fit.

Secundum, quod vertebrarum secundam

Bbbb 2

capiti

capiti copulat, teres ac validissimum est, & partim ab externa dentis sede, partim ab ejus apice enatum, occipitis ossi, ad magnum ipsius foramen, affigitur, sicque una cum dente quasi axim efformat, ad quam caput circumagitur.

*Tertium*, quod cartilagineæ naturæ est, transversim ipsi denti obducitur, & simul cavitatem, quæ dentem suscipit, circumdat. Ex latere autem primæ vertebræ procedit, & alteri ejusdem vertebræ lateri validissime annectitur, eo modo impediens, quo minus in vehementibus capitis motibus dens è sinu suo exsiliat, sicque luxatio, & spinalis medullæ compressio fiat.

*Quartum*, membraneum est, & primam vertebram secundæ adnectit, iisque interius & exterius circumducitur.

Maxilla-  
rum.

Maxillæ superioris ligamenta, inter suturas & harmonias, tenuia & membranosa sunt, ad muscutorum insertionem constructa, utpote quibus muscutorum faciei, vi-

cinarumque partium tendines adnascuntur.

Inferioris verò maxillæ totum articulum, cum ossibus temporum, obvolvitur ligamentum membraneum commune.

Ossis hyoidis & linguæ varia sunt ligamenta. Ossis hyoi-  
dis & lin-  
guæ.

Duo oriuntur à majoribus ossibus hyoidis processibus, quibus ima linguæ pars, seu basis devincitur.

Duo adherent cornibus ejusdem ossis, & annectuntur styloideis apophysibus, quæ totum os cum suis musculis suspensum tenent, ut ei lingua firmitus innitatur.

Unum validum, linguæ proprium, eique substratum est, quod usque ad dentes anteriores exporrigitur. Hoc si linguam inferna parte nimis versus dentes constringat, loquela, atque in infantibus etiam sucktio impeditur, quam ob causam tunc scissore rescindi solet.

## C A P U T IV.

### De ligamentis totius trunci.



Ligamenta  
vertebra-  
rum.

Ropter varios spinæ motus, vertebrae quoque firmis vinculis colligari necesse fuit, quæ trium sunt generum.

I. Ipsa vertebrarum corpora (quæ superne & inferne unctiosa cartilagine obducuntur) anteriore potissimum parte & in lateribus, per ligamenta connectuntur, quæ Lunarem figuram referunt, & crassa, fibrosa, validaque sunt, atque ipsas vertebrae ambiunt, easque per totam longitudinem dorso valide colligant, ut violentos motus facile perferre queant.

II. Corpora vertebrarum, qua parte conjunguntur, fortiter coherent per ligamentum cartilagineum, fibrosum, & mucosum, extrinsecus crassum, versus medium tenuius, amplitudini vertebrarum respondens, earumque figuram referens, & cartilaginem inter vertebrae mediam detinens, è qua illud oriri multi arbitrantur.

III. Processus vertebrarum, cum transversi, tum acuti, per ligamenta membranea communia colligantur, quæ in acutis à supernæ spinæ medio quodam canaliculo exorta, & in suppositæ spinæ velut linea quadam inserta, ac cum sequentibus ordine cœcuntia, quasi unum ligamentum, per spinarum longitudinem ductum, efformant, & vertebrae ita continuant, ac si unum os essent.

Costæ vertebrae copulantur per valida, Costarum. & fere cartilaginea ligamenta, quæ à vertebrarum transversis ligamentis enascuntur. At cum sterno intercedentibus cartilaginibus iunguntur per ligamenta tenuia.

Ipsa verò sterni ossa, pertinacissima intercedente cartilagine, & duplici per osteo obducta, arctissime connectuntur. Superiore parte sternum claviculis alligatur proprio ligamento. Sterni.

Os ilium, præterquam quod ossi sacro per impositam tenacem cartilaginem cohaereat, eidem etiam connectitur per ligamentum membranosum commune, latum, & validum. Ossis ilii

Os sacrum ossi ilii jungitur per crassam cartilaginem, & per geminum ac teres ligamentum, quod ex ossis sacri una parte prognatum, uno sine in coxendicis processum acutum, altero in ejusdem sedem posteriorem, seu appendicem, inferitur, sicque non tantum ossa hæc valide colligat, verum etiam rectum intestinum cum suis musculis sustinet. Ossis sacri.

Pubis ossa, partim cartilaginis interven- Ossium pu-  
bis. tu, partim gemino ligamento connectuntur: quorum prius illa circulariter ambit: alterum, quod membraneum est, ipsum foramen occupat, ejusque loci musculos sustinet.

De ligamentis hepatis, vesicæ, lienis, uteri, & pudendi, dictum suis locis lib. I.

CA-

## CAPUT V.

## De ligamentis scapulae, brachii, &amp; manus.

**S**capula capiti ossis humeri, claviculaeque jungitur quinque ligamentis, quae imprimis constari videntur ex tendinibus musculorum omoplae, caput & cervicem ossis humeri circumdantibus, & ita unitis, ut unum robustissimum orbiculare ligamentum constituent. Horum

*Primum*, quod latum & membraneum, ex cervicis scapulae superciliis ortum, totum articulum ambit, atque in capitis humeri priorem internamque regionem implantatur.

*Secundum*, quod rotundum instar nervi, ex apice interioris processus scapulae enatum, capitis humeri exterioribus partibus insiguitur.

*Tertium*, quod etiam rotundum, sed praecedente crassius & majus, è coracoidae processu exurgens, in humeri caput parte exteriori definit.

*Quartum*, quod amplo principio ex eodem cum priore loco procedit, in humeri capitis exteriorem posterioremque sedem implantatur.

*Quintum*, ab interiori scapulae sede enascitur, & oblique sursum ad summum humerum progreditur.

Cubiti.

Cubiti ligamenta duplicia sunt, quorum unum validum membranofum, secundum totam cubiti longitudinem musculis omnibus circumdatur, eosque in sua sede continet, cui musculorum propriae membranae adnascuntur pertinaciter.

Reliqua verò ligamenta colligant ossa. Quippe ulna & radius humero connectuntur per ligamenta membranacea communia & valida: carpo verò junguntur non solum communibus, verum etiam duobus peculiaribus & teretibus vinculis: quorum *prius*, quod magis cartilagineum, à processu styloide ad carpi os quartum procedit, & ulnam carpo adnectit: *alterum* è radii apice

enatum, carpum excipit, & radium carpo jungit, quam copulam firmiorem facit ligamentum nerveum toti articulo circumjectum. Vlna verò cum radio nequitur, supra & infra, communi vinculo: item alio peculiari validoque ligamento membraneo, inter ossium intervalla secundum totam longitudinem sito, quod ab acutiore ulnae linea exortum, in radii lineam implantatur.

In carpo duplicia sunt ligamenta, quorum unum ossa solummodo connectit, duo tendines ulterius transmittendos firmant.

Carpi.

Illud primum, ab inferiore radii & cubiti processu ortum, carpi ossa complectitur, & artissime colligat, definitque in ossis metacarpii appendicem.

Reliqua duo (hæc pro uno numerat Riolanus) ab osse carpi, pollicem spectante, transversim ad os carpi minimum digitum attingens, unum exterius, alterum interius, feruntur instar annuli, unde etiam ab iis qui hæc duo pro uno ligamento describunt, **Ligamenti annularis** nomine designatur, continentque musculorum digitos flectentium & extendentium tendines. Andreas Laurentius & Bauhinus, putant externum in sex ligamenta commode dividi posse.

Ligamentum annulare.

Metacarpii ossa ligamentis communibus sibi mutuo, & carpi ossibus junguntur.

Digitorum internodia ligamentis communibus etiam vinciuntur. In manus autem vola digitorum phalanges una cum metacarpii ossibus junguntur ligamento transverso. Præterea singuli digiti secundum suam longitudinem ligamentum habent ab interna ossium parte prognatum, quod canalem imitatur, & tendines digitos flectentes suis sedibus continet.

Metacarpii.

Digitorum.

His denique addi posset membrana mucosa, quæ tendinibus ad manum & digitos transmissis, ligamenti vice obducitur.

## CAPUT VI.

## De ligamentis cruris, &amp; pedis.

Ligamenta femoris.

**E**mur ischio copulatur duobus vinculis. Unum, quod exterius, totum articulum ambit, estque latum, durum, crassum, & validum. Alterum, quod interius, & non nisi resecto priore conspici potest, ex acetabuli fundo procedens, mox in medium femoris caput inseritur, estque oblongum, teres, & durum,

atque hinc **Nervus cartilagineus** nonnullis appellatur.

Hæc ligamenta si per defluxiones pituitorum humorum, in acetabulum decidentium, nimis laxentur, fit hujus articuli luxatio, quæ osse in locum suum restituto, per medicamenta exsiccantia & corroborantia, commodasque fasciaciones, curatur. At si ab acri fluxione erodantur &

Luxatio ischii.

Bbbb 3

cor-

corrumpantur, fit immedicabile malum. Vel si à violento externorum impetu illa luxatio contingat, tunc interius rotundum ligamentum plerumque disumpitur, quia ob singularem duritiem tantam, tamque subitam non patitur extensionem, ut extra profundum acetabulum foras sine ruptione elabi possit: atque hinc talis luxatio prorsus incurabilis existit: quamvis enim os in suum locum seu acetabulum reducatur, tamen mox iterum excidit, propter interius ligamentum disruptum; sicque ægri perpetuo claudicantes manent, luxato crure brevior existente altero: quod diligenter notandum Chirurgis, ne in tali dislocatione articuli restitutionem, cum maximis ægri tormentis, identidem frustra moliantur.

Tibia.

Tibiam & fibulam cum femore connectunt ligamenta sex: quorum.

*Primum*, est membraneum ac commune, quod universum articulum, excepta patellæ regione, ambit.

*Secundum*, quod validum & nervosum, in genu interno situm, ex tibiæ processu exurgens, bifidum utrique femoris capiti inseritur.

*Tertium*, quod cartilagineum & validissimum, ex elatiore tibiæ parte inter ipsius sinus enatum, ingreditur medium sinum qui posterius intra femoris capita existit.

*Quartum*, quod crassum, & propemodum teres, genu externo lateri adhæret, & femoris, tibiæ, ac fibulæ ossa connectit.

*Quintum*, quod præcedente paulo gracilius & mollius est, interno lateri adnatum, oblique in tibiæ priora fertur.

*Sextum*, quod gracile & molle, in articuli genu medio reperitur, & à tibia in femur fertur. Hoc tamen cum duobus præcedentibus non semper adest, atque hinc alii, non admodum malè, hic tria tantum ligamenta agnoscunt, unum commune, & duo interjecta, eaque cruenta.

Fibula.

Tibia fibulæ copulatur tribus vinculis.

*Primum & secundum* sunt ligamenta membranea communia: unum scilicet quod parte superiore & exteriore ossium connectionem ambit: alterum quod parte inferiore extibiæ ossi procedens, fibulam accedit. *Tertium* verò est ligamentum membraneum peculiare; quod tibiæ ossi tōto ductu adnatum, ad fibulam fertur, ac per intervallum inter hæc duo ossa expanditur, sicque ossa conjungit, & simul musculos istius loci distinguit, eorumque nonnullis exortum præbet.

Pedis duplicia sunt ligamenta: alia quæ tendines firmant, ne in motu suis locis excidant: alia quæ ossa colligant.

Illa tria sunt: quorum.

*Primum* anterius ad articulum pedis cum tibia situm est.

*Secundum* à malleolo interno in calcis os progreditur, & tres quasi annulos tendinibus transmittendis constituit, quia tres ibi sinus sunt.

*Tertium* à malleolo externo exsiliens, calcis ossi implantatur, & sinibus duobus obducitur.

Præter jam dicta, in digitorum pedis interna regione, ligamenta etiam transversa, ut in manu, occurrunt, quæ tendines digitorum, internodium secundum & tertium flectentes, continent.

Hæc, quæ scilicet ossa connectunt, vel sunt tali, vel pedii, vel metapedii, vel digitorum.

Talum tibiæ copulant ligamenta tria; quorum.

Tali.

*Primum*, quod articulum tibiæ cum talo ambit, membraneum est, cum reliqua cartilaginosa existant.

*Secundum*, à tali parte interna enatum, tibiæ ossi talum respicienti implantatur.

*Tertium*, tali partem externam fibulæ connectit.

Talum verò pedio connectunt ligamenta quinque: quorum.

*Primum* commune, quod calcis talique articulum complectitur: hoc membraneum, reliqua cartilaginea sunt.

*Secundum*, ab inferiore sede tali ad calcem progreditur.

*Tertium* ex tali cervice assurgens, ossi naviculari implantatur.

*Quartum*, tesseræ os cum tali cervice jungit.

*Quintum*, calcis os copulat ossi tesseræ, & articulum ambit.

Pedii ossa sibi mutuo & vicinis ossibus firmiter connectuntur ligamentis durissimis & cartilagineis, quibus inferiore parte, ad majus robur, accedit ligamentum validissimum peculiare, quod ossium media invicem devincit.

Pedii.

Metapedii & digitorum ligamenta, à manus ligamentis structura, insertionem & forma, parum aut nihil differunt. Sub planta pedis, ablata cute & adipe, ligamentum latum & validum occurrit, quod primæ phalangis ossa connectit, ejusque sesamoidea comprehendit.

Metapedii, &amp; digitorum.


F I N I S.

Summo opt. max. Macrocosmi & Microcosmi Creatori Deo, sit laus, honos, & gloria, per omnia secula.



# INDEX RERUM

Primariarum hifce Anatomies libris contentarum.

A.		Pag.		
	<i>Abdomen.</i>	8	<i>an continue ex hepate effluat.</i>	74
	<i>Abortuum varia hiftoria.</i>	183. 184	<i>receptacula, vide, folliculus fellis.</i>	71
	<i>Acetabula.</i>	202. ad 204	<i>Bilarii ductus.</i>	72. 73
	<i>Acicula &amp; acus c. urina reddita.</i>	98. 99	<i>ductus infoliti.</i>	75
	<i>Actio partis quid fit.</i>	3	<i>De Bilis colore experimenta.</i>	78
		14	<i>observatio.</i>	77
<i>Adeps.</i>		264	<i>Brachium.</i>	442
<i>cordis.</i>		210	<i>Bronchia.</i>	321
<i>Alantois membrana.</i>		412	<i>Bucca.</i>	424
<i>Alveareum.</i>		208	<i>Bulla in conceptu.</i>	176. 183. 185
<i>Amygdala vid. Tonsilla.</i>		93	<i>observationes.</i>	185
<i>Amnios membrana.</i>		2	C.	
<i>Anasarca causa.</i>		471	<i>Alculi in ventriculo geniti.</i>	23
<i>Anatomes definitio &amp; fubjectum.</i>		472	<i>Callus.</i>	519
<i>Aneurifmatis generatio.</i>		195	<i>observatio.</i>	ibid.
<i>observatio.</i>		253	<i>Canthi oculorum.</i>	396
<i>Anima vegetativa.</i>		375	<i>Caput.</i>	328
<i>Anima duplex in homine vegetativa &amp; rationali.</i>		251	<i>Capillorum hiftoria.</i>	329. ad 337
<i>Anima rationalis fedes.</i>		251. 254	<i>Carpus.</i>	443. 555
<i>Anima brutorum mortalis.</i>		8. 39	<i>Caruncula lachrymalis.</i>	395
<i>Anima rationalis analogon in brutis.</i>		520	<i>Caruncula myrtiformes.</i>	150
<i>Anus.</i>		380	<i>Cartilaginis hiftoria.</i>	564
<i>Apophyses offium.</i>		469	<i>Cartilago fcutiformis.</i>	322. 546
<i>Apoplexia causa.</i>		470. 472	<i>Cataracta.</i>	410
<i>Arteriarum hiftoria generalis.</i>		474	<i>Cerebrum.</i>	340
<i>fubftantia &amp; origo.</i>		280. 475. 478	<i>Cerebri magnitudo.</i>	341
<i>Pulfus unde.</i>		95	<i>observatio.</i>	ibid.
<i>Arteria aorta.</i>		311	<i>Cerebri Stria.</i>	342. 352
<i>afpera. 321. adipofa.</i>		95. 479	<i>motus.</i>	345
<i>bronchialis.</i>		310	<i>glandula Malpighii.</i>	343
<i>emulgens.</i>		479	<i>rara conftitutio.</i>	348
<i>pulmonaris.</i>		479	<i>corpus callofum.</i>	349
<i>Arteriofum vas breve.</i>		264. 475. 478	<i>feptum lucidum.</i>	ibid.
<i>Arteria Coronaria.</i>		477	<i>fornix.</i>	350
<i>carotides.</i>		480	<i>glandula pinealis.</i>	352
<i>cervicales. 476. crurales.</i>		478	<i>observata.</i>	353
<i>gafttrica.</i>		ibid.	<i>Cerebri glandula pituitaria.</i>	362. 364
<i>hepatica &amp; fplenetica.</i>		39. 479. 480	<i>in fundibulum.</i>	363
<i>hamorrhoidales.</i>		480	<i>nates &amp; teftes.</i>	352
<i>iliaca.</i>		257. 478	<i>plexus choroidis.</i>	350. 353
<i>intercoftales &amp; phrenica.</i>		475	<i>processus papillares.</i>	359
<i>mammaria.</i>		479	<i>rete mirabile.</i>	363
<i>meferica.</i>		106. 129. 479	<i>thalami nervorum opticom.</i>	352
<i>fpermatice.</i>		475	<i>Cerebri Ventriculi fuperiores.</i>	349
<i>fubclavia.</i>		218. 480	<i>tertius.</i>	351
<i>umbilicales.</i>		522	<i>quartus.</i>	355
<i>Articulatio offium.</i>		7. 442	<i>Cerebrum an poffit deeffe.</i>	347
<i>Artus.</i>		64	<i>Cerebri partes ablata.</i>	ibid.
<i>Ascitis causa.</i>		ibid.	<i>vulnera lethalia.</i>	348
<i>observatio.</i>		306	<i>Cerebellum.</i>	354
<i>Afthma in lapicidis unde.</i>		418	<i>Cerebelli calamus fcriptorius</i>	355
<i>Auditus quid.</i>		411. 532	<i>processus vermiformes.</i>	354
<i>Auditus organa.</i>		414	<i>Cerebri officium.</i>	375
<i>officula.</i>		412	<i>Cholera causa.</i>	31
<i>Auris mufculi.</i>		442	<i>Chylus.</i>	23
<i>Axilla vel ala.</i>			<i>an tranfeat per venas mefericas.</i>	54. 447
B.			<i>an cum fanguine mixtus, ex eo rurfus feperetur.</i>	206. 291. ad 294
<i>Bilis, ejufque generatio, materia e qua, color, fa-</i>			<i>an cor tranfiens maneat chylus.</i>	291
<i>por, motus, &amp; ufus. 75. ad 78. item 89</i>			<i>an ad lienem fluat.</i>	32. 33. 53. 82
<i>Bilis an generetur in ventriculo.</i>		31		an

# INDEX RERUM.

an totius per ductum thoracicum feratur.	53	Dentium permutatio.	538
Chylus per vesicam excretus.	99	Dentes senibus renati.	540
Chyli color.	24	Diaphragmatis historia.	256
receptaculum. 49	usus. 34	Digit.	443
Chylo an nutriantur partes.	34	Diploe cranii.	525
Chyliferus ductus thoracicus.	49	Diversitas partium in fetu & adulto.	227
Chylificationis historia.	23. ad 27	Ductus chyliferus thoracicus.	49
Chorion & amnios.	183. ad 185. 208	Ductus Cholidochus.	74
Cilia.	396	Ductus pituita e cerebro.	359
Clavicula.	350	Ductus salivales.	433
Clavus ferreus cum urina excretus.	98. 99	Dura mater.	338
Clitoris.	152	E.	
observatio Bartholini.	153	Efervescentia.	23
Clitoris an semen transmittat.	154	Empyematis curatio per sectionem.	548
observationes.	ibid.	Empyicorum pus cum urina evacuatum.	98
Clysteres an nutriant.	35	Epididyma.	113
Cochlea.	415	Epigastrium.	8
Colligamentum in conceptu.	176. 183. ad 185	Epiglottis.	322. 432
Collum.	327	Epiphyses ossium.	520
Columella.	427	Eunuchi quare sint pinguijores.	174
Conceptionis historia.	175. ad 186	F.	
Conceptio extra uterum.	141	Facies.	390. 424. 523
Concha.	412	Facultatum principum sedes.	346
Confricatrices.	153	observatio.	347
Continuum quid.	3	Falx.	338
Cor.	261	Fames quid.	25
an sit musculus.	262. 449	canina.	26
an anima sedes.	283	depravata, vid. Pica.	
an primum formetur & alias partes formet.	186	Famis causa.	25
Cordis actio.	179. 283	abolita causa.	26
auricula, vasa, ventriculi &c.	277. ad 280	Fauces.	427
observationes.	278	Femur.	444
Cordis Fibra.	262	Fermentatio.	23
motus causa.	267. 271	Fermentum sanguinis & chyli.	89. ad 92
Cordis vasa & nervi.	264	Fibra quid.	467
vulnera rara.	265. 266	Fetus ex qua materia formetur.	176. 183
observationes.	ibid.	Fetus extra uterum conceptus.	141
Corporis incrementum in pueris.	174	Fetus in tubis concepti.	135
Corpora adiposa.	19	observatio Ruyschy.	ibid.
Corpora nervosa.	124	Fetus mortua matre excussus.	144
Corpus pyramidale.	108	Fetus formatio.	176. 182
Corpus callosum.	349	primum nutrimentum.	177. 182
Costa.	547	duplex nutritionis modus.	178. 223
Cotyledones.	203	observatio.	224
Cranium.	523	Fetus magnitudinis formice.	176
Cranii ossa.	528. ad 535	Fetus situs in utero.	228
figuratio bona & mala.	523	abortivi exempla varia.	183. ad 186
substantia & tabula: 524.	Sutura. 525	Fetus quinquimestres, Sextimestres octimestres nati.	229. 230. 232
fovea supra nasum.	529	Folliculus fellis.	71
Cranii contrassura an detur.	527	ejus rara constitutio.	74
Gravis lesio.	341	Foramen lachrymale.	395. 535
Crista galli ossea.	534	Foramen ovale cordis.	282
Crus.	555	Formationis fetus tempus.	183
Cubitus.	442	partium ordo.	186
Culter e ventriculo excisus.	22	Fornix in cerebro.	349
Cunius.	151	Frenulum 432.	Frons. 328. 391. 529
Cuticula.	9	Functio quid.	3
Cutis.	10	G.	
an sit tactus instrumentum.	ibid.	Galea fetus.	208
D.		Genae.	424
Dentium historia.	337	Genitalia virorum.	106
vasa. ibid.	338	Genitalia viri & mulieris quomodo differant.	155
Dentitionis tempus.	ibid.	Genus. 444.	Germen seminis. 163. 179
Dentes genuini.	540	Gingly-	

# INDEX RERUM.

<i>Ginglymus ossium.</i>	522	<i>observatio.</i>	229
<i>Gingiva.</i>	427	<i>Lacteus succus per vesicam excretus.</i>	99
<i>Glandula adiposa Malpighii.</i>	12	<i>per quam viam e matre ad fœtum perveniat.</i>	205, 206
<i>Glandula Mesenterii.</i>	40	<i>Lactes.</i>	260
<i>observationes tres.</i>	ibid.	<i>Larynx.</i>	321
<i>Glandula pinealis.</i>	352	<i>Lien.</i>	79
<i>pituitaria.</i>	362, 364	<i>Lienis vasa, 81. — substantia.</i>	83
<i>Glandula renales.</i>	103	<i>observatio. 83. &amp; 84. — glandula.</i>	84
<i>Gonorrhœa causa.</i>	116, 162	<i>Malpighii experimentum.</i>	85
<i>Gurgulio.</i>	427	<i>Lienis excissio.</i>	86, 87
<i>Gustus quid.</i>	437	<i>morborum ortus.</i>	92
<i>organum primum.</i>	438	<i>Ligamentorum historia.</i>	564, 565
<i>quomodo fiat.</i>	439	<i>substantia &amp; usus.</i>	ibid.
		<i>Ligamenta capitis.</i>	565
<b>H.</b>		<i>Ligamentum ciliare.</i>	408
<i>Hepar.</i>	65	<i>Ligamenta lambricalia.</i>	139
<i>Hepatis substantia.</i>	65	<i>Ligamenta maxillarum.</i>	566
<i>Malpighii observationes.</i>	ibid.	<i>ossis hyoidis &amp; lingua.</i>	ibid.
<i>Hepatis color.</i>	66	<i>trunci corporis.</i>	ibid.
<i>ligamenta, 66. vasa.</i>	67	<i>scapula, brachii, &amp; manus.</i>	567
<i>vasorum commissio.</i>	67	<i>cruris &amp; pedis.</i>	ibid.
<i>Glissonii experimentum.</i>	68	<i>Linea alba abdominis.</i>	15
<i>Hepatis actio.</i>	69, 88	<i>Lingua.</i>	429
<i>rara constitutionis observationes quatuor.</i>	71, 74	<i>Lingua corpus papillare Malpighii.</i>	430
<i>Hepatis vulnera sanata.</i>	70	<i>Lippitudo an contagiosa.</i>	392
<i>Hepar uterinum.</i>	199, ad 205	<i>observatio.</i>	394
<i>Hermaphroditii.</i>	153	<i>Liquor in amnio.</i>	211
<i>Hernia varicosa &amp; carnosæ.</i>	108	<i>Luis Venerea signum.</i>	395
<i>Homines caudati.</i>	546	<i>Lympha qualis sit liquor.</i>	61, ad 63
<i>Humani corporis divisio.</i>	2	<i>Lympha &amp; chylus an sint iidem humores?</i>	60
<i>Diversitas in figura, magnitudine, colore.</i>	2, 3	<i>Lympha motus, 64. usus.</i>	63, 88
<i>Partes quid sint.</i>	3	<i>Lymphaticæ vasculæ.</i>	58
<i>Humores an sint partes corporis.</i>	4	<i>Lymphaticus circulus, seu Labyrinthus Bilsi.</i>	51
<i>Humores, quibus fœtus innat.</i>	211, ad 216		
<i>Hymen, 148. observatio.</i>	149	<b>M.</b>	
<i>Hymen an sit nota virginitatis.</i>	ibid.	<i>Alacia causa.</i>	29
<i>Hypochondria.</i>	8	<i>Malleoli.</i>	444, 557
<i>Hypogastrium.</i>	8	<i>Mammærum historia.</i>	259, ad 251
<i>Hysterica passio.</i>	131, 142, 143	<i>observatio.</i>	241
		<i>Manus.</i>	442
<b>I.</b>		<i>Matrix vide uterus.</i>	
<i>Imaginatio brutorum.</i>	171	<i>Maxilla superior.</i>	535
<i>Imaginationis vis in formatione fœtus, 165.</i>	270	<i>inferior.</i>	536
<i>Infimus venter.</i>	8	<i>Mediastinum.</i>	259
<i>Inflammationis causa.</i>	275	<i>Medulla spinalis.</i>	355
<i>Infundibulum. vid. cerebri.</i>		<i>Meatus e tympano ad fauces.</i>	415
<i>Inguen.</i>	8, 444	<i>observatio.</i>	ibid.
<i>Intestina.</i>	35, ad 39	<i>Membrana quid.</i>	466
<i>an generent chylum.</i>	35	<i>Membrana adiposa.</i>	13
<i>Intestinorum motus.</i>	36	<i>Membrana Carnosa.</i>	14
<i>observationes duæ.</i>	ibid.	<i>Membrana fœtus.</i>	185, 208, ad 211
<i>Intestinulum umbilicale.</i>	216	<i>Membrana urinaria.</i>	208
<i>ejus nodi.</i>	ibid.	<i>Meninges cerebri.</i>	338, 340
<i>Iris.</i>	407	<i>Mentum.</i>	424
<i>Ischuria à nimia vesicæ distensione.</i>	105	<i>Menstrui fluxus causa.</i>	140
		<i>Mesenterium.</i>	39
<b>L.</b>		<i>ejus glandula.</i>	40
<i>Abia.</i>	151, 424	<i>Metacarpium.</i>	443
<i>Labyrinthus.</i>	415	<i>Metapodium.</i>	444
<i>Lachrymarum historia.</i>	401, ad 403	<i>Mucus.</i>	350
<i>observatio.</i>	402	<i>Mulier an semen habeat.</i>	167
<i>Lac quid sit.</i>	242	<i>an genitalibus differat à virò.</i>	155
<i>Lac in maribus.</i>	243	<i>an in virum mutari possit.</i>	155, 156
<i>ex quo succo generetur.</i>	242	<i>an castrari possit.</i>	136
<i>an ex sanguine generetur.</i>	242, ad 245	<b>Cccc</b>	<i>Musculo-</i>
<i>Lac ex chylo gignitur.</i>	246		
<i>quid chylum ad mammas impellat.</i>	248		

# INDEX RERUM.

Musculorum historia.	446	Odor.	421
nervorum insertio.	447	Oesophagus.	326
motus causa.	451	Olfactus historia.	421. ad 424
motus an sit voluntarius?	448	organum.	419
actio.	450	Omentum.	18
Musculi abdominis.	15. ad 17	Ophthalmia an contagiosa.	392
ani.	39	Ophthalmia causa.	407
vesicae Sphincter.	105	Os, oris.	424
Musculi testium.	112	Ossium historia generalis.	516
penis. 125. laryngis.	312. 313	observationes.	518
frontis & occipitis.	391	Ossium generatio.	517
Musculi oculorum.	395. 404	substantia.	519
buccarum, labiorum, & faciei.	425	vasa sanguifera.	517
ossis hyoidei.	428	coalitus. 519. numerus.	521
capitis. 452. lingua.	433	Ossium conjunctio.	522
Musculi Colli.	453	articulatio.	ibid.
brachii.	454	prominentia & cavitates.	520
scapulae.	455	differentia inter virorum & mulierum ossa.	550
respiratorii.	456	Ossium constitutio in infantibus.	560
dorsi & lumborum.	458	Os cordis.	280
partium in abdomine.	ibid.	Os hyoideum.	428
Musculi cubiti, & Radii.	459	lux.	545
carpi & manus.	460	sacrum.	546
digitorum & pollicis manus.	ibid.	coccygis. 546. sternum.	549
femoris. 461. tibia.	463	Ossa capitis.	528
pedis & digitorum & Pollicis pedis.	464	cranii.	529. ad 535
Musculis an pereat sensus manente motu.	501	maxilla.	535. 536
N.		narium.	534
Nasus.	419	cribrosa.	ibid.
Nasi ossa.	534	innominata.	551
Nervorum historia generalis. 497. ad 510	509	Coxendicis.	ibid.
numerus.	509	pubis. 552. ilium.	551
Nervi an sint cavi.	497	Ossa pubis an dilatentur in partu.	552
an habeant valvulas.	506. & 507	Ossa brachii, humeri & cubiti.	553
an humorem nutritium vehant.	82. 498	manus, femoris & cruris.	555
an sint sensus & motus instrumenta.	501	pedis. 557. sesamina.	556. 558
an sensorii & motorii sint diversi.	501	Ossa an sentiant.	520
Nervi intra cranium oriundi.	361	observatio N. Masse.	ibid.
Nervi optici.	361	Ova muliebria.	131
oculos moventes.	364	Ovorum via ad uterum.	132. 133
olfactorii.	365	Ovarium.	132
gustatorii, & auditorii.	ibid.	primus inventor.	129
vagi.	367	Ova subventanea.	134
Nervi vocales recurrentes.	367	observationes.	ibid.
cordis.	368	P.	
linguam moventes. 369. cervicis	510	Alatum.	447
Nervi thoracis & dorsi.	511	Palma manus.	443
lumborum.	512	Palpebra.	395
ex medulla ossis sacri.	513	Pancreas.	41
brachii & manus.	ibid.	Pancreatis ductus. 42. usus.	43
crurum & pedum.	515	Pancreaticus liquor.	43
Nutritionis processus & modus.	294. 295	observatio.	45
Nympha.	151	Panniculus carnosus.	14
O.		Papilla.	240
Oeciput.	328	Paralysis differentia & causa.	501
Ostimes tres nati an sint vitales.	230	Parastata.	113
Oculi.	391	Patella.	556
Oculi morbofi, an sint contagiosi.	392	Partis corporis definitio.	3
Oculorum bulbus.	407	Partes quamam sint.	6
membrana & humores.	407. ad 410	Partes similes & dissimiles.	ibid.
vasa & musculi.	403. 404	sanguinea, spermatica, organica.	ibid.
partes continentes.	394	Partes principes & ministrae.	7
orbita.	ibid.	nobiles & ignobiles.	ibid.
Odontalgia remedium.	412	continentes & communes.	9
		Farin.	

# INDEX RERUM

<i>Partus historia, causa, &amp;c.</i>	229. ad 237	<i>Renes succenturiati.</i>	103
<i>Partus magni fetus quomodo fiat.</i>	552	<i>Respirationis historia.</i>	312. ad 320
<i>Partus naturalis, &amp; non naturalis.</i>	232	<i>observationes.</i>	319
<i>Pedum.</i>	444	<i>Rete mirabile, vide Cerebri.</i>	
<i>Penis.</i>	123. 127	<i>S.</i>	
<i>Penis corpora nervosa &amp; glans.</i>	124	<b>S</b> <i>Aliva qualis sit liquor.</i>	435
<i>observationes.</i>	126	<i>Salivales ductus.</i>	433
<i>Pericardium.</i>	260	<i>observatio.</i>	434
<i>Pericranium.</i>	337	<i>Saliva ortus.</i>	435
<i>Peristheum.</i>	ibid.	<i>Sanguinis &amp; spiritus vitalis historia.</i>	287. ad 305
<i>Perineum, seu interfamineum.</i>	126	<i>Sanguis an generetur à spiritu sibi infuso?</i>	284
<i>Peritoneum.</i>	17	<i>an gignatur ante alias partes?</i>	286
<i>Pes.</i>	444	<i>Sanguis est omnium partium nutrimentum.</i>	473
<i>observatio Spigelii.</i>	442	<i>arteriosus an sit peior venoso.</i>	469
<i>Pedis ossa.</i>	557	<i>Sanguis loco seminis excretus.</i>	160
<i>Pia mater.</i>	340	<i>Sanguis quis nutriat.</i>	298
<i>Pica, ejusque cause.</i>	29	<i>observatio.</i>	299
<i>Pili cordis.</i>	264	<i>Sanguinis quatuor humores</i>	296
<i>ciliorum.</i>	397	<i>circulatio.</i>	272. ad 277
<i>Pilorum historia.</i>	329. ad 337	<i>Malpighii observatio.</i>	304
<i>observationes.</i>	329. 336	<i>Sanguinis motus in fœtu.</i>	282
<i>colores. 331. materia.</i>	ibid.	<i>Sapor quid sit.</i>	440
<i>Pinguedo.</i>	11	<i>quare semper sit idem.</i>	439
<i>Placenta uterina.</i>	199	<i>Saporis causa.</i>	440
<i>locus adhesionis.</i>	202	<i>Scapula. 550. Scrotum.</i>	112
<i>Plexus Choroides.</i>	350. 353	<i>Secundina.</i>	208
<i>Plexus pampini formis, s. varicosus.</i>	108	<i>Sella equina cranii.</i>	533
<i>Pleura.</i>	259	<i>Seminis historia.</i>	159. ad 175
<i>Pleurinidis sedes.</i>	308	<i>materia è qua. 159. 160. germen.</i>	163
<i>Podex.</i>	39	<i>ejus loco sanguis excretus.</i>	160
<i>Polypi causa.</i>	419	<i>Semen quare non generetur in pueris &amp; senibus?</i>	174
<i>Pomum Adami.</i>	322	<i>quare non copiosum in pinguibus.</i>	175
<i>Poples.</i>	444	<i>an factò conceptu effluat.</i>	179
<i>Porus biliaris.</i>	72	<i>Semen an etiam generetur in muliere?</i>	167
<i>Processus papillares, vid. Cerebri.</i>		<i>Semen muliebri, an sit efficiens formationis fetus.</i>	
<i>Processus cerebelli vermiformis.</i>	354		169. 171
<i>Præputium.</i>	125	<i>Seminis muliebris necessitas.</i>	168. 172
<i>Prostate.</i>	116	<i>Senes an fiant breviores.</i>	295
<i>Pubes. 126. Pudenda.</i>	106	<i>Sensus an in musculis pereat, manente motu.</i>	501
<i>Pudendum muliebri.</i>	150	<i>observationes.</i>	502
<i>ejus labia.</i>	151	<i>Sensus perceptio quomodo fiat.</i>	503
<i>observatio.</i>	ibid.	<i>Septem paria nervorum.</i>	631
<i>vima. 152. observatio.</i>	ibid.	<i>Septum lucidum.</i>	349
<i>Pulmonis historia.</i>	305 ad 312	<i>Septum transversum.</i>	256
<i>observationes.</i>	306. 307. 308. 309. 310	<i>Serum quid sit.</i>	94
<i>motus.</i>	316	<i>Seri evacuatoria.</i>	94
<i>Pulsus.</i>	272. 473	<i>separatio.</i>	97
<i>Puncta lachrymalia.</i>	396	<i>Sextimestres nati.</i>	229
<i>Pupilla.</i>	408	<i>Sinus dura meningis.</i>	338
<i>Pus è thorace per urinarias vias evacuatum.</i>	98	<i>Sinus pudoris.</i>	150
<i>Pylorus.</i>	21	<i>Sonus quid sit.</i>	418
		<i>Spatium triquetrum.</i>	22
		<i>Sphincter.</i>	39. 105
<b>R</b> <i>Adius.</i>	554	<i>Spina dorfi.</i>	542
<i>Ramus Splenicus</i>	81	<i>Spiritus an sint corporis partes.</i>	4. 5
<i>Ranula causa.</i>	434	<i>Spiritus architectonicus.</i>	188
<i>Ratio brutorum.</i>	253. 254	<i>Spiritus vitales.</i>	289
<i>Renes.</i>	95	<i>vivificus.</i>	195
<i>an sanguinem conficiant?</i>	101	<i>Spiritus animales in qua parte cerebri generentur?</i>	
<i>an semen præparent?</i>	ibid.		377. ad 379
<i>Renum caruncula papillares.</i>	96	<i>Spirituum animalium generatio totaque historia.</i>	
<i>observationes Malpighii.</i>	95		381. ad 390
<i>Renum actio.</i>	97	<i>Spirituum determinatio varia quomodo fiat.</i>	451. 506
<i>observationes.</i>	98	<i>Stomachus.</i>	21
<i>Renum sympathia. 101. observatio.</i>	ibid.		

# INDEX RERUM.

Suffocati unde moriantur.	313	mammaria. 491.	mediana.	493
Suffocatio uterina.	131. 142. 143	Vena porta cum suis camis.		486
Suffusio.	410	usus.		489
Supercilia.	397	Vena pulmonaria.		280. 490
Sura.	444	salvatella. 492.	splenica.	486
Sutura cranii.	523. 525	saphena. 495.	umbilicalis.	217. 486
Synceput.	328	Vena Ranina.		432. 492
T.				
<b>T</b> Abes dorsalis.	160	axillares & brachii.		492
Talus.	444. 557	capitis. 491.	crurales & pedis.	495
Tarsus.	557	hamorrhoidales.	39. 82. 487.	495
Tempora.	328	intercostales.		49
Temperamenta corporis quomodo fiunt.	296	Vena Iliaca, & Lumbares.		494
Tendo.	447.	jugulares.		491
Tentigo.	152	meseraica.	36. 41.	495
Testes viriles.	108	phrenica, s. diaphragmatica.		490
muliebres.	130	Vena subclavia.		491
observationes.	131	spermatice virorum.		106. 494
Testium officium.	120	mulierum.		129. 494
Thoracis historia generalis.	238	Vena sectio in Asthmate & Apoplexia cur instituitur.		316
angustia suspecta.	ibid.	Ventres tres.		7
observatio.	ibid.	Venter infimus.		7. 8
Thymus.	259	Ventris signa Physiognomonica.		ibid.
Tibia.	444. 557	Ventriculus.		20
Torcular Herophili.	339	Ventriculi magnitudo.		21
Tonsilla.	323. 432	actio, & coctio. 23.	vasa.	22
Tonsillarum cavitas & tumor.	323	Ventriculi vulnera curata.		ibid.
observationes.	ibid.	observatio.		ibid.
Trachea arteria.	321	Vertex.		328
Trochlea.	404	Vesicula seminaria.		115
Tuba uteri.	132	Vesica urinaria.		105
Tunica testium albuginea & vaginalis.	112	Vesica cervix.		105. 148
Tunica retina.	408	Vertebra spina.		542
Vitrea & Aranea.	410	colli. 543.	dorsi.	544
Tympanum.	414	lumborum.		545
V.				
<b>V</b> Agitus in utero.	235	Virtus architectonica.		188
observationes.	236	Vis formatrix, s. plastica.		188. 196
Valvula Bauhini.	38	Visus quid sit.		411
Valvula nervorum.	506. 507	Vultus.		390
Valvula tricuspidis.	279	Ubera.		239
Sigmoidea.	280	Ulna.		554
mitrales, & semilunares.	ibid.	Umbilicus.		216
Vasa biliaria.	71	Umbilici sectio.		223
deferentia virorum. 114.	mulierum. 139	paracentesis in aschite.		226
Vasa lactea mammaria.	240	Ungues.		443. 561
lactea mesenterica.	47	Vola.		443
valvula ejusdem.	48	Vox.		324
Vasa uterina.	213	Urachus.		220
lymphatica. 58. 240.	salivalia. 433	observatio.		221
Vasorum unio in corde fetus.	282	Urina per renes transitus.		97
Vas venosum breve.	22. 486	Ureteres.		104
Venarum historia generalis.	482	Urethra.		123
Venarum tunica & sensus.	483	Usus quid.		4
valvula.	484	Uterus.		137
Vena adiposa.	493	an prolabi possit.		138
azygos, s. sine pari.	490	Uteri partes.		146
basilica.	492	fundus.		ibid.
cava.	279. 490. 493	cervix, & cavitas.		ibid.
cephalica. 492.	cervicalis. 491	Uteri vagina.		147
coronaria cordis.	490	tuba. 132.	motus.	142
Vena emulgens.	95. 493	Uteri constitutio in gravidis.		157
epigastrica. 495.	epiplois. 486. 487	Uterina suffocatio.		131. 142
frontis. 492.	gastrica. 486	Uterinum fermentum.		140
		Uvula.		437

F I N I S.

ISBRANDI DE DIEMERBROECK,

*Med. Doct. & Profess.*

TRACTATUS

D E

P E S T E,

*In quatuor libros distinctus ;*

TRUCULENTISSIMI

MORBI HISTORIAM

Ratione & experientiâ confirmatam  
exhibens.





# BENEVOLE LECTOR.

 Uos antehac, cum plurimorum stupore, ex ipsius Cerberi faucibus satis audacter eripui bolos, illos nunc pluribus gratis offero, nempe observationes meas de Peste, quas olim intruculentissima Noviomagensium peste, summo cum vitæ periculo collegi. Hunc meum laborem paucis quidem destinaveram, sed ne viderer communi salutis invidere, eundem omnibus communicandum sensi, propterea quod multi præstantissimi Medici, exitialis contagii metu deterriti, à curiosiore multarum rerum, in peste omnium maxime notandarum, inquisitione abstinuerint, atque hinc pestis historiam satis accurate non descripserint, & varia quidem usu observata tradiderint, sed interim innumera alia, quæ ipsis videre non contigit, partim ex incerto aliorum relatu, partim pro suis singuli speculationibus diversimodè adjunxerint, alique ex aliis rursus exscripserint, & solummodo diversissimis theoreticis rationibus, aliorumque auctoritatibus confirmare conati fuerint. In quibus cum varia animadverterem, tam in mali cognitione, quam in curatione, quæ experientiæ minus responderent, hunc meum à multis diu exoptatum de Peste tractatum, nunc magis quam in prodromo, ante aliquot annos edito, perpolitum, multumque adauctum, publici juris facere volui, hoc imprimis tempore, quo dira Lues Inferioris Germaniæ Provinciis bellum minari videtur: ut ille aliis quibuscunque Medicis, pestiferorum curationi, hic aut ullibi terrarum, incumbentibus, ex usu esse, melioremque, quam hætenus ab aliis tradita est, præcautionem ac curationem ostendere posset. Lector autem percipiet, me in toto hoc tractatu non tam in probandis aut improbandis veterum & recentiorum scriptis, ac in sermone expoliendo laborare, quam ipsius morbi veram naturam, morem, cognitionem, præcautionem, ac curationem inquirere, & hac in parte me plurima longè aliter, quam multi alii antehac fecerunt, explicare, eaque partim clarissimis rationibus demonstrare, partim meâ, aliorumque doctissimorum virorum, cum veterum tum neotericorum, experientiâ confirmare. In quibus omnibus si fortè adhuc obscura quædam supersint, aut talia inveniantur, quæ ad votum à me non satis perfectè potuerunt declarari, non est quod quispiam miretur, quandoquidem in hoc morbo divinitatis involucri multa obteguntur, quæ nos præstat pio animo ignorare, quam arroganti spiritu explicare velle. In ceteris tamen, monente Galeno, lib. de usu respir. cap. i. audendum, & veritas investiganda, quam etiamsi in omnibus non assequamur, omnino tamen propius, quam nunc sumus, ad eam perveniemus. Ut autem qualibet hujus morbi mysteria fieri possint notiora & clariora omnes Medicos rogatos velim, ut si aliquid melius, quod ad majorem ejus dilucidationem facere possit, invenerint, vel observaverint, illud humaniter & liberaliter in medium conferre dignentur. Interim quæ scripsi, Candide Lector, boni consule & Vale.

\*

E P I.

# EPIGRAMMATA,

*In Experientissimi Doctissimique*

D. ISBRANDI de DIEMERBROECK,

*Med. Doct. & Profess.*

## TRACTATUM de PESTE.

### I.



Orrida luctificæ pridem contagia Pestis,  
Et Batavum grassans sensimus urbe mahum.  
Ut Cancris & rabidi deferbuit ira Leonis,  
Visus & Icarias Sol superasse minas,  
Mox gravis à Tungris exercitus incubat, illic  
Pro Cereris spicis spicula dira volant.

Vim primæ sensere luis florentia Galli  
Corpora, sed lentâ detenuata fame.  
Succedunt Batavi, morbo mortique dabantur:  
Quæ sine tabe foret vix erat una domus.  
Sæviit Autumnus, nivibusque extinguere flammæ,  
Nec toto potuit turbida Bruma gelu.  
Vere calor rediit novus, & philomela sub umbra  
Qua cecinit, fœdus tristia bubo gemit.  
Pro Flora Libitina ruit. Non Pleias amicam  
Conspecta est terris expediisse caput.  
Non alius Majo mensis mage lethifer: ipsi  
Tyndaridæ fratres fulmina pestis erant.  
Vestæ catervatim manantia corpora tabo,  
Frigida communi cespite clausit humus.  
Vidimus, & meminisse piget, certamina tristi  
Pro feretro, & laceris ora cruenta genis;  
Funera funeribus densari, mortua vivis  
Corpora corporibus mista jacere toris.  
Heic quoties medius tunc DIEMERBROECKIUS inter:  
Adstitit, atque ægris pocula fida dedit!  
Votivam hic meritò tabulam suspendit, ut ejus  
Tu quoque sis cladis, qui legis ista, memor.  
Nil metue: & bubo, & carbunculus aure vel alis,  
Aut alia innocuus nunc tibi parte patet:  
Antidotique patent species, & pharmaca. Pesti  
Forsitan & pestem pagina docta feret.

I. SMITIUS,

*Pastor Ecclesiæ Noviomagensis.*

I I. Quis

I I.



Uis sacrum queat explicare morbum?  
Qui spargens varias Dei sagittas,  
Ferit mille modis volante telo,  
Grassans dissimili necatione:

Qui quos corripuit suo veneno,  
Hos ipsos quoque vertit in venenum,  
Nec curam patitur medentis ægro,  
Ægrum quin faciat simul medentem.

Tanti forma mali lateret ergo,  
Alcides nisi quis timore pulso,  
Diræ cominus obstitisset hydræ,  
Observans oculo laborioso,  
Et notans bene multiforme monstrum,  
Nec stratus tamen impetentis ictu.

DIEMERBROECKIADES quod ausus unus,  
Tunc cum nobilis urbs Neomagorum  
Hoc oppressa malo jaceret, uni huic  
Credens innumeros misella cives,  
Queis ille omnibus adfuit medendo.

Hinc quæ curâ adeo periculosa  
Spretis perdidicit tamen periculis,  
Testis nunc oculatus edit Orbi,  
Dignus perpetuum virente cedro.

At cum feceris ista, DIEMERBROECKI,  
Intactus tamen integerque, nec te  
Ægris agglomerarit illa cura,  
Quis curam neget esse te Jehovæ?

A. MOL, I. C.

II I.



Non levis est virtus inimici prodere mentem,  
Quoque magis possit, scire, nocere modo.  
Haftenus infesta latuit quod peste venenum,  
Nunc DIEMERBROECKI sedulitate patet.

Viribus occultis animosior undique strages,  
Quæ dedit & morti spicula multa, lues,  
Illa modo in lucem protracta nocere timebit,  
Nec tot, ut ante dedit, funera sæva dabit.  
Adde quod antidotis munitus miles, ab illo  
Hoste, istoc Medico nunc mage tutus erit.  
Si tamen incautum prosternat, vulneret, ecce  
Pharmaca grassanti certa parata malo.  
Pharmaca lethiferum virus quæ ritè coercerent,  
Non magis ut possit triste nocere malum.  
Addita, ne dubites, certa experientia scriptis,  
Et quod ei specimen pestis acerba dedit.  
Ergo stude, PERRIS, sævas compefcere flammæ,  
Fons DIEMERBROECKI plus valet igne tuo.

G. COETS,

*Reipublicæ Arnhemienfis Medicus ordinarius.*

IV. Diræ

I V.



Ira lues, funesta lues, crudelior Orco,  
 Aurâ quæ superas cuncta venena truci:  
 Cur toties populos numerosa strage perisse  
 Vidimus, & tantos occubuisse viros?  
 Indoctus morbum hunc monstrosum curat agyrta,  
 Et, quot pœnè lues, tot necât ille homines.  
 Sed tu qui veram Medicinæ diligis artem,  
 Et non plus tibi, quam vivere vis aliis,  
 Hos lege, quos crebro tibi DIEMERBROECKIUS usu  
 Conscripsit magna cum utilitate libros.  
 Non hic conspicias laudes vanasque stupendasque,  
 Ut multi celebrant pharmaca, inepta licèt,  
 Sed doctam praxin, depromptam ex Arte medendi,  
 Et certa methodo, quæ Medicinæ anima est.

H. GESSELIUS,

*Med. Doct.*

V.



Ivit in æternum Medicinæ verus amator,  
 Qui præbet medicam, queis opus, aptus opem.  
 Hujus testis erit DIEMERBROECK, arte Galenus,  
 Ipse Plato vitâ, Tullius ore gravis.  
 Hic patriæ Hippocrates, decus insuperabile Phœbi,  
 Edidit hoc plenum frugis & artis opus.  
 Hoc ipso post fata cupit prodesse relictis,  
 Et tunc morborum languor asylon habet.  
 Præsentes dirimit morbos, tollitque futura  
 Noxia, præsentes ore, futura manu.  
 Ut miseris, doctrina dedit, succurrere posset,  
 Ut vellet, Virtusfecit, utrumque Deus.

H. van RENTSEN,

*Lib. Art. & Philios. Magister.*

V I.



Um commissa foret nostris Correctio curis,  
 DIEMERBROECKI, Operis; Pæone nate, tui,  
 Quod scripsi de PESTE: equidem sic ore precabar:  
 Talia Collegæ, vota; mihiq; vovens:  
*Pestilitas, quæ fœda lues, & turpis habetur*  
*Prodeat ut vitis incommitata, paro.*  
*Ergò meas operas maneat quæ Gratia? ne me*  
*Tangat, & immunem me quoque labe sinat.*  
 Ad finem perducta Operis correctio. Peste  
 Quod modò correptis utile prodit Opus.  
 Cum Peste, & sine Peste tamen modò vivit uterque:  
 Et neutrum tetigit dira, tuente Deo.  
 At sparsim erratum? dices. sed crimine parvo.  
 Tum, non Argum, hominem me. Tibi sisto libens.  
 Adde quòd à denâ modò nunc trieteride, Labis,  
 Inguine, pestiferæ stigmata & ipse feram.

*Samuel le Rousseau,*

*Poëta L. Cxf.*

SE-

# SERIES CAPITUM

## Cujusque Libri.

### LIBRI I.

CAPUT	PAG.
I. <b>D</b> E Pestis nominibus. pag.	1.
II. Pestis definitio.	2.
III. De pestis Noviomagensis principio. vigore, & fine.	5.
IV. De pestilentiae subjectis.	7.
V. De nonnullis quæ in hac peste notanda occurrerunt.	9.
VI. De signis pestem antecedentibus & præsagientibus.	10.
VII. De signis & symptomatibus pestem concomitantibus.	12.
VIII. De pestilentiae causis.	16.
IX. De pestilentis inquinamenti processu.	40.
X. De contagio.	42.
XI. De causis infectionis.	49.
XII. De causis febris pestilentis, quæ pestem comitatur.	52.
XIII. De causis symptomatum pestis.	57.
XIV. De causis bubonum. carbunculorum. & exanthematum.	59.
XV. De prognosticis.	67.

### LIBRI II.

CAPUT.	PAG.
I. <b>D</b> E præservatione in genere. pag.	74.
II. De prophylaxi Theologica.	74.
III. De prophylaxi Politica.	76.
IV. De prophylaxi Medica in genere. & de fuga.	85.
V. De prophylaxi dietetica, & primò de aëre.	89.
VI. De cibo & potu, repletionem & inanitionem, balneis & vestimentis.	94.
VII. De somno & vigiliis, motu & quiete, ac animi pathematis.	100.
VIII. De prophylaxi Chirurgica.	103.
IX. De prophylaxi Pharmaceutica; & primò de purgatione.	104.
X. De antidotis internis.	107.
XI. De antidotis externis.	118.
XII. De meo ipsius vivendi modo.	124.

### LIBRI III.

CAPUT	PAG.
I. <b>D</b> E curatione in genere. pag.	126.
II. De dieta peste laborantium.	ibid.
III. De auxiliis chirurgicis.	130.
IV. De purgationibus.	133.
V. De	

V. De antidotis & sudoriferis.	136.
VI. De curationis methodo.	162.
VII. De symptomatum pesti conjunctorum, & primo de curatione febris.	167.
VIII. De curatione doloris capitis, delirii, vigiliarum, & nimii soporis.	168.
IX. De curatione anxietatis, debilitatis, siccitatis linguae & vomitus & singultus.	170.
X. De curatione hæmorrhagiarum, menstruum, & sputi cruenti.	173.
XI. De curatione alvi fluxus & lumbricorum.	174.
XII. De curatione bubonum pestilentialium.	176.
XIII. De curatione carbuncularum & exanthematum.	184.

## L I B R I . I V .

**C**ontinet centum & viginti historias agrotorum peste laborantium. 187.

## N O T A ,

Ubicunque in textu capitis numeri alicujus character, parenthesi inclusus, insertus reperitur, ad illum locum, seu illa verba, respondere annotationem sequentem eodem numero notatam.



D E



# INDEX RERUM

*In Libro de*

## P E S T E,

E T D E

## VARIOLIS & MORBILLIS

Contentarum.

A.

**A** Bortuum frequentium causa in Peste. Pag. 12  
 Aceti vires & usus in praeservatione & curatione pestis. 89. 90. 91. 93. 109. 117. 161  
 Acetum Bezoarticum nostrum. 109  
   Ernesti. 160  
   Magistrii. 161  
   Matthioli. 160  
   D. de Spina. ibid.  
   Untzeri. 117  
 Acida an convenient in variolis. 284  
 Aer an putrescat. 32. 37  
   Infectus quare non omnes inficiat. 49. 50  
 Aeris inquinamentum pestis causa. 37  
   Venenositas sine putredine. 41  
   Correctiones 89. ad 94  
 Aedium infectarum expurgatio.  
 Alexicaca olea & linimenta. 123. 124  
 Alexipharmaca multa dari. 110  
 Alium damnosum tempore pestis. 112  
 Alvus quando movenda in aegris 127  
 Alvus suppressa in aegris pestiferis non semper mala. 68. 71. 139  
   in variolis ante septimum diem non facile citanda. 279  
 Alvi fluxus periculosus in peste. 68. 71.  
   174. 229  
 Curatio & remedia. 174. 175. 221  
   223. 285  
   Sanguineus lethalis. 174. 229  
 Amuleta venenata varia. 119  
   omnia rejicienda. 118. 120  
 Amuletorum refutatio. 120. 121

Amuleta superstitiosa. 118. 121  
   Naturalia 118. 122  
   ex lapidibus pretiosis. 122  
 Anhelitus factor malum. 68. 71  
 Animalcula invisibilia an sint pestis causa. 35  
 Animi motus quid faciant in peste. 39. 100  
 An ad hunc morbum divinum liceat uti remediis naturalibus. 85  
 Anthrax vide Carbunculus.  
 Antidotum certum contra pestem an detur. 109. 226  
 Antidota sunt vera pestis remedia. 136  
   quando, quomodo, & quibus praescribenda. 136. 141  
   interna praeservantia. 107  
 Antidota externa praeservantia. 118  
   simplicia curativa. 136  
   varia recentiorum. 154. ad 156  
 Antidotorum sudoriferorum formula. 138 ad 140  
 Antimonii usus internus damnosus. 135.  
   136. 192. 261  
 Antimonii butyrum ad anthraces. 186  
 Anxietatis causa. 58  
   remedia. 170  
 Apertio variolarum an conducat. 289.  
   299  
 Aquae putredo an pestis causa. 32  
   potus an conveniat aegris. 129  
   Saponatae feter damnosus. 76. 78  
 Aquae vitae abusus. 108  
 Aquarum stagnantium noxa. 82  
 Aqua infecta an coctione deponat venenositatem. 98  
 Aqua theriacalis Ultrajectina. 137  
   Nostra. ibid.  
   \* \* \* con-

# INDEX R E R U M.

<i>conducit etiam in variolis.</i>	291	<i>Butyrum ad præſervationem peſtis.</i>	94
<i>Langii.</i>	157	<i>ad linguæ ariditatem in peſte.</i>	171.
<i>Bauderoni.</i>	158		172
<i>Sennerti.</i>	ibid.		
<i>Leydenſis.</i>	ibid.		
<i>Crollii.</i>	ibid.		
<i>Cratonis.</i>	159	<b>C</b> <i>Acochymi an magis inficiantur</i>	
<i>Mathioli.</i>	ibid.	<i>peſte.</i>	7
<i>Paracelſi.</i>	ibid.	<i>Cadavera peſtiferorum ſintne magis vel</i>	
<i>cinnamomi eſt præſervativum fa-</i>		<i>minus contagioſa.</i>	80
<i>ciæ in variolis.</i>	299	<i>Cadaverum cita corruptio.</i>	144
<i>Aquiloniæ ventus ſalubris.</i>	91	<i>Caparum uſus ad bubones.</i>	181
<i>Araneæ an aerem corrigant.</i>	90	<i>Calor in peſte ſæpe mitis.</i>	12.15
<i>Argentum vivum noxium in peſte.</i>	119.	<i>Camphoræ vires &amp; encomia in peſte.</i>	141
	181	<i>Camphorata medicamenta varia.</i>	142
<i>Aſtra an peſtem inducant.</i>	20	<i>Capitis doloris in peſte curatio.</i>	168
<i>Aviculæ ſua morte peſtem præſagientes.</i>		<i>Carbunculus peſtis ſignum.</i>	12.15
	11	<i>an ſit cruſta.</i>	64
<i>an aerem corrigant.</i>	92	<i>ſine febre.</i>	52.148.267
<i>Auſter inſalubris.</i>	91	<i>à cauſa externa.</i>	4.267
<i>Auſiones ſuppelleſtilium prohibendæ.</i>		<i>an à febre excitetur.</i>	65
	76.79	<i>vaſtæ magnitudinis.</i>	73.208.254
<i>Aurium curatio in variolis.</i>	286	<i>in quacunque parte.</i>	60.65
<i>Auxilia Chirurgica in variolis.</i>	279	<i>in ventriculo, hepate, pulmone.</i>	58
		<i>in rene.</i>	ibid.
		<i>in digitis.</i>	242.245
		<i>in lingua.</i>	212
		<i>in ſcroto.</i>	266
		<i>an etiam in corde fiat.</i>	66
		<i>Carbunculi nomina &amp; definitio.</i>	63
		<i>Cauſa.</i>	59.60.63.64
		<i>veſiculæ unde fiant.</i>	66
		<i>venenum ubi maneat, cum excidit.</i>	ibid.
		<i>prognostica.</i>	69.73
		<i>curatio.</i>	184
		<i>Separatoria remedia.</i>	184.185.
			186
		<i>Carnes aſſatæ an præſtent elixis.</i>	96
		<i>porcinæ damnosæ in peſte.</i>	97
		<i>Cafeus viridis ad præſervationem peſtis.</i>	
			94
		<i>Cataplaſma ad bubones.</i>	177
		<i>Cathartica vide purgantia.</i>	
		<i>Cauſa peſtis Divina.</i>	16.36
		<i>an de novo creetur.</i>	18
		<i>an ab aſtris generetur.</i>	20
		<i>an incantamenti inducatur.</i>	27
		<i>an à putredine procedat.</i>	28.38.41
		<i>an à tempeſtatum conſtitutioni-</i>	
		<i>bus.</i>	33
		<i>an à venenis.</i>	34
		<i>an ſit congeries beſtiolarum inviſibi-</i>	
		<i>lium.</i>	35
			Cau

# INDEX RERUM.

<i>Causæ secundariæ pestis.</i>	16. 39
<i>infectionis.</i>	49
<i>symptomatum pestis.</i>	57
<i>Causæ variolarum &amp; morbillorum.</i>	273.
	289
<i>Cauteria ad præservationem pestis.</i>	103
<i>Cerevisia quæ bona quæ mala.</i>	94. 98
<i>Cerevisia medicata præservans à peste.</i>	108. 113
<i>Chirurgica remedia curativa in peste.</i>	130
<i>Cibus &amp; potus ad præservationem pestis.</i>	94
<i>in variolis &amp; morbillis.</i>	277. 279
<i>Cibi pestiferis liberalius offerendi.</i>	127.
	128
<i>Citrii mali vires antidotales.</i>	129
<i>Cotio an tollat aquæ vitia.</i>	98
<i>Commercium cum infectis prohibenda.</i>	76.
	77
<i>Contagium quid sit.</i>	41. 42
<i>quomodo fiat.</i>	ibid.
<i>an adsit pesti.</i>	ibid.
<i>Contagium an oriatur ex putredine</i>	45
<i>quare non omnes inficiat.</i>	249
<i>ejus requisita ad communicationem.</i>	41. 45
<i>an aque efficax exeat ab omnibus</i>	
<i>pestiferis.</i>	46. 48
<i>an in corpore aliquandiu latere pos-</i>	
<i>sit.</i>	47. 238. 257
<i>an à sano circumferri, &amp; alium infi-</i>	
<i>cere possit.</i>	48
<i>an pestem generalem faciat.</i>	ibid.
<i>quo temporis intervallo in fomite</i>	
<i>moriatur.</i>	49
<i>in fomite brevi extinguitur.</i>	18.
	19
<i>in variis rebus latens.</i>	262. 267
<i>Contagii occasiones fugiendæ.</i>	76. 77. 81
<i>Conventus publici periculosi in peste.</i>	83
<i>Conversatio cum peste infectis fugien-</i>	
<i>da.</i>	79
<i>Convulsivi motus lethales in peste.</i>	68.
	70
<i>etiam in variolis &amp; morbillis.</i>	295
<i>Cornu, &amp; corium ustum aerem corrigunt</i>	
	90. 93
<i>Cornu cervi vires.</i>	144
<i>Corroborantia remedia.</i>	164
<i>Crises fallaces in peste.</i>	67. 70
<i>Sextæ diei lethales.</i>	70

<i>Croci usus an tutus in peste.</i>	141
<i>in variolis.</i>	298
<i>Cubiculum ægri quale.</i>	162. 163
<i>Cucurbitulæ bubonibus male applicantur.</i>	176. 179. 239
<i>Curationis nostræ methodus in peste.</i>	162
<i>in variolis.</i>	277 ad 280

## D.

<b>D</b> <i>Ebilitatis curatio.</i>	170
<i>Decoctum antidotale sudoriferum.</i>	160
<i>Demoniorum historia.</i>	190. 210. 230
<i>Delirium in peste periculosum</i>	58. 70.
	249
<i>Dieta præservativa in peste.</i>	94. 124
<i>curativa in peste.</i>	126. 127
<i>in variolis &amp; morbillis.</i>	278
<i>Dietam mutare in peste periculosum.</i>	24. 96
<i>Diascordium.</i>	156
<i>Differentia inter variolas, morbillos, &amp;</i>	
<i>febrem petechialem.</i>	272
<i>Dispositio ad pestem.</i>	50
<i>Dolor gutturis lethalis in peste.</i>	68. 70
<i>Doloris capitis curatio.</i>	168
<i>Draco vomitu ejectus.</i>	236
<i>Dulcia in peste noxia.</i>	95. 97

## E.

<b>E</b> <i>Brietas tempore pestis damnosa.</i>	99
<i>Ebrietate fugata pestis.</i>	225
<i>Eclipses an pestem inferant.</i>	22
<i>Electuarium de ovo.</i>	154
<i>theriacale Wieri.</i>	156
<i>Elixir pestilentielle Crollii.</i>	146
<i>Emplastrum Paracelsi ad bubonem.</i>	182
<i>Angeli Salæ.</i>	182
<i>Enula campana. Vide Helenium.</i>	
<i>Epistola ad D. Patinum de Theriaca.</i>	151
<i>Error medicorum in curatione variola-</i>	
<i>rum.</i>	284
<i>Euchymi an facilius inficiantur peste.</i>	7
<i>Exanthemata pestis signa.</i>	12. 15
<i>eorum nomina.</i>	66
<i>causa.</i>	61. 66
<i>ortus.</i>	66. 184
** 2	cura-

# INDEX RERUM.

curatio. 184  
 prognos. 96.73.184.228  
*Exercitia moderata.* 100.101  
*Exhalationes fædæ an pestem inducant.* 31  
*Extractum antidotale.* 137.160

## F.

**F** *Aciei præservatio in variolis.* 287  
*Fames noxia tempore pestis.* 94.96  
*an pestem inducat.* 30.41  
*quenam pestem præcedant.* 41  
*Familie integræ peste infectæ.* 7.8  
*Faucium remedia in variolis.* 286  
*Febris an sit de essentia pestis.* 9.10.53.  
 193  
*lenta fallax in peste.* 9.10.265.266  
*signa præcedentia.* 9.10  
*Febris pestilens an detur sine peste.* 56  
*quomodo differat ab aliis putridis.* 56  
*quomodo differat à peste.* 56  
*ad quam classẽ referenda.* 57  
*an à carbunculo.* 65  
*quæ pestem comitatur vel sequitur*  
*quomodo fiat.* 41  
*Febris pestilentis causæ.* 41.52.56  
*curatio.* 167  
*Febris semper adjungitur variolis.* 273  
*Ficus ad bubones.* 181  
*ad propulsionem variolarum condu-*  
*cunt.* 283  
*Florum sulphuris vires.* 145.146  
*Fætores cadaverum noxii.* 78  
*Fomes quid sit.* 42  
*quale debeat esse corpus.* 42.47  
*Fomes quamdiu perduret.* 19.20.47.48  
*Fonticuli præservant à peste.* 103.261  
*exarescentes mali.* 68.223  
*Fraxini mira vis.* 91  
*Fructus ab inquinamento pestilenti cor-*  
*rumpuntur.* 41  
*Fuga qualis, quibus, quando, & quorsum*  
*conveniat.* 85.87.88  
*an licita sit Christianis.* 87

## G.

**G** *Alline peste infectis.* 262  
*Gelatina nutriens & corroborans.* 127  
*Gravidæ mulieres periclitantur.* 9

*Gutturis dolor funestus in peste.* 68.70.  
 219.250  
*remedia in variolis & morbillis.* 286

## H.

**H** *Æmorrhagiæ causa.* 58  
*omnes fere lethales.* 68.71.224.  
*an sint critica.* 173  
*curatio.* 173.174.242  
*Hæces noxiæ tempore pestis.* 97  
*Halitus moribundorum periculosissimi.* 48.218  
*Helenii radices ad præservationem pe-*  
*stis.* 106.112  
*Helleborus ad curationem pestis.* 166.178  
*Hepatis auxilia in variolis.* 285  
*Hilaritate fugata pestis.* 102.225  
*Homines soli variolis & morbillis ob-*  
*noxii.* 172

## I.

**J** *Actationis corporis causa.* 14  
*Jaspidis vires ad Hæmorrhagias.* 174  
*Jiunium in peste malum.* 94.66  
*Jentaculum quale debeat esse.* 94.96  
*Ignis correctorium aeris.* 89.91  
*qualis, quantus, & quando struen-*  
*dus.* 91.92  
*Imaginationis vires in peste.* 39.101  
*in variolis & morbillis.* 293.294  
*Inanitiones noxiæ in peste.* 94.96  
*Incantamenti an pestis inducatur.* 27  
*Indusorum mutatio agris noxia.* 78.208  
*Infusio bezoartica Cratonis.* 159  
*Matthioli.* 159  
*Paracelsi.* 159  
*Insecta pestem præsagientia.* 10.11  
*Inquinamentum an sit venenum.* 4.5  
*Inquinamenti pestilentis processus.* 40  
*Ira quid faciat ad pestem.* 39.124.200

## L.

**L** *Ac dulce an attrahat venenum*  
*aeris.* 94  
*Lanæ vestes in peste damnosæ.* 100  
*Lapis Bezoartici vires.* 143.232  
*Lapis hæmatitis & Iaspis ad Hæmor-*  
*rhagias.* 174  
*Lapides pretiosi quid præstent.* 149  
*Lassitudines damnosæ.* 100.101.228  
*Linguae siccitatis causa.* 58  
 nigre-

# INDEX RERUM.

*nigredo.* 14.68  
*remedia.* 128.171.172.260  
*Linimenta præservantia.* 122.123  
*Linteaminum mutatio agris noxia.* 78  
*Lumbricorum curatio* 175  
*Lumbrici vomitu ejecti. vide vermes.*  
*Luna qualis magis noxia.* 9

## M.

**M** *Acule pestilentes. vide exanthemata.*  
*Magica curationes fugiendæ.* 75  
*Magistratus officium in peste.* 76  
*Magnes arsenicalis ad bubones.* 182.183  
*Malicitrii vires antidotales.* 129  
*Medici quales, & quando eligendi.* 83.84.  
*Medicamentis an uti liceat.* 85  
*Medicamenta præservativa* 107. ad 118  
*Mediocritas optima in victu.* 95.98  
*Mellis usus noxius in peste.* 97  
*Menstruorum fluxus in peste periculosus.* 68.194.231  
*etiam in variolis periculosus.* 296  
*curatio.* 173.194  
*Methodus curandi nostra in peste.* 162  
*alterius inaudita in peste.* 166  
*Mercurii usus damnosus.* 181  
*Metus & mæstitia an pestem inducant.* 39  
*Meus vivendi modus in peste.* 124  
*Miasmata quid sint.* 42.46  
*per quas vias exeant è corpore.* 46  
*quibus communicentur.* 42.46  
*quo tempore operentur.* 46.47  
*quando non constituent fomitem.* 47  
*quomodo se explicent.* 46.49  
*quo temporis intervallo extinguantur.* 19.42.48  
*Mithridatium minus præservans.* 108. 114  
*Morbi alii silent in peste.* 9  
*Morbillorum nomina, & origo.* 271  
*definitio.* 289  
*differentia à variolis.* ibid.  
*Causa.* ibid.  
*Signa.* ibid.  
*Curatio.* ibid & 301  
*Morbilli variolis conjuncti.* 302  
*Moribundorum halitus exitiosi.* 48. 218  
*Morsuli A. Sale pro jejunis.* 97  
*Mortes repentinæ.* 52.252  
*Mortuus putatus revixit.* 244

*Moschus noxius in peste.* 150  
*Muscarum horribilis copia.* 11  
*Musica pestis remedium.* 102  
*Mutatio victus periculosa.* 94.96  
*Myrrha præservat.* 113

## N.

**N** *Arcotica minime tuta in peste.* 168.169  
*Narcotico occisus.* 220  
*Narium hæmorrhagia periculosa in peste.* 68. 71. 242  
*an critica & quomodo curanda in peste.* 173.242  
*Narium defensio à variolis.* 286  
*Natationes in fluminibus periculosa.* 95. 100. 238  
*Nicotiana. vide Tabacum*  
*Nosocomiorum pessimus ordo.* 81  
*Novilunium peste mexacerbat.* 9  
*Nubecula contagiosa è moribundis exiens.* 48  
*Nummi an contagiosi fiant.* 47

## O.

**O** *Culorum medicatio in variolis.* 286. 287.300  
*Odores suaveolentes noxii in peste.* 89.92 119.122  
*Odoramenta præservativa.* 118.122  
*Oleum antimonii ad anthraces.* 186  
*præservans Matthioli.* 123  
*Lud. de Leonibus.* 123  
*Brassavola.* 123  
*Oleum Scorpionum.* 123.181  
*Vitrioli.* 146  
*Orationes supplices summum pestis remedium.* 74.75  
*Orientalis ventus saluberrimus.* 91

## P.

**P** *Aræi secretum ad alvi fluxus.* 175  
*Partium internarum curatio in variolis.* 284  
*externarum* 286  
*Pauperes an ejiciendi in peste.* 82  
*Pestis nomina.* 1  
*definitio.* 2.3  
*quale morbi genus.* 2.3.  
 \* \* 3 perni-

# I N D E X R E R U M.

<i>perniciēs.</i>	3	<i>Periculosa conversatio cum infectis</i>	43.
<i>Noviomagensis principium vigor</i>			79
<i>&amp; finis.</i>	5	<i>Pilule Ruffi.</i>	106
<i>subje cta.</i>	7	<i>antipestilentiales nostræ.</i>	105
<i>pecora inficiens.</i>	7	<i>Alberti Ducis.</i>	106
<i>signa.</i>	10.12	<i>Cratonis.</i>	106
<i>signa post mortem.</i>	190	<i>Planetæ, vide astra.</i>	
<i>diu absque signis.</i>	13.205	<i>Platearum expurgatio.</i>	76.78.81.
<i>causa, vide causa.</i>		<i>Plenilunium pestem exacerbat.</i>	6. 67.70
<i>processus.</i>	36.40	<i>Pleuritides in peste lethales.</i>	68.71.213
<i>differentiæ.</i>	17.50	<i>Porcina caro damnosa.</i>	97
<i>prognostica.</i>	67.69	<i>Potus agrorum.</i>	128
<i>an sit contagiosa.</i>	43	<i>Potiones agris gratae.</i>	129
<i>vehementia secundum tempora.</i>	5.	<i>Præservativa medicamenta.</i>	107. ad 118
	50	<i>Preces optimum pestis præservativum.</i>	74
<i>sine febre.</i>	52.192.193.194		74
<i>omnibus morbis adjungitur.</i>	9.10.	<i>Prophylaxis theologica.</i>	76
<i>in una sola domo orta &amp; extincta.</i>	13	<i>Politica.</i>	76
<i>quare non omnes inficiat.</i>	45.50	<i>diætetica pestis.</i>	89. ad 103
<i>an bis invadat eundem.</i>	212.218	<i>variolarum.</i>	277
<i>cum bubone</i>	203.225.233	<i>chirurgica pestis.</i>	103
<i>cum hæmoptysi.</i>	243	<i>variolarum.</i>	279
<i>cum antraxe.</i>	194.229.233.248.	<i>pharmaceutica pestis.</i>	104.107
	256	<i>variolarum.</i>	277
<i>cum alvi fluxu.</i>	166.211.214.	<i>Pulsus qualia det signa pestis.</i>	10.11.15.
	219		67.70
<i>coitu contracta.</i>	192.223.226	<i>Pulsus intermittens lethalis in peste.</i>	68
<i>Pestis ex insomnio.</i>	233		70
<i>vulneri adjuncta.</i>	231.246	<i>Pulticula nostra ad carbunculos.</i>	184
<i>in puerpera.</i>	205	<i>Pulveres antidotales varii.</i>	147
<i>à terrore.</i>	209.243	<i>Pulvis serpentum ad pestem.</i>	148
<i>à tristitia.</i>	217.258	<i>Pulvis pyrius aerem corrigit.</i>	93
<i>à contagio.</i>	241.252.267	<i>Purgantia ad præservationem.</i>	105.106
<i>cito curata.</i>	189.195.216.248.	<i>in curatione pestis damnosa.</i>	106.
	256		133.135.196.200.211.231.265
<i>vino depulsa.</i>	225	<i>quo tempore danda in peste.</i>	133
<i>tabaco fugata.</i>	199.214	<i>in variolis.</i>	281.293
<i>vomitorio curata.</i>	203.214	<i>Pulmonis auxilia in variolis.</i>	285
<i>Pestis critice soluta.</i>	203.205		
<i>multum remittens fallax.</i>	256		
<i>Pestiferi quinam magis contagiosi.</i>	46		
<i>Pestilentis &amp; epidemii morbi differentiæ.</i>	1		
<i>Pestilens inquinamentum est venenum.</i>	35		
	45		
<i>differt ab inquinamento putrido.</i>	14.71		
<i>venenum an sit diversum.</i>	48		
<i>Pestiferorum extremi halitus maxime contagiosi.</i>	82		
<i>Pestiferi ab aliis separandi.</i>	76.77		
<i>Peregrini arcendi.</i>			

# I N D E X R E R U M.

<i>Remedia purgantia in variolis.</i>	281	<i>Singultus causa.</i>	58
<i>corroborantia peste</i>	164	<i>lethale signum.</i>	68.71.171
<i>diaphoretica &amp; variolas expellen-</i>		<i>remedia.</i>	171
<i>tia.</i>	281. ad 284. 301	<i>Sobrietas qualis conveniat.</i>	94.96
<i>Remedia ad superstites variolarum exul-</i>		<i>Somnium pestem inferens.</i>	233
<i>cerationes.</i>	288	<i>Somnus moderatus bonus.</i>	100.101
<i>Remedia ad superstites variolarum tica-</i>		<i>meridianus quibus conducit</i>	101
<i>trices, &amp; vestigia tollenda.</i>	288	<i>sub dio, &amp; supra fœnum noxius.</i>	100
<i>ad pruritus plantarum pedum &amp;</i>		<i>ante sudores noxius in peste infec-</i>	
<i>in volis manuum in variolis &amp;</i>		<i>tis.</i>	127
<i>morbillis.</i>	289	<i>Sanitus mortem pasciagens.</i>	230
<i>foveas faciei prævenientia.</i>	297	<i>Soporis causa.</i>	58.59
<i>Repletiones noxiæ tempore pestis.</i>	94.95	<i>periculum.</i>	68.70.169
<i>Respiratio pauca conducit.</i>	101	<i>remedia.</i>	169
<i>Rotule præservativa.</i>	116	<i>Spirituum diabolicorum visiones.</i>	190.
<i>Rubeola &amp; Rubores quid?</i>	290.303		210
S.		<i>Sporadici morbi.</i>	2
<i>Sacharius usus noxius in peste.</i>	97	<i>Sputi cruenti causa.</i>	58.59
<i>Sal est efficax ad præservationem.</i>	118	<i>Sputum cruentum lethale signum in peste.</i>	68.71
<i>Salia usualia ad curationem pestis.</i>	137.	<i>incurabile in peste.</i>	173.174
	146	<i>Sternutationes crebræ lethales.</i>	68.70.
<i>Sanguinis missio. vide, venæ sectio.</i>			200
<i>Sanguinea dejectio lethalis.</i>	68.72.196.	<i>Stragula rubræ an faciant ad provoca-</i>	
	214.229	<i>tionem variolarum.</i>	282
<i>urina lethalis in peste.</i>	68.72.218	<i>Suaveolentia damnoſa.</i>	89.92
	264.	<i>Succini vires in suffumigiis.</i>	92
<i>curatio in variolis.</i>	285	<i>Sudare an conveniat ad præservationem.</i>	118
<i>Sapphiri vires ad anthraces.</i>	185	<i>Sudores in curatione pestis, quando,</i>	
<i>Saponis fœtor damnoſus.</i>	76.78	<i>quomodo, &amp; quoties promovendi.</i>	162
<i>Scarificationum usus.</i>	132		ad 165
<i>Scabiosæ vires ad bubones.</i>	181	<i>Sudoriferorum formulæ in peste.</i>	137.2d
<i>Secreta quorundam irridenda.</i>	110		141
<i>Secretum Magistris de bufone.</i>	161	<i>in variolis &amp; morbillis</i>	282.288
<i>Segetes corrupti à pestilente veneno</i>	41	<i>Suffumigia varia.</i>	89.92
	7.8	<i>Sulphirus vires in peste.</i>	92.145
<i>Senes à peste maxime immunes.</i>	148	<i>Suppelles contageii fomes.</i>	77
<i>Serpentum pulveris usus.</i>	10.11	<i>Suppellectilium venditio prohibenda.</i>	76.77
<i>Signa pestem præcedentia.</i>	12	<i>Suppedanea varia.</i>	168.169
<i>concomitantia.</i>	ibid.	<i>Symptomatum pestis causa.</i>	57.58
<i>pleraque incerta.</i>	14	<i>diversitatis causa.</i>	14.57.58
<i>ex pulsu</i>	12.15	<i>Syncopeſ remedia.</i>	170.171
<i>ex alvi excretis.</i>	15	T.	
<i>ex urinis.</i>	12.15	<i>Tabellæ præservantes.</i>	109.116
<i>ex maculis.</i>	190	<i>Tabaci vires in peste.</i>	107.111.
<i>Signa post mortem prodeuntia.</i>	67		125
<i>prognostica pestis</i>	276	<i>Tabaco fugata pestes.</i>	199.214
<i>Signa prognostica variolarum.</i>	ibid.	<i>Temperantia præservat.</i>	94.95
<i>diagnostica variolarum.</i>	21	<i>Tempeſtates an pestem inducant.</i>	33
<i>Sinarum regnum pestis expers.</i>	94.96		Ter.
<i>Sitis noxia sanis &amp; agris.</i>	128		
<i>remedia</i>			



# INDEX RERUM.

*Terror, Tristitia, & timor damnosa in peste.* 16.39.101.102.209  
*etiam in variolis.* 293.294  
*Theriace vires, laudes, & vituperia* 116.  
 150 ad 154  
*Theriaca Matthioli.* 155  
*Monavii.* 154  
*Tò dñon quid sit.* 34  
*Topica ad carbunculos.* 184 ad 186  
*ad variolas non conducunt.* 284  
*Trochisci de viperis.* 148  
*Tumores cito in crescentes & molles mali.* 68.69.72.201.249

## V.

**V**ariolarum nomina & quid sint. 271.  
 172  
*Variolæ vigesimo die morbi erumpentes.* 292  
*Variola morbillis conjunctæ.* 302  
*Aliquando bis terque eundem invadunt.* 275  
*Venæ sectio in peste damnosa.* 130. 190.  
 198. 201. 207. 214. 237  
*in variolis.* 279. 298.  
*Venenum pestilens an sit diversum.* 14. 71.  
*per menses in corpore latens.* 46. 237.  
*Veneri vis an coctione in aqua extinguitur.* 98  
*Venere translata pestis in alium.* 192  
*Venus noxia in peste.* 9. 67. 100. 192. 236  
*Veneris nimia abstinentia noxia.* 102  
*Venti qui salubres sint.* 91  
*Vermes pestilentes vomitu ejecti.* 220.  
 223. 236.  
*Vesicatoriorum usus.* 130. 133.  
*Vestes contagii fomes.* 42. 47. 48.  
*Vestes quæ bonæ, quæ noxiæ.* 100  
*Vespillones quare magis immunes à peste.* 248

*Vespillonum nequitia.* 81. 84  
*Via publica mundanda.* 76. 78. 81  
*Victus subita mutatio periculosa.* 94. 96  
*liberalior, conveniens, tenuis noxius.* 128  
*Victus ratio præservans.* 124  
*Vigilie nimie noxiæ.* 101  
*in aegris non nocent.* 169  
*Vinum valet ad præservationem.* 95. 99  
*quale noceat.* 95. 239  
*Aloeticum præservans.* 105  
*absinthite præservans.* 108. 113  
*Vini absinthites damnæ.* 113  
*modicus usus convenit.* 99  
*potus an aegris sit tutus.* 130  
*spiritus quibus conducatur.* 95  
*Vino depulsa pestis.* 95. 225  
*Virium prostratio periculosa.* 68  
*Virium robur usque ad mortem.* 240  
*prostrationis remedia.* 370. 172  
*Vires conservandæ.* 164  
*Visu an pestis contrahatur.* 101  
*Vitrioli olei vires.* 146  
*Unicornu incertitudo & vires.* 144  
*Unguentum præservans Liddellii.* 123  
*Magiri.* 123  
*Vomitur causa.* 58. 197  
*periculosus.* 68  
*an conveniat in curatione pestis.* 171  
*Vomitur remedia in peste.* 170. 171  
*in variolis & morbillis.* 285  
*Vomitória maxime noxia in peste.* 133.  
 135. 192. 261  
*feliciter data.* 203. 214  
*Urinæ incerta signa.* 12. 15. 68. 72. 238  
*quenam periculosa.* 68. 72. 238  
 264  
*potus damnosus* 112  
*ex urina experimentum.* 72  
*Vulneri adjuncta pestis.* 231. 246

## F I N I S.



# DE PESTE,

## LIBER PRIMUS.

### CAPUT I.

#### DE PESTIS NOMINIBUS.

**D**Esripturus historiam truculentissimæ illius Pests, quæ annis post Christum natum 1635, 1636, 1637, totum Belgium, maximamque Germaniæ Superioris partem diris furiis peragravit, & imprimis Geldriæ provinciam, atque in ea omnium maximè civitatem Noviomagensem anno 1636 miserrimè afflixit, pauca quædam de morbi hujus nominibus præmittenda esse judicavi.

Quemadmodum crudeles Tyranni, magnique Principes plurimis heroicis titulis donari solent, ut ex iis eorum excellens potestas clarissimè queat innotescere: sic etiam magno huic morbo varia nomina attributa fuerunt, quibus crudelissimi Tyranni perniciosissima vis & natura manifestissimè indigitatur. Græcis appellatur λοιμός (1.) ὀλέθρον (2.) Ἐπιδημία (3.) vel ἡ νόσος Ἐπιδημία: etiam νόσος (4.) simpliciter, & νόσος Θεῶν, (5.) Latinis nominatur *Pestis* (6.) & *Pestilentia*: *Lues* (7.) & *Contagium* (8.) Lucretius & Paracelsus vocant *Pestilitatem*.

### ANNOTATIONES.

**I.** Appellatur λοιμός, ὅτι τὸ λείπειν, id est, à deficiendo, quia hominum defectum inducit; seu, ut aliis placet, ὅτι τὸ λιμῆς, id est, à fame, indigentia, vel quia hominum penuriam seu famem parit; vel quia post famem seu annonæ caritatem non raro sequi solet: secundum Græcum proverbium, λοιμός μετ' λιμόν, *pestis post famem*. Etiam appellatur λοιμικὴ νόσος, & ἡ λοιμώδης ἀσθένεια.

II. Ὀλέθρον, ab ἔκλυμι, pessundo, quod plurimos pessundet.

III. Ἐπιδημία, *popularis*, vel *vulgaris*, quia maximè communis existit. Sciendum tamen Pestem ita solummodo vocari per excellentiam; nam differentia est inter morbum vulgarem & pestilentem. Vulgaris enim, est quilibet morbus qui in una regione eodem tempore multos invadit (tales morbi sæpe sunt variolæ, morbilli, colica, dysenterix, &c.) Pestilens verò morbus

est, qui non solum plurimos invadit, sed eorum maximam partem occidit. Ita ut morbus pestilens sit species morbi epidemii, seu vulgaris, eaque pessima, utpote qui morbus non tantum communis est ratione causarum manifestarum & externarum; verum etiam absque illis causis communis esse potest ratione suæ occultæ malignitatis & contagiositatis. Dico, *esse potest*, nam licet unus solus sit peste infectus, inde tamen non licet concludere, illum peste non laborare, quia communitet plures ea non laborant: sufficit illi inesse potentiam malignum morbum contagio diffundendi ac communicandi, licet actu nondum communis sit.

IV. Νόσος, κατ' ἐξοχήν, tanquam morborum omnium maximus ac potentissimus. Ita etiam Gallis per excellentiam appellatur *La maladie*; Italis, *il morbo*.

V. Νόσος Θεῶν, *morbus Dei*, seu *divinus*, non tantum quia occultum & incognitum quid in se

A

conti-

continet; verum etiam quia iustissima ira Dei mortalium delicta non raro punire solet immisione huius morbi.

VI. *Pestis*, à depascendo appellata: & Isidorus, lib. 4. cap. 6. *Pestilentiam* quasi *pastulentiam* dictam fuisse refert: quia, scilicet, instar immanissimæ feræ humanum genus absument & depascit: unde Galenus, *de theriaca ad Pison*, inquit, quod pestis, seu fera quædam venenata, non paucos alios quos miserè perdat, sed totas civitates depopuletur. Vocabulum autem *Pestis*, non semper uno modo sumitur. Interdum in genere sumitur pro quocunque morbo vulgari, qui multos interimit: sic Galenus, 3. *epid. com.* 3. text. 26. inquit: *Non est certum morbi nomen Vulgare, vel Pestilens: ceterum quicumque in uno loco multos simul invadit, Vulgaris hic vocatur: qui si simul hoc*

*habeat, quod multos interimat, Pestilens est.* Interdum specialiter significat Pestilentiam, & nonnquam Pestilentem constitutionem. Sæpe quoque Pestis nomen detorquetur ad omne id quod in perniciem & detrimentum alicujus rei cadit: sic Cicero inquit: *Tam detestabilis pestis nulli est, quam non homini ab homine nascatur.* Alibi malos consules imperii pestes, Carilinam reipublicæ pestem, pecuniæ cupiditatem, pestem in amicitiâ nominat. Itaque quoque Terentius: *lenones juvenutis pestes*; & Seneca invidiam pestilentem vocat.

VII. *Lues*, simpliciter per excellentiam, propterea quod magis & vehementius quam ulla alia lues polluat.

VIII. *Contagium*, à contingendo, propterea quod contactu inficiat;

## CAPUT II.

## PESTIS DEFINITIO.



Um definitio, teste Cicerone, sit rerum operatarum & incognitarum, quasi patefactio, qua quidnam aliqua res sit, aperitur: etiam hinc à Pestis definitione incipiendum est, ut de quali morbo acturi sumus, clarius innotescat.

Est autem Pestis (1.) morbus (2.) communissimus (3.) peracutissimus (4.) perniciosissimus (5.) & maximè contagiosus (6.) ex maligno & occulto (7.) spiritibus calorigue nativo tota substantia infestissimo inquinamento ortus, à quo omnium viscerum, & imprimis cordis (8.) functiones læduntur.

## ANNOTATIONES.

I. **Q**uercetanus, in *Alex. cap.* 1. definit pestem, quod sit morbus epidemicus contagiosus, venenatus, & perniciosus, qui omnes quidem in genere corporis spiritus, imprimis verò cor, arcem vitæ, cum dependentibus ab eo spiritibus aggreditur. Mindererus illam sic definit: *Pestis est lues venenata, summeque lethalis & contagiosa, cor primariò afficiens, febre, bubone, anthrace, aut exanthematis ut plurimum comitata, Hermetici definiunt pestem hoc modo: Pestis est morbus astralis, igneus, ac contagiosus, qui venenato suo vapore, seu spiritu arsenicali aut napellino, corporis meatus subintrans, citissimè omnium spirituum principalia subiecta, cor scilicet, cerebrum & hepar, occupat, eaque malignitate & acuitate sua inficit, corrumpit ac dissolvit; & tandem sulphuris accensi adminiculo sal sub auribus, alis, ac inguinibus coagulando, varia apostematum genera, ut sunt bubones ac carbunculi, protrudit.* Hæc Hermeticorum definitio plurimas patitur objectiones; in ea tamen non male venenum pestilens assimilatur veneno arsenicali & napellino, ab effectuum similitudine, quam latius exponit Quercetanus in *Alex. cap.* 6. Julius Palmarius, Angelus Sala, aliique multi pestem definiunt, dicunt, illam esse febrem peracutam, contagiosam, malignam, & communiter grassantem. Quæ definitio pesti planè non convenit, cum febris propriè non sit de essentia pestis, sed ab illa sepa-

rabilis, ejusque symptoma, ut *cap.* 12. *annot.* 2. latius docebimus. Sic etiam plane non convenit pesti definitio Jacobi Sylvi, qua dicit, *febris pestilens est incendium quod præcedit aut consequitur illos tumores; qui pestis sunt certissimi characteres*, scilicet carbunculos aut bubones. Non convenit dico, quia præterquam quod febris non sit de essentia pestis, ut jam dictum; etiam isti tumores non constituunt ejus essentiam, sed sunt ejus symptomata & signa separabilia, sine quibus etiam pestis esse potest, ut liquet ex iis quæ scribimus sequente *cap.* 7. *annot.* 1. Adde, quod exanthemata quoque pestis characteres & signa sint separabilia; quæ tamen non sunt tumores, sed tantum maculæ, ut docebimus sequente *cap.* 14. *annot.* 7.

II. Morbi quicumque eodem tempore multos invadunt, vel sunt dispersi (quos *Sporadicos* appellant) id est, qui genere diversi, in una vel pluribus regionibus grassantur, multosque infestant, ut si eodem tempore multi ophthalmia, hydrope, colica, dysenteria, aliisve morbis laborent. Vel sunt communes. Horum autem sunt alii *Endemii*, qui inquilini, patrii, ac vernaculi dicuntur, & sunt alicui regioni solummodo communes & perpetui, qualis est Phthisis in Lusitania, elephantiasis in Ægypto, scorbutus in maritimis Septentrionalibus, quartana in Zelandia. Alii vero sunt

*Epidemii*,

*Epidemii*, qui in una pluribusve regionibus pro tempore dominantur, & postea desinunt, quia regioni non sunt patrii & familiares. Atque hi vel sunt *mitiores*, vel *perniciosi*. *Mitiores* magna ex parte cum salute aegrorum finiuntur, nec tam multos interimunt, quales sæpe sunt, variolæ, morbilli, febres quædam putridæ, dysenteria, peripneumoniæ communes (quales observavit Dodonæus *observat. med. t. 21.*) colli tumores (quales observavit Wierus) tussis, & catarrhi, quales communiter vagasse notavit Forestus *lib. 6. observat. 3.* *Perniciosi* verò plurimis sunt lethales: hos Græci *λοιμώδεις*, hoc est, pestilentes, appellant; quales sunt, febres pestilentes, dysenteria pestilentes, angina & peripneumoniæ pestilentes (quales se vidisse refert Wierus) alique similes, quibus præcipuè ipsa pestis annumeranda est, quia est morbus communissimus maximeque lethalis. Porro hîc inquirendum venit: Cum duo sint morborum genera, nempe morbi intemperiei, & pravæ conformationis; ad quam classem pestis referenda sit? Certum est non esse morbum pravæ conformationis, cum non consistat in vicio magnitudinis, numeri, situs, nexus, aut continuitatis (tumores enim & ulcera non sunt ipsa pestis, sed producta pestis) ergo eam esse morbum intemperiei, quam classem Mercurialis ei etiam adscribit. Intemperies autem duplex est, alia materiæ, alia totius substantiæ. Hanc multi vocant Intemperiem formæ. Fernelius totam rei substantiam appellat insitum calorem, facultates, ac formam, quæ junctim perfectionem & integritatem, qua res unaquæque consistit, constituunt. Hæc autem totius substantiæ temperies quoties immutatur, & de perfectione recedit, (quod citissime, & quasi in momento fieri posse docent multa venena) res tota subito perfringitur, atque illa illius temperiei recessio est morbus totius substantiæ. Sic Galenus *lib. 2. ad Glaucon. cap. 2.* scribit, *immoderate laxantia robur solvere, refrigerantia calorem extinguere, & qualitates extraneas vim ac facultatem debilitare.* Quo loco in partibus corporis duas intemperiei species manifestè constituit, alteram manifestam, alteram occultam seu totius substantiæ. Ex. gr. ventriculo intemperies humida inducitur à multo pinguium, humidorum, & laxantium usu, frigida verò à largo frigida potu, aliorumque frigidorum usu: quæ duæ intemperies instrumentum ad debitum officium, nempe coctionem, ineptum reddunt. Sed totius substantiæ intemperies ventriculo imprimitur, cum à veneno, aliave re occulta ejus calidum innatum affligitur vel exstinguitur, à quo calido ipsius actionis principium dependet. Quia autem pestis hoc calidum innatum cum suo subiecto, scilicet humido primigenio, præcipuè impugnat, hinc necessario referenda est ad illos intemperiei morbos, qui occulti, seu totius substantiæ appellari solent.

III. Dico, *esse morbum communissimum*, quia plerumque omni ætati, sexui, & temperamento communis existit, iis in locis ubi grassatur, quod aliis epidemiis morbis tam familiare non est. Mor-

borum autem alii sunt communes actu, alii etiam potentia; utrique à communi causa inducuntur. Sed illi ab illa sola causa foveantur, neque se ipsos diffundere valent, sicut interdum à certa quadam aëris dispositione, vel communi victu, angina, catarrhi, tussis, aliive morbi communes, sed minimè contagiosi, inducuntur. Hi verò; vel jam actu communiter grassantur; vel posito communiter non grassari, habent tamen in se potentiam se ipsos contagio diffundendi & communes faciendi: & horum ordini etiam pestis annumeranda est, ut dictum *precedente capite, annot. 3.* Haly dicit, *Pestem esse morbum multiplicem, pluribus eodem tempore communem.* Multiplicem autem & communem appellat, propter duas rationes. 1. Quia sola non manet, sed statim post invasionem illi plures alii morbi adjunguntur, ut febres, carbunculi, bubones, syncope, &c. qui tamen morbi non sunt de essentia pestis, sed eam insequuntur & comitantur, ut ejus symptomata, 2. Quia tempore pestilenti pestis adjungitur & communis fit omnibus fere morbis, ita ut tunc vix ullus alius morbus peste incomitatus conspiciatur.

IV. Morbi acuti dicuntur qui celeriter & cum vehementia ac periculo cursum suum absolvunt. Hos Medici dividunt in tres ordines, scilicet in acutos, acutissimos, peracutissimos. Acuti sunt illi qui plerumque ad vigesimum diem protrahuntur, eoque spatio vel desinunt, vel ægros occidunt: si ad trigessimum vel quadragesimum diem excurrant, tunc appellantur acuti ex decedentia. Acutissimi sunt illi qui ad quartum, vel septimum, rarius ad decimum quartum diem extenduntur, ut pleuritis, peripneumonia, cholera, angina. Peracutissimi sunt illi, qui citissime ad vitam vel mortem moventur, & raro ad quartum, rarius ad septimum diem protrahuntur, quales sunt, apoplexia, pestis, sudor Anglicus.

V. Dico, *perniciossissimus*, quia nullus unquam morbus cognitus fuit, qui tantam stragem in genere humano edit, sicut pestilentia: quod non tantum hodierna obvia exempla docent, verum illud ipsum, præter Sacras literas (quæ super hac re videri poterunt Exodi cap. 5. Levitici cap. 26. Jeremiæ cap. 14. 37. & 51. Isaia cap. 37. Ezech. cap. 5. & 14. 2. Regum cap. 24. & 4. Regum c. 19.) etiam ex Historicorum scriptis passim liquet. Eusebius, in *Chronic.* refert in illa peste quæ sub Vespasiano & Commodo Imperatoribus Romæ sævit, quotidie decem hominum millia interisse. Suetonius, in *Nerone*, unius autumnii peste triginta hominum millia (ubi Lipsius putat legendum esse, 300000.) Romæ occubuisse testatur. Thucydides, Manilius, & Lucretius, adeo truculentam pestem Atheniensium describunt, qua durante neminem repertum fuisse tradunt, quem vel morbus, vel mors, vel luctus non attingeret. Sub Marco Antonio duas pestes sævisse legimus, quibus pene ad internecionem usque humanum genus deletum est. Procopius, *lib. 11. de bello Persico*, describit pestem, quæ in urbe Constantinopoli qualibet die quinque, & sæpe etiam decem homi-

hominum millia occidit. Illa verò pestis quæ ab anno 1343, toto quinquennio per totum terrarum orbem diris furiis debacchata fuit, totius mundi dimidiam ferè partem pessumdedit, ut refert Iacobus Foroliviensis, in *expasit. can. 1. Avicenn. fen. 2. doct. 12.* Platina narrat sub Bonifacio VIII. plures peste fuisse mortuos, quam superfuisse vivos. De peste illa quæ sub Clemente VI. Papa sæviit, testatur Guido, quod vix quartam mortalium partem in vivis reliquerit. Petrarca refert suo tempore, anno 1359, tantam pestem Italiam invalisse, ut ex millenis quibusque hominibus vix decem superessent. Nicephorus, *lib. 17. histor. Eccles. cap. 17.* narrat pestem ex Æthiopia universum pene orbem invalisse, ita ut neminem fere hominum intactum reliquerit, & totas civitates incolis vacuas fecerit. Cayri aliquando ad decem dies, spatio 24 horarum, viginti millia peste sublata fuisse, narrat Radzevilius, in *itiner. Hierosol.* Spangenbergius, in *Chronicis*, refert anno 1348 Erfordiæ una die 1500 homines peste interiisse. Michael Saxo refert anno 1453, in eadem urbe unica peste 28000. hominum millia succubuisse. Palmarius, *lib. de pest. cap. 5. Pestem*, inquit, *avi nostri descripserunt, anno Christi 1382 ortam, quæ Avinionem primum gliscere visa fuit, atque illinc Allobrogas, Italiam, Graciam, Germaniam, Britanniam, Galliam, Hispaniam, Celtiberiam, universas denique orientis & occidentis regiones pervagata est. Talem etiam commemorant, anno 1450, in Asia exortam fuisse, quæ per Illyricum Dalmatiamque serpsit in Italiam, per Germaniam verò in Gallia & Hispania fines, multisque annis in omnes fere populos misere adeo debacchata fuit, vix ut tertia hominum pars superstes evaserit. Qui plures huiusmodi historias scire desiderat, ille legat Plutarchum in vita Camilli: Paulum Orosium lib. 7. cap. 15: Baronium tom. 2. Paulum Diaconum & Crisostomum part. 1. lib. 11. Leonclavium in Pandect. Hist. Turc. Iohannem Wolffium cent. 2. memorab. lect. Iustum Lipsium lib. 2. de Constant. cap. 23. Georgium à Frunsberg in Hist. Funccium in Chron. Blondum l. 7. Decad. 2. Polidorum Virgilium lib. 7. Riccium Neapolitanum, Pomarium, Hedium, aliosque plurimos, qui immanissimam pestis perniciem notis historiis describunt & confirmant. Ex quorum omnium, & aliorum plurium historiis, cum sacris, tum profanis, Franciscus Piens concinnavit egregiam chronologiam pestium magis insignium celebriorumque, quæ post diluvium ad hoc usque tempus orbem terrarum infestarunt, quam chronologiam inseruit suo tractatui de febribus, post historiam febrium pestilentialium.*

VI. Dico, *Maximè contagiosus*, ad differentiam aliorum morborum contagiosorum (ut lepræ, phthiſeos, luis Venereæ, &c.) quorum contagium tam facile, citò, & vehementer non diffunditur. Præterea etiam ad differentiam multarum febrium pestilentium sine peste, quales sæpe plurimas citra ullum contagium fieri, clarissimè docet Galenus, *lib. 3. de prasag. ex puls. cap. 4.* Notandum etiam pestem dici contagiosissimam,

non quod pestiferi semper alios actu inficiant (hoc enim multis de causis impediri potest) sed quod nullo dato impedimento alios inficiendi potestatem habeant.

VII. Dico, *Maligno & occulto*, quia est excellens, incognitum, ac vix explicabile inquinamentum, quod non consistit in aliquo manifestarum qualitarum excessu, sed in venenositate quadam vitæ nostræ prorsus contraria, cujus natura difficulter describi potest. Hic tamen dubitant nonnulli, an inquinamentum illud verè venenosum, aut venenum sit; putantque potius tale quid esse, quod in corpore nostro facile in venenum mutatur, vel efficit ut humores venenum fiant: nec aërem venenosum fieri, vel esse posse arbitrantur; quia si talis foret, omnes eo inficerentur, cum ejus usu nemo carere possit. Hanc partem defendit Mercurialis, qui *lib. de peste. cap. 17.* ita scribit: *Dixi, & ni fallor, clarissimè demonstravi, aërem nunquam fieri posse venenatum, eodem modo quo sunt alia venena, propter animalium custodiam. Fit quidem ut aër possit esse occasio gignendis venenis, in corporibus dispositis. Cum Mercuriali pro eadem opinione pugnat Marsilius Ficinus, lib. epid. cap. 1. Cum dico venenosum, inquit, hunc esse vaporem, tu ne credideris ipsum fore talem secundum formam & totam sui naturam, quia omnes inde inficerentur: sed huiusmodi est qualitas, ut quam facillimè in veneni naturam transeat. Et propriè venenum efficitur, quando per ipsum in humano corpore certo quodam gradu putrescunt humores simul & ebulliunt.* Verum hæc opinio longissimè aberrat à vero. Nam respondeo Mercuriali, pestilens illud quaecunque inquinamentum aëri immissum, non minus illum speciali modo corrumpere & venenatum reddere posse, quam humores, nec eum hac in parte majore prærogativa gaudere quam alios quoscunque humores: & quod talis venenatus aër non inficiat omnes, hoc fieri, quia ubique & per omnes sui particulas non est venenatus, atque non ab omnibus malignus, ut neque æque venenatus inspiratur: præterea dispositionum corporum diversitas huc plurimum facit, quæ talis est, ut ab eodem veneno alii facillimè, alii planè non lædantur. Marsilio Ficino respondeo, ut inquinamentum malignum ac contagiosum in corpore humores putrefaciendo venenum fiat, quod factum vires suas exferat, tempore opus esse, cum tanta mutatio in minimo momento fieri nequeat: at è contrà experientiam docere, multos auræ perniciosæ afflatu ilico pestem contraxisse, item multos fortes ac sanos, tanquam fulmine ictos, subito concidisse (hac de re vide *sequens cap. 12. 1.*) quod tam citò fieri non posset, si prius debuisset gigni venenum, & tunc in actum prodire: nam eventus docet repentinas istas consternationes non procedere à veneno gignendo, sed jam actu genito. Ità ut pro certissimo concludendum sit, inquinamentum pestilens venenatum, imò venenum esse antequam humanum corpus ingreditur, non verò venenum in corpore fieri.

VIII. Hoc venenosum inquinamentum nonnunquam extrinsecus partibus adhærens, corde robu-

robusto existente, in iis carbunculos excitat, et si id rarissime contingat; quod tamen contingere, in me ipso expertus sum, qui tempore pestilenti carbunculum in sinistra manu habui, reliquo corpore prorsus sano existente; quod ipsum vidi in Capitanei famulo, ut & in illa muliere cuius memini *lib. 4. histor. 90.* cuius rei etiam plura aliorum medicorum extant testimonis, quorum aliqua collegimus *sequente cap. 12. annot. 2.* Sed plerumque, simul ac corpus humanum invadit, vitalitatis primariam arcem, cor, peculiari antipathia impugnatur, idque omnium gravissime afficit; quod ex eo apparet, quia syndrome gravissimorum symptomatum, à læso corde procedentium, ut plurimum ingruit, animali sæpe facultate usque ad mortem parum labefactata. Hic quidem nonnulla repugnantia, sed admodum frivola, occurrunt, quæ videntur docere cor à veneno pestilenti primario non affigi. I. Quia multis pestiferis vitalis facultas robusta est, animali maxime læsa, ut sæpe docent deliria, sopores, &c. Sicut contigit Paræo (ut scribit *lib. de peste cap. 12.*) cum pestilentem halitum per nares ad cerebrum attraheret. II. Quia sæpius venenum pestilens in aliis partibus sedem capere, easque magis quam cor affigere visum est: sicut contigit in truculentissima illa colica pestilenti, quæ tempore Pauli Aginæ totam Italiam aliasque regiones plurimas devastavit: Sicut etiam ex gravissimo vomitu, doloribus pleuriticis, aliisque symptomatibus, id pluries contingere animadvertitur. III. Quia sæpius carbunculi & bubones visi sunt absque ulla manifesta cordis læsione. Verum, nos respondemus ad *primum*, pestilens venenum per nares attractum, posse quidem primò & graviter afficere ipsum cerebrum, (nam quamcunque partem primo invadit, illam primo lædit: ut si cum saliva deglutiatur, primo ventriculum cardiàlgia, nausea, & vomitu affligit; si extrinsecus cuti adhæreat, in ea carbunculos excitat; &c.) in eoque deliria, vigilias, sopores, convulsiones, atque etiam membranas ejus acriter vellicans, graves dolores suscitare, sed illam malignitatem non posse non statim etiam ad cor deferri; (circulatio enim sanguinis continuè procedens, etiam infectionem sanguini aut spiritibus in capite impressam, protinus cordi communicat.) idque adhuc multo gravius affigere, quod manifestissime apparuit in Paræo, qui venenum quidem per nares hausit; sed ab illo etiam cor ilico affectum fuisse, testis erat lipothymia,

quæ protinus insequabatur. Ad *secundum*: in pestilenti colica, pleuritide, aliisque pestilentibus morbis, venenum pestilens etiam primario impugnare cor; sed illud validum ac robustum existens, magnam virulentiam partem à se depellere, modò ad intestina, & tum colicam; modò ad ventriculum, & tunc vomitum; modò ad pleuram, & tum pleuritidem pestilentem facere, ita ut hi affectus tanquam symptomata, ex pugna cordis cum veneno pestilenti, procedant, non verò sine prævia cordis gravi afflictione; ex se ipsis oriuntur. Quare autem in tali casu venenosum virus magis ad unam quam ad alteram partem propellatur; & quare in eadem parte, sumamus cerebro, in uno ægro phrenitidem, in alio soporem inducat, docebimus *sequenti cap. 13.* Ad *tertium*: bubones & anthraces sine manifesta aut notabili cordis afflictione duobus modis apparere: Primò, cum cor adeo validum est, ut venenum pestilens, simulac in ipsum irrumpit, ilico à se ad partes exteriores propellere possit; in quo tamen casu ipsum cor primitus fuit impugnatum. Secundo, cum à pestilentis contagii externo contactu carbunculus contrahitur, corde robusto existente, & hostem suum eminus extra limites suos profligante: in quo casu cor quidem primitus & maxime non affigitur, sed quia hoc rarissime, imò ex tribus ægrorum millibus vix uni contingit, non potest talis rarissimus casus communem regulam evertere. Hic adhuc aliud examinandum occurrit, scilicet, cum cor primario afficiatur, idque constet ex spiritibus, humoribus, & solidis, quodnam horum afficiatur? Dico, vel simul omnia tria, vel tantum aliqua ex his affici posse. Spiritus tamen omnium primo affici, verisimile est, utpote qui à veneno pestilenti interdum protinus corrumpuntur; interdum nimis dissipantur, sed frequentius nimis concentrantur, atque ita figuntur, ut amplius propelli nequeant. Humores verò & solida cordis, illi facilius & citius; hæc difficillime & cum exitio corrumpuntur, ac à pestiferi veneni septica qualitate enecantur. Hæc veneni pestilentis operatio manifestissime apparet in anthracibus, de quibus agemus infra; *cap. 14.* Avicenna hæc tria, explicans, dicit: aërem pestilentem corrumpere complexionem spiritus cordis, deinde putrefacere quod circumdat spiritum, tertio accendere calorem præter naturam, quarto hunc calorem diffundere in corpus.

## C A P U T III.

## De Pestis Noviomagensis principio, vigore &amp; fine.



Er anni 1635 tepidum & modicè humidum fuit: post hoc secuta est æstas vehementer calida & sicca: qua tempestate maximæ putredines, multique graves morbi epidemii plurimis in locis excitati fuerunt. Imprimis autem gravissima pestis Lugduno Baravorum uno anno ultra viginti millia

A 3

fune-

funerum extorsit. In nos autem & totam Geldriam, aliasque plures regiones febris quædam pestilens epidemia diris furiis debacchata fuit, magnamque hominum stragem edidit. Circa autumnum, adhuc permanente, imò magis adaucto aëris fervore, summis siccitatibus conjuncto, undique adhuc majora putredinis indicia, & undique plures maligni morbi apparuerunt, variolæ, morbilli, diarrhoeæ, & dysenteriae pessimi moris passim grassabantur, sed omnium maximè prædicta febris pestilens, quæ indies majora incrementa sumens, magis magisque in pejus mutabatur, & purpurata (quam *Petechialem* vocant Itali) evadebat, donec tandem in apertissimam pestem transiret. Quæ Noviomagi mense Novembri anno dicto initium sumens, paulatim ista (1.) hyemæ spargebatur. Hyems autem nullo magno frigore excelebat, in siccitate & humiditate mediocris erat. Mense Januario sequentis anni 1636, omnia pejora reddi cœperunt: at circa Martium pestis longè majora incrementa sumpsit: summo autem acumine exarsit circa finem mensis Aprilis, atque in isto furore usque ad finem mensis Octobris continuavit; quo temporis intervallo tam crudeliter grassatus fuit morbus, ut in tota urbe nulla fere, quod scio, domus à peste immunis fuerit. Innumeri undique conspiciebantur ægri, inter quos Mors sceptrum tenebat; plures enim moriebantur quam evadebant: & inexplicabilis morbi malignitas omnium fere remediorum efficaciam illudere ac superare videbatur. Quibus mensibus morbum in vigore seu statu fuisse, certum est. Postea lues hæc paulatim cœpit declinare, ita ut tandem mense Decembri multo pauciores ægri, & rariores mortes viderentur. Hyems illa præter consuetudinem valde tepida fuit, hincque pestis diutius perduravit. Anno sequenti 1637, circa medium Februarii, magno frigore præter expectationem repente oborto, per sex septemve dies fortiter gelavit; quod acerrimum, licet breve, frigus horrendæ hujus luis vires adeo infregit, ut in principio mensis Martii ejus reliquæ apud Noviomagenes penitus eradicae fuerint (2.) quo tempore ultimos hoc contagio infectos invisimus. Dico, apud Noviomagenes, nam multis aliis in locis etiam, toto illo anno 1637, maximam tyrannidem exercuit, & præter alia loca, in diocesi Ultrajectensi, charam mihi patriam Montfurtum oppidum, totumque territorium Montfurtense, adeo misere afflixit, ut vix dimidia incolarum pars superstes remanserit. Quemadmodum annus 1635, æstate & autumnno maximis aëris fervoribus excelebat, ita sequens annus 1636, non minori fervoris vehementia, à Vere usque ad hyemem perdurante, antecedentem annum exceperit. Venti à Vere usque ad hyemem fere semper meridionales, vel zephyri erant, cum magnis aëris squalloribus. Ad hæc, à mense Martio usque ad finem Augusti continuæ erant siccitates, quales vix unquam antea tam diuturnæ visæ fuerant: quæ omnia anni præcedentis mala plurimum adauxerunt.

### A N N O T A T I O N E S.

I. **P** Estis quæ in autumnno vel hyeme incipit, longè vehementior & diuturnior esse solet, quam quæ aliis temporibus initium sumit. Petrus Paschalis, *de febr. pest.* bene sic ait: *Quæ Vere & æstate incipit pestis, hyeme solet desinere: quæ verò autumnno vel hyeme, longius protrahitur.*

II. Pestis apud Noviomagenes duravit per sexdecim menses, postea inde ad alia loca demigravit. Cardanus, *lib. 2. Subtil.* scribit, nullam pestem ultra triennium sævire; (quod de uno eo-

demque loco est intelligendum) ejusque rei has causas subjungit. 1. Quia si tam diu sæviat, non habet ferme in quos ulterius sævire potest. 2. Quia aër ipse cum sit levissimæ substantiæ, ulteriorem corruptionem pati nequit. 3. Quia vix fieri potest, quin tanto tempore aër motu suo in ventos transferat totam corruptionis labem. 4. Quia omnibus pessimis rebus Dei beneficio modus quidam impositus est; nec ullum vehemens malum potest esse diuturnum.



## CAPUT IV.

## DE PESTILENTIÆ SUBJECTIS.

**P**Estis hæc, bruta (1.) fere intacta relinquens, solis hominibus bellum indixerat. Nihil sexum, nihil temperamenta curabat, non humorum synceritatem, ac bonitatem, non eorundem corruptionem: (2.) laudabiles humores eandem non impediabant, & propter vitiosos citius non invadebat. Corpora cacochyma sæpe intacta relinquens, optimè temperata inficiebat. Æque mulieres (3.) atque viros, æquè virgines atque prægnantes, æquè infantes, pueros, juvenes, atque constantis ætatis homines corripiebat: sola senectus (4.) maximè immunis erat. In principio morbi à contagio plurimi inficiebantur; postea verò adeo immanis evasit dira lues, & aëris tam horrenda labes, ut nullus fere in tota civitate locus non infectus inveniretur. Tunc æque fere inficiebantur, qui contagiosa & infecta loca fugiebant (5.) atque alii qui indiscriminatim quoslibet ægros & sanos adibant. Præterea non raro, quasi sympathiâ quadam occultâ, integræ familiæ eodem tempore inficiebantur: imò vidimus nonnullas familias, longissimè à se invicem distitas, & diversis in locis ac urbibus habitantes, eodem fere tempore exitialissimis hujus tyranni spiculis graviter affictas, & fere deletas fuisse. (6.) Tantâ crudelitate grassabatur hæc lues, ut totum Noviomagum, quasi instar ignis, ab ea accensum videretur, & in tota turbe vix aliqua domus ab illius contagio immunis fuerit. Eheu, quam triste spectaculum erat, sæpe tria quatuorve cadavera ex iisdem ædibus simul ad sepulturam efferri videre! feretra funeralia per omnes plateas ante plurimorum civium ædes deposita, & mortuos hinc illinc ad sepulchra deportatos conspicer!

## ANNOTATIONES.

I. **P**Estis Noviomagensis bruta animalia à furoris sui violentia excusavit: si fortè hic vel illic aves quasdam domesticas; vel etiam nonnullos canes (quod tamen rarum erat) corripuerit; quia tamen inter bruta non fuit communis, non debet inde concludi pestem inter bruta dominatam fuisse: nam boves, equi, oves, tuniculi, columbæ, porci, anseres, aliaque huiusmodi animalia tam immunia à peste fuerunt, ut vix unum peste mortuum fuisse noverim; imò ipsi etiam feles & canes, quos maximè pestilenti contagio infici vulgò credunt; rarissimè infecti sunt; quemadmodum etiam paucissimæ gallinæ: de sylvestrium brutorum strage toto tempore nihil audivimus. Aves quidem sylvestres regionem nostram maxima ex parte deseruisse (fortè aëris pravitate persentientes) sed nihil de earum strage observavimus. Homerus, nec non Hippocrates, lib. de flat. meminerunt etiam pestis quæ sola bruta animantia invadit, & alterius, quæ homines & bruta æqualiter corripuitur: Villanovanus, cap. 2. epid. antid. scribit, pestem humanam pecora non invadere, & vice versa; frequenter homines sanos ac sospites degisse, interim contagio pestifero armentorum myriades catervatim prosternente. Cuius rei historias describunt, Michael Saxo, in *Cesarum chronica*, & Matthias Mehonius, in *Chronica*. Fernelius, lib. 2. abdit. cap. 12: refert anno 1514 irrepsisse pestem, quæ

solos feles corripuit. Jo. Wierus, lib. 4. de præfig. demon. cap. 30. de brutorum peste ita scribit: *Superioribus annis contigisse meminimus; ut solos jugulaverit boves pestilentia quadam. Irrepsit etiam quæ sues, & quæ oves, item alia quæ gallinas interimit.* Addit paulo inferius, anno 1552. circa pagum Menabiam pectora tam pestilentem morbum invalisse, ut statim correpta ac tumescentia conciderent mortua, & si horum insectorum sanguis nudum hominis corpus contingeret; anthraces procrearet; qui aliquibus mortis causa erant. Furiosam pestem quæ pecudes invasit, etiam describit Virgilius; his versibus:

*Hic quondam morbo cœli miserranda coorta est  
Tempestas, totoque autumno incanduit æstus;  
Et genus amine neci pecudum dedit, omne ferarum,  
Corruptæque lacus, infectis pabula tabo.*

II. Nonnulli Medici arbitrantur pestem magis vel citius invadere corpora cacochyma, quam pura, quia illorum constitutio malignæ putredini recipiendæ aptissima est. Sic Mercurialis, lib. de pest. cap. 2: notavit in peste Patavina maximè infectos fuisse ignobiles, servos, ministros, intemperantes, incontinentes, & qui nullam prorsus rationem vitæ aut valetudinis habuerant. Contra verò, alii putant corpora pura & bene sana citius peste infestari, quia, teste Hippocrate, *Eventus quæ ad summum pervenit, periculosa.* Dicendum

dum ad hujus dubii solutionem: Pestilens venenum interdum solum in aëre divagari, sine manifesta putredine; interdum cum magna putredine conjunctum esse. In priore casu magis timendum esse euchymis & optimè temperatis corporibus, utpote quæ minimas quasque noxas tum longè citius percipiunt, quam corpora cacochyma, quæ jam dudum multis vitiis morbolis, ab humorum impuritate productis, assueverunt. In posteriore casu magis periclitari cacochymos, utpote quorum impuri humores ab aëris aliarumque rerum occurrente putredine facillimè afficiuntur, & ad pestem recipiendam disponuntur. Verum, utcunque se res habeat, ego auctor esse volo euchymis & robustis, ne multum confidant suæ dispositioni ac fortitudini: cacochymis quoque, ne impuritatibus suis aliquid tribuant immunitatis ab hoc morbo: nam hac pestilenti constitutione manifestè edocti sumus, pestem nullam cujuscunque temperamenti, vel boni, vel mali, vel mediocris, rationem habere, & morbi invasionem non dependere à corporum puritate vel impuritate, sed ab occulta quadam dispositione, de qua pluribus agemus alibi.

III. Dionysius Halicarnassæus, *histor. Rom. lib. 9.* similem truculentissimam pestem Romam invalisse scribit, quæ promiscuè sæviebat in omnes, sine ullo discrimine ætatis aut sexus, aut corporum roboris, vel imbecillitatis, nec arti & remediis, quæ morbum levare & expellere creduntur, cedebat. Idem auctor, *lib. 4. histor. Rom.* describit pestem, qua solummodo virgines fuerunt correptæ. Et quod virgines peste correptæ plerumque moriantur, videtur observasse Mindererus, nam, *lib. de pest. cap. 10.* dicit: *Virgines nobiles peste correpta difficulter evadunt: an, inquit, quia spirituosum semen in motu cum sit, facile succenditur, an verò quia intrò detentum, facile corrumpitur, & in veneni perniciem abit. Unde Jacobus de Partibus, comm. super primam quarti, experientia sibi notam affirmat, venenum tempore pestis in virginibus genitum irremediabile quodammodo existere: cui Hieron. Mercurialis, lect. de pestil. subscripsisse meminimus.* Contra vero in illa peste quæ tempore Gentilis Medici grassata fuit, paucæ mulieres, sed non nisi viri robusti mortui sunt. Sic Joannes Boterus, *lib. 3. relat. univ. de mundo novo*, magnam enarrat pestilentiam quæ solos juniores fuit adorta, paucis triginta annos egressis illius contagionis insultu tentatis. Quare autem pestis modò hæc, modò illa subjecta magis invadat & unde magna symptomatum diversitas procedat, videndum sequente capite 7. annot. 2.

IV. Plinius, *lib. 7. cap. 50.* dicit, *Senes pestilentiam minimè sentire*: hoc est, minus cæteris, vel omnium minimè. Sic quoque Mercurialis observavit, in peste illa Patavina senes maximè immunes fuisse: quod ipsum in Delphensi peste quoque animadvertisse, refert Forestus. At Platerus scribit pestem illam quæ anno 1563 Basileæ grassata est, neque senibus, neque decrepitis percipisse. Causam autem, quare senes plerumque à peste maxime immunes sint, inquit Mindererus, *cap. 10. Tandem senes, inquit, & decrepi-*

*ros, ob siccam forsan & frigidam temperaturam, à peste præ reliquis securos esse, fuit creditum, cum quod in victu bi probe se gubernare norint, sibi que bene præ reliquis prospiciant; tum quia frigido & sicco temperamento præditi paucum ac rarum spiritum attrahunt.*

V. Ratio fuit, quia aër Noviomagi ubique æquali fere modo (quod tamen in aliis pestibus rarissimè accidere solet) infectus erat, nec multo magis in ædibus ægrotantium, quam extra easdem, & tantum erat ubique locorum aëris contagium, ut qui aptam ad pestem dispositionem habebant, nusquam fere tuti essent, sed quocunque loco peste corriperebantur: qui verò hanc occultam dispositionem non habebant, omni in loco, etiam in ædibus infectis non minus quam extra easdem, tuto versari possent. Guilielmus Fabr. Hildanus, *cent. 4. obs. 23.* refert anno 1613 similia contigisse in peste Laufannensi, in qua dicit rusticos, & illos qui in altissimis montibus, ab omni hominum consortio separati, vivebant, non minus peste infestatos fuisse, quam illos qui in civitate habitabant; qui licet etiam maxima diligentia à se invicem separarentur, nihilominus tamen infinitos, qui cum ægris nullum consortium habuerant, trucidatos esse.

VI. Multa hujusmodi extiterunt exempla. Novimus civem, N. van Dans appellatum, qui pestem timens, & liberos amans, duos eorum Gorcomum in Hollandiam ad amicos transmisit, tertium domi retinuit. Cum autem illi duo in ista civitate (in qua tunc temporis nulla pestis erat) per duos tresve menses bene sani vixissent, tandem simul peste correpti & mortui fuerunt, eodem tempore quo etiam pater cum tertio filio Noviomagi peste extinctus est: mater autem venenatæ luis spicula sensit, sed tamen feliciter effugit. Circa idem tempus illius civis soror, & adhuc duo tresve liberi, qui ab alia sorore superstites erant (singuli satis longè à se invicem habitantes) pluresque ejusdem familiæ nepotes & cognati peste interierunt. Sic aliam novimus familiam, è qua intra octiduum circiter viginti occubuerunt. Ita etiam Euagrius, *lib. 4. histor. Eccl. cap. 28.* refert, in peste Antiochena certas familias prorsus interiisse, salvis manentibus reliquis urbis incolis. Causa verò ob quam pestis integras familias corripiat, dependet ab arcana quadam dispositionis similitudine, quam inter se habent, quæ apta est ad pestem recipiendam. Hanc dispositionis similitudinem etiam agnovit Duncanus Liddellius, qui *lib. 3. de febr. cap. 2.* sic inquit: *Ex natura proprietate quidam à peste immunes sunt, licet cum peste infectis perpetuò vivant: alii, licet bene constituti, contagione tamen facillimè inficiuntur. Quod evenit ob peculiarem naturam proprietatem & similitudinem, quam habent corpora, quibus contagium communicatur, ad illa qua communicant. Nam communicatio sive receptio per similitudinem fit: ac ob similitudinem sape videmus integras familias contagio perire: ob dissimilitudinem raro belluas ab hominibus infici, item in peste belluarum raro homines affici.* De hac dispositionum similitudine paucis agemus *cap. 11.*

CA-

## CAPUT V.

*De nonnullis quæ in hac peste notanda occurrerunt.*

**D**Uobus tribusve diebus ante & post novilunium, ut & (1.) plenilunium; hæc dira lues semper exacerbata fuit, eoque tempore, & plurimos morbus corripiebat, & quos tunc invadebat, illi fere omnes moriebantur, idque valde citò; nam multi antequam vix ægrotare viderentur, nescio qua virium labefactione oppressi, intra paucas horas extinguebantur, multi secunda aut tertia die deficiebant, iis præcipuè mensibus quibus morbus in vigore erat.

Pestis sine febre (2.) paucis incipiebat & finiebat: pluribus sine febre quidem incipiebat, sed quæ tamen non diu post insequabatur: plurimos autem ab ipso principio cum parvo rigore pestis corripiebat, cui febris protinus adjungebatur, interdum ardens, nonnunquam mitis, ut plurimum verò mediocris.

Mulieres gravidæ (3.) plurimæ abortiebant, ac simul etiam peste corripiebantur, à qua paucissimæ evadebant. Quæ verò ad justum partus tempus perveniebant, & feliciter pariebant, etiam has dira lues, cum suo foetu, citissimè occidebat, ita ut quoque tales mortis spicula rarius subterfugerent.

Viri Veneri minus affueti, si eandem nimis strenuè exercebant, brevi post peste corripiebantur (4.) ac cum cymba Charontis ad Elysios campos citissimè deferebantur. Hinc factum quod plurimis sponsis, secunda tertiave post tedam nuptialem die, funebris tecta accensa fuerit.

Si quispiam alio quodam morbo corriperetur, intra viginti quatuor horas pestis illi morbo adjungebatur (5.) ita ut toto anno vix ullus morbus peste incommittatus visus fuerit.

Ægri qui in ipso morbi principio antidota sudorifera sumebant, multi sanabantur: principio transgresso grave periculum imminebat.

Plurimi ægri ante septimum diem interibant, multi subitò prima die extinguebantur, multi quoque tertia vel quarta, plures autem quinta vel sexta.

Qui diem septimum & nonum supervivebant, de iis aliqua spes erat. Aliquos tamen vidimus qui ad tertiam, & paucos qui ad quartam septimanam morbum protraxerunt, & tandem tamen mortui sunt. Febres enim pestilenciales lentæ valde fallaces erant (6.) nam propter symptomatum minorem violentiam sanationis magnam spem dabant, & ægros longo tempore circumducebant, sine magnis (ut videbatur) symptomatibus, & tandem tamen ex improvviso sæpe eosdem trucidabant.

## A N N O T A T I O N E S.

1. **Q**uemadmodum in hac peste circa novilunium & plenilunium morbum valde exacerbatum fuisse observavimus, sic etiam Ioubertus suo tempore in plena atque silente Luna id ipsum notavit. Hinc quoque monet Iohannes Morellus, *lib. de febr. purp. ut unusquisque sibi caveat circa novilunium & plenilunium, quia, inquit, tunc fortiter aëreum venenum movetur.* Hoc ipsum quoque animadvertit Iohannes Heurnius, *de peste cap. 8.* qui adhuc aliam observationem addit: *Cave tibi, inquit, circa novilunium & plenilunium, tunc enim aëreum venenum movetur violentius. Vis, addit, aliquid secretioris in natura? cave tibi cum singulis mensibus Luna venit in eum locum cæli, in quo erat Saturnus cum nasceris: idem de Marte dictum puta, quod tamen vix*

*millesimus observat.* E contra verò Gemma scribit in peste anni 1575, Lunæ decrescens quadraturam fuisse efficaciorē. Paræus, *lib. de peste,* ait Lunam decrescētem peste correptis sæpe fatalem esse ad interitum. Illud ipsum quoque affirmat Duncanus Liddellius, *lib. 3. de febr. cap. 4.* Luna decrescens, inquit, peste laborantibus lethalis esse solet, plures enim Luna crescente, quam decrescēte restituuntur. Quercetanus; *lib. 1. Alex. cap. 7.* dicit senes & scēminas peste laborantes frequentius Luna decrescēte, plethoricos verò in plenilunio plerumque interire. Alii particulatim de quolibet subiecto annotarunt, in nova Luna natis circa novilunium maximum pestiferæ infectionis periculum impendere, & in plena Luna natis circa plenilunium: idque observavit

B

Cocle-

Goclenius, *de pest. quest.* 8. De Lunæ in corpora sublunaria viribus, diversissimæ sunt opiniones, quas hîc examinare nimis longum foret: inter has tamen verior videtur illa, quæ statuit, ad motum aquarum, humorum, succorum, &c. Lunam nihil facere, sed illa sponte naturæ moveri eodem modo & tempore quo Luna, atque Lunam istius motus tantum signum esse, non verò causam efficientem.

II. Pestem esse quid diversum à febre, & febrem ejus esse symptoma, durante hac pestilente constitutione multoties observavimus, ac proinde nonnulli pestem malè per febrem definiunt, cum febris non sit de ipsius essentia, ut infra probabitur *cap. 12. annot. 2.*

III. Quare mulieres gravidæ tempore pestis magis afficiantur & periclitentur, docebitur *cap. 15. annot. 22.*

IV. Ratio erat, quia nimia seminis profusio spirituum dissipatione corpus enervans, nec non humorum omnium excalescens, atque ex his procedens primariorum viscerum debilitatio, & ad veneno pestilenti resistendum major impotentia, corpora citissimè crudelitati hujus tyranni subiciebant. Alexander Massaria, *lib. 2. de peste*, de Veneris usu cum quadam distinctione, sic bene scribit: Coitu, inquit, arbitror non esse omnino interdendum juvenibus, bono habitu præditis, laute degentibus, assuetis, si modo illi moderationem adhibeant. Alii hujusmodi conditionibus destituti, illo prorsus abstineant, ne viribus labefactis, & spiritibus exsolutis, naturalis calor debilior reddatur, quam ut tanti veneni violentia obsistere possit. Laertius semel interroganti, quando liceret uti coitu, respondit, Cum aliquis se ipso imbecillior fieri cupit. Quantum sanitati noceat nimius Veneris usus,

scitè admodum designavit Plato, dicens; imprimis tria esse capita servandæ sanitatis: Ventrem cibis non replere, ad labores impigrum esse, semen denique naturæ custodire. Aliud quid de Veneris usu; infra videndum, *lib. 2. cap. 7.*

V. Sic etiam Sennertus scribit, se observasse in magnis pestibus annorum 1616, & 1626. fere omnes alios morbos siluisse; & si nonnulli quosdam invaderent, illis statim pestem adjunctam fuisse. Hoc ipsum quoque observavit Mindereus, *de peste cap. 11.*

VI. Si pestilens venenum substantiæ cordis firmius infingeretur, & valde exiguum humorum putredinem induceret, adeo parva sæpe inducebatur febris, ut ipsi ægrotantes se febricitare vix sentirent. Cum hujusmodi febribus ægri, vel citò interibant, si nempe pestilens venenum majore quantitate, aut fortiore qualitate cor invaderet: vel morbum longius protrahabant, si minori quantitate vel qualitate cordi se insinuaret. Atque tales febres lentæ valde fallaces erant. Quod etiam Avicenna animadvertens, ex Galeni *lib. 3. de prasag. ex puls. feb. 1. lib. 4.* sic inquit: Sunt quippe ex his pestilentibus febribus nonnullæ; in quibus neque ager, neque ipsum tangens, excellentem febrilem calorem persentunt, imò ipsius agri pulsus & urina à naturalibus non multum distant, & tamen febris ipsa interficit. Qua propter oportet ut Medici tempore pestis de talibus ægris prudenter judicent, ne calumniam incurrant, & salutem promittant dum mors in propinquo est. Quam ob causam Galenus carpit Medicos sui temporis, qui in diuturna quadam peste hæc discernere nescirent, eosque nihil plebe præstantiores, imò imperitiores esse dicit.

## CAPUT VI.

### *De signis pestem præcedentibus, & præsagientibus.*



Uia prima pestis causa coelitus dimittitur & occulta est, hinc etiam difficulter ejusdem adventus ex signis seu præsagiis certò prævideri potest; nam haud rarò obscure ac furtim, nullis sui indicibus præmissis, multa loca repente invadit: nonnunquam etiam quibusdam in locis sui signa quædam, modò obscuriora, modò clariora, præmittit, maximè ab occulti pestilentis veneni effectû primo ac leviori, nec non ab iis quæ corpora ad pestem præparant, desumpta. Hujus quoque generis varia signa pestem Noviomagensem prænunciare visa sunt: Tota enim æstate anni 1635, non minus quam anni 1636, hujusmodi indicia se prodiderunt: Nempe, stellarum ardentium in cœlo oberrantium magnus concursus, & in terram (1.) prolapsio. Plurima & fere continua nocturna fulgura, cœlo non nubiloso existente, sine pluviis & tonitruis. Venti austrini (2.) diuturniores, sæpe etiam nulli venti manifesti. Maximi æstatis fervores, & siccitates diuturnæ, quæ hyemem tepidam humidamque sequebantur, & rursus ab hyeme tepida excipiebantur. Avium (3.) multo rarior numerus quàm aliis temporibus. Maxima & incredibilis insectorum (4.) copia, qualis vix unquam visa fuit, ut culicum, papilionum, scarabeorum, crabronum, cicadarum, omniumque

que maximè muscarum, quarum utroque anno tam stupenda ubique copia reperi-  
ebatur, ut ædium interiorum parietes undique muscis confiti viderentur, & foris  
ipse aër multis in locis quasi muscarum nubibus obfuscaretur. Carnium aliarumque  
rerum putredines, præter consuetudinem, longè citiores & graviores. Mulierum  
gravidarum (5.) frequentes abortus. Morbi epidemii mali moris, ut erant vario-  
læ, morbilli, dysenterix valde malignæ & contagiosæ, imprimis febres putridæ  
malignissimæ, & purpuratæ, plurimisque lethales. Pueri in lusibus suis mortuo-  
rum (6.) sepulturam agentes; aliaque similia, quæ omnia huic regioni imminetia  
mala prænunciabant: quibus & illud accedebat, quod pestis crudelissima Lugdu-  
num Batavorum jam miserrimè affligeret. Pro singulis autem individuis invaluræ  
pestis paucissima vel nulla dabantur præsagia, nam fere omnes ex improvise ferie-  
bat, nec nisi effectis & eventis deprehendebatur. Hoc unum adhuc observavimus,  
ubi aviculæ (quas nonnulli caveis inclusas delectationis & cantus gratia alunt) mori-  
ebantur, in illis ædibus etiam non diu post, imò frequentissimè intra duos tresve  
dies, inter inhabitatores homines pestem dominatam fuisse, idque multis in locis  
seu ædibus contigisse vidimus.

## A N N O T A T I O N E S.

I. **M**ercurialis, Forestus, alique Medici, in iis pestibus quas describunt; hujus-  
modi meteora quoque visa fuisse nota-  
runt: atque sic etiam Trichemius, Andreas Gal-  
lus, & Crusius, similitum præfagiorum pestis in  
suis historiis meminerunt. Verum nec cometæ,  
nec terræ motus pestem Noviomagensem præ-  
nunciarunt, quæ tamen signa nonnullas alias pes-  
tes præfagiisse & præcessisse, testes sunt Sigeber-  
tus, Platina, Paulus Warnefridus, Michaël Saxo,  
aliique Historici. Aliud aëreum signum referunt Ti-  
tus Livius & Sabellicus, contigisse anno 296 ab Ur-  
be condita, scilicet, cælum multo tempore, omni-  
um cum stupore animique consternatione, apparui-  
sse in forma flammæ ardentis, post quod signum fu-  
riossissima pestis subsecuta est. Nonnulli etiam in-  
ter hæc præsagia referunt pluvias sanguinolentas  
(quales ante paucos annos Bufcoduci visæ dicun-  
tur) funerum per nubes delatorum visiones, tonos  
lugubres in aëre, sonitus in cæmiteriis auditos, ali-  
aque similia. Alii credunt astra sæpius in terram  
excrementa quædam exspuere, è quibus imminens  
pestis, ejusque forma præfagiri possit. Sic ajunt  
Paracelsum anno 1538 hujusmodi recrementa stel-  
larum discipulis suis monstrasse, eaque invenisse  
intestinis simillima, atque hinc exactis ab eo pau-  
cis mensibus secutam fuisse pestem crudelissimam,  
quæ homines una cum colica atrocissima affligebat.  
Ita eundem quoque in Ungaria dicunt notasse hæc  
stellarum excrementa, repræsentantia linguam  
crassitudine digitali, punctis atris signatam, ac  
paulo post secutam fuisse truculentissimam pestem,  
cum angina, & faucium ac linguæ exustione. At-  
que in Borussia illum, vidisse hujusmodi recrementa  
maculis luteis, nigris, ac lividis insignita, ad quæ,  
ecchymata cum peste secuta fuerunt. Verum quia  
solus Paracelsus, nec alius quispiam, quod scio,  
hujusmodi stellarum recrementa observasse dicitur,  
rei veritatem cuilibet judicandam relinquimus.  
Porro, solent etiam Astrologi ex cometarum ap-  
parentiis, & ex eclipsibus, item ex variis syde-

rum aspectibus & concurrentiis, pestem imminen-  
tem prædicere: verum illa prædictio potius inanis  
conjectura, quam certa præscientia appellari de-  
bet, ut patet ex iis quæ dicuntur *sequente cap. 8.*  
*problem. 2.*

II. Hippocrates agens de peste, austrinæ con-  
stitutionis plerumque mentionem facit. Ita quo-  
que Galenus annum australem pestilentium mor-  
borum feracissimum esse, passim testatur. Quia  
nempe auster corpora ad pestem facilius suscipien-  
dam maximè præparat ac disponit, si modò ali-  
quod pestiferum venenum cœlitus in aërem dimis-  
sum fuerit: nam alioqui auster per se nullas pestes  
inducit; (hoc latius docebimus *cap. 8. annot. 1. pro-  
blem. 5. & annot. 7.*) & austrini venti multoties  
longo tempore perstiterunt sine ullo sanitatis in-  
commodo. Præter austrum, etiam aëris quies, si  
nempe à ventis non agitetur, ad pestis præparati-  
onem plurimum facit. Hinc Hippocrates, 3. *epi-  
dem.* de constitutionem pestilentem describens,  
inquit, *Sine aura usque annus fuit.*

III. Aves, quia illud aëreum pestilens vene-  
num citius ac facilius perferunt, regionem mu-  
tare, & ad loca salubria se conferre, etiam nidos,  
ova, & pullos non rarò deferere solent: quod à  
multis Historicis & Medicis antehac quoque ob-  
servatum fuisse, passim legimus.

IV. Insectorum copiam pestem præfagire, jam  
à multis seculis annotatum fuit. D. Augustinus, *de  
civit. Dei, cap. 31*, scribit, post immensam locusta-  
rum copiam, tantam pestem insecutam fuisse, qua  
in solo regno Masinissæ octies centum millia ho-  
minum perierunt, & prope Carthaginem bis cent-  
um millia, & Uticæ ex triginta millibus juniorum  
militum, qui ibierant, decem millia remanserunt.  
Sic quoque D. Hieronymus, in *Joël. Prophet.* scri-  
bit, tempore Theodosii Imperatoris maximam lo-  
custarum copiam in Judæa horrendam pestem præ-  
fagiisse. Simile quoque in Gallia Cisalpina conti-  
gisse, tradunt, Agricola, *de pest. lib. 1.* & Johannes  
Wolffius, *cent. 16. lectio. memorab.* Refert Hilda-

nus, cent. 4. obs. 24. in peste Lausannensi, anno 1613, tantam ubique fuisse muscarum copiam, ut post hominum memoriam vix similis visa fuerit.

V. Mulierum abortus pestem sæpe præfagiisse, etiam observarunt Alexander Benedictus, Forestus, Sennertus, alique plurimi. Fiunt autem, quia tenelli & imbecilles foetus, propter cordis & reliquorum viscerum debilitatem, venenatæ aëreæ malignitati minus resistere valent, sed ab ea facile enecantur, tumque mulieri pondere & putredine molestam irritationem facientes, abortu excluduntur.

VI. Gallus Tridentinus, fascic. de pest. agens de pestis prænunciis, inter cætera etiam hujus præfagii meminit: Pueri, inquit, ab intelligentia non errante ducti, presbyterorum modo cantant, alios viros pueros sepelire simulant, hanc universam animantibus perniciem futuram præfagientes. Mindererus, lib. de peste, cap. 9. de isto præfagio hæc scribit:

*Admiratione digna res est, puerulos una ludentes & vespillonum mote scrobes ac sepulchra fodientes, ac feretra deportantes; quasi genio id eos docente, venturam pestem hoc suo lusu prædixisse. Forestus ante pestem Delphensem illud præfagium etiam observavit: Pueri, inquit, antea colludentes scrobes instar sepulchrorum faciebant, & feretra in humeris, ut vespillones, portabant: & quamquam hæc & similia ab aliis pro portentis, ab aliis pronugis habeantur, tamen savissima pestis subsequuta est. Sic etiam nos anno pestem hanc præcedente, Noviomagi variis in locis, atque etiam in vicinia nostra, puerulos mortuorum sepulturam agere vidimus. Memini me quondam Montfurti vidisse puerulos quosdam per aliquot dies continuos, ante ædes vicini nostri Arentii Vos, mortuum, ut aiebant, lussisse, nec ab illo lusu prohiberi potuisse; atque post duos ab inde menses iidem in ædibus tres liberos variolis extinctos fuisse.*

## CAPUT VII.

### De signis & symptomatibus pestem concomitantibus.

**S**igna & symptomata (1.) quæ pestem hanc comitabantur; eamque adesse testabantur, varia (2.) erant: Febres; jactationes (3.) corporis: summa anxietas: æstus sæpe internus magnus: dolores capitis (4.) rarius acres, sæpius gravativi: terrores: deliria, (5.) convulsivi subsultus, & quasi leves contractiones membrorum: in aliis continuæ vigiliæ, (6.) in aliis graves sopores: visus (7.) turbidus: aurium tinnitus, & in nonnullis surditas: linguæ siccitas (8.) rarius tamen nigredo: oris & sudoris graveolentia: syncope: pulsus sæpe validus (9.) & naturali pene similis, interdum debilis, creber & inæqualis, ac in nonnullis intermittens, in multis valde parvus & creber, modò æqualis, modò inæqualis. Hæmoptysis: tussicula (10.) sicca: sitis (11.): inappetentia: oris ventriculi dolor: nausea, vomitus, singultus: alvi dejectiones crudæ, admodum foetentes, ut plurimum turbidæ, ac interdum cum vermibus: diarrhoeæ (12.) perniciosæ. Urinæ (13.) multis optimi coloris & sedimenti, sanorum urinis similes, multis igneæ, aliis tenues & crudæ, interdum quoque turbidæ, nonnullis etiam unica die variæ, nempe modò bonæ & laudabiles, modò turbidæ, vel igneæ, aliquibus quoque sanguineæ. In aliis repentina virium dejectio & impotentia ad motum ab ipso morbi principio, in aliis vires robustæ usque ad mortem. Calor corporis in aliis acer & vehemens, in aliis tantum (14.) naturalis. Color vultus aliis pallidus, aliis erysipelaceus, plurimis verò sanorum colori non multum absimilis. Maculæ (15.) purpureæ, nigræ, violaceæ, vel rubæ, modò paucæ, modò multæ, modò angustæ, modò latæ, at fere semper (16.) exactè rotundæ, modo in una corporis parte, modò in alia, sæpe in toto corpore apparentes. Tumores (17.) in emunctoriis. Carbunculi (18.) in variis corporis partibus. Hæc dicta signa non pleraque in eodem subjecto (19.) videbantur, sed modò hæc in uno, illa in altero.

## ANNOTATIONES.

I. **V**ix aliquod exactè certum pathognomicum pestis signum reperiri potest, quo posito pestis necessariò ponatur, sublato auferatur. Quia morbus hic multoties variat, neque eundem morem semper servat, unde quoque varia ejus ac intricata, & pleraque fallacia signa

sunt, partim propter occultam malignitatem primò efficientem, partim propter humorum corporumque varietatem: propterea unum, duo, vel tria ex his signis nihil certi concludunt sola, sed ex multorum congerie certius judicium ferri potest. Quamvis enim pestilens venenum suas habeat notas



tas peculiares quibus se prodit, nempe bubones, carbunculos & exanthemata, quia tamen hæc nonnunquam in aliis quoque morbis apparent, quia etiam in peste semper non apparent, & morbus sæpe irrumpit in corpus variis humoribus ad putredinem paratis refertum, multa alia simul infert symptomata diversis aliis morbis communia, quæ magis propria pestis signa obscurant, vel prodire impediunt, cognitionemque inturbant, utpote quorum multa non immediate à malignitate, sed à putredine oriuntur. Quapropter non febris, non somnolentia, non capitis dolor, aliudve simile ex prædictis symptomatibus, per se pestem designant; sed si his accedat magna virium prostratio, & pestilens sit cœli status, ac morbus epidemius perniciosus grassetur, haud exigua de peste conjectura fieri poterit, imprimis si aliquod ex peculiaribus signis (nempe bubo, anthrax, vel exanthemata) accesserit. De quibus tamen peculiaribus signis, cum illa etiam aliis quibusdam morbis communia sint, non imprudenter judicandum, sed his pestis characteribus apparentibus, ut certa morbi cognitio indagari possit, etiam præcedentia, concomitantia, & subsequencia symptomata considerata, aliæque circumstantiæ (ut aëris malignitas, pestis grassatio; contagii occasio, &c.) animadvertendæ sunt. His tamen peculiaribus signis non apparentibus, statim inde pestis absentia concludenda non est; nam sæpe vel æger moritur antequam illa erumpunt; vel debilitata atque oppressa virtus nullam à centro ad peripheriam morbi veneni expulsionem moliri potest.

Hic jam quæritur, cum signa pestis sint valde incerta, si fortè morbus hic in urbe unam solam domum invaderet, (peste nusquam apparente) & nullis carbunculis, bubonibus, aut exanthematibus se manifestaret, an & unde cognosci posset, istius domus ægros peste infectos esse? Respondeo, illud primo ingressu vix certo judicari posse, quamvis Reipublicæ plurimum intersit illud sciri, ut contagii propagatio declinari queat. Ex syndrome tamen pravorum signorum, & malis concurrentibus circumstantiis, morbum suspectum fieri debere; atque si primus æger sine magno ardore, magna cum anxietate viriumque prostratione, accedentibus magno vomitu, delirio, somnolentia, aut jactatione, aliisque similibus symptomatibus, primo vel secundo morbi die moriatur, & post eum secundus & tertius similiter citò extinguantur, aliique iis inservientes inficiantur, maxime verisimile est, illum morbum esse pestem, licet nec anthraces, nec bubones, nec exanthemata appareant. Sic refert Follinus, in *Amuleto cap. 19.* se Sylvæ-Ducis ex syndrome pravorum symptomatum in ædibus cujusdam civis detexisse pestem, qua pater & mater familias, una cum duobus liberis & ancilla, citissime fuere sublata, nullis carbunculis, bubonibus, aut exanthematibus prodeuntibus, nullo etiam contagio se ulterius extra domum illam extendente. Ita scribit Joubertus, anno 1574. pestem solas Caroli Bargæ, judicis, ædes occupasse, eumque cum dimidia familia ene-

casse. Testatur quoque Matthias Untzerus, *lib. 1. de pest cap. 11.* sibi oculato testi constare, quod tum Halæ Saxonum, tum alibi interdum una aut altera duntaxat domus pestifera contagione, peregrinis locis illata, fuerit contaminata, cæteris in tota urbe nihil periculi ab eadem passis. Simile etiam à nobis postmodum Ultrajecti contigisse visum est anno 1661, apud nobilissimam viduam Dominam van de Perck, in media circiter urbe habitantem, in cujus ædibus (eo tempore nusquam peste observata) in fine Octobris mensis & principio Novembris, unus filiolus intra biduum fuit extinctus, cum maximis anxietatibus & continuo vomitu, quem brevi secuta est ancilla ipsi inserviens, hanc item alia ancilla quæ huic inserviverat, illam adhuc alia mulier extrinsecus ad hujus servitium vocata: tandem ipsa Domina eodem malo correpta, eum summo vomitu maximaque anxietate intra viginti horas obiit: (reliqui liberi fuga servarunt) hanc simili modo non diu post secuta est alia pedissequa, cum famulo: & ex his septem (qui omnes intra tres quatuorve septimanas succubuerunt) nemo ultra quatrimum decubuit, sed omnes citius extincti sunt; etiam in nullo eorum ulli anthraces aut bubones apparuerunt, nulla exanthemata prodierunt, ita ut chirurgus pestiferorum visitationi destinatus, illos peste non laborasse pronuntiaret. Ego tamen ex syndrome pessimorum symptomatum, contagio, & tot domesticorum repentina morte illos omnes peste interiisse, & domum fugiendam esse dixi; quod tamen pauci tunc temporis crediderunt. Sed ultimò, una, quæ adhuc superat, ancilla, Amsterdamum ad fratrem suum profectura, in itinere male habere cœpit; mox prodiit ipsi bubo inguinalis cum duobus anthracibus, sicque omne de peste dubium sublatum est. Ipsa tamen ancilla sanata est, sed Amsterodami duos fratris liberos suo contagio infecit. Sic interdum diu occultum latet hoc malum, cujus tamen præsentia ex concursu pravorum symptomatum & aliis circumstantiis dijudicanda est. Verum hic maxime mirandum videtur, quod ex ista domo acris illius pestis seminaria ulterius non fuerint disseminata, nec quisquam alius in tota urbe infectus, nec etiam Amsterodami per ultimam ancillam malum ulterius propagatum fuerit. Certè plaga illa in illam solam domum dephuisse, in eaque, cum suo contagio, rursus extincta fuisse videtur: cujus origo nulli putredini adscribi poterat, cum splendidissima esset domus, nitide inhabitata, ab omnibus cloacis & foetoribus longissime remota, in qua domestici erant valde nitidi, & ante hujus mali invasionem omnes optimè sani longo tempore vixerant, nec ullis corruptis, sed optimis semper cibis usi fuerant. Neque etiam contagio imputari poterat, cum pestis tunc nusquam grassaretur, & in illa domo post hominum memoriam nemo unquam peste infectus fuisset. Ex his jam liquet, quod differentia sit inter morbum epidemium & pestilentem: & quod epidemius seu communis non semper sit periculosus, & quod pestilens non necessario semper sit



communis. Imò quod ad hujus essentiam non pertineat ut sit communis, sed hoc potius accidens quoddam sit, quod vel ejus communem causam, vel ejus effectum, scilicet contagium, sequitur.

II. Symptomatum diversitatem nonnulli malè opinati sunt dependere à veneni pestilentis naturæ diversitate, quod tamen semper est unius ejusdemque naturæ, differens tantum in quantitatis vel qualitatis minore vel majore excessu, non in natura, cujus ratione modò plures & vehementiores, modò pauciores & leviores effectus edit. Præterea illam symptomatum diversitatem parit, partim diversa corporum dispositio, quæ in causa est quod alia in biliosis, alia in pituitosis, alia in euchymis, alia in cacochymis, alia in juvenili, alia in senili corpore producantur: partim ipsius pestilentis constitutionis varietas, quæ prout conjuncta est, cum putredine, pravis exhalationibus, fervoribus vel frigiditatibus, humiditatibus vel siccitatibus longè diversa symptomata suscitatur, unde fit ut in una peste non contingant eadem quæ in alia; nec in omnibus pestibus semper eadem lædantur subjecta. In una enim maximè corripuntur mulieres, in alia viri; in una pueri, in alia adulti; in una interdum sola bruta, in alia soli homines; pro ut scilicet modò horum, modò illorum corpora (ratione aëris, temperamentorum, alimentorum, animi motuum, &c.) magis ad infectionem suscipiendam apta sunt. Non enim una peste omnes peccatores simul castigare & extinguere, sed modò brutorum interfectione nonnullos magno damno mulctare, sicque Dei sui suorumque peccatorum (quorum nomine talia fiunt) memores facere; modò multos homines è medio tollendo, alios superstites ad timorem Domini & poenitentiam adducere, decrevit Altissimus. Talia non considerantes Franciscus Joel, tom. 5. lib. 1. sect. 3. alique multi Medici, putarunt hætenus ipsum venenum pestilens esse diversum, idque interdum displadis, interdum viperæ, interdum cicutæ, interdum nappelli, interdum arsenici, interdum alterius toxici naturam æmulari: cum tamen operationum diversitas, non à naturæ ipsius veneni diversitate, sed potius aliunde procedat, ut modò dictum & ut latius infra docetur, cap. 12. annot. 2. in quest. an pestis sit certum morbi genus. Qualiacunque autem fuerint symptomata quæ pestis inducit, pleraque gravia sunt & multum timenda: hinc, juxta Paulum & Aëtium, bene dixit Altomarus: omnia horrendissima in peste fieri posse, & gravissima supervenire symptomata.

III. Jactationes corporis fiunt ob angustiam cordis veneni malignitate oppressi, & virium debilitate: dum enim cor graviter angitur, artus debiles, tanquam cordi aliquod juvamen & solatium allaturi, huc illuc jactantur; eodem modo sicut in gravi dolore alicujus partis, aliæ omnes partes se contrahunt, tanquam hoc modo levamen aliquod allaturæ. Joubertus, lib. de peste, aliam jactationis rationem reddit: Plerisque, inquit, maxima est inquietudo, ob æstum, & pectoris, quæ premuntur, angustiam, quod suscitati vapores minus

diffuari & discuti possint, magisque inclusus maneat calor: unde fit ut usquam consistere valeant, huc atque illuc agitati, & in lecto se dimovere impotentes, velamenta abjiciant. Verum non valet hæc ratio, quia Joubertus præsupponit veneni pestilentis operationem consistere in fervore seu æstu, vel saltem sine illo non peragi; quod minimè verum esse alibi latus docebimus: quod ex eo uno etiam satis liquet, quia sæpe hujusmodi jactationes contingunt absque ullo interni ardoris signo, sed nunquam tamen absque cordis anxietate; quod indicium est cor à venenositate, non verò ab ardore angi.

IV. Fallopius, lib. de tumor. cap. de bubon. inter alia pestis signa etiam recenset vehementem capitis dolorem cum tensione & calore vehementissimo conjunctum: verum non in hac peste Noviomagensi, præter capitis dolores solos, imprimis gravativos, nec ullam tensionem, nec vehementem calorem animadvertimus.

V. Delirium in peste frequentissimum esse solet, in hac tamen nostra peste illud rarius erat. Thucydides refert in peste Atticâ deliria fuisse maximè communia, imò à deliriis memoriam multis abolitam, eosque tanta rerum oblivione captos fuisse, ut restituti, nec amicorum, nec rerum gestarum memores essent, sed sibi ipsis quasi peregrini & incogniti haberentur.

VI. Sic etiam Hippocrates, 3. epidem. inquit: In totum autem plurimos aut gravi sopor comitabatur, aut parvos ac tenues somnos habebant. Causas soporis & vigiliarum describimus cap. 13.

VII. Sunt qui inter alia pestis signa etiam statuunt rubores oculorum; & Galenus, lib. de prasag. ex puls. hos non tantum accuratè observari, verum etiam ægrorum oculos aqua frigida ablui vult: qua ablutione si magis magisque inflammantur, illud pro certissimo & infallibili pestis signo reputatur. Nos tamen in furiosissima hac peste rubores oculorum in paucissimis observare potuimus.

VIII. Quercetanus, in pestis Alex. inter certiora pestis signa etiam nigredinem linguæ numerat, eamque semper necessariò subsequi ait. Verum eandem in hac nostra peste raram observavimus: fortassis quia illi pesti, quam ipse vidit, magnus ardor; huic verò nostræ exiguus fervor adjunctus erat.

IX. Varietatem pulsus inducit naturæ ac veneni pugna, dum in se vicissim agunt, alter in alterius perniciem. Cum venenum cor ferit, fit aliqua humorum cordis fixatio, quam mox sequitur non sufficiens sanguinis dilatatio ac propulsio; hinc magna procedit anxietas, & pulsus obscurus, frequens, & intercidens evadit: qui è contra fit plenior & firmior, cum cordis robur in venenum insurgit, & humorum fixatio jam minuitur, sanguinisque dilatatio melius procedit. Interdum etiam pulsus naturali plane similis est, quod Mercurialis, de febr. 3. cap. 17. dicit fieri, quia facultas motrix est debilis, & necessitas eventilationis magna, ita ut ex his duobus fiat mo-

tus quidam moderatus; exemplo illius qui debilis sit & hostes fugiat. Alii melius arbitrantur id fieri, quod aut venenata, non aucto incendio; nec figendi modo; sed alia quadam deleteria qualitate cor impugnet. Utcunque se res habeat, ex solo pulsu de peste nihil certi judicatur; sic etiam Joannes Baptista ab Helmont ingenuè fatetur, se ex pulsu pestem non posse agnoscere: Nunquam, inquit, potui ex pulsu vel urina, quantumvis distillata, pestem novisse presentem: urina enim & pulsus nunquam apud meam ruditer detexerunt pestem. Forestus scribit, in peste Delphica interdum per totum morbi decursum nonnullos probum pulsum habuisse, & tamen mortuos fuisse. Quod ipsum quoque asserit Galenus, 3. de prasag. ex puls.

X. Galenus, 5. method. cap. 12. tussim siccam omnibus fere pestilentialibus affectionibus adesse refert. Hoc dictum Galeni ab experientia confirmari tradit Quercetanus, in alexic. Nos tamen in hac peste, licet tussim siccam multoties, non tamen communiter nec valde frequenter observavimus.

XI. Sitis est symptoma quod frequenter pestem comitatur, sed non tamen semper: & quamvis Rondelerius dicat esse symptoma à peste inseparabile, nos tamen multos etiam absque siti peste laborasse & extinctos fuisse, vidimus.

XII. Alvi excretiones in peste non sunt similes illis quæ in aliis alvi fluxibus contingunt, sed sunt foetidissimæ, turbidæ, confusæ, liquidæ quidem, verum quasi oleaginosæ, hincque illas à colliquatione oriri, putat Galenus. In his excretis, præter colorem & foetorem, aliud quippiam ipsis familiare observavit Sennertus, nimirum exigua quædam glutinosa corpuscula, modò albis, modò crocei, modò viridis coloris. Forestus observavit in iis aliquando apparere quippiam simile ovo foetido aqua diluto.

XIII. Ex solis urinis certò pestis præsentia judicari nequit; hinc Galenus, 3. de prasag. ex puls. inquit Verum ex urina in hujusmodi febribus, præsertim ubi corpus cordis occupaverint, certam notitiam petere semper non licet. Sunt itaque alia quoque considerata. Optimi coloris & sedimenti sunt urinae, sanorum urinis similes, vel parum mutatae, cum venenata labes in cor & spiritus solummodo agit, humoribus adhuc illæsis relictis: vel cum humores plus peccant maligna qualitate, quam putredine. Ignæ vel rubicundæ fiunt, cum calor internus nimis excandescit: turbidæ autem à caloris nativi imbecillitate, & magna humorum jam putrefactorum ebullitione ac confusione: quæ ebullitio & confusio si per intervalla fiant, in causa sunt quod urinae modò turbidæ, modò laudabiles appareant.

XIV. Calorem sæpe ad tactum mitem ac placidum esse, observavit etiam Avicenna; sen. 4. lib. 1. cap. de febr. pest. Quod ipsum quoque asserit Galenus, 9. simpl. cap. de bolo ar. Ratio est, quia morbo magis infestat maligna & venenata qualitas, quam excessus caloris aut frigoris, vel putredo.

XV. Maculae hæc communiter & plerumque erant purpureæ: rariores erant rubæ, violacæ, vel nigrae. Omnes quidem macula (inquit Crato, tract. de febr. petech.) quacunque fuerint, febris pestilentis sum indices, sed non omnes febris pestilentis contagiosa: nam cum in progressu morbi, videlicet quarta vel nona die, rubra primum se produnt, pestilentis spuria nota sunt: cum verò in initio morbi conspiciuntur, contagiosam febrem indicant, aut cum livida apparent vel nigra, quæ raro in vivo, in cadaveribus plerumque se offerunt, cum nempe contagii vis subitò vitam adimit. Hæc Crato; cujus dictis in hac nostra peste non respondit experientia: nos enim tertia, quarta, quinta, sextave, imò & septima die prodeuntia rubra exanthemata contagiosissimæ luis, & plerumque mortis instantis certissimum indicium dedisse vidimus; nam in tota hac peste vix viginti cum maculis rubris evaserunt; cum purpureis; unum tantum; cum nigris aut violaceis nullum evasisse novimus. Præterea etiam istas maculas lividas, imò & instar atramenti nigras, non solum in mortuis, sed in vivis quoque non raro observavimus, certa quidem mortis indicia, sed cum quibus tamen nonnulli ægri aliquando per biduum triduumve adhuc supervivebant. Hujusmodi maculae, cujuscunque formæ vel coloris fuerint, semper vel pestem; vel saltem febrem maximè malignam & pestilentialem (qualis etiam est petechialis) indicant, in nullo enim alio morbi genere reperiuntur. Interdum quidem apparent in aliis quoque affectibus maculae his non multum absimiles (ut in scorbutis, lue Venerea, &c.) citra pestem vel pestilentem febrem, sed earum ab his differentiam peritus Medicus sola inspectione & circumstantium consideratione facile animadvertet. Adde quod procedant à longè diversa causa, nempe à sanguinis nimia tenuitate, sanguine, vel aliquo excrementitio humore illi permixto, qui à calore effervescentis & agitatus, à facultate expultrice foras ad cutem propellitur, in eaque efflorescit.

XVI. Dico, fere semper rotunda, quia vidimus etiam maculas lividas & nigras oblongas, quasi calamo scriptorio inscriptas; alias quoque majores, quasi flagellis inductas; nonnullas etiam maximas; totum aliquod membrum, vel magnam ejusdem partem occupantes. Sic etiam scribit Julius Palmarius, lib. de peste, cap. 24: se multoties vidisse maculas, quæ universum brachium, aut crus totum, aut faciem, aut aliam maximam partem occupabant.

XVII. Tumores in emunctoriis frequentissimi, & inter omnia symptomata pestis certiora signa erant; sicut etiam carbunculi & exanthemata, ac proinde vulgares his tribus indiderunt nomen pestis.

XVIII. Carbunculi ut plurimum ab exili pustula oriebantur; magnitudinis milii seminis; interdum à pluribus hujusmodi pustulis simul junctis: his sensim incrementibus pars subitus emoriebatur quasi cauterio inusta; & pravum colorem, vel nigrum, vel cinereum acquirebat, in ejusque summitate ut plurimum omnes vesiculæ

in unam ichore nigricante plenam coibant. Caro in circuitu magnopere inflammabatur. Hi carbunculi in aliis erant parvi, in aliis magni: imò non semel vidimus illos, instar sphaceli, mortificationis labem brevissimo tempore latissimè in vicinas partes extendisse.

XIX. Licet venenum pestilens nullarum non

corporis partium actiones interturbare, omniaque mala inducere possit, tamen non eadem mala omnes affligunt, nec in omnibus pestilentibus constitutionibus eadem apparent; imò vix duos eodem contagio infestos, planè eadem symptomata pati videas. Hujus diversitatis rationem dedimus annotatione secunda præcedente.

## CAPUT VIII.

### DE PESTILENTIÆ CAUSIS.



Mnis vera pestis, qualis etiam fuit hæc Noviomagensis, tres causas habet, quarum secunda à prima, tertia à secunda descendit. Prima & primaria causa est justissima summi Dei (1.) ira, quam turpissimæ ac teterimæ exhalationes è stagnis fœdisque peccatorum nostrorum cloacis sursum elatæ provocarunt & incenderunt. Ab hac causa promanat illud τὸ Θεῶν (2.) quod pesti inesse animadvertitur, cujus etiam Hippocrates sæpe mentionem facit.

Secunda causa, quæ à prima originem sumit, est malignissimum, occultum (3.) venenosum, & naturæ humanæ insensibilem pestilens seminarium, coelitus (4.) demissum, quod minima quantitate aëri infusum, instar subtilis cujusdam fermenti sese per aërem dilatat, eumque inquinat, (5.) ac plurimis ejus particulis, multis in locis seu regionibus, similem venenositatis labem imprimit, per cujus communionem non pluribus tantum unius loci incolis, sed pluribus etiam orbis terrarum partibus pestis plerumque communicatur. Hujus autem causæ, scilicet venenatæ inquisitionis aëris, origo, non ab astrorum aliorumve corporum cœlestium variis motibus & influentiis, non à tempestatum certis constitutionibus, non à sublunarium putredine (6.) aut certa quadam elementorum mistione, non à pravis exhalationibus, sed ab illo *Divino*, seu primo immisso seminario resultat ac dependet. Huic tamen inquisitioni aëris plerumque variæ aliæ causæ adjutrices seu secundariæ, partim per corruptiones à dicta inquisitione introductas genitæ, partim aliunde advenientes, adjungi solent, quibus non primariò pestis inducitur, sed humorum alterationes, putredines, aliæque præparationes ad pestem suscipiendam generantur. Quales causas secundarias (7.) etiam in hac peste varias habuimus; nempe malignas siderum (8.) conjunctiones, (si modò malignæ dentur, & sidera in inferiora quicquam operentur) aëris cælique maximos ardores & squallores, ventos meridionales, & sæpe fere nullos ventos manifestos; siccitates diuturnas, hyemis & veris tepores, putridarum rerum fœdissimas exhalationes, aliasque similes.

Tertia causa, quæ à secunda procedit, est contagium, quod est morbi primò soboles, postea causa. Dico *Soboles*, quia non existit nisi post morbum primò inductum; nam qui primus peste corruptus fuit, illam à contagio non contraxit, sed post semel factum morbum, exivit contagium, quod similem quoque morbum multis aliis communicare potuit. De quo plura capite decimo sequente.

His tribus pestilentiae causis nonnulli etiam adjungi volunt animi emotiones (9.) iram, terrorem, metum, luctum, repentinam lætitiā, & tristem (10.) imaginationem. Sed cum hi motus nihil maligni in se contineant, & solummodo per accidens spirituum commotione corpora disponant ad facilius recipiendum pestilentem labem, eamque ad cor deferant, nullo modo causæ pestem efficientes, sed tantum secundariæ seu præparatoriæ ad pestem recipiendam, dici possunt.

ANNO-

## ANNOTATIONES.

I. **D**E causis pestis maximè ardua inter Medicos quæstio movetur. In eo conveniunt omnes, illam excitari à cœca quadam pernecie, & inexplicabili aëris labe. Sed unde labes illa emerferit, quomodo aër tantum vitium contraxerit, quid hoc elementum inquinaverit, de eo dubitant, & in eo inveniendolaborant omnes. Atque hæc difficultas doctissimorum ingenia adeo torfit, & tam diversas opiniones, veritatis specie omnes exornatas, extorsit, ut ex eorum scriptis simul collatis, cum quo sentiendum sit, gravissimè judicari queat. Alii hanc labem à Deo præternaturaliter immitti, alii à malignis siderum influentiis induci, alii per incantamenta & Diabolicas artes excitari, alii à tempestatum certis constitutionibus produci, alii à putredine, tetrisque ac venenatis exhalationibus generari existimant. Quas omnes opiniones Paracelsistæ simul colligentes, quinque pestis causas, & ab illis quinque ejusdem differentias, statuunt: Dicentes, pestem generari, 1. Ab ente Deali, cum solo Dei nutu inducitur, ad coercenda hominum flagitia. 2. Ab ente astrali, cum à maleficis siderum aspectibus, configurationibus, conjunctionibus, & oppositionibus illa labes in aëre gignitur. 3. Ab ente Magico, cum veneficorum & incantatorum operâ provocatur. 4. Ab ente veneni, cum per inspirationem halituum venenatorum aër inficitur. 5. Ab ente Naturæ, cum oritur ex interna maligna humorum putredine. Harum quinque causarum nonnulli secundam & tertiam rejiciunt, ac quartam cum quinta conjungunt, sicque duas pestis species agnoscunt, unam ab ente Deali, alteram ab ente Naturæ. Nos verò etiam nullam ab ente Naturæ pestis causam agnoscimus, sed omnem veram pestem à solo ente Deali procedere dicimus, & jam latius probabimus.

Omnis pestis primam causam in supplicium à Deo irato immitti, ab omni ævo creditum fuit, tam apud Gentiles, quam apud Judæos & Christianos. Plato in *Phad.* pestilentia causam Diis attributam fuisse docet. Idem etiam testantur, & historiis confirmant, Plutarchus, in *vita Romuli*, & Titus Livius, *Hist. lib. 11. cap. 45.* nec non Homerus, antiquissimus scriptor, qui ob filiam Chrysis stupratam, læsum Apollinis numen, telo pestifero in Græcos sævisse scribit. Eodem sensu etiam Ovidius Phœbum una cum sorore filios & filias Niobes interfecisse dicit. Plin. *l. 7. c. 28.* refert, ob præcipitatum è Capitolio Manlium, Diis Capitolinis indignatis, sævam pestem Romanos adortam esse. Hippocrates pestilentis contagii labem τὸ Θεῶν ἢ continere docet: & *lib. de nat. mulieb.* dicit, maximè divinam in hominibus morborum causam esse, ac propterea curationem τὸν Θεῶν inchoari debere. Avenzoar, 3. *Theisir.* ait, pestem procedere ab illo qui est summæ & ultimæ scientiæ. Hinc olim quoque, teste Galeno, in pestiferis constitutio-

nibus semper consulebant deos de remediis: quia ut morbi causam ab iis descendisse pro certo habebant, sic etiam causæ ablationem & remedia ab iisdem petebant; atque sic ille ipse Galenus, *lib. de propriis lib.* Fatetur se votum Æsculapio fecisse, quo à pestifero mortaliq; apostemate liberatus est. Etiam hodie Gentiles confugiunt ad sua idola, ut testantur illi qui Indias perlustrant.

Præter hæc & innumera alia Gentilium testimonia, Sacræ literæ quoque plus satis confirmant, pestis primam causam semper à summo Deo, ad hominum punitionem, cœlitus descendere atque immitti. Exodi, *cap. 5. vers. 3:* *Sacrificemus Iehova Deo nostro, ne forte occurrat nobis peste & gladio.* Ibidem, *cap. 9. vers. 15:* *Nunc extendens manum percutiam te, & populum tuum peste, peribisque de terra.* Levitici, *cap. 26:* *Ait Dominus, si non audieritis me, nec feceritis omnia mandata mea, &c. tandem addit: cumque confugeritis in urbes, mittam pestilentiam in medio vestri.* Numeri, *cap. 16. vers. 46:* postquam 14700 peste occubuisse, dixit Moyses ad Aaron, *Jam egressa est ira à Domino, & plaga savire capit.* Ibidem, *cap. 25. vers. 9.* leguntur 24000 homines peste extincti. Deuteronomii, *28. vers. 21 & 22:* *Adjunget tibi Dominus pestilentiam, donec consumat te de terra: percutiet te Dominus tumore, febre, & frigore; ardore & aestu, & aëre corrupto ac rubigine.* Jeremiæ, *cap. 14. vers. 12:* *Quoniam gladio, fame & peste consumam eos.* Ibid. *c. 21. vers. 6:* *Percutiam inhabitatores hujus civitatis, ita ut homines & bestia magna peste sint moritura.* Ibidem, *cap. 29. vers. 17, 18:* *Ecce mittam in eos famem, gladium & pestem, & persequar eos in fame, gladio & peste.* Ibidem *cap. 51. vers. 1:* *Ecce ego suscitabo super Babylonem quasi ventum pestilentem.* Ezechiel. *cap. 5. vers. 12:* *Non parcat oculus meus, & non miserebor, tertia pars tui peste morietur.* Ibidem, *cap. 14. vers. 19:* *Si autem pestilentiam immiserò super terram, & effudero indignationem meam super eam.* 2 Regum, *cap. 24. vers. 15:* *Immisit Dominus pestilentiam in Israel, à mane usque ad tempus constitutum, & mortui sunt ex populo à Dan usque ad Bersabee septuaginta millia virorum.* Habacuc, *3. vers. 5:* *Ante faciem Dei ambulabat pestis, & carbunculus ante pedes ejus procedebat.* His Sacræ paginæ testimoniis addi possunt duæ memorabiles historiæ, quarum primam describit Acmon, *lib. 5. de gestis Francorum, cap. 16,* nempe filiis patrem Ludovicum. Principem pium ac religiosum, injustè persequentibus, Deum hoc factò tantopere infensum & irritatum fuisse, ut immissa peste undecim dierum spatio totam fere Gallia Nobilitatem extinxerit. Alteram describit Eusebius, *Histor. Eccl. lib. 9. cap. 8.* de violentissima peste, quæ in omnes indifferenter idololatrias & paganos sævit, Christianorum ecclesia planè intacta. Qualem historiam quoque refert Orosius, *lib. 7.* His adjungatur auctoritas Theophylacti, in *Matth. cap. 24.*

cap. 24. ita scribentis : *Nunquam aliunde pestis quam à Deo provenit.* Ex quibus omnibus causam pestis divinam esse, & præternaturaliter à summo Deo immitti, nemo non videt. Quod ipsum quoque docet horrendum illud præfagium adventus Christi, *Matthæi cap. 24. Erunt pestes; & famines, & terra motus per loca.* Etiam liber Apocalypseos sanctis Angelis (tanquam divinæ voluntatis executoribus) pestis illationem attribuit, non verò ullis causis naturalibus. Præterea hæcenus quoque ab omnibus Christianis idem illud semper creditum fuit : hinc enim est, quod Magistratus in pestilenti constitutione publicas supplicationes indicere soleant, ut communibus omnium precibus, jejuniis, & elemosynis divinum Numen placari, & Angeli percutientis gladius à populo averti possit.

His ita positis, ut rei ipsius veritas clarius elucescat, etiam aliorum opinionum fundamenta perscrutanda sunt. In eum finem hic problemata examinanda proponemus :

1. *An pestis causa de novo à Deo generetur.*
2. *An ab astris producat.*
3. *An incantamentis & diabolicis artibus excitari queat.*
4. *An ex putredine & tetræ exhalationibus resultet.*
5. *An à tempestatum certis constitutionibus procedat.*
6. *An veneficiis induci possit.*

### Problema I.

Primi problematis negativam defendit Johannes Pistorius, *lib. de Peste*, qui dicit in prima mundi creatione Deum omnia creasse, quæ ad rerum omnium sustentationem & lapsum necessaria erant, ac postea destitisse à creatione : atque hinc concludit omnium rerum fata certo & irrevocabili ordine continuè volvi, nec quidquam de novo ad sanitatem vel morbos inducendos à summo Deo creari. Pistorii sententiam probat Platerus, qui, *prax. tract. 2. cap. 2.* statuit pestilens venenum ab initio mundi fuisse creatum : neque unquam pestem primitus generari, sed eandem solummodo propagari per contagium, quod vel aliquibus in locis in fomite longo tempore delituit, vel ab aliis regionibus peste infectis (nunquam enim mundum à peste ita liberum esse credit, quin semper alicubi grassetur) allatum est per ventos vel fomites. Illud ipsum, *cent. quest. posthum. quest. 42.* secundo pronunciat; his verbis : *Puto pestilens hoc venenum originem suam in mundi origine habuisse, de corpore in corpus per contagium dispergi; de novo non creari vel produci, quamvis concedam certum certorum astrorum concursum, & hinc certam aëris mutationem factam, hoc virus, cujus naturam nescimus, at effectus videmus diversos & horrendos, quod alias delitesceret, in actum producere posse : sed cum nihil agat nisi in proportionatum objectum, quamnam hæc objecti sit dispositio, ut lubenter edoceri cupio, sic me nescire prompte fateor.* Huic sententiæ quoque subscribunt, Joan-

nes Magirus, *parbol. lib. 2. sect. 7. cap. 6.* & Matthias Untzerus, *de lue pest. lib. 1. cap. 15.* Verum hanc opinionem à veritate prorsus alienam esse, jam demonstrabimus. Primo enim inde necessariò concluditur, Deum in prima mundi creatione fuisse auctorem multorum malorum, utpote qui tunc expressè multa condidisset ad lapsum & interitum generis humani. Quod tamen repugnat Sacro textui, *Genesis cap. 1. Viditque Deus cuncta quæ fecerat, & erat valde bona. Secundo*, inde sequitur, semen pestilens semel natum deinceps intrasse in naturam, nec quidem ut maledictionis cuiuspiam, sed ut creationis prolem, postmodum suam continuare generationem. Quæ conclusio è directo repugnat verbo Divino, quod pestilentiam tanquam maledictionis & divinæ indignationis plagam à summo Deo ad deputata loca immitti docet : sicut illud paulo ante ex plurimis Bibliorum sacrorum locis probavimus. Tertio, dicimus, Deum, postquam mundum & omnia quæ in eo sunt creasset, sexta quidem die quievisse, ut dicit textus Sacer, id est, plures mundos creare noluisse, sed interim tamen creationis potestatem non deposuisse, ita ut ipsi non liceret in mundo jam creato aliquid immutare, & de novo addere, aut creare, vel ante creatum auferre seu annihilare. Hoc quippe certissimum est, quamquam rerum omnium Conditor cælo & elementis certas ac definitas vires dederit, & leges indixerit, quibus mandas hic administraretur, illum tamen nullis legibus addictum, imò legis auctorem, omnibus præesse, & quas condidit ordinatas vires ac leges, pro beneplacito suo immutare, & novas addere : Sicut olim Solis ordinatum cursum impedivisse, eamque stitisse legimus, ut Josua hostes suos prosequi posset : sicut etiam aquarum ordinatum cursum mutavit, easque in Mari Rubro instar murorum stitit, ut Israëlitis ex Ægypto exitus, & per mare transitus daretur. Ita quoque non semel ad mortalium punitionem varias plagas in mundum hunc extra omnes naturæ leges ac ordines demisit. Sic quadraginta dierum pluvia totum terrarum orbem submersit : Azotius, propter Arcam Testamenti captam, morbum hæmorrhoidum imposuit : sulphur & ignem super Sodomam & Gomorram depluit : aliaque similia multoties peregit, quorum causæ in prima mundi creatione creatæ non fuerunt, sed quibus ipse, naturæ Creator & rector, naturæ leges immutavit. Fortè quis dicet, hæc plagæ non sunt de novo creatæ, sed aliunde solummodo advocatæ, & in designata loca immissæ : nam, ex gr. aqua creata fuit ante Diluvium, sulphur ante Sodomam, ignis ante Gomorram, rana ante Ægyptum, &c. hæc enim à prima mundi creatione originem suam agnoscunt. Addam igitur plura an uxor Lothi in prima creatione etiam creata fuit statua salis ? an baculus Moysis serpens ? an aqua Cananæa vinum ? an calcei Israëlitarum tam fortes ut quadraginta annis non fuerint attriti ? extiterunt quidem in mundo colles salini ante natam uxorem Lothi, serpentes ante natum Moysen, vinum ante

ante nuptias Cananæas; sed tamen uxor Lothi, baculus Moysis, aqua Cananæa; talia nec erant in principio, nec ulla naturæ opera fieri potuissent, nec unquam facta fuissent, nisi summo Deo placuisset huiusmodi novam immutationem seu creationem, pro omnipotentia sua de novo efficere. Quid mirum igitur si etiam pestis seminaria nonnunquam de novo producat, & in aërem præternaturaliter dimittat ad hominum punitionem, quando scelorum nostrorum infamia id postulat? eaque rursus, poenâ sufficienter illatâ extinguat? certè maximus ille Opifex, qui Naturæ concessit in particularibus subjectis nova venena producere posse, (qualia sunt illa quæ ex sanguine menstruo & semine corrupto, aliorumque multorum tetra putredine generantur, ut & venenum rabiosum canis rabidi, &c.) sibi etiam illam potestatem reservavit, ut morbificum aliquod venenum ad punitionem mortalium, in & ex ipso aëre generare possit, quando celsissimæ ipsius Majestati sic placuerit: juxta illud quod populo Israëlítico dicit, *Deuteronomii cap. 28: Nisi custodieris & feceris omnia verba legis hujus, augebit Dominus plagas tuas, & plagas seminis tui, plagas magnas & perseverantes, infirmitates pessimas & perpetuas, & convertet in te omnes afflictiones Ægypti, quas timuisti, & adhærebunt tibi: insuper universos languores & plagas quæ non sunt scriptæ in volumine legis.* Verbo autem Dei summa est potestas, qui crescentibus nostris impietatibus, etiam poenas crescere facit, inter quas haud minimum locum tenent morbi; quorum magna series, majoribus nostris planè ignota, in hoc nostrum ulcerosum seculum de novo irrupit, quorum multorum causas non creatas in prima mundi creatione, sed ob multam peccatorum nostrorum accumulationem, à summo Deo de novo productas esse, certum est. Tales novi & antea incogniti morbi sunt: *Sudor Anglicus* seu *Britannicus*, qui primo visus est anno 1436. *Lues Venerea*, quæ anno 1494, in obsidione Neapolis primum initium in Christianismo sumpsit. *Scorbutus*, qui anno 1556, in nostris oris maritimis primo observatus fuit. *Morbus Ungaricus*, qui anno 1566 mundum intrasse dicitur. *Bruno Gallicus*, sive *Nova Moravia-lues*, quem annus 1577 peperit. *Morbus novus Lunenburgensis*, qui anno 1581 primo spargi cœpit. *Febris castrensis insolita & contagiosa*, quæ non ante multos annos visa est: alique plures. Si aliorum venenatorum morborum (quales sunt *Sudor Anglicus*, *Lues Venerea*, &c.) venenum de novo à Deo genitum sit, quis venenum pestilens de novo à Deo generari posse negabit? Non est quod quispiam hic objiciat: si Deus causam pestis de novo præternaturaliter immitteret & generaret, illum fore magnorum malorum causam. Illud nos negamus: Deus enim nec vult, nec desiderat mortem peccatorum, sed ut convertantur & vivant: atque hinc non immittit pestem ad perditionem mortalium, sed ad salutem plurimorum, ut cum isto flagello multos quidem justè castiget, verum maximam partem, poenæ & furoris divini metu, à

peccatis avertat, & ad salutis viam impellat; qui alioqui omnes ad æternæ perditionis barathrum se facile devolvissent. Eodem modo sicut Magistratus facit, qui homicidas & latrones capite plectit, non eo solo finè ut ipsos justè castiget, sed magis ut per illam poenam multos alios ab ejusmodi delictis avertat, & ad virtutis viam, metu poenæ & dedecoris, impellat. Si in prima mundi creatione Deus expressè ad humani generis interuccionem pestilens venenum condidisset, tunc longè aliter se res haberet, haud secus ac si Magistratus ad civium perniciem foveas in urbe foderet; hoc enim non fieret ad bonum finem, in poenam delinquentium, sed fieret ex crudelitate & tyrannide in malum finem, & plurimorum infontium perditionem. Atque ita ex omnibus his satis liquet, summum Deum pro omnipotenti sua potestate, pestilens venenum de novo in sub-lunarem mundum introducere, quando peccatorum numerus poenam exigit; idque ex contagio aut fomite non suscitari. Hujus rei veritatem, præter modò dicta, confirmat ipsa ratio. Nam si pestis à contagio semper excitaretur, fieret vel à contagio in aëre hærente, vel in fomite latente. Non ab illo, quia venti & radii solares aëris squalores purificant & continuè expurgant, ac inquinamenta absumunt, ita ut noxia illa contagiosa miasmata longo tempore in aëre conservari, multo minus integris viribus ad longinqua loca deferri nequeant. Non ab hoc, quia si pestis produceretur à solo contagio in fomite asservato, necessariò, cum urbem vel regionem aliquam invaderet, ibi perpetuam sedem figeret: nam in constitutione pestilenti semper innumeri fomites in ædibus infectis asservantur, ex quibus commotis identidem varii contagio insciuntur, scilicet quo usque pestis in vigore est: sed declinante vigore, etiam imminuitur infectio; ac denique cessante peste, fomites passim commoventur & excutuntur, vel sine, vel cum valde exigua noxa. Si autem ex tali fomite identidem nova pestis epidemia produceretur, tunc in illis locis semel infectis duraret pestis in perpetuum. Ita ut tandem concludendo dicamus, à fomitis contagio alios infici, quousque fomes recens, & pestis in vigore est: sed extra pestilentem constitutionem à fomite diu asservato, aut fortè nonnunquam unum atque alterum, vel saltem paucissimos, pestem contrahere posse, à contagio scilicet quod isti fomiti jam commoto vel excusso inhærebat. Nam hoc in nostra crudeli peste satis diligenter observavi, quod desinente peste, contagium in quocunque fomite latens, anni spatio penitus emoriatur: neminem enim in tota civitate, in qua propter maximam pestem fomites innumeri fuisse debuerunt postquam pestis per annum siluerat, à fomite infectum fuisse, aut quidquam mali contraxisse, audiui, quantumvis ubique domus expurgarentur, suppellectilia lanea, lineæ, aliæ qualiacunque excuterentur, vestes peste mortuorum induerentur, nullusque fomitis locus intactus relinqueretur. Quod ipsum quoque observavimus in illa peste quæ Montfortum



anno 1637 gravissimè afflixit; ut & in nupera peste Ultrajectina, quæ annis 1655 & 1656 grassata est. Quæ observationes faciunt ut non admodum magnam fidem habeam iis, qui scribunt pestem aliquam excitatam esse à contagio è fomite, post 12, 20, vel 30 annos in lucem producto, erumpente: sed posito, à tali fomite fortè unum vel alterum ex proximè astantibus infici, malum tamen non longè proserpet ulterius; (vide exempla lib. 4. *Hist. 112, 119.*) nec epidemiam pestem generabit, pestis nomine verè dignam, utpote cujus primum seminarium seu causa prima à summo Deo, non concurrente natura, præternaturaliter in aëre gignitur, & genita, instar subtilis fermenti, se mox ulterius expandit. Hanc nostram sententiam etiam acriter & bene defendit Eustachius Rudius, *art. med. lib. 3. cap. 30.* Hic fortè quis objiciet nuperam pestem Amsterodamensem, quæ à fomite ex Algeria Turcarum, ut & Smyrna allato, circa Autumnum anni 1663 vigere cœpit, ac brevi majora incrementa sumpsit, aliisque circumjacentibus urbibus & pagis communicata fuit. Respondeo, illud contagium per solum fomitem eò non fuisse transportatum, sed imprimis per ipsos peste infectos & ægrotantes, ex Barbaria & Græcia (quibus in locis pestis acerrimè grassabatur) huc delatos, qui suo contagio nautas & peregrinos in navibus infecerunt, cumque tandem omnes Amsterodamum venirent, atque in diversis urbis partibus hospitium sumerent, plurimis in locis suo contagio infecerunt cives suos hospites, sicque propagatum est malum per totam urbem, & sequenti æstate, per infectos ad vicinas urbes inde commeantes, etiam Lugduno-Batavorum, Hagæ-Comitis, Dordraci, pluribusque oppidis & pagis fuit communicatum; idque per contagium quidem, sed cujus tamen primum seminarium Dei nutu aëri fuit impressum, in pœnam scelestissimorum prædatorum Algeriensium, cujus etiam aliqua pars, ad nostrorum peccatorum punitionem, nobis per contagium fuit transmissa, & mediante putido fœtore, Amsterodamo non modò per æstivalem æstum familiari, verum etiam propter dilatata eo tempore urbis pomœria, hincque magnam stagnorum & cloacarum commotionem, multum adaucto, plurimis communicata. Sed quis scit, an non quoque nostro aëri antea aliquid pestilens seminarii fuerit immissum? nam diu antè adventum istarum navium contagium advehentium, pestis crudeliter grassabatur Heusdæ, multisque in pagis, quæ tamen ab isto forinsecus allato contagio processisse non potuit. Denique, posito casu, mercimoniam in antedictis navibus contenta, fuisse fomites contagii, hoc tamen non probat pestem semper excitari à contagio in aëre vel fomite asservato, (ut vult Platerus;) verum si fomes recens fuerit, sicut in illis navibus (quæ brevi tempore ex Barbaria & Græcia huc trajecerant) & acre contagium vigente peste fomiti immissum, tunc illud fieri posse concedimus: sed quod contagium per multos annos in fomite asservari, & postea ex eo

excussum pestem epidemiam excitare possit, hoc negamus; nam, ut modò dictum, anni spatio emoritur.

### Problema II.

Secundi problematis affirmativam partem multi gravissimi Philosophi ac Medici cum Astrologis defendunt, docentes pestilentiam causam generari à sola vi corporum cælestium, quæ pro variis aspectibus, conjunctionibus, oppositionibus, & configurationibus, ita hæc inferiora vires suas diversis modis exerunt. Hanc opinionem probare nituntur rationibus, & auctoritatibus præstantissimorum virorum. Receptissimum, est, inquit, Peripateticorum axioma, *Cælum, ut causam universalem, cum particularibus causis concurrere.* Hinc ait Philosophus, *Sol & luna generant hominem.* At si cælum sit auctor generationis, erit etiam corruptionis: nam *Corruptio unius est generatio alterius*, hæcque eadem habent principia. Unde cælum, tanquam causa universalis, huic sublunari mundo non beneficia tantum, sed quoque maleficia, non salubria tantum ad vitam, sed etiam venenata ad mortem imperitur. Operationes autem cœli seu astrorum in corpora hæc inferiora maximas esse, varia docent, imprimis verò Lunæ effectus, qui omnibus maximè cogniti sunt, in fluxu & refluxu maris, in plantationibus, seminationibus, lignorum cæssionibus, etiam in nonnullis morbis, ut hydrope, epilepsia, aliisque, qui secundum varium Lunæ motum, modò hoc tempore ingravescere, modò alio leniri solent. Ex variis quoque siderum motibus tempestates, pluvias, calores, frigiditates, & similia prævideri posse, Astrologorum scripta non tantum docent, sed ipse quoque eventus demonstrat. Ex iis etiam Hippocrates alique Medici varios morbos præviderunt & prædixerunt. Tradunt etiam Philosophi astra esse primarias causas papilionum, muscarum, locustarum, ranarum, murium, aliorumque ex putri materia ortorum animalium, ut & plurimorum morborum, tam cum, quam sine putredine, corpora humana infestantium. Cum autem tales astrorum in hæc inferiora virtutes, tales in morbis prædictiones, tales putredinum excitationes, tales animalium quorundam ac morborum generationes notissimæ sint, quis dubitabit inter alios morbos etiam pestem ab astrorum hoc illove concursu produci? Probant hanc opinionem maximi quoque Philosophi & Medici, ut & ipsa experientia. Aristoteles, 1. *Meteor. cap. 2.* dicit, mundum hunc inferiorem superioribus motibus esse contiguum, & omnem ejus virtutem inde regi ac gubernari; & tam omnem corruptionem, quam generationem à cœlo provenire, necessarium esse. Idem alibi dicit, coitione Jovis & Saturni, regum principatus deletum iri, sæviturosque morbos pestilentes. Alexander Aphrodisæus, 2. problem. 88. inquit: *Aër siderum pestilenti defluxio vitatur.* Avicenna, primo quarti, ubi tractat de pestilentia, & sen. 3. primi, doct. 5. cap. 1. astra, pro diversa in-



ter se missione, in corpora subcoelestia, & in ipsum aërem qualitates occultas, seu benignas, seu maleficas imprimere, hincque etiam pestis causam derivari, clarissime demonstrat. Vallesius de Taranta, in *Philos. pharmas. lib. 7. cap. 16.* & Fernelius, de *febr. cap. 17.* nec non *lib. de abdit. cap. 12.* causas quoque pestilentiae figuris atque influxibus coelestibus adscribunt, cum quibus consentit Ludovicus Mercatus, de *febr. lib. 7. cap. de febr. pestilenti.* Albertus Magnus dicit, Jovis cum Marte coitum bella & pestes excitare. Duncanus Liddellius, *lib. 3. de febr. cap. 2.* tradit, adspectum Saturni & Martis, aut Jovis, potissimum in signis humanis, vel in signo Scorpii, esse insanitum, & pestis causam. Ex conjunctione Saturni, Jovis, & Martis generatam pestem describit Guido de Chauliaco. Aliam ex Saturni & Jovis conjunctione ortam, enarrant Marcellus Ficinus, & Josephus Quercetanus. Astrologi præter siderum conjunctiones, etiam à Solis & Lunæ eclipsibus, cometis, aliisque meteoris, & portentis, pestem, famem ac bella produci ac præfagiri tradunt. Sic ab eclipsibus exortas pestes referunt Georgius Tholosanus, *lib. 2. de Rep. cap. 7.* Michael Saxo, *Chronic. in vita Constantini Secundi Imp. Matthias Mechonius, lib. 3. Chronic. cap. 26.* A cometis inductas pestes describunt Andreas Angelus, *annal. lib. 3.* Crusius, in *annal. Trichemius, in Chronicis, & Porphyrius.* Inter neotericos Sennertus, *lib. 4. de febr. cap. 2.* doctè & latè probat, non supernaturaliter, sed sola astrorum vi pestis causam generari. Idem quoque docent Matthæus Zeisius, in *orat. de caus. & period. pestis;* Quercetanus in *Alex. & Untzerus, de pest. lib. 1.* qui tamen duo posteriores pestiferam vim astris supernaturaliter à Deo tempore pestilenti attribui credunt.

Nonne munitissima & inexpugnabilia videntur omnia hæc argumenta? & tamen illa omnia, quantumvis valida, & gravissimorum virorum auctoritatibus munita, facili negotio ab ipsa Sacra scriptura evertuntur, quæ docet, *Genes. cap. 1.* stellas creatas esse in signa, & tempora, & dies, & annos, non verò in malorum & mortis causas. Profectò in Paganismum (inquit Joannes ab Helmont) impinget, quicumque stellarum officia ac destinationes supra Textum Sacrum extendere audebit. Nam *Psalm. 148.* Deus dicitur præceptum posuisse cælo, quod non præteribit. A transgressu Adami nulla maledictio vel labes cælo infusa legitur, sicut terræ, quæ spinas & tribulos profert, & propter peccatum remansit mortis feudum. *Cæle enarrant gloriam Dei, & opera manuum Domini annunciant firmamentum.* Cæli ergo futura annunciant, non verò generant, nec venenosos morbos, nec bella inducunt: per motum suum naturalem vicissitudines temporum faciunt, sed nihil mali producant. Liber Apocalypseos etiam nullam vim punitivam cælis attribuit, sed eandem Angelis adscribit. Ad hæc ipsam pestem inferendi potentiam Angelis à summo Deo mandatum fuisse, legimus, 1 *Paralipom. cap. 21. vers. 12.* Iesaiæ *cap. 37. vers. 36.* Ezech. *cap. 9. vers. 3, 4.*

aliisque locis. Imò etiam sæpe non per Angelos (multo minus per astra) sed ipsemet pestem immisit, cuius rei vide citata loca in *initio annot. 1. hujus cap.* Cum itaque cæli à summo Deo non sint ordinati ad plagarum illationem, neque in se continent mortem, bella, venena, pestem, non poterunt quoque huiusmodi plagas super nos effundere; nam dare nequeunt quod non habent, nec continent, nec generant, non enim nuncius bellorum præco eorum causa est. Hinc quoque Origenes, 4. *tract. super Matth.* acriter eos damnat, qui stellas affirmant maleficas, cum nullam stellarum Deus Opt. Max. creaverit aliquid malefici in se continentem. Præter Sacras literas, ipsa quoque ratio prædictæ opinioni repugnat. 1. Cum terra respectu cælorum sit minimi puncti instar, & astra multa millena milliaria à terra distent, ac generalissimos influxus habeant, non poterunt malignæ ac pestilentes irradiationes inde defluere ad certas quasdam regiones vel urbes, (sicut plerumque non per totum mundum simul, sed in certis quibusdam civitatibus, vel regionibus pestem grassari videmus;) sed debebunt ad omnes mundi, quem quotidie ambiunt, angulos, vel saltem ad dimidiam mundi partem extendi; nisi fortè quispiam tubum à cælo ad nos usque per aërem directum supponat, per quem astra huiusmodi pestifera inquinamenta nonnunquam ad determinata loca ejaculentur. 2. Quia cum omnes regiones aëtorum influentiis expositæ sint, non poterunt non omnes esse pestis tributariæ. Contra verò Trigautius refert, in Sinarum toto Imperio pestem insolitam, & nunquam visam esse. Sic etiam Scaliger tradit illam Æthiopiarum oram, quæ Nigir accolit fluvium, semper pestis expertem esse: quibus tamen idem Saturnus, Jupiter, Mars, aliaque sidera eadem sunt quæ aliis regionibus. 3. Si ab aëtorum conjunctione induceretur pestis, ut conjunctio illa, sic & pestis brevissimo tempore duraret: nam cessante causa, cessaret simul etiam effectus. 4. Quia si astra venena generare & depluere possent, unica maligna coitione tantum veneni generaretur, quo totum mortalium genus penitus extingueretur. 5. Quia si astra generarent venena, forent perniciofa; atqui Deus illa creavit absque omni perniciæ, ut inferiora hæc benigniter continerent & foverent. Hic si fortè quispiam objiciat, astra per se quidem bona esse, sed pestilens venenum per accidens ab iis produci, quatenus hoc illove contrario modo inter se commissa, propter contrarias inter se discordes vires, casu aliquid naturæ inimicum generant. Respondeo, ob tempestatum mutationes (quarum astra sunt signa, non causæ) ad calidum, frigidum, humidum, vel siccum, fortè humorum alterationes vel putredines, hincque morbos quosdam naturales per accidens induci, nullum verò venenum pestilens (quod in nulla humorum putredine consistit) nec à tempestatibus, nec ab astris earum signis, unquam de novo generari. Quantum ad Peripateticorum axioma, *Cælum, ut causam universalem, concurrere cum causis particularibus:* illud in multis falsum erit, nisi per cælum intelligant ipsum Deum; nam alio-

alioqui etiam ipsa miracula forent naturalia. Sic etiam non satis propriè dicitur, *Sol & homo generant hominem*; nisi per *Solem* (quem multi Gentiles pro vero Deo coluerunt) intelligatur ipse Deus. Malè etiam Lunæ operationes citantur in fluxu & refluxu maris, &c. in quas res nulla Lunæ operatio incidit, cum aquæ marinæ, succi, & humores sponte naturaliter moveantur eodem modo & tempore quo Luna, atque illorum motuum Luna tantum signum sit, non verò causa efficiens. *Tempestatum* verò & quorundam morborum prædictiones è siderum motibus prædici posse concedimus, nempe tanquam è signis, non verò tanquam è causis efficientibus: nam Deus ab initio mundi omnium quæ futuræ erant tempestatum mutationes præscripsit, iisque talem ordinem motus qualem astris dedit; ita ut astra harum mutationum signa esse possint, quia naturaliter simul cum tempestatibus moventur. *Negamus* quoque sidera esse causas papilionum, muscarum, &c. nam hæc animalcula è certa putredine oriuntur in illis locis ubi putredinis occasio est, nempe ubi sunt cadavera animalium putrescentia, fructus facile corruptibiles, aquæ paludosæ, cloacæ, aliaque fœdam corruptionem suscipientia. Si ab astris talia insecta primariò generarentur, totus mundi circuitus ab iisdem occuparetur, quia astra generalissimos dicuntur habere influxus, & mundum ambiunt: verum experientia docet illorum insectorum extraordinariam abundantiam non nisi in certis locis reperiri, iis nempe, in quibus magna est putredinis seges, alia verò loca ab iisdem esse immunia. Idem quoque de morbis intelligendum. Quantum ad Aristotelem, Avicennam, aliosque Gentiles, prædictæ opinionis patronos, non mirum est illos astris multas virtutes tribuisse, nam verum Ens entium ignorabant; ac propterea videntes necessario aliquid debere esse à quo sublunarium mutationes producerentur, astra id facere arbitrati sunt, utpote quorum motus cum tempestatum motibus convenire videbant. Aristoteles adhuc ulterius prospiciens, cum etiam astrorum ordinatos motus adhuc aliud majus principium necessario agnoscere videret, duos Angelos cœlorum rotatores affinxit. Præterea ipse quoque Aristoteles nullam maleficam vim astris adscribit; nam 9. *Metaph. cap. 10.* dicit, in his quæ sempiterna atque ætheræa sunt, neque malum, neque errorem, neque corruptionem inveniri. Plato quoque docet, cœlum & siderum concursus semper bonum in hæc inferiora influere, ab iisque non nisi conservationem & beneficium inferri. Sic quoque Averrhoës, *cali cap. 24.* inquit: *Corpora cœlestia continent elementa, conservant ipsa, & universaliter sunt ipsis quasi forma.* Rationem subjungit, *lib. 1. cal. com. 82.* Si, inquit, *adversaria nobis cœlestia corpora essent, corrumpi statim universum, consequens plane foret.* Illud ipsum ulterius confirmat, *lib. de subst. orbis*, dicens: *Vitam nobis vegetabilem, sensibilem, & animale calorem cœlestium corporum tradit.* Quibus verbis manifeste concludit, alienum esse à ratione, existimare ea, quorum bene-

ficio vivimus, nos contagio afficere. Verum hic planè mirari licet, quomodo Mercurialis, Sennerthus, aliique Christiani, viri doctissimi, qui verum Deum omnium principium agnoscunt, prædictæ cœcæ Paganorum doctrinæ tam facile subscribant, ut etiam, licet verbo Dei contradicente, à creaturis potius quam Creatore rerum principia & causas quærant, atque infontia sidera, tanquam malorum fabricatores, culpent, iisque pœnas extraordinario modo inferendi vim tribuant, quæ soli Deo propria est. Quapropter omnium horum auctoritates & rationes, in quantum Sacræ scripturæ repugnant, & astrorum operationes ad alia munia, à Deo ipsis non præscripta, distorquent, rejiciendas esse arbitramur. *Flocci* etiam faciendæ sunt historiarum ab experientia de conjunctionum astrorum effectibus annotatæ: quam frivolæ enim sint & distortæ, vel sola Guidonis historia ante citata satis docet: nam ille describit pestem furiosissimam, qualis vix unquam sævior grassata fuit, hancque dicit incepisse mense Januarii anni 1348, & gentem fuisse ex conjunctione Saturni, Jovis, & Martis; quam conjunctionem ait contigisse anno 1340, die 24. mensis Martii. Ecce quam egregiè causam illius pestis conjunctioni illorum Planetarum adscribit, quæ totis octo annis antea facta fuerat, & solummodo per exiguum temporis duraverat: quis non videat absurdissimum esse credere conjunctiones astrorum minimo tempore durantes, post tot annorum intervallum primò operationes suas edere, & tanto temporis interstitio nullum malignum signum præmittere? profecto si tales conjunctiones aliquid possent, in instanti suas operationes ederent, nam sunt tantum momentaneæ. Sic etiam multorum aliorum similes observationes, si curiosius examinentur, nullo solido fundamento inniti apparebit. Et posito, pestes oriri tempore talium conjunctionum, quis vel ex Sacris literis, vel firmis rationibus demonstrabit, illas à talibus siderum conjunctionibus produci? & rursus, posito, venenum pestilens ab istis conjunctionibus generari, unde tunc illarum pestium causæ procedent, quæ sæpe cum salutiferis (ut appellantur) astrorum conjunctionibus & influentiis inducuntur? sicut se id in gravissima peste sui temporis observasse scribit Platerus, *prax. tract. 2. cap. 2.* Frivolæ igitur sunt hujusmodi observationes, ut & illæ quæ de Solis Lunæque eclipsibus (quas ærem pravis & malignis inquinamentis conspurcare credunt) gravi stylo à quibusdam descriptæ sunt. Profecto nihil eclipses ad inductionem pestis facere, quotidiana experientia demonstrat; nam nullo non anno aliquot hujusmodi eclipses contingunt, nulla omnino peste subsequente. Huc etiam accedat Cardani observatio, qui *Subril. lib. 16.* inquit: *Ab anno 1539 usque ad annum 1551, tot Solis, & maxima, tum Luna deliquia apparuerunt, & tamen Italia ab anno 1531, ad annum præsentem 1552, nullam passæ est insignem pestis cladem, imò nec ferme vestigium.* Quantum ad cometas, meteo-ora, aliaque similia, illa etiam nunquam pestem generarunt, sed aliquando ejusdem adventantis signa

signa fuerunt; quemadmodum etiam terræ motus bella & pestem non raro prælagierunt. Fiunt autem hæc prælagia, quia Deus Opt. Max. secundum immensam suam misericordiam, antequam vult punire, solet signo dato peccatores præmonere, (sicut præmonuit Ninivitas per Prophetam Jonam) ut à sceleribus suis tandem desistant, & convertantur ac vivant, priusquam indignationem suam super illos effundat. Concedendum ergo multis divinos morbos, propter delictorum nostrorum magnitudinem, de novo à summo Deo immitti, (quales olim etiam fuerunt illi, quibus Azotios in secretiore parte natum, in Ægypto omne primogenitum, in castris Assyriorum centum & octoginta quinque hominum millia percussit) quorum primaria causa ab astris, aliisve naturalibus corruptionibus petenda non est: atque inter hos morbos pestem facile primarium esse. Quapropter, his ita habentibus, non immerito Petrus Paulus Pereda, in *Paschalis meth. med. l. 2. c. 9.* Joannes Picus Mirandula, lib. 4. *advers. Astroli Valleriola; in append. locor. com. cap. 2.* Iamblichus, lib. de *myster.* multique alii, negant influxus astrorum aërem corrumpere, & ad pestem quidquam facere posse. Averrhoës quoque dicit: *Qui credit Martem, aut aliud sidus quoquo modo dispositum nocere corporibus, aliena ab omni Philosophia credit.* Sic etiam Carolus de la Font, in Avenionensi academia Professor Medicinæ primarius, in suo *libello de Peste, dissert. 1. cap. 6.* Astrologorum opinionem acriter impugnatur, & quia illam aliis rationibus splendide refutat, dignum & necesse videtur, ut ipsa illius verba, quæ hac de re scripsit (honori enim tanti viri nihil detrahendum censeo) omnia hic adjungam. *Non corrumpitur aer, inquit, à causis superioribus, id est, illis quæ calidius influunt.* Ex cœlo enim & astris quidquam aliud, præter calorem, motum, & lucem, in hæc infusa, non dimitti, nondum probatum est; neque in astris aliud quidpiam, præter hæc tria, ab ipsis etiam Astrologis observari, aut demonstrari posse existimo. Illa autem aerem ita corrumpere nequeunt, ut venenatus evadat: neque ulla ratione probari potest; motum, calorem, aut lucem astrorum, mirabiles illos, qui ipsis tribuuntur, effectus producere posse. Itaque Astrologi hæc nunc de afferunt, non autem probant, neque explicant; quæ ratione, aut per quid astra influant: nudæ autem eorum assertioni fidem habere non possumus: Philosophia enim libertatis regnum est, in qua persuadere rationibus, non cogere licet. Et ut ad illam ipsam rem, cujus gratia Astrologorum placita hic perpendimus, deveniamus; quomodo probare possunt Astrologi pestem à conjunctione & positu quorundam planetarum in aëreis quibusdam signis pendere? statunt siquidem coitum duorum aut trium superiorum planetarum, Saturni, Jovis, & Martis, in signis aëreis aut humanis, qualia dicuntur esse Gemini, Virgo, Libra, Aquarius, & prima medietas Saturni, pestem efficere, adeo ut ex prævisis hisce conjunctionibus arseram

pestem prædicere soleant. Scio equidem supponere Astrologos Saturnum & Martem esse planetas maleficos, cum Mars sit summe calidus & siccus, Saturnus maxime frigidus, & ideo quando ambo conveniunt in signis humanis dictis, scilicet Gemini atque Virgine, quæ cum specie humana analogiam quandam & familiaritatem habere feruntur, hinc fieri ut homines per manipulos ægrotent, & commoriantur peste affecti. Verum recte dictum est, id totum ipsos supponere, cum nullo modo probent. Imprimis enim ab ipsis querere vellem, undenam hoc potuerit ipsis innotescere, Martem calidum esse, Saturnum frigidum? An scilicet, (ut præclare eos refutat clarissimus Gassendus, in sua *Meteorologia Epicuri*) quia Mars rubeus est, idcirco exurit? Saturnus quia subpallidus, idcirco valde frigefacit? O consecutionem præclaram! sic carbunculus ureret, calx refrigeraret tangentem. Quasi verò omnia quæ rubescunt necessario sint ignea; quæ pallescunt, vel potius quæ candida sunt, sint nivæ. Cur autem illos Martis ardores, non experimur per hyemem, ac præsertim donec acronychus est? cur non per æstatem Saturni rigores? an congruis magis temporibus tales probari effectus possent? An dicere valent, quomodo agnoscant gradum aliquem caloris defluere à Marte, non verò à Sole? gradum aliquem frigoris esse à Saturno, non ab alia causa? Sed demus Martem calidum, Saturnum frigidum esse, an illi propterea censendi tantopere malefici, ut dum sunt conjuncti, nos ilico venenatis sagittis petant? cur non censeatur potius Mars suo nos calore fovere? cur non Saturnus exarsuantes suo recreare frigore? Hæc Gassendus; quibus ego addo; & dum sunt conjuncti illi planetæ, cur non se mutuo contemperant, adeo ut temperatos influxus tunc temporis in terras dimittant? Sed iterum quero; cur prædictæ planetarum tantopere maleficorum conjunctiones, nihil tamen mali hominibus inferant dum in aliis signis reperiuntur, sed tum solum potissimum cum in Gemini, aut Virgine contingunt? Respondebunt ipsi, quia hæc signa humana sunt, & peculiarem analogiam ad speciem humanam habent. At insto ego, undenam cognoscant signa alia esse humana, ut Geminos, Virginem, alia ferina, ut Arietem, Taurum; alia reptilia, ut Cancrum, & Scorpionem? an quia priora hominum, altera ferarum, tertia reptilium nomina habent? quæ nomina ipsis fortuito valde, & pro mero arbitrio ab antiquis sunt indita, ut mox demonstrabo. Nimirum hæc omnia meræ suppositiones sunt, quæ non probantur, neque ullo fundamento nituntur, sicut alia pleraque Astrologorum placita: ut quando dicunt, v. gr. Leonem & Canem esse calidos, Scorpionem & Pisces esse frigidos: item eclipsin aut cometam in Ariete observatum, summorum Pontificum, aut Imperatorum, aut Regum mortem prælagiare, eo quod Aries sit primum signum quod cum vivis principibus habeat analogiam, & similia.

Enim;

„Enimvero omnes illæ suppositiones ab altera  
 „quadam generali suppositione Astrologorum de-  
 „ducuntur, nimirum, astrorum virtutem ex di-  
 „versis nominibus constellationum & planetarum  
 „ab antiquis ipsis inditis significari: ut, v. gr. Le-  
 „onis, Arietis, Tauri, Piscium, Virginis, &c.  
 „nam verisimile est, inquirunt, antiquos illos fa-  
 „pientissimos ejusmodi nomina stellis non impo-  
 „suisse, nisi prius naturâ earum perspectâ, cog-  
 „nitâve proprietatum analogiâ, ac similitudine  
 „cum iis rebus quorum nomina mutuabantur, a-  
 „deoque putandum omnia illa esse mysteriis plena,  
 „stellarumque proprietates demonstrare. Verum  
 „cum hæc astrorum doctrina ab antiquis tradita, à  
 „plerisque facile & incogitanter, absque prævio  
 „examine, accipitur, propter falsam quandam  
 „plerorumque nostri temporis hominum persuasi-  
 „onem, quæ ipsorum animis alte jam insedit,  
 „nimirum Astrologos, non homines, ut nos, sed  
 „supra humanam veluti constitutionem extitisse,  
 „neque errare unquam potuisse, ita ut, piaculum  
 „esse existiment de tantis illorum sententiis per-  
 „dubitare. Nos pro virili animorum hanc fa-  
 „scinationem excutere satagamus & totam hanc  
 „doctrinam in ipso ejus fonte inquirentes, omne  
 „mysterium pandamus. Notandum imprimis est  
 „Chaldaeos, qui primi astrorum speculatores per-  
 „hibentur, cum cælum accurate cognoscere, vi-  
 „asque omnes atque semitas, quas Sol, Luna,  
 „aliique planetæ ordinario suo motu percurrunt,  
 „exacte describere apud se statuissent, non melius  
 „id efficere se posse arbitrati sunt, quam si dictas  
 „planetarum vias atque semitas per varium, quem  
 „in illis habent ad stellas fixas ipsis superiores, quæ  
 „inter se immobiles eandemque semper distanti-  
 „am servare videntur, respectum describerent;  
 „non absimili ratione, ac varii araneæ per cubi-  
 „culum ambulantis itus reditusque per varium  
 „quem habent ad tabulati trabes respectum, facili  
 „describi demonstrarique possent. Itaque Chal-  
 „dæi has stellas fixas in chartis describere in ea  
 „proportione & distantia, quam in cælo ipso ser-  
 „vare videbantur: sed quia, & si partem tantum  
 „stellarum tunc cognoscerent, stellas tamen su-  
 „pra millenas numerabant, quæ non facile singu-  
 „læ propriis ac specialibus nominibus, poterant  
 „appellari, ideo ne tantus variarum appellatio-  
 „num numerus memoriam eorum obrueret ac sub-  
 „verteret, in plures velut acies & classes, nempe  
 „in quadraginta octo, easdem distinxerunt, quas  
 „sydera, id est, conflatæ ex pluribus stellis signa,  
 „seu constellationes nominarunt, & cuique syderi  
 „nomen indidit, pro ut varia erat figura illa,  
 „quam prædictæ constellationes, ad eorum arbitri-  
 „um efficit, ipsis referre videbantur. Postea  
 „verò, cum observarent Solem, Lunam, & ali-  
 „os planetas, non nisi sub duodecim ex dictis sy-  
 „deribus, quibus fortuito & per accidens Arietis,  
 „Tauri, Geminorum, Virginis, Piscium, & si-  
 „milis nomina tribuerant, motus suos & progres-  
 „sus efficere, ideo hæc ipsis dicta sunt duodecim  
 „signa zodiaci, quæ quidem huc usque bene se

„habent. Verum quæ his superstructæ sunt fabu-  
 „læ, ejusdem rationis non sunt. Etenim seu an-  
 „tiqui eorum curiositati indulgere qui ab ipsis quæ-  
 „rebant cuiusmodi usui inservirent illa omnia in qui-  
 „bus tantopere defudabant, totamque vitam in-  
 „sumebant; seu vulgi existimationem & famam  
 „captare; seu denique in illis fortunarum suarum  
 „incrementum quærere vellent, ex Astronomia  
 „Astrologi sunt effecti, & quæcunque in terris  
 „agerentur aut evenirent, ab astris pendere sta-  
 „tuerunt. In hunc finem astrorum facultates  
 „describere necesse habentes, unicuique syderi pe-  
 „culiæ virtutes tribuere aggressi sunt. Has au-  
 „tem non melius assignare & vulgi credulitati  
 „imponere se posse arbitrati sunt, quam si earum  
 „verum, quorum nomina pro syderum nomen-  
 „clatura mutuati fuerant, proprietates unicuique  
 „syderi inesse assererent. Inde Leonem & Ca-  
 „nem, quia animalium calidorum nomina habent,  
 „calida: Cancrum, Scorpionem, & Pisces, ob  
 „similem rationem frigidos: Virginem & Ge-  
 „minos, quia nomina hominum propria sunt,  
 „cum hominibus analogiam habere statuerunt.  
 „Similiter Saturnum, quia nomen viri senis est,  
 „Lunam & Venerem, quia nomina foeminarum  
 „sunt, frigidos planetas esse dixerunt: Solem ve-  
 „rò, Jovem, & Martem, quæ nomina sunt vi-  
 „rorum, calidos: soli Mercurio nullas certas tri-  
 „buunt qualitates, sed velut alterum Protheum,  
 „omnes formas, omnesque aliorum qualitates su-  
 „scipere contendunt. Quæ cum ita sint, & pri-  
 „us ex varia syderum figura, ut dixi, imposita fu-  
 „erint nomina, quam proprietates descriptæ (cum  
 „Astronomia omnium consensu sit Astrologiâ an-  
 „tiquior, hæcque illius sit veluti spurius & abortivus  
 „foetus) & tamen videamus proprietates syderum  
 „nominibus prius ex mero arbitrio impositis ita  
 „ad amussim non respondere, nonne absurdum  
 „videtur, censere nomina imaginaria, & fortuito  
 „astris indita, vim quandam in homines habere?  
 „nonne perspicuum est, astra & sydera, quæ his  
 „nominibus sunt appellata, alia potuisse ratione  
 „nominari? Stellæ, v. gr. illæ, quæ in unam &  
 „eandem aciem seu classem redactæ, unum quod-  
 „piam sidus componunt nonne eodem jure potu-  
 „issent ad diversas acies, reduci, & ita ad diversa  
 „spectare sydera? Quod equidem auctor quidam,  
 „Schilerus dictus, facere aggressus est, & omni-  
 „um signorum figuram & appellationem com-  
 „mutavit, & in globo cælesti, quem descripsit,  
 „loco Arietis divum Petrum, loco Persei divum  
 „Paulum, loco Ursæ majoris sanctum Michaellem  
 „constituit. Et nonne unusquisque etiam hodie  
 „alia signa pro arbitrio efformare eodem jure pos-  
 „set, ac primi illi Astronomi? Ultero quidem fa-  
 „teor, non temere mutanda esse nomina anti-  
 „quitas pro stellarum & syderum distinctione re-  
 „cepta, ne scilicet omnia confundantur: sed ta-  
 „men, quibuscunque utamur nominibus, ab-  
 „surdum semper censendum est, rerum causas a-  
 „strorumque virtutes à nominibus ejusmodi ima-  
 „ginariis deducere. Ubi igitur audieris Astrolo-

„gos dicentes, homines die Veneris natos vo-  
 „luptatibus fore deditos, eo quod illa dies nomen  
 „Veneris, habeat, ipsique subjaciat atque sit  
 „sacra; homines die Lunæ natos leves & in-  
 „constantes fore, eo quod illa dies nomen Lu-  
 „næ acceperit: ubi audieris dicentes esse quod-  
 „dam in cœlo signum quod Antiquis Libram  
 „vocare libuit, in quo qui nati fuerint, justos  
 „futuros esse, eo quod libra justitiæ symbolum  
 „dicatur; ubi audieris dicentes, tria esse zodia-  
 „ci signa, Arietis, Tauri, & Capricorni, ani-  
 „malium ruminantium nomine appellata, quæ-  
 „que similiter Mulus, Leo, & Elephas appellari  
 „potuissent, ideo eos qui purgans medicamen-  
 „tum iis diebus sumpserint, quibus Luna illis  
 „signis subest, illud medicamentum per vomitum  
 „rejecturos: ubi audieris dicentes, homines sub  
 „Leone natos fortes, sub Virgine timidos fore,  
 „sub Cancro natos nunquam in rebus suis pro-  
 „ventum facturos, quia hoc animal non nisi re-  
 „trogradiendo ambulat: ubi denique audieris di-  
 „centes, cœlitum trium superiorum planetarum,  
 „Saturni, Jovis, & Martis, in Geminis atque  
 „Virgine (quæ signa humana antiquis vocare li-  
 „buit, etsi non magis hominum quam velaris  
 „molitrinæ speciem præ se ferant) hominibus ex-  
 „itium & pestem portendere, hæc omnia pro  
 „anilibus fabulis sunt reputanda, & imbecillita-  
 „tis accusandi sunt illi, qui similibus rebus dele-  
 „ctantur. Ubi Astrologi sic se vi argumenti pres-  
 „sos agnoscunt, ad experientiam confugiunt,  
 „quod cum sit ultimum eorum effugium, illud  
 „etiam sedulo examinandum est, & ostendendum  
 „quam incerto fundamento nitantur. Enimve-  
 „ro si soli experientiæ fides adhibenda, & histo-  
 „riæ consulantur, imo si præcipue ad ea quæ  
 „quotidie ante oculos nostros habemus, mentis  
 „acies convertatur, id unum sufficit ad omnes  
 „Astrologicas divinationes, rerumque *ἀνολο-  
 „γίας*, ab aliorum influxibus desumptas, explo-  
 „dendas. Et ut rem ipsam, de qua quæstio est,  
 „statim attingamus, cum statuam Astrologi,  
 „ut jam dictum est, cœlitum duorum aut trium su-  
 „periorum planetarum, Saturni, Jovis, & Mar-  
 „tis, in signis æreïs aut humanis pestem efficere,  
 „adeo ut ex prævisis hisce conjunctionibus futu-  
 „ram pestem præfigere soleant, demonstrandum  
 „hac in re nullam esse certam experientiam, un-  
 „de ex tali causa talem effectum prædicere, aut  
 „hunc effectum ad talem causam referre possint.  
 „Jam age, videamus, an sit aliqua causæ vel  
 „signi necessitas inter pestem & conjunctionem  
 „& positionem quorundam planetarum in certis  
 „quibusdam signis, & inquiramus sintne tales  
 „conjunctiones, vel causa pestis necessaria, vel  
 „signum pestis necessarium, seu quibus positis  
 „pestis necessario & semper sequatur: sicut So-  
 „lis accessus ad vernal æquinotium est causa  
 „necessaria florum in arboribus; & Aurora ad  
 „orientem conspecta, est signum necessarium  
 „exoritur brevi Solis. Itaque examinemus ma-  
 „gnas conjunctiones quæ hoc seculo contige-  
 „runt, visuri an ex pestem prædixerint iis in locis,

„qui signis, in quibus prædictæ conjunctiones  
 „effectæ sunt, subjacent, hoc nimirum præter-  
 „ea inquirunt Astrologi: neque enim magnæ  
 „illæ conjunctiones, quas vocant, in universo  
 „orbe pestem excitant, sed solum iis in regio-  
 „nibus quæ subjiciuntur iis signis in quibus repe-  
 „riuntur magnæ conjunctiones. Prima istius se-  
 „culi magna conjunctio contigit anno 1603, die  
 „19 mensis Novembris, erat autem illa con-  
 „junctio Saturni & Jovis, in gradu nono Sagit-  
 „tarii: cum autem nonus gradus Sagittarii sit in  
 „prima Sagittarii medietate, quæ inter signa hu-  
 „mana recensentur, eidem que signo subest urbs i-  
 „sta Avenionensis, sequitur urbem hanc multis de  
 „causis ab illa conjunctione peste affligi debuisse,  
 „cum tam multa ad pestem in hac urbe excitan-  
 „dam concurrerent, scilicet conjunctio duorum  
 „superiorum planetarum Saturni & Jovis in si-  
 „gno humano, eoque tali cui Avenio subici di-  
 „citur ab Astrologis; & tamen neque eo anno,  
 „neque sequentibus ulla sævit in hac urbe pesti-  
 „lencia. Neque dici potest, beneficum tunc ad-  
 „fuisse reliquorum planetarum aspectum, qui  
 „hunc effectum impediverit, aderat enim tunc  
 „simul & eadem die aspectus quadratus Martis  
 „cum Sole, qui similiter malus ab Astrologis  
 „censetur: adde, quod nullus reliquorum pla-  
 „netarum aspectus tantas habeat vires, quantas  
 „magnæ illæ conjunctiones, ita ut earum effe-  
 „ctum nequeant impedire. Secunda hujus seculi  
 „magna conjunctio contigit anno 1623, die 17.  
 „Juli, erat autem illa conjunctio Saturni & Jovis  
 „in gradu sexto Leonis, concurrente simul alia  
 „mala conjunctione Lunæ cum cauda Draconis:  
 „regiones autem quæ Draconis signo subjacent,  
 „sunt Alpes, Italia, Sicilia, Bohemia, & inter  
 „urbes Roma, Praga, Mantua, Cremona, quas  
 „tamen tunc peste laborasse nullæ testantur hi-  
 „storiæ. Tertia hujus seculi magna conjunctio  
 „contigit anno 1643, die 26. mensis Februarii:  
 „erat autem illa conjunctio Saturni & Jovis, in  
 „gradu 25 Piscium: Piscibus verò subjacere fe-  
 „runtur, Sicilia, Calabria, Portugallia, Nor-  
 „mandia, Alexandria, Hispalis, Rothomagus,  
 „Ratisbona, quas similiter tunc peste affectas  
 „fuisse, nullus auctor prodidit. Quarta denique  
 „istius seculi magna conjunctio, contigit anno  
 „1663, die 21. secundum aliquos, secundum al-  
 „ios verò die 15. Octobris: erat autem illa con-  
 „junctio Saturni & Jovis, in 13 gradu Sagittarii:  
 „Sic autem gradus cum sit in prima Sagittarii me-  
 „dietate, quæ inter signa humana numeratur,  
 „eidemque signo subjiciatur Avenio, ex Astro-  
 „logis ut jam dictum est, debuerat hæc con-  
 „junctio multis nominibus hac in urbe maxi-  
 „mam pestilentiam excitasse, si verum sit id  
 „quod dicunt Astrologi, conjunctiones magnas  
 „superiorum planetarum in signis æreïs aut hu-  
 „manis, aut iis quibus aliqua regio subjicitur, esse  
 „pestis in ea causam; & tamen cum hæc scribo,  
 „jam septem anni à prædicta conjunctione elapsi  
 „sunt absque, ulla pestilentia labe, quamvis  
 „tempore prædictæ conjunctionis nullus alius  
 „ad-



„adfuerit beneficis planetarum aspectus, qui  
 „effectum hunc avertere potuerit: Respondebunt  
 „Astrologi, cum effugiis nunquam careant,  
 „conjunctiones forte prædictas non fuisse factas  
 „in domo mortis: determinari namque ajunt  
 „malignam harum conjunctionum virtutem, pro  
 „ut in figura ad horam conjunctionis erecta, af-  
 „fecta fuerit octava domus, quæ domus mortis  
 „vocatur. Vel etiam respondebunt, multa alia  
 „potuisse impedire harum conjunctionum effe-  
 „ctum, cum præter causas superiores requira-  
 „tur causarum inferiorum seu terrestrium con-  
 „cursus. Attamen non sic effugiunt. Etenim  
 „quantum ad primum attinet, si magnæ supe-  
 „riorum planetarum conjunctiones, ut possiat  
 „pestem in aliqua regione procreare, debeant in  
 „figura ad horam conjunctionis, & ad latitudi-  
 „nem talis regionis erecta, in octava figuræ do-  
 „mo reperiri, inde clare apparet, nullam ua-  
 „quam fuisse factam observationem, qua liqui-  
 „do constet, pestem aliquam à superiorum pla-  
 „netarum concursu fuisse procreatam. Enimvero  
 „impossibile fere est exactam harum magnarum  
 „conjunctionum figuram erigere, cum ad hoc  
 „præstandum necessarium sit veræ conjunctionis  
 „horam exactissime assequi, quam perfecte se  
 „asscutum esse nemo mortalium certo asserere  
 „potest, cum hac in re, præter tardissimum su-  
 „periorum illorum planetarum motum, & lon-  
 „gam conjunctionis durationem, præstantissi-  
 „mi quilibet Astrologi hallucinentur, & sæpi-  
 „sime plurium dierum intervallo à veritate aber-  
 „rent, ut manifeste apparet in ultima ex mox  
 „enarratis conjunctionibus, Saturni & Jovis.  
 „Etenim ea secundum Argolum, contigit die  
 „21. Octobris, post meridiem: secundum Eix-  
 „tadium, eadem die, horis 16. post meridiem:  
 „secundum Malicassium, die 15 Octobris, ho-  
 „ra 8. post meridiem: secundum Keplerum,  
 „die 19. horis 14. post meridiem: denique se-  
 „cundum Ricciolum die 10. horis 7. post meri-  
 „diem. Atque incertum omnino est, quonam  
 „modo tempore illarum conjunctionum affecta  
 „fuerit octava domus in erecta, ad hujus vel il-  
 „lius regionis latitudinem figura. Quod vero  
 „spectat ad secundum Astrologorum quorun-  
 „dam effugium, qui ajunt multa alia potuisse  
 „impedire prædictarum conjunctionum effectum  
 „cum præter causas superiores & cœlestes, re-  
 „quiratur etiam causarum inferiorum seu terre-  
 „strium concursus, qui si defuerit, effectus  
 „non sequitur. Ego respondeo, dari multos Me-  
 „dicos atque Astrologos qui contra sentiunt,  
 „atque asserunt, pestem aliquando à solis supe-  
 „rioribus causis exoriri. Ita Junctinus, *tract. de*  
 „*revolutionibus annorum mundi, cap. 1.* Hæc scri-  
 „bit: Pestilentia vero & epidemiae corruptiones  
 „æris ex multis causis possunt contingere: quan-  
 „doque enim contingunt ex superioribus, &  
 „quandoque ex inferioribus, & quandoque ex  
 „utrisque simul. Ita Raimundus à Vinario (trium  
 „hac in urbe summorum Pontificum, Clementis  
 „sexti, Innocentii sexti, & Gregorii undecimi,

„Medicus) *in tract. de Peste, lib. 2. cap. 1.* Hæc  
 „habet: Atrocis igitur mali hujus triplex origo  
 „est: prima cœli & syderum gravis aspiratio;  
 „altera, ex terris sublatus nocens vapor; tertia,  
 „composita simul utraque causa. Ita Fernelius,  
 „*lib. 2. de abdit. rer. caus.* dicit: pestilentem fore  
 „annum ex sola syderum commixtione, quæ il-  
 „lius est procreatrix, prævideri posse, Ita deni-  
 „que Petrus Salius Diversus, *lib. 1. de febr. pest.*  
 „*cap. 11.* pestilentiam censet aliquando ab astris,  
 „nihil inferioribus causis ad hoc conferentibus,  
 „gigni, pro ut varia sydera vel in idem cœunt,  
 „vel diversa respiciunt. Contra hos igitur qui ex  
 „solis astris pestem exoriri posse contendunt, &  
 „ab ipsis occultam quandam & malignam vim &  
 „influxum, qui sit causa pestis principalis, in  
 „hæc inferiora dimanare asserunt, ego possi-  
 „mum disputo: sed tamen etiam contra eos, qui  
 „pestem sic ab astris inferri putant, ut necesse  
 „est sit causarum inferiorum concursus, qui cum  
 „forte in supradictis magnis conjunctionibus de-  
 „fuerit, huic defectui volunt attribui effectus  
 „impedimentum. Ego ulterius sic urgeo, & da-  
 „to, ut volunt, semper adfuisse aliquod impe-  
 „dimentum, ex hoc solo evinco id quod proba-  
 „re intendo, nempe nullam esse observationem  
 „aut experientiam certam, qua constet pestem  
 „à prædictis magnis superiorum planetarum  
 „conjunctionibus pendere. Quæro enim ab ip-  
 „sis, si semper aut plerumque aliquid absuit,  
 „quo minus pestis à tali causa fuerit inducta,  
 „quomodo talem causam pestem producere, per  
 „experientiam cõghoverint? Supra enim dictum  
 „est ex clarissimo Gassendo, & ratio etiam sua-  
 „det, quod cum plures sint observationes, quæ  
 „perspectum faciunt, hujusmodi causam esse  
 „crebrius sine hoc effectu, quam cum illo, tunc  
 „non modo conjectationem, sed meram hario-  
 „lationem esse, ex tali causa hunc effectum fu-  
 „turum prædicere, aut hunc effectum ad talem  
 „causam referre. Adde, quod causa illa inferior  
 „quæ cum cœlesti concurrere debet ad pestem  
 „producendam, ex doctissimorum Medicorum  
 „& Astrologorum sententia, nihil aliud est,  
 „quam dispositio corporum, quæ potissimum  
 „consistit in cacochymia, obstructione, & debi-  
 „litate (ita enim sensit doctissimus Guido de  
 „Cauliaco, *tract. 2. chirurg. doct. 2. cap. 5.*) quæ  
 „dispositio cum semper in quam plurimis corpo-  
 „ribus, & in quavis regione reperiatur, sequi-  
 „tur nunquam posse malignum astrorum influ-  
 „xum ita ab omnibus declinari, ut pestis even-  
 „tus impediretur, si pestis ab illa causa penderet.  
 „Quod si nonnulli Astrologi præter corporum  
 „dispositionem, alias etiam causas inferiores &  
 „terrestres una cum astris ad pestis productionem  
 „necessario concurrere debere contendunt certe  
 „ego valde miror, cur ex sola astrorum positio-  
 „ne & conjunctione futuram pestem tam confi-  
 „denter præfagiant. Cum enim sit præter om-  
 „nem rationem, ut dum plures alicujus effectus  
 „sunt causæ, sine quibus omnibus concurrentibus  
 „secuturus effectus non sit, arbitrentur sufficere

„ ut

„ut earum unica noscatur, quo de existentia  
 „effectus pronunciare liceat: præter rationem  
 „quoque videtur esse, ut quia præter sydera,  
 „sunt etiam causæ inferiores; quibus non con-  
 „currentibus effectus non fiant, pronuncietur  
 „de existentia effectuum huiusmodi, nisi, præ-  
 „ter notitiam syderum, ipsæ quoque inferiores  
 „cognoscantur. Atque ut hoc addam, cum effe-  
 „ctus sint aliqui, quorum vel nulla, vel imma-  
 „nifesta est dependentia à syderibus, necessaria  
 „verò & manifesta est ab inferioribus causis (ut  
 „de pestilentia notum est, quæ à vaporibus te-  
 „tris è terra prodeuntibus absque ulla syderum  
 „conjunctione aut maligno influxu excitari pos-  
 „test) poscere rationem ut ad has potius, quam  
 „ad sydera recurramus. Jure igitur concludi-  
 „mus, non corrumpi aerem à causis superio-  
 „ribus.

### Problema III.

Tertii problematis affirmativum patronum  
 imprimis se offert Paracelsus, cum suis affectis;  
 qui docet pestem spirituum infernalium ope, ac  
 sagarum incantamentis induci quoque posse.  
 Quod etiam antiquitus à nonnullis creditum fuisse,  
 liquet ex Diodoro Siculo, qui pestem ap-  
 pellat, *Demoniacam calamitatem*. Ita quoque  
 Eustathius refert, nonnullos putasse, illam pe-  
 stilentiam Græcorum, de qua scribit Homerus,  
*Iliad.* 1. magicis artibus à Chryse machinatum  
 fuisse. Hercules Saxonia, *lib. de plica, cap. 11.*  
 Sagarum, non tantum vivarum sed etiam defun-  
 ctarum, magnas esse vires ad pestis inductionem,  
 historia (quam tanquam certam & veram pro-  
 ponit) admiranda probare annititur. Præterea  
 ex magica pestis curatione quoque judicandum  
 videtur, pestem magicis Sagarum artibus induci  
 posse. Nam si morbum hunc generaliter curare  
 & tollere diabolo concessum fuerit, quidni etiam  
 inferre? Sic Philostratus 4. 3. & Eusebius, in  
*Hierocl.* 4. referunt, Apollonium magum gra-  
 vissimam Ephesiorum pestem diabolicis artibus  
 extinxisse. Sic quoque refert Jovius, *hystor.* 21.  
 tempore Hadriani Pontificis Romam à peste gra-  
 viter afflictam fuisse, quæ omnibus remediis de-  
 ficientibus, tandem à Græculo quodam Deme-  
 trio Spartano, diabolicis incantamentis, & im-  
 molatione tauri sedata est. Verum etsi hæc non-  
 nihil speciosa esse videantur, multa tamen, quæ  
 in contrarium docent, nec cacodæmones, nec  
 sagas pestem inferre posse. Nam si talis potestas  
 diabolis concessa foret, illi propter odium per-  
 petuum maximamque iram, qua perpetuò in ge-  
 nus humanum flagrant, pestem immanissimam  
 & infinitam, usque ad totalem humani generis  
 extinctionem, inducerent. Præterea cacodæmo-  
 nes illam in nos potestatem habere, nusquam in  
 Sacris literis invenitur; neque in iis alii satellites,  
 qui plagam hanc inferant, leguntur, quam An-  
 geli lucis, qui nativa bonitate præditi, non odio  
 in humanum genus efflagrant, neque illius inte-  
 ritum, sed salutem potius desiderant. Ideoque

à Sacre pagine veritate recedunt, qui diabolis  
 vim pestem inferendi tribuunt. Quantum ad  
 historiam Saxoniam, quam magnus ille vir, nimis  
 credulus, non nisi ex relatu aliorum, tanquam  
 veram describit, illa tota fabulosa est; ut quilibet  
 citato loco videre poterit. Profectò nimis incre-  
 duli, & minus Christiani nobis videntur, qui à  
 vero Deo recedunt, & cacodæmones plagarum  
 primarias causas absolutâ voluntate ac potestate  
 inferre statuunt: haud secus ac illis jam diu à  
 summo Deo in æternum condemnatis; etiam  
 aliqua alios condemnandi, plagasque inferendi  
 libera potestas superesset: quasi verò judex con-  
 demnato latroni liberum latrociniorum exerci-  
 tium adhuc permittat. At enim dicas, diabolus  
 id facit Deo sic permittente, sicut etiam sanctis-  
 simi viri Jobi corpus gravi morbo defœdavit.  
 Respondeo, *primò*, nusquam in Sacris literis legis  
 Deum Satanæ permisisse ut pestem plurimis re-  
 gionibus communem inferret, sed Deum illam  
 potestatem semper sibi reservasse, ut liquet ex  
 Sacre scripturæ locis jam antea citatis. *Secundò*,  
 posito casu, Deum id Satanæ permittere, illa ta-  
 men pestis tunc à Deo est, neque à Satanæ arbi-  
 trio dependet; quam etiam Satan non invehit,  
 nec invehere potest jussu sagarum & incantato-  
 rum, imò ne quidem propria potestate, sed so-  
 lius Dei. Idem quoque de magica pestis cura-  
 tione intelligendum, quam etiam Satan pro suo  
 arbitrio, aut sagarum beneplacito perficere ne-  
 quit. At repugnant, dices, citatæ historiæ. Mi-  
 nimè: nam illæ curationes generales à diabolo  
 peractæ non fuerunt, sed à Deo. Satan autem  
 cum sit perspicacissimus, & ad generis humani  
 seductionem ac perditionem dies noctesque in-  
 tumbat, simul ac percipit morbi terminum à Deo  
 præfinitum jam adesse, tunc per sagas, incanta-  
 tores, aliosque suos ministros; pestis extinctio-  
 nem promittit, dummodo homines hanc illamve  
 ceremoniam celebrent, ut hoc modo multos à  
 veritatis via ad erroris tenebras seducat: qui vi-  
 dentes pestem ad sagarum promissa cessare, (quæ  
 etiam sine illis, propter præsentem terminum à  
 Deo præscriptum, cessatura erat) diabolicis la-  
 queis facile irretiuntur, dum credunt diabolum  
 divina maximaque potestate præditum, atque  
 etiam metuendum, honorandum, & imploran-  
 dum esse. Denique objicies, tamen sagas &  
 fascinatores diabolicis artibus alios morbos indu-  
 cere posse, ut à longa experientia constat, (exem-  
 pla describunt, Alexander Benedictus, *lib. 7. præf. c. 25.* Joannes Langius, *lib. 1. epist. 38.* An-  
 tonius Benivenius, *de abdit. sanat. cap. 8.* Bapti-  
 sta Codronchius, *de morb. venef. Forestus, lib. 18. observat. 16. in scholio.* Cornelius Gemma, *lib. 2. de divin. naa. charact. cap. 4.* Fabricius Hildanus, *centur. 2. observ. 43.* Zacutus Lusitanus, *prax. admir. lib. 3. observat. 134.* alique plures) si alios  
 morbos, ergo etiam pestem inferre posse. Re-  
 spondeo: sagas ope diaboli non posse aliquos  
 morbos inducere quando volunt, neque etiam  
 quibuslibet illos inferre, sed quando Deo pla-  
 cuerit, & solum talibus, vel quorum fidei con-  
 stantiæ



stantiam Deus hoc modo vult probare: sicut sancto viro Jobo contigit: vel quorum incredulitatem & impietatem Deus hoc modo vult punire, non solum in propria impii persona, sed multoties quoque in infantibus liberis, armentis, frugibus, aliisque bonis: atque ita sagarum inecantamentis interdum etiam infantes, (quod ego ipsemet bis vidi) interdum alicujus boves, oves, equi, vel fruges laeduntur; non tamen quod ista laedendi potestas dependeat ab arbitrio sagarum, sed Dei, ut jam diximus. Ita ut concludendum sit, nullos morbos primario induci à sagis aut Satana, sed à Deo, qui ad illorum illationem interdum Satana utitur tanquam instrumento, non verò tanquam causa efficiente. Nusquam tamen, quod scio, in Sacris legimus ad pestem inferendam Deum Satana usum fuisse tanquam ministro, multo minus tanquam causa. Hanc quaestionem curiosius examinandam relinquimus Theologis, præter quos, eadem satis accuratè discutitur à Wiero, *lib. de praestig. demon.* Joanne Bodino, *in confutat. opin. Wieri*; Jacobo Magnæ Britanniae Rege, *in libello hac de re ab ipso peculiariter conscripto*; Sennerto, *lib. de morbu à fascino inducitur.*

#### Problema IV.

Quarti problematis affirmativam partem tenent, Fracastorius, Eustachius Rudius, Capi-vaccius, Antonius Portus, Marcellus Capra, Gerardus Columba, Augenus, Massaria, Riverius, alique gravissimi artis Medicæ proceres, qui ex putredine pestis causam resultare omnes statuunt. Hanc autem putredinem alii excellentem, alii totius substantiæ destructivam, alii profundam, alii sordidam appellant: alii rursus ex sola putredine & re putrescente, alii à veneno putrescente, pestilens seminarium generari existimant. In hoc autem cardine tota res versatur, quod credant pestilens venenosum inquinamentum generari ex certa quadam putredine, eaque vel interna, intra corpus hominum genita; vel externa, ab aliis rebus externis putrescentibus producta: vel ex putredine interna & externa simul concurrentibus: & illud nihil aliud esse quam excellentem putredinem quæ superat communis putredinis gradum. Hanc opinionem stabilire nituntur rationibus, historiarum exemplis, & auctoritatibus.

1. Præcipuum argumentum quo imprimis nituntur, hoc est: Si ab excellenti putredine, tam intra, quam extra corpus, aliqua venena generari possint, ergo etiam venenum pestilens: Atqui verum prius, ergo & posterius.

2. Probant minorem ex Galeno, qui *lib. 6. de loc. affect. cap. 9.* dicit, à Medicis olim indubie sancitum & conclusum fuisse, quod in animantibus corruptio quædam possit excitari tam vehemens, ut veneni serpentis similem habeat vim ac qualitatem. Etiam, *eodem lib.* scribit, corruptum semen veneni naturam induere, & convulsiones, suffocationes, alique sævissima accidentia pro-

ferre. Ad hæc, inquit, quia venenum rabiosum, epilepticum, hystericum, aliaque plura, ex occulta insigni putredine intra corpus generari, notissimum est.

3. Probant consequentiam, partim quia plurima symptomata ex putredine orta, ut nausea, linguæ siccitas, febris, bubo, anthrax, &c.) pestem comitantur. Partim, quia febres ille pestilentes, quæ constitutiones pestilentes plerumque antecedunt, ex insigni putredine intra corpus genita nascuntur, ex qua adacta venenum pestilens generari; atque hinc, postquam tales febres nonnihil grassatæ sunt, pestem plerumque sequi tradunt. Sic quoque pestilentes illæ febres quæ pestem comitantur, id ipsum docere ajunt, quæ ex eadem putredinis malignitate una eum peste oriuntur. Præterea famem, seu annonæ caritatem, quam plerumque pestis sequitur, dicunt omnium manifestissime ostendere, pestilens venenum intra corpora humana generari ex putredine humorum è corruptis alimentis genitorum: quales pestes describunt, Julius Cæsar, *lib. 2. de bello civili*; Flavius Josephus, *lib. 7. de bello Judaico, cap. 26.* Euagrius, *lib. 2. Hist. Eccles. c. 6.* Avenzoar, *lib. 3. tract. 3. cap. 1.* Forestus, *lib. 6. observ. 9. & 26.* Rulandus, *de morbo Ung. cap. 8.* alique plures. Illud ipsum quoque clarissima historia demonstrare tradunt Thomam Erastum, *epist. med. 7.* ubi refert, cum in nuptiis quibusdam ob æstum carnes putrescere cepissent, omnes illos qui de iis esitassent, communi morbo correptos & confectos fuisse: nempe à veneno, ajunt, pestilenti, è corruptis illis carnibus, in corporibus adhuc magis putrescentibus, & humorum quoque internorum malam putredinem indigentibus, genito. Similem quoque historiam adferunt ex Julio Obsequente, qui tradit ad insulam Liparas, mare ab Etnæ montis ignibus fervescens multos pisces neci dedisse, quibus semicorruptis ad littus ejectis cum incolæ avidius vescerentur, ex interna corruptione morbos pestilentes exortos fuisse, quibus multi perierunt. (His posterioribus historiis, aliisque similibus etiam probant, interdum neque solam externam, neque solam internam putredinem, sed utrasque concurrentes, venenum pestilens producere posse.) Tandem colophonis loco citant Galenum, qui *2. de nat. hum. com. 2.* scribit, quosdam qui in fame coacti fuerant triticum semiputre comedere, morbo communi laborasse; & olim exercitum universum, cum aqua corrupta fuisset usus, in omnibus militibus commune malum sensisse. Et *lib. de cibis boni & mali succi*, nec non *1. de differ. febr. cap. 3.* docet ex pravis & corruptis alimentis morbos pestiferos oriri. Atque his jam dictis arbitrantur se satis probasse, venenum pestilens ex putredine interna oriri posse.

4. Ab externorum verò putredine venenum pestilens quoque generari, docent, inquit, magnæ bellicæ strages, post quas, è cadaverum putrescentium multitudine venenatus pestilens vapor elatus, gravissimas sæpe pestes induxit; quales describunt, Julius Alexandrinus, *de bello Punico*

*Panico lib. 8.* Joannes Cuspius, in *vita Henrici I. Imp.* Diodorus Siculus, alique plures. Sic etiam *Paræus, lib. 10. cap. 13.* refert, Penz multa interfectorum hominum cadavera in puteum centum ultas altum projecta fuisse, atque hinc tam foetidum ac venenatum vaporem suscitatum esse, quo multa hominum milia, pesto tam Agennesium provinciam, tanquam peste interierunt. Aliorum quoque animalium cadavera putrescentia idem facere, vari scribunt. D. Hieronymus, in *Joselph Prophet.* & D. Augustinus, *l. 3. de civ. Dei, c. 31.* ac Sabellicus, *lib. 9. En. 5.* tradunt, ingentem locustarum multitudinem, in mari suffocatarum, ac postea in litus ejectarum, ibique putrescentium, horrendam pestem excitasse. Ex piscibus emortuis in littora ejectis, & putrescentibus, excitatas pestes describunt, Joannes Wolfius, *tom. 1. l. 1. mem. tab. cent. 10.* Andreas Angelus, in *annal. Brandenburg.* Forestus, *lib. 6. observ. 9. in scholio.* Paræus, *lib. de peste, cap. 3.* Agricola, *de peste, lib. 1.*

5. Externas quoque evaporationes, exhalationes, putridosque vapores, pestilentes ac venenatos esse, præter modò dicta, imprimis demonstrare, dicunt, lātrinas & antiquas cloacas, è quibus apertis tam exitiosi halitus expirant, qui multosque proxime adstantes statim interimunt, quod quotidiana experientia compertum habemus: & Guānerius, *de peste, cap. 1.* scribit in Campania ex pateo quodam antiquo, diutissime clauso, & tandem aperto, tam venenatum halitum exspirasse, quo adstantes subito perempti sunt. Ita quoque notissimum esse ajunt, post terræ motus non raro ex abditiis terræ meatibus adeo putridum venenosum halitum prodire, qui pestes furiosissimas inducat, qualem Platina refert conigisse anno 1332. Georgius Agricola anno 1360. Quæstetanus anno 1584.

6. Stagnis quoque, latus, atque aquas putrescentes pestilens venenum generare, satis notum esse, arbitrantur ex eo, quod Lærtius testatur Empedoclem ex adjacentis fluvii foetore genitam pestem à Salernitans averisse, duobus vicinis annis in istum immisissis. Etiam ex aqua illa in qua cannabæ vel linum mactatum fuit, quæ adeo venenosa evadit, ut non tantum pisces, verum etiam potata homines occidat.

7. Ab aere in sua substantia putrescente, pestilens venenum generari, probant historia illa Capitolini, in *L. Verò*, & Ammiani Marcellini, *Hist. 73.* (cujus etiam meminerunt Cardanus, Portus, Jo. Riolanus, alique) qui referunt in Seleucia furiosissimam pestem natam, & inde Parthis, Græcis, Italis, ac toti orbi communicatam fuisse, ubi in templo Apollinis ex arca quadam miræ vetustatis (in quam milites fortè includerant) aperta, spiritus contagiosus ac pestilens exiisset, qui adeo horribilem excitavit pestem, qua tertia pars hominum prostrata fuit. Hunc autem spiritum pestilentem generatum fuisse credunt ex putrefactione substantiæ illius aeris, qui in arca ista tanto tempore conclusus fuerat.

Atque hæc sunt præcipua fundamenta quibus vetus opinio, de pestilenti veneni generatione ex putredine, innititur: quæ antiquissima fundamenta nunc evertere, & tot tantisque doctissimis viris se opponere velle, emittit insipienti non minus temerarium, quam operosum, videbitur. Verum quia *Nihil temere credere, nervus est sapientiæ*, etiam nos huic opinioni non temere subscribendum censemus; sed, ut rei veritas melius elucescat, prius singula breviter examinabimus.

1. Videamus quanti momenti sit præcipuum eorum argumentum: *Si ab excellenti putredine, &c.* Nos concedimus aliqua venena ex putredine generari posse, sed dicimus pestilens venenum ab illa non produci. Non ex putredine interna, quia hæc præ vias alterationes, & longius tempus requirit, neque ab illa eodem tempore hæc omnia simul fieri possibile est, nempe putredinem incipere, summam evadere, venenum generare, hominem occidere, & ejusdem veneni translatione eundem morbum etiam aliis communicare: quæ omnia necessario simul fieri deberent in iis, qui peste correpti statim mortui concidunt, ac simul etiam alios contagio inficiunt, quales subitas mortes sæpe evenire notissimum est. Non etiam ex putredine externa, partim propter jam dictas rationes, partim quia veneni, quæ inde producuntur, proximos quidem, qui illa attrahunt vel attingunt, inficiunt, non verò aliis contagione multum communicantur. Velim igitur illos, qui ex putredine pestilens venenum extorqueere volunt, modum & formam illius putredinis depingere, & docere processum quo humores interni taliter putrescant, & quomodo illa venenifactio peragatur, in quo loco illa putredo concipiatur, quomodo in sanguine euchymo ante pestem oriatur, etiam demonstrare essentiam istius putredinis, quæ paucis subinde horis, imò momentiis tragediam suam absolvit. Nisi hæc edoceant, ca sit eorum doctrina: quam etiam eleganter multisque rationibus refutat Eustachius Rudius, *art. med. lib. 3. cap. 3.*

2. Galeni loca ad probationem minoris citata, nihil pro iis faciunt: nam Galenus ibi docet, ex interna putredine posse generari venenum serpentino veneno simile, vel aliud aliquod non contagiosum ad distans, minime verò probat pestilens venenum maxime contagiosum inde produci. Sic quoque nos concedimus, venenum canis rabidi, aliudve simile, sponte Naturæ ex certa aliqua interna corruptione posse generari, minime verò venenum pestilens, aliudve, quod contagio totas regiones inficere possit.

3. Male etiam consequentiam inde probare nituntur: *Primo*, quod symptomata ex putredine orta pestem comitentur, nam illa non sunt de essentia pestis, & putredo humorum, est pestilentis veneni effectus, non causa, à quo effectui symptomata illa procedunt. Talis etiam fuit mens Galeni, quando *3. epid. com. 3. text. 75.* de quodam peste cum phrenitide extincto, ita scribit: *Hic quoque eger statim tertio die censendus est obisse*

à qualitate succorum virulentorum, non phrenitide pre-  
emptus: at phrenitis illum est subsequuta symptoma-  
tis vice. Secundo, quod febres pestilentes putridæ  
pestem præcedant & comitentur: nam pestis non  
procedit ab aucta putredine istarum febrium causa  
(ut illi putant) sed ab aucta causa illius putredinis,  
quæ eadem est cum causa pestis, à qua tantum  
differt intensioris gradu, quam causam paulo al-  
tius inquiremus sequenti capite. Neque fames et-  
iam, seu annonæ caritas eorum opinionem sta-  
bilire potest; nam non omnem, sed illam tantum  
famem sequitur pestis, quæ fames & ipsa à pe-  
stilentiæ causa originem sumit, (dum ab ea cau-  
sa primò fruges terræ corrumpuntur, postea pe-  
stis inducitur) sicut putredo è qua febres pesti-  
lentes (ut sequenti capite docebimus) ita ut fa-  
mes illa non sit causa pestis, sed ipsamet eandem  
cum peste causam habeat. Nam putredines hu-  
morum è corruptis alimentis genitas non produ-  
cere pestilens venenum, liquet ex iis qui diu vel  
annonæ, vel opum defectu (ut captivis, alijsve  
fugitivis, in peregrinis regionibus, hominum  
confortia sæpe diu fugientibus, nec non inter-  
dum pauperibus quibusdam honestioribus & men-  
dicare erubescantibus, non semel contigisse no-  
vimus) valde corruptis alimentis usi, & tamen  
peste correpti non fuerunt. Liquet etiam ex eo  
quod omnem famem non sequatur pestis, quod  
alioqui necessariò contingere deberet. Sic Joanes  
Morellus, lib. de febr. pest. cap. 3. refert apud  
Cabilonenses fuisse rei frumentariæ inopiam, &  
tamen agrestes ac plebejos homines, qui pravis  
eduliis vescabantur, pestilenti morbo correptos  
non fuisse, sed eundem maximè sævisse in divi-  
tes, nobiles, & genio indulgentes. Item &  
Galenus, lib. de bonit. & vit. succ. meminit pestis  
quæ Romam crudelissimè afflixit, quam conti-  
nuò excepit haud mitior fames, post quam ta-  
men famem nulla pestis de novo excitata fuit. At  
enim hic forte dices, in urbibus longa obsidione  
clausis, ut plurimum post famem invadit pestis,  
quæ fames & pestis non possunt adscribi supernæ  
alicui causæ, quia tunc non uni tantum urbi, sed  
pluribus etiam locis illa pestis communis foret, &  
soluta obsidione, ac copioso victu allato, statim  
non cessaret, quod tamen plerumque fieri vide-  
mus: ergo illa pestis oritur ex maligna humorum  
putredine, è corrupto ac pravo victu inducitur.  
Respondeo: primò, post huiusmodi famem diu  
obsessi loci, à vitiosis & corruptis alimentis,  
hincque generatis pravis succis ac humoribus, ge-  
nerari febres pestilenciales privatas sine peste, quæ  
etiam perniciosæ sunt ob putredinis magnitudi-  
nem, ac corporum à longa fame emaciatorum  
debilitatem, & communes sunt, non tam à  
contagio, quam communi vitioso victu: & quia  
se contagio ad distans non diffundunt, hinc ex-  
tra obsessa mœnia non conspiciuntur. Huiusmo-  
di autem febres pestilentes (quæ in locis diu ob-  
sessis frequentes sunt) vulgariter, quamvis im-  
propriè, pestes appellantur, cum propter fre-  
quentiam, tum propter perniciem; etsi à peste  
multum differant, (hoc docebimus cap. 12. an-

not. 4.) atque ita sæpe putatur pestis in talibus lo-  
cis grassari, quæ tamen vera pestis non est: ut  
ex eo patet, quod soluta obsidione, & victu co-  
pioso allato, rursus brevi tempore cesset, cum  
alioqui vera pestis nulla victus copia vel bonitate  
extinguatur. Secundo dico, multoties gravem an-  
nonam seu famem, tanquam justissimæ divinæ  
iræ flagellum, ad mortalium punitionem, non  
minus quam ipsam pestem, à summo Deo cœli-  
tus immitti, sicut legere est Deuteronom. cap.  
28. Exodi cap. 5. Jeremias cap. 14, & 19. alijs-  
que plurimis Sacræ paginæ locis, ubi Deus mi-  
natur se fame, peste, & gladio hominum delicta  
puniturum, è quibus tribus plagis Regi Davidi  
optionem dedit. Unde satis percipi potest in lo-  
cis obsessis pestem non necessariò oriri à fame, sed  
Deum posse illis obsessis & bellum, & famem, &  
pestem simul immittere, ita ut unum non sit cau-  
sa alterius, sed singula suas proprias ac diversas  
causas habeant ab uno Deo diversimode immittas.  
Tandem ergo concludentes, dicimus cum Lidde-  
lio (lib. 3. de febr. cap. 2.) ex pravis alimentis per  
se pestem non oriri, sed febres pestilentes priva-  
tas: ex accidente verò, quia corpora ad pestem  
suscipiendam disponunt, causas pestis secunda-  
rias dici posse. Huic conclusioni etiam non re-  
pugnat citata Erasmi historia; nam illa ex putre-  
scientium carniū esu non probat genitam fuisse  
pestem, seu aliquod pestilens venenum, sed tan-  
tummodo morbum communem putridum, ac le-  
thalem iis qui illas carnes edissent; neque de pe-  
stiferis signis, nempe bubonibus, anthracibus,  
vel exanthematibus, ut neque de contagio, ul-  
lam facit mentionem. Neque repugnat historia  
Obsequentis, qui dicit, ex comestione piscium  
putrescentium generatos fuisse morbos pestilen-  
tes, (fortè febres malignas, dysenterias, alijsve  
similes) minimè verò pestem: quam etsi ex-  
presso verbo etiam nominasset, tamen nonnihil  
concedendum fuisset scriptori non Médico, sed  
Historico. Etiam non repugnat Galeni auctori-  
tas, colophonis loco, ex 2. de nat. hum. citata,  
nam Galenus ibi in toto commentario loquitur  
de aliis morbis communibus, non verò de peste,  
cujus ne minimam quidem mentionem facit: hæc  
sunt illius verba: *Qui in Aëno, tempore maxima  
famis, vescabantur leguminibus, ille cruribus debili-  
tabatur: qui verò erya edebant, hos genuum dolor  
corripiebat: neque hoc nos ignoramus, cum in fame  
quidam frumentum semiputre coacti manducare es-  
sent, in communem communi de causa incidisse mor-  
bum: aliquando etiam cum usus infecta aqua esset  
totus exercitus, similiter afflictos omnes milites  
fuisse.* Exemplum super hæc Galeni verba petere  
licet ex Polybio, 3. Hist. ubi dicit, totum Han-  
nibalis exercitum multa mala perpeffum, à pravo  
victu cachexia & λιμοψύχω (id est, scabie è fame  
orta) laborasse. Galenus etiam, lib. de cib. boni  
& mali succ. ut & 1. de differ. febr. cap. 3. non di-  
cit pestem, sed morbos pestiferos ex pravo vi-  
ctu oriri, quod fieri posse etiam nos concedi-  
mus. Ratum igitur esto, saltem nullam inter-  
nam humorum putredinem, qualiscunque illa  
fuerit,

fuert, pestilens venenum, & veram pestem generare posse. Nunc videamus quid possit externa putredo.

4. Cadavera, sive hominum, sive aliorum animalium, putrescentia pestem non generare; docent multæ magnæ strages, post quas talis cadaverum inhumatorum putrefactio nullas pestes induxit. Nostri temporibus, anno 1642, in agro Juliacensi maxima strages facta; & præter Weimerenses (qui victoria potiebantur) ad minimum octo millia militum Cæsariorum occisa sunt, præter maiorem adhuc famulorum, rusticorum, aurigarum, puerorum, & mulierum numerum, atque equorum copiam innumerabilem: corpora inhumata sub dio computruerunt; maximo cum foetore, nulla tamen pestis infecuta est. Sic in Germania, durantibus his nostri seculi crudelissimis bellis inter Cæsarianos & Suedos, etiam plurimæ maximæ strages factæ sunt, nulla peste subsequente. Idem quoque alias sæpe contigisse, ex historiis constat. Si aliquando ex foeda cadaverum putredine aliqui morbi oriantur, illi vel erunt putridi simpliciter, vel putridi maligni, ac pestilentes privati, non autem vera pestis. Liqueat id ex historia Paræi citata, qui ex cadaveribus in puteum projectis, dicit multos tanquam peste interiisse: non dicit simpliciter *peste*, sed *tanquam peste*, id est, morbo tali, quem propter malignitatem assimilat pesti. Idem quoque liquet ex altera Paræi, ut & Foresti historia, qua singuli describunt pestem inductam ex teterrimo foetore balenæ in littore putrescentis, quam pestem dicunt tantum invasisse proximis accolas. Ubi ambos per *pestem* intellexisse febres, vel morbos pestilentes privatos, ipse eventus docet, nam vera pestis contagio se ulterius propagasset: neque facile mihi quispiam persuaserit, veram pestem in unico solo pago sedem figere, eique immori. Præterea sciendum, post magnas hominum strages, sæpe magnam cœlestem plagam, nempe pestem à summo Deo imitti, quæ tanti homicidii peccata vult punire, non quod illius plagæ causa ex putredine cadaverum oriatur, sed ex venenato inquinamento, quod ab ultrice Dei manu descendit. Quam etiam causam, non verò locustarum putredinem, agnovimus pestes illæ ex D. Hieronymo & D. Augustino citatæ: nam in præcedentibus referunt magni illi viri, summum Deum maximas plagas, in Africam & Judæam, & inter cæteras, tantam locustarum copiam immisisse, quæ non arborum solummodo, sed omnium frugum & herbarum folia, fructus, ac cortices, consumerent atque deperderent; quibus locustis tandem ventorum turbine simul in mare transportatis ac suffocatis, & inde rursus in littora ejectis, successisse alias duas maximas plagas, famem nempe & pestem. Hanc autem pestem non ex locustarum putredine processisse (hæc enim solummodo potuit esse causa secundaria, corpora labefactans, & ad pestem facile suscipiendam disposita) sed cœlitus demissam fuisse, vel cæcus videtur. Nam locustæ illæ in plagam hominum eodem modo immisæ fuerunt, sicut tempore Pharaonis,

Exodi 8. cyniphes & muscæ in Ægyptum missæ sunt; ut & locustæ, Exodi 16. quæ similiter super terram devorant omnem herbam: & Pharaone nondum resipiente, Deus alia nova plaga percussit omne primogenitum in Ægypto, Exodi 12. quæ percussio non fuit orta à plaga præcedente; seu à locustis, sed de novo à Deo fuit immisæ. Idem quoque de illis citatis pestibus judicandum est: nam hoc modo verificatur verbum Dei, qui minatur se inobedientibus, & verba legis non custodientibus, immisurum omnes plagas Ægypti, ut ex Deuteronomii cap. 28. citavimus problemate primo: quæ plagæ non producebantur una ab alia, sed singulæ seorsim à Deo immittebantur; quemadmodum illud ipsum in citatis quoque pestibus factum fuit.

5. Evaporationes quasdam putridas & malignas interdum à graviore putredine etiam venenatas fieri posse, concedimus, sed minimè pestilentes fieri, aut pestem generare posse. Docent id citatæ latrinæ & antiquæ cloacæ, quarum halitus proximè adstantes tantum afficiunt, neque contagio suum virus ulterius diffundunt, neque unquam bubones, anthraces, aliudve pestilens symptoma producant, imò isti foetori assuetos plane non afficiunt, ut apparet in iis qui talia loca purgare solent. Idem quoque intelligendum de puteo illo Guainerii, in Campania aperto, cujus halitus tantum proximè adstantes interemit, non alios, neque contagio diffusum fuit virus. Qui pest terræ motus ex terræ hiatusbus exspirant halitus venenati, illi venenositatem suam non habent ex putredine, sed à profundissimis maximeque exitiosis mineris (antimonialibus, arsenicalibus, mercurialibus, vel aliis) è quibus sæpe emergunt: quod ex eo manifestum est, quia cum ex talibus mineris non protrahuntur, etiam nulla eorum venenositatis percipitur. Sic anno 1649. 4. Aprilis stylo novo, seu 25. Martii stylo veteri, nocte circa diluculum magnus terræ motus totum Belgium & magnam Germaniæ partem concussit; hinc in Geldria, non longè à civitate Venloo, montem arenaceum disruptum, magnum hiatus fecisse intelleximus: sed à spiritu inde prodeunte vel exhalante nulla pestis aliudve morbus contagiosus vel venenatus excitatus fuit, imò nemo male habuit, propterea quod in illo & vicinis montibus nullæ latebant exitiosæ minere. Et posito, ab exitiosis mineris huiusmodi venenatos halitus exspirari, illorum tamen venenositatis non erit à putredine, neque etiam inducet pestem, sed fortè alios quosdam morbos venenatos ac malignos. Nam, teste Seneca, lib. 6. *quæst. nat. cap. 28.* varia Italiæ loca pestilentialem (id est, venenatum) halitum exhalant, sed absque ulla peste. Et Mercurialis testatur se plurimas, & venenatos spiritus exhalantes cryptas prope Romam vidisse, quæ tamen nullas pestes inducebant. At enim dices, post terræ motus sæpius tamen pestis subsequuta fuit, procul dubio, à spiritu venenato ex terræ hiatusbus exspirante. Respondeo: *Primo*, inde non probari istum spiritum venenatum ex putredine ortum esse, vel in putredine consistere; de qua re

quæstio nostra agitur. *Secundo*, terræ motum esse signum à summo Deo præmissum, quo, secundum suam misericordiam, peccatores ad resipiscentiam admonet, antequam indignationis suæ plagam super illos effundat, non verò esse causam pestis.

6. Aquarum foetidarum putridas exhalationes venenum pestilens non generare, testis est ipsa Hollandia, cujus maximæ urbes (imprimis Lugdunum Batavorum, Haga Comitum, Amsterdamum, & nonnullæ aliæ) inter plurimas plateas latos aquarum stagnantium ductus habent, qui æstate, propter aquæ corruptionem ac putredinem sæpe tantum fætorem exspirant, ut cum nautarum remis aut contis aqua commovetur, transeuntibus isti fœtori non assuetis multoties nares obturare necesse sit: atque illa etiam aqua multi plebeji in istis locis ad omnes usus utuntur: Hollandi tamen rarius peste infestantur, ut & Zelandi, quorum aquæ non minorem mephitim redolent. Quantum ad Empedoclem, ille corruptas aquas emendando, à Salenutiis dicitur avertisse pestem, id est, morbos pestilentes, à fœda expiratione illius aquæ productos. Pestem fuisse, non Medicus, sed Historicus scribit; qui etiam febrem quartanam facile malam pestem appellaret, & inter pestem ac morbos pestilentes, aut alios quoscunque pravae endemios morbos, nullam differentiam statuit. At non fuisse veram pestem quæ Salenutios infestavit, vel ex eo liquet, quia si hæc tanto tempore, & tot annis vel seculis ibi sævisset, usque ad omnimodam internecionem omnes incolas dudum delevisset, imò locum istum diu antea omnes homines fugissent & deseruissent. Aquas verò ex immaceratione cannabæ vel lini putrescere ac venenatas evadere concedimus; pestilentes tamen non fieri, inde docemur, quia non sunt contagiosæ, nec alios lædunt quam qui illas bibunt, aliove modo intra corpus assumunt: imò impunè eas nudo corpore absque ulla minima noxa tractare licet, dummodo per os corpus non ingrediantur.

7. Substantiæ ipsius aëris putredinem pestilentis seminarii causam aut genitricem esse, nemo facile probaverit: quia corruptio aëris est quidam motus, qui non potest excitari ab ipso aëre (nihil enim est causa sui ipsius) sed ab alio, quatenus scilicet quidpiam corruptum aëri admiscetur, quod quidem pravis qualitatibus eum inficit, sed tamen in propria substantia eum non corrumpit. Historia Capitolini & Ammiani nihil ad rem facit. Primo enim de historiæ illius veritate non parum dubitatur, nempe an spiritus ille venenatus ex aurea arca prodiens, pestem illam induxerit: nonnulli enim alii Historici, qui eandem pestem describunt, nullam illius causæ ex aurea arca prodeuntis mentionem faciunt. Astrologi quoque negant illam pestem inde ortam fuisse, sed illam potius conjunctioni Martis & Saturni, quæ tunc temporis facta fuit, acceptam ferunt. Credibile esse posset, ab halitu illius venenositatis adstantes fuisse interemptos, sed de ejus pestilitate non sine ratione dubitatur. Verum posito casu, pestem ab illo halitu ortam fuisse, historia tamen

nihil scribit, è quo colligi possit, spiritum illum pestilentem fuisse aërem in substantia putrefactum, aut aliquid ex aëris putredine productum. Nam aërem, licet diutissime conclusum, nullam in substantia putredinem contrahere, unde pestis oriri possit, experientia demonstrat. Prope antiquissimam arcem Noviomagensensem, & in variis territorii Noviomagensis partibus, plurimæ inventæ sunt, & adhuc quotidie inveniuntur urnæ feræ, calce exactissime occlusæ, profunde in terra sepultæ ante mille & quingentos vel sexcentos forte annos, (quo tempore Romani ibi sedem fixerant, & imperium tenebant, quibus mos erat cadavera comburere, & cineres urnis exceptos sepelire) aërem tamen ex illis urnis tot seculis exactissime conclusis prodeuntem, ne minimam quidem noxam ulli hominum intulisse, animadversum est; ego ipsemet earum quinquaginta noviter inventas, & mihi dono datas, horæ spatio aperui, sine ullo damno. Præterea etiam sepulchra profundissima exactissime clausa, in eodem territorio multa inventa sunt, in quibus cadavera non concremata ab iisdem Romanis deposita fuisse, ex adjacentibus nummorum aliorumque indiciorum signis inventum ac perceptum est, è quibus tamen sepulchris apertis exiens spiritus nulli unquam noxius fuit, cum tamen ille aër (si unquam alius) in talibus sepulchris tot seculis conclusus, non tantum à sua ipsius, sed etiam à cadaverum putredine, malignam venenositatem acquirere debuisset. Cryptæ quoque subterraneæ variæ, ab iisdem Romanis olim fabricatæ, nunc casu inventæ & apertæ, nulli damnum intulerunt. Ante paucos quoque annos Arnheimi, in angulo quodam templi, sepulchrum valde antiquum, & in eo arca argentea exactè clausa inventa est, alicujus magni Ducis Geldrici inclusum continens, verum neque ex sepulchro, neque ex arca illa exspirans aër ulli noxius fuit. Ultrajecti anno 1648, tria antiquissima Romanorum sepulchra prope Aedes Papales casu eruta vidimus, quæ (quantum ex adjacentibus nummis colligi poterat) per mille & quadringentos annos conclusa fuerant: item paucis annis post, in templo D. Petri casu erutum vidimus sepulchrum Bernulphi Episcopi, ultra quadringentos annos lapideæ cistæ inclusi; è quibus sepulchris exspirans aër nemini obfuit: certissimum signum, aërem diu conclusum non putrescere, multò minus à putredine venenositatem pestilentem contrahere. Hæc ad refutationem istius opinionis, quæ ex putredine veneni pestilentis originem deduci existimat, sufficere arbitramur: quæ de adhuc nonnulla alia videri possunt annotatione sexta sequente, & qui plura hac de re scire cupiet, legat Sennerti *de febr. lib. 4. cap. 1.* Pro conclusione tandem subjungemus rationes & verba Fernelii, *lib. 2. abdit. cap. 12.* quibus docet pestem ex nulla putredine, sed ex peculiari venenata qualitate, oriri. *Si quis ex vobis*, inquit, *contentiose asseveret putredinem causam esse pestilentiam, sed quæ tamen non una semper sit & ejusmodi, verum nunc illi, nunc alteri animantium generi pesti-*

*niciosa,*



niciosa; necesse est fateatur malignam hanc esse, quæ huic illive præcipue adversetur. Id autem quid aliud est quam venenum, tota substantia, non manifesta qualitate insensum? Nemo enim explicare possit, quis modus, aut quæ ratio sit ejus putredinis, quæ vel bobus, vel ovibus, vel hominibus solis sit insensa. Id si nec dilucide exprimi, nec animo percipi potest, debet in eorum genere censeretur, quæ caca, obscura, & abdita nuncupamus, & tota substantia contraria sunt, totoque genere deleteria, quæ nec ab elementis, nec ab eorum qualitatibus fluxerunt. Itaque, quidquid asseratur, omnis pestilentia caca & delitescens est causa, & aliunde quam ex primis qualitatibus, aut ex putredine profecta. His ita dictis, mox subdit, quod illa à cælo defluat. Paulo inferius sic pergit. Cum peste, inquit, correptus solo spiritus halitu, aut excrementorum expiratione asfidentes vel integrè sanos labefactet, hique vestibus contagium longius exportent, reserventque diutius, constat hanc non simplicem putredinem, sed multo immaniolem perniciem esse, quæ tenui, eoque admodum repentino aëris inquinamento tenetur, hancque alio quovis veneno expeditiorem. Non enim si quis toxicum ebiberit, aut sit à scorpione demorsus, halitu alios inquinet. Reliqua symptomata si diligenter expenderit, pulsus parvum & obscurum, animi depressionem, syncopem, vomitionem assiduam, jactationem cum vigiliis, omniaque nullo fere sensu dolore; quis vestrum hæc non potius veneni, quam putridi caloris sobolem dicat? &c. addit: si illarum febrium urina sanis sint simillima, fieri nequaquam potest ut in vasis mala putredo subsistat, quæ interitus sit causa, sed latet nonnihil gravius pestilentiustque putredine, quod nimirum cordi totius substantiæ repugnantia & dissidio adversum sit, & tanquam deleterium. His verbis, aliisque multò pluribus, citato capite videndis, Fernelius abundè docet pestilens venenum è nulla putredine oriri: quod ipsum quoque paucis solidisque verbis significare voluit Joannes Juvenis, in epistola ad Braklemium, ubi sic inquit: Pests diversissima est ab aliis morbis quibuscunque, quam nulla humorum in nostro corpore immoderatio, nulla intemperies profert; nulla infestina putredo, ingestorumve corruptela gignit: non esculentorum potulentorumque commune vitium, non paludum, stagnorum, barathrorumque pador, pestem epidemiam efficiunt: nulla graveolentia quam exspirant cadavera, cœmiteria, forica publica; non tinctorum cortinalia, cerdonum alutariorum proluvia, aliave ulla mephitis, pestem in orbem diffundunt, nisi è sublimi inficiantur, & inde noxam hauriant. Franciscus Plempius, lib. de Peste, pag. 2. multis solidissimis rationibus etiam probat putredinem non esse causam pestis: quod ipsum splendide docet Carolus de la Font, dissert. de pest. 1. cap. 8. ut & Palmarius, de febr. pest. cap. 5. Cum quibus consentiunt, Columba, lib. 1. de pest. cap. 3. Saracenus, lib. de peste, cap. 2. Valleriola, in appendice ad loc. comm. & Taurellus, in methodo prædict. med.

## Problema V.

Quinti problematis affirmativam confirmare videtur Hippocrates, qui aphorismorum sect. 3. plurimos morbos à tempestatum constitutionibus produci docet: & speciatim 3. epidem. text. 3. annum austrinum & humidum sævissimam pestem generasse scribit: quod ipsum confirmans lib. de aëre, aq. & loc. ait, austrinas cœli constitutiones esse morborum pestilentium causas. Hunc sequitur Galenus, qui per 788 Hippocratis nihil aliud intellexit, quam aëris constitutiones: & 2. de differ. febr. cap. 4. scribit, pestilentes morbos oriri necessarium esse, cum aëris temperatura ad caliditatem & humiditatem conversa fuerit. Aristoteles, 1. problem. docet, austros siccos & nihil humentes procreare febres pestilentes. Avenzoar à sicca constitutione pestem fieri scribit. Rases æstate & autumno vehementer calidis & aridis existentibus, pestem maximè dominari ait. Titus Livius, decad. 4. lib. 1. narrat Romæ magnam pestem factam fuisse propter ingentem siccitatem: qualem pestem etiam describit Nicephorus, lib. 15. cap. 10. Virgilius refert in Creta, ob calidam & siccam constitutionem, pestem contigisse. Ab altera verò parte alia multa obstant, quibus evincitur nullas tempestatum constitutiones pestem generare. Concedimus quidem, austrinas & humidas constitutiones multas putredines inducere, siccas verò & calidas spiritus incendere, sanguinem & humores inflammare, bilem augere & exacuere, ac utrasque multos & graves morbos, imò etiam malignos ac pestilentes producere, sed veram pestem generare negamus. Primo, quia pestilentis causæ ratio non consistit in caliditate, siccitate, aut humiditate, vel ex his procedenteputredine, sed potius in peculiari aliqua venenositate, manifestis qualitatibus & putredine longè diversa. Secundo, quia si constitutiones calidæ & humidæ, vel siccæ, pestes inducerent; facerent illud semper, nam ejusdem causæ foret idem effectus: at contra, multoties animadversum est, austrinas, calidas & humidas, vel siccas constitutiones, etiam diuturnas, nullam pestem, imò sæpe nullos morbos pestiferos excitasse. Sic Fernelius, lib. 2. de abdit. cap. 13. dicit: Annus ab hoc secundus, omnium quos majorum memoria notaverat, toto orbe ferventissimus, maximè tamen salubris obtrigit. Tertio, quia si à prædictis constitutionibus oriretur pestis, ergo contrariæ, nempe aquiloneæ, frigidæ & siccæ, vel humidæ eandem extinguerent: at contra Titus Livius, decad. 1. lib. 5. pestilentem constitutionem ab ingenti frigore ortam describit: & Galenus, de lib. prop. cap. 2. scribit, furiosissimam pestem Aquileiam invasisse media hyeme, & ea de causa ingentem hominum stragem fecisse, quod media hyeme inter magna frigora morbus sæviret. Fernelius, Joannes Juvenis, Platerus, Io. Morellus, Riverius, alique præclari Medici testantur, animadversum esse, pestilentes constitutio-

nes hyeme atque æstate, sicco & pluvioso cœlo, bene temperato ac inæquali, nulla præcedente temporum anni mutatione insigni, accidisse. *Quarto*, quia si jam dictæ constitutiones pestilentiz seminaria generarunt, nulla pestis posset esse generalis, nam quæ calidas regiones invaderet, frigidas illæsas relinqueret, quæ locis humidis familiaris, siccis ignota esset; verum contrâ, non semel pestes generales, ac toti fere orbi (tam calidis, quam frigidis; tam humidis quam siccis regionibus) communes sævisse, notum est, quæ integras provincias immanissimè devastarunt, cum tamen aeris nulla maligna alteratio aut putrefactio fuerit animadversa: qualem pestem anno 1348 contigisse scribunt Guido de Chauliaco & Matthias Villanus, quæ totum terrarum orbem peragravit, & à nulla temporum anni tempestate mitigata fuit, sed per integros annos tantum sævitie perduravit, ut ex quatuor mortalium partibus fere tres sustulerit. Quales alias duas sub Marco Antonio fuisse referunt, quibus maxima humani generis pars extincta fuit: qualem etiam anno 1450 contigisse tradunt. Verum, his ita se habentibus, quid tandem respondebimus ad auctoritates Hippocratis, Galeni, aliorumque citatorum? Dicemus constitutiones austriacas, calidas, & siccas, vel humidas, posse esse causas pestis secundarias, quatenus corpora ad pestem facile suscipiendam disponunt, non verò primarias: atque de illis secundariis prædictos auctores fortè locutos fuisse. Sic etiam Fernelius, lib. 2. *abdit.* cap. 12. apertissimè, & bene docet, anni tempestates regionumque constitutiones esse pestis causas remotas, non pestem inferentes, sed præparationem ad pestem facientes. *Pestilentia*, inquit, *gravior evadit in regione putridis expirationibus infecta, quam in sicca atque pura: rursumque gravior æstate, quam hyeme; & austriaca tempestate, quam aquilonea; & inæquali intemperatoque cœlo, quam aequali & temperato.* In summa *gravior est pestilentia qua epidemiis & endemiis constitutionibus permiscetur, quam qua pura solaque consistit.* Ergo *graves terrena inferioresque expirationes pestilentiam sola non inferunt, ad illam tamen non parum præparant & excitant.* De his videantur adhuc pauca annotatione septima hujus capituli.

### Problema V I.

Sexti problematis negativam nonnulli defendunt eo argumento, quod nullum aliud venenum pestilenti veneno in vehementia & contagiositate simile, in tota natura existat, nec arte etiam efformari possit. Verum facillimè evertitur horum opinio. Nam concessio, non dari aliud venenum pestilenti veneno simile, tamen ab ipsa peste contagiosum pestilens venenum desumi, idque aliis rebus immisceri, atque ita veneficia pestifera confici posse, docent ratio & experientia. *Ratio*: quia si peste ægrotantium spuma, aliaque excrementa, si pus & sanies ex anthracibus & apostematibus effluens, sæpe contagiosa sint,

ac pestilens venenum in se contineant (quod suo periculo, se didicisse testatur Paræus, *de Peste* c. 12.) quare illa venefica unguenta, quibus talem pestiferorum illuviem, nec non carnes putridas cadaverum peste extinctorum, immiscere solent, contagiosa esse, & pestem multis aliis inferre possent, negabimus? Si in aliò fomite pestilens venenum asservari, ac postea pestem inducere possit; quare non æque ab hoc venefico fomite pestis excitabitur? quam quidem credimus adeo furiosam esse non posse, quam si primario aeris vitio induceretur; neque etiam tam generalem, aut multis locis communem, sed tamen mediocrem. Rationi quoque favet *Experientia*, & historiarum testantur non semel quorundam sceleratorum hominum perfidiam eo usque progressam fuisse, ut interdum per pulveres, sed plerumque per hujusmodi unguenta venenata pestem disseminaverint: quales tres quatuorve insigniores historias descripsimus lib. 2. cap. 3. annot. 12. Quales etiam plures apud Scriptores inveniuntur, ut apud Titum Livium, *de cad.* 11. lib. 8. Antonium Sabellicum, *Ennead.* 4. lib. 4. Dionem Nicæum, & Xiphilium, in *vita Commodi Imper.* Antonium Portum, lib. *de Peste*; Paracellum, *tract.* 2. *de pestil.* cap. 2. Herculem Saxoniam, *de plica*, cap. 11. & 12. Joannem Ewichium, lib. 1. *de Officio Magistrat.* cap. 20. Wierum, *de venef.* lib. 3. cap. 27. Michaëlem Saxonem, in *Append. Chronic.* Victorem de Bonagentibus, *de febr. pest.* *tract.* 2. cap. 1. Augenium, tom. 1. *epist.* lib. 4. *epist.* 1. & *de peste*, cap. 3. Petrum Droëtum, lib. *de pest.* cap. 10. Jordanum, *de pestis phenom.* *tract.* 1. cap. 18. Nicolaum Polium, in *Hemerolog. Siles.*

*Explicatis & enucleatis jam his problematibus, redeundum ad Annotationes.*

II. Docuimus nunc, & satis superque demonstravimus, pestem ex solo Dei præcepto in mundum, vel deputata loca præternaturaliter immitti. Quod etiam animadvertens Hippocrates, dixit, inter alios morbos pestem *ἐν θένει* continere. Quidnam autem illud sit quod Hippocrates per *ἐν θένει* intellexerit, de eo valde dubitatur & disputatur inter præstantissimos Medicos. Galenus existimat ipsum nihil aliud intellexisse, quam aeris constitutiones. Fernelius, 2. *de abdit.* cap. 12. dicit esse abditam quandam & occultam qualitatem, à certis astrorum conjunctionibus productam. Augenius, Massaria, Altmarus, alique plures, per *ἐν θένει* intelligunt excellentem putredinem, vel summum quandam putredinis gradum. Medici Astrologi intelligunt certas malignas siderum influentias. Sed nulla harum opinionum ipsius Hippocratis mentem tangit vel explicat. Nam si Hippocrates per *ἐν θένει* intellexisset aeris constitutiones, quare non omnes aeris constitutiones divinas, & morbos, inde productos, divinos appellavit? si abditam & occultam qualitatem, quare non omnes hujusmodi occultas qualitates (quales multis venenis,



nenis, magneti, aliisque rebus insunt) divinitatis titulo donavit? si magnam & excellentem putredinem, quare non omnes insignes putredines, quales in febribus petechialibus, aliisque putridis malignis, in variolis, dysenteris epidemiciis contagiosis, multisque aliis morbis deprehenduntur, etiam divinas esse dixit? si malignas siderum influentias, quare benignos influxus ab iisdem sideribus manantes, divinos non appellavit? Quapropter nos arbitramur, Hippocratem per τὸ θεῖον intellexisse causam quandam morbificam, præter naturæ ordinem ac potentiam, à diis è sublimi immisissam, vel in & ex aëre de novo ab ipsis suscitaram, cujus essentia nec in certa elementorum mistione, nec in manifestarum qualitatuum intemperie, nec in magna aliqua putredine consistit, sed in novo quodam veneno, præternaturaliter à diis in hoc sublunari mundo suscitato, cujus veneni processum describemus sequenti capite. Sic etiam ex sententia Fernellii, *lib. 2. de abdit. cap. 12.* causa pestis est aëris quoddam inquinamentum coelitus diuissimum, hominum naturæ penitus insensum & prorsus inimicum, ab intemperie & putredine longe diversum; sed usque adeo occultum, & à sensibus alienum, ut ejus natura nos prorsus lateat, inopinanterque feriat; nec unquam nisi effectis & eventis deprehendatur.

**III.** Pestilens inquinamentum, quia venenum est, hæcenus occultum & incognitum fuit, nec ab ullo Medico perfectè describi potuit, quia venenorum plerorumque natura occulta est. Illud autem inquinamentum esse venenum, ex eo liquet, quia habet veneni effectus (qui sunt, corpus citissimè malo modo afficere & mutare, corrumpere, mortificare, nigrum, lividum, & diffuens reddere, maculis conspergere, &c.) & illam veneni proprietatem, quod curetur alexipharmacis. Hinc Galenus, in *comm. ad Hippoc. lib. de nat. hum.* dicit, illud nocere substantiæ proprietate: & *lib. de theriac. ad Pison.* illud clarè nominat venenum. Sic etiam Oribasius, *lib. 6. cap. 24.* & Aëtius, *2. tetrab. 1. cap. 94.* illud exitiosum ac venenosum appellant. Horum aliorumque Veterum, de pestilentis inquinamenti occulta venenositate, opinioni maxima pars doctissimorum Neotericorum subscribit, nempe Fernellius, Hercules Saxonia, Oddo de Oddis, Hollerius, Forestus, Julius Palmarius, Gentilis, Nicolaus Massa, Mindererus, aliique plurimi, inter quos Joannes Juvenis, in *epist. ad Braklemium*, sic inquit: *Pestis neque præcaveretur, neque demitur medicamentis primatum secundarumve facultatum vi instructis, cum morbus sit occultus, & à natura ipsa involutus, etsi ab obviis rebusque evidentibus credatur nasci, multorumque talis de peste inoleverit opinio.* Etiam Sennertus, *lib. de peste*, ita scribit: *Qualis sit specifica veneni pestilentis natura, & causa, nemo unquam explicare potuit; & profectò talia sunt qua latent animos temperatos, illudunt curiosos.* Hermetici, ab effectuum aliqua similitudine, hoc inquinamentum assimilarunt veneno nappellino, arsenicali, dipsadis, aliisque similibus, ut occultam ejus naturam saltem aliqua comparatio-

ne nonnihil illustrarent. Contra verò Altomarus, Conciliator, Massaria, Thomas Minadous, Augenus, Antonius Portus, Eustachius Rudius, aliique horum sectatores, dicunt inquinamentum illud non esse occultum, sed manifestum, ortum scilicet ex insigni putredine, quam statuunt tam in aëre, quam in humoribus, vel sponte naturæ; vel ab astrorum influentiis talem fieri posse, ut inde pestilens inquinamentum produci queat. Profectò longissimè errant, qui occultum inquinamentum manifestare volunt per aliud æque vel magis occultum, nempe per insignem vel excellentem putredinem, id est, occultum vel ignotum putredinis gradum, cujus nec formam, nec modum, nec processum, nec locum, ullo calami acumine depingere vel describere noverunt; quæ qualiscunque putredo etiam ipsamet ab isto inquinamento primitus inducitur, ut latius docebitur sequenti capite **IX.** Sed horum opinionem nos paulo ante, problemate quarto, satis refutasse existimamus. Similiter etiam hodierni nonnulli Philosophi nimis animosè promittunt, se hanc obscuritatem claram reddituros, & explicaturos, per minimas particulas aculeatas, striatas, unciatas, pungentes, aliove, nescio quo, modo dispositas; cum interim, dum aliis plus sapere videri volunt, nil nisi inania verba & meras tenebras effundant, alioque, novo quidem, sed non minus obscuro, termino rem magis implicent, quam extricent, nec istarum particularum generationem, conjunctionem, causam congressus & motus, operationes, &c. describere queant, ut nec qualis sit illarum, & qualium commissio, aut commissionis causa ac differentia cum soli boves, qualis cum solæ oves, qualis cum soli feles (inter quæ bruta speciatim pestem sæviisse, aliis animantibus à peste prorsus immunibus, observatum est) qualis cum soli homines peste infestantur. Quæ omnia cum isti Philosophi per suas minimas particulas minimè explicare possint, cogentur, una cum cæteris ad obscuritatis asylum, scilicet occultam veneni pestilentis qualitatem, rursus confugere. Ad quod asylum etiam redeundum erit Athanasio Kircheri & aliis ejus assecelis, qui novo ingenioso commento divortium ab illo facere volentes, totam pestilentis veneni occultatem minimis bestiolis dilaniandam ac devorandam objecerunt: hanc quippe obscuritatem novo lumine illustraturi, dicunt, venenum pestilens esse congeriem minimarum bestiolarum, seu animalculorum invisibilium, per aërem volitantium, quæ corpora humana per inspirationem, aut poros subeuntia, eorum partes corrodunt ac corrumpunt, ex iisque ad alia corpora evolitantia, seu ad alia quocunque modo delata, & quasi contagio propagata, etiam illa inficiunt, corrodunt, & corrumpunt, sicut priora è quibus exiverunt: ab horum verò injuriis maximè vendicari, & præservari illos qui luculentis exstructis ignibus eorum alas pedesque (sertè etiam rostra & dentes) exurunt, ut ulterius volitare & corrodere nequeant, vel per suffumigia aut alexipharmaca penitus illa suffocent, & extinguant. Atque sic illi hæc & alia mille similia somnia sibi

fiunt (quæ omnia hic referre nimis longum foret) eaque tanquam nova quædam oracula publicè exhibent, cum interim animalculorum istorum nec generationem, nec generationis causam & modum, nec eorum constitutionem aut formam, imò denique nec unum ex illis, vel demonstrare, vel certis rationibus probare valeant.

**I V.** Pestilentem labem à Deo immitteri, nec ab ullis naturalibus causis produci, præter illa quæ jam diximus, etiam alia sunt quæ id docent. 1. *Morbi vehementia & perniciēs*, quæ tanta est, ut ex nulla rerum sublimarium missione vel putredine tam exitialem & vehementem morbum produci possit, certum sit. 2. *Veneri pestilentis effectus*, qui tam exitialis ac furiosus est, ut sæpe eodem momento homines invadat, inficiat, & occidat, quod nullis naturalibus morborum causis internis concessum est, cum omnes, ut effectus suos edant, majore tempore opus habeant. 3. *Magnitudo contagii*, quod tantum est, ut nullum è naturalibus causis productum contagium ei assimilari possit. 4. *Morbi communio*, nam pestis, præter naturalium morborum consuetudinem, omnibus ætatibus, sexibus, temperamentis, regionibus, anni temporibus, & tempestatibus communis existit.

Verum etsi prima labes, seu primum pestilens seminarium à summo Deo aëri immittatur, non est tamen existimandum, illud necessario esse aliquid quod excedit in magna quantitate, sed potius id esse exiguum quid, pessima summeque venenosa qualitate maximè noxium, in & ex ipso aëre Dei verbo genitum, quod, instar acerrimi fermenti, sese dilatans, aërem hic illic certo modo corrumpere, ejusque multis particulis peculiarem quandam veneni speciem, hominibus, aut interdum his illisve brutis animalibus, speciatim insensam imprimere, atque ita se longè lateque diffundere potest. Ita ut quamvis prima venenata corruptionis causa à Deo immittatur, ipsa tamen venenosa ac maligna corruptio, aëri, aquæ, alimentis, aliisve rebus impressa, sit illa quæ morbum proximè infert, & corpora animalium inficiendo corrumpit. Talis autem aëris aliarumque rerum corruptio à nullis venenatis expirationibus arsenicalibus, sulphureis, mercurialibus, antimonialibus, aliisve (quales interdum è venenatis mineris, aliisve terræ visceribus erumpunt) quod strenue defendere conatur *Christophorus de Cock* van Kerckwijck, libello suo *Belgico de Peste*: ut nec ab ulla putredine fieri potest, quamvis id *Thomas Willis*, aliique varii sentiant ac inculcare nitantur: quamvis etiam *Carolus de la Font*, illud ipsum longo sermone multisque rationibus probare studeat. 1. *dissert. de peste*, cap. 9. 10. 13. quorum opinionem abunde refutavimus *problem. 1. & 4.*

**V.** Dico, aërem inquinat, quia cum pestis sit morbus communissimus, ejus causam aëri, qui omnium maximè communis existit, & cujus usu nemo carere potest, inesse, planè necessum est. Hujus talem dat rationem *Galenus*: Aër, inquit, cum natura existat volatilis, ac totaliter spiritualis, corpora porosa, aërea, & spiritualia, sive bona, sive

mala, salubria vel insalubria fuerint: pari subtilitate permeat ac facilitate. Sic etiam *Hippocrates* verè pestis causas in solo aëre statuit. nam *lib. de nat. hum. text. 8. & 9.* sic inquit: *Morbi sunt partim à vivendi ratione, partim à spirita; cujus attractione vivimus: utrosque hoc modo discernere. Ubi multi homines uno morbo corripiuntur eadem tempestate; in id referenda causa est, quod sit communissimum; quæque maxime utuntur universi; hoc est quod spiritu attrahimus: tunc enim victum cujusque nostrum nequaquam in causa esse manifeste constat, cum morbus omnes juxta attingit, tam juvenes, quam senes, tam feminas, quam viros, tam vinum, quam aquam bibentes, tam qui carnem, quam qui panem commendant: ergo non fuerit victus ratio in causa, cum homines quocunque victu utentes in eundem incidunt morbum.* Secundum hanc *Hippocratis* sententiam etiam bene dicit *Willisius*, *lib. de febr. cap. 12*: *Rationi consonum videtur, ut ab eodem fonte, quo vita communis pabulum, etiam necis haud minus diffusa initia petantur: eadem nobis respirandi aeris necessitas, ac piscibus in aqua degendi incumbit necessitas: nam sicut piscium catervatim morientium aquis veneno infectis lues adscribitur; ita homines sine causa manifesta è clade epidemica occumbentes, nil præter aëris inspirati labem interimere potest.* Igitur corruptio venenata quæ pestem infert, in aëre querenda est, quo nemo carere potest, & qui vel purus, vel quocunque modo infectus, etiam invitis, hauriendus est. Male nonnulli etiam in alimentorum pravis qualitatibus primam pestis causam quæserunt, eum inde quidem pravi & epidemii, ac multoties etiam contagiosi morbi excitati fuerint, sed nunquam pestis inde orta sit (ut paulo ante, *problem. 4.* latius explicavimus) nam alimenta prava sunt tantum causæ adjuvantes, quæ corpora ita disponunt, ut à corrupto aëre facile infici possint: & ipsa etiam alimenta pestilenti tempore haud parvam pravitatem à corrupto aëre plerumque consequuntur. Ita ut quocunque modo rem inspiciamus, prima pestis causa in aëre lateat. Hoc ipsum quoque asserunt *Ludovicus Mercatus*, *de febr. lib. 7. cap. de febr. pestil.* aliique plurimi Medici. Talis in aëre constituta fuit causa illius crudelissimæ pestis, quam describit *Homerus*, 1. *Iliad.* dum finxit *Apollinem* suis radiis, tanquam spiculis aut sagittis, pestilentiam è cælo in *Trojanum* exercitum ejaculasse: ut & illius acerrimæ pestis, quam longo sermone describit *Theucides*: nec non illius quæ tempore *Galenus* longissima fuit: aliarumque plurium, integras civitates & regiones, instar venenatæ feræ, depascentium. Huic tamen opinioni contrarius videtur esse *Galenus*, *lib. 1. de differ. febr. cap. 3.* nec non *lib. de cibis boni & mali succi*, ubi dicit, pestiferos morbos etiam oriri ex prava victus ratione: & *com. in lib. de nat. hum. text. 4.* scribit, non rectè statuere *Hippocratem*, morbos communes fieri solum ab aëre, quandoquidem etiam prava victus ratio, nec non vapores elati ex putridis aquis & speluncis, morbos communes facere possunt. Ad contrarietatis solutionem dicimus, *Hippocratem* rectè primariam

mariam pestis causam in solo aëre statuisset, neque huic doctrinae adversari. Galenum, cum ex mala victus ratione, putridis vaporibus, & pravis exhalationibus, morbos communes ac pestiferos generari scribit: nam Galenus ibi non loquitur de vera peste, sed de morbis epidemii pestiferis, qui à peste longissime differunt in causa, vehementia, velocitate, contagio, & curatione; interim tamen pestiferi appellantur, quia putridæ cuiusdam venenositatis participes, & nonnihil contagiosi sunt; multosque occidunt, & virium dejectione, summa anxietate, deliriis, aliisque pravis symptomatibus proximè ad pestem accedunt. Sciendum præterea Hippocratem per morbum communem interdum intelligere veram pestem, cuius causam soli aëri primario ineffe statuit; interdum alios morbos epidemios, quibus tunc etiam alias causas, humores & spiritus vel immediatè, vel mediante aëre inficientes, adscribit. Galenus autem citatis locis intelligi potest de posterioribus epidemiis, non de vera peste. Denique possemus etiam dicere, Hippocratem locutum fuisse de primaria pestis causa: Galenum verò, hac brevitate non contentum, etiam secundarias addere & describere voluisse, nempe pravam victum, putridas exhalationes, aliasque similes, quæ corpora ad pestem recipiendam disponunt & præparant. Verum his omissis, ulterius procedendum.

Illud aëris inquinamentum, de quo hic agimus, multi hæcenus nihil aliud esse putarunt, quam halitus venenosos & putridas expirationes aëri immistas adde, quas arsenici, aut napelli similitudinem habere scribit Untzerus, lib. 1. de pest. cap. 9. Carolus de la Font, in suis dissent. de pest. illis solius arsenici naturam adscribit, easque ex mineris arsenicalibus suscitari, & sic per aërem longe lateque dispergi, hominesque inficere existimat; suscitari autem per Solis fervorem, terræ motus, ignes subterraneos, aliasve similes causas; non considerans fervores Solis singulis æstatibus contingere, atque nonnullis annis admodum urentes esse, cum tamen pestis rara sit; quin & multas sæpe æstates ferventissimas sine ulla peste transire: non animadvertens sæpe crudelissimas pestes suscitatas fuisse post diurnas pluvias, atque etiam hybernæ frigidis temporibus (tales pestes describunt Hippocrates, 3. epidem. Wagnerus, in chron. Siebertus, centur. 8. Funccius, in chronolog. Erodoardus, in chron. Bonfinius, decad. 1. lib. 8. Fernexius, lib. 2. de abdit. cap. 12. alique plures) quibus certe tales arsenicales spiritus ex mineris illis suscitari nequeunt: non observans quoque ignes subterraneos in Sicilia, Calabria, Neapoli, Islandia, aliisque variis locis, perpetuos esse; & pestem tamen, etiam in illis ipsis locis, rarissimam: & terræ motus plerumque sine ulla peste observatos fuisse: denique non inspiciebat talis arsenicali veneno bruta non magis immania esse posse, quam homines, atque hinc omnia animalia in aëre viventia æqualiter ab eo infici & ladi debere, cum tamen plerumque solos homines infestet: dico, plerumque, quia obser-

vata sunt etiam pestes, quæ solas pecudes invaderent, ut ante dictum, cap. 4. annot. 1. Utterior jam dictæ opinionis refutatio videatur *problemate quarto*. Multi judicarunt esse tantum certam aëris dispositionem, qua aptus redditur ut venenum in corporibus dispositis generet: quam opinionem Mercurialis, lib. de peste, cap. 7. variis rationibus defendit, quas splendide refutavit Sennertus, lib. 4. de febr. cap. 2. Multi ipsius substantiæ aëris putredinem: cuius opinionis nervos dicto problemate quarto valde infregimus, eorum reliquias hic nunc penitus extirpaturi. Substantiam aëris putrescere posse, docent ratione & auctoritatibus. *Ratione*: quia illa quæ calida & humida temperie prædita sunt, prompte putredinem concipiunt: atqui talis est aër, ergo, &c. *Auctoritatibus*: quia Zoar, cap. 4. *juxta finem*, dicit aërem calidum & humidum promptissimum esse ad putredinem: & Avenzoar, 3. thes. tract. 3. ponit duo genera putredinis aëris, unum ex vaporibus, alterum in substantia propria. Hinc tandem concludunt, qualitatem pestiferam, ex substantiæ aëris putredine genitam, interdum adeo gravem esse, ut pestem faciat; interdum minus gravem, atque tunc producere alios morbos epidemios. Ex. gr. si excessus caloris & humiditatis levior fuerit, aër leviter putrescens inducet morbos epidemios leviores: si verò magnus fuerit, aër in substantia magnopere putrescens, generabit pestem. Verum si rem ipsam penitus iudicio trutinemus, videbimus hæc argumenta nullo solido fundamento inniti: quia nullus manifestarum qualitatum excessus ipsas elementorum substantias putrefacere potest: nam putrefactio solis rebus mistis competit, utpote per quam fit misti dissolutio, & elementorum vel à se invicem omnimoda separatio; vel quædam levis dissolutio, aliaque nova mistio. Ex. gr. in cadavere putrescente nullum elementum putrescit in sua substantia, sed exacta elementorum mistio dissolvitur, & singula, vel omnino separantur (atque tunc quod aereum vel igneum ei inest, sursum ascendit; quod aqueum, defluit; aut in vapores resolvitur; quod terreum, terram petit) vel rursus alio novo modo simul miscentur, atque tunc generantur vermes, muscæ, apes, serpentes, &c. Talis autem substantiarum separatio in ipsa aëris substantia, quæ simplex est, fieri nequit: nam in quas quæso partes dissolveretur? non in aqueas, igneas, terreas, quia nihil horum ipsi inest: non in minimas alienas particulas, quia singulæ minimæ particule aëris sunt aër. Ergo in aëris substantiam non incidit ulla putrefactio. Vidit hoc ipsum Aristoteles, ac propterea, *sect. 25. probl. 20.* dixit, aërem non corrumpi nec putrescere. Et inter neotericos Sennertus, *prax. lib. 6. part. 3. cap. 2.* scribit, ipsum aërem, quatenus purum elementum est, nec putrescere, nec alio modo corrumpi posse. Profectò si aër, vel alia elementa putrescerent in suis substantiis, subverteretur tota rerum natura, ipso Hippocrate id testante, qui, lib. de nat. hum. dicit: *si unum elementum putresceret, corrumpere totum.* Nihil hic

ad rem facit quorundam effugium, scilicet, aërem modò sumi pro puro elemento, modò pro elemento unà cum aliis rebus ipsi immistis: atque hoc posteriore modo illum in substantia putrescere posse. Respondeo: 1. externa illa quæ ipsi permista sunt, non esse de substantia aëris. 2. Cum loquimur de aëris substantia, tunc semper aër tanquam purum elementum sumitur; quod dicimus nunquam putrescere posse: Cum verò loquimur simpliciter de aëre: tunc interdum sumitur pro puro elemento; interdum pro elemento cum suis contentis: Si priore modo sumatur, tunc non putrescit: si posteriore modo, tunc substantia aëris etiam non putrescit, sed tantum pravi vapores aliaque heterogenea ipsi immista, & quasi unita, ab eo secessum faciunt, qui in rebus mistis putredo appellatur, quæ tamen putredo ipsam aëris substantiam minimè corrumpit. Ita ut prædicta distinctio sit tantum inane diverticulum. Concludimus ergo aëris substantiam non putrescere, nec putrescendo pestis causam fieri posse, sed illam causam esse à putredine longè diversam, nempe substantiæ aëris corruptionem sine putredine, cœlitus demissam: quæ corruptio qualis sit, & quomodo fiat, nemo hæcenus describere potuit, neque illud cuiquam revelare voluit Altissimus Deus: ac propterea mysterium hoc occultum manet, & Medicos illud explicare, & manifestare, ac frustraneo & nimis fastoso conatu per naturales speculationes rem divinam describere volentes, fere omnes in putredinis labyrinthum deduxit, quem quo magis ingressi, eo minus inde extricati fuerunt.

V I. Non sine ratione illam opinionem, quæ pestilens venenum è putredine extorquere nititur, problemate quarto impugnativimus & deiecimus: nam præter ibi dicta, adhuc varia sunt quæ clarissimè docent, illud nec ex putredine educi. 1. *Putredinis generatio*; quæ sit longiore tempore & gradatim, per excessum manifestarum qualitatuum, imprimis caloris cum humiditate conjuncti: nec in momento simul fieri, perfici, venenum generare, ejusque effectum edere potest: at in peste sæpe nullus caloris, alteriusve qualitatis excessus animadvertitur, & cum ille adest, inde tamen pestis causa non dependet, nam alioqui febres putridæ ardentes forent omnes pestilentes, utpote in quibus calida qualitas maximè excellit. 2. *Morbi divinitas*: quia pestis est flagellum Altissimi Dei, quo homines præter Naturæ ordinem castigat: ergo non oritur à putredine, utpote quæ ordini naturæ inclusa est. 3. *Morbi invasio*: quia æque invadit regiones salubres quam insalubres; æque, & sæpe magis corripit euchymos, optimis humoribus donatos, atque caco-chymos, pravis humoribus refertos: nulli sexui, nulli ætati parcat: frigida, calida, aliave quacunque tempestate, & quocunque anni tempore æqualiter grassatur: præterea tanta velocitate invadit, & gravissima symptomata inducit, ut nulla putredo tam citò fieri, nec ab ulla putredine tanta symptomata adeo repentè excitari possint. 4. *Pestis signa*: quia sæpe nulla putredinis indicia

ex pulsu, sanguine, urina, siti, fœtore, vel caloris intensione percipiuntur; neque etiam in externis sæpe talia reperiuntur, ut cum pestis cœlo temperato & æquali, vel media frigida hyeme invadit. 5. *Febris*: quæ, si lues hæc à putredine excitaretur, foret individuus pestis comes, cum tamen multoties contrarium evenire, usus doceat: præterea inter febres putridas, imprimis malignas, & pestem, nulla foret differentia. 6. *Pestis curatio*: quæ à putridorum morborum curatione longissimè differt: nam in his requiruntur venæsectiones, purgationes, aliaque similia, quæ omnia in peste sunt maximè noxia, cujus curatio imprimis peragenda est alexipharmacis, quæ sæpe sunt calida, siccantia, alstringentia, obstruentia, ac proinde, putredini amovendæ minus idonea. Præterea morbi putridi maligni, & graves rarò sanantur absque ope convenientium remedium; à peste verò innumeri evadunt citra ullius remedii usum, & præsertim citra usum eorum quæ corpus à putredinosa illuvie expurgant. Franciscus Valleriola, his & similibus secum diligentius examinatis, in *append. loc. com. cap. 2.* non sine ratione in hæc verba erupit: *Cum aliquis, inquit, integre sanus accessu ad peste correptum peste quoque inficitur, atque paucis post horis concidit; (quod fieri sæpe videmus,) aut cum quis à rabido cane demorsus in rabiem & ipse agitur, quis tam hebes sit, qui putredinem tam repentina mortis causam statuatur? nam qua posset tam vehemens tamque perniciofa putredo in hominem incurrere, sine alterius cuiuspiam rei concursu, qua tam citò hominem tollat? præsertim cum qui concidit, nec plethora, nec caco-chymia, obstructione ve esset correptus, sed bene valens, sanus, & vegetus, bonoque habitu præditus.*

Hic fortè aliquis objiciet, si putredo non producat venenum pestilens, quare igitur necesse sit, tam in præservatione, quam in curatione, omnes putredines externas & internas, earumque causas summo studio evitare, impedire, corrigere, & auferre? Respondeo: æque rationem habendam esse causarum secundariorum, quam primariorum: putredinem autem esse unam ex causis secundariis, quæ corpora disponunt & apta reddunt, ad pestilens venenum facile recipiendum, sine qua aptitudine pestilens virus sine noxa in hominem incurrat, ab eoque mox re-percutitur, sicut sagitta à clypeo ferreo.

Ex his omnibus, atque etiam ex illis quæ præcedentibus sex problematibus, nec non annotat. 2. 3. 4. 5. dicta sunt, pensius consideratis, satis patet nimis anxios & timidos esse illos, qui præcedentium Medicorum errori, de pestilenti putredine, se opponere non audentes, hanc à nobis propositam veritatem (de pestilentis seminarii principio cœlitus immissio) ambabus ulnis amplecti, & pleno ore profiteri verentur; sed ut præcedentes, circa pestem putredinosam errantes, è directo non offendant, & interim veritatem à nobis propositam etiam omnino non rejiciant, mediam viam eligere maluerunt, dicentes, tutius & commodius duas statui pestis causas; unam

unam supernaturalem à Deo immissam; alteram naturalem, à sublunarium spontanea putredine, aliave corruptione excitatam: cum tamen in præcedentibus satis superque probatum sit, hanc posteriorem, ipsis naturalem appellatam, causam, non generare veram pestem, sed tantummodo morbos putridos, pestiferos, malignos, aliosve epidemios pravos.

VII. Causas illas, quas secundarias appellamus, corpora ad pestem solummodo præparare, nihil verò per se ad veneni pestilentis generationem facere, quotidiana experientia docet. Maligni siderum influxus pestem non inducunt, sæpius enim facti fuerunt nulla peste subsequente: nec benigni influxus pestem avertunt, cum his enim non semel invalisse, docuimus problemate secundo. Aëris fervores maximos, ut & ventos meridionales, siccitates, ac hyemis tepores, ut plurimum animadversum est nullas pestes excitasse. Exemplo est annus 1558, quem Medici & Historici istius temporis referunt, non tantum ipso vere, sed etiam tota æstate atque autumnò fuisse calidissimum & siccissimum, nullas tamen tunc pestes, verum solummodo febres varias, maxime intermittentes & diurnas, minimè lethales, per totam Europam viguisse. E contra verò absque fervida, & sicca tempestate, & sine ulla aëris inclementia pestem nonnunquam invadere, observavit Platerus, *prax. tract. 2. cap. 2.* Sic etiam Fernelius, *lib. 2. de abdit. cap. 12.* testatur nonnunquam hyeme media cœpisse pestem, æstate solutam, sæpeque ardentes æstates ab omni peste vacuas fuisse. Radzivilius, in *Itiner. meminit pestis*, quæ mensibus Decembri, Januario & Febuario maxime sæviit, & æstivis caloribus soluta est. Similiter quoque Joannes Morellus, *de febr. purp. cap. 3.* dicit, se non raro observasse, flante Borea pestem ferocius in suos cives excanduisse, pluresque aquilonea tempestate morbo correptos fuisse: & paulo post inquit, Cabiloni post hyemem siccam & aquiloneam successisse ver temperatissimum ac saluberrimum, quod tamen induxit pestem, & quidem tempestate aquilonea, ac puro synceroque aëre existente. Huc accedunt exempla locorum, quæ etiam doceant caliditatem & siccitatem per se nihil ad pestem facere: calidissima enim & siccissima illa Æthiopie ora quæ Nigir accolit fluvium, teste Scaligero, pestis plane expers. Sic in Ægypto pestis dominium caloribus magnis extingui tradunt: Etiam Hispania, licet calidissima, rarius peste infestatur, neque ea tam vehementi ac multis aliis in locis. Exhalationes quoque fœdas ac putridas ad hanc litem primario nihil facere, doceant loca hujusmodi exhalationibus perpetuò obnoxia, in quibus tamen non perpetua, sed rarius pestis observatur, ut dictum problemate quarto. Non obstat quod hic nonnulli objiciunt, in Cayro, Ægyptiorum urbe, pestem fere esse continuam, teste Prospero Alpino, *de medic. Ægypt. lib. 1. cap. 15.* & Sardiniam insulam, ob malignas exhalationes, continuis pestilentibus morbis subiectam esse, teste Pausania, aliisque Geographis.

Dico, in Cayro, non ob pravas exhalationes isti loco familiares pestem fere perpetuam sedem fixisse, sed ob contagium, quod non tantum incolæ sibi mutuo communicant, sed etiam forinsecus ex Syria, Græcia, Barbaria, aliisque adjacentibus locis, peste frequenter infectis, eo defertur, quemadmodum idem Prosper Alpinus, *citato loco*, id fieri testatur: & quia a solo contagio, sine primario aëris vitio, suscitatur, illam pestem valde exiguum nulliusque momenti esse. De Sardinia dico, consuetas putridas exhalationes istius insulæ, continuos quidem inducere morbos malignos ac pestiferos, sed non veram pestem, ut ex eo patet, quod nemo, ratione contagii, insulam illam fugiat, neque commercia ibidem sileant. Hæc igitur omnia silentium injungent Carolo de la Font, qui *dissert. 1. de pest. cap. 16.* ab hisce etiam seminaria pestis suscitari, longo sermone inculcare nititur, & inter potissimas enumerat ignes subterraneos, quam opinionem paulo ante. *annot. v.* refutavimus.

VIII. Solæ conjunctiones Saturni, Jovis & Martis, ad inductionem pestis facere creduntur: habuimus autem anno 1635, 27. Sept. conjunctionem Jovis & Martis in signo Leonis: sequenti verò anno 1636, 20. Octobris, conjunctionem Saturni & Martis, in signo Virginis; quæ conjunctio à multis pessima esse creditur, quia sit in signo humano: attamen circa tempus hujus ultimæ conjunctionis pestis nostra fuit in declinatione. Quapropter hujusmodi conjunctiones non esse magni faciendas, neque ad pestis inductionem quidquam facere, demonstravimus problemate secundo, & in principio præcedentis annotationis septimæ.

IX. Animi motus per accidens tantum ad pestis inductionem juvant. Ira humores & spiritus vehementius exagitat, confundit, & excalefacit, sicque eosdem ad pestilens venenum facile suscipiendum disponit. Terror & metus intus omnia conturbant, & spiritus inordinate movendo, malignitatem corpus ambientem versus interiora alliciunt, & intus latentem in actum promovent. Hinc Thucydides, dicit, in truculentissima illa, quam in sua historia describit, peste, mœstos metuque anxios præ reliquis periisse. Mœstitia cordis constrictione calorem & spiritus opprimendo: nimia verò ac subita lætitia spiritus nimis diffundendo ac dissipando, eadem pericula facile accersunt. Hinc non ineptè dicit P. graecus: *Sicut mala victus ratio præparat humores, sic animi passiones præparant spiritus ad recipiendam pestem; tristitia, terror, ira, ac metus, sunt pabulum ac nutrimentum pestis.* Sic etiam Bauderonus, *prax. tract. 1. cap. 15.* inquit: *Confidentes ut plurimum servantur: contra meticolosi faciliè corripuntur.* de his videantur plura *lib. 2. cap. 7. annot. 9.*


X. An imaginatio sola ad pestilentis veneni in corpore generationem aliquid faciat, dubium existit. Affirmativam partem, quæ docet, sola fortissimæ imaginationis vi pestilens venenum generari posse, tria confirmare videntur: 1. Imaginationis

nationis stupendi effectus: 2. Ratio: 3. Experientia. *Stupendi effectus* imaginationis clarissime elucet in mulieribus gravidis, quarum foetibus pro gravi concepta imaginatione, in utero materno insignes ac miraculosæ notæ imprimuntur, cuius rei exempla apud Scriptores passim inveniuntur. Isti effectus etiam in aliis animadvertuntur: nam à sola tristi cogitatione homines sæpe inhorrescunt ac tremunt, vel lachrymas profundunt: imò à forti mortis imaginatione nonnullis una nocte capillos incanduisse, ex historiis notum, & à nobis ipsis quoque visum fuit. Sic etiam nonnulli ab adpectu & imaginatione epileptici cadentis, epilepsiam contraxerunt. Imaginatio grati cibi salivam copiosam in os profluere facit: rei foetidæ imaginatio ad vomitum incitat: Veneris cogitatio colem erigit. Visi quoque sunt ægri, qui per solam validam imaginationem de remedio aliquo conceptam, sanitatem recuperarunt. Ratio docet, cum ab imaginatione humores & spiritus in corpore variis motibus agitati, varios effectus, & multos quoque morbos inducant, etiam pestilens venenum inde in corpore generati, sicque pestem induci posse. *Experientia* hæc priora magis confirmare videtur, cum sæpius visum fuerit, nonnullos ex sola imaginatione peste correptos fuisse: quod historiis seu exemplis demonstrant, Erasmus Hedenus, in oratione quadam. Jo. Matthæus, cent. quæst. 86. Scheunemannus, in Paracels. de cap. 15. Cum autem hæc ita se habeant, videtur sola imaginationis vi pestilens venenum etiam in corpore generari posse. Pro negativa parte, his jam dictis itidem tria opponuntur: 1. *Imaginationis* in plurimis rebus debilitas, seu agendi impotentia: ex. gr. quantumcunque homo pallidus imaginetur, & velit ut sanguis spiritusque ad faciem ferantur, illud propterea per imaginationem non impetrat: sic neque ictericus flavedinem, neque hydropicus aquam intercutem, neque calculosus calculum ulla imaginationis vi deponere potest: sic etiam qui tempore hyberno friget, imaginationis vi non in-

calescit, nec qui esurit, saturatur. 2. *Ratio*, quæ docet, à forti imaginatione induci animi affectus, lætitiā, iram, metum, terrorem, &c. & spiritus ac humores non primariò ab imaginatione, sed ab his affectibus commoveri variis modis, pro eorundem varietate, atque sic non ab imaginatione, sed ab illis motibus procedere varios affectus, pro varietate corporum in quibus fiunt. 3. *Experientia*, quæ illud confirmat: nam licet mille homines sibi firmissimè imaginentur epilepsiam, ex illa sola imaginatione nemo epilepticus fiet: verum si illi mille epilepticum horribiliter convulsū viderint, & à visione illa omnes graviter terreantur, fortè ex illis omnibus unus aliquis (nempe cujus dispositio jam antea ad epilepsiam inclinabat) epilepsia corripitur, illud tamen non fiet ab imaginatione, sed à dispositionis aptitudine & terrore, qui humores subito movet versus cerebrum, jam ante ad epilepsiam præparatum. Idem de aliis quoque morbis & imaginationis effectibus intelligendum. Sic quoque dicendum est, pestilens venenum per solam tristem imaginationem in corpore humano non gigni, sed terrorem isti imaginationi comitem commotione spirituum, corpora, disposita ad venenum pestilens facile recipiendum, disponere, & si veneni quid in corporibus latet, illud in actum promovere. Quod ipsum quoque asserit Thomas Fienus, de virtut. imaginat. Quod fortiter, inquit, de peste imaginantes pestem interdum acquirant, sit per accidens, quatenus scilicet imaginatio hac magnum infert timorem, qui timor movet malignos humores in corpore imaginantis latitantes, qui moti pestem faciunt: Et ita dico, imaginationem pestis non facere pestem, nisi in corporibus ad eam dispositis: uti ex eo patet, quod tempore pestis grassantis multi sæpe intensissime, & cum subsequente maximo timore de ea cogitantes, non propterea tamen ea corripantur, tempore verò non grassantis multo minus. Idem quoque sentiunt Goelenius, in Lomographia, & Sennertus, lib. de consens. chym. cap. 14.

## CAPUT IX.

## De pestilentis inquinamenti processu.

 Um pestilens inquinamentum aëri jam coelitus immissum, atque in & ex illo exigua quantitate genitum, per eumque aliquantillum dispersum est, paulatim quasi fermentatione quadam se expandit, in eoque augetur, sicque magnæ aëris parti sibi similem venenositatem imprimit. Cum autem aër à venenoso hoc inquinamento incipit alterari, pollui, & ad venenositatem disponi, incipit simul etiam rebus sublunaribus valde infensus & noxius esse, iisque pro tempestatum, quæ tunc vigent, varietate, varia damna inferre (eodem modo sicut pestis in hominibus, pro humorum, temperamentorum, ac dispositionum diversitate, varias partes variis modis affligit, & diversa symptomata profert) interdum armentorum magnas strages edere; interdum segetes & terræ fructus (1.) ad vitæ sustentationem necessarios, corrumpere; nec non cicadas, muscas, scarabeos, aliaque noxia insecta, item millepedes & mures, aliaque animalcula segetes fructusque



que corrodentia ac comedentia, quantitate maxima gignere, sicque sterilitatem terræ inducere (hinc sæpe oritur illa gravis annonæ difficultas (2.) quæ pestem præcedit) interdum carniū, pisciū, aliorumque alimentorum, imò & humorum corporis nostri citas ac malignas putredines inducere, à quibus tunc febres illæ malignæ & pestilentes (3.) quæ pestem antecedunt, generantur. Porro, sicut interdum partis alicujus phlegmone paulatim augetur, & transit in gangrænam, hæcque paulatim in sphacelum: sic quoque à primi inquinamenti pollutione aër corrumpitur & inficitur per gradus (4.) donec tandem magna illius pars venenositatem, primo inquinamento similem, acquisiverit, atque tunc demum fit apertissima pestis. Nam aër ille non putridus, sed venenatus (5.) existens, cum sit hominum calori nativo insensibilissimus, totaque substantia contrarius, pestilenti sua venenositate corpora facillimè inficit, & statim post invasionem innatum calorem impugnando, humidumque primigenium depopulando, viscerumque actiones lædendo seu depravando, facit ut humores amplius nec bene coquantur, nec cocti bene regantur, ac in salubri statu conserventur; unde plerumque graves eorum putredines citissimè inducuntur, è quibus tunc ilicò procedunt febres istæ putridæ pestilentes, quæ pestem mox sequuntur, vel comitantur, idque sæpe tam citò (præcipuè in corporibus quorum humores jam antea ad putredinem inclinabant) ut multoties pestis & febris simul invadere videantur: quo errore nonnulli, putarunt pestem esse febrem, eamque per febrem definierunt.

## A N N O T A T I O N E S.

I. **S**EGETES & fructus à pestilentis aëris malignitate corrumpi, etiam scribit Avicenna: *Mortalitas*, inquit, *corrumpit segetes & vegetabilia, & animalia corrumpuntur quæ ea comedunt.* Nam illa aëris maligna corruptio fruges & arborum fructus injucundos, insipidos, & mali saporis reddit, germina, herbas, & plantas perimit: frumenta vel nasci impedit, vel nata rubigine aliave labe inficit.

II. Hæc est illa fames quam pestis sequi solet, cujus mentionem fecimus capite præcedente, problemate quarto: ubi docuimus pestem non produci ab ulla fame, neque etiam sequi quamcunque famem, sed tantum illam quæ eandem cum peste causam habet, licet intensioris gradu minorem.

III. Citato problemate etiam probavimus pestem non induci ab aucta putredine illarum febrium pestilentium quæ pestem antecedunt, sed illam putredinem oriri ab eodem aëris inquinamento (sed intensioris gradu minore) à quo & ipsa pestis producitur, sicut ex hoc processu jam manifestissimè apparet.

IV. Obijciat aliquis: si illa pestilens venenositas ita paulatim & per gradus in aëre augeatur, quomodo potuit in exercitu Regis Davidis trium dierum spatio incipere, & simul adeo magna fieri, ut septuaginta millia virorum occiderit? Respondeo, æque in manu Dei esse magnam partem prædicti inquinamenti in aërem immittere, vel in eo suscitare, atque ita citò multos perdere, quam parvam, & ita præmissis poenæ imminuentis signis, secundum immensam suam misericordiam, homines ad peccatorum poenitentiam præmonere, antequam omnes in furore suo disperdat, ut multi resipiscentes & conversi vivere, ac poenam effugere possint.

V. Si quis fortè dicat, aërem non posse exuere naturalem conditionem, & venenositatem induere, nisi mediante putredine ipsius substantiæ aëris? Respondebo, illud sine substantiæ putredine fieri posse; eodem modo sicut corpus violenta morte enecatum, quamvis exuit naturalem vitalitatis conditionem, propterea tamen non exuit statim corporalitatem illius quod fuit (ut si hominis corpus fuerit, per mortem statim non mutatur in corpus equi, piscis, vel alterius animalis) nec etiam statim potest dici putrefactum, sed spiritu vitali privatum; post quam privationem postea putredo substantiæ insequitur: ita ut mors non à putredine, sed putredo à morte seu vitalitatis privatione procedat. Sic quoque aëris aliqua pars à cœlesti inquinamento polluta, naturalem conditionem exuere, & venenosa fieri potest absque putredine, à qua venenositate postea putredines (scilicet rerum compositarum, non verò simplicium elementorum) inducuntur: ita ut venenositas non oriatur à putredine, sed putredo à venenositate. Et quare, quæso, hoc in aëre fieri posse negabimus, quòd in aliis rebus fieri manifestissimè percipimus? ex. gr. Si frustum vitri antimonii, exactissima statera ponderatum, paucis horis imponatur vino optimo, postea eximatur, & siccatum iterum ponderetur, nihil de pondere imminutum esse comperietur, licet talis infusio vigesies, vel trigesies eum eodem frusto reiteraretur. Ergo manifestum est ex antimonii vitro nihil, quod animadverti potest, exiisse in vinum: præterea vinum omnino servat suum colorem & saporem, nec ulla in eo animadvertitur corruptio, & interim talem qualitatem ab antimonio contraxit, cujus ratione corpus sursum deorsumque satis violenter evacuat. Unde a-

liena



liena illa qualitas seu purgans vis vino accessit? an à putredine? Hoc nemo, credo, defendet, cui aliquid solidi iudicii supererit: igitur à venenata aliqua qualitate ab antimonio ei communicata & impressa sine putredine. Sic etiam vehenum pestilens coelitus demissum potest aërem venenata qua-

litate inficere sine putredine; quæ infectio postea in corpora sublunaria varias putredines & corruptiones inducit. Verum manifestissimum est, hæc non generare primum venenum infectionis causam, sed potius ab illò generari hæc corruptiones.

## C A P U T X.

## D E C O N T A G I O.

**C**ontagium (1.) est (2.) communicatio inquinamenti (3.) morbifici ab uno corpore in aliud, qua corporis inficientis morbus planè similis alteri corpori viventi communicatur. Ut cum per morsum canis rabidi similis rabies alteri communicatur: vel cum ab exhalationibus ægri peste laborantis alius quoque peste corripitur. Ut autem hæc communicatio (de pestilenti loquemur) cum effectu peragi possit, quatuor requiruntur: 1. Aptæ dispositio patientis. 2. Contactus patientis ab agente. 3. Efficacia major agentis quam patientis. 4. Tantum temporis (4.) ut ad invicem agere patique possit. In contagio quatuor consideranda veniunt: 1. corpus quod communicat: 2. quod communicatur: 3. cui communicatur: 4. quomodo communicetur. Corpus communicans est corpus à peste morbosum (5.) vel fomes. Quod communicatur est *μιασμα* (6.) seu occultum pestilens seminarium, ab ægroto seu infecto corpore (7.) vel fomite exiens. Hoc *μιασμα* communicatur alteri corpori analogo (8.) aptam dispositionem ad huiusmodi seminarium recipiendum habenti. Fit autem hæc communicatio, vel immediatè, ut cum per contactum corporis morbosum, vel excrementorum infectorum illud seminarium transmittitur: vel mediatè, idque sive per aërem (qui sicut fumos, odores, aliaque similia, ita etiam illa *μιασμα*, & vapores pestilenti veneno inquinatos recipit, atque aliis deinde communicat) sive per fomitem. Nam hæc *μιασμα* per aëris vehiculum transmittuntur, aut primo ad corpora animata analogæ aptam dispositionem habentia, quibus tunc pestem statim inferunt: aut primò ad inanimata, atque ab his postea ad animata. Omne corpus inanimatum, ad quod hæc transmissio fit, & quod pestilens venenum recipere, atque aliquamdiu servare potest, Medicis neotericis (9.) appellatur fomes. Debet huiusmodi fomitis corpus esse rarum, (10.) laxum, porosum, nullo frigore, nullo vehementi calore præditum; qualia sunt corpora lanea, lineæ, pellicea, lignea rariora & foraminolenta, aliaque similia. Quemadmodum autem odores, foetores, vel fumi, diu in vestibis, aliisque rebus conservari queunt, sic etiam pestilens inquinamentum sæpe longo tempore, in fomite servari, & cum eodem quoque ad alia longinqua loca (11.) transferri potest: si nempe quietus maneat fomes, nec agitetur, aut incalescat: nam si vel agitetur, vel incalescat, tunc inquinamentum loco suo movetur, & inde transfertur, vel ad corpora animata, quibus pestem infert, si modo aptam habeant dispositionem: vel rursus ad alia inanimata, in quibus iterum aliquamdiu servari potest: vel dissipatur, & sursum in aërem ascendit, in eoque extinguitur. Sæpe etiam fit, ut inquinamentum illud pestilens in fomite asservatum, licet non agitetur, si tamen à radiis Solaribus calidioribus quotidie feriatum, paulatim resolvatur, attenuetur, & evanescat, vel sursum ascendat ac dissipetur, sine ulla noxa eorum qui haud longè ab eo versantur. Sæpe etiam fit ut à maximo frigore vel gelu venenata ejus vis adeo infringatur, ut vel penitus extinguatur (ut in hac nostra peste factum fuisse diximus supra, cap. 3.) vel adeo debilis evadat, ut non multum nocere possit; exemplum vide infra, lib. 4. *Histor.* 129. At si fomes fuerit in tali loco qui à ventis perflatur, pestilentia *μιασμα* diu (12.) in isto loco commorari nequeunt.

## A N N O T A T I O N E S.

I. **C**ontagium à *contactu*, vel *contingo*, seu potius ab antiquo verbo *contago* nomen desumpsit. Solet autem contagii nomen tribus attribui: 1. Ipsi morbo contagioso, atque eatenus pestis, tanquam maximè contagiosa, haud rarò per excellentiam simpliciter *contagium* appellatur. 2. Seminario venenatæ qualitatis, atque eo sensu nonnulli definiunt contagium, quod sit, *inquinamentum ab aegroto corpore exiens, quo similis affectus alteri corpori analogo communicatur*. 3. Communicationi morbi contagiosi per *μιασμα*, seu seminarium: quo sensu Hercules Saxonia definit contagium, quod sit, *actio quaedam qualitatis morbose in corpus humanum dispositum & preparatum, quæ sit per contactum*. Et dicit contagium contineri sub actione, tanquam sub proprio genere. Sic Petrus Salius Diversus definit contagium, quod sit, *contactus duorum corporum, cujus ratione similis in altero per alterum morbus producitur*. Quæ tamen Salii definitio pestilenti contagio minus propriè convenit, utpote quod non tantum per corporis morborum contactum, sed etiam per medium, nempe per aërem vel fomitem, aliis communicatur. Quapropter nos potius dicendum arbitramur, *Contagium esse communicationem inquinamenti seu seminarii, &c.* sive illa actio communicationis fiat per immediatum contactum, sive per medium. Eodem modo Liddellius definit contagium, quod sit, *communicatio inquinamenti similis morbi, facta à corpore in corpus, aut immediate, aut mediante aliquo*. Nomen autem contagii non satis bene seminario, seu inquinamento attribui putamus, cum inquinamentum pestilens sit res per se, quæ morbum inducere potest etiam ante contagium, ut proinde nulla ratione contagium, sed propriè inquinamentum contagiosum appellari possit: nisi enim illa actio communicationis seminarii ab uno corpore in aliud accesserit, non sit contagium.

II. De contagio, anne pesti adsit, nec ne, alii aliter sentiunt. Petrus Salius Diversus, *lib. de peste, cap. 11.* contagium alicui pesti adesse concedit, sed non omni: idque probare nititur auctoritatibus & historiis Hippocratis, Galeni, aliorumque Medicorum, qui in furiosissimis pestibus, nulla habita contagii ratione, imò ne ulla quidem ejus mentione facta, quoslibet peste laborantes indiscriminatim inviserunt, neque contagium fugientes, neque alios id fugere monentes, utpote quod tunc temporis nullum (inquit) pesti aderat. Præterea dicit in Syria, Ægypto, & Cayro etiam hodie neminem peste infectos fugere, procul dubio propterea quod pestis ibi non sit contagiosa. Alii existimant nulli pesti adesse contagium, idque probare nituntur auctoritatibus & rationibus. *Auctoritatibus*: quia Hippocrates, Galenus, Avicenna, alique varii, cum Græci, tum Arabes, viri sagacissimi, qui pestem curiosissimè descripserunt, contagium, neque fugerunt, neque illud cognovisse videntur, quia aut nullam, aut saltem valde obscure de eo loquun-

tur. *Rationibus*: 1. Quia si pestis, inquiunt, contagiosa foret, ab illius contagio omnes illi necessarîo inficerentur qui cum ægrotis peste laborantibus conversantur, iisque inserviunt; at contrarium apparet in Medicis, Chirurgis, vespillonibus, aliisque, ergo non est contagiosa. 2. Quia si vapores & halitus è sano corpore emanantes, aliis corporibus ægrotis sanitatem istius corporis, è quo exiverunt, communicare, & morbos expellere nequeant, ergo etiam ægrotorum morborum vapores & halitus in sana corpora eosdem morbos transferre, ac sanitatem expellere non poterunt. His argumentis utitur Gregorius Nyssenus, magnus Philosophus & Theologus, in *explicatione istius dicti Servatoris nostri, Quod uni ex minimis meis fecistis, &c.* ubi tandem concludit, eos, qui cum ægrotis pestiferis conversantur, propterea eodem morbo corripî, quod communî cum infectis aëre utantur, ut eandem dispositionem internam habeant, non autem quia ab infectis contaminantur. Has jam dictas opiniones plurimi rejiciunt, & ex altera parte cum Fracastorio fere omnes primarii neoterici Medicinæ proceres, omni pesti maximum contagium adesse meritò judicant. Profectò non potuit etiam non illud contagium ipsis quoque Veteribus cognitum fuisse, quia antiquus Græcus Historicus Thucydides, in descriptione gravissimæ pestis Atheniensis, maximi contagii mentionem facit: cui pesti ipse Hippocrates etiam interfuisse dicitur, qui tamen istius contagii non facit apertam mentionem, quia, teste Galeno, *lib. 2. de difficult. respir. cap. 7.* sicut Thucydides, populo vulgariscribens, omnes totius morbi vulgò spectabiles circumstantias describit; ita Hippocrates omnes fereres notissimas prætermittens, tantum illa describit, quæ vulgares ordinariè non observant, & maximos sæpe Medicos latent. Ita ut Hippocrates pestis contagium tanquam notissimum quid præsupposuerit, hincque de eo verba non fecerit: cum tamen *lib. 2. de nat. hum. text. 4. v. corpūs δὲ πικρὸς*, id est, *morbosi effluviis*: & *lib. de flat. μίαισμα*, id est, *seminarium pestilentium*, meminerit. Aristoteles, *sect. 1. problem. 7.* dicit, unam pestem omnium maximè contagiosam esse. Galenus quoque, *lib. 1. de diff. febr. cap. 2.* inquit: *Pestilenti morbo laborantium conversatio minimè tuta, periculum enim est, ne concipiatur, ut scabies & lippitudo*. Atque ibidem, *cap. 4.* scribit pestem Atticam ex Æthiopia per putrida inquinamenta & aëris infectiones fuisse propagatam. Inter Historicos Titus Livius, tam *lib. 3.* quam *lib. 25.* graves pestes describens, contagii vocem expressit. Appianus Alexandrinus scribit Celtas ab Illyriis peste laborantibus, quoque infectos fuisse. Seneca 4. *de ira, cap. 5.* dicit: *In pestilentia cavendum est, ne corruptis jam corporibus & morbo flagrantibus assideamus, quia pericula trahimus, afflatuque ipso laborabimus*. Hinc ait Ovidius, 7. *Metamorph.*

*Quo propior quisque est, servitque fidelius agro,  
In partem lethi citius venit.*

Ex quibus omnibus satis liquet, Veteribus contagium non fuisse ignotum. Quod autem Hippocrates & Galenus contagium non metuerint, nec fugerint, illud eorum humanitati & audacia adscribendum est, qui non timuerunt per flammam & ignem, ac per mille pericula proximis suis in summa pestilenti necessitate auxilium ferre, (quemadmodum etiam ego in hac furiosissima Noviomageni peste continenter feci;) non quod à peste contagium abesse putarent; non etiam quod cum Syriis & Aegyptiis, pestem per solam fatorum destinationem hominibus immitti, ac propterea neminem per contagium peste corripere, vel pestem effugere posse, crederent; vel quod charitatis in proximos ergo, huic periculo se exponere, quam proximorum extremis necessitatibus non succurrere, mallent. Verum dicas; quare igitur plerique veterum Medicorum contagii descriptionem silentio præterierunt; vel adeo obscure de contagio locuti sunt? Respondeo: vel quia illos deterruit rei gravitas, cum ejus descriptionem difficillimam fore viderent; vel quia illud tanquam rem clarissimam & notissimam tacite præsupposuerunt; vel quia non cognoverunt aliud contagium, quam quod sit per immediatum contactum corporis morboſi, quo modo scabiem, lepram, morsum canis rabidi, aliaque similia contagiosa appellarunt. Cum autem contagium in peste frequentius per medium, quam per immediatum contactum communicetur, propterea de eo, tanquam rariore, vix loqui dignati sunt. Illius enim contagii, quod sit per vapores, aërem, fomitem, aliudve medium, vix uspiam meminerunt, propterea quod causam morbi ita inducti, non corpori ægroto medium illud inficienti, sed ipsi medio infecto adscriberent: ex. gr. æger peste infectus sudorum, exhalationum, & excrementorum foetidissimorum malignitate inficit aërem, qui aër ita infectus postea ab alio aptam dispositionem habente, inspiratus, eidem illam, quæ ab ægroto corpore exierat, infectionem communicando, eundem morbum infert. Talem morbum Veteres non à contagio corporis primò ægotantis, sed à maligna aeris infectione proficisci dicebant, neque id contagium appellandum esse judicabant. Porro, quantum ad rationes in contrarium allatas, illæ non sunt magni ponderis. Respondeo ad primam, propterea non infici omnes qui cum peste laborantibus conversantur, quia multa corpora tali occulta dispositione prædita sunt, ut à veneno pestilenti, etiam vehementi, profus affici nequeant; qua de re pluribus agemus sequenti capite. Ad secundam dico, sanitatem in mediocritate, morbum verò in excessu consistere: mediocritatem autem non vincere excessum, sed excessum evincere mediocritatem; atque hinc esse quod salubres expirationes, cum sint remissiores, morbos tollere nequeant: morbidæ verò expirationes, cum excedentes qualitates habeant,

mediocritatem possint corrumpere. Præterea sciendum, ita comparatum esse in rebus naturalibus, ut ad alicujus rei destructionem longè paucioribus mediis opus sit: quam ad constructionem. Ut sanitas constituatur, omnium humorum concordans ac conveniens mixtio requiritur, cum unus solius excessus morbum inducere possit. Ad hæc, effluvia sanorum cum sint excrementicia & inutilia, à meliore mixtura separata, non possunt continere facultatem sanitatis, sicut effluvia corporum peste laborantium continent ipsam maligni inquinamenti pestilentis proprietatem ac potentiam. Denique auctoritati & opinioni gravissimi viri Gregorii Nysseni, opponimus auctoritatem & opinionem S. Basilii, non minus Medici, quam Philosophi & Theologi insignis, qui in *explicatione primi Psalmi*, docet pestem esse maximè contagiosam: ut & auctoritatem Bezzæ & Riveti, summorum Theologorum, qui reprehendant eos, qui dicunt pestem non esse contagiosam, & bene docent, ejus contagiosam infectionem fugiendam esse. Præterea Gregorius Nyssenus videtur pæ necessitate coactus statuisse, vel saltem dixisse, pestem non esse contagiosam: videns enim passim quoscumque metu contagii & mortis fugere, postpositis omnibus misericordiæ & amoris operibus, atque hinc plurimos mori qui vivere potuissent, si aliquis iis inservisset, atque hinc metuendum esset, ne omnes tandem interirent, consultum duxit nonnullis fucatis rationibus populo persuadere, pestem non esse contagiosam, non quod talis non esset, verum ut sic multi à fuga detinerentur, & sibi mutuo auxiliares manus ferendo, plurimi servarentur. Cum Paulus Apostolus naufragium pateretur (*Actor. cap. 27.*) & nautæ fuga se servare nitebantur, dicebat: *Nisi hi in navi manserint, vos salvi fieri non potestis.* Sic etiam in peste, nisi auxiliares manus ferantur ægris, pereunt plerique, & qui fugiunt etiam sunt incerti, an se fugâ servare possint. Ità ut ex illa necessitate, quæ Nysseno hanc persuasionem extorsit, concludi nequeat, pestem non esse contagiosam. Verum qui his sibi nondum satisfieri patiuntur, sed antedictam opinionem pertinaciter defendere volunt, tandem eam confirmare nituntur verbis Sacre scripturæ, quæ *2 Samuelis 24.* pestem appellat manum Dei: & *Psalm. 38, ut & 91.* sagittam Dei: & *1. Paralipom. 21.* gladium Dei. Atqui, inquit, Dei manus, sagitta, gladius non vulnerant contagio, ergo, &c. Respondeo, Sacram scripturam dictis locis, per manum, gladium, & sagittam Dei, manifestissimè designare partim eum qui plagam desuper immittit, scilicet Deum; partim ipsius plagæ magnitudinem, quæ plaga per se, & per ex se emissum contagium, instar immanissimæ feræ grassatur inter homines, sicut potentissimorum hostium gladii & sagittæ debacchari solent. Ita ut per has Sacre scripturæ loquendi formulas pestis comes contagium à peste non excludatur (sic etiam non excluditur ab elephantiasi, quæ & ipsa appellatur manus Dei, qui tamen Deus, ratione contagii, jubet leproſos separare ab aliis) propter illud

illud enim jubet Deus, (*diversis in locis, infra citatis lib. 2. cap. 4. annot. 2.*) fugam capescere.

III. Dico, *inquinamenti*, quia corpus peste infectum duo communicat, vapores seu halitus putridos, & inquinamentum venenosum: in hoc consistit, & ab hoc peragitur contagium pestilens, non verò ab illis. Quia contagium pestilens, quod à putredinosa contagio longissime differt, non resultat ex putredine (ut c. 8. in *annot.* fuscè probavimus) nec ejus essentia in putredine consistit; sed in veneno; licet putredinem, ut plurimum comitem habeat. Attamen Matthias Untzerus, *l. 1. de lue pest. c. 7.* pestilens contagium in putredine, tanquam in proprio subiecto subsistere, statuit: quam suam opinionem his rationibus stabilire nititur. 1. Quod in externis videmus res putrescentes putredinis communicatione alias res vicinas corrumpere, ut liquet in carnibus, pomis, aliisque rebus putrescentibus. 2. Quod in omni contagio cernitur putredo. 3. Quod nullus, quantumvis periculosus, morbus, dummodo expers sit putredinis, contagione in alios proferat. 4. Quod in omni contagio fiat corruptio substantiæ, non secundum totum, sed secundum partem, idque sensim, quæ corruptio est putredo. Omnes hæ rationes speciosæ quidem sunt, sed interrim parvi momenti. Ad primam respondeo, maximam esse differentiam inter contagium putridum & venenatum: illud lente, & non nisi post prævias alterationes, aliud corpus contaminare; hoc in momento operationem suam edere, ut apparet in iis, qui pestilenti contagio infecti subito concidunt: illud corpora etiam diversi generis contaminare; hoc ut plurimum tantum corpora analoga: illud operationem exercere etiam in corporibus mortuis; hoc tantum in vivis. Ita ut omnino claudicat hæ Untzeri comparatio, qui illud tantum describit, hoc verò planè ignorasse videtur; nesciens, si in putredine consisterent illa contagiosa pestilentia *μιάσμα*, illa necessariò in se ipsis à putredine brevi tempore consumi debere, neque integris viribus in fomite asservari posse. Ad secundam & tertiam dico, nos negare, in omni contagio putredinem cerni, & morbum sine putredine contagio non proferpere, idque probamus exemplo eorum qui subito peste correpti statim mortui concidunt, & simul eandem contagiosam labem adhuc aliis communicant, nullis putredinis signis, neque in his, neque in illis, apparentibus, nec ante, nec post morbum vel mortem, imò nullo tempore ad putredinis inductionem concessio. Quod exemplum etiam falsitatem quartæ rationis demonstrat, & probat in omni contagio non fieri talem corruptionem substantiæ, quæ sit putredo, nam neque hæc, neque illa in momento fieri potest, cum tamen venenosum pestilens contagium id possit. Ad hæc, dico etiam in humoribus posse fieri venenatam qualitatem ex substantiæ corruptione sine putredine, nam ad prioris formæ corruptionem & novæ inductionem, necessariae quidem sunt præviæ alterationes (ut in semine, quod dum corrumpitur secundum

formam seminis, & induit formam fœtus, alteratur quidem, sed non putrescit) non verò putredo. Liqueat id in parte gangræna vel sphacelo correptæ, quæ primo corrumpitur, postea putrescit. Sic corruptio quoque præcedit in iis qui per contagium peste afficiuntur: nam venenatum inquinamentum prius communicatur, communicatum corrumpit spiritus & humores; & hanc corruptionem sequitur putredo, sicut demonstravit *præcedente capite, annotat. 5.* Atque ita ex his satis manifestè liquet putredinem non esse de essentia contagii, neque contagium pestilens ex ea oriri. Quod contra se ipsum docet Untzerus *lib. citato, cap. 9.* ubi inquinamentum pestilens appellat venenum, quod non dependet ab aliqua quatuor vulgarium qualitate, sed ab occulta specifica qualitate. Super hoc dubio etiam legi poterunt, Fernellius, *lib. 2. de abdit, cap. 14.* & Franciscus Valleriola, in *append. loc. com. cap. 2.* sed imprimis Sennertus, *lib. 6. prax. part. 3. cap. 3.* & *Paralipom. ad lib. 6. prax. cap. 1.* qui omnes plurimis aliis firmissimis rationibus (quas hic referre nimis longum foret) hanc; de contagio pestifero à putredine, sententiam penitus destruunt.

IV. In qualibet naturali actione hæc quatuor concurrunt: Agentis fortitudo, patientis dispositio, contactus passus ab agente, & mora agentis in passio. Maxime requiritur agentis fortitudo; quoniam à proportionem minoris inæqualitatis non sequitur actio, sed à proportionem majoris inæqualitatis, nam magna navis non à parvo, sed à magno vento impellitur. Patientis dispositio necessaria est, quia quodlibet non agit in quodlibet, sed actus agentium fit tantum in agente bene disposito: sic magnes non trahit lignum, non lapidem (quia non sunt aptè disposita subiecta) sed ferrum, dummodo sit mundum, non verò admodum rubiginosum; vel oleo illitum; vel adamante alteratum, tunc enim; propter malam dispositionem ferri, illud non attrahit. Huc facit contactus, immediatus, vel mediatus: nisi enim aut ipsum magnetis corpus, aut aer aliudve medium cui virtus ejus impressa est, ferrum tangat, illud non attrahit: quemadmodum neque ignis aliquem calefacere potest, nisi calefaciendus ab ipso igne; vel ejus calore aëri infuso, tangatur. Etiam tempus & mora expostulatur, nam si lignum parvum in ignem quantumcunque magni posueris, & statim rursus amoveris, non comburetur, propter nimis parvam moram. Quantum ad pestilens contagium; illud ut agat, debet esse fortius patiente, & non potest agere nisi per contactum in patiente disposito, accedente aliqua mora; quæ interdum longior requiritur, interdum brevis sufficit, imò nonnunquam vix temporis momento opus est, ut contagium vires suas exerat: quæ diversitas procedit ex majore vel minore veneni efficacia ac quantitate; & majore vel minore corporis quod invadit, aptitudine.

V. Dico, *corpus à peste morbosum*: quia non quodlibet corpus, quod alteri quam ipsum habet affectionem communicat, contagiosum est, ut

cum calidum aliud calefacit, aut frigidum frigidat. Neque quodlibet morbosum corpus contagiosum est, ut cachecticum, ictericum, hydropicum. Neque quodlibet corpus morbosum & contagiosum pestilenti contagio contaminat alterum. (sic scabie vel lue Venerea infectum alteri non infert pestem) sed tantum illud quod à peste morbosum, seu pestilenti veneno infectum est. Sciendum enim; non quælibet venena, nec quælibet corpora venenata esse verè contagiosa, licet multa nobis sint lethalia: sic arsenicum, etsi sit nocentissimum, non est tamen contagiosum: scorpio vel serpens, quamvis homini ictu vel morsu suum venenum communicent, non sunt tamen animalia contagiosa, quia illud venenum non est ipsis morbosum, sed naturale.

Hic quæri posset, an corpus à peste morbosum, sit contagiosum ratione morbi, an verò ratione causæ morbificæ? Dico, utriusque: nempe primariò ratione causæ morbificæ, absque qua nec morbus, nec contagium fieri potuisset: secundariò ratione morbi: nam postquam causa morbifica in corpore generavit morbum, etiam ipsi simul impressit facultatem eandem causam multiplicandi, quæ multiplicata ulterius diffundi ac disseminari potest ad alios: eodem modo sicut fit in fermento, cujus parva quantitas magnæ farinaceæ massæ admixta, totam fermentare facit, ita ut postea quælibet istius massæ particula, quousque in operatione persistit, æque efficax sit ad similem quoque effectum edendum: quæ vis illi massæ primò impressa est à primo fermento, at secundariò aucta à fermentatione.

Hic & alia quæstio adjungenda est, an omnia corpora à peste morbosa sint æque contagiosa? Dico, non: sed illa, quorum morbus in salutem & vitam terminatur, esse minus contagiosa iis, quorum morbus lethalis est. Quia in illis venenum pestilens à robusta naturæ vi & alexipharmacorum usu non solum retunditur, verum etiam tandem extinguitur, ita ut qui è tali corpore exhalant vapores, multò minus venenositatis in se contineant. In his verò venenum evicto calore vitali triumphans, omnibus humoribus maximè venenatam corruptionem imprimit; ita ut è talibus corporibus, quorum humores venenosa labe magis magisque inficiuntur, multò magis venenosas exhalationes efferri necesse sit. Sic tempore pestilentiae plurimos ab iis, quorum morbus in exitum terminatur; pauciores verò ab aliis, qui à morbo convalescunt, infici, observatum est. Nam in domo aliqua si quispiam peste correptus à morbo evadat, sæpe nullum domesticorum inficit; atque sic morbus sæpe in uno solo illic terminatur: contra verò si unus æger peste correptus moriatur, plures in eadem domo infici & mori solent.

VI. Illa *μιάσματᾱ* Græci etiam *νοστικὰ ἀπορρίσεις*, & *ἀπορίσεις*, ac *ἀνέμιατᾱ*, Latini *Morbidas expirationes*, vel *Morbosa effluvia*, vel *inquinamenta*, & *contagii seminaria* appellant. Quia sicut semen corporis viventis aliud animatum ejusdem speciei producere potest, sic illud *μιάσμα*

seu seminarium, è corpore morbofo emissum, alteri corpori similem quoque morbum inducere potest.

Occurrit hic quæstio, cum in plerisque aliis morbis etiam aliquid morbifici exhalet, quare non omnes sint contagiosi? Respondeo: quia in aliis morbis solummodo effectus causæ aliqua pars, nihil verò ipsius causæ morbificæ exhalat, quæ si exhalare posset, forent plerique morbi contagiosi. Explicabo mentem: multi morbi oriuntur, vel à sanguinis nimia copia, vel à meatuum obstructione, vel à putredine. In morbis à sanguinis copia exhalat quidem pars istius copię, sed causa istius copię (scilicet nimia boni cibi ingestio, otium, aliave) non potest exhalare. In morbis ab obstructione potest quidem exhalare pars humoris obstruentis, sed ipsa obstructio nequit exhalare, & adhuc minus debilitas viscerum humores obstruentes generantium. In morbis à putredine exhalat quidem pars humorum putrescentium, sed causa istius putredinis (nempe obstructio, solutio unitatis, mala coctio, visceris alicujus vitium, debilitas, vel corruptio, aliave qualiscunque) nequit exhalare. Idem de cæteris intellige. Ac propterea non possunt tales morbi esse contagiosi, in quibus non exhalat aliqua causæ morbificæ pars, nam contagium in ipsa causa morbifica consistit, & ab ea peragitur. Hinc autem est, quod pestis sit contagiosa, quia in ea exhalat ipsius causæ morbificæ, nempe veneni pestilentis, pars, una cum parte effectus, nempe putridis vaporibus & excrementis.

VII. Contagiosa *μιάσματᾱ* per varias vias è corporibus infectis exeunt, ut, per poros cutis, sudores, & invisibiles exhalationes, per expirationes, dejectiones, & sputa, per pus & saniem, &c.

VIII. Corpori analogo & ejusdem speciei illud venenum pestilens communicari debet, ut pestilentem infectionem inferat: (loquimur de eo quod plerumque contingit, nam pro miraculo habendum non est, si fortè animal brutum, canis, felis, &c. aliquando ab homine, vel homo à bruto animali ægrotante inficiatur, sicut canem rabiosum videmus per contagium inficere hominem simili veneno, licet humanum corpus ipsi non sit analogon: ) Nam si ab homine transferatur ad equum, illum non inficiet, quia inter hominem & equum nulla est analogia; atque hinc fit, quod idem venenum, quod homini perniciosum est, equo non noceat. Illa autem perniciofa istius pestilentis veneni operatio, in omnibus hominibus non eodem tempore & modo peragitur: nam cum illud contagiosum *μιάσμα* in corpore receptum est, in aliis citissime, in aliis lente morbum inducit. Imò in hac peste Noviomagensi, etsi plerumque citissime se effectis prodederet, tamen interdum per aliquot dies, interdum per duas tresve hebdomadas, semel per aliquot menses (exemplum annotavimus lib. 4. *Hist. 103.*) in corpore latuisse, observavimus, antequam sui præsentiam certis ac notis signis manifestaret, viresque suas manifeste exereret.

Illa

Illam autem operationis tarditas ob duas imprimis rationes fieri potest: 1. Cum venenum pestilens, quod corpus ingreditur, vel est nimis parvæ quantitatis, vel nimis debile, quam ut calorem nativum citò afficere possit; atque tunc ab exiguo initio paulatim vires acquirens, longiore tempore eget, antequam calorem nativum impugnare ac debilitare, viscerum robur dejicere, putredines malignas inducere, & sic ad excellentem potentiam assurgere, ac se manifestè prodere possit: quemadmodum Galenus, *lib. 6. de loc. affect. cap. 5.* illud ipsum docet de sputo canis rabidi. 2. Cum venenum illud recipitur à corpore non satis aptam dispositionem habente, cujus calor nativus fortior illum hostem diu non persentiscit; nec ab illo notabilem vim patitur; attamen tandem ab hoste, tractu temporis clanculum potentiore facto, laceratus, adversus illum insurgit, & tunc ex illa pugna oriuntur pestifera symptomata. Nam quod venenum pestilens citius vel serius hominem afficiat; non tantum à magis minusve malefica vi dependet, sed etiam à maiore minoreve dispositione ac resistentia ejus, qui illud recipit. Id quod quotidie experimur in aliis venenis: nam idem ejusdem ponderis & qualitatis venenum variis hominibus exhibitum, aliis statim, aliis post aliquod tempus; aliis gravius, aliis levius; aliis fere nihil afficit: quod ipsum in medicamentis purgantibus quotidianus usus etiam docet, quæ pro varia disparique ægrotantium ægrotorum constitutione; temperamentique diversitate, citius aut tardius, levius aut vehementius operantur. Has rationes planè rejiciunt Hieronymus Mercurialis; Jo. Anton. Saracenus; Andreas Cuspalpinus; Matthias Untzerus; Joannes Morellus, alique plures; qui expresse negant pestilens venenum per menses vel hebdomadas aliquot in corpore humano occultum latere posse, idque tantum parvo tempore, nempe per duos tresve, aut ad summum per septem vel octo dies fieri posse concedunt. In horum sententiam etiam ego quodque antehac facile ivissem, nisi experientia me aliud docuisset. Sed quare, quæso, venenum pestilens aliquamdiu in corpore occultum latere non possit, æque atque venenum canis rabidi? Quod licet etiam naturæ sit insensissimum, in corpore tamen humano, non tantum per dies, hebdomadas; vel menses, sed per annos latuisse, observant, Alpharabius, præclarissimus Arabs Medicus, Matthiolus, Palmarius, Amatus Lusitanus, Albertus Magnus, Guainerius, Petrus Salius, alique plures. Quare non æque atque virulentia luis Venereæ? quam in corpore humano diu latere posse, præter quotidianam experientiam, testes sunt; Fernellius, Ingrassias, Franciscus Rennetus, Cardanus, alique gravissimi Medici. Quare non æque atque in aliis venenis assumptis? quæ teste Galeno, ut & Theophrasto *lib. 9. cap. 16.* nimis parva quantitates, vel debili qualitate assumptæ, non nisi post tempus aliquod nocent & interficiunt. Hic fortè dicent adversarii, differre venenum pestilens à rabioso, Venereo, aliisve venenis, quod hæc

lentore quodam, & terrestri gravitate prædita sint, cujus ratione tardius in actum promoven-  
tur; illud verò subtilissimum sit, ac citissimæ actionis. Sed respondeo: neque alia omnia venena terrestri lentore prædita esse, neque pestilens venenum semper subtilissimum existere; sed hoc sæpius quoque alicujus lentoris particeps esse, cujus ratione tanto tempore in fomite as-  
servari & latere potest. Quæstionem hanc latius tractat Joannes Oelhasius, *disput. 1. de seminari. pestil. intra corpus vivum latente.* Tandem concludimus, non solum pestilens, verum etiam omne qualecunque venenum, quod corpus ingressum est, vel citius; vel tardius operationes suas edere, prout corpus hoc illo modo dispositum invenit; & maiore vel minore quantitate; aut qualitate illud ingressum fuerit.

Hic non malè subungi posset alia quæstio, nempe, an venenum pestilens, quod corpus subiens in eo latitat, priusquam illi corpori morbum actu inducat, aliud externum corpus inficere possit? Dico, posse, eodem modo sicut fit in muliere, quæ cum viro Gallica lue infecto rem habens, ab eo inficitur, potestque cum alio statim coeans eandem ei labem contagio inferre, licet in se ipsa adhuc nulla morbosa istius luis indicia percipiat.

IX. Dico; Medicis neotericis appellari *fomitem*, quia nemo, quod scio, veterum Medicorum fomitis meminit.

X. Fomitis corpus debet esse rarum, ut *purior* illa contagiosa, tenaci aliquo vaporis immixta; recipere possit; densa enim corpora illa non admitterent: ac propterea nec lapides duriores porphyrii, marmorei; ut nec metalla possunt esse fomes, tum propter densitatem, tum propter frigiditatem. Hac de causa Mercurialis irridet eos, qui tempore pestis monetas tractare recusant; vel easdem antequam contingant, abluunt. Fortè hinc ille laudabilis Medicorum mos, toti mundo, quasi verò, communis, originem sumpsit, quod nempe ægris suis in pestilenti constitutione gratis, si diis placet, inserviant, propterea quod nummos scilicet metu contagii tractare non audeant. Videtur Mercurialis ea in parte non fuisse adeo strupulosus; ut alii Itali solent esse, qui porrectam pecuniam de manu alterius immediate non audent accipere, sed illam in pelvim aqua repletam prius injici curant; ut si quis fortè viscidis noxii vapores à manu dantis adhæreant; illi prius aqua vel abluantur; vel extinguantur. Nostrates videntur cum Mercuriali sentire; fomitem contagii metallis; propter eorum densitatem & frigiditatem, inherere aut adhærere vix posse, atque hinc tempore pestis nunquam anxii sunt in tractandis monetis; sciunt quippe fomitis corpus, nec adeo densum, nec adeo frigidum esse debere aut posse; quia frigore & gelu edomatur contagii vis, sicut è contra magno calore consumitur. Pergat jam Franciscus Ranchinus; *lib. de purific. rer. infect.* contrarium sentire quo usque volet, & ipsi datas monetas primò aceto abluat, antequam illas contrectet: paucos  
certè



certe inveniet assecclas, qui sibi persuaderi permittent, quod aurum, argentum, æs, aut ferrum, pestilentis seminarii fomes esse possint, atque hinc monetas ex iis confectas sine præmissa ablutione & purificatione non esse contrectandas. Profecto Auri sacra fames tam potens est antidotum adversus huiusmodi scrupulosum timorem, ut simul, & timorem, & omnem pestilentis seminarii, tam suspensionem, quam etiam vim ipsam penitus discutiat, pessundet, & extinguat.

Quæritur, utrum contagiosa *μιάσματα*, quæ in fomite hærent, sint ejusdem naturæ & venenositatis cum causa morbifica, quæ isti corpori, è quo exierunt, morbum induxit? Dico, planè eandem naturam & vehementiam continere. Quare igitur omnia *μιάσματα* è corpore morbofo exeuntia, non constituunt ubique fomitem, corpore, seu subiecto aliquo commodo ad fomitem dato? quia *μιάσματα* illa per se tenuia plerumque sunt, ac propterea deferuntur & disperguntur ubi plurimum per aërem, nec facile alicui rei, propter tenuitatem & subtilitatem adhærent, sed una cum aëre facile ab aliis inspirantur; (hac de causa valde periculosa est conversatio cum infectis.) At si illa *μιάσματα* immixta fuerint tenaci alicui vaporum, atque ita ad commodum inane corpus delata, illi firmiter adhærebunt, & fomitem constituent. Hinc est quod pestiferorum novissimi halitus (quibus illa *μιάσματα* immixta sunt) è moribundis exeuntes, plerumque fomitem constituent; quia moribundorum calor jam penè extinctus & omni vigore privatus, putridas fuligines amplius attenuare & discutere nequit, ac propterea crassas tantum & tenacissimas exhalationes vaporosas emittit, quæ cuicunque disposito corpori obvio facile inhærent, eique se insinuant. Hic est ille halitus verus (à multis pro fabula habitus) de quo vulgares loquuntur, cum dicunt, se vidisse ab ægro extremum spiritum reddente exiisse venenum pestilens instar parvæ nubeculæ ceruleæ (nam illi ultimi halitus talem colorem aliquo modo rudioribus referre videntur, si candela ardens paulò longius à lecto adstet) idque se insinuasse in hanc aut illam rem. In eo quidem errant illi rudiores, quod totum venenum pestilens una cum extremo spiritu è corpore exire arbitrentur, cum tantum aliqua veneni pars, vaporibus istis permixta, exeat: attamen docet experientia, ex rebus illis, in quas talem nubeculam transferri viderunt, postea casu commotis vel excussis, pestem non semel aliis adstantibus mox communicatam fuisse.

XI. Thucydides refert contagium pestilens per fomitem ex Æthiopia in Græciam advenisse. Sic quoque Appianus Alexandrinus, *lib. de bello Illyrico*, scribit olim Celtas, cum superassent Illyricos, ipsorum rebus positos, peste infectos fuisse, propterea quod Illyrici peste laborassent. Non minus etiam hodie cum vestibus aliisve rebus pestilens venenum ad alias civitates vel regiones deferri videmus: qua de re plura videantur *precedente cap. 8. annot. 1. problem. 1. & lib. 2. cap. 3. annot. 4. & 11.* Hic duæ quæstiones occurrunt:

1. Utrum aliquis contagium in vestibus suis circumferre possit, & illud aliis communicare, seipso illaeso manente. 2. Anne solum contagium è fomite prodiens possit inducere pestem generalem. Ad primam respondeo; id fieri posse, si contagiosum inquinamentum circumferatur ab homine aptam dispositionem ad pestem non habente, qui tamen illaesus manens per hunc fomitem, illud venenum pestilens alteri aptam dispositionem habenti impertiri potest. Hujus rei exempla tempore pestis extant in vespillonibus, aliisque qui ægris & mortuorum sepulturæ inseruiunt, quorum hominum communionem non minus quam ædes infectas, imò adhuc magis fugere jubent omnes Medici, quia tales plerumque solent contagium pestilens, ipsis innoxium, aliis verò dispositis damnosissimum circumferre. Ita scribit Evagrius, *Histor. Eccles. lib. 4. cap. 28.* contigisse in magna peste sui temporis, ut sæpe homines sani ex infectis regionibus discedentes, & in liberas abeuntes, inficerent illarum regionum sanos, eo quod in vestibus fomites inscii circumferrent, quos aliis communicabant, atque ita etiam aërem inficientes, pestem inducebant. Ad secundam dico; per contagium fomitem translatum duobus modis pestem induci. 1. Cum contagium illud peste vigente fomiti immixtum non diu post ad alia loca transfertur, ibidemque aliis communicatur, qui rursus simile contagium à se diffundentes, plures ipsis vicinos inficiunt, atque sic pestis pomeria ulterius extendunt: qualem pestem describit Rondeletius, *lib. de febr.* à qua illos tantum infectos fuisse refert, qui infectas ædes frequentaverant. Verum talem pestem minimè generalem seu epidemiam appellari posse putamus. 2. Cum contagium adeo vehemens est, ut non tantum proximos homines, sed ipsum etiam aërem inficiat, qui deinde omnibus promiscue communicatus, sævam pestem inducere potest: quæ tamen pestis licet in una vel duabus civitatibus vagari queat, pluribus tamen regionibus communis fieri nequit, nisi aliquid *divini*, de novo cœlitus immixti, aut in aëre generati, concurrat, quod non tantum inceptam causam adaugeat & promoveat, verum etiam aërem pravis qualitatibus imbuendo, & alimenta corrumpendo, corpora debilitet, atque sic ad pestem facile suscipiendam disponat. Saltem contagium in fomite latens non debet esse antiquum, ut pestea pestem accendat: nam (ut antea dictum, *cap. 8. annot. 1. problem. 1.*) contagium in fomite integris viribus non diu persistit, sed aliud citius, aliud tardius in eo emoritur, & ad summum spatium unius anni prorsus invalidum evadit, adeoque aboletur, ut inde nihil mali amplius metuendum sit. Huic nostræ sententiæ, procul dubio, in contrarium objiciuntur testimonia aliorum auctorum, qui scribunt, non tantum à recenti, verum etiam ab antiquissimo contagio, quod plurimis annis in fomite delituit, furiosissimas epidemias maximeque perniciosas & generales pestes fuisse excitatas. Quale est testimonium Ammiani Marcellini (hujus mentionem fecimus supra, *cap.*



cap. 8. annot. 1. probl. 4.) qui scribit ex antiquissima arca aurea, in templo Apollinis reperta, tam virulentum pestilens contagium erupisse, quod magnam mundi partem infecerit. Ut & aliud Trincavellæ, qui, lib. 3. Consil. 17. refert Justinopoli pestilens venenum per viginti annos latuisse in chordis illis, quibus mortui tempore pestis ad sepulchra dimissi fuerant, quibus post tantum temporis è scrinio quodam depromptis, contagiosam malignitatem primò proximè adstantes, ac deinde totam civitatem invalisse, ita ut ex hac occasione decem hominum millia interierint. Item illud Sennerti, qui lib. 4. de febr. cap. 3. scribit, Laubani à contagio, quod quatuordecim annis in linteo latuerat, pestem magnam excitatam, & vicinis quoque civitatibus communicatam fuisse. Verum etsi hæc testimonia ab auctoribus fide dignis conscripta sint; attamen quia illi hæc non de sua propria experientia proponunt, sed tantum ex relatu proletriorum quorundam, de vilissima plebis sæpe hominum, (qui non tantum mendaces, verum etiam valde rudes & creduli sunt, atque suas imaginationes facile aliis tanquam verissima oracula proponunt, vel ut alios ignaros fallant, vel ut nimis credulos irrideant) scribunt, non videntur certe tanti momenti, quæ nostram experientiam, multijuga

observatione, atque etiam ratione confirmatam evertere queant. Sciehdum quippe, cum pestis invadit, multos homines, præcipuè rudes, timidulos, ac superstitiosos, sibi facile persuadere, illam ex hac illave occasione initium sumpsisse, cum tamen illis putata occasio sæpe nihil ad pestem fecerit, sed morbi causa ad peccatorum punitionem à Deo de novo in aëre genita vel immissa fuerit. Eodem modo sicut fit, cum hostis urbem aliquam ex improvviso obruit & capit, facile sibi quisque persuadet, vel fossas minus altas, vel muros ruinosos urbis captæ causas esse, cum potius incolarum negligentia, & quod non vigila-verint, culpari deberet. Hic aliud occurrit dubium, quomodo tam exigua veneni pestilentis in fomite latentis quantitas, tantam infectionem de se diffundere possit, ut multos adstantes inficere queat? Dico, illud eodem modo fieri, sicut parvum fermenti frustum magnam farinaceam massam fermentat: plura hac de re videantur annot. 5. præcedente.

XII. Etiam Marsilius Ficinus, lib. de peste, docet pannos & parietes si spatio viginti dierum persentur & emundentur, ab omni contagio depurari. Quod tamen semper tam brevi spatio non fieri, etsi plerumque contingat, liquet infra, ex lib. 4. histor. 119.

## CAPUT XI.

## DE CAUSIS INFECTIONIS.

**J**Am ante docuimus pestem esse morbum communissimum, ejusque causam elemento communissimo, nempe aëri, imprimis inhærere, sive illa primitus à summo Deo ei immissa, vel in eo genita, sive à contagio ei ingesta fuerit. Hanc quoque causam pesti adscripserunt Hippocrates, Galenus, Avicenna, alique præclarissimi Medici, nec quemquam fere invenias, qui non putaverit primitivam pestis causam in aëre gigni, ejusque nocentissima seminaria in aëre maximè divagari. Verum cum nemo viventium aëre carere possit, sed eodem illo elemento omnes necessariò frui debeant, mirum videtur, illo jam maligna ac pestilenti labe infecto, quare non omnes homines & animantes, qui eodem illo fruuntur, ista venenata pernicies æqualiter offendant: cur aër ille inquinatus, cum sit omnium sanitati vitæque adversus, inspiratus omnes non malè afficiat: cur eadem pestis quæ homines invadit, pecora etiam non inficiat. Ad hujus dubii solutionem dicimus: *Primo*, aërem per omnes suas partes (1.) æquali malignitatis gradu infectum non esse. *Secundo*, infectionem omni tempore (2.) & ubique locorum (3.) æquè magnam non esse, sed suos gradus habere: nonnullis enim in locis & temporibus minimam, in aliis majorem, in aliis maximam existere, & prout homines hunc illumve aërem hoc illove loco & tempore ingrediuntur ac inspirant, ita illos, pro ista diversitate, vel vehementius, vel levius, vel planè non infici. *Tertio*, ad pestilentem infectionem non minus requiri causam recipientem (4.) quam efficientem; quæ non ex qualitatibus primarum intemperie, non ex putredine (5.) sed ex totius substantiæ occulta quadam & inexplicabili dispositione resultat: quæ dispositio in aliis talis est, ut à pestilenti veneno statim afficiantur; in aliis talis ut difficulter ab eo lædantur; in aliis talis ut eidem sine ulla noxa resistere possint.

## ANNOTATIONES.

I. **S**I aër per omnes suas partes æqualiter pestilenti labe contaminatus foret, totus venenum esset, nec ullum animal in eodem absque sanitatis vitæque naufragio commodè vivere posset. In peste autem nonnullæ minimæ ejus particulæ tantum contaminatæ sunt, eæque adeo paucæ, ut plurimorum animalium naturis nihil obsint, & tantum certis quibusdam dispositionibus damnum inferant. Eodem fere modo se res habet, quemadmodum si quis in cubiculo hominibus pleno aliquantum sulphuris accendat: ab isto enim nidore, si paucus sit, nec aërem totaliter inficiat, maxima eorum pars nihil offendetur, imò multi exiguum istum nidorem non percipient: verum si inter illos quidam fuerint asthmatici, tussiculosi, aliudve pectoris vitium habentes, illis nidor ille sulphuris, licet exiguus, statim summam molestiam inducet. At si tantum sulphuris in isto cubiculo accenderetur, ut omnes aëris partes æqualiter ab eo inficerentur, nemo in isto nidore vivere posset, sed omnes suffocarentur.

II. Omni tempore infectionem non esse æque magnam, docet usus: in principio enim & fine pestilentis constitutionis morbus adeo gravis & crudelis non existit, quam in augmento & statu. Præterea ut plurimum æstate & autumno (quia horum temporum constitutiones corpora maximè disponunt & præparant ad pestem) imprimis in his nostris regionibus, multò gravio-rem tyrannidem exercet, quam media hyeme; licet interdum etiam contrarium evenire visum sit, idque propterea, quia anni tempestates non semper debito ac consueto modo se habent, (ut cum æstas subfrigida, hyems tepida fuerit, &c.) atque hinc pro earundem varia mutatione, sæpe etiam furor pestilens variat.

III. Certissimum est pestilentem infectionem ubique locorum non esse æqualem, neque eandem per totum mundum æqualibus furis debacchari; sed ut plurimum modò hæc, modò illa loca, nunc vehementius, nunc levius invadere, & rursus alia multa intacta relinquere. Eo sensu intelligendus est Galenus, quando longam sui temporis pestem describit: ut & Philostratus, cum pestem suo tempore quindecim annis durasse, refert: nec non Jacobus de Partibus, in *comm. ad primam quarti Avicennæ*, quando pestem suo tempore per quindecim annos totum terrarum orbem pervagasse refert. Non quod eodem tempore omnes regiones & urbes simul peste infectæ fuerint, sed quod isto intervallo, modò in una orbis parte, modò in altera, morbus hic debacchatus fuerit, & plerasque regiones infestaverit. Sic etiam nostra ætate non semel Italiam solam, vel solam Germaniam, vel Galliam, vel Angliam, aliasve regiones seorsim peste afflictas fuisse notum est. Sic quoque Euagrius, Ecclesiasticus scriptor, refert maximam sui temporis pestem non simul omnes regiones invasisse, sed sine ullo ordine, modò

hanc modò illam afflixisse: *Subjungit*: sæpe aliqua in urbe dimidium populi fuisse infectum, & aliud dimidium fuisse liberum. Hanc de pestis varietate secundum loca opinionem confirmant omnes Medici, nam hoc fundamento innixi, jubent ad præservationem infecta loca citò & longè fugere. Sed quò? ad aërem salubriorem: ergo præsupponunt aërem in uno loco pestilenti labe infectum esse, aliis multis illæsis.

IV. Nullum agens potest agere absque patientis aptitudine, teste Galeno, i. de *diff. febr. cap. 4.* ubi sic inquit: *Nulla causarum sine patientis aptitudine agere potest: alioqui omnes qui sub sole æstivo, aut nimio motu exercentur, aut vini potu gravarentur, aut irâ excandescerent, aut tristitia affecti, febricitarent: alioqui etiam, ut arboror, circa Canis exortum omnes agrotarent, & pestilentia morerentur: at, ut diximus, magnam in generatione agritudinum, partem habet ejus, qui passurus est, habitus corporis.* Idem paulo post, eodem capite; subjungit: *Cum enim corporum dispositiones dissimiles sint ac multiformes, quædam facile alterantur ac patiuntur à causa in ipsis operante, quædam insuperabiles ac impassibiles omnino existunt, quædam cum difficultate patiuntur.* In hunc sensum quoque scribit Hippocrates, lib. de *flatibus*: *Sed est forte qui dicat, ut quid ergo non omnibus animantibus, sed alicui eorum generi accidunt hi morbi? cui ego sic responderim: differt corpus à corpore, natura à natura, nutrimentum à nutrimento, non enim omni animantium generi eadem sunt commoda & incommoda, sunt alia aliis magis convenientia.* Sic etiam pestifera lues neminem corripit, nisi eum qui habuerit recipiendi aptitudinem, procedentem potius ex occulta quadam naturæ proprietate, quam ex mala corporum vel humorum dispositione, seu morbofo apparatu. Hanc aptitudinem nonnulli Medici male arbitrati sunt dependere à peculiari quadam similitudine, seu analogia veneni pestilentis cum corpore quod inficitur; quia, inquit, *simile cum simili promptè jungitur.* Dico, male, quia in analogia non est pugna, simile enim simili junctum illud conservare nititur. Contra verò omnis actio in contrarietate consistit, & agens dum agit in patiens, ea intentione agit, ut illud sibi simile reddat. Non dependet ergo illa aptitudo ab analogia, sed potius à peculiari quadam *analogia*, quæ est inter venenum pestilens & corpus recipiens. Ista autem *analogia* dependet à peculiari quadam corporis dispositione, quæ dispositio duo requirit: *Primo*, similitudinem generis; neque enim quæ hominibus infesta est pestis, eadem bruta afficit, quæ ovibus eadem sues; quæ piscibus eadem quadrupedes terrestres; quia non est similitudo generis, ergo dispositionum magna diversitas. Hinc etiam est quod venenum aliquod non sit cuilibet animali venenum; sine noxa enim araneas comedunt gallinæ, serpentes & bufones ciconiæ, quæ tamen hominibus salis-que multis animantibus sunt lethalia venena: idem

idem quoque in peste evenit. *Secundo*, requirit hæc dispositio aliquam occultam specificam similitudinem inter corpora inficienda & infecta, cuius ratione pestilens venenum ipsis æqualiter magis infestum ac perniciosum existat, quam aliis qui illam specificam qualitatem non habent. Atque hæc causa est, quod interdum integræ familiæ, in quibus omnes, ratione originis, istam similem qualitatem habent, peste extinguantur (exempla vide supra, cap. 4. annot. 6.) aliis plurimis illæsis. Hinc etiam est quod interdum una natio magis peste inficiatur, quam alia, quemadmodum Cardanus, lib. 8. de rer. varietat. cap. 40, meminit pestis cujusdam Basiliensis, in qua soli Helvetii, non Itali, non Galli, non Germani affecti sunt. Et Joannes Utenhovijs, peregrinat. Eccles. Anglica cap. 4, meminit sævissimæ pestis Hainiæ in Dania, à qua omnes advenæ, Angli, Belgæ, Germani, immunes erant, quamvis etiam promiscuè inter infectos in ædibus infectis versarentur. In quo autem illa occulta dispositio consistat, quæ tantam cum veneno pestilenti antipathiam habet, nemo facile explicaverit: ac proinde frustra laborant, qui illam in manifestis qualitibus, in temperamentis, in sexu, in ætate, in regione, in caloris nativi & vitalis facultatis robore vel debilitate, in corporum puritate vel impuritate, in minimarum particularum figuratione, aliisve similibus quaerunt; nam nihil horum majorem vel minorem immunitatem à peste polliceri potest, ut docet quotidianus eventus: plurimi enim tam juvenes quam senes, tam viri quam mulieres, tam in una mundi parte quam alia, debiles, cacochymi; pravis humoribus referti, intemperanter viventes, pravo victu utentes, alique similes, in domibus infectis, inter ægros peste correptos, inter eorum foetidissima excrementa, imò inter jam putrescentia mortuorum cadavera, absque ullo sanitatis incommodo sæpe versantur; cum è contra alii multi euchymi temperatissimi, robustissimi, prudentissimè viventes, qualibet levissima occasione peste corripantur. Hinc Pigræus, prax. lib. 8. cap. 1, non ineptè sic ait: *Quamvis difficile sit judicare, qualia corpora disposita sint ad pestem, attamen videmus illam magis quætere certam quandam præparationem, quam cacochymiam, aut malam habitudinem; facilius enim ab illa inficiuntur corpora quorum humores ad corruptionem apta sunt, quam alia quorum humores corruptionem jam conceperunt; & videtur pestis esse talis qualitas, quæ sedem potius quaerit in corpore sano, quam aliis morbis obfito.* Fateri igitur necesse est, in quibusdam individuis esse peculiare dispositiones corporis

atque cordis, quæ auræ pestilenti vel validissimè resistunt, vel non resistunt; has autem dispositiones, vel dispositionum qualitates, nobis in hac naturæ caligine, & formarum ac qualitatum ignoratione, occultas esse & incognitas. Quapropter etiam Fernelius, lib. de febr. cap. 17, in hujus dispositionis investigatione non multum laborat, sed simpliciter dicit: *Est cognitu difficillimum quid corpus unumquodque pestilentia obnoxium reddat.* Lucretius & Fracastorius succincte & eleganter dixerunt, in peste varia ac diversa vagari seminaria, quæ prout his illisve amica vel inimica existunt; ita etiam modò hunc, modò illum inficere. Platerus, centur. posthum. quæst. 42, sic inquit: *Quanam hæc objecti sit dispositio, ut lubenter edoceri cupio, sic nos nescire, promptè fateor; licet non ignorem hoc venenum pro varia corporis dispositione variè agere.* Forestus, lib. 6. Obs. 9. in scholio, ait: *Propria & peculiaris constitutio atque præparatio, qua loca vel corpora reddit pesti obnoxia, omnino nos latet, neque sensu, neque ratione, sed solo eventu & experimento comprehenditur.*

V. Dico, non ex putredine; id est, non primario ex putredine: nam putredo est una ex illis causis quæ tantum secundario corpora ad pestem disponunt. Hæc enim humores torrumpendo, & spiritus alterando ac inficiendo, calorem nativum ad sui coctionem & expulsionem distrahit, ac simul viscerum robur imminuit, naturæque vires infringit & impotentiores reddit, quam ut pestilenti veneno resistere queant. Hinc fit quod in constitutione pestilenti ad omnes morbos putridos; qui homines tunc invadunt, se pestis facile adjungat, & rarò tunc morbus putridus peste incomitatus cernatur: quia dispositio eorum qui morbis putridis affliguntur, mediante putredinis occasione apta redditur ad pestem recipiendam. Eodem fere modo hæc res peragitur, sicut fit in munitissima aliqua urbe, quam nullus hostis, durante civium concordia, superare potest: hæc si exortis diffidiis intestino bello conflaret, atque tunc eandem fortis aliquis hostis forinsecus invaderet, dum ab intestino tumultu vires diffractæ, & aliis negotiis impeditæ, vel aliorum distractæ fuerint, facillimè eam ingreditur & capiet: non quod illa urbs primariò per se aptitudinem habuerit ut facile capi posset; non etiam quod cives in isto tumultu hostem primi advocaverint, sed quod secundario ex occasione istius intestini belli hostis occasionem nactus fuerit muros absque impedimento conscendendi; & urbem superandi.

## CAPUT XII.

*De causis febris pestilentis, quæ pestem comitatur.*

**V**enenum pestilens, quod totius substantiæ dissidio calori nativo infensissimum existit, cum sit tenuissimum ac subtilissimum, simul ac corpus ingreditur, & præcipuè cum per inspirationem ejus penetralia subit, facillimè labis ac malignæ suæ venenositatis notam imprimit sanguini arterioso, ejusque subtilissimæ parti, spiritui vitali, cum eoque ad cor procedens, ipsius vitalitatis asylum fortissimè impugnat, ut evictò summo illo munimento, totum microcosmicum regnum protinus devastet. Hujus crudelissimi tyranni insultibus natura se opponit, omnesque vires intendit, ut dirum hunc hostem reprimere, retardare, & quam longissimè è penetralibus suis propellere atque arcere possit. Hæc pugna si citò peragatur, & cor vel à majore seu fortiore veneno statim (1.) suffocetur, vel illud statim foras expellat, antequam ulla humorum putredo generari possit, tunc fit pestis sine febre, & sæpe etiam fiunt anthraces ac bubones sine febre. Si verò pugna hæc diutius perduret, & calor nativus in certamine adversus pestilentem hostem occupatus, debilitetur, ac in coctione & regimine humorum corporis imbecillior evadat, non possunt non humores citò putredinem concipere, è qua tunc febris (2.) exsurgit, quæ etiam maligna (3.) ac pestilens evadit, à pestilentis veneni infectione, ipsis quoque humoribus communicata. Tunc cor à duobus malignis hostibus impugnatur, nempe à pestilenti veneno, & à putredine febrili: pestilentis tamen veneni invasio tempore & natura putredinem febremque (4.) antecedit, atque ita putredo & febris fiunt symptomata pestis. Illa verò febris, vel citius, vel tardius pestilentis veneni invasionem sequitur, & major vel minor, ac hujus vel illius typi (5.) vel propter humorum putrescentium confusio- nem, absque typo est, prout pestis invadit hoc illove tempore & loco, & corpus hoc illove modo (6.) vel bene, vel male temperatum.

## A N N O T A T I O N E S.

**I.** **T**Antæ violentiæ sæpe est pestilens venenum, ut nonnullos statim ipso invasionis momento repente occidat, aliis intra breve tempus vitæ filum citius abrumpat, quam inflammationi aut putredini tempus detur. Hujus rei etiam aliqua exempla in peste Noviomagensi vidimus, & aliàs quoque ab aliis Medicis observata fuisse legimus. Jacobus de Partibus, in *comment. ad primam quarti Avicennæ, cap. de peste*, narrat suo tempore in pestilenti constitutione interdum ægros ad ipsum cum urinis accessisse, quos ex pulsu aliisve signis nulla febre, nulla inflammatione, nullo gravi symptomate laborare percipiebat, qui tamen statim mortui concidebant. Plutarchus in *Romulo*, scribit in illa peste multos absque morbo interiisse, id est, ex improvviso extinctos fuisse, antequam aliquis morbus generari posset. Valleriola, *loc. com. lib. 3. cap. 18.* scribit tempore pestilentis anni 1534, in Gallia Narbonensi hujusmodi mortes sæpius visas fuisse, imò nonnullos loquentes & incedentes, repente, quasi fulmine ictos concidisse. Mercurialis *lib. de Peste, cap. 18.* in Patavina peste tales subitaneas mortes non uni accidisse refert. Quercetanus, in *Alex. cap. 4.* meminit magnæ pestis quæ Aquisgranum infestavit, in qua multi mensis assidentes, & cibos

deglutientes, animam reddiderunt. Droëtus, *Consil. de peste, cap. 3.* refert, Lugduni tempore pestilenti homines obambulantes per viam subito exanimatos concidisse in terram. Alexander Benedictus, *lib. de febr. pest. cap. 2.* de peste quadam sic inquit: *Hoc malum miserabile mortalibus ita evenit subito, ut plurimi sine febre inter domesticas ac forenses actiones, decem horarum spatio, quidam viginti, sine urina pulsusque certo signo, in templis, in via, ex insperato raperentur.* Follinus, *Amulet. cap. 16.* refert anno 1502, Bruxellis tam crudelem sæviisse pestem, qua sæpe quingenti una die fuere sublati, & homines læto convivio assidentes, inter calicem supremæque labra, tanquam percussi fulgure, protinus exspirarunt. Zacutus Lusitanus, *Prax. admir. lib. 3. Observat. 43.* scribit, ex immenso fœtore sanguinis è secta pestiferi vena effluentis, tres ministros subito interfectos fuisse, & quasi sideratos illicò animam efflasse. Similia quoque se vidisse testantur, Gemma, *lib. 1. Cosmocrit. cap. 17.* Petrus Salius Diverfus, *de pest. cap. 5.* & Paræus, *lib. 21. cap. 17.* Sed quænam est causa tam violentæ operationis? Dodonæus, *Prax. lib. 1. cap. 18.* dicit, pestis seminaria interdum esse minus acuta & lentioris activitatis; interdum acutissima & tenuissima, atque hæc citissimè ad cor pervenire, &

maximæ, ac velocissimæ activitatis esse. Qualem autem operationem hæc acutissima seminaria in corde faciant, describit Hercules Saxonia, *Prax. lib. 11. sect. 2. cap. 3.* his verbis: *Hinc fit in peste non raro homines, integra valetudine fruentes, & sanorum omnia munia obeuntes, momento temporis, quasi fulmine percussos, cadere & interire, quod in aliam causam, quam in spirituum vitalium à veneno, inspiratu accepto, corruptionem, referri non posse, pro constanti habeo.*

II. Hic gravissimum problema examinandum occurrit, nempe, *Utrum febris sit de essentia pestis, nec ne.* Hercules Saxonia, Joannes Paschalius, Rondeletius, Angelus Sala, Petrus Paulus Pereda, Palmarius, Antonius Portus, Untzerus, Mindererus, alique præclari Medicinæ proceres, multis variisque argumentis probare nituntur, febrem esse de essentia pestis, nec pestem sine febre dari posse. 1. *Quia*, inquirunt, invasionis modus & symptomata illud docent: nam pestis invadit cum horrore, quem postea excipit calor; ut in multis febribus putridis fieri solet: adsunt quoque vigilæ, oris siccitas, sitis, aliaque symptomata, putredinis & febris indicia. 2. *Quia* morbi acutissimi semper febrem comitem habent, testibus, Hippocrate, 1. *epidem. sect. 3. text. 3.* & Galeno, 1. *aphorif. 7.* nec non 3. *de difficult. respir.* ubi scribit, febrem esse inseparabilem à morbis acutis. 3. *Quia*, secundum Galenum, 1. *de differ. febr.* 4. pestis generatur ex putredine accensa circa cor. Nequaquam autem insignis putredo circa cor fieri potest sine calore in ipso prius accenso, atque inde per universum corpus diffuso. 4. *Quia* intensissimum pestilens inquinamentum non potest subsistere sine putredine & calore præter naturam: Galenus enim, 6. *epid. com. 1. text. 29.* pestis causam statuit in immensa humorum corruptione, calorem simul putridum inducente. 5. *Quia* Hippocrates, *lib. de flat.* dividens febrem in particularem & communem, dicit communem febrem ab omnibus appellari pestem. 6. *Quia* Galenus, *lib. 1. de differ. febr. cap. 4.* & cum illo Avicenna, Rases, Aëtius, Paulus Aegineta, omnesque fere Medici, tam veteres, quam neoterici, in tractatu de febribus pestis historiam describunt, quasi eandem febribus annuerant. 7. *Quia* experientia docet, pestem cum febre invadere. Hæc sunt primaria argumenta & propugnacula, quibus gravissimi Medici dictam opinionem hætenus stabilierunt: quam tamen veritati minus consentaneam, nec febrem de essentia pestis esse, sed hanc ab illa differre, & sine illa existere posse, nunc ordine demonstrabimus. Respondemus igitur *ad primum argumentum*, pestem quidem multoties invadere cum horrore, sed non semper, neque etiam calorem intensum semper sequi, sed ejusdem nullum excessum haud raro in ægris toto morbi decursu animadverti, ut experientia docet, & Medicinæ Scriptores passim testantur. Dicimus etiam horrorem non esse certum signum febris, ut nec calorem. Quantum ad symptomata, vigilias, sitim, &c. neque illa in peste semper apparere, neque semper esse certa

febris indicia. *Ad secundum*: cum Hippocrates & Galenus dicunt, morbos acutos habere febrem comitem, ipsos non de omnibus, sed de plerisque id intellexisse: quod inde liquet, quia dantur aliqui acutissimi morbi sine febre, ut apoplexia, epilepsia, tetanus, &c. quos sine febre acutos esse testatur Galenus, *com. ad 2 Aphor. 19. & ad 5. Aphor. 30.* Præterea illis verbis ipsos significare voluisse, febrem plerumque vel antecedere, vel comitari, vel sequi morbos acutos, non autem febrem esse de essentia morborum acutorum, & ab illis inseparabilem; nam si interdum sequatur, interdum planè non adjungatur, separabilem esse certum est. Illam fuisse Hippocratis mentem, liquet ex 3. *epidem.* ubi agens de sacro igne & ulceribus pestilentialibus, inquit: *Multos autem una cum febribus, & ante febrem, & à febre arripuerunt.* *Ad tertium*: cum Galenus dicit, pestem generari ex putredine circa cor accensa, ipsum eo loco per pestem non intellexisse ipsam pestem, sed febres pestilentes: nam alioqui sibi ipsi contraxisset, talis enim putredo non posset circa cor accendi sine putredine, & tamen *lib. 9. de medic. simpl. facult.* docet pestem interdum esse sine febre. *Ad quartum*: nos ante, *cap. 8. annot. 1. problem. 4. & annot. 6.* satis fuse demonstrasse, pestilens inquinamentum, nec è putredine oriri, nec in putredine consistere, sed esse rem à putredine diversam: quotidianam quoque praxim docere, multos à pestilenti inquinamento repente ac in momento suffocari, antequam ad gignendam putredinem aut inflammationem ullum tempus detur: exempla patent annotatione præcedente. Quantum ad Galeni citatum locum, negamus ipsum eo loco agere de peste, vel pestis causam inquirere, sed dicimus illum apertissimis verbis loqui de febre pestilente: sic enim ait: *Sed febrium enumeratio, nunc in presenti sermone proposita, à differentia caloris accipitur, sub qua & pestilens febris, putridum calorem habens, contineri potest.* Et paulo post addit: *Sola pestilens febris denotatur, cujus ab aliis calor per putredinis excellentiam differt.* Ne minimam autem in toto isto commentario mentionem facit ipsius pestis, sed dicit, febrem habere calorem putridum excellentem; quod ipsi concedimus, de quacunque febre pestilente illud intellexerit, sive de ea quæ pestilentem constitutionem præcedit, sive de ea quæ pestem comitatur, sive de ea quæ est sine peste: verum de ipsa peste id minimè verum est. *Ad quintum*: licet Hippocrates dicat febrem communem appellari pestem, inde tamen concludi non posse, pestem esse febrem communem: nam illud eodem rediret, ac si quis diceret, apoplexia ab omnibus appellatur morbus lethalis, ergo omnis morbus lethalis est apoplexia. Præterea sciendum (sicut etiam antea, *cap. 1. annot. 6.* diximus) *pestis* vocabulum sæpius etiam detorqueri ad omnes res perniciosas, atque eo sensu fortè Hippocratem significare voluisse, febrem communem, quia valde perniciofa existit, multosque interimit, ab omnibus appellari pestem: sic etiam hodie vulgus febres malignas com-

munes; quibus multi moriuntur, pestem appellare solet, propterea quod instar pestis communes sint, ac valde perniciosæ. Galli adhuc magis improprie solent febres quartanas, omnesque morbos odiosos ac difficilis curationis, suâ linguâ *pestes* appellare. *Ad sextum*: historiam pestis à plerisque Medicis subungi tractatui de febribus, quia morbus hic ut plurimum febrem sibi comitem, vel à principio vel paulopost, adsciscit, non tamen individuum, sed ab eo separabilem, nam est sua cuique particularis ratio, pestis enim oritur ex maligno veneno, febris ex putredine & calore. *Ad septimum*: in prima pestis invasione febrem sæpe quidem animadverti, sed talem quæ procedit ex putredine à pestilenti veneno inducitur, ita ut veneni invasio tempore febrem antecesserit: præterea dicendum, sæpius etiam per multas horas febrem pesti in principio non adesse; imò sæpe toto morbi decursu nullam febrem pesti adjungi, quod necessario tamen ipso invasionis momento fieri deberet, si febris esset de essentia pestis, nam essentia est inseparabilis ab eo cui præstat suum esse.

Hæc sufficiant ad amputationem istorum fulcrorum, quibus prædicta opinio hæctenus innixa fuit. Quid de re ipsa sit, in textu diximus, nempe febrem pestilentem, pestis comitem, immediate non oriri à veneno pestilenti, sed mediante putredine, id est, non generari propterea quod humores à veneno pestilenti inquinantur, sed quod cor pestilenti veneno irretitum, obrutum, plurimumque debilitatum, inquinatos humores debito modo, neque coquere ac dilatare, neque regere & satis dispellere possit; qui hac de causa putrescunt, caloremque præter naturam concipiunt, sicque febrem excitant; quæ ob dictam causam ordine posteriorem necessario est diversa ac separabilis à peste, ejusque symptoma. Hoc ipsum confirmant dogmata & auctoritates, tam veterum, quam neotericorum, nec minus quotidiana praxis & obvia exempla. Hippocrates, 3. *epidem.* pestilentes quosdam morbos describens, inquit: *His adjuncta aliquando erat febris; aliquando non erat.* Paulo post addit: *Ipse morbus multis eo erupit citra febrem, & in febre.* Et 6. *epidem. sect. 7.* dicit: *Quibus voces frangebantur ad tussim, horum plurimi ne febricitarunt quidem, aliqui vero parum.* Galenus, 3. *epid. sect. 3. comm.* 158. ait: *Cum mortales vel citra febrem pestis corripit, &c.* Idem, 9. *de simpl. med. fac. cap. de Terra Samia*: *Bibitur, inquit, ex vino albo consistentia tenui, modicè diluto, si aut planè febre careant, aut leviter ea teneantur; sin graviter febriant, admodum aqueo.* Æschines, antiquus & doctissimus Orator, in epistola ad Philocratem ita scribit; *Delii pestilenti morbo laborabant, catenum nulla febris accedebat.* Haly, inter Arabes magni nominis Medicus, *Theoria lib. 5. cap. 2.* expressis verbis docet, pestem multoties febrem minime comitam conspicui. Inter neotericos idem docent, Duncanus Liddellius, *de peste cap. 1.* Theodorus Corbejus, *lib. 2. patholog. sect. 7. cap. 6.* (qui liber ab aliis Io. Magiro adscribitur) Lazarus Riverius, *sect. 3. de febr. cap. 1.* alique innu-

meri. Forestus, *lib. 6. Observat. 10.* inquit: *Vidimus anthracem habentes in membris ignobilioribus, sine febre, qui & vix decumbebant, & facillimè ab initio restituebantur: alios rursus spectavimus, qui subito simul exstinguebantur, cum ab initio nequam febricitare aut malè habere viderentur.* Alexander Massaria, *lib. 2. de peste*, his verbis utitur: *In nostra peste, non solum nostro, sed aliorum quoque gravissimorum hominum testimonio, sine ulla febre plerique interierunt.* Joannes Morellus, *lib. de pest. cap. 4.* scribit, tempore pestilenti multos dari bubones & carbunculos, quos nec febris, nec ullum malum symptoma comitatur, idque Cabiloni in constitutione pestilenti sæpius à se fuisse observatum. His accedat quoque testimonium nostrum, qui in peste Noviomagensi anthraces & bubones non semel sine febre vidimus; quin ego ipsemet carbunculum pestilentem magnum in manu sinistra habui, sine ulla febre, imò sine ullo alio sanitatis dispendio, qualem etiam sine febre vidi in manu famuli Capitanei Brouwer, ut & in muliere illa, cujus historiam infra descripsi, *lib. 4. histor. 90.* Observavi etiam in multis ægris peste jam correptis, non nisi post viginti, vel triginta, pluresve ab invasione pestis horas, febrem incepisse. His adjungantur etiam præcedente annotatione citata testimonia eorum, qui referunt plurimos subito peste extinctos fuisse sine febre antequam putredini aut accensione febrili tempus daretur. Ex quibus omnibus meridiana luce clarius patet, febrem non esse de essentia pestis; sed ejus comitem separabilem. Quapropter non sine ratione Andreas Dudith, in epistola quadam ad Petrum Monavium (quæ est *Epist. Med. à Scholzio collect. 52.*) ita scribit: *Pesti necessario febrem adesse, non prius credam, quam tu affirmaris bonis rationibus illud me docueris, an eos, qui subito correpti concidunt in mediis compitiis attriviis, cum antea incolumes domo egressi essent, febre etiam affectos fuisse tam subitè, tam improvisa, tam insensibili, dicendum sit.* Sed audiamus etiam Fernelium, qui apertissimè distinguit inter pestem & febrem, & licet pestis cum febre invadat, tamen pestem esse quid diversum à febre, idque ex eo manifestum esse, quod desinente febre ægros postmodum sæpe extinguat sola pestilentia: hac de re, *lib. 2. de abditis, cap. 12.* sic inquit: *Initio calor vehemens, sitis, capitis dolor, vigilia, nausea, aliaque vehementia symptomata exercebant; simul urina cernebantur rubicunda, crassa, turbida, atque confusa, omnia in septimum diem persistentia. Hoc verò ipso die urina puriores evadebant, coctione manifesta, quotidie in melius procedente. Cum ita se mox persanatum iri, magna spe, Medicorum judicio, sibi pollicerentur, plerique non multo post peribant, Pulsus quippe hinc indies sensim minuebatur & languescibat, totiusque corporis robore pedetentim dissoluto, intra quartum decimum diem mortem optebant.* In his ergo febribus, inquit, putredini immixta erat pestilentia; ac die septimo, evicta jam putredine, perseverans pestilentia tacite ac furtim jugulabat. Super his plura videantur apud Sennertum, *lib. 4. de febr. cap. 1.*

Verum



Verum fortassis hæc omnia nondum satisficient Untzero, qui *lib. 1. de pest. cap. 10.* ut pestilens venenum è putredine oriri statuit, sic febrem de illius essentia esse, ac semper & necessario inseparabiliter ipsi conjungi, variis distortis argumentis probare nititur. Profectò verisimile est Untzerum, virum alioqui doctissimum, cum illud caput scriberet, capite omnino doluisse, neque animadvertisse se ipsum sibi ipsi in multis contradicere, variaque absurda ad sententiæ suæ probationem adferre. Nam *cap. 7.* in febribus putridis nullam agnoscit putredinem: citato autem capite, pestem, febremque pestilentem è sola putredine oriri statuit. Dicit etiam, omnes morbos acutos necessariò febrem adjunctam habere; & ut hoc probet, egregiè scilicet apoplexiam, syncopem, choleram, tetanum, & iliacam passionem, ab acutorum morborum numero excludit, eosque improprie morbos acutos appellari scribit, quia non habent febrem conjunctam. Modò dicit febrem inseparabilem esse à peste: modò, cum Minderero, dicit, illam interdum in principio adjunctam non esse, sed symptomatum vi excitari. Dicit etiam, omnes Medicos libenter fateri, pestilens venenum semper à putredine oriri; fortassis ita scribit, quia nunquam legit Fernelium, Valleriolam, Sennertum, aliosque plurimos, qui contrarium sentiunt. Multas insuper nullius momenti distinctiones, ac frivolas rationes in medium profert, quibus hic singulatim respondere non videtur operæ pretium, cum illa quæ jam diximus, & ipsius, & omnium aliorum contrarias rationes satis superque refellant.

Conclusionis loco audiamus hac de re breviter & solide loquentem Joannem Juvenem, *epist. ad Brakelium, de medic. bezoart.* ubi inter alia sic inquit: *Non pestis censenda est febris perniciofa, neque definiti natura febre explanatur: nam discrepant à se mutuo pestis & febris specificâ differentiâ. Quippe soboles pestis est venenum humano generi contrarium, inspiratione & perspiratione attractum, quod cœlitus in aërem fuit dispersum. Febris verò à calore præter naturam suscitatur, quæ pestem aliquando comitatur, estque illius symptoma, & ortu succedit: quæ autem morbo posteriora sunt, non censentur esse de morbi substantiâ. Symptoma autem morbo supervenit, & ortu posterius est, non igitur symptoma morbi essentiam constituit, & improprie pestilentia febre definitur, quandoquidem ab illa separabilis est, & pestis solitaria esse potest, nulla conjuncta febre.*

Hanc quæstionem de febre mox excipit alia, scilicet, *An pestis sit certum morbi genus*, sicut apoplexia, pleuritis phthisis, &c. Alexander Massariæ, aliique varii, considerantes syndromem variorum morborum (quales sunt febrès, aphthæ, cephalalgia, deliria, altus sopor, vomitus, angina, ulcera, tumores, maculæ; &c.) nec non plurimorum symptomatum, cum peste concurrentium: considerantes etiam quod omnes diversotum temporum pestes, non eodem modo, nec similibus morbis ac symptomatibus comitatur, semper invaserint & grassatæ sint, judicarunt,

pestem non esse certum morbi genus. Cujus opinionis etiam fuisse videtur Galenus, utpote, qui *3. epid. com. 3. text. 20.* dicit: *Non est certum morbi nomen Vulgare, vel Pestilens: ceterum quicumque in uno loco multos simul invadit, vulgaris hic vocatur: qui si simul hoc habeat, ut multos interimat, pestis est.* Verum etsi multi morbi, plurimæque & multum diversa symptomata pestem comitentur, tamen illi morbi non sunt de essentia pestis; sed illi resultant ex humorum putredine spirituumque corruptione, quam pestis inducit, atque hinc non sunt nisi ejus symptomata, quorum diversitas non procedit ex diversitate ipsius pestis, aut veneni pestilentis, sed ex diversitate illius putredinis, quam venenum pestilens humoribus ac spiritibus inducit: cujus putredinis & corruptionis varietas procedit ex diversitate constitutionis corporum hominum: hæc quippe aliter constituta sunt cum pestis invadit tempore æstuoso ac fervido, quam frigido; aliter tempore humido, quam sicco; aliter post longam magnamque famem, seu annonæ caritatem, quam cum omnium rerum nimia abundantia suppetit; aliter post bella longasque perpessas miseria, & prævum victum, quam in pace, & boni victus copia; aliter aëre magnâ putridorum vaporum infectione contaminato, quam co puro existente; &c. Pro horum enim diversitate gignuntur varii in corpore humores, eique à pestilenti venenoinquinati, etiam variis modis putrescunt & corrumpuntur, atque hinc magna morborum & symptomatum, cum peste concurrentium, diversitas procedit, quam multi valde male ipsius pestis diversitati adscripserunt. Atque sic liquet, & ratum manet; quod pestis sit certum morbi genus, & quod ex ei adjunctis morbis nullus quidpiam de ejus essentia constituat. Super his etiam videantur quædam præcedente *cap. 7. annot. 2.*

Verum cum pestis sit certum morbi genus, & duo tantum morbi existant, scilicet, intemperies & prava conformatio, quæritur, qualis morbus sit? Respondendum, esse intemperiem, non quidem manifestam, sed occultam, quam Fernelius, multique clarissimi Medici male ex intemperiei ordine excludunt, & morbum totius substantiæ appellant, ac peculiarem quandam morbi speciem esse tradunt (hoc multis rationibus edocere & inculcare nititur Matthias Untzerus, *lib. 1. de pest. cap. 3.*) haud secus ac si ille defectus Medici, quod occultum id satis clare percipere & explicare non possit, novam morbi speciem pariat. Ipsa autem pestis, nullo etiam modo prava conformatio dici potest, licet illa in bubonibus & anthracibus adsit, quoniam bubones & anthraces non sunt ipsa pestis, sed ejus producta, seu effecta & symptomata, & non magis pertinent ad essentiam pestis, quam lingua arida pertinet ad essentiam febris ardentis; vel catarracta ad essentiam ophthalmiæ. Quantum ad solutionem continui, quæ hæctenus tertia morbi species à Medicis fuit constituta, illam pro peculiari morbi specie non agnoscimus, cum pertineat ad pravam conformationem; neque ad illam pestis ullo modo referri



referri potest. Super his plura videantur *precedente cap. 2. annot. 2.*

III. In eo differt hæc febris ab aliis putridis, quod non solo caloris putridi excessu, sed etiam maligna ac venenata qualitate cor afficiat, viresque citissimè prosterнат; etsi sæpe, neque ardore, neque siti multum molesta sit, & ægrorum urinæ à sanorum urinis vix differant: quod etiam frequens syncope adsit, cum pulsu parvo ac pressio, vel cum assidua vomitione, vel cum vigiliis, aut sopore, vel cum inquietudine, aut corporis jactatione, & quod plerumque sine sensu doloris hominem inopinatò rapiat. Quantum ad alia signa, quæ cum prædictis sæpe concurrunt, ut capitis dolor, delirium, sitis magna, incendium vehemens, urina turbida, &c. illa ab incremento putredinis oriuntur, & malignam febrem longè pejorem efficiunt.

IV. Docuimus jam pestem esse quid diversum à febre pestilenti, & illam sine hac existere posse: verum nunc ab altera parte quæritur, an febris pestilens dari possit sine peste, & quomodo differat à peste, & à febre maligna? Respondemus, posse dari, idque duobus modis. 1. Cum pestilens inquinamentum coelitus immissum, aërem incipit alterare, polluere, & ad venenositatem disponere: qui aër cum incipit naturæ damnosus esse, (nondum satis venenatus existens ut pestem producat) putredines malignas & venenosas in corporibus gignit, è quibus procedunt febres illæ pestilentes, quæ pestilentem constitutionem præcedunt, & pestilentes ac malignæ vocantur, quia valde perniciosæ sunt, idemque cum peste habent principium (solo malignitatis & venenositatis gradu diversum) à quo mediante putredine oriuntur: qua de re fufius locuti sumus capite nono. 2. Cum à pravis exhalationibus, vel corruptis alimentis, aliove interno corporis vitio pessima humorum putredo inducitur, quæ perniciofa, venenosa & pestilens evadit. Tales sunt illæ febres, quas Galenus, 3. *epidem. comm.* 57. & alibi, pestilentes sine peste vocat, quales se non rarò observasse testatur Amatus Lusitanus, *cent.* 7. *curat.* 27. Imò Quercetanus, in *Alex.* & Riverius, *sect.* 3. *de febr. cap.* 1. dicunt hujusmodi febres non semel visas fuisse cum veræ pestis indicibus (puta anthracibus, & exanthematibus) & tamen à vera peste longè diversas fuisse, quia non erant contagiosæ. Has febres Saxonia & Riverius appellant *pestilentes sporadicæ*: Crato & Liddelius, *pestilentes privatas*: alii *pestilentes spurias*.

Febres autem pestilentes in multis differunt à peste. 1. Quod illæ procedant ab humorum gravi putredine, hæc ob occulto venenato inquinamento ante putredinem. 2. Quod in illis dicta putredo generetur à putridis exhalationibus, vel pravis nutrimentis, vel alio quopiam interno corporis vitio: in hac, occulta venenositas à præternaturali aëris iniquatione & contagio. 3. Quod illæ non ante putredinem & inflammationem fiant: hæc autem sine putredine invadat. 4. Quod illæ non sint tam communes ac perniciosæ quam pestis: quia illarum causa in cujusvis

privati subjecti humorum putredine consistit: pestis vero in inquinamento aëris, elementi omnibus communis. 5. Quod illæ sæpius non sint contagiosæ, & si tales fuerint, earum tamen contagium non nisi proximè adstantes inficere, nec ad distans longè dispergi, nec in fomite diu asseruari possit: pestis verò omnium contagiosorum morborum contagiosissima existat, cujus contagium ad distans etiam alios inficere, atque etiam in fomite aliquamdiu asseruari queat.

Differunt præterea febres pestilentes ab aliis febribus malignis, perniciosi, symptomatum, & putredinis gradu ac contagio, quod illæ perniciosiores existant, multò graviora symptomata habeant, & à majore seu pejore putredine oriantur, quam febres malignæ: præterea, quod illæ frequenter, hæc rarius contagiosæ existant. Denique quod illæ semper alicujus venenositatis participes sint, hæc non semper, utpote quæ à sola symptomatum pravitare multoties malignæ nominantur. Fernelius, 2. *abdit. cap.* 12. febrem pestilentem etiam ab aliis clarissimè distinguit. *Quoniam*, inquit, *pestilens febris, neque caloris incendio, ut causus, neque siccitate, ut bestica, cor torret, ab utraque plurimum differt, habetque præsentem vim & perniciem omni intemperie, omni putredine majorem, quæ una veneni speciei cor, viâ fontem, obsidet demoliturque.*

V. Febrium pestilentium differentias hic longo sermone inquirere, non decrevimus, tantum breviter dicimus, licet Mercurialis, Andreas Gallus, Hercules Saxonia, & Riverius, febres pestilentes intermittentes pestis comites dari, easque se vidisse, asserant, nos tamen hæcenus nullas potuisse animadvertere intermittentes, sed observasse omnes fuisse continuas, earumque multas subinde quidem, sed absque ullo certo ordine, remississe, nunquam verò intermisisse. Solent autem hæc febres pestilentes variare, pro diversitate humorum putrescentium, & pro malignitatis ac putredinis magnitudine. Dico, *humorum putrescentium*: nam si sanguis secundum omnes, ex quibus constat, humores putrescat, fiet febris synocha pestilens putris, qualis rarissimè, aut vix unquam contingere potest, cum tam æquabilis totius sanguineæ massæ putredo vix fieri queat: si biliola sanguinis pars plus cæteris putrescat, fit pestilens causus, vel tertiana continua, rarò vera, plerumque notha: si pituitosa vel melancholica sanguinis pars plus cæteris putrescat, fit pestilens quotidiana vel quartana continua: si duo humores diversis temporibus accendantur, fit febris duplex: si simul mixti putrescant, fit febris vaga: quæ omnia symptomatum diversitas ostendit. Sic quoque Hippocrates, 3. *epid. sect.* 3. scribit, in illa constitutione pestilenti pervagatas esse quartanas, tertianas, & quotidianas, scilicet pestilentes. Sed cum plerumque plures humores simul putrescant, plerumque febres vagæ sunt, earumque vix ulla manifesta distinctio animadverti potest. Dico autem, *pro magnitudine malignitatis vel putredinis*: nam hinc procedit febrium pestilentium major vel minor

vehementia

vehementia. Interdum enim summa maligna qualitas summam malignam putredinem sibi sociam adsciscit, atque tunc fit sævissima febris pestilens, in qua non minus à venenata qualitate, quàm à gravissima putredine cor lacessitur, omnesque facultates læduntur, gravissimaque symptomata inducuntur. Interdum maligna qualitas remissior est, putredo verò summa, atque tunc cor vitalisque facultas magis à putredine & febris, quàm à venenata qualitate affligitur. Nonnunquam intensior est venenata qualitas, putredo verò remissior, tunc cor magis labefactatur à veneno quàm à febris, neque tam gravia videntur accedere symptomata; licet revera gravissima existant. Aliquando putredine minima & levissima existente, maligna qualitas intensa est, tuncque fit febris clemens, quæ & ægros, & Medicos sæpe fallit, interea enim dum ex hac felicem morbi eventum sperant, cor à maligna qualitate obruitur & extinguitur.

Verum graviter disputatur inter Medicos, ad quam febrium classem pestilentes referri debeant? Non febribus putridis easdem annumerandas esse censemus: non verò ephemeris, quia hæ generantur à solo incendio & effervescencia spirituum absque putredine; & viginti quatuor horarum spatio salubriter terminantur: pestilentes autem oriuntur à maligna putredine, & cum exitio ægrorum plerumque finiuntur. Nonnulli tamen ephemeris pestilentes in sola spirituum putredine consistere asseverant. Sed his rehero, si ex putredine fiant, aut in putredine consistent, non posse esse diarias (utpote quibus nihil commune est cum putredine) verum necessariò esse putridas, cum ex putredine non generetur alia quàm putrida febris: addo; de putredine spirituum vitalium esse acerrimam litem inter Medicos, eamque adhuc sub iudice pendere. Non possunt etiam hæ febres pestilentes annumerari febribus hæcticis, quia hæ gravia symptomata non habent, diu durant, totumque corpus sensim emaciant: pestilentes verò gravissima habent symptomata, & curriculum suum citò absolvunt: præterea quia in his cordis substantia afficitur calida intemperie; in illis verò non sola illa intemperie, verum magis maligna venenositate. Nostram opinionem non evertit frivola illa distinctio, quam Franciscus Vallesius, *controvers. Med. lib. 5. cap. 2.* in contrarium profert, qua dicit ipsam cordis substantiam, vel saltem illos succos qui proprium ejus alimentum, & more roris per illud sparsi

sunt, in aliis hæcticis à calida intemperie consumi; in hæcticis verò pestilentibus mala putredine corrumpi. Respondeo: si febres illæ pestilentes, quas Vallesius hæcticas nominat, oriuntur ex putredine substantiæ ipsius cordis, non minus erunt putridæ, quàm aliæ quæ ex putredine humorum oriuntur: & præterea, quomodo quæso ipsa substantia cordis poterit putrescere sola sine humoribus in ea contentis, aut succis ejus magnam partem constituentibus? cordis enim substantia non constat ex solis particulis siccis, sed ex siccis cum humidis mixtis. Atque hinc est, quod etiam Galenus, *lib. 1. de differ. febr.* dicit: *Postquam autem mentionem fecimus febrium pestilentium, quæ omnes ex putredine fiunt, &c.* Verum hic fortè obijcietur, quorsum igitur Galenus, *3. de præsig. ex puls.* longo sermone docet, multas pestilentium febrium esse hæcticas statim à principio? Respondeo, Galenum illas pestilentes febres, quæ clementer procedunt, nec protinus ægros interimunt, hæcticas appellare, non quod tales sint, sed ratione lenti processus & clementiorum symptomatum, tales esse videantur: eodem modo sicut illa lenta febris; quæ in phthisi ab ulcere pulmonum oritur, à multis Medicis hæctica appellatur, cum tamen re vera sit putrida, ab ulceris putredine orta. Quod autem Galenus has lentas pestilentes non ad hæcticarum, sed ad putridarum classem referri voluerit, patet ex loco ante citato, quo dicit, omnes febres pestilentes oriri ex putredine. Præterea illud ipsum quoque manifestum est ex ipsius verbis eodem loco sequentibus: *Ad sunt, inquit, necessariò huic febris fætor anhelitus & calor in thorace, &c.* Atqui fætor est symptoma proprium putredinis, è qua si febris oriatur, illa erit putrida. Hic certè aliud non facile persuadebunt nobis Massaria & Hercules Saxonia, quantumvis subtilissimis disputationibus pestilentes illas, hæcticas dicant, è putridarum classe separare nitantur: nam vix solvent hunc nodum, *quomodo possit dari febris à putredine, quæ non sit putrida.*

V I. Dico, *corpus hoc illo modo temperatum*: nam in corporibus biliosis, plethoricis, cacochymis, & obstructionibus laborantibus, humores longè citiorem & graviolem putredinem atque inflammationem concipiunt, quàm in multis aliis; imprimis verò æstate & autumnis, atque in locis quæ pravis & putridis exhalationibus obnoxia sunt.

## CAPUT XIII.

*De causis symptomatum pestis.*

Ræter febrem jam dictam, multa symptomata horrenda & gravia pestem comitantur, quorum alia hæc, alia illa subjecta, pro veneni magnitudine, & cujusque naturæ (1.) ac temperamenti diversitate, invadere solent. Hæc autem vel sunt morbi à peste orti, vel mera symptomata, &

H

excre-

excrementorum vitia: suntque vel pesti magis propria, & cum aliis paucis morbis communia, ut bubo, anthrax & exanthemata (quorum causas sequenti capite inquiramus) vel minus propria; & cum pluribus aliis morbis communia; quorum primaria hæc sunt: Capitis dolor, phrenitis, sopor, vigiliæ, anxietas, debilitas seu magna virium prostratio, visus turbulentus, cordis palpitatio, linguæ siccitas, vomitus, singultus, lumbrici, fluxus alvi, hæmorrhagia narium, menstruorum profluvium, sanguinis mictus, sputum cruentum, dolores lateris, hepatis, renum, aliarumve partium. Omnia hæc symptomata à pestilenti veneno, vel immediate, vel mediante putredine inducuntur. Nam simulac labes illa corpus ingressa est, ac vires suas exerere incipit, tunc prout singula ejus viscera disposita invenerit, & has illasve partes magis vel minus invaserit, varios effectus edit. Cor enim (2.) maligna hac perniciæ impugnatum, antequam à tanto hoste se expedire possit, angitur & comprimitur, ejusque vitales spiritus vel dissipantur, vel, quod frequentius contingit, graviter concentrantur, unde tunc necessario procedunt summæ anxietates, virium debilitates, & cordis palpitationes, imprimis si vel venenum violentius, vel cor debilius fuerit, quam ut tam gravi inimico satis fortiter resistere possit. Cor autem hujus tyranni injuriis se fortissimè opponens, ejusdem spicula, quantum potest, à se divertit, & magnam venenatæ malignitatis partem quaquaversum ad alias partes; aliaque viscera expellit & extrudit. Hinc sæpe (3.) per arteriam aortam, ac inde per carotides arterias cerebro haud parum communicatur: quod si excrementis vacuum offenderit, membranas ejus pungendo ac vellicando capitis dolores excitat; quibus si magna spirituum animalium agitatio accedat, fit delirium; si membranarum inflammatio, fit phrenitis. Si verò cerebrum serosis vel pituitosis humoribus repletum invenerit, spirituum animalium generationem imminuit, volatilitatem ac tenuitatem incrassat, & sopores (4.) facit. Vigiliæ inducit, si acri malignitate spiritus nimis exagitet, nimiumque calorem cerebro inducat; quo roridi suavesque vapores, ad somnum necessarii, consumuntur. Oculi verò turbidi, & flentium ac moerentium oculis similes apparent, simulque vivido colore ac splendore destituuntur, propter spirituum paucitatem, motumque inordinatum, & caloris nativi debilitationem. Lingua sicca & aspera redditur ab ardore interno, qui à maligna humorum putredine, veneni pestilentis malignitate excitat, & hinc prodeunte febre, inducitur. Sæpe etiam ad alia viscera venenatæ malignitatis pars propellitur: quæ si fortè ab arteria aorta per coeliacos ramos ad arterias gastricas & gastroëpiploicas (quæ ventriculo inferuntur) transferatur in ventriculi tunicas, continua vellicatione anxietates inducit, & naturam ad id quod molestum est excludendum incitat, unde cardialgia, nausea, & vomitus procedunt. Si verò validum fuerit venenum, & adeo tenaciter ventriculi tunicis adhæreat, ut avelli nequeat, facile in aliqua ejus parte mortificationem seu anthracem (5.) excitat, quam molestiam natura irritò conatu expellere nititur, tuncque fit singultus, aut vomitus continuus lethalis. Ventris lumbrici generantur ab ingenti foeda putredine. Si autem inferioris ventris colluvies, non solum per veneni pestilentis admixtionem putrescat, verum etiam fortiter effervescat, seu fermentetur, naturam valde stimulat ad excretionem, hinc versus intestina decumbens ac defluens, producit alvi fluxum. Hæmorrhagia narium, fluxus menstruorum, & cruenta mictio, fiunt, cum cor veneni pestilentis aliquam partem, una cum sanguine, per arterias ad nares, uterum, aut renes cum tanto impetu propellit, ut ruptis vel apertis vasorum extremitatibus, per illa loca effluat. Sputum cruentum, præterquam quod ob dictam causam frequenter contingat, non rarò etiam oritur ab anthracibus (6.) in pulmone obortis: quam causam etiam agnoscunt dolores lateris, hepatis, aliarumve partium.

A N

## A N N O T A T I O N E S.

I. Illud ipsum quoque docet Galenus, 3. epid. com. 3. text. 70. Hæc tempestas, inquit, videtur humores coacervasse, & replevisse caput, idque omnibus morbis commune fuisse; sed fuisse suo quemque modo alium alio correptum, pro sua cujusque natura: alvi fluxionibus acris, pinguibusque, dejectionibus biliosis: rubicundi vero & ad melancholiam dispositi, non injuria sunt phrenitide & febre ardente correpti (ut & crasso biliosoque sanguine pradi) & cruentis dysenteriiis. Quæ autem essent natura frigidiores tantum, vel frigidiores simul & humidiores, hæc par erat, ut quæ nec facile febribus; nec biliosis affectibus sunt obnoxia, in solas incidisse capitis distillationes.

II. In peste solet fere semper ab ipso morbi principio cor vehementer impugnari, nam pestilens venenum huic vitalitatis arcem primario bellum indixisse videtur, ut etiam antea, cap. 2. dictum: Hinc fit quod illa symptomata, quæ à cordis affectione procedunt, plerumque gravissimè affligant, & omnium primò conspiciantur, qualia sunt palpitatio, anxietas, lipothymia, syncope, & pulsus alterationes.

III. Dico, sæpe: nam interdum etiam cerebrum à pestilenti labe citius inficitur quam cor, quod imprimis per infectum aërem inspiratione attractum contingere videtur, ut Paræo contigisse diximus supra, cap. 2. annot. 8.

IV. Nonnulli existimant sopores in peste induci ab humidis vaporibus à calore pestilenti in partibus inferioribus excitatis, sursumque ad caput delatis, ac cerebri substantiam humectantibus. Sed cum tales sopores non multum distarent à soporibus naturalibus, nec valde damnos essent, alia debet eorum esse causa: scilicet, quod ve-

nenata qualitas cor & cerebrum simul impugnet ac debilitet (nunquam enim in peste contingunt graves illi sopores, corde non graviter afflicto) atque hinc fiat, quod cor paucos spiritus vitales, eosque vitiosos, generet, & debilitet ad cerebrum propellat (liquet hoc ex pulsu debili ac parvo) è quibus in cerebro, à venenata labe etiam debilitato, tam pauci generantur spiritus animales, qui propter paucitatem (fortè quod etiam vitiosi sint) non sufficiunt ad debitas actiones in organis sensuum perficiendas, unde tunc iis in actionibus deficientibus, ac quiescentibus, fit altus sopor.

V. Ventriculi anthraces vix ullus Medicorum antehac observavit, nec quisquam illam singultus ac vomitus perniciosi causam ante nos animadvertisse videtur (exemplum describimus lib. 4. histor. 15.) præter Joannem ab Helmont, qui in *trunulo pest.* eorundem etiam meminit, & Christophorum de Cock van Kerckwijck, Medic. doctorem & Professore Sylvæducentem, qui, lib. de peste, scribit se illos anthraces ventriculi suis oculis vidisse in cadavere juvenulæ cujusdam peste mortuæ per chirurgum Joannem van Driel aperto, in quo invenit ventriculi tunicas omnino nigricantes, & uno loco, quasi cauterio, corrosas ac perforatas. Idem, ab hac experientia, haud inani conjectura, putat, etiam simile quid in intestinis nonnunquam contingere posse.

VI. Sic etiam Palmarius, de febr. pest. cap. 24, dicit, carbunculos, si thoracem, id est, pulmonem occupent, sanguinis excretionem & spirandi difficultatem inducere, mortemque in biduum aut triduum differri; idemque periculum esse, si vel in jecore, vel in liene excitentur.

## C A P U T XIV.

## De Causis bubonum, (i.) carbunculorum &amp; exanthematum.

**V**enenum pestilens cum sit aëreum & subtile, corpus humanum subiens; raro ad cerebrum primò vel hepar unà cum humoribus deferitur, sed partim ob substantiæ tenuitatem, partim quia cum inspiratione plerumque in pulmones adducitur, facillimè ac citissimè venenatam qualitatem im-  
primit sanguini arterioso, è dextro cordis ventriculo in pulmones impulsio, qui ista labe infectus ad sinistrum cordis sinum descendens, vitalitatis arcem impugnare ac labefactare incipit. Huic insensissimo tyranno cor se statim opponens, fortiter cum eo colluctatur, omnesque vires intendit, ut dirum ac molestissimum hostem quam citissimè foras expellere, & longissimè à se ablegare possit. Hoc autem venenum si paucum ac debile, & solummodo tenui seroso vehiculo junctum fuerit, interdum vel solius naturæ vi, vel medicamentorum tempestivo subsidio, brevi temporis spatio cum sudoribus per poros cutis expellitur & dissipatur, antequam sanguinis massæ aliqua pars ab ejus contagio corrumpatur: atque tunc unica forti sudatione ita restituuntur tales infecti, ut nullum mali vestigium relinquatur, sicut in hac nostra peste illud multoties contigisse vidimus.

H 2

cordis

cordis penetralia ingressum fuerit, eique firmitus inhæserit, tunc ab ejus prava infestaque qualitate stimulum viscus, istius veneni quam maximam potest partem longissimè à sese, qua datà commodiore viâ, dispellit: eamque interdum cum impetu, una cum seroso lymphatico vehiculo, ad axillarum glandulas (quæ vulgò dicuntur esse cordis emunctoria) deponit; antequam ab ejus contubernio aliqua sanguinis arteriosi pars in arteriis majoribus notabiliter corrumpatur: quæ in his insigni acrimoniâ salvas lymphatici influentis liquoris particulas, cum effervescencia quadam figendo (sicut in chymia, aquæ tartari particulæ salis affusione pauxilli olei vitrioli, ilicò cum effervescencia quadam figuntur & coagulantur) insignem dolorem, &, propter eartum impeditum profluxum, conspicuum tumorem faciunt, quem bubonem (2.) appellant Medici. Reliquam veneni partem cor quaquaversum à se dispellere, & quam celerrimè potest è suis & arteriarum liminibus ad alias partes exturbare nititur, antequam ab istius infensi hospitis contubernio, & ipsum, & ipsius proximum nutrimentum, vitæque fulcrum, sanguis spiritusque vitales corrumpantur & extinguantur. Hanc fortem expulsionem etiam molitur per arteriam aortam: in quam sæpe magna hujus perniciosi veneni pars deposita, una cum sanguine arterioso, cui immiscetur, sursum ad cerebrum ascendit per arterias carotides, in eoque varia symptomata (de quibus præcedente capite dictum) excitat. Ab hujus veneni malignitate gravatum ac stimulum cerebrum cum suis membranis, illius quam maximam potest partem ad glandulas in faucibus & pone aures deponit, quæ in iis salivæ liquoris fixationem cum effervescencia inducens, tumorem dolorosum facit, ut sub axillis fieri dictum. Sæpe etiam cor magnam istius veneni partem per ejusdem arteriæ aortæ ramos descendentes, ad inguinum glandulas propellit, quæ & ibi bubones (3.) excitat. Si verò venenum illud acerrimùm sit, & à corde per arterias aliquas, una cum sanguinis parte cui inhæret, ad cutem propellatur, in eaque nonnihil subsistat, quocunque loco substituerit, caustica & deleteria sua vi particulam, quam occupat, adurit instar cauterii potentialis, & mox unam pluresve exiguas vesiculas (quales per ambustionem etiam oriri solent) in ea excitat, sicque illam enecando, carbunculum (4.) facit. Quia autem venenum illud, cum sanguinis, cui inhæret, parte, à corde huc illuc, qua datâ viâ, propellitur, hinc fit quod non semper in uno, sed multoties in diversis corporis partibus carbunculi (5.) excitentur. Si verò non ad cutem, sed ad aliqua viscera, partesve interiores hæc veneni propulsio fiat, tunc in iis carbunculi oboriuntur, gravium symptomatum causæ, & ægris lethales (vide præcedente cap. annot. 5. & sequenti cap. annot. 13. & lib. 4. histor. 15. & 38.) quales interdum in membrana pleura, ventriculo, intestinis, pulmonibus, renibus, generari docet usus. Notandum tamen carbunculos non semper hanc internam causam habere, sed interdum etiam, licet rarius, à fomite aut contagio extrinsecus in cutem incidente, eique, mediante nonnihil viscoso vehiculo, adhærente, excitari; atque tales sæpe curriculum suum absolvere sine ulla notabili cordis læsione, præcipuè in talibus hominibus, quibus cor validum est: hujus rei duo vel tria exempla dedimus supra, cap. 12. annot. 2. Carbunculus autem ut plurimum ab exili adurente pustula, (6.) interdum à pluribus parvis pustulis, seu vesiculis paulo post in unam vesiculam coeuntibus, rarius sine pustula seu vesicula exordium sumit. Hinc pars pungitivum dolorem sentit, qualis in gangræna adesse solet, & brevi magis magisque emoritur, ac nigrum vel cinereum colorem acquirit. Quæ verò carbunculum in circuitu proximè circumstant partes, alterantur (sicut etiam in gangræna & sphacelo fieri solet) valde inflammantur, & acriter dolent, easque natura coquendo ad suppurationem deducit, antequam perfectæ mortificationis labes in illas quoque proserpat, & mediante illa suppuratione corruptam ac emortuam particulam à sanis separat & ejicit. Fiunt igitur bubones & carbunculi à veneno pestilenti, quod cor ex sese per arteriarum cavitates ad alias partes expellit. In quo expulsionis opere si cor, vel ob summum veneni acumen, ejusve firmiorem inhæSIONem, vel ob propriam debilitatem, aliudve impedimentum, diutius occupetur, neque satis citò & fortiter se expedire possit,

fit, facile multæ spirituum vitalium ( id est, subtilissimæ sanguinis arteriosi ) particulæ, ante veneni ex arteriis egressum, sine putredine corrumpuntur, & quasi extinguuntur, atque tales cum reliquo nutritio sanguine ad frigidiores partes, nempe membranas, tendines, ligamenta, & periosteâ delatæ, ob earum subfrigidam constitutionem, mox in iis paulo crassiores evadunt, summamque mobilitatem deponentes, ex illis partibus pyramidalis forma, à latiore basi paulatim versus cutem in acumen ascendunt (instar fumilampadis recens extinctæ) muscutorum aliarumque intermediarum partium substantiam porosam, ob aliqualem superstitem tenuitatem, insensibiliter transeunt, usque dum ad cutem perveniant, in qua ob externum frigus nonnihil condensatæ, & à cuticulæ densitate detentæ, magis constipantur, & maculas illas constituunt, quas exanthemata (7.) appellamus. Quæ maculæ majores vel minores, & hujus vel illius coloris sunt, prout magis minusve corrupti sunt illi spiritus arteriosi, & majore vel minore quantitate, à partium calore magis minusve sursum, seu versus cutem feruntur: plerumque autem sunt coloris obscure purpurei, & exactè rotundæ, granum piperis majusculum, vel etiam parvum, in circuitu magnitudine referentes: aliæ formæ, alique colores non tam communes & frequentes sunt, quamvis interdum etiam inveniuntur. Tam diu autem per illas intermedias partes corrupti illi spiritus arteriosi versus cutem ascendunt, quousque à partium calore propelluntur, quo deficiente, mox in partibus quasi coagulati subsistunt, sui que coloris (purpurei, subnigricantis, violacæi, alteriusve) maculas in illis relinquunt, quæ in cadaverum pestiferorum dissectione, non minus intus, quam foris inveniuntur, & plerumque ab aliqua membrana, ligamento, aut periosteâ, latiore basi in acumen versus cutem assurgere comperiuntur. Interim quia partibus quibus inhærent nullam molestiam aut corruptionem inferunt, videtur venenum, quod dictos spiritus corripit, in iis esse extinctum & emortuum; eæque sine veneno esse.

## A N N O T A T I O N E S.

I. **N**emo Medicorum hætenus bubonum, carbunculorum & exanthematum historiam à vero certoque fundamento descripsit: fortasse quia vel naturæ veneni pestilentis ignorantia, vel rei gravitas, vel contagii metus omnes à curiosiore hujus necessariæ scientiæ inquisitione deterruit. Fortè hæc etiam causa fuit quod veteres Medicinæ proceres, ut veneni pestilentis, sic etiam horum præcipuorum pestilentialium symptomatum historiam levi calamo transierint. Quorum vestigiis plurimi posterius insistentes, & in illorum verba somniculose jurantes, nihil illis certius hac de re prodiderint, sed dum in veterum scriptis evolvendis & probandis toti occupati fuerunt, ex illorum rudiori rei delineatione multa sibi somnia finxerunt; pleraque veritatis titulo, & veneni pestilentis occultate exornata, de quorum veritate hætenus accerrimè, tanquam pro aris & focis, contenderunt, cum tamen nihil solidi contineant, & neque horum symptomatum veram causam, neque generationis modum, ullo modo attingant. Nam bubonum causam judicaverunt esse pituitosam sanguinis partem veneno infectam (haud secus ac si venenum illud sanguinis massæ admixtum, ejus peculiarem aliquem humorem, & quidem talem, qui ipsi, ratione frigoris & crassitiei, maximè contrarius est. primò & seorsim inficeret) carbunculorum sanguinem torridum & inflammatum (haud secus ac si aliquis san-

guis in nostro corpore totus torridus esset, aut veneni pestilentis essentia in summo fervore & tostione consisteret) exanthematum, sanguinem biliosum infectum, haud secus ac si sanguinis biliosa pars seorsim infici posset. Sic etiam carbunculorum causam è venis & arteriis expelli tradunt, sed per quam viam venas aut arterias ingrediatur venenum, nemo verè describit; plurimi hæc de re planè tacent; alii illud è corde in venam cavam; magno orificio ipsi junctam, expelli autumant; immemores quod cor è vena cava sanguinem quidem recipiat, sed, ob valvularum obstacula, nihil in illam expellere possit. Ita exanthematum materiam per venarum extremitates in cutem effundi putarunt, cum tamen venarum extremitates humores è partibus recipiant, nullos verò in eas effundant, cum etiam exanthemata non à venis cutaneis prodeant, sed ab interioribus membranis sursum versus cutem ascendant: quod alii, cum Fernelio, animadvertentes, nullam hujus materiæ viam describere ausi sunt. Erratum igitur est, non in una aliqua parte, sed in toto, ut jam docebimus.

II. Galenus, 2. ad Glauco. cap. 1. ut & 1. de differ. Febr. cap. 5. definit bubonem, quod sit glandulosarum partium inflammatio. Verum cum inflammatio neque necessariò, neque semper bubonibus adsit; sed tunc præcipue accedat, cum natura pus & coctionem molitur, & alioqui multo-



ties sine inflammatione aliquamdiu subsistat, & postea evanescat; videtur melius definiri, quod fit tumor earum glandularum qua sita sunt retro aures & in collo, sub axillis, & in inguinibus, quæ vulgò emunctoria appellantur. Quamvis enim plurimæ in corpore sint glandulæ, tamen ab omnibus Practicis hæcenus observatum est, bubones pestilentes non in aliis quam dictis locis & glandulis emergere; quemadmodum etiam nos in truculentissima hac peste nullos alios videre potuimus. Huic præstantissimorum Medicorum observationi solus Zacutus Lusitanus se opponere velle videtur, qui aliquid novi scribere desiderans, *Prax. admir. lib. 3. observat. 28.* refert se in magna quadam peste, non tantum in dictis locis, sed in aliis quoque corporis partibus multos bubones vidisse, ut in capite, in nucha, in humeris; thorace, umbilico, femore; & tibia, sed cum talibus bubonibus omnes ægros periisse. Ex centum mille Practicis neminem invenias, qui tam perfictæ frontis sit, ut quotidianæ Practicorum experientia tam audacter contradicere audeat. Verum cum Zacutus fuerit homio multæ quidem lectionis, sed interim supra modum gloriosus, quantum ex ejus scriptis, & præcipue ex Praxi admiranda, colligo; aliorum plurimorum Medicorum observationes sibi adscripsit, & ut speciem aliquam veritatis haberent, casum alicujus ægri affinxit, qui æger vel nunquam in rerum natura exitit, vel in pago aliove abstruso loco, nunquam invento, nec unquam inveniundo, vixit; imò multis in locis, ut aliquid gloriolæ sibi conquirat; tam splendide veritati parcat, ut vel cæcus videat plurimas ejus observationes ab omni veritate alienas esse. Atque sic etiam, quod citato loco de bubonibus aliarum partium scribit, tam longè distat à veritate, quam cælum à terra. Ille hæc scribat quo usque velit, ego tamen, qui mihi ipsi non peperci in praxi pestiferorum sedulò peragenda, & solus in peste plus vidi ac inquisivi, quam fortasse sex Zacuti viderunt, vel videre ausi fuissent, ego, dico, nihil hujusmodi unquam comperire potui, ac proinde hujusmodi arrogantem dicacitatem, ut maximè inanem, penitus rejiciendam censeo.

III. Hic explicandum, qua ratione à veneno pestilenti, quod est tenuissima & minimæ quantitatis, glandulæ intumescere possint, & quare ab ejus virulentia non enecentur, sicut pars carbunculo correpta. Cum venenum pestilens ad dictas glandulas expellitur, statim permiscetur lymphaticis vel salivalibus illis humoribus, quibus glandulæ illæ semper scatent. Hi humores cum valde humidi sint, atque etiam nonnihil tenaces, glutinosi, ac subfrigidi existant, ineptum sunt subiectum in quod venenum pestilens suam septicam vim imprimere possit, fere æque atque stercorea in intestinis. Ac proinde illos malignâ suâ acrimoniâ solummodo ebullit, seu fermentat, sicut sal & acetum; panis massam fermentant, & jusque minimas partes à se invicem distendunt; vel sicut citri succus oculis canceri pulverisatis affusus, eosdem ebullire facit, qua effervescencia sal-

sæ in iis contentæ particulæ tandem coagulantur. Ab hac fermentatione dum effervescunt illi humores, fit aliquis calor immodicus in parte, & quia valde extenduntur, fit à distensione illa tumor, à tumore illo acris dolor; partim ob minimarum particularum substantiæ solidioris à se invicem divulsionem; partim ob erosionem à falsis jam coagulatis particulis liquoris contenti inductam. Ad dolentem autem partem undequaque è vicinâ plures tales humores ex consuetudine affluunt, qui & ipsimet paulatim effervescenciam similem concipientes, tumorem & dolorem adaugent. Natura ut ab hac molestia se expediat, illorum humorum coctioni incumbit, eosque in pus mutatos foras expellit. Hinc jam liquet quare dictæ glandulæ à veneni virulentia non enecentur, sicut in carbunculo pars carnosâ enecatur; quia scilicet venenum statim immiscetur tali seroso humori, qui ob substantiæ contrarietatem, veneni violentiam retardare ac multum infringere potest, contra quam fit in carbunculis, in quibus venenum ingreditur ipsam solidam alicujus partis substantiam, quam caloris nativi extinctione devastat; & nutritios humores corrumpit; neque ab ullius rei contraria qualitate impeditur in sua operatione. Accidit tamen interdum, sed rarissimè, ipsam glandulam, propter venenum ei inhærens, emori, atque tunc in bubonum locum emergunt carbunculi: quod fit cum in glandulis paucus est liquor ille serosus, multumque falsedinis habet: atque etiam cum venenum in pessimâ qualitatis summo gradu, magnaquantitate in illas irruiat; ita ut glandulæ adversus tam violentum tyranni impetum à suo præsidio defendi nequeant.

Præter jam dicta, adhuc tria alia scitu digna, hic consideranda occurrunt. 1. Quomodo bubones interdum absque suppuratione, in aliis cum salute, in aliis cum exitio, subsistant & evanescant. 2. Quam ob causam nonnunquam etiam serius prodeant, vel ad salutem vel, ad exitium ægri. 3. Ubi post sanationem maneat eorum causa venenum. *Primum hoc modo fit:* cum venenum pestilens vel debile, vel paucum in glandulas expellitur, & illæ multo lymphatico aut salivali liquore abundant, fit aliquando ut in primâ fermentatione illud vel insensibiliter expiret & dissipetur, vel ejus vires omnino infringantur, aut extinguantur, (multa enim sunt quæ pestilentis veneni virulentiam extinguunt, ut liquet in antidotis;) antequam magna intemperies partem occupaverit, atque tunc falsæ humoris contenti à veneno coagulata particulæ paulatim rursus dissolvuntur & fluidæ evadunt, sicque tumores spontè evanescunt, in salutem ægri. Interdum verò, cum venenum copiosius in corde & arteriis continetur (quæ copia ex symptomatum vehemetia ac multitudine innotescit) natura ab illo nimis gravata, valde debilitatur, & cum totum non possit, saltem illius aliquam partem ad glandulas propellit; cumque in reliquis expellendis laborans, arteriarum poros seu fines aliquos identidem circa glandulas referat, ac frustraneo debili conatu intestinum hostem illac



illac ejicere nititur, tunc facile contingit, ut paucum illud venenum non satis efficax sit, quod validam effervescentiam in glandularum humoribus faciat, atque hinc in fluido subjecto fluidum manens, cum reliquo sanguine circuletur, & ad cor redeat, ejusque afflictionem cum exitio ægri augeat, sicque interim bubonum tumor evanescat. *Quantum ad secundum:* jam ante satis docuimus, quare bubones citius in principio morbi prodeant: quod autem serius emergant, duplex causa est: Una, quando cor obruitur, vel à nimia veneni copia, vel à malignissima ejus qualitate, à qua tantopere intricatur & debilitatur, ut hostem suum non nisi tardius expellere possit, atque tunc bubones & carbunculi serius excitantur, idque cum summo vitæ periculo, quia venenum grave vix tantas moras in corpore trahere potest, absque maximo spirituum sanguinisque arteriosi nocumento. Altera causa est, cum cor debile impugnetur à debili veneno, cum quo diu colluctatur, antequam ab eo se expedire, hostemque suum ejicere possit. Atque in tali casu sæpe bubones & carbunculi, etiam serius prodeunt, salutare sunt, & morbum brevi finiunt: quia illud debile venenum, ob suam parvam potentiam, in diuturniore illa mora non potest magnum nocumentum inferre sanguini spiritibusque vitalibus, per quos illud à continuo cordis motu sine magno damno agitur, donec tandem excutitur: eodem modo sicut homo parvam ignis prunam longo tempore ab una manu in alteram sine ulatione excutere & agitare potest, donec illam tandem abiciat. *De tertio dicimus,* venenum pestilens bubonum causam, dum humores in glandulis contenti fermentantur, aut in pus coeuntur, sæpe ibidem extinguuntur, sæpe etiam insensibiliter exspirare, atque tunc pus ex illis apostematibus effluens, non esse contagiosum. Fieri quoque multo res, ut venenum, ob cutis densitatem, aliudve impedimentum, exspirare nequeat, & ob summam malignitatem non extingatur, atque tunc rupto apostemate, illud una cum pure effunditur, idque pus tunc contagiosum esse, sicut liquet ex historia Paræi; supra, cap. 2. annot. 8. citata.

IV. Carbunculus, à similitudine, variis nominibus nominatur. Appellatur *Carbunculus*, vel *Carbo*, quia extinctum carbonem refert, vel (ut alii volunt) quia illius color in ambitu, instar carbunculi lapidis, obscuro rubore splendet. Dicitur etiam *ἀνθράξ*, ab *ἀνθράκω*, in carbonem mutato, quia est quasi pruna extincta, & in carbonem mutata. Arabibus vocatur *Ignis Sacer*, *Ignis Persicus*, & *Pruna*, quia extrinseco aspectu non male refert exustionem cum pruna ignita factam: vel, ut 6. Aphor. 54, mavult Galenus, quia instar ignis circumstantes partes inflammantur. Nonnulli inter carbunculum, anthracem, & ignem sacrum, aliquam differentiam statuere voluerunt, cum tamen revera nihil differant, neque veteribus ulla differentia cognita fuerit; nam Avicenna in curatione ignis sacri eadem remedia præscribit, quæ Galenus in carbunculi curatione.

Hactenus in carbunculi pestilentis cognitione graviter hallucinati sunt Medici. Galenus, illum ordini ulcerum annumerans, in comment. ad 6. aphor. 45, sic definit: *Anthrax est ulcus crustosum, cui adjungitur multus partium circumstantium fervor*. Et 5. de comp. medic. sec. gen. sic inquit: *Carbunculus est ulcus crustum cum, cum valida phlegmone circumstantium particularum, inducens*. Galeni definitionem sequitur etiam Paulus, lib. 4. cap. 25. illique etiam posteriores Medici plerique omnes subscripserunt. Verum si ipsius carbunculi naturam ac constitutionem pensius examinemus, videmus has definitiones ipsi non satis proprie accommodari; cum carbunculus non sit ulcus, sed particulæ alicujus enecatio, seu mors, à veneno pestilenti inducta. Est igitur carbunculus partis alicujus gangræna, dum est in fieri; & sphacelus, dum est in facto esse, quorum neutrum ulceribus annumerari potest. Sphacelum esse, & non ulcus, ex eo liquet, quia carbunculus nulla naturæ vi edomari & in pus converti potest (quod posset, si ulcus esset) sed integer à vicinis partibus separatur; & si à natura debiliore separari nequeat, illius mortificatio ulterius proserpit in proximas partes, ut in sphacelo fieri solet; & putredinem quidem concipit, nunquam verò coctionem, quia in partem emortuam nulla incidit coctio. Male igitur plerique Medici, ex sententia Galeni, hactenus carbunculum ulcus appellaverunt, nisi forrè gangrænam & sphacelum propterea etiam ulcera nominari velint, quod in eorum separatione vicinæ partes suppurent. Præterea etiam Galenus alibi, (nempe 10. & 14. Method. & 2. ad Glauco. & lib. de tumor. prat. nat.) carbunculum ordini tumorum annumerat.

In causis carbunculi adhuc longè gravius erratum est. Galenus, lib. de tumor. prat. nat. dicit, carbunculos excitari, cum sanguis tanquam fervens & inflammationi propinquus exurit cutem. Actuarius, Method. med. lib. 2. cap. 12. consentit cum Galeno, dicitque cum oriri à sanguine melancholico fervente. Aegineta, lib. 4. cap. 17; tradit, illum excitari à crassis & adustis humoribus. Hos sequuntur neoterici. Aquapendens, Chirurg. par. 2. lib. 1. cap. 27. scribit, carbunculum fieri à fluxione ferventissimi sanguinis ad partem. Mercurialis, de pest. cap. 18. illius causam, cum Aegineta, crassis adustisque humoribus adscribit. Fernelius crassum torridumque sanguinem: Forestus verò sanguinem corruptum, fervidum, cum succo melancholico vel atra bile, ejus causam statuunt. Guainerius triplicem adfert materiam, sanguinis putredinem; bilis impetum & acumen, ac melancholiæ diuturnitatem. Aliquibus ex prædictis sententiis, parum inter se dissentiens, omnes fere Medici hactenus calculum adjecerunt, & unanimiter hæc duo concluderunt: *Primum*, sanguinis massam, aut aliquos ejus humores fervidos vel adustos, generare carbunculum. *Secundum*, veneni pestilentis operationem in fervida adustione consistere. Verum, (parceat mihi dictorum Virorum manes) longissime à veritate aberraverunt, & illi,

& illi, & quotquot hætenus eorum sententiis subscripserunt Medici. *Prima enim conclusio* admodum vacillat, nam meridiana luce clarius est, nec sanguinis massam, nec ejus humores aliquos fervidos, adustos, biliosos, vel atrabilarios excitare carbunculos; hocque satis docent, erysipelas, febris ardens, mania, alique varii morbi à talibus humoribus orti, nullis tamen carbunculis comitati: illud ipsum ex eo quoque liquet, quod in pestiferis sæpe nullus sanguinis aliorumve humorum notabilis excessus in calore deprehendatur, cum tamen in talibus etiam prodeant carbunculi. Sanguinis vel humorum putredinem huc quoque nihil facere, ex eo liquet, quod plurimæ graves putredines multoties fiant, maximis quoque inflammationibus sæpe conjunctæ, quas nulli carbunculi sequuntur. Si quis igitur, unde carbunculi oriantur, nos roget? Dicemus, omnes carbunculos, sive pestilentes, sive non pestilentes fuerint, oriri à veneno. Pestilentes, à veneno aërio ac subtilissimo, qui proinde, ob communem causam, pluribus sunt communes, & ob causæ tenuitatem ac fluxibilitatem contagiosi. Non pestilentes, à veneno crassiore, quod certis aliquibus de causis, in particulari aliquo homine, ex humorum gravi quodam corruptionis modo, tanquam novum productum, resultavit: qui carbunculi propterea non sunt communes, quia tantum privatam causam habent: nec sunt contagiosi, propter veneni crassitiem. *Secunda conclusio* non minus falsa est; nam veneni pestilentis operatio planè non consistit in fervoris excessu, verum in septica quadam qualitate, calori nativo totaliter contraria, à qua partium calor nativus corrumpitur, sicque ipsa pars extinguitur ac enecatur: hæcque septica operatio in carbunculo adeo manifestè apparet, & oculis conspicua est, ut eam nemo sanus in dubium vocare possit. Contra verò, à veneni eccellente vel adurente fervore carbunculum non excitari, ratio docet: nam si inde oriretur, deberet ille fervor esse, vel in penultimo, vel in summo gradu. Si esset in penultimo gradu, faceret partis colliquationem, sicut in febribus acutis corpus à fervente calore colliquari, & carnes ad ignem in humores ac pinguedinem resolvi & contabescere videmus: talis autem colliquatio in carbunculo non fit, quia partis affectæ substantia non imminuitur, sed tantum prius temperamentum cum forma vitali perit. Non est quod quispiam hic objiciat, tales partium colliquationes fieri & conspici in alvi fluxibus pesti supervenientibus: nam illæ colliquationes non fiunt immediatè à veneno pestilente, sed mediante putredine ab isto veneno inducta, è qua putredine postea colliquans ille fervor resultat: si enim illæ colliquationes immediatè procederent à fervore veneni pestilentis, tunc omnes ægri pestiferi aliquo colliquativo fluxu, vel alvi, vel urinæ, aliove affligerentur, quos tamen usus docet rarius contingere. Si verò veneni fervor esset in summo & ultimo excessus gradu, faceret partis assationem seu tostionem, ac citam duramque exsiccationem; si-

cut summus ignis fervor, aut ferrum candens, carnes statim urit ad siccitatem & crustam; talis autem assatio seu tostio in carbunculo non fit, nam eo affecta pars laxa humidaque permanet; & quamvis Galenus dicat; carbunculum esse ulcus cum crusta, vel crustam inducens, qualis candenti ferro inuri solet, nunquam tamen vera crusta in carbunculo pestilenti reperietur, nam pars non est spoliata humiditate, sed vitalitate: ac proinde verisimile est, Galenum per crustam, intellexisse particulam enecatam seu mortuam, quæ patienti crustosa & dura esse videtur, propterea quod insensibilis sit, & cum novacula inciditur, illa incisio quidem audiat, non verò sentiat, sicut in crustis etiam fieri solet. Certum igitur manet venenum pestilens non operari summo fervore adurendo, at septica perniciofa quadam vi enecando seu extinguendo.

In quonam autem consistat illa septica vis, ad majorem rei elucidationem, etiam paucis inquirendum est. Galenus, 5. *de simpl. med. fac. cap. 15.* & Haly Abbas, 2. *pract. cap. 18.* putarunt illam septicam vim consistere in vehementi fervore: quæ opinio jam dictis rationibus satis refutata est: nempe quod fervor ille vel colliquaret, vel assaret, quorum neutrum septica faciunt per se; & si quid tale eorum operationi adjungatur, illud contingit mediante putredine aut inflammatione, quæ præter septicam qualitatem, partem invadit & affligit. Præterea si à summo fervore extingueretur partium calor nativus, exque sic enecarentur, ergo piper, euphorbium, spiritus vini sæpe rectificatus, aliaque similia, majore adurente vi prædita quam multa septica, eandem operationem citius peragerent; usus tamen contrarium docet. Cum itaque nulla manifesta qualitas hujusmodi effectum edere possit, dicendum septicorum vim consistere in occulta venenata, & calori nativo totaliter contraria qualitate. Hoc ipsum quoque animadvertens doctissimus Thomas Fienus, 2. *de cauteriis cap. 6.* elegantissimè sic inquit: *Certe, meo judicio, non tam videntur septica calore, quam potius maligna sua & venenata qualitate partes corrumpere: neque videntur eas colliquare, sed potius ad putredinem & sphacelum deducere. Etenim venenata sua qualitate & tota substantiâ spiritibus vitalibus infesta sunt, eosque sic inficiunt, ut intermorianur, & vel fugiant, vel ineptum anima in particula fiant instrumentum: inde calor nativus in particula extinguitur, eo extincto pars putrescit, & humidum à sicco decedit, parsque humida, frigida, flaccida, emortua, & decolor relinquitur.* Fienus hac in parte sequitur Avicennam, qui, 2. *canon. tract. 1. cap. 4.* ita scribit: *Septicum est, cujus proprietas est, ut corrumpat complexionem spiritus pervenientis ad membrum, & complexionem humiditatis membri ejus cum resolutione, ita ut nequeat amplius permanere pars membri illius: & non pervenit ad hoc ut adjuvet ipsum, & corrodat, & resolvat humiditatem ejus, imò dimittit in ipsum humiditatem corruptam, in qua agit aliud quam calor innatus, & putrescit.* Ejusdem quoque opinionis est Averrhoes, 4. *collig. cap. 16.*

In huiusmodi septica vi veneni pestilentis operationem consistere, quilibet pestilentes carbunculos diligentius perscrutari volens, facile percipiet. Nullam verò qualitatem adurentem ipsi primario & necessario adesse, varia docent. 1. Quod pestis multos affligat sine ullo vel interno, vel externo fervoris signo. 2. Quod multi pestiferi non febricent. 3. Quod exanthemata non fiant cum inflammatione. 4. Quod carbunculis semper in principio non adsit magna inflammatio. 5. Quod fomes à multis innoxie attingatur sine cutis adustione, & sine ullo sensibili calore; imò à vespillonibus ipsum venenum pestilens sæpius impunè manibus contrectetur, absque ulla adurente læsione: quæ certè fieri non possent, si actio veneni pestilentis in adurente calore consisteret. Hic fortè obijcietur, quod multi pestiferi conquerantur de maximo interno ardore, & quod in carbunculis etiam magna oculis conspicua inflammatio, cum summis doloribus conspicitur. Respondeo: internum illum ardorem non induci primitus à veneno pestilenti, sed à putredine humorum internorum & biliosorum, ab illo veneno inducta: post magnas autem humorum putredines sequi inflammationes, in febribus ardentibus, multisque aliis putridis manifestum est. In ipso autem carbunculo dico non esse inflammationem hanc, ut nec dolorem, cum jam perfectus est carbunculus, sed tantum excitari à pugna veneni contra calorem nativum cum carbunculus est in fieri: postea verò cum carbunculus jam factus, & particula emortua insensibilis est, tunc dolorosam illam inflammationem inesse partibus proximè circumvicinis, quarum calor natiuus à particulæ emortuæ contiguitate graviter affligitur, quo afflicto cum humores in iis non satis debite regantur, accedit statim caloris præternaturalis dominium & inflammatio, quæ tamen non fit proximè à veneno pestilenti (quod per caloris excessum non operatur) sed à putredine & caloris præternaturalis dominio.

Hodierni Philosophi, qui omnes hæcenus occultas qualitates septicorum venenorum jam manifestas reddere tentant, eorum naturam explicant per minimas particulas, striatas, pungentes, unciatas, aculeatas, & nescio quibus non figuris donatas, quæ prout hoc vel illo modo inter se miscentur & cœcunt, modò partes corrumpunt, modò dolores, modò stuporem, modò gangrænam, modò sphacelum &c. inducunt. Verum non docent quomodo tales particulæ, quæ antea non erant, nec peccabant in sanguine & partibus, in iis generentur, quid illas introducat, moveat, jungat: si dicant in peste hoc facere venenum aëri inhærens, deberent docere quale, & cuius naturæ ac formæ foret illud venenum, & quomodo illius operatio, novaque particularum generatio procederet. Cum autem nihil horum dicant, certè nihil melius docent, sed obscurum per æque obscurum explicare nituntur. Interim tamen quamvis illi dicta principia non satis solide explicare queant, videtur occultum pestilens venenum per corrosivam qualitatem, si non

semper, saltem plerumque operari, ut abunde docent, cordis palpitatio, phrenitis, dolor capitis, ventris tormina & fluxus, convulsiones, vomitus, anxietates, urinæ cruentæ, bubones, aliaque multa effecta seu symptomata. Willisius quidem, *lib. de ferment. & febr.* putat venenum pestilens duntaxat coagulando operari; sed ea in parte multum à scopo aberrare videtur, propterea quod in peste laborantibus sanguis non raro adeo tenuis è naribus aut utero profluat, ut hæmorrhagia plerumque sisti non possit: quod etiam in peste extinctis, sanguis nunquam in corde aut vasis coagulatus inveniatur. Adde, quod pulsus in pestiferis ægris sæpe magnus & sanorum pulsui fere similis existat, qualis in sanguinis coagulatione fieri nequit: à qua coagulatione etiam febris excitari non potest; sed necessario difficilis respiratio semper adesse deberet, quæ tamen rarius adest. Denique, quod sanguis coagulatus ad emunctorias glandulas & cutem, in bubonibus, carbunculis, & exanthematibus, propelli non posset. Hanc Willisii sententiam longe pluribus rationibus acriter etiam impugnat Carolus de la Font, *dissert. 1. de pest. cap. 15.*

V. Carbunculi non habent certa determinata loca in quibus exoriantur, sicut bubones, sed ob rationem in textu dictam, in quacunque corporis parte excitari possunt: modò enim conspiciuntur in thorace, vel collo; modò in abdomine, vel dorso; modò in brachiis vel cruribus; modò in manuum pedumve digitis; modò unus aut alter; modò plures simul, vel in una, vel in diversis partibus: imò sæpe etiam in partibus internis oboriuntur, ut in pulmonibus, ventriculo, renibus, &c.

Hic quæri posset, quare à veneno pestilenti, dum hæret in arteriis, non corrumpatur tota sanguinis massa? dico, illud fieri non posse, partim quia venenum non ingreditur omnes arterias: partim quia illud in arteriis nusquam quiescit, sed à corde continuè movetur ac propellitur ab una parte in aliam, donec tandem per arteriarum extremitates pervenerit ad cutem, per cuius poros, si latiores fuerint, expirat ac dissipatur; si verò obstructi, in cute (vel, si introrsum pellatur, in aliqua membrana) quiescit, ubi, propter moram, calorem nativum extinguit, & particulam enecat. Nullum autem venenum in celeri transitu magum damnum humoribus inferre potest: antimonii vitrum vino injectum, & inde statim rursus exemptum, nullam vomitivam qualitatem ipsi communicat; sed diutius in eo relictum illi vomitivam qualitatem imprimit. Propterea, si in illa veneni pestilentis propulsione per arterias, ob naturæ cordisve debilitatem, vel ob humorum sanguinisve crassitiem, vel propter vasorum nimiam repletionem, aut aliquam obstructionem, aliudve impedimentum, hoc venenum tardius vel lentius vasa transeat, aut hic vel illic aliqua mora fiat, tunc in istis locis, ubi segnior ille progressus fit, in transitu magna putredo sanguinis massæ à veneni malignitate inducitur, cui statim adiungitur intemperies nimis calida, atque hinc febris, multaque gravissima symptomata oriuntur.

tur. Hinc jam facilis fit solutio istius dubii, quod nonnulli moverunt, nempe cum febris plerumque comitetur carbunculum, utrum illa excitetur à carbunculo, an verò carbunculus à febre. Dicendum, neutrum ab altero produci, sed utrumque malum generari seorsim; à veneno quidem pestilenti, at carbunculum immediate, febrem verò mediante putredine: atque hinc, cum carbunculus possit fieri absque humorum internorum putredine, & illa putredo, quæ putredo, non possit facere carbunculum (ut antea diximus) sequitur nec illum à febre, neque hanc à carbunculo excitari, & carbunculum posse curriculum suum absolvere absque ulla febre. Hoc ipsum etiam docet Fernelius *Pathol. lib. 4. cap. 18.* Ex prædictis, de celeri transitu, etiam alterum dubium solvitur: Utrum etiam carbunculi in cordis parenchymate fiant? duæ rationes docent illud fieri non posse. Prima, quia si venenum fuerit in summo malignitatis gradu, & magna copia in cor irruat, totum ejus nativum calorem subito corrumpit & extinguit, ita ut non fiat carbunculus in aliqua ejus parte, sed subita totius mors. Altera, quia si venenum fuerit in minore malignitatis gradu, vel exigua quantitate cor impugnet, citissime è corde excutitur, ita ut propter exiguam moram tantum malum in isto viscere operari nequeat.

VI. Pustula illa, à qua carbunculus plerumque ortum sumit, inde fit, quod cor fortiter stimulatum venenum pestilens cum valido impetu per minimarum arteriolarum extremitates propellat in cuticulam, per cujus poros, si satis patentes sint, ilico exspirat; sin verò occlusi, tunc isto loco, ubi desinit arteriola (per quam fortè propellitur) extremitas, sub cuticula detentum, mox humoris, cui immiscetur, corruptionem cum quadam ebullitione molitur, sicque cuticulam à cute divellens, corruptumque humidum sub ea deponens, vesiculam instar parvæ pustulæ excitat; vel si per plures proximè vicinarum arteriolarum extremitates eo propulsum fuerit, tunc sæpe plures parvas vesiculas sibi mutuo proximè junctas, & ichore subnigricante repletas, producit, quæ haud infrequenter brevi in unam vesiculam concurrunt: aliquando etiam nullam vesiculam facit, cum scilicet venenum non est tam acutum vel acre, & minore cum impetu propellitur. Venenum autem illius partis, cui infixum hæret, calorem nativum septica sua vi destruit, eamque enecans carbunculum facit. Verum illâ particulâ jam enecatâ, & carbunculo à vicinis partibus separato, ubinam manet pestilens venenum quod illum excitavit? Idem hic respondendum quod antea, *annotatione tertia*, de bubone diximus, nempe venenum in illo loco vel extingui, vel foras exspirare, vel in carbunculo remanere, nec ab illo separari, nisi particula mortua per summam putrefactionem penitus dissolvatur.

VII. Exanthemata pestilentialia (quæ vulgus *mortis & pestis maculas*, Itali *petechias*, *peticulas*, & *lenticulas*, Galli *purpuras*, & *papiliones*, Belgæ

*granum piperis* appellant) sunt maculæ purpureæ vel rubræ, vel nigræ, vel violaceæ, ut plurimum rotundæ, aliquando latæ, oblongæ, aliisque formæ, in summa cute efflorescentes. Nonnulli distinguunt inter exanthemata & maculas, quod illa habeant eminentiam, & sint de genere tumorum, hæc non. Verum illi confundunt vassiolas & morbillos cum exanthematibus pestilentialibus, quæ sunt prorsus sine tumore: ac proinde nos ommissa hac curiosa magis quam necessaria distinctione, ad exemplum Fernelii, utroque vocabulo indifferenter pro eadem re utemur.

De causis exanthematum pestilentialium minime convenit inter Medicinæ Scriptores. Actuarius, *Method. med. lib. 12. cap. 11.* dicit exanthemata consilari à crassis humoribus cuti impactis, ubi densa est summa cuticula. Mercurialis, de *pest. cap. 18.* scribit fieri maculas parvas rotundas, cum humores pauci subtiles sanguini permixti feruntur ad cutem, atque ubi per *Αἰμαδύνην*, hoc est, rarefactionem vasorum, excernuntur: si verò copiosi fuerint illi humores, dicit, cum Stephano Atheniense, disruptis venis plus sanguinis subtus cutem effundi, atque hinc produci maculas latissimas, quasi vibices. Palmarius, de *febr. pest. cap. 24.* illa fieri credit ex biliosa & tenui sanguinis parte. Petrus Paschalis, de *febr. petech.* existimat illa generari ab ebullitione sanguinis circa cor à virulentia aliqua contaminari. Eodem fere modo Joannes Morellus, *lib. de febr. purp. & pest. cap. 2.* refert ex Seguino, illa produci ab humore corrupto, per malignam auram intus ebulliente. Paræus, *lib. 21. cap. 28.* sæpe à crassa & adusta materia illa generari scribit. Riverius, *lib. de febr. sect. 3. c. 1.* putat illa oriri ex prava & venenata sanguinis aliorumve humorum qualitate putredini conjuncta. Benedictus Faventinus, in *sua Empirica*, docet, ex quatuor humoribus illa gigni posse, & ab humore prædominante colorem habere, à sanguine rubrum, à bile citrinum, à pituita pallidum, à melancholia nigrum vel lividum. Sennertus, *lib. 4. de febr. cap. 4.* illorum originem adscribit humorum putredini & corruptioni. Platerus, *tract. 2. Prax. cap. 2.* illa fieri tradit, cum portio veneni in poros cutis se exonerat. In has sententias innumeri, imò fere omnes Medici hætenus discesserunt, alii huic, alii illi opinioni subscribentes. Verum Medici non videntur hætenus exanthematum pestilentialium naturam satis perspexisse, ac propterea alii errarunt in cognitione ipsius mali, alii in cognitione viarum per quas exanthemata progrediuntur. Primi putarunt exanthemata tantum esse maculas solius cutis, cum revera sint maculæ ab internis partibus ascendentes, qui in cute terminantur. Secundi crediderunt exanthemata produci à sanguine, vel aliquibus ejus humoribus ebullientibus, inflammatis, putrescentibus aliove modo corruptis, & ad cutem delatis, cum illa tamen non prodeant ex hoc fonte, sed è sola spirituum vitalium extinctione, seu corruptione sine putredine, & extravasatione, ut mox docebimus. Tertiū existimarunt causam exanthematum

matum per venarum extremitates expelli in fungosam cutis substantiam: alii verò per anatomiam melius edocti, ab interioribus partibus illa foras adscendere animadverterunt, sed rei difficultate perterriti, nullam viam describere ausi sunt. Sic doctissimus Fernelius, *de febr. cap. 18.* ita dicit: *Ut autem [exanthemata] corporis summa, ita & interiora omnia viscera, musculos, nervos, catenarumque partes solidas obsident, ex hisque primam ducunt originem.* De causa nihil aliud dicit, quam quod producantur à maligna aeris qualitate: de via & modo generationis planè tacet: cum tamen cognitio viæ, per quam exanthematum causa transit & expellitur, multum luminis ad cognitionem causæ proximæ dare potuisset. Nos in textu docemus, exanthemata oriri ab arteriosi spirituosioris sanguinis sine putredine corruptis seu extinctis particulis, per arteriarum minimarum extremitates exclusis seu expulsis. Illa est vera exanthematum materia, hæc vera via per quam excutuntur. *Veram materiam* esse, varia docent. 1. Quod insensibiliter, sicuti solent spiritus, transeat partes carnosas aliasque intermedias. 2. Quod exanthemata pestilentialia sint sine tumore. 3. Quod persistant sine inflammatione. 4. Quod sint absque dolore. 5. Quod non lædant manifestè partes per quas transeunt, & quibus inhærent. 6. Quod non separentur instar carbunculi, nec suppurent instar ulceris. Quæ omnia, aut saltem aliqua ex his necessariò adesse deberent, si secundum supradictas opiniones producerentur ab alicujus humoris putredine, in-

flammatione vel ebullitione. *Veram viam* esse, docet Anatomia, quæ primò ostendit exanthemata non esse solum cutis maculas, sed illas ab interioribus partibus initio sumpto ad cutem ascendere, nec minus inhære interioribus partibus, quam cuti. Deinde demonstrat multo latiores arteriolas versus interiores membranas hiare, quam versus cutem, (hoc etiam observavit Galenus, cum alibi, tum maximè *lib. de dissect. venar. & arteriar. cap. 9.* cum quo etiam consentit Fernelius) atque hinc naturam laceffitam longè facilius corruptas spirituosas sanguinis arteriosi particulas effundere; & per latiores vias deponere versus interiores membranosas partes, quam per angustiores versus cutem; quæ tamen, ob tenuitatem jam deficere incipientem, à vicinarum partium calore propelluntur, ac per incumbendum carnosarum partium latiores poros ascendant ad cutem, in qua sub cuticulæ densitate, & à frigore externo intrassati subsistunt, dictasque maculas efficiunt: quæ semper longè periculosiores sunt quam carbunculi aut bubones, non ut causæ, sed ut signa: quia in his cor adeo validum est, ut perniciosum venenum versus externas partes depellere, & sanguinem à pestilenti corruptione præservare possit: in illis verò adeo debile est, ut nec venenum foras expellere, nec sanguinis corruptionem avertere possit, quod brevi secuturæ mortis indicium est; unde fit, quod ex sexcentis peste laborantibus vix unus evadat cui exanthemata in cute apparent.

## CAPUT XV.

## DE SIGNIS PROGNOSTICIS.



*Autorum morborum*, inquit Hippocrates, *incertæ admodum ac fallaces sunt prædictiones.* Hoc dictum si in ullo morbo, certè in peste verissimum esse experimur, in qua signa ambigua sunt & incerta, cumque singulis fere horis ac momentis mutantur, prædictiones admodum obscuras & lubricas (1.) faciunt, ita ut Practici etiam exercitatissimi sæpenumero in morbi hujus prognosi graviter decepti ac delusi fuerint: quia hîc sacro involucro multa teguntur, & fallax ille inimicus sæpe dum arridet, occultas insidias struit; dum blanditur, maximè nocet; in facie salutem, in tergo funus gerit. Attamen cum non omnes perimat gravis hic & fallax morbus, & praxis nos morum ejus magnam partem edocuerit, nonnulla signa prognostica, quæ in hac peste Noviomagensi certiora fuisse observavimus, breviter describemus.

I. Criticæ mutationes qualescunque, diebus decretoriis incidentes, nihil certi promittebant, omnes enim fallaces (2.) erant, & cum his, etiam optimis, æque multi moriebantur, quam evadebant. At sextæ dici (3.) crises semper certò lethales erant.

II. Quicumque circa novilunium aut plenilunium (4.) peste corripiebantur, illi maximè de vita periclitabantur.

III. Pestis quæ invadebat post ingentem iram, vel terrorem, vel venerem fortiolem, multo gravius periculum minabatur, quam quæ absque his præcurforibus corripiebat.

I 2

IV. Magna

IV. Magna virium prostratio in morbi principio, ut & crebra animi deliquia, ac cordis palpitaciones, periculosa, imò plerumque lethalia signa erant.

V. Pulsus sanorum pulsui fere similis, fallax & periculosus, intermittens (5.) verò semper lethalis erat.

VI. Sopores (6.) à principio morbi grave periculum indicabant.

VII. Sternutationes (7.) crebræ mortis præcones erant.

VIII. Motus tremuli (8.) manuum & linguæ funesti erant.

IX. Delirium (6.) semper grave periculum, at convulsivis partium motibus, & nervorum levibus contractionibus, membrorumque quasi subsultibus conjunctum, certam mortem prædicebat.

X. Dolor in gutture (10.) qui sine ullo tumore, sine aphthis, orisve siccitate, aliave aliqua manifesta causa, aderat, ut & rauco, imminens exitium certò prænunciabant.

XI. Narium hæmorrhagia (11.) die decretorio incidens, valde periculosa, non decretorio, lethalis erat.

XII. Lingua in principio morbi nigrescens, malum: sed humida & naturalis coloris apparens, bonum erat indicium.

XIII. Anhelitus valde foetens (12.) quasi carniū putrescentium foetorem olens, plurimis infelix signum erat.

XIV. Pleuritides (13.) quæ durante hac pestilente constitutione invadebant, semper lethales erant, sive præcederent, sive statim sequerentur pestis invasionem.

XV. Tussicula, spirandi difficultas, sputum cruentum (14.) dolor punctorius in pectore, hepate, liene, renibus, utero, aut vesica, hæc omnia calamitosa erant.

XVI. Singultum (15.) semper mors citò sequebatur.

XVII. Vomitus erat molestissimus, multosque ad mortem usque comitabatur, multis etiam tempestivo alexipharmacorum subsidio feliciter sistebatur.

XVIII. Suppressio alvi (16.) in morbi principio & augmento, imò usque ad vigoris declinationem, laudabilis erat, & spem salutis dabat.

XIX. Alvi fluxus (17.) summum minabatur periculum, & cum hoc vix centesimus æger evadebat.

XX. Cruentæ dejectiones (18.) mortem antecedeabant.

XXI. Cum urinis (19.) sanorum urinis similibus multi, præter expectationem, subito moriebantur, idque non rarò sine gravibus, ut videbatur, symptomatibus.

XXII. Urinæ turbidæ (20.) malæ quidem erant, sed cum his tamen nonnulli adhuc evadebant.

XXIII. Urinæ pingues, oleaginosæ, nigricantes, livescentes, vel hypostasin lividam nigramve deponentes, fere semper exitiosæ erant.

XXIV. Qui per urinarias vias sanguinem (21.) excernebant, sive solum, sive urinæ permistum, illi omnes brevi moriebantur.

XXV. Menstruorum fluxus pesti superveniens, etiam die critico erumpens, valde periculosus, & plurimis exitiosus erat: die verò non critico certissime occidebat.

XXVI. Mulieri gravidæ, puerperæ, vel abortienti (22.) si peste corriperebatur (quod plerisque contingebat) magnum periculum imminebat, & tales plerumque moriebantur.

XXVII. Si fonticuli, quos ad præservationem multi in brachiis aut cruribus habebant, in morbi principio exarescerent, certæ mortis indicium erant.

XXVIII. Tumores in emunctoriis (23.) laudabiles erant, & quo citius prodibant, tanto meliores.

XXIX. Si tumores illi sine febre (24.) vel ante febrem prodirent, citæ sanationis & salutis magnam spem dabant. Contra verò si post febrem, imprimis majorem, prodirent.

XXX. Si



XXX. Si tamen prædicti tumores, imprimis qui in faucibus & pone aures protuberabant, spatio duodecim vel viginti horarum valde increverent, & molles essent (25.) instar tumoris flatulenti, sive cum, sive absque inflammatione, semper lethales erant, & quamvis ægri cum talibus tumoribus se aliquamdiu non admodum, malè habere viderentur, omnes tamen moriebantur.

XXXI. Contra, si illi tumores in principio duri essent, instar tendinis duri, rigidi, & oblongi, atque paulatim increverent, cum tolerabili dolore, bonum erat, præcipuè si accrescendo duritiem illam aliquamdiu servarent.

XXXII. At si duri illi bubones circulum quendam (26.) diversi coloris, instar iridis, haberent, malum erat indicium, ac perniciem prænuñciabat, ut & si rubicundi, lividi, aut nigri fierent.

XXXIII. Tumores in emunctoriis manente febre subito evanescentes (27.) sæpissimè mortem prænuñciabant.

XXXIV. Si illi tumores cito ad suppurationem pervenirent, imminutum periculum significabant. Si verò cessante febre (28.) paulatim sine ulla suppuratione evanescerent, nihil quoque metuendum erat.

XXXV. Si in emunctoriis loco tumorum (29.) emergerent carbunculi, gravissimum periculum indicabatur.

XXXVI. Anthraces, vel à morbi principio, vel paulo post in locis carnosus apparentes, erant laudabiles. At si in pedum vel manuum digitis (30.) prodirent, pessimi ominis erant, ut & illi qui supra spinam dorsi conspiciebantur.

XXXVII. Si carbunculi tardius prodirent, malum: si valde multi (31.) erumperent, pessimum erat.

XXXVIII. Carbunculi si intra duos tresve dies circulo rubeo comprehenderentur, citius & facilius sanabantur. Si verò, instar sphaceli, quotidie latius proferperent (32. magnamque latitudinem acquirerent, difficilis curationis erant, imò sæpe pessimi ominis, præcipuè si supra dorsi spinam, vel in parte aliqua nervosa subsisterent.

XXXIX. Carbunculus in principio subsidens, recurrens, ac fere disparsens, vel postea manente febre exarescens, calamitatem prædicebat.

XL. Maculæ purpureæ, nigræ, virescentes, violaceæ (33.) quocunque tempore apparentes, semper lethales erant. Cum rubris nonnulli evadebant, etsi paucissimi.

## A N N O T A T I O N E S.

I. **P** Estem Medicos gravissimè deludere, docet quotidiana experientia; ac proinde in hoc morbo divinissima Medicinæ pars *Prognosis* admodum incerta est, quæ maxima incertitudo Joanni Morello, de febr. pest. cap. 5. hæc verba extorsit: *Unde fit, inquit, ut in peste fallat nos sensus, fallat ratio, fallant Hippocratis aphorismi, & ipse, ut putò, in his falleretur Hippocrates.* Ob hanc incertitudinem etiam sic dicit Liddellius, lib. 3. de febr. cap. 4: *Nullus morbus ex se magis perniciosus est, aut in quo signa omnia magis infida sunt; & motus magis incerti inconstantesque: sæpe enim signis bonis apparentibus in urina, pulsu, aliisque, præter expectationem ægri subitò moriuntur.* In eundem sensum etiam eleganter ita scribit Raimundus Mindererus, de peste cap. 11: *Quia morbus pestifer suâ naturâ infidus existit; ideo fida de se mortis ac salutis signa non perhibet. Unde apparentibus alioquin indicibus salubribus (qua tamen omnia in hoc morbo suspecta sunt) ægros interdum perire. deprehendimus, & quos morbus inducâtà savissimorum accidentium tur-*

*bâ, jugulare velle videbatur, vitalis virtus, quasi clam subterfugiens, hostiles per sæpe manus evasit.* Hujus fallaciæ morbi præclarum exemplum describit Paræus, lib. 21. cap. 17. de ancilla quadam Regina, cui inguinis bubone dissipato, omnia quoque symptomata evanuisse videbantur, ita ut illa ipsa se mali morbi expertem prædicaret, cum tamen animo & corpore constans, perque cubiculum obambulans, eadem illa die interierit de eadem pestilentia fallacia aliam historiam scribit Hieronymus Montuus, in sua practica, part. 2. lib. 7. cap. 1. *Nos pestilentiam, inquit, grassari vidimus Lugduni & Vienna, anno à Christo nato 1525: febris parva videbatur, & febris se liberos agrotantes opinabantur: pulsus erant moderatis similes, & urina colore, consistentia, & contentis, non illaudabiles; qui tamen omnes occubuerunt.* Quapropter bene monet Guainerius, ut in peste nequaquam signis, quamvis bonis, fidamus, etsi pessimis signis absentibus: Nam quamvis neque febrilis ardor; neque sitis, anxietas; aliave gravia symptomata, ut



ta, ut neque urinæ vel pulsus indicia ullum periculum portendere videantur, tamen omnia tuta timenda sunt: sæpe enim horror, nausea, levis capitis dolor, aliudve exiguum symptoma, ægris non valde molestum, pestilentiam lethalem antecedit vel comitatur.

II. Fallacia crifium inde procedebat, quod pestilens venenum nulla naturæ coctione mitigari, neque etiam per vias humorum purificationi dicatas satis commodè evacuari posset. Hæc causa fuit quod alvi fluxus criticus, nec non uteri vel narium hæmorrhagia, nunquam laudabiles essent; nam rarissimè spontè cessabant, sed medica arte semper sisti debebant, & multoties sisti non poterant, propterea quod natura per has inventas jamque apertas vias totum venenum expellere nitēbatur, atque hinc cum plurimi boni humores effluerent, & malignitas corpori ac cordi altius inhærens hoc modo multum imminui non posset, vires brevi deficiebant, citiusque ad mortem, quam veneni totalem expulsionem perveniebant ægri. Etiam copiosi spontanei sudores, à quibus maximum levamen expectabatur, valde incerti erant, nam etsi morbum aliquando feliciter solverent, multoties tamen in principio aliquam remissionem adferre videbantur, post quam longè gravius recrudescēbat malum. Causa erat, partim quod natura inceptum per hanc viam expulsionis opus, vel propter ægrorum externos errores, vel propter summam debilitatem, plerumque absolvere non posset, sed in medio opere impediretur vel deficeret: partim quod illi sudores multoties symptomati essent.

III. Periculosa, infida; imò lethales sunt sextæ diei crises, non in sola peste, verum etiam in aliis morbis acutis; quapropter Medici hunc diem appellant *Tyrannum*; cujus tyrannidem Galenus, lib. 1. de diebus decret. cap. 4. his verbis expressit: *Multos hic dies in syncopen derepente conjecit, aut immodico sanguinis profluvio extinxit, aut immoderatis vacuationibus, vel etiam catoche, aut mania multavit: alios verò in manifestam perniciem conjecit, icterum invehens, parotides suspectas, rubras quippe & vertiginosas excitans, & ad hac marasmis insanabilibus irretiens, & quod demum malignus dies ille non infert?* Idem illud de hoc die variis locis testatur Hippocrates, in *coac. pranot.* *Quibus sexta die rigores sunt, agere judicantur. Sudores sexta die manantes, pessimi. Icterus sexta die lethalis, &c.* Exempla etiam scribit in libris epidemiorum. Ita ut multorum sæculorum experientia confirmet, sextæ diei crises ægros semper ad exitium præcipitare, aut saltem in maximum vitæ discrimen deducere: Speciatim autem de peste hanc observationem scribit Brassavola, in *com. ad 2. aphor. Hipp. 24.* Nos, inquit, *sexcenties anno 1528, experientia vidimus in epidemio morbo, omnes fere sexta die obiisse; & in pestilentibus morbis ut plurimum ægri sexto die intereunt.* Propter hæc Galenus hunc diem tyrannum vocat; quoniam si non interficiat, quando judicat saltem, malè judicat: quippe tyrannus si non interficit, saltem bona surripit, vulnerat, percutit. Ita sextus dies, vel perni-

cie illius, quem judicandum accepit, gaudet, vel salute dolet, quaritque ubi animum expleat, & malè agrum tractet, tum longa punitione exerceat.

IV. De novilunio & plenilunio antea dictum, cap. 5. in textu, & annot. 1.

V. Galenus dicit pulsum intermittentem in juvenibus semper esse lethalem, & se plurimos senes ac pueros cum tali pulsu liberatos vidisse, juvenem verò nullum. Contra Galenum testatur Riverius, se in febribus malignis observasse, juvenes non paucos, qui pulsum intermittentem per multos dies habuissent, evasisse. Idem se observasse, exemplo demonstrat Wierus, lib. *Observat. Medic.* Contra hos ego testor, me in tota hac peste neminem, sive juvenem, sive senem, sive puerum, sive virum, sive mulierem vidisse, qui cum pulsu intermittente evaserit, sed omnes, quotquot talem pulsum habebant, brevi temporis spatio obiisse. De pulsus mutati causis videndum supra, cap. 7. annot. 9.

VI. Sopores indicio erant, præter cor, etiam cerebrum graviter impugnari & labefactari: his autem duobus vitæ fulcris vacillantibus, naturam facile succumbere, necesse est. Sic etiam Dodonæus, *Prax. lib. 1. cap. 18.* refert anno 1602, in magna peste omnes fere occubuisse, quibus cum sopore morbus invadebat. Quod ipsum in peste sui temporis quoque contigisse, scribit Minderus.

VII. Riverius, de *febr. pest.* dicit, se observasse, licet alia sæva symptomata periculum portenderent, sternutamenta tamen spem solutionis attulisse. Contra verò Cardanus, lib. 5. *Aphorif. Hipp.* meminit pestilentia, in qua cum brevi spatio sæpius sternutassent ægri, statim mortui concidebant. Sic nos quoque in hac peste cum crebris sternutationibus neminem evasisse vidimus. Ratio erat, quia sternutamenta producebantur à venenata labe cerebri membranis tenaciter affixa, sicut singultus in ventriculo à veneno ventriculi tunicis firmiter adhærente, easque vellicante. Itaque Riverii experientia hac in parte non est intelligenda de vera peste, sed potius de aliis febribus malignis: in quibus sternutationes à pravorum & acrium humorum aut vaporum vellicatione excitati, naturæ & facultatis animalis robor denotant, validamque molesti vellicantis humoris excussionem ostendunt.

VIII. Hi motus maximam arguunt cerebri læsionem, spirituum animalium paucitatem, & nervorum ac virium imbecillitatem, atque ostendunt naturam à morbo jam evinci; quapropter etiam ab Hippocrate, 1. *Prognost.* damnantur.

IX. Delirium gravem cerebri afflictionem, & convulsivi motus ipsius, & principii nervorum pessimam læsionem indicabant.

X. Hoc mortis instantis præsagium adeo certum & infallibile erat, ut cum hujusmodi gutturis dolore vel raucedine nullum evasisse viderim, & sæpe ægri iis infestati ambulantes & loquentes moriebantur. Videtur etiam Hippocrates simile quid observasse in acutis, nam 1. *proth. 11.*

prorrh. 11. inquit: In acutis morbis faucium sine tumore dolores, & pusilli, & strangulantes, perniciosi.

XI. Quare narium hæmorrhagia tam periculosa esset, jam diximus annot. 2. Huic nostræ observationi obstare videntur historiæ eorum qui pestem anni 1568. describunt: testantur enim tunc temporis febres pestilentes, fluente è nariibus sanguine copiosissimo, eoque fere florido, maxima ex parte fuisse judicatas, & quamvis ad lipothymiam usque proflueret, fere omnes tamen, quibus hæc crisis accidebat, fuisse sanatos. Quænam causa tantæ contrarietatis? Plurimi crediderunt hanc operationis diversitatem inde dependere, quod venenum pestilens sit diversissimæ conditionis: & sic Platerus, tract. 2. prax. cap. 2. dicit, *venenum pestilens ejusdem natura minimè esse, sed diversa; verum quidnam, inquit, in veneno latens illius varietatis causa sit, atque unde proficiatur, ut & in cæteris venenis, describi minimè potest.* Verum pestilentis veneni non satis exacta cognitio, & rudis operationum ejus inspectio, hæcenus in causa fuerunt, quod plurimi illud venenum diversum esse judicaverint, cum tamen semper sit uniusmodi, seu ejusdem naturæ ac conditionis, differens tantum intensiōis & remissionis gradu, & diversitas quarundam operationum procedat à diversitate tempestatum, locorum, victus, temperamentorum corporum, exhalationum, &c. Fortasse anno 1568, venenum pestilens in minimo intensiōis gradu, & propter certas tempestates corporumque dispositiones, internæ putredines ac fervores in fummo gradu viguerunt, quorum ratione gravissimæ ac malignæ, & naturæ magis, quam illud exiguum pestilens venenum, infelæ febres productæ sunt, quæ ratione sui per copiosam narium hæmorrhagiam judicatæ fuerunt, à quarum onere levata natura; exiguum illud pestilens venenum facilius evicit & expulit (super his vide præcedente cap. 7. annot. 2. & cap. 12. annot. 2.) Interim quod maximum periculum præstagent hæmorrhagiæ quæcunque, ipsi vulgo innotuit, quod hæmorrhagias videns, mox desperat de ægro, dicens illum laborare peste sanguinolenta. Illud ipsum periculum etiam in sua praxi observavit Minderus, qui de pest. cap. 11. sic inquit: *Mors videtur esse vicina iis; qui inente morbo sanguinem è naribus, utero, aut ore profundunt.* Sic mulieres peste correptas, quibus menses extra statum tempus fuissent, prognosticis sepe linquendas censuimus. Hæmorrhagiam autem narium quinta die passos, obiisse notavit Heurnius. Re vera, quicumque tandem sit sanguinis fluor, in peste mihi semper suspectus est habitus; de quo tamen aliis in morbis sæpe gratulari licuit: hic enim sanguis non sine magna virium interiectione promanat. Etiam Eustachius Rudius, lib. 3. art. med. cap. 3. has damnosas hæmorrhagias notavit. Propter maximum, inquit, natura conatum, & expultricem à prava materia valde irritatam, sanguis sæpe syncerus è naribus stillat: hoc si fiat, aut si in morbi principio per uterum syncerus stillat, vel per hæmorrhoides, febrem perniciosam sig-

nificare solet; ut & si per alvum pravus, fetidus, male coloratus, aut copiosus egrediatur, tabescentia seu liquationis modo. His bene perpensis, abunde patet omnino rejiciendum esse consilium Paræi, qui etsi lib. 21. cap. 24. damnositatem purgationis & phlebotomiæ late probasset, tamen cap. 25. hæmorrhagiam narium arte provocare jubet, scalpitu narium, vel forti emunctione, vel setâ equinâ. Certè in potestate nostra non est tempore pestis hæmorrhagias narium qualescunque ad arbitrium nostrum sistere, plerumque enim nullis artibus cohiberi possunt, ac proinde semper sunt extimescendæ, nec unquam incitandæ.

XII. Sic quoque scribit Avicenna: *Plurimi ex istis, quorum anhelitus fatet, ex primis moriuntur.* Et Fracastorius, de morb. contag. lib. 2. *Quorum anhelitus præter solitum immodicè (inquit) fatet, omnes moriuntur.*

XIII. Pleuritides propterea lethales erant, quia quæ post invasionem pestis fiebant, generabantur à carbunculo in membrana pleura & musculis mesopleuriis excitato, quod malum in interiore thorace erat prorsus insanabile. Quæ verò ante pestem invadebant, illis statim adungebatur pestis, ac proinde lethales evadebant; partim, quia acutum morbum alteri acuto adungi, exitiosum, propter citissimam maximamque virium prostrationem: partim propter contraria indicantia & medendi difficultatem, cum venæ sectio, in qua pleuritidis curatio potissimum consistit, ratione pestis maxime lethalis sit, ut latius docebimus lib. 3. cap. 3. annot. 1. & cap. 13. annot. 1. & lib. 4. histor. 4. 28. 53, 71. 107. 113.

XIV. Omnia hæc lethalia erant, quia generantur à carbunculis in visceribus internis excitatis. Inter cætera sputum cruentum magis commune erat, & semper præceps exitium prænuñciabat. Sic etiam Guido de Chauliaco, 2. doct. apost. cap. 5. observavit in maxima peste anni 1348, omnes illos qui sanguinem sputabant, intra triiduum mortuos fuisse. Cum his consentiens Valescus de Taranta, lib. 7. cap. 16, dicit, sputum sanguineum rejicientes citò perire, & anhelitu infecto alios adstantes magis inficere.

XV. Singultum morbis acutis supervenientem, lethalem esse; docet Hippocrates, probat experientia. Quare autem in peste lethalis sit, liquet ex ejus causa, supra cap. 13. enarrata, quo loco etiam vomitus causa describitur.

XVI. Suppressionem alvi in tota hac peste nulli ægro noxiam fuisse observavimus. Indicabat, partim tantum naturæ robur quod venenum pestilens fortiter à centro ad peripheriam moveret: partim tam exiguum veneni quantitatem, vel debilem qualitatem, quæ humores confundere, colliquare, & per inconvenientes vias expellere non posset. Præterea etiam laudabilem corporis constitutionem, ad graves humorum putredines minimè proclivem, significabat.

XVII. Alvi fluxus in hac peste nunquam sponte subsistebat, imò etiam medicamentis, summa

summâ diligentia adhibitis; rarius sisti poterat. Sic quoque refert Hippocrates, 3. *epidem.* in pestilenti illa constitutione plurimos alvi fluxu & dysenteria fuisse sublato. Sic & Galenus scribit, in peste illa longissima, quæ ipsius ætate sævit, omnes prope periisse quibus alvi fluxus superveniebat. Hildanus, *cent. 4. observ. 23.* de peste sui temporis sic dicit: *In hac peste nullum eorum, qui aut vomitu, aut fluore alvi laboravit, evasisse scio.* Illud ipsum quoque à plurimis aliis neotericis observatum fuit. Quapropter minimè audiendi sunt illi, qui in pestis curatione minus exercitati, contra experientiam; dicunt, fluxum alvi in peste, si die critico incidat, laudabilem esse, nec medicamentis sisti debere: ignorantes in peste hunc fluxum semper esse symptomaticum, & nunquam criticum aut salutarem: qua de re plura dicentur *lib. 3. cap. 11.*

XVIII. Quare cruentæ dejectiones exitialæ essent, liquet ex annotatione secunda.

XIX. Quæ ex urinis sumebantur prognostica, pleraque incertissima & valde fallacia erant, neque enim color, neque consistentia, neque hypostasis, aut sedimentum, aliaque innatantia corpuscula quidquam certi prædicebant, cum lethalissimis urinæ signis plurimi evadebant, cum saluberrimis moriebantur innumeri. Ita ut rectè Galenus dicat, *lib. 3. de præsign. expuls.* ex urina in huiusmodi febribus, præsertim ubi corpus cordis occupaverint, firmam notitiam petere, semper non licere. Hic unum adhuc vulgi experimentum adjiciam ex Foresto, qui *lib. 6. observat. 13. in scholio*, dicit aliquos hoc experimentum pro signo verissimo habere: *projiciunt, inquit, lac mulieris lactantis masculum in urinam pestiferi: si cadit ad fundum, morietur, ut ajunt, in sex aut septem diebus: at si non, citò evadet.*

XX. Hippocrates, 3. *epidem. cap. 3.* idem quoque prognosticum observavit, inquit enim, *Urina turbida multa, mala.* Non dicit illas esse lethales, sed malas & periculosas, utpote cum quibus multi, licet non omnes, moriantur.

XXI. Solasanguinis mictio certissimum instantis mortis signum erat: ratio petenda ex annotatione 2. ut & ratio prognostici vigesimi quinti.

XXII. Mulieres gravidæ quia magnam humorum impurorum copiam coacervabant; parturientes verò & abortientes, quia magnam mutationem & alterationem subibant, ac summo pere debilitabantur, pesti non tantum maximè obnoxie erant, sed eidem etiam minimè resistere poterant, hacque de causa plurimæ moriebantur, secundum dictum Hippocratis, 3. *aphorif. 31.* *Mulierem gravidam morbo quopiam acuto corripit, lethale.* Forestus in peste Delphensi illud ipsum quoque observavit: *Femina, inquit, quadam magis afficiebatur, & præsertim illa ex fæmineo sexu, qua uterum gerebant, tum ob mensium obstructionem, tum ex frequenti pro se & fætu anhelitu; & hæc rarius evadebant.* Hinc etiam Liddelius, *lib. 3.*

*de febr. cap. 5.* scribit gravidis nihil consultius esse, quam tempore pestilenti statim locum mutare, quia valida remedia præservativa non ferunt, cæterisque facilius inquinantur & moriuntur.

XXIII. Tumores citò prodeuntes indicabant robur naturæ, quæ magna vi adversus venenum pestilens insurgerebat, idque foras propellebat.

XXIV. Ante febrem prodeuntes tumores indicium erant, à victrice natura venenum citius foras expelli, quam humorum putredo intus generari possit, eamque, si forte sequeretur & febrem produceret; levem & non valde periculosam futuram. Post gravioverem verò febrem emergentes tumores significabant cor dupliciter impugnari, & à veneno, & à gravi humorum putredine, atque tam ab illius virulento furore, quam ab hujus infesto ardore vehementer affligi, & his duobus magnis hostibus resistere vix posse posse: quapropter multi tales tumores funestos esse scripserunt: verum nos illos potius valde periculosos esse dicimus; nam etsi cum illis plurimi in nostra peste mortui fuerint, multos tamen cum iisdem evasisse vidimus.

XXV. Hoc infelix prognosticum, de tumoribus subitò in magnam molem excrescentibus, in hac peste fuit infallibile & certissimum. Quod ipsum quoque observasse videtur Paræus, qui *lib. 21. cap. 30.* de bubone sic inquit: *Lethale est tumores repente augeri, & furente velut impetu ad debitam magnitudinem pervenisse, summaque omnia doloris, tumoris, & ardoris symptomata subitò & momento habuisse. Visi sunt nonnunquam bubones colore nativæ cuti similes, cætera tumoris edematosi æmuli, qui tamen mox agrum ad exitium præcipitant, eorum more qui lividi & attri existunt.*

XXVI. In bubonibus diversi coloris circulus maximi veneni index est, quod non tantum tumorem, verum etiam mortificationem parti infert, & ad vicinas partes ulterius proserpit.

XXVII. Hujus, ut & 39. prognostici ratio est, quod subsidentia bubonis aut carbunculi, quæ fit manente febre & morbi vehementia, significat veneni pestilentis ad partes principes recursum, & cordis dejectum robur, quod jam à maligna perniciem nimis obrutum, incipit succumbere, neque amplius intestinum hostem è suis penetralibus expellere potest.

XXVIII. Tumores post febrem evanescerentes, venenum vel edomitum, vel penitus extinctum ac evictum, vel foras ejectum & dissipatum indicabant.

XXIX. Rationem prognostici 35. pete ex annotatione 26. ut & ex præcedentis capituli annotatione 3. Idem prognosticum etiam annotasse videtur Joannes Morellus, nam *lib. de febr. pest. cap. 5.* scribit, se observasse illos, quibus circa fauces effloruit carbo, cita morte fuisse peremptos: periculosum quoque esse carbunculum qui sit in inguine.

XXX. Docent Medici, carbunculos, quo longius à corde erumpunt, eo minus esse pericul-

culosos. Nos tamen è contra in hac peste, experientia edocti, frequentissime observavimus, carbunculos in manuum vel pedum digitis, præcipue in extremis eorum articulis emergentes, semper mali ominis fuisse, & cum hujusmodi carbunculis paucissimos evasisse: nam licet sæpe ægri cum illis adhuc per sex septemve dies superviverent; tandem tamen moriebantur. In talibus carbunculis etiam periculum aliquod animadvertisse videtur Actuarius, qui *Method. Medic. lib. 2. cap. 12.* sic inquit: *Qui carbunculi carni tantam insident, brevi spatio circumscribuntur: qui verò in membranis aut nervis nascuntur, longo tempore durant, & subjecta loca in affectionis consensum protrahunt, adeo ut inflammatio, qua erysipelatis naturam sapit, in iis excitetur.* Quod ipsum quoque confirmat Paulus Ægineta, *lib. 4. cap. 26.*

XXXI. Galenus, 3. *epidem. com. 12.* pestiferum carbunculum vocat perniciosissimum, quia nihil salutiferi secum fert, & pestilentis veneni index est: ergo quanto major carbunculorum est numerus, eo plus & fortius venenum intus latere, ac gravius periculum impendere, significatur. Quapropter minimè audiendus est Mercurialis, qui, *lib. de pest. cap. 18. & 29.* scribit, carbunculos, quo plures sunt & latiores, eo magis salutem promittere. Quam opinionem cum illo multi alii Medici (fortè in peste majores Theorici, quam Practici) confirmant, propterea quod solum expultricis facultatis robur intueantur, de causæ verò summa magnitudine parum solliciti sint, quæ tamen illud magnum robur facile deijcere potest. Plures autem carbunculos paucioribus esse periculosiores, in hac peste millies vidimus: neque id à nobis tantum, verum ab aliis quoque Medicis, diu ante nos, notatum fuisse legimus: inter novissimos, se illud etiam observasse testantur Daniel Sennertus, Morellus, Lazarus Riverius, alique plures.

XXXII. Carbunculos latæ magnitudinis metuendos ac periculosos esse, docet ratio: nam, instar sphaceli, mortificationem in vicinas partes magis magisque extendunt, ita ut neque nervis, neque majoribus vasis, aliisve profundioribus partibus parcant. Hinc bene Paræus, *lib. 21. cap. 33.* inquit: *Ab ejusmodi abscessibus, magnitudinis vastis, & adpectu horridis, mors vel toti animanti, vel certa parti imminet.* Sic quoque scribit Joannes Morellus: *Omnis carbunculus magna molis & magnitudinis horrenda partimescendus, cum præsertim serpit ad subjectas partes depascitur, velut nos aliquando in faucibus vidimus, qui ad asperam arteriam usque, & in epigastrio, qui ad peritonæum rodendo pervaserant.*

XXXIII. Multi magni nominis Medici has maculas, quocunque tempore prodeuntes, & præcipue die decretorio apparentes, scribunt esse salutiferas, inde seducti, vel quod earum causam & originem (de qua latius egimus capite præcedente, in textu, & annotatione 7.) non satis co-

gnoverint, & ipsum venenum pestilens per has maculas evacuari putaverint: vel quod sola inani speculatione ducti, gravi stylo multa de peste scribant, cum nihil de ea viderint, nec quidquam de ejus historia curiose ad veritatem examinauerint. Quantumvis enim eorum rationes hujusmodi criticam evacuationem probare videantur, necesse tamen est, ut experientia, contrarium docenti, hac in parte cedant: neque interest quam acutè & doctè de hujus criseos bonitate disputent, si subrepens mors pendentis litis decisionem faciat. Nos semper observavimus exanthematum eruptionem symptomaticam, nunquam verò criticam esse, & semper naturam succumbentem indicare, multorum quoque spirituum vitalium interuccionem seu extinctionem, nunquam verò naturæ victoriam significare. Neque aliter se res habere potest: nam in laudabili crisi expellitur materia morbifica, vel tota, vel ex parte, hic verò illa intus remanet, & ejicitur illius materiæ productum, nempe arteriosi sanguinis ab illa extincti & corrupti pars, (sicut interdum in hydropse deijcitur serosæ saburræ pars, manente interim hepatis obstructione, debilitate, aliave hydropis causa) ad hæc, post laudabilem crisin sequitur levamen & sanatio, hic verò majus gravamen, & plerumque mors. Quapropter simul ac in hac peste exanthematum eruptionem animadvertēbamus, omnem vitæ spem abjiciebamus, ægrisque omnia quæ petebant tunc ad lubitum dari concedebamus: quamvis enim per diem unum aut alterum (quod tamen rarum erat, nam plurimi post exanthematum eruptionem intra horas octo, duodecim, vel viginti, moriebantur) & sæpe quidem sine gravibus, ut videbatur, symptomatis, vitam protraherent, tandem tamen inopinanter exstinguebantur. Dico, *inopinanter*, quia multos vidi adeo fortes, qui loquentes & ambulantes, ac nihil minus quam mortem expectantes, præter spem & opinionem subito conciderunt. Neque exanthematum multitudo (quam multi, tanquam salutarem laudandam censent) neque paucitas, majorem vel minorem sanationis spem dabat: nam plures maculæ majorem quidem veneni violentiam & quantitatem, majusque spirituum vitalium damnum indicabant, causam verò morbi nihil imminuebant: æque cum paucis & parvis, quam cum innumeris majoribus per totum corpus copiosissime erumpentibus moriebantur ægri: atque in tota hac truculentissima peste, unum solum cum exanthematibus purpureis copiosis evasisse vidimus, cujus historiam raritatis gratia libro quarto annotavimus. Post omnia lethalia signa hoc capite à nobis proposita, addam adhuc unum, quod vulgus notare solet, cujus mentionem faciens Franciscus Joel, *tom. 5. lib. 1. sect. 3.* sic inquit: *Remotum signum mortis est, nocturnarum ad fenestras agrotantis volatus, & infelix clamor.* Huic vulgus adhuc aliud addit, scilicet, corvorum volatus, & crocatus supra ædes agrotantis.

# LIBER SECUNDUS.

## De Præservatione à Peste.

### C A P U T I.

#### DE PRÆSERVATIONE IN GENERE.



In ullis aliis morbis, certè in Pestilentia diligens Medici officium requiritur: quod duplex est, Corpora sana præservare, & ægrota curare. Hinc duplex emergit remedium, Unum *προφυλακτικόν*, alterum *θεραπευτικόν*: illud sanitatem tuetur, ac imminet morbum avertit: hoc præsentem morbum curat. Cum verò præstantius & optabilius, imò tutius sit, futurum morbum arcere, quam jam factum expellere; sicut tutius & melius est prævenire domus incendium, quam ejusdem igne jam flagrantis incendium extinguere: propterea, imprimis in Peste, illa Medicinæ pars, quæ de Præservatione agit, alteri, nempe Curativæ, tanquam nobilior præferenda est, de qua etiam nos hoc secundo libro sermonem instituere decrevimus. Prophylaxis autem, seu præservatio in duobus præcipuè consistit, nempe in remotione causæ agentis, & in præmunitione corporum adversus illam causam. His indicationibus maxime tribus modis satisfit, Spirituali, Politico, & Naturali: atque hinc triplex resultat prophylaxis, Theologica, Politica, & Medica, de quibus singulis jam ordine dicturi sumus.

### C A P U T II.

#### DE PROPHYLAXI THEOLOGICA.



Um pestis sit morbus à summo Deo ad mortalium punitionem coelitus immissus, (ut satis probavimus *lib. 1. cap. 8. annot. 1.*) difficulter ejusdem advenientis invasio averti vel impediri, & invadentis pernicies graviter reprimi potest, quia in divinis morbis humana auxilia plerumque silent, imò nihil profunt, nisi per Divini favoris radios ad optatum actum promoveantur. Quapropter in hoc naturæ defectu altiora remedia ab ipso remedium Creatore petenda sunt. Cum enim in plagis divinitus immisissis summi Dei Justitiam pari passu comitetur immensa atque imperscrutabilis ejus Misericordia, ab illo summo Medico primarium auxilium petendum; neque amplius obdurandus animus, neque etiam in extremæ desperationis barathrum abjiciendus, sed verè contritus, poenitens, ac humiliatus, ante summi irati Numinis pedes devolvendus, & devotis precibus, (1.) jejuniis ac eleemosynis justissima ejus ira placanda est, ut hoc modo imminens à plagis exitium, per immensam ejus misericordiam, sisti & averti possit: Hic est ille Deus qui sacrificiis & holocaustis non delectatur; cui spiritus contribulatus sacrificium est; qui cor contritum & humiliatum non despicit; qui non vult mortem peccatoris, sed ut convertatur & vivat; qui debilibus ipsemet auxilium offert, dum inquit: *Venite ad me omnes qui laboratis & onerati estis, ego reficiam vos.* Quapropter in pestilenti constitutione ad hunc misericordiæ fontem ante omnia confugiendum est, utpote in cujus solius potestate, ut pestilentem plagam immittere, sic eandem rursus auferre, consistit; utpote sine cujus auxilio frustra laborant omnes Medici. Itaque tam publicè (2.) quam privatim supplices orationes, poenitentia, suspiria, ac devota jejunia unanimiter Deo offerenda

renda sunt, ut iis, tanquam dulci holocausto furor ejus extinguatur, ac in misericordiam transmutari, & quemadmodum à Ninive interitus, sic ab afflicta regione Angeli percutientis gladius averti (3.) possit.

## A N N O T A T I O N E S.

I. **Q**uamvis ad afflictiones pœnasque divinas (inter quas Pests primarium locum obtinet) cervicibus nostris imminentes, declinandas, valeant orationes è contrito ac pœnitenti corde prodeuntes, nemini ignotum esse arbitramur. Quapropter D. Bernhardus dicit, *piam & ex fide profectam orationem esse salutare in omnibus adversis remedium, clavem Paradisi, scutum defensionis, in calamitatum aestu refrigerium, in morbis pharmacum, gladium contra diabolum, murum contra infortunium.* Devotas preces ad morborum quoque sanationem prodesse, docet Jacobus Apostolus, *Epist. cap. 5. v. 15. Oratio fidei, inquit, servabit agrotum, & Dominus alleviabit ipsum.* Idem illud quoque docet Ecclesiasticus, *cap. 38. vers. 9. Fili in tua infirmitate ne despicias te ipsum, sed ora Dominum, & ipse curabit te.* Omni verò tempore plagarum, atque etiam pestis, supplices ad Deum suas orationes exaudiri, liquet ex 2 Paralipom. cap. 6. ubi Sacra Pagina hoc modo loquitur: *Si fames orta fuerit in terra, & pestilentia, aer corruptus, & ariditas, & locusta, & bruchus, & hostes vastatis regionibus portas obsederint civitatis, omnisque plaga & infirmitas precesserit, si quis de populo tuo Israël fuerit deprecatus, cognoscens plagam & infirmitatem suam, & extenderit manus suas in domo hac (nempe Templo) Tu exaudies de caelo, de sublimi scilicet habitaculo tuo, & propitiaberis.* Ad hæc, *Jeremia cap. 3.* ipsemet Deus promittit se pœnitentes ac confitentes peccatores exauditurum. *Revertere, inquit, Israël, & non faciam cadere iram meam super vos, quia sanctus ego sum, & in perpetuum non irascor, solum agnosce iniquitatem tuam.* Horum Sacræ scripturæ locorum veritatem ipsa experientia comprobavit in Rege David, 4 Regum cap. 24. qui cum se coram Deo humiliasset, & peccata sua confessus esset, ac pœnitentiam egisset, cessavit pestilens plaga. Item in Ezechia Rege, apud *Jesaiam cap. 34. & 4 Regum cap. 20.* qui similiter lachrymis & precibus ad Deum profusus, à pestilenti morbo & jam annunciata morte liberatus fuit. Hinc est quod Savonarola, animadvertens, quam necesse sit ut homo reconcilietur Deo, non malè sic dicat: *Ut corpora munda præserventur, fac ut anima tua primo mundetur, & sic Deus misericors te ab ipsa peste præservabit.* Sic etiam Jacobus Horstius, eodem fere sensu sic inquit, *in consil. de peste: Pestilentia in peccatorum infinitorum à nobis commissorum vindictam, tanquam hostis vita & natura insensibilis, à Deo immittitur: ad cujus ablationem non tam ad ordinaria Medicina principia, quam piacula, devotas preces, & veram cordis pœnitentiam Deo summo litandam, confugiendum est.* Similiter etiam Alexander Benedictus, *lib. de pest. cap. 1.* dicit: *Hic supplicationibus, vo-*

*tis, ac expiationibus duntaxat locus est, quibus ritè pestilentiam reperiuntur, vel submovemus, vel aliquando differimus.* Idem, sequente cap. 6. hæc habet: *Fatalis pestilentia, divinâ plerumque ulciscendi vindictâ mortalibus ob merita dimittitur; & à summo Deo suspensa quandoque relinquatur ob preces admotas, vota que suscepta, quibus salus publica regionibus multis restituta est.* Hac prima sunt nobis præsidia, quibus nulla præsentior medicina habetur: id sapius viderunt majores nostri inter religionis Christianæ exempla admirabilia. Has orationum vires in peste etiam Gentilibus ignotas non fuisse, apparet ex Avicenna, qui, 4. Method. cap. 1. inquit: *Ob has causas profunt hominibus orationes & sacrificia.* Et alibi dicit: *Ira Dei reconciliatur sanctis ac devotis precibus.*

II. Tempore pestis non tantum olim, sed etiam hodie apud Christianos, laudabili instituto, publicæ supplicationes & jejunationes indictæ consueverunt, quarum non semel maximi effectus fuere. Sic testantur Historici quondam Marfilæ deploratissimam pestem solis orationibus & jejniis extinctam fuisse: idemque etiam Romæ, tempore Gregorii Papæ, contigisse; ut & Papiæ, referente Paulo Diacono, *lib. 6. de bello Longobard. cap. 3.* nec non apud Bulgaros; teste Georgio Cedreno, *in suis Hist.* Eundem morem ipsis quoque gentilibus familiarem fuisse, legimus apud Titum Livium, 11. hist. ubi scribit de peste quæ tunc sæviit: *Supplicatio per omnia pulvinaria indicta per diem unum, & Coss. edixerunt ut per totam Italiam triduum supplicatio & seria essent.* Sic in pestilentia quæ proximè sequenti anno secuta est, inquit: *Decemviri supplicationem in biduum, valetudinis causa, in Urbe, & per omnia fora conciliabulaque edixerunt; majores duodecim annis omnes coronati, & lauream manu tenentes supplicaverunt.* Idem, *lib. 41. de alia peste* inquit: *Consul Apollini, Æsculapio, Saluti, dona vovit, & dedit signa inaurata.* Ita L. Ebutio, & P. Servilio Coss. in gravissima peste etiam publicè summa devotione ad Deos concursus fuit: *Supplicatum est, inquit, in omnibus templis, matres passim strata crinibus templa verrebant, celestium irarum veniam pacemque poscentes.*

III. Quæritur, an tempore pestis etiam confugere liceat ad Magicas & diabolicas artes; cum testentur Historici, violentissimas pestes his artibus non semel sedatas & extinctas fuisse. Sic refert Diodorus Siculus quendam Aristæum immolatis victimis ardores Syriæ mitigasse, & adductis ethæsiis Græciam à peste liberasse. Etiam scribit Suidas, Jachen Ægyptium carminibus, non solum variorum morborum curationem feliciter peregrisse, sed Ægyptum etiam à maxima peste liberasse. Refert quoque Paulus Jovius, *Hist. 21.*



(cujus historiae etiam meminit Gilbertus Cognatus, *lib. 8.*) tempore Adriani Sexti, Pontificis, furiosissimam pestem, Romam miserè affligentem, tandem extinctam fuisse praeiis & carminibus Demetrii Spartani, qui ferum taurum, verbis nonnullis in aurem insusurratis; mansuefactum reddidit, & postea immolavit, atque sic ab illa inanis sacrificii litatione mitescere coepit

morbus. Nos dicimus artes diabolicas à Christianorum ecclesia ad inferorum domicilia obligandas, neque unquam à vero Deo ad condemnatorum diabolorum opem confugiendum esse, imò ne credendum quidem pestes aliasve plagas, per diaboli propriam voluntatem ac potestatem vel inferri, vel auferri posse, sicut *lib. 1. cap. 8. annot. 1. problem. 3.* fusius demonstravimus.

## C A P U T III.

## DE PROPHYLAXI POLITICA.



Rophylaxis Politica consistit in officio Magistratuum (1.) quorum munus est publica auctoritate impedire, ne pestilens contagium intra urbes recipiatur, (2.) & curare, ut vel cælitus immissum, vel aliunde cum fomite allatum, non multum disseminetur, sed citissimè extingatur. Ut hæc bene peragantur, præmissis primo supplicationibus publicis (de quibus præcedente capite dictum) amovendæ sunt omnes occasiones, quibus aër vitari, contagium propagari, & corpora ad pestem disponi possunt. In eum finem diligenter caveant necesse est, ne promiscuè omnes advenæ & peregrini, (3.) è suspectis præcipuè locis venientes, admittantur: ne etiam vestes, suppellectilia (4.) aliave antiqua, vel etiam lanea, lineæ, gossypina, ac similia mercimonia, ex iisdem locis delata, intra urbes recipiantur. Deinde oportet, ut sub gravi poena edicto publico prohibeant, ne quispiam incolarum ulla sordes vel fæces, multò minus excrementa (5.) ægrotorum, stramina in quibus ægri vel mortui decubuerunt, aquam saponatam (6.) in qua fordida linteamina lota sunt, canum aliarumque mortuorum bestiarum (7.) cadavera, stercorea (8.) quælibet, bestiarum mactatarum sordes, aliasve quascunque res putridas ac færentes, in vias publicas ejiciat: omnium verò maximè impediunt ne ullæ putridæ, færentes, aliove modo inquinatæ sordes in puteos aquaticos (9.) publicos injiciantur. Adhæc ne sani promiscuè cum infectis conversentur: ne ex infectis ædibus exeuntes, aut eas inhabitantes, unquam in publicum prodeant absque bacillo (10.) albo, aliove signo, quo ab aliis distinguui & internosci possint. Ne suppellectilia quælibet, ex ædibus infectis delata, intra anni spatium (11.) publicè vendantur, vel ad alias, nondum infectas, ædes deportentur. Ne mortuorum cadavera ultra biduum (12.) asservantur. Præterea oportet ut, pro sua auctoritate, publicè jubeant, ut omnes & singuli ante suas ædes quotidie diligenter expurgent plateas, compita, vicos, & aquarum compitalium ductus: ut cloacæ, (13.) publica fimeta, aliaque loca vulgi sordibus colligendis dicata, per certos homines isti operi destinatos & assuetos, sæpius expurgentur: ut ædes infectæ occludantur, (14.) & aliquo signo foris præfixo notentur, sicque alii ab earum ingressu arceantur: ut pauperum ægroti ad nosocomia, (15.) solis pestiferis excipiendis destinata, quam primum deferantur. Ad hæc consultum est, aquis stagnantibus, (16.) si quæ in urbibus fuerint, flumina vel rivulos currentes (dummodo id fieri possit) immittere, ut per continuum fluxum à putredine præservari possint: vel si hoc fieri nequeat, easdem exficcare, & terrâ replere: si neque hoc, tunc excrementorum, cadaverum animalium aliarumque sordium injectionem strictissimè vetare. Requiritur etiam, ut Magistratus certos viros constituent, qui diligentem rationem habeant publicæ venditionis annonæ (17.) & prohibeant ne frumenta quæ situm contraxerunt, aliove modo corrupta sunt, necarnes, volatilia, pisces, ova, aliaque similia, morbosa, corrupta, vel putrida, ac malè olentia vendantur: ne in macello, aut apud laniones mactentur boves, oves, porci, aliasve bestię ægrotantes: ne fructus horarii facile corruptibiles & pravi succi seu nutrimenti (quales sunt cucumeres, pruna, melones, per-

ficæ



sica mala, aliique similes) ad forum deferantur. Item ut alios constituent viros, qui pauperum (18.) rationem habeant, atque illis res necessarias è publico ærario suppeditent, & diligentem ædium, linteamentorum, vestium, aliarumque rerum domesticarum quotidianam expurgationem strictè injungant: ac curam quoque gerant, ut per totam urbem omnes quorumcunque civium infectæ ædes, post paucarum septimanarum ab ultimo in iis mortuo, quietem, diligenter expurgentur, (19.) omniaque suppellectilia bene emundentur. Denique necesse est, ut encenia, nundinas, comediarum spectacula, aliosque majores publicos conventus (20.) inhibeant. Maximè etiam requiritur ut aliquos boni nominis doctos ac peritos Theologos, Medicos, & Chirurgos eligant (21.) qui ægrorum pestiferorum diligentem curam habeant; utque hi alacrius magisque intrepidi periculosissimum hoc munus (22.) obeant, liberali & annuo stipendio ex ærario publico dotandi sunt. Non minus etiam requiritur, ut multos honestos viros, (23.) de quorum vitæ probitate constet, nec non aptas ac fidas mulieres sub publico juramento constituent, qui ægrotis ubique inserviant, & si ab iis aliquod improbitatis, furti, homicidii, aliufve sceleris signum peractum intellexerint, ut statim severissimè tales puniant, aliisque exemplo constituent.

## A N N O T A T I O N E S.

I. **E**X prædictis illis, durante hac peste, Noviomagi paucissimæ tantum leges conformatae & publicatae sunt, neque adhuc postea earundem exacta aliqua ratio habita fuit: quia Magistratus Noviomagensis eo tempore gravibus bellorum turbis & hostium vicinia tantopere intricatus, & ut inde se aliquo modo expediret, adeo occupatus erat, ut intestini mali, scilicet Pestis, non nisi minorem curam habere posset. Hac de causa in morbi principio contagii semina longè lateque disseminata fuerunt, ita ut intra paucos menses veneni pestilentis furor totam civitatem occuparet, cui certè bonis legibus, tempestive institutis, multum obviari iri potuisset.

II. Solet semper in omni peste, si initia periculi contemnantur, & contagii propagatio citissimè non impediatur, postea vix ullo consilio succurri posse. Quapropter necesse est, ut in ipso principio strictis legibus obviari eatur illis erroribus quibus tanto hosti liberior introitus præbetur, ut vix locum aliquem ingressus, antequam ibi firmam sedem figat, rursus ejiciatur, nam

*Egrius ejicitur, quam non admittitur hospes.*

III. Multoties docuit experientia, peregrinos ex infectis locis venientes, sæpe contagium pestilens, vestibus aliisve suis rebus inhærens, ad alias urbes & regiones detulisse, iisque hoc pacto pestilentem labem communicasse. Ab hac causa refert Mercurialis pestem Venetam sui temporis initium sumpsisse: qualia exempla plura enarrantur à Joanne Ewichio, *lib. 1. de offic. Magistrat. cap. 10.* Ab hac occasione etiam anno 1663. initium sumpsit pestis Amsterodamensis; propterea quod navem unam aut alteram ex Algeria & Smyrna (quibus in locis, & tota Græcia, pestis crudeliter grassabatur) admitterent, & peregrinos inde venientes nimis imprudenter intra urbem reciperent, quorum multi peste correpti primò hospitia sua infecerunt, ab hisque malum ulterius

per urbem disseminatum fuit. A multijuga hujus rei experientia prodit ille ordo, in Italia, Gallia, Hispania, multisque Germaniæ locis familiaris, nempe, ut neminem, licet sanum, ex infectis locis venientem, intra alias urbes recipiant, nisi post quadragesimum ab exitu è tali loco diem; certissimum judicantes, eum qui per quadraginta dies continuos extra locum infectum sanus vixerit, nullo contagio infectum esse, qui ordo nobis quondam in itinere Gallico haud parum molestus fuit, ac interdum ille mendacia extorsit, ut iis mediantibus alicubi hospitio excipi possemus; nam adeo ab hujusmodi peregrinis abhorrebant passim homines, ut eorum neminem intra ædes suas admittere vellent. In multis quoque locis omnia commercia ad infecta loca omnino prohibentur, & merces ex infectis locis allata non admittuntur.

IV. Testatur Fracastorius, *lib. 2. de morb. contag. cap. 7.* Anno 1511. cum Germani Veronam tenerent, exorta peste, qua hominum fere decem millia periere, ex una veste pellicea non pauciores quam quinque & viginti Teutones obisse; uno defuncto, alius induerat eam vestem, donec monefacti ex tot defunctis, vestem combussere. Contagii enim fomes imprimis vestibus, ut & laneis, lineis, aliisque similibus suppellectilibus ac mercibus diu inhære solet, nec quidquam est per quod magis communiter disseminetur, & ad alia loca deferatur, non tantum ad propinquas ædes vel civitates, verum etiam ad longissimè distitas urbes & regiones, cujus rei exempla extant apud Appianum Alexandrinum, *lib. de bello Illyrico*, Fracastorium, *lib. 2. de morb. contag. cap. 7.* Mercurialem de peste *cap. 1.* Alexandrum Benedictum, *de peste cap. 3.* Ewichium, *loco proxime citato*. Trincavellam, *lib. 3. Consil. 17.* Forestum, *lib. 6. Observat. 22. in scholio.* Erasmus Heldenum, *in orat. de contag.* aliosque plures.

V. Sordes & foeces putridæ foetore suo aërem inquinant: excrementa vero ægrorum, cum sint contagiosa, facile quolibet transeuntes inficiunt: sic quoque stramina quibus incubuerant ægri & mortui, non semel aliis contagium intulisse, observavimus.

VI. Hoc pestis tempore animadvertimus foetorem illum qui excitabatur ab aqua saponata, in qua sordida linteamina lavabantur vel lota erant, & ægris, & sanis maximè noxium fuisse. Illud enim notatu dignum sæpissimè observavimus, nempe in illis ædibus in quibus nulla adhuc pestis erat, si linteamina sordida aqua & sapone nostrate (ut in Belgio moris est) illic lavarentur, eo ipso die, vel interdum postridie duos tresve simul peste correptos fuisse, ipsique ægri testabantur foetorem aquæ saponatæ illis primam & maximam alterationem intulisse. Hoc ipsum quoque in mei ipsius hospitio infelix experientia docuit, in quo post lota linteamina statim gravem alterationem perceperunt plerique domestici, & proximè sequenti nocte tres peste correptæ, ac brevi post mortuæ fuere, nempe hospitis mei filia, ancilla, & alia lotrix forinsecus advocata, quæ etiam omnes conquerebantur mali principium ipsis ab aquæ saponatæ nauseabundo foetore inductum fuisse. Quia imo interdum integras familias post sordidorum linteaminum lotionem peste infectas fuisse vidimus, idque maximè in ædibus angustioribus, in quarum omnia cubicula dictæ calentis aquæ foetidus vapor facile penetrabat. Ego ipsemet, si aliquas ædes intrarem ubi sordida linteamina lavabantur, statim sentiebam me ab aquæ saponatæ foetore ad nauseam & vomitum proritari, cum tamen extra pestem huiusmodi foetor me planè non afficiat. Hinc tandem per multijugam experientiam Noviomagi factum est, ut plurimi hunc foetorem non minus, imò magis, quam ædes infectas fugerent; & multi quoque melioris fortunæ cives, aliorum periculis prudentiores redditi, sordida sua linteamina passim foris lavari curarent, à lotricibus isti operi ac foetori assuetis. Quemadmodum autem saponis foetor sanis nocebat, ita quoque ægris multum oberat: idque sæpissimè animadvertimus in delicatioribus, aliisque qui sordida linteamina fastidirent; cum enim post sudores indusia vel alia linteamina renovarent, & cum mundis mutarent (licet iis optimè calefactis) semper quatuor aut sex horis post multo pejus se habebant; anxietates, vomitum, febres majores, capitis dolores, aliaque incommoda plura incurrabant; eaque omnia maximè oriebantur à saponis foetore, quem lota, quamvis optimè sicca, linteamina plus minus retinent. Non autem hæc mala producebantur à frigore (ut quispiam existimare posset) in hac linteaminum mutatione corpus facillime subeunte, & poros cutis occludente, nam usus contrarium docebat; quia si ægris induerentur talia indusia quæ ab alio quopiam sano homine prius per tres quatuorve dies gestata fuerant, quorum saponis foetor jam à sani corporis calore discussus erat, tunc illa nullum nocumentum inferebant,

quod alioqui per illud ipsum frigus tunc fieri debuisset. Hanc ob causam ego in meis ægris renovationem seu mutationem indusiorum ante diem septimum, vel in aliquibus ante decimumquartum (pro morbi & ægri conditione, sordiumque copia) non desiderabam, atque tunc adhuc semisordida, ab aliis sanis per aliquot dies gestata ipsis indui curabam, & immunditiam munditiei in hoc casu præferebam, cum hanc graviter nocere, illam verò prodesse, nec ullum unquam incommodum ab indusiorum sudorifero foetore sequi, observarem. Linteaminum renovationes tantopere nocuerunt ægris, ut etiam imperitum vulgus, tristibus plurimorum exemplis edoctum, has cane pejus & angue fugeret, & urgente aliqua necessitate, non alia quam semisordida indusia ab aliis sanis per aliquot dies prægestata induere vellet. Huic nostræ observationi unanimiter obstitunt omnes Medici, qui hæcenus de Peste scripserunt; nec quemquam invenias qui non suadeat, post copiosos sudores indusia aliaque linteamina sudore madentia (quibus malignitatem aliquam per sudores expulsam inhærere arbitrantur) abjicere, aliaque nitida induere, quorum opinioni ego ipsemet etiam antehac subscripsi, & si solam speculationem sequerer, adhuc fortè subscriberem, nisi me fere nolentem quasi vi, ab illa discedere coëgisset multiplex experientia.

VII. Inveniuntur nonnulli qui putridos & corruptos foetores cadaverum animalium, aliarumque similium rerum putrescentium, pro amuleto esse credunt, eodem modo sicut aliquando unum venenum alterius veneni vim infringit. Atque ea ratione ducti suadent felēs, canes, aliaque inutilia animalia trucidare, & in vias publicas projicere, ut ibi putrescant, & aërem teterrimis foetoribus impleant: quo modo olim Medicum quendam à peste Scythiam liberasse ajunt (quod illius Medici experimentum etiam Alexander Benedictus, *lib. de febr. pest. cap. 6.* ex relatione cujusdam mercatoris referre & confirmare non erubescit;) suadent etiam quotidie foetidissimarum cloacarum aut latrinarum teterrimum nidorem olfacere. Hoc modo dicunt naturam citra vitæ periculum adversus pestilentis aëris malignitatem ita confirmari, ut postea eandem planè negligat. Opinionem hanc confirmant exemplis vespillonum, qui ægrotis continuè inservientes, pestilenti malignitati assuescunt, ita ut ægrorum foetores & excrementa contagiosa innoxie tractent & ferant: præterea exemplis cordonum, coriariorum, eorumque sordidorum hominum qui latrinas & cloacas expurgant, quos malignis foetoribus assuefactos, rarius peste infestari tradunt. Verùm non sunt audiendi hujus foetidæ opinionis patroni, cum putridos foetores semper febres pestilentes inducere, & corpora ad pestilentem malignitatem facile suscipiendam disponere, ac per consequens pestem semper multum augere, experientia doceat. Testes sunt Diodorus Siculus *lib. 14.* Joannes Cuspinianus, *in vita Henrici I. Imp. & in vita Ludovici II. Imp.* Julius Alexan-

Alexandrinus, de bello Punico lib. 6. Forestus, lib. 6. Observat. 9. in scholio. Michael Saxo, 2. part. Chronic. Caesar. Paræus de peste cap. 3. alique plures, cum Medici, tum historici, imprimis illi qui diuturniores urbium obsidiones describunt, qui omnes plurimis exemplis putridorum foetorum noxas annotarunt. Ad probationem dictæ opinionis nihil etiam confert exemplum Scythiæ, utpote quod pro falso & incredibili habendum est, cum planè non constet quo tempore, & à quo Medico pestis tali modo fugata fuerit: & quamvis istius historiæ meminerit præclarus Medicus Alexander Benedictus (nemo enim alius, quod scio, istius meminit; nisi ex Alexandro Benedicto citati) hoc tamen nihil ad rem facit, nam & ille deceptus fuisse potuit, nimis facile fidem præbens rumori, qui sine auctore in ore solius populi vagatur, quem ipse Alexander etiam non ex sese, tanquam de re sibi visa, sed tantummodo ex cujusdam mercatoris (quorum multi satis splendide mentiri norunt) relatu describit. Malè etiam per exemplum vespillonum docere nituntur, naturam citra vitæ periculum putridis malignis foetoribus affueri; & consuetudine illa adversus pestilentem malignitatem muniri posse: nam in principio pestilentis constitutionis, etiam plurimi moriuntur vespillones, nec quidquam illis prodest foetorum consuetudo: illi verò soli superstites manent, omnesque venenosos pestilentes halitus innoxie ferunt, quorum occulta temperamenti proprietas veneno pestilenti resistit, atque hi postea tuti omnibus pestiferis inserviunt. Hinc fit quod in pestis principio plurimi vespillones moriuntur, illi scilicet qui illam occultam temperamenti qualitatem non habent: & quod postea in progressu pestis pauciores vespillones moriuntur, quia vix alii supersunt quam illi qui occultam istam dispositionis proprietatem pesti contrariam habent. Sic quoque cerdones, coriarii, alique ejus generis homines, à peste non magis immunes sunt quam alii, imò eà gravius plerumque affiguntur: refert enim Palmarius, cum pestis invadit eam urbis Parisiorum partem in qua sordidi illi mechanici habitant, illam nusquam gravius levire. Itaque explodendum est foetidum illud pro putidis putridisque foetoribus allatum patrocinium. Gravibus & insuavis potius, quam suaveolentibus, odoribus se assuefacere, etiam nos laudamus, (ut docemus sequenti cap. 5.) sed minimè putridis ac corruptis.

VIII. Sennertus præcipit ut viæ publicæ imprimis mudentur à stercore suillo & anserino, quia illud foetore suo spiritibus & cerebro insensissimum esse, ac præ cæteris ad contagium propagandum multum facere, dicit. Sic quoque Untzerus porcorum imprimis stercorea abominatur: Magistratus, inquit, officium erit, sedulo cavere ne in urbibus cives ac incolæ prope ades suas, aut saltem in interiore earum parte, haras aut suilia erigant aut construunt, in illisque porcos magno numero alant ac saginent, cum hac re nihil perniciosius civitati, præsertim tempore grassantis pestis, possit contingere, propagatâ per eam tanquam fomite aptissimo, conta-

gione virulenta, & ad plures celerrimè translata.

IX. Puteorum publicorum imprimis diligens ratio habenda est, præcipuè in illis civitatibus in quibus, sicut Noviomagi, ad omnes necessarios usus puteali aqua, tanquam clarissima & optima, semper utuntur. Nihil enim est quod pestilens seminarium magis disseminare potest, quam hujusmodi puteorum publicorum infectio. Non semel malignorum, ac sceleratorum hominum perfidiâ, qui carbunculos è cadaveribus extractos, pus & saniem ex ægrotorum abscessibus effluentem, ac spumam ab agonizantium ore pendulam, in puteos projecerant, pestes citissimè propagatas, multumque aggravatas fuisse, legimus; cujus memorabile exemplum refert Ewichius, de offic. Magistrat. lib. 1. cap. 20. de Germaniæ quadam urbe; in qua vespillones tabo ac maligna purulenta materia ex apostematibus pestiferis effluente puteos infecerant, sicque multos, qui aquis istis utebantur, infecerant, & interemerant. Neque id mirum, cum enim omnes incolæ ad ciborum coctiones, lotiones, & alios usus illa aqua intrepidè utantur, absque ullius mali suspitione; quomodo potest non disseminari contagium? Nos Noviomagi in puteum illum qui est in Magna platea, una quadam nocte plures quam quadraginta glires (procul dubio peste, aut saltem veneno enecatos) à nebulonibus injectos fuisse, novimus, & postridie profundissimum istum puteum hanc ob causam summa cum molestia semel atque iterum penitus evacuatum & expurgatum fuisse, vidimus.

X. Periculosa est conversatio cum iis qui inter infectos versantur, præcipue cum vespillonibus; aliisque qui illis perpetuo inserviunt; ac propterea eorum consortium fugiendum est; quia ut plurimum in vestibulis suis circumferunt contagium, ipsis quidem, propter certam dispositionis proprietatem, plerumque innoxium, aliis verò damnosissimum. Ac propterea strictè jubendum est; ne tales in publicum prodant, nisi aliquod signum gestantes, quo ab aliis cognosci, eorumque consortium evitari possit. Hac in parte adeo curiosi seu exacti sunt Itali, ut etiam publico edicto prohibeant conversationem cum iis Sacerdotibus, Medicis & Chirurgis; qui ad curationem ægrorum pestiferorum destinati sunt.

XI. Maximo errore Noviomagi permissum fuit, supellectilia ex infectis ædibus delata mox publicè divendere. Multoties una die ad sepulturam delatis mortuis; postridie, vel intra paucos dies publica auctione vendebantur lecti ab ægrorum excrementis graviter adhuc foetentes; tegmina, vestes, omnesque aliæ res domesticæ nondum purgatæ: qui error quantum fecerit ad contagii propagationem, innumera docuere exempla, ut inter alia illud cujusdam rusticæ Bataviensis, quæ cum in tali auctione lecti tegmenti emisset, idque domum veniens suo ipsius lecto imposuisset, prima nocte una cum marito peste infecta, & postea mortua fuit: item aliud exemplum

plum militis cujusdam nobis noti, habitantis in ultimo angiporitu prope portam Hesium, qui cum in simili auctione pro filio suo vestimentum parvo pretio emisset, filiolum & veste, & peste simul vestivit, quæ labe ad ipsum, uxorem, & reliquos liberos transcendens, omnes enecavit. Magistratus Noviomagensis cum Phrygibus serò sapiens tandem, postquam intestinus hostis jam firmissimas radices egisset, prohibuit hujusmodi supellectilium venditiones solummodo per tres menses: profeò longè præstitisset in ipso mali principio illas potius per tres annos prohibuisse.

XII. De cadaveribus peste extinctorum, sint ne contagiosa nec ne, & anne magis vel minus contagiosa existant, quam pestiferorum viventium corpora, controvertitur apud Medicos. Fracastorius, lib. 1. de contag. cap. 12. inquit: *Mortuum autem animal contagionem eam non servat, quæ tenebatur vivens, quoniam seminaria contagionis una cum calore innata, extincta sunt.* Sic etiam Rondeletius scribit, corpora mortuorum nullum amplius venenum conjunctum habere, mortuoque animali, perire omne venenum; idque probat ab experientia, dicens se aliquando multis spectantibus absque ullo damno corpus peste extinctum in Theatro Anatomico dissecuisse. Hanc opinionem probat etiam Jordanus, dicitque illud fieri, quia magnus venenatus halitus, aliorum calori nativo infestissimus, exhalat è corpore vivente, qui è corpore mortuo nullus exit, utpote in quo venenum illud, una cum calore, evanescit & emoritur. Cum Jordano consentit Gregorius Horstius, lib. de morb. caus. exercit. 5. quest. 14. Contra vero Zacutus Lusitanus, multique alii clarissimi viri, multo majus contagium metuendum esse à cadavere peste extincto, quam à corpore vivo peste infecto: idque Joubertus, lib. 7. de pest. cap. 3. dicit fieri, quia extincto calore nativo (qui alioqui in viventibus veneni ferociam reprimere solet) universum corpus à veneno occupatur, quod tunc non tantum multo ferocius, quam antea, dominatur, verum etiam ab insequente putredine multum augetur & exasperatur. Hanc sententiam confirmare videtur historia Diodori Siculi, qui lib. 14. refert, ob multitudinem cadaverum insepultorum, pestem Atheniensem maxima incrementa sumpsisse. Sic quoque Zacutus Lusitanus, lib. 3. Prax. admir. observ. 42. dicit se vidisse plures, corpus peste emortuum ex agro, ubi jacebat, per funes super tabulas deportantes, qui omnes unius diei spatio peste correpti occubuerunt. Nos ad controversiæ hujus decisionem dicimus, cadaveris tempus distinguendum esse in tres partes. 1. Cum cadaver peste extinctum primis horis adhuc calet. 2. Cum cadaver tam diu mortuum fuit, ut planè refrigeratum sit. 3. Cum cadaver tam diu extinctum jacuit, ut jam putredinem contrahere incipiat. In primo tempore cadaver magis contagiosum est, quam corpus vivens peste infectum: primo, quia venenum pestilens in illo cadavere adhuc ferociter dominatur, ut docent bubones & exan-

themata, quæ nonnullis dum moriuntur, aliis statim post mortem erumpunt: secundo, quia veneni violentia à calore nativo amplius non coercetur: tertio, quia halitus illi qui è morbo vivo corpore prodeunt, cum tenues sint & à magno calore propulsi; eodemque comitati, facile dispelluntur, nec aliis multum adhærent, atque minorem malignitatem sibi conjunctam habent: contra verò halitus qui è cadavere adhuc calente exeunt, ab exiguo calore propulsi, non attenuantur, nec satis discutiuntur, sed prope cadaver hærent, magnamque simul conjunctam malignitatem in se continent, & propter deficientem calorem incrassati, ac viscositate quadam præditi, facillime aliis corporibus adhærent, eaque inficiunt. Eodem modo hic processus fit sicut in lampade ardente, cujus vapores quousque à luculenta flamma dispelluntur & attenuantur, minime molesti sunt, at extinctâ flammâ illi vapores magno calore privantur, & exudat ab elychnio adhuc calente crassus, tetricus ac viscosus vapor omnibus facile adhærens, maximeque inferus. In secundo tempore cadaver multo minus contagiosum est quam corpus morbosum vivens, quia ob frigiditatem & extinctionem caloris nativi pori sunt adstricti & occlusi, humores & spiritus amplius non agitantur, nullæ vel paucissimæ fiunt expirationes, & veneni intus latantis actio (quæ à calore & motu antea excitabatur) languida ac torpida reddita est. In tertio tempore cadaver rursus multo magis contagiosum evadit, quam corpus morbosum vivens, quia tunc quod antea languidum latebat venenum, vi caloris externi non solummodo in actum rursus promovetur, verum etiam ab insequente putredine multum exasperatur. Hinc fit quod iis in locis, ubi peste mortuorum cadavera diu insepulta manent & putrescunt, pestis brevi tempore multum increseat, ut patet ex Diodori Siculi citata historia. Hac consideratione ducti omnes præclarissimi Medici, qui de Peste præcavenda scripserunt, unanimi consensu statuunt, peste interemptorum cadavera citò terræ esse mandanda, (nempe antequam putrescere incipiant) & quidem in sepulchris altius effossis, atque, si fieri possit, longius extra urbes in locis solitariis, soli peste mortuorum sepultura dicatis, ne fortè ulli adhuc vapores vel halitus è cadaveribus illis sursum extra terram efferantur & aliis noceant; quemadmodum illud Noviomagi in hac peste non semel factum fuisse novimus, ubi in ipso Templo majore, ob sepulchra nimis multis cadaveribus repleta, & pauca terra negligentius contecta, cadaverum pessimus fœtor expirans non uni exitiosum contagium intulit. Quapropter non sine ratione dicebat Zoar, antiquissimus Medicus, pessimum esse tempore pestis habitare in locis mortuorum monumentis propinquis. Porro, quantum ad illud quod Fracastorius, Rondeletius & Jordanus credunt, venenum pestilens in cadaveribus, planè mortuum esse, atque illa omni contagione carere, quia multi innoxie cum iis conversantur, eaque contrectant; dicimus, non tantum cum pestiferis

stiferis cadaveribus, sed etiam cum ægrotantibus vivis multos tuto conversari, non quod ægri aut cadavera contagiosa non sint, sed quod illi, qui cum iis tuto conversantur, non habeant aptam dispositionem ad recipiendam pestem. Ad hæc si vestis, aliaque supellex possit esse fomes veneni pestilentis, quanto magis cadaver illo veneno occisum & occupatum? Præterea, quid mirum, venenum pestilens in cadavere permanere, & mortuo animali non penitus extinguui, cum etiam alia venena contagiosa in corporibus mortuis diu integris viribus latuisse visa sint? Sic ex Jo. Bauhino refert Sennertus, rusticum quendam suum rabidam occisam minus alte in terra defodisse, quam cum tempore hyberno vulpes olfecissent, erutamque vorassent, non tantum illas in rabiem actas fuisse, sed eandem etiam alijs pecoribus & hominibus morfu communicasse. Si rabidum venenum tanto tempore in cadavere latere potuerit, quare non æque venenum pestilens? quod non minus quam alia venena diu in corpore latere posse, docet clarissime Julius Alexandrinus, qui refert duos veneficos conjuratos Patavii inter tormenta confessos fuisse, se, cum peste extinctorum cadaverum elixatorum jure, ostiorum repagula, manubria, limina, & postes illevisse, atque ita quoslibet transeuntes & attingentes contagio infecisse, ac pestem incredibiliter propagasse. Idem quoque docet historia Nicolai Poli, in suo *Hemereol. Siles.* qua refert, anno 1606, Franckesteinii Silesiæ vespillonones quosdam veneficos captos, inter tormenta confessos fuisse, se veneficio ultra duo hominum millia occidisse; quod veneficium ex cadaveribus peste interemptorum parabatur, quibus capita amputabant, & bubones ac carbunculos abscondebant, præterea è monumentis carnosas imprimis seu musculosas cadaverum putrefactorum, ac in tabum jam fluentium partes sumebant, atque ex his omnibus pulveres & unguenta sua venefica conficiebant. Eodem modo è cadaveribus peste extinctis, & elixatis maleficis anno 1555, unguenta contagiosa & pestifera concinnasse, testantur Hercules Saxonia, *lib. de plica, cap. 12.* & Fallopius, *de bubone pest. cap. 13.* Si in illis cadaveribus venenum pestilens planè emortuum fuisset, etiam malefica illa unguenta non fuissent contagiosa. Profectò agens cum ob caloris privationem, aliudve incidens impedimentum, ab actione cessat; omnino interire, dicendum non est. Concludimus ergo, cadavera pestiferorum esse contagiosa, idque magis vel minus pro dictorum temporum diversitate. Quod contagiosa sint, hoc ipsa bruta animalia ab experientia & naturali instinctu noverunt: nam refert Thucydides, animalia carnivora in peste Atheniensi cadavera pestifera non attigisse, & si illa gustassent, statim mortua fuisse. Quod ipsum quoque testatur Titus Livius, *Decad. 5. lib. 1.*

XIII. Foetidissimam platearum, cloacarum, & sterquilinorum illuviem ad multorum morborum, & imprimis malignarum febrium inductionem, ac pestiferi contagii propagationem pluri-

mum facere, docet experientia, sicut de Parisiorum urbe testatur Palmarius, *lib. de pest. & Quercetanus, in diatet. lib. 2. cap. 3.* de urbe Tholosana. Quapropter omnium maximè in pestilenti constitutione annitendum est, ut viæ publicæ ab omni sordium & excrementorum illuvie diligentissimè mudentur, & impediatur ne ullæ foetidae sordes in illas rursus projiciantur, secundum legem Pampinii J. C. *Ædiles non permittant, neque in plateas stercora aut sordes projici, neque cadavera, neque cerdones pellium sordes abstergere.*

XIV. Si veteres Hebræi prohibuerint conversationem in illis cubiculis, ubi mulieres menstruatae depurabantur, propterea quod timerent sanguinem menstruatam corruptum alijs contagio aliquam noxam illaturum; quanto magis periculosa & contagiosa debet censerī frequentatio illarum ædium in quibus aliqui peste laborant, vel ab eadem extincti sunt? Hinc est quod in Gallia, Italia, aliisque multis regionibus, non tantum ægros peste infectos statim longius extra urbes deferri, eorumque ædes occludi, ac sigillo publico obsignari curent; verum etiam non raro istarum platearum, in quibus multæ ædes infectæ sunt, transitum objectis muris impediunt. Verum etsi nostrates tanta morbi & mortis formidine non teneantur, ut in pestilentia integras plateas occludant, & charitatis Christianæ immemores, multos ægros, & simul sanos, in iis habitantes, solorum sceleratorum & quorundam inhumanissimorum vespillonum tyrannidi, ad exemplum Italarum & Gallorum, exponant, eosque ab omni honestorum hominum ac amicorum subsidio secludant; tamen illud cum maxima Reipublicæ utilitate fieri posse, existimandum est, ut Magistratus ædes infectas occludi, & signo præposito notari, atque in iis, si officinæ fuerint, omnem venditionem prohiberi, & extraneos ab illis diligenter arceri & averti curent. Verum hic fortè quispiam mihi objiciet; cum alios ab infectis locis arceri velim, quare ego ipsemet, durante tota hac peste, quolibet infectas ædes adierim, & ægros pestiferos tam liberaliter inviserim? Respondeo, licet morbi hujus malignitas præsens exitium minaretur, tamen minime Christianum, sed planè inhumanum ac crudele fuisset, proximos omni spe & ope destitutos deserere; quapropter cum meæ essent partes, hoc imprimis tempore, proximorum necessitatibus succurrere, nolui huic meo officio deesse, sed in summo Deo confidens, (etsi nullo pretio aut præmio publico, nulla lege, nullo Magistratus jussu ad munus illud devinctus essem) promiscuè omnes, pauperes æque atque divites, sine ulla tergiversatione in-visi; iisque consilia & auxilia mea libentissimè communicavi, idque non temere sordidi lucri gratiâ, sed piè proximorum commiserationis ergo: atque ea de causa non minus vigilanter interviebam pauperibus gratis, quam divitibus mercede, quam ab his etiam non majorem petii in peste, quam alijs temporibus solvi solet, imò sæpe minorem. Quis scit an non summus Deus, qui omnium corda & renes perscrutatur, & cui

hæc mea pia intentio cognita fuit, me propter illam miraculose ab omni pestilenti contagione immunem servaverit? Nam non tantum Noviomagi, verum etiam in aliis plurimis civitatibus, multi Medici sordido lucro toti inhiantes, peste extincti sunt, alii ingratis, alii dissolutis quibusdam hæredibus morte adeptum lucrum relinquentes.

XV. Noviomagi in eo quoque graviter erratum fuit, quod pauperum ægri à sanis non fuerint statim separati, quæ res plurimum ad contagii propagationem fecit; partim quia pauperes angustis domibus inclusi, non poterant ægrotos in diversa cubacula deferre, & sic à sanis domesticis sejungere: partim quia etiam defectu lintheamentorum aliarumque rerum necessariorum, non poterant ægrorum & ædium impuritates satis debito modo expurgare, atque ita propter sordium, vaporum, exhalationum, & fœtidorum excrementorum communionem, unico infecto facillimè ac citissimè reliqui omnes ejusdem familiæ inficiebantur. Solent in Rebus publicis melius constitutis sua habere Nosocomia solis pestiferis dicata, ad quæ tales ægros statim deferri curant, ut ibi ex ærario publico alantur, & à Medicis ac Chirurgis, illis Nosocomiis ordinarie inservientibus, curentur ac sanentur. Qui tamen laudabilis ordo multis in locis, apud Italos, Hispanos, & Gallos (Magistratuum nonnullorum sive avaritiâ, quod sumptus fugiant: sive immisericiordiâ, quod proximorum his extremis ac maximis necessitatibus oppressorum non magis quam canum meminerint: sive negligentia, quod publicum non satis curent) horribilis & execrabilis evasit, propterea quod hujusmodi nosocomiorum curam solummodo nebulonibus quibusdam ac sceleratis hominibus committant, (sicut ipsimet in Gallia quondam variis in locis vidimus) qui nullam pestem curandi cognitionem habent, & ægrotos non pluris quam stercora æstimant; ac, si qui valde debiles sint, vel sordida apostemata curatu molestiora habeant, hos pulvinari faciei imposito, atque sic anhelitus meatu obstructo, suffocant; reliquos verò negligunt, & qui facile curari possent, non curant, sed ad interitum dimitunt, ita ut vix centesimus quisque ægrorum eò delatorum inde sospes revertatur: quæ causa est quod iis in locis adeo ab hujusmodi nosocomiis abhorreant homines, ut plurimi in apertum campum sub parva straminea casa deponi, atque ibi negligi malint, quam istorum crudelium ac sceleratorum nosocomiis illis inservientium tyrannidi exponi: atque ita tempore pestis extra multas urbes in aperto campo innumeras stramineas casas, in iisque singulis singulos ægros pestiferos depositos vidimus, quibus bis terve de die necessaria quædam porrigebantur à paucis quibusdam hominibus, vitæ probitate cognitis, quos ægrorum amici eum in finem conduxerant, ut eorum rationem haberent.

XVI. Aquæ stagnantes publicæ pestem sæpe multum adaugent contagii cita propagatione, præcipuè iis in locis ubi quilibet suas qualescun-

que sordes & excrementa in eas projicit, ubi quoque latrinarum, cloacarum, ac platearum illuvies in illas exoneratur, sicut Lugduni Batavorum, Amsterodami, Hagæ-Comitis, aliisque multis in locis fieri solet. Illis enim aquis ab his impuritatibus (quarum multæ sunt valde contagiosæ) inquinatis & infectis alii rursus ad coquendas cerevicias, cibos, aliaque alimenta; alii ad ædes expurgandas, alii ad alios usus utuntur, atque ita malignas infectiones ipsimet sibi ipsis imprudenter & inscii inferunt. Quapropter semper, & imprimis pestilenti tempore, summo studio annitendum est, ut tales aquarum corruptiones impediuntur & corrigantur; idque vel currentes rivulos in illas (si fieri possit) deducendo seu immittendo, sicut Empedoclem à Salernitiis pestilentes morbos, ex adjacentis stagni fœtore ortos, avertisse testatur Laërtius; nempe duobus vicinis amnibus proprio sumptu in illud deductis: vel easdem exsiccando, sicut Petrus Salius, de febr. pest. c. 20. scribit patriam suam exsiccatione fossarum stagnantium à febribus pestilentibus, quibus incolæ singulis annis circa finem æstatis infestabantur, fuisse liberatam: vel sordium quarumcunque influentiam prohibendo.

XVII. Corrupta alimenta, qualiacunque fuerint, pravos humores, & hi graves morbos generare solent. Licet autem hæc pestem primariò non inducant, (ut late docuimus lib. 1. cap. 8. annot. 1. problem. 4.) quia tamen in pestilenti constitutione omnes fere alii morbi corpora facillime disponunt ad pestem; propterea omnes occasiones ad quorumcunque morborum generationem facientes, diligentissimè fugiendæ, & imprimis pravorum alimentorum publicæ venditiones strictissimè prohibendæ sunt.

XVIII. Solent in Italia, Hispania, Gallia, aliisque multis regionibus, tempore pestilentie nullos pauperes in urbes recipere, imò sæpe omnes illos qui in urbibus malè habitant, vel malè ac miserè vivunt, extra urbes ejicere, ut illa ratione pestis occasiones imminuant, & minorem populum in urbibus retineant, qui latius, largius, & commodius habitare possit. Nam populi multitudinem angustè habitantem pestilens contagium citius disseminare notum est: eaque de causa Athenienses, teste Plutarcho, olim Periclem incusabant, quod pesti occasionem dedisset, coacta, ob bellum, multâ agrestium copiâ intra urbem. Sic quoque scribit Titus Livius, Decad. 1. lib. 3. Romæ pestem excitatam fuisse, propterea quod populus coactus esset sub arctis tectis, atque copiosius habitaret. Hanc autem pauperum ejectionem olim Galliæ multum profuisse tradunt, eandemque etiam Venetiis insigniter contulisse, refert Sabellicus, lib. 3. Decad. 4. histor. Venet. Verum cum pauperibus semper benefacere ipse Christus jubeat, præcipuè iis qui in gravi aliqua miseria (qualis est hic morbus) constituti sunt, ac per consequens verè impia sit hæc pauperum immisericors ejectio & seclusio, non solet illa in usu esse Belgis (præcipuè in Confederatis Provinciis) utpote quos Deus clementiore



tiore spiritu donavit: sed solent noſtrates plerifque in locis diligentiffimam pauperum curam habere, iisque omnia neceſſaria liberaliter ſuppeditare, ut hoc pacto jam percutientem divinum gladium citius à regionibus ſuis avertant.

XIX. Hic quærunť nonnulli, an non expurgationes ædium, aliarumque rerum domesticarum (præcipue in domibus jam infectis) prohibenda potius ſit, quam injungenda. 1. Quia peſtilentis contagii miaſmata, ſi quieta relinquantur, tandem ſponte emoriuntur, (hoc liquet cum peſtis deſinit graſſari, quæ ſi illa miaſmata non extinguerentur ſponte, identidem ab illis rurfus ſuſcitaretur, atque ſic duraret in perpetuum) & ſi nimis cito & multum commoveantur, facile per aërem late diffunduntur, ſicque vires ſuas magis exſerunt, & proximos quoſque, vel inſpiratione, vel contactu, inſiciunt. 2. Quia contagionis ſeminaria ſatis reſolvuntur, diſſipantur, & diſcutiuntur beneficio aëris, aquarum, & ventorum, ita ut iſto, & quidem iſtis expurgatoribus ac domesticis ſæpe damnoſo, expurgationis labore opus non ſit. 3. Quia periculofum eſt hominibus inſidis (quales ſunt plerique illi qui domuum infectarum & ſupelleſtilium expurgationem ſuſcipiunt) totam rem familiarem committere, cum plurimas ſæpe res furentur, imò iſas infectas res multoties alio transferunt, ſicque peſtem ulterius propagent. 4. Quia peſtis eſt flagellum Dei, quod nullis humanis expurgationibus extingui aut eliminari, ſed ſola Dei miſericordia placari debet & poteſt. Verum eſſi hæc nonnihil ſpecioſe proponantur, tamen expurgationum publicarum & privatarum neceſſitas atque utilitas undequaque patet. Reſpondeo igitur ad *primum*, quod eſſi peſtilens venenum tandem ſponte emoriatur, tamen ſi quietum in domibus relinquatur, ſe plerumque, inſtar fermenti cujuſdam, indies magis magiſque expandat, aëremque magis inſiciat, atque ſic plurimos in eo viuentes miſere occidat, antequam ad tempus ſuæ extinctionis perveniat: præterea, quod omnino metuendum non ſit; illud ulterius ſe propagaturum, cum in expurgatione domuum & ſupelleſtilium hinc illinc commovetur & agitur, quia tali modo illud non ſolum per aëris & ventorum ſtatum diſcutitur; verum etiam per ignes, ſuſfumigia, & ablutiones cum aqua, lixivio; aceto; calce, aliſque ſimilibus (qualibus in expurgando utuntur) multum extinguitur. Ad *ſecundum*; quod, quia contagionis ſeminaria beneficio aëris, aquæ, & ventorum valde diſcutiuntur, hinc, ut illud beneficium quam citiſſime impetrari poſſit, expurgationes maxime neceſſarias, & quocunque tempore inſtituendas eſſe. Ad *tertium*: quod publica ſalus & plurimorum hominum vita nullis iſpericulis exponendæ ſint propter inanem metum, quem nonnulli concipiunt de expurgantium inſidelitate: quærat ſibi quiſque fideles expurgatores, quibus ſupelleſtilium curam tuto committere poteſt, quales facile inveniet, qui liberaliorem mercedem ſolvere volet: ſed qui avari, parum ſolvere, & multum periculofum officiũ

ſibi præſtari deſiderant, communiter incidunt in fures, qui paſſim furantur quantum poſſunt. Ad *quartum*: quod, eſſi peſtis flagellum Dei ſit, ea tamen de cauſa non prohibeantur expurgationes, omniaque illa quibus contagii propagatio impeditur (ut nec medicamenta; de quibus vide *ſequentis cap. 4. annot. 1.*) dummodo talia cum timore Domini fiant, & humilibus precibus flagelli ablatio ab eo expetatur. Itaque, ſi extra peſtis tempus, unanimiter ab omnibus laudetur mundities imò maxime neceſſarium ſit, ut è domibus & viis publicis ejiciantur cadavera, & quælibet res corruptæ, ſordidæ, & foetentes, ne per talem corruptas foedæque exhalationes hominum ſanitati damnum inferatur, ſi olim in caſtris Hæbræorum id ipſum jufſu Dei exactiſſime fieri debuit, quemadmodum id ex variis ſacræ Scripturæ locis patet; an illud etiam tempore peſtis (quo virus peſtilens per hujusmodi abominandam immunditiem multo magis propagari, & corpora ad infectionem facilius ſuſcipiendam præparari à longo tempore docuit experientia) non eſſe faciendum ædiumque ac compitorum, imo omnium rerum, infectarum expurgationes non eſſe inſtituendas, quiſpiam mente ſanus exiſtimabit? Vivant tales ſordidi immunditiei patrõni in mediis ſordibus & impuritatibus, ſic brevi per ſordidam iſtam pertinaciam ſordidum damnoſumque ſordidæ ſuæ opinionis præmium confequantur.

XX. Cum in magnis publicis conventibus plurimi ignoti, ex infectis ædibus prodeuntes, etiam accurrere, & ſe reliquo populo immiſcere ſoleant, atque ſic aliis quoque contagium, quod ſæpe inſcũ in veſtibus ſuis circumferunt, non raro communiſcent, ſicque peſtilentem labem ulterius diſſeminent, neceſſario requiritur, ut tempore peſtis hujusmodi conventus inhiſbeantur, & in aliud tempus rejiciantur; ſicut Noviomagi in hac peſte illud à Magiſtratu prudenter factum fuit. Sunt qui etiam publicas in Templis conciones, ac Verbi divini prædicationes, eo tempore, ob prædictam rationem, intermittendas eſſe ſtatuunt. Verum nos potius arbitramur populum admonendum eſſe, ut qui ſe malè habere, vel infectos eſſe ſentiunt, vel inter infectos converſantur, ab illis concionibus abſtineant: præterea curandum eſſe ut illæ conciones tempore peſtilentiæ non celebrentur in communibus Templis ubi mortui ſepeliuntur, (qui peſſimus mortuos ſepeliendi mos noſtratibus ubique familiaris eſt) ſed in loco aliquo à ſepulturis longè ſeparato, vel tali templo in quo nulla cadavera ſepeliuntur. Nam propter cadaverum eo tempore undiquaque allatorum maximam multitudinem, ſæpe fit ut durante concione hinc illic varia ſepulchra aperta relicta, & multa quoque cadavera minus altè terrâ conteſta, peſſimum ac contagioſum foetorem expirent, qualem durante hac peſte in Magno templo Noviomagi multoties olfecimus.

XXI. Maxima (proh dolor) conſpicitur Magiſtratum plurimis in locis negligentia in eo, quod extra peſtilentes conſtitutiones non eligant,



& ex publico ærario annuis stipendiis liberaliter dotent pios & aptos Theologos, prudentes, doctos, atque in praxi dudum versatos Medicos, & peritos Chirurgos, quorum opera tempore necessitatis ad omnium pestiferorum visitationem & curam publicè uti possint. Ut illis stipendiis & exiguis sumptibus parcant, publicum commodum negligunt; volentes potius ingruente peste totum ægrorum negotium committere ignavis quibusdam, ac sæpe non satis bonæ famæ, semitheologis (quos ægrorum consolatores appellant) & sciolis agyrtis, medicaltris, ac pseudochirurgis, (quos in genere pestis magistros nominant) quam ad publicæ salutis & sanitatis curam annuis stipendiis doctos atque peritos viros obligare. Hinc fit quod hujus gravissimi morbi (in quo Medici summa ac cita prudentia atque peritia opus est) curatio plerumque demandetur ineptissimis ac stolidissimis quibusdam pseudochirurgis & bardis, seu potius ex licentia homicidis, quibus tunc temporis publica auctoritate ægrorum impunè necandorum licentia conceditur, & quorum temerariâ ignorantia innumeri pereunt, qui à prudentibus Medicis servari potuissent: cuius rei etiam nos in hac peste à tribus quatuorve talibus ignavis asinis (à Magistratu ad id munus imprudenter deputatis, & liberali stipendio donatis) multa perpetrata exempla vidimus. Neque id mirum, nam cum sint Medicinæ prorsus ignari, nec morbum, nec curationis modum, nec medicamentorum vires noverunt; atque hinc fit quod æque facile venenum quam alexiterium porrigant, & quos corroborare oportet, detracto sanguine labefactent; quos propinato antidoto convenit erigere, dato cataractico dissolvant. Propterea dico expertos atque peritos viros extra pestem esse eligendos & obligandos, quia in ipsa peste aliorum vestigia quemlibet terrent, & à tanto munere abhorre faciant, ita ut tunc difficulter quis doctum aliquem Medicum practicum inveniat, qui tam gravi & periculoso oneri se subicere velit. Dico etiam illos non exiguo, sed liberali annuo stipendio dotandos esse, non minus extra pestem, quam in peste: quia Medici & Chirurgi docti ac periti cum satis habeant quod agant, ægerrimè periculosissimam hanc provinciam suscipiunt, ac proinde talibus continuis nummorum illecebris ad hanc publicam utilitatem illiciendi sunt, ne forte stipendii exiguitatem contemptui habentes, aliquando tantæ servitutis jugum è cervicibus suis excutiant. Sic etiam sentit Bricius Bauderonus, *prax. tract. 1. cap. 15.* per largas remunerationes peritos Medicos & Chirurgos ad periculosum hoc munus esse invitandos ac deducendos: postquam enim proposuit, illam curam magistratui imprimis gerendam, ut præter theologos religiosos, etiam doctos atque peritos Medicos & Chirurgos, constituat, qui pestiferorum ægrotantium curam suscipiant, & annuis stipendiis ad illud munus obligati sint, tandem addit: *Ea cautione, ut si quis eorum ea lue moriatur, tunc præter stipendia concessa, etiam annua pensio ex ærario publico detur,*

*quæ uxores & liberi vivere possint. Sic doctos, & non ignaros habebunt Medicos & Chirurgos.* Verum hodie, proh dolor, hujusmodi cantilenæ surdis canuntur Magistratibus; utpote quorum maxima pars magis privato, quam publico commodo studeat, & dum eorum singuli ex ærario publico proprias crumenas aureis nummis infarciunt, vix anci aut plumbæ in publicam utilitatem impenduntur. Interim propter illud regentium proprii commodi studium, & publici negligentiam patiuntur subditi, & tempore pestis destituuntur Medicorum necessariorum desiderato subsidio; propterea scilicet, quod luculenta præmia & dignæ mercedes pro magno labore & summo periculo subeundo non sint constitutæ, & horum nemo gratis tantam onas libenter suscipere velit. Quippe perpauci inveniuntur Medici, qui non lucri, sed pietatis ergo, ægrotos pestiferos omnes intrepide invisunt, sicut ego libentissimè & sponte, à nemine incitatus feci; quod meum factum Senatus Noviomagensis haud iniquis oculis adspexit, sed adeo inhumanus fuit, ut finita peste, non tantum nullis donis (sicut aliarum civitatum Magistratus Medicos suos, qui in peste aliquam operam præstiterunt, luculentis & honorificis donis cumulare ac exornare solent in gratiarum actionem) me pro præstito meo officio donaverit, sed ne quidem ullis verbis mihi unquam aliquas minimas gratias agere dignatus sit.

XXII. Dico, *periculosissimum*, quia multoties

*in ipsos sæva medentes.*

*Irrumpit clades, obsuntque auctoribus artes.*

XXIII. Tempore pestis maximus quoque error in plerisque urbibus in eo committitur, quod Magistratus publica auctoritate non eligit & constituat certos notæ fidei homines, qui ægrotis ubique inserviant, sed illud munus à quibuslibet obiri permittat. Hæc enim causa est quod multæ pessimæ formæ ac sceleratissimi vespillones se ubique in civium ædes, sub pii auxilii prætextu, egregiè insinuant, non tam ut ægrotis inserviant, quam ut eorum loculos spolient, & quælibet pretiosiora suppellectilia furentur: quod ut commodius peragant, non raro spumam de primi agonizantis ore pendulam clanculum cibis immiscent, quibus reliquos domesticos sanos omnes inficiunt, infectos verò ægrotantes ac debiles pulvinaribus faciei impositis suffocant, atque tunc pro libitu æraria, cistas, scrinia aperiant, & nullo prohibente quidlibet furantur: sicut plurima tristissima exempla illud passim testantur, quorum (proh dolor) nimia copia invenitur apud Medicinæ & Historiarum Scriptores, atque etiam nostro tempore pluries videre contigit. Imò sæpe illius generis nefariorum hominum eo usque processit sceleratissima audacia, ut etiam mulieres ac virgines ægrotantes & summe debiles stuprare ac violenter vitare non timuerint: quod scelus an non Noviomagi in hac peste aliquoties perpetratum fuerit, dicere non ausim; credo terram hujusmodi flagitia non semel occultasse. Memini, cum in Gallia quondam versarer, illud

illud tunc Salmurii à quodam nebulone factum fuisse, qui deprehensus, illam ob causam publice vivus igne concrematus est. Sed quid de vivis ægrotantibus dico? vix etiam mortuorum cadavera ab horum sceleratorum hominum scelestissimo furore immunia esse posse videntur, nam (præterquam quod ab illis varias partes ad venefica sua unguenta conficienda excindant) scribit Jorda-

nus, *de pest. phenom. tract. 1. cap. 18.* Vratislaviæ Silesiorum peste atrociter grassante, vespilionem quendam pulchrum virgineum cadaver, lue pridie interemptum, sequenti mane nefando scelere inivisse, atque ob illud flagitium publice virgis cæsum, & in perpetuum exilium ejectum fuisse.

## CAPUT IV.

## De Prophylaxi Medica in genere, &amp; de fuga.

**P**rophylaxim Theologicam & Politicam sequitur Medica, quæ in divino hoc morbo semper Theologicæ prophylaxi necessario unita procedere debet, propter rationes jam ante *cap. 2.* dictas. Hanc Medicam (1.) prophylaxim dividimus in diæticam, chirurgicam, & pharmaceuticam, atque de illis tribus jam in sequentibus ordine acturi sumus. Verum antequam eo perveniamus, hîc de uno maximo & laudatissimo præservativo paucis præfari necesse est, nempe de fuga (2.) cum timore Domini copulata, quam tanquam præstantissimum ac certissimum prophylacticum commendant plerique Medici, & multi Theologi. Dico, *cum timore Domini copulata*, quia non debet quispiam cum audacia fugere, tanquam summi Dei manus effugiturus, sed tanquam Deum timens, & evitaturus solummodo illa loca in quæ divinæ plagæ effunduntur, quas nihilominus Deus ubique terrarum cui vult immittere potest: ac proinde non instituenda fuga, nisi divina ope ac protectione ardentissimis precibus simul etiam implorata, ut hoc pacto divino favori, tanquam inseparabili comiti, fuga associari possit. Fugiendum autem in mali principio (3.) cum pestis primo urbem aliumve locum invadere incipit: & in longè remotas (4.) à loco pestilenti terras salubres demigrandum, atque inde tardissimè (5.) redeundum est, juxta versiculos:

*Hæc tria tabificam tollunt ad verba pestem,*

*Mox, longè, tardè, cede, recede, redi.*

Quos versiculos alii brevius sic contrahunt:

*Ocyus; hinc ito longè, tardèque redito.*

Ita quoque nos in truculenta hac peste fugam, tanquam certius præservativum, Nobilibus aliisque ditioribus, quorum res familiaris id permittebat, maxime commendavimus: quorum verò conditio loci mutationem non patiebatur, his alios se præservandi modos, de quibus mox agemus, præscripsimus.

## A N N O T A T I O N E S.

**I.** Hic dubium occurrit: Anne homini Christiano in hoc cœlesti ac divino morbo liceat confugere ad auxilia & remedia mundana ac terrestria? Dicimus, non modo licere, verum etiam in hoc morbo maxime necessariam esse citum remediorum usum, dummodo in iis solis tota sanationis spes non ponatur, sed illis adjungantur spiritualia remedia, nempe supplices orationes, & ferventes auxilii cœlestis implorationes. Tali modo post fervidas orationes per emplastrum ex ficibus à peste liberatus fuit Ezechias Rex, *4 Regum 20.* Verum tres sunt ordines eorum qui de Medicina & remediis male judicant. Primi, nimium in Medicina confidunt. Secundi, nihil omnino in ea confi-

dunt. Terti, quamvis hanc salutarem Dei manum noverint, eaque ipsimet sæpissimè feliciter usi fuerint, tamen per malevolentiam, invidiam, aut contemptum malè de ea loquuntur. Primi, cum nimium tribuant instrumento, negligunt instrumenti auctorem & directorem, sine quo instrumenti operatio non procedit; tantopere confidunt creaturæ, ut creatorem non agnoscant, non respiciant; atque hos in sua perversitate punxit Altissimus Deus: cujus rei clarissimum exemplum habet Sacra Pagina, de rege Asa, *2. Paralipom. cap. 16. vers. 12.* qui recessit à Deo, & solis Medicis confisus est, atque hac de causa simul benedictione divina & vita privatus, impietatis suæ poenâs dedit. Medicina manus & do-

num Dei est, ille autem qui manum creat & donum dat, major est & creaturâ, & ipso dono, ac proinde qui manum adorât, Creatorem verò manûs negligit, ei fit inutilis manus, & divinum donum ei cedit in perditionem. Medicina utendum est cum gratiarum actione & confidentia in Deo, supremo Medico, à quo supplicibus precibus cum fide petendum, ut doctam medicam manum nutu suo dirigat, eique benedicat, & donum hoc in ægrorum salutem convertat: nam,

*Ni Deus adsuerit, viresque infuderit herbis,  
Quid rogo, dictamnus, quid panacea ju-  
vent?*

Homines sumus omnes: nullus autem homo, qualiscunque fuerit, sine nutu Dei manum vertere poterit, multo minus aliquid boni præstare circa proximos suos: ille Deus fons est omnis boni; ille est qui *Deuteronomy cap. 32. vers. 39.* dicit, *Ego occidam, & ego vivere faciam, percutiam & ego sanabo.* Et *1. Regum. 2. vers. 6.* ait: *Dominus mortificat & vivificat, deducit ad inferos & reducit.* Medicus vero instrumentum est quod creavit, & quo utitur, quo benedictionem suam circa ægros exequitur: malè igitur faciunt, qui nimium confidunt instrumento, & interim instrumenti creatorem ac directorem negligunt. Ab altera parte, non minus malè faciunt, qui Medicinam omnino negligunt; nec quidquam salutare ab ea procedere posse arbitrantur; sed à solo Deo, omnium bonorum fonte, morborum sanationem, nullis remediis adhibitis, expectandam esse existimant; imò etiam impietatis eos accusant, qui medicam opem in morbis imploranti Deus, inquit, omniscius est, morbi que adventum & eventum diu præscivit & præordinavit, ejusque voluntatem hac in parte nulla Medicina immutabit, aut evertet: præterea omnipotens est, atque morbos, quosunque vult, sanare potest sine remedium medicorum usu, ergo in scopulos impietatis impingunt, Deoque diffidunt, qui à Medicis morbi medelam expectant. Certè, qui ita loquuntur, aut ipsimet impii sunt, aut saltem adeo stolidi, ut præ crassa ignorantia nesciant quid dicant. Æque sonat eorum argumentum, ac si quis diceret, Deus, quos vult, potest alere sine cibis, ergo tempore famis confugere ad cibos, impium est; ab iisque solatium & vitæ prolongationem expectare, nihil aliud est, quam diffidere Deo. Profectò nimis impia foret hæc locutio: nam sicut Deus ad vitæ sustentationem creavit cibos & alimenta, sic ad morborum sanationem creavit herbas aliaque medicamenta, & voluit ut utrisque uterentur homines. Non tamen promisit per alimenta vitam in sempiternum productum, nec per medicamenta morbos semper sanatum iri, sed nihilominus voluit per illam obedientiam honorari. Nam sicut illi, quorum vita sustentatur per alimenta, non vivunt per illa sola alimenta, sed per Deum, qui illos ipsos Verbo creavit, ut & alimenta illa quæ iis concessit; (sicut scriptum est, *Non in solo pane vivit homo, sed in omni verbo quod exit ab ore Dei;*)

ita etiam illi qui per medicamenta curantur, non per illa sola sanantur, sed Deum, qui illa creavit, iisque tales sanativas facultates indidit. Atque ita per eorum felicem usum & successum non debent, nec verè possunt illa sola laudari, neque etiam propter sinistram morbi eventum damnari infantia medicamenta, sed per obedientiam iis utentis, in qualicunque morbi eventu, magnificari debet Deus, sine quo illa medicamenta non fuissent, & qui per illa operatur in ægris operationem ad suum beneplacitum; quæ operatio ut feliciter cedat, precibus ab illo petendum, & ipsi soli sanationis summa ac prima gloria danda est. Dicimus igitur, sicut qui volentes se ipsos fame enecant, nolentes uti alimentis ut remediis ad famem extinguendam, vitamque sustentandam concessis, illi omnium homicidarum pessimi, & æternæ perditionis rei habentur; sic etiam gravissimum peccatum incurrere illos, qui inobedientes medicamenta aliaque remedia, summi Dei dona, tanquam inania irrident & contemnunt; atque in morbis iisdem uti prohibent, vel negligunt, cum tamen ipse Christus dicat, ægros egere Medico; imò cum ipse Servator Christus, qui omnes languores verbo sanare poterat, medicamentis tamen nonnunquam uti voluerit, ut etiam tali modo gloriam Patris sui exaltaret: sicut legimus apud Marcum, *cap. 8.* cum cæcum sanare vellet, quod verbo potuisset, ipsum usum fuisse collyrio ex saliva, nam *exspuit in oculos ejus, & bis imposuit manus suas*: id est, collyrium illud bis manu infricavit in oculos. Si etiam apud Joannem, *cap. 9.* cæcum sanaturus, hujusmodi collyrium fecit: *Exspuit in terram, & fecit lutum ex sputo, & linivit lutum super oculos ejus, & dixit, Vade, lava in natatoria Siloe.* Sic etiam discipulis suis injunxit, ut ægros, quos verbo sanare potuissent, oleo inungerent ad sanationem, ut non sine medicamento perageretur sanatio ad gloriam Dei; sicut videre est Marci *cap. 6.* & epist. Jacobi *cap. 5.* Non minus misericors quam justus est Omnipotens, & quos punit ac vulnerat, eodem, quando vult, rursus sanat, idque sæpissimè per media naturalia, sicut per medicamenta id fieri videmus in morbis, quos licet, sine medicamentis aliisve naturalibus remediis, verbo sanare possit, vult tamen ut iis utamur, & ex illorum infinito numero, viriumque varietate & excellentia, omnipotentiam ejus admiremur, gloriam ejus extendamus, & divinitatem ejus veneremur. Ex quibus satis patet, quam longè à vero aberrant, qui Medicinam, summi Dei donum, penitus contemnunt. Concludendum igitur, etiam in peste maxime necessarium esse remedium usum. Nam licet prima causa pestis desuper à Deo immittatur, (ut dictum *lib. 1. cap. 8. annot. 1.*) ejus manus nullis remediis cohiberi posse videtur; tamen sciendum, illam causam tale quid esse, quod res naturales corrumpit, quarum corruptio commodis remediis emendari, imminui, & evinci potest, (dummodo summi Numinis favor supplicibus precibus impetratus accedat;) atque hinc, cum in nullo alio morbo major corruptio

ruptio aëris, alimentorum, humorum corporis, aliarumque multarum similitum rerum, invenitur, etiam in nullo alio morbo citissimus remedium usus magis necessarius est.

II. Hippocrates, lib. 2. de nat. hum. fugam capefcere suadet his verbis: *Locum præterea in vim alienam; ab eo, in quo morbus ille excitatus est, mutabis.* Sic Galenus, lib. de prop. lib. cap. 2. non solum verbis innuit fugiendum esse, sed illud ipsum suo ipsius exemplo docet. Nam dicit, cum pestilentia Aquileiam invasisset, atque hinc imperatores statim Romam, cum paucis militibus, inter quos ipse versabatur, fugere coacti essent; finxisse se in patriam ad Æsculapii sacrificium vocatum esse, atque sic ab Antonio discedendi licentiam postulasse, propterea quod cum militibus, qui una cum ipso Romam confugerant, conversatio tuta non esset. Idem alibi scribit, quod cum Romæ tribus annis versatus esset, se magna ingruente peste, confestim urbe excessisse, atque in patriam properasse. Ratio autem fugæ est, ut per loci mutationem, non solum infectus aër, sed etiam contagium ab ægrotis exiens, evitetur; quod plurimos inficere solet, ut abunde docet Aristoteles, dum inquit, *Omnes celerissime his morbis corripuntur, qui è spiritu corrupto proveniunt; quale omne pestilens genus est: qui autem appropinquaverit talem spiritum trahit, qualem æger reddiderit: ægrotat igitur, quia mortiferum est quod spiritu trahitur.* Hanc fugam nonnulli Stoici nec piam esse, nec hominem Christianum decere arbitrantur. 1. Quia repugnat (inquiunt) fidei, & abjectionem fiduciæ in Deum indicat. 2. Quia nemo Altissimi manus uspiam effugere potest, qui neminem non omni loco servare vel perdere potest, pro ejus beneplacito. 3. Quia per illam charitas in proximos annihilatur. 4. Quia cum unicuique certus & inevitabilis vitæ terminus à summo Deo constitutus sit, nemo ulla fuga illum transire, vel longius extendere poterit. Verum non sunt audiendæ tales frivolæ rationes: nam in peste ea intentione non instituitur fuga, quasi per diffidentiam, manus Dei omnipotentis effugere, vel vitæ statutam metam prolongare quispiam vellet aut posset; verum, ut hoc pacto timor Domini demonstraretur, quem Sacra Pagina ubique non minus commendat quam Spem, Fidem, & Charitatem: nam cum hac triplici cœlesti scala nemo ad salutem adscendit, absque timore Domini, utpote cui scala illa, tanquam basi & firmo fundamento, insistit: nam est initium & quasi prima via ad Sapientiam & salutem; sicut testatur Salomon, *Initium sapientia timor Domini.* Qui ergo à nullo rei familiaris aut publicæ impedimento detinetur, & tamen in loco ad quem pestilentem plagam depluit Altissimus, audacter ac pertinaciter vult permaquere, in tali homine non est timor Domini, sed temeraria ac impia audacia, qua Divini furoris justissimas plagas irridet & contemnit, quas tamen unumquemque cum timore & tremore metuere oportet. Neque etiam per fugam charitati quidquam detrahitur, quia hæc incipit

à se ipso: nullus enim veram & debitam charitatem in alios ostendere potest, qui suam ipsius & domesticorum salutem ac sanitatem eadem charitate non prosequitur; nam scriptum est: *Diliges proximum tuum sicut te ipsum.* Non dicit S. Scriptura, *Ante te ipsum*, nec *Plus quam te ipsum*, sed, *Sicut te ipsum.* Talem charitatem ostendit ille; qui ingruente aliqua calamitate, Deum timens, se suosque fuga servare nititur, & simili, vel alio modo proximos suos servari posse desiderat, cum sua ope, vel suo auxilio illos servare omnino nequeat. Si vero per illius auxilium cum illo aliqui proximorum servari possent; & tunc ipse sibi soli fuga consulere, ac proximos deserere, charitatem non haberet; verum illud non fit in peste. Præterea charitas non requirit ut omnes omnibus agris adsint, ipsis quippe succurri potest per eos qui ad id munus electi ac deputati sunt. Certè omnino contra charitatem foret, si quis, ut uni inserviat, multis aliis velit officere; si familiam suam inficere, si alios, cum quibus conversatur, in periculum velit adducere non necessarium: quid enim necesse est ut singuli ægrotis inserviant, cum ad illud munus obeundum satis multi alii sint destinati; qui lubentes agris inserviunt; & melius aëri ac contagiosis fœtoribus jam dudum assueti sunt? Profectò non est omnium tanta perfectio, ut agris pestiferis intrepidè ac sine terrore adesse possint, in quo tamen morbo terror ac timor maximam communicationis contagii ac infectionis occasionem præbent. Quapropter dico è locis pestilentia infestatis cuilibet fugere licere, exceptis his qui speciali officio proximis & Reipublicæ sunt devincti; quales sunt, Magistratus, Verbi divini Ministri, Medici; Chirurghi, obstetrices, alique similes, quos pietas fugere vetat, & quorum opera Respublica, tali imprimis tempore, carere nequit. Reliquis autem omnibus, quos nec rei familiaris angustia, nec alia necessaria impedimenta detinent; licitum esse fugam sibi consulere, ipsa S. Scriptura docet: nam Ezechiel cap. 7. inquit, *Qui in civitate sunt, pestilentia & fame devorabuntur, & salvabuntur qui fugerunt ex eis.* Jeremias cap. 51, non tantum docet, sed jubet fugam capefcere: *Hæc dicit Dominus, ecce ego suscitabo super Babylonem & super habitatores ejus quasi ventum pestilentem, &c.* Paulo post addit: *Fugite de medio Babylonis, ut salvet unusquisque animam suam.* Sed velim mihi dicant prædicti Stoici, quare non æque licitum sit homini Christiano fugere è locis peste infectis, ut pestilentia pericula evitentur, atque aliis sanctis viris licitum fuit alia pericula fugiendo evitare? sicut legimus Gen. cap. 17. Jacobum Patriarcham; propter iram fratris sui Esau; in Mesopotamiam recessisse: Exodi 2. Moysen à facie regis Egyptii in Madian fugisse: item 2. Samuel. 4. vers. 19, 20, 21. Davidem ob furorem regis Saul se multoties occultasse: & 3. Regum. cap. 19. Eliam propter minas Jezabelis reginæ diu in deserto solitarium vixisse: In Actis Apostolorum & Epistolis Pauli; ipsos Apostolos; ob metum Judæorum; multoties

toties sibi fuga consuluisse : *Matthæi cap. 2.* Josephum cum Maria matre Jesu à facie Herodis clanculum in Ægyptum confugisse : imò ipsum Servatorem nostrum Jesum Christum imminetia pericula fugiendo non semel evitasse, ut videre est apud *Matthæum, cap. 12. vers. 15.* Marcum, *cap. 14. vers. 50.* Joannem, *cap. 6. vers. 15. & cap. 7. vers. 1. & cap. 8. vers. 59.* Quam fugam etiam Christus discipulis suis inculcavit, *Matthæi cap. 10. vers. 23* : Si vos persecuti fuerint in una civitate, tunc fugite in alteram. Præterea cum fames etiam sit manifestissimum supplicium quod Altissimus sæpe alicui populo vel variis regionibus immittit, quam tamen famem Patriarchæ Abraham, Isaac, & Jacob fugerunt, scire velim, quare non etiam pestem, quæ haud levius supplicium est, effugere liceat Christianis? Si in bello, quod ad hominum punctionem quoque suscitatur, hostium perniciosas copias, regionum vastationes, & militum tyrannidem fugere ac evitare liberum sit; quare illud ipsum in pestilentia quoque facere non liceat? His omnibus pensus consideratis, non sine ratione fugam non modo permittunt, sed etiam suadent; ac ipsimet instituunt præstantissimi Pontificii scriptores, cum quibus etiam aliarum Religionum clariores Ministri hac in parte passim consentiunt. Lutherus enim in epistola quâdam ad Joannem Hesium ita scribit : *Si sanctis Patriarchis licitum fuit fugere gladii, famis, &c. impendens periculum, cur non idem quoque in peste sit licitum; cum non minus hac, quam illis, utpote peccatorum nostrorum flagellis, mortem nobis accersere queamus?* Idem 2. tom. in *Genes.* omnibus, & imprimis pavidis fugam suadet : *Si pestis (ait) imminet, fugiat qui volet, ac præcipue isti qui pavidi sunt; hos enim Sacra Scriptura jubet excedere castrum, ne simul faciant pavere corda fratrum.* Sic quoque Joannes Calvinus, *epist. 362.* agens de quaestione fugæ, scribit, hanc quaestionem videri ex stupiditate eorum nasci, qui nunquam aliquo humanitatis gustu fuerunt præditi : *Ergo (inquit) non licebit eligere salubrem aërem? ergo in adibus quoque non licebit prospectum salubrem præferre? ergo cavere à noxio factore non licebit? ergo nulla contagio erit timenda?* Facessant igitur paradoxa, quorum finis est, exuere nos omni sensu. Interea nostri consilii non est, eorum indulgere timiditati, qui objecto periculi colore, à vocatione sua discedunt : quemadmodum, si vir uxorem, si maritum uxorem, si liberi parentes, aut vicissim parentes liberos suos deserant; si Pastor ecclesiâ relictâ sibi consulat; si Magistratus officio desit. Denique, modone officium negligatur, non minus pestis contagio, quam gladius aut ignis vitari potest. Idem etiam sentiunt Hieronymus Zanchius, *comm. ad 2. epist. ad Philip. vers. 30.* Guilhelmus Perkinsius, in *explicat. Decalogi* v. 1. Georgius Abbat, Cantuariensis Archiepi-

scopus in *schola Theolog. quaest. 5. de fuga in persecut. & pest.* Ludovicus Lavaterus, in *lib. 5. Paral. cap. 21.* Georgius Sohnius, Theodorus Beza, Andreas Riverus, alique præstantissimi Theologi. Concludimus ergo fugam in peste licitam esse, juxta illud Jesu Syrach : *Qui amat periculum, peribit in eo* : & juxta dictum Alcibiadis, apud Plutarchum : *Stultum est non fugâ sibi consulere, cum fugere possis.* Nam,

*Se minus afflictum sentit, qui providet idum :*

*Sis procul à jaculis, & feriere minus.*

III. Citò fugiendum est, priusquam admissum aëris vitium spiritus & humores infecerit : nam qui serius locum mutant, non rarò pestis causam jam in sinu foveant, quæ paulatim vires acquirens, illos sæpe brevi in aëre serenissimo atque saluberrimo versantes perimit : quod Jo. Ewichius, *lib. 1. de off. Magistrat. cap. 9.* confirmat historiâ cujusdam primarii Medici, cujus uxor & filia pestiferam contagionem fugientes, cum in locum salubriorem se recepissent, eadem contagione, quam jam antea domi contraxerant antequam fugerent, paucis diebus extinctæ sunt.

IV. Longè fugiendum est, extra pestilentiam infectæ regionis limites. Sed quò ergo? Avicenna laudat transitum in aërem crassum. Hujus opinionem rejiciunt alii, atque ad aërem purum & tenuem fugere suadent. Nos Septentrionem versus fugiendum esse arbitramur, (si modo nulla illic pestis vigeat) ad aërem frigidiorum, cum hæc lues in frigidioribus regionibus rarius grassetur, imò in nonnullis fere nunquam, ut de Moscovia testantur quidam Historici. Nam frigus est inimicum corruptioni ac putredini, & impedit valde dispositionem illam qua corpora ad pestem apta redduntur. Quapropter non temere rejicienda est Avicennæ opinio, qui, procul dubio, per aërem crassum intellexit frigidiorum.

V. Tardè redeundum est, id est, non antequam malignitas prorsus extincta ac deleta sit, & aër pristinam puritatem ac integritatem receperit. Qui citius revertuntur, pessimè sibi consulunt, nescientes periculosum esse transitum è salubri loco in gravem ac insalubrem. Consultius sane fuerit in aëre inquinato remanere, ejusque malignitati paulatim assuescere, quam alternatis vicibus modò in salubri, modò in insalubri aëre versari. Hujus rei triste exemplum vidimus in Trans-Isulana Provincia, in qua cum anno, nō fallor, 1657, pestis totâ ætate crudeliter grassaretur, multique divites inde fugissent, iique circa hyemem, peste fere cessante, rediissent, pluri eorum peste correpti & mortui fuerunt, ita ut quasi nova pestis inter divites speciatim accensa videretur.

## CAPUT V.

## De prophylaxi Diætetica, &amp; primò de Aëre.

**P**rophylaxis diætetica consistit in exacta & conveniente observatione scelerum non naturalium, Aëris, Cibi & potus, Inanitionis & repletionis, Motus & quietis, Somni & vigiliarum, ac Animi pathematum. Primum locum tenet aër, qui cum omnibus viventibus ad vitam sit necessarius, isque purus absque inquinamento existens sanitatem foveat, impurus verò vel contaminatus morbos inducat, tempore imprimis pestilenti, maximo studio annitendum est, ut ille purus ac nulla labe infectus haberi possit. Quod si verò per se talis non fuerit, illum mutare, expurgare, & arte, quantum fieri potest, ad salubritatem reducere necesse est. Quod Veteres olim præcipue peragebant luculentis ignibus (1.) per vias publicas passim exstructis. Qui modus cum hodie, propter sumptuum magnitudinem, & incendiorum pericula omnino abolitus sit, nos in hac peste particulatim in cujusvis ædibus aërem sequentibus modis emendavimus. Primò domus ab araneis (2.) telis, aliisque sordibus quotidie curiosissimè expurgari curavimus. Deinde, ut noxius aër excludi, & purior ac salubrior intra ædes admitti posset, iussimus fenestras (scilicet postquam Solis exortus vapores prope terram hærentes discussisset) quæ orientem, & imprimis illas quæ aquilonem (3.) versus spectabant, per horam unam aut alteram aperiri, dummodo non foret tempus nebulosum; reliquas verò quæ austrum (4.) vel occasum, vel propinquas cloacas respiciebant, semper clausas teneri. Post hæc passim in cœnaculis & cubiculis luculentos ignes è lignis juniperinis (5.) (quæ tunc temporis è proxima sylva satis copiosa ad forum deferiebantur) vel fraxineis (si haberi possent) vel quercinis exstruximus, qui ignes hyemali & frigidior tempore maximè conveniebant: calidior tempore eisdem non adeo (6.) magnos struximus. Æstate in maximo aëris fervore, loco ignis, cubicula aceto (7.) conspersimus, & interdum pampinos, folia salicis, rosas, folia & flores nymphææ, aut violarum, aceto vel oxycrato immersa, dispersimus per pavimenta. Aëre verò non admodum calido existente, sæpe etiam herbas calidiores per pavimenta dispergi curavimus, ut melissam, serpillum, hyssopum, nepetam, betonicam, thymum, majoranam, rosmarinum, folia lauri, aliasque similes. Nonnulli suo ipsorum consilio aviculas (8.) in caveis alebant, easque in cubiculis ad aëris purificationem suspendebant. Præterea quocunque anni tempore suffumigia per totas ædes, manè & vesperi, & sæpe etiam meridie instituimus, in quibus illud notatu dignum animadvertimus, quod suffitus boni seu suavis (9.) odoris, (qualia ex styrace, labdano, benzoino; gariophyllis, aliisque similibus conficiuntur) non tantum patum profuerint, sed plurimis maximè noxii extiterint: præterquam enim quod caput tentarent, imprimis aëre calidior existente, etiam illi qui his gratis assuefacti erant odoribus, si forte malum quendam foetorem alicubi persentiscerent, multo magis ab eo exterrebantur, & gravius afficiebantur, quam alii qui suavis odoribus se non assueverant. Quapropter nos suaveolentia hæc fugientes, alia nonnihil insuavia & graveolentia, non quidem multa & varia, sed pauca, fere omnibus præscripsimus; imprimis hæc sequentia:

Rx. *Thuris, baccarum juniperi, ana part. æq. imponantur igni ad suffumigium. Hoc licet vile & commune esset, plurima tamen alia suffumigia viribus longè superabat.*

Rx. *Thuris (10.) granorum juniperi, succini (11.) albi, ana unc. f. myrrhæ, benzoini, mastiches, styracis cal. ana drach. ij. gariophyllorum drach. j. f. fiat pulvis, è quo cum mucagine tragacanthæ concinnentur pastilli, prunis candentibus imponendi.*

*Sæpe solum sulphur (12.) igni imponi & accendi curavi, utpote cujus fumus seu*  
*M halitus*



*halitus putredini maximè resistit, & omnes aëris corruptiones optimè ac citissime corrigit.*

R. *Sulphuris (13.) thuris, baccarum juniperi, picis navalis, ana unc. f. miscantur & parentur s. art. pastilli.*

R. *Thuris, unc. f. sulphuris unc. j. myrrhæ drach. iij. picis navalis, benzoini, styracis. succini, ana drach. j. f. gariophyllorum drach. j. fiat pulvis, cui adde olei juniperi scrup. ij. cum mucaginis tragacanthæ q. s. fiant trochisci ad suffumigium.*

Præter hæc pauca, quæ nobis maximè in usu erant, subinde etiam pulverem tormentarium (14.) (cujus sulphur & sal nitrum aërem egregiè expurgant) in mediis ædibus longis ductibus accendimus, vel solum, vel cum forti aceto in massas, magnitudinis pilæ, redactum. Nonnunquam etiam solo aceto acerrimo (15.) ignitis lapidibus infuso magnum fumum seu vaporem excitavimus: de quo tamen illud notandum, hunc aceti vaporem ab omnibus ferri non posse, quia multorum pulmonibus molestus existit, & asperam arteriam per inspirationem admodum exasperat, quod non tantum in me ipso, verum etiam in plurimis aliis, tam sanis, quam ægris, sæpius comperi, qui nescientes quidnam pectus eorum tantopere exacerbaret, ac molestam aridamque tusculam moveret, de suffumigio aceti non cogitabant, quod tamen solum mali causa erat. Hæc prædicta nostro consilio ad aëris domestici emendationem à nobis præscripta sunt: præter quæ pauperrimum vulgus in eundem finem cornua bestiarum (16.) & detritos calceos, aliave antiqua coria comburebat. Nonnulli ditiores Equitum Capitanei, hircum, (17.) quem alioqui apud equos stabulo includunt, in cenaculis & cubiculis alebant, atque hujus foetorem ab experientia aëris pestilentis contagium impedire & extinguere asseriebant. Innumeri suffumigium tabaci omnibus aliis præferebant, de quo plura dicentur sequenti cap. 16. Quidam etiam lac dulce (18.) recens multum, hinc illic in ædibus passim deponebant, idque aëris malignam venenositatem ad se trahere credebant.

## A N N O T A T I O N E S.

I. **A** Eris inquinamenta maximè consumit ignis, neque ullum melius pestilentis aëris correctorium in rerum natura datur. Cujus rei veritatem non semel comprobavit experientia. Hippocrates (testibus Galeno, Plutarcho, Aëtio, Varrone, aliisque) famosissimam illam pestem, quæ ex Æthiopia Græcos invaserat, olim per ignes edomavit & extinxit. Jusserat quippe per totam civitatem accendi ignes luculentos, nocturnis præcipuè temporibus, qui non simplicem incendii materiam habebant, sed etiam odoratissima ligna; præterea etiam coronas & herbas ac flores fragrantis odoris, nec non aromata & unguenta pinguisima in illos projiciebat: ut his ignibus aëris inquinamenta purgarentur, eumque homines sic puriorem inspirarent, atque hoc modo à peste immunes viverent: imò referunt nonnulli, illum in locis campestribus, eundem in finem, integras sylvas accendisse & combussisse. Sic Plinius, lib. 7. cap. 27, refert Acronem Agrigentinum & Empedoclem à Siciliæ urbibus pestem ignium vi depulisse. Ita quoque Plutarchus, in *Isid. & Osir.* scribit Aegyptios solere noctu consurgere, ac inquinatum aërem suffitibus & odoratis incendiis purgare. Ita ut ignes, imprimis publicos & generales, ad pestis extinctionem plurimum valere, jam à multis seculis constet. Hinc est quod Plinius, lib. 36.

cap. 26. dicat: *Est & ipsis ignibus medica vis, cujus suffitum pesti auxilium ferre, certum est.* Etiam Augenius, lib. 2. de pest. cap. 3. ignes maximè commendat: *Vellem (inquit) tempore pestis ut circa arbem in quatuor vel quinque angulis quotidie ignes excitarentur, injectis lignis quercinis, miscendo odorata ex lauro, cypresso, junipero, & aliis; autem premittere, adhibita tali diligentia, pestem vel exiguam, vel nullam noxam esse allaturam.* Sic quoque Joannes Ewichius, lib. 1. de offic. Magistrat. cap. 8. scribit: *Ego si interrogarer, quid ad præservandam civitatem aliquam à pestis contagione, omnium rerum sit primum, quid item secundum, & quid tertium, haic uno respondebo verbo, ignem.*

II. Nonnulli satis stultè credunt araneas, quæ telas suas in mediis ædibus expandunt, omnem aëris venenositatem ad se trahere, eumque à contagiosis inquinamentis emundare ac liberare. Sic in hac peste vidi quosdam, qui illas, tanquam magnum aëris expurgatorium, curiosissimè servabant, eoque privilegio donabant, ut telas suas, quousque vellent, extenderent, neque illas ab ancillis abigi, expelli, vel occidi volebant. Horum opinioni video etiam calculum adjicere Matthiam Untzerum, qui, lib. 1. de lue pest. cap. 21. sic ait: *Illi malè sibi consulere videntur, qui tempore grassantis pestis araneas scopis ac perticis à parietibus detrahunt, easque ab omnibus omnium cubiculorum*



torum ac conclavium angulis deficiunt ac deturbant; ignorantes scilicet, hoc insectum omnia inquinamenta aëris putrida ac venenata peculiari natura sua proprietate allicere, & pro alimento attrahere & coquere. Profectò miror Untzerum, virum doctissimum, tam facile talibus nugis subscribere, quæ adeo frigidam & frivolam rationem habent, ut ejus refutationi incumbere vix operæ pretium videatur: qua de re plura dicemus cap. 11. annot. 1. Illud tamen unum non possum non hic adjicere, pestilens venenosum contagium se multoties insinuare in telas araneorum, atque in illo fomite sæpe diu latere, ac postea inde casu excussum sæpe alios inficere; cujus rei experientia notissima est, quam exemplo confirmat Forestus lib. 6. Observ. 22. Si araneis inesset illa vis consumendi venenum pestilens, profectò illud maximè consumere deberent dum telis earum inhæret, quod cum usus doceat ipsas non posse; talis quoque vis ipsis minimè adscribenda est.

III. Hippocrates, lib. de morb. sacro, dicit; Aquilonem omnium ventorum saluberrimum esse. Et paulo ulterius, eodem lib. dicit, ventum aquilonarem aërem compingere, turbatum ac nebulosum excernere, illustriorem ac pellucidiorum facere. Hinc est quod Aristoteles, 7. Polit. cap. 11. tradit, urbes auroram versus spectantes, & ventos ab oriente spirantes, salubriores esse; proximum verò ab his salubritatis gradum obtinere urbes quæ in Aquilonem vergunt. Aquillo aëris impuritates, putredines, ac corruptiones impedit, expurgat, & extinguit, ac simul etiam corpora ad pestem suscipiendam minus disposita reddit. Hinc etiam dicit Alexander Benedictus, lib. de pest. cap. 6. Homo cum securus esse non potest, peregrinari primum, atque longius ire vel navigare debet, versus præcipue aquilonem septentrionem: ubi id non licet, saluberrima cæli pars foris deligenda est qua in septentrionem spectet. Attamen nonnunquam observatum est, flante Borea pestem magis incanduisse, quod de peste Cabilonensi testatur Joannes Morellus; de febr. purp. cap. 3. Sed cum illud rarius contingat, & septentrionales regiones rarius, & quæ magis polares sunt, nunquam peste infestentur, atque ut plurimum Aquilonem pestis progressus multum sistere ac imminuere; jam à multis ævis animadversum, & ab innumeris Medicis observatum & annotatum sit, omnibus modis studendum est, ut hic ventus, tanquam reliquis salubrior, intra ædes admitti possit. Verùm hic notare oportet (quod etiam monet Hollerius, lib. de peste) cum Aquilonem saluterum, Austrum verò noxium esse dicimus, illud solummodo intelligi debere in Europa aliisque regionibus citra zonam torridam sitis; nam in Africa & locis ultra hanc zonam sitis, Auster salutaris est; Aquilo verò damnosus existit; quodque nobis Aquilo, illud iis Auster operatur.

IV. Observatum semper fuit ventos austrinos pestem maximè augere, quod etiam testatur Plinius, lib. 7. cap. 50. Quapropter diligentissimè providendum est, ut hujusmodi venti, quantum

fieri potest, evertantur & arceantur, aliique salubriores, quales sunt septentrionales & orientales; intra urbes; si fieri possit, vel saltem intra domus admittantur. Ita refert Plutarchus, Empedoclem olim Agrigentinam regionem à sterilitate & pestilentia liberasse, obstructis montis faucibus, per quas Auster in campos decidebat. Sic etiam scribit M. Varro, 1. de Re Rustic. 4. se Coryram insulam à gravissima peste liberasse; obstructis iis fenestris quæ Austrum spectabant, & apertis iis quæ ad Aquilonem vergebant.

V. Lignum juniperinum ad venenatas aëris corruptiones emendandas multum valere, propterea credibile est, quia illud accensum (ut & ejus baccæ) suo halitu seu fumo & odore è tota vicinia serpentes fugare dicitur. Nec minus illud de fraxineis lignis credi potest, nam arboris fraxini, teste Plinio, contra venena tam præclara vis est, ut illius ne matutinas quidem occidentesve umbras, licet sint longissimæ, serpentes attingere audeant, sed longè inde diffugiant. Paræus scribit se expertum fuisse, si circulus conficiatur; cujus una pars ignis sit, altera verò frondibus fraxini clausa, & serpens vivus in medio collocetur, illum in ignem potius, quam in fraxinum fugere.

VI. Ignis calidis tempestatibus adeo luculenti non sunt extruendi; ut frigidis temporibus, ne fortè ab intenso calore aër nimis effervescat, ac spiritus humoresque in eo degentium nimis excandescant, hincque febres accendantur: quem damnosum errorem in hac peste inter vulgus non rarò vidimus, qui in maximo cæli fervore se ipsos interdum ante magnos ignes extorrebant, atque ita incidebant in Scyllam volentes evitare Charybdin; nempe pestilentem infectionem evitare & fugere volentes, incidebant in febrem; à qua mox corporis dispositio citius ad pestem præparata fuit. Sic etiam Mercurialis, lib. de Pest. cap. 22. observavit in peste Patavina multos ex iis interiisse, qui ad ignem artes exercebant, ut fabri ferrarii; aurifices, &c. neque id (inquit) sine ratione, quia vi ignis corpora rarefacta facilius aëris inquinamenta admittebant. Cum igitur ignes luculenti ad aëris expurgationem laudantur; hoc intelligendum est de iis qui frigidioribus, non verò qui fervidis temporibus extruuntur.

VII. Rhazes, lib. 4. de Re Medic. cap. 25. jubet domum quotidie irrorare aceto cum aqua mixto, quia acetum veneno & putredini potentissimè resistit: hinc plurimi Medici illius irrotationem ad pestem; maximi faciunt. Quantum autem valeat acetum ad aëris pestilentis emendationem; abundè satis compertum habent nautæ qui Indos petunt; multoties enim vehemens pestis ipsos invadit dum longius à terris absunt; quam cum ob medicamentorum aliorumque subsidiorum inopiam compestere nequeunt, solo multoties aceto, si ejus copiam habeant, profligare solent; quod non tantum ægris ad sanationem, & sanis ad præsertionem exhibent, sed eodem etiam totas naves interiores quotidie diligenter ablunt & emundant, hocque pacto brevi tem-

pore intestinum hostem expellunt. Hinc etiam Liddelius jubet ædes illas, in quibus aliqui pestiferi mortui sunt, primò scopis bene emundare, ac postea aceto acerrimo cum aqua mixto abluer. Quæ autem vi acetum conveniat videndum sequente cap. 10. annot. 17. Videntur veteres loco aceti ad æris purificationem interdum usi fuisse vino: nam Joannes Beverovicus, in *Idea Medic. veter.* ex Luciano hæc verba citat: *Quo tempore sava pestilentia grassabatur Athenis, existimavit Architelis Areopagita viri uxor, astantem sibi Toxarim jussisse, ut Atheniensibus diceret, cessaturam pestem, si vino multo conspergerent angiportus: quod cum sæpe fecissent, non amplius grassata est pestis, quia vapores infestos odore suo vinum extinxit.*

VIII. Aviculas, & imprimis passeris, si in cubiculis alantur, ærem purgare, nonnulli scribunt, atque hinc fortasse vulgi de hac æris purificatione, dimanavit opinio: quam nos nihili æstimamus, utpote ab experientia & ratione planè alienam. Dico, ab experientia: quia sæpissimè animadverti aviculas illas in ædibus omnium primò peste correptas & mortuas fuisse, atque pestem non potuisse excludi è domibus eorum qui plurimas hujusmodi aviculas alerent, easque per omnia conclavia deponerent. Dico, à ratione: quia non percipio qua vi illæ ærem corrigere possint, nisi dicamus illud fortasse propterea fieri, quod ærem alarum motu identidem commoveant, quem à nimia quiete, instar aquæ mortuæ, putrescere ac corrumpi, nonnulli existimant.

IX. Multi arbitrantur suaveolentia sola efficere ut pestiferi halitus ab homine citius ac facilius recipiantur, quam depellantur; quorum opinioni non malè favent ratio & experientia. Illa: quia cum grati odores à mente percipiuntur, cerebrum, ut diutius fruatur ista amœnitate, poros suos undequaque dilatat, sicque suaveolentium fragrantis halitus longè copiosiores; sed simul etiam longè plures halitus venenatos suscipit & admittit: adde quod ad suaveolentium occursum longè fortior & frequentior fiat inspiratio, atque ita simul cum aëre copiosa pestilentia miasmata, aëri inhærentia, cum magno hominis periculo, introducuntur ad pulmones & cor. Hac: quia in hac peste à nobis observatum est, his odoribus assuetos, citius & magis fuisse afflictos, quam alios. De his suaveolentibus etiam mentionem facit Alexander Massaria, lib. 2. de peste, eaque damnanis, hoc modo scribit. *Illud hoc loco nullo pacto praterendum est, quod miror à paucis animadverti, ut tum in suffimentis, tum in aliis omnibus remediis adhibendis, quæ odora menta suscipiunt, talis adhibeatur modus & temperatio, ut perpetuo vitentur illa, quæ summe odorata, acuta, & calida sunt: etenim praterquam quod hæc totum sæpenumero corpus excalefaciunt, inflammantque, etiam peculiari quadam vi capitis dolorem & gravitatem inducere consueverunt.* Paulo post addit: *Communi quadam consuetudine plerique omnes uti solent pila ex ladano, cinnamomo, myrrha, cariophyllis, & aliis id genus medicamentis calidioribus, quæ suapte na-*

*tura evaporationem capiti infestam excitare, & per sæpe cor ac universum corpus inflammare solent. Quamobrem hæc magis officere, quam prodesse valent.*

X. Averrhoes, 9. *Collect. cap. ult.* laudat pro suffumigio costum, styracem, & galbanum, nec non terebinthinam, eo quod proprietate quadam pesti resistat. Rhazes domum suffumigare jubet cum colto, thure, myrrha, styrace, bunch, santalis, & camphora. Atque ita hi auctores fumis grati odoris insuavia quædam admiscunt; ne solà suavia noceant, iisque nimis assuescat natura. In eum finem nonnulli etiam laudant suffitus ex assaætida, sagapeno, galbano, & similibus. Arnoldus Weichardus, in *sua tract. pract. lib. 3. cap. 1.* cornu arietis accensum magni facere videtur: *Quocunque autem modo, inquit, pestis se habeat, aër corrigendus est suffitu ex cornu arietis vel hirci accenso, in hoc enim magnum & peculiare praesidium est contra pestem, isque suffitus etiam vestimenta munis.* Aliud suffumigium fœtidum vide paulo post; annot. xvi. Sennertus, lib. 4. de febr. cap. 5. ab experientia commendat hunc pulverem, à Gregorio Horstio quoque laudatum:

*Rec. Baccarum juniperi M. iij. radicem bele-nii, cortic. exterioris betula, cornu hirci raspati, sabina, ana M. ij. foliorum quercus, myrrha, ana unc. j.*

*Fiat pulvis pro suffumigio.*

Præscribit etiam pro pauperibus, ad suffumigia, hoc sequens: *Rec. baccarum juniperi M. ij, corticum baccarum lauri M. j, thuris lib. ℥, fol. absinthii, ruta, quercus, ana M. ij, scobis ligni juniperini M. iv, succini ʒj, fiat pulvis.*

*Commodum est (inquit idem) calcem vivam in conclavi aqua persundere, atque eo vix aliud efficacius.* Idem quoque probant Quercetanus & Follinus, nec non Franciscus Ranchinus, lib. de purif. rer. infect. qui scribit, calcem aquæ affusione in cubiculis accensam & extinctam, acerrimo suo fumo admodum penetrante, subtiliora, eaque latentia contagii seminaria dissipare & absumere. Denique addit: longâ experientiâ confirmatum esse, si parietes calce oblinantur, eaque meatus lapidum occludantur, perire & penitus extinguî pestilentia fomes.

XI. Succinum suffitum ærem optimè corrigere, & venenum pestilens occulta quadam proprietate extinguere, ab experientia testantur, Cardanus, lib. 5. Subtil. Anselmus Botius, lib. 2. de lapid. cap. 160, Georgius Agricola, lib. 4. de natur. fossil. Libavius, part. 3. singular. de succino; lib. 15. cap. 27. & 28.

XII. In sulphuris accensione notandum, ejus vaporem seu fumum cerebro & pectori admodum gravem & molestum existere, atque præcipuè tucculosus, anhelosis, aliisve thoracis vitiis detentis, valde noxium esse: ac proinde cum in cœnaculis aut cubiculis accenditur, eo tempore hominibus per horam unam aut alteram ex iis recedendum esse. Interim ad corrigendas æris in-

fectio-

fectiones, tam præclaras vires obtinet, ut vix aliud quippiam cum eo comparari possit. Unde etiam Veteres sulphuris suffumigatione ad aërem alterandum, purificandum, & à putridis contagiosisque ac venenatis miasmatis expurgandum, usos fuisse, liquet ex Homero, in *Odyss.* 22. circa finem, ubi Ulysses ad purgationem suæ domus petit ignem & sulphur, malorum medelam, & dicitur sulphure bene purgasse coenaculum, & reliquam domum, ac vestibulum. Arnoldus Weichardus, *tract. pract. lib. 3. cap. 1.* non sine ratione sulphuris suffitum imprimis commendat ad expurgationem cubiculorum in quibus pestiferi extincti sunt. *Locus in quo*, inquit, *pestilentiales decubuerunt & extincti fuerunt, nulla re melius à contagio (quod sæpe parietibus aliisque externis tenaciter adhæret) emendatur, quam sulphure crudo, si illud in cubiculo undique clauso accendatur, & suffitus aliquamdiu retentus iterum per fenestras apertas emittatur.* Inveniuntur tamen nonnulli, qui sulphur nimis fœtens & calidum esse, aliisque potius temperatis, aromaticis, & suaveolentibus utendum existimant. Verum, quantum ad fœtorem, sciendum tempore pestis non nimis indulgendum esse naso, neque ullam habendam esse rationem gratiæ, sed magnam utilitatis medicamentorum: nam venenum pestilens vehemens & malignum est, quod non magis per solum gratum odorem benzoini, styracis, moschi, zibethi, aliarumque rerum suaveolentium, domatur, quam rabies leonis per resistantiam agni, vel quam viperæ, scorpionis, aut arsenici virulentia per usum sacchari Candi. Quantum ad calorem, dicimus oleosas sulphuris partes quidem esse calidas, sed eas, dum accenditur, temperari ac infringi per spiritus seu vapores acidos, qui unctione ab eo separantur, atque in aëre oleosis particulis immiscuntur. Hos enim acidos vapores non esse calidos, docet aqua (vulgò malè appellatur oleum) sulphuris, quæ ex sententia Medicorum refrigerandi vim obtinet, putredinem, omnemque corruptionem ac venenatam qualitatem tollit & corrigit, febrilem calorem extinguit, etiam aquas vitiosas & putridas, nec non vinâ turbida clarificando purificat. Sic etiam vapor ille effumans in accensione sulphuris, aërem purificat, omnemque ejus corruptionem & noxam abigit, quam ob causam usus ejus in peste merito magnificandus est. Neque etiam ob flammæ calorem usus ejus extimescendus, cum ipsa quoque flamma sit optimum aëris purificatorium, ut ante dictum, *annot. 1.* Si fœtidus illius odor minus arideat, dum accenditur, aliquantisper secedendum est.

XIII. Theophrastus Paracelsus cum sulphure parat tale suffumigium:

*Rec. Sulphuris, lib. j. myrrha, unc. iiii. thuris, unc. viij. gr. opoponacis, dr. j. assæ fetidæ unc. j. baccarum lauri, lib. ij. succini flavi, lib. f.*  
Fiat pulvis.

XIV. Pyrius seu tormentarius pulvis insigni-

ter aëris impuritates expurgat & emendat; ratione sulphuris & salis nitri; præterea etiam ratione violentæ commotionis aëris, si nempe in tormentis bellicis accendatur, nam tali modo pestiferæ nebulae quaquaversum dispelluntur, & succensi pyrii pulveris flamma atque ardore venenata qualitas corrigitur. Hoc modo Tornacenses venenum pestilens dispulisse, testis est Levinus Lemnius, *lib. 2. de occult. natur. mirac. cap. 10.* *Factum* (inquit) *apud Nervios, quos Tornacenses modo vocant, ubi milites prædarii machinas tormentaque bellica pulvere bombardico, non globis, oppleta urbi obverterunt, eaque sub diei noctisque crepusculo, incenso funali explodi curabant: quo effectum est, ut sonitu violento, fumantique odore aëris contagium discuteretur, ipsaque civitas à peste facta fuerit immunis & libera.* Mox addit Lemnius: Neque enim minus præsentaneum est hoc remedium in dissipandis nebulis, insectisque aëris contagiis, quam, quod Hippocratem fecisse legimus, exstructis pyris per compita ignes excitare. Hinc etiam Petrus Sallius, de *febr. pest. cap. 20.* inquit: *Credo ego quod maxime in tali casu proficiunt tormenta bellica majora, sæpius vi ignis excussa: nam cum hac validissime aërem, & ad distans commoveant, & sonitus maximus ab eis concitetur, & terra etiam circumstantis tremor; idcirco apta erunt, si sæpius reiterentur; ad aëris validam purificationem, poteruntque aërem ab illis inquinamentis, ea displodendo, liberare.*

XV. Medici Antverpientes, in suo Consilio ad pestem dato, anno 1624, in aceto jubent coquere rutham, scordium, scarleam, rosmarinum, lavendulam, radices iridis, gentianæ, zedoariæ, & baccas juniperi, idque sic coctum infundi in lapides ignitos, huncque fumum seu vaporem, jannuis & fenestris bene clausis, ad minimum sex horis intus detinere, antequam cubiculum aperiatur. Eodem vapore etiam vestes aliæque mobilia eorum qui peste interierunt, perfumare jubent.

XVI. Lemnius, alique multi suffitus ex cornibus & detritis coreis combustis valde laudant; eosque etiam antiquitus apud nostrates in usu fuisse, docet Belgicum proverbium: *Wacht u, men brant daer hoorn*: id est, cave tibi ab illo loco, nam ibi cornu comburitur: quasi dicas, est pestilens ille locus, vel instar pestis fugiendus: in eos enim quadrat proverbium, quorum ædes & consortia, tanquam peste infecta loca, fugere oportet. Ex cornibus aliisque fœtidis hujusmodi suffumigium præscribit Franciscus Ranchinus:

*Rec. cornu hirci raspati 3 iij, limatura cornu cervi 3 ij, rad. angelica, valeriana, ana 3 j, baccar. lauri, juniperi, ana lib. f. thuris lib. j, resina lib. iij, sulphuris, 3 iij, fiat omnium pulvis pro suffumigio. Alia suffumigia vide paulo ante, annot. x.*

XVII. Illud experimentum de hirco, testatur Mercurialis se suo tempore etiam vidisse apud Hungariæ Cancellarium, qui ad aëris correctionem, & præsertionem à peste, magnum hircum

cum in ædibus suis alebat. Omnino simile de hircō etiam referunt Jordanus, *de pest. phœnom. cap. 9. tract. 3.* Paræus, *lib. 21. cap. 6.* & Liddelius, *de febr. lib. 5. cap. 5.* Illud ipsum quoque observasse videtur Palmarius, nam *de febr. pest. lib. 1. cap. 15.* inquit: *Sunt qui pro singulari præcautione in cubiculo, ubi cibum capiunt & cubant, hircum alant, qui gravi suo halitu tetraque nidore de se persuso omnia impleat, omnemque vim aëris maleficam vel repellat, vel dissipet, atque extinguat; quorum minimè rejicienda videtur opinio, nam adversus hoc contagium optimum creditur esse suffimentum: gravis enim & olidus vapor, alium qui fœtidus est, diversi tamen generis, oppugnat & arcet quam longissime.*

XVIII. Stulta est hæc vulgarium opinio, qui existimant lac dulcē, quasi magnetica quadam vi, pestilentia miasmata ad se attrahere, eaque in illo extingui: atque hac falsa imaginatione decepti, illud non tantum hīc illic in ædibus ad præservationem deponunt; verum etiam in scutellis patulis ægrorum lectis apponunt, certò creden-

tes illud adeo fortiter ad se trahere venenum pestilens è corpore ægroto exspirans, ut nusquam alio deferri, vel alibi fomitem facere possit: cum verò pestilentis veneni bona quantitas à lacte jam attracta est, illud eo significari dicunt, quod lac in supremitate aliquantum ex cæruleo liveſcat, ac propterea illo tunc abjecto aliud novum deponunt. Verum frivola sunt hæc omnia, iisque neque experientia, neque ratio favet. Non illa; quia non minus peste infestantur illæ domus in quibus lac illud depositum est, quam aliæ: præterea qui ægroti propius adsunt, æque contagio inficiuntur lacte illo deposito, quam illo non deposito: & usus docet, æquē fomites inveniri in illis lecticis, in quibus lac ante ægrotos depositum fuit, quam in aliis. Non hæc; quia lac non contrahit illum cæruleum livorem à seminario pestilenti in illud attracto, sed à generali maligna aëris alteratione, qua non tantum lac, verum etiam carnes, fructus, aliaque multa facile & citò corrumpuntur.

## CAPUT VI.

*De cibo & potu, repletionē & fame, balneis & vestimentis.*

**D**urante hac peste in cibo & potu (1.) ad præservationem commendavi mediocrem sobrietatem, (2.) & in genere jussi famem ac sitim (3.) ut & majores ac insolitas inanitiones & repletiones (4.) fugere. In utroque autem consuetudini (5.) multum concessi: illis qui assueti erant crassioribus & durioribus cibis & potibus, non facile ad alios transeundum esse arbitratus sum, tantummodo ex iis maxime suspectos vel noxios prohibui: aliis autem, qui levioribus assueti erant, transitum ad crassos interdixi: qui verò utrisque, & levioribus, & crassis, omnisque generis cibis semper usi & assueti fuerant, & quorum lautior fortuna copiosiorē victum ac quadram bene instructam permittebat, his sequenti modo victum præscripsi. Cibus commendavi euchymos & facilis digestionis, quales sunt, panis optimus, caro agnina, ovilla, hœdina, vitulina, bubula: gallinæ, capones, pulli gallinacei, galli Indici, cuniculi, perdices, alaudæ, passerēs: pisces plurimi fluviatiles, cancri: ova gallinacea recentia, lac acidum e butyratum (quod etiam à Rhaze valde commendatur) aliique similes, qui ad lubitum vel assari, vel elixari (6.) possunt: quorum condimenta etiam conficere jussi cum talibus quæ cordis robur firmant, putredines impediunt & tollunt, ac corruptionibus malignis resistunt: qualia sunt vinum, acetum, omphacium, cappares, uvæ immaturæ, fructus, ribesii rubri, berberis, cerasa, morella acida: herbæ, cichoreum, pimpinella, endivia, borago, acetosa, lactuca, melissa, betonica, chærefolium, petroselinum, majorana, rosmarinum: asparagi, bulbi raparum, mala citria, aurantia, cydonia, aurea vinosa (nostratibus *guldelingen* dicta) item cinnamomum, chariophylli, macis, nux moscata, aliaque similia. Summopere improbavi jejunum exitum matutinum, imprimis qui in diei crepusculo, vel nondum discussis à Sole vaporibus circa terram hærentibus, fiebat, & omnibus suasi non ante in publicum prodire nisi post duas à Solis exortu horas, idque non nisi prius assumpto jentaculo (7.) ex frusto panis butyro pinguius inuncto, vel solo, vel caseo ovillo viridi ei imposito, & poculo cerevisiæ melioris superbibito: nam butyrum adversus pestem valere creditur & caseum viridem (qui à stercore ovillo viriditatem habet) alexipharmacam vim habere, & malignas corporis

poris putredines à centro ad peripheriam propellere, notissimum est. Prohibui usum eorum ciborum qui mali succi sunt, vel difficilius digeruntur; ut & ciborum valde pinguium, antiquorum, durorum, aut facile corruptibilium: quales imprimis sunt, carnes porcinæ (8.) vel recentes, vel fumo siccatae, (sicuti pernae & lardum venundari solent) haleces, (9.) soleae, aselli saliti, salmones, anguillae, alosae, conchae, lac dulce, similesque plures: nec non fructus horarii plurimi, exceptis acidis; ut cucumeres, pepones, melones, abricochi, pruna, mala persica, cerasa dulcia, dauctyli, pira dulcia, uvae maturae dulces, &c. ad hanc fabam Romanam, omniaque legumina, allium, (10.) caepe, porri, &c. etiam abstinere iussi à melle (11.) & saccharo, omnibusque valde dulcibus. In genere illud in omnibus eduliis præcepi, ut cum aqua clara & optima curiose abluerentur, & deinde usque ad sufficientem mollitiem percoquerentur, vel assarentur, ac cum maximo nitore præpararentur: deinde ut in eorum usu ac comestione mediocritas (12.) servaretur, nec maiore copia ingererentur quam pro famis necessitate natura desiderat, utque potius uno aut altero cibi genere fames pelleretur, quam multis variisque simul ingestis denique ut ex prædictis cibis singuli eligerent sibi maxime convenientes, secundum cuiusque temperamenti diversitatem; biliosi nempe humidiores & refrigerantes, pituitosi sicciore & calefacientes, & sic de cæteris. Pro potu concessi cerevisiam claram, tenuem & mediocrem, ex optima aqua (13.) confectam (qualis Noviomagi clarissima exhauritur è cerevisiariorum puteis, ut & vinum (14.) tenue modice sumptum, vel solum, vel potius admisto succo citri recens expresso, vel imposito frusto pomi citrii, vel aurantii, vel granati acidii. In potu temperantiam maxime colere, & ebrietatem (15.) tanquam infensissimum hostem fugere, præcepi: tristioribus usque ad hilaritatem, (præcipue hyberno tempore) nemini usque ad ebrietatem vinum concessi. Verum hos à me præscriptos limites plurimi haud raro transgrediebantur, quorum tamen multi temeritatis suae poenas dederunt. Imprimis fugere iussi crassissimam cerevisiam Brunsvicensem, & Bremensem, aliasque similes: ut & cerevisias turbidas minimeque defœcatas, easque quae è stagnantibus vel corruptis aquis, vel hordeo corrupto confectae erant: adhuc etiam fugere melicratum, & omnia vina dulcia ac fortia, qualia sunt pleraque vina Gasconiensia, Canarina, Hispanica, & similia. Spiritum vini, ut & omnes aquas vitae varii generis (quibus vulgus apud nostrates maiore copia uti solet) in plerisque prohibui, solis senibus, aliisque frigidam temperiem, vel debilem ventriculum habentibus, exiguum earundem usum concedens, imprimis hyberno tempore, & maxime usum spiritus vini juniperini. Post cibos & potus, suasi ut natationibus assueti, hoc tempore ab omni natatione (16.) penitus abstinerent, sive in fluminibus, sive in aquis stagnantibus ea fierent: sicut aliis in locis, ubi publica tepida balnea in frequenti usu sunt, ab eis abstinere, bene jubent Medici. Iis, quorum fortuna lautior paulo majores impensas permittebat, suasi ut gestarent vestes ex serico tenuiore, vel undulato, vel satino (17.) aliove simili; in aliis verò minoris conditionis, ex lana tenuiore, vel camelina, vel lana bombacina, vel ex corio tenui, aut similibus, confectas. Illas autem vestes semper nitidas servari, alias verò, ex pannis laneis crassioribus confectas, in aliud non pestilens tempus seponere ac servare, iussi.

## A N N O T A T I O N E S.

I. S I ullo tempore, certè in pestilente constitutione exquisita victus ratio magnopere requiritur, & ad præservationem conducit; nam licet illa sola per se pestem fugare & excludere nequeat, tamen per illam variae occasiones ad pestem declinantur, & corpora in tali dispositione conservantur, quae pestilenti veneno contraria est, ita ut pestis illa vel non invadat, vel minus & levius affligat. In hunc sensum eleganter M. Varro, lib. 1. de Re Rustic. cap. 4. sic in-

quit: *Est salubritas, quae ducitur à celo & à terra, non sit in potestate nostra, sed natura, multum tamen est in nobis, ut quae sunt graviora, possimus diligentiam nostram facere leviora.*

II. Pestis sibi summum jus vendicat in intemperantes, quapropter consultum est, pestilenti imprimis constitutione, temperantiam colere, quae quantum ad sanitatis conservationem proficit, exemplo suo docuit olim Socrates, de quo Aulus Gellius, lib. 2. cap. 1. ita scribit: *Temperantiam cum*

eum fuisse tanta traditum est, ut omnia fere vita sua tempora valetudine inoffensa vixerit, in illius etiam pestilentia vastitate, qua in bello Peloponesiaco imprimis ipsam Atheniensem civitatem internecino genere morbi depopulata est, is parcendi moderandique rationibus dicitur & à voluptatum labe cavisse, & salubritates corporis retinuisse, ut nequaquam fuerit communi omnium cladi obnoxius.

III. Fames spiritus resolvit, vires dejicit, corpora languida, eorumque meatus inanes reddit, & ea præparat ut pestilentem labem facilius suscipiant, eique minus resistent. Sitis autem humores incendit, eosque acriores reddit, præcipuè in biliosis: adde, quod etiam haud parvum languorem inducat. Quapropter Rhases, 4. ad Almans. cap. 25, scribit, *maximè cavendum esse ne in Sole fiat, sessio, neque jejundet aliquis, neque comestio tardetur, sitim etiam nullo modo esse tolerandam.* Quantum ad pestis incrementa facere possit fames, diuturna multarum urbium obsidia satis docuerunt, præcipue autem notissima illa duo, primum Lugduni Batavorum, ab Hispano milite quondam obsessi; alterum Rupellæ in Gallia, à Galliarum Rege anno 1628, captæ, in quibus multa hominum millia fame & peste interierunt. Hinc Bauderonus, *prax. tract. 1. cap. 15.* sic inquit: *Non sine ratione vulgus Medicorum improbat quinque nomina ab F; incipientia: fœmina, fames, fructus, status, & fatigatio.* Inter hæc tamen fames omnium maxime damnosa est: ad quam proxime accedit fœmina, seu nimia Venus, ut liquet ex iis quæ diximus præcedente lib. 1. cap. 5. annot. 4. & quæ dicentur sequente cap. 7. annot. 7. ubi etiam ex annot. 5. & 6. liquet, quam noxia sit fatigatio.

IV. Magnæ repletiones meatus obstruunt, & corpus cruditatibus replent, atque ad morbos disponunt; inanitiones verò illud debilitant: atque ita utraq; per accidens illud ad pestem præparant. Si quispiam hic roget, cujusnam magnus excessus tempore pestilenti magis periculosus ac noxius existat? dicam, inanitionis, propter rationes præcedente annotatione relatas: & si necessariò in alterutro peccandum foret, ego peccari malim in repletionem, quam inanitionem, quia illam facilius & tutius est imminuere, quam hanc replere. Hinc etiam Hippocrates, 1. Aphor. 5. postquam docuisset ægros magis delinquere in tenui victu, quam in paulo pleniore, tandem addit: *Propterea etiam sanis periculosus est valde tenuis, & status, ac exquisitus victus.* Plerumque, imprimis autem tempore pestilenti, minus peccatur in replendo, quam in inanendo, quia tutius est superfluitates cumulare, quam spiritus vitales humidumque nativum consumere ac debilitare, superfluum enim facilius expellitur, quam deperditum restauratur. De inanitione quæ fit per chirurgiam & pharmaciam, dicemus cap. 8. & 9.

V. *Omnia repentina mutatio periculosa;* quapropter à consueta victus ratione subitò discedere, præcipue in constitutione pestilenti, maximè periculosum foret: neque etiam ratio ad illud fa-

ciendum urget. Nam summus Deus omnes res alimentares eo fine creavit, ut ad nutritionem & conservationem hominis inservirent, easque variis modis inter mortales distribuit, ut alii his, alii illis, pro regionum & cujusque fortunæ varietate uterentur, utque illi qui crassis & crudioribus alimentis vescuntur, æque bene nutrentur, quam alii levioribus & tenuioribus assueti. Quod ipsum quoque docet experientia, cum in utriusque æque bonus sanguis reperitur, neque ordinariè melior sit in iis qui panem triticeum album cibosque delicatos comedunt, & vinum bibunt, quam in aliis qui panem secalinum, castanearum, vel fabarum, & carnes suillas, aliasque crassas edere, atque aquam bibere consueti sunt. Quapropter si Medicus talem victus consuetudinem repente mutare ac invertere velit, robur corporis non conservabit, nec augebit; sed illud potius imminuet & dissolvit: quemadmodum illud in multis fieri videmus, qui è longinqua regione ad aliam transeunt, in qua ob aëris & alimentorum mutationem in principio valde debilitantur, ac non raro etiam in morbos concidunt, neque ad pristinum statum redeunt, antequam huic novæ diætæ temporis tractu paulatim rursus assueti fuerint. Hinc est quod Hippocrates, lib. de nat. hum. dicat: *Si quis citò diætam permutet, periculum est etiam à permutatione aliquid in corpore novatum iri: quapropter victu solito quidem utendum [in peste] ubi hominem nihil ladere videtur.* Paulo ante dicit: *Homines eo tempore (scilicet peste) commonesciendi sunt, ut diætæ non commutent, quia morbi causa non existunt, sed ut corpus habeant quam minimè molis.*

VI. Ridendi profectò sunt illi Medici, qui, in pestilenti constitutione diætam exquisitam præscribere volentes, omnes carnes assari scrupulosissimè præcipiunt, ut hoc pacto earum humiditas consumatur; haud secus ac si ciborum succi pejores forent illa humiditate quæ cum condimentis affunditur, & pejores potu, qui post siccos cibos necessariò superbibitur. Videntur nescire, cum cibis elixis longè commodius varias herbas, fructus, aliasque res malignæ corruptioni ac putredini resistentes, visceraque corroborantes, & ad feliciores coctiones præparantes, coqui posse, quam cum assatis; ac proinde nihil esse quod elixatorum usum magis quam assatorum, damnent. Non minus etiam ridendi sunt illi, qui carnes bubulas, hœdinas, & cervinas damnant, propter nimiam siccitatem: nec non carnes agninas, ovillas, & vitulinas, propter nimiam humiditatem: quasi verò illarum siccitas, vel harum humiditas ad pestilentis veneni generationem vel inductionem aliquid faciat, & nulla etiam arte corrigi possit.

VII. Malum est vigente peste jejuno stomacho manè exire in publicum, quia ventriculus vacuus non habens quod concoquat, parum vel nihil chyli ad cor transmittit; hinc cor etiam debilius pulsans, cum non fortiter propellat à centro ad peripheriam, facile sibi assumit aëris inquinamenta per inspirationem assumpta, & corpori



pori in ambitu adhærentia. Contra verò cum ventriculi aliorumque viscerum coctiones liberally procedunt; tunc à centro ad partes externas humores alimentarii, spiritus & vapores transmittuntur. Quapropter jentaculum manè ante exitum assumptum, etiam pro insigni præservativo contra pestem habendum est, imprimis illud de quo in textu diximus. Qui non sunt assueti jentare, illi buccellam panis albi, vel panis biscotti, vino intinctam edere: vel Anglorum more, haustum cerevisiæ, cui frustum panis recenter tostum, cum pauxillo nucis moscatæ immisum est, bibere queunt: vel morsulorum seu placentularum, ab Angelo Sala descriptarum, unam aut alteram assumere possunt, quæ sunt admodum delicatæ, & grati saporis:

*Rec. Panis triticeï biscotti, sacchari albißimi, ana lib. j. amygd. dulc. excortic. cortic. citri virid. condit. ana lib. f. gelatina cydoniorum unc. iij. nucis muscatæ condit. zingiberis chynæ condit. myrobalanorum condit. ana unc. ij. cinnamomi electi drach. j. f. croci opt. drach. f. singula seorsim exactè contundantur, postea cum pistillo ligneo simul misceantur, & fiat pasta, addendo Aquæ rosarum q. s. Ex hac deinde conficiantur placentula, quæ postea lenissimo calore aliquantum exsiccentur; & ad usum servantur.*

Angelus Sala huic pastæ addit ambra griseæ & moschi; ana scrup. j. sed nos illa duo studio omisimus: partim quia hujusmodi grati ac subtiles odores in peste minus conveniunt: partim quia multi tales odores ægerrimè ferunt, imprimis verò mulieres.

VIII. Carnes porcinæ in pestilenti constitutione maximè damnosæ sunt: quod in hujus pestis principio ipsa experientia adeo notum fecit omnibus, ut earundem usum postea quilibet fugeret; imò multi quoque easdem foras canibus projicerent; utpote post quarum comestitionem multos statim peste infectos fuisse observaverant. Quo factum ut Noviomagi tota æstate & autumno pauci porci macerarentur. Hoc ipsum Rhazes quoque observasse videtur, nam *lib. de peste cap. 4.* in victu, præter alia, etiam à carnibus porcinis abstinere, expresse jubet.

IX. De halecibus illud notatu dignum in hac peste observavimus, nempe cum mense Junio & Julio haleces novæ (ut appellant) muria conditæ adveherentur, & incolæ, novitatis gratia, illas passim crudas (ut solent nostrates) comederent, pestem eo tempore multum accrevissè, multoque, qui illas comederant, intra viginti horas contagio infectos fuisse: quibus exemplis alii prudentiores redditi, postea halecum usum intermiserunt. Huic nostræ observationi è directo contrarium est illud, quod scribit Palmarius, *lib. 2. de febr. pest. cap. 18.* his verbis: *Certissimo experimento constare tradunt, cum primum halecis sale condita copia à piscatoribus in maritimas civitates defertur, pestem brevi tempore evanescere; ignoratâ*

*causâ, propterea quod omnibus falsis id minime concessum sit.* Ut hæ contrariæ observationes concilientur, dicendum; primò, dubitari posse de veritate illius posterioris observationis, utpote quam Palmarius solummodo scribit ex relatione aliorum, ipsemet autem non vidit. Secundò, posito illam verissimam esse, varietates tamen locorum seu regionum, nec non tempestatum, sæpius in causa esse, ut quod in una peste prodest in victu, id in alia noceat, quod uni regioni damnosum, illud alteri salutiferum existat. Quapropter Cardanus, *lib. 2. Subtil.* non sine ratione inquit, tot ferme esse modos pestis, quot tempora. Non quod venenum pestilens sit diversæ naturæ, sed quod diversimodè operetur pro diverso corporum apparatu. Hoc est quod Lucretius significare voluit his versibus, nempe, eandem pestem etiam pro mutatione temporis anni multum variare: nam quod

*— aliis dederat vitales aëris auras  
Volvere in ore licere, & cœli templa tueri;  
Hoc aliis erat exitio, lethumque parabat.*

Hanc varietatem multoties confirmavit experientia. Scribit Appianus, *de bello Parthico*, in exercitu Antonii, pestilentia gravi laborante, casu præsidium inventum esse, quo plerique servati sunt, qui eo utebantur, idque erat οὐνέλαιον, id est, vinum oleo permixtum; quod tamen aliis in pestibus nihil prodest, imò sæpe nocet. Sic in vehementissima peste anni 1580, observatum est, nulla alia medicamenta profuisse, præter lenientia (teste Thuano, *Hist. 68.*) quæ contra in aliis pestibus semper noxia fuerunt, ac in hac nostrâ certissimam mortem advocarunt. Hujusmodi varietates aliàs quoque sæpius animadversa sunt, quas nonnulli scribunt procedere à diversæ veneni pestilentis natura ac conditione: sed errant: nam veneni pestilentis semper una eademque est conditio, sola intensione vel remissione differt: operationum verò diversitas (ut modo dictum) procedit à diversitate locorum, tempestatum, victus, & temperamentorum corporum.

X. De aliis & cæpis; quare non conveniant in præservazione, dicemus paulo post, *cap. 10. annot. 6.*

XI. Omnia dulcia facile bilefcunt, inflammationem concipiunt, & corrumpuntur, præcipue in adolescentibus, juvenibus; aliisque calidiore natura præditis. Hac de causa Rhazes, *lib. de Peste*, omnia dulcia vitare jubet: & Avicenna, à saccharo abstinere, ac succos refrigerantes, acetosæ, citri, &c. sine saccharo exhibere præcipit. Sic etiam Valescus de Taranta, *lib. 7. Philon. pharmac. cap. 16.* inquit: *Non probantur mellita confectioes, & quæ dulcedine pollent.* Etiam Mercurialis, æstate ab omnibus dulcibus abstinendum esse, docet. Nos quoque in hac peste dulcia maximè nocuisse, & in corporibus, præcipue calidioribus, citissimè in bilem mutata ac corrupta fuisse animadvertimus, imprimis autem mel & mellitâ



mellita omnia; quoniam mellis damnosissimus usus erat: illud enim hoc tempore assumptum, in ventriculis sanorum non minus quam ægrotorum, statim corrumpebatur, bilefcebat, ac malignam qualitatem suscipiebat, vomitum quoque, diarrhoeam, summas anxietates, febrem, aliaque mala inducebat, ita ut illud omnino sugiendum esse, doceret usus, neque ullis medicamentis facile admiscendum, nisi iis quorum alexicaca vis hanc ejus qualitatem planè evincit, qualia sunt, theriaca, mithridatium, diascordium, aliaque similia. Quapropter etiam minimè probandum est consilium Quercetani, aliorumque Medicorum, qui jubent ut apozemata sudorifera ad pestem in hydromelite coquantur, aliaque variae confectioes, loco sacchari, cum melle conficiantur. Notandum etiam, si condita, conservæ, vel qualiacunque fuerint medicamenta, quibus ad pestis tam præservationem, quam curationem utimur, possent sine melle, saccharo, vel alia dulcedine confici, quod longè utiliora forent, cum dulcia hic noceant. Verum multa medicamenta cum melle, saccharo, vel syrupis exactè misceri debent ad meliorem commistionem, & ut integris ac copulatis viribus melius diu conservari possint. Ad hæc, sæpe etiam cogimur dulcedine aliqua gratiam conciliare medicamentis, eaque ad delicatiorum palatum hoc modo aliquantum accommodare, qui alioqui ab illis nimium abhorrent. Sed ego auctor esse velim, ut in quam paucissima fieri potest quantitate dulcia reliquis admisceantur. Sic nos hoc pestis tempore in tabellis (si forte præscribendæ forent) duplo plus pulverum sumebamus, quam ordinariè ad sacchari quantitatem fieri solet; syrupis solis rarissimè utebamur, & si syrupos aliis rebus admiscere necesse foret, non utebamur aliis quam de succo citri, de scordio, & conservæ radicis helenii conditarum.

XII. In ciborum quantitate mediocritatem servandam esse, docet Hippocrates, 2. aphorif. 17. *Ubi nutrimentum ultra naturam capitur, morbum facit.* Præstat igitur tempore pestis paulo infra subsistere, quam ultra progredi, & in omnibus nimias repletiones evitare, ut hoc pacto crudorum excrementorum copia, hincque procedens meatuum obstructio & humorum putredo, declinari possit: nam id maximè tuetur corpus à morbis, si vatuum sit excrementis, optimeque perspirabile.

XIII. Cerevisia ex optima aqua confecta esse debet, nam si per se, vel in se corrupta fuerit aqua, vel injectione seu influxu sordium contagiosarum & pestiferarum infecta, licet coctio ad ejusdem emendationem multum faciat, tamen totam malignitatem penitus absumi, vix certo asseri potest: nam etsi putredo, impuritas, malus sapor, & similia, coctione multum corrigantur, semper tamen venenositas ejus omnino auferri & extinguere nequit. Huic nostræ, fortassis novæ, opinioni statim occurrunt tres objectiones. *Prima*: si pestilens venenum aëri inhærens expurgari & extinguere possit per ignem, (ut in annota-

tionibus præcedentis capitis abunde probatum est) ergo illud etiam fiet per coctionem, si aqua inhæreat. *Secunda*: si quælibet venena per ignem mitigentur, expurgentur, & sæpe etiam extinguantur, ergo etiam venenum pestilens quod aqua immistum est. *Tertia*: si per sudorifera medicamenta una cum sanguinis fero simul expellatur venenum pestilens, ergo per coctionem illud una cum vaporibus ex aqua expellitur. *Respondet ad primam*, non valere consequentiam, quia quod in aëre extinguitur ab igne venenum, non potest semper extingui in aqua, quia scilicet ignis, propter substantiæ contrarietatem, non potest eodem modo agere seu operari in aqua, sicut in aëre, quia aëris exigua & tenuissima humiditas vi ignis statim dissolvitur in igneam fere subtilitatem, & quod ipsi inhæret venenum, illud eadem ignis vi etiam dissolvitur in minimam naturam, atque ita extinguitur. Contrarium autem fit in aqua, cujus crassa & maxima humiditas venenum, aliaque in se contenta, diu defendit ab illa extrema in minimas particulas dissolutione per ignem, ac propterea venenum, cum in minima naturalia non redigatur, retinet suam venenositatis formam, eamque etiam aqua imprimit ac communicat; quæ aqua si usque ad siccitatem excoqueretur, tandem & ultimo non posset non etiam extrema dissolutione extingui venenum, sed talis aquæ consumptio non inservit nostris usibus, ut nec cerevisiæ conficiendæ. *Ad secundum*: non valere consequentiam in genere, nam mercurius vivus ignis siccæ calore facillimè resolvitur ac evanescit, in aqua verò coctus non dissipatur: arsenicum igni injectum exuit venenositatem; in aqua coctum, eandem retinet & aquæ imprimit: venenum canis rabidi, quod combusto cane, aliove rabido animali extinguitur, nulla coctione edothatur, cujus manifestum exemplum refert Lycosthenes, de infido quodam canepone, qui porcum à cane rabido commorsum, statim occidit, coxit, & hospitibus suis comedendum apposuit, qui omnes in rabiem acti, se invicem miserrimè dilaniarunt. Similem quoque historiam refert Fernelius, lib. 2. *Abdit. cap. 14.* de quibusdam venatoribus, qui lupum, ipsis nescientibus rabidum, captum trucidaverant, coxerant, & in varia obsoniorum genera apparaverant, ac comederant, atque omnes rabie correpti fuerunt. Hoc si in veneno rabido factum fuerit, quis idem in pestilenti aliquando fieri dubitet? Non obstat hic quorundam distinctio, qui illam statuunt differentiam inter venenum rabidum & pestilens, quod illud crassius sit, ac crassiori & densiori materiæ inhæreat, ac propterea tardius resolvatur aut dissipetur; hoc verò sit tenuius, acrius, & facile resolvable seu dissipabile. Quam differentiam licet simpliciter non negemus, interim tamen experientia docet in utroque veneno rursus magnam occurrere differentiam, & neque omne venenum rabidum esse lentum, neque omne pestilens adeo subtile ut facile dissipetur, (prius ex copatet, quod sæpe solus canis rabidi halitus, vel tenuis saliva, cuti, imò vestibus solum, adhærens,

rens, alios inficiat: posterius, quod subtile venenum per multos menses fomiti inhærere, in eo-que integris viribus servari non posset) imprimis si aquæ immistum fuerit. Ad hæc, certissima rerum magistra, experientia multoties docuit, venenum pestilens sæpe nulla coctione edomari, expelli, vel extingui; quod historiis ex Julio Alexandrino, Fallopio, & Hercule Saxonia citatis, supra abunde probavimus, *hujus lib. cap. 3. annot. 12. ut & lib. 1. cap. 8. annot. 1. problem. 6. Ad tertiam dico*: non valere consequentiam, propter maximam diversitatem subjecti & operationis. In homine venenum continetur in partibus sentientibus, quæ à veneni injuriis laceffitæ, illud proprio naturali instinctu foras expellunt: in aqua verò venenum continetur in tali re, cui nec vitalis sensus, nec venenum percipiendi, nec discernendi, nec expellendi facultas inest. In homine propellitur, attenuatur, & expellitur venenum vi caloris cordis & corporis, quæ expulsio juvatur per partium sentientium, molestam veneni vellicationem percipientium, irritationem ac contractionem: in aqua verò coquente venenum solummodo commovetur ab igne non vivente, in subiecto mortuo & non sentiente: atque sicut in homine ad veneni expulsionem nihil prodest magnus ac fervidus calor intus accensus, sed nocet; sic quoque in aqua venenata, solus fervor ignis parum aut nihil facit ad veneni extinctionem. Si in homine calor intensus seu fervor faceret ad veneni expulsionem & extinctionem, ergo euphorbium, piper, aliaque calidissima medicamenta forent optima antidota, imò ipse febrilis ardor veneni pestilentis vires infringeret: contrarium tamen docet usus. Roges fortè, quid faciunt igitur sudorifera? Fermentatione quadam humores à veneno, vel alia quacunque causa nonnihil coagulatos seu condensatos dissolvunt & attenuant, viasque & meatus versus peripheriam aperiunt; & dum attenuatos serofos humores eò depellunt, etiam expultricem partium facultatem adjuvant in expellendo veneno: præterea imprimis antidotali sua facultate veneni vires suffocant, tollunt, infringunt. Concludimus ergo, aliquod venenum pestilens, nempe quod densiori seu firmiori substantiæ firmiter immistum est, aquæ inhærens, non facile posse coctione expurgari, expelli, vel extingui. Dico, *aliquod*, & non omne, quia si in sese fuerit tenuissimæ substantiæ, & subiecto tenuissimo inhæserit, instar spiritus cujusdam, coctione citissime dissolvi, dissipari, & expurgari posse, credibile est. His ita se habentibus, sanè alienum non fuerit, suspectas habere illas cerevias quæ conficiuntur in locis peste multum infectis, præcipue illis, in quibus cerevisiæ coctores non ex aliis quam publicis stagnantibus aquis cerevisiam conficiunt, (sicut fit Lugduni Batavorum, Harlemi, Hagæ-Comitis, Delphis, aliisque multis in locis) quæ aquæ ab injectione excrementorum ægrotantium aliarumque rerum infectarum, corruptione cadaverum bestiarum in illis sæpe putrescentium, foetidissimo influvio mul-

tarum latinarum ac cloacarum in illa se exonerantium, omnibus denique, omnium ædium ac platearum putridis, foetidissimis, & infectis sordibus in illas defluentibus, corrumpuntur atque inficiuntur. Profectò si insalubres sint illæ aquæ in quibus linum vel cannabis macerata sunt, (quas Petrus Pena venenatas esse scribit) quanto insalubriores erunt illæ, in quas tanta putridarum, foetidissimarum, & infectarum sordium confluentia est?

XIV. Quamvis nonnulli Medici vinum tempore pestis omnino prohibeant, nos tamen ejusdem moderatum usum laudandum existimamus, imprimis hyeme, & in naturis frigidioribus, ut & vino assuetis. Nam vinum putredines aufert & impedit; præterea alexipharmacam vim habet, ac venenis insigniter resistit, testibus Dioscoride *lib. 5. cap. 11.* & Plinio, *lib. 33. cap. 2.* quo loco hic scribit, illud in peste magnam auxiliandi vim habere. Ad hæc vinum partes principes confortat, vires corroborat, easque conservat, & quod omnium maxime in pestilenti constitutione requiritur, animum exhilarat, tristitiam, metum, terroremque fugat, qui affectus maxime noxii sunt. Si nimius ejus calor metuatur, imprimis æstate, Rhazes illud multa aqua frigida temperare; Cornelius Celsus modo aquam, modo vinum bibere, præcipit. Nos aliquantum succi fructus ribesiorum rubrorum, berberis, aut ceraforum morellorum, vel pomi citrii, aut aurantiorum, cum tantillo sacchari & aquæ rosaceæ eidem admiscemus, vel pomum citrium in taleolos dissectum, eidem imponimus, atque ita omnem nimii caloris suspicionem amputamus. Plutarchus, in *Cæsare*, scribit exercitum Cæsaris horrenda hac lue correptum, in eadem abigenda vini vires egregie persensisse; quippe milites eodem largius hausto; tanti hostis acutissima spicula ita retuderunt, ut pestis brevi tempore planè disparuerit. Sic etiam Toxaris Medicus solo vini odore Athenienses à peste liberasse traditur. Qui has aliasque innumeras vini facultates scire desiderat, illas curiosius descriptas legat apud Canonherium Antverpiensem, *lib. 2. de vini facult. admir.* & apud Lælium Bisciolam, *tom. 2. Horar. Subcisivar. lib. 5. cap. 3.* Videantur adhuc nonnulla de vino infra; *lib. 3. cap. 2. annot. 5.*

XV. Ebrietas, cum cruditates generet, vitales spiritus incendat, omniumque maxime cerebrum & animales spiritus malè afficiat, valde damnosa habenda est; quod Noviomagi in hac peste plurimos suo damno expertos fuisse novimus: idemque se etiam observasse testatur Mercurialis, *de peste cap. 22*: Et Patavii, inquit, & Venetiis vidimus bibaces plurimos extinctos esse, qui existimabant vinis generosis se propulsaturos esse pestem. Verum licet Noviomagi ebrioli multi morerentur, attamen ter quaterve vidi copiosiore vini usu pestem, quæ jam invaserat, propulsatam & extinctam fuisse: qua de re exempla dabimus libro quarto; sed illa pro rarissimis habenda sunt: neque debent hujusmodi paucissima ex-

empla contrariæ quotidianæ experientiæ anteponi.

XVI. Solent Medici tempore pestis prohibere balnea, propterea quod corpora rarefaciant & languida reddant, spiritusque dissolvant: imprimis autem fugere jubent publica balnea, ad quæ omnis generis homines accedunt, & procul dubio etiam multi tales qui ex infectis ædibus produnt, vel infcui aliquem pestilentis contagii fomitem, vestibus aliisve rebus fortè in hærentem, secum ferunt. Hujusmodi tepida balnea cum Noviomagenses non haberent, solebant multi ex consuetudine, æstivo tempore, in stagnis, vel ipso flumine Vahali natæ: quod innumeris malè cessit, idque non sine variis rationibus. *Primo*, quia stagnorum aquæ ob diuturnas siccitates, & intensissimum aëris æstus valde corruptæ, multisque in locis malè olentes erant: fluminis verò aqua infectionis pestilentis suspicione non carebat, propterea quod sursum Germaniam versùs, imò per totam Germaniam usque ad Helvetiam, pleræque urbes ad Rhenum sitæ, unà cum innumeris pagis, eodem tempore gravissima peste infestarentur, quarum omnium fœda illuvies, tam cloacarum, quam latinarum, domuium, & platearum, una cum infectis ac contagiosis sordibus in flumen dies noctesque effluens, ejusdem aquis permiscebatur, atque sic cum illis deorsum ad Noviomagenes, aliasque inferiores civitates descendebat. *Secundò*, quia illi natatores se nudos radiis Solaribus exponunt, quod, teste Rhaze, tempore pestis valde periculosum. *Tertio*, quia sudantes & valde calentes in aquam frigidam profiliunt, ex ea paulo post egressi radiis Solaribus nuda corpora exponunt, ut incalescant, calidi rursus aquis se

immittunt; quæ mutationes admodum damnosæ existunt. Quidquid sit, multoties observavimus illos natatores, statim post natationem de capitis dolore primò conquestos, & intra paucas horas peste correptos fuisse. Germani Medici, præter balnea, etiam merito in pestilenti constitutione jubent fugere calorem hypocauftorum, imprimis publicorum (quæ apud ipsos in frequenti usu sunt) quem multis pestem intulisse, à Platèro observatum est.

XVII. Vestes laneæ crassiores, pelliceæ, aliaque similes, tempore pestis rejiciendæ sunt, propterea quod quælibet infectæ fordes, & contagiosi vapores facilimè iis inhæreant, ac fomitem constituent; quod in vestibus sericeis, tenuibus, & lævibus, aliisque in textu commemoratis, tam facile fieri nequit. Quam noxiæ sint vestes laneæ, sæpe docuit experientia. Mercurialis, *lib. de pest. cap. 22*, scribit, Venetiis peste sæviente, plurimos Medicos extinctos fuisse, eo quod in ægris invisendis, uterentur tunicis pelliceis latissimis. Hanc ob causam putat Follinus, in *Amulet. anton. cap. 8*. suo tempore in urbe Sylva-Ducensi pestem tam immaniter propagatam fuisse per universam plateam Lanificii, ut vix domus intacta relinqueretur. Rationem hujus rei suppeditat Marcellus, *Antid. epid. cap. 24*. *Ut oleum, inquit, ignis, sic nutrimentum hujus veneni est lana: & quidem enutrit hac lana venenum, ut non modò conservet ipsum, sed & augmentet, simulque fortificet*. Hoc certum est, corpora spongiosa & laxa, quale etiam est lana, promptè suscipere, & diu conservare infectos venenatosque vapores, atque hinc laneas vestes tempore pestis rejiciendas esse. Super his videantur quædam *precedente cap. 3. annot. 4.*

## C A P U T V I I.

### *De Somno & vigilia, Motu & quiete, ac animi Pathematibus.*



**A**D præservationem consului omnibus, ut in somno & vigiliis (1.) modum servarent, atque nec illum ultra consuetos naturæ limites extendèrent, nec his præter consuetudinem corpus nimis emaciarent: imprimis autem ut fugerent somnum meridianum, (2.) iis exceptis, qui plus solito vigilaverant, vel à longo tempore tali somno assueti erant. Ad hæc, ut nunquam sub dio, radiis solaribus expositi, vel supra fœnum cubantes (3.) somnum capescerent. Similiter ut corpora moderatè (4.) tantum exercerent, ac majora (5.) exercitia, & graves labores, (6.) quibus corpus vel nimis incalescit, vel delassatur, cane pejus & angue fugerent, omnium verò maximè illi, qui talibus exercitiis vel laboribus non erant assueti, utpote qui ab iis gravius lædebantur, quamvis etiam iis assueti hoc pestis tempore inde non rarò pessimè afficerentur. Præterea ut à Venere (7.) abstinèrent, vel ea saltem moderatè & rarius uterentur, utpote quæ spiritus excalefaciendo & vires resolvendo, hoc tempore corpora ad pestiferam labem suscipiendam citissimè disponebat, præcipuè in non assuetis; quemadmodum id æstivæ plurimorum sponsorum exequiæ hoc tempore plus satis testatæ sunt. Denique

que ut omnes quieto ac tranquillo animo essent, & quoslibet vehementes ac impetuosos animi motus, (8.) atque occasiones ad tales motus, studiosissimè evitarent, imprimis verò iram, metum, & terrorem (9.) qui hoc tempore omnium pessimi ac damnosissimi erant. Ut intrepidi, hilares (10.) & bene contenti viverent, omnemque moerorem ac tristitiam (11.) penitus in exilium ejicerent.

## A N N O T A T I O N E S.

I. **S**omnus & vigilia, (inquit Hippocrates, 2. aphor. 3.) *utraq; si modum excefferint, malum.* Nimius enim somnus caput ac totum corpus aggravat & pituitosis excrementis replet, sensus quoque torpidos reddit; omniaque viscera & membra ad munia sua ignava facit. Immodicæ verò vigiliæ cerebrum exsiccant; spiritus dissipant; coctiones debilitant, cruditates pariunt, totumque corpus labefaciunt. Ac propterea utriusque excessus evitandus est, cum imprimis tempore pestilentis corpus vegetum servare, omnesque morborum occasiones diligenter evitare conveniat.

II. Somnus meridianus, præcipuè insuetus, ut & ille qui sub dio fit, ab omnibus Medicis, tanquam multorum morborum auctor & maximè noxius, semper damnatus fuit. Quod tamen absolute pro generali regula habendum non est, neque omnibus hominibus æqualiter applicari potest: iis enim, qui gravibus laboribus matutinis sunt delassati, vel ratione studiorum, alteriusve cujuscunque causæ, matutino tempore solito maturius surrexerunt, continuisque ac firmis animi intentionibus occupati fuerunt, & circa meridiem animi corporisque actiones nonnihil languidas sentiunt; ad spirituum refectionem aliqua quies necessaria est, & brevis somnus meridianus plurimum conducit. Aliis verò, quorum spiritus non multum dissipantur, & qui quietiores vivunt, somnus meridianus nocet.

III. Supra fœnum cubare ac dormire, sæpissimè comperiti sumus valde exitiosum fuisse, imprimis si fœnum recens foret. Hinc primò capitis dolores ac febres, & tandem brevi post ipsam quoque pestem accessisse; observavimus.

IV. Elegantissimum est illud quod ex Carone citat Aulus Gellius, lib. 11. cap. 2: *Vita*, inquit, *humana prope uti forrum est; si exerceas, conteritur; si non exerceas, tamen rubigo interficit: itidem homines exortendo videmus conterì: si nihil exerceas, inertia atque torpedo plus detrimenti facit, quam exercitatio.* Ab hoc aureo dicto alienum non est illud Fulgentii: *Exercitium est humana vite conservatio, caloris nativi lima, virtutum robur, superfluitatum consumptio, temporis lucrum, juventutis debitum, & senectutis gaudium:* Verum hæc aurea dicta non de aliis quam honestis & temperatis exercitiis, convenienti tempore institutis, intelligenda sunt: quod etiam Aristoteles, 2. Ethicor. docens, inquit: *Exercitium temperatum conservat sanitatem.* Item Avicenna, qui 3. primi sen. cap. 3. ait: *Si homines, debito tempore, moderato exercitio ac labore uterentur, carere possent multis medicamentis.* Nam

hujusmodi exercitationes omnia viscera & membra ad naturales functiones melius peragendas excitant; cum è contra inconsumpta & graviora exercitia totum corpus debilitent & affligant.

V. Cornelius Celsus in pestilentis constitutione imprimis vitare jubet defatigationes seu lassitudines: idque non sine ratione, quia spiritus incendunt ac dissipant, poros externos aperiunt, corpus debilitant, humores aciores ac biliosiores reddunt, & quod omnium pessimum est, crebriores majoresque respirationes efficiunt, atque ita multi aëris impuri & inquinati inspiratione cordis facultatem maximè lædunt. Hinc etiam Hippocrates, lib. de nat. hum. in peste crebras respirationes fugere præcipit: *Verum*, inquit, *cura erit adhibenda, ut quam parçissime spiritus in corpus insuat, sitque maximè familiaris.* Sic etiam Avicenna, 3. primi, doct. 5. cap. 1 scribit: *Pestis tempore illud studendum, ut fugiatur necessitas attrahendi multi aëris, quod optimè fit quiete & otio.*

VI. Durante hac peste sæpius observavimus statim post graves exercitationes & magnas defatigationes, multos peste correptos fuisse; cujus rei eventus tandem adeo innotuit omnibus, ut multi etiam vulgares à gravioribus laboribus abstinerent; quin & rustici, tempore messis fœni, suum fœnum metere & colligere nollent; edocti tristibus aliorum exemplis, qui graviter laborantes statim post pestem correpti fuerant.

VII. Quam ob causam Venus noceat; docuimus lib. 1. cap. 5. annot. 4. Verum sicut nimius Veneris usus corpora debilitando & excalescendo ad pestem disponit, ita quoque ejusdem nimiam abstinentiam illud ipsum facere, nonnulli credunt; inter quos est Cornarius, qui lib. 1. de pest. cap. 13. hanc opinionem ita confirmat: *Ego certè, inquit, affirmare possum, in una urbe, in diversis adibus, & fœminas nuptas, & viduas, & puellas, omnes ad unam pestem correptas & absumptas esse, cum mates magna ex parte fugâ sibi consulissent: nec adhuc scio an alia, quam à viris abstinentia, mortis illarum causa fuisse, putari debeat.* Illud ipsum etiam sentit Alexander Massaria, ut supra dictum, lib. cap. & annot. modo citat.

VIII. Animi emotiones corpora ad pestiferam labem disponere; docuimus lib. 1. cap. 8. in textu, & annot. 9.

IX. Nullus est animi motus qui pestilentis dominii limites longius & citius extendit, quam terror, sive ex consternatione funeris visi, vel hominis infecti occurrentis, vel mali nuncii, vel terribilis imaginationis, alteriusve rei, incutiatur. Hunc solum durante maligna hac constitutione, pestem multis advocasse novimus: idemque se an-

no 1626, in plurimis quoque observasse, refert Sennertus, lib. de peste cap. 1: Memini, inquit, peste correptos fuisse, qui currum illum, quo peste extincti ad sepulturam vehuntur, è longinquo extra urbem conspexerant; alios qui domo inclusi eum non viderunt, sed strepitum saltem ejus audiverunt. Imò etiam nobis relatum est, & ex insomniis de peste nonnullos peste correptos fuisse, qui cum nullo peste infecto conversati erant, & quos certum erat per contagium pestem non hausisse. Sic etiam Euagrius & Nicephorus ex solo aspectu infectarum ædium varios peste infectos fuisse, affirmant. Guido de Chauliaco, 2. doct. apostem. cap. 5. scribit, in peste anni 1348, à solo aspectu ægrotorum plurimos pestilens contagium concepisse. Ex sola imaginatione quorundam peste infectorum historias referunt, Scheunemannus, in Paracels. de peste, cap. 15. Erasmus Hedenus, in quadam Oratione, & Joannes Matthæus, in Cent. quest. 86. Non possum non mirari opinionem Quercetani, in Pest. alex. cap. 2. ubi scribit, per solum visum eodem modo contrahi pestem, sicut à muliere menstruata speculum contrahit maculas, & ab ophthalmico ophthalmia contrahitur. Profectò Quercetanus hic tota errat via, nam visus per se nihil facit ad inductionem pestis, sed qui per hunc sensum incutitur terror, ille est qui inordinato spirituum motu, eorumdemque concentratione circa cor, ad veneni pestilentis contractionem per accidens aliquid facit, ut docuimus lib. 1. cap. 8. Nisi fortè velit Quercetanus, per inordinatum motum spirituum à scædi ophthalmici aspectu inductum, sic etiam per accidens gigni ophthalmiam. Metus igitur & terror, sive visu, sive imaginatione, sive alio quocunque modo inducti, spiritus & humores conturbando, corpora ad pestem facile suscipiendam plurimum disponunt, atque hinc omnibus modis illi animi motus arcendi sunt. In quem finem hac methodo utendum scribit Jacobus Sylvius, lib. de peste. Imprimis verò Deo optimo maximo, inquit, omnis salutis, vitæque bonæ ac beatæ auctori, non modo diebus aut horis, sed singulis diei momentis pia vota facienda sunt, qui tibi puram nullaque vitiorum turpitudine inquinatam mentem inferat, tuumque animum omni suspitione ac metu cujusque imminentis mali, potissimum verò contagionis pestifera apprehensione omni vacuum ac liberum faciat: nil enim aque sanguinem commovet ac conturbat quam metus, fixaque in rem aliquam cogitatio suspitionis plena: nihil quod aque humores ac spiritus corporis putredini reddat obnoxios. Liberabis verò mentem hoc pathemate, si veterem hominem exuas, & novum induas: si tuas omnes cogitationes, studia, actiones, divina voluntati committas, id solum optes

aut fugias quod divini numinis nutus imperabit: denique si tecum reputes id mortem non esse quod mortem existimamus, sed potius commutationem vitæ brevis, fluxilis, ac ærumnosa, in vitam nunquam desitutam, omnisque beatitudinis ac felicitatis dotibus exornatam.

X. Animus præsens & imperterritus minimè omnium afficitur, & audaciores minus à peste infestantur, ac, correpti, minus periclitantur: quod exempla multorum vespillonum, aliorumque qui quaslibet ædes infectas audacter frequentant, sæpius docent. Contraria autem timidis evenire, ut jam diximus, experientia certissimum facit, & utrorumque plurima exempla in hac peste vidimus. Causa dependet à spirituum motu, qui in illis fortis & constans procedit, sine ulla cordis alteratione aut læsione: in his verò maxime inordinatus sit, cum summa cordis alteratione ac debilitatione; cujus debilitatis ratione cor pestilens venenum minus à se dispellere valens, ab eo occupatur.

XI. Mœror, tristitia & timor (quos animi motus Pigræus pabulum & nutrimentum pestis appellat) tantum valent in maligna constitutione, ut iis solis de causis pestes maxima incrementa sumere, multi crediderint: ac propterea quoque Veteres adversus has animi affectiones peculiare alexipharmacum excogitaverunt, nempe Musicam, cujus vi olim multos maximosque morbos sanatos fuisse, referunt. Plutarchus, de Musica, scribit, à Lacedæmoniis gravi pestilentia infestatis, Pythii Apollinis oraculo, Thaletem Crentensem accitum fuisse, eumque Musica grassantem pestem fugasse: cujus Thaletæ etiam mentionem facit Pausanias lib. 1. Sic quoque Homerus, Iliad. 1. Græcos pestem cantu depulisse tradit. Ubi per Musicam & Cantum nihil aliud quam animi lætitiæ & hilaritatem, duos præcipuos pestis hostes, intelligendum esse, plurimi existimant. Præter Musicam, nos aliud mœrorisfugium ac tristitiæ alexipharmacum habemus, nempe vinum, quo tristibus interdum uti licet usque ad hilaritatem, (cavendo tamen ab ebrietate) ut hoc modo curæ & mœrores è corde excutiantur. Tempore itaque pestilenti illud omnibus inculcandum est, ut timorem & tristitiam in totum fugiant, & divini Numinis auxilio ardentibus precibus primum implorato, in Medici sui fidelitate, & alexipharmacorum viribus fiduciam reponant, sicque animo imperterrito ac tranquillo vivant; nam, ut inquit Avicenna, plus interdum prodest ægroti fiducia in Medicum, quam ipsa medicina.

## CAPUT VIII.

## DE PROPHYLAXI CHIRURGICA.

**A**bsoluta diætica prophylaxi, ad Chirurgicam deveniendum est. Duò tantum media ad prævationem à peste subministrat Chirurgia, nempe venæsectiones, & cauteria. Venæsectiones, (1.) quamvis à multis veteribus & neotericis Medicis summè laudatas, nos tanquam valde periculosas & damnosissimas planè rejecimus. Cauteria (2.) verò, seu fonticulos per ea excitatos, summopere approbavimus, & utilissima fuisse observavimus; per eaque in brachiis, vel ut plurimum in cruribus, fonticulos (quos *fontinellas* vulgò vocant) multis fecimus, atque illos toto pestis tempore apertos servavimus, per quos multi superflui, acres, noxii, corrupti, ac foetidi humores paulatim effluerunt. Tali ratione multi præservati sunt, imò vidimus aliquos his præmunitos, qui pestis invasionem sentientes, statim in ipso principio antidotum sudoriferum assumpserunt, atque ita citissimè liberati sunt, natura expellente per fonticulos atrum quendam ac venenatum tabum.

## ANNOTATIONES.

**I.** Multi præclarissimi, tam veteres, quam neoterici Medicinæ proceres, ad prævationem, magnis laudibus extollunt venæsectionem, præcipuè in plethoricis, hancque opinionem plurimis egregiis, & sanè verisimilibus rationibus confirmant; (has brevitate gratia hic præteribimus) quibus non tantum calculum suum adjecit Quercetanus, sed reliquis curiosior existere volens, etiam certum venæsectionis tempus definivit; eamque instituere jubet circa Lunæ quadraturam, sed studiosissimè cavendum esse ait, ne fiat venæsectio cum Lunà Marti, Saturno, vel alii cuidam astro maligno opposita, aut in alio quodam adpectu sinistro collocata est: illud autem tempus observari vult, quo benignis quibusdam Planetis (quales sunt Jupiter & Venus) Luna conjungitur, vel saltem eos benigno respiciat, aut ab iisdem respiciatur adpectu. Verum omne venæsectionis patrociniū evertitur ab experientia: nam in hac peste Noviomagenis, neque prædictorum Medicorum rationes, neque Quercetani scrupulosa temporum observationes, unquam impedire potuerunt, quo minus pestis invasio brevi post venæsectionem sequeretur: semper observavimus venæsectiones, etiam in optimè sanis & plethoricis institutas, fuisse damnosissimas: idque abunde docuerunt tristitia plurimorum; etiam plethoricorum; exempla; qui cum prævationis gratia venam perturbidissimam, statim post peste correpti sunt. Quapropter nos venæsectionem omnibus prohibuimus. Hac in parte nobiscum sentit Jacobus Sylvius, lib. de peste, Phlebotomia, inquit, ad pestem nullo modo conferre videtur, quia exhausto sanguine perspirabile sit corpus, externisque injuriis magis perivium redditur: quin etiam vires sunt debiliores detracto sanguine, qui vita pabulum

& thesaurus est. Sic quoque Liddellius & Riverius tempore pestilenti à venæsectione, etiam in plethoricis, abstinere, & non nisi magna aliqua necessitate urgente (ut plenitudine ad vasa, vel aliqua sanguinis solita evacuatione suppressa) eò devenire jubent. Ratio est, quia exhausto sanguine & viribus imminutis, cor malignam auram minus potenter à se expellit, minusque eam evincit & extinguit, atque hinc ab inspirato maligno aëre pestilens qualitas facilius & gravius ei imprimitur. Hac de re plura videantur lib. 3. cap. 3. annot. 1.

II. Cauteria, seu potius fonticulos iis excitatos, ad prævationem à peste, Nicolaus Florentinus, Jo. Arculanus, Parisinus, Ingrassias, Paræus, Antonius Portus, Nicolaus Massa, Hercules Saxonia, alique plurimi insignes Medici; summopere commendant: quorum fonticulorum insignem utilitatem nos quobque in hac peste multoties vidimus, non solum in euchymis, verum etiam in cacochymis, quos per illa sæpissimè tam insigniter præservatos vidimus; ut nullam à pestilenti infectione nocumentum perceperint. Alexander Massaria, lib. 2. de peste, de cauteriis ita scribit: Illud (scilicet quantum profint cauteria) experientia satis confirmavit: quandoquidem accurata observatione compertum est, non solum apud nos, verum etiam apud Venetos, Patavinos, & alios, ex infinitis pestilentia sublati, aut nullos, aut certe paucos obisse, quibus alicubi cauteria inusta essent. Paulo post addit: Quod quidem præsidii genus non alienum à ratione censendum est, quandoquidem naturam quotidie noxios humores ad eas partes facile & libenter propellere videmus. Guilielmus Fabricius Hildanus, Cent. 4. observat. 23. scribit, anno 1612, in maxima Laufania peste, neminem eorum qui fonticulos in brachiis aut cruribus habebant,



bant, præter unum aut alterum summè cacochymum, peste obisse, ac proinde præsentaneum esse præservativum, tum in aliis, tum in se ipso observasse: quod ipsum rursus confirmat *cent. 6. observat. 86.* Sic etiam Georgius Guarnerus, *lib. de peste, cap. 9.* scribit se affirmare posse, quod anno 1574, peste multos Venetiis interficiente, nullum unquam viderit extinctum qui fontinellam gestasset. Quercetanus, *lib. 2. de peste, cap. 2.* scribit, se multos novisse Chirurgos pestiferorum curationi destinatos, qui sibi cauteriis melius, quam ulla alia cautione, prospexerant. Mercurialis quoque suum de cauteriis seu fonticulis experimentum describit *lib. de peste, cap. 23:* Dicam, inquit: quod ego experientia vidi: possum testari me innumeros hac peste extinctos vidisse, nec unquam vidisse quemquam qui haberet cauterium, præter unum tantum, atque ille erat sacerdos: interrogavi etiam hac de re multos Medicos, qui testati sunt, neminem se vidisse. Quod quidem argumentum esse potest, hoc genus auxilii magnopere conducere: & summa cum ratione, quandoquidem per cauteria, tanquam per cloacas, continuò ichores pravi & putredini obnoxii educuntur. Nos cum Mercuriali, Guarnero, & Hildano, tantum cauteriorum seu fonticulorum encomium adeo audacter exclamare non auderemus; quandoquidem in hac peste non unum, sed plures etiam cum fonticulis mortuos fuisse novimus, licet pauciores. Platerus, *Prax. tract. 2. cap. 2.* scribit, peste anno 1564 Lugduni regnante, monachum quendam non cauteriis aut vesicatoriis, sed alio attractorio usum fuisse nempe perforabat in viris scrotum; & vulneri imponebat radicem hellebori nigri, sicque viros à peste tutos fore pollicebatur: de quo curationis modo vide plura *lib. 3. cap. 12. annot. 2.* Nos durante hac pestilenti constitutione vidimus nonnullos qui antiqua ulcera in cruribus habebant; quæ ipsis

loco fonticulorum inserviebant, cum æquali præservationis favore. Quod ipsum Forestus, *lib. 6. Observat. 15.* refert se quoque observasse in Chirurgo quodam, qui ægrotos in Nosocomio tractabat. Sic in pestilenti constitutione Galenus, *Method. 5. cap. 12.* scribit omnes fere evalisse quibus scatebat corpus ulceribus. Ita quoque Paræus, *lib. 21. cap. 17.* refert, se observasse, à peste minus tentatos fuisse eos qui caneros ulceratos habebant, quibus nares fœda ozæna diffuebant, qui lue Venerea, abscessibus & ulceribus fœdis correpti erant, ut & scrophulosos, elephantiacos, leprosos, scabiosos, omnes denique eos quibus ulcera erant in corpore fistulosa & fluentia. Hunc in finem etiam Alexander Benedictus, *lib. de pest. cap. 9.* tempore pestis scabiem & ulcera curare vetat, ne scilicet vitiosi humores per scabiem evacuari soliti, curata scabie in corpore detineantur, sicque alios morbos inducant, iisque mediantibus corpora ad pestem facilius suscipiendam disponant. Aliud item præceptum, inquit, est inter omnes regulares observationes, ne sanguinis naturale profluvium (puta, menstruorum, hæmorrhoidum in consuetis, &c.) pestis tempore prohibeatur, neque item scabies unguine sanetur, & ulcera corporis impleantur: male enim sibi consulunt qui scabiem curant, nam certissimum est remedium, quo corpus à peste tutissimum redditur. Hic quispiam objicere posset, cum fonticuli tantum evacuent excrementitios & noxios humores, pestilentis autem veneni ingressum in corpus impedire, ejusque virulentiam extinguere nequeant, quomodo ad præservationem conducere possint? Respondendum: quod evacuando corruptos humores, viscerumque integritatem conservando, præservant corpus ab aliis morbis, quibus mediantibus ad pestem disponi posset; ut dicemus proximè sequenti capite, *annot. 1.*

## CAPUT IX.

*De prophylaxi Pharmaceutica: & primò de Purgatione.*

**P**rophylaxis pharmaceutica consistit partim in expurgatione noxiarum superfluitatum, partim in præmunitione corporum adversus venenum pestilens. Cum autem noxiæ superfluitates in corporibus retentæ, variorum morborum causæ existant, per quos morbos corpora præparantur ad pestem, eapropter hic primo dicturi sumus de illarum superfluitatum expurgatione. Tempore pestis in corporum expurgatione (1.) maxima Medici prudentia requiritur, nam impuritates clementer & leniter (2.) subducere, nullis verò catharticis (3.) vehementer proturbare oportet. Quapropter etiam nos in hac peste nullis catharticis usi sumus, ipsa ratione, experientiæ copulatâ, satis docente, per fortiora purgantia humoribus violentius agitatîs, spiritibusque exhaustis atque etiam confusis, corpora ad pestem præparari ac disponi, quemadmodum hac tempestate cathartico- rum assumptione varios hunc crudelissimum tyrannum citissimè ad penetralia sua advocasse vidimus. Si igitur corpora firma occurrerent, in iis quidem alvum liberam, sed non planè fluidam servabamus. Si verò cacochyma forent, eorum cacochymiam corrigere, & paulatim ac clementer subducere annitebamur medicamentis



mentis lenientibus (4.) quibus semper etiam talia quædam admiscebamur, quæ pestilenti malignitati resistere possent. Ad has intentiones pauca nobis in usu erant medicamenta. Nonnullis è massa pilularum Ruffi, duas, tres, quatuorve, pili magnitudinis pilulas semel aut bis in septimana, aliis duas alternis diebus, vel mane, vel vesperi, aliis tantum semel in hebdomada deglutiendas dabamus. Plurimis etiam nostras pilulas magistrales antipestilentiales simili modo exhibuimus, quarum hæc est descriptio:

℞. *Radicum petastidis,*  
*carlinæ,*  
*dictamni,*  
*angelicæ,*  
*helenii, ana unc. f.*  
*gentianæ drach. j. f.*  
*rhabarbari opt. unc. j. f.*  
*agarici albißimi unc. f.*

*herbar. scordii,*  
*centaurii minor.*  
*ruthæ, ana unc. f.*  
*cardui bened. drach. vj.*  
*florum stæchados drach. j. f.*  
*sem. citri,*  
*aurantiorum,*  
*zedoariæ, ana drach. j.*

Ex his omnibus fiat pulvis grossus, qui maceretur per biduum vel triduum in vini albi lib. ij. f. vel iij. deinde coquatur per horæ quadrantem, fiatque colatura cum forti expressione in torculari, quæ colatura coletur rursus per chartam emporeticam seu bibulam rariorem. In hac colatura tunc dissolve,

*aloës optimæ unc. iij. f.*  
*myrrhæ claræ in guttis drach. iij. f.*

Ac in scutellâ porcelana fiat evaporatio humiditatis, usque dum massa pilularis fieri possit, e qua formentur pilulæ, quas tempore pestis utilissimas esse comperti sumus.

Multis etiam bis terve in septimana vini aloëtici (5.) nostri haustum matutino tempore dabamus, quod tali modo conficiebatur:

℞. *Radic. angelicæ,*  
*helenii,*  
*petastidis,*  
*dictamni,*

*aloës lucidæ scrup. vj. f.*  
*herb. cardui ben. M. f.*  
*centaurii minoris p. ij.*  
*absinthii p. j.*

*ortorum aurantium ana drach. j.*

Conscindantur minutim, & ex his concinnetur puppa, suspendenda in vini albi tenuis Rhenani vel Gallici lib. vj. in quo vino puppa illa remaneat usque dum totum epotum fuerit.

Hujus vini quatuor uncizæ assumptæ, alvum semel, bis, vel ter clementer subducunt. Ab illo tamen & ab aliis amaris abstinebamur in iis, quos hæmorrhoides affligebant, nec non in mulieribus gravidis, quibus potius rhabarbari & agarici usum commendabamus. Paucissimis aliis medicamentis purgantibus ad præsertionem utebamur.

## A N N O T A T I O N E S.

I. **G**raviter nobis errare videntur illi, qui venæsectionibus & purgationibus identidem reiteratis, immunitatem à peste audacter pollicentur; cum his artibus solummodo corpora ab intrinseca putredine vendicent; non autem à peste, quæ pura pariter atque impura corpora æqualiter invadit; eo tantum facto discrimine, quod impura citius quam pura, levi aliqua de causa, febres aliosve morbos putridos non pestilentes concipiant, qui morbi, spirituum & humorum concordiam interrompendo,

corpora ad pestem citius suscipiendam disponunt: præterea quod pestis in corporibus cacochymis graviore putredine aliaque pejora symptomata inducat, quam in puris: denique, quod puris corporibus metuenda sit pestis ab occulta dispositionis aptitudine quam in se habent; cacochymis verò & ab eadem aptitudine quam in se habent; & præterea ab illa aptitudine, quam, mediante alio aliquo invadente morbo, habere seu nancisci possunt. Quapropter in præsertione optimum quidem est, siue victu, siue medicamen-

tis, corpora pura conservare, sed in illa puritate ac purificantibus medicamentis veram, totam, certamque pestis prophylaxin constituere, nec ratio, nec experientia patitur. Adde, quod tempore pestilenti illa corporum puritas non sine maximo periculo per venæsectiones & medicamenta purgantia, imprimis cathartica, sæpius repetita, acquiratur, ut latius docebimus, lib. 3. in annot. cap. 3. & 4.

II. In constitutione pestilenti corpus non multum purgandum esse, docet Cornelius Celsus lib. 1. cap. 10. *Neque movenda est (inquit) alvus, atque etiam, si per se mora fuerit, comprimenda est.* Quia tali tempore humores valde proclives sunt ad fluxum, & si moveantur, facillime damnosissimum alvi fluxum inducunt.

III. Medicamenta cathartica & fortiter purgantia, cum veneno pestilenti non resistent, neque ejus introitum in corpus prohibeant, neque illud, cum ingressum est, foras proturbare queant, neque etiam cordis & insiti caloris robur taceantur; tempore pestilenti prorsus fugienda sunt. Nam præterquam quod prædictæ virtutes catharticas concessæ non sint, & quod pleraque nonnihil venenatæ qualitatis participant, etiam pestilentem perniciem, quæ fortè circa ambitum corporis innoxie adhuc hæret, ad præcordia citissime, maximo cum damno, advocant & protrahunt. Adde, quod multa etiam frugi materiam cum inutili eripiant, spiritus dissipent ac conturbent, vires deiciant, & corporis harmoniam dissolvant.

IV. Non quælibet mitia purgantia conveniunt in peste, sed illa præcipue quæ putredini fortiter resistent, viscera roborant, eaque ab internis obstructionibus liberant, ac simul etiam proprietate quadam venenatæ pestilenti malignitati resistent. Tale medicamentum est aloë, præcipue lota cum succo rosarum. Tales etiam sunt tot seculorum experientiis probatæ pilulæ Ruffi (sic nominatæ ab auctore Ruffo: ab ingredientium verò numero, *pilula de tribus*: à communi usu, *pilula communes*) quas ipsemet Ruffus Ephesus in peste accommodatissimas fuisse comperit, hancque earum descriptionem posteris reliquit:

Rec. Aloës, ammoniaci thymiamatis, ana part. ij. myrrha, part. j.  
Misceantur cum vino odorato

Illam compositionem Arabes sequenti modo immutarunt, & meliorem reddiderunt, quos hac in parte plerique hodierni Medici sequuntur:

Rec. Aloës, part. iij. myrrha, part. ij. croci, part. j.  
Cum vino odorato fiat massa.

Nos quoque illa, hoc modo composita, massa utimur, quamvis istam compositionem varii adhuc variis modis immutaverint, addendo vel ammoniacum, vel mastichen, vel cinnamomum,

vel alia quædam, pro singulorum diversis intentionibus. Tales sunt etiam pilulæ nostræ antipestilentiales in textu commemoratæ, quarum in hac peste maximas virtutes ipsa experientia satis demonstravit. Tales sunt etiam pilulæ Alberti, Ducis Bavariz, à Quercetano in sua Pharmacopæa hoc modo descriptæ:

Rec. Croci, myrrha, camphora, cornu cervi, spodii, ana drach. j. ligni aloës, been candidi, ana unc. s. terra sigillata, drach. ij. florum sulphuris, drach. j. corticum & seminum citri, gariophyllorum, ana scrup. j. ambra, five succini flavi, scrup. j.  
Fragmentorum hyacinthi,  
fragarum odorum,  
granatorum bene præparatorum,  
ana scrup. s.  
agarici electi, rhabarbari optimi, ana unc. s. aloës è vesica, ad pondus omnium, cum syrupo aut succo limonum, fiat massa pilularis.  
Dosis drach. s. paulo ante cibum.

Tales sunt etiam hæ pilulæ pestilenciales Cratonis:

Rec. Aloës rosata unc. j. myrrha, croci, ana unc. s. agarici trochiscati drach. ij. rhabarbari electi, drach. j. boli Armenæ, scrup. ij. ligni aloës, dictamni albi, margaritarum præparatar. ana scrup. j.  
Cum succo limonum formentur pilula parva. Dosis drach. j. singulis septimanis.

Sunt qui has pilulas laudant:

Rec. Myrrha, camphora, croci, ana drach. j. rad. angelica,  
gentiana,  
vincetoxici,  
florum sulphuris, ana scrup. ij. corticum ac seminum citri, Zingiberis albi, xyloaloes, ana scrup. j. agarici electi, rhabarbari optimi, ana drach. iij. diagridii, drach. j. aloës unc. s. olei stillatitii angelica scrup. j. syrupi de scordio, q. s.  
Fiat massa pilularis.

Chymici in hoc casu admodum commendant flores rhabarbari sulphuratos, quorum talis est compositio:

Rec. Extracti rhabarbari ad duritiem & friabilem fere ariditatem exsiccati, unc. j. florum sulphuris ter sublimatorum unc. ij. olei cinnamomi, scrup. j. olei macis, scrup. s. invicem optimè mista indantur sucurbita vitrea, impostoque alembico cæco, & janctaris undique probe oclusis, lento igne sublimantur. Quod peracta sublimatione in altum ascenderit, denuo cum reliqua materia in fundo residua misceatur, & fiat de novo secunda vice subli-

*sublimatio, eademque etiam tertio repetatur, & sic non vulgare medicamentum leniter laxans, omnemque putredinem coercens obtinebis. Dosis in adultioribus scrup. j. ad gr. xv. in junioribus gr. viij vel ix.*

Qui plura leniter purgantia in peste convenientia scire volet, legat Scriptores Medicos, qui magnam eorundem copiam describunt: nos in nostra praxi paucioribus usu probatis acquiescere potius solemus, quam cum magna quasi eruditionis ostentatione in incertum per multa divagari.

V. Mirum est tam parvum aloës pondus tantæ vini quantitati purgativam aliquam vim conferre posse, attamen millies comperi, si aliquantum cardui benedicti, centaurii minoris, & absinthii, cum aloës drachm. ij. aut drach. ij. s. indatur vini lib. viij. istius vini unicum haustum non

minus purgare, quam si aloës in substantia drach. s. assumatur. Causam adscribendam arbitramur leptomeriæ substantiæ vini, qua aloës purgativa qualitas facillime ad viscera penetrat. Palmarius, lib. de peste, cap. 13. hujusmodi vinum enulatum ad præservationem præscribit.

Rec. rad. helenii siccatum, ʒ ss.

diſſamni,

tormentilla,

gentiana, ana ʒij.

folior. siccor. mentha,

absinthii vulgaris,

rutha, ana p. i.

vini albi optimi lib. vi.

ponantur omnia in phiala, quæ soli exponantur, aut loco calido asservetur dies sex ante usum. Dosis ʒi ss. aut ʒj. mane.

## CAPUT X.

## DE ANTIDOTIS INTERNIS.

**P**Ræmuniuntur corpora adversus veneni pestilentis impetum per medicamenta, vel interna, vel externa. Interna (de quibus hoc capite agemus) sunt antidota (1.) seu alexipharmaca, (2.) quæ corpora in naturali statu conservant, iisque occultam quandam qualitatem imprimunt, quæ totaliter contraria est, & è directo repugnat veneno pestilenti. Hæc autem magis experientiâ, quam ratione inventa fuerunt, & multa variaque sunt, tam simplicia, quam composita: quibus nos ad præservationem tantum pauca (3.) eaque selectiora, certiora, & experientia comprobata, in usu habuimus. Inter simplicia (quorum seriem describimus lib. 3. cap. 5.) imprimis duo commendavimus: Primum erat tabacum, (4.) nempe illius fumus per tubulum seu fistulam ore attractus, & post paucam retentionem inde rursus dimissus, quemadmodum ordinariè à fumisuctoribus sumi solet. Illius usum in hac peste, tam in meipso, quam in plurimis aliis, insigniter profuisse observavimus. Alterum erat radix helenii (5.) vel sicca masticata, vel in pulvere sumpta, vel potius saccharo condita: quas radices ita conditas plurimis solas ad præservationem præscripsimus, easque semper maximi fecimus, utpote quas solas animadvertimus plus profuisse, quam plurima alia medicamenta magno sumptu & labore præparata. Illas autem acriores eligebamus, non tam ad palatum & saporis gratiam, quam ad maiorem utilitatem conditas: nam ad gustum delicatiorum præparatæ, optima earum vis longa maceratione & coctione sic extrahitur & dissipatur, ut tandem vix alium quam sacchari saporem retineant. Harum autem radicum conditarum non unum frustulum, ut vulgò solent, sed duo, tria, quatuorve matutino tempore sumere suasimus. Præter hæc duo primaria simplicia, pauperioribus radices angelicæ masticandas, vel pulverem cardui benedicti, ejusdemve decoctum assumendum; delicatioribus vero cortices aurantium vel citri conditos comedendos, vel aliquot guttulas olei juniperi cum paulillo vini bibendas, vel ipsum rob juniperinum ad nucis moscatæ quantitatem, edendum dedimus. Pluribus simplicibus usi non sumus, cum hæc pauca nobis viderentur sufficere, & utiliora esse reliquis. Multi vulgares hoc tempore allium (6.) crudum masticabant & comedebant, nec non etiam pani affricabant, & edulis incoquebant, idque tanti faciebant, ut eo solo se optimè præservari posse crederent: alii urinam (7.) propriam matutino tempore recenter mictam bibeant, non tantum ad præservationem, sed eandem quoque pestem jam correptis exhibebant ad curationem. Verum nos tam allii, quam urinæ usum, ut inutilem,

sordidum, ac damnosum, improbavimus. Non pauci etiam aquas vitæ dictas quotidie ad præservationem mane sumebant, in quarum nimio excessu, sub præservationis prætextu instituto, sæpissime graviter peccabatur, atque ea ratione aquæ vitæ multis fiebant aquæ mortis. Composita præservativa varia confecimus. Multis cerevisiam quandam medicatam præscripsimus, de qua bis terve de die haustum bibebant, vel eadem, si vellent, pro potu ordinario utebantur, eamque summis laudibus ubique extollebant, eo quod non esset valde ingrati saporis, & si quid in corpore latebat malignitatis, illud ad cutem propelleret: formula (8.) hæc erat:

- ℞. *Radicum petasitidis, dictamni, ana unc. j. corticum aurantium sicc. rad. ostrutii, angelicæ, ana unc. iij. f. herb. absinthii unc. j. f. centaurii minoris unc. j. cardui ben. unc. iij. conscindantur minutim, & in sacculo setaceo fiat puppa, suspendenda in integro vase (mensuræ nostratis) cerevisiæ melioris.*

Similiter etiam matutino tempore, præcipuè aëre frigidiore existente, in vino assuetis approbavimus haustum vini absinthitis (9.) communis, nostratibus familiaris, quod cum puppa ex cardui benedicti, absinthii, & centaurii minoris, ana part. æq. adjectis baccis juniperi, confecta, & in vino tenui subacidulo suspensa, parari solet. Nonnullis vinum medicatum præservans (10.) sequenti modo præscripsimus:

- ℞. *Radic. helenii sicc. unc. j. rad. angelicæ, dictamni, ostrutii, cortic. aurantium, & citri sicc. ana unc. f. rad. gentianæ drach. j. herb. cardui ben. unc. f. centaurii minoris, absinthii, ana drach. ij. ex his consciis & nonnihil conquassatis fiat puppa in sacculo setaceo, suspendenda in vini albi tenuis lib. xx.*

Quantum ad alia composita, etsi Medici ut plurimum in pestilenti constitutione multis variisque antidotis utantur, in forma electuorum, conditorum, pulverum, tabellarum, syruporum, &c. (quorum sæpe multa ad vanam potius scientiæ ostentationem, quam ad aliorum utilitatem commendant) nos tamen pauca (11.) solummodo in usu habuimus. Quolibet anni tempore commendavimus mithridatium minus (12.) sequenti modo compositum:

- ℞. *Foliorum ruthe viridis, ficuum, nucum juglandium, ana lib. j. Contundantur singula seorsim fortiter cum pistillo ligneo, in mortario lapideo: postea in eodem mortario bene simul misceantur, adjiciendo salis communis unc. j. & syrupi de succo limonum q. s. ad faciendam electuarii consistentiam.*

Præter hoc etiam alia, sequentibus fere formulis, præscripsimus:

- ℞. *Pulveris liberantis scrup. iij. rad. helenii condit. cort. aurantium cond. ana drach. vj. diascordii Fracastorii, drach. iij. olei juniperi scrup. j. syrupi limonum q. s. misce, fiat conditum.*

- ℞. *Theriace Androm. Mithridatii Democ. ana drach. j. f. diascordii Fracast. unc. f. cortic. aurantium condit. rob ribesiorum rubr. ana drach. vj. olei succini flavi scrup. f. syrupi de scordio q. s. misce, fiat electuarium.*

- ℞. *Pulveris Bezoartici Renodei, drach. j. f. florum sulphuris drach. j. conservæ absinthii drach. iij. radic. helenii condit. unc. j. mithridatii minoris, diascordii Fracastorii, ana unc. f. syrupi de succo citri q. s. misce, fiat electuarium. (13.)*

- ℞. *Conservæ acetosæ, rosarum rubr. corticum aurantium condit. rob ribesiorum rubr. rob juniperini, ana unc. f. pulveris liberantis drach. j. f. syrupi limonum q. s. misce, fiat conditum.* Pulve-

Pulveres cornu cervi, terræ sigillatæ, croci, aliosque innumeros admiscere necesse non erat, quia in confectione liberante, pulvere bezoartico, diascordio, &c. hæc omnia ordine maximè laudabili conjunctim habentur. De his & similibus conditis assumebatur semel aut bis de die frustum magnitudinis nucis moscatæ. Vel etiam una aut altera de his tabellis: (14.)

- ℞. *Pulveris bezoartici drach. j. liberantis drach. f. rad. helenii sicc. angelicæ, petasitidis, ana scrup. j. f. florum sulphuris ter sublimatorum drach. j. fiat pulvis subtilissimus, e quo cum sacchari albi, aqua cardui benedicti dissoluti unc. iiij. fiant f. art. tabellæ.*

Hyeme quoque non paucis folius theriacæ (15.) Andromachi, vel Mithridatii Democ. æstate verò diascordii Fracastorii parvam particulam manè dedimus. In forma liquida etiam pauciora exhibuimus:

- ℞. *Aquæ nostræ theriacalis unc. iiij. syrupi limonum unc. j. olei vitrioli vel sulphuris scrup. f. misceantur. Dosis, bis de die cochleare unum aut alterum.* (16.)

- ℞. *Aquæ nostræ theriacalis unc. iiij. succi citri recentis, syrupi de scordio, ana unc. j. misceantur.*

Pauperioribus etiam consulimus ut quotidie mane unum, duo, vel tria cochlearia aceti vini optimi ac fortis (17.) biberent, vel sine, vel cum paucillis granulis salis (18.) supermasticando frustulum panis: atque illud in hac peste animadvertimus fuisse unum ex optimis præservativis, dummodo eo non uterentur asthmatici, tussiculosi, a liive qui aliquod pectoris aut pulmonum vitium habebant. Nonnullis etiam acetum bezoarticum commendavimus, hoc modo confectum:

- ℞. *Radicum angelicæ, carlinæ, petasitidis, helenii, dictamni, ana unc. f. zedoariæ drach. ij. herbarum cardui ben. scordii, ana drach. vj. cent aurii minoris, ruthe, ana unc. f. florum stæchados drach. ij. sem. cardui ben. citri, ana drach. j. bac. juniperi drach. iiij. fiat pulvis grossus, cui affunde aceti fortissimi lib. v. vel vj. Stent simul in loco radiis solaribus exposito per quatuordecim vel plures dies, postea colentur cum forti expressione. Eidem aceto, si velis, eundem pulverem adhuc semel de novo infundere poteris, tuncque erit multo efficacius.*

Hæc & similia ad sanorum præservationem in hac peste præscripsimus, habita semper ratione ætatis, temperamentis, sexus, & anni temporis, pro quorum diversitate etiam medicamenta variavimus, & modo frigidiora, modo calidiora, modo astringentia, &c. modo gravioris, modo minus grati saporis, dedimus. Verum hoc tempore invenimus etiam nonnullos adeo nauleabundos & a medicamentis abhorrentes, ut talibus alexipharmacis quotidie uti non possent. His consulimus ut tantum singulis quinque vel septem diebus semel matutino tempore, assumptâ theriacâ cum aqua nostrâ theriacali, aliore sudorifero, in lecto sudores clementer promoverent (19.) & post illos aliquot horis se domi continerent, nec ante prandium se rursus aëri committerent: atque hoc modo nonnulli etiam præservati fuerunt, licet minus tuto quam alii qui quotidie antedone utebantur.

## ANNOTATIONES.

I. **A** Cerrimè disputatur inter Medicos, an detur in rerum natura certum aliquod specificum medicamentum, quod propria specifica qualitate venepo pestilenti ita repugnet, ut, accedente Divini Numinis favore,

omnium cujuscunque conditionis hominum corpora adversus tanti hostis insidias præmuat, atque etiam pestilens venenum, quod corpus jam ingressum est, extinguere vel expellere possit? Multi statuerunt Deum Opt. Max. nullas impo-

bos immittere, quin etiam, secundam immensam suam bonitatem, remedia adversus eosdem concedat; atque ita quoque plurima insignia adversus pestem medicamenta à Deo creata & data esse; idque manifestum esse ex Medicorum praxi, qui remedium ope multos à peste præservant, & plurimos infectos curant. Huic opinioni quilibet facile suffragium adderet, si; ad illius confirmationem, comitata esset descriptione istius specifici antidoti; aut si unquam scriptum, lectum, vel auditum fuisset, unum saltem mortalium, qui sunt, quique fuerunt, tale specificum pestis alexicacum invenisse, vel scivisse, vel si illi ipsi dictæ opinionis patroni se tale antidotum scire gloriarentur. Quod cum non possint, cadit eorum causa, & melius fecissent, si cum Cratone, Cunrado Gesnero, Scheunemanno, Rudolpho Goclenio, aliisque multis Medicis, simpliciter dixissent, verum pestis antidotum in manu Dei esse, & cum Francisco Ulmo, pestis quidem exitum certum esse, remedium tamen nullum inveniri quod certo servare possit; & licet quædam fortasse juvent, incerta tamen esse omnia. Si quis meam opinionem roget, dicam cum Julio Palmario, aliquod certum veneni pestilentis antidotum creatum quidem esse, sed illud hæcenus in Naturæ sinu occultum latuisse. Causa quod latuerit, duplex est. 1. Quod pestis sit inter pœnas supernaturaliter immisas, quibus hominum peccata singulariter puniuntur, ac propterea non voluit Deus, ut adversus hanc plagam homines invenirent specificum illud antidotum, sed ut ad pœnitentiam & unius Dei auxilium revocarentur, idque specificum ab illo solo peterent. 2. Quod Medici hæcenus veram essentiam seu naturam pestilentis veneni non cognoverint: quæ cognitionis ignorantia inde promanavit, quod hæcenus omnes suo naturali ingenio morbi supernaturalis essentiam perscrutari & cognoscere voluerint, cuius notitiam ab ipso Deo, vero Medicinæ fonte, petere debuissent; sed maluerunt, Gentilium vestigiis insistentes, eorumque sapientiæ ac suæ propriæ humanæ scientiæ nimium confidentes, suo ipsorum ingenio illam inquirere & percipere, quam cum propriæ ignorantie confessione ad Deum confugere, & ab illo Divini morbi naturam & curationem ediscere; ac propterea in sua cœcitate adhuc magis occæcati sunt: nec quempiam etiam maximorum & doctissimorum Philosophorum aut Medicorum hæcenus invenias, qui sibi ipsi, nedum aliis, hac in re satisfacere possit. Hinc factum est, quod Medici, nec certam præsertionem, nec curationem pestis hæcenus sciverint, sed generalem venenorum cognitionem habentes, in incerto multa variaque antidota simul miscuerint, (liquet in theriaca aliisque innumeris compositionibus) ea spe, aliquod inter tam multa casu immixtum iri quod pestem sanet: hinc quoque factum, ut, ex multis tentatis, interdum aliqua compositio casu inventa sit, quæ in variis ægris felicem effectum edit; sed quidam tunc illi compositioni speciatim insit, quod

peculiari vi pestilens venenum extinguit, & quidnam etiam insit quod illum optatum effectum in omnibus fieri impediat, illud est quod ignoratur. Attamen multa egregia non contemnenda auxilia contra pestem inventa sunt, quæ licet incerta existant, præstat tamen in desperato morbo, cum spe salutis, uti incerto aliquo remedio, cuius felices successus multoties apparuerunt, quam nullo, & sic ægrum certæ morti relinquere. Hanc questionem etiam latius examinant, Untzerus, lib. 2. de pest. cap. 7. & Sennertus, in Paralipom. ad lib. 5. de febr.

II. Alexipharmaca antipestilentia licet omnino certa non sint, inter multa tamen aliqua esse quæ pestilenti malignitati resistunt, docet experientia, etsi quænam illa speciatim sint, & qua vi illud faciant, adhuc ignoretur: (hic ridendos censemus eos qui hoc occultum jam manifestum reddere, & per minimas particulas flexiles, obtusas, rotundas, &c. quibus aculeatæ ac pungentes veneni particule retunduntur, involvuntur, atque implicantur, explicare nituntur; dum enim ingenioso figmento aliquid dicere videntur, nihil dicunt quod demonstratione probari possit; nec quæ hominibus velare voluit secreta Deus, acutissimis speculationibus satis patefaciunt, vel unquam patefacere poterunt.) Interim tamen illud compertum est, præter antidota non dari alia medicamenta, quæ majus subsidium adversus hujus insensibilissimi tyranni impetum promittunt. Hinc etiam Sennertus, lib. 4. de febr. cap. 5. inquit: *Hoc quisque sibi persuasum habeat, post Deum Opt. Max. à nulla re quempiam sibi majorem immunitatem à peste polliceri posse, quam ab alexipharmacis; ea ipsa nimirum quæ pestilentiam curant, ab ea quoque præservant.* Non tantum enim occulta quadam proprietate venenis resistunt, verum etiam dispositiones hominum iis utentium; occulta vi ita immutant, & adversus quælibet venena præmuniunt, ut à nulla venenorum vi affici queant. Exemplo fuit Mithridates, Pontirex, qui, teste Plinio, lib. 15. cap. 2. ob continuum antidotorum usum, talem dispositionem nactus est, ut tandem à fortissimis venenis offendi non potuerit.

III. Nos in hac peste paucioribus, & experientia maximè probatis, uti fuimus alexipharmacis, flocci facientes multa multorum arrogantium Medicorum inania secreta, & nescio quæ non abstrusa præsidia, quibus, tanquam è deorum concilio prolatis, nimis temere gloriantur se pestis aculeos deflectere & retundere posse; haud secus ac si in manibus eorum esset altissimi Dei iram suis medicamentis sedare & consopire, eamque his quasi fasciis & funibus ita constringere, ut plane impotens reddatur. O superbam vanitatem! O inanem arrogantiam! Sanè frivolum est in populari morbo, ubique obvio, recurrere ad remedia abstrusa & vix parabilia: stultum est vixgente peste totam regionem alere velle carnis ciborum, vel essentis pretiosorum lapidum, vel auro potabili, aliisque similibus. Cuncta hæc ignaram detegunt arrogantiam, nullam verò solidam

solidam sapientiam indicant. Quapropter nos in hac peste irridebamus magnos illos jactatores, imprimis chymicos, nil nisi meras tincturas, essentias, secreta, & nescio quæ non mytheria crepantes, qui splendidissimis promissionibus omnium animos occæcabant, sicque plurimos turpiter seducebant, & non aliorum solummodo, sed etiam suam ipforum spem plerumque miserè illudebant, quia vix unquam eventus aureis horum Thrasonum promissionibus respondebat: imò vidi quorundam horum gloriatorum vanam ac superbam arrogantiam, non obstantibus validissimis suorum secretorum propugnaculis, à pestilentis veneni levioribus insultibus facile suppressam fuisse, atque illos qui alios certò servare promiserant, se ipsos servare non potuisse.

I V. Jacobus Primerofius, *lib. 4. Error. Medic. cap. 35.* non credit tabacum adversus venenum pestilens quidquam valere. Sic etiam hodie multos novimus, haud parvi nominis, Medicos, qui in peste tabaci usum valde detestantur, & summo opere improbant, propterea quod nullum è tabaco commodum se agnoscere posse dicant, atque proinde alia potius præservativa, occultâ qualitate occulto morbo resistentia, danda esse judicant. Verum non quid hi dicant, sed quibus rationibus eorum sermones innitantur, videndum est. Nihil enim absurdius, quam quod tabacum incusantes, ad proprias ignorantias confugiant; & quia ejus vires ipsis incognitæ sunt; inde turpiter concludunt, nullum ex ejus usu commodum sequi posse; haud secus ac si herbarum vires ab eorum scientia vel cognitione procederent, eorumque ignorantia eadem suis viribus spoliaret. Sed aliter hanc rem examinare necesse est. Pestem à veneno oriri, unanimiter sentiunt omnes Medici, cui veneno magna plerumquæ & maligna putredo adjungitur. Tabacum autem peculiari specifica qualitate venenis (ut testantur Monardus, Dodonæus, & alii) omnique putredini ac corruptioni resistit, deterget, attenuat, siccatur, dolores sedat, & validè discutit: quæ ejus facultates oculis conspicuæ sunt, si applicetur antiquis putridis ulceribus, vel carbunculis, vel tumoribus externis, vel partibus scabiosis; eademque etiam manifestè apparent, si ad affectus internos tabacum foris applicetur: nam ejus folia capiti imposita cephalalgia medentur & dolores sedant (nempe discutiendo vapores & humores acres, pravos, superfluos) arthriticos quoque dolores applicata mitigant, &c. Dictæ autem facultates seu vires ad præservationem à peste plurimum conducunt, neque propterea, quod occultæ non sunt, pro malis haberi debent; præstat enim cognitæ qualitatibus certius huic morbo resistere, quam occultis per incertum fluctuare. Quærat aliquis, anne quoque fumus per tubulum seu fistulam ore attractus, & inde rursus emissus, eadem illa in corporibus nostris operetur? Respondeo, quantum ad affectus internos, fumum tali modo haustum adhuc melius operari. Primò enim, discutit in cerebro quoscunque va-

pores noxios, humoresque excrementitios ac superfluos educit. Secundò, odor & qualitas tabaci, cum parte vaporum, qui cum inspiratione anhelitus os transeuntis necessario pulmonibus & pectori communicatur, impedit ne aliqua in pectore generetur corruptio, nam detergendo, attenuando, & discutiendo, pulmones à saburra & malis vaporibus, excrementitiisque humoribus liberat, & sanguini per pulmonem ad sinistram cordis sinum transeunti, qualitatem suam præservativam imprimit. Denique eodem quoque modo operatur in ventriculo aliisque visceribus, quibus hæc tabaci virtutes communicantur per potum qui superbibitur, qui fumos & vapores toti ori inhærentes abluat & deorsum transfert, ut & per salivam, quæ hoc fumo imbuta identidem deglutitur, atque ad inferiores partes descendit, quas absterget, in iisque omnem corruptionem, putredinem, & obstructionem impedit. His jam dictis adhuc duo alia tabaci commoda in pestilenti constitutione accedunt. Primum, quod illi qui tabacum sumpserunt, ob adhærentem continuum ejus odorem, vix ullos alios noxios foetores percipere possint, à quibus alioqui homines valde exterreri solent. Alterum, quod odor cum qualitate tabaci ori inhærens, in transitu ita corrigat aërem inspiratum, ut interiora viscera nullo damno afficere queat. Prædictas rationes confirmat experientia, quæ in nostra aliisque pestibus satis docuit, plurimos solius tabaci usu à maligna labe fuisse præservatos; imò nonnullos pestem quæ jam invaserat, in ipso principio solius tabaci usu fugasse: (hujus exemplum videatur *lib. 4. Histor. 17.*) Ita ut ratione & experientia concludendum sit, tabaci fumum, hodierno modo per fistulam haustum, ad præservationem à peste optimum esse alexicum. Dico, *sumam*, nam tabacum in substantia, decoctione, vel infusione sumptum, non est æque conveniens, cum, tali modo datum, corpus nimium conturbet; quamvis etiam isto modo pestem intra paucas horas sanatam viderim, cujus exemplum videatur *lib. 4. Histor. 40.* Verum circa hujus summi usum quatuor notanda occurrunt. 1. Quod non alio quam optimo tabaco sit utendum, ex foliis satis maturis & minimè putridis contortum. 2. Quod illi qui nimis siccis habent pulmones, eundem ferre nequeant, cum eosdem adhuc magis exsiccet. 3. Quod tabaco utentibus abstinendum sit ab aquis vitæ & spiritu vini, nam hæc simul non conveniunt, sed viscera debilitant, & imprimis pulmones nimia exsiccatione lædunt, atque sic aliquos; his simul uti consuetos, asthma (ita Henrico Zasio & Joanni ab Hervelt evenit, quibus pulmones post mortem adeo exsiccati inventi sunt, ut amplius aperti nequeunt, suos possessores suffocaverint) aliquos phthisi, (sic Isaaco à Langevelt, post venam in pulmone ruptam, ulcus, phthisis, ac denique mors successit) hac sola de causa interemptos vidimus. 4. Quod in usu hujus summi unusquisque se ipsum noscere, atque etiam modum servare debeat: nam qui à tabaco



facilius afficiuntur, seu alterantur, eo parcius uti debent: qui non facile afficiuntur, iis liberalior ejusdem usus concedi potest: utrisque tamen mediocritatis limites excēdere nefas esto: quos limites quisque suo naturæ modulo metiri oportet.

V. Radicum helenii qualitates duplices sunt, occultæ & manifestæ. Ratione illarum, alexipharmacam vim habent, &, secundum Dioscoridem, Plinium, Dodonæum, aliosque, omni veneno contrariæ sunt, ac venenatorum morsus sanant, imò & pesti quoque fortiter resistunt, ut testantur Crato, Augenius, Swenckfeldius, Hollerius, Jacobus Horstius, Gabelchoverus, Joannes Vochs, Eustachius Rudius, & plures alii. Ratione harum, calefaciunt, putredines tollunt, easque fieri impediunt, vermes, aliaque è putredine genita animantia è corpore expellunt, urinas movent, coctiones augent, crassos humores incidunt & attenuant, pectus expurgant. Ita ut non sine ratione primariis antidotis annumerari debeant. Memini doctissimum, & in praxi Medica versatissimum virum D. Schrevelium in Academia Lugduno-Batava Medicinæ Professore primarium, nobis quondam narrasse, se in magna illa peste, quæ anno 1624 Hagam-Comitis afflixit, helenii radicibus conditis tam in se ipso, quam in aliis, omnium maxime ad præservationem usum fuisse, atque ex illarum usu se plus commodi percepisse, quam ex aliis antidotis omnibus. Loco helenii, Droëtus, *de peste, cap. 9.* comedendam exhibet radicem petasitidis derafam<sup>1</sup>, & per noctem in vino albo, vel vino absinthite maceratam. Hollerius succum thapsi barbati cum vino expressum magni facit.

VI. Multi existimant tempore pestis utilem esse allii usum, eo quod Galenus, 12. *Method.* allium vocaverit theriacam rusticorum; & Dioscorides dixerit, illud contra viperarum & rabioforum animalium morsus valere. Sed longè falluntur, quandoquidem id corporibus, imprimis biliosis, valde noxium existit, nam malos & putridos succos generat, cerebrum gravat, somnolentiam inducit, & æstuosos humores facit; ac proinde licet fortissimis quibusdam rusticis, gravibus laboribus assuetis, ciborum crudiorum & durorum concoctionem promovendo, conducatur, aliis tamen, nec tantis laboribus, nec tam rudi diætæ assuetis, minimè convenit, sed in iis noxios succos generat. Hinc etiam Galenus, *lib. 1. de differ. febr. cap. 3.* allium & capas inter cibos pravi succi numerat. Sic quoque Aëtius dicit, allium habere quippiam virosum & mali succi. Cum his etiam consentiunt Simeon Sethi, & Dodonæus, docentes allium nullum dare corpori nutrimentum, sed malum, æstuosum, & acrem succum seu sanguinem generare, ac proinde damnosum esse, imprimis biliosis & calidioribus naturis. Propterea Oribasius a continuo allii usu abstinere præcipit: & Valescus de Taranta, *lib. Philon. pharmac. cap. 16*, dicit tempore pestis abstinendum esse ab alliis, porris, eru-

ca, & pipere: *Nec audiendi sunt* (inquit) *allia commendantes, quoniam fumos generant, supercalescunt, ebullitionem augent, & sanguinem adu-runt, unde mortiferi generantur abscessus.* Quam noxios & putridos succos generet allium, docuit Arnulphi Imperatoris mors, quem Crantzius, *lib. 3. Histor. Saxon. cap. 3.* narrat, ex allii frequentiore usu in tantam incidisse vermium multitudinem, ut nulla ope medica servari potuerit. Quam noxius etiam sit ipsius allii odor, liquet ex eo quod Bruyerinus, *lib. 9. de Re Cibar. cap. 12.* referat, Jacobum Foroliviensem Medicum, ab allii odore, tanquam à re pestilenti, lædi consuevisse. Ex eo etiam quod epilepticis ab eodem odore paroxysmus epilepticus inducatur. Atque his de causis etiam plane rejciendum est consilium Plateri, qui, *lib. 3.* ad curationem pestis exhibet ʒij decocti alli in hydromelite arati, quod potenter sudores & urinas elicere dicit. Sed utinam etiam ingentem ardorem, capitis gravitatem, soporem, bilis exæstuationem, & cordis anxietatem majorem, non induceret.

VII. Dioscorides, Avicenna, Rhazes, Crollius, aliique, scribunt urinam humanam præsentaneum antidotum esse contra plurima venena, viperarum moribus auxiliari, & canis rabiosi morsum, virulentorumque animalium puncturas, coercere ac retundere. Hinc multi concluderunt, eandem, si bibatur, plurimum valere adversus venenum pestilens. Sed non video, neque percipio, quam, vel qualem alexipharmacam seu præservativam qualitatem ex urina quispian expiscari possit. Nam etsi aliquantum abstergat, sola tamen abstersio non sufficit ad præservationem. Etsi adversus morsus animalium venenatorum, & venena extrinsecus advenientia, foris tuto adhiberi possit, (quod videntur imprimis voluisse antedicti Medici) tamen bibita, aliove modo intus assumpta, nobis non modò non prodesse, sed multum potius nocere posse videtur, propterea quod Natura per urinarias vias sæpe noxios & corruptos humores urinis permistos expellat, ac proinde qui illas bibunt, easdem corruptiones, cum manifestissima noxa, sibi ipsis rursus ingerunt & infundunt. Attamen certum est illud remedii genus non esse planè novum, verum etiam à Galeno, 10. *simpl. med. fac. cap. 15.* propositum, sed tamen minimè laudatum; scribit enim, abominandum esse urinam degustare; interim tamen, cum Syria peste affligeretur, multos, qui urinam puerorum simul & virorum hausissent, se hinc servatos credidisse. Henricus Rantzovius, *lib. de tuenda sanitate*, pueri impuberis, vel propriam urinam epotam maximi facit: cum quo consentiunt Follinus, *lib. 2. amulet. cap. 9.* Georgius Magirus, *in libello Germanico de Peste.* Marsilius Ficinus, Philippus Ingaras, Hollerius, & Massarias. Sed quid opus sordido hoc atque suspecto remedio uti, cum aliorum longè præstantiorum, certiorum, & gratiorum copia nobis abunde concessa sit? Franciscus Joel, *tom. 5. lib. 1. sect. 3.* loco urinæ, admodum extollit urinæ sal, ex urina hominis fani

fani coctione separatim, sed quia per coctionem omnes urinz impuritates un cum serositate exhalare vix credibile est, propterea etiam hoc ipsum sal nobis manet suspectum remedium.

VIII. Maximè proficius fuit istius cerevisiæ medicatæ usus. Vidimus hoc tempore multos, quibus, cum per aliquot dies illa cerevisia usi fuissent, pustulæ, aliis pauciores, aliis plures, aliis infinita copia in cute per totum corpus eruperunt; quibus sanatis, postea optimè valuerunt, neque plures pustulæ amplius eruperunt, quamvis ejusdem cerevisiæ usum continuarent. Imò vidimus aliquos in quibus (adjuvante fortè maligna aëris constitutione) variolas produxit. Medici Antwerpienses, in *Consil. pestis anni 1624.* cerevisiam medicatam hac formula præscribebant:

Rec. Corticum aurantium sic. lib. f.  
herb. cardui bened.

scabiosa,  
scordii, ana M. j.  
absinthii M. f.

minutim confissa indantur sacco, suspendendo in vase cerevisia melioris notæ.

IX. Vinum absinthite, cum cruditates absumat, superfluos & biliosos humores absterget, coctiones adjuvet, obstructions tollat, urinas moveat, & putredini resistat, ad præservationem non parum convenit. Imò præter alexipharmacam vini vim, ipsum quoque absinthium adversus venenum pestilens magnopere valere, scribunt, Tabernamontanus, Joannes Vochs de Colonia, Keglerus, Sibyllenus, Bartholomæus Hubnerus, & alii. Sed moderatus illius vini debet esse usus; nam observavimus nonnullos, qui illud aliquamdiu copiosius biberant, appetitum omnino prostravisse, & viribus tandem dejectis adeo debiles evasisse, ut non sine difficultate ad pristinum statum reduci potuerint, cujus rei causam alibi describemus.

X. Mindererus, de *pest. cap. 20.* scribit se tali vino medicato usum fuisse, pro suo ipsius primario præservativo remedio:

Rec. Absinthii vulgaris, M. j. f.

scordii,  
cardui bened. ana M. j.  
dictamni Cretici, M. f.  
cortic. citri, unc. f.

rad. pimpinella, unc. j. f.  
incidantur grosso modo, & in syndone fiat puppa, in vino suspendenda, de quo bibatur haustus post sumpsum jentaculum.

Medici Dordraceni in peste anni 1636 præscripserunt, in suo Consilio publico, hoc vinum medicatum præservans:

Rec. Summisatum absinthii, M. iij.  
sol. scordii, M. ij.  
rad. enula campana, unc. iij.

corticum, &  
seminum citri, ana unc. j.  
sem. carui unc. j. f.  
injiciantur in vasculum continens vini albi lib. xxx  
vel xxxv.

Collegium Medicum Ultrajectinum, in peste anni 1655, in Consilio publico præscripsit hoc vinum medicatum præservans:

Res. Radic. angelica,  
belenii,  
petasidis,  
zedoaria, ana unc. f.  
sol. cardui bened.  
absinthii,  
melissa,  
rutha,  
scordii, ana drach. ij.  
granorum juniperi, unc. j.  
corticum citri unc. f.  
fiat sacculus, suspendendus in vini albi lib. xij.

XI. Myrrha in ore retenta & paulatim deglutita, valde laudabilis existimatur ad præservationem; cujus tamen usus, ob ingratitude, delicatulis, pueris, mulieribus, aliisque qui palatum magis quam sanitatem curant, displicet. Fallopius, de *bubon. pest. cap. 13.* refert illos qui tunc temporis inserviebant peste correptis, nulla alia re præservasse sua corpora, quam usu zingiberis & zedoariæ, ea ore masticando; manè masticabant zingiber, postea bibebant vinum malvaticum, & tota die habebant zedoariam in ore mandendo. Droëtus, *Consil. de peste cap. 10.* refert nonnullos hujusmodi homines se nulla alia re defendisse à peste, quam nuce juglande, quam ad ignem parum adurebant priusquam comederent. Joannes Schenckius, *lib. 9. Observat. Medic.* refert ex Antonio Maria Parolino, Medico Ferrariensi, duo remedia, quibus venefici quidam nebulones, qui contagio alios inficiebant, se præmuniebant, ne veneficia illis ipsis nocerent. Unum fuit hoc electuarium:

Rec. Imperatorie,  
carlina,  
gentiana,  
dictamni albi,  
dictamni Cretici,  
baccarum lauri, ana part. eq.  
omnia subtiliter pulverisata misceantur cum Mel-  
lis despumati q. s.  
fiat electuarium.

Alterum fuit hoc unguentum:

Rec. Olei terebinthina,  
petrolei,  
de jasmino,  
lauri,  
pinguedinis taxi, ana unc. v.

P

CCTA

*cera nova,*  
*olei commun. ana unc. iij.*  
*bulliant per hora quadrantem, postea adjun-*  
*gantur,*  
*absinthii,*  
*chamedryos,*  
*salvia,*  
*rutha,*  
*anethi, ana M. j.*  
*coquantur in B. & fiat unguentum, quo inun-*  
*gantur tempora, arteria manuum, & cor-*  
*dis regio.*

Alexis Pedemontanus scribit hunc pulverem in maxima quadam Angliæ peste, ab omnibus Medicis probatum esse, & omnes qui de eo quotidie mane aliquantum sumebant, præservatos fuisse:

*Rec. Aloës hepatica,*  
*cinnamomi electi,*  
*myrrha electa, ana drach. iij.*  
*gariophyllorum,*  
*macis,*  
*ligni aloës,*  
*mastiches, boli Armena, ana unc. l.*  
*pulveriscentur subtilissime.*

Dodonæus, lib. I. Prax. cap. 18. hunc pulverem summopere commendat:

*Rec. Radicum tormentilla,*  
*carlina,*  
*zeduaria,*  
*angelica, ana unc. l.*  
*herb. scordii, drach. iij.*  
*baccarum lauri,*  
*juniperi, ana drach. ij.*  
*cinnamomi,*  
*macis,*  
*croci,*  
*sem. acetosa. ana drach. j*  
*fiat pulvis, cui per minimas guttas instillandum*  
*aliquid aceti, atque ita ad usum servandus est.*

Untzerus scribit hunc pulverem annis 1607, & 1610, in gravissimis pestibus valde salutarem compertum fuisse:

*Rec. Florum sulphuris ter sublimatorum, drach.*  
*ij. l.*  
*cornu cervi preparati drach. j. l.*  
*boli Armena preparata,*  
*terra Lemnia vera, ana scrup. ij.*  
*myrrha electa, drach. j.*  
*croci, scrup. j.*  
*sacchari fini, ad lubitum,*  
*fiat pulvis, dosis 2. aut 3. cuspidos cultri manè je-*  
*juno stomacho.*

Gregorius Horstius, Consil. de peste anni 1611, hunc suum pulverem extollit:

*Rec. Radic. dictamni,*  
*pimpinella,*  
*angelica,*  
*tormentilla, ana unc. j*  
*Zeduaria:*  
*corticum citri,*  
*cornu cervi usti preparati, ana dra. vj.*  
*sem. rutha.*  
*cardui bened. ana drach. ij.*  
*myrrha, unc. l.*  
*terra sigillata, unc. j*  
*salis absinthii, drach. iij.*  
*misce, fiat pulvis bezoarticus. Dosis à scrup. ij.*  
*ad scrup. iij.*

Cornelius Gemma, de curat. bubon. pest. scribit hanc compositionem pro summo secreto à rege Hispaniæ haberi.

*Rec. myrrha selecta*  
*mastiches,*  
*boli arm.*  
*terra sigill.*  
*ligni aloës,*  
*gariophyllorum,*  
*macis,*  
*croci, ana part. aq. fiat pulvis.*  
*Dosis quotidie mane 3ß,*  
*vel quantum vis.*

Crato hunc pulverem hoc modo immutat.

*Rec. myrrha,*  
*ligni aloës,*  
*terra sigillata,*  
*boli arm. ana 3ß*  
*macis, aceto preparati,*  
*croci, ana 3ij,*  
*fiat pulvis.*

XII. Pompejus devicto magno rege Mithridate, dicitur in sanctuariis ejus invenisse hoc electuarium, propria Mithridatis manu descriptum, quod ille Rex confecerat ex duabus nucibus siccis, ficibus totidem, & ruthæ foliis viginti, simul tritis, addito salis grano: qui hoc jejunos sumeret, nullum venenum ei nociturum illa die, nec pestem incurrere posse. Hoc medicamentum Sirenus, Medicus Poeta, his verbis cecinit:

*Bis denum rutha folium, salis & breve granum,*  
*Juglandesque duas, totidem cum corpore ficus.*  
*Hæc oriente die, paucis confersa Lyæo,*  
*Sumebat, metuens dederat quæ pocula mater.*

Nos, ut in meliorem formam compositio redigeretur, Forestum imitati, potius singula seorsim contudimus, ac postea miscuimus cum syrupi limonum, quantitate sufficiente. Nonnulli Medici huic composito adhuc varia alia admiscunt, ut bolum Armenam, crocum, myrrham, cornu cervi, galangam, dictamnium, baccas lauri,

lauri, &c. atque ita quasi parvam theriacam componunt. Sic D. Stapedius olim pro sua familia hoc compositum præparabat :

Rec. Granorum juniperi, unc. vj.  
 caricarum pinguium, ℥i.  
 nucleorum nucum juglandium, unc. xiiij.  
 conserva boraginis,  
 buglossa, ana unc. iij.  
 theriaca veteris,  
 Mithridatii, ana unc. ij.  
 radic. tormentilla,  
 gentiana,  
 pimpinella,  
 angelica,  
 zedoaria, ana unc. j.  
 Syrupi limonum q. s.  
 misce, fiat electuarium.

Untzerus aliud electuarium dianucum, hoc modo componit.

Rec. nucum jugland. excort. n. vj.  
 ficus pingues, n. iv.  
 fol. rutha 3j. scordii 3j.  
 rad. angelica,  
 tormentilla, ana 3j.  
 dictamni,  
 zedoaria, ana 3j.  
 theriaca Androm. 3j.  
 myrrha, 3j.  
 conserva rosarum, aut acetosa 3j.  
 salis absinthii 3j.

Ex hisce contusis & optime mixtis, cum Syrupi cardui ben. q. s. fiat s. art. electuarium. dosis ad magnitudinem juglandis.

Arnoldus Weickardus aliud hoc modo describit.

Rec. nucleorum nucum jugland.  
 excortic. 3iiij  
 caricarum ping. n. xx.  
 rad. tormentilla, pimpinella,  
 zedoaria, angelica, ana 3iiij  
 gentiana, 3ij.  
 bac. lauri excort. 3j.  
 juniperi 3ij  
 cort. citri, galanga, macis in  
 aceto preparat. ana 3j.  
 summitat. absinthii, rutha,  
 cardui ben. ana M. j  
 cornu cervi usti, boli arm.  
 terra sigillata, ana 3ij.  
 myrrha elect. 3j  
 croci 3ij, conserva florum  
 boraginis, violarum, rosarum, ana 3j,  
 molles vel sacchari  
 clarificati lib. iij, fiat s. art.  
 electuarium. dosis magnitudo  
 castanea, vel avellana.

Jacobus Sylvius, lib. de peste, aliud longe simplicius ex nucibus describit; quippe dicit omnes montepessalanos opiatam conficere ex ficu integra

per medium secta; dimidia huc veteri in modum ficum imposita, & quinque aut sex foliis rutha: idque eos totum tempore pestilenti singulis matutinis devorare, alios quidem crudum, alios ustulatum ex cuspide cultelli super ignitos carbones.

Franciscus Joël, tom. 5. lib. 6. sect. 3. hoc electuarium sic componit :

Rec. ficum ping. 3iiij, nucleor. jugland.  
 a pelliculis purgat 3j, rutha viridis 3j  
 scordii, cardui bened. ana 3ij, aceti  
 pauxillum, fiat s. art. electuarium.

XIII. Joannes Crato his duobus electuariis se bis in pestilentia præservatum fuisse refert, alternis diebus ad magnitudinem castanæ de his sumendo :

Rec. Succicydoniorum, unc. iij.  
 conserva boraginis,  
 rosarum, ana. unc. ij. s.  
 mithridatii opt. unc. s.  
 margaritarum dissolut. drach. j.  
 hyacinthorum,  
 specier. elect. de gemmis,  
 liberantium,  
 coralli dissoluti, ana scrup. iij.  
 extracti cardui benedicti,  
 Veronica,  
 scabiosa,  
 scordii, ana drach. ij.  
 misceantur, & fiat electuarium.  
 Æstate dicit se plus conserva rosarum & succi cydoniorum, & interdum aliquid conserva nymphae adjecisse.

Alterum electuarium tale est :

Rec. Materis unc. j. maceretur horis 24. in aceto vini fortissimo, vel succo limonum, deinde siccetur, & minutim incidatur, addendo,  
 theriaca opt. unc. s.  
 conserva boraginis, unc. ij.  
 corticum citri condit. unc. j.  
 sem. citri excortic.  
 cardui bened. ana drach. j. s.  
 specierum liberantium, drach. j.  
 xyloaloes, drach. s.  
 misce, fiat electuarium.

Forestus hoc sequens electuarium laudat :

Rec. Conserva fol. acetosa, unc. iij.  
 succi acetosa condensati, unc. s.  
 succi rutha condensati, drach. j.  
 pulveris scordii, drach. s.  
 theriaca, drach. ij.  
 sem. citri mundat. drach. iij.  
 Syrupi de limonibus q. s.  
 fiat electuarium.  
 Dosis drach. ij. vel drach. iij.

Idem scribis, se ipsum hoc sequente alburno  
ut solere, mane Jejunio stomacho: qui cum sit

Rec. Consolida, Mithridatica, da. nucibus  
et aliis, ana. iij. drach. ana. drach. iij. drach.

iberiaca antiqua,  
ana. drach. iij. drach. iij. drach. iij. drach.

bol. Armena vera,  
terra sigillata, ana. scrup. j. f.

Untzerus hoc capitis experientia dicitur

Rec. Theriaca antiqua, ana. drach. iij. drach. iij. drach. iij. drach.

flor. sulphuris, 3j  
camphora 3b

rad. Zedoaria,  
angelica, ana. 3b

gentiana, ana. 3b  
pimpinella, ana. 3b

dictamni,  
tormentilla, ana. 3b

fol. rutha,  
scordii, ana. 3b

myrrha, 3j  
croci gr. xij,  
ossis de corde cervi,  
cinnamomi, ana. 3b

coralli rubr. preparat. ana. 3b  
succini, ana. 3b  
boli arm. ana. 3b

specier. diamargariti frig.  
diatrium santalorum,  
ana. 3b

syr. de acetositate citri q. l.  
misco, fiat aleutarium

XIV. Crato has tabellas Maximiliano Secun-  
do, Imperatori, olim prescripsit, quae gratae  
sunt, & omni sexui, aetati, & tempore famili-  
ares esse possunt:

Rec. Bol. Arm. in aqua scabiosa lata. ana. f.  
margaritarum preparatarum, ana. 3b

coralli preparat. ana. scrup. iij. f.  
sem. cardui bened. ana. 3b

citri ex cortic. ana. drach. f.  
hyacinthi preparati, scrup. ij. f.  
smaragdi preparati,  
specierum liberantium,  
terra sigillata, ana. 3b

cornu cervi preparati, ana. drach. iij. f.  
folia auri, no. xv. f.  
ambra, gr. vj. f.  
sacchari, lib. f. f.

dissolve in f. q. aqua rosarum & cinnamomi, ad-  
dita paucula conservae rosarum, fiat confectio  
in tabulis. Dosis drach. ij. vel unc. f. superbi-  
bendo haustum vini.

Minus operosius hoc

Rec. flavescens, ana. drach. iij. drach. iij. drach. iij. drach.

rad. angelica, ana. 3b  
helenii, ana. 3b

specierum liberantium drach. iij. drach. iij. drach. iij. drach.

Zedoaria, ana. 3b  
cinnamomi, ana. 3b  
macis, ana. 3b

bol. arm. ana. 3b  
sem. citri, ana. drach. iij. drach. iij. drach. iij. drach.

croci scrup. f. f.  
fiat pulvis, e quo cum  
sacchari in aqua rosarum soluti ana. 3b

fiant f. art. tabella.

Alii cum extractis hujusmodi tabellas compo-  
nunt

Rec. Extracti angelica,  
rad. helenii, ana. scrup. j. f. f.

zedoaria, scrup. j. f. f.  
olei corticum citri, gut. iij. f. f.

cinnamomi, gut. ij. f. f.  
florum sulphuris scrup. ij. f. f.

croci opt. gr. vij. f. f.  
sacchari albi, aqua rosarum dissoluti q. f.

fiant f. art. rotula.

XV. Paræus in præfervatione theriacam &  
mithridatium cæteris cardiacis omnibus præponit,  
sumendo calidis tempestatibus ad theriacam unc. f.

conservae rosarum, vel buglossae, vel violarum  
unc. j. f. boli Armenae, drach. iij. misceantur. Alii  
admodum extollunt hoc antidotum, quod in Su-  
dore Anglico plurimos præservasse dicitur:

Rec. Mentha crispa,  
absinthii,  
chelidonia majoris,  
rutha,  
omnium recentium, ana. M. j.

ex his exprimatur succus: cui adde  
radic. gentiana,  
angelica,  
tormentilla,  
helenii, leviter contusarum,  
ana. unc. f.

vini albi lib. f.  
digerantur in vitro bene clauso horis 24.  
postea admisceatur  
spiritus vini lib. f.

& stans simul per tres quatuorve dies, postea si-  
mul exprimantur, eaque expressio in vitro clau-  
so servetur. Dosis ad præfervationem cochlearia  
duo, singulis matutinis: ad curationem cochlea-  
ria tria, cum provocatione sudoris.

XVI. Joannes Hartmannus, in Praxi Chy-  
miatrica, tanquam singulare præservativum,  
commendat hoc sequens:

Rec.

Rec. Spiritus salis dulcorati q. v.

*Saccharum imbibatur cum predicto spiritu ad formam electuarii, cujus dosi orani mane drach. j.*

Hoc omnem putredinem arcet, & viscera in optima conservat constitutione. Dulcificatur Spiritus salis hoc modo: Spiritus salis cum spiritus vini æquali parte miscetur, & simul ter quaterve distillantur, atque ita uniuntur inseparabiliter, & dulcescunt.

XV. II. Acetum maximæ virtutis est adversus plurima venena, idemque etiam omnes Medici jam à multis seculis experientia comperti sunt fortiter resistere pestilenti malignitati, nec quempiam fere Præcticum invenias, qui ejus alexipharmacam vim non cognoscat, & acetum usum, tam in præservatione, quam in curatione pestis, summis laudibus non extollat. Rhazes, lib. de pest. cap. 5. nec non 4. de Re Medica, cap. 25. acetum tanti facit, ut illud omnibus cibis & potibus, multisque medicamentis admiscere, eodemque etiam domus conspergere, & aerem corrigere jusserit. Nos in hac peste vidimus multos pauperes, qui quotidie manè acetum vini cochleare unum aut alterum bibebant, melius fuisse præservatos, quam multos alios qui pretiosissimis antidotis utebantur. Ut acetum alexipharmacæ vis augeatur & potentior fiat, Medici varia simplicia, antidoti vi prædita, in illo quandoque macerare solent, quod tunc appellant *acetum bezoarticum seu theriacale*, cujus varæ extant compositiones apud Medicos, & fere quilibet illud componit suo modo: nos nostram compositionem, quam in hac peste admodum efficacem esse usque comperti sumus, in textu describimus. Sennertus, lib. 4. de febr. cap. 5. duas tresve alias acetum bezoartici formulas proponit, Vntzerus hoc acetum bezoarticum extollit:

Rec. Rad. petasidii,

belenii,

pimpinella,

angelica, ana drach. vj.

baccarum juniperi, unc. j. f. corticum citri

fice, unc. j. cymarrum rubra dr. v.

herb. scorodii,

valeriana,

scabiosa,

cardui bened. ana M. j.

flor. rosarum,

calendula,

ambros, ana p. j.

camphora, serup. ij. croci, drach. j. incisa

& confusa infundantur in aceti gariophyl. bortenst,

lib. ij.

Va: bene clausum quotidie agitur.

Dosis duo vel tria cochlearia.

Notandum tamen ab aceti usui arcendos esse tussiculosos, asthmaticos, calculosos aliisque pectoris, renum, aut vesicæ morbis infectos. De aceti visibus videantur quædam supra, hujus libri cap. 5. annot. 7. & lib. 3. cap. 5. annot. 18. & 19. Has præstantissimas aceti, aliorumque multorum aci-

dorum (ut olei vitrioli, sulphuris, aluminis, succi citri, &c.) vires tam ad præservationem, quam ad curationem in peste, hactenus sola docuit experientia. Verum hoc nostro seculo, quo quælibet abstracta erunt, etiam hujus rei causa aliqua percrepabilis inveniri accepta est. Solent acida modice sanguini admixta laudabilem ejus consistentiam in justa mediocritate conservare, & prohibere quo minus à sale volatili (quod tempore pestis admodum acre & copiosissimum aëri immiscetur) cum aëre identidem per inspirationem introducto, nimis tenuis fluidusque fiat; quæ ejus vitæ in pestiferis causa sunt, quod, præter alia gravissima symptomata, nonnunquam perniciose hæmorrhagiæ contingant, quæ raro fisci possunt, & ægros plerumque ad exitium deducunt. Eum in finem, ut scilicet sanguinis consistentia in justa mediocritate conservetur, etiam in nostro corpore acidi humores generantur, tam in liene, quam in pancreatē, qui leviter coagulando aliqualem crassitiem in sanguine conservant, eumque refrigeratum nonnihil coagulari faciunt. Verum si illi subacidi humores peccent in quantitate, aut qualicunque prava qualitate, tunc sanguinem aut nimis multum, aut nimis parum coagulando, à justa consistentia dejiciunt, variorumque morborum cause fiunt. Hæc vera esse docuerunt ingeniosa quædam hodiernorum Medicorum experimenta. Quippe si sal volatile sanguini admisceatur, sanguis fluidus permanet, & refrigeratus non coagulatur: si verò acetum, vel aliud aliquod acidum affundatur, mox coagulatur, & quo magis excellit acidi adjecti aciditas, tanto major fit coagulatio. Præterea, acida, præter coagulandi vim, etiam effervescentiam aliquam in sanguine & humoribus excitant, qua serosi attenuati humores, una cum salis volatilibus particulis, sudoris forma per poros foras propelluntur. Sic fit quod in peste, in qua salsa ista volatiles particule valde acres & malignæ sunt, multum discutiantur, & sanguis ab illius noxii salis volatilis admixtione multum liberatus, rursus nonnihil incrassetur, & ad pristinam constitutionem redeat. Quemadmodum acida intus assumpta, ita etiam foris naribus admodum & odorata sanguinem aliquo modo leviter coagulando in justa consistentia conservant, atque etiam salis acris volatilis cum aëre inspirati volatilitatem compescunt. Alexander Massarius, lib. de pest. 2. scribit in crudelissima peste sui temporis, loco aceti, multos mirum in modum celebrasse acetosam, atque illius maxime succum expressum, sive per se, sive cum aliis medicamentis sumptum, ita ut in maxima illa peste huic uni medicamento salutem referrent acceptam Gordonius, de febr. parit. 1. cap. 10. omnia acida, idque non sine ratione, laudat, cum insignis aciditas, cuiusque subiecto insit, in præservatione & curatione pestis admodum excellens sit: Omnia acetosa, inquit, competunt, sicut est lac acetosum, herba acetosa, & mala granata acida, & succus uva acerba, & acetositas citri & limonum, & citranguli, & acetum.

**XVIII.** Salem esse antidotum præstantissimum tam ad præservationem, quam ad curationem, scribit Augenius, *lib. 9. Epist.* cum quo consentit Joubertus, *Tract. de peste, cap. 13.* Refert Joannes Wittichius, in *Halilog.* incolas Militæ insulæ quotidie ad præservationem à peste parum salis usurpare solere, dicentes hoc esse efficacissimum remedium removendi à se pestiferum contagium. Fidejustus Reineccerus, *lib. 6. thes. Chym.* asserit, sal commune in aqua haustum, præservare à lue pestifera. Brudus Lusitanus, *lib. 3. de vict. rat. in febr. cap. 19, & 20.* pluribus docet, sal esse efficacissimum præservativum ac curativum in peste, & refert chirurgum quendam in Anglia solitum esse piscibus salitis laborantes feliciter nutrire. Vincentius, in *Specul. Alch. cap. 18.* sale trito cum aceto utitur. Sic etiam in nostra peste multi eorum qui aceto utebantur, pauca grana salis ei injiciebant. Chymici spiritum salis in frequenti habent usu, ejusque aliquot guttas cum haustu alicujus liquoris exhibent matutino tempore: vel illum dulcificatum cum saccha-

ro miscent, ut dictum præcedente annotatione 16.

**XIX.** Paracelsus, *lib. de peste ad Storz. ingenses, cap. 2.* inquit: *Præservativum optimum & compendiosissimum est, senis singulis diebus potionis nostræ, drach. j. cum vino, aut similibus, calide bibere, & in lecto strenuè sudare. Hac potio præservat sex diebus.* Hujus potionis descriptionem vide *lib. 3. cap. 5. annot. 18.* Verum cum sudorifera semel in septimana assumpta, nòxia quidem inquinamenta fortè in corpus recepta, foras expellant, sed intermedii diebus corpus non satis defendant, minus tutò nobis præservari videntur illi qui his utuntur, quam alii qui quotidie antidota sumunt: nam unico & singulis momentis aliquod fortius pestilens venenum corpus subire, pestem inferre, & hominem occidere potest. Propterea in hac peste, tanquam utilius commendavimus, antidotis potius quotidianis corpora adversus hujus tyranni insultus præmunire, quam latentes ejus exploratores carius per sudorifera expellere.

## CAPUT XI.

## DE ANTIDOTIS EXTERNIS.



Medicamenta externa quibus corpora adversus venenum pestilens præmuniuntur, duplicia sunt. Alia quæ foris appensa solâ occultâ qualitate prodesse creduntur, & Medicis *Amuleta* vocantur: alia quæ occulta quidem qualitate veneno pestilenti resistunt, sed simul etiam manifesta qualitate corroborant principalia viscera, aërem corpus ingredientem emendant ac purificant, putredines arcent, omnesque corruptiones impediunt. *Priora* sunt vel venenata seu venena per se, vel non venenata. Nos venenata (1.) tanquam summè noxia, planè rejecimus. Non venenata vel sunt superstitiosa & fictitia, (2.) vel naturalia. Illa, tanquam deliramenta & meras fallacias, non minus quam venenata amuleta, in totum repudiavimus: neque hæc (3.) quoque magni fecimus, quia succinum, ebur, & similia gestata, parum aut nihil profuisse animadvertimus; & quæ forsân prodesse poterant, eorum nobis deerat copia, qualia sunt lapis hyacinthus, (4.) smaragdus, &c. *Posteriora*, multa variaque sunt: nos tamen è paucioribus tantum usi sumus, quibus cor & cerebrum roborari, & aëris circumstantis ac corpora subeuntis impuritates corrigi possent. Æstate & calidis temporibus, multis corticem citri extractâ per parvum foramen medullâ cavum, aut pomum eburneum vel argenteum cavum, ac multis foraminibus undequaque pertusum, cui parva spongia aceto (5.) theriacali madefacta erat imposita, naribus objiciendum dedimus, quam spongiam interdum quoque imbuimus hac mixtura:

*℞. Aceti theriacalis, vini Rhenani odoriferi, aquæ rosarum, ana unc. j. camphoræ scrup. j. vel scrup. j. f. misceantur.*

Cum eadem mixtura nonnulli ditiores manus & faciem lavabant. Pauperibus solius aceti odorem commendavimus. Tempore hyberno vel subfrigido, multis succini vel ruthæ oleum distillatum, vel theriacæ pauxillum naribus illinendum, dedimus. Curiosioribus interdum tale unguentum (6.) præscripsimus, quo nares, tempora, regionem cordis, & pulsus manuum quotidie manè inungebant:

*℞. The-*



*℞. Theriacæ Andromachi, drach. j. camphoræ, gr. 1x. olei nucis moscatæ expressi, olei scorpionum, axungie serpentum, ana scrup. ij. olei succini, ol. rutacei distillati, ana scrup. s. olei cinnamomi, gariophyllorum, ana gut. j. olei cortic. citri, gutt. v. misceantur.*

Maximopere autem improbavimus epithemata humida, ex simplicibus in aqua vel vino decoctis, vel ex aquis stillatitiis mistis confecta, & cordis regioni imposita: nec non poma illa odorifera factitia, quæ *poma ambra* vulgo vocantur (qualia delicatuli naribus obtrudere solent) omniaque alia suaveolentia balsama, præsertim illa quæ moschum & zibethum redolebant: subgraves odores magis laudavimus, propter rationes antea cap. 5. allatas. Pluribus externis antidotis in hac peste usi non sumus, cum hæc pauca sufficere, & plurima alia inutilia esse, nobis viderentur.

## A N N O T A T I O N E S.

I. **A** Muleta venenata plurima sunt, è quibus alii hæc, alii illa summis laudibus ad cælum usque extollunt, eaque, tanquam è deorum scriniis deprompta, commendant. Nonnulli araneum magnum, vivum includunt duobus corticibus nucis juglandis, quibus filo colligatis, illum de collo suspendunt. Alii bufonem exficcatum, vel combustum & in cineres redactum, ac in sacculo ligatum, eodem modo gestant. Alii corticem nucis avellanæ, nucleo per exiguum foramen extracto, replent argento vivo, cera obstruunt, & cum filo sericeo rubro carmosmo, è collo propendent, idque Droëtus, de pest. cap. 8, summopere laudat: cum quo consentiunt Tabernamontanus, Joannes Beguinus, Poppius, Martinus Panfa, Goclenius, & Joubertus: imò Marsilius Ficinus illud mirè juvare, exemplis adhibitis probare nititur. Alii penna scriptoria mercurio vivo repleta, & cera sigillari obstructa, eodem modo utuntur. Plurimi verò laminam ex arsenico crySTALLINO nudam supra cordis regionem gestare jubent, quo remedio etiam Adrianum VI, Pontificem, usum fuisse scribunt, putantes fortè auctoritatem vel eminentiam Sedis Pontificalis aliquid conferre ad majorem remedii excellentiam. Mercurialis, ut isti amuleto majores vires addat, aliis admistis, hujusmodi pastam componit:

*Rec. Arsenici crySTALLINI, unc. ij.  
diſſammi albi,  
croci, ana drac. ij.  
camphoræ,  
euphorbii, ana drach. j.*

*Ex his pulverisatis cum mucilagine ex aqua rosea & gummi Arabico facta, fiat pasta, è qua conficiantur rotula majuscula, qua exficcata gestentur supra cor.*

Alii maximi faciunt placentulas ex arsenici crySTALLINI part. ij. rubei part. j. (nonnulli sumunt eujusque partes æquales) cum albumine ovi, vel mucilagine tragacanthæ confectas, & tenui sericeo investitas. Quibus placentulis, in servandis

fanis, multi Medici Itali nihil illustrius à Deo immortalali hominibus concessum esse tradunt, vocantque divinum inventum Dei: imò non pudet multos etiam infectam juramento asserere, neminem peste fuisse, qui illas gestaverit; (quod, inter alios, quoque testari non erubescit Monavius, Medicus Cæsareus, epist. à Scholtio collect. 225. & 227.) cum tamen nos in hac peste innumeros, qui illas curiosissimè gestabant, contagionis labe infectos & mortuos fuisse, noverimus. Harum ex arsenico placentularum fastosum encomium describunt, Georgius Agricola, Montuus, Fallopius, Joann. Pistorius, Ludovicus Mercatus, Lacuna, Saracenus, Petrus Monavius, Joannes Bickerus, Vidus Vidius, Joannes Baptista Theodosius, Crollius, David Herlicius, Petrus Pav, Quercetanus, Follinus, Hildanus, aliique plurimi: imò Joannes Rhenanus, qui omnium perfectissimum amuletum dare voluit, hoc sequens non solum ad pestilens contagium, sed etiam ad alias malignas cœlestes impressiones avertendas, summopere commendat:

*Rec. Pulveris bufonum exficcatum, unc. ij. arsenici crySTALLINI,  
citrini, ana unc. s.  
mercurii sublimati,  
farina tritici,  
radicum diſſammi, vel tormentillæ, ana drach. iij.  
croci.  
hyacinthi,  
smaragdi, ana scrup. j.  
Pulverisentur subtilissime, ac cum mucagine tragacanthæ, aquâ rosaceâ extractâ, fiat massa, è qua formantur pastilli, de collo suspendendi.*

Ut huic compositioni adversus cœlestes impressiones major efficacia adsit, jubet ex tenui chalybis lamina formari capsulas cordis figuram referentes. ut istius massæ drach. j. s. recipere possint: in istis capsulis, ubi Luna caput Draconis attigerit, insculpere jubet signum serpentis instar cochleæ sese in gyrum volventis: in altera parte, Luna in Scorpione existente, formam scorpionis insculpit, & statim, Luna in eodem signo adhuc existente,

stente, capsulam illam replet massa prædicta, eamque siccatam cordis regioni applicat. Profecto non piget tantum, verum etiam pudet, tot doctissimorum virorum somnia hic in medium proferre, qui omnia venena & venenata tempore pestilenti fugere jubentes, ipsamet omnium pestifera venena circumferre jubent ad præservacionem, haud secus ac si ex deleteriis venenis, cordi calorque nativo intensissimis, aliquid boni sperandum sit, aut magnetica qualitas his insit, qua alia venena ad se trahant, nec suas malignissimas qualitates corporibus communicent. Mirari sane licet, quomodo tot præclarissimi Medici & inter alios jam nuper etiam Carolus de la Font, *dissert. 1. de Peste, cap. 10*, eò non tantum seducti fuerint, sed jam tot seculis isti errori pertinaciter inhæserint, ut venenata illa amuleta homines à pestilenti veneno præservare posse crediderint. Non sine ratione istius opinionis sectatoribus se opponunt, Hercules Saxonia, Erastus, Augenius, Hennemannus Reysing, Martinus Mollerus, Gregorius Horstius, Laurentius Heylandus, Gerardus Columba, alique plures, qui omnes venena hæc nostræ naturæ esse adversissima, eaque non tantum non à peste præservare, sed maximum damnum inferre posse, docent. Verum ut ipsius rei veritatem clarius perscrutemur, audiendum etiam qua ratione venenata hæc, & pleraque ex arsenico confecta amuleta, prodesse putentur. Jordanus, Antonius Portus, Petrus Salius, alique, discedunt in Paracelsi sententiam, qui illa prodesse statuit à veneni similitudine, cujus ratione illa internum pestilens venenum ad se trahunt & dissipant. Alii exsiccativa qualitate illa conducere, & humores pravy ac venenatos siccando absumere credunt. Alii, cum Simone Simoneo, illa venenum pestilens occulta qualitate extinguere tradunt. Alii, cum Theodosio, putant, per talia amuleta cor venenis assuefieri, atque ob illam consuetudinem à veneno pestilenti minus lædi posse. Alii, cum Joanne Heurnio, existimant illa hac ratione prodesse quod cor veneni qualitatem persentiscens, sese contrahat, ac proinde ejus systole fortior fiat diastole, atque eo modo validius à se expellat quam attrahat. Alii simpliciter experientia hac in parte credendum esse arbitrantur, quæ jam à longo tempore docuit, hujusmodi amuleta conducere ad præservacionem. Thomas Willis, *lib. de febr. cap. 13*, præter experientiam, etiam manifestam rationem, ipsa subtilitate subtiliorem hujus rei tradere volens, ita scribit. *Amuleta venenata in hac casu prodesse, præter Medicorum observationes, hac ratio nonnihil suadere videtur. Effluvia, seu corpuscula atmoidea, à corporibus, modo his emergentia, modo super illis residentia, per totam æris regionem circumvolitant. Hac cum diversimode sint figurata, eorum alia cum aliis optime coherant sin vero in quadam alia forma impingant, eadem oppugnant & evertunt: hinc pestilentis miasmatis particula, qua spiritibus nostris adversantur, cum istis veneni corpusculis juxta positis, optime conveniunt iisque prompte assignantur. Quare hoc faciunt amuleta et veneno constata, scilicet*

*pestilencia semina nobis occurrentia, propter similitudinem partium in se excipiunt; etiam a corpore nostro eadem in amplexus suos allivendo, insectos quodammodo à malignitate liberant.*

Nos ad omnes has plurimum discrepantes sententias breviter respondemus, nullam earum valere ad dictæ opinionis confirmationem. Nam si amuleti venenum ratione similitudinis ab interioribus partibus ad se foras trahat venenum pestilens, quare non venenum pestilens ob eandem similitudinem introrsum ad cor trahit venenositatem amuleti, præsertim in peste correptis, in quibus pestilens venenum longè efficacius est altero? Si venenata amuleta conducant exsiccacione, tunc araneus, Mercurius vivus, bufo, & similia, nihil saltem proderunt: ad hæc, tunc alia quælibet calida & multum exsiccantia eateus conducere; quod tamen negat experientia. Si occulta qualitate extinguant venenum pestilens, quare non æque paribus admoventur; quam pectori? quare non iisdem etiam suffiatur domus ad æris correctionem quare talia per os non exhibentur? Si cor hoc modo venenis assuefiat, ita ut postea à veneno pestilenti minus lædi possit; quare ipsum cor, antequam illam consuetudinem contraxit, ab amuleti veneno non extinguitur? Si cor veneni malignitatem sentiens, se contrahat, & majorem systolem quam diastolem faciat, an non illa operatio satis ostendit, venenatum amuletum cordi esse inimicissimum, & paulatim temporis tractu magnam noxam ipsi inde expectandam esse? Si effluvia atmoidea à corporibus exeuntia aliis corporibus similiter figuratis ad hæreant, ab iisque excipiantur, quare amuletorum venenatorum effluvia nos ad hærent partibus corporis veneno pestilenti infectis, ab iisque excipiuntur? quare harum effluvia potius excipiuntur ab amuletis, quam amuletorum ab his, cum utrimque sit par ratio? Damnanda igitur sunt venenata illa arsenicalia amuleta, stulto encomio à multis imprudenter, decantata; nec minus reiendum cœcum eorum consilium, qui oleum & balsamum arcenici admiscere suadent cataplasmatibus & emplastris buboni ac carbunculo adhibendis, quasi venenum pestilens sic melius per horum venenositatem foras attraheretur, nugæ sunt, & damnosæ fallaciæ, ab imperita speculatione sine fundamento procedentes. Hic nihil etiam ad rem facit quorundam effugium, dicentium, etsi arsenicalia amuleta damnum aliquod inferre posse videantur, nihil tamen mali expectandum esse à Mercurio vivo, araneis, & bufonibus, utpote quæ nullam adurentem qualitatem habent. Dico, nihil etiam boni ab his expectari, sed multa mala metui posse. Nam hydrargyrum non convenit, quia frigidum existens, poros condensando, fuliginum putridarum exhalationem prohibet, quibus in corde accensis excitatur febris, ipsumque cor debilitatur, atque sic minus resistit futuro imminenti veneno. Ab araneis magnum periculum impendere, docet illud quod de araneis in Vasconia refert Scaliger, *Exercit. 186*. qui calcati per calceorum soleas transmittunt venenum. Quanto facilius ergo per crepaturam nucis illud

illud cordi propinquo communicabunt? Adde, quod tanta venenositate præditi sint, ut Nicolaus Florentinus, *Sermon. 4. tract. 4. cap. 23.* referat, à fumo aranei combusti quendam Leobardum Florentiæ pene occisum fuisse; ibidemque. Florentiæ cœnobium monachorum veneno infectum esse, quod araneus niger in ollam decidisset dum jacula coquerentur: & Mercurialis tradat, in monasterio Eremitanorum multos monachos peremptos fuisse potu vini in quo araneus extinctus fuerat. Bufones quoque suspectos & metuendos esse, ob magnam virulentiam, liquet ex historiis variorum. Antonius Mizaldus, *memorab. cent. 1. aphor. 1. & in Hort. Medic.* nec non Paræus, *de venen. cap. 24.* referunt exempla eorum, qui gustatis tantum herbis à bufone contactis, extincti sunt. Bufones anhelitu alios lædere, auctor est Aëtius, *tetrab. 4. serm. 1. cap. 63.* Cannam, cum cujus inferiore parte rubeta transfixa fuerat, superiore parte manibus arreptam, quendam veneno infectisse, scribit Ferdinandus Ponzettus, *de Venen. lib. 3. cap. 12.* & simile quoque refert Ardoynus, *lib. 4. de Venen. cap. 7.* Si venenum bufonis per baculum usque ad manum transmitti possit, quanto magis, si bufo cordis regioni admoveatur, eidem etiam communicabitur? Ex quibus satis manifestum est, nullis solidis & veris, imò ne quidem verisimilibus rationibus confirmari posse, amuleta venenata ullo modo conducere ad præsertionem à peste, & absque periculo gestari posse. Atque hinc etiam irridendum esse experimentum illud quod de bufone scribit Wilhelmus ten Rhyn, *in suis meditat. ad textum 24. Hippocrati de veteri Medicina*, ubi sic inquit: *Memini me Franequera tempore pestis bufonem fere per semestre spatium in pera gestasse, quem dum sortuito in cubiculo deposuissem, exhorruit ad huius visum hospita mea, existimans eum vivere, ita enim intumuerat ante exsiccatus, tum ominabatur eum mihi fuisse non in salubre remedium, quod venenum absorpserat.* Quasi verò exsiccatus bufo solum venenum pestilens ab illo absorpisset, & non potius a vaporibus e corpore ejus continue exeuntibus adeo intumisset. Quantum ad experientiam, cui hac in parte fidem adhibendam esse arbitrantur, profectò illa ad defensionem dictæ opinionis nihil facit, sed è contra illam omnino everit. *Primo* enim illos qui ista amuleta gestant, ab iis præservari, certò dici nequit, quia multi eorum per se, seu ratione nativi temperamenti non habent aptam dispositionem ad pestem, atque etiam non inficerentur, licet illa amuleta non gestarent. *Secundò*, cum plurimi eorum, qui amuleta ista de collo pendula ferunt, iis non satis confidunt, quotidie variis utuntur antidotis internis, quibus illorum præsertio potius quam amuleti adscribenda est. *Tertiò*, quia non tantum in hac nostra lue, verum etiam in aliis pestibus, sæpe visum fuit amuleta hæc nihil profuisse. Sic testantur, Cornelius Gemma, *de curat. bubon. pest.* & Hercules Saxonia, *lib. de plica, cap. 52.* se certò scire, cum in pestilentia Patavina, anno 1576, Hieronymus Capivaccius

multis hæc adhibuisset, nihil egregii præstitisse. Nos in nostra peste vidimus indiscriminatim æque mortuos fuisse illos qui ista gestabant, atque alios qui illa contemnebant. *Quartò*, quia non tantum illa non conducere, verum lethales noxas à venenatis amuletis multoties induci, docet usus, idque plurimorum testimoniis constat. Sic Crato, *epist. 168. ad Monarium*, inquit: *Vera tibi narro, N. ex gestatione arsenicalis sacculi adeo debilitatum, & in pectore exulceratum fuisse ut cum magna indignatione sacculum abjecerit.* Ita quoque Massaria, *lib. 2. de peste*, refert quendam Jurisconsultum, tempore pestis sacculum ex arsenico gestantem, cum aliquando concitatore motu incaluisse circa cordis regionem, incidisse in febrem vehementem ac periculosissimam, à qua cum magna difficultate servatus fuit. Sic etiam Franciscus Alphanus, Medicus Salernensis, testatur juvenem quendam amuleto ex arsenico munitum, in sphæristerio pilæ lusu defatigatum corruisse, & confestim occubuisse. Alia varia incommoda à venenatorum amuletorum gestatione inducta, se quoque vidisse testatur Zacutus Lusitanus, *lib. 3. Prax. observ. 45. & Histor. Medic. lib. 2. hist. 89.* His accedat quoque testimonium nostrum, qui in hac peste infelices successus horum amuletorum (quæ ex arsenico parata Gerardus Busæus Pharmacopæus, & Adolphus Fildar Chirurgus, quibuscunque satis magno pretio divendebant) non semel observavimus: quippe in aliquibus ab eorum contactu pustulas nigras dolorificas in pectore excitatas, & quasi cauterio potentiali inustas (quæ non erant à veneno pestilenti foras attracto, ut illi venditores populo persuadebant, sed à corrode ac caustica arsenici qualitate) fuisse: in nonnullis illa tantam cordis angustiam & debilitatem induxisse vidimus, ac si venenum per os assumptum fuisset, (inter varios conspectos tales casus, huius rei duas annotavimus historias libro quarto, historia 44. & 99.) à quibus malis ægri assumptione antidoti, & amuleti abiectione rursus liberati sunt. Cum itaque neque ratio, neque experientia prædictæ opinioni ullo modo faveat, sed utraque damnosum usum venenatorum amuletorum demonstret, explodenda jam tandem erunt tot seculis receptissima quidem, sed maximè fallacia, periculosa, & noxia illa venenata amuleta, atque alia potius alexiteria certiora, non suspecta, sed longo usu probata, in usum vocanda erunt.

II. Multa inania amuleta timor, multa fallacia & superstitiosa excogitavit avaritia. Illa maximè à Medicis timidis inventa sunt, ut hominibus inservirent consolationi, dum ipsi auxiliores fugitivi essent. Hæc ab avaris quibusdam Medicis & circulatoribus eum in finem maximè concinnata sunt, ut si non venenum pestilens, saltem loculorum nummos evacuant, quorum talibus major solet esse cura, quam sanitatis aliorum. *Priores*, ut auxilii vanitas magis lateret, amuleta sua investierunt aliqua fucata verisimili ratione, imprimis ab astrorum influxibus desumpta, atque in eum finem iis figilla, figuras, & certa signa

in-

inculperunt, cum sidera hoc illove modo simul miscentur. Tale est Xenexon Paracelsi, quod ab una parte serpentem in gyrum convolutum, ab altera scorpionem certo quodam tempore insculptum habet. Tale est etiam sigillum id Regum Persarum, (huic in lapide hæmatite insculptus erat homo, gubus flexis, cinctus serpente, ita ut dextra manu caput, sinistra caudam, teneret) cujus meminerunt Petrus Apocensis & Hollerius *lib. de Pest.* & innumera alia, astrologica aliqua verisimilitudine exornata amuleta. Posteriores, ut dolum occultarent, alii gestanda nomina ineffabilia, & scripta meris stipata vanitatibus, verbis quoque non significativis polluta, proposuerunt, quibus interdum versiculum aliquem ex Sacris literis adjunxerunt. Alii radices aut herbas ignotas, lapides, animalium longè petitorum particulas, aliaque nonnulla (quæ ex Syria, Ægypto, vel à monte Olivarum, aut à Pirenæi montis cacumine, aliove longinquo & incognito loco deportata esse ferunt) summis ac divinis laudibus extulerunt. Alii figuras, lineas, characteres, verba, numerorum typos, aliaque, sub Pythagoræ, Salomonis, alteriusve nomine commendaverunt. Huic posteriorum ordini non male etiam annumerari possunt multi avari sacrificuli & monachi, malè religiosi appellati, qui argenteo magis quam spiritali lucro inhiantes, passim scedulas benedictas, imagines, sanctorum reliquias, aliaque similia hominibus, turpi superstitione effascinati, ex collo suspenderunt. Verum omnia hæc media infida sunt, nugacia, illicita, ac penitus abominanda, quæ hominum mentes à divina confidentia ad res inanes ac frivolæ divertunt. Quid de talibus, aliisque multis venenatis, aut inanibus amuletis judicandum sit, admodum dilucide explicat Thomas Erasmus, in *disputationum libro, disputatione 22.*

III. Amuleta naturalia, quamvis plurimæ exiguas vires emittant, vel saltem non tantas habeant, quantas varii illis adscribunt, quia tamen ratio docet, illas aliquo modo prodesse, nec unquam nocere posse, præter naturales suas quas habent vires, eatenus quoque utilia sunt, quod multis animositatem, spem, & aliqualem fiduciam persuadeant, metumque ac terrorem, in pestilenti constitutione maxime noxium auferant. Quale hoc modo subinde concinnavimus:

Rac. Rad. angelica drach. ij.

ostrutii,

zedoaria,

belenii, ana ʒi.

præonia marii ʒʒss.

succini flavi ʒʒʒss.

foliorum lauri ʒi

subtiliter pulverisata misceantur cum mucagine tragacantha in aqua rosarum extracta, fiatque massa, è qua formentur pastilli magnitudinis daleri imperialis, qui exsiccati de collo suspendantur.

Arnoldus Weickardus, hoc sequens præscribit.

Rec. Rad. Angelica,

Zedoaria,

belenii,

dictamni, ana ʒʒ

castorei ʒʒi

campbora, ʒʒi

croci, ʒʒss.

thuris, ʒʒss.

iberiæ Androm. ʒʒss.

olei succini, gut. iij.

Juniperi, gut. ij.

cum mucagine tragacantha in aceto rosæ facta, fiat massa, seu placenta, (serico includenda, & de collo suspendenda)

Gregorius Horstius, *lib. 2. part. 2. observ. 28.* & Jo. Capellanus, Regis Francisci Medicus, *Consil. de peste*, hoc sequens simili modo componunt, quod tamen ob suævolentiam (quam noxiam esse, præcedente cap. 5. in ipso text. & annot. 9. docuimus) minus nobis probatur:

Rec. Benzoini,

Storacis calam. ana unc. j.

ladani bene olentis unc. iij.

cortic. citri drach. ij. scrup. ij.

santali citrini,

majorana,

rosmarini, ana ʒʒi ʒʒi

olei cinnamomi gut. xvi.

macis, gut. xxiiij.

Cum mucagine tragacantha fiat massa, è qua formentur pastilli ʒʒij

IV. Avicenna, Aloysius Mandella, & Marsilius, probant smaragdum de collo suspensum, ut nudum pectus contingat. Dodonæus jubet gestare lapides pretiosos, (quales sunt rubini, sapphiri, &c.) sed imprimis hyacinthum experientia sibi notum esse testatur: quem etiam laudant, Lonicerus, Gerardus Bergensis, Anselmus Bootius, & Jo. Fragosus. Joannes Baptista ab Helmont, in *Tumulo Pestis*, summo opere commendat Sapphirum saturato colore cœruleum, & Hyacinthum fulvo colore prægnantem, sed tamen sapphirum præfert hyacintho, quia in Sacerdotis pectorali olim sapphirus, non verò hyacinthus fuisse legitur. Idem *ibid.* etiam maximis laudibus extollit succinum præservationis gratia gestatum, atque illud multum prodesse posse, rationibus & experientiâ docet: illud etiam plurimum laudat Bernhardus Croneburgius, *lib. de peste.*

V. Vallesius, *tract. de epidem. cap. 19.* etiam jubet spongiam, vel linteam aceto intinctum sæpius naribus admovere: quod consilium quoque probat Jacobus Horstius, & à nobis quoque comprobatur.

VI. Duncanus Liddellius, *lib. 3. de febr. cap. 5.* tale linimentum naribus, temporibus, carpis & regioni cordis illinendum præscribit:

Rec.

Rec. olei nucis moscata expressi, ʒij  
 olei sem. angelica,  
 sem, rutha  
 cort. citri, ana gut. v.  
 olei cinnamomi, gut. j.  
 gariophyllorum, gut. ij.  
 theriaca ʒ. j.  
 moschi,  
 ambra, ana gr. ij.  
 misce, fiat balsamum.

Georgius Magirus, in suo Germanico libello de pest.  
 hoc unguentum ad eandem intentionem com-  
 mendat:

Rec. olei nucis moscata expressi, drach. j. f.  
 majorana distil. gut. vj.  
 myrrha,  
 succini, ana gut. iij.  
 theriaca ʒ. j.  
 extracti ligni aloës scrup. f.  
 moschi,  
 ambra, ana gr. iij.  
 aqua vite q. f.  
 fiat unguentum.

Verum hæc suaveolentia nobis displicent, pro-  
 pter rationes cap. 5. allatas. Melius hoc sequens  
 linimentum in eundem finem præscribit Arnol-  
 dus Weickardus, tract. pract. lib. 3. cap. 1.

Rec. Mithridatii, vel theriaca ʒij  
 pulv. santali citrini ʒf.  
 zedoaria, scrup. ij.  
 castorei, scrup. j.  
 camphora, scrup. f.  
 olei nucis moscata distillat ʒj  
 de corticibus citri ʒf.  
 cum pauca cera virginea, fiat linimentum.

Mindererus, lib. de peste, cap. 16. extollit hoc  
 oleum scorpionum.

Rec. olei antiquissimi lb v.  
 scorpiones vivos, n<sup>o</sup> 120.  
 aceti fortissimi unc. iij.  
 bulliant simul, donec scorpiones crepent in cola-  
 turam deinde conjice,  
 zedoaria,  
 gentiana,  
 diſſamini, ana unc. j.  
 theriaca,  
 mithridatii, ana unc. ʒf.  
 spicatum allii, no. iij.  
 cera nova modicum.  
 bulliant lento igne, vase clauso, per diem natu-  
 ralem, & oleum expressum unglyco, arteriæ,  
 dorso, cordi, & loco buboni vicino inungatur.

Multi tanquam præstantissimum præservativum  
 extollunt operosum illud antidotale oleum Mat-  
 thiohi, quod in præfatione sib. Dioscor. describit,

& adversus omnia lethaliſſima venena (exceptis  
 erodentibus,) ab experientia commendat, si æm-  
 pe pulsibus temporum, manuum, ac pedum,  
 ut & extimæ cordis parti ad sinistram mammil-  
 lam illinatur, singulis tribus horis repetita illini-  
 tione. Alii maximi faciunt oleum Ludovici de  
 Leonibus, summi Practici Bononiæ, cujus hanc  
 descriptionem, acceptis mille ducatis aureis Un-  
 garicis, Matthiæ, Ungariæ Regi, dedit.

Rec. olei terebinthina,  
 laurini,  
 abietis, ana lib. f.  
 gummi elemni, unc. if.  
 hedera, unc. j. f.  
 thuris, unc. ij.  
 opeponaci unc. j.  
 resina pini,  
 picis navalis, ana unc. f.  
 mastiches,  
 myrrha,  
 ladani,  
 sagapeni,  
 castorei, ana unc. ij. f.  
 galanga,  
 cinnamomi,  
 gariophyllorum,  
 nucis moscata,  
 cubebarum,  
 zedoaria ana unc. j.

Terantur terenda, & in vase vitreo panantur,  
 stent per mensem in putrefactione, postea lento igne  
 distillantur.

Hoc oleo non solum cor præservationis gratia  
 inungi præcipit, sed si aliquod pestis signum  
 appareat, ad curationem etiam pulsus temporum,  
 brachiorum, ac pedum. Alii mirè extollunt  
 hoc oleum Brasavolz:

Rec. olei antiquissimi, lib. v.  
 terebinthina opt. unc. vj.  
 euphorbii,  
 castorei, ana drach. j.  
 lumbricorum terrest. M. j.  
 bulliant in olla plena aqua per sex horas, deinde  
 exprimantur. Oleo colato ferventi injiciantur.  
 scorpiones vivi n<sup>o</sup> 180.  
 vipera femella, imago, n<sup>o</sup> ij.  
 bulliant in vase duplici per horas septem, postea  
 insolentur sub cunicula in vase vitreo obturato, per  
 decem vel plures dies: deinde addantur,  
 zedoaria,  
 rottemilla,  
 gentiana,  
 diſſamini albi,  
 aristolochia rotunda,  
 rhabarbari: ana unc. j.  
 florum altheæ,  
 hyperici,  
 ebuli,  
 rosmarini, ana M. j.  
 theriada,

*mithridatii, ana unc. l.*

*Tritū terendis misceantur omnia, & in clauso vase vitreo in fimo equino recondantur per tres menses, deinde fiat colatura, qua ad usum fervetur.*

Dicunt hoc oleo pectori & pulsibus temporum, brachiorum, ac pedum inuncto, quendam capite damnatum, cui venenum exhibitum erat, servatum fuisse: qualem experientiam de suo oleo etiam sumptam fuisse, refert Matthiolus.

Montagnana admodum extollit hoc suum oleum.

*Rec. olei antiquissimi lib. j.*

*scorpios centum,*

*frigantur in sartagine: postea exprime & cola, colatura adde,*

*rhabbarbari ℥j*

*insolentur in vase vitreo per dies quindecim. Hoc praesidium, inquit, arteriis temporum, & carpi, & circa cor illitum, omnem luem pestiferam a corpore eximit.*

Montuus, *practica sua part. 2. lib. 7. cap. 5.* admodum commendat hoc sequens oleum valde operosum.

*Rec. cymarum hyperici immaturarum M. ij.*

*olei vetustissimi lib. j.*

*mixta in phiala vitrea obturata insolentur octo diebus: mox in balneo maris bulliant horis duodecim: postea colentur per cilicium vino albo lotum. In altera phiala ponantur flores hyperici. In tertia ponatur semen: & omnia apparentur ad normam primae phialae. Deinde mixtis illis tribus expressionibus adde hunc pulverem.*

*Rec. gentiana,*

*corallina,*

*zedoaria,*

*aristolochia longa,*

*& rotunda,*

*diſtamni,*

*tormentilla,*

*santali rubri,*

*boli armena ppt. ana ℥ij.*

*insolentur diebus viginti, deinde in B. M. bulliant horis 14. post sub torculari exprimantur: addendo expressioni,*

*croci ℥ij.*

*aloës,*

*rhabbarbari,*

*spica,*

*myrrha, ana ℥iij.*

*Rursus insolentur, & bulliant in balneo, & exprimantur. Adde ad singulas libras*

*scorpios vivos 120.*

*Insolentur iterum, & in balneo bulliant, & exprimantur. Expressioni adde, ad singulas libras,*

*mithridatii,*

*Theriaca. ana ℥℞*

*fervetur hoc oleum in vitro bene obturato. Illinitur, inquit auctor, circa cor & arterias manuum, temporum, & pedum: evocat omne venenum a corde. Illinitur etiam circa anthracem, & circa vulnera ex morſu venenato.*

Hæc aliaque similia externa remedia tuto adhibere & in usum vocare licet, valeant quantum possint: sed iis tamen non nimis confidendum arbitror, cum eorum vires non satis certæ & notæ sint, eorumque multa à medicis excogitata videntur, partim ut satisfiat timidis hominibus: partim ut satisfiat avaris quibusdam medicis, tali modo crumenas suas auro infarciuntibus.

## C A P U T XII.

### De meo ipsius vivendi modo



Uemadmodum Regis ad exemplum totus componitur orbis, sic in pestilenti constitutione omnes homines, subitanæ mortem metuentes, oculos in Medicos conjicere, suamque vitam ad illorum vivendi formam instituere desiderant, ut æquali cum ipsis modo præmuniti, horrenda truculentissimi tyranni spicula melius à se deflectere queant. Durante hac peste mirabantur multi, quomodo fieri posset, ut ego, qui quasilibet ædes infectas, & omnes ægrotos indiscriminatim invisebam, à tanta malignitatis & contagii violentia non læderer, ac proinde meum vivendi ordinem plurimi diligentissime considerabant qui ut omnibus cognitus esse possit, eundem hoc capite describam. Omnes animi vehementes motus, quantum poteram, inhibebam ac fugiebam, intrepidus planè vivebam, nec pericula, nec mortem, nec aliud quippiam timens: mihi eodem redibat, ædesne infectas. an non infectas adirem, pestiferosne an alios ægrotos inviserem; æque libenter pauperibus gratis, quam divitibus mercede inserviebam. Nec terro-ri, nèc iræ, nec mœrori locum concedebam. Si fortè me ipsum aliquo modo contristatum perciperem (quod tristi illo tempore, quo in toto Noviomago nulla, quod scio,

scio, domus à peste immunis remansit, interdum fieri non erat alienum) tunc tribus quatuorve vini haustibus assumptis cor exhilarabam, atque ita citissimè omnem melancholicum luctum fugabam. Quamvis somnum diurnum aliis plerisque dissuaderem, cum tamen mihi ob ægrotorum invisendorum multitudinem ne nocte quidem ad lubitum & necessitatem requiescere permetteretur, & continuis deambulationibus vehementer delassarer, de die, nempe post prandium (quo tempore id optimè licebat propter pauciora negotia) per horam unam necessariò dormire cogebar. In victu utebar cibus euchymis & facilis digestionis, studiosissimè abstinendo ab iis quos aliis noxios fuisse animadverteram, quales erant carnes porcinae, haleces, &c. Potus mihi erat cerevisia Noviomagensis ordinaria, ut & vinum album tenue vel mediocre, quo interdum usque ad hilaritatem, nunquam ad ebrietatem utebar. Alvum non fluidam, sed ita liberam servabam, ut eandem semel aut bis de die exonerarem. Cubitum iturus semel aut bis in septimana deglutiebam unam vel alteram pilulam ex antipestifentialibus nostris, quas supra, *cap. 9.* descripsimus. Manè inter horam quartam & quintam ægros invisurus, nihil omnino assumere poteram (quod tamen ipsemet valde improbabam) nec cibi, nec potus, nec medicamenti, sed ad omnia nauseabam, ac proinde præmissis piis precibus, me meamque sanitatem Deo Opt. Max. commendabam, & solummodo aliquot grana cardamomi minoris mastigando, jejunos primos ægros invisebam usque ad horam sextam, præter propter. Tunc vel theriacæ, vel diascordii pauxillum, vel corticem aurantiorum conditum, vel ut plurimum radicum helenii conditarum tria quatuorve frustula comedebam. Post horam septimam, vel circa octavam frustum panis cum butyro & caseo ovillo viridijentabam, superbibendo haustum cerevisiæ. Inter octavam & nonam sæpe quidem, sed tamen non quotidie, data occasione, haustum vini absinthitis bibebam. Circa decimam, si per otium liceret, fistulam unam tabaci exsugebam: statim post prandium duas tresve fistulas, nec pauciores post coenam: sæpe etiam intermediis horis post meridiem, hic illic ubi occasio dabatur, adhuc duas tresve fistulas sumebam. Si verò ab ægrotorum vel ædium infectarum foetore me vel tantillum alteratum sentirem, statim postpositis omnibus negotiis quantumvis necessariis, qualicumque diei hora foret, duarum triumve tabaci fistularum fumum suctione trahebam: nam, ut verum fatear, tabacum pro primario præservativo in peste semper habui, & re vera tale esse, non sola ratione ductus, sed experientia edoctus, comperi; neque aliud melius pro ordinario usu hætenus inventum fuisse existimo, dummodo illud sit melioris notæ, ex maturioribus foliis in funes coactum. Quapropter ego solo tabaco contentus, nullis aliis suffumigiis, morsellis odoratis, similibusve utebar: eaque causa fuit, quod durante hac maligna constitutione, istius nobilissimæ herbæ bonam quantitatem consumpserim, cujus tamen usum postea rursus derelinqui, nolens naturam meam illi nimis assuescere, ne tandem ejus laudabilem usum in detestandum abusum converterem, quemadmodum illud hodie in plerisque fieri animadvertimus.

*Atque hac hætenus de Præservatione.*



# LIBER TERTIUS.

## De Curatione Pestis.

### C A P U T I.

#### DE CURATIONE IN GENERE.



Estis certam medendi formam præscribere haud facile est, propterea quod divini hujus morbi naturam (1.) humani ingenii acumen non satis perspiciat : hæcque causa est, quod in pestis curatione semper plurimum hallucinati fuerint omnes Medici, dubii causarum, dubii remedium. Hinc etiam, nec à majoribus nostris viris sagacissimis, nec à neotericis quantumvis in arte Medica versatis, hætenus ullum certum antipestilenale remedium, ullum proprium venenatæ hujus pernicipi alexiterium inventum fuit : semper ad cardiaca, quæ cor tuentur ac roborant, ut & ad communia venenorum alexipharmaca (2.) concursus est : è quibus etiam in hac peste primaria nostra subsidia dimanarunt, additis simul etiam aliis generalibus addi consuevit & necessariis. Post imploratam igitur divinam opem, pestis curationem deprompsimus è triplici Medico fonte, diætâ, chirurgia, & pharmacia, de quibus in sequentibus singulatim acturi sumus.

### A N N O T A T I O N E S.

I. **V**erè & bene cecinit Poëta :  
*Felix qui potuit rerum cognoscere causas,*  
*Ille metus omnes, & inexorabile fatum,*  
*Subjiciet pedibus, strepitumque. Acherontis a-*  
*vary.*

Sic etiam, si veneni pestilentis natura unquam verè cognosci potuisset, procul dubio etiam remedium ex opposito ei contrarium inventum fuisset : verum & cognitio naturæ atque essentia pestis, & ejusdem certum remedium, summi Dei consilio hætenus mortalibus denegata fuisse videntur : *Fortè non placet Deo* (inquit Gesnerus lib. 1. Epist. Medic. 64.) *ut contra flagellum peccatis nostris debitum, ullum certum presidium habeamus,* Quapropter bene & Christianè loquuntur, qui dicunt verum pestis alexicacum penes illum ad-

huc latere, qui flagelli hujus immisionem & aversionem sibi soli reservare voluit.

II. Animadverterunt Medici causam pestis esse venenum, atque hinc, ab effectu aliquâ similitudine, alii illud assimilant veneno nappellino, alii arsenicali, alii aliis venenis; & quamvis incerti essent in quonam consisteret vera essentia istius veneni, tamen, ut pestem certius curarent, plurimorum venenorum antidota simul miscuerunt: atque ea ratione multa egregia ad pestem inventa sunt remedia, etsi verum specificum adhuc lateat. Hinc etiam Goclenius, in *λογιστική*, inquit : *Certum est multa præclara quidem, usuque & experientia comprobata haberi remedia pestifero veneno antipathetica, sed specificum, & quod totius substantia sua viribus ei adversetur, à nemine adhuc monstratum vidi.* Plura hæc de re videantur lib. 2. cap. 10. annot. 1.

### C A P U T II.

#### DE DIÆTA PESTIFERORUM.



Uamvis in curatione pestis, in qua magnum periculum est in mora, pharmacia necessario diætâ antecedere debeat, nos tamen hanc illi hic præponemus, ut vulgarem ordinem, qui in curatione aliorum morborum teneri solet, etiam servemus. In cubiculis, in quibus decumbebant ægri, jussi-

jussimus ditoropi servari, & ceteris commendari. eo modo quem descripsimus lib. 2; cap. 3. Somnium ante ptomoros sudores in totum prohibuimus, & postea tantum in modum ut breuiorem laudavimus. Mortis magnos animi & corporis fugere jussimus. Aliæ exactiones non promovimus medicamentis ante morbi declinationem. Quæritur ad reliquam victus partem, quæ in assumptis consistit, etsi pestis ut plurimum siccorem comitem habeat, quæ febris ratione caloris & siccitatis dietam humedantem (sicque dicitur communem Medicorum opinionem requirere solet, nam tamen simpliciter humedans dieta nobis in hac peste non admodum convenire videbatur, quæ non tam caloris febrilis, quam pestiferæ malignitatis ratio habenda erat, hæc enim ab ipso morbi principio totam curationem ad se trahebat, eaque neglecta præsens periculum imminerebat. Quapropter nos omnibus cibis & potibus etiam talia admiscuimus, quæ simul concutere ac roborare, & venenaræ malignitati resistere possent, quamvis illa etiam modice exsiccarent, dummodo vel leniter refrigerarent, vel saltem in calore non nimis excellerent, atque hoc modo cibariis etiam alexipharmacam aliquam vim indidimus. Prohibitis primò piscibus, omnibusque aliis falsis, acribus, multum calidis, & facile corruptilibus, ac mali nutrimenti cibis, præscripsimus cibos euchymos & facilis digestionis, ut plurimum liquidos (assatis enim & siccioribus difficulter vescuntur ægri) ex jusculis caponum, pullorum, gallinarum, perdicum, carnis agnæ, vel vervecinæ, aut vitulinæ, quæ cum acetosa, pimpinella, boragine, melissa, radicibus petroselini, fructu ribesiorum rubrorum, cerasis morellis, pomis citriis, aurantiis, cydoniis, aliisque similibus, cocta erant. In condimentis etiam laudavimus succum citri, acrum vini simplex, vel potius rosaceum, osacibucinum, vel calendulatum, omnibusque cibis aliquid acidi admiscuimus, ut dejectus ægrorum appetitus magis excitari, & putredo melius coerceri posset. Cibos quidem paulo copiosiores, quam in aliis acutissimis morbis fieri solet, obtulimus, ut vires servari possent. Verumtamen primis duobus tribusve diebus ad eisdem assumendos non valde impulimus, & ægros his diebus post cibos assumptos se multò pejus habuisse observavimus, eo quod natura, quæ in principio ad sudores impellenda erat, ciborum coctione impedita, à necessario sudandi opere avocabatur. Sequentibus autem diebus (1.) corde sudoriferorum alexicacorum usu aliquantum allevato, ægris, etiam nolentibus (nempe ter quaterve de die) parum cibi liquidi dedimus, ut vires labascentes reficerentur. Si verò ægrorum debilitas ciborum assumptionem impediret, talia præparavimus quæ exigua quantitate multum nutrire possent. Interdum carnem (2.) vitulinam aut vervecinam, vel capum, aut gallinam carnosam, in veru assatam contundi, ac in torculari fortiter exprimi curavimus, cui succo expresso aliquantum succi citri recentis, una cum alicujus pulveris cardiaci & antidotalis boni saporis tantillo, admiscuimus, ejusque aliquoties de die cohleare unum aut alterum exhibuimus. In eundem usum multoties gelatinam hac fere forma confecimus:

*R. Gallinam, aut pullum carnosum, vel caponem juvenem, abjectis intraneis bene mundatum, & cum aceto rosaceo vel sambucino lotum, conscindatur una cum ossibus in minutas partes, & imponatur cantharo lapideo vitreato, angustioris orificii, addendo carnis vitulinæ musculosæ, similiter conscissæ, lib. f. (subinde quoque perdicem, aut passerem, vel alaudas aliquot addidimus) pomum citri, (3.) unum (si parva fuerint, sumenda duo) in particulas una cum cortice conscissum, conserva rosarum rubrarum, unc. ij. cinnamomi electi drach. ij. vel iij. vini Rhenani unc. v. vel sex, his immissis cantharus exactissime firmo operculo obturetur, & coquatur in balneo sex septemve horis: deinde totum effundatur super mappam mundam, ex eoque omnis succus fortiter contorquendo exprimatur, à quo frigefacto postea omnis pinguedo auferatur, & sit gelatina.*

Hujus

Hujus gelatinæ aliquoties de die dabam pauca cochlearia ad ignem liquefacta, vel folia, vel cum pauxillo alterius jussuli tenuis & succo citri. Hujusmodi autem cibis, neque theriacam, neque aliud quid gustui ingratum admiscuimus, ne hoc modo ægri à cibis nimium absterrentur. Sitim magnam diu perferre omnino prohibuimus: plerisque pro potu dedimus cereviciam tenuem (hæc enim est instar decocti hordei fermentati) vel solam, vel admistis aliquot olei sulphuris, aut vitrioli guttulis: aliis decoctum hordei simplex cum succo citri ad gratum saporem: aliis julebos refrigerantes ac malignitati resistentes, ex aquis stillatis acetosæ, carthui bened. scabiosæ, cichuræ, boraginis, cum succo citri, & syrupo granatorum acidorum, vel de acetositate citri, vel rob. ribesiorum rubr. oleo sulphuris, aut vitrioli paratos: Aliis aquam fontanam (4.) purissimam solam, vel cum paucis succi citri concessimus. Aliis ex modo dictis coctas potiones gratissimas confici curavimus. (5.) Si magnus ardor non adesset, ægris delicatiusculis valde debilibus, & vino assuetis, etiam vinum (6.) album tenue, cum aqua fontana aut succo citri dilutum, modica quantitate concessimus. Nonnullis hujusmodi potum gratum confecimus.

*Poma citri succo plena n. iij. conscindantur una cum cortice in particulas, ac vitro impositis affundatur aquæ fontanæ, rosarum, ana lib. i. vini albi tenuis lib. j. sacchari albiissimi, vel syrapi limonum, parum, ad levem dulcedinem, misceantur pro potu.*

Omnis potus, cui vinum admistum erat, moderatum tantum usum ægris debilibus injunximus. Sitim nimiam sæpe fallere jussimus cum frustulo pomi citri in ore detento, aut masticato, vel cum pulpæ tamarindorum pauxillo, vel cum foliis sedi majoris, quæ detractâ exteriori pelliculâ, & aquæ frigidæ immacerata, linguæ imponebantur. Si lingua valde sicca & arida esset, os sæpissime lavare jussimus cum sola aqua fontana, quæ hoc in casu multum proderat: huic nonnulli addebant acetum, sed minus bene, propterea quod acetum per se exsiccat, & linguam aridiorem faciat, ac paulo post lotionem, sitim majorem excitet. Alii etiam sero lactis acido os colluebant.

### A N N O T A T I O N E S.

I. **C**um in peste spiritus vitales admodum corrumpantur & dissipentur, post usum sudoriferorum (quæ omnibus posthabitis, in principio morbi aliquoties sunt exhibenda) liberaliore, euchymo, & cardiaco victu ægri alendi sunt. Sic quoque Avicenna & Rhazes, cibis assatim nutrientibus, acidis omnibus, ne concidat appetentia, peste correptos rescire, imò invitos ad cibum capiendum cogere jubent. Etiam scribit Avicenna, suo tempore à peste tantum evasisse illos, qui viriliter edebant & bibebant: quod ipsum a se quoque observatum scribit Hippocrates, lib. de attenuante victu. in epidemicis 3. com. 1. Refert quoque Galenus, in constitutione quadam maligna eos duntaxat evasisse qui multum cibi sumperant. Verum huic sententiæ videtur repugnare Hippocrates, 1. aphorif. 7. qui in morbis acutis victum tenuem instituere jubet. Dico, eundem Hippocratem, 1. aphorif. 9. expressis verbis jubere, ut consideretur, ane æger cum tali victu usque ad vigorem morbi pervenire possit; quod si virium lapsus ante statum futurus anim advertatur, vel me-

tuatur, (quod in peste citissime fieri solet) ut tunc copiosiore alimento restaurentur. Hac quoque de causa, Galenus in accessionibus febrium, si syncope metueretur, cibum porrigebat. De talibus morbis etiam loquitur Hippocrates, 1. aphorif. 5. dum inquit: *In tenui victu ægri delinquant, quo fit ut magis ledantur, quicumque enim error committitur, major in tenui sit, quam in paulo pleniori victu.* Item aphorismo præcedenti: *Victus tenuis atque exquisitus, in morbis quidem longis semper, in acutis vero, ubi non convenit, periculosus.* At pestis est morbus acutus, in quo talis victus non convenit. Hinc Julius Palmarius, lib. de peste, cap. 16, etiam suadet ægros paulo copiosiore alimento alere. Nemini obscurum esse puto, inquit, *alimenti benignitate venenata causa malignitatem mitigari, labascentemque naturam vim erigi, ejus denique facultates & dissipatos spiritus instaurari.* Toto itaque morbi decursu paulo copiosiore, quam in aliis febribus, alimento, eoque euchymo, cardiaco, & enepeto, vires confirmanda sunt, quicquid obganniant nonnulli.

II. Avenzoar peste laborantibus carniarum usum

usum prohibet; quod intelligendum est de ipsa carnis substantia, quam non nisi robustis quibusdam, idque non ante morbi declinationem, tuto dari posse, ipsa ventriculi concoctrix facultas debilitata satis docet. Iusculis autem & succis carnis libere uti licet.

III. Adversus venena pomis citreis maxima alexipharmaca vis inest, quod Athenæus confirmat historia cujusdam hominis in Ægypto, qui morte damnatus, aspidum, serpentum, aliarumve similium venenatarum bestiarum tyrannidi exponendus erat: huic, cum ad supplicium duceretur, muliercula quædam commiseratione ducta, citria poma ad refectorem, & sitim compescendam, obtulit, quibus reus comestis, nihil à lethalibus virulentarum bestiarum ictibus noxæ persequi. Præter Athenæum, omnes etiam Medici unanimiter antidotalem citreorum vim attestantur & extollunt, eaque in peste plurimum prodesse, ab experientia docent, Matthiæolus, Daniel Mylius, Augenius, Fumanellus, Montagnana, Mizaldus, Monardes, Mindererus, aliique. Virgilius, 2. Georg. antidotalem citrei vim his versibus exprimit:

*Media fert tristes succos, tardamque saporem  
Felicis mali, quo non presentius ullum,  
Pocula si quando seva infeceret averca,  
Auxilium venit, ac membris agit atra venena.*

Omnes autem mali citrei partes antidotalem vim obtinent, nempe succus, semen & cortex, imprimis autem exterior corticis flavedo: ideoque nos tota poma in taleolos dissecta cibus incoquimus, & potibus ordinariis immiscemus, ut iis alexipharmaca vis à tota citri substantia, aciditas & refrigeratio à succo, fragrantia à cortice concilietur.

IV. De aquæ potu litigant Medici, anne turò peste correptis pro potu concedi possit. Fracastorius judicat aquam simplicem in pestilenti febre non convenire, nisi eadem ardens sit & biliosa. Ejusdem usum quoque damnant, Nicolaus Florentinus, Hercules Saxonia, Montanus, & Mindererus, qui omnes aquam humectando putredinem augere, & per consequens multum nocere existimant. Forestus aquæ potum omnino lethalem esse scribit, idque, lib. 6. observat. 33. probat exemplo pagi Schoonderloo, prope Rotterdamum siti, in quo omnes pestiferi, qui ob ingentem febrilem calorem aquam bibissent, intra duos dies mortui sunt. Contra vero Rhazes, lib. de peste, cap. 7. aquam frigidam ægris pestiferis porrigit: Nam frigida, inquit, si paulatim absorbeatur, sudorem elicit, & adjuvat foras extrudere superflua ad corporis superficiem. Hanc quoque laudant, Avicenna, Paulus, Ruffus, Celsus, Aëtius, aliique: imò Mercurialis dicit se expertum esse, hanc multum contulisse. Ad hujus controversiæ decisionem dicimus, Aquæ optimæ usum turò concedi posse, dummodo non peccetur in nimia quantitate. Dico, Aquæ optimæ; id est, claræ, insipidæ, nullo malo sapore

vel calore infectæ, qualis est aqua fontana, ex arenaceis vel saxosis montibus erumpens, ut & putealis illa quæ ex simili fundo ascendit. Aquæ verò stagnantes & puteales illæ, quæ è lutosis ac cœnosis puteis emergunt, cum facile, imprimis tempore pestis, putrescant, corrumpantur, & malignitatem aliquam suscipiant, atque in se contineant, maxime damnosæ sunt; ut & aquæ fluviales, in quas tempore pestis omnium urbium in litoribus fluminum sitarum, infecta inquinamenta effluunt & projiciuntur. Atque hujusmodi aquarum stagnantium corruptarum, & fluvialium infectarum usus in causa fuisse potuit, quod in pago Schoonderloo (de quo Forestus loquitur) ubi alias aquas non habent, omnes peste laborantes ab aquæ potu mortui sint; si non violentiæ morbi potius, quam aquæ potui illorum mors adscribenda fuerit. Aquas autem stagnantes facile corrumpi & putrescere, testis est Avenzoar, lib. 3. cap. 2. ubi sic inquit: *Aqua mortua quæ non moventur, & facibus replentur, illa putrescant & foetent, & sunt causa corruptionis aëris & pestilentie.* Hinc etiam Ovidius ait:

*Et vitium capiunt, nî moveantur, aquæ.*

Dico; Dummodo non peccetur in nimia quantitate: nam nimia copia, etiam optimæ aquæ, noxam infert. Quapropter planè rejiciendum est consilium Celsi, Paræi, aliorumque qui frigidam largam usque ad satietatem bibere jubent: qui modus, sicut in aliis quibusdam ardentibus utilis, ita in pestiferis damnosissimus existit. Concludimus ergo, moderatum solius aquæ optimæ (qualis Noviomagi est aqua putealis & fontana) usum, peste correptis turò permitti posse: ac proinde nos in hac peste illam bibere cupientibus, eo modò liberè concessimus, nequæ ulli unquam nocuisse, observare potuimus; imò contra animadvertimus, alios qualescunque potus ægros sæpe maxime gravasse, usque anxietates induxisse, cum aquæ simplicis potus nihil tale efficeret, sitim melius extingueret, & ægros alacriores redderet.

V. Duncanus Liddellius, 3. de febr. cap. 6. duas portiones gratissimas, hic apprimè convenientes, præscribit, quarum prior hæc est:

*Rec. Limatura cornu cervi unc. f.*

*santalæ curram,*

*corticum citri,*

*cinnamomi electi, ana drach. j.*

*aquæ puræ fontanæ lib. ij.*

*coquantur lento igne ad tertie partis consumptionem, calidiora admisce.*

*succi limonum, unc. j. f.*

*sacchari albi unc. ij. f.*

*leviter bulliant, & fiat potio clara.*

Posterior sic se habet:

*Rec. Aquæ hordei lib. ij.*

*acetæ vini optimi,*

*succi acidi citri, ana unc. j. f.*

*saccharum unc. ij.*

*fiat*

fiat s. art. juleb, cujus aciditas pro voluntate acri augeri vel imminui potest.

VI. De vini usu, an conveniat peste correptis, nec ne, acriter disputatur apud Medicos. Multi ob virium dejectionem, syncopen, spirituum oppressionem, aliaque similia mala, concedi debere judicant, quia vinum vires corroborat, spiritus reficit, malignitati, putredini ac corruptioni resistit, & sudorum promotionem adjuvat. Contra alii ob febrem, ejusque ardorem, & inflammationes internas, illud canepes & angue fugiendum esse arbitrantur. Ad quaestionis solutionem dicimus, propter magnam debilitatem vel syncopen vini usum permitti posse, dummodo aeger non sit valde biliosus, & febris non sit vehementer ardens, neque adsit sopor vel capitis dolor, aut ullum delirii signum, neque visceris alicujus inflammatio: dummodo etiam aeger sit vino assuetus, neque sit puer; (nam in his vino curare, non satis tutum, inquit Celsus) dummodo etiam morbus non sit in principio, sed circa statum. Extra hos casus vinum tenue, dilutum, subacidulum & aquosum concedi potest, nam vires citissime reficit, viscera corroborat, & malignitati resistit. Dicto etiam favet experientia, nam nos multoties vinum in hac peste tali modo tutissime exhibuimus, non tantum sine damno, verum etiam cum insigni emolumento. Hoc ipsum quoque expertus videtur Mindererus, qui eapropter lib. de pest. cap.

19. de vino hæc scribit. Vinum, inquit, tempestive ac suo loco, consideratis omnibus circumstantiis, exhibitum, magni medicamenti vicem gerit, hoc enim acri celerrime recreantur, ac regeneratis denuo spiritibus, vires resumunt, & quodam modo reviviscunt, ut mirari quandoque liceat, naturam tantopere delassatam, pauci meri exhibitione tam cito refocillari ac insurgere. Vinum ægrotis exhibere, jubet etiam, in pestis curatione versatissimus Julius Palmarius, lib. de peste, cap. 16. Potus, inquit, esto vinum album, vel gilvum odoratum, bene defocatum, beneque maturum: hoc enim languidioris natura vires, disjectosque spiritus mirifice recreat atque reparat, & optimum pestilentis veneni antidotum existit, simplici peste percussis nunquam denegandum: sed diluatur aqua fontana, qua cum rasura cornu cervi serbuerit. Diluendum autem pro consuetudine, si simplex pestis nec sit, nec ardore insigni fatigat. At si febris putrida implicita est, urgentque calor, dolor, sitis, ac præterea si ferventissimus aestus sit, vel regio torrida, vel natura ægrotantis biliosa, vel oligophorum seligendum, liberaliusque diluendum atque temperandum, vel in totum vino interdicens est. Sic quoque Riverius, lib. de febr. sect. 3. cap. 1. dicit se peste laborantibus vinum cum felici successu sæpissime exhibuisse. Et Zacutus Lusitanus, Prax. admir. lib. 1. observ. 93. solo vini usu restituit mulierem maligna febre laborantem, & jam fatalem terminum expectantem. De vino ad huc nonnulla videantur, lib. 2. cap. 6. annot. 14.

### CAPUT III.

#### DE AUXILIIS CHIRURGICIS.



Auxilia quæ ad pestis curationem Chirurgia subministrat, varia sunt, præcipue quando anthraces & bubones curandi occurrunt, de quibus agemus suo loco; hic solummodo dicturi de generalibus chirurgicis auxiliis, nempe Venæsectione, scarificatione, & vesicatoriis. Nos durante hac peste venæsectionem (1.) damnosissimam fuisse animadvertimus, ac proinde venam nullis secuimus, nec sanis, nec ægris, imò vix quidem in aliis morbis, qui venæsectionem exigere videbantur. Illud enim observavimus, si peste correptis vena secaretur, illos ad unum omnes citò & citò obiisse: si aliis morbis laborantibus, his statim post venæsectionem se adjunxisse pestem: si sanis, plurimos eorum, qui illud tentaverant, brevi post peste correptos fuisse. Scarificationibus, (2.) cucurbitulis, & hirudinibus, loco venæsectionis, etiam usi non sumus, sed solis duntaxat vesicatoriis (3.) emunctoriis applicatis.

#### A N N O T A T I O N E S.

**I**N curatione pestis maximum dubium occurrit de venæsectione, utrum illa conveniat, nec ne: & quæ de re maxime discrepantes sunt Medicorum opiniones, & alii hanc, alii illam partem, tanquam pro aris & focis defendunt, ac singuli suam opinionem ita

mordicus tenent, validisque rationibus confirmant, ut ne ad unguis quidem latitudinem inde divilli possint: neque his, neque illis gravissimæ auctoritates, & præstantissimorum Medicinæ procerum consentientes sententiæ desunt. Affirmativam partem defendunt, Lud. Mercatus,

tus, Trincavellius, Joannes Costæus, Altomarus, Pereda, Andernacus, Lud. Septalius, Janus Antonius Saracenus, Nicolaus Massa, Montuus, Paulus Mongius, Paschalius, Fonsæca, Mercurialis, Forestus, Zacutus Lusitanus, alique plures clarissimi Medici, qui hanc opinionem variis rationibus confirmant.

1. Quia si plethora adsit, necessariò quærendum est citum remedium ad illam solvendam, ut corpus perspirabile reddatur: atqui tale remedium est venæsectio.

2. Quia in febribus putridis venæsectionem convenire, eamque putredines maximè coercere, notissimum est; atqui illæ adsunt pesti.

3. Quia per venæsectiones citissimè evacuatur venenati ac putridi humoris magna pars, & natura à majore sarcina levata, quod postea reliquum est facilius evincit.

4. Quia per venæsectiones fiunt commodissimæ revulsiones à partibus illis in quas venenatus humor decumbit; nempe bubonibus & carbunculis.

5. Quia Hippocrates, 6. *epidem.* in affectionibus pestilentialibus usus fuit venæsectione, eamque etiam approbaverunt, Galenus, Rufus, Paulus, Oribasius, alique veteres: quorum opinioni quoque subscribens Avicenna, 1. 4. *Tract. 4. cap. 4.* sic inquit: *Summa curationis pestilentium febrium est exsiccatio, & illud cum phlebotomia & solutione ventris.*

6. Quia experientia multoties docuit illud remediū genus multum profuisse; & Petrus Bayrus, *lib. 20. cap. 8.* illud confirmat manifestissimo exemplo mulieris peste laborantis, venæsectione curatz.

Hæc sunt præcipua fundamenta quibus affirmativa opinio maximè innititur: qui plura alia videre cupiet, legat Alexandri Massariæ *lib. 2. de peste*, ubi hanc affirmativam mordicus tenet, eamque, tanquam pro aris & focis, defendit.

Negativam autem partem doctissimè tuentur, Cardanus, Fernelius, Platerus, Raymundus à Vinario, Petrus Salius, Andreas Chiocchus, Palmarius, Mindererus, Andreas Trevisius, alique gravissimi viri, cum quibus etiam nos sentimus, in pestis curatione omnino non convenire venæsectionem.

1. Quia pestis non inducitur nec generatur à plethora, obstructione, aut humorum putredine, sed à veneno.

2. Quia venæsectione non potest extrahi aut imminui venenum pestilens, neque evacuari malignitas cordi & spiritibus vitalibus inhærens.

3. Quia majoris causæ major est habenda ratio: ac proinde, quamvis febris (quæ tamen semper non adest) ratione putredinis, venæsectionem poscere videatur, quia tamen venenum ratione suæ malignitatis illam prohibet, & alexipharmaca citissimè poscit, major ratio habenda est veneni, quam putredinis.

4. Quia venæsectione detrahatur vitæ thesau-

rus sanguis, & vires maximè dejiciuntur, quæ in peste omnium maximè conservare oportet; ut furiosissimo morbo Natura fortiter resistere queat.

5. Quia venæsectio, cum trahat à peripheria ad centrum, pervertit laudabiles & necessarias naturæ operationes, quæ fiunt à centro ad peripheriam, per sudores, tumores, & anthraces; quas operationes non impedire, sed promovere oportet.

6. Quia venæsectio spiritus & humores exagitando, eosdem disponit ad venenum pestilens promptius suscipiendum.

7. Quia venenum pestilens, vel foris circa peripheriam, vel intus alicubi in partibus ignobilibus sanguini nondum permistum hærens, inanitis venis, facile illas ingreditur, ac sanguinis massæ permiscetur.

8. Quia Hippocrates in vera peste non fuit usus venæsectione, ut liquet 1. *epidem. in Historia Critonis*, aliisque in locis: imò 6. *epidem. sect. 7. text. 1.* cum in morbis quibusdam pestilentialibus venæsectiones in multis ægris tentasset, nunquam tamen illas profuisse, ipsemet testatur. Quapropter ipse quoque Galenus, *lib. de cibis boni & mali succi, cap. 1.* laudat illos Medicos, qui in peste paucissimè ausi fuerunt sanguinem mittere; & dicit in ea pestilentia sui temporis venam paucissimis sectam fuisse. Sic. 1. *de differ. febr. cap. de febr. pestil.* phlebotomiam inter pestis remedia non recenset, imò de ea ne verbum quidem facit. Et 9. *simpl. cap. de terra Samia*, scribit nulla alia remedia in peste profuisse, præter bolum Armenam, ergo neque venæsectiones. Ad hæc, 4. *de tuenda sanit. cap. 4.* venam secare vetat, humoribus à sanguinis natura multum recedentibus: quod iterum confirmat *lib. adversus Juliam. & 11. Methodi, cap. 14.*

9. Quia experientia à multis seculis docuit, venæsectiones in peste semper damnosissimas fuisse: & si fortè uni aut alteri sanguinis missio feliciter cesserit, illud tamen communissimam experientiam evertere nequit; & credendum potius, vel rarissimum quid accidisse talibus ægrotis, vel illos vera peste non laborasse, sed febribus pestilentialibus sine peste, quales sunt petechiales, aliaque similes, in quibus venæsectiones maximè laudabiles habentur. Maximam autem esse experientiam, quæ semper docuit in peste cum infelicissimo successu institutam fuisse venæsectionem, liquet ex Medicorum scriptis. Andernacus, *lib. de pest.* testatur in pestilentia sui temporis venæsectionem magnum damnum dedisse, extinctis omnibus iis qui illam adhibuerant. Fallopius observavit in longa peste, ab anno 1524 ad 1530, omnes extinctos esse, quibus vena secta fuerat; multos autem hanc venæsectionem omittentes, servatos fuisse. Illud ipsum in duabus pestibus se quoque observasse, testatur Henricus Florentius, insignis Practicus Leydensis, in *additamento ad cap. 7. lib. P. Ray, de peste*. Venæsectionis damna se quoque expertum fuisse, scribit Simonius, *lib. 2. de pest.* Dodo-



næus refert se in peste anni 1602, non vidisse quod sanguinis missio ulli profuerit, sed contra sanguine adhuc fluente, in quibusdam vomitus prorupisse, mortemque sublecutam esse, ut ut adhibitis omnibus cautionibus, ab iis præscriptis qui illam commendant, sectio facta fuisset. Simile etiam testatur Mindererus, de pest. cap. 14. observatum fuisse in peste sui temporis. Guil. Fabr. Hildanus, cent. 4. observ. 23. refert in peste Lausannensi, omnes fere, quibus vena secta fuit, interiisse. Qui celebres pestes annorum 1508, & 1529, describunt, omnes uno ore, se illud quoque comperisse testantur. Paræus, lib. de pest. cap. 24, talem historiam refert: Anno Domini, inquit, 1565, qui annus toti fere Gallia peste pestilentibusque morbis fœtus & funestus fuit, ex omnibus urbium, per quas Carolo IX, Regi, iter Bayonæ erat, Medicis & Chirurgis diligenter ac studiose sciscitatus sum, quid agris successisset ex purgatione & phlebotomia: una voce responderunt se sedulo observasse, omnes peste correptos, quibus sanguis detractus fuerat, & corpus purgatum, deterius inde habuisse, tandemque interiisse: reliquos, quibus sulis alexiteriis provisum esset, fere curatos evasisse. Infelicem venæsectionis usum se quoque compertos habere scribunt, Gesnerus, Donzelinus, Dalechampius, Jo. Heurnius, Bauhinus, Salustius Sylvianus, Jo. Ant. Saracenus, Petrus Silius Diverfus, Angelus Balicochus, Montanus, Jo. Nævius, Cornelius Gemma, alique plures insignes Prædici: Imò Wierus, lib. rarar. observat. Med. meminit pleuritidum & anginarum pestilentium, in quibus venæsectio, quæ maximè profutura putabatur, etiam exitialis fuit. Horum virorum testimoniis adjungatur quoque nostrum, qui in hac peste venæsectionem semper damnosissimam & lethalem fuisse observavimus. Idem illud etiam notasse videntur Medici Antverpienses, qui proinde in Consil. de pest. anni 1624, venæsectiones & purgationes omnino prohibent. Quapropter concludimus, venæsectionem in curatione pestis, tanquam maximè exitialem, semper fugiendam esse, propter jam dictas rationes: quibus & illud incommodum adjungi potest, quod in peste laborantibus interdum per apertam venam effluens sanguis ægrè coerceri, & vix ullis mediis fisti possit. Sic etiam Zacutus Lusitanus, lib. 3. Prax. obs. 41. scribit se in peste vidisse, multis sanguinem è cucurbitulis emanantem, nec validis auxiliis, nec ipso cauterio potuisse compesci, sed omnes obiisse. Tandem pro conclusione adjungamus etiam testimonium magni Fernellii, qui, lib. 2. de abdit. cap. 12. sic dicit: In peste, Medici celeberrimi, qui longo artis usu doctrina studia compleverunt, prorsus abstinere à venæsectione, experti eos quibus sanguis, sive initio, sive postea esset missus, aut paulo post obiisse, aut in deterius lapsos esse. Non enim (ut quibusdam videri posset) evacuatio hanc perniciem summovet, aut imminuit, aut cohibet, ut quæ non est in humoris vitio posita: neque laborantem ulla ratione levat, sed contra gravius offendit. Etenim extrinsecus nos circumfundens perni-

cies, vacuato sanguine, & spiritu, in pulmones, in cor, & in venas facilius penetrat, & ferocia majore invalescit: sanguis etiam phlebotomia cancellatus, promptius labem contrahit, quemadmodum aqua cui fellis tantillum injeceris, si agitur, acryus quam si consistat, amarescit. Quin etiam vires agitatione imminuta insipienti pernicipi minus obsistunt. Hæ rationes experientia confirmata, ut à venæsectione, ita magis à valida purgatione docent abstinendum.

II. Oribasius, lib. 7. Collect. cap. 20. refert Galenum (vel, ut Amatus & alii volunt, Apollonium) cum vehemens pestis Asiam præhendisset, ipsumque attigisset, secunda morbi die, remissione febris factâ, crus scarificasse, duasque fere sanguinis libras detraxisse, hocque modo periculum evitasse. Quam historiam ipse Galenus describit, lib. de cucurbit. & scarif. cap. 20. ubi subjungit, quod plerique etiam alii hoc præsidio usi, superstites remanserint. Hinc multi illud auxilium adeo præstans esse scripserunt, ut plerique peste infecti cum eo feliciter evaserint, sicut annotaverunt Claudinus, de ingress. ad infirm. lib. 2. cap. 6. Septalius, de pest. lib. 5. cap. 19. Denatus Sanctorius, lib. 1. epist. 2. Aloysius Toreus, lib. de febr. punct. Fracastorius, de curat. febr. punct. lib. 3. cap. 5. Joannes Colle: lib. de morb. malig. cap. 6. Jo. Cremona, lib. de pest. cap. 1. Alexander Massaria, lib. 2. de peste. qui omnes citatis locis de causa præstantiæ hujus auxilii latè disserunt. Egyptii & Turcæ solent etiam peste correptis crura panno aspero fricare, & aqua calida fovere, deinde illa infragenu vincire, & ab interiore parte incipiendo, longiusculas incisiones triginta vel quadraginta facere, atque ita duas tresve sanguinis libras extrahere: cujus curationis historiam describit Mannus, lib. de malleolor. scarificat. eamque se Memphis in Ægypto vidisse refert: cujus curationis felix experimentum se quoque fecisse, refert Gavassetius, in Epist. Quicquid sit, nos, propter rationes præcedenti annotatione dictas, in hac nostra peste tales scarificationes prorsus improbavimus, atque hinc, ut à me relictæ, sic à nullo alio durante hac constitutione, easdem feliciter institutas fuisse novimus. Quantum ad prædictorum virorum experientiam, credimus illam duntaxat intelligendam esse de febribus peccetialibus aliisque pestilentialibus sine peste, in quibus re vera multum prodesse possunt, minimè autem de vera peste. Eustachius Rudius, art. med. lib. 3. cap. 30. valde commendat hirudines penitioribus natiæ partibus admotas, ut & cucurbitulas scarificatas, dorso potissimum è regione cordis applicatas. Verum quia etiam hæc media maxime infida esse, plurimisque citissimam mortem intulisse, experientia in hac nostra peste millies docuit, penitus à nobis rejicienda fuerunt, plurimos enim talibus sanguinis evacuationibus ab aliis duobus Medicis (quos honoris gratia non nomino) occisos fuisse novimus, quibus tandem illi ipsi Medici (qui illud in Eustachio legisse videbantur) cum variis ex suis domesticis, misere interempti sunt.



III. Veteres in curatione pestis maximi faciebant vesicatoria, quæ applicabant brachiis, tribus digitis supra carpum, & parte interiore crurum, paulo supra malleolum. Figura autem vesicatorii erat rotunda, magnitudo circiter latitudinis trium digitorum. Sic Galenus, 1. de humoribus (ut etiam narrat Rabbi Moses in aphorismis) scribit: ubi humor ad caput aut ventrem fertur, medicinas mordicativas manibus & pedibus appositas, magnopere conferre. Oribasius quoque, 8. Collect. cap. 19. inter remedia quæ maximè revellunt venenum & pravy humores à partibus nobilioribus, enumerat medicamenta acria artubus apposita. Hos aliosque veteres hac in parte secuti sunt plurimi neoterici. Marsilius Ficinus ante

eruptionem anthracum vel bubonum, adhibet vesicatorium paulo supra carpum dextri brachii ab interiore parte, & supra talum interiorem dextri pedis. Jacobus de Partibus, in com. supra primam quarti Avicenna, cap. de febr. pest. inter alia remedia convenientia enumerat vesicatoria, brachiis & cruribus apposita, facta ex lacte vel sicuum, vel tithymali, vel cantharidibus cum fermento. Hercules Saxonia maximi quoque facit revulsionem quæ fit per vesicatoria, qua de re latè disputat lib. de phænig. Credibile est vesicatoria hoc modo applicata multum prodesse posse: nos tamen illum modum secuti non sumus, sed ipsis emunctoriis illa potius applicavimus: rationes infra petantur, cap. 12. annot. 4. & 6.

## CAPUT IV.

## DE PURGANTIBUS ET VOMITORIIS.

**A**D curationem pestis è Pharmacia duo remediorum genera peti solent, nempe purgantia, & antidota sudorifera: de his sequenti, de illis verò hoc capite sermonem habebimus. Purgantia (1.) & vomitoria maximè fugienda esse, præter rationem, in hac peste etiam docuit usus. Quapropter nos ante diem septimum nullis, ne quidem cacochymis (2.) aut cathartica, aut lenientia (3.) aut clysteres, aut aliud quippiam quod alvum citare posset, dedimus, & quamvis totis septem diebus alvum non deponerent ægri, nihil tamen movere ausi fuimus: paucissimis enim, qui id tentaverant, feliciter cessit: at fere in omnibus (veneno à peripheria ad centrum revocato) diarrhœa insecuta fuit incurabilis & brevi occidens. Quo autem magis cacochyma erant corpora, eo citior fluxus, & majus erat periculum. Ac proinde nos illud opus usque ad septimum morbi diem naturæ totaliter commisimus. Post diem autem septimum, tantummodo unam alteramve pilulam, ex nostris antipestilentialibus, aut Ruffi, exhibuimus. Aliis autem purgantibus vix ante diem vigesimum usi sumus, cum etiam in morbi declinatione illa non sine periculo dari animadverteremus, imò non paucis jam à morbo convalescentibus, illa valde noxia fuisse, viriumque recuperationem plurimum impedivisse. Neque etiam alvi constipationem (4.) magnopere metuimus, utpote quam nullis nocuisse animadvertimus. Vomitoria qualiacunque, etiam stibiata (5.) à multis insigniter decantata, minimè probavimus, utpote quorum violentiâ semper corpora nimis vehementer conturbata & exagitata fuisse, atque ægros post illa se multo pejus habuisse, citiusque extinctos esse, observavimus.

## ANNOTATIONES.

**I**Nter veteres, Averrhoës, Aëlius, Avanzoar, Oribasius, Avicenna, Aegineta, alique plures, curationem pestis à purgatione auspicantur: quorum vestigiis, inter neotericos, insistant, Mercurialis, Donatus ab Altomari, Rodericus à Castro, Monardus, Hercules Saxonia, Vallesius, Augenius, Septalius, Johannes Bravus, Conciliator, Paschalius, Zacutus Lusitanus, alique plurimi doctissimi

viri, qui omnes purgantia in curatione pestis convenire, his rationibus confirmant:

1. Quia Hippocrates, 4. aphorif. 10. inquit: *Medicamento purgante utendum in valde acutis, si materia turget, eadem die; tardare enim in talibus, malum.* Atqui pestis est morbus acutus, in quo materia turget, ergo, &c.

2. Quia venenum pestilens cum nullam coctionem recipiat, citissimè est extirbandum, sicut

sicut docet Galenus, 4. de sanitat. tuend. cap. 3. inquiens : *Quod omnino alienum est, nulla ratione fieri potest, ut id naturæ suæ gratiam recipiat, sed educere id, quamprimum est tentandum.*

3. Quia vomitus bilioli, capitis dolores, cardialgia, inquietudines, aliaque multa symptomata, purgationem necessariam esse demonstrant.

4. Quia compertum est purgantia multis ægrotis peste correptis plurimum profuisse.

Verum non obstantibus his validissimis ac verisimilibus rationibus, præclarissimorum veterum & neotericorum Medicorum auctoritate munitis, nos tamen purgantia in pestis curatione planè non convenire dicimus, & sequentibus rationibus probamus.

1. Quia venenum pestilens, cum nullam coctionem recipiat, statim quidem (secundum Hippocratis dogma) exturbandum est; sed illa exturbatio (docente eodem Hippocrate) fieri debet per vias lege naturæ commodas, ad quas natura feliciter vergere animadvertitur : atqui ab omni ævo observatum fuit, ipsam naturam semper feliciter moliri veneni pestilentis expulsionem à centro ad peripheriam, per sudores, tumores & anthraces, & ex hoc motu salutaria signa desumi, sicut lethalia ex omni contrario naturæ motu, qui fit à peripheria ad centrum : ergo cum purgantia perverso motu moveant, per vias lege naturæ in commodas, planè non conveniunt.

2. Quia purgantia cacochymiam quidem corrigunt, & corruptos putridosque humores (à quibus pestilentia causa non dependet) expellunt, sed ipsum venenum pestilens cordi ac spiritibus inhaerens, educere nequeunt, quia nullum purgans medicamentum (inquit Crato) pestilens seminarium ejicit; quod tamen primò & citissimè extirpare necesse est, antequam ipsius vitalitatis fontem extinguat.

3. Quia cathartica humores & spiritus imminuunt, exagitant, confundunt, & corporis vires dissolvunt; quas hic conservare maximè necessarium est.

4. Quia plurima cathartica, præterquam quod venenis non resistent, venenata ac malefica qualitate prædita sunt.

5. Quia maligni & putridi humores ipsimet per se naturam maximè stimulant; qui si aliquo modo agitentur, & ad intestina trahantur, cum furore eò decumbunt, & validissimas ac perniciosas evacuationes faciunt.

6. Quia experientia hætenus docuit, fere omnes ægros peste laborantes, qui purgantia sumpserunt, subsequente ut plurimum lethali diarrhœa, vel exitiali virium prostratione, fuisse extinctos : quod etiam Paræus & Joannes Morellus in praxi se observasse testentur. Ipse Hippocrates, 3. epidem. text. 3. de gravissima pestilenti constitutione agens, inquit : *Purgationes multos offendebant, quorum qui sic habebant, subito multi peribant; multum malum producebatur.* Sic etiam referunt Annalium scriptores, anno 1510,

pestem in Gallos sæviisse, & in hujus curatione observatum fuisse, à purgantibus, etsi levioribus, exhibitis, ægros multo citius interiisse. Forestus scribit, anno 1557, in peste Delphensi, omnes qui statim ante tertium vel quartum diem purgabantur, periisse; & quocunque fere tempore purgans medicamentum sumerent, paucos pristinae sanitati restitutos fuisse. Jo. Anton. Saracenus testatur in peste Genevensi, fere omnes eos quibus, sive mox ab initio, sive postea essent humores catartico medicamento agitati vehementius, vel esset corpus sanguinis missione inanimatum, aut non multo post obiisse, aut in deterius lapsos esse. Palmarius refert in peste anni 1565, omnes fere perfanatos fuisse, qui neglectis vacuantibus sola antidota sumpserunt. Idem, lib. de febr. pest. cap. 7. sic dicit. *Vix centesimus quisque evadit ex iis quibus bubones aut carbunculi intro remeantes citra suppurationem subito disparent : vel qui incipiente morbo cathartico utuntur, vel spontaneo alvi profluvio corripuntur, vel exacto triduo quatrduoque, sectâ venâ spiritu & sanguine solvantur.* His nostris rationibus favent multorum clarissimorum Medicorum scripta. Rhazes purgationes valde suspectas habet. Galenus, 9. Simpl. solam bolum Armenam, non autem purgationes profuisse, scribit. Cornelius Celsus, lib. 3. cap. 7. dicit, in peste minimè ducendam esse alvum. Fernelius, 2. abdit. cap. 12. scribit, in peste abstinentiendum esse à venæsectione & purgatione, propterea quod causa pestis à venenata qualitate scaturiat, quæ antidotis expugnanda, & per sudores ejicienda est. Christophorus à Vega, lib. 3. pognost. in comment. sent. 15, & 1. aphorif. 23. sic ait : *In febre pestilenti natura motus universus est ad cutem, hunc Medicus per ea quæ sudorem eliciunt, jurabit : unice autem cavebit ne per alvum evacuet, quod is motus natura instituto è diametro oppugnet.* Inter reliquos neotericos, purgantia, tanquam damnosissima, quoque rejiciunt doctissimi viri, Hieronymus Cardanus, lib. 2. contradi. 4. Crato, lib. de peste : Gregorius Horstius, decad. 10. probl. 1. Mundella, epist. 16. Pereda, lib. 2. in meth. Paschal. in schol. cap. 9. Joannes Bokelius regim. part. 2, cap. 9. Aquapendens, lib. 1. tumor. præternat. cap. 17. Valleriola, in append. loc. com. cap. 2. Leonardus Fuchsius, aliique plures. Hercules Saxonia tamen Prax. lib. 8. cap. 37. hæc in re tali distinctione utitur, nempe, si pestis originem duxerit à causa externa, & invaserit corpus probis humoribus refertum, tunc in curatione probari posse purgationes, nec illas alvi fluxum inducturas, metuendum esse : sin minus, non probari purgationes. Hanc distinctionem ratio non minus quam experientia evertit. Illa : quæ docet nulla dari purgantia quæ venenum pestilens extrahant : præterea in corporibus euchymis purgantia, defectu cacochymia, non posse non educere humores bonos & laudabiles, atque ita per consequens vires (quarum in peste maxima ratio habenda est) graviter dejicere, nec minus salutaris operationi naturæ obesse, eamque contrario motu interturbare. Hæc : quæ in ægris ianu-

innumeris euchymis lethales alvi fluxus purgantium usu inductos fuisse, & nobis & plurimis aliis videndum exhibuit.

II. Quæri posset, si in corpore cacochymo magnam humorum putredinem pesti adjunctam esse animadverteretur, an tunc non liceret in principio curationis per cathartica humorum putridorum copiam, sicque ipsam putredinem, imminuere? Minimè, quia in corporibus cacochymis peste infectis longè gravior & periculosior metuendus est alvi fluxus, quam in euchymis. Præterea, quia curatio incipienda est ab eo quod magis urget & majus periculum minatur, nempe à veneno, (neglectâ tantisper humorum putredine, quæ interim per alexipharmaca, ratione veneni adhibita, simul egregiè coercetur) eique citissimè resistendum, antequam radices agens vitæ fundamenta subvertat. Illo autem expugnato hoste, reliqua minoris periculi mala (qualia sunt cacochymia, calor in sanguine & spiritibus accensus, humorum putredo, &c.) si naturæ solius vi non evanescant, artis subsidio commodius evincentur.

III. Ad evacuationem corporum peste infectorum alii alia commendant; alii clementioribus, alii fortissimis catharticis utendum censent. Hercules Saxonia pilulas Ruffi, & serum caprinum cum syrupo rosato solutivo, laudat: quo syrupo solo mavult uti Fracastorius: alii syrupum furni terræ, alii pomorum solutivum commendant: alii rhabbarum, senam, agaricum, diacatholicum, & similia, magni faciunt. Multi etiam in peste alvum, si spontè non dejiciat, lenire jubent clystere emolliente, suppositorio, decocto prunorum cum manna, infusione foliorum senæ & rhabbari: aliisque similibus. Verum licet omnia hæc levia tantum esse videantur, attamen in hac nostra peste ante diem septimum exhibita, præfens periculum inferebant; atque ita, proh dolor! Noviomageneses multi, qui hujus illiusve consilio talia assumpserant, infelicitè perierunt. Sic non semel solum syrupum rosatum solutivum, aut de cichoreo cum rheo, nonnunquam solum prunorum decoctum, ut & ipsam quoque mannam, ac clysmata emollientia, diarrhoeas lethales excitasse, summasque virium prostrationes citò induxisse, visum fuit: de rhabbaro quoque & foliis senæ plurima tristitia extiterunt exempla. Quapropter non possumus non mirari, quod multi celeberrimi Medici, his lenioribus, & tamen periculosis, nondum satis contenti, adhuc ad longe fortiora cathartica confugiant, idque, ut ajunt, secundum regulam: *Ad extremos morbos extrema sunt adhibenda remedia.* Haud secus ac si conveniret in extremis morbis causam morificam violentis medicamentis agitare per vias lege naturæ incommo- das, per quas expelli nequit. Sic legimus Fallopium gloriari se fortibus purgantibus in ægris peste correptis feliciter usum fuisse, & inter cætera, cum Avenzoare, maximè extollere calidissimum illud medicamentum euphorbium: dicere etiam, Jacobum Carpentem, maximi no-

minis Chirurgum, innumeros tali modo sanasse. Gentilis, 4. *can. fen. 1.*, refert suo tempore Medicos scammoniatâ & validissima purgantia ægrotis pestiferis exhibuisse. Paræus etiam extollit diagridium. Mercurialis in principio curationis, cum Avershoë, laudat pilulas cochias; ut & euphorbium. Marsilius Ficinus confectionem hamech; Heurnius trypheram Persicam tanquam specificum; alii diaturbith cum rhabbaro, alii benedictam laxativam commendant. Hollerius hellebori drach. j. pomo includit, quod stuppis aqua rosacea madefactis involutum, sub cineribus assat, idque pomum comedendum offert: sed albumne an nigrum sumat helleborum, non addit. Etiam Capivaccius ad helleborum, nec non euphorbium, scammonium, colocyntidem, trochiscos alhandal confugit. Paracelsistæ exhibent suum turbith minerale, quod ex mercurio præcipitato præparatur; quem mercurium exhibere audet Guilhelms Magistrius, eoque medicamento pestilens venenum per alvum & vomitum optimè expelli ait: quod tamen Antonius Valetius (*in Schol. ad Hollerii lib. de peste*) dicit nefas esse imitari. Nos verò experientiâ plus satis edocti, existimamus nefas esse ullum violentum catharticum, qualecunq; fuerit, peste correptis exhibere; imò ipsa quoque lenientia non, nisi maxima aliqua necessitate urgente, exhibenda esse, idque summa cum prudentia: nam in hac peste fere omnes periisse vidimus, quibus, ante diem septimum alvus, vel sponte, vel arte commota fuit. Quantum ad prædictorum virorum auctoritates, dicimus illa fortia purgantia in febribus malignis, petechialibus, aliisque morbis pestilentialibus (qui à prædictis viris fortè sub nomine Pestis describuntur) interdum fortassis prodesse posse, minimè autem in vera peste; & si forte aliquibus robustissimis naturis non infelicitè cesserit catharticum operatio, tamen inde, tanquam ab experientia, concludi non posse, cathartica (vel etiam venæsectiones) ad curationem pestis semper maximè conducere & necessaria esse; qualem regulam generalem, à paucissimis ægris sibi, quondam Nardeni visis, Medicis Practicis libenter inculcaret Clarissimus Regius.

IV. Alvi adstrictionem non modo non nocere, sed primis diebus prodesse, sæpius observavimus. Ratio erat, quia hoc pacto unitæ nec aliorum distractæ Naturæ vires, validiores erant, & in pestilens venenum alacrius insurgent. Huic nostræ experientiæ etiam favet Julius Palmarius, qui, *lib. de febr. pest. cap. 23*, sic ait: *Quamdiu xenodochio curandis ægrotantibus præsum, eos quibus per initia alvus adstricta esset, etiam si nullo alio remedio uterentur, præterquam Mithridatio, magna ex parte convaluisse deprehendi: contra verò, quibus sponte vel arte proflueret, omnes fere occubuisse.*

V. Droëtus, *de pest. cap. 11.* Quercetans, *in alexic. lib. 2. cap. 7.* Matthiæolus, *in comment. ad cap. 59, lib. 5. Dioscoridis*, & cum illis multi alii Chymici ac Empirici, stibium præparatum in pestis curatione summis laudibus extollunt, atque

atque illud, si in morbi principio, viribus adhuc constantibus, exhibeatur, mirabili & occulta quadam proprietate venenatam perniciem una cum noxiis humoribus sursum deorsumque expellere, dicunt. Ex hoc etiam Angelus Sala, *lib. de peste*, tale oxylaccharum vomitivum componit, quod singulari proprietate pesti resistere scribit:

Rec. Vitri antimonii hyacinthini subtilissime pulverisati, unc. j.  
cinnamomi electi,  
Zedoaria,  
ligni aloës,  
seminis angelica, ana drach. ij.  
croci orient. drach. ij.  
aceti rosacei unc. xviii.

Omnia mittantur in vitrum subure bene clausum, & digerantur in B. M. horis 24. postea liquor frigesfactus filtratur per per chartam emporeticam: deinde cum aqua rosarum tantum sacchari solvatur quantum est pondus liquoris prædicti, quod coquatur ad consistentiam tabellati, & ita calidum cum prædicto liquore pedetentim misceatur, & servetur usui. Dosis drach. ij. ad unc. j.

A vomitoriis ex antimonio curationem pestiferorum incipiendam, & post vomitum ad alexiteria sudorifera progrediendum esse, etiam censet, Th. Willis, *lib. de febr. cap. 13.* eaque methodo etiam usum fuisse scribit Henricum Sayer, medicum Londinensem eruditum, qui peste laborantes passim curabat. Verum cum ipsum stibium ve-

nenata qualitate præditum sit, cum in hoc morbo motu naturæ contrario moveat, cum viscerum maxime deiciat, cum pestilentem labem cordi spiritibusque impressam exagitet, & non educat. cum innumeris Medicorum observationibus constet ejusdem usu plurimos peste laborantes occisos fuisse, ac paucissimos evalisse; quis, quæso, stibium ad curationem pestis sano consilio, salvaque conscientia adhiberi posse judicabit? Quis non magis adhuc abominandum censerebatur consilium Arnoldi Weickardi, qui, *prax. lib. 3. cap. 1.* præter stibium, etiam hoc sequens laudat.

Rec. turpethi mineralis, vel Mercurii præcipitati, gr. vi.  
misce cum pauxillo theriacæ, & exhibe cum syrupo appropriato.

Hoc dicit non modo alvum subducere, sed & vomitum simulque sudorem excitare. Profecto, qui pertinacem luem Veneream isto remedio aliquoties curarunt, illi horrendas istius Mercurii vires, quantas anxietates, & quantas salivationes inducat, satis noverunt, quales operationes pestiferorum debiles vires omnino sufferre nequeunt. Adde quod evacuationes per alvum, vomitum, & salivationes maxime damnosæ in pestis curatione fuisse, semper docuerit experientia: & quod Mercurius, præterquam quod sit violentissimum remedium, etiam in se nihil speciale habeat, quo venenum pestilens impugnare possit.

## CAPUT V.

## DE ANTIDOTIS ET SUDORIFERIS.



Um pestilens venenum primario vitæ hujus asylum, cor, impugnare solet, in pestis curatione ante omnia regii visceris rationem habere, eique citissime suppetias ferre oportet, ut hostis truculentissimi injuriis fortius resistere queat. Huic primariæ intentioni seu indicationi ut satisfiat, statim ab ipso principio ad antidota (1.) & sudorifera confugiendum est: nam præsentissimum subsidium, quod cordi in his angustiis constituto adferri potest, inest medicamentis alexicacis, præcipue talibus quæ sudores movent: hæc enim specifica vi cor à venenis tuentur, ac simul etiam pestilentis labis vires infringunt, obrundunt, atque foras expellunt. Sunt autem hæc alexipharmaca multa & varia, è quibus modo hæc, modo illa magis conveniunt, & variis quoque modis miscentur, pro vario malignitatis & auctæ putredinis gradu, (2.) pro varia febris adjunctæ intensione vel remissione, pro vario ægrotantium temperamento, sexu, & ætate, pro regionum & anni temporis varietate, aliisque circumstantiis, quarum decisio ex Medici judicio atq; prudentia omnino dependet, neque certis regulis determinari potest. Horum alexipharmacorum plurima nobis in usu fuerunt in curatione hujus pestis, imprimis verò hæc (3.) sequentia. Radices: carlinæ, petasitidis, aristolochiæ, heleniæ, dictamni, valerianæ, ostrutii, bistortæ, zedoariæ, gentianæ, angelicæ, eryngii, vincetoxici, calami aromatici, tormentillæ, bulbi cæparum. Herbæ: scordium,

dium, rutha, carduus benedictus, veronica, tanacetum, pimpinella, scorzonera, absinthium, plantago, abrotanum, rosmarinum, melissa, scabiosa, morsus diaboli, verbenae, marubium album, centaurium minus, acetosa, borago, buglossa, betonica, artemisia, hedera terrestres. Flores: stachados, rosarum, balaustiorum, croci, (4.) nymphaeae, calendulae, sambuci. Fructus: berberis, ribesii rubri, poma cydonia, citrea, aurantia, granata, eorumque cortices & succi. Semina: citri, cardui benedicti, acetosae, coriandri, quatuor frigida majora: Omphacium, vinum, spiritus vini, acetum vini simplex, vel sambucinum, calendulatum, aut rosaceum. Aquae distillatae: cardui benedicti, acetosae, boraginis, scabiosae, rosarum, cinnamomi. Nux moscata, macis, gariophylli, cinnamomum, santala omnia, lignum fasssefras. Myrrha, camphora, (5.) succinum, margaritae, lapis bezoar. (6.) corallum rubrum, cornu cervi crudum & praeparatum, (7.) ebur ustum, oculi cancri, flores sulphuris, (8.) terra sigillata, bolus armena, (9.) Salia; cardui benedicti (10.) absinthii, scordii, ruthae prunellae. Extracta; cardui benedicti, petasitidis, ruthae, angelicae. Syrupi; granatorum acidorum, cydoniorum, scordii, de succo citri, conservationis radicum helenii condit. Olea: succini, citri, juniperi, nucis moscatae, cinnamomi, vitrioli, (11.) sulphuris, baccarum lauri, scorpionum. Conservae: anthos, melissae, absinthii, rosarum, florum calendulae, boraginis. Conditae: cortices citri, limonum, aurantiorum, rad. helenii, eryngii, calami aromatici, cydonia conditae, myva cydoniorum, rob ribesii rubri, berberis, acaciae, saccharum perlatum. Pulveres: liberantis (12.) Bezoarticus Renodei, aromatici rosati, diamargariti frigidi, diatrium santalorum, diarrhodonis Abbatis. Trochisci: de viperis, (13.) de camphora, de terra sigillata. Electuarium juniperinum, confectio alckermes, & de hyacintho (14.) sine moscho, (15.) Theriaca Andromachi (16.) Mithridatium Damocratis, diascordium Fracastorii. (17.) His aliisque similibus, interdum solis, sed ut plurimum hac illave forma mistis, utebamur. In principio hujus pestilentis constitutionis hanc aquam theriacalem seu sudoriferam, nobis instar magni secreti communicatam, in usum habuimus:

℞. Ruthae viridis, melissae, ana lib. ℥. absinthii sicci conscissi ac nonnihil contusi, cardui benedicti sicci, ana lib. ij. aquae communis q. s.

Macerentur & stent in infusione prope ignem per decem vel duodecim dies, quotidie baculo ligneo bis terve agitando: postea distillantur. Ex facibus autem combustis, una cum menstruo residuo prius exsiccatis, extrahatur sal: cujus salis defectu potest simile sal compositum fieri, ex sale absinthii, melissae, cardui, ruthae, ana part. eq. simul mistis.

Ufus illius aquae talis erat:

℞. Aquae praedictae unc. ij.  
salis dicti drach. ℥.  
olei vitrioli gut. 12. aut 15.  
misce, fiat haustus.

Haud contemnendas quidem hujus aquae virtutes in principio comperti sumus, sed interim morbo magis magisque ingravescente, cum illa nimis debilis nobis videretur, aliam fortiolem ad nostros usus parari curavimus, qua deinde semper cum felicissimo & admirabili successu usi sumus: compositionis (18.) haec erat forma:

℞. Radicum; ostrutii, petasitidis, angelicae, carlinae, valerianae, ana unc. ij. ℥. enulae campanae, corticum aurantiorum siccat. ana unc. iij. Herbarum; scordii, absinthii, ana unc. ii. cardui benedicti, unc. iij. Florum, rosarum rubrarum unc. ℥. stachados, drach. iij.

S

bac.

baccarum juniperi, unc. ij. f.

granorum cardamomi minoris, drach. v.

cinnamomi electi, unc. j.

Hec omnia sumantur sicca, conscindantur simul, & grosso modo contendantur, iisque affundantur in cantharo lapideo.

Vini albi Rhenani, vel Gallici tenuis lib. xxij.

aquæ rosarum lib. ij.

Vase bene obturato, stent in infusione decem diebus: tunc addantur hæc herbae virides & recentes, conscissæ & aliquantum conquassatæ.

Foliorum ruthe, M. vi. tanacetii M. iij.

rosmarini, pimpinellæ, ana M. j. f.

Maneant simul in infusione adhuc per octo vel decem dies, quotidie bacula commovendo, postea affunde.

succi citri lib. ij.

Stent adhuc per tres quatuorve dies, postea super ignem leviter ebulliant, & coquantur, ac in torculari fortissime exprimantur. Colatura expressa distilletur in B. M. aut arena, per alembicum vitreum.

Illud quod post distillationem in fundo cucurbitæ remanet, adjecta aqua cardui benedicti attenuandum, & per chartam empareticam raram colandum est, quæ colatura lento igne exsiccanda est ad extracti (19.) consistentiam, quod usus servandum. Hoc extractum Magistrale vocavimus. Ex facibus & herbis combustis interdum quoque sal extrahi curavimus.

Hac nostra aqua theriacali interdum solâ, sed ut plurimum aliis medicamentis admistâ utebamur. In usu quoque habuimus acetum bezoarticum (20.) nostrum, lib. 2: cap. 10. descriptum. Ex his autem, pro necessitatis diversitate, variis formis medicamenta concinnavimus. Ut autem quibus circiter modis antidotalia sudorifera à nobis præscripta fuerint, sciri possit, hæc aliquot formulas subjiciemus:

℞. Extracti magistralis, salis absinthii, ana scrup. j.

diascordii Fracastorei drach. j.

aquæ nostræ theriacalis unc. ij.

olei vitrioli gut. x. aut xij.

misce, fiat haustus.

℞. Salis ruthe, scrup. j. f. extracti angelicæ scrup. j.

aquæ theriacalis unc. ij. succi citri unc. f.

misce, fiat haustus.

℞. Extracti cardui ben. ruthe.

salis cardui, ana scrup. f. salis scordii scrup. j. f.

theriacæ Androm. diascordii Fracast. ana scrup. j. f.

aquæ theriacalis, aceti bezoartici, ana unc. j.

misce, fiat haustus.

℞. Theriacæ Androm. scrup. iij.

aquæ theriacalis unc. j. f. aceti bezoartici, unc. j.

misce, fiat haustus.

℞. Terræ sigillatæ scrup. ij.

trochiscorum de viperis scrup. j. f.

aceti bezoartici, aquæ theriacalis, ana unc. j.

misceantur pro haustu.

℞. Boli Armenæ veræ, coralli rubri præparati,

cornu cervi usti, ana scrup. j.

diascordii Fracast. drach. j. aquæ theriacalis unc. ij.

misce,

miscē, pro haustu.

℞. Salis cardui ben. scrup. j. f. aquæ theriacalis unc. ij.  
succo citri unc. f.  
miscē, fiat haustus.

℞. Theriacæ, mithridatii, ana scrup. ij.  
salis scordii, scrup. j. aquæ theriacalis unc. j. f.  
aceti bezoartici unc. f.  
fiat haustus.

℞. Oculorum cancri præparatorum scrup. ij.  
salis absinthii scrup. j. theriacæ,  
diascordii, ana scrup. ij. aquæ theriacalis,  
aceti calendulati, fortis, ana unc. j.  
miscē, fiat haustus.

℞. Ruthæ viridis recentis, M. j.  
contundatur in mortario, affundendo  
aceti bezoartici, vel calendulati unc. ij.  
fiat fortis expressio, colaturæ addantur  
salis absinthii scrup. j. vel scrup. j. f.  
theriacæ, aut diascordii drach. j. vel scrup. iij.  
miscantur pro haustu.

℞. Rad. petasitidis, angelicæ, helenii, ana drach. j.  
herb. ruthæ, cardui bened. scordii, ana M. f.  
vini albi q. s. coquantur f. art.

℞. Istius colaturæ unc. ij. vel iij.  
salis scordii, vel cardui scrup. j.  
theriacæ scrup. ij.  
fiat haustus.

℞. Rad. dictamni, petasitidis, ostrutii,  
angelicæ, ana drach. ij. herbar. scordii,  
cardui ben. ruthæ, ana M. f.  
coquantur aliquandiu in aceti & vini, part. æq.  
colatura expressa detur pro haustu.

℞. Stercoris ovilli recentis, drach. iij.  
rasuræ rad. raphani sylvestris drach. j. sem.  
aquæ theriacalis unc. ij.  
aceti calendulati unc. j.  
miscantur, & sic mixta stent per aliquot horas, postea fiat per linteum co-  
latura cum expressione, atque expressus ille liquor detur pro haustu, ad-  
miscendo theriacæ drach. j.

℞. Salis communis drach. j.  
aceti (21.) vini fortis unc. ij. vel iij.  
fiat haustus, pro pauperibus.

℞. Capam aliquantum excavatam, cui impone theriacæ Androm. scrup. iij.  
& cooperculo suo tectam, ac charta bibula aceto madida involutam, sub ci-  
neribus calidis assata: Postea succus in prælo fortiter exprimatur, cui ad-  
de acetis simplicis, vel bezoartici unc. j.  
detur pro haustu.



- ℞. *Theriaca* drach. j. *aceti vini fortis*, vel *bezoartici* unc. ij.  
*olei juniperi* scrup. f. vel scrup. j.  
*misce*, fiat *haustus*.

Illis qui potiones assumere non poterant, bolos vel pulveres dedimus:

- ℞. *Theriaca*, *diascordii*, ana scrup. j. f.  
*salis scordii* scrup. f.  
*olei vitrioli* gut. v.  
*misce*, fiat *bolus*. Cui interdum addebantur aliquot grana lapidis bezoar-  
*tici orientalis*, interdum scrup. j. *confectionis de hyacintho sine moscho*: in-  
*terdum aliud quid simile*.
- ℞. *Pulveris liberantis* scrup. j. vel scrup. j. f.  
*lapidis bezoartici or.* scrup. f. *camphoræ*, gr. ij. vel iij.  
*fiat pulvis*.
- ℞. *Florum sulphuris*, *terræ sigillatæ*, *coralli rubri præparati*, *pulveris liberan-*  
*tis*, *lapidis bezoartici or.* ana scrup. f. *crocigr.* iij. *fiat pulvis*.

Apozemata quæ ad curationem præscribebamus, hujus fere formæ erant:

- ℞. *Rad. petasitidis*, *eryngii*, *vincetoxici*, *helenii*, *carlinæ*, *corticum auran-*  
*tiorum sicc.* ana. unc. f. *rad. tormentillæ*, *angelicæ*, ana drach. ij. *herb.*  
*cardui ben. scordii*, ana M. j. f. *boraginis*, *ruthæ*, *scabiosæ*, ana M. f.  
*pomum citri in frusta dissectum n. j.* *sem. 4.* *frigid. major.* ana drach. j. f.  
*cicerum rubr.* unc. j. *Aquæ commun.* q. f.  
*coquantur s. art. ad lib. ij.* *Addantur colaturæ*, *syrupi limonum*, *de scor-*  
*dio*, ana unc. j. f.  
*misce*, fiat *apozema*.  
*Dosis unc. ij. unc. iij. unc. iiij. bis, ter, quaterve de die. (22.)*

Condita & electuaria quoque variis formis paravimus:

- ℞. *Pulveris liberantis*, drach. j. f. *margaritarum præparat. oculorum cancri*,  
*lapidis bezoar orient.* ana scrup. j. *confect. de hyacintho* scrup. ij. f. *con-*  
*servæ rosarum rubr. boraginis*, *calendulæ*, ana unc. f. *olei cort. citri*, gut. viij.  
*syrupi limonum* q. f.  
*misce*, fiat *electuarium*.
- ℞. *Pulveris bezoartici Renodei* drach. j. *diascordii Fracast.* drach. ij.  
*rad. helenii condit. electuarii juniperini*, ana unc. f.  
*olei juniperi* scrup. j. *syrupi de scordio* q. f.  
*misce*, fiat *electuarium*.
- ℞. *Theriaca Androm.* drach. ij. *diascordii Fracastorii*, *cortic. aurantiorum*  
*cond. rad. helenii condit.* ana drach. iij. *olei juniperini* drach. f. *syrupi ace-*  
*tositatis citri* q. f.  
*fiat conditum*.
- ℞. *Mithridatii Damoc.* *diascordii Fracast.* ana. drach. ij. *electuarii de nuci-*  
*bus*, *juniperini*, ana drach. iij. *pulveris bezoartici*, drach. j. *syrupi he-*  
*lenii* q. f. *fiat electuarium*.

Hic (23.) fuit præscriptionum nostrarum stylus, ex quo de reliquis facile judica-  
bit peritus Medicus; nam singulatim omnia describere, & impossibile, & nimis  
longum foret. Qui majorem copiam medicamentorum antipestilentialium scire  
desiderat, pluribusque uti mavult, is alios quoque consulat Medicos, qui hoc ex  
professo

professo agunt, ut si non optima, saltem multa huiusmodi remedia præscribant.

## A N N O T A T I O N E S.

**P**rimarius scopus, in curatione pestis, à veneno desumi debet, quod ab ipso initio totam curationem ad se trahit. Huic scopo seu indicationi imprimis satisficit per antidota sudorifera, quibus venenum pestilens ab ipso morbi principio impugnandum, refrenandum, infringendum, & foras expellendum est. Venæsectiones autem, purgationes, aliaque huiusmodi præsidia postponenda sunt, quia putredini, obstructioni, humorumque vitiiis potius medentur, quam pesti, quæ non nisi in deleteria qualitate consistit, ita ut talibus remediis locus esse non possit, nisi post evictum venenum.

I. Sic etiam Platerus, *prax. lib. 3.* unicè commendat ut curatio incipiatur ab antidotis sudoriferis. *Horum remedium usus inquit, statim a prima invasione esse debet, ut, si fieri possit (antequam qualitas illa venenata cor pessundet, quod statim facit, nisi propellatur, vel sponte a natura, vel adjuncta exhibitis hisce expulsiis) una cum spiritu & calore, ad exteriora propellatur, illiusque malignitas antidotis his infringatur. Itaque quoties hac exhibentur, eo rectius, hoc fiet, cum in ipso præcipuo curationis cardo versetur: & nisi intra viginti quatuor horarum spatium, vel citius (cum etiam sæpe hoc brevi tempore pestis jugulet) exhibeantur, quæ postea fiunt ad veram curationem parvi sunt momenti, neglectæque hac occasione, nisi natura sponte id faciat frustra postea laboramus. Sed & altero die eadem repetuntur remedia: quin & in progressu morbi, viribus constantibus, si natura rursus eo vergat, repeti possunt. Cum Platero etiam consentit Eustachius Rudius, *lib. 3. art. med. cap. 30.**

II. In medicamentis semper est habenda ratio morbi, sexus, ætatis, virium, regionis, & temporum. Morbi: ut alexipharmacis certioribus & potentioribus citissimum subsidium cordi feratur: nempe calidioribus in subjectis pituitosis, frigidioribus verò in biliosis, & iis quibus febris atrox morbo conjuncta est: vel saltem frigidioribus cum calidis mistis. Sexus: ut non eadem dentur mulieri quæ viro, imprimis quæ moschum, ambram, vel zibethum redolent. Ætatis: ut infantibus & pueris debiliora, minusque calida & ingrata, quam adultis exhibeantur. Virium: ut nimis sudoribus ægrorum vires non totaliter prosternantur; atque ægris debilibus talia alexipharmaca dentur, quæ simul vires corroborare possunt. Regionis: ut longè calidiora & fortiora antidota & sudorifera præscribantur in frigidis, quam in calidis regionibus, & sic de cæteris. Temporum: ut in fervore ætatis & quocunque tempore æstuoso, minus calida; hyeme verò ac frigidis tempestatibus, minus frigida offerantur.

III. Maximè insignes ad pestilentis veneni expulsionem & extinctionem sunt omnes radi-

ces, herbarum, fructus, semina, aliaque tam simplicia, quam composita medicamenta in textu à nobis descripta, quorum alia tamen sunt fortiora, alia debiliora, nonnulla his, alia aliis convenientiora; quas differentias peritus Medicus ratione facile percipiet, & levissimo usu addiscet. Horum autem omnium eximias virtutes singulatim recensere, non est nostri instituti, pauca tantum scitu necessaria leviter attingemus, ne fortè liber noster, quem brevem volumus, in magnum volumen excrescat. Qui curiosius reliqua scire desiderat, ille legat Dioscoridem, Galenum, Matthiolum; Tragum, Alfonso, Marefcottum, Tarquinium Ocyorum, Snelenbergum, Castorem Durandum, Dodonæum, Lobelium, aliosque Rei Herbariæ Scriptores; ut & nonnullos Medicos, qui de Peste latius scribere volentes, in multitudine verborum gloriam quæsiiverunt, inter quos Matthias Vntzerus, magno labore, omnium herbarum, radicum, aliorumque simplicium & compositorum medicamentorum antipestilentialium vires à variis auctoribus descriptas, collegit, *antidotar. pestil. lib. 2.*

IV. Nos in hac peste croco rarius usi sumus, neque magnopere laudabilem effectum adversus contagiosam hanc malignitatem in eo animadvertere potuimus. Adde, quod ejus vires vix satis tutò in peste experiri liceat, cum in hoc morbo exigua duntaxat quantitate exhiberi debeat, propterea quod cerebrum petit; & si majore quantitate detur, vel nimia somnolentia, vel deliria inducantur, quæ utraque extimescenda sunt in peste.

V. Io. Crato, *lib. de pest. & Epist. Med. à Scholzio collect. 103. & 234.* nec non Goclenius, in *Loimographia*, & Martinus Panf, 3. *Consil. antipest. quæst. 21.* camphoram in curatione pestis super omnia remedia extollunt: cujus enoium describit Mindererus, *lib. de pest. cap. 15.* his verbis: *Nostri laudibus insigniter merito celebranda venit camphora, non mirabile modo, sed & forte, & efficax pestis alexiterium: siquidem hac assumpta, interno nostro calore mox ignita, & in corporis quasi meditullio flagrans, coinquinatos spiritus, eosque tetra miasmate pollutos ac inspiratos, & circum præcordia hærentes, exurit, & sicco planè igneoque calore pervadens, partim dissipat ac expellit, partim combustionem absumit, partim verò corrigit & emendat: proinde camphoram inter fortissima pestis alexiteria merito reposuerim.* Idem Mindererus sequentem pulverem camphoratum (quem etiam *Praxeos tract. 2.* describit Platerus) summis laudibus extollit:

Rec. Sacchari candi, drach. iij.  
zingiberis albi, drach. ij.  
camphoræ, drach. j.

S 3

fiat

*fiat pulvis. Dosis drach. j. cum liquore conveniente.*

Hunc maximè commendat in morbis pestilentibus, si modò magni capitis & ventriculi dolores non adsint, eumque plus prodesse asserit, quam pretiosissima quævis medicamenta bezoartica. Eundem pulverem etiam extollit Follius, in *amuleto*, lib. 2. cap. 9.

Mindereri pulverem, propter zingiberis caliditatem, sequenti modo immutat Riverius, eoque se feliciter usum fuisse refert:

Rec. Bezoartici mineralis, drach. iij.  
salis prunella, drach. ij.  
camphora drach. j.  
fiat pulvis.

Dosis drach. j. cum aqua cardui, aliave conveniente.

Crato legitur usus fuisse electuario camphorato, quod tanquam valde præclarum commendarunt posterii. Descriptio hæc est:

Rec. Scordii, drach. iij.  
tormentilla,  
dictamni albi,  
zedoaria,  
gentiana,  
angelica,  
cariophyllata, ana drach. j.  
croci,  
camphora, ana scrup. ij.

subtilissime pulverisata conspergantur aqua cardui benedicti, in qua dissoluta fuerint theriaca drach. ij. & cum syrupo de succo cardui, fiat electuarium.

Idem hunc pulverem, à pluribus laudatum, componit:

Rec. Rad. tormentilla, drach. iij.  
dictamni albi, drach. ij.  
ossis de corde cervi,  
santali rubri, ana drach. j.  
camphora, scrup. ij.  
misce, fiat pulvis. Dosis drach. j. cum liquore conveniente.

Gemma etiam conficit electuarium camphoratum, quod experientia patris, ac sua ipsius se efficacissimum vidisse asserit:

Rec. Camphora, part. j.  
zingiberis albi, part. ij.  
sacchari rosacei, part. iij.  
vini q. s. permisceantur sedulo, & fiat electuarium. Dosis drach. j. & cooperatus ager componatur ad sudorem.

Paulo generosius est quod sequitur:

Rec. Camphora,  
dictamni Cretensis,

scordii,  
rad. angelica,  
zedoaria,  
cinnamomi,  
zingiberis, ana drach. j.  
nucis myristica, drach. ij.  
boli arm. drach. f.  
seminis rusbe,  
macis,  
croci, ana scrup. j.  
moschi, gr. vij.  
sacchari albi,  
vini odorati, ana q. s.  
fiat instar opiata.

Joannes Poppius camphoram in aceto dissolvit, & hujus cochleare unum exhibet contra æstum à pestilenti veneno excitatum. Jo. Hartmannus hanc aquam pestilentialem camphoratam in peste anni 1611, plurimis insigniter profuisse refert.

Rec. Spiritus vini opt. lib. j.  
camphora selecta,  
tempore æstivo drach. vij. & scrup. j.  
hyberno verò, drach. x. & scrup. ij.  
misceantur, incisâ prius camphorâ, & statim solvetur sine igne: appende in nodulo,  
croci orient. scrup. f.  
hinc spiritus vini fiet aurei coloris. Aqua servetur in vitro capaci, nec pleno, sed quinta vel sexta parte vacuo.

Matthias Untzerus hunc spiritum theriacalem camphoratum conficit:

Rec. Theriaca antiqua, unc. v.  
myrrha rubra, unc. ij. f.  
croci orient. unc. f.  
spiritus vini opt. unc. x.  
Inditis omnibus cucurbita vitrea, impositoque alembico cæco, in cujus rostro prius sint posita camphora drach. ij. stent in infusione per octiduum in loco calido, deinde fiat in B. M. distillatio, igne lentissimo, & sic habebis spiritum theriacalem subtilissimum.

Hunc spiritum dicit solum drach. j. f. vel drach. ij. pondere, cum cochleari aquæ cardui benedicti exhibitum, sudorem ad miraculum prolicere, idque se anno 1610, in peste Hallensi, non uno experimento compertum habere. Præterea maximopere commendat Untzerus sequentem misturam, eamque scribit superare, & longo studio post se relinquere omnes alias aquas theriacales seu pestilenciales, cæteraque quævis antidota, quocunque etiam nomine appellanda veniant, utpote in qua credit latere omnia requisita ad perfectam absolutamque morborum pestilentium curationem propriè spectantia.

Rec. Prædicti spiritus theriacalis camphorati,  
drach. v.

spiritus

*spiritus tartari optimè rectificati super colcothar.  
vitrioli, drach. iij.  
spiritus vitrioli opt. drach. j. f.  
Confusa in vicem misceantur. Dosis in adultiori-  
bus, drach. j. ad scrup. iij. cum aqua scordis.  
vel cardui. in junioribus drach. f. ad scrup. ij.  
plus minusve pro ætatis ratione.*

Sennertus. lib. 4. de febr. cap. 6. monet in camphora ac camphoratis exhibendis, naturarum constitutionem esse considerandam: iis enim qui infirmo sunt ventriculo aut capite, vel qui alias camphoram averfantur, non convenire, sed alia potius medicamenta esse præscribenda, cum in maxima pharmacorum copia uni medicamento non astringamur, immò sæpe utile sit mutare medicamenta. Adde ego, camphorata medicamenta aut odoramenta etiam non admodum convenire viris sanis ad præservationem, cum hoc in variis expertus sim, quod camphora Venerem potenter extinguat, ab eoque incommodo, per camphoratorum medicamentorum usum contracto, varii mihi liberandi fuerint. Verum in ægris, in quibus ad periculosissimi morbi depulsiōnem quidvis molendum est, illa indicatio omnino consideranda non est, sed eā prætermissa, libere ad camphorata medicamenta procedendum.

V I. Lapidem bezoarticum adversus pestem plurimum valere, prædicant Rhazes, Serapio, Matthiolus, Leonardus Rhauwolfius, Martinus Rulandus, Lonicerus, Nicolaus Monardes, Jordanus, Sanctius Ardonius, alique plurimi, qui magnum illius encomium tanta gravitate describunt, ut illum theriacem, omnibusque aliis antidotis præferro videantur. Contra verò plurimi alii doctissimi viri ab experientia edocti scribunt, hunc lapidem ad pestis curatiōnem, aut parum, aut nihil conferre. Quorum omnium discrepantes opiniones collegit Casparus Bauhinus, lib. de lap. bezoar. cap. 34. & 37. Nos arbitramur priores in eo deceptos esse, quod, cum viderent verum lapidem bezoarticum adversus multa venena prodesse, inde concluderint, illum necessario non minorem alexipharmacam vim adversus omnia venena, nec non adversus pestilens venenum, habere. Quam conclusionem magnopere vacillare docet experientia: nam adversus arsenicum, mercurium sublimatum & præcipitatum, hunc lapidem nihil conducere, experti sumus: venenum rabidum in iis, qui à cane rabido commossi sunt, per hunc lapidem extinctum & superatum fuisse, hæcenus inauditum est. Credimus illum fortè prodesse posse adversus venena scorpionum, hysonum, araeorum, viperarum, & multa alia similia: ut & adversus illa venena quæ ex interna humorum corruptione in corporibus nostris generantur: nam aliquoties comperti sumus illum prodesse in febribus malignis & pestilentialibus sine peste, variolis, morbillis, aliisque similibus morbis, quorum venenata malignitas resultat ex interna humorum corruptione. Sed adversus venenum pestilens, quod ærium est, nec intus genitum, sed forinsecus

corpus ingreditur, hunc lapidem aut parum, aut nihil profuisse, in praxi semper observavimus: neque etiam in hac nostra peste ex lapidis bezoartici orientalis, optimi & electissimi, usu, ullum notabile commodum unquam percipere potuimus: utque de ejus viribus certius nobis constaret, aliquoties ægrotis ditioribus dicti lapidis pulverisati semel drachmam, nonnunquam etiam integram drachmam simul exhibuimus, sed absque ullo fructu: movebat aliquo modo exiguum duntaxat sudorem, at nunquam subsequēbatur expectatum levamen. Quapropter nos eo postea rarior usi sumus, idque solummodo, aut in iis qui sibi non satisfieri putabant, si aliis medicamentis hic lapis non adjungeretur; aut in iis qui alia medicamenta assumere non poterant. Nam exi veneni pestilentis virulentiam infringere ac coercere non possit, tamen aliquo modo prodesse comperti sumus, ratione malignæ corruptionis humorum, à veneno pestilenti inductæ. Pessimè autem illos sibi consuluisse observavimus, qui in principio morbi, antequam humores multum corrumpereantur, salutem suam huic soli lapidi concrediderunt; nam ipsa experientiā sapissimè edoctus dico, illum in tali casu nihil prodesse; & cum jactura temporis in peste, magnum periculum minetur, sæpe factum fuisse vidimus, ut dum ab exhibitio hujus lapidis levamen frustra expectaretur, morbum interea radices egisse, nec postea expelli potuisse. Huic nostræ experientiæ etiam respondet Crato, qui, in epistola ad Thomam Jordanum, scribit se in praxi animadvertisse, lapidem bezoarticum in peste parum conferre. Sic quoque Hercules Saxonia, Prax. lib. 8. cap. 34. de hoc lapide loquitur: Ego, ait, ut ingenue dicam, cum Venerem prædicaret, maximam hujus lapidis copiam consumpsi, nec egregiam operam sensi. Scio plurimas quibus exhibui, fuisse sanatas, sed non retuli in lapidem: causa, quia reperio apud scriptores, quod ex sumpto sudor copiosius exciteretur, postquam statim subleventur ægri: ego tamen non vidi sudorem præsumptum, vel si apparebat, erat sudor imperfectus. Itaque quantum ad me, abjeci omnem spem hujus lapidis in peste. Cum Saxonia consentiens Mindeterus, lib. de peste, cap. 15. sic inquit: De lapide bezoar quod scribam non habeo, vix enim cum unquam in alijs morbis benignioribus, videretur in peste res effectus præstitisse vidi, quos insignes quantumvis viri multo testimonio pollicentur, quod quidam nostræ fassari iustitiam ad scribendum nonnulli ardeant, quorum nos cæcitatem non immerite adeo abundi suspiciamus, quem in pestilentia sæpe datum, nihil profuisse, Crato quoque agnoscit. Unde si optio esset, inter terram sigillatam & lapidem bezoar, mallet Jordanus bezoar lapidem duntaxat omittat, quam terram medicatam & pestilentium medicamentorum catalogo expungere. Idem paulo post, incertitudinem hujus lapidis demonstrare volens, dicit omnino similes lapides in equis nonnunquam generari, & meminit equi generosi cujusdam Baronis, in eadem cum ipso civitate habitantis, qui quotannis similes politos lapides per ventrem excernebat, simileque etiam lapi-

des

des in aliis quibusdam equis post mortem dissectis inventos fuisse tradit. Idem cum illis innumerati ali quoque testantur. Ita ut tandem concludendum sit, huic lapidi in peste non multum esse confidendum, propter jam dictam experientiam. Cui & illud accedit, quod maxima sit de vero lapide incertitudo, utpote quem mercatores avari, & ipsi quoque Indi tam inligniter adulterare noverunt, ut etiam perspicacissimi Lyncei oculi in ejus cognitione fallantur: cujus adulterationis hoc certum indicium est, quod maximi Indiarum Orientalis mercatores mihi testati sint, quod hic lapis in nostris regionibus multo viliori pretio vendatur, quam in ipsa India, è qua alioqui cum magnis sumptibus huc advehi deberet, imò multo majore copia hic venalis exhibeatur, quam ibi inveniat. Quondam ego ipsemet Pictavii in Gallia mercatorem vidi, qui me presente multos hujusmodi lapides ex terra quadam (quæ illic in crypta cujusdam montis prope urbem inveniebatur copiosa, & terræ sigillatæ non absimilis erat) tam artificiose conficiebat & adulterabat, ut nemo non pharmacopœorum (qui postea me adstante illos frangebant & quocunque modo probabant) illos genuinos & veros bezoarticos lapides esse judicaret, atque hinc etiam eos pro veris emeret. Constabant enim quasi ex squamis sibi mutuo impositis, in medietate exilem paleam continebant, & colore ac lævitate externa nihil omnino a vero lapide differebant. Etiam hac de re legi poterunt, Franciscus Vallesius, *lib. 4. Method. cap. 2.* Andreas Baccius, *de gem. cap. 34.* Hildanus, *cent. 4. obs. 24.* Jacobus Primerosius, *lib. 4. Error. Med. cap. 36.* Garcias ab Horto, alique auctores.

De unicornu eadem, imò, major adhuc incertitudo est, ut apud prædictos auctores etiam invenietur: ac propterea nos hujus usum è praxi penitus ejiciendum arbitramur; cum hoc ipsum animal, quod cornu illud in fronte habere tradunt, nulli unquam mortalium visum aut notum fuerit, nec quibus in terris vivat, ulli constet; & tamen passim in Christianismo, unicornu, tanquam pretiosissimum quid, vendatur, ac præcipue apud credulos Magnates, alioque divites, inter thesauros asservetur. Quatuor enim dicuntur esse animalia uno cornu donata, Monocerotem, Rinocerotem, Asinum Indicum, & Orygem. Sed quam dubia atque incerta sint illa omnia quæ de Monocrote traduntur, liquet ex ejus varia descriptione, quam exhibent Philostratus Lemnius, *lib. 3. cap. 1.* Elianus, *lib. 4. animal. cap. 52. & lib. 16. cap. 20.* Plinius, *hist. nat. lib. 8. cap. 21.* Julius Solinus, *polyhistor. cap. 55.* Isidorus *ethymol. lib. 12. cap. 2.* Marcus Paulus Venetus, *lib. 3. cap. 15.* Ludovicus Vertomannus, *lib. 1. navig. cap. 19.* Garcias ab Horto, *lib. 1. arom. cap. 14.* alique varii. Hac de re etiam legendam censeo Mercurialem, *tom. 1. consult. 94. & tom. 2. consult. 63.* quibus locis hujus cornu incertitudinem & inefficaciam antidotalem latè describit. Item Ambrosium Paræum, *lib. 20. cap. 39.* nec non Henricum Sonetium, *miscel. medic. lib. 8.*

*epist. 1.* Nos incertitudinem hujus cornu ante aliquot annos egregie comperti sumus Ultrajecti, ubi in templo S. Mariæ duo vera, ut ab omnibus putata sunt, monocerotis cornua, tres quatuorve pedes longa, à multis annis instar magni thesauri, asservata fuerunt. Casu hujusmodi simile pulchrum, ponderosum, & longum cornu venale oblatum, & à mihi notissimo haud infimæ sortis cive satis magno pretio emptum fuit. Aliquandiu post accessit, me adstante, nauta mercator marinus, qui illud cornu videns nobis pro certissimo affirmavit, in freto Davidis ingentes quosdam pisces esse tali cornu in fronte armatos, imò ex iis unum, cum ipsemet per istud fretum navigaret, in navem suam maxima vi impigisse, & cornu suum per omnes navis tabulas trajecisse, atque sic illud à capite piscis diffractum iis firmissime inhæsisse, & sequenti anno, cum eadem navis expurgaretur, & ad aliud iter præpararetur, illud cornu ibi inventum & a fabris extractum fuisse. Cornu autem à cive emptum dicebat isti adeo simile esse ut ovum ovo, atque etiam ne minimum quidem differre ab iis quæ in templo Mariæ servabantur. Eodem circiter tempore alius nauta Enchusanus ex eodem freto veniens, mihi ipsi quoque tale cornu venale obtulit. Hujus aliquantum rasuræ abradi, & tribus catellis prius venena diversa deinde hanc rasuram exhibui, sed nihil valuit adversus venena. Sequentianno sex hujusmodi cornua, ex eodem freto Davidis allata, simul venalia extiterunt, & parvo pretio coempta sunt, erantque sicut etiam priora, omnino talis figuræ, quales à pictoribus depinguntur. Ex quibus omnibus manifestissime liquet, incertissima esse omnia quæ de monocrote animali quadrupede, ejusque cornu & viribus traduntur, atque omnino verosimile existere, illa cornua, quæ promonocerotis cornibus venduntur, esse cornua talium piscium, neque ullam vim alexipharmacam adversus venena, aut pestem, vel morbos malignos habere.

VII. Cornu cervi, præcipue usto, utebatur, imprimis in talibus ægris, quibus intestinorum dolores & murmura, aliæque indicia alvi fluxum minari videbantur, vel quibus alvi fluxus jam aderat; nam præterquam quod malignitati aliquantulum resistat, etiam siccando & modicè astringendo, in tali casu multum proderat: aculeatas enim acrium humorum particulas, alvi tormina & fluxus facientes, obtundit, inflectit & infringit (hoc ipsum etiam faciunt oculi cancri, margaritæ, corallum rubrum) ut ex eo liquet, quod ustum aceto admixtum ejus acidam acrimoniam tollat. Sic quoque Galenus, *simpl. med. fac. lib. 11.* cornu cervi ustum dysentericis, hæmoptoicis, cœliacis, aliisque similibus convenite scribit. Quantum ad antidotalem ejus vim, illam certum est longè majorem ei adscribi (sive crudo, sive usto) quam in se habet: eam aliqualem quidem in eo lubens concedo, sed non certè tam excellentem, quam ei tribuitur. Haud ignoro multos non parvi nominis Medicos, illius magnum adversus pestem encomium describere; quales

quales sunt Rulandus, *lib. de febr. Vng. c. 7. Hist.*  
 1. Crato, *lib. de peste. Mercurialis, tom. 2. consult. 63.* Hercules Saxonia, *lib. de plica, cap. 59.*  
 Gregorius Horstius, *problem. decad. 1. quest. 4.*  
 Samuel Clossius, *epist. ad Horstium*, alique, imprimis illi qui è Chymica schola prodierunt. Verum si quis rem ipsam penitus inspicere velit, & cornu cervi, sive crudi, sive usti, qualitates curiosius inquirere desideret, satis percipiet, fastosum illud cornu cervi encomium nullis solidis rationibus firmari, nulla certa experientia probari posse. Horstius, *citato loco*, scribit, quod insigniter visciditatem humorum incidat, internas viscerum obstructions aperiat, & vi sua penetrandi putrescentibus humoribus resistat, earumque malignitatem corrigat, &c. Verum hæc omnia præter rationem, præter experientiam proponit. Vel cæcus enim videat cornu cervi crudum visciditate sua, ustum verò siccitate sua humores incrassare, eorumque fluxum inhibere, & obstructions potius inducere, quam tollere: docet illud gustus, docet tactus, docet visus, omnis denique ratio illud docet, & experientia comprobat, in fluxibus dysentericis, menstruorum, &c. Si doctus vir tam malè differat de ejus qualitatibus manifestis, quam difficulter probabit ejus occultam antidotalem qualitatem? Hanc tamen qualitatem à sale volatili & fixo (quod ei multum inesse tradunt) procedere, communiter volunt. Verum ego hæcenus nullum reperi Chymicum, qui mihi hujus cornu sal volatile demonstrare potuerit, ac ne quidem fixum, nisi fortè cornu cervi usto ad perfectiorem dissolutionem addiderint, vel acetum, vel succum citri, vel vinum citri aliaque similia, quæ in seipsis multum salis continent, quod post excoctionem relictum credulos illos decipit, qui illud sal à cornu cervi relinqui putant, cum sit à menstruo in quo illud dissolverunt. Nam si cornu illud copiosa quantitate in aqua simplici distillata dissolverint, nihil salis inde extrahent, vel fortè adeo parum & insulsum, ut pene visum subterfugiat, & potius pollen ipsius cornu usti, quam sal esse videatur. Verum ut de viribus melius constet, examinemus, quæso, breviter Chymicas præparationes hujus cornu. Sennertus, *insitut. lib. 5. part. 3. sect. 3. cap. 15.* magisterium cornu cervi conficit, dissolvendo cornu cervi crudum in spiritu nitri, quam post colationem, evaporatione separat. Alii illud cum oleo tartari, alii cum aqua regia conficiunt. Quis non videt, si quid virium huic magisterio adsit, illud non tam à cornu cervi, quam à sale fixo ipsius menstrui esse? Spiritum cornu cervi parant, cornu cervi distillando cum dimidia parte vitrioli Ungarici: quis non statim animadvertat, hunc esse spiritum vitrioli, & non cornu cervi? Idem sentiendum de ejus extracto, quod cum aqua vitriolata conficitur, ut & de essentia cornu cervi: quam cum spiritu salis conficiunt; nec non de cornu cervi vitriolato, cum spiritus vitrioli cornu cervi usto paulatim affunditur, usque dum inde trochisci confici queant; aliisque similibus chym-

micis præparationibus, in quibus omnibus talia huic cornu adduntur, quæ sua salsedine & aciditate putredini resistunt, obstructions aperiant, & sudores movent; quorum salibus illam vim adscribendam puto, cum in ipso cornu solo illam nunquam percipere potuerim, ac proinde huic cornu tantam tamque excellentem antidotalem vim in peste, ut alii fecere, non adscripserim, sed illud in fluxibus, tanquam manifesta qualitate conveniens, adhibuerim, ut modo dictum. Gregorius Horstius sequentem aquam ex cornubus cervorum, tanquam pretiosissimam, & usu sibi compertam, commendat: cujus tamen compositionem si accuratius examinemus, nullam ab ipso cornu cervi, sed totam vim ab iis quæ cum eo distillantur, huic aquæ tribui cõperiemus:

Rec. Cornuum cervi recenter limat. lib. ij.

rosarum rubr. lib. f.

Florum buglosse, boragini,

rosmarini, tilia,

herb. majorana,

matri sylva, ana unc. iiij.

galanga, unc. f.

nucis moscata, macis,

garyophyllorum, ana drach. ij.

croc. drach. f.

camphora scrup. j.

incisis & contusis adde

aqua rosarum,

boragini,

buglosse,

flor. tilia,

melissa hortensis & sylvestris,

matri sylva,

beronica, ana lib. j.

vini Malvatici lib. ij.

per dies aliquot digerantur, postea distillantur in B. M. distillato admisceatur aliquid margaritarum præparatarum, coralli rubri præparati, unicornu raspati, ossis de corde cervi, ligni aloës, moschi, ambra, visci quercini, auri, & argenti foliati, ana q. v.

Dosis cochlear. j. vel ij.

Hæc aliaque similia antidotalem cornu cervi vim non confirmant. Quam cum experientia etiam non edoceat, pessimè sibi consulere nobis videntur, qui in magno morbo, qualis est pestis, tali medicamento nimium confidunt; cujus antidotalem virtutem nec Dioscorides descripsit, nec Galenus (curiosissimus facultatum medicamentorum perscrutator) observavit, nec alii Veteres agnoverunt, sed quod, nulla duntaxat comitæ ratione vel experientia, laudatur ab iis, qui cum libet transeunti facile aurem præbent atque hinc etiam facile decipiuntur.

VIII. Sulphur ad veneni pestilentis extinctionem plurimum facere, diximus *lib. 2. cap. 5. annot. 12.* Ac proinde ejus flores maximè commendant, Severinus, *in Idem cap. 15.* Baldwinus Ronsæus, *Epist. Med. 28.* & Joannes Rhenanus, *de Antid. pest.* Crolius autem, *in hest.*

T Chym.

*Chym.* his verbis utitur : Flores sulphuris summum sunt curativum & preservativum in peste, resistunt enim impressioni, & preservant à putredine : cum extracto enula campana ad miraculum operantur tempore infectionis. Idem auctor ex floribus sulphuris conficit suum elixir pestilentielle, à plurimis Medicis miro encomio celebratum, cujus hæc est compositio :

**Rec.** *Florum sulphuris spagyricè preparatorum, unc. iij. affunde olei juniperini è baccis, in balneo rectificati, ad eminentiam trium vel quatuor digitorum. Olei succini, in balneo ter rectificati, quartam partem ad oleum juniperi, sunt simul in igne cinerum vel arena, sæpius movendo, ut flores sine adustione solvantur & liquecant. Postea.*

**Rec.** *Theriaca Veneta lib. j. è qua cum spiritu vini optimo tincturam extrahes, quam à spiritu vini separatam seorsim servato. Extrahes eodem spiritu radicem helenii, angelicam, baccarum juniperi contusarum, ana unc. iij. & tincturam à spiritu vini in balneo separatam, misce cum tinctura theriaca, & affunde oleum juniperi ac succini, floribus sulphuris essensificatum, ac per chartam bibulam prius filtratum, omniaque circula lentissimo cinerum calore per dies quatuordecim. Dosis ad preservationem una vel dua gutta in vino vel aceto, quotidie mane : vel singulis septimanis semel octo aut decem gutta; jejuno ventriculo, expectando sudorem : peste verò correptus statim ab initio assumat à scrup. j. ad scrup. ij. in vino, aceto rutaceo, aliove conveniente liquore, & sudet.*

Hoc elixir, dicit Crollius, esse secretum, quod in peste & morbis epidemicis, ex Dei benignitate, ad miraculum operari solet. Sic etiam Matthias Untzerus scribit se in magna peste ab experientia comperisse, hoc elixir esse singularissimum & miraculosum adversus hunc morbum. Sennertus lib. 4. de peste, cap. 5. describit flores sulphuris compositos adversus pestem efficacissimos. Paracelsus, de pestil. tract. 1. dicit sulphur & sal curationem pestis reficere, nec aliis medicamentis opus esse. Joannes ab Helmont, in Tumulo Pestis, scribit Hippocratem olim ad curationem pestis vinum dedisse ægris, quod sequenti modo sulphurabat : Poculum, inquit, stridit colli lychnio ardenti sulphuris sufficiebat, vinum ad certam partem affundebat, ac poculum arde obclusum agitabat, dudum conquassanda, sursum ac deorsum donec vinum omnem spiritum sulphuris in se combuisset.

IX. Bolus Armena ut singulare antidotum describitur à Galeno, lib. 9. de simpl. med. facult. cap. de Terra Samia. In magna hac peste, inquit, cujus eadem facies fuit atque ejusque Thucydides memoria grassabat, quotquot hoc medicamentum bibere, ceteriter curati sunt. At quibus non profuit, omnes interire, scilicet cum nullo alio quavis medicamento

juvantur. Unde colligitur, quod iis duntaxat non fuerit auxilio, qui planè erant incurabiles. Cæterum bibitur ex vino albo consistentia tenui, modicè diluto, si aut planè febre careat ager, aut leviter ea teneatur : sin gravius febrat, admodum aqueo. Sic etiam Fernellius, lib. 2. abdit. cap. 12. dicit bolum Armenam, ut & terram Lemniam, non exsiccando, sed totius substantiæ proprietate in venenum pestilens vires habere; quin etiam bolum hac in re peculiari quasi privilegio donatum esse. Galenum magno assensu sequuntur omnes Medici, propterea quod hanc rem videant ab experientia passim confirmari.

X. Nos promiscuè usi fuimus salibus, cardui benedicti, scordii, absinthii, & ruthæ, nec viribus multum à se invicem differre comperimus; quamvis alii hunc, alii illum salem magis laudent. Ita salem ruthæ maximi facit Julius Palmarius : salem artemisiæ Paræus, Conradus, & Swenckfeldius : salem fraxini, Droëtus, Goclenius, Michaël Neander, & Lubbertus Estius. Omnes autem Medici unanimiter extollunt salem cardui benedicti. Salis absinthii mirum encomium scribunt, Daniel Mylius, Codronchius, Jo. Matthæus, Jo. Wittichius, & Petrus Sihyllenus. Droëtus, de pest. c. 12. salem absinthii & scabiosæ in curatione primas partes tenere, scribit, ut qui non solum minima quantitate exhibitus, copiosissimum sudorem concitet, verum etiam huic malignitati potentissimè resistat. Refert idem, Hieronymum Flandrum, Chirurgum, ægris pestiferis solere dare decem vel duodecim grana salis fraxini, cum aqua cardui benedicti vel scabiosæ, atque ita copiosissimo sudore provocato plurimos curasse. Cum muria carnis porcine cocta & despumata multos curatos fuisset, refert Hildanus, Cent. 2. observat. 34. Paræus extollit muriam encrasicholorum (quos nostros anchioves appellant) quam probatissimam, & putredini demandæ ac corrigendæ accommodatissimam esse, prædicat.

XI. Inveniuntur nonnulli, inter quos primarius est Joannes Sylvaticus, lib. Controvers. Med. 48. qui oleum (proprie aqua est) vitrioli in curatione pestis, tanquam summè damnosum, omnino rejiciendum esse existimant. 1. Quia gustum acriter afficit, & acerrimum est, quod adurentem facultatem indicat. 2. Quia Dioscorides & Galenus, vitriolum, erodentem & septicam facultatem habere, vomitum movere, ac molestum medicamentum esse, scribunt. Verum sciendum, dictos viros loqui de ipso vitriolo, non verò de illius oleo, ipsis ne nomine quidem cognito, quod differt à vitriolo ut candidum à nigro; nam refrigerat, malignitati resistit, exsiccet, putredines tollit, & sudores movet: quæ omnia in pestis curatione maxime necessaria & proficua esse, nemo non novit. Hos effectus non nostra solummodo, sed plurimorum quoque doctissimorum Medicorum experientia jam à longo tempore probavit, eosque attestantur Hercules Saxonia, Evangelista Quatmannus, Meturialis, Hephtus, Wirzangus, Rudolphus,



mus, Penotus, Mollerus, Lefchius, Fumanelius, Dornæus, Matthiolus, Joannes Neander, Augenius, Untzerus, aliique plures. Quantum ad acrimoniam hujus olei, sciendum, Medicos illud nunquam solum exhibere, sed julebis, syrupis, conditis, aliisque medicamentis admiscere, quibus acrimonia illa satis castigatur, ejusque erodens vis infringitur, adeo ut nihil prorsus nocere queat : quam acrimoniam qui in adurente qualitate consistere tradunt, non longè aberrant à via modò bene distinguant inter hanc qualitatem, quæ ab acris & acidis salis particulis procedit, & aliam manifestiorem magisque sensibilem adurentem qualitatem à sulphure procedentem, qualis est in febribus ardentibus. Magna enim inter has est differentia & contrarietas : nam si salfarum particularum acida qualitas prævaleat supra sulphuream, tunc hanc extinguit; atque hinc illa medicamenta, in quibus salfarum acidarum particularum prædominium prævalet, dicuntur refrigerare, ut, oleum vitrioli & sulphuris, acetum, succus citri, &c. non quod calore prædita non sint, sed quod talem specificum habeant calorem, qui manifestum & acutè sensibilem calorem sulphureum extinguere valet. Taceat igitur Sylvaticus cum suis affeclis; & de vitrioli ac sulphuris olei viribus audiat Minderus, qui lib. de pest. cap. 15. in hæc verba prorumpit : Nulla est putredo cujus vires non frangant, nulla infectio quam non superent, nulla humorum depravatio, quæ per ista non superetur : sanè, ut liberrimè loquar, si mihi vitriolatorum medicamentorum usus, vel interdiceretur, vel inhiberetur, ego ad pestis curationem nunquam, vel saltem interim accederem. Similia etiam de oleo vitrioli scribit, sequente cap. 17. Notandum tamen in olei vitrioli usu, illud non convenire hæmoptoicis, phthisicis, tussiculosis, asthmaticis, aliove thoracis vitio infectatis, ut neque iis quorum vesica vel renes laborant.

XII. Innumeri pulveres à Medicis describuntur, & singuli suo modo illos componunt. Inter cæteros maximi nominis est pulvis Foresti, de quo, lib. 6. in scholio Observat. 16. ita scribit : Nos hoc pulvere felicissimè uti sumus in hac peste, tam ad præcautionem, quam ad curationem, in multorum salutem : & quamquam hunc pulverem pro maximo secreto habeamus, nefas tamen esse duximus ejusdem descriptionem nobis solis retinere, quin potius volumus omnibus communem facere, ut quivis junior Medicus, tum alii omnes, ad mortalium utilitatem eo rectè uti possint. Est hæc descriptio :

Rec. Rad. dictamni,  
tormentilla,  
boli Arm. in aqu. scabiosa lota,  
terra sigillata, ana drach. vj.  
rad. gentiana,  
petasitidis,  
betonica, ana drach. ij.  
santali rubri, drach. j.  
rasura eboris,  
cortic. citri,

coralli rubri,  
ossis de corde cervi,  
rad. zedoaria; ana drach. f.  
margaritarum purissimarum, been utriusque, ana  
syrup. ij. fragmentorum quinque lapidum pretio-  
forum, ana scrup. j.  
Succini,  
ramentorum unicornu veri, ana scr. f.  
folior. auri,  
argenti, ana no. iij.  
fiat pulvis tenuissimus. Dosis ad præservationem,  
à scrup. ij. ad drach. j.  
ad curationem, à drach. j. ad scrup. iij.  
vel v.  
cum liquore idoneo.

Item Forestus alios duos huic non multum ab-  
similes pulveres describit eodem libro, in Scholio  
Observat. 27. Joannes Moibanus, Crato, Ges-  
nerus, aliique celebrant hunc pulverem, quem  
Saxonix Elector à rustico acceperat :

Rec. Rad. valeriana,  
hirundinaria,  
urticarum minorum, ana unc. f.  
polypodii quercini,  
angelica sativa,  
sylvestris, ana unc. ij.  
althea, unc. j.  
cort. rad. laureola, unc. j. f.  
Radices hæ effodienda sunt inter Augusti diem 14,  
& Septembris 8. Incisa imponantur olla vitrea-  
ta, affundendo aceti tantum ut duobus digitis  
excedat : bulliant ad lentum ignem : deinde  
radicibus siccatis ac pulverisatis, adde acinos  
herba paradisi no. 26. fiat pulvis.

Platerus scribit se anno 1593, in peste hoc pul-  
vere usum fuisse :

Rec. Boli Arm. preparata, unc. f.  
coralli rubri drach. ij.  
succini drach. j. f.  
rasura eboris, &  
cornu cervi, ana drach. f.  
rad. tormentilla drach. j. f.  
dictamni,  
carlina,  
pimpinella,  
angelica,  
imperatoria,  
myrrhidis, ana drach. j.  
corticum limonum,  
gariophyllorum,  
zedoaria, ana drach. f.  
cinnamomi, drach. ij. f.  
sem. acetosa, drach. j. f.  
sem. cardui bened.  
angelica,  
ocymi,  
coriandri, ana drach. f.  
medulla sem. citri, scrup. j.  
broci, scrup. f.

rosarum rubr.  
 fol. verbenæ,  
 fol. ruthæ,  
 cardui ben.  
 scordii, ana drach. s.  
 galange drach. j.  
 specier. diamargariti drach. j.  
 fiat pulvis.  
 Si camphora scrup. j. vel drach. s. vel drach. j. ad-  
 datur, tunc vis ejus erit efficacior, sed minus  
 conveniet pueris & gravidis.

Sennertus hunc pulverem bezoarticum compo-  
 nit, ejusque scrup. ij. ad drach. j. exhibet:

Rec. Cornu cervi usti drach. j. s.  
 oculorum cancri preparat.  
 terra sigillata,  
 succini,  
 margaritarum preparat.  
 coralli rubri, ana scrup. j.  
 ossis de corde cervi,  
 smaragdi,  
 rubini,  
 hyacinthi preparat. ana scrup. s.  
 lap. bezoartici orient. scrup. j.  
 folia auri no. iij.  
 fiat pulvis.

Cornelius Gemma hunc pulverem pro summo  
 secreto à Rege Hispaniæ haberi scribit:

Rec. Myrrha electa,  
 mastiches,  
 boli. Arm.  
 terra sigillata,  
 ligni aloës,  
 gariophyllorum,  
 maci,  
 croci, ana part. eq.  
 fiat pulvis.

Matthias Untzerus hos duos pulveres admodum  
 extollit.

Rec. Rad angelica,  
 pimpinella,  
 gentiana,  
 Zedoaria, ana ʒʒ.  
 enula,  
 patasitidis,  
 carlina,  
 aristolochiæ rot. ana ʒj  
 herb. cardui ben.  
 veronica,  
 verbenæ,  
 scordii,  
 melisse, ana p. j.  
 ruthæ,  
 myrrha, ana ʒʒ.  
 sem. citri,  
 cardui ben.  
 aurantiorum,

nucis moscate,  
 cinnamomi,  
 gariophyllorum, ana ʒj  
 fiat pulvis subtilis.

Rec. bac. juniperi, ʒʒ.  
 lauri,  
 rad. angelica, ana ʒij.  
 serpentaria,  
 gentiana,  
 tormentilla, ana ʒj  
 fol. scordii,  
 ruthæ ana ʒj  
 sem. acetosa,  
 cardui ben.  
 citri,  
 ruthæ, ana ʒʒ  
 rasura eboris,  
 coralli rubr. prepar.  
 terra sigillata,  
 ossis de corde cervi  
 succini preparati ana ʒj.  
 myrrha opt.  
 flor. sulphuris, ana ʒʒ.  
 fiat omnium pulvis subtilis.

XIII. Medici Mospelienses & multi Itali  
 in peste, tanquam utilissimo alexipharmaco,  
 utuntur trochiscis viperinis, qui ad confectio-  
 nem theriacæ concinnari solent, eosque exhi-  
 bent à drach. s. ad drach. j. cum aquis cordia-  
 libus. Nos in hac nostra peste iisdem aliquoties  
 usi sumus, sed absque magno fructu, fortasse  
 quia eisdem non satis recentes habuimus, vel  
 quia non tantopere valent adversus venenum  
 pestilens, quantum adversus alia venena: sal-  
 tem ego in peste nullum commodum ex iis per-  
 cipere potui, atque hinc omnem apud me fidem  
 perdidit. Loco horum trochiscorum apud  
 Germanos primo excogitatus, in usum venit  
 pulvis serpentum, ex colubrorum carne lota &  
 exsiccata confectus, quem adversus venenum  
 pestilens plurimum valere prædicant, Cunra-  
 dus Cunradi, 2. part. medul. distil. tract. 27.  
 Angelus Baldus, lib. de vip. Crollius. in Basil.  
 Chym. Quercetanus, lib. 2. alex. cap. 5. nec non  
 in Pharmacop. aliique plures, imprimis qui è Scho-  
 la Paracelsica prodierunt, mirabilium mysterio-  
 rum jactatores, qui fastoso hujus pulveris ser-  
 pentum encomio, jam plurimis annis Magna-  
 tum non minus quam civium infimæque plebe-  
 culæ mentes miris modis effascinarunt. Rati-  
 ones quibus serpentine pulveris fundamentum in-  
 nititur, hæc sunt: 1. Quod Galenus, 6. epidem.  
 sect. 6. text. 5. dicat vinum viperinum multum  
 valere adversus venena: quod ipsum quoque  
 docent Rabbi Moyse, & Nicolaus Florenti-  
 nus, lib. de venen. 2. Quod Galenus, lib. 11.  
 simpl. & lib. de antid. referat, duos leprosos vi-  
 no viperino fuisse sanatos. 3. Quod trochisci  
 de viperis adversus omnia venena valere, jam  
 ab Andromachi tempore, vel diutius, creditum,  
 & ab omnibus pro indubitato habitum fuerit,  
 qui

qui ea propter theriacæ compositionem ingrediuntur. Hæ rationes & auctoritates tantum valuerunt apud multos, ut solas serpentum ac viperarum carnes ad venenum pestilens fugandum, retundendum, & extinguendum sufficere existimaverint; ita ut inter cæteros Ernestus Burggravius, in *Lampad. vita & mort.* Stentorea voce exclamet: *Pulvere serpentino si quis utatur, extra omnium venenorum, qualiacunque illa sint, ac pestilentia aleam ac periculum tutus erit.* Ex altera parte multi celeberrimi Medici carnes serpentinas & viperinas adversus venena nihil prodesse, credunt, easque tanquam inutiles & fallaces, ab agyrtis aliisque burfarum castratoribus primò in usum productas, rejiciunt, aliosque Medicos, qui illas laudant, temeritatis & inscitiae arguunt. Si meam opinionem quispiam roget, ego utrosque errare dicam: illos, quod prædictas rationes & Galenicæ auctoritates nimis longè extendant: hos, quod easdem nimis temere in totum rejiciant. Nam carnes viperinas & serpentinas adversus aliqua venena eximiam antidotalem vim obtinere, adeo notum est, ut absolutè negari non possit; idque non tantum liquet ex prædictis Galeni testimoniis, verum etiam ex quotidiana experientia. Sic Hartmannus scribit se propriis oculis vidisse, à quodam experto Medico tribus diebus continuis gravissima quædam venena assumpta, eademque paulo post sine ulla noxa, ab exhibito pulvere, cum adstantium admiratione iterum expulsa fuisse. Ita etiam refert Untzerus, se vidisse quosdam qui araneos vivos devorant, vel arsenicum aut simile toxicum potarunt, corpore eorum saluari hoc alexiterio præmunito. Idem in adolescente quodam se vidisse testatur Cunradus; qui insuper narrat historiam cujusdam rei Prægræ morti damnati, in quo hujus pulveris experimentum factum est, & compertum eundem arsenici sublimati virulentiam edomasse. His adde, quod carnes viperinæ lepram etiam hodie interdum sanent. Verum qui hanc antidotalem vim ad omnia venena extendere volet, longissimè errabit, nam multa inveniuntur adversus quæ carnes viperinæ vel serpentinæ non magis proderunt, quam saccharum adversus arsenicum. Venena enim quadruplicia fere sunt. 1. *Vegetabilia*, quæ nonnullis herbis, radicibus, fructibus, &c. insunt. 2. *Mineralia*, omnibus satis nota. 3. *Humoralia*, quæ insunt animalibus viventibus, vel sanis, vel ægrotis, & in illis ex certa quadam naturali humorum dispositione resultant, qualia sunt venena scorpionum, bufonum, araneorum, &c. in his verò ex certa quadam humorum in corpore corruptione præternaturali generantur, ut sunt venenum rabidum, venereum, epilepticum, & illud à quo variolæ, multæque malignæ febres generantur. 4. *Aërea*, è quibus generatur pestis, quorum essentiam & naturam nemo hæcenus bene cognovit. Adversus multa ex tribus prioribus venenis carnes serpentum multum valere, certum est, sed non tamen adversus omnia: nam

rabidum, venereum, aut epilepticum venenum per illas extinctum & expulsum, dictosve morbos sanatos fuisse, nondum (quod scio) compertum est. Verum adversus quartum venenum, nempe aëreum, illas specificè prodesse, nulla certa experientia hæcenus demonstravit: imò contra multoties compertum est, illas adversus pestilens venenum nihil omnino profuisse. Sic testatur Untzerus, anno 1610, quo gravissima pestis grassabatur, maximam eorum partem, qui hoc pulvere usi fuerant, interiisse. Ita quoque Libavius, tom. 2. *Syntag. Alch. Pharm. cap. 14.* inquit: *Falsum est, non interire peste omnem eum qui pulvere serpentino est præcinctus; imò tam fortiter experientia refutavit illud mendacium, ut magnum pondus detractum sit isti omni.* Illud ipsum ab experientia edocti testantur Casparus Bauhinus, in *append. ad lib. de lap. bezoar*, & Rulandus, in *præfatione Latina Loimogog. sui Germanici.* His adde, quod nec divinus Senex, nec Galenus, diligentissimus facultatum medicamentorum indagator, cui carniū viperinarum vires satis notæ erant; nec Avicenna, nec ullus veterum Medicorum, sive Arabum sive Græcorum, viperinas vel serpentinas carnes, tanquam specificum adversus pestem, exhibuisse legatur; quibus tamen sagacissimis viris non potuisset non cognita esse talis antipestilentialis vis, in medicamento ipsis multo magis, quam nobis, usuali & cognito. Quidquid sit, saltem nos in hac peste ex trochiscis viperinis nullum laudabilem effectum comperire potuimus: unde illos pessimè sibi consulere existimamus, qui tempore pestis in carnibus vel trochiscis viperinis aut serpentinis solis nimium confidunt.

XIV. Ex fragmentis pretiosorum lapidum, præter confectionem de hyacintho, varia alia antidota concinnantur, quorum tamen vires multi irrident, alii easdem suspiciunt. Inter alios lapides, Avenzoar, 2. *thesir. tract. 1. cap. 3.* magnam & excellentem vim tribuit Smaragdo, adversus morbos venenatos, & refert, se ipsum ex veneno laborantem, hoc solo remedio fuisse curatum. Sic etiam Mindererus, *lib. de pest. cap. 15.* narrat se mulieri febre pestilenti correptæ quæ omnia remedia averfabatur, pulverem sequentem exhibuisse. quem sine odore vel sapore transglutire poterat, eoque assumpto, abactis sævorum symptomatum seditionibus, & in salutem protinus converso morbo, evasisse.

Rec. *Smaragdi præparati*,  
*lapid. bezoar Orient, ana gr. vii.*  
*hyacinthi, gr. iij.*  
*fiat pulvis.*

Eandem Smaragdi vim refert se expertum fuisse Zacutus Lusitanus, *Prax. Admir. lib. 3. observ. 87.* in Nobili Lusitano, alvi diurno fluxu ex veneno assumpto laborante, à quo nulla medicamentorum ope liberari potuerat, quod malum tandem solo smaragdi usu curatum fuit. Crato, *tract. de pest.* inquit. *Omnes pene Medici, post*

*theriacam & Mithridatium, Smaragdum laudant; datur ad gr. vj. cum mithridatio.* Smaragdum ad gr. 10. exhibitum cum aliquo liquore appropriato, magnopere laudant, Eustachius Rudius, *lib. 3. Pract. cap. 30.* Fumanellus, *de peste, cap. 6.* Quatramnus, *de pest. cap. 4.* Sapphirum potum aut exhibitum commendat Augenius, *lib. 3. de pest. cap. 8.* Hyacinthum extollunt Crato, *tract. de pest.* & Jo. Fragosus. Succinum exhibent Georgius Agricola, *de pest. lib. 2.* Cunradus Cunradi, *part. 1. medul. distil. tract. 9.* Libavius, *part. 3. singular. de succino, cap. 28.* Ex his aliisque pretiosis lapidibus Chymici multa præparant magisteria, essentias, liquores, olea, & nescio quæ non chymica Extracta, quorum nonnulla quidem insignia sunt, sed nimis fastoso encomio semper comitata. Erasius, *disput. 4. contra Paracelsum*, multis argumentis probat lapides pretiosos nullam cardiacam vim exercere, inter quæ illud primum est, quod medicamenta quæ debent agere in corpus, debeant actuari & dissolvi; lapides autem illi non dissolvantur, sed eodem pondere, & tales quales assumti sunt rursus excernantur. Quo argumento in eandem quoque opinionem pertractus fuit Hercules Saxonia, *Prax. lib. 8. cap. 37.* Verum Erasii argumentationem nullius momenti esse, præter plurimorum gravissimorum Medicorum experientiam, etiam multorum lapidum, non occultæ modò, sed manifestissimæ operationes docent. Nam lapis ætites femori alligatus partum promovet, ut testantur Arabes, Erotas, Nicolaus Rocheus, alique innumeri, & ipsa quoque experientia: magnes trahit ferrum: & sic plurimi alii lapides varias edunt operationes oculis conspicuas, qui tamen lapides, nec dissolvuntur, nec in pondere aut forma quippiam immutantur: sic etiam vitri antimonii frustum in vino depositum, quamvis ejusdem formæ, qualitatis, ac ponderis, absque substantiæ dissolutione inde rursus extrahatur, tamen isti vino maximam vomitivam vim impressit. Si magnes, lapis ætites, lapis hæpatites, alique, si vitrum antimonii, absque substantiæ, ponderis, viriumque immutatione, vires suas exercere possint; quare non etiam nonnulli alii lapides pretiosi, in corpore humano macerati ac cocti, cardiacam & alexipharmacam suam vim absque substantiæ ponderisque immutatione cordi communicare possent? Scio quidem magnos hac in parte errores apud multos committi, qui dum quælibet sua effata ex Apollinis tripode deprompta putant, speculationibus suis absque fundamento abrepti, ex variis lapidibus tales volunt extorquere vires, quibus nunquam præditi fuerunt, nec sunt, nec erunt. Verum hæc interim talium hominum vanitas non debet derogare fidem & auctoritatem iis lapidibus, quos experientia à longo tempore demonstravit antidotalibus facultatibus esse præditos.

XV. Moscum hoc tempore ægrotos omnes, viros æque atque mulieres, ægerimè tulisse, & post ejus usum se multo pejus habuisse, obser-

vavimus, ac propterea confectionem de hyacintho, ut & alchermes, sine moscho parari iussimus. Etiam Valescus de Taranta, *Philon. pharmac. lib. 7. cap. 16.* moscum in peste fugiendum esse tradit. De moscho aliisque fragrantibus remediis videantur adhuc quædam *lib. 2. cap. 5. in text. & annot. 9.*

XVI. Theriaca & Mithridatium duo nobilissima & antiquissima sunt antidota, quorum adversus vena & pestilentem luem excellentissimas virtutes, jam à multis seculis experientia probavit, eaque in peste aliisque malignis ac contagiosis morbis plus profuisse semper compertum est, quam innumera alia magnis titulis decantata alexipharmaca. Hinc est quod ubique in Rebuspublicis bene constitutis eximia curiositate confecta, & in celeberrimo usu per totum terrarum orbem, absque ulla compositionis immutatione, semper habita fuerint. Neque id sine ratione, nam calorem nativum suscitant, facultatem vitalem recreant, cor adversus venena & omnis generis malignitates firmant ac defendunt, easque procul à vitæ fonte per poros cutis expellunt. Imprimis autem theriaca, non neotericis solum cognita, sed ab ipsis quoque veteribus summo opere laudata existit: ut ab Aëtio, *Tetrab. 4. serm. 1. cap. 96.* Paulo Ægineta, *lib. 2. cap. 36.* Nicolao Myrepsio, aliisque: imò Galenus (vel alius quicumque auctor) *lib. de Theriaca ad Pison. c. 16.* in hæc verba prorumpit: *Deprehensa est mihi sola theriaca in pestilenti constitutione languentibus posse succurrere, cum nullum aliud præsidium tam magno malo, ac ipsa resistere valeat, &c.* Paulo post addit: *Theriacam tanquam ignem purificantem esse comperi: illos quidem qui adhuc sani illam præbuerunt, non permittere ut pestilentia prorsus capiantur: illos autem qui jam agrotassent, sanare posse, tum aëris inspirati malignitatem immutando, tum corporis temperaturam corrumpi non sinendo.* Cum Galeno consentit Alexander Massaria, *lib. 2. de peste: Inter antidota*, inquit, *plerique omnes primas facile tribuunt theriaca Andromachi & Mithridatio, qua duo medicamenta usque adeo præstant, & alia superant, ut sola præsentis usus satisfacere posse videantur, cum præter hæc nullum forte aliud remedium inveniri liceat quod vehementissimo huic malo absistere possit, quandoquidem illa, si quid aliud, pestilentem omnem somitem & dispositionem, instar ignis mirandum in modum absumunt & extinguunt.* Post Galenum & Massariam, fere omnes maximi nominis Medici theriacam Andromachi, tam ad præsertionem, quam ad curationem pestilentis, summis laudibus extulerunt. Taceant hinc Capivaccius, Trincavellius, Julius Alexandrinus, alique varii, qui celeberrimæ divini hujus medicamenti usum frivolis & distortis quibusdam argumentis è praxi Medica exterminare nituntur, inculantes nescio quæ non incommoda, & imprimis magnum ejus calorem, qui in febribus extimescendus est; quasi vero ille admistis frigidis non posset attemperari, & sic tutius non foret calido medicamento malignitatem extinguere, quam solo frigido cale-

calorem edomando, malignitatem relinquere, ejusque continuo ac citissimo, maximeque damno incremento nullis mediis obviam ire. Procul dubio hi de theriaca malè loquuntur, non ut humano generi melius consulant, sed ut alio novo quodam ab ipsis excogitato antidoto magnum sibi nomen conquirant, atque se plus, quam antiquos, sapere monstrent; cum tamen præstaret bene inventis ac probatis uti, quam novarum compositionum vires cum plurimorum periculo inquirere, idque in hoc perniciosissimo morbo, in quo medicamenti periculum sine periculo facere non licet; *quia exitiales morbi* (inquit Galenus) *ne levissimum quidem errorem ferunt*: adde ego, quod neque temporis jacturam patiantur. Eapropter etiam nos in hac peste nullis novis theriacis (quales sunt, theriaca Londinensis, Arnoldi de Villa nova, Tabernamontani, Germanorum Monavii, Antidotus Matthioli, ut & Guidonis de Chauliaco, electuarium de ovo Imperatoris, aliæque similes compositiones, ab Andrea Gallo, Langio, Augenio, Platero, aliisque pluribus Medicis collectæ) usi sumus; cum theriaca Andromachi & Mithridatium Damocratis alias neotericorum theriacas, et in compositionis forma, et in simplicium exquisito selectu, et in singulari effectu, longis paralangis antecellere nobis videretur. Non quod aliorum Medicorum præclara inventa contemptui haberemus, sed quod illa antiquorum sapientissimè compositis antidotis minimè præferenda esse judicaremus. Præterea, quod theriaca Andromachi & Mithridatium Damocratis aliquot annorum, semper ad usum parata haberemus, cum aliæ theriacæ non nisi de novo, & proinde nimis recenter, & minus aptè compositæ haberi possent. Adde, quod in nostris Belgii Inferioris regionibus, ad quas omnium rerum, atque etiam medicamentorum abundans copia ex totius mundi partibus undequaque advehitur, selectissima simplicia ad theriacæ Andromachi confectionem necessaria haberi possint, (quæ selecta copia in multis aliis regionibus desideratur) ac proinde theriaca Andr. curiosissimè conficiatur, & non sine prævio accuratissimo doctissimorum Medicorum examine confici debeat; (si fortè per mercatorum quorundam avaram fraudulentiam hic illic non satis exacta præparetur, hoc maximè per incuriam aut inscitiam quorundam Pharmacopœorum contingit, iis in locis ubi isti confectioni nulli eximii Medici præfides examinatores à Magistratu sunt constituti;) cum aliorum theriacæ ex variis simplicibus, sæpe non debito tempore collectis, nec satis convenienter siccatis, aut bene servatis (quorum interdum nonnulla quoque deficiunt) confici debeant.

Verum antequam de theriaca Andromachi discedam, operæ pretium censeo, ut lectoribus ostendam, quanto cum vituperio nonnulli docti viri de hac theriaca loquantur, & quam facile à me aliisque veriora sentientibus talium dicta retundi queant. Quippe inter primarios theriacæ contemptores comperi esse Guidonem Pati-

num, magnæ eruditionis & experientiæ Medicum Parisiensem, ac in Sorbonnensi academia Medicinæ Professore regium. Hic (etsi non nisi de nomine & fama mihi notus) anno 1657 mense Decembri, à me petiit, ut ipsi mitterem libellum disputationum mearum medicarum in academia nostra habiturum: quem illi lubens transmissi: pro quo munusculo per epistolam mihi gratias egit in principio mensis Martii anni 1658. Sed in eadem illa epistola me admodum acriter perstrinxit, quod in hoc meo tractatu de peste, theriacam Andromachi tantopere extollam & commendem. Prolixam ejus epistolam hic inferere nimis longum foret, sed meum responsum (quod etiam proluxum esse debuit) hic duntaxat subiiciam, cum ex eo satis intelligi possit, qualia ille tela, & mihi, & theriacæ intorserit, & quomodo ego illa retorserim. Responsum meum, quod 23. Martii anni 1658. rescripsi hoc fuit.

„ Clarissime doctissimeque Vir, litteræ tuæ „ ante octiduum mihi traditæ sunt, quibus nias „ certe pro exili munusculo gratiarum actiones „ profundis faxit summus Deus ut postmodum „ aliquando majus quid mittere possim, quod „ melius talem gratiarum actionem mereatur. „ Porro, quandoquidem ex litteris tuis percipio, „ te antehac librum meum de peste perlegisse, „ id unice laudo, quod omni postposita „ adulatione sententiam meam de Theriaca tam „ animosè reiicias, propterea, sine dubio, quod „ ipsum pharmacum, & simul meum ipsi adscriptum „ encomium tibi planè non arideat. Verum „ nimis præcipitanter tam antiquum maximique „ nominis medicamentum atro calculo à te depingi „ seu denigrari videtur. Quippe illam dicis „ esse merum, solummodo officinæ pharmaceuticæ „ recrementum, in ægrorum perniciem „ olim excogitatum, & exinde ab imperitis solum „ Medicis & empiricis in usum vocatum, etsi „ boni medicamenti nomine prorsus sit indignum. „ Quod his probas rationibus. 1. Quia „ est congeries multorum simplicium contrariis „ qualitatibus pugnantium. 2. Quia plerique „ Medicorum in Gallia illi sine ulla ratione „ trocinantur. 3. Quia Belgæ, qui aucupes „ sunt commerciorum per totum orbem, illam, „ ut & plurima alia medicamenta, summo artis „ nostræ dedecore & damno publico, ubique „ vendunt. 4. Quia est nimis calida. 5. Quia, „ propter multorum simplicium defectum & „ mercatorum fraudes, illa non potest hodie „ deliter & exacte componi, seu parari. Atque „ ex his tandem concludis, eos qui theriacam „ magni faciunt, non ex methodo, sed ex sola „ traditione & aliena fide medicinam facere. Certe „ hæc argumenta (quod pace tua dixerim) non „ videntur tam efficacia & nervosa, ut eorum ratione „ quispiam tam impotenter in medicamentum „ tot seculis probatum & laudatum invehat. „ Tur. Tranquillo animo omnia ponderanda sunt, „ & clementer sine præjudicio de rebus judicandum. „ Theriaca congeries quidem est multorum „ & diversorum simplicium, sed hoc nihil „ detra-

„detrahit ejus dignitati; nam si singula illa seor-  
 „sim considerentur, in eo pleraque conveniunt,  
 „quod insignem, vel antidotalem, vel corro-  
 „borantem vim habeant. Pulveribus, præter  
 „mel & vinum Creticum, admiscuntur varia  
 „gummata, haud contemnendis quoque viribus  
 „prædita, ut compositum iis mediantibus melius  
 „cohereat, & ob aliqualem tenacitatem, diu-  
 „tius sine virium suarum jactura conservari pos-  
 „sit. Adduntur denique quæ fermentationem  
 „inducunt, ut ea mediante omnium simplicium  
 „vires resolutæ simul coeant & jungantur in  
 „unam antidotalem ac corroborantem qualita-  
 „tem. Simplicium alia incidunt, alia increassant,  
 „alia calefaciunt, alia refrigerant, &c. sed ex  
 „omnibus his resolutis & exacte simul mixtis ex-  
 „surgit medicamentum antidotale, cujus præ-  
 „claras qualitates multis seculis plurimorum ex-  
 „perientissimorum Medicorum, & quotidiano  
 „etiam usu, probatas, licet mirari possimus,  
 „tamen, fateor, verbis explicare commode  
 „non possumus. Quemadmodum enim nemo  
 „hactenus plurimorum venenorum, ut scorpio-  
 „nis, tarantulæ, bufonis, araneæ, torpedi-  
 „nis, canis rabidi, etc. ita etiam nemo pluri-  
 „morum antidotorum, & inter cætera theriacæ,  
 „alexipharmacam qualitatem explicare potuit;  
 „quæ antidotalis vis non consistit in calore, fri-  
 „gore, apertione, aut constrictione, etc. sed  
 „abdita est, nec per ulla manifestas qualita-  
 „tes magis explicari potest, quam ipsæ multo-  
 „rum venenorum qualitates. Ita ut magna mul-  
 „torum simplicium congeries nihil detrahat no-  
 „bilitati tantæ compositionis: sæpe contingit ut  
 „ex multis simul mixtis præclarum quid educa-  
 „tur, quod ex singulis simplicibus haberi nequit,  
 „sicut illud in multorum medicamentorum mix-  
 „tione, & valde frequenter in chymia patet.  
 „Quod quia in Medicina passim compertum est  
 „hinc cum ab antiquis, tum à recentioribus  
 „præcificis multa præclara composita inventa  
 „sunt, quorum laudandas vires quotidianus  
 „usus probat: hæc tamen omnia tunc simili ra-  
 „tione etiam reprobanda viderentur, quia scilicet  
 „ex multorum congerie constant. Sic reiicienda  
 „forent electuaria diaprurnum, hiera picra, spe-  
 „cies diambrae, pilulae cochiae, Ruffi, plera-  
 „que unguenta & emplastra, aliaque innumera:  
 „si forte dicas, illa ad certum effectum seu finem  
 „esse destinata, ego idem etiam dicam de theria-  
 „ca; quippe sicut hiera picra purgat vitiosos hu-  
 „mores & cacochymiam tollit, ita theriaca su-  
 „dores movet, ac malignitati resistit. Hæc si  
 „eodem modo fortasse consideraverint plurimi  
 „vestrae Galliae Medici, non miror quod theria-  
 „cæ patrocinentur, eamque in variis morbis ma-  
 „lignis hactenus valde laudaverint, etsi illud tibi  
 „displiceat, & sine ulla ratione fieri videatur.  
 „Quod autem Belgæ sint, ut dicis, aucupes  
 „commerciorum per totum orbem, atque etiam  
 „plurima medicamenta, ubique divendant, hoc  
 „certe nihil arti nostræ detrudere, nullumque  
 „reipublicæ medicæ damnum inferre, nec ullam

„minimam infamiae notam theriacæ inurere po-  
 „test; atque hinc neque illa, neque ullum  
 „aliud medicamentum eo nomine male audire  
 „debet. Commerciorum aucupium mercatores  
 „tangit, non vero Medicinam, quæ interim illud  
 „commodi ex tali aucupio recipit, quod pluri-  
 „ma præstantissima & antehac penitus nobis in-  
 „cognita medicamenta ex Indiis, aliisque lon-  
 „gissimis & ignotis regionibus adferantur: sic  
 „ante hac rhabarbarum: senna, agaricus lignum  
 „guajacum & sassefras, sal saparilla, aromata  
 „plurima, &c. ac novissime gummi caranna,  
 „tacamahaca, lignum serpentinum, balsamum  
 „Peruvianum, aliaque innumera medicamenta  
 „nobis allata fuere, quorum præclaras virtutes  
 „quotidie experimur, idque non cum ullo dam-  
 „no aut dedecore, sed cum totius Medicæ artis  
 „honore. Ad quid igitur illud aucupium, tan-  
 „quam magnum opprobrium, nostris Belgis  
 „speciatim exprobras? Si mercatores merces  
 „suas nonnunquam adulterent, sicut ab omni se-  
 „culo avaritia per fas & nefas, per dolum & frau-  
 „des proprium quærit commodum, illud non  
 „lædit Medicinam, multoque minus theriacam,  
 „sed lædit imprimis famam & honorem imperi-  
 „torum Medicorum, atque imprimis pharma-  
 „copæorum, qui multoties, prohdolor, per  
 „inscitiam & imperitiam non cognoscunt sim-  
 „plicia, atque hinc sæpe quid pro quo, mala  
 „pro bonis coemunt, ex iisque composita medi-  
 „camenta conficiunt, qui certe error magis eo-  
 „rum stoliditati & ignorantiae, quam mercato-  
 „rum fraudi imputandus est: quippe si illi bona  
 „medicamenta satis cognoscere didicissent nun-  
 „quam iis mala pro bonis, nec adulterata pro ve-  
 „ris obruderentur. Quantum ad theriacæ ca-  
 „lilitatem, quæ forte in febribus pestilentibus  
 „minus conveniens videri posset: dico usum  
 „theriacæ pendere à prudentis Medici judicio,  
 „qui si videat magnum esse febris ardoris pru-  
 „denter abstinet à tam calido remedio, & uti-  
 „tur alio frigidiore: si verò febrilis calor par-  
 „vus, aut tantum mediocris sit (qualis in multis  
 „malignis reperitur) malignitas verò magna exi-  
 „stat, ut in pestilentibus solet esse, tunc, quia  
 „magno opus est antidotali remedio, exhibet  
 „theriacam cum aceto, succo citri, aliove si-  
 „mili alexipharmaco liquore, qui calorem ejus  
 „infringere valet. Tali modo possum gloriari  
 „me innumeros ægros ex ipsa Charontis cymba  
 „retraxisse; nam ubi multa alia non proderant,  
 „tandem admixta theriaca requisitam vim medi-  
 „camentis adicere seu conferre videbatur, si mo-  
 „do nimius febrilis ardor eam non prohiberet.  
 „Præterea, cum pestis sine febre est, quid  
 „tunc, quæso, vetat usum theriacæ ob calidi-  
 „ditatem? multos vidi pestiferos non febricitan-  
 „tes, & ego ipsemet tempore crudelissimæ no-  
 „stræ pestis, magnum carbunculum pestilentem  
 „habui sine ulla febre, & sine ullo alio magno  
 „incommodo, in qualibus casibus theriaca sem-  
 „per felicissime usus sum, idque etiam æstivo ca-  
 „lidoque tempore. Expertus hæc scribo, non  
 „verò



„verò ex traditione veterum, aut aliena fide, ut  
 „tu arbitraris. Magnus mihi apertus fuit cam-  
 „pus annis 1635 & 1636, nec non his annis  
 „1654, & 55. quælibet in peste mysteria per-  
 „scrutandi & inquirendi, quæ alii maximi no-  
 „minis, & simul maximi timoris Medici ne qui-  
 „dem de longe videre ausi fuerunt, qui interea  
 „sæpe nimis faciles sunt in culpandis iis rebus,  
 „quæ cum inexpertis eorum speculationibus non  
 „conveniunt, cum tamen nemo eorum (qui aliis  
 „in hac praxi versatis longe doctiores videri &  
 „haberi volunt) per suas speculationes abstrusam  
 „& abditam, cum pestilentis veneni, tum  
 „alexipharmicorum vim explicare potuerit, quæ  
 „non in calore, frigore, aliave manifesta, sed  
 „in occulta atque incognita qualitate consistit.  
 „Quod denique scribis, theriacam hodie non  
 „posse fideliter & exactè compositam ac præpa-  
 „ratam haberi, an hoc in Gallia verum fiet,  
 „nescio (olim cum illic versarer me maximas  
 „pharmacopœorum fraudes in multis alijs com-  
 „perisse memini) sed hic in Belgio, & præcipue  
 „in nostra patria urbe Ultrajecto, illam exac-  
 „tissime componi scio, ex simplicibus omnibus  
 „tam eximis & selectis, ut nullus Medicus me-  
 „liora exoptare posset, idque non sine prævio  
 „Medicorum primariorum curioso examine, in  
 „quorum etiam præsentia omnia ponderantur  
 „& miscentur, ita ut nulla prorsus fraus subesse  
 „queat: solummodo pro opobalsamo (quod  
 „haberi nequit) oleum nucis moscatæ expres-  
 „sum, & pro carpobalsamo baccas juniperi suc-  
 „culentas, ac pro malabalthro folia lauri, vel cor-  
 „ticis citri exteriorem flavedinem substituiimus,  
 „reliqua omnia habemus hic selectissima. Haud  
 „equidem inficias eo, sub hac compositione  
 „passim, per pharmacopœorum avaritiam, in  
 „toto Christianismo magnas irrepsisse fraudes,  
 „sed hoc duntaxat probatum volo, illam satis  
 „sinceram posse parari, si modo Medici, quo-  
 „rum interest, diligentem compositionis ratio-  
 „nem habere velint, sicut nos hic Ultrajecti fa-  
 „cimus, ubi nulli pharmacopœo hodie licet ali-  
 „quod alicujus momenti compositum medica-  
 „mentum pro communi usu servandum præpa-  
 „rare, sine prævio Medicorum ad id munus de-  
 „putatorum examine. Ex his denique omnibus  
 „concludo, theriacæ in peste usum imprimis  
 „male audire & parvi fieri apud eos qui parum  
 „aut nihil in pestis curatione fecerunt, qui si  
 „mihi explicaverint naturam pestilentis veneni,  
 „tunc ego statim theriacæ antidotalem vim ex-  
 „plicabo; vel si aliud præstantius & certius re-  
 „medium protulerint, ego statim hoc tanquam  
 „incertius rejiciam. Rideo etiam multorum,  
 „imprimis Germanorum, vanas jactationes, qui  
 „theriacam Andromachi continentem, tan-  
 „quam quid melius prolatur, multa alia exco-  
 „gitavere, conscribere, & ad cœlum usque  
 „extulere composita medicamenta & antidota,  
 „quorum omnium splendor, propter minorem  
 „efficaciam, majoritque incertitudinem tem-  
 „pere perit: qualia sunt electuarium de ovo,

„theriaca Germanorum Monavii, ut & illa Mat-  
 „thioli, nec non innumera alia fastoso encomio,  
 „à suis auctoribus decantata. Si quis forte pu-  
 „tet, sine hujusmodi antidotis posse curationem  
 „pestis commodius absolvi per venæsectiones  
 „& purgationes, ille non minus infelix erit in  
 „curatione pestis, quam si luem Venericam sine  
 „ligno guajaco, falsa parilla, Mercurio, aliisque  
 „propriis antidotis velit curare. Licet ardor  
 „febrilis & sordida, vel quocunque abstrusore  
 „nomine nominanda, putredo, phlebotomiam  
 „& catharsin exposcere videantur, experientia  
 „tamen isti medendi methodo refragatur: nam  
 „sanctè affirmo, me in crudelissima illa peste,  
 „de qua librum meum conscripsi, semper ob-  
 „servasse, ex quinquaginta, imò ex centum  
 „ægris pestiferis, in quibus hæc remedia tentata  
 „fuerant, vix unum evasisse; ex iis verò qui  
 „antidotis utebantur innumeros sanatos fuisse;  
 „quod ipsum etiam ante quadriennium in nupe-  
 „ra nostra peste rursus comperi. Ita ut in peste  
 „nemo speculationibus propriis, nullo praxeos  
 „usu suffultis, nimis pertinaciter insillere pos-  
 „sit, sed eas in occulto hoc morbo experientiæ  
 „subicere necessario debeat; idque adhuc multo  
 „magis quam in lue Venerea, in qua tamen pas-  
 „sim ad appropriata antidota, quæ maxime pro-  
 „desse experientia docuit, feliciter concurrunt.  
 „Interim illi, qui tam in peste, quam in lue  
 „Venerea, appropriatis et experientia probatis  
 „antidotis seu alexipharmacis secundum metho-  
 „dum utuntur, eaque conveniente modo, for-  
 „ma, ac tempore ægris præscribunt, eo no-  
 „mine declamandi non videntur, tanquam si  
 „empiricorum instar, non ex methodo, sed  
 „ex sola traditione & aliena fide medicinam fa-  
 „cerent: certe experta & longo usu probata re-  
 „media nisi cum bona methodo adhibeantur, pa-  
 „rum utilitatis ex iis redundabit; atque ita ipsis  
 „etiam optimis maximeque expertis remediis  
 „necessario cum bona methodo utendum est.  
 „Quantum ad Galeni librum de theriaca ad Pi-  
 „sonem, quem scribis spurium esse, & te mi-  
 „rari quod illum citem tanquam librum alicujus  
 „auctoritatis: illum ego tanquam Galeni au-  
 „tenticum non assumpsi defendere, nam eodem  
 „mihi redit quisnam ejus auctor fuerit, ego tex-  
 „tum illius duntaxat citavi, quatenus de theria-  
 „ca bene judicare mihi videretur; quo nomine  
 „etiam quoslibet præclaros scriptores, imò &  
 „anonymos citare auderem. Sed hæc su-  
 „per his: quæso ut acerbius ferre nolis, quod  
 „in modo dictis ab opinione tua dissentiam; illud  
 „Philosophicæ libertati concedendum: ego  
 „etiam mearum opinionum tam pertinax defen-  
 „sor esse nolum, ut ab iis dissentientium senten-  
 „tias ægre ferre velim: sentiat quilibet quod  
 „lubet, dummodo mihi dissentienti libertas  
 „relinquatur, coram ejusdem tribunalis mihi facile  
 „licentia concedetur etiam meis propriis opi-  
 „nionibus discedendi, easque immutandi, quan-  
 „do meliora aut veriora videro: interea tamen  
 „hoc à me longe aberit, ut de aliis à me dissen-  
 „tenti-



„tientibus male loquar, vel eos contemptui  
habeam.

„Sed quandoquidem video parvum, quod  
„scribere decreveram, epistolum in longam  
„epistolam excrevisse, tempus erit ut vela con-  
„traham, ac proinde te tuosque Deo opt. max.  
„meque tuæ benevolentiaë unicè commendans,  
„semper ero.

Tuum,

J. DE DIEMERBROECK.

Post hanc meam epistolam, per parenthesin hic  
interjectam, nunc tandem ad rem redeundum,  
& ad alias quasdam neotericorum theriacas accen-  
dendum.

Inter recentiorum antidota, tria sunt maximi  
nominis: nempe, electuarium de ovo Maximi-  
liani Imperatoris, theriaca Germanorum Mona-  
vii, & antidotus Matthioli, quorum descrip-  
tiones, omiſſis innumeris aliis, tanquam nobilio-  
res, hic subjungemus:

Electuarium de ovo hoc modo describit Quer-  
cetanus, de peste, cap. 5.

Rec. Ovum gallina recens, à quo albumen è fo-  
ramine in acumine facto extrahatur: tunc  
croco orientali, quicquid in eo vacuum erit,  
repleatur, & foramen sedulo occludatur, ne  
quid exhalet: deinde ad ignem lentum, vel  
in furno assetur, donec superficies nigredinem  
conspiciat, cavendo tamen ne crocus combura-  
tur: postea abjectâ testâ ovum totum exsicce-  
tur & pulverisetur, atque hac sequentia ad-  
dantur:

Rec. Pulv. rad. tormentilla,  
diſtamni, ana drach. ij.

cornu cervi,  
myrrha,  
nucia vomica, ana drach. j.  
rad. angelica,  
pimpinella,  
zedoaria,  
granorum juniperi,  
camphora, ana unc. f.

Omnia in mortario simul misceantur, addendo  
theriaca ad pondus omnium, fiat s. art. ele-  
ctuarium.

Platerus, ne crocus aduratur, illud electuarium  
talimodo componit:

Rec. Vitellum ovi cocti ad duritiem, cui adde  
croci contriti aequale pondus, agitanturque probe  
simul, addendo deinde

Pulv. rad. tormentilla,  
diſtamni, ana ana. f.  
angelica, unc. j.  
vincetoxica,  
succisa,  
zedoaria, ana drach. ij.

sem. eruca, drach. j.

myrrha, scrup. j.

theriaca,

mithridatii ana q. s. ad formandam massam satis  
duram.

Dosis drach. j. cum aquis distillatis, vino, vel  
aceto.

Monavius de sua theriaca ad Cratonem ita scribit:  
Composui hic, dum proxima contagio nobis metum  
injiceret, theriacam quandam, quam Germanorum  
nuncupavi, cujus libras jam multas Pharmacopœum  
meum divididit. Constat ex iis potissimum quæ apud  
nos pura & sincera reperiri possunt, nec minorem vim  
in venenis extinguendis possident, quam exotica ab ex-  
tremis Indiis huc importata.

Rec. Rad. angelica,  
gentiana,  
zedoaria,  
tormentilla,  
• diſtamni,  
pimpinella,  
valeriana,  
ostrutii,  
morsus diaboli,  
aristolochia rotunda,  
asari,  
serpentaria,  
levistici,  
cardo pat.  
pentaphylli, ana drach. iij.

herbar. scordii,  
chamedryos,  
betonica,  
rutha,  
cardui benedicti,  
centaurii, ana unc. f.

florum calendula,  
lavendula,  
anthos,

Seminum cûri,  
acetosa,  
napi,  
ammi,

baccarum lauri, ana drach. iij.  
boli Arm. preparat.

terra sigillata,  
cornu cervi uſti, ana unc. j.

croci,  
macis,  
macropiperis,  
mastiches,  
thuris,

santalorum omnium, ana drach. ij. f.

myrrha electa

florum sulphuris,

camphora, ana drach. vj.

opii Thebaici, scrup. iij.

castorei,  
euphorbii, ana drach. j.

rhapontici veri, unc. j.

cinnamomi electi,

corticum citri,  
 aurantiorum, ana unc. f.  
 nucum jugland. excortic.  
 ficum per cribrum transmiss. ana unc. iij.  
 succi cardui bened.  
 scordii,  
 scabiosa,  
 veronica,  
 rutha,  
 salvia,  
 acetosa,  
 botryos,  
 melissa, ana unc. ij.  
 olei vitrioli, unc. j.  
 specier. diamargariti frigidi, calidi,  
 è gemmis frig. & calidi ana drach. j. f.  
 cordialium temperat. drach. ij.  
 diambra,  
 diamoschi, ana drach. j.  
 theriaca Andromachi unc. iij.  
 mithridatii,  
 elect. de ovo, ana unc. ij.  
 diascordii, unc. j. f.  
 extracti angelica, unc. f.  
 salis absinthii, drach. ij.  
 vini odoriferi, lib. ij. f.  
 mellis despumati, lib. xij.  
 Exquisitè commisceantur omnia ad formam  
 opiata.

Matthioli in præfatione lib. 6. in Dioscoridem,  
 de sua theriaca ita scribit: Licet hac ætate rari ad-  
 modum habeantur Medici, qui sua arcana pandere  
 velint, si quod nacti sint pulchrum & singulare auxi-  
 lium; tamen cum mihi consilium ab initio fuerit, meâ  
 operâ, quantulacunque sit, omnibus generatim pro-  
 desse; alienum quidem inhumanumque foret, si modo  
 vel invidiâ, vel avaritiâ compulsus, aliquid silentio  
 involverem, quod in arte Medica usui futurum putem.  
 Igitur antidotum, cujus admirandas in venena vires  
 sæpius expertus sum, hoc modo conficitur:

Rec. Rhabarbari,  
 rhapontici ex Ponto advecti,  
 rad. phu, acori (quem falso calamum aromati-  
 cum vocant)  
 cyperii,  
 quinquefolii,  
 tormentilla,  
 aristolochie rotunde,  
 pæonia,  
 belenii,  
 costi,  
 iridis Illyrica,  
 chamælaontis albi, ana drach. iij.  
 galange,  
 imperatoria,  
 dictamni albi,  
 angelica,  
 millefolii,  
 filipendula,  
 doronici,  
 zedoria,

zingiberis, ana drach. ij.  
 agarici, drach. iij.  
 libanotidis maris,  
 morsus diaboli,  
 gentiana, ana drach. ij. f.  
 Seminum mali citrii,  
 viticis,  
 cocci insectorii,  
 oxalidis,  
 fraxini,  
 pastinacæ sylvestris,  
 napi,  
 nigelle,  
 pæonia,  
 ocymi,  
 ironis,  
 thlaspios,  
 fœniculi,  
 ammi, ana drach. ij.  
 baccarum lauri,  
 juniperi,  
 hedera,  
 smilacis asperæ,  
 cubebarum, ana drach. j. f.  
 foliorum scordii,  
 chamedryos,  
 chamæpytheos,  
 centaurii minoris,  
 stæchados,  
 nardi Celtica,  
 calamentha,  
 rutha,  
 mentha,  
 betonica,  
 verbenæ,  
 scabiosa,  
 cardui benedicti,  
 melissophyli, ana drach. j. f.  
 dictamni Cretensis, drach. iij.  
 sampsuchi,  
 hyperici,  
 junci odorati,  
 marrubii,  
 galega,  
 sabina,  
 pimpinella, ana drach. ij.  
 caricarum,  
 nucum juglandium,  
 pistaciorum, ana unc. iij.  
 myrobalanorum embelic. drach. iij.  
 florum utriusque buglossi,  
 rosarum,  
 salvia lavendula,  
 rosmarini coronarii, ana scrup. iij.  
 croci, drach. iij.  
 cassia odorata, seu cinnamomi, drach. x.  
 cariophyllorum,  
 nucis myristica,  
 macis, ana drach. ij. f.  
 piperis longi, ac nigri,  
 santalorum omnium,  
 agallochi, ana drach. j. f.  
 cornu cervi crudi, drach. iij.

unicornu, drach. j.  
 offis cordis cervini,  
 ramentorum eboris,  
 virga cervina,  
 castorii, ana scrup. iij.  
 terra Lemnia, drach. iij.  
 opii, drach. j. f.  
 margaritarum orientalium,  
 ramentorum smatagdi,  
 hyacinthi,  
 coralli rubri, ana drach. j. f.  
 camphora, drach. ij.  
 mastiches,  
 thuris,  
 styracis,  
 myrrha,  
 gummi Arabici,  
 resina terebinthina,  
 sagapeni,  
 opoponacis,  
 laserpitii, ana drach. ij. f.  
 moschi odorati,  
 ambra, ana drach. j.  
 olei vitrioli, unc. f.  
 pulveris cordialis temperati,  
 diamargariti,  
 diamoschi,  
 diambra,  
 elect. de gemmis,  
 pastillorum caphura,  
 scylla, ana drach. ij. f.  
 pastillorum vipera, unc. ij.  
 succi oxalidis,  
 sonchi,  
 scordii,  
 echii,  
 melissophyli,  
 buglosse, ana lib. f.  
 hypophistidis, drach. ij.  
 theriacae,  
 mithridatii opt. ana unc. vj.  
 vini vetris albi odorati lib. iij.  
 sacchari e Madera insula vel  
 mellis optimi lib. viij. & unc. vj.

Ex his summa diligentia inquisitis fiat electua-  
 rium eo modo quo theriaca & mithridatis anti-  
 dotus conficiuntur.

Matthiolus exhibet hujus electuarii drach. j. ad  
 drach. iij. pro aetate & constitutione patientis, idque  
 tanquam presentissimum antidotum adversus pestem  
 & omnia venena commendat.

Hæc est famosa illa antidotus, magna illa con-  
 geries plurimorum simplicium sine ordine, sine  
 methodo, sine ulla ratione simul congestorum  
 ac conjunctorum in unam compositionem, quam,  
 tanquam e deorum scriniis prolatum remedium,  
 admirantur Itali, extollunt Germani, laudant  
 imperiti & novarum rerum potius, quam melio-  
 rum studiosi; cujus descriptionem huic nostro li-  
 bro inferere volui, partim ut satisfacerem iis, qui  
 novitatis & longitudinis amantes, eam ambabus

ulnis amplectuntur: partim ut illam doctiorum  
 & saniorum quorumcunque judicio exponere-  
 rem.

Præter hæc jam dicta maximi nominis anti-  
 dota, innumera alia ab auctoribus describuntur.  
 Joannes Wierus refert Canonicum quendam Lo-  
 tharingium, hoc sequenti electuario tanquam  
 summo secreto, apud Principes questum non  
 vulgarem fecisse:

Rec. Specierum latitiæ Galeni,  
 terra sigillata, ana drach. j.  
 boli Arm. preparata. unc. f.  
 theriaca Androm. unc. iij.  
 conserva rosarum,  
 boragina,  
 buglosse, ana unc. j.  
 sympi violacci, q. s.  
 fiat electuarium.

Platerus, *Prax. tract. 2.* describit suum ele-  
 ctuarium, quo anno 1582 feliciter usus  
 fuit.

Joannes Kentmanus olim pro republica Tor-  
 genti præscripsit hoc electuarium curativum.

Rec. Rasura cornu cervi,  
 offis de corde cervi, ana ʒss.  
 camphora ʒj. [forte ʒj.]  
 dictamni Cretici,  
 rad. tormentilla, ana ʒss.  
 sacchari candi, ʒss.  
 theriaca Androm. ʒvj.  
 syr. de acetositate citri, q. s.  
 misce, fit electuarium.

Plures hujusmodi compositiones passim inveni-  
 untur apud auctores qui de Peste agunt.

XVII. Diacordio usi sumus secundum  
 ipsius Fracastorii descriptionem, nobis ab eo re-  
 lictam lib. 3. de morb. contagios. cap. 7. quæ, inter  
 alia, recipit opii drach. j. f. Video ab aliis malè  
 augeri opii quantitatem ad dr. ij. vel drach. iij.  
 imò à nonnullis ad dr. iiii. vel drach. v. atque ita  
 bonum medicamentum per adauctum opium,  
 fieri nimis soporiferum et noxium, imò maxime  
 periculosum. Fracastorius illud quibuslibet sum-  
 mopere commendat, atque etiam fere jam de-  
 speratis hoc modo exhibet:

Rec. Succo acetosella, unc. ij.  
 succi citri, unc. j.  
 diascordii, drach. j.  
 specierum cordial. & gemmis, scrup. ij.  
 aceti, unc. j.  
 misceantur, & fiat haustus.

Hujus diascordii Fracastorii laudes decantat  
 Mindererus, lib. de peste, cap. 15. Magna, inquit,  
 hæc veterum remedia ac auxilia (scilicet theriacam  
 & Mithridatium) consequitur electuarium illud Fra-  
 castorii diascordium appellatum, quo confidenter me  
 semper usum fuisse profiteor: etenim præter insigni-  
 nem

nem quam in hoc malapellendo vim obtinet, corpus nullo vehementi calore, ut theriaca vel Mithridatium, perurit, unde & puerulus, gravidus, ac puerperis tutum, securum, ac salutare medicamentum existit, putredinem corrigens, venenum pessundans, sudores absque magna humorum agitatione prodiciens, gravia symptomata, cephalas praesertim ingentes, sedans, & multo nobis usu compertum, cui plurimum tribuendum esse censemus non immerito. Nos in hac nostra peste eodem diascordio Fracastorii feliciter semper usi sumus.

Sunt qui loco diascordii Fracastorii, summopere commendant diascordium Gemmae, cujus haec est descriptio:

Rec. Scordii recens collecti & in umbra siccati, drach. x.

diſtamni Cretici,  
summitat. absinthii Pontici,  
epithymi Cret. ana unc. ſ.  
florum rosarum Damas.

calendula,  
buglosse, ana drach. ij.  
sem. plantaginis scrup. ij.  
melonum,  
cucumeris,  
cucurbita excortic. ana zif.

cornu cervi uſti, ziiij.

rad. gentiane,

angelica,

zedoaria,

diſtamni albi, ana ʒv.

nucis moscata,

macis,

croci orient.

piperis albi,

boli Arm.

masticis, ana ʒiiij.

camphora, ʒiij.

cinnamomi,

corallina,

rhabarbari,

ligni aloës,

ligni rhodii,

asa dulcis, ana ʒj.

cardamomi,

spica Indice,

santali albi,

corticum citri,

rasura eboris, ana ʒiiij.

offis de corde cervi,

moschi, ana ʒj.

Subtilissime levigata cum sacchari albissimi, aqua rosarum ac vino Cretico despumati q. ſ. fiat electuarium, cui sub finem adde,

extracti tormentillae

veronica,

salsaparilla, ana ʒj.

juniperini, ʒij.

olei calcamhi rectificati, ʒiij.

olei citri ʒj.

fiat opiata.

XVII. Maximarum virtutum est illa nostra aqua theriacalis, quae non tantum veneno pestilenti potenter resistit, cor à malignitate defendit, & sudores movet, verum etiam in debilibus jam labascentes vires miro modo corroborat. Mirum dictu quam insignes ejusdem effectus in hac peste aliisque febribus malignis comperti fuerimus.

Sunt qui aquam chelidoniae majoris tanto encomio extollunt, ut putent aliud melius antipeſtilens remedium dari non posse. Hanc autem ita conficiunt. Chelidoniam majorem recentem ac viridem in mortario contundunt, consusam in cantharum lapideum angustioris orificii coniiciunt, addendo aliquantulum aquae aut vini: hunc cantharum exactissime obstructum per duas trefve septimanas sepeliunt in fimo equino, postea totum quod ei inest extrahunt, & tunc in alembico distillant. Cum aqua illa forte ad manum non est, fumunt nonnulli decoctum ejusdem chelidoniae, eoque felici cum successu utuntur. Novi virum nobilem literatum, qui ad pestem, & quascunque febres, ac viscerum debilitates, tanti facit antedictam aquam chelidoniae, ut eam semper in promptu domi suae paratam servet, eamque supra omnia alia medicamenta plurimum extollat.

Innumerae conficiuntur aquae theriacales, & quilibet fere Medicus novam quandam ad suos usus excogitat. Inter ceteras autem maxime celebratae sunt Aqua bezoartica. Langii, & aqua theriacalis Bauderoni. Langii haec est descriptio:

Rec. Chelidoniae maj. cum radicibus M iij. ſ.

ruthae, M. j.

scordii, M. j.

diſtamni Cretici,

carduibenedicti, ana M. j. ſ.

zedoariae,

angelicae, ana drach. iij.

corticum citri,

limonum, ana drach. ij. ſ.

florum tunicae,

boraginis, ana drach. ij.

cinnamomi opt. drach. ij. ſ.

gariophyllorum, drach. iij.

Incisus incidendus, & confusus contundendus, fiat infusio in Vini sublimati ter distillati lib. viij.

vini malvatici,

aceti scordii, ana lib. j.

Macerentur per biduum, postea lento igne in organo vitreis distillentur. Huic distillato liquori adde,

Theriace, unc. iij.

mithridatii, unc. j. ſ.

camphorae, scrup. ij.

macis drach. j. ſ.

cinnamomi, drach. iij.

ligni aloës scrup. ij.

santalicitrini,

gariophyllorum, ana drach. ij. ſ.

conserva florum tunicae, unc. ij.

carduibenedicti, unc. j.

cornu cervi preparati, drach. j. ſ.

specierum liberantium, scrup. v.

Macerentur in priore distillatione, & ita servantur ad usum.

Descriptio aquae Bauderoni haec est:

V 3

Rec.

Rec. Theriacæ opt. mediæ ætatis, unc. iiij.

Rad. tormentillæ,  
angelicæ,  
scorzonæ,  
diſtamni Cretici,  
ligni ſaſſeſſæ, ana unc. ij.  
boli orientalis, unc. j.  
granorum juniperi,  
ſem. citri mundat.  
cardui bened.  
acetosæ,  
portulacæ, ana unc. f.  
herb. betonicæ,  
calendulæ,  
meliffophylli,  
ſcordii,  
boraginæ, ana M. j.

cinnamomi,  
macis, ana drach. ij.

Incisus & contusus affunde, aceti vini roſacei, ſucci  
citri, omphacii, ana lib. f. ſeu unc. vj.

Fiat in vaſe vitreo tepida maceratio per biduum: de-  
inde diſtillantur. Doſis ad præcautionem, unc. j. ad  
curationem, unc. ij.

Hanc deſcriptionem poſteritati reliquit Baudero-  
nus, in appendice ad ſuam Pharmacopœam. In  
qua mihi omnino diſplicet liquoris affuſi nimis  
parva quantitas: nam reſpectu tot ſimplicium  
aliorumque ingredientium, ad minimum affuſus  
liquor adjectione duarum triumve librarum vini,  
aceti, alteriusve liquidi augeri deberet, ut com-  
moda infuſio & diſtillatio fieri poſſit.

Sequenti aqua uſus fuit Sennertus, deſcripta  
Paralipom. ad lib. de feb. 5.

Rec. Radicum tormentillæ,  
bardanæ, ſeu lappæ majoris,  
pimpinellæ,  
ſuccisæ,  
valerianæ, ana unc. iiij.  
imperatoris,  
angelicæ,  
gentianæ,  
ſerpentariæ, ana unc. j.  
nucum recentium nondum planè maturarum,  
lib. j.  
foliorum ruthe cum floribus,  
acetosæ,  
calendulæ,  
cardui benedicti,  
ſcordii,  
verbenæ, ana M. ij.  
camphoræ in ſpiritu vini diſſolutæ, drach. j.  
theriacæ,  
mithridatii, ana unc. j. f.  
diſcordii Fracaſt. unc. j.  
aceti roſacei,  
vini albi præſtantiſſimi, ana part. æq.  
diſtillantur.

Chriſtophorus de Cock van Kerckwijck, lib.  
de Peſte, admodum magni facit hanc ſuam aquam  
corroborantem & ſudoriferam cujus exhibit  
adultis ʒiij. vel ʒiiij, junioribus verò minus, pro  
ratione ætatis.

Rec. Radic. angelicæ, ʒiiij.  
contrajervæ, ʒij.  
flavedinis citri,  
aurantiorum, ana ʒj.  
groſſo modo contuſis, ſuperfunde

ſucci nucum juglandium  
immaturarum ʒxii.

ſucci fol. ruthe, meliſſæ, & ſalviæ, cum vino  
rhenano irrigator. & ſimul expreſſor. ʒviiij.

ſucci citri cum ſpiritu ſulphuris per campanam ad li-  
bitum acrefacti, lb. ij.

Digerantur calide per triduum, & igne leno ex cacur-  
bita vitrea ad ſiccitatem diſtillantur. Liquori diſtillato  
admisce.

aqua cinnamomi acutiſſimi ʒvj.

ſyrupi aurantiorum, unc. ij.

ceraſorum, unc. iiij.

miſce, & uſui ſerva.

Antehæc Leydæ uſualis eſſe ſolet hæc aqua the-  
riacalis:

Rec. Rad. angelicæ,  
zedoariæ, ana unc. j.  
galangæ,  
zingiberis,  
gentianæ, ana drach. iiij.  
corticum aurantiorum,  
citri, ana unc. f.  
gariophyllorum,  
cinnamomi,  
nucis moſcatæ,  
cubebarum,  
pipæris albi & nigri, ana drach. ij.  
baccar. juniperi, unc. vj.  
lauri, unc. iiij.  
herbarum meliſſæ,  
ruthe,  
ſcordii,  
ſalviæ,  
cardui benedicti,  
menthæ, ana unc. j. f.  
roſmarini,  
pulegii,  
ſabinæ, ana unc. j.  
majoranæ,  
artemiſiæ,  
calamenthæ, ana unc. f.  
ſeminum dauci,  
aniſi, ana unc. ij.  
carui,  
ſeniculi, ana unc. j.  
florum chamomillæ,  
meliloti, ana unc. f.  
myrrhæ, unc. ij.  
theriacæ veteris, unc. vj.  
ſpiritus vini opt. lib. xv.  
Macerentur per duodecim dies, poſtea diſtillantur  
in B. M.

Crollius ſuum ſpiritum theriacalem camphora-  
tum egregiè ſudorem ciere, ac peſtilenti veneno  
fortiter reſiſtere ſcribit:

Rec. Theriacæ Andr. unc. v.  
myrrhæ rubræ, unc. ij. f.  
croci orient. unc. f.  
camphoræ, drach. ij.  
mixtis ſuperfunde ſpiritus vini redificati, unc. x.  
ſtent loco tepido, vaſe bene clauſo, per dies 24.  
poſtea lento calore diſtilla in B. M. Doſis, drach. j.

Hercules Saxonia, l. 8. de febr. cap. 37, deſcribit,  
multumque laudat ſuam aquam cordialem diſtil-  
latam. Platerus, Prax. tract. 2. deſcribit tres  
quatuorve inſigniores aquas theriacales diſtilla-  
tatas, quibus ipſe in peſte feliciter uſus fuit,  
Poſt quarum deſcriptiones hoc addit. Si

CAM-

camphoram, inquit, prædictis compositionibus, quas distillare volumus, addamus, aquas illas odorem illius spirantes, admodum efficaces reddemus: quod & fieri poterit, si camphora portionem in eis maceremus, vel dissolutam prius cum aqua vita illi permisceamus.

Sunt qui aquas illas theriacaes per infusionem potius conficiunt quam per distillationem, atque ita illas efficaciores esse judicant, propterea quod multorum simplicium virtutes in distillatione non transcendunt, quæ in infusionibus integræ haberi possunt. Talis est aqua Johannis Cratonis, quam, tanquam utilissimam, commendat:

Rec. Carline,  
zedoaria,  
gentiana,  
angelica,  
tormentilla,  
boli Arm. ana unc. ij.  
trium santalorum, unc. j.  
camphora, scrup. ij.  
moschi, scrup. j.  
theriaca,  
mithridatii, ana unc. iij.  
spiritus vini lib. iij.

Fiat insolutio, vel tepida maceratio per mensem: postea colentur per triplicem pannum lineum.

Alii hanc infusionem laudant:

Rec. Boli Arm.  
terra sigillata, ana unc. vj.  
rad. tormentilla,  
dictamni albi,  
pimpinella,  
valeriana,  
zedoaria,  
gentiana, ana unc. ij.  
angelica, unc. iij.  
florum veronica,  
herb. scabiosa,  
cardui bened. ana M. ij.  
Insundantur in vini distillati & aceti, ana lib. vj.  
Huic infusioni per chartam bibulam colata adde, theriaca lib. j.  
Dosis, unc. j. s. ad unc. ij.

Nonnulli hanc sequentem pluri faciunt:

Rec. Aceti vini fortissimi decocti cum seminibus  
ruthæ,  
vini Rhenani albi,  
malvatici, ana lib. ij.  
theriaca Androm.  
mithridatii Damoc. ana lib. j.  
Misceantur, & stent per aliquot dies, quotidie bis terre agitando, postea colantur primo per manicam, deinde per chartam bibulam

Matthiolum summis laudibus extollit. suam

quintam essentiam per infusionem paratam, quam in præfatione lib. 6. Dioscoridum ita describit:

Rec. Antidoti nostri (vide descriptionem paulo ante, annotat. 16.)

Syrupi de cortice citri, ana lib. j.

aqua vita ad quintam essentiam distillata lib. v.

Omnia in vas vitreum injiciantur dupla a rebus inditis capacitatis, postea vasis ore ita obturato ut nullus spirandi meatus relinquantur, magna cum dexteritate aqua in vase cum electuario tam diu agitetur, donec totum dissolvatur; atque tunc vasis ore cera vel picæ obducto, per mensem integrum reponatur, & bis in hebdomada bene agitetur. Post mensem clara aureoque colore nitens aqua quæ supernat, in aliud vitrum paulatim effundatur, quod bene obturatur.

Istam aquam dicit Matthiolum se millicies expertum fuisse tanta virtute pollere ut quatuor drachmarum pondere pota, vel per se, vel cum pari quantitate vini odoriferi, alteriusve stillatitii cordialis liquoris, illos qui à quocunque venenato animali demorsi sunt, & jam vocem, visum, & reliquos sensus amiserunt, instar miraculi, quasi à longo somno excitet.

Paracelsus, lib. de peste ad Sterz. sequentem infusionem valde celebrat:

Rec. Vini sublimati rectificati mensuram unam,  
theriaca opt. unc. vj.  
myrrha, unc. ij.  
radic. tussilaginis, unc. iij.  
spermatidis ceti,  
terra sigillata, ana unc. f.  
rad. asclepiadis, unc. j.  
dictamni albi,  
pimpinella,  
valeriana, ana drach. ij.  
camphora, drach. j.

Mista omnia in purum vitrum conficiantur, ac in ipso bene obturato ad Salern stent per octiduum.

Hanc aquam jubet exhibere quantitate dimidii vel integri cochlearis, pro ratione ægri, & sudorem expectare. Illius etiam virtutes augeri dicit, si tartarum bonum purumque subtiliter tritum, per alembicum vitreum bis distilletur, & hujus aquæ dimidia quantitas priori aquæ affundatur, simulque probe misceantur.

Nonnulli hoc decoctum magni faciunt, cujus etiam nos felices aliquot successus in peste vidimus:

Rec. Radicum calendula,  
helenii,  
fol. ruthæ,  
nepethæ,

nastur-

*nasturtii aquatici*, ana unc. j. f.  
*rad. aristolochia sabacea*, unc. j.  
*oculorum cancri* unc. j. f.  
*aceti vini* lib. viij.

Coquantur ad medietatis consumptionem: ad-  
 de colatura, *theriaca* unc. j. f. misceantur.  
 Detur bonus haustus, & sudet ager ante  
 somnum.

XIX. Similia extracta variis modis confici,  
 & aliis additis efficaciora reddi possunt: aut,

Rec. *Rad. petasitidis*,  
*distamni*,  
*zedoaria*,  
*angelica*,  
*carlina*, ana unc. j.  
*helenii*, drach. x.  
*cortic. citri*, unc. j.  
*aurantiorum*, unc. f.  
*herb. ruthe*,  
*scordii*,  
*distamni*,  
*cardui bened.* ana M. j.  
*baccarum lauri*, drach. iij.  
*juniperi*, unc. j. f.  
*sem. cardui ben.*

*citri*, ana drach. ij.  
*spiritus vini opt.* q. s.  
 fiat s. art. extractio in B. M. Liquor abstrahatur  
 ad consistentiam mellis, cui admisceantur pul-  
 veres cardiaci & antidotales, ut,

Rec. Hujus extracti unc. iij.  
*magisterii perlarum*, *corallorum*, ana drach. j. f.  
*essentia camphoræ*, & *croci*, ana scrup. j. f.  
*florum sulphuris*, scrup. iij.  
 misceantur.

XX. Aceta bezoartica quilibet fere Medicus  
 suo modo componit, prout alius hæc, alius illa  
 ei admista magis convenire arbitratur. Multi  
 laudant illud Matthioli:

Rec. *Granorum juniperi*, unc. j.  
*ruthe*,  
*scordii*, ana unc. f.  
*santalii citrini*,  
*rad. angelica*,  
*valeriana*,  
*aristolochia*,  
*zedoaria*, ana drach. j. f.  
*myrrha*, drach. j. f.

Pulveriscentur grosso modo, & infundantur in aceti  
 vini lib. iij. f.

Schroderus in sua Pharmacopæa, tanquam maxi-  
 marum virium, extollit hoc acetum bezoarti-  
 cum D. D. de Spina:

Rec. *Radic. emule camp.* unc. ij.  
*angelica*,  
*Rad. ostruthi*,  
*valeriana*,  
*vincetoxici*,

*chelidonia*,  
*pimpinella*, ana drach. vj.  
*gentiana*,  
*distamni albi*,  
*aristolochia rotunda*,  
*tormentilla*,  
*scabiosa*,  
*succisa*,  
*petasitidis*,  
*zedoaria*, ana unc. f.

*baccar. juniperi*, M. iij.  
*myrrhæ electæ*, unc. f.

*fol. ruthe*,  
*chelidonia majoris*,  
*scordii*,  
*cardui bened.*

*chamedryos*, ana M. ij.

Incisis & contusis affunde, *aceti vini acerrimi*  
 lib. viij.

*spiritus vini*, lib. iij.

*theriaca Androm.* unc. ij.

*spiritus tartari*, unc. f.

*camphoræ*, drach. ij.

Digerantur per dies aliquot, deinde exprimantur, fil-  
 trenturque per chartam.

Ab hoc aceto non multum differt sequens ace-  
 tum prophylacticum Johannis Ernesti, ab ipso,  
 tract. de Oleis, sic descriptum;

Rec. *Rad. angelica*,  
*imperatoria*,  
*pimpinella*,  
*vincetoxici*,  
*valeriana*,  
*distamni*,  
*petasitidis*,  
*zedoaria*,  
*tormentilla*,  
*gentiana*, ana unc. j.  
*baccar. juniperi*, M. ij.  
*fol. ruthe*, M. iij.  
*sem. citri*,  
*acetosæ*,

*cortic. citri*, ana drach. vj.  
*theriaca Androm.* unc. j. f.  
*florum sulphuris*, drach. iij.  
*ossis de corde cervi*, drach. j.  
*myrrhæ*, drach. iij.  
*spiritus vini opt.* lib. ij.  
*aceti distillati*, lib. vj.  
*spiritus vitrioli*, drach. j.

Digerantur loco calido & ferventur ad usum.

Paulus Barbette sequentis aceti descriptionem  
 posteris reliquit, quod se feliciter usum fuisse scri-  
 bit: eandem descriptionem etiam laudant, alii,  
 qui pestiferis inservierunt.

Rec. *rad. angelica*, *zedoaria*, ana unc. j.

*petasitidis* unc. ij.

*fol. ruthe*, *melissa*,

*scabiosa*,

*flor. calendule*, ana unc. ij.

*nucum juglandium immaturarum*, *ancisarum*  
 lib. ij.

*potarum citri recent.* concis. lib. j.

contunde omnia simul, tunc affunde, *aceti vini*  
*optimi* ad tres quartas partes,

fiat in cucurbita vitrea in arena digestio per noc-  
 tem, deinde distillentur igne lento, usque ad  
 siccum.



*siccitatem, sine unctione. Hoc acetum usui servetur.*

Guilhelmus Magistrius refert empiricum quendam ipsi familiarem, hoc potu innumeros a peste aliisque febribus liberasse:

*Rec. Micam unius panis triticei, recenter è furno extracti, & aceto acerrimo intinctam, ac omnino madentem alembico ad distillandum impone. Istius liquoris stillatitii exhibebat unc. iij. & stragulis bene coopertos sudare faciebat, idque tribus matutinis reiterabat.*

XXI. Acetum in peste curatione plurimum valere, multoties observavimus: imò varios novimus, qui peste correpti, bonum haustum aceti vini fortissimi, cum pauxillo salis communis, in ipso principio bibentes, ilico in copiosissimum sudorem profusi, atque ab imminente periculo citissime liberati fuerunt. Forestus, lib. 6. in schol. observat. 19. scribit, Nosocomii Chirurgum tunc temporis theriacam cum aceto sambucino, pro liberante & sudorifero medicamento, pestiferis omnibus ex æquo statim dedisse. Neque id malè, quia Acetum, inquit Lev. Lemnius, 2. Occult. cap. 36, venenis resistit, ac pestilentis morbi contagia repellit, dissipat vitiosum aërem; & si quid in corpus haustum est, humores infici ac putrescere prohibet. De aceto plura diximus lib. 2, cap. 5, annot. 7. & cap. 10. annot. 17.

XXII. Platerus, prax. lib. 3. pro apoze-  
mate antidotali commendat decoctum guajaci, quod hoc modo componit.

*Rec. ligni guajaci, unc. ij.  
salsaparilla, unc. j.  
aqua q. s.  
fiat s. ait. decoctio, in  
qua decoque,  
granorum juniperi,  
baccarum lauri,  
rad. angelica,  
enula, ana drach. ij.  
cinnamomi, parum  
fiat decoctum.*

Verum & si guajacum & salsaparilla sint specifica adversus luis Venereæ virus, non sequitur tamen quod æqualiter valeant contra venenum pestilens: nam ista singula venena habent diversas qualitates specificas, & hinc requirunt singula diversa specifica remedia, quæ experientia magis quam ratio docet; cum in quonam consistat, & quidnam sit illud specificum, tam in veneno, quam in remedio ei contrario, nobis occultum sit, atque hinc etiam ignotum, quare guajacum non æque valeat ad pestem, vel hydrophobiam, quam ad luem Veneream. Interim hoc usu didici, quod sicut theriaca prodest in curatione pestis, nihil verò ad curationem luis Venereæ confert; ita è contra guajacum & salsaparillam conducere ad curationem luis Ve-

neræ, nihil verò, vel valde parum prodesse in curatione pestis, quia licet sudores moveant, tamen post eos tali modo excitatos nunquam vel raro sequitur expectatum levamen, quale ab aliis antidotis frequentissime sequi solet, quia scilicet guajacina decocta veneni pestilentis virulentiam non extinguunt, propterea quod destituantur specifica illa occulta qualitate veneno pestilenti contraria.

XXIII. Non possum non his corollarii loco subungere Guilhelmi Magistri secretum, quod in Isagoge Therapeut. sect. 2. his verbis describit: Neque etiam praterire volui, quod certo scio omnibus adhuc intactum, nescio an incognitum fuisse, experientiam quam de bufone habeo, qui si è collo hominis in sacculo lineo vivus suspendatur, hominem peste contaminatum paucis horis liberat. Paracelsus, de pestil. tract. 1. non de solo bufone, sed etiam de plurimis aliis idem asserit. Rana, inquit, bufo, tinca, anguilla, murena, passer, gallus, pavo, cornix, corvus, pestiferum venenum ex homine extrahunt & eliciunt. Qua enim conditio ac natura digestionis in animali est, quod venena digerit in materiam non venenatam; per eandem naturam eandem quoque materiam idem animal, seu vivum, seu mortuum sit, per integram hominis cutem exsugit & extrahit. Videtis enim merulam araneas & venenosos vermes digerere, velut & gallinam gallumque; & in aquis lucium & ciconiam, cum aliis animalibus pluribus: & cur hac vobis non exemplo & documento sunt, quod hac animalia conceptum venenum ab homine prolecent & extrahant?

Quantum in peste valeat bufo, videndum supra, lib. 2. cap. 11. annot. 1. ubi liquet quam suo veneno damnosum sint, bufones atque hinc, quod illud consilium de bufone vivo ex collo ægri suspendendo, non modo vanum, verum etiam maxime periculosum & damnosum existat. Ibidem etiam latius docemus, quam exitiosa sint, quælibet remedia venenata ad pestis præservationem aut curationem adhibita. Atque hinc nescio certè, quo fundamento doctissimus Th. Willis, in suo lib. de febr. cap. 13. dicat, quod inter medicamenta etiam præ cæteris commendentur illa, quæ parantur ex Mercurio, antimonio, arsenico, aliisque similibus; quæ cum à calore, inquit, nostro minime subigantur, aut superentur, contra virus luis pestilentialis optima evadunt remedia: hac enim non modo superflua potenter evacuant, sed cum particulas valde fortes & indomitas exserant, & quaquaversus in corpore explicent, veneni fermenta hinc inde gliscentia, dissipant, & a maturatione impediunt. Miror certè magni viri imprudentiam, qui ut cor à veneno pestilenti liberetur, illud insuper adhuc alio veneno, seu venenato medicamento impugnandum, sicque duorum fortissimorum hostium tyrannidi eodem tempore exponendum censet, cum tamen ne Hercules quidem contra duos, ut habet proverbium [an ut tanto facilius succumbat, sicque æger tanto citius à morbo simul & à vita liberetur?] Quis hoc unquam vidit aut exper-

expertus est, vel ulla perceptibili ratione sufficienter explicare aut probare potuit, quod dicta illa venenata medicamenta veneni pestilentis fermenta dissipent, & à maturatione impedian, vel ea extinguant? quare non potius illius pestilentis veneni vires augment, & ad maiorem efficaciam exaltant? Experientia pro Willisii opinione adduci non potest, cum illa è contrario doceat, ægros, venenatis illis medicamentis adhibitis, longe citius interire, imò dico iis occidi; quemadmodum illud per temerarium & stupidam variorum chymicorum aliorumque empi-

ricorum praxim non semel contigisse ipsemet vidi. Illud igitur consilium, de venenatis medicamentis ad pestis curationem adhibendis, tanquam damnosum, penitus rejiciendum est, utpote quod non ex Medicorum in peste curanda exercitatorum pharetra depromitur, sed ex sola inani timidorum quorundam medicorum speculatione producitur, qui etsi pestilentes ægros vix eminus adspicere auderent, huiusmodi tamen inania ac damnosa somnia effingere, & tanquam mysteria ex Apollinis scrinio deprompta proponere, non extimescunt.

## CAPUT VI.

## DE CURATIONIS METHODO.



Urationem peste laborantium sequenti modo instituimus: Cubicula, in quibus decumbent ægroti, nitida servari, & primis tribus quatuorve diebus diligenter (1.) clausa teneri (ne ab aëris frigidioris introitu obstiparentur corporis pori) iussimus; nisi forte enormis vomitus vel diarrhoea morbo conjungeretur, tunc enim ægro bene coniecto, ad maximi foetoris dissipationem, fenestram aliquam, Septentrionem vel Orientem versus spectantem, per horæ quadrantem semel aut bis de die aperire necesse erat. Præterea tempore hyberno & frigidior ignem continuum luculentum in cubiculis illis accendi curavimus: tempore minus frigido non tam magnum, æstate verò & aëre fervido existente, nullum; tuncque potius rosas, folia nymphaeæ, pimpinellæ, salicis, pampinos, aliasque herbas refrigerantes, aceto vel oxycrato gelido immerfas, per cubicula sparsimus. Ad hæc, ter quaterve de die aërem suffumigiis alteravimus, de quibus sat dictum *lib. 2. cap. 5.* Interea dum hæc fiebant, statim (2.) ægris (quocunque tempore advocati essemus, sive in ipso morbi principio, sive secunda tertiave die) potiunculam sudoriferam (3.) exhibuimus, iisque bene stragulis coniectis, sudores copiosos per duas, tres, pluresve horas (habita semper virium (4.) ratione) promovimus; qui si difficilius prodirent, arenam calefactam siccis lineis infusam (5.) pedibus, axillis, & inguinibus apposuimus, dum sudabant, iussimus ut adstantes continuo alloquio ægros à somno detinerent, nec dormire permetterent ante peractum secundum sudorem. Si primum medicamentum vomitu rejicerent ægri, idem statim secundo, & urgente necessitate, etiam tertio repetitum fuit. Peracto sudore, sub ipso quidem tegmine cum mappa calefacta ipsis ægris sudores aliquantum detergere, sed indusia (6.) reliquaue linteamina vix ante diem septimum renovari permisiimus. Si verò foetorem sudoris (quem nulli ægro nocuisse vidimus, ut dictum *lib. 3. cap. 3. annot. 6.*) molestè ferrent, indusia sordida, quæ ab aliis quibusdam, à sanis, vel ab ipsis ægris ante morbum, gestata fuerant, induebantur, idemque etiam fiebat de reliquis linteaminibus: unicè cavendo ne recenter lota, aut quæ diu in arcis vel cistis conclusa fuerant, darentur. Si à primo sudore non levarentur ægri, sed febris reliquaue symptomata crescerent, post paucas horas exhibitò rursus (7.) alexipharmaco hydrotico, sudor de novo repetebatur. Interea gratæ aliquæ antidotales misturæ, ad virium corroborationem, & julebi resistentes malignitati, pro sedanda siti, porrigebantur. Si post secundum sudorem febris cum aliis symptomatibus adhuc cresceret, nec quidquam levarentur ægri, pessimum erat indicium; sicut è contra post primum vel secundum sudorem allevari ægros & imminui symptomata, magnam salutis spem dabat. Post decem vel duodecim horas, & sequentibus diebus adhuc quater vel quinquies (pro ut necessitas exigere videbatur) sudorifera reiteravimus. Intermediis autem horis varia antidota ad veneni violentiam

lentiam

lentiam extinguendam, ut & condita corroborantia ac putredini resistentia, vel apozemata convenientia, aliaque quæ malignitatem à centro ad peripheriam quoque pellebant, nec non cibos quosdam liquidos facilis digestionis, & antidotali condimentorum qualitate alteratos, exhibuimus. Symptomatum quoque morbo conjunctorum diligentem rationem habuimus, de quibus in sequentibus dicemus.

(8.)

## A N N O T A T I O N E S.

I. **M**ulti præclari Medici tempore pestis cubiculum lucidum & bene perflatum requirunt, cujus fenestram Septentio- nem vel Orientem spectent, quas paulo post Solis exortum, & ante ejusdem occasum aperiri jubent, ut perflatione aeris liberioris ac purioris, cubuli nidores expurgentur. Verum, sicut hujusmodi cubiculum maximè laudandum est in præservatione sanorum, ita minimè probandum est in curatione ægrotorum, (iis exceptis, quorum pessimi halitus & plurimorum excrementorum foetores, aeris perflationem necessariò exigunt) utpote in qua, præcipuè duobus vel tribus primis diebus, cubula clausa & tepida servare præstat: nam hac ratione corporis spiracula laxa & patentia servantur, atque ita malignæ perniciæ, per sudores & insensibilem transpirationem commodior exitus datur.

II. Dico, me statim exhibuisse sudoriferum, id est, quam citissimè fieri potuit: nam in hoc morbo curationis occasionem amittit, qui remedium usum differt: occasio enim præceps, & hic cunctari, est ægrum in grave periculum, aut mortem, præcipitare. Hinc etiam Celsus, lib. 3. cap. 7. inquit: *Quo celerius ejusmodi tempestates corripunt, eò maturum auxilia, etiam cum quadam temeritate, rapienda sunt.* Ratio est, citissimè augetur hic morbus, & nisi in ipso principio suppetiæ ferantur, sæpe fit ut propter summam virium dejectionem postea magnis & præcipuis remediis locus non sit.

III. Sudores in perniciosissimo hoc morbo alexiteriis provocatos, citissimum & omnium præstantissimum auxilium adferre, multorum seculorum experientia plus satis edocuit. Huic tamen Thomas Minadous, alique nonnulli se opponere non erubescunt, dum sudorifera in principio non convenire docent, præcipuè si febris adsit. 1. Quia Hippocrates, Galenus, alique veteres, studiosissimè monent ne quidquam moveatur ante coctionem. 2. Quia sudores, in febrium principio medicamentis excitati, corpus nimis exsiccant, spiritus dissipant, vires deiciunt, ardores aliaque symptomata exasperant. 3. Quia materia morbifica ante coctionem excludi nequit. 4. Quia pleraque sudorifera nimis calida existunt. Ad has distortas rationes breviter respondendum, cruda non esse movenda in febribus putridis, aliisque morbis ex putredine vel corruptione humorum, aut viarum obstructione ortis, nisi (ut 1. aphorif. 22. addit Hippocrates) materia turgat, tunc enim in ipso

principio cruda movere licet: eos verò qui in talibus morbis, non turgente materia; in principio cruda movent; imprimis per sudores aut purgationes, symptomata omnia exasperare, nec ipsam materiam morbificam expellere posse, concedimus. Verum hæ rationes locum non habent in morbis qui à venenis inducuntur, ut nec in vera peste, cujus causa non consistit in obstructione, vel humorum putredine, sed in venenata ac perniciofa labe cordi & spiritibus maximè impressa: quæ labe cruda dici nequit, quia nullam unquam coctionem admittit: crudum enim dicitur de iis tantum, quæ coctionem recipere apta sunt. Si verò pesti humorum putredo fortè adjungatur, illa tantum est secundaria, non autem primaria morbi causa; quod ex eo liquet, quia multos pestis citissimè invadit absque humorum putredine, & quæ putredo etiam in nonnullis ægris vix ulla toto morbi decursu apparet, ut indicio sunt urinæ coctæ sanorum urinis similes, & calor minimè mordax. Cum itaque neque obstructio, neque humorum putredo, sed maligna venenata labe pestis causa existat, ejusdem curationem non protrahendam, frustra expectando coctionem, sed ut naturæ, dum vires habet, citissimæ suppetiæ ferantur, ilico incipiendam esse, ipsa ratio docet. Nam illud venenum cum nullam admittat coctionem, quo citius, eò melius expellitur, dummodo illa expulsio fiat per vias lege naturæ commodas: atqui natura in tumoribus, anthracibus, & spontaneis sudoribus, monstrat materiam morbificam à centro ad peripheriam esse pellendam; ergo cum hæc illac salubriter vergat, ipsam ducem sequi, & per talia sudorifera quæ venenatæ malignitati resistunt, damnosissimam labem quam citissimè foras expellere oportet: nam talia sudorifera adversus venena & venenatos morbos, imprimis autem adversus pestilentem luem, nec non malignam humorum putredinem, summopere conducere, non nostra duntaxat, verum etiam tot seculorum experientia hætenus comprobavit; ut hac de re nullum dubium superesse possit. Non est etiam quod sudoriferorum calor multum metuetur, nam præterquam quod multa sint quæ nullo calore eximio excellunt, etiam ipsa calidiora frigidis admixtis temperari possunt. Verum hic aliquis objiciat, propterea non convenire sudorifera, quia experientiâ constat omnes pestiferos per illa non sanari. Respondeo: primò, morbum hunc in ipsissimo principio curationem requirere, antequam arcis vitalis fundamenta eruantur; sæpe autem

autem Medicos non satis tempestive advocari, vel medicamenta sat citò preparari, haberi, aut exhiberi non posse. 2. Imaginationem peste jam correptorum & mortis metum, sæpissimè tantam spirituum & humorum perturbationem inducere, ut nulla naturalia subsidia prodesse queant. 3. Latere in hoc morbo aliquid divini, quod Deo sic volente, sæpe omnium medicamentorum naturalium vim illeudit, atque propterea non esse in Medico semper relevetur ut æger: nam,

*Ni Deus adfuerit, viresque infuderit herbis,  
Quid, rogo, dictamnus, quid panacea ju-  
vent?*

4. Sudorifera alexicaca & antidota aliis medicamentis tamen esse præferenda; quia certum, & longâ experientiâ infinitisque exemplis comprobatum est, cum aliis paucissimos, aut fere nullos, cum illis plurimos felicissimè curatos & sanatos fuisse.

Quo autem modo antidota pro sint, describit Th. Willis, lib. de febr. cap. 13. *Pharmaca alexiteria*, inquit, *intus sumpta, cruorem & succos in vasis & visceribus confluos, corpusculis suis, velut novo fermento inspirant eosdem leniter movendo, & in aquabili mixtione servando, a coagulatione & putredine vindicant: veneni particulas agglomerari ceptas eadem blanda agitatione ab invicem dissipant, & a maturitate impediunt: denique sanguinem & spiritus præoccupando, eos a characteris pestilentis impressione tuentur.*

IV. Hoc unice cavendum, ne per sudores omnino prosternantur ægri vires: fortius quidem & sæpius in hoc morbo promovendi sunt sudores, sed tamen habita semper virium ratione. Hunc in finem, & inter sudandum, & tempore quietis, ægri sæpius reficiendi sunt cardiaca non ingratis, corroborandi, & simul malignitati resistendi vim habentibus, ut:

Rec. Aqua melissa,  
cardui ben.  
vini Rhenani, ana unc. iiij.  
confectionis alchemes sine moscho,  
de hyacintho, ana scrup. ij. f.  
aqua cinnamomi drach. vj.  
syrupi morellorum. unc. j. f.  
olei vitrioli q. f.  
misce, fiat juleb.

Rec. Corticum aurantiorum condit.  
myxa cydoniorum,  
rob de ribesii rubr. ana drach. v.  
pulveris liberantis drach. j.  
magisterii perlarum,  
confect. de hyacintho, ana scrup. ij.  
syrupi limonum q. f.  
fiat conditum.

Mindererus, lib. de peste, cap. 16. hoc sequens valde commendat, quo scribit se in nosoco-

mio pestilente creberrimè usum fuisse magno ægrorum commodo, qui hòc post sudorem hausto, mirum in modum reficiebantur, atque hinc fere omnibus ibidem decumbentibus post peractum sudorem porrigebatur.

Rec. aqua rosarum odoratissima,  
acetosa ana unc. viij.  
aceti de rubo Idæo,  
rosati, ana unc. vi.  
vini albi odoriferi lib. j.  
Syrupi de limonibus  
julepii rosati, ana unc. ij,  
corticum citri recentium & extimorum minutim incisorum, unc. j. f.

Omnia simul mixta stent in vitro, ut odorem corticum citri in se proliciant, & de hac mixtura rubella, subacida, ac odorata, demur ægris post sudorem unc. v.  
vel vi. per quam vires ingenue redintegrantur, ut non immerito à nobis Potus refectorius dici meruerit, quod hoc ipso ægotantes commodè reficerentur, ac vires à sudore nonnihil languidas resumerent.

Idem Mindererus, paulo post, hoc sequens, tanquam singulare & egregium quid, apponit. *Egregie vires sulcit*, inquit, *aqua è corticibus extimis ac recentibus mali citrii distillata. Asperguntur cortices succo pomorum, aqua rosata, & vino Cretico, indeque postmodum liquor arte elicitur, veneno & pesti resistens, nauseam auferens, putres ventriculi humores dissipans, melancholiam fugans, ac cordis vires eximie insurgere faciens, odore, potu, & appositu salutaris.*

Idem sequente cap. 17. in eundem finem præscribit hunc syrupum.

Rec. vini granatorum acidorum unc. iiij.  
syrupi de succo acetosa unc. iij.  
de limonibus unc. ij.  
de succo cichorei,  
agrestis, ana unc. j.  
julebi rosati unc. j. f.  
olei vitrioli q. f. pro jucundo acore, misce.

Hujus mixturæ singulis binis horis exhibet unc. j. f. vel paulo plus, aut ejus quandam portionem miscet cum aliqua aqua cocta, & sic componit julebum, ad sitim sæpius exhibendum. Alia quædam similia præscribuntur sequenti cap. 9.

V. Cum ægri ad sudorem componuntur, jubet Petrus Paschalis, ut panis recens è furno extractus, & adhuc calens, aliquantum excavetur, & drachmis duabus theriacæ impositis umbilico imponatur: hoc ait venenum elicere, & sudores movere. Illud ipsum etiam laudat Joannes Morellus. Alii, ut ægri melius & commodius sudare queant, summo opere laudant præmissas corporis frictiones cum linteis asperis, & præcipue si in toto corpore fiant cum hoc linimento Aëtii:

Rec.

Rec. Olei fabina,  
aqua fontis, ana unc. iij.  
salis nitri, drach. ij.  
bulliant ad aqua consumptionem.

Manibus hoc oleo inunctis totum corpus calidè perfricetur. Hoc linimentum cutis poros aperire prædicant, ut natura venenatos vapores commodius per illos exspirare queat. Baptista Montanus & Hercules Saxonia, loco olei fabinae, quod calidius est, substituunt oleum amygdalarum dulcium vel chamemelinum. Nobis tamen hic apparatus in vehementissimi incrementi morbo nimis longus & periculosus videtur; & Georgius Melichius, *comm. de Medic. componend. rat.* scribit, tales frictiones in Andrea Marino, febre pestilenti correpto, infelicissimè & cum morte ægri factas fuisse. Alii, ut sudores melius profluant, saniore consilio, pedes, inguina, axillis, & latera, cum spongiis sequenti decocto intinctis, fovent:

Rec. Radic. angelica,  
gentiana, ana unc. ij.  
folior. betonica,  
majorana,  
folior. scabiosa,  
scordii,  
melissa, ana M. j.  
centaurii minoris,  
cardui bened. ana M. j. f.  
florum anethi,  
chamomilla,  
meliloti,  
stachados,  
calendula, ana M. j.  
baccarum lauri,  
juniperi,  
sem. cardui bened. ana unc. j.  
fiat decoctio in aqua communi, addendo sub finem parum vini albi.

Interea dum sudores prima & secunda vice promoventur, somnus admodum noxius est. Scio quidem quod Julius Palmarius permittit ut assumpto sudorifero ægri per duas horas dormiant, cum sudor ægre profluat dormientibus atque vigilantibus. Verum ego in praxi hoc millies animadverti, si ægri ante peractum secundum sudorem dormirent, vires per somnum non modo non conservatas aut resectas fuisse, sed ægros semper adeo debilitatos & torpidos evigilasse, ut collapsæ vires vix unquam ulla arte restitui potuerint, & eorum, qui somno citius indulserant, paucissimi servati fuerint. Videbatur per facultatis animalis quietem spirituumque animalium minorem motum, cerebrum una cum corde fatiscere, sicque venenum pestilens minus impugnari ac discuti: quod ea de causa tempore somni virosus halitus magis magisque per corpus dilatans, tantum incrementum sumebat, adeoque reliqua viscera debilitabat, ut ægri evigilantes, viribus omnino prostratis, brevi succumberent.

VI. Platerus, multique insignes Medici, volunt ut indusia aliaque linteamina sæpius permulentur; quam permutationem nos maximè noxiā fuisse observavimus: de qua pluribus egimus lib. 2, cap. 3, annot. 6.

VII. Si à primo sudore non levetur æger, propterea statim desistendum non est, neque etiam cunctandum, sed rursus ad antidota confugiendum, eaque sæpius & majore quantitate exhibenda sunt, usque dum inde levamen percipiatur. Hoc ipsum, de theriaca & mithridatio agens, Galenus, lib. 1. de antid. asserit his verbis: *Mithridatica antidotum, itemque theriaca, non eam vim habent post venena accepta, quam ante sumpta habuissent: nam portio antidoti qua prius semel hausta tutum à morte quempiam praestitisset, ea venenum subsecuta, nisi ad quadruplum quintuplumve aucta, non juvabit; neque id semel tantum, sed bis singulis diebus hausta faciet.*

IV. Non possum non his etiam adjungere inauditum quendam & alienissimum medendi modum, quo Sacerdos quidam Sylvæducensis fere omnes peste correptos sanare dicebatur. Primò hujusmodi pulverem componebat sine ullo ordine: Rec. nuces moscatas integras & bonas, n°. iij, radicem angelicæ, galangæ, aristolochiæ fabacæ, ana duodecim frusta magnitudinis articuli digiti (nullum pondus nominabat) pulveriscentur simul: huic pulveri adde salis communis assati, M. iij. butyri veteris assati, olei raparum, aceti vini fortissimi, ana lib. f. theriacæ unc. f. cerevisiæ veteris optimæ lib. iij. Hæc omnia misceantur & simul calefiant, fiatque potus pro quatuor dosibus, quarum unica unus æger tantum opus habet; (profectò nos ægrotis nostris vix haustum trium unciarum exhibere poteramus, nedum potum adeo ingratum & tantæ quantitatis.) Cum aliquis se peste infectum sentiret, huic talem dosim exhibebat, utque melius retineretur, scrobiculo gutturis ovum aliquamdiu imponebat. Ægrum autem oportebat hunc haustum stando assumere, & si solus stare non posset, à duobus viris robustis sustinebatur: deinde apponebatur luculento igni, è lignis quercinis exstructo, atque ibi sudabat, & cum linteis à corde, deorsum versus, duriter, quantum ferre poterat, fricabatur, quacunque diei vel noctis hora foret, eodem redibat. Cum sudor jam copiosus prorumpere inciperet, offerebatur ægro aquæ frigidæ quantum bibere posset, imò etiam invitus eandem bibere cogebatur, atque ita interdum sex, interdum octo pluresve aquæ cantharos, interdum situlam plenam ægro infundebat, donec rursus evomeret: qui adstant sibi bene cavere debebant ab eo quod evomebatur, ne illud contingerent, eoque inficerentur. Cum bene evomisset æger, rursus aqua porrigebatur, ut ante. Post secundum tertiumve aquæ vomitum, cerevisia optima calefacta, cui butyrum assatum immixtum erat, dabatur. Atque ita stans sustinebatur æger ante magnum ignem, adeo calidum ac ferre posset, in continuo sudore, sine ullo somno. Postea sudor linteis

lintheis calefactis abstergebatur, sed indusium non permutabatur. Prohibebat quoque ægris usum panis albi, ut & sacchari, quod calorem fursum pellere aiebat. Post hunc exhibitum potum, cutem in femore, sub glandula inguinali (sive tumor adesset, sive non) acu acuta perforabat, eandemque novaculâ super cutem disscindebat: postea radicem hellebori nigri sylvestris (helleborastrum vocamus) recenter effosam per medium conscindebat, atque illud quod in medio album erat, inde extrahebat, atque vulneri imponebat, superponendo folium brassicæ rubræ butyro recenti inunctum. Hinc brevi tempore cum acerrimo dolore magnus tumor excitabatur, circumcirca lividus, cui circulo livido imponebat medullam junci, quam dicebat cutem peredere: atque ita carbo excidere, & æger sanari debebat. (Talem curationem per helleborum nigrum etiam Angelus Sala maximi facit, eaque sola pestem curari posse, credit: quæ de re dicemus infra, *cap. 12. annot. 3.*) Hunc Sacrificulum in magna quadam peste Sylvæducis seu Buscoduci mirabilia peregrisse, plurimorum testimoniis affirmabatur. Idem ille, durante hac nostra peste, Noviomagum venit, atque extra civitatem in diversorio ante portam Galinaceam (cum propter religionis ecclesiasticum munus urbem intrare ipsi non liceret) per aliquot dies commoratus fuit, ibique varios peste infectos, qui ad ipsum venerunt, persanasse dicitur, idque cum maxima creduli & ignari vulgi admiratione, nec minus cum mea, propterea quod primo exhiberet ægris potum, quem ne equus quidem assumere potuisset; deinde situlam plenam, imò nonnullis plus, aquæ frigidæ putealis bibendum daret, eamque etiam invitis infunderet, & illa rejecta iterum novam, & tandem adhuc cerevisiam cum butyro offerret, atque ita vomitum aliquoties irritaret: nec non insuper crudelissimis doloribus per helleborum inductis, ægros mirum in modum excruciet. Profectò ego in tota hac peste nunquam habui ægros adeo fortes ac patientes, qui tanto certamini se exponere voluissent; imò plurimi ob summam debilitatem, quæ pestis comes existit, id ferre non potuissent. Illum tamen fere omnes sanare, & vix centesimum suorum ægrorum mori aiebant. Attamen Medicinæ planè ignarus erat, neque de constitutione hominis, neque de viri-

bus suorum medicamentorum, neque de suo curandi modo; ullam rationem reddere poterat, ut ipsemet confitebatur. Pontificii, quibus facilis est superstitio, hanc scientiam ipsi divinitus datam esse asseriebant, ejusque operationes valde admirabantur, vitam ejus non inspicientes, quæ satis profana, dissoluta & impia erat. Verum solent plerumque scioli & rudes hujusmodi erroneos majorem apud multos, imprimis plebejos, fidem mereri, quam alii doctissimi Medici; & si fortè sex vel octo ægros casu sanent, illud à vulgo tanquam magnum miraculum annotatur & proclamatur: at si ducentos alios suâ ignorantia occidant, illos errores prætereunt & terra contegunt. Illud etiam huic Sacrificulo contigisse comperi; nam paucos tantum robustissimos viros, à veneno pestilenti minus graviter afflictos, ab illo sanatos esse; plurimos autem alios discessisse incuratos, & mortuos fuisse, novimus, quorum mortem eo excusabat, quod nimis serò ad ipsum venissent. E contrario autem se res habere solet cum Medicis, qui si aliquem ægrum à morbo periculoso liberent, illud saro adscribitur, quia (inquiunt vulgò) hora ejus nondum venerat: si verò aliquis æger fatalem diem attigerit, & mortuus fuerit, illud Medico & adhibito remedio imputatur. Prædictum medicamentum Sacrificulus ille, tanquam magnum, celavit, nec ulli patefacere voluit: attamen è monasterio quodam Buscoducensi (cui illud pro magno secreto, divinitus ipsi dato, communicaverat, & scripto, tanquam testamentum, in perpetuam sui memoriam dedicaverat) illud nobis à singulari amico communicatum fuit. Verum ego omnibus auctor esse velim, ut sibi diligenter caveant ab hujusmodi ineptissimis impostoribus, inter quos (proh dolor) multi sacrificuli, monachi, alique religiosi appellati, etiam inveniuntur, qui ad tantam avaritiam & superbiam pervenerunt, ut licet Medicinæ maximè sint ignari, quidvis tamen tentare non erubescant, quo nummos & nomen sibi comparent; atque ita sæpe in perniciem hominum hoc illudve medicamentum, tanquam divina inspiratione datum, maximè commendant, & magno divendunt, cujus infelices effectus postea hoc uno demulcent: *Sic erat in fatis.*

## CAPUT VII.

*De symptomatum pesti conjunctorum, & primò de Febris curatione.*

**Q**uemadmodum magni Tyranni magno exitioso famulatio stipati procedunt, ita etiam magnus hic morbus multis diris & horrendis symptomatis comitatus, humani corporis penetralia subire consuevit, quorum in curatione sæpe non minor quam primarii morbi habenda est ratio: nam qui symptomatis planè neglectis, ipsam pestem, horum dominam ac ducem, evincere atque expellere nititur, illud ipsi facile eveniet quod civibus, qui magnum atque infensum Tyrannum, neglecto ejus comitatu, interimere atque extra urbem ejicere conantur, quem antequam evincere possint, à famulatio ejus tota urbs undique flagranti incendio comburitur. Quapropter in curatione pestis non minus particularibus remediis adversus principalia & vehementiora symptomata, quam contra causam malignam pugnandum est. Inter symptomata autem quæ pestem comitantur, communissimum est febris maligna pestilens, quæ, ut plurimum, gravis & periculosa existit. Hanc nos, durante hac constitutione, eodem fere modo, sicut ipsam pestem, tractavimus, & (1.) sudorifera atque antidota ad illius curationem maximè profuisse, observavimus, dummodo abstinere-  
mus à calidioribus, vel, si iisdem uti placeret, alia frigida, ut acetum, succum citri, &c. admisceremus. Purgationes autem & venæsectiones (2.) ad hujus febris curationem maximè noxias fuisse animadvertimus; imò paucissimos, qui vel alter-  
utram: vel utramque administraissent, evasisse, sed fere omnes, superveniente magno alvi profluvio & cordis summa anxietate, viriumque extrema dejectione, extinctos fuisse notavimus.

## A N N O T A T I O N E S.

**I** Febris hæc, quia malignam humorum putredinem, à veneno pestilenti inductam sequebatur, duos curationis scopos exigebat. Primum, veneni pestilentis (à quo maligna illa putredo oriebatur) extinctionem: secundum, ipsius putredinis sublationem. Utrique autem scopo satisfiebat per antidota & sudorifera, utpote quæ veneno pestilenti simul, & omni putredini potenter resistebant.

Præter illa antidota quæ *precedenti cap. 5.* contra pestem à nobis sunt præscripta, speciatim ad hanc febrem scribit Prosper Alpius, Ægyptiis familiariter in usu esse hunc pulverem.

Rec. scordii, chamedryos, sem. citri, ana drach. j.  
aristolochia longa, Zedoaria,  
diſſamni Cretici, cornu cervi uſti,  
boli arm. terra figill. roſarum,  
ſpica, margaritarum præpar. ana ſcrup. ij.  
camphora drach. ſ. coralli rubr. ſcrup. j.  
ſacchari candi drach. ij.  
ſiat pulvis. Doſis drach. j. cum  
theriaca Androm. ſcrup. ij, in  
aq. cardui ben. q. ſ. mane,

& ſudor omni conatu provocandus.

Sennertus, lib. 4. de febr. cap. 11. commendat ſuum pulverem bezoarticum ad ſcrup. ij. vel drach. j. exhibitum, cujus hanc reliquit deſcriptionem.

Rec. cornu cervi uſti, drach. j. ſ.  
oculorum cancri præparat.  
terra figillata  
ſuccini, margaritarum præparat.  
coralli rubr. præpar. ana ſcrup. j.  
offis de corde cervi,  
ſmaragdi præpar. hyacinthi præpar.  
rubini præparat. ana ſcrup. ſ.  
lapidis bezoartici orient. ſcrup. j.  
ſol. auri, n. iij.  
ſiat pulvis.

Quantum ad corroborantia, quæ vires reficiunt, & ſitim extinguunt, ea propoſuimus *capite præcedente, annot. 4.*

II. Quare medicamenta purgantia & venæſectiones in hujus pestilentis febris curatione non conveniant, docuimus lib. 2. cap. 8, annot. 1. & cap. 9, annot. 1, 2, 3. & hujus lib. cap. 3, annot. 1. & cap. 4. annot. 1, 2, 3, 4, 5.

CAP.



## CAPUT VIII.

*De curatione capitis doloris, delirii, vigiliarum,  
& nimii soporis.*

Egri peste correpti sæpe de magnis capitis doloribus conquerebantur, ad quorum curationem paucissima remedia peculiaria adhibuimus, utpote qui exhibitis sudoriferis & antidotis, ante quartum vel septimum diem paulatim spontè evanescebant. Si tamen necessitas ad aliquid faciendum impelleret, tunc sola topica aliquantum anodyna præscripsimus, ex unguento alabastrino & populeo, cum pauxillo olei nucis moscatæ confecta, quibus interdum croci, interdum camphoræ nonnihil admiscebatur. Interdum tale frontale capiti adhibuimus:

R. *Conservæ rosarum rubr. unguenti alabastrini, populei, ana drach. iij. olei nucis moscatæ expressi scrup. j. f. croci scrup. f. vel scrup. j. misceantur, & excipiantur stupa.*

Interdum etiam suppedanea (1.) revulsoria pedibus applicavimus, imprimis si facies insigni rubore excandesceret.

R. *Foliorum petasidis, ruthæ, ana M. j. contundantur minutim in mortario, addendo stercoris columbini, fermenti panis acidi, ana unc. j. f. salis communis, drach. iij. aceti rosacei vel sambucini, q. f. Fiat suppedaneum.*

His & similibus etiam in deliriis usi sumus, neque in hoc illove affectu amygdalata exhibuimus, (quæ tamen à Medicis laudari solent) quia experientia nos edocuit, amygdalata pestiferis exhibita, (sive in deliriis, sive in capitis doloribus, vigiliis, diarrhœa, aliave quacunque occasione,) non tantum non profuisse, sed semper plurimum nocuisse; nam in ventriculis ægrorum statim corrumpebantur, atque ita febris alimentum fiebant, subsequenter etiam molestissimis vomitionibus, anxietatibus, aliisque gravibus symptomatibus. Neque etiam oxyrrhodina, (2.) aliaque frigida capiti admovimus, quia hæc causam mali tunicis cerebri firmitus affigebant, & talium usum plurimis infelicitè cessisse animadvertimus. Si planè dormire non possent ægri, & continuis vigiliis (3.) torquerentur, solummodo tempora inunximus oleo nucis moscatæ expresso, vel unguento alabastrino, populeo, aliove simili: medicamentis autem soporiferis per os exhibitis somnum nunquam provocavimus. Si in ipso morbi principio ad somnum (4.) nimis proclives essent ægri, (quod admodum familiare erat) illos prima die à somno studiosissimè prohibuimus, usque dum alexipharmaco assumpto prius bene sudassent. Quapropter ut adstantes ipsos perpetuo alloquerentur, contrectarent, & commoverent, sicque vigiles detinerent, jussimus. Sequentibus autem tribus quatuorve diebus parciolem tantum somnum trium quatuorve horarum permisimus, eumque non nisi præsumpto antidoto capefci voluimus.

## A N N O T A T I O N E S.

- I. **S**uppedanea materiam morbificam deorsum revellendo, aliquantum prodesse, & tutò adhiberi poterant. Quibus etiam Forestus scribit suo tempore usum fuisse nofocomii chirurgum, qui tantummodo sinum columbinum cum aceto sambucino subactum, in folio caulibus pedibus supponebat; atque illud remedium plus profuisse refert, quam columbas, aut gallinas nigras dissectas, aliave quæ pedibus supponi solent. Crato summopere laudat cataplasma ex raphanis: *Raphanus*, inquit, *quia magnam vim habet attrahendi malignitatem materiae, utile*

utile est scobem ejus pedibus, sale & aceto prius mundatis, alligare. Alii raphanum cum rutha, sale, & aceto contundunt, atque ita pedum plantis supponunt. Riverius in febre pestilenti magis laudat hoc cataplasma:

Rec. Rasura raphani,  
bryonia, ana unc. ij.  
sem. nasturtii hortensis, unc. j.  
granorum paradisi, unc. f.  
salis marini drach. iij.

Mista, irrorentur aceto fortissimo, & excipiantur sufficiente quantitate saponis liquidi, fiat veluti cataplasma, applicandum plantis pedum cum stupa, calidè, hora somni.

II. Paucissima topica capiti adhibuimus, propterea quod quorumcumque usus in venenato hoc morbo non omnino tutus esset: interdum quæ adhibuimus aliquatum, sæpe nihil proderant, multoties nocebant. Omnino evitavimus oxycratum, oxyrhodinum, aliaque frigida, utpote quæ venenatos vapores membranæ cerebri firmitus affigebant: actu calida vel tepida vapores in cerebro suscitabant, sed eos non satis discutiebant: narcotica & soporifera cerebri vires stupefaciendo debilitabant: ita ut qualiacunque topica adhiberentur, vix tamen absque periculo id fieri posset.

Interim videtur aliter hac de re sentiisse Christophorus de Cock van Kerckwijck, lib. de peste, utpote qui in doloribus capitis & pervigiliis hoc sequens, tanquam maxime conveniens; plurimum commendat.

Rec. succi fol. papaveris,  
solani;  
ruthæ,  
verbena,  
simul express. q. v.  
admisce singulis sex uncias  
aceti rosacei camphorati unc.

Hoc liquore imbuantur spongia plana & longiuscula, qua in umbra exsiccentur, sicque ter quaterve dicto liquore imbuta & seccata, usui servantur. Usus tempore talis spongia, aceto rosaceo vel aqua rosacea nonnihil conspersa, fronti alligetur.

III. Vigiliæ in peste non magnopere metuendas esse, docuit experientia; nam molestæ quidem erant, sed earum ratione neminem se pejus habuisse, observare potuimus. Ac propterea diligenter cavendum esse arbitrati sumus, ne, secundum præscriptum Rondeletii, Plateri, Angeli Salæ, Mindereri, aliorumque, opiatæ aliisque per os exhibitæ medicamentis soporiferis, quamvis levioribus, somnus provocaretur, cum id tutè fieri in hoc morbo non posse, ratio una cum experientia doceret. Vidimus tamen natum quendam Chirurgum, unicâ experientiâ non contentum, multoties opiatæ aliisque soporiferis infelicissimè usum fuisse.

IV. Sopor in principio pestis maxime damnosus & mali ominis erat, imprimis si eidem

se committerent ægri ante antidoti sudoriferi assumptionem: nam ea ratione pestilens venenum firmitus cordi infigebatur, & sopore obruti cerebri vires fatiscebant. Contingebant autem, quia cerebrum à malignis vaporibus debilitatum tam paucos generabat spiritus animales, qui non sufficiebant ad actiones animales peragendas, atque hinc ab istorum defectu, in organis animalibus actionibus dicatis quies contingebat, qui erat sopor. Ad hæc debilitatum cerebrum se multo debilius movebat, sicque per consequens etiam spiritus multò minus agitabat & propellebat; hincque dictorum organorum actiones etiam lentè & graviter procedebant. Quapropter nos, ut spiritus animales melius agitentur ac moverentur, sopores omni modo impedivimus, ne per admissam quietem tandem omnino immobiles sisterentur spiritus. Ad soporem impediendum multi varia præscribunt topica. Alii acetum solum: alii acetum camphoratum naribus odorandum obijciunt: alii in eodem angelicam, zedoariam, baccas lauri, betonicam, rosmarinum, rutham, castoreum, & similia coquunt; tuncque illud naribus admovent; eodemque etiam tempora fricant. Paracelsus, lib. de peste, ad Stertz. hoc sequens commendat:

Rec. Betonica;  
majorana,  
salvia,  
rosarum sylvestrium,  
florum sambuci, ana M. j.  
vini,  
aceti rosacei, ana part. æq.

Coquantur aliquantum, postea herba exprimantur, & calidè capiti imponantur.

Hoc remedio dicit Paracelsus somnium lethiferum mitescere & naturalem fieri; dummodo sæpius reiteretur, & herbæ frigate eadem liquori calido immersæ, identidem rursus caleant. Alii brachia & crura panno laneo fortiter fricare, & aceto rosaceo camphorato humectare: item sternutatoria, cum pauxillo castorei, naribus instillare jubent. Alii linimenta quædam ex oleis stillatitiis, succini, ruthæ, majoranæ, rosmarini, & similibus conficiunt. Verum totus hic labor non admodum necessarius, saltem ad curationem soporis non primarius videtur; nam sublatâ causâ soporis, nempe vaporibus malignis ad cerebrum ascendentibus, tollitur effectus: illa autem per sola topica auferri nequit. Uno modo optimè auferitur, nempe per antidota sudorifera exhibitæ, quæ malignitatem non tantum coercent, sed noxios vapores etiam à nobilioribus visceribus optimè divertunt, atque per cutis spiracula expellunt & discutunt. Quapropter his præcipue toties & tam diu utendum est, quousque hunc adscensum malignorum vaporum ad cerebrum cessare, effectus demonstrabit. Si interim prædicta quoque topica adhibere quis velit, non malè id fiet; dummodo ab iis solis sanatio non expectetur.

## CAPUT IX.

*De curatione anxietatis, debilitatis, vomitus, linguae siccitatis, & singultus.*

**I**N hac peste summa debilitas & anxietas sudoriferorum medicamentorum assumptionem, & enormis vomitus (1.) eorumdem retentionem sæpe omnino impediēbat, ita ut vix cochleare unum medicamenti necessarii paulo ingratoris exhiberi & retineri posset. His malis præcipuè duobus tribusve remediis obviam ivimus, quæ ad anxietatem, virium debilitatem, (2.) & vomitum (3.) miraculose profuerunt. Primum erat hæc mixtura, de qua sæpius de die cochleare unum exhibuimus,

℞. *Conservæ rosarum rubrarum, unc. j. f. diascordii Fracastorii, drach. iij. vel iij. aquæ nostræ theriacalis, unc. iij. succi limonum recentis, aquæ cinnamomi, ana unc. j. f. misceantur simul, & stent per horam unam aut alteram. deinde per linteum colentur. Adde colaturæ, confectiōis de hyacintho sine moscho drach. j. misce.*

Secundum erat hoc linimentum:

℞. *Olei nucis moscatæ expressi, olei scorpionum vel laurini, theriacæ Androm. ana drach. j. olei juniperini scrup. f. succini scrup. j. gariophyllorum vel cinnamomi, gut. iij. Misce, fiat linimentum.*

Hujus linimenti parum in cochleari tepesactum scrobiculo cordis seu stomachi regioni, locisque circumvicinis ad latitudinem palmæ manus inungebatur, idque bis terve de die, superponendo hanc pastam ad ignem calefactam:

℞. *Radic. calami aromatici, nucis moscatæ, ana drach. j. gariophyllorum, benzoini, ana drach. f. fol. menthæ, drach. ij. Subtiliter pulverisatis adde, micæ panis secalini unc. iij. vel iij. aceti rosacei q. f. Fiat pasta molliuscula, quæ in linteo extendatur, atque ita ad ignem calefiat, & ventriculi regioni imponatur.*

Interdum etiam talem nodulum naribus odorandum objecimus,

℞. *Corticum citri drach. iij. cinnamomi, gariophyllorum, granorum cardamomi minoris, ana drach. j. macis scrup. ij. Contundantur aliquantum, & fiat nodulus, sequenti liquori immergendus:*

℞. *Aquæ rosarum, vini Rhenani generosi, aceti sambucini, vel aquæ cinnamomi, ana unc. j. misceantur.*

Talis nodulus deficientes spiritus insigniter recreabat. Præter hæc, nullo alio topico (4.) in hoc casu usi sumus, cum his solis vomitum & anxietatem ut plurimum brevissimo tempore sedari animadverteremus. His autem paucis medicamentis, licet non videantur esse magni momenti, multis multum profuimus, magnamque laudem nobis conciliavimus. Sedato vomitu sudoriferum dedimus. Si verò morbus inciperet prolongari, & magna debilitas sine vomitu adesset, ad virium restaurationem varia præscripsimus, & præter medicamenta, etiam alimenta multum corroborantia obtulimus, de quibus supra dictum cap. 2. Sæpe quoque apozemata antidotalia malignitati resistentia, interdum condita, aliæque, pro morbi & ægri conditione, præscrip-

præscriptissimus. Nonnunquam in magnis ardoribus etiam suppedanea (de quibus dictum præcedente capite) pedum plantis supposuimus. Si ardor internus magnam linguæ siccitatem & nigredinem induceret, in principio hujus pestis os variis collutionibus ablui curavimus; sed temporis progressu animadvertimus, solam aquam simplicem in hoc casu plus profuisse, quam omnes alias collutiones, cui nonnulli acetum adjiciebant; quod etsi linguæ gratius esse videretur, illud tamen incommodi ab eo sequebatur, quod statim post ablutionem longè major sitis ac linguæ siccitas succederet. Si lingua obduceretur nigra crusta, quæ sæpe loquelam & deglutitionem impediabat, tunc multoties de die butyri (5.) recentis insulsi, in aqua simplici vel rosacea loti, frustulum magnitudinis fabæ vel parvæ avellanæ, solum, aut saccharo involutum, in ore dedimus, quo plerumque brevi tempore separata crusta à lingua decidebat, & loquela citissimè restituebatur. Si singultus morbo adjungeretur, multa huic remedia adhibere necesse non erat, nam tales ægri omnes citò moriebantur; neque ullum singultientem, medicamentis, etiam plurimis diligentissimè adhibitis, servari potuisse vidimus: ratio erat, quia causa ejus tolli non poterat; de qua vide lib. 2. cap. 13.

## A N N O T A T I O N E S.

I. Cornelius Celsus, Rondeletius, multique alii Medici, vomitum in peste judicant non esse supprimendum & sistendum, sed potius vomitoriis exhibitis continuandum, & naturam hoc modo adjuvandam esse, ut noxiam malignitatem citius & facilius excludat, secundum 1. aphorif. 21. *Quo natura vetgit, eo ducere oportet.* Verum hic aphorismus non convenit huic loco, nisi altera ejus pars addatur, nempe: *Si vergat per vias lege naturæ commodas.* Atque evacuatio quæ fit in peste per vomitum, non fit per vias lege naturæ commodas, ergo per illas non est ducendum. Probatur minor, quia evacuationes per commodas vias fiunt cum levamine, sed vomitus in peste fit sine levamine, imò ut plurimum in ægrotorum perniciem. Ad hæc natura ipsa docet alio ducendum esse, nempe à centro ad peripheriam, eumque motum fieri cum levamine, docet experientia; exemplo sunt sudores, bubones, & anthraces. Dicendum ergo, vomitum vomitoriis optimè sedari & curari posse, cum producit ab humorum putredine, vel acrimonia, vel copia: in peste autem vomitoria non prodesse, sed noxia esse, quia ille vomitus non oritur à talibus causis, sed potius à venenata perniciæ naturæ robur dissolvente, & non in ventriculi cavitate contenta, sed cordi firmissimè affixa, quod cor ob viciniam ventriculum etiam in consensum trahens & inficiens, vomitum inducit. Cum verò per hunc vomitum, quantumvis evacuatis excrementitiis humoribus, illa maligna perniciæ à corde detrahi nequeat, ex tali vomitu non modo nullum levamen, sed maxima virium dejectio sequi, & quo magis ille urget, tanto majus periculum impendere necessario debet. Quapropter citissimè medicamentis suppressendus est; antequam prostratis viribus una cum excrementis ipsa quoque anima evomatur. Naturæ enim, non morbi minister debet esse Me-

dicus: atqui cum illæ vomitiones sint symptomaticæ, fiantque non naturæ, sed morbi vi, ergo illas non magis promovere, sed in sistendo naturæ opem ferre debet. Hac de re plura videantur infra, cap. 11. annot. 2.

II. Untzerus, lib. 3. de lue pest. cap. 10. ad syncopen & debilitatem laudat oleum seu quintam essentiam perlarum cujus descriptionem etiam addit, & dicit, post aurum potabile, ad naturam humani corporis confortandam, nullum hætenus repertum esse elegantius ac præstantius medicamentum. Anselmus Bootius, lib. 2. de gemmis, cap. 154, scribit se, cum febre pestilenti extremè laborasset, cum crebris animi deliquis, ac de sua salute omnes desperassent, tincturæ veræ corallorum gut. vj. assumptis, extemplo & quasi miraculosè fuisse liberatum, cordis spiritibus ita recreatis, ut ilico quasi luce depulsis tenebris, morbi vim medicaminis efficaciam abigi perceperit. Mindererus, de pest. cap. 16. ad vires post promotos sudores reficiendas, magno encomio extollit suum julebum paulo ante, cap. 6. annot. 4. descriptum, qui revera admodum conveniens est.

Christophorus de Cock van Kêrckwijck, ad ægrotorum pestiferorum corroborationem super omnia extollit vinum, præcipue rhenanum, modica quantitate datum, quod vires ilico reficere, idque se in seipso (qui quater febribus ardentibus, & ter peste laboraverat) expertum scribit: miscebat autem vinum rhenanum cum aqua acidula (nobis *born aut bron waster* appellata) & succo citri. De vino plura videantur supra, lib. 2. cap. 6. annot. 14. & hujus lib. cap. 2. annot. 6.

III. Riverius, tract. 3. de febr. cap. 1. de vomitu in peste agens, sequens remedium ab experientia commendat: *Huic, inquit, symptomati gravissimo statim medetur, quasi miraculo, sal absinthii ad drach. j. in succi limonum recentis cochleari*

cochleari uno exhibitum, ut experientia didici.  
Mindererus, de pest. cap. 17. ad cohibendum vomitum præscribit hunc fotum:

Rec. Rosarum rubrarum,  
absinthii, ana M. ij.  
mentha,  
origani,  
anethi,  
balaustiorum, ana M. f.  
nardi Celtica, p. j.  
granorum juniperi,  
rad. gariophyllata,  
pistolochia,  
acori, ana drach. ij.  
cyperi,  
zedoaria, ana drach. j.

Incisa grosso modo, indantur duobus sacculis, qui coquantur in vini, aceti, & aqua chalybeata aequis partibus, & alternatim expressi ventriculo imponantur, cavendo ne unquam refrigerentur. Vel madescat ex horum decocto spongia, qua ventriculus foveatur.

Post hunc fotum aliquamdiu adhibitum, applicat hanc puliculam:

Rec. Mica panis filiginea tosta, unc. iij.  
mastichis, drach. j.  
nucis moscata,  
santali citrini,  
labdani,  
coriandri preparati,  
calami aromatici, ana scrup. j.  
macis, scrup. f.  
Contundantur simul fortiter in mortario, addendo,  
olei cydoniorum,  
vini rubelli,  
aceti rosacei, ana part. aq.

Redigantur in puliculam, qua calefacta extendatur super pannum, & ventriculi regioni applicetur.

Julius Palmarius, lib. de peste cap. 24. ad vomitum compescendum præscribit hos sacculos,

Rec. foliorum siccorum mentha,  
sampsuchi,  
absinthii vulgaris,  
origani,  
calamenta,  
thymi,  
pulegii,  
melissa,  
artemisia,

summitatum anethi,  
ana p. j.

sem. anif.

faniculi,

carui,

rad. calami aromatici,

cyperi, ana unc. f.

nucis moscata,

gariophyllorum,

macis, ana drach. f.

Conficito duos sacculos intersitos, qui saxeant in aqua, addendo sub finem vini odorati sere tertiam partem, aceti, aqua rosacea, ana, unc. ij. f. misbridatii unc. j. f. Hi vicissim expressi calide ventriculo applicentur. Mox a fotu resiccatus locus innatur oleo salvia & rosmarini, arte chymica extracto, cui aceti & misbridatii, ana drach. j. accesserit.

IV. Ad virium lapsum multi commendant epithemata cordialia, ex herbis aliisque simplicibus cordialibus in vino coctis confecta: quorum tamen usus nobis displicet, quia liquida & humida facillime refrigerantur, eaque ratione plus damni quam utilitatis adferunt. Eustachius Rudius summo opere commendat oleum de scorpionibus compositum, a Matthiolo, comm. ad lib. 6. Diosc. descriptum: & ejus defectu, oleum scorpionum simplex, aut oleum magni Ducis Florentiæ; jubetque ut his oleis aliquantulum theriacæ admisceatur. Mindererus, de peste, cap. 16. ad virium refectiorem etiam magnopere laudat odoramenta. Inter refectiões, inquit, connumerandi sunt odores, jucunda exhalatione spiritus plurimum reficientes: proinde linthea aceto rosato calendulato, vel rutaceo, aut sambucino, addita modica camphora, parietibus extendenda, aut stabello consimili aceto tincto ventus coram agri facie concutiendus ac stabellandus, & acetum de rubo Ideo spongia exceptum, vel vinum perquam odorum aqua rosata admixtum, intincta medulla panis triticeo recentis, naribus saepe admovendum. Mirum quantum hac reficiant. Camphora aqua rosarum immergitur, & ex hac aqua lintheum madescit, quo frons, nares, tempora, labia, & cordis regio abstergitur.

V. Mindererus loco butyri simplicis, sumit butyri recentis aqua rosacea loti unc. ij. salis prunellæ drach. f. eaque mista in aqua frigida servari jubet. Alii ad eundem usum lac dulce calens gargarizare jubent, quod dolorem lenit, inflammationem temperat, linguam & fauces humectat, & venenum attrahere putatur. Alii præferunt usum feri lactis: alii lac ebutyratum acidum, alii ejusdem serum commendant.

## CAPUT X.

*De curatione hæmorrhagiæ narium & menstruorum, nec  
non sputi cruenti.*

**H**æmorrhagiæ qualescunque in hac nostra peste admodum periculosa, & necessario quam citissime sistendæ (1.) erant. In narium hæmorrhagiæ statim topica refrigerantia & astringentia fronti & cervici applicavimus: petiās crassas pulveribus & aquis astringentibus imbutas in nares immisimus: ægros, quantum fieri poterat, erectos posuimus, extremas partes fricavimus & ligavimus; scapulis, dorso, & pedibus eucurbitulas siccas sine scarificatione imposuimus. His tamen omnibus non obstantibus, sæpe sanguinis fluxus sisti (2.) non poterat, atque tunc in desperata re ad desperatum auxilium interdum concurrebatur, nempe ad venæsectionem, per quam tamen neminem servatum vidimus. In nimis & intempestivis menstruorum profluviiis, statim ad antidota astringentia, bolum Armenam, terram sigillatam, corallum rubrum, cornu cervi ustum, & similia concurrendum erat, quibus fluxus ille sæpe sistebatur, imprimis si ab ipso fluxus principio talia adhiberentur. Ad sputa cruenta (3.) medicamentis opus non erat, nam hæc ægros brevi occidebant, nec ulla remedia huic malo inveniri poterant, cum quo unum solum in tota hac peste servatum novimus.

## A N N O T A T I O N E S.

I. **M**ulti præclari Medici existimant hæmorrhagias pesti supervenientes, esse criticas, ac propterea easdem non esse cohibendas, sed potius promovendas. Sed errant: nam bona crisis sit vi naturæ, & in salutem ægri, hæc autem hæmorrhagiæ non naturæ, sed morbi vi producuntur, & fiunt in perniciem ægri; easque in hac peste adeo perniciosas fuisse observavimus, ut si in principio non satis tempestivè sisterentur, postea nullis mediis sisti possent. Ratio erat, quia dum natura debilis per hanc perversam viam venenum pellens, cordi & spiritibus vitalibus maximè inhærens, frustraneo conatu deponere annitebatur, boni & laudabilis sanguinis tamen quantitatem expellebat, ut simul virium, vitæ, & morbi finem faceret. Huic nostræ observationi contrariari videtur illud, quod Medici Galli scribunt anno 1568 febres pestilentes, fluente è naribus sanguine copiosissimo, eoque fere florido, magna ex parte fuisse judicatas; & ex iis quibus ad lipothymiam usque sanguis profluebat, paucos evasisse, quibus ad revulsionem vena in brachio secta fuit; eos verò, qui totum negotium naturæ committebant, & alimentis ac medicamentis cardiacis prostratas vires resarciebant, omnes fere sanatos fuisse, quamvis vehementes & graves viderentur animi defectiones. Dicimus hanc observationem non esse nostræ contrariam: nam hæc febres pestilentes, procul dubio, ortæ fuerunt à venenata qualitate ex humorum insigni pu-

tredine vel corruptione resultante, non autem à veneno aëreo forinsecus corpus intrante, à quo vera pestis inducitur, quod venenum nulla sanguinis evacuatione expelli posse, supra cap. 3. annot. 1. satis probavimus. Illam autem venenatam qualitatem, quæ ex gravi humorum corruptione resultat, tam arte per venæsectiones, quam naturæ vi per criticas hæmorrhagias expelli, imminui, detrahi, & extinguere posse, præter rationem, etiam docet experientia. Nam venæsectiones in febribus petechialibus primum remedium & verum alexipharmacum esse, scribunt Medici; idque etiam multo usu edoctus testatur Joannes Morellus. Nos anno 1635, in vehementissima pestilenti epidemia febre, (quæ primo Noviomagum & Geldriæ Provinciam crudelissimè infestavit, atque hinc toti fere Belgio communicata est) illud ipsum quoque manifestissime comperti sumus: nam in his venæsectiones ter quaterve, imò quinquies sexiesve repetitæ, ut & hæmorrhagiæ spontaneæ criticæ morbum optimè solvebant, qui alioqui vix ullis medicamentis edomari poterat. Non evertit etiam nostrum propositum historia Paræi, lib. 21. cap. 26. descripta, de Domino Fontano, Equire Torquato, qui sanguine è naribus per biduum continuum spontè copiosè effluente, peste liberatus fuit. Nam unica hirundo non facit ver, & pluries contingit ut ab acutissimis morbis cum lethalibus symptomatibus unus aut alter mirabiliter evadat: præterea etiam dubitari posset, utrum

utrum ille D. Fontanus vera peste, an vero fe-  
bri pestilentiali absque peste laboraverit.

II. Ad hæmorrhagias sive narium, sive men-  
struorum sistendas, maximè commendari solet  
lapis hæmatitis, quem in manibus detentum, do-  
nec incalescat, sæpissimè periculosissimas hæ-  
morrhagias, nullis aliis remediis curabiles, sti-  
tisse referunt. Alii eundem lapidem ex collo su-  
spendunt, ut nudam cutem attingat. Retulit  
nobis quondam Domina de Walta, mulier fide  
dignissima, se habuisse lapidem hæmatitem ru-  
brum, politum, coloris corallii rubri, magni-  
tudinis unguis pollicis, exiguo aureo annulo  
circumdatum, cum quo lapide ex collo suspenso  
dicebat se millies desperatissimas menstruorum &  
narium hæmorrhagias intra semi horam mira-  
culi instar stitisse, neque unquam fefellisse e-  
ventum. Nos lapidem hæmatitem in pharma-  
copoliis venalem eodem modo etiam multis ex  
collo suspendimus, sed nunquam optatum effe-  
ctum inde videre potuimus, fortè propterea quod  
verum lapidem non habuerimus. Anselmus  
Booth, lib. 2. de gemm. & lap. cap. 102. dicit  
jaspidem (credo lapidem Dominæ de Walta  
fuisse jaspidem rubri coloris) de collo suspensam,  
ut nudam cutem contingat, arcana quadam vir-  
tute hæmorrhagias desperatissimas sistere; idque  
memorabilibus aliquot historiis & exemplis de-  
monstrat. Ejusdem lapidis hac in parte virtutes  
magno encomio celebrat & decantat Hildanus,  
cent. 3. observat. 2. Si nobis hoc tempore hujus  
lapidis copia fuisset, etiam mirabiles ejus effectus  
experiri potuissimus. Nonnulli quoque dicunt  
bufonem exsiccatum, & syndone involutum, si  
manibus detineatur donec incalescat, quemlibet

sanguinis fluxum, incantamenti instar, suppri-  
mere & restringere.

Christophorus de Cock van Kerckwijck, lib.  
de Peste, Bufone aliter utitur, quippe dicit,  
nullum dari excellentius remedium, quod hæ-  
morrhagiam citius compescat & sistat, quam  
pulvis Bufonis exsiccati naribus inditus, aut  
ejusdem prunis impositi fumus attractus.

III. Sputa cruenta, quamvis in multis visa  
fuerint, tamen valde communia non erant, fi-  
cut illa tempore Mart. anno 1348, maximè  
communis fuisse, ac diris furiis toris quinque  
annis peragrantia, ingentem mortalium stragem  
dedisse, refert Fracastorius, in Syphilide lib. 1.  
his versibus:

*Bis centum fluxere anni, cum flammea Marte  
Lumina Saturno tristi immiscente, per omnes  
Aurora populos, per quæ rigat aquora Ganges,  
Insolita exarsit febris, qua pectore anhelio,  
Sanguineum sputum exagitans (miserabile visu!)  
Quarta luce frequens fato perdebat acerbo.  
Illa eadem Assyria gentes, & perfidus, & que  
Euphratem Tigrinque bibunt, mollemque Ca-  
nopem,  
Inde Phrygas, inde & miserum trans aquora  
vecta,  
Insecit Latium, atque Europâ saviit omni.*

Hæc pestilens sputatio tunc temporis non minus  
incurabilis fuit, quam in hac nostra peste, ut li-  
quet ex eo quod Andreas Gallus, lib. 4. fascic.  
de pest. ita dicat: Tanta fuit hujus miserabilis bel-  
lua immanitas, ut ab Oriente usque ad Occasum  
mortalium decimam partem vix supersitem relique-  
rit; quotquot rapiebat, tot necabat.

## CAPUT XI.

### De curatione alvi fluxus, & lumbricorum.



Alvi fluxus ægris peste correptis superveniens, (1.) semper ingens pe-  
riculum minabatur. Ac proinde non expectandum, (quod tamen  
multi opinantur) neque solis amygdalatis (quæ in hoc casu semper  
maximè noxia fuisse observavimus) dolores sedandos, sed statim, si  
ægri ullo modo quidquam assumere possent, fluxum medicamentis sedandum esse,  
præter rationem, etiam docuit usus. Quem in finem usi sumus sudoriferis astrin-  
gentibus (2.) aliquoties repetitis, nec non pulveribus antidotalibus, & conditis quo-  
que astringentibus ac malignitati resistentibus, quorum omnium copiam descrip-  
simus supra, cap. 5. Atque talibus Medicamentis interdum in principio sistebatur ille  
fluxus, cum alioqui transgresso principio nullis remediis (3.) sisti posset, sed æ-  
gros secundo flumine ad æternitatis habitacula deferret. Natura enim totam ma-  
lignitatem qua data porta expellere nitebatur, hinc bonis æque atque putridis hu-  
moribus fermentatione effervescentibus, sicque effluentibus, maligna interim la-  
be cordi aliisque visceribus firmiter infixam manente, vires ad extremam debilita-  
tem brevi concidebant; unde tandem ipsa quoque retentrix facultas adeo sui im-  
potens evadebat, ut naturæ impellenti resistere nequiens, nihil amplius retineret,  
imò laxatis vasorum interiorum extremis osculis, etiam sanguinem per alvum &  
urinam



urinam effluere sineret, quem fluxum mors brevi sequebatur, neque ullus in tota hac peste evasit, cui sanguis per has vias effluxit. Quantum ad alvi lumbricos, qui in multis pestiferis etiam apparebant, maximæque putredinis adjunctæ indicium erant, illorum curationi particulatim incumbere necessum non erat, nam pleaque omnia antidota, aliaque medicamenta diaphoretica & putredini resistentia, quibus ratione veneni pestilentis utebamur, etiam lumbricos satis enecabant & expellebant, eorumque generationem impediabant. Interdum tamen speciatim pulverem aliquem ad vermes exhibui (4.) imprimis si animadverterem lumbricos copiosos in intestinis adesse.

## A N N O T A T I O N E S.

I. **Q**Uæ de vomitu mota fuit quæstio, eadem etiam hic movetur, nempe: *Quo natura vergit, eo ducere oportet, per loca lege natura commoda.* Ergo evacuatio quæ fit per intestina, cum fiat per loca commoda, & natura eo vergat, non erit sistenda aut impedienda, sed potius adjuvanda & magis promovenda. Præter solutionem super hoc dubio datam supra cap. 9. annot. 1. dicimus nos prædicto aphorismo opponere sect. 4. aphorismum 2. *Talia educenda è corpore, qualia sponte prodeuntia utilia: quæ verò contrario modo prodeunt, cohibenda.* Nam in curatione ægrorum, præter cætera, semper habenda est ratio morbi & causæ morbi, ex qua observatione facile liquebit, non omnem spontaneam evacuationem per intestina omnibus morbis esse convenientem, nec per eam semper talia evacuari qualia decet evacuari, (nempe primariam morbi causam;) istam quoque viam in multis morbis (variolis, morbillis, peste, &c.) lege naturæ non esse commodam, sed ipsam naturam, vel nimis debilitatam, vel à materiæ morbificæ copia nimis gravatam, vel à materiæ venenositate, aliave prava qualitate, acriter stimulatam, interdum ad perversum motum impelli, & per inconvenientes vias evacuare humores quos non convenit evacuari, idque magis in ægri exitium, quam morbi exilium. Ut autem certo cognosci possit, an in morbis excernantur qualia decet, per vias lege naturæ commodas, jubet Hippocrates, 1. aphorif. 2. non à copia & numero metiri excretiones, sed pro ut conferunt, & ægri ferunt ex facili. In peste autem excretiones per alvum difficulter ferunt ægri, cum summa, citissima, & periculosissima virium dejectione, ergo non evacuantur qualia decet, neque fit ista evacuatio per loca lege naturæ commoda. Quod ipsum Hippocrates, 4. aphorif. 47. agens de alvi & urinarum excretionibus, apertissime explicat, inquiens: *Si verò nihil quod allevationem adfert, per ea loca excludatur, calamitosum.* Contra quæ per sudores, anthraces, & bubones contingunt evacuationes, illæ fiunt cum salute ægrorum, & facile feruntur, ergo evacuantur qualia decet per vias commodas. Concludimus igitur, in peste non esse indulgendum alvi fluxui, (quicquid hic obganniant nonnulli, qui lupum in stabulo concludendum non esse clamitant) sed eidem quam citissime resistendum, & naturam

impellendam esse ad debitas excretionem per vias in tali morbo convenientes, quales viæ sunt illæ quæ ducunt à centro ad peripheriam. Neque credendum est tali modo lupum in stabulo concludi, sed eundem, qui antea perversa via exitum quærens, stabuli parietes perfodiebat, hoc modo per rectam portam citissime expelli.

II. In peste alvi fluxus per sudorifera & antidota astringentia est cohibendus: non enim quælibet sudorifera & astringentia hic conveniunt, sed talia quæ speciatim pestilenti venenositati resistunt, eamque aliorum per commodas vias à centro ad peripheriam educunt. Sic etiam Riverius scribit se observasse in febribus pestilentibus alvi fluxus perniciosos, cum quibus ægri ad interitum ruere videbantur, potentioribus diaphoreticis magna dosi exhibitis, quasi in momento cohibitos fuisse, fugato scilicet veneno, quod intestina aliaque viscera vellicando fluxum illum syntecticum efficiebat. Paræus lib. 21. cap. 40. ad hos fluxus unice commendat sequens remedium, quod dicit se habere ex Capellano, Regis Medico primario, qui id à patre acceptum magni secreti loco habebat, & ægris felici admodum successu præscribere solebat:

Rec. Boli Arm.  
terra sigillata,  
lapidis hamatidis, ana, drach. j.  
picis navalis, drach. j. s.  
coralli rubri,  
margaritarum præparatarum, cornu cervi ussi  
& loti in aqua plantag. ana scrup. j.  
sacchari rosacei unc. j.  
Fiat pulvis.

Hujus pulveris exhibet ægro cochleare unum ante cibum, vel cum vitello ovi. Eustachius Rudius, art. med. lib. 3. cap. 30. in hujus fluxus curatione plurimum extollit scordium, una cum saccharo rosato, aut conserva acetosæ exhibitum, quod dicit insigniter putredinem restringere, & succorum venenatæ qualitati potenter resistere. Hoc igitur ut commodius in usum vocetur, poterit exhiberi cum præcedente pulvere Paræi, aut cum pauxillo theriacæ Androm. vel diascordii Fracast. aut, si febrilis ardor ingens adsit, cum conserva rosarum rubrarum, vel cum rob cornorum aut acaciæ. Angelus Sala, lib. de peste, reliquis non

non iuvantibus, tale enema parare jubet :

*Rec. Caput ovillum recens & crudum, secetur in duas partes, & abscissa lingua, coquatur una cum cerebro in aqua q. s. donec caro ab ossibus separetur: postea coletur brodium, cui mox infunde summitatum hypericonis duos vel tres manipulos, radicum tormentilla grosso modo contusar. unc. j. ponantur ad cineres calidos per tres aut quatuor horas, postea fiat colatura, qua sine rebus additis in forma clysteris agro injiciatur manè vesperique.*

*Hujus clysteris, inquit, effectum invenies mirabilem, quia liquor iste superat alia omnia, quo ad fluxiones desperatas.*

III. Illud sæpius observavimus, si alvi pe-

stilens fluxus in ipso principio non sisteretur, postea planè incurabilem in omnibus fuisse; & quibus principium sine contrariorum medicamentorum assumptione transierat, illos omnes citò obiisse.

IV. Etsi rarius, tamen interdum ad vermes specialia remedia, vi aliqua antidotali prædita, adhibere necesse est, cum eorum redundat copia. In quem finem hujus pulveris scrup. ij. vel drach. j. cum aqua aliqua conveniente exhibetur.

*Rec. cornu cervi usti,  
corallina præpar.  
sem. zedoaria,  
flavedinis corticum citri,  
ana drach. j.  
fiat pulvis.*

## CAPUT XII.

### *De curatione bubonum pestilentialium.*

**B**ubonum pestilentium curatio peragitur medicamentis (1.) partim internis (de quibus in præcedentibus sat dictum) partim externis sive topicis: per quæ tribus modis curari possunt; nempe per discussionem, (2.) diversionem, (3.) vel suppurationem: Nos in hac peste, relictis duobus prioribus modis, tanquam incertis & magis periculosis, per solum suppurationis modum bubones omnes curare tentavimus. Quamprimum igitur ægri, sive in ipso morbi principio, sive in progressu (4.) duritiem aliquam cum dolore sentirent pone aures, in collo, sub axillis, vel in inguinibus, huic plerumque ad citiorem tumoris provocationem & maligni ichoris extractionem, vesicatorium (5.) in inferiore ejusdem parte applicavimus, ita ut vesicatorium ipsam duritiem (6.) attingeret: eoque per octo vel decem horas inhærente vesicam mediocrem excitavimus; quâ, unicâ vice, totâ ablatâ, folium brassicæ rubræ vel betæ, butyro veteri vel oleo raparum inunctum, imposuimus, ut hoc modo locus apertus teneri, & damnosî ichores melius effluere possent. Formula vesicatorii (7.) hæc erat:

*R. Radic. pyrethri, sem. sinapi albi, ana drach. f. cantharidum scrup. j. f. vel scrup. ij. mellis drach. j. fermenti panis acidi drach. j. f. vel drach. ij. aceti rosacei, q. s. Fiat pasta vesicatoria.*

Vel talis erat:

*R. Sem. sinapi albi, euphorbii, ana drach. j.  
rad. pyrethri drach. f. cantharidum drach. ij.  
resinæ pini, ceræ, ana q. s.  
Fiat ceratum.*

Cucurbitulas (8.) nec infra bubones, nec ipsis bubonibus apposuimus, earumque usum in multis, qui id tentaverant, damnosissimum fuisse observavimus. Secunda die, ut noxia materia ad bubones attrahi, ibique digeri ac suppurari posset, toti tumori cataplasmata attrahentia, & emollientia, ac suppurantia imposuimus, quibus præter alia etiam cæpe, stercus columbinum, (9.) fermentum panis acidum, & similia (10.) admista erant: hac fere forma:

*R. Rad.*

℞. Rad. liliorum albor. unc. ij. herb. ruthe,  
malvæ, altheæ, ana M. j. scabiosæ (11.) M. j. f.  
flor. chamomil. M. f. ficus (12.) ping. n<sup>o</sup>. ix.  
aquæ comun. q. s.

Coquantur s. art. & in mortario minutissimè pistentur, addendo tres quatuorve bulbos cæparum, prius chartâ bibulâ aceto madidâ involutos, ac sub cineribus aliquantum assatos,

pulv. rad. altheæ, unc. f. stercoreis columbini unc. ij. f.  
fermenti panis acidî, unc. j. f. farinæ tritici drach. iij.

His affunde colaturam prædictorum, & omnia simul mista coquantur ad formam cataplasmatîs, cui postea admiscuantur,

mellis unc. j. unguenti basilici unc. f. axungie anatis, vel olei scorpionum (13.) vel butyri unc. j. f. Pro ditioribus interdum etiam theriacæ Andromachi; pro pauperioribus theriacæ rusticorum nonnihil admiscebatur.

Nonnullis etiam solas cæpas (14.) sub cineribus aliquantum assatas, & deinde contusas, pauco theriacæ (15.) & butyri insulsi admixto, cataplasmatîs forma primo biduo vel triduo imposuimus (16.) Horum cataplasmatum usu aliquot diebus continuato, cum tumorem jam satis magnum esse, atque ad maturationem tendere videremus, tunc attrahentia (stercus columbinum, fermentum, &c.) amplius non addidimus, sed solis maturantibus usi sumus, ut tumores citius ad suppurationem perducî possent. Sæpe ab ipso principio usque ad perfectam suppurationem, hoc solum emplastrum (17.) imposuimus, quod omnibus intentionibus satisfaciebat, eoque solo tumores non rarò ad integram sanationem perveniebant:

℞. Gummi galbani aceto dissoluti, emplastri oxycrocei, diachyli cum gummis,  
ana unc. j.  
misceantur.

Notandum tamen nos quibuslibet tumoribus non imposuisse fortiora attrahentia, sed tantummodo iis qui sub axillis & in inguinibus oriebantur. Tumoribus autem qui prope aures vel in collo prodibant, talia non conveniebant; nam talium usu eisdem, cum maximo suffocationis periculo, imò cum multorum exitio, sæpe paucis horis enormiter accrevisse observavimus: quapropter sola emollientia, vel leviter tantum attrahentia, his imponebantur. Tumores maturefacti, propter cutis duritiem & firmitatem plerumque longas moras trahebant antequam sponte aperirentur; quapropter, ne tetri vapores inde sursum elati cor affligerent; Chirurgi ope citiorem puri exitum paravimus, utque pus liberius effluere posset, tumores in declivi parte scalpello pertundi curavimus. Cauterio autem potentiali (quamvis id venenatam materiam consumere credatur) propter longiorem escaræ moram, nunquam usi sumus. (18.) Hanc autem tumorum apertionem non moliebamur, nisi cum jam fere ad perfectam maturationem pervenissent; quibus enim citius aperiebantur, iis id malè cedebat, nam plerumque immensi dolores fequebantur, inflammatio accedebat, febris augebatur, & sæpe etiam ulcus malignum ac difficilis curationis reddebatur. Tumoribus apertis & pure expurgato, ad ulceris emundationem hoc digestivum (quod insigniter hic proderat) primis diebus imponebatur:

℞. Scordii subtilissimè pulverisati drach. ij. vitellum unius ovi, terebinthina Venetæ, mellis, unguenti apostolorum, ana unc. f.  
misceantur.

Postea ulcera aliorum ulcerum modo perturabantur, cavendo ne nimis citò occluderentur.

## ANNOTATIONES.

I. **U**trum in curatione bubonis pestilentis convenient venæsectiones & purgationes, satis exactè à nobis examinatum est supra cap. 3. annot. 1. cap. 4. annot. 1.

II. Curationem tumorum pestilentialium omnium tutissimè & jucundissimè per discutientia peragi posse, nonnulli haud parvi nominis Medici judicant, quam discussionem sequenti modo instituunt: Deorsum versus recta linea sub ipsis tumoribus duas tresve cucurbitulas, unam infra aliam, cum multa flamma affigunt, easque ter quaterve reiterant. Deinde inferioris cucurbitulæ loco vesicatorium confestim applicant, atque ita vesicam excitant, qua disrupta noxiam saniem extrahunt. Interim ipsis tumoribus fomentationes digerentes & discutientes calidè admovent cum spongia aut pannis laneis vel lincis: vel stupam cannabinam in pulvinar justæ magnitudinis consuunt, hocque immergunt decocto betonicæ, hyssopi, malvæ, meliori, anethi, chamemeli, & seminum cumini ac fœniculi, & expressum tumori calidè applicant, idque singulis horis vel semihoris immutant. Præterea subinde quoque cataplasmata digerentia & discutientia imponunt, ut his modis venenatos humores in tumoribus contentos discutiant. In quem finem etiam Angelus Sala, *Tract. de Peste*, hoc oleo singulis horis quinque tumorem inungere jubet.

Rec. olei resina elemi per  
vesicam distillati,  
baccarum juniperi, ana unc. iiij.  
succini rectificati, unc. ij.  
rosmarini,  
styracis liquida, ana unc. j.  
miscantur.

Tali modo ad septimum usque diem procedunt, quo temporis intervallo si non planè discutiantur tumores, sed majores, & magis dolorosi fiant, concurrente aliqua inflammatione, tunc primum ad suppurantia deveniunt, quæ citius adhibere vetant, metuentes ne per illa obstructis poris impediretur venenatorum halituum ac vaporum exspiratio, qui vapor non sine periculo ad cor regurgitare posset. Hanc medendi formam (quia venenati humoris multum dissipat, nec febres auget, nec acerbos dolores inducit) multi, tanquam valde insignem, summis laudibus ad ecelum usque extollunt. Verum etsi ratio dicat tumores pestilenciales hoc modo etiam compendiosè curari posse, nobis tamen tutior ac certior videtur illa curatio quæ fit per suppurationem, quam tot secula, tanquam meliorem, & ipsa experientia magis probatam, hætenus receperunt, cujus etiam in hac nostra peste optimos effectus & eventus experti sumus. Quantum ad pericula quæ illi metuunt ex suppurantium usu, illa admistione medicamentorum attrahentium

& usu vesicatoriorum facile præveniuntur.

III. Nonnulli scribunt per diversionem, pestem & bubones non tantum optimè, citissimè, & tutissimè curari, sed tumorum quoque preventum præveniri, & prodeuntium materiam statim aliorum diverti posse. Hunc modum describit Guilhelmus Magistrius, *Isag. Therap. sect. 3*. In partibus extremis longèque à corde remotis, ac minimè periculosis, præcipuè in medio femore, exiguam faciunt incisionem cutis, quam implent exiguo frusto radices pseudohellebori, aut veratri nigri, cortice abrafo: postea emplastrum tenax superponunt, & viginti quatuor horis ægrum manibus pedibusque devinctum (nam præ summo dolore propemodum insaniunt ægri) custodiunt: illo finito tempore, totum pestilens virus hellebori vi ad illum locum attractum, & ægrum ab omni periculo liberatum esse tradunt. Eundem curationis modum miris modis celebrat Angelus Sala, *lib. de Peste*, & dicit experientia se edoctum illud laudis tribuere helleboro nigro, quod inter omnia simplicia & composita nullum noverit, quod hujusmodi magnetica & attractiva qualitate præditum sit, pro facienda revulsione peccantis alicujus humoris, atque se cum ista radice miracula præstitisse, omnes curas ordinarias aliaque medicamenta superando. Hac radice utebatur etiam Sacrificulus ille Buscoducensis, cujus meminimus supra cap. 6. annot. 8. Hollerius verò hac radice non utitur ad diversionem faciendam, sed aliud habet experimentum longè facilius. *Ostrea viva*, inquit, pestiferos bubones loco transferunt, & virus omne ad se trahunt. Sunt autem agglutinanda brachio, quæ axillaris decurrit, si quidem bubo in alis fuerit: si verò inguen obsidetur, lineamentis femoris, quæ vena cruris describit. Idem cum Hollerio etiam sentit Paracelsus, *lib. de pestil. tract. 1*. quo loco omnibus cochleis pluribusque animalibus illam vim adscribit: *Pestis*, inquit, *remedia sunt rana, & testudines, & cochlea omnes alligata: etiam buso, tinca, anguilla, muræna, passer, gallus, pavo, cornix, corvus, pestiferum venenum ex homine extrahunt*.

IV. Sunt qui attractiva medicamenta in ipso morbi principio, nullis tumorum signis uspiam adhuc apparentibus, inguinum emunctoris applicanda, atque hac ratione pestilens venenum eo protrahendum esse, judicant. Verum ille curandi modus nobis valde incertus esse videtur, propterea quod sciri nequeat an natura eò vergat, & venenum pestilens versus illam partem expulsurum sit. Nam attractivo remedio isti loco imposito, si natura materiam morbificam fortè aliorum, ad capitis vel axillarum glandulas deponere velit, per illud medicamentum impeditur, & turbabitur in sua operatione. Propterea nos magis tutum esse arbitramur, expectare donec aliquo modo animadvertatur quorsum natura vergat,

vergat, atque tunc illam omnibus modis in operatione sua adjuvare, & istis locis, ad quæ materia morbifica vergere percipitur, medicamenta attrahentia applicare.

V. Vesicatoria in hac peste plurimum profuisse, milles observavimus; non tantum enim malignos ichores attrahebant & extrahebant, verum etiam impediabant ne facile retrogrado gradu ad cor, vitæ fontem, remearent. Sæpe etiam virus pestilens per illa tam insigniter evacuatam fuisse novimus, ut cum salute ægrorum tumores postea planè evanuerint. Sunt qui vesicatoriorum usum rejiciunt, dicentes, quod impediunt naturæ motum & coctionem, præterea quod calorem febrilem augeant, &c. Quas objectiones ab Hercule Saxonia fulsissime refutatas, hic refellere, inutile & nimis longum arbitramur.

VI. Multi Medici jubent vesicatoria longè à tumoribus applicare; ut, si post aures vel in collo tumores fuerint, humero vel scapulæ ejusdem lateris; si sub axillis, medio brachio; si in inguinibus, medio femori. Qui modus etiam Ægyptiis communis esse videtur, nam illos solere peste infectorum cruribus & brachiis vesicatoria applicare, testis est Prosper Alpinus, *de Medic. Ægypt. lib. 4. cap. 15.* Verum cum hac ratione natura in suo opere interrumpatur, & noxia illa materia quam ad emunctoria transmittat, ad alias partes carnosas, firmiores, & sensibiliores, cum ægri malo trahatur, non videtur approbandus hic curandi modus. Nostra opinione præstat applicare vesicatoria infernæ buboni parti, ut recta ac declivi via fluxio promoveatur ad talia loca, ad quæ ipsa natura ducendum esse docet; quæ loca cum sint glandulæ, vulgò emunctoria appellatæ, partes verè ignobiles, excrementitiis humoribus tempore necessitatis excipiendis dicatæ, fas est, natura duce, pestilentem malignitatem ad illas protrahere.

VII. Mercurialis tali vesicatorio utitur:

Rec. *Cantharidum præparat. drach. iij.*  
*fermenti, unc. l.*  
*aceti acerrimi parum; misceantur.*

Paræus *lib. 21. cap. 31.* hoc sequens tanquam divinum commendat:

Rec. *Cantharidum,*  
*piperis,*  
*euphorbii,*  
*pyrethri, ana drach. l.*  
*fermenti acris, drach. ij.*  
*sem. sinapi, drach. j.*  
*aceti parum, misceantur.*

Chirurgus quidam saponem nigrum cum sale torrefacto subigebat, cui aliquantum pulveris cantharidum adjiciebat, eoque vesicatorio utebatur: quod vesicatorium etiam laudat Julius Palmarius. Hieronymus Fabr. ab Aquapendente omnium maximè laudat flammulam, quia ad-

modum attrahit & vesicas excitat, per quas venenum expurgatur. Vulgares in hac peste multoties ranunculum herbam in mortario contusam tumoribus imponebant, atque ita magna vesica excitabatur, quæ postea detractâ, folium brassicæ rubræ vel betæ, oleo raparum inunctum, imponebant.

VIII. Galenus, Aëtius, Paulus, alique gravissimi Medici, in bubonum curatione cucurbitularum usum commendant, à quibus ille ad neotericos dimanavit. Chalmeteus partibus buboni vicinis cucurbitulas imponere suadet: quod etiam laudat Zacutus Lusitanus, *lib. 3. Prax. Admir. obs. 3.* Plurimi tamen alii ipsis bubonibus in principio cucurbitulas cum multa flamma aliquoties imponunt, ut hoc modo venenum pestilens à corde citius & melius detrahatur. Verum etsi ipsa ratio hoc remedii genus approbare videatur, nulli tamen in hac peste, in qua id pluries tentatum fuit, illud feliciter cessisse observavimus: semper enim post adhibitæ cucurbitulæ, cruciatus immanes, febres acerbiores, inquietudines & anxietates majores sequebantur, nec ullum levamen inde consecutum fuisse, unquam vidimus, ita ut tandem earundem usum in hac peste omnino relinquere necesse fuerit. Fortasse propterea non profuerunt cucurbitulæ, vel quod vicinos humores indifferenter attraherent, non autem venenum: vel quod vicinos humores in cuculum durum contrahendo, viam ad glandulas obstruerent vel occluderent, atque ita impedirent ne venenata materia eò pervenire posset: vel quod dolores, & per hoc febres acutiores reddendo, plus noxæ quam utilitatis inferrent. Alexander Massaria, *lib. 2. de peste,* cucurbitularum usum rejicit, tanquam remedium nimis durum. *Sententia nostra summa est,* inquit, *hos tumores non admodum graviter & aspere tractandos esse, tam incipientes, quam declinantes, cum perpetuo nos oporteat operam dare, ut naturam juvemus ac foveamus; at nullo pacto ut eam magis vexemus & labeficiamus: illa namque sola & vera est morborum omnium medicatrix.*

IX. Rulandus, *cap. 8. de febr. Vng. quest. 78.* & Burggravius, in *Achille*, tradunt bufoni exsiccatæ magneticam quandam virtutem inesse, qua buboni vel anthraci pestilenti impositus, venenum pestilens mirabiliter ad se trahat, eumque adeo fortiter illud venenum attrahere asserunt, ut inde totus intumescat, atque tunc illo abjecto alium siccum de novo imponere jubent. Quod remedii genus etiam magnis laudibus extollunt, Libavius, *part. 4. singular. lib. 2. batrach. cap. 20.* Michaël Papa, in *alex. venen.* Gabelchoverus, in *Tarrio part. 3.* Caspar Keglerus, in *regim. pest.* Mizaldus, *cent. 6. distinct. 34.* Crollius, Daniel Mylius, Jo. Hartmannus, alique plures. Monent autem ut in exsiccatione bufonis caveatur, ne venter ejus lædatur, tunc enim venenum non attrahere ajunt. Illam autem bufonis aridi à veneni pestilenti attractione intumescantiam, se experientiâ falsam comperisse, refert

refert Joannes Baptista ab Helmont: attamen dicit se illos aqua tepida aliquantum mactatos apposuisse bubonibus & anthracibus, tam in pectore, capite, mammillis, quam alibi, tam in viris, quam in mulieribus, non sine prompto levamine & doloris mitigatione. Weckerus, in *Secret.* pulverem rubetæ aridæ buboni inspergit. Alii oleum bufonum inunctum ad veneni extractionem mirabiliter extollunt, quod sic paratur:

*Rec. Olei olivatum lib. l. ebulliat in sartagine, postea sume bufones ligno per caput transfixos, & aliquamdiu suspensos, donec exsiccati fuerint, n. viij. vel ix. projice in oleum bulliens, atque ita aliquamdiu relinque; postea refrigeratum cola & serva.*

Bufonibus magnam vim inesse ad pestilens venenum extrahendum, testatur etiam Paracelsus, *lib. de pest. ad Sterzing.* Verum statuere videtur illos non in omni peste æque efficaces esse; nam ut est in aliis novorum dogmatum introductor studiosissimus, sic etiam in hoc morbo aliquid novi scribere volens, docet, *lib. de pestil. tract. i.* quatuor esse pestis differentias: scilicet, aliam esse igneam, aliam æream, aliam aqueam, aliam terream: & pro hac varietate dicit varianda esse topica, cum unaquæque pestis habeat sua appropriata. *Qua pestis,* inquit, *cum ingenti ardore & inflammatione corripit, & post aures glandulas tumefacit, in qua agri tamen non sitiunt, ea pestis ignis censenda est: in hac extrahendi veneni (quod recta ad cor penetrat, & mortem invehit) cura est tereniabin, manna, saccharum, allium, porrum, cape. In qua autem peste sitis vehemens, brevis aut nullus somnus, utriusque inguinis bubones apparent, ea aqua est: huic adhibe pisces, ranas, bufones, & quæcumque in aquis degunt, & præcipue ciconia & anatis carnes impositas. In qua bubones sub alis sunt, & difficilis anhelitus urget, & compressio vel angustia pectoris incumbit, & dolor capitis cum delirio infestat, ista est pestis æris: applica passeris, merulas, carnes gallinarum, perdicum, pavonum, urogallorum. In qua tandem somnus profundus seu narcoticus est, tumores ac bubones nulli certi in corpore, licet istorum ægrorum cutis plerumque varia & livida sit, tumoribusque sanguine suffusus conferta, ea pestis terra est: huic adhibe adipem viperinum, melinum, carnes salpæ, vulpis, lupi, cati. Nam hac omnia conferre, usus & experientia dicitur. Verum scire oportet, Paracelsum multa sibi somnia finxisse, eaque plerumque tanquam Apollinis oracula descripsisse, & magno titulo lectoribus obtrussisse. Sicut de bufone multi mirabilia scribunt, ita etiam nonnulli ranas simili encomio extollunt. Forestus *lib. 19. obs. 35.* refert ex Grado, historiam rustici, qui suo tempore, dum pestis grassaretur, ranas viventes scissas & non scissas, venenosis apostematibus applicabat, felici successu. Similiter etiam Crato, Gesnerus, Fumanellus, Ullstadius, Mizaldus, Jo. Dan. Mylius, & Libavius, magnam vim ranis adscribunt in attrahendo*

veneno pestilenti, easque vivas bubonibus imponunt, & cum una moritur, mox aliam vivam admovent, idque toties, donec una viva maneat, atque tunc venenum penitus extractum esse, idque à multis experientiis constare, tradunt. Nonnulli, ut venenum magis foras trahatur, cum Hollerio, tumoribus à principio imponunt ostrea viva: & cum tumores jam mediocriter intumuerunt, tunc capras sub cineribus assatas cum theriaca adhibent.

X. Ut venenata materia versus tumores melius attrahatur, suadent nonnulli Medici calide iis imponere gallinas vel columbas vivas dissectas. Verum cum hæc dolores quidem sedare, minimè verò pestilens venenum attrahere queant, videntur prodesse non posse: si enim vis attractiva illis inesset, qua materiam morificam attraherent, tunc cum maximo damno in phreneticis capiti imponderentur, materiamque morificam versus caput magis attraherent, in quibus tamen tanquam laudatissimum & ab experientia probatum remedium, à clarissimis quibusque Medicis commendantur. Ad extractionem venenati humoris versus exteriora, varia topica præscribuntur. Nonnulli hoc imponunt.

*Rec. ruthe viridis, raphani in saleolos dissecti, ana mi sem. synapi, cochleare unum, singula seorsim consundantur, & sic misceantur, ex eoque aliquid buboni imponatur.*

Alii stercus gallinarum, cum albumine ovi ad formam cataplasmati mixtum applicant. Alii sumunt, *medii corticis sambuci unc. j. farina avenacea unc. ij. hacque in lacte dulci coquant in formam cataplasmati, quod apostema citissime maturare tradunt.* Alii hoc utuntur cataplasmate Joannis Nævii, electoris Saxonici Medici,

*Rec. fermenti unc. l. raphani unc. j. l. farina sem. synapi drach. j. cape asse, drach. ij. l. alii assi, drach. j. l. theriaca, drach. ij.*

*misceantur omnia in mortario & fiat cataplasma, apostemati ter de die imponendum.*

Alii hoc laudant:

*Rec. caricarum ping. drach. iij. pulpa passularum majorum gummi ammoniaci, ana unc. l. bdellii, serapini, ana drach. ij. l. succi apii unc. ij. l.*

*gummata in aceto dissolvantur, postea in mortario omnia bene misceantur, fiat s. art. emplastrum imponendum, & singulis sex horis renovandum.*

Guilhelmus Magistrius, *tract. de peste*, altum præ-

præscribit modum deducendi venenum à centro ad peripheriam: quippe dicit, ex attrahentium genere esse balneum tepidum ex aqua fontana, aut potius lacte vaccino, in quo æger duabus horis à cibo stare debet spatio trium vel quatuor horarum, ad medias usque coxas, eoque modo venenum, non tantum ad exteriora allici, sed etiam ut plurimum integre resolvi, tradit. Verum nonnihil suspectum videtur hoc remedii genus, cum in hujus virulenti morbi curatione magnum periculum sit in mora, & statim per alexipharmaca sudorifera sudores sint promovendi, idque ægro stante in balneo vix convenienter fieri, & aeris frigidi accessus à superioribus corporis partibus extra balneum constitutis omnino arceri non possit: cum præterea per antidota sudorifera venenum pestilens ad corporis peripheriam satis propelli imò & dispelli ac discuti, multorum seculorum experientia docuerit, à tali remedio seu balneo, minus probato, & propter prædictas rationes suspecto, curationem non incipere, præstabilius duco.

Pro conclusione hic subjungam rarum quid, quod de bufone scribit Franciscus Jôel, tom. 5. lib. 1. sect. 3. Pro natura, inquit, miraculo haberi debet, si quis bufonem terrestrem (venenatum animal) ligneo cuspidem transfixum sub dio exsicaverit, siccumque tempore pestis, per noctem in aceto maceraverit, tumore aperto, vel carbunculo imposuerit, illum omne contagii venenum ad se trahere, & hominem certo præsidio, à peste liberare, Paulo post in carbunculi curatione, simile quid repetit: Bufo exsiccatus, inquit, & in aceto maceratus, carbunculo positus, in veneno eliciendo reliqua omnia superat. Hæc ille: verum ego bufoni tantas in peste vires non adscribo, ut patet ex iis quæ de eo supra scripsimus, lib. 2. cap. 11. annot. 1.

XI. Scabiosam Germani sua lingua appellant *Apostemen kraut*, propterea quod plurimis tumoribus curandis conveniat, & in pestiferis bubonibus etiam singularis existat. De scabiosæ facultatibus in peste mirabilia narrant, Arnoldus Villanovanus, Guainerius, Manardus, Hollerius, Savonarola, Matthiolus, Gerardus Bergensis, Massaria, Quatramnus, Tabernamontanus, aliique multi Medici. Droëtus admodum probat radicem cynoglossæ, cujus singularem suppurandi bubones vim, dicit sibi à multa experientia constare.

XII. Nonnulli hoc tempore solas ficus coctas & pistatas, cum pauxillo butyri veteris & theriacæ mistas, tumoribus imponebant; idque multis feliciter cessit. Sic propheta Jesaias, ex Dei præcepto, Ezechix Regi emplastrum de ficibus imposuit, quo ille sanatus fuit, ut videre est, 4 Regum cap. 20. & Iesaiæ cap. 38.

XIII. Palmarius, cap. 11, scribit, oleum scorpionum arteriis illitum, & vicino buboni loco inunctum, præsentem opem adferre. Alii hujus olei vires etiam ad præsertionem & curationem pestis admodum extollunt. Petrus Salius, lib. de Pestil. cap. 23, sic inquit, *Oleum scorpionum, & in veneno assumpto, & in pestilentia-*

*libus affectibus mirabiles edit effectus, semimortuos patientes reviviscere faciens, si eo oleo cordis regio & arteriarum loci inungantur.* Alexander Massaria, lib. 2. de Peste, dicit, oleum ex scorpionibus, pulsantibus temporum, manuum, ac pedum arteriis, cordisque regioni inunctum, non modo peste affectos juvare, sed & sanos præservare. Illud ipsum etiam asserunt Manardus, Rulandus, Croneburgius, Rudius, Droëtus, Goclenius, Hollerius, aliique multi. Nos tamen in hac peste oleo isto rarius usi sumus, quia cum propter defectum scorpionum illud oleum apud nos confici non posset, & de eo quod aliunde è longinquis regionibus adferri dicebatur, admodum incerti essemus, anne esset verum oleum scorpionum ritè paratum, huic remedio non multum confidere potuimus.

XIV. In hac peste vulgares communiter tumoribus & anthracibus imposuerunt sola folia brassicæ rubræ oleo raparum inuncta, atque in eorum usu continuabant usque ad abscessuum maturationem; eoque modo innumeri feliciter curati fuerunt. Multi bulbum capæ crudum per medium dissectum tumoribus imponebant, & cum nigresceret, renovabant, idque toties reiterabant, donec amplius non nigresceret, atque tunc totam malignitatem extractam esse credebant. Alii saniore consilio capas magnas aliquantum excavatas theriaca implebant, & sub cineribus calidis affabant, deinde in cataplasmatibus formam contundebant, & admiscendo axungiam suillam, tumoribus imponebant, cum felici successu: quod ipsum etiam nos non semel pro pauperibus felicissimè tentavimus, sed theriacam non admiscebamur nisi post affationem caparum, quia illius virtutes affatione multum imminui necesse est. Notandum etiam, capas non esse diu affandas, nam si ad perfectam molliem affando perveniant, optima earum vis calore ignis dispellitur. Forellus, lib. 6. in Scholio obs. 19. scribit, Chirurgum, qui tunc nosocomio præerat, bubonibus præcipue applicasse capas coctas contritas cum sinapi albo recentem molito; quod si sinapi album deesset, ejus loco sumebat theriacam, eamque cum capis contundebat ac miscebat, nec alio attractivo medicamento utebatur; quo remedio sæpe intra tres dies bubo & abscessus maturabantur, aut ad summum quarto die.

XV. Sunt qui solam theriacam bubonibus imponunt, cujus tamen usus multis valde suspectus est, ac propterea Valescus de Taranta, lib. 7. Philon. pharmac. cap. 16. jubet applicare theriacam inter regionem cordis & abscessum: *Quoniam, inquit, venenum ante se expellit, ideo errant qui illam illinunt abscessui.* Multi tamen aliter sentiunt. Hanc quæstionem fusè tractat Nicolaus Florentinus, lib. de venen. nec non Gentilis, & alii.

XVI. Nonnulli Chirurghi tumorum pestilentialium curationem cum mercurio vivo aggredi non extimescunt: in quem errorem etiam quondam Simonium, doctum Lutetiæ Medicum,



protractum fuisse scribunt, qui hoc remedium in se ipso ulus ad dirigendum pestilentem inguinis bubonem, illico vires prostratas sensit, brevique delitescente bubone, occubuit. Huic damnosissimo errori etiam graviter intricatus fuisse videtur Paræus, qui lib. 21. cap. 29. inunctiones mercuriatis ad pestis curationem magnopere extollit, haud secus ac si æque necesse foret venenum pestilens, quod æreum & subtilissimum est, eodem modo & remedio attenuare, fundere, ac resolvere, quo venereum crassum ac tenacissimum attenuatur & resolvitur. Quare autem mercurius ad pestis & pestilentis bubonis curationem non conveniat, notum esse potest ex eo quod Palmarius, lib. de peste, cap. 24. scribit: Sunt, inquit, qui unguento ex hydrargyro corpus inungunt, ignari frigidum & humidum hydrargyrum calamitosum veneni labem cum humore intro regerere, mortemque inferre, contaminatis visceribus; quod multis usu venisse, animadverti.

XVII. Ad bubonis pestilentis curationem mirificè laudatur hoc emplastrum Paracelsi:

Rec. Gummi opoponacis, unc. ij.  
Serapini, unc. iij.  
bdellii, drach. iij.  
galbani, unc. j.  
olibani, drach. ij.  
dissolvantur in aceto, & colentur, addendo pulverem unius busonis, ac etiam rana exsiccata,  
sulphuris vivi, unc. j.  
camphoræ, drach. j.  
Fiat emplastrum, imponendum tumori; & singulis sex horis renovandum.

Idem Paracelsus etiam solo opoponaco aceto dissoluto emplastri forma utitur. Ad citam verò maturationem opoponacem cum oleo laterino miscet, atque ita expeditè maturare & malum tollere dicit. Gregorius Horstius de morb. contagios. magni facit hoc sequens emplastrum pestilentielle Angeli Salæ, quod magnò encomio describit:

Rec. Gummi Sagapeni,  
ammoniæ,  
galbani, ana unc. iij.  
terebinthina cocta,  
cera virginea, ana unc. iij. s.  
magnetis arsenicalis subtiliter pulverisati,  
unc. ij.  
terra vitriolata, unc. j.  
olei succini, unc. ij.  
radic. aronis pulv. unc. j.

Gummi depurentur cum aceto squillitico, & ad consistentiam emplastri decoquantur, deinde cum rebus aliis fiat emplastrum lege artis, quod excellentissimum atque specificum est ad extrahendum virus pestiferum ex profunditate ad extra, præcavendo ne vicissim ad interiora regurgitet, & cor ipsum suffocet, ut credam inter omnia topica simile

remedium non inveniri. Hoc emplastro carbunculus obducatur, paucis horis venenum extrahet. Preparatio magnetis arsenicalis antidoti, hæc est:

Rec. Arsenici crystallini,  
sulphuris vivi,  
antimonii crudi, ana part. æq.

Hæc tria in mortario ferreo pulveriscentur, in vase fortissimo vitro ponantur ad ignem arena; donec vitrum optimè incalcescat, & prædicta solvantur atque liquentur instar picis: tunc raptò vitro, eximenda materia, & in unam massam cogenda, quæ erit dictus magnet; ejus maximum encomium videndum apud Angelum Salam, anatom. vitriol. tract. 2. cap. 10.

Ad bubonum & carbunculorum curationem ab aliis magnopere commendatur hæc mixtura de fuligine:

Rec. Fuliginis camini, drach. x.  
fermenti,  
terebinthina,  
butyri, ana unc. j.  
saponis Veneti, unc. j. s.  
mellis rosacei, drach. vj.  
salis communis, unc. s.  
vitella ovorum n<sup>o</sup>. ij.  
theriaca,  
mithridatii, ana drach. ij.  
Misceantur.

Cum anno 1655 pestis Ultrajecti nonnihil grassaretur, pro nosocomii aliisque pauperibus ægris in Collegio Medico præscriptum fuit hoc cataplasma bubonibus applicandum:

Rec. Radic. liliorum alb.  
caparum sub cineribus assat. ana unc. j.  
fol. malva,  
althæa,  
scabiosa,  
flor. chamomill.  
meliloti, ana M. j.  
ficuum, paria x.  
Coctis & contusis adde,  
farina sem. lini,  
fœnugraci, ana unc. j.  
stercoris columbini, unc. ij.  
olei chamemelini,  
ung. althæa, ana unc. j. s.  
fiat s. art. cataplasma.

Experientissimus Paulus Barbette, præclarus Amsterodami Practicus, in suo libello Belgico quem de peste edidit, ad curationem bubonis pestilentis admodum extollit Emplastrum magneticum arsenicale, cum eoque bubones non ad suppurationem deduci, sed eorum venenositatem, felicissimo successu, foras evocari, scribit. Quia autem in perniciosissimo hoc morbo impium foret quippiam celare quod communi commodo inservire posset, ille satis liberaliter hanc

hanc suam medendi methodum adscribit, & publici juris facit: quæ quia imprimis notatu digna est, ipsius Auctoris verba Latinitate donata hîc adscribi merentur: *Bubonis*, inquit, *curationem hoc modo instituere consuevi: Quamprimum impono vesicatorium, etsi vix quidquam intumuerit, non premittendo cucurbitulas, quoniam illa mihi non placent, quia dolores & febres excitant, bonos praesque humores aequaliter attrahunt, totumque sanguinem magis turbant. Post septem, octo, pluresve horas, vesicam excitatam incidere curo, & impono emplastrum magneticum arsenicale, quod inter omnia alia quæ unquam vidi, aut nominari audivi, praeclarissimos maximosque effectus edit, quemadmodum quilibet, qui eo utitur, comperiet. Ejus descriptio invenitur apud Hartmannum & Agricola, estque hac:*

*Rec. Antimonii crudi,  
sulphuris flavi,  
arsenici albi, ana unc. ij.*

*Subtilissime pulverisata sepeliantur in phiala in arena, subministretur ignis donec colliquescant, & colorem rubeum subobscurum induant. Vase refrigerato exime materiam, qua Magnes arsenicalis vocatur, & venenata amplius non est, ut in canibus cuilibet id experiri licet, Postea,*

*Rec. Gummi serapini,  
ammoniaci,  
galbani,  
magnetis arsenicalis, ana drach. iij.  
terebinthina Laricea,  
cera, ana unc. i.  
olei succini, drach. ij.  
terra vitrioli dulcificata, drach. j.*

*Gummata dissolvantur in aceto vini forti, & per pannum linteum expressa, bulliendo iterum inspissentur ad priorem consistentiam. Deinde seorsim eliqua ceram & terebinthinam, & extra ignem agita, donec in spissitudinem unguenti redigantur. Adde porro supradicta gummata, & magnetem arsenicalem, cum terra vitrioli & oleo succini, & habebis emplastrum ad extrahenda omnis generis venena efficacissimum.*

*Hoc emplastrum, inquit, ejus natura esse comperi, quod si cuti crassa duraque imponatur, tunc ne minimam quidem crustam faciat, & nihilominus malignos humores tam potenter extrahat, ut magnitudinis nucis tumor interdum quatuor aut sex dierum spatio penitus evanescat: sed hoc non semper tam cito facit; atque hinc saepe urget necessitas subita evacuationis, ut primò vesica vesicatorio excitetur: & tamen in nonnullis validis corporibus crustam non facit, nisi*

*impositum vesicatorium non solam cuticulam, verum etiam cutem ipsam nonnihil corroserit. Sed in junioribus ac tenellis corporibus, etiam sine praemisso vesicatorio, crustam satis commode inducere potest. In hac crusta propriè subsistit seu continetur foras extractum venenum, & propterea mediocrem habet crassitiem, cum interim subjecta cutis vix sit exesa; quod notatu dignum est: nam hanc causam esse arbitror, quod longè facilius, quam alia arte facta crusta, dissolvi possit: quippe 24 aut 36 horarum spatio, sine praemissa scarificatione, illa radicitus spatulâ eximi potest, cum minimo aut nullo patientis dolore; si modo aliquantum unguenti basilici cum theriacali mixtum, sub communi emplastro aliquo pestilentiali imposueris. Alioqui ad crusta separationem & casum, hoc sequens valde convenit:*

*Rec. Mellis virginei,  
axungiae anatis, ana unc. j.  
fuliginis camini, drach. vj.  
terebinthinae Argentinensis, unc. j.  
vitell. ovor. N. ij.  
theriacae, drach. iij.  
olei scorpionum, q. s.  
misce, fiat unguentum.*

*Si tumor, post primam ablatam crustam, non satis evanuerit, excitabis aliam secundam, aut tertiam per antedictum emplastrum arsenicale magneticum, & tractabis ut ante. Denique ulcus remanens iterum sanabitur cum emplastro de minio, albo cocto, diapompholygos, aliisque siccantibus & cicatrizantibus medicamentis. Sed non nimium festinandum in sanatione & occlusionis ulceris, ne forte mali aliqua reliquia intus superstites manentes, morbi recidivam & mortem inducant.*

**XVIII.** Nonnulli Medici bubones antequam ad perfectam maturationem pervenerunt, cultello per incisionem aperire jubent. De hac apertione ita scribit Valescus de Taranta, lib. 7. cap. 16. Avicennas, cui ego suffragor, suadet illos aperiri, priusquam fuscum acquirant colorem: quamobrem quidam aperiunt phlebotomo, vel novaculis quarto die. Ego verò quandoque jussi aperiri hujusmodi abscessus, & nihil exibat nisi modicum sanguinis: deinde in secunda visitatione fluebat virus & sanies. Non ergo expectetur perfecta maturatio. Verum hoc consilium nobis plane displicet, propterea quod talem immaturi tumoris apertionem magnus sequetur dolor, & ab hoc febris magna exacerbatio, cum virium prostratione. Ad hæc, etiam ipsa natura in opere maturationis à tali præpropere ac dolorosa apertione admodum interturbabitur, & loco ulterioris maturationis facile buboni magnam inflammationem & gangrænam inducet.

## CAPUT XIII.

## De curatione Carbunculorum, &amp; exanthematum.

**I**N hac peste carbunculorum curationem (1.) præter (2.) fudorifera antidota, aliaque interna medicamenta, etiam topicis sequenti modo instituimus: Sæpe prima & secunda die imposuimus folium brassicæ rubræ oleo raparum inunctum, quod in frequentissimo usu erat apud vulgares. (3.) Postea statim, imò ut plurimum ab ipso principio, per suppurantia dolores mitigavimus, & suppurando carbunculum à vicina carne separare annixi sumus. Illum in finem hujusmodi medicamentum topicum, carbunculis applicandum, paravimus:

*R. Radicum consolide majoris succ.  
herb. scordii sic. ana drach. ij.  
rad. altheæ succ. farinæ sem.  
lini cribratæ, pollinis farinæ tritici, ana unc. f.  
Fiat pulvis subtilis, cui affunde.  
aquæ communis, q. s.*

*Coquantur aliquantum, ut mucilagines solvantur, & compositio ad puliculæ crassioris formam deveniat, cui adde,  
mellis, terebinthinæ,  
unguenti apostolorum, ana drach. iij.  
picis liquidæ, ung. basilici, ana drach. ij.  
vitellum unius ovi, croci scrup. j.  
misceantur.*

*Interdum etiam addebantur theriacæ drach. ij.*

Hanc puliculam (4.) ob eximium commodum quod inde percepimus, in frequenti usu habuimus, & ex multis (5.) tentatis, nihil invenimus cum quo carbunculorum separatio & curatio citius ac melius perageretur. Illius aliquantum in linteo pinguius extensum anthraci imponebatur, idque bis terve de die renovabatur. Emplastra minus proderant, atque hinc rarius à nobis fuerunt imposita; & si iisdem uti cogeremur, ubi alia topica ad manum non essent, solum emplastrum diachylum cum gummis, vel basilicum, vel emplastrum ex galbano, diachylo & oxycroceo mistum; vel etiam in vulgaribus picem navalem liquefactam, ac tunc cum picis liquidæ æquali parte mistam, emplastri forma applicavimus: qua sola pice sæpius vidimus anthraces citissimè separatos, & dolores optimè sedatos fuisse. **Acia** (6.) & attrahentia topica plus damni quam commodi attulisse, & ficaltas ac dolorosas scarificationes (7.) plurimum nocuisse, & carbunculos, quo mitius tractarentur, eo melius & citius curatos fuisse, millies observavimus. Carbone separato & extracto, primò ulcus mundabatur digestivo, præcedente capite descripto, ac postea instar aliorum ulcerum percurabatur. Quantum ad curationem exanthematum, illam instituere necessum non fuit, quia hæc mortis instantis præsagia erant, neque curationi tempus dabant, quam si admisissent, per fudorifera & alexipharmaca curari debuissent.

## A N N O T A T I O N E S.

I. **G**alenus, lib. 14. method. med. cap. 10. in carbunculi curatione venæsectionem ad lipothymiam convenire docet, ut sanguis ebulliens, à quo dicit generari carbunculum, magna copia educatur. Eiusdem sententiæ quoque sunt Paulus Aegineta, lib. 4. cap. 25. Oriba-

Oribasius, *de curat. morb. lib. 3. cap. 27.* & Actuarius, *lib. 4. method. med. cap. 16.* Hoc veteres sequuntur Leonardus Fuchsius, Joannes Cornarius, Zacutus Lusitanus, alique multi neoterici. De hujus opinionis veritate hic multum differere necesse non est, cum illam satis examinaverimus supra, *cap. 3. annot. 1.* Illud unum tantum addemus, experientiam in hac peste adeo repugnasse huic curationis modo, ut ex omnibus illis, quibus ratione carbunculi vena secta fuit, nullum evasisse viderimus: in omnibus enim illis statim post venæsectionem, veneno ad centrum retracto, & cordis viribus prostratis, exaruerunt carbunculi, & mors brevi subsecuta fuit. Nos cum Galeno & aliis etiam probaremus venæsectionem, si verum foret illud quod tanquam verissimum præsupponitur, nempe carbunculos fieri à sanguinis ebullitione: sed quantum illa hypothesis absit à vero, docuimus *lib. 1. cap. 14. in textu, & annot. 1, 4, 5, 6.*

II. De purgatione, an conveniat, alii aliter sentiunt. Averrhoës, *lib. 3. collect. cap. 31.* in febre pestilente cum carbunculo, dicit, non sufficere medicinam unum tantum humorem purgantem, sed omnes, sicut sunt pilulæ cochineæ. Galenus in malignis exanthematibus etiam probat purgationem, *lib. 6. epid. sect. 2. cap. 29.* In apostemate pestilenti purgantia exhibet Avenzoar, *lib. 3. thes. tract. 3. cap. 1.* Purgationes quoque in hoc casu præscribunt Monardus, Ficinus, Zacutus, & alii. Contra verò experientia, & plurimorum aliorum illustrium Medicorum dogmata & auctoritates demonstrant, purgationes hic cane pejus, & angue fugiendas esse. Hanc quæstionem latius agitavimus supra, *cap. 4. annot. 1.*

III. Joannes Tagaultius, *chirurg. 5. lib. 1. cap. 7.* scribit, quod consolida major inter duos lapides contrita, divino quodam miraculo, anthraces sanet, & ex toto intra diem unum interimat. Hoc ipsum de scabiola viridi, in mortario lapideo tusa, & instar cataplasmati imposita, testatur Bauderonus, *prax. tract. 2. cap. 2.* Jacobus Horstius, *consil. de pest. dicit, anthraces tritico à sanis masticato, & imposito, egregie mitigari.* Nicolaus Myrepsus, *sect. 38. cap. 162.* inquit: *Carnem bubulam diligenter contusam, carbunculis imposito, solve post tres dies, & cum radice ascendit carbo: est probatum.*

Joannes Hartmannus jubet ut carbunculus in principio circumrotetur Sapphiro eleganti, donec circumferentia aliquoties à Sapphiro ducta vivere videatur. Hartmannus illud habet ex Paracelso, qui præcipit, ut spatio quadrantis horæ illa Sapphiri circumductio fiat, donec circulus appareat niger. Quam circumductionem cum Sapphiro plurimum prodesse, & carbunculi separationem citius promoveri, testes quoque sunt Crollius, Villanovanus, Albertus Magnus, Franciscus Ruëus, Sennertus, Jacobus Horstius, alique. Imò Wolffangus Gabelchoverus, *in schol. cap. 7. lib. de gem. Andr. Bacci, de hoc lapide ita scribit: Sapphirus anthraces tempore pe-*

*stis nasci vetat, & quod majus est, super anthracem posita, non aliter cum ac aqua ignem extinguit, ut sapius se expertum fuisse Antonius Guainerius testatur: nam ejus maltham ac venenositatem reprimat, & ne venenatus ejus fumus ad cor ascendat, ac spiritus inficat, impedit.* Nobis in hac peste Sapphiri copia nunquam fuit, ac proinde de virtutibus illius experimentum facere non licuit. Hujus tamen defectu jubet Paracelsus sumere crystallum instar Solis radiantem, eumque circumductum, eundem, quem de Sapphiro diximus, effectum edere tradit.

IV. Joannes Tagaultius, *Chirurgia lib. 1. cap. 7.* in eundem finem simile medicamentum facit, ex melle, sale, farina triticea, & ovorum luteis, cui ad citiorem carbunculi casum, interdum addit butyrum & axungiam suillam. Avicenna & Paulus Aegineta ad carbunculum radicitus evellendum, commendant, ut malum punicum acidum in aceto coquatur, & ubi intabuerit, in lavorem conteratur, linteoque illitum imponatur, siccatum verò rursus aceto humectetur. Verum hoc nobis ad separationem nihil prodesse posse videtur, sed conferre duntaxat ad malignitatem ita inhibendam, ut carbunculus ulterius proferpere nequeat. Melius Joel, *tom. 5. lib. 1. sect. 3.* pro pauperibus hanc mixturam imponendam præscribit,

Rec. terebinthina in aqua  
scordii lota,  
mellis rosacei, ana unc. l.  
miscantur.

Huic mixturæ ego tertiam partem picis liquidæ, cum pauxillo saponis hispanici admiscere suaderem, ut, sic efficacius evaderet medicamentum, Alii hoc cataplasma laudant:

Rec. ficuum ping.  
passularum mund.  
nucleorum nucis juglandis, ana unc. ij.  
coquantur aliquamdiu in vini albi  
q. s. deinde optime pistentur in  
cataplasmati formam, cui  
admisce vitellas duorum ovorum.

Julius Palmarius, *lib. de pest. cap. 27.* isti cataplasmati adiicit aliquantillum salis: & postea hæc addit: *Idem præstat ovi luteum cum sale, in tenellis corporibus. Vel*

Rec. ovorum recentium lutea sex,  
salis communis torrefacti, unc. j.  
olei liliorum unc. l.  
theriaca, drach. j.  
farina hordei, q. s.  
fingito cataplasma, quod stupis  
excipiatur: duris corporibus convenit.  
Hoc validius, inquit, fiet, si  
saponis,  
calcis nuper extinctæ,  
& fermenti nonnihil addatur,

A 4

cym

cum porci vetusta & salsa axungia.

Angelus Sala, tract. de peste, imponit hoc emplastrum.

Rec. picis navalis,  
resina pini,  
guthmi ammoniaci depurati,  
cera virginea, ana unc. j. s.  
asphaltis, unc. j.  
mellis ad nigredinem cocti ana. s.  
camphora in oleo succini  
dissoluta, drach. j.  
fiat s. art. emplastrum.

Marcellus magni facit emplastrum dictamnus vocatum, quod describit operis cap. 7.

V. Paræus, lib. 21, cap. 34. scribit se tali remedio sæpe feliciter usum fuisse ad carbunculorum ardores doloresque sedandos, & promovendam suppurationem:

Rec. Fuliginis camini, unc. iiij.  
salis communis, unc. ij.  
redigantur in pollinem, adjectisque duorum ovorum vitellis, agitentur simul, quoad pulvis consistentiam adeptum fuerit medicamentum, quod tepidum imponatur.

Franciscus Joel, loco citatio, hoc sequens ex fuligine emplastrum mirifice & venenum elicere, & maturare, putridasque partes à puris separare, & crustum auferre dicit.

Rec. theriaca Androm.  
mixbridatii, ana drach. ij.  
terebinthina in aqua scordii lota,  
butyri sine sale, ana unc. s.  
mellis rosacei, drach. iiij.  
salis torrefacti drach. ij.  
fuliginis camini drach. v.  
saponis nigri, drach. vj.  
vitellum ovi unum  
contundantur & subigantur s. art. & fiat emplastrum.

VI. Varii sunt qui vesicatoria etiam ipsis anthracibus imponunt, atque ita eorum separationem citius promoveri asserunt. Verum quamvis in hac peste illud non semel à Chirargis tentatum fuerit, nunquam tamen laudabilem effectum inde videre potuimus. Nonnulli alii carbunculos à principio aqua forti illinunt, alii ferro candenti eosdem aliquantum inurunt, ut veneni magnam partem absumant, ejusque malignitatem coerceant. Verum cum ab inducta crusta venenati humoris exhalatio seu transpiratio impeditur, hanc

curacionem plus damni, quam commodi inferre, verisimile est.

Ita ut hujusmodi acria remedia in peste Noviomageni non modo nihil, aut parum profuisse, sed multoties nocuisse, à nobis observatum sit. Verum anno 1655, cum peste Ultrajectum multasque alias urbes invasisset, inventum est aliud, acerrimum quidem, sed aureum certè remedium, quo carbunculi mox cohibentur, ut ulterius non proserpant, & in vicinas partes limites non extendant; sed quam citissime à sanis separantur & excidant. Illud est oleum seu butyrum antimonii, quod, cum carbunculus jam sedem fixit, cum pluma circumferentis ejus leviter illinitur: mirum profectò quam citò emortuæ partis à sana circumstante separationem faciat, ita ut postea curatio emplastris facile peragatur. Hujus butyri compositionem describit Schroderus, in sua Pharmacopœa Medicochymica, lib. 3. cap. 15:

Rec. Antimonii purissimi,  
mercurii sublimati, ana part. æq.  
miscuantur exactè in mortario lapideo, hinc vitrea retorta indantur, & in cella vinaria per triduum deponantur, ut liquecant, tunc per retortam istam distillantur in arena igne modico, vel igne aperto sensim & successivè aucto: sic liquor seu butyrum antimonii instat glaciei egreditur, qui si concrecat in collo, ne id obstruat, admove cautè ignitum carbonem, ut liquecat. Liquorem egressum rectifica per retortam vitream. Vel hoc oleum cinnabari sua anterectionem imprægnetur. Nimirum cinnabari tritam adde dicto oleo, stentque in digestionem horis 24. vitro clauso, in cinere, sic fiet unio, hinc rectifica per retortam.

Hoc oleum seu butyrum in carbunculis, & quibuslibet sphacelatis ac emortuis partibus à sanis separandis, mirabilia præstat.

VII. Rhazes, Oribasius, Paulus Aegineta, Hollerius, Platerus, alique plurimi magni nominis Medici, anthraces altè scarificare, vel eisdem, cum maximis ægrorum doloribus, novacula usque ad radices conscindere jubent. Verum hæc curatio duabus de causis rejicienda videtur: Primò, quia ob ingentes cruciatus venenatorum humorum magnus impetus fit in partem affectam, à quibus partes sanæ, carbunculo proximè adstantes, novacula incisæ ac valde jam dolentes, inficiuntur, & pars carbunculi sunt: ad hæc febres exacerbantur, & vigilie inducuntur. Secundò, quia in hac nostra peste millies docuit experientia, hujusmodi altas scarificationes & excisiones infelicissime successisse, & semper carbunculos, quo citius tractabantur, eo citius curatos fuisse.

# DE PESTE, LIBER QUARTUS.

P R O O E M I U M.

**Q**Uamvis illa, quæ præcedentibus libris de Pestiferæ Luis diagnosi, præcautione & curatione ex nostris aliorumque observationibus curiosissime conscripsimus, ad historiæ Pestis totalem cognitionem abundè sufficere posse viderentur, tamen ad maiorem rei elucidationem, utile nobis visum fuit prædictorum confirmationem practicis exemplis stabilire, atque in eum finem ex innumeris in hac Noviomagensi peste à nobis annotatis ægrorum historiis, pauciores quasdam simul in unum librum congerere, eumque prioribus tribus adjungere, ut hoc pacto simul & diri morbi mores, & nostræ curationis methodus, multaquæ in utrisque observanda occurrerunt, lectori Medico melius & clarius innotescere possent. Non tamen hic, alicujus ostentationis gratia, innumerabilium ægrorum, à nobis curatorum & sanatorum, historias simul colligere, (illud enim nimis longum, imò etiam inutile fuisset cum mea curandi methodus ex paucis abundè satis innotescere possit) sed tales duntaxat exhibere volui, in quibus plerumque aliquid singulare, vel ad curationem, vel ad diagnosin, vel ad prognosin, considerandum occurrit; aut insolitum quid in excretionibus aliisve symptomatibus, item in contagio & morbi tempore, vel more, observatum fuit.

## HISTORIA I.

**A**ncilla Antonii Vos, Mercatoris vini, anno 1635. 6. Novembris ægrotare coepit; circa vesperam ad illam vocatus fui. Inveni ipsam magna cordis anxietate pressam, & febricitantem, cum capitis gravativo dolore, ac pulsu parvo, crebro & aliquantum inæquali: vires tamen non multum dejectæ erant. Duas parvas pustulas magnitudinis seminis anisi, rubicundas & dolentes, alteram in mamma dextra, alteram in medio ossis sterni habebat, quæ anthraces erant incipientes, certa pestis indicia. Præscripsi hunc haustum sudoriferum, à quo bene, & totâ fere nocte sudavit, cum magno levamine:

℞. *Extracti cardui benedicti, salis absinthii, ana scrup. j. salis cardui scrup. i. theriacæ*  
A 2

*theriacæ androm. drach. j. aquæ theriacalis, & cardui bened. ana unc. j.  
olei vitrioli gut. xv,  
Misce, fiat haustus.*

Postridie vidimus prædictas pustulas ad unguis pollicis latitudinem increvisse, & jam perfectos esse carbunculos nigricantes, in superficie vesiculam habentes, quâ pertusa & ablata effluxit ichor niger ac venenatus, & sub illa vesicula latens carbunculus denudatus est, cui imposuimus unguentum ex apostolorum & basilici ana part. æq. superinjecto emplastro diachylo cum gummis. Ad sitim hoc julabium præscripsi:

*℞. Aquæ cardui benedicti, lib. j. scabiosæ, & acetosæ, ana lib. f.  
syrupi de succo citri, unc. ij. olei vitrioli q. s. ad gratum acorem,  
Misce, fiat juleb.*

Statim post meridiem reiteratus fuit prior haustus sudoriferus, à quo cum rursus optime sudasset, anthrax qui in medio ossis sterni erat, se extendit ad latitudinem femi daleri imperialis. Tunc pulticulam nostram ad carbunculos (lib. 3. cap. 13. descriptam) quam interea præparari curaveram, anthracibus imponere, & ter de die renovare jussi. 8. Novembris, hoc conditum præscripsi, de quo ter quaterve de die ab apice cultri particulam magnitudinis avellanæ comedit:

*℞. Specierum liberantium drach. j. radicum helenii condit.  
cortic. aurantiorum cond. ana unc. f. diascordii Fracastorii, drach. ij.  
syrupi acetositis citri q. s.  
Misce, fiat conditum.*

Reiteratum quoque fuit antedictum julabium: 12. Novembris anthraces à vicinis partibus separati sunt; quibus extractis, unguentum mundificativum de apio cum unguento apostolorum mistum, ter quaterve impositum fuit, deinde cum unguento aureo cavitatibus carne repletis, & emplastris ad cicatrizationem perductis, ægra convaluit. Toto morbi tempore alvus satis respondit, & præter anxietatem (quæ post secundum sudorem una cum febre cessavit) alia valde gravia symptomata non supervenerunt.

### Annotatio.

**A**Nno 1635, æstas erat calidissima & siccissima, eo nomine clara, quod tunc temporis duo potentissimi (nempe Regis Galliarum & Hollandorum) exercitus simul conjuncti in Brabantia Lovanium obsederant. Hac æstate circiter Junio mense febris quædam maligna & pestilens Noviomagi passim grassari cepit, quæ postea adventu utriusque dicti exercitus plurimum adaucta, maximam stragem edidit. Hujus febris curatio in principio propter mali novitatem difficilior visa fuit, sed non diu post compertum est, venæsectiones ter quaterve, & interdum pluries reiteratas, ad hujus morbi curationem primum subsidium attulisse, aliorumque lenientium, refrigerantium, sudoriferorum & alexicacorum medicamentorum usu æ-

cedente, à maximi illius hostis injuriis plurimos fuisse liberatos. Circa finem Septembris febris hæc valde imminuta est, ita ut multo pauciores ægrotarent; sed in multis eorum quos tunc morbus tenebat, maculæ exiguæ rubræ & purpuræ in corporibus apparuerunt, certa indicia febris illius pestilentis quam purpuream, petechialem, peticularem, vel lenticularem appellant Medici. Circa medium Octobris varii absque his maculis febris cum summa anxietate correpti, subito intra biduum vel triduum interierunt, & venæsectiones antea valde utiles, tunc inutiles, imo noxias evasisse, compertum est. In principio Novembris certissima pestis signa in ægrotis apparere coeperunt, atque exinde dira labe paulatim per urbem dispersa fuit.

HISTO-



## HISTORIA II.

**P**etrus Vervoort, cujus ædibus Regina Angliæ pro insigni erat, vir robustus, 24. Januarii, anno 1636, peste correptus fuit. In ipso principio meum consilium imploravit. Vomebat, valde anxius erat, cum pulsu celeri & inæquali, capite dolebat, & durum in altero inguine sentiebat tumorem. Tale fudoriferum statim præscripsi, quod circa vesperam assumpsit:

℞. *Confectionis de hyacintho, salis scordii, ana scrup. j.*  
*salis cardui bened. scrup. f. theriaca Androm.*  
*diascordii Fracast. ana scr. ij. aque theriac. & cardui bened. ana unc. j.*  
*olei vitrioli gut. xij.*  
*Misce, fiat haustus.*

Tota nocte vehementer sudavit, idque vigil, nam primis octo horis à somno abstinere jusseram. Omnia prædicta symptomata hoc unico sudore cessarunt; ipse quoque tumor in inguine evanuit, atque æger sequenti die mediocriter valuit. Deinde per aliquot dies quotidie bis terve particulam hujus conditi sumpsit:

℞. *Pulveris bezoartici drach. j. radic. helenii condit.*  
*cortic. aurantiorum cond. ana drach. iij. theriaca drach. j.*  
*diascordii drach. ij. syrupi de scordio q. s.*  
*Fiat conditum.*

2. Februarii, cum se jam plane sanatum esse sentiret, & alvum tamen per aliquot dies non deposuisset, exhibui pilularum nostrarum antipestilentialium drach. f. unde bis terve alvum dejecit, nec pluribus medicamentis opus habuit.

## Annotatio.

**I**N velocissimo hoc morbo semper periculum est in mora, & sæpe animadvertimus illos, qui in ipso principio citissime medicamenta assumentes, cito & facile curatos fuisse; principio autem neglecto summum periculum ægris impendisse. Quod ipsum in sua Praxi observavit quoque Sennertus, nam lib. 4. de febr. cap. 6, sic ait: Existimo tot homines peste interire, quod plerique tardius alexipharmaca usurpant; multosque

posse servari, si ea citius, & antequam venenum humores corrumpere incipit, assumerent. Aliquoties enim observavi in pestilentibus constitutionibus, quosdam cum se infectos sensissent, statim sumptis alexipharmacis ad sudorem se composuisse, & postea nihil mali amplius passos esse, sed postmodum ad consueta negotia rediisse. Contra si curatio protrahatur, & hora octo vel duodecim jam elapsa sint antequam medicamentum aliquod propinatur, centesimus vix evadit.

## HISTORIA III.

**G**erardus Lucas, cerevisiarius in platea Hesia habitans, peste cum gravissima febre affectus fuit: adfuerunt summa anxietas, capitis dolor, ardor internus, linguæ ariditas, sitis, & dolor sub axilla absque tumore. Duo assumpsit alexipharmaca, à quibus copiose sudavit; sed post secundum sudorem loco tumoris sub axilla magnus carbunculus visus fuit, è quo signo mortem prædixi, quæ tertia morbi die præfagium nostrum verificavit.

## Annotatio.

**P**aucissimis loco tumorum in emunctoriis carbunculi nascebantur; sed quibus id contingebat, illi moriebantur omnes.

HISTO-

## HISTORIA IV.

**J**acobus vander Mijl; eques robustus & plethoricus, se peste correptus sentiens cum dolore sub axilla absque tumore, statim suo ipsius consilio Chirurgum adiit, & lateris affecti venam in brachio sibi pertundi curavit. Extractis aliquot sanguinis uncias domum recessit: ilico magno horrore correptus est; accessit vomitus enormis, cum summæ cordis anxietate & virium prostratione. Tunc ad me concursus est. Exhibui statim haustum sudoriferum, quem cum evomisset, statim alterum alexipharmacum dedi, quod quidem retinuit, verum sudare non potuit. Sequenti nocte febris multum adaucta est, valde sitiit æger, omnemque assumptum potum revomit: deliravit usque ad horam septimam matutinam: tunc iterum mentis compos factus, de maxima debilitate, ac dolore sub axilla conquestus est: circa meridiem obiit.

## Annotatio.

**F**orestus in Peste Delpheni ad ægros in ipso morbi principio vocatus, iis statim venam incidit: & addit, omnes illos quibus post duodecim horas, vel diem naturalem, vena aperta fuisset, mortuos esse, vel admodum paucos ex iis evasisse. Nos in hac Peste Novio-

mageniæ in ipso quidem principio venæsectiones unquam feliciter administratas fuisse observavimus, sed omnibus quibus sanguis quocunque morbi tempore detractus esset, mortem multo celerius advenisse.

## HISTORIA V.

**J**oannes Dubbert magna angustia cum febre correptus, intra biduum mortuus est, nullo externo pestis indicio uspiam apparente, ita ut illum non peste, sed alio quodam morbo extinctum esse crederent domestici. Verum cum corpus jam duodecim horis emortuum cistæ ferali imponeretur, viderunt in cadavere post mortem multa exanthemata nigra erupisse, vera pestis indicia.

## Annotatio.

**I**nterdum à fortiore pestilenti venenocitius extinguiebantur ægri, quam natura malignitatis aliquod signum foras propellere posset, atque tunc interdum etiam post mortem aliquod culti veneni indicium foras prodibat. Quod etiam annotavit Forestus lib. 6. in scholio observationis 12: *Hic (inquit) ob virtutem debilem neque petechia ab Italia dicta, neque macula, neque bubones vel anthraces apparent, sed multum post mortem magna quidem macula nigra circa dorsum spectatur, ut si quis sustibus casus esset, ab alto cecidisset; quod præter Montanum etiam nos aliquando observavimus.* Propterea bene monent Medici, ut tempore grassantis pestilentiae, absentibus externis pestis indicibus, statim non temere iudicetur morbum non esse pestilentem, nam sæpe aut obruitur natura priusquam illa signa prodeant; aut

propter virtutis debilitatem, aliave aliqua de causa impeditur, ut illa expellere non possit. Sicut variis in hac peste contigit, inter quos etiam fuit hospitis mei filiulus, qui absque ullo externo pestis signo quarta morbi die obiit; nec etiam post mortem ulla signa prodierunt; & tamen ipsum peste laborasse & mortuum esse, inde satis constare poterat, quod eodem circiter tempore adhuc alii duo ejusdem hospitis liberi una cum ancilla peste morerentur. Tale exemplum se quoque vidisse refert Alexander Benedictus lib. de Peste, cap. 12, in quodam Patricio Veneto, qui peste absque ullo externo signo mortuus est. Cui non absimile quoque describit Benivenius lib. Abditior. 54. Videantur hac de re quædam supra, lib. 1. cap. 7. annot. 1.

## HISTORIA VI.

**M**ulier quædam lotrix nomine Belia (quæ in nostris aliorumque multorum ædibus linteamina lavabat) inserviebat Gertrudæ, ancillæ Dimmeri de Raet, quæ pestelaborabat, & in horto decumbebat. Cum huic ancillæ

ancillæ varia exhibuisse medicamenta, & carbunculo separato illa jam propemodum sanitati restituta foret, atque hinc domestici Dimmeri de Raet valde lætarentur, vidi tamen mulierem hanc valde tristem sæpius alta suspiria ducere, sæpius lachrymare. Quodam tempore ab ipsa seorsim inquisivi tristitiæ hujus causam. Primo quidem nihil ab ipsa scire potui, sed tandem bonis verbis magnâ importunitate ipsam eo detorsi, ut promitteret se tristitiæ suæ causam secretam mihi indicaturam, si juramento asserere vellem me nulli de ea quippiam dicturum ante rei eventum. Promisi quod petiit. Tunc illa cum fletu dicebat, sciebam satis hanc ancillam non morituram, sed morietur uxor Dimmeri de Raet, quæ me valde amat, ac propterea adeo tristis sum. Quærebam unde illud sciret, cum illa tunc peregre versaretur? vidi, inquebat, super tabulatum in domo illius ad portam magni cubiculi anterioris spiritum ejus sine capite, optimis vestibus indutum, & clavem portæ haud aliter manu tenentem, quam si januam aperire voluisset, quæ spirituum visio mihi familiaris & molestissima est; quorumque vero spiritus sine capite video, illi omnes intra paucos menses moriuntur, cujus rei certum eventum videbis in hac foemina. Gaudebam occasionem mihi datam esse videndi, anne hæc spirituum visio, de qua multi multa nugantur, aliquid certi contineret. Dimmerus de Raet una cum uxore tunc temporis Ultrajecti degebat, quò propter pestis metum diu ante confugerat. Injunxi sororibus illius ut ipsi scriberent, ne domum reverteretur antehyemem. Quid sit? post aliquot septimanas uxor Dimmeri de Raet in urbe illa, in qua fere nulla pestis vigeat, & in domo nulla labe infecta, peste corripitur, & intra paucos dies moritur.

### Annotatio.

**S**ocrætes quondam de se ipso testatus est, se dæmonium habere, non semel visum, sed toto vitæ suæ tempore ipsi familiarem, qui semper eum dehortaretur, hortaretur nunquam. Hoc fundamento innixus Plato, qui Socratem virum veracissimum esse, & pro vita servanda nec mentiri, nec turpe quid committere velle sciebat, docuit ab experientiâ illâ dari dæmones, eamque doctrinam multis verisimilibus rationibus confirmavit. Postea super hac re à multis multum nugatum est: alii dæmones immortales, alii mortales, alii tantum malos, alii etiam bonos, alii debiles, alii potentes, alii sentientes, alii insensiles esse, alii illos etiam coire & generare, alii illos ex duobus vel tribus elementis constatos, alii meras tantum species ab objectis separatas & in aëre hærentes, alii intelligentias esse, & multo plura hujusmodi somnia tradiderunt, quibus etiam magni Philosophi multas chartas satis inutiliter commacularunt: qua de re in Cardani *de Rerum varietate lib. 16. cap. 93*, legi potest. Pselli mirabilis & satis jejuna opinio, cui non sine ratione ipsius quoque Cardani de dæmoniis opinio, loco citato, & lib. 18. *de Subtilitate* descripta, atque à Scaligero *Subtil. Exercit. 355*. curiosius examinata, adjungi potest. Profecto omnes falli nobis videntur, quotquot spirituum non naturalium naturam naturali ingenio comprehendere volunt. Præstat sane hæc in parte Litteris Sacris simpliciter fidem adhibere, quam talium spirituum substantiam, quantitatem, qualitatem, formam, actiones, aliaque similia, terrestri cerebro comprehendere, me-

tiri & indagare velle. Sacra pagina docet Sanctis viris sæpius Angelos aliosque spiritus apparuisse; Prophetas etiam modo has, modo illas visiones vidisse, eaque omnia divinitus facta fuisse credimus: nonne ergo impium & Christiano homini indecens foret, inquirere velle ex qua materia illi spiritus confecti fuerint? quam longitudinem vel gravitatem habuerint? quomodo ad suas actiones impulsus, & visibiles facti sint? quibus mediis, & per quam viam ab æthere descenderint? Sic rursus diabolicas illusiones sapissime quoque factas fuisse, eadem Sacra Pagina testatur. Ita diabolus in forma serpentis locutus fuit cum totius humani generis prima matre Eva, eamque miserabili totius posteritatis lapsu decepit. Sic etiam Satan in forma Samuelis Prophetæ apparuit regi Saul, eique infortunium suum prædixit. Sic Magi Egyptii plurimis diabolicis artibus Pharaonis omniumque Egyptiorum oculos mirè effascinarunt. Præter Sacrarum Litterarum testimonia quoque sunt historiarum quæ de incubis & succubis, ut & illarum quæ de plurimis spiritibus, qui multis apparuerunt, & cum illis locuti sunt, passim leguntur. Notissimum quoque est Sagas etiam hodiernas, hominibus quaslibet spirituum formas in speculis & vitris aqua plenis videndas exhibere; ut, si furem, vel habituram amasiam, vel futurum maritum, vel alium videre quispiam desideret, in speculo ejusdem imaginem integramque formam per apparitionem spiritus spectandam offerant; idque testimoniis plurimorum fide dignissimorum, qui illa spectra viderunt, magis constat,

stat, quam ut de eo dubitari possit. Quis horum spirituum non naturalium naturam naturali ingenio comprehendat? qui illud tentare volet, facilius intra naturalium terminos manens, ventorum gravitatem ponderare, ignis calorem ulna metiri, aquarum guttulas montiumque arenulas dinumerare poterit. Diabolum plurimis illusionibus, spectris, vocibus, multorum hominum mentes seducere, exterrere, perturbare, atque à vero Divino cultu divertere, certum est; utque magis irretiantur ipsius retibus, solet sæpe vel verbis, vel spectris res præteritas ad hominum petitionem cum magna omnium admiratione demonstrare. Sic quondam narravit nobis strenuissimus vir D. Morgant, legionis Præfectus, se militem habuisse, qui per dæmonem sibi familiarem cujuslibet formæ spiritus videndos exhiberet; cumque D. Morgant, his diabolicis apparitionibus nullam fidem adhiberet, aliquod experimentum sumere placuit in præsentia plurium Nobilium: petiit igitur à milite ut videndos exhiberet hos quatuor Heroës, Hectorem, Achillem, Alexandrum Magnum, & Iulium Cæsarem: miles rursus petiit ne durante visione quippiam verbum nutiret; cumque facto cum creta in pavimento, circulo rotundo, variis caracte-

ribus abstrusis inscripto, se in medio ejus stitisset, & obscuro susurro quippiam secum murrasset, statim magna vi aperta fuit cœnaculi (in quo erant) porta, & cum omnium horrore intrarunt quatuor dicti Heroës; unus post alium, tali forma & magnitudine quali vixisse dicuntur; cumque ad alterum cœnaculi finem pervenissent, eadem viâ lento gradu reversi per portam denovo, exierunt, & janua post ipsos magnâ violentiâ sponte rursus oclusa est. Hæc nobis narravit D. Morgant, qui propter has diabolicas artes istum militem à cohorte sua abegit. Multoties etiam diaboli per spirituum apparitiones futura prænunciant, ut hoc modo nonnullos præsciendi & prædicendi cupidine captos alliciant & irretiant: atque tales sunt illæ spirituum visiones, cujus exemplum in prædicta historia recensuimus. Verum satius esse arbitramur, ardentibus precibus Deum orare ne nos inducat in tentationem, & omnia talia spectra pro diabolicis illusionibus simpliciter habere, quem talium spirituum formam, substantiam, generationem, & causam naturalem cum multis Philosophis frustra inquirere. Sufficiat nobis certum esse, hujusmodi spectra à quibusdam videri.

## HISTORIA VII.

**P**etrus de Wildt, qui in platea cervina habitabat, uxorem suam peste jam correptam, & bubonem habentem in inguine (quod tamen malum ipsa celabat) inivit, atque ab ipsa statim pestem contraxit. Advocatus fuit chirurgus Egmundus Anglus, qui utrique vomitorium ex vino stibiato exhibuit; à quo enormiter vomuerunt, & multos etiam secessus habuerunt. Circa vesperam ad me concursus est. Inveni ægros adeo delassatos & debilitatos ut se vix commovere, imo vix loqui possent: pulsus erat titubans, & adeo exilis ut vix sentiretur. Vomendi irriti conatus adhuc graviter ipsos torquebant: alvus etiam subinde adhuc aquosa quædam excernebat. Præmissis mortis præfagio, utriquo talem haustum calide exhibui:

*℞. Theriacæ androm. scrup. ij. aquæ theriacalis, unc. j.  
aquæ cinnamomi, unc. i.  
Misce, fiat haustus.*

Hinc vomitus quidem cessavit, verum supervenientibus crebris animi deliquiis, sequenti nocte ambo extincti sunt.

### Annotatio.

**F**Orestus lib. 6. observat. 20. refert historiam mulieris, quæ peste cum bubone correpta, cum marito hujus rei ignoro concubuit, qui ab illa statim pestem furiosam contraxit, illa verò à peste in totum liberata fuit, & bubo statim evanuit, ita ut maritus, quasi cum sponsa, venenum uxoris deterfisse, & sibi servasse videretur. Credo illam felicitatem paucissimis mulieribus à Veneris usu contingere ut vitæ suæ periculum in maritum transmitt-

tant: saltem prædicta nostra ægra, præterquam quod per Venerem à morbo liberata non fuerit, illud etiam infortunium incurrit, quod unà cum marito per nasuti Chirurgi stoliditatem perverso modo curata fuerit vomitoriis stibiatis; quæ quidem à Matthiolo, Quercetano, multisque Chymicis ad pestis curationem tanquam singulare præsidium commendantur, sed quorum tamen felices effectus in hac peste videre non potuimus; nam si forte uni aut alteri

teri robustissimo homini non nocuerint, rursus aliis quinquaginta certissimam mortem induxerunt. Neque id sine ratione, nam venenatâ qualitate prædita sunt, & humores, non venenum æreum, educunt: præterea corpus gravi-

ter perturbant, & vires, quibus ad veneni resistentiâ hic maxime opus est, citissime prosterunt, ac naturam intestino hosti resistere impotentem reddunt.

## HISTORIA VIII.

**V**ice-Capitaneus Biscot, 26 Aprilis post meridiem cœpit male habere: circa vesperam summa anxietate pressus est: totam noctem cum maxima inquietudine transiegit. Sequenti mane, cum ipsum inviserem, vires adhuc mediocriter constabant: æger autem de nullo alio malo, quam de cordis maximâ anxietate conquerebatur, præter quam neque ardor, neque capitis dolor, neque vomitus, aliudve malum symptoma aderat; imo nec pulsus (qui creber & parvuserat) ullam inæqualitatem percipere potui: æger dicebat sibi cor tanquam in torculari comprimi & disrumpi. Exhibui hoc alexipharmacum:

℞. *Theriace androm. diascordii Fracastorii, confectiōis de hyacintho, salis scordii, ana drach. f. aquæ theriacalis, unc. ij. olei vitrioli gut. xj.*  
*Misceantur pro haustu.*

Hinc fortiter quidem sudavit, sed absque ulla morbi immutatione. Tota die sæpius cochleare hujus mixturæ sumpsit:

℞. *Conservæ rosarum rubr. unc. f. theriace androm. drach. j. f. diascordii Fracast. drach. ij. aquæ theriacalis, unc. ij. succi citri, aquæ cinnamomi, ana unc. j.*  
*Misceantur, & post horam unam colentur, adde colaturæ confectiōis de hyacintho, drach. j. f.*  
*Misce.*

Circa vesperam tale alexipharmacum dedi:

℞. *Rad. petasitidis, & carlinæ, ana drach. ij. rad. dictamni, drach. j. f. foliorum cardui bened. scordii, & ruthe, ana M. f. cortic. citri, drach. ij. sem. cardui, & citri, ana drach. j. aquæ communis, q. s. coquantur, f. art. ad unc. iiij.*  
 ℞. *Colaturæ unc. ij. theriace, scrup. ij. extracti angelicæ, scrup. j. f. salis absinthii, scrup. j.*  
*Misce, fiat haustus.*

Illa nocte aliquantum sudavit, sed absque levamine. Tertia morbi die reiterata fuit mixtura pridie præscripta, & mane sumpsit hunc pulverem cum paucis illius mixturæ dissolutum:

℞. *Lapidis bezoar orient. gr. xv. pulv. Liberantis, scrup. j. croci or. gr. ij.*  
*Fiat pulvis.*

Vesperi prodierunt pauca exanthemata purpurea. Sequenti nocte obiit.

## Annotatio.

**T**oto morbi decursu nullum febrile symptoma in hoc ægro animadversum fuit, nec sitis, nec linguæ ariditas, nec urinæ mala dispositio, aliudve simile: cor tamen gravissime affligebatur, non quidem ab humorum putredine, sed à maligna veneni pestilentis qualitate, quod se solius cordis substantiæ firmissime insinuasse videbatur. Sic in pluribus aliis

B b

etiam

etiam observavimus, maximas illas & fixas cordis anxietates, à principio morbi incipientes plerumque mali ominis fuisse, imprimis si à primo vel secundo alexipharmaco nihil imminuerentur.

## HISTORIA IX.

**A**Ncellæ Christophori de Four (cujus ædibus Amsterodamum pro insigni erat) 7 Aprilis tumor pestilentialis durus, magnitudinis ovi gallinacei, sub axilla sinistra protuberavit. Ipsa tamen nec febricitavit, nec præter hunc tumorem ullum incommodum in toto corpore sensit: omnia solita munia obivit satis alacriter, excepto quod præ dolore brachium sinistrum ad lumbum movere non posset. Nulla voluit assumere medicamenta. Tumori imposuit emplastrum diachylum simplex, quo post paucos dies maturatio facta, & apostema disruptum fuit, multumque puris effluxit, atque ita hoc malum absque ullo incommodo sanatum est.

## Annotatio.

**M**ulti statuunt pestem esse febrem perniciosam, & febrem ita esse de essentia pestis, ut sine febre pestis nunquam sit, nec esse possit. Verum ex definitionis hujus reciprocatione cum definito, sequeretur, omnem febrem perniciosam esse pestem, quod absurdum esse, præter rationem docet experientia. Quandoquidem in humano corpore nascitur multoties perniciose febris sine peste, & non raro etiam pestis febre incommittata invadit, quod manifestissime liquet ex iis, qui citissime, quasi in momento, peste correpti expirant. Interdum etiam cor adeo robustum est, ut perniciosam malignitatem statim excutiat ad emunctoria, idque sine ulla febre, quemadmodum illud apparet ex prædicta historia, cujusmodi exempla, durante hac peste, plura vidimus. Sic etiam Mercurialis *lib. de Peste, cap. 6*, refert in Peste Veneta multis inguina atque alas subitus intumuisse, nec non varia tubercula sponte prorupisse, sine ullo insigni detrimento. Hac de re plura videntur *lib. 1, cap. 12, annotat.*

## HISTORIA X.

**U**Xor Jacobi Baersvelt, mulier fortis circiter triginta annorum, peste correpta, carbunculum habuit in latere dextro supra costas spurias: aderat etiam febris cum maxima anxietate & inquietudine. Sumpsit varia sudorifera & antidota, quibus non obstantibus morbus in eodem statu continuavit usque ad diem quartum, tuncque menstruorum fluxus copiosior accessit extra ordinarium periodi tempus. Quod cum mihi indicasset, statim tale sudoriferum exhibui:

*℞. Coralli rubri præparati, terræ sigillatæ, cornu cervi usti, ana scrup. j. diascordii Fracastorii, drach. j. aquæ theriacalis, aceti vini rubri, ana unc. j. Misceantur pro haustu.*

Jussi etiam ut sæpius de die comederet particulam hujus conditi:

*℞. Specierum diatrium santalorum, scrup. ij. trochiscorum de terra sigillata, scrup. j. f. florum sulphuris, scrup. j. conservæ anthos, drach. iij. & rosarum rubr. drach. vij. diascordii Fracast. drach. ij. f. syrupi granatorum acid. q. s. Fiat electuarium.*

His duobus medicamentis fluxus ille paulatim rursus imminutus est, sed tamen ante diem quintum non omnino substitit. Carbunculus impositione puliculæ ad anthraces brevi separatus, & ægra pristinae sanitati restituta est.

## Annotatio.

**I**N hac peste menstruorum fluxus criticus (qui alioqui salutaris esse solet) periculosus erat; nam multoties observavimus, si in ipso principio antidotis astringentibus paulatim non cohiberetur, quod postea ut plurimum nullis remediis coerceri posset, sed ægras dejectis viri-

bus citissime occideret. Eapropter in casu non videtur sequendum consilium eorum, qui hunc fluxum critica die apparentem, non cohibere, sed aperientibus medicamentis adjuvare suadent. Vide hac de re *lib. 3, cap. 10, annot. 1.*

## HISTORIA XI.

**C**Hirurgus quidam castrensis, ante Schenkii Munimentum in castris peste correptus, & statim è regione Noviomagi ad pagum Lent delatus, atque ibidem in exiguo conducto cubiculo à sociis militibus depositus est. Hunc 12 Aprilis post meridiem invisens, febricitantem & valde debilem atque anxium inveni, cum pulsu inæquali, crebro & duro, ac lingua nigricante crustâ obducta. Præscripsi hoc alexipharmacum:

℞. *Theriaca androm. scrup. ij. Diascordit Fracast. salis absinthii, ana drach. f. aquæ theriacalis, aceti bezoartici, ana unc. j. Misce, fiat haustus.*

Sudavit multum, cum magno levamine, & bubo in inguine prorupit, cujus adventum ex dolore antea prædixeram. Postridie multo melius se habuit, & eodem sudorifero reiterato, bubo mediocriter increvit. Tunc æger ille nasutus (quales plerique solent esse chirurgi) me nesciente, suo ipsius consilio, unguentum mercuriatum (quod forte ad tophos venereos compositum in pixide habebat) buboni inunxit. Hinc bubo sequenti nocte plane disparuit, febris recruduit, maxima anxietas & vomitus enormis accesserunt, atque vires illâ unâ nocte adeo dejectæ sunt, ut æger sequenti die se vix amplius commovere posset. Tunc mihi confessus est se illud unguentum inunxisse, & sperasse bubonem mercurii vi feliciter curatum iri, sed jam se videre lethalem suum errorem. Adhuc unum alexipharmacum exhibitum est, quod cum ilico evomisset, apparuerunt statim exanthemata purpuræ; cum quibus post tres horas mortuus est.

### Annotatio.

**M**ercurii vivi usum ad curationem bubonis pestilentis minime convenire, & Passæum, qui *lib. 2, cap. 29*, inuncti-ones mercuriatas in hoc morbo summopere extollit, gravissime errare, præter hujus-historiæ

experientiam, ipsa quoque ratio demonstrat, quæ mercurium sua frigiditate & humiditate pestilens venenum cum humore intus repellere docet, ut latius demonstravimus, *lib. 3, cap. 12, annot. 16.*

## HISTORIA XII.

**R**Udolphus de Swart, eques Capitanei Wilmouth, vir animosus & mediocriter fortis, se peste correptum sentiens, statim ad me venit, consilium petens. Dicebat hanc labem cum parvo horrore ipsum invasisse, & se jam magnâ cordis anxietate ac quasi compressione quadam, cum nausea torqueri, simulque dolorem in inguine, sed absque tumore, sentire. Jussi ut hoc alexipharmacum calide assumpto statim cubitum discederet, & stragulis bene cooperitus fortiter sudaret:

℞. *Theriaca, scrup. iij. diascordit, salis absinthii, ana drach. f. aquæ theriacalis, aceti vini fortis, ana unc. j. f. Misce, stat. haustus.*

Bb 2

Postri-



Postridie bene sanus ad me rediens, dicebat se per sex septemve horas copiosissime sudasse, eoque sudore omnia prædicta mala in totum evanuisse, nec quicquam incommodi se amplius sentire.

*Annotatio.*

**S**I in ullo morbo, certe in peste verus & valde considerabilis est ille versiculus:

*Principiis obsta, sero medicina paratur,  
Cum mala per longas invaluere moras.*

Nam cum morbus hic morâ citissime invalescat, solet in principio unicum alexipharmacum sæpe plus prodesse, quam in morbi incremento multa.

## HISTORIA XIII.

**D**Ominus Colberry, Nobilis Anglus, qui voluntarius exercitum comitabatur, cum è nostris castris, quibus Schenckii Munimentum tunc temporis obsidebatur, 14. Aprilis Noviomagum venisset, simul ac urbem ingrederetur, insolitum quendam foetorem percepit, à quo ipsi nausea facta fuit, & caput doluit. Postridie manè è somno expergefactus, valde nauseabundus fuit, & dolorem cum dura tensione in parotide post aurem sensit. Ipse pestem metuens, summo mane ex massa pilularum Ruffi, quam semper secum portabat, quatuor pilulas confecit, easque deglutivit: à quibus post sex horas alvus ter quaterve deiecit, & simul etiam cessavit dolor post aurem. Meridie tamen prandere non potuit. Circa vesperam rursus tres quatuorve spontaneos secessus habuit, quos magna cordis anxietas cum debilitate insecuta est. Sequenti nocte magnus alvi fluxus una cum febre supervenit. 16. Aprilis mane consilium meum expetiit. Vidi excreta esse turbida, oleosa, colliquativa, maxime foetentia; adjuncta tamen febris non videbatur valde magna. Exhibui hoc sudoriferum hora sexta matutina:

*℞. Terræ sigillatæ, boli Armenæ, coralli rubri præparati,  
cornu cervi usti, ana scrup. j. extracti ruthe. scrup. j. f.  
salis scordii, scrup. j. theriacæ, diascordii, ana scrup. ij.  
aquæ theriacalis, unc. ij.  
Misce, fiat haustus.*

Hinc per tres quatuorve horas fortiter sudavit cum levamine, & alvi fluxus usque ad meridiem substitit. Statim post meridiem alvus rursus emota est. Tunc eundem haustum rursus assumpsit, & multoties illa die ac sequenti nocte particulam hujus conditi comedit:

*℞. Trochiscorum de terra sigillata, florum sulphuris,  
cornu cervi usti, ana scrup. j. specier, diatrium santalorum, scrup. ij.  
diascordii Fracastorii, conservæ rosarum rubr.  
Myræ cydoniorum, ana drach. iij. syrupi granatorum acid. q. s.  
Misce, fiat conditum.*

Ad finem usus est hoc julabio:

*℞. Aquæ cardui bened. lib. j. & scabiosæ, lib. f.  
conservæ rosarum rubr. unc. j. f. rob. acaciæ, drach. ij.  
olei vitrioli q. s. ad gratum acorem.  
Misceantur, & post horam colentur per linteum, sit julebus.*

Verum his nihil imminutus est alvi fluxus. 17. Aprilis sudoriferum tali modo præparatum est:

*℞. Radicum*

℞. *Radicum tormentillæ, unc. f. rasuræ santali rubri, drach. j. f. corticum granatorum, drach. j. herb. pimpinellæ viridis, M. f. & ruthæ, herb. cardui bened. & scordii siccat. ana p. j. sem. cardui, & plantaginis, ana drach. j. florum balaustiorum, & rosarum rub. ana drach. j. f. aquæ communis q. s. Fiat s. art. decoctio ad lib. j.*

℞. *Hujus decocti unc. iij. trochiscorum de terra sigillata, scrup. f. cornu cervi usti, scrup. j. theriacæ, drach. j. diascordii, drach. f. Misce, fiat haustus.*

Hoc assumpto iterum fortiter sudavit, dolorem etiam in parotide rursus sensit, & alvi fluxus aliquantum imminui visus est, qui tamen statim post sudorem æque magnus rediit; atque tunc primò sanguinolentæ dejectiones; postea sanguis purus absque dolore defluxit, hinc viribus totaliter prostratis, ipsius animæ efflu- vium insecutum est.

### Annotatio.

**H**ieronymus Mercurialis, Joannes Manar- dus, alique magni Medici, ex decreto Avicennæ 1. 4. tract. 4. cap. 4. pestis curationem à purgatione incipiendam esse sta- tuunt, eamque opinionem acriter plurimis inni- xus auctoritatis defendere nititur Zacutus Lu- sitanus, *Præx Admir. lib. 3. observat. 119.* Ve- rum minime recipiendum est illud consilium, neque soli magnorum Medicorum auctoritati hac in parte insistendum est, imprimis cum & ra-

tio, & experientia contrarium doceant. Ratio, quæ salutarem naturæ motum hoc pacto inter- turbari, ac vires maxime deijci: *experientia*, quæ purgationes nullis pestiferis prodesse, de- monstrat: qua de re pluribus egimus *lib. 3. cap. 4. annot. 1, 2, 3.* Si parva pilularum Ruffi quan- titas in prædicto ægro naturæ motum adeo inter- turbaverit, ut ad veneni expulsionem per commo- das vias reduci non potuerit, quæ non mala à pur- gationibus fortioribus metuenda sunt?

## HISTORIA XIV.

**A**ncilla Domini Schayck Capitanei, per aliquot septimanas male valuerat, & de siti ac cordis aliqua anxietate conquesta fuerat. Tandem summis de- bilitatibus correpta, sæpius animo linquebatur: ultimò successit vomitus adeo violentus, ut dejectis viribus instar moribundæ, quasi jam jam expi- ratura jaceret. Cum ad ipsam vocatus essem, eamque adeo debilem cum pulsu exili & crebro invenirem, tale sudoriferum exhibui:

℞. *Cornu cervi usti, scrup. j. salis absinthii, scrup. j. f. theriacæ, drach. j. aquæ theriacalis, unc. j. f. olei vitrioli, gut. ix. Misce, fiat haustus.*

Hoc assumpto maximum dolorem in stomacho sensit, atque post horæ quadran- tem magno ac violento vomitu ejecit medicamentum, una cum lumbrico valde longo, rotundo, crasso & albicante. Quo facto à dictis symptomatibus liberata fuit, & assumptâ drachmâ unâ theriacæ cum haustu vini calefacti, obdormivit, ex- pergefacta rursus optime valuit.

### Annotatio.

**D**ecepti fuimus in hac ægra, quam peste laborare judicavimus, cum tamen gravia illa symptomata ab isto lumbrico ventricu- lo innatante excitata fuerint: qui lumbricus e- jectus admodum vivax erat, & sesquipedalem longitudinem aliquantum excedebat, ac casu as- sumptione antidoti lumbricis quoque contrarii

expulsus fuit. Fortasse maligna aëris consti- tutio hujus lumbrici generationem etiam induxit, nempe quod venenum pestilens, propter dispo- sitionis occultam contrarietatem, aliter hanc æ- gram afficere non potuerit, quam inductione alicujus putredinis in humoribus excrementitiis ventriculo aut intestinis inhaerentibus.

## HISTORIA XV.

**A**D militem quendam peste laborantem una cum Adolpho Fildar-chirurgo vocatus fui, huncque carbunculos quatuor habentem, & gravissimis symptomatis infestatum invenimus, nempe summa anxietate & inquietudine, magna virium dejectione cum crebris deliquiis, & vomitu violento, qui jam per aliquot horas duraverat. Præfagio mortis facto, tamen antidorum exhibuimus, quod cum revomisset, paulo post animam Creatori reddidit. Inter me & Chirurgum incidit sermo de causa vomitus pestilentis, cumque ego inter cætera statuerem illum plerumque induci à veneno pestifero ventriculi tunicis, & imprimis ipsius orificio superiori firmitus infixio, eique magis quam aliis partibus communicato propter cordis viciniam, &c. Dixit ille, hunc vomitum plerumque induci à carbunculis in ventriculi tunicis enatis, idque se ab experientia scire: nam ut illius vomitus causam certius cognosceret, se aliquando cadaver peste cum vomitu emortuum ac jam refrigeratum dissecuisse, & in ventriculo à latere orificii superioris invenisse locum quendam longiusculum, circiter magnitudinis articuli pollicis, qui nigricabat instar carbunculi, quæ nigredo tunicas ventriculi transiens, æquæ foris quam intus conspiciebatur. Etiam si vellem, se quoque in prædicto mortuo milite illud demonstraturum promisit. Verum nobis non placuit irritare crabrones, & apertâ abdominis cavitate contagii periculis nos exponere: illud credere, quam videre maluimus.

*Annotatio.*

**V**erisimile est carbunculos interdum ventriculi tunicis non minus quam aliis visceribus innasci, ac multoties lethalem vomitum inducere: verum ab hac tamen causa vomitum pestilentem semper non dependere, vel inde liquet, quod multi cum vomitu evadant, quod fieri non possit si à carbunculis semper induceretur. Quicquid sit, neminem Medicorum hætenus tales carbunculos annotasse scio, solus inter novissimos Joannes ab Helmont in Tumulo

Pestis, scribit se illud ipsum quoque observasse, & in cadavere peste cum violentissimo vomitu emortuo ac dissecto, Stomachum triplici escarâ jam perfectâ pertusum invenisse. Quod illud ab aliis observatum non fuerit, metum contagii in causa fuisse reor; nam paucissimi Rondeletio credunt, qui cadavera pestiferorum contagiosa non esse, asserit. Hac de re plura videantur lib. I. cap. 13. annot. 5.

## HISTORIA XVI.

**E**Duardus Grien Anglus, & Melchior Rouwert Germanus (ambo equites strenuissimi Capitanei Thomæ Lucas) fortes & benevalentes, mense Maio præservationis gratia sibi venam in brachio pertundi, & sanguinis circiter libram extrahi curarunt. Parvo tempore post venæsectionem insolito quodam horrore & gravi somnolentiâ correpti pestem metuerunt, utque hanc imaginationem animis suis melius excuterent, alter vini absinthitis libras duas, alter vero spiritus vini juniperini uncias duas ebibit, quo facto simul ambulatufi prodierunt. Circa meridiem domum venientes prandere non potuerunt, sed non aliter quam media hyeme frigescentes, ad lectum se contulerunt; ubi stragulis bene cooperti, per aliquot horas alto somno obdormiverunt: tandem evigilantes se pessime habuerunt, uterque summis anxietatibus pressus fuit, alter enormiter vomuit, de vertigine & intensissimis capitis doloribus conquerebatur alter. Percepit à me fuit ut illos inviserem. Percepi in utroque febrem fortem, cum pulsu parvo, crebro & inæquali: maxima sitis aderat, tantaque virium dejectio, ac si longo tempore ægrotassent. Ipsimet ante meum adventum assumpserant theriacæ drach. j. cum aceti vini fortis unc. ij. & olei juniperini scrup. f. à quo medicamento aliquantum sudaverunt, sed absque ullo levamine. Eduardo duo exiles carbun-

carbunculi in pectore, alteri unus in manu apparuit. Circa vespere adeo debiles fuerunt, ut amplius ullum medicamentum sumere nec possent, nec vellent. Ad immensam sitim sola aqua simplici utebantur, omnem alium potum renuebant. Die tertia post meridiem exspiravit Eduardus: Melchior vero usque ad diem quintum in tali statu permansit, atque tunc media nocte etiam ipse è vivis excessit.

### Annotatio.

**M**agnus hoc tempore à Chirurgis in eo commissus fuit error, quod propter exiguum lucrum cuilibet tempore Veris venæsectionem tanquam optimum præservativum commendarent; hocque modo multis morbi & mortis causa fuerunt. Vix ullum novi

cui non venæsectio præservationis gratiâ instituta maximum damnum intulerit: & qui post tales venæsectiones peste corripiebantur, multo magis periclitabantur, quam alii, in quibus talis occasio præmissa non fuerat.

## HISTORIA XVII.

**C**um N. Straeten, Notarius publicus in angiportu prope Scholam triptidariam habitans, peste cum alvi fluxu laboraret, ad ipsum invisendum vocatus fui. Simulac cubiculum ejus intrarem, statim pessimum excrementorum foetorem naribus percepi, à quo graviter affectus fui. Post brevissimam visitationem domo rursus egressus, ilico me vertigine, nausea, & cordis anxietate affectum sensi, ita ut pestilens contagium me concepisse non dubitarem. Quapropter postpositis omnibus negotiis (erat namque circiter hora decima antemeridiana) statim me domum contuli, atque tabaci optimi quinque sexve fistulas fumifunctione exhausti, cujus usu omnia prædicta symptomata ita penitus evanuerunt, ut ne minimum quidem mali amplius sentirem. Tunc rursus foras prodire & reliquos ægros invisere volens, theriacæ Andromachi drachmam præsumpsi, atque ita deinceps optime valui.

### Annotatio.

**I**llud ipsum durante hac pestilenti constitutione mihi ter quaterve accidit, ut statim, simulac me aliquam contagionis labem concepisse arbitrarer, eodem modo ad copiosorem tabaci usum confugiens, liberatus fuero. Excepta unica vice, cum horâ nonâ matutinâ pistorem quendam in platea Nonnea decumbentem, ac pestilenti diarrhœa unâ cum uxore laborantem invisissem, atque ab ejusdem foetore graviter alteratus essem, tunc ob longiorem moram quam trahebam, antequam ad tabaci usum me conferrem, tam cito liberatus non fui, sed post assumptas aliquot tabaci fistulas, tanto sopore tantæque anxietate obrutus fui, ut volens nolens ad lectum me conferre cogerer, ubi præsumpto antidoto per tres horas dormivi. Deinde à famulo expegefactus, & ad visitationem plurimorum ægrorum (qui meum adventum avidissime expectabant) adhortatus, propter vertiginosam capitis gravitatem me vix sustentare potui: multum quoque cum summa molestia vomui. Tandem tamen surrexi, & famuli humero aliquantum innixus ad focum perveni, ubi rursus tabaci usum arripui; cumque duas tresve fistulas haussem, capitis gravitas, vertigo &

nausea evanuerunt, manente adhuc aliqua cordis anxietate. Tunc mihi ipsi rursus animum addens, omnemque metum exeutens, theriacæ sesqui drachmam assumpsi, & bonum hauritum vini calefacti cum pauxillo cinnamomi & nucis moscatæ superbibi, atque ita me rursus aëri commisi, & inter ambulandum fortissime sudavi; in quo ambulatorio sudore continuavi usque ad horam decimam vespertinam, quâ horâ absque ulla cordis anxietate aliove incommodo bene sanus domum redii, & satis famelicus ad cœnam accessi, cui pro clausula tabacum rursus adjunxi. Tabacum pro insigni præservativo remedio semper habui, ejusque fumum in ipso conceptæ luis principio mihi aliquoties insigniter profuisse comperi: qui felix effectus etsi omnibus non contingat, in multis tamen militibus peste jam correptis eundem quoque non semel observatum fuisse, à Capitaneis fide dignis nobis narratum est. Referunt etiam quondam Londini in Anglia ab horribili peste illic sæpienter immunes fuisse omnes illas domus in quibus tabacum vendebatur. Verum Noviomagi illa felicitas omnibus tabaci mercatoribus non contigit, nam aliquos ex iis peste correptos fuisse novimus,

mus. In ædibus tamen primarii tabaci mercatoris, Thomæ Pieters Angli, qui nenerosam liberorum, famulorum & ancillarum familiam

alis, neminem, quod scio, pestis invasit: præter unam ancillam, & ipsa brevi convalescit.

## HISTORIA XVIII.

**O**tto de Linnich, vir robustus, pestilentem carbunculum in brachio, & profundum tumorem in inguine sentiens, cum somnolentia ac capitis gravitate, chirurgi consilio, theriacæ drach. j. cum aceti vini, unc. j. & olei juniperi gut. xij. assumpsit, atque ita stragulis coopertus statim dormivit, & mediocriter sudavit. Post aliquot horas expergefactus, de intolerabili capitis dolore conquestus est. Tunc ego secunda morbi die advocatus, rursus alexipharmacum exhibui, à quo quidem multum sudavit, sed capitis dolor nihil imminutus est. Tertia die cœpit æger sine magna intermissione crebro sternutare, quam sternutationem nec lacte tepido in nares attracto, nec aliis mediis impedire potuimus, atque ita æger, postquam plusquam trecenties sternutasset, deficientibus viribus obiit.

### Annotatio.

**H**ujusmodi lethales sternutationes adhuc in duobus tribusve aliis pestiferis observavimus. Quamvis sternutamenta in aliis morbis cerebri & naturæ robur denotent, in peste tamen exitalia plerumque sunt, & pestiferum venenum membranæ cerebri firmissime infixum

esse, easque aliqua parte mortificam; unde illud venenum non magis sternutatione, quam ventriculi carbunculus vomitu vel singultu ejici potest. Cardanus quoque meminit pestis, in qua ægri multum sternutantes statim mortui sunt.

## HISTORIA XIX.

**C**ognatus Joannes de Goldt, post nosocomium habitans, juvenis robustus, bubonem pestilentem in inguine sentiens, morbum celavit, cumque magno capitis dolore torqueretur, pilulas capitales à Gerardo Buys Pharmacopœo parari curavit, qui ex massæ pilularum cochiarum drach. j. pilulas novem concinnavit. His assumptis alvus primo cum levamine deturbari visa fuit, sed paulo post magnum ventris profluvium insecutum est. Evanuit bubo, & vires spatio viginti horarum ad extremum prostratæ sunt. Cum ego advocatus nullis sudoriferis nec antidotis astringentibus fluxum sistere, huncque perversum naturæ motum invertere possem, tertia morbi die occubuit.

### Annotatio.

**A**D pestis curationem medicamenta purgantia maxime perniciosa esse, non hujus tantum, sed plurimorum aliorum ægrorum experientia docuit. Quapropter mirari licet, quod Averrhoës lib. 3. collect. 31, scribat, in curatione pestis non sufficere medicinam unum tantum hominem purgantem, sed omnes, sicuti sunt pilulæ cochiarum. Quæ pilulæ quam utiles in peste sint, ex prædicta historia satis li-

quet. Nos neque hanc pilularum, neque aliorum purgantium usum in tota hac peste unquam ægrotis feliciter ante diem septimum administratum fuisse, certò novimus. Sic quoque Palmarius de febr. cap. 7. inquit: *Vix censesimus quisque evadit ex iis, qui incipiente morbo cathartico utuntur, vel spontaneo alvi profluvio corripiuntur.*

## HISTORIA XX.

**S**tephanus à Sevenser, qui post templum D. Joannis habitabat, nescio quare cum aliis quibusdam contendens, magnâ irâ incanduit. Domum veniens inhorruit, ac statim ardenti febre correptus fuit, cum maxima siti, anxietate & inquietudine, paulo post etiam accessit linguæ nigredo. In pectore

pectore duo carbunculi prodierunt. Antidota varia exhibita sunt, sed propter vomitum pauca retinuit, iisque nihil proficientibus, & viribus ad extremum dejectis, circa finem secundæ diei simul cum vita morbum finivit.

*Annotatio.*

**I** Ram multorum corpora ad pestem disposuisse, notavimus, & qui hac præcedente in morbum incidebant, febribus longe gravioribus, aliisque multo pejoribus & periculosioribus symptomatis corripiebantur, quam alii quibus absque illo duce morbus introducebatur.

## HISTORIA XXI.

**M** Argarita de Tienen, quæ in horto Capitanei Hæften decumbebat, se peste correptam sentiens, bis propriam urinam bibit. Secunda die meo consilio sudoriferum sumpsit. Post copiosum sudorem retro aurem sinistram magnus & mollis tumor protuberavit, qui intra viginti quatuor horas in tantum molem excrevit, ut affecti lateris collum antrorsum versus totum occuparet. Quarta die apparentibus exanthematibus purpureis, extincta est.

*Annotatio.*

**Q** uibus duri tumores in colli glandulis oriebantur, qui lentius increverant, eorum multi sanabantur: at cum tumoribus mollibus instar tumoris flatulenti vel aquosi, qui cito multum increverant, nullum evasisse novimus.

## HISTORIA XXII.

**P**etrus Buys, juvenis fortis, 7 Aprilis peste correptus est, cum febre exigua, tumore sub axilla, & maxima cordis anxietate. Neque à primo, neque à secundo alexipharmaco quicquam allevatus est. Febris per biduum magis magisque increvit, tanta fuit virium dejectio & à medicamentis nausea, ut post secundum diem vix quicquam amplius exhiberi potuerit. 10 Aprilis tanta cordis anxietate premebatur, ut illud tanquam in torculari confringi diceret, atque summa illa angustia ipsam animam è corpore expressit.

*Annotatio.*

**P**estilens venenum ipsius cordis substantiæ firmitus infixum, ejusque calorem innatum extinguens, huic ægro vitam finivit: quod quidem venenum etiam humorum aliquam putredinem, hincque febrem simul produxit; verum hæc tamen tanta non erat, quæ periculum per se causare potuisset.

## HISTORIA XXIII.

**A**gneta Wilhelmi, cerevisiarii ancilla, robusta, plethorica, bene valens, mense Majo ex annua consuetudine sex aut octo cucurbitulas cum scarificatione pedibus imponi curavit. Sanguinis sex aut octo unciis extractis horrore quodam correpta est. Post paucas horas tanta accessit somnolentia, ut per duas horas dormire cogeretur. E somno excitata maximam cordis anxietatem sensit, quam non diu post infecutus est gravis vomitus. Inveni ipsam febricitantem, cum pulsu parvo, crebro & inæquali: urina sanorum urinæ similis erat. Exhibui circa meridem hoc alexipharmacum:

℞. *Theriace Androm. diascordii Fracast. ana scrup. ij. salis scordii, scrup. j. l. aqua*

℞ c

*aquæ theriacalis, unc. j. f. succi citri, unc. f.  
Misceantur pro haustu.*

Hinc egregie sudavit, & dolorem aliquem in inguine percepit, sed absque tumore. Anxietas parum aut nihil imminuta fuit. Statim post sudorem rediit horror: quapropter post tres horas idem sudoriferum reiteratum fuit, à quo cum sequenti nocte bene sudasset, postridie paulo melius habere visa est, & tumor durus in inguine dextro apparuit. Illa die nullum medicamentum assumere voluit, imò se meo consilio amplius non indigere putavit: comedit aliquantum lactis pressi cum pane cocti, & consilio matris familias imposuit tumori folium brassicæ rubræ oleo raparum inunctum. Die tertia febris cum magnâ vehementiâ recrudit, (quæ tamen secunda die non omnino intermiserat, sed multo remissior fuerat) cum capitis dolore, maxima siti, & enormi vomitu: evanuit etiam inguinis tumor. Tunc iterum ad me concursus est. Exhibui duo sudorifera, quæ utraque statim revomuit: julebos cordiales aliaque nonnulla præscripsi, sed omnia frustra, proptervomitum. Tandem hujus mixturæ subinde cochleare unum exhibui:

*℞. Conservæ rosarum rubrarum drach. vj. diascordii Fracast. drach. ij.  
aquæ theriacalis, unc. iij. succi limonum, aquæ cinnamomi, ana unc. j.  
Misceantur, & stent per horam, postea colentur per linteum.*

Ad hæc Theriacam Andromachi chartæ bibulæ illitam, ac prope ignem calefactam ventriculi regioni imposui. His duobus substitit vomitus. Tunc circa noctem tale sudoriferum dedi:

*℞. Salis absintii, & scordii, ana scrup. j. extracti angelicæ, drach. j.  
aquæ theriacalis, unc. ij. olei vitrioli gut. xij.  
Misce, fiat haustus.*

Hinc mediocriter sudavit, & febris aliquantum imminui visa fuit, quæ tamen postridie iterum recrudit, & magno cum furore usque ad vesperam continuavit, quo tempore extra debitum periodi tempus menses fluere cœperunt. Sequenti die febris quidem aliquanto mitior esse videbatur, sed vires maxime prostratæ erant. Sitim sedabat cum cervisia tenui, cui aliquot olei vitrioli guttulæ immistæ erant. Ad mensium suppressionem hunc bolum exhibui, & ex sequenti condito sæpius de die particulam assumere jussi:

*℞. Coralli rubri preparati, cornu cervi usti, terræ sigillatæ,  
Lapidis bezoar orient. ana scrup. f. diascordii Fracastorii scrup. j.  
cum syrapi granatorum acidor. q. f.  
Fiat bolus.*

*℞. Specierum diatrium santalorum, scrup. ij. coralli rubri, terræ sigillatæ,  
cornu cervi usti, ana scrup. j. diascordii Fracast. drach. iij.  
conservæ rosarum rubr. drach. v. rob. acaciæ, drach. j. f.  
syrapi granatorum acid. q. f.  
Fiat conditum.*

Die sexta menstruorum fluxu magis adaucto, & viribus deficientibus, circa vesperam exspiravit.

#### Annotatio.

**D**Urante hac pestilenti constitutione, dam-  
nosissimas semper fuisse sanguinis detra-  
ctiones, etiam in sanis, experientia to-  
ties docuit, ut venæsectio, quæ antea præfer-  
vationis gratia communiter iustituebatur à vul-  
garibus, postea adeo horribilis evaserit, ut vel  
solum venæsectionis nomen cuilibet terrorem  
incureret incuteret. Nam quocunque tempore,  
& quan-



& quantacunque adhibita cautione sanguis ex-  
traheretur, etiam in plethoricis & maxime sa-  
nis corporibus, fere semper tamen pestis hanc  
evacuationem insequabatur, ita ut sanguine eva-  
cuata. vena protinus pestilenti hosti locum fa-  
cere, ejusque introitum sponte invitare videretur.

## HISTORIA XXIV.

**I**odocus Rutgeri, rusticus fortis, magnam cordis anxietatem cum capitis gravitate & nausea sentiens, petiit à Chirurgo medicamentum fortiter purgans, qui ipsi haustum vini stibiati exhibuit. A quo enormiter vomuit, multosque pravos humores excrevit, ad hæc duodecim per alvum secessus habuit, Hinc adeo debilitatus est, ut ipsum moriturum arbitrarentur, quapropter ut ipsum inviserem petierunt. Vidi ægrum irritis vomendi conatibus adhuc graviter delassari, hinc jussi ut domestici statim vini albi lib. j. calefacerent, eique pulveris canella & nucis moscata aliquantum injicerent, idque calidissime exhiberent, atque bene coopertum ægrum dormire sinerent. Hoc facto cessavit vomitus, & æger fere tota nocte dormivit. Postridie evigilans optime valuit, & adeo famelicus fuit, ut vix duplici pranio famem sedare posset.

## Annotatio.

**H**oc tempore paucissimis bene cesserunt vomitoria; imo vix ex centum uni, quæ huic robustissimo ac temerario homini, contigit felicitas.

## HISTORIA XXV.

**A**ntonius Knuyt, corii mercator in foro habitans, vir mediocriter fortis, 29 Maji circa vespere male habere cœpit. Postridie dolorem sub axilla sentiens, meum consiliū petiit. Pulsus ipsi erat inæqualis, & creber, vires pro morbi principio satis dejectæ, calor corporis non admodum præter naturam excellens, urina sanorum urinis similis: anxius erat, somniculosus & capite gravis, interdum ad vomitum proclivis, sed nihil tamen evomit. Exhibui statim hoc alexipharmacum:

℞. Theriacæ, scrup. ij. diascordii, drach. f. salis absinthii,  
oculorum cancri preparat. ana scrup. j. aquæ theriacalis, unc. j. f.  
succu citri, unc. f.  
Misce, fiat haustus.

Hoc assumpto valde sudavit cum levamine, & sub axilla magnus durus tumor protuberavit, cui hoc cataplasma bis de die impositum fuit:

℞. Radicum liliorum albor. unc. ij. & helensii recentium, unc. j.  
herb. malvæ, althææ, florum chamomillæ, ana M. j.  
ficum ping. N. ix. aquæ communis, q. s.  
Coquantur s. art. & pistentur, addendo.  
fermenti acidi, farinæ seminis lini, ana unc. j. fimi columbini, unc. j. f.  
mellis, axungie porci, ana drach. vj.  
Fiat s. art. cataplasma.

31. Maji mane & meridie hujus apozematis uncias quatuor bibit:

℞. Radic. angelicæ, petasitidis, ana drach. vj. & tormentillæ,  
corticum citri siccat. ana unc. f. rad. ostrutii, drach. ij. herb. scabiosæ,  
taraxici, melissæ, scordii recent. ana M. j. cardui bened. M. j. f.  
pimpenellæ viridis, & ruthæ recent. ana M. f. sem. cardui bened.

℞ 4. *frigid. major. ana drach. j. f. ricerum rub. unc. j. f.*  
*aquæ communis, q. s.*  
 Coquantur s. art. ad lib. ij. adde colaturæ  
*syrupi de scordio, & de succo citri, ana unc. j.*  
*Misce, fiat apozema.*

Circa vesperam hunc haustum dedi:

℞. *Theriace androm. diascordii Fracast. salis absinthii, ana drach. f.*  
*aquæ theriacalis, avari bezoartici, ana unc. j.*  
*Misce, fiat haustus.*

Hinc bene sudavit cum magno levamine. 1. Junii nauseabundus & ad vomitum proclivis erat. qui ut præveniretur, hanc misturam præscripsi, de qua ter quaterve de die cochleare plenum sumpsit:

℞. *Conservæ rosarum rubr, drach. vj. theriace and. scrup. ij.*  
*diascordii, drach. j. f. aquæ theriacalis, unc. iij. rosarum, unc. f.*  
*& cinnamomi, drach. vj. succi citri, unc. j.*  
*Misceantur, & stent per duas horas, deinde colentur, adde colaturæ*  
*confectionis de hyacintho, scrup. ij. & de alkermes, scrup. ij.*  
*Misce.*

Eadem die etiam duos haustus prædicti apozematis bibit. Circa vesperam hunc bolum cum prædicta mistura dissolutum exhibui:

℞. *Mithidatii Damoc. scrup. j. f. diascordii, scrup. j. salis absinthii,*  
*confect. de hyacintho, ana scrup. f. olei vitrioli gut. iij.*  
*Misce, fiat bolus.*

2. Junii præter jam dictam misturam, etiam ex hoc condito interdum particulam sumpsit:

℞. *Pulveris Liberantis, drach. j. cortic. aurantiorum condit.*  
*rad. helenii cond. ana drach. iij. conservæ rosarum rubr.*  
*diascordii Fracast. ana drach. ij. confectionis de hyacintho, scrup. ij.*  
*syrupi de limonibus, q. s.*  
*Misce, fiat conditum.*

Sequenti die iisdem modo usus fuit medicamentis. 4. Junii, qui erat dies à morbi principio septimus, valde debilis & anxius fuit, nec præter sequentem bolum cum prædicta mistura solutum, quippiam assumere potuit:

℞. *Confectionis de hyacintho, theriace, ana scrup. j.*  
*lapidis bezoar. or. gr. xv.*  
*Fiat bolus.*

Circa vesperam sponte vehementer sudavit, tumor sub axilla multum increvit, & morbus hoc critico sudore solutus est: anxietas, capitis dolor, reliquaque symptomata cessarunt. Postea etiam tumor sub axilla sine maturatione paulatim dissipatus evanuit. Omnibus his diebus æger alvum non exoneraverat, quapropter ipsi 6 Junii massæ pilularum antipestilentialium scrup. j. exhibui, unde bis terve alvum deposuit: atque ita per summi Dei clementiam integræ sanitati restitutus fuit.

*Annotatio.*

## Annotatio.

**H**Oc tempore paucissimis morbus critice solutus fuit perfecte, & præter crisin per sudores (quæ & ipsa multoties imperfecta erat) omnes aliæ erant periculosæ. In hoc ægro tumor sub axilla paulatim dissipatus fuit; & sic quoque in multis aliis tumores post febris solutionem salubriter evanuisse vidimus. Quod ipsum quoque observavit Palmarius, de febr. Pest. cap. 24. ubi inquit: *Quamplurimos persanatos vidi citra bubonum suppurationem, veneno paulatim antidotis devicto, resolutaque bubonis*

*materia.* Secus autem se res habet cum bubones evanescunt ante morbi solutionem, nam illud maxime periculosum est. Alvum dicto ægro movere non voluimus ante morbi solutionem, quia nunquam ex diuturniore alvi constipatione in ægris pestiferis ullum damnum animadvertere potuimus; verum è contra alvi proritatio- nes per clysteres, lenientia, aliave medicamen- ta, semper cum maximo periculo ante diem sep- timum factas fuisse, observavimus.

## HISTORIA XXVI.

**U**Xor Gerardi de Stolck, puerpera, postquam filium bene sanum peperisset, tertia die peste correpta est, & duo carbunculi in pectore prodierunt: anxietas autem valde gravis non erat, ut nec febris: lochia quoque non substituerunt, quæ omnia magnam sanationis spem dabant. Infans à lacte matris pestem contrahens, cito extinctus est, antequam ipsamet se peste laborare certo sciret. Infante mortuo quæsitæ sunt caniculæ juniores, quæ mammas copioso lacte abundantes exsugerent: quatuor inventæ sunt; quarum duæ cum per biduum mammas suxissent, mortuæ sunt; reliquæ duæ usque ad quintum diem vixerunt, atque tunc priores secutæ sunt. Interea variis antidotis usæ fuit ægra, quibus non obstantibus paulatim cum anxietate adaucta est febris, & tandem viribus omnino prostratis, sexto morbi die vitam cum morte commutavit: Eamque non diu post maritus una cum altera prole, ejusdem morbi violentia oppressus, infectus est.

## Annotatio.

**P**leræque puerperæ, propter magnam quam à puerperio subibant alterationem, peste corripiebantur & moriebantur; etiam infantes, nisi tempestive aliis nutricibus committerentur, plerumque cum matre interibant, sicut ex prædicta historia illud non tantum in infante, verum etiam in caniculis liquit, quibus hoc tempore communiter in puerperis peste correptis utebamur, (cum netho alius propter con-

tagii metum illarum mammas exsugere vellet) nam egregie fugebant; sed illas fere semper post secundum vel tertium diem, interdum primo die mortuas fuisse observavimus. Rarissimum est illud quod ex Joachimo Camerario refert Joannes Schenckius *Observat. Medic. l. 6.* de infante quodam qui duabus nutricibus fuit lactatus, quæ ambæ hac lue sunt extinctæ, infante in vivis & optimæ valetudinis permanente

## HISTORIA XXVII.

**U**Xor generosissimi equitum Capitanei D. Douglas, Scoti, 16 Maji pestilenti febre correpta fuit. Valde debilis erat in ipso morbi principio, summa anxietate premebatur, & capite aliquantum dolebat: urina turbida erat, pulsus creber & inæqualis: calor tamen non multum excelebat, neque ulla extrinsecus in corpore pestis signa apparebant. Primo statim hoc alexipharmacum exhibui, à quo optime sudavit:

℞. *Theriace androm. diascordii Fracast. ana drach. f.*  
*salis absinthii, scrup. j. oculorum cancri præparat. scrup. j. f.*  
*aquæ theriacalis, unc. j. succi limonum, aceti calendula, ana unc. f.*  
*Misce, fiat haustus.*

Cc 3

Post

Post sudorem, interdum hujus misturæ cochleare assumpsit:

℞. *Conservæ rosarum rubr. unc. f. diascordii Fracast. drach. ij.*  
*aquæ cardui bened. & theriacalis, ana unc. ij.*  
*succi limonum recent. unc. j. aquæ cinnamomi, unc. j. f.*  
*Misceantur simul & stent per sesquihoram, postea colentur: adde colaturæ*  
*confect. de hyacintho sine moscho, drach. j.*  
*Misce.*

17. Maji, morbo in eodem statu permanente, hesternum sudoriferum mane reiteratum fuit. Circa meridiem præscripsi apozema, de quo ter quaterve de die hauritum biberet:

℞. *Radicum carlinæ, petasitidis, dictamni, helenii,*  
*angelicæ, ana unc. f. & ostrutii, drach. ij.*  
*cortic. aurantiorum sicc. unc. f.*  
*herb. scordii, cardui bened. ana M. j. f. cichorei, acetosæ, ana M. j.*  
*melissæ, pimpinellæ, & ruthæ, ana M. f.*  
*sem. 4. frigid. major. ana drach. j. cicerum rubr. unc. j.*  
*Coquantur in aquæ communis q. f. ad lib. ij. adde colaturæ*  
*syrupi de succo citri, & de scordio, ana unc. j.*  
*Fiat apozema.*

18 Maji reiterata fuit mistura ante præscripta, ut & sudoriferum, cui addidimus extracti cardui bened. scrup. j. f. Interdum etiam comedit particulam hujus conditi:

℞. *Pul. Liberantis, drach. j. diascordii Fracast. drach. ij.*  
*cortic. aurantiorum condit. conservæ rosarum rubr. ana drach. iij.*  
*theriacæ, drach. j. confect. de hyacintho sine moscho, scrup. iij.*  
*syrupi acetositis citri, q. f.*  
*Fiat conditum.*

Eadem die etiam duos hauritus apozematis bibit, ut & sequenti nocte. 19 Maji ad extremam fere debilitatem devenerat, ita ut vix quicquam assumere posset: tamen hunc bolum exhibui, à quo licet valde parum sudaret, aliquod tamen levamen sensit:

℞. *Theriacæ, confect. de hyacintho, lapidis bezoar orient. ana scrup. j.*  
*Fiat bolus, involvendus folio auri.*

Hactenus nulla externa pestis indicia apparuerunt, & febris (quæ tamen non admodum violenta videbatur) absque ulla intermissione continuavit. 20 Maji cum rursus medicamenta assumere posset, prædictum apozema reiteratum est, quod ista & sequenti die totum ebibit; idemque 22 Maji rursus paratum fuit, addendo foliorum Ruthæ, M. j. 24 Maji, qui erat nonus à principio morbi dies, crisis facta est per vehementem sudorem spontaneum, post quem totum corpus à malignitate foras prodeunte, parvis pustulis rubicundis, magnitudinis, milii seminis, undique obsessum fuit, cum magno pruritu: in inguine etiam bubo ovi columbini magnitudine protuberavit, atque sic ægra à gravi anxietate aliisque symptomatis simul liberata, & morbus critice solutus fuit. Ne tamen recidiva sequeretur, ultimum apozema adhuc semel reiteravimus, ut & conditum 18 Maji præscriptum. Buboni quoque cataplasma attrahens aliquot diebus, & postea emplastrum impositum est, sed tamen absque maturatione paulatim evanuit, atque ægra summi Numinis favore à periculosissimo morbo feliciter evasit. Primis morbi diebus nihil edere poterat, & postea tantum tenui victu utebatur, exjussulis carniū, cum acetosa, boragine, pomis citreis, aurantiis, & similibus paratis ac coctis. Potus erat cervisia tenuis, quam amabat, à julebis abhorrebat.

Primis

Primis septem diebus alvum tantum semel deposuerat, nec ego ante crisin per has vias moveri volui: biduo post crisin exhibui pilularum Ruffi, scrup. j. à quibus bis terve deiecit.

### Annotatio.

**E**Rat hæc ægra valde obediens ac verè patienti, quæ nihil sine meo consilio agebat, cujusmodi obediens ægri rarius inveniuntur. Cum post primum sudorem non levaretur, ipsam in continuo calore & parvo sudore continui usque ad diem quartum, sperans naturam interea forinsecus per tumores vel anthraces aliquam maligni veneni partem expulsuram. Verum die quarto valde debilis fuit, nec ulla mutatio secuta est: cumque hic dies sine crisi præterisset, eoque se multo pejus habuisset, crisin sine dubio die septima futuram existimavi: propterea admonui ægram ut bono ac forti animo esset, & in parvo illo sudore patienter continuaret usque ad diem septimum, tunc enim morbum mutatum iri. Ipsa satis obediens, quamvis in mediis angustiis constituta, exacte tamen ad meum præscriptum vixit, & sudores continuos à primo usque ad septimum morbi diem patienter (de quo ipsemet mirabar) tulit, idque in medio fœtore; nulla enim toto tempore lintamina recentia dabantur: nam sæpius animadvertentem hujusmodi mutationem plurimis valde nocuisse, fœtorem verò sudoris nulli damnum intulisse. Cum autem septima die se rursus multo pejus haberet, nec ulla sequeretur critica morbi mutatio, in eodem sudore patienter continuandum fuit usque ad diem nonum, (ad quem usque diem febris eodem fere tenore sine ulla intermissione duravit, sine ullis etiam externis pestis indiciiis) quo morbus critice solutus est, ut dictum.

Si hoc pestilenti tempore febris aliqua quempiam invaderet, eam publicæ malignitatis participem esse judicare oportebat, etiamsi nulla pestis indicia præ se ferre videretur: nam licet

interdum (quod tamen rarissimum erat,) in principio nullius pernicipi particeps esset, celerime tamen intra paucas horas communi aëris vitio pestifera lues ei adjungebatur. Sicut etiam cum Montano testatur Forestus, tempore pestilenti infinitas videri febres continuas, tertianas, vel similes, quæ statim convertuntur in pestilentes. Nobis igitur præstabilius videbatur, in ipso morbi principio omnes hujusmodi febres, tanquam verè pestilentes, convenientibus antidotis oppugnare, quam expectare dum viribus dejectis & salute deploratâ, certis & indubitatis notis pestilens malignitas se proderet; nam si protraheretur hujusmodi curatio, tandem venenum altioribus radicibus cordi infixum, omnia præsidia aspernebat. Nec etiam ab oppugnatione hujus hostis desistendum erat, antequam penitus è cuniculis & latebris suis expulsus, totusque expugnatus & profligatus foret. Quemadmodum nos illud in prædicta ægra fecimus; in qua illud rarum & notatu dignum occurrit, quod externa pestis signa tam sero, nec ante crisin apparuerint. Eapropter quamvis raro datur pestis, in qua non bubones, exanthemata vel anthraces in principio vel paulo post appareant; attamen iis non apparentibus statim cum vulgo concludendum non est, ægrum peste non laborare: sæpe enim pestilens venenum diutius in corpore latere posse, antequam se prodatur, docuimus lib. 1. cap. 10. annot. 8. sæpe etiam à veneni virulentia ægros extinguere antequam talia signa prodeant, omnibus notissimum est; in quibus talia indicia sæpe post mortem primo apparent: non raro quoque virtus adeo debilitata & oppressa est, ut nullam veneni expulsionem ad exteriores partes moliri queat.

## HISTORIA XXVIII.

**G**Osuinus Dickwoldt, vir fortis, 3 Maji de gravativo capitis dolore & cordis anxietate conquestus est, atque adeo somniculosus fuit, ut se vix sustentare posset. Circa vespere ad ipsum vocatus, hoc alexipharmacum exhibui:

℞. *Extracti magistralis, salis absinthii, ana scrup. j. f. theriacæ, scrup. ij. aque theriacalis, unc. j. f. aceti bezoartici, unc. j.*  
*Misceantur, pro haustu.*

Jussi ut astantes ipsum continuo alloquerentur, ac omnibus modis somnum impedirent, usque dum per quatuor vel quinque horas egregie sudasset. Æger ab assumpto medicamento vehementer sudavit; post sudorem etiam plane cessavit anxietas cum somnolentia, ita ut sequenti mane multo melius se haberet: atque tunc duo satis magni carbunculi, alter in brachio, alter in femore appa-

apparuerunt. Cum autem propter ægrorum multitudinem illo mane non satis tempestive hunc ægrum inviserem, statim natus quidam chirurgus advocatus fuit, qui meum adventum non expectans, suo consilio venam brachii incidit, & sanguinis circiter uncias decem extraxit; & mihi in via obviam factus, tanquam re bene gesta, factum narravit. Post tres à sanguinis missione horas ægrum simul invisimus, quem ille à sanguinis detractioe multum allevatum fore existimabat: sed longe aliter se res habuit, nam varia desperata signa in ipso animadvertimus: carbunculi non tumidi, nec in circumferentia multum inflammati, sed exiles, depressi & quasi aridi visi sunt; febris vehementissima accesserat cum maxima anxietate, quam tanta comitabatur virium debilitas, quâ, intra paucas horas æger deficiens, fatalem diem clausit.

*Annotatio.*

**Q**uamvis cum Galeno multi Medici in pestis, & præcipue in carbunculorum curatione, venæsectiones instituendas esse doceant, nos tamen in hac peste illas nunquam feliciter administratas fuisse novimus, nec quemquam evasisse scimus, cui sanguis venæsectione detractus fuit. Sic ipse quoque Hippocrates

6. *epidem. sect. 7.* testatur se in pestilentibus morbis infelicitè usum fuisse venæsectione & purgatione: *His (inquit) neque per medicamenta, quæ humores suis sedibus submovent, ullum esset dignum auxilium allatum est; neque alvi perturbatio, neque venæsectio juvit, quæ ipse tentavi.*

## HISTORIA XXIX.

**U**Xor Domini Wiljems, nobilis Angli, mulier delicatula, juvenis, & mediocriter fortis, peste cum magna anxietate correpta fuit, cumque alexipharmaco à nobis assumpto fortiter sudasset, protuberavit in inguine bubo, & anthrax in altero brachio erupit, ac magnum levamen sensit. Postridie mane ab eodem reiterato alexipharmaco rursus egregie sudavit, & bubo multum adauctus est, febris quoque plane recessit; ita ut periculum jam evasisse videretur. Cum autem foetorem sudoris ægrius perferret, rogavit ut lecti lintheamina ipsi mutare liceret; quod omnino prohibui, (sicut in omnibus id curiose prohibere solebam) & adhuc per duos tresve dies expectandum esse dixi. Illa tamen post meum discessum foetoris pertæsa, indusium nitidum prope ignem bene calefactum, abjecto priore madido, calidissime induit. Deinde post horas duas horrore cum magna anxietate correpta est; vehementissima febris, cum maxima siti, nausea & debilitate accessit, ac caput doluit. Præscripsi duo alexipharmaca, quæ statim revomuit, nec julebos etiam, nec alia convenientia medicamenta retinere potuit: bubo quoque disparuit. Circa mediam noctem alvus sponte turbata est, & exanthemata pauca hic illic in cute apparuerunt. Sequenti mane obiit.

*Annotatio.*

**R**enovationem lintheaminum ante diem septimum, periculosissimam fuisse, semper observavimus; & quantumvis calidissime illa mutatio fieret, nulli tamen feliciter cessit: omnibus enim paulo post febres, anxietates,

inquietudines, aliaque symptomata graviter cruduerunt. Causam fuisse animadvertimus foetorem saponis, quem recens lota & nitida lintheamina plus minusue retinent: qua de re scripsimus *lib. 2. cap. 3. annotat. 6.*

## HISTORIA XXX.

**F**ilius bipenniferi Capitanei Veer, puellus circiter sex annorum, peste correptus, magnum carbunculum in media mala, supra maxillam superiorem, habuit, qui ab exili pustula initio ducto, intra biduum horribiliter crevit, & totam genæ substantiam penetrans, mortificationem gingivarum, & tandem etiam palati induxit, atque octava die ægrum occidit.

*Annotatio.*

*Annotatio.*

**S**imilem casum adhuc semel vidi in alio quodam pauperculo puello, cui non tantum gingivæ, sed magna quoque nasi pars à pestilentis veneni malignitate ante mortem sphacelata fuit, cum teterrimo fœtore: sed hujusmodi exempla in hac peste rariora fuerunt. Fo-

restus *lib. 6. observat. 12.* refert se vidisse puellam anthracem sub labro intus habentem, è quo pestiferus, & ob membri mollitiem putridissimus vapor exhalans totam domum infecit. Et *observat. 25.* naarat historiam puelli, cui carbunculus labia, mentum, genas, maxillas & nasum invasit.

## HISTORIA XXXI.

**F**ilia Engelberti de Man Procuratoris, juvenula circiter viginti annorum, viso aliquo ægroto pestilenti febre cum phrenitide correpto, & horribili aspectu vociferante, adeo exterrita fuit, ut inde pestem statim conceperit. Febris aderat mitior, anxietas vero maxima, cum summa virium debilitate: bubo protuberavit sub axilla, & carbunculus in brachio erupit. Varia sumpsit rlexipharmaca: satis fortiter aliquoties sudavit, sed nihil imminuta est anxietas, cum qua die sexta è vivis excessit.

*Annotatio.*

**M**ultis à terrore pestem inductam fuisse observavimus; idemque etiam ab Historicis & Medicis, qui in tractandis

ægris pestiferis curiosiores fuerunt, annotatum fuisse legimus) quorum aliquot testimonia citavimus *lib. 2. cap. 7. annotat. 9.*

## HISTORIA XXXII.

**D**idricus Petterd, miles Anglus, robustus, mense Majo peste correptus, carbunculum in manu habuit. Ad hunc tertia morbi die vocatus est magister Cornelius chirurgus, ut ex charitate ægrum pauperem inviseret. Ipse in platea Regularia ante ædes in quibus decumbebat æger, mihi casu obviam factus, rogabat ut una cum ipso intrarem. Invenimus ægrum jam morti propinquum, corpore plurimis exanthematibus purpureis obrito, quapropter ipsum Deo commisimus. Post discessum disputatio inter nos orta est de causis, origine & forma exanthematum. Ego inter alia cum Fernelio statuebam, illa non esse solius cutis maculas, sed etiam partium subjectarum. Alter id negabat, & dissectione unius aut alterius exanthematis se id facile demonstrare posse dicebat. Convenit inter nos ut in cadavere prædicti militis (qui intra semi horam à nostro discessu moriebatur) refrigerato, postera die levem incisionem experiundi gratia faceremus. Ipse in femore levem tantum in cute fecit dissectionem, credens subjectas carnes maculatas non esse; verum se plane deceptum videns, altiore facta incisione istarum macularum progressum inquisivit, ac Fernelium vera dixisse confessus est: nam invenimus maculas illas ab ipso perioestio initium ducere, & latiore basi pyramidis instar per medios musculos recta sursum usque ad cutem ascendere, atque ibi in co- num terminari. Chirurgus hac experientia nondum contentus, in brachio supra cubitum aliâ factâ incisione, idem illud adhuc semel inquisivit: ubi invenimus basin duorum exanthematum (quorum progressum quærebamus) adeo profunde sitam non esse, neque ad perioestium usque pertingere, sed à duro tendone cujusdam musculi originem sumere.

*Annotatio.*

**T**radunt Jacobum Bontium, Medicum Lugduno Batavum, quondam ejusdem rei periculum fecisse, & invenisse quod

exanthemata ab ipsis ossibus initium ducerent. Procul dubio etiam Fernelius ejusdem rei oculatum experimentum sumpsit, nam, *lib. de febr. cap. 18.*

D d

cap. 18.



cap. 18. inquit: *Exanthemata ut corporis summa, ita & interiora viscera, musculos nervos ceterasque partes solidas obsident, ex hisque primam ducunt originem.* Sic etiam Joannes Morellus scribit non tantum exteriorem corporis habitum, sed & interiora viscera atque musculos ejusmodi papulis obsideri, non secus ac per variolas & morbillos. Anne hepar, lien, pulmo, aliaque

interna viscera hujusmodi pestilentialibus exanthematibus etiam infestentur, de eo ocularem experientiam non habeo, propterea quod licet contagium à dissectione musculorum pravi faciam, illud tamen, ex apertione cavitatum abdominis & pectoris, furiosius in astantes irruere posse credam.

## HISTORIA XXXIII.

**L** Ambertus Stoffels pestilenti febre absque ullo externo pestis signo correptus est, cum summa anxietate, siti, & capitis dolore. Mox in ipso principio advocatus fuit Adrianus chirurgus in Magna platea habitans, qui statim venæsectionem suavit, ac brachii vena pertusa, sanguinis aliquot uncias extraxit. Aeger inter chirurgi manus animi deliquio correptus est, quod cum diutius perduraret, meum consilium petatum fuit. Inveni ægrum sudore frigido perfusum, cum pulsu adeo parvo ut vix sentiri posset. Prædixi mortem. Attamen ne quicquam intentatum relinqueretur, aliquantillum aquæ vitæ Matthioli cum aqua cinnamomi ori infudimus, eademque nares & tempora fricavimus, acetum quoque rosaceum naribus objecimus, verum his non obstantibus intra horæ quadrantem exspiravit.

### Annotatio.

**F**orestus scribit in Peste Delphensi venæsectiones semper noxias fuisse, excepto si administrarentur in ipso morbi principio, antequam duodecim vel viginti horæ exspirassent, tunc enim profuisse. Nos verò in hac

peste omnes venæsectiones, etiam in ipso morbi principio factas, valde noxias, fuisse, non tantum in prædicto ægro, sed in pluribus etiam aliis observavimus.

## HISTORIA XXXIV.

**M**ense Majo circa vesperam casu transibam prope portum Noviomagensem, atque ibi civem quendam (non nominandum) fide dignissimum vidi quasi attonitum stare, & intensissimos oculos in certum quendam portus locum fixos habere. Rogavi quidnam ageret? ipse quasi è somno evigilans, respondit se nihil agere, sed maxima alteratione perculsum esse propter visionem quandam quam ibi viderat. Cumque curiosius quidnam vidisset inquirerem, primo quidem nihil dicere voluit, sed tandem sub fide silentii narravit se in portu navem vidisse, è qua funus efferebatur ad sepulturam, quod funus plurimi milites inversis ac terram verrentibus armis præcedebant: juxta ante funus vexillum (inquit) portabatur, & vir quidam thorace ferreo ac galea indutus nudum gladium manu tenebat, alius arma clypearia portabat: proxime post funus pauci pullati, & post hos varii viri absque palliis & famulis comitati, hosque rursus multi pullati sequebantur. Aliàs etiam (dicebat) sed rarius talia spectra vidi, eaque semper aliqujus mortem præsagierunt. Cum hæc aliaque pauca cum ipso locutus fuisset, discessi. Mense autem Julio istius spectri effectus visus est, nam cadaver nobilis Capitanei Jodoci ab Hæften (qui tunc temporis supra Longeweerdam mortuus fuerat) navi in portum Noviomagensem delatum, atque è navi plane eodem modo, quemadmodum civis ille diu ante in spectro se vidisse narraverat, ad sepulturam delatum fuit, ita ut nihil eorum, quæ in visione visa fuerant, deesset.

### Annotatio.

## Annotatio.

**H**Oc tempore mulier quædam epileptica, quam vulgò Joannam cum mammis vocant, dicebat se eorum qui morituri erant spiritus, atque feretra funeralia ante ædes illas è quibus mortui efferendi forent, aliaque multa spectra videre; cujus dicta multoties ab eventu confirmata fuerunt: verum postea cum sæpe etiam multa mendacia visionibus suis affingeret, ejus verbis parva aut nulla fides adhibita fuit. Attamen nonnunquam hujusmodi spectra cum infelici præfagio videri, ex narratione prædicti fide dignissimi civis, vel inde certò constare poterat, quod mihi rem illi ipsi incognitam, & quæ non nisi diu post effectum cognita facta fuit, eo ordine se vidisse narraret, sicut postea peracta est. Sic etiam hospes meus Bartholomæus de Claer nobis narravit, se quodam tempore serius domum venientem, vidisse in foro è magno illo diversorio cui Cygnus pro insigni est, elatum funus, cui arma clypearia præferebantur, & quod multi tubicines præcedebant;

cujus spectri effectus post aliquot à visione mentes manifestatus est in equitum quodam Capitaneo ægro ad illud diversorium delato, atque ibidem mortuo, & prædicto modo ad sepulturam delato. Memini etiam mulierem quandam mihi sanguine proxime junctam, quondam nobis præsentibus circa horam sextam post meridianam narrasse, se videre tria funera è vicini nostri ædibus efferri, multosque pullos funera sequi: effectus post duos ab inde menses licuit, nam in iisdem ædibus octidui spatio tres liberi variolis laborantes mortui sunt. Multa & mirabilia exempla spirituum, qui nonnullis apparuerunt, recenset Cardanus lib. 16, de Rerum varietate, cap. 93; Quamvis, apertè hujusmodi historiæ innumeris fabulis etiam investiri plerumque soleant, omnino tamen pro fabulis habendas non esse, sed Deo sic permitte diabolum multis ludibriis hominum quorundam mentes exagitare, pro certo credendum esse arbitramur.

## HISTORIA XXXV.

**U**Xor Orthonis à Wyler, mulier fortis & florentis ætatis, se magna cordis anxietate premi, atque exilem quendam tumorem cum dolore sub axilla sentiens, celavit malum: cumque per aliquot dies alvum non deposuisset, suo ipsius consilio foliorum senæ unc. f. cum seminis anisi drach. j. & aliquot prunis Damascenis in cervisia decoxit, atque illam colaturam bibit, & pruna comedit. Post duas horas maxima debilitate correpta fuit, ita ut ab animi deliquio parum abesset: huic debilitati adjuncta erant maxima intestinorum tormina, ac tandem secutæ sunt alvi dejectiones, quæ primo aliquod levamen inducere visæ sunt, sed paulo post exitiales evaserunt, nam in alvi continuum fluxum mutatæ sunt. Evanuit tumor qui sub axilla latuerat, & invasit febris vehemens, cum maxima siti & virium dejectione. Tunc meum consilium petatum est. Inveni vires summe languidas, cum pulsu crebro ac titubante. Excreta quæ per alvum dejiciebantur foetidissimum foetorem redolebant, neque erant steræque aliive humores excrementitii, quales in aliis fluxibus dejiuntur, sed erant quasi oleosa, turbida, cinerea, instar colliquationum. Præmissio igitur mortis præfagio, ne nostrâ negligentia perire videretur ægra, tale alexipharmacum exhibui:

℞. *Terræ sigillatæ, scrup. j. f. coralli rubri præparati, scrup. f.*  
*cornu cervi usti, scrup. j. theriacæ, diascordii, ana drach. f.*  
*aquæ theriacalis, unc. ij.*  
*Misce, fiat haustus.*

Non potuit sudare, nec quicquam imminutus est alvi fluxus. Post quatuor horas rursus aliud antidotum astringens assumpsit, à quo quidem aliquantum sudavit, sed absque levamine. Postridie viribus deficientibus simul morbo vitæque finem imposuit.

## Annotatio.

**E**Xitialia in hac peste fuerunt omnia medicamenta quæ alvum ducunt, etiam maxime levia, præcipue ante morbi perfectam declinationem assumpta; nam semper alvi fluxum fere omnibus lethalem induxerunt, non eo quod violentam operationem exercerent, sed quod naturam in suo opere inturbarent, & materiam morbificam, quam natura per commodas vias & cum salute ægrorum à centro ad

peripheriam movebat, in ægtorum perniciem ab externis partibus ad interiora viscera retraherent. atque eandem per incommodas vias versus intestina diverterent, per quæ tamen perfecte expelli non poterat: interea enim dum natura, ad hanc perversam viam jam seducta, venenum pestilens frustraneo conatu expellere anitebatur, cum viribus citius vita deficiebat quam morbus.

## HISTORIA XXXVI.

**E**Metus Batbergen, cum peste propemodum absque febre correptus sudoriferum à me sumpsisset, conquestus est, se in media lingua dolorem cum alicujus particulæ insensibilitate percipere. Cum locum inspicerem, vidi parvum nigricantem anthracem in media lingua enatum esse. Ad reliquam veneni expulsionem adhuc duobus sudoriferis usus est, cum optato levamine. Ne autem anthrax in fungosa parte se nimis cito & late extenderet, jussi ut os sæpe collueret eum sequenti decocto:

*Rx. Corticum granatorum, drach. vj. glycyrrhizæ rasæ, drach. iij.  
herb. betonicæ, melissæ, violariæ, pimpinellæ, foliorum bellidis, & herb.  
rubi, ana M. f. flor. balaustiorum, & rosarum rubr. ana drach. j. f.  
aquæ communis q. s.  
Coquantur ad lib. j. f. Colaturæ admisce.  
syrupi diamori, mellis ros. ana unc. j.*

Cùm hac collutione per biduum usus fuisset, ad citiorem escaræ separationem, aliam præscripsi:

*Rx. Hordei mundat. drach. v. radic. althææ sicc. glycyrrhizæ rasæ, ana drach. iij.  
herb. malvæ, pimpinellæ, althææ, & violariæ. ana M. j.  
ficuum ping. no. v. passularum, unc. ij. aquæ communis q. s.  
Coquantur s. art. ad lib. j. f. addendo colaturæ.  
mellis ros. syrupi diamori, ana unc. j.  
Fiat decoctum pro collutione.*

Idem postea adhuc bis reiteratum est. Octava morbi die parva escara separata excidit, magnum linguæ dolorem relinquens, qui collutionibus & vulneris sanatione paulatim evanuit. Ita æger hic restitutus fuit, retinens post sanationem in lingua parvam cavitatem, eo in loco ubi anthrax fuerat.

## Annotatio.

**C**arbunculos in lingua rarissime oboriri, hinc credibile est, quod in tota hac furiosissima peste hunc casum tantum bis vi-

dere nobis contigerit. Chirurghi qui pestiferos tractabant, se eundem casum tantum bis terve quoque vidisse, referebant.

## HISTORIA XXXVII.

**E**ques notissimus Schabhals, homo fortis, audax, & maxime temerarius, peste cum magna febre ac debilitate correptus, bubonem in inguine, & tres anthraces in corpore habuit. A quibus omnibus malis cum optimè summi Dei auxilio sanatus esset, & jam rursus foras prodiret, nullas Deo gratias egit,

egit, sed satis impie gloriatus fuit, se ipsa peste nequiores & fortiores esse, atque nec pestis, nec diaboli spicula ipsum quicquam afficere posse, imo se neque pestem neque diabolum curare. Audivit Altissimus impia impiissimi hominis verba. Quid fit? Postquam cum reliquis equitibus hostilia castra aliquoties explorasset, (nam famosissimus erat conductor, quem vulgo *Guide*, alii *Gidse* appellant) tandem circiter quintâ post perfectam sanationem hebdomadâ, rursus de novo peste correptus est, & ante diem sextum victrici pesti duram subiecit cervicem.

## Annotatio.

**D**isputatur inter Medicos, an illi qui à peste semel evaserunt, rursus peste corripì possint. Negativam partem sectatur Guilielmus Magistrius, qui *de Pest. sect. 1.* scribit, eos qui semel peste laborarunt, eodem toto anno ab illa lue immunes evadere, atque etiam totâ vitâ minus periclitari. Sic quoque Massaria inquit, neminem bis pestilentiam incurere, sed eos qui semel peste laborarunt, imposterum à peste tutos esse: eamque causam esse arbitratur, quod vespillones illi, qui ægris pestiferis inserviunt, à contagio non lædantur, quia plerique semel peste laborarunt. Matthias Untzerus dicit eos qui semel peste tentati fuerunt, eodem pestilenti tempore vix, ac ne vix quidem in eandem relabi. Subjungit has rationes: Quia humor ille pestifeto veneno fomitem subternens habilem, totus in illo morbo evacuatus & dissipatus fuit, ut non facile contagionis labem suscipere queat; vel quia cor antidotis in prima peste munitum, porro qualitate alexiteria perfruitur, qua venenum pestis longe à se propulsare valeat: vel quod cor pugnae priori cum pestilenti veneno assuetum, nunc iteratos crudelis tyranni insultus eludat, minasque despiciat. Verum omnes has auctoritates & rationes ipsa experientia facillime evertit: nam varios novimus qui ante aliquot annos peste laboraverant, & propterea tamen in hac constitutione non magis à lue immunes fuerunt, quam alii. Eodem autem anno eundem

hominem bis peste corripì posse, liquet ex prædicta historia, ut & ex historia 45. Sic etiam Marsilius *lib. epidem. cap. 34.* scribit, ter unum ex Florentinis luem hanc invasisse, qui etiam secundo perfecte liberatus, tertio mortem evadere non potuit. Angelus Bellicochus, *tract. de Peste*, refert, in illa peste Veneta nonnullos ab hoc gravissimo malo liberatos, per aliquot menses se rursus satis bene habuisse, & postea iterum in morbum hunc incidisse, à quo tamen nonnulli fuere restituti.

Sic etiam Follinus, *Amulet. cap. 20. problem. 2.* dicit, se in peste Sylæducenti vidisse, qui ter hoc morbo laboraverunt; & nonnullos fuisse defunctos, qui novena morbi pugna succubuerunt. Verum etsi hæc ita se habeant, tamen docet experientia, illos, qui semel hoc malo afficti fuerunt, tutius degere, & minus periclitari aliis, qui nunquam eo detenti fuere. Quod etiam in gravissima sui temporis peste notat Historicus Thucydides, *lib. 2: Verum ii*, inquit, *præcipue morientium laborantiumque miserabantur, qui ipsi evaserant, quippe id jam antea experti, ac de se securi: neque enim bis eundem morbus corripiebat, ut extingueret.* Verum in nostra peste Noviomagensi, etsi qui semel pestem experti essent, raro secunda vice in illam inciderent, quibusdam tamen hoc contigisse novi, eorumque nonnullos evasisse, nonnullos mortuos fuisse.

## HISTORIA XXXVIII.

**R**obertus Wendel cum peste una cum vehementi febre correptus esset, nec à primo alexipharmaco ullum levamen perciperet, secunda die acutissimum dolorem pleuriticum sensit in latere dextro, qui statim anhelitus libertatem impediit, atque ægrum intra duas horas jugulavit. Cadavere vix refrigerato, totum dextrum pectoris latus nigerrimo colore, instar carbonis, infectum est.

## Annotatio.

**D**olores pleuritici qui pesti superveniunt, semper erant lethales, & ægros cito occidebant, propterea quod non solum ab inflammatione membranae pleuræ, sed à pestilenti veneno isti membranae vicinisque partibus infixio producerentur; quod venenum non solum inflammationem, sed partis mortificationem inducebat, quæ nec venæsectione, nec

ullis aliis mediis curari poterat. Hæc pleuritico pestilens admodum familiaris non erat. Wierus autem *lib. rarar. observat.* describit pleuritides, peripneumonias & anginas pestilentes epidemias, quæ per totam Inferiorem Germaniam gravissime dominabantur, nec venæsectione aliisque remediis cedentes, maximam hominum stragem ediderunt.

H I S-

## HISTORIA XXXIX

**V**Idua Joannis Rodenburch, mulier fortis, peste correpta statim carbunculum in femore habuit: febris aderat vehementior, cum magna siti, anxietate, & inquietudine. Hoc alexipharmaco assumpto egregie sudavit:

℞. *Extracti ruthe, & cardui, ana scrup. j. salis scordii, scrup. j. f. diascordii Fracast. drach. j. aquæ theriacalis, unc. j. aceti bezoartici, unc. f. Misce, fiat haustus.*

Secunda die tumorem sub axilla percepit: tunc alterum sudoriferum exhibitum est, quod statim evomuit. Hoc julebo ad sitim utebatur:

℞. *Aquæ cardui bened. lib. j. scabiosæ, & acetosæ, ana lib. f. syrupi de succo citri, & granatorum acid. ana unc. j. olei sulphuris q. s. ad gratum acorem. Misce, fiat juleb.*

Nihil aliud illa die assumere potuit. Postridie morbo in eodem statu permanente, nec tumore sub axilla magis crescente, meo persuasu hunc bolum deglutivit:

℞. *Extracti magistralis, scrup. j. & angelicæ, scrup. j. f. lapidis bezoar Orient. gr. vij. mithridatii demac. scrup. j. M. Fiat bolus.*

Circa vespere de ventris dolore conqueri cœpit, intestinorum quoque murmura accesserunt. Sequenti nocte vehementius febricitavit. Die quarta mane alvus liquida dimisit: paulo post colliquativus fluxus secutus est, cum quo foetidissima, turbata, confusa, cinerei coloris dejiciebantur; quem fluxum nullis astringentibus nec antidotis sudoriferis (quamvis ægra mortem metuens, tunc quidlibet assumeret) sistere potuimus. Post sexdecim à principio fluxus horas etiam sanguis defluxit, & ægra sequenti nocte obiit.

## Annotatio.

**A**lvi fluxus pesti superveniens plerumque lethalis fuit, & cum illo vix centesimus quisque evasit. Sic etiam Galenus scribit in peste sui temporis omnes prope perisse quibus alvi fluxus superveniebat. Itaque quoque Nicolaus Florentinus, Gallus Tridentinus, Forestus, & alii observarunt in peste, maxima ex parte mortuos fuisse illos, quibus alvi fluxus accessit, imprimis si anhelitus foetens adjungeretur. Errant omnes qui hunc fluxum critica die incidentem, morbi salutarem eventum prænunciare arbitrantur: errant nempe in eo, quod fluxum hunc criticum esse, & à victrice naturâ produci judicent, cum re vera sit symptomaticus & morbi vi inductus.

## HISTORIA XL.

**N**icolaus ab Elten, eques generosissimi Capitanei Coenjers, vir robustus ac temerarius, peste jam correptus & bubonem in inguine sentiens, statim pro duobus assibus tabacum minutim conscissum emit, idque in cervisia aliquantum decoxit, postea colavit, expressit, ac colaturam ebibit. Hinc non diu post tanta anxietate & debilitate correptus est, ut animo totus lineretur, ac jam mori videretur: paulo post rursus ad se reversus, adeo enormiter sursum deorsum purgatus est, ut in mediis excrementis instar porci provolutus jacens, vix quispiam ipsum contingere auderet propter contagii metum. Tandem à domesticis ex illuvie illa extractus, mundatus & in lectum depositus est, adeo debilis existens

existens ut se commovere non posset, inguinis quoque bubone plane disparente. Tunc petiit Vice-Capitaneus Couper ut ipsum inviserem. Cum autem illum adeo debilem & toto corpore turbatum invenirem, ad eluendam tabaci qualitatem bis terve cervisiam offerri jussi, quam statim cum violentia revomuit. Denique vini Gallici generosi lib. j. ad ignem calefecimus, eique (ut solent equites) aliquantum nucis moscatæ, canellæ & zingiberis immiscuimus; quem potum calidissime assumptum retinuit, & stragulis bene coopertus in somnum incidit, atque inter dormiendum valde sudavit. Post aliquot horas è somno evigilans, tale vinum adhuc semel à domesticis paratum ebibit, & rursus ad dormiendum & sudandum se composuit. Sequenti die optime valuit, & cum satis magna voracitate rursus comedit. Tunc passim gloriabatur se quendam diabolum ipsa peste nequiores (nempe tabacum) invenisse, qui corpus subintrans statim ipsam pestem ejiceret.

### Annotatio.

**S**æpe (inquit Celsus) quos ratio non restituit, temeritas adjuvat. Liquit illud in prædicto equite, cujus temeritatem cum alii duo ejusdem cohortis equites peste correpti (alter cum inguinis bubone, alter cum tumore sub axilla) sequi vellent, infelicitè perierunt: prior intra duas horas ipsam animam evomuit; alter vero deficientibus viribus sequenti nocte è vivis excessit. Nobis etiam narratum est, nonnullos alios milites, consilio & experienciâ prædicti equitis dementatos, illud ipsum quoque infelicissime tentasse, eorumque animas tabaci adventu citissime è corporibus fuisse fugatas. Quamvis ad pestis præservationem tabaci fumus ore attractus valde insignis sit, attamen ipsum tabacum, vel ejus extractum, aut decoctum in corpore assumptum, ad pestis curationem noxium est, propterea quod violentissima sua operatione corpus, jam à pestilenti veneno infestatum & debilitatum, gravissime exagitet & conturbet, imò residuas vires ad veneni resistentiam maxime necessarias in totum dejiciat. Ita ut quamvis tabacum qualitatem aliquam veneno pestilenti contrariam obtineat, quia tamen isti antidotali qualitati alia vehementer conturbatoria conjuncta est, quâ vires plane dejiciun-

tur, harum conservandarum gratia, ab ejus interno usu abstinendum est. Nam curationis pestis duæ primariæ sunt intentiones, Veneno resistere, & Vires conservare. Harum autem intentionum prior nequit bene perfici sine posteriore; natura enim succumbens neque veneno resistere, neque antidota in actum promovere potest. Nec etiam posterior sine priore perficitur, cum venenum, cui non resistitur, invalescens, vires quantumvis conservatas obruat. Quapropter ad curationem pestis talibus medicamentis utendum, quæ his duabus intentionibus simul satisfaciant, veneno resistent, & vires, quantum fieri potest, conservent. Quæ verò medicamenta in alterutro peccant, rejicienda sunt. Tale est tabacum, cujus usus si forte uni alicui fortissimo salutaris existat, rursus mille alios occidet. Hujus tamen fumo per fistulam attracto, & rursus foras dimisso, innoxie, imò cum magna utilitate (imprimis ad præservationem) uti possunt illi, qui ejus usui assueti sunt; nam in talibus vires non dejicit, nec corpus conturbat, partim propter consuetudinem, partim quod manifestâ quantitate non ingrediatur corporis interiora.

## HISTORIA XLI.

**M**ense Junio casu transivi, Adolpho Fildar Chirurgo comite, plateam vulgo Bloemerstraet appellatam, atque ibi puerulos quosdam colludentes vidimus, & inter hos filiolum militis cujusdam, circiter sex annorum, qui exanthematibus obscure purpureis & rotundis totus scatebat. Mirati sumus puellum hunc non ægrotare. Interim dum illum cum admiratione aspiceremus, accurrit mater, quæ nobis filii crura, ventrem, clunes reliquumque corpus detexit, quod totum exanthematibus non minus oblitum erat quam manus & facies. Mater dicebat puellum per quatuordecim dies has maculas habuisse, & vix unquam ægrotasse, solummodo unica die aliquantum de capitis dolore conquestum fuisse, nec bene edere potuisse, ea tamen de causâ ipsum domi manere noluisse, sed cum sodalibus suis in plateis adhuc colluisse: ista autem insequente nocte ipsum in somno multum sudasse, ac postridie exanthematibus adeo scatentem inventum fuisse, neque ipsum postea male valuisse, licet illa & vicini omnes mortem

tem pueri quotidie expectassent. Ego post tres deinde septimanas curiositate erga puerum rufos inuisi, cumque optime valere, & exanthemata fere omnia paulatim insensibiliter evanuisse vidi.

#### Annotatio.

**P**rocul dubio natura fortis & torrobustum in hoc puella non tantum unico sudore venenum pestilens totum foras expulit, verum etiam spiritus vitales ab ejus contagio jam corruptos extra artèriarum cavitates simul protulit; atque ita ægrum à gemino malo, nempe tam à pestilenti veneno, quam à spirituosa arteriosi sanguinis parte, per veneni virulentiam jam corruptâ, simul & in totum liberavit. Quod exemplum hac tempestate pro rarissimo habendum erat, nam in tota hac tam furiosa peste, præter hunc puellum, nullum unquam vidi evalisse, cui exanthemata purpurea aut nigricantia appaerent; sed quo plura & majora prodirent, eo citius ægros semper interiisse: reliqui etiam qui peste infectos tractabant, se id nusquam amplius vidisse affirmabant. Exanthemata rubra, parva & non multa, licet plu-

rimis essent lethalia, cum his tamen pauci ad hac evadebant; cum purpureis aut nigricantibus, nullus. Ac propterea quod maculæ illæ instantem mortem certissime prænunderent, vulgus illas appellabat *stygias mortis*, iisdemque apparentibus omnem de ægris spem abjiciebat. Joannes Morellus *lib. de febr. purp. & Pest. cap. 2.* satis longo sermone contendit exanthemata pestilentialia dari vel existere non posse sine febre. Verum cum Hippocrates in *epidem.* testetur bubones & carbones pestilentes sine febre multoties visos esse; cum ipsa quoque pestis sine febre esse possit, ut docuimus *lib. 1. cap. 12. annotat. 2.* cum etiam Gemma se illud sæpius vidisse testetur; cum experientia quoque in prædicta historia satis demonstret, exanthemata purpurea copiosa sine febre enata fuisse, non est quod Morelli opinionem pluribus refutemus.

### HISTORIA XLII.

**R**outherus Wanhans, Germanus fortis, peste correptus vomuit, capite doluit, ingenti sopore & cordis anxietate pressus est, nullum tamen externum pestis signum percepit. Urina sanorum urinæ similis, pulsus creber erat atque inæqualis. Quia morbus, cum ipsum primo inviserem, erat in ipso principio, magnam salutis spem dedi, atque hunc haustum statim exhibui:

*℞. Theriacæ, drach. j. salis communis, scrup. ij. aceti vini fortis, unc. iij. Misce, fiat haustus.*

Ab hoc assumpto per sex septemve horas vigilare jussi. Vehementer sudavit, simulque bubo in inguine dextro erupit. Postridie eodem haustu reiterato, iterum copiosissime sudavit, atque ab anxietate & capitis dolore in totum liberatus fuit: duo carbunculi satis magni sinistrum femur invaserunt, quibus à chirurgo f. art. tractatis, æger brevi convaluit, tumore inguinis sponte evanescente.

#### Annotatio.

**E**odem modo cum felicissimo successu multis pauperioribus in ipso morbi principio exhibui solius aceti fortissimi unc. iij. vel iij. cum salis marini pugillo, & optime sæpius profuit; interdum etiam Theriacæ drach. j. admiscui. Si illud revomerent ægri, paulo post rursus offerebatur. Notandum autem non omnibus promiscue acetum esse exhibendum, sed ab ejusdem usu arcendos esse illos qui in pectore aliquod vitium habent, puta asthmaticos,

tussiculosos, & similes. qui ab aceto pessime afficiuntur. Ita quendam no-vi civem, qui cum me acetum nonnullis præscripsisse vidisset, etiam uxori suæ peste correptæ (quæ naturâ erat asthmatica & tussiculosa) idem exhibuit, à quo tanta tussi & suffocatione obruta fuit, ut non sine magna molestia aceti acrimonia & pectoris asperitas mitigari, ipsaque à præsentis suffocationis periculo liberari potuerit.



## HISTORIA XLIII.

**J**Oannes Guilhelmi, famulus fabri lignarii, nuncium recepit parentes ejus prope Tielam habitantes, peste mortuos esse; à quo tristi nuncio tantopere conturbatus & perterritus est, ut etiam ipse inde statim pestem conceperit, à qua, non obstantibus variis adhibitis remediis, ante quartum diem obiit.

## Annotatio.

**S**I ex solo nuncio hic æger peste correptus fuerit, quis mirabitur de eo quod Nicephorus scribit, ex solo aspectu infectarum ædium nonnullos peste infectos fuisse: & de eo quod Sennertus refert, ab aspectu currus in quo mortui ad sepulturam vehuntur, nonnullos contagium concepisse; imo nonnullos ex insomniis de peste, dirâ labe contaminatos fuisse.

## HISTORIA XLIV.

**N**obiles quidam Galli cum mense Junio graviore equitatione exercitii gratia se valde defatigassent, hincque multum sudarent, inter illos unus subito maxima anxietate & debilitate correptus est, ita ut se vix diutius supra equum sustentare posset. A sociis ad diverforium deductus & lecto impositus fuit: interea me advocarunt. Inveni pulsum crebrum, celerem & parvum. Narrabant focii quomodo ab exercitio incaluisset & valde sudasset, atque tunc subitaneo illo languore correptus esset: addebat æger se in pectore aliquas pustulas dolorificas sentire, & credere se peste correptum esse. Ut illas pustulas inspiceremus anne carbunculi essent, thoracem aperuimus, & denudato pectore vidimus ægrum supra pectus amuletum aliquod tenuissimo serico investitum, & à sudore jam valde madidum, gestare, sub quo pars multum inflammata, & multæ exiles nigricantes pustulæ enatæ erant. Cum hoc amuletum detracto serico examinarem, vidi esse commune illud ex arsenico rubro & albo confectum. Interea dum hæc agimus, æger animo linguebatur, vino dato & ad se reversus, conquerebatur se suffocativam quandam anxietatem, cum summo cordis ardore sentire. Tunc statim abjecto amuleto hoc alexipharmacum præscripsi:

℞. *Extracti Angelicæ, & ruthæ, ana scrup. j.*  
*theriacæ, scrup. iiij. aquæ theriacalis, unc. j. aceti bezoartici, unc. f.*  
*Misce, fiat haustus.*

Cum hoc assumpto per tres continuas horas fortiter sudasset, à prædictis symptomatibus liber evasit, ac postridie rursus bene valuit. Ad latentis tamen veneni reliquias penitus absumendas, hoc condito per aliquot dies usus fuit:

℞. *Specier. liberantium, drach. j. radic. helenii condit. cortic. citri condit.*  
*rob. ribesii rubri, diascordii Fracastorii, ana drach. iiij.*  
*syrupi de scordio q. s. olei juniperi, scrup. j.*  
*Fiat condituum.*

Pustulis oleum scorpionum & laurinum inunximus, atque ita citissime sanatæ sunt. Consului ne unquam amplius talia venenata amuleta gestaret.

## Annotatio.

**E**tsi Niddanus, Simonius, Theodosius, Mercurialis, alique clarissimi Medici, amuleta ex arsenico & sublimato confecta, tanquam divinum remedium ad pestis præservatio-

nem extollant, nos tamen in hac peste nemini illa profuisse animadvertimus. Gerardus Busæus Pharmacopæus illa satis magno pretio omnibus vendebat; ut & Adolphus Fildar Chirurgus,

gus, qui illa tanquam è deorum scrinis prolatum donum commendabat: verum per illa nullos, imo nec ipsos venditores præservatos fuisse vidimus:

*in ipsos sava medentes irrupit clades.* Nam Rufæus una cum tribus liberis; Fildâr vero cum uxore & liberis peste extinctus est, quamvis omnes hæc amuleta longo tempore curiosissime gestassent. Quapropter cum neque ratio, neque experientia (ut latius docuimus lib. 2. cap. 11. annotat. 1.) amuletorum arsenicalium usum probet, rejicienda sunt, imprimis cum sæpius etiam maxime noxia esse possint, ut liquit in prædicto ægro, qui à suo amuleto paulo

minus quam si venenum per os assumpsisset, læsus fuit; & nisi illud tempestive amotum, abjectum, & antidoto exhibito provisum esset, forte ab ejusdem virulentia enecatus fuisset. Similia damna ab hujusmodi amuletis illata se quoque vidisse, refert Zæutus Lusitanus, *Præf. Admiz. lib. 3. observat. 45. In pestilentia (pintada) lue febribusque pestiferis sum expertus, plures de auxilio usos, subito peste correptos occubuisse: alii in inflammatione oborta in lava thoracis externa parte, febribus sunt apprehensi, qua ex admoto sublimato orta sunt, qui summo labore deinceps convalescere: quidam inflammato corde incensisque spiritibus in palpitationem incidere.*

## HISTORIA XLV.

**C**hristophorus de Four, Mercator ferrarius, mense Majo peste correptus fuit, ac quarta morbi die obiit. Ipsi autem animam agenti duo filii cum ancilla ante lectum adstabant, qui tres, simul ac æger extremum spiritum efflaret, eodem momento simul contagio infecti sunt. Ancilla cum filio juniore ob contagii vehementiam statim animo linquebantur, deinde magna febre simul omnes obruti fuerunt. Filii intra biduum vel triduum occubuerunt. Ancillæ autem ingens tumor sub axilla dextra protuberavit, ut & bubo in inguine, quibus tumoribus maturefactis atque disruptis, sanata, & ab imminente periculo etiam hac secunda vice liberata fuit; nam hæc erat eadem illa ancilla quam antea adhuc semel peste laborasse, diximus historia nona.

### Annotatio.

**Q**uotidiana praxis docet adhuc fortiter spirantibus ægris multo minus contagii periculum adesse, quam iisdem morientibus: eaque de causa multi non sine ratio putant, se tutius invisere posse decem languentes, quam unico morienti, vel statim mortuo, adesse. Quod tamen alienum videtur, cum viventium longe major sit exhalatio, totumque corpus apertum caloris vi majorem putredinis partem foras transmittere posse videatur. Quæritur igitur

quænam sit ratio? haud alia est ac si quis accensam lampadem extinctæ comparat: ipse enim ignis tantisper dum excandescit, exhalat tenue ac fuliginosum quippiam, sed minus malignum, utpote quod ab ignis calore prius discutitur, quam intermedium aërem inficere possit: at sublato igne, exsudat adhuc ab elychnio crassus & tetricus vapor, quem magis pestiferum & pertinacius inhaerentem esse, tum color & odor, tum tota substantiæ ratio satis ostendunt.

## HISTORIA XLVI.

**G**enerosus vir D. Wiljems, nobilis Anglus (de cujus uxore mentionem fecimus supra hist. 29.) homo fortis, 16. Junii mane è somno evigilans, nondum tamen ægrotans, anthracem in brachio dextro percepit: quo pestis signo viso, statim meum consilium petiit. Exhibui hoc alexipharmacum, de quo bene sudavit:

℞. *Extracti magistralis, & angelicæ, ana scrup. j.*  
*salis scordii, scrup. j. f. theriacæ, scrup. ij. aquæ theriacalis,*  
*aceti bezoartici, ana unc. j.*  
*Misce, fiat haustus.*

Circa vespèram vehementi febre correptus est, cum magna siti, anxietate, & inquietudine. Tale antidotum rursus sumpsit:

℞. *Extracti cardui ben. scrup. j. f. & angelicæ, scrup. j.*  
*salis absinthii, scrup. j. f. diascordii Fracast. scrup. ij.*

*aque*

*aque theriacalis, unc. j. succi citri unc. f.  
Misce, fiat haustus.*

Ad sitim hic julebus præscriptus est:

*℞. Aqua cardui bened. lib. j. scabiosa, acetosa, ana lib. f.  
& rosarum, unc. ij. syrupi de scordio, & granatorum acid. ana unc. j.  
succi citri, q. s. ad gratum acorem.  
Misce, fiat juleb.*

Noctem illam admodum gravem habuit. Postridie mane duo alii anthraces apparuerunt, alter in femore, alter in crure. Ab ultimo diaphoretico reiterato rursus illo mane multum sudavit: bis reiterarum quoque est julabium: febris eadem vehementiâ continuavit, & vires ad extremam debilitatem dejectionis fuerunt. Hujus misturæ sæpius illa die cochleare plenum sumpsit:

*℞. Conservæ rosarum rubr. drach. v. aque theriacalis, unc. j. f.  
aque cinnamomi, drach. vj. succi citri, unc. j.  
Misceantur, & colentur, adde colaturæ,  
confectionis de hyacintho, scrup. ij. & de alkermes, scrup. j. f.  
Misce.*

Tertia die per vias urinarias sanguinem purum ter quaterve magna quantitate reddidit: circa horam vespertinam obiit.

#### Annotatio.

**Q**ui sanguinem mingebant, omnes moriebantur: quod lethale symptoma hoc tempore satis commune erat, & à vulgo *pestis sanguinea* appellabatur. Etiam lethalis alvi sanguineus fluxus pesti multoties adjungebatur. Sudorem autem pestilentem sanguineum nusquam vidimus, quem tamen se vidisse testantur, Agricola lib. 2. de Pest. Lycosthenes, de prodig. & Zacutus Lusitanus, Prax. Admir. lib. 3. observ. 40.

## HISTORIA XLVII.

**H**enicuster Coelen, pistor, qui prope Wijmel portam habitabat, à pestis invasione maximas habuit debilitates, cum multis animi deliquiis: de cordis etiam anxietate conquestus est: gravis tamen febris non aderat. Varia sumpsit alexipharmaca, satis copiose sudavit, eruperunt duo carbunculi, cum tumore sub axilla. Morbus usque ad diem sextum in eodem statu permansit: tunc gutturis raucedinem in ipso percepimus, è quo solo signo certam & citam mortem prædixi. Sequenti nocte eruperunt pauca exanthemata: & circa diluculum æger vitæ hujus miseras effugit.

#### Annotatio.

**L**aboraverat hic æger anno præcedente per tres menses febre purpurata, cum plurimis punctulis rubris ac purpureis, & ter quaterve cum summo vitæ periculo recidivam passus fuerat. A quo morbo quamvis Dei, & medicamentorum nostro consilio adhibitorum, ope feliciter sanatus, & optime valens, ex pistori jam pharmacopola factus esset, lethalia tamen pestiferæ luis spicula effugere nequivit. Quæ lues primâ fronte symptomatum parvitate multo minus periculum quam prædicta febris minari videbatur, verum tandem raucedine gutturis infelicem morbi eventum præsignificavit; qua raucedine quotquot tenebantur, illi omnes certo moriebantur, etli alia signa salutarem morbi eventum promittere viderentur.

## HISTORIA XLVIII.

**E**lisabetham Petri sutoris filiam, ætatis circiter viginti annorum, pestis una cum maximo vomitu, summa anxietate & debilitate corripuit, nec potum, nec aliud quid retinere potuit. Post duodecim ab invasione horas evomit duos vermes vivos, breves, rubros & crassos, qui circiter longitudinem ac crassitiem minimi digiti habebant, & instar sanguinis rubescebant, atque per pelvim vivi volutabant. Hos cum eiecisset, intra horæ quadrantis spatium mortua est.

*Annotatio.*

**V**ehemens fuisse debuit illud venenum, quod tam paucis horis tantam & talem humorum putredinem inducere potuerit, è quo hujusmodi vermes tam cito generati fuerint. Nec mirum est ægram cito obiisse, nam cum tanto veneno, tamque perniciofa humorum putredine neminem diu super vivere posse,

credibile est. Anno 1576, in peste Veneta vermes quoque observatos fuisse, refert Angelus Bellicochus: *Multi (inquit) hoc tempore per os & intestina vermes excreverunt, qui propter infignem humorum putredinem difficilior, quam alii, fuere curati.*

## HISTORIA XLIX.

**V**ice-Capitaneus nobilissimi viri D. de Sterckenburch, legionis Groeningensis Præfecti, peste correptus post varia assumpta medicamenta, & maturatum ac disruptum bubonem rursus convaleuit. Toto morbi decursu nimis vigil fuerat, sed tamen absque molestia, quæ vigilæ, morbo jam penitus sanato, (postquam æger rursus per octiduum foras prodiiisset) adhuc perdurabant, ita ut singulis noctibus vix per sesqui horam dormire posset. Tandem ab illo pseudochirurgo, qui bubonem ejus tractaverat, aliquod medicamentum adversus has vigilias petiit: qui illi cubitum ituro circa horam decimam vespertinam potiunculam narcoticam exhibuit, à qua tam egregie dormivit, ut vigiliarum & vitæ plane oblitus fuerit, nam intra quindecim horas, nunquam rursus evigilaturus, extremum somnum absolvit.

*Annotatio.*

**E**cce quam egregie rebus suis consulant, qui nimis avaritiosi (qualis erat hic æger) talium homicidarum potius, quam peritorum Medicorum consilia petunt? quam egregie Magistratus Reipublicæ commodo studet, qui in genere omnibus Chirurgis ultra crepidam sapiendi, & in medicina quilibet cum ignoran-

tia temere audendi, liberam potestatem permittit? quam egregie civium & incolarum salus curatur, cum nonnullis ignavis pseudochirurgis, veris homicidis, pestiferorum curandorum, vel pro libitu impune necandorum, provincia à Magistratu imponitur?

## HISTORIA L.

**S**trenuissimus Capitaneus Jodocus ab Hæften, pestem fugiens civitatem dereliquerat, ac cum tota familia ad pagum Oosterhaut (qui unico milliari à Noviomago distat) in castellum ibidem situm migravit. Postquam per tres menses ibidem habitasset, uxor illius 13. Junii peste correpta est, ad quam sequenti die post meridiem vocatus fuit. Inveni ægram leviter quidem, ut videbatur, febricitantem, sed tamen debilem, capite dolentem, & summa anxietate pressam. Urina erat turbida, pulsus parvus, creber & inæqualis, lingua tumida, calor corporis non admodum vehemens, nec vultus color multum immutatus. Nullum in externis dolorem sentiebat, præterquam in inguine sinistro, ubi parvus & durus tumor sub cute adhuc latens sentiebatur. Appetitus plane prostratus erat.

litis

sitis non multum vexabat. Istâ vespere hoc alexipharmacum exhibui:

- ℞. *Diascordii Fracast. drach. j. salis absinthii, coralli rubri præparati, extracti cardui, pulveris liberantis, ana scrup. j. aquæ theriacalis, unc. j. f. olei vitrioli gut. xj. Misce, fiat haustus.*

Illa nocte bene sudavit. 15. Junii diarrhoea pestilens supervenit: dejectiones erant turbidæ, cinericæ, foetidissimæ. Inguinis tumor plane disparuit, vires quoque valde prostratæ sunt, ita ut de vita ejus desperarem. Hoc sudoriferum matutino tempore dedi:

- ℞. *Trochiscorum de terra sigillata, coralli rubri præparati, ana scrup. j. diascordii Fracast. drach. j. aquæ theriacalis, unc. j. & cardui bened. unc. f. Misce, fiat haustus.*

Hoc assumpto mediocriter sudavit, sed morbus tamen in eodem statu permanfit. Circa vesperam, ipsa ægra & marito illud unice petentibus, tale amygdalatum præscripsi:

- ℞. *Amygdalarum dulc. depil. drach. v. sem. lactucæ, & papaveris albi, ana drach. iij. decocti hordei, q. s. Fiat emulso ad unc. vj. cui admisce, syrupi cydoniorum, unc. f.*

Hoc emulsum illa nocte duabus vicibus totum sumpsit, verum plus nocuit quam profuit, (quod amygdalata in hac peste semper faciebant) multo enim majore anxietate tota nocte pressa fuit ægra; amygdalatum instar casei coagulatum partim cum summa molestia evomebatur, partim cum infernis excretis dejiciebatur, nec quicquam imminutus est alvi fluxus. 16 Junii mane postremum sudoriferum reiteratum fuit, à quo bene sudavit, cum aliquali levamine, sed alvi fluxus in eodem statu permanfit. Post meridiem de magno dolore sub cartilagine ensiformi conquesta fuit, qui inunctione sequentis unguenti cito cessavit:

- ℞. *Olei distillati nucis moscatæ, macis, ana scrup. j. & juniperi, scrup. f. theriacæ andromachi, olei scorpionum, ana drach. j. Misceantur pro linimento, bis terve de die inungendo.*

Ad fluxum ventris sæpius de die hujus conditi frustulum comedit:

- ℞. *Trochiscorum de terra sigillata, cornu cervi usti, ana scrup. j. f. specier. diatrium santalorum, scrup. ij. diascordii Fracast. drach. ij. conservæ rosarum rubr. drach. vij. syrupi granatorum acid. q. s. Misce, fiat conditum.*

Lingua hoc tempore nigricans erat & tumida, ac propterea decoctio facta est, ex plantagine, foliis bellidis, acetosa, pimpinella, & fructu ribesiorum rubr. ad os colluendum & gargarizandum, post collutionem lingendo parum syrupi granatorum vel de succo citri. 17. Junii videbatur quidem alvi fluxus aliquantum immiui, verumtamen circa vesperam ægra extreme debilis fuit, quapropter hoc alexipharmacum dedi:

- ℞. *Theriace, mithridatii, ana scrup. j. f. confect. de hyacintho sine moscho, scrup. j. lapidis bezoar orient. scrup. f. aquæ theriacalis, unc. j. f. Misce, fiat haustus.*

Inter sudandum aliquantum dormiverat, ac postea nonnihil levata videbatur:

fluxus quoque alvi aliquantum imminutus fuit. 18. Junii mane idem haustus reiteratus est: tota quoque die continuavit in usu conditi, ut & 19 Junii, quo rursus circa vesp̄eram assumpsit ultimum sudoriferum. 20. Junii nauseabunda & extreme debilis fuit: tunc hæc mistura parata est:

℞. *Conservæ rosarum rubr. unc. j. diascordii Fracast. drach. ij.*  
*aquæ theriacalis, cardui benedicti, ana unc. ij. f.*  
*& cinnamomi, unc. j. f.*

*Stent simul mista per horam, deinde colentur cum levi expressione, adde colaturæ confect. de hyacintho sine moscho, drach. j.*  
*Misce.*

Hujus misturæ aliquoties de die cochleare unum aut alterum post usum prædicti conditi bibit, atque in iis continuavit usque ad 23. Junii, quo ultimum sudoriferum reiteratum fuit. A 24. ad 28. Junii prædicta mistura cum sequenti condito usâ est:

℞. *Specier. Liberantium, cornu cervi usti, coralli rubr.*  
*margaritarum præparat. boli arm. veræ, ana scrup. j.*  
*specier. diatrium santalor. scrup. ij. diascordii Fracast. drach. ij.*  
*myræ cydoniorum, conservæ rosar. rubr. ana unc. f.*  
*rob. acaciæ, drach. j. f. confect. de hyacintho, drach. j.*  
*syrupi granatrum acid. q. f.*  
*Misce, fiat conditum.*

His diebus cordis anxietas, capitis dolor, & linguæ nigredo multum imminuebantur. 30. Junii, cum diarrhœa nondum plane cessaret, ultimum sudoriferum rursus exhibitum est. Hinc post valde copiosum sudorem sensit dolorem in inguine, cum tumore magnitudinis ovi columbini, qui postea increvit ad magnitudinem semi ovi gallinacei. Fluxus quoque alvi adeo imminutus fuit, ut tantum bis terve de die deiceret; sed dejectiones adhuc erant turbidæ & valdæ foetentes. Hactenus appetitum plane dejectum habuerat, sed nunc rursus aliquantum comedere coepit. Toto morbi decursu oblatis sunt cibi euchymi & facilis digestionis, liquidi quidem, sed tamen non nihil astringentes: pro potu utebatur cerevisiâ tenui, cum olei vitrioli pauculis guttulis acidulâ factâ, nam à julebis abhorrebat. Interea tumori per sex dies impositum fuit cataplasma attrahens & maturans. 2. Julii ultimum diaphoreticum rursus exhibui, (nam hujusmodi diarrhœæ pestilenciales per sudorifera optime curantur) à quo cum bene sudasset, excrementa alvi naturalem colorem & crassitiem receperunt: tumor quoque in inguine aliquantum increvit. 3. Julii cessavit alvi fluxus, & ægra mediocriter valuit. 6. Julii, cum tumor amplius non cresceret, & ægra propter incommoditatem cataplasma abjiceret, hoc emplastrum impositum est:

℞. *Gummi galbani aceto dissolut. emplastri diachyli cum gummis,*  
*& oxycroci, ana drach. ij.*  
*Misceantur.*

8. Julii, cum ægra propter morbi præcedentis violentiam debilis esset, nec cibos bene digereret, hoc tabellatum (quod ipsi etiam extra hunc morbum alias præscripseram, & quo jam sæpius uti consueverat) confectum fuit:

℞. *Radic. calami aromatici, cinnamomi electi, ana scrup. j. f.*  
*zingiberis albi gr. v. specier. aromatici rosati, scrup. ij.*  
*sacchari cum aqua melissæ dissoluti, unc. iij.*  
*Fiat s. art. tabellatum.*

Hoc tabellatum magnis laudibus extulit, ejusque subinde frustulum comedit.  
 Bubo

Bubo in inguine circiter adhuc per decem dies eodem statu permansit, postea sine maturatione paulatim evanuit, & aegrum mi De auxilio sanitatis restituta fuit.

*Annotatio.*

**T**Ante molis erat naturam versus incommo-  
das vias declinantem, ad vias com-  
modas reducere. Vix centesimus pestife-  
rorum evadebat, quibus bubones in principio  
morbi intus remeantes disparebant: præterea  
rarissimum quoque erat vel solâ diarrhoeâ cor-

reptum evadere videre, plerisque enim morbus  
cum vita effluxit. Prædicta tamen ægra (ex  
jus historiam tanquam rarissimam hic ascripsi-  
mus) cum utroque lethali indicio præter expe-  
ctationem in vita servata fuit.

## HISTORIA LI.

**U**Xore Capitanei J. ab Hæften jam à peste (ut præcedente historia dixi-  
mus) sanata, ipse maritus (qui ad Longewardam in principio morbi  
uxoris confugerat) eandem ad se vocavit, ac cum illa concubuit. Sed  
proh dolor, fuit illa brevis & damnosa voluptas, nam secunda die post  
lætum adventum uxoris, illum ipsum pestis invasit. Ad præservationem amuletum  
ex arsenico paratum magna curiositate semper gestaverat: fonticulum in brachio  
sinistro habebat, loca infecta maxime fugerat, variis præservativis internis usus  
fuerat, sed tamen his omnibus non obstantibus, ab illo, quem metuerat, hoste  
obrutus est. In ipso morbi principio ipsum invisi, eumque inveni febricitantem,  
jactabundum, somniculosum, capite dolentem, & adeo anxium, ut quo se ver-  
teret, nesciret. In inguine dolorem absque tumore sentiebat. Fonticulus in brachio  
totus exsiccatus apparuit, qui tamen antea copiosam foetentem humiditatem pro-  
jicere solitus erat; è quo signo ipsum brevi morituum prædixi. Ne tamen quic-  
quam intentatum relinqueretur, exhibui alexipharmacum, à quo satis copiose su-  
davit, sed absque ullo levamine. Post aliquot horas idem illud reiteratum est, ve-  
rum sine fructu. Ad sitim dedi julabium ex aquis scabiosæ, cardui, theriacali,  
cum syrupo de limonibus & oleo vitrioli concinnatum. Postridie per cubiculum  
solus aliquamdiu deambulavit, tandem ambulando defessus se ad lectum contulit,  
in quo cum se vix deposuisset, & cum astantibus fortiter adhuc colloqueretur, pal-  
lida mors ex improvviso medios sermones interrupit.

*Annotatio.*

**I**N hac peste semper lethale signum erat si  
fonticuli exsiccarentur, nec ullus, quod  
scio, evasit, in quo exsiccatio hæc visa  
fuit. Amuletum arsenicale, quod tanto tempore  
circumtulit æger, ipsum à peste præservare  
non potuit, nec mille alios qui illa gestabant.  
Multi tamen inveniuntur qui sine talibus amu-  
letis se præservari non posse, satis stulte sibi i-  
maginantur; atque hic error apud multos, præ-

sertim ditiores, tam altas radices egit, ut vix  
ullis machinis rursus eradicari possit. Illam ta-  
men unam utilitatem ex his amuletis, per se  
noxii, habent, quod dum se optime præser-  
vatos credunt, pestem minus timeant, ita ut  
quamvis per illa nullam immunitatem à peste  
adipiscantur, saltem à timore magis liberi sint,  
qui alioqui corpora ad pestilentem labem poten-  
ter disponere solet.

## HISTORIA LII.

**D**vande Krents, qui in Campanarum monte decumbebat, contagio in-  
fectus, gravissimâ febre & summâ anxietate pressus fuit. A primo ale-  
xipharmaco fortiter sudavit, & duo carbunculi prodierunt, cum obscu-  
ro inguinis tumore: à secundo sudare non potuit propter inquietudinem  
& intolerabilem sitim. Secunda die enormis vomitus accessit, quem nullis mediis  
sedare potuimus, qui etiam tertia die continuavit per intervalla, atque illa die  
post meridiem per vomitum ejecit plus quam sexaginta vermiculos parvos & instar  
sanguinis rubentes, formâ & magnitudine non multum differentes ab iis vermi-  
culis



calis qui in cadaveribus sub sole putrescentibus nascuntur. His egestis prodierunt paucæ exanthemata purpurea, & æger paulo post extrema necessitate satisfecit.

*Annotatio.*

**H**UJUSMODI parvos & copiosos vermiculos in nullis aliis vidimus, qui tamen maxima & lethalis putredinis indices erant.

## HISTORIA LIII.

**T**Heodorus Wesemer, cum aviam pestelaborantem invisisset, contagio infectus est, atque è domo ejus exiens, se graviter alteratum sensit, magnumque gravativum ac vertiginosum capitis dolorem percepit. Vocavit Chirurgum, qui ipsi statim alexipharmacum aliquod exhibuit, à quo multum sudavit, & tumor durus cum magno dolore retro aurem apparuit. Tunc Chirurgus venæsectionem suavit, atque ex affecti lateris brachio sanguinis uncias decem extraxit. Æger inter Chirurgi manus syncope correptus, ac pro moribundo impositus est lecto. Paulo post ad se rediens, de summa debilitate & cordis anxietate conquestus fuit. Non diu post, horrore primò ac frigore præcedente, vehemens febris subsecuta est. Tunc meum consilium petatum fuit. Inveni hominem adeo debilem ut vix loqui posset: disparuerat tumor durus retro aures: pulsus creber & inæqualis erat, atque adeo parvus ut vix sentiri posset. Prædixi mortem, nec ullum medicamentum exhibere volui, ne nasutus Chirurgus ægri mortem, suo errore inductam, meo medicamento imputaret. Post paucas horas diuturniore deliquio superveniente æger è vivis excessit.

*Annotatio.*

**V**ENÆSECTIONIS exitiale damnum, & nasutissimi chirurgi temerariam stoliditatem, cum multis aliis, etiam hic æger expertus est, in quo ipsa natura robusta venenum pestilens jam ad emunctorium expellebat; ac salutarem morbi eventum promittebat; cujus tamen laudabilis operatio sanguinis detractio interturbata fuit: præterea etiam hoc modo vires ægri adeo prostratae sunt, ut pestifero veneno chirurgi pestifera temeritate ad interiora retracto plinè resistere non potuerint. Liqueat ex eo verum dixisse Palmarium, de Pest. cap. 7. vix centesimum quemque evadere ex iis, qui selectâ venâ spiritu & sanguine privantur.

## HISTORIA LIV.

**D**Omicella Martens, quæ in Sartorum platea decumbebat, contagio infecta, exiguam febrem cum tumore in inguine habuit. Exhibui tale alexipharmacum, à quo cum bene sudasset, magnum levamen percepit:

*℞. Salis absinthii, extracti angelicæ, ana scrup. j. s. theriacæ, diazcordii, ana scrup. ij. aquæ theriacalis, unc. j. aceti bezoartici. unc. s. Misce, fiat haustus.*

Sequenti die idem sudoriferum reiteratum est, post cujus usum multo melius valuit, & è lecto assurgens foco assedit, medicamentorum usum rejecit, nec ullis persuasionibus ad antidotorum continuationem induci potuit. In tali statu biduum transiit. Tertia autem die gravissima febris derepente ingruit, cum summa anxietate & inquietudine, siti inexhausta, interno ardore, lingua sicca, dura & crustosa, & parvo maximeque doloroso tumore in inguine. Exhibui duo sudorifera in forma liquida, sed utrumque evomuit: tertium in forma boli dedi, à quo sudare non potuit, propterea quod propter intolerabilem sitim identidem bibere cogereetur, & propter anxietatem maxime inquieta foret. In illo statu perduravit morbus circiter

citer per 26, aut 28, horas, quibus exactis prodierunt exanthemata purpurea, & paulo post collapsas à morbo vires mors penitus prostravit.

*Annotatio.*

**B**ene observavit Paræus, *lib. 21, cap. 17*, nonnunquam contingere ut scævientium paulo ante symptomatum subita fiat remissio, ægrique melius habere videantur, imò omnino bellè, qui tamen postea subito intereunt; idque etiam contigisse refert Mariæ, pedissequæ Reginæ Galliz. Illud ipsum ex prædicta historia etiam liquet, nam nostra ægra propter symptomatum remissionem putabat se amplius non ægrotare, ac propterea medicamentorum usum

nimis temere & citò rejecit, antequam venenum pestilens plane evictum esset. Cum quo veneno plane eodem modo sicut cum fortissimo ac callidissimo hoste pugnandum est; huic enim jam delassato ac propemodum evicto nulla requies permittenda est, ne durante quiete majores vires recolligat, & ovantem triumphatorem ex improvviso obruens, vita simul & triumpho spolet.

## HISTORIA LV.

**N**. Appeltern, cervisarius notissimus, civis verè civilis, qui pestem valde timebat, se magna cordis anxietate pressum, & dolore atque exiguo profundo tumore infestatum sentiens, malum celavit, & statim in ipso principio assumptis aliquot fociis, ad diversorium illud, cui Mons vinaceus pro insigni est, se contulit, ut vini copiosioris usu, & gratis sociorum colloquiis jam conceptum timorem, & simul ipsius pestis principium dispelleret. Ibi inter pocula præter solitum maxime hilaris fuit, atque à copiosiore vino multum incaluit: tandem tanta vini copia præter consuetudinem se ingurgitavit, ut maximo vomitu ventriculum rursus evacuare coactus fuerit. Quo facto, frustulum panis cum sale & zingibere comedit, atque rursus, ut ante, cum sociis ad vinum & jocos se contulit, ita ut tandem circa mediam noctem bene potus & hilaris domum discederet, ubi exutis vestibus ad lectum se conferens statim obdormivit, atque inter dormiendum copiose sudavit. Sequenti mane expergefactus optime valuit, evanuerat inguinis tumor, atque à peste immunis fuit.

*Annotatio.*

**P**urimis hoc tempore illud commune erat, ut simulac se peste correptos sentirent, statim ad diversoria se conferrent, ut vini copiosioris potatione jam conceptam pestem, hilari ebrietate rursus profligarent. Qui error tantum valuit, imprimis apud vulgares, ut vix ullis rationibus apud multos eradicari potuerit; quamvis etiam plurimi suo interitu ejus infelicem eventum aliis conspiciendum exhiberent. Nam etsi vinum modice sumptum alexipharmacam vim habeat, & terrorem, in pestilenti constitutione maxime noxium, dispellat, vires quoque in debilibus corroboraret; ebrietas tamen & nimia vini copia ad pestis jam conceptæ extinctionem plane damnosa est. Vini enim paulo copiosior usus magis conveniens est ad præsertionem, quam ad curationem: nam,

— *data tempore profunt,*

*Et data non apto tempore vina nocent.*

Ad curationem potentiora requiruntur antidota, quæ venenatam qualitatem ab internis visceribus ad peripheriam citissime expellant, nec ulla viscera offendant, sicut facit copiosus vini usus, qui ebrietate graviter offendit ipsum cerebrum

& totum nervosum genus, à qua offensione etiam aliis quibusque partibus, quibus nervi communicantur, & quarum sensus, motus & operationes à nervis magna ex parte procedunt, summa debilitas inducitur per aliquod tempus, nempe usque dum dissipatis narcoticis spiritibus, rursus ad priorem statum redeant cum cerebro nervi. Cum autem debilitata & narcosi quædam obfuscatæ partes interno hosti minus resistent, atque in coctione & discussione spirituum narcoticorum totæ occupatæ sint, pestilens venenum durante illo tempore tam altas plerumque radices agit, ut postea nullis mediis expelli vel extinguí queat. Quapropter longe consultius fuerit, simulac hujus diri tyranni spicula sentiuntur, statim ad fortissima antidotalia arma concurrere, quàm sola ebria hilaritate munita viscera, inermia & debilia tanti hostis invasioni opponere: facilius enim erit hosti ingredienti armatâ manû resistere, quàm eundem penetralia jam ingressum & focos occupantem expellere. Quantum ad prædictum cerevisarium, (cujus historiam tamquam raram hic ascribimus) sciendum illud, quod ipse cum

Ff

felici

felici eventu tentavit, innumeris aliis infelicissime cessisse: imo paucissimos novimus, qui peste jam correpti, ebrietatem antidotis præmittentes, non fuerint extincti: nullis enim alexipharmacis venenum durante ebrietate altius infi-

xum, postea expelli potuit: plurimos hujusmodi ægros tractavimus, sed vix centesimum evasisse vidimus. Quapropter dictam historiam tanquam raram, sed non imitandam habere oportet.

## HISTORIA LVI.

**F**ilia N. de Steenwijck, scholæ Gallicæ Ludimagistri, juvencula circiter viginti annorum, 13. Julii peste correpta est, cum summa anxietate, debilitate, febre, inquietudine, siti, & capitis gravitate. Exhibui circa vesperam hoc alexipharmacum:

℞. *Extracti cardui bened. salis scordii, ana scrup. j. f.*  
*aquæ theriacalis, unc. j. f. succi citri, unc. f.*  
*Misce, fiat haustus.*

Hinc egregie illa nocte sudavit, sed absque levamine, quapropter sequenti mane idem medicamentum reiteratum est. Sed neque post secundum sudorem levaminæ subsequente, post meridiem talis haustus exhibitus est:

℞. *Diascordii Fracast. scrup. ij. extracti magistralis,*  
*cardui bened. & angelicæ, ana scrup. j. salis absinthii, scrup. j. f.*  
*aquæ theriacalis, aceti bezoartici, ana unc. j.*  
*Misce, fiat haustus.*

Ab hoc cum rursus vehementer sudasset, magnum levamen percepit, & tumorem durum in inguine sensit; cujus inferiori parti statim hoc vesicatorium imposuimus:

℞. *Radic. pyrethri, sem. sinapi albi, euphorbii, ana scrup. j.*  
*cantharidum, scrup. j. f. fermenti acidi, drach. ij.*  
*mellis, drach. j. aceti rosacei, q. f.*  
*Fiat pasta.*

Hinc vesica magna excitata est, qua pertusa & detracta, folium brassicæ rubræ butyro veteri inunctum imposuimus. Pro potu tali julebo utebatur:

℞. *Aquæ cardui bened. & scabiosæ, ana lib. j.*  
*syrupi de succo citri, unc. ij. f. olei sulphuris q. f. ad gratum acorem.*  
*Misce, fiat juleb.*

Circa noctem hunc bolum præscripsi:

℞. *Confect. de hyacintho sine moscho, extracti cardui, ana scrup. j.*  
*lapidis bezoar orient. scrup. f.*  
*Misce, fiat bolus.*

Illa nocte aliquantum dormivit, & febris remissior fuit. 15 Julii detracto brassicæ folio, maximam ichoris aquosi copiam ex vesicato loco effluxisse, omniaque imposita lintamina humectasse, & tumorem in eodem statu permanisse, vidimus: quapropter folium brassicæ rursus imposuimus, & sequens cataplasma superapplicavimus:

℞. *Radic. liliorum recent; unc. ij. & altheæ, unc. j.*  
*herb. malvæ, & altheæ, florum chamomille, ana M. j.*  
*ficuum ping. n°. vij.*  
*Coquantur in aqua communi & pistentur, adde bulborum cape sub cineribus*  
*parum assatorum, n°. iij. fermenti acidi, fimi columbini, ana unc. j. f.*  
*mellis,*

*mellis, olei chamomillini, ana unc. j.*  
*Fiat cataplasma.*

Illa die jusculi pulli, cum acetosa, boragine & fructu ribesii rubri cocti, aliquantum sorbsit, & quater particulam hujus conditi comedit:

*℞. Specier. liberantium, drach. j. diascordii Fracastorii, drach. ij.*  
*corticum citri condit. & aurantium condit.*  
*conservæ rosarum rubr. ana dr. iij. confectiōis de hyac. sine moscho, dr. j.*  
*syrupi acetositatis citri q. s.*  
*Misce, fiat conditum.*

Circa vesperam febris recrudit, tuncque ultimus haustus diaphoreticus reiteratus est. Sequenti die adeo debilis fuit ut vix loqui posset: tumor in eodem statu permansit. Continuum est in usu conditi & cataplasmati. Hujus etiam misturæ nonnunquam cochleare exhibitum est:

*℞. Conservæ rosarum rubr. & ribesii rubr. ana unc. i.*  
*diascordii Fracast. drach. ij. aquæ theriacalis, unc. iij.*  
*aquæ cinnamomi, unc. i. succi citri, unc. j.*  
*Misceantur, & post horam colentur, adde confect. de hyacintho sine moscho,*  
*drach. j.*

16 & 17 Julii, cum morbus in eodem statu permaneret, & virium summa debilitas aliorum medicamentorum usum prohiberet, in iisdem continuatum est. 18 Julii, cum locus vesicatus jam pridie occlusus fuisset, aliud vesicatorium de novo imposuimus à latere prioris vesicati loci, unde magna vesica rursus excitata, è qua postea multi ichores effluerunt. 20 Julii, febre nonnihil remittente, hoc alexipharmacum dedi, à quo pro viribus egregie sudavit:

*℞. Extracti cardui, & angelicæ, confect. de hyacintho,*  
*salis scordii, ana scrup. j. aquæ theriacalis, unc. j. olei vitrioli gut. viij.*  
*Misce, fiat haustus.*

21 & 21 Julii multo melius se habuit, & febris paulatim evanuit: quibus diebus solo condito aliquoties de die usus fuit. Præterea juscula quædam cum paulillo panis albi sorbere coepit. 23 Julii, exsiccato rursus vesicato loco, & bubone detumescente, loco cataplasmati, solum emplastrum diachylum cum gummis impositum est, sub quo intra paucos dies tumor disparuit. Toto morbi decursu tantum semel alvum exoneraverat, quapropter 26 Julii assumpsit pilularum antipestilentialium nostrarum, drach. i. unde tres quatuorve sedes habuit: atque ita summi Dei auxilio integræ sanitati restituta fuit.

### Annotatio.

**V**esicatoria in principio apparentibus bubonibus applicata, semper præstantissimum subsidium attulisse, non in prædicta tantum ægra, verum etiam in mille aliis compertimus: damnosos ac venenatos ichores extrahebant, venenum pestilens versus emunctorium

trahebant, ejusque recursum ad interiora impediebant. Observavimus, si satis tempestive applicarentur, extractis venenosis aquis, tumores pestilentes sæpissime absque ulla suppuratione dissipatos evanuisse.

## HISTORIA LVII.

**S**Ymon Noorman peste correptus hoc sudoriferum sumpsit:

*℞. Extracti cardui, salis scordii, ana scrup. j. f. theriaca, dr. j.  
aque theriacalis, unc. j. f. aceti bezoartici, unc. f.  
Misce, fiat haustus.*

Postridie exiguum tumorem in inguine sensit, qui cum paulo post rursus delitesceret, idem sudoriferum reiteratum est, à quo mediocriter quidem sudavit, verum absque levamine. Febris non admodum vehemens, sed continua in eodem statu permansit, cum summa anxietate, inquietudine & debilitate. A tertio sudorifero circa vespem exhibito rursus sudavit. Die tertia in pectore & reliquo corpore nonnulla exanthemata purpurea & nigricantia vidimus, atque tunc æger se multo melius valere sibi visus est, & fortiter cum astantibus colloquebatur. Dixi uxori ut quæcunque peteret, ipsi darentur, mortem enim brevi affuturam. Præfagium confirmavit eventus, nam post sesqui horam extinctus est.

## Annotatio.

**E**Xanthemata purpurea, livida, nigra & violacea, certissima erant mortis jam jam instantis præfagia; & quamvis multi ægri his apparentibus, se primo multo melius habere viderentur, omnes tamen moriebantur: atque in hac tam furiosa peste, qua Noviomagum decem hominum millia terræ reddidit, unicuique tantum puellum cum purpureis exanthematibus evalisse novimus: quem casum descripsimus paulo antehistoria 41.

## HISTORIA LVIII.

**A**rentius Capell, cum in aprico aëre tota die in secandis lignis occupatus fuisset, & se multum defatigasset, vespere domum veniens capite doluit, & valde somnulosus fuit; cumque coenare non posset, cubitum discessit, ac statim obdormivit. Media nocte expergefactus, se magna anxietate pressum sensit, hinc pestem timens propriam urinam bibit; à qua non diu post vomere coepit, qui vomitus diu perduravit. Sequenti mane ego accitus, tale alexipharmacum exhibui:

*℞. Extracti magistralis, salis absinthii, & scordii, ana scrup. j.  
extracti angelicæ, scrup. j. f. aque theriacalis, aceti bezoartici, ana unc. j.  
Misce, fiat haustus.*

Ad vomitum compescendum ventriculi regioni imposuimus hanc pastam lineo inunctam & prope ignem calefactam:

*℞. Gariophyllarum, nucis moscatæ, cinnamomi, benzoini,  
mastiches, ana scrup. ij. pulverisatis adde fermenti acidæ, unc. j. f.  
conservæ rosarum rubrarum, unc. f. aceti rosacei q. s.  
Fiat pasta molliuscula.*

Cum hæc per semihoram imposita fuisset, & vomitus jam cessaret, prædictum haustum assumpsit, cumque retinuit, atque inde egregie sudavit. Interea etiam prodierunt duo carbunculi, alter in femore, alter in latere dextro; magnum tamen levamen secutum non est, sed tribus horis post finitum sudorem gravissima febris, cum magna siti, anxietate & interno ardore ægrum invasit. Tunc prius alexipharmacum reiteratum est, à quo cum fortiter sudasset, magnum levamen percepit, & tumor durus ac tensus cum summo dolore in inguine protuberavit, cujus inferiori

riori parti statim imposuimus vesicatorium, quo postea cum vesicula detracto, folium brassicæ rubræ oleo raparum inunctum applicavimus. Pro potu maxime desiderabat æger aquam simplicem fontanam, cujus moderatum usum ipsi concessimus. Circa horam decimam nocturnam hunc pulverem dedimus:

℞. *Camphoræ* gr. iiii. *florum sulphuris*, *specier. liberantis*, ana scrup. j.  
Fiat pulvis.

Totam illam noctem cum magna inquietudine transegit, maxime propter intensissimum bubonis dolorem. Secunda die primum sudoriferum reiteratum est, addendo diascordii drach. j. post quod cum fortiter sudasset, magna violentiæ febrilis pars remisit, & simul etiam anxietas multum imminuta est. Buboni cataplasma attrahens simul & emolliens, carbunculis vero nostram pulticulam imponi curavimus. Vesperis prædictum pulverem rursus sumpsit. Postridie propter dolorem bubonis, qui jam in majorem molem excreverat, febris aliquantum recruduit, quæ ultimi sudoriferi usu iterum remisit. Hujus conditi sæpius de die particulam edere jussimus:

℞. *Specier. liberantium*, drach. j. & *diamargariti frigidi*, drach. f.  
*diascordii Fracast.* drach. iij. *cortic. aurantiorum condit.*  
*rob. ribesiorum rubr. ana unc. f. olei succini*, scrup. f. *syrupi de scordio q. s.*  
Fiat conditum.

Cum æger se jam melius haberet, per triduum in usu conditi & topicorum continuatum est. Die septima tantum maturans cataplasma buboni impositum fuit. Die decima, separatis carbunculis & bubone maturato ac disrupto, omnibusque symptomatibus cessantibus, convaleuit æger, & ulcera paulatim Chirurgi ope consolidata sunt. Quia autem toto morbi decursu tantum bis alvum excreverat, jam post ruptum bubonem assumpta pilularum Ruffi, drach. f. alvus bis terve citata fuit.

### Annotatio.

IN hac pestilenti constitutione observavimus | diis solaribus exposito: nam delassata & vehem-  
valde periculosum esse, gravibus exercitiis | mentius calefacta corpora venenum pestilens fa-  
corpus delassare, præcipue in aperto aëre ra- | cillime suscipiebant.

## HISTORIA LIX.

**R**ikerus Wilcher, Juliacenſis, vir fortis, mense Augusto peste correptus fuit; cui quatuor anthraces satis magni in cute eruperunt, Febris aderat gravis, quæ non tam immenso ardore, quam summa malignitate vires ad extremum dejiciebat. Assumptis alexipharmacis primo biduo ter sudavit. Tertia die de ventris levi dolore cum murmure conquerebatur, qua de causa ob metum diarrhoeæ statim sudoriferum astringens (cui bolus arm. terra sigillata, cornu cervi ustum, & corallum rubrum immista erant) exhibui, & electuarius antidotalis astringens dedi. Verum his non obstantibus, sequenti nocte diarrhoea accessit, sine magno dolore, qua excrementa turbida foetidissima dejiciebantur. Quarta die sanguis, primo facibus permixtus, postea purus & solus defluxit: media nocte cum hoc fluxu secundo flumine æger ad Acherontinum flumen delatus, in ejusdem scopulos impulit, ac vitæ naufragium fecit.

### Annotatio.

**N**ullus in tota hac peste evasit, cui sanguis per inferiora defluxit.

## HISTORIA LX.

**M**ense Junio in angiportu Vaginæfactorio, in domo quadam prope puteum sita (in qua tunc temporis nemo habitabat) à vicinis & transeuntibus noctu auditus fuit strepitus quidam, haud aliter sonans ac si quis cistam feralem clavis ferreis malleo obseraret, sicut fieri solet antequam cadavera ad sepulturam efferuntur. Mirabantur quod talis strepitus in illa domo audiretur, in qua nemo habitabat, qui alioqui in aliis domibus ab hominibus inhabitatis auditus, solet (ut aiebant) alicujus mortem præfagire. Illud tamen præfagium in illa domo etiam non fefellit, nam 2. Augusti peste correptus est secundus (priore antea mortuo) Vice-capitaneus Domini Starckenburch, qui ut à fanis separaretur, & ad majorem quoque sui ipsius commoditatem, ab hospite suo ad illam domum, cum lecto omnibusque rebus necessariis delatus est, in qua 6. Augusti obiit, & biduo vel triduo post ex illa ad sepulchrum delatus est.

## Annotatio.

**H**ujusmodi strepitus durante hac peste multis in locis auditi sunt, & semper alicujus mortem prænuciarunt, nunquam fallente præfagio. Sic etiam anno 1643, mense Octobri, Noviomagi quatuor vicini nostri duabus noctibus continuis circa noctis medium audiverunt similem sonum, ac si cista ferilis cum malleo clavis ferreis occluderetur; dubitabant autem an in meis, an verò in proximè vicinis ædibus illum strepitum audivissent; sed imaginabantur sibi in meis ædibus illum auditum fuisse, & uxorem meam, quæ gravida ac mense Decembri paritura erat, morituram: ne tamen uxorem animo consternarent, tacuerunt & celarunt auditum omen, usque dum uxor mea feliciter peperisset, & puerperium jam egressa esset, tunc simul narrabant quantopere de uxoris meæ vita anxii fuissent, propter illum auditum strepitum. Anno sequenti mense Martio gener proximè vicini nostri Joannis Tros, Tylæ mortuus, & Noviomagum ad ædes dicti vicini delatus, atque inde ad sepulchrum elatus est. Eadem æstate etiam ipse Joannes Tros obiit: atque ita diu antea à vicinis auditum infelix omen in vicini mei ædibus duorum funerum certus prænuncius fuit. Hujusmodi alia similia fere funerum præfagia ab aliis interdum audita fuisse novimus. Elisabetha Joannis, Montfortii quondam nostra vicina, cum media nocte audivisset quasi magnum saccum arena vel sale plenum in tabulatum decidens, eadem nocte unus ex proximis consanguineis mortuus est. Novi etiam sartorem quendam, qui nobis multoties narravit, se & liberos aliosque domesticos sæpius media nocte in officina sua talem sonitum seu strepitum audivisse, ac si quis forfice sartorio pannos nigros ad vestimenta lugubria conficien-

da conscinderet; atque illum sonum semper indubiè significasse brevi aliquem alicubi moriturum, pro cujus proximis consanguineis vestimenta lugubria in ejus officina ab ipso conscinderentur & conficerentur. Cardanus lib. 15. de rerum varietate, cap. 84. scribit se audivisse in suo cubiculo tres validos ictus mallei, qui mortem Galeazei de Rubeis fabri armorum indicarent: atque eodem loco etiam alios ab ipso aliisque auditos infelicitis præfagii sonitus enarrat. Quidnam sint hi sonitus, & quomodo fiant, alii aliter judicant: saltem illos interdum fieri, audiri, & mortem alicujus præfagire, certum est. Philosophi existimant illos excitari à Dæmonibus (qualem Socratem sibi familiarem habuisse, diximus in annotatione ad histor. 6.) quos Dæmones Plotinus Philosophus, teste Nicolao Perotto, scribit esse animas hominum, easque, pro ut ex bonis vel malis hominibus exierint, bonum vel malum hominibus facere ac prænunciare, arbitratur: atque hinc etiam horum dæmoniorum tres statuit differentias: si nempe sint animæ quæ exierint è bonis hominibus, illos dæmones appellat *Lares*: si è malis, illos *Larvas* nominat: si è talibus qui nec boni nec mali fuerint, illos *Manes* esse dicit. Paracelsus prædictos sonitus nocturnos & auditas voces ab invisibilibus necromanticis astris moveri contendit. Alii aliter hac de re fabulantur. Nos illos à diabolis plerumque excitari credimus: hi enim dum iram & vindictam Dei præsentunt, & de futuro hominum excidio mirifice gaudent, sæpe solent inconditis quibusdam vocibus ac sonitibus, vel spectris, aliisque illusionibus imbecillum animos perterrefacere, vel iisdem aliorum imbecillum exitium & interitum prænunciare.



## HISTORIA LXI.

**C**Lara Guilhelmi, fabri lignarii filia, ætatis circiter viginti annorum, peste una cum magna febre, anxietate, & debilitate correpta est. Prima die unum, secunda duo sudorifera exhibita sunt, à quibus bene sudavit, & bubo sub axilla protuberavit, febris tamen nihil remisit, sed in eodem vigore usque ad diem quartum continuavit, qua die menstruorum fluxus prorupit, qui intra sesquihoram valde copiosus evasit, unde vires tam cito prostratæ fuerunt, ut post sex horas ipsa quoque vita effluerit.

*Annotatio.*

**H**Oc menstruorum profluvium etsi die critico incideret, salutare tamen non fuit, sed ægram citissime occidit. Sic etiam multas alias mulieres cum menstruorum fluxu, etsi critico die erumpente, mortuas fuisse novimus. Ita ut multum à vero aberrant illi, qui tales crises tanquam salutiferas laudant, quas usu comperti sumus incertissimas esse, & cum iis multo plures mortuas, quam a morbo fannatas fuisse.

## HISTORIA LXII.

**G**ofuinus à Burick, miles, cum alio milite pugnans, gladio punctim vulneratus fuit in læva thoracis parte, vulnere pectoris cavum non penetrante, sed supra costas tantum transeunte. Secunda die febricitavit, & vulnus valde intumuit, qui tumor post copiosum sudorem ab exhibito alexipharmaco promotum, rursus aliquantum subsedit. Tertia die cum jam aliqua vulneris suppuratio expectaretur, ipsum vulneris orificium in anthracem mutatum visum fuit, qui anthrax procul dubio etiam vulneris interiora obsedit, nam æger protinus dejectis viribus, quarta ab inflicto vulnere die obiit. Paulo post mortem thorax circumcirca vulnus, ad latitudinem integræ manus, instar carbonis nigricavit.

*Annotatio.*

**N**on mirum est hunc vulneratum peste correptum fuisse, nam præterquam quod ira multum faceret ad pestis inductionem, etiam omnibus aliis morbis, qui durante hac pestilenti constitutione invadebant, statim pestis adjungebatur, ita ut pestis, tanquam omnium calamitatum summa ac pessima, etiam in reliquos morbos dominium exercere, omnesque suo imperio subicere videretur.

## HISTORIA LXIII.

**U**Xor Isaaci Verloo, pestem cum tumore in inguine percipiens, ut summam, qua torquebatur, anxietatem aliquantum imminueret, mannæ unciam unam cum cerevisiâ calidâ dissolutam assumpsit, quo remedio in puerperio interdum uti solita erat. Hinc post aliquot horas alvus enormiter turbari coepit, & simul disparuit bubo. Tunc ad me concursus est. Exhibui duo alexipharmaca astringentia, sed utrumque evomuit. Postea pulverem astringentem dedi, quem retinuit. Ad virium corroboracionem nonnulla alia præscripsi, sed omnia nihil profuerunt, nam cum fluxus circiter per sexdecim horas perdurasset, ægra cum morbo vitam finivit.

*Annotatio.*

*Annotatio.*

**T**aceant qui pestis curationem à purgatione incipiendam esse, cum Avicenna aliisque magnis Medicis sentiunt: nam neque fortia cathartica, neque mediocria, neque sola

lenientia in hac peste unquam tuto & cum utilitate exhibita fuisse, sed è contra ægros semper in maximum periculum præcipitasse, observavimus.

## HISTORIA LXIV.

**P**ater Tiburtius Sacerdos, Ordinis Franciscanorum Monachus missionarius, vir eruditione, humanitate, & vitæ probitate excellens, peste cum bubone in inguine correptus, varia alexipharmaca assumpsit, & inter alia bis illi exhibui lapidis bezoartici Orientalis electissimi pulverisati drachmam, & tertia vice scrupulos quatuor: à cujus lapidis usu levis quidem sudor sequebatur, sed omnino nihil levaminis inde consecutus est æger: alia alexipharmaca ex theriacâ, salibus, aqua theriacali, aliisque similibus confecta, quamvis morbum non sanarent, copiosos tamen sudores cum aliquo levamine movebant. Interim omnibus remediis frustra adhibitis, cum febrem ingravescere, aliaque mala symptomata augeri perciperem, prædixi mortem procul dubio morbum finituram. Quod nuncium æger cum maximo & incredibili gaudio excipiens, intra paucas horas, tanquam ad nuptias iturus, lætus obiit.

*Annotatio.*

**A**dversus venenum pestilens lapidis bezoartici vires non multum prodesse, in variis ægris experti sumus. N. Dermell febre pestilenti laborans, ejusdem lapidis prima vice integram drachmam secundâ scrupulos quatuor absque ullo levamine assumpsit. Idem quoque frustra tentatum est in Domino Verfpiek, Noviomagi Consule, in cognata viduâ de Triest, in Petro Buys, in Gerardo Buys Pharmacopœo, in vidua Petri Nooteboom, aliisque plurimis, qui ipsimet, etiam me invito, lapidis bezoartici usum exposcebant. In nullo manifestam felicem operationem adversus

pestem ab illo lapide vidimus; quapropter nos etiam postea rarius eo usi sumus, idque tantum in iis qui vel ejus usum sponte postulabant, vel ob summam debilitatem alia medicamenta assumere non poterant. Hinc etiam magno isti encomio, quo à multis clarissimis Medicis decantatur, tantam, ut antea, fidem non adhibemus. Nec est quod quispiam existimet nos veros lapides non habuisse, nam certo credimus, si uspiam veri extant, in quibus omnia veri lapidis bezoartici signa concurrunt & conspiciuntur, nos tales elegisse, iisque usos fuisse.

## HISTORIA LXV.

**N**obilissimus Dominus Nulant (qui in castello de Valburgh, Bataviæ superioris pago, habitabat) mense Julio peste correptus est, cum summa anxietate & parva febricula. Secunda morbi die deliravit: tertiâ phreneticus evasit, indusium aliaque linteamina dilaceravit, & in adstantes, si propius lecto adstarent, violentas manus inferebat. Sequenti nocte eruperunt in cutem plurima exanthemata purpurea, & phrenitis perduravit. In tali statu constitit morbus per quinque dies, ita ut toto illo tempore vix aliqua mutatio animadvertetur. Propter insaniam nulla medicamenta neque alimenta exhiberi poterant. Nona morbi die circa vespeream subito extinctus est.

*Annotatio.*

**I**n nemine alio exanthemata tanto tempore mortem præcedebant, sed semper iis prode-

untibus mors in propinquo erat.

HISTO-

## HISTORIA LXVI.

**G**uillielmo Beems (qui in molarum platea decumbebat) peste cum febre & maxima anxietate correpto, post primum à nobis exhibitum alexipharmacum quatuor carbunculi, duo in femoribus, & duo in pectore, eruperunt. Sequenti nocte adhuc duo in abdomine prodierunt. Secunda die, antidoto rursus assumpto, tres alii circa scapulas visi sunt; & sequenti nocte adhuc duo, unus in latere dextro versus lumbos, alter in brachio apparuit: ita ut ab undecim carbunculis corpus obsideretur. Febris, aliaque prava symptomata magis magisque adaucta sunt. Omnia exhibita antidota non majus levamen induxerunt quam si saccharum candium exhibitum fuisset. Tertia die circa noctem vitam cum morte commutavit.

*Annotatio.*

**I**n hoc ægro nulli bubones, sed tantum multi carbunculi visi sunt, quod indicium erat naturam à veneni copia & maligna qualitate adeo obrutam fuisse, ut nihil ad emunctoria expellere potuerit, atque hinc totum venenum venas ingressum, sanguinis massam dupliciter corrupisse, partim putredine malignâ, unde febris; partim mortificatione, unde tot carbunculi. Sæpius autem in hac peste, imo semper falsum esse comperti sumus, illud quod nonnulli magni Medici statuunt, nempe plures car-

bunculos paucioribus esse tuciores, & quanto majore copia erumpunt, tanto melius esse. Nos semper observavimus plurimos eorum quibus multi carbunculi eruperant, interiisse; quibus vero pauciores, melius evasisse. Ratio liquet ex iis quæ diximus, nempe quamvis plures carbunculi naturæ robur in expellendo veneno denotent, quod tamen maximi ac copiosissimi veneni sanguinis massam corrumpentis indices sint; quod antequam natura tum expellere possit, succumbit.

## HISTORIA LXVII.

**R**utgerus ab Oxsteyn, eques Capitanei Douglas, cum vesperi bene sanus cubitum discessisset, media nocte somniavit se ab homine pestifero nudo ac furibundo in terram prosterni, & cum eodem fortiter colluctari, tandem pestiferum divaricatis cruribus ipsius corpori insidentem, suam pestem in illius os evomuisse. Ex illo somno cum maximo terrore expergefactus, credidit se peste cito moriturum, quam imaginationem adeo fortiter concepit, ut nullis rationibus ex animo illius excuti potuerit. Tertia post somnium die correptus est peste, cum maxima anxietate & febre, nec quicquam proficientibus medicamentis, quarta morbi die mortuus est.

*Annotatio.*

**Q**uod huic ægro, illud etiam suotempore nonnullis contigisse, refert Sennertus; ut à solis insomniis peste corriperentur. Sciendum tamen somnia per se non inferre contagium, pestilensve venenum, sed terrorem, qui inde contrahitur, posse humores & spiritus disponere ad receptionem veneni pestilentis: dum enim spiritus intus ad cor confugiunt, si aliqua venenata aura forte foris cuti adhæreat, illam facillime per poros & arteriarum extre-

mitates intus ad cor trahunt, quod à concentratis in se spiribus impeditum, isti maligno veneno etiam minus resistit. Huc quoque multum facit tristis imaginatio, qua venenum licet exiguum, non tantum ad cordis penetralia deducitur, verum attentiore de peste cogitatione & metu in actum excitatur: præterea etiam absque veneni præsentia solet imaginatio, metui ac terrori conjuncta, augere dispositionis corporum ad pestem aptitudinem.

## HISTORIA LXVIII.

**R**egnerum Beeckman, Quæstorem, florentis ætatis virum, 24. Julii pestis corripuit. Simulac se male habere sentiret, hoc sudoriferum (quo vulgares passim utebantur, & quod multis quoque proderat) suo ipsius consilio statim assumpsit:

Gg

R. Thea

℞. *Theriace androm. drach. j. aceti calendulae, unc. ij.*  
*olei juniperi gut. vij.*  
*Misce, fiat haustus.*

Hinc bene sudavit, & tumorem parvum ac durum in inguine dextro percepit. Postera die circa meridiem ad illum invisendum vocatus fui. Inveni ipsum adeo debilem ut vix loqui posset, caput grave erat cum proclivitate ad somnum, pulsus parvus, creber & aliquantulum inæqualis, urina turbida, calor corporis non præter modum intensus, febris non vehemens, nec faciei color multum mutatus, lingua tamen sicca & aspera cum aliqua siti. Propter summam debilitatem vix quicquam assumere poterat, quapropter cum ad omnia nausearet, hanc misturam ad vires aliquantum reficiendas præscripsi, de qua primo singulis semihoris, postea singulis horis cochleare plenum exhibitum fuit:

℞. *Conservæ rosarum rubr. drach. vj. diascordii Fracast. drach. iij.*  
*aquæ theriacalis, unc. iij. aquæ cinnamomi,*  
*succi citri recentis, ana unc. j.*  
*Misceantur, post horam colentur cum levi expressione, colaturæ admisce,*  
*confect. de hyacintho, drach. j. f.*

Ad sitim hunc jubelum præscripsi:

℞. *Aquæ acetosæ, cardui, analib. j. & rosarum,*  
*succi citri recentis, aquæ theriacalis, ana unc. j. f.*  
*syrupi de limonibus, unc. ij. olei sulphuris, q. f.*  
*Misce, fiat juleb.*

Ne bubo introrsum regrederetur, hoc vesicatorium inferiori bubonis parti applicui:

℞. *Cantharidum pulverisat. scrup. j. euphorbii, scrup. f.*  
*fermenti acidi, drach. j. mellis, scrup. ij. aceti rosacei parum.*  
*Fiat placentula.*

Hac post aliquot horas rursus ablata, & vesica pertusa atque abscissa, folium brassicæ rubræ oleo raparum inunctum impositum est. 26 Junii mane, cum jam paulo fortior esse videretur, hoc alexipharmacum sumpsit:

℞. *Extracti magistralis, & cardui ben. salis scordii, ana scrup. j. f.*  
*theriace, diascordii, ana scrup. ij. aquæ theriacalis, unc. j.*  
*Misce, fiat haustus.*

Bene sudavit, & bubo multum increvit. Reiteratum quoque fuit julabium hesternum. Circa vesperam hunc bolum dedi:

℞. *Lapidis bezoar orient. scrup. f. theriace, diascordii, ana scrup. j.*  
*confect. de hyacintho, scrup. f.*  
*Fiat bolus in folio auri.*

Quia autem valde anxius erat, & cor haud aliter torqueri diceret quam si in prælo comprimeretur, hoc linimentum bisterve de die œsophagi & cordis regionicalide inunctum fuit:

℞. *Olei nucis moscatæ expressi, laurini, & scorpionum, ana scrup. ij.*  
*theriace androm. drach. j. olei juniperi, scrup. f. succini, scrup. j.*  
*cinnamomi, citri, ana gut. iij. & gariophyllorum gut. j.*  
*Misceantur pro linimento.*

27. Junii

27. Junii murmura in abdomine percepit, & fæces quoque liquidiores dejecit, quapropter alvi fluxum accessurum metui, qui ut melius præveniretur, hunc pulverem cum aqua theriacali mane exhibui.

℞. *Florum sulphuris, terræ sigillatæ, cornu cervi usti, margaritarum præparat. coralli rubri, ana scrup. f. croci or. gr. iij.*  
Fiat pulvis.

Etiam sæpius de die hujus conditi particulam edere jussi:

℞. *Specier. diatrium santalor. scrup. ij. & liberant. scrup. j. f. cornu cervi usti, trochisc. de terra sigillata, ana scrup. j. diascordii Fracast. drach. ij. rob acaciæ, drach. j. f. conservæ rosarum rubr. unc. f. conservæ florum calendulæ, myræ cydoniorum, ana drach. iij. syrupi granatarum, q. f.*  
Misce, fiat s. art. conditum.

Reiterata quoque fuit mistura 25. Julii præscripta. Post meridiem æger summè debilis fuit, quapropter confectionis de hyacintho & lapidis Bezoar ana scrup. j. cum pauxillo aquæ theriacalis in cochleari miscui & exhibui. Circa vesperam idem illud reiteratum est. Etiam hoc cataplasma buboni imponendum præscripsi:

℞. *Bulborum cape sub cineribus parum assatorum n. iij. radic. althææ pulverisat. farinæ sem. lini, & tritici, ana unc. f. fermenti acidi, fimi columbini, ana drach. vj. aquæ communis, q. f.*  
Coquantur leviter, adde  
axungie anatis, ung. basilici, ana unc. f. mellis, unc. j.  
Fiat s. art. cataplasma molle.

28. Julii hunc bolum dedi, nihil enim aliud ob summam debilitatem assumere poterat:

℞. *Lapidis bezoar orient. confect. de hyacintho, mithridatii, ana scrup. j. olei cinnamomi, gut. j.*  
Fiat bolus in folio auri.

29. Julii, cum rursus paulo fortior esse videretur, summo mane tale sudoriferum sumpsit:

℞. *Extracti angelicæ, & magistralis. confect. de hyacintho, ana scrup. j. theriacæ, diascordii, ana scrup. j. f. aquæ theriacalis, unc. j. f.*  
Misce, fiat haustus.

Copiosissime sudavit, & post sudorem se paulo melius habere cœpit. Illa die utebatur subinde de condito & mistura antedicta. Etiam jusculi pulli cum herbis cardiatis cocti aliquantum sorpsit. 30. Julii iterum pejus se habuit, & febris vehementior fuit quam unquam antea. Exhibui hunc bolum cum dicta mistura dissolutum:

℞. *Lapidis bezoar orient. gr. xv. salis absinthii, confect. de hyacintho, diascordii, ana scrup. j. olei sulphuris, gut. iij.*  
Miscoantur.

Circa vesperam sponte sudavit copiosissime, à quo critico sudore (nam erat morbi dies septimus) morbus solutus est. 1. Augusti ipsum diætæ commisimus, cum tam propter debilitatem, quam propter nauseam plura medicamenta assumere non posset, neque etiam necessitas multum urgeret. 2. Augusti ad citiorem bubonis maturationem, cataplasma hoc modo immutavimus:

Gg 2

℞. *Radic.*

*Rad. liliorum alb. unc. ij. & altheæ recentis, unc. j.  
herb. altheæ recentis, M. j. flor. chamomillæ, M. f.  
ficuum ping. n. xj.*

*Coquantur in aq. communis q. s. pistatis adde  
farina sem. lini, pollinis farina tritici, ana unc. f. mellis, unc. j.  
axungia porci, ung. basilici, ana, unc. f.  
Fiat cataplasma.*

5 Augusti tumor jam maturus scalpello apertus fuit, atque ulcus deinde instar aliorum ulcerum mundatum & consolidatum est; & æger, qui jam jam hiantis Cerberi præda futurus putabatur, integræ sanitati restitutus fuit.

#### Annotatio.

Summa virium debilitas, ut & alvi commotio in hoc ægro summum periculum minabantur; quod tamen continuo antidotorum usu feliciter præventum fuit.

### HISTORIA LXIX.

**F**redericus Willenburch, juvenis fortis, circiter triginta annorum, sponsus, eum Agnetam de Soust mense Augusto sibi uxorem duxisset, Venerum agrum nimis strenue (ut solent multi sponsi) coluerat. Hinc tertia nuptiarum die peste correptus est, cum maxima anxietate & summa virium dejectione: febris autem exigua erat. Nihil profuerunt alexipharmaca, nec ullis modis collapsæ vires restaurari potuerunt. Circa finem secundæ diei ad campos Elysios delatus est.

#### Annotatio.

Sponsi plurimi hoc tempore inter ipsas nuptias peste correpti sunt, & paucissimi à morbo evaserunt. Eodem illo tempore mulier quædam Noviomagensis spatio sex septimanarum tres maritos peste extinctos habuit: vix primo sepulto statim alteri nupsit, & sic etiam tertio; certè mulier non amore, sed libidinoso ardore flagrans, profectò flagris vel ignis ardore magis quam amore digna. Liberalior Veneris usus virorum corpora debilitando ad pestem disponebat, quæ cum propter debilitatem à seminis profusione inductam, pesti minus resistere possent, facile & cito deficiebant.

### HISTORIA LXX.

**S**oror Joannis Rouckus, civitatis Noviomagi Procuratoris, peste eum vehementi febre & anxietate correpta fuit, quibus accessit obscurus tumor in inguine. Ab ipso morbi principio vires admodum prostratæ erant. Secunda die vomitus sequebatur, qui tertia die valde violentus evasit, viresque adhuc multo magis deiecit, quo multa foetidissima, turbida & varij coloris ejecit. Quarta die multo molestior & fere continuus evasit vomitus: tandem cum difficillimo conatu inter alia excrementa evomuit animalculum quoddam parvum instar draconis vivi, quo ejecto non diu post obiit. Mater ægræ illud animalculum Francisco Patien Chirurgo spectandum obtulit, (cum ego forte ad manus non essem) qui mihi retulit, fuisse bestiolam vivam, horribilem visu, oblongam, sed parvam, circiter longitudinis minimi digiti, quadrupedem, lacertæ non multum absimilem, excepto quod sanguinei coloris esset, & caudam tenuiorem ac parvas aurículas haberet.

Anno 1721

## Annotatio.

**Q**uis non miretur violentissimos effectus pestilentiae? quæ tantam & tam venenatam putredinem paucis diebus inducere potuerit, ut brevissimo tempore animal venenatum, naturæ humanæ maxime contrarium, in medio corpore ex ea generatum fuerit? Mater ægræ narravit mihi bestiam hanc aliquamdiu in pelvi vixisse, quam Chirurgus Patien liquore aliquo affuso libenter occidisset, atque

in perpetuam memoriam exsicasset ac servasset, nisi contagii metus & ægræ morientis vestigia, ipsum deterruissent. Durante hac peste lumbricos breves, crassos, rotundos & rubros, interdum vomitu ejectos, interdum per alvum deturbatos vidi, sed præter hanc ægram, nullum unquam talem draconem ejecisse, nec vidi, nec audiui.

## HISTORIA LXXI.

**D**ominus Welting, Nobilis Anglus, qui urbem videndi gratia Noviomagum venerat, 8. Augusti matutino tempore foras prodiens, capitis aliquam vertiginem, & non diu post maximam anxietatem sensit, ita ut se ad lectum conferre cogeretur. Vocatus Chirurgus sudoriferum exhibuit, & copiosos sudores promovit, à quibus nonnihil allevatus fuit æger, & bubo sub axilla dextra erupit. Chirurgus post sudores venæsectionem in brachio dextro instituit, promittens se ægrum hac ratione citissime curaturum. Ex aperta vena sanguis floridus magna vi erupit, cumque jam aliquot unciae effluxissent, Chirurgus nullis compressis, nullis ligaturis fluxum sanguinis cohibere, & venæ incisionem obturare potuit. Interim ægri vires in totum collapsæ sunt, & qui sub axilla eruperat tumor disparuit: anxietatibus adauctis etiam syncope accessit. Cum circiter per sesquihoram in obturanda vena frustra laborasset Chirurgus, tandem meum consilium etiam imploratum fuit. Inveni vulnuscule fungum illum, quo ad sistendum sanguinem utuntur Chirurghi, impositum, eique crassum compressum cum ligatura satis arcta injectum. Jussi caput mortuum vitrioli imponere, sed nihil profuit. Cum autem æger crebris animi deliquiis identidem deficeret, in re desperata ad extremum remedium (sed nimis sero) devenire necesse fuit, nempe ad ustionem, qua ferro ignito leviter imposito vulnuscule occlusum fuit, atque ita sanguis quidem substitit, sed æger non obstantibus variis exhibitis corroborantibus, post semihoram exspiravit, atque ita secundum Chirurghi promissum morbus citissime curatus fuit, idque tam egregie, ut recidivam metuere necesse non fuerit.

## Annotatio.

**Q**uamvis rarissime eveniat ut aperta vena rursus occludi nequeat, tamen vel eo saltem nomine in peste metuenda est venæsectio, cum illud quod aliquando fit, pluries fieri posse, credibile sit. Tantum bis mihi hunc casum videre contigit, semel in prædicto ægro, & mense Junio adhuc semel in uxore militis cujusdam Frisii, quæ cum sibi venam in pestilenti febre pertundi curasset, Chirurgus factam incisionem nullis medijs obturare potuit,

quam ego quidem impositâ petiâ oleo vitrioli intinctâ restrinxi, sed tamen ægra intra horæ spatium vitæ naufragium fecit. Zacutus Lusitanus, *Admiri 3. observat. 41.* similem casum in cucurbitulis observavit: *Multis (inquit) in peste sanguis à cucurbitulis emanans, nec validis auxilijs, nec cauterio ipso potuit compesci; omnes obiere: nam facultas retentrix à venefica qualitate prorsus erat extincta.*

## HISTORIA LXXII.

**G**erardus Buys Pharmacopœus, vir foris, qui amuleto arsenicali munitus semper incedebat, pustulam rubram inflammata sine dolore, cum levi pruritu in collo percepit, quæ mihi aliquid mali ominari visa fuit, ac propterea ad tempestivum antidotorum usum ipsum exhortabar. Verum ille



rem flocci faciebat, & toto corpore optime valens, consueta munia peragebat, bene edebat, bibebat, ridebat, & hilaris erat, nec quicquam mali suspicabatur, imo etiam me irridebat quod de periculo aliquo locutus fuisset. In tali statu circiter per tres septimanas vixit. Tunc demum capitis gravitate, cordis anxietate, nausea, & debilitate infestari coepit. Assumpto alexipharmaco (cui præter cætera lapidis bezoar orientalis integra drachma admista erat) cum copiosius sudasset, nihil quidem allevatus fuit, sed prædicta pustula in perfectum carbunculum transivit. Postridie febris vehementior evasit, vires admodum dejectæ sunt, denique morbi violentiâ omnium antidotorum vim superante, post triduum è vivis excessit.

*Annotatio.*

**D**isputant Medici, utrumne pestilens venenum in corpore aliquamdiu occultum latere possit, antequam gravibus symptomatibus se prodatur: quam quæstionem agitavimus lib. 1. cap. 10. Mercurialis, Andreas Cæsalpinus, Untzerus, alique gravissimi Medici, negativam tenent: è contra verò Roboretus, Platerus, Sen-

nertus, & alii, affirmativam defendunt quam posteriorem opinionem etiam confirmat experientia, ut liquet ex prædicta historia, ut & ex sequenti historia 103. Affirmativæ etiam astipulari videtur Fernelius, nam Pathologiz lib. 4. cap. 18. inquit: *Interdum carbunculi initium multo ante tempore conspicuum, quam febris est.*

## HISTORIA LXXIII.

**J**acobus Verhorst & Casparus Nitteler, focii milites, animi gratia exutis vestibus in flumine aliquamdiu nataverant, atque ita modo aquis, modocalidissimis solaribus radiis nuda corpora exposuerant. Peracta natatione, ambo dolorem capitis gravativum senserunt, cum inclinatione ad somnum. Ad hospitium reversi lecto se imposuerunt & dormiverunt. Post aliquot horas evigilantes, præter capitis dolorem, etiam anxietatem maximam cum nausea senserunt, cui non diu post magna quoque febris adjuncta est. Exhibui utrique alexipharmacum, à quo cum propter summam inquietudinem sudare non potuissent, post aliquot horas alterum sumpserunt, quod rursus evomuerunt, nec deinceps quicquam amplius assumere voluerunt. Inextinguibili siti ambo torquebantur. Jacobus magnum dolorem sub axilla, sed absque manifesto tumore habuit, & circa finem secundæ diei obiit. Casparo autem parvus dolorosus tumor in parotide erupit, & morbum protraxit usque ad quartum diem, quem una cum vita finivit.

*Annotatio.*

**H**ujusmodi infelices casus in pluribus aliis natatoribus etiam observavimus, ac proinde illas natationes curiosissime prohibere solebam: partim quod periculofum foret fervidis radiis solaribus nudum corpus exponere: partim quod etiam periculosa foret illa mutatio, qua modo à sole corpora calefunt, modo ab aqua refrigerantur: denique quod ipsa flu-

minis aqua valde suspecta esset, quia Germaniam versus plurimæ urbes, & innumeri pagi in Rheni littoribus siti, gravissima peste affligebantur; quorum omnium locorum contagiosa inquinamenta in flumen effluebant, & aquam illam, Noviomagum versus descendentem, ratione contagii haud parum suspectam reddebant.

## HISTORIA LXXIV.

**A**ncilla Jacobi Leeuwens, Mercatoris vini, quæ in horto ejus decumbebat, secunda morbi die urinas oleaginosas copiosas reddidit, ita ut oleum crassum & turbidum repræsentarent. Carbunculum habuit in altera mamma. Assumptis alexipharmacis & sudoriferis omnia gravia symptomata unà cum febre cessarunt, & ipsa præter opinionem à morbo convaleuit.

*notatio.*

## Annotatio.

**C**um talibus urinis oleaginis tantum duos | quot tales urinas reddebant, citissime mortui  
tresve evasisse novi: omnes reliqui, quot- | sunt.

## HISTORIA LXXV.

**A**dolphus Fildar, Chirurgus non imperitus, qui amuleto arsenicali curiose semper munitus erat, 11. Julii peste correptus, sibi ipsi sudoriferum aliquod præparavit, à quo cum copiose sudasset, buboni (qui in inguine apparebat) cucurbitam magnam cum multa flamma imposuit, eamque bis terve reiteravit. Hinc pars affecta valde intumuit, & tam horribili dolore ægrum affecit, ut quo se verteret, nesciret. Magnum istum dolorem violentissima febris, & hanc summa debilitas viriumque dejectio insecuta est. Tunc meum quoque consilium expetivit. Exhibui varia sudorifera & antidota: parti quoque affectæ, tam ad intensissimi doloris sedationem, quam ad veneni extractionem, varia topica admovi. Verum his omnibus cum nec febris, nec dolores imminuerentur, æger deficientibus viribus morbo victoriam concessit.

## Annotatio.

**A**nimadvertimus in plurimis ægris, quibus cucurbitulæ bubonibus impositæ fuerant, illud remedii genus fere semper infelicitè cessasse; & dolores adeo acres hoc modo parti affectæ fuisse inductos, ut inde acerrima febris excitaretur: cujus violentia antequam sedari posset, plerumque virium defectu extinctos fuisse ægros. Quapropter licet in pestis hujus exordio etiam nobis illud auxilium arderet, partim quia veteres, multique clarissimi Medici illud commendarent; partim quia ipsa ratio illud etiam approbare videretur, tamen postea in totum ab illo abstinuimus, & usu edocti sumus, bubones tutius ac melius tractari cum vesicatoriis & cataplasmatibus attrahentibus ac emollientibus, quam cum violenta cucurbitularum suctione, qua non ipsum venenum pestilens, (quod hoc modo extrahi nequit) sed tantum sanguis vicinique humores supra glandulas in durum cumulum contracti, vel glandulas comprimunt, earumque extensionem ac venenati ichoris receptionem impediunt; vel vias quæ ab internis vasis ad glandulas tendunt, obstruunt, atque ita in causa sunt quod natura sæpe laudabilem veneni expulsionem ad emunctoria perficere nqueat.

## HISTORIA LXXVI.

**C**hristianus ab Ummerson, vini Mercator, magna inappetentia laborabat, cui etiam aliqualis nausea aderat: valde debilis erat, quia per multos dies vix quicquam comedere potuerat. Ipse pestilenti contagio se infectum esse arbitrabatur: sed male, nam causa mali inde proveniebat, quod bonus ille vir præservationis gratia quotidie matutino tempore vino absinthite majore copia utetur. Quod cum ilico animadverterem, hujus vini usum plane prohibui, ac dietâ conveniente præscriptâ, hunc bolum exhibui:

℞. *Rhabbarbari pulverisati, scrup. ij. cremoris tartari, scrup. j.*  
*pulpæ tamarindorum, unc. f. syrupi de limonibus parum.*  
*Fiat bolus.*

Hinc ter ista die alvum exoneravit. Postridie tale conditum præscripsi;

℞. *Calami aromatici, nucis moscatæ, macis, florum sulphuris, ana scr. j. f.*  
*cremoris tartari, unc. j. cinnamomi, scrup. j. gariophyllorum, scrup. f.*  
*Pulverisentur subtilissime, deinde addantur.*  
*radic. helenii cond. drach. vj. conservæ anthos, unc. f.*  
*zingiberis condit. drach. vj. olei vitrioli gut. xv. syrupi de limonibus q. s.*  
*Fiat conditum.*

Hujus

Hujus conditi mane & vesperi, interdum etiam meridie, particulam edebat, à vini absinthitis usu abstinendo. Hinc brevi rediit appetitus. Ex illo tempore conditum hoc tanti fecit, ut illud postea per aliquot annos multoties à Pharmacopœo confici curaret, ad appetitum & sanitatem, (ut ajebat) conservandam.

*Annotatio.*

**Q**uamvis absinthium, quocunque modo moderate sumptum, adversus venenum pestilens egregium sit præservativum, & ventriculum detergeat, atque appetitum excitet: immoderatum tamen ejusdem usum multoties animadverti inducere debilitatem, & cibi inappetentiam. Sic N. Heymerick a nimio vini absinthitis usu (quo se per annum pessime assueverat, ut pestis contagium evitaret) adeo dejectum appetitum habuit, ut postea nullis mediis restaurari potuerit; atque ea de causa debilitatis internis visceribus, tandem vitam cum

morte commutaverit. Ita quoque Antonius de Tricht Pharmacopœus, vini absinthitis matutino potui nimis deditus, per aliquot annos adeo inappetens fuit, ut vix quicquam comedere potuerit, cumque illius vini matutinum usum, vel potius abusum, intermittere noller, tandem epilepticus factus misere obiit. Quapropter in usu absinthii, sicut in omnibus aliis rebus, modus servandus est: nam etiam optima quæque, vel medicamenta, vel nutrimenta, immoderate sumpta, nocent.

## HISTORIA LXXVII.

**P**ater Felicianus Sacerdos, Ordinis Franciscanorum Monachus missionarius, vir doctus & humanissimus, peste correptus est, cui vix ulla manifesta febris adjuncta erat, ut nec alia gravia symptomata, præter solam & summam anxietatem, qua cor tanquam in prælo comprimi dicebat. Post sudorem copiosum alexipharmaco provocatum, duo exiles carbunculi in femore eruperunt, etiam dolor in inguine perceptus est cum obscuro quodam tumore. Exhibui tria quatuorve sudorifera, & alia quoque antidota intermedio tempore dedi, verum his omnibus neque inguinis tumor adauctus, neque anxietas quicquam imminuta est. Interea tamen vires egregie constabant, ac valde parum dejectæ erant. Quarta morbi die cum ipsum inviserem, totus vestitus erat, & circiter horæ quadrantis spatio mecum per cubiculum deambulavit, (non titubante gradu, sed fortiter) ac de confidentia in Deo, de non extimescenda morte, de maximo & flagrantissimo suo hinc ad salutarem patriam migrandi desiderio, multa notatu dignissima loquebatur. Postea inter ambulandum monstrabat mihi etiam sex septemve exanthemata purpurea, quæ in pectore & brachio eruperant, & rogabat quales nam essent, & quidnam indicarent hæ maculæ? Respondi esse mortis advenientis prænuntia. Quo nuncio intellecto, bonus ille vir non minus gavisus est, quam gratissimo aliquo dono accepto, & statim cum gaudio in hæc verba erupit: Jam liberabis servum tuum Domine, & videbunt oculi mei salutare tuum facie ad faciem: fiat voluntas tua; & sit nomen tuum benedictum in sæcula. Tunc ego ipsi in æternum valedixi, atque discessi. Postea retulerunt mihi astantes qui illi inferviebant, quod statim post meum discessum diceret: Sentio me ab ambulatione aliquantum defessari; & cum dicto lecti margini se imposuisset sedendo, atque ilico quasi in momento retrorsum supra lectum cadens exspirasset.

*Annotatio.*

**Q**uod in hoc ægro, illud in nonnullis aliis etiam animadvertimus, nempe in quibusdam peste laborantibus tantam corporis fortitudinem usque ad mortem fuisse, ut ambulantes, nec quicquam minus quam mortem metuentes, subito conciderint. Verum in paucissimis tantam animi fortitudinem, tantam in morte constantiam, tantum vitæ æter-

næ ex intimo corde procedens desiderium observavimus, quantum in prædicto D. Feliciano, & socio ejus Tiburtio, nec non Patre Gregorio, ejusdem quoque Ordinis Monacho, qui tres summo cum gaudio mortui sunt, totumque mortis metum læta spe melioris vitæ omnino extinxisse videbantur. Non omnes qui vitæ æternæ gaudia prædicant, ad illa festinant, sed

crema

extrema necessitate ingruente plerique diverticula quærent, & his illisve mediis extremam illam horam differre nituntur. Sic Pater de Bruyn, Jesuita doctus, cum peste correptus esset, maximo mortis metu perculsus fuit, & tam altum terrorem concepit, ut exhibita remedia plane nihil operarentur ad salutem: tandem omnibus nihil proficientibus, cum ab exanthematum eruptione mortem ipsi prædicerem, tres

quatuorve exiguas pyxides (in quibus imagines, reliquæ sanctorum, schedæ benedictæ, & similia continebantur) de collo pendulas manu prehensens, ac cum indignatione irridens, dicebat: *O inania fulcra, in quibus confisus sum! quid jam mihi prodestis?* & paulo post cum magna desperatione obiit, immemor versiculi: *Fer facili quod fata ferunt; si ferre recusas, Ipsum te crucias, nec minus illa trahent.*

## HISTORIA LXXVIII.

**C**Asparus de Swart, cum à Molarum platea ad plateam Cervinam properaret, brevioris viæ gratia transivit vicum quendam rarissime frequentatum, juxta templum B. Mariæ situm, in quem ex plurimis infectis ædibus sordes, stramina lecticarum, vetusta ac derrita vestimenta, ægrotorum fæces & excrementa, aliaque similia tunc temporis projiciebantur. Ipse in transitu à contagio harum rerum foetore gravissime affectus, & tanto contagio infectus fuit, ut domum veniens statim conciderit, vomuerit, capitis dolore & maxima cordis anxietate pressus fuerit, in utroque crure carbunculum habuerit, atque intra viginti horas vitam finiverit.

## Annotatio.

**N**on sine ratione curiosiores Rerumpublicarum Gubernatores edicto jubere solent, ut omnes res contagii ratione suspectæ comburantur, neque in publicum projiciantur: atque ita in nonnullis Italiæ locis interdum integras domos cum tota suppellectili Ma-

gistratus jussu combustas fuisse, legimus. Verum Magistratus Noviomagensis, & belli turbis, & morbi furis intricatus, multarum hujusmodi necessariorum rerum negligentiorum curam habuit: quæ etiam causa fuit, quod contagii semina plurimum disseminata fuerint.

## HISTORIA LXXIX.

**M**ense Augusto Domicellam quandam nobilem, (quæ in cubiculo prope arcem Noviomagensis ad ejus curationem à me conducto commorabatur) lue Venereâ graviter infestata, tractabam, cui cum post præmissa generalia, jam per quatuor dies quotidie bis sudores Guajacino decocto provocassem, pestis illarum ædium domesticos invasit, è quibus intra sex dies quatuor mortui sunt; unica vetula superstes remansit, quæ huic Domicellæ inserviebat. Domicella pestem magis quam luem Veneream timens, libenter aliò migrasset; verum quia in tota civitate paucissimæ domus erant in quibus contagium non dominaretur, ad hæc quia verebar mutatione domicilii & ipsam & morbum ejus ab aliis cognitum iri, suasi ut illic maneret, & nihil periculi metueret, propterea quod à peste omnino immunis futura esset, quo usque curationi luis Venereæ vacaret. Meum consilium secuta remansit, & continuatis quotidianis sudoribus, aliisque remediis ad luis Venereæ curationem necessariis, & suffumigiis ad æris emendationem in cubiculo etiam excitatis, nullum pestis aculeum sensit, sed post tertiam septimanam bene sana & pulcherrima discessit, quæ horribili turpi Venerea scabie foedata ad nos venerat.

## Annotatio.

**C**um in mormi Gallici curatione medicamentis talibus plerumque utamur, quibus Venereum virus à centro ad peripheriam propellitur, non facile tales ægri, quousque huic curationi se submitunt, peste corri-

piuntur; quamvis etiam inter pestiferos versentur, ut ex prædicta historia liquet; quam etiam ratio approbat: nam quousque natura occupata est in expulsiōe veneni Venereî à centro ad corporis circumferentiam, non facile potest recipere,

Hb

pere, & à circumferentia ad centrum attrahere venenum pestilens; vel si illud forte receperit, statim per apertos pororum meatus illud rursus foras expellit. Sic ob eandem pene rationem

dicit Paræus, *lib. 21. cap. 21.* quartanarios à peste magis tutos & liberos esse, quia tertio quoque die vehementer sudare solent: quod ipsum quoque affirmat Sennertus, *de Peste, cap. 1.*

## HISTORIA LXXX.

**M** Achtilda de Bie, juvencula circiter viginti annorum, 3. Septembris peste correpta fuit, cum anxietate, febre & anthrace in brachio. Sudorifera aliaque convenientia antidota ab ipso morbi principio satis curiose exhibita fuerunt. Eodem tenore continuavit febris usque ad diem quartum, quo hæmorrhagia narium supervenit, qua sanguis, non quidem affatim, sed paulatim, diu & magna quantitate effluxit. Ut hanc hæmorrhagiam sisteremus, omnes modos adhibuimus; per Chirurgum extremas partes arctius ligari, oxycratum actu frigidum cervici, fronti & pudendo admoveri, cucurbitulas cum multa flamma pedibus applicari, pulveres astringentes cum petiis naribus immitteri, aliaque multa fieri curavimus; quibus omnibus non juvantibus, tandem etiam inviti ad venæsectiones brachiorum pervenire coacti fuimus: sed omnia frustra tentata sunt, nec sanguinis è naribus effluxum sistere potuimus, qui cum circiter per triginta horas perdurasset, ægra deficientibus viribus animam æternitati consecravit.

### Annotatio.

**M** Inime audiendi sunt illi, qui in peste hæmorrhagias die critico incidentes, in principio non modo non cohibendas, verum etiam, si tardiores fuerint, magis promovendas esse, indicant. Falluntur toto cælo, nam licet natura hoc modo se à gravante malignitate levare nitatur, frustra tamen per illam viam id facere laborat, per quam pestiferum venenum cordi maxime impressum, aut parum, aut nihil imminui potest: vel dato, aliquantum imminui, certum tamen est profusione multo-spirituum & copiosi ac boni sanguinis, citius viribus collapsis morituros ægros, quam tota malignitas excerni possit. Hinc etiam Saxonia, *Præcos lib. 8. cap. 37.* scribit, vacuationem sanguinis per nares in pestiferis nunquam esse salutarem, & magna ex parte compesci non posse;

atque in hoc differre pestem ab aliis acutis, quod hæ per sanguinis narium copiosam excretionem feliciter judicentur, illa vero infelicitur. Dictum comprobatur experientia, qua in hac peste edocti sumus, periculosissimas & plurimis lethales fuisse crises illas, quæ per hæmorrhagias, sive narium, sive menstruorum, fiebant, easque rarissime sponte substituisse; ut plurimum autem si in ipso principio arte non sisterentur, postea plane nullis mediis sisti potuisse; imo sæpe etiam maximâ diligentia adhibita sisti nequivisse. Hujusmodi lethalis hæmorrhagiæ exemplum quoque refert Schenkius in  *suis Observationibus*. Forestus in peste Delpheni etiam observavit, plurimos, quibus sanguis è naribus fluebat, fuisse mortuos.

## HISTORIA LXXXI.

**U**xor Joannis Pallemmer, Cerevisiarii, peste correpta, unum carbunculum in sinistra manu inter minimum & annularem digitum habuit, alterum vero in primi digiti medio. Nec vehemens febris, nec, præter magnam anxietatem, alia sæva videbantur adesse symptomata. Sudorifera aliaque alexipharmaca ab ipso morbi principio diligentissime exhibita sunt, quibus omnibus non obstantibus, tamen paulatim magis magisque defecerunt vires, ac die morbi septima vitæ hujus miseras exuit.

### Annotatio.

**I**N hac peste observavimus plerumque sinistri & ex innumeris ægris, quibus id contingebat, omnis fuisse anthraces in digitis prodeuntes; paucissimos evasisse.

HISTO-

## HISTORIA LXXXII.

**H**ermannus Thomas, pistor, cum militem quendam peste correptum & phreneticum horribili vultu foras excurrentem & vociferantem casu conspexisset, tanto terrore perculsus est, ut inde statim & ipse pestem conceperit. Exhibui sudorifera, aliaque varia antidota: prodierunt duo carbunculi cum obscuro tumore sub axilla, sed absque levamine. Nullis modis, nec verbis, nec rationibus ab animo illius excuti potuit conceptus terror. Omnibus frustra tentatis, quinta die visa sunt exanthemata purpurea; & sequenti nocte obiit.

## Annotatio.

**T**errorem ad pestis inductionem plurimum facere, non tantum nos in hac peste animadvertimus, sed illud ipsum quoque in aliis pestibus multoties observatum fuisse, testes sunt Euagrus, Nicephorus, Erasmus He-

denu, Scheunemannus, Joannes Matthæus, Sennertus, & alii. Semper etiam notavimus, rarius evasisse illos qui ex alto concepto terrore, peste corripiebantur, quam alios, quos absque hoc præcurfore invadebat.

## HISTORIA LXXXIII.

**J**acobus ab Hamburch, eques Capitanei Thomæ Lucas, vir fortis, audax & temerarius, 12 Octobris peste cum febre violenta & bubone in inguine correptus, post varia assumpta alexipharmaca, quarta morbi die fortiter tussire, sexta autem sanguinem tussiendo rejicere coepit copiosius, è quo signo illum moriturum judicavi. Attamen ne mea incuria perire videretur, ut sanguinis sputum aliquantum cohiberi & imminui posset, 18. Octobris circa vesperam hunc pulverem præscripsi, quem illa nocte duabus vicibus cum pauxillo aquæ theriacalis assumpsit:

*℞. Boli arm. cornu cervi usti, ana scrup. j. florum sulphuris, scrup. j. f. specier. diatrium santalorum scrup. j. croci or. scrup. j. sacchari candi albi, drach. j. f. Fiat pulvis subtilis, qui dividatur in duas doses.*

19 Octobris febris remissior fuit. Tunc sæpius de die sequentis electuarii particulam edere jussi:

*℞. Specier. diatrium santalorum, cornu cervi usti, ana scrup. j. f. coralli rubri, spodii usti, terræ sigillata, cooci orient. ana scrup. j. florum sulphuris, scrup. ij. Fiat pulvis subtilissimus, cui adde diascordii Fracastorii, drach. iij. conserva rosarum rubr. unc. j. Syrupi de scordio, & de rosis siccis, ana q. s. Fiat electuarium.*

Hoc die bubo, qui topicorum usu ad maturationem pervenerat, à Chirurgo pertusus est. 20 Octobris omnino febris experts fuit, sanguinis tamen sputo remanente. Cum appetitu aliquantum comedere coepit æger. Continuatum est in usu electuarii. Quia vero durante morbo tantum bis alvum excreverat, circa vesperam ex pilulis Ruffi tres pisi magnitudinis pilulas deglutivit, à quibus sequenti mane duos secessus habuit. Hoc facto ad electuarii usum rediit. 21. Octobris dicebat se magna vi tussiendo frustula quædam pulmonis cum multo sanguine rejecisse. 22. & 23. Octobris sputum sanguinis multum imminutum est: quapropter illum diætæ commisi, & ab omnibus rebus noxiis abstinere jussi. Anno sequenti, mense Martio, rursus ad me venit, valde emaciat & debilis, ac conquerebatur se post sanationem

tionem pestis aliquamdiu mediocriter valuisse, verum sanguinis sputum nunquam in totum substituisse: in magno autem gelu mensis Februarii ipsum adeo afflictum esse, ut per aliquot septimanas lecto incumbere coactus fuisset. Animadverti hominem ex ulcere pulmonis tabem jam contraxisse, nam præter sanguinem etiam verum pus rejiciebat, quapropter illum eodem modo, quo varios alios vere phthisicos alias sanavi, curare aggressus sum, atque ita circiter trium mensium spatio pristinae sanitati omnino restitutus fuit.

*Annotatio.*

**H**æc historia tanquam rarissima notanda est: nam in tota hac truculentissima peste, præter hunc unum solum equitem, cum sputo cruento (quod à carbunculis in pulmone excitatis plerumque inducitur) neminem evasisse scio: rogavi etiam Chirurgos, quibus pestiferorum curatio demandata erat, anne illud uspiam vidissent, qui testabantur se observasse omnes illos quibus sputum cruentum superveniebat, brevissimo tempore mortuos fuisse.

## H I S T O R I A LXXXIV.

**D**uo filii Domini Gatiem, Galli, Verbi divini Ministri, peste cum violentissima febre correpti intra triduum occubuerunt. Cadavera tertio post mortem die horribiliter immutata, valde tumida, & instar carbonis vel atramenti tota nigricantia visa sunt: ita ut Pater, qui ex Hollandia post mortem filiorum advenerat, ipsorumque cadavera adhuc videre desideraverat, primo viso, adeo abhorruerit, ut statim effugiens secundum videre ausus non fuerit.

*Annotatio.*

**C**adaverum citissima & malignissima corruptio maximi veneni index fuit. Sciendum tamen in hac constitutione omnia pestiferorum cadavera, tam cito & tam horribiliter putrefacta non fuisse: nam multa non minus quam ab aliis morbis emortua corpora, per aliquot dies absque manifesta putredine servari potuerunt, nempe illa, quæ absque magna febre enecata fuerant: quibus vero ægris pestiferis gravis febris adfuerat, eorum cadavera propter malignam humorum putredinem cito computruerunt; & quanto humorum putredo cum febre, morbo durante, gravior fuerat, tanto post mortem citior & malignior, magisque horribilis cadaverum putredo sequebatur.

## H I S T O R I A LXXXV.

**P**etrus Parvus (inde Parvus cognominatus, quod esset brevioris stature) rusticus notissimus in pago Bommel, unico milliari à Noviomago distante, peste correptus fuit, cum violenta febre, aliisque gravibus symptomatibus, à qua tertia die mortuus est, ut putabatur. Consanguinei, qui illi interviebant, amiculo ferali corpus induerunt, idque à lecto in pavementum super stramina deposuerunt. Etiam hæredes vestimenta ejus aliamque supellectilem inter se diviserunt, atque ita metu furum spoliarunt domum omni supellectile. Interea etiam curarunt ut cista feralis à fabro lignario conficeretur, atque ad exequias sequenti die peragendas omnia præpararunt. Postridie omnibus jam paratis, sola cista feralis (sine qua nostrates mortuos non sepeliunt) deerat, quam faber lignarius propter plurima negotia tam citò conficere non potuerat: quapropter exequiæ usque in tertium diem necessario differendæ erant. Sequenti die cistâ ferali jam paratâ, cum ad funeris elationem festinaretur, viderunt mortuum efferendum reviviscere, & brachia ac pectus commovere, (postquam quinquaginta duabus horis in tali statu tanquam verè mortuus jacuisset) qui etiam intra horæ quadrantem surgebat, vociferabatur, indusium aliaque linteamina totus maniacus dilacerabat, imò quoque in proxime astantes violentas manus inferebat; ita ut illum vi continere, & fasciis brachia ligare ac constringere necesse fuerit. Duravit illa maniacæ passio circiter



circiter per quinquaginta quatuor horas (ut ipsemet mihi narravit) ac postea cessavit, & æger plane ad se rediit, atque consanguineos nonnullos suis vestibus indutos, aliamque suppellectilem inter hæredes divisam vidit, quam ipse redivivus possessor repetiit. Intra paucos dies vires deperditas recuperavit, & à morbo convaleuit cum maxima omnium admiratione. Nono jam anno (quo historias has in ordinem redigo) bene sanus vivit, & inservit etiamnum hodie Nobilissimo viro Joanni de Bronckhorst, Bataviæ superioris Majori, in eodem pago habitanti, ejusque opera rustica peragit.

### Annotatio.

**I**N peste aliisque contagiosis morbis corpora mortua ratione contagii citissime inhumari solent; quæ ultra biduum, præsertim æstivo tempore, asservanda non esse, alibi docuimus. Verum semper diligentissime animadvertendum, anne verè mortua sint: nam multoties observatum est, ægris pestiferis talia animi deliquia supervenisse, ut pro mortuis habiti, imo nonnulli etiam vivi inter mortuos sepulti fuerint: quod etiam prædicto Petro Parvo accidisset, si cista feralis pridie parata fuisset, nam illum certissimè mortuum esse, omnes putaverant. Hinc verosimile est, in illis locis ubi peste extinctos intra paucas horas sepeliunt, plurimos hujusmodi errores committi. Qualem historiam refert Alexander Benedictus, *lib. de Peste, cap. 1. de nobili Matrona*, quæ tali modo viva inter mortuos deposita fuit. Lycosthenes quoque, *lib. de prodig. & ostent.* duas memorabiles refert historias eorum qui peste mortui putabantur, & quibus exequiæ jam parabantur, qui antequam sepelirentur, revixerunt. Hildanus, *centur. 2. observat. 95.* tria clarissima exempla pestiferorum enarrat, quorum primi corpus jam loculo imponebatur ad sepulchrum efferendum: secundi jam sepultum fuit, & postea, casu à furibus aperto sepulchro, ad se rediit: tertii à Joanne Wiero Medico deprehensum fuit non esse mortuum. Joannes Jacobus Crafftius, *in epistola ad Hildanum*, varia hujusmodi exempla recenset. Hæc cum in peste accidere posse, notissimum sit, cujusque officii est mortuos suos non statim à vespillonibus temere ad sepulchrum efferri curare, sed prudenter prospicere, ne, temerariæ festinationis errore, homicidium committatur. Extra pestem in aliis morbis talia non semel quoque evenisse, & nonnullos apoplexiâ, lethar-

go, comitiali morbo, vel uteri strangulatione oppressos, ita suffocatos fuisse, ut pro mortuis habiti, & nonnulli etiam inter mortuos sepulti fuerint, testes sunt Plinius *Natural. Hist. lib. 7. cap. 52.* Lemnius, *de occult. rerum mirac. lib. 2. cap. 3.* & Georgius Pictorius, *Sermon. Convival. lib. 1. cap. 10.* nec non Paræus, Forestus, Albertus Bottonicus, Schenckius, Amatus Lusitanus, & alii. Idemque etiam mihi semel videre contigit in quodam nautæ puello quatuor annorum, qui anno 1641, media hyeme prope portum Noviomagensem in aquam incidens, suffocatus ac pro mortuo domum delatus est, ubi à vicinis & matre vestibus tractus amiculo ferali indutus, & in pavimento super stramina collocatus fuit, interea dum cista feralis pararetur: postquam summæ aëris frigidissimi violentiæ puer ibidem per decem horas expositus jacuisset, nec corpus obriguisset, me vocarunt, ut unde illud fieret scire possent: ego manibus utrimque tempora puelli constrinxi, atque obscurum quendam arteriarum temporalium motum sensi, quem deinde etiam in carpo brachii deprehendi: quapropter jussi statim puellum igni luculento admoveri, totum pectus, ventrem, tempora ac faciem cum spiritu vini calefacto, calidis manibus fricari; quod cum aliquamdiu factitatum fuisset, cœpit puellus brachia & crura leviter movere, anhelitum etiam manifestius ducere; verumtamen non rediit ad se, sed cum in tali statu adhuc per sesquihoram vixisset, obiit: fortasse si in principio prope ignem bene calefactus, & immenso isti frigori (nam asperrimum erat gelu) tot horis nudus expositus non fuisset, in vita servatus esset.

## HISTORIA LXXXVI.

**U**Xor Domini Verspieck, civitatis Noviomagi Consulis, peste cum gravi anxietate correpta, statim conquesta est de dolore secundi digiti pedis dextri: explorato loco, in extremo articulo vsciculam, & sub ea parvum carbunculum deprehendi, è quo infelicem morbi eventum præjudicavi. Varia sudorifera exhibui, à quibus optime sudavit: alia etiam dedi antidota, tam ad virium sustentationem, quam ad febris (quæ admodum vehemens non erat) & veneni extinctionem: verum hæc omnia nihil profuerunt, vires defecerunt, & quarta morbi die è medio sublata est.

*Annotatio.*

**E**Xperientia multoties in hac peste edocuit, veritati minus consentaneum esse illud, quod nonnulli magni Medici pro certo statuunt, carbunculos quo longius à corde diffusi sunt, tanto melioris indicii esse. Nos fere semper observavimus, anthraces in pedum digitis prodeuntes, infelicem morbi eventum præ-nunciassse. Sic etiam Hippocrates *epid. lib. 1. scđ. 3. histor. 9.* scribit, Critonem pustulis nigris ad pollicem & talum erumpentibus, secunda morbi die mortuum fuisse. Sic Silenus *eodem lib. scđ. 3.* cum extremorum nigritie obiit.

## HISTORIA LXXXVII.

**U**Xor Wichmanni Buys, cum per aliquot dies peste cum exigua febre & summa anxietate laborasset, ac carbunculum cum tumore in inguine haberet, omniaque exhibita sudorifera, alexipharmaca, & alia præsidia nihil omnino profuissent, tandem in utraque manu nonnullæ maculæ nigræ atramento simillimæ apparuerunt, sine dolore, oblongæ, haud alterius formæ ac si calamo scriptorio latioris crenæ super cutim raptim inductæ fuissent; atque adeo perfecte hanc formam referebant, ut ego ipsemet in eo deceptus fuero, quod illas calamo scriptorio cum atramento inductas esse arbitrarer. Verum cum ægræ paululum astarem, vidi illas rursus plane evanescere, ita ut earum ne minimum quidem vestigium amplius appareret: paulo post alias similes alibi rursus emergere vidi, sed tamen non exacte eandem formam & magnitudinem habere: idque dum astarem me præsentis bis terve factum fuit. Ex his maculis (etsi præter anxietatem, ægra aliis valde gravibus symptomatibus infestari non videretur) mortem prædixi, quæ post paucas horas præsagium eventu confirmavit.

*Annotatio.*

**N**unquam durante tota hac peste hujus formæ maculas amplius vidimus, quas à spirituum subtilissimorum pestilenti veneno infectorum, è sinibus arteriarum exhalantium, & sub duriore cuticula paulisper subsistentium, malignitate inductas fuisse certum est.

## HISTORIA LXXXVIII.

**R**utgerus Pontman, miles, cum muskettam explodere vellet, nescio quo infortunio disrupta machina, in frustra dissiliens, pollicem dextræ manus amputavit. Miser ille à terrore & dolore statim pestilenti febre correptus est. Post deligatum vulnus exhibui sudoriferum, à quo fortiter sudavit, & sub axilla brachii vulnerati acutissimum dolorem sensit. Circa noctem idem sudoriferum reiteratum est. Postridie dolorem sub axilla evanuisse dicebat, sed intolerabili totius manus dolore se tota nocte vexatum fuisse. Interea febris magnâ vehementiâ continuabat. Cum vulnus à chirurgo dissolveretur, vidimus totam manum nigricare, multasque lividas pustulas undique enatas esse, adhæc scarificationes altas in manu factas vix sentiri, & partem à veneni pestilentis malignitate, cò expulsâ, jam propemodum emortuam esse. Spiritum vini cum linteaminibus manui circumposuimus. Plura topica adhibere necesse non fuit, nam paulo post prodierunt exanthemata purpurea, & subrepens mors vulneris curationem & vitæ cursum interrupit.

*Annotatio.*

**Q**ui peste correpti partem aliquam corporis graviter affectam habebant, ad illam partem venenum pestilens sæpius extialiter propulsum fuisse, vidimus.

HISTO-

## HISTORIA LXXXIX.

**P**etrus à Deutecom peste, cum sopore, anxietate, & carbunculo in crure, correptus, theriacæ drach. j. cum aceti calendulati unc. ij. & olei juniperi scrup. f. assumpsit, atque ita stragulis bene coopertus ad sudorem se composuit, & dormivit: at sudare non potuit. Media nocte expergefactus se maxima anxietate pressum sensit: accessit febris cum maxima siti, & denique vomitus violentus. Mane ego accitus ægrum valde debilem inveni. Præscripsi sudoriferum, quod cum statim evomeret, secundum datum est, quod post tantillum temporis etiam rejecit. Cum autem viderem illum nihil retinere posse, primò vomitum sedare annixus sum, in quem finem hanc misturam præscripsi, de qua sæpius de die cochleare plenum ægro exhibere jussi:

℞. *Conservæ rosarum rubr. drach. vj. diascordii Fracast. drach. ij. aquæ theriacalis, unc. ij. & cinnamomi drach. vj. succi citri, unc. j. misceantur, & colentur, adde colaturæ confect. de hyacintho, drach. j. Misce.*

Præterea ter quaterve hujus linimenti aliquantulum in cochleari calefactum, & regioni orificii ventriculi circa scrobiculum cordis ad palmæ manus latitudinem inunctum est:

℞. *Olei nucis moscatæ expressi, scrup. ij. theriacæ Androm. olei scorpionum, ana drach. j. olei succini scrup. j. & cinnamomi gut. iij. Misceantur pro linimento.*

Horum duorum usu vomitus intra duarum horarum spatium plane suppressus est. Tunc hujusmodi alexipharmacum dedi:

℞. *Salis scordii, & absinthii, extracti ruthæ, & cardui bened. ana scrup. j. diascordii Fracast. scrup. ij. aquæ theriacalis, unc. j. f. succi citri unc. f. Misce, fiat haustus.*

Hinc copiosissime sudavit, & inter sudandum de prædicta mistura aliquoties cochleare exhibitum fuit. Erupit dolorosus tumor sub axilla sinistra. Anthraci imponi curavi pulticulam nostram ad carbunculos. Circa horam octavam idem sudoriferum reiteratum est, à quo tota fere nocte sudavit. Sequenti mane se valde allevatum sensit, febris reliquaque symptomata multum remiserunt, & tumor sub axilla increvit, cui hoc cataplasma applicatum est:

℞. *Cæparum sub cineribus assatarum ℞. iij. fermenti acidi, fimi columbini, ana unc. j. farine sem. lini, hordei, & tritici, ana drach. vj. aquæ communis q. s. coquantur paulisper, adde mellis, axungie porci, ana unc. j. Fiat s. art. cataplasma.*

Illo mane hunc pulverem cum pauco aquæ theriacalis sumpsit:

℞. *Pulv. liberantis, scrup. j. f. camphoræ gr. v. florum sulphuris, scrup. f. Fiat pulvis.*

Pro potu utebatur cerevisia tenui cum pauco olei vitrioli acidulâ factâ. Meridie aliquantum jusculi pulli cum pomo citreo parati scripsit. Circa vespeream cum febris recrudescere videretur, reiteratum est prius sudoriferum, à quo rursus multum sudavit cum magno levamine. Quarta morbi die, præcedentibus alvi torminibus, liquida deijcere coepit, quapropter statim sudoriferum astringens dedi:

℞. *Boli*

℞. *Boli arm. cornu cervi usti, coralli rubri, ana scrup. j.*  
*diascordii Fracastorii, drach. j. aquæ theriacalis,*  
*aceti bezoartici, ana unc. j.*  
*Misce, fiat haustus.*

Sæpe quoque de die hujus conditi particulam comedit:

℞. *Specier. diatrium santalorum, & liberantium, cornu cervi usti.*  
*terræ sigillatæ, ana scrup. j. diascordii Fracastorii, drach. ij.*  
*conservæ rosarum rubr. myræ cydoniorum, ana unc. f.*  
*syrupi granatorum, acid. q. s.*  
*Misce, fiat conditum.*

Vesperis hic pulvis exhibitus est:

℞. *Coralli rubri præparati, cornu cervi usti, ana scrup. j.*  
*lapidis bezoar. orient. scrup. f. croci or. gr. ij.*  
*Fiat pulvis.*

His remediis, postquam sex septemve turbidos & liquidos secessus habuisset, substitit alvi fluxus. Quinta die febris aliaque symptomata multum imminuta erant, & tumor sub axilla aliquantum increverat. Continuatum est in usu conditi, & circa vesperam hunc bolum deglutivit:

℞. *Diascordii Fracast. theriacæ Andr. confect. de hyacinto, ana scrup. j.*  
*Fiat bolus in folio auri.*

Sexta die morbus in eodem statu permanfit: bis illa die aliquantulum jusculi bibit, & circa noctem prædictum bolum assumpsit. Septima die febris cum anxietate totaliter evanuit, & æger cum majore appetitu comedere coepit. Etiam carbunculus à sana carne separatus fuit, tumor autem subaxillaris paulatim disparuit, atque ita hic æger, qui jam jam de naulo rationem cum Charonte initurus putabatur, pristinae sanitati restitutus fuit.

#### Annotatio.

**E**T Scyllam & Charybdim, periculosissimos scopulos, (vomitus puta & alvi fluxum) absque naufragio feliciter transivit hic æger; quæ felicitas paucioribus contigit: nam multi in alterutrum tantum scopulum impingentes, vitæ naufragium fecerunt: Ad vomitum compescendum prædictâ mistura, inter-

dum hoc illove modo aliquantulum immutatâ, unâ cum adjuncto linimento sæpissime feliciter usus sum; ac multoties observavi, si his duobus remediis non sisteretur vomitus, eundem plerumque lethalem fuisse, nec ullis mediis cohiberi potuisse.

### HISTORIA. XC.

**C**Atharina Guilhelmi, mulier robusta, potatrix, imperterrita, quæ passim ægrotis peste laborantibus (maxime inter milites) inserviebat, mense Septembri, cum pestiferum quendam inviserem, cui ipsa aderat, monstravit se carbunculum in brachio, non longe supra carpum, habere; verum alioqui se reliquo corpore bene valere, dicebat. Jussi ut hunc bolum cum haustu vini assumeret:

℞. *Florum sulphuris, scrup. j. f. camphoræ gr. iiij. theriacæ, scrup. iiij.*  
*Misce, fiat bolus.*

Hunc sumpsit circa vesperam, & cum illâ nocte bene sudasset, nihil mali amplius sensit, & sequenti mane tantum spiritus vini rursus bibit, ut illam ebriam invenirem. Carbunculum solis foliis brassicæ rubræ oleo raparum inunctis percuravit.

Annotatio.

*Annotatio.*

**I**N principio hujus pestis varios ex iis qui ægrotis pestiferis inserviebant, contagio infectos, & multos etiam mortuos fuisse, vidimus: postea verò cum morbus incrementa sumeret, pauciores; cum verò maximo furore debaccharetur, fere nullos infectos, vel saltem mortuos, & qui inficiebantur, minus læsos fuisse observavimus. Hujus rei causa triplex esse potest. 1. Quod in principio pestis plurimi quæstus gratia illud munus facile suscipiant, inter quos multi sunt qui propter dispositionis aptitudinem facile contagio inficiuntur & moriuntur: quibus sublati, postea tantum superstites remanent tales qui non habent illam dispositionis aptitudinem; qui propterea à peste vel plane non, vel minus graviter afficiuntur. 2. Quod tales homines plerumque audaces & temerarii sint, nec ullo periculi metu terreantur: præsentem autem animum in præservatione à peste plurimum valere, ipsa experientia docet. 3. Quod horum hominum natura, licet forte in principio ad pestem suscipiendam complexionis ratione aliquantum disposita sit, tamen longa consuetudine veneno

pestilenti sic paulatim assuescat, ut ab eodem postea minus affici queat. Illud impossibile non esse, docent alia venena, quibus natura paulatim ita assuescere potest, ut tandem nihil noceant. Sic Galenus *lib. 3. de simpl. medic. facult. cap. 18.* refert anum quandam Atheniensem ab exigua cicutz potione auspicatam, postea nullo detrimento ad magnam copiam progressam fuisse. Nota quoque est historia (quam ex Ruffi testimonio describit Avicenna) de elegantis formæ puella, quæ venenis nutrita Alexandro Magno dono missa fuit. Ita Cœlius Rhodiginus *lib. 11. Lect. Antiq. cap. 15,* narrat Coloniz Agrippinz puellam fuisse quæ araneas sine damno devorabat: etiam nos novimus juvenem qui ab ipsa pueritia araneas comedere assuetus est, idque sine ulla noxa. Hæc consuetudo, imprimis accedente aliqua dispositionis aptitudine, tantum valet, ut nonnulla corpora à veneno pestilenti insuperabilia esse videantur; quod liquit ex historia istius execrandi vespillonis, qui cadaver virginis peste mortuæ horribili scelere iniivit, nulla inde noxa contracta, cujus mentionem fecimus *lib. 3. cap. 3. annot. 22.*

## H I T O R I A XCI.

**M**ichaël N. sartor primarius, in Arcis platea habitans, 26. Octobris pestilenti contagio infectus est, cum tumore in inguine, anthrace in brachio, parva febricula, & maxima anxietate. A primo sudorifero nullum levamen secutum, nec bubo adauctus est. Neque à secundo alexipharmaco, quod circa vesperam assumpsit, mutatus est morbus. Buboni impositum est vesicatorium, anthraci vero pulticula nostra ad carbunculos. 27. Octobris febricula in febrem vehementem transiit, cum magna siti, & maximo delirio: æger vociferabatur, per cubiculum discurrebat, (nam vires adhuc constabant) multas res non præsentis se in cubiculo videre sibi imaginabatur, aliaque similia delirantium acta agebat. Rursus sumpsit alexipharmacum, sed propter inquietudinem sudare non potuit: topica tumori & anthraci imposita abjecit: etiam bubo rursus disparuit. Sequenti die delirium in furorem versum est. 29. Octobris prodierunt exanthemata purpurea, victoris morbi trophæa, & mortis advenientis præcones.

*Annotatio.*

**M**alum signum erat, à primis duobus alexipharmacis non allevari ægrum: pejus, febrem augeri, & delirium continuum accedere; (quæ duorum principalium,

nempe vitalis & animalis, facultatum gravissimam afflictionem indicabant;) pessimum, bubonem evanescere & exanthemata prodire.

## H I T O R I A XCII.

**F**iliolus Domini Benthem, Jurisconsulti & Collegii Deputatorum Secretarii, peste correptus, eandem contagio matri, quæ illum lactabat, communicavit: quæ, cum inde primò carbunculum in mamma contraxisset, statim assumpto alexipharmaco fortiter sudavit, & à sudore tumor in parotide post aurem sinistram prodiit, qui brevi tempore magnitudine pugni intumuit, non ta-

I i

men

men durus fuit, sed mollis, instar tumoris flatulenti vel aquosi. Sequenti die cum tumor ille adhuc plurimum increvisset, servando istam mollitiem, & jam totum fere collum occuparet, nec à secundo sudorifero quicquam mutaretur morbus, instantis mali præfagium feci, quamvis adjuncta febris non admodum vehemens esse videretur. Dictum confirmavit mors.

*Annotatio.*

**O**bservavimus quoslibet tumores molles subito, instar tumoris flatulenti, in magnam molem excrescentes, semper exitiales & sinistri ominis fuisse: tumores vero du-  
ros qui lentius increvcebant, & duritiem illam aliquamdiu servabant, melioris judicii extitisse.

## HISTORIA XCIII.

**J**oannes Pauli, Senatus Noviomagensis Scabinus, peste cum bubone correptus, cum varia exhibita alexipharmaca nihil profuissent, tandem die quarto de raucedine quadam ac levi gutturis interni dolore (qui absque ullo tumore erat) conquestus est; è quo signo, quamvis alia valde gravia symptomata morbo non adessent, illum brevi morituum prædixi; quod præfagium eventus probavit.

*Annotatio.*

**I**n hac peste omnes illi, quibus talis gutturis interioris dolor absque tumore superveniebat, mortui sunt.

## HISTORIA XCIV.

**D**ominus Schievelberch, Verbi divini Minister, vir solide doctus ac pius, sed valde meticulosus, qui pestem diu metuerat, tandem contagiosa labe infectus fuit, cui se adjunxit febris una cum summa anxietate. Prima die circa vespere hoc alexipharmacum exhibui, à quo optime sudavit, & bubo in inguinē prorupit:

℞. *Extracti angelicæ, & ruthæ, ana scrup. j. salis absinthii, scrup. j. f. theriacæ, diascordii, ana drach. f. aquæ theriacalis, aceti bezoartici, ana unc. j. Misce, fiat potio.*

Postridie mane idem sudoriferum reiteratum est, à quo rursus fortiter sudavit, sed absque levamine. Buboni impositum fuit vesicatorium, & detracta vesica folium braslicæ rubræ oleo raparum inunctum. Pro potu utebatur hoc julebo:

℞. *Aquæ cardui ben. lib. j. scabiosæ, & acetosæ, ana lib. f. succi citri recentis, unc. j. f. syrupi de limon. unc. ij. olei sulphuris, q. f. Fiat juleb.*

Sæpius de die particulam hujus conditi comedit:

℞. *Pulveris liberantis, drach. j. diascordii Fracastorii, drach. ij. cortic. aurantiorum condit. & citri condit. rob. ribesii rubri, ana drach. ij. confect. de hyacintho, drach. j. syrupi acetositis citri, q. f. Fiat conditum.*

Vespero hunc pulverem præscripsi, cum pauco julebi miscendum & assumendum:

℞. *Lapidis*

- ℞. *Lapidis bezoar orient. scrup. ij. florum sulphuris, scrup. i.*  
*croc. or. gr. iij.*  
*Fiat pulvis*

Tertia die cum febrem magis ingravescere, & bubonem nihil in altum attolli animadverterem, tale sudoriferum parari curavi:

- ℞. *Radic. angelica, dictamni, petasitidis, & helenii, ana drach. j.*  
*herbar. ruthæ recentis & viridis, scordii, & cardui bened. sicci, ana M. f.*  
*cortic. citri, & aurantium sic. ana drach. j. sem. cardui,*  
*acetosæ, & citri, ana scrup. ij. aque communis, q. s.*  
*Fiat decoctio ad lib. f.*
- ℞. *Colaturæ, unc. ij. f. theriacæ, diascordii, ana scrup. ij.*  
*salis cardui, scrup. j. f.*  
*Misce, fiat haustus.*

Hinc copiosissime sudavit cum manifesto levamine. Tota die usus fuit de suo condito. Etiam aliquantum jusculi sorpsit. Buboni impositum fuit hoc cataplasma:

- ℞. *Rad. liliorum albor. unc. ij. herb. altheæ, flor. chamomillæ, ana M. j.*  
*ficuum ping. n. ix.*  
*Coquantur in aque communis q. s. pistentur in mortario, tunc adde*  
*fmi columbini, unc. j. f. fermenti acidi, unc. j.*  
*farinæ tritici, drach. vj. & lini, unc. f. mellis, unc. j.*  
*axungie anatis, olei anethini, ana drach. vj.*  
*Fiat s. art. cataplasma.*

Vesperis reiteratus fuit præcedens pulvis. Die quarta, morbo in eodem statu permanente, eadem acta sunt quæ pridie. Die quinta mane, cum post assumptum ultimum sudoriferum rursus copiosissime sudasset, magnum levamen percepit, febris remioris fuit, neque anxietas adeo gravis ut ante, bubo etiam multum increvit. Tunc petiit ut sordida & sudore madentia linteamina ipsi mutare liceret, quod curiosissime prohibui. Ille tamen post meum discessum foetoris sudorem pertæsus, indusium nitidum bene calefactum abjecto sordido induit. Hæc mutatio paulo post maximam quoque morbi mutationem induxit, scilicet in pejus, nam febris recrudit, & tanta anxietate oppressus fuit æger, ut quo se verteret, nesciret, & quamvis vires hætenus mediocriter constitissent, tamen hoc grave febris incrementum brevissimo tempore illas penitus dejecit, & ægrum tantopere afflixit, ut die sexta vitæ satur mortis imperio se subjecerit.

### Annotatio.

**H**Ujus ægris curatio feliciter pro tempore cedebat: & nisi hac indusii mutatione peccatum fuisset, procul dubio à morbo cito evasisset: tantum potuit hic parvus error, de quo alibi latius egimus.

## HISTORIA XCV.

**N**. Majus, Scholæ trivialis Conrector, peste cum summa anxietate correptus est, cui magna febris statim comes accessit. 6. Septembris hoc sudoriferum exhibui:

- ℞. *Extracti cardui, salis absinthii, ana scrup. j.*  
*diascordii Fracast. drach. j. confect. de hyacintho, scrup. j.*  
*camphoræ, gr. iij. aque theriacalis, aceti colendulati. ana drach. vj.*  
*Misce, fiat haustus.*

*Iti 2*

Hinc



Hinc fortiter sudavit cum aliquo levamine, & bubo in inguine prodiit, cum duobus carbunculis, altero in femore, altero in brachio. Sæpe de die cochleare hujus misturæ sumpsit:

R. *Conservæ rosarum rubr. rob ribesii rubr. ana unc. f.*  
*diascordii, drach. ij. aquæ theriacalis, unc. iij. f.*  
*succi limonum, unc. j. aquæ cinnamomi, drach. iij.*  
*Misceantur, & colentur, adde colaturæ,*  
*confect. de hyacintho, drach. j.*  
*Misce.*

Ad sitim utebatur cerevisia tenui cum paucis olei sulphuris acidulata. Circa vespem febris multum exacerbata fuit. Reiteratum est prius sudoriferum: sudavit absque levamine: totam noctem cum maxima anxietate & inquietudine transiegit. Postridie vires ad extremum prostratæ erant, & lingua nigricabat. Datum est alexipharmacum, quod evomit: interdum aliquantum de prædicta mistura bibit; alia medicamenta assumere non potuit. Febris eadem vehementia usque ad sequentem diem continuavit, nec quicquam increvit bubo: post meridiem in cute visa sunt exanthemata purpurea, & paulo post mortuus est.

#### Annotatio.

Quibus febris magnâ vehementiâ primo biduo perdurabat, nec primis alexipharmacis imminuebatur, illi plerique moriebantur, & ut plurimum mortis prænuncia in talibus præcedebat linguæ nigredo.

### HISTORIA XCVI.

Michael Krieckman, peste cum diarrhœa lethali laborabat, cumque ipsum brevi morituum prædixissem, cognatus ejus Bernhardus Suyderdijck, eques fortis, avunculum suum ante mortem adhuc semel invisere voluit, horâ circiter decimâ matutinâ, quapropter cum adhuc jejunus esset, prius jentaculum sumpsit, & haustum cerevisiæ superbibit, atque ita bene sanus, & contra pestem egregie (ut putabat) munitus, avunculi ædes ingressus est: ægri autem cubiculum intrare volens, casu ipsi occurrit ancilla pelvim ferens in qua æger alvum exoneraverat. Ille statim à maligno & contagioso istorum excrementorum foetore adeo perculsus fuit, ut subito instar apoplectici in terram conciderit, atque intra horæ quadrantem exspiraverit.

#### Annotatio.

Valde venenatus & malignus de buit fuisse ille excrementorum vapor, qui hominem robustum tam cito deiecit, atque è medio sustulit. Fortassis præter dispositionis peculiarem aptitudinem, illud etiam ad subitam hanc infectionem fecit, quod tetricis illis vaporibus minus assuetus fuerit, atque ea de causa hæc venenata spicula ipsum magis ferierint, quæ tamen iis assuetis, qui ægris pestiferis inserviunt, minus lædunt. Hujusmodi subitas mortes se etiam vidisse testantur, Valleriola, Salius, Gemma, & alii. vide lib. 1. cap. 12. annot. 1. Zacutus Lusitanus, *Prax. Admir. lib. 3. observat. 43.* refert se cuidam pestifero venam secari jussisse, è quâ apertâ sanguis horrendum in modum foetens effluxit, quo foetore tres ministri, proprius astantes infecti, & veluti siderati

subito occubuerunt, atque animam efflarunt. Hujusmodi observationes satis docent pestem absque febre hominem enecare posse: quæ difficultas graviter torquet illos qui febrem à peste inseparabilem, & de pestis essentia esse statuunt: ac propterea videntes nonnullos citissime exspirare, antequam inflammationi & putredini faciendæ tempus detur, ut nodum hunc dissolvant, dicunt, illud fieri quia putredo non est in ipso corde, sed extra vasa. Atque ita putant se insigniter nodum hunc extricasse, cum tamen hoc modo in totum concedant, pestem fieri, esse, & occidere posse sine febre, scilicet cum putredo est extra vasa: quasi verò venenum pestilens extra vasa remanens, neque cor attingens, hominem tam citò extinguere possit.

## HISTORIA XCVII.

**J**Oannes ab Hæften, qui in Molarum platea decumbebat, 1 Septembris peste correptus, propriam urinam bibit. Postridie ipsum invisi. Febricitabat, dolorem absque tumore in inguine sentiebat, & summâ anxietate torquebatur. Exhibui hoc alexipharmacum:

℞. *Diascordii Fracast. drach. j. confect. de hyacintho, salis absinthii, ana scrup. j. extracti cardui bened. scrup. j. f. aquæ cardui bened. & theriacalis, ana drach. vj. olei vitrioli gut. xj. Misce, fiat haustus.*

Hinc fortiter sudavit cum maximo levamine, cumque post sudorem mediocriter valeret, toto biduo nullum medicamentum assumere voluit. 5. Septembris vehementissima febris rursus invasit, cum summa anxietate, siti, & atrocissimo capitis dolore. Tunc prius sudoriferum reiteratum est, à quo cum rursus magno cum levamine (bubone tamen nondum prodeunte) sudasset, rursus medicamentorum usum continuare noluit. 7. Septembris summo mane febris iterum magnâ violentiâ recruduit. A primo sudorifero rursus copiosissime sudavit, verum absque levamine. Circa meridiem enormis vomitus accessit, quem aliquo modo sedavimus sequenti topico ventriculi regioni inuncto:

℞. *Theriace Androm. drach. j. olei nucis moscatæ, scorpionum, ana scrup. ij. juniperi, succini, ana scrup. f. & gariophyllorum, gut. ij. Misceantur.*

Post meridiem tali alexipharmacum usus est:

℞. *Confect. de hyacintho, salis scordii, extracti cardui, & ruthe, ana scrup. j. salis absinthii, scrup. f. mithridatii, diascordii, ana scrup. ij. aquæ theriacalis, aceti bezoartici, ana unc. j. Misceantur pro haustu.*

Hunc quidem retinuit, sed vix sudare potuit. Vires hoc die valde collapsæ sunt. Circa noctem hunc bolum deglutivit, cum propter debilitatem nihil aliud assumere posset:

℞. *Lapidis bezoar orient. extracti angelicæ, & cardui, ana scrup. f. confect. de hyacintho, theriacæ, ana scrup. j. Fiat bolus involvendus folio auri.*

8 Septembris mane, cum rursus paulo alacrior esse videretur, tale sudoriferum præscripsi:

℞. *Theriace, diascordii, ana scrup. ij. trochiscorum viperinarum, scrup. f. f. salis absinthii, extracti cardui, ana scrup. j. aquæ theriacalis. unc. j. succi citri, unc. f. Misce, fiat haustus.*

Sudavit, sed nihil imminuta est febris. Etiam obscurus in inguine tumor perceptus est, cui statim vesicatorium imponi curavi. Ad virium corroborationem sapius de die cochleare hujus misturæ sumpsit:

℞. *Rob. ribesii rub. conservæ rosarum rubr. ana unc. f. aquæ theriacalis, unc. ij. acetosæ, scabiosæ, & rosarum, ana unc. f. succi citri recentis, aquæ cinnamomi, ana unc. j.*

*Ii 3*

*Misce-*

*Misceantur & colentur, adde colaturæ  
confect. de hyacintho. drach. j. & alchermes, drach. f.  
Misce.*

Pro potu ordinario utebatur cervisiâ tenui cum oleo sulphuris acidulatâ. Circa vesperam hic bolus præscriptus est:

*R. Lapidis bezoar orient. gr. xiiij. croci orient. gr. iiij.  
confect. de hyacintho, theriacæ, ana scrup. j.  
Fiat bolus in folio auri.*

His non obstantibus febris, anxietas & capitis dolor, magis ingravata sunt. Postridie lingua tumida & nigricans visa est; dolor quoque in gutture adfuit. Circa meridiem exanthemata purpurea mortis instantis nuncium tulerunt.

#### *Annotatio.*

**P** Effime & cum suo exitio hic æger alexipharmacorum usum bis intermilit; à quo in curatione pestis non ante desistendum, quam venenatus hostis plane evictus vel expulsus fuerit: neque illi fidendum cum inducias concedit; nam etiam tunc graviore struit insidias, ut collectis viribus, ex improvviso, majore insultu vitalitatis arcem invadere & obruere possit.

### HISTORIA XCVIII.

**P**etrus de Cranenburch, famulus rustici in Cervina platea habitantis, graviter peste laborans, carbunculum sub mento, & bubonem in inguine habuit, aderatque simul febris cum maxima anxietate & debilitate. Post multa assumpta alexipharmaca febris quidem multum remisit, sed tamen æger in summæ debilitatis statu per quatuordecim dies remansit, quo temporis intervallo etiam ad virium restorationem vix ullis cibis uti potuit. Interea cataplasmatibus attrahentibus & maturantibus bubo ad maturationem perductus, atque à Chirurgo incisione apertus fuit. Verum anthrax sub mento maximam molestiam induxit, non obstantibus enim quibuscumque optimis præsidiiis à nobis adhibitis, quotidie magis magisque limites suos in vicinas partes extendit, atque instar sphaceli deorsum versus pectus serpendo, integræ manus expansæ latitudinem acquisivit: atque tunc demum circulo facta, ejus separatio in vicinis partibus incepta est, quæ topicorum auxilio multum adjuncta fuit; ac tandem adeo magna mortificatæ carnis pars excidit, ut totum mentum subtus, & magna quoque asperæ arteriæ pars planè nuda conspiceretur. Ulcus postea instar aliorum ulcerum paulatim percuratum fuit, & æger, de cujus vitâ diu desperaveramus, post sextam septimanam integræ sanitati restitutus rursus foras prodit.

#### *Annotatio.*

**M**ense Aprilli alium magnæ molis carbunculum in collo cujusdam militis, usque ad claviculam se extendentem vidimus, à quo aspera arteria etiam denudata fuit, sed nunquam animadvertere potuimus carbunculos ipsius asperæ arteriæ substantiam invasisse. Carbunculorum etiam in aliis partibus interdum horrendam magnitudinem conspeximus. In uxore cujusdam Signiferi anthracem vidimus, qui femoris interioris circiter tertiam partem occuparet, atque inde usque ad interfemurium & medium clunem se extenderet, à quo tamen sanata fuit. Filio Lubberti Wolffbipenniferi carbunculus totam fere scapulam dextram occupave-

rat. Ancillæ pistoris cujusdam prope portam molarem habitantis, anthrax inferioris ventris quartam circiter partem obsederat, & usque ad pudendi labia se extenderat. In Cornelio Chirurgo lethalis carbunculus à costis spuriis deorsum versus per totos lumbos descenderat. Palmarius refert se quoque tantæ molis carbunculos vidisse, qui solo intuitu Medicos terrent. Paræus lib. 21, cap. 23, testatur se etiam hujusmodi maximos carbunculos non semel vidisse: *Animadverti (inquit) carbunculos qui escata sua medium fere dorsum occuparent: alios qui clavículas farsum gulam versus spectantes, subiensam ipsis carnem adeo excederent, ut trachea arteria nuda con-*

da conficeretur. Mihi obortus aliquando carbunculus qui medium epigastrium occupabat, adeo ut delapsa escatâ peritoneum nudum oculis se videndum

præberet, relicta cicatrix manus palmam æquat. Similes horrendæ magnitudinis carbunculos etiam vidit Forellus, lib. 6. observat. 12, 13, & 25.

## HISTORIA XCIX.

**V**Idua nobilis viri Daps, cum se multa deambulatione fatigasset, & hinc multo sudore perflueret, internum quendam ardorem ac cordis anxietatem sensit, quâ intra parvum tempus multum adauctâ, aliquoties animi deliquium passa fuit, & acrem dolorem externum in medio pectore sensit, eo nempe loco, quo amuletum arsenicale nudo pectori impositum gerebat: cum autem denudato pectore locum inspexisset, ibidem nonnullas exiguas nigricantes pustulas animadvertit, unde se peste laborare existimans, meum consilium statim expetiit. Vidi ab acrimonia & virulentia amuleti, sudore madentis, in media ossis sterni regione pustulas illas summæ cuti inustas esse, atque ab eadem quoque causâ magnam debilitatem, internum ardorem, cordisque anxietatem productam fuisse. Quapropter abjecto amuleto hoc antidotum exhibui, à quo egregie sudavit:

℞. *Extracti ruthe, & angelicæ, salis scordii, ana scrup j.*  
*theriacæ, drach. j. aquæ theriacalis, unc. j. f.*  
*Misce, fiat haustus.*

Pustulæ hoc unguento ter quaterve de die innunctæ, intra biduum sanatæ sunt:

℞. *Theriaca Androm. drach. j. f. olei scorpionum, & laurini,*  
*unguenti alabastrini, ana drach. ij.*  
*Misceantur.*

Post copiosum sudorem prædicta symptomata maxima ex parte evanuerunt: ut tamen veneni reliquæ penitus extinguerentur, per aliquot dies mane, meridie, & vesperi particulam hujus antidoti sumpsit:

℞. *Pulveris liberantis, drach. j. theriacæ, diascordii, ana drach. j. f.*  
*confect. de hyacintho, scrup. ij. corticum aurantium condit.*  
*& citri condit. rob. ribesii rubri, ana drach. ij.*  
*Syrupi de limonibus, q. f.*  
*Fiat conditum.*

His paucis remediis ab imminente periculo liberata fuit.

## Annotatio.

**Q**ui amuleta ex arsenico, sublimato, aliisve venenis confecta ad præservationem circumferunt, haud melius sibi consulunt, quam cives imprudentes, qui ut magnum aliquem hostem ab urbe repellant, alium non minus perniciosum in auxilium vocant, qui dum ipsi mœniorum defensio committitur, datâ aliquâ occasione, urbis penetralia ex improviso occupat, & auxiliandos cives auxiliaturus miserrime suppressit. Quod ex prædicta historia manifeste liquet, nam à sudore aliquantum dissolutâ amuleti venenatâ substantiâ, & à calore apertis corporis poris, statim hac oblata occasione defensivum amuletum offensivos ac vi-

ruentos aculeos intus ad cor, vitæ fontem, transmisit. Quam periculosa igitur sint hujusmodi amuleta, satis apparet, non tantum ex hac historia, verum etiam ex illa quam refert Franciscus Alpharus, de juvene amuleto arsenicali munito, qui cum in sphæristerio pilæ lusu defatigatus multum sudasset, subito corruit, & confestim extinctus est. Huic quoque non multum abfimilem historiam refert Massaria, lib. 2. de Pestes: qualem etiam nos supra descripsimus, historia 44. Taceant igitur quotquot talia fallacia & perniciose amuleta tanquam deorum dona commendant, hominibus obtrudunt, ac magno ære divendunt.

HISTO.

## HISTORIA. C.

**U**Xor Lamberti de Schermbeeck, peste correpta cum febre & magna anxietate, nullum externum pestis signum habuit. Die morbi quarto (postquam quatuor sudorifera jam ante exhibita, & sudores feliciter promoti essent) totum corpus phlegmonoso quodam rubore suffusum, & exiguis pustulis, non majoris quam milii seminis magnitudinis, obsitum fuit. Hinc anxietatem multum levatam fuisse sensit. Verum ægra sudoris foetorem fastidians, me nesciente indusium mutavit, & sordido abjecto aliud nitidum induit, quod tamen prohibueram. Hinc protinus evanuit tota illa corporis rubedo, & pustulæ quasi exsiccatae subsederunt: febris acutissima cum maximis anxietatibus & capitis doloribus accessit, quæ ægram intra sex horas jugulavit.

*Annotatio.*

**R**arius pestilens febris tali modo critice solvebatur; quibus verò id contingebat, illi evadebant, dummodo sibi ipsis non obessent, sicut fecit hæc ægra, quæ materiam morificam à centro ad cutem laudabiliter expulsum suâ culpâ (intempestivâ nempe indusii mutatione & aëris frigidi admissione) rursus introrsum ad nobilia viscera exitialiter repulit. Similem crisin etiam vidimus in filia N. ab Vden,

cervisarii in fabrorum ferrariorum platea habitantis, cui post factam crisin adhuc duo sudorifera deditus, eamque in continuo calore & levi sudore per aliquot dies continuimus, atque ita paulatim evanuit inflammatorius ille cutis rubor, ac pustulæ exsiccatae sunt, & ægra totius corporis cuticulam mutavit, & præter omnium opinionem è maximo periculo evaluit.

## HISTORIA CI.

**T**homas à Kalckberch, Colonienſis, peste cum magna febre correptus, à primo sudorifero carbunculum in pectore sub mamilla dextra, & obscurum tumorem in inguine percepit, qui tumor à tribus sequentibus sudoriferis nihil adauctus est. Tertia morbi die æger de murmure in intestinis & aliquo ventris dolore conquestus est, quem non diu post diarrhoea lethalis inſecuta fuit, cum qua statim evanuit bubo, & æger intra octo horas obiit.

*Annotatio.*

**Q**uibus alvi fluxus in peste superveniebat, illi maxime periclitabantur, & eorum paucissimi evadebant. Illud ipsum quoque olim ab Hippocrate observatum fuisse legimus, nam lib. 3. epidem. text. 57. agens de Peste, inquit: Qui longis morbis vel acutis tenebantur, ventris vitio omnes præcipue mortui sunt,

cunctos namque venter suffulit. Ubi per ventris vitium, alvi fluxum intelligendum esse, patet ex commentario Galeni ad eundem locum: Et pestis quoque illa longissima, (inquit) qua nostra aetate vulgata est, ex iis qua per alvum evacuantur, & omnes prope peremunt: qua evacuantur erat colliquatio.

## HISTORIA CII.

**P**etrus ab Asperen, vitriarii famulus, cum bubonem jam incipientem in inguine sentiret, malum celavit, & statim ad me veniens aliquid consilii petiit. Jussi ut hunc bolum deglutiret, vel cum pauxillo vini calidi mistum biberet, & haustum vini calefacti superbiberet, atque ita se ad sudandum componeret:

℞. Theriacæ androm. scrup. iiij. florum sulphuris, scrup. j.  
camphoræ, gr. iiij. olei juniperi, & succini, ana gut. v.  
Misceantur pro bolo.

Postridie

Postridie ad me reversus, dicebat se fere per totam noctem sudasse, atque bubonem plane evanuisse, nec quicquam mali se amplius sentire.

*Annotatio.*

**N**on omnibus illa, quæ huic ægro contigit felicitas, ut unico medicamento pestilens venenum tam cito extingueretur & expelleretur, quod in plurimis aliis vix ullo antidotorum auxilio evinci potuit. Hujus varietatis triplex causa statui potest. 1. Diversa quantitatis & qualitatis veneni magnitudo. 2. Dispositionum varietas. 3. Imprimis tempestivus vel serus medicamentorum usus. Morbi enim malignitas nullas dat inducias, ac proinde exiguum venenum, etiam in corpore non valde disposito, paulatim vires acquirit, nisi tempestivo medicamentorum usu coercetur. Illud etiam in Peste Delphica observavit Forestus: *Frustra (inquit) fere semper omnia auxilia adhibebantur, si malum, diem naturalem fuisset transgressum; id quod experientia, pro dolor, vidimus, & pro compertissimo habuimus; nisi fortasse in quibusdam corporibus tam levis fuisset facta impressio, aut tam fortis esset virium facultas, ut etiam post illud tempus quidam, sed valde pauci, sanati fuerint.*

## HISTORIA CIII.

**N**obilissimus vir Didricus à Welderen, Dominus de Leeuwenburgh, fratre suo una cum sorore peste extincto, venenatum contagium etiam hausit, quod circiter per tres menses circumtulit, antequam manifestis indiciis se proderet: quibus mensibus modo de gravativo capitis dolore, modo de totius corporis lassitudine, modo de debilitate corporis, modo de inappetentia, aliisque similibus malis, & toto fere tempore de cordis anxietate conquestus est. Ut sanitati suæ melius consulere, meo consilio statim post mortem sororis suæ (uxoris nobilissimi ac strenuissimi viri D. de Wijbergen, legionis Præfecti) aërem mutavit, & relictis omnibus rebus suspectis, extra urbem ad pagum Bommel in castellum Domini de Wolfferen se contulit. Ubi cum circiter per decem hebdomadas vixisset, continuum antidotorum præservantium usum nunquam intermittens, & tamen prædicta symptomata paulatim magis magisque crescerent, imprimis vero anxietas & virium debilitas, tandem Noviomagum consilium meum petiturus reverti coactus est. Hic cum ob mali venenati suspicionem alexipharmacum sudoriferum unum aut alterum ipsi exhibuissem, prodiit in inguine bubo pestilens, verus diu latitantis hostis nuncius, qui primo biduo aliquantum adauctus est, & deinde post exhibita adhuc aliquot convenientia antidota, impositione solius emplastri tacamaëctici nostri magistralis, paulatim absque maturatione evanuit, atque ita æger ab interno illo venenato hoste feliciter liberatus fuit; à cujus tamen diuturniore contubernio ventriculum debilitatum diu retinuit, quem post aliquot deinde menses, exhibitis duobus vomitoriis, aliisque calefacientibus, detergentibus & corroborantibus medicamentis, ad consuetum sanitatis statum reduximus. Notandum etiam hunc prædictum Dominum toto illo tempore, quo venenum pestilens in corpore ipsius latuerat, usque ad perfectam sanationem, nulla manifesta febre correptum fuisse.

*Annotatio.*

**H**anc historiam tanquam rarissimam hic annotare placuit; nam vix unquam creditum fuisse arbitror, venenum pestilens tanto tempore in corpore humano latere posse antequam gravioribus indiciis se prodaret. Plurimi magni Medici illud duntaxat per aliquot horas, vel ad summum per sex septemve dies in corpore occultum latere posse sentiunt: ejusque rei exempla se in praxi vidisse testantur, Octavi-

anus Roboretus, *de febre petec. cap. 19.* Felix Platerus, *praxeos tract. 2. cap. 2.* Daniel Senner-tus, *praxeos lib. 6. part. 3. cap. 3. ut & lib. 4. de febrib. cap. 3.* Guilh. Fabr. Hildanus, *centur. 2. observat. 34.* Verum nullus hæcenus illud per menses latuisse, ante nos (quod scio) observavit. Hujus rei rationes fusius inquisivimus *lib. 1, cap. 10, annot. 8.*

## HISTORIA CIV.

**C**Um N. van de Wart, telonarius, peste mortuus esset, uxor ejus maxima tristitia affecta fuit, atque longo tempore mariti mortem planxit, nec ullo modo cordolium illud à se rejicere potuit: cui tristitiæ etiam propriæ mortis imaginatio accessit, quam adeo firmiter animo suo impressit, ut se peste brevi tempore morituram, certò imaginaretur. Ea de causâ testamentum conscripsit, & de omnibus quæ post mortem fieri vellet, pro beneplacito suo disposuit. His aliisque hujusmodi rebus aliquot dierum spatio peractis, tandem mihi & proximis suis consanguineis dixit se jam brevi morituram, & præeuntem maritum secuturam. Hanc tristem & firmissimam imaginationem paulo post infecta est pestis, quæ, cum nullo remediorum genere (etsi satis multa adhiberentur) mitigaretur, quarta morbi die præsagium ægræ mortifero sigillo subsignavit.

*Annotatio.*

**T**ristitiam multum facere ad pestis inductionem, hoc tristi tempore tristitia multorum exempla satis docuerunt. Verum hoc mirabile fuit in prædicta ægra, quod animus illius & pestem, & mortem, & circiter tempus utriusque prælagiret, ita ut paulatim agenda sua commode peragere, & tandem dicere posset, *jam brevi morior*. Veteres lætitiæ & hilaritatem (magis pestilentie hostes) imprimis in pestilenti constitutione tristitiæ opponere, eamque musicâ & cantu depellere solabant; quibus non male, nostro judicio, addi posset moderatus vini usus, juxta dictum: *Ut smaragdus in auro, sic musica in vino.*

## HISTORIA CV.

**P**ater Antonius Jesuita, cum peste correptus bubonem in inguine sentiret, majoris commoditatis gratia, ex illis in quibus commorabatur ædibus ad hortum quendam satis longe inde dislitum deambulavit, atque ibidem decubuit. Illic cum varia medicamenta sudorifera, alexipharmaca, aliaque à me præscripta assumpsisset, dereliquit ipsum febris, & bubo in inguine detumuit, atque æger cum appetitu rursus comedit. Cum per paucos dies mediocriter valuisset, allatum est nuncium milites aliquos ipsius adventum rescivisse, atque de illo captivo abducendo jam consilium inire. Hinc ille perterritus se nimis intempestive aëri commisit, atque ex horto ad aliud hospitium longius inde situm domiculum migravit. Ab illo terrore, nec non præpropere aëris mutatione rursus gravissimam febrem pestilentialem, cum summa anxietate viriumque dejectione concepit, quæ nullis remediis cedens, ipsi intra biduum vitæ finem imposuit.

*Annotatio.*

**J**am à morbo evasisse, omneque periculum transisse videbatur hic æger, cui tamen à novo terrore & repentina aëris mutatione morbus lethaliter recrudit; exemplum exhibens aliis, ne ante perfectam sanationem se nimis cito aëri committerent.

## HISTORIA CVI.

**H**enricus Petri, qui in pago Lent in ædibus Secretarii Seldens decumbat, bene sanus ad campos deambulatum exiens, & aliquo modo fatigatus domum rediens, super cumulum fœni recentis requievit, atque ibidem per duas horas obdormivit. Expergefactus inhorruit, ac se febricitare, & capitis gravitate ac cordis anxietate affici sensit, non diu post vomuit, atque ad lectum discedens, cum magna inquietudine noctem illam transegit. Postridie ex meo præscripto alexipharmacum sumpsit, à quo cum copiose, sed absque levamine,



mine, sudasset, eruperunt tres anthraces. Postea adhuc tribus quatuorve sudoriferis aliisque antidotis frustra usus fuit, & morbus quotidie magis ingravescens, die quinta vitam finivit.

*Annotatio.*

Supra scenum, imprimis recens, cubare, perti sumus, idque non tantum in peste, verum maxime noxium esse, in multis rusticis com- etiam in aliis variis morbis.

## HISTORIA CVII.

**F**ranciscus Lanckfort, vir fortis, è sommo evigilans magna cordis anxietate pressus fuit: hinc pestem metuens, statim aceti vini calefacti bonum haustum ebibit, atque ita ad sudorem se composuit; qui sudor cum per tres quatuorve horas durasset, omnis illa anxietas evanuit, & manifestum tumorem cum magno dolore sensit in inguine sinistro, reliquo corpore rursus optime valens. Tumori prima die imposuit folium brassicæ rubræ oleo raparum inunctum: cum autem secunda die multum increvisset, adeo ut præ dolore nec incedere, nec crus ad lubitum movere posset, advocavit unum ex illis pseudochirurgis, qui ægrotis pestiferis in serviebant. Hic ad citiorem curationem, & febris regressum (ut ajebat) impediendum, sanguinis semilibram è brachio dextro extraxit. Sed quo eventu? paulo post æger inhorruit, & gravi animi deliquio correptus est: statim violenta febris insecuta est, cum vomitu, siti & capitis dolore: etiam brevi spatio disparuit bubo. Postera die meum consilium imploratum est: cum autem ægrum invenirem gravissime febricitantem, cum pulsu parvo, crebro & intermittente, linguam etiam nigricare, ac vires maxime prostratas esse perciperem, ipsum brevi moriturum prædixi, quod præsagium post paucas horas mors confirmavit.

*Annotatio.*

**M**ulti gravissimi Medici in curatione bubonis pestilentis venæsectiones laudant: verum cum hæc malignum virus jam extra venarum, & arteriarum limites in emunctoria ejectum, ad interiora revocent, nescio quo nomine laudari possint. Quantum ad auctoritates Galeni, Avicennæ, Avenzoaris, aliorumque qui illas suadent, illis opponimus auctoritatem Hippocratis, qui 6. *epidem. sect. 7. text. 1.* testatur venæsectiones in tali ab ipso institutas nunquam quicquam juvisse. Forte di-

ces, in dicto ægro propterea exitialem fuisse venæsectionem, quod in brachio instituta fuerit, quæ in pede fieri debuisset, Respondeo, in eo quidem, secundum multorum opinionem, graviter ab illo stolido Chirurgo erratum fuisse; sed tamen nos experientia multoties edoctos esse, in inguinis bubone etiam nunquam sanguinem feliciter è pede extractum fuisse, sed omnes illos obiisse, quibus in peste sanguis quacunque de causa quacunque de parte missus fuit.

## HISTORIA CVIII.

**E**duardus Moulets, miles Anglus, in angiportu Vaginæfactorio decumbens peste cum violenta febre correptus, carbunculum satis magnum in ventre inferiore habuit: post aliquot horas vehementer vomere cœpit: subinde animi deliquia accesserunt. In tali statu cum maxima inquietudine, anxietate, & debilitate, totam noctem transegit. Sequenti die vomitum commodis remediis cohibere frustra tentavi. Tandem circa vespere, viribus jam omnino prostratis, vomitu ejecit vermem nigrum, longum, & vivum, hirudini non multum absimilem. Paulo post obiit.

*Annotatio.*

**P**Ræter hunc agrum, nemo (quod scio) hujus formæ vermes nigros ejecit,

## H I S T O R I A C I X.

**L**Ambertus de Wyburch, peste cum obscuro tumore subaxillari, violenta febre, & maxima anxietate correptus fuit. 20. Septembris exhibui hoc alexipharmacum:

*Rx. Trochiscorum de viperis, salis scordii, extracti angelicæ, ana scrup. j.  
diascordii Fracast. drach. j. aquæ theriacalis, aceti bezoartici, ana unc. j.  
Misce, fiat haustus.*

Hinc fortiter sudavit cum aliquo levamine. Lingua valde sicca, & sitis immensa erat: petiit ut ipsi aquæ simplicis potum permitterem: concessi illius moderatum usum, & os eadem sæpe quoque colluere jussi. Sequenti die aliquantum deliravit: tunc idem sudoriferum reiteratum est, post cujus usum adauctus est tumor sub axilla, cui vesicatorium applicavi. Febris tamen non multum imminuta est. Vesperi hunc bolum dedi:

*Rx. Camphoræ, croci or. ana gr. iij. pulv. liberantis,  
confect. de hyacintho, ana scrup. j. syrupi de limon. q. s.  
Fiat bolus in folio auri.*

22. Septembris minus deliravit. Reiteratio facta est mane sudoriferi, & vesperi boli: etiam cataplasma attrahens buboni impositum est. Illa die febris aliquantum remisit, & circa vesperam absque delirio fuit. Quia autem lingua siccissima, & nigricante crusta obducta erat, ita ut æger vix amplius loqui posset, butyrum recens cum aqua rosacea lavari, & post lotionem aquæ simplici frigidissimæ imponi, atque illius butyri aliquoties de die particulam fabæ magnitudinis linguæ imponi, in eaque liquefcere jussi; cujus usu intra biduum linguæ crusta omnino à lingua separata decidit. 23. Septembris febris aliquanto mitior fuit, & tumor paulo magis adauctus est. Tale apozema præscripsi, atque de illo quater de die haustum trium quatuorve unciarum bibere, & corpus bene calidum in leni sudore continere, jussi.

*Rx. Corticum citri, & aurantiorum sicc. radicum petasitidis, helenii,  
angelicæ, dictamni, & eryngii, ana unc. f. herb. cardui bened.  
acetosæ, scordii, boraginis, scabiosæ, centaurii minoris, ana M. j.  
& pimpinellæ, M. f. sem. acetosæ, cardui, citri,  
& bardanæ, ana drach. j. aquæ communis, q. s.  
Coquantur f. art. ad lib. ij. adde colaturæ,  
syrupi de limonibus, & de scordio, ana unc. j. f.  
Misce, fiat apozema.*

Hac die alvum prima vice exoneravit, & parum lactis pressi acidi cum pane cocti comedit. 24 & 25 Septembris in usu apozematis continuatum est. 26. Septemb. mane hoc sudoriferum præscripsi:

*Rx. Extracti ruthæ, cardui, & angelicæ, salis scordii, ana scrup. f.  
theriacæ, diascordii, ana scrup. j. f. aquæ theriacalis, unc. j.  
succu citri, unc. f.  
Misceantur pro haustu.*

Hinc cum fortissime sudasset, disparuit febris una cum anxietate, & æger postea medio-

mediocriter valuit. Ad maiorem tamen curationis certitudinem præcedens apozema adhuc semel parari, atque de eo per aliquot dies quotidie bis haustum bibere iussi. Loco cataplasmati attrahentis tumori aliud maturans imposui, verum eo non obstante, tumor intra paucos dies absque suppuratione dissipatus est. Post exhaustum apozema ægrum purgavi cum pilulis nostris antipestilentialibus, atque ita feliciter à periculosissimo morbo liberatus est.

## Annotatio.

**A**quæ simplicis fontanæ vel putealis (nempe Noviomagensis, nam illa clarissima & optima est, ac plurimorum locorum putealem aquam puritate & bonitate longe superat) usum ad sitim sedandam ægris facile permittebam, dummodo eâ moderate uterentur: nec illius aquæ potum illi unquam nocuisse, imo

multis plus profuisse, quam julebos aliasve arte confectas potiones, multoties animadverti. De butyro illud etiam notatu dignum, quod præstantissimum sit remedium ad linguam humectandam, ejusque crustas emolliendas: abstinendum tamen à nimia ejusdem copia, qua alvus forte nimis emolliri posset.

## HISTORIA CX.

**J**oachimus Nauta, qui præservationis gratia in crure sinistro fonticulum in principio Veris sibi fieri curaverat, mense Novembri quendam ex suis consanguineis peste cum diarrhœa laborantem circa vesperam invisens, contagio infectus est. Sensit primo vertiginem & capitis gravitatem, ac paulo post magnam anxietatem cum nausea. Statim meo consilio assumpsit hoc alexipharmacum:

℞. *Theriaca Androm. scrup. iiij. salis cardui bened. scrup. j. f. aquæ theriacalis, aceti bezoartici, ana unc. j. Misce, fiat potio.*

Hinc tota fere nocte sudavit, cum tanto levamine, ut omnia symptomata evanuerint. Postridie de magno fonticuli cruris dolore conquestus est, è quo vidi iehorem quendam nigricantem effluxisse, ipsumque fonticulum in circumferentia nigricantem colorem contraxisse: hujus fonticuli margines à topicis convenientibus impositis, instar carbunculi, separati fuerunt, & æger deinceps optime valuit.

## Annotatio.

**F**onticulos ad præservationem à peste inter præstantissima subsidia semper habuimus, & multoties observavimus, si quid veneni jam intus conceptum esset, illud per eosdem vel sponte naturæ, vel medicamentorum ope in signiter & cito evacuatum fuisse; quod ex

prædicta historia manifeste liquet. Illud ipsum de fonticulis ab experientia testantur etiam, Mercurialis, Hercules Saxonia, Georgius, Hildanus, Joannes Arculanus, alique magni Præetici.

## HISTORIA CXI.

**J**acobus Moulin, Gallus, bubonem in inguine sentiens, statim chirurgum quendam castrensem consuluit, qui ipsi haustum vini stibiati exhibuit, quo epoto æger domum discessit; nam adeo fortis adhuc erat ut ipsemet chirurgum adiret. Non diu post maximo animi deliquio obrutus fuit. Ego advocatus, cum quidnam assumpsisset ignorarem, & pulsus jam pene deficientem sentirem, ipsum brevi moriturum prædixi. Cum ab illo discederem, obviam mihi venit dictus chirurgus, qui ex hospitio ægri me exeuntem videns, rogabat quomodo valeret Jacobus Moulin? quærebam, unde sciret ipsum ægrotare? jam ante horam, respondit, aut circiter, ad me veniens; conquestus fuit se exiguum quendam tumorem valde dolorificum in inguine sentire, utque gravius malum præveniri posset, exhibui uncias duas vini vomitivi, quo in plurimis morbis cum ma-

ximo fructu uti solemus inter milites. Egregie vero (inquebam) rem egisti, jam invise ægrum, & vide cum quanto fructu etiam huic illud vinum exhibueris. Ipse audacter ægrum accessit, & astantibus dixit nihil periculi metuendum esse, se tale medicamentum ægro exhibuisse, quo solo unica diē morbus pestilens in totum sanaretur. Interea dum lecto adstat, æger aliquantum ad se rediens, bis terve vomuit. Jam (inquebat chirurgus) & morbus evictus, & omne periculum superatum est. Nec de morbo fefellit præsagium, nam paulo post inter vomendum æger ipsam quoque animam evomuit, morbo scilicet tam egregie superato, ut nullum periculum foret illum unquam rediturum. Pudibundus chirurgus non sine astantium calumniis & diſteris discessit.

*Annotatio.*

Quam egregie Capitanei consulunt militum rebus, quando talibus ineptissimis & nefutis bardis, seu potius homicidis, eorum curandorum provinciam imponunt; quine in pauperiorum militum curatione diutius detineantur, quælibet periculossima medicamenta ipsis exhibere non erubescunt, cum hoc dicto: *hinc aut cita mors venit, aut victoria lata.* Profecto si vires dicti ægri in principio conservatæ fuissent, simulque venenum pestilens (quod à robusta natura jam foras pelli incipiebat) ab interioribus visceribus per convenientia antidota

& sudorifera expulsum esset, procul dubio magna sanationis spes affulisset; cum nunc è contra, per vomitorii violentiam & sibi venenositatem, jam à pestilenti veneno gravata viscera obrui & deficere necessario debuerint. Quapropter nunquam eorum consilium audiendum arbitramur, qui ut perniciosum hostem expellant, alium non minus exitiosum in auxilium assumunt, & intra moenia sua admittunt, qui duo, dum alter in alterius perniciem laborat, facile durante pugna ipsam urbem incendio consumunt.

## HISTORIA CXII.

IN ædibus generosissimi viri Domini de Nassau, equitum Capitanei, mense Junio quatuor ex famulatio peste laboraverant, quorum duo mortui fuerant. Domus bis terve ista æstate expurgata est. Domina tamen de Nassau (quæ cum tota familia Hagam-Comitis confugerat, interea dum maritus cum cohorte castra sequeretur) his expurgationibus nondum satis contenta, mense Novembri duas tresve Hollandicas purgatrices Hagâ-Comitis Noviomagum misit, quæ jam post quintum ab ultimo ægroto mensem totam domum adhuc semel more Hollandico curiosissime expurgarent. Hæ omnia linteamina, aliasque res quæ commode lavari poterant, lavarunt, reliquam omnem supellectilem Soli & aperto aëri exposuerunt, atque eventilarunt, omnem immunditiem curiose detergentes. domum denique totam à summi tecti cacumine usque ad imum, non tantum scopis simpliciter expurgarunt, sed etiam aqua undique abluerunt, & muros nova calce induxerunt seu dealbarunt. Postea sordes expurgatas in fumarium projecerunt. Ex his sordibus gallinæ forte aliquid nutrimenti quæsierunt, iisque se immerferunt & involverunt, atque hinc omnes contagium contraxerunt, & peste correptæ mortuæ sunt; aliis autem in pectore & dorso carbunculi eruperunt, aliis sub alis tumores protuberarunt, atque ita omnes gallinæ, circiter viginti numero peste interierunt.

*Annotatio.*

Multoties araneorum telis, aliisve ædium sordibus pestilens venenum diu hære, & maxime necessariam esse domuum peste infectarum curiosissimam expurgationem, ex prædicta historia satis liquet. Hæc autem expurgatio ut melius peragatur, sequenti modo instituenda est: Primo apertis undique (præcipue versus Aquilonem & Orientem) fenestris,

tota domus à summo ad imum scopis diligenter est mundanda, omnesque araneorum telæ ac reliquæ sordes (ne caminis quidem prætermittis) curiosissime expurgandæ, atque una cum lecticarum straminibus in unum cumulum omnia illa longius extra domum projicienda, & igne comburenda sunt. Deinde rursus tota domus (imprimis verò lecticæ omnesque anguli secretiores)

res ) aquâ abluenda , & per aliquot dies rursus eventilanda est. Postea luculenti ignes in singulis strui possunt. Tertiò omnes parietes calce nova obducendi sunt , & tabulata omniaque pavimenta , item lecticæ , scrinia , cistæ , abaci , mensæ , scamna , aliaque lignea supellex acetæ & aqua simul mistis abluenda est. Deinde suffumigia ( qualia lib. 2. cap. 5. descripsimus ) in cubiculis & cœnaculis bis terve accendere oportet. Circa vestes , aliaque similia quæ fomitis rationem habent , major expurgationis cura requiritur , cum in iis negligentius expurgatis venenum pestilens sæpe diu latere possit ; quod præter quotidianam experientiam , manifesto exemplo docet Forestus lib. 6. in scholio ad observat. 22. de muliere quæ ex Zelandia è domo peste infectâ quædam vestimenta Alckmariam attulerat , eaque ibidem Soli exposuerat , in quibus septem pueri colludentes , omnes peste infecti & mortui fuerunt. Quapropter ut huiusmodi pericula evitentur , oportet ut omnia linteamina , etiam illa quæ diu in arcis nitida conclusa fuerunt , convenienti modo cum lixivio laventur , etiam stragulæ & lectorum tegmina , imprimis illa , quibus ægri usi fuerunt , omnesque laneæ vestes quæ absque damno lavari possunt. Quæ verò commode lavari nequeunt , ut tapeta , vestes sericæ , holosericæ , lecti , chartæ , libri , aliaque similia , illa multis diebus Soli & ventis aquilonaribus exponenda , & diligenter agitanda , concutienda , fustiganda , & abstergenda sunt ; nam à ventis perflatus & multum agitatus pestifer vapor , illis rebus forte inhærens , non potest non imminui ac dispelli ; unde Mercurialis laudat Marsilium Ficinum , quod libro de Peste doceat , pannos atque parietes spatio viginti dierum , si persentur & emundentur , ab

omni contagio mundari. Denique post illarum rerum longiores eventilationes , singula convenientibus suffumigiis perfumiganda sunt : etiam particulatim in singulis cistis suffumigium aliquod accendendum est , antequam supellex in iis deponatur. His omnibus ita peractis , & singulis rebus suis locis repositis , domum ab omni venenata pestilenti labe satis emundatam esse , credibile est. Ut autem certo sciri possit an pestilens contagium satis expurgatum sit , nonnulli hoc experimento utuntur : Panes recentes è furno extractos , & adhuc calentes , in duas partes dividunt , eosque in medio cubiculi viginti quatuor horis deponunt ; si venenum adhuc in conclavi latuerit , eo temporis spatio illum panem mucescere & putrescere dicunt , ac propterea postea caute vel aquis immergendum , vel alte sepeliendum esse. Alii ova recentia concutiunt , eaque in patella aperta in conclavi viginti quatuor horis relinquunt , si quid veneni superfuerit , intra illud tempus ova corrumpentur , summumque foetorem contraheant. Verum nos talia experimenta flocci facimus , nec quicquam certi continere arbitramur : nam panem atque ova in cubiculo non infecto , nonnunquam ratione alterius non venenatæ causæ , posse corrumpi , & in cubiculo infecto interdum absque corruptione per aliquod tempus manere posse , credimus. Quantum ad gallinas quæ à sordibus contagium contraxerant , illud in tota hac peste nusquam alibi vidimus , præterquam in illa sola domo. Aves tamen interdum etiam peste corripiliquet ex eo , quod Forestus & Sennertus referunt ex Joachimi Schylleri libro de Peste Britannica , aves sub arboribus peste correptas & interemptas passim repertas fuisse , & abscessus sub alis ciceris instar habuisse.

## HISTORIA CXIII.

**F**ilia Petri de Botfel , juvenula circiter viginti annorum , bubonem pestilentem in inguine percepit , præter quem nullum aliud magni momenti malum in corpore sensit. Ipsa morbum celare cupiens , tacite Matthiam Aquisgranensem ( qui ex professu cucurbitularum encheiresi vacabat ) adiit , & sex vel octo cucurbitulas cum scarificatione pedibus imponi curavit. Extractis paucis sanguinis uncis , animo deficiens concidit : ad se rediens de maxima cordis anxietate conquesta fuit. Statim à duobus viris robustis domum delata & in lectum deposita est , ubi tantis & tam crebris animi deliquiis corripiebatur , ut parentes , ipsam jam jam morituram existimantes , me vocarent. Jussi ut acetum cum spiritu vini naribus odorandum offerrent , & hujus misturæ subinde cum cochleari aliquantum exhiberent :

*R. Aquæ cinnamomi , & theriacalis , vini albi ,  
Syrupi de limonibus , ana unc. j.  
Misceantur.*

Hujus usu aliquantum ad se rediit , & confessa est se bubonem sensisse , ac propterea cucurbitulas pedibus imponi curasse , eumque bubonem jam fere totum evanuisse. Tunc manu imposita locum ipsemet exploravi , sed nihil aliud quam exiguum quandam & profundam duritiem deprehendere potui. Præscripsi sudoriferum

rum statim calide exhibendum, à quo quidem mediocriter sudavit, sed absque ullo levamine. Sequenti die maximà cordis anxietate pressa est, & animi deliquia subinde revertebantur. Jussi ut pulli decoctum, quod casu paratum habebant, pauco vini & succi citri admisto, exhiberent: sumpsit tria quatuorve cochlearia, eaque statim revomuit. Tunc prioris misturæ interdum cum cochleari aliquantum datum est, sed frustra, nam illo die circa vesperam in diuturniore deliquio exspiravit.

*Annotatio.*

**M**ultum interest in curatione pestis, ut ægri vires in quam maxima fieri potest integritate conserventur, & venenum pestilens foras protrudatur: cum autem à sanguinis detractio vires citissime dejiciantur, simulque venenum quod extra vasa est introrsum in vasa trahatur, ab illa necessario abstinendum est: nam quantacunque curiositate illa detractio peragatur, illam tamen nunquam in peste profuisse, ab experientia testantur Paræus, Fallopius, Gesnerus, Dodonæus, alique magni Practici. Sic etiam in hac nostra peste sanguinem plurimis infelicissime detractum fuisse vidimus.

Quapropter Zacutum Lusitanum aliosque audientes non esse existimamus, qui hac in parte rationem & quotidianam experientiam sola quorundam veterum auctoritate evertere nituntur, haud secus ac si veteres, Dii, & non homines fuissent, & propterea quod multa insignia scripta ediderint, in nullis errare potuissent. Plus nobis sapere videntur illi, qui doctissimorum Medicorum monumenta prudenter perlegunt, atque inde eorum experientiam quidem addiscunt, sed interea tamen magis propriis oculis, quam aliorum scriptis confidunt, & oculati speculatores aliorum errores corrigere malunt, quam sequi.

## HISTORIA CXIV.

**P**ater Augusti, monachus, peste correptus fortiter vomuit, quem vomitum medicamentis convenientibus sedavi. Postea exhibui tria sudorifera, aliaque nonnulla alexipharmaca, à quibus levamen secutum est. Quinta morbi purum sanguinem minxit, & paulo post extinctus est.

*Annotatio.*

**S**ic etiam adhuc alium Sacerdotem eodem fere tempore cum sanguinis mictu vitam finisse vidimus. Erat illa sanguinis mictio certissimum mortis præfagium, idque malum nullis medicamentorum auxiliis curari poterat; in cuius pessimi symptomatis medicatione in principio hujus pestis multoties frustra laboravimus;

cum autem neque ægrorum vires, neque temporis brevitatem unquam curationem admittere animadverteremus, postea hoc symptomate apparente, ægris nulla medicamenta dedimus, sed eosdem Deo commisimus, nullum enim evadere vidimus.

## HISTORIA CXV.

**G**erardus ab Hattem, famulus pistoris, mense Decembri peste correptus anthracem habuit in sura cruris sinistri: febricula aderat nec ardore, nec aliis symptomatibus gravis: urina sanorum urinæ plane similis: æger tamen abjecto animo erat, alta suspiria sæpissime ducebat, & de recuperanda sanitate omnino desperabat: quietus jacebat, & tacebat fere semper, qui alioqui satis loquax esse solebat. Exhibui tria alexipharmaca, à quibus mediocriter sudavit, sed absque levamine. Carbunculus majorem molem acquisivit, sed nullo circulo rubro circumscriptus est, quod signum mihi plane displicuit. Postea adhuc variis aliis antidotis usus est, sed omnibus frustra. Die morbi sexta, cum pulsus explorarem, qui exilis, creber & inæqualis erat, nervorum quendam tremorem sensi: urina tamen in eodem statu laudabilis, cum bona hypostasi erat. Prædixi mortem, quæ sequenti nocte post eruptionem exanthematum præfagii veritatem confirmavit.

*Anno*

## Annotatio.

**V**alde fallaces erant illæ febriculæ pestilentes quæ sine gravibus symptomatibus invadebant; nam postquam ægros fallaci spe per aliquot dies aluissent, eosdem tandem præter expectationem trucidabant. Causam fuisse arbitror, quod venenum pestilens in ipsius cordis substantiam magis, quam in humores violentiam suam exerceret, & cordis humidum

radicale magis depopularetur, quam aliorum humorum putredinem induceret. Quod in prædicto ægro ipsa urina docuit, quæ toto morbi decursu adeo laudabilis fuit, ut nulla putredinis indicia in illa conspicerentur, cum tamen exilis, creber & inæqualis pulsus cordis graviter affecti indicium exhiberent.

## HISTORIA CXVI.

**F**amulus Domini Couper, Vice-Capitanei equitum, juvenis robustus, cum se peste correptum sentiret, & jam in brachio carbunculum haberet, ut malum celaret, chirurgus Egmundo Anglo rem clanculum indicavit, qui ipsi ad citiorem curationem pulveris passavant drachmam unum cum haustu cerviciæ exhibuit. Hinc post sesquihoram alvi enormis deturbatio, & deinceps continua fluxio secuta est, ægrique res intra viginti horas adeo dejectæ sunt, ut vix loqui posset. Postridie ad ipsum invisendum vocatus sum una cum dicto chirurgo, qui se ex præstantissimorum Medicorum decreto curationem à purgatione bene incepisse arbitrabatur. In extremitate illa constituto ægro, hanc potionem exhibui:

*℞. Trochisc. de terra sigillata, scrup. j. f. cornu cerviusti, scrup. j. theriaca, scrup. iij. aquæ theriacalis, unc. ij. Misceantur pro haustu.*

Hunc quidem assumpsit, sed post horæ quadrantem rursus evomit. Idem medicamentum reiteratum est, sed absque emolumento, nam ingravescente colliquativo alvi fluxu, circa vesperam sanguis deiciebatur, & æger sequenti nocte cum illo fluxu è turbulenti mundi fluctibus ad tranquillitatis portum delatus est.

## Annotatio.

**I**nnumeros hujusmodi errores commiserunt varii Chirurgi, qui licet ineptissimi sint & medicinæ maxime ignari, sibi ipsis tamen & populo multum persuadent, seque fere solos sapere existimant, (quæ opinio non Noviomagensibus, sed etiam plurimis Belgii aliarumque regionum Chirurgis familiaris est) & unica fidelia omnes parietes dealbare soliti, etiam unico medicamento omnium morborum, & uno unguento omnium fere vulnorum atque ulcerum curationem peragere tentant. Sic etiam dictus ille Egmundus Anglus pestiferos curaturus, aliis pulverem passavant, aliis vinum stipticum exhibebat, multis quoque sanguinem detrahebat: idemque cum illo nonnulli alii Chirurgi satis imprudenter & impudenter faciebant: quare? quia illorum nasutorum scientiæ limites ulterius non extendebantur; morbi causas, ægroti dispositionem, tempestatis rationem, commoda medicamenta, aliaque ad curationem scitu ne-

cessaria ignorant, neque illa scire studebant, sed ægrorum nummis potius quam eorum sanitati & propriæ scientiæ inhiantes, quidvis temere audebant. Verum si mortui hac peste horum bardonum avarâ temeritate occisi, adhuc vociferari possent, credo totum Noviomagum tanto clangore repletum iri ut & incolæ obsunderet, & aves præ terrore urbem longius fugerent. Fortasse nonnullis laudandus videbitur ille curationis ordo, qui à purgatione principium ducit, propterea quod Avicenna, Avenzoar, Oribasius, Mercurialis, alique magni Medici illud ipsum quoque fundeant: verum oportet ut auctoritates illorum Medicorum (qui etiam homines fuerunt, & non Dii; & quamvis doctissimi, interdum tamen errare, & aliquid scribere potuerunt quod experientiæ contrariatur) rationi & experientiæ postponentur: qua de re pluribus egimus lib. 3. cap. 4, annotat. 1.



## HISTORIA CXVII.

**P**etrus Schram, peste correptus carbunculum in scroto habuit, qui circiter per dimidiam scroti partem se extendit, & tandem post varia exhibita & imposita medicamenta anthrace ad separationem deducto, magna scroti pars excidit, ita ut testiculus in sua vagina pendens nudus conspiceretur: quod scroti foramen commodorum topicorum usu postea rursus coaluit.

*Annotatio.*

**D**urante hac peste ter quaterve carbunculos in labiis pudendi muliebris, sed rarissime in virorum scroto enatos vidimus; quod tamen olim in crudelissima Atheniensi peste sæpius contigisse, liquet ex eo quod Thucydides refert, nonnullos genitalibus exsectis, oculis excavatis, manibus pedibusque truncatis vitam redemisse.

## HISTORIA CXVIII.

**U**xor Severini de Kuyck, 14 Decembris maxima debilitate correpta est, ita ut sæpius animo linqueretur: aderat parva febricula, absque aliis symptomatibus, pestifere indiciis: urina sanorum urinæ similis cum laudabili hypostasi, pulsus creber & parvus erat cum inæqualitate. Exhibitis aliquot alexipharmacis sudoriferis, aliisque vires corroborantibus medicamentis, nullum levamen secutum est: morbus toto quadriduo in eodem statu permansit. Postea tandem carbunculum in mediis lumbis percepimus, sed circulo rubro non circumscriptum; cui topicum conveniens bis de die renovandum imponi curavimus. Die septimo ægra paulo melius habere visa est, pulsus etiam aliquanto fortior fuit: coepit parum jusculi sorbere. Die undecima ad priorem debilitatis statum relapsa est. Interea carbunculus magnam molem acquisivit. Utebatur ægra quotidie, modo his, modo illis antidotis, modo jusculis ad virium restorationem. Verum his omnibus non obstantibus eodem fere modo (ut nunc paulo melius, nunc pejus se haberet) continuavit morbus usque ad diem vigesimum sextum, qua die, nempe 9 Januarii anno 1637, miseriarum finem imposuit. Carbunculus ad tantam molem excreverat, ut integræ manus latitudinem multum excederet.

*Annotatio.*

**R**arissime febres pestilentes ad tantum tempus producebantur, illud tamen in nonnullis factum fuisse vidimus: de quibus febribus agens Galenus 3. de crisi, cap. 4. inquit: *Debiles & parva febres quandoque valde maligna sunt.* Causa est, quod venenum pestilens vel debili qualitate, vel exigua quantitate firmiter se insinuet ipsius cordis substantiæ, atque ibidem hærens humorum graves putredines (à quibus molestissima symptomata procedunt) non inducat:

accedente quoque eo, quod humores in nonnullis ita dispositi sint, ut putrescendum vel venenum pestilens recipiendum minus apti existant. Atque tunc venenum solius cordis calidum nativum paulatim corrumpens, hominem lente occidit, eodem modo sicut Galenus dicit venena: quæ debili qualitate, vel exigua quantitate exhibentur, interdum lente, & non nisi post aliquod tempus occidere.

HISTO-

## HISTORIA CXIX.

**F**Amulus Antonii de Tricht, Pharmacopœi, mense Julio peste laborans in horto decumbebat, in domuncula incurvis quidem lateribus fursum contenta, sed absque parietibus, & undique circumcirca aperta, quam tamen velis tunc undique investierant. Ægro sanato lectus, vela, reliquaque suppellex inde rursus ablata fuit. Anno sequenti mense Martio ipse Pharmacopœus instrumentum aliquod hortulanum in eadem domuncula casu quærens, cum stramen, cui ægri quondam lectus impositus fuerat (quod ibi adhuc relictum, & autumnus totaque hyeme vento, pluviis, nivibus ac frigori expositum fuerat) dextro pede ab uno saltem in alterum latus dimoveret, statim situosum quendam fœtorem naribus percepit, & paulo post acrem ac pungentem dolorem in inferiore cruris parte prope pedem sensit, haud secus ac si aqua fervida se combussisset. Sequenti die magna vesica ibidem excitata visa fuit, quâ pertusa effluxit aliquantum aquæ nigricantis, & sub illa vesica carbunculus pestilens latens inventus est, qui vix duabus septimanis postea sanari potuit. Patiens tamen nec febricitavit, nec reliquo corpore male valuit.

## Annotatio.

**H**ujusmodi plura exempla Noviomagi visa sunt, quod scilicet pestilens inquinamentum per aliquot menses fomiti in hærens, postea aliquibus adhuc communicatum sit. Sed observandum quod ab illo contagio silente alioqui peste inducto, nulla illius ulterior alicujus momenti propagatio facta fuerit. Interim hoc exemplo Medicorum doctrina de contagio in fomite latente satis confirmatur. Mirum tamen est, hoc contagium tanto tempore in prædicto stramine potuisse subsistere, utpote quod tota hyeme ventis & pluviis expositum fuisset. Concordans enim est Marsilii Ficini, Mercurialis, aliorumque variorum Medicorum opinio, fomitem spatio viginti vel plurium dierum, à ventis perflatum, durare non posse, sed imminui & deleri necesse esse: attamen contrarium interdum contingere ex prædicta historia liquet. Fomitem verò conclusum, aliove modo quietum manentem, diutissime pestilentem vaporem continere, & integris viribus ser-

vare posse, communis est opinio. Sic Forestus, lib. 6. observat. 22. refert exemplum contagii pestilentis in tela aranei diu asservati. Alexander Benedictus scribit, in urbe Veneta culcitram quandam multis annis pestiferam malignitatem retinuisse, eaque tandem excussa, servos adstantes protinus subita peste correptos fuisse. Sennertus, lib. 4. de febr. cap. 3. refert, anno 1542, spatio viginti duarum septimanarum Vratislaviæ 5900 homines peste mortuos fuisse, ab eoque tempore pestilens contagium in linteo circiter annis quatuordecim conclusum hæsisse, quo tandem anno 1555, Laubani explicato, pestis excitata fuit, quæ per contagium vicinis etiam urbibus & locis communicata est. Verum quia hæc sunt præter nostras observationes, nec quidquam conveniunt cum nostra experientia, etiam superant nostram fidem: quid autem hac de re sentiendum sit, diximus lib. 1, cap. 8. annot. 1. probl. 1. & ejusdem lib. cap. 10, annot. 10.

## HISTORIA CXX.

**C**apitaneus Brauwer anno 1638, mense Augusto, cum nusquam in tota Geldriâ pestis communiter grassaretur, hac lue correptus decubuit in pago Bommel. Varios carbunculos habuit, & remediis serius adhibitis, tandem obiit. Ego cum hunc ægrum prima vice invisissem, statim ab ipso contagium contraxi, & ingens carbunculus cum maximo dolore in manu sinistra mihi obortus est, quem commodorum topicorum applicatione postea feliciter sanavi; neque à principio usque ad finem mali reliquo corpore male valui, nec febre, nec ullum malum symptoma sensi, nec alio antidoto usus sum quam tabaci fumo. Ab eodem illo Capitano etiam contagione infectus fuit miles quidam qui ipsi inserviebat, cui etiam, ut mihi, in manu sinistra carbunculus prorupit, quem postea topicis etiam curavimus: cumque etiam hic reliquo corpore non ægrotaret,

grotaret, & ex consuetudine tabaco satis copiose uteretur, huic quoque alia antida non dedimus.

*Annotatio.*

**G**Ravissime errare illos, qui pestem sine febre non dari, arbitrantur, meo ipsius exemplo satis edoctus sum; nam etsi in aliis ægrotis exigua aliquâ febricula forte indicium Medici subterfugere posset, in me ipso tamen febriculam etiam minimam facile percepissem. Idem in se ipso quoque expertus fuit Platerus, nam *prax. tract. 2, cap. 2*, refert sibi ipsi in manibus, & socero Chirurgo in pedibus pustulam Pestilentialem citra febrem vel aliam noxam natam fuisse: quod ipsum repetit. *cap. 17.*

& *Observationum lib. 2.* Sic quoque Forestus *lib. 6. Observat. 10*, inquit: *Vidimus, sed paucissimos, anthraxem in membris ignobilioribus, sine febre, qui facillime ab initio restituebantur.* Ex prædicta historia etiam liquet error Plateri aliorumque, qui negant pestis communis causam de novo à Deo immitti, sed à contagio initio sumpto propagari: nam si solum contagium pestem generalem facere posset, quare non ab hoc ægro talis pestis inducta est? qui me quidem & militem contagio infecit, sed nos nullos alios.

FINIS.



ISBRANDI

ISBRANDI DE DIEMERBROECK,

*D E*

VARIOLIS

*E T*

MORBILLIS,

LIBER SINGULARIS.

THE ALLEGED

THE ALLEGED

# TRACTATUS

## DE

# VARIOLIS & MORBILLIS.

### C A P U T I.

#### *De Variolis & Morbillis in genere.*



Quandoquidem Arabes, plurimique magni Medici, historiarum pestis morborumque que contagiosorum & epidemiorum subjungunt historiam variolarum & morbillorum, nos similiter, eos duces sequuti, tractatui nostro de peste, variolarum & morbillorum descriptionem subiiciemus.

Hoc autem primo capite (antequam de singulis his morbis speciatim agamus) pauca quædam in genere præfari necesse est, de utriusque morbi nominibus, prima origine, natura, subjectis, & differentiis.

Nominum aliqua varietas occurrit apud scriptores medicos. Græcis usitata fuere τῶν ἐκθύματων καὶ ἐξανθημάτων vocabula (hæc ambo veteres Latini uno verbo *Papulas* dixere: Alzaravius sua lingua *Algigram* & *Alasmom*, Mercurialis verò *Efflorescentias* nominat) per quæ non semper intellexerunt duos distinctos morbos, sed frequenter unum eundemque. Alii ἐκθύματων duplex genus constituerunt: unum in quo pustulæ eminentiores in cute erumpunt: alterum in quo saltem color cutis mutatur. Atque prius illud nonnulli speciatim ἐκθύματα, latini *Variolas*, quasi parvos verrucos, nominarunt, cui etiam *Papularum* nomen proprie adscribendum putant. Posterius verò ἐξανθημάτων nomine donarunt, & Latini etiam *exanthemata* & *morillos* appellarunt. Notandum interea, *exanthemata* propriissime nominari illas maculas purpureas quæ in pestiferis ægris frequenter apparent (de his egimus in tractatu nostro de peste, lib. 1. cap. 7. 14. & 15. & lib. 3. cap. 13. & lib. 4. histor. 57. & 77.) postmodum autem à multis Medicis hoc nomen etiam, sed minus proprie, morbillis fuisse assignatum. Quidquid sit, hodie nullum amplius dubium, nullaque ambiguitas de nominibus superest, cum Medici per ἐκθύματα & *Variolas* passim intelligant pustu-

las illas eminentes in cute erumpentes & suppurantes, per totum corpus conspicuas: & ἐξανθημάτων seu *Morillos* nominent maculas rubicundas, cutem nonnihil exasperantes, & nonnunquam minimis tuberculis, instar seminum milii, conspersas.

De horum morborum prima origine magnus est dissensus inter Medicos. Sunt enim qui antiquissimum iis ortum, à prima mundi origine, adscribunt, eosque ipsi quoque Hippocrati, Galeno, & aliis antiquis Græcis notos fuisse tradunt. Mercurialis verò, Liddelius, aliique multi, illos antiquis Græcis prorsus incognitos fuisse, & Arabum ætate primo innotuisse, ac propterea ab his primam eorum perfectam descriptionem exhibitam esse, judicant, cum Græci fere nihil speciale de iis scriptum reliquerint. Sed horum posteriorum opinio minus verosimilis videtur, cum Græcorum ἐκθύματων & ἐξανθημάτων descriptiones à nostris variolis & morbillis parum discrepent, ut liquet ex Hippocratis, lib. 3. epid. sect. 3. text. 57. in curatione Sileni: Cum Arabes quoque illos morbos tanquam novos non describant, quod, procul dubio, fecissent, si illos Græcis incognitos fuisse scivissent vel putassent. Adde; quod licet Græci in suis scriptis speciatim de his morbis non tractent, sicut Arabes, sed eorum historiam ordini istorum morborum epidemiorum, qui per modum crisis solvuntur, annumerent & immisceant, tamen inde non bene concludi illos iis minimè cognitos fuisse, utpote cujus contrarium ex eo imprimis liquet, quod multa nobiscum communia scribant, quæ tum naturam, tum curationem eorum spectant.

Hi morbi non sunt unum, sed duplex morbi genus: quippe sunt morbi intemperiei, quod ex calore præter naturam & febre notissimum est: atque etiam morbi pravæ conformationis, quia adsunt tumores & continui solutiones.

Referuntur autem ad febres acutas malignas,

contagiosas, epidemias, & pestilentes (ceteri non sunt tam exstiofi quam pestis) quia inter quatuordecim dies pterumque terminantur, aut saltem quadragesimum non transcendunt; malignitatis participes sunt, per contagium propagantur, & frequenter, instar pestis, epidemice grassantur.

Solis hominibus bellum indixerunt, quippe à nullo Medico hactenus observatum est, ullam animata his morbis affligi.

Præterea non modo solis, sed fere omnibus hominibus communes adeo sunt, ut pauci moriantur, qui vivi ab iis non aliquando tentati fuerunt. Hinc dicebat Avenzoar, *cap. ult. sua medic.* miraculum esse, si aliquis homo vivens ab his morbis immunis evadat, idque potius Dei beneficio adscribendum esse, quam alteri causæ. Hoc ipsum quoque inauens Thomas Willis, *lib. de febr. cap. 16.* sic inquit: *Convenit homini omni, soli, & semel variolis vel morbillis affici: si forte quispiam in tota vita immunis degerit, aut alius in hos affectus sæpius inciderit, sunt hæc rara & inusitata Natura eventa, quæ communi observationi minime derogant: quin omnino ratum sit, quod nimirum cuncti & soli homines sint variolis & morbillis obnoxii, atque unica plaga iis absolvi soleant.*

Partes quæ in his morbis afficiuntur, sunt, vel totum corpus, ratione febris: vel partes externæ, scilicet cutis, ratione pustularum & macularum, in ea conspiciuntur: vel interdum etiam partes internæ, ventriculus, intestina, pulmo, jecur, renes, &c. quas subinde non minus quam cutem, variolis obsideri, docuit

cadaverum variolis mortuorum sectio.

Hi autem modi, etiam ejusdem malignitatis participes sunt, in his tamen differunt. 1. Quod, cum sanguinis ab illa malignitate infecti duplex sit excrementum, unum crassum, alterum tenue, ex crasso variolæ, ex tenui verò morbilli generentur. 2. Quod in illis, propter istam materiæ diversitatem tubercula elevata & purulenta fiunt, in his verò duntaxat maculæ, vix cum aliqua cutis elevatione, & sine ullo pure appareant. 3. Quod illæ sanatæ foveas ac cicatrices, hi verò nullam foeditatem relinquunt.

Verum, quia in febre petechiali etiam maculæ erumpunt, quibus Medicus facile decipi posset, notanda est harum ab iis quæ in principio variolarum & morbillorum prodeunt, differentia; quæ est. 1. Quod primæ maculæ quæ in variolis & morbillis conspiciuntur, sint floridi rubicundi coloris, & exiles, ac postea dilatentur, maximeque appareant in facie & manibus: petechiæ verò sint rubri-obscurioris coloris, sæpe versus purpureum inclinantis, & a principio aliquanto latiores, exacteque rotundæ, & nullæ fere erumpant in facie & manibus, sed copiosæ in pectore & dorso. 2. Quod variolarum & morbillorum maculæ tertio quartove die à febris invasione plerumque erumpant criticè, & cum levamine ægri: petechiæ verò, etiam die septimo apparentes, plerumque symptomaticæ sint, & ægrum reddant deteriorem. 3. Quod hæc oriuntur instar morsuum pulicum, variolarum verò & morbillorum nullam cum morsibus pulicum similitudinem habeant.

## C A P U T II.

### DE VARIOLIS IN SPECIE.



ariolæ sunt pustulæ suppurantes, in summa cute erumpentes ac conspiciuntur (raro internas partes occupantes) cum febre continua, à peculiari maligna humorum fermentacea effervescencia ortæ.

Pueris maxime familiares sunt, minus frequenter iuvenes, rarissimè senes invadunt.

In cute sola ut plurimum subsistunt, ac in naribus interdum & faucibus etiam erumpunt, natura totam malignam materiam à centro ad peripheriam propellente. Quo in opere si, vel ob debilitatem, vel ob materiæ morbificæ copiam, vel ob specificæ fermentationis non sufficientem, satique celerem progressum, impediatur aut hæsitet, tunc nonnunquam etiam œsophagus, pulmo, jecur, lien, ventriculus, intestina, uterus, pluraque interiora viscera, sordidissimis ulcusculis, non minus quam cutis, obsidentur, ut in variis post mortem dissectis cadaveribus apparuit: ut patet ex Fernelii *lib. 2.*

*de abdit. cap. 12.* & Paræi *lib. 19. cap. 1.* aliorumque plurium scriptis ac testimoniis.

Interim de cute notandum, quod licet in ea passim dispersæ conspiciantur, non tamen æquali quantitate ubique in ea erumpant: quippe communiter majore semper magnitudine & copia in facie, pedibus, ac manibus, quam in aliis partibus prodeunt. Hujus effecti rationem, admodum plausibiliter hepatis imprimis adscribit Lazarus Riverius, propter cujus à maligna hac ebullitione conceptam calidiorem intemperiem vitiosos putridosque humores cum sanguine magis ad illas (quas emunctoria hepatis appellat) quam ad alias partes propelli putat: eodem modo sicut calidiore hepate præditi solent faciei rubedine & pustulis laborare, caloremque intensum in volis manuum & plantis pedum sentire. Hujus rei alias, sed nimis longe petitas, rationes adducit Mercurialis, *lib. de morb. pueror. cap. 2.* Dicta Riverii ratio magnam habet veri similitudinem: Sciendum tamen interdum



serdum contingere posse, ut per errorem variolæ in dictis partibus majore copia, quam in aliis, erumpere videantur, etsi res ita se non habeat, quia in illis continuo visui obiciuntur, & majorem molestiam pariunt, quam in aliis.

Nulla ætas sibi immunitatem ab iis promittere potest: pueri tamen multo frequentius iis infestantur, quam adultiore; propterea quod illorum dispositio debilius specificæ malignitati minus resistat, & ad peculiarem, quæ hic contingit, ebullitionem aptior esse videatur. Senectus multo majorem ab his libertatem sibi vendicat, quam aliæ ætates. Præterea facilius inficiuntur illa corpora quæ cum infectis aliquam analogiam habent; atque hinc consanguinei se mutuo magis inficiunt: quod ipsum in peste à nobis observatum, & notatum est, *tract. de pest. lib. 1. cap. 4. & annot. 6. nec non cap. 11. annot. 4.*

Quolibet anni tempore grassantur, sed imprimis Vere & Autumno, præcipue si hyems tepida & humida, vel æstas pluviosa & austri- na, multorumque fructuum fugacium usus præcesserit.

Modò sporadicæ, modò epidemiæ sunt, interdum etiam ad tempus silent. Cum autem epidemiæ sunt, tunc quoque aliis plerisque morbis adjunguntur, in iis scilicet qui antea variolis nunquam laborarunt.

A materia crassiore, seu viscidior, cui illa malignitas inhæret, cum sanguine specifico modo fermentante, oriuntur, atque hinc in pustulas majusculas purulentas attolluntur.

In hac fermentatione putat Thomas Willis, *lib. de febr. cap. 15.* sanguinis aliquas portiones cum veneno coagulari, & sic simul cum eo foras expelli. Hoc tamen minus verosimile videtur, nam etsi corrumpantur, tamen non coagulantur, cum portiones sic coagulata, ob nimiam crassitiem ægre foras propelli possent. Sed hæc ebullitio fere simili modo peragitur ut in cerevisia fermentante, in qua nulla fit humoris coagulatio, sed multæ spirituosæ particule per fermentaceam effervescentiam in cerevisia fortiter agitata, ejusque viscidioribus particulis intricata & involuta, sursum tendunt, & cerevisiæ superiori innatant, aut e vase spumosa erumpunt, sed minime coagulantur, nam sunt valde subtiles & spirituosæ, sicut non tantum

ex forti odore, sed etiam ex eo liquet, quod ex isto cerevisiæ flore distillato eliciatur spiritus fortis, instar spiritus vini.

Semper iis adjungitur febris, plerumque mitis, modò paulo major, modò minor, eaque putrida, ut liquet ex evacuatione critica per pustulas, quæ sine putredinosa ebullitione omnino fieri nequit; nam ubi corrupti & vitiosi humores à bonis separantur, ibi necessario adest aliqua putredo, seu putredinosa effervescencia. Inveniuntur quidem nonnulli, qui scribunt, etiam sine febre variolas fieri posse, sed minime verum est: horum autem error ex eo procedit, quod nonnunquam in infantibus aut pueris illa febris ante eruptionem variolarum adeo mitis sit, ut iis vix aliquod observabile incommodum faciat: nam quod aliquanto magis inquieti, aut somnolenti sint, aut alimenta aspernentur, vel minus alacres exsistant, hoc nutrices facile dentitioni, aut ventis dolori, aut vermibus intestinorum, adscribunt, & sic erumpentibus variolis, has sine ulla febre prorupisse putant & dicunt; cum potius ab illis ipsis parva ista febris non fuerit fatis animadversa.

Hæc autem febris ad nullum febrium genus commodius referri potest, quam ad Synocham putridam: in hac enim fit sanguinis in vasis putredinosa ebullitio, cum æquali calore per totum morbi decursum, & tandem critica vitio- forum humorum expulsio.

Variolæ suas habent differentias, etsi pauci Medici earum meminerint. Aliæ enim sunt majores ac purulentæ, quæ frequentissimæ, & nostratibus Belgis κατ' ἐξοχὴν. *de Pocken*: aliæ minores, quæ iisdem *de Steen-pocken* appellantur, & hæc sunt tuberula quædam parva, sine multo pure, sparsim, sed minime copiosa in cute erumpentia, sine gravibus symptomatibus: aliæ denique sunt claræ & majusculæ, instar aquæ vel crystalli resplendentes, & aquosum quendam liquorem continentes, nostratibus *Wint-pocken*, & quibusdam *Water-pocken* dictæ. Præter has adhuc aliæ sunt differentia, quatenus variolæ sunt magnæ vel parvæ, paucae vel copiosæ, profundæ vel superficiales, contiguæ vel sejunctæ, albæ vel rubicundæ, lividæ, violaceæ, alteriusque coloris, molles vel duræ, elevatae vel depressæ, tardè vel citò erumpentes, externæ vel internæ.

## DE VARIOLARUM CAUSIS.

### CAPUT III.



Variolarum causæ sunt vel internæ, vel externæ, & de utrisque magnus est dissensus inter præstantissimos Medicos; qui tanto acrius de iis disputant, quanto inutilior est earum inquisitio, nam à qualicunque causa oriuntur, curatio eadem est.

Avicennas & plerique Arabes, primi accuratiores hujus morbi descriptores, causam materialem referunt in impuritatem sanguinis materni in muliere imprægnata restagnantis, quo foetus in utero nutritus fuit: quam labem tam diu in corpore delitescere scribunt, donec specifica aliqua de causa (efficiente scilicet) ad fermentaceam effe-

effervescentiam excitata, ac in sanguinis massam effusa, eam totam similiter effervesce & ebullire faciat, sicque illud inquinamentum minutis quibuscumque corporis particulis ab ortu inhærens secernat, secretumque, una cum ab eo inquinatis sanguinis particulis, ad ambitum corporis propellat, & has pustulas ibi excitet: eodem modo sicut in multo per fermentaceam ebullitionem heterogeneas partes à vini homogeneis separantur. Avenzoar ab Avicenna nonnihil discrepare videtur, quippe animadvertens foetum in utero vix, salvâ vitâ, impuro sanguine menstruo restagnante nutriri posse, dicit illum non nutriri sanguine menstruo, verum alio sanguine bono per se, sed tamen à contubernio sanguinis menstrui magnore ejus labe inquinato. Et quia in utero omnes homines necessario tali sive menstruo, sive alio inquinato, sanguine nutriri, ex prima illa partium nutritione impuritatem illam contraxerunt, hinc Arabes judicant, omnes homines variolis obnoxios esse, propterea quod illa impuritas aliquando è partibus rursus separanda venit. Et si specifica illa fermentacea effervescentia in prima variolarum invasione satis fortiter peragatur, tunc illam impuritatem penitus evacuari, & sic hominem, in quo hoc contingit, reliquo vitæ tempore à variolis prorsus immunem vivere (eodem modo sicut cum butyrum è lacte acescente semel valida concussionem separatum est, postea nulla agitatione rursus butyrum ex eo separari potest) si verò illa effervescentia non satis fortiter procedat, tunc totam illam impuritatem non expelli, atque sic hominem illum ex labis istius reliquis, aliis quacumque de causa rursus fermentantibus, secundo, & interdum etiam tertio, rarissime quarto in eundem morbum incidere posse.

Arabum sententiam fortiter defendit Duncanus Liddellius, *lib. 3. de febr. cap. 8.* eamque sequuntur Fracastorius, Amatus, Forestus, alique plurimi Medici, & inter eos etiam novissime Thomas Willis, *lib. de febr. cap. 15.* ubi, præter aliorum rationes, ad majorem confirmationem etiam hæc addit. *In utero, inquit, muliebri (secus ac in aliis plerisque animalibus) generatur fermentum quoddam, quod sanguinis massa communicatum, ipsi vigorem ac revivificationem conciliat, ac dein statis periodis turgescentiam, & sanguinis superflui excretionem procurat: tempore autem conceptus, cum omnino fluere desistunt menstrua, plurimum hujus fermenti foetui impenditur, ejusque particula ceteris quibuscumque heterogenea, velut extraneum quoddam, humorum ac sanguinis massa confunduntur: cui involuta & ab invicem separata, diu delitescunt: postea tamen aliquando à causa evidente commota, cum sanguine fermentescunt, ipsique ebullitionem, ac deinde congelationem inducunt, è quibus varia hujus morbi symptomata oriuntur.*

Dictam Arabum sententiam omnino reiicit Gentilis, & non credit foetus in utero nutriri impuro aliquo sanguine: non credit etiam adultis & senibus, cum variolis corripiuntur, illam impuritatem tot annis potuisse superesse, & per

sudores, febres, scabiem, aliosve intercedentes morbos, aut per luis Venereæ curationem) in iis qui ea laborarunt) atque etiam in mulieribus per menstrua, tanto temporis interstitio non evacuatam fuisse.

Gentilem sequitur Mercurialis, qui insuper statuit variolas esse morbum hæreditarium, atque hinc nullum fere hominem ab iis immunem esse posse, quia omnes nascuntur ex parentibus hoc vitio tentatis, hancque suam sententiam plurimis egregiis rationibus stabilire nititur, quas tamen omnes efficaciter destruit Daniel Sennertus, *lib. 4. de febr. cap. 12.*

Fernelius, in variolarum productione aliquid occulti observans, præter varias rationes à Gentile aliisque propositas, statuit illas oriri à causa quadam cœlesti & occulta, cui cum infantes & pueri minus resistent, quam adulti, hinc fieri dicit, quod illi frequentiores variolis laborent, quam hi. Hanc Fernelii opinionem splendide refutat Mercurialis, *lib. de morb. pueror. cap. 2.*

Sennertus, *loco citato*, concedit à certa quadam ac determinata putredinosa humorum ebullitione variolas oriri & propelli, sed hanc ebullitionem à tribus causis provenire statuit, scilicet ab aëre maligno, à sanguine materno, & vitioso alimento: atque in sequentibus admodum laborat in latiore explicatione hujus suæ, nec non Arabum, & Fernelii sententiæ.

Verum, ut ingenue fatear, nulla harum sententiarum mihi placet. Non Arabum, quia, præter rationes à Gentile allatas, etiam hæc accedit, quod cum illud è sanguine materno contractum inquinamentum communiter omnibus hominibus in esse statuatur, non posset quispiam ab hoc morbo excusatus vel immunis esse, quod repugnat experientiæ, cum multi usque ad altissimum senium vixerint, antequam obierint, qui nunquam variolis fuere tentati, quales in scula nostra familia plures cognovimus (ut patrum & patrem meum fere nonagenarios, aviam octogenariam, cognatos duos octogenarios, & nonnullos alios) quales etiam alios plurimos in aliis familiis enumerare possem. Ad hæc, si menstrui sanguinis impuritas foetui communicata, variolarum causâ sit, quare illas non producit in ipsis mulieribus quibus menstrua præter Naturæ ordinem subsistunt, & præcipue in iis quibus illa toto vitæ tempore non fluxerunt, quæ tamen fecundæ fuerunt, sæpiusque pepererunt, quarum plurima exempla inveniuntur apud Trincavellium, Guainerium, Bertinum, Marcellum Donatum, Joubertum, Fabricium, aliosque? Præterea illud privatum cujusque inquinamentum. ægerime per contagium alios inficere, vel aliorum in corpore latens inquinamentum ad similem ebullitionem incitare posset. Si dicas, quod possit, tunc da, quæso, rationem, quare non omnes adstantes, & ægris variolosis inservientes, eorumque foetores diu perferentes, variolis inficiantur, etsi nunquam iis antea laboraverint? quare illud contagium hæcenus etiam me, jam fere septuagenarium, non conta-

mina

minaverit, qui millenos variolis laborantes invisi, eorumque foetores satis diu perpeſtus ſum, & ulcera tractavi? quare nonnulli ex eo, quod ſaltem eminus aliquem variolis obſitum viderunt, iſdem etiam corripantur, cum contagium, ſeu inficiens illud miasma ab ægro effluens, per tam longum interſtitium ab ægro ad ſanum transferri, huncque ſic inficere, alios verò proxime adſtantes iſtæſos relinquere poſſe, omnem fidem ſuperet? Non capio etiam illud quod Thomas Willis ad ſententiæ hujus confirmationem addit, ſcilicet, privatum illud inquinamentum aliqua de cauſa commotum cum ſanguine fermentefcere, ipſique ebullitionem, ac dein coagulationem inducere. Nam cum ebullitio ſemper majorem faciat attenuationem, non percipio quomodo illa eadem deinde poſſit facere coagulationem. Præterea, ſi talis ſpontanea coagulatio poſt ebullitionem neceſſaria foret, ergo Medici in principio curationis mile adhiberent attenuantia diaphoretica, utpote quibus illa coagulatio impediretur; & poſtea iſdem etiam mile præſcriberent incrassantia, lentes, tragacanthum, ficus, &c. utpote quæ iſtam coagulationem nimiam facerent; atque etiam minimè neceſſaria forent, ſi ſanguis ille poſt ebullitionem ſponte coagularetur: utrumque tamen repugnat experientiæ, cum & illa, & hæc in curatione feliciter adhiberi doceat uſus.

Non etiam aridet Fernellii ſententia, nam ille occultas iſtas cæleſtes cauſas paſſim, pro more ſuo, in morbis occultis à ſyderum influentiis deducit: ſed quam incerta, imò quam frivola ſint illa omnia quæ ab his influxibus; tam ab Astrologis, quam à Medicis deducuntur, & dicuntur, abunde liquet ex iis quæ ſuper his ſcripſimus in tractatu noſtro de peſte, lib. 1. cap. 8. annot. 1. problem. 2.

Neque Sennerti opinio nobis probatur, quia ille quidem tres vicioſæ fermentationis cauſas proponit, ſed per illas non poſteſt explicari ſpecificum illud malignum quod variolis ineſt, & quare per vicioſam fermentationem à tribus illis cauſis excitatam ſpeciatim variolæ potius & magis producantur, quam aliæ febres putridæ, malignæ, aut peſtilentes, vel etiam ſcabies, herpes, cancri, aliive ſimiles morbi.

Quantum ad variolarum cauſas externas & procataſticas, à quibus interni humores moventur, illarum primarias Medici ſtatuunt eſſe, 1. Aëris peculiarem diſpoſitionem & pravam qualitatem: quo pertinent temporis anni mutationes inſigniores, ut Veris & Autumni conſtitutio calida & humida, vel hyemis etiam auſtrina & tepida. 2. Sanguinis & humorum perturbationem, quo

pertinent, corporis nimia agitatio, balnea crebra, ira, terror, crapula &c. 3. Contagium, nam per illud morbum hunc propagari experientia manifeſtum facit: è corpore enim infecto exeunt continua effluvia, quæ ab aliis corporibus ſuſcepta, ſtatim, inſtar veneni, cum ſanguine fermentefcunt, & ſemina ejusdem affectus latentia, ipſiſque homogenea ſuſcitant, & in hujus morbi ideam diſponunt, hæcque effluvia miasmata non ſolum immediato contactu, ſed etiam ad diſtans communicantur. Verum per tales cauſas, talemque aeris qualemcumque manifeſtam, ſive bonam, ſive vicioſam qualitatem aut diſpoſitionem, & humorum perturbationem, aut per contagium nondum innotefcit, nec explicatur ſpecificum illud malignum quod in variolis adeſſe animadvertitur, & quare illud magis in his quam illiſubjectis, & his quam illiſ temporibus operetur. Nam multoties fervida, vel humida, aut calida ſimul & humida extiterunt conſtitutiones: multoties etiam diuturnus victus pravus (ut in annonæ caritate, & urbibus obſeſſis) continuatus, & hinc magna corporum cacochymia genita eſt, multique fuerunt qui crapulis diu indulſerunt (quas tanquam primariam aliquam cauſam adducit Th. Willis) & tamen nullæ fuerunt generatæ variolæ: contra verò, multoties temperatiſſimo cœlo, & frigidiffima hyeme epidemice graſſatæ ſunt, & victu optimo magis quam pravo utentes, atque euchyma potius, quam cacochyma corpora infeſtarunt: nonnunquam etiam primitus, nullo alio præagrotante, aut miasma aliquod communicante, quinimo etiam per ſolum terrorem, & per ſolam imaginationem productæ ſunt, abſque ullius contagii ſuſpicionem.

Itaque, cum per omnes illas cauſas à Medicis propoſitas, neque ſpecificæ malignitatis, quæ variolis, vera ac ſpecifica eſſentia, neque peculiaris ac determinata ſanguinis corruptio, neque ſpecificæ fermentationis cauſa & modus, innotefcat, aut explicari poſſit, ego potius dicendum arbitror, cauſas variolarum proximas, cum, internas, tum externas quæ interiores ſpecificè movent, occultas eſſe (ſicut ipſius quoque peſtis cauſæ occultæ ſunt) & à nobis explicari non poſſe: præſtabilius enim cenſeo hic conſiteri ſcientiæ noſtræ infirmitatem, quam per multas ambages & vanas conjecturas, nullo fundamento innitentes, tandem crassam ignorantiam prodeſſe. Quis enim tantæ rei ſe veram & perceptibilem rationem daturum promittet? hæc quippe ſunt ex illis arcanis, quorum cauſas nos exacte ſcire noluit altiffimus Conditor.

## CAPUT. IV.

## DE SIGNIS DIAGNOSTICIS.



**V**ariolæ non facile dignoscuntur priusquam pustulæ ipsæ malum prodant: iis autem aliquo modo apparentibus, tunc visu facile innotescunt, Sed cum ad curationem bene instituendam plurimum intersit, ante pustularum eruptionem, imminentes variolas prænoscere, harum signa imprimis observanda & inquirenda veniunt.

Quæ imminentes variolas indicant, varia sunt. Febris modò intensior, modò remissior, cum pulsu parvo, crebro, inæquali, & calore plerumque non multum ardente. Cordis oppressio, cum anxietate, ejusdemque palpitatio subinde recurrens; interdum etiam syncope. Capitis dolor. Delirium. Nonnunquam epilepticæ convulsiones. Sternutatio crebra. Somnus solito gravior, & inquietus. Insomnia de fulminibus, igne, & flammis. Evigilationes cum terrore. Respiratio difficilior, cum crebris suspiriis. Oscitatio crebra. Dorsi lumborumque dolor, & pulsatio in spina. Totius corporis gravitas & lassitudo. Pun-

ctorius quidam sensus, & quasi pruritus in cute, atque etiam in naribus. Facies rubicunda. Oculorum caligo, splendor, & pruritus. Lachrymæ involuntariæ. Interdum narium hæmorrhagia. Tumor faciei. Os siccum. Vox rauca. Tussicula sicca. Extremorum tremor. Maculæ exiguæ rubicundæ in cute. Hæc autem omnia signa certiora erunt, si variolæ multos infestent, vel communiter grassentur, vel contagii suspicio adsit, & æger forte aliis variolosis adfuerit, vel eos inviserit, vel ab occurso variolosi exterritus fuerit. Ex urinis nullum certum imminentiæ variolarum signum desumitur, quia in hoc morbo plerumque urinis sanorum similes sunt.

Si, præter cutem, etiam partes interiores à variolis obsideantur, tunc quales illæ fuerint, ex actionum læsione dignoscitur. Sic ventriculorum ab iis infestari, liquet ex vomitu & cardialgia: intestina, ex ventris torminibus & alvi fluxu purulento: pulmonem, ex difficili respiratione: renes, ex urina cruenta: & sic de cæteris.

## CAPUT. V.

## DE SIGNIS PROGNOSTICIS.



**V**ariolæ, quia morbis acutis annumerantur, ut dictum *cap. I.* habent, sicut alii morbi acutiores, quatuor tempora; & si cursus morbi convenienter procedat, terminantur intra quatuordecim dies: quos si excedant, indicium est, aut debilitatis naturæ, aut valde magnæ copię materiæ morbificæ, aut utriusque. Tempus ebullitionis plerumque quatuor diebus absolvitur: horum primus est principium, secundus augmentum, tertius status, quartus initium declinationis, quo tempore febris & symptomata remittere solent. Idem quartus dies, qui est declinatio ebullitionis, etiam solet esse principium eruptionis variolarum: augmentum verò ad septimum protrahitur: status undecimo die viget; à quo usque ad decimum quartum, est declinatio, eoque tempore variolæ siccantur, quæ exsiccatio interdum ad vigesimum usque protrahitur. Si morbus secundum hunc ordinem convenienter procedat, de felici eventu bene sperare licet: sin verò è contra, hunc ordinem non servet, sed eum pervertat, de sinistro eventu omnino metuendum est.

Exitus autem seu eventus morbi, an salutaris,

an vero exitialis futurus sit, præfagitur ex collatione virium ægri, cum magnitudine morbi. Vires ægri colliguntur ex tolerantia, & omnibus actionibus. Magnitudo morbi colligitur ex febris & symptomatum magnitudine atque ex ipsis etiam pustulis. Si ægri vires tantæ sint, ut quatuor morbi tempora sustinere valeant, felix: at si à febris & symptomatum magnitudine ita obruantur, ut vix ad statum usque sufficere possint, infelix erit eventus. Ex iis igitur quæ variolas comitantur & sequuntur, de eventu judicandum est; cujusmodi sunt, variolarum qualitas, magnitudo, numerus, figura, color, tempus & modus eruptionis, locus, febris magnitudo, varia symptomata, & ægri facilis difficilisve tolerantia.

Bona signa prognostica sunt hæc. In principio, ante aliquarum macularum eruptionem, larga narium hæmorrhagia. Cita variolarum eruptio, & hinc mox febris, aliorumque symptomatum imminutio. Variolæ primo rubræ, hinc albicantes, molles, eminentes, rotundæ, copia mediocres, & distinctæ, non contiguæ. Vox libera, & respiratio facilis. Ex his duobus ultimis multum ad salutem pollicetur Eustachius Rudius.

Rudius, lib. 3. de medend morb. cap. 31. Vt exatius, inquit, salutem & mortem prasagire possimus, respirationem & vocem perpendere oportet: dum enim duo hæc bene se habent, salva res est; indicant enim materiam procul à nobilibus, & præsertim spiritalibus partibus, expulsam.

Mala prognostica sunt hæc. Febris, cum gravibus symptomatibus, post eruptionem variolarum permanens. Variolæ tardè prodeunt, & lentè maturantes; parvæ & paucæ, duræ, depressæ, post eruptionem rursus evanescentes, vel subsidentes: item lividæ, violaceæ, purpureæ, nigricantes, duplices in medio, nigra macula notatæ, interiores partes occupantes. Majoris mali prælagium augent, magna virium debilitas: cardialgia: vomitus, singultus, ingens sitis: summa anxietas, & inquietudo magna, lipothymia crebra: delirium: altus sopor, aut nimis vigiliæ: convulsio quasi epileptica: pectoris, & faucium angustia: respirandi difficultas: raucedo: cibi aversio: deglutitio impedita: alvi fluxus & dolor: menstruorum fluxus extra periodi tempus: urina cruenta: extremorum frigus. His

duo adhuc addenda: 1. si in eadem familia multi ex variolis moriantur: 2. si senes iis corripiantur.

Qui autem ex variolis moriuntur, plerumque aut suffocantur, præclusâ à pustulis spiritus via: aut syncope deficiunt: aut alvi profluvio cruento, vel non cruento pereunt.

Si variolæ interiora viscera obsederunt, peripneumoniam, tabem, jecoris & renum exitiosas ulcerationes, aliaque lethalia mala inducent.

Si oculos occupent, sæpe ophthalmiam diuturnam, sinum, fistulam lachrymalem, ægilopem, carunculæ anguli absorptionem, caliginem, albuginem, & non rarò cæcitatem generant.

Si post eas in auribus aut naribus disruptas hypofarcosis oriatur, audiendi, vel odorandi sensu ægrum privant.

In facie si integram magnam crustam, instar larvæ, efficiant, & deponant, indicium est, secuturas foedi coloris maculas, & turpes cicatrices.

## CAPUT. VI.

*De curatione prophylactica, seu præservatoria.*

**I**N hoc morbo, non minus quam in peste, curatio duplex requiritur, *πεφυλακτική & θεραπευτική*. De prophylactica curatione pauci Medici scripserunt: vel quod illam fortassis minus necessariam esse existimaverint vel quod paucissimi sani super ea Medicos consulere soleant. Interim tamen, quandoquidem magnus Arabs medicus Avenzoar illam, bona cum ratione, hic non minus necessariam judicat, quam in peste, & plurimi existunt (præsertim adulti & jam seniores, ut & aulici, de pulchritudine sua præ aliis valde solliciti) qui sibi de hoc morbo admodum metuunt, tam propter vitæ periculum, quam propter foveas, cicatrices, aliasve turpitudines, quas in facie frequenter relinquit, etiam nos de prophylactica curatione primo breviter agemus, antequam ad therapeuticam accedamus, quia tutius & præstabilius est hunc morbum arcere, quam jam hospitantem expellere, atque hinc præservatio etiam necessaria est, imprimis cum morbus aeris vitio grassatur, & contagio multum proserpit.

In præservatione autem instituenda, omnium primo habenda est ratio aeris, utpote cujus vitio morbus hic plurimum propagatur, eoque mediante etiam plerumque contagiosa miasmata aliis communicantur. Hic aer, si vitiosus esse putetur, corrigendus est, non luculentis ignibus, sicut id fieri solet in peste (ne nimis excandescant corpora) sed suffumigiis, ex baccis

juniperi, thure, mastiche, benzoino, succino, rosmarino, corticibus citri & aurantiorum, ligno juniperino, laurino, aliisque similibus: maxime autem conducit cubicula aceto, aut oxycrato conspergere, aut in iis subinde fumum vaporosum excitare aceto in lapidem ignitum infuso; atque etiam per pyxidem perforatam acetum cum spongia ei impositum naribus odorandum obicere. Ut nec susveolentia valde frangrantia, ita nec fætida hic laudanda, at solum acetum omnibus aliis suffumigiis præferendum censemus, utpote quod non tantum vitia aeris corrigit, eique inhærentia miasmata extinguit, verum etiam odore cerebrum partesque spiritales firmat, & in sanguine putredinosam effervescentiam impedit. Præterea, ut contagiosa per aerem volitantia miasmata melius evitari possint, injungendum ut pueri, alique qui nunquam variolis laborarunt, fugiant, non solum ægros variolis aut morbillis jam infestatos, verum etiam illos qui talibus ægris inserviunt, aut cum iis aliquo modo conversantur, imo & ipsas ædes in quibus decumbunt.

Cibus utendum boni succi & facilis digestionis eorumque condimenta frequenter præparanda sunt cum acetosa, agrestis, aceto, succo limonium & aurantiorum, uvis crispis immaturis, ribesii rubris, cerasis morellis, aliisque acidis. Abstinendum autem à cibis duræ digestionis, aut pravi nutrimenti: item ab acris, multum aromatatis, valde salsis, fumo siccatis, aliis, cæpis, fructibus horariis, &c. In usu ciborum

modus servandus est, ut enim magna fames, ita & nimia satietas nocet.

Potus sit pituitosa, aut cerevisia nostra tenuis, vino assuetis etiam vinum tenue modica quantitate concedendum: delicatulis subinde etiam iulebi dari possunt, ex decocto hordei, succo citri, syrupo morellorum, violarum, limonum, aliisque similibus, grato sapore præditis, concinnati. Abstinendum autem à vino forti, spiritu vini, cerevisia Gedana, aliisque quocunque potu forti ac fumoso, item ab ebrietate & crapula.

Exercitia corporis mediocria sint, evitando valde gravia magnumque æstum excitantia, & nimiam quietem.

Somnus etiam moderatus sit oportet,

Imprimis etiam excernendorum ratio habenda est, & procurandum ut præter solitas quotidianas alvi dejectiones, corpora à superfluis humoribus, ad minimum semel singulis, septimanis, clementer evacuentur, idque pilulis Ruffi, vel pilulis ex aloë rosata, foliis fennæ, rhabarba-

ro, tamarindis, aliisque similibus medicamentis in adultis, at in pueris, syrupo de cichoreo cum rheo, aut syrupo passularum corinthiacarum laxativo, aliisque simili, abstinendo à catarticis fortioribus, quæ humores totumque corpus turbant. Præterea in virginibus adultioribus, & mulieribus etiam curandum ut menses statim periodis fluant, nisi in his eas fluere prohibeat ingravidatio: item, ut in aliis quoque, quibus hæmorrhoides per intervalla fluere consueverunt, ille fluxus more consuetudo procedat.

Plethoricis, aliisque quibus sanguis abundat, aut calidior esse videtur, vena secanda est, si modo ætas venæsectionem ferat, & nihil aliud sit, quod illam prohibeat.

Animi summa tranquillitas, cum animositate conjuncta, hic plurimum conducit: maxime autem fugere oportet ejus motus vehementiores, imprimis iram, metum, & terrorem, multamque de variolis, earumque foeditate cogitationem.

## C A P U T. VII.

### *De curatione therapeutica, & primo de diata.*



N curatione eorum qui variolis jam laborant, ad duos præcipue scopos collineandum. Primus est, naturæ in expulsiōe materiæ morbificæ suppetias ferre, omniaque impedimenta amovere, quæ illam hac in parte impeditam reddere possent. Alter est, accidentia tollere, & præcavere ne in illa expulsiōe partes internæ, aut externæ gravem noxam contrahant. Ut hi scopi impetrentur, in usum vocanda veniunt tria Medicinæ instrumenta, Diæta, Chirurgia & Pharmacia.

Diætæ in hoc morbo exactissima est habenda ratio, quia per illam solam bene institutam curationis frequenter absolvitur, & errores in ea commissi morte puniuntur.

Imprimis hic aeris habenda est ratio. Decumbat æger in cubiculo, bene clauso & à ventis libero, ut facilius respirare queat, simulque foetentes vapores melius discuti & minus molestiæ ei exhibere possint. Aer autem sit tepidus, & ab eo frigus omni studio arceatur: si hyems sit, aut frigida tempestas, extructis luculentis ignibus aer calefaciendus est. Maxime autem cavendum ut nullum frigus ad decumbentis ægri lectum perveniat: quippe si ad illum sudantem, vel in humido tepore jacentem minimum aliquod frigus accedat, vel ille ipse, sese jactando, aut tegumenta abiiciendo denudet, aut sudorem dispellat, facillime contingit, ut, cum magno suo damno, jam erumpentes variolæ retrocedant & evanescant, vel subsidant, quod summopere periculosum est. Hac eadem de causa etiam oportet, ut ægri ante decimum quartum diem indusia non mu-

tent, ne per illam mutationem frigus aliquod suscipiant, & variolæ retrocedant, quemadmodum illud cum plurimorum deplorando exitio contigisse vidimus. Præstat ut indusia à sudore madida in lecto à corporis ægri calore rursus sponte paulatim exsiccentur, & æger per aliquot dies sudorac-variolarum erumpentium foetores patienter ferat, quam ut maximo suo periculo sordida linteamina mutet, & alia nitida assumat. At si fortè contigerit, ut necessaria aliqua de causa indusium ut & lodes mutare necesse sit, tunc procurandum ut rursus talia dentur linteamina, quæ vel ab ipso ægro ante suum morbum, vel ab alio sano per aliquot dies gestata fuerunt: nam semper observavi nitida & recenter lota linteamina ægris nocuisse (hoc ipsum etiam notavi in peste, & scripsi, *tract. de pest. lib. 2. cap. 3. annot. 6. & lib. 4. histor. 29.*) quod à foetore saponis, quam aliquo modo redolent, fieri suspicor. Præterea diligenter observandum, ut induendum indusium sit bene ad ignem calefactum, utque, dum induitur, quam minimum frigidi aeris ad ægrum accedat. Quidquid sit, linteamina non mutare, semper profuisse, at illa ante decimum quartum diem mutare, semper plus minus nocuisse animadvertimus. Non est autem quod quis hic metuat istum aliqualem foetorem, quem à sudoribus & ruptis pustulis linteamina contrahunt, quoniam hunc nullis ægris noxium fuisse, millies observavimus.

Denique & hoc notandum existimamus, scilicet variolosis capita arctis capitibus, aut strictis linteamini non esse obvolvenda: hinc enim duo



duo incommoda oriuntur. 1. Calore sic in capite nimis adaucto, longe plures variolæ facie & capite erumpunt, quam eo leviter contexto. 2. Variolæ sub strictis capitis integumentis enatae, semper majores, depressæ, & valde latæ fiunt, imò sæpe sub illis strictis tegumentis adeo ulcerantur, ut postea cum molestia curatæ foveas admodum indecoras in fronte relinquant. Atque hinc ego communiter caput quidem laxis capitibus contegere, & à frigore defendere, sed non arcte aut stricte ligare jubeo.

Ciborum conveniens administratio ad curationem plurimum quoque facit. Victus in principio convenit tenuis, præcipue à morbi exordio usque an diem septimum vel decimum quartum: isque constare debet ex pulticula hordeacea, aut emulsione facta ex amygdalis dulcibus & seminibus quatuor frigidis majoribus in decocto hordei, vel ex jusculis tenuibus pullorum aut ovillis, aliqua refrigerandi vi (per adjectionem lactucæ, endiviæ, portulacæ, &c.) donatis: abstinendo tamen ab ipsis carnibus, ut & ab ovibus & piscibus, aliisque cibis mali succi, aut difficilis coctionis; item à quibusvis rebus acidis, falsis, acerbis, pinguibus, & ab aromatibus, alliis, coepris, aliisque similibus valde calidis. Si æger sit infans & lactans, tunc cibi convenientes nutrici sunt præscribendi. Post eruptionem verò, cessante febre, & pustulis suppuratis crustisque cadentibus, solidiores cibi concedendi sunt; quales sunt carnes pullorum galinaceorum, agninae, vitulinae, ova sorbilia, &c.

Potus sit prisana, vel cerevisia tenuis, non acida; multi pro potu laudant aquam decoctionis limaturæ cornu cervi: abstinendum autem à vino (nisi syncopes metus sit) omnique forti, calido, ac fumoso potu. Quam noxius autem sit vini usus, notavit Forestus, lib. 6. observat. 41. Muliercula quadam, inquit, & imperitum vulgus sine delectu, pueris ex variolis & morbillis decumbentibus vinum Gallicum rubrum propinabant, quamvis febris ardenti corriperebantur: perperam etenim sibi persuasum habebant, hoc modo melius per-

cutem exire variolas. Hinc factum ut quam plurimi, qui tale vinum astringens bibissent, subito morerentur, motu natura inhibito, quo minus foras protruderentur; ac febre aucta capitis doctum incurrebant, delirio subsequente mox exstinguebantur, & aliqui horum non sine periculo evadebant. Idem simile quid etiam repetit in scholio observat 46. & obs. 49. in scholio.

Hic obiter notandum quod de dulcibus in victu scribit Mercurialis: Potissimum autem cavendum est, inquit, à dulcibus omnibus, & in potu, & in cibo: addit, quod Avenzoar scribat, eos qui dulcibus utuntur, vix posse servari. Verum hæc ejus opinio non convenit cum praxi, qua decemur, glycyrrizam, ficus, jujubas, passulas, saccharum, syrupum vulgare, similiaque dulcia, materiam morbificam citius coquere & versus exteriora propellere: ergo dulcia non obesse: excipi tamen debent vina dulcia, quæ cum fortia sint, eorum usu caput offenderetur, calor valde cresceret, & febris augeretur. Præterea ipse Mercurialis aliquanto post scribit, quod soleat ficus aridas concedere pro cibo.

Somnus sit moderatus, & æger corpore quiescat.

Excreta alvi si sponte & naturaliter procedant, bene est. Si verò dura & constipata fuerit alvus, ante septimum diem non facile citanda est, idque non nisi notabili aliqua necessitate urgente: quoniam dura alvus variolarum eruptionem non impedit; at si medicamentis proritetur, facillime exitiosus alvi fluxus succedit: quod etiam notavimus lib. 3. de pest. cap. 4. annot. 1. 2. 3. 4. & libro 4. hist. 13. 19. 35. 63. 116.

Fugiendæ sunt omnes curæ, & vehementes animi perturbationes, imprimis timor, terror, tristitia, & ira. Verum de ira videtur Mercurialis aliter sentire, & putare quod illa conducere possit, nam sic inquit: Neque agre ferendum est quod agri interdum irascantur, quia ira nonnihil confert ad extrudendos humores in superficiem corporis. Sed utinam etiam non conferret ad incrementum caloris & febris.

## CAPUT VIII.

## DE AUXILIIS CHIRURGICIS.



Præparatum chirurgicum auxilium hic est venæsectio (de topicis foris adhibendis, aliisque similibus infra dicturi sumus, cap. 12.) de qua inter celebriores Medicos nobilis quæstio incidit, scilicet, an illa in hujus morbi curatione conveniat, nec ne.

Avicenna, 1. 4. tract. 4. cap. 10. venæsectionem instituere suadet, ante eruptionem, atque etiam, in magna repletionem, post earum eruptionem. Rases, lib. 10. de re med. cap. 18.

solummodo ante eruptionem vult phlebotomiam institui. Si priusquam erumpant, inquit, incidat in aliquem sic affectum medicus, sanguinem ilico, si nihil obstat, vel per venam apertam, vel per cucurbitulam cum scarificatione agglutinatam, detrahat: omnino enim sanguinis copia minuenda est. Forestus, lib. 6. obser. 47. in scholio, scribit hoc auxilii genus mirifice prodesse solere, imprimis in plethora, modò adhibeatur in principio, antequam variolæ egrediantur: & observat. 46. scribit, illos quibus vena sic tempestive secta fuerat,



fuerat, citius fuisse curatos. Amatus Lusitanus, *cent. 3. curat. 16. aliisque locis*: refert exempla puerorum qui sanguine tempestive per venæsectionem aut cucurbitulis detracto, evaserunt, cum alii plurimi morerentur, qui hoc remedii genus non admiserant. Nicolaus Fontanus, *resp. & curat. medic. lib. 1.* scribit, se in variolis semper felicissime uti venæsectione. Sennertus, *de febr. lib. 4. cap. 12.* in pueris à venæsectione prorsus abstinendum censet, propterea quod eorum vires illam non ferant: sed in adultis, modo sint valde plethorici, eam institui posse iudicat, scilicet mox in principio, ante quartum diem, aut saltem priusquam variolæ erumpant, dum vires adhuc constant, ut sic natura oneris parte levata, quod reliquum est facilius evincere possit: at post quartum diem, vel ubi maculæ aliquæ jam erumpere incipiunt, tum ab ea penitus abstinendum existimat. Sententiæ Sennerti subscribit doctissimus Willis. Sunt tamen alii nonnulli hodierni magni practici, qui non solum ante, verum etiam post variolarum eruptionem, in plethoricis venam secandam, sicque ebullitionem sanguinis nonnihil inhibendam iudicant.

Ut dubium hoc commode decidatur, primo consideranda veniunt duo morbi tempora, unum ante, alterum post variolarum eruptionem: & Secundo videndum, quidnam ipsa natura in singulis illis temporibus per spontaneam sanguinis evacuationem feliciter aut infeliciter molietur, ut sic Medicus, qui est Naturæ minister, in sua artificiali sanguinis evacuatione per phlebotomiam instituta, ejus felicem actionem sequi, infelicem verò evitare possit. Illud autem à longa experientia Medicis omnibus notissimum est, si ante variolarum eruptionem larga contingat narium hæmorrhagia spontanea, illam feliciter, & cum ægri levamine fieri, tuncque febrem imminui, & variolas facilius ac minore copia erumpere. At verò si post variolarum eruptionem talis spontanea hæmorrhagia contingat, illam admodum infeliciter, & in exitium ægri fieri. Ex hac Naturæ operatione plus satis docetur Medicus quidnam in artificiali sanguinis evacuatione faciendum sit; scilicet, venæsectionem ante variolarum eruptionem in plethoricis feliciter institui posse; sed valde infeliciter post earum eruptionem. Ratio est, quia ante earum eruptionem, Natura per sanguinis detractionem parte oneris levata, quod reliquum est, facilius expellit: atque sic plerumque observavi, facta in plethoricis tali tempestiva venæsectione, variolas non modo

facilius & sine magna molestia, verum etiam longe pauciores erumpere, & citius maturari: quod ipsum diu ante nos quoque notavit Forestus, *lib. 6. observat. 16.* At si post eruptionem instituitur phlebotomia, tunc naturam in materiæ morbificæ coctione & expulsionem modò occupatam, plurimum debilitari, & ab illo opere avocari, cum tanto ægri damno, ut plerisque, in quibus hoc ab aliis tentatum fuerat, interisse notaverim. Atque hinc discipulis meis inculcare soleo, ut satis tempestive ad ægrum vocati, ante ulla variolarum erumpentium signa, venam secant, si necesse sit, aut utile videatur: sed postquam aliqua minima earum indicia, vel punctula rubra in cute apparere incipiunt, tunc à venæsectione prorsus absterneant, utque tunc alexipharmacis potius diaphoreticis aliisque appropriatis naturam in incepta expulsionem adjuvent.

Venam autem tempore necessitatis secari volo in ætate paulo adultiore, quæ ad venæsectionem apta est, eamque ferre potest, sed in puerili ætate, ante annum septimum vel octavum, mihi non probatur venæsectio, quamvis illam laudent Avenzoar & Averroes eamque se feliciter instituisse gloriantur, multi Itali, Galli, & Hispani, ac inter cæteros etiam Amatus Lusitanus, *cent. 1. curat. 10. & 3. curat. 16. & 5. curat. 52. ac 96.* si illis in istis calidis Regnis Italia, Gallia, & Portugallia, hoc fortassis bene cesserit, fieri potest: saltem in his nostris regionibus Belgicæ puerulis non sine periculo vena secatur.

Sic etiam Trincavellio, *de curand. morb. lib. 2. cap. 10.* hæc puerorum venæsectio non probatur, quia sæpe malus rei eventus sequitur, & si aliquando bene succedat, id potius fortunæ, quam rationi attribuendum dicit.

Eustachius Rudius, *lib. 3. cap. 13.* Duncanus Liddellius, *lib. 3. de febr. cap. 9.* & Bauderonus, *prax. med. tract. 2. cap. 3.* volunt & jubent, ut si pueris variolæ non satis cito erumpant, hirudines famelicæ dorso, natibus, & coxis admoveantur: vel harum loco partibus iisdem cucurbitulæ cum levi scarificatione, primo aut secundo die admoveantur. Sed hoc consilium, ob duas rationes, prorsus improbandum censeo. 1. Quia maxime damnosum est primis diebus corpus denudare (quod in hirudinum & cucurbitularum admotione necessario fieri deberet) & sic aeri frigido accessum præbere, quo variolarum eruptio maxime impeditur. 2. Quia periculosum est per sanguinis extractionem puerorum vires prostrernere, quæ alioqui per se nimis facile collabuntur.

## CAPUT IX.

*De remediis pharmaceuticis, & primo de purgantibus.*

**R**emedia pharmaceutica duplicia sunt, alia quæ purgant, alia quæ variolas expellunt.

De purgantibus haud parva lis & dissensio est inter practicos, scilicet an non ab iis incipienda sit curatio, & in ipso principio pars materiæ per purgantia sit evacuanda, ut sic natura, isto onere levata, reliquum quod super est commodius & facilius expellere possit. Hæc purgantia multi probant, multi improbant. Qui illa probant, in eo consentiunt, quod à catarticiis fortioribus abstinendum esse unanimiter censeant: sed lenioribus utendum putant, ut foliis senæ, rhabbaro, pilulis Ruffi, pil. ex alœ, manna, cassia, tamarindis, aliisque quæ alvum clementer lenire, & præcipue talibus, quæ simul nonnihil refrigerare valent: alii potius, cum Averrhœe, nulla etiam qualiacunque lenientia per os exhibenda, sed solis potius clysteribus ac suppositoriis, urgente necessitate, alvum subducendam judicant: atque sic hi non longe absunt ab eorum sententia qui alvum planè non movendam existimant; inter quos est Nicolaus Florentinus, qui apparentibus variolis etiam ab ipsis clysteribus abstinendum censet. E contra tamen Thomas Willis, nesciocerte quo fundamento, solis purgantibus non satis contentus, etiam ad emetica procedere audet.

Nos ad controversiæ decisionem dicimus, quod Medicus hac in parte rationem & experientiam sequi debeat. Ratio docet, naturam in bono cœpto opere non esse turbendam, nec contrario aliquo motu impediendam, aut ab isto opere avocandam: quod fieret, si motus ille quem natura molitur à centro ad peripheriam, per purgantia inverteretur à peripheria ad centrum. Experientia docet, semper in hoc morbo feliciter movere materiam morbificam à centro ad peripheriam (quod autem natura vergit, eo ducere oportet, per vias lege natura convenientes) & motum huic contrarium esse infelicissimum,

sive sponte, sive arte procedat, atque omnes alvi qualescunque turbationes, & vomitiones, esse maxime damnosas, imò ut plurimum exitiosas: quia expulsionem variolarum mox impediunt, & faciunt etiam ut quæ modò expulsæ erant statim evanescant, vel subsidant, ægrique summis anxietatibus obruti, collabentibus citissime viribus, brevi extinguantur. Præterea etiam docet, quod lenientia qualiacunque medicamenta, quantum vis mitia, facillime in hoc morbo perniciosum alvi fluxum proritent (hoc ipsum etiam in peste notavimus, tract. de peste, lib. 3. cap. 4. ejusque annot. 1. 2. 3.) & quod melius expellantur variolæ, si alvus primis diebus parum aut nihil deiciat, quam si aut sponte, aut arte liquida evadat, & frequenter defluat. Hac de causa etiam jubet Avicenna, ut in processu & fine modice astringentibus conservetur alvus ne fluat. Idem quoque sentiunt Rases & Avenzoar, nec non inter neotericos Fracastorius, Mercurialis, Hollerius, ac denique Lazarus Riverius, qui, lib. de febr. sect. 3, cap. 2. hac de re sic loquitur: *Variolis apparere incipientibus, purgatio futura est perniciofa; tum etiam si maxima vigeat malignitas, ut in constitutione epidemica, quando plurimi pueri ex eo morbo intereunt; atque hinc satius est omnino à purgatione abstinere, quia in morbis valde malignis & pestilentibus purgatio in principio morbi instituta, valde noxia est.* Ac proinde ego Medicis auctor esse velim, ut primis aliquot diebus de alvo lenienda aut solvenda non admodum solliciti sint: vel si forte necessaria aliqua de causa illam subducendam esse judicent, ut eum in finem nulla saltem purgantia aut lenientia per os exhibeant, sed eam in adultis per clysterem emollientem, & in infantibus ac pueris per suppositorium ex solo melle subducant. Longa enim praxis me docuit, hanc esse tutissimam curationis viam, aliosque qui aliter curationem instituere voluerunt, plurimos, imo plerosque suos ægros inteliciter occidisse.

## CAPUT X.

*De pharmacis diaphoreticis, & variolas expellentibus.*

**Q**uævis itaque ad tempus purgatione, & de necessitate venæsectionis deliberatione habita, Medico ad ægrum vocato statim considerandum venit, an natura in expulsionem sufficienter fungatur suo officio, nec ne.

In priore casu non opus est eam multis medicamentis adjuvare, præcipue si nulla gravia symptomata adsint, nam levia facile sponte evanescent, & variolæ satis erumpent, si duntaxat externum frigus arceatur, & æger in leni diaphoresi, seu miti calore primis tribus qua-

tuorve diebus servetur. At verò si, æger fortè sit aliquis ex magnatibus, aut magnatum liberis, qui sibi hujusmodi solis verbis Medici vix satisfieri patiuntur, tunc exhibendum est aliquantum lapidis bezoartici, cum magisterio perlarum, aut oculorum cancri, vel essentia corallorum, additis paucis granis croci, aliudve simile, quod naturam in suo opere turbare nequit, & interim adstantibus satisfacere possit.

In posteriore casu, scilicet, si natura in expulsiōe non satis videatur suo officio perfungi posse, sed auxilio opus habere, concurrendum est ad illa remedia, quæ naturam hoc in opere juvare possunt.

Inter expellentia autem, quæ ipso primo Medici accessu exhibenda veniunt, sunt pleraque illa diaphoretica & alexipharmaca, quæ in principio ad pettem exhibenda diximus, tract. de pest. lib. 3. cap. 5. è quibus Medicus ea seligere debet quæ præsentī ægro magis profutura judicabit: quippe alia infantibus & pueris, alia adultis, alia robustis, alia debilibus, alia graviter, alia leviter febricitantibus, sunt magis convenientia. Pro robustis generosa pharmaca sunt theriaca & diascordium, cum salibus absinthii, cardui bened. aliisve. Pro pueris & delicatulis imprimis eligenda talia quæ non valde ingratum saporem habent, concinnata ex speciebus liberantibus cornu cervi, coralliis, margaritis, croco, confectiōe alkermes, de hyacintho, aliisve similibus. Inter alia autem nullum aquâ nostrâ theriacali (tract. de peste, loco citato descripta) efficacius inveni, quæ non est ingrati saporis, atque hinc vel sola, vel cum paucillo grati alicujus syrupi mixta, facile infantibus & pueris exhiberi potest.

Si igitur variolæ sponte non satis prorumpant, primo exhibendum est aliquod sudoriferum, hoc vel simili aliquo modo præscriptum.

Rec. theriaca Andromachi drach. j. salis cardui ben. scrup. j. f.  
aqua cardui ben. unc. ij. misce, fiat haustus.

Rec. diascordii Fracastorii, theriaca, ana drach. f.  
extracti cardui ben. salis absinthii, ana scrup. j.  
decocti cardui ben. q. s. misce, fiat haustus.

Rec. diascordii, drach. j. cornu cervi usti, coralli rubr. preparati, ana scrup. j.  
aqua nostra theriacalis, unc. j. f.  
syrupi de rosis siccis, unc. f.  
misce, fiat haustus, in metu alvi fluxus.

Rec. aqua theriacalis unc. j. vel unc. j. f.  
sacchari per lati drach. j. misce fiat haustus, pro pueris delicatulis.

Rec. confect. de hyacintho, diascordii, cornu cervi usti, ana scrup. j.  
misce, fiat bolus.

Rec. pulveris liberantis, scrup. ij. croci gr. iiij.

cornu cervi usti scrup. j. misce fiat pulvis.

Rec. margaritarum prepar. coralli rubri prepar. cornu cervi usti, ana drach. j. manus Christi, scrup. ij.  
fiat pulvis, cum aliquo liquore exhibendus.

Rec. seminis aquilegii, raparum, ana scrup. j. f.  
nasturtii, scrup. j. fiat pulvis pro vulgaribus.

Rec. stercoris ovilli recentis drach. vi. aut unc. j. vini albi tenuis, decocti hordei, ana unc. j. f. misceantur, & stent per duas tresve horas, tunc colentur, cum levi expressiōe, & colatura detur pro haustu, qui potenter variolas propellit.

His, aliisve similibus formulis sudorifera præscribi, & commode exhiberi possunt, neque ad hoc negotium opus est multas operosas compositiones præscribere, sicut nonnulli Medici (imprimis illi qui ex Paracelli schola prodire) id magno fastu moliantur, quippe pauca huic indicationi satisfacere possunt.

Cum æger sudoriferum assumpsit, stragulis aliisve tegumentis bene contegendus, sicque ad sudorem impellendus est: cavendum tamen ne nimis tegumentis intectus, aut in hypocausto calido decumbens, nimium sudando in lypothymiam incidat, sicut enim in aliis rebus, ita etiam in hoc sudore modus servandus est.

Hic obiter notandum, quod Fracastorius, Jo. Paschalis, Forestus, Riverius, alique multi, ad meliorem variolarum provocationem, commendunt ut ægri sudaturi contegantur stragulis rubris, propterea quod speciatim rubrum istum colorem aliquid singulare ad variolarum provocationem, præ cæteris coloribus, conferre; aut sudorem talibus rubris stragulis provocatum, etiam in eliciendis foras variolis efficaciorē esse, sibi imaginantur, vel quod inspectionem rubri coloris, humores extrorsum movere putent, sicut id scribunt, Valescus de Taranta, lib. 7. cap. 15. & Duncanus Liddellius, de febr. lib. 3. cap. 9. Verum omnes mihi errare videntur, qui à rubro colore stragulorum aliquid singulare expectant: non enim color, sed calor stragulis provocatus ad variolarum expulsiōem facit: illorum autem error hinc primam originem sumpsisse videtur, quod olim, & etiam tempore avorum & attavorum nostrorum (ut videmus in nostra familia ex istis stragulis quæ hæreditate ab illis ad nos pervenerunt) optima & crassiora stragula rubro colore tingebantur, tenuiora aliis coloribus, atque hinc cum istius temporis Medici ægros sudaturos bene contegi videbant, jussisse ut stragulis rubris, id est, melioribus & crassioribus, contegerentur: hoc non satis perspicientes medici posteri, putarunt antecedentes Medicos rubris stragulis ægros suos contegi voluisse, quia ex rubro colore aliquid singulare & notabile prodidisse observassent, quod variolas foras elceret.

Cum

Cum æger jam bene, pro virium ratione, sudavit, nonnihil detegendus est, ita ut à magno sudore aliquantum releveretur: interim tamen in tepore aliquo subhumido, seu leni ac blanda diaphoresi per diem unum aut alterum est detinendus, usque dum variolæ satis bene propulsa fuerint; cavendo tamen ne à nimio calore vires prosternantur. Sic quoque Forestus, lib. 6. *observ.* 44. ægros in aere mediocriter calido versari, & corpus vestibus stragulisque ita munire jubet, ut in levi quadam diaphoresi serventur, unice cavendo, ne nimis tegumentis ac stragulis injectis, vel in hypocaustis calidis, calor corporis nimium augeatur, sicque febris magis increseat, & æger syncope correptus suffocetur. Hoc ipsum etiam bene monet Duncanus Liddellius, *de febr. lib.* 3. *cap.* 9.

Ut autem durante illa leni diaphoresi, variolarum propulsio citius & melius succedat, scilicet vulgò nostrates ficus conscissas in cerevisia tenui decoquere, & hoc decoctum ægris tepidum pro potu exhibere, idque felici plerumque successu. Forestus, lib. 6. *observat.* 41. illud simplex ficuum decoctum admodum extollit, idque passim omnibus pueris exhibet, Leonellus non in cerevisia tenui, sed in sero lactis ficus decoquit, eoque decocto commode utitur. Sunt qui pueris alacrioribus ficus comedendas concedant, neque id male, dummodo ventriculus eas sufferre valeat. Ficus enim quocumque modo in usum vocatæ hic plurimum conducunt: ratio hæc est, quia sicut cataplasmatibus incoctæ vel admixtæ, & suppurandis tumoribus foris impositæ, crudos humores coquunt, & maturationem accelerant, ita etiam illas in decocto assumptas vel commestas cito variolas propellere, earumque etiam citam maturationem efficere, quotidiana experientia docet. In harum tamen usu hoc unice observandum, ut nec illæ, nec earum decoctum detur talibus ægris quibus alvus jam liquida est, aut nimium fluit, aut in quibus alvi fluxus adventurus metuitur, nam ad hunc fluxum proclivibus facile perniciosum fluxum concitarent. Medici frequenter, non simplex illud ficuum decoctum, sed aliud magis compositum in eundem usum præscribunt: hoc fere modo.

Rec. *bordei mund. unc. j. glycyrrizæ rasæ drach. ij.*  
*cicerum rubr. unc. j. f. sem. raporum, foeniculi, ana drach. ij. ficus no. xvij.*  
*aqua q. s. fiat s. art. decoctum ad lib. ij.*

Huic decocto nonnulli carduum benedictum & scordium, alii lentes & passulas majores, semen apii, aquilegiæ, napi, alii alia nonnulla adiciunt.

Ex Avicenna & Rase hæc duæ desumuntur decoctiones, Medicis posteris usitatæ & plurimum laudatæ:

Rec. *lacca abluta, drach. v. lentium excortic. drach. ij.*

*drach. vij.*

*gummi tragacantha drach. iij.*

*aqua q. s. fiat decoctio ad lib. j. f.*

Rec. *ficuum drach. vij. lentium excortic. drach. ij.*

*lacca drach. ij. f. tragacantha,*

*sem. foeniculi, ana drach. ij.*

*aqua lib. j. f. coque ad remanentiam tertie partis.*

Potest tale decoctum etiam paulo aliter præscribi:

Rec. *uvarum passul. mund. unc. ij.*

*caricarum, no. x. lentium mund. unc. iij.*

*lacca, drach. j. f. sem. foeniculi, drach. iij.*

*sem. apii, drach. j. f. croci, scrup. j.*

*aqua lib. iij. coquantur ad lib. ij.*

Garcias Lopius simile decoctum hoc modo præscribit:

Rec. *caricarum, no. x. jujubarum sine nucleis, no. xv.*

*lentium decortic. unc. ij. sem. foeniculi,*

*anisi, apii, cydoniorum, ana drach. ij.*

*lacca, tragacantha, rosarum,*

*santalorum, ana drach. ij. aqua q. s.*

*coquantur s. art. adde colatura*

*croci pulverisati drach. f.*

In hisce decoctis Cardanus, Jo. Bapt. Sylvaticus, Amatus Lusitanus. Septalius, aliique nonnulli, lentes & tragacanthum improbant. Sennertus illa decocta lic composita per solam experientiam approbat, eo quod plurimi Medici illis feliciter usi fuerint, rationem non addit. Hanc ego nunc adjungam, estque hæc, quod ebullientem sanguinem nonnihil incrassent, eumque ad citiorem variolarum maturationem disponant: ac proinde illis, non tam in ipso morbi principio ad solam variolarum expulsionem, sed paulo post principium, ad earum simul expulsionem & citiorem maturationem, utendum censeo, sicut de ficibus modo dictum.

Sunt nonnulli qui talia decocta distillant, & aquam ab iis distillatam ægris exhibent. Verum hi in chymia prorsus stolidi sunt, & nesciunt quod lacca, ficus, lentes, tragacantha, aliaque primaria eorum ingredientia viscida & dulcia, in distillatione per alembicum non transcendant, atque hinc ex bono & efficaci decocto fiat aqua prorsus inefficax.

Si fervor non sit admodum intensus, tunc decocto ficuum etiam magno commodo adiciuntur radices helenii, utque quæ expulsionem feliciter promovent: nonnulli etiam flores calendulæ adjiciunt.

Loco talium decoctionum pro delicatioribus (ubi magna morbi vis, & ingens necessitas non urget) præscribuntur gratæ emulsiones.

Rec. *amygdalarum dulc. mundat. unc. j. sem. 4.*

*sem. 4. frig. excortic. ana drach. j. f.*  
*napi, aquilegia, cardui ben. ana drach. j.*  
*aqua hordei q. f. fiat emulsio ad lib. j.*  
*cui adde, sacchari albillimi, aut pro*  
*ditioribus, manus Christi perl. unc. f. vel*  
*q. f. ad gratam dulcedinem,*  
*misce, fiat emulsio.*

*Rec. sem. cardui ben. excortic. aquilegia,*  
*napi, ana drach. ij. melonum, drach. iij.*  
*aqua foeniculi, & cardui ben. ana unc. ij.*  
*fiat emulsio, addendo manus Christi q. f. ad*  
*dulcedinem, misce, pro infantibus & pue-*  
*ris.*

Germani omnes hujusmodi emulsiones con-  
 ficiunt cum aquis distillatis, acetosæ, boragi-  
 nis, cardui ben. scabiosæ, &c. sed nos iis par-  
 vas vires adscribimus, & solum decoctum hor-  
 dei, quod maturationem aliquo modo promo-  
 vere potest, pluris facimus.

Si qui cordatiores conditis uti velint, illa hoc  
 modo præscribi possunt.

*Rec. rad. helenii condit.*  
*conserva boraginis,*  
*violarum, ana unc. j.*  
*syrupi helenii, q. f.*  
*misce, f. conditum.*

*Rec. pulpa passularum majorum,*  
*ficuum.*  
*corticum aurantiorum condit.*  
*conserva rosarum, ana drach. vi.*  
*syrupi aurantior. q. f.*  
*misce, f. condit.*

*Rec. pulveris liberantis, drach. j.*  
*cornu cerviusti, drach. f.*  
*corticum citri condit.*  
*nucum jugland. condit.*  
*conserva flor. calendula, ana drach. vi.*  
*syrupi nuc. jugland. q. f.*  
*misce, fiat conditum.*

Chymici extollunt suas solutiones, magisteria,  
 essentias, perlarum, corallorum, cornu cervi,

aliasque, vano magis titulo, quam re, celebra-  
 tione dignas, utpote in quibus in hoc morbo  
 multa præstanda promittuntur, sed pauca pro-  
 missa præstantur, & quæ magis vendentium  
 lucrum, quam ægrotantium salutem spectare  
 videntur.

Omnibus prædictis medicamentis, si magnus  
 sit febris ardor, adiici possunt aliqua refrigeran-  
 tia: ut si decoctis addantur, borago, cichore-  
 um, lactuca, violaria, endivia, buglossa, ro-  
 sæ, sem. 4. frigid. majora, &c. conditis vero,  
 conserva violarum, rosarum, nymphaeæ, pul-  
 diatragacanthi aut diamargariti frigidi, trochisci,  
 de spodio, aliaque similia.

Præter interna medicamenta, Bauderonus,  
*prax. tract. 2. cap. 3.* ad sudoris promotionem &  
 citiorem variolarum expulsionem, etiam præ-  
 scribit epithemata, fomenta, emplastra, olea  
 pulsibus illinenda, aliaque similia foris adhiben-  
 da. Verum hæc omnia plus damni, quam uti-  
 litatis adferre, & sudoris provocationem, per  
 aeris ventilationem, magis inturbare & impe-  
 dire, quam promoveri possunt.

In horum omnium usu communis multorum  
 Medicorum error notandus venit, qui in eo con-  
 sistit, quod suis medicamentis immisceant, a-  
 cetosam, uvas crispas immaturas, fructus ber-  
 beris & ribesiorum, poma, succum, & syrupum  
 de limonibus, tamarindos, aliaque acida, idque  
 ad mitigandum, ut inquit, fervorem, & e-  
 bullitionem inhibendam. Profecto hi tota errant  
 via: mitigent, si velint, per acida fervorem,  
 & inhibeant effervescentiam in inflammationibus,  
 febribus ardentibus & tertianis, aliisque similibus  
 sanguinis fermentationibus vitiosis, sed non in  
 hoc morbo, qui per aliquem caloris excessum  
 atque ebullitionem ad crism & materiam morbifi-  
 cam expulsionem ac maturitatem adducendus, sic-  
 que finiendus est. Acida quia calorem & ebul-  
 litionem sulphuream, qualis hoc morbo adest,  
 infringunt (quemadmodum alias salsam promo-  
 vent) & materiam morbificam necessariam cocti-  
 onem ac maturationem, simulque expulsionem  
 hic impediunt, & pectori plurimum obsunt,  
 adeo noxia sunt, ut vix quidquam damnosius  
 præscribi possit.

## CAPUT XI.

### De partium corporis, præ cæteris magis afflictarum, & primo de de Internarum, curatione.

**P**ost generalem curationem, quæ  
 imprimis totius corporis conser-  
 vationem & vitam spectat nunc eti-  
 am pauca quædam dicenda sunt de  
 speciali curatione aliquarum partium, quæ non-  
 nunquam in hoc morbo magis quam aliæ affli-  
 guntur; propterea quod materia morbifica, aut  
 iis speciatim magis infesta sit, aut majore co-

pia & impetu ad illas decumbat.

Partes autem plus aliis afflictæ, sunt vel in-  
 ternæ, vel externæ.

Internæ præcipuæ sunt, pulmo, ventriculus,  
 intestina, hepar, & renes: quas affectas &  
 graviter læsas esse, ex actionum læsione depre-  
 henditur, ut etiam alibi dictum.

Etsi autem his partibus, una vel pluribus, spe-  
 ciatim

ciatim magis afflictiſ, maximum ægris periculum incumbat, & pauci ſic detenti à morbo reſurgant ac ſerventur, tamen quia non omnes moriuntur, ſed aliqui adhuc ſanantur, oportet ut Medicus qualem cunq; poteſt curationem, etiam in deſperatis hiſce caſibus, inſtituat, ſicque cauſam mali, quantum poteſt, imminuat, & ſymptomata leniat, ac denique vel ægro ſanitatē reſtituat, vel mortem leniorem procuret.

Omnibus hiſce partibus ſeu viſceribus afflictiſ in genere ſuccurrit decoctum lentium, lacca, & tragacanthæ, *precedente capite* ex Avicenna deſcriptum: lacca enim jecur, lienem & renes tuetur, lentes inteſtina roborant, tragacanthum partes ſpirituales defendit.

Peculiariter verò pulmoni laboranti conveniunt dulcia, utpote quæ maturationem promonent, tuſſim leniunt, & ſputa faciunt: qualia ſunt, ſyrupus de tuſſilagine, de glycyrriza, de jujubis, papaveris erratici, violaceus, roſaceus, diatragacanthum frigidum, diapenidium, glycyrrizæ pulvis & ſuccus, conſervæ roſarum, boraginis, violarum, aliaque ſimilia, ex quibus, pro re nata, modò linctus, modò trochiſci, modò condita conſciuntur; vel iſdem etiam decocta pectoralia, ex hordeo mundato, tuſſilagine, althea, violaria, ficubus, paſſulis, jujubis, aliſque conſecta, dulcorantur.

Ventriculi vomitum & cardialgiā principio potenter ſedat theriaca. Poſtea ſæpe exhibenda eſt talis emulſio.

Rec. amygd. dulc. mundat. unc. j.  
ſem. 4. frigid. major. ana drach. j. ſ.  
ſem. lactuca, aquilegia, ana drach. j. ſ.  
ſem. papaveris albi drach. ij. ſ.  
aqua hordei q. ſ. fiat emulſio ad lib. j.  
cui admiſce, ſyr. de papavere drach. ij.  
ſyr. de boragine unc. ſ.  
miſceantur.

Foris in regione ventriculi cum magna ſpongia facienda eſt fomentatio, ex decocto malvæ, altheæ, menthæ, falviæ, meliſſæ, majoranæ, flor. roſarum, chamomillæ, meliloti, ſem. anethi, & cumini. Poſt forum, ad majorem corroborationem illinendum eſt hoc linimentum.

Rec. olei mentha, anethi, ana unc. j.  
nucis moſcata expreſſi, drach. j. ſ.  
ſpica, philoſophorum, ana drach. j.  
miſce, fiat linimentum.

Poſt inunctionem imponendus hic ſacculus ſiccus, vel vino calido irroratus, vel in vino non nihil excoctus, & leviter expreſſus.

Rec. fol. majorana, roſmarini, ſalvia,  
flor. meliloti, roſarum, ana m. ſ.

ſem. anethi, leviftici, cumini,  
nucis moſcata, ana drach. j.  
gariophyllorum ſcrup. ij.  
fiat pulvis groſſus, ex quo inter duo lintea  
fiat ſacculus ſ. art. interſutus.

Inteſtinorum tormina & alvi fluxum ſedant theriaca, mithridatum, diaſcordium, cornu cervi uſtum, oculi cancri pulveriſati, terra ſigillata, coralum rubrum, conſerva roſarum rubrarum, decoctum primum ex Avicenna *cap. precedente* deſcriptum, vel tale amygdalatum,

Rec. ſem. papaveris albi drach. iij.  
amygd. dulc. mundat. unc. ij.  
decocti hordei. q. ſ.  
fiat emulſio ad lib. j. adde  
ſyrupi de papavere,  
de roſis ſiccis, ana drach. iij.  
miſce, fiat amygdalatum.

Hepati laboranti conveniet ſimile amygdalatum, additis ſeminibus quatuor frigidis majoribus: vel conducet etiam decoctum hordei cum roſis & ſantalidis rubris dulcoratum cum ſyrupo papaveris erratici, roſarum, & violaceo: aut præſcribendum conditum, ex corticibus citri conditis, conſerva roſarum, boraginis, violarum, & pulvere triumſantalorum, addito ſyrupo papaveris erratici.

Renes ſi ſanguinem cum urina profundant, præſcribenda erit talis emulſio.

Rec. amygdalarum dulc. mundat. unc. j. ſ.  
ſem. 4. frigid. major. ana drach. j.  
ſem. papaveris albi drach. iij.  
decocti hordi q. ſ. fiat emulſio ad lib. j.  
in qua diſſolve, tragacantha pulveriſata  
ſcrup. ij.  
ſyrupi papaveris erratici, de roſis ſiccis,  
de ſymphyto, ana unc. ſ.  
miſce, ſit amygdalatum.

Liddellius in hoc caſu commendat pulverem ſuccini, aut trochiſtorum de carabe, vel alkekengi, cum emulſione ſeminum quatuor frigidorum majorum datum.

Hæc ſunt primaria quæ adhiberi & præſcribi queunt in dictis illis periculoſiſſimis caſibus, ubi viſcera interiora graviter ſunt afflicta, ſecundum quam methodum Medici adhuc plura alia ſimilia effingere poſſunt, & debent, non enim in maxima neceſſitate & mortis periculo ſtatim pro deplorato derelinquendus eſt æger (hoc foret præter Chriſtianam charitatem) ſed oportet ut Medicus ſua faciat, reliqua Deo committat, qui etiam alias plurimos deſperatos ægros ſanitati reſtituit.

## CAPUT. XII.

## De externarum partium curatione.



Xternæ partes, quæ plus cæteris affligere solent, sunt manus & pedes, os & fauces, nares, aures, oculi, & facies.

In eruptione variolarum, aut dum maturefcere incipiunt, interdum ingens dolor aut pruritus ægrotantes affligit in volis manuum & plantis pedum, eo quod densior illarum partium cutis eruptionem impediat. Huic symptomati medebris, si partes illas in aqua calida, vel in aqua cum lacte dulci mixta, vel in decocto emolliente diu foveas: qua de re etiam infra aliquid notavimus, cap. 13. de morbillis.

Si magna copia variolarum in ore & faucibus eruperit, molesta inde fieri solet respiratio & deglutitio. Hinc os frequenter colluendum, & fauces gargarizandæ sunt cum decocto ficum simplici: vel si forte magnus fervor, aut inflammatio adsit, poterit illud hoc modo præscribi.

Rec. hordei mundat. unc. j. f. ficus confissas, no. xvij.

passularum mundat. unc. j. f. fol. althea, violaria, endivia, lactuca, ana m. j. f. flor. rosarum pallid. m. j. sambuci, m. f. aqua q. f. fiat decoctum ad lib. ij. pro collutione oris.

Cum jam maturæ sunt variolæ, ad faciliorem deglutitionem & citiorem variolarum ruptionem, subinde deglutienda est pilula, magnitudinis nucis avellanæ, ex butyro recenti insulso, saccharo obvoluta: hæc enim mirabiliter faucium tumentes variolas dissolvit. Si hoc tamen non succedat, variolæque integræ remaneant, & magna respirandi deglutiendique difficultas plurimum urgeat, tunc parva spongia bacillo firmiter alliganda, eaque syrupo violaceo intincta, fortiter in fauces intrudenda est, ut sic variolæ illic vi disrumpantur & angustia dissolvatur. Facta disruptione, gargarizandum est cum decocto hordei plantaginis, & rosarum rubr. dulcorato cum melle rosaceo & syrupo de symphyto.

Nares, ut à variolis defendantur, sæpe acetum naribus odorandum obiciendum est. Sic etiam scribit Forestus, Benedictum Faventinum, ante earum eruptionem, ægris odorandum dedisse acetum in quo rosæ coxerant: aceti odorem commendant quoque Liddellius & Riverius. Variolæ autem si in naribus copiosæ eruperint, cum pluma subinde illinendæ sunt oleo amygdalarum dulcium. Si verò in crustas duriusculas abeant, naresque obstruant, sicque mo-

lestam respirationem efficiant, tunc butyrum recens insulsum naribus infarciendum est, quo crustæ mirabiliter emollitæ excidere, & sic obstructio brevi dissolvi solet. Suadent quidem alii, ut ægri hæc vel illa decocta naribus attrahant; sed illud pueri facere nequeunt, & in adultis etiam, propter obstructionem, peragi non potest: verum solum butyrum, naribus aliquoties immissum, totum negotium feliciter absolvit, ita ut aliis opus non sit. Si verò in naribus exulceratio contingat, linimento ex oleo de vitellis ovorum & succo plantaginis, in mortario plumbeo subactis, curabitur; cui, si magis luccandum sit, etiam aliquantum unguenti de tutia admiscendum est.

Aures si doleant vel pruriant, curandum ne manibus contrectentur; & si fluant, ut sæpe solent, dimittendum est, & curandum ut apertæ maneant. At si dolor urget, spongia immergenda est decocto fol. altheæ, flor. chamomillæ, meliloti, rosarum, sem. foenugræci, anethi, & cumini, eaque tepens auri aliquamdiu imponenda.

Oculorum medicatio partim consistit in præservatione, partim in curatione. Ut oculi à magna variolarum copia præserventur, nonnulli palpebras sæpe lavant cum aqua rosarum & plantaginis, in qua nonnihil tutiæ præparatæ insulsum, aut pauxillum sief albi & comphoræ admixtum fuerit. Bauderonus eundem in finem hoc collyrium præscribit.

Rec. fol. rubi, plantaginis, rosarum rubr. ana m. f. coquantur in aqua fabrorum, ad unc. iij. in colatura dissolve

croci scrup. j. camphoræ gr. v.

albumen unius ovi, misceantur.

hujus aliquot guttulas singulis fere horis oculis instillat, & linteola eodem madida palpebris imponit, & ægrum à magno lumine remotum in loco obscuro detinet.

Liddellius hoc præferibit.

Rec. aqua rosarum unc. ij. plantaginis unc. j. pulv. sem. sumach. drach. ij. misce; ad ignem lentum calefiant, coquantur cum forti expressione: adde colatura, camphoræ scrup. j. croci, gr. v. misce, fiat collyrium. quo cum tenui linteo oculi sæpe madefiant.

Mercurialis hoc componit.

Rec. aqua rosarum, plantaginis, ana unc. j. sumach,



*sumach. unc. l. macerentur per noctem.  
& cum modico albuminis ovi, fiat mistura.*

Vel sumit lac chalybeatum cum aqua rosacea mistum, cui interdum myrrhæ aliquantillum admiscet, ad pruritus & dolorem leniendum. Ego omnium optimum esse comperio si crocus pulverisatus misceatur cum lactis dulcis crema, superius lacti innatante, hæcque mixtura palpebris cum pluma illinatur, ejusque etiam nonnihil carunculæ in angulo majori admoveatur. quo ipso, addito pauxillo sief albi, etiam feliciter utor ad curationem, cum oculi modo læsi sunt.

Si forte palpebræ à variolis præservari nequeant, tunc frequenter contingit, ut ab iis valde intumescant, ita ut oculi ob illum tumorem omnino claudantur. In eo casu notandum, palpebras, non obstante isto tumore, singulis diebus semel aut bis, digitis à se invicem dimovendas, & nonnihil aperiendas esse, ut sic liquor intus subsistens effluat, qui alioqui intra palpebras crassescens albuginem parit. At si forte ob tumoris magnitudinem commode aperiri nequeant, prius foveandæ sunt cum spongia molli, intincta in jure vervecino, aut tepido decocto fol. althææ, flor. rosarum pall. meliloti, & seminis scœnugræci: eoque fotu aliquamdiu adhibito, admotis digitis apertio palpebrarum tentanda est. Si post detumescentiam, & hinc liberam palpebrarum apertionem, nebulae albuginæ in oculis obortæ, visum obfuscentes, observentur, saccharum candum album subtilissime pulverisatum, per pennam scriptoriam à pluma rescissam, in oculos subinde inflandum est: quo solo illas nebulas sæpe feliciter sustuli. At si forte duriores evaserint, & oculos planè excæcent, tunc isti saccharo cando addenda est quarta aut sexta pars lapidis calaminaris subtilissime cum saccharo pulverisati: tali pulvere albuginosæ istæ nebulæ egregie tolluntur, visusque restituitur. Si à variolis oculi ulcerentur, curandi erunt hoc collyrio.

*Rec. cerusa lota drach. iij. sarcocolla drach. j.  
gummi tragacanthi scrup. j. opii, gr. ij.  
cum mucilagine tragacanthæ in aqua  
plantaginis extracta, fiant trochisci,  
qui usus tempore dissolvendi sunt in  
lacte muliebri, vel aqua rosacea.*

Faciæ medicatio, non minus quam oculorum, partim in præservatione, partim in curatione consistit.

Præservatio ea de causa non instituitur, ut variolæ in facie prorsus non erumpant (si enim illic earum eruptio impediretur, forte labes illa alias interiores partes, ut cerebrum, meninges, oculos, aliaque, gravius feriret) sed ut decedentes & exsiccatae variolæ quam minimas foveas & cicatrices relinquant. Hunc in finem varia excogitata sunt topica. Nonnulli erumpentibus jam variolis totam faciem identidem

fovent cum decocto illo in quo pisa ad summam mollitiem excocta sunt. Alii faciem pluma bis de die illinunt cum, oleo raparum, egregio successu. Forestus laudat oleum amygdalarum dulcium, Riverius verò oleum nucum. Alii lardum in camino fumatum, & in forcipe ignito seu ab igne candente assatum, seu tostum, & liquatum aqua rosacea exceptum, instar mollis unguenti, feliciter illinunt; hocque magni practici Timanni Geslelii ordinarium erat. Alii porci masculi recens macerati omentum in veru ad ignem assant, & distillantem pinguedinem supposita aqua rosacea excipiunt, eamque toti faciei illinunt; & mox faciem totam contegunt ejusdem porci lardo in tenues laminæ conscisso: hæc bis de die renovant, usque ad perfectam variolarum maturationem (quæ sic longe mitius maturantur) & usque dum decidunt: hoc dominarum aulicarum secretum est. Certe hæc omnia non contemnenda, sed egregia, atque nonnunquam in usum vocanda existimo, præcipue in iis ditioribus & magnatibus qui sibi imaginantur Medicum magno aliquo molimine plus præstare posse, quam Naturam proprio conamine. Interim, ego ordinariè meis ægris consilium do, ut in principio molli spongia foveant totam faciem cum jure carnis vervecinæ ad summam mollitiem coctæ, ablata pinguedine (hæc enim cutem nonnihil denigrat, vel obfuscat) idque aliquoties de die repetant, usque ad variolarum maturationem, postea verò reliquum totum negotium naturæ committant: imò multis suadeo ut ab ipso principio negotium naturæ committant, imprimis si variolæ non valde magnæ & copiosæ sint. Præterea & hoc maxime commendo, ut caveant ne variolas scalpendo detrahant, experientia enim docet, eos quibus variolæ sponte, vel sine apertione exsiccantur ac decidunt, paucioribus minoribusque vestigiis & cicatricibus deformatos evasisse: quod ipsum etiam notarunt Garcialopius, & Forestus, lib. 6. observ. 50. in scholio.

Verum hic jam examinandus venit aulicorum mos, qui de pulchritudine sua magis solliciti præ aliis existentes, solent variolas maturas ac aurea aperire, & sic puseducere, antequam (ut inquirunt) cutem profundius erodat (hoc ipsum etiam facere jubent Arabes, multique Medici neoterici) & sic profundas foveas faciat. Dicendum hanc apertionem prorsus damnosam existere (hoc ipsum etiam bene notavit Riverius) & semper à nobis compertum esse, post illam vestigia valde profunda & fæda relictæ fuisse. Hanc experientiam quoque gemina suffulcit ratio. Nam primo, apertio seu perforatio illa non potest aut debet institui, nisi cum variolæ jam factæ sunt maturæ & albæ; atqui cum pure albo & cocto existente, omnis ab eo acris fervor & potentia cutem carnemve ulterius exedendi, absit, imò & pustulæ sponte exsiccari incipiunt, omnino frustra supervacaneum illud apertionis opus ac aurea instituitur, cum ulterioris erosionis nullus metus amplius super sit. Secundo, per illam apertionem

apertionem educto pure, tunc cavitates mox ab ambiente aere exsiccantur, & indurescunt, unde fit, ut substrata caro altius succrescere, easque ulterius replere nequeat: at si variolæ non aperiantur, sed pus in iis paulatim sponte exsiccari permittatur, tunc substrata caro mollis servatur, tantumque succrescit, ut ante omnimodam puris exsiccationem vestigia carne repleantur, ita ut tandem delapsis exsiccatis variolis, vix amplius ullæ foveæ superstites maneant. Hæc eadem posterior ratio etiam docet, omnino impediendum esse, ut ægri variolas purientes unguibus scalpendo non dicerent, aut ante exsiccationem detrahant; certa enim experientia docet, tali modo semper fœdas cicatrices & profunda vestigia relinqui. Atque hinc in pueris & infantibus istius rei exactam curam haberi mando, & eorum manus linteaminibus obvolvi, vel caligis indui, vel fasciis ita ligari jubeo, ut eas faciei admoveere, in eaque variolas scalpere non possint. Hoc ipsum etiam monens Auctor libri de proprietatibus rerum, sic inquit: *Caveat autem nutrix vel Medicus, tam in puerulo, quam in adulto, ne talium pustularum vesicula, nec propter pruritum, nec propter aliud, rumpantur, seu aperiantur, maxime circa faciem: quod si perforantur variola, perpetuis temporibus vestigia apparebunt.* Illud etiam tibi ab experientia constare scribit Forestus, loco citato.

Apertas variolas Arabes aqua salis (hanc etiam laudant Jo. Paschalis, Eustachius Rudius, & alii.) multi decocto santalorum, rosarum rubr. plantaginis, myrtillorum, & saniculæ abluunt: sed tales ablutiones rejiciendæ sunt, cum cavernulas variolarum nimis cito exsiccant, sicque carnem succrescere impediunt, & hinc profundiores foveæ remaneant.

Contingit interdum ut à variolis superstites remaneant exulcerationes quædam fœdæ, cutem erodentes. Has Amatus primo lavat hoc decocto.

Rec. florum rosarum rubr. myrtillorum,  
fol. lentisci, summitatum quercus,  
tamarisci, ana par. aq. aqua q. s.  
fiat decoctum, quo ulcerationes laventur,  
& linteo abstergis hunc pulverem inspergit.

Rec. thuris, mastichis, rosarum rubr. sarcocol-  
la, ana part. aq.  
fiat pulvis subtilis.

Forestus in eodem casu, præter unguentum camphoratum, etiam utitur hoc unguento de plumbo, descriptionis Montagnanæ, quod etiam valde commendat Duncanus Liddellius.

Rec. plumbiusti unc. ij. lithargyri unc. j.  
cerusa lota, aceti, ana unc. l.  
olei rosacei unc. iij. mellis rosacei unc. j.  
vitel. ovorum no. iij. myrrhæ unc. l.  
cera, q. s. fiat s. art. unguentum.

Sanatis variolis maculæ rubicundæ aliquamdiu

superstites manent, ad quarum citiorem sublationem nonnulli eas bis terve de die lavant cum cocto lupinorum & fabarum, in quo aliquetiam coquunt radices arundinis & abrotanum: alii utuntur aqua distillata florum fabarum & sigilli Salomonis, alii miscendo aliquantum succi limonum: alii maculas abluunt cum aqua milleflorum, id est, stercoris vaccini: Jo. Paschalis commendat lotionem cum aqua rosmarini: Mercurialis celebrat aquam distillatam ex duobus pedibus vituli, totidem limonibus, & pauxillo serpentariæ: alii inungunt unguentum rosaceum, aut pomatum, cui oleum tartari admixtum est. Sed ego in praxi à longo tempore observavi, illas citius sponte evanescere, si omnino nihil adhibeatur, nam aer externus cutem post exulceratas variolas de novo regeneratam paulatim exsiccant & indurat, & sic paulatim etiam imminuitur macularum istarum color, imò tandem penitus evanescit, ubi nova illa cutis cum reliqua prior eute æqualem duriem adeptæ est. Ac proinde ego communiter nullas lotiones aut inunctiones cum in finem præscribo, cum illas cutis indurationem & macularum sublationem potius tardare, & solum aërem externum optimum macularum remedium esse comperiam. Si tamen aulicis quibusdam Domicellulis sine aliquo remedio topico satisfieri nequeat, illis commendo lotionem ex aqua fabarum, cui pauxillum aquæ tartari (vulgo male appellant oleum) vel succi limonum admixtum sit, vel lotionem ex lacte virginali.

Ad superstites cicatrices & relicta vestigia tollenda, multi axungiam humanam, aut sebum vervecinum, alii multa alia inungenda & imponenda præscribunt. Bauderonus, *prax. tract. 2. cap. 3.* hæc proponit. *Conducit, inquit, aqua mellis cum terebinthina distillata. Idem confert pinguedo asini cum oleo liliorum liquata: & oleum ovorum, & de lateribus. Sanguis leporis aut tauri calide admotus cavitates implet. Idem corium suillum salsum & calefactum, si fricentur vestigiorum cavitates, cutem æquant. Idem valet axungia anseris, anatis, aut gallinae, & cinis ungularum arietis, aut caprae, aut putaminum ovorum, ad cutis asperitatem delendam.* Idem ad tubercula eminentia æquanda hæc præscribit.

Rec. olei liliorum, axungia anseris,  
& asini, ana unc. j. unguenti citrini unc. l.  
misce pro litu tuberculorum hora  
somni, per multos dies continuando.

Die sequenti mane lavetur facies hoc decocto.

Rec. rad. liliorum albor. unc. ij.  
rad. ari, vel serpentariae unc. j.  
malum citrium in frusta divisum, no. j.  
furfuris macri M. j. aqua q. s.  
coquantur pro lotionem faciei tepide mane.

Forestus præ multis aliis hoc unguentum prædicat.

Rec. olei

Rec. olei amygdalatum dulcium,  
 liliorum alborum, ana unc. j  
 pinguedinis capi, drach. iij.  
 pulveris rad. paonia, iridis Florent.  
 labargirii auri, ana scrup. f.  
 sacchari candi scrup. j.

His omnibus in calido mortario bene mistis, &  
 per linteum expressis, inunge dicta loca mane &  
 sero: postea verò aqua è pedibus vitulinis distil-  
 lata, aut aqua millefoliorum bene abluantur.

Verum hæc omnia plerumque frustra sunt, nam  
 ubi semel exsiccatæ sunt variolarum foveæ, &

cicatrices nimis cavæ vel elevatæ constant, tunc  
 omnino fixæ permanent, nec unquam ullis to-  
 picis immutantur. Verum si nimis rubicundum  
 aliumve fœdum colorem habeant, ille per lac  
 virginale, aliaque ad maculas delendas modò  
 præscripta, fortassis aliquantum imminuetur,  
 aut penitus tolletur, sed ulterius in fovearum  
 curatione & repletionem nihil proficietur. His  
 adde, quod axungia humana, vervecina, asi-  
 nina, anserina, aliæque variæ, cutis splendo-  
 rem adeo obfuscent, & subnigricantes reddant,  
 ut longe majorem, quam ipsæ variolarum cicat-  
 rices & foveæ, fœditatem inducant.

## CAPUT. XIII.

## DE MORBILLIS.



Orbilli sunt maculæ, seu tubercula  
 parva, rubra, in cute erumpentia,  
 non suppurantia, cum febre con-  
 tinua, à sanguinis peculiari fermenta-  
 tione orta.

Differunt à variolis accidentaliter, seu se-  
 cundum magis & minus: quia variolæ in altum  
 exsurgunt & suppurantur; morbilli verò vix in  
 molem conspicuam attolluntur, & non suppu-  
 rantur: atque hinc etiam hi citius & minore  
 cum periculo, quam variolæ, finiuntur (er-  
 rant qui in his majus periculum subesse putant,  
 quam in variolis) & frequentissime pueros, ra-  
 rius ætate grandes, aut senes, aut qui prius vari-  
 olis laborarunt, corripunt: variolis enim qui  
 laborarunt, illi plerumque (& si non semper) à  
 morbillis excusantur; sed hi tamen nihil immu-  
 nitatis ab illis promittunt.

Cutem & epidermidem habent pro subjecto in  
 quo erumpunt & conspiciuntur: an verò simili-  
 ter, sicut variolæ, internas quoque partes non-  
 nunquam obsideant, merito dubitandum, imò  
 vix credendum cenfeo, cum illud à nullis Medi-  
 cis hætenus compertum sciam.

A subtiliore, calidiore, & siccior humore  
 sanguineo subbiliofo, specifico modo fermenta-  
 nte, oriuntur, atque hinc citò egrediuntur,  
 & non assurgunt in pustulas, aut alicujus mo-  
 menti tumores, sicut variolæ, sed parvæ in  
 principio exortæ, fiunt maculæ rubræ ac latæ,  
 cum levi aliqua cutis asperitate. Post septimum  
 fere diem, imò frequenter citius, sine ulla ex-  
 ulceratione evanescant, nullo sui veltigio super-  
 stite, nullaque fœditate relicta.

Causa eadem censetur cum causa variolarum,  
 sed differentia horum morborum in eo consistit,  
 quod materia è qua generantur, in variolis cras-  
 sa, sanguinea, & humida sit, unde hæc in pustu-  
 las assurgunt; in variolis verò tenuis, siccior, &  
 subbiliofa existat, ut modò dictum.

Plerumque semel duntaxat unum hominem  
 prehendunt, neque tam frequenter bis aut ter re-

deunt, sicut variolæ, quoniam horum materia,  
 ob longe majorem tenuitatem, prima invasione,  
 ut plurimum tota diffatur & consumitur. Vi-  
 deantur super hac re quædam præcedente cap. 3. in  
 sententia Arabum.

Febris iis adjungitur, sicut variolis, imò à  
 febre oriuntur, cujus quasi critica evacuatio  
 sunt.

Signa diagnostica imminentes morbillos indi-  
 cantia, eadem sunt quæ variolas imminentes  
 præfagiunt, descripta præcedente cap. 4. Præ-  
 sentes morbillos visus dijudicat.

Prognostica sunt, sicutò appareant, cum fe-  
 bris, anxietatis, aliorumque symptomatum im-  
 minutione, & per tres quatuorve dies in statu  
 persistant, postea verò paulatim evanescant.  
 Mala sunt, si tarde erumpant, gravia sympto-  
 mata adsint, & primo die rursus dispereant. Por-  
 rò multa alia prognostica cum variolis communia  
 habent descripta præcedente cap. 5.

Curatio in principio à variolarum curatione  
 non differt, quippe datis sudoriferis appropria-  
 tis præcedente cap. 10. descriptis) ægri ad sudo-  
 res sunt impellendi, & in leni diaphoresi, usque  
 ad perfectam eruptionem, servandi: omne fri-  
 gus ab iis arcendum, & decoctum hordei, gly-  
 cyrrizæ, oicerum ac ficuum, sæpius exhiben-  
 dum, hoc enim morbillos non minus feliciter,  
 quam variolas expellit. Hac methodo proceden-  
 dum, usque dum rursus sponte & salutariter  
 evanescant.

Nullis hic topicis opus est. Interdum tamen  
 contingit, ut ingens, molestissimus, & into-  
 lerabilis pruritus ac punctio in plantis pedum, &  
 volis manuum accedat (hoc symptoma etiam in  
 variolis interdum acriter argere, dictum præce-  
 dente capite) ad cujus symptomatis mitigationem  
 certo experimento conducit, si pedes & manus  
 continuo detineantur in aqua calida: tali enim  
 modo pruriginosa illa punctio optime sedatur, &  
 morbilli in plantis pedum & volis manuum me-  
 lius emergunt. Hoc experimentum fuit olim

arcanum Nicoli Florentini, à quo illud mutuatus est Bafius Aftarius Papiensis, *lib. de curand. febr.* Hac de re singularem observationem habet Forestus, *lib. 8. observ. 42.*

Morbillis finitimus est, eandemque fere originem ac causam agnoscit, & similem curationem requirit, alius affectus, qui Belgis *roodjonck, roodhont, & rootgront*, appellatur; quem Philippus Ingrassias, *de tumor. p. n. tom. 1.* dicit Neapolitanis vocari *Rossaniam, & rossaliam*; Forestus, *lib. 6. observ. 59.* *Purpuram & Rubores* nominat. de hoc loquitur Halii Abbas, *lib. 8. theoric. cap. 14.* Est species, inquit, aliqua, quæ vocatur *Rubeola, quæ ex sanguine calido ac subtili, & non multum malo oritur, & hæc species cum ad statum pervenerit, similis sit milii granis, aut paulo major, & ejus color rubeus, nec aperiantur pustula, sed insensibiliter discutiuntur & evanescent.*

In hoc affectu maculæ rubræ & quasi ignitæ, sæpe exilibus tuberculis, instar milii seminis, interspersæ, cum vix effatu digno tumore, per universum corpus, quasi parva quædam erysipelata, erumpunt in principio morbi, id est,

primo, secundo, tertio, quartove die. In statu verò universum corpus rubrum & quasi ignitum apparet, aliis magis, aliis minus, ac si universali erysipelate laboraret. In declinatione rubor ille imminuitur, & maculæ latæ, ut in principio, iterum apparent, quæ tandem quinto, sexto, septimo, octavo, vel nono die evanescent, epidermide squamularum adinstar decedente.

Malum hoc ut plurimum infantes & pueros, raro adultos infestat, & sicut morbilli, plerumque solam cutem cum epidermide occupat, ac facile curatur, imprimis si frigus externum ab ægris arceatur. Contingit tamen nonnunquam, & si rarius, etiam internas partes ab eodem (sicut in variolis quoque interdum accidit) obsideri, magno ægri periculo: tunc febris intensa, calor maximus, & sitis ingens existit, ac sæpe pulmonum, faucium, aliorumque viscerum inflammationes, una cum difficili respiratione, summa anxietate, deliriis, hypochondriorum tensione, aliisve pravis symptomatibus, accedunt: quæ de re notabilem talis ægri historiam describit Senertus, *lib. 4. de febr. cap. 12.*

# TRACTATUS

## DE

# VARIOLIS & MORBILLIS.



D majorem perfectionem, & solidiorem antedictorum confirmationem, aliquot ægrorum, qui in praxi nobis occurrerunt, Historias jungemus, non plane communes, sed imprimis tales, in quibus singulare quid notari potuit.

## HISTORIA I.



Nno 1640. post ver humidum ac tepidum secuta est Æstas fervida & mediocriter sicca, quæ febres tertianæ, cum continuæ, tum intermittentes, multos invaserunt. Circa medium mensis Julii variolæ & morbilli grassari cœperunt; qui morbi, sed maxime variolæ, mense Augusto magna incrementa sumpserunt, & sic usque ad finem istius anni continuarunt, plurimosque è medio sustulerunt: imò quibus dictis illis mensibus alii contingebant morbi, illis morbilli, sed longe frequentius variolæ, brevi adjungebantur.

Varios hoc tempore vidimus, qui cum variolas copiosissimas habuissent, vix ab iis sanati, paulo post in idem malum reciderunt, atque illis ista secunda vice sæpe multo majore copia eruperunt, quam prima: imò aliqui visi sunt qui intra spatium sex

sex mensium ter copiosissimis variolis laborarunt, quod alioqui raro solet contingere, imprimis tam parvo temporis spatio.

Hi morbi à febre continua, in aliis majore, in aliis minore, initium sumebant, cum pulsu plerumque oppresso, parvo, crebro, & inæquali. Ut plurimum gravia aderant symptomata, ingens anxietas, cordis oppressio, oris siccitas, extremorum tremores, deliria, &c.

Multis post primum aut secundum, sed pluribus non ante tertium, quartum, vel quintum diem variolæ prodibant. Quibus tardius apparebant, illi periclitabantur, multique moriebantur, nam à morbi violentia sæpe primis diebus adeo debilitatæ erant vires, ut tandem apparentibus variolarum prænunciis rubris maculis, natura nimis debilis easdem satis propellere non posset.

Qui sanguinem vomitu, aut tussi rejiciebant, aut urinas cruentas mingeant, illi fere omnes moriebantur, & ex sexcentis talibus vix unum evasisse novimus: in his quippe interiora viscera variolis obfessa adeo corrumpebantur, ut nunquam integritati restitui possent.

Quibus in ore, lingua, palato, faucibus aspera arteria, & oesophago variolæ magna quantitate erumpebant, his ante earum maturationem & disruptionem deglutitio & respiratio valde angebantur, indeque etiam nonnulli fuerunt suffocati.

Qui in morbi principio ab imperitis purgabantur, illi maxima ex parte moriebantur. Cum alvo dura ac constipata melius erumpebant variolæ & morbilli, quam cum fluida.

Aqua nostra theriacalis ad primos sudores movendos in pueris plus profuit, quam ullum aliud diaphoreticum. Huic in adultis theriaca vel diascordium admiscebatur.

Post sudores potus decoctionis ficuum variolas admodum (1.) propellebat, imprimis si glycyrriza, carduus benedictus, scabiosa, ciceres rubri, aliaque similia adjecta forent: Ab eo tamen abstinendum erat si alvus lubrica existeret.

Vulgares & rustici stercus ovillum & caballinum, in vino vel cerevisia tepide maceratum, & per linteum colatum suis ægris exhibebant felici successu, hinc enim sudores & variolæ insigniter expellebantur.

Magna curationis pars in eo consistebat, si frigus ab ægris summa cura arceretur. (2.)

### Annotationes.

I. **D**E usu & viribus ficuum, earumque in curatione horum morborum utilitate, & decoctis ex iis componi solitis, supra latius egimus cap. 10. Avicenna de earum viribus, lib. 4. sed. 1. tract. 4. cap. 10. ita loquitur. *Aquæ ficuum est bona valde: ficus enim sunt vehemens expulsionis ad exteriora, & illud est unum de causis evasione à nocumento variolarum.*

II. Hoc ipsum de frigore etiam notavit Avicenna, loco citatio: Cum incipiunt, inquit, va-

riola apparere, tunc fortassis erit infrigidatio causa erroris magni, ex eo quod retinet superfluitatem interiorius, & desert eam ad membra principalia, cum eo quod non sit eis possibile exire & apparere, & accidit inquietudo, & angustia, & fortasse accidit syncope. Imò oportet ut juventur superfluitates in hujusmodi dispositione, cum eis quæ faciunt ebullire, & aperiunt oppilationes, sicut fœniculum, & apium cum saccharo, & succus eorum, aut decoctio radicum & seminum.

## HISTORIA II.

**F**ilia Joannis Crasselt, octo annos nata, variolis laborabat, quæ primis tribus diebus per totius corporis cutem copiosissimæ epullularunt. Quarta die accessit raucedo cum tussicula & ventris dolore. Febris à principio huc usque in eodem fere statu permansit. Sexta die diarrhæa purulenta cum torminibus intestinorum sequebatur, atque etiam per tussim purulentam & sanguineam multa ejiciebantur. Medicamentis nihil juvantibus & viribus prostratis, octava die obiit. Eodem plane modo extincta fuit filia Nicolai ab Hervelt.

Anno-

## Annotatio.

**I**N his egris, procul dubio, variolæ etiam interna viscera, intestina & pulmonem, obfederunt, & fortassis etiam hepar, aliaque plura, quorum, affectiones in hoc morbo lethales esse solent. Quod autem interiora viscera interdum variolis corripantur, illud ab autopsia docet Fernelius, lib. 2. de abdit. cap. 12. Sæpe, inquit, deprehensum, quosdam ab interita fuisse dissectos, quibus jecur, lien, pulmones, omnia- que interiora, haud secus atque cutis, fœdissimis papulis manantibus scaterent. Illud ipsum quoque notavit Paræus, lib. 19. cap. 1. mihi, inquit, & Richerdo Huberto chirurgo videre licuit in duabus puellis, quarum una quatuor, altera septendecim annos nata erat: utrique enim sex morbillis (putar variolas) mortua & dissecta interiora viscera crustosis pustulis, his similibus quæ in cute emergunt, obfita visa sunt.

## HISTORIA III.

**U**Xor Jacobi de Claer, mulier 30 annorum, febris correpta fuit non violenta, cum quadam soporositate, cardialgia, capitis gravitate & subinde leni aliquo intercurrente delirio: quia autem variolæ tunc grassabantur, suspicatus sum ei variolas subsecuturas, utpote quibus nunquam laboraverat. Ad curationem igitur, alvo clystere subducta, sudoriferum dedi.

*R. theriacæ, diascordii Fracast. ana drach. f.  
salis absinthii scrup. j. aquæ theriacalis unc. ij.  
misce fiat haustus.*

Hoc sumpto bene sudavit: sed morbo in eodem statu permanente, illud ipsum postridie reiteratum est, pari eventu, nam etiam ab isto sudore morbus non est immutatus. Tunc hoc decoctum bibendum præscripsi, & ægram per triduum in leni diaphoresi servari jussi, quod facile pertulit, nam erat bonæ indolis & Medico valde obediens.

*R. Hordei mundat. radicum fœniculi, ana unc. j.  
rad. helenii, unc. f. glycyrrizæ rasæ, drach. ij.  
cicerum rubr. unc. j. f. herb. scabiosæ, man. f.  
sem. fœniculi drach. j. f. ficus n. xvij.  
aquæ q. f. fiat s. art. decoctum ad lib. ij.*

Cum nec tunc quidem ulla variolarum indicia apparerent, iterum alvum clystere subduxi, & postridie venam in brachio secari jussi. Die tertia rursus assumpto sudorifero, mediocriter sudavit, & exinde per decem dies continuavit in usu prædicti decocti. Postea, quia febris, cum anxietate, rursus aliquantum increfcere videbatur, & somnus gravior, magisque turbulentus fieret, rursus dedi superius medicamentum diaphoreticum, addendo *extracti cardui benedicti unc. f.* Cum ab hoc fortiter sudasset, cœperunt in cute passim apparere prænunciæ variolarum, maculæ rubræ: ægra rursus in leni diaphoresi per biduum continuavit, decoctum ante memoratum pro potu bibens, eoque tempore variolæ admodum elevatæ sunt, & simul febris cum aliis symptomatibus paulatim evanuit. Toto morbi tempore in victu usa fuit jusculis tenuibus: alvum alternis diebus sponte semel evacuabat.

## Annotatio.

**I**N hac ægra prope modum desperaveram de variolarum eruptione, & me in judicio meo deceptum putaveram, nunquam enim tam tarde, scilicet vigesimo die, earum eruptionem futuram credideram: nec adeo seram eruptionem unquam in aliis videram. Hinc patet vere dixisse Hippocratem, remedia quæ bene adhibentur non esse mutanda, quousque nulla alia urgens indicatio illa mutare cogat.

HISTO-

## HISTORIA IV.

**F**ilius Eduardi Wilmer, decem annorum, cum febricitaret, eique variolæ in variis corporis partibus apparere inciperent, ad eum vocatus fuit Egmondus Anglus, chirurgus, qui ægrum ab anxietate, qua premebatur, liberaturus, medicamentum aliquod purgans exhibuit. Hinc brevi multum adaucta anxietas, & gravis diarrhœa, cum summa virium prostratione, subsecuta est. Variolæ protinus delituerunt, & æger sequente nocte obiit.

## Annotatio.

**H**ippocrates, *sect. 1. aphorif. 21.* sic inquit: *Quo natura vergit, eo ducere oportet, si vergat, per vias lege natura commodas.* In variolis autem natura vergit à centro ad peripheriam, eamque viam ad materiæ illius malignæ fermentantis & ebullientis evacuationem commodam esse, jam multis seculis docuit experientia. Quapropter Medicus in curatione hujus morbi illud imprimis advertere debet, ut naturam vel sponte suum opus peragere sinat, vel si debilis videatur, eam in sua actione adjuvet; non verò salutarem ejus motum alio contrario motu inturbet, & ad exteriores partes salutariter declinantem malignam materiæ, ad interiores & nobiliores introrsum retrahat. Talia enim, (inquit Hippocrates, *4. aphorif. 2.*) *educenda è corpore, qualia sponte prodeuntia utilia: quæ verò contrario modo prodeunt, cohibenda.* At evacuatione per intestina, non educuntur talia qualia educere oportet, neque ea procedunt secundum salutarem naturæ motum, nec per vias lege naturæ com-

modas, ergo in hoc morbo, per intestina medicamentis evacuatio non est promovenda, & si sponte procedat, citissime est cohibenda. Hinc etiam Rases, *de re med. lib. 10. cap. 18.* sic inquit: *Summe cavendum, ne cui post eruptionem exanthematicum, sive sublimium, sive latorum, alvus medicamentis subducatur, prompte enim dysenteriam concitant præsertim in eminentioribus cæchy-matis. Quod si alvus lubrica nimis fuerit cohibeatur.* Sic quoque Avenzoar variolis & morbillis laborantibus nulla purgantia exhibebat, neque ventrem movendum esse dicebat, nisi glandibus injectis, si alvus sponte non flueret. Hæc ignoravit dictus chirurgus Egmondus, atque hinc per suam inscitiam istum ægrum occidit: quemadmodum illud etiam plurimis aliis contingere solet, qui doctos Medicos contemptui habentes, malunt ab hujusmodi ignavis agyrtis & homicidis mortem auro, quam à veris prudentibus Medicis sanitatem ære cõemere.

## HISTORIA V.

**D**Uæ sorores, domicellæ juvenes, una 24. altera 26. annorum, grassantibus variolis sibi admodum metuebant ab hoc morbo. Contigit fortuna, ut iis ad templum ituris, eminus in platea in conspectum veniret puer quidam (ad minimum triginta passibus ab iis distans) qui à variolis sanatus jam foras prodibat, faciem totam rubris maculis, à pustulis in ea residuis adhuc obsitam habens: à quo ambæ adeo exterritæ fuerunt, ut se jam variolis infectas esse putarent. Hinc ego statim ad ipsas invisendas vocatus, accessi, huncque metum multis rationibus discutere annixus fui: utque ipsis melius satisfaceret, utrique medicamentum clementer purgans præscripsi, à quo convenienter fuerunt purgatæ: uno die interposito, utrique venam in brachio secari, & bono animo esse jussi: utque se melius, & certo certius ab hoc morbo præservatas esse crederent, in victu omnia illa prohibui, quæ ad morbi hujus suscitationem aliquid conferre posse videbantur: apozemata quoque aliqua ex cichoracæis, aliisque refrigerantibus, bibenda dedi: porro mandavi ut ambulationibus, & gratis amicorum visitationibus ac colloquiis, aliisque quibuscunque modis, dictam conceptam imaginationem ex animis suis excuterent: Sed frustra hæc omnia fuere tentata, quippe jam altis radicibus illa modò erat impressa & infixæ, ut eradicari non posset. Postquam sic per quatuordecim dies sanæ vixissent, de ambulassent, alios invisissent, & interea semper de variolis cogitassent, tandem, sine ulla contagionis occasione, ambæ simul febre correptæ fuerunt. Cum jam utrique ad curationem sudoriferum dedissem, sequenti die parvæ maculæ rubicundæ in facie & manibus apparuere,

P p

eæque



exque dato decocto ficuum, brevi altiores factæ in variolas desierunt, quæ toto corpore, & imprimis in facie, copiosissimæ eruperunt, sicque febris, anxietas, aliaque symptomata desierunt, atque ipsæ, nec sordida lintamina spatio quatuordecim dierum mutantēs, nec ullum in diætâ errorem committentes, sed exatē ad meum præscriptum ordinem viventes, ut nec variolâ scalpando detrahentes, cum valde exigua defœdatione sanatæ sunt.

### Annotation.

**Q**uam stupendæ sint imaginationis vires (de quibus egregium librum conscripsit Thomas Fienus) in multis experimur: hæc quippe, mediantibus animi motibus, sæpe mirabilia præstat: qua de re pluribus egimus in nostro tract. de peste, lib. 1. cap. 8. annot. 1. & lib. 2. cap. 7. annot. 9. Sic etiam in hisce duabus Domicellis ex continua firmaque cogitatione per antecedentem terrorem inducta, tam fortiter illa variolarum idea animo, & hinc spiritibus ac humoribus fuit impressa, ut ab ea tandem in his

aptitudo & dispositio ad variolas fuerit genita. Memini me eodem anno invisisse nobilem Germanum, qui somniaverat, se invitum ad ægrotum quendam variolosum, valde deturpatam faciem habentem, protractum fuisse; quod somnium tam firmiter animo ejus impressum hæsit, ut nullo modo illius cogitatio discuti vel abigi potuerit: sanus vixit per tres fere septimanas: tunc in febrem incidens variolis copiosissimis persusus est.

## HISTORIA VI.

**P**armacopœus fortis, vir circiter 30 annorum, cum aliquando domum cuiusdam civis ingressus, illic ex improvise inveniret ac conspiceret ægrum tota facie variolis obsessum, à fœditatis istius adpectu nonnihil inhorruit, & sic discessit. Paulo post, ut hanc conceptam phantasiam discuteret, vinum copiosius ad hilaritatem bibit, & tribus quatuorve sequentibus diebus genio, cum aliis, liberaliter indulgit; sed interim tamen cogitationem illam, de fœdo istius ægri adpectu, à se excutere non potuit, quamvis alioqui esset homo admodum intrepidus. Sexta die febrî corripiebatur, cum summâ anxietate, somno maxime inquieto, & subinde levi aliquo delirio: hanc, post bis sumptum sudoriferum, tertia die sequebantur maculæ rubræ, variolarum prænunciæ, quæ spatio 24 horarum copiosissimæ prodierunt, qua eruptione febris, omniaque symptomata evanuerunt, & æger post tertiam septimanam sanitati restitutus, rursus foras prodit.

### Annotation.

**N**ullis meticolosis auctor esse velim, ut ad peste aut variolis laborantes accedant: nam si talis variolosi visio hujusmodi virum intrepidum tantopere moverit, quanto magis afficeret meticolosum? Quæri jam posset, an hic pharmacopœus contagio fuerit infectus, an verò alia de causa morbum contraxerit? Contagium minimè culpandum videri, ex eo patet, quod hic intrepidus vir aliàs

plurimis aliis variolosis diutius adfuerit, sine ulla sui læsione. Causa potius fuisse videtur repentina illa conturbatio animi & spirituum, quàm ex improvise fædi istius ægri variolosi conspectu concepit, & exinde continua cogitatione fovit: ex qua idea in corpore talis dispositio enata fuit, quæ tandem variolas produxit. Si jam aliquis clarè possit explicare quomodo res illa peragatur, ille nobis erit magnus Apollo.

## HISTORIA VII.

**J**uvenula viginti duorum annorum, plethorica, bene colorata, subpinguis, febrî mitiore correpta, præter magnas anxietates, & levîa intercurrentia deliria, toto bidui spatio frequentēs & validas patiebatur convulsiones epilepticas & subinde graves lypothymias, ita ut adstantes eam suffocatione uterina laborare & repente morituram existimarent. Ego advocatus, cum menstruatam periodum ante octiduum præcessisse intellexissem, alvum clystere subduci, & eadem

dem die etiam brachii venam secari jussi. Circa vesperam hoc sudoriferum dedi.

℞. *Theriaca Androm. drach. j. cornu cervi usti,*  
*extracti cardui ben. salis ejusdem, ana scrup. j.*  
*aqua theriacalis, cardui ben. ana unc. j. olei succini, gut. iiij.*  
*misce, fiat haustus.*

Hoc assumpto, ea nocte fortiter sudavit, cum summo levamine, neque convulsiones, aut lipothymia redierunt. Postridie passim ubique in cute apparere ceperunt maculae rubrae, variolarum praenuntiae. Pro potu dedimus hoc decoctum.

℞. *Rad. helenii, glycyrrizae rasae, ana drach. iiij.*  
*hordei mundat. unc. j. cicerum rubr. unc. j. s.*  
*sem. feniculi, drach. ij. ficus, n. xvj.*  
*passularum mundat. unc. j. s. aquae q. s.*  
*fiat decoctum ad lib. ij.*

Hinc variolae copiosissimae prodierunt, omnibusque cum febris symptomatibus protinus cessantibus, quarta septimana sanitati restituta, & quasi e Cerberi faucibus erepta, rursus foras prodiit.

### Annotatio.

**I**N hoc morbo pessimi ominis sunt tales convulsiones epilepticae ac lipothymiae, & nisi variolae citò erumpant, maximum periculum metuendum venit, quippe facile posset aeger ab iis enecari ante variolarum eruptionem. Neque id mirum: nam malignum hoc inquina-

mentum cor graviter affligit, ut ex febris, anxietate, & lipothymia patet, necessario adhuc majus periculum metuendum est, si etiam alterum primum ac animale viscus, scilicet cerebrum, non minus affligat.

## HISTORIA VIII.

**R**utgerus Schorer, adolescens quatuordecim annorum, filius natu maximus hospitis mei Isaaci Schorer, mense Septembri febris & variolis correptus fuit, easque toto corpore copiosissimas habuit. Cum ille jam convalescens ad decimum quartum diem pervenisset, ejus frater Isaacus Schorer, duodecim annorum, iisdem valde copiosis correptus fuit. Cum hic ad decimum sextum diem pervenisset, variolae invaserunt eorum sororem Mariam Schorer, decem annorum. Cum & haec convalescens ad diem decimum quartum pervenisset, variolis copiosissimis correpta fuit altera filia domus, priorumque soror, natu minima, Machtilda Schorer, octo circiter annorum. Interea duo filii, priores hoc morbo detenti, pristinam sanitatem consecuti sunt, & foras exierunt. Cum ultima illa Machtilda Schorer, circiter viginti diebus cubiculo inhasset, rursus secunda vice febris & variolis correptus fuit Rutgerus Schorer, & eo fere sanato Isaacus Schorer, hoc que fere per sanato Maria Schorer, & tertia post hanc septimana Machtilda Schorer. Atque sicut prima vice morbus ordine à natu majore ad natu minimam descenderat, sic etiam, tam brevi illo interstitio interposito, rursus eundem ordinem observavit secunda vice, nec unquam duo simul illo morbo correpti fuerunt, & quod mirandum, omnes illi quatuor tam illaesi ab hoc morbo evaserunt, ut eorum nemo à variolarum foveis aut cicatricibus in facie defoedatus fuerit, quod magna ex parte impetratum putari debet, per summam quam in curatiqne (nam erant nostri domestici, in quos singulis fere horis oculi convertebantur) adhibuimus diligentiam.

## Annotatio.

**R**Arò variolæ bis terve eundem hominem invadunt, propterea quod communiter in prima invasione totum illud specificum malignum inquinamentum, sanguini partibusque inhærens, per fermentaceam ebullitionem segregatum, excutitur. Quæ effervescencia si non satis valida fuerit, tunc interdum contingit ut corpus ab illo inquinamento prima vice non omnino depuretur, atque hinc post aliquot annos ex residua parte, nova aliqua occasione rursus in actum suscitata, variolæ iterum gignantur. Sed quod tali ordine quatuor ejusdem viri liberos, à natu majore ad minimum præhenderint, idque tam brevi interjecto spatio bis, & singulis vicibus copiosissimæ eruperint, hoc alias in praxi nunquam nobis videre contigit. Si forte

prima vice paucæ epullulassent, aliqua de inquinamenti reliquiis, propter debilem fermentationem non sufficienter sequestratis, suspicio fuisse potuisset, sed jam cum propter variolarum tam prima, quam secunda vice toto corpore prorumpentium immensam copiam, illa suspicio penitus tollatur, quorsum, quæto, alio hujus rei causam referemus, quam ad occultum & inexplicabile quid, quod in variolis non minus quam in peste latet? & quorsum alio etiam illud, quod ego ipsemet, qui jam fere septuagenarius sum, non solum cum his, sed cum mille etiam aliis variolosis diu multumque conversatus, & nunquam tamen variolis infestatus fuerim, cum illud contagium quolibet alios tam facile inficere soleat?

## HISTORIA. IX.

**V**irgo viginti trium annorum, plethorica & fortis, cum repente in magnam febrem, summæ anxietati conjunctam, incideret, suo Marte assumpsit drach. unam theriacæ cum pauxillo vini: hinc sudore copioso provocato, mox simul copiosissimæ toto corpore eruperunt variolæ, sed febris anxietasque, non modo non imminutæ, sed graviore factæ fuerunt. Tunc meum consilium, at nimis sero, imploratum fuit, quippe propter virium magnam prostrationem, vix quidquam remedii adhiberi potuit. Deditamen bis oculorum cancri præparat. drachmam unam cum pauxillo decocti hordei, & julebum gratum præscripsi. Sexta die, matutino tempore, menstrua copiosa, extra periodi tempus, fluere cœperunt, & eadem die, quæ hactenus elevatæ fuerant variolæ, subsederunt, ac depressæ evaserunt: febris autem, cum anxietate, plurimum adaucta, ægra sequenti nocte, viribus omnino collapsis, extincta est.

## Annotatio.

**H**Oc eodem tempore adhuc duæ aliæ juvenculæ variolosæ, præter expectationem erumpente extra periodi tempus menstruo fluxu, brevi perierunt. Idque in hoc morbo etiam alias multoties à nobis observatum, cum valida sit sanguinis, ebullitio, & copiosissimæ variolæ profliliunt, sine febris & symptomatum imminutione, tunc pessimum, imò lethale signum esse, si menstrua extra periodi tem-

pus erumpant, tales enim ægrotæ vix unquam servantur, quamvis etiam septimo, aliove critico die illa eruptio contingat. Imò & hoc notavimus, si durante illa variolosæ ebullitione menstrua quoque erumpant tempore debito & ordinariæ periodi, tales ægras etiam tunc maxime periclitari, earumque multas mori, licet ab illa evacuatione aliquod insigne levamen sperari posse videatur.

## HISTORIA. X.

**A**Nna de Durenburgh, juvencula viginti annorum, febricula, cum anxietate correpta fuit: aderant etiam capitis gravitas, cum inclinatione ad somnum, subinde leve aliquod delirium, pavor in somno, & sitis mediocris. Assumpto diaphoretico, & sudore copioso provocato, mox apparuerunt variolæ. Postea sequentis decocti quater, quinquies aut sexies de die haustum bibit.

Rec. hordei mund. unc. j. rad. helenii. drach. v.  
glycyrrizæ rasæ drach. ij. cort. aurantior. drach. iij.

herb.

*herb. scabiosæ man. j. f. sem. fœniculi drach. j.  
sem. 4. frigid. major. ana scrup. iiij.  
ficus pingues, no. xv. passularum mund. unc. j. f.  
aquæ q. s. fiat apozema ad lib. ij.*

Cum hujus decocti usu variolæ jam satis essent expulsæ, jussi ut cum molli spongia juri vervecino tepido intincta totam faciem sæpe fomentaret: sed cum illud casu haberi non posset, & illa tamen topicum aliquod ad faciei præservationem à me peteret, jussi ut totam faciem bis de die illineret cum oleo raparum veteri. Hoc facto, variolæ in facie non devenerunt adeo magnæ, ut in reliquo corpore, citius etiam maturuerunt, & crustis tandem sponte decidentibus, nullæ omnino foveæ in facie remanserunt. Continuata fuit hæc inunctio usque ad sanationem.

### Annotatio.

**S**I variolæ non sint magnæ & contiguz, ad præcavendas foveas plerumque nihil adhibere, sed naturæ totum negotium committere solemus, utpote quæ illud plerumque melius absolvit sua sponte, quam Medici arte, dummodo ipsimet ægri pustulis scalpendo non detrahant, sed exsiccari & sponte decidere permittant: hoc quotidiana docet experientia, quippe milleni optime sanantur sine ullis foveis aut vestigiis, quibus nulla topica sunt adhibita: multi etiam sunt qui varia topica sine judicio adhibuerunt, & longe peiores foveas retinuerunt, quam si absque illis topicis naturæ negotium commisissent. Verum si variolæ sint valde magnæ & contiguz in facie, aut si tales fuerint ægri qui sibi non patiuntur satisfieri (hoc familiare est domicellis virgunculis, pulchritudini suæ studentibus) nisi medicus aliquod topicum adhibeat, tunc talia sunt præscribenda quæ leniunt & emolliunt pustularum crustas, in iisque contentam materiam ad citiorem maturitatem perducunt. Eum in finem oleum raparum frequenter inunxi, felici successu, sic enim nulla, vel pauca & exigua variolarum vestigia relicta fuisse, sæpius comperi, quod, tanquam magnum secretum, mihi aliquando communicatum fuit ab insigni medi-

co practico Harscampio. Forestus, lib. 10. observ. 57. variolis inungit oleum amygdalarum dulcium, donec exsiccantur, atque ita scribit nulla vestigia relinqui, idque remedium sibi adeo placere dicit, ut nullum aliud præstantius reperit, cum odorem non habeat, & neque pueris neque adultis molestum sit. Imprimis autem in hoc casu cavendum ne exsiccantia in principio, aut etiam postea adhibeantur, hæc enim ulteriorem puris maturationem inhihent & crustas foveasque exsiccando, novæ carnis generationem impediunt: qua de re miserandum exemplum scribit Forestus, lib. 10. observ. 45. Cum quidam inquit, triginta annorum, variolas incurrisset, ac butyrum prius in sartagine ad nigredinem coctum (tunc valde exsiccatur) ex muliercula cujusdam consilio accepisset, & totam faciem eo oblevisset, facta est crusta admodum sæda, totam faciem exulceravit, ita ut unum oculum perdiderit, & nisi ego commoda adhibuissem remedia, alterum quoque oculum non retinuissem. Propterea animadvertimus quosdam sapissime nullis adhibitis bujusmodi remediis, melius convaluisse. Et ideo quamvis auctores scribant, quadam maturativa esse apponenda, id cum diligenti cautione faciendum.

## HISTORIA. XI.

**D**Omicella nobilis octodecim annorum, cum minus bene valeret, me vocari jussit. Leviter febricitabat, & conquerebatur de cordis anxietate (hinc alta sæpe suspiria ducebat) & capitis gravitate, cum inclinatione ad somnum. Propter præsentem constitutionem, qua variolæ grassabantur, mox mihi incidit suspicio de variolis. Hinc cum mihi dixisset se alvum ea die dejecisse, atque etiam à menstrua periodo longius abesse, sine mora venam brachii incidi, & sanguinis uncias octo (nam erat plethorica) extrahi curavi. Hinc se aliquantum levatam dicebat. Post horas decem à venæsectione, cœperunt in pectore & manibus pauca & parva quædam maculæ rubræ apparere. Exhibui circa vesperam hoc diaphoreticum.

*Rec. theriacæ Andr. diascordii Fracast. ana drach. f.  
salis absinthii, confectiois de hyacintho, ana scrup. j.*

P p 3

aquæ

*aquæ theriacalis, cardui ben. an unc. j.  
misce, fiat haustus.*

Hinc cum tota nocte mediocriter sudasset, postridie compertum est variolas aliquanto altiores epullulasse, & febrem, cum anxietate, fere totam evanuisse. Decoctum ficuum ex cerevisia tenui dedimus pro potu. Atque sic illa his paucis fuit perfanata, & in facie non nisi tres quatuorve, & reliquo etiam corpore valde paucas habuit variolas.

#### *Annotatio.*

**Q**uid de venæsectione in hoc morbo sentiendum, & quando illa instituenda sit, supra latius explicavimus *cap. 8.* Illud autem in ea observavi, si in plethoricis tempestive instituatur ante ullam variolarum eruptionem, tunc longe facilius, multoque pauciores eas erumpere, & facilius sanari. Ac proinde, in

iis præcipue, qui de suæ faciei pulchritudine admodum solliciti sunt, eam tempestive instituere utilissimum censeo, cum sic pauciores variolæ & minores in facie procedant. Sed quia Medicus plerumque vocatur, cum jam variolæ erumpere incipiunt, hinc fit quod venæsectio raro institui possit.

### HISTORIA. XII.

**F**iliolus Nicolai ab Hervelt mense Augusto ægrotare cœpit: febricitans erat, cum magna proclivitate ad somnum. Cum autem in principio vocarer, & mihi statim de variolis suspicio foret, aquam theriacalem, cum lapidis bezoartici & croci pauxillo, exhibui (alia ingrati saporis dari non poterant, quia puellus erat trium annorum) & ad oculorum præservationem jussi, ut crocum cum lacte muliebri miscerent, eoque palpebras circum circa illinerent. Amita (quæ ægri curam habebat) me absente crocum majore, quam solet, quantitate lacti admiscuit; eoque non oculos tantum, verum totam quoque faciem inunxit bis de die. Horribilis profectò pueri, à croco ita flavescentis, erat aspectus. Interim puellus satis bene sudavit, & exinde adhuc ter cochleare aquæ theriacalis assumpsit, atque in mediocri calore servatus fuit, & decoctum ficuum simplex (quod amabat) pro potu bibit. Postridie minimæ quædam rubræ maculæ hic illic in cute videri cœperunt: tertia autem die variolæ per totum corpus magna copia eruperunt, excepta facie, in qua nullæ omnino, imò ne minima quidem earum signa apparuerunt, unde tamen puer sepejus non habuit, cum reliquo corpore satis copiosæ epullarent: Febris erumpentibus variolis mox evanuit, & sic tandem hic puellus, facie à variolis prorsus immuni & illæsa servata, integræ sanitati restitutus fuit.

#### *Annotatio.*

**C**rocus leviter astringendo, aliquantum repellit & exsiccatur, an verò ob hanc facultatem foris adhibitus variolarum eruptionem impediat: vel an ob aliud specifici & occulti quid, quod ei fortè inest, ille effectus fiat, incertus dubito: interim effectum ipsam vidimus, non solum in illo puello, sed

etiam in tribus quatuorve aliis, nam dicti ægri amita, cum illum eventum aliis mulierculis hic illic narrasset, fuerunt etiam aliæ, quæ in suis ægris illud ipsum experimentum tentarunt, simili felici successu: an felix ille eventus semper successurus sit, aliàs, data occasione, experiemur.

### HISTORIA. XIII.

**N**obilissima Domina Lucas, Angla, domicellam juvenulam, fratris sui filiam, domi suæ alebat, sex septemve annorum. Cumque illa febricitare, anxia & soporosa esse inciperet, meo consilio, pauxillum pulveris liberantis, cornu cervi usti, lapidis bezoartici, & croci, cum aquæ theriacalis uncia una exhibitum fuit, quo sudor satis bene processit, cum aliquo levamine.

Pro

Pro potu bibit decoctum cornu cervi crudi (quemadmodum illud pro gelatinis præparari solet) & subinde etiam decoctum ficuum simplex. Interim Domina Lucas (quæ inter mulieres magnates erat Medicastra aulica) totam ægræ nostræ faciem quotidie bis terve lavavit cum aqua illa cinnamomi, quam communiter vendunt nostri pharmacopœi (hæc constat ex cinnamomo in aqua boraginis distillato) eamque in continuo calore satis diligenter servavit. Die secunda circa vesperam rubræ maculæ hic illic apparere, & die tertia variolæ copiose erumpere cœperunt, excepta facie, in qua ne una quidem videri potuit. Illa dictam faciei lotionem adhuc per aliquot dies continuavit. Interim evanescente post eruptionem febre, nostra ægra feliciter fuit sanata, nec ei ullum variolarum vestigium in facie superstes relinqui potuit.

## Annotatio.

**I**lla ipsa idem illud consilium dedit dominæ Couper, quæ cum etiam tribus suis liberis, variolis laboraturis, similiter faciem cum aqua cinnamoni lavisset, etiam nullæ variolæ in facie eruperunt. An ille successus semper adeo felix

sequiturus sit, plurium ægrorum experientia notum fiet. Sed interim considerandum venit, an non, in facie sic inhibita variolarum eruptione, metuendum sit, illas meningibus aut cerebro ali- quod gravius malum illaturas.

## HISTORIA XIV.

**D**omicella Ruchabor, juvenula 24. annorum, adeo pulchra, ut multis admirationi esset, mense Augusto, febre & variolis correpta fuit, eique totum caput mirabiliter intumuit. Cum ex meo præscripto variis medicamentis usa fuisset, & variolæ per totum corpus copiosissimæ erupissent, faciemque valde obsedissent, & tandem febris cessasset, & caput rursus detumuisse, atque ego jussissem ut faciem cum jure vervecino sæpe fomentaret: illa his non contenta, ut pulchritudinem suam magis illæsam conservaret, ex consilio quarundam muliercularum, variolas maturas acu aurea sibi aperiri curavit, & pus expressit. Sed quo, quæso, eventu? tandem illa, que nullas foveas superstites futuras sibi persuaserat, persanata faciem innumeris foveis ac vestigiis admodum deformatam retinuit, ita, ut è formosissima valde deformis evaserit, & hunc stultum perforationis actum millies deploraverit.

## Annotatio.

**Q**uamvis multi Medici, ut faciem à cicatricibus ac foveis præservent, variolas maturas acu aurea aperire jubeant, tamen experientia millies edocti sumus, tunc multo plures foveas relinqui, & cutationem multo melius peragi, si acus & mællus non admoveantur. Hinc Sennertus, lib. 4. de febr. cap. 72. sic inquit: *Tatissimum plerumque est, præcipue ubi sanies alba & proinde cocta apparet, rem totam natura committere, cum experientia docuerit, eos quibus variola sponte aperta & exsiccata sunt, minore cum deformitate, & minoribus relictis vestigiis, sanatos fuisse.* Cum Sennerto consentit Gregorius Horstius, part. 2. lib. 1. in append. Quam periculosum autem sit variolis manus & topica adhibere, docet Forestus, lib. 6. observ.

exemplo juvenulæ. Cum malum, inquit, in declinatione jam esset, atque ipsa linimenta exsiccantia, faciei adhibenda, mihi proponere, suadebam, ut ab iis abstinere, totumque negotium natura committeret, cum sanies alba concocta à variolis per se ruptis efflueret, & imperavi ne digitis crustas avelleret, & ut à frictione abstinere, quanquam pruritum sentiret. Verum cum à vellicando variolas non abstinere, quibusdam non maturis; deinde cum ex muliercularum consilio ad exsiccationem pinguedinem seu cremorem lactis adhibuisset, facies crusta obducta est admodum fœdâ, & vestigia relicta fuere, atque oculis rubedo oborta est, quæ postea vix curari potuit, & tota vita adhæsit. Ratio quare apertis variolis tanta mala contingant, supra videatur, cap. 12.

HISTO-

## HISTORIA XV.

**D**omicella nobilis, 20 annorum, cum consodali variolis laboranti paulisper adfuisset, aliquod ab ea contagium suscepisse videbatur. Eadem vespere caput ipsi grave, & ventriculus in appetens evasit, cum lassitudine ponderosa totius corporis. Postridie febricitans inventa fuit: prædixi variolas expectandas esse. Dedi mox haustum diaphoreticum, à quo bene suadavit, & in leni diaphoresi illam tota insequente nocte detineri jussi. Tertia die, matutino tempore, illam toto quidem corpore bene contactam, sed pedes à lecto pendulos, & vasi subjecto in lacte dulci calido usque ad suras immisos habentem, inveni. Hoc fecerat ex muliercularum quarundam consilio, qui ipsi persuaferant, si pedes in lacte calente balnearet, tunc nullas variolas faciem invasuras. Continnavit in isto lactis balneo tota die, usque ad vespem. Interea variolæ illa eadem die erumpere coeperunt, sed nusquam majore copia prodierunt quam in facie, atque sic illud consilium, de pedibus in lacte balneandis, prorsus inutile inventum est. Ægra tamen in cæteris meum consilium secuta, bene persanata est, & in facie non valde multas foveas à variolis retinuit, atque exinde lacteum illud consilium milles irrisit.

## Annotatio.

**F**elix in eo fuit hæc ægra quod ista balneatio ipsi non male cesserit, quia quantumvis bene contacta foret, tamen per illam ventilationem facillime ad ægram frigus aliquod accedere, eique magnum damnum inferre potuisset. Memini me postmodum illud ipsum balneum in aula Baronis de Brederode, adhibi-

tum vidisse in domicella quadam pedissequa, variolis laboratura, sed pari, ut in priore, successu, atque exinde illud in ista aula omnem fidem perdidit, quam etiam apud me nunquam habuit, & si illud à multis mulierculis admodum laudari audiverim.

## HISTORIA XVI.

**M**ense Octobri, duo filii N. Romburch, œnopolæ, ætatis sex, & octo annorum, febricorrupti fuere. Parentes postridie singulis exhibuerunt theriacæ drachm. s. unde sudor mediocriter provocatus: pro potu dederunt decoctum ficuum simplex in cerevisia tenui factum. Tertia die aliquæ maculæ rubræ, & exinde variolæ copiosissimæ toto corpore eruperunt, earumque etiam multæ oculorum palpebras obsederunt, atque hinc illæ adeo tumidæ evaserunt, ut oculi penitus occluderentur. Tunc meum consilium petatum est. Cum pueri, pro ratione temporis morbi mediocriter sese haberent, nullum medicamentum exhibere, necesse visum fuit: solummodo jussi ut parentes per mollem spongiam ter quaterve de die oculos tepide foverent, cum decocto althææ, flor. meliloti, rosarum, foenugræci, &c. & digitis semel aut bis de die palpebras à se invicem dimoverent, sicque oculos nonnihil aperirent, ut sub iis collectus liquor effluere posset. Sed parentes hoc neglexerunt, stulto amore metuentes se filiis illa contrectatione aliquem dolorem inducturos. Die decimo quarto, variolis jam ad maturitatem deductis, detumuerunt etiam palpebræ, & oculi aperti sunt, sed observatum ambos filios esse plane cæcos, & ab illo liquore tot diebus intra occlusas palpebras detento, viscidoque facto, pelliculam ante pupillam & iridem fuisse enatam, quæ instar velaminis cujusdam fere totum oculum contegebat. Hic inexpectatus casus admodum contristavit parentes. Præscripsi hunc pulverem.

℞. sacchari candi albissimi drachm. ij.  
lapidis calaminaris scrup. j.  
fiat pulvis subtilissimus.

Hunc



Hunc à chirurgo bis terve de die per pennam scriptoriam à pluma rescissam, in oculos inflari jussi. A parvo dolore hinc excitato palpebræ frequentius sursum deorsumque motæ: & sic pelliculæ istæ paucis diebus detritæ, ac cum lachrymis foras elapsæ fuerunt, ita ut exinde nullum visus impedimentum his pueris amplius superfuerit.

*Annotatio.*

**I**llud multoties nobis in praxi videre contigit, quod ob palpebras à variolis tumidas atque oclusas hujusmodi pelliculæ in oculis enatæ fuerint, sed illas, quia foris pupillæ obhærent, tali pulvere semper facile detrivimus, si mox à principio detumescentiæ palpebrarum & apertionis oculorum adhiberetur. At si aliquamdiu expectatum fuerit, & pelliculæ ab aëre externo jam magis exsiccatae & induratae sint, tunc tam levi medicamento non facile cedunt, sed

acrioribus utendum, & majore cum molestia ac dolore illud vitium tollendum est. Duo igitur hic observanda veniunt. 1. Ut palpebræ tumidae, etiam invitis ægris, quotidie semel atque iterum digitis à se invicem dimoveantur, & sic liquori intus contento exitus concedatur. 2. Si forte illic pelliculæ enatæ fuerint, ut earum curatio non diu differatur, sed citò instituatur, antequam ab externo accedente aëre indurentur.

## HISTORIA XVII.

**M**ense Octobri, ad pagum Bemmell, cum chirurgo, vocatus, ad invisendum rusticum in pectore vulneratum, casu apud eundem invenimus puerulum octo annorum, febricitantem, ac summa anxietate pressum: cumque ibi nulla medicamenta nobis ad manum essent, suasi ut sumerent unc. j. stercoris ovilli recentis, idque per duas tresve horas macerarent in cerevisia tenui, & postea colaturam calidè exhiberent, sicque puerum contegerent, & sudores provocarent. Dicebam me postridie eo rediturum, & alia medicamenta allaturum. Sequenti die reversus intellexi puerum ab illo haustu egregie sudasse, cumque illum propius adspicerem, videbam ipsi morbillos valde copiosos erupisse, ab eaque eruptione febrem fere evanuisse, & magnam anxietatis partem recessisse. Jussi ut eum in calore servarent per triduum aut quatrimum, omneque frigus ab eo arcerent. Atque ita, sine ullis aliis remediis, sanitati restitutus est.

*Annotatio.*

**I**N hoc puero variolas expectaveram, sed prodierunt morbilli, quorum prima curatio cum variolis eadem est. Stercus ovillum recens hos & illas æque potenter expellit, ac proinde in utroque casu valde utiliter exhibetur, præcipue in locis, ubi alia medicamenta ad ma-

num non sunt. Inveniuntur qui huic præferunt stercus caballinum, eodem modo exhibitum: sed ovillum longe efficacius esse docet sapor, quo sal nitrum, seu potius specificum ali-quod sal diaphoreticum ei copiosius inesse, gustu manifestum sit.

## HISTORIA XVIII.

**J**uvenis 26. annorum, fortis & plethoricus, post gravia pilæ & gladiatorii ludi exercitia, atque intermistas vini potationes, incidit in febrem vehementissimam, cum magna siti, oris ariditate, summa anxietate & inquietudine, aliisque gravibus symptomatibus. Huic, post injectum clysterem venam secari jussimus; julebos ad sitim, atque apozemata & condita refrigerantia præscripsimus. Tertia die purgatus est, haustu ex infusione foliorum senæ & rhabarbari, cum admixto electuario diapruno: hinc quinque sexve sedes habuit. Ardore autem cum febris permanente, quarta die iterum vena secta est. Quinta & sexta die continuatum in usu julebi, apozematis, & conditi refrigerantis. Nox quæ sextam diem sequebatur, adeo gravis erat, ut vix ulla spes vitæ superesse videretur, & jam moriturus putaretur. Septima die circa meridiem, un-

dequaque per totum corpus morbilli criticè eruperunt: hinc febris, cæteraque urgentia symptomata tantopere remiserunt, ut æger sequente nocte aliquantum dormiverit: eaque sequentibus duobus diebus sensim in totum evanuerunt. Decima die imminui cœperunt morbilli, & duodecima penitus disparuerunt. Sic ille æger, qui jam cum Charonte de naulo pacisci videbatur, præter multorum expectationem sanitati restitutus fuit.

### Annotatio.

**P** Rincipium hujus morbi tale erat, ut nulla morbillorum suspicio subesset, atque hinc æger, tanquam febris ardente laborans, à nobis tractatus fuit, quæ tamen febris tandem per criticam morbillorum evacuationem feliciter finita fuit.

## HISTORIA. XIX.

**J** Uvenis fortis, febris valida correptus est, cum pulsu crebro, parvo, & inæquali, magna anxietate, capitis gravativo dolore, soporositate, somno turbulento, & leni aliquo delirio. Postposita alvi subductione, libenter venam secuissem, cumque id permittere nollet, circa vesperam dedi hoc sudoriferum.

*Rx. theriacæ, scrup. ij. diascordii Fracast. scrup. j. f. confect. alkermes, extracti cardui ben. salis absinthii, ana scrup. j. aquæ nostræ theriacalis, cardui ben. ana unc. j. misce, fiat haustus.*

Cum hinc bene sudasset, & tamen morbus in eodem statu permaneret, postridie illud ipsum reiteratum, & ab eo rursus bene sudatum fuit, tuncque rubræ maculæ parvæ, variolarum prænunciæ in cute passim apparere cœperunt: febris tamen, aliaque symptomata, etsi aliquantillum imminuta viderentur, tamen persisterunt. Suasi ut æger in leni diaphoresi conservaretur, & subinde hujus decocti haustum biberet tepide.

*Rx. cicerum rubr. unc. j. f. hordei mundat. unc. j. herb. scabiosæ, m. j. f. ficus pingues no. xvi. passularum mundat. unc. ij. aquæ q. s. fiat decoctum ad lib. ij.*

Hinc intra biduum variolæ maxima copia undequaque eruperunt, & elatiores evaserunt, febris tamen & anxietate permanentibus, ita ut æger omnino de vita periclitari videretur. Hac de causâ necessarium duxi, superius sudoriferum rursus exhibere. Hinc sudore paulo majore provocato, & decocto ficuum insuper per biduum continuato, die septimo, præter expectationem toto corpore inter variolas passim apparuerunt morbilli, atque tunc febris, aliaque symptomata mitiora evaserunt, ac paulatim in totum desierunt, ægerque quarta ab exordio morbi septimana feliciter sanatus, rursus foras prodiit.

### Annotatio.

**H** Oc in tota mea praxi me tantum bis terve vidisse memini, scilicet quod variolis adjungerentur morbilli: ex qua tamen observatione liquet, etsi ambo hi morbi ratione inquinamenti aliquid commune habeant, tamen ratione subjecti, cui illud inquinamentum inhæret, eos etiam aliquid distincti & diversi habere: quænam alioqui causa fuisset, quod in hoc ægro totum inquinamentum cum variolarum expulsionem non fuisset evacuatum? Interim hoc mirandum subest, quare morbilli, subtiliori seu tenuiori materiæ inhærentes non eruperint priores, anse variolas, cum materia tenuior ad eruptionem magis prompta & apta videatur, quam crassior.

HISTO-

## HISTORIA. XX.

**N**obilis Bataviensis, febris correptus fuit, cum pulsu forti, sed valde inæquali, item cum summa anxietate, siti inquietudine, leni delirio, & levibus extremorum convulsivis motibus. Alvo clystere subducta, venam secari jussi. Circa vesperam ab assumpto sudorifero fortiter sudavit. Morbo autem in eodem statu permanente, postridie reiterato sudorifero, rursus fortiter sudavit. Hinc symptomata nonnihil remiserunt, sed æger coepit conqueri de molesta punctione seu pruritu in cute totius corporis. Paulo post animadversum est, hic illic magnas rubras maculas, amplitudinis, alias daleri imperialis, alias dimidiæ manus, plus minus, in cute apparere, quæ quasi igneæ conspiciebantur, & hic illic exilibus pustulis, instar milii seminis, interspersæ erant. Hæ maculæ unius diei spatio cöierunt, & per totum corpus extensæ fuerunt, ita ut totum ruberrimo florido colore excandesceret. Interea febris & symptomata evaserunt mitiora. Triduo post, generalis illa totius rubedo imminuta fuit, & maculæ ad priorem invasionis statum redierunt, atque exinde intra tres dies penitus evanuerunt, & sic æger, decidente per squamulas totius corporis cuticula, sanitati restitutus fuit.

## Annotatio.

**H**ic affectus, quem Forestus *purpuram*, & *rubores* nominat, morbillis finitimus est, & curatione ab iis non distat: at subjectum cui vitiosum ejus inquinamentum, inhæret, fervidius est, quam subjectum morbillorum, verum æque facile discutitur, neque exiles pustulæ suppurantur, sed à calore dissipantur.

## F I N I S.



SERIES

# SERIES CAPITUM

*Hujus Libri*

D E

## VARIOLIS & MORBILLIS.

CAPUT	PAG.
I. <b>D</b> <i>E Variolis &amp; Morbillis in Genere.</i>	271
II. <i>De Variolis in specie.</i>	272
III. <i>De Variolarum Causis.</i>	273
IV. <i>De signis diagnosticis.</i>	276
V. <i>De Signis Prognosticis.</i>	ibid.
VI. <i>De Curatione Prophylactica, seu preservatoria.</i>	277
VII. <i>De Curatione therapeutica, &amp; primo de diata.</i>	278
VIII. <i>De auxiliis Chirurgicis.</i>	276
IX. <i>De remediis pharmaceuticis, &amp; primo de purgantibus.</i>	281
X. <i>De pharmacis diaphoreticis, &amp; variolas expellentibus.</i>	ibid.
XI. <i>De partium corporis præ cateris magis afflictarum, &amp; primo de internarum curatione.</i>	484
XII. <i>De externarum partium curatione.</i>	286
XIII. <i>De Morbillis.</i>	289
<i>Historia viginti Ægrotorum Variolis &amp; Morbillis laborantium.</i>	290

ISBRAN-

ISBRANDI DE DIEMERBROECK,

OBSERVATIONES

*ET*

CURATIONES

MEDICÆ

CENTUM.



ISBRANDI de DIEMERBROECK,  
**OBSERVATIONES**  
*ET*  
**CURATIONES MEDICÆ.**

O B S E R V A T I O. I.

*Peripneumonia.*

**D**ominus La Fontaine, nobilis Gallus, vir circiter 30 annorum, plethoricus, vini non copiosi, sed meracioris amans, 10 Novembris cubitum iturus, de anhelitus difficultate cœpit conqueri, sine ullo tamen in pectore dolore: paulo post rubor faciem, imprimis malas præhendit, oculi quoque tumidi & inflammati apparuere. Illa spirandi difficultas intra duas horas tantopere adau-  
 cta fuit, ut vix amplius anhelitum trahere potuerit, sed jam suffocationem metueret. Quapropter media circiter nocte me per famulum excitari iussit, se jam jam moriturum inquiens, nisi præsentī aliquo remedio succurrerem. Ego tam ex rubore faciēi, sputisque paucis, spumosis & floridis, quam ex maxima spirandi difficultate, quæ erat sine dolore, cum aliqua in pectore gravitate, judicavi affectum hunc peripneumoniam esse, eoque magis, cum ex pulsu etiam febrem vehementem adesse perciperem. Quapropter statim è basilica dextri brachii sanguinis libram extrahere iussi: a qua venæsectione magnum levamen sentiit. Pro potu (nam sitiebat valde) dedi ptisanam, ex solo hordeo mundato & paucoglycyrrizæ cum aqua coctam. Interea sequens enema parabatur, quod hora sexta matutina injectum fuit.

℞. decocti emollientis unc. x. elect. diacatholici, diaphænici, ana unc. j.  
 salis communis drach. j. olei violacei unc. ij.  
 misce, fiat enema.

Hinc bis satis multa deiecit. Cum verò anhelitus difficultas adhuc valde gravis esset, circa horam decimam è brachio sinistro sanguinis libram extraximus. Sanguis mediocriter bonus apparebat, præterquam quod in superficie spumam flavescentem satis multam haberet. Deinde præter ptisanam aliquoties de die etiam hujus apozematis haustum bibit.

℞. hordei mundati drach. vi. glycyrrizæ rasæ drach. j. f.  
 herb. endiviæ, acetosæ ana m. j. violariæ m. ij.  
 flor. papaveris rheados pug. ij. sem. 4. frig. major.  
 lactucæ, ana drach. ij.  
 passul. corinth. unc. ij. aquæ communis q. s.  
 coquatur S. art. ad lib. ij. in colatura dissolvantur  
 syrupi papaveris rheados, violacei, de limonibus, ana unc. j.  
 misce, fiat apozema.

Pro nutrimento juscula cum cherefolio, endivia, hordeo mundato, & similibus cocta præscripsi. Postridie, cum æger plura clysmata admittere nollet, medica-



mentum laxans exhibui, à quo alvum quater magno cum levamine deposuit. Interea anhelitus multo facilior, febris quoque mitior evasit. Prædictum apozema sequentibus diebus quinquies reiteratum fuit. Die morbi septima copiosissimo spontaneo sudore profluxit, atque ita morbo criticè soluto, febris cum anhelitus difficultate cessavit, & æger paulatim pristinae sanitati restitutus fuit.

### Annotatio.

**G**alenus 4 de loc. affect. cap. 9. inquit: Quando cum spirandi difficultate, cui angustia & gravitas conjuncta est, acuta quoque febris inciderit, is affectus inflammatio pulmonis est. Hæc autem inflammatio modo per se oritur, modo anginæ vel pleuritidi succedit, dum è faucibus, aut è latere humor natæ per tracheam repente in pulmones deferitur. Unde Hippocrates, A morbo laterali inflammatio pulmonis, malum. Periculosum enim est, morbum acutum alteri acuto supervenire, vel eundem sequi. Quæ verò peripneumonia non ex alio morbo, sed ex sese primam ducit originem, fit ex tenui biliosoque sanguine copia majore in substantiam pulmonis excusso, quam circulari potest, atque ibidem inflammato. Hanc peripneumoniam minus frequentem esse tradit Fernellius. Multo quoque rarior est pleuritide, à qua differt, quod ille morbus cum a cutissimo, pulmonia verò cum exiguo & gravativo dolore invadat, propterea quod ille membranam pleuram exquirit, seu præditam, hæc verò ipsum pulmonem obtusò sensu donatum inflammet ac distendat. In reliquis, nempe febris acuta, difficili respiratione, aliisque variis signis, ut & causa mali ac curatione fere conveniant. Præter dictam peripneumoniam alia frequentior datur, quæ à priori tum symptomatum magnitudine, tum causâ multum differt, utpote inducta, vel à pituita in pulmone coarctata ac tandem putrescente; vel à tenui & acri multaque distillatione, confertim è cerebro in pulmones illapsa, atque ibidem ardore præter naturam excandescente, ac febrem inducente, ægrosque tussi, spirandi difficultate, & lentâ febre sensim conficiente, sine cruenta expectoratione.

Peripneumonia acutum malum est, quod (teste Celso lib. 4 cap. 7.) plus periculi, quam doloris habet.

Hoc autem malum non semper totos pulmones, sed interdum aliquem eorum lobum tantummodo apprehendit, quod in peripneumonici aperto cadavere se vidisse testatur Jacotius. Sic etiam Joubertus de affect. thorac. cap. 7. inquit: In pulmonia non est necesse totum pulmonem inflammari, quin sæpius unus aut alter lobus tantum id patitur, ut infusorum cadaverum apertio nos docuit. Illud ipsum Hippocrates etiam clarissime scripsit in Coac. prænot. ubi ex signis mali differentias cognoscere docet, his verbis: In pulmonis inflammatione si lingua tota alba fiat aspera, amba pulmonis partes inflammatione vexantur: quibus verò dimidiata lingua, qua parte id apparet, inflammatio affligit. At quibus quidem ad unam

claviculam dolor subit, is una superior pulmonis ala laborat: quibus verò ad ambas claviculas dolor extenditur, amba superiores pulmonis ala laborant: quibus ad mediam costam, media: quibus verò ad quam partem palmo extenditur dolor permeat, inferior ala laborat: quibus una tota pars laborat, qua ei parti respondent omnia ægrotant. &c.

Veræ peripneumoniz, præter alia, certissimum & proprium signum est, maxillarum rubor (testibus Gal. 1. de loc. affect. Paulo Ægineta lib. 3. cap. 30. Avicenna lib. 3. fen. 10. tract. 4. cap. 11.) cum acuta febris & anhelitus summa difficultate, nullum vel exiguum dolorem gravativum conjunctum habente. Quæ omnia cum in prædicto nostro ægro apparent manifestè, non erat de ipso morbo dubium: qui morbus septimâ die cum magno spontaneo sudore disparuit, quemadmodum in vera peripneumonia illud plerumque fieri notavit Forestus lib. 16, in scholio observat. 16. Quamvis etiam (teste Ætio) in junioribus non raro per copiosam narium aut menstruorum hæmorrhagiam salubriter finiri soleat: quod tamen video negare Jo. Riolanum partic. method. med. sect. 2. cap. 2.

Gregorius Horstius lib. 3. observat. 7. peripneumoniam septimo die fluxu critico solutam fuisse observavit: quod tamen à ratione alienum videtur, cum alvi fluxus, secundum Hip. 6. aphor. 16. huic morbo damnosus existat, utpote quo materia morbifica in thorace contenta nequit evacuari, cum à visceribus thoraci inclusis non detur via ad intestina. Dicendum naturam interdum occultas, nobis ignotas, sibi querere vias, per quas noxiam atque molestem saburram evacuat (ut cum in empyemate pus thoracis evacuat per urinas) atque illud etiam in peripneumonia fieri & materiam ad intestina interdum deferri posse, licet id rarius contingat.

Hujus morbi curatio pleuritidis curationi similissima est, atque in ea primas partes tenet venæsectio, aliquoties pro virium & morbi magnitudine reperita, adjunctis deinde lenientibus, aut clysteribus, aliisque tum expectorantibus, tum febris calorem extinguentibus medicamentis. Festinanda autem est curatio, nam nisi huic malo citius occurratur, brevi vel suffocat ægrum, vel in empyema aut phlegmonem abit, pulmonum enim substantiam corrumpere solet. Sic Jacotius refert se aperuisse cadaver pulmonia occisum, cujus pars pulmonis superior in gangrænam abierat. Riverius quoque cent. 1. observat. 60. aperto cadavere mulieris hoc morbo extinctæ, universam pulmonis substantiam materia purulenta repletam, & mediastinum sero sanguineo plenum invenit.

OBSER-

## OBSERVATIO. II.

*Odontalgia.*

**F**ilia N. de intolerabili dentium dolore conquerebatur, qui per aliquot menses continuos duraverat, nec ullis topicis aliisque assumptis medicamentis dispelli potuerat. Consului ut per aliquot dies cubitum itura, deglutiret duas pilulas, pisi magnitudinis, ex sola aloë lucida confectas, nec quicquam superbiberet. Hoc cum ter quaterve fecisset, dolor cessavit, neque deinceps rediit.

*Annotatio.*

**I**nterdum orificium ventriculi superius viscosis ac frigidis, vel biliosis humoribus oblitum odontalgia causa existit, partim propter magnum illius consensum cum cerebro per nervum sextæ conjugationis; partim quod tunc nimia humiditate laxum nec satis oclusum multos crudos frigidosque vel biliosos & acres vapores, ad cerebrum transmittat. In tali casu frigidi illi ac viscosi & biliosi humores optime inde exturbantur, vel vomitoriis vehementioribus, vel medicamentis detergentibus amaris, diutius loco affecto adhærentibus: atque ea de causa

pilulas ex aloë siccas sine potu vespere post cænam deglutire iussi, ut hoc pacto œsophago immorantes, in eoque liquefactæ, diutius orificio ventriculi adhærent, idque melius detergerent: quæ enim jejuno stomacho bibuntur medicamenta, ad fundum ventriculi statim subsidunt, atque in ejusdem orificii superioris affectibus minus profunt. Sic quoque Avicenna lib. 5. canon. cit. de pil. aggregat. catapotia caput expurgantia, noctu à cæna, interposita hora una aut altera, exhibere consulit.

## OBSERVATIO. III.

*Febris Pestilentialis.*

**M**ercator quidam Gallus, ad diversorium accessit, qui, cum non satis bene valeret, statim cubitum properabat, existimans se ex longi itineris molestia illam mutationem subiisse. Postridie autem malò ingravescente, rogavit me hospita ut ipsum inviserem, & anne peste (quæ multa loca invaserat) infectus esset, diligenter animadverterem. Valde debilis erat, cum pulsu parvo, crebrò & inæquali: febris non tam calore (qui admodum vehemens non erat) quam malignitate offendere videbatur. Intellexi etiam ex ægro ipsum pridie ante adventum male valuisse, atque hunc esse tertium morbi diem. Cum autem nec bubones, nec carbunculos aliave pestis indicia uspiam animadverterem, illum non tam verâ peste, quam pestilenti febre laborare judicavi. Curationem statim à venæsectione auspicatus sum, quâ (enemate alvo prius subductâ) sanguinis circiter unc. xv. vel xvi è mediana dextri brachii extractæ sunt, qui sanguis (quod mirum) maximâ ex parte albicabat, ita ut vix sanguis esse videretur; cum refrigeratus esset, qui prior effluerat, instar lactis, totus mucilaginis modo coagulabatur, ac virescentis coloriserat, in eoque tantum paucissimi rubri grumi in fundo reperiiebantur: qui posterior effluerat, etiam magna ex parte ex albo virescebat, sed inferius aliquantum obscurè rubri sanguinis deponebat, qui vix coagulabatur: Magnum levamen hæc venæsectio induxit. Interea pro potu dedi pristinam, cui cortices citri & fructus tamarindorum incocta erant. Propter magnam sanguinis corruptionem postridie venæsectionem repetendam esse dixi, quo audito æger anxietatis (quâ valde premebatur) impatiens, obnixè rogavit, ut eadem die illud fieri curarem. Ipso igitur sic petente (nam sanguinis missionem Galli fortiter ferunt) circa vespem ejusdem diei ex altero brachio adhuc sanguinis circiter libram extraximus: qui prior effluebat, etiam valde albicabat, posterior ruber erat. Resiciebantur vires jusculo pulli cum acetosa & malo citreo cocto. Sequenti totâ nocte admodum anxius, debilis, & inquietus fuit, ita ut

ipsum moriturum putarent astantes. Verum Natura tantò jam onere levata, quod reliquum erat malignitatis, postridie ( qui erat morbi dies quartus ) fortiter & feliciter expulit per sudorem criticum spontaneum, quo æger circa meridiem vehementer profluxit, simulque rubicundæ pustulæ, parvæ instar milii seminis, immensâ copiâ undique proruperunt, ita ut à capite usque ad calcem totius corporis cutis iisdem arctissime contacta foret. Hac felici crisi febris plane disparuit, & æger deinceps se jusculis reficiens, ac ptisanam pro potu sumens, intra paucos dies pristinam valetudinem & vires deperditas recuperavit. Totius autem corporis cuticulam mutavit, priore per exiguas squammulas non sine magno pruritu decedente.

*Annotatio.*

**M**agna sine dubio malignitas tantam humorum corruptionem induxisse debuit, qua sanguis tam brevi tempore adeo immutatus fuit, ut amissò colore naturali rubrò jam albus evaderet. Hujusmodi sanguinem ex ipsa vena primo instar lactis albicantem, postea leviter rubrum profilientem, adhuc semel mihi videre contigit Bellovacii, in ægro simili malignâ febre laborante, qui sanguis tunc tem-

poris cum summa admiratione plurimis spectandus offerebatur. Hujusmodi autem febres malignæ seu pestilentes in plurimis Galliarum partibus eò tempore ferociter dominabantur, & ab æris communi ac gravi infectione excitabantur: quarum naturam & curationem vide paulo inferius obs. 24. ubi historiam omnino similis febris quæ nostrates invalit, describemus latius.

OBSERVATIO. IV.

*Gonorrhæa.*

**J**oannes de Laurier, mercator Pictaviensis, viduus, circiter sexagenarius, mense Junio meum consilium petiit ad Gonorrhæam, quâ jam per aliquot menses laborabat, cui & lumborum gravis dolor aderat. Examinatò casu, ex variis indiciis percepi nullam adesse virulentiam, sed tantum à violentiore veneris usu, debilitatis vasis seminariis, malum esse contractum. Quapropter dietam modice calefacientem ac siccantem, cibos euchymos & multi nutrimenti, assos potius quam elixos, vini rubri meracioris modicum potum, aliaque nutrimenta & corroborantia præscripsi. Deinde corpore cathartico mitiore bis expurgato, ut viscosæ cruditates è seminariis viis, ante aliorum medicamentorum usum, prius exturbarentur, singulis matutinis temporibus, & à prandio circa horam quintam salis prunellæ *scrup. ij. s.* cum hauustu vini rubri exhibui, unde urina copiosior profluxit. Cum autem illud per octiduum continuasset, sanatus fuit, nec aliis medicamentis, quibus postea uti decreveram, opus habuit. Lumbos his diebus manè & vespèri in unxerat hoc unguentò:

*℞. ungenti Martiati drach. vj. olei vulpini unc. i.  
olei terebintinæ drach. ij. olei nucis moscatæ expressi drach. j.  
misce fiat unguentum.*

*Annotatio.*

**G**onorrhæa, secundum Galenum, Paulum, Aetium, & alios, est invita & præter voluntatem seminis excretio. Hujus alii duas, alii tres, nos verò quatuor differentias statuimus.

*Prima* fit ob fervorem renum ac seminis copiam, & pollutio appellatur: fit cum aliqua voluptate & colis erectione, in quo ab aliis gonor-

rhæis differt, quod horum neutrum aliis adit: curatur autem sanguinis missione, tenui dietâ, alimentis ac medicamentis refrigerantibus, exsiccantibus & leniter astringentibus. Hujus gonorrhææ exempla & curationes describit Forestus lib. 16. *observat. 11. & 17.*

*Secunda* fit ob malorum vel corruptorum humorum & phlegmatis à cerebro, hepate, aliove visce-

ve viscere ad vasa spermatica alluvionem, quorum inde læditur retentrix facultas, & sic illi humores una cum semine putidi effluunt. Hæc ut viris rarior, sic fæminis admodum frequens & difficilis curationis existit, nec sanari potest, nisi prius sublatô vitiô istius visceris, quod huiusmodi humores eò transmittit.

*Tertia* fit à nimio Veneris usu, quô nimis de-lassatæ & exhaustæ partes spermaticæ refrigerantur, flaccescunt, crudosque ac frigidos humores colligunt, unde debilitata earum coctrix & retentrix facultas materiam seminalem nec satis coquere, nec retinere valet. Hanc facile incurrunt seniores Veneri minus assueti, qui huius oblectamenti occasionem rariorem nacti, omnes nervos isti agriculturæ tam strenuè intendunt, ut totius corporis vires debilitent, & destructô partium seminalium robore, postea talem gonorrhæam cum lumborum imbecillitate incurrant. Hæc curatur alimentis & medicamentis corroborantibus, calefacientibus ac leniter astringentibus, quibus tamen omnibus detergentia quædam & diuretica necessariò præmittenda sunt,

ut urinariæ ac seminariæ viæ à crudis viscidis ac frigidis humoribus, ibidem coacervatis, primò bene liberentur, quô factô deinde curatio facilius succedit, ut apparuit in prædicto nostro ægro tali gonorrhæa laborante.

*Quarta*, quam fœdam virulentamque appellant, è congressu cum lue venerea infectis contrahitur, cujus luis sæpe prodromus, sæpe fidelis comes existit, utpote eandem cum lue causam agnoscens, non nisi curatâ prius lue tutò & bene sanari potest. In hac virus album & subcitrinum malè olens è vasis seminariis sine sensu distillat, ac non raro penis cannam exedit, unde tunc dolores in colis tentigine & mictione, ulcera quoque & carunculæ in meatu urinario nascuntur. Si autem virulentus ille fluor præter rationem supprimatur, plerumque abscessus colligit, vel circa testiculos, qui inde valde intumescunt, vel circa vesiculas seminarias, unde bubones veneriei. Multoties etiam virus introrsum ascendens, & hepar aliaque viscera inficiens toti corpori veneream lûem citissime communicat.

## OBSERVATIO. V.

*Ambustio.*

**W**iggerdus Simonis, super luculentum ignem in cacabo bonam resinæ quantitatem liquefaciebat, eaque, cum nimis effervesceret, forte flammam concepit: hanc extinguere, & pulvinari cacabum obturare volens, improvidus nimis ambas manus resinæ liquefactæ bullienti & jam incensæ totas immerisit, easque vehementer combussit: illud ipsum uxori, eandem flammam etiam extinguere volenti evenit: tandem flamma extincta, de immenso manuum ex ambustione dolore uterque graviter conquerebatur. Præsentaneum hic remedium necessarium erat, cumque nihil ad manus haberemus, forte venit mihi in mentem atramenti scriptorii, quod paulo ante ad meos usus ipsemet confeceram, cujus integrum cantharum plenum in musco habebam: illud in ollam effudi, eique manus suas ambo immergebant, atque ita aliquamdiu lavabant & fovebant, quod cum per semi horæ spatium fecissent, omnino cessarunt ardor & dolor, nullis vesiculis prodeuntibus, nec ullum ex tam vehementi ambustione incommodum retinuerunt.

## OBSERVATIO. VI.

*Palpebræ occlusio à Vulnere.*

**J**Uvencula quædam rustica ex alto ceciderat, atque à casu isto magnum vulnus in supercilio dextro receperat, interiore nempe parte versus oculum, quo vulnere os cranii denudatum conspiciebatur, & superciliô transversim præcisô palpebra superior supra inferiorem propendebat. Chirurgus quidam vulnus, quam citissimè curaverat, sed post sanationem nunquam sponte palpebram superiorem elevare, oculumque aperire potuit, quod tamen facile digito admotô faciebat. Multa ad huius mali sublationem à variis chirurgis (qui singuli perfectam sanationem promiserant) adhibita fuerant topica, quibus omnibus nihil proficientibus, tandem post aliquot menses meum auxilium petitum fuit. Cum locum af-

fectum inspexissem, vidi malum esse incurabile, ac proinde consului ne quicquam amplius imponerent, Ipsa nihilominus aliorum consilio, qui magnam spem dabant) per totum fere annum modo hæc, modò illa applicuit, quibus omnibus nihil proficientibus, tandem desit.

*Annotatio.*

**P**æcisus hic erat palpebræ musculus rectus, quo palpebra elevatur. Adhæc sciolus chirurgus in principio labia vulneris ad se invicem non satis adduxerat, hinc postea cicatrice crassâ inductâ, non potuit musculus ille officio suo amplius fungi, quod malum omnino incurabile esse, nemo non facile judicare poterit anatomiz peritus.

OBSERVATIO. VII.

*Dysuria.*

**F**iliolus Joannis N. famuli Domini Dolre, puellus quinque annorum, per aliquot menses urinam cum summo dolore difficulter & miserrimè reddiderat, quæ inter mingendum etiam sæpe supprimebatur, Parentes modò chirurgorum, modo anicularum, modo circumforaneorum consilio varia exhibuerant & foris applicaverant, quibus omnibus nihil proficientibus, tandem mense decembri meum consilium imploratum fuit. Ego, corpore cum pulvere diacarthami & syrupo de cichoreo cum rheo leniter expurgato, sequentis apozematis sæpius de die haustum exhibere jussi, quod puer doloris impatiens satis avidè bibit:

*℞ radicum ononidis, eryngy, glycyrrizæ rasæ, ana unc. ℥.  
florum chamomillæ m. ij.  
sem. urticæ, apii, anisi, ana drach. ij.  
ficuum ping. n. vij. lactis dulcis, aquæ communis, ana lib. ij.  
coquantur ℥. art. ad tertiæ partis consumptionem, deinde colentur.*

Cum per biduum hoc apozemate usus fuisset, multam viscidam & valde tenacem pituitam una cum urina quotidie excrevit, eoque decocto adhuc bis reiterato, à molestissimo hoc affectu in totum fuit liberatus.

*Annotatio.*

**D**ysuria seu urinæ difficultas varias causas habet, inflammationem, abscessum, vesicæ calculum, hypofarcosim, frigidam vesicæ & sphincteris intemperiem, crassos & viscidos humores, vel urinæ permistos, vel vesicæ ejusque sphincteri pertinaciter adhærentes, aliasque similes; inter quas tamen frequentiores sunt duæ posteriores. Omnes autem singulatim non tantum difficilem reddunt mictionem, verum etiam urinam interdum planè supprimunt, ut nonnunquam etiam contigit prædicto puerulo; quem illi, qui calculos secant, etiam viderant, eumque calculo laborare, ac sectionem necessario quamprimum instituendam esse judicaverant. Ego autem non à calculo, sed à crassa ac tenaci pituita vesicam ejusque exitum obsidente illud malum oriri judicans (quemadmodum id pueris junioribus sæpe contingere animadverti) malui per medicamenta attenuantia, lenientia &

diuretica curationem auspicari, cum talibus etiam calculi minores non raro expellantur. In hoc autem casu in puerulis, quibus ingrata medicamenta exhiberi nequeunt, solos flores chamomillæ cum ficubus in lacte dulci decoctos, sæpe magnum subsidium attulisse observavi, præcipuè si statim post factam coctionem & colaturam, illi flores ita calidi etiam admoveantur pectini, decoctione interea pro potu exhibita. Forestus in simili casu summopere laudat parietariam & cherefolium cocta, & cum butyro atque oleo scorpionum calide pectini admota, idque experimentum etiam in adultis raro fefellisse scribit lib. 25. obs. 8. Kusnerus solam parietariam in sartagine cum oleo assatam commendat. Mercurialis allium contusum & vesicæ impositum mirifice laudat. Amatus Lusitanus capam excavatam, oleo anethi impletam atque sub cineribus coctam, pistatam, & impositam magni facit.

Ob-

## OBSERVATIO VIII.

*Menstruorum Suppressio.*

**J**oanna Elberti, juvencula robusta annorum circiter 24. mense Januariò conquerebatur menstruas purgationes per quatuor menses suppressas fuisse, atque hinc se jam pessimè valere, sinistri lateris ac capitis doloribus valde torqueri, suffocationibus interdum vexari, appetitum valde dejectum esse. Diætâ prius attenuante & calefaciente institutâ, atque etiam prohibitis omnibus iis quæ frigidos, crassos ac viscosos succos generant, 6. Januarii corpus expurgavi cum electuario hieræ picræ. Deinde hoc apozema præscripsi, de quo ter die haustum assumpsit:

℞. *radicum levistici, ostrutii, fœniculi, petroselini, valerianæ, ana unc. f. ligni sassefras drachm. iij. herb. nepetæ, artemisiæ, pulegii, menthæ albe, matricariæ, ana M. j. flor. chamomillæ, m. f. sem. levistici, dauci, nigellæ, ana drach. ij. bacc. lauri drach. j. f. tartari rhenani drach. vj. passul. enuc. unc. ij. aquæ communis q. f. fiat s. art. apozema ad lib. ij.*

11 Januarii rursus purgans exhibitum est, ex infusione foliorum senæ & agarici, cui admixta fuit hieræ picra. Postridie aliud apozema sequenti modo confectum fuit quò utebatur ut priore.

℞. *radic. ostrutii, unc. j. helenii, valerianæ. apii, ana unc. f. dictamni, aristolochiæ rotundæ, ana drach. iij. herb. artemisiæ, nepetæ, sabinae, matricariæ, ruthe, pulegii, ana m. j. abrotani, flor. chamomillæ, ana m. f. sem. apii, nigellæ, levistici, dauci, ana drach. j. f. cicerum rubr. unc. j. f. aquæ communis & vini albi, ana part. æq. fiat s. art. apozema ad lib. ij.*

14. Januarii hoc etiam electuarius dedi, de quo ante haustum dicti apozematis sumeret particulam magnitudinis avellanæ.

℞. *specierum diacurcumæ, cremoris tartari, trochiscorum de myrrha, millepedum præparat. chalybis præpar. ana drach. j. semin. apii, nepethæ, boracis venet. ana drach. f. salis prunellæ, croci orient. ana scrup. j. fiat omnium pulvis subtilissimus, cui adde. olei juniperi, succini, ana scrup. j. anisi, gut. vij. elect. hieræ picræ, unc. f. syrupi conservationis radic. helenii, q. f. fiat s. art. electuarius.*

Præterea cum etiam duritiem aliquam in inferiore ventre circa umbilicum sentiret, tale ceratum imponendum præscripsi.

℞. *gummi opoponacis, Galbani aceto dissolut. emplastri de cumino, de me-*

*de meliloto, ana drach ij. castorei pulverisati, drach. j.  
misceantur & fiat magdaleum, de quo extende q. s. in corio rubro.*

19 Januarii secta fuit saphæna sinistri pedis, è qua sanguis mediocriter effluxit. Etiam reiteratum fuit ultimum apozema, quò deinceps una cum electuario utebatur usque ad 28 Januarii, quò tempore menses satis magnâ quantitate fluere cæperunt, atque ægra postmodum bene valuit.

### Annotatio.

**G** Ravissimorum malorum sæpe causa existit longa menstruorum suppressio, hinc enim præfocationes uterinæ & virginum decolorationes magna ex parte oriuntur, hinc cordis palitationes, vertigines, articularum, capitis, dorsi, lumborumque graves dolores, febres, syncope, tusses, difficiles respirationes, dolores quasi colici nephriticique, ac denique malô nimis diu perdurante, etiam melancholicæ passionis, viscerum tumores, & hydropes procedunt. Quapropter non est diu differenda curatio, verum citus instituenda, nam quo diutius menses subsistunt tanto difficilius revocantur. Hujus autem morbi causa procedit ab angustia vasorum uteri (non agimus hîc de iis quibus non obstruuntur, sed deficiunt menstrua, ut gravidis ratione nutritionis fætus, lactantibus ratione diversionis sanguinis ad mammas, ægotantibus, valde emaciatibus aut vetulis, ratione defectus sanguinis) quæ rursus varias causas ha-

bet, obstructionem, constipationem, coalescentiam, compressionem & subsidentiam. Omnium autem frequentissima causa est obstructio ab humoribus crassis & viscidis; quæ crassities & visciditas vel est in ipso sanguine, quando is frigidus nimis aut viscidus generatur; vel sanguini bono humores excrementitii pituitosi aut melancholici permiscuntur, qui postea cum sanguine ad uteri venas delati, easdem obstruunt. Hæc autem obstructio humorumque visciditas, prout major vel minor, diuturnior vel brevior fuerit, etiam curatio facilius vel difficilius, medicamentis mitioribus vel fortioribus peragitur. In nostra autem ægra fortioribus uti necesse fuit, tam ratione anni temporis frigidissimi, quam magnæ obstructionis: fructus enim horarios crudos, nec non cibos crassos & viscosos ac frigidi nutrimenti edere consueta erat, unde magnam humorum crassorum ac crudorum copiam accumulaverat.

## OBSERVATIO. IX.

### *Raucedo incurabilis.*

**R**usticus Hollandus in conflictu quodam aurigarum vulnus cultro inflictum recepit in colli latus dextrum circa jugulum. Vulnus à chirurgo cito curatum fuerat. Post aliquot deinde menses ad me venit, rogans ut ipsi aliquod medicamentum præscriberem pro maxima sua raucedine, quæ statim ab accepto vulnere laborare cœpisset, & quàm medicus ille, qui ipsum cum chirurgo tractaverat, nullis linctibus, tabellis, decoctionibus, aliisque medicamentis dispellere potuisset. Vox homini adeo exilis & rauca erat, ut vix, quid diceret, intelligi posset. Ego è vulneris loco animadverti nervum recurrentem transversim præcisum fuisse, per quem vocis efformandæ virtus defertur, hincque dimidiam vocalitatem deficere, quod malum cum nullis remediis restaurari posset, ægrum pro incurabili dimisi.

### Annotatio.

**V**ocis efformandæ virtutem deferunt nervi vocales, Galeno recurrentes dicti, à sexta conjugatione orti, & guttur perrepantes ad laryngem delati. Harum admirandam in vocis efformatione virtutem magno encomio decantat Galenus lib. 7. de usu part. cap. 4. 13. & 16. & lib. 3. de loc. affect. cap. 7. Horum nervorum curiosam demonstrationem exhibent Andreas Laurentius lib. 4. anatom. cap. 17. Realdu Columbus anatom. lib. 8. cap. 2. & lib. 14. de sect. one viva. Casparus Bauhinus theat. anatom. lib. 2. cap. 19. His nervis præcisus aphonum redditur animal; altero tantum præciso, semi-

vocale. In dicto rustico ab uno latere tantum præcisus fuit, atque hinc semivocalis evasit; si in altero latere etiam præcisus fuisset, totus aphonus remansisset. Columbus loco citato in sectione vivi canis hujus nervi miram vim ad vocis efformationem eleganter demonstravit. Omnium primus horum nervorum usum notum fecit Galenus, qui eundem tali historia confirmat lib. 5. de usu part. cap. 6. Cum ex cervice quidam charadas (id est strumas) in profundo incumbentes excideret; unguibus eas evellens, imprudens ob ignorantiam simul nervos recurrentes distraxit, atque hoc pacto puerum liberavit à strumis, sed matrem reliquit.



liquit. Quidam alius in alio puero sectionem faciens, ipsum similiter semivivum reddidit, laeso videlicet altero duntaxat nervo. Mirabantur vero omnes, quo pacto neque aspera arteria, neque gutture affecto, vocem ladi comingeret, qui cum vocales nervos, me ostendente, conspicerent, mirari desierunt. Quibus igitur partibus vel materia, vel facultatis copia non transmittitur, actionem ladi probabiliter dixeris, parte ipsam faciente nequaquam laesa. Similem historiam de scrophilus male incisis habet Avicenna 3. 4. tract. 2. cap. 10. Homo quidam (inquit) erravit, cum perforaret quasdam scrophulas, & obviavit ramo nervorum reversivorum, quare destructa est vox. Item 10. 3. tract. 2. cap. 1. Fuit alius qui cum curaretur à scrophulis, incisus est ei unus duorum nervorum reversivorum, quare abscissa est medietas vocis. Huiusmodi historiam etiam refert Amatus Lusitanus cent. 2. curat. 70. mulieris strumam in collo habentis, cui chirurgus ad refecandas radices sublimatum indidit, cuius acrimonia alter recurrentium nervorum corrolus, & vox ex toto fere amissa fuit. Verum non tantum huius nervi dissectio,

sed etiam refrigeratio vocem corrumpere solet, quod Galenus citato loco confirmat hac historia: Equidem vocem vitiatam fuisse memini, adeo ut pene perderetur in frigidatis vehementer, nervis recurrentibus, cum per hyemem cervix fuisset incisa, quod cum intelligerem, calorificis remediis naturalem temperaturam nervis restituens, vocem revocavi. Avicenna 10. 3. tract. 2. cap. 1. similem habet historiam: Homo cuius nervo reversivo accidit frigus, cum esset necessarium ut disco operiretur cum ferro, quare destructa est vox ejus. Gentilis in com. affirmat aliquod apostema in ea parte fuisse, quod debuit secari & expurgari; secto igitur apostemate & nudato nervo recurrente, cum præcipue ob hyemem valde frigidus esset aer, frigida intemperies in eo est introducta, indeque vocis vitium evenit. De vocis usu ac natura, & aphonix generatione legi poterunt, Aristoteles de anim. quest. 3. art. 1. Vidus Vidius de curat. membr. cap. 20. Vesalius 7. de fabr. cap. 4. ad 8. Bisciola lib. 10. horar. subc. tom. 1. cap. 22. Baptista Codronchius de vocis nat. lib. 1. & 2. Aquapendens tract. de larynge.

## O B S E R V A T I O. X.

## Paralysis.

**M**irabilem admodum vidimus paralyseos sanationem in Susanna Smacht, muliere notissima, quæ soror erat æditi templi Montfortensis. Hæc in pueritia sextum agens annum, casu aliquo vehementer perterrefacta, ilico incidit in totius corporis, excepto capite, paralytim. Tractata fuit à quibusdam istius temporis medicis & chirurgis, qui affectum, plurimis adhibitis medicamentis eo reduxerant, ut reliquis partibus restitutis, solummodo utrumque crus, à lumbis usque ad pedes, omnino paralyticum remaneret, ita ut deinceps nunquam amplius incedere nec deambulare potuerit. In tali statu miseram vitam duxit usque ad annum circiter quadragesimum quartum, quò tempore mirabiliter ab hoc morbo liberata fuit sequenti modò, mense Juniò, medià nocte, acerrima ingruit tempestas, cum horribilibus tonitruis & fulminibus, a quibus illa præter consuetudinem gravissimè perterrefacta, ac simul etiam à deplorata ista paralyti subito liberata fuit. Sequenti manè cum omnium admiratione ante ædes suas liberrimè prodeambulabat, gratias agens Deo pro hac inexpectata sanatione. Millia hominum, non ex ipso tantum oppido & vicinis locis, verum etiam è longinquis civitatibus accurrunt, ac nemo non miratur miraculosam hanc sanationem. Ab aliis rogata, quomodo hæc curatio peracta fuisset; respondit se à tonitru & fulmine summopere perterrefactam fuisse, Deumque continuò adorasse: durante autem hac tam terribili tempestate, fratrem æditum forte ad cubiculi sui januam (quæ intus occlusa erat) pulsasse, eamque vocasse, quò auditò, se per pavimentum more solitò proserpere & januam aperire voluisse, atque in eum finem duos baculos seu scipiones (nostratibus *kruckas*, Gallis *potentes* appellatas) quos cubitum proserpens semper ante lectum deponebat, quibus aliquò modò adhuc inniti poterat, quævisse, sed eo in loco, ubi ab ipsa depositi fuerant, illos non invenisse; tunc autem cum hos quæreret, ingens fulmen effulcisse, atque in ista luminis claritate se vidisse baculos illos ad alteram cubiculi partem miraculosè depositos; quapropter se parabat ut per pavimentum super cubitos proserpendo ad scipiones istos perveniret, utpote sine quibus se omnino elevare non poterat. Cum verò jam pedes è lecto deponere vellet (quo tempore se aliquid vidisse & audivisse aiebat, quod,

B

quid

quid fuerit, nulli unquam patefacere voluit) se sentiisse quod iis insilere posset, atque ita sine ullo adminiculo ad cubiculi ostium accurrisse, idque aperuisse. Hæc illa ipsa nobis aliisque non semel narravit. Frater autem ædituus, qui sororem suam circiter per quadraginta annos adeo paralyticam cognoverat, cum ipsam nunc ostium aperire & alacriter deambulare vidisset, præ timore totus attonitus ferè in syncopen incidisset. Postridie & sequentibus diebus dicta Susanna se omnium conspectui publicè exposuit. Ego quoque illam in miserabili illo paralyseos statu à prima pueritia multis annis cognovi ac millies invisi, atque ipsam postea à tanto malo liberatam per quindecim pluresve annos bene sanam vixisse vidi.

#### Annotatio.

**H**ujus mirabilis curationis posset quidem manifesta dari ratio naturalis, nempe humorem istum à primo terrore nervis impactum, hòc ultimò vehementissimò terrore ab iisdem rursus excussum fuisse. Sed cum ægra se nescio quid non vidisse & audivisse affirmet, judicium penes lectorem relinquam: sibi fortassis quippiam imaginata fuit, quod tamen re ipsà nunquam extiterat. Interim hujusmodi improvisas paralyseos curationes etiam alias contigisse auctorum testimoniis constat. Sic Valleriola *lib. 2. observat. 4.* refert historiam civis Arelatensis, alterius partis resolutione plurimis annis affecti, & omni humanà ope destituti, ut quem non operosa medicorum manus, non oportune adhibita remedia, non cauta victus ratio observata, levare tam diro morbo potuerant, qui tandem domò, in qua degebat, igne jam flagrante, eòque hoc incendii & mortis timore vehementissimè percussò, a deplorato morbo derepentè liberatus

fuit, sensu motuque partibus resolutis restitutum. Idem auctor ibidem aliam similem enarrat historiam sui consobrini utroque crure sex annis paralytici, qui tandem vehementi ac repentinà irà in famulum percitus, à deplorato morbo subito liberatus fuit, ac reliquam vitam sanam degit. Sic subitæ ac magnæ animi emotiones non tantum paralysem, sed alios quoque morbos curatu difficillimos vel arte incurabiles restituisse visæ sunt. Testatur Herodotus Cræsi filium, nativo linguæ ac vocis proferendæ impedimento affectum, cum Persidem quendam in Cræsum patrem irruere velle videret, ira & metu percitus mox vocalem evasis, se & dixisse. Homo ne perimus Cræsum, atque deinceps mutum non fuisse. Ita refert Valleriola loco citato se quartanarium studio in vehementem iram accensum, extemplo curatum vidisse, quum nullis antea medicamentis cessisset morbus.

### OBSERVATIO. XI.

#### *Hæmorrhagia narium.*

**C**arolus N. cervisiarius, cum mense Octobri in nuptiis sororis suæ ebrius esset, ac saltaret dissolutius, inter choreas ex improvise pronus cecidit in faciem. A gravi casu vena in naribus disrupta & aperta fuit, hincque sanguis affatim & impetuosè largo ductu effluxit, haud minus quam si mediana brachii incisa fuisset. Oxycratum cervici & collo circumjectum, naribus quoque & fronti applicatum, atque in nares infusum fuit, ligaturæ extremarum partum etiam injectæ, sed omnia hæc nihil profuerunt. Interea æger, tam à casu & ebrietate, quam ab ingenti sanguinis effluentis copia, animo linquebatur. Cum autem reliqua ista nihil juvarent, nec chirurgus qui venam secaret ad manus esse, mantile quadruplicatum aquæ frigidæ immergi jussi ac testibus circumponi; quod cum bis reiteratum esset, præter astantium opinionem hæmorrhagia substitit, æger ad se rediit, & simul etiam cessavit ebrietas.

### OBSERVATIO. XII.

#### *Impetigo.*

**S**cabie quadam sicca, seu ferà impetigine laborabat Cornelius Joannis, cum crustis siccis ac squamulis in cute, & pruritu intolerabili, quò maximè noctu, cum in lecto incalesceret, divexabatur. Crustis autem ob pruritum unguibus scalpando abrais, sub iis cutis pauxillum elevata, rubra valde sicca & aspera conspiciebatur, quæ paulo post rursus similes crustas seu squammas acquirebat. Vul-

gus

gus ipsum leprâ infectum esse putabat. Malum hoc imum ventrem, femora & crura adeo obsederat, ut propter siccas illas crustas seu squamas (horrendum visu) nuda cutis in iis partibus vix uspiam conspiceretur; brachia & pectus etiam nonnullis in locis infecta erant. Ante biennium ex crisi febris quartanæ (qua mensibus quindecim curationem celeberrimi medici D. Gallii, aliorumque (qui omnes malum à lienis vitio induci existimaverant) consilio plurima tam interna quam externa remedia longo tempore frustra adhibita fuerant, malò non tantum non immutò, sed magis ingravescente. Ego tandem in consilium vocatus, cum hominem robustum totò corpore, exceptò hòc solò vitiò, bene valere, nec ullum affecti lienis, hepatis, alteriusve visceris signum apparere animadverterem, judicavi per illam quartanæ crisin, omnibus noxiis & acribus ac vitiosis succis è liene ad cutem excussis, lienem integræ sanitati restitutum, cutem verò hac sicca scabie altius infectam fuisse, nec causam huius mali amplius in liene, verum in sola cute nunc altius fixam subsistere, eamque sic infectam cutem eadem labe etiam quotidie succos & humores, in sui nutrimentum eò pervenientes, inficere, atque propterea malum adeo diuturnum esse: eodem modò sicut vas quod situm contraxit, inficit omne quod in illud effunditur vinum, etiam optimum. Iudicii mei veritatem probavit curationis eventus, nam secundum illud, non tam internis, quam topicis medicamentis hoc grave ac diuturnum malum debellare decrevi, iisque non lenioribus, sed propter affectus magnitudinem & materiæ pertinaciam fortioribus, cum multa alia antea ab aliis tentata nihil profuissent. In hunc finem, corpore prius cathartico purgato, Mense Martio hoc fomentum præscripsi, quò loca infecta per quinque sexve dies quotidie bis tepidè foveret.

℞. *radicum bryoniae unc. iij.*

*herb. absinthii, plantaginis, marubii albi, pimpinellæ, centaurii minoris, ana M. iij.*

*foliorum quercus, M. iij. florum sambuci, M. ij.*

*coquantur in aquæ communis q. s. ad lib. x.*

*addendo sub finem vitrioli Romani, unc. j.*

*aluminis, unc. j. f. fiat fomentum.*

Statim post fomentationem, partibus linteo exsiccatis, inunctum est unguentum nostrum ad herpetem. Post sex dies ommissa est fomentatio, & continuata sola dicti unguenti inunctio, qua solâ intra paucas hebdomadas magna mali pars evanuit. Hòc unguentò æger deinde totâ æstate usus fuit, usque ad mensem Septembrem, quò tempore propemodum curatus erat exceptis tribus quatuorve locis hac labe adhuc infectis, imperialis daleri magnitudinis, quæ huius unguenti usu non cedebant, sed novas identidem squamosas crustas proferebant, quapropter 16 Septembris unguentum sequenti modo præparavi:

℞. *mercurii vivi drach. j. f. therebinthinæ, drach. iij.*

*bene mixtis adde vitellum unius ovi, unguenti populei drach. vj.*

*ung. nostri ad herpetem unc. j. f.*

*misce, fiat unguentum.*

Ægrius evinci & extirpari potuerunt hæ mali reliquæ, propterea diutius in huius unguenti (in quo mercurii vivi quantitatem postea aliquantum adauxi) usu continuatum etiam antedicta fomentatio rursus aliquoties adhibita fuit, atque ita hoc foedum & molestissimum, ab aliis pro desperato habitum, cutis vitium paulatim imminutum & evictum est, usque dum tandem circa finem mensis Novembris omnino dispareret; ita ut æger reliquæ vitæ tempore ab eodem prorsus immunis fuerit.

## Annotatio.

**I**mpetigo, Græcis *Lichen*, aliis *Serpigo* à serpendo appellata, est cutis asperitas dura cum pustulis siccis & ingenti prurigine, ad vicina serpens & se extendens Galenus in Introductorio duas hujus mali statuit species: *Impetiginis* (inquit) *duas species sunt, quæ cutem molestant: una tolerabilis mitiorque est: altera effera, quæ difficiliter tollitur. Squamula in his ex cute abscedunt, sub quibus locus rubicundior fereque exulceratus apparet.* Cornelius Celsus, qui nomine *Impetiginis* aliud malum intellexisse videtur, hanc Galeni impetiginem describit sub nomine *Papula*, ejusque similiter duas statuit differentias *Altera* (inquit) *est in qua per minimas pustulas cutis exasperatur, & rubet leviterque roditur: medium habet paulo levius, tarde serpit: idque vitium maximè rotundum incipit, eademque ratione in orbem procedit. Altera autem est, quam αγγύριον, id est, feram Græci appellant, in qua similiter quidem, sed magis cutis exasperatur, ulceraturque, ac vehementius & roditur, & rubet, interdum etiam pilos remittit. Quæ minus rotunda est, difficiliter sanescit.* Quantum ad mali causam, Galenus 5 de comp. med. sec. loc. Aetius ferm. 8. cap. 16. Aegineta lib. 4. cap. 3. impetiginem generari tradunt ex mixtis quibusdam humoribus, ex serosis nempe, tenuibus & acris succis cum crassis mixtis. Sed melius nostrò judicò & dilucidius Galenus in Introductorio scribit, hunc affectum gigni à pituita salsa & flava bile, unde (inquit) *seu in sulfuginum vasis scitilibus, ex cute secedunt squamae.* Hi autem humores ad cutem transmissi, eandem corrumpunt, ut loquitur Avicenna: ego addo, quæ corruptio etiam postea bonis humoribus ad cutem, pro ejus nutrimento, delatis, imprimitur, atque eò modò malum diuturnum evadit. Sic etiam mercurialis tom. 3. consult. med. 128 scribit sæpè usu venire, ut

sola cutis habitum pravum naçta, totum sui alimentum corrumpat, atque in impura recrementa convertat. Ut sequenti consult. 129. de tali scabioso agens inquit. *In universo corporis ambitu pravus & (ut ita loquor) scabiosus habitus est insitus, merito cujus, quicquid alimenti etiam optimi ad illum defertur, protinus corrumpitur, atque in tetrum quendam nec non salsum & mordacem succum conversum, pruritus illum assiduus, ulcuscula, simulque fœdæ illam à speritatem inducit.* Hujusmodi autem humores cutem corrumpentes necessariò calidi sunt & falsi, atque hinc procedunt ardor, prurigo, & squamæ. Non tam periculosum quam molestum est hoc vitium, quod si inveteretur tantas radices agit, ut postea vix eradicari possit, imò, teste Galen.ò, facile in pforam & lepram transeat.

Mitior in principio lenioribus medicamentis sæpe sanatur, ut siliuà jejuna sæpius affricatâ, butyrò tostò inunctò, vel oleo ovorum, tartari aut juniperino, melle coctò, pice liquidâ, succo citri, &c. Quæ verò diuturnior & fera est, valentioribus indiget, ut sulphure, minio, lythargio, cerusâ, vitriolò, sale fossili, ærugine, calce, alumine, nitro, helleboro albo, &c. quibus adde Mercurium vivum, sublimatum, & præcipitatum, utpote qui Mercurius malignitatem, malo huic comitem, proprietate occultâ & manifestâ extinguit. Sic Petrus Pachetus in observationis Riverio communicatis, feram impetiginem nullis aliis remediis curabilem, tandem sequenti unguento sanavit.

Rec. unguenti rosacei unc. iij.  
præcipitati albi drach. iij.  
misce pro unguento.

## OBSERVATIO XIII.

*Sphacelus crurum à Frigore.*

**E**Briorum imprudentiam gravia nonnunquam mala sequuntur, quod suò exemplò satis docuit robustus quidam juvenis. Hic asperissimè hyeme, cum intensissimè gelaret, mediâ nocte bene potus domum venit, ac nemine comite cubiculum suum ingressus est, ubi nimia ebrietate obrutus in tabellatum concidit, atque ibidem prostratus, lecti & sui ipsius immemor, obdormivit usque in sequentem diem. Cum evigilasset, nec pedes nec crura sentit. Statim medicum auxilium imploratum est. In pedibus & cruribus, etiam altissimè scarificatis nullus tactus sensus percipi potuit. Deinde etiam fomentationes calidæ, ex herbis calefacientibus in vino coctis, addito etiam spiritu vini, adhibitæ fuere, sed cum parvo fructu, nam pedes & dimidiata crura infra furas mortua mansere, calore innatò frigoris violentiâ penitus extinctò. Per triduum in fomentatione continuatum fuit. Die quarta partes emortuæ nigricare, ac instar cadaveris fætere cæperunt. Ut æger servari posset, ad extremum remedium perveniendum erat, nempe ex-

pe extirpationem, qua die sextâ utrumque crus paulo infra suram in parte viva extirpatum est, atque eò modò æger, quod instabat mortis periculum, sine pedibus effugit, novòque modò postea supra genua ambulare didicit, atque egregia ebrietatis suæ præmia totò vitæ tempore secum tulit.

### Annotatio.

Simile exemplum etiam vidi Noviomagi, anno 1636, in Dano quodam milite, qui cum frigidissimò tempore ebrius super scamno totâ nocte obdormivisset, manè expergefactus pedes non sentiit; sed fomentationibus calefacientibus per biduum adhibitis, calor pedum innatus, qui à frigore fere extinctus fuerat, restitutus est, exceptis pedum digitis, qui ad naturalem constitutionem reduci non potue-

runt, sed emortui manentes, etiam putrescentes, à chirurgo omnes amputati fuerunt. Consultos igitur velim omnes potatores, ne tam imprudenter hybernò tempore somnum capeſcant, nisi prius se loco calido deposuerint, & contra injurias æris bene muniverint, ne somnò vi-  
nòque sepulti, ob inimicum frigus tandem etiam terrâ sepeliantur.

## OBSERVATIO. XIV.

### Obstructio lienis.

Catharina N. mulier annorum quadraginta quatuor, toto anno lienis obstructione laboverat; flatus in lienis regione obaudiebantur, ejusdem lateris, ob visceris ac vicinarum partium magnam distentionem, summis doloribus torquebatur, ita ut omnino in affectum latusincurvata incederet, tandem autem à continuis cruciatibus instar sceleti emaciata, amplius incedere non posset. Lienem multum intumuisse foris manibus percipi poterat: appetitus quoque dejectus erat. Ad hujus morbi curationem mense Martio vocatus, primò corpus cathartico leniore expurgavi: à qua purgatione cum parum levaminis sequeretur, biduo post sequens apozema præscripsi, quo viæ obstructæ aperiri, & materia morbifica præparari, simulque clementer subduci posset.

℞. *radicum polypodii querni, taraxici, ana unc. j. fœniculi, helenii, petroselini, cort. rad. cappar. tamarisci, ana unc. f. herbar. melissæ, fumariæ, trifolii palustris, summitatum lupuli, ana m. j. centaurii min. m. f. sem. fœniculi drach. ij. prunorum damasc. no. xi. passul. corinth. unc. ij. coquantur s. art. in aquæ communis q. s. in colatura macerentur per noctem herb. cochleareæ, nasturtii hyemalis, ana m. j. fol. senæ mundat. unc. ij. sem. anisi drach. vi. fiat apozema ad lib. i j.*

Hujus decocti matutinis temporibus haustum bibens, bis terve de die deiciebat, sed nondum sequebatur expectatum levamen: quapropter evacuato apozemate rursus purgans medicamentum aliquanto fortius exhibere placuit, quod in hunc modum præscripsi:

℞. *foliorum senæ mund. unc. f. agarici albi drach. j. radic. hellebori nigri drach. f. tartari rhenani, seminis anisi, ana drach. j. aquæ fumariæ q. s. factâ per noctem infusione, addantur colaturæ elect. hieræ picræ, diaphænici, ana drach. ij. misce, fiat haustus.*

Hòc assumptò, primo excrementa communia dejecit: paulo post ingentem sentiit in latere sinistro dolorem, qui statim inde ad intestina translatus fuit, quò dolore tantopere debilitabatur, ut aliquoties animo linqueretur: non diu post de-

orsum excrevit aquam quandam ( mirum visu ) nigram, fere instar atramenti, tantâ copiâ, ut eadem integræ tres matulæ replerentur ad summum. Hinc maximum sentiit levamen, & sinistri hypochondrii dolores fere in totum evanuerunt. Quatriduo post, illud ipsum purgans iterum exhibitum fuit, à quo rursus magnam aquæ nigricantis copiam dejecit, sed non tantam ut antè, neque etiam hæc erat adeo nigra ut prior, sed non absimilis lixivio in quo fæminæ nostrates filamenta linea coxere. Post hanc evacuationem valde debilis erat, & tormina in ventre sentiebat, quapropter circa vesperam exhibui Mithridatii Democ. drach. j. cum olei anisi gut. v in haustu vini calefacti. Post horum medicamentorum usum ægra mediocriter valuit, cumque jam adeo nausearet, ut vel solum medicamento nomen horrorem incuteret, curationis reliquum usque ad mensem Majum differre coacti fuimus; interea ipsam diætæ convenienti commisimus. Mense autem Majo rursus tria apozemata bibit, & ter quaterve purgata fuit, etiam electuario usa est, atque ita pristinæ valetudini prorsus restituta fuit.

### Annotatio.

**H**UIC ægræ biennio antè, ratione ætatis, menstruæ purgationes defecerant, atque ex eo tempore lienis morbo paulatim magis magisque corripere cæperat, atque etiam tota melancolica evaserat. Ita ut credibile sit hujus consueta evacuationis (qua etiam multa aliorum viscerum excrementa deturbari solent) defectum, fuisse causam accumulationis hujus melancolici humoris in liene & vicinis partibus, utpote cui jam deerat consueta evacuationis via per uterum. Hinc non malè Sennertus praxeos lib. 3. part. 4. cap. 3. sic inquit: *Ad cumulandos vitiosos in liene humores faciunt consueta hemorrhoidum vel mensum evacuationes suppressæ.* Sic & nos in praxi non semel vidimus post menstruum defectum mulieres modò hos, modò illos graves morbos incurrisse, propterea nempe quod noxii humores, qui antea una cum menstruo sanguine evacuebantur, tunc intus retinerentur. Quapropter menstruum purgationibus ob ætatem jam primo deficientibus medicamenta purgantia aliquoties sunt exhibenda, quibus illi excrementitii humores, antea per uterum evacuari consuevi, jam protrahantur ad intestina.

Quantum ad nigras dejectiones, profectò mirum est quomodo illi melancolici humores in nostra ægra tantâ copiâ coacervari, tantò tempore sine majore noxa in corpore retineri, & in tantam nigredinem (quæ atramento similima erat) mutari potuerint. Dejectiones autem nigras periculosas & sæpe lethales esse docet Hippocrates 4 Aphorism. 21. 22. 23. 24. 25. Verum Petrus Salius Diversus hic bene monet Medicos, ne semper hujusmodi dejectiones nigras timeant, cum sæpe omni periculo vacent. Si enim splen præter naturam sese habeat, limosa

hæc materia plurima accumulatur circa viscera, in venisque illis communibus, & si abundantior colligitur, etiam in mesenterio & circa pancreas, quæ totius corporis veluti sentina sunt, accumulatur, quæ tandem, cum gravis admodum naturæ fuerit, vitute expultrice vel sponte vel medicamentis incitata, expellitur, hincque dejectiones fiunt nigerrimæ, cum salute ægri. Illa autem sic collecta melancolica materia, non semper per intestina, verum etiam per urinas interdum salubriter expellitur quod etiam asserit Mercurialis tom. 2 consult. med 49. Neque verò mirari (inquit) debes, à me præ cæteris diuretica commendari, quoniam lienosos & melancolicos ichorosos sanguinem habere, & ratio docet, & Aristotelis in problematibus auctoritas, maximeque omnium Hippocrates, qui non solum id lib. epidem. 6. scriptum reliquit, verum etiam Biantis pugilis apud ipsum historia, qui à lienis tumore liberatus est urina profluvio, aperte demonstrat: ut ob hæc omnia qui tumores lienis curant, in urinam provocandam incumbere debeant. Hujus rei notabilem historiam refert Antonius Valetius ad Hollerium de morb. intern. exercit. 40. Novi ego (inquit) religiosum virum, quo cum quotidie familiariter versor, cui ter aut quater in anno, maxime verè & autumnò ineuntibus, intumescit lien, ac dum prominulus tumor instat, dolore hypochondrii infestatur, sublividus totò fit corpore, sensimque deterius habet. Sed tandem nigricantibus urinis atramentò similibus, erumpentibus per quinque aut septem dies, pristinam resumit incolumitatem, tumore & gravitate hypochondrii evanescentibus. Jam à 12 aut 15 annis repetitò istiusmodi per intervalla urinarum profluvio detinetur, cum ante turgidas, sed minus apertas, habuisset hemorrhoides.

## OBSERVATIO. XV.

*Vulnus tibiæ.*

**A**ndreas Joannis caupona, cum ebrius portam cubiculi sui clausam vi aperire vellet, pedem quam maximâ vi potuit in januam intorsit, qua iu medio disruptâ, crus cum impetu per foramen transiit, & læsum fuit in tibiæ medio paulo introrsum versus suram, solutione non admodum latâ, sed usque ad periostrum pertingente; à contusione pars quoque multum intumuit. Ignarus quidam chirurgus ipsum per aliquot dies tractaverat, tandem doloribus incrementibus etiam meum consilium petitum fuit. Totum crus valde intumuerat, & obscurè ex livido virefcebat, cum doloribus acutissimis, ac jam sphaceli prodromum gangrænam contracturum color satis demonstrabat. Quod malum chirurgi incitiâ vel errore inductum fuisse statim animadverti; hic enim petiâ durâ vulnere usque ad periostrum immissâ, illud tam arcte obturaverat, ut nulla humiditas inde egredi posset: huic emplastrum defensivum (ex bolo aliisque frigidis & astringentibus concinnatum) ad manus latitudinem imposuerat: denique cruri, à genu usque ad pedem, lintea oxycrato madefacta circumjecerat, totumque crus fasciâ arcte ligaverat, atque tali modo inflammationem & tumorem impedire voluerat. Vulnus plane crudum erat & malè coloratum, sine ulla digestionem, & extractâ petiâ tantum paucillum ichoris aquosi effluebat. Ego his omnibus abjectis, ut gangræna præveniri posset, vulnus spiritu vini ablui, nullam petiam immittere, sed tantum linteolum quadruplicatum eidem imponi, ac toti cruri hoc fomentum calide circumiici curavi:

*℞. herbarum betonicae, thymi, absinthii, salviae, hyssopi, rosmarini, florum chamomilla, sambuci, meliloti, rosarum, ana m. j. sem. cumini, levistici, ana unc. f. bac. lauri drach. ij. vini albi q. s. coquantur ad lib. iij. adde colaturæ, spiritus vini lib. j.*

His impositis dolor sequenti nocte multo mitior fuit, & multum aquosi ichoris per vulnus effluxit. Crus intra biduum planè detumuit & ad naturalem colorem rediit, pus quoque bene coctum ejecit, atque deinde debitò modò tractatum ad sanationem facile perductum fuit.

*Annotatio.*

**R**es peregrinæ quæ vulneribus insunt, naturæ, consolidationem molienti, sunt inimicissimæ, præsertim si nervosum aliquod corpus, membranam aut tendinem vel periostrum comprimant; hinc enim graves dolores, tumores, inflammationes, aliaque mala procedunt, ac proinde huiusmodi res eximendas esse Paræus, Pigræus, aliique chirurgi docent. Eodem modo etiam turundæ (quas & petias & tentas appellant) crassiores & duriores, quæ vulnus interiorius offendunt ac distendunt, atque simul etiam penitus obturant, vel nervos, membranas, aut periostra comprimunt, non sunt vulneribus immitteandæ, utpote quæ naturæ operationes (nempe suppurationem, puris ejectionem, & consolidationem) potentissimè impediunt, atque dolores, inflammationes, aliaque mala generant. Sic in praxi, quorundam nasutorum chi-

rurgorum incitiâ hōc modò aliis crudelissimos dolores, atque hinc febres & lyncopes, aliis convulsiones, aliis partium gangrænas & mortificationes inductas fuisse non semel vidimus: quemadmodum illud etiam huic nostro ægro contigit, cui præter alia gravia symptomata, jam gangræna imminabat, & nisi citò huic malo occursum fuisset, procul dubio, accedente sphacelò, vel cruris, vel forte etiam vitæ jacturam fecisset. Hinc Felix Wirtius lib. 2 chirurg. cap. 11. in vulneribus articulorum & manuum turundarum usum plane reiicit. Hujus tamen opinionem refutavit Hildanus cent. 4 observat. 76. qui turundas etiam in nervosis partibus necessarias esse docet, ut nempe superiora vulneris labia aperta retineantur, & puri effluxus pateat. E qua doctrina patet ipsum tales laudare turundas, quæ interiores vulneris partes non offendunt,



dunt, sed tamen superiores apertas retinent, sic nimirum ut puris effluxus pateat. In nostro autem ægro in his gravis error à chirurgo commissus fuerat, nam crassa & dura turunda inte-

riores vulneris partes distenderat, ipsumque periossum compresserat, ac coctionem, nec non materiam, saniei purisque exitum impedierat.

## OBSERVATIO XVI.

*Suppressio urinæ*

**U**Xor Gerardi Antonii, sartoris, mense Majo puerpera erat, & jam tertio à puerperio die lorium non reddiderat, unde vehementer angebatur, adeoque debilis erat, ut vix amplius loqui posset. Obstetrix partum satis feliciter successisse, sed statim post eundem lochia suppressa fuisse, atque in puerperæ ventre inferiore ab altero latere adhuc aliquid duri latere & sentiri referebat. Hinc judicavi vel alterum fætum, vel molam, vel simile quid adhuc intus remansisse, quod os uteri & vesicæ comprimeret. Ad malicurationem, ut urina & lochia simul provocarentur, hoc apozema præscripsi:

*Rx. radicum petroselini, ostrutii, valerianæ, eryngii, ononidis ana unc. f. aristolochiæ rotundæ, glycyrrizæ rasæ, ana drach. ij. foliorum ribesii nigri, artemisiæ, pulegii, nasturtii aquatici, ana m. j. signis cum toto, m. ij. sabinae, florum chamomillæ, ana m. f. vini albi q. s. coquantur f. art. fiatque apozema ad lib. j. f.*

*Rx. dicti apozematis unc. iij. olei succini per descensum distillati gut. xx. fiat haustus.*

Hunc prima vice calidum assumpsit, eundemque cum post tres horas reiterasset, paulo post supervenientibus parturientium conatibus, peperit molam rotundam, magnitudinis capitis infantis, undiquaque oculos humanos perfectissimos habentem. Hac feliciter expulsâ, statim urina & lochia satis copiosa subsequerantur, & ægra ab instanti periculo liberata fuit.

*Annotatio.*

**M**olæ variae sunt, aliæ sine, aliæ cum fætu: aliæ fætui & mulieri valde damnosæ & molestæ, aliæ minus: aliæ planè informes, aliæ formam alicujus rei referentes: aliæ vitales, aliæ non vitales, &c. Nunquam autem boni quid præfagiunt, licet enim

interdum non obsint, plerumque tamen vel fætui, vel matri, vel utrique graves noxas inferunt: quod nostra ægra suo exemplo satis edocuit, de cujus vita actum fuisset, nisi medicamenti vi molaeducta, atque ita lochius & urinis via data fuisset.

## OBSERVATIO XVII.

*Dysenteria.*

**G**erardus Vossius, vicinus noster, dysenteria per aliquot dies laboraverat. Maximis intestinorum doloribus miserè cruciabatur, sæpe multa deieciat, quæ cruenta & mucco tenaci permixta erant omnia: nihil dormiebat: appetitus planè dejectus erat, vehementer sitiebat, febris aderat non admodum vehemens, sed continua. Licet æger juvenis esset triginta annorum, & valde robustus, attamen his malis exagitatus adeo prostratus fuit, ut paucis diebus

bus ad summam debilitatem pervenerit. Sexto Februarii, morbum curaturus, tale purgans exhibui, à quo multa biliosa dejecit:

℞. *rhabarbari opt. aliquantum ustulati drach. ij.*  
*myrobalanorum Indorum, citrinorum ana drach. j.*  
*folior. senæ mundat. drach. iij.*  
*sem. anisi drach. j. papaveris albi drach. ij.*  
*aquæ plantaginis q. s. ebulliant per sem. horam, adde colaturæ*  
*elect. diaphenici drach. j. s.*  
*misce fiat haustus.*

Vesperis post purgationem hunc bolum exhibui, à quo illa nocte per horam unam aut alteram quievit:

℞. *terræ sigillatæ, requiei Nicolai, ana scrup. j.*  
*mithridatii Damoc. scrup. ij.*  
*misce, fiat bolus.*

Postridie sequens apozema coctum fuit, de quo ter de die & semel nocte mediâ haustum bibit.

℞. *hordei mundat. unc. j. radicum bistortæ, tormentillæ,*  
*corticum granatorum, ana unc. s.*  
*foliorum quercus, plantaginis, saniculæ,*  
*pimpinellæ, alchimillæ, bistortæ, ana m. j.*  
*seminis rosarum minimarum drach. vi.*  
*capitum papaveris albi no. iij.*  
*passularum cum acinis unc. v.*  
*aquæ communis lib. iij.*  
*coquantur s. art. ad medias: sit apozema.*

Intermediis horis etiam sæpe de die particulam hujus conditi comedit:

℞. *nucis moscatæ, trochiscorum de terra sigillatæ, ana drach. s.*  
*cornu cervi usti, coralli rubri præparati,*  
*lapidis hæmatitis mastiches, ana scrup. j.*  
*pulverisatis adde, conservæ rosarum rubrarum unc. j. s.*  
*myræ cydoniorum, rob acaciæ, ana drach. iij.*  
*requiei Nicolai drach. j. s.*  
*syrupi granatorum acid. q. s.*  
*misce, fiat conditum.*

Sitim, quantum possibile erat, ferre jussi, cui legi eò facilius obtemperavit, quod post potum, imprimis cervisiæ, semper maxima tormina sentiret, atque hinc etiam loco cervisiæ, tale amygdalatum pro potu ordinario præscripsi:

℞. *hordei mundati unc. j. s.*  
*seminis rosarum minimarum unc. j.*  
*papav. albi, plantaginis, lactucæ, ana unc. s.*  
*aquæ communis lib. iij. coquantur ad medias.*  
*℞. dictam colaturam, amygdalarum dulc. depilat. unc. v.*  
*sem. papaveris albi drach. iij. 4 frigid. major. ana drach. j. s.*  
*fiat s. art. amygdalatum, cui admisce*  
*syrupi de papavere unc. j. rosarum rubr. unc. j. s.*

9 Februarii manè exhibui rhabarbari parum ustulati & pulverisati scrup. iij. cum pauxillo cervisiæ. 10, ut & 13 Februarii apozema, 12 autem conditum reite-

C

raturum

ratum fuit. Atque his medicamentis fluxu cessante, æger paulatim convaluit, & vires deperditas convenienti diætâ recuperavit, verum adhuc diu post sanationem à quolibet potu male afficiebatur & magna intestinorum tormina sentiebat, quod malum etiam paulatim evanuit, nempe intestinis ab usu ciborum novò muccò (priore humorum acrimoniâ abralò) rursus oblitis & investitis. Hòc ægrò sanatò, in iisdem ædibus paulo post idem morbus tresquatuorve alios invasit, qui omnes simili fere modò curati fuerunt.

*Annotatio.*

**E**odem illò tempore Montforti per totum oppidum dysenteria inter vulgus passim grassabatur, multosque necabant, integræ quoque familiæ hòc morbo corripiebantur, quem propterea multi malignum & contagiosum esse judicaverunt; sed malè, quia non contagii, sed temporis anni & diætæ ratione communis erat: causâ enim mali hiinc procedebat. Autumnus anni præteriti fuerat calidus & humidus, multosque in corporibus humores accumulaverat: hunc subsequēbatur hyems admodum siccâ & intensissimè frigida, quod frigus cum asperimo gelu longo tempore duravit, humoresque valde condensavit. Initio Februarii asperissima illa frigida tempestas subito in tepidam mutata est, qua humores à frigore condensati ad fluxum dissoluti fuerunt. Durante autem gelu, cum nihil

neque carniū, neque piscium, aliorumque eduliorum recentium adveheretur, vulgares (ut illo in loco consueverunt) toto illo tempore vesciebantur carnibus & piscibus antiquis, salsis & fumo induratis etiam multis capis, & aromatibus calidis, aliisque similibus, quæ humoribus non parvam acrimoniam induxerunt, quibus tandem repentinò calore ad fluxum dissolutis, tot passim dysenteria excitata sunt; non tamen alibi quam apud vulgares, qui tali diætâ usi fuerant, divites enim qui liberalius vixerant, ab hoc malo immunes erant. Hinc etiam evenit, quod ratione unius ejusdemque diætæ, tres quatuorve in iisdem ædibus sæpe hòc morbo inficerentur, non autem ratione contagii, quod æque alios qui ipsos adibant, quam hos invalisset.

OBSERVATIO. XVIII.

*Dysenteria.*

**P**ancras Collert, juvenis robustus annorum circiter 22. eodem tempore dysenteria quoque correptus fuit, cumque à medicinis esset aversus, forte quia valde erat avarus, noluit medicorum consilia petere, sed sibi ipsi medicus esse voluit. Viderat aliquoties me dysentericis in principio curationis medicamentum purgans exhibuisse, quapropter hoc meum consilium in suo ipsius morbo etiam sequi, & interim sumptibus parcere volens, ipsemet sibi tale purgans præparavit: sumpsit tabaci minutim incisi semi unciam, idque pernoctem maceravit in cervisia tenui, manè parum coxit & colavit cum expressione, actotam colaturam unico haustu ebibit. Paulo post summâ anxietate usque ad animi deliquium correptus fuit, ita ut ipsum jam jam moriturum crederent domestici. Eandem enormis vomitus & ingens per inferiora purgatio supervenit, magnaue variorum humorum, maximè bilis flavæ ac viridis, copia sursum deorsumque ejecta est, atque eò modò causâ morbi violenter & simul evacuatâ, hoc unico haustu à dysenteria in totum liberatus fuit.

*Annotatio.*

**S**æpe (inquit Celsus) quos ratio non restituit, temeritas adjuvat. Liquet illud in prædicto juvene, cujus temeritatem si qui forte debiliores sequi vellent, facile per effluxum ipsius animæ dysentericum alvi fluxum sanarent. Nam tabacum tali modò sumptum, est medicamentum turbatorium vehementissimum, cu-

jus violentiæ non est cujuslibet resistere. Ac proinde ego non omnibus auctor esse velim ut hujus experimenti periculum faciant. Si nonnullis robustissimis hominibus hujus violentissimi medicamenti temeraria assumptio casu feliciter cesserit, non in omnibus ille eventus sperandus est. Quod tamen tabacum in robustissimo juvene

venē dysenteriam sanaverit, non est à ratione alienum, nam maximā suā violentiā totam mali causam simul evacuavit. Audiui etiam tunc temporis adhuc alios duos rusticos dysenteria laborantes, eodem experimento fuisse sanatos.

## OBSERVATIO XIX.

*Lochiorum Suppressio*

**A**Ntonia mulier plethorica, fortis, circiter 23 annorum, primipara, post tertium à partu diem è lecto surgens, aeri frigidiusculo se nimis temere commisit, unde lochiorum purgatio statim substitit, attamen ipsa bene valuit usque ad tertiam à partu septimanam, qua dolor vehemens latus sinistrum versus lienis regionem, ut & lumbos invasit, seque ab ischio osse ad veras usque costas extendit. A dolore appetitus prostratus & vires multum dejectæ fuerunt. E pulsu tamen comperi nullam adesse febrem. 20 Septembris, mane tali hauſtu assumptò, mediocriter purgata fuit.

℞. rhabbari optimi, drach. j.  
fol. senæ mundat. drach. iij.  
tartari rhenani, sem. anisi, ana drach. j. f.  
aquæ artemisiæ q. s. fiat infusio s. art. & addendo colaturæ  
elect. hieræ picræ drach. j. f.  
fiat hauſtus.

Post purgationem adeo abhorruit à medicamentis, ut nihil amplius assumere voluerit, ita ut hic subsistendum fuisset, nisi 22 Septembris ingens ab utero præfocatio ægram invasisset, qua anhelitus meatu interceptò ferè suffocaretur, interdum animò lineretur: tunc ægra, hinc doloribus cruciata, illinc mortis metu perculsa, se medicamenta quælibet ingratissima sumpturam promisit, dummodo ex iis aliquod levamen sperari posset. Ad uterinam suffocationem imminuendam hoc decoctum dedi, cujus sæpius de die unam, duas, tresve uncias bibebat.

℞. fol. ruthæ m. j. seminis levistici drach. vi.  
julorum nucum unc. f. sem. carui, ameos ana drach. j.  
decocti hordei q. s. coquantur ad lib. j. & colentur.

Hujus usu suffocatio magna ex parte cessavit, sed interim dolores lateris magis magisque increverunt, seque jam ad humerum usque extendebant, ita ut non parum de vita ægræ metuerem. 24 Septembris hoc apozema coctum fuit.

℞. radicum feniculi, valerianæ,  
petroselini, ana unc. f. bryoniæ, drach. vi.  
aristolochiæ rotundæ, diptamni, ana drach. ij.  
ligni sassefras drach. iij. herbarum artemisiæ,  
ruthæ, pulgii, matricariæ, sabine, nepethæ, ana m. j.  
florum chamomillæ, m. f. seminis levistici drach. v.  
aquæ communis q. s. coquantur s. art. ad lib. ij.  
in colatura macerentur per noctem,  
folior. senæ mundat. unc. ij.  
agarici albi drach. j. f. sem. anisi drach. v.  
manè leviter ebulliant & colentur  
cum expressione, sitque apozema.

Hujus decocti bis de die (nam non facile movebatur) nempe matutinò tempore, & hora quarta vel quinta postmeridiana assumpsit uncias quatuor vel quinque, idque repide,

tepidè, unde singulis diebus ter, quater vel quinquies admodum putida, fœda, nigricantia, tenacia, & valde viscosa excrementa, multosque flatus excrevit. Intermediis horis, propter suffocationes subinde redeuntès, interdum usà fuit de prima decoctione. Horum usu intra quatrìduum dolores magna ex parte cessarunt. 29 Septembris saphænà in pede sinistro sectâ sanguinis bona quantitas cum maximo levamine extracta fuit, eademque die ultimum apozema reiteratum est, quò sequentibus diebus tantum semel de die utebatur. His remediis à periculossimo morbo evasit & convaluit.

### Annotatio.

**P**uerperæ sæpius graves in puerperio committunt errores, postea gravissimorum malorum causas, inter quos non minimus est ille quod viribus suis nimium confidentes, citius se aëri committant quam puerperii tempus permittit; unde tunc periculossimi morbi succrescunt, lochiorum suppressiones, febres, suffocationes, alique plurimi, quorum, præter quotidiana, apud auctores varia inveniuntur exempla, qualia describunt Cordæus comment. 3. ad lib. 1. de mulieb. Hipp. Solenander sect. 5. consil. 15; Valleriola lib. 5. obs. 10. Hildanus cent. 4. observat. 12. alique varii. Sic etiam nos in praxi non semel vidimus hóc errore puerperis gravissimos morbos fuisse inductos, quibus aliæ è vivis sublata sunt, aliæ in gravissimum vitæ periculum conjectæ, aliæ gravi alicujus partis afflictione totò vitæ tempore detentæ fuerunt. Non omnes adeo feliciter evadunt sicut nostra jam dicta ægra, interdum enim nimia debilitas, vel nausea, vel febris, vel aliud quid medicamentorum assumptionem prohibet, vel assumptorum operationem invertit

aut impedit, atque tunc medicus omni sua diligentia parum aut nihil prodesse poterit. Sic eodem annò, quò hanc ægram tractabam, Ultrajecti uxor cognati mei, mulier fortis, ob eundem errorem simili morbo laboravit, sed nulla medicamentorum, à doctissimis medicis prudentissimè præscriptorum, ope servari potuit.

In talibus autem casibus illud aliquoties observavi, lochia paulo post partum suppressa, nisi intra tres quatuorve dies medicamentis citentur, postea medicorum ope, aut difficulter, aut omninò non posse promoveri, sed gravium sæpe morborum causas fieri, qui morbi interdum statim, interdum post aliquot dies, interdum non ante tertiam quartamve septimanam manifestantur: atque in horum curatione illud etiam notavi, in principio, viribus adhuc constantibus, maximum subsidium adferri, partim per apozemata attenuantia & simul etiam laxantia, quibus humores copiâ & qualitate peccantes simul præparari & per intestina evacuari possunt; partim per venæsectiones in pedibus: quem medendi modum non semel cum felicissimo successu tentavi.

## OBSERVATIO. XX.

### Nephritis.

**D**Omicella Calslager intolerabili paulo infra lumbos dolore per triduum vexata fuerat tam immaniter, ut quo se verteret nesciret: aderant simul vomitus & maxima inquietudo. Nephritis erat, & sabulum vel calculus per ureterem descendens, hos dolores inducebat. Hic calculus ut citius & facilius expelleretur, hoc decoctum à me præscriptum fuit:

*R. glycyrrizæ rasæ unc. f. herbar. petroselini,  
altheæ, chærefolii, malvæ, sionis,  
fol. ribesii nigri, ana m. j.  
florum chamomillæ m. j. f. ficuum ping. no. ix.  
lactis dulcis, aquæ communis ana lib. j. f.  
coquantur ad tertiæ partis consumptionem,  
coletur, sitque apozema.*

Ista die totum fere decoctum ebibit, & circa vesperam aliquot exiguos calculos cum bona sabuli quantitate excernens, ab hoc malo liberata fuit.

Anno-

## Annotatio.

**M**edicamenta saxifraga calculos in renibus hærentes interdum comminuere docet experientia: verum è renibus expulsos & in ureteribus jam hærentes calculos nullâ medicamentorum vi confringi posse, præter experientiam, docet ratio, cum nullum medicamentum integris viribus eò pervenire queat, & maxima feri quantitas accurrens atque ibi subsistens, medicamentorum etiam vires impediat & infringat, ita ut nihil efficere possint. Proinde in calculi ex uretere promotione, diureticis simul etiam lenientia & emollientia admiscenda sunt, quæ ureteres lenire simul & emollire, atque ita calculo faciliorem descensum præparare possunt. Tale est illud decoctum quod nostræ ægræ præscripseram. Tale est secretum Joann. Bapt. Theodosii, quo se minime deceptum, sed ad calculi expulsionem & præsevationem semper felicissime usum fuisse prædicat: estque hoc:

Rec. fol. altheæ recent. m. j. s.  
butyri recentis unc. iij.  
milles lib. s. bulliant aq. q. s.  
ad tertias: de colatura bibatur mane & vespere  
haustus calidus.

Tale est etiam illud tanti nominis secretum Foresti, quod plurimi medici maximi faciunt, & quod etiam ego interdum solo interdum quibusdam additis immutatò, sæpius feliciter usus sum. De quo ipse Forestus lib. 21. observat. 29. ita scribit: *Hoc meum secretum & arcanum ne nunc quidem reticere volo, ob communem agrotantium utilitatem, ne illud audiam, quod servus ille nequam audivit à Domino suo, quod talentum sibi à Domino commissum sine favore sub terra condidisset. Ideo neque hoc arcanum posteritati iniquior apud me servare volui; estque hoc decoctum sequens:*

Rec. sem. malva  
althea, ana drach. iij.  
cicerum rubr. unc. iij.  
sem. 4. frig. maj. ana drach. ij.  
hordei mundati unc. ij.  
caricarum pinguium no. ix.  
sebesten no. vii.  
glycyrrizæ rasa drach. j.  
aqua pluvia lib. iij.

fiat decoctio ad consumptionem medietatis, colatura usui reservetur; qua ægri continuo utentes, calculos semper excernunt.

## OBSERVATIO. XXI.

## Vermes.

**F**iliolo Antonii, puello trium annorum, imus venter valde intumuerat, & instar tympani tensuserat, ita ut hydropicus esse videretur: appetitum dejectum habebat, cum parva febricula, terrores in somno aderant, & digitis nates identidem perfricabat. Judicavi vermes crudosve humores, in prima ventris regione hærentes, hæc omnia mala inducere. Quapropter cum nihil omnino assumere vellet, & tamen sæpe biberet, cervisiam recentem ipsi pro potu dari jussi, cui tantum olei vitrioli admiscui, quantum ad levem acorem sufficiebat. Hòc solò potu per duas tresve septimanas continuatò, venter omnino detumuit, nullos tamen lumbricos excrevit.

## Annotatio.

**O**leum vitrioli dicto modo exhibitum, non modo putredines omnesque corruptiones tollere, verum etiam lumbricos ventriculi & intestinorum enecare ac consumere, & talibus malis infestatos ægros, etiam desperatos, sæpe præter expectationem restituisse, vidimus. Sic soror mea Cornelia, cum septem annorum ætatem attigisset, & intestinorum lumbricis immaniter torqueretur, plurimæque remedia frustra adhibita fuissent, rebus jam desperatis, cum mors indies expectaretur, tandem

olei vitrioli, cum cervisia dati, usu brevi tempore restituta fuit. Idem etiam evenit Margareta Dolre, Mareschalci Montfortensis filia, aliisque pluribus. Propterea non sine ratione hujus olei encomium plenis buccis exclamitant chymici. De quo, & de sulphuris oleo Mindererus lib. de Peste cap. 15. ita scribit: *Nulla est putredo cujus vires non frangant, nulla infectio quam non superent, nulla humorum depravatio quæ per ista non superetur.*

## OBSERVATIO. XXII.

*Ambustio.*

**P**etrus Abstece Muskettam explodere volens, fortè postèrius disrupta fuit machina, & quamvis à ferri frustis illæsus, totâ tamen facie pyrii pulveris flammâ graviter combustus fuit, plurimæque pulveris grana ipsi cuti impacta remanserunt. His granis cito exemptis, statim oculis parva lintea duplicata butyrò bene salito inuncta imposuimus, totiautem facièi cæpas crudas cum sale in mortario contusas applicavimus, quas ter primâ die, & semel sequenti nocte renovavimus: quo cataplasmate totum empyreuma insigniter extractum fuit, etiam in ipsis oculorum palpebris (quas ad oculorum defensionem butyro præmunieramus) nullæ vesiculæ excitatæ fuerunt, ita ut postea unâ aut alterâ inunctione ex unguento rosaceo & pomato, prorsus sanatus fuerit.

*Annotatio.*

**I**N combustionem statim omni studio enitendum est ut empyreuma extrahatur, & pustularum ac vehicularum exortus impediatur. Ad hoc efficiendum multa varique commendantur. In leviori combustionem, illud parte læsa igni admotâ, vel in aquam calidam immisâ, atque in ea quam calidissimè fieri potest detentâ, facile perficitur. In graviore verò, efficacissimum remedium sunt cæpæ crudæ cum sale contritæ, quibus in gravissimis ambustionibus multoties egregia præstiti. De his audiat Paræus lib. 11. cap. 9. *Experiantur (inquit) plebei homines, ambusta leviter partis ardorem vanescere & dolorem levare, si partem ipsam ardentis candela, vel accensarum prunarum ardori aliquamdiu admovent, attractionem enim facit similitudo: itaque ignis extrinsecus intrinsecum, & inustum à se parti ignem dum foras evocat, mali, quod intulerat & creaverat alexiterium est. Paratu etiam facile & expeditum remedium est, si quis statim à combustionem cæpas crudas & cum sale contritas dolenti parti apponat. &c.*

Hildanus tamen libro de combust. cap. 6. cæpas in facièi combustionibus minime convenire, easque oculis damnum & jacturam haud exiguum inferre scribit. Quod verum foret, si cæpæ ipsis oculis imponerentur, aut si oculi ante cæparum applicationem primò aliis rebus non præmunirentur, quod nos linteis duplicatis vel triplicatis & butyrò bene salitò inunctis optime fieri arbitramur, eo quod buturum salitum empyreuma extrahat ratione salis, & pinguedine sua palpebras leniat ac defendat: minus autem conveniunt aquæ distillatæ, lac muliebre, ovorum albumina, aliaque similia, quæ statim exsiccantur & parti adeo firmiter agglutinantur, ut vix absque excoriatione detrahi possint. In facièi combustionibus Hildanus potius utitur hoc unguento:

Rec. Saponis Veneti, unc. j.  
olei amygdalarum dulc.  
rosarum, ana unc. l.  
muccilaginis sem. cydonior.  
cum aqua rosar. extracta parum,  
misc fiat unguentum.

In aliis autem partibus scribit sequens unguentum empyreuma potenter extrahere:

Rec. Cæpa cruda, unc. j. s.  
salis,  
saponis Veneti, ana unc. l.  
misceantur in mortario, fiatque unguentum cum oleo rosarum & amygdalarum dulcium.

Præter hæc multa alia sunt quæ empyreuma potenter extrahunt. Sic atramentò scriptorio illud feliciter peractum fuisse, exemplò docuimus ante observationem quintâ. Sola muria, linteis eâ intinctis, ut & aqua calcis, idem faciunt. De muria sic ait Lev. Lemnius lib. 3. occult. nat. cap. 9. *Muria, aut salsilago præsentanea vi ambustis vim igneam, atque urentem fervorem extrahit, doloresque intensissimos placat, ac mitigat, vel ex pulvere bombardico, vel oleo, pice, aqua fervida, prunisque accensis, præsertim si tenui peplo salsilagine imbuto perusta partes foveantur: hujusmodi enim irrigatione ignea vis eluitur, atque acerrimi cruciatus consopiantur.* Idem de muria, quoque testatur Matthias Pactzerus lib. de Sale, cap. 26. Butyrum quoque multo sale pulverisato mixtum, linteis inunctum, & sic impositum, egregia præstat. Verum hæc omnia in ipso principio admovenda sunt, antequam pustulæ aut vesiculæ excitentur & excoriatio fiat, tunc enim hæc minus conveniunt, sed curatio alio modo instituenda est.

OBSER-



## O B S E R V A T I O. XXIII.

*Odontalgia.*

**C**ornelia Jacobi, mulier robusta, dentium dolore vehementissimò, cum dimidii capitis dolore laborabat. Huic tale vomitorium exhibui:

℞. *Vitri antimonii pulverisati*, gr. xij.

*vini albi*, unc. v.

*fiat maceratio per noctem, mane*

*coletur vinum per chartam*

*emporeticam, & detur pro haustu.*

Hinc plurima biliosa, pituitosa, ac tenacia evomuit, aliquot etiam secessus habuit. Nocte sequenti bene dormivit, & cessavit dentium dolor, neque rediit.

## O B S E R V A T I O XXIV.

*Febris Gallica, epidemia.*

**A**Nno 1635. æstas erat admodum calida & sicca: quò tempore regis Galliarum exercitus cum nostro conjunctus Lovanium obsederat, ubi milites magnam rerum, præcipuè panis & aquæ, inopiam patiebantur, atque hinc passim horarios fructus immaturos & crudos, carnes recenter mactatas & insulas sine pane, aliosque mali nutrimenti cibos comederunt, simulque ex stagnis quibusvis biberunt, atque ita magnam crudorum & pravorum succorum copiam sibi ipsis in corpore accumulaverunt. At tandem fame sitique pene consumpti, obsidionem relinquere, & ob Schenckianum munimentum per insidias ab Hispano milite captum, in patriam nostram reverti coacti fuere. Huc cum venissent, præter nostros etiam Gallorum peditatus maxima pars Noviomagi (ubi tunc temporis habitare & praxin exercere cæpi) aliquamdiu remansit, atque inter illos milites febris quædam maligna & pestilens paucis diebus ante eorum adventum grassari cæperat. Hic læti milites omnium rerum copiâ fruebantur, meliusque reficiebantur: sed, proh dolor, illa maligna febris intra paucos dies maxima sumpsit incrementa, & totum exercitum, præcipue Gallos, gravi clade multavit; nam præter nostros, intra duos tresve menses hæc dira lues ad minimum tria millia funerum solis Gallis Noviomagi crudeliter extorsit, nec minori sævitia in castris ante Schenckianum munimentum, & aliis in locis inter nostros & Gallorum milites passim dominabatur: atque ab illis etiam ad cives & incolas Noviomageneses contagio delata, eorum ad minimum mille & plures paucis mensibus terræ devorandos objecit, nec minor etiam strages aliarum circumjacentium urbium civibus illata est, imò usque ad interiora patriæ nostræ penetralia malum hoc subiit. Quia autem febris hæc primò & gravissimè Gallos, infecerat, deinde autem reliquos, vulgariter *Febris Gallica*, à multis etiam *Morbus Gallicus* appellabatur.

Non parvum huic morbo aderat contagium, quod maximè per contactum & attractionem putridorum ac fætidissimorum vaporum, sudoris, stercoris, &c. aliis communicabatur; ac proinde qui ægris inserviebant vel diu aderant, eorumque foetores suscipiebant, plurimi eodem malò corripiebantur. Tori autem Noviomago brevi tempore contagium undique ingestum fuit hac imprimis de causa, quod ob tantum exercitum tota civitas militibus plena esset, ita ut ipsæ quoque plateæ & viæ publicæ undique militibus tam sanis, quam ægris ad latera platearum decumbentibus, repletæ forent, atque hinc sordes & excrementa tam ægro-

rum

rum quam sanorum in vias publicas projecta ubique abundarent, nec quicquam, ob hominum sibi invicem occurrentium nimiam multitudinem, expurgari posset: ex hac enim fœtidissima colluvie elevati maligni ac putidissimi vapores totum aërem, atque ita maximam totius civitatis partem contagiò morbòque infece-  
runt.

Febris hujus causa non tam in spirituum, quam humorum maligna corruptione consistebat, atque propterea non admodum improprie pestis in humoribus appellari poterat. A peste autem in eo differebat, quod in peste imprimis spiritus vitales, in hac febre humores malignò modò corrumperentur; præterea quod pestis contagium aëri imprimis inhæreat & magis ad distans inficiat, hujus verò febris contagium maximè per malignorum vaporum immediatum contactum & attractionem communicaretur: denique, quod pestis longè acutior & periculosior morbus sit, & cum quo plures moriuntur quam evadunt, cum in hac febre longe plures evadant quam moriantur.

Febris hæc nonnullos acriter, plurimos autem leniter in ipso principio invadebat, aliis sine, aliis cum levi frigore & rigore. Magnus, paulo post initium, in multis subsequēbatur calor, cum siti vehementi, qui ardor, subinde brevibus intervallis leviter intermittens, ad septimum plerumque diem, vel diutius continuabat. In multis etiam calor intensus non percipiebatur, atque in iis cor magis ab humorum malignitate, quam à calore affici videbatur, namque & his vitalis facultas magis læsa erat.

In principio morbi statim magna aderat debilitas seu ingens virium dejectio, nonnullis deliria, plurimis anxietates, multis capitis dolores, vigilæ, omnibus sitis cum maxima linguæ siccitate, multis quoque non diu post initium dysentericæ & diarrhææ malignæ, difficillimæ curationis, superveniebant. Pulsus plerumque valde creber, parvus & inæqualis sentiebatur.

Diebus criticis ægri se semper pejus habebant, paucissimæ tamen crises laudabiles fiebant; videbatur natura velle moliri crises, sed propter humorum corruptorum copiam & malignitatem, viriumque summam dejectionem, perficere non posse. Crises per sudorem vel narium & menstruorum hæmorrhagiam solæ morbum interdum, sed rarius, solvebant, nam plerumque imperfectæ erant: per alvi fluxum periculosa multisque læthales erant. Nonnullis parvæ maculæ rubræ (Italis lenticulæ, puncticulæ & petechiæ appellatæ) per totum corpus in cute erumpentes, morbum mutabant, interdum in pejus, sed sæpius in melius. Quibusdam qui diu egrotaverant, abscessus critici in aliqua parte salubri fiebant. Anthraces nusquam apparebant. Glandulas quoque in inguinibus, post aures, vel sub axillis nulli intumuisse, nihilque naturam per hæc emunctoria deposuisse vidi.

Ab hac febre curati, multi bis terve recidivas satis periculosas ac sæpe læthales facili de causa incurrebant, imprimis si se ipsos vel nimis citò aëri exponerent, vel in diætâ leve aliquod vitium committerent.

In curatione hujus febris primarium & maximum subsidium adferebatur sanguinis missione, ter quaterve, imò in nonnullis sexies septiesve repetitâ: vidi etiam Gallos quibus à suis medicis quatuor dierum spatio sanguis duodecies è brachiis satis magna quantitate detractus fuerit cum summo fructu: maximum enim levamen à venæsectione sentiebant ægri, quod brevi tempore adeo notum evasit omnibus, ut plurimi ægri, etiam sine Medicorum consilio, sibi ipsis aliquoties venam secari curarent, atque ita multi à morbo liberarentur. Ita ut præcipuum hujus mali remedium venæsectio re verâ fuerit. Sed quod mirum videri posset, cum à sanguinis missione alioqui valde debilitentur vires, in hoc tamen morbo natura post extractum majore copiâ sanguinem, à malignorum humorum gravamine manifesto levare & vires resumere videbatur, omnesque ægri, etiam illi quibus vires ad extremum dejectæ erant, venæsectionem fortiter ferebant. Nulli remedio febres istæ magis cedebant quam sanguinis missione. Sanguis duabus vel tribus primis vicibus extractus admodum corruptus erat in omnibus, nec in tanta istius  
temporis

temporis ægrotorum multitudine ullum me vidisse memini, cui sanguis laudabilis extractus fuit in principio; sed ut plurimum albicans, sæpe ex livido virefcens apparebat, cui parum rubri sanguinis admixtum erat: mucilaginosus erat instar decocti pedum vituli: in plurimis coagulabatur, in multis etiam vix coagulabatur, fibris nempe putredine magna ex parte consumptis, & hi maximè periclitabantur. Tertiâ quartave sectione sanguis erat laudabilior.

Accedentes igitur ad ægros, primò statim vel clystere injecto, vel levi medicamine alvò parum citatâ, venæsectionem instituebamus quam citissimè fieri poterat, eamque, si vires permitterent, postridie repetebamus, extrahentes quaque vice à semel libra usque ad libram sanguinis, idque deinde adhuc ter quaterve (pro virium robore & febris magnitudine) uno, duobus aut tribus diebus interpositis, reiterabamus. Interea tamen temporis modò exhibitis medicamentis purgantibus, modò clysteribus subinde alvus citabatur, & quia malignitas morbo aderat, sudorifera & antidota sæpius dabantur. Julebi & condita refrigerantia ac cardiaca, ut & apozemata refrigerantia & diuretica vim habentia non parum quoque proderant, præcipuè si admiscerentur talia, quæ simul etiam malignitati resisterent. In nimis vigiliis (quæ admodum frequentes erant, & deliriis, tantum lene aliquod soporiferum temporibus illinebamus, narcotica enim per os nunquam tuto exhiberi poterant.

### Annotatio.

**F**ebres malignæ & pestilentes quomodo sine vera peste dari possint, & quid ab ea differant, latius docuimus in tractatu nostro de Peste, lib. 1. cap. 12. annotat. 4. 5. Sunt autem hæ febres variæ, neque semper ab eadem causa procedunt, neque eodem modo invadunt, neque eandem curationem admittunt. Interdum solius æris infectiones, interdum humorum ex prava diætâ aliave causa pessimæ corruptiones, interdum rerum putridarum & corruptarum nocentissimæ exhalationes, interdum temperamentorum æris & corporum pravæ dispositiones, vel singula hæc seorsim, vel aliqua ex his conjuncta, vel omnia simul hujusmodi epidemias febres generare valent, à quarum causarum varietate etiam earum, ut & curationis varietas maximè dependet: atque hinc est quod hujusmodi febres malignæ ac pestilentes vix unquam bis sibi planè similes visæ sint. Fracastorius lib. 2 & 3 de morbis contagiosis, describit febrem petechialem, quæ multum differebat ab hac nostra febre, nam ab æris certa infectione originem sumpserat, & maximè spiritibus, non autem humoribus, bellum indixerat, atque imprimis curabatur antidotis, venæsectiones verò

nocebant. Contra, hæc nostra humoribus magis inimica quam spiritibus, venæsectione præcipue sanabatur. Wierus lib. observat medic. etiam mentionem facit febris malignæ & pestilentis, quæ circa Reheni tractum crudeliter grassabatur; sed illa quoque longè diversa fuit ab hac nostra, quod docuit curatio, nam scribit se comperisse in his venæsectionem admodum periculosam fuisse. Ab hac nostra febre etiam multum differunt illæ quas Forestus lib. 6. observat. 4. 5. & 6. describit, in quibus neque eadem aderant symptomata, neque curatio venæsectionem repetitam admittebat. Lazarus Riverius, vir doctissimus centur. 1. observat. 17. unum adfert exemplum febris malignæ, quæ in multis cum hac nostra conveniebat, & quinque iteratâ venæsectione curata fuit; cui non multum absimilem etiam nos in Gallia quondam vidimus anno 1632. cujus antea mentionem fecimus observat 3. Verum ut quomodo ægri hac jam dictâ malignâ febre laborantes optimè tractati fuerint, melius innotescat, jam his proximis observationibus unam aut alterum exemplum ex millibus subjiciam.

## HISTORIA. XXV.

### Febris Maligna.

**H**ermannus Thomas, pistor, prædictâ febre malignâ correptus fuit 5 Septembris, cum ingenti æstu & magna virium dejectione ab ipso morbi principio (nam febris hæc omnibus ægris statim vires potenter dejiciebat) pulsus erat, creber, nec parum inæqualis; sitis quoque maxima, cum lin-

D

guæ

guæ magna ariditate. Totum corpus æqualiter affectum esse videbatur, ac proinde nullum uspiam dolorem sentiebat, de sola maxima cordis anxietate querebundus. Prima morbi die circa vespere ipsam invisens, statim clysterem emollientem iniici curavi, à quo alvum ter exoneravit. Ad sitim hunc julebum pro potu dedi:

℞. *aquæ cardui benedicti*,  
*boraginis, acetosæ, ana lib. j.*  
*succi citri recenter epomo expressi, syrupi de acetositate citri,*  
*violacei, rob ribesiorum rubr. ana unc. j.*  
*olei sulphuris q. s. ad gratum acorem,*  
*misce fiat juleb.*

6 Septembris tempore matutino è vena mediana dextri brachii sanguinis libram venæsectione extraximus, cum summo levamine. Sanguis erat valde corruptus, cujus dimidia superior pars ex livido virescebat & mucilaginosus erat, inferior nigricans vix coagulabatur, serum quoque virescebat. Postridie dolorem in gutture sentiebat, qui sine tumore erat, ad quem sedandum gargarisma conveniens præscripsi. Etiam manè sumpsit medicamentum leniter purgans, à quo quinques excrevit. Ad sitim utebatur interdum cervisiâ tenui, interdum julebò dicto. 8 Septembris, febre in eodem statu permanente, sanguinis unc. x. è sinistro brachio extraximus, qui corruptus erat ut prior. 9 Septembris mane hoc sudoriferum datum est:

℞. *diascordii Fracastorii drach. j.*  
*confectionis de hyacintho,*  
*extracti cardui bened. salis ruthæ, ana scrup. j.*  
*aquæ theriacalis cardui ana unc. j.*  
*olei vitrioli gut. ix.*  
*misce, fiat haustus.*

Hinc bene sudavit, sed tamen continua febris (quæ singulis diebus per aliquot horas tantum pauxillum remittebat) debilitas, dolor gutturis, sitis & oris siccitas in eodem statu permanserunt, quibus etiam vigilæ fere continuæ aderant. Post prandium hujus apozematis duos haustus bibit, eoque etiam sequenti die usus fuit.

℞. *radic. cichorei, graminis, asparagi, ana unc. j.*  
*helenii, eryngii, petroselini, ana unc. s.*  
*herbar. acetosæ, cardui ben. boraginis,*  
*centaurii minoris, scordii, scabiosæ, ana m. j.*  
*pomum citri integrum, in taleolos dissectum.*  
*sem. 4 frig. major ana drach. j. s.*  
*fruct. tamarindorum,*  
*tartari rhenani, ana drach. vi.*  
*passularum corinth. unc. j. s.*  
*coquantur in aquæ communis q. s. ad lib. ij.*  
*adde colaturæ syrupi de limonibus unc. iij.*  
*misce, sit apozema.*

11 Septembris, præmissò enemate emolliente, rursus sanguinis uncias septem è dextro brachio cum euphoria extraximus, à qua venæsectione febris multum minuebatur. 12 Septembris mane ab assumpto priore antidoto rursus copiose sudavit. Post meridiem apozemate usus fuit. Sequenti die, cum alvus non satis responderet, hunc pulverem dedi, quem cum pauxillo sui julebi mixtum assumebat, atque inde ter alvum exonerabat:

℞. rha-

℞. *rhabarbari optimi drach. j.*  
*cremoris tartari drach. f.*  
*fiat pulvis.*

Hic pulvis 16 Septembris reiteratus fuit. Intermediis autem diebus, ut & sequentibus tribus, utebatur antedictō apozemate, & interdum particulam hujus conditi comedebat.

℞. *pulveris liberantis drach. j. f.*  
*diatrium santalorum scrup. ij.*  
*confectionis de hyacintho scrup. j. f.*  
*cortic. aurantiorum condit. jobribesiorum rubr.*  
*pulpæ tamarindorum, ana unc. f.*  
*syrupi de limonibus q. f.*  
*misce, fiat. conditum.*

A 12 Septembris febris indies magis magisque minuebatur, ita ut 19 Sept. æger jam expers febris videretur, neque angeretur, neque sitiret amplius, sed cibi appetentior esset. Tunc in victu fortè leviori aliquo errore commissō, 22 Septembris recidivam passus est, febrisque magna cum vehementia rediit. Hinc rursum præmisso clystere, statim è sinistro brachio sanguinis semi libram extraximus, cum tanto levamine, ut hac unâ venæsectione febris fere in totum supprimeretur. Postridie manè sumpto antidoto copiosissimè sudavit, atque illō, & sequentibus tribus quatuorve diebus apozemate antedictō cum conditō utens, à morbo in totum liberatus fuit. Durante hac curatione, diætā tenui nutritus fuit, ex jusculis cum acetosâ, boragine, pomis citri, hordeo mundato, uvis immaturis, & similibus paratis. Interdum cervisiâ tenui, interdum tenuissimâ (quam *scherrebier* appellat) interdum julebis pro potu utebatur, sæpe intolerabilem sitim fallebat cum pulpa tamarindorum, vel masticando frustum pomi citri saccharo immersum, vel linguæ imponendo folium sempervivi majoris detractâ exteriorē pelliculâ in aqua maceratum.

## OBSERVATIO. XXVI.

*Febris Maligna.*

**G**Ertruda Coets juvencula circiter 24. annorum, eadem malignâ febre correpta fuit. 8. Septembris vespere (qui erat morbi dies quartus) ad illam vocatus, inveni ægram adeo debilem, ut vix loqui posset, singulis momentis animo linquebatur, ob malignos vapores cor obruentes. Pulsus erat omninò parvus creber, & inæqualis, calor tamen non admodum intensus, cum materia morbifica malignitate magis quam calore infestaret. Statim hoc sudoriferum exhibui.

℞. *lapis bezoar. or. scrup. f.*  
*diascordii Fracast. mithidatii Damoc.*  
*confect. de hyacintho, ana scrup. j.*  
*aquæ cardui ben. unc. j.*  
*misceantur pro haustu.*

Quamvis ob debilitatem non diu sudaret, tamen hinc valde levata fuit. Ad sitim hunc julebum præscripsi.

℞. *aquæ cardui bened. melissæ, acetosæ, scabiosæ, ana lib. f.*  
*cinnamomi unc. j. succi citri recenter expressi unc. j. f.*

D 2

syrupi

*syrupi de limonibus, violacei, ana unc. j. f.*  
*olei sulphuris q. f.*  
*misce, fiat juleb.*

6 Septembris mane alvus suppositoio citata est: post duas abinde horas e vena mediana dextri brachii sanguinis lib. f. extraximus, qui valde corruptus, mucilaginosus, è pallido virescens erat, cum sero viridi, parum boni sanguinis in fundo continens. Non obstante magna virium debilitate, fortiter tulit venæsectionem, indeque magnum levamen sentiit. Hujus conditi subinde particulam comedit:

*℞. pulv. liberantis drach. j. salis prunellæ scrup. j.*  
*rob ribesiorum rubr. pulpæ tamarindorum,*  
*conservæ rosarum, ana unc. f.*  
*confect. de hyacintho drach. j. f.*  
*syrupi de limonibus q. f.*  
*misce fiat conditum.*

Postridie in iisdem continuatum est. Cervisiam tenuem olei vitrioli paucis guttis acore levi donatam pro potu ordinario bibit. 11 Septembris ultimum sudoriferum rursus sumpsit, indeque levamen aliquod sentiit. 12 Sept. febris, anxietas & debilitas rursus augeri videbantur, quapropter è brachio sinistro extraximus unc. vi. qui corruptus erat ut prior. Ab hac venæsectione magnum levamen successit. Libenter apozemata & alia quædam medicamenta præscripsissem, sed quia per se delicatula erat, & jam à morbo valde nauseabunda, fere nihil assumere potuit. 13 Septembris rhabarbari pulverisati drach. j. cum cremoris tartari drach. f. cervisiæ teui immiscuimus, atqui ita non sine molestia exhibuimus, unde ter alvum exoneravit. Postridie paulo melius habuit, & antedicto condito usæ est, febris valde exilis evasit. 18 Septembris in summam recidit debilitatem. Tunc hanc mixturam in cochleari exhibui, à qua aliquantum levari videbatur.

*℞. lapidis bezoar orient. scrup. f.*  
*confect. de hyacintho scrup. j.*  
*aquæ cinnamoni drach. j. cardui drach. ij.*  
*misceantur.*

19 Septembris, iterum è brachio dextro sanguinis unc. v. extractæ sunt: qua venæsectione febris admodum mitigata fuit. Illa & sequenti die continuatum est in usu conditi & julebi. Hoc tempore etiam in consilium advocatus fuit D. Gilbertus Coëts, vir doctissimus & Arnhemii medicus primarius, qui inter cætera tanquam expertum & convenientissimum remedium comendavit suam aquam theriacalem, quam Carbunculi aquam nominabat, & instar magni secreti celabat. Hujus aquæ illius consilio bis terve de die offerebatur ægræ cochleare unum. 21 Septembris, febre rursus ingravescente, hoc antidotum dedi:

*℞. salis absinthii confectiois de hyacintho, ana scrup. j.*  
*lapidis bezoar orient. gr. xii.*  
*aquæ carbunculi cardui, ana unc. f.*  
*misceantur.*

Idem illud 22 & 23 Septemb. mane & vesperi reiteratum fuit. 24 Sept. immisso suppositoio vix semel alvum deiecit. Vesperi hoc sumpsit.

*℞. lapidis bezoar or. gr. xii.*  
*margaritarum præparat. scrup. j.*  
*aquæ carbunculi unc. f.*  
*misceantur, & dentur è cochleari.*

Sequenti

Sequenti die è massæ pilularum Ruffi gr. xii. duas pilulas deglutivit, à quibue circa vesperam bis deiecit: quæ pilulæ 28 Septembris reiteratæ sunt, ut & 2 Octobris. Intermedio autem tempore continuatum fuit in usu conditi, julebi, & aquæ carbunculi, & tenui victu ex jusculis nutriebatur ægra. Atque his tandem integræ sanitati restituta fuit.

## OBSERVATIO. XXVII.

*Febris maligna.*

**H**enricus ter Koelem, prædictâ maligna febre correptus, 4 Septembris meum consilium expetiit. Inveni hominem valde anxium ac debilem, cum pulsu parvo & inæquali, absque intenso tamen calore. Venâ ter sectâ, clysteribus injectis, medicamentis laxantibus, sudoriferis, putredini ac malignitati resistentibus, & confortantibus sæpius exhibitis, tandem à morbo liberatus fuit. At cum se nimis cito æri & diætæ temerariæ committeret, 28 Septembris recidivam priore morbo periculosiorem incurrit. Rursus post venam bis sectam, aliaque multa exhibita medicamenta, tandem 16 Octobris per totum corpus maculæ rubræ & nonnullæ purpureæ magna copia undique in cute eruperunt, atque ab his paulo post cessavit febris, & ægro vires intra octiduum mediocriter restitutæ sunt. Verum cum ipse debilitatis suæ ignarus, & viribus suis nimium confidens, 28 Octobris semel tantum foras exiisset, secundam recidivam incidit valde periculosam, propter vires priore morbo nimium labefactatas. Febris magnâ violentia corpus jam debile exagitavit: nihilominus venæsectione rursus cum summo levamine institutâ, multisque medicamentis feliciter exhibitis, tandem 10 Novembris copiosissimò spontaneò sudore profluxit, atque inter sudandum in latere sinistro super quintam, sextam & septimam costam, tumor quidam rubicundus apparere cæpit, qui postridie ad pugni magnitudinem protuberavit. Ita febris planè cessavit, & morbus per sudorem & abscessum feliciter judicatus est. Tumor autem ille valde durus erat, qui cum cataplasmatibus emollientibus & maturantibus quinque diebus non maturesceret, & æger de interiore partis affectu dolore jam conquereretur, summopere timui materiam aliquam, prope membranam pleuram inter costas hærentem jam maturuisse, quæ facile, apostemate ante exteriorem maturationem introrsum disrupto, & pure ad interiora effluente, gravius aliquod malum inducere posset. Quod periculum ut prævenirem, licet forinsecus nulla maturationis signa visu vel tactu percipi possent, tumorem per chirurgum ab inferiore, scalpello ad sesqui digiti latitudinem sursum juxta costas immisso, aperiri jussi; quò facto judicium me non fefellisse apparuit, effluxit enim pus maturum & album: atque ita magnum hoc ab apostemate imminens periculum evasis æger, & tumore postmodum à chirurgo per sanato, pristinam valetudinem recuperavit.

## OBSERVATIO. XXVIII.

*Dysenteria maligna.*

**E**odem tempore quo prædicta febris tam crudeliter grassabatur, etiam dysenteria malignæ, multisque lethales, plurimos invadebant. Post mucum intestinorum statim ægri sanguinem excernebant, non quidem solum & purum, sed humori cuidam albo, viscoso & tenacissimo permixtum, qui instar picis aut visci rebus omnibus firmissimè adhærebat, & in longissima filamenta extendi poterat. Ægris aderant ventris tormina intolerabilia, febris continua, cor-



dis summa anxietas, vires maximè debiles, sitis ingens, totalis appetitus dejectio, vigiliæ continuæ, & nonnullis urinæ ardores. Quibus limus iste viscosus & albus, sanguinolentis dejectionibus permixtus, valde tenax erat, plurimi moriebantur, at quo minus tenacitatis adesset, eo melius evadebant. Qui in dejiciendo flatu simul excernebant, de iis magna recuperandæ valetudinis spes erat. Illi qui ægris diu aderant iisque inserviebant, à communi contagioso factore sæpe ejusdem mali participes fiebant. Difficillimæ curationis erant hi fluxus, in quorum curatione venæsectio parum aut nihil proderat: sæpe quoque nec purgantibus, nec astringentibus, nec sudoriferis, aliisque remediis, in hujusmodi morbis adhiberi solitis, quicquam proficiebatur.

### Annotatio.

**E**Adem illa lues hoc ipso tempore in castris nostris ante Schenckianum munimentum innumeros infecit, & plurimos occidit; cumque Medici castrenses omnes in curatione hujus mali omnia tentarent, sed pauca prodesse, tandem à medicis quibusdam Italis (qui cum Gallorum exercitu huc venerant) auxilium inventum est, quò postea innumeri curati fuerunt. Primò purgabant ægros cum rhabarbaro: deinde sumebant ceræ drach. j. s. vel drach. ij. hancque minutim incisam in lactis dulcis unc. jv. vel v. aliquantisper coquebant usque dum perfecte liquefacta foret, atque tunc illud lac quam calidissime bibendum dabant, (calidissime sumi necesse est propter ceram quæ in lacte tepido coagulatur, ita ut bibi non possit) si primâ vice non subsisteret fluxus, etiam secundâ & tertiâ repetebant. Cum autem plurimi in castris hoc morbo laborarent, tantum ceræ albæ brevi tempore consumtum fuit, ut pharmacopæi Emericenses in tota civitate nihil amplius haberent, sed illam bonâ quantitate aliunde coëmere coacti fuerint. Et si autem cera ra-

rius exhibeatur per os, tamen novum remedium non est, nam Dioscorides lib. 2. cap. 105. scribit eam ulcera implendi vim habere, & dysentericis in sorbitionibus dari. Sic Valleriola lib. 3. Observ. 4. refert dysentericum desperatum tali remedio fuisse restitutum: pomum integrum excavatum cera citrina mundissima implevit, & indito operculo prunis assandum admovit, donec cera liqueceret & pomi substantiæ admisceretur, idque pomum ante omnem cibum ægro edendum aliquot diebus dedit. Idem Valleriola adhuc præstabilius fore putat si cera tali modo liquecat & affetur in malo cydonio, ut medicamentum simul astringentiam & glutinatoriam vim habeat. Quercetanus idem remedium parat ex pomo curtispindulo excavato, & ceræ albæ ac gummi Arabici ana drach. j. repleto: quo remedio feliciter usus fuit Greg. Horstius Lib. 4. Obs. 18. Solenander lib. 4. consil. 9. turturem ceræ unc. j. infarcit, & in aqua coquit, postea carnem edendam & jusculum cum pane sumendum porrigit. Alii pullum columbinum cera infarctum & assum, comedere jubent.

## OBSERVATIO XXIX.

### Dysenteria.

**M**Arcellus Bor, vir robustus, annorum circiter quadraginta, prædicta dysenteria etiam correptus fuit. 9. Octobris ipsum purgavi cum rhabarbaro. Deinde julebos, condita, pulveres, & apozemata refrigerantia, incrassantia & astringentia, sudorifera quoque, aliaque convenientia medicamenta convenienti modò & tempore exhibui: verum hæc omnia nihil profuerunt, ita ut tandem viribus ægri ad extremum dejectis ipsum pro desperato haberem, neque per biduum in tali statu vivere posse crederem. Cum autem vehementer sitiret, & aquam frigidam appeteret, jussi in desperato casu illam magnâ quantitate & frigidam ægro offerri, ut hoc copiosiore aquæ potu causa morifica (si fortè fieri posset) ab intestinis ablueretur, ejusque acrimonia vi frigoris retunderetur. Æger itaque totâ illâ nocte aquam putealem frigidam magnâ copiâ (nam maximè sitiebat) ad libitum bibit, quæ in principio raptim intestina transibat, & magna tormina inducens per inferiora defluebat; postea minora tormina faciebat; circa matutinum tempus intestinorum dolores fere nulli erant, & dejectiones multo rariores: circa meridiem æger in somnum prolapsus, per aliquot

quot horas quietè dormivit; ante vesperam fluxus omnino substitit, atque ita hic æger, qui jam cum Charonte de naulo pacisci putabatur, convenienti postmodum diætâ refectus, convaluit, insperatò hòc remedio à morbo desperatissimo liberatus.

### Annotatio.

**D**E aquæ frigidæ potu in dysenteria vix loquuntur medici recentiores: est tamen remedium in cholericâ dysenteria non alienum, nam humiditate suâ abluit intestina, eaque ab omni humorum acrium saburra liberat, & interna ulcera emundat; præterea frigiditate suâ obtundit bilis calorem & acrimoniam, atque intestinorum ulcera astringit. Frigidæ potum etiam veteribus in hoc morbo ignotum non fuisse liquet. Aetius terrab. 3 sermon. 1. cap. 45. sic inquit: *In potu à principio quidem pluviam aquam utendum est; quod si pluvia optima non adsit, fontanâ utemur.* Cornelius Celsus lib. 4 cap. 15 hæc scribit: *Si pluribus diebus remedia alia non juverunt, vetusque jam vitium est, aqua bene frigida potio assumpta ulcera astringit, & initium secundæ valetudinis facit.* Similiter etiam Paulus aliquæ veteres frigidæ potionis in dysenteria gravi meminerunt. Inter recentiores Amatus Lusitanus cent. 2 curat. 56 etiam dysenteriam biliosam frigidæ copioso potu curatam vidit.

Aliàs quoque sæpe evenit, ut optimis remediis nihil proficientibus, interdum simplex aliquod desperatas dysenterias curaverit. Sic ex relatu plurium capitaneorum intellexi, cum anno 1624 Breda ab Hispano milite obsessa esset, & dysenteria in urbe graviter dominarentur, nec ullum huic malo remedium excogitari posset, cum omnia medicis nota auxilia nihil prodesse, tandem casu novum aliquod inventum fuisse, quod plerique sanati sunt, nempe sericum duplici rubro carmesino colore tinctum, in tenuissima filamenta posum, & in vino maceratum: hòc

vino cum scrup. j. vel semi drach. pulveris ejusdem serici aliquoties assumptò, innumeri restituti sunt. Novi quendam dysentericum pro desperato jam habitum, qui cum mespila cruda majore copia devorasset, præter spem convaluit. Alius quidam pulvere ossium humanorum aliquoties cum vino rubro assumptò ab incurabili fluxu liberatus est. Solum oleum olivarum assumptum, vel cum pane albo tosto ei intincto comestum, multoties egregia præstitit. Testatur Hollerius hederæ terrestris succum propinatum plurimos à morte liberasse. Forestus lib. 22. observ. 35, scribit se aliquando expertum fuisse, in hoc casu nihil præstantius contulisse, quam sterus canum sola ossa vorantium cum lacte chalybeato exhibitum. Hoc remedio refert Fuchsius se uno anno plus quam centum dysentericos curasse. Riverius centuria 3 observat 84. scribit dysentericum quendam usum fuisse solò decoctò pimpinellæ, cum aqua & butyro confectò, atque intra triduum curatum fuisse. Bruyerinus lib. 11 de re cibaria cap. 22. de se ipso dysenteria laborante ita scribit: *Nos gravissime tentati pene à medicis deplorati jacebamus; exitum enim superabat opem, nullaque auxilia videbantur morbum lenire, nedum juvare. Tandem consiliò anus cujusdam, sorba cruda largissime vorans, postridie vim propemodum omnem torminalem sensi depulsam: indeque firmata alvo, ab Orco (ut ita dixerim) revocatus, & pristina valetudini restitutus, verissimè expertus sum Cornelii Celsi dictum, videlicet, temeritatem plerumque efficere in morbis, quod prudentia nequiverit.*

## OBSERVATIO. XXX.

### Phthisis.

**L**UDOVICUS Guilhelmi, nauta, circiter 34 annorum & mediocriter robustus, febris malignâ aliquamdiu laboraverat, à qua (adjuvante summo Numine) ipsum feliciter curaveram. Mense Octobri, quartâ post dictæ febris sanationem hebdomadâ, maximâ tussi correptus fuit, à catharro acri & salso ad pulmones descendente. Paulo post sanguinem bona quantitate tussiendo rejecit: non diu post hoc sanguinis sputum etiam puris sputum insecurum est. Præter hæc admixtus erat his rejectionibus spumofus quidam mucus albus viscosus & tenacissimus, qui magna quantitate puri & sanguini permixtus quotidie reiciebatur. Huic morbo etiam parva aderat febricula, sed non continua. Æger totus extabescebat, & adeo raucus evadebat, ut vix loqui posset amplius. Conquerebatur

batur de interno gravativo sinistri pulmonis dolore, totumque quod exscrebat ex illo pectoris latere ascendere se satis sentire dicebat. Decubitus in dextrum latus molestus erat. Interdum tussiendo ferè suffocabatur, propter tenacissimam materiam gutturi inhærentem. Ad hujus morbi curationem multa variaque longo tempore adhibui remedia, quibus catharri sisti, tussis imminui ac leniri, expectorationes promoveri, & pulmo exsiccare atque sanari posset: apozematibus pectoralibus, exsiccantibus & vulnerariis, decoctis guajaci, chynæ & salseparillæ, pulvere Haly contra tabem, linctibus, aliisque variis convenientibus medicamentis diu frustra usi sumus. Tandem his omnibus nihil proficientibus, & ulcere quotidie in pejus abeunte, cum ægrum jam ab omni remediorum usu aversum, corpore ad extremam maciem sceleti instar tabefactò, viribusque magis magisque deficientibus, viderem, à medicamentorum usu aliquamdiu abstinere coacti fuimus. Interim ad virium refectionem & sustentationem quotidie ter (nempe manè, meridie & vesperi) lactis caprilli recens mulcti & adhuc tepidi, haustum bibere jussi, incipiendo à minore quantitate, & paulatim ascendendo ad lib. j. pro dosi. Hujus lactis usum cum per duas tresve septimanas continuasset, caput tussis multum imminui & pulmo exsiccare, parum quoque rejecit & indies fortior evasit æger. Continuando autem in ejusdem usu usque ad tertium mensem, ulcus pulmonis plane consolidatum fuit, & à periculosissima tabe feliciter evasit æger, neque deinceps multis annis quicquam mali in pectore percepit. Post duodecim vero annos à catharorum acrium defluxu in idem malum relapsus est, cumque ego tunc Noviomagi non habitarem, & alii Medici non satis convenientia medicamenta adhiberent, totus emaciatus & tabefactus obiit.

### Annotatio.

**P**ericulosus admodum morbus est vera phthisis, à qua paucissimi sanantur: nonnunquam longò medicamentorum usu malum ad tempus leniri, & vita aliquanto longius extendi potest, sed perfectam sanationem raro consequuntur ægri, quam tamen in prædicto feliciter obtinuimus, qui totis undecim post curationem annis, bene sanus vixit. Lac autem ad phthisicos sanationem plurimum prodesse, Galeni, Rhasis aliorumque veterum & recentiorum Medicorum testimoniis sancitum est. De hoc Sennertus praxeos lib. 2. part. 2. cap. 12. ita scribit: *Commodissima autem hic sunt medicamenta, qua omnibus scopis satisfaciunt, ulcus nimirum consolidant, corpus emaciatum instaurant, caloremque febrilem mitigant. Inter qua primas facile lac tenet, & quo, ut Galenus 3 de med. facult. cap. 16. & de cibis boni ac mali succi cap. 4 & 5 method. med. cap. 12. & 7 meth. med. cap. 6. docet, curandis phthisicis vix quid præstantius datur.* Paulo post addit. *Inter alimenta autem præcipue primum locum lac obtinet. Optime enim corpus nutrit, sanguini bonam materiam præbet, acrimoniam vitiosorum humorum temperat, parte serosa ulcus abstergit, caseosa consolidationi inservit, butyracea humectat & corporis exsiccationi resistit.* Eodem modò de lacte etiam loquitur Riverius praxeos lib. 2 cap. 6. Verum in usu lactis hic varia considerata veniunt. 1. quibus non conveniat. 2. quando & quomodo dandum sit. 3. quâ quantitate. 4. quomodo sit corrigendum. 5. quale lac conveniat. 1. Quibus lac non conveniat docet Crato (consil. à

Scholtio collect. 86.) his verbis: *Observent autem medici practici tres conditiones in exhibitione lactis: quarum prima est, ne capitis adsit imbecillitas & dolor, iis enim non convenire Hippocratico oraculo monemur. Secundò, si febris non sit magna, vix enim fieri potest, quin febrienti lac in ventriculo non corrumpatur. Tertio, si non sit βορβορυσμός, id est, si viscera statu non distendantur. In his cum cautione exhibendum.* Hoc ipsum quoque docet Sennertus locis citatis.

2. Dandum lac vacuò ventriculo & mundatò ventre, alioqui facile acefcit & corrumpitur. Ex ipsa autem mamma sugendum, vel recens mulctum adhuc calidum sumendum est; nam refrigeratum facile situm contrahit; si verò coquatur, nimis crassum, viscosum, & ingratum redditur. Post ejus assumptionem æger neque statim dormiat, neque alium cibum vel potum (imprimis vinum, acetum, potum acidulum, vel simile quid) sumat, antequam lac bene concoctum fuerit, ne in ventriculo corrumpatur.

3. Quantitas primò sit exigua, unciarum quatuor vel quinque, ut ventriculus paulatim assuefcatur, deinde augeri potest ad lib. f. & ad lib. j. Ea enim quantitate semper dandum est, ut à ventriculo bene ferri & concoqui possit. Ideoque à minori quantitate ad majorem ascendendum, & primò quotidie semel, deinde bis, tandem ter dandum.

4. Ne autem lac in ventriculo coaguletur aut acefcatur, aliquid sacchari admisceri potest (Riverius saccharum rosaceum admixtum laudat) quod tamen necesse non est, ubi coagulatio non metuitur.

metuitur. Alii medici etiam mel admisceri volunt, sed illud nos improbamus.

5. Ultimo etiam aliquis lactis delectus habendus est. *Lac humanum* (inquit Mercurialis) *ceteris melius esse, nullus in controversiam vocabit.* Hoc enim naturæ corporis nostri maximè cognatum esse extra dubium est, ejusque usu se phthisicum perfectè sanasse refert zacutus Lusitanus prax. admir. lib. 1. observat. 120. qualem curationem etiam refert Valleriola lib. 5. observat. 5. Sic etiam Platerus lacte muliebri ex ipsis mammis exsucto aliquos restitutos se vi-

disse refert, ex iisque unum non solum convalescere, verum etiam tantas vires recepisse, ut, ne lac sibi in posterum deficeret, nutricem de novo impregnaverit. Post humanum lac, est asininum, bubulum & caprinum. Asininum lac est serosius, tenuius, & ad ulcus abstergendum commodius. Lac bubulum est minus serosum, & magis nutriens. Lac autem caprinum non multum differt ab humano lacte plurimum nutrit siccatur & consolidatur. Hujus usu noster æger optimè sanatus fuit.

## OBSERVATIO. XXXI.

*Vomitus.*

**D**ominus de Guade, centurio in exercitu regis Galliarum, vehementi vomitu fere per triduum laboraverat, vomitoria aliaque ipsi data remedia nihil profuerant. Tertia morbi die, Medicus Gallus qui ipsum tractabat, videns ægrum præ vomitus violentia jam fere deficere, meum quoque consilium petiit. Vidi ea quæ vomuerat esse pituitam quandam spumofam (quam falsam esse testabatur ipse æger) cui parum bilis permixtum erat; non tamen valde multa vomebat, sed pauca, sæpe, & cum violento conatu. Exhibuimus bis terve bonum huiusmodi decocti hordei cum pauxillo mellis ad levem dulcedinem, idque tepidè; quod cum singulis vicibus cum multa tenaci pituita mixtum revomisset, tandem dedimus aquæ einnamomi cum vino distillati unc. f. cui olei cinnamomi guttas tres admiscuimus; quò assumptò cæpit melius habere: post sesqui horam illud ipsum reiteravimus. Interea ventriculi regioni hoc cataplasma impositum fuit calidè:

*Rx. foliorum menthæ, melissæ,  
florum rosarum rubr. ana m. f. macis drach. f.  
gariophyllorum, nucis moscatæ mastiches, olibani,  
styracis cal. benzoini, ana scrup. ij.  
fiat pulvis, cui adde fermenti acidi unc. iij.  
aceti rosacei q. s.  
fiat pasta mollis sine coctione.*

His paucis enormis ille vomitus cessavit.

Alteri molestissimum vomitum, qui per totum diem duraverat, cohibui, exhibendo bis hunc haustum.

*Rx. vini albi ad ignem calefacti unc. ij.  
olei gariophyllorum gut. j.  
cinnamomi gut. ij.  
misce, sit haustus, quem sumat calidissimè.*

Ventriculi regioni calidè inungebatur oleum nucis moscatæ.

*Annotatio.*

**V**omitum vel inducitur per consensum aliarum partium, ut fit in vulnere meningum cerebri, in nephritide, &c. qui vomitus cessat curato illo morbo cujus est sympto-

ma. Vel excitatur ab humoribus copiâ vel acrimoniâ ventriculi tunicas stimulantibus, iisque aut biliosis & calidis, aut pituitosis, salsis & frigidis, aut melancholicis salsis, aut sanguineis extravasatis & in ven-

in ventriculo corumpentibus, aut nimia copia in illum irruentibus. In principio curationis, vomitus adhuc magis promovendus est, ut ventriculus eluatur & a mali causa liberetur, nam secundum Hippocratem, vomitus vomitum curat. Hoc factò, ventriculus roborandus est, vel frigidis, vel calidis medicamentis, prout causa mali calida frigidave fuerit. In causa calida conveniunt julebi cum succo granatorum, cydoniorum, citri, & oleo vitrioli confecti. Solus succus cydoniorum crudus ad cochleare unum aut alterum sumptus, hunc vomitum miraculosè sistit. Exterius conveniunt foci cum spongia aceto rosaceo aut sambucino calido imbuta. Aut malum cydonium assutum & cataplasmatibus forma calidè impositum. Aut fermentum acidum cum succo menthæ & aceto mixtum & applicatum, quod vomitum citissime sedit, & à Villanovano plurimum commendatur. Odoramenta quoque ex aceto, camphora, & similibus plurimum prodesse poterunt.

In causa frigida, ventriculus calidioribus roborandus est, ut vinò, aquà vitæ Matthioli,

aquà cinnamomi, oleo cinnamomi, nucis moscatæ, maceris, gariophyllorum, spiritu vitrioli, & similibus distillatis. Inter simplicia conveniunt omnes herbæ stomachales calidæ & aromata, etiam foris castorium, styrax, ladanum, benzoe, galbanum, tacamacca, olibanum, oleum nucis moscatæ & maceris &c. quibus adde mala cydonia, mastichem, aliaque altringentia. His non proficientibus, Fallopius (de medic. purg. simpl.) hoc experimentum scribit: *Quod si non cessat nausea, attripiat mordicus capam communem bis vel ter, & non mandat, sed mordeat tantum ipsam primis dentibus, & videbitis quod omnino quiescet nausea statim, etiamsi ventriculus esset debillimus. Et sciatis quod istud auxilium est ita præstans, ut nullum ego invenerim hac in re præstantius.* His si non sedetur vomitus, ad narcotica deveniendum, inter quæ in causa frigida primas tenet philonium Romanum ad drach. j. exhibitum. At in calida causa magis conveniunt pilulæ de styrace, & ladanum opiatum.

## OBSERVATIO. XXXII.

**R**usticus Groelbecensis (quem propter staturæ proceritatem ironicè parvum Joannem vulgo appellabant) quadragenarius & fortis, ante biennium in lignis secandis festinantior, casu à ligni frusto dissiliente læsus fuerat in cruris dextri musculo tibiæ antico, vulnere quidem non latò, sed ad periostrium usque pertingente: quod vulnus primò parvi fecerat, postea verò nullis mediis consolidari potuerat, sed remanserat instar fonticuli, natura plurimos excrementitios humores per illud continuò excernente: hinc sæpe inflammationes, aliasque molestias rusticus patiebatur. Tandem cum mense Septembri casu ligna cuidam chirurgo Noviomagensi vendidisset, atque illi crur suum spectandum exhibuisset, chirurgus illud jam biennale vulnusculum (quod, ut multi tales scioli solent, parvi faciebat) citò consolidare promisit. Alter mali pertæsus, conditionem latus accepit. Tunc ille statim, non purgatò corpore, nescio quæ non unguenta cum petiis immisit, & emplastra imposuit, quorum pinguedinem periostrii vicinia ægerrimè tulit, hinc, ut & à pravis humoribus horum usu jam intus subsistentibus, totius cruris gravis inflammatio cum ingenti tumore & dolore intolerabili intra triduum accessit, ita ut jam de gangræna metus foret. Tunc meum consilium petitum est. Ego statim, amotis istis omnibus, ut & oxycratò, quod toti cruri circumjectum erat, abjectò, vulnus cum spiritu vini optimè eluere & balsamum peruvianum, paucis camphoræ granis ei admixtis, tepidum infundere, toti autem cruri spiritum vini cum linteis circumponi curavi Corpus etiam cathartico purgavi, & postea die venam secare jussi, ac diætam convenientem præscripsi. His non sine molestia, evanescente inflammatorio tumore, crus intra sex dies ad priorem statum reductum fuit. Verum cum postea adhuc nonnullis in locis nova inflammationis rudimenta (quibus etiam antea infestari solitus erat) subinde apparerent, toti cruri emplastrum griseum (ad cujus singulas uncias admiscueram camphoræ scrup. ij. circumpositum, quod ter renovatum tribus septimanis continuis adhæsit, ejusque usu inflammationum istarum reditus omnino impeditus fuit. Interea tamen ut vulnus etiam curaretur, jussi primò in ejusdem

cruris

cruris altero latere cauterio potentiali fontinellam inuri, unde vix extractâ escharâ natura magnò impetu excrementitios illos humores, per vulnus evacuari consuetos, hac novâ via evacuavit, atque ita vulnus intra paucos dies solius balsami peruviani camphorati usu coaluit. Fontinellam autem totò vitæ tempore apertam retinere suasi. Crure tali modo jam perfanatò, iterum de novo rusticus conque- rebatur malo, uxori suæ ingratisimo, nempe de Veneris tanta imbecillitate, ut ne minimum quidem stimulum ad illam sentiret, hoc malum durante cruris cura- tione sibi advenisse dicebat. Ego statim suspicabar hunc languorem ab usu cam- phoræ (quam balsamo & emplastris immiscueram) procul dubio inductum fuisse, ac proinde ab ejus usu postea abstinui, & electuarium diasatyronis rustico u- tendum dedi, ac simul diætam ex cibis bene nutrientibus calidioribus, cum aro- matibus, porris, cæpis, aliisque similibus coctis præscripsi, quibus intra paucos dies adeo restitutus fuit, ut exinde solitò modò dictam agriculturam exercuerit.

### Annotatio.

**D**iscant hinc chirurgi juniores, ne suæ scientiæ nimium tribuentes certitudinis, hujusmodi tibiarum, etiam exigua, vul- nera parvi faciant, multò minus ea festinanter consolidare nitantur, ne suâ incitiâ gangrænam & sphacelum inducentes, ægros vel crure, vel vita privent. Primò igitur circumspectant pru- denter, an natura jam à longo tempore non sit consueta humores excrementitios per illud vulnus evacuare, atque tunc non ante factam diversionem, per fontinellam aliumve modum, curatio est incipienda. Deinde locum affectum bene examinent, an periostium, nervus, vel simile quid, quod pingua unguenta ferre nequit, prope adsit, & qualia tunc convenient topica. De- nique totum corpus ante inceptam curationem bene expurgent, ut illo aliisque convenientibus modis omnem pravorum humorum affluxum (qui facilis est ad partem declivem) impedian.

In hujus rustici curatione etiam camphoræ, in extinguenda Venere, miras vires observavi- mus; cujus odorem & fumum per nares attra- ctum venereos stimulos infringere etiam docet verficulus,

*Camphora per nares castrat odore mares.*

Verum illud vix unquam credidissem, quod cru- ribus imposita hanc operationem edidisset. Illud ipsum tamen antea etiam fratri meo contigisse memini, in curatione antiquis ulceribus infestati cruris Domini Eduardi, qui cum emplastrum quoddam camphoratum per duos menses cruri impositum gestasset, Venerem simul quasi ex- tinctam, & uxorem non parum querebundam habuit, qui etiam usu calidorum medicamen- torum & diætæ multum nutrientis & calidæ, non invita uxore, pristino vigori restitutus est. Prop- ter eximias has camphoræ virtutes, monachi qui- dam in Belgio, qui castiorem vitam agere vo-

lunt, eandem in cervisia sua, qua pro potu or- dinario utuntur, macerandam suspendunt, ut tali potu carnalia desideria supprimant, & ve- nereas insidias subterfugiant. Hinc Noviomagi aliquando valde ridiculam vidimus historiam, in fabro quodam lignario, qui cum in monasterio quodam territorii Clivienfis (in quo camphoram tempore quadragesimæ cervisiis suis immacera- bant monachi) tabulati conficiendi gratia, per tres quatuorve septimanas commoratus fuisset, tandem domum reversus uxori minus gratus ho- spes advenit, nam ne minimum quidem ad Ve- nerem stimulum sentiens, agellum suum incul- tum relinquebat; quod tamen impedimentum postea calidorum usu brevi sublatum fuit, ipse interea summo opere detestabatur illud monaste- rium, neque deinceps in eo quicquam amplius fabricare voluit. Hanc venerem extinguendi fa- cultatem nonnulli frigiditati & siccitati camphoræ attribuunt, sed malè, nam & sapor, & inflam- mabilitas illam non frigidam, sed calidam esse manifestissime testantur: ac proinde illa peculia- ris facultas potius proprietati cuidam nobis occultæ ascribenda videtur, qualis etiam inesse creditur agno casto, menthæ, & ruthæ, quæ tamen omnia licet etiam calida sint, Venerem tamen (experientia id docente) inhihent. Sennertus siccitati camphoræ dictam facultatem tribuit, ve- rum ne sic quidem rem acu tetigit, cum multa alia sint tali & majori siccitate prædita, quibus hu- jusmodi facultas non inest: Venerem enim siccitas non extinguit sola. Julius Scaliger exercet 104. sect. 3. camphoram venerem non extinguere ex- perimento canis edocere nititur, sed male, cum alia sit canis alia hominis constitutio, propter quam diversitatem licet eadem operatio in utro- que non succedat, inde tamen adversus notis- simam experientiam conclusionem facere teme- rarium est.

## OBSERVATIO XXXIII.

*Dolor Capitis.*

**U**Xor capitanei Schayck, mulier fortis, quadragenaria, intolerabili capitis dolore per tres menses laboraverat. Varia multorum in castris adhibita remedia nihil profuerant. Tandem mense Septembri meum consilium petiit. Ego præscriptâ convenienti diætâ, & corpore cathartico expurgatô, hanc cucupham præscripsi.

℞. *Foliorum majoranæ rosmarini, ana p. ij.*  
*salviæ, florum rosarum rubr. meliloti, ana p. j.*  
*mastiches, olibani, nucis moscatæ, ana scrup. ij.*  
*gariophyllorum, scrup. j. f.*  
*fiat pulvis grossus, è quo cum serico*  
*rubro & bombace fiat s. art. cucupha.*

Hac capiti impositâ, intolerabilis ille dolor imminui cæpit, & paucis diebus totus evanuit. Ipsa tanti faciebat hanc cucupham ut in Frisiam (ubi habitabat) proficisci volens, adhuc duas similes sibi à pharmacopæo parari curaret, quarum alteram sibi ipsi servare volebat, alteram cognatæ suæ, simili dolore sæpe vexatæ, donare.

## OBSERVATIO XXXIV.

*Suppressio Menstruorum.*

**J**Oanna N. juvencula Plethorica, robusta, circiter 24. annorum menstruas purgationes per tres menses suppressas habuerat, quæ suppressio primò induta fuerat à copiosiore lactis pressi crudi ac frigidi potatione. Hinc decoloratio faciei, appetitus dejectio, nausæa, dolores capitis, aliaque similia mala scaturiebant. 1. Octobris postquam diætam convenientem præscripsissem, corpus expurgavi cum infusione foliorum senæ & agarici, cui hieram picram admiscueram. Postridie hæc præscripsi.

℞. *Radicum aristolochiæ rotundæ, drach. ij.*  
*diptamni, ostrutii, valerianæ, ana unc. f.*  
*foliorum nepethæ, pulegii, abrotani,*  
*sabinae, ana M. f. absinthii, p. j.*  
*seminum nigellæ, apii, ana drach. ij.*  
*levistici, drach. j. f.*  
*anisi, nasturtii, ameos, ana drach. j.*  
*croci orient. scrup. j.*  
*fiat pulvis grossus, ligandus in puppa,*  
*quæ maceranda suspendatur in vini albi lib. v.*

℞. *Trochiscorum de myrrha, scrup. j. f.*  
*specierum hieræ,*  
*diacurcumæ*  
*croci or. ana, scrup. j.*  
*castorei,*  
*boracis venet. ana scrup. f.*  
*gummi ammoniaci aceta*

scyllis



*scyllit dissol. drach. ij.*  
*fiat s. art. massa, e qua formentur,*  
*pilulae magnitudinis pisi, & deaurentur.*

Harum pilularum quotidie manè & vesperi quinque deglutiebat, superbibendo prædictæ infusionis seu vini, unc. iiij. vel v. Tandem 15. Octobris menses eruperunt. Verum cum se biduò post inceptam hanc purgationem satis temere rursus aëri frigido ac ventoso exposuisset, jam feliciter inceptum naturæ opus suppressum est. Hinc statim magna uteri suffocatio illam invasit, ita ut subinde omnino strangulari videretur. Castoreum cum assa fætida & rutha viridi in puppa ligata statim naribus objeci. Hujus quoque decocti sæpe de die aliquantulum bibere jussi.

℞. *Radic. valerianæ, ostrutii, ana unc. f.*  
*folior. ruthæ viridis, M. j. f.*  
*matricariæ M. j.*  
*julorum nucum unc. f.*  
*sem. levistici, drach. v.*  
*dauci,*  
*ameos, ana drach. j.*  
*vini albi & aquæ commis ana part. æq.*  
*coquantur s. art. ad lib. j.*

Cum autem mulierculæ astantes etiam aliquid pedibus supponi peterent, quo matrix deorsum detrahi posset, hujusmodi cataplasma seu potius pasta à me præscripta, & pedibus supposita fuit.

℞. *Foliorum viridium petasitidis, man. v.*  
*pistentur minutim, & addendo*  
*fermenti acidi, unc. iiij.*  
*salis, drach. j. f.*  
*vini decoctionis matricariæ, q. s.*  
*fiat pasta suppedanea*

His mediocriter cessavit illa uterina suffocatio. Cum tamen in totum non evanesceret, 20. Octobris purgata est cum sola hiera picra. 21. Octobris prædictum decoctum reiteratum est. Postridie hoc sudoriferum sumpsit, à quo cum copiosissimè sudasset, bene valuit.

℞. *Oculorum cancri præparat.*  
*salis cardui bened. ana scrup. j.*  
*theriacæ Androm. drach. j.*  
*castorii, croci or. ana gr. iiij*  
*aquæ theriacalis, unc. j. f.*  
*olei succini gut. xij.*  
*misce, fiat haustus.*

Reliquum curationis, cum necessitas jam non urgeret, distulimus usque ad 8. Novembris, quo tempore rursus, corpore prius purgato, rediit ad usum pilularum & infusionis 2. Octobris præscriptæ. 14. Novembris saphæna in pede sinistro secta est. 18. Novembris menses rursus copiose fluxerunt, & ægra deinceps optimè valuit.

## Annotatio.

**E**O tempore quo menstrua fluunt, oportet ut fœminæ sibi diligenter caveant, alioqui vel à frigida potu, vel ab aëre ventove frigido subtus recepto, vel pedum refrigeratione, vel terrore, aliove errore, facile fiunt, & postea gravium malorum causæ fiunt, sicut & huic nostræ ægræ contigit. Ita quoque Forestus Lib. 28. Observat. 2. refert historiam ancillæ, quæ cum menstruas purgationes consuetas haberet, nudis pedibus pavimentum aqua deterfit, unde subito restrictis mensibus multa gravia symptomata insecuta sunt, & fluxus ille non nisi post aliquot menses satis difficulter restitutus fuit. Idem etiam contigisse refert alteri juvenulæ, quæ tempore hujus fluxus in aquam saltabat: item rusticæ, quæ tali tempore sibi venam in brachio secari curaverat.

Ad menstruorum provocationem variis utimur remediis multis variisque formis compositis, prout ægras Medicamenta hac illâve formâ libentius assumere velle animadvertimus; atque ea de causa huic nostræ ægræ, præter hystericam infusionem, potius pilulas dedimus, utpote illi gratiores, atque in illo morbo non parum efficaces, quales pilulas medici multis variisque modis etiam conficiunt. Montagnana has sequentes laudat.

Rec. Trochisc. de myrrha, drach. j. f.  
seminis apii,  
cassia lignea, ana scrup. f.  
moschi gr. xv.  
cum succo apii fiant pilula.

Sennertus prax. lib. 4. part. 2. sect. 2. cap. 3. valde commendat trochiscos de myrrha in forma pilularum sumptos, ut & has pilulas,

Rec. Trochisc. de myrrha, scrup. iiij.  
extracti gentiana,  
sabina, ana scrup. j.  
castorii, scrup. f.

fiant pilula. Dosis, scrup. ij.

Alii hac formam efficaciores esse putant:

Rec. Trochisc. de myrrha,  
specier hieræ,  
diambra,  
boracis venet.  
chalybis preparati,  
castorii, ana scrup. ij.  
croci or. scrup. j.  
gummi ammoniaci aceto  
scyllit. dissol. drach. iiij.  
fiant f. art. pilula parva,  
dosis, scrup. j. ad scrup. ij.

Zacutus Lusitanus prax. admir. lib. 2. Observat. 100. nobilem matronam morti jam vicinam, in qua omnia alia adhibita auxilia nihil profuerant, tandem restitutam fuisse scribit, solis pilulis ex chalybe & pulvere calamenthæ, cum syropo de artemisia paratis, quarum drach. j. sumebat mane cum exercitio, spatio viginti dierum. Sic pilulas singuli medici pro diversis intentionibus diversimodè componunt.

Quantum ad suppedanea quæ pedibus supponuntur, si magnas in uterinis affectibus vires non habeant, saltem nihil nocent, ac proinde ægrorum petitioni hac in parte etiam satisfieri potest, præcipuè cum magni quoque medici hinc aliquod auxilium expectari posse scribant, imprimis si talia supponantur, quæ à proprietate conferre putantur, qualia sunt artemisia, pulegium, sabina, matricaria, maxime autem petasitidis & bardanæ folia, quæ à nonnullis tam efficacia esse creduntur, ut capiti imposita matricem sursum, pedibus verò supposita deorsum potenter trahant. Veteres, teste mercuriali prælect. Pisan. ad histor. 28. etiam spongiis aceto imbutis & expressis ac pedibus alligatis solebant menstruum & puerperiorum provocationes tentare.

## OBSERVATIO. XXXV.

## Hypercatharsis.

**C**Ognatus strenuissimi viri D. Thomas Lucas equitum capitanei, vir circiter quadragenarius, cum se non admodum bene haberet, meo consilio foliorum senæ drach. ij. rhabarbari drach. j. & seminis anisi scrup. ij. (nam dicebat se facillime medicamentis moveri) per noctem maceravit in cervix tenuis, unc. iiij. vel iiij. atque istam colaturam sequenti manè bibit. A facili & levi hoc medicamento (mirum dictu spatio octo horarum circiter sexaginta sedes cum summis torminibus habuit, & fortassis de vita illius actum fuisset, nisi sequenti haustu exhibito, & sudore provocato, fluxum sedassem.

Re. Terra

℞. *Terra sigillata*, scrup. j. s.  
*coralli rubri preparati*,  
*cornu cervi usti*, ana scrup. j.  
*theriaca Androm.* scrup. iij.  
*requiæ Nicolai*, scrup. j.  
*aquæ theriacalis*,  
*cardui bened.* ana unc. j.  
*misce fiat haustus.*

Lintamina ad ignem calefacta ventri quoque imponi & sæpius renovari jussi: atque ita substitit fluxus. Suasi autem, ne in posterum ullius Medici consilio aliquod purgans medicamentum, quantumvis leve, assumeret, sed necessitate sic urgente, alvum potius enemate proritaret, vel aliquo jusculo emolliente.

### Annotatio.

**I**nfelices profectò sunt illi Medici, quibus in principio praxeos hujusmodi ægri curandi occurrunt, haud parvo enim nominis & famæ periculo exponuntur: nam illud in medicina plerumque evenire solet, ut juniores medici meliores tortores appellentur, & si suis exhibitis medicamentis ægrum aliquem à periculo morbo sanent, id fato ascribatur (quia, inquiunt, hora ejus nondum venerat) si verò à morbi violentia evictus æger succumbat, illud statim Medico ejusque medicamentis imputetur. Ita hîc quoque mihi absque dubio error aliquis imputatus fuisset, si in pharmacopœa à me præscriptum ibique paratum fuisset medicamentum, tunc facile hoc aut illud venenum admixtum fuisse dixissent; nunc autem plane inamunis habitus fui, quia uxor Domini Lucas infusionem ipsamet fecerat & præparaverat. Similis infelix casus etiam fratri meo aliquando evenit, qui cum Domino N. solius rhabarbari drachmam in cervisia tenui domi suæ macerandam dedisset, ab hoc solo potu ultra quadragesies ei alvus fortiter citata fuit.

Magna est hominum in purgando differentia: non nullis robustissimis, qui vix ullis medicamentis moveri posse viderentur, interdum facillimis & levissimis medicamentis gravissimi fluxus excitantur; aliis autem, qui debiles & facilis emotionis esse putantur, nonnunquam vix for-

tissimis medicamentis alvus cieri potest. Ita novum virum brevis staturæ & macilentum cui alvus non potest emoveri aliis medicamentis quam tabaco, quod per noctem in cervisia tenui macerare & dein colare solet, eamque colaturam bibens, sine ulla alteratione tantum ter quaterve dejicit, quod tamen tabacum aliis haud parvum vitæ periculum induceret. Uxor quoque Simonis Wiggers mulier debilis & macilenta, vix ullo cathartico purgari poterat, tabaco tamen sumptò alvus ipsi leviter absque molestia ciebatur. Cornelius Sleenacker, ludimagister, vir debilis, adeo duræ alvi erat, ut interdum non nisi antimoniatis aliisque vehementibus catharticis emoveri posset.

Contrarium verò in aliis evenit, in quibus solus ferè medicamentorum aspectus operari videtur. Sic non semel vidi nobilem Domitellam, à solo purgantium odore æque purgatam fuisse, ac si illa per os assumpsisset, nam iisdem assumptis vix magis purgabatur. Atque illud ipsum etiam in aliis nonnullis me vidisse memini. Similia quoque exempla eorum, qui solo medicamentorum odore purgantur, referunt Alexander Benedictus in præfat. ad Lib. de Peste. Erasius Lib. de Occultis pharmacorum potestatibus cap. 60. Joannes Posthius in Observat. Rondeletius, alii-que plures.

## HISTORIA XXXVI.

### Anhelitus Fætor.

**F**ilius nobilis viri Jodoci N. anhelitum valde fætentem habebat. Parentes hujus mali originem à ventriculo procedere existimaverant, eaque de causa hieram picram aliquoties ipsi exhibuerant: cujus usu cum fætor non cessaret, meum consilium petierunt. Ego non in ventriculo, sed in gingivis & dentibus totam fætoris causam latere statim animadverti, quippe fæces in interstitiis & cavitatibus dentium diutius retentæ & putrescentes, hunc fæto-rem producebant.

Jussi

Jussi ut bis terve de die dentiscalpio dentes bene expurgaret, & cum pauxillo hujus aquæ aluminatæ bene collueret.

℞. *Aluminis pulverisati, drach. j.*  
*aquæ communis, unc. v.*  
*aquæ cinnamomi, unc. f.*  
*olei vitrioli gut. ix.*  
*misceantur.*

Hoc lavamentò cum per paucos dies usus fuisset, nullum deinde fætorem amplius percepit.

*Annotatio.*

**A**nhelitus fætor varias causas habet. Interdum producit à pulmonibus ulceratis, ut in phthisicis: interdum à pravis vaporibus gingivas corrumpentibus, ut in scorbuticis: interdum ab orificii ventriculi superioris laxitate, & cibis in eo corrumpentibus: interdum (ut statuit Bauhinus) à laxitate valvulæ ad principium crassi intestini, per quam tunc

stercorum fætor continuus, intestina tenuia & ventriculum transiens, per os expirat. Interdum fætor hic inducitur solo dentium vitio, cum fæcibus refertæ diu non expurgantur, sed sordes in eorum interstitiis putrescunt & corrumpuntur. In hoc ultimo casu aqua aluminata maxime prodest, utpote quæ putredini fortiter resistit, & dentes ab omni corruptione præservat.

OBSERVATIO. XXXVII.

*Asitia.*

**C**hristianus ab Ummerfom, vini mercator, anno 1636 mense Martio valde nauseabundus erat, & appetitum dejectum jam multis diebus habuerat, ita ut vix quicquam comedens totus debilis evaderet. Quia autem pestis tunc temporis crudeliter grassabatur, ipse se pestilenti labe infectum esse putabat. Verum non pestis, sed ordinarium suum præservativum, quo contra pestem quotidie ante meridiem nimiam copiam utebatur, mali causa erat, nempe vinum absinthite. Quapropter hujus vini usum plane prohibui, & dietam conveniente præscriptam, corpus leviter expurgavi, ac deinde sequens conditum præscripsi.

℞. *rad. calami aromatici, nucis moscatæ,*  
*maceris, florum sulphuris, ana scrup. jf.*  
*cremoris tartari drach. j. cinnamomi electi scrup. j.*  
*gariophyllorum scrup. f.*  
*pulveriscentur subtilissime, deinde addantur*  
*radicum helenii condit. drach. vi.*  
*conservæ anthos unc. f.*  
*zingiberis condit. drach. vi.*  
*olei vitrioli gut. xv. syrupi de limon. q. s.*  
*fiat conditum.*

Hujus conditi manè & vesperi, interdum etiam meridiè, particulam edebat, & vini absinthitis usum intermittebat. Hinc brevi; cessante nausea, rediit appetitus. Ex illo tempore conditum hoc tanti fecit, ut illud postea per aliquot annos multoties à pharmacopæo confici curaret, ad appetitum & sanitatem (ut agebat) conservandam.

*Anno-*

## Annotatio.

**G**alenus absinthio calefacientem extergentem, roborantem & desiccantem vim tribuit: unde Plinius scribit illud corroborare stomachum, ejusque saporem utiliter in vina transferri. Vinum autem absinthite (quod hodie multis in usu, plurimis verò in detestando abusu est) non novum, sed antiquum inventum est, ipsis quoque veteribus notissimum, quod liquet ea eo, quod Dioscorides lib. 5. cap. 49. varias ejusdem compositiones tradat, ubi scribit illud utile esse stomacho, urinam ciere, tandem concoctionem accelerare; hepaticis, nephriticis, ictericis, cibum averfantibus, & stomacho male affectis auxiliari: valere etiam contra inflationes & diuturnam hypochondriorum distentionem, lumbricos teretes expellere, remoratos menses producere, quæ omnia etiam de vino absinthite testatur Oribasius collect. lib. 5. cap. 25. Verum etsi plurimæ insignes absinthii & vini absinthitis sint dotes, tamen notandum omnibus rebus bonis modum indictum esse, quem si excedamus, bona nobis mala faciemus, nam optima quæque vel medicamenta, vel etiam nutrimenta, immoderatus sumpta nocent. Sic multoties etiam observavi, vini absinthitis nimium & inordinatum usum, gravissimam in-

ducere inappetentiam, hepatis, ventriculi & totius corporis summam debilitatem, atque hinc tandem capitis vertigines, memoriæ læsiones, epilepsias, hydropes, aliaque mala oriri, quibus non pauci absinthitis vini copiosioris quotidiani potatores, fuerunt extincti. Ut evenit N. Heymerick, qui hac de causa cachecticus & hydropicus) nec non Antonio N. qui epilepticus obiit, aliisque innumeris. Quapropter ut vinum absinthite prosit, tantum modice sumendum est. Unum ridiculum hic subungere placet. Cum anno 1635 Gallorum exercitus Noviomagum venisset, Galli matutinis temporibus ad præventionem à peste bibeant vinum Hispanicum, rogantibus autem quibusdam nobilibus quid nam Belgæ biberent ad præventionem, respondit œnopola illos bibere vinum absinthite: hoc cum illis prorsus incognitum esset, sibi dari petierunt, verum cum illud gustassent, statim cum execratione exclamaverunt: Maledicta sit illa vinca è qua tale vinum exprimitur, nam hic est re vera ille potus quem Judæi obtulerunt Jesu Christo cruci affixo. Profectò illi Galli putabant illud vinum tam amarum è terra succrescere, neque illud ita compositum esse sciebant.

## OBSERVATIO. XXXVIII.

*Pulmonis vulnus sclopeto inflictum*

**A**Nno 1636 mense maio, durante obsidione munimenti Schenckiani, eques quidam ex nostris in conflictu equestri ictu sclopeti vulneratus in pectoris dextro latere circa mammillam, tribus globulis plumbeis pectus & pulmonem dextrum transeuntibus, atque in tergo circa scapulam tribus diversis foraminibus iterum exeuntibus. Cum Noviomagum ad ædes suas delatus esse, atque ibi cum chirurgo ipsum invisissem, è vulnere statu certam mortem prædixi. Ne tamen nostrâ incuriâ mori videretur, vulnera religavimus, alvum clystere subduximus, ad sanguinem è pulmone effluentem sistendum medicamenta convenientia dedimus, inferiori etiam vulnere cannam plumbeam immisimus, per quam sanguis & interna materia evacuari possent; quod cum per illud vulnus minus commodè fieret, postea in latere, factâ intercostali incisione, commodiorem viam fecimus. In diætâ prohibuimus omnia acrida, frigida, salsa, acida, ut & cibos difficilis digestionis & mali nutrimenti: At cibos dulciores, juscula carniū vitulinorum, agnorum, gallinarum, ut & ipsas carnes, ova quoque forbilia, lac dulce, & similia concessimus, ac reliqua diætâ spectantia pro re nata quotidie præscripsimus. Interea continuatum semper fuit in usu apozematū vulnerariorum pectoralium: nulla febris accessit, & appetitus mediocris remansit. Post tres quatuorve septimanas una cum sanguine (qui totò ipsò intervallò modò spumofus, modò aquosus, modò coagulatus per cannam plumbeam, sed paucus, effluerat, & sursum rejectus fuerat) pus satis magna quantitate cum tussi reiici caput, quod puris & sanguinis sputum continuavit usque ad sextum mensem, ita ut omnino nulla sanationis spes eluceret, æger enim totus extabescens, jam ad extremam

F

maciem

maciem & debilitatem pervenerat. Miser tamen ille, vitæ cupidus, nos sæpe supplex rogabat, ne ipsum pro desperato desereremus, sed in curatione omnem diligentiam adhiberemus. Itaque, licet nos oleum & operam perdituros existimarem, ipsius tamen precibus inducti, non potuimus non inceptum opus continuare. Quia autem propter summam debilitatem vires restaurandæ erant, præter apozemata vulneraria, quæ ter de die assumebat, etiam ter de die haustum lactis caprini recenter mulcti tepidè bibere iussimus: nonnunquam etiam amygdalatum, subinde conditum corroborans præscripsimus. Postquam lactis caprini usus reliquis medicamentis adjunctus esset, cæpit paulatim imminui puris sanguinolenti sputum, quod tandem una cum tussi planè desiit circa initium decimi ab inflicto vulnere mensis. Exinde æger in dicti lactis usu continuando, indies magis magisque corroboratus fuit, & carnosus evasit. Circa finem decimi mensis rursus per tubiculum deambulavit. Exacto undecimo mense omnino sanatus foras prodiit, nec deinde quicquam mali è tanto vulnere retinuit. Septenniò post ipsum adhuc bene sanum inter reliquos equites equitantem vidi.

### Annotatio.

**P**ulmonum vulnera admodum periculosa & plerumque lethalia esse, testantur Hippocrates 6. aphor. s. 18. Galenus in com. ad dictum aphor. s. Avicenna quarta quarti, cap. de disrupt & extract sagit. Celsus lib. 5. cap. 26. alique primarii Medici simul & chirurgi, propterea quod viscus fungosum propter continuum motum vix aliquam curationem recipere possit. Semper tamen lethalia non esse docuit experientia, cum sæpe gravia pulmonum vulnera, gladiis inflicta, perfectè sanata fuisse visa sint, atque etiam talia in quibus pulmonis substantiæ pars exsecta fuit; quod se vidisse testantur Rolandus Parmensis præcios lib. 3. cap. 25. Theodorius lib. 2. cap. 17. Gemma lib. 1. cosmocrit. cap. 6. Valleriola lib. 4. observ. 10. Hildanus cent. 2. observ. 32. alique plures. Verum hæc paucissimos invenias, qui pulmonum gravia vulnera sclopetis inflicta perfectè sanata viderint, (qualem tamen casum sibi visum describit Petrus Fuhrmannus epist. ad Gregorium Horstium) propterea quod à plumbei globuli maxima violentia facta gravis contusio, nullam in fungosa illa parte sanationem admittere videatur, sed potius inflammationem, gangrænam, putredinem, aut sphacelum minetur. Quæ tamen curatio prædicto equiti, usu medicamentorum & lactis caprini (de quo lacte antea observat.

30. in annot. pluribus egimus) feliciter contigit. Cujus equitis sanatio verè monstruosa haberi debet. Ego antehac vix unquam credidissem hujusmodi tria gravia pulmonis vulnera (quibus à globulorum transeuntium violentia debuit magna adfuisse contusio) sclopeto inflicta sanari ullo modo posse, & nisi ipsemet oculatus testis adfuissem, fortassis adhuc dubitarem. Vulnera pulmonum gladiis & cultris inflicta aliàs sanata fuisse etiam nos vidimus, sed illud non est adeo mirum, cum iis non adsit tanta contusio, neque iis tam facile accedat inflammatio.

Præter dictam sanationem, etiam illud rarum contigit huic ægro, quod tam graviter læsus, peste, quæ tunc crudelissimè grassabatur, non fuerit infectus, cum alioqui plurimis vulneratis & aliis morbis laborantibus id contingeret. Erat autem hic æger homo robustus, florentis ætatis, boni temperamentis, & militabat sub capitaneo Coenjers, Anglo. Ante aliquot annos, cum Bredæ Dominum de Nassau ægrotantem inviserem, hic eques, cum sexaginta aliis (inter quos adhuc duo alii erant, quibus capita trepano quondam perforari curaveram) in gratiarum actionem me conduxit usque ad Gertruydenbergam.

## OBSERVATIO XXXIX.

### *Hernia in testinalis:*

**U**Xor Joannis Vermeulen, cervisarii, mulier circiter 40 annorum, herniam intestinale habuit in inguine dextro, magnitudine ovi aserini protuberantem. Totalis aderat alvi obstructio, propter intestinum per angustum rupturæ foramen in inguen prolapsum. Sexto à principio mali die ad illam vocatus fui. Bis injectum est clyisma, & à muliere quadam, quæ ex professo huic operi vacabat, intestini reductio multoties clementer, sed frustra,

tentata

tentata fuit, intestinò flatibus adeo distentò, ut nec ipsum, nec flatus remeare possent. Nihil fomentationes aliaque convenientia topica posuerunt. His visis, dixi, vel certam mortem esse expectandam, vel anceps remedium esse tentandum, nempe peritonæi dilatationem incisione faciendam, ut per latius foramen intestinum introrsum repelli posset. Non arrisit iis meum consilium: ac proinde cum præter hoc nihil aliud faciendum restaret, nec ipsi hoc permittere vellent, ego discedens ægram deploratam dereliqui. Post me vocatus fuit homo quidam rudis & nihili, circumforaneus lithotomus Gravæ habitans, quem vulgo magistrum Gerardum appellabant, qui gloriatus fuerat se intestinum brevi reducturum: verum cum illud tribus diversis vicibus summâ vi facere annixus frustra fuisset, pudibundus gloriator tacitè discedens Gravam profectus est. Quatriduo post ejus discessum, inguine spontè putrefactò & disrupto, multa excrementa inde effluerunt, cum magno quidem ægræ levamine, sed certo exitio, quippe intestinum ab agyræ durissima compressione disruptum fuerat, atque hinc à fœcibus in illud inguinis interstitium effluentibus pars illa computruerat. Tunc ultimum supererat remedium, intestini rupturam consuere, & peritonæum dilatare, verum cum etiam hinc in ægra debili nulla salus mihi videretur expectari posse, negotium hoc intermittere & clementiorem mortem expectare suasi. Non obstante autem mea dissuasione, tanta fuit vitæ cupido, ut ægram nec dolorum magnitudo, nec periculi gravitas ab illo opere detertere potuerit, sed convocatis statim quatuor chirurgis primariis, illam operationem confestim fieri petierit. Cute igitur & vicinis partibus crucialiter apertis, intestinum tenue prolapsum, non parva tantum parte disruptum, sed fere transversim abruptum invenimus, vix enim straminis latitudine fines intestini sibi invicem cohærebant, & adeo intumuerant ut crassioris bubuli corii crassitiem æquarent. Hinc certum mortis indicium apparuit, nam si exigua fuisset solutio, fortassis adhuc sanari potuisset, cum de magna hac nulla spes esset. Interea tamen filo sericeo quadruplicato & bene cerato confutum fuit intestinum, & peritonæi rupturâ scalpello aliquantum dilatata, in ventris cavitatem adauctum. Clysteres, diætâ conveniens, aliaque necessaria adhibita sunt. Ægra de magno dolore circa umbilicum coquerebatur, quem nullis fomentationibus, sacculis, aliisque topicis sedare potuimus, alioqui ægra mediocriter valebat, cum appetitu edebat, excrementa etiam laudabilia deiciebat. Quinta post peractam operationem die multum adauctus est ille dolor circa umbilicum: sequenti nocte cum ægra cum astantibus adhuc fortiter colloqueretur, ex improvviso medios sermones pallida mors interrupit.

### Annotatio.

**R**uptura hæc adeo erat angusta, ut mirum foret quomodo solum intestinum per illam foras excidere potuisset, ita ut omnino impossibile fuerit illud solum & vacuum, multo minus flatibus distentum, per viam tam angustam vi repellere. Hujusmodi angustissimam rupturam antea quoque videram in alio hernioso, post mortem aperto. Quapropter pessimè faciunt illi, qui intestina per tam angustam viam summa vi repellere conantur, ut solent agyræ veri carnifices, nam citius disrum-

pi, quam tanta vi reduci posse, cum ratione docet experientia. Leniter igitur hernias tractare, & cataplasmatibus, fomentationibus, aliisque convenientibus topicis, flatus primò discutere ac introrsum repellere, & rupturam aliquantum emollire, atque tunc demum intestini reductionem, absque ulla violentia, leniter aliquoties tentare præstat: quæ omnia si non juverint, tunc necessario ad extremum subsidium, peritonæi dilatationem, deveniendum est.



## OBSERVATIO. XL.

*Dysuria.*

**G**erardus Driessm mercator, circiter quinquagenarius, urinæ difficultate sæpius laborabat, qua non tantum urina difficulter & cum summo dolore fluebat, verum etiam non raro in totum sistebatur. Causa mali erat pituita quædam viscida & tenax, quæ nonnullis temporibus magnâ copiam ad vesicam descendens, ejusdem sphincterem adeo obsidebat, ut sibi ipsi & urinæ liberum egressum impediret. Ille limus per penis meatum descendens & exiens tenax erat, ut sæpe instar filamentorum inde manibus extrahendus forer: etiam multoties adeo pertinaciter meatui inhærebat, ut argenteo acu crinali longiore immisso dissolvi & extrahi deberet. Malum hoc plurimis annis ipsi familiare fuerat, & modò ter, modò quater vel quinquies singulis annis invadebat, ac per duas tresve hebdomadas singulis vicibus durabat. quo intervallo maximam istius viscidæ pituitæ copiam excernebat. Multi maximi nominis medici ad mali hujus curationem plurimis usi fuerant remediis, sed omnibus frustra; qui Medici de causa & generatione illius tenacissimæ ac viscosæ pituitæ: nec non de loco unde sic per periodos descendebat, alii aliter judicaverant. Interim neque ab aliis, neque à me curari potuit æger. Ingruente malò maximum auxilium & doloris levamen inducebatur sequenti potione, quo sæpius utebatur, eoque dolores leniebat, subsistentem urinam ciebat, & vias urinarias lubricas reddendo crassam viscosamque illam pituitam commodius, citius. minore cum dolore, & majore copia exonerabat.

℞. olei amygdalarum dulcium unc. j. f.  
vini malvatici optimi unc. ij  
succu citri recenter expressi unc. f  
misce, fiat potio.

*Annotatio.*

**S**ennertus praxeos lib. 3. part 8. sect. 2. cap. 5. aliis dysuriæ causis unam annumerat huic jam dictæ non multum dissimilem. Sæpe etiam (inquit) materia alba & lactea quasi cum urina copiose emittitur, & mictionem ardentem excitat, & quidem sæpe tanta copia excernitur, ut ubi subsidet, dimidia pars matula repleatur: & talis urina mictio sæpe satis diu continuatur. De ejus generatione alios aliter sentire novi, ac scio quosdam eam pro pure in renibus genito habuisse. Verum si toti renes in pus resolverentur, non posset tanta ejus copia, quanta interdum per aliquot septimanas singulis diebus excernitur, inde suppeditari. Ego in ea sum sententia, provenire illam materiam à cruditate & vitiata coctione, primò quidem ventriculi, deinde etiam, cum error prima coctionis non possit corrigi in secunda, epatis, qua chylus, & postea etiam sanguis crudus relinquitur, neque à partibus falsis & tartareis, qua in prima coctione separari debent, mundatur, qua postea à renibus attracta & ad vesicam transmissa, dolorem inter mingendum pariunt, & præ-

cipue in fine mictionis, dum aliquid ejus materia collo vesica & extremitati meatus urinarii adherescit pertinacius.

Ad hujus mali curationem multum profunt illa quæ acrimoniam temperant, emolliunt, & vias urinarias lubricas reddunt, ut crassiori matetæ liberior detur transitus: qualia sunt, oleum amygdalarum dulcium recens expressum, quod in hoc casu in frequenti usu solet esse. Vinum malvaticum, cujus solius potu Sennertus, locò citatò, scribit virum quendam tali gravi dysuria infestatum fuisse sanatum. Decoctum florum chamomillæ in lacte bubulo, quod Forellus tradit senem quendam fuisse curatum. Vel decoctum illud quo nos aliàs puerum sanavimus, de quo diximus antè observat. 7. Item decoctum malvæ, althææ, ficuurti, glycyrrizæ, & similium: ut & syrupus de althea Fernelii: imprimis autem terebinthina in bolo cum saccharo deglutita, quæ crassos humores incidit, attenuat deterget, propellit, & vias lenit atque emollit.

OBSER-

## O B S E R V A T I O. XLI.

*Hæmoptysis.*

*Dominus Joannes, Sacerdos Craneburgensis, anno 1636. 16. Februarii has ad me Litteras misit.*

**E**Xpertissime Domine Doctor, maxima scientiæ & experientiæ tuæ fama me impulit, ut vestrum in meo morbo consilium experiri desiderem, sperans V. Rtiam aliquod salutare auxilium mihi allaturam. Diu valida tussis me infestavit, vix unquam requiem permittens: præterea ante mensis circiter spatium ad tussim adhuc accessit sputum sanguinis spumosi, quem exinde continenter (interdum majore, interdum minore quantitate) rejicere soleo; quæ expuitio mihi valde molesta est. Ad hæc appetitum plane perdidit, ita ut nihil edere possim, nisi parum, cui acetum vel aliud quid acidi admixtum sit. Totus emaciator, & vires jam ad extremum dejectæ sunt. Multa aliorum consilia nihil mihi profuerunt. Quæso si V. Rtia adhuc aliquid remedii ad hiberi posse existimet, illud nobis impartiri velit. Vale, 16. Februarii, 1636.

*V. Rtia Deditissimus,*

JOANNES SACERDOS.

*Huic eadem die sequenti modo Respondi.*

**R**everende vir Litteræ tuæ mihi datæ sunt, quibus breviter pro temporis brevitate respondeo. Acri & & falso catharro ad pulmones decedente diu te vexatum fuisse, atque hinc vehementem illam & continuam tussim originem traxisse percipio. Tandem autem humorum distillantium copia pulmonis aliqua vena aperta, vel tussis vi disrupta sanguinem profundit, qui è pulmone spumofus plerumque ejicitur. Malum hoc non curabitur, nisi catharri descensus impediatur, & tussis sedata fuerit. Ad has intentiones quatuor tibi mitto medicamenta. Primum, sunt septem pilulæ, quas cras mane assumes, atque his clementer purgaberis. Secundum est conditum, de quo peracta purgatione singulis diebus ter, nempe manè, meridiè, & vesperi, assumes particulam magnitudinis avellanæ vel nucis moscatæ. Tertium, est linctus, de quo, cum tussis maxime infestat, interdum linges. Quartum, est tabellatum, de quo sæpius diu noctuque particulam in ore liquefcere fines. His quatuor adhuc addidi sacculum, cui quod inest, effundes in ollam novam fictilem, & super ignem calefacies sine ulla humiditate, crebro movendo spatulâ, ne herbæ comburantur, deinde sacculo iterum infundes, atque ita calidè capiti impones, imò quam calidissimè ferre poteris, atque per unam duasve horas in hædere fines, idque bis terve de die reiterabis, eoque ablatò, statim capitium laneum, fumo masticis & gariophyllorum bene perfumatum, calidè capiti impones, eique mantile calidum adhuc circumligabis, ut hoc modo refrigeratum & debilitatum cerebrum rursus calefieri, corroborari, exsiccare, atque ita catharri descensus impediri possit, quò factò, reliqua curatio facilius succedet. Satis nobis constat vos propter bellorum turbas & milites hospitio excipiendos minus commodè vivere posse, interea tamen, quantum fieri potest, aliqua etiam diætæ ratio habenda est. Itaque con-

F 3

tinebis

tinebis te loco calido, imprimis autem caput ab omni externo frigore præservabis. In victu abstinebis ab omnibus cibis salitis & fumo induratis, ut & ab omnibus quæ sunt difficilis concoctionis aut mali nutrimenti, maxime autem ab omnibus acidis (licet te his maximè delectari scribas) ut aceto, succo limonum, pomis acidis, vino acido, omnibus denique, quibus aliqua aciditas admixta est, quia acida pulmones maxime lædunt. Conveniunt juscula carnis ovillæ, agninæ, vitulinæ, hædinæ, gallinarum, ut & ipsæ carnes, cum rosmarino, majorana, hordeo mundato, vel passulis cocta; ova quoque sorbilia, & lac caprillum: ut breviter dicam, pleraque dulcia conveniunt. Si his non cessaverit malum, morbi statum post aliquot dies rescribito. Interim V. R. tiam Deo Opt. Max. commendatum volens, ero

*Tuus in omnibus,*

I. de DIEMERBRÖECK.

Medicamenta quæ præscripseram, hæc erant.

℞. *Massæ pil. cochiarum, scrup. j. f.*  
*diagridii, gr. v.*  
*fiant pilulæ viij. deaurentur.*

℞. *Coralli rubri præparati, lapidis hæmatitis,*  
*trochiscorum de terræ sigillata, ana scrup. ij.*  
*florum sulphuris, drach. j.*  
*olibani, tragacanthæ, spodii,*  
*cornu cervi usti, ana scrup. j.*  
*conservæ rosarum rubrarum, unc. ij.*  
*myræ cydoniorum, unc. j. f.*  
*requiei Nicolai, drach. j. f.*  
*syrupi de papavere q. f.*  
*misce, fiat conditum.*

3. ℞. *Syrupi de jujubis, de tussilagine,*  
*de glycyrriza, ana unc. j.*  
*de papavere,*  
*loch sani, ana unc. j. f.*  
*misce, fiat linctus.*

4. ℞. *Capitum pavaveris albi, n. v.*  
*conscindantur minutim, & coquantur*  
*per semi horam in aquæ communis q. f.*  
*deinde colentur cum forti expressione:*  
*colatura coquatur cum sacchari albi, unc. iiij.*  
*ad tabellati consistentiam, addendo*  
*sub finem: pulveris radic. althææ scrup. j. f.*  
*glycyrrizæ rasæ, drach. j.*  
*florum sulphuris, scrup. ij.*  
*coralli rubri præparati,*  
*boli arm. veræ ana scrup. j.*  
*fiant f. art. tabellæ*

℞. *Herb. majoranæ, M. j.*  
*rosmarini, betonicæ,*  
*flor. rosarum rubr. meliloti, ana M. f.*  
*gariophyllorum, drach. j.*

*nucis*

*nucis masticæ, sem. cumini, ana drach. ij.  
 grosso modo contusis adde,  
 sem. milii M. iiij. salis communis M. iiij.  
 misceantur simul, & dentur in sacculo lineo satis largo.*

Cum his remediis per octiduum usus fuisset, transcripsit, tussim & sanguinis sputum non quidem curata, sed multum tamen fuisse imminuta. Ut malum prorsus sanaretur, rursus sequentia præscripta sunt. Reiterentur pilulæ, linctus, & conditum, antea præscripta.

*℞. Radicum consolida majoris, bistortæ,  
 tormentillæ, feniculi, ana unc. i.  
 glycyrrizæ rasæ, drach. vj.  
 herbarum hyssopi, tussilaginis,  
 scabiosæ, veronicæ, plantaginis,  
 betonicæ, rosmarini, ana M. j.  
 salviæ,  
 florum rosar. rubr. ana M. j.  
 capitum papaveris albi minutim concisorum, n. iiij.  
 passularum cum arillis, unc. iiij.  
 dactylorum, n. ix.  
 decocti hordei, q. s.  
 coquantur s. art. & fiat apozema ad lib. iiij.*

Primo purgetur dictis pilulis, linctu utatur ad tussim, mane & vesperi post assumptum conditum bibat haustum apozematis. Circa finem Martii scripsit se à sputo sanguinis & tussi planè liberatum esse, optime quoque dormire & edere posse, mihiq; pro meis consiliis maximas gratias egit.

### Annotatio.

**O** Mne sanguinis sputum è pulmonis venis gravius minatur malum, ac proinde citissime & summa cum prudentia curari debet: quod etiam docet Benedictus Faventinus praxeos lib. 2. cap. 6. *Rejeto (inquit) sanguine è pulmone cum tussi dirupta vena, ipsa non solidabitur, nisi magna cum difficultate, & Medici providentia ac sollicitudine.* Hæc autem curatio pro causarum varietate, morbi vehementia ac diuturnitate, & naturali ægrorum pulmonumque robore, aliàs facilius, aliàs difficiliter peragitur. Inter alias autem causas una est hæc, quando nempe sanguinis rejectio per os fit è pulmone, cum natura magno & violento tussis impetu humores, vias spiritales obstruentes, expellere nititur. Eò enim gravi impetu spirationis organis vis inferitur, & ipsa cum suis vas-

valde tenduntur, atque interdum disrumpuntur, & tunc sanguis rejicitur. Tali sanguinis sputo laborabat hic noster æger, quod periculosum quidem erat, sed minus tamen quam si à pulmonis mala dispositione, aut vasorum erosione, aliave simili causa, ortum duxisset. Verum nihilominus si diutius perstitisset ille morbus, sine dubio ab humorum distillantium acrimoniâ vasa quoque paulatim fuissent erosa, & ipsius visceris robur concidisset, atque tunc facile suppuratio, rabes, putredo, febris aliaque mala curatu difficillima & plerumque lethalia accessissent. Nunc verò quia res eò nondum devenerat, neque malum admodum inveteratum erat, ipse quoque æger satis robustus foret, curatio feliciter peracta fuit, Imo multò feliciter & citius quam ego ipsemet opinatus fueram.

OBSER.

## OBSERVATIO. XLI.

*Secundinae & lochiorum Suppressio.*

**U**Xor Petri Vleys-houwer, 6. Martii abortum fecit, ac factum sextimestrem peperit. Statim post abortum secundina, lochia, urina, & alvi dejectiones simul substiterunt per tres dies continuos, iisque de causis maximo periculo exposita fuit ægra, imprimis cum quoque Medicamenta ab obstetrice data nihil profuissent. 9. Martii (qui erat quartus à partu dies) ad illam vocatus fui, atque hæc statim præscripsi.

℞. *Radicum aristolochiæ rotundæ, dictamni, valerianæ, ostrutii, feniculi, bryoniæ, ana drach. iij.*  
*herbar. artemisiæ, pulegii, tanaceti, matricariæ, sabinae, ana M. j.*  
*seminis apii, levistici, dauci, ana drach. ij.*  
*cicerum rubr. unc. j. f. vini albi q. f.*  
*coquantur s. art. ad lib. j. f. sit apozema.*

℞. *Hujus decocti, unc. v.*  
*foliorum senæ mundat. drach. iij.*  
*rhabarbari opt. drach. j. f.*  
*sem. anisi, drach. j.*  
*cinnamomi electi, scrup. j.*  
*fiat infusio per quatuor horas, deinde colentur cum forti expressione, & addendo colaturæ, olei succini gut. ix.*  
*fiat haustus.*

Hoc assumptò alvus leviter purgata fuit, lochia cum urina satis copiose fluxerunt, & secundina frustulatim prodiit, atque ita unico hoc medicamento ab imminente periculo liberata fuit ægra.

## OBSERVATIO. XLII.

*Cerebri vulnus Sclopeto inflictum.*

**N**Vaim, nobilis Anglus, qui signifer erat, juvenis robustus, circiter 27 annorum, anno 1636, in obsidione munimenti Schenckiani in capite sclopeti ictu vulneratus est, globulo plumbeo parvo intrante per cantum interiorum oculi dextri (sine oculi tamen læsione) & cerebri substantiam rectâ transeunte usque ad superius os bregmatis ejusdem lateris, quod os non transiit, sed isti loco sub ossæ inhæsit. Ipse statim ab ictu concidit alto sopore obrutus, & mentis sensusque expers, atque ita pro mortuo Noviomagum delatus fuit. Nemo à tali vulnere ægrum sanari posse judicavit, utpote in quo ipsum cerebrum non parum læsum erat. Interea tamen ne ob incuriam aliquam perire videretur, chirurgus longo instrumento globuli lacum exploravit, cumque circa supremitatem ossis lambdoidalis sentiit: tunc statim aliud instrumentum longum & tenuè, instar vaginæ, cui terebellum, globulis affigendis accommodatum intus inest, usque ad globuli locum immisit, & globulum terebello firmiter affixit, sed cum eundem una cum instrumento extrahere vellet, nescio qua malâ Fortunâ (forte quod tenellum terebellum nimium contorsisset) terebellum diffractum

fractum fuit, ejusque pars globulo affixa in cerebro una cum globulo remansit, ita tamen ut ejus extremitas circa vulneris introitum conspici posset; cum autem alia commoda instrumenta ad diffractum illud ferrum extrahendum ad manum non essent, illud in cerebro relictum fuit usque ad vesperam, quo tempore aptis instrumentis illud ferrum cum adhærente globulo extractum est, simulque etiam de cerebri substantia aliquantum effluxit, magnitudo nempe nucis moscatæ: etiam pauca & parva ossea fragmenta vulneris orificio inhærentia exempta fuerunt. Vulneri apposuit chirurgus balsamum magistrale, & fomentationes cephalicæ ad cerebri corroboracionem toti capiti circumpositæ sunt, atque etiam alvus enemate citata est. Postridie è brachio dextro sanguinis aliquot uncia extractæ sunt. Quarta ab accepto vulnere die, subinde aliquantum evigilavit æger, qua ablata occasione statim pro nutrimento aliquid jusculi offerri curavi. Utque ad decimum-quartum diem gravis ille sopor paulatim imminutus fuit, ita ut postea tantum naturaliter dormiret. Nulla febris accessit, neque appetitus dejectus fuit. Decoctis & conditis cephalicis per aliquot septimanas utebatur. Vulneri præter dictum balsamum nihil aliud impositum fuit. Loco fomentationis cephalicæ postea capitium cephalicum siccum, ex herbis aliisque cephalicis confectum, toti capiti impositum est. Atque hoc modo desperatissimus ille æger post tertium mensem bene sanatus iterum foras prodiit, & post quartum mensem rursus ad castra profectus est. Sexto post curationem anno Noviomagum veniens nos bene sanus invisit, illud tantum incommodi se retinuisse dicens, quod ingruente aliqua repentina tempestuosa æris mutatione, tunc sibi caput aliquantum doleret, præterea quod à vini liberaliore potu statim inebriaretur & amens fieret: alioqui in reliquis omnibus solita munia haud secus administraret, ac si nunquam vulneratus fuisset.

### Annotatio.

**C**erebri vulnera lethalia esse statuit Hippocrates 6. Aphorif. 18. *Vesica* (inquit) *discissa, aut cerebro, aut corde, aut septo transverso, aut aliquo ex tenuioribus intestinis, aut ventriculo, aut jecore, lethale est.* Quo loco lethale, non pro necessario mortifero, sed pro summe periculoso intelligendum esse, ait Galenus, in comment. ad eundem aphorismum. Nam cerebri vulnera ventriculos non penetrantia, non necessario mortem inferre inde liquet, quod sæpe sanentur, quod se vidisse testantur Nicol. Massa, Carpus, Jacotius, Berengarius, multique alii. De sagittis ex dictarum partium vulneribus extrahendis, ita scribit Avicenna quarta quarti, cap. de disrupt. & extract. sagit. *Quod si sagitta fixa fuerit in aliquo membro principali, sicut cerebro, aut corde, aut pulmone, aut ventre, aut intestinis, aut hepate, aut matrice, aut vesica, & apparent signa mortis, tunc oportet ut abstinemus ab attractione sagittæ, quoniam fiet inde inquietudo plurima: ne superveniat nobis locus sermonis stolidorum, cum hoc quod parum conferimus infirmo. Si autem non apparuerint signa mala, tunc incipiemus curationem:*

*multoties enim de eis in quibus accidit illud, salvatur aliquis absque spe mirabiliter. Verum si nos dimiserimus iterum in his membris principalibus, accidet mors secundum omnem dispositionem & proportionabimur ad paucitatem misericordia. Si autem abstulerimus sagittam, fortasse salvabitur infirmus quandoque.* Nos quoque secundum hanc Avicennæ doctrinam, quamvis res deplorata videretur, quia tamen spes, si aliqua superesse poterat, sita erat in extractione globuli è cerebro, illum extraximus in hoc ægro, quem sanari posse nullus, quod credo, rationalis Medicus judicasset, imprimis cum vulnus summa cum violentia sclopeto inflatum foret, (quibus vulneribus necessario maxima adest contusio) atque meningum perforatio, & ipsius substantiæ cerebri aliqua perditio accederet. Profecto si unquam monstrosa curatio visa fuit, hæc etiam verè talis haberi debet. Ego auctorum hac de re testimoniis antehac vix fidem adhibueram, & nisi his meis oculis jam bis tam gravia vulnera cum jactura cerebri sanata fuisse vidiissem, vix etiamnum crederem.

## OBSERVATIO. XLIII.

*Asthma.*

**A**Ndreas à Salingen mense Majo vehementi asthma laborabat, qua tantopere angebatur, ut propter difficillimam respirationem vix loqui posset: sine tussi erat, nihil aut parum exspuebat; appetitum quoque dejectum habebat. Se hoc malo sæpius quidem, sed maximè sex proximis septimanis vexatum fuisse, multaque aliorum consilio assumpta remedia nihil omnino profuisse dicebat, metuere autem se tandem suffocatum iri posse. Ego malum hoc in corpore senili sexaginta annorum non penitus eradicari, sed multum tamen imminui ac leniri posse prædixi, atque proinde bono animo esse, & sequentis electuarii (licet amari) quotidie manè & vespèri particulam magnitudinis avellanæ assumere, & ab omnibus acidis, fumo induratis, frigidis, flatulentis, viscosis, duræ concoctionis aut pravi nutrimenti cibis abstinere jussi.

*℞. myrrhæ electæ, aloes lucidæ florum sulphuris  
rad. enulæ camp. glycyrrizæ rasæ, ana scrup. ij.  
croci opt., benzoini, ana scrup. j  
fiat pulvis subtilissimus, cui adde  
mellis optimi drach. xii.  
olei anisi gut. ix.  
misce fiat electuarium.*

Hujus usu alvus leniter solvebatur, & appetitus restituebatur, asthma etiam mirabiliter cessabat, ita ut intra paucos dies ab eodem plane liber evaserit: & malo postmodum redeunte, eodem illo electuario sibi ipsi statim medebatur.

*Annotatio.*

**A**sthma ex iis morbis est, qui in senibus non curantur, sed eos plerumque comitantur usque ad mortem, propterea quod inducatur vel à fluxionibus crudis & frigidis è cerebro in pulmones irruentibus; vel à crudioribus & crassis humoribus ex hepate per venam arteriosam in pulmones effusis: quales crudi, frigidi, & pituitosi humores (teste Hippocrate 2 Aphorif. 40) in valde senibus concoctionem non admittunt, ob imbecillitatem facultatis concoctricis, quæ in iis debilis est propter frigidam constitutionem, ætatem, & abundantiam superfluitatum frigidarum. Quapropter in his malum solummodo lenire tentandum est: quo in casu nostro ægro plurimum profuit usus præscripti electuarii.

Mercurialis tom. 1. consult. med. 1. & tom. 3. consult. 8. in asthma valde commendat cauterium in brachio excitatum, & diu apertum servatum: Etenim experientia (inquit) quotidiana exploratum est, anhelitus difficultate vexatos ex hujusmodi remediorum usu incredibilem utilitatem percipere. Quantum ad medicamenta specifica asthmaticis convenientia, illa multa ab auctoribus describuntur.

Avicenna in omnibus asthmaticis, cum spi-

randi difficultas admodum torquet, cuminum cum aceto, vel semen synapi albi cum æquali portione mellis ad formam electuarii multum exhibet. Hippocrates de morb. mulier & 1 de nat. muleb. in suffocationis metu præscribit sulphur vivum ad magnitudinem fabæ, cum cumino æthiopico, nec non sulphur cum sale nitri tritum & solutum. Sic inter neotericos Lælius à Fonte, Bened. Victor Favent. Salomon Albertus, Quercetanus, Beguinus, & alii sulphur tanquam primum remedium ad asthma commendant. Nonnulli ad ejus imitationem in vehementissimo asthma, sulphur exhibent cum terebinthina Veneta. Mizaldus viscosos & tenaces humores nullo negotio expectorari scribit, si seminis urticæ pulverisati scrup. j. cum aliquo syrupo pectorali deglutatur. Leonellus ammoniacum cum paucis oxymelis scyllitici dissolutum commendat: quod ammoniacum etiam à plerisque Medicis laudatur de quo Mercurialis tom. 2. consult. 47. sic inquit. Sed quia asthmatici solent accessiones quasdam habere, in quibus vehementius molestantur, experientia compertum habeo, in illis difficultatibus maxime valere oxymel ad unc. ij. cum unc. l. ammoniaci simul in mortario commixta, & cochlearis mensura sumpta. Paulus Aegineta



Ægineta lib. 3. cap. 3. cap. 29. millepedes in fictili ad albedinem tostos melli coctos commiscet. Verum ego millepedibus non tostis uti soleo. Sic etiam. Antonius Valetius exercit. 25 ad cap. 25. lib. 1. Hollerii de morbis intern. hos laudat. *Euporistum est (inquit) & Gracia plebecula hac etiam tempestate usitatum remedium, ad pulmones infarctibus à crassis humoribus liberandos. Millepeda quæ sub aquariis vasis stabulantur, panno lineo involuta in vino albo macerantur, hinc facta expressio potui datur: dictu mirum quam brevi saburrhatos pulmones depleat.* Idem paulo post subiungit. *Probatum est ad levandum asthma quantumvis magnum, tabellam unam diatragacanthi guttulis aliquot olei salvia, anisi, aut rosmarini, arte chymica extracti; irrigatam, præsentaneum adferre adjumentum.* Cardanus in consil. de difficult. respir. scribit crocum esse animam pulmonis, eoque se multos anhelosos curasse. Sic Joachim. Camerarius in horto, inquit: *Crocus adeo est thoracis affectibus amicus,*

*ut sint qui ad scrup. sem. atque etiam scrup. j. cum dimidio moschi grano, & vino optimo calido propinando, asthmaticos curaverint.* Decoctum caulium rubrorum pauco saccharo per plures dies sumptum aliquando multum juvasse, ipsemet vidi. Augenius maximi facit syrupum de tabaco seu nicotiana, nullumque præstantius remedium dari posse affirmat: cujus etiam meminerunt Monardes, Quercetanus, Sennertus, alique: cujus usu zacus Lusitanus prax. lib. 1. observat. 94. se asthmaticum desperatum curasse scribit. Non defunt qui terebinthinæ drach. ij. vel iij. cum oleo amygdalarum dulcium summo cum commodo exhibent, ita pectus & alvum simul purgantes. Mercurialis loco præcitato, sulphuris vivi scrup. s. cum terebinthinæ opt. unc. j. exhibet, idque remedium valde extollit. Probatum hic etiam vinum enulatum, balsamum sulphuris, looch de scylla, de pulmone vulpis, aliaque similia.

## OBSERVATIO. XLIV.

*Nephritis.*

**N**icolaus à Rostock, mense Junio acutissimis nephriticis doloribus torquebatur, qui per octiduum sine intermissione duraverunt: Tandem ancilæ cujusdam consilio bis terye de die butyri recentis & insulsi frustum magnitudinis juglandis deglutivit: quod cum per triduum continuasset, tandem sine ullo fere dolore excrevit calculum magnitudinis & formæ amygdalæ, aliosque plures minores, cum multo sabulo; atque ita ab hoc malo liberatus est. Postea autem eodem redeunte (nam erat ipsi à multis annis familiare) illo ipso statim remedio calculos depulit.

*Annotatio.*

**C**um calculus jam è renibus excidit in ureteres, optimè & citissimè expellitur talibus medicamentis quæ vasa urinaria emolliunt, & vias lubricas reddunt; Tale est butyrum recens, quo etiam Joannem de Scherpenhuysen, nephriticis doloribus multoties obnoxium, sibi calculos sæpe feliciter depulisse vidimus. Tale est etiam oleum amygdalarum dul-

cium, quod Medicis in frequenti usu solet esse, vel solum, vel cum vino malvatico exhibitum. Vidimus qui frequenti ficuum comestione calculos feliciter excreverunt. Decoctum Foresti, aliaque antea observatione 20, & in annotatione observationis 44 à nobis descripta, in hoc casu etiam maxime laudabilia sunt.

## OBSERVATIO. XLV.

*Ulcus Tibiæ.*

**U**Xor Christiani ab Ummer sum cum tibiam ad scamnum leviter contudisset, & emplastrum aliquod suo consilio imposuisset, levis illa contusio transivit in ulcus, ad cujus curationem chirurgum vocavit, qui cum per ter quatuorve septimanas, modò unguenta, modò emplastra, modò alia varia topica imposuisset, nihil tamen profecit. Tandem ipsa ægra mulierculæ

cujusdam consilio, cretam pulverisatam cum butyro veteri assato miscuit, coque unguento ulcus brevissimo tempore sanatum fuit.

## OBSERVATIO. XLVI.

*Dolor Fascino inductus.*

**J**oannes Petrus Nirot, puellus circiter quinque annorum, per totum fere annum conquestus fuerat de dolore ventris inferioris, & tantis sæpe torminibus exagitabatur, ut parentes præ commiseratione quid agerent nescirent. Non febricitabat, appetitus mediociter constabat, alvum satis deponebat, & tamen venter tumidus erat, totum corpus emaciabatur nares perfricabat sæpissime, parum & cum turbulentis insomniis dormiebat. Mense Junio meum consilium imploratum fuit. Ego puellum intestinorum lumbricis laborare judicans, ut eisdem & primæ regionis cruditates ac impuritates expellerem, multa variaque exhibui, sed sine ullo fructu, torminibus indies adhuc magis incrementibus, ita ut à vehementi & continuo fletu puellum brevi herniosum futurum metuerem. Tandem omnibus jam in cassum adhibitis, in ventre inferiore duritiem aliquam manu percepi, loco circiter medio inter umbilicum & pubem, aliquantum versus latus sinistrum: quæ durities erat oblonga, nec tamen tumorem ullum faciens, ita ut quidnam id esset judicare non possem: quapropter matrem cum puello ad chirurgum misi, ut etiam illius de hac duritie judicium exploraret. Ille aliquamdiu locum affectum manibus contrectavit, nequiens quicquam certi judicare: cum autem puellum à contactu magis dolere perciperet, ut causam mali certius sciret, locum affectum ab utraque parte manibus fortiter compressit, & statim ab uno latere sentiit aliquid acuti & duri cutem perforare ac ipsius digitum pungere; quapropter illud officulum vel simile quid esse existimans, forcipe parvo rostrato id statim apprehendit, verum non officulum, sed magnam subulam futoriam cum summo astantium stupore extraxit, atque ab eo tempore puellus sanatus fuit. Subula hæc erat longitudinis digiti medii longissimi (maxima nempe, qua sutores in durioribus coriis & altis talorum subfulcris, quæ *poluvias* appellant, consue-dis utuntur) sine manubrio, sed ejus obtuso fini adhærebat adhuc frustum fili futorii picati, quo manubrio quondam infixæ fuerat.

*Annotatio.*

**A**ffectum hunc præternaturalem fuisse, nemo non judicare poterit, non est enim verosimile puellum hunc tam longam subulam ullo modo vel studio deglutire potuisse, idque nullo sciente & sine ulla læsione oris vel gutturis. Verum si hoc factum fuisse concederetur, nulla tamen poterit dari ratio, quomodo per ventriculi vel intestinorum membranas, peritoneum, & musculos abdominis, tandem ad cutem transversim deferri potuerit, visceribus tamen illæsis & nulla facta ulceratione, quin & ipso ægro post subulæ extractionem quasi in momento sanato, quem exinde per septennium bene sanum vixisse novimus. Proinde artis diabolicæ incantamenti eandem in corpus puelli immisam fuisse credibile est; quemadmodum etiam similem maleficii historiam enarrat Jo. Langius lib. 1. epist. 38. de agricola, cui primo clavus ferreus sub illæsa cute apprensus, à

chirurgo fuit excisus, & ægro tandem mortuo in ejus ventriculo, quatuor cultri, duo alia feramenta aspera, capilli, aliaque inventa fuerunt. Gregorius Horstius part. 2. lib. 1. Observat. 13. ejusdem generis memorabiles historias etiam refert, quales etiam describunt Hildanus cent. 2. Observat. 43. Alexander Benedictus lib. 7. pract. cap. 25. Antonius Benivenius, Forestus, Codronchius, Gemma, zacutus Lusitanus, alii-que plures.

Jam à multis seculis disputatum fuit apud Theologos, Jurisconsultos, Medicos & Philosophos, anne re vera dentur incantatores & malefici: & si tales inter mortales vivant, anne tanta artium suarum maleficarum vi polleant, ut creaturis nocere, morbos & mortem inducere, pluvias sistere, tonitrua facere, aliaque multa similia quasi miracula perpetrare possint. Alii negant, alii affirmant, alii ambigunt. Verum

ut

ut quæstio hæc breviter solvatur, relictis innumeris præstantissimorum virorum in utramque partem historiis & auctoritatibus, dicendum est, & existere, & Deo sic permittente multa efficere posse incantatores, cum ipsa sacra Scriptura testetur Magos seu sapientes Pharaonis olim tempore Moysis in Egypto tales fascinatores fuisse, qui etiam ipsa summi Dei miracula suis præstigiis imitarunt, virgas in dracones, fluvios in sanguinem mutaverunt, ranas quoque & ciniphes per totam provinciam excitarunt, quemadmodum legi potest Exodi cap. 7. & 8. Sic quoque Evangelista Lucas in Actis Apostolorum cap. 8. meminit cujusdam Simonis Magi, qui magicis artibus dementabat populum. Ibidem etiam cap. 16. enarrat historiam puellæ spiritum Pythonis habentis, quæ divinando magnum quæstum faciebat, quem spiritum malignum Paulus Apostolus ab ipsa ejecit. Ex quibus Sacræ Paginæ testimoniis necessario concludendum est, re verà dari sagas & fascinatores, qui Deo permittente dæmoniis suis artibus ac præstigiis non tantum varia miracula effingere, verum etiam herbis, fructibus, bestiis, imò & hominibus graviter nocere possunt. Quæ tamen sua maleficia non possunt semper quando volunt, neque omnibus quibus voluerint modis, neque in quolibet inferre, sed tantum quando & quo modo Deo placuerit, & in tales, vel quorum fidei constantiam Deus hōc modō vult probare, sicut sanctum virum Jobum diaboli maleficiis exercere & probare voluit: vel quorum incredulitatem & impie-

tatem hoc modo vult punire, non tantum in propria impij persona, sed sæpe etiam in infantibus liberis, armentis, frugibus, aliisque bonis: atque ita sagarum incantamentis interdum etiam infantes (ut vidimus in prædicto nostro ægro) interdum alicujus boves, oves, equi, vel fruges læduntur, quod Monfortii rustico cuidam contigisse novimus. Verum hinc jam quoque manifestè patet, quamvis re vera existant tales malefici incantatores, non tamen istam lædendi potestatem dependere à libero eorum aut diaboli arbitrio, sed Dei, neque ullos morbos posse induci à Satana, nisi Deo permittente, qui propter jam dictas rationes ad eorum illationem interdum Satanā cum suis sagis utitur tanquam instrumento, non verò tanquam causa efficiente primaria. Sed quæstionem hanc latius examinandam relinquemus Theologis, cujus etiam nos mentionem fecimus in tractatu nostro de Peste, lib. 1. cap. 8. annot. 1. problem. 3. Hanc quoque eleganter describit Sennertus lib. de morbis fascino inductis. Wierus tamen lib. de præstig. dæmon. & lib. de lamiis negat sagas & lamias ullos morbos inferre posse: cujus opinionem refutavit Joannes Bodinus. Qui fascini vires, & quomodo morbos inferant Sagæ, quo usque hæc dæmoniaca potestas se extendat, quando & quomodo mirabilia efficiat, aliaque similia latius scire desiderat, legat de his Andream Laurentium, de mirabili strumarum sanatione lib. 1. cap. 9. ubi admodum succinctè & eleganter hanc materiam tractat.

## OBSERVATIO. XLVII.

## Gonagra.

**F**iliolus Thomæ Petri mercatoris Angli, puellus sex annorum, gonagra per tres quatuorve septimanas correptus, tandem propter dolorem amplius incedere non potuit. Nullus aderat tumor, nulla inflammatio, nec dislocatio, eaque de causâ purgato corpore tantummodo ceratum ex oxycroceo imposui, quod per triduum adhæsit nihilque profuit. Postea autem genu valde intumuit, & dolor plurimum adauctus est, quapropter abjecto cerato sequens cataplasma impositum fuit per quatuor aut quinque dies continuos, bis de die renovando, eoque solo tumor & dolor prorsus evanuerunt, neque deinceps redierunt.

℞. *Stercoris caprilli recentis, lib. j.*  
*coquatur in vini gallici fortis q. s. ad*  
*cataplasmatum formam, cum amovetur,*  
*ab igne, adde spiritus vini optimi, unc. iij.*  
*misce, fiat cataplasma molle.*

*Annotatio.*

**M**agnam discutiendi & corroborandi vim habet hoc cataplasma, quod in hujusmodi articularum tumoribus pro summo secreto à nonnullis habetur cujus in-

signes effectus in aliis similibus casibus aliquoties experti sumus. Eodem illo stercore ex posca decocto, in genu inveterato tumore feliciter usus fuit Aetius tetrab. 1. ferm. 2. cap. 94.

## OBSERVATIO. XLVIII.

*Tumor Frontis à casu.*

**F**iliolus Dimmeri de Raet, consilarii Comitum de Boxmeer, de gradibus in frontem ceciderat, à quo casu ingens tumor ovi magnitudinis in fronte protuberavit. Huic solum gramen viride ac recens in mortario contusum frigidè applicui, quo facto tumor totus postridie ita evanuerat, ut ne minimum quidem ejus vestigium superesset.

*Annotatio.*

**H**ujusmodi tumores, quamvis à plurimis flocci fiant, tamen si in principio negligantur, postea interdum graves molestias inducere solent, quod vidimus in puella Domini Eremstraeg, cui cum talis frontis tumor in principio nullis topicis dissiparetur, postea locus affectus per aliquot septimanas tumidus remansit, ac denique humore in eo contento putrescente, atque hinc gravibus symptomatis accedentibus, non tantum cruciali incisione tumorem aperiri, atque humorem putridum inde extrahi necesse fuit, verum ipsum

quoque pericranium eadem putredine corruptum à subjecto osse deradi, atque ita imminens ægro periculum eximi debuit, cui etiam vulnus non sine conspicua satis cicatrice consolidatum est. Quapropter longe præstabilius est horum tumorum dissipationem in ipso principio moliri, quo tempore illud facile fieri potest. Quod nos solo gramine contuso sæpe felicissime peregrimus. Multoties etiam chartam emporeticam spiritu vini madefactam non minori successu imposuimus, vel oleum ceræ aut anili arte chymica distillata illevimus.

## OBSERVATIO XLVIII.

*Colica passio.*

**G**enerosus Dominus Starckenburch, legionis Groeningensis præfectus, vir quadragenarius, mediocriter fortis, temperamento frigidiore ac pituitoso præditus, mense Septembri vehementi colica passione correptus fuit. Habebat ventrem à flatibus valde turgidum, quos tamen neque sursum, neque deorsum emittebat: maximi dolores intestina dilacerare videbantur. Conquerebatur etiam de summa cordis anxietate, qua tantopere premebatur, ut sudore frigido totus perflueret. Quia autem æger à flatibus pene disrumpi videbatur, ac citissimo subsidio opus habebat, sequens enema præscripsi, quod vesperi hora undecima (quo tempore vocabar) injectum fuit.

*Rx. decocti emollientis lib. j. elect. diaphanici,  
hieræ picræ, ana unc. j. f. olei anethini,  
chamemelini, ana unc. j.  
salis communis drach. j. misce fiat clyster.*

Hoc enema post horæ quadrantem absque ullo fructu rursus deiecit, nullis nec flatibus

flatibus nec fœcibus subsequenter: quapropter illud paulo post de novo injectum, atque ut ante sine utilitate emissum fuit. Eo tempore æger nauseabundus aliquantum bilis cum tenaci pituita evomit. Circa horam sextam matutinam aliud enema hoc modo præscripti.

℞. herbar. emollientium, centaurii minor.  
 absinthii, ruthe, florum chamomillæ,  
 anethi, ana m. f. sem. anisi, levistici, ana drach. ij.  
 cumini, baccarum lauri, ana drach. j. f.  
 coquantur in aq. communis q. s. ad lib. j.  
 in colatura leviter ebulliant.  
 foliorum senæ unc. j.  
 deinde exprimantur, & addendo  
 elect. hieræ picræ, diacatholici, ana unc. j. f.  
 olei chamemelini, anethini, ana unc. j.  
 salis communis drach. ij.  
 fiat enema.

Hoc injectio multa excrementa cum plurimis flatibus subsecuta sunt. Postea rursus nauseabundus fuit, & multum bilis ac pituitæ tenacis cum levamine evomit. Bis eà die jusculum pulli cum hordeo mundato, corticibus citri & arantiorum coctum sumsit, & modò ptisanam, modò cervisiam tenuem pro potu bibit. Vesperti hic bolus exhibitus est, à quo sequenti nocte nonnihil dormivit, & dolores egregie fedati sunt, ac postridie alvus ter cum levamine exonerata fuit.

℞. electuarii nostri anticolici drach. j.  
 aloes lucidæ scrup. j.  
 misce, fiat bolus.

Hic bolus postea adhuc ter alternis diebus reiteratus fuit. 7 Octobris, cum alvus per triduum rursus constitisset (intermisso usu dicti boli) dolores colici de novo increverunt, tunc, quia æger à clysteribus aliquantum abhorrebat, haustum leniter purgantem exhibui, à quo multum bilis & pituitæ sursum deorsumque exoneravit. 20 Octobris, alvo rursus nimium constipata, enema injectum est. 13 Octobris etiam advocatus fuit D. Harscampus, Medicus peritissimus, atque tunc communi consilio, ad sedandam nauseam exhibuimus bis aquæ cinnamomi cochleare unum, cum olei cinnamomi gut. ij. atque hoc sequens linimentum ventriculi regioni illinendum præscripsimus.

℞. olei nucis moscatæ expressi, laurini, ana drach. j.  
 anethini, feniculi distillati, ana scrup. j.  
 anisi gut. iij.  
 misce fiat linimentum.

Vesperti assumpsit bolum antea præscriptum. 16 Octobris rursus enema injectum est, à quo tres secessus habuit cum magno levamine. 20 Octob. ad alvum subinde leviter solvendam præscripsimus pilulas ex sola alœ lucida confectas, de quibus leviter solvendam præscripsimus pilulas ex sola alœ lucida confectas, de quibus tantum duas tresve alternis vel singulis tribus diebus deglutiit: quæ pilulæ tantopere profuerunt, ut postea aliis purgantibus opus non habuerit. 28 Octobris dedisse ægro electuarii nostri anticolici unc. j. f. cui admiscueram aloes lucidæ drach. j. f. cujus subinde mane aut vesperti assumpsit drach. sem. vel scrup. ij. cum summo commodo, nam stomachum corroborabat, flatu discutiebat, & pituitam simul ac bilem detergebat. Hoc electuario postea utebatur pro præservativo, intermediis diebus subinde fumens pilulas ex aloë. Atque ita tandem pristinae sanitati restitutus fuit.

Anno-

## Annotatio.

**C**Ausa hujus colicæ passionis fuit pituita falsa copiosior intestinis inhærens & nimia abundantia bilis excrementitiæ acris. Bilis enim è suo folliculo ad intestina excreta, atque ibidem isti pituitæ permixta, pituitam illam tenacem & falsam ebullire faciens (sicut facit calx viva aquæ injecta, aut oleum vitrioli oculis cancri pulverisatis affusum) infinitos flatus, dolores immensos & summas anxietates excitabat. Hanc veram causam fuisse docuit vomitus, quo subinde bilem flavam ac virescentem cum tenaci ac spumosa pituita copiosius evomebat æger (qualem bilem tali pituitæ in intestinis mixtam, ut plurimum colicæ passionis causam esse in praxi multoties observavi) Quapropter hic opus erat medicamento calidiore, ratione frigidæ pituitæ ac flatuum, & bilem simul detergente, atque dolores sedante. Quibus tribus intentionibus dicto electuario (quo in tali casu felicissimè uti soleo) cum aloë mixto, egregie satisfactum fuit, nempe adhibitis etiam generalibus necessariò adhibendis.

Ad colicum dolorem multa insignia ab auctoribus describuntur remedia, quæ pro causarum varietate subinde sunt varianda. Ego in causa frigida felicissimè uti soleo electuario nostro anticolico, cujus eximias virtutes nemo facile describet. Compositio hæc est:

Rec. *specier. diagalanga*,  
*aromatici rosati, ana drach. iij. f.*  
*diambra, drach. iij.*  
*massa pilularum de styrace. drach. iij. f.*  
*theriaca Androm. unc. iij. f.*  
*mithridatii Damoc. unc. iij. drach. v.*  
*olei anisi, drach. ij. scrup. ij.*  
*gariophyllorum drach. j.*  
*nucis moscata distillat. drach. j. f.*  
*syrupi de stachade q. s.*  
*fiat electuarium.*

Hoc electuario modò solo utor, modò ad singulas uncias admisceo aloes drach. j. vel drach. ij. atque tali modo ad colicam efficacius esse compertum. Hollerius de morb. int. lib. 1. cap. 41. absinthii communis p. j. cum sem. cumini drach. ij. coquit in vino odorifero, eamque expressionem exhibet. Idem certissimo experimento probatum esse inquit, si cortex aurengiorum in vino coquatur, idque vinum jejune bibatur. Nos etiam corticem hunc pulverisatum cum vino feliciter exhibitum vidimus. Ab Aetio plurimum commendatur vinum absinthite, eo quod alvum roborat, bilem repurget, ejus generationem prohibeat, detergeat, flatus propellat ac discutiat. Alii seminis cumini drach. j. in vino absinthite coquant, & colaturam exhibent. Rases probat confectionem de baccis lauri. Avicenna efficax medicamentum parat ex æquali-

bus partibus castorii, piperis & anisi. Utiliter quoque datur rad. zedoariæ pulvis à scrup. j. ad drach. j. olea etiam distillata, anisi, fœniculi, carui, anethi, zedoariæ cum vino calido. Decoctum florum chamomillæ (cui aliquantum seminis cumini addi potest) in cervisia, vel vino albo tenui, ad unc. iij. vel v. exhibitum, ad dolores leniendos & flatus discutiendos præsentissimum est remedium. Sequentem aquam carminativam (quam Schroderus phamacopææ lib. 2. cap. 37. describit) nonnulli magni faciunt.

Rec. *florum chamomilla Romana m. xxx.*  
*incidantur & contendantur,*  
*infundantur que horis 24.*  
*in aqua chamomil. lib. x. (alii xv.)*  
*vini generosi lib. vi.*  
*Hinc exprime fortissime,*  
*in colatura iterum horis 24.*  
*infundantur flor. chamomil. commun. m. xxiv.*  
*exprimantur, colentur.*  
*In colatura macera, flor chamomil. m. xij.*  
*flaved. cort. arantior. unc. j. f.*  
*herb. absinthii pont. m. ij.*  
*centaurii min. pulegii origani, ana m. ij. f.*  
*sem. anethi unc. iij.*  
*anisi, fœnic ana unc. j. f.*  
*carui, cumini,*  
*sem. cardui bened.*  
*sem. cardui maria ana unc. j. f.*  
*bac. juniperi unc. j. lauri unc. f.*  
*stent horis 24.*  
*tunc. in B. M. lento igne distilla.*

Rodericus Fonsæca consult. 57. tanquam singulare & maxime secretum remedium, à totius substantiæ proprietate valens, commendat testiculos equorum, quos in curandis doloribus colicis, se in multis expertum fuisse scribit: hos in vino generoso lotos ac in taleolas incisos, lento calore in furno exsiccant, atque ita usui servat, exhibendo, post generalia, horum pulverisatorum drach. j. in vino, tribus horis ante alium cibum. Zacutus Lusitanus prax. admir. lib. 2. observ. 24, pudendum tauri specifica virtute mirabiliter juvare, scrupulo uno ejus pulveris cum vino malvatico assumpto, eoque solo auxilio multos miserrime hoc tormento concussos, se sanatos & præservatos vidisse scribit: atque ita etiam, sequenti observatione, solius urinæ potu multos curavit. In vehementi dolore Riverius prax. lib. 5. cap. 1. has pilulas præscribit, quibus se gravi colica laborantem feliciter curasse refert centuria 2. observ. 1.

Rec. *aloes opt. drach. j.*  
*laudani opiati gr. iij.*  
*diagridii gr. vi.*  
*misce, formentur pilula sex.*

Capiat

Capiat has æger hora comoda: dolorem post horam (inquit) sedant, & postea humores noxios evacuant. Narrat Ambrosius Paræus lib. 16. cap. 28. quendam cum nullis remediis à dolore colico liberari potuisset, tandem haustis olei amygdalarum dulcium unc. iij. cum vino albo & aqua parietariæ mixtis. deinde devorata glan-

de plumbea argento vivo illita, eademque alvo reddita à cruciatu colico mox liberatum fuisse. Simile nos quoque vidimus in equite colicis doloribus sæpius obnoxio, qui ceglutitis tribus quatuorve globulis plumbeis minoribus, iisque alvo paulo post redditis, se ipsum ab hoc malo citissime liberare solebat.

## O B S E R V A T I O. L.

*Vulnus capitis.*

**T**homas Greverer, vir sexagenarius & pro ætate mediocriter robustus, eques sub capitaneo Coigners Anglo, 14 Novembris in area vicecapitanei sui cum aliis quibusdam colludens, nescio qua mala Fortuna retrorsum in terram cecidit, ac posteriorem capitis partem in pavementum inæquale illisit, ita ut leve in summa cute vulnusculem appareret, quod chirurgus parvi fecit, eique tantum emplastrum aliquod imposuit. A principio tamen casus æger nauseabundus fuit, cum inclinatione ad vomitum: levis quoque aderat & vertiginosus capitis dolor, sed is tamen adeo exiguus, ut non impediret quominus tribus primis quatuorve diebus per plateas deambulet, quocunque vellet. Die sexta facies totumque caput valde intumescere cæperunt. 24 Novembris (qui erat undecimus post casum dies) circa vespæram ad ipsum primò vocatus fui. Inveni ægrum debilem, & capite adeo tumido, ut oculos præ tumore omnino aperire non posset: sub oculis etiam livores erant. Totò negotiò à principio casus diligentius examinatò, judicavi ipsum moriturum, cum ex signis mihi videretur cranium esse fissum, & sanguinem inter meninges & cranium extra vasa effusum esse atque ibidem corrumpi. Quapropter hunc sanguinem, qui à chirurgo cranii perforatione primis diebus extrahi debuisset, mortis causam futurum prædixi. Chirurgi qui ipsum tractabant, nempe Egmundus Anglus cum suo filio alterius cohortis chirurgus, imprudentiam suam animadvertentes, nec non ægri uxor & amici unicè petierunt, ut ista operatio jam adhuc institueretur; & quamvis ego illud summopere dissuaderem, cum inde jam nulla salutis spes expectanda mihi videretur, ipsis tamen etiam me invitò sic volentibus, operationi spectator adfui. Itaque illà vespërâ, ablatis capillis & in loco affecto cruciali incisione facta, cranium satis lata amplitudine denudatum fuit. Postridie manè extractis petiis & vulnere penitus detecto, longam fissuram in cranio invenimus, quod cranium statim trepano perforatum fuit: illo autem aperto, sanguis supra crassam meningem effusus hærens, non coagulatus aut putrefactus, sed ibidem plane exsiccatus à nobis inventus fuit, ita ut instar pulveris viscosi meningi & cranio firmiter adhæreret, quod pro certissimo lethali signo haberi debuit, cum propter hanc siccitatem sanguis ille nullo modo effluere posset. 26 Novembris alto sopore correptus est, ac sequenti die obiit.

*Annotatio.*

**C**ontusiones & vulnera capitis nunquam flocci facere oportet, non rarò enim perspicacissimos etiam oculos fallunt, ita ut quæ omni periculo vacare nonnunquam videntur, ægros in maximum vitæ discrimen inducant. Vidimus interdum ægros qui post decimum, imò post decimum quartum ac vigesimum ab ictu capitis diem, vel levissimum, vel nullum malum sentierunt, & tandem tamen ex

improvise apoplexia, convulsionibus, aliove gravi malo correpti, præter expectationem vitæ suæ finem imposuerunt. Quemadmodum id vidimus in famulo Domini Morignam Galli, qui ab equo in caput ceciderat, nullum tamen externum vulnus habebat: hic primo die capite doluit & valde vertiginosus fuit, ita ut omnino incedere non posset: à secundo autem usque ad duodecimum diem nihil mali sentit, sed

H

solita



solita munia peregit: duodecimo die de capitis gravitate conquestus est: decimoquarta circa meridiem apoplectus concidit, & intra paucas horas exspiravit. Sic etiam Eduardus N. famulus Domini Lucas equitum Capitanei, confictu quorundam militum ictum baculi haud exiguum in caput receperat, à quo tumor quidem magnus, verum sine vulnere, excitatus fuit: primis diebus vertiginosus erat, deinde per aliquod tempus de capitis gravitate conquestus: trigesima secunda die epilepsia supervenit, quæ paucis diebus tantopere increvit, ut quadragesimo sexto post ictum die convulsivus obierit. Valeriola cap. 5. append. ad loc. comm. refert historiam mulieris exiguo ac plane contemnendo vulnere ictu poculi in fronte sauciata, cui nullum malum symptoma primo biduo adfuit: ter-

tia autem die gravis febris, totius faciei ingens tumor, rubori ac inflammationi conjunctus, mox delirium & convulsio accesserunt, quibus omnibus malis quinta die finem imposuit mors: aperto autem capite, rimula vix conspicua in cranio apparuit, & ingens phlegmone intra calvariam inventa est, dura meninx tumens, livore affecta & ingenti puris copia suffusa reperta. Cum itaque hujusmodi dubii casus occurrunt, non sunt flocci faciendi, sed præstat cranium quam primum denudare, atque etiam, si opus fuerit, perforare, quam longiore expectatione lethali periculo ægro exponere: à perforatione enim ista (cummodo bene peragatur) nullum periculum metuere necesse est, si tempestivè administretur, cum eadem nimis diu neglecta mortem certo inducere possit.

## OBSERVATIO. LI.

*Fissura Cranii.*

**P**etrus ab Ewijck, eques capitanei Coigners, vir 34 annorum, cum 2 Februarii in ædibus vicecapitanei Joannis Couper detecto capite cum vicecapitaneo super arcam colloqueretur, famulus quidam magnum lignum, ponderis decem vel duodecim librarum, per fenestram altiore in detectum caput dicti equitis imprudenter dejecit. Ipse ab ictu momento in terram prolapsus obmutuit, ac pro mortuo in vicinum stabulum delatus fuit, ubi per horæ spatium taliter apoplecticus jacuit, ita ut illum mortuum esse omnes judicarent. Tandem aliquantum ad se rediit, sed tota ista die & nocte sequenti deliravit. Chirurgus ad ipsum vocatus, cum leve tantum & superficiarium vulnus adesse animadverteret, nullum periculum adesse credidit, ac se ægrum tribus quatuorve diebus facile sanaturum promisit. Dominus Couper tamen huic chirurgo non satis fidens, cum nuper infelicem minoris vulneris eventum in Thoma Grevenervidisset, tertia die me rogavit ut ægrum inviserem. Inveni ipsum sine magnis doloribus, sanæ mentis, cum levi ac contemnendo vulnere in syncipite, vix autem penetrante: oculi in circuitu liviscebant. Propter pauca symptomata chirurgus & astantes totum negotium flocci fecerunt. Ego autem totâ historiâ à principio diligentius examinata, certissimè affirmavi cranium non posse non esse fractum seu fissum, & summopere necessarium fore dixi, ut illud quamprimum trepano perforaretur, ut hoc pacto sanguis extravasatus subtus latens extrahi posset, neque expectandum esse donec alia gravia symptomata subsequerentur, utpote quibus apparentibus operatio hæc nimis sero institueretur. Ægrè, sed tandem tamen in meam sententiam itum fuit. Itaque alvo statim clystere subductâ, eadem illa vespere in sinistro bregmatis osse, ubi vulnus erat, incisio satis magna facta est ad formam litteræ T. & cranium triangulariter denudatum est, Tunc ob hæmorrhagiam nihil videre potuimus, at postridie invenimus duas in cranio fissuras satis magnas, & ab unico latere particulam longitudinis semi digiti, parum depressam, quæ particula à reliquo osse quasi in circulo undequaque soluta & disrupta erat. In vicina parte firma cranium trepano perforavimus, hincque sanguinis circiter unc. f. (qui inter cranium & crassam meningem ex disruptis à casu venulis effluxerat, ibique delituerat) effluxit, quo deterso, parvum linteolum melle rosaceo imbutum meningi impositum, ac vulnus forinsecus carpia sicca oppletum, & emplastro de betonica contextum fuit. 6. Februarii adhuc aliquid sanguinis effluxit, sequentibus autem diebus nihil amplius. Interea alvus medicamento leniente exhibitò leviter commota fuit. Porro vulnus usque ad 12 Februarii eodem modo tractatum, viximus,

vimus, & capitium ex herbis aliisque cephalicis confutum toti capiti imposuimus: postea hunc pulverem cum mellè rosaceo mixtum meningi imponere cepimus.

℞. sanguinis draconis, thuris, aloes myrrhae, ana scrup. j.  
pollinis farinae hordei scrup. j. f.  
fiat pulvis subtilis.

18 Februarii ab interiore cranii parte caro succrescere cepit. 1 Martii, meningi carne contexta fuit. 16 Martii, squamula à superiore denudati cranii ossè separata est. Deinde caro exterior undique succrescens cranium brevi contextit, atque in principio Aprilis æger perfectè sanatus foras prodiit.

### Annotatio.

**S**ubita hujus ægri consternatio quasi apoplectica certissimum cranii depressi signum erat: quæ depressio vix sine fractura vel fissura fieri potuerat, & quamvis æger sequentibus diebus nihil mali in capite sentiret, cum tamen hujusmodi depressio cum fissura fieri non possit sine disruptione aliquarum venularum duræ meningis, præstabat cranio aperto sanguinem ex-

travasatum citius extrahere, quam ejusdem putrescentis vel putrefacti & corrupti symptomata expectare, qualia sunt, graves dolores, deliria, febres, convulsiones, aliaque, quæ ut plurimum lethalia esse solent: paucissimus enim sanguis, licet vix drachmæ pondus æquaret, supra meningem tamen putrescens, dira symptomata & mortem inferre potest.

## OBSERVATIO. LII.

### Dolor Capitis.

**P**etronella de Kuijck, rustica sexagenaria, mense Februario conquerebatur se magnis capitis doloribus, nec non catharris ad oculos, dentes, humeros, aliasque partes defluentibus, totâ fere hyeme infestatam fuisse, atque in capitis summitate magnum frigus sentire, haud secus ac si synciput aqua frigida perfusum foret. Præscriptâ prius diætâ calidiore & cephalica, corpus pilulis cochiis & aureis expurgavi. Deinde lintea quadruplicata spiritu vini calefacto inbuta ac rursus leviter expressa, toti superiori capiti imponere, idque sequentibus diebus aliquoties reiterare jussi: hâc factò, diuturnus ille dolor, una cum catharris intra paucos dies prorsus evanuit. Tunc ad præservationem jussi sequentem cucupham capiti impositam gestare.

℞. herb. majoranæ p. ij. rosmarini, salviæ  
florum meliloti lavendulæ ana p. j.  
nucis moscatæ, gariophyllorum, ana scrup. ij.  
fiat pulvis pro cucupha.

### Annotatio.

**I**n hujusmodi frigidis cerebri affectibus, præter generalia & interna medicamenta, sæpe topica convenientia multum quoque profunt, ita ut his solis, si in ipso capite primaria doloris causa consistat, curatio multoties peragatur. Quo in casu nos spiritu vini feliciter usi sumus, cujus fotum etiam summopere commendat Arculanus. Alii aliis utuntur. Platerus anethum, Forestus chamomillam, quocunque modo adhibeantur, dolores à causâ frigida potenter se-

dare scribunt. Aetius stercus caprinum tritum, & vesperi ac mane impositum; item nasturtium torrefactum cum aceto rosaceo tritum & impositum, plurimum ac citissimè prodesse tradit. Sunt qui frigidos ac superfluos humores hâc modo exsiccant.

Rec. sem. milii lib. j.  
salis communis lib. f.  
sol. majoranæ,  
H 2

rosma-

rosmarini  
salvia,  
flor. lavendula,  
meliloti, ana p. j.  
sem. anisi,  
faniculi  
anethi,  
cumini, ana drach. ij.  
bacc. lauri drach. iij.

His in sartagine torrefactis, & post in sacculos coniectis, siccetur & confricetur calidissime caput per sesqui horam. Aetius verbenam cum radicibus & serpillio oleo incoctam, omni capitis dolori ex frigidis & crassis humoribus mederi scribit, atque etiam prodesse tradit ascellos seu millepedes sub aquariis vasis nascentes, si

oleo incoquantur. P. Aegineta lib. 3. cap. 5. scribit mulierem quandam valde inclaruisse, quod sequenti remedio capitis dolores, vel cum, vel sine febre, mirabiliter sanaret: radicem cucumeris asinini viridem minutim concisam, & absinthium, in aqua & oleo, donec flaccuissent, coquebat, & hydroleo illo caput rigabat, ac radicem cum absinthio contusam imponebat. Quod medicamentum efficacissimum esse etiam testatur Avicenna, qui illud sequenti forma describit.

Rec. olei communis,  
aqua communis, ana lib. j.  
fol. absinthii m. j. f.  
radic. cucumeris asinini unc. ij.  
bulliant simul.

## OBSERVATIO. LIII.

*Singultus.*

**A**Ntonetta N. mulier paupercula, me rogavit ut filiam suam inviserem, juvenculam circiter 24 annorum. Hæc continuo, magno ac molestissimo singultu per decem dies vexata fuerat, & varia anicularum adhibita remedia nihil profuerant. Ego cum utrum se bene habere animadvertirem, judicavi malum hoc induci ab acri quadam materia ventriculi tunicis firmiter impacta. Exhibui prius leve vomitorium, à quo ter quaterve satis vomuit, singultu tamen permanente. Tunc sequentem sacculum præscripsi.

℞. foliorum menthæ, florum chamomillæ,  
anethi, ana m. j. rosarum rubr. meliloti, ana m. f.  
cap. papaveris albi minutim concisum no. j.  
nucis moscatæ, seminis anisi, ana drach. j.  
anethi, cumini, ana drach. j. f.

consciendantur & contendantur grosso modo, ac è tenui lintheamine fiat sacculus intersutus, magnitudinis duarum manuum.

Jussi ut ipsamet hunc sacculum per semi horam leviter coqueret in lactis dulcis & aquæ communis ana lib. j. f. & de hoc decocto subinde parvum haustum biberet, ac sacculum aliquantum expressum calidè ventriculi regioni imponeret. Hoc cum per integrum diem continuasset, præter suam expectationem à molestissimo singultu prorsus liberata fuit.

*Annotatio.*

**H**ippocrates 6 Aphor. 39. inquit. *Convulsio fit ex repletionem, aut ex inanitione: ita verò & singultus.* Verum magna ex parte singultum à plenitudine, rarius ab inanitione fieri, testatur Galenus in comment. ad 6 Aphorif. 13. Sub plenitudine etiam illa comprehenduntur, quæ ventriculi tunicis firmitus affixa, easdem sua acrimonia mordent & vellunt, ut humores acres & tenaces, piper, aliaque similia acria.

Singultus si diu duret, ægrum graviter affligit rarius autem diu durare solet. Marcus Ga-

tinaria lib. de morb. partic. cap. de singultu, refert historiam juris doctoris, qui per duodecim dies singultu laboraverat: quam historiam Marcellus Donatus, hist. mirab. lib. 4. cap. 3. tanquam rarissimam ex Gatinaria describit. Forestus tamen lib. 18. obs. 12. meminit vetulæ cujusdam, quæ subinde per semi annum singultiebat. Ad singultum hunc primò convenient talia medicamenta, quæ acrem ac mordicantem materiam è ventriculi tunicis excutiant, qualia sunt vomitoria, atque etiam sternutatoria: hinc Hippocrates 6 Aphorif. 13. inquit, *A singultu detentum*

*detentum sternutatio superveniens liberat.* Quod si hæc non juverint, & acris illa materia hoc pacto non excutiat, tunc illius acrimonia vel est mitiganda (sic apud Forestum vetula quædam aliis remediis non juvantibus, looch sano devorato curabatur) vel coquenda & mitiganda simul, sic profunt decoctum chamomillæ, flor. & sem. anethi, cumini, ficuum, vini malvatici alteriusve meracioris potus, &c. Vel est coquen-

da & simul etiam acutus ventriculi sensus aliquantum obtundendus, in quo casu conveniunt, theriaca, mithridatium, & maxime philonium, quo se varios curasse scribit Forestus. Interdum solo subito terrore singultum curatum fuisse legimus: sic refert Valleriola lib. 2. observat. 4. se in quodam singultum gravissimum atque contumacem, qui nullis remediis cedebat, terrore subitaneo incusso curasse.

## OBSERVATIO. LIV.

*Vulnus capitis & cranii apertio per trepanum.*

**L** Ambertus N. nobilis Bataviensis, juvenis robustus circiter 24 annorum, 7 Martii, cum equum generosum exerceret, & improvise ab equo in terram dejectus, capitis partem posteriorem illisit in thecam tormenti bellici, ita tamen ut forinsecus nullum vulnus appareret. Statim post casum evomuit, & vertigine magna correptus fuit, qua aliquantum cessante, rursus equum conscendit ac domum se contulit. Cum autem stabulum jam intrasset, iterum vertigine correptus in terram concidit, & quasi deperdita prorsus memoria, quid sibi accidisset, vel quomodo ab equo cecidisset aut ubi fuisset plane ignorabat. Imperitus quidam chirurgus castrensis advocatus, ablatis capillis post aurem sinistram paulo fursus versus (de cuius loci dolore conquerebatur æger) levem fecit incisionem, quæ nullo modo ad pericranium usque pertingebat, & postridie circiter libram sanguinis è dextro brachio extraxit. 12 Martii, doloribus incrementibus etiam ego advocatus sum, quo tempore ægrum de acutissimis capitis doloribus conquerentem inveni, nulla tamen febris aderat. In loco affecto, præter vulnus quod chirurgus fecerat, levem ac mollem percepi tumorem, ita ut ad tactum de cranii depressione aut fractura (quæ adesse symptomata satis indicabant) nihil certi judicari posset. Chirurgus imposuerat hætenus defensivum (ob metum, ut aiebat, inflammationis) ex bolo armena, albumine ovi & aceto simul mixtis: quod cum pessimè hic adhiberetur, illud statim abjeci, & lintea quadruplicata sequenti fomento intincta, ac parum expressa, toti capiti calidè circumponi, & ter quaterve de die renovari jussi.

*R. herbar. betonicae rosmarini, thymi, salviae, majoranae, verbenae, ana m. j. f. florum stachados, chamomillae, meliloti, ana m. f. baccarum lauri, sem. cumini, ana drach. iij. vini albi q. s. coquantur s. art. ad lib. iij. adde colaturæ spiritus vini unc. vi. misce, pro fomento.*

Cum autem æger alvum per quatrimum non exonerasset, atque clysterem admittere nollet, haustum leniter purgantem exhibui, à quo alvum quinquies deposuit. Vesperis ejusdem diei, post fomentationem aliquoties applicatam, apparuit in loco affecto tumor magnitudinis dimidii ovi gallinacei, quo pertuso effluxit sanguis niger. Tunc postridie alio peritioris chirurgo simul advocato, de cranio perforando consilium dedi. Verum renuentibus acerrimè ægro & amicis, adhuc per biduum expectatum fuit, nempe ad 15 Martii (qui erat à casu dies nonus) quo tempore cum capitis dolores jam ad summum acumen pervenissent, & rursus eodem loco tumor priore major conspiceretur, consentiente ægro, circa vesperam cranium ibidem denudari jussi, cumque musculo temporali vicina esset

H 3

plaga,

plaga, aliquantum versus posteriorem capitis partem, ad futuram lambdöidalem, incisio crucialis usque ad os ipsum facta est. Effluxit statim multum sanguinis nigri & coagulati, qui à natura robusta per lambdoidalem futuram (quam hac incisione ex parte denudavimus) expulsus fuerat, & inter cranium ac pericranium hæserat. Cranio sufficienti latitudine denudato, & pericranio abrafo, vulnus carpia sicca repletum est. Insequenti nocte, dolore nonnihil mitigato, aliquantum dormivit æger. Postridie cranium trepano perforatum fuit, quo aperto vix drachma sanguinis effluxit, qui inter cranium & duram meningem hæserat, & jam aliquo modo coagulatus erat: hinc magnum egro periculum impendere judicavi, cum viderem sanguinem coagulatum, qui fortassis sub cranio adhuc latere poterat, sponte effluere non posse, & depressa meninge nihil etiam sequi. 17 Marti febris correptus fuit æger. Nocte subsequente convulsiones accesserunt, quibus per intervalla tantopere convellebatur, ut quatuor viri fortes ejus brachia & crura continere non possent. Adhæc nihil dormivit, omnino deliravit, sitiit, & si potus vel aliud quid offerretur, illud sine ratione assumpsit. Sequenti die in eodem statu permansit, ita ut propter maximum delirium ac convulsiones vulnus ægrè religari posset. Sic delirans in lecto cacabat & mingebar, magnum quoque linguæ anterioris frustum dentibus morsu abscidit, de cujus dolore, postea ad se reversus valde conquestus fuit. Tria hæc lethalia signa, delirium, febris & convulsiones durarunt usque ad 20 Martii, quo tempore convulsiones aliquantum remiserunt, manente tamen febre cum delirio. Ista die chirurgus instrumento quodam plano, obtuso & oblongo (quod in hunc usum expressè parari curaveram) meningem aliquantum depressit, atque inter meningem & cranium, ad duorum digitorum latitudinem instrumentum immisit, meningem à cranio circum circa deprimitendo dissolvens, ut hoc pacto, si quid alicubi lateret sanguinis coagulati, illud commodius evacuetur. Verum cum retrorsum versus instrumento meningem deprimeret, casu pervenit ad illum locum ubi causa totius mali residebat, è quo statim effluxit circiter semi uncia sanguinis nigri, purulenti, & aquosi. 21. 22. & 23 Martii, eodem instrumento quotidie immisso, sanguinis & puris aquosi bona quantitas extracta est. Interea etiam delirium magna ex parte cessavit, & subinde nonnihil dormivit æger. 24 Martii depressa meninge nihil effluxit. parum deliravit æger, & è lecto assurgens duabus horis igni assedit. Tunc etiam caro ab inferiore osse circa meningem in foramine cranii succrescere cepit. Vix comedere poterat ob linguæ anterioris dentibus abscissæ dolorem, qua de causa collutionem convenientem, qua os sæpius lavaret, parari feci, eaque lingua paulatim rursus sanata fuit. Toto tempore, à principio usque ad hunc diem usi sumus fomentatione 12 Martii præscripta, tunc autem, illà omiſſa, capitium siccum, ex herbis cephalicis confutum, toti capiti circumposuimus. 25 Martii febris evanuit, atque æger multo melius valuit. Hactenus solum mel rosaceum cum paucis spiritus vini mixtum formini cranii seu meningi impositum fuerat, tunc autem sequens pulvis isti meli permixtus est.

℞. aloes hepat. sang. draconis, myrrhæ,  
mastiches, olibani ana scrup. j. f.  
pollinis farinæ hordei scrup. ij. f.  
fiat pulvis subtilis.

26 Martii omnino sanæ mentis fuit. Tunc meninge rursus supradicto instrumento depressa, puris albi & bene cocti adhuc exigua quantitas tam mane quam vesperi effluxit. Post hunc diem quotidie per tres quatuorve horas è lecto surrexit, & bene comedit. Sequentibus etiam nihil materiæ amplius è cranii foramine excretum est, sed illud, nobis etiam invitis, quatruidi spatio carne repletum fuit. Forinsecus quoque caro undique, sed nimis cito, accrevit, ita ut levi caustico imposito eandem subinde auferre coacti fuerimus, nam expectanda erat  
ossis

ossis desquamatio. Sexta denique septimana ab ossē magna, lata, & crassa squamma separata est. Exinde æger vulnere carne repleto, brevi post sanatus fuit, illud tantum incommodi retinens, quod majore ingruente aëris tempestate, capite aliquantum doleret, & a vini potatione statim inebriaretur.

In isto sanitatis statu ultra quadriennium more solito vixit. Anno autem 1641. mense Septembri, in castris cum aliis quibusdam equitibus bene sanus colludens, subito in terram attonitus & mentis experts concidit ac statim acerrima convulsione totum corpus contractum fuit, & intra horæ quadrantem miser exspiravit. Si tunc temporis præsens adfuisssem, apertō craniō inspexissem anne ab antiquo prædicto vulnere mortis causa processisset.

### Annotatio.

**D**E vulneribus capitis cum fractura cranii, quæstio est, quando ossis separatio facienda sit; quod tempus Albucasis chirurg. lib. 3. cap. 3. ita describit: *Quodsi venit ad te vulneratus primis statim diebus, & est illud tempore hyemali, tunc oportet ut perficias ablationem ossis ante diem decimumquartum, secundum omnem dispositionem: si est in diebus æstatis, tunc oportet ut properes remove os ante diem septimum, antequam corrumpatur quod est sub ossē ex panniculo, & adveniant accidentia gravia.* Cum Albucase consentit etiam Haly, præct. lib. 9. cap. de fract. cranii. Avicenna verò hoc tempus paulo strictius sumere videtur: lib. 4. fen. 5. tract. 3. cap. 1. *Oportet (inquit) ut separatio non tardetur æstate ultra septem dies, in hyeme autem ultra decem, quanto autem citius fuerit, tanto erit melius, & longinquius ab hoc ut accidant nocumenta magna, &c.* At Hippocrates omnium brevissimum tempus præscripsit, nam lib. de vuln. cap. monet, intra triduum os, quod secandum est, secari debere, neque permittendum ut operatio ulterius protrahatur, præsertim ubi tempus calidum fuerit. Cui Hippocratico dicto hæc clausula adjungi debet, nempe intra triduum ossis sectionem faciendam, si Medicus in principio satis tempestivè vocatus fuerit: at si fortè serius ad ægrum accedat (ut mihi hic contigit) vel ab ægro aut amicis operatio aliquamdiu impediat, tunc etiam licere quocunque tempore cranium perforare, dummodo vel minima vitæ servandæ spes ab hac operatione expectari posse videatur; præstat enim in certo periculo dubium tentare remedium, quam nullum: *nihil enim interest, inquit Celsus, præsidium an satis tutum sit, quod est unicum: & extremis morbis extrema adhibere remedia jubet Hippocrates.* Greg. Horstius part. 2. lib. 4. Observ. 20. cranium cuidam ægro feliciter aperuit undecimo die, & alteri ægro similiter die 15. Hildanus cent. 4. Observ. 3. memorabilem refert historiam de cranii perforatione post duos à recepto ictu menses felicissime administrata, quâ factâ, pus per foramen statim pleno ductu exsiliit, atque ita æger servatus fuit. Sic etiam in nostro ægro primis diebus effluxit sanguis purulentus & aquosus, at die decima septima me-

rum pus album. Idem Hildanus prædictæ centuriæ Observ. 4. aliud refert exemplum cranii undecima morbi die feliciter perforati. Paulus Ægineta lib. 6. cap. 90. scribit se novisse quendam cui post annum ab accepto vulnere cranium cum salute ægri perforatum fuit. Quo eodem capite etiam supradictam Hippocratis regulam paulo latius extendit, inquit: *Hyeme quidem ante decimumquartum diem omnino ossis ablationem facere caveris, æstate verò ante septimum, antequam mala symptomata accedant.* Præstat quidem in principio hujusmodi operationes administrare, idque, (ut ex Avicenna modò diximus) quanto citius, tanto melius; verum prætergresso initio ægros pro deploratis deferere non foret humanum, nisi lethalia symptomata ante operationem appareant, ut delirium, convulsiones, paralysis, &c. In tali enim casu meminisci oportet dicti Cornelii Celsi, lib. 5. cap. 25. *Prudentis hominis est, cum qui servari non potest, non attingere.* Si lethalia illa symptomata, quæ in nostro ægro post operationem supervenerunt, ante eandem visa fuissent, operationem hanc non instituissemus, sed omnem de ægro spem abjecissemus, quemadmodum etiam desperavimus iisdem post operationem accedentibus, & nihilominus tamen præter spem & expectationem nostram sanatus fuit.

Nonnulli Medici admodum anxie cavere jubent, ne in denudatione cranii, quæ perforationem præcedit, incisio fiat in ipsis futuris, & ne fibrillæ duræ meningis, futuras transeuntes ac cum pericranio unitæ, lædantur, haud secus ac si inde magnum periculum expectandum foret. Sed ego jam multoties hujusmodi operationibus adfui, & ipsemet etiam incisiones super futuras (loco magis commodo ita se offerente) fieri, ac fibrillas istas etiam scalpello abradi sæpe curavi, neque ullum unquam incommodum inde prodiisse animadvertere potui, & experientia edoctus sum, hujusmodi anxias curas relinquendas esse illis Medicis theoreticis, qui nunquam talibus curationibus adfuerunt, quas practici peritiores pro somniis habendas esse noverunt. Solummodo cavendum est ne lædatur musculus temporalis, & ne trepanum futuris imponatur atque ibi perforatio fiat.

OBSER.

## OBSERVATIO. LV.

*Ophthalmia.*

**U**Xor capitanei Junii, mense Aprili magna oculorum inflammatione laborabat, cum dolore. Biduo post etiam duæ ejusdem ancillæ & famulus simili ophthalmia affecti sunt, eamque se ab aspectu Dominæ suæ contraxisse dicebant. Præmissa purgatione, ad doloris sedationem vitellum ovi ad duritiem assatum & cum lacte muliebri subactum, oculis per noctem imposui. Postea bis terve de die guttulam unam aut alteram hujus aquæ ophthalmicæ oculis instillari jussi, cujus usu intra triduum ophthalmia prorsus evanuit:

*℞. Vitrioli albi, scrup. j.  
 sacchari candi, drach. j.  
 aquæ plantagini, unc. ij.  
 rosarum, unc. j.  
 misceantur.*

*Annotatio.*

**G**alenus 1. de differ. febr. cap. 2. ophthalmiam seu lippitudinem annumerat morbis contagiosis, eamque sicut pestis & scabies, contagio contrahi posse tradit: istius tamen contagii (quale sit, in quo consistat, quomodo communicetur vel contrahatur) nullam rationem subjungit. Sic etiam Plutarchus 5. Symp. 7. *De reliquis* (inquit) *morbis, cum maxime, cum facillime ophthalmia contagium proserpit ad unâ degentes; tam acrem habet vim visus afficiendi alterum.* Hoc sensu quoque inquit Ovidius, 2. de remed. amor.

*Dum spectant laesos oculi, laduntur & ipsi.  
 Multaque corporibus transiione nocent.*

De hujus contagii natura plerique Medici tacerunt, cum ejusdem descriptionem difficilem fore animadverterent, atque ex quinquaginta vix unum invenias qui hanc rem solidius examinare voluerit: qui verò eandem tractant, illius opinionis fuisse videntur, quod ex oculo affecto vapores vel spiritus quidam corrupti exeant, qui ad sanos oculos delati eosdem inficiunt. Sic Benedictus faventinus prax. tom. 1. sect. 2. cap. 2. scribit ab oculis lippientibus quid putridum expirare, quod aërem circumfusum eadem qualitate inficit, qui aër ab oculis intuentibus receptus; eosdem contagiò lippitudine afficit. Illius opinionis etiam est Mercurialis, qui prax. lib. 1. cap. 38. ex Alexand. 2. problem. 42. scribit, ophthalmiam ideo esse contagiosam, quia spiritus oculi affecti contaminati sunt, qui cum tangant oculos sanos, inficiunt ipsos. Verum non videntur nobis magni illi viri rem acutè tetigisse. 1. Quis enim credat ex oculo, cor-

nea membrana duriore contexto, posse expirare tantam maligni humoris vel spiritus copiam, quæ eminus inficiat intuentium oculos? Profectò si inde continuò tanta fieret exspiratio, oculi paucis horis exhaurirentur & prorsus exsiccarentur. 2. Positò tamen fieri talem & tantam exspirationem quæ circumfusum aërem, & hinc aliorum sanos oculos inficiat, quare ab illa non læduntur omnium præsentium & propinquorum oculi, sed tantum eorum, qui lippientes oculos curiosius intuentur. 3. Quare etiam non læduntur omnium eorum oculi qui lippientes curiosè, diu, & sæpe intuentur, imò iis propius & diu adsunt, sed sæpe tantum unius aut alterius, qui ex improvviso, & forte tantum eminus nec diu lippientes aspiciat? His curiosius perpensis, satis animadverti lippitudinem nullo modo per contagium communicari posse, sed interdum contrahi propter humorum & spirituum oculi sani conturbationem; quæ conturbatio non inducitur à spiritibus vel humoribus corruptis (ut à medicis plerisque hæcenus putatum fuit) è lippiente oculo ad sanum delatis, sed inde quod sanus oculus lippientes intuetur cum aliquo terrore; abominatione, horrore vel aversione; qui terror quorundam debiliorum oculorum spiritus & humores graviter conturbat, qui à conturbatione hac rapide moventur & ad oculum confluunt, sicque ibi effervescunt, atque hinc oculi inflammantur. Idem illud videtur significare voluisse Rabbi Moyles 24. Aph. part. *Qui primò videt ophthalmia laborantem, statim ipsi oculus conturbatur, quodsi adhuc intentè aspiciat, non solum conturbatur, verum etiam ophthalmiam contrahit.* Dico autem debiliores oculos conturbari, unde Seneca, 2.



ca, 2. de Clemen. inquit, *Imbecilles oculos esse scias, qui ad alienam lippitudinem & ipsi suffunduntur.* Fortiores autem oculi, & eorum qui minus terrentur ab intuitu lippientium, non conturbantur multum atque hinc ab aspectu illo ophthalmiam non contrahunt. Fortitudo igitur vel debilitas oculorum, & major vel minor terror seu aversio, in causa sunt, quod ab ejusdem lippientis intuitu alii sani oculi lædantur, alii non lædantur. Non est autem quod cuiquam hæc nostra, fortè nova, opinio mirabilis & incerta videatur, cum maximas ad morborum quorundam inductionem esse vires, conturbationes ex visu rei terribilis conceptæ, doceat experientia in mulieribus gravidis, quarum tenellis fætibus sæpe hac sola de causa insignes & stupendæ notæ imprimuntur: cum etiam in aliis sæpe contigisse visum sit, ut ab hujus illiusve terribilis rei aspectu, graviter conturbatis cerebri spiribus, paralytici, aut dementes facti; vel cordis spiritibus conturbatis, in palpitationem, syncopen, febres, aliudve malum prolapsi sint. Quid mirum igitur si ab oculi lippientis intuitu cum horrore etiam sani oculi spiritus conturbentur, atque ita effervescent, & ophthalmiam inducant? Concludimus igitur, ophthalmiæ non adesse ullum contagium. Quod si quispiam ophthalmias epidemias (quales interdum grassatas fuisse testantur Medici) nobis objiciat, dicimus illarum propagationem non fieri propter aliquod contagium ex affectis oculis exiens, sed propter commune aeris vel diætæ vitium. Non obstat etiam quod Aristoteles scribat, mulieres menstruatas visu inficere & corrumpere speculum; quia omnino credibile non est, illud fieri ab aliquo contagio ex oculis earum exeunte, ut multi arbitrati sunt hæcenus, sed potius à quibusdam corruptis vaporibus, quos propius astantes speculo cum anhelitu affundunt: ex solis autem menstruatæ oculis tantum & eam efficax virus emana-

re, quod eminus speculum inficere possit, credit Judeus apella, non ego. Non obstat etiam quod philosophi dicant basiliscum solo visu interficere hominem, nam hujus rei duplex potest dari ratio: prima quod multi venenati halitus, non ex solis basilisci oculis, sed ex toto ejus corpore expirent, & aërem vicinum inficiant: altera, quod ille qui horrendum illud animal aspicit, maximè terreatur & conturbetur, à quo terrore venenosi halitus, à corpore illius propinquo, facile intus trahuntur, & una cum spiritibus ad cor feruntur, idque graviter lædunt: ita ut non solus visus, sed terror & conturbatio horribili illa visione inducta, & venenato habitui juncta, mortis causa fiat. Dico, juncta venenato habitui, nam haud facile mihi quispiam persuaserit, basiliscum eminus visum (nempe locò tam longe distitò, unde venenati ejus halitus ad videntem pervenire nequeunt) quempiam isto intuitu occisurum, licet etiam tota die curiosius conspiceretur. Quod autem dicatur, basiliscus mori cum se ipsum in speculo conspiciat, illud certè vel pro somnio habendum est, vel dicendum, ipsum à sua ipsius terribili imagine visa, tantopere terreri & conturbari, ut spiritibus circa cor nimis conturbatis & concentratis statim moriatur: aut suam ipsius imaginem sibi pulcherrimam videri, atque illum hinc tam enormiter gaudere ac lætari, ut dissipatis spiritibus occumbat, quemadmodum etiam homines quosdam nimio terrore, nimiove gaudio ac lætitia subito extinctos fuisse historiis constat. Verum à veneno sibi naturali à speculo percussio ipsum mori non est credibile, nam talis percussio etiam fieri posset, cum in angusto aliquo antro recubat, atque ibi tunc etiam mori deberet, quod nusquam visum vel auditum est. Vid. Anatomies lib. 3. c. 13. & c. 8. lib. de Peste.

## OBSERVATIO. LVI.

*Hæmoptysis.*

**J**oannes Hugo, tubicen Domini de Persil, cum nimia violentia cantilenas aliquot tubâ cecinisset, atque inde valde incaluisset, paulo post obscurum in pectore sentit dolorem, & simul etiam cum tussicula sanguinem spumofum, sed paucum, exspuere cepit. adeoque debilis evasit, ut anhelitum vix trahere, imò ne stare quidem nec loqui posset, sed continuo supinus in lecto jacere cogeretur. Erat à medicamentis admodum aversus, ac proinde nullius Medici consilio uti statuerat. Verum cum usque ad sextam septimanam in tali statu jacuisset, neque morbus in melius mutaretur, tandem 10 Martii meum consilium imploravit. Inveni ægrum absque feбри, sed valde debilem, quæ debilitas ab anhelitus defectu aliquo proveniebat, nam thoracem ad lubitum extendere & contrahere nequebat, cujus mali hæc causa erat, quod fortissima illa tubæ inflatione musculos thoracis magna & nimia violentia intendisset, atque hinc adeo debilitasset, ut postea rursus contrahi nequiverint. Sanguinis autem sputum, quod non

erat copiosum, ab exili aliqua venula in pulmone disrupta originem habebat. Curationem aggressurus, primò convenientem dietam præscripsi: secundò alvum medicamento leniente subduxi: tertio è mediana dextri brachii sanguinis lib. f. extraxi. Denique hoc sequens ceratum toti pectori applicandum præscripsi:

℞. Castorii,  
croci, or. ana scrup. ij.  
mastiches,  
olibani,  
styracis cal. ana drach. j.  
benzoini, drach. j. f.  
g. taccamacce,  
galbani aceto dissoluti,  
emplastri de meliloto,  
oxycrocei, ana unc. j.

fiat s. art. ceratum quod extendatur in corio rubro tantæ magnitudinis, ut totum pectus à cartilagine ensiformi, usque ad asperam arteriam, atque etiam latera sub brachiis utrimque investire possit, inungatur olei nucis moscatæ, scrup. ij.

Præterea cingulum ex corio alcis molliore, latitudinis manus, cum lata fibula parari jussi. Ceratum primò pectori impositum fuit: deinde pectus proxime sub axillis hoc cingulo circumdatum, & quantum ferre poterat æger contractum, ac fibula firmatum fuit. Hòc factò, statim maximum levamen sentit æger, atque anhelitum multo liberius & fortius attraxit. 14. Martii sanguinis sputum una cum tussi prorsus desit. Adhæsit hoc ceratum per integrum mensem, quo tempore musculi thoracis adeo firmati sunt, ut æger nullis aliis medicamentis opus habuerit, atque etiam sine prædicto cingulo rursus optime tuba caneret. Monui tamen ut hunc cingulum semper gestaret, præcipue cum eo circumdatus, se multò levius, facilius, & melius tubam inflare diceret.

#### Annotatio.

**Æ** Ger hic præter medicamentum laxativum nullum aliud per os assumere voluit, quapropter summopere metuebam ipsum in phthisin prolapsurum, nam præter periculosa sanguinis sputationem, tanta etiam aderat virium dejectio, ut in lecto erectus sedere non posset, at semper supinus jacere cogeretur. Verum cum animadverterem hanc debilitatem totaliter dependere à defectu motus instrumentorum spirationi inservientium, ipsum mirabiliter præter omnium expectationem dictò cerato & cingulo restitui: cingulo tamen non minima curationis pars ascribenda erat, nam simulac pectus eodem constrinxissem, statim

erectus sedere, & anhelitum multo liberius trahere potuit.

Tubicines sæpe nimis superbi, honoris acquirendi gratia, omnes vires in tubæ inflatione & cantu adeo intendunt, ut non rarò herniosi fiant, vel sanguinem spuunt, imò sibi ipsis vitæ filum ex improvise sæpe præcidant, quemadmodum id anno 1641. mense Novembri, vidimus evenisse tubicini capitanei Bax, qui cum inter alios tubicines tuba cantando maxime excellere vellet, disrupta magnâ in pulmone venâ, & sanguine copiosissime effluente, intra duas horas expiravit.

OBSER-

## OBSERVATIO. LVII.

*Suffocatio Hysterica.*

**R**icherda, pedissequa Dominae de Nassau, vehementi suffocatione hysterica intervalla laborabat, cui etiam aderant, summa angustia cum murmure in alvo, interdum etiam vomitus & delirium cum garrulitate. Hoc malum se contraxisse dicebat à vento frigido, quem in latrina ventis exposita sedens per uteri orificium subtus receperat. 9. Januarii, cum alvum per biduum non deposuisset, medicamento leniente eandem quinquies subduxi, qua die paroxysmus non infestavit, at sequenti nocte vehementior fuit, qui etiam postridie gravis fuit. Paroxysmus pennarum perdicum combustarum fumò naribus aliquoties admotò, optimè recessit, atque agra ad se rediit; cui pilam exassa foetida, castoreo & galbano concinnatam manibus contrectandam & saepe odorandam dedimus. Circa vesperam, duabus horis ante gravem paroxysmum, præcesserunt dementationes, ita ut multa stultè garriret, subinde etiam graviter vomituriēbat, sed præter potum vel aliud quid quod assumpserat, nihil evomebat. Paroxysmus fumo pennarum perdicum rursus discussus, & sequens emplastrum umbilico impositum fuit.

℞. Castorei, scrup. j.  
benzoini, scrup. j.  
opponacis,  
Sagapeniaceo dissolut. ana scrup. ij.  
misceantur, & extendantur in corio  
magnitudinis palmæ manus.

Exhibui etiam haustum hytericum, sed eundem post horam evomuit. 11. Januarii hujus apozematis sæpius aliquantum assumpsit.

℞. Radic. ostrutii,  
valerianæ,  
diptamni, ana drach. iiij.  
folior artemisiæ,  
pulegii,  
matricariæ, ana M. j.  
sem. levistici, unc. f.  
dauci, drach. ij.  
aquæ communis q. s. coquantur s. art. ad lib. j. f.

Totum hoc ista die ebibit, nec evomuit, nihil tamen profuit: deliria & suffocationes eodem modo per intervalla redierunt. Circa vesperam hunc pulverem cum paucis cervisiæ exhibui.

℞. Castorei, scrup. f.  
croci or. gr. v.  
trochisc. de myrrha, scrup. f.  
fiat pulvis.

Nihil profuit. 12. Januarii, cum symptomata rursus graviora ingruerent, exhibui solius succini flavi præparati & pulverisati drach. j. cum paucis cervisiæ mixtam: quo pulvere, miraculi instar, intra horam unam symptomata omnia cessarunt. Cum autem vesperi rursus ejusdem mali aliqua præsentia sentiret, idem

pulvis, ut antea, exhibitus est, & sic tota sequenti nocte quietè dormivit. 13. & 14. Januarii, cum aliquid murmuris in ventre inferiore sentiret, idem pulvis mane & vesperi exhibitus fuit, atque ita prorsus convaluit ægra.

### Annotatio.

**S**uccinum peculiari quadam facultate in hysteriis affectibus prodesse dicitur, cujus effectus cum hoc experimento didicissem, postea eodem isto pulvere in similibus casibus sæpe felicissimè usus sum. In dicta ægra ad præsentis paroxysmos discutiendos multum profuit fumus pennarum perdicum, quo etiam aliàs feliciter uti consuevi. His pennis forestus, lib. 28. in schol. Obs. 2. suffocatam, quæ nullis aliis mediis excitari potuerat, à paroxysmo citissime liberavit, easque occulta quadam proprietate juvare, ac semper à se ad usum servari scribit. Easdem quoque commendant, Gradus, Bottonus, Riverius & alii, idemque præsidium hodie mulierculis nostris ignotum non est. Extollunt etiam plerique Medici pilos combustos, cornua animalium, veteres soleas calceorum crematas, linteamina accensa, aliaque similia naribus objecta. Galenus & Priscianus rutham odoratam commendant, quam multum prodesse frequenti experimento constat. Eodem modo etiam conferunt galbanum, castoreum, assâ fætida, aliaque similia gravis odoris naribus admota. Leonellus pomum odorandum componit ex castorei drach. iij. assâ fætida, galbani, ana drach. ij. ceræ q. s. ad incorporationem. Albertus Bottonus de morb. mulier. cap. 46. hoc sequens plurimi facit: *Inter cetera (inquit) quod omnium maxmè solet mulieres præfocatas quasi momento revocare, est evaporatio facta adnates, ex pulvere verrucarum qua tibiis equorum adnascuntur, qua si in calente furno exsiccentur, & in pulverem redigantur, & naribus suffumigium fiat, tanquam præsentaneo remedio, & magna astantium admiratione, solent mulieres quasi à mortuis revocari.* Idem ille pulvis ab Augenio, aliisque Medicis plurimum laudatur. Verum quamvis hæc odoramenta fætida & gravia, experientiâ ipsâ comprobata, à Galeno,

Avicenna, aliisque maximi nominis Medicis, tam veteribus, quam recentioribus, tanquam optima ac præstantissima paroxysmi propulsoria, in usum vocentur, attamen inveniuntur nonnulli, qui de iis pessimè sentiunt & loquuntur. Sic Cleopatra 1. & Moschio cap. 129. illa tanquam vana & inutilia prorsus rejiciunt. Capi-vaccius prax. lib. 4. cap. 10. inquit malè facere illos qui statim ab initio deveniunt ad frictions & odoramenta, sive hæc sint odorata, sive fætida, quoniam vult ut prius totum evacuetur, & imprimis uteri partes. Duretus in enarrat. Ad Hollerii cap. 59. scribit graveolentia naribus admota non valere in suffocatione, quæ fit ex suppressione menstruum (quod etiam asserit Lud. Mercatus) & in illa quæ fit ex suppressione seminis, non modò non prodesse, verum etiam nocere: sed illa tantum convenire cum uterus sua sponte movetur ad hepar, eique adhærescit. Verum (quod pace istorum virorum dixerim) hæc opinio mihi videtur prorsus aliena, utpote quæ repugnat doctrinæ Hippocratis, qui lib. de nat. mul. in omni uterina suffocatione jubet ut supra graveolentia, infra verò odorata suffiantur, & castoreum ac conyza exhibeatur. Ad hæc ipsa quotidiana experientia hujus opinionis fulcra evertit, cum indies videamus in quacunque suffocationis specie fætida naribus adhibita paroxysmum citissimè dispellere, quod non tantum nostro, verum omnium fere veterum ac recentiorum testimonio constat. Quantum ad illam suffocationis speciem, in qua Duretus fætida convenire scribit, cum nempe uterus spontè movetur ad hepar, vix credibile est illam dari in rerum natura, nam uterus per se nunquam sponte movebitur, nisi à manifesta causa (menstruis suppressis, refrigeratione, semine corrupto, aliave simili) impellatur & commoveatur.

## OBSERVATIO LVIII.

### Anorexia.

**D**ominus Heer, nobilis Anglus circiter 30. annorum, cum per aliquot dies, præter consuetudinem, crapulæ nimis deditus fuisset, atque hinc ventriculi functiones inturbasset, multasque cruditates in eo collegisset, adeo inappetens evasit, ut spatio duarum septimanarum vix quicquam comedere potuerit. Tandem meo consilio hoc vomitorium assumpsit.

¶. Folio-

℞. *Foliorum asari recentium, drach. iij.*  
*contundantur, & exprimatur succus cum*  
*decocti raphani unc. ij. s. adde expressioni,*  
*oxymelitis cum agarico, unc. j.*  
*misce fiat haustus.*

Hinc enormiter evomuit. Postea radicum helenii conditarum tria quatuorve frusta bis terve de die assumere, diætā calefacientem instituere, à crapulis abstinere, vina generosa quidem sed pauciore quantitate bibere, & statim post prandium vel cœnam (quia ventriculus illi admodum humidus erat) frustulum unum aut alterum halecis salitæ crudæ comedere jussi. Atque hoc modo appetitus illi paucis diebus optime restitutus fuit.

### Annotatio.

**A** *Negētia* seu inappetentia interdum calidam causam habet, ut ventriculi intemperiem calidam, febrem, bilis abundantiam, aliamve similem, atque tunc remediis cholagogis & refrigerantibus curatur. Plerumque autem inducitur à frigida ventriculi dispositione; quæ refrigeratio ipsi accidit, vel ratione calidi innati debilitati, ut fit in senibus: vel ratione pravæ diætæ, atque hinc collectionis cruditatum in ventriculo: vel ratione frigidorum humorum è capite aliove loco ad ventriculum defluentium. In quacunque autem frigida ventriculi dispositione, propter facultatem concoctricem debilitatam, colliguntur in ventriculo multi crudi, pituitosi, humidi, ac frigidi humores, qui sua frigiditate ventriculi calorem debilitant & humiditate robur dissolvunt, atque utraque suctionis sensum obtundunt. In mali hujus curatione ad cruditatum saburram è ventriculo exturbandam, imprimis conveniunt vomitoria. Si verò aliis purgantibus utendum sit, laudat Galenus, ut dentur in forma pilularum, quia hæ diutius in ventriculo morantur; imprimis autem commendat pilulas de hiera. Præter hæc & diætā (quæ ex cibis euchymis & facilis digestionis, calidis ac siccantibus est instituenda, cum abstinencia à pinguibus oleosis, aliisque quæ suctionis sensum obtundunt) convenit usus plerorumque calidorum, ut galangæ, calami aromatici, rosmarini, majoranæ, hyssopi, salviæ, baccarum lauri, seminum calidorum, aromatum omnium, aliorumque similium: etiam vinorum generosorum, imprimis vini absinthitis. Ab omnibus commendatur spiritus vini, vel simplex, vel cum baccis juniperi, semine anisi, carui, fœniculi, cinnamomi vel gariophyllis distillatus: ut & vinum hippocraticum, & aqua cinnamomi è vino sublimata. Matthiolus maximi facit suam aquam vitæ, quæ pleris-

que Medicis in usu esse solet. Euonymus, alique chymici plurimas hujusmodi insignes aquas, stomachalas distillant. Levinus Lemnius lib. 4. de occ. rer. mirac. cap. 26. omnium maxime extollit zingiber, vel siccum, vel conditum, idque coctioni præclare auxiliari, appetitum mirabiliter restituere, flatu discuti, ac cruditates consumere tradit. Sunt qui piperis aliquot grana, vel integra, vel in tria quatuorve frusta contracta, & deglutita magni faciant. Ego in praxi observavi, post evacuationes, solas radices helenii ita conditas ut amaritudinem suam referrent, semper omnium maximè profuisse, quarum usu, illos qui diu inappetentes fuerant, non semel paucis diebus satis famelicos reddidi. Soleo easdem interdum pulverisatas cum vino generoso simili successu exhibere easque omnibus intentionibus ad mali hujus curationem requisitis satisfacere comperi; egregie enim, nec nimis calefaciunt, cruditates consumunt, detergent, coctiones potenter promovent, roborant, aperiunt, flatu discutiunt, & siccant. Præter hæc jam dicta, etiam appetitum plurimum excitant alimenta falsa, atque ita multoties observavi, quando anorexiæ maxima adest ventriculi humiditas (adest autem ut plurimum) & æger non fuerit valde senex, tunc quoque plurimum prodesse, si nonnunquam tertia vel quarta pars halecis muria salitæ crudæ, more nostratum, post cœnam vel prandium comedatur, nam hoc ventriculum egregie exsiccat ac roborat; & quamvis halec sit cibus duræ digestionis cum coquitur vel assatur, tamen est facilis digestionis si recenter è muria extracta sic cruda comedatur, quod licet Gallis, Italis, aliisque multis incredibile videatur, tamen nostratibus quotidianâ experienciâ satis comperitum est.

## OBSERVATIO. LIX.

*Superfœtatio.*

**U**Xor Dionysii N. Militis, habitantis Noyiomagi in angiportu proximo isti cœnobio, quod vulgo Campanarum montem appellant, gravida, anno 1637. mense Octobri peperit filium bene sanum & plenè gestatum, seu novimestrem, quem ipsamet lactavit: post partum lochia debito modo fluxerunt, & puerpera toto puerperii tempore mediocriter valuit, instar aliarum puerperarum. Quarta septimana bene jam restituta, ad templum, Deo gratias actura, processit, atque exinde domestica munia more consueto peregit. Septima post hunc partum hebdomada, cum in templo fortè concioni interesset, alteratio quædam uterina præter consuetudinem ipsamprehendit, ita ut citissimè domum reverti cogeretur. Vocatur statim obstetrix, vocantur & aliæ fœminæ, ex utero aquosa profluunt, accedunt parturientium labores: omnes mirantur: dubitant an in priore partu mola vel secundinæ aliqua pars in utero relicta fuerit, quam natura nunc expellere moliatur. Interea dum spemque metumque inter hærent, solutum est dubium, & præter omnium expectationem secundum enixa est filium, bene sanum & debitæ magnitudinis, quem cum priore lactavit, & postea ambo diu superstites fuerunt, & fortassis adhuc vivunt.

*Annotatio.*

**M**agnus Hippocrates 5. Aphorif. 51. inquit: *Qua utero gerunt, iis os uteri comprimitur.* Et Galenus in commentario, si os uteri claudatur, conceptionis indicium esse statuit. Hinc factum, ut apud Valverdam & alios plerisque Medicis pro certissimo habitum fuerit, os uteri in prægnantibus non ferari; idque eò magis, cum Galenus de usu part. lib. 14. cap. 3. & lib. 15. cap. 7. dicat à conceptu usque ad tempus partus ita occlusum esse os uteri; ut ne specilli quidem tenuissimi mucronem admittat. Verum etsi hæc ut plurimum ita se habeant, ex his tamen Hippocratis & Galeni verbis concludendum non est, nunquam posse fieri superfœtationem, sed eandem rarissimè fieri. Nam etsi illud rarius contingat, tamen interdum fieri posse, docet Aristoteles de generat. animal. lib. 4. cap. 5. *Si jam aucto (inquit) conceptu coitus adhibetur, superfœtari quidem potest, sed raro, quoniam uterus magna ex parte ad partum usque sese comprimit.* Idem etiam liquet ex Hippocratis lib. de superfœtatione: *Superfœtant (inquit) mulieres, quarum uteri os post primum conceptum non exquisitè clauditur.* Uterus enim libidinis cœstro percitus, denuo aperiri potest, ut semen excipiat, non tamen prior conceptus jam conformatus & grandior propterea excludetur, si sana sit mulier, quoniam firmiter adhæret, neque adhuc quærit exitum. Superfœtationis exemplum habemus apud Hippocratem. 5. epid. num. 5. in uxore Gorgiæ, quæ concepit fœmellam, & cum jam

instaret tempus partus superfœtavit. Mirum est illud quod scribit Albucasis lib. 2. chirurg. cap. 76. de superfœtatione post factum priorem mortuum: *Vidi (inquit) mulierem factum mortuum etiam utero gerentem, nihilominus denuo imprægnatam.* Huic similem casum refert Schenckius observat. lib. 4. Cardanus in comment. ad 5. Aphor. 35. inquit: *Superfœtatio res est rara, visa tamen Mediolani nostris temporibus.* Dodonæus in annot. ad cap. 111. Benivenii, inquit: *Rarior superfœtatio est, & adeo rara, ut non nullis impossibilis habeatur, cujus tamen manifestum in honesti civis uxore exemplum apparuit.* Duo superfœtationis exempla describit Platerus observat. lib. 3. Ex his igitur superfœtationem, quamvis rarè contingat, interdum fieri satis liquet, quod ipsum etiam confirmant, & exemplis demonstrant, Avicenna, Averroes, Rases, Plinius, Bonaciolus, Rouffetus, Joubertus, Bauhinus, & alii quam plurimi: & Schenckius lib. 4. Observat. tit. de superfœtat. varia & pulchra adfert superfœtationis exempla. Modum autem, quo superfœtatio fit, jam demonstravimus, eumque etiam docent Andreas Laurentius anatom. lib. 2. quæst. 32. Paræus lib. 23. cap. 32. aliique plures. Verum data jam superfœtatione, quæritur an fœtus superfœtatus possit ad perfectionem perducere? Aristoteles loco ante citato, scribit, si statim post conceptum superfœtet mulier, enutriri posse quod superfœtatum est, si verò aucto conceptu superfœtet, perfici non posse, sed instar abortus expelli.

Idem

Idem illud etiam docet & exemplis confirmat lib. 7. de hist. animal. cap. 4. Hoc ipsum quoque asserit Hippocrates lib. de superfœtatione: ejusque rei exempla tradunt Plinius nat. histor. lib. 7. cap. 11. Dodonæus loco supra citato, Bauhinus in appendice ad partum cæsareum Rousseti, alique plures. Experientiæ astipulatur quoque ratio, quæ docet, primò conceptum & jam formatum atque auctum maximam nutrimenti partem ad se trahere, atque sic alterum fœtum postea conceptum & debiliorem debito nutrimento fraudari, atque hinc perfici non posse, sed tandem emori & instar abortus (ut inquit Aristotiles) expelli: Quod si verò ultimò conceptus fœtus satis nutrimenti trahat, & satis perficiatur, neque instar abortus excidat, fieri tamen vix posse, quin tempore partus, quo natura priorem moturum fœtum magna violentia expellere nititur, etiam posterior adhuc immaturus fœtus simul dissolvatur & ejiciatur. Quid jam dicemus de hac à nobis observata & raritatis gratia hic descripta superfœ-

tatione, tot plæclarissimorum virorum experientiis & rationi quoque contraria, quæ septima post primum conceptum hebdomada peracta est, & in qua uterque fœtus vividus ac vitalis unusquisque suo debito tempore, absque ulla læsione expulsus est? Dicendum, hanc raram esse, ejusque rarissima extare exempla, cujus tamen ferè simile refert Paulus Peræda schol. ad cap. 55. Jo. Paschalii lib. 1. de curand. morb. imò adhuc magis mirabilem Nicolus serm. 60. tract. 1. cap. 22. *Ego novi (inquit) uxorem Zacharia de Scarparia, qua peperit masculum, & hinc ad tres menses peperit alium masculum, & bene vixerunt ambo.* Præterea dicendum in prædicta nostra, ut & hac Nicoli muliere ultimò conceptum fœtum satis nutrimenti in utero traxisse, atque hinc robustum fuisse, & proinde se in prioris partu intus absque incommodo retinere potuisse, propterea quod partus ille facilis, & absque insigni violentia peractus fuerit. Super hæc vide quædam ex Baulino in lib. Genesimi à Spachio collect. pag. 488.

## OBSERVATIO. LX.

*Capitis Tinea.*

**F**ilius quæstoris cujusdam Juliacenſis, adolescens 12. annorum, ab ipsa pueritia laboraverat tinea in capite. Multa variorum consiliis sæpius adhibita fuerant remedia, quæ omnia nihil profuerant. Tandem ægri mater agyrtæ cujusdam consilio nescio quibus non lotionibus caput quotidie lavit, variaque unguenta inunxit, atque sic tinea brevi sanata fuit: hinc gloriator agyrta sibi magnum nomen apud vulgus conciliare sperabat. Sed qualis, quæso, hujus curationis fuit eventus? Paucis post curationem diebus cepit æger de capitis dolore conqueri, qui cum quotidie accresceret, quarta septimana adeo acutus & intolerabilis evasit, ut meam opem implorare coacti fuerint parentes, qua parum aut nihil profui, nullis enim internis externisque medicamentis, nullis diversionibus aliisque mediis hunc dolorem lenire potui. Nona septimana accesserunt leves epilepticæ convulsiones, quæ paucis diebus in epilepsiam vehementissimam transierunt, quæ primo singulis diebus, postea singulis horis, denique singulis horæ quadrantibus ægrum miserrimè afflixit, ita ut tandem, 22. Augusti 1640. miserrimam hanc vitam cum feliciore commutaret. Post mortem, consentientibus parentibus, defuncti cranium per chirurgum aperiri curavi, quo serà undique dissoluto ac denique detractò, vidimus duram meningem totam rubro colore suffusam, eamque in superioris capitis parte, aliquantum versus sinistrum latus, valde nigricare. Hæc dissecta statim effluxit ichor quidam nigricans & aquosus, qui inter utramque meningem occultatus latuerat. Pia mater aliquantum ex obscuro flavescebat: cerebri substantia nihil aut saltem non multum à naturali statu recessisse videbatur; in ejus ventriculis humor quidam paucus continebatur aliquantulum virescens, aquosus nec valde lentus. Reliqua vix quicquam immutata erant.

*Annotatio.*



## Annotatio.

**E**cce quam egregiè tineam hanc curaverat bomachides ille agyrta, qui tamen in eo prudens fuit, quod morte pueri intellecta statim Noviomago discesserit, metuens fortasse ne causam mortis hujus ægri ipsi publice

exprobrarem, utpote qui Medicinæ ignarus viam istam per quam natura cerebri excrementa noxia exonerabat, obstruxerat, nulla prius facta diversione.

## OBSERVATIO. LXI.

*Febris Tertianæ Intermittens.*

**U**Xor generosissimi viri Domini de Spieck, mulier robusta, & puerpera, secunda post partum septimana mediocriter quidem valuit, sed viribus suis nimium confidens, è lecto surrexit & per cubiculum deambulavit, adhuc etiam paucillum carnis bubulæ fumo induratz comedit. Sed quo quæso eventu? Statim post tertiam septimanam valida febris tertiana intermittente duplici obruebatur, cum ingenti calore, vigiliis continuis, appetitu plane dejecto, siti inextinguibili, aliisque pravis symptomatibus. 22. Augusti ad ipsam vocatus fui, cum valde anxia & debilis, atque in medio secundi paroxysmi esset, quo ipsam morituram astantes verebantur: Exhibui statim lapidis bezoar. scrup. f. confectiois de hyacintho scrup. j. cum aquæ theriacalis nostræ drach. vj. à quo paulo post se multum levare dicebat. Ad intolerabilem sitim hunc julebum præscripsi, qui ipsi adeo placuit, ut postea durante morbo nihil aliud bibere voluerit, cumque multoties reiteraverit.

℞. *Aquæ cardui bened.*  
*cichorei, boraginis, ana lib. f.*  
*syrupi de limonibus, unc. j. f.*  
*violacei, unc. j.*  
*olei sulphuris q. f. ad gratum acorum,*  
*misce fiat juleb.*

Circa vesperam hanc infusionem præscripsi, quam sequenti manè assumpsit.

℞. *Foliorum senæ bene mundat. unc. f.*  
*rhabarbari opt. drach. j. f.*  
*tartari rhenani,*  
*sem. anisi, ana drach. j.*  
*aquæ cichorei, q. f.*  
*macerentur per noctem, postridie, facta*  
*levi ebullitione, fortiter exprimantur,*  
*addendo syrupi rosati solutivi, unc. f.*  
*fiat haustus.*

Cum hunc ebibisset, statim aliquot nobiles Domina ipsam invisebant, quæ audito ægram medicamentum sumpsisse, summopere meam absentis temeritatem increpabant, quod ægræ tam debili & puerperæ medicamentum purgans exhibuissem, atque ægram rogabant ut digito in fauces immisso illud revomeret, dicentes Medicos non bene intelligere quomodo se res habeant cum puerperis, & alia similia multa garriebant, ut mihi postea narratum fuit. Quibus ægra respondit, se curationem corporis mihi totam commisisse, cumque me prudentem satis

satis in omnibus novisset, etiam se in hoc morbo mihi plane fidere, & medicamento effectum experiri velle. Post aliquot horas alvus adeo clementer moveri cepit, ut se nunquam melius & mitius purgans assumpsisse confiteretur: quatuor secessus habuit, quibus fætida multa excrevit cum summo levamine. Post purgationem jusculum ex decocto pulli, cum acetosa, cherefolio, & pauco succi citri recentis parato, sorbsit, julebum prædictum ad sitim sumens. Ægra ista sequenti nocte mediocriter dormivit, & post somnum calorem multo remissionem sentit. Proximus expectatus paroxysmus adeo levis fuit, ut vix perciperetur, neque postea febris amplius apparuit, solo hoc levi medicamine egregie fugata. Exinde à prædictis mulieribus ego prudens puerperarum Medicus appellari cæpi, & quemadmodum primò me culpaverant, ita postea summis laudibus me ad coelum usque extulerunt, meoque consilio in suis etiam puerperiis usæ sunt.

### Annotatio.

**S**olent ut plurimum puerperæ, quæ in puerperio sibi non satis cavent, postea temeritatis suæ pænas luere, quod satis liquit in hac ægra, ut & in illa cuius antea cent. 1. observ. 21. mentionem fecimus. Sic illud etiam edocti sumus tristi eventu vicinæ nostræ, quæ cum se nimis citò aëri commississet, incidit in febrem continuam, quam primo phrenitis, & tandem ipsa quoque mors subsequuta fuit. Uxor quoque procuratoris Pavert, secunda post

partum septimana, domesticis curis se nimium immiscens, & capillos etiam pectere volens, incidit in epilepsiam, quam paulo post grave delirium insecutum est, qui affectus medicamentorum ope multum quidem fuerunt immixti, sed toto vitæ tempore exactè sanari non potuerunt. Ita ut non sine ratione muliercularum nostrarum proverbium sic habeat, *Puerperium vult celebrari, aut bene in puerperio, aut malè postea.*

## OBSERVATIO. LXII.

### Hæmorrhagia Narium.

**T**heodorus Bijl, vir circiter 55. annorum, mense Augusto hora quarta matutina hæmorrhagia naris dextri correptus fuit. Ego post tres horas ad ipsum vocatus, ad revulsionem statim per chirurgum venam in dextro brachio satis largo vulnere aperiri, & sanguinis unc. x. extrahi curavi: quo factò, & aquâ etiam frigidâ fronti ac cervici admotâ, sanguinis fluxus subsistit. Post triduum, cum vespertino tempore ad convivium vocatus, vinum paulo liberalius bibisset, domum reversus eodem malo iterum correptus fuit, fluxitque sanguis tota nocte antequam me vocarent. Postridie ipsum invisens venæsectionem rursus institui, ut ante, sed nihil profuit, neque ob ætatem & vires jam dejectas eandem reiterare licuit. Turundas in nares immitti primò non permisit, quapropter hanc mixturam cum stuppa cannabina fronti applicavimus.

℞. *Boli armen., drach. ij. f.*  
*lapidis hematitis*  
*mastiches,*  
*thuris,*  
*coralli rubri, ana scrup. ij.*  
*albumen unius ovi,*  
*aceti rosaci, q. s.*  
*misceantur.*

Præterea oxycratum actu frigidum cervici, fronti, & testibus admotum fuit, & revulsiones per ligaturas & frictiones dolorificas extremarum partium, ac per cucurbitulas

K

cucurbitulas scapulis applicatas, factæ sunt, quæ tamen omnia nihil profuerunt. Tandem cum hæmorrhagia jam ultra 36. horas duraret, & ægri vires ob copiosum sanguinis fluxum admodum exhaurirentur, ac de vita periculum foret, tunc sibi metuens astringentia in nâres admittere coactus fuit. Pulverem itaque ex trochiscis de terra sigillata, bolo arm., mastiche, & thure compositum, cum penna scriptoria utrimque pertusa (expurgato prius nare à sanguinis thrombis, quam altissimè in narem insufflari curavimus, simulque turundam crassiusculam, ex tenui linteo ad digiti fere longitudinem paratam, aceto & albumine ovi madefactam, eodemque pulvere conspersam, superimmissimus: atque eo pacto hæmorrhagia per duas tresve horas subsistere videbatur, sed postea sanguis per palatum ad os descendere cæpit, & excidente turunda etiam rursus per narem. Tunc iterum expurgato nare, eundem pulverem inflavimus, & turundam ex frusto cretæ confectam, tantæ magnitudinis ut totam narem obturaret, immisimus, atque sic hæmorrhagia statim substitit, ad maiorem tamen certitudinem, turundam istam tribus diebus inhærere permisimus: ita hac vice ab imminente periculo servatus fuit æger. Sequenti tamen anno in autumno eadem hæmorrhagia rursus invasit, in qua cohibenda cum anilibus quibusdam consiliis tota die & nocte frustra usus fuisset, tandem viribus pene exhaustis rursus ad me concursus est: hanc ego eadem ex creta turunda iterum citissimè cohibui. Verum non diu post, hepate à nimia ista sanguinis evacuatione admodum refrigerato & debilitato, hydropes simul & asthma correptus, extremum diem clausit.

### Annotatio.

**N**arium hæmorrhagia immoderata (symptomata nempe, non critica) cum hydropem, cachexiam, aliaque gravia mala inducat, quam citissime est cohibenda. Hæc autem (præmisso sex rerum non naturalium convenienti regimine) imprimis curatur his modis: revulsione sanguinis ad nâres affluentis; ejusdemque à naribus repulsione: sanguinis incrassatione: & venarum apertarum occlusionem.

Revulsio optimè & citissimè fit sanguinis missionem in brachio lateris affecti, qua Galenus, lib. de sang. miss. asserit se validas narium hæmorrhagias repente cohibuisse. Plurimi Medici exiguo facto foramine, & parva quantitate, sed iteratis vicibus, sanguinem detrahendum esse arbitrantur; verum magis nobis aridet opinio illorum, qui è largo foramine sanguinem confertim effluere sinunt, nam tali modo citior & melior fit revulsio. Præter venæsectionem etiam cucurbitulæ sanguinem potenter aliorum revellunt. Sic Galenus, lib. de præcog. ad Posth. maximam hæmorrhagiam in juvene curavit, cucurbitula magna hypochondrio admota. Forestus lib. 13. observat. 14. hæmorrhagiam desperatam, quam nullis mediis sistere potuerat, tandem cucurbitulis pedi impositis, miraculi & incantamenti instar substituisse refert: quod experimentum etiam nobis aliquoties felicissimè cessit. Cucurbitulæ scapulis impostæ, quamvis multum revellant, multis tamen non sine ratione suspectæ sunt, propterea quod etiam ab inferioribus partibus sanguinem ad superiores potenter trahant. Crato inter revulso-

ria commendat minimi digiti in latere affecto incurvationem cum dolore: cujus generis etiam sunt, extremarum partium frictiones & ligaturæ dolorificæ, ut & cauterium actuale plantis pedum admotum, quo Zacutus Lusitanus gloriatur se desperatam hæmorrhagiam curasse.

Repellitur sanguis à naribus (nempe præmissa revulsione) aceto, aqua frigida acta, vel oxycrato fronti, temporibus & cervici admoto, vel cataplasmatibus ex bolo, terra sigil., mastiche, ture, albumine ovi, aceto, & similibus paratis, ac fronti admotis, quibus plantago, pimpinella, aliæque herbæ astringentes & refrigerantes, recentes contusæ addi possunt. Cochleæ cum suis domiciliis tritæ, admixto thure & aceto, atque sic fronti & naribus impostæ multum commendantur. Riverius tanquam efficacissimum laudat gypsum cum aceto subactum, & ad crassitiem duorum digitorum fronti & temporibus admotum. Acetum solum, vel oxycratum naribus sæpe attractum idem præstat, ut & aqua frigida majore copia ex improvviso in faciem projecta. Aëtius tanquam expertum laudat vaporem ex aceto lapidi ignito infuso, si naribus excipiatur. Paehequus (in observationibus Riverio communicatis, obs. 16.) aliud experimentum describit: *Rasticus* (inquit) *ex hæmorrhagia liberali jam vicinus morti me accersivit: sed cum nulla remedia contulissent, instillavi in aurem è directio naris sanguinem fundentis, guttas aliquot acetis resati, & sanguinis fluxus statim subsistit. Didiceram hoc à D. Pontuado, qui viderat hoc remedium à Belgæ Medico factum: legi apud*

apud Scribonium Largum cap. de hemorrhagia.

Sanguinis incrassatio peragitur Medicamentis refrigerantibus, astringentibus & incrassantibus per os exhibitis, iisdemque etiam foris admotis; quo in casu foris conveniunt jam dicta repellentia, imprimis vero oxycratum & aqua frigida. Sic Hildanus cent. 2. observat. 15. in desperato casu totum corpus linteis oxycrato immergis involvens, hæmorrhagiam cohibuit. Idem cent. 3. observ. 2. totum corpus aquæ frigidæ immergit, eodemque loco de hujus remedii utilitate latius disserit.

Venas referatas occludunt & conglutinant astringentia & glutinantia naribus immissa. Galenus lib. de medic. paratu facil. thus & aloen in pulverem redacta albumine ovi excipit, & cum linteolo, aspersis prius pilis leporinis, in nares immittit. Turundæ astringentibus pulveribus aspersæ utilissimè naribus induntur. Muscus crescens in craniis humanis aëri expositis, pulverisatus & quocunque modo in nares immissus, potentissimum censetur medicamentum. Ego turundam longam ex frusto cretæ confectam, efficacissimam esse aliquoties expertus sum. Gossypium thecæ scriptoriæ atramento diu infectum, aliquantum expressum, & instar turundæ in nares immissum, valde efficax est.

Fimus porcinus inter præstantissima & specifica recensetur, si adhuc calens solus, vel cum bolo armena & aceto calefactus, fronti & temporibus admoveatur, & olfaciendus præbeatur, aut in nares immittatur: hujus usu desperatam hæmorrhagiam in nobili Germano me curasse memini. Rodericus à Castro & Zacutus Lusitanus maximè extollunt sterqus asininum, eodem modo usurpatum; quod etiam Zacutum non pudet per os exhibere & omnibus cibis admiscere. Pulvis sanguinis humani exsiccati, ut & limacum cum cochleis combustarum, & ranarum combustarum, in nares immissus efficax censetur. Refert Pereda vetulam quandam immanem hæmorrhagiam tribus diebus durantem, curasse sola mentha naribus imposita. Succus urticæ per os exhibitus, & naribus attractus, ut & ipsa urtica contusa ac fronti admotæ, specifica vi hunc sanguinis fluxum efficacissime cohibere traditur. Riverius tanquam præstantissimum remedium à se multoties probatum, commendat spicam nardi subtilissime pulverisatam, & ad drach. j. cum jusculo, aqua plantaginis, aliove liquore exhibitam, hanc que non solum specifica vi, sed hepar roborando, sanguinis fluxum cohibere tradit.

## OBSERVATIO. LXIII.

*Lues Venerea.*

**N**obilis capitaneus Anglus, sexagenarius, conquerebatur de valde sicca tussi, qua per duos tresve menses infestatus fuerat, cum aliqua anhelitus difficultate, & magno in pectore dolore. Propter appetitum plane dejectum totis duobus mensibus vix quicquam comederat, hinc valde debilis evaserat, licet nondum plane decumberet. Caput & scapulæ ipsi valde dolebant, qui dolor noctu maximè infestabat. Dolebat quoque in lumbis: sæpe & parum mingebat, cumque urinandi necessitas urgeret, statim ipsi mingendum erat, urinam enim retinere non poterat. Interdum etiam urina valde acriserat, & dolorem in transitu dum mingeret excitabat; tingebat urina indusium croceo ac subrubro colore. Ad hæc Veneris omnimoda impotentia per totum annum & diutius laboraverat. Ego ex his omnibus judicavi ipsum morbo Gallico laborare, idque tanto magis cum se longo tempore gonorrhæa infestatum fuisse confiteretur, quam imperitus quidam chirurgus ante annum, nulla præmissa corporis expurgatione, repente suppresserat, atque exinde hæc symptomata paulatim subsecuta, & indies adaucta fuerant. Præterea ante decennium adhuc semel hac lue gravissimè infectus fuerat, ita ut ab illa experientia ipsemet jam satis morbum suum cognosceret, à qua tamen lue se tunc temporis optimè sanatum fuisse, nec postea mali quicquam inde sentiisse dicebat. Ipsum quoque sæpius cum scortis & meretricibus versatum fuisse nemini non notum erat. Quantum ad pectoris dolorem internum & siccam tussim hæc mala ab immoderato tabaci usu (cujus quotidie quinquaginta, ad minimum verò triginta fistulas fumifunctione exhaurire consueverat) maxime inducta fuisse judicavi, cum tabacum immodice sumptum pulmones nimium exsiccat ac debilitet, & anhelitus difficultatem, dolorem, siccamque tussim inducat, quemadmodum illud exemplis demonstravimus lib. 2.

de Peste, cap. 10. annot. 4. Curationem aggressurus, primò diætam huic curationi congruam præscripsi: inter cætera etiam usum tabaci multum imminuere jussi: propter inveteratam quadraginta annorum consuetudinem illud totaliter deferere periculosum fuisset, & subita hæc mutatio in sene gravem aliquam noxam facile intulisset, proinde tres quatuorve fistulas singulis diebus adhuc concessi. Ad tussim & pectoris dolorem sequens emplastrum toti pectori imponendum præscripsi, quo intra paucos dies dolor, tussis & anhelitus difficultas ad miraculum magis magisque imminuta & brevi sanata fuerunt.

℞. Castorii, croci opt. nucis moscate,  
gariophyllorum, styracis calam.  
benzoini, ana scrup. j. f.  
pulverisentur subtiliter, & misceantur cum  
gummi ammoniaci, galbani vino dissolut.  
emplastri de moliloto, oxycrocei, ana drach. v.  
fiat emplastrum extendendum in tenui coreo.

Ante hujus emplastri applicationem corpus cathartico expurgavi. Postridie verò nempe 22. Novembris, hoc decoctum præscripsi, de quo singulis matutinis temporibus bonum haustum calidè assumpsit, & aliquantum sudavit: vesperi quoque similem haustum bibit, sed ob virium magnam debilitatem non expectabatur sudor.

℞. Ligni guajaci, unc. xij.  
cortic. ejusdem salseparillæ, ana unc. iij.  
ligni sassefras, glycyrrizæ rasæ, ana unc. j. f.  
aquæ communis, lib. xij.  
macerentur prope ignem horis 24. deinde coquantur  
in vase bene clauso ad remanentiam, lib. v.  
addendo sub finem decoctionis,  
radicum helenii, unc. j.  
herb. cardui bened. M. ij.  
rosmarini, scordii, melissæ,  
chamedryos, chamepyth. majoranæ,  
centaurii minor. ana M. j.  
passularum mundat. unc. vj.  
fiat s. art. decoctum.

28. Novembris iterum purgatus est, idemque decoctum reiteratum fuit addendo radicis chynæ unc. j. f. quò utebatur ut ante, sed difficulter ac parum sudabat, propter maximam aëris inclementiam & acerbissimum frigus. Non fecimus ex reliquiis secundam decoctionem, quia hujusmodi potum planè abnucebat. 5. Decembris dolores capitis & scapularum multum imminuti erant, ita ut noctu rursus quietè dormiret, seque jam multo melius valere sentiret: permanebat tamen adhuc urinæ acrimonia, & quasi parva quædam gonorrhæa, quapropter in incepto continuavimus. Ad tussim & ventriculi debilitatem hoc tabellatum dedi.

℞. Radic. helenii sic. drach. j.  
croci Britannici, scrup. f.  
calami aromatici,  
iridis florent.  
benzoini, ana scrup. j.  
florum sulphuris, scrup. ij.  
glycyrrizæ rasæ, scrup. j. f.  
pulverisentur subtilissimè, & cum  
sacchari albi aqua fenic. dissol. unc. iij.  
fiant s. art. tabellæ.

10. Decembris

10. Decembris purgatus est pilulis nostris antipestilentialibus, nam facile movebatur. Ut & 17. Decembris reiteratum fuit decoctum, à quo tunc temporis copiosissimè sudavit, non obstante acerrimo aëris frigore, fortassis quia natura longiore decocti usu ad sudandum magis proclivis evasit: Symptomata omnia paulatim evanuerunt, urinæ acrimonia cessavit, appetitus egregie rediit, cumque nihil mali amplius sentiret æger, à medicamentis prorsus abstinuimus, atque ita hoc facili modo à detestanda illa lue perfectè liberatus est. Verum à diuturna gonorrhæa tantam debilitatem contraxerant partes genitales, ut postmodum Venus in ipso plane emortua remanserit, neque illud vitium ullis mediis restaurari potuerit. Anno deinde sequenti 1638. mense Februario, cum ad antiquum tabaci usum, vel potius abusum, se rursus devolvisset, rediit dolor in pectore cum sicca tussi & anhelitus difficultate, quæ mala emplastro prædicto, & abstinencia tabaci iterum penitus, sublata sunt.

## OBSERVATIO. LXIV.

*Diarrhæa.*

**N**obilis Bataviensis, cum vespertimo tempore mustum liberalius bibisset, tota nocte intensissimis ventris doloribus torquebatur. Postridie diarrhæa accesset, quæ primò aliquod levamen inducere videbatur, sed postea accrescens, intra biduum in dysenteriam mutata fuit. Tunc æger sibi metuens meum consilium petiit. Exhibui statim hoc purgans.

℞. *Rhabbarbari opt. drach. ij.*  
*fol. senæ mundat: drach. iij.*  
*myrobolan. cheb. drach. ij.*  
*sem. anisi, scrup. ij.*  
*decocti hordei, q. s.*  
*fiat infusio s. art. adde colaturæ*  
*syrupi de cichoreo cum rheo, unc. j.*  
*misce fiat haustus.*

Hinc multa biliosa dejecit, & ventris tormina valde imminuta sunt. Vesperi dedi sequens sudoriferum, à quo illa nocte multum sudavit, quietè dormivit, & postridie ab omni dolore ac fluxu immunis fuit, atque exinde optimè valuit.

℞. *Theriace Androm. drach. j.*  
*philonii Romani, scrup. j.*  
*aquæ nostræ theriacalis,*  
*petroselinii, ana unc. j.*  
*misce, fiat potio.*

*Annotatio.*

**M**ustum teste Dioscoride & Galeuo, difficulter concoquitur & status gignit. Hinc igitur cruditates, viscerum oppilationes, & ventris tormina prodacuntur. Interdum illius usus copiosior urinæ magnam suppressionem inducit, quod mihi ipsi in Gallia degenti semel contigisse memini: illius quoque exemplum habet Hildanus cent. 4. Observat. 52. Interdum colicos dolores generat: interdum

diarrhæam vel dysenteriam inducit, quemadmodum huic nostro agro evenit, ut & illis quorum Forestus lib. 22. Observat. 31. mentionem facit. Hinc sæpe contingit Belgas musto minus assuetos, cum in Gallia degentes illud nimis copiose ingurgitant, diarrhæis & dysentericiis periculosis, multisque lethaliibus, frequentius infestari, præcipue illos qui antea uvas copiosius comederunt.

## OBSERVATIO. LXV.

*Suffocatio Uterina.*

**J**oanna Segers vidua florentis ætatis, gravida (marito ante paucos menses mortuo) mense Augusto peperit filium. Cumque durante puerperio se nimis temere per ædes commovisset, tertia septimana uterina suffocatione correpta fuit, qua uterus ad jugulum usque ascendere putabat: aderant ventris & lateris dolores cum murmure. Ægra per tres continuas noctes & dies non dormiverat, nec se quietam tenere potuerat, modò deambulare, modò sedere, modò jacere desiderabat, nec per dimidium horæ quadrantem in eodem statu quiescere permanebat. Ego ipsam subtus in uterus frigus vel flatum recepisse, indeque has inquietudines, præfocationem uterinam, & dolores induci judicavi. Ad hujus mali curationem circa vesperam talem potiunculam exhibui, à qua ista nocte mediocriter dormivit, & dicta symptomata magna ex parte cessarunt.

℞. *Florum chamomillæ*, M. f.  
*seminis levistici*, drach. j. f.  
*dauci*, drach. f.  
*vini albi q. s. coquantur aliquantum.*

℞. *Colaturæ*, unc. ij.  
*Philonii Romani*,  
*Mithridatii Democ. ana drach. f.*  
*olei succini per descensum distillati*, gut. ix.  
*misce, fiat haustus.*

Postridie, licet se multo melius haberet, quia tamen symptomata nondum plane sedata erant, alvum per triduum constipatam haustu purgante exhibito, clementer subduxi. Quo facto, hoc emplastrum umbilico impositum est.

℞. *castorii pulverisati*  
*benzoini ana scrup. j. f.*  
*gummi galbani aceto dissol.*  
*tacamacæ, ana drach. ij. f.*  
*misceantur & extendantur in corio magnitudinis*  
*palme manus.*

Vespera cubitum itura assumpsit succini pulverisati scrup. ij. cum pauxillo vini. Quietè dormivit, neque amplius ulla apparuerunt symptomata.

*Annotatio.*

**E**rotis de pass. mulieb. cap. 4. ad uterinam suffocationem & dislocationem plurimum prodesse refert levistici radicem coctam & tritam cum axungia, ac super umbilicum ligatam. Ego radicem illam crudam contusam efficaciorē esse arbitrarer. Ludovicus Mercatus de morb. mulieb. lib. 2. cap. 1. solam tacamacam vel carannam emplastratam commendat, ut & emplastrum ex theriaca magna, semine agni casti & angelicæ. Montagnana consil. 225 tanquam maximum & certissimum auxilium com-

mendat hoc sequens emplastrum umbilico impositum:

Rec. *artemisa*,  
*matricaria*,  
*ligni aloes, ana scrup. f.*  
*galbani*,  
*ammoniacy aceto dissol. ana drach. j. f.*  
*cera q. s.*  
*fiat ceratum.*

Idem sequenti consilio 226 juvenentum notabi-

lis



lis laudis expectandum esse scribit ab hoc sequenti emplastro, umbilico tam diu affixo donec sponte cadat.

Rec. galbani aceto dissol. unc. j.  
bdellii mollis & subalbidi drach. ij.  
pulv. matricaria drach. j. f.  
myrrha scrup. f.  
fiat emplastrum.

Forestus lib. 28. observ. 32. emplastrum ex solo galbano sæpe egregia præstitisse scribit; & ex sequenti emplastro magistrali se maximam utilitatem quotidiana experientia comperisse refert, cujus quantitatem sufficientem in corio extendit, atque in circuitu, ut firmitus adhæreat, gal-

bano obducit:

Rec. gallia moscata,  
aliptra moscata,  
styracis calam.  
ladani purissimi,  
mastiches, ana unc. j.  
xyloaloes,  
xylobalsami,  
carnobalsami,  
galanga,  
cypers, ana drach. iij.  
rosarum rubr. drach. j. f.  
cera nova lib. f.  
terebinthina q. s.  
fiat s. art. emplastrum.

## OBSERVATIO LXVI.

*Hernia inguinalis, cum gangræna.*

**T**homas Adeler, eques Anglus sexagenarius, herniam in inguine sinistro per multos annos habuerat. Anno 1637. mense Septembri intestinum, quod in herniam inciderat, nimis flatibus distentum, atque hinc disruptum fuit, ita ut stercora in herniæ capacitatem prolaberentur. Hæc proluvia gangrenam cum foetore intolerabili parti statim induxit, quæ inde cito putrefacta & disrupta fuit, atque ita fæces alvi ordinariè per herniam foras profluxerunt, nunquam per anum. Ego vocatus prædixi ægrum evadere non posse: netamen incuria mea perire videretur, per chirurgum applicare jussi spiritum vini cum melle rosato & unguento ægyptiaco, usque dum partes gangrænosæ à sanis separarentur & deciderent. Tunc intestinum non tantum ruptum, sed omnino transversim abruptum esse, ejusque partem superiorem foras propendere, hincque stercora profluere animadvertimus. Hic intestini finis progressu temporis carnosior evasit, & quasi carneum annulum acquisivit, qui annulus cum vicina carne firmiter coaluit, ita ut postea intestinum hoc loco semper fixum & apertum remanserit, atque inde ægro præter voluntatem alvi fæces sempe effluerint. Huic parti postea cacabum parvum æneum, commodè adaptatum, semper appensum gessit, sic reliqua sanus, quocumque vellet deambulans. Nonus jam agitur annus quo huic molestissimo oneri assuetus nunquam ægrotavit.

*Annotatio.*

**R**arissimum hoc est & notatu dignum exemplum. Antehac nunquam credideram intestinum abruptum in inguine cum vicina carne coalescere posse, quod tamen in hoc ægro oculatus testis me vidisse testor, nunquam antea à me observatum, licet hujusmodi intestinorum rupturas in aliis aliquoties viderim. Si forte intestinum abruptum inter carnosos abdominis musculos foras erumpat, tale quid aliquando contingere posse verisimile videtur, cujus rei notabilem casum Platerus observat. lib. 3. sic describit. *Capitaneus quidam ante annos multos in ventre vulneratus, stercus per fistulam, qua sanato vulnere illis remanserat, multos annos incolumis atque superstes, excrevit. Cujus causam investigans ex anatomicis observationibus, certis ar-*

*gumentis collegi, intestinorum vulnera, si illis in locis, ubi carnea musculorum abdominis portiones existunt, ventrem penetrant, agglutinati tunc utrimque, & intestinorum & musculo carnalis, vulnerum in ambitu labiis, viam fieri posse, per quam stercus extra corpus educatur, & in abdominis cavum excidere prohibeatur, eaque vulnera licet consolidari nequeant, minime tamen esse lethalia: quod etsi rarum sit, tamen & in aliis partibus, ut vesica, accidit. Idem Platerus proxime sequenti observatione adhuc alium similem casum enarrat. Joannes Hornung medicus Heidenheimensis, epist. ad Gregorium Horstium, enarrat historiam rustici, cui è vulnere abdominis intestinum rectum vulnere lato apertum exivit, neque a chylutugo intus reductum est, sed sanato abdominis*

nis vulnere toto vitæ tempore foras propendit, naturalem colorem retinens, sed paulatim crassius ac carnosius evadens, per quod propendens

intestinum fæces alvi cum magno fæore excrebantur, neque amplius ab ano prodibant.

## OBSERVATIO. LXVII.

*Extabescencia à vitio ventriculi.*

**D**ominus de Nassau, vir florentis ætatis, generosus, & equitum capitaneus, anno 1637. durante obsidione Bredæ, tota æstate cum cohorte castra sequebatur. Mense Septembri. cum nocte dormiens sudore totus proflueret, ac forte turmas aliquas equitum prope hospitium suum transire audiret, nudus è lecto exsiliit, ac fenestram aperiens foras aliquamdiu prospexit: atque sic à vento Septentrionali, tunc temporis frigidus & tempestuosus, subito refrigeratus est, unde postea in magnum incidit morbum. Statim de ingenti ventris dolore circa ventriculi regionem conquerebatur, accedebat febricula, cum magna tussi, qua multa tenacia pituitosa & male colerata reiciebat, absque ullo tamen pectoris dolore. Advocati fuerunt clarissimi Medici, D. Valentius senior, Principis Auriaci Medicus. D. Romphius senior, Medicus Reginæ Bohemæ; D. Synapius, medicus totius equitatus; D. vanden Brouck, Medicus ordinarius Bredæ, alique nonnulli præclari viri, qui omnes ex sputis, tussi, aliisque symptomatibus, judicarunt ipsum vera phthisi laborare, eaque incurabili, & Principi Auriaco, de valetudine ægri roganti, ipsum brevi moriturum retulerunt. Quantum ad intolerabiles ventris dolores, illos à subitaneo frigore inductos, ac verè colicam esse passionem, omnes unanimiter statuerunt. Ad hunc dolorem, quem colicum appellabant, varia longo tempore adhibuerunt remedia, quibus eundem interdum aliquanto leniorem fecerunt, nunquam tamen sanarunt, nec unquam sanari posse pro certo statuerunt. Ad tussim minuendam fonticulum in brachio sinistro fecerunt, & sequens apozema per multas septimanas exhibuerunt.

℞. *radic. chynæ elect. unc. j.*  
*folior. scabiosæ, tussilaginis,*  
*betonica, pimpinellæ,*  
*plantaginis, ana m. j.*  
*florum cordialium ana p. ij.*  
*passularum enuc. unc. j.*  
*glycyrrizæ rasæ, drach. ij.*  
*sem. anisi, scrup. iiij.*  
*coquantur in aquæ hordei secundæ decoctionis q. s. ad lib. ij.*  
*fit apozema.*

Pro linctu ordinario dederunt syrupi de papavere & de symphyto, ana partes æquales. Præscripserunt quoque diatragacanthum frigidum in tabulis. Ad alyum subducendam subinde hanc potiunculam exhibuerunt.

℞. *rhei electi, drach. j.*  
*santali citrini scrup. i.*  
*decocti hordei unc. iiij.*  
*fiat infusio per noctem, adde colaturæ*  
*mannæ Calabrinæ unc. i.*  
*fiat haustus.*

Hinc semel atque iterum dejiciebat, nam erat facilis emotionis. Cum ægrum his & similibus medicamentis per duos menses cum dimidio tractassent, nec quicquam proficerent, sed æger ad extremam maciem deveniret, vires quoque magis ma-

gisque prolaberentur, plura medicamenta exhibere noluerunt, sed ægrum pro incurabili derelinquentes, singuli domum suam profecti sunt. Dum hæc aguntur, & pallida mors indies expectatur, de me cogitari cæptum fuit, meumque etiam consilium experiri desideravit æger. In hunc finem in navem bellicam delatus, cum eadem Bredâ Noviomagum transportatus fuit. Ubi de morbo suo longos sermones mecum habuit, morbi invasionem, morem exacerbationis, Medicorum judicia, multaque alia ordine recensuit, ac remedia Medicorum, quibus hætenus usus fuerat, in scriptis secum adferens, mihi examinanda obtulit, ex quibus animadverti omnes opinatos fuisse illum vera phthisi laborare. Verum ego omnibus diligenter perpensis, fui alterius opinionis. Ex tussi enim & sputis nulum certum phthiseos signum percipere potui, multa quidem tenacia & malè colorata, interdum etiam foetentia exscreabat, nihil tamen puris aut sanguinis in iis animadverti. Dolor ventris, ipsis colicus putatus, non erat colicus, nullis enim flatibus comitatus, in ventriculo fixus hærebat, atque inde per intervalla crudelissimas exacerbationes inducebat, non tamen per intestina totumque ventrem vagas, sed eo ipso loco fixas: quapropter ego judicavi hujus doloris causam esse tenacissimam falsam pituitam, à subita illa prima refrigeratione ventriculi tunicis firmissimè affixam, quæ per intervalla affluxu vel bilis, vel catharri acris, alteriusve humoris, fermentans (sicut calx viva affusione aquæ) hujusmodi graves exacerbationes faciebat. Ventriculum autem graviter affectum esse, præter hunc dolorem, etiam testabantur alia, appetitus dejectio, nausea, ructus molestissimè prodeuntes, cruditates, &c. Tussim autem produci judicavi à catharris ad pulmones defluentibus, quorum continuum fomentum erant crudi vapores è ventriculo laborante ad cerebrum (quod à prima illa subita refrigeratione valde debilitatum fuerat) delati, atque inde rursus ad pectus descendentes, ubi longiore mora pravum colorem, & interdum etiam foetorem acquirebant. Hoc meum novum judicium ægro tantopere placuit, ut de curatione sui morbi magnam spem conceperit, quam sequenti modo auspicati sumus. 26 Novembris capitium ex herbis cephalicis aliisque calidis confutum. & capiti impositum est, quod postea tota illa hyeme gestavit. Præscripsi diætam calefacientem, & attenuantem (non refrigerantem & incrassantem, ut fecerant priores Medici) cibos euchymos & facilis digestionis: cui diætæ propter summam virium debilitatem, ipsum per quadriduum commisi, nulla medicamenta exhibendo. Intra paucos dies foetida illa & male colorata sputa (cerebro capitii ope corroborato, & defluxionibus hinc imminutis) alba ac naturalis consistentiæ, nec adeo multa & tenacia, ut ante, fuerunt. 30 Novembris cæperunt exacerbari dolores ventriculi, qui ultra ventriculi regionem se non extendebant, atque adeo crudeles erant, ut etiam parturientium & nephriticorum dolores immanitate superare viderentur. Mirabantur æger & consanguinei, quod totum hoc malum in ventriculo latere, ibique curari debere dicerem, cum priores Medici nullam ventriculi mentionem fecissent, non magis quam si æger ventriculum non habuisset; sed re examinata facile in meam sententiam iverunt. Ad hujus doloris mitigationem hora quinta matutina exhibui electuarii nostri anticolici drach. j. idque reiteravi hora undecima, verum hinc nihil omnino imminutus fuit. Etiam ceratum calefaciens, ex styrace, benzoino, castoreo galbano, tacamacca, & similibus toti ventriculi regioni impositum est. 1. Decembris æger nullum medicamentum per os assumere voluit, solum enema injectum est, quo alvus tantum semel deiecit. Postridie pilulis Ruffi assumptis, ter alvum exoneravit, sed nihil remisit dolor, ob cujus magnitudinem cum vires prorsus deiicerentur, ad narcoticum deveniendum erat, quod elegi calidissimum, ut summo calore ventriculum roborare, & tenaces frigidosque humores digerere & incidere, opio verò dolores sedare posset; quod erat philonium Romanum cum euphorbio paratum cujus drach. j. circa noctem exhibui, à quo intra tres horas dolores prorsus sedati fuerunt. 3 Decembris, sæpius de die particulam hujus conditi assumpsit.

℞. *specier. diamofchi,*

*diambre, ana scrup. j. f.*

*diagalange, scrup. f.*

*radic. calami aromatici condit*

*conservæ anthos, ana unc. f.*

*nucis moscatae condit. drach. ij.*

*confectionis alkermes scrup. ij.*

*syrupi de limonibus q. f.*

*olei cinnamomi gut. ij.*

*misce, fiat conditum.*

Circa noctem recrudit malum, sed non tanta vehementia ut ante. Sequenti die pilulis Ruffi iterum assumptis bis terve deiecit. Circa vesperam ex pulsu percepi febriculam, quam sequenti potiuncula fugavimus.

℞. *theriacæ Androm. drach. j.*

*aquæ nostræ theriacalis unc. j. f.*

*olei vitrioli gut. vij.*

*misce, fiat haustus.*

5 Decembris ventriculi dolor admodum mitis & in tali statu fuit, quali erat ante exacerbationem: tussis, & sputa cessarunt: sed febris aliqua adhuc rudimenta apparuerunt, quæ usu sequentis apozematis evanuerunt.

℞. *radic. cichorei,*

*asparagi ana unc. j.*

*helensi unc. f.*

*herb. endiviæ, centaurii minor.*

*absinthii Rom. ana m. j.*

*cardui ben. m. f.*

*sem. anisi drach. j. f.*

*passul. corinth. unc. ij.*

*cortic. arantiorum succ.*

*citri, ana drach. ij.*

*coquantur in aquæ communis q. f. & fiat*

*apozema ad lib. j. f.*

Vesperis amygdalatum exhibui, a quo mediocriter dormivit, quod tribus diebus continuatum fuit, quibus diebus etiam jusculum pulli interdum sumens, vires mediocriter corroborabantur. Interea inhærebat adhuc ventriculo affectus quidam qui ægro valde molestus erat (quidnam esset ipsemet verbis exprimere non poterat) unde sæpe aliquid sursum usque ad jugulum ascendere putabat: hoc malum appetitum impediēbat, & ciborum digestionem interturbabat, idque idem illud esse dicebat æger, à quo illæ exacerbationes per intervalla originem sumerent. Ut hunc mali totius fomitem radicitus extirparemus, hoc vinum antimoniatum exhibui.

℞. *croci metallorum nostræ præparationis, gr. xv.*

*vini Gallici generosi unc. iiij.*

*macerentur per noctem, sequenti manè*

*fiat colatura per chartam emporeticam*

*duplicem: sit haustus.*

Assumpsit hanc potionem 12 Decembris hora octava matutina. Hora nona usque ad decimam valde nauseabundus fuit, nihil tamen evomuit: paulo post, maxima cum anxietate pauca quædam tenacissima instar glutinis, & virescentia evomuit.

Hora

Hora undecima, cessante anxietate, coepit per alvum purgari, hacque purgatione sine ullis torminibus decies & septies plurima aquosa mixti coloris deiecit, a qua magna evacuatione vires admodum prostratae fuerunt, quas aqua cinnamomi cum saccharo perlato subinde refecimus. Vespero haustum vini generosi calefacti cum drachma theriacae exhibui, atque ita sequenti nocte mediocriter dormivit. Postridie illum mali fomitem e ventriculo prorsus sublatum esse percepit, quem postea nunquam amplius sentit. Aeger ab eo tempore valde appetens fuit & prima die tria jacula cum bono appetitu comedit, ac bene digessit. Sequentibus diebus adeo famelicus evasit, ut non tantum quater de die, verum etiam semel media nocte ipsi comedendum foret. Primis duabus septimanis alebatur jusculis variis modis praeparatis: tertia etiam carnes coctas pullorum, agnorum, vituli, &c. cepit edere, & interdum haustum vini bibere: quarta septimana ad carnes assatas, & sic paulatim ad consuetam dietam deventum fuit. Ita desperatus ille aeger, auxiliante summo Numine, vires suas brevi recuperavit, & cum magno meo honore pristinae sanitati, praeter omnium opinionem, restitutus fuit, hacque curatione, tam inter magnates, quam inter alios, maximum mihi nomen conciliavi.

## OBSERVATIO. LXVIII.

*Nephritis.*

**D**ominus Bronck-horst, qui Dominus est de Weerdenburch, vir florentis aetatis, vini rhenani amantissimus, 26 Decembris intolerabilibus torquebatur nephriticis doloribus, sed sine urinae obstructione. Ante sexennium similibus doloribus vexatus, parvum calculum excreverat; sed exinde ne minimum quidem hujus mali rudimentum perceperat, neque etiam sabulum cum urinis unquam excreverat. Ad dolorem leniendum clyster emolliens injectus fuit. Deinde hanc mixturam praescripsi:

℞. olei amygdalarum dulc. recentis unc. iij. l.  
 succi limonum drach. vj.  
 vini malvatici unc. iij.  
 misceantur, pro tribus dosibus, quarum  
 singulis tribus horis una exhibeatur.

Tale quoque linimentum lumbis calide illitum fuit.

℞. olei scorpionum, laurini,  
 amygdalarum amararum. ana unc. l.  
 chamemelini, anethini,  
 terebinthinae, ana drach. ij.  
 misceantur.

Circa vesperam dolores sedati sunt. Nocte cum urinae majore impetu excrevit calculum scabrum & inaequalem, magnitudinis pisi. Postea 14. Januarii, cum se asperissimo frigori per totum fere diem exposuisset, nephriticus dolor simili modo rediit, eaque praedicta mixtura iterum assumpta, calculum excrevit, atque sic rursus a malo hoc liberatus fuit. Ad praeservationem consului, ut interdum pilulam unam aut alteram ex aloë lucida, interdum bolum ex terebinthina Veneta deglutiret, interdum syrupo dealthea Fernellii uteretur, imprimis autem ut a vini rhenani usu prorsus abstineret, quod vinum postea cane pejus & angue fugiens, ab hoc malo multis annis liber remansit.

*Annotatio.*

**Q**uod vinum rhenanum calculos in renibus generet, & arthriticos dolores inducat, à sale tartareo est, quo illud triplo quadruplove magis, & quidem acriore, quam Gallicum, Canarium, Hispanicum, aliudve vinum abundat. Qui sal tartareus nimis copiosus, cum à naturis quibusdam non satis fortiter digeritur, à sanguinis massa separatur, (sicut fermentatione tartarum separatur à vino in dolis, & doliorum parietibus accrescit) atque ad renes cum fero delatus, ibidem in calculos concrevit; ad articulos verò expulsus, acrimonia sua immanes cruciatus excitat. Nam ea salium natura est, ut alia corpora corrodendo in minimas atomos redigant & sibi affociant: quod videmus in solutione metallorum in aqua forti, in qua crassa metalla sali aquæ solventis ita uniuntur, ut per chartam bibulam transcolari possint. Hæc corrosio arthritidis causa est, dum enim sal tartareus ad nervosas & membranosas partes expulsus, easdem corrodit & sibi associare nititur, immanes illi dolores excitantur, qui mitigantur si fiat affluxus aquosorum humorum, nam multa humiditate solutus sal minorem habet acrimoniam. Verum dicas, quare hic sal in renibus concrevit ibi tantos dolores non facit quantos in articulis? quia continuo urinæ transitu illud quod subtilissimum & acerrimum illi inest solvitur, & cum urina per vesicam expellitur, quod verò crassum, argillosum ac terreum illi inest, hoc intus subsistens calculosam substantiam retinet, & non tam acrimonia, quam mole & scabritie sua dolores facit. Vina autem Germanica (quæ nostrates malè generali nomine Rhenana appel-

lant) propterea tali tartareo sale abundant, quod in plurimis Germaniæ locis ipsum solum, in quo vites crescunt, tali tartaro abundet. Nulla autem est planta, quæ quod salsum, & tartareum terræ inest, magis exsugat, quam vitis; inde fit ut vinum iis in locis, ubi solum est nitrosum & tartareum, collectum, plurimum huiusmodi tartarei salis in se contineat, atque prædictis morbis generandis aptissimum sit. Rationi suffragatur experientia, nam videmus in multis Moraviæ, Austriæ, Bohemiæ, Ungariæ locis, ubi solum tale est, quale jam dictum, plerisque homines arthritide, vel renum & vesicæ calculo, vel utrisque laborare, quia utuntur vinis aliisque nutrimentis in tali solo crescentibus, quæ naturam soli in se suxerunt, eamque postea hominibus iis utentibus communicant. Hanc rem curiosius examinatam describit Daniel Sennertus lib. 2. institut. part. 2. cap. 9. & praxeos lib. 3. part. 7. sect. 1. cap. 6. & lib. de arthritide, cap. 2. & paralipom. ad dictum caput 2. Multa autem vina arthritidem inducere, ex eo liquet, quod abstinencia vini nonnulli podagrici restituti sint. Sic refert Trincavellius de cur. part. morb. lib. 12. cap. 2. Medicum senem graviter podagricum, per quinquennium sibi ipsi vinum interdixisse, atque ita à morbo prorsus liberatum fuisse. Sic Rales, Avicenna, Celsus, Gatinaria Mercurialis alique medici, vini abstinencia ad arthritidis curationem plurimum conferre testantur: idque se in se ipso comperisse scribit Marcellus Donatus histor. med. mirab. lib. 1. cap. 8. cum enim per biennium à vino prorsus abstinuisset, à podagra liberatus est.

## OBSERVATIO. LXIX.

*Dolor immanis sub osse sterni.*

**V**icecapitaneus Mour, vir florentis ætatis, mense Januario subito incidit in acerrimum quendam dolorem, qui rectâ lineâ ab asperæ arteriæ summitate usque ad superius ventriculi orificium, secundum ossis sterni longitudinem, se extendebat, hominemque tam atrociter excruciat, ut se hinc illinc commovere nullo modoposset, atque hinc immaniissimi doloris impatiens ab astantibus obnixè peteret ut pugione vel gladio ipsi vitam finirent. Non tuliebat neque difficulter spirabat æger, pulmones cum aspera arteria planè liberi erant, etiam œsophagus in deglutiendo non dolebat: ad hæc foris nec visu malum percipiebatur. Sub ipso osse sterni, ea parte qua mediastinum ipsi annectitur, vel in membranula ipsi interius annexa, doloris causa latebat, quæ hoc modo inducta fuerat. Vespere præcedente æger in convivio quodam vinum gallicum generosum ac forte liberalius ingurgitaverat, eoque ante luculentissimum ignem se valde calefecerat. Cum verò tandem media nocte sudans foras exiret ac domum properaret, subito in via maximo frigore (nam asperrimum tunc temporis erat gelu) correptus est, hinc protinus occlusis poris vapores calidi & acres condensati & congelati

gelati interiori ossis sterni membranæ adhæserunt, atque hinc pars illa cum acri dolore quasi obriguit, qui dolor motu thoracis exacerbabatur. Ut huic intolerabili malo citissimè occurrerem, statim alvò enemate subductâ, hoc sudoriferum calidè exhibui.

℞. *theriacæ scrup. iiij.*  
*extracti cardui bened.*  
*angelicæ, ana scrup. j.*  
*crocī Britannici gr. vj.*  
*aquæ theriacalis nostræ unc. ij.*  
*olei anisi gut. iiij.*  
*misce, fiat haustus.*

Hinc optime quidem sudavit, sed dolor in eodem statu permanfit. Post sudorem ceratum sequens loco dolenti applicavi.

℞. *pulv. castorei, gariophyllorum*  
*benzoini, croci, ana scrup. j.*  
*g. galbani vino dissoluti unc. f.*  
*emplastri de meliloto*  
*oxycroci ana drach. iiij.*  
*misceantur & fiat s. art. ceratum, quod*  
*extendatur in corio longitudinis partis*  
*affectedæ, & latitudinis quatuor digitorum,*  
*& inungatur oleo nucis moscatæ distillato.*

Cum hoc ceratum per sex septemve horas parti adhæsisset, plurimum cessare cæpit dolor, multoque tolerabilior evasit, ita ut æger se melius movere posset. Sequenti die medicamento purgante assumpto quinquies alvum deposuit. Prædicto autem cerato adhuc per triduum inhærente, dolor totus evanuit, & æger rursus bene sanus foras prodiit. Postea verò, mense Februario, cum vinò hispanicò largius haustò rursus nimium incaluisse, idem malum eodem planè modo rediit, atque tunc eodem illo & solo cerato rursus intra triduum curatum fuit.

## OBSERVATIO. LXX.

*Dolor Capitis.*

**P**etrus Joannis, famulus cerevisiarius, homo robustus, mense Januario, cum acerrimè gelaret, crudelissimo capitis dolore correptus fuit (reliquo corpore se bene habente) ob cujus immensitatem aliquot dies noctesque continuas insomnis traduxerat, unde non tantum appetitus languescebat: verum etiam delirium jam aliudve gravius malum imminebat. Attamen æger adeo pertinax erat (ut plerumque solent hujusmodi rudes homines) ut ad mali sanationem nihil medicamentorum assumere vellet: tandem verò meis & amicorum bonis verbis eo inductus fuit, ut topica admitteret. Proinde, cum præsentī egeret levamine, sequens fomentum præscripsi, quo caput calide foveri, & lintea quadruplicata ei intincta toti capiti calide circumponi, ac refrigerata rursus eidem fomento calefacto intingi, idque tota nocte (nam circa vesperam vocabar) continuare jussi.

℞. *rosmarini, verbenæ, betonicæ,*  
*thymi ana m. j. majoranæ, m. j. f.*

L 3

*salvia*



*salvia, m. f. florum chamomillæ,  
meliloti, ana m. j. anethi,  
stachados, ana m. f. sem. cumini,  
anethi, baccarum lauri, ana unc. f.  
vini albi q. f.  
coquantur f. art. ad lib. iij.  
adde colaturæ  
spiritus vini unc. iij  
misce, pro fomento.*

Sequenti die dolor longè mitior fuit, cumque adhuc omnia alia medicamenta repudiaret æger, in ejusdem fomenti usu continuatum fuit biduum, quo intervallo somnus rediit, & dolor fere totus evanuit, exceptò quod in fronte supra nasum adhuc aliquantum remaneret, cum narium etiam obstructione. Hoc cum fieret à tenaci quadam pituita (sicut totus morbus à frigido ac crudo humore in cerebro propter externum frigus coacervato, atque ibidem obstructo inductus fuerat) ossi ethmoides firmiter impacta, errhinum ex succo radicis betæ præscripti, de quo cum bis terve aliquantum cum penna utrimque pertusa in nares attraxisset, magnam tenacis pituitæ copiam per palatum & nares excrevit, atque ita ab intolerabili hoc malo prorsus liberatus fuit.

#### Annotatio.

**C**urationem hanc, nullâ præmissâ evacuatione nec diversione, non satis tutam fuisse fateor, nam humores pituitosi in cerebri ventriculis coacervati & obstructi, à fomentatione calida attenuati, & liquefacti facile ad nobile aliquod viscus, non sine magno periculo, defluere potuissent. Verumtamen cum humorum coacervatorum copia, vel apoplexiam, vel delirium, vel læthargum, doloris verò ma-

gnitudo febrem jam jam minaretur, & pertinax æger nihil omnino per os assumere vellet, imò ne clysteres quidem nec venæsectionem admitteret, necessariò, ut graviora jam instantia mala præcaverem, curationem dicto modo solis topicis peragere coactus fui, memor istius dicti Corneli Celli, *Nihil interest, præsidium an satis tutum sit, quod est unicum.*

## OBSERVATIO. LXXI.

### Scorbutus.

**A**Gneta Elberti, juvenula monasterialis, circiter 24 annorum, mense Januario conquesta fuit de obtuso seu gravativo dolore sinistri lateris sub costis spuriiis, ut & de totius spinæ quadam rigiditate: aderant simul parvi rigores, crebræ debilitates & quasi leves lypothymix, quæ statim rursus cessabant: adhæc nonnullæ maculæ ceruleæ livescentes in cruribus conspiciebantur, dentes vacillabant, gingivæ exedebantur & foetebant. Ipsam scorbuto laborare ex dictis signis facile erat judicare. Cum autem hyems ac gelu asperrimum tunc esset, & herbæ virides huic morbo appropriatæ inveniri non possent, & horrendum frigus purgationes quoque prohiberet, tantum hoc sequens electuarium præscripti, ejus ter de die particulam magnitudinis nucis moscatæ comedit, interea etiam dietam convenientem servando.

*℞. specier, diambrae,  
aromatici rosati  
seminis ammeos, apii. ana scrup. ij.  
nasturtii, cremoris tartari, ana drach. iij.  
cinnamomi opt. drach. j.*

*salis*

*salis prunellæ scrup. j.*  
*fiat pulvis subtilis: tunc*

℞. *passularum longarum pinguium q. s.*  
*coquantur in vino usque ad mollitiem,*  
*deinde pulpa per setaceum extrahatur.*

℞. *hujus pulpæ lib. s. cui admisce*  
*prædictum pulverem totum,*  
*olei anisi, juniperi, ana, scrup. j.*  
*syrupi de limonibus. q. s.*  
*fiat s. art. electuarium.*

Admiscuisssem libenter aliqua amara, sed ab his omnino abhorrebat. Consului etiam, si cochleariam vel nasturtium hyemale alicubi invenire posset, ut illas herbas in cerevisia tenui vel vino per noctem maceratas leviter ebulliret, eoque decocto uteretur, ac reliquum curationis usque in mensem aprillem differret. Interea ad firmandos dentes hanc aquam aluminatam præscripsi.

℞. *aluminis pulverisati drach. j.*  
*aquæ communis, unc. vj.*  
*aquæ cinnamomi unc. j.*  
*misce, pro collutione oris.*

Cum his aliquamdiu usa fuisset, magnum levamen percepit, & maculæ crurum evanuerunt. 26. Aprilis sequens apozema paratum fuit, quo deinde ter quaterve reiterato, & corpore bis repurgato, ab hoc malo immunis evasit.

℞. *rad. polypodii querni,*  
*cort. rad. cappar. ana unc. j.*  
*radic. feniculi,*  
*eryngii, petroselini*  
*helenii, ana unc. s.*  
*herbar. fumarie,*  
*cuscutæ, centaurii minor.*  
*taraxici totius, ana m. j.*  
*absinthii Romani,*  
*florum sambuci, ana m. s.*  
*sem. apii, anisi, feniculi,*  
*nasturtii ana drach. j. s.*  
*passul. corinth. unc. ij.*  
*tartari rhenani unc. j.*  
*aquæ communis q. s. coquantur s. art. addendo sub finem*  
*radic. raphani sylvestris unc. j.*  
*herbar. cochlearie,*  
*nasturtii aquat.*  
*becabunge, ana m. j.*  
*fiat apozema ad lib. ij.*

### Annotatio.

**S**corbutus, Germanis *Scheurbuyck* quod-interdum ventris dolores adsint, vel potius *Scheurbeck*, quod gingivas corrumpat & quasi disrumpat, atque etiam *Scheurbet*, quod ossium quasi ruptorios dolores inducat, aliis quo- que male *Blauweschuyt*, sed bene *Blauwescheyt* ap- pellatur, eo quod maculas quasdam livescentes, quasi ex contusione plumbei bombardæ globuli relictas inducat. Multi scorbutum putant esse ex morbis novis, quem Dodonæus observat. medic. cap. 33.

cap. 33. scribit in Brabantia anno 1556 primo visum, antea tamen aliquot annis Belgis, Danis, aliisque septentrionalibus maritimis regionibus cognitum & endemium fuisse. Hippocrates tamen lib. de morbis internis, morbum quendam describit, Volvulum sanguineum dictum, qui cum scorbuto, si non in omnibus saltem in pluribus convenit, nam scribit in eo morbo os male olere, à dentibus gingivas discedere, à naribus sanguinem profluere, aliquando ex cruribus ulcera pullulare, quorum alia senescunt, alia emergunt, & cutem extenuatam nigrescere; talesque ægros ad laborandum & ambulandum minime promptos esse (ubi nota, græcum textum omissione vocis & depravatum esse) Plinius lib. 25. natur. hist. cap. 3. hunc morbum describit per *σπυδαίνην* & scelerubem, ubi dicit, in castris Germanici Cæsaris trans Rhenum novum morbum exortum fuisse, quo dentes deciderent, compagesque in genibus

solverentur. Repertam verò auxilio esse herbam, quæ vocatur Britannica, nervis & oris malis salutarem; foliis oblongis & nigra radice præditam. Sicut lues venerea guajacum, balsam parillam, aliaque pauca, sic etiam hic morbus certa quædam & pauca habet antidota, cochleariam, nasturtium hortense, aquaticum & hyemale, becabungam, fumariam, & raphanum sylvestrem, quibus amara quælibet (non cathartica) admixta, atque ita simul cocta, macerata, aliisve modis præparata, morbum plerumque curare solent; adhibitis etiam oris collutionibus aliisque ad sanguinis purificationem & viscerum labefactorum corroboracionem necessariis. De hoc autem morbo, ejusque causis & curatione, videatur Dodonæus loco citato, Reusnerus lib. de scorbuto: Sennertus præcos lib. 3. part. 5. sect. 2. Langius; Eugalenus, Ronseus, alique auctores, qui ex professo hujus morbi historiam plenissime describunt.

## OBSERVATIO. LXXII.

*Ventriculi imbecillitas.*

**C**apitaneus de Gone, quinquagenarius, per aliquot septimanas ventriculi imbecillitate laboraverat, plane inappetens fuerat, & cibos assumptos difficulter concoxerat, adèrant quoque ructus ægrè prorumpentes & molestissimi, cum nausea. Præscripta prius conveniente diætâ, ut ventriculum à cruditatibus, frigidorum ac viscidorum humorum saburra clementer expurgarem, sequens apozema dedi, de quo per quatrimum matutinis temporibus haustum bibit, atque inde ter quaterve alvum dejecit.

*℞. rad. helenii, mechoacanæ,  
feniculi, ana unc. l.  
calami aromatici,  
galangæ ana drach. ij.  
herbar. menthæ,  
rosmarini, nepethæ, majoranæ,  
centaurii minoris, ana m. j.  
absinthii, melissæ hyssopi, ana m. l.  
sem. carthami unc. j.  
feniculi carui, ana drach. ij.  
passularum enuc. unc. ij.  
aquæ communis q. s. coquantur s. art. addendo sub finem  
agarici albiss. drach. ij.  
foliorum senæ mundat. unc. j. s.  
sem. anisi drach. v.  
fat apozema ad lib. j. s.*

Hoc apozemate evacuato, hujus pulveris bis de die (nempè semi hora vel hora una post prandium & cænam) unam dosim cum haustu vini generosi assumere jussi.

*℞. radic. calami aromatici,  
specier. diagalangæ,*

*diem*

*diambre . ana drach. j. f.  
macis , cinnamomi electi ,  
zingiberis . ana drach. j.  
fiat pulvis , qui dividatur in  
decem doses aequales.*

Consului etiam ut interdum matutino tempore modicum haustum vini absinthites biberet. His paucis ventriculo pristinum robur brevi restitutum fuit.

### Annotatio.

**A**D ventriculi morbos frigidos , præter illa quæ diximus paulo ante observat 58. varia sunt quæ à Medicis plurimum laudantur. Terebinthinæ usum nonnulli magnopere extollunt, idque viscerum verum balsamum appellant , propterea quod calefaciat , abstergat , & viscera clementer repurget. Zechius hunc bolum commendat , & nullum valentius præsidium usurpari posse tradit.

*Rec. terebinthina clara, drach. ij.  
mastichis pulversati, drach. f.  
pulv. aromatici rosati, scrup. f.  
fiat bolus, duabus horis ante  
cibum exhibendus.*

Sunt qui terebinthinam coquunt ad formam pilularum, sed male, nam præstantior ejus vis coctione exhalat. Balsamum Peruvianum ad roborandum ventriculum est præstans & efficax, si ejus guttæ aliquot cum vino Hippocratico, aliove generoso hora ante pastum exhibeantur. Riverius prax. lib. 4. cap. 1. dicit apud Parisienses maximo in prætio haberi syrupum de absinthio Penæ, cujus descriptionem ibidem subjungit. Crollius suum elixir proprietatis ventriculi mirabiliter corroborare tradit. Hartmannus, multique alii, zedoariam omnibus aliis præferunt, atque ab ejus usu ventriculum maxime roborari, & nunquam non petitem effectum consequi tradunt. Ligna guaiacum & sassefras decocta, sæpius non parum profuerunt. Conveniunt etiam olea distillata, gariophyllorum, anisi, carui, cinnamomi, nucis moscatæ, aliæque similia, cum vino generoso paucis guttis exhibita. Sequens pulvis digestivus, ad coctionem ventriculi adjuvandam, in frequenti usu esse solet.

*Rec. coriandri preparati unc. f.  
sem. faniuli dulcis,  
anisi, ana drach. ij.  
cinnamomi,  
gariophyllorum, ana drach. f.  
sachari unc. iij. fiat pulvis.  
Dosis cochlear j. post pastum.*

Absinthium quocunque modo exhibitum maxime laudabile existit, cujus efficacia satis innoscit ex historia Galeni lib. de theriac. ad Pi-

lon. cap. 2. ubi mulierem graviter decumbentem, stomachi dissolutione affectam, inappetentem, adeoque debilem ut ne cibum quidem assumere posset, solo vino absinthite sanavit, cujus potu ilico stomachus ab imbecillitate vindicatus, & appetitus restitutus fuit. De absinthio sic quoque inquit Montagnana consil. 107. *Inter medicinas stomachales, quæ appetitum & digestivam ejus vigorem possunt, & aperire oppilationes ejus, abstergere & exsiccare materias in eo inventas, prima & famosa est absinthium, & proprie siccum, & omnes absinthiales medicina, sive juleb, vel confectiones vel electuaria fuerint.* Quid Dioscorides de absinthio sentiat, vide supra in annotatione observationis 37. quo loco ejusdem nocumenta etiam descripsimus. In hujusmodi ventriculi morbis hoc Langii electuarium admodum conveniens est.

*Rec. conserva rosarum unc. ij. f.  
flor. rosmarini unc. j.  
flor. lavendula unc. f.  
galanga,  
cubebarum  
xyloaloes, ana scrup. j.  
sem. anisi, drach. f.  
cinnamomi, drach. j.  
calami aromatici drach. ij.  
zingiberis condit. unc. f.  
pinearum præp. drach. vj.  
cum syrupo conservationis citri  
fiat electuarium.*

Ego antehac quendam ventriculi debilitate, cum inappetentia ac cruditatibus affectum sequenti pulvere restitui.

*Rec. rad. zedoaria  
galanga,  
calami aromat, ana drach. j.  
zingiberis albi, drach. f.  
cinnamomi, scrup. ij.  
cremoris tartari drach. ij.  
fiat pulvis. Dosis manè,  
meridie, post prandium, & vespere  
post canam drach. f. vel scrup. ij. cum  
haustu vini generosi.*

Dominus de Spieck quondam pro ordinario utebatur hoc.

M

Rec. rad.

Rec. rad. calami aromat.  
zingiberis albi,  
galanga, ana drach. j.  
fiat pulvis.

Hujusmodi electuaria, pulveres, tabellæ, aliaque insignia stomachalia medicamenta quilibet Medicus pro particulari cujusque ægri dispositione variis modis præscribere potest; eorumque copia apud auctores passim descripta reperitur.

Gregorius Horstius lib. 4. observat. 1. laudat

usum sequentis trageæ post cibum sumptæ.

Rec. sem. coriandri præparati unc. j. f.  
anisi,  
feniculi, ana unc. f.  
zingiberis,  
galanga ana drach. j. f.  
cinnamomi drach. j.  
ligni aloes drach. f.  
sacchari opt. ad pondus omnium,  
fiat tragea.

## OBSERVATIO LXXIII.

### Calculus.

**R**utgero Schorer, filiolo, parvus calculus cum summis doloribus per ureterem ad vesicam descendit, inde verò paulo post in penis meatum expulsus, cum ob magnitudinem transire non posset, mediæ urethræ in hæsit, atque urinam totaliter obstruxit. Variis modis illius extractio tentata fuit, sed frustra: tandem autem cum ad doloris immanitatem etiam partis inflammatio accedere animadverteretur, eundem sectione extrahere necesse fuit, quapropter cute aliquantum sursum versus glandem attracta, chirurgus urethram in latere loco ubi calculus subsistebat, sectione aperuit, atque inde calculum extraxit, quod vulnusculum postea facili negotio rursus consolidatum fuit, puello nullum incommodum inde retinente.

### Annotatio.

**H**anc chirurgiam, qua calculus in urethra hærens sectione extrahitur, describunt Aëtius tetrabib. 3. serm. 3. cap. 5. Steph. Grumelenus, chirurg. lib. 2. & Paræus lib. 16. cap. 40; quæ sectio quamvis aliquid difficultatis & periculi habere videatur, secure

tamen administrari potest. Fonseca lib. 2. cap. 10. eandem quoque suadet. Platerus observationum lib. 3. etiam duo refert exempla calculorum ex urethra ab ipso feliciter excisorum. Sunt qui metuant de vulnere illo fistulam remansuram, verum illud ego nunquam vidi.

## OBSERVATIO LXXIV.

### Nephritis.

**F**ilius vicecapitanei Sin George, juvenis circiter 18 annorum (qui renum sabulo ab infantia laboraverat, & sæpius etiam parvos calculos excreverat) mense Januario à calculo in uretere altero hærente tantis torquebatur nephriticis tormentis, ut quo se verteret nesciret. Ad mali sanationem hoc apozema præscripti.

℞. radicum feniculi,  
saxifragiæ, ana unc. f.  
glycyrrizæ rasæ drach. vj.  
herbar. altheæ,  
malvæ, ana m. j.

florum

*florum chamomillæ m. j. f.*  
*hordei mundati unc. j.*  
*sem. dauci, malvæ,*  
*urticæ, bardanæ, ana drach. j.*  
*4 frigid. major. ana drach. j. f.*  
*ficuum ping. no. ix.*  
*daſtylorum no. xi.*  
*lactis dulcis recenter mulcti,*  
*aquæ communis ana part. æq.*  
*coquantur ſ. art. & fiat apozema ad lib. iij.*

Hoc epotò, eodemque poſtridie reiterato, dolores ceſſarunt, & parvum calculum cum multis arenis excrevit.

Idem ille ſequenti menſe iisdem doloribus rurfus infeſtatus fuit, atque tunc calculus eodem decocto facile & citò per ureteres in veſicam deductus eſt, verum cum inde in meatum urinarium cum urina extruderetur, adeo magnus fuit, ut tranſire nequiens, medix urethræ inhæſerit, atque urinam prorfus obſtruxerit, immaniſſimoſque dolores induxerit: qui calculus cum inde chirurgi opera abſque incifione extrahi non poſſet, & chirurgus cataplaſmate impoſito partem affectam emollire niteretur, ipſemet pater, tantos filii ſui cruciatus æquis oculis diutius aſpicere nequiens, abſente chirurgo novaculam arripuit, & filii ſui miſertus, meatum urinarium ſubtus, eo loco ubi calculus hærebat, parvo vulnere incidit, è quo calculus cum impetu protinus exiliit, magna urinæ copia ſubſequenti. Poſtea inflictum vulnus, citius quam opinati fueramus, paucis emplaſtris rurfus conſolidatum fuit, nullo poſt ſanationem incommodo remanente.

## OBSERVATIO. LXXV.

*Lac in mamilla virginis.*

**D**Omicella quædam nobilis haud ignota nomine, & notiſſimæ pudicitix, virgo cirter 20 annorum, menſe Februario de dolore dextræ mammæ conqueſta fuit, è qua mamma etiam lac ſatis copioſe effluxit. Cum locum affectum diligentius explorarem, in media fere mamma duritiem quandam ſentii, magnitudis ovi columbini, quæ aliquantum compreſſa dolebat. In ſiniſtra mamma nihil horum percipiebatur. Intellexi etiam ex ipſa purgationes menſtruas per quatuor menſes ſuppreſſas fuiſſe. In curatione primò dietam convenientem attenuantem præſcripſi: deinde purgato corpore apozemata aliquot ad menſtrua emovenda exhibui, & triduo vel quatruiduo ante periodi tempus venam in talo ſecui, atque ita paulo poſt evacuatio hæc feliciter ſubſecuta fuit, quæ cum per tres quatuorve dies duraffet, mamma omnino detumuit, nec quicquam lactis amplius effluxit. Remanſit tamen durities illa cum dolore, cui impoſui ſequens unguentum in linteo extenſum, idque ſemel de die renovavi.

*℞. mellis,*  
*unguenti populei,*  
*ceræ virginæ, ana unc. j.*  
*primò liqueſiat cera, deinde reliqua admiſceantur, & ſpatula commoveantur ſimul uſque ad inſrigidationem.*

Hoc ſolo topico dolor ſtatim multum imminutus fuit, & intra quatruiduum durities illa ad maturationem pervenit: apoſtoma deinde diſruptum, cum multum puris albi eieciffet, eodem illo topico intra paucos dies etiam ſanatum eſt.

M 2

Anno-

## Annotatio.

**P**rofectò si Domicella hæc non fuisset honestissima, & vitæ castitate omnibus notissima, facile corruptæ virginitatis suspicionem apud vulgus incurrisset. Dico, *Apud vulgus*, nam rationales Medici, obstructis purgationibus menstruis lac in virginum mammis interdum generari posse non negabunt, licet id raro fiat. Quod ipsum etiam olim observavit Hippocrates, qui lib. 3. Aphorif. 39. sic inquit. *Si mulier, qua neque gravida est, neque peperit, lac habet, ei menstrua defecerunt.* Memini me antea adhuc semel talem casum vidisse in nobili quadam Domicella Montforensi, cujus castitatem nemo in dubium trahere poterat, quæ promotis mensibus etiam cito curata fuit. Christ. à Vega in comment. ad citatum aphorismum, testatur se illud ipsum etiam vidisse in puella Brugenfi: cui non absimilem historiam quoque refert Alex. Benedictus, anatom. lib. 3. cap. 4. De generatione hujus lactis ita scribit Bartholinus anatom. lib. 2. cap. 1. *Etiam in virginibus & mulieribus non gravidis aliquando (licet raro fiat) lac generari potest, si copioso & spirituofo sanguine referta sint mamma, & accedat suppressio menstruorum, nam ibi glandulosa substantia plus coquit quam mulieri ad nutritionem opus est.* Refert Forestus sibi ab Hugone Medico narratum fuisse, quod semel lac in virgine vidisset: & ab Ericio collega, quod illud ter vidisset. Verum non est quod quispiam miretur talia fieri

in juvenculis quibus menstrua fluere consueta sunt, cum etiam in vetulis id contingere visum sit, quemadmodum Bodinus theat. natur. lib. 3. refert, infantem, cum aviam vetulam siccissimam mortua matre fugeret, tandem lac emulisse, eoque abunde nutritum fuisse. Non minus etiam mirum est illud, quod in filiola Domini de Leuwenburch, infante bimestri, aliisque pluribus istius ætatis infantulis, non semel lac è mammis emulctum viderim: quod ipsum se quoque observasse testantur Cardanus subtil. lib. 12. & Joach. Camerarius de illust. medic. historiis. Omnium autem maxime mirabile est illud, quod etiam lac in virorum mammis nonnunquam generatum fuisse visum sit, sicut Aristoteles testatur de captivo quodam in Lemno, qui plurimum lactis dabat: & Abensina, qui è viro tantum lactis emulctum vidit, ut inde caseus conficeretur. Ita etiam Walæus Flandrum vidit copiosum lac effundentem, qualem historiam de quodam Laurentio Wolfio narrat Conradus Schenckius. Hujusmodi viros lactantes se etiam vidisse testantur Vesalius, Alex. Benedictus, Cardanus, Eugubius, Donatus, And. Laurentius, Aquapendens, aliique plures; imò narrant in novo orbe viros pene omnes magna lactis copia abundare: quid mirum igitur juvenculis nostris, cum menstrua obstruuntur, lac interdum in mammis generari?

## OBSERVATIO. LXXVI.

*Convulsiones epilepticae.*

**F**iliolus Joannis ab Udem, infans septimestris, epilepticis convulsionibus (quas nostrates *Stuypkens* appellant) fere sine ulla intermissione per biduum convellebatur, ita ut nihil aliud, quam certa mors singulis momentis expectaretur. Tandem meum consilium imploratum fuit tertia die, rebus jam pene desperatis, cum nullum medicamentum exhiberi posset. Ego in miserabili hoc infantis flatu, sequentem cucupham parari & capiti imponi jussi.

*℞. folior. majoranæ,  
verbenæ, rosmarini.  
florum meliloti, ana p. j.  
nucis moscatæ scrup. j. f.  
gariophyllorum scrup. j.  
fiat pulvis grossus, è quo in serico rubro  
conficiatur s. art. cucupha.*

Hæc cum per quatuor vel quinque horas capiti inhæsisset, ceperant paulatim cessare illæ convulsionες, atque intra duodecim horas prorsus evanuerunt, ita ut non sine admiratione à tanto malo citissimè in totum liberatus fuerit æger.

*Anno-*



## Annotatio.

Cum cerebrum in infantibus sit humidissimum, indeque plurimi vapores aquosi ac pituitosi eleventur, natura ad facilitatem horum vaporum evacuationem, cranium eorum in vertice ad aliquod tempus apertum relinquit. Sed quemadmodum per hanc viam facilis datur vaporum exitus, ita etiam, si in capite bene tegendo non satis diligens habeatur ratio, per eandem facilis datur frigoris externi introitus, à quo tunc oclusis poris & refrigerato ac debilitato cerebro, vapores intus retinentur, atque in cerebri ventriculis in tenacem mucum coeunt; quo onere gravata natura cum se ab illo expedire nititur, & tamen non possit, ex illo motu oriuntur istae epilepticae convulsiones, quae in infantibus valde periculosa sunt, & cum quibus multi commoriuntur: qui verò cum illis evadunt, si malum vehemens fuit, saepe vel mentis aliquod vitium, vel membrum aliquod paraliticum aut distortum, vel oculos luscus, aliudve malum toto vitae tempore inde retinent. Differt hic morbus à vera epilepsia, quod convulsiones in eo sint minus vehementes, saepe tamen frequentiores ac diuturniores quam in epilepsia vera: praeterea quod hae convulsiones ab humorum copia & cerebri in eorundem coctione & expulsionem debilitate, epilepsia verò ab humorum malignitate & certa venenositate inducatur. Interdum tamen factum fuisse visum est, ut illi in cerebro taliter coacervati humores, malo diuturniore existente, paulatim malignam qualitatem acquisiverint, & cerebro vel meningibus pravam aliquam qualitatem aut corruptionem infixerint, atque ita morbus hic in veram & omnium gravissimam epilepsiam transferit. Curationis huius mali in eo praecipue consistit, ut cerebrum refrigeratum rursus calefiat & corroboretur, simulque pori aperiantur atque ita vaporibus sursum exitus detur: his duobus satis bene & tempestivè administratis, plerisque hoc morbo correptos feliciter evadere animadverti. Nonnulli oleo succini, rosmarini, aliove simili, cum pluma in nares immisso, pituitae per nares &

palatum evacuationem moliri nituntur; sed cum cerebrum à nimia pituitae copia adeo obrutum & debilitatum sit, ut se ad expulsionem liberè contrahere nequeat, saepe curatio vix quicquam prodest) imò interdum cerebrum hoc onere gravatum & debilitatum ad fortiolem, quae impedita est, expulsionem incitans majores convulsiones inducit. Ita ut longè praestabilius sit, ante omnia cerebrum calefacere ac corroborare, atque ita humorum crudorum coctionem promoveri, & vaporum magnam partem per consolidatum cranium evacuare: hoc enim factò, reliquum pituitae vel muci, quod ventriculis inhaeret, cerebrum deinde satis coquit, dissipat, & per huc evacuationi dicatos meatus sponte expellit. In huiusmodi casu cucupham aliquam cephalicam vertici impositam plurimum prodesse multoties comperi: haec enim omnibus intentionibus satisfacit, cerebrum calefacit, corroborat, poros aperit, & humorum crudorum concoctionem ac dissipationem potenter promovet. Hac sola cum magno meo honore innumeros curavi. Interdum etiam guttulam unam aut alteram olei majoranae vertici primò inungi, ac tunc cucupham supra poni jubeo: interdum etiam, si aliquid assumere possit, exhibere spleo cochleare unum aut alterum ex aquae florum liliorum convallium, vel tiliae, partibus duabus, & syrupi de stachade parte una: atque his & similibus potissimum utor remediis. Animadverti etiam si infantes huiusmodi cucuphas gestent usque ad firmam cranii consolidationem, ipsos non solum ab hoc morbo, verum etiam ab innumeris aliis frigidis cerebri affectibus certissimè praeservari. Ad puerorum epilepsiam Nicolaus Fontanus comm. ad cap. 10. lib. de morb. pueror. Sebastiani Austrii, magnopere laudat urinam puerorum, atque ibidem refert historiam talis aegri, cui cum felicissimo successu injecit triaclysinata ex herbis convenientibus in urina coctis, atque etiam syrupum ex urina pueri cum variis cephalicis confectum exhibuit, quorum descriptiones citato loco videri possunt.

## OBSERVATIO. LXXVII.

*Febris tertiana intermittens.*

Josephus Wintjes, adolescens, in principio mensis Martii febre tertiana intermittente laborare cepit, quae cum ingenti rigore invadebat, & cum magno sudore singulis paroxysmis terminabatur. Ipsimet parentes mensis spatio ex circumforaneorum & anicularum consilio varia adhibuerunt medicamenta, modò vomitoria, modò has illasve purgationes, & nescio quas non específicas (ut vocant) antifebriles potiones: adhuc topica quoque carpis manuum superligarunt, & amuletum quoddam de collo suspenderunt. Quibus omnibus fe-

bris non tantum non imminuta, sed in principio Aprilis duplicata fuit, ita ut jam quotidie, & quidem vehementius quam antea, invaderet. Tandem 17. Aprilis meum consilium imploratum est. Inveni ægrum satis debilem, cum appetitu dejecto, & adeo emaciatum ut sola cutis ossa contegere videretur. Præcedente die vomitorium sumpserat, ita ut ipsum amplius purgare necessarium non videretur. Quapropter præscripta conveniente diætâ, apozema quoddam aperiens & refrigerans dedi, quod tribus diebus ebibit, sed nihil profuit. Deinde sequentem puppam in vino albo tenui suspendendam præscripsi.

℞. *foliorum cardui benedicti,*  
*centaurii minoris,*  
*absinthii, ana p. ij.*  
*aloes lucidæ scrup. ij.*  
*herbæ minutim conscindantur, & ligentur*  
*simul in puppa, quæ suspendatur in*  
*vini albi tenuis lib. v. & interdum exprimatur.*

Hujus vini amari primo die bis, reliquis diebus quotidie semel haustum unciarum quatuor vel quinque bibit. Hinc quotidie leviter purgabatur, & febris rursus simplex evadebat, atque exinde quotidie minuebatur, eademque puppa adhuc semel reiterata, prorsus evanuit, & appetitus egregie restitutus fuit.

## OBSERVATIO. LXXVIII.

### *Febris tertiana intermittens notha.*

**D** Omina de Nassau, mulier florentis ætatis & macilenta ac delicatula, 23 Aprilis febris tertiana intermittente non exquisitâ correpta fuit, quæ alternis quidem diebus, sed incertis horis, modò citius modò tardius, cum capitis dolore, nausea, cordis anxietate, & maximo rigore invadens, post quinque sexve horas in immensum sudorem terminabatur. Appetitus planè dejectus, & somnus brevis ac turbulentus erat. A medicamentis valde abhorrebat ægra, cumque vehementer sitiret, nihil aliud quam aquam fontanam bibere voluit, cujus sex vel octo libras durante paroxysmo ebibebat. 25 Aprilis, ingruente paroxysmo ad ipsam vocatus fuit. Ut sudor tunc citius provocaretur hunc haustum exhibui.

℞. *salis absinthii,*  
*extracti cardui bened.*  
*confectionis de hyacintho, ana drach. j.*  
*aquæ theriacalis unc. j.*  
*misceantur pro haustu.*

Postridie libenter purgans medicamentum exhibuissem, sed noluit assumere, solummodo clysterem admisit, à quo bis dejecit, simulque per quatrimum medicamentorum usum intermisit. 1 May apozema refrigerans & aperiens præscripsi, quod intra biduum ebibit, febre tamen in eodem statu permanente. 3 May Capitaneus de Gone se mixturam quandam scire affirmabat, quæ pulsibus carpi superligata febres certò experimentò intra triduum fugabat, ejusque se miraculosos effectus sæpius vidisse dicebat. Ægra morbi pertæsa, eandem applicuit, verum cum tridui spatium nihil levaminis inde perciperet, & febris eo tempore duplicaretur, ac jam quotidie invaderet, topicum illud cum abominatione rursus abiecit, atque meum consilium iterum expetiit. Cum autem ordinariè durioris alvi foret

foret, nec aliis quam fortioribus medicamentis purgari solita, atque omnia quæ vel minimum medicamentosum saporem habebant repudiaret, sequens vomitorium exhibui, quod assumens putabat se vinum purum bibere.

℞. croci metallorum gr. xvi.  
vini Gallici albi unc. iij. vel v.  
fiat maceratio per noctem, & postridie  
fiat colatura per chartam emporeticam  
duplicem.

Hunc haustum sexto May, tempore matutino assumpsit. Circa horam nonam cepit vomere, qui vomitus cum primò sine magna anxietate aliquantum perdurasset, tandem cum gravi molestia bilis flavæ ac viridis, multo tenacissimo pituitoso muco permixtæ, circiter integram matulam plenam evomit: cessante vomitu, etiam duostresve secessus per alvum habuit. Magnum à tanta evacuatione sperabatur levamen, quod ad opinionem subsequutum non fuit, sed febris in eodem planè statu remansit. Tunc vini absinthitis magistralis usum commendavi, à quo licet admodum abhorreret ægra, tamen sanitatis cupida etiam illius periculum facere voluit. 8 igitur May illud sequenti modo præscripsi.

℞. herb. cardui bened.  
centaurii minor.  
absinthii, ana p. ij.  
aloes lucidæ drach. j.  
herbis minutim conscissis, fiat puppa  
oblonga, cui in vitrea lagena suspensæ  
affundantur vini albi tenuis gallici  
vel Rhenani, canthari duo, id est,  
lib. viij.

Hujus vini primò biduò manè & vesperi haustum unciarum quatuor bibit, sed cum alvus ter quaterve de die moveretur copiosius (quod tamen mirum erat, cum ægra vix aliis fortioribus catharticis purgari ordinariè posset) postea semel tantum de die, nempe matutino tempore, illud assumere jussi. Die quarta ab usu hujus vini febris simplex, & multo mitior ac brevior evasit, atque exinde quotidie sic imminuta fuit, ut ægram octava die prorsus relinqueret. Ad majorem tamen certitudinem adhuc per quatrimum in vini illius usu continuavit, à quo quotidie duos secessus habuit: etiam appetitus cum somno rediit, & ægra paucis diebus deperditas vires recuperavit.

#### Annotatio.

**H**oc tempore febres tertianæ intermittentes nothæ, non tantum Noviomagi, verum etiam in circumvicinis locis passim grassabantur, quæ diuturnæ erant ac pertinaces, in nonnullis simplices, in multis quoque duplices. Rarò medicamentis citius curabantur, multa ordinaria præsidia sæpe frustra adhibebantur, & venæsectiones nihil omnino proderant. Nonnulli subinde leves dolores in dextro hypochondrio sentiebant, alijs lingua semper amara erat: aliqui etiam sponte copiosam bilem evomebant: multis capitis dolores, alijs cordis anxietates, omnibus autem sitis ingens in paroxysmo aderat, cum magno frigore in initio, & immenso calore in fine. Causam hu-

jus febris è bile extremamentitia, in folliculo fellicis & circumvicinis locis putrescente, procedere, ipsa signa & mos febris satis indicabant. Interdum vomitorijs potenter evacuatâ mali causa, brevi cessabat morbus: multoties autem neque his, neque alijs catharticis cedebat malum, propterea quod bilem quidem copiosam exturbarent, sed non ita, quin sæpius adhuc sedem affectam bilis corruptæ reliquiis infectam, relinquerent, ad quam novi humores denuo affluentes, ejusdem quoque corruptionis participes fiebant, atque ita ex hoc fomite febris identidem succendebatur. Venæsectio non proderat, quia mali sedes non erat in venis aut sanguine. Refrigerantia medicamenta bilem hanc citò edomare non poterant,

rerant, propterea quod eò vix satis permeare possent, cum folliculus solummodo id attrahat quod est in sanguine amarissimum & calidissimum, ita ut refrigerantia tantum amputando causam antecedentem, nempe bilioforum humorum generationem, prodesse possent. Cum hæc omnia pensiore iudicio mecum trutinarem, ad hujus febris curationem mihi visum fuit requiri medicamentum aliquod detergens, aperiens, amarum & modicè calidum, idque in substantia tenuiore & liquidiore; ut ratione tenuis liquiditatis venas melaericaas facilius permeare ratione verò caloris & amaritudinis à folliculo fellis commodius attrahi, atque etiam cruditates melius concoquere, obstructions tollere, putredini resistere, locum affectum detergere, & noxios ac superfluos humores leniter expellere posset. His omnibus intentionibus abundè satisfacere videbatur tale vinum absinthite, quale Josepho Wintjes & Dominæ de Nassau præscripti; cujus vini nostri salutaris usus, non tantum in his duobus, verum etiam in innumeris aliis ægris ab ipsa experientia confirmatus fuit, utpote quo solo multoties, absque ulla alterius medicamenti exhibitione, plurimos tertianarios curavi: imo etiam in quartana & quotidiana, aliisque mixtis febribus semper plurimum contulisse observavi. Non est quod quispiam existimet nos contra omnium veterum institutum malè ex-

hibere vinum in febribus, quia veteres de simplici vino, non de medicato sic locuti sunt, quod inde liquet, quod cum Galeno multi alii veteres & neoterici vinum absinthite ad febres plurimum commendaverint. De ipso absinthio etiam quæstio moveri solet inter medicos, an medicamenta ex eo parata conveniant in quibuscumque febribus tertianis, exquisitis nempe & nothis. Trallianus lib. 12. cap. 6. in nothis tantum convenire scribit minime vero in exquisitis. Idem sentiunt Avicenna lib. 4. fen. tract. 2. cap. 10. Oribasius lib. 14. collect. cap. 49. & Amatus Lusitanus cent. 7. curat. 43. Contra verò Galenus lib. 1. de arte curativa, cap. 9. illud etiam in exquisita tertiana exhibet: *si tibi (inquit) coctionis signa monstrantur, jam cum fiducia absinthium potes exhibere, quod alioqui summum est stomachi remedium, ubi bilis infestaverit, si præsertim ex ipsius coma quantum sufficiat accipiens, melicrato intinxeris.* Ad quæstionis decisionem dico, absinthium in exquisitis non minus quam nothis convenire, imprimis post coctionem, cum bilem potenter detergat & per alvum ac urinas evacuet, eaque ratione febrilem fomitem subducendo febrem necessario imminuat: ac proinde etiam calorem & siccitatem ejus non multum extimeri debere, imprimis si absinthium cum aliis refrigerantibus detur, quia exturbata bile, calor sponte cessabit.

## OBSERVATIO. LXXIX.

*Colica passio.*

**P**etrus Galmam, mercator Germanus, mense Martio, tempore pluvioso & frigido mecum in itinere erat; cum autem propter viæ incommoditatem equi nostri tantum lento gradu procederent, equitando calefieri non potuimus, sed ob frigidam pluviae humiditatem valde refrigerati sumus: quod frigus illi vehementissimam colicam passionem induxit, ita ut vix diutius equo insidere posset. Primum quod in via invenimus diversorium ingressi, ante luculentum ignem nos egregie calefecimus, & ad illius colici doloris mitigationem mappas calefactas ventri aliquoties calidissimè imposuimus. Verum cum dolor nihil minueretur, sed magis cresceret, nec ad mali sanationem medicamenta ibi ad manum essent, sumpsi saponis communis & vini albi ana unc. j. hæc miscui & super ignem egregie calefeci, calefactis addidi spiritus vini unc. j. Hac mixtura madafacta linthea quadruplicata, magnitudinis palmæ manus, calidissimè umbilico imposui, atque hoc solo topico ab acri isto dolore intra horæ quadrantem omnino liberatus est.

*Annotatio.*

**P**ræter plurima insignia remedia quæ ad colicæ flatulentæ curationem intus assumuntur, etiam varia topica sunt, quæ foris adhibita nonnunquam plurimum conducunt, quod vidimus in nostro ægro, qui hac mixtura ex sapone egregiè & citò sanatus fuit.

Hoc in casu à multis tanquam singulare laudatur etiam oleum è sapone distillatum, cujus extractionem describit Sennertus in institutionibus: nec minus efficax est oleum galbani. Imò galbanum ipsum cum vino vel aqua vitæ dissolutum, & castoreo mixtum, atque instar emplastri umbilico

bilico impositum, ut & gummi caranna & tacamacca cum spiritu terebinthinæ dissoluta, maximopere prodesse comperta sunt. Hollerius parat linimentum ex civetha: *Probatissimum* (inquit) *mibi est istud linimentum*:

Rec. olei rutacei,  
nardini, ana drach. vj.  
galbani aqua vita dissoluti drach. iij.  
liquefiant simul, deinde adde,  
civetha, gr. iij.  
croci, gr. vi.  
misce fiat litus.

Gregorius Horstius lib. 4. obser. 12. theriacam cum pauxillo zibethi feliciter umbilico inunxit. Multum etiam confert, si sal commune & arena æqualibus partibus calefiant, & sacco lineo infusa, calide ventri applicentur. In vulgari usu est lapis ophites calefactus, quem Ser-

pentarium vulgo appellant. Non sine magna utilitate faceuli quoque conficiuntur ex floribus anethi, chamomillæ, meliloti, semine cumini, anisi, fœniculi, aliisque similibus, qui vino irrorati ac calefacti, vel in vino leviter excocti, calide ventri applicantur. Unum adhuc de sapone, quod quondam, cum in Gallia Pictavi versarer, circumforaneum quendam viderim, qui colicam flatulentam unico enemate passim curare dicebatur: ita ut plurimi ægroti ad ipsum concurrerent: quod illius secretum dexteritate quadam rescivi, neque erat aliud quam hoc.

Rec. vini malyatici lib. j.  
saponis hispanici unc. f. vel drach. vi.  
interdum etiam unc. j.  
salis drach. ij.  
ex his simul dissolutis fiat  
enema tepide iniciendum.

## OBSERVATIO. LXXX.

*Obstructio Lienis.*

**J**ustinus de Nassau, puellus nobilis, sex annorum, circa finem mensis Aprilis obstructione lienis laborare cepit, quæ intra duas septimanas tantum adaucta est, ut lien durus ad pugni dimidii altitudinem foras protuberaret. 15 May, cum ipsum primò inviserem, tumorem lienis manibus sentii, & puellum, qui antea satis alacris esse solebat, instar hominis senioris plane melancolicum inveni. Cum autem à medicamentis ita abhorreret, ut vix quicquam assumere posset, tantum diætam convenientem præscripsi, ac tartari pulverisati drach. f. quotidie manè & vesperi cum aliquo juscule dari jussi. Præterea sequens emplastrum lienis regioni imposui, quod cum per decem dies impositum, & deinde adhuc semel renovatum fuisset, evanuit cum tumore durities illa lienis, & obstructio dissipata fuit.

℞. gummi ammoniaci,  
galbani, aceto dissol. ana unc. f.  
emplastri de meliloto. drach. iij.  
misceantur, & extendantur in corio rubro.

## OBSERVATIO. LXXXI.

*Suffocatio Uterina.*

**G**odefrida ab Essem, mulier circiter triginta annorum, suffocatione uterina, identidem redeunte, per octiduum laboraverat, ad quod malum toto illo tempore ab obstetricibus & aliis mulierculis ipsi varia exhibita fuerant remedia, sed omnia sine fructu. Maritus ejus peregrè versabatur, ita ut etiam Veneris usus præscribi non posset. Tandem 17 May, admodum ingruente paroxysmo, quo ipsam morituram omnes arbitrabantur, meum quoque consilium petitum fuit. Inveni ægram facie aliquo modo rubicundam, omnis

N

tamen

tamen sensus expertem, & solo anhelitu, eoque valde exili viventem. Uterum usque ad guttur ascendisse (quod tamen impossibile erat) aiebant mulieres praesentes: verum in superiore ventriculi regione duritiem quandam magnitudinis pugnari, modò ad unum, modò ad alterum latus divagantem, ipsemet manu sentiebam. His ita se habentibus, praesens remedium malum hoc exigere res ipsa indicabat. Per os autem nihil exhiberi poterat, cum enim agra sui impotens non deglutiret, medicamentum non sine suffocationis periculo in asperam arteriam delapsum fuisset. Primò itaque oleum succini per descensum distillatum, temporibus & naribus infricavi, ac castoreum cum assa fætida naribus objeci. Deinde jussi ut obstetrix digitum suum tribus quatuorve granis zibethi inunctum, uteri collo infereret, idque aliquantum fricaret. Interea alia quaedam mulier praedictam duritiem manu deorsum pellere nitebatur: atque ita intra semi horæ quadrantem agra nostra semen fætidum ejecit, & quæ alterum pedem in cymba Charontis jam habere putabatur, revixit, neque deinde paroxysmus rediit.

### Annotatio.

**O**dorata inferius supposita uterum deorsum trahere, non tantum auctorum testimonia, verum ipsa quoque experientia docet. Galenus inquit, odorata, & quæ calefacere ac laxare possunt, hac ipsa ratione juvare quod calefaciant: quæ verò calefaciunt, etiam extenuant & laxant, unde fit ut quod retinetur præter naturam crassum & difficulter mobile, extenuatum mox per apertos poros facile expurgetur. Habent etiam hoc quod flatus discutiant, qui in uterina suffocatione multoties etiam adesse solent. Paulus Aegineta jubet unguenta odoratissima in uterum infundere. Acutius uterum suffici præcipit aromaticis remittendis, calefaciendi, flatumque educendi vim habentibus: idque ex præscripto Hippocratis, 4. Aphorif. 28. dicentis: *Suffusus aromatum muliebria ciet, idemque ad alia non raro valeret, nisi capitis gravitatem adferret.* Quapropter diligenter cavendum ne hujusmodi odorata ad nates perveniant, & caput magis aggravando suffocationem adaugeant. Solent Medici in hunc usum varia sumere aromata, verum ego interdum moscho cum paucis olei liliorum mixto utor, pleurumque tamen solum zibethum pudendo infricari jubeo, eoque solo mirabiles saepe edidi effectus. Sola etiam fricatio seu titillatio (quam, tanquam Christiano medico illicitam, reiiciunt Mercatus, Sennertus, Riverius, & nonnulli alii) cum digito facta multum juvat, eaque à Galeno, Avicenna, Valesco de Taranta, Simone Betreino aliisque magni nominis Medicis summo opere commendatur, præcipue in viduis & castè viventibus, minus tamen in virginibus (quamvis etiam has tali modo servare, quam Morti prædæ relinquere præstet) & maritum

habentibus, cum longè excellentius & gratius remedium sit ut viro copulentur; unde etiam Hollerius, Forestus, Leonellus, Platerus, Sylvius, multique alii dicunt, nullum melius remedium esse marito. Quod maxime intelligendum est de illa suffocatione quæ fit ex retento vel corrupto semine. Qua de re historiam habemus apud Duretum, in enarrat. ad cap. 59. Hollerii: *Nuper (inquit) vocatus sum nocte media ad curationem mulieris quæ hysterica suffocatione laborabat, & conciderat quasi mortua: eam inveni frigidiorē marmore, pulsus erat parvus: maritus aderat, de uxoris salute valde sollicitus bene est, dixi: jussi ut rem cum uxore haberet: rem habuit, indeque statim convaleuit.* Aliam historiam scribit Matth. de Gradib. consil. 84. de nobili muliere Germana, mediocris ætatis & bonæ habitudinis, quæ cum senescente marito rarius venere uteretur, furore, mentisque perturbatione ac rugitibus in ventre nonnunquam graviter corripiebatur, quæ omnia cessabant cum concepisset; at si per annum unum aut alterum à conceptu immūnis esset: redibat affectio. Hoc ipsum quoque confirmatur Hippocratis doctrinā, qui libro de morbis virginum, circa finem, inquit: *Equidem virginibus sæpe, quibus tale quid accidit, ut citissime viris conjungantur, si enim conceperint, sana evadunt.* Quod ipsum docet lib. de nat. mulieb. Ita & Valesco de Taranta, philon. pharmac. lib. 6. cap. 10. *Si fiat (inquit) affectus in virgine propter retentionem spermatis, nunciat illa, & morbum effugiet.* Capiuaccius verò præf. lib. 4. cap. 10. ut efficacius sit hoc remedium, jubet ut vir penem inungat oleis aromaticis & zibetho, atque cœat.

... morbum effugiet. Capiuaccius verò præf. lib. 4. cap. 10. ut efficacius sit hoc remedium, jubet ut vir penem inungat oleis aromaticis & zibetho, atque cœat.

HISTO-

## OBSERVATIO. LXXXII.

*Erysipelas cruris.*

**D**omino Kelfken, urbis Noviomagi consuli, dextrum crus erysipelate correptum fuit, cui malo sæpius etiam antea obnoxius esse contueverat. Sexagenarius erat, & corpore valde cacochymo. Erysipelati, ex more vulgi, ipsemet imposuerat lintea intincta in aceto & aqua florum sambuci, quibus erysipelas aliquantum quidem minuebatur, sed vesiculæ quædam hic illic excitatæ fuerunt, quales etiam antea ab hujus aceti & aquæ usu sæpius habuerat: his acu pertusis imposuerat folium tabaci viridis (quo præcedentes vesiculas semper curaverat) quod cum per tres quatuorve dies applicatum fuisset, ab acrimonia humorum effluentium cutis magis magisque exulcerata fuit, ac in medio particula quædam nigra & gangrænosa apparuit, qua visa, æger sibi metuens chirurgum accersiri jussit. Hic particulam istam gangrænosam in sola cute hærentem facile exscidit, & variis emplastris impositis solutionem sanare conatus fuit, toti cruri propter erysipelas inungens unguentum refrigerans Galeni. Atque isto modo æger per sex septimanas tractatus est. Tandem cum variis & sæpe mutatis emplastris ac unguentis nihil omnino proficeretur, sed malum indies accresceret, mense Junio etiam ego ad curationem advocatus fui. Animadverti ægrum multis aquosis ac pituitosis humoribus abundare, qui falsi ad crus descendentes hujusmodi continuam exulcerationem inducebant: hinc etiam alvum humidam & liberam, imò quatuor vel quinque secessus quotidie habebat. Appetitus mediocris erat: sed à medicamentis tantopere abhorrebat, ut nihil, nisi extrema urgente necessitate, per os assumere vellet. Inspecto crure, comperi emplastra in causa fuisse quod vicinæ partes exulcerarentur, cum enim ob pinguedinem & densitatem humores acres & falsos effluentes in se retinere vel exsugere non possent, illos ad circumvicinas partes effluere necesse erat, quæ ab eorum acrimonia exedebantur. Proinde crus illud cataplasmatibus curare præstabilius mihi visum fuit, quæ ob mollitiem humores effluentes imbibere ac in se continere, partemque exficcare possent. In hunc finem sequens cataplasma absque ulla pinguedine præscripsi.

℞. corticum granatorum,  
 flor. balaustiorum, ana unc. i.  
 foliorum quercus,  
 plantaginis, agrimonie,  
 sanicula, ana m. ij.  
 pimpinella,  
 flor. rosarum rub. ana m. j.  
 aque communis lib. iiij. coquantur ad medias.

℞. foliorum quercus m. iiij.  
 agrimonie,  
 plantaginis, ana m. j. f.  
 pulveriscentur simul, tunc adde  
 farine fabarum unc. ij.  
 decocti prædicti q. s. coquantur  
 aliquantum, & fiat cataplasma.

Hoc postea aliquoties reiterato, ulcus omnino sanatum fuit. Circiter tertio post sanationem mense, rursus nova defluxio ad crus descendit, magnum ulcus erysi-



pelatodes inducens. Præter unicum haustum purgantem, & unum decoctum ex radicibus chynæ, falsæparillæ, & similibus, nullum aliud medicamentum assumere voluit. Impositum fuit antedictum cataplasma, quo res ad tempus bene successit: tandem verò nova rursus accedente defluxione cum magno erysipelate, dolores valde accreverunt, ulcus multum extendebatur, ac paulo post etiam gangræna partem invasit, & in cruris exteriori latere particula gangrænosa nigricans, latitudinis daleri imperialis, conspiciebatur. Chirurgus vino tepido partem affectam aliquantum abluit, ac postea unguento mundificativo ex apio inunxit, & prædictum cataplasma superposuit; atque his aliquot diebus continuatis, gangrænosa particula tandem exciderunt. Tunc ulcere prius mundato, solum cataplasma impositum est. Interea ad humorum descendantium commodiorem evacuationem, libenter fonticulum in suræ exteriori parte fecissem, verum illud permittere noluit æger. Mense Martio ulceribus jam sanatis, rursus nova accessit acris defluxio cum erysipelate, hinc ab utroque cruris latere novum ulcus latitudinis palmæ manus excitatum fuit. Cataplasma impositum nihil profuit, vires cum appetitu dejectæ sunt, & æger adeo debilis evasit, ut amplius incedere non posset. Paulo post gangræna ad palmæ latitudinem subito accessit, Æger periclitari nobis visus fuit, tam propter cacochymiam corporis, quam propter magnam virium debilitatem. Ulceribus gangrænosis inunctum fuit unguentum mundificativum ex apio, & cataplasma superpositum; si spiritus vini admoveretur, tantus excitabatur dolor, ut illum protinus abiicere necesse foret. Tunc fonticulum in sura fieri permisit æger, quem sectione novaculæ libenter fecissem, verum cum inde nimis abhorreret, cauterium potentiale, holosericum Paræi, impositum fuit, quod sine ullo dolore operationem suam brevi peregit. Post tres quatuorve dies gangræna in ulcere multum adaucta est, atque etiam invasit locum illum cui cauterium imposueramus, unde eschara nondum exciderat. Hunc proinde locum cauterisatum ad carnem usque vivam scarificavit chirurgus, ut eschara citius separaretur, cujus etiam frustula quædam excidit. Sequentibus tribus diebus gangræna magis magisque accrevit, ita ut in loco fonticuli carnis emortuæ pars magnitudinis daleri imperialis, & profunditatis latitudinis pollicis, exscindenda foret. Postridie gangrænosa partes fætebant instar cadaveris putrescentis, tanto fætoe quem vix quispiam astantium ferre poterat, & gangræna continuo crescebat. Ut mortificationi ac putrefactioni resisteretur, partes infectas abluimus cum spiritu vini in quo sal commune dissolveramus, & petias eodem liquore madefactas imposuimus, ulcusque ter de die religavimus, quò mediò fætor fere totus intra sesqui diem recessit. Deinde ut gangrænosa & emortuæ partes à vicinis per supurationem citius separarentur, & sanæ à corruptela præservarentur, balsamum nostrum magistrale impositum fuit, quod putredini potenter resistebat, & supurationem egregiè promovebat: atque ita partes gangrænosa paulatim ceperunt excidere; quibus ablatis, per aliquot dies impositum fuit unguentum digestivum, ac tandem rursus solum cataplasma, quo ulcera progeffu temporis, sed admodum lentè, sanata sunt, humoribus postmodum per fonticulum effluentibus. Hoc ægro, qui ab omnibus pro desperato habebatur, præter multorum opinionem, sanato, magnum nobis honorem conciliavimus.

HISTO.

## OBSERVATIO. LXXXIII.

*Febris tertiana exquisita*

**D**ominus Wilmout, capitaneus eques, vir robustus, febre tertiana exquisita intermittente correptus est. Post tertium paroxysmum me vocavit. Exhibui intermissionis die medicamentum purgans, à quo sex septemve vicibus multa biliosa deiecit, & bis etiam evomuit. Cum verò postridie febris eadem vehementia reverteretur, nullum medicamentum amplius assumere voluit, sed alterius Capitanei consilio pulsibus in utroque carpo sequentem mixturam applicuit, qua ille alter dicebat se multoties quasi miraculosè febres intra triduum vel quatrimum ita fugasse, ut non reverterentur amplius.

*℞. sem. sinapi albi aceto præparati drach. j. f.*

*piperis nigri gr. xv.*

*alliorum bulbos quinque*

*salis, p. j.*

*fuliginis camini,*

*fermenti acidi, ana drach. iij.*

*contundantur simul, & cum pauxillo*

*aceti rosacei fiat pasta: cujus particula*

*magnitudinis daleri imperialis singulis*

*carpis applicetur, & adhæreat per triduum.*

Hoc triduo febris ita remisit, ut sexto paroxysmo finiretur, septimus enim vix sentiebatur. Ab illo autem topico vesica dolorifica in utroque carpo excitata fuit, quæ deinde pertusa, ablata, & facile rursus consolidata fuit.

*Annotatio.*

**N**oster æger, multique alii qui illum sic curatum viderant, totam curationem huic solo topico ascribebant, sed malè, cum illa febris post corporis expurgationem, etiam absque illo topico, & absque aliorum medicamentorum usu, sponte isto temporis intervallo cessasset, nam æger exactam diætæ normam servabat, & ipsa febris erat exquisita tertiana intermittens, quæ, ut millies observavi, ultra septimum paroxysmum non extenditur, nisi error aliquis, in diætâ committatur: de qua habemus regulam Hippocratis 4. Aphor. 59. *Tertiana exquisita septenis, ad summum, circuitibus judicatur.* Ego millies varia topica carpis imposita vidi, sed illud plerumque observavi, hæc nihil adversus febres profuisse; & si forte post eorum applicationem febres imminutæ vel curatæ fuerint, illud non istis topicis, sed aliis quibusdam causis semper necessario ascribendum fuisse. Memini me quendam vidisse diuturna febre tertiana notha detentum, qui cum nullis remediis à duobus Medicis exhibitis curari potuisset, tandem aniculæ consilio zingiber, semen nasturtii, & telas araneorum cum pauxillo unguenti po-

pulei subegit & carpis imposuit. Hoc topico bis terve renovato, intra quatrimum cessavit febris: sed quomodo? anne singulari hujus topici facultate? minimè: verum inde, quod hoc topicum casu applicaretur tali tempore quo natura jam jam crism per alvi fluxum biliosum ac copiosum moliebatur, quæ crisis postridie à topici applicatione superveniens, & duobus diebus perdurans, evacuato morbi fomite ægrum à febre liberavit, quæ tamen curatio à medicine ignavis huic topico tunc ascribebatur. Alium novi, cui cum post similis topici applicationem enormis criticus vomitus supervenisset, à febre liberatus fuit, non topici, sed vomitus vi. Innumera hujusmodi vidimus exempla. Solent autem vulgares ultimo remedio morbi curationem tribuere, atque ille error de his topicis ad Medicos nonnullos doctiores etiam permanavit, qui medullam rei non satis perscrutantes, alii hæc, alii illa maximis laudibus extollunt, quorum tamen pleraque tantum mera sunt deliramenta, nulla prorsus rationis verisimilitudine sustentata. Ita solas araneorum telas plurimi magni faciunt, de quibus

quibus Abraham Seiler (in epist. à Scholzio collect. ep. 3.) ita scribit: Expertus sum, si ante accessionem febrilem tela aranea cum unguento populeo incorporata, carpo & temporibus, ubi pulsus deprehenditur, apposita fuerint, plurimum consulisse. Has telas alii sic miscent.

Rec. *urtica minoris*,  
*salvia*, ana m. f.  
*tela araneorum unc. f.*  
*salis communis drach. iij.*  
*aceti fortis cochlear j.*  
 misce pro emplastro, quod pulsibus  
 utriusque manus per duas horas  
 ante paroxysmum applicetur.

Ægyptii, teste Prospero Alpino de medic. Ægypt. lib. 4. cap. 15. unguentum parant ex ipsis araneis cum suis telis contusis, & cum oleo rosaceo ad linimenti formam mistis: vel ex araneis in oleo rosarum coctis, quo calido carpum utriusque manus inungunt. Alii talem mixturam parant.

Rec. *fol. plantaginis*,  
*chelidonia maj. ana m. j.*  
*tela araneorum*,  
*femina urtica*,  
*fuliginis camini*,  
*salis communis, ana drach. j.*  
*aceti fortiss. q. f.*  
 fiat cataplasma, carpi paulo  
 ante accessionem applicandum, &  
 ter quaterve renovandum.

Platerus observat, lib. 2. horum loco sumit corticem internam nucis arboris, eumque in aceto forti maceratum pulsibus applicat: quo loco etiam hoc laudat.

Rec. *fol. thlaspi*,  
*plantaginis*,  
*bursa pastoris ana m. f.*  
 cum sale & aceto contusa  
 applicentur.

Alii fuliginem è furno cum nasturtio & ovi albumine contusam: alii eandem fuliginem cum allio & capis mixtam: alii folia ranunculi recentia contrita: alii auriculam muris cum sale & aceto contusam: alii sempervivum minimum eodem modo paratum carpi applicant. Novi mulierem medicaltram, quæ semen zedoariæ contusum & cum oleo terebinthinæ mixtum pulsibus carpi imponit, atque sic multos sanare creditur. D. Coëtius, Medicus Arnhemensis doctrina & experientia celebris, hoc sequens topicum carpi applicat, idque multis profuisse asserit.

Rec. *herb. chelidonia maj. viridis*,  
*matricaria, ana m. f.*  
 contusis in mortario adde,  
 pulveris olibani drach. j.

*fermenti acidi drach. iij.*  
*aceti fortis q. f. fiat*  
*pasta molliuscula.*

Atque ita de his topicis alii alia sibi somnia sinxerunt. Verum quantumvis hæc à multis laudata existant, non intelligo tamen qua facultate, quibus viribus, qua ratione prodesse possint; imò ipsorum quoque ingredientium notissimæ facultates horum vanitatem plus satis arguunt, & omne quoque ad occultas qualitates refugium præcidunt. Dixi jam quod interdum calu, & in quibus casibus prodesse videantur, cum tamen re vera per se nihil prosint. Videtur etiam Sennertus his topicis parvam fidem adhibuisse, nam de febr. lib. 2. cap. 18. de iis sic loquitur: De modo, si queratur, quo hac medicamenta agant, vix alia quam hac ratio reddi potest, quod ab istiusmodi medicamentis putridus vapor à corde & suo foco revocatur & revellitur, ac præcipue inquinamentum illud seu plures humores corrumpens evocatur, maxime si pauca amplius putredo restet, & febris in declinatione sit. Quæ ratio aliquam habet verisimilitudinem in iis quæ vesicæ in carpi excitant, atque secundum illam omnia vesicatoria hæc febrifuga vi aliquo modo polerent. De reliquis verò, ut telis araneorum, plantagine, matricaria, olibano, salvia, zedoaria aliisque pluribus, nulla conveniens ratio non modo non datur, imò ne effingi quidem vel excogitari potest. Attamen Riverius putat hæc vires suas cordi communicare per arterias insignes ad carpum decurrentes, atque ita aliquid præstare posse. Verum hæc quoque ratio magis speciosa quam efficax est, nam per arterias cor à se expellit, ita ut topicorum vires per has ægerimè ad cor ascendere queant; præterea hæc ratio nondum docet, qua vi topica hæc, quorum qualitates notissimæ sunt, prodesse possint, & nisi fiat refugium ad sacram anchoram, nempe occultas aliquas qualitates, non video quomodo Riverius aut alius quispiam ex hac difficultate se extricare possit, quamvis etiam plurimis horum topicorum ingredientibus qualitates adeo occultæ non sint, quæ non philosophis & medicis notissimæ existant. Præstat igitur de his topicis febrifugis ita concludere, nempe, abstinendum quidem esse a venenatis & corrosivis, tanta malignitate præditis ut manifestam aliquam noxam inferre possint: verum reliqua (quorum plurima si non prosint, saltem non nocent) interdum à Medicis præscribi posse, non tam ut inde febris profligatio & sanatio ægri expectetur, quam ut opinioni vulgi satisfiat, quod in talibus nugis magnam fiduciam habere solet. In febris enim longioris curatione vulgares sæpe malè loquuntur de Medico, quod morbum citius sanare non potuerit, atque tunc, ut apud tales sciolos honor Medici conservetur, morbo jam declinante talium topicorum applicatio conveniet & efficax videbitur, atque morbus declinans, qui brevi per se cessaturus erat, prudentiâ Medici, ac huiusmodi topici efficacia fugatus fuisse putabitur.

HISTO.

## OBSERVATIO LXXXIV.

*Faciei tumor à Casu.*

**M**aria de Trift, juvenula florentis ætatis, 3 Junii curru, cui insidebat, per aurigæ imprudentiam ab aggere dejecto, gravi admodum casu cecidit in faciei sinistram latus. Statim fortiter evomuit: & per semihoram animi deliquium passa fuit. Cum ad se rediret etiam sanguinem evomuit, sed ille per palatum è vena aliqua in naribus disrupta ad ventriculum descendisse videbatur. Vehementer intumuit totius capitis dimidia pars, ita ut vix oculi sedes in facie conspici posset. In exteriori orbitæ oculi parte exigua erat solutio continui. Ex interiori oculi angulo sanguis etiam effluebat. Cum domum delatam inviserem, ad contusionis & tumoris dissipationem, tale fomentum imponi curavi.

*℞. fol. betonica,  
flor. chamomilla,  
meliloti, rosarum rubr. ana m. f  
sem. cumini drach. j.  
conscindantur & consuantur in  
parvo sacculo, qui aliquantum in vino  
coctus & expressus, calidè imponatur.*

Non parum de cranii fissura dubitabam, propterea quod statim à casu vomuisset, animi deliquium accessisset, sanguis ex oculo effluxisset, & maximus tumor cum contusione adesset, Post topici applicationem etiam sanguinis lib. f. è dextro brachio extraximus. Circa noctem febricula cum rigore accessit, quæ assumpto sudorifero brevi evanuit, neque postea rediit. Sequenti die haustum purgantem dedi, à quo quatuor secessus habuit. Per biduum continuatum fuit in prædicta fomentatione, eandem bis terve de die renovando. 6 Junii facies multum detumuerat, ita ut oculus mediocriter aperiri potuerit, qui totus rubore suffusus erat, multumque lachrymabat, nec ægra quicquam ex eo videre poterat. Fomentatione adhuc per duos dies continuatâ, postea oculo per quatrimum hoc collyrium repellens inter duo tenuia linteamina toti oculo impositum fuit, manè & vespere renovando.

*℞. albumina ovorum no. ij.  
concutiantur cum frusto aluminis  
tam diu donec crassescant in formam  
quasi unguenti durioris, tunc stappa  
cannabina excepta, inter duo linteamina  
imponantur.*

Istò collyriò rubedo oculi brevi sublata, lachrymatio multum imminuta, & visus egregiè restitutus est. Tumore faciei plane dissipato, magnus ac fædus rubor in tota mala remansit, qui cum variis domicellarum consuetis lotionibus non evanesceret, tandem à me usu lactis virginalis curatus fuit: quo facies ter quaterve de die lavabatur. Interea tamen semper remanebat adhuc aliqua oculi illachrymatio, ægræ molestissima, quæ cum variis adhibitis remediis non cederet, placuit ad diversionem vulgare quoddam experimentum (quod etiam aliàs ad oculorum præservationem non semel feliciter adhibitum fuisse videram) experiri: jussi ut frustum carnis bubulæ crudæ & recentis, è museulis cervicis excissæ, nudum cervici

vici ægræ imponeretur, linteis deinde leviter collo circumligatis, idque manè & vesperi renovaretur. Hoc cum per quinque sexve dies fecisset, omnis illachrymatio (quod mirum) totaliter desit. Atque ita ægra pristinæ sanitati restituta fuit, excepto quod in exteriori oculi angulo circa genam cicatricem parvam retineret, quo loco os à casu depressum fuisse post curationem manifestò apparuit.

## OBSERVATIO. LXXXV.

*Strumæ in collo miraculosè sanatæ.*

**D**ominus Gualterus Vaine, nobilis Anglus, eques torquatus, atque apud nostrates equitum capitaneus, in adolescentia strumis in collo laboraverat. Plurimi ac præstantissimi totius Angliæ Medici & chirurgi, ad hujus mali curationem convocati, omnibus optimis remediis adhibitis, nihil omnino proficere potuerunt, sed malum indies magis magisque adauctum fuit, ita ut horribile fuerit visu. Consuluerunt tandem Medici ut Angliæ regem adiret, ejusque benedictionem expeteret, qua sola hunc morbum certò sanari posse asserebant. Pater ægri, qui præsentis Regis Caroli Secretarius erat, Regem adiit, ejusque benedictionem pro filio suo, tunc præsentem, supplex petiit. Rex misericordia commotus, manum dextram capiti adolescentis imposuit, atque hæc verba pronunciavit: *Tangit te Rex, sed Deus te sanat.* Et simul etiam nummum quendam (quem *Engelot* vocant) perforatum ac cerulea fasciola trajectum collo ejus circumligavit, huncque in perpetuam hujus divinæ sanationis memoriam toto vitæ tempore gestare jussit. Ab eo tempore malum paulatim, absque ullo Medicamentorum usu, sponte evanuit, idque paucis mensibus. Rogavi aliquoties hunc Dominum (cui Medicus ordinarius quondam fui) an nummum istum de collo deponere non auderet? Respondit, se non audere, quia noverat alios quosdam, qui hujus divini beneficii immemores, nummum abjecerant, quos eodem malo rursus puniverat Deus, atque hos, licet deinde Regia benedictione iterum donatos, nunquam tamen sanari potuisse, sed miserrimam usque ad mortem vitam degisse.

*Annotatio.*

**H**oc strumas sanandi divinum beneficium multi foliis Galliæ regibus ascribunt, inter quos primarius est Andreas Laurentius, qui libro proprio de strumarum mirabili curatione, hanc materiam latissimè tractat, & foliis Galliæ regibus hoc beneficium à summo Deo concessum esse asserit, ac lib. 1. cap. 3. omnes alios reges, atque inter cæteros etiam peculiariter Angliæ Regem ab hoc beneficio excludit. Sed experientia satis demonstrat, non foliis Galliæ, verum etiam Angliæ Regibus divinum hoc donum à summo Deo divinitus da-

tum esse (unde Angli malum hoc sua lingua appellant, *Kings euvel*, id est, morbum regium, vel potius morbum talem qui non nisi regia benedictione sanatur) nam præter hunc prædictum Dominum Vaine, mihi familiarem, qui etiamnum in vivis superest, adhuc alium vidi juvenem, filium Bipenniferi Capitanei Kellegræf, qui accepta ejusdem Regis benedictione, ab incurabilibus strumis quoque liberatus fuerat, & similem nummum de collo pendulum gestabat. Referunt etiam Angli innumeros hujusmodi ægros singulis annis tali regio contactu sanari.

HISTO-

## OBSERVATIO. LXXXVI.

*Obstructio Lienis.*

**C**apitaneus Aufsuma, vir florentis ætatis, obstructione lienis diu laboraverat, atque hinc valde melancolicus evaserat. Tandem lien etiam induruit, multumque intumuit, ita ut non parum foras protuberaret. Postquam in castris doctissimi Valentii aliorumque Medicorum castrensium consilio multis variisque usus fuisset remediis, & malum nihilominus ingravesceret, tandem Noviomagum ad me venit. Præscripsi primò dietam convenientem, in qua prohibui cibos muria diu asservatos, fumo induratos, omnesque alios difficilis digestionis, viscosos ac crassos, ut & flatulentos crudosque humores generantes, quales sunt caro suilla, bubula diu salita, vel fumata, anates, anseres, haleces quocunque modo præparatæ, salmones, soleæ, ostrea, conchæ, poma, pyra, omnesque fructus horarii, alique similes. Prohibui quoque vini fortissimi & dulcis, spiritus vini, cerevisiæ turbidæ ut Bredanæ & Roterodamensis, atque etiam fortissimæ, ut Bremensis & Brunsvicensis, usum. Commendavi cibos facilis digestionis & boni nutrimenti, præparatos cum talibus rebus quæ coctiones promovere, flatum discutere, & lienem prodesse possent: pro potu autem vinum tenue & mediocre, ut & cervisiæ medicamentum clarum, amaram potius quam dulcem. Imprimis in cibo & potu mediocritatem servare, etiam ambulationibus aliisque levibus exercitiis uti, jucundorum ac facietorum consortiis interesse, solitudinem ac sollicitudines & mærores fugere, somnum quoque diuturnum evitare præcepi. His actis, corpus cathartico convenienter expurgavi, & quia ab omnium medicamentorum usu maximè abhorrebat, tantum mane & vespere bonum haustum hujus vini medicati sumere jussi.

℞. cortic. rad. tamarisci  
 cappar. fenic. helenii,  
 polypodii quer. ana unc. f.  
 herb. trifolii palustris, m. j.  
 cuscute, scolopendriæ,  
 fumariæ, centaurii minor.  
 absinthii romani, ana m. f.  
 nucis moscatæ, bacarum juniperi,  
 sem. anisi, feniculi,  
 ameos, ana drach. j.  
 fiat s. art. pappæ, cui superfunde  
 vini albi tenuis lib. v.

Hoc epotò, eadem puppa reiterata fuit, addendo foliorum senæ mundat. unc. j. f. feminis anisi unc. f. atque tunc semel tantum de die, nempe matutino tempore, haustum bibit, à quo ordinariè bis terve alvum deiciebat. Ex horum usu aliquod quidem levamen percepit, & appetitus restitutus est, æger quoque aliquanto alacrior evasit, verum durities illa lienis cum magno dolore in eodem statu permansit. Cum autem æger nulla decocta, pulveres, condita, aliave medicamenta, imò vix jam præscriptum vinum diutius assumere vellet, reliquum curationis maximè topicis peragendum erat, quæ in hunc modum præscripsi.

℞. herb. absinthii,  
 altheæ, malvæ,  
 flor. chamomille

meliloti,

*meliloti, sambuci,  
anethi, ana m. j.  
sem. cumini unc. f.  
anisi, levistici,  
feniculi, ana drach. ij.  
ex his fiant f. art. duo sacculi intersuti.*

*℞. radicum ebuli unc. j.  
altheæ, bryoniæ,  
feniculi, ana unc. f.  
foliorum sambuci, brassicæ,  
cicutæ, ana m. j. f.  
malvæ, altheæ, betæ,  
florum meliloti,  
chamomillæ, ana m. j.  
sem. cumini,  
anisi, ana drach. vj.  
coquantur in aquæ communis q. f. ad lib. ij. f.  
adde, aceti fortis lib. f.*

*℞. olei de capparibus,  
absinthii,  
amygdalarum amararum  
axungia anseris, ana unc. j.  
olei terebinthinæ unc. f.  
misce, fiat linimentum.*

Matutino tempore his topicis sequenti modo utebatur. Primò lienis regio aliquamdiu durius confricabatur, deinde sacculi illi in decocto calido immerfi & aliquantum expressi imponebantur, uno refrigerato alter: atque hæc fomentatio circiter per sesqui horam fiebat: postea oleis calefactis locus affectus inungebatur, & emplastrum ex solo galbano in aceto dissoluto, imponebatur. His per aliquot dies continuatis, & subinde haustu ultimi vini assumpto, lien omnino detumuit, & durities quoque evanuit, ad cujus reliquias dissipandas, relictis aliis topicis, hoc solum emplastrum impositum fuit.

*℞. galbani aceto dissol. drach. vj.  
ammoniaci, drach. iij.  
emplastri de meliloto unc. f.  
misceantur. & extendantur in corio.*

Atque sic æger ab hoc morbo liberatus, iterum ad castra reversus est.

### Annotatio.

**O**bstusiones & durities lienis, cum per os medicamenta exhiberi nequeunt, nonnunquam topicis egregie curantur. Inter quæ maxime celebrata sunt talia qualibus nos in hoc ægro usi sumus. Imprimis autem commendatum existit galbanum, nec non ammoniacum aceto dissolutum & applicatum. Hieronymus Fabricius ab Aquapendente chirurg. part. 1. cap. 51. hoc ceratum valde commendat: In lienis (inquit) scirrhus remedium habeo probatum, quod est ceratum meum pro splene, factum ex duabus partibus ammoniaci in aceto disso-

luti, una succi herba regia, quam tabacum vocant, dimidia resina pini & terebinthina & succi ebuli, una olei de capparibus, & cera nova q. f. ad cerati formam adipiscendam. Hoc emolliente & digerente sua satietate plurimos obduntatos lienes sanavit. Mercurialis tom. 2. consult. 49. hoc ut maxime potens commendat:

*Rec. g. ammoniaci aceto dissoluti unc. ij.  
pulveris utriusque hellebri,  
colocynthis, ana drach. j.  
misceantur & applicentur.*



Jo. Heurnius method. ad prax. lib. 2. cap. 10. efficacissimum emplastrum ita componit.

Rec. *cicuta m.* iij.  
*ammoniaci lib.* f.

Infunde aceto acerrimo dies octo, dein bulliant dum ammoniacum solvatur, hinc per pannum fortem lineum validè exprimantur, iterumque expressus liquor ebulliat quinquies, & adjecta cera cum oleo amygdalarum dulcium fiat emplastrum. Forestus lib. 10. observat. 8. tali unguento utitur.

Rec. *olei de capparibus,*  
*lilorum alb.*  
*butyri recentis, ana unc.* f.  
*succi bryonia,*  
*cyclaminis, ana drach.* v.  
coquantur ad succorum consumptionem,  
postea addantur.  
*ammoniaci aceto dissol. drach.* ij. f.  
*pinguedinis gallina,*  
*medulla crurum visuli*  
*asypi humide, ana unc.* f.  
*puly. cort. rad. cappar.*  
*tamarisci,*  
*filicis,*  
*ceterach, ana drach.* f.  
*sem. genista,*  
*agni casti, ana scrup.* j.  
*cera parum,*  
fiat unguentum.

Amatus Lusitanus hoc sequens tanquam mirabile extollit, quo se pertinacissimum lienis scirrhum curasse gloriatur.

Rec. *olei communis lib.* iij.  
*medulla crurum bovis lib.* j.  
*butyri recentis lib.* f.  
*succi bryonia,*  
*cyclaminis, ana lib.* j.  
bulliant lento igne fere ad

consumptionem succorum;  
colatura adde,

*cera citrina unc.* viij.  
*puly. ceterach.*  
*cortic. cappar.*  
*tamarisci,*  
*sem. agni casti, ana unc.* iij.  
misce, fiat unguentum.

Sennertus scribit efficacissimum medicamentum parari ex succo florum sambuci misto cum decocto malvæ & oxycrato. Galenus de comp. med. sec. loc. lib. 9. & method. med. lib. 11. & 14 & 5 simp. acetum maximè conducere refert, quia humores crassos, obstruentes incidit & attenuat, & ratione visceris convenit, quia fermentatio illi non est molesta: ac proinde omnibus topicis illud utilissimè admiscetur. Aquapendens loco ante citato etiam gloriatur se abdominis metu ex spongia in aqua calcis expressa scyrrhum lienis & hydropem curasse, quam experientiam ibidem pluribus verbis describit. Cardanus lib. 8. de rerum varietate cap. 44. mirabilem lienis duri curationem habet: Spleni scirrhuso (inquit) linthea in crucem imponunt, his securim, quam ligneo malleo percutiunt, scirrhusque solvitur succedentibus diebus. De hac mirabili curatione Aquapendens loco ante citato, ita scribit: Vir, cui multum credebant, hic Patavii olim profusebatur chirurgiam in scirrho lienis, & nominabat hanc chirurgiam, splenem excidere, aut splenis excisionem. Hic charta super lienem obduratum, & supra chartam acie securis imposita, tum malleo securim percutiebat validè, & ita dimittebat patientes, cum curatos. Eratque hic curandi modus divulgatus. Tandem semel accidit, ut securis acies, sub valentiore percussione, & chartam, & abdomen, & lienem uno ictu præciderit, cum morte ipsius patientis. Et scio fuisse hic Patavii Medicum, qui conabatur hanc chirurgiam, de excidendo liene, probabilem reddere, quam ego tanquam absurdam, nunquam volui audire, quia ex Aristotele, stultas opiniones disquirere, stultum est.

## OBSERVATIO. LXXXVII.

*Dolor Ischiadicus.*

**F**ilius Alberti Verstegen, juvenis circiter 24 annorum, nec Veneri; nec ingluviæ aut crapulis deditus, mense Martio cepit ischiadis doloribus in dextro latere infestari, qui paucis diebus tantopere adaucti sunt, ut amplius incedere non posset. Cum per integrum mensem variis chirurgorum & anicularum medicamentis usus esset, & malum interim in pejus laberetur, tandem meum consilium expetitur fuit. Nullus aderat in parte tumor, nulla quoque inflammatio, & tamen dolor erat acer, eum tanta articuli debilitate, ut nec ei insistere, nec erus sine magna molestia movere posset. Sumpserat aliorum consilio antea duo purgantia, quapropter malui ad humorum defluxum imminuendum,

dum, tale apozema præscribere, de quo singulis matutinis temporibus bibebat unc. iij. vel. v. hincque ter quaterve purgabatur.

℞. rad. helenii,  
 valerianæ, fœniculi,  
 bryoniæ, mechoacannæ,  
 petroselini, ana unc. f.  
 herb. rosmarini,  
 majoranæ, betonicæ, ana m. j.  
 thymi, melissæ, salvie,  
 chamedryos, chamepyth.  
 florum sambuci, ana m. f.  
 stœchados, p. ij.  
 sem. levistici,  
 anisi ana drach. ij.  
 carthami unc. j.  
 passular. mundat. unc. ij.  
 coquantur in aquæ communis q. s. addendo sub finem,  
 folior. sennæ mundat. unc. j. f.  
 agarici albiss. drach. ij.  
 sem. fœniculi  
 anethi, ana drach. j. f.  
 fiat apozema ad lib. ij.

Etiam sequens emplastrum parti affectæ applicatum fuit.

℞. sulphuris subtilissimè pulverisati drach. v.  
 castorei, drach. j.  
 picis navalis drach. vj.  
 emplastri oxycrocei unc. f.  
 balsami sulphuris drach. ij.  
 fiat emplastrum in corio rubro.

Apozemate absumpto, & doloribus in eodem statu remanentibus, aliud decoctum non purgans præscripsi, de quo bis de die haustum bibit.

℞. ligni sassefras drach. vj.  
 radic. eryngii, ononidis,  
 levistici, ana unc. j.  
 ostrutii, fœniculi,  
 petroselini, ana unc. f.  
 herb. verbenæ,  
 rosmarini, betonicæ  
 majoranæ, chamedryos,  
 chamepyth, ana m. j.  
 sabina,  
 florum stœchados, ana m. f.  
 sem. anisi,  
 bac. juniperi ana drach. ij.  
 coquantur in aquæ communis q. s. ad lib. ij. adde  
 syrupi de stœchade unc. iij.  
 fiat apozema.

Biduo post etiam reiteratum fuit prius emplastrum. Finito apozemate tale vomitorium exhibui, à quo cum bile magnam tenacissimæ viscositatis pituitæ copiam evomuit.

℞. foliorum

℞. foliorum asari recent. drach. iij.  
contundantur & exprimatur succus cum  
decocti raphani unc. ij. cui adde  
oxymelis scyllit cum agarico unc. j.  
misce, fiat haustus.

Cum his omnibus nihil omnino proficeretur, aliud emplastrum aliquantum rubificans applicavi.

℞. sem. sinapi albi,  
nasturtii, ana drach. j.  
castorei, scrup. ij.  
euphorbii scrup. j. f.  
saponis hispanici drach. x.  
resinae pini,  
terebinthinae, ana drach. iij.  
misceantur ut simul cohaereant, &  
extendantur in corio.

Cum hoc per biduum adhæsisset, innumeræ exiles vesiculæ in cute excitatæ sunt, è quibus humoris citrini copia ab interioribus partibus foras extracta continuò effluebat, unde intra quatrimum persentiit magnum levamen. Amorò emplastrò non imposui folia brassicæ, ut communiter fieri solet, sed cum animadverterem illud non violenter rubificare, sed leniter humores internos extrahere, & vesiculas absque mordicatione apertas tenere, illud ipsum aliquoties renovatum (quod necesse erat, cum propter effluentes humores sapo nimis dissolveretur) identidem de novo imposui, atque ita duodecim dierum spatio ab omni dolore liberatus, & articulus adeo roboratus est, ut exinde absque ulla molestia incederet. Ne tamen recidiva fieret, prius apozema purgans adhuc semel reiteratum, & prius emplastrum ex sulphure adhuc per duas septimanas impositum fuit. Atque ita in posterum ab illo malo prorsus immunis fuit.

### Annotatio.

Quamvis dolor ischiadicus arthritidis sit species, tamen propter loci structuram in nonnullis remediis diversam curationem obtinet. Plerumque autem difficillimæ curationis solet esse, propterea quod articulus ille est maximè profundus, ad quem topica ob musculorum incumbentium crassitiem vix penetrare queunt; & quod medicamenta per os exhibita non nisi valde longo usu, causam antecedentem imminuendo, juvent. Interdum inducitur hic morbus à sanguinis repletione, interdum à defluxu humorum frigidorum & acrimum ad partem. In sanguinis repletione convenit venæsectio, quæ in maxima repletione primò in brachio instituenda, postea in crure dolente, quamvis etiam in sano omnem dolorem subito sustulisse visum fuerit. Secunda autem vena in poplite, aut juxta malleolum anteriorem, illa, quæ ob insignem utilitatem quam adfert in hoc affectu, ischiadica nominatur. Galenus lib. de curand. rat. per sang. miss. cap. 11. inquit: Memini me ischiadas uno die, facta ex cruribus evacuatione, curasse. Loco venæsectionis sunt qui sanguinem ex hæmorrhoidibus per hi-

rudines eductum, plurimum opitulari tradant. Paulus & Aurelianus scribunt, hirudinibus octo vel decem parti laboranti affixis, hunc morbum egregiè sanari. Quibus hirudinibus zacutus Lusitanus gloriatur se decem horarum spatio dolorem ischiadicum sustulisse omnibus aliis remediis incurabilem. Loco hirudinum nonnulli cucurbitulas commendant. Si verò malum producat à defluxu humorum tartareorum, acrimum, & frigidorum ad partem, venæsectiones (nisi forte plethora simul adsit) parum proderunt: tunc præmissis purgantibus fortioribus (inter quæ tanquam specifica commendantur elect. caryocostinum & pilulæ de hermodactylis) aut vomitoriis (inter quæ chymici admodum extollunt antimonium: Rondeletius omnibus præfert asarum) topicis curatio maximè peragenda est. Horum autem alia sunt anodyna, quæ dolorem leniunt, cuilibet perito Medico satis cognita, & ab auctoribus Medicis copiose descripta. Alia materiam morbificam extrahunt & dissipant insensibiliter; ac simul articulum corroborant: alia eandem sensibiliter evacuant. Prioris generis multa insignia remedia à Medicis inventa

inventa sunt, quæ tam ad ischiadicos, quam ad alios quoslibet arthricos dolores plurimum conducunt. Donatus ab Altomari, lib. de vinaceis, tanquam certissimum remedium extollit fomentationem calidam in vinaceis factam. Sumit magnam quantitatem vinaceorum recentium ex dulcibus uvis, è quibus vinum fortiter expressum fuit; hanc cum suo multo fervefacit, atque tunc in pavementum effundit, & manibus fortiter in cumulum comprimit: deinde facta in his vinaceis scrobe, ægrum usque ad medium ventrem in iis sepelit, & laneis pannis totum acervum contegit, atque sic ægrum semel aut bis de die per semi horam, aut totius horæ spatium in iis sudare facit, ac mirabilia se præstare dicit, & exemplis ascriptis demonstrat. Duretus in Hollerium, vinacea sic commendat in omni arthritide: *Sed mirificè prodest vinaceorum usus tempore vindemiarum, si vinacea ex portentur ex torculari in horreum, & stragulis operta incalascant: in his ager contineat pedes, tibias, crura, aut brachia, vel totum corpus: centies expertus sum non dari sub cælo melius remedium.* De iisdem etiam Solenander sect. 4. consil. 21. sic inquit: *Sed inter optima remedia & tutissima, quæ partes etiam affectas roborant, ac calorem innatam fovent, hoc ponendum, & diligenter singulis annis, cum amplius fieri nequeat, usurpandum; videlicet ut tempore vindemia immergantur pedes atque manus affectæ, vinaceis post expressionem calentibus adhuc, vel multo calido calefactis, per dies quindecim.* Hoc remedium maximum robur membri addit: ac possem nominare virum præstantem, cui hoc medicamentum communicavi, & ab eo præclaro munere sum donatus, qui planè incedere non poterat, & isto remedio, beneficio Dei, restitutus est. Quo autem uva maturiores sunt, eo plus adjumenti vinaceorum usus adfert. Ego novi rusticum, qui simili fomentatione aliquot diebus usus in fimo equino calido, optimè restitutus est. Matthiolus refert compertum esse multorum experimentis, dolores ischiadicos nullis aliis remediis curabiles, litu ex aqua limacum mucosa fuisse sanatos (quod remedium Paræus scribit multis experimentis esse comprobatum, idemque plurimum extollit Andr. Laurentius lib. de arthride cap. 6) Sunt qui radicem sigilli B. Mariæ tritam & coxendici impositam, tanquam singularem commendant. Caseus antiquus putridus cum decoctione pernæ fumatæ salsæ subactus & cataplasmatibus vice impositus, dolorem mirabiliter sedat, ac mali causam resolvit & extrahit, partisque rigidam duritiem potenter dissolvit, Cataplasma ex ebulo, farina hordei, & melle communi, laudat Sylvius. Forestus lib. 29. observat. 20. refert duos ischiadicos, cum nulla alia remedia profuissent, tandem miraculi instar fuisse sanatos, imponendo urticam coctam in cervisia, cataplasmatibus instar. Nos balsamum sulphuris inter efficacissima ad hoc malum remedia, etiam habendum esse censemus, cujus non semel felices vidimus effectus. Galenus 10 de comp. med. sec. loc. commendat emplastrum,

quod recipit picis partes duas, & sulphuris partem unam, misceantur, & loco dolenti imposita relinquantur, donec sponte cadant. Quod emplastrum etiam tantopere extollit Forestus, ut lib. 29. obs. 20. & 22. scribat, se aliud præstantius remedium non invenisse; atque illud efficacius fieri putat, si pix & sulphur pari mensura sumantur.

Si hæc & similia non juvent, tunc ad ea deveniendum quæ sensibilibus materiam extrahunt, idque vel per diversionem, vel ex ipsa parte affecta. Per diversionem extrahunt imprimis cauteria brachiis vel cruribus inusta. Sic Jo. Mich. Paschalius de curat. morb. lib. 1. cap. 16. refert Medicum quendam multos à coxendicum dolore liberasse, caustico sub genu facto, ex capitulo calcis vivæ & aluminis. Hippocrates venas retro aures incidere jubet lib. 2. epid. sect. 5. & aliis nonnullis in locis. Zacutus Lusitanus prax. sect. 2. observat. 160. in fluxione à capite, vidit quendam sanatum inustione cauterii retro aures, unde, post lapsum escharæ, decem diebus defluxit tenuis aquosaeque humiditas, atque ita morbus cessavit.

E parte affecta materiam morbificam extrahunt vesicatoria & rubificantia. Sic Douynet apolog. lib. 4. cap. 3. & 4. phænigmis impositis & vesica excitata, quosdam egregie sanatos fuisse refert. Arculanus & multi alii, in dolore pertinaci, nullis aliis remediis cedente, cataplasmate vesicante feliciter usi sunt.

Rec. fermenti acris lib. f.

cantharidum unc. j.

pulpa ficuum unc. f.

misceantur.

Andr. Laurentius hoc vesicatorio utitur.

Rec. fermenti veteris unc. ij.

cantharidum drach. ij.

sem. sinapi, staphisagria ana drach. iij.

malaxentur cum aceto fortissimo,

& fiat vesicatorium

Jo. Matth. de Gradib. parat aliud ex sem. sinapi, nasturtii, fimo columbino, decoctione ficuum & aceto: quod rubificat & vesicas excitat, quibus pertulis, & decocto ficuum detestis, imponitur folium brassicæ rubræ tepidum, ut materia magis foras evocetur: atque hoc modo inveteratos coxendicis & podagræ dolores extirpari tradit. Galenus, Aëtius, Paulus, multique alii his præferunt cataplasma ex iberide, quæ planta vesicas excitat, & huic affectui curando peculiariter efficax censetur. Schenckius observat. medic. lib. 5. refert quendam ischiadicum post plurima remedia frustra adhibita, tandem proprio consilio fila cannabina cineribus macerata, coxisse in aceto fortissimo, eaque ferventia loco dolenti applicasse, prout tolerare poterat: quibus semotis cutem plurimis vesicis abundasse, è quibus magna aquæ citrinæ copia proma-

promanavit, unde à doloribus ita liber evasit, ut nunquam vexatus fuerit amplius. Tagaultius miro encomio celebrat hoc emplastrum Galeni & Avicennæ, quo nec melius, nec præsentius remedium excogitari posse tradit.

Rec. sem. sinapi,  
urtica,  
sulphuris,  
spuma maris,  
aristolochia rotunda,  
bdellii. ana unc. j.  
olei antiqui,  
cera, ana unc. ij.  
fiat s. art. emplastrum.

Ego illud emplastrum quod cum sapone hispanico, in nostro ægro, præscripsi, in aliquibus mirabilem effectum edidisse animadverti. Memini quondam juvenulam quandam Montfortensem miserabiliter arthriticam, ita ut per totum biennium nec incedere, nec humeros, brachia, articulos ischiadicos, genua, vel pedes movere potuerat, sanatam fuisse emplastris ex solo sapone hispanico cum vino mollescente, & in corio extenso, quod partibus maximè dolentibus impositum vesicas excitabat, & continuata applicatione multam aquæ citrinæ copiam extrahabat, quo modo ægra præter omnium opinionem paucis hebdomadis integræ sanitati restituta fuit.

## OBSERVATIO LXXXVIII.

*Vulnus sclopeto inflictum.*

**C**ivis quidam Noviomagensis 20 May, anno 1637. bombardam imprudenter deorsum explosit, ita ut globulus plumbeus in plateæ silicem inpingens, eadem vi sursum resiliret, atque ita fortuito læderet mulierem quandam, quæ prope D. Stephani portam habitabat, cujus ædibus *gradus* pro insigni erant. Intraverat globulus pectoris cavitatem tribus circiter digitis à spina dorsii, inter quintam & sextam costam, ac pulmonis exteriorem substantiam transiens, magnum ictum in latere dederat costæ quartæ ab interiore parte, ita ut hæc quidem diffracta foret, sed globulus tamen non transiret, at in pectoris cavitate remaneret, qui ob ictum in silicem non rotundus, sed necessario inæqualis planus vel oblongus fuisse debuit, quod & ipsum vulnus solito majus & inæquale satis testabatur. Ægra sic vulnerata statim domum delata fuit. Fere nihil sanguinis è vulnere effluxit, sed die secunda multum sanguinis cum tussi ejecit. Ex ipso vulnere magnum periculum adesse prædixi, partim quia globulus diaphragmati incumbens, nulla ratione è pectoris cavitate extrahi posset: partim quia pulmonis vulnera difficulter sanantur propter continuum motum, imprimis bombardæ ictu inflicta, quæ non sine magna contusione esse possunt. Ut autem officio nostro debitè fungeremur, chirurgus quotidie vulnus religavit, & ego, corpore prius leviter expurgato, hoc apozema præscripsi, de quo manè & vesperi haustum bibit.

℞. radic. rubiæ tinctorum unc. j.  
eryngii, feniculi,  
petroselinii, ana unc. l.  
glycyrrizæ rasæ, drach. vj.  
herbar. scabiosæ,  
violarie, tussilaginis,  
cherefolsii,  
fol. ribesii nigri. ana m. j.  
chelidoniæ majoris m. ij.  
sem. 4. frig. maj.  
anisi ana drach. j.  
passularum cum toto unc. ij.  
coquantur in aquæ communis q. s. ad lib. ij. adde  
syrupi de glycyrrizæ,

papa-

*papaveris rheados ana unc. j. l.  
misce, fiat apozema.*

De nullo conquerebatur dolore, præterquam in vulnere, & isto in loco ubi costæ diffracta erat, qui dolor paulatim evanuit, imposito emplastro oxycroceo, & costæ rursus coaluit. Primis sex diebus valde debilis erat ægra; parum aut nihil comedebat, è vulnere vix parum puris exibat: nulla aderat febris, nec tussis, nec anhelitus difficultas: post secundum diem neque sanguinem, neque pus per os reiciebat, de quo mirabamur. 27 May, cum alvus iterum constipatiores foret, haustum laxantem exhibui, à quo bis terve alvum deiecit. 30 May valdeangebatur, ita ut ipsam morituram omnes existimarent, verum circa vesperam puris albi bonam quantitatem cum paucò sanguine ex improvviso per tussim rejecit, unde summopere levata fuit, atque exinde melius habere cepit. Vulnus etiam nobis invitis coaluit, nec è thoracis cavitate quicquam puris toto curationis tempore per vulnus effluxit. Post hoc rejectum pus, septem diebus sine tussi fuit. 7 Junii cum parva tussi aliquantum puris iterum exspuit, atque ita tussis rursus cessavit. Ægra quotidie fortior evasit, neque exinde quicquam puris aut sanguinis amplius exspuit, sed post secundum mensem integræ sanitati restituta, præter meam & omnium opinionem iterum foras prodiit, nullum à tanta plaga incommodum postea sentiens: nonus jam agitur annus quo bene sana vivit, neque etiam globulum plumbeum in pectore sentit, excepto cum anhelitum magno cum suspirio trahit, tunc enim se aliquid grave supra diaphragma sentire dicit.

#### *Annotatio.*

**P**ROcul dubio globulus plumbeus medium pulmonem non transiit, neque bronchia aut majora vasa dissecuit, sed tantum in exteriore latere pulmonis substantiam leviter oblæsit, nam alioqui graviora subsecuta fuissent symptomata, nec etiam curatio tam cito peracta fuisset, quæ tamen adhuc satis mirabilis fuit, cum tale vulnus non sine magna contusione inflictum fuisse potuerit.

Quamvis omnium Medicorum & chirurgorum testimonio gravia pulmonis vulnera insanabilia, levia verò curatu difficillima existant, tamen cum talia occurrunt, animus in totum abiiciendus non est, cum interdum, tam illa, quam hæc, præter spem sanata fuisse visum fuerit, quod multorum insignium Medicorum historiis constat. Nos supra observat. 38. gravissimum pulmonis vulnus curatum descripsimus, hæc vero observatione leve vulnus curatum annotamus. Hujusmodi graves pulmonum læsiones curatz etiam alias nobis visæ sunt. Memini me quondam novisse cauponem in pago Kaukerca, prope Leiidam, habitantem, qui cum alio rustico pugnans, ictum recepit sub dextræ mammæ papilla, vulnere lato, ac cultro medium pulmonem transeunte, & posterius sub scapula exeunte. Hic à variis Medicis & chirurgis diversis modis & diu tractatus fuit: tandem cum à continua pulmonis suppuratione æger totus extabefactus, morti jam proximus videretur, post duos circiter ab accepto vulnere annos Ultrajectum delatus, à chirurgo quodam solis decoctis vulnerariis perfectè sanatus est. Pulmonis tamen

maxima pars suppuratione consumpta fuerat, quod manifestò percipiebatur cum se antrosum & retrosum identidem commoveret, tunc enim pulmo dexter instar linguæ campanæ anteriorem & posteriorem thoracis partem obverberabat. Mirum est quod tantum ulcus ad perfectam cicatrificationem perducipotuerit: istum tamen (qui erat homo admodum robustus) decennio post curationem vidi sine ulla tussi, sine ullo malo, atque adeo sanum & validum, ut nullum unquam viderim saniores. Anno 1635 adhuc alium rusticum robustissimum cum chirurgo tractavi in pago Linschoten, prope Montfortum, qui pugnando, sub sinistræ mammæ papilla ictus fuit cultro lato usque ad medium pulmonem intrante. Rustici alii, qui ipsi tunc temporis aderant, interea dum ego cum chirurgo Montforto vocarer, ipsum prorsum in ventrem deposuerant, ac duabus manibus vulnus apertum retinuerant, ne sanguis in thoracis capacitate occluderetur, atque sic ultra tres matulas plenas sanguine effluxisse nobis retulerunt. Postquam vulnus à nobis religatum foret, æger statim animo linquebatur, & moriturus putabatur, verum exhibitis corroborantibus ad se rediit. Primis diebus per os modò sanguinem satis copiosum, modò pus reiecit, sanguis etiam spumulosus coagulatus è vulnere, sed pauca quantitate, effluxit: ut breviter dicam, hic æger à tam periculoso vulnere cotinuenti medicamentorum usu optime sanatus fuit, præter omnium opinionem, neque postea ullum in pectore incommodum retinuit. *Guilhelmus Fabricius Hildanus cent. 3. observ. 36. simi.*

similem etiam casum refert: verum cent. 2. observat. 32. valde memorabilem describit historiam vulneris pulmonis sanati, in quo pars substantiæ ipsius pulmonis fuit abscissa: quale exemplum ex Costero etiam adducit Nicolaus Fontanus. lib. resp. & curat. medic. Similia exem-

pla vulnerum pulmonum curatorum describunt Gregorius Horstius, Jessenius, Arcæus, aliique plures, in quibus non tantum pulmones graviter vulnerati, verum etiam substantiæ particulæ, imò & venarum majora rudera extracta fuerunt.

## OBSERVATIO. LXXXIX.

*Alvus constipata.*

**N**. Ab Offendorph, nobilis Germanus, militans sub capitaneo Lex, vir fortis & florentis ætatis, ordinariè tanta alvi constipatione laborabat, ut vix unquam absque medicamento alicujus usu eandem deiiceret, quod malum ipsi multis annis familiare fuerat. Interea tamen non ægrotabat, sed cum alvus jam quinque sexve diebus substitisset, tunc somnolentus & in actionibus omnibus piger fiebat. Accidit mense Augusto, cum alvus per septem dies constipata pilulis suis ordinariis (quæ ex præscripto Medici cujusdam Germani semper secum portabat) non moveretur, ut D. Romphium, Reginae Bohemæ medicum ordinarium (qui tunc temporis Principem Auriacum in castris sequebatur) adierit, qui injectis duobus clysteribus, & duabus potionibus cathartici fortioribus exhibitis, cum alvum emovere non potuisset, non ausus fuit ulterius procedere. Quapropter ipse vitæ suæ metuens, è castris Noviomagum ad me venit, ac totum negotium mihi exposuit, simul aliquod salutare auxilium exposcens. Decimus sextus jam agebatur dies quo alvus constipata erat. Ego ejusdem emotionem sequenti clystere tentare volui.

℞. radic. bryoniæ unc. j.  
herb. malvæ, althææ,  
mercurialis, absinthii,  
centaurii minor.  
florum chamomillæ,  
meliloti, ana m. j.  
fol. senæ unc. j. f.  
pomi colocynthidis drach. j.  
ficuum ping. no. viij.  
sem. anisi unc. f.  
coquantur in aquæ communis q. f. ad unc. x.  
colaturæ adde  
vini sibiati unc. iiij.  
fiat enema.

Hoc cum per horæ quadrantem retinuisset, alvus vehementer conturbata fuit, & ultra viginti dejectiones subsecutæ sunt, cum maximo levamine. Postea diætam emollientem & laxantem præscripsi, atque sic illum tanto onere levatum, benè lætum ad castra remisi.

*Annotatio.*

**I**nveniuntur nonnulli quibus alvus mirabiliter constipatur, eorumque varia & stupenda exempla collegit Schenckius observat. lib. 3. In talibus naturis, si cathartica exhibita nihil proficiunt, non semel observavi vinum sibiatum cly-

steribus admixtum egregiam operationem edidisse, idque tutò, cum cathartica fortiora per os exhibita, interdum prohibito transitu, facile aliquod periculum inducere possint. Memini me aliquando rustico Bataviensi robusto & valde con-



constipato catharticum forte exhibuisse, à quo cum alvus plane non commoveretur, postmodum injeci enema, cui præter alia, semiunciam tabaci sicci incoxeram, atque sic alvus egregie turbata fuit. Novi Capitaneum navis bellicæ, qui mihi narravit, sibi quondam in mari alvum multis diebus constipatam fuisse (unde valde anxius fuerat) neque à chirurgo suo multis variisque medicamentis emoveri potuisse, tandem ve-

rò) cum jam de vita desperaret, quondam ex nautis consuluisse ut aliquantum salinis unguis pollicis cum haustu cervisiæ biberet, quod cum fecisset, se maxima anxietate correptum in animi deliquium incidisse, ita ut ipsam mentem omnes arbitrarentur, postea verò ad se rediisse, & sursum deorsumque enormiter purgatum, atque sic ab imminente mortis periculo liberatum fuisse.

## OBSERVATIO. XC.

*Febris notha.*

**F**lliola Capitanæi Riiffelaer, ætatis sex annorum, longo tempore febre quadam inordinata, non tamen admodum vehementi, laboraverat, quæ interdum ante; interdum post meridiem noctu, interdum alternis, ac sæpius singulis diebus invadebat, cum frigore incipiens, & in mediocrem sudorem desinens. Circulus livescens circum oculos conspiciebatur: somnos turbulentos, & ventrem tumidum ac tensum habebat: nares sæpe fricabat: de nullo tamen conquerebatur dolore. Ex dictis signis crudos ac pituitosos humores in prima ventris regione putrescere, indeque febrem induci, & fortè lumbricos quoque in intestinis generatos esse judicavi. Cum autem valde delicatula esset ægra, nec quicquam assumere vellet, quod vel minimum ingratum saporem haberet, exhibui cum pauxillo cervisiæ mercurii dulcis scrup. j. à quo multa viscosa & aquosa quinque sexve sedibus dejecit, simulque tres quatuorve lumbricos magnos excrevit. Sequenti triduo exhibui mane & vesperi dosim hujus pulveris, quo spatio adhuc octo lumbricos exoneravit.

*Rx. cornu cervi usti,  
corallinæ præparatæ, ana scrup. iiij. sacchari candi drach. ij.  
fiat pulvis, dividendus in sex doses æquales.*

Postea cum febrem & ventris tensionem in eodem fere statu permanere animadvertentem, rursus mercurii dulcis scrup. j. exhibui, à qua cum sexies purgata esset, se melius habuit. Tunc sequentibus tribus diebus nihil omnino assumere voluit. Quarto autem die mercurium dulcem bonis verbis iterum exhibui, à quo cum viscosa & aquosa multa, sed absque vermibus, excrevisset, ventris tensio & tumor una cum febre desiit, atque ipsa convaluit.

*Annotatio.*

**I**N hujusmodi casibus mercurio dulci sæpissime feliciter usus sum; & quamvis non pauci magni nominis Medici ejus usum valde suspectum habeant, & nimis periculosum existiment, ego tamen in naturis humidis nunquam ex eo (dummodo bene præparatus sit, cujus præparationis diligentem curam habere soleo) aliquod incommodum vel periculum resultasse observare potui: siccioribus naturis aliquantum obesse putatur, ac propterea in talibus, aut aliis utor medicamentis, aut si mercurium dulcem exhibere placet, illi alia purgantia simul admisceo, ut citius e corpore expellatur. Sic etiam Simeon

Jacoz observat. Riverio communic. i r. ejusdem gr. xij. exhibuit cum diagridii gr. v. in puello quatuor annorum, atque sic post duas horas 20 lumbrici fuerunt expulsi. Sæpe observavi esse præstantissimum remedium ad lumbricos intestinorum, ita ut vix habeat sibi simile, nam non tantum lumbricos occidit & expellit, verum etiam eorundem causam simul expurgat. Sebastianus Strommaier, epist. ad Gregorium Horstium, de hoc mercurio sic inquit: *Simile medicamentum vix inveniri posse affirmo, quod omnis generis vermes in corpore nostro genitos tam promptè, citò, citò & jucunde aggrediatur, & specifica quadam*

quadam virtute absque omni periculo funditus expellat: id quod experientia jam diu satis testatum fecit: ita ut merito rideam omnes, qui pro iisdem tuncidandis, vel argentum vivum crudum, vel alia violenta medicamenta exhibent. &c. Soleo hujus loco interdum etiam exhibere radices jalapae pulverisatæ scrup. j. vel minus pro ætate, quod est medicamentum insipidum nec ingratum, egregie & clementer causam lumbricorum & febrium illis sæpe junctarum, expurgans. Rondeletius maximè extollit elect. diacarthamum, tanquam remedium potentissimum ad vermes deiciendos & pituitam expurgandam, tum etiam chylum corruptum, unde vermes generantur & nutriuntur. Alii diaturbith cum rhabbaro commendant. In iis qui ab ingratis medicamentis non abhorrent, efficax remedium est hiera picra, ut & aloë sola in forma pilularum data. Dodonæus in annotat. ad observat. Benivenii cap. 85. refert mulierem quadragenariam, gravissimis ventriculi doloribus & nausea subinde correptam, assumptâ hierâ picrâ excrevisse vermes quadraginta. Eandem facultatem obtinent omnia medicamenta quibus aloë admiscetur. Ita scribit Ant. Benivenius citato loco, quendam ab assumpto medicamento ex aloë, myrrha & croco, deposuisse 48 vermes. Crato consil. à Scholzio collect. 203 has pilulas habet:

Rec. aloes rosat unc. j.  
myrrha elect. drach. j.  
fiant pilule:  
dosis drach. f.  
Sequentes extollit Platerus:

Rec. aloes drach. ij.  
myrrha drach. j.  
sem. contra lumbricos scrup. j.  
cum succo absinthii  
vel gentiana  
fiat massa:  
dosis drach. f.  
ad drach. j.  
Sennertus tales prescribit:

Rec. aloes scrup. ij.  
rhabbari scrup. j.  
myrrha scrup. f.  
trochisc. albandal. gr. iij.  
pul. corallina drach. f.

cum succo absinthii  
fiant pil. 22.  
dosis pueris scrup. j.

Mercurialis tom. 1. consult. med. 13. de alôe sic inquit. Id minime silentio praterendum judico, ad consumendam omnem ascaridum [& lumbricorum] materiam, nec non delendam intestinorum proprietatem [illam nempe à qua vermes generantur] vix quicquam utilius excogitari posse, quam si aloës succocitrina scrupulum unum singula quaque hebdomada devoret ager: aloem enim extremas intestinorum partes arcana quadam facultate eluere atque expurgare, longo usu probatum est. Sæpius etiam rhabbari drach. j. vel ij, in puppa ligari atque in potu ordinario suspendi jubeo, atque tali modo lumbricos eorumque causam clementer expello. Saxonia & Solenander cum multis aliis valde extollunt decoctum sebesten: in cujus unc. iij. Crato macerat rhabbari drach. j. atque ita expressum exhibet. Rhabbarum in substantia datum vermes quoque optime educit. Dodonæus prax. lib. 2. cap. 53. hunc pulverem exhibet:

Rec. sem. sementina drach. j.  
ramentorum cornu cervi,  
sem. citri,  
oxalidis, ana scrup. j.  
rhabbari drach. ij.  
fiat pulvis: dosis drach. j.  
Riverius sumit pulv.  
rhabbari &  
corallina ana drach. f.  
misce.

Duretus in Hollerii lib. 1. cap. 54. hoc prescribit:

Rec. rhabbari electi,  
absinthii, santonici,  
rasura cornu cervi, ana drach. iij.  
fiat pulvis:  
dosis drach. j.  
cum decocto scordii:

Hoc, ut experti sumus, (inquit) omnium principatum tenet. Antonius Cermisofonius consil. 93. efficacissimum vermium interfectivum & educitivum scribit esse, si enema iniiciatur ex lactis caprilli unc. x. & mellis drach. ij.

## OBSERVATIO. XCI.

*Vermes.*

**F**ilius Domini Couper, puellus sex septemve annorum, alvi lumbricis diu laboraverat, qui interdum in æsophagum ascendentes, noctu per os egressi erant. Parentes semen contra vermes aliquoties exhibuerant, sed nulli tamen expulsi fuerant, tandem cum puer totus emaciaretur, & interdum de ventris dolore conquereretur, meum consilium petierunt. Ego cum puellum valde sitibundum & ab omnibus medicamentis aversum esse animadverterem, dixi me julebum gratum pro potu ordinario missurum sequenti die. Sumpsi Mercurii vivi lib. f. hunc in aquæ graminis lib. ij. horis viginti maceravi, & per aquam illam sæpius concussi, postea separato mercurio, addidi isti aquæ syrupi de limonibus unc. iij. olei vitrioli q. f. ad gratum acorem, fiat juleb. Hujus solius usu spatio bidui triginta sex lumbricos deorsum excrevit, atque sic ab hospitibus his liberatus, egregie convaluit.

*Annotatio.*

**M**ercurium vivum, etiam in substantia exhibitum, ad vermes intestinorum tanquam præstantissimum remedium nonnulli extollunt, ita ut Sanctorius in meth. vitand. error lib. 5. cap. 11. dicat, in necandis lumbricis nihil fieri, nisi confugiat. ad valida præsidia, ut aloem, & mercurii scrup. j. Baricellus, in horto geniali, de mercurio sic loquitur: *Hydrargyrum, quod à multis venenum existimatur, felicissimo successu contra vermes exhibetur, tantaque certitudinis illud in Hispania reputatur, ut mulieres tenellis pueris qui lactis vomitu laborant, ad quantitatem granorum trium in propria substantia propinare audeant. Hac autem via morbus cessare videtur frequentatis experimentis. Ego quidem viduam mulierem curavi, quæ novem dierum spatio vomitibus continuis ex vermibus laboraverat, & fere triduo non comederat, nec cibum retinere valuerat: huic cum hydrargyri scrup. ij. cum tantillo cydonii mortificati propinasset, absque ulla molestia per alvum ventum & plures emisit vermes, & eadem die liberata est, & solita exercuit domi & foris, negotia, magna profectò parentum admiratione, cum prius debilis & emaciata esset. Aliis etiam exhibui, & bono semper eventù. Domi etiam continuè aquam habeo, in qua hydrargyrum infusum retineo, illamque puerulis pro vermibus libentissime concedo, nec adhuc quempiam inde noxam accepisse expertus sum. Mercurius datur pueris in substantia scrup. j. grandioribus scrup. ij. vel drach. j. Corrigitur & mortificatur in mortario vitreo cum saccharo rubro, ibique tam diu conteritur, ut in partes invisibiles dissolvatur. Ne autem in pristinam formam iterum redeat, olei amygd. dulc. guttulas binas addere oportet, & cum saccharo rosaceo, violato, vel cydoniato, jejuno stomacho languentibus propinatur. Joannes Baptista zappata, lib. de secre-*

*tis mirabil. cap. 5. insignes proponit historias lumbricis laborantium, mercurii usu sanatorum, in quibus infinita alia remedia, tum aloë & absinthium frustra usurpara fuerant. Hildanus cent. 2. observat. 71, mulierem quandam, quæ innumeris & convenientibus remediis sanari non potuerat, tandem curavit hydrargyro, quod cum ad drach. j. f. purum, & per corium tractum, exhibuisset, à lumbricis prorsus liberata fuit. Ubi illud notatu dignum adscribit, quod mulier illa tunc temporis emplastrum pro matrice gestaret, quod postea hydrargyro totum perfusum inventum est. Sic innumeri alii Medici clarissimi argentum vivum ad enecandos lumbricos celebrant, ut Vidus Vidius de curat. membr. lib. 9. cap. 27. & lib. 2. curat. gener. cap. 2. & lib. 3. cap. 13. Quercetanus consil. 3. de lue Gallica; Casalpinus lib. 3. de metall. cap. 11. Burggavius in Achill. Philippus Mullerus in myst. medic. Hujus autem hydrargyri usum multi valde suspectum habent, idque tanquam grave venenum fugiendum, nec unquam per os exhibendum esse judicant. Alii rursus nihil omnino periculi inde metuendum esse arbitrantur. Sic Platerus in curat. lumbric. illud vermes optime & citò fugare, atque innoxie sumi posse docet. Cum quo consentit Brassavola lib. de exam. stirp. qui se hydrargyrum tutissime contra lumbricos exhibere scribit. Horat. Augenius tom. 1. lib. 11. epist. 1. tam propria experientia, quam aliorum auctoritate probat mercurium vivum tuto assumi posse, atque ipsis etiam infantibus exhiberi: quod ipsum quoque confirmat Libavius tom. 1. syntag. lib. 1. cap. 13. nec non Angelus Sala in recens. 7. plan. Fallopius de morbo gallic. cap. 76. inquit: Si bibatur argentum vivum, illud non facit quod facit unctum. Vidi mulie-*

res quæ libras ejus biberunt, ut abortum facerent, & sine noxa. Ego exhibeo in vermibus puerorum, & nullum parit symptoma; solum necantur vermes. Marianus Sanctus testatur sibi visam mulierem quæ plurimis vicibus ultra libram mercurii hauserit sine damno. Similiter Fracastorius lib. de Siphil. scribit, mulieres quasdam argenti vivi libram sumpsisse ad perdendum foetum, quæ tamen voti minime compotes factæ, ne tantillum quidem molestiæ inde perceperunt, foetu omnino in utero servato. Matthiolus epist. 4. ad Seph. Laureum med. Cæsar. Cum (inquit) argentum vivum nulla alia lethifera facultate (ut Dioscorides inquit) interimat, quam quod suo ingenti pondere intestina laceret, nihil sane verendum videtur, minima quantitate id posse moliri unquam, præsertim cum sua gravitate & spherica forma, facile è corpore per inferiora labatur. Idcirco mirari non debemus, si Brassavolus, tam clarus ætatis nostra Medicus, ad necandos interaneorum vermes, dari pueris argentum vivum, nullo incommodo, scriptum reliquit, & eo tam feliciter usus sit alter quidam clarissimus Medicus Patavinus. Atqui ego, & si hoc medicamento nunquam usus sum, vidi tamen dari sæpe illud à Goritiensibus obstetricibus agere parturientibus mulieribus, nullo prorsus incommodo, sed felici semper eventu. Horum clarissimorum virorum experientia satis docet hydrargyrum in

substantia tuto exhiberi posse. Quantum ad me, ego hæcenus illud tali modo nunquam dedi, sed illius infusione in aqua graminis, vino, aliove liquore facta, aliquoties summo cum successu usus sum. Sebastianus Stromajer epist. ad Greg. Horstium, ut & Horstius respons. ad eandem epist. mercurium crudum aliquantum suspectum habent, sed rite præparatum & ab impuritatibus repurgatum adeo extollunt, ut simile medicamentum ad vermes vix inveniri posse affirmant, quod specifica quadam virtute, tam prompte, tute, cito, & jucunde, absque omni periculo vermes funditus expellat. Sennertus prax. lib. 3. part. 2. lect. 1. cap. 5. hydrargyri usum aliquantum extimescere videtur: Verum etsi argentum vivum (inquit) præcipitato & sublimato longè tutius sit, & in casibus desperatis contulisse atque utile fuisse negandum non sit; tamen ubi necessitas non urget, & aliis mitioribus medicamentis res peragi potest, iis non utendum, cum aliquam pravam dispositionem corpori facile imprimere possit, sicut etiam contactu sensum stupefacere potest. Idem prax. lib. 6. part. 4. cap. 21. De hydrargyri viribus latius agit, ubi curiosius inquirat an tuto exhiberi possit: qua de re etiam videatur Zacutus Lusitanus Histor. medic. lib. 1. quæst. 41. imprimis autem Matthias Untzerus, anatom. mercur. lib. 1. cap. 16.

## OBSERVATIO. XCII.

*Arthritis.*

**D**ominus Hameltong. nobilis Anglus florentis ætatis, intolerabili torquebatur arthritico dolore in articulo humeri dextri, ita ut se emori malle, quam tantum dolorem diutius perpeti diceret. Tres dies & noctes ob doloris magnitudinem insomnes duxerat: Præscripta conveniente diætâ Purgavi ipsum cum pilulis cochiis, decoctum valide diureticum aliquot diebus bibendum dedi, & sequens emplastrum loco affecto applicui.

℞. gummi galbani spiritu vini dissoluti,  
tacamahacæ spiritu terebinth. dissol.  
emplastri oxycrocei, ana unc. i.  
misceantur & extendantur in corio.

Hoc emplastrum per octiduum adhæsit, quo spatio immensus ille dolor totus evanuit, ita ut sine ullo impedimento brachium rursus libere movere posset, Cum jam sanatus esset, Bredam versus (quod tunc temporis à nostris obsessum erat) profectus fuit, ubi voluntarius arma sumens, aliquamdiu post cum hostibus fortissimè pugnans interfectus est.

## Annotatio.

**D**E arthritidis causis diu litigatum est inter Medicos, dum alii à pituita, alii à bile, melancolia, sero, aliisve humoribus, alii à defluxionibus è capite ad articulos delabentibus, alii ab acris humoribus ex internis visceribus ad articulos expulsi, arthritidem oriri putarunt: quorum omnium opiniones hic curiosius examinare nimis longum foret, atque etiam inutile, cum illa satis legi possint apud auctores qui ex professo hanc materiam tractant. Si meam opinionem quispiam roget, ego articulum dolorum duas differentias necessarias statuendas esse dicam. Duabus enim è causis hi dolores generantur. Primò, cum à frigidis catharris seu defluxionibus (alicujus falsedinis seu acrimoniae participibus) è capite ad articulos delabentibus, nervi, tendines articulis annexi, & ligamenta refrigerantur, debilitantur atque ab acrimonia corroduuntur. Hinc dolores magnos induci non est alienum; quam inimicum enim sit frigus nervis & nervosis ac membranosis partibus, docent hyemali tempore vulnera quibus tales partes denudantur, quibus tunc à frigore facile accedunt acres dolores, convulsiones, aliaque mala: unde regulam istam signavit Hippocrates, *Omne frigidum nervis inimicum*. Adde, quod præter frigus, etiam à talibus defluxionibus articulis inducatur debilitas, nimiaque vel rigiditas, vel mollities & relaxatio, unde inepti ad motum non sine dolore moventur; imò suomet pondere gravati ab ipso pondere extenduntur cum dolorifico sensu. Hæc autem arthritidis species minus est acerba. Altero modo inducuntur arthritici dolores, ab humoribus falsis, acris & tartareis è sanguine secretis & ad articulos expulsi. Quod ipsum quoque Sennertus lib. de arthritide, quæst. 6. validissimis præmissis rationibus, tandem sic concludit: *Aliter (inquit) statuere non possum, quam humorem falsum, acrem, subtilem, & spirituum salinorum naturam plerumque referentem, arthritidis causam esse. Appellet eum jam quis bilem, pituitam bili permixtam, salem, tartarum, vel pro ut lubet, per me licet, modo res recte explicetur*. Qua ratione hi falsi humores à sanguinis massa separentur, & articulis magis infesti sint quam aliis partibus, alio loco docui. Quomodo autem nervosis partibus dolores inferant, explicui supra annotat. ad observat. 68. Hujus causæ pauciores Medici

ante nostra tempora meminerunt, his vero temporibus omnibus fere nota evasit: qui eandem curiosius inquirere, & solidissimas, quibus fulcitur, rationes scire volet, legat Sennertum lib. de arthritide cap. 2. & quæst. 6. 7. 8. ut & lib. 2. institut. part. 2. cap. 9. & prax. lib. 3. part. 7. sect. 1. cap. 6. & paralipom. ad cap. 2. lib. de arthrit. nec non Quercetanus consil. de arthrit. & calculo.

Frustra igitur Medici hætenus in calore & siccitate bilis, vel in humiditate ac frigiditate pituitæ arthritidis causam quæsierunt, eo quod non primæ qualitates, sed secundæ hos dolores inducere queant, nempe falsedo & acrimonia, qua partes roduntur, vellicantur ac lancinantur. Huc referri poterit illud quod Hippocrates lib. de prisca medicina, eleganter tradidit: *Non calidum (inquit) frigidum, humidum & siccum magnam habet vim agendi, sed amarum & salsum, dulce & acidum, insipidum & acerbum: quæ & si in mixtione, & mutua inter se contemperazione neque cernantur, neque molestia afficiant, tamen ubi horum quippiam secretum fuerit, & per se extiterit, tum & conspicuum fieri, & hominem molestia afficere, & noxam inferre, &c.* Pro diversitate verò & magnitudine causarum curationem diversis modis instituere necesse est. In priore arthritide, cum à cerebri prava dispositione mali causa maxime descendat, illud omnibus modis evacuandum & corroborandum erit, ut hujusmodi excrementa in eo amplius non colligantur: præterea ipsæ partes affectæ topicis calefacientibus, crudos humores dissipantibus, & exsiccantibus erunt corroborandæ. In altera arthritide internis medicamentis falsi humores erunt evacuandi & dissipandi, antequam ad articulos expellantur, eorumque generatio prorsus impedienda. Partibus verò affectis necessario topicis quoque erit providendum, quibus falsorum humorum acrimonia temperatur, atque sic dolor mitigatur; postea talibus quæ hujusmodi humores dissolvunt, dissipant, & per cutis spiracula evacuant, partesque debilitatas corroborant; quælia innumera & varia sunt (non enim eadem omnibus conveniunt ac profunt) alia temperata, alia calida, alia falsa & acris, &c. quorum alibi varias insigniores & usæ comprobatas formulas dabimus.

HISTO-

## OBSERVATIO. XCIII.

*Dolor ventriculi cum vomitu.*

**P**etronella Beekman, juvenula circiter 27 aut 28 annorum, 19 Junii intolerabili cruciatur dolore in alvo superiore, nempe in toto ventriculi regione, qui se modò aliquantum ad dextrum, modò ad sinistrum latus, ut plurimum autem ad lumbos fere extendebat, atque adeo crudelis erat, ut quilibet astantes commiseratione aegræ commoverentur. Vomitus aderat, interdum mitior interdum vehemens, quo omnem cibum & potum evomebat. Subinde etiam vehementiori vomitu aquam quandam nigricantem ad lib. j. vel lib. j. f. eiiciebat, cui aliquantum tenacis pituitæ admixtum erat: huic aquæ, (quæ magna cum violentia evomebatur) ordinariè corpuscula quædam (quatuor vel quinque, interdum plura) innatabant, magnitudinis parvæ avellanæ, colore & consistentia butyrum recens adeo exactè referentia, ut etiam ipsos butyri mercatores fefellisset. His vomitu ejectis, dabatur aliquod doloris levamen ad duas tresve horas, post quas dolor iterum recrudescebat. Nulla aderat febris, nullus in liene tumor, neque etiam dolor eò usque se extendebat; antea quoque nulla lienis affecti signa animadversa fuerant. Nulla quoque in renibus erat obstructio, nec dolor in ureteribus, urina absque molestia, & satis crassa fluebat; nec calculos, nec sabulum unquam antea, nec postea, nec durante morbo excrevit. Menstrua ordinario modo bene fluxerant, nec ullum in utero vitium percipi poterat. Neque etiam diætæ vitio inductus fuerat morbus, neque bilem huc quicquam fecisse docebat vomitus, quo rarò & tantum pauxillum flavæ bilis evomebatur. Hæc omnia mihi de loco affecto & causâ mali non parvam dubitationem injecerunt: judicavi tamen causam morbificam vel in ventriculo residere, vel potius è parte aliqua vicina ipsi suggeri, & propter vomitus violentiam ligamentorum commotione etiam lumbis & vicinis partibus dolores communicari. Sed unde igitur iste vomitus aquæ nigricantis, & illud butyrum? non à ventriculo, cum ibi tanta aquæ nigræ copia occultari, & talis butyracea substantia in ejus parenchymate inveniri non possit: non à liene nec hepate, cum hæc viscera nullo modo afficerentur: non à renibus, cum dolor in lumbis parvus ac levis esset, nec ullum in urina vitium. Fortassis igitur illa aqua nigricans in mesenterio vel pancreate collecta, atque inde ad ventriculum expulsa fuit; & butyracea illa materia fortè fuit bilis aliquo modò corrupta, ac in talem substantiam præter naturam mutata. Atqui tunc talia etiam per alvum excreta fuissent! verum in hac ægra raræ erant alvi dejectiones, eæque naturalis coloris & consistentiæ. Ita ut verè fatear, hunc morbum mihi admodum obscurum visum fuisse, de quo nihil certi judicare potui, de quo etiam alii Medici, quibus casum hunc notum feci, non minus quam ego dubitarunt. Curationem aggressurus, cum nihil retineret, primò topicis vomitum sistere, ac ventriculum corroborare visum fuit: in quem finem ventriculum oleo nucis moscatæ inunximus, eique calidè imposuimus cataplasma, ex mentha, rosæ rubris, nuce moscata, gariophyllis, mastiche, olibano, fermento acido & aceto rosaceo concinnatum, quod tota nocte inhæsit, sed nihil profuit. Postridie à violento vomitu & continuis ac truculentissimis doloribus valde debilis erat ægra, ita ut ad spirituum refectorem corroborans medicamentum præscripserim, ex aqua vitæ Matthioli, aq. theriacali, aq. cinnamomi, & syrupo de limonibus, æqualibus partibus mixtis, de quo subinde cochlear sumpsit, & retinuit, cum tamen omnem alium potum evomeret. 21 Junii emplastrum corroborans ex tacamacca, galbano, gariophyllis, benzoïno, & similibus concinnatum ventriculi regioni imposui. 22 Junii haustum leviter purgantem exhibui, quem statim

statim evomuit. Tunc clyfma iniici curavi, a quo bis terve alvum deiecit. Horribilis dolor in eodem statu permansit, cui per intervalla vomitus adungebatur. Præter corroborans ante præscriptum, nihil retinebat ventriculus. 24 Junii, cum alvus iterum non responderet, exhibui pilularum Ruffi scrup. j quas retinuit, atque ab iis circa vesperam tres sedes habuit. Quia emplastrum ægræ molestum erat, neque levamen adferebat, illud detraxit; cuius loco sacculum lineum imposuimus his intersutum, nempe menthâ, absinthio, salvia, floribus chamomillæ, meliloti, anethi, nuce moscata, semine cumini, fœniculi, anethi, qui sacculus in vino forti semel ebulliebat, atque tunc expressus calidissimè applicabatur. 28 Junii reiteratum fuit enema. 29 Junii circa noctem exhibui philonii Romani cum euphorbio parati scrup. ij. cum pauxillo vini, à quo ista nocte quatuor horis dormivit, cum hætenus à principio morbi omnes dies noctesque insomnes duxisset. Postridie dolor ad antiquum statum rediit: videbatur tamen calidissimum illud philonium aliquam coctionem moluisse, nam ventriculus subinde ructus aliquos difficiles cum levamine edebat, qui ut facilius promoverentur apozema gratum ex flatus discutientibus aliisque similibus, præscripsi, sed non potuit retinere. Quapropter circa vesperam iterum exhibui philonii scrup. ij. 1. Julii, ructus faciliores prodibant. illa vespera rursus philonium dedi ut antè. Sequenti die dolores erant mitiores, & vomitus nullus: tunc meridie sorbit jusculum pulli, idque fuit primum nutrimentum quod toto morbi decursu retinuit. 3 Julii alvus constipata pilulis Ruffi rursus emota fuit. 4 Julii dolores rursus exacerbati sunt: præscripsi amygdalatum, sed nullam dosim retinere potuit, etiam omnia alia assumpta evomuit, præter corroborans ante præscriptum. Varia topica ventriculi regioni dolenti applicui, sed nihil profuerunt. 6 Julii, rursus ad philonium confugere coactus fui, cuius scrup. ij. f. exhibui, à quo mediocriter dormivit. Postridie dolores erant mitiores, tunc circa noctem eadem dosis philonii rursus data fuit, ut & sequenti die circa vesperam. 9 Julii matutino tempore pilulis Ruffi purgata est, & vesperi rursus philonium sumpsit, quod etiam sequenti triduo singulis vespertinis temporibus datum est: atque sic hujus usu dolores & vomitus prorsus cessarunt, rediit appetitus, & agra pristina sanitati restituta fuit.

23 Novembris iisdem truculentissimis doloribus cum vomitu violento, ut antè, infestata fuit. Exhibitis pilulis corpus expurgavi, & vesperi rursus dedi philonium, cum levamine, in cuius solius usu libenter per aliquot dies continuassem, sed fuit illud medicamentum nimis suspectum D. Breulio, medico docto, qui tunc temporis etiam advocatus, maluit topicis, amygdalatis, apozematibus, conditis, aliisque convenientibus medicamentis curationem peragere, quæ omnia ad illius beneplacitum, frustra tentata fuerunt, denique illo non redeunte, ego rursus philonium duodecim diebus continuis circa noctem exhibui, singulis quatuor diebus alvum pilulis citando, atque ita tandem pertinacissimum morbum philonii narcosi & calidissima qualitate evici, à quo sic liberata fuit ægra ut postea toto sexennio ab eodem immunis fuerit, &, ut spero, semper futura est.

## OBSERVATIO. XCIV.

### *Febris tertiana intermittens notha.*

**H**ermannus N. institor, vir florentis ætatis, in principio mensis Martii febris tertiana intermittente notha correptus est, quæ cum magno frigore invadens, ægrum graviter affligebat, & post sex horas cum sudore copioso rursus terminabatur: alternis quidem diebus, sed incertis horis, modò citius, modò tardius invadebat. Tempore paroxysmi etiam caput valde dolebat,

sum-



summaque aderat anxietas. Appetitus prostratus fuit, atque hinc vires admodum debilitatae. Alterius Medici consilio variis usus est medicamentis, atque hinc adeo nauseabundus evasit, ut post duas tresve septimanas ab omnibus abhorreret, & Medico suo valedicens, omnium medicamentorum usum intermitteret. Tandem tamen, cum morbus usque ad finem Aprilis extenderetur, magisque increveret, relicto priore Medico, meum consilium expetiit. Cum autem propter nauseam se vix quicquam assumere posse, & amara maximè diligere diceret, exhibui drach. f. aloes lucidae in pilulas redactae, unde quinquies alvum deiecit. Postea, quia non erat dives nec magnos sumptus ferre poterat, jussi, ut ipsemet sumeret absinthii sicc. m. j. centaurii minoris M. ij. cardui bened. florum chamomillae, ana m. j. l. atque haec omnia minutim confcissa coqueret in cervisiae tenuis lib. iij. circiter per horae quadrantem, vel paulo diutius, deinde colaret cum forti expressione, & de ista colatura die paroxysmi bis, intermissionis verò die ter haustum calide biberet, idque decoctum aliquoties repeteret. Hujus usu, cum bono Deo, magna immutatio secuta est, febris, quae admodum vehemens fuerat, statim mitior evasit, & ultra quartum paroxysmum se non extendit amplius: capitis dolor evanuit, appetitus rediit, & aeger, cum magno meo honore, citius quam quispiam opinatus fuerat, à diuturna febre liberatus est.

### Annotatio.

**H**oc decoctum, quo hic aeger à longa febre liberatus fuit, quamvis non reciperet multa praeciosa, vel longe petita, aut gravi & fastuoso chymico labore praeparata ingredientia, tamen ex talibus fuit compositum, quae ad febrium curationem maximè sunt celebrata. Absinthium enim, carduus benedictus, & centaurium minus, omnes obstructions viscerum insigniter aperiunt, cruditates tollunt & coquunt, detergunt, crassa incidunt, putredini maximè resistunt, eamque tollunt & impediunt, omni malignitati ex quacunque putredine adversantur potentissimè, & noxios humores per urinas ac sudores expellunt, quin & febrilem fomitem evincunt & eiciunt. Quae harum herbarum virtutes omnium Medicorum & ipsius quotidianae experientiae testimonio sunt notissimae, imò de iis ipsi quoque vulgo plus satis constat, quod in febribus vel pulverem cardui benedicti assumere, vel vinum absinthite bibere, vel centaureum (quod ab effectu febrifuga appellatur) decoquere, atque ita sibi ipsi medicinam facere solet. Ego his, propter flatum qui in hypochondriis sentiebantur, etiam addidi chamamelum, propterea quod adversus huiusmodi febres admodum utile existat: de quo Galenus 3. de simpl. med. fac. cap. 110. ita scribit: *Chamamelum febres, quae citra visceris alicujus inflammationem insistant, discutit dissolvitque, ac pra-*

*sertim quae ex humoribus biliosis, aut cutis densitate proveniunt. Quae de re & ab Aegyptiorum sapientioribus Soli consecratum est, febriumque omnium putatur remedium. Verum haec quidem in re à veritate aberrant. Solas autem eas, quas dixi, febres sanare potest, easque percoctas; licet reliquas etiam adjuvet, quae melancolicae sunt aut pituitosae, aut ex viscerum inflammatione procreata. Nam & harum remedium strenuissimum est chamamelum, ubi concoctis adhibetur scilicet. Quapropter & hypochondriis, ut si quid aliud, gratum existit. Quamvis autem Galenus hoc loco doceat, chamamelum tantum utendum esse post materiae coctionem, tamen cum per se coctionem illam potenter promoveri valeat, adhuc crassos humores incidat, obstructions aperiat, cruditates tollat, flatum discutiat, sudores & urinas insigniter promoveat, etiam ante materiae morbificae coctionem illud summa cum utilitate exhiberi posse ipsa ratio satis demonstrat. Sic quoque refert Sennertus, Joannem Anglicum scribere, quod chamamelum promiscue in omnibus, tam ante quam post coctionem, exhibere soleat; atque observasse illud semper plurimum profuisse. His igitur quatuor nobilissimis febrifugis simul decoctis, non est mirum quod in agro nostro materia morbifica citò cocta, discussa, expulsa, & patiens à gravi ac molesta febre brevi liberatus fuerit.*

## OBSERVATIO. XCV.

*Fulmine icti.*

**A**Nno 1637. 24. Augusti, paulo post meridiem, magna subito ingruit tempestas, cum fulmine ac tonitru horribili. Tunc temporis Noviomagi ante urbem in monte Gallinaceo, fortè rustici cujusdam famulus frumenta colligebat, secum habens ancillam, & anum quandam cum infante, ut & currum, qui ab unico robusto equo trahebatur. Ipsi hac horribili tempestate perterrefacti, fugam parant, anus cum infante sub carrum ob pluviam confugit, interea dum famulus cum ancilla equo frenum iniicere studet. Dum hæc agunt, validum fulmen ab æthere descendens, famulum, ancillam, equum & carrum ferit, anu & infante intactis. Temo carri, qui ex valido ligno confectus erat, in varia frustra comminuebatur. Equus ipso momento mortuus concidit, nec tamen in toto corpore ulla læsio percipi potuit. Fulmen ancillæ femur & crus dextrum percusserat, quæ partes omnino lividæ & purpureæ erant, præterea partem tunicæ & indusii in mille filamenta dissecuerat: ipsa statim ab ictu in terram corruit, ac circiter duabus horis sine loquela prostrata jacuit. Famulus toto corpore percussus erat, præcipua verò ictus violentia in latus maximè dextrum sæviit, à quo latere thorax, bracca, caliga, indusium laneum, & ipsum etiam lineum indusium, non simpliciter dilacerata, sed quasi dississa & in tenuia filamenta discerpta fuerunt, & simul ingentem combustionis factorem retinebant, ac si paulisper in igne jacuissent. Calceus dexter, ex fortissimo corio confectus, quasi miraculosè in tenuia longa filamenta (qualia ne studio quidem quispiam conscindere posset) discerptus, & tringinta passuum longitudine à pede projectus fuit. A tanto ictu in terram prostratus fortis ille juvenis in syncopen incidit, atque sic pro mortuo domum delatus fuit. Duravit hic animi defectus circiter per tres horas deinde paulatim ad se rediit. Invisi hominem, ac totum corpus inspexi: totum latus dextrum à pede usque ad caput colorem ex nigro purpurascentem habebat, eique cuticula plurimis in locis abrasa erat, haud aliter atque ab ictu baculi inæqualis fieri solet; magna quoque aderat contusio, cui & ardentem combustionem conjunctam esse manifestissimè apparebat. Æger parum loquebatur, & de maximo totius dextri lateris dolore, ut & de summo cordis ardore (cui tamen febris non erat adjuncta) ac pectoris compressione, atque hinc impedito anhelitu conquerebatur: artus dextri lateris omnino commovere non poterat, atque ita sui impotens per duos menses remansit, & postea paulatim pristinae sanitati restitutus est. Interrogatus quomodo se habuisset ingruente malo, dicebat sibi nihil aliud inde constare, quam quod ipso momento, quo fulmen percussit, sibi cor candenti ferro uri visum fuisset, atque anhelitum quoque trahere non potuisset, & sic statim suffocatus concidisset. Varia ipsi exhibui, varia etiam topica medicamenta partibus percussis adhibui, sed omnia hæc ad ignem istum æthereum nihil vel parum profuerunt, tandem æger spontè sine medicamentis Divino auxilio sanatus fuit, ut & ancilla, quæ sibi nulla medicamenta adhiberi permisit. Anus illa quæ cum infante sub carro latuerat & intacta remanserat, narrabat cum ingenti illo fulminis ictu pessimum simul ingruisse factorem, cum maximo ardore, quem haud aliter se sentiisse dicebat, quam si caput in furnum pistoris ignitum ad momentum immisisset, ita ut ob brevem istum ardorem etiam ipsa anhelitum trahere vix potuisset. Sed cum fulmen corpora solidiora imprimis ferire soleat, mirum est nec in ancilla, nec in equo ullum os confectum fuisse.

Anno-

## Annotatio.

**Q**uanta vi & quam mirabiliter fulmina res inferiores interdum feriant, tam venterum quam recentiorum testimoniis satis constat, quod etiam nos ipsimet aliquoties vidimus. Anno 1626 octiduo ante festum Paschatis, subita ingruit tempestas cum fulmine & tonitru horribili, qua unico fulminis ictu in Blocklandia prope Montfurtum quatuor domus & sex horrea penitus everfa sunt, & arborum plus quam tria millia non solum confracta, sed penitus eradicata, & cum totis radicibus longe è suis alveis ejecta fuerunt, hominibus tamen & bestiis omnibus illæsis. Anno 1628 prope pagum Bodegravum rusticus quidam in campis fulminis ictu occisus fuit, in cuius corpore pleraque ossa minutim confracta erant, cute cum carne plane illæsa. Vidimus in Gallia Pictavii in turri quadam fulmen illæso plumbo subjectas tabulas incendisse, quæ flamma non sine summa molestia extincta fuit: quod ipsum quoque nostra ætate semel atque iterum evenisse visum fuit Ultrajeeti in turri Dominicali. Anno 1638 mense Julio, Noviomagi in deambulacro illo, quod Sylvam vitulorum appellant, plus quam mille aviculæ à fulmine simul occisæ fuerunt: eademque illa tempestate etiam boves aliquot in pratibus à fulmine percussi & ossibus confractis occisi sunt, & variz arbores dejectæ ac confractæ fue-

runt, quarum folia corrugata, & quasi flamma ignis ustulata erant. Cardanus de rerum variet. lib. 14. cap. 70. refert anno 1521 arcem Mediolanensem vehementi fulmine penitus dejectam, in eaque 113 homines occisos fuisse. Hildanus cent. 3. observ. 26. valde mirabilem refert historiam, de nobili quodam, qui fulmine graviter percussus concidit, ejusque equus, ut & famulus cum altero equo statim enecati sunt: à fulmine præterea nobilis vestes diffractæ erant, & gladius, illæsa vagina, circa cuspidem haud aliter liquefactus, ac si ex plumbo fuisset, imò & extremum vaginæ ferrum eodem modo liquefactum conspiciebatur. Cardanus de Subtil. lib. 2. harum mirabilium operationum causas inquirens, sic inquit: *Verum motus non solum penetrare magis cogit, sed & calorem ipsum accendit, atque ignem igne calidiorem reddit. Nihil mirum igitur est, fulmini tantam inesse vim, ac ignem illum, quasi ab aliorum ignium natura alienum, miracula quadam efficere: namque ob motum celerem non solum magis penetrat, sed ignis ille multo calidior reliquo omni igne existit. &c. Quis verò est alius ignis qui solo contactu occidat? hoc igitur ei proprium est, quod calidissimus sit calidissimorum, atque, ut ita dicere liceat, ignis ignium. Itaque illa quandoque crumena, pecunias colliquat. &c.*

## OBSERVATIO. XCVI.

## Tussis.

**N**icolaus Kerckwegius, Hollandus, vir florentis ætatis, molestissima tussi per tres quatuorve annos infestatus fuerat: tandem totus emaciatus est, ita ut planè phthisicus esse videretur, ossa enim sola tantum cute tegebantur. In zelandia, ubi longo tempore habitaverat, variorum Medicorum consiliis per biennium frustra usus fuerat. Deinde, his nihil proficientibus, & malo indies in pejus vergente, per tres quatuorve menses in Hollandia ex præscripto duorum Medicorum variis usus fuit medicamentis, verum absque ullo fructu. Tandem anno 1637 mense Julio Novimagum devectus fuit, ubi etiam meum consilium experiri voluit. Examinaui diligenter ægri & morbi conditionem, inspexi etiam sputa, quæ mucosa erant & tenacia, absque ullo pure aut sanguine, quapropter neque ex his, neque ex aliis signis comperire potui ipsum vera phthisi laborare (quod ex sola corporis emaciatione priores Medici judicasse videbantur) sed à tenui catharro, ad pulmones continuo decidente, tussim hanc induci, quæ temporis diuturnitate pulmones totumque corpus admodum debilitaverat. Ad morbi curationem, præscripta prius diæta conveniente, paucis usus sum remediis, propterea quod propter ægri summam à medicamentis nauseam, & virium debilitatem multa exhiberi non possent. Corpore igitur leniente medicamento clementer expurgato, sequentis decocti ter quaterve de die haustum bibere jussi.

℞. marubii albi m. iij.

Q 2

con-

*conscindatur minutim,  
& maceretur per noctem in aquæ communis lib. j. f.  
cui postridie adde caput papaveris albi conscissum no. j.  
fol. hyssopi m. j.  
melicrati optimi lib. j. f.*

*In olla fictili bene cooperta coquantur simul ad consumptionem tertiæ partis,  
colatura servetur usui.*

Hujus decocti ( quod ipsemet præparabat ) usum per tres quatuorve menses continuavit, & hinc tussis quotidie magis magisque imminuta fuit, ac tandem desit: æger quoque vires recuperavit, carnosus & pinguis evasit, denique hoc solo decocto perfectè sanatus Noviomago discessit, atque exinde optime sanus vixit, quemadmodum ipsemet quadriennio post mihi retulit.

## OBSERVATIO. XCVII.

### *Suffocatio uterina.*

**U**Xor Petri, fabri cementarii Noviomagensis, mulier circiter 28 annorum, mense Julio magna uteri suffocatione laborabat, cum magno lateris sinistri dolore & summa anhelitus difficultate, ita ut astantes ipsam pleuritide laborare existimarent. Circa vesperam vocatus, sequentem haustum exhibui, quo assumpto magna ex parte cessavit malum, atque ista nocte mediocriter quievit.

*℞. croci britannici,  
castorei, ana gr. v.  
trochiscorum de myrrha scrup. f.  
succini præparati scrup. j.  
theriacæ scrup. ij.  
aquæ theriacalis unc. j.  
artemisiæ unc. f.  
olei succini, gut. ix.  
misceantur, & fiat haustus.*

Postridie malum eadem vehementia rediit, cumque per tres dies alvum non exonerasset, hoc purgans dedi.

*℞. fol. senæ mundat. unc. f.  
seminis levistici drach. j. f.  
aquæ artemisiæ q. f.  
fiat infusio f. art. adde colaturæ  
elect. diaphenici,  
hieræ picræ ana drach. j. f.  
fiat haustus.*

Hinc quinquies alvum dejecit, manente tamen suffocatione, imo magis ingravescente. Deinde sequens decoctum præscripsi, de quo sæpius, nempe singulis fere horis, unc. j. vel unc. j. f. tepide bibit, cujus usu toto die continuatò, menstrua copiose fluxerunt, & simul cessavit suffocatio

*℞. radic. ostrutii,  
valerianæ ana unc. f.  
diptamni,*

*bryoniæ,*

*bryonia, ana drach. iij.*  
*fabinae m. j.*  
*femini levisfici drach. vj.*  
*dauci drach. ij.*  
*vini albi q. s.*  
*coquantur s. art. & fiat apozema ad lib. j. s.*

## OBSERVATIO XCVIII.

*Surditas.*

**U**Xor Henrici Jordens, mense Augusto conquerebatur se per semi annum magna surditate affectam fuisse, ita ut non nisi magnos clamores audiret, meumque ad hanc molestiam consilium expetiit. Erat mulier quadraginta annorum, eique durante hac surditate alvus admodum obstructa semper fuerat, ita ut vix singulis quatuor vel quinque diebus eandem semel deieceret: atque hac de causa judicavi multos vapores sursum ad cerebrum deferri, ab iisque ibidem hærentibus, & auditorium nervum ac tympanum obfuscantibus, surditatem hanc induci. Proinde corpore pilulis expurgato, jussi ut singulis vespertinis temporibus cubitum itura deglutiret duas pilulas pisi magnitudinis ex sola aloë lucida confectas. Harum usu alvus exinde naturaliter laxabatur, atque sic ingens illa surditas sine alio remedio, intra duas septimanas. penitus sublata fuit, cum multorum admiratione

*Annotatio.*

**C**aput instar cucurbitæ seu alembici subjectionum partium vapores recipit: qui si copiosiores eò ferantur, quam ut à cerebro digeri ac discuti possint, varios capitis morbos inducere solent, dolores, catharros, ophthalmias, surditates, aliosque. Horum autem vaporum nimis copiosus ascensus imprimis fit in iis quibus alvus constipata est. Hac de causa si gravis auditus vel surditas non admodum inveterata, originem sumpserit, tunc morbus optimè sanatur alvi solutione, utpote qua materia morbifica continens derivatur ad intestina, & antecedentis via ad partem affectam amputatur. Quod etiam significare voluit Cornelius Celsus, lib. 2. cap. 8. dum inquit: *Nihil plus adversus surditatem, quam biliosa alvus, potest.* Illud ipsum quoque docuit Hippocratis 4. Aphor. 28. *Quibus surditas, supervenientibus biliosis dejectionibus, cessat.* Cujus hanc adfert rationem Galenus, quod bilis ad auditivos meatus delata & surditatem faciens, si ab iis ad infernas partes depellatur, per dejectiones biliosas finitur surditas. Hoc autem non tantum verum est in surditate, sed etiam in lippitudine (unde Hippocrates 6. Aphor. 17. *Lippientem alvi profluvio corripit bonum*) & aliis capitis affectibus, juxta

id quod scriptum est 2. Epidem. *abscessus omnes inferiores tollere morbos superiorum partium.* Atqui hinc illud non tantum de biliosis, verum etiam de aliis dejectionibus intelligendum est. Hippocrates autem & Celsus de biliosis humoribus speciatim loquuntur, quia ab his frequentius, quam ab aliis, surditas inducitur, propterea quod bilis ad aures transitum habet familiarem, ut ostendit amaritudo sordium aurium: quem succum amarum Mercurialis putat naturam eò ferri voluisse, ut organum auditorium continuo abstergeretur, & mundum teneretur. Quapropter in talibus capitis affectibus medicamenta purgantia & alvum lenientia plurimum conducunt, partim ut iis impediatur copiosus talium humorum & vaporum ascensus sursum, partim ut qui jam ad caput ascenderunt his remediis iterum detrahantur, cujus rei felicem eventum vidimus in nostra ægra, ut & apud Hippocratem 3. Epid. in historia Heropythi. Quamquam autem non appareat conspicua via, qua possit hujusmodi materia à cerebro depelli ad inferiora, tamen natura, ut dicebat Hippocrates, ignotas nobis vias reperire solet, quibus evacuans noxiam materiam, ægros à morbis liberat.

HISTO-

## OBSERVATIO. XCIX.

*Scabies.*

**D**omicella nobilis scabiem contraxerat, quæ præcipue manus cum summo pruritu infestabat, easque multis pustulis defœdabat. Duraverat hoc malum per semi annum, cumque ab exiguis principiis inceptum quotidie majora incrementa sumeret, tandem meum consilium ea conditione expetiit ne ipsi fætida aliqua unguenta præscriberem, nam delicatula erat & pulchritudinis amans. Proinde cum ab his tantopere abhorreret, purgato prius corpore, jussi ut partes infectas matutino & vespertino tempore aliquantulum lavaret cum aquæ mercuriatæ & lactis virginalis ana part. æq. & sponte absque deterfione siccare permitteret. Hujus usu primo biduo scabies adhuc magis undique epullulavit, sequentibus verò tribus quatuorve diebus iterum exsiccata atque intotum sanata fuit.

## OBSERVATIO. C.

*Ventriculi affectus.*

**I**Saacus Aquisgranensis, ætatis 46 annorum, antiquo laborabat ventriculi affectu, ructibus nempe molestissimis ac cum difficillimo conatu prodeuntibus: cum aliquid edisset vel bibisset, interdum quinquaginta, interdum centum & plures ructus cum maxima molestia eruëbat, idque sæpius etiam diu noctuque, neque eos ructus ullo modo sistere vel retinere poterat, & si per se non satis erumperent, præ anxietate disrumpi videbatur. Præterea visus ipsi valde debilis erat, ita ut non nisi in propinquo, idque adhuc cum specillis, quicquam legere vel scribere posset, nec sine specillis quicquam legeret. Utrumque affectum se à vigesimo anno ad hanc usque ætatem produxisse ajebat, quo tempore uterque simul invadere cœperat. Plurimis præstantissimorum Medicorum consiliis usus, nihil omnino profecerat, ita ut hæc mala pro desperatis haberentur. Ego ut unicum meum consilium adhuc experiretur rogavi, nempe ut ordinarie post prandium & post cœnam tabaci optimi fistulam unam fumifunctione exhauriret. Hoc meum consilium, etsi magnus esset tabaci hostis, tamen experiri voluit. Primò igitur addidicit sumere semi fistulam, deinde integram, tandem ultra meum præscriptum tam egregie in hac arte profecit, ut duas, tres, pluresve una vice exhaurire posset. Hujus tabaci usum cum per mensem continuasset, ructus illi omnino cessarunt, & visus etiam multo melior evasit, atque eò usque restitutus est, ut sine specillis majorem scripturam commodè legere posset, at cum specillis quamlibet sine molestia legeret. Hinc ipse gavissus, tabacum summis laudibus ad cælum usque extulit, eoque postea pro ordinario semper usus fuit.

*Annotatio.*

**N**icolaus Monardes scribit tabacum esse calidum & siccum gradu secundo, præterea attenuare, concoquere, detergere, discutere, & dolores sedare ac stupefaciendi vim habere, ad odontalgiam prodesse, capitis quoscunque dolores foris impositum lenire, ventriculo frigido applicatum. eundem sanare, &c. Quas facultates etiam in tabaco agnoscunt Dodonæus & alii. Verum cum illorum tempore hujus herbæ

usus minus frequens fuerit, ejusdem utilitas iis minus quam posteris nota fuisse potuit, quibus (proh dolor) usus in abusum plerumque convertitur. Quam utilitatem in variis morbis, ut & utendi modum, aliaque circa ejus usum observanda latius descripsimus in tractatu nostro de Peste, lib. 2. cap. 10. annot. 4. ejusque etiam mentionem fecimus antè observat. 18. ut & lib. 4. de Peste, histor. 17. & 40.

## INDEX

# I N D E X

## OBSERVATIONUM

E T

## Curationum Medicarum

OBSER.	Fol.	OBSER.	Fol.
1 <i>Peripneumonia.</i>	1	39 <i>Hernia intestinalis.</i>	42
2 <i>Odontalgia.</i>	3	40 <i>Dysuria.</i>	44
3 <i>Febris Pestilentialis.</i>	ibid.	41 <i>Hæmoptysis.</i>	45
4 <i>Gonorrhæa.</i>	4	41 <i>Secundina &amp; Lochiorum suppressio.</i>	48
5 <i>Ambustio.</i>	5	42 <i>Cerebri vulnus sclopeto inflitum.</i>	ibid.
6 <i>Palpebræ oclusio à vulnere.</i>	ibid.	43 <i>Asthma.</i>	50
7 <i>Dysuria.</i>	6	44 <i>Nephritis.</i>	51
8 <i>Menstruorum suppressio.</i>	7	45 <i>Ulcus Tibiæ.</i>	ibid.
9 <i>Rauedo incurabilis.</i>	8	46 <i>Dolor fascino inductus.</i>	52
10 <i>Paralysis.</i>	9	47 <i>Gonagra.</i>	53
11 <i>Hæmorrhagia narium.</i>	10	48 <i>Tumor Frontis a casu.</i>	54
12 <i>Scabies sicca seu impetigo.</i>	ibid.	49 <i>Colicæ passio.</i>	ibid.
13 <i>Sphacelus crurum a frigore.</i>	12	50 <i>Vulnus capitis.</i>	57
14 <i>Lienis obstructio.</i>	13	51 <i>Fissura Cranii.</i>	58
15 <i>Vulnus tibiæ.</i>	15	52 <i>Dolor Capitis.</i>	59
16 <i>Suppressio urinae.</i>	16	53 <i>Singultus.</i>	60
17 <i>Dysenteria.</i>	ibid.	54 <i>Vulnus Capitis &amp; Cranii per trepanum apertio.</i>	67
18 <i>Dysenteria.</i>	18	55 <i>Ophthalmia.</i>	68
19 <i>Lochiorum suppressio.</i>	19	56 <i>Hæmoptysis.</i>	69
20 <i>Nephritis.</i>	20	57 <i>Suffocatio Hysterica.</i>	71
21 <i>Vermes.</i>	21	58 <i>Anorexia.</i>	72
22 <i>Ambustio.</i>	22	59 <i>Superfatatio.</i>	74
23 <i>Odontalgia.</i>	23	60 <i>Tinea capitis.</i>	75
24 <i>Febris Gallica Epidemia.</i>	ibid.	61 <i>Febris tertiana intermittens.</i>	76
25 <i>Febris maligna.</i>	25	62 <i>Hæmorrhagia narium.</i>	77
26 <i>Febris maligna.</i>	27	63 <i>Lues Venerea.</i>	79
27 <i>Febris Maligna.</i>	29	64 <i>Diarrhœa.</i>	81
28 <i>Dysenteria maligna.</i>	ibid.	65 <i>Suffocatio uterina.</i>	82
29 <i>Dysenteria.</i>	30	66 <i>Hernia inguinalis cum gangrena.</i>	83
30 <i>Phthisis.</i>	31	67 <i>Extabescencia à vitio ventriculi.</i>	84
31 <i>Vomitus.</i>	33	68 <i>Nephritis.</i>	87
32 <i>Vulnus cruris.</i>	34	69 <i>Dolor immanis sub osse sterno.</i>	88
33 <i>Dolor Capitis.</i>	36	70 <i>Dolor Capitis.</i>	89
34 <i>Suppressio menstruorum.</i>	ibid.	71 <i>Scorbutus.</i>	90
35 <i>Hypercatarsis.</i>	38	72 <i>Ven-</i>	
36 <i>Anhelitus fetor.</i>	39		
37 <i>Asitia.</i>	40		
38 <i>Pulmonis vulnus sclopeto inflitum.</i>	41		



# I N D E X

OBSERV.	Fol.	OBSERV.	Fol.
72 <i>Ventriculi imbecillitas.</i>	92	86 <i>Obstructio lienis.</i>	109
73 <i>Calculus.</i>	94	87 <i>Dolor Ischiadicus.</i>	111
74 <i>Nephritis.</i>	ibid.	88 <i>Vulnus sclopeto inflictum.</i>	115
75 <i>Lac in mamilla virginis.</i>	95	89 <i>Alvus constipata.</i>	117
76 <i>Convulsiones epilepticae.</i>	96	90 <i>Febris notha.</i>	118
77 <i>Febris tertiana intermittens.</i>	97	91 <i>Vermes.</i>	120
78 <i>Febris tertiana intermittens notha.</i>	98	92 <i>Arthritis.</i>	121
79 <i>Colica Passio.</i>	100	93 <i>Dolor ventriculi cum vomitu.</i>	123
80 <i>Obstructio lienis.</i>	101	94 <i>Febris tertiana intermittens notha.</i>	124
81 <i>Suffocatio uterina.</i>	ibid.	95 <i>Fulmine icti.</i>	126
82 <i>Erysipelas cruris.</i>	103	96 <i>Tussis.</i>	127
83 <i>Febris tertiana exquisita.</i>	105	97 <i>Suffocatio uterina.</i>	128
84 <i>Faciei tumor à casu.</i>	107	98 <i>Surditas.</i>	129
85 <i>Strumæ in collo miraculose sanatae.</i>	108	99 <i>Scabies.</i>	130
		100 <i>Ventriculi affectus.</i>	ibid.

# F I N I S



ISBRANDI

ISBRANDI DE DIEMERBROEK,

DISPUTATIONES

*PRACTICÆ*

*DE*

M O R B I S

*CAPITIS,*

T H O R A C I S,

*ET*

INFIMI VENTRIS.

12BREVETED

DECLASSIFIED

1999, 2000, 2001, 2002, 2003, 2004, 2005, 2006, 2007, 2008, 2009, 2010, 2011, 2012, 2013, 2014, 2015, 2016, 2017, 2018, 2019, 2020, 2021, 2022, 2023, 2024, 2025, 2026, 2027, 2028, 2029, 2030, 2031, 2032, 2033, 2034, 2035, 2036, 2037, 2038, 2039, 2040, 2041, 2042, 2043, 2044, 2045, 2046, 2047, 2048, 2049, 2050, 2051, 2052, 2053, 2054, 2055, 2056, 2057, 2058, 2059, 2060, 2061, 2062, 2063, 2064, 2065, 2066, 2067, 2068, 2069, 2070, 2071, 2072, 2073, 2074, 2075, 2076, 2077, 2078, 2079, 2080, 2081, 2082, 2083, 2084, 2085, 2086, 2087, 2088, 2089, 2090, 2091, 2092, 2093, 2094, 2095, 2096, 2097, 2098, 2099, 2100, 2101, 2102, 2103, 2104, 2105, 2106, 2107, 2108, 2109, 2110, 2111, 2112, 2113, 2114, 2115, 2116, 2117, 2118, 2119, 2120, 2121, 2122, 2123, 2124, 2125, 2126, 2127, 2128, 2129, 2130, 2131, 2132, 2133, 2134, 2135, 2136, 2137, 2138, 2139, 2140, 2141, 2142, 2143, 2144, 2145, 2146, 2147, 2148, 2149, 2150, 2151, 2152, 2153, 2154, 2155, 2156, 2157, 2158, 2159, 2160, 2161, 2162, 2163, 2164, 2165, 2166, 2167, 2168, 2169, 2170, 2171, 2172, 2173, 2174, 2175, 2176, 2177, 2178, 2179, 2180, 2181, 2182, 2183, 2184, 2185, 2186, 2187, 2188, 2189, 2190, 2191, 2192, 2193, 2194, 2195, 2196, 2197, 2198, 2199, 2200, 2201, 2202, 2203, 2204, 2205, 2206, 2207, 2208, 2209, 2210, 2211, 2212, 2213, 2214, 2215, 2216, 2217, 2218, 2219, 2220, 2221, 2222, 2223, 2224, 2225, 2226, 2227, 2228, 2229, 2230, 2231, 2232, 2233, 2234, 2235, 2236, 2237, 2238, 2239, 2240, 2241, 2242, 2243, 2244, 2245, 2246, 2247, 2248, 2249, 2250, 2251, 2252, 2253, 2254, 2255, 2256, 2257, 2258, 2259, 2260, 2261, 2262, 2263, 2264, 2265, 2266, 2267, 2268, 2269, 2270, 2271, 2272, 2273, 2274, 2275, 2276, 2277, 2278, 2279, 2280, 2281, 2282, 2283, 2284, 2285, 2286, 2287, 2288, 2289, 2290, 2291, 2292, 2293, 2294, 2295, 2296, 2297, 2298, 2299, 2300, 2301, 2302, 2303, 2304, 2305, 2306, 2307, 2308, 2309, 2310, 2311, 2312, 2313, 2314, 2315, 2316, 2317, 2318, 2319, 2320, 2321, 2322, 2323, 2324, 2325, 2326, 2327, 2328, 2329, 2330, 2331, 2332, 2333, 2334, 2335, 2336, 2337, 2338, 2339, 2340, 2341, 2342, 2343, 2344, 2345, 2346, 2347, 2348, 2349, 2350, 2351, 2352, 2353, 2354, 2355, 2356, 2357, 2358, 2359, 2360, 2361, 2362, 2363, 2364, 2365, 2366, 2367, 2368, 2369, 2370, 2371, 2372, 2373, 2374, 2375, 2376, 2377, 2378, 2379, 2380, 2381, 2382, 2383, 2384, 2385, 2386, 2387, 2388, 2389, 2390, 2391, 2392, 2393, 2394, 2395, 2396, 2397, 2398, 2399, 2400, 2401, 2402, 2403, 2404, 2405, 2406, 2407, 2408, 2409, 2410, 2411, 2412, 2413, 2414, 2415, 2416, 2417, 2418, 2419, 2420, 2421, 2422, 2423, 2424, 2425, 2426, 2427, 2428, 2429, 2430, 2431, 2432, 2433, 2434, 2435, 2436, 2437, 2438, 2439, 2440, 2441, 2442, 2443, 2444, 2445, 2446, 2447, 2448, 2449, 2450, 2451, 2452, 2453, 2454, 2455, 2456, 2457, 2458, 2459, 2460, 2461, 2462, 2463, 2464, 2465, 2466, 2467, 2468, 2469, 2470, 2471, 2472, 2473, 2474, 2475, 2476, 2477, 2478, 2479, 2480, 2481, 2482, 2483, 2484, 2485, 2486, 2487, 2488, 2489, 2490, 2491, 2492, 2493, 2494, 2495, 2496, 2497, 2498, 2499, 2500, 2501, 2502, 2503, 2504, 2505, 2506, 2507, 2508, 2509, 2510, 2511, 2512, 2513, 2514, 2515, 2516, 2517, 2518, 2519, 2520, 2521, 2522, 2523, 2524, 2525, 2526, 2527, 2528, 2529, 2530, 2531, 2532, 2533, 2534, 2535, 2536, 2537, 2538, 2539, 2540, 2541, 2542, 2543, 2544, 2545, 2546, 2547, 2548, 2549, 2550, 2551, 2552, 2553, 2554, 2555, 2556, 2557, 2558, 2559, 2560, 2561, 2562, 2563, 2564, 2565, 2566, 2567, 2568, 2569, 2570, 2571, 2572, 2573, 2574, 2575, 2576, 2577, 2578, 2579, 2580, 2581, 2582, 2583, 2584, 2585, 2586, 2587, 2588, 2589, 2590, 2591, 2592, 2593, 2594, 2595, 2596, 2597, 2598, 2599, 2600, 2601, 2602, 2603, 2604, 2605, 2606, 2607, 2608, 2609, 2610, 2611, 2612, 2613, 2614, 2615, 2616, 2617, 2618, 2619, 2620, 2621, 2622, 2623, 2624, 2625, 2626, 2627, 2628, 2629, 2630, 2631, 2632, 2633, 2634, 2635, 2636, 2637, 2638, 2639, 2640, 2641, 2642, 2643, 2644, 2645, 2646, 2647, 2648, 2649, 2650, 2651, 2652, 2653, 2654, 2655, 2656, 2657, 2658, 2659, 2660, 2661, 2662, 2663, 2664, 2665, 2666, 2667, 2668, 2669, 2670, 2671, 2672, 2673, 2674, 2675, 2676, 2677, 2678, 2679, 2680, 26

1. 2

# SECRET

[illegible]


THE UNIVERSITY OF CHICAGO

# P R Æ F A T I O

## A D

# L E C T O R E M.

Benevole Lector,

X quo ad publicam Medicinæ Practicæ Professionem vocatus fui, illud unice semper annixus sum, ut brevem quandam & succinctam Medendi methodum Auditoribus meis inculcarem, qua agros brevi certa-que via, parvis sumptibus, & suavi modo curare possent, secus quam ante hac à multis aliis Medicis præstitum est, qui per longas ambages, magnosque sumptus, curationes fastoso, imo fastidioso magis, quam utili apparatu docere & peragere consueverunt. Interea autem dum in erudiendis meis discipulis, cum publicè, tum privatim, totus occupatus fui, subinde nonnulli generosiores Medicinæ studiosi à me petierunt, ut ipsis ad historias quorundam in praxi mea occurrentium agrorum medicationes aliquas conscriberem, publicè disputandas, ut sic ipsi, & publica exanthlati laboris specimina edere, & hoc exercitio methodum nostram melius percipere possent. Ego laudabili eorum petitioni satisfacere volens, ordine quodam disputationes istas auspicatus sum, incipiendo à morbis capitis: sed tam avidè & citò distracta fuerunt exemplaria, more Academico non magno numero edita, adeoque à multis postmodum desiderata, ut vix finitis disputationibus de Morbis thoracis, plurimorum incitatione permotus Typographus, obnixè à me veniam petierit, primas duas disputationum nostrarum (scilicet de Capitis & Thoracis morbis) partes minori quadam forma conjunctas in lucem edendi; ut sic desiderio plurimorum, quibus mea Methodus curandi placere videbatur, aliquo modo satisfaceret, dum in futuro inferioris ventris aliique corporis morbi, sequentibus disputationibus simili stylo conscribi, & publici juris fieri possent. Verum etsi ego hoc quaecunque opusculum tanti non facerem, ut illud secunda vice edendum judicaret, antequam disputationes de inferioris ventris Morbis & de Febris adjungerentur, tamen in consensu facilem me præstiti, & sublatis, qua in prima rudiore editione irrepperunt, crassioribus typographicis erroribus, permisi ut hæc disputationes prælo subjicerentur. Tu interim his utere, & valè.

# S E R I E S DISPUTATIONUM, D E *M O R B I S C A P I T I S*

- |   |  |
|---|--|
| <p>I. <b>D</b>E Dolore Capitis.<br/>         II. De Phrenitide.<br/>         III. De Melancholia.<br/>         IV. De Melancholia Hypo-<br/>             chondriaca.<br/>         V. De Mania.<br/>         VI. De Comate Somnolento &amp; Vi-<br/>             gili.<br/>         VII. De Lethargo.<br/>         VIII. De Caro.<br/>         IX. De Catalepsi.<br/>         X. De Vertigine.<br/>         XI. De Incubo.<br/>         XII. De Apoplexia.<br/>         XIII. De Paralyfi &amp; Tremore.</p> | <p>XIV. De Convulsione.<br/>         XV. De Epilepsia.<br/>         XVI. De Catarrho.<br/>         XVII. De Ophthalmia.<br/>         XVIII. De Suffusione &amp; Suggillatione<br/>             Oculorum.<br/>         XIX. De Cæcitate.<br/>         XX. De Gravi auditu, &amp; Aurium tin-<br/>             nitu.<br/>         XXI. De Narium Hæmorrhagia, Gra-<br/>             vedine, &amp; Odoratu Perdito.<br/>         XXII. De Odontalgia.<br/>         XXIII. De Aphtis.<br/>         XXIV. De Ranula.<br/>         XXV. De Hydrocephalo.</p> |
|---|--|

## *De Morbis Thoracis.*

- |   |  |
|---|--|
| <p>I. <b>D</b>E Pleuritide.<br/>         II. De Empyemate.<br/>         III. De Tussi.<br/>         IV. De Asthmate.<br/>         V. De Angina.</p> | <p>VI. De Peripneumonia.<br/>         VII. De Sanguinis sputo.<br/>         VIII. De Phthisi.<br/>         IX. De Syncope.<br/>         X. De Palpitatione Cordis.</p> |
|---|--|

## *De Morbis Infimi Ventris.*

- |  |  |
|--|--|
| <p>I. <b>D</b>E Fame præternaturali.<br/>         II. De Ventriculi difficili co-<br/>             ctione.</p> | <p>III. De Affectione Hypochondriaca,<br/>             nausea, &amp; vomitu.</p> |
|--|--|

*Pri-*

*Primariorum morborum totius capitis*  
**MEDICATIONES,**  
 Viginti quinque disputationibus

A D

**HISTORIAS ÆGRORUM**

P R O P O S I T Æ

H I S T O R I A. I.

*De Dolore Capitis.*

Ir quinquagenarius, temperamento pituitosus, catarrhis subinde obnoxius, media hyeme, tempore frigidissimo, per quatrimum iter fecit, & in itinere victu inordinato, cibisque flatulentis, viscosis, duræ digestionis, aliisque sibi insuetis usus est, ac defectu vini, cerevisiam turbulentam bibit. Tandem domum reversus, conqueritur de molestissimo totius capitis dolore, gravativo magis quam acuto, qui capite foris manu compresso non exasperatur, sed aliquantum mitescit. Adsunt aurium tinnitus, proclivitas ad somnum (qui tamen à dolore impeditur) inappetentia, totius corporis lassitudo, & faciei pallor.



I. Ficitur in hoc ægto imprimis caput, quod ex dolore cum aurium tinnitu satis innotescit: atque hinc per consensum etiam reliquum corpus patitur, ut ex lassitudine, aliisque symptomatibus constat.

II. Malum de quo omnium maximè conqueritur, est κεφαλαλγία, seu capitis dolor, qui est molestia sensus tactus in partibus membranosis à solutione continui facta.

III. Dolorem hunc internum esse, in partibus intra cranium contentis, ex eo liquet, quod compressione foris manu facta non exasperetur, sed mitescat.

IV. Causa remota hujus mali est victus inordinatus, quo ex pravis ac duris cibis in hoc subiecto pituitoso plurimi crudi pituitosique humores in toto quidem corpore, sed imprimis in capite geniti ac coacervati sunt, antecedentem causam constituentes: quæ à causa procatactica (scilicet

frigore externo, in quo per quatrimum iter fecit) aucta, & membranosis cerebri partibus accrescens seu affixa, continentem causam præbuit.

V. Hi pituitosi humores, cum ob externum frigus in capite condensati sunt, nec per frigus obstructos poros, aliosque cerebri excrementis evacuandis dicatos meatus evacuati, magna copia in ventriculis & meatibus cerebri accumulati fuerunt, ita ut sua copia membranosis cerebri partes distendendo malè efficiant, & continuum solvendo dolorem inducant.

VI. Curatio festinanda erit, quia si diutius in capite restagnet copiosa illa pituita, metus incumbit ne in soporem gravem, apoplexiam, aliudve gravius malum affectus hic degeneret, vel si citius liquecat, sibi in convenientem viam faciat, ne catarrhus periculosus fiat, qui ad inferiores partes destillans, vel in pulmonibus gravissimam tussim aut suffocationem, vel

in alia aliqua parte magnum periculum inferat.

VII. Indicationes curativæ quatuor occurrunt: 1. Ut pituita in capite & toto corpore abundans evacuetur. 2. Ut speciatim evacuetur ex ipso capite. 3. Ut dolor sedetur. 4. Ut caput corroboretur, & viscerum coctiones promoveantur, sicque nova copiosa pituitæ generatio & accumulatio, tam in capite, quam in toto corpore impediatur, & pituita modò generata & abundans consumatur.

VIII. Ad pituitæ in toto corpore abundantis evacuationem assumet hunc haustum purgantem:

Rec. *agarici trochiscati drach. j.*  
*fol. sena mund. unc. f.*  
*sem. anisi drach. j. f.*  
*Zingiberis albi scrup. j.*  
*decocti hord. q. f. fiat infusio f. art.*  
*addantur colatura*  
*elect. diaphanici drach. ij.*  
*diagridii gr. iij.*  
*misce, fiat haustus.*

Hunc si æger forte assumere nequeat, dentur scrup. ij. aut scrup. iij. pilularum cochiarum, vel earum loco, pulveris diacarthami, aut diaturbith cum rheo drach. j. Hæc purgatio bis terve repetenda erit, scilicet ad humorum præparationem tribus quatuorve diebus inter singulas purgationes interpositis.

IX. Ad pituitæ in capite accumulatz ibique detentæ evacuationem, maxime proderunt sternutatoria & errhina: hæc quia viscidos & tenaces humores magnâ copiâ è capite per nares & palatum educunt: illa, quia cerebrum iis irritatum se cum violentia quadam contrahens, magno impetu tenaces humores offi ethmoideo aliisque viis infarctos exprimit & expellit, sicque soluta obstructione excrementis intus detentis exitum præbet.

X. Hujus igitur pulveris sternuatorii bis terve de die aliquantum in nares attrahat:

Rec. *fol. majorana scrup. j.*  
*radic. hellebori albi scrup. j. f.*  
*pyrethri scrup. f.*  
*piperis nigri, benzoini ana gr. v.*  
*fiat pulvis.*

Si verò sternutatio ad votum non succedat, sequentis errhini aliquantum in nares attrahat:

Rec. *succi majorana unc. f.*  
*succi rad. beta alba unc. j.*  
*misceantur pro errhino.*

XI. Interea ad doloris mitigationem fiat inunctio frontis, temporum & verticis, cum unguento martiato vel alabastrino, cui sexta pars olei anethini distillati admixta sit. Vel cataplasma ex floribus chamomillæ, meliloti & anethi, addito pauxillo nucis moscatæ & croci, cum mica panis albi recentis & vini albi q. f. confectum, temporibus & fronti inter duo lintea calide applicetur. A narcoticis in hoc ægro abstinendum.

XII. Ad capitis aliorumque viscerum corroboracionem, & pituitæ imminutionem, convenient medicamenta interna & externa, ut & dicta. Utatur itaque æger ter de die unc. iij. hujus apozematis.

Rec. *radic. calami aromat. helenii.*  
*sanic. ana unc. f.*  
*galanga drach. iij.*  
*herbar. betonica, majorana, rosmarini,*  
*hyssopi, melissa, thymi, ana m. j.*  
*salvia, florum chamomilla, stachados ana m. f.*  
*sem. sanic. anisi, carui, ana drach. j. f.*  
*baccar. juniperi drach. vj.*  
*passular. mund. unc. ij.*  
*aqua communis. & vini albi ana part. eq.*  
*coquantur. f. art. & fiat apozema ad lib. j. f.*  
*cui admisce syrupi de stachade unc. ij. vel iij.*

Si post hujus usum, magis exsicandum videatur, poterunt prædicta illa simplicia coqui in decocto guajacino, vel salsaparillæ, & sassafras, atque tali modò longe efficacius evadet medicamentum. In hujus decocti usu aliquamdiu continuandum est, cujus sapor si ægro tandem displiceat, ejus loco subinde utatur particula hujus conditi:

Rec. *specier. diambra scrup. iij.*  
*aromatici rosati scrup. ij.*  
*Zingiberis conditi, conserva florum salvia,*  
*anthos, ana unc. f.*  
*syrupi de stachade q. s.*  
*misce, fiat conditum.*

XIII. Cum topica quoque efficaciter caput corroborare, & frigidos humores in eo reliquos potenter consumere queant, illinat æger manè & vesperi tempora & sinciput ad futuram coronalem hoc linimento:

Rec. *olei nucis moscata expressi drach. i.*  
*olei thymi, rosmarini, anethini*  
*destillati ana scrup. j.*  
*misce, fiat linimentum.*

Post hanc inunctionem sequens cucupha capiti imponatur:

Rec. *fol. rosmarini, majorana ana drach. f.*  
*fol. meliloti, rosar. rubr.*  
*lavendula ana drach. j.*  
*rad. iridis florent. nucis moscata,*  
*gariophyllor. benzoini, ana scrup. j.*  
*fiat pulvis grossus pro cucupha:*

hanc per mensem unum, aut alterum capiti impostam gestet.

XIV. Dietam servet æger convenientem: versetur in aëre modicè calido: utatur cibis eueptis & eupeptis calidioribus, qui condiantur cum rosmarino, majorana, petroselino, salvia, betonica, hyssopo, pipere, zingibere, aliisque aromatibus. Potus sit vinum mediocre, vel melicratum, vel cerevisia mediæ notæ. Somnus non sit longus: exercitia sint mediocria. Alvus quotidie respondeat, vel sponte, vel arte. Animus tranquillussit, à tristitia & metu alienus, vitentur repentini terrores.



## HISTORIA II.

## De Phrenitide.

**J**Uvenis robustus, temperamento biliosus, sanguine abundans, & intemperanter vivens, cum in symposio vinum copiosius bibisset, atque hinc multum incaluisse, tandem ab alio contumeliis affectus, magna ira incanduit, cumque à præsenti vindicta detineretur, ac domum deduceretur, tota nocte non dormivit, sed furentis instar per cubiculum discurret, nil nisi de vulneribus, pugnis, litibus & vindicta locutus, idq; cum ferocia & multis admixtis ineptiis. Postridie omnino deliravit, & ipsis quoque domesticis violentas manus inferre cepit, ita ut à robustis viris detineri debuerit. Secundam quoque noctem vigil cum summo dilirio ac furore transigit, modò floccos & festucas colligens, modò in astantes irruens. Oculi rubent, torvum videt, vociferatur, valde sitit, febricitat, urina pallet. Die tertia Medici consilium imploratur.

**I.** Continuum & ferox delirium cum vigiliis cerebrum in hoc ægro graviter laborare demonstrat, sicut febris reliquum quoque corpus male affici.

**II.** Morbus quo affligitur est inflammatio membranarum cerebri, hincque procedens intemperies calida cerebri & spirituum, unde producantur febris continua, & illa mentis emotio, quam phrenitidem appellant Medici, quæ est delirium ferox & continuum cum febre continua, ab inflammatione membranarum cerebri ortum.

**III.** Remota morbi causa est intemperans vitæ, quo biliosi sanguinis magna copia in corpore genita, antecedentem causam præbuit. Sanguis ille biliosus à nimio vini potu & ira exalefactus ac vehementer commotus, & ad caput copiosior delatus, ibique in substantiam membranarum cerebri nimia copia effusus, morbi hujus continentem causam constituit, quem morbum hoc symptoma sequitur.

**IV.** In illas enim membranas nimia copia percalidus irruens, ibique putrescens, illas inflammavit; ac parte illius putredinis per venas cordi communicatâ, indeque fervidiore per arterias ad totum corpus expulsâ, febrem accendit, cujus magnum calorem œsophagi & oris siccitas cum siti immensa sequitur.

**V.** Ab hac membranarum inflammatione etiam calida intemperies ipsi cerebro & spiritibus ejus inducitur, à quorum nimia caliditate æ mobilitate & inordinato motu, principes cerebri functiones depravantur, sicque delirium generatur: quod ferox ac continuum evadit, & cum vigiliis conjunctum est, propter nimium continuumque calorem, spirituumque ferventium rapidum motum.

**VI.** Morbus hic variis de causis periculosus est. 1. Quia pars princeps laborat. 2. Quia continuæ vigilæ ægrum valde fatigant. 3. Quia febris adest continua. 4. Quia hoc delirium non est cum risu, sed cum ferocia. 5. Quia dicta inflam-

matio inde etiam multum fovetur & augetur, quod biliosa materia, quæ urinam tingere solent, tota ad caput abripiatur, sicque urinam pallidam relinquat. Sanationis tamen spem faciunt virium robur & absentia pessimorum symptomatum, qualia sunt, convulsiones, aphonia, singultus, dentium stridor, aliaque similia. Ac proinde curatio quam primum erit instituenda, antequam malum in pejus vergat.

**VII.** Hæc curatio consistit in causæ antecedentis ac continentis ablatione, & intemperiei correctione.

**VIII.** Biliosus sanguis qui ad caput copiosior affluit, necessariò quam primum est evacuandus, revellendus, derivandus, & repellendus. Quapropter clystere emolliente præmissio, vena in brachio aperiatur, & sanguinis unc. x. vel xij extrahantur: quæ venæsectio postridie in altero brachio reiteretur, atque etiam tertia die, si necesse videatur: primarium enim in hoc malo remedium est sanguinis detractio; quæ, si æger id permitteret, non incommodè secunda vel tertia die institueretur, in vena frontis.

**IX.** Ad humorum biliosorum expurgationem detur hic haustus.

Rec. rhabarbari opt.

sol. senæ mundat. ana drach. ij.

tartari rhenani drach. iij.

sem. anisi scrup. j. aquæ cichorei q. s.

fiat infusio s. art. colatura addantur

elect. diapruri solut. drach. iij.

diagridii gr. iij. misce, fiat haustus.

Si sequentibus diebus alvus quotidie non respondeat, clysteribus proritetur, & tertia vel quarta die præscriptus haustus iterum exhibeatur.

**X.** Bis terve de die inungantur tempora & frons hoc linimento:

Rec. unguenti populei drach. vj.

olei papaverini drach. iij.

misce, fiat linimentum.

Post

Post hujus inunctionem sequens oxysrhodinum cum linteis capiti tipidè applicetur :

Rec. olei rosacei unc. ij.  
succu lactuca unc. iij.  
succu semper vivi majoris, aqua rosarum,  
aceti rosacei; ana unc. j. s.  
misceantur bene, & fiat oxysrhodinum.

XI. Ad materiæ morbificæ diversionem columbæ vivæ dissectæ, vel hoc suppedaneum plantis pedum applicetur.

Rec. fol. brassica rubra, beta alba ana m. j. s.  
contundantur in mortario,  
& cum fermenti acidi unc. iij.  
salis drach. ij. aceti rosacei q. s.  
fiat pasta suppedanea.

XII. Sub noctem exhibeatur pilula ex laudani opiatu gr. iij. Vel si pilulam respuat, aut abjiciat æger, dissolvantur istius laudani gr. iij. in decocti hordei unc. j. & additâ syrupi papaveris rheados unc. j. fiat haustus ad somnum provocandum.

XIII. Interea dum hæc fiunt, bibat æger pro potu ordinario cerevisiam tenuem vel tenuissimam, vel serum lactis acidi, vel aquam fontanam, in qua pomum citri in frusta confissum immaceratum est, addito pauxillo sacchari & aquæ rosacæ, vel hujusmodi julebum :

Rec. fol. lactuca m. iij. endivia m. ij.  
fruct. ribesiorum rubr. m. j.  
aqua hordei q. s. coquantur ad lib. j.  
colatura refrigerata addantur  
syrupi violacei, de limonibus, ana unc. j.  
de papavere unc. s.  
succu citri recentis q. s. ad gratum acorem,

misce, fiat juleb.

XIV. Utatur etiam sæpe de die particula hujus conditi :

Rec. pulv. diamargariti frig. scrup. iij.  
pulpa tamarindorum, conserva violarum,  
rosarum pallid.  
rob. ribesiorum rubr. ana drach. iij.  
syrupi violacei q. s. fiat conditum.

Circa vespeream (nempe, cum laudanum opiatum non sumit) bibat haustum unum aut alterum hujus emulsionis :

Rec. sem. 4. frigid. maj. ana drach. ij.  
sem. papaveris albi unc. s.  
decocti hordei q. s. fiat emulsio ad unc. viij.  
cui adde, syrupi papaveris rheados,  
violacei, ana drach. v. misceantur.

XV. Cum malum nonnihil incipit mitescere, ad materiam peccantem citius resolvendam, capiti admoveatur gallina viva per medium dissecta, vel pulmo vituli aut ovis recenter è matato animali evulsus, tepidus imponatur.

XVI. In dieta sit aer aliquantum ad frigidum & humidum inclinans, & sublucidus. Cibus sit parcus, & refrigerans, cum lactuca, endivia, boragine, acetosa, aliisque refrigerantibus præparatus. Qualis potus conveniat, ante dictum. Absint ab ægro multa colloquia, multique collocutores, & quies ac somnus omnibus modis concilietur. Furibundus animi affectus paucis ac blandis sermonibus demulceatur, imprimis à talibus, quorum præsentiam tempore sanitatis amavit æger. Alvus quotidie vel sponte, vel arte respondeat.

## HISTORIA III.

### De Melancholia.

**V**ir quadragenarius & doctus, temperamento melancholicus, cum æstivo calido tempore una cum Filio 12. annorum extra urbem deambulans ad flumen pervenisset, exutis vestibus in aquam insiliit, ut se natatione obletaret; ad quam natationem etiam Filium natandi imperitum invitavit : qui cum in aquam insiliret, mox fundum petiit & submersus est, antequam Pater, qui paulo longius aberat, accedere, eique suppetias ferre posset. Hinc admodum contristatus Pater, ac de infortunio hoc continuò cogitans, ejusdemque se auctorem esse putans, dies noctesque cum fletu & suspiriis insomnes duxit : imò intra paucos dies res eò devenit, ut se homicidium commisisse, hacque de causa in æternum condemnatum, & horribilem Dæmonem in pertuam tentationem sibi à summo Deo adjunctum esse diceret, propterea quod sua persuasione Filius in aquam descendisset, sicque sua culpa periisset. Hunc autem Dæmonem sibi continuò à latere adstare putabat, ejusdemque horribilem figuram adstantibus enarrabat, ac mirabatur alios illum non videre, cum sæpe proximè illi adessent. De omnibus aliis rebus bene judicabat, hæc sola falsa imaginatio tam firmiter animo ejus insedit, ut hætenus nullis amicorum consolationibus, aliisque rationibus evelli potuerit. Quapropter medicum tandem consilium & auxilium imploratur.

I. Cum

**C**um principum facultatum in cerebro sedes sit, & imaginatio in hoc ægro lædatur, cerebrum affligi manifestum est: quod etiam ex tristitia & timore liquet.

II. Affectus hic est Melancholica, ac prava cerebri intemperies, imaginationem lædens & falsis spectris eludens, hincque simul timorem & tristitiam sine causa continuo exhibens. Quæ duo Hippocrates statuit indubitata esse Melancholiæ signa, si nimirum adsint: nam hæc sola signa non sunt, quoniam non omnes Melancholici timidi sunt & mœsti, imò nonnulli lætitia affici videntur, cum se reges, divites &c. esse imaginantur. Quapropter Melancholiam bene definiri putamus, quod sit delirium sine febre & furore, à phantasmate melancholico ortum.

III. Prima & externa hujus mali causa fuit grave illud infortunium, quod Filio contigit, quo noster æger, naturâ Melancholicus, valde contristatus ac perturbatus est: cumque cordolium illud oblivisci non potuerit, sed dies noctesque cum anxietate de eo cogitans, insomnes duceret, spiritus animales ad Melancholiam proni, inordinatè in cerebro agitati sunt, sicque malam ac specificam seu occultam intemperiem contraxerunt, quam non tantum cerebro, sed per hunc etiam cordi reliquoque corpori communicarunt. Hinc horrendæ cogitationes, tristitia & timor exorta sunt.

IV. Quia autem continua illi cogitatio est de Filio, quem sua culpa interiisse putat, homicidium se commississe sibi persuadet; quod cum sciat esse execrabile apud summum Deum, qui homicidas graviter punire solet, hinc in eam venit imaginationem, se hac de causa in æternum condemnatum, & horribilem Dæmonem sibi adjunctum esse; à qua cogitatione cum non desistat, sed illud pro verissimo habeat, certam quandam imaginem istius dæmonis firmissimè cerebro impressit, quæ cerebri & spirituum motu animæ tam evidenter offertur, ut se dæmonem istum continuè videre putet, nec ab illa imaginatione dimoveri possit. In reliquis autem non delirat, sed mens officium satis facit, propterea quod aliarum rerum perceptio & iudicium à falsa hac imaginatione non impediuntur: quod etiam circa hanc imaginationem continuè totus sit occupatus, neque de aliis rebus tam intentè, diu, & tanta cum animi emotione cogitet.

V. Quia verò hæc cerebri & spirituum animalium occulta intemperies in ipso cerebro genita est, melancholiam hanc primariam seu idiopathicam esse liquet.

VI. Melancholicum hujus ægri delirium, quamvis grave & molestum sit, tamen lethale non est, & magnam sanationis spem exhibet, quod sola imaginatio depravata sit, ratiocinatione vix læsa, & memoria integra existente: deinde quod corpus morbis non infestetur: quod etiam æger ipse sit vir doctus, qui commodis rationibus à falsa imaginatione melius deduci poterit. Adde, quod tempus sit æstivum, ad cu-

rationem optimè conveniens.

VII. In curatione materia melancholica prava, cerebrique intemperies sunt corrigenda, ut spiritus puriores, à specifica illa melancholica labe immunes fieri & de novo generari possint: nec non evacuatio istius pravae materiae est instituenda, ipsumque caput roborandum, & omnibus modis tentandum, ut æger à falsis & horrendis imaginationibus abducatur.

VIII. Primò igitur alvus subducatur & evacuetur hoc bolo:

Rec. confect. hamech,

elect. diaphanici, ana drach. j. s.

diagridii gr. vij. misce, fiat bolus.

Vel si illum assumere nolit, injiciatur hic clyster:

Rec. decocti emollientis, cui unc. j.

fol. senna addita sit, unc. ix.

elect. diaphanici, unc. ij.

olei chamamelini unc. j. s.

salis drach. j. misce, fiat clyster.

IX. Quia in hoc ægro sanguis non abundat, & vires conservandæ sunt, ne iis dejectis animum prorsus abjiciat; quia etiam temperamentum ejus frigidius est, à venæsectione abstinere poterit, nisi vel palpitatio cordis, vel aliud quid accedat, quod sanguinis missionem suadeat.

X. Post expurgatam primi ventris saburram, ad melancholici humoris præparationem & capitis corroborationem, bibat ter quaterve de die haustum hujus apozematis:

Rec. radic. polypodii querni unc. j.

calami aromatici, faniculi,

cort. rad. capparum, tamarisci, ana unc. l.

herb. melissa, boraginis, violaria,

summitat. lupuli, betonica,

chamedryos, majorana, ana m. j.

florum stachados m. l.

flor. cordialium, ana p. j.

corticum citri, arantiorum, ana drach. iij.

sem. faniculi, carui, ana drach. j. s.

passularum corinth. unc. ij.

aqua & vini, ana part. aq.

coquantur s. art, & fiat apozema ad lib. j. l.

cui admisceantur syrupi de stachade,

de boragine, ana unc. j. s.

XI. Præmissa tali præparatione, instituatur purgatio hac potione:

Rec. fol. senna mund. unc. l.

agarici albiss. drach. j.

sem. anisi drach. j. zingiberis scrup. j.

decocti hordei q. s.

fiat infusio per noctem, adde colatura

confectionis hamech drach. iij.

misce, fiat haustus.

XII. Deinde revertatur æger ad usum antedicti apozematis, quo, vel alio simili, longo tempore uti debet, singulis triduis vel quatriiduis alvum clementer subducendo, vel haustu prædicto, vel confectione hamech, vel pilulis cochiis, vel etiam syrupo de pomis composito Mesues, cujus magnum encomium in in tali casu describit Rondeletius.

XIII. Post singulas doses apozematis, nec non meridie & & vesperi post paltum comedat hujus conditi particulam magnitudinis nucis moscatæ:

Rec. specier. diambra, diamoschi dulcis, dianthos, ana scrup. ij.  
corticum citri & arantiorum condit. ana drach. iij.  
conserva flor. boraginis,  
melissa, anthos, ana unc. f.  
confect. alhermes scrup. j. f.  
syrupi cortic. citri. q. s.  
misceantur, & fiat conditum.

XIV. Interea dum hæc aguntur,, non inutiliter subinde fient peculiare capitis evacuationes per masticatoria, vel per pulverem sternutatorium ex majorana, semine nigellæ, radicibus hellebori albi, pyrethri, aliisque similibus paratum.

XV. Imprimis etiam curandum ut æger dormiat; quapropter interdum pro cœna dandum est hordeatum, vel amygdalatum cum decocto hordei & lactucæ paratum, cui, si vigiliæ pertinaces sint, nonnunquam syrupi de papavere unc. f. vel paulo plus admiscere licet: vel si hæc non juvent, pilula ex massæ pil. de styrace gr. xv. vel ex laudani opiat gr. iij. sed raro, exhibenda. In minoribus vigiliis interdum prodesse posset, si opii pauca grana cum unguento populeo mixta temporibus illinerentur. Notandum tamen, rarius & non nisi urgente necessitate narcoticis utendum esse, ne æger frequentiore eorum usu vel lædatur, vel iis nimis assuecat.

XVI. Maximè quoque necessaria est conveniens victus ratio, ut pote qua sanguis bonus & purior generatur, & melancholici succi vitium pravaque qualitas corrigitur. Aër igitur ad calidum & humidum vergat, sitque lucidus & suaveolens. Cibi sint boni succi & concoctu faciles, moderatè calidi & humidi, conditi cum hordeo mundato, boragine, melissa, betonica, majorana, buglossa, uvis passis, &c. fugiendo porrum, cæpas, allium, brassicam, pisces & carnes muria diu asservatas vel fumo siccatas, aliosque cibos, qui vel corpori pravam nutrimentum, vel succo melancholico materiam præbent. Nec abstinencia se maceret æger, nec multa ciborum quantitate se oneret. Potus sit vinum tenue aut mediocre, cui non male melissa, rosmarinus, aliudve simile immacerari posset: vel bibat cerevisiam bene defæcatam mediocris notæ. Exercitia sint mediocria. Somnus sit longior. Excernenda bene procedant, vel sponte, vel arte. Et quod in hac curatione maximi momenti est, omnibus modis studendum, ut animus à mæore abducatur, omnisque metus & tristitiæ occasio vitetur: ut gratis & solidis quoque rationibus illi sæpius demonstretur quod falsa imaginatione detineatur, quod homicidium non commiserit, quod nullus dæmon illi adsit, quod filius sua culpa non perierit, &c. Tales enim erroris demonstrationes apud hujusmodi ægros, imprimis doctos, qualis hic est, tantum valent, ut iis solis, accedente conveniente victu, non pauci fuerint restituti.

## HISTORIA. IV.

### *De Melancholia Hypochondriaca.*

**N**obilis Germanus quadragenarius, temperamento Melancholicus, cum in nupero Germanico bello hostium invasiones, captivitatem, exilium, famem, aliasque ærumnas perpeffus, pravaque diætæ diu usus fuisset, atque hinc longo tempore circa præcordia flatus, rugitus tensiones, & ponderosam quandam molestiam (imprimis circa sinistrum hypochondrium) cum respiratione difficiliore, cordisque palpitatione non continua, & appetitus læsione persentiisset, simulque tristis, meticulosus & cogitabundus fuisset; tandem morte uxoris intellectâ, adeo consternatus est, ut nullis sermonum blandimentis tristitia ejus leniri potuerit: hinc pervigiliis, inquietudine & horrendis cogitationibus ac insomniis subsequenter, per intervalla primò, postea verò continuo delirare coepit. Omnes vitæ suæ inhiare putat, ac proinde solitudinem quærit, hominumque consortia fugit: si præter domesticos (à quibus sibi etiam metuit) alius quispiam cubiculum ejus ingrediatur, mox orat ne ipsum inopinanter occidat, sed tempus concedat quo ad mortem se præparet. Soli Medico confidere videtur, nam alixipharmaca adversus venena, quæ cibis sæpius immisceri putat, ab illo exposcit, & quælibet oblata medicamenta assumit.

**I.** IN hoc ægro variæ partes graviter affliguntur, imprimis autem cerebrum, ut patet ex delirio; & viscera mediæ ac infimæ ventris, quod cordis palpitatio, difficilis respiratio, tensio gravitasque in hypochondriis, appetitus læsio, &c. satis edocent.

**II.** Symptoma quod maximè infestat Melancholia appellatur, quæ est, *delirium sine furore & febre à phantasmata Melancholica ortum.*

**III.** Causæ mali remotæ sunt metus, terrores, mœstitia ab infortuniis illata, aliaque similia quæ spiritus diu turbant & inordinatè moverunt: quibus accessit prava diæta ex cibis crassiss, pravi succi, dyspeptis, aquæ potationibus &c. Quo pravo victu cruditates primò generatæ sunt in visceribus infimæ ventris, hincque obstructions in lienè & circumvicinis locis; atque etiam lienis virtus non parum labefacta fuit, ita ut in chymificatione officio suo non satisfaciens; & chymi materiam ad humorum convenientem fermentationem ineptam gignens, multos humores sæculentos, acidos, acerbos, crassos & crudiores reliquerit, qui cum ob crassitiem minima vasa transmeare satis non potuerint, in hypochondriis, imprimis sinistro circa lienem, majore copia coacervati sunt, unde ponderosa illa molestia processit; cui status & rugitus junguntur, propterea quod dum natura acidæ hujus materiæ coctionem molitur, quam satis bene perficere nequit, acidi illi humores fermentationem aliquam suscipiant, qua status copiosi gignuntur, qui cum omnes facilem non inveniant exitum, rugitus partiumque tensiones faciunt. Hæc crassior, acerbior & acida Melancholica materia per venas ad cor delata, sæpe palpitaciones in eò facit, quia cor acrem illam pungentem materiam cum impetu à se expellere nititur; cumque succus ille Melancholicus inæqualis sit, nec omnibus suis partibus cordi æqualiter infestus, hinc etiam fit quod palpitatio cordis non sit continua, sed sæpius quidem, at per intervalla contingat, partibus nempe magis infestis cor ingredientibus. Idem ille succus cum è dextro cordis ventriculo ad pulmones expulsus, ob crassitiem & acerbitem minimos ramos venæ arteriosæ & arteriæ venosæ, cum difficultate transeat, multisque vaporibus pectus repleat, difficilem facit respirationem: ad cerebrum verò per arterias cum sanguine vitali delatus, animales spiritus inordinatè commovet, impuriore reddidit, & specifica pravaque intemperie alterat; unde tunc phantasmata tristitia menti continuè offeruntur, quibus operationes ejus, maximè imaginatio & ratiocinatio, læduntur, sicque delirium inducitur cum timore & tristitia.

**IV.** Quia verò Melancholicus ille humor in ipso capite primitus generatus non est, verum ex hypochondriis, maximè sinistro, ad caput ascendit, hinc *Melancholia* hæc non est primaria seu idiopathica, sed sympathica, quæ à loco in quo mali fomes latet, *Hypochondriaca* nominari consuevit.

**V.** Melancholicum hujus ægri delirium cura-

tu difficile erit, neque periculi expers. **I.** Quia graves & diuturnas causas remotas habuit, quarum ratione plurimum causæ antecedentis, nimirum sæculentæ Melancholicæ materiæ, in hypochondriis generatæ & collectæ est. **II.** Quia copiosa illa sæculenta materia pernix est, ac medicamentis non facile edomatur, & spiritus animales peculiari prava intemperie afficit. **III.** Quia, cum ad curationem longiore tempore opus sit, metuendum est ne æger tam diu medicamentis uti velit. **IV.** Quia diuturnus Melancholici humoris ad cerebrum adscensus paulatim pejorem cerebro dispositionem imprimit, unde malum à sympathico idiopathicum fieri posset. **V.** Quia hi humores Melancholici occulta qualitate & manifesta, nempe acrimoniâ, acerbitate, &c. membranæ cerebri & nervis infesti sunt, unde metuendum est à diuturno & copioso eorum ad caput affluxu tandem convulsiones, epilepsiam, aliudve gravius malum secuturum. **VI.** Quia delirium hoc non est cum risu, sed cum tristi ac serio studio. Tamen spem aliquam sanationis exhibet virium robur, & ad medicamenta sumenda promptitudo: præterea quod malum non sit idiopathicum sed sympathicum.

**VI.** In curatione studendum est ut causa continens discutiatur, spirituumque animalium intemperies tollatur, & ut causa antecedens, nempe humor Melancholicus in hypochondriis, incidatur, attenuetur, digeratur & evacuetur, ejusque nova generatio & accumulatio prohibeatur, obstructions tollantur, cerebrum, lien, aliaque viscera corroborentur.

Medicamenta clementiora, non admodum calida; convenient, ne fortioribus, aut valde calidis exagitata materia multo copiosior ad cor & cerebrum deferatur.

**VII.** Primò alvus subducatur hoc clystere:

Rec. decocti emollientis unc. x.

elect. hiera picra, diacatholici ana unc. j. f.

olei chamamelini unc. j. f.

salis drach. j. misce, fiat clyster.

Postridie vel tertia die exhibeatur hæc potio:

Rec. fol. senæ mund. unc. f.

agarici albiss. sem. anisi ana drach. j.

zingiberis scrup. j. decocti hordei q. s.

fiat infusio si art. adde colatura.

confect. hamech drach. ij.

elect. hiera picra drach. j.

misce, fiat haustus.

**IX.** Quia venæ huic ægro tument, pulsus durus est, cordis palpitatio nonnunquam infestat, & vires mediocriter constant, non malè post expurgatum corpus venæsectio instituetur in brachio: & si venæ hæmorrhoidales aliquo modo in conspectum prodeant utilissimè hirudines iis apponentur.

**X.** His præmissis bibat ter quaterve de die haustum hujus apozematis:

Rec. radic. polydii querni unc. j.

eryngii, ononidis,

corr. rad. capparum, tamarisci, ana unc. f.

herb. bptaginis, absinthii rom.

B 2

fragaria,

## M E D I C A T I O F E M I N A E H I S T. V.

fragaria, taraxaci totius, scolopendria,  
chamedryos, trifolii aquatici, ana m. j.  
violaria, melissa, ana m. l.  
corticum citri, arantiorum, ana unc. l.  
prunorum damasc. par. vij.  
passul. corinth. unc. ij.  
chalybis in nodulo ligati unc. j.  
sem. anisi drach. iij.  
aqua communis q. s. fiat. s. art.  
apozema ad lib. j. l.

XI. Cum per quatuor dies hoc apozemate  
usus est, iterum purgetur haustu ante praescripto,  
& deinde revertatur ad usum apozematis, hoc-  
que ordine per aliquod tempus procedat; & si  
his diebus, quibus apozemate utitur, alvus sub-  
sistat, clysteribus quotidie prorietur. Per inter-  
valla etiam dictum apozema purgans fieri pote-  
rit, adjectis sol. sena mundat. unc. ij. rad. helle-  
bori nigri, drach. ij. myrobalanorum indor. drach. vj.  
sem. anisi unc. l. atque inde xgro quotidie mane  
haustus unc. iij. exhiberi. Si vero xger nausea-  
bundus & ad vomitum proclivis evadat, non  
inutiliter hac porione vomitus provocabitur:

Rec. conserva soliorum asari drach. x.  
decocti raphani unc. iij.  
oxymelis scyllitici cum agarico unc. l.  
vini vomitivi drach. iij.  
misce, fiat haustus.

XII. Interea dum haec fiunt, xger ad capi-  
tis & viscerum corroboracionem sumat aliquo-  
ties de die unam ex his tabellis:

Rec. specierum diambra drach. j.  
diambros. aromatici rosarum ana scrup. j.  
pulv. flavardinis citri scrup. j.  
sacchari aqua benonica dissoluti q. s. fiat.  
fiunt. s. art. tabella.

Vel utatur interdum particula hujus conditi-

Rec. specierum diambra drach. j.  
conserva boraginis melissa, anther.  
rosarum pall. ana. drach. iij.  
syrops de cort. citri q. s. fiat.  
fiat. conditum.

XIII. Dietam servet convenientem; ver-  
setur in aere temperato & lucido: solitudinem  
viter. Gratis & jucundis amicorum, quibus  
confidit, colloquiis exhilaretur. Corpus ambu-  
lationibus modice exerceat. Somnum quoquo  
modo capeat. Abstineat a cibis duris ac diffi-  
cili coctionis, vel pravi nutrimenti, prae-  
cipue antiquis, salis, vel fumo siccatis: item  
a viscosis, flatulentis, & facile corruptibilibus:  
utatur cibis euchymis & eupeptis, qui condi-  
antur cum talibus quae attenuandi, aperiendi,  
& coctiones promovendi vim habent, abstinendo  
tamen a valde calidis. Bibat cerevisiam me-  
diocrem bene defaecatam, & in prandio ac coe-  
na pauxillum vini tenuis, diurectici. Abstineat  
ab omni potu valde fumoso. Tristitiam, metum,  
terrorem, eorumque occasiones, quantum possibi-  
le, evitet: hilaritatem amplectatur: curas om-  
nes & inanes cogitationes rejiciat.

## H I S T O R I A. V.

### De Mania.

**D** Onicella nobilis circiter 28. annorum, robusta, sagax, Melancholica,  
subtristis, cogitabunda, dietam inordinatam servans, obstructionibus in  
hypochondriis interdum obnoxia; cum se a parentibus parvi fieri anim-  
adverteret, diu altum pressit corde dolorem, ac magna cum simulatione  
hilaritatem quidem in propatulo finxit, solitaria vero integras noctes insomnis cum  
tristitia, morositate, fletu, ac suspiriis transegit. Tandem capitis dolore cum fe-  
bricula inordinata continua correpta est; quem dolorem paucis post diebus non  
fentiit amplius, sed mente laborare comperta est; nam quae taciturnior esse sole-  
bat, loquacissima praeter consuetudinem evasit, ita ut sine ulla fere cessatione con-  
tinuè loqueretur, & non dies tantum, sed integras quoque noctes garriendo in-  
sumeret, nullo propemodum intercedente somno. Primo biduo vel triduo, quam-  
vis multa loqueretur, nihil tamen a ratione alienum dicere videbatur: postea ve-  
ro multa delira admiscebantur. Hoc tempore febricula defuit. Vigiliae tamen per-  
manserunt. Delirium illud intra paucos dies valde adauctum est, ita ut aegra vix  
quippiam sani loqueretur amplius, motosa evadebat, & iracunda, per cubicu-  
lum discurrebat, vociferabatur, & tandem omnino furibunda adeoque sui impos-  
facta est, ut in quolibet adstantes violentas manus inferret, impudica loquere-  
tur, suaeque vestimenta dilaceraret: ita ut, ne vim faceret sibi aut aliis, a qua-  
tuor fortissimis mulieribus continuae brachia cruraque ejus continenda forent, cum  
illam ligari non permitterent parentes. Interim vires robustae sunt, menstrua or-  
dinariis

dinariis periodis satis copiose fluunt, appetitus mediocriter constat, nec magna sitis adest. Ab intensissimo hyberni aëris frigore & asperissimo gelu non admodum refrigeratur, licet sæpe vestibis parum aut vix contacta sit, semper ramen calida reperitur. Furore hoc per aliquot menses durante & magis ingravescente, Medicorum consilia expetuntur.

I. **C**erebrum in hac ægra graviter affici, liquet ex continuo furore cum vigiliis perpetuis, audacia, & ira: cor quoque reliquumque corpus pati, liquet, ex totius magnò calore.

II. Delirium hoc *Mania* appellatur, *estque mentis diuturna emotio cum feroci audacia, à fervore spirituum orta.*

III. Inter causas evidentes primaria fuit cordolium ipsi à dicto parentum vilipendio illatum: quod etsi simulatione quadam suppressum fuerit, tamen in subiecto juvenili per se melancholico, & propter victum inordinatum ex parte quidem biliosis, sed pluribus melancholicis humoribus abundante, hincque ad morbos proclivi, hujusmodi delirium cum furore inducere potuit: Hoc enim vilipendium modò iracundiam ipsi movit, bile, quæ melancholico humori admixta est, effervescente; modò tristitiam, melancholicis succis emotis & bilem superantibus, & ab illa inordinata lucta & effervescencia bilis cum melancholia, tota sanguinis massa efferebuit, hincque processit aliqua levis putredo, quæ febriculam inordinatam generavit, capitis dolore comitatam, quem inducere acres vapores biliosis & melancholici simul ad caput delati. Tandem illa bilis sanguinisque effervescencia à melancholici humoris ferventis copia & qualitate superata, evanuit febricula, atque à fervidis humoribus melancholicis in corpore & capite prædominantibus, à præcedente bilis effervescencia æstuantibus, spiritus animales etiam incanduerunt, & rapidè ac inordinatè moti sunt, hincque delirium accessit, primo mitius, spiritibus nondum valde excalescentis & agitatibus; deinde violentum cum ira, audacia & furore, ob auctum spirituum animalium acrem fervorem, unde nimis attenuati & aciores reddit, rapide moventur, & inordinate ac violenter agitantur.

IV. Quia vero fervor ille non tantum inest spiritibus animalibus, sed etiam vitalibus, totique sanguinis massæ, hinc fit quod totum corpus adeo caleat, ut etiam ab externo aëris frigore non refrigeretur, sed semper calidum permaneat.

V. Febris tamen non adest, quia fervor ille sanguinis & spirituum magnus quidem est & acer, verum sine putredine & inflammatione, quia magis in falsis, quam sulphureis particulis consistit.

VI. Malum hoc difficulter curabitur; partim quod hic nobilissima viscera afficiantur: partim quod causa lateat in humore pravo, pertinaci & copioso: denique quod ægram, propter furorem, prorsus inobedientem habeamus, ita ut convenientia remedia commode adhiberi nequeant. Quo tamen diutius differtur, eo difficilior evadet cura-

rio, ac proinde quam citissime, & quocunque fieri potest modo tentanda erit.

VII. Indicationes curativæ primariæ hæc sunt: I. Ut humor melancholicus in corpore abundans præparetur, evacuetur, ejusdemque & totius sanguinis ac spirituum fervor extinguatur. II. Ut nova ejusdem humoris & fervoris generatio impediatur. III. Ut viscera, imprimis cor, cerebrum, hepar, & lien, corroborentur. His autem indicationibus satisfaciendum est diætâ, chirurgiâ, & pharmaciâ.

VIII. Diætâ quamvis in hac ægra, furore percita, debito modo institui nequeat, illius tamen, quantum fieri poterit, ratio habenda est. Cubiculum igitur in quo decumbit, subobscurum sit; in quo à viris vel mulieribus robustis bene fervetur, vel latis fasciis brachia ligentur, ne vel sibi vel aliis violentas manus inferat. Nemo ad illam accedat, præter paucos, qui continuè cum illa versantur, & quorum consortio sanitatis tempore gaudere solebat, neque illi multa loquantur. Aër sit temperatus. Cibi afferantur humectantes, & modice refrigerantes, humidi potius quam sicci. Potus sit pitana vel cerevisia tenuis. Animi emotiones paucis & blandis verbis subinde demutentur, iisque continuè blandis actionibus sine multa loquela obviam eatur. Omni modo studendum, ut ægra quieta detineatur & dormiat quantum possit: Menstrua, alvus, aliæque evacuationes, vel sponte, vel arte procedant.

IX. Quamvis ob furorem medicamenta sæpe abjiciat ægra, tentandum tamen an blandis verbis, vel loco potus, illi hic haultus obtrudi & exhiberi possit.

*Rec. sol. sen. mund. unc. l. sem. anis. drach. j.  
decocti hordei q. s. fiat infusio s. art.  
adde colatura confectiois hamech drach. iij.  
extracti hellebori scrup. j.  
misce, fiat haultus.*

X. Corpore expurgato ad sanguinis missionem deveniendum est, quæ non semel facienda, sed postea sæpius erit reiteranda: primo in brachio, deinde in manibus, in pedibus, in fronte, aliisque locis convenientibus, & pro ratione virium bona sanguinis quantitas est detrahenda. Post venæsectionem bene servanda est ægra, ne ligacula venæ dissectæ injecta detrahat, sibi que nimiam hæmorrhagiam faciat.

XI. Inter singulas venæsectiones subinde purgetur ægra haultu modo præscripto, vel pulvere *diasennæ*, vel sola confectioe *hamech*, aliove simili medicamento. Vel si hæc omnia abjiciat, dentur illi talia quibus delectatur, ut *myva cydonæorum* vel *rob ribesiorum rubrorum*, ad quorum singulas uncias, ipsa nesciente, *diagridii gr. xxliij.* admisceantur, atque talis mixtura dentur *drach. vj.*



*drach. vi.* vel viij, plus minusve, prout inde purgari observabitur. Vel si *passulas corinthiacas* amet, coquantur illæ in decocto *foliorum senna & radic. bellebori nigri*, usque dum intumescant, postea inde exemptæ in loco ventis exposito aliquantum siccentur, ut coctas non animadvertat, sicque comedendæ offerantur. Quod enim studio haberi non potest, fallaciùs ab hac ægra impetrandum est.

XII. Videndum etiam an blandis verbis vel fallaciis aliquoties de die haustus hujus apozematis exhiberi possit:

Rec. *rad. polypod. querni*,  
*cichorei, ana unc. j.*  
*cort. rad. cappar. tamarisci, ana unc. f.*  
*herbar. cuscus, capilli veneris, lactuc,*  
*taraxici cum toto, acetos. scolopend.*  
*boragin, buglos. ana M. j*  
*florum cordialium ana P. j.*  
*cortic. citri, arantior. ana drach. iij.*  
*fruct. tamarind. unc. j.*  
*aqua q. S. coquantur s. art. &*  
*fiat Apozema ad lib. j. f.*

Si in hoc apozemate macerentur.

*fol. sem. mundat. unc. j. f. rad. bellebori nigri*  
*drach. ij. sem. anisi drach. ij.* fiet tali modo apozema purgans, quo, si ægra id assumere vellet, corpus subinde posset expurgari.

XIII. Hoc quoque conditum per occasiones offeratur.

Rec. *Conserv. violar rosar. pallid.*  
*rob. ribesior rubror,*  
*cort. citri condit. ana drach. iij.*  
*pulpa tamarind. drach. v j.*  
*syrup. violacei q. f. fiat Conditum.*

XIV. Quia somnus huic ægræ maxime necessarius est, ut ille etiam provocetur, studendum; vel exhibitio circa vespere *amygdalato*,

cui *syrupi papaverini unc. f.* vel paulo plus admixtum sit; vel tria quatuorve grana *laudani opiati*, semel aut bis in septimana exhibendo; vel caput unum aut alterum *papaveris albi* in apozemate antedicto coquendo: vel condito præscripto *drach. j. vel ij. requies Nicolai* cum pauxillo *syrupi papaverini* addendo: vel frontem & tempora *oleo papaverino & unguento populeo inungendo*. Cavendo tamen ne nimis frequenter, nimis diu, & nimis forte soporiferum detur.

XV. Interea caput ablatis capillis, matutino tempore per horam unam aut alteram hoc fomento tepido foveatur.

Rec. *herb. beton. verben. majoran.*  
*plantag. ana m. j. lactuca, m. iij.*  
*flor. rosar. meliloti anethi,*  
*chamomili. ana M. l.*  
*sem. cannabis, coriandri ana unc. f.*  
*aqua commun. q. f.*  
*coquantur pro fomento.*

Post fomentationem caput bene servandum & contegendum, ne ab aëre frigido male afficiatur. Hujusmodi tamen fomentatio non conveniet, nisi corpore prius bene expurgato, & sanguine aliquoties detracto.

XVI. Cum malum incipit mitescere, non male capiti imponetur gallina viva dissecta, vel pulmo ovis aut vituli recentem è mactato animali evulsus.

XVII. Sunt qui in Mania etiam laudant suppedanea, & columbas dissectas, vel tincam dissectam, vel folia brassicæ & ruthe, cum fermento acido, sale & aceto, in formam pastæ contusa, plantis pedum alligant, quæ si non prosint, saltem non nocent, ac proinde tuto adhiberi possunt in hac ægræ imprimis ut satisfiat iis qui curationem hinc pendere putant.

## HISTORIA VI.

### De Comate somnolento & vigili.

**V**ir quadragenarius, mediocriter fortis, temperamento aliquantum pituitosus, bis terve in anno catarrhis ad dentes vel pulmones delabentibus, per aliquot dies affici consuetus erat, qui interdum nullo, interdum levi aliquo capitis dolore præcedente, invadebant. Tandem autumnii tempore in postica capitis parte dolorem tensivum ac gravativum rursus sensit, qualis catarrhum præcedere solebat, nullo tamen catarrho subsequente. Dolori huic indies adaucto, cum vertigo adjungeretur, Medici consilio corpus purgatum, vena secta, aliaque convenientia remedia adhibita sunt, quibus dolor adeo mitis evasit, ut æger rursus foras prodiret: verum cum se intempestive nimis aëri frigido exponeret, incrementum subito dolore, una cum vertigine, cubitum discedere coactus fuit, ac subinde aliquantum delirare compertus est. Dolor hoc magis magisque incrementum, secundo die ante lectum casu pedibus insistens, concidit, nec se erigere rursus potuit, sed ab adstantibus lecto impositus est, in quo paulo post tanto somno obrutus fuit, ut non nisi magnis corporis concussionibus vel actionibus

tionibus excitari potuerit, excitatus oculos tantum aliquantulum elevaret, nihil autem loqueretur, sed mox in somnum relaberetur. Tertio die excitari amplius non potuit. Cum altus ille sopor circiter per quatrimum durasset, postea subinde paulisper evigilare coepit, tuncque plerumque nihil, interdum pauca cum delirio loquebatur. Tali modo soporosus vixit per octiduum. Postea continuam quidem habebat inclinationem ad somnum, cum oculis conniventibus, sed dormire tamen non poterat, plurimaque deliramenta secum loquebatur, interdum quiescens, cum dormire putaretur, repente è lecto exsilire (quod tamen ob debilitatem non poterat) & hoc illudve peragere volebat. In ista inclinatione ad somnum cum continuo delirio, per octo decemve dies remansit. Postea omnino dormire non potuit, neque ulla inclinatione ad somnum per duas septimanas tenebatur; interea tamen delirium indies magis imminutum est, ita ut eo spatio mentis planè compos evaserit, viribusque paulatim recuperatis, tandem summi Dei & Medicorum ope pristinae sanitati restitueretur. Toto morbi decursu non febricitavit. Appetitus constitit usque ad profundum soporem, & postea evigilans, nihil quidem petiit, sed oblata assumpsit & bene digessit. Ex deliris responsis, præter imaginationem ac ratiocinationem, etiam valde labefactatam fuisse memoriam, compertum est. Quæritur quo morbo hic æger laboraverit, & quibus remediis curari debuerit?

**C**erebrum in hoc ægro omnium maxime laborasse, hincque sensus principes & externos valde afflictos fuisse, clarissime patet ex historia.

II. Gravis ille sopor, quo in principio detinebatur æger, fuit *Cataphora seu Coma somnolentum, quod est, sopor gravis ob sensum communem torpescentem exortus*. Quæ vero postea, cessante sopore, accessit gravis ad somnum inclinatio, cum impotentia tamen dormiendi, fuit *Coma vigil, quod est gravis ad somnum propensio, & ad eundem impotentia, à vasorum in ventriculis cerebri compressione vel obstructione, & spirituum inordinato motu mentem turbante, producta*.

III. Causa antecedens hujus mali fuit pituitæ in partibus inferioribus paulo copiosior generatio; quæ ad cerebrum delata, in ejusque ventriculis copiosior collecta, causam continentem constituit. cum enim hæc pituita, more solito, non deflueret ad partes inferiores, sed ibi detineretur, paulatim ventriculos sua copia distendit, unde primo dolor capitis tensivus ac gravativus exortus est. Deinde verò, illâ pituitâ magis adauctâ, plexum choroidem una cum reti mirabili, aliquo modo compressit, & magna parte obstruxit: hinc cum spiritus vitales, in animales mutandi, non sufficienti copia transirent, spiritus animales tam paucigenerati sunt, qui ad sensuum principum & externorum officia non sufficerent, unde æger, motu imminuto, primò concidit, neque se erigere rursus potuit; & deinde sensibus externis quiescentibus altus ille sopor obortus est. Tandem verò naturæ & medicamentorum beneficio, illa plexus choroidis obstructione aliquantum imminuta, cum spiritus vitales jam paulo copiosiores transirent, atque hinc plures generarentur spiritus animales, nondum tamen satis copiosi, iique per impeditas vias inordinate moverentur, inde factum ut mens admodum turbata sit, & spiritus quidem plures ad

sensuum externorum organa effluerent, sed non satis copiosi ad eorum munia bene peragenda, quæ causa fuit magnæ inclinationis ad somnum, qui tamen à continua mentis turbatione impediabatur, ita ut æger dormituriens dormire non potuerit, sed cum continuis deliriis dormituriendo vigilaverit. Ultimò, cum soluta penitus obstructione, spiritus jam satis libere quidem transirent, sed ob magnam corporis inanitionem paucissimi ad cerebrum ascenderent vapores, qui illos debito tempore aliquantum in cerebro sisterent, hinc continuæ securæ sunt vigilæ, quæ postea pluribus vaporibus, à copioiore alimentorum usu, ad cerebrum elatis, paulatim rursus imminutæ sunt. Febris non adfuit, quia nulla humorum putredo cor infestavit.

IV. Coma somnolentum, ut & vigil, periculosissimum malum est, quo plurimi intereunt, imprimis si ultra quartum diem sopor profundus extendatur: propterea quod nobilissimum viscus, cerebrum, in eo graviter afficiatur. Ex obstructione enim & compressione illa plexus choroidis duplici de causa periculum imminet: vel quod à spirituum animalium defectu, coma in Apoplexiam mutari, ægrumque cito extinguere possit. Vel quod à spiritibus vitalibus calidis solitas vias transire nequeuntibus, facile inflammatio in cerebri membranis fieri, hincque malum in Phrenitidem mutari possit.

V. Indicationes curativæ primariæ sunt, ut materiæ continentis in ipso principio instituaturs revulsio & evacuatio, sicque solvatur obstructio. Deinde ut causa antecedens tollatur, cerebrum corroboretur, & impediatur ne in eo nova pituitæ collectio fiat.

VI. Quia æger profundo sopore oppressus, nihil per os assumere potest, clysteres, ad minimum semel de die, sunt iniiciendi. Asperæ frictiones & ligaturæ dolorificæ in extremis partibus faciendæ. Sanguis è brachio

è brachio detrahendus. Cucurbitulæ cum & sine scarificatione scapulis, dorso & collo imponenda. Corporis concussionibus & vellicationibus dolorificis æger, si fieri possit, sæpius è somno excitandus est. Utque materia continens excutiat & evacuetur, hic pulvis sternutatorius subinde cum penna in nares sufflandus est?

Rec. rad. bellebori albi scrup. j.  
pyrethri scrup. l. fol. majorana scrup. j.  
piperis, castorei, ana gr. v.  
fiat pulvis.

VII. Sopore aliquantum imminuto, exhibeantur hæ pilulæ.

Rec. massa pil. cochiarum scrup. j.  
extracti catholici scrup. l.  
fiant pilulæ v.

Vel si illas deglutire nequeat, detur drach. j. pulveris diatrbith, aut diacarthami. cum paulillo cerevisiæ tenuis: vel haustus purgans ex foliis senæ, agarico, radice jalappæ, aliisque similibus paratus.

VIII. Corpore satis purgato, præscribendum tale apozema:

Rec. rad. acori drach. vj.  
helenii, feniculi, ana unc. l.  
galanga drach. ij.  
herb. majorana, betonica, rosmarini,  
melissa, calamentha, ana m. j.  
salvia, florum stachados, ana m. l.  
bac. juniperi drach. vj. lauri drach. ij.  
passularum mundat. unc. ij.  
aqua q. s. coquantur. s. art. &  
fiat apozema ad lib. j. l.  
cui admisceri possunt syrupi  
de stachade unc. ij. vel iij.

Hujus decocti ter quaterve de die haustus exhibeatur. Interea tamen continuandum est in usu

sternutatorii.

IX. si apozemate continuè uti nequeat, detur subinde particula hujus conditi:

Rec. specier. diambra, drach. j. l.  
conserva melissa,  
flor. salvia, betonica, anthos, ana unc. l.  
syrupi de stachade q. s.  
misce, fiat conditum.

X. Conficiatur quoque sequens cucupha, vel potius capitium capiti imponendum:

Rec. fol. majorana, rosmarini,  
flor. lavendula, meliloti ana scrup. iij.  
benzoini, nucis moscata,  
gariophyllorum, ana scrup. ij.  
fiat pulvis grossus pro cucupha.

Tempora & vertex capitis illinantur hoc linimento:

Rec. olei rosmarini, majorana,  
nucis moscata, ana scrup. j.  
ung. martiati drach. ij.  
misceantur pro linimento.

Illud autem capitium medicatum æger morbo jam cessante diu adhuc gestet.

XI. In diætâ, aer sit purus, mediocriter lucidus, ad calidum vergens. Cibi dentur pauciores, euchymi & eupepti, cum rosmarino, majorana, aliisque cephalicis conditi. Potus sit ptisana, cerevisia tenuis bene defœcata, vel julebus aliquis cephalicus. A continuo somno æger arcendus est: postea tamen ubi ad continuas vigilias deventum erit, convenient amygdalata, aliaque, quæ corpori bonum nutrimentum exhibere, & capiti blandum soporem conciliare possunt. Evacuationes naturales sponte, vel arte procedant. Æger autem bene servandus est, ne in delirio se è lecto devolvat, aliove modo lædat.

## HISTORIA VII.

### De Lethargo,

**V**ir sexagenarius, temperamento pituitosus, pro ætate mediocriter fortis, cum toto autumnii tempore nullam diætæ rationem habuisset, sed fructus horarios, lactucas, cucumeres, melones, aliaque similia copiosius ingessisset, per aliquot dies totius corporis lassitudinem, cum magna ad somnum proclivitate persentiit. Deinde miti, sed continua febricula corripitur, sub noctem quotidie aliquantum recrudescente, & quotidianæ normam gerente. Hanc statim maxima somnolentia comitari cæpit, tanta scilicet ut à somno detineri nequeat æger; qui somnus adeo profundus est, ut nec adstantium altos clamores, nec ullum in cubiculo excitatum strepitum æger audiat. E somno non sine molestia & valida corporis agitatione excitatus, adstantes paulisper aspicit, atque ad interrogata paucis verbis, & sæpe non satis ad rem, respondet, se dormivisse nesciens: matula si detur, mingere obliviscitur: sicque oculis & ore clausis in somnum mox relabatur. Pulsus est mediocriter magnus, tardus & rarus, cui subinde, imprimis circa noctem, inæqualitas quædam, & paulo major celeritas adest. Urina turbida est, quæ refrigerata sedimentum pituitosum copiosum deponit. Quæritur medici consilium.

In

**I**N hoc ægro caput & totum corpus afficitur: illud liquet ex gravi sopore; hoc ex febris continua & totius corporis lassitudine.

II. Gravis ille sopor, quo æger noster laborat, *Lethargus* appellatur, qui est *inexplebilis in somnum propensio, cum febre lenta, & principum facultatum lesione.*

III. Causa remota hujus mali imprimis fuit victus pravus & refrigerans, quo in corpore pituitoso multi crudi ac pituitosi humores generati, causam antecedentem præbuerunt.

IV. Hi pituitosi humores partim ad cerebrum copiosiores delati, idque frigida intemperie afficientes, partim in vasis majoribus putrescentes, & in corde accensi, indeque per totum corpus, & simul etiam per arterias carotides ad caput impulsæ, continentem soporis & febris causam constituerunt.

V. Cum enim per arterias carotides crudiores illi humores, jam in corde accensi, ad plexum choroidem perveniunt (cujus minimæ arteriæ ob frigidam cerebri intemperiem solito angustiores sunt) & partim propter arteriolarum istarum angustiam, partim ob propriam crassitiam, plexum illum lentius transeunt, in eodem à frigida cerebri constitutione magis in crassantur, sicque adhuc tardior fit eorum transitus. Quæ causa est, quod spiritus animales solito pauciores & tardius conficiantur, propter spiritus vitales, è quibus confici debent, parcius & tardius per plexum choroidem transeunt. Qui pauciores spiritus cum ob paucitatem non sufficiant ad continua munia sensuum externorum, hinc fit quies in sensuum istorum organis; per quorum quietem cum nulla objecta ad sensus principes deferantur, etiam illi quiescunt, sicque altus fit sopor. Aquo cum æger excitatur, etiam sensus principes læsi comperiuntur, ob eandem spirituum paucitatem, eorumque inordinatum per impeditas vias motum.

VI. Periculosus est hic affectus: 1. Quia nobile viscus cerebrum hic graviter afficitur. 2. Quia febris adest, unde cor totumque corpus patitur. 3. Quia æger senex est, ob caloris nativi debilitatem, tam grave malum vix evincere poterit: adde, quod in illa vires facile collabuntur, & difficulter restaurantur. Spem tamen sanationis exhibent vires mediocriter fortes, ac proinde curatio quam primum instituenda est, antequam illæ collabuntur.

VII. In curatione materia pituitosa, in toto corpore redundans, evacuanda, à capite revelenda, & ad partes inferiores derivanda est: præterea cerebri frigida intemperies tollenda, caput corroborandum, atque in eo contenta materia educenda ac resolvenda.

VIII. Injuncto clystere instituantur ligaturæ dolorificæ, & asperæ frictions in cruribus, quæ sæpius repetantur. Venæsectio in hoc senili corpore minus conveniens videtur, sed ejus loco cucurbitulæ, partim cum, partim sine scarificatione, admovei possunt scapulis, dorso, humeris & cervici. Ab oxyrrhodino, aliisque similibus

repellentibus frigidis hic abstinendum iudicamus.

XI. Deinde excitato ægro hic haustus purgans exhibeatur:

Rec. *Agarici albiss. drach. j.*

*sol. Senna mundat. unc. f.*

*sem. Anisi drach. j. zingiberis scrup. j.*

*decocti hordei q. s.*

*fiat infusio f. Art. Adde colatura*

*elect. Diaphanici drach. iij.*

*misce, fiat haustus.*

Postea si alvus quotidie non satis respondeat, clysteribus proritetur.

X. Corpore expurgato, subinde detur ægro haustus hujus apozematis:

Rec. *Rad. Calami aromat. Helenii, faniculi,*

*Petroselinii, ana unc. f.*

*Herb. Betonica, capilli ven.*

*Cardui ben. Centaurii min. Taraxici, ana m. j.*

*rosmarini, majorana, hyssopi,*

*florum stachados,*

*chamomilla, ana m. f.*

*baccarum juniperi drach. vj.*

*sem. Anisi scrup. j. f.*

*corticum citri, arantiorum, ana unc. f.*

*aqua q. s. coquantur f. Art. &*

*fiat apozema ad lib. j. f.*

*cui admisceantur syrupi de*

*stachade unc. ij. vel iij.*

XII. Post usum hujus apozematis corpus iterum expurgetur haustu purgante ante dicto: cujus loco si æger pilulas malit, dentur scrup. ij. vel scrup. iij. pilularum cochiarum: vel si pulverem melius assumere possit, detur drach. j. pulveris diacarthami aut diaturbith, cum decocto hordei dissoluta.

XIII. Secundâ hac purgatione peractâ, ad prædictum apozema redeundum, cui tunc plura diuretica (ut radices ononidis, asparagi, eryngii, herb. Petroselinum, fragaria, aliaque similia) commode adjiciuntur. Et quia castoreum in hoc morbo admodum laudatur, non malè interdum cum haustu istius apozematis, aut cum oxymeli scyllitico, castorei pulverisati grana quinque aut sex exhibebuntur.

XIV. Interea dum hæc fiunt, studendum etiam, ut materia e capite speciatim evacuetur, & ipsum caput topicis roboretur, in eoque contenta residua materia discutiatur. Prius impetrebimus, si succum radicum betæ & foliorum majoranæ æqualibus portionibus pro errhino in nares immittamus: vel si hunc pulverem sternutatorium in nares sufflemus:

Rec. *Rad. Hellebori albi scrup. j.*

*rad. Pyrethri, fol. majorana, ana scrup. f.*

*piperis nigri gr. v. castorei,*

*benzoini, ana gr. iij.*

*fiat pulvis.*

Posteriori consequemur, si verticem & tempora sæpe illinamus hoc linimento, & sequentem cucupham imponamus:

Rec. *Olei succini, rosmarini,*

*majorana, ana scrup. j.*

*unguenti martiati drach. ij.*

**C**

*castorei.*

*castorei pulverisati scrup. s.  
miscantur pro linimento.*

*Rec. Fol. majorana m. s.*

*rosmarini, salvia, flor. meliloti, ana p. j.  
gariophyllorum, nucis moscata ana scrup. j.*

*castorei scrup. s.*

*fiat pulvis grossus pro cucupha.*

XIV. Porro dietam convenientem instituere necesse est. Aër sit purus, lucidus, moderatè calidus, & alteratus odoribus ex castoreo, pulegio, rosmarino, salvia thymo, majorana, melissa, &c. Cibi dentur pauci & facilis digestionis, conditi rosmarino, majorana, betonica, hyssopo, aliisque quæ humorem pituitosum attenuandi & coquendi, caputque corroborandi vim habent: (non enim hic ratione febris vitæ merè refrigerans est instituendus, sed potius ratione humoris peccantis, aliquo modo

calefaciens: nam hoc modo sublata humoris pituitosi generatione, ejusque coctione peracta, febris facile evanescet) Abstineat æger à lacte, leguminibus, fructibus horariis, aliisque frigidis alimentis, ut & ab iis quæ subtili calore attenuatos humores copiose & subito ad caput deducunt, qualia sunt cæpe, allium, synapi, raphanus, &c. Potus sit aqua hordei, cum hyssopo, majorana, rosmarino, & similibus decocta, melle vel hydromelite dulcorata, & cum pauxillo cinnamomi aromatizata. A continuo somno æger omnibus modis arceatur, & quam sæpius excitetur. Evacuationes naturales, si sponte non succedant, arte proritentur: cumque lethargici mictionis & egestionis alvi oblivisci soleant, sæpe admonendus est æger ad urinæ & alvi excretionem.

## HISTORIA VIII.

### De Caro.

**J**Uvenis robustus cum è loco editiore in caput decidisset, mox alto sopore oppressus est. Ab amicis præsentibus, qui illum ebrium esse putabant, in lecto depositus, toto biduo in isto statu remansit; cumque illo temporis spatium sponte non evigilaret, tandem Medici consilium imploratum est. In capite nullum vulnus animadvertitur, propterea quod pileus durior caput à vulnere defenderat. In vertice tamen aliqua non magna contusio observatur. Pulsus bene sese habet, neque cordis malè affecti signa exhibet. Respiratio facilis est. Si pungatur æger, compunctum membrum aliquantillum contrahit. Interim, nullis clamoribus, pilorum vellicationibus, aliisque mediis è somno excitari potest.

I. **Q**uantopere in hoc ægro caput afficiatur, gravissimus ille sopor satis ostendit.

II. Sopor hic *Carus* appellatur, *estque somnus maxime profundus cum actionum animalium læsione.*

III. Apoplexiam non esse liquet, quod respiratio libera sit, & æger compuncta membra aliquantillum contrahat. Neque Lethargum, quia febris abest, & æger excitari nequit; quo signo etiam à Comate distinguitur, ut pote in quo ægri subinde excitantur, & membra loco dimovent.

IV. Mali hujus causa est depressio superioris cranii, sive ossium bregmatis, lapsu isto facta, qua etiam depressum cerebrum in suo motu impeditur, ita ut se dilatare commode non possit: hinc propter impeditam illius actionem, omnes quoque animales actiones læduntur. Adde, quod propter compressum, & hinc magna ex parte obstructum plexum choroïdem spiritus vitales pauciores ad cerebrum penetrent, hincque pauciores etiam generentur animales spiritus; quorum influxus ad sensuum organa, aliasque par-

tes ab eadem compressione non parum impeditur: atque sic propter spirituum animalium tum non satis liberum influxum, deficiunt partium actiones, & fit quies altiusque sopor.

V. Sopor hic grave periculum minatur, & nisi quam primum commoda remedia adhibeantur, metuenda est mali hujus in fortem Apoplexiam mutatio.

VI. Indicationes curativæ sunt: 1. Ut cranium depressum elevetur. 2. Ut cerebrum à depressione illa debilitatum corroboretur. 3. Ut totius corporis ratio habeatur: & ne humores multi ad caput affluant, vel alius in corpore morbus generetur, præcaveatur.

VII. Præmisso igitur clystere, sanguinis unc. viij. vel ix. è brachio extrahantur. Quo facto ad generosum maximeque necessarium remedium deveniendum est, scilicet cranii denudationem, & si necesse sit, perforationem.

VIII. Eadem die (nam periculum est in mora) qua clyster injicitur, & sanguis detrahitur, etiam circa vespertam cranium, eo loco ubi extrinsecus in vertice contusio apparet, cruciali incisione, in partibus carnosæ facta, satis lato vulnere denu-

denudetur. Postridie matutino tempore annitendum, ut commodis instrumentis depressum os elevari possit. Sed quia non sine ratione metus est, a violenta illa depressione aliquas in dura meningē venulas disruptas esse, ex hisque nonnihil sanguinis inter illam meningem & cranium effluxisse, qui postea ibidem putrescens mortem inferre posset, tutissimum foret si cranium trepano perforaretur in parte firma depressæ parti proxima, ut sic extravasatus ille sanguis effluere, & cranium, immixtis per illud foramen instrumentis, commodius elevari possit.

IX. Elevato crano, & vulnere s. art. petiis obstructo, toti capiti hoc fomentum tepidè circumponatur, & cum refrigerari incipit, mox renovetur:

Rec. *herb. betonica* m. iiij.  
*majorana*, *rosmarini*, *verbena*, *faniculi*,  
*fol. lauri* *melisse*, *thymi*, *rutha*,  
*flor. stachados*, *chamomilla*,  
*meliloti*, ana m. j.  
*aqua commun.* q. s. coquantur s. art.  
 adjiciendo sub finem, *vini albi* lib. j.  
 fiat fomentum ad lib. iiij.

X. Temporibus illinatur hoc linimentum:

Rec. *olei succini*, *rosmarini*,  
*majorana* distill. ana scrup. j.  
*castorei* pulverisati gr. ix.  
*unguenti martiati* drach. ij.  
 misceantur.

XI. Egro è somno jam excitato (quod paulo post cranii elevationem plerumque fieri solet) hic haustus purgans exhibeatur.

Rec. *fol. senna mund.* drach. iiij.  
*rhabbarbari opt.* drach. j. s.  
*agarici albi* drach. s.  
*sem. anisi* drach. j. decocti *bordei* q. s.  
 fiat infusio s. art. Adde colatura

*elect. diapruni solutivi* drach. iiij.  
 misce, fiat haustus.

XII. Corpore purgato, bibat bis tervē de die haustum hujus apozematis:

Rec. *radic. cichorei*, unc. j. s.  
*faniculi*, *acori*, ana unc. s.  
*herb. betonica*, *taraxici*, *boraginis*,  
*melissa*, *rutha*, ana m. j.  
*rosmarini*, *majorana*,  
*florum stachadis*, ana m. s.  
*corticum citri*, *arantiorum*, ana unc. s.  
*passularum corinth.* unc. ij.  
*aqua* q. s. coquantur s. art. &  
 fiat apozema ad lib. j. s.

XIII. Loco apozematis subinde etiam dari potest particula talis conditi:

Rec. *specier. diambra*, drach. j.  
*rad. acori* cond. *corticum arantiorum* cond.  
*conserva anthos*, *rosatum pallid.* ana unc. s.  
*syrupi de stachade* q. s.  
 fiat conditum.

XIV. Si interea alvus non respondeat, clysteribus subinde proritetur: vel suspendatur hæc puppa in cerevisiæ tenuis lib. j. s. de qua subinde matutinis temporibus haustus detur.

Rec. *foliorum senna mund.* unc. j. s.  
*rhabbarbari* drach. ij.  
*rad. jalappa*, drach. j.  
*sem. anisi* drach. ij.  
*fol. majorana*, *cardui ben.* ana m. s.  
 fiat puppa.

XV. In diætā, sit aer temperatus & clarus. Cibi offerantur euchymi & eupepti, primis diebus pauciores. Potus sit cerevisia tenuis & vinum tenue. Somnus primis diebus brevior sit, postea moderatus. Exercitia sint mediocria. Excretionēs naturales vel sponte, vel arte debito modo procedant. Animi pathēmata fugiantur.

## HISTORIA IX.

### De Catalepsi.

**D**omicella 10. annorum ob menses parcius fluentes, uterinis suffocationibus subinde obnoxia, his diebus subito prehensa, omnis sensus expers remansit, & in illo, quo prehensa fuit corporis situ, obriguit, oculos apertos ac fixos detinens, nihil tamen videns. Si adstantes brachium illius sursum, deorsum, vel ad latus inflecterent, illud in tali situ remanebat. Si ægram in pedes deponerent, stabat, si corpus impellerent, pedem promovebat: si caput ad latus detorquerent in illo situ remanebat. Respiratio tamen libera persistebat. Cum hic paroxysmus per horam durasset, tandem ad se rediit ægra immemor omnium, quæ ipsi contigerant. Post biduum simili paroxysmo de novo detenta fuit, qui etiam sponte cessavit.

**I**N capite mali hujus sedem esse, actionum animalium gravis læsio satis ostendit, sicut uteri affectionem indicant Hystericæ suffocationes.

II. Affectio hæc est Catalepsis, quæ etiam Catoche, & Prehensio appellatur, estque actionum animalium, excepta respiratione, subita & maxima læsio cum totius corporis rigiditate, quæ a-

gri istum corporis situm servant, in quo erant, cum illo affectu corriperebuntur.

III. Afficitur in hac ægra cerebrum, non quidem totum, sed secundum illam partem, in qua sit sensus communis. Afficitur autem hæc pars à vitioso humore, aut vapore ex utero eo trahato.

IV. *Causa antecedens*, est vitiosus & viscidus humor, aut vapor crassus in utero genitus vel collectus, indeque per cætos ductus ad caput trahatus, (quod ex præcedentibus uteri suffocationibus liquet) qui sensorio communi, partibusque ei vicinis adhærens, easque subito involvens, spirituum à sensorio communi determinationem impedit, sicque hujus Catalepticos *Causam continentem* constituit.

V. Quia autem hic totum cerebrum non afficitur & Spiritus satis copiosi in eo generantur, quorum etiam influxus in nervos, nullâ principii nervorum compressione, vel obstructione impeditur, hinc fit quod Spiritus illi in determinatas partes influentes, cum jam sensorium commune à prædicto vitioso humore, crassove vapore subito occupatur, involvitur, & detinetur, non determinantur ad alias partes, sed continue copiosi influant ad illas partes, ad quas determinati erant, mox ante illam prehensionem, seu detentionem. Atque hæc causa est, quod singulæ partes in illo situ detineantur, in quo erant mox ante prehensionem, & oculi, brachia, crura, &c. quasi fixa remaneant.

VI. Quod autem ægra in pedes deposita stet, & membra ab adstantibus aliorum reflexa in novo rursus statu contineat, hoc fit, quod mutato musculorum situ, mutatur etiam influxus Spirituum; & pori antea aperti, per quos Spiritus influebant, clauduntur: alii vero, qui antea clausi fuerant, aperiuntur, ac Spirituum influxum recipiunt, ita ut qui Spiritus modo copiosi influebant in hos musculos, statim, mutato pororum situ, copiosiores influant in illos; in quos etiam continue influere, partemque in tali statu continere non desinunt; usque dum situs ille rursus mutetur.

VII. Respiratio eodem modo perficitur ut in dormientibus, & illæsa manet, partim propter insignem magnitudinem & latitudinem pororum, maximeque necessarium usum nervorum respiratoriorum: partim consuetam & continuam determinationem ad musculos respiratorios.

VIII. Cessat paroxysmus & ad se redit ægra, vapore illo vel humore, qui sensorium commune occupat, discusso ac dissipato. Reddit paroxysmus cum ab utero similis humor vel crassus vapor ad sensorium commune de novo pervenit, idque subito occupat & involvit.

IX. Periculosum est hoc malum, propterea quod pars nobilis hic afficiatur, & tenaces viscidique humores, sensorio communi adhærentes, non facile dispellantur Magnam tamen sanationis in nostra ægra spem facit, quod malum non sit idiopathicum, ejusque causa in ipso cerebro non generetur, sed aliunde eo feratur: præterea

quod invasiones sine breviores, unde judicamus sensorium commune non tam detineri ab humore tenaci, & viscido, quam potius à crasso quodam vapore, qui facilius attenuatur & dispellitur. Hic tamen crassus vapor, quia in tenacem humorem ibi aliquando conetescere, sicque gravissimam Cataleptin, cum summo vitæ periculo, inducere posset, curatio quam erit primum instituenda, antequam res eo deveniat.

X. Indicationes curativæ sunt. 1. Ut in accessione crassus ille vapor vel humor, sensorium commune occupans, discutatur. 2. Ut uterus expurgetur, ejus obstructions tollantur, novaque hujus pravi humoris generatio in eo præveniat. 3. Ut pravi istius humoris vel vaporis ad caput translatio impediatur. 4. Ut caput ita corroboretur, ut hujusmodi crassos ac pravos vapores vel amplius non admittat, vel admissos protinus dissipet, ac dispellat.

XI. In paroxysmo hic pulvis Sternutatorius in nares suffletur, ut irritatâ (si fieri possit) facultate expultrice, vapor ille vel humor, sensorium commune occupans, valide excutiat.

Rec. rad. Hellebori alb. scrup. j. s.

Pyrethri. fol. Majorana, flor. Lilior.

convallium ana scrup. s. Piperis nigri no. vij.

Castorei gr. iij. s. pulvis

Postea hoc linimentum naribus, temporibus ac vertici illinatur, ejusque nonnihil cum gossypio auribus immittatur.

Rec. Olei Thymi, Rosmarini, Salvia,

Carui, Castorei, succini ana. scrup. s.

Ung. Martiati drach. j.

Misce pro linimento.

Hic quoque nodulus de collo suspendatur.

Rec. Castorei, Assæfatida, Camphora an.

scrup. j. s.

fiat nodulus in tenui serico.

Interea etiam clyster acrior iniiciatur.

XII. Si his peractis, paroxysmus adhuc perduret, cucurbitulæ sine & cum scarificatione imponantur, Cervici, Scapulis, & Humeris, fiantque ligaturæ dolorificæ, & asperæ frictiones in cruribus ac pedibus. Præterea hic sacculus, in vino paulisper coctus, & dein expressus, summo capiti calide imponatur.

Rec. Fol. Rosmarini, Majorana,

Thymi, calamentha, Flor. Chamomilla,

Stachados xia th. s. Sem. Cumini, Carui,

Levistici ana drach. j. s.

Baccar. Latri, Nucis Moscæ ana drach. j.

Fiat. S. a. in

tenui linteamine sacculus intersutus,

vel capitium.

XIII. Soluta paroxysmo, cum ægra ad se revertitur, detur hic haustus purgans:

Rec. Fol. Sente mund. inc. s.

Agurici albiss. drach. j.

Sem. Levistici scrup. ij., decoct. hord. q. s.

fiat infusio S. a. adde colaturæ.

Elect. Hieræ Picra drach. ij.

th. Fiat haustus.

XIV. Corpore sic expurgato, secetur vena in mal-



in malleolo, & sanguinis unc. vj. aut viij. extrahantur.

XV. Bibat tunc ægra ter quaterve de die haustum hujus apozematis.

Rec. Rad. fœniculi, valeriana,

diſſamini, calami Aromat.

peonia maris ana unc. ſ.

Herb. Majorana, Nepetba,

Calamentha, Ruta, Pulegii,

Trifolii aquatici, Meliffa, ana m. j.

Flor. Chamom, Meliloti,

ſtechados ana m. ſ.

ſem. leviftici, dauci ana drach. ij.

Baccar. Juniperi drach. vj.

aqua q. S. j. S. a.

Apoſema ad lib. j. ſ.

XVI. Prædicta medicamenta ſubinde reitoranda ſunt, iſque diætã conveniens adjungenda. Aër ſit temperatus, lucidus, & purus, alteratus herbis odoriferis, roſmarino, Meliffa, Thymo, Rutha, Leviftico, Caſtoreo, aliſque ſimilibus.

Cibi ſint Euchymi & Eupepti cum talibus conditi, quæ cerebrum & uterum corroborant. Potus ſit cereviſia tenuis bene defæcata, vel ſubinde pauxillum vini tenuis.

Somnus & Exercitia ſint mediocria. Alvi excrementa & menſes vel ſponte vel arte debito modo & juſtã quantitate procedant. Animi pathemata vehementiora, imprimis triſtia, videntur.

## HISTORIA X.

### De Vertigine.

**M**ulier 30. annorum, obefa & fortis, temperamento pituitofa, cum præterita hyeme gravativo capitis dolore & aurium tinnitu multoties laboraſſet, tandem hoc verno tempore vertigine ſæpius recurrente correpta eſt, primò mitiore, deinde vehementiore, qua omnes res in gyrum rapi & moveri videntur, ita ut ſe interdum ſuſtinere nequeat, ſed in terram prolabatur, neque inde aſſurgere poſſit, niſi vertigine aliquantum ceſſante; quæ facillimè redit, ſi rotarum circumgyrationes, flammam, fumumve aſcendentem, vel fluminis fluctuantem aquam aſpiciat, vel res profundas aut in præcipitio poſitas intueatur. Appetitus illi ſatis conſtat, & ventriculus bene concoquit: menſtrua debito modo & tempore fluunt, omniaque infimi & medii ventris viſcera bene ſe habere videtur. Quia autem hæc vertigo illi valde moleſta eſt, indeque gravius malum ſibi metuit, conſilium Medici implorat.

I. **I**N cerebro hanc affectionem fieri manifeſtum eſt, cum viſionis illa læſio non procedat à vitio oculi, vel medi, vel objecti.

II. Affectio hæc Medicis *Vertigo* dicitur, eſtque viſionis fallacia, qua objecta viſibilia in orbem verti vel circumgyrati ægris videntur, orta à ſpirituum animalum in cerebro motu vorticoſo.

III. Cauſa remota eſt frigus externum, cerebrum refrigerans, ejuſque meatus extremis evacuandis dicatos conſtringens: hinc cauſa antecedens, pituita ſcilicet in corpore abundans, in ventriculis cerebri copioſior collecta eſt, ibique continentem cauſam conſtituit.

IV. Ab his humoribus pituitofis ibi majore copia collectis, primò diſtenti fuere ventriculi, unde præcedens tenſivus ac gravativus capitis dolor originem ſumpſit. Deinde adaucta illa copia, etiam cerebri meatus, per quos ſpiritus tranſire debent, partim à pituitæ frigida repletionem & conſtrictionem, partim à compreſſione, hic illic nimis anguſtati fuerunt, ita ut ſpiritus eò impoſſis non ſatis liber tranſitus fuerit, qui hic

illic in anguſtiorẽ vel obſtructum locum impingentes, & recta tranſire nequeunt, in orbem moti tranſeunt: eodem modo ſicut aqua fluminis cum impetu descendens, ſi offendant aggerem flumini injectum, bis terve in orbem movetur, antequam aggerem præterlabatur.

V. His ſpiritus ita circumgyrantibus ad mentis ſedem delatis, imagines rerum viſibilium, ad eandem ſedem delatæ, miſcentur, unaque circumgyrata ſenſorio communi offeruntur, atque ſic viſus illam fallaciam inducunt, qua omnia objecta viſibilia eodem modo, quo imagines rerum viſibilium, in orbem agi videntur.

VI. Hæc autem ſpirituum circumgyratio non eſt continua, partim quia anguſtia meatuum cerebri modò major, modò minor eſt; partim etiam quia ſpiritus modò craſſiores, modò tenuiores tranſeunt, & modò cum majore, modò cum minore impetu. Atque hinc eſt quod vertigo ſuos paroxyſmos habeat. Nam in motu corporis ſpiritus majore impetu & copioſiores moventur, qui ſi per cerebri poros ac meatus ordinarios liberè & recta tranſire nequeant, ſed

hic illic in constrictos meatus impingant, paroxysmum faciunt, sive tenues, sive crassiores illi fuerint. Tenuis enim ob maiorem copiam & fortio-rem impulsam, crassi verò ob crassitiem difficilius transeunt, & in angustiores vel obstru-ctas vias impingentes, circumgyrantur. Atque hinc est quod posita meatuum quorundam cerebri nimia angustia, vertigo æque fiat in ebriis, juvenibus, aliisque qui tenuibus spiritibus abund-ant, ob eorum copiam & impulsione vehementiam, quam in senibus, ob eorum crassiti-em; frequentior tamen & diuturnior fit in seni-bus, quia in illis ob copiosiore, qua abundant, pituitam, frequentius & diutius angustantur me-atus plexus choroidis. Hinc etiam est quod ver-tigo frequenter fiat in motu corporis, rarius in quiete: sed quiete potius imminuatur & fe-detur.

VII. Quia verò spiritus circumrotati non satis copiosi per dictos cerebri meatus feruntur, neque ob illam circumgyrationem in nervos sa-tis copiosi ingredi possunt, fit quod nostra ægra ob defectum spirituum animalium in musculis, sub-inde in terram prolatur, neque inde assur-gere possit, antequam vertigine cessante spiri-tus animales iterum copiosiores in musculos in-fluant.

VIII. Ab aspectu motus inæqualis, unda-rum fluminis, flammæ, fimi, vel rotarum cir-cumgyrantium, redit paroxysmus: quia ab ista-rum rerum imaginibus inæqualiter motis vel circumrotatis & ad interiora delatis, etiam spiritus animales, ob modò dictas causas ad circumgyrationem apti, facile agitantur & in gyrum moventur. Sic etiam à conspe-ctu rerum in præcipitio positarum redit ver-tigo: quia aspectus ille subito terrorem ægræ incutit, à quo spiritus subito, propter meatuum constrictionem detenti, à subsequenteribus ta-men spiritibus impulsis, cum libere non tran-seant, interius agitantur, & in orbem moven-tur.

IX. Affectio hæc (teste Hippoc. 2. *proreth.*) est gravissima ac curatu difficilis, & (teste Ga-leno in *comm. ad 3. aphor.* 17. & 23.) facile mu-tatur in Epilepsiam vel Apoplexiam, aliudve grave cerebri malum: proinde in hac quoque æ-gra curatio festinanda est.

X. Curatio consistit in causæ procatactice, antecedentis, & continentis ablatione, ac de-nique cerebri corroboracione.

XI. Primo igitur purgetur his pilulis:

Rec. *Massa pil. cochiarum scrup. j.*  
*extracti catholici scrup. s.*  
*diagridii gr. ij.*  
*syrupi de stachade parum,*  
*fiant s. art. pil. vij.*

Vel si illas deglutire nequeat, detur drach. j. pulveris diaturbith cum rheo, cum pauxillo deco-cti hordei.

XII. Licet à venæsectione magnum subsidium non sit expectandum, tamen ne sanguis nimia quantitate ad caput propellatur, poterit illius modica quantitas è sceta brachii, vel (si men-struorum fluxus forte instet) pedis vena extra-hi. Fiat autem venæsectio ægra jacente, ne-que sanguinem suum aspiciente.

XIII. Bibat deinde ter quaterve de die hau-stum hujus apozematis.

Rec. *Rad. acori unc. j.*  
*helenii, feniculi, ana unc. s.*  
*herb. beton. majorana, rosmarini,*  
*calameniba, thymi, ana m. j.*  
*salvia. fol. lauri,*  
*flor. stachados, ana m. s.*  
*sem. anisi, fenic. carui, ana drach. j. s.*  
*passularum mund. unc. ij.*  
*aqua q. s. coquantur s. art.*  
*addendo sub finem vini albi lib. s.*  
*fiat apozema ad lib. j. s.*

Interdum loco apozematis poterit sumere particu-lam hujus conditi:

Rec. *Specier. diambra, drach. j.*  
*diamosch. dulcis scrup. j.*  
*rad. acori condit.*  
*conserva flor. salvia, anthos, melissa ana unc. s.*  
*syrupi de stachade q. s.*  
*misce fiat conditum.*

XIV. Interea utatur subinde hoc mastica-torio:

Rec. *Rad. pyrethri, helenii, ana drach. j.*  
*herb. majorana, hyssopi, ana drach. s.*  
*piperis nigri, scrup. s.*  
*mastiche drach. v.*  
*fiat pulvis, è quo cum pauxillo*  
*terebinthina & cera,*  
*fiant trochisci mastificandi.*

XV. Tempora, nares, & vertex bis de die illinantur hoc oleo:

Rec. *Olei nucis moscata distil. drach. j.*  
*ol. rosmarini, succini, majorana, ana scrup. s.*  
*misceantur.*

Sequens etiam cucupha capiti per aliquot menses imponatur:

Rec. *Fol. rosmarini, majorana, salvia,*  
*flor. meliloti, ana p. ij. nucis moscata scrup. ij.*  
*gariophyllorum scrup. j.*  
*benzoini scrup. s.*  
*fiat pulvis grossus pro cucupha.*

XVI. In diætâ, sit aer calidior & purus. Ci-bi sint parciore, concoctu faciles, & minimè flatulenti, conditi cum cephalicis calidioribus & feminibus carminativis. Potus sit cerevisia medio-cris, vel vinum tenue, in quo si puppa ex ma-jorana, rosmarino, & pauxillo cinnamomi su-spendatur, tanto melius erit. Somnus sit medio-cris. Præsentè vertigine corporis quies magis convenit, illa verò absente, modicum exercitium laudabile erit. Excreta naturalia procedant natura vel arte. Animi pathemata maxima sunt vitanda.

HISTO-

## HISTORIA XI.

## De Incubo.

**M**ulier quinquagenaria, boni habitus, carnosâ, fortis & plethorica, capitis gravitate & catarrhis ad pectus delabentibus hyberno tempore interdum obnoxia, hac hyeme nullis catarrhis infestata, interdiu bene sana, mente sensibusque integris vixit, sed nocte ad quietem composita frequenter in somno nocturnis ludibriis afficitur: interdum enim putat se dæmone obrui & detineri, interdum à magno cane vel latrone corpori incumbente suffocari, adeo ut vix loqui aut respirare possit; cumque se ab hoc onere expedire nititur, quasi fortiter detenta, non potest membra movere, tantaque anxietudine premitur, ut se jam suffocatum iri putet: atque dum in illa lucta est, tandem difficulter & summa cum perturbatione interdum sponte evigilat, interdum a marito, obscuram, inarticulatam & anxiam ejus vocem audiente, è somno excitatur, moxque se in lecto erigens aliquamdiu celeriter respirare cogitur, ut anxietatem illam dispellat. Sæpe etiam contingit, ut postea ad somnum se iterum componens, in idem malum rursus incidat. Menses illi ante decennium ætatis ratione defecerunt.

**I.** IN hac ægra primario afficitur cerebrum, maxime secundum partem posteriorem, seu posticum cerebri ventriculum, prope spinalem medullam. Afficiuntur etiam musculi partium infra caput sitarum, quod ex difficili respiratione, & impedito motu thoracis, crurum & brachiorum innotescit. Hinc cum pulmonibus etiam cor afficitur.

**II.** Affectio hæc *incubus* nominatur, qui est motus, potissimum respirationis, & vocis interceptio, cum falso rei gravis thoraci incumbens in somnio, ob impedimentum liberum spirituum ad nervos influxum.

**III.** Causa antecedens hujus mali est sanguinis in toto corpore nimia redundantia, unde multi vapores ad caput delati, ibique a causa procatactica frigore (scilicet hyberno poros constringente, istosque vapores incrassante) detenti, & meatum ad principium spinalis medullæ angustantes, spirituumq; animalium sufficientem ad nervos transitum impredientes, causam continentem constituunt.

**IV.** Dum enim à vapore crassiore, detento circa inferiorem cerebri partem, ad ingressum medullæ in spinam, meatus nervorum comprimuntur, spiritus animales sufficienti copia ad inferiores partes non influunt, unde statim motus musculorum imminuitur vel deficit. Quia verò musculorum motus in somno per se maxima ex parte quiescit, exceptis musculis respirationi interservientibus, quorum actio continue procedere debet, propterea non tam aliorum, quam respiratoriorum, actionis imminutio primo sentitur, ob summam angustiam quæ ex necessitate respirationis defectu oboritur. Cum autem ægra somno obruta, angustiam illam percipiat, causam verò ob sensuum stuporem ignoret, sibi per

insomnium imaginatur, se à Dæmone, latrone, aliove corpori incumbente gravi onere premi, hincque nec thoracem movere, nec respirare posse. Deinde cum ab illa angustia suffocationem secuturam persentiens, se à gravi illo incumbente, ut putat, pondere expedire nititur, reliqua autem membra movere quoque non possit (ob spirituum animalium in musculis paucitatem) etiam illa ab eodem Dæmone vel latrone detineri putat: atque hinc alios in subsidium vocare volens, propter respirationis verò angustiam clarè & perfecte eloqui nequiens, obscuram & inarticulatam vocem cum difficultate profert. In conamine autem illo laborioso perseverat, usque dum spiritus animales, ob medullæ cerebri ad ejus basin compressionem detenti, & ibi magna copia collecti, atque à continue succedentibus è corde spiritibus propulsi, vi tandem percurrant, sicque per medullam in nervos & musculos omnes copiosi influentes, motum in integrum restituant: unde ægra mox corpus movet, hincque expergiscitur; & illo motu corporis statim dissipantur crassi illi vapores, nervorum principium dicto loco comprimentes: si verò spontè non expergefiat, sed à marito excitetur, etiam corpus movendo vapores illi eodem modo statim dissipantur. Expergefacta verò aliquamdiu celeriter respirare cogitur, ut damnum illud, quod ex defectu respirationis passa est, refarciat. Quia autem hujusmodi crassorum vaporum major copia in capite continetur, hinc sæpe fit ut ægra post hanc excitationem, si de novo in somnum incidat, in idem malum facile relabatur, imprimis si supina jaceat, propterea quod crassi illi vapores tunc facilius versus posteriorem cerebri partem ad medullam subsistant.

V. Va.

V. Vapores autem esse, non verò humores, qui dicto loco spirituum animalium influxum impediunt, ex eo liquet, quod malum tam facile dispellatur, quod in humoribus tam facile non fieret, qui potius apoplexiam, aliudve grave malum inducerent. Illos verò vapores crassos esse, non autem tenues, ex eo manifestum est, quod tenues eo loco non hærent, sed per poros, licet angustiores, facile transirent & evacuantur, quod crassi non possunt, qui ut dissipentur, motu corporis calefieri & attenuari debent, quo motu in somno deficiente, hærent dicto loco, nervorumque poros angustant. Si verò frigida aliqua cerebri dyscrasia accesserit, facile illi vapores frigore isto condensantur in humores; qui si in capite detinerentur, ejusdem gravitatem, coma, apoplexiam, aliudve malum inducere possent; si verò è capite ad inferiores partes defluant, catharos faciunt, quibus ad thoracem delabentibus ægra nostra hybernis temporibus subinde laborare consueta est.

VI. Affectio hæc periculosa est, & vaporibus in humores condensatis ac in capite coacervatis, facile in coma somnolentum, carum, vel apoplexiam mutari posset; ac proinde illius curatio quam primum est instituenda.

VII. Consistit autem curatio in causæ antecedentis, procatactica, & continentis ablatione, cerebrique corroboracione.

VIII. Ut causa antecedens, humorum scilicet copia (è qua vapores copiosi ad caput eleventur) tollatur, corpus primò expurgetur cum pilulis cochiis aureis, pulvere diaturbith, vel hac potione:

Rec. Fol. fenna mun. drach. iij.  
agraric. albiss. Rhabbarbari, ana drach. j. s.  
sem. anisi scrup. ij.  
zingiberis albi scrup. s.  
decocti hordei q. s.  
fiat infusio s. art. adde  
colatur. elect. diaphanici drach. iij  
misce fiat potio.

IX. Deinde, quia plethorica est, sanguinis unc. viij. vel ix è brachio extrahantur.

X. Post venæsectionem utatur aliquot diebus matutino tempore haustu hujus apozematis:

Rec. Rad. calami aromatici, fœniculi,  
petroselinii capparum ana drach. vj.

herb. betonica, majorana, cuscuta,  
cichorei, boraginis acetosa, ana m. j.  
florum stachados m. s.  
bac. juniper. unc. s.  
passularum corinth. unc. ij.  
aqua q. s. coquantur s. art.  
addendo sub finem,  
fol. fenna mundat. unc. j. s.  
rhabbarbari opt. agarici albiss. ana drach. ij.  
sem. anisi unc. s.  
cinnamomi scrup. j. s.  
fiat apozema ad lib. j. s.

XI. Ad continentis causæ dispulsionem, proderunt errhina in nares attracta, vel pulvis sternutatorius ex rad. hellebori albi, pyrethri, fol. majoranæ & floribus liliorum convallium compositus.

XII. Ad capitis corroboracionem interdum sumat particulam hujus conditi:

Rec. Specier. diambra,  
aromatici rosati ana scrup. ij.  
conserva flor. betonica, salvia, anibos,  
rad. acori condit. ana unc. s.  
syrupi de stachade q. s.  
misce fiat conditum.

XIII. In eundem finem etiam talem cucupham capiti impositam gestabit:

Rec. Fol. majorana rosmarini, thymi,  
flor. lavendula, ana drach. j.  
nucis moscata, scrup. ij.  
gariophyllorum scrup. j.  
benzoini scrup. s.  
fiat pulvis grossus pro cucupha.

XIV. In dieta sit aer purus & moderate calidus. Cibi fiat euchymi & eupepti, sed aliquanto tamen pauciores quam pro consuetudine; in iisque assumendis satietas omnino vitetur, imprimis vespertino tempore, quo cœna tenuior magis convenit. Potus sit cerevisia tenuis vel mediocris, aut inter cibos vinum tenue parcius sumptum. Corpus mediocriter exerceatur. Somnus sit mediocris, & decubitus fiat in alteruro latere, viteturque supinus, quantum fieri potest. Si maritus illam in somno obscure queritantem audiat, mox expergefaiat. Alvus quotidie respondeat, vel sponte, vel arte. Sit animo quieto, fugiatque pathematum excessus.

## HISTORIA XII.

### De Apoplexia.

**V**ir quadragenarius ac fortis, crapulæ & ebrietati admodum deditus, postquam de capitis gravativo dolore, modò majore, modò minore, per duos menses conquestus fuisset, nec remedia adhibuisset, sed more solito, tam ante meridianis quam pomeridianis temporibus, aliorum sanitatem magnis multisque poculis bibendo, suam citissime profligare diligenter studuisset, tandem matutino tempore

pore in cubiculo deambulans, postquam tria quatuorve inarticulata verba protulisset, repente concidit, omnis sensus & motus expers, sola respiratione exceptâ, quam Medicus post sesqui horam vocatus aliquantum ingravescere percepit, pulsu mediocriter valido etiamnum existente.

I. **C** Aput in hoc ægro gravissimè affligi, animalium functionum prostratio satis docet.

II. Affectio hæc *Apoplexia* nominatur, quæ est subita omnium functionum animalium, excepta respiratione, privatio.

III. Non esse lethargum, syncopen, coma somnolentum, carum, catalepsi, aut epilepsiam, ex eo liquet, quod æger sine febris existens, prorsus immobilis jaceat, nihil omnino sentiat, nullis mediis excitari possit, & omnia membra flaccida habeat, cum pulsu mediocriter valido, & respiratione jam ingravescente; quæ omnia simul in prædictis affectibus non adsunt.

IV. Cerebrum autem in hoc ægro imprimis afficitur circa principium medullæ, è qua omnium nervorum origo procedit: quod principium ab humore pituitoso obsidetur.

V. Causa remota fuit continua ebrietas & crapula, qua longiore tempore debilitatum est cerebrum, in eoque multi crudi ac pituitosi humores generati, & in ventriculis cumulati, causam antecedentem dederunt; qui postea ad nervorum principium decumbentes constituerunt causam continentem.

VI. Istius enim nervorum principii poros obstructione & compressione repente angustantes, ingressum spirituum animalium prohibent; qui cum ea de causa subito sistantur & in nervos non influant, subito etiam concidunt omnes animales functiones, ægerque omnis motus & sensus expers relinquitur: excepta tamen respiratione, quæ aliquandiu persistit, quia spiritus animales in principio mali ad solos musculos respiratorios adhuc influunt, propter pororum in nervis respiratoriis majorem latitudinem, qui ea de causa tam citò non obstruuntur, ut aliorum nervorum pori angustiores. Verum malo perdurante, & humore pituitoso se magis magisque in eorum poros paulatim inferente, vel eos compressione angustante, etiam magis magisque impeditur spirituum animalium in eos influxus, unde tunc actio musculorum respiratoriorum imminuitur, & respiratione cum stertore ingravescit.

VII. Pulsus integer sentitur, quia malum est in principio, & sanguis è dextro cordis ventriculo in pulmonem impulsus propter respirationem adhuc permanentem, satis refrigeratur. At si perduret malum, etiam pulsus paulatim imminuetur ac deficient, non quod cordis motus ab influxu spirituum animalium dependeat, ab eoque deficiente etiam deficient, sed quod dextri ventriculi sanguis, propter respirationem deficientem, non satis eventiletur & refrigeretur, atque hinc pauca quantitate ad sinistrum ventriculum deveniat, unde cor debilitatum in suo motu deficit.

VII. Malum hoc periculosissimum est, nam juxta 2. aphor. 42. *Apoplexiam fortem solvere impossibile, debilem vero non facile.* Quia tamen in principio est, & respiratione nondum fit cum stertore, ægrique calor ratione ætatis validior existit, aliqua sanationis spes elucere videtur, sed non sine metu paralytis, post morbi solutionem secuturæ.

IX. Curatio igitur citissime instituenda est; ac studendum primò ut humores pituitosi nervorum principium obstruentes, loco moveantur, sicque spiritus in nervos transitus patefiat: deinde ut eorum nova generatio & in capite collectio impediatur, ac cerebrum corroboretur:

X. Corpus itaque moderatè commoveatur, fiantque pilorum vellicationes & asperæ frictiones ac ligaturæ in brachiis & cruribus. Hic quoque clyster injiciatur.

Rec. *Herb. absinthii, ruthæ, parietariae, mercurialis, hyssopi, betæ, centaurii minoris, ana m. j. fol. senæ unc. j. colocynthis in puppa ligata drach. j. sem. anisi drach. v. aquæ q. s. coquantur f. art.*

Rec. *colatura unc. x. elect. hiera picra, diaphænici ana unc. j. olei chamæmelini, rutacei, ana unc. j. salis scrup. iiij. misce fiat clyster,*

Vel ejus loco uti licet tali suppositoio:

Rec. *Specierum hiera drach. j. trochisc. alhandal scrup. l. salis gemma scrup. j. mellis scrup. vj. Fiat f. art. suppositorium: cujus extremitati adhæreant diagridii gr. iiij*

XI. Post injectum clysterem secetur vena in brachio, & sanguis mediocri quantitate educatur. Deinde cucurbitulæ cum & sine scarificatione applicentur collo, humeris, scapulis, & cruribus.

XII. Naribus etiam hic pulvis sternutatorius infletur.

Rec. *Radic. hellebori albi scrup. j. pyrethri scrup. l. fol. majorana scrup. j. piperis nigri, castorei, ana gr. v. Fiat pulvis.*

XIII. Foris capiti calide imponatur hic sacculus:

Rec. *Salis m. j. l. sabuli marini m. ii. sem. cumini, fœniculi, levistici, ana drach. ij. gariophyllorum drach. j. l. calefant simul in olla lapidea sicca, ac sacculo lineo infusa, capiti calido applicentur.*

XIV. Naribus, temporibus & vertici illinatur hoc linimentum.

D

Rec.

Rec. Olei castorei, lavendula,  
rosmarini, succini, ana scrup. j.  
unguenti martiati drach. j.  
misce, fiat linimentum.

XV. Cum æger incipit ad se redire, detur  
interdum cochleare hujus aquæ.

Rec. Aqua florum tilia, lilii convallium, vita  
Matthioli, syrupi de stachade, ana unc. j.  
misceantur.

XVI. Deinde purgetur cum pilulis cochiis,  
vel extracto catholico, vel elect. diaphænico  
aut hieræ picræ, vel pulvere diaturbith, vel in-  
fusione ex phlegmagogis parata. Quæ purgatio  
subinde repetenda est.

XVII. Corpore purgato præscribatur hoc  
apozema :

Rec. Rad. acori, faniculi, ana drach. vj.  
galanga unc. iij.  
herb. majorana, betonica,  
rosmarini, rutha, calamenta,  
hyssopi ana m. j.  
florum stachados m. l.  
cordialium ana p. j.  
bac. juniperi drach. vj.  
sem. anisi, faniculi, ana drach. ij.  
aqua & hydromelitis, ana part. æq.  
coquantur s. art. &

fiat apozema ad lib. j. s.

De quo sumat æger ter de die unc. iij. vel v.  
cum particula hujus conditi :

Rec. Specier. diambra scrup. iij.  
diamoschi dulcis drach. l.  
rad. acori condit. conserva florum salvia,  
anthos, betonica, ana drach. v.  
syrupi de stachade q. s.  
fiat conditum.

XVIII. Capiti imponatur hoc capitium.

Rec. Fol. majorana m. j.  
rosmarini, flor. lavendula, ana p. ij.  
gariophyllorum, nucis moscata, ana scrup. ij.  
benzoini scrup. j.  
fiat pulvis grossus, è quo in serico rubro  
fiat s. art. capitium.

XIX. In diæta sit aër modice calidus & siccus,  
vel naturâ vel vel arta. Cibi sint boni nutrimenti  
& facilis coctionis, conditi cum iis quæ at-  
tenuandi, calefaciendi, & caput corroborandi vim  
habent, qualia sunt, rosmarinus, majorana, fer-  
pillum, salvia, betonica, melissa, hyssopus,  
semina carminativa, & aromata. Potus sit me-  
licratum, vinum tenue, & nonnunquam pau-  
xillum vini hippocratici. Somnus sit brevior, &  
corporis exercitatio mediocris. Excreta natura-  
lia bene procedant. Fugiantur animi pathemata.

## HISTORIA. XIII.

### De Paralyfi, & Tremore,

**V**irgo 25. annorum, temperamento pituitoso prædita, postquam longo tem-  
pore lactucis, cucumeribus, & fructibus horariis copiosius usâ, ac postea de  
capitis doloribus gravativis sæpe conquesta fuisset, tandem subito in ter-  
ram concidit apoplectica, sensu motuque, excepta respiratione, privata.  
Vocatus statim Medicus convenientibus remediis rem eo deduxit, ut post sex  
horas oculos rursus aperiret, & post 20. horas plane mentis compos fieret, ac  
denuò loqueretur : sed totum sinistrum corporis latus infra caput omnino immo-  
bile remansit, cum sensu valde obtuso. Menses ipsi statis quidem periodis, sed non  
admodum copiosi fluere consueverunt.

I. **A**ffectio quæ huic ægræ post solutam  
debilem apoplexiam relinquitur, Pa-  
ralysis nominatur, quæ est motus volun-  
tarii, aut sensus, vel utriusque, in una vel pluribus  
corporis partibus abolitio.

II. Pars affecta est spinæ medulla, maximè  
circa suum principium; in quo dimidia ejus pars  
ab humore pituitoso, è cerebro excusso, obstru-  
cta vel compressa, nervorum omnium ex illo  
latere prodeuntium, & per consequens muscu-  
lorum etiam usum lædit.

III. Causa remota est victus inordinatus, &  
rerum frigidarum nimius usus, unde multi pitui-  
tosi humores in corpore pituitoso generati, &  
nimia copia in capite cumulati, capitis dolorem  
gravativum induxerunt, & hujus mali causam

antecedentem dederunt. Deinde verò principium  
totius medullæ cerebri intra cranium obstruentes  
primò apoplexiæ, ac postea inde ad dimidiam  
ejus partem excussi, & eandem in principio suo  
obstruentes, hujus Paralysos causam continentem  
constituerunt.

IV. Aboletur hæc de causa motus sinistri late-  
ris, quia propter dictam dimidiæ medullæ obstru-  
ctionem, denegatur spirituum animalium in il-  
lam dimidiam medullam, omnesque inde pro-  
deuntes nervos influxus, unde mox omnino con-  
cidit actio instrumentorum motus voluntarii,  
scilicet musculorum, quæ à copioso istorum spi-  
rituum in nervos influxu procedit, atque ita to-  
tius dicti lateris omnia membra prorsus immo-  
bilia manent. sensus verò non quidem in totum  
aboletur

aboletur, sed valde obtusus relinquitur, quia licet per medullæ angustatos poros tam multi spiritus non transfluant, qui ad motum sufficere possunt, pauci tamen transeuntes partibus sentientibus sensum tribuunt, eumque stupidum, propter nimiam paucitatem.

V. Malum hoc erit longum & curatu difficile, propter frigidi, viscosi & pertinacis humoris in parte frigida detentionem, qui tam ratione propriæ naturæ, quam ratione partis eam detinentis difficulter discutietur. Ætas tamen juvenilis, robur corporis, & quod una cum motu etiam sensus in affecto latere omnino non perierit, magnam recuperandæ sanitatis spem promittunt, si modò convenientia remedia quam primum adhibeantur.

VI. In curatione studendum 1. Ut humor pituitosus medullam obstruens, vel è loco illo excutiat, vel attenuetur & dissipetur, sicque obstructi pori rursus aperiantur. 2. Ut præcaveatur ne novi humores ad locum illum affluant. 3. Ut causa antecedens tollatur, novaque talis humoris generatio impediatur. 4. Ut cerebrum & spinæ medulla cum nervis, totumque latus paralyticum corroborentur.

VII. Ad humoris pituitosi è toto corpore evacuationem, exhibeantur hæc pilulæ:

Rec. *massa pil. cochiarum drach. f.*  
*extracti catholici scrup. f.*  
*cum pauxillo syrupi de*  
*stachade, fiant pil. vij.*

Harum loco etiam dari potest pulveris diaturbith aut diacarthami drach. j; vel haustus ex infusione foliorum sennæ, rad. jalappæ, agarici, &c. Hæc purgantia per intervalla sunt repetenda, quibus si ægra uti nequeat, clysteribus alvus subducenda erit.

VIII. Venæsectio in hoc casu non convenit.

IX. Ad cerebri totiusque nervosi generis corroborationem, frigida intemperiei, ac generationis pituitosorum humorum sublationem, præscribatur hoc apozema:

Rec. *rad. acori, feniculi, ana drach. vj.*  
*iridis florent. drach. iij.*  
*herb. betonica, iva arthritica,*  
*majorana, rosmarini,*  
*calamentha, thymi, ana m. j.*  
*Flor. stachados m. f.*  
*sem. feniculi, carui,*  
*ameos. ana drach. j. f.*  
*aqua & vini ana part. eq.*  
*coquantur f. art. ad lib. j. f.*  
*colatura, admisce*  
*syrupi de stachade unc. iij.*  
*fit apozema.*

De quo utatur ægra ter quaterve de die unc. iij. cum particula hujus conditi:

Rec. *specier. diambra, diamoschi*  
*dulcis, ana scrup. iij.*  
*conserva florum salvia, anthos,*  
*rad. acori condit. ana drach. v.*  
*syrupi de stachade q. s.*  
*misce, fiat conditum.*

X. Conveniens hic etiam erit usus aquarum paralyticarum & apoplecticarum. quæ calefaciunt & corroborant cerebrum, omnesque nervosas partes, quarum multæ existunt apud Medicos descriptiones.

XI. Si his non cedat malum, utatur ægra singulis matutinis temporibus unc. v. sequentis decocti, & pro ratione virium in lecto fudet:

Rec. *ligni guajaci unc. iij.*  
*sassefras, salsaparilla, ana unc. ij.*  
*aqua lib. vij.*  
*fiat maceratio horis viginti,*  
*postea coquantur f. art. addendo sub finem*  
*rad. acori, valeriana,*  
*petasitidis, feniculi, ana drach. vj.*  
*galanga, glycyrriza rasa; ana drach. ij.*  
*herb. betonica m. iij.*  
*iva arthritica, m. ij.*  
*thymi, majorana, rosmarini,*  
*florum stachados, ana m. j.*  
*salvia m. f. bac. juniperi unc. j.*  
*fiat decoctum ad lib. iij.*

XII. Ad cerebri corroborationem hæc quoque cucupha capiti imponatur.

Rec. *fol. rosmarini, majorana, thymi, flor.*  
*lavendula, meliloti, ana p. j.*  
*gariophyllorum,*  
*nucis moscata, ana scrup. ij.*  
*fiat pulvis grossus pro cucupha.*

XIII. Interea dum hæc fiunt, spina dorso, imprimis in cervice prope caput, linteis calidis fortiter fricetur, & deinde foveatur cum fomento ex cephalicis calidis in vino coctis præparato; ac denique calide inungatur hoc linimento:

Rec. *olei vulpini, spica, rutacei,*  
*axungia anseris, cati ana drach. vj.*  
*olei terebinthina, unc. f.*  
*olei petra, rosmarini, succini, ana scrup. ij.*  
*pulveris castorei scrup. iij.*  
*misceantur pro linimento.*

Post hujus inunctionem & affricationem imponatur hoc emplastrum:

Rec. *pul. castorei drach. ij*  
*benzoini drach. j.*  
*gummi galbani, opoponacis spiritu vini dissolutor.*  
*emplastri de betonica, de baccis lauri,*  
*de meliloto, ana drach. vj.*  
*ex his s. art. mixtis fiat emplastrum.*

XIV. In diætâ sit aer calidus, siccus & purus. Cibi sint euchymi & eupepti, calefaciendi & attenuandi vim habentes, conditi cum aromatibus, seminibus carminativis, foliis lauri, betonica, majorana, aliisque cephalicis calidis. Potus sit hydromel, aut vinum, alteratum cum rosmarino, majorana, betonica, cardamomo, &c. Conveniet etiam subinde haustus vini hippocratici; aut cochleare spiritus vini juniperini, vel anthosati, vel aquæ vitæ Matthioli. In omni cibo & potu repletio maximè fugienda est. Somnus brevior sit. Excretiones naturales bene procedant, & vehementiora animi pathemata fugiantur.



## HISTORIA.

*De Tremore*

**V**ir quinquagenarius pituitosus, magno repentino terrore perculsus, subito concidit, adstantes aspiciens quidem, sed loqui nequiens. Paulo post animum resumens, satis bene locutus est, & toto corpore tremens surrexit. Ab eo tempore, cum membra movet, tremor ille remansit, qui corpore frigescente major, calente verò minor existit.

**I.** *Tremor hic est depravatio motus voluntarii membrorum, quæ illa perpetua vicissitudine in contrarium agitantur.*

**II.** Causa antecedens est pituitosus humor in cerebro contentus, qui propter magnam, repentinam, & inordinatam spirituum à causa procatarctica (terrore scilicet) commotionem simul etiam commotus, & ad spinæ medullam excussus, causam continentem constituit.

**III.** Eo enim loco poros medullæ angustans, satis liberum spirituum animalium per medullam in nervos & musculos influxum impedit. Qui spiritus parciore quantitate transeuntes, cum non sufficiant ad motum voluntarium sufficienter perficiendum, fit ut membra à voluntario motu

promoveantur, à sua vero gravitate deprimantur, atque sic ex his duobus fit motus tremulus.

**IV.** Tremor hic major est corpore frigidior, minor calidior existente: quia à frigore magis constringuntur obstructi pori, hincque pauciores spiritus animales transeunt: à calore verò magis dilatantur pori, & obstruentes humores discutiantur; hincque ob liberiores transitum plures spiritus in nervos & musculos influunt, membraque cum minore tremore moventur.

**V.** Tremor hic periculo non vacat, facile enim in paralysem transiret, vel ei apoplexia, carus, aut lethargus adjungi posset.

**VI.** Curatio eodem modo, iisdemque fere remediis perficitur, ut in paralyfi.

## HISTORIA. XIV.

*De Convulsione.*

**V**iro 30. annorum vulnus inflictum fuit in brachio dextro, quo nervus denudatus est, sed illæsus tamen remansit, decumbit loco frigidus, neque, ob paupertatem, adversus aëris injurias satis munitus habitat Imperitus chirurgus, subsistente hæmorrhagiâ, imposuit vulnere petiam unguento Apostolorum & Ægyptiaco inunctam, unde convulsio vehemens & dolorosa vulneratum brachium corripuit; quam paulo post cruris ejusdem lateris, deinde & in altero latere brachii ac cruris convulsio subsequuta est, interdum ad semi quadrantem horæ, interdum horæ, interdum ad quadrantem aut paulo diutius perdurans, atque sic per intervalla modò intermittens, modo rediens. Æger præ summo dolore adeo turbatus est, ut subinde etiam deliret.

**I.** *Afficiuntur in hoc ægro nervi & muscoli, quod ex motu involuntario nimisque aucto; & subinde etiam cerebrum, quod ex delirio satis patet.*

**II.** Symptoma hoc *Convulsio* appellatur, quæ est nervorum musculorumque suum principium versus perpetua & involuntaria contractio. Perpetua autem dicitur, quia diutius durat.

**III.** Causa remota est inflictio vulneris nervum denudantis: proxima verò causa est irritatio molesta ab unguento acri, & mordicante, nec non aëre frigido, nervo illata, eumque vellicante.

**IV.** Ubi enim molestia huic nervo illata cerebro est communicata, & à mente percepta, mor,

ut ille hostis excluderetur, eique ingressus denegaretur, spiritus copiosiores è cerebro ad locum affectum determinati fuere, à quorum copia nervus, & musculus ille cui nervus inferitur, secundum latitudinem magno cum dolore distensus, secundum longitudinem verò contractus est. Postea à maximo isto dolore per nervi vellicationem & dictæ partis contractionem violentam illato, turbatum fuit cerebrum, quod ea de causa spiritus animales inordinatè ad has illasve partes inferiores copiose dimittens, alias quoque partes eodem modo contrahit, sicque convulsio non solum in parte vulnerata, sed in aliis etiam partibus contingit: & à magna illa cerebri, spirituumque animalium turbatione delirium

rium quoque subinde accedit.

V. Periculosum est hoc malum, quia præter nervos & musculos, nobile quoque viscus cerebrum afficitur. Et semper, teste Hippocrate 5. Aphorif. 2. *Convulsio vulnere superveniens lethalis*, id est, valde periculosa. Quia tamen æger hic juvenis ac fortis est, & hæc convulsio oboritur a causa externa, quæ facile removeri potest, magna recuperandæ sanitatis spes affulget, si convenientia remedia adhibeantur.

VI. Curatio igitur quam citissimè instituentda, & ante omnia æger loco calido deponendus, ab ærisque injuriis defendendus est. Deinde statim à vulnere removendum est unguentum illud acre & mordicans, ac vulnus eluendum aqua hordei cum pauxillo hyssopi coctâ, in qua parum mellis solutum sit, eique immittenda petia hoc unguento inuncta:

Rec. vitellum ovi n. j,  
mellis, terebinthina, ana drach. iij.  
spiritus vini drach. ij.  
misce. fiat ung.

Denique emplastrum de betonica vel mililoto imponendum.

VII. Fomentari poterunt partes convulsæ, & imprimis brachium vulneratum tali fomento:

Rec. herb. majorana, rosmarini, betonica,  
calamenta, hyssopi, origani ana m. j.  
flor. anethi, m. ij.  
chamom. meliloti, ana m. j. f.  
sem. cumini unc. j. levistici drach. iij.  
sem. anethi unc. l.  
vini albi q. s. coquantur ad lib. iij.  
pro fomento.

VIII. Post fomentationem, cum forti frictione calidè inungantur partes convulsæ hoc linimento.

Rec. unguenti martiati, olei irini, vulpini,  
lumbricorum, spica, ana unc. j.  
olei castorei unc. f.  
misceantur pro linimento.

IX. Interea præmissis clystere, interdum da-

bitur haustus apozematis cerebrum nervosque corroborantis:

Rec. radic. acori, faniculi,  
paonia maris, ana drach. vj.  
herb. majorana, rutha. betonica,  
rosmarini, melissa, origani, calamenta, ana m. j.  
flor. stachados, m. f.  
sem. faniculi drach. ij.  
passularum mundat. unc. ij.  
aqua q. s. coquantur. f. art.  
& fiat apozema ad lib. j. f.  
cui admisce aqua florum tilia, syrupi de  
stachade, ana unc. iij.

X. Subinde etiam exhibeatur particula hujus conditi:

Rec. specier. diambra scrup. iij.  
rad. acori condit. conserva flor. salvia,  
betonica, anthos. ana unc. f.  
syrupi de stachade q. s.  
misce fiat conditum.

XI. In eundem finem etiam tale capitium capiti imponatur:

Rec. fol. majorana m. f.  
rosmarini, betonica, flor. anethi,  
meliloti, ana pjj, nucis moscata drach. j.  
benzoini drach. f.  
fiat pulvis grossus pro capitis vel cucupha.

XII. Cessante convulsione corpus clementer expurgetur cum infusione foliorum fennæ, Rhabbari, agarici, &c. Vel cum pilulis cochiis, aureis, electuario diaphœnico, diaturbith cum rheo, &c. Post purgationem redeat ad usum antedicti apozematis & conditi.

XIII. In diætâ sit aer calidior. Cibi sint euchymi & eupepti, conditi cum majorana, hyssopo, rosmarino, betonica, salvia, semine anisi, fœniculi, aliisve similibus. Potus sit prifana, melicratum, vel cerevisia mediocris notæ, bene fermentata. Somnus longus sit, magnaue corporis quies. Excreta naturalia bene procedant, & fugiantur animi pathemata.

## HISTORIA. XV.

### De Epilepsia.

**P**uer octo annorum, mediocriter fortis, nullam diætæ rationem habens (propterea quod nimium ipsi indulgerent parentes) paulatim tristior evasit, & præterita hyeme de capitis gravitate sæpius conquestus fuit. Postea mense Martio hujus anni cum sodalibus colludens, repente corruit, sensus expers, oculos distorsit, ac pollices pugno firmissimè insertos detinuit. Paroxysmus ille brevi cessavit, postridie bis rediit multo gravior, nam corporis manifestæ accesserunt convulsiones, Exinde bis, ter, quaterve singulis septimanis rediere paroxysmi, cum convulsionibus multo gravioribus. Verum æstate paroxysmi fuere mitiores & rariores, ita ut vix semel in hebdomada invaderent. Hoc verò autumno, præcipue circa hyemem, frequentissimi & violentissimi evaserunt, ita ut singulis diebus bis terve, idque repente, nullo præcedente præsagio, invadant,

cum horrendis convulsionibus, multa; spuma in ore. A mali magnitudine & diuturnitate principes animales functiones valde læsæ sunt, ita ut æger jam quasi aliquo modo fatuus sit.

I. **C**erebrum in hoc ægro graviter affigi, animalium actionum læsio satis testatur.

II. Malum quo infestatur, *Epilepsia* dicitur, quæ est totius corporis convulsio non perpetua, qua homo subito concidit, cum sensuum mentisque functionum interceptione, à peculiari maligna & acri materia orta.

III. Ad generationem causæ hujus mali plurimum fecit diætâ inordinata (fortasse fructuum horariorum, aliorumque pravorum ciborum copiosior ingestio) unde in corpore pituitoso crudi ac pituitoli humores copiosiores generati sunt: qui in cerebro majore copia collecti, primò capitis gravitatem per aliquod tempus induxerunt: deinde ob diuturnam in cerebro moram illic peculiarem quandam pravitatem & acrimoniam concipientes, *Epilepsia* causam continentem constituerunt.

IV. Hic enim pravus & acer humor quoties acres malignosque vapores de se exhalat, qui nervorum principium circa sensorii communis sedem male afficiunt & vellicant, toties paroxysmum inducit. Dum enim natura à partibus illis sensibilibus molestam acrimoniam excutere conatur; fit, ut spiritibus modò copiosis, modò paucis in eas influentibus, sese alternatim contrahant & relaxent, unaque reliquos corporis nervos & musculos eodem modo moveant, atque hinc vehementes illæ, breves, crebræque convulsiones procedant.

V. Quia verò hic pravus & acer vapor exiles minutissimosque nervulos prope sensorii communis sedem maximè & repente affligit, hinc fit ut repentè invadat paroxysmus: nam simul ac nervuli illi acrimoniam istam recipiunt, mox natura illam excutere nititur. Quia verò illa convulsoria excussio fit & incipit circa sensorium commune, hinc etiam sensuum mentisque functiones mox intercipiuntur. Nam conarium ipsum statim male afficitur, & spirituum animalium (à quorum integritate & debito influxu functiones bonæ procedunt) influxus per nervos modò contractos, modò relaxatos convenienter fieri nequit, atque hinc etiam sensuum organa deficiunt in suis officiis, & propter istum inordinatum spirituum influxum in nervos & musculos, æger statim corruit.

VI. Æstate rariores & mitiores huic ægro fuerunt paroxysmi: quia propter calorem externum pori totius corporis fuerunt magis aperti, ita ut major facta sit humorum dissipatio, & ratione temporis anni tunc etiam minus pituitæ generatum & in cerebro coacervatum est. Autumno autem & hyeme frequentissimi & violentissimi evaserunt, quia multo copiosior pituita generata, minusque per frigore constrictos poros dissipata est: quæ majore copia in capite cumulata, ibique pravam & acrem qualitatem adeptæ, & calore agitata, plures & acriores vapores versus

nervorum principium de se emittit, atque hinc violentiores magisque frequentes paroxysmos facit.

VII. Spuma in ore producit, quod pituitosi illi humores per vehementem istam agitationem è cerebro in fauces & pulmones depulsi, ob impeditam respirationem nimis illic incallescant, deinde aëri in respiratione inæqualiter & difficulter transeunti commisceantur, atque sic vehementi respiratione spumefacti ad os protrudantur.

VIII. Paroxysmus durat quousque malignus & acer ille vapor omnino discussus sit: redit verò, cum prava materia de novo agitata similem vaporem ad nervorum principium rursus emittit. Major est vel minor, & magis minusque principes functiones lædit, prout pravitas est major vel minor, magisque vel minus copiosa fuerit materia. Hinc fit ut in nonnullis Epilepticis supersint aliquo modo Sensus, Imaginatio & Reminiscencia: cum scilicet propter minorem pravitatem & acrimoniam, materiæque paucitatem, convulsiones fiunt minores, ita ut mentis sedes hinc non magnopere afficiatur. Contra verò in plerisque nulli sensus supersunt, ob mentis sedem gravius affectam à maximis convulsionibus, ex materia magis prava & copiosa procedentibus.

IX. Quia pravitas & acrimonia humoris, hujus ægri epilepsiam facientis, in cerebro gignitur, ejusque paroxysmi frequentes & vehementes sunt, & ipsum malum per novem jam menses duravit, difficilis erit ejus curatio, cujus tamen magnam spem exhibent robur ægri & ætas puerilis, cujus mutatio, teste Hippocrate, plurimum ad hujus mali ablationem facit.

X. Curatio facienda est vel in paroxysmo, vel extra paroxysmum. In paroxysmo cavendum ne æger se lædat, & curandum ut paroxysmus citò solvatur. Vtrumque igitur brachiis è terra elevatus capite sursum detinendus est, ne illud in pavimentum fortiter incutiat: vel si tempus & occasio id ferat, lecto statim imponendus. Lignum etiam dentibus inferendum, ut linguam mordicus non præcidat, & spumæ ex ore liberior detur exitus. Deinde castoreum, rutha viridis, oleum majoranæ, succini, nucis moscatæ, aliaque similia naribus admovenda. Adstantium aliquis in ægri auribus clamet vel sonitum fortiorem excitet. Manus fortiter occlusæ vi aperiantur, reliquaue convulsa membra, quantum fieri potest, in convenienti situ detineantur.

XI. Extra paroxysmum causæ procatasticæ sunt avertendæ, & antecedens causa tollenda, ac continentis prava qualitas corrigenda, totumque cerebrum corroborandum est.

XII. Corpus clementer expurgetur cum drach. ij. hieræ picræ aut diaphœnici, si exhiberi possit: vel cum pulveris diacarthami scrup. j. s. vel cum passularum corinth. purgantium unc. j.

XIII De-

XIII. Deinde bibat ter quaterve de die haustum hujus decocti:

Rec. Radic. pœonia maris, visci quercini, ligni sassefras, ana drach. vj.  
calami aromatici, valeriana, ana unc. f.  
herb. majorana, ruta, calamentha, rosmarini, verbona, fol. lauri.  
flor. stachados, ana m. j.  
bacc. juniperi unc. f.  
sem. anethi, dauci, feniculi, ana drach. j.  
sem. pœonia maris drach. iij.  
passularum mund. unc. ij.  
aqua q. s. fiat. s. art. apozema ad lib. j. f.

Ante hujus usum sumat particulam sequentis conditi:

Rec. Specierum diambra drach. j. f.  
rad. acori condit. conserva anthos,  
flor. salvia, betonica, ana unc. f.  
cum syrupi de stachade q. s. fiat conditum.

XIV. Loco apozematis interdum exhiberi potest cochleare hujus mixturæ:

Rec. Aqua epileptica Langii unc. iij.  
aqua florum tilia,

lilii convallium, ana unc. j.  
syrupi de stachade unc. j. f.  
miscantur.

XV. Capiti hanc cucupham capitii forma impositam gestet.

Rec. Fol. majorana, rosmarini, thymi,  
flor. lavendula, rosarum rubr. ana. pii,  
nucis moscata scrup. ij.  
gariophyllorum, benzoini, ana scrup. j.  
fiat pulvis grossus pro cucupha.

XVI. In dicta sit aer ad calidum vergens. Vitet æger fumi ascendentis, undarum fluminis, præcipitiorum, & rerum terribilium aspectum. Cibi sint boni succi & concoctu faciles, cum melissa, rosmarino, majorana, aliisque cephalicis conditi. Vitentur fructus horarii, allia, capræ, caro porcina, aliaque duræ digestionis vel pravi succi alimenta. Potus sit cerevisia tenuis vel mediocris, bene defœcata, & subinde pauxillum vini tenuis. Somnus sit moderatus, ut & corporis motus. Vitentur animi pathemata, imprimis terror. Excrementa alvi bene procedant.

## HISTORIA XVI.

### De Catarrho.

**V**ir quadragenarius, temperamenti frigidioris, cum victu refrigerante & humectante diutius usus fuisset, incidit primò in gravativum capitis dolorem, modò majorem, modo minorem, cum proclivitate ad somnum. Hinc modò valida tussi, modo gravi auditu, tinnitu aurium, dentium, cervicis, humeri, aliarumve partium gravibus doloribus infestatur, quibus subinde graviter per aliquot dies excruciat: interdum validissima tussi corripitur, cum impedimento respirationis, non sine suffocationis periculo: sæpe nauseabundus est, & ventriculi molestis ructibus ac dolore torquetur: sub maxilla inferiore oedematosi tumores oboriuntur, qui postea dissipati rursus evanescunt. Nares ipsi præter consuetudinem siccae sunt, & per os pauca ejicit. Conqueritur se in vertice capitis continuam quandam frigiditatem sentire, & capillos non esse adeo humidos ut solent.

I. **A** Eger hic Catarrhis infestatur, qui sunt humorum excrementitiorum defluxiones præter naturam à capite ad partes inferiores.

II. Victus refrigerans crudius ac pituitosum nutrimentum corpori exhibens remota mali causa fuit, hinc enim refrigerata & debilitata sunt viscera coctionibus inservientia, multaq; in corpore generata est pituita excrementitia, antecedentem hujus mali causam præbens: quæ in cerebro majore copia collecta, illud nimis frigida & humida intemperie affecit, atque inde quæ data porta defluens ad alias inferiores partes, causam continentem constituit.

III. Pituita autem illa collecta fuit in cerebro, partim quia cerebrum intemperie frigida affectum, exiguo suo calore tam frigidum crassum-

que humorem coquere & dissipare non potuit: partim quia obstructi fuerunt meatus per quos talia excrementa naturaliter evacuari solent, & debent: scilicet viæ quæ ducunt ad nares & palatum, nec non pori in vertice capitis.

IV. Contingit autem hæc obstructio partim in interioribus, partim in exterioribus capitis partibus. In interioribus ob crassitiem & viscositatem istorum humorum angustos meatus, excretionum talium excrementorum dicatos, infarciunt. Unde, cum per debitas vias evacuari nequeant, defluunt, modò ad aurium interiora, ubi tinnitum, dolorem, gravem auditum: modò ad laryngem & pulmones, ubi validam tussim & suffocationis periculum: modò ad ventriculum aliaque interiores partes, in quibus gravia mala excitant. In exterioribus, ob pororum in vertice capitis

ab iisdem humoribus repletionem, eorundemque à frigore externo constrictionem: à quo frigore externæ capitis partes adeo refrigeratæ sunt, ut æger frigus illud continuum in vertice præsentiat. Quod frigus præterquam quod poros constringat, in causa est ut quicumque vapores è cerebro per suturas & cranii poros transeunt, illic extra cranium sub cute vel pericranio condensentur in humorem serosum ac pituitosum, qui ob pravam coctionem sæpe falsus & acris existit. Hic cum ob suam crassitiem & pororum constrictionem dissipari nequeat, secundum externas capitis partes defluens ad maxillas, dentes, cervicem, scapulas, aliasve quasunque partes, iis dolores aliave mala inducit.

V. Vias ordinarias, excrementorum istorum evacuationi dicatas, esse obstructas, ex eo liquet, quod nares ægro præter consuetudinem siccatæ, & capilli quoque sicciores sint, quodque pauca sputa ejiciat: nam per palatum, nares, & verticis poros, maxima horum excrementorum pars naturaliter evacuari solet & debet, quod hic non fieri manifestum est.

VI. Affectio hæc, præterquam quod symptomatum multitudine ac gravitate molestissima est, etiam periculo non vacat: nam humoribus his copiosis & acribus subito ad fauces & pulmones defluentibus, repentina suffocatio, vel pulmonis erosio & exulceratio, hincq; tabes metuenda est: ad alias verò partes interiores ruentibus, apostemata occulta & periculosa induci facile possent.

VII. In curatione (quæ sine periculo differri non potest) primò corpus bis terve expurgandum est pilulis cochiis; pulvere diaturbith vel diacarthami: aut tali haustu:

Rec. folior. *sena mund.* drach. iij.  
*agarici albi* drach. j. s.  
*sem. anisi* drach. j.  
*cinnamomi electi, zingiberis albi*, ana scrup. s.  
*decocti hordei q. s. fiat infusio s. art. adde*  
*colatura. elect. hiera picra*, drach. j.  
*diaphanici* drach. ij.  
*misce fiat haustus.*

VIII. Deinde sequenti apozemate corpus & cerebrum corroborandum & siccandum:

Recl. rad. *acori, fœnic. ana* drach. vj.  
*galanga* drach. iij.  
*herb. majorana, betonica, thymi, rosma-*  
*rini, melissa, calamentha*, ana m. j.  
*fol. lauri, flor. stachados*, ana m. s.

*sem. anisi, fœnic. ana* drach. ij.  
*baccarum lauri* drach. j. s.  
*aqua & vini ana part. eq. coquantur.*  
*s. ar. & fiat apozema ad lib. j. s.*  
*de qua sumantur tres quatuorve*  
*haustus de die.*

IX. Meridie & vespere utatur post pastum particula hujus conditi.

Rec. *specierum diambra, diamoschi,*  
*diagalanga*, ana drach. s.  
*conserva anthos, rosarum rubr. ana* drach. vj.  
*rad. acori condit*, drach. iij.  
*syrupi de stachade q. s. misce fiat conditum.*

X. Magnum hic etiam locum habebunt decocta guajaci, salsæparillæ & sassefras; imprimis si cum cephalicis calefacientibus & siccantibus præparentur, iisque sudor semel de die provocetur.

XI. Interea dum hæc fiunt, etiam masticatoria, & errhina sunt adhibenda, ut dictorum meatuum obstructions tolli, & excrementa per debitas ac convenientes vias educi seu evacuari queant. Tabaci usus eundem in finem etiam multum proderit.

XII. Capiti imponatur hujusmodi cucupha vel capitium.

Rec. fol. *rosmarini, majorana, thymi,*  
*flor. lavendula*, ana pjj  
*masticis, thuris ana* drach. j.  
*gariophyllorum, nucis moscata ana* scrup. j.  
*fiat pulvis pro cucupha.*

Tempora & vertex illinantur quotidie hoc linimento.

Rec. olei *rosmarini, succini,*  
*majorana*, ana scrup. j.  
*olei nucis moscata expressi* scrup. ij.  
*unguenti martiati* drach. ij.  
*misceantur pro linimento.*

XIII. Si malum his adhibitis diutius perseveret, ut catarrhus à principalioribus partibus diverti possit, conveniet fonticulus in altero brachio aut cervice excitatus.

XIV. In diæta sit aer modicè calidus. Cibi sint euepti & eupepti, assi potius quam elixi, conditi cum aromatibus & cephalicis calefacientibus, attenuantibus & siccantibus: fugienda autem, raphanus, allium, synapi, cæpe, aliaque quæ copiosos vapores excitant, & sic caput replent. Potus sit paucus & generosus. Somnus moderatus, potius brevior, quam longius. Corpus mediocriter exerceatur & animus quietus sit.

HISTO-

## HISTORIA XVII.

## De Ophthalmia.

**V**ir triginta annorum, sanguine calido ac bilioso abundans, cum præterita hyeme vino generoso admodum excalesfactus, maximo nocturno hyberno frigori se paulo diutius exposuisset, acutum in oculis sensit dolorem, cum ardore. Postridie magna quoque rubedo conspecta est in adnata tunica seu albo oculi, cum venularum manifesta intumescencia. Lucem ferre omnino non potuit, ita ut clausis oculis continue federet. Lachrymæ acres ex oculis affatim profluxerunt, & apertis oculis visus obscuritas observata est.

**I.** **P**ars affecta in hoc ægro est oculus, in quo primario afficitur tunica adnata seu conjunctiva dicta, reliquæ vero oculi partes per accidens.

**II.** Hic autem morbus Medicis *Ophthalmia & Lippitudo* appellatur, quæ est inflammatio adnata seu alba tunica cum rubore, ardore, dolore & lachrymis.

**III.** Causa mali antecedens fuit corporis totius sanguis copiosus & calidus, qui ob exandescencia à vino inductam valide commotus, cum à causa procatarctica, externo scilicet magno frigore, in oculo repente detineretur, in ejus adnatam tunicam copiosior effusus, causam continentem constituit.

**IV.** Cum enim sanguis, ob magnam incalescentiam a vino, rapidius per arterias & venas moveretur, ab externo illo frigore oculis recepto in adnata tunica subito incrassatus est, ita ut per minimas ejus venulas tam citò transire & circulari non potuerit, quam à corde per arterias eo propelleretur. Hinc cum plus eò impelleretur quam transire posset, intumuerunt adnatæ tunicæ venulæ, & ipsa quoque tunica à sanguinis copia distenta fuit: qui sanguis diutius ibi detentus & aliquam putredinem suscipiens nimis calidus & acris factus est, ac inflammationem induxit.

**V.** Dolor autem accessit, partim propter adnatæ tunicæ (quæ acutissimi sensus est) distensionem; partim propter acrimoniam humorum eandem tunicam erodentium.

**VI.** Clausis oculis sedet æger & lucem perferre nequit, partim quia ab aëre externo admissio exasperatur dolor: partim quia, cum apertis in luce oculis radii oculum feriant, sicque visio fiat, atque in eum finem, ut visio fiat, copiosiores spiritus animales ad locum determinantur & confluant, oculumque distendant, hinc ab illa distensione longe acrior fit dolor, quem ut æger evitet, oculos clausos tenere cogitur, ut ita radios illos evitet, sicque minor fiat spirituum determinatio, & ad oculum influxus, ac per consequens minor distensio tunicæ adnatæ.

**VII.** Cum autem visus fiat à copioso spirituum ad oculum influxu, eumque influxum ob

dolorosam distensionem adnata tunica perferre nequeat, hinc apertis oculis visus ægro obscurior est; nam pauciores spiritus in principio visum obscuriorem præstant; cum verò copiosiores influere incipiunt, ob distensionem & dolorem adnatæ tunicæ cogitur æger oculum occludere, ut sic majorem spirituum influxum sistat.

**VIII.** Lachrymæ verò profluunt, imprimis aperto oculo, quia caruncula, quæ in cantho majore infidet puncto lachrymali, seu foramini nasi ossi insculpto, in utroque oculo à vicina inflammatione etiam vellicatur, hincque dolet & contrahitur; imprimis si aperto oculo aëris injuria accedat; atque propter illam dolorosam contractionem minus exacte tegit ante dictum punctum lachrymale, unde per foramen nimis laxum & apertum lachrymæ liberius effluunt. Quæ acres sunt propter salem isti seroso humori admixtum; & multo acriores ægro videntur quam per se sunt, quia fluunt ad acutissime sentientem tunicam adnatam, nunc male affectam, & cujuscunque rei, etiam aëris, quam minimam acrimoniam facillime persentientem.

**IX.** Ophthalmia hæc oculis periculum minatur, quia ob aëris hyberni frigidi allapsum, difficilior est humorum in adnata tunica influxorum discussio; qui si diutius ibi hæserint, metuendum est ne nimis erodatur & tandem exulceretur tunica adnata, atque etiam cornea, indeque albugo, cicatrix, aliudve vitium remaneat, quod visum lædat.

**X.** In curatione quamprimum tollenda est causa antecedens, utpote quæ continentem fovet; procatarctica quoque removenda est, ut sic continens melius discuti possit.

**XI.** Corpus primo expurgandum cum pilularum cochiarum drach. j. vel electuarii diapruni solutivi unc. f. additis paucis granis diagridii, vel tali haustu.

Rec. *rhabarbari elect. drach. j. f.*

*fol. senæ mundat. drach. iij.*

*tartari drach. j. sem. anisi drach. j.*

*decocti hordei q. f. fiat infusio f. art. adde*

*colatura, elect. diapruni solutivi drach. iij.*

*misce, fiat potio.*

E

XII. Pur-

XI. Purgato corpore, mox vena brachii secanda est, & sanguinis unc. viij. aut x. educenda. Deinde rursus purganda, & post purgationem iterum vena secanda, si necesse sit.

XIII. Ut verò pauciores humores excrementitii è cerebro ad oculos affluant, revulsionem instituenda sunt per cucurbitulas cervici & scapulis appositae; nec non per vesicatoria post aures applicata. Quae si affluxum humorum ad oculum non satis avertant aut revellant, & malum diuturnius fieri videatur, cervici setaceum, vel etiam cauterium actuale aut potentiale eidem, aut brachio adhibendum.

XIV. Ad doloris sedationem sanguis è penis vivorum pipionum recentes evulsis in oculum exprimendus est; vel las muliebris recens maulctum instillandum, vel mucilago seminis psyllii & cydoniorum in aqua rosacea extracta adhibenda: vel vitellum ovi ad duritiem coctum, aut sequens cataplasma imponendum.

Rec. *pulpa pomi assati unc. j. f.*  
*mica panis albi recentis unc. iij.*  
*croci pulverisati scrup. j. f.*  
*lactis recentis & aqua rosacea, ana part. aq.*  
*fiat cataplasma.*

XV. Dolore aliquantum sedato, tale collyrium immittendum:

Rec. *sarcocolla lacte nutrita drach. j.*  
*tragacantha drach. f.*  
*mucilaginis sem. cydoniorum q. s.*  
*fiat collyrium.*

XVI. Ad discussionem humoris in tunica adnata contenti, sequenti fotu tepido oculi cum molli spongia saepe fovendi sunt:

Rec. *herb. altheda, feniculi, flor. chamomilla,*  
*meliloti, ana m. j.*

*aqua q. s. coquantur ad unc. viij.*

*quibus adde, aqua rosarum unc. iij. misce.*

XVII. Post fotum imponatur cataplasma ante praescriptum: vel tale collyrium oculo instilletur:

Rec. *aloes aqua feniculi lota scrup. j.*

*sarcocolla lacte nutrita drach. j.*

*croci gr. vij.*

*aqua euphrasiae, feniculi ana unc. j.*

*misce: fiat collyrium.*

XVIII. In quatuor sit ac temporis ac purus, expertus sumi, pulveris & ventorum, obscurior tamen & tenebrosior, habeatque æger linteolum atrum, ceruleum, vel potius viride oculis obductum. Cibi sint pauciores & facili digestioni ac boni succi, conditi cum euphrasia, feniculo, cichoreo, boragine, &c. Potus sit pitana, cerevisia tenuis, & in pasta pauxillum vini valde tenuis. In cibo & potu vitetur semper repletio: vitentur etiam ea quae caput replent; raphanus, cepae, allium &c. ut & ea quae peculiari vi oculis nocere solent, qualia sunt caules, fabae, lentesc, olivae, &c. Somnus longior sit, & quies corporis solito major, Alvus liquida servetur; & fugiantur animi pathemata, imprimis ira.

## HISTORIA XVIII.

### De Suffusione & suggillatione oculorum.

**A**dolescens duodecim annorum, temperamenti frigidioris, ante quinque menses visus aliquam obscuritatem in utroque oculo percepit, quae primò culices, pulvisculos ac paleas ante oculos volitare putabat. Postea tanquam per nebulam densiorem vidit: sicque visus paulatim magis magisque immixtus est, ita ut nunc homines quidem aliquo modo videat, sed neminem cognoscere possit, imò vix equum à bove distinguat. In pupilla albicans quiddam, crystallinum humorem contegens, conspicitur, quod, oculis digito pressis, loca cedit, seque dilatat.

**H**ujus ægri affectio Medicis Suffusa appellatur, quae est pupilla sive uveae foraminis obstructio, facta ab humore praeter naturam inter corneam tunicam ac pupillam collecto ac consistente, visionemque impediens.

I. In hoc ægro humor ille est pituitosus, ut ex colore albicante in pupilla conspicuo patet: ibique colligitur, quia ob oculorum frigidius temperamentum, eorum nutrimentum non ita bene coquitur, quin ex uvea tunica exhalent subinde pauci crassiusculi vapores, qui in interstitio inter crystallinum humorem, foramini uveae incumbentes, & corneam tunicam, ab aëre externi fri-

gore in humorem crassiusculum condensati, sistuntur, & humoris aëre admiscuntur, ac crassiusculis viscidisque particulis eidem innascuntur.

II. Humor hic cum in principio paucior ac tenuior esset, radiorum quidem ingressum ad crystallinum humorem non prorsus impedit, sed crassioribus suis particulis hic illic impedimento fuit, ut omnes radii non ingrederentur, atque hinc æger in principio putavit pulvisculos, paleas ac culices ante oculos volitare, quae tamen non fuere nisi crassiusculae dicti humoris particulae: aëreo humori ante crystallinum innatantes. Postea verò ubi paulatim copiosior & aequaliter crassior



crassior evasit, quasi per densiorem nebulam vidit, sicque pro incremento istius crassitiei visus paulatim magis magisque obscuratus est.

IV. Difficilis erit hujus mali curatio, quia humor ille pupillam contegens nunc valde incrustatus est; & medicamentis non facile discutietur, unde metuendum ne in pelliculam concreascit, & omnimodam cæcitatem inducat. Aliqua tamen sanationis spes apparere videtur, quia ad absolutam cæcitatem nondum est devenit; & oculis digito compressis, suffusio aliquantum loco cedit, neque firmata est.

V. In curatione primò corpus aliquoties purgandum est cum pilulis lucis, aureis, vel cochiis, electuario diaphanico, hiera picra, diacarthamo, vel haustu aliquo phlegmagogo, ex agarico, turbith, jalappa, sena, aliisque similibus composito.

VI. Deinde ad humorum frigidorum discussionem bis in septimana promovendi erunt sudores, cum theriaca, mithridatio, decocto salis parillæ, chynæ, & sassefras. Intermediis diebus convenient decocta cephalica ex majorana, rosmarino, euphrasia, fœniculo, betonica, rutha, & similibus confecta: ut & condita cephalica ex conserva euphrasie, flor. salviæ, betonicæ, anthos, &c.

VII. Ad capitis corroborationem cucupha ex cephalicis calefacientibus vertici imponenda est. Capitis humores excrementitii etiam ab oculis divertendi, & ad alias vias deducendi sunt; quod commodè fiet per vesicatoria post aures sæpe applicata, vel per fonticulum in brachio aut cervice excitatum, qui diu apertus servandus est.

VIII. His præmissis, ad topica ipsi oculo

adhibenda deveniendum, ac primo talis decoctio paranda.

Rec. *radicum raphani unc. ij.*

*valeriana unc. j.*

*herb. rutha, fœniculi, euphrasie,*

*levistici, majorana,*

*fol. lauri, ana m. j.*

*flor. chamomilla m. ij.*

*sem. fœniculi, carui, ana drach. ij.*

*aqua q. s. fiat s. art.*

*decoctio ad lib. j. s.*

Inter coquendum recipiat æger in oculos decocti vaporem: postea ipso decocto tepido oculos cum molli spongia diu multumque foveat, in ejusque usu per duas tresve septimanas procedat.

IX. Postea hoc collyrium in oculos instilletur.

Rec. *succi chelidoniae majoris, rutha, fœniculi,*

*aquæ mellis, ana unc. s.*

*misce fiat collyrium.*

Hoc cum aliquamdiu usus fuerit, fortius reddetur, addendo *fellis perdicis & lucii piscis ana drach. j.* & postmodum *ana drach. j. s.*

X. In diæta sit aer ad calidum vergens, non valde lucidus. Cibi & potus sint modice calefacientes, attenuantes, & discutientes, vitenturque talia quæ caput vaporibus replent. In somno & corporis motu fervetur mediocritas. Excretiones naturales bene procedant, & fugiantur animi pathemata.

XI. Si, his omnibus non juvantibus, absoluta tamen cæcitas fiat, ad chirurgiam deveniendum, & suffusio acu à pupilla removenda est.

## HISTORIA.

### De Suggillatione Oculorum.

**J**Uveni plethorico in sphæristerio ludenti per infortunium pila inflicta fuit in oculum sinistrum. Hinc ipsi oculus adeo doluit, ut oculum per totum diem aperire non potuerit. Postridie dolore pene cessante, magna sanguinea rubedo per totum oculi album conspecta est, sine ulla inflammatione; & palpebræ quoque simili rubedine infectæ visæ sunt. Attamen nullo modo visus immutatus aut oblatus est.

I. **H**ujus ægri affectio, oculum occupans, *Suggillatio* dicitur, *estque sanguinis extra vasa in oculorum tunicas & palpebras effusio.*

II. Sanguis hic imprimis profluxit è minimis vasculis tunice adnatæ & palpebrarum, ictu pilæ disruptis & apertis. Corneam autem tunicam illasam esse patet ex visu, qui nullo modo immutatus est: nam si in illam quoque sanguis effluxisset, præcipuè anteriore parte, objecta visibilia rubro colore ægro offerrentur.

III. Affectus hic periculo vacat, si modo remedia convenientia tempestive adhibeantur, antequam sanguis extravasatus putrescat & inflammetur, tunc enim ophthalmiam aliudve gravius malum induceret.

IV. Primo igitur corpus purgandum, ac vena brachii secanda. Deinde lac muliebre recens multum in oculum instillandum, vel sanguis è pipionum vivorum pennis in oculum exprimensus est, hicque focus oculo frequenter adhibendus.

E 2

Rec.

Rec. foliorum salicis, plantaginis,  
 flor. chamomilla, meliloti, ana m. j.  
 coquantur  
 in aqua q. s. ad lib. l.  
 adde colatura aquae rosaceae unc. j. l.  
 misceantur pro fomento.

V. Postridie, cum major sanguinis extra vasa  
 effluxus non metuetur, fomentum sit solum dis-  
 cutiens:

Rec. herb. feniculi, euphrasia, betonica,  
 chelidonia majoris,  
 flor. chamomilla, meliloti, ana m. j.  
 sem. sanguinei unc. l.  
 sem. anisi, feniculi, ana drach. j. l.  
 aqua q. s. coquantur ad lib. j.  
 sit fomentum, cum spongia molli adhibendum.  
 Post fotum inungatur unguentum rosaceum cum  
 pauxillo olei ceræ.

## HISTORIA. XIX.

### De Cæcitate.

**V** Ir quadragenarius & fortis, crapulæ nimis addictus, cum per aliquot tem-  
 pus de levi aliqua vertigine cum molesta gravedine conquestus fuisset, tan-  
 dem ipsi visus bidui spatio adeo imminutus est, ut nihil prorsus videre,  
 imò ne lucem quidem percipere amplius potuerit; & exinde omnino cæ-  
 cus remanserit. Oculi tamen bene sese habere videntur, in iis enim nihil mali,  
 nec decoloratio, nec suffusio, nec aliud quid præter naturam apparet. Æger qui-  
 dem à crapulis per aliquot tempus abstinuit, sed remanet cæcitas. A vertigine au-  
 tem & gravedine maxima ex parte liberatus est. Reliquo alioqui corpore medio-  
 criter bene valet.

I. **A**ffectio nostri ægri est cæcitas seu abo-  
 litio visio.

II. Hujus mali causa antecedens  
 est pituita in cerebri ventriculis collecta, quæ  
 inde ad nervos opticos defluens, eosque ob-  
 struens, atque sic spirituum animalium ad ocu-  
 los influxum, & objectorum visibilibus per-  
 ceptionem impediens, causam continentem con-  
 stituit.

III. Collecta autem fuit in cerebro ex cru-  
 dis vaporibus & humoribus à nimia crapula ge-  
 nitis, & ad caput delatis; ibique ob partis fri-  
 gidiorem naturam nec satis coctis, nec dissipatis,  
 sed magis incrassatis.

IV. Ab iisdem crudioribus humoribus per  
 arterias carotides ad plexum choroidem delatis,  
 ejusque angustissimos meatus hic illic aliquantulum  
 obstruentibus, primò vorticosus spirituum  
 transitus factus, ac vertigo generata est. Cui  
 accessit maxima gravedo, à crassis viscosisque  
 humoribus, quos natura per os cribriforme eva-  
 cuare nitebatur. Verum cum illi ob copiam &  
 crassitiem non satis cito evacuari potuerint, pars  
 eorum ad nervos opticos decubuit, eosque ob-  
 struxit.

V. Oculi interea bene se habent, quia nulla  
 in iis est interperies aut prava conformatio; nec  
 visus abolutus est propter oculos male dispositos,  
 sed propter defectum spirituum animalium, fa-  
 ctum ab obstructione viarum per quas ad ocu-  
 lum defluere debent, scilicet nervorum opti-  
 corum.

VI. Hi nervi tantum in suo principio ob-  
 structi sunt à dicto pituitoso humore, qui in

principii medullæ latioribus poris se aliquanta-  
 lum insinuavit: credibile tamen non est illum  
 humorem ulterius nervos ingressum esse, cum ob  
 ejus crassitiem & pororum in nervis angustiam  
 id fieri vix possit.

VII. A vertigine & gravedine postmodum  
 maxima ex parte liberatus est æger, quia destitit  
 à crapulis & consuetis potationibus: unde crudi-  
 tates in valido corpore magis magisque excoctæ  
 sunt, sicque imminuta est causa antecedens, quæ  
 dictorum affectuum continentium causam fove-  
 bat, atque hinc etiam à natura paulatim consump-  
 ta est continens.

VIII. Remansit tamen cæcitas, quia humor  
 crudus nervorum poris infixus, tam ratione pro-  
 pria crassitiei & viscositatis, quam ratione den-  
 sitatis & angustiae pororum in nervis, neque ex-  
 cuti, neque consumi potuit: & licet ab antecede-  
 nte causa amplius non foveatur, tamen ratione  
 sui, & partis cui inhaeret, ibi remanere, & con-  
 tinuam illam obstructionem facere potest.

IX. Hæc cæcitas curatu difficilis erit, quod  
 humor nervis opticis impactus non facile discuti-  
 atur. Quia tamen malum recens est, aliquam  
 sanationis spem exhibet, si modo convenientia  
 remedia quamprimum adhibeantur.

X. In curatione primò corpus purgandum his  
 pilulis.

Rec. masse pilularum lucis,  
 coctiarum, ana drach. l.  
 cum pauxillo syrupi de stachade,  
 fiant pilula novem.

Quarum loco etiam dari potest drach. j. pul-  
 veris diatrybi cum rheo.

XI. Quia

XI. Quia sanguis in hoc ægro redundat, posttridie à purgatione aliquantum sanguinis detrahendum. Quo facto, post biduum vel triduum rursus est purgandum.

XII. Postea bibat æger ter de die haustum hujus apozematis.

Rec. radic. acori, valeriana. fœniculi, helenii, ana unc. f.  
herb. betonica, euphrasia  
serpillii, majorana,  
rosmarini, fol. lauri, ana m. j.  
florum chamomilla, stachados, ana m. f.  
sem. fœniculi, carui, ana drach. ij.  
bacc. juniperi unc. f.  
passularum mundat. unc. ij.  
aqua q. s. coquantur.

f. art. & fiat apozema ad lib. j. f.

Hoc absumpto, illud ipsum apozema fiat purgans, addendo.

folior. sena mund. drach. j. f.  
rhabarbari opt. agrici albiss. ana drach. ij.  
sem. anisi drach. iij.  
cinnamomi drach. j.

Tunc æger ex eo tantum semel de die haustum sumat.

XIII. Corpore satis purgato, & sanguine convenienter extracto, hoc errhinum sæpe in nares attrahat, ut pituita in cerebro contenta evacuari possit.

Rec. succi majorana, fœniculi, ana unc. f.  
beta drach. j. f.  
miscantur pro errhino.

XIV. Ad diversionem & simul revulsionem cucurbitulæ dorso & scapulis, cum & sine scarificatione apponendæ: vesicatoria etiam post aures applicanda: vel, quod efficacius erit, cervici setaceum adhibendum, aut foniculus in ea excitandus.

XV. Ad dissipationem reliquiarum in cerebro, & imprimis in nervis opticis contentarum, & capitis corroboracionem, fiat sæpe oculorum, frontis, verticis. & temporum fomentatio cum hoc decocto.

Rec. herb. fœniculi, majorana, ruta,  
betonica, rosmarini,  
euphrasia, florum chamomilla  
meliloti, stachados, ana m. j.  
sem. anisi, carui, levistici. ana drach. ij.  
aqua q. s. coquantur ad lib. ij.  
pro fomento.

XVI. Post fotum imponatur capiti cucupha ex cephalicis calefacientibus & attenuantibus confuta. In aures quoque cum petiis ex bombace immittatur gutta una aut altera olei fœniculi.

XVII. His peractis, in ipsos oculos etiam instillanda talia, quorum incidens & attenuans vis usque ad nervum opticum penetrare potest, quale est hoc collyrium:

Rec. succi fœniculi unc. j.  
chelidonia, ruta, ana unc. f.  
miscantur.

Illud postea acrius fiet, addendo succi raphani sylvestris drach. iij.

XVIII. In victu sit aer modice calidus. Cibi sint boni succi & facili digestionis, conditi cum majorana, fœniculo, betonica, rosmarino, euphrasia, semine fœniculi, anisi, aliisque similibus: abstinendo ab alliis, capis, synapi, aliisve quæ caput replent. Potus sit cerevisia mediocris, bene defœcata, & vinum tenue: fugienda vina omnia generosa, & quilibet potus fumosus; nec mîpus repletio, tam in cibis, quam in potu. Somnus & exercitia sint mediocria. Alvus bene respondeat, & fugiantur animi pathemata.

## HISTORIA XX.

### De Gravi auditu & aurium tinnitu.

**M**ulier 36 annorum, temperamento pituitoso prædita, præterita hyeme catharrhis subinde laboravit, à quibus tamen circa principium mensis Februarii prorsus immunis evasit, sed tunc per paucos dies de leviori gravativo capitis dolore conquesta fuit, qui brevi evanuit, subsequente magno aurium tinnitu, cum tanta auditus gravitate, ut vix altos clamores audire posset, quæ auditus gravitas cum tinnitu jam per tres, menses continuos remansit. Reliquo aliqui corpore bene valet, & menstrua statim periodis satis fluunt.

**A**fficitur in hac ægra instrumentum auditus secundum partem interiorem.

II. Affectus duplex est: *Auditus gravitas*, & *Aurium tinnitus*. Illa est, auditus imminutus ac difficilis, quo non nisi magni soni ab objectis externis moti audiuntur, leves vero non percipiuntur. Hæc est, sonitus molestus inter ipsas aures,

à nullo externo objecto excitatus.

III. Gravis auditus causa est humor pituitosus versus utriusque auris interiora decumbens, & partim nervum acusticum compressione angustando, sufficientem spirituum animalium influxum ad auris interiora prohibens: partim tympani liberum motum impediens. Hinc enim fit ut

leves soni tympanum impeditum & inclusum aerem congenitum vix moveant, isque ex illis motus ob spirituum paucitatem non percipiat, nec sensorio communi communicetur: fortes verò soni tympanum & inclusum aerem fortius quidem commoveant, sed motus tamen, ob spirituum paucitatem & nervi acustici angustiam, tantum leviter sensorio communi communicatus percipiat.

IV. Tinnitus seu sibilus aurium fit à spiritibus vitalibus arteriolas aurium interiores transeuntibus, atque motu suo proxime vicinum, auri interiori inclusum, aerem congenitum simul etiam moventibus; cujus motus cum ob locum continentem à pituita, quæ versus aurium interiora decubuit, angustatum, libere fieri nequeat, hinc dictus aer commotus continuo in tympanum impingit, ab eoque percussus, in forma levis sibilus seu tinnitus sensorio communi offertur.

V. Per tres circiter menses perdurarunt hi affectus, partim quia à pituitoso totius corporis temperamento fovetur causa proxima: partim quia pituita illa in parte affecta hærens ob crassitiam & frigiditatem ægrè dissipatur.

VI. Licet hi affectus per se non magnum vitæ periculum minentur, attamen metuendum ne ingravescentes, tandem in absolutam & incurabilem surditatem definant. Nam pituitosus humor, qui ad auditus organum decubuit, paulatim augeri poterit, & dissipatis tenuioribus partibus adeo incrassescere, ut postea nullis remediis attenuari & rursus discuti queat. Si tamen curatio quam primum instituatur, spes est illum dissipatum iri posse, quia paucus est, ut ex eo liquet, quod nullus adsit dolor tensivus nec auditus omnino perierit.

VII. Corpus igitur singulis septimanis semel aut bis purgetur cum pilulis cochiis vel aureis, pulvere diaturbith, electuario hiera aut diaphanico, vel infusione ex agarico, jalappa, aliisque phlegmagogis.

VIII. Ad totius corporis pituitam imminuendam, convenient decocta falsæparillæ, sassefras, & guajaci, quibus cephalica calida sub finem decoctionis adjicienda. Humores verò in cerebri ventriculis contenti evacuabuntur masticatoriis, errhinis & sternutatoriis. Deinde ad capitis corroborationem præscribenda erunt apozemata & condita cephalica modice calefacientia.

IX. Ad dissipandas reliquias in capite & parte affecta residuas, conveniet fomentum ex cephalicis calidis ac discutientibus (betonica, rosmarino, majorana, salvia, calamenta, thymo, chamemelo, &c.) confectum, & cum magna spongia, vel panno laneo sæpius calide capiti admotum: Post cuius usum capilli mappis calidis sunt exsiccandi, & caput contègendum cucupha ex cephalicis calefacientibus consuta.

X. Postea ad incidendos, attenuandos ac diffi-

pandos pituitosos humores, in auditus organo contentos præparabitur huiusmodi decoctum.

Rec. rad. raphani sylvest. unc. iij.

herb. thymi, betonica, hyssopi, majorana, rosmarini, serpilli, fol. lauri.

flor. chamomill. meliloti, ana m. j.

sem. cumini, carui, levistici,

fanic. ana unc. f.

aqua q. s. fiat s. art. decoctio.

Inter coquendum, per infundibuli ollæ impositi tubulum vapor calidus modo in unam, modo in alteram aurem admittatur, ac postea cum spongiis decocto immergis aures fomententur. Post fomentationem verò cum petiis exbom-bace immittantur in aures duæ guttulæ olei anisi, fæniculi, aut carui.

XI. Plurimum etiam proderit hoc cataplasma, inter duo lintheamina utrique auri nocturnis temporibus calide impositum.

Rec. herb. majorana, salvia.

flor. chamomilla, mililoti, ana m. j.

sem. nasturtii, cumini, fanic, ana drach. j. f.

pulveriscentur: pulveri adde,

bulbos coëparum sub cineribus assatos no. ij.

rapam assatam mediocrem no. j.

farina sem. fenugraci unc. j.

aqua q. s. coquantur paulisper, & addendo

olei anethini, amygdalarum

amararum, ana unc. j.

fiat. S. art: cataplasma.

XII. De die poterit loco cataplasmatis utrique auri calide admoveri talis sacculus siccus.

Rec. herb. majorana m. j. rosmarini

flor. chamomilla ana m. f.

sem. cumini, fæniculi, carui,

levistici, ana scrup. ij.

ex his concisis & grosso modo contusis, fiant s. art. in serico duo sacculi interfusi.

XIII. Si horum remediorum usus aliquamdiu continuatus manifestum levamen non inducat, multum proderit fonticulos in cervice & brachiis excitare, ut pituitosa materia versus aures decumbere solita, per alias vias deduci et evacuari possit.

XIV. In victu sit aer modice calidus & vitetur turbulentus ac ventosus, imprimis aquiloneus. Cibi sint boni succi & facili digestionis, conditi cum majorana, foliis lauri, serpillio, rosmarino, betonica, seminibus carminativis, nuce moscata, & similibus. Potus sit vinum tenue, & cerevisia mediocris notæ ac bene defæcata. Caveat sibi ægra ab omnibus iis quæ caput replent, ut raphano, synapi, allio, coëpis, vino generoso nimia quantitate sumpto, spiritu vini, &c. Etiam à repletionem, tam in cibo, quam in potu. Somnus non sit nimius, & corpus mediocriter exerceatur. Alvus si sponte quotidie non respondeat, arte laxa servetur. Fugiantur vehementiora animi pathemata.

## HISTORIA. XXI.

## De Narium Hæmorrhagia, Gravedine &amp; Odoratu Perdito.

**V**ir quadragenarius mediocriter fortis & multo sanguine abundans, potui interdum nimis indulgens, cum catarrhis acribus & falsis partim ad nares, partim ad fauces & pulmones delabentibus aliquamdiu infestatus fuisset, hincque valide tussisset, tandem in vehementiori tussi sanguis ipsi è naribus profiliit, & per aliquot horas satis largiter effluxit. Eo subsistente, mox Remediis ad tussim & catharrhum adhibitis, tussis intra biduum omnino cessavit. Sed tamen cessante tussi, illud sanguinis effluviū per intervalla revertitur (imprimis si æger corpus paulo validius commoveat) & copiosum est, cum vitæ periculo.

**I.** **H**ic affectus, qui per se satis notus existit, est narium hæmorrhagiâ.

**II.** Causa antecedens duplex est, 1. Sanguinis redundantia. 2. Humor acris in capite collectus.

**III.** Sanguis in toto corpore redundans, à causa procatactica [scilicet valida tussi] cum impetu magnâ copiâ sursum impulsus, venasque & arterias narium distendens atque aperiens, ratione sui causa continens evasit.

**IV.** Sanguis autem à tussi magna copia sursum impulsus fuit, quia ob validam contractionem musculorum thoracis & abdominis, quæ in tussi fit, compressus & angustatus est arteriæ aortæ truncus deorsum descendens, ita ut à corde multo minus sanguinis per illum depelli potuerit, qui proinde per dictæ arteriæ trunci partem sursum ascendentem versus caput multo majore copia impulsus fuit, sicque omnes capitis arterias & venas distendit.

**V.** Ab illa autem copia distendente in naribus facilius quam in aliis capitis partibus aliqua vascula reserata & aperta sunt, quia illic sita sunt in parte humida ac molli, & tenella tantum pellicula in veltiuntur, quæ facile dehiscit & dirumpitur.

**VI.** Quia vero acres & falsi catarrhi præceserunt, hinc certum est, non tantum ob nimiam distensionem à copia sanguinis inductam, verum etiam propter erosionem, ab acri humore versus nares delapso factam, vascula aliqua in naribus aperta fuisse. Quod inde liquet, quia si sola distensione aperta essent, postea brevi tempore [imprimis cessante tussi] rursus satis firmiter consolidata fuissent, nec toties rediisset illa hæmorrhagiâ, quæ nunc sæpe recurrit, quia solutio erosionis facta tam cito & firmiter consolidari nequit, sed à quolibet impulsu mox iterum dissolvitur.

**VII.** Si æger se paulo validius commoveat deambulatione, aliove exercitio, mox redit hæmorrhagiâ, quia ab illo corporis motu incalcescit

& rapidius movetur sanguis, qui hac de causa paulo copiosior & calidior ad nares deveniens, à debilibus vasorum extremitatibus, nondum satis firmiter consolidatis, contineri nequit; hinc de novo solutione facta foras erumpit.

**VII.** Hæc crebro recurrens hæmorrhagiâ periculosa est, partim quia erosa vasa non ita facile consolidantur: partim quia metuendum est ne à copiosi sanguinis effluxu, vel æger aliquando in syncopen incidat, sicque moriatur; vel tandem nimis refrigeretur & debilitetur hepar, hincque cachexia vel hydrops sequatur.

**IX.** In curatione venæsectio quam primum instituenda in brachio dextro, ac paulo post in sinistro, & sanguis mediocris quantitate extrahendus, habita tamen virium ratione. Alvus vel rhubarbaro cum tamarindis exhibito, vel clistere in jecto subducenda.

**X.** Durante hæmorrhagiâ, aqua frigida, vel oxycratum actu frigidum cervicis & testibus admovendum, ac cucurbitulæ cum multa flamma cruribus & pedibus, eum & sine scarificatione, imponendæ.

**XI.** Fronti cum stupa alligetur hæc mixtura:

Rec. boli arm. terra sigillata, sanguinis draconis, coralli rubri, ana drach. j.  
farina volatilis drach. ij.  
albumen anis ovi, aceti fortis parum, misceantur.

**XII.** In nares infletur hic pulvis:

Rec. trochiscorum de terra sigillata, lapidis hæmatitis, ana drach. j.  
thuris, coralli rub.  
sang. draconis, ana scrup. j.  
fiat pulvis.

Vel petiæ oblongæ albumine ovi madefactæ hoc pulvere obducantur, sicque in nares immittantur. Vel misceatur idem pulvis cum albumine ovi in forma unguenti, quo petiæ istæ inungantur; quæ diu in naribus detinendæ sunt.

**XIII.** Simplicia etiam in nares immitti possunt,

ut equisetum viride recens contusum, pimpinella vel plantago contusa, stercus porcinum vel asininum, aliaque similia, quæ sæpe plurimum profuisse docuit usus.

XIV. Non negligenda etiam ea quæ ab ocula qualitate profunt, in eumq; finem tale amuletum de collo suspendatur:

Rec. pulveris busonis exsiccati drach. ij.

lapidis hematitis drach. j. s.

trochiscorum de terra sigillata,

musci cranii humani ana drach. j.

coralli rubri drach. s.

tela araneatum scrup. j.

fiat pulvis, quicum albumine ovi aut mucagine tragacantha redigatur in pastam, è qua formetur placentula exsiccanda, & in serico de collo suspendenda.

XV. Interea dum hæc fiunt, exhibeatur aliquoties de die haustus hujus decocti:

Rec. radic. tormentilla, consolida majoris, bistorta, ana drach. vj.

herb. polygoni, pimpinella, plantaginis,

bursa pastoris, sanicula, portulaca, ana m. j.

rosarum rubr. m. s.

sem. papaveris albi drach. v.

sem. cydoniorum, lactuca ana drach. i. s.

nucum cypressi drach. ij.

passularum cum toto unc. ij.

aqua q. s. coquantur s. art.

fiat apozema ad lib. j. s.

cui admisce syrupi cydoniorum, granatorum

acid. ana unc. j. s.

XVI. Per intervalla detur particula hujus conditi:

Rec. trochiscor. de terra sigillata scrup. ij.

myra cydoniorum, conf. rosarum rubr.

ana drach. vj.

syrupi papaveris rheados q. s.

misce, fiat conditum.

XVII. Si his omnibus adhibitis non cesset hæmorrhagia, utrique hypochondrio magna cucurbitula cum multa flamma imponatur sine scarificatione; & exhibeantur massæ pilularum derynoglossa gr. xiv in tres pilulas redacta. Vel detur hoc amygdalatum.

Rec. amygdalarum dulc. depilat. unc. j.

sem. 4. frigid. maj. ana drach. j.

sem. papaveris albi drach. iij.

decocti bordei q. s. fiat s. art. emulsi ad lib. s.

cui admisce syrupi de papavere drach. j. s.

sacchari q. s. misceantur, pra

duabus dosibus.

XVIII. In diæta sit aer frigidus & ficcus, non valde lucidus. Cibi sint incrassantes & refrigerantes. Potus sit pitifana vel cerevisia tenuis. Abstineat æger ab exercitiis, nec corpus multum contegat, nec ad ignem accedat vinum etiam evitet, aliaque omnia quæ corpus & sanguinem excalefacere possunt, nisi forte propter lypothymiam aliquantum vini rubelli concedere cogat necessitas, Somnus sit longus. Alvus facilis & lubrica sit, natura vel arte, & fugiantur animi pathemata.

## HISTORIA.

### De Gravedine & Odoratu perduto.

**V**ir generosus triginta annorum, animi gratia pulverem tabaci naribus subinde attrahere, ab eoque sternutare per aliquod tempus consueverat. Tandem gravedine correptus, tamen persistit in dicti pulveris usu, quem ter quaterve aut pluries de die sumebat; unde multos quidem humores pituitosos per nares & palatum excrevit, sed interim adeo adaucta est gravedo, ut tandem odoratu prorsus sit privatus, nullos omnino odores percipiens. Ad hæc paucissimus nunc, & sæpe nullus mucus per sternutationes excernitur.

I. **H**uic ægro periit odoratus propter gravedinem, quæ est, frigida pituitosaque distillatio è cerebri ventriculis (raro è partibus circum cerebrum) in os ethmoides ejusque membranas incidens.

II. Hæc pituitosa materia, quæ antea in hujus ægri cerebro attenuari, & per ejus, ut & meningum ac cranii poros evaporare ac discuti, pauca vero quantitate (quæ per os ethmoides facile & sponte evacuari poterat) in cerebri ventriculis colligi solebat, propter creberrimas longo tempore excitatas sternutationes, & membranarum cerebri contractiones, hincque pororum angustationes & vaporum retentiones, magna copia in ventriculis cumulata, & continuo

ad os ethmoides depulsa fuit: cujus minima foraminula ob crassitien commodè transire nequens, illa tandem ita obstruxit, ut vix paucissimi amplius nunc transire possint, & odores etiam ad interiora narium pervenire nequeant, unde odoratus periit.

III. Quia hæc gravedo, odoratum impediens, diu perduravit, non facile sanabitur, nisi quamprimum remedia adhibeantur.

IV. Præmissa corporis evacuatione, imprimis capitis ratio habenda, idque cephalicis calefacientibus, in forma apozematum, conditorum, pulverum, &c. corroborandum, ut vapores eo venientes melius attenuare & discutere possit.

V. Ad

V. Ad pororum apertionem convenient capitis frictiones, ut & fomentationes cum decoctis cephalicis calidis & aperientibus factæ. Post quas, exsiccatis capillis, siccum capitium ex iisdem cephalicis consutum, capiti imponendum.

VI. Naribus obijciantur talia, quæ crassos humores attenuandi & incidendi vim habent: ut camphora, acetum scylliticum, radix raphani sylvestris contusa, aliaque similia.

VII. In horum usu aliquamdiu continuandum. Quæ si non profint, fonticulus in cervice excitatus plurimum juvabit.

VIII. In victu condiantur cibi & potus cum cephalicis calefacientibus, vitando nimiam repletionem, Vivat æger in aëre modice calido. In exercitiis & somno mediocritas, in alvo laxitas servetur. Animus ad hilaritatem sit compositus.

## HISTORIA XXII.

### De Odontalgia.

**A**dolescens 15 annorum, temperamento pituitoso præditus, cum à validiore exercitio excalesctus, nudo capite se aeri frigido & ventoso diutius exposuisset, in atrocissimum maxillæ sinistri lateris plurium dentium incidit dolorem, usque ad capitis interiora & superiora se extendentem, quo diu noctuque continuo infestatur. Nullus in gingivis aut maxilla exteriori tumor, nulla rubedo aut inflammatio apparet. Sentit è dente quodam molari excavato serosum, salsum, acrem, ac instar glaciei frigidum humorem in os exstillare.

**H**ujus ægri affectio Medicis *Odontalgia & Dentium dolor* appellatur.

II. Causa antecedens sunt humores pituitosi ac frigidi in toto corpore collecti, qui à majore calore exercitio conquisito in vapores attenuati, sicque copiosiores ad caput delati, à causa procatactica, scilicet frigore externo, non tantum ob pororum occlusionem intus detenti, verum etiam in liquorem serosum, & ob cruditatem salsum atque acrem rursus condensati sunt, qui cum ad vias excrementorum cerebri evacuationi dicatas non decurreret, sed ad sinistri lateris maxillares dentes deflueret, acerrimum ibi dolorem excitavit.

III. Frigidum, serosum, ac salsum esse hunc humorem ipse æger lingua satis percipit ex guttulis per excavatum dentem in os delabentibus.

IV. Dolor autem inde fit, quod nervulus cavitati cujusque dentis molaris insertus, una cum periostio, quo cavitas & radix investitur, ab acri humore eroditur, ab ejusque summo frigore [quod nervis maxime inimicum] male afficitur.

V. Dolor autem sursum usque ad capitis interiora extenditur, quia nervuli dentium cavitatibus inserti, sunt propagines tertii & sexti paris; iis igitur male affectis, non est mirum totos illos nervos usque ad capitis interiora dolere: imò credibile est hunc frigidum & acrem humorem per cranii foramina, ex quibus nervi illi egrediuntur, secundum nervorum istorum longitudinem usque ad dentes defluere; sicque non tantum eas particulas, quæ radicibus dentium inferuntur, sed integros nervos secundum longitudinem à cranio usque ad dentes à dicto

humore affigi.

VI. Nullus autem tumor est in exteriori maxilla, quia humor ille, unde fluxio procedit, non est copiosus, sed paucus & acer. Neque etiam tumor fit in gingivis, quia humor in iis non diu subsistit aut colligitur, sed paulatim per excavati dentis foramen in os effluit.

VII. Nulla etiam rubedo præter naturam aut inflammatio in gingivis aut maxilla apparet, quia licet humor defluens sit acer, est tamen actu & potentia frigidus, ita ut inflammatio aliave calida intemperies ab eo produci nequeat.

VIII. Atrox hic dolor, licet in parte sit ignobili, atque hinc minoris momenti esse videatur, tamen contemnendus non est, cum propter summam crudelitatem, & continuas quas inducit vigilas, humorumque & spirituum commotionem, facile delirium, convulsionem, periculosissimam, aut febrem validam inducere posset. Ac proinde illius curatio differenda non est.

IX. In curatione primo imminuenda est causa antecedens, mox continens, ac procatactica statim removenda, dolor sedandus, & caput corroborandum.

X. Corpus igitur purgetur cum pulveris diaturbith aut diacarthami drach. j. aut cum his pilulis:

Rec. *massa pilul. cochiarum,*  
*aurearum ana scrup. j.*  
*diagridii gr. iiij.*  
*cum pauxillo syrupi de stachade,*  
*fiant pil. vij.*

XI. Ad humoris in cerebri ventriculis contenti evacuationem hoc errhinum in nares attrahatur:

F

Rec.



## MEDICATIO APHTHIS HIST. XXIII.

Rec. sacci mercurialis,  
majorana ana unc. f. bera unc. j. l.  
misce pro erythino  
Hujus loco æger hoc pulvere sternutatoriis sub-  
inde uti poterit:  
Rec. rad. pyrethri, hellebori albi,  
fol. majorana ana scrup. j.  
piperis nigri gr. v.  
fiat pulvis.

XII. Ad capitis corroboracionem, pororum  
apercionem, & frigidi humoris dissipacionem,  
præparetur hoc capitium:

Rec. fol. rosmarini, majorana,  
salvia, ana m. l.  
flor. lavendula, meliloti,  
rosarum rubr. ana p. j.  
nucis moscata, gariophyllorum, ana scrup. ij.  
thuris, mastichis, ana drach. j.  
fiat pulvis grossus, & quo in tenui serico  
consuatur f. art. capitium.

XIII. Temporibus utrimque imponatur hoc  
emplastrum:

Rec. thuris, mastichis ana scrup. j.  
sagapeni, tacamacca ana scrup. j. l.  
misceantur, & extendantur in serico nigro:  
fiantque duo emplastra rotunda.

Interea etiam exhibeantur condita & apoze-  
mata cephalica, ex majorana, rosmarino, sal-  
via, betonica, conserva anthos, salvia, aliis-  
ve similibus confecta. Tabaci etiam fumus per  
fistulam communi modo sumptus non erit in-  
conveniens.

XIV. Eger os sæpe colluat hoc decocto

calido:

Rec. radic. oxylapathi unc. j.  
paonia matis unc. f.  
herb. majorana, salvia, hyssopi, thymi,  
betonica, rosmarini, ana m. l.  
sem. fenic. anisi ana drach. ij.  
vini q. s. coquantur f. art. ad lib. j.  
pro collutione.

XV. Post collutionem denti excavato cum  
petia ex gossypio immittatur guttula una olei o-  
rigani, aut gariophyllorum. In summo dolore  
interdum etiam paucillum spiritus vini in ore ad  
dentes affectos detineatur, quod tamen non  
est sæpe faciendum, ne gingivæ inde lædantur.

XVI. Interea etiam ad humorum diversionem  
summa cum utilitate vesicatorium post aurem,  
atque in cervice applicabitur, & locus diu aper-  
tus servabitur.

XVII. His omnibus non juvantibus, in  
summa doloris atrocitate exhibeatur sub vespere  
pilula ex laudani opiat gr. ij, aut tres pi-  
lulae ex massa pilularum de cynoglossa gr. xij.  
aut dentur philonii romani scrup. ij. vel up.

XVIII. In victu sit aer calidus & siccus,  
viteturque turbulentus, pluviosus, imprimis a-  
quiloniis. Cibi condiantur cum cephalicis ca-  
lescentibus; fugiantur autem omnia salsa, acia,  
acida, & ea quæ caput vaporibus replent, ut  
allium, porrum, raphanus, &c. Potus sit ce-  
revissa mediocris notæ, & vinum tenue. Som-  
nus longior. Exercitium mediocre: & alvus  
facilis sit.

## HISTORIA. XXIII.

### De Aphthis.

**M**ulier triginta annorum continua febre correpta est, cum magna anxietate, sine vehementi calore, sine magna siti, qua intra biduum vires admodum prostratæ sunt. Pulsus est parvus & inæqualis: urina instar urinæ hominis sani. De nullius partis excellenti dolore, sed de maxima totius corporis conqueritur debilitate, quæ tanta est ut in lecto erecta sedere nequeat. Quarta die in deglutiendo sentit aliquam difficultatem, ita ut potus non sine dolorosa molestia & impedimento per gulam & œsophagum descenderet. Eo tempore palatum, gingivæ, lingua, & fauces innumeris exiguis pustulis albicantibus obsideri comperta sunt. Gustus etiam adeo læsus est, ut assumentorum verum saporem vix percipiat.

I. **L**aborat hæc ægra febris maligna, ad quam accedunt Aphthæ, quæ sunt exulcerationes quadam in summa oris superficie, cum caliditate conjunctæ.

II. Causa antecedens sunt humores putridi, acres, maligni, in corpore contenti, qui à calore febrili attenuati, per arterias & occultos meatus ad os delati, in eoque exulcerationem hanc facientes, causam proximam constituerunt.

III. Has aphthas à maligno quodam putrido humore excitari, liquet ex febre putrida maligna præcedente vel adjuncta; cujus malignitas satis innotescit ex maxima anxietate & virium ægræ prostratione, cum tamen febris nullas manifestas tantæ debilitatis causas exhibere videatur. Humorem autem istum magna ex parte pituitosum esse, patet ex minori febris calore, & pustularum seu ulcusculorum albedine.

XI. Hic

IV. Hic humor à calore febrili attenuatus & acer ad os deveniens, ejus interiora (palatum, linguam, gingivas, fauces, &c.) magis quam alias partes per quas transit, exulceravit, quia tenui & molli tantum pellicula investuntur, quæ à rebus acribus, imprimis putridis, eo devenientibus & diutius ibi remanentibus, facillime exulcerari potest, cum aliæ partes firmiores hujusmodi corruptioni melius resistent.

V. Quia verò illa pellicula oris interiora investiens se per fauces & torum œsophagum extendit usque ad ventriculum, hinc etiam cum faucibus œsophagus similibus aphthis interius oblidetur, ut ex eo liquet, quia deglutitionis adest difficultas, & potus non sine dolore & impedimento ad ventriculum descendit.

VI. Gustus oblæsus est, quia pellicula oris interior, cui nervi gustatorii inferuntur, & qua mediante gustus fit, ab illis ulcusculis adeo oblidetur, ut objecta gustabilia ad eam integra pervenire, & ab ea percipi vix possint. Adde, quod lingua ab ulcusculis dolens, & jam pravis humoribus infecta, de saporibus assumptorum bene judicare nequeat.

VII. Hæ aphthæ sunt magis signum, quam causa periculi, indicant enim febrem malignam & valde periculosam, à cujus curatione earum curatio maxima ex parte dependet.

VIII. Corpore igitur expurgato, vena secta, aliisque febrì convenientibus remediis adhibitis, os sæpe colluat & gargariset ægra hac decoctione.

Rec. Hordei mundati, radic. bistortæ, tormentilla, ana unc. l.

glycyrrizæ rasa drach. iij.

herb. plantaginis, portulacæ, polygoni,

foliorum quercu, ana m. j.

flor. malvæ arboreæ, rosarum rub.

balaustrorum, ana m. l.

aqua q. s. fiat decoctio ad lib. j.

Adde syrupi diamori, dianuci, ana unc. j. s.

misceantur pro collutione.

IX. Post collutionem lambat ægra, totumque os interius oblinat hoc syrupo:

Rec. Syrupi cydoniorum, granatorum

acidor. de rosis siccis, ana unc. j.

misceantur.

X. Si dolor acrior evadat, ægra in ore detineat lac dulce, vel potius serum lactis, idque sæpius mutet. Deinde solum syrupum cydoniorum vel de rosis siccis lambendo assumat, imprimis cum aphthæ jam separantur.

XI. Victus sit refrigerans & malignæ putredini resistens. Cibi sint euchymi, eupepti & liquidi. Potus sit cerevisia tenuis aut ptisana. Alvus bene respondeat, & absint animi emotiones.

## HISTORIA II.

### De Aphthis.

**I**nfans duorum mensium, cum matri lac deficeret, nutrici commissus fuit, temperamento bilioso præditæ, sed alioqui bene valenti multoque sanguine & lacte abundanti. Huic cum per octiduum adfuisset, cepit lac coagulatum cum pituitosis & biliosis humoribus mixtum sæpius evomere, inquietius dormire, biliosa flava ac viridia multa per alvum dejicere. Tandem etiam os interius aphthis albicantibus undique oblitum est, ita ut jam propter dolorem hinc procedentem vix amplius sugere possit, licet mammam cum desiderio appetat & ore amplectatur. Interea tamen nulla manifesta febris accedit, nec pulsus quicquam immutatus est.

**L** Causa harum aphtharum est lac nutricis serosius, calidius & acrius, quod in debili ventriculo infantis non satis bene concoquitur, sed multa bilis inde generatur, è qua acres halitus sursum ad os ascendentes, tenellas totius oris interioris pelliculas exulcerant.

II. Bilem copiosam inde generari liquet ex bile flava & viridi, quæ copiosa per inferiora dejicitur.

III. Lac autem in ventriculo coagulatur ob acrimoniam bilis & cruditatem ibi genitarum. Coagulatum verò evomitur, quia natura illo, aliisque crudis humoribus gravata, & ab acrimonia irritata, molestiam illam per vomitum,

quantum potest, deponere nititur.

IV. Febris non adest, quia bilis illa putredinem nondum concepit, neque etiam ad venam cavam delata est, sed hætenus sursum deorsumque satis copiosa excernitur.

V. Infans vix amplius sugere potest, quia dolor, quem ex aphthis habet, lugendo exasperatur. Mammam tamen appetit, quia majorem oris calorem humiditate lactis lenire & extinguere desiderat.

VI. Hæ aphthæ quia recentes & sine febre sunt, neque malignam causam habent, facile sanabuntur, si remedia tempestive adhibeantur. Alioqui si differatur curatio, metuendum est, ab aucta, & tandem putrescente bile, non tan-

tum aphtharum profundiorum & periculosa exulcerationem, verum etiam alvi fluxum cum torminibus & febre graviore secuturum.

VII. In curatione ante omnia ratio habenda est nutritio, utpote quæ ob temperamentum biliosum lac acius generat, quam infantis ventriculus bene ferre aut digerere potest. Deinde ratio habenda est ipsius infantis.

VIII. Nutrix igitur semel atque iterum bene purganda est medicamento cholagogo. Deinde vena secanda; & apozema aliquod refrigerans, ex cichoreo, endivia, lactuca, boragine, acetosa, tamarindis, seminibus frig. maj. aliisque similibus, per aliquot dies exhibendum. Etiam puppa ex rhabarbari drach. iij. in pinta cerevisiæ tenuis suspendenda, de qua bis terve in septimana haustum bibet: hinc non tantum ipsa, sed etiam infans biliosa deiciet.

IX. Curandum ut cibus utatur boni succi, conditis cum hordeo mundato, endivia, lactuca, asparagis, pomis citriis, cerasis, fructu

ribes, &c. Abstineat ab alliis, cæpis, raphano, synapi, aromatibus, omnibusque multum calefacientibus; etiam à melle & saccharo copioso, aliisque quæ facile bilefcunt. Potus sit cerevisia tenuis, aut mediocris notæ: evitet vinum, spiritum vini, melicratum, omnesque potus fumosos & calidos, nec non iram, aliasque animi emotiones.

X. Infanti autem (cui vix quicquam exhiberi potest) sæpe in os ingeratur syrupus de moris & cydoniorum, vel de rosis siccis & granatorum acidorum, aliisque similis, quo totum os interius oblinendum est. Etiam cum coehleare subinde exhibenda pulicula liquida ac tenuis, ex decoctione passularum corinthiacarum ad repturam coctarum, cum pauxillo sacchari & micæ panis albi parata.

Si his remediis adhibitis tamen perdarent, aut in pejus vergant aphthæ, quamprimum mutanda est nutritio, & alia quærenda quæ naturæ infantis convenientior sit.

## HISTORIA XXIV.

### De Ranula.

**M**ulier triginta sex annorum, victu pituitam copiosam generante uti solita, conqueritur de maximo loquelæ impedimento, cum alioqui reliquo corpore mediocriter valere videatur. Sub ejus lingua tumor conspicitur mollis, laxis indolens, concolor cæteris sub lingua membranis, venis nigricantibus conspersus, ad linguæ vinculum in dextram sinistramque partem manifeste distinctus, utrimque avellanæ, vel circiter nucis moscatæ magnitudinem adæquans, atque ipsos dentes altitudine jam superans, & os replendo linguam ad palatum impellens, sicque non solum loquelæ, verum etiam deglutitionis impedimentum inferens. Tumor hic à ciccris magnitudine primo incipit, hinc indies majora incrementa sumpsit, ita ut spatio trium quatuorve septimanarum ad dictam magnitudinem increverit, & ægra non sine ratione metuat, ne per illius majus incrementum tandem suffocetur.

I. **M**Orbus, quo hæc ægra laborat, βαρεαχὴ Græcis, Latinis vero *Ranula* appellatur; vel quod posteriorem ranæ partem aliquo modo repræsentet; vel potius quod ægri non nisi coaxando instar ranarum loqui possint.

II. Est autem *ranula* tumor mollis & laxis, sub lingua collectus, vinculo linguæ in dextram sinistramque partem divisus.

III. Afficiuntur in hoc morbo extremitates ductuum salivalium, sub lingua latentium, quæ una cum linguæ membrana iis incumbente, à saliva seu muco crassiore distenduntur, hincque tantam magnitudinem conquirunt.

IV. Quod autem in hac ægra nunc magis quam aliis temporibus intumescant, fit, quia per alimenta refrigerantia, quibus longo tempore usa fuit, copiosa, crudior, & viscidior pituita

in corpore fuit generata, quæ ex parte ad salivales ductus decumbens, cum ob suam crassitiam non possit per poros glandularum raninarum consueto modo effluere, abundantior in iis accumulatur, easque nimia copia distendens, tumorem mollem efformat, in duas quasi vesiculas sibi invicem coherentes, & linguæ frenulo distinctas divisum.

V. Procul dubio, præter dictam pituitosam salivæ crassioris & viscidioris copiam, etiam ad hunc tumorem non parum fecit, quod istius ductuum vel glandularum extremi pori, propter externam aliquam causam, ut frigidam oris collationem, potus vel cibos astringentes, &c. fuerint obstructi, vel adeo angustati, ut crassior saliva transire non potuerit, atque ita concurrentibus duabus his causis, tumor sub lingua generatus fuerit.

VI. Mollis

VI. Mollis & latus est tumor, propter humoris contenti molliem. Indolens est, quia consistit in parte humida, cui propter paucissimos, quos recipit nervulos, sensus valde obtusus est. Concolor est vicinis partibus, quia non adest inflammatio, nec intus contentus humor eum alieno colore tingit. Brevis tempore multum ad-auctus est, quia mucus salivaris per hanc viam ordinariam continuè ad linguam fluit, cumque per poros ejus exonerationi dicatos effluere com-mode non possit, tumorem citò auget.

VII. Signis diagnosticis hic opus non est, cum affectus per se manifestus sit. Quantum ad prognosin, nondum multum periculi adest, sed quo citius tamen remedia adhibentur, eo facilius erit curatio, quæ alioqui, si differatur, incre-scente indies tumore, tandem suffocationis pe-riculum incurret patiens.

VIII. Ægra hæc quinta aut sexta quaque die purganda erit pilulis cochleis vel aureis, ele-ctuario diaphænico, hiera picra, diacarthamo, infusione agarici, aliove medicamento phlegma-gogo.

IX. Ad pituitæ copiam imminuendam, ejus-que generationem impediendam, exhibenda sunt intermediis diebus apozemata, ex radicibus be-lenii, acori, scæniculi, herb. calamentha, thy-mo, rosmarino, majorana, hyssopo, foliis lau-ri, seminibus carminativis, aliisque calefacienti-bus, ut & condita, & pulveres calefacientes visceraque corroborantes.

X. Interea dum hæc fiunt, topica adhibenda sunt, quibus viscosus salivaris humor incidi & attenuari, pori ductuum salivalium aperiri, sic-que tumor discuti possit.

XI. Ægra os sæpe colluat hoc decocto.

Rec. herb. hyssopi, calamenthae, majorana, flor. chamomilla, anam. j.

sem. anisi, fæniculi, ana drach. iij,  
vini albi q. s. coquantur. s. art. ad lib. j.  
adde colatura, syrupi de prassio,  
de hyssopo, ana drach. vj.  
miscantur pro collutione.

XII. Post collutionem ranulæ affricetur & imponatur hic pulvis.

Rec. hyssopi sicci, salis communis, ana drach. ij,  
calamentha, rad. belenii, ana drach. j.  
fiat pulvis.

XIII. Si his non discutiatur tumor, ad chirur-giam deveniendum & tumor lato vulnere trans-versim incidendus est, totaque viscida materia, in eo contenta, educenda, & os eluendum col-lutione antedicta, aliave abstergente, cui pau-xillum aluminis adjectum sit.

XIV. Si consolidato vulnere, de novo re-deat tumor (quod interdum fit) ubi ad aliquam magnitudinem rursus increvit, facta cruciali & superficiali incisione, sine læsione vesiculæ seu membranulæ interioris, superior ei incumbens pellicula ab ea separanda est, totaque vesicula ab utraque frenuli linguæ parte, denudanda, & quam profundissime fieri potest, excindenda est, atque deinde vulnus consolidandum. Quod si ægra hanc chirurgiam sic institui non permit-tat, alio modo, scilicet per cauterium potenti-ale, vel etiam actuale (hoc Paræus lib. 7. cap. 5. depinxit) dicta vesicula est absumenda. Neque metuendum est ori magnum incomodum futu-rum, si per hanc curationem ductuum salivalium transitus in perpetuum occludatur, nam expe-rientia docet, iis viis tali modo occlusis, adoris humectationem satis multum salivolæ pituitæ à faucibus aliisque salivalibus ductibus adfluere.

Dietâ instituaturn aliquantum calefaciens & at-tenuans, sicut in morbis pituitosis fieri solet.

**Q**Uandoquidem hic paradoxon, scilicet novam *Ranulæ* causam, aliamque partem affectam propono, quam alii Medici hætenus fecerunt, & *Ductuum salivalium* mentionem facio, quales sint illi ductus etiam breviter adscribere ne-cesse videtur.

Ductus hi antehac prorsus fuerunt incogniti, & tandem primo in Anglia nuper inventi à D. Warthono & Glissonio, atque præterita hyeme primo apud no-strates in theatro anatomico publice demonstrati à Clarissimo Viro D. Johanne ab Horn in Inclita Leydensi Academia Anatomæ & Chirurgiæ Professore ce-leberrimo.

Substantiam habent veris non multum absimilem, sed sæpe firmiorem. Nu-mero bini sunt, in homine tantæ latitudinis ut stylum mediocrem admittant: in canibus vero venam spermaticam vix adæquant.

Oriuntur lato principio ex magna & insigni glandula supra tendinem medium inter digastrici & Biventris muscoli carnes sita: Hinc oblique sursum delati, ad mediam circiter maxillam se abscondunt inter duas exiles glandulasibi fitas; quas ubi transierunt, recto ductu feruntur juxta nervum septimi paris (ad computum Vesalii) quem tandem decussatim transeunt, atque sic paulum versus anteriora, juxta linguæ frenulum, terminantur & aperiuntur in duas peculiare glandulas (has D. ab Horn *Raninas* & *hypoglossides* non male appellat) tenui & porosa membranula investitas, quæ sitæ sunt sub lingua, prope venas raninas, inter

carnem quæ linguam vicinis partibus connectit, & glandulas basi linguæ substratas. In brutis verò major est longitudo, propter maxillam longiorem, & oriuntur à peculiaribus glandulis sub parotidibus sitis.

Horum ductuum usus est, salivalem humiditatem in glandulas raninas continue effundere, quæ in iis, tanquam in spongia, continetur, & per latos poros membranæ eas integrentis paulatim in os eructatur, ad linguæ & oris humectationem; quam humiditatem, si insufflentur ductus, per ejus poros exire, oculis pater. Sciendum tamen omnem salivam per hanc viam non profluere, sed magnam partem è faucibus aliisque ductibus in os descendere.

## HISTORIA. XXV.

### *De Hydrocephalo.*

**P**uello unius & dimidii anni, per sex menses ablactato, cum à parentibus pauperioribus fere negligeretur, nec ei alimenta convenientia, sed lac presum crudum, fructus horarii crudi, aliaque similia darentur, & caput etiam hyberno tempore non satis tectum servaretur, caput in parte capillata & fronte, usque ad oculos cœpit intumescere; qui tumor spatio unius mensis in tantum adauctus est, ut fere ad virilis capitis magnitudinem excreverit: facies tamen non intumuit. Est autem tumor ille mollis & albicans, eique altè impressa digitorum vestigia inhærent. Puer interea mediocriter edit & bibit, non febricitat, sed somniculosus est, & totius corporis membra languide movet. Nares præter consuetudinem sicciore sunt, & saliva paucior ab ore profluit. Urina & liquidæ alvi dejectiones satis copiose procedunt.

**I.** **H**ujus pueri affectus Medicis *Hydrocephalus* appellatur, qui est tumor capitis, quo caput à serosi humoris collectione intumescit.

**II.** Hic serosus & pituitosus humor collectus est extra cranium, & latet sub cute, quod tactu percipitur, quia nulla ossis durities sentitur sed tantum mollis tumor.

**III.** Serosum, pituitosum & copiosum, esse humorem qui colligitur, patet ex colore cutis albicante, & quod altè impressa digitorum vestigia capiti inhæreant sine dolore.

**IV.** Causa antecedens hujus mali sunt humores frigidi & humidi in toto corpore, & imprimis in cerebro collecti, qui extra cranium elati, & sub cute condensati, causam continentem constituunt.

**V.** Humores hi generati sunt, tum ob prævium victum pituitam crudosque humores producentem, tum ob frigidam & humidam totius corporis constitutionem: quippe horum ratione viscerum coctiones debiliores evasere, unde multi pituitosi & serosi humores generati sunt: qui partim per urinas & alvi liquidas dejectiones evacuati, partim ad caput delati fuerunt, cumque per nares & palatum more solito non effluerint, à cerebri calore in crassos vapores attenuati, cranii poros & suturas transierunt, atque sub cute rursus condensati, ibidem constiterunt & collecti sunt.

**VI.** Per nares & palatum evacuati non sunt, quia sua crassitie ductus eo tendentes obstruxerunt. Sub cute autem collecti sunt, quia ab externo frigore ejus pori angustiores & humores ipsi densiores evaserunt, ita ut ob crassitiem per constrictos pores permeare non potuerint. Cumque quotidie novi humores ad priores accesserint, & nulli vel admodum pauci per poros dissipati fuerint, hinc factum quod caput spatio unius mensis in tantam magnitudinem intumuerit.

**VII.** Ager alimenta adhuc assumit, quia ventriculi appetitus à cruditatum saburra non multum impeditur, cum illa per copiosas urinas & liquidas alvi dejectiones satis evacuetur.

**VIII.** Non febricitat, quia humores non putrescunt, nec calor est nimius excessus aut malignitas.

**IX.** Somniculosus est ob frigidam & humidam cerebri intemperiem, cujus ratione non tantum nervi sensorii flaccidi, & ad spirituum animalium transitum, atque objectorum sensibilibus receptionem minus apti sunt, verum etiam pauciores spiritus animales generantur, cum à frigida humiditate angustiores seu strictiores factæ sint arteriolæ in plexu choroide, atque hinc pauciores spiritus vitales transmittantur, qui quandoquidem materia sunt à qua animales conficiuntur, sequitur si illa materia pauca sit, necessario quod inde generatur paucum esse debere. Hæc spirituum animalium paucitas etiam in causa est, quod ager totius

totius corporis membra languide moveat, cum enim dicti spiritus pauci ad partes & musculos influant, necessario motus animalis languidus est.

X. Alvus liquida est ob copiam serosorum & pituitosorum humorum, qui in corpore generantur, & magna parte ad intestina defluunt: quorum tenuior pars sanguini permixta, & in renibus ab eo separata, urinas quoque facit copiosas.

XI. Hic affectus admodum periculosus est; licet enim collectio feri sit extra cranium, atque hinc magnam sanationis spem promittere videatur, tamen periculo non vacat, cum capitis intemperies, totiusque corporis cachexia magna sit, serosus humor copiosus, & ætas ténella, quæ fortia remedia non fert. Quia tamen in re dubia alhuc spes apparet, curatio quamprimum est instituenda, antequam affectio pejor fiat.

In curatione serosus & pituitosus in toto corpore redundans humor, in primis ille qui in capite colligitur, quocunque modo clementer & vacuandus, & viscerum corroboracione ac intemperiei sublatione ejus copiosior generatio, & in capite collectio impedienda.

XIII. Primo cum cochleari exhibeatur syrapi de cichoreo laxativi unc. f. cum pulveris jalappæ gr. v. vel. vj. vel passulatum solutivum drach. v. vel vj. comedendæ dentur. Postea subinde exhibeatur pauxillum theriacæ veteris, & si fieri possit, sudor provocetur. Offeratur etiam ter quaterve de die pauxillum conservæ anthos, melissæ, aut florum salviæ.

His præmissis sequenti fomento tepido caput sæpe foveatur.

Rec. herb. betonicæ, rosmarini, origani, thymi, flor. chamomilla, meliloti, stachados, ana m. j. fol. lauri, m. f. sem. anisi, feniculi, cumini, ana drach. ij. vini albi q. s. coquantur ad lib. ij. pro fomento, cum magna spongia aut panno lano admovendo, diligenter cavendo ne refrigeretur.

XV. Postquam usu hujus fomenti tumor capitis maxima ex parte dissipatus est, ad ulteriorem intemperiei sublationem, inungatur caput mane & vesperti hoc unguento calido.

Rec. olei chamamelini, unguenti alabastrini, ana unc. j. olei nucis moscata expressi, scrup. iij. pulveris castorei, styracis cal.

benzoini, ana scrup. j. misce fiat unguentum.

XVI. Post inunctionem imponatur capitale capitium.

Rec. sol. rosmarini, majorana, flor. chamomilla, meliloti, ana m. j. benzoini, gariophyllorum, nucis moscata, ana scrup. j. f.

fat pulvis grossus, e quo in serico rubro conficiatur f. art. capitium intersutum.

Postea relicto etiam linimento, hoc solum capitium diu in capite gestare debet.

XVII. Interea etiam ad viscerum corroboracionem bis terve de die exhibeatur cochleare hujusmodi mixturæ.

Rec. aqua florum thie & liliorum, convallium, ana unc. ij. aqua cinnamomi drach. vj. syrapi de stachade unc. j. misceantur.

Vel hujus loco detur subinde pauxillum melicrati. Regioni ventriculi, hepatis & lienis hoc linimentum inungatur.

Rec. olei laurini, chamamelini, unguenti martiati, ana unc. f. olei nucis moscata expressi drach. j. f. misce fiat linimentum.

XVIII. Si hæc non profuerint, in capitis tribus quatuorve locis maxime tumidis lanceola perforatio exigua per cutem facienda est, non major quam in venæsectione fieri solet, ut per illa foraminula serum paulatim exstillare possit, quod mappis calidis impositis excipiendum est, usque dum fluere desinat: postea antedictum capitium capiti imponendum est.

XIX. In victu sit aer calidus & siccus. Cibi offerantur paulo sicciores quam ordinarie hujusmodi puellis exhiberi solent: ut panis bis coctus masticatus: ossa ex pane albo cum decocto passulatum, aut iustulo gallinæ humectata; & cinnamomi ac sacchari pauxillo conspersa. Pulticulæ etiam conficiantur ex farina tritici cum decocto passularum, usque aliquantulum vini addatur. Bibat æger subinde lac amygdalatum cum pauxillo aquæ cinnamomi. Abstinendum ab usu lactis pressi acidii, feri lactis, cerevisiæ tenuissimæ, fructuum horariorum, & pomorum, licet coctorum, Somnus sit mediocris, non nimis longus. Excreta naturalia si non procedant arte provocentur.

PRIMA-

*Primariorum Morborum Totius Thoracis*  
**MEDICATIONES,**  
*decem disputationibus*

A D

**HISTORIAS ÆGRORUM**  
*Propositæ.*

**HISTORIA I.**

*De Pleuritide.*

**I**Uvenis 24. annorum, cum in sphæristerio pilæ lusu admodum inca-  
 luisse, & valde sitiret, magnum haustum cerevisiæ frigidæ bibit.  
 Hinc paulo post sentit dolorem in thoracis latere sinistro, qui intra  
 semihoram adeo acutus evasit, ut non nisi summa cum molestia &  
 intolerabili dolore respirare potuerit. Accessit febris valida, cum tussicula sicca,  
 qua dolor plurimum exasperatur. Anxietas, nec non sitis magna est. Medi-  
 cus in principio, circiter quarta vel quinta ab adventu doloris hora, advocatur.

**I.** **A**fficiuntur in hoc ægro varæ partes, imprimis membrana pleura, muscu-  
 li mesopleurii, & cor, hincque re-  
 liquum corpus.

**II.** Morbus ipsum infestans *Pleuritis* dicitur, quæ est membrana pleura muscularumque mesopleu-  
 riorum inflammatio, punctorio lateris dolore, respirandi difficultate & continua febre comitata.

**III.** Quod ille morbus sit, patet ex ejusdem signo pathognomonico manifestissimo, scilicet acuto lateris dolore, cum respirandi difficultate & febre continua, cui etiam tussicula sicca acce-  
 dit. Peripneumoniam non esse docet præsentia doloris acuti, qui in illa non adest. Lienis tumo-  
 rem, inflammationem, aliumve dolorem non esse, liquet, tum ex doloris summo acumine, tum ex ejusdem situ supra diaphragma versus a-  
 xillas, & gravissimo respirationis impedimento.

**IV.** Antecedens hujus morbi causa fuit sangui-  
 nis copia in corpore contenta. Causa procatar-  
 ctica duplex fuit, magnum exercitium, & frigidæ  
 cerevisiæ potus. Causa continens est sanguis in

membrana pleura & musculis mesopleuriis nimia  
 copia coacervatus, inflammatus ac putrescens.

**V.** Ab exercitio intensius incaluit totum cor-  
 pus, unde pulsus cordis validus & creber, factus  
 est, quo sanguis ab eodem calore attenuatus per  
 arterias copiosus ad omnes partes impulsus est,  
 qui quousque ei liber per venas reditus concede-  
 batur, nihil molestiæ intulit. Sed cum ex repen-  
 tino actuali cerevisiæ & potus frigore sanguis in  
 pleura lateris sinistri venis aliquantum incrassare-  
 tur, & ipsæ venæ nonnihil constringerentur,  
 atque hinc sanguis non satis libere transiret, fa-  
 ctum est ut multo plus per arterias influxerit,  
 quam per dictas venas circulari seu transire po-  
 tuerit: & quia singulis pulsibus aliquid ibi reman-  
 sit quod venas non transiit, hinc per multos pul-  
 sus magna sanguinis accumulatio, hincque in-  
 signis ibi tumor in pleura excitatus est: & quia  
 singulæ sanguinis guttulæ à corde propulsæ suum  
 habent calorem, hinc cum incremento sanguinis  
 eo loco increvit calor & sic facta est inflamma-  
 tio, unde putredo sanguinis ibi conclusi processit.

Cujus



Cujus putrescentis sanguinis pars per venas intercostales ad cavam, hincque ad cor continue delata, febrem continuam excitavit, quæ symptomatrica est, ut pote non generata ex primaria putredine in vasis majoribus accensa, sed ex tali quæ è parte inflammata continue in vasa majora effunditur, sicque cordi communicatur.

VI. Cum in inspiratione necessario costæ dilatari debeant; & jam propter tumidam inflammationem, ac membranz pleuræ musculorumque mesopleuriorum tensionem ægre dilatari possint, hinc difficilis fit respiratio, quæ propterea maxime gravis existit, quod pleura acuto sensu prædita nullam ulteriorem tensionem ferat, & quia tamen respirandum est, cum violentia distenditur, sicque acutissimus dolor infertur: quem æger evitare studens, parvas facit inspirationes, quæ cum sanguinem in pulmone non satis refrigerent, ex ejus nimio calore magna cordis anxietas excitatur, nec non faucium totiusque oris siccitas, ingentem sitim producens.

VII. Acres vapores ex inflammata parte exhalantes vicinum pulmonem etiam infestant, ejusque bronchia vellicando tussiculam siccam excitant.

VIII. Periculosissimus est hic morbus, tum propter affectum cor, & respirationem læsam, qua æger carere omnino nequit; tum propter gravia symptomata, & empyematis metum. Quia tamen medicus in principio advocatur, & tempestive convenientia remedia adhibere potest, magna sanationis spes est.

IX. Curatio à generoso, & in hoc casu primario remedio, scilicet venæ sectione, incipienda, atque statim in alterutro brachio vena secanda, & sanguis liberaliter educendus est. Qua venæ sectione si non levetur æger, eadem post horam unam aut alteram reiteranda est, atque deinde etiam, si necesse sit; tertio repetenda; habitatione virium, quarum tamen mediocris dejectione non extimescenda.

X. Interea alvus clystere nonnunquam subducenda.

Rec. decocti emollientis unc. x.

elect. diacatholici, diapruni solutivi, an. unc. j.

salis drach. j.

misce fiat clyster.

Vel rhabarbari drach. ij. infundantur in aqua hordei, eaque colatura, cum unc. j. syrupi de cichoreo cum rheo, aut rosati solutivi pro haustu exhibeatur. A catarticiis fortioribus abstinendum.

XI. Poterit etiam ter quaterve de die dari haustus hujus apozematis.

Rec. hordei mundat. radicum asparagi,

graminis, ana unc. j.

glycyrrizæ rasæ unc. f.

herb. capilli veneris. boraginis, endivie,

lactuca, violaria, ana m. j.

flor. papaveris erratici, violarum ana p. ij.

sem. 4. frigid. major. ana drach. j. f.

passularum corinth. unc. j.

aqua q. s. fiat. s. art. apozema ad lib. j. f.

cui admisce syrupi papaveris theadax,

violacei, ana unc. j.

Ad tussiculam leniendam præscribatur hic linctus.

Rec. syrupi papaveris erratici, capilli

veneris, violacei, ana unc. j.

misce fiat linctus.

Ad doloris sedationem, & sanguinis in parte affecta cumulati attenuationem, ac discussionem, vel citiorem coctionem, partis affectæ regio extrinsecus per magnam spongiam tali decocto tepido foveatur.

Rec. herb. malva, althea, brassica, cheresolii,

bete, violaria, flor. chamomilla, sambuci,

anethi, ana m. j.

aqua q. s. fiat decoctio ad lib. ij.

pro fomento.

Ex iisdem etiam, additis farinis lini & hordei, oleo amygdalarum & butyro recenti, componi poterit cataplasma conveniens, lateri applicandum.

XIV. In diætâ sit aer temperatus, vel aliquantum ad frigidum vergens. Cibi sint pauci, euchymi, & facili digestionis, ex cremore ptisanæ, jusculis pullorum cum endivia & lactuca paratis, aliisque similibus. Vel detur subinde haustus amygdalati.

Rec. amygdalarum dulc. depilat. unc. ij.

sem. 4. frigid. maj. papaveris

albi, ana drach. j. f.

decocti hordei. q. s. fiat emulsio ad lib. j.

cui admisce sacchari q. s. ad levem dulcedinem.

Potus ordinarius sit ptisana, cerevisia tenuis non acida. aut talis julebus.

Rec. decocti hordei lib. j.

syrupi papaveris erratici, violacei, ana unc. j.

misce fiat juleb.

Somnus, si fieri possit, longior sit, ut & maxima corporis animique quies.

## HISTORIA. II.

*De Empyemate.*

**V**iro quadragenario, gravi sinistri lateris pleuritide detento, remedia non ante tertium diem fuerunt adhibita, quibus postea morbus imminutus non est, sed ultra decimum quartum diem excurrit, febre aliisque magnis symptomatibus comitatus. Ab eo tempore dolor multum imminui, febris mitior fieri, & ponderosa gravitas in latere affecto ad costas sentiri cepit. Circa vigesimum quintum diem, febre jam valde parva existente, cum exiguo dolore, molestam gravitatem, ad sinistrum maxime latus diaphragmati incumbentem percepit ægor, & si ab uno in alterum latus se repente devolveret, humorem aliquem defluere sentit, cujus etiam fluctuatio in motu corporis antrosum manifeste obauditur. Adjungitur tussicula sicca, qua nihil effatu dignum expuitur. Respiratio difficilis est, imprimis si in latere dextro decubitus fiat. Æger anxius & debilis est, facile & sæpe sudat sine levamine: ciborum fastidio tenetur, & magis potum quam cibum desiderat.

I. **A**ffligitur Æger Empyemate, quod est puris in thoracis cavitate collectio.

II. Dignoscitur hic affectus, partim ex signis præcedentibus, partim ex præsentibus. Præcedentia signa sunt, quod pleuritis præcesserit, quæ ante decimum quartum diem non est imminuta: quod postea dolor cum febre imminui cœperit sine manifesta aliqua evacuatione per sputa, atque hinc gravitas ponderosa ad costas in latere affecto percepta fuerit. Præsentia sunt, quod molesta gravitas diaphragmati incumbat, & in devolutione corporis fluctuatio humoris in pectore sentiat & obaudiat: quod irrita tussis adsit, eum difficili respiratione, anxietate, debilitate, & ciborum fastidio.

III. Causa collectionis hujus puris fuit, membranz pleuræ & musculorum mesopleuriorum inflammatio mutata in abscessum, è quo rupto pus illud in thoracis capacitatem delapsum est, cumque per diaphragma nullus ei daretur transitus, nec per pulmonem commode evacueretur, ibi detentum & cumulatam est.

IV. Quod per sputa pus non fuerit evacuatum, factum est, 1º. quia procul dubio hujus ægri pulmo lateri affecto firmiter non adhæsit, ut in multis contingit, in quibus è rupto abscessu pus facile in pulmonem annexum eructatur. 2º. Quia pus in cavitate thoracis contentum, ob suam crassitiem, poros membranz pulmonem investientis subire, sicque pulmonem ingredi non potuit. 3º. Quia fortè pori in hujus ægri pulmone angustiores sunt, ita ut hujusmodi crassiores humores non admittant.

V. Dolor cum febre imminutus est, inflammationis acri materia jam in pus conversa, & sic mitiore reddita: cujus puris magna quantitas

membranz adhuc conclusa; ad affecti lateris costas ponderosa gravitate molestiam exhibuit. Tandem circa vigesimum quintum diem, rupto apostemate in thoracis cavitatem effluens, molesto pondere diaphragmati incubuit, ejuque, in corporis commotione, manifesta fluctuatio percepta est. Eiusdem etiam pondere depressum diaphragma non satis liberè movetur, hinc difficilior fit respiratio, imprimis si lateri sano incumbat æger, tum quippe, præter diaphragma, etiam dexter pulmonis lobus à puris cum mediastino incumbentis pondere comprimitur.

VI. Tussicula procedit à vellicatione pulmonis exteriori tunicz ab acrimonia puris illata. Hacque nihil fere expuitur, quia materia irritans extrinsecus pulmonem attingit, nec ejus quicquam bronchia ingreditur.

VII. Æger anxius est ob impeditam respirationem. Etiam debilis, quia ab acuto præcedente morbo vires admodum sunt prostratz, unde quoque facile & sæpe sudat sudorem symptomaticum. Ventriculo autem eandem ob causam, una cum hepate, valde debilitato, ejus coctio imbecillis, & appetitus dejectus evasit, hincque cibi fastidium processit: adde quod etiam pus diaphragmati incumbens, stomachum ei annexum languidum faciat. Potus tamen magis desideratur quam cibus, ob aliquam sitim à permanente febricula excitatam.

VIII. Affectus hic periculosus est: 1º. Quia respiratio læditur. 2º. Quia subsequitur acutum morbum qui vires admodum imminuit. 3º. Quia pus in thoracis cavitate conclusum sponte nunquam commode evacuari potest, nam quæ per sputa, vel urinas nonnunquam fit excretio, illa adeo rara est, ut ex sexcentis vix uni contingat. 4º. Quia si pus dicto loco diutius subsistat, putrescet,

treſcet, ſicque pulmonem ei innatantem corrup-  
pet, febresque augebit. 5°. Si curatio per medi-  
camenta exhibita inſtituatur, incertum erit de  
felici eventu, quia pus è thoracis cavitare per pur-  
gantia non poteſt educi, & per alterantia diffi-  
culter in pulmonem impellitur. 6°. Si ad chirur-  
giam deveniendum ſit, illa etiam non vacabit  
periculo. Interim tamen, quia febris exigua eſt;  
& vires adhuc mediocriter conſtant, atque con-  
veniẽs adhibita mœdela multos huiusmodi ægros  
ſervavit, non eſt omnino deſperandum, ſed cu-  
ratio quam primum inſtituenda, quippe quo di-  
utius malum protrahitur, eo magis vires colla-  
buntur, & affectus periculoſior evadit, nam cor-  
rupto tandem pulmone facilis fieret in phtiſin  
transitus, juxta 5. Aphoriſ. 15.

IX. Præmiſſa igitur clementi evacuatione alvi,  
mox ad expectorantia devenire ſuadet tuſſicula.  
Sic enim tentandum anne pus per illam viam poſ-  
ſit educi, ope talium medicamentorum quæ par-  
tim pulmonis poros laxant & dilatant, partim  
pus ad faciiliorem in iſtos poros ingreſſum præpa-  
rant.

X. Hunc in finem præſcribendum tale apoze-  
ma:

Rec. radicum belenii unc. j.  
iridis florent. drach. ij.  
glycyrrizæ raſæ, unc. ſ.  
herb. hyſſopi, præſii albi, capilli  
Veneris, violariæ, ana m. j.  
braſſicæ rubræ, m. ij.  
ſem. aniſi drach. ij.  
ſ. q. frig. maj. ana drach. j. ſ.  
paſſularum mund. unc. iij.  
aqua q. ſ. fiat ſ. art. apoze-ma ad lib. j. ſ.  
cui admiſce, ſyrupi de præſio. de hyſſopo,  
oxymelis, ana unc. j.  
dentur tres quatuorve doſes de die.  
Per intervalla lambat æger hunc linctum.  
Rec. ſyrupi de præſio, de hyſſopo,  
de jujubis ana unc. j.  
croci pulveriſati ſcrup. j.  
miſce fiat linctus.

Terebinthina cum vitello ovi in aqua hordei ad cre-  
morem redacta & ſaccharo dulcorata, plurimum quo-  
que proderit. Neque horum medicamentorum a-  
liqualis calor propter febrem valde extimeſcendus  
eſt, quia febris exigua eſt, & cauſæ ejus major  
ratio habenda eſt, utpote qua ſublata, facile e-  
vanefcet febris.

XI. Si his & ſimilibus medicamentis æger ſpa-

tio duarum ſeptimanarum ad puris excretionem  
non deveniat, ab eorum uſu vix quicquam ſpe-  
randum eſt, ac proinde, antequam longiore  
mora vires magis concidant, & pus corruptelam  
contrahat, eamque etiam pulmoni inprimat,  
citior illius evacuatio molienda eſt per chirurgi-  
am.

XII. Igitur in latere affecto, infra axillam,  
inter quintam & ſextam coſtam, thorax uſque  
ad interiorem cavitatem cultello perforandus eſt  
(cavendo læſionem pulmonis, ut & arteriæ,  
venæ ac nervi intercoſtalis) foramini non valde  
lato, ſed tali tamen quod tubulum argenteum  
cavum admittere poteſt, qui facta incifione ſta-  
tim immittendus eſt, & ita ligandus ut ſponte  
excidere non poſſit; anteriore autem parte ſit  
turunda linea obturatus, ut pus præter volun-  
tatem Medici per illum effluere nequeat. Per hunc  
tubulum bis de die, extractâ turundâ puris lib.  
ſ. vel lib. j. (plus minus, pro puris quantitate  
& facili tolerantia ægri) extrahenda eſt, hinc  
ejuſdem effluxus immiſſâ turundâ ruiſus ſiſten-  
dus.

XIII. Ubi tandem pus totum evacuatum vi-  
detur, & nihil amplius effluit, pulmo & inter-  
rior cavitas aliquoties abluatur hac mixtura per  
vulnus injecta.

Rec. decocti hordei unc. v.  
ſpiritus vini unc. iij.  
mellis roſacei,  
ſyrupi de præſio, ana unc. j.  
miſce pro injectione:  
qua per aliquot horas intus relinquenda eſt,  
& poſtea per dictum tubulum ruiſus educenda.

XIV. Si continua & diuturna puris effluxio  
indicet ulcus interius nondum eſſe perſanatum,  
præſcribenda erunt decocta abſtergentia & vul-  
neraria, nec non injectiones modice ſiccantes  
& abſtergentes. Tubulus verò argenteus in  
dicto vulnere detinendus eſt, quo uſque ni-  
hil puris amplius effluit, tunc demum exi-  
mendus, & vulnus ſecundum artem conſoli-  
dandum.

XV. Viſtus ratio ſiccior, attenuans & ab-  
ſtergens inſtituatur, cibique condiantur cum che-  
refolio, hyſſopo, braſſicæ rubræ, beta, fœni-  
culo, paſſulis, amygdalis, &c. Potus ſit pti-  
ſana ſaccharo vel melle dulcorata, aut hydromel.  
Somnus mediocris ſit, & alvus facilis. Ira &  
triftia animi pathemata fugiantur.

## HISTORIA. III.

## De Tussi.

**M**ercator florentis ætatis, cum nullam diætæ rationem haberet, & modo frigido, modo calido, modo sereno, modo tempestuoso & pluvioso tempore itineri se comitteret, idque multoties adversus externi aëris injurias non satis munitus, cibis etiam quibuscumque uteretur, præcipue frigidis, acidis, falsis, aliisque duræ digestionis, quibus maxime delectabatur, præterito autumno multoties gravedine, circa hyemem vero tussi molesta infestari cepit, quæ tota hyeme usque ad hoc tempus duravit. Sæpissime magna cum violentia tussit, idque omnium maxime circa noctis principium & diei crepusculum, quibus temporibus per integram horam plus minus fortiter tussit, magnamque viscerum & tenacis muci copiam summa cum molestia ejecit, quem nonnunquam subsalsum esse, gustu percipit. Post sumptum cibum etiam major evadit tussis, à cujus valida agitatione sæpe quicquid in ventriculo est evomitur, ac dolor multoties in thorace & abdomine excitatur. Post vomitum istum rursus mitescit tussis. Sanguinem nunquam expectoravit. Non febricitat. Corpus emaciatur & vires imminuuntur, nondum tamen omnino collapsæ sunt, nam foras adhuc progreditur, & solita munia peragit. Sæpe alvum nimis laxam habet: & liquida de- jicit. Appetitus satis constat, & somnus nocte mediocris est.

**P**ulmonem in hoc ægro imprimis affici, hinc ventriculum, aliasque varias corporis partes à valida agitatione simul etiam pati, extra dubium est.

II. Affectio hæc tussis appellatur, quæ est *vehemens efflatio, à veloci thoracis & pulmonum constrictione orta, qua id quod spirandi instrumentis est molestum, vi aëris inspirati expellitur.*

III. Hic affectus ad sui cognitionem signis opus non habet, cum per se satis manifestus sit.

IV. Causa antecedens est frigida ac pituitosa cerebri & pulmonum dispositio, diætæ erroribus maxime contracta. Procataretica est frigus, calor, exercitium intempestivum aut nimium, aliudve, quodcumque pituitam in capite contentam liquefacere, exprimere aut deturbare potest. Continens est pituita in pulmone, vel per defluxum, vel per congestionem cum- lata, cumque partim acrimonia vellicans, partim bronchia illius copia obstruens, sicque magnum & molestum respirationi impedimentum in- iiciens.

V. A frigidis enim & duræ digestionis cibis multis cruditates in corpore factæ, multique pi- tuitosi subsalsi humores generati, qui ut à debili coctione, sic etiam ab acidorum & salforum crebro usu, majorem acrimoniam adepti sunt. Ad hæc ab aëre frigido, pluvioso & tempestuoso refrigeratum etiam fuit cerebrum, & exterioris capitis pori occlusi sunt, unde pituitosi serosique vapores ex inferioribus partibus ascendentes, in cerebri jam frigidioris ventriculis fuerunt conden- sati; atque hinc, neque per angustos & à frigore

externo oclusos poros, potuerunt dissipari, neque per ossis cribriformis angustias commode evacuari: unde primo frequens gravedo fuit ex- citata. Postea vero circa hyemem, propter ma- jus aëris frigus, adaucto istorum frigidorum humorum cumulo, cum iis, ob suam crassitiem, per nares & palatum liber exitus non pateret, per insolitas vias defluerunt in asperam arteri- am & pulmonis bronchia; eaque sua copia an- gustando respirationi impedimento fuerunt. Ad hæc interior eorum pellicula, acuto sensu præ- dita, ab eorundem acrimonia molestatam velli- cationem passa est, cujus ut & angustationis, molestia menti communicata, spiritus animales copiosi ad thoracis musculos determinati fue- runt, ut per eorum validam & interpolatam contractionem vehemens fieret aëris inspirati excussio, atque ita simul etiam molesti, irritan- tis & angustantis humoris cum impetu exclu- sio.

VI. Diu duravit hæc tussis, quia neque diætæ ratio habita, neque frigida cerebri intem- peries convenientibus remediis sublata fuit; at- que hinc catarrhorum crebra ad thoracem de- fluxio hæc processit: à quorum frigore pul- mones quoque tractu temporis multum re- frigerati & debilitati sunt; atque hinc ab inferio- ribus partibus excitati vapores, qui in pulmo- nem impingunt, in eo facile in viscosum liquo- rem condensantur ac sistuntur; ita ut nunc e- jus ductus, non solum à delabentibus catarrhis, verum etiam à tenaci humore, è crassis vaporibus in iis condensato, ac instar visci parietibus bron-

chiorum adhærente, angustentur. Atque hinc sæpe æger magna cum violentia tussit, antequam tenacem & vellicantem illam materiam extundere possit.

VII. Circa noctis principium & diei crepusculum gravior & longior est tussis, ac plus tenacis pituitæ ejicitur, quia pituitosi humores tota die vel nocte collecti, circa diei & noctis principium tanta copia redundant, ut in capite contineri diutius nequeant, hinc defluunt ad thoracem; & pulmonum bronchia, non solum acrimonia sua vellicando, ad tussim irritant, verum illa etiam, à vaporibus, in iis per frigus condensatis, angustata, magis replent, atque hinc respirationi maximam molestiam injicientes, tussim exacerbant, ut pote qua natura molestiam excutere nititur.

VIII. Post assumptum cibum increscit quoque tussis, quia vapores ab ingestis alimentis suscitati, & acrimonia aliqua præditi, mox impingunt in pulmonem, ejusque frigidioribus bronchiis condensati adhærent; quorum, ut & asperæ arteriæ, sensilem, atque à prioribus humoribus ad facilem irritationem paratam, tunicam internam vellicando, tussim exasperant: per cujus validam agitationem & musculorum abdominis compressionem, ventriculus sæpe omnia contenta evomit; quo facto, aliquantum pro tempore imminuitur tussis, quia tunc nihil in ventriculo remanet, è quo acres vapores ad pulmonem ascendere possint.

IX. Ab eodem valido motu, nimisque crebra musculorum tensione, interdum etiam dolor in thorace & abdomine sentitur. Et propter nimiam alvi à crebra illa tensione compressionem, sæpe etiam cibus & potus vix concoctus è ventriculo in intestina propellitur, per eaque, antequam commoda chyli distributio fieri possit, versus inferiora citius deturbatur, unde tunc alvus laxa fit, & liquida dejicit.

X. Non febricitat æger, quia non adest humorum putredo. Interim emaciatur & debilis evadit, 1º. Quia propter frequentissimam illam totius corporis à valida tussi concussionem, omnes partes non tantum valde delassantur, verum etiam ob musculorum frequentem contractionem, concussionem & agitationem, sanguinem alimentarium per arterias, modo compressas, modo laxatas, non satis commode & copiose recipiunt, nec receptum satis diu retinere queunt. 2º. Quia, ut jam dictum, propter validam istam agitationem ingesta alimenta in ventriculo nec satis retinentur, nec bene coquantur, & quod coctum etiam est non satis distribuitur, sed multoties per inferiora deturbatur, antequam vasa lactea subire possit; unde tunc corpus & singulæ partes debito alimento fraudantur.

XI. Appetitus satis constat, quia ventriculus bene se habet, nec ad eum delabuntur catarrhi. Quod autem coctio ejus interturbetur, & vomitus subinde fiat, id non illius vitio, sed per accidens ab agitatione tussis contingit.

XII. Somnus mediocris est; quia dum pituitosi humores noctu è capite ad thoracem non defluunt, nec tussim faciunt, sed paulatim colliguntur, & in ventriculis cerebri cumulantur; ab eorum frigiditate & copia rapidior spirituum animalium motus ad organa sensuum pro tempore aliquantum cohibetur; atque hinc illa, defectu satis copiosi spiritus, eo tempore quiescunt.

XIII. Licet tussis à multis pravi fieri soleat, tamen in hoc ægro magnum minatur periculum, quia catarrhi delabentes non tantum copiosi, verum etiam subfalsi sunt; (quod æger gustu percipit) à qua acrimonia, ut & tussis magna violentia, facile erodi vel dirumpi possent aliquæ venæ pulmonis, & sic hæmoptysis periculosissima, hincque ulcus, & ab eo tabes perniciose oriri. Curatio tamen difficilis erit; quia diuturna illa cerebri & pulmonis frigida intemperies non facile tolli poterit, sed longiore tempore opus habebit; de qua tamen hoc calidiore autumnii tempore melius sperare licet, quam si hyeme instituenda foret: hanc spem multum augent ægri vires & ætas.

XIV. Indicationes curativæ primariæ quatuor sunt. 1. Ut tussis vehementia, nec non catarrhorum defluentium acrimonia mitigetur. 2. Ut summa sputorum tenacitas imminuatur, eaque coquantur & ad maturitatem redigantur. 3. Ut frigida temperies, cum pulmonis, tum capitis, emendetur, eaque partes corroborentur. 4. Ut omnis catharrorum delapsus ad pulmones præveniatur.

XV. Præmissa clementi purgatione, per haustum aliquem phlegmagogum, aut pilulas cochias vel aureas, electuarium hieræ picæ aut diaphœnicum, &c. ut primis tribus indicationibus imprimis satisfiat, hujusmodi apozema præscribendum.

Rec. Radicum belenii, acori,  
iridis florent. ana unc. f.  
glycyrrizæ rasa,  
bordei mundati, ana drach. vj.  
herb. scabiosæ, capilli Veneris, prassii albi,  
betonica tussilaginis, ana m. j.  
botrys m. f.  
baccarum juniperi unc. f.  
sem. anisi, fœniculi, ana drach. ij.  
caricarum ping. no. ix.  
passular. mundat. unc. ij.  
aqua q. s. coquantur. f. art. ad lib. j. f.  
adde colatura, syrupi de stachade,  
de prassio, oxymelis thoracici  
magistralis, ana unc. j.  
misce; sit apozema.

Huic ad citiorem pituitæ consumptionem non inutiliter postea addentur, *salsaparilla, sassefras,*  
& *radix china.*

Utatur etiam æger hoc linctu.

Rec. Syrupi de hyssopo, de prassio,  
oxymelis magistralis, ana unc. j.  
syr. de stachade unc. f.  
misce; fiat linctus.

Hujus loco subinde sumi potest una ex his tabellis.

Rec. Pulveris rad. belenii scrup. j.  
 iridis florent. scrup. ij.  
 glycyrriza rasa drach. j.  
 croci opt. gr. xiiij.  
 sacchari aq. fœnis. dissoluti unc. ij.  
 fiat s. art. tabellatum.

XVI. Si his omnibus adhibitis, æque violenta maneat tussis, detur bis in septimana cubitum ituro talis bolus.

Rec. Philonii Rom., Requei Nicolai,  
 mithridatii democ. ana. scrup. j.  
 Misce fiat bolus.

Reliquo tempore utatur apozemate, bolo, & tabellis ante dictis.

XVII. Ad capitis corroborationem præscribatur hoc capitium.

Rec. fol. majorana m. f.  
 rosmarini p. ij.  
 flor. rosar. rubr. lavendula anap. j.  
 nucis moscata, benzoini,  
 garyophyllorum, ana. scrup. ij.  
 fiat pulvis grossus pro cucupha,  
 seu capitis.

XVIII. Si his omnibus nihil imminuantur catarrhi defluxus & tussis, ut quartæ indicationi satisfiat, ad humoris defluentis diversionem & evacuationem excitetur fonticulus in brachio, vel potius in cervice, isque longo tempore apertus servetur.

XIX. In victu sit aer mediocriter calidus & siccus, fugiatur nebulosus aut tempestuosus. Caput & thorax adversus aeris frigidi & humidæ injurias vestibus bene præmuniantur. Cibi sint facili digestionis & boni nutrimenti, conditi cum rapis, cherefolio, hyssopo, majorana, betonica, melissa, oryza, hordeo mundato, aromatibus, passulis, saccharo, aliisque similibus. Potus sit cerevisia, mediocris, non antiqua, melicratum anthosatum, aut vinum subdulce modica quantitate. In cibis & potibus abstinendum ab omnibus, acidis, austeris, salis & acris aliisque quæ tussim irritant. In somno & motu corporis mediocritas servetur, quippe nimia quies cruditatis & pituitosorum humorum copiam auget; nimius vero motus, humores liquefaciendo & agitando, defluxiones citiores facit. Excreta naturalia bene procedant. Fugiantur ira, terror, & tristitia animi pathemata, ut & Veneris usus.

## HISTORIA IV.

### De Asthmate.

**V**ir triginta sex annorum, temperamenti pituitosi, interim satis fortis, sed in diæta negligens, & sedentariam vitam agens, ante aliquot annos, autumnali tempore, cum à deambulatione majore admodum incaluisse, hincque apertis vestibus & capite detecto se aëri frigido exposuisset, & vinum rhenanum frigidum bibisset, incidit in difficilem & anhelosam respirationem, cum sibulo seu rugitu aliquo procedentem; qui affectus postridie tantopere adauctus est, ut tertia die non nisi stans aut erectus sedens respirare, & totis quatuordecim diebus in lecto decumbere non potuerit, sed tot integras noctes & dies stans aut sedens transire coactus fuerit; de nocte tamen majore angustia pressus, quam de die. Postea aliqua tussi, cum tenacis viscidique sputi copiosa rejectione accedente, paulatim illa respirandi difficultas imminuta est, sicque tandem ad pristinum statum rediit. Ab eo tempore sæpius per intervalla eodem illo malo afflictus fuit, modo paucioribus, modo pluribus diebus; imprimis si plus solito calefactus se aëri frigido exponeret, aut vinum rhenanum frigidum biberet; ac proinde hoc etiam observavit, flante borea, se facillime hunc affectum incurrere, nisi curiosissime sibi caveat ab ejus injuriis, idque æstate & autumnis magis, quam hyeme. Durante hoc malo appetitus quidem mediocriter constat, sed præ angustia vix potest comedere, & post sumptum alimentum etiam exacerbatur respirandi difficultas. Proclivis quidem est ad somnum, sed vix concidentibus oculis, cum terrore & summa anxietate mox expergiscitur, ita ut durante paroxysmo dies noctesque, velit, nolit, insomnes ducere cogatur. Venter & pectus quasi à flatibus distendi videntur. Nonnunquam in capite gravativum quendam dolorem sentit cum refrigeratione aliqua in postica parte, versus cervicem. Jam hoc tempore rursus in similem paroxysmum admodum gravem incidit, cum magno suffocationis periculo. Non febricitat, nec de aliarum partium dolore conqueritur.

I. Affectio,

I. **A**ffectio, qua hic æger detinetur, & quæ per se sine aliis signis facile cognoscitur, est *Asthma*, seu *difficilis & anhelosa respiratio*; & quidem summus illius gradus, quem *Orthopnoeam* appellamus, quæ est *summa respirandi difficultas, quæ ægri non nisi ære-æsi respirare queunt, ab angustia respiratoriarum partium procedens.*

II. Causa antecedens huius mali fuerunt pituitosi humores in corpore redundantes. Procatartica duplex est, calor & frigus. Continens verò est pituita viscida & tenax in pulmonum bronchiis copiosior cumulata, ilque firmiter agglutinata.

III. Propter pituitosam totius dispositionem multi frigidi, crudi & pituitosi humores in corpore redundant, quorum nimia cumulatatio facillime fit in iis partibus, quæ per se frigidiores ab externa aliqua causa facile nimis refrigerantur; quales inter alias sunt cerebrum & pulmonis bronchia. Corpori igitur per maiora exercitia, aliumve quemcunque modum, præter consuetudinem excalescens, sanguis & humores velocius moventur, multique vapores in ventribus excitantur; qui, si calor ille sensim imminuatur, ab eodem etiam paulatim dissipantur: at (ut in ægro nostro multoties contingit) repentinum frigus superveniat, mox condensantur, & in cerebro, quod per se frigidius est, maiore copia cumulantur; postea catarrhorum materia futuri, Pulmonum vero bronchiis, substantia frigidior præditis, & ab inspirati aeris frigiditate magis refrigeratis, instar tenacis visci firmiter agglutinantur, eaque angustant, & respirationem difficilem faciunt quibus deinde accedens crudorum humorum à capite in bronchia defluxio, omnino maxime difficilem respirationem fieri necesse est, propter maiorem viarum angustationem; cuius ratione etiam sibilus seu rugitus in respirando obauditur, & respiratio non nisi erecto corpore fieri potest, cum pulmones penduli, nec aliis partibus incumbentes facilius dilatentur, earumque bronchia in illo situ magis aperta sint, & inspiratum aerem facilius admittant.

IV. Nocte exacerbatur malum, quia per aeris nocturni frigus in pulmone magis crassescunt & tenaciores sunt pituitosi humores, sicque bronchia magis obstruunt: in capite etiam eadem de causa plures colliguntur, & copiosiores ad thoracem defluunt. Adde quod nocte per quietem minor etiam fiat vaporum dissipatio.

V. Tandem ubi viscosa materia in pulmone collecta aliquo modo cocta, & illius summa tenacitas aliquantum imminuta est, eaque per tussim ejicitur, tunc obstructio bronchiorum imminuitur, & sic æger ab illa respirandi difficultate paulatim liberatur. Ab ea autem liber remanet, quo usque rursus à maiore calore excitati in corpore copiosiores vapores ab insolito aut repentino frigore externo in pulmone condensantur, ejusque bronchiis agglutinantur, &

in capite maiori copia collecti ad thoracem etiam defluunt.

VI. Hinc jam liquet quare septentrionalis ventus ipsi adeo inimicus sit; quia nimirum suo frigore poros constringit, humores ac vapores condensat, caput & pulmones refrigerat. Qui ventus ipsi æstate & autumno damnosior est, quam hyeme; quia tunc à calore externo corpus sæpe nimis incalescit, hincque copiosi vapores excitantur, qui superveniente repentina aliqua refrigeratione bronchiis frigidioribus facile adhærent & agglutinantur. Hyerno vero tempore pulmo, aliæque medii & infimi ventris viscera (constrictis ab externo frigore poris) sunt calidiora (juxta Hippocratis *aphor. 15. sect. 1.*) habentque calorem æqualem & permanentem, ita ut excitati vapores in dictis partibus non facile condensentur, sed ulteriore coctione attenuati consumantur.

VII. Durante hoc affectu constat appetitus, quia nec inspiratus frigidus aer, nec frigida defluxiones à capite ad ventriculum perveniunt; atque hinc ejus actio non magnopere impeditur. Ab assumpto tamen alimento exasperatur respirandi difficultas, propter vapores in ventriculi coctione excitatos, qui ad medium & supremum ventrem ascendentes, in utroque condensantur, atque in illo pulmonum bronchiis agglutinantur; in hoc copiosioris defluxionis causa fiunt. Peracta vero coctione ventriculi, rursus mitius evadit malum, quia tunc pauciores elevantur.

VIII. Licet admodum proclivis sit ad somnum, tamen non potest dormire, quia vigilans summa vi cogitur ut in dilatatione thoracis, ut necessitati respirationis satisfaciat; per somnum verò illam necessitatem tam accurate non persentit, atque hinc tanta vi in dilatando thorace non utitur, qua deficiente, statim deficit respiratio, utpote quæ ob bronchiorum obstructionem sine magna vi peragi nequit, atque sic æger mox cum terrore & summa anxietate expergiscitur, & cogitur vigilare, ut satis respiraret, ac cum violentia respirare, ut vivat.

IX. Venter & pectus quasi à flatibus distenta videntur, licet flatu nulli, vel forte pauci insint. Et hoc, quia propter summam respirandi difficultatem & necessitatem spiritus animales copiosissimi continue determinantur in musculos respiratorios, quorum continuus & copiosus influxus dictos musculos admodum distendit, ita ut inde talem aliquam molestiam persentiat ægrotus, ac si ab internis flatibus distenti tenerentur.

X. Gravativus capitis dolor nonnunquam adest, à frigidorum humorum in capite collectorum copia: atque hinc etiam sensus frigiditatis in postica capitis parte procedit.

XI. Febris adest, quia nulla in humoribus aut sanguine est putredo. Neque dolent aliæ partes, quia frigidi illi humores in hoc ægro non sunt acres, neque in aliis partibus, quam capite & pulmone, copiosiores colliguntur.

XII. Ad-



XII. Admodum periculosus est hic affectus, qui agro suffocationem minatur, imprimis si durante malo forte nova copiosa defluxio e capite ad pulmonem irruat. Sanationis spem faciunt, ætas florens, virium robur, & aliorum morborum absentia.

XIII. Indicationes curativæ sunt. 1. Tolerare causam continentem, quæ bronchia obstruit. 2. Impedire catarrhi defluxum ad pulmones. 3. Frigidam capitis & pulmonis intemperiem emendare. 4. Totius corporis pituitosam dispositionem immutare, frigidosque humores in toto redundantes imminuere. Ut autem his indicationibus satisfiat, alia curatio in præsentī jam paroxysmo, alia extra eam est instituenda.

XIV. In præsentī paroxysmo ad respirationem facilitandam, æger erectus sedeat, pectore nullis vestimentis constricto, idque in aëre libero & temperato. Injiciatur clyster communis, vel si eum admittere nolit, suppositorium immittatur. Victu utatur tenui, & cibi condiantur cum hyssopo, salvia, betonica, croco, aniso, fœniculo, passulis, aliisque similibus.

XV. Sumat subinde, quasi lambendo, cochleare hujus syrupi.

Rec. *syrupi de hyssopo, de prassio, conservationis Zingiberis & rad. bel. condit. ana unc. l. oxymelis compositi magistralis unc. j. misceantur.*

Detur etiam mane, hora quinta pomeridiana drach. j. hujus pulveris, cum vino malvatico, hydromelite, aut jusculo.

Rec. *Rad. helenii. drach. j. rad. iridis florent. sem. ameos, ana drach. j. benzoini, croci opt. ana scrup. j. moschi gr. j. sacchari candi albi drach. iij. fiat pulvis, cui admisce olei anisi gut. iij. vel v.*

XVI. Paroxysmo cessante, purgetur æger singulis septimanis semel cum pilulis cocheis, aureis, hiera picra, vel haustu aliquo phlegmagogo, ex infusione agarici, jalappæ, fenæ, &c. Venæsectio in hoc subiecto pituitoso & frigidiore minus convenit.

XVII. Reliquis diebus utatur tali Apozermate.

Rec. *rad. helenii, fœnic. ana unc. j. acori, glycyrrizæ rasæ, ana drach. v. majoranæ, scabiosæ, capill. ven. hyssopi, prassii albi, sabina, ana m. j. botryos, salvia, ana m. l. bacc. juniperi unc. l. sem. anisi, fœnic. ana drach. ij. l. passularum mundat. unc. ij. aqua q. s. coquantur s. art. ad lib. j. l. adde colatura. oxymelis magistralis,*

*syrupi de stœchade, de prassio, ana unc. j. misce fiat apozerma.*

XVIII. Subinde etiam utatur particula hujus conditi.

Rec. *specierum dianthos, diambra, ana drach. j. rad. helenii condit. conserva flor. salvia, anthos. ana drach. v. syrupi helenii q. s. misce, fiat conditum.*

XIX. Ad imminutionem pituitæ in toto corpore, conveniens erit usus decocti falsæparillæ & falsæfras, cui sub finem decoctionis adjici possunt nonnulla appropriata cephalica & thoracica medicamenta, ad capitis & pulmonum corroborationem. Capiti etiam cucupha, ex cephalicis calefacientibus confuta, est imponenda; & si catarrhus pertinaciter ad pulmonem ruere persistat, excitandus erit fonticulus in alterutro brachio, aut in cervice.

XX. Ubi æger his remediis aliquamdiu usus fuit, & jam melius valere videbitur, ad ulteriorem causæ mali sublationem, utatur alternis diebus, matutino tempore haustu hujus vini medicati.

Rec. *radicum helenii sic. unc. l. iridis florent. jalappæ, ana drach. j. l. berb. hyssopi, prassii, albi, ana m. l. bacc. juniperi unc. l. sem. anisi, fœnic. ana drach. j. l. agarici albiss. scrup. v. aloes lucida scrup. iij. fiat puppa, suspendenda in vini albi lib. iij. vel v.*

XXI. Ad præservationem utatur etiam per tres menses, bis in septimana, bolo ex terebinthina optima.

Rec. *terebinthinæ Venetæ drach. iij. sacchari albi drach. ij. misce, fiat bolus in nebula cum vino malvatico deglutendus.*

XXII. In diætâ sit aër calidus, & clarus, fugiatur nebulosus, crassus, tempestuosus & humidus. Cibi sint boni succi & facili digestiōis, conditi cum hyssopo, serpillō, salvia, rosmarino, melissâ, betonica, rapis, semine anisi & fœniculi, croco, nuce moscata, zingibere, gariophyllis, passulis, saccharo, melle aliisque similibus. Potus sit parciōr, isque cerevisia mediocris notæ, & subdulcis vel subamara, minime acida, vinum tenue subdulce, aut melicratum, in quo suspendi poterit puppa ex hyssopo, majoranâ, salvia, &c. In somno servetur modus. Corpus levibus exercitiis mediocriter exerceatur. Alvus sit facilis, & fugiantur animi perturbationes.

HISTO.

## HISTORIA. V.

## De Angina.

**V** Ir triginta annorum carnosus, robustus, plethoricus, cum à gravilabore admodum incaluisse, plurimumque sitiret, cerevisiam tenuem, è frigida cella depromptam, avidissime magno haustu bibit, ita ut frigiditatem potus in faucibus ferre nequiens, poculum ab ore deponere cogeretur. Paulo post angustiam quandam cum ardore in faucibus, & hinc respirandi ac deglutiendi molestiam percepit, quæ continuo magis magisque adaucta est. Post septem aut octo horas febris valida accessit, cum pulsu magno, crebro & inæquali, tantumque adaucta est respirandi, deglutiendique difficultas, ut vix stans aut erectus sedens respirare posset, & assumptus potus ilico per nares resiliiret. Os siccum est, cum magna siti, quæ, ob deglutiendi impedimentum, nullo potu leniri potest. Lingua obscurioris coloris evasit, eaque oris speculo depressa, posterius in faucibus maxime intensâ rubedo seu fuscus color apparet, tumor tamen insignior, quia humiliore loco consistit, conspici nequit. Venæ raninæ sub lingua crassæ ac tumidæ sunt. Loquela etiam adeo impedita evasit, ut vox ægre audiat. Æger maxime anxius se quaquaversum summa cum inquietudine movet, & frigidum patulumque aërem continuo captat. Foris nullus tumor, sed insueta aliqua rubedo circa faucium regionem apparet.

**I.** **G** Ravissimus affectus, qui ægrum nostrum exagitat, vulgo ab angendo Angina appellatur; estque respirandi & deglutiendi difficultas, ab inflammatione & angustia partium summæ gulæ, laryngis, fauciumque procedens, ac brevi febrem continuam sibi comitem assumens.

**II.** Non est autem notha angina, à tonsillarum ex catarrho tumore cum rubore conjuncto, sed est vera angina, ex mera inflammatione genita. Cui cum pro varia intensiōis magnitudine à neotericis quatuor gradus constituentur, hæc ad gradum tertium referenda videtur, quem *παρὰ πύλιν* appellant, quippe in nostro ægro inflammatio versus superiores faucium partes se extendit, & depressa lingua quodammodo conspici potest, quæ alioqui in duobus prioribus gradibus, *πύλιν* & *θύλιν*, tota occulta latet.

**III.** Sanguinis redundantia hujus mali antecedens fuit causa; hic autem sanguis à causis procatasticis agitatus, ac in faucibus & laryngis musculis majore copia coacervatus, ibidemque putrescens, causa continens evasit. Procatasticæ vero illum partim moventes, partim circa dictas partes detinentes, quæ fuerunt, nempe gravis labor magnum calorem excitans, & nimis frigida potio, subitam refrigerationem inducens.

**IV.** A gravi quippe labore excalescens toto corpore nec minus corde, sanguis per validas crebrasque cordis pulsationes rapidè fuit agi-

tatus, ac celeriter per vasa transit, idque sine ullo incommodo, quo usque in viis nullum datur impedimentum. Verum cum ab actuali frigiditate assumpti nimis frigidi potus, qui in minimis venis circa fauces & laryngem hærebat sanguis nonnihil incrassaretur, ipsæque venularum radices & orificia constringerentur, ac cor excalescens tamen non desineret per crebros magnosque pulsus æque multum sanguinis, atque antea, eò per arterias propellere, non potuit tantâ quantitas à venulis, per frigus in crassumque sanguinem angustatis, tam cito recipi & transmitti, sicque circulari; ac proinde cum singulis pulsibus aliquid transiret, aliquid etiam dictis locis detineretur, hinc per plurimos pulsus multum sanguinis in dictarum partium substantia detentum ac collectum fuit; unde tumor calidus, respirandi deglutiendique vias angustans, paulatim magis magisque adauctus est; ipseque detentus ibi sanguis, cum à corde amplius non regeretur nec moveretur aut elaboraretur, paulatim majorem inflammationem & putredinem concepit, cujus pars, cordi per venas communicata febrem continuam accendit, non quidem prima hora, sed inter septimam & octavam: in ipso enim exordio copia sanguinis paulatim collecta, ejusque nimius calor continue adauctus fuit, sed putredo cum magna inflammatione post aliquot horas primo invasit, scilicet cum tanta esset copia, quæ naturæ gravis foret, & jam effervescente inciperet: à qua effervescencia pulsus major & crebrior, quam antea, evasit, ac simul etiam inæqualis, à putrescentibus particulis, reliquo sanguini inæqualiter permixtis, in cor illabentibus.

V. A febris invasionē multo difficilior fuit respiratio, tum, quia effervescens sanguis majorem locum requirebat, atque hinc tumorem & viarum angustiam plurimum augebat: tum, quia ratione majoris caloris febrilis, majore usus fuit respiratione; cum per angustas vias procedere vix posset, difficilior evasit, & defectus quoque; necessarii refrigerii maximam anxietatem & inquietudinem induxit: atque hinc est quod æger frigidum parvulumque aerem capiet.

VL. Os siccum & sitis maxima est, à calidis vaporibus, partim ex inflammato loco, ori proximo, partim per febre, ex corde & inferiore corpore sursum in os exhalantibus, idque exsiccantibus. Potus tamen deglutiri nequit, sed in os resilit, quia ab inflammatorio tumore superior œsophagi pars tantopere comprimitur & angustatur, ut nihil amplius transmitti possit, hincque potus deglutitionis impetu versus œsophagum impulsus, cum non possit per eum transire, per superiora palati mox resilit in nares.

VII. Intensa rubedo seu fuscus color, qui in faucibus depressâ linguâ conspicitur, fit à copia sanguinis ea in parte, ob antedictas causas coacervata, qui color se inde aliquo modo versus linguam extendit: & propter denegatum liberum sanguinis per venas transitum, venæ rarinæ sub lingua admodum tument.

VIII. Loquela impeditur, ut æger vix au-  
diri possit, propter respirationis difficultatem &  
musculorum laryngis inflammationem.

**IX.** Foris nullus conspicuus est tumor, quia inflammatio tota intus circa laryngem, oesophagum & fauces latet: rubedo tamen aliqua, propter viciniam, se versus exteriora protendit.

X. Acutus sane ac periculossimus est hic morbus, à quo æger aut cito liberari, aut citò mori debet; quia si pauxillum adhuc increseat inflammatio & augeatur tumor, respirandi via omnino præcludetur, & æger suffocabitur. Periculum augeat febris magnitudo, & quod æger nihil omnino deglutire, sicque ardor internus nullo potu leniri, nec vires ullo alimento corroborari possint. Aliquam tamen sanationis spem facere videtur, quod inflammatio non omnino in interioribus laryngis musculis abscondita delitescat, sed aliquo modo versus fauces extendatur, ita ut topica ad partem affectam paulo melius accedere queant. Adde, quod aliqualis rubedo, foris apparens, videatur etiam promittere aliquam prurptionem inflammationis versus exteriora, quod cum salute ægri fieret.

**XI.** In curatione, 1. *Affluentis sanguinis impetus ad partes affectas est impediendus.* 2. *Qui jam influxit & ibidem collectus est sanguis, quantum fieri potest discutiendus est.* 3. *Si ad maturationem tendat, ea quam citissime promovenda est.* 4. *Si dum hæc tentantur, ægri suffocatio interea metuiatur, illa per chirurgiam prævenienda erit.*

XII. In hoc magno igitur morbo statim à generoso remedio auspicanda erit curatio, &

venæsectio in brachio instituenda, ac sanguis liberaliter detrahendus. Si prima vice non imminuatur affectus, haud diu post eadem venæsectio in eodem vel altero brachio erit reiteranda: atque illud ipsum etiam tertia vice, si necesse videatur, sine scrupulo tentandum; quoniam ab hoc imprimis remedio salus expectanda. Etiam è venis raninis sanguis bona quantitate per phlebotomiam erit extrahendus.

XIII. Interea clysteribus ordinariis alijs in-  
terdum subducenda.

XIV. Utatur æger sæpius hoc gargarizante  
descutiente & emolliente.

Rece glycyrrhiza rafa drach. ij.  
 capasitae medicinis magnitudine  
 herb. scabiosa, violaria, smaltina  
 mercurialis, beta, ana m. lb  
 flor. chamomilla,  
 rosarum pallid. ana m. s.  
 corticam citri unc. s.  
 aqua q. s. coq. s. art. ad lib. j. s.  
 adde colacata, syrupi diacori unc. ij.  
 diacori, unc. j.  
 mellis rosacei unc. s.  
 misce, fiat gargarisma.

Huic, si tumor ad suppurationem tendere videatur, addantur.

bordei mandati drach. j. f.   
 fol. altheae m. j. f.   
 ficus novem.

XV. Extrinsecus imponatur hoc cataplasma.

Rec. rad. lili<sup>o</sup>rum albor. drach. j. s.  
fol. bet<sup>u</sup>e, malva mercurialis, althea,  
flor. chamomil. ana m. j.  
rosarum pallidarum m. l.  
farina fenugraci unc. j. s.  
unius nidi hirundinis interiorem partem  
pulverisatam, aqua q. s.  
coquantur s. ar.  
ad pultricula formam,  
cui adde olei chamamelini unc. ij.  
misce, fiat cataplasma.

Huic, si maturatio expectanda videatur, addi poterunt,

ficus pingues septem aut octo, farina rad.  
alba, sem. lini, pulpa cassia, olei liborum  
ana unc. j.

XV Í. Quam primum æger aliquid deglutire poterit, detur clemens purgans *ex infuso rhabbarbari, pulpa cassia, syrupo rosata solutivo, aut de cichoreo cum rbeo, &c.*

XVII. Tunc etiam pro potu prescribatur  
julebus.

Rec. decocti bordei lib. j. s.  
 Syrupi dianthi, dianci,  
 violacei, ana unc. j.  
 olei sulphuris panxillam ad levem acorem;  
 misce fiat juleb.

XVIII. Si abscessus tumpatur, æger pro-  
no capite purulentam materiam expuat, & ul-  
cus abstergat gargarismo, ex decocto hordei  
cum saccharo, mellè, aut syrupo de prassio vel  
hyssopo

hyslopo dulcorato: ex quibus syrupis etiam linctus confici potest. Postea utatur gargarismate ex fanicula, plantagine, agrimonia, nucibus cypressi, rosis rubris, &c. cum syrupo de rosis siccis & granatorum dulcorato.

XIX. Si interea dum hæc adhibentur, magis increseat respirandi difficultas, & suffocationis periculum jamjam imminuere videatur, antequam materia vel discuti, vel ad maturitatem deduci possit, viribus nondum plane collapsis, ad extremum concurrendum est remedium, scilicet, *laryngotomiam*; de qua consulendi sunt Julius Cæsserius in *historia anatomica vocis*: A-

quapendens, titulo *de perforatione aspera arterie*; Sennertus *institutionum lib. 5. part. 1. sect. 2. cap. 7.* aliique chirurgi scriptores.

XX. Vivat æger in aëre frigidiusculo. Cum deglutire poterit, concedatur victus tenuis, ex cremore hordei, amygdalatis, jusculis pullo- rum vel carnis vervecinæ, decoctis cum lactuca, endivia, portulaca, acetosa, prunis damascenis, &c. Potus sit cerevisia tenuis, julebus refrigerans, ptisana. Alvus laxa servetur per clysteres, aut concessa deglutitione, per assumpta. Corporis animique sit quies.

## HISTORIA VI.

### De Peripneumonia.

**J**Uvenis robustus, cum à meracioris vini copioso potu admodum incaluisse, post mediam noctem aquæ frigidæ poculum unius libræ exhausit, sicque nocturno aëri frigidus se exposuit, & domum tendit. Eo cum venisset, respirandi difficultatem sentit, quæ de momento in momentum magis inagisque increcebat, sine ullo tamen acuto thoracis dolore. Gravativam & ponderosam molestiam in medio thorace sentiebat, maxime versus sinistrum latus. Tussicula crebra irritabat, qua valde parum, sed subcruentum & spumosum exspuebat. Genas magnus rubor prehendit. Post tres quatuorve horas accessit valida & continua febris, cum maxima siti, oris siccitate, pulsu magno, frequenti ac inæquali, & summo capitis dolore, tantumque adaucta est respirandi difficultas, ut æger pene suffocaretur, ita ut ad medicam opem necessario concurrendum fuerit.

I. **I**N hoc ægro pars primariò affecta est pulmo, ejusque imprimis sinister lobus, quod liquet ex respirandi difficultate, & ponderosa molestia, quæ in medio thorace versus sinistrum latus declinans sentitur. Secundariò vero afficitur cor, & hinc totum corpus.

II. Morbus ægrum infestans *Peripneumonia* dicitur, quæ est *inflammatio pulmonis cum febre continua, difficili respirazione, & ponderosa in thorace molestia*. Quæ tria pathognomonicum ejus signum constituunt.

III. Plethora fuit ejus causa antecedens: proxima verò est sanguis majore copia in pulmonis substantiam impulsus, quam circulari commode potest. Causa procatactica duplex est, scilicet nimia incalescentia, & subita refrigeratio; illam liberalior meraci vini usus, hanc frigus tam aquæ potæ, quam nocturni aëris induxit.

IV. A vino meraco admodum incaluit totum corpus, hinc pulsus cordis frequens & magnus evasit, quo sanguis, calore attenuatus, rapide per arterias in partes propulsus est; qui, quo usque ei per venas satis liber concedebatur reditus, nullum exhibuit in commodum: verum, superveniente repentino frigore, ab actuali aquæ potæ & aëris inspirati frigiditate illato, eoque in pulmones magis quam alias partes impingente, mox spirituosus sanguis pulmonis substantiæ & minimis ramulis venæ pulmonariæ inhærens,

nonihil condensatus seu incrassatus, & ipsæ quoque exiles venæ pulmonariæ radices, una cum pulmonis poris aliquantum constrictæ sunt; atque hac de causa sanguis, qui per omnes arterias, nec non per pulmonarem valida crebraque pulsatione cordis rapidè movebatur, non satis bene per has impeditas vias transit, sed plus per arteriam pulmonarem è dextro cordis ventriculo in pulmonem fuit impulsus, quam è venæ pulmonaris radicibus commodè admitti, & ad sinistrum ventriculum dimitti potuit: hinc singulis pulsibus aliquid ibi remansit, quod per venas non permeavit, unde post multos pulsus, magna illic sanguinis accumulatio ab eaque insignis tumor in pulmone excitatus fuit; cui adjuncta inflammatio, quia partim ab incremento sanguinis, partim ab ejusdem putredine fortique effervescencia, calor præter modum adauctus est.

V. Ab hoc pulmonis tumore, multum compressis & angustatis bronchiis, valde difficilis evasit respiratio; eaque difficultas magis magisque increvit, quia singulis pulsibus aliquid sanguinis ad partem tumidam apponitur, quod tumorem comprimantem & inflammationem auget.

VI. Quia autem pulmo tumidus & tensus gravior fit, hinc ponderosa molestia in medio thorace sentitur, eaque maxime versus sinistrum latus, procul dubio quia inflammatio sinistrum lobum imprimis occupat. Magnus ta-

tamen seu acutus dolor non adest; licet æger cum violentia quoque respiret, & thoracem ac pulmonem distendat, quia ipsa pulmonis substantia caret nervis majoribus, atque hinc vix sentit, & exterior ejus tunica solummodo valde obtusum sensum habet, ab exili ramulo sexti paris eam ingrediente: interior vero bronchiorum tunica, quæ acuti sensus est, hic vix afficitur; solummodo acris calor sanguinis putrescentis eam nonnihil vellicans, & tenuiores sanguinis particule in eam expressæ, tussiculam proritant, qua parum & subcruentum expuitur.

VII. Genæ admodum rubent (quod in hoc morbo familiare) à spirituoso sanguine in pulmone effervescente, qui se, suosque vapores in fungosam genarum substantiam facilius insinuat, tantumque ruborem infert; idque magis in hujus, quam aliorum viscerum inflammatione; quia præter dictum sanguinem, ex ipso pulmone inflammato fit fervens exspiratio, cum qua ferventes fuligines & vapores è faucibus erumpunt, & interius in ore in genas impingunt, easque multo adhuc magis excalfaciunt, sicque ruborem multo plus augent, quam in aliorum viscerum inflammatione fieri potest.

VIII. Febris continua valida accessit, à sanguine in pulmone putrescente, & cordi continue communicato. Qui sanguis, cum in ipso mali principio nondum putresceret, sed primo paulatim in quantitate & calore incretceret, & non nisi post tertiam horam inflammaretur, ac verè putredinem conciperet, hinc febris ab ipso mali exordio non adfuit, sed post tertiam quartamve horam supervenit, magnamque oris siccitatem & sitim comitem habuit, ob fervidas exspirationes ex interius nimis exsiccantes. In eaque pulsus magnus & frequens est, ob sanguinis copiam & caloris magnitudinem; inæqualis vero, propter sanguinis inæqualitatem ab admittione particularum putrescentium, quæ modò plures, modò pauciores cum sanguine in cor incidunt, hincque cor, modo facilius modò difficilius eas dilatans, citius tardiusve cum inæqualitate movetur.

IX. Incipiente febre, respirandi difficultas citissime adaucta est, fere usque ad suffocationem, partim quia cor per multo crebriores pulsus plus sanguinis in pulmonem impulit, quam antea per rariores; sicque tumorem & inflammationem citissime adauxit: partim, quia sanguis, in pulmone jam putrescens & effervescens, majore loco indiget, atque hinc sese in vicinas particulas undequaque extendens, bronchiorum compressionem & angustationem majorem facit.

X. Capitis summus dolor obortus est, partim ab acris copiosis vaporibus, è nimio vini potu excitatis, & in membranas cerebri impingentibus, easque vellicantibus: partim à fervido sanguine, ejusdemque acris halitu, in easdem membranas, à nocturni aeris frigore nonnihil refrigeratas, per motum cordis copiosè impulsas.

XI. Morbus hic valde periculosus existit,

propter summam spirandi difficultatem & febris magnitudinem: adde quod hic affectum sit viscus cordi maxime vicinum, idque amplectens, cuius usu carere nemo potest. Magnam tamen sanationis spem præbent ætas firma, virium robur, & aliqualis subcruenta excreatio in principio apparens, quæ, teste Hippocrate 2. Prognost. aphor. 50. magnum salutis indicium exhibet.

XII. Curatio nullo modo differenda, sed mox instituenda est, quia maximum hic periculum in mora. Vena igitur quam citissime in brachio secanda, & sanguis liberaliter extrahendus: eaque venæsectio, si prima vice non imminuatur morbus, postea bis terve reiteranda, qua licet vires aliquantum deiciantur, ea tamen de causa nihil metuendum, quippe præstat ægrum debilem sanari, quam fortem mori.

XIII. Interea etiam moveatur alvus clystere communi, infusione rhabbari, syrupo rosato solutivo, aut cichorci cum rheo, decocto prunorum damascenorum, aut electuario diapruno solutivo, aliisque elementibus purgantibus: abstinentium autem à fortioribus.

XIV. Ad sitim detur hoc julabium:

Rec. decocti hordei lib. j. f.  
syrupi papaveris rheados, violacei,  
rosarum pallidarum, ana unc. j.  
misce fiat juleb.

XV. Præscribatur etiam apozema ter quaterve de die bibendum.

Rec. rad. cichorei, tussilaginis, asperagi,  
graminis, ana unc. j.  
glycyrrizæ, rase unc. l.  
herb. violaria, endivia, tussilaginis,  
lactuca, capilli Veneris,  
boraginis, ana m. j.  
flor. papaveris rheados, p. ij.  
sem. 4. frigid. maj. ana drach. j.  
passularum corinth. unc. j.  
aqua q. s.  
coquantur s. art. ad lib. j. f.  
admisce colatura,  
syrupi papaveris rheados, violacei,  
rosarum pallidarum, ana unc. j.  
misce fiat apozema.

Ex iisdem syrupis æqualibus partibus mixtis, addito pauxillo croci, conficiatur etiam linctus ad leniendam tussim.

XVI. Si inflammatio fortè ad maturationem veniat, quod ex purulento sputo & febris imminutione apparebit, præscribenda primo erunt apozemata abstergentia, ex helenio, praffio, hyssopo, scabiosa, &c. ut & linctus ex syrup. capilli Veneris, de praffio, de hyssopo, &c. Postea ulcere satis absterfo, ad consolidantia deveniendum. Verum si eo res procedat, vix æger phthisi & mortis periculum effugiet.

XVII. Porro vivat æger in aëre subfrigido vel temperato. Cibis utatur paucis, boni succi, & facilis digestionis, ut cremore hordei, jusculis ex pullis aut carne vervecina, cum hordeo mundato, passulis corinthiacis, endivia, lactuca, prunis damascenis, aliisque similibus paratis, à

tis: à quibus si abhorreat, detur lac amygdalatum. Pro potu ordinario bibat cerevisiam tenuem, aut julebum ante præscriptum. Sit cor-

poris & animi quies, & somnus subinde capetur.

## HISTORIA VII.

## De Sanguinis Sputo.

**J**Uvenis fortis, nullam diætæ rationem habens, cibis falsis, duris, & acerbis vesci solitus, postquam hyberni aëris frigori nudatum caput multoties exposuisset, atque hinc primò magnam gravedinem cum aliquo gravativo capitis dolore contraxisset, & postea validissima tussi, ab acerbis catarrhis in thoracem delabentibus, aliquamdiu exagitatus fuisset, tandem incidit in sanguinis sputationem, qua copiosum sanguinem, per intervalla tussiendo, rejicit, idque sine dolore. Medicus in principio advocatus venam in brachio secuit, & mediocrem sanguinis quantitatem detraxit, qui refrigeratus, admodum tenuis & male coloratus apparuit, ac vix pauxillum coagulabatur. A venæsectione sputum sanguinis per biduum substitit, sed postea rediit. Appetitus dejicitur & vires debilitantur, sed nulla febris adest.

**I.** Hujus ægri primaria affectio, quæ per se satis cognoscitur, Græcè *αιμόπτυξις* Latinis *Sanguinis sputum*, & *rejectionis* nuncupatur. Quæ nomina licet quæcumque sanguinis evacuationem per se significent, specificè tamen apud Medicos per *αιμόπτην* intelligitur illud sanguinis sputum, quando cum tussi, ex partibus respirationi dicatis, sanguis rejicitur, sine illarum inflammatione.

II. Est igitur symptoma in genere excretorum, præter naturam è pulmone & vasis ejus profluentium. Morbus autem, quem symptoma illud sequitur, est solutio continui.

III. Pars primariò affecta est pulmo cum suis vasis, quod patet ex tussi, & ex sanguine cum tussi rejecto; qui sine dolore prodit, quia pulmo est valdè obtusi sensus. Præterea caput quoque affici, docent gravedo & catarrhorum descensus. Secundariò etiam nonnihil patiuntur aliz partes, quatenus à valida tussi lassantur, ab eaque & sanguinis evacuatione debilitantur.

IV. Causa antecedens sunt humores acres & crudi in capite collecti, qui inde ad pulmones delapsi, acrimonia sua respiratorias illas partes, partim vellicando gravissimam tussim, partim erodendo solutionem continui inducunt, ejusque causa proxima evadunt. Procatareticæ causæ sunt frigus externum, obstructio pororum capitis, alizve, quæcumque crudos humores colligi faciunt, aut collectos ex eo deturbant.

V. Ab inordinato victu, multorumque salforum & acrimia usu, copia pravorum & acrim humorum in corpore fuit genita, ac ipse etiam sanguis tenuis & acris evasit, hinc in valida illa calidaque juvenili ætate multæ acres evaporationes ad caput elatz sunt, quæ per ordinarios

ethmoidæos meatus evacuari, ac per ipsos quoque poros discuti solitæ, cum postea à frigore externo condensatz, per eodem frigore contractas ordinarias vias transire amplius non potuerint, primò majore copia in cerebro cumulatz, sua crassitie & visciditate spongiosa narium ossa obstruxerunt, sicque gravedinem excitarunt, quam à copia retentorum humorum, membranas cerebri distendentium, subsecutus est gravativus aliquis capitis dolor. Postea per alienas & insolitas vias ad asperam arteriam & pulmones defluerunt, in quibus acri vellicatione, viarumque respiratoriarum obstructione, validam tussim, ac vasorum erosionem induxerunt, ex quibus duobus concurrentibus solutio continui subsecuta est, quippe erosa vasa à validissimo tussis impetu facile disrupsa & aperta fuerunt.

VI. In sanguine multos pravos & acres humores redundare, ex eo patet, quod qui venæsectione detractus est, sit male coloratus & tenuis, ac vix tantillum coaguletur.

VII. Per intervalla redit hoc sanguinis sputum, quia ubi aperta vasa semel evacuata sunt, tunc nonnihil concidunt, ita ut rursus aliquo tempore opus sit, antequam tantâ sanguinis copiâ turgeant, quæ cum impetu ex iis erumpere possit, eâ autem datâ, & vasis nonnihil intumescens, iterum profluit sanguis.

VIII. Quod à venæsectione per biduum subliterit hæmoptysis, inde evenit, quia per illam sanguinis educationem cor nonnihil debilitatum fuit, hinc pulsus ejus minores evaserunt, sicque minus sanguinis è dextro ejus ventriculo in pulmones fuit impulsum, qui minori copia in iis redundans, & per ordinarios meatus levi negotio ad sinistrum ventriculum propetans, non

tam facile per leviter apertas venulas potuit effluere, sed post duos dies, corde rursus fortius pulsante, in pulmonum vasculis turgescens, facile effluxit, imprimis validiore tussis agitatione impulsus. Ad hæc, eandem ob causam, minus quoque acris sanguinis ad cerebrum impulsus est, & pauciores acres exhalationes sursum elevatae sunt, sicque pauciores acres humores in capite colligi, & ex eo ad thoracem delabi potuerunt.

**I X.** Appetitus dejicitur, propter continuam inquietudinem & agitationem à tussi, nec non debilitatem, à sanguinis per sputa evacuatione inductam: quibus de causis etiam totum corpus delassatur, omniaque viscera una cum ventriculo debilitantur. Adde, quod procul dubio etiam multi crudi humores in ventriculo, propter inordinatam diætam, generentur & colligantur, vel aliunde in eum defluant, qui appetitus stimulum obtundunt, & coctionem debilitant.

**X.** Vires dejiciuntur, partim à sanguinis copiosa evacuatione, partim à delassatione, per tussim inducta. Febris tamen abest, quia humores non putrescunt.

**X I.** Hæc affectio admodum periculosa existit.

**1.** Ratione partis affectæ, quæ ad vitam maxime necessaria est, cum nemo respiratione carere possit. **2.** Ratione magnæ causæ; quia hæc continui solutio non fit ab aliqua vasis anastomosi, sed à diæresi, seu vasis partim erosione, partim ruptione. **3.** Ratione difficilioris curationis; quod solutio hæc in curando quiete opus habeat, quæ in parte respiratoria impetrari nequit: quod etiam solutio seorsim tolli nequeat, verum etiam catarrhorum acrium defluxus & valida tussis simul curanda veniant. His pensius consideratis, magna cum ratione à Benedicte Viæ. Faventino hæc duo prognostica de tali hæmoptysi, *prax. tom. 2. cap. 6.* conscripta sunt. **1.** *Rejeto sanguine à pulmone cum tussi, disrupta vena ipsa non solidabitur, nisi magna cum difficultate, & Medici providentia ac sollicitudine.* **11.** *Ubi ex vena pulmonis vel pectoris rupta sanguis cum tussi exilierit, ab humore quidem erodente salso procedente, curationem moliri non parum difficile est.* Ratio est, quia aperto aliquo vasculo facile oboritur ulcus, ulcus sequitur phthisis, phthisis mors: teste *Hippocr. 7. aph. 15. 16.* Interim tamen, quia nostro ægro juveni virium robur mediocriter constat, febris nondum accessit, & malum in principio est, non omnino de felici sanatione desperandum est, cum alias etiam plures à tali affectione optimè curatos fuisse constet.

**XII.** Curatio igitur quamprimum incipienda, in eaque multis indicationibus satisfaciendum. **1.** Tussis sedanda. **2.** Sanguis à pulmone revellendus & avertendus. **3.** Vasa aperta constringenda & consolidanda. **4.** Catarrhorum delapsus ad pulmones præveniendus. **5.** Prospiciendum ne crudi & acres humores in capite colligantur. **6.** Sanguinis & humorum prava constitutio emendanda.

**XIII.** Præmissis igitur clystere aliove lenitivo per os exhibito, ad venæsectionem devenien-

dum, quæ postmodum subinde reiteranda est, pro ut necessitas illam urgere videtur, urget autem, cum æger gravitatem aliquam in imo pectore incipit sentire, tunc enim mox instituta venæsectio vasorum pulmonis nimiam repletionem, novamque apertionem prævenit & impedit.

**XIV.** Ad sanguinis & catarrhi incrassationem, atque tussis sedationem præscribendus talis haustus.

*Rec. pulveris haly contra tabem scrup. ij. s.*  
*coralli rubri preparati scrup. j.*  
*decocti plantaginis unc. j.*  
*syrupi de symphyto unc. s.*  
*misce, fiat haustus mane &*  
*vesperi exhibendus.*

Æger etiam sæpius de die utatur sequentiinctu, ut & amygdalato:

*Rec. syrupi de symphyto, de rosis siccis,*  
*de tussilagine, ana drach. vj.*  
*de papavere drach. iij.*  
*misce fiat linctus.*

*Rec. amygdalarum dulcium mund. unc. ij. s.*  
*femium lactuce drach. j. s.*  
*papaveris albi unc. s.*  
*decocti bordei q. s. fiat s. art.*  
*emulsio ad lib. j.*  
*cur admisce sacchari albi q. s.*  
*fiat amygdalatum.*

**XV.** Interea etiam ad catarrhi diversionem fonticulus in brachio, aut potius in cervice excitetur, & cucurbitulæ scapulis ac dorso applicentur. Præterea, ad crudorum humorum in capite collectionem præveniendam, cucupha cephalica calefaciens, corroborans, ficans, & poros aperiens, capiti imponatur. Urque via per nares rursus patefiat, clemens aliquis sternutatorius pulvis iis aliquoties immittendus.

**XVI.** Ubi his mediis tussis sublata est, & sanguinis sputum subsistit, nondum desilendum, sed malum illud diu suspectum habendum est, ac proinde ad ulteriorem erosæ aut ruptæ venæ consolidationem, acriumque humorum sublationem pergendum; in quem finem æger per intervalla clementer purgandus est, ut acres humores per epicrasin paulatim evacuentur. Intermedio tempore ter de die exhibendus haustus apozematis.

*Rec. bordei mundati unc. j.*  
*rad. consolida majoris,*  
*tormentilla, bistorta,*  
*glycyrrica rasa, ana drach. vj.*  
*herb. sanicula, veronica,*  
*pyrola, tussilagine, agrimonia,*  
*alchymilla, plantaginis, ana m. j.*  
*rosarum rubrar. m. j.*  
*capitum papaveris albi unc. ij. s.*  
*passularum cum arillis unc. iij.*  
*ficus no. v. aqua q. s. fiat*  
*s. art. apozema ad lib. j. s.*

Hujus loco potest æger subinde fumere ex hoc condito particulam magnitudinis nucis moscatæ.

*Rec. pulveris haly contra tabem drach. j. s.*  
*coralli rubri preparati, lapidis hematidis,*

COTM



*cornu servi usti, ana scrup. j. f.*  
*conserva rosarum rubrarum unc. ij.*

*Syrupi de Symphyro q. f.*  
*misce fiat conditum.*

XVII. In victu abstinendum ægro ab omnibus acidis: & licet Galenus oxycratum epotum in hoc affectu commendet quam maxime, nos tamen illud nocentissimum existimamus; propterea quod talia acida acrem tussim irriterent, qua nihil pejus in hoc casu, in quo summa quies maxime requiritur. Abstinendum etiam à salis & quibuscumque acris edulibus & potibus. Aer convenit modice frigidiusculus. Cibi sint facili digestionis & subdulces ac boni nutrimenti, & succi viscidioris, quales sunt carnes vitulinæ, agnæ, vervecinæ, pulli galinacei, & ex his parata juscula, cum hordeo

mundato, oryza, passulis, aliisque similibus. Maxime autem conveniens est lac dulce, imprimis caprillum. Potus sit cerevisia subdulcis, mediocris notæ. A vino abstinendum longo tempore: vel si forte ratione ventriculi, aut alterius cujusdam debilitatis, necessarium vini usum judicet, utendum erit rubro subaltringente, eoque subdulci, aut alio vino subdulci, sed admodum pauco. Somnus solito longior existat. Corpus quiescat. Abstineat æger à cantu, alta locutione, voci feratione, & loquatur quam minimum fieri poterit. Alvus liquida servetur, ut sine multa compressione facile deiciat. Animus omnino quietus sit, à graviore pathematibus, quantum fieri potest, immunis.

## HISTORIA VIII.

### De Phthisi.

**J**Uvenis validus, 22. annorum, postquam longo tempore nullam diatæ rationem habuisset, & admodum inordinate vixisset, primò gravativum capitis dolorem aliquamdiu passus est, qui cum circa hyemem imminui videretur, mox catarrhorum acrium crebro defluxu ad pulmones, atque hinc validissima tussi infestari cepit, qua copiosam tenacem pituitam quotidie rejecit. Cum hac molestissima tussi per aliquot menses exagitatus fuisset, tandem etiam sanguinem aliis sputis immixtum excrevit, imo jam ante tres, quatuorve septimanas etiam purulenta materia in sputis observata fuit, modò nullo, modò pauxillo sanguine admixto, eaque indies copiosior rejecta est. Sputa tamen non foetent. Accessit quoque febricula lenta continua, symptomatibus non admodum magnis comitata. Nares præter consuetudinem sicciores sunt, per easque nihil effatu dignum evacuatur. Æger totus valde emaciatur & debilis evadit. Appetitus exiguus est. Somnus à tussi plerumque interrumpitur.

I. **A**fficiuntur in hoc ægro plurimæ corporis partes, sed imprimis caput, ut liquet ex præcedente cephalalgia, & præsentibus catarrhis: Pulmo, ut liquet ex tussi ac sputis: & cor, ut liquet ex febre, quæ porro totum corpus affligit.

II. Affectus quo infestatur, Phthisi seu Tabes appellatur; quæ vocēs licet in genere quamcumque corporis extenuationem seu atrophiam, quacunque de causa ortam, significant, medicis tamen specificè Tabes seu phthisi est totius corporis extenuatio, ab ulcere pulmonis cum febre lenta procedens.

III. Causa remota hujus mali fuit victus inordinatus, à quo multi acres & vitiosi humores in corpore fuerunt generati, atque etiam ob caput frigidis temporibus non satis tectum, cerebri intemperies frigida fuit inducta, & pori capitis oclusi vel angustati sunt; hincque vapores ex inferioribus partibus sursum ascendentes,

partim ob dictam intemperiem, in cerebro fuerunt condensati; partim ob pororum angustiam in eo detenti. A quorum coacervatione & copia dolor capitis primò fuit inductus, isque non acer, sed gravativus; quia istorum humorum coacervatio imprimis facta fuit in ventriculis cerebri, qui minus sentiunt, atque hinc non tam acrimonia, quam pondere & tensione membranz cerebri affectæ fuerunt.

IV. Coacervati crudiores humores sua viscositate obstruxerunt vias illas, per quas ad nares & palatum evacuari debebant; hincque denegato ordinario exitu, per insolitas vias, quæ data porta, eruperunt, ac sic ad asperam arteriam & pulmones delapsi sunt: easque partes tum salis acrimoniâ vellicando, tum copia & viscositate obstruendo, gravissimam tussim, cum copiosa pituitæ exspitione, induxerunt, ejusque causa proxima evaserunt. Atque tunc temporis imminutus est capitis dolor, quia condensati in frigidiore

diore cerebro vapores, & humores, per inventam novam declivem viam, ilico & continue defluerunt, & etiamnum defluunt ad thoracem, nec copia, aut distensione capiti ulteriorem molestiam exhibuerunt.

V. Ab acrimonia autem catarrhorum in pulmone erosio aliqua facta est, atque hinc accedente valido tussis impetu, sanguis profusus, & sputis admixtus animadversus est, non tamen valde copiosus, quia nulla magna vasa erosa aut tussiendo dilacerata sunt. Erosionem insecuta est suppuratio & ulcus, unde purulenta materia cum aliis sputis etiam rejecta est, quæ indies copiosior evadit, propter ulceris incrementum. Nondum tamen fateri, quia morbus est in principio, atque ad tantum putredinis gradum ulcus nondum devenit, ut pus ex eo procedens foetere possit.

VI. Febricula accedit continua symptomatice, ab humoribus circa ulcus putrescentibus inducitur: quippe sanguis, à dextro cordis ventriculo in pulmonem impulsus, non potest non in transitu isto ab ulcere aliquid istorum putrescentium humorum secum rapere ad sinistram ventriculum, quod in eo accensum febrem illam parit. Quæ levior existit, quia putredo non admodum magna est. Continue tamen affligit; propterea, quod singulis cordis dilatationibus, una cum sanguine, etiam nonnihil dictæ putredinis in sinistram ventriculum incidit.

VII. Nares siccae sunt, propterea quod omnes pituitosi humores per alias vias ad thoracem ruant; nulli vero ad nares perveniant.

VIII. Egri totum corpus emaciatur, quia à putridis humoribus, in corde continue accensis, & sanguini admixtis, sanguis depravatur, & inutilis redditur ad nutritionem, ita ut partibus assimilari non possit, quæ defectu boni nutrimenti, accedente calore præternaturali, jam in corde & sanguine hospitante, necessario extabescunt, hincque ægri vires indies debiliores evadunt.

IX. Appetitus dejicitur, coctioque prima debilis evadit, partim, quia ventriculus bono sanguine non nutritur, atque hinc debilis evadit, pravosque humores generat & coacervat: partim, quia propter continuam & validam, quæ à tussi fit, agitationem, ejus naturalis constitutio læditur, ita ut neque famificam rofionem sentire, neque cibos convenienter comprehendere aut concoquere possit.

X. Ex modo dictis satis liquet, ægrum vera Phthisi laborare, cujus certissima signa sunt, sputa cruenta & purulenta, febris lenta ac continua, totiusque corporis consumptio seu extenuatio.

XI. Morbum hunc admodum periculosum esse varia docent; 1. Quod ulcus sit in tali viscere, cujus continuo usu carere non potest æger. 2. Quod sit in parte spongiosa, quæ ægre consolidatur. 3. Quod adjungatur febricula totum corpus exsiccans. 4. Quod vires admodum dejiciantur, quibus tamen validis opus est ad spu-

torum rejectionem, cum ea subsistente æger repletis bronchiis facile suffocaretur. 5. Quod ad ulceris curationem quiete opus sit, quæ in hac parte respiratoria haberi nequit. 6. Quod medicamenta integris viribus ad pulmones non accedant, sed per varias coctiones, multasque itineris ambages plurimum immutentur, antequam eo perveniant. 7. Quod febris & ulcus contraria possint remedia.

Nihilominus, quia non semel observatum est phthisicos feliciter fuisse curatos, & ad sanitatem reductos; quia etiam æger noster juvenis, nec ad extremum emaciatus est, & morbus in principio, hinc de felici sanatione spes concipienda est, omniaque media quam primum adhibenda sunt, quæ ad curationem ejus facere possunt.

XII. Indicationes curativæ hic duplices sunt. 1. Ut capitis frigidior intemperies auferatur, sicque frigidorum in eo humorum generatio & collectio, ac simul catarrhorum defluxiones & tussis impediatur. 2. Ut ulcus sanetur, & febricula tollatur.

XIII. Ut primæ indicationi satisfiat, mox catarrhorum defluxus à thorace est divertendus, per fonticulos in cervice & brachiis excitatos. Caput etiam corroborandum, redundantes in eo frigidi humores exsiccandi, constrictique pori rursus aperiendi sunt. Hunc in finem mane & vespere inunctio fiat in temporibus & bregmae, cum oleo rosmarini, salviæ, succini, nucis moscatæ, aliove simili. Præterea caput ex cephalicis consutum in capite continuo gestet.

Rec. sol. majorana, rosmarini, ana drach. j. f. florum rosarum, lavendula, melilori, ana drach. j. nucis moscatæ scrup. ij. gariophyllorum, styracis sal. ana scrup. j. fiat pulvis grossus pro capitis.

XIV. Alvus subinde lenienda cum manna, syrupo rosato solutivo, aut sero lactis dulci.

XIV. Alvus subinde lenienda cum manna, syrupo rosato solutivo, aut sero lactis dulci.

XV. Ut secundæ indicationi satisfiat, primo studendum est ut sputa facilius, eaque sine magno impetu rejiciantur, idque faciendum talibus remediis quæ simul ulcus sanant: ut tali linctu:

Rec. syrupi capilli veneris, de symphyto, rosæ sicci, ana unc. j.

Misce, fiat linctus.

Vel talibus trochiscis.

Rec. florum sulphuris, pul. glycyrrizæ rasæ, ana drach. j. rad. iridis florent. scrup. ij. pulveris Halii contra tabem, drach. ij. benzoini, croci opt. ana scrup. i. sacchari albiissimi unc. v. cum aqua rosacea q. s. fiat pasta, à qua formantur trochisci.

XVI. Si

XVI. Si tussis nimis violenta perduret, etiam linctibus nonnihil syrupi papaveris albi admiscendum erit. Præterea ad ejusdem sedationem, viriumque corroboracionem, sæpe utatur æger lacte amygdalato.

Rec. *amygdalarum dulc. mundat. unc. ij. f.*  
*sem. 4. frig. maj. ana drach. j.*  
*sem. papaveris albi drach. iij.*  
*aqua hordei q. f.*  
*fiat s. art. emulsio ad lib. j.*  
*cui addo syrupi papaverini drach. ij.*  
*sacchari rosati. q. f.*

Misce fiat amygdalatum.

XVII. Postea ad citiorem ulceris consolidacionem, tale conditum præscribendum.

Rec. *pulveris Haly contra tabem drach. iij.*  
*conserva rosarum rubrarum antiqua unc. j. f.*  
*syrupi de symphyto q. f.*  
*fiat conditum.*

XVIII. Quantum ad diætam, cujus summa quoque ratio habenda est; vivat æger in aëre calidiusculo & sicco. Cibi sint boni succi, concoctu faciles, & multi nutrimenti, ut ova forbilia, juscula ex carnibus vervecinis, vituli-

nis, pullis, cum hordeo mundato, passulis, oryza, amygdalis, cherefolio, betonica, aliisve similibus parata: item gelatinæ ex dictis carnibus confectæ. Inter alia autem omnium maxime convenit usus lactis; præcipue caprilli, cujus manè & vesperi aliquot unciz recenter multæ statim tepidè ebibendæ, neque intra duas, tresve ab assumpto lacte horas aliquid edendum vel bibendum, ne admixtione aliorum assumptorum lac in ventriculo acefcat, coaguletur, vel corrumpatur. Abstinentum à cibis prævi nutrimenti, aut difficilis coctionis, item antiquis, falsis, fumo siccatis, piscibus marinis, fructibus horariis, &c. ab omnibus etiam acidis rebus. Potus sit ptisana, aut decoctum hordei, cum multo saccharo rosato dulcoratum: cavendumque ab omni potu forti, fumoso, acri, aut subacido. Somnus sit longior, & corpus quiescat. Alvus & sputa convenienter procedant: omniaque tristitia animi pathemata vitentur; ut & curæ, ira, terror, seriæ occupationes mentis, &c. Ad lætitiâ & hilaritatem animus componendus.

## HISTORIA IX.

### De Syncope.

**V**ir quadraginta annorum, temperamento pituitoso præditus, postquam lactucas, cucumeres, fructus horarios, lac pressum, aliaque similia durante ætate copiosa ingessit, tandem appetitu paulatim omninò prostrato, admodum debilis evasit, cum quadam somnolentia & Torpore, ac syncope multoties redeunte, imprimis si aliqua de causâ contristetur vel exterreatur: qua Syncope, cum extremarum partium magna refrigeratione & sudore frigido, interdum per semihoram, aut longius detinetur, ita ut illum jam mortuum esse putent adstantes; quia tunc pulsus modò vix, modo nihil amplius sentitur, & nulla manifesta respiratio percipitur. Ad se reversus æger conqueritur de languore cordis, & nausea bundus pituitæ mucosæ copiam ex ore dimittit. Nulla febris adest, ut nec ullus dolor.

I. **A**fficiuntur in hoc ægro variæ partes, & multoties totum corpus: malorum autem scaturiginem præbent ventriculus & cor, unde reliquarum affectiones procedunt.

II. Affectio hic maxime urgens est crebra Syncope, quæ est, ingens & præceps virium prostratio, ex caloris & spirituum vitalium defectu procedens.

III. Syncopen, non verò apoplexiam esse, liquet ex pulsu & respiratione, quæ duo hic deficiunt ab ipso initio, cum in apoplexiæ principio aliquamdiu perdurent; & sic etiam lisdem signis facile ab aliis soporibus distinguitur.

IV. Causa remota hujus Syncopes est victus

inordinatus, quo multa frigida & cruda sunt ingesta, à quibus in corpore pituitoso per se ventriculus admodum debilitatus primam coctionem malè peregit, ex iisq; ingestis magnam pituitæ copiam generavit, antecedentem causam constituentem, quæ viscosa pituita superiori orificio ventriculi pertinacius adhærens, & in ipsa quoque ejus cavitæ copiosior collecta, valde magnam frigidam, humidamq; intemperiem ei impressit, sicque hujus intemperiei, & simul dejecti appetitus causa proxima evasit: & quia magnus consensus est stomachi cum corde, tum propter viciniam, tum propter nervos sextæ conjugationis stomacho, cordis orificiis & pericardio insertos, hinc etiam modò magis, modò minus lan-

guet eor, atque interdum deficiens syncopen patitur. Idque propterea, quod sanguis pituitosus, ventriculos ejus transiens, partim ob ejus languorem, partim ob ipsius sanguinis frigiditatem & ineptitudinem, in corde parum attenuetur, ex eoque paucissimi spiritus generentur, quorum paucior effluxus vires debiles, ac multoties omnino prostratas reddit.

V. Concidunt autem actiones non minus animales quam vitales: deficientibus enim spiritibus vitalibus in corde, nulli etiam generantur animales in cerebro, utpote quorum materia è qua sunt spiritus vitales. Ad hæc, deficiente motu cordis, etiam deficit cerebri motus, utpote qui à cordis motu dependet, atque hinc, licet fortè aliqui spiritus animales in cerebro superfint, tamen propter defectum motus cerebri non possunt moveri in nervos, & impelli ad partes animalibus actionibus inservientes; atque hinc, etiam extra syncopen, à spirituum animalium paucitate, corpus torpidum est, cum quadam somnolentia.

VI. In ipsa Syncope jacet æger tanquam mortuus, ob summam virium & actionum omnium prostrationem. Externæ partes frigent, quia nullus sanguis calidus è corde, jam deficiente, & fere in totum quiescente, ad illas impellitur. Sudor adest frigidus & viscosus, quia halitus tenuissimus, qui alioqui per poros cutis insensibiliter exhalare consuevit, à subito caloris defectu repente incrassatur, sicque viscosus cuti adhærens frigidum sudorem parit. Respiratio vix ulla manifesta percipitur, quia deficiens cor sanguinem calidum è dextro ventriculo ad pulmonem non impellit ad refrigerandum: ad hæc, deficiente cordis, & per consequens cerebri motu, paucissimi vel nulli spiritus animales ad mufculos respiratorios impelluntur.

VII. Desinente syncope superest languor cordis; propter pituitæ in ventriculo contentæ copiam; quæ cum aliqua nausea etiam ab ore effluit. Nulla febris, nullusque dolor adest, quia hæc pituita caret putredine & acrimonia.

VIII. Periculosus admodum est affectus, tam ratione principis visceris affecti, quam ratione curationis, quæ in subjecto viribus fere destituito difficulter peragi poterit.

IX. Curatio alia debet esse cum æger syncope detinetur, alia cum est extra syncopen.

X. In ipsa syncope extremarum partium frictiones fortiores sunt instituendæ, moschus, ambra, benzoinum, styrax, melissa viridis contrita, aliave similia odorata naribus admovenda, vel sola, vel vino, aut spiritui vini immixta. Pauxillum aquæ vitæ Matthioli, spiritus vini, aquæ cinnamomi, aut vini hippocratici cum cochleari ori infundendum. Cordis & ventriculi regio tali epithemate calide fovenda.

Rec. Rosmarini, melissa, mentha,  
fol. lauri, ana m. j.  
Nucis moscata, cinnamomi,  
gariophyllorum, ana drach. j. f.  
sem. faniuli drach. ij.

vini generosi q. s.  
coquantur s. art. ad lib. j.  
adde colatura, spiritus vini unc. ij.  
misce, fiat epithema.

XI. Extra Syncopen, pituita in ventriculo cumulata clementer est subducenda, in quem finem dandus talis bolus.

Rec. Elect. hiera picra drach. ij.  
fiat bolus.

Vel hic pulvis:

Rec. Rad. jalappa, cinnamomi  
electi, ana scrup. j.  
diagridii gr. iij. fiat pulvis.

XIII. Postea ad cordis & ventriculi corroborationem, ac simul clementem pituitæ absterisionem, præscribendum vinum medicatum, de quo æger quotidie, vel alternis diebus matutino tempore haustum fumer.

Rec. Rad. helenii unc. f.  
aceri, galanga, ana drach. ij.  
herb. melissa, majorana,  
summitat. absinthii, anam. f.  
cortic. arantiorum  
bacc. juniperi, ana m. f.  
sem. feniculi, anisi ana drach. j. f.  
agarici, aloes lucida ana drach. j.  
cinnamomi electi drach. ij. f.  
gariophyllorum scrup. ij.  
fiat ex his puppa, suspendenda in vini albi  
odoriferi lib. iij.

XIII. Interdiu utatur æger subinde pauxillo vini Hippocratici, vel melicrati, in quo puppa ex cinnamomo, gariophyllis, nuce moscata, zingibere, & granis cardamomi est suspensa: vel particulâ talis conditi:

Rec. Specierum diambra, diamofchi  
dulcis, ana drach. j. f.  
cortic. aurantiorum, rad. helenii, &  
Zingiberis condit. ana unc. f.  
conserve anthos unc. v.  
olei cinnamomi;  
gariophyllorum, ana gut. ij.  
sympi conservat. zingib. q. s.  
misce, fiat conditum.

Vel utatur his tabellis:

Rec. Cinnamomi elect. scrup. ij.  
macis, gariophyllor.,  
zingiberis albi, ana scrup. j.  
specierum diambra drach. j.  
sacchari vino odorifera dissoluti unc. iij.  
flant. f. art. tabella.

XIV. Extrinsecus regioni cordis & ventriculi applicetur hic sacculus.

Rec. Gariophyllor., cinnamomi, nucis moscatae,  
styracis cal, benzoini, ana scrup. j. f.  
fol. majorana, rosmarini, ana m. f.  
fiat pulvis grossus, è quo in serico  
consuatur sacculus s. art.  
intersutus.

Denique pomum ambræ appellatum; vel styrax, benzoinum, cardamomi grana, cinnamomum, gariophylli, aliave aromata odorifera nonnihil contusa, & in tenui serico instar noduli colligata,

ligata, vel pomo eburneo aut argenteo perforato inclusa, sæpe naribus admoveantur.

XV. Cum virium lapsus jamjam imminere videtur, mox exhibendum cochleare unum aut alterum hujus mixturæ:

Rec. Vini rhenani generosi unc. iij.

aqua cinnamomi lunc. j.

aqua vitæ Matthioli drach. vj.

confectionis alkermes drach. j. s.

sacchari perlati, q. s.

ad levem dulcedinem, misceantur.

Defectu hujus compositi dandum aliquantum vini generosi, aut spiritus vini, aut aquæ vitæ Matthioli, aliudve simile quod ad manum est.

XVI. In diætâ sit aer temperatus vel calidiusculus. Pavimentum cubiculi herbis odoriferis conspergatur, ut melissa, mentha, calamentha, thymo, rutha, rosmarino, majorana, &c. Vel ex aromatibus suffumigia fiant.

Cibi sint pauciores, sed facili digestionis &

boni ac multi nutrimenti; quales sunt succi ex pullis aut perdicibus assis expressi, juscula carnis vervecinæ, aut vitulinæ, aut gallinarum, præparata & condita cum melissa, rosmarino, salvia, betonica, foliis lauri, radice raphani sylvestris, semine fœniculi & anisi, nuce moscata, gariophyllis, pipere, zingibere, cinnamomo, passulis, aliisque similibus.

Potus sit vinum mediocre, modica quantitate sumptum, aut melicratum, vel cerevisia medicis notæ, non acida, in qua pauxillum absinthii suspensum est. Subinde etiam pauxillum vini absinthitis vel Hippocratici, vel cochleare aquæ vitæ Matthioli, aut spiritus vini juniperini, cinnamomati, aut fœniculati sumere conducet.

Somnus brevior existat. Corpus levi aliquo exercitio, pro virium ratione, exerceatur. Excreta alvi, si sponte non satis procedant, arte nonnihil prætentur. Animus quietus sit, immunis à curis & tristibus pathematibus.

## HISTORIA. X.

### De Palpitatione Cordis.

**V**Ir triginta quatuor annorum, fortis, sed melancholicus, & simul nonnihil scorbuticus, cibus salis, fumo siccatis, aceto conditis & servatis, aliisque duræ digestionis à longo tempore assuetus, ante hac multoties de aliqua ponderosa sinistri hypochondrii molestia conquestus est; jam verò aliud quid accessit, nam sæpe tribus quatuorve horis post pastum, magnam cordis palpitationem perſentit, quam pulsus fortior, admodum inæqualis, & nonnunquam spatio unius aut duorum ictuum intermittens, comitatur, quo tempore magna anxietate premitur. Durat hæc vehemens palpitatio per semi horam, vel paulo longius, postea rursus cessat, redeuntibus subinde levibus quidem, sed brevibus palpitationibus. Cum æger cursu, aliove exercitio corpus plus solito movet, mox palpitationes molestissimæ redeunt, eademque per quietem rursus sedantur. Appetitus satis constat, & ventriculus benè digerit. Somnus etiam sufficiens est, excepto quod propter terribilissima insomnia multoties turbatur.

**P**ræter alias partes, omnium manifestissime in hoc ægro afficitur Cor, hæcque dicta ejus affectio Medicis appellatur *Palpitatio cordis*, qua est inordinatus & nimis vehemens cordis motus.

Causa proxima est humor falsus & acris sanguini permixtus, qui chylo, ex falsis acribusque cibus confecto, tribus quatuorve post pastum horis in venam cavam effuso, permixtus, cum eoque in cor illapsus, inordinatæ & vehementis in chylo sanguificando fermentationis causa est, propterea quod acres falsæque chyli particule, una cum sanguine venoso, acri isto humore imprægnato, in cor delapsæ fermentationem ni-

mis augeant: unde tunc illa nimis vehemens & inordinata cordis præter modum dilatati & contracti concussio procedit, quam fortis & inæqualis articularum pulsus necessario sequitur.

III. Quia in illo falso & acris humore particulis tenuioribus hic illic admiscuntur multæ particule crassiores, magis fixæ, & ægrè dissolubiles, quæ in corde tam citò dissolvi & attenuari nequeunt, hinc fit, quod, dum cor in earum dissolutione & dilatatione opus habet longiore tempore, illis in ventriculos illabentibus, pulsus ad tempus unius aut duorum ictuum intermittat, unde etiam tunc anxietas oritur, nam quo tempore pulsus intermittebat, nulli spiritus ad

partes propelluntur.

IV. Durat hæc vehemens palpitation per semi horam, aut paulo longius; quia isto intervallo totus chylus uno pastu confectus, aut maxima ejus pars sanguini cavæ permixta, per cor transit, & pro ut postmodum aliquæ pauciores residuæ ejus partes adhuc transeunt, ita nonnullæ leves & breves palpitationes postea oboriuntur.

V. Quod verò acris ille humor, continue ad cor cum sanguine venoso profluens, non faciat continuam palpitationem, ex eo fit, quod sanguinis, illiusque acris humoris jam multoties in corde fermentati & dilatati particulæ sint æqualiores, multum mitigatæ, & minus acres, atque hinc in eo tam vehementes effervescentiæ in corde excitari nequeant, si modò quantitate mediocri & paulatim in ventriculos illabatur. Quod si verò cursu, aliove gravi exercitio corpus admodum moveatur & incalascit hincque sanguis copiosior cum suis acribus immixtis particulis rapidè per cor transeat, mox cum ab aucto calore, tum ab acrium particularum in cor illabentium majore copia, nimis increfcit dicta effervescencia, hinc cordis palpitation exoritur; eaque per quietem rursus imminuitur & cessat, imminuto scilicet calore, & nimio sanguinis motu, copiosoque transitu per cor.

VI. Hic autem falsus & acris humor peculiariter vitio lienis generatur, ex eoque per ramum splenicum in hepar effunditur, in quo cum sulphureo succo in chymum excoquitur, atque in cava sanguini ad cor fluenti admiscetur. Vitium illud lienis, est quædam prava salsaque ejus intemperies, cum aliqua obstrukctione, ponderosam molestiam inducente, conjuncta.

VII. Ventriculus satis famelicus est, beneque alimenta assumpta digerit; quia primario non laborat, & acres succi sanguini immixti per arterias ad ejus tunicas cum sanguine delatis fermentationem in eo faciunt.

VIII. Somnus sufficiens, sed tericulofus est, quia satis copiosi quidem, sed nonnihil acres vapores ad cerebrum feruntur, qui somnum quidem provocant, sed membranas cerebri & principia nervorum subinde nonnihil vellicantes, sicque phantasiam præter ordinem excitantes, tericulosa insomnia procreant.

IX. Affectus hic licet ægrum non repente prosterнат, tamen periculo non omnino vacat, partim quia afficitur princeps viscus cor; partim, quia lienis illa prava dispositio non tam citò & facile tolli poterit; ægri tamen robur & morbus non admodum inveteratus sanationis spem faciunt.

X. In curatione ad tres scopos collimandum est. 1. Ut lienis vitium corrigatur. 2. Ut falsi acresque humores in sanguine redundantes partim attenuentur & melius coquantur. 3. Ut cor omni modo corroboretur.

XI. Ut his tribus indicationibus satisfiat, primò bis terve medicamentis melanagogis & phlegmagogis humores crudi, falsi & acres è corpore sunt evacuandi, ut pilulis coctis, de hiera, aureis, electuario diaphanico, hiera picra, confectio

thione hamech, infusione foliorum senæ, agarici, &c.

XII. Postea hujusmodi apozema præscribendum.

Rec. rad. helenii, fœniculi ana unc. j.

capparum, tamarisci, ana unc. s.

Herb. chamedryos, cuscute,

sumaria, boraginis, cardiaca,

trifolii palustris, ana m. j.

melisse, m. ij.

Corticum citri,

baccar. juniperi, ana drach. v.

Sem. fœniculi drach. iij.

Passularum corinth. unc. ij.

Aqua & vini, ana part. aq.

Coquantur. s. art. &

fiat. apozema ad lib. j. s.

XIII. Hoc absumto, bibat æger singulis matutinis haustum hujus vini medicati.

Rec. radic. acori, helenii, ana unc. s.

cappar. tamarisci, ana drach. ij.

Herb. trifolii palust.

chamedryos, ana m. s.

Cort. aurantiorum unc. s.

baccar. juniperi drach. vj.

Cinnamomi electi drach. j. s.

gariophyllorum, scrup. j.

Sem. fœniculi drach. ij.

aloes lucida, Agarici albiss. ana scrup. iij.

fiat ex his puppa.

XIV. Post meridiem bis terve utatur hujus conditi particula magnitudinis nucis moscata.

Rec. Specierum diambra,

diamoschi dulc. ana drach. j.

cort. aurantiorum, & rad.

helenii condit. conserva anthos,

flor. salvia, melissa, ana unc. s.

syrupi helenii q. s.

misce, fiat conditum.

XV. Imprimis autem necesse est ut æger convenientem victus rationem instituat. In ære versetur calidiusculo. A cibis abstineat salis, antiquis, rancidis, acidis, fumo siccatis, aliisque quibusvis duræ digestionis & acribus. Item à brassicis & quibusvis leguminibus, à lactucis, cucumeribus, melonibus, multisque fructibus horariis, aliisque pravi nutrimenti. Cibi sint euhymi & facilis digestionis, ut carnes vitulina, vervecina, agnina, gallinarum, cuniculorum, perdicum, &c. quarum juscula præparentur, cum rosmarino, boragine, melissa, betonica, hyssopo, calamentha, serpillio, foliis lauri, radice raphani sylvestris, corticibus citri & aurantiorum, seminibus anisi & fœniculi, passulis, nuce moscata, cinnamomo garyophilis, zingibere, &c. Item pisces saxatiles, rapæ; ova recentia.

Potus sit cerevisia mediocris notæ, non antiqua vel acida. In pastu etiam vinum album bene maturum.

Somnus & corporis exercitia mediocria sint.

Excreta naturalia curandum ut bene procedant.

Fugienda ira, terror, curæ, omniaque tristitia animi pathemata.

Prima-

*Primariorum morborum Infimi ventris,*  
**MEDICATIONES.**  
 tribus disputationibus

AD

**HISTORIAS ÆGRORUM**

PROPOSITÆ

HISTORIA. I.

*De Fame præternaturali.*

**J**Uvenis 28 annorum, qui toto corpore sanus, sed nonnihil melancholicus esse videtur, & duris, falsis, acidisque alimentis oblectatur, nonnunquam repente maxima atque intolerabili fame corripitur, & nisi mox vinum aut cerevisiam fortiorem largo haustu bis terve bibat, ac nonnihil panis alteriusque cibi comedat: de visus aliqua obscuritate, cum levi vertigine conjuncta conqueritur, adeoque protinus debilitatur, ut se sustinere nequiens in lipothymiam incidat: è qua ad se nonnihil reversus, vino & pane dato iterum reficitur, ac post refectionem aliquot diebus ab illa fame immunis manet. Hic affectus interdum tempore matutino, cum æger jejunus est, interdum hora una aut altera post pastum, ventriculo nondum inanito, cum invadit subito, nulla precedente nausea, nullo comitante vomitu.

**A**fficitur in hoc ægro ventriculus secundum partem superiorem, appellaturque ejus affectus *Bulimus*, qui est, *Maxima fames præter naturam, hominem subito invadens, cum debilitate & lipothymia.*

II. Causa remota fuit melancholica corporis dispositio, & talis diæta quæ lienis coctionem nonnihil vitiavit, sicque multos acres acidosque humores, à liene malè coctos (antecedentem causam constituentes) in corpore genuit; qui inde ad ventriculum delati, ejusque superiori parti prope stomachum adhærentes, eam peculiari modo vellicarunt, & acida quadam intemperie ac constrictione famem vehementem induxerunt, sicque causa continens evaserunt.

III. Lipothymia subsequitur, viriumque prostratio, propter eximium consensum stomachi cum corde & cerebro, per nervos sextæ

conjugationis, seu vagos, qui multiplici ramificatione stomacho ac superiori parti ventriculi inseruntur; hincque iis circa stomachum malè affectis, mox per sympathiam afficiuntur cerebrum & cor. Hoc, quia ab eodem pari vago suos nervulos habet, & quam proximè stomacho incumbit. Illud, quia ex eo nervi illi vagi progrediuntur, quorum mala circa stomachum affectione cerebro communicata, mox spirituum animalium motus & è cerebro effluxus turbatur, atque inordinatus fit, unde visus aliqua obscuritas & levis quædam vertigo oboritur; ac propter spiritus eandem ob causam pauciores in musculos influentes, corpus tremit, ægerque se sustinere vix potens, interdum concidit. Adde, quod propter eundem inordinatum & parciorem spirituum animalium influxum, etiam cor debilitetur & inordinatè moveatur, sanguinemque arteriosum pauciores & inordinatè ad cerebrum tran-



transmittat, unde & illud non convenienter dilatatum pauciores spiritus gignit, atque ex se propellit.

Æquè paucis horis post pastum, atque jejuno stomacho invadit hic affectus, quia quocunque tempore subacidus ille succus in ventriculum influit, & superiorem ejus partem vellicat, ingens illa fames obruitur. Succum autem illum aliquandiu post pastum influentem, post protinus ab alimentis in ventriculo contentis obtundi, sed iis sæpe innatare, sicque superiorem ventriculi partem vellicare, imò nonnunquam cum aliqua nausea ad os ascendere, docet usus.

V. Vino generoso aut cerevisia optima roboratur æger, affectusque mox mitigatur, quia talis potus spiritus, cum vitales, tum animales reficit, & humorem acidum ventriculi tunicis adhaerentem diluit, imò & digerit ac concoquit, suaeque admitione acerbam ejus vim refringit, unde fit, ut semel sic sedata fames non statim redeat, sed aliquot dierum spatio opus sit, antequam alius similis collectus humor ad ventriculum feratur, eumque vellicet ut ante.

VI. Nullis hic opus est signis diagnosticis, cum affectus se ipsum prodat, & ex ægri relatu sciri possit. De eventu autem statuendum, quod periculosus existat, & metuendum sit, ne aliquando hac fame tali loco corripatur æger, quo potus & cibus ad manum haberi non potest, atque sic horum defectu graviore lipothymia protrahatur extingatur.

VII. Ea propter curatio quamprimum instituenda, jubendumque ut æger nusquam foras procedat, nisi pane & vino generoso comitante, ut hostis subito invadentis vires talibus armis mox infringere, suasque collabentes vires protinus reficere possit.

VIII. Præterea corpus subinde clementer purgandum cum elect. hiera picra, pilulis cochis, Ruffi, aliisque similibus, abstinendo à valde fortibus. Si tamen æger facilis sit ad vom-

tum, non inutiliter exhibebitur vomitorium ex aloë.

IX. Ad ventriculi & lienis corroboracionem, ac coctionis emendationem, præscribendum apotema.

Rec. Rad. tamarisci, capparum, helenii, ana drach. vj.

galanga, unc. f.

Herb. chamaedrys, cuscuta, eupatorii, stolopendria, melissa, ana M. j.

fol. lauri M. f.

Cort. aurantiorum, unc. f.

Bac. juniperi, drach. vj.

Sem. feniculi, drach. ij. f.

Passularum corinth. unc. j. f.

Aqua & vini, ana part. æq.

Fiat s. art. apoz. ad lib. j. f.

Eundem in finem etiam præscribendum conditum.

Rec. Specierum diambra,

diarrhodonis abb. ana drach. j.

Rad. Helenii, & cort. aurantior.

condit., Conserv. anthos,

& flor. salvia, ana unc. f.

Syrupi helenii q. s. fiat. s.

art. conditum.

XI. In victu prohibenda alimenta duræ digestionis, salsa, acida, & acria: & præscribendi cibi euchymi & eupepti, ut carnes vervecinæ, agnina, vitulina, gallina, cuniculi, pisces saxatiles, &c. quorum juscula condienda sunt cum cherefolio, boragine, melissa, rosmarino, betonica, semine anisi & feniculi, nuce moscata, gariophyllis, raphano rustico, &c. Potus sit minimè acidus, sed subdulcis, ut cerevisia bene defœcata, unius aut duarum septimanarum, & vinum medicre. Versetur æger in aëre lucido, minimè nebuloso: corpus mediocriter exerceat, nec somno nimis indulgeat, fugiatque iram & quælibet tristitia animi pathemata.

## HISTORIA.

### De appetentia Canina.

JUVencula 30. annorum, melancholica, subtristis, cibos sallos, fumo siccatos, acres, acidos, aliosque duræ digestionis edere consueta, per integrum annum ingenti fame laboravit, sine lipothymia. Quælibet edulia ingenti copia avidissime comedit, & mediocriter potum superbibit: repleto ventriculo fames non omnino cessat, sed aliquanto mitior evadit. Paulo post pastum omnia assumpta rursus evomit, quæ isto exiguo temporis intervallo adeo acida in ventriculo evaserunt, ut adstantibus valde acidum nidorem offerant, & ægra dicat illa sapore succi limonum aciditatem superare. His ejectis præ ingenti fame mox iterum edere cogitur, assumpta paulo post rursus evomendo. Atque dies noctes que modò edere, modò vomere posset, nisi res angustior domi subinde molestissimam abstinentioniam, & dolorosum famis perpeffionem injungeret. Interim paulatim emaciatur ægra.

I. Affc.

I. **A**ffectus hujus ægræ est *Canina appetentia*, id est, *Maxima fames sine lipothymia*, ab acida inferioris ventriculi intemperie procedens, qua alimenta copiosa avidissime assumuntur, ac non diu post rursus evomuntur (etiam per inferiora deturbantur) & iterum alia comeduntur, sine insigni famis imminutione.

II. Differt à bulimo, quod in hoc adfit yrium prostratio sine vomitu, sed multoties cum lipothymia, in illo vomitus, sine insigni debilitatione.

III. Afficitur in hac ægra ventriculus, imprimis secundum inferiorem partem: ejusque affectus ex relatu ægræ satis cognoscitur.

VI. Causa continens est humor acidus ac viscidus, vitio lienis genitus, & in ventriculum infusus, ejusque tunica rugosa inferiore parte firmiter inhaerens, qui aciditate sua ventriculum simili intemperie afficiens, ac peculiari modo vellicans, inducit appetitum vehementem ad sumenda alimenta in molestæ vellicationis remedium. Quibus cum ab eodem humore etiam valde acida constitutio imprimatur (sicut vinum quod in aceti vas infusum statim acescit) sicque vellicatio molestior fiat, mox è cerebro copiosis spiritibus ad ventriculi inferiores fibras determi-

natis, fit inferiorum tunicarum ventriculi contractio, sicque, ope musculorum abdominis valida contentorum expulsiō seu evomitio; quia dictus acidus humor ventriculi tunicis firmiter impactus, nec dissolvitur, nec ejicitur, imò potius à liene fovetur, fit ut post vomitum eadem ingens fames adhuc infellet & perduret.

V. Non adjungitur lipothymia, quia inferioris partis Ventriculi non est eximius consensus cum corde & cerebro.

VI. Quia hæc vehemens fames cum vomitione conjuncta, nutritionem debitam fieri impedit, non parvus atrophia, ac tandem dejectionis virium metus incumbit.

VII. In curatione corpus subinde evacuandum cum aloë, hiera picra, infuso agarici, aliisve amaris: item vomitus bis terve promovendus cum foliis asari.

VIII. Postea deveniendum ad talia, quæ lienem & ventriculum corroborant & abstergunt, coctionesque promovendo acidas cruditates consumunt, qualia sunt illa modò ad bulimum præscripta, aliaque similia, ut & similis diæta, qualis bulimo dicata.

## HISTORIA II.

### De ventriculi difficili coctione.

**V**ir quinquagenarius, falsis, acidis, fumo duratis, aliisque duræ digestionis cibis uti consuetus, postquam cum febre quartanâ intermittente per octo menses conflictatus fuit, tandem ab eâ liberatus, & convalescens, vires lente recuperat, propterea quod ventriculus assumptos cibos ægerrime digerat; quippe post pastum valde angitur à magna tensione, quæ ipsi in ventriculi, & hypochondriorum regione oboritur, nonnunquam cum levamine ructus aliquos, magno cum impetu & sono eructat, quos quo pauciores excutit, eo magis angitur. Interdum nullos ructus emittit, & tunc cibos comestos diu in ventriculo fluctuare sentit, eosque non raro postridie plane crudos & incoctos, cum aliquo levamine anxietatis evomit, sicque ab anxietate illâ liber manet, quo usque ventriculus inanis est, eaque post assumptos cibos redit. Urina crassa & subpallida est, cum sedimento crasso, copioso, subpallido, nulla febris percipitur; sed pulsus est debilis atque inæqualis, vires languent, & animus dejectus est.

**A**fficitur in hoc ægro pars primæ coctioni seu chylicationi inserviens, nempe ventriculus, in quo admodum difficilis fit alimentorum assumptorum coctio, quam uno Græco vocabulo *βενδυνησις* appellant Medici à frigida intemperie ventriculi & viscerum chymificantium procedentem.

II. Causa proxima hujus mali est, fermenti ad fermentaceam coctionem in ventriculo promo-

vendam ineptitudo, inde procedens, quod ejus particulae subacidae & subsalsæ sint minus fixæ, nec ad istam fluxibilitatem & tenuitatem deductæ ut alimentorum particulas permeare, spiritusque in iis latentes suscitare, & è crassiore massa dissolvere queant.

III. Illud fermenti vitium contrahitur propter viscerum chymificationi inservientium (hepatis, lienis, pancreatis, &c.) pravam, ac minus

nimis frigidam dispositionem, cujus ratione fermentum preparandum non satis concoquunt, nec ad justam tenuitatem ac fluxibilitatem deducunt, sed nimis fixum crudumque conficiunt, quod per circulationem toti corpori communicatum ubique cruditates parit. 1. In sanguine, qui hinc difficulter, & propter inæquales particulas, inæqualiter in Corde dilatatur (unde pulsus debilis & inæqualis) paucique & crassiores spiritus, cum vitales, tum animales, ex eo suscitantur, unde virium languor, & animi dejectio. 2. In glandulis faucium salivalibus, aliisque capitis, in quibus etiam generatur succus fermentaceus salivialis crudus, qui in ventriculum delapsus, ineptus est ad debitam fermentationem alimentis inducendam. Huc accedit, quod succi fermentacei per ductum cholidochum & pancreaticum in duodenum intestinum defluentes, ac sui aliquâ parte ad ventriculum ascendentes, ad promovendam fermentaceam coctionem, aut non, aut parum juvent, propter ineptitudinem, quam à nimia cruditate & fixitate habent, atque hinc aut nullam fermentationem faciant (tunc cibi diu in ventriculo fluctuant, & postmodum plane crudi vomitu ejiciuntur) aut solummodo flatuosam quandam alimentorum dilatationem inducant, unde ventriculi magna distentio cum anxietate, & interdum crassi ructus procedunt, cum magno sonitu erumpentes, ob materiæ crudæ, qua continentur, viscositatem. A quorum eruptione distentio, cum hinc procedente anxietate, pro tempore imminuitur.

IV. Mala dispositio viscerum chymificantium contracta fuit per inordinatam dietam, multumque & longum usum ciborum crassorum, acrium, concoctu difficilium, è quibus chylus non satis excoctus, ex eoque sanguis crudior, ac minus dilatabilis genitus fuit, qui ad viscera chymificantia delatus, ab iis convenienter subigi nequivit, atque sic paulatim, cum à dicto sanguine, tum à fermentaceo succo malo genito, debilitas & vitiosa dispositio iis impressa est, cujus ratione chymum nimis fixum ac crudum, & minus efficacem conficiunt, quo etiam non parum contulit, longa febris quartana præcedens, quæ succi melancholici vitio orta, vitiosæ debilitatis, ac digestionis lienis ac pancreatis haud parva causa fuit.

V. A chymo male excocto, hincque in ventriculo genitis, ac collectis crudis humoribus, frigida intemperies ipsi ventriculo est impressa, cujus ratione etiam ille suo munere non satis perfungitur, & neque fermentaceam materiam, tunicis suis adhærentem, ad ulteriorem perfectionem deducit, neque hujus imperfectionis ergo alimentorum concoctionem convenienter molitur ac perficit.

VI. Ob pituitosorum humorum in sanguine redundantium copiam, etiam bona eorum pars cum sero per renes transit, hincque urina est crassa ac sub pallida cum consimili sedimento.

VII. Nulla comitatur febris, quia neque putredo, neque excellens sulphurea effervescencia adest.

VIII. Admodum molestum malum est, quod defectu convenientis nutritionis, paulatim vires imminuendo periculum minatur, cui proinde convenientibus remediis cito est occurrendum.

IX. In curatione corpus subinde purgandum cum hiera picra, diaphænico, pilulis Cochiis, infusione agarici, sol. senæ, aliisque similibus.

X. Deinde præscribendum apozema, de quo ter quaterve de die haustus exhibendus.

Rec. Rad. Helenij, calami aromatici ana unc. j.

rad. Zedoaria, tamarisci ana unc. f.

herb. calamenth., rosmarin.

chamedrys, cuscute, meliss. ana m. j.

fol. laur. majoran. ana m. f.

baccar. juniperi

corticum aurantiorum ana unc. f.

sem. anisi, fœniculi ana drach. ij.

passul. mundat. unc. ij.

aq. & vin. alb. ana partes æquales

F. s. a. apozema ad lib. i. f.

XI. Ventriculus & reliqua viscera corroboranda tali condito

Rec. Zingib. condit.

rad. helen. condit., cort. aurant. condit.

conserv. anthos, flor. saly. ana unc. f.

ol. juniper. scrup. j.

anis. gut. vii i i.

ol. cinamomi, gariophyllor. ana gut. i. vel ii.

syr. helen. q. f.

m. F. conditum.

XII. Si his non imminuatur affectus, exhibendum vomitorium.

Rec. Fol. asar. recent. drach. iiij.

aq. raphan. unc. ij.

exprimatur s. a. succus. adde

vin. vomitivi. drach. iiij.

oxymel. scyllitici. unc. f.

m. F. haustus.

XIII. Postea veniendum ad usum vini medicati, de quo singulis matutinis haustum bibet, intermediis horis subinde sumendo particulam antedicti conditi.

Rec. Rad. helen. unc. f.

Zedoaria drach. ij.

herb. chamedr. majoran.

cardui. ben. ana m. f.

cort. aurant. bac. juniper. ana drach. iiij.

sem. anisi, fœniculi, ana drach. j.

gariophyllorum.

cinnamomi ana scrup. ij.

aloes lucid. scrup. iiij.

fiat puppa, suspendenda in vini

albi lib. iiij

XIV. In victu prohibendi sunt omnes cibi difficilis concoctionis, carnes porcine, & quælibet aliæ muria servatæ, aut fumo siccata, similiter pisces saliti, alique difficilis coctionis aut pravi nutrimenti. Præscribendi cibi facilis digestionis, & boni succi, conditi cum radice raphani sylvestris, majorana, rosmarino, salvia, foliis lauri, seminibus anisi, & fœniculi, pipere, garyophillis aliisque aromatibus, passulis, rapis, &c. potus sit vinum mediocres, cerevisia mediocris

notæ,

notæ, interdum post pactum cochleare spiritus vini, aut aquæ vitæ matthioli: vivat æger in aëre, mediocriter calido, in somno modum servet.

Corpus mediocriter exerceat, & ventriculi regionem ac hypochondria interdum inungat

oleo nucis moschatæ, & contegat pelle vulturis, aut felis sylvestris, excrementa corporis procurandum, ut bene evacuentur. Animi tristitia, & terribilosa pathemata cære pejus & angue fugienda.

## HISTORIA. III.

*De Affectione Hypochondriaca cum nausea & vomitu.*

**V** Ir florentis ætatis, duris, falsis, acidisque cibis diu assuetus, otiosus vivens, à longo tempore nausæa quorumcunque alimentorum detentus, modò planè inappetens, modò nimis appetens fuit, sed ingesta alimenta cum rugitu, tensione, ac dolore ventriculi ægrè tulit & digessit: per intestina quoque totumque ventrem inferiorem plerumque tormina cum magno murmure percepit. Hæc tamen mala flatuum copiosissimorum sursum deorsumque eruptione pro tempore multum imminuta sunt. Subinde liquor quidam subsalsus sponte cum summa nausea vel levissimo vomitu, ab ore effluere solet, præcipuè matutino tempore, quamvis etiam aliis diei temporibus illud non raro contigerit; hoc evacuato nonnihil melius se habet. Nunc tandem ante mensem hæc omnia in pejus verti cœperunt, quippe vomitus frequens & violentus accessit, quo omnia assumpta magno cum impetu ejicit, quæ licet non diu assumpta fuerint, tamen valde acida evomuntur: & quod mirandum, interdum paulo post assumptum prandium evomit duas tresve uncias solius liquoris cujusdam pellucidi, nonnihil (ut dicit) subsalsi subacidive vel austeri, omnesque assumptos cibos & potus in ventriculo retinet, quos, isto liquore evacuato, bene fert & digerit. Cum non vomit tunc multo molestiores sunt ventris torsiones & rugitus. Æger non febricitat, sed cogitabundus ac subtristis est, eique scorbuticæ maculæ hic illic in cute subinde apparent, totumque corpus paulatim emaciatur.

I. **V** Ariæ partes in hoc ægro malè afficiuntur, præcipuè autem ventriculus, intestina, & pancreas: de ventriculo res nota est ex nausea & vomitu, ut & ex appetentia ciborum modò nimis aucta, modò nimis imminuta. Intestinorum affectio ex rugitibus, flatibus, & torminibus innotescit. Affectiorem pancreatis effecta docent.

II. Appellatur hic morbus AFFECTIO HYPOCHONDRIACA, quæ est intemperies acida pancreatis, ventriculi, intestinorum, partiumque vicinarum.

III. Causa primaria symptomatum in historia enarratorum procedit ab acida ac subsalsa quadam intemperie pancreatis, ex inordinato victu imprimis contracta, cujus ergo succus pancreaticus in hoc ægro nimis acer & falsus subacidusve gignitur, idque uno tempore magis quam alio, pro ut scilicet per hæc illave assumpta alimenta isti malo major minorve fomes adjicitur.

IV. Hic succus ex pancreate in duodenum intestinum defluens, & aliqua sui parte versus ventriculum ascendens, paulatim fermentum ventriculi corrumpit, sicque vitiosæ coctionis

causa fit. Quippe si prava scedave qualitate præditus (in animalium vivorum sectionibus maxime scedum saporem nonnunquam habere comperiturum est) in ventriculum irreat, tunc inappetentiam ac nauseam, & interdum vomitum inducit: si verò nimis acidus influat, tunc nimiam famem, malam coctionem, & nonnunquam, ob acidam vellicationem ventriculi, etiam vomitum suscitatur, idque magis aut minus, prout excedens qualitas major minorve fuerit, & ipse succus majore vel minore quantitate ventriculum ingreditur.

V. Ex illa vitiosa coctione ac fermentatione oriuntur tensiones, dolores, & rugitus, plurimique flatus suscitantur, qui nonnunquam sursum per ructus erumpendo, tensiones nonnihil imminuere, sicque levamen aliquod pro isto tempore inducere solent.

VI. Si verò vitiosus ille succus ad ventriculum non ascendat, sed totus ad intestina defluat, tunc coctio ventriculi in ægro nostro melior, & nausea minor, sed vitiosa effervescencia in intestinis excitatur, cum in coctis alimentis è ventri-

culo elabentibus, tum in pituitosis ac mucosis succis in intestinis contentis; atque hinc in intestinis flatus, rugitus, dolores, ac tensiones cum anxietate suscitati, iique sæpe alvi dejectione flatuumque plurimorum excretionem multum imminuti sunt.

VII. Liquor ab ore subinde cum nausea effluens, est succus pancreaticus sursum ad ventriculum delatus, & per nauseam, una cum ei in ventriculo admixto salivali liquore, per os erumpens.

VIII. Tandem succo pancreatico temporis progressu pejore, ac simul acriore evadente, & ventriculum magis, quam antea, vellicante, accessit frequens vomitus violentus, quando scilicet in ventriculum ascendit: & si hoc contingat paulo post assumpta alimenta, isque affatim per illa alimenta sursum cum impetu ad superiorem ventriculi partem prorumpat, magnam ibi nauseam faciens, sæpe levi cum vomitu (quia alimentis nondum est admixtus) solus evomitur, alimentis intus subsistentibus, quæ tunc, vitioso illo succo fermentaceo evacuato, bene digeruntur.

IX. Non febricitat æger, quia nulla putredinosa effervescencia in corde excitatur.

X. Cogitabundus ac subtristis est, quia propter acidos humores sanguini admixtos, spiritus animales minus tenues seu subtiles, sed paulo fixiores in cerebro generantur, qui minus alacriter & inordinate per pororum cerebri angustias transeuntes, ægrum cogitabundum ac subtristem, & rebus suis minus intentum faciunt.

XI. Corpus emaciatur, propterea quod alimentorum prima coctio non bene peragatur, atque hinc sanguis paucus & parum laudabilis, sed scorbutica qualitate infectus, sicque ad partium nutritionem minus aptus, generetur.

XII. Ex modo dictis, quid de prognosi statuendum, sit, facile judicari potest, scilicet quod hic affectus periculo non careat, & metuenda sit maxima corporis atrophica, cum summa virium prostratione, paulatim ægrum dejectura.

XIII. In curatione primum æger purgandus, cum infusione fol. senæ, agarici, &c. addendo aliquantum elect. hieræ picræ, aut diapruni: aut cum pilulis cochiis, extracto catholico, pulvere diaturbith, aliisque similibus, eaque purgatio postea singulis octo vel decem diebus reiteranda. Venæsectio hic parum ad rem factura videtur, si tamen febris aliave aliqua magna exandescencia accesserit, pro ratione necessitatis institui poterit.

XIV. Si vomituriendi conatus permanferit, non inutiliter tale vomitorium dabitur.

Rec. fol. asari recent. drach. iij. f.

aquæ raphani unc. ij.

fiat s. art. expressio succi,

adde, vini antimoniat. drach. iij.

oxymelis scyllitici unc. f.

misce fiat haustus.

XV. Postea conveniens apozema præscribendum, ejusque ter de die haustus exhibendus.

Rec. radic. tamarisci, capparum,

polypodii querc. helenii, ana drach. vj.

herb. chamedryos, M. j. f.

melissa, betonica, boraginis,

cuscuta ana m. j.

fol. lauri, trifolii palustris, ana m. f.

corticum aurantiorum drach. vj.

sem., anisi, fœnic. ana drach. j. f.

passular. mundat. unc. ij.

aqua q. f.

fiat s. art. apozema ad lib. j. f.

XVI. Loco apozematis, vel inter mediis horis subinde dari poterit particula hujus conditi.

Rec. rad. helenii,

corticum aurantior. condit.

conserva boraginis, melissa,

flor. salvia ana unc. f.

olei anisi gut. xij.

syrupi helenii q. f.

misce; fiat conditum.

XVII. In magna ventriculi aut intestinorum tensione cum anxietate aut dolore, conveniet exhibere talem bolum.

Rec. theriaca drach. j.

oculorum cancri pptor. scrup. j.

olei anisi gut. iiii.

misce, fiat bolus.

XVIII. Interdum mane jejuno stomacho, loco apozematis, exhibenda dosis hujus pulveris, cum pauxillo cerevisiæ aut jusculi.

Rec. oculorum cancri pptor. drach. ij.

coralli rubri ppti, drach. f.

succini ppti, drach. f.

fiat pulvis, dividendus in quatuor doses.

XIX. In victu sit aer mediocriter calidus. Cibi sint facilis digestionis & boni nutrimenti, & abstineat æger ab omnibus cibis falsis, acidis, acribus, fumo siccatis, antiquis, rancidis, crudis, aliisque difficilis coctionis aut pravi nutrimenti. Potus sit cerevisia communis bene defœcata, nonnihil subamara, minimè acida: item vinum tenue minimè acidum. Somnus & exercitia corporis sint mediocria: fugiantur otium & nimia quies. Excreta naturalia bene procedant, & non sponte, saltem arte. Fugienda quælibet tristitia animi pathemata: lætitiæ & hilaritati, quantum fieri potest, indulgendum.

F I N I S.

Summo Opt. Max. Creatori Deo sit laus, honos & gloria per omnia Secula.















